

BIBLE

BALA LUK DO'

Lun Bawang Language

Lun Bawang - All Bible

Old Testament			
		Nahm	1.855
Pudut	3	Habakuk	1.860
Pura'	127	Sepania	1.865
Ukum	227	Hagai	1.871
Lap	300	Sekaria	1.875
Bada' Ratnan Ukum	387	Malaki	1.895
Yusak	475	New Testament	
Lun Luk Nguyut	533	Matius	1.901
Rut	592	Markus	1.990
Semuil Luk Pun-Pun	600	Lukas	2.047
Semuil Luk Kedueh	678	Yahya	2.142
Raca'-Raca' Luk Pun-Pun	741	Kekamen Rasul-Rasul	2.214
Raca'-Raca' Luk Kedueh	814	Rum	2.304
Inul Luk Pun-Pun	884	1 Korintus	2.342
Inul Luk Kedueh	949	2 Korintus	2.380
Esra	1.029	Galatia	2.404
Nehemia	1.050	Epesus	2.417
Ester	1.082	Pilipi	2.430
Ayub	1.098	Kolose	2.439
Nani Ubur	1.160	1 Tesalonika	2.448
Bale'	1.318	2 Tesalonika	2.456
Lun Luk Mada'	1.376	1 Timotius	2.461
Nani Selimun	1.394	2 Timotius	2.471
Yesaya	1.403	Titus	2.478
Yeremia	1.515	Pilimon	2.483
Tido Yeremia	1.643	Iberani	2.485
Yehiskiel	1.653	Yakub	2.513
Daniel	1.763	1 Petrus	2.523
Hosia	1.798	2 Petrus	2.534
Yoel	1.817	1 Yahya	2.541
Amos	1.824	2 Yahya	2.551
Obadia	1.837	3 Yahya	2.553
Yunus	1.839	Yahuda	2.555
Mika	1.844	Bala Luk Linio	2.558

Lun Bawang - All Bible

Pudut

Pudut 1

- ¹Kareb Allah nengimun mudut tana' idi amung-amung luk bang langit,
- ²idi tana' ineh na luk idi ayu idi na uang teh, idi dacem maput pa luun abpa'.
Idi Roh Allah nesigio pa luun abpa' ineh.
- ³Idi Allah nepebala, "Do' inan acang." Idi acang pana' mangun.
- ⁴Idi Allah nenier acang ineh idi Ieh mawang niat. Idi Ieh nengatad acang ineh
ratnan dacem.
- ⁵Idi Ieh neneten acang ineh "Maco" idi dacem ineh titenNeh "Malem." Pangeh
ineh inan malem idi pekak, ieh ineh aco luk pun-pun.
- ⁶Idi Allah nepebala, "Do' inan su luk pa luun abpa' ineh luk peringuned, pelé
mabpat abpa' pad inan dueh babpat.”
- ⁷Idi Allah nenganau' su luk pa luun abpa' ineh idi nengatad abpa' luk pa liang
ratnan abpa' luk pa luun. Idi pangeh mangun mepad kudeng ineh.
- ⁸Idi Allah neneten su luk pa luun abpa' ineh "Langit." Pangeh ineh inan
malem idi pekak, ieh ineh aco luk kedueh.
- ⁹Idi Allah nepebala, "Do' amung-amung abpa' luk pa liang langit ineh
mepamung bang sebuleng luk inan, pad inan su luk tekering." Idi pangeh
mangun mepad kudeng ineh.
- ¹⁰Idi Allah neneten su luk tekering ineh "Tana", idi abpa' luk nepamung ineh
titenNeh "Abpa' Rayeh." Idi Allah nenier amung luk inau'Neh idi Ieh mawang
niat.

¹¹Idi Ieh nepebala, "Do' tana' ngeruat uduh, irin luk inan ilung, idi puar-puar lawa luk kebua' luk inan ilung bang ineh, maya' ayudeh." Idi pangeh mangun mepad kudeng ineh.

¹²Idi tana' nengeruat uduh, irin luk inan ilung maya' ayudeh, idi puar-puar lawa luk kebua' luk inan ilung bang ineh, maya' ayudeh. Idi Allah nenier amung luk inau'Neh, idi Ieh mawang niat.

¹³Pangeh ineh inan malem idi pekak, ieh ineh aco luk keteluh.

¹⁴Idi Allah nepebala, "Do' inan tuda'-tuda' acang bang langit, pad ngatad acang ratnan dace, idi mangun ku tanu' tuda'-tuda' kareb, aco, idi lak.

¹⁵Idi do' ideh mangun ku acang bang langit pad ngacang tana'." Idi pangeh mangun luk kudeng ineh.

¹⁶Idi Allah nenganau' dueh acang luk rayeh ineh, ieh ineh luk meluun rayeh luk inan lalud kareb maco, idi luk isuut ineh luk inan lalud kareb medace. Idi Ieh nenganau' amung-amung gituen pana'.

¹⁷Idi Allah nenganau' acang ineh bang langit pad ngacang pa luun tana',

¹⁸idi luk inan lalud kareb macang idi kareb medace teh, pelé ngatad acang ratnan dace. Idi Allah nenier amung luk inau'Neh, idi Ieh mawang niat.

¹⁹Pangeh ineh inan malem idi pekak, ieh ineh aco luk keapat.

²⁰Idi Allah nepebala, "Do' amung-amung abpa' ngeruat mula' pudut luk inan niat. Idi do' inan suit-suit temulud arang gawa'."

²¹Idi Allah nemudut puar-puar pung luk mekara bang abpa' rayeh, idi puar-puar pudut luk inan niat luk amé' mula' bang abpa' ineh, idi puar-puar suit luk inan ilad teh. Idi Allah nenier amung luk inau'Neh, idi Ieh mawang niat.

²²Idi Ieh nemaré peruan kuandeh, kebalaNeh, "Do' muyuh ngeruat anak idi iuk amé' mula' idi manu' abpa' rayeh, idi do' amung-amung suit pana' amé'-amé' mula'."

²³Pangeh ineh inan malem idi pekak, ieh ineh aco luk kelimeh.

²⁴Idi Allah nepebala, "Do' tana' ineh ngeruat puar-puar pung luk melayo idi puar-puar pung luk meliputi, luk rayeh idi luk isuut teh." Idi pangeh mangun luk kudeng ineh.

²⁵Idi Allah nemudut amung ineh, idi Ieh mawang niat nenier luk inau'Neh ineh.

²⁶Idi Allah nepebala, "Do' Tau mudut lemulun maya' ayu Tau, pelé ieh ngimet amung-amung lawid, suit, pung luk melayo, idi pung luk meliputi, luk rayeh idi luk isuut teh."

²⁷Idi Allah nemudut lemulun ineh, maya' ayu'Neh sebuleng. Idi Ieh nenganau' lemulun ineh mangun ku deléi idi decur.

²⁸Idi Allah nemaré peruan kuan didueh. Idi kebala Allah nedidueh, "Do' medueh mula' anak, pad inul medueh manu' tana' ini idi ngimet neneh, idi ngimet amung-amung lawid, idi suit, idi pung luk meliputi, luk rayeh idi luk isuut teh."

²⁹Idi teh kebala Allah, "Ui maré nemedueh puar-puar pimara, idi puar-puar bua' luk miak kenen medueh.

³⁰Iamo' kuan amung-amung pung luk meliputi, idi kuan amung-amung suit, Ui maré uduh luk miak kenendeh." Idi pangeh mangun mepad kudeng ineh.

³¹Idi Allah nenier anid-anid luk pinudut'Neh ineh, idi Ieh pelaba awang niat. Pangeh ineh inan malem idi pekak, ieh ineh aco luk keanem.

Pudut 2

¹Idi tana' idi langit pangeh pinudut.

²Idi bang aco luk ketudu' Allah nemangeh kekamen'Neh. Idi Ieh nucu'.

³Idi Ieh nengeperuan aco luk ketudu' ineh idi nengeligan neneh, ngaceku bang aco sineh Ieh nemangeh pudut'Neh, idi nucu' ratnan kekamen'Neh.

⁴Idi kudeng ineh tana' idi langit pangeh pinudut. Kareb Tuhan Allah nemudut tana' idi langit,

- ⁵na luk idi uduh idi ilung luk mulun luun tana', ngaceku nateh Tuhan Allah nengebpeh udan pa luun tana' ineh, idi nateh lemulun luk ngasa' tana' ineh.
- ⁶Iamo' inan noon remuat rat bang tana' luk ngeba' aput-apat tana' ineh.
- ⁷Idi Tuhan Allah nenganau' lemulun ratnan abuh tana', idi Ieh nengiup bang icungneh, pad lemulun ineh inan niat, idi ieh mulun.
- ⁸Idi Tuhan Allah nenibu aceh kabun déi' Eden luk pa busat aco. Idi déi' Ieh nenganau' lemulun luk pinudutNeh.
- ⁹Idi Ieh nengulun puar-puar kayuh luk do' siren mateh idi luk ngeruat bua' luk do'. Idi teh inan aceh kayuh luk titen lawa ulun déi' uned kabun ineh, idi lawa ileh kali' luk do' idi luk dat.
- ¹⁰Idi ratnan Eden ineh inan aceh abpa' luk manud ngeba' kabun ineh, idi rat su ineh abpa' ineh bibpat apat.
- ¹¹Idi ngadan abpa' luk pun-pun ineh Pison, ieh ineh luk nengelibut tana' Hawila, su luk inan amas.
- ¹²Idi amas ratnan tana' ineh pelaba do'. Idi teh inan umau luk do' buen idi batu luk meraga.
- ¹³Idi ngadan abpa' luk kedueh ineh Gihon, ieh ineh luk nengelibut tana' Kus.
- ¹⁴Idi ngadan abpa' luk keteluh ineh Tigris, ieh ineh luk manud amé' pa busat aco bang bawang Asur. Idi ngadan abpa' luk keapat ineh Pirat.
- ¹⁵Idi Tuhan Allah nengalap lemulun ineh idi nenganau' neneh bang Kabun Eden ineh, pad ieh miak ngasa' idi ngimet ineh.
- ¹⁶Idi Ieh nengecuk neneh, kebalaNeh, "Iko miak kuman bua' lawa luk bang kabun ini pad pianmu;
- ¹⁷iamo' lawa ileh kali' luk do' idi luk dat ineh, aleg iko kuman bua'neh, ngaceku kareb iko kuman bua' ratnan lawa sineh, iko maté."
- ¹⁸Idi teh Tuhan Allah nepebala, "Na do' lemulun ineh sebuleng mo'. Idi Ui pian nganau' kuanneh seburur rurunneh luk ngedengan neneh."

¹⁹Idi Ieh nenganau' ratnan abuh tana' ineh amung-amung pung idi amung-amung suit. Idi Ieh nemaré amung-amungdeh kuan Lemulun pad kali' kudeng apeh ieh nganau' ngadandeh. Idi anun-anun luk inau'neh ku ngadan amung-amungdeh, kudeng ineh teh luk mangun ku ngadandeh.

²⁰Idi lemulun ineh nenganau' ngadan amung-amung pung luk melayo, suit, idi pung luk meliputi. Iamo' na luk idi rorum luk petulu ngedengan lemulun ineh.

²¹Idi Tuhan Allah nenganau' lemulun ineh pelaba rudap. Idi laba' ieh rudap Allah nengalap sebuleng tulang sigarangneh, idi Ieh nemapen su ineh ku uang teh.

²²Idi ratnan tulang luk ilapNeh ratnan lemulun ineh, Ieh nenganau' seburur decur, idi Ieh nenguit neneh matun lemulun ineh.

²³Idi lemulun ineh nepebala, "Idi nekini tulang ini ratnan tulangku Idi uang ini ratnan uangku. Idi ieh miak tetanen decur, ngaceku ieh pangeh rinuat ratnan seburur deléi."

²⁴Ngaceku ineh lemulun na miak na necan taman-tinanneh idi pamung dengan awanneh, idi didueh ineh mangun ku sebuleng burur.

²⁵Idi deléi idi decur ineh lubpa dengan na migu'.

Pudut 3

¹Idi menipeh ineh meluun ileh ratnan amung-amung pung luk pangeh inau' Tuhan Allah luun tana'. Idi kebalaneh nan decur ineh, "Matuké Allah nepebala, kudeng ini, 'Aleg medueh kuman bua' amung-amung lawa luk bang kabun ini'?"

²Idi kebala decur nan menipeh ineh, "Miak kai kuman amung-amung bua' luk bang kabun ini.

³Iamo' ratnan sebuleng lawa kayuh luk luun uned kabun ineh Tuhan nemebpeng nekai na kuman idi na ngakem bua'neh, pad kai na maté."

- ⁴Idi kebala menipeh nan decur ineh, "Bala ineh na matu. Kali' rungen medueh na maté.
- ⁵Iamo' Tuhan Allah nepebala kudeng ineh, ngaceku Ieh kali' kareb medueh kuman ineh, mateh medueh mukab, idi medueh mangun mepad kudeng Allah pad kali' luk do' idi luk dat."
- ⁶Idi decur ineh nenier lawa ineh do' siren matehneh, idi bua'neh pana' do' én sirenneh. Idi ieh nengerawé ineh mangun ku luk do' kuanneh lek, pad ieh mileh. Idi ieh nengalap bua' ineh, idi nekuman ineh. Idi ieh nenguit kuan awanneh, idi awanneh pana' nekuman teh.
- ⁷Idi petacu mateh didueh mukab idi didueh nekali' didueh lubpa. Idi didueh nerut don gita' mangun ku abpar didueh.
- ⁸Idi didueh neninger gara Tuhan Allah nalan bang kabun kareb malem, idi deléi dengan decur ineh pana' nesigapung nan apet kabun ineh.
- ⁹Idi Tuhan Allah nenawar deléi ineh, kebalaNeh, "Iapehké iko?"
- ¹⁰Idi kebala deléi ineh, "Ui neninger garaMu bang kabun, idi ui matot, ngaceku ui lubpa, ineh punneh ui sigapung."
- ¹¹Idi Allah nepebala, "Idéké nemaré kali namu ratnan iko lubpa? Pangehké iko nekuman bua' luk bibpengKu na miak kenen?"
- ¹²Idi kebala deléi ineh, "Decur luk pangeh biréMu negku ineh, ieh luk nemaré bua' ineh kinanku."
- ¹³Idi kebala Tuhan Allah nan decur ineh, "Anunké luk pangeh inau'mu ineh?" Idi kebala decur ineh, "Menipeh nenaluk negku idi ui nekuman ineh."
- ¹⁴Idi kebala Tuhan Allah nan menipeh ineh, "Ngaceku iko pangeh nenganau' luk kudeng ineh, iko sebuleng ngalap kediman. Idi dengan batekmu iko miak suloi, idi iko miak kuman abuh tana' seruked ulunmu.
- ¹⁵Idi Ui nganau' aceh bunu' arangmu dengan decur ineh, idi arang inulmu dengan inulneh. Idi Ieh miak ngeradu' uluhmu, idi iko miak nicuk tumidNeh."

¹⁶Idi kebala Tuhan nan decur ineh, "Ui miak ngula' derehmu kareb iko mali', idi dengan derehmu iko miak nenganak, idi teh iko geregan ku awanmu, idi ieh pana' pa luunmu."

¹⁷Idi kebala Allah nan deléi ineh, "Ngaceku iko pangeh neninger bala awanmu, idi nekuman bua' ineh luk pangeh bibpengKu na miak kenen, idi tana' ini uen ngediman ngaceku iko. Idi dengan medereh iko nakap akan rat bang tana' ini seruked ulunmu.

¹⁸Idi tana' ineh miak ngulun tabpa' idi uduh luk baken kuanmu. Idi irin-irin luk bang pulung mangun ku akanmu.

¹⁹Idi dengan panamu iko ngakem, idi teh iko miak ngalap akan, pad macing iko lemubed amé' ku tana' teh, ngaceku ratnan abuh tana' iko ilap, idi iko lemubed mangun ku abuh teh."

²⁰Idi Adam neneten awanneh ineh Hawa, ngaceku ieh luk tinan amung-amung lemulun.

²¹Idi Tuhan Allah nenganau' kuan Adam idi awanneh ayung ratnan kubil pung, idi Ieh nengayung nedidueh.

²²Idi kebala Tuhan Allah, "Nekini lemulun ini pangeh mangun mepad kudeng Tau, ngaceku ieh kali' do' idi dat. Idi na miak kuman bua' ratnan lawa kayuh ulun ineh idi na ieh mulun ruked-ruked."

²³Idi Tuhan Allah nengecuk neneh remuat rat bang Kabun Eden, pelé ieh luk pinudut ratnan tana miak ngasa' tana' teh.

²⁴Idi Ieh nenganau' tuda'-tuda' melaikat karub pa busat aco Kabun Eden ineh. Idi Ieh nenganau' sebuleng pelapet luk mebudung idi luk mediper, luk ku matar dalam amé' lawa kayuh ulun ineh.

Pudut 4

¹Idi Adam nepamung dengan awanneh Hawa. Idi ieh mali' idi nenganak aceh anak deléi, ieh ineh Kain. Idi kebalaneh, "Ui pangeh nengalap aceh anak deléi ngaceku Tuhan ngedengan negku."

- ²Muci ratnan ineh teh ieh nenganak aceh anak deléi, ieh ineh Abil. Idi Abil ineh mangun ku lun matar dumba, idi Kain ineh mangun ku lun amé' lati'.
- ³Idi mio-mio kareb udung lak, idi Kain nenguit bua'-bua' luk tinibuneh mangun ku baré kuan Tuhan.
- ⁴Idi Abil pana' nenguit anak-anak dumbaneh luk atun idi nengeret nedeh idi nemaré babpat luk do' kuan Tuhan. Idi Tuhan mawang niat ni Abil ku baréneh.
- ⁵Iamo' na Allah mawang niat ni Kain ku baréneh. Idi Kain pelaba useh idi netekedamut.
- ⁶Idi kebala Tuhan ni Kain, "Ngudeh iko museh idi tekedamut?"
- ⁷Kudeng iko nganau' luk do', naké iko merimud? Idi kudeng iko na nganau' luk do', idi sala' ineh ngabang munung tanga' niatmu. Idi sala' ineh sikal ngimet namu, iamo' do' iko metueh rat neneh."
- ⁸Idi kebala Kain ni Abil, kinanakneh ineh, "Do' kiteh amé' bang pulung." Idi kareb didueh nalan bang pulung ineh, petacu Kain nenecat ni Abil, idi ieh nengaté neneh.
- ⁹Idi kebala Tuhan ni Kain, "Iapehké Abil, kinanakmu ineh?" Idi kebala Kain, "Na kali'ku. Uiké luk matar kinanakku?"
- ¹⁰Idi kebala Tuhan, "Ngudehké iko nenganau' kudeng ineh? Arod dara' kinanakmu pindengerKu ngitang ratnan tana', mepad kudeng tang luk sikal ngua'.
- ¹¹Idi nekini iko ngalap kediman idi uen masut ratnan tana' luk netenganga' miak ngalap dara' kinanakmu ineh ratnan ticu'mu.
- ¹²Kareb iko ngasa' tana' ini, kali' rungen ieh na ngeruat bua'; idi iko na ruma', iamo' lawé-lawé mo'."
- ¹³Idi kebala Kain nan Tuhan, "Ukumku ini pelaba berat kuanku.

¹⁴Idi nekini Iko masut negku ratnan tana' ini idi rat pa kiungMu teh. Idi ui na ruma' iamo' lawé-lawé mo', idi kareb lemulun papu' negku, kali' rungen ui pitayendeh.”

¹⁵Idi kebala Tuhan ni Kain, "Ngacheku ineh idé luk ngaté Kain ineh miak uen ngua' tudu' kua'." Idi Tuhan nenganau' aceh etu luun Kain, pad ieh na miak pitayen idé-idé luk papu' neneh.

¹⁶Idi Kain neburo rat pa kiung Tuhan, idi netudo déi' tana' luk titen Lawé-Lawé, pa busat aco Kabun Eden.

¹⁷Idi Kain nepamung dengan awanneh. Idi awanneh ineh mali'. Idi ieh nenganak aceh anak luk titen Enok. Idi Kain nemudut aceh bawang, idi ieh nenganau' ngadan bawang ineh Enok, maya' ngadan anakneh.

¹⁸Idi Enok ineh pana' nenginul Irad, Irad nenginul Mekuyal, Mekuyal nenginul Metusail, idi Metusail nenginul Lamék.

¹⁹Idi Lamék nengalap dueh burur ku awanneh. Ngadan sebuleng Ada, idi sebuleng Sila.

²⁰Idi Ada ineh pana' nenginul Yabal, ieh ineh taman amung-amung lemulun luk tudo bang ruma' kibung idi luk ngasa' sapi'.

²¹Idi ngadan kinanakneh luk isuut Yubal, ieh ineh taman amung-amung lemulun luk nateg giula' idi ngiup suling.

²²Idi Sila ineh pana' nenginul Tubal Kain, ieh ineh lun mileh nganau' amung-amung luk metadem ratnan tekaling idi belawan. Idi ngadan kinanak decur Tubal Kain ineh, Naama.

²³Idi kebala Lamék kuan dueh awanneh ineh, "Ada idi Sila, ninger medueh ratnan balaku. Ui pangeh nengaté seburur anak adi', ngaceku ieh nemepag negku.

²⁴Kudeng Kain uen ngua' tudu' kua', idi Lamék uen ngua' tudu' ngepulu' kua' tudu'.”

²⁵Idi Adam nepamung dengan awanneh teh, idi awanneh nenganak aceh anak deléi, idi anak ineh titenneh Set, kebalaneh, "Allah pangeh nemaré kuanku aceh inul luk baken, ku libal Abil ngaceku ieh pangeh pinaté Kain ineh."

²⁶Idi Set ineh pana' nenginul aceh anak deléi luk titenneh Enos. Idi rat kareb ineh lemulun ngimun sembayang idi nawar ngadan Tuhan.

Pudut 5

¹Ini surat anak inul Adam. Kareb Tuhan Allah nenganau' lemulun, Ieh nemudut neneh maya' ayuNeh sebuleng.

²Idi Ieh nenganau' nedidueh ku deléi idi decur, idi Ieh nengeperuan nedidueh, idi Ieh nenganau' ngadan didueh "Lemulun."

³Kareb ulun Adam 130 lak, idi ieh nenginul aceh anak deléi mepad kudeng ayunéh, idi ieh neneten ngadanneh Set.

⁴Muci ratnan ineh Adam mulun 800 lak, idi ieh nenginul tuda'-tuda' anak teh.

⁵Kareb Adam naté, ulunneh 930 lak.

⁶Kareb ulun Set 105 lak, idi ieh nenginul Enos.

⁷Idi mucu ratnan ineh, idi Set mulun 807 lak, idi ieh nenginul tuda'-tuda' anak teh.

⁸Kareb Set naté ulunneh 912 lak.

⁹Kareb ulun Enos 90 lak, idi ieh nenginul Kainan.

¹⁰Muci ratnan ineh, ieh mulun 815 lak, idi ieh nenginul tuda'-tuda' anak teh.

¹¹Kareb Enos naté, ulunneh 905 lak.

¹²Kareb ulun Kainan 70 lak, idi ieh nenginul Malalel.

¹³Muci ratnan ineh, Kainan mulun 840 lak, idi ieh nenginul tuda'-tuda' anak teh.

¹⁴Kareb Kainan naté, ulunneh 910 lak.

¹⁵Kareb ulun Malalel 65 lak, idi ieh nenginul Yarid.

- ¹⁶Muci ratnan ineh Malalel mulun 830 lak, idi ieh nenginul tuda'-tuda' anak teh.
- ¹⁷Kareb Malalel naté, ulunneh 895 lak.
- ¹⁸Kareb ulun Yarid 162 lak, idi ieh nenginul Enok.
- ¹⁹Muci ratnan ineh, Yarid mulun 800 lak, idi ieh nenginul tuda'-tuda' anak teh.
- ²⁰Kareb Yarid naté ulunneh 962 lak.
- ²¹Kareb ulun Enok 65 lak, idi ieh nenginul Metusala.
- ²²Muci ratnan ineh Enok perurum dengan Allah 300 lak, idi ieh nenginul tuda'-tuda' anak teh,
- ²³pad macing ulun Enok ineh 365 lak.
- ²⁴Idi Enok ineh perurum dengan Allah raked ulunneh, idi ieh na idi peh, ngaceku Allah nengalap neneh.
- ²⁵Kareb ulun Metusala ineh 187 lak, idi ieh nenginul Lamék.
- ²⁶Muci ratnan ineh, Metusala mulun 782 lak, idi ieh nenginul tuda'-tuda' anak teh.
- ²⁷Kareb Metusala naté ulunneh 969 lak.
- ²⁸Kareb ulun Lamék 182 lak, idi ieh nenginul aceh anak deléi.
- ²⁹Idi ieh neneten ngadanneh Noh, kebalaneh, "Anak ini luk miak ngubuk netau bang erur tau idi bang ét ticu' tau ngaceku ratnan tana' ini luk pangeh kidiman Tuhan."
- ³⁰Idi mucu ratnan ineh, Lamék mulun 595 lak, idi ieh nenginul tuda'-tuda' anak teh.
- ³¹Kareb Lamék naté ulunneh 777 lak.
- ³²Kareb ulun Noh 500 lak, idi ieh nenginul Sem, Ham, idi Yapet.

Pudut 6

- ¹Idi kareb lemulun ineh iuk-iuk mula' luun tana', idi pangeh ideh nenginul tuda'-tuda' anak decur,
- ²idi anak-anak deléi luk ratnan Allah nenier anak-anak decur luk ratnan lemulun pelaba do' taga, idi ideh nengalap nedeh ku awandeh padpad piandeh.
- ³Idi Tuhan nepebala, "RohKu na miak mudeng bang niat lemulun macing ruked-ruked, ngaceku ieh ratnan ulun tana' ini, iamo' ieh miak mulun 120 lak mo'."
- ⁴Idi bang kareb ineh inan mula' lemulun luk medita' idi rayeh bang tana' ini, idi mucu ratnan ineh peh, pangeh anak-anak deléi luk ratnan Allah nepamung dengan decur-decur luk ratnan lemulun, idi ideh nenginul tuda'-tuda' anak. Idi anakdeh ineh mesangit idi luk mebala bang kareb luk mon.
- ⁵Kareb Tuhan nenier sala' lemulun luk bang tana' ini pelaba ula', pad ieh ngerawé idi geregan ku luk dat mo' kidi-kidi,
- ⁶idi Tuhan nenginuud ngaceku lemulun luk pangeh inau'Neh bang tana', idi Ieh mesusa' niat.
- ⁷Idi Tuhan nepebala, "Ui pian ngaté lemulun luk pangeh inau'Ku luun tana'. Idi Ui pian ngaté amung-amung pung idi suit teh. Ui nginuud ngaceku Ui pangeh nemudut nedeh."
- ⁸Iamo' Tuhan méi' kuan Noh.
- ⁹⁻¹⁰Ini bala ratnan Noh. Ieh inan teluh anak, Sem, Ham, idi Yapet. Noh ineh selemulun luk matu idi mesiri niat arang lemulun bang kareb ineh. Idi ieh perurum dengan Allah.
- ¹¹Amung lun baken pelaba dat siren Allah idi aput tana' mula' ria'.
- ¹²Idi Allah nenier luun tana', matu-matu ieh pelaba dat, ngaeku amung-amung lemulun luk luun tana' nepanu' ku dat.
- ¹³Idi kebala Allah ni Noh, "Ui pian ngaté amung-amung lemulun, ngaceku tana' ini pangeh pinu'deh ku sala'deh.

¹⁴Do' iko mudut aceh alud rayeh ratnan kayuh luk do'; idi do' iko nganau' neneh mula' takep, idi ngamut pa luun idi pa lubangneh.

¹⁵Do' kadangneh 75 depeh, pipangneh 12 depeh setangal, idi dita' neh 7 depeh setangal.

¹⁶Idi do' iko nganau' aponeh, idi necan semikuh arang apo dengan alad ku gisuman. Idi do' nganau' sebuleng tanga' mo'. Idi do' nganau' alud dengan teluh parung.

¹⁷Idi Ui ngacing ereb pa luun tana', pad ngaté amung-amung pudut luk inan niat. Idi amung-amung luk luun tana' miak maté.

¹⁸Iamo' Ui ngacing pejani'Ku namu. Do' iko semuet bang alud rayeh ineh, dengan awanmu idi anak-anakmu dengan awandeh.

¹⁹⁻²⁰Do' iko nguit semuet bang alud ineh puar-puar pung idi suit, tineh idi deléi, pad iko ngasa' nedeh.

²¹Idi do' iko nguit ratnan anun-anun akan luk miak kenen muyuh, idi pung idi suit pana'."

²²Idi Noh nenganau' amung-amung luk icuk Allah neneh.

Pudut 7

¹Idi kebala Tuhan Allah ni Noh, "Semuet iko dengan amung uang tetek ruma'mu bang alud rayeh ineh, ngaceku iko mo' luk matu pa kiungKu arang amung-amung lemulun luk luun tana' ini.

²Do' iko nguit tudu' etung pung luk meligan. Iamo' ratnan pung luk na meligan, do' nguit sebuleng deléi idi sebuleng tineh mo'.

³Idi do' iko nguit ratnan puar-puar suit, tudu' etung, ieh ineh deléi idi tineh, pad ngasa' inuldeh apud tana'.

⁴Ngaceku tudu' aco teh idi Ui ngacing udan pa luun tana', apat ngepulu' aco idi apat ngepulu' dacek kinioneh, pad ngaté amung-amung pudut luk inan niat, luk pangeh inau'Ku."

⁵Idi Noh nenganau' amung-amung luk icuk Tuhan neneh.

- ⁶Idi ulun Noh kareb ereb ineh 600 lak.
- ⁷Idi Noh dengan awanneh, idi anak-anakneh dengan awandeh nesemuet bang alud rayeh pad mepuit ratnan ereb ineh.
- ⁸Idi puar-puar pung idi suit luk meligan idi luk na meligan,
- ⁹nesemuet bang alud ineh dengan Noh, ieh ineh deléi idi tineh, maya' kudeng luk icuk Allah ni Noh.
- ¹⁰Idi pangeh tudu' aco inan ereb.
- ¹¹Kareb ulun Noh 600 Lak, ieh ineh pulu' tudu' aco bulan dueh amung-amung bued abpa' rayeh ineh pana' uput, idi inan teh udah luk pelaba ula'.
- ¹²Idi udan netemurun pa luun tana' apat ngepulu' aco idi apat ngepulu' dacem kinioneh.
- ¹³Idi bang aco sineh teh Noh dengan awanneh idi teluh anakneh, Sem, Ham, idi Yapet, dengan awandeh ineh nesemuet bang alud ineh.
- ¹⁴Idi ideh dengan puar-puar pung luk meliputi idi luk melayo, luk rayeh idi luk isuut pana', dengan puar-puar suit,
- ¹⁵idi puar-puar pudut luk nginiat, nacing tedueh-tedueh matun Noh bang alud ineh.
- ¹⁶Idi ideh luk nesemuet ineh, ieh ineh deléi idi tineh ratnan amung-amung pudut, idi ideh nesemuet maya' kudeng luk icuk Allah ni Noh. Idi Tuhan nengitek tanga' alud ineh.
- ¹⁷Idi ereb ineh inan pa luun tana' apat ngepulu' aco kinioneh, idi abpa' ineh iuk-iuk temubu' idi nengalapung alud ineh, pad ieh netegenang.
- ¹⁸Idi abpa' ineh iuk-iuk rayeh idi temubu', pad alud ineh lupung.
- ¹⁹Idi abpa' ineh iuk-iuk temubu' teh, pad amung-amung pegkung luk medita' nereb peh.
- ²⁰Idi ieh nengereb amung-amung pegkung ineh apat depeh kidita' neh.

²¹Idi amung-amung pudut luk inan niat luun tana' ineh pana' naté, ieh ineh suit, pung, idi lemulun pana'.

²²Idi amung-amung pudut luk luun tana', luk inan niat pana' naté.

²³Idi Tuhan nengaté amung-amung pudut luk inan niat luun tana', do' lemulun, pung, idi suit pana'. Iamo' Noh dengan amung-amungdeh luk denganneh bang alud ineh mo' luk mulun.

²⁴Idi kinio abpa' ineh na melena' 150 aco.

Pudut 8

¹Iamo' Allah nengerawé Noh idi amung-amung pung luk denganneh bang alud ineh. Idi Ieh nenganau' aceh bui malid pa luun tana', idi abpa' ineh pana' melena'.

²Idi amung-amung bued abpa' rayeh luk rat bang tana' melena', idi udan pana' mato.

³Idi abpa' ineh iuk melena'. Idi pangeh 150 aco, abpa' ineh melena'.

⁴Idi pulu' tudu' aco bulan tudu' ineh alud ineh nepasad luun Pegkung Ararat.

⁵Idi abpa' iuk melena', pad macing bulan pulu'. Idi aceh aco bulan pulu', amung-amung buduk pegkung melagan.

⁶Idi pangeh apat ngepulu' aco Noh nengukab tabuk alud ineh.

⁷Idi ieh nemuit sebuleng bungkek, luk netemulud kidi-kidi, pad macing abpa' ineh nekeket rat luun tana'.

⁸Pangeh ineh ieh nemuit sebuleng sukur pelé nier kudeng abpa' ineh pangeh melena'.

⁹Iamo' sukur ineh na kali' luk inanneh ucep. Idi ieh nelemubed iné' ni Noh bang alud ineh, ngaceku inan teh abpa' pa luun tana' ineh. Idi Noh nengulang ticu'neh idi nengalap neneh semuet bang alud ineh.

¹⁰Idi Noh nenganét tudu' aco teh, idi ieh nemuit sukur ineh teh.

¹¹Idi suit ineh nelemubed iné' ni Noh kareb malem aco, idi ieh nenguit bang ticukneh aceh don saitun. Ngaceku ineh Noh kali' abpa' ineh pangeh nekeket.

¹²Idi ieh nenganét tudu' aco teh, idi ieh nemuit sukur ineh teh. Iamo' na ieh nelemubed iné ni Noh peh.

¹³Kareb ulun Noh 601lak, kareb aceh aco bulan aceh ineh, abpa' ineh pana' nekeket. Idi Noh nengukab itek alud ineh, idi nenier, idi matu tana' ineh netekering.

¹⁴Kareb dueh ngepulu' tudu' aco bulan dueh, idi tana' ineh netekering do'-do' peh.

¹⁵Idi kebala Allah ni Noh,

¹⁶"Remuat iko rat bang alud ineh, dengan awanmu idi anak-anakmu, idi awandeh.

¹⁷Idi nguit amung-amung suit idi pung denganmu, pad ideh miak nenganak idi amé'-amé' mula' luun tana'."

¹⁸Idi Noh neremuat rat bang alud ineh dengan awanneh, anak-anakneh, idi awandeh.

¹⁹Idi amung-amung pung idi suit neremuat rat bang alud ineh, maya' ayudeh.

²⁰Idi Noh nenganau' aceh bubpun kuan Tuhan. Idi ieh nengalap ratnan amung-amung pung idi suit luk meligan, idi ieh nengeseb baré luk sabpen luun bubpun ineh.

²¹Idi baré ineh do' buen pa kiung Tuhan, idi Ieh nepebala bang niatNeh, "Na Ui sikal ngacing kediman bang tana' ini peh ngaceku ratnan lemulun, sagan pana' terawé niatdeh dat rat karebdeh isuut. Nateh Ui sikal ngaté amung-amung pudut luk mulun kudeng luk pangeh inau'Ku.

²²Seruked tana' ini idi, inan kareb ngeranih idi nibu, teneb idi lau', udah idi merikan, macang idi medacem teh."

Pudut 9

- ¹Idi Allah nengeperuan ni Noh dengan anak-anakneh, idi kebalaNeh nedeh, "Do' muyuh mula' anak idi iuk amé mula', pad manu' tana' ini.
- ²Idi amung-amung pung, suit, idi lawid, miak matot nemuyuh, idi Ui maré nedeh bang imet muyuh.
- ³Idi amungdeh miak kenen muyuh, dengan irin pana'. Amung ineh Ui maré kuan muyuh ku akan muyuh.
- ⁴Sebuleng mo' luk na miak kenen, ieh ineh uang pung luk inan dara' nugkeng. Ngaceku dara', ieh ineh ulunneh.
- ⁵Kudeng seburur lemulun ngaté lemulun Ui maré ukum até neneh. Ui miak ngaté pung luk ngaté lemulun.
- ⁶Idé-idé luk ngaté lemulun, ieh pana' miak pitayen lemulun. Ngaceku lemulun pangeh pinudut kudeng ayu Allah.
- ⁷"Do' muyuh mula' anak pad inul muyuh iuk amé' mula', aput-aput tana' ini."
- ⁸Idi kebala Allah ni Noh idi anak-anakneh,
- ⁹"Ngerawé do'-do', Ui ini ngelelep pejani'Ku kuan muyuh idi kuan inul muyuh,
- ¹⁰idi teh kuan amung-amung pudut luk inan niat, suit, pung, ieh ineh amung-amung luk neremuat rat bang alud ineh.
- ¹¹Idi Ui ngelelep jani'Ku ini kuan muyuh: Amung-amung pudut luk inan niat ineh na tupu-tupu miak uen ngaté ku ereb. Idi mucu na luk idi ereb luk ngusag tana' ini peh.
- ¹²Idi ini etu pejani'Ku nemuyuh idi nan amung-amung pudut luk inan niat:
- ¹³Ui nganau' tagkangKu bang laput, idi ineh luk ku etu pejani'Ku dengan tana' ini.
- ¹⁴Kareb Ui ngacing laput pa luun tana', idi tagkang ineh miak melagan bang laput ineh,

¹⁵Idi Ui sikal ngerawé jani'Ku nemuyuh, idi nan amung-amung pudut luk inan niat. Idi na tupu-tupu ereb miak mangun peh, luk ngaté amung-amung pudut luk inan niat.

¹⁶Idi kareb tagkang ineh bang laput, Ui miak nier ineh, pad Ui miak ngerawé pejani' luk meruked luk arang Allah dengan amung-amung pudut luk inan niat, idi amung-amung uang tana' ini.”

¹⁷Idi kebala Allah ni Noh, "Idi ini etu pejani'luk pangeh litepKu arangKu dengan amung-amung luk inan niat bang tana' ini.”

¹⁸Idi anak-anak Noh luk neremuat rat bang alud ineh, ieh ineh Sem, Ham, idi Yapet. Idi Ham ineh luk taman Kanaan.

¹⁹Idi diteluh ini luk anak Noh mangun ku tepun amung lemulun bang tana' ini.

²⁰Idi Noh ineh lun amé' lati', idi ieh luk pun-pun nenibu aceh kabun anggur.

²¹Idi Noh nengirup abpa' anggur ineh, idi ieh nabuk. Idi ieh netelubid dengan lubpa luun uned lepo kibung.

²²Idi Ham luk taman Kanaan ineh nenier tamanneh lubpa. Idi ieh iné' maré kali' kuan dueh kinanakneh luk déi' liang.

²³Sem idi Yapet nengalap aceh pekatu kibung, idi nengecang neneh luun tudung didueh idi nenalan lumuut, idi nemapen taman didueh luk lubpa, idi neteketed pad na nenier taman didueh luk lubpa.

²⁴Idi Noh nekulat ratnan abukneh, idi nekali' luk inau' anakneh luk isuut kuanneh.

²⁵Kabalaneh, "Kediman kuan Kanaan! Ieh mangun ku demulun amung kinanakneh.

²⁶Ubur kuan Tuhan, luk Allah Sem! Kanaan ineh mangun ku demulunneh.

²⁷Do' Allah ngerayeh Yapet! Inulneh miak tudo dengan pupu Sem. Kanaan miak mangun ku demulun Yapet.”

²⁸Muci ratnan ereb ineh Noh mulun 350 lak.

²⁹Idi ieh naté kareb ulunneh 950 lak.

Pudut 10

¹Idi ini anak inul Noh luk deléi, ieh ineh Sem, Ham, idi Yapet. Idi pangeh ereb ineh ideh inan tuda'-tuda' anak deléi.

²Idi anak-anak Yapet, — Gomer, Magog, Madai, Yawan, Tubal, Misesek, idi Tiras — mangun ku tepun pupu luk makai ngadandeh.

³Idi anak-anak Gomer, ieh ineh pupu Askenas, Ripat, idi Togarema.

⁴Idi inul Yawan, ieh ineh pupu Eliseh, Tarsis, Kitim, idi Dodanim.

⁵Idi ideh mangun ku tepun pupu luk tudo tangeb abpa' rayeh idi luun pulau-pulau teh. Ideh ineh inul Yapet luk tudo bang bawangdeh sebuleng, maya' inuldeh idi baladeh sebuleng.

⁶Idi anak-anak Ham, — Kus, Masir, Libia, idi Kanaan — mangun ku tepun pupu luk makai ngadandeh.

⁷Idi inul Kus, ieh ineh pupu Siba, Hawila, Sabta, Rama, idi Sabteka. Idi inul Rama, ieh ineh pupu Siba idi Dedan.

⁸Idi Kus pana' nenginul Nimrod, idi ieh ineh luk pun-pun mangun ku lun rayeh luk mesangit bang tana' ini.

⁹Idi ieh seburur lun nganup luk meluun tueh pa kiung Tuhan; ngaceku ineh pangeh bila, "Do' iko mepad kudeng Nimrod, seburur lun nganup luk meluun tueh pa kiung Tuhan."

¹⁰Pun-pun ieh mengun ku raca' bang bawang Babil, Erik, idi Akad luk bang babpat Sinar.

¹¹Idi rat bang bawang ineh ieh iné' Asur idi nemudut bawang Ninewé, Rehobot Ir, idi Kala,

¹²Idi Resen luk arang Ninewé dengan Kala, aceh bawang luk rayeh.

¹³Idi Masir nenginul pupu Lidia, Anam, Lihab, Naptu,

¹⁴Patrus, Kaslu, idi Kaptor. Idi ratnan inuldeh inan teh lun Pilistin.

- ¹⁵Idi anak-anak Kanaan, — Sidon, anakneh luk atun, idi Hit — mangun ku tepun pupu luk makai ngadan didueh.
- ¹⁶Idi Kanaan ineh tepun lun Yebusi, lun Amori, lun Girgasi,
- ¹⁷lun Hiwi, lun Arki, lun Sini,
- ¹⁸lun Arwadi, lun Semari, idi lun Hamati pana'. Idi amung-amung lun Kanaani nepatad,
- ¹⁹pad lakan bawang lun Kanaani ineh rat Sidon matun Gerar macing déi' Gasa, idi pa busat aco macing déi Sodom, Gemora, Adma, idi Seboyim, luk muneng ku Lasa.
- ²⁰Ideh ineh inul Ham luk tudo bang bawangdeh sebuleng, maya' inuldeh idi baladeh sebuleng.
- ²¹Idi Sem, kinanak Yapet luk rayeh ineh mangun ku tepun amung lun Iberani.
- ²²Idi anak-anak Sem, — Elam, Asur, Arpaksad, Lud, idi Aram ---mangun ku tepun amung pupu luk makai ngadandeh.
- ²³Idi inul Aram, ieh ineh pupu Us, Hul, Geter, idi Misek.
- ²⁴Idi Arpaksad nenginul Sila, idi Sila nenginul Iber.
- ²⁵Idi Iber inan dueh anak deléi, ngadan sebuleng Peleg, ngaceku bang kareb ineh amung-amung lun bang tana' ineh nepatad, idi ngadan kinanakneh luk isuut ineh Yoktan.
- ²⁶Idi inul Yoktan ineh Almdad, Selep, Hasarmawet, Yera,
- ²⁷Hadoram, Usal, Dikla,
- ²⁸Obal, Abimail, Siba,
- ²⁹Opir, Hawila, idi Yobab. Amungdeh ini inul Yoktan.
- ³⁰Idi bawang luk inandeh tudo rat bawang Misa macing déi' Separ, ieh ineh pegkung luk pa busat aco.
- ³¹Ideh ineh inul Sem luk tudo bang bawangdeh sebuleng, maya' inuldeh idi baladeh sebuleng.

³²Idi amung pupu ini inul Noh, anid-anid maya' inuldeh idi pupudeh. Idi mucu ratnan ereb amung-amung pupu bang tana' ini kali' rungen inul Noh.

Pudut 11

¹Idi pun-pun lemulun bang aput tana' inan sebuleng buri' mo' idi baladeh mepad mo'.

²Idi bang aceh kareb ideh nenalan amé' pa busat aco, idi ideh nenier patar luk rayeh déi' tana' Sinar, idi ideh netudo déi'.

³Idi kebaladeh seburur dengan seburur, "Do' tau nganau' tana' mangun ku batu bata idi ngeseb ineh do'-do'." Idi batu bata ineh mangun ku libal batu idi amut mangun ku libal tana' salit.

⁴Idi teh kebaladeh, "Do' tau mudut aceh bawang idi aceh pudut luk medita', idi budukneh macing déi' langit, idi ratnan ineh tau miak mebala, pad tau na mepatad bang aput tana' ini."

⁵Idi Tuhan netemurun sikal nier bawang idi pudut luk medita' luk inau' lemulun ineh.

⁶Idi kebalaNeh, "Siruh, amung-amung lemulun ini mepad, idi amung-amungdeh mepad buri' teh! Idi ini luk pun-pun inau'deh; idi nekini na luk mebpeng nedeh na nganau' anun-anun luk piandeh.

⁷Do' Tau temurun idi ngeraruh buri'deh déi', pad seburur pana' na kali' bala lun denganneh."

⁸Idi Tuhan nematad nedeh rat déi' amé' aput-aput bang tana'. Idi ideh nugka' ratnan kekkamen mudut bawang ineh.

⁹Idi ngaceku ineh, ngadan bawang ineh titen Babil, ngaceku déi' Tuhan nengeraruh bala amung-amung lemulun bang tana'. Idi rat déi' Tuhan nematad nedeh bang aput-aput tana'.

¹⁰Idi ini inul Sem. Kareb ulun Sem 100 lak, idi ieh nenginul Arpaksad, ieh ineh dueh lak pangeh ereb ineh.

¹¹Mucu ratnan ineh, Sem mulun 500 lak, idi nenginul tuda'-tuda' anak teh.

- ¹²Kareb ulun Arpaksad 35 lak, idi ieh nenginul Sila.
- ¹³Muci ratnan ineh Arpaksad mulun 403 lak, idi ieh nenginul tuda'-tuda' anak teh.
- ¹⁴Kareb ulun Sila 30 lak, idi ieh nenginul Iber.
- ¹⁵Muci ratnan ineh Sila mulun 403 lak, idi ieh nenginul tuda'-tuda' anak teh.
- ¹⁶Kareb ulun Iber 34 lak, idi ieh nenginul Peleg.
- ¹⁷Muci ratnan ineh Iber mulun 430 lak, idi ieh nenginul tuda'-tuda' anak teh.
- ¹⁸Kareb ulun Peleg 30 lak, idi ieh nenginul Ru.
- ¹⁹Muci ratnan ineh Peleg mulun 209 lak, idi ieh nenginul tuda'-tuda' anak teh.
- ²⁰Kareb ulun Ru 32 lak, idi ieh nenginul Serug.
- ²¹Muci ratnan ineh Ru mulun 207 lak, idi ieh nenginul tuda'-tuda' anak teh.
- ²²Kareb ulun Serug 30 lak, idi ieh nenginul Nahor.
- ²³Muci ratnan ineh Serug mulun 200 lak, idi ieh nenginul tuda'-tuda' anak teh.
- ²⁴Kareb ulun Nahor 29 lak, idi ieh nenginul Tira.
- ²⁵Muci ratnan ineh, Nahor mulun lak 119 lak, idi ieh nenginul tuda'-tuda' anak teh.
- ²⁶Kareb ulun Tira 70 lak, idi ieh nenginul Abram, Nahor, idi Haran.
- ²⁷Idi ini anak inul Tira. Tira nenginul Abram, Nahor, idi Haran. Idi Haran nenginul Lut.
- ²⁸Haran ineh naté atun ratnan tamanneh Tira, bang bawang luk inanneh tinganak, ieh ineh Ur Kasdim.
- ²⁹Idi Abram dengan Nahor pana' nengaweh. Idi ngadan awan Abram ineh Sarai. Idi ngadan awan Nahor ineh Milka, ieh ineh anak Haran luk taman Iska pana'

³⁰Idi Sarai ineh na anak.

³¹Idi Tira ineh nenguit anakneh Abram, idi mupunneh Lut, luk anak Haran, idi ibanneh Sarai, ieh ineh awan Abram ineh, idi ideh nepura' rat Ur Kasdim iné' bawang Kanaan. Idi ideh nacing dei' Haran, idi tudo déi'.

³²Idi ulun Tira 205 lak, idi ieh naté déi' bawang Haran ineh.

Pudut 12

¹Idi kebala Tuhan ni Abram, "Remuat iko ratnan bawangmu, pupumu, idi ruma' tamanmu, amé' bawang luk badénKu namu.

²Idi Ui sikal nganau' namu mangun ku aceh pupu luk mula', idi Ui ngeperuan namu idi nganau' ngadanmu mebala, pad ineh mangun ku peruan kuan lun baken.

³"Ui ngeperuan idé-idé luk ngeperuan namu. Iamo' Ui ngediman lemulun luk ngediman namu. Idi rat namu amung-amung pupu luk bang tana' ini miak ngalap peruan."

⁴Kareb ulun Abram 75 lak idi ieh nenalan rat Haran, maya' kudeng luk bila Tuhan neneh. Idi Lut pana' nemaya' neneh.

⁵Idi Abram nenguit awanneh Sarai, anak pinakenneh Lut, dengan amung-amung binaweh idi demulun luk ilapdeh déi' bawang Haran. Idi ideh nenalan iné' bawang Kanaan. Kareb ideh nacing déi' bawang Kanaan,

⁶Idi Abram nelemaba bawang ineh pad ieh nacing lawa kayuh luk meraben déi' Moré, ieh ineh su luk inan sembayang déi' Sikem. Idi kareb ineh lun Kanaani tudo bang bawang ineh.

⁷Idi Tuhan nesilagan ni Abram, kebalaNeh, "Ui maré tana' ini kuan inulmu." Idi su ineh Abram nemudut aceh bubpun kuan Tuhan luk pangeh nesilagan neneh.

⁸Pangeh ineh ieh nemubuh iné' luun pegkung luk pa busat aco bawang Baitel. Idi ieh nelupo arang Baitel luk pa acep aco dengan Ai luk pa busat aco. Idi su ineh teh ieh nemudut aceh bubpun, idi ieh nesembayang inan Tuhan.

⁹Idi Abram nenalan matun Tana' Negeb.

¹⁰Idi inan aceh iru' bang bawang ineh, idi Abram iné' déi' Masir sikal tudo déi', ngaceku iru' pelaba io bang bawang ineh.

¹¹Idi kareb ieh lélé macing déi' Masir, idi kebalaneh nan awanneh ineh, "Ui kali' namu seburur decur luk metaga.

¹²Kareb lun Masir nier namu, ideh miak pebala, 'Ini awanneh.' Idi ideh sikal ngaté negku, pad ideh miak ngalap namu.

¹³Do' iko mala namu kinanakku, pad ui na mesusa' ruendeh, idi ui miak uen ngulun ngaceku iko."

¹⁴Kareb Abram nacing bang bawang Masir, idi lun Masir nenier decur ineh selemulun luk do' taga.

¹⁵Idi pengulu-pengulu raca' Masir nenier neneh, idi nengubur neneh pa kiungneh. Idi decur ineh inuitdeh semuet bang ruma' raca'.

¹⁶Idi ieh nengasa' Abram do'-do' ngaceku decur ineh; idi ieh nemaré kuan Abram amék, sapi', keladai, demulun, idi unta.

¹⁷Idi Tuhan nengacing ét luk mebura' kuan raca' idi uang tetek ruma'neh, ngaceku Sarai awan Abram ineh.

¹⁸Idi raca' nenawar ni Abram, idi kebalaneh, "Kudeng apeh luk inau'mu negku? Ngudeh iko na maré kali' negku ratnan decur ineh awanmu?

¹⁹Ngudeh iko neten neneh kinanakmu, pad ui lélé ngalap neneh ku awanku? Siruh, ini awanmu, do' ngalap neneh idi buro!"

²⁰Idi raca' Masir nemaré bala kuan lun dukenneh, pad ideh nenated ni Abram remuat rat bang bawang ineh dengan awanneh, idi dengan amung-amung luk ieh kuan.

Pudut 13

¹Idi Abram neremuat rat bang bawang Masir, dengan awanneh idi amung-amung luk ieh kuan, matun Tana' Negeb. Idi Lut pana' nemaya' neneh.

- ²Idi Abram ineh lun do' dengan mula' aya', pirak, idi amas teh.
- ³Idi ieh nenalan maya' dalam luk nedalanneh atun rat Tana' Negeb macing déi' Baitel, ieh ineh su luk inanneh nelupo pun-pun, arang Baitel dengan Ai;
- ⁴macing su bubpun luk pinudutneh ineh. Idi Abram nesembayang inan Tuhan.
- ⁵Idi Lut luk nemaya' ni Abram ineh, inan dumba, amék, idi sapi', idi lepo kibung teh.
- ⁶Idi na tana' ineh miak inan didueh tebawang, ngaceku aya' didueh pelaba ula'.
- ⁷Idi teh inan aceh kedaluh arang lun matar aya' Abram dengan lun matar aya' Lut. Idi bang kareb ineh lun Kanaani idi lun Prisi mo' tebawang nan tana' ineh.
- ⁸Idi kebala Abram ni Lut, "Kiteh ini dingetameh. Na do' demulun kiteh pekedaluh.
- ⁹Do' kiteh patad. Do' mili' tana' luk pianmu. Iko amé i léi, idi ui améi' i léi."
- ¹⁰Idi Lut nenier apud raket Abpa' Yarden macing déi' Soar, idi inan petap abpa', mepad kudeng Kabun Eden idi tana' Masir. Ieh ineh atun ratnan Tuhan nengukum bawang Sodom idi Gemora.
- ¹¹Idi Lut nemili' raked Abpa' Yarden kuanneh. Idi ieh nenalan iné' pa busat aco. Idi didueh nepatad.
- ¹²Idi Abram tebawang déi' Kanaan. Iamo' Lut tudo bang bawang-bawang rayeh luk luun raked abpa' ineh. Idi ieh nelupo muneng ku bawang Sodom.
- ¹³Idi lemulun bang bawang Sodom ineh pelaba dat idi pelaba sala' pa kiung Allah.
- ¹⁴Pangeh Lut nepatad rat ni Abram, kebala Tuhan ni Abram, "Do' iko nier libut-libut rat su luk inanmu tuper ineh.
- ¹⁵Ngaceku amung-amung tana' luk sirenmu ineh, Ui maré namu, idi nan inulmu macing ruked-ruked.

¹⁶Idi Ui miak ngula' inulmu ineh mepad kudeng kinula' abuh tana'. Kudeng miak ngiap abuh tana' ineh, idi teh miak ngiap inulmu ineh.

¹⁷Do' iko amé' aput-apat tana' ineh, ngaceku amung ineh barénKu namu.”

¹⁸Idi Abram nemubuh leponeh idi nelupo muneng ku lawa kayuh Mamré luk meraben luk bang bawang Hebron. Idi ieh nemudut aceh bubpun kuan Tuhan déi'.

Pudut 14

¹Apat burur raca', ieh ineh Amrapel raca' Sinar, Ariok, raca' Elasar, Kedorlaumer, raca' Elam, idi Tidal, raca' Goyim,

²iné' pebunu' dengan limeh raca', ieh ineh Bira, raca' Sodom, Birsa, raca' Gemora, Sinab, raca' Adma, Semebar, raca' Seboyim, idi raca' Béla, ieh ineh bawang Soar.

³Idi limeh raca' ineh neperurum idi nepamung luun raked déi' Sidim, ieh ineh Abpa' luk Mepaci'.

⁴Pulu' dueh lak raca'-raca' ineh pangeh inimet Raca' Kedorlaumer. Iamo' bang lak luk kepulu' teluh ideh sikal metueh rat neneh.

⁵Idi bang lak luk kepulu' apat Kedorlaumer idi amung-amung raca' luk denganneh nacing dengan bawehdeh, idi nengelaya' lun Repaim déi' bawang Asterot Karnaim, lun Susim déi' bawang Ham, lun Imim déi' Saweh Kiritaim,

⁶Idi lun Hori déi' luun pegkung-pegkung Edom. Idi ideh nengerada' nedeh macing déi' Elparan, luk iring su luk ali-ali.

⁷Pangeh ineh ideh nelemubed iné' déi' En Mispas, ieh ineh Kadis, idi ideh nengelaya' amung-amung bawang lun Amalek idi teh lun Amori luk tudo déi' Hasesen Tamar.

⁸Idi raca' Sodom, raca' Gemora, raca' Adma, raca' Seboyim, idi raca' Béla, ieh ineh Soar, netemina' pebunu' déi' luun Raked Sidim;

⁹sikal metueh ratnan raca' Elam, raca' Goyim, raca' Sinar, idi raca' Elasar. Apat burur raca' sikal metueh ratnan limeh raca' ineh.

10Idi Raked Sidim ineh panu' ku lubang tir Idi kareb raca' Sodom idi raca' Gemora neburo, idi ideh nekab bang lubang ineh. Idi teluh raca' luk ketecan ineh neburo iné' déi' luun pegkung.

11Idi apat raca' ineh nengalap amung-amung binaweh luk bang bawang Sodom idi Gemora, dengan amung-amung akandeh, idi nuli'.

12Idi ideh nenaban ni Lut, ieh ineh anak pinaken Abram dengan amung-amung binawehneh, ngaceku ieh pana' tudo déi' bawang Sodom ineh. Idi ideh nuli'.

13Idi seburur lun luk nepuit nupun nemada' bala ineh ni Abram, lun Iberani ineh, luk tudo muneng ku lawa kayuh Mamré luk meraben. Mamré ineh seburur lun Amori, luk kinanak Eskol idi Aner, ieh ineh lun luk megéi' ngedengan ni Abram.

14Kareb Abram neninger bala ratnan anak pinakenneh pangeh tiban, idi ieh nengampung amung anak itinneh luk miak pebunu'. Amungdeh 318 burur. Idi ideh nengerada' bunu' ineh macing déi' Dan.

15Idi ieh nemabpat bawehneh dueh babpat, idi ideh nengerieng bunu' ineh kareb medacem. Idi ideh metueh rat nedeh, idi nengusu nedeh pad macing déi' Hoba, luk pa tinueh busat aco bawang Damsik.

16Idi ieh nengalap amung-amung binaweh luk tibandeh ineh lemubed. Idi ieh nenguit anak pinakenneh Lut ineh teh lemubed dengan amung-amung binawehneh, idi dengan amung-amung decurneh idi lun baken luk pangeh tiban ineh.

17Kareb Abram nelemubed pangeh ieh nengelaya' Raca' Kedorlaumer idi raca'-raca' luk baken, idi raca' Sodom ineh neremuat ngapu' neneh déi' Raked Saweh, ieh ineh Raked Raca'.

18Idi Melkidadak raca' Salem nenguit ruti idi abpa' anggur kuan Abram, ngaceku ieh ineh imam Allah luk Meluun Dita'.

19Idi ieh nengeperuan ni Abram, kebalaneh, "Allah luk Meluun Dita', ieh ineh Allah luk nemudut langit idi tana' ngeperuan ni Abram.

²⁰Idi amung-amung ubur kuan Allah luk Meluun Dita', luk namaré namu metueh ratnan bunu'mu!" Idi Abram namaré kuanneh babpat pulu' ratnan amung-amung luk ilapneh ineh.

²¹Idi kebala raca' Sodom ni Abram, "Maré kuanku amung-amung lun ineh, iamo' amung-amung binaweh lapenmu."

²²Iamo' kebala Abram, "Ui pebulung ku ngadan Tuhan Allah luk Meluun Dita', luk nemudut langit idi tana',

²³idi na tupu ui sikal ngalap anun-anun luk iko kuan, kudeng sepekatu gitian idi sebuleng abet kasut pana', pad iko na pebala, 'Ui pangeh nengula' binaweh Abram.'

²⁴Ui na miak ngalap anun-anun luk kuanku. Iamo' ui miak ngalap luk pangeh kinan anak itinku, idi babpat lemulun luk nengedengan negku, ieh ineh Aner, Askol, idi Mamré."

Pudut 15

¹Pangeh ineh, bala Tuhan nacing kuan Abram bang aceh luk siniernes. "Aleg iko matot, Abram, ngaceku Ui luk utapmu. Idi rayeh tu tabparamu."

²Idi kebala Abram, "O Tuhan Allah, anunké ulek tabparMu kuanku, ngaceku ui na anak? Idi Elieser lun Damsik ineh luk ngalap binawehku.

³Idi Iko na namaré anak kuanku, iamo' seburur demulunku luk miak ngalap amung-amung luk ui kuan."

⁴Idi teh, kebala Tuhan neneh, "Demulun ineh na miak ngalap binawehmu, iamo' anak bururmu sebuleng luk ngalap ineh."

⁵Idi Tuhan nenguit neneh remuat idi nepebala, "Tengook iko déi' langit, ngiap amung-amung gituen, kudeng iko miak ngiap amung-amungdeh. Kudeng ineh teh inulmu."

⁶Idi Abram manu ku bala Tuhan, idi ineh luk bila Tuhan mangun ku luk matu kuanneh.

- ⁷Idi kebala Tuhan neneh, "Ui ini Tuhan luk nenated namu remuat rat bang bawang Ur Kasdim, pad maré tana' ini ku babpatmu raked-ruked."
- ⁸Idi kebala Abram, "O Tuhan Allah, kudeng apehké ui kali' tana' ini mangun ku babpatku raked-ruked?"
- ⁹Idi kebala Tuhan neneh, "Do' nguit kuanKu sebuleng sapi' tineh, sebuleng amék tineh teh, sebuleng dumba deléi luk teluh lak ulunneh, idi suit sukur sebuleng, idi sebuleng anak suit limun."
- ¹⁰Idi Abram nenguit amung ineh, idi ieh nengupa nedeh dueh babpat, idi nengerareng nedeh dueh babpat teh; iamo' na ieh nengupa suit ineh.
- ¹¹Idi suit-suit kanui netemurun pa luun luk kirat ineh, idi Abram nengusu nedeh.
- ¹²Kareb macep aco, idi Abram nerudap, idi nacing aceh gagap idi tot luk rayeh neneh.
- ¹³Idi kebala Tuhan ni Abram, "Inulmu ineh miak mangun ku lun sakai bang bawang dulun. Idi ideh miak mangun ku demulun lun bang bawang ineh, idi ruendeh ngedereh apat ngeratu lak kinioneh.
- ¹⁴Iamo' Ui miak ngukum pupu luk naban nedeh ineh pad inulmu miak remuat dengan binaweh luk mula'.
- ¹⁵Idi iko miak maté dengan awang; idi iko tinamen kareb petap ulunmu.
- ¹⁶Idi inulmu luk keapat miak lemubed amé' tungé', ngaceku dat lun Amori ineh luk amé' mula', pad Ui miak ngukum nedeh mucu."
- ¹⁷Kareb aco pangeh macep, idi dacem pana' macing, idi inan aceh su luk inan apui luk merabpun, idi aceh sesakan luk mebudung nengelaba uned amung-amung luk kirat ineh peh.
- ¹⁸Idi bang aco sineh teh Tuhan nepejani' ni Abram, kebalaNeh, "Ui pejani' maré tana' ini kuan inulmu, ieh ineh rat lakan Masir macing déi' Abpa' Pirat,
- ¹⁹su luk inan lun Keni, lun Kenisi, lun Kadmoni,
- ²⁰lun Hiti, lun Prisi, lun Repairim,

²¹lun Amori, lun Kanaani, lun Girgasi, idi lun Yebusi.

Pudut 16

¹Sarai awan Abram ineh na anak; idi ieh inan seburur demulun rat Masir luk decur, ngadanneh Hagar.

²Idi kebala Sarai ni Abram, "Tuhan na nemaré anak kuanku. Ngaceku ineh do' iko pamung dengan demulunku, pad ui miak ngalap anak rat neneh." Idi Abram nemaya' bala Sarai ineh.

³Idi Sarai nemaré Hagar ni Abram ku apidneh. (Ini mangun kareb Abram pangeh netudo déi' bawang Kanaan pulu' lak kinioneh.)

⁴Idi Abram nepamung dengan Hagar, idi ieh mali'. Idi kareb Hagar nekali' ieh pangeh mali', idi ieh medita' niat idi nengedat Sarai luk kuan neneh.

⁵Idi kebala Sarai ni Abram, "Sala'mu ini ngaceku Hagar ngedat negku. Ngaceku ui pangeh nemaré demulunku bang abinmu, idi kareb ieh kali' neneh mali' ieh nengedat negku. Ngaceku ineh Tuhan teh miak ngukum arangku denganmu!"

⁶Idi kebala Abram, "Demulunmu ineh inan bang paladmu. Nganau' anun luk pianmu kuanneh." Idi Sarai megateh neneh, pad Hagar neburo rat neneh.

⁷Idi Melaikat Tuhan nepapu' neneh muneng ku aceh bued abpa' déi' su luk ali-ali, luun dalan amé' bawang Sur.

⁸Kebalaneh, "O Hagar, demulun Sarai, rat iapeh iko, idi amé' iapeh iko teh?" Idi kebalaneh, "Ui neburo rat ni Sarai luk kuan negku."

⁹Idi kebala Melaikat Tuhan neneh, "Lemubed iko mangun ku demulunneh."

¹⁰Idi teh kebalaneh kuanneh, "Ui ngula' anak inulmu, pad ideh na mekiap.

¹¹Iko ini mali' idi iko miak nenganak aceh anak deléi. Idi do' iko nganau' ngadanneh Ismail, ngaceku Tuhan neninger arod derehmu.

¹²Idi anakmu ineh mulun mepad kudeng keladai luk meliput, idi ieh sikal metueh ratnan amung-amung lemulun, idi amung-amung lemulun sikal

metueh rat neneh teh. Idi ieh miak tudo setau' ratnan amung-amung kinanakneh.”

¹³Idi kebala Hagar, "Matuké ui pangeh nenier Allah, idi mulun teh?" Idi ieh neneten ngadan Tuhan luk nepebala nneh ineh, "Allah luk Nier.”

¹⁴Ngaceku ineh subuk luk arang Kadis idi Bered ineh titen "Subuk Tuhan luk Mulun idi luk Nier Negku.”

¹⁵Idi Hagar nenganak sebuleng anak deléi kuan Abram; idi Abram nenganau' ngadanneh Ismail.

¹⁶Idi kareb ineh ulun Abram, ualuh ngepulu' anem lak.

Pudut 17

¹Kareb ulun Abram iwa' ngepulu' iwa' lak idi Tuhan nesilangan neneh, idi kebalaNeh, "Ui ini Allah luk Melalud. Idi do' iko maya' balaKu, idi nganau' luk matu.

²Ui maré aceh pejani' arangKu denganmu, idi Ui sikal ngula' namu.”

³Idi Abram netekunal. Idi kebala Allah neneh,

⁴"Ini jani'Ku namu: Ui pejani' ratnan iko mangun ku taman tuda'-tuda' pupu.

⁵Idi na iko tetanen Abram peh, iamo' iko miak tetanen Ibrahim, ngaceku iko pangeh inau'Ku mangun ku taman tuda'-tuda' pupu.

⁶Idi Ui miak maré namu mula' inul, idi sebuangdeh mangun ku raca'. Idi inulmu pelaba ula', pad ideh mangun ku mula' pupu.

⁷"Idi Ui maya' jani'Ku namu idi nan inulmu mucu rat namu, ieh ineh sebuleng pejani' luk meruked. Idi Ui mangun ku Allahmu idi Allah amung-amung inulmu luk mucu rat namu.

⁸Idi kuanmu dengan inulmu Ui sikal maré tana' luk inanmu tudo nekini mepad kudeng sakai, ieh ineh amung tana' Kanaan mangun ku babpatmu macing raked-raked. Idi Ui mangun ku Allah kuandeh.”

⁹Idi teh kebala Allah ni Ibrahim, "Do' iko idi inulmu luk mucu rat namu maya' jani'Ku.

¹⁰Iko dengan inulmu luk mucu rat namu, na miak na maya' jani'Ku ratnan amung-amung deléi arang muyuh ruen nunat.

¹¹⁻¹²Rat pad sini do' muyuh nunat amung-amung anak deléi kareb ulundeh ualuh aco, dengan anak demulun luk tinganak bang ruma'mu, idi luk pangeh bilih rat nelun sakai, pad mangun ku tanu' pejani' luk arangKu dengan muyuh.

¹³Anid-anid burur deléi na miak na uen nunat teh, pad pejani'Ku miak mangun ku aceh pejani' luk meruked bang burur muyuh ineh.

¹⁴Idi amung-amung deléi luk na sinunat miak uen matad rat arang pupudeh, ngaceku ideh pangeh nengelaba pejani'Ku.”

¹⁵Idi kebala Allah ni Ibrahim, "Aleg iko neten ngadan awanmu Sarai peh, iamo' rat pad sini ngadanneh Sara.

¹⁶Ui miak ngeperuan neneh, idi rat neneh teh Ui maré seburur anak deléi kuanmu. Idi teh Ui ngeperuan neneh pad ieh mangun ku tinan tuda'-tuda' pupu. Idi rat arang inulneh miak mangun tuda'-tuda' raca'.”

¹⁷Idi Ibrahim netekunal idi meriruh, keterawéneh, "Miakké seburur lemulun luk ulun meratu lak inan anak? Miakké Sara luk ulun iwa' ngepulu' lak inan anak?”

¹⁸Idi kebalaneh nan Allah, "O Tuhan, nima' Ismail ruenMu ngasa'!”

¹⁹Iamo' kebala Allah, "Na! Awanmu Sara ineh miak nenganak sebuleng anak deléi kuanmu. Idi do' iko neten ngadanneh Isak. Idi Ui miak maya' pejani'Ku arangKu denganneh, idi dengan inulneh, ngaceku ieh ineh aceh pejani' luk meruked.

²⁰Idi Ui pangeh neninger putuhmu ratnan Ismail, pad Ui miak ngeperuan neneh, idi maré neneh mula' anak idi mula' inul. Idi ieh miak mangun ku

taman pulu' dueh raca'. Idi Ui miak nganau' inulneh mangun ku sebuleng pupu luk rayeh.

²¹Iamo' Ui miak maya' pejani'Ku kuan Isak, luk miak ruen Sara nenganak kuanmu bang kareb luk kudeng ini lak baruh.”

²²Kareb Allah pangeh nepebala ni Ibrahim, idi Ieh nepatad rat neneh.

²³Bang aco sineh teh Ibrahim nemaya' bala Allah, idi ieh nenunat anakneh Ismail, idi amung-amung deléi luk tinganak bang ruma'neh, idi luk bilihneh pana', ieh ineh amung-amung deléi luk bang ruma'neh.

²⁴Idi ulun Ibrahim iwa' ngepulu' iwa' lak kareb ieh sinunat.

²⁵Idi ulun Ismail, anakneh ineh, pulu' teluh lak.

²⁶Bang aco sineh Ibrahim dengan Ismail pangeh sinunat,

²⁷dengan amung-amung demulun Ibrahim.

Pudut 18

¹Idi teh Tuhan nesilagan ni Ibrahim muneng ku lawa kayuh luk meraben déi' Mamré, kareb ieh tudo munung tanga' leponeh kareb mét idang.

²Ieh netukag idi nekali' teluh burur lemulun tused pa kiungneh. Kareb ieh nenier nediteluh, ieh nupun ratnan tanga' ineh iné' papu' nediteluh, idi ieh netekunal.

³Kebalaneh, "O tuan-tuanku, kudeng meteluh méi' negku, aleg ngelaba negku, ui ini demulun meteluh.

⁴Nima' negku ngalap abpa' idi maru' kukud meteluh, idi do' meteluh tudo ngato erur meteluh liang kayuh ini.

⁵Ui miak ngalap sesuut ruti, pad ngetueh burur meteluh. Pangeh ineh miak meteluh nalan teh. Ngaceku meteluh pangeh nengikak demulun meteluh." Idi kebala diteluh, "Do'! Kai maya' balamu.”

⁶Idi Ibrahim saget-saget nesemuet bang lepo, idi kebalaneh ni Sara, "Miket ngalap banak luk meluun do'. Ngerabur neneh, idi nganau' ku ruti.”

⁷Idi Ibrahim nupun matun sapi'-sapi'neh, idi ieh nengalap sebuleng anak sapi' luk do' lamu, idi nemaré neneh inan demulunneh. Idi demulun ineh petacu nenaneh neneh.

⁸Idi ieh nengalap lemak rata idi rata sapi' ineh idi uang teh, idi ieh nengerareng ineh pa kiungdeh. Idi ieh netuped iring diteluh liang kayuh ineh laba' diteluh kuman.

⁹Kebala diteluh neneh, "Iapehké Sara, awanmu ineh?" Idi kebala Ibrahim, "Déi' ieh bang lepo."

¹⁰Idi kebala sebururdeh, "Idi na miak na Ui lemubed matun namu pangeh iwa' bulan. Idi Sara, awanmu ineh miak nenganak aceh anak deléi." Idi Sara neninger rat pa ketedNeh, munung tanga' lepo ineh.

¹¹Ibrahim idi Sara pangeh mengered, idi pangeh nepelaba ulun didueh. Idi Sara pana' pangeh nugka' ratnan dalan decur.

¹²Idi Sara meriruh, keterawéneh, "Ui pangeh mengered idi awanku pana' mengered, miakké ui ngalap awang luk kudeng ineh?"

¹³Idi kebala Tuhan ni Ibrahim, "Ngudehké Sara meriruh idi pebala, 'Miakké ui nenganak aceh anak, ngaceku nekini ui pangeh mengered?'

¹⁴Inanké luk pelaba ikat kuan Tuhan? Idi bang kareb luk petulu, pangeh iwa' bulan Ui miak lemubed matun namu, idi Sara miak nenganak aceh anak deléi'."

¹⁵Iamo' Sara nengalum, kebalaneh, "Na ui meriruh"; ngaceku ieh matot. Iamo' kebala Tuhan, "Matu, iko pangeh meriruh."

¹⁶Idi teluh burur lemulun ineh nenalan matun bawang Sodom. Idi Ibrahim iné' nated nediteluh maya' dalandeh.

¹⁷Idi kebala Tuhan, "Na Ui ngapung anun-anun luk ruenKu ineh pa kiung Ibrahim?"

¹⁸Ngaceku Ibrahim miak mangun ku aceh pupu luk rayeh idi melalud, idi amung-amung pupu luk bang tana' miak ngalap peruan rat neneh?"

¹⁹Ui pangeh nemili' neneh, pad ieh miak ngecuk anak-anakneh idi inulneh luk mucu rat neneh ineh maya' ukumKu idi nganau' luk matu idi luk mesiri, pad Ui miak ngacing kuanneh anun-anun luk pangeh pijani'Ku neneh.”

²⁰Idi kebala Tuhan ni Ibrahim, "Ngaceku adu' rat bawang Sodom idi Gemora pelaba rayeh idi sala'deh pelaba dat,

²¹idi nekini Ui sikal temurun nier kudeng kekamendeh petulu dengan adu' luk pindengerKu ineh.”

²²Idi dueh burur ineh nenalan matun Sodom. Iamo' Tuhan ketecan dengan Ibrahim.

²³Idi Ibrahim iné' muneng Neneh idi nepebala, "Miakké Tuhan ngaté lemulun luk matu puar-puar dengan lemulun luk dat?

²⁴Kudeng inan limeh ngepulu' burur luk matu bang bawang ineh, miakké Iko ngusag bawang ineh dengan na méi' nedeh luk limeh ngepulu' burur luk matu ineh?

²⁵Kali' rungen Iko na miak ngaté lemulun luk matu pad-pad dengan lemulun luk dat, idi ngukum lemulun luk na mesala' pad-pad dengan lemulun luk mesala'. Ngaceku Lun luk Mutut Besara' bang aput-aput tana' ini na miak na nganau' luk matu.”

²⁶Idi kebala Tuhan, "Kudeng inan limeh ngepulu' burur lun bang bawang Sodom, luk matu kali'Ku, idi ngaceku lemulun ineh kali' rungen Ui ngulun bawangdeh ineh.”

²⁷Idi kebala Ibrahim, "Matu, ui ini lemulun mo'. Ui mutuh do' ngaceku ui mekuu' pebala inan Tuhan.

²⁸Kudeng arang luk limeh ngepulu' burur luk matu ineh inan limeh luk na matu, miakké Tuhan ngusag bawang ineh ngaceku limeh burur luk na matu ineh?" Idi kebala Tuhan, "Ui na miak ngusag bawangdeh kudeng Ui nier apat ngepulu' limeh burur luk matu su ineh.”

²⁹Idi teh kebala Ibrahim, "Kian inan apat ngepulu' burur mo' luk matu lek." Idi kebala Tuhan, "Ngaceku apat ngepulu' burur lemulun luk matu na Ui miak ngusag bawang ineh."

³⁰Idi kebala Ibrahim, "Do' Tuhan na museh ku balaku, ngaceku ui sikal pebala teh. Kian inan teluh ngepulu' burur mo' luk matu bang bawang ineh." Idi kebala Tuhan, "Na Ui miak ngusag bawang ineh kudeng Ui nier teluh ngepulu' burur luk matu."

³¹Kebala Ibrahim, "Ui mutuh do' ngaceku ui mekuu' pebala inan Tuhan. Kian, inan dueh ngepulu' burur lemulun luk matu lek." Kebala Tuhan, "Ratnan dueh ngepulu' burur lemulun luk matu, na Ui miak ngusag bawang ineh."

³²Idi kebala Ibrahim teh, "O Tuhan, aleg museh, idi ui sikal pebala teh sekua' ini mo'. Kian, inan pulu' burur lemulun luk matu lek." Idi kebala Tuhan, "Ngaceku pulu' burur lemulun luk matu na Ui miak ngusag bawang ineh."

³³Kareb Ieh pangeh nepebala kuan Ibrahim, idi Tuhan neburo. Idi Ibrahim pana' nuli'.

Pudut 19

¹Kareb dueh melaikat ineh nacing déi' Sodom kareb malem aco, Lut tudo munung tanga' bawang ineh. Kareb ieh nenier nedidueh, petacu ieh iné' papu' nedidueh. Idi ieh netekeradung pa atun didueh,

²kebalaneh, "Do' medueh umak ruma'ku, idi rudap déi', maru' kukud medueh, idi pekak nebpa medueh miak nalan uka-uka." Iamo' kebala didueh, "Na, kai dueh sikal rudap tungé' luun natad bawang ini."

³Iamo' ieh mesaad nguit nedidueh, pad didueh maya' neneh idi numak bang ruma'neh. Idi ieh nenganau' irau kuan didueh dengan ruti luk na lamud. Idi ideh nekuman.

⁴Iamo' kareb nateh didueh nerudap, idi amung-amung deléi bang bawang ineh nacing, do' lun rayeh idi anak adi' pana', idi ideh nengelibut ruma' ineh.

⁵Idi ideh nenawar ni Lut, kebaladeh, "Iapehké lemulun luk nacing namu malem ini? Nguit nedidueh amé' nekai, pad kai pamung nedidueh.

⁶Idi Lut neremuat rat bang ruma'neh. Idi ieh nengitek tanga' ineh.

⁷Kebalaneh, "O kinanakku, aleg muyuh nganau' luk dat kudeng ineh.

⁸Ui inan dueh anak decur luk nateh nekali' deléi. Ui miak nguit nedidueh amé' nemuyuh, pad muyuh nganau' anun-anun luk pian muyuh kuan didueh. Iamo' aleg muyuh nganau' anun-anun kuan dueh deléi ineh, ngaceku didueh sakai, idi ui na miak na matar nedidueh."

⁹Iamo' kebaladeh, "Buro iko! Iko lun pupu baken! Iko na miak mada' nekai. Buro, pad kai na ngedereh namu, meluun rat nedidueh." Idi ideh nengerieng ni Lut, idi teh ideh nacing sikal ngusag tanga'.

¹⁰Iamo' dueh burur ineh nengulang ticu' didueh idi nengalap Lut semuet bang ruma'neh, idi nengitek tanga'.

¹¹Idi didueh nemuser nedeh luk muneng ku tanga' ineh, pad ideh na kali' tanga'.

¹²Idi kebala didueh ni Lut, "Inanké pupumu tungé', ieh ineh iban, anak deléi idi decur, idi idé-idé luk iko kuan bang bawag ini? Do' nguit nedeh remuat rat ieni.

¹³Kai sikal ngusag bawang ini, ngaceku Tuhan pangeh neninger adu' luk rayeh ratnan bawang Sodom. Idi Ieh pangeh nengecuk nekai ngusag neneh."

¹⁴Idi Lut iné' mada' deléi luk sikal ngaweh anak decurneh, kebalaneh, "Miket remuat rat bang bawang ini, ngaceku Tuhan sikal ngusag neneh." Iamo' didueh ngerawé Lut marot nedidueh.

¹⁵Idi kareb masat aco, idi melaikat ineh nengubuk ni Lut, kebala didueh, "Tumui iko, nguit awanmu idi dueh anak decurmu, pad iko na maté kareb Tuhan ngukum bawang ini."

¹⁶Iamo' Lut mepedueh niat. Iamo' Tuhan méi' neneh. Idi dueh melaikat ineh nengimet ticu'neh idi ticu' awanneh dengan dueh anakneh luk decur, idi didueh nenated nedeh remuat rat bang bawang ineh.

¹⁷Idi kareb didueh pangeh nenguit nedeh remuat, idi kebala didueh, "Upun muyuh; aleg muyuh lumi pa puet idi aleg ucu' luun raked ini. Upun muyuh matun pegkung, pad muyuh na maté."

¹⁸Idi kebala Lut, "Mutuh do', O Tuan;

¹⁹kali' rungen medueh méi' negku ngaceku medueh pangeh nemuit negku. Iamo' ui na miak upun matun pegkung ineh, ngaceku kudeng luk dat ineh macing negku, kali' rungen ui maté kareb nateh ui macing déi'.

²⁰Siruh, bawang luk isuut ineh! Miak ui buro amé' déi', ngaceku muneng. Do' ui amé' sigapung déi'. Medueh kali' bawang ineh isuut. Idi ui miak mulun!"

²¹Idi kebala melaikat ineh, "Mo miak! Na ui ngusag bawang luk bilamu ineh.

²²Miket muyuh! Upun! Ngaceku na ui miak nganau' anun-anun kareb nateh iko macing déi." Ngaceku Lut nemala bawang ineh isuut, idi ideh nenganau' ngadan bawang ineh Soar.

²³Idi kareb aco masat Lut nacing bawang Soar.

²⁴Idi Tuhan nenurun batu apui rat déi' langit pa luun Sodom idi Gemora.

²⁵Idi Ieh nengusag amung-amung bawang ineh, idi aput raked ineh, dengan amung-amung lemulun luk bang bawang ineh, idi amung-amung tibu luk mulun luun tana' ineh.

²⁶Iamo' awan Lut nelumi pa puet, pad ieh nisu' ku diri tucu'.

²⁷Idi pekak uka-uka Ibrahim petacu iné' su luk inanneh pangeh netuped pa kiung Tuhan ineh.

²⁸Idi ieh nenier pa bawang Sodom idi Gemora dengan aput tana; raked ineh. Idi ieh nenier inan rabpun umak ratnan tana' ineh mepad kudeng rabpun ratnan tetel luk rayeh.

²⁹Iamo' kareb Tuhan Allah nengusag amung bawang luk luun raked ineh, idi Ieh nengerawé Ibrahim, pad Ieh nemuit ni Lut ratnan dereh ineh.

³⁰Idi Lut neremuat rat bawang Soar, idi iné' déi' luun pegkung dengan dueh anakneh luk decur, ngaceku ieh matot tudo déi' Soar. Idi diteluh netudo bang lubang batu.

³¹Idi kebala anakneh luk rayeh nan kinanakneh luk isuut, "I Ama' pangeh mengered, idi na luk idi deléi bang bawang ini luk miak pamung rudap dengan kitech mepad kudeng lawé luk pekalai bang tana' ini.

³²Do' kitech maré abpa' anggur rupen i Ama', idi kitech miak pamung rudap denganneh, pad kitech inan anak."

³³Idi didueh nemaré abpa' anggur rupen taman didueh bang alem ineh, idi aceh luk rayeh nesemuet idi rudap dengan tamanneh. Idi tamanneh na kali' idan ieh netelubid idi idan ieh netumui teh.

³⁴Idi kenebpa, kebala aceh luk rayeh nan kinanakneh luk isuut, "Malem ina ui nerudap dengan i Ama'. Do' kitech maré abpa' anggur rupenneh teh bang alem ini, idi iko amé' rudap denganneh, pad kitech inan anak."

³⁵Idi didueh nemaré abpa' anggur rupenneh bang alem ineh. Idi luk isuut ineh pana' nepamung rudap denganneh. Idi na Lut kali' idan ieh netelubid idi idan ieh netumui.

³⁶Idi dueh anak Lut ineh pana' mali', ieh ineh ratnan taman didueh.

³⁷Idi luk rayeh ineh nenganak aceh anak deléi. Idi ieh nenganau' ngadanneh Moab, ieh ineh taman lun Moab macing nekini.

³⁸Idi luk isuut ineh nenganak aceh anak deléi teh. Idi ieh nenganau' ngadanneh Benami, ieh ineh taman amung-amung lun Amon macing nekini.

Pudut 20

¹Idi rat Mamré Ibrahim nenalan amé' Negeb. Idi ieh netudo arang bawang Kadis dengan bawang Sur. Idi ieh lun sakai bang bawang Gerar.

- ²Idi kebalaneh ratnan awanneh Sara, "Ieh ineh kinanakku." Idi Abimelek raca' Gerar ineh nengecuk nelun ngalap ni Sara.
- ³Iamo' kebala Allah ni Abimelek bang nupineh, "Iko malé maté, ngaceku decur luk pangeh ilapmu ineh awan dulun."
- ⁴Iamo' Abimelek nateh nepamung danganneh. Idi kebalaneh, "O Tuhan, ui na sala! Kudeng apehké Iko miak ngaté negku idi pupuku?"
- ⁵Kebala Ibrahim, 'Decur ini kinanakku.' Idi kebala decur ineh pana', 'Deléi ini kinanakku.' Idi dengan mesiri niat ui pangeh nenganau' ineh."
- ⁶Idi kebala Tuhan neneh bang nupineh, "Mo, Ui kali' idi dengan mesiri niatmu, iko nenganau' ineh. Idi teh pangeh Ui nemebpeng namu na miak nganau' sala' pa kiungKu. Idi na Ui nenima' namu ngakem decur ineh.
- ⁷Iamo' nekini do' iko ngelubed decur ineh kuan awanneh; ngaceku ieh seburur lun nabi. Idi ieh miak mutuh kuanmu, pad iko mulun. Iamo' kudeng iko na ngelubed neneh, do' iko ngerawé, dengan matu-matu iko maté, idi dengan amung pupumu."
- ⁸Idi pekak uka-uka Abimelek nenawar amung-amung lun tarehneh, idi ieh nemada' nedeh ratnan luk pangeh nangun, pad ideh pelaba tot.
- ⁹Idi Abimelek menawar ni Ibrahim, kebalaneh, "Anun luk inau'mu kuan kai ini? Anun sala'ku namu, pad iko pangeh nengacing susa' luk rayeh kuanku idi kuan imetku teh? Na petulu seburur pana' nganau' luk ruenmu kuanku.
- ¹⁰Ngudehké iko nenganau' kudeng ineh?"
- ¹¹Idi kebala Ibrahim, "Ngaceku bang terawéku, dengan matu-matu lun bang bawang ini na matot inan Allah, kali' rungen ideh ngaté negku ngaceku ratnan awanku ini.
- ¹²Idi matu ieh kinanakku, ieh ineh anak tamanku. Iamo' baken ieh anak tinanku. Idi ieh pangeh mangun ku awanku.

¹³Idi kareb Allah nengecuk negku nalan rat ruma' tamanku, idi kebalaku neneh, 'Do' iko méi' kuanku, idi iapeh-iapeh luk ulek kiteh do' mala negku kinanakmu.' “

¹⁴Idi Abimelek nemaré dumba, sapi', idi demulun kuan Ibrahim. Idi Sara awan Ibrahim ineh pana' linubedneh.

¹⁵Idi kebalaneh ni Ibrahim, "Idi amung-amung tana'ku ineh pa kiungmu. Tudo mo' iapeh-iapeh luk pianmu.”

¹⁶Idi kebalaneh ni Sara, "Idi kuan kinanakmu ini, ui pangeh nemaré meribu balad pirak mangun ku tanu' iko na mesala' siren amung lun denganmu. Idi amung-amung lemulun miak kali' iko na mesala'.”

¹⁷⁻¹⁸Allah pangeh nengitek nakan amung-amung decur bang ruma' Abimelek ngaceku ratnan Sara, awan Ibrahim ineh. Idi Ibrahim sembayang mutuh kuan Abimelek. Idi Allah nengedo' neneh dengan awanneh idi demuluneh, pad ideh inan anak teh.

Pudut 21

¹Idi Tuhan méi' ni Sara, mepad kudeng luk bilaNeh atun.

²Idi Sara mali' idi nenganak aceh anak deléi kuan Ibrahim kareb ieh mengered, ieh ineh bang kareb luk litep Allah atun.

³Idi Ibrahim nenganau' ngadanneh Isak.

⁴Idi kareb ulun Isak ualuh aco, idi Ibrahim nenunat neneh, maya' kudeng luk bila Allah neneh.

⁵Idi kareb Isak tinganak, ulun Ibrahim meratu lak.

⁶Idi kebala Sara, "Allah nenganau' negku mawang niat idi meriruh, pad amung-amung lemulun luk ninger bala ineh miak meriruh denganku.”

⁷Idi teh kebalaneh, "Idéké luk nepebala kuan Ibrahim, 'Sara miak niti' anak'? Iamo' ui pangeh nenganak aceh anak deléi kuanneh kareb ieh mengered.”

⁸Idi anak ineh temubu', idi kareb aco luk inan Isak nugka' niti', idi Ibrahim nenganau' aceh irau rayeh.

- ⁹Idi Sara nenier anak Hagar, decur lun Masir, luk pangeh tinganakneh kuan Ibrahim, idi ieh marot dengan anakneh Isak.
- ¹⁰Idi kebala Sara ni Ibrahim, "Masut demulun decur ini dengan anakneh. Ngaceku anak demulun decur ineh na miak ngalap babpat pad-pad dengan anakku Isak."
- ¹¹Idi bala ini pelaba dat pedingeren Ibrahim, ngaceku Ismail pana' anakneh.
- ¹²Iamo' kebala Tuhan ni Ibrahim, "Aleg mesusa' ratnan anak ineh idi ratnan demulumu pana'. Idi anun-anun luk bila Sara namu, do' iko nganau', ngaceku ratnan Isak, inulmu miak tetanen.
- ¹³Idi anak demulunmu pana' miak ruenKu mangun ku aceh pupu, ngaceku ieh pana' anakmu."
- ¹⁴Idi pekak uka-uka Ibrahim nemaré aceh nuba' ku balu' Hagar idi sebuleng seréi' luk panu' ku abpa'. Idi ieh nemaré Ismail baben Hagar. Idi ieh nengecuk neneh nalan. Idi Hagar neburo, idi nalan-nalan déi' su luk ali-ali luk titen Birsiba.
- ¹⁵Idi kareb abpa' luk bang seréi' ineh pangeh mabud, idi ieh nenganau' anak ineh telubid pa liang kayuh.
- ¹⁶Idi ieh nenalan, idi netudo limeh ngepulu' depeh kiadoneh rat ni Ismail. Kebalaneh, "Na ui tuman nier anakku ini maté." Idi ieh netudo mado rat neneh idi anak ineh nangi'.
- ¹⁷Idi Allah neninger tangi' anakneh; idi kebala melaikat Allah rat déi' langit ni Hagar, "Anunké luk inanmu mesusa', O Hagar? Aleg matot, Allah pangeh neninger tangi' anakmu.
- ¹⁸Do' iko tumui, ngalap anak ineh idi ngubuk neneh. Ui sikal nganau' neneh ku aceh pupu luk rayeh."
- ¹⁹Idi Allah nengukab mateh Hagar pad ieh nenier aceh bued abpa'. Idi ieh iné' ngalap abpa' bang seréi' ineh, idi nemaré rupen anakneh.

- ²⁰Idi Allah nengedengan anakneh pad macing ieh rayeh. Idi ieh netudo déi' su luk ali-ali idi mangun ku selemulun luk mileh nganup.
- ²¹Idi ieh netudo déi' su luk ali-ali déi' Paran. Idi tinanneh nengalap seburur decur rat tana' Masir ku awan Ismail.
- ²²Kareb ineh Abimelek dengan Pikol, lun rayeh bawehneh, nepebala ni Ibrahim, "Allah idi denganmu bang amung-amung kekamenmu.
- ²³Ngaceku ineh, nekini do' iko pejani' negku pa kiung Allah, pelé iko na naluk negku, anakku, idi mupunku. Iamo' mepad kudeng luk pangeh inau'ku kuanmu, do' iko pana' nganau' kuanku idi kuan bawangku luk inanmu tudo."
- ²⁴Idi kebala Ibrahim, "Mo, ui pejani'."
- ²⁵Idi Ibrahim nengilang ni Abimelek ratnan subuk luk pangeh pino demulunneh ineh.
- ²⁶Idi kebala Abimelek, "Na ui kali' idé luk nenganau' kudeng ineh. Idi teh iko na nemaré kali' negku. Ini mo' ui kali'."
- ²⁷Idi Ibrahim nemaré tuda'-tuda' dumba idi sapi' ni Abimelek idi didueh nepejani'.
- ²⁸Idi Ibrahim nengatad tudu' anak dumba tineh ratnan dumba-dumbaneh.
- ²⁹Idi kebala Abimelek ni Ibrahim, "Ku anun dumba tineh luk tudu' ini luk pangeh itadmu?"
- ³⁰Idi kebala Ibrahim, "Tudu' anak dumba ini lapenmu rat bang paladku mangun ku aceh tanu' kuanku ratnan ui pangeh nengukat subuk ini."
- ³¹Idi su ineh titen Birsiba; ngaceku déi' inan didueh nepejani'.
- ³²Pangeh didueh nepejani' déi' Birsiba, Abimelek, idi Pikol nelemubed iné' déi' tana' lun Pilistin.
- ³³Idi déi' Birsiba Ibrahim nenibu aceh lawa kayuh, idi ieh nesembayang déi' idi nenawar ngadan Tuhan, ieh ineh Allah luk Meruked.
- ³⁴Idi Ibrahim netudo déi' tana' lun Pilistin bang tuda'-tuda' io.

Pudut 22

¹Pangeh amung-amung ineh nangun, Allah nenutun Ibrahim, kebalaNeh, "O Ibrahim!" Idi kebala Ibrahim, "Anun idi, Tuhan?"

²Idi kebala Allah, "Ngalap anak bulengmu, Isak luk inanmu mawa, idi amé' déi' tana' Moria. Idi maré neneh sabpen ku aceh baré kuanKu luun aceh surud luk badénKu namu."

³Idi pekak uka-uka, Ibrahim nengapak kayuh ku ngeseb baré luun bubpun. Idi ieh nenganau' amung-amung luk itenneh luun keted keladaineh. Idi ieh nenguit Isak dengan dueh demulunneh, idi nenalan iné' su luk pangeh bila Allah kuanneh.

⁴Bang aco luk keteluh Ibrahim nenier su ineh rat mado.

⁵Idi kebalaneh nan demulunneh, "Tudo su ini medueh dengan keladai ineh, idi ui dengan anakku ini miak amé' déi'. Kareb kai pangeh sembayang kai miak lemubed matun nemedueh teh."

⁶Idi Ibrahim nemaré kayuh ineh panen Isak. Idi Ibrahim nenguit apui, idi iyu teh. Idi dingetameh nenalan.

⁷Idi kebala Isak, "O Ama!" Idi kebala Ibrahim, "Anun idi, Asi?" Idi kebala Isak, "Siruh, ini apui idi kayuh. Iamo' iapeh anak dumba luk barén sabpen ineh?"

⁸Idi kebala Ibrahim, "Allah sebuleng miak maré aceh anak dumba." Idi dingetameh nenalan teh.

⁹Kareb didueh nacing déi' su luk pangeh bila Allah neneh, idi Ibrahim nenganau' aceh bubpun. Idi ieh nemipin kayuh luun ineh. Idi ieh nengaling anakneh ineh idi nengerareng neneh luun kayuh luk luun bubpun ineh.

¹⁰Idi ieh nengalap iyu, ku ngeret neneh.

¹¹Iamo' aceh Melaikat Tuhan nengitang rat déi' surga, kebalaneh, "O Ibrahim, Ibrahim!" Idi kebala Ibrahim, "Anun idi, Tuhan?"

¹²Idi kebala Melaikat ineh, "Aleg iko ngaté anak ineh, idi aleg nganau' anun-anun kuanneh. Nekini Ui kali' iko matot inan Allah. Ngaceku sagan pana' ieh anak bulengmu, na iko ngibpeng neneh kuanKu."

¹³Idi Ibrahim netugak idi nenier libut-libutneh idi inan sebuleng dumba deléi nepabpung unganéh nan angkat kayuh. Idi ieh pana' iné' ngalap dumba ineh idi nemaré neneh mangun ku baré luk sabpen ku libal anakneh.

¹⁴Idi Ibrahim neneten ngadan su ineh "Tuhan Miak Maré." Idi macing nekini pana' lemulun mala, "Luun surud Tuhan ineh Ieh maré."

¹⁵Idi Melaikat Tuhan nengitang kuan Ibrahim sekedueh kua' rat déi' surga,

¹⁶kebalaNeh, "Ratnan ngadanKu Ui pebulung, Ui ini Tuhan luk pebala, ngaceku iko pangeh nenganau' ini, idi na nengibpeng anak bulengmu, kuanKu,

¹⁷idi matu Ui miak maré peruan kuanmu, idi Ui miak ngula' anak inulmu mepad kudeng gituen bang langit, idi mepad kudeng bada tangeb abpa' rayeh. Idi anak inulmu ineh miak metueh ratnan amung-amung bunu'deh,

¹⁸idi ratnan inulmu amung-amung pupu luk bang tana' ini miak ngalap peruan, ngaceku iko nemaya' balaKu."

¹⁹Pangeh ineh Ibrahim nelemubed matun demulunneh, idi ideh nenalan iné' déi' Birsiba, idi Ibrahim netebawang déi' Birsiba.

²⁰Idi pangeh ineh, idi Ibrahim nekali' ratnan Milka pangeh nenganak tuda'-tuda' anak kuan kinanakneh Nahor:

²¹ieh ineh, Us, anak lun atun, Bus, kinanakneh, Kemuel, taman Aram ineh,

²²Kesed, Haso, Pildas, Jidlap, idi Betuil."

²³(Idi Betuil nenginul Ribeka.) Idi luk ualuh burur anak deléi ini tinganak Milka kuan Nahor, kinanak Ibrahim ineh.

²⁴Idi apid Nahor, luk ngadanneh Riuma ineh pana', nenganak Tiba, Gaham, Tahas, idi Maka.

Pudut 23

- ¹Idi Sara mulun meratu dueh ngepulu' tudu' lak.
- ²Idi ieh naté déi' Hebron bang bawang Kanaan; idi Ibrahim netemido neneh.
- ³Idi ieh neburo rat iring butung awanneh idi iné' nelun Hiti, kebalaneh,
- ⁴"Ui ini seburur lun sakai luk tudo arang muyuh. Do' masuk aceh tana' nanku nanem awanku."
- ⁵Idi kebaladeh,
- ⁶"Do' iko ninger bala kai, O tuan. Iko seburur pengulu luk rayeh arang kai, idi iapeh-iapeh lengutan kai luk bureh, idi do' iko nanem awanmu déi'. Ngaceku seburur pana' rat arang kai na miak ngibpeng lengutandeh kuanmu pad iko miak nanem awanmu déi'."
- ⁷Idi Ibrahim netekunal pa kiungdeh,
- ⁸kebalaneh, "Kudeng muyuh maré negku nanem awanku su ini, idi do' muyuh mutuh ni Epron Sohar lun Hiti ineh,
- ⁹pelé ieh masui lubang Makpéla luk iring lati'neh kuanku dengan petap raganeh pa kiung muyuh, pad tana' ineh mangun ku lengutanku."
- ¹⁰Idi Epron idi tudo arang uned lun Hiti ineh, munung tanga' bawang su luk inan lun pegayam. Idi ieh nengor bala Ibrahim pa kiung amungdeh, kebalaneh,
- ¹¹"O tuan, do' iko ninger balaku, ui miak maré amung tana' ineh kuanmu dengan lubang luk bang ineh. Ui sikal maré ineh namu pa kiung amung pupuku pad iko miak nanem awanmu déi'."
- ¹²Idi Ibrahim netekeradung pa kiung lun bang bawang ineh.
- ¹³Idi kebalaneh ni Epron pedingeren lun mula', "Do' iko ninger do'-do'. Ui sikal melih amung tana' ineh; do' ngalap usin ini rat negku ku raganeh, pad ui miak nanem awanku déi'."
- ¹⁴Idi kebala Epron,

¹⁵"O tuan, na mekudeh ratnan raga tana' ineh, luk apat ngeratu balad pirak. Nanem mo' awanmu su ineh."

¹⁶Idi Ibrahim nengamo idi ieh nenimang kinula' pirak luk bila Epron ineh pa kiung lun mula' ieh ineh 400 balad pirak, ieh ineh maya' timang lemulun luk pepua'.

¹⁷Kudeng ineh lawéneh tana' Epron luk déi' Makpéla luk pa busat aco Mamré mangun ku tana' Ibrahim, ieh ineh lati'neh idi lubang luk bang ineh pana', idi amung-amung lawa kayuh luun tana' ineh macing ku lakanneh.

¹⁸Amung lun Hiti luk idi neninger gayam ineh nengamo ratnan tana' ineh miak lapen Ibrahim.

¹⁹Pangeh ineh, Ibrahim nenanem awanneh, Sara, bang lubang ineh déi' bawang Kanaan.

²⁰Idi tana' ineh, dengan lubang luk bang ineh teh biré lun Hiti ni Ibrahim miak mangun ku lengutanneh sebuleng.

Pudut 24

¹Idi Ibrahim pangeh mengered. Idi Tuhan pangeh nengeperuan neneh bang luk amung-amung.

²Idi kebala Ibrahim nan lun dukenneh luk rayeh luk ngimet amung binawehneh, "Ngerareng tiku'mu pa liang tipanku,

³idi do' iko pebulung ku ngadan Tuhan, Allah langit idi tana', pad iko na nima' anakku ngaweh decur lun Kanaani luk arang tau ini.

⁴Iamo' do' iko amé' bawang su luk inanku tinganak, idi ngalap seburur decur ku awan anakku Isak rat arang pupuku."

⁵Iamo' kebala lun dukenneh kuanneh, "Kian, kudeng decur ineh ara' maya' negku amé' bang bawang ini, miakké ui nguit anakmu lemubed amé' bang bawangmu ineh?"

⁶Idi kebala Ibrahim neneh, "Aleg tu-tu iko nguit anakku lemubed amé' déi'.

⁷Tuhan Allah luk kuan langit nenguit negku rat bang ruma' tamanku idi rat bang bawang luk inanku tinganak. Idi Ieh nepejani' maré tana' ini kuan anak inulku. Ieh miak ngecuk melaikatNeh amé pa atunmu, pad iko ngalap seburur decur ku awan anakku rat déi'.

⁸Idi kudeng decur ineh na sikal maya' namu, idi iko mepuit ratnan jani'mu ini. Iamo' aleg iko nguit anakku lemubed amé' déi'."

⁹Idi lun duken ineh nengerareng ticu'neh pa liang tipan Ibrahim luk tuanneh. Idi ieh nepejani' neneh ratnan luk bila Ibrahim.

¹⁰Idi lun dukeh ineh nengalap pulu' unta tuanneh, idi binaweh luk meraga. Idi ieh nenalan iné' Mesopotamia, ieh ineh bawang Nahor.

¹¹Kareb ieh nacing, idi ieh nenganau' untaneh tekeradung muneng ku subuk bal alad bawang kareb malem aco, ieh ineh kareb amung-amung decur remuat amé' ngalap abpa'.

¹²Idi ieh nesembayang, "O Tuhan, Allah tuanku Ibrahim, ngedengan negku, pad ui miak mangeh kekamen ini bang aco sini, idi ui mutuh Namu mada' éi'Mu kuan tuanku Ibrahim.

¹³Siruh, ui tuped muneng ku subuk ini, kareb amung-amung anak adi' decur lun luk bang bawang ini remuat ngalap abpa'.

¹⁴Ui miak pebala kuan seburur decur, 'Ngerareng sidangurmu pad ui miak ngirup,' idi kudeng ieh pebala, 'Ngirup iko, idi ui miak maré kuan amung-amung untamu teh,' ieh ineh decur luk pangeh pinili' Allah kuan demulunMu Isak. Ratnan ini ui miak kali' idi Tuhan maya' jani'Mu kuan tuanku ineh."

¹⁵Idi kareb nateh sembayangneh pangeh, idi Ribeka nacing maan sidangurneh, ieh ineh anak Betuil luk anak Milka, awan Nahor, luk kinanak deléi Ibrahim.

¹⁶Idi decur ineh seburur anak adi' luk do' taga idi luk pun mebaruh. Idi ieh netemurun matun subuk ineh idi nengook abpa', idi numak teh.

- ¹⁷Idi lun duken ineh nupun matun neneh, idi nepebala, "Maré negku ngirup sesuut abpa' rat bang sidangurmu ineh."
- ¹⁸Idi kebala decur ineh, "Do' iko ngirup, Tuan," idi ieh petacu nengerareng sidangurneh idi nemaré abpa' rupenneh.
- ¹⁹Pangeh ieh nemaré rupen lun duken ineh idi keburu'neh, "Ui miak ngook abpa' kuan amung-amung untamu pad ideh ngirup macing mebor."
- ²⁰Idi petacu ieh nengutang abpa' rat bang sidangurneh bang bau' idi nupun matun subuk ineh idi ngook abpa' teh, idi ieh nenguit abpa' kuan amung-amung untaneh.
- ²¹Idi lun duken ineh nenier neneh idi ungeng, pian kali' kudeng Allah maré peruan bang lawéneh lek.
- ²²Kareb amung unta ineh pangeh ngirup, idi lun duken ineh nengalap aceh susing amas luk meraga, idi dueh leku' amas luk meraga teh.
- ²³Idi kebalaneh, "Anak idé iko ini? Do' mada' negku. Inanké luk inan kai ucu' déi' bang ruma' tamanmu?"
- ²⁴Idi kebala decur ineh neneh, "Ui ini anak Betuil Nahor didueh Milka.
- ²⁵Kai inan uduh luk tekering idi luk kenen unta pana' inan petap, idi luk inan ucu' pana' inan."
- ²⁶Idi lemulun ineh netekunal idi nesembayang inan Tuhan,
- ²⁷kebalaneh, "Amung ubur kuan Tuhan, ieh ineh Allah tuanku Ibrahim, luk lutep maya' jani'Neh kuan tuanku. Idi Tuhan pangeh nenguyut negku macing bang ruma' kinanak tuanku."
- ²⁸Idi decur ineh nupun iné' ruma' tinanneh idi nemada' bala ineh nedeh.
- ²⁹Idi Ribeka inan sebuleng kinanak deléi, ngadanneh Laban; idi Laban nupun matun lun duken ineh déi' iring subuk.
- ³⁰Ieh pangeh nenier susing, idi leku' ineh luun tiku' kinanakneh, idi ieh pangeh neninger amung bala luk bila lun duken ineh ni Ribeka. Idi ieh iné' matun lun duken ineh luk tupid dengan untaneh déi' iring subuk.

³¹Idi kebala Laban, "Do' umak bang ruma'ku. Iko seburur lemulun luk inan Tuhan pangeh nemaré peruan. Ngudeh iko tuped déi' liang? Ui pangeh nganau' temina' luk inan kuanmu idi kuan amung unta ineh pana'."

³²Idi lemulun ineh numak, idi Laban neneka abet amung-amung unta ineh idi nenganau' nedeh kuman uduh luk tekering idi luk kenen baken teh. Idi ieh nemaré abpa' ku maru' kukud sakai ineh.

³³Pangeh ineh ideh nemaré akan. Iamo' keburu' lemulun ineh, "Na ui miak kuman kareb nateh ui pangeh nemada' amung-amung balaku atun." Idi kebala Laban, "Do' mada' ineh."

³⁴Kebalaneh, "Ui ini demulun Ibrahim.

³⁵Idi Tuhan pangeh nengeperuan tuanku pad ieh mangun ku lun do'; idi Ieh nemaré kuanneh mula' sapi', amék, amas, pirak teh, idi tuda'-tuda" burur demulun, do' deléi idi decur teh, dengan unta idi keladai pana'.

³⁶Idi Sara awan tuanku ineh pangeh nenganak aceh anak deléi kuanneh bang kareb ieh mengered; idi ieh nemaré amung-amung luk ieh kuan bang palad anakneh.

³⁷Idi tuanku nengecuk negku pejani', kebalaneh, 'Aleg iko ngalap seburur decur lun Kanaani ku awan anakku Isak.

³⁸Iamo' amé' iko déi' ruma' tamanku idi pupuku idi nakap seburur decur déi' ku awanneh.'

³⁹Idi kebalaku nan tuanku, 'Kian, decur ineh na sikal maya' negku lek.'

⁴⁰Iamo' kebalaneh, 'Ui megéi' maya bala Tuhan. Idi Ieh miak ngecuk MelaikatNeh maya' namu, pad lawému inan peruan. Idi iko miak ngalap seburur decur ku awan anakku ratnan pupuku idi ratnan ruma' tamanku.

⁴¹Idi kudeng ineh mo' lawéneh iko mepuit ratnan jani' ineh: kareb iko pangeh nacing déi' dengan pupuku, idi kudeng ideh na maré neneh kuanmu, kali' rungen iko mepuit ratnan jani' ini.'

- ⁴²"Kareb ui nacing iring subuk ineh aco sini, idi ui nesembayang, 'O Tuhan, Allah tuanku Ibrahim, di' maré peruan kuan lawéku ini.
- ⁴³Siruh, ui tuped iring subuk ini. Kareb seburur anak adi' decur remuat ngalap abpa' idi ui pebala neneh, "Maré sesuut abpa' rupenku rat bang sidangurmu ineh,"
- ⁴⁴idi kudeng decur ineh pebala, "Ngirup iko idi ui miak ngalap abpa' rupan amung-amung untamu pana'," do' ieh mangun ku decur luk pinili' Tuhan kuan anak tuanku.'
- ⁴⁵Idi kareb nateh ui pangeh sembayang bang niatku, idi Ribeka neremuat maan sidangurneh, idi ieh netemurun matun subuk ineh idi nengook abpa'. Idi kebalaku neneh, 'Do' maré abpa' rupenku.'
- ⁴⁶Idi petacu ieh nengerareng sidangurneh, kebalaneh, 'Do' iko ngirup, idi ui maré abpa' rupan kuan untamu pana'. Idi ui nengirup, idi ieh nemaré abpa' rupan unta pana'.
- ⁴⁷Idi ui nengitun neneh, 'Anak idéké iko?' Idi kebalaneh, 'Anak Betuil Nahor didueh Milka.' Idi ui nenganau' susing nan icungneh, idi dueh leku' luun penguanneh.
- ⁴⁸Idi ui netekunal idi nesembayang inan Tuhan. Ui nengubur Tuhan, Allah tuanku Ibrahim, luk pangeh nenguyut negku petacu, pad ui miak ngalap anak decur kinanak tuanku ku awan anakneh.
- ⁴⁹Idi nekini, kudeng iko sikal nganau' luk do' idi luk matu pa kiung tuanku, do' mada' negku; kudeng na miak, do' mada' negku teh; pad ui kali' anun luk petulu ruenku."
- ⁵⁰Idi kebala Laban idi Betuil, "Amung ini ratnan Tuhan; idi na kai miak mutut ini.
- ⁵¹Siruh, Ribeka ineh idi pa kiungmu, do' iko ngalap neneh idi nguit neneh, pad ieh mangun ku awan anak tuanmu, maya' kudeng bala Tuhan ini."

⁵²Kareb demulun Ibrahim neninger bala didueh ineh, idi ieh netekunal idi nesembayang inan Tuhan.

⁵³Idi ieh nengeruat tuda'-tuda' binaweh pirak idi amas, idi tuda'-tuda' kibung luk biréneh kuan Ribeka. Idi teh tuda'-tuda' binaweh luk meraga biréneh kuan kinanakneh luk deléi idi kuan tinanneh teh.

⁵⁴Idi lun duken ineh nekuman idi nengirup, dengan amung lun luk maya' neneh, idi ideh rudap sedacem déi'. Kareb ideh nekulat pekak idi kebala lun duken ineh, "Do' maré negku muli' amé' inan tuanku."

⁵⁵Iamo' kebala kinanakneh, idi tinanneh, "Nima' Yamu tudo dengan kai pulu' aco teh. Pangeh ineh ieh miak amé'."

⁵⁶Iamo' kebalaneh nedeh, "Aleg muyuh ngimet negku, ngaceku Tuhan pangeh nengeperuan lawéku. Do' nima' negku muli' amé' inan tuanku."

⁵⁷Idi kebaladeh neneh, "Do' tau nawar ni Yamu idi ngitun neneh."

⁵⁸Idi ideh nenawar Ribeka, kebaladeh neneh, "Sikalké iko amé' maya' lemulun ini?" Idi kebalaneh, "Ui sikal amé'."

⁵⁹Idi ideh nemaré Ribeka nalan dengan seburur demulunneh, idi lun duken Ibrahim ini dengan amung lun luk maya' neneh.

⁶⁰Idi ideh nengeperuan ni Ribeka, kebaladeh, "Do' kinanak kai mangun ku tinan tuda'-tuda' juta lemulun. Idi do' anak inulmu metueh ratnan amung-amung bunu'deh!"

⁶¹Idi ideh nengegkang Ribeka dengan amung-amung demulunneh luk decur, idi ideh nenalan maya' unta dengan lun duken Ibrahim ineh.

⁶²Idi Isak pangeh nacing rat "Subuk Tuhan luk Mulun idi luk Nier Negku," ngaceku ieh tudo bang bawang Negeb.

⁶³Idi Isak pana' neremuat sikal nalan-nalan déi' natad kareb malem aco, idi ieh netukag idi nenier tuda'-tuda' unta macing.

⁶⁴Idi Ribeka pana' netukag, idi ieh nekali' ni Isak, idi ieh netemurun ratnan untaneh.

⁶⁵Idi kebalaneh nan lun duken ineh, "Idéké deléi luk nalan déi' natad ineh luk amé' matun netau?" Idi kebala lun duken ineh, "Ieh ineh tuanku." Idi Ribeka nengalap ebpu uluhneh idi nemapen kiungneh.

⁶⁶Idi demulun ineh nemada' ni Isak ratnan amung-amung luk pangeh inau'neh.

⁶⁷Idi Isak nenguit ni Ribeka semuet bang lepo kibung tinanneh Sara, idi ieh nengalap Ribeka mangun ku awanneh; idi ieh mawa neneh. Ratnan luk kudeng ineh Isak mawang niat pangeh até tinanneh.

Pudut 25

¹Idi brahim nengalap aceh awan baruh, ngadanneh Ketura.

²Idi ieh nenganak Simran, Yoksan, Medan, Midian, Isbak, idi Sua.

³Idi Yoksan teh nenginul Siba idi Dedan. Idi inul Dedan ineh luk titen lun Asurim, Letusim, idi Lumim.

⁴Idi amung-amung anak deléi Midian, ieh ineh Epa, Epir, Hanok, Abida, idi Elda. Idi amung-amungdeh ini inul Ketura.

⁵Idi Ibrahim nemaré amung binawehneh kuan Isak.

⁶Iamo' kareb ieh mulun ieh nemaré tuda'-tuda' baré kuan anak-anak deléi luk tinganak awanneh luk baken. Idi pangeh ineh ieh nengecuk nedeh amé' bawang luk pa busat aco, mado ratnan Isak anakneh ineh.

⁷⁻⁸Idi Ibrahim naté kareb ulunneh meratu tudu' ngepulu' limeh lak.

⁹Isak idi Ismail, dueh anakneh ineh nenanem neneh bang lubang Makpéla, luk luun tana' Epron Sohar, lun Hiti ineh, ieh ineh pa busat aco Mamré.

¹⁰Ieh ineh natad luk bilih Ibrahim rat nelun Hiti. Idi Ibrahim idi Sara tinanem su ineh.

¹¹Idi pangeh até Ibrahim, Allah nengeperuan anakneh Isak ineh. Idi Isak netebawang muneng ku "Subuk Tuhan luk Mulun idi luk Nier Negku."

- ¹²Idi ini inul Ismail, luk tinganak Hagar decur lun Masir luk demulun Sara ineh, kuan Ibrahim.
- ¹³Ini ngadan anak-anak deléi Ismail, maya' rayehdeh: luk pun-pun, ieh ineh Nebayot, pangéh ineh Kedar, Adbil, Mibsam,
- ¹⁴Misma, Duma, Masa,
- ¹⁵Hadad, Tema, Yetur, Napis, idi Kedma.
- ¹⁶Idi ini anak-anak deléi Ismail — pulu' dueh tepun pupu — idi bawangdeh idi su luk inandeh nelupo titen ku ngadandeh ineh.
- ¹⁷Idi kareb Ismail naté, ulunneh meratu teluh ngepulu' tudu' lak.
- ¹⁸Idi inul Ismail tebawang arang Hawila idi Sur luk pa busat aco Masir, iring dalam luk amé' déi' Asur. Ideh tudo setau' ratnan inul Ibrahim luk baken.
- ¹⁹Idi ini inul Isak luk anak Ibrahim.
- ²⁰Idi ulun Isak apat ngepulu' lak kareb ieh nengaweh Ribeka anak Betuil (lun Arami rat Mesopotamia) kinanak Laban ineh.
- ²¹Idi Isak nesembayang mutuh ratnan Tuhan kuan awanneh, ngaceku ieh na anak. Idi Tuhan nengua' sembayangneh, idi Ribeka pana' mali'.
- ²²Idi anak rapid nesigio bang nakanneh. Idi kebalaneh, "Na ui tuman ku luk kudeng ini." Idi ieh iné' ngitun inan Tuhan.
- ²³Idi kebala Tuhan neneh, "Inan dueh pupu bang nakanmu. Iko miak nenganak dueh pupu luk pekedaluh. Sebuleng meluun tueh ratnan sebuleng. Seluk isuut miak ngimet seluk rayeh."
- ²⁴Kareb aconeh petap idi Ribeka nenganak anak rapid.
- ²⁵Idi anakneh luk nebpeh atun mesia', idi kubilneh mepad kudeng kuyu' luk mebuluh. Ngaceku ineh ieh titen Esau.
- ²⁶Kinanakneh luk nebpeh mucu nengimet tumid Esau. Ngaceku ineh ieh titen Yakub. Idi ulun Isak anem ngepulu' lak kareb didueh tinganak.

²⁷Idi dueh anak ineh luk amé' rayeh, idi Esau ineh mileh nganup, idi ieh selemulun luk megéi' amé' bang pulung, iamo' Yakub selemulun luk tebawang.

²⁸Idi Esau ineh inan Isak mawa, ngaceku ieh sikal kuman uang pung luk lapenneh; iamo' Ribeka mawa ni Yakub.

²⁹Bang aceh kareb Yakub nenanek peretek sia', idi Esau nacing rat bang pulung. Idi ieh pelaba lau.

³⁰Idi kebala Esau ni Yakub, "Do' maré luk mesia' ineh kenenku, ngaceku ui ini merur!" (Idi ratnan ineh ideh neneten neneh Edom.)

³¹Idi kebala Yakub, "Ui maré ineh namu, kudeng iko maré negku babpat anak luk atun."

³²Idi kebala Esau, "Mo! Ui lélé maté. Anun ulekneh babpat ineh kuanku?"

³³Idi kebala Yakub, "Do' iko pebulung negku atun." Idi ieh pana' nepebulung kuanneh, idi nemaré babpat anak luk atun ineh kuan Yakub.

³⁴Pangeh ineh Yakub nemaré kuan Esau ruti idi peretek luk mesia' ineh. Kareb ieh pangeh nekuman idi nengirup, idi ieh netuped idi nenalan. Kudeng ineh lawéneh Esau nenala' babpat anak luk atun.

Pudut 26

¹Kareb ineh inan iru' bang bawang ineh, ieh ineh baken ratnan iru' luk bang kareb Ibrahim. Idi Isak iné' matun Abimelek, raca' lun Pilistin déi' Gerar.

²Idi Tuhan nesilagan ni Isak, kebalaNeh, "Aleg iko amé' déi' Masir; do' iko tudo déi' tana' luk miak badénKu namu.

³Do' iko tudo segageh bang bawang ini, idi Ui sikal ngedengan namu idi ngeperuan namu; Ui maré amung tana' ini kuanmu idi kuan inulmu. Ui miak ngeletep jani'Ku luk pijani'Ku ni Ibrahim, tamanmu ineh.

⁴Idi Ui sikal ngula' inulmu mepad kudeng gituen déi' langit, idi Ui maré amung tana' ini kuan inulmu ineh. Idi amung-amung pupu bang tana' ini miak ngalap peruan ratnan inulmu:

⁵Ieh ineh ngaceku Ibrahim pangeh nemaya' balaKu, idi nengimet bada'Ku, idi ukumKu.”

⁶Idi Isak tudo déi' Gerar.

⁷Kareb lun bang bawang ineh nengitun neneh ratnan awanneh, idi kebalaneh, "Ieh ineh kinanakku," ngaceku ieh matot mala neneh awanneh, keterawéneh, "Kudeng ui mala neneh awanku, ideh miak ngaté negku ngaceku Ribeka do' taga.”

⁸Kareb Isak mio tudo déi', idi Raca' Abimelek ineh nenier rat bang tabukneh, idi ieh nekali' Isak idi Ribeka pegapel.

⁹Idi Abimelek nenawar ni Isak, kebalaneh, "Siruh, decur ini awanmu; kudeng apeh balamu, 'Ieh ini kinanaku?'" Idi kebala Isak neneh, "Ngaceku bang terawéku, 'Kian lemulun ngaté negku ngaceku ieh.' “

¹⁰Idi kebala Abimelek, "Anunké luk ruenmu kuan kai? Seburur lemulun bang bawang ini malé amé' pamung dengan awanmu. Ratnan luk kudeng ineh, iko miak ngacing sala' kuan kai.”

¹¹Idi Abimelek nemebpeng nelun mula', kebalaneh, "Idé-idé luk ngesusa' lemulun ini dengan awanneh miak pitayen.”

¹²Idi Isak nenganau' lati', idi bang lak ineh ieh nengalap meratu kua' kinula' luk inisakneh, ngaceku Tuhan nengeperuan neneh.

¹³Idi ieh megéi' ngalap mula' uli', pad ieh mangun ku lun do'.

¹⁴Lun Pilistin megateh neneh, ngaceku ieh inan mula' amék, sapi', idi demulun teh.

¹⁵Idi amung-amung subuk luk pangeh inukat demulun tamanneh bang kareb Ibrahim, tamanneh ineh, pipen lun Pilistin idi pinu'deh ku tana'.

¹⁶Idi kebala Abimelek ni Isak, "Do' iko buro rat nekai, ngaceku iko iuk meluun lalud rat nekai.”

¹⁷Idi Isak nenalan rat déi', idi ieh nelupo luun raked déi' Gerar, idi ieh netudo déi'.

¹⁸Idi Isak nenuneh amung-amung subuk ineh luk inukat bang kareb tamanneh, Ibrahim, luk pipen lun Pilistin mucu ratnan até tamanneh. Idi Isak neneten ngadan amung-amung subuk ineh maya' luk inau' tamanneh.

¹⁹Idi lun duken Isak ineh nengukat aceh subuk déi' luun raked ineh, idi ideh kali' aceh bued abpa'.

²⁰Idi amung lun luk matar sapi' lun Gerar nepekedaluh nelun luk matar sapi' Isak, kebaladeh, "Kai kuan abpa' ini." Ngaceku ineh ieh neneten ngadan subuk ineh, "Kedaluh."

²¹Idi lun duken Isak nengukat aceh subuk luk baken teh, idi ideh nepekedaluh neneh teh. Ngaceku ineh ieh neneten ngadan subuk ineh "Saro."

²²Idi Isak nemubuh rat déi' idi nengukat aceh subuk luk baken, idi na ideh pekedaluh neneh peh. Ngaceku ineh ieh neneten ngadan subuk ineh "Puit," kebalaneh, "Nekini Tuhan nemaré meruar kuanku. Ngaceku ineh miak tau uen ngeperuan bang bawang ini."

²³Idi Isak nenalan iné' déi' Birsiba.

²⁴Idi bang alem ineh Tuhan nesilangan neneh, kebalaneh, "Idi Ui ini Allah tamanmu Ibrahim. Aleg matot, ngaceku Ui idi denganmu. Ui ngeperuan namu idi Ui ngula' inulmu, ngaceku jani'Ku nan demulunKu Ibrahim."

²⁵Idi Isak nenganau' aceh bubpun su ineh, idi ieh nesembayang inan Tuhan. Idi ieh nelupo su ineh, idi lun dukenneh nengukat aceh subuk teh.

²⁶Idi Abimelek nacing rat déi' Gerar pad-pad dengan Ahusat, rurunneh, idi Pikol, lun rayeh bawehneh, pian pegayam ni Isak.

²⁷Idi kebalala Isak nediteluh, "Anunké punneh meteluh amé' negku, ngaceku muyuh megateh negku idi muyuh pangeh nengecuk negku buro rat nemuyuh?"

²⁸Idi kebalala diteluh, "Kai kali' Tuhan idi denganmu, idi kai ngerawé, do' inan aceh bulung luk arang tau. Kai pian namu pejani',

²⁹pad iko na ngesusa' nekai, mepad kudeng kai pana' na nengesusa' namu. Kai pangeh méi' namu, idi kai nenima' namu buro dengan do' teh. Idi nekini iko inan Tuhan nemaré peruan.”

³⁰Idi Isak nenganau' aceh irau kuandeh, idi ideh nekuman idi nengirup.

³¹Idi pekak uka-uka ideh netumui idi nepebulung seburur dengan seburur; idi Isak nenima' nediteluh muli', idi diteluh nenalan rat neneh dengan nepedo'.

³²Idi bang aco sineh teh lun duken Isak nacing maré kali' ratnan subuk luk inukatdeh, kebaladeh, "Kai pangeh nengalap abpa'.”

³³Idi ieh neneten ngadan subuk ineh "Bulung." Ngaceku ineh ngadan bawang ineh titen Birsiba pad macing nekini.

³⁴Kareb ulun Esau apat ngepulu' lak, idi ieh nengaweh dueh anak lun Hiti, ieh ineh Yudit Beri, idi Basemat Elon.

³⁵Idi didueh nengacing susa' niat kuan Isak idi Ribeka.

Pudut 27

¹Kareb Isak mengered idi ieh nebuser, idi ieh nenawar ni Esau, anakneh luk atun idi nepebala neneh, "O Asi!" Idi Esau nengor, "Anun idi, Ama?"

²Kebala Isak, "Siruh, ui pangeh mengered; idi na ui kali' idan karebku maté.

³Do' iko ngalap binor idi ilebmu amé' bang pulung nakap pung kuanku.

⁴Idi nanek aceh kikidku, mepad kudeng luk inanku geregan, idi nguit ineh amé' negku. Kareb ui pangeh nekuman ineh, idi ui miak ngeperuan namu kareb nateh ui maté.”

⁵Idi Ribeka neninger bala Isak ni Esau. Idi Esau iné' nganup.

⁶Idi kebala Ribeka ni Yakub, "Bala i tamam kuan kinanakmu Esau ui pangeh neninger,

⁷kebalaneh, 'Do' nguit kuanku aceh pung, idi nganau' aceh kikidku. Kareb ui pangeh nekuman ineh, idi ui miak maré peruan kuanmu kareb nateh ui maté.’

- ⁸Ngaceku ineh, O Asi, do' ninger balaku idi nganau' anun-anun luk belénku namu.
- ⁹Do' iko amé' bang laman, idi nguit dueh anak amék luk melamu kuanku, idi ui miak nanek ineh ku kikid i tamam, ieh ineh mepad kudeng luk inanneh geregan.
- ¹⁰Idi iko miak nguit ineh amé' ni tamam pad ieh kuman, idi ieh ngeperuan namu kareb nateh ieh maté."
- ¹¹Idi kebala Yakub kuan tinanneh Ribeka, "Iamo Esau ineh selemulun luk mebuluh kubilneh, idi ui lemulun luk melana kubil.
- ¹²Kian, tamanku miak ngakem negku lek, idi ui mangun kudeng selemulun luk naluk neneh, pad ui ngacing kediman kuan bururku, idi baken peruan."
- ¹³Kebala tinanneh, "Kedimanmu kuan dui, O Asi, iamo' do' iko maya' balaku, idi amé' ngalap dueh amék ineh kuanku."
- ¹⁴Idi ieh iné' ngalap anak amék ineh, idi ieh nenguit ineh kuan tinanneh, idi tinanneh nenganau' ineh ku kikid, mepad kudeng luk inan tamanneh geregan.
- ¹⁵Idi Ribeka nengalap ayung Esau luk meraga luk bang ruma'neh, idi nekungayungneh ni Yakub.
- ¹⁶Idi dueh-dueh ticu'neh idi dierneh ibpuneh ku kubil amék ineh.
- ¹⁷Idi ieh nemaré kikid ineh idi ruti luk pangeh inau'neh, bang palad anakneh Yakub.
- ¹⁸Idi Yakub iné' matun tamanneh, kebalaneh, "O Ama!" Idi kebala Isak, "Anun idi, Asi, anakku sapeh iko ni?"
- ¹⁹Kebala Yakub kuan tamanneh, "Ui ini Esau, anakmu luk rayeh, idi ui pangeh nenganau' mepad kudeng luk bilamu. Nekini do' iko tumui idi tudo kuman pung luk ilapku, pad iko maré peruan negku."
- ²⁰Idi kebala Isak, "Kudeng apehké iko mesaget nengalap ineh, Asi?" Idi kebalaneh, "Ngaceku Tuhan Allahmu nengedengan negku."

- ²¹Kebala Isak ni Yakub, "Do' iko amé' muneng, pad ui miak ngakem namu. Matuké iko anakku Esau?"
- ²²Idi Yakub iné' muneng nan tamanneh, idi Isak nengakem neneh, kebalaneh, "Balamu kudeng bala Yakub, iamo' tiku' ini tiku' Esau."
- ²³Iamo' na ieh nengiti neneh ngaceku tiku'neh dueh-dueh mebuluh kudeng tiku' Esau. Kareb ieh lélé ngeperuan neneh,
- ²⁴idi ieh nengitun, "Matuké iko Esau?" Kebalaneh, "Matu."
- ²⁵Idi kebala Isak, "Do' nganau' akan ineh muneng negku. Pangeh ui kuman ineh idi ui ngeperuan namu." Idi Yakub nenganau' akan ineh muneng neneh idi Isak nekuman. Idi Yakub nemaré abpa' anggur rupenneh.
- ²⁶Idi kebala tamanneh neneh, "O Asi, do' iko amé' muneng idi muen negku."
- ²⁷Idi kareb Yakub iné' muen tamanneh, petacu Isak kali' buen ayungneh, idi ieh nengeperuan neneh, kebalaneh, "Buen anakku ini mepad kudeng buen lati' luk inan Tuhan pangeh nemaré peruan!
- ²⁸Idi do' Allah ngebpeh kuanmu ipup rat déi' langit, pad tana'mu mebaleng idi padé idi abpa' anggurmu petap.
- ²⁹Idi do' tuda'-tuda' bawang mangun ku demulunmu, idi tuda'-tuda' pupu tekunal pa kiungmu. Do' iko ngimet amung-amung pupumu sebuleng, idi inul tinanmu pana' miak tekunal pa kiungmu. Idi kediman kuan idé-idé luk ngediman namu, idi peruan kuan idé-idé luk ngeperuan namu!"
- ³⁰Pangeh Isak nemaré peruan kuan Yakub, idi Yakub neburo. Kareb ineh Esau nacing rat nakap pung ineh.
- ³¹Idi ieh nenganau' kikid, idi nenguit ineh kuan tamanneh, kebalaneh, "O Ama', tumui iko, idi kuman luk ilapku, pad iko miak ngeperuan negku."
- ³²Idi kebala Isak, "Idéké iko ini?" Idi kebalaneh, "Ui ini Esau, anakmu luk atun."
- ³³Idi Isak pelaba gegker, kebalaneh, "Idéké luk nengeret pung ineh idi luk nenguit ineh iné' negku? Ui nekuman ineh kareb nateh iko nacing. Idi ui

pangeh nengeperuan neneh. Idi kali' rungen peruan ineh kuanneh macing raked-raked.”

³⁴Kareb Esau neninger bala tamanneh, idi ieh nengitang idi mesusa' niat, kebalaneh kuan tamanneh, "O Ama', maré peruan kuanku teh.”

³⁵Kebala Isak, "Kinanakmu nacing dengan naluk, idi nengalap peruanmu ineh.”

³⁶Idi kebala Esau, "Naké ieh matu titen lun, Yakub? Ngaceku nekini dueh kua' ieh pangeh nenaluk negku. Idi ieh pangeh nengaro babpatku luk rayeh. Idi nekini peruanku pana' ilapneh." Idi kebala Esau, "Naké iko maré peruan kuanku teh?”

³⁷Idi kebala Isak neneh, "Ui pangeh nengiding neneh mangun ku tuanmu, idi ui pangeh nenganau' amung-amung pupuneh mangun ku demuluneh. Ui pangeh nemaré kuanneh padé idi abpa' anggur teh. Anunké luk barénku namu peh?”

³⁸Idi kebala Esau nan tamanneh, "Inanké aceh peruanmu teh, O Ama'? Barénmu aceh peruan kuanku teh." Idi Esau nangi'.

³⁹Idi kebala Isak neneh, "Luk inanmu tebawang na tana' mebaleng, idi na luk idi ipup kuan lati'mu.

⁴⁰Iamo' ratnan pelapetmu iko miak mulun, idi iko mangun ku demulun kinanakmu. Iamo' kareb iko sikal metueh rat neneh, iko miak mepuit ratnan imetneh.”

⁴¹Idi Esau megateh ni Yakub ngaceku peruan luk biré tamanneh kuanneh. Keterawéneh, "Aco luk inan temido até tamanku pangeh muneng. Kareb ineh ui ngaté ni Yakub.”

⁴²Iamo' Ribeka nekali' ratnan terawé Esau ineh, idi ieh nengecuk nawar ni Yakub, kebalaneh, "Do' iko ninger, kinanakmu Esau pian ngua' datmu idi ngaté namu.

⁴³Idi nekini, Asi, do' maya' balaku. Do' iko temina' idi buro matun kinanakku Laban déi' Haran.

⁴⁴Idi do' iko tudo déi' pad macing niat kinanakmu do',

⁴⁵pad ieh mekelupan kekamenmu luk neneh; idi mucu ui ngecuk lemulun nawar namu rat déi'. Ngudehké ui tacin medueh bang seaco?"

⁴⁶Idi kebala Ribeka ni Isak, "Ui pangeh musam ku awan Esau luk pupu baken. Kudeng Yakub ngalap seburur decur lun Hiti, meluun do' ui maté."

Pudut 28

¹Idi Isak nenawar ni Yakub idi nepetabi' neneh, kebalaneh, "Aleg iko ngalap awan ratnan decur lun Kanaani.

²Do' iko nalan amé' déi' Mesopotamia déi' ruma' Betuil luk tepunmu. Ngalap aceh decur ratnan anak Laban luk taman pinakenmu ineh.

³Idi do' Allah luk Meluun Lalud ngeperuan awehmu ineh pad iko mula' anak, pelé iko mangun ku taman tuda'-tuda' pupu.

⁴Do' Ieh ngeperuan namu idi inulmu mepad kudeng Ieh nengeperuan ni Ibrahim, pad iko ngimet tana' ini luk inanmu tudo luk pangeh biré Allah kuan Ibrahim!"

⁵Idi Isak ngecuk Yakub nalan amé Mesopotamia matun ni Laban luk anak Betuil lun Arami ineh, ieh ineh kinanak Ribeka tinan Yakub idi Esau.

⁶Idi Esau nekali' Isak nengeperuan ni Yakub, idi Yakub icukneh amé' déi' Mesopotamia pad ngaweh déi'. Idi teh ieh kali' kareb Isak nengeperuan neneh, idi ieh nemebpeng neneh na ngalap decur lun Kanaani.

⁷Idi teh ieh kali' Yakub nemaya' bala taman-tinaneh, pad ieh iné' déi' Mesopotamia.

⁸Idi Esau kali' tamaneh Isak na sikal ku anak decur lun Kanaani,

⁹idi ieh iné' matun Ismail idi nengalap Mahalat anak Ismail Ibrahim, luk kinanak Nebayot ku apidneh.

- ¹⁰Yakub nenalan rat Birsiba, idi iné' déi' Haran.
- ¹¹Idi ieh nacing nan aceh natad luk inan ucu', idi ieh nerudap déi', ngaceku aco pangeh macep. Idi ieh nengalap aceh batu ratnan natad ineh idi nenganau' neneh ku laganeh, idi ieh netelubid sikal rudap.
- ¹²Idi ieh nenginupi, idi inan aceh ican luk tuped rat luun tana', macing déi' langit. Idi inan tuda'-tuda' melaikat umak ican ineh idi temurun teh!
- ¹³Idi ieh nenier Tuhan tuped iringneh. Idi kebala Allah, "Ui ini Tuhan, Allah Ibrahim idi Isak; idi tana' su luk inanmu telubid ineh pana' Ui miak maré kuanmu idi inulmu.
- ¹⁴Idi inulmu miak mangun kudeng abuh tana' ula'deh. Idi ideh miak ngimet aput tana'. Idi rat namu idi ratnan inulmu amung-amung pupu bang tana' ini miak ngalap peruan.
- ¹⁵Ngerawé do'-do', Ui idi denganmu, idi matar namu bang amung-amung lawému. Idi Ui miak ngelubed namu amé' bang bawang ini. Ui na necan namu pad Ui pangeh ngacing amung jani'Ku namu."
- ¹⁶Idi Yakub nekulat, idi kebalaneh, "Tuhan idi ieni, idi na ui nekali' Neneh."
- ¹⁷Idi ieh matot, kebalaneh, "Su ini inan luk katot! Kali' rungen ini ruma' Allah, idi tanga' surga teh."
- ¹⁸Idi Yakub netumui pekak uka-uka, idi ieh nengalap batu luk inau'neh ku laganeh ineh, idi nenaped ineh mangun ku aceh terawé, idi ieh nengutang umau saitun luunneh.
- ¹⁹Idi ieh neneten ngadan su ineh Baitel. (Iamo' atun ngadan bawang ineh Lus.)
- ²⁰Idi Yakub nepejani', kebalaneh, "Kudeng Iko idi denganku idi matar negku bang amung lawéku, idi maré akan idi ayungku,
- ²¹idi kudeng Iko nguli' negku dengan do' amé' ruma' tamanku, kali' rungen Iko mangun ku Allahku.

²²Idi batu ini luk pangeh typedku ku aceh terawé ineh, miak mangun ku su inanku sembayang Namu. Idi ui miak maré kuanMu babpat pulu' ratnan anun-anun luk barénMu negku."

Pudut 29

¹Idi Yakub nenalan rat déi' matun tana' luk pa busat aco.

²Denak-denak ieh nenier aceh subuk luun natad dengan teluh ngeriudan dumba telubid muneng ku ineh. Ngaceku rat bang subuk ineh lemulun maré luk rupen dumba ineh. Idi inan sebuleng batu luk rayeh ngakeb munung subuk ineh.

³Kareb dumba ineh nepamung, idi lun luk matar dumba ineh nengelubid batu ineh, idi nemaré amung dumba ineh ngirup. Pangeh ineh ideh nengelubed batu ineh amé' munung subuk ineh.

⁴Idi kebala Yakub nedeh, "O kinanak-kinanakku, rat iapeh muyuh?" Kecaladeh, "Kai rat Haran."

⁵Idi kebalaneh nedeh, "Kali' muyuh Laban Nahor?" "Kali'."

⁶Idi kebala Yakub nedeh, "Do' ieh?" Idi kecaladeh, "Do'. Siruh, ineh anakneh, Rakel macing dengan aya'neh!"

⁷Idi kebala Yakub, "Siruh, aco ini macang teh. Nateh karebneh miak inan ngamung dumba. Do' maré nedeh ngirup, idi nguit nedeh amé' luun laman."

⁸Idi kecaladeh, "Na kai miak nganau' kudeng ineh, kareb nateh amung riudan aya' ineh imung idi lemulun ngelubid batu luk munung subuk ineh, pad kai maré luk rupen amung-amung dumba ineh."

⁹Kareb Yakub uned pebala nedeh, idi Rakel luk matar dumba tamaneh nacing.

¹⁰Kareb Yakub nenier Rakel dengan aya' taman pinakenneh Laban, idi ieh iné' ngelubid batu ineh, idi nemaré amung aya' ineh ngirup.

¹¹Idi Yakub nemuen Rakel idi nangi'.

- ¹²Idi kebalaneh ni Rakel, "Ui ini pupu i tamam, idi anak Ribeka." Idi Rakel nupun mada' tamanneh.
- ¹³Kareb Laban neninger bala ratnan anak pinakenneh, Yakub, idi ieh nupun papu' neneh, idi ieh nengapel neneh idi nemuen neneh, idi ieh nenguit neneh umak ruma'neh. Idi Yakub nemada' ni Laban ratnan amung-amung lawéneh.
- ¹⁴Idi kebala Laban neneh, "Matu iko pupuku luk muneng!" Idi Yakub netudo sebulan su ineh.
- ¹⁵Idi kebala Laban ni Yakub "Na petulu iko ngakem kuanku mo'-mo' sagan tu pana' iko pupuku. Anun luk pianmu ku tabparmu?"
- ¹⁶Idi Laban inan dueh anak decur, seluk rayeh, Lia, idi seluk isuut, Rakel.
- ¹⁷Idi Lia ineh na do' taga mateh, iamo' Rakel ineh metagap burur idi do' taga.
- ¹⁸Idi Yakub mawa ni Rakel, idi kebalaneh ni Laban, "Ui ngakem tudu' lak kuanmu kudeng iko nima' negku ngalap ni Rakel ku awanku."
- ¹⁹Kebala Laban, "Meluun do' ui maré neneh namu ratnan ui maré neneh nelun baken. Do' iko tudo denganku."
- ²⁰Idi Yakub nengakem tudu' lak kuanneuh pad ieh miak ngalap ni Rakel. Idi bang terawéneh, tudu' lak ineh mepad kudeng segageh mo', ngaceku ieh mawa neneh.
- ²¹Idi kebala Yakub ni Laban, "Do' maré anakmu negku, ngaceku pangeh petap karebneh."
- ²²Idi Laban nenganau' aceh irau paweh, idi ieh neneteng nelun mula'.
- ²³Iamo' malem ineh ieh nenguit ni Lia amé' ni Yakub. Idi Yakub nepamung neneh.
- ²⁴(Idi Laban nemaré Silpa mangun ku demulun anakneuh Lia.)
- ²⁵Kareb pekak uka-uka Yakub nenier ni Lia. Idi kebala Yakub ni Laban, "Ngudeh iko nenganau' luk kudeng ini kuanku? Ui pangeh nengakem pad ui ngalap ni Rakel? Ngudeh iko nenaluk negku?"

²⁶Idi kebala Laban, "Bang bawang ini kai na miak maré anak luk isuut ngaweh atun ratnan seluk rayeh.

²⁷Nganét seminggu, pad irau paweh ini mabud, idi ui maré ni Raket kuanmu kudeng iko ngakem kuanku tudu' lak teh."

²⁸Idi Yakub nengamo, idi pangeh seminggu, abud irau paweh ineh, idi Laban nemaré anakneh Raket ni Yakub ku awanneh.

²⁹(Idi Laban nemaré Bilha mangun ku demulun anakneh Raket.)

³⁰Idi Yakub nepamung ni Raket teh, idi ieh mawa neneh meluun ratnan Lia. Idi ieh ngakem kuan Laban tudu' lak teh.

³¹Kareb Tuhan kali' Lia na inan Yakub mawa, idi Tuhan nemaré neneh inan anak. Iamo' Raket ineh na anak.

³²Idi Lia mali' idi nenganak seburur anak deléi, idi ieh nenganau' ngadanneh Rubin, kebalaneh, "Tuhan pangeh nenier derehku, pad deléiku mawa negku."

³³Idi ieh mali' teh idi nenganak aceh anak deléi, idi kebalaneh, "Tuhan nekali' negku na inan Yakub mawa, idi Ieh nemaré anak ini kuanku." Idi ieh nenganau' ngadanneh Simion.

³⁴Idi ieh mali' teh idi nenganak aceh anak deléi, idi kebalaneh, "Nekini deléiku muneng negku lek, ngaceku ui pangeh nenganak teluh anak deléi kuanneh."

³⁵Idi ieh mali' teh, idi nenganak aceh anak deléi, kebalaneh, "Sekua' ini ui sikal ngubur Tuhan." Idi ieh nenganau' ngadan anak ineh Yehuda. Idi ieh nugka' na akan peh.

Pudut 30

¹Iamo' Raket na anak, idi ieh temaruh inan kinanakneh luk rayeh, idi kebalaneh ni Yakub, "Maré negku inan anak, kudeng na luk idi, maté ui!"

²Idi Yakub museh neneh, kebalaneh, "Miakké ui ngelibal Allah luk maré namu na anak?"

- ³Idi kebala Raket, "Siruh, ini demulunku Bilha. Do' iko pamung neneh, idi ieh inan anak kuanku, pad ui pana' ngalap anak rat neneh."
- ⁴Idi ieh nemaré Bilha ni Yakub mangun ku apidneh. Idi Yakub nepamung neneh.
- ⁵Idi Bilha mali' idi nenganak aceh anak deléi kuan Yakub.
- ⁶Idi kebala Raket, "Allah pangeh nengamo luk pianku. Ieh pangeh neninger putuhku idi nemaré seburur anak deléi kuanku." Idi ieh nenganau' ngadan anakneh Dan.
- ⁷Idi Bilha mali' teh, idi ieh nenganak aceh anak deléi luk kedueh kuan Yakub.
- ⁸Idi kebala Raket, "Idi ui sikal metueh ratnan kinanakku, pad ui nengelaya' neneh." Idi ieh nenganau' ngadan anak ineh Naptali.
- ⁹Kareb Lia nekali' ieh nugka' na anak, idi ieh nemaré demulunneh, Silpa ni Yakub ku apidneh.
- ¹⁰Idi Silpa nenganak seburur anak deléi kuan Yakub.
- ¹¹Idi kebala Lia, "Samal kuanku!" Idi ieh nenganau' ngadan anak ineh Gad.
- ¹²Pangeh ineh Silpa nenganak aceh anak deléi luk kedueh kuan Yakub.
- ¹³Idi kebala Lia, "Samal kuanku, ngaceku amung decur miak ngesamal negku." Idi ieh nenganau' ngadan anak ineh Aser.
- ¹⁴Kareb uned ngeranéh padé, idi Rubin neremuat idi nengalap udéh pelamai déi' bang pulung, idi ieh nenguit ineh kuan tinanneh Lia, idi kebala Raket ni Lia, "Maré aceh udéh pelamai luk ilap anakmu ineh."
- ¹⁵Idi kebala Lia neneh, "Iko pangeh nengalap deléiku? Nekini iko pian ngalap pelamai anakku teh?" Idi kebala Raket, "Kudeng iko maré pelamai anakmu negku, idi iko miak pamung rudap dengan Yakub dacem ini."
- ¹⁶Kareb Yakub nacing rat luun lati' kareb malem aco, idi Lia iné' papu' neneh, kebalaneh, "Do' iko amé' rudap denganku dacem ini, ngaceku ui pangeh nenabpar namu ku pelamai anakku." Idi ieh nepamung neneh bang dacem ineh.

- ¹⁷Idi Allah neninger sembayang Lia pad ieh mali', idi nenganak aceh anak deléi luk kelimeh kuan Yakub.
- ¹⁸Idi kebala Lia, "Allah pangeh nemaré samal kuanku, ngaceku ui nemaré demulunku kuan deléiku." Idi ieh nenganau' ngadan anak ineh Iskar.
- ¹⁹Idi Lia mali' baruh teh, idi nenganak aceh anak deléi luk keanem kuan Yakub.
- ²⁰Idi kebala Lia, "Allah pangeh nemaré aceh samal luk do' kuanku. Nekini deléiku miak tudo denganku, ngaceku ui pangeh nenganak anem anak deléi kuanneh." Idi ieh nenganau' ngadan anak ineh Sebulon.
- ²¹Muci ratnan ineh, ieh nenganak aceh anak decur, idi ieh nenganau' ngadanneh Dina.
- ²²Idi Allah nengerawé ni Rakel, idi Ieh neninger sembayangneh, pad Ieh nemaré neneh inan anak.
- ²³Idi ieh mali' idi nenganak aceh anak deléi, kebalaneh, "Allah pangeh nengagka' igu'ku."
- ²⁴Idi ieh nenganau' ngadan anak ineh Yusup, kebalaneh, "Do' Tuhan maré aceh anak deléi baruh teh kuanku!"
- ²⁵Kareb Rakel pangeh nenganak Yusup, idi kebala Yakub ni Laban, "Nima' negku muli'.
- ²⁶Do' maré awan-awanku idi anak-anakku luk pangeh ilapku laba' ui ngakem kuanmu, pad ui miak nalan. Ngaceku iko kali' ratnan erurku ngakem kuanmu."
- ²⁷Idi kebala Laban neneh, "Nima' negku pebala: Ui pangeh nesibada' ratnan luk ginala' kuanku; ui kali' Tuhan nengeperuan negku ngaceku iko.
- ²⁸Do' ngegala' tabparamu, idi ui miak maré ineh."
- ²⁹Idi kebala Yakub, "Iko kali' ratnan kélku ngakem kuanmu, idi kudeng apeh do' amung aya'mu luk bang paladku.

³⁰Ngaceku sesuut mo' luk iko kuan kareb nateh ui nacing, idi nekini ideh iuk amé' mula'. Idi Tuhan pangeh nengeperuan namu ngaceku ui. Nekini ui pian ngakem kuan tetek ruma'ku sebuleng?"

³¹Idi kebala Laban, "Anunké luk barénku namu?" Idi kebala Yakub, "Na ui pian ngalap tabpar anun-anun. Ui lutep maman idi matar amung-amung aya'mu baruh teh, kudeng iko maya' balaku.

³²Bang aco sini nima' negku nier amung-amung aya'mu, idi ngatad amung-amung luk meburit idi mebulan rat arang dumbamu, idi amung0amung anak dumba luk mitem, idi amung0amung amék luk meburit idi mebulan. Ineh mangun ku tabparku.

³³Idi mucu iko miak kali' kudeng kekamenku mesiri, kareb iko macing nier tabparku. Idi anid-anid luk na meburit idi luk na mebulan rat arang amung-amung amék, idi luk na mitem rat arang amung-amung anak dumba ineh, ieh ineh miak belénmu pinoku, kudeng inan arang aya'ku."

³⁴Idi kebala Laban, "Do! Miak kiteh nganau' kudeng luk bilamu."

³⁵Iamo' bang aco sineh teh Laban nengatad amung-amung amék deléi luk meburit idi mebulan, idi amung-amung amék tineh luk meburit idi mebulan, idi amung-amung luk bulan mebuda', idi amung-amung luk mitem rat arang amung-amung dumba, idi amung ineh biréneh bang palad anak-anakneh.

³⁶Idi Laban nenguit amung aya' ineh nenalan teluh aco kiadoneh rat ni Yakub. Idi Yakub nematar amung-amung aya' Laban luk neketecan.

³⁷Idi Yakub nengalap tuda'-tuda' angkat luk mebata ratnan lawa aru', lawa berangan, idi lawa talun, idi ieh nenala' sebuang anitneh pad angkat ineh mebuda' idi mebata'.

³⁸Idi ieh nengerareng batang-batang luk pangeh kinulitneh ineh pa atun aya'neh su luk inandeh ngirup. Ngaceku ideh petebaneh kareb ideh macing ngirup.

³⁹Kareb pangeh amung-amung amék ineh petebaneh iring batang ineh, idi ideh nenganak. Inan luk meburit, inan luk mitem, inan luk mebulan teh.

⁴⁰Idi Yakub nengatad amung-amung dumba ineh ratnan amék, idi ieh nenyum kiungdeh matun luk mepilang idi amung-amung luk mitem rat arang aya' Laban. Idi ieh nenganau' setau' amung-amung aya'neh sebuleng, pelé ideh na mepuar dengan amung-amung aya' Laban.

⁴¹Idi kareb aya'neh luk metueh ineh petebaneh, Yakub nengerareng batang-batang ineh pa kiung aya' ineh su luk inandeh ngirup, pad ideh petebaneh muneng ku batang ineh.

⁴²Iamo' na ieh nengerareng batang ineh kuan amung-amung luk melaya'. Ratnan luk kudeng ineh amung aya' luk melaya' ineh kuan Laban, idi luk metueh kuan Yakub.

⁴³Idi Yakub iuk mula' binaweh, pad inan tuda'-tuda' riudan amék, dumba, unta, idi keladai, dengan mula' demulun teh.

Pudut 31

¹Idi Yakub neninger bala anak-anak Laban, kebaladeh, "Yakub pangeh nengalap amung-amung binaweh taman tau. Idi ratnan binaweh taman tau ieh mangun ku lun do'."

²Idi teh Yakub nenier kiung Laban, idi na ieh do' kudeng luk atun.

³Idi kebala Tuhan ni Yakub, "Muli' iko amé' bawang tepunmu idi matun pupumu. Ui miak ngedengan namu."

⁴Idi Yakub neneteng ni Raket idi Lia papu' neneh bang laman su luk inanneh matar aya' ineh.

⁵Idi kebala Yakub nedidueh, "Pangeh ui nekali' kiung taman medueh, na ieh do' negku kudeng luk atun. Iamo' Allah tamanku idi denganku.

⁶Idi medueh kali' kélku nengakem kuan taman medueh.

⁷Iamo' ieh nenaluk negku idi nengisu' tabparku macing pulu' kua'. Iamo' na Allah nima' neneh nganau' luk dat kuanku.

⁸Kareb ieh pebala, 'Amung aya' luk meburit ineh miak mangun ku tabparamu,' idi amung-amung riudan aya' ineh pana' nenganak anak luk meburit. Idi

kareb ieh pebala, 'Amung-amung luk mepilang ineh mangun ku tabparamu,' idi amung-amung aya' ineh nenganak anak luk mepilang.

⁹Ratnan luk kudeng ineh Allah pangeh nengalap amung-amung riudan aya' taman medueh, idi nemaré nedeh negku.

¹⁰"Bang aceh kareb luk inandeh petebaneh, idi ui nenginupi idi nenier tuda'-tuda' amék deléi luk ngebaneh amék luk tineh. Inan luk mepilang, idi meburit, idi mebulan.

¹¹Idi Melaikat Tuhan Allah nepebala negku bang nupi ineh, "O Yakub!" Idi kebalaku, 'Anun idi, Tuhan?'

¹²Idi kebalaneh, 'Siruh, amung-amung amék luk deléi luk ngebaneh amék tineh, ieh ineh mepilang, meburit, idi mebulan. Ngaceku pangeh Ui nekali' amung-amung luk inau' Laban kuanmu.

¹³Idi Ui ini Allah luk nesilangan namu déi' Baitel, su luk inanmu nengutang umau saitun luun batu mangun ku aceh terawé, ieh ineh su luk inanmu pangeh nepejani' Negku. Idi nekini do' iko temina' remuat rat bang bawang ini, idi muli' amé' inan bawang pupumu.' "

¹⁴Idi kebal Rakel idi Lia ni Yakub, "Na luk idi babpat luk lapen kai ratnan taman kai teh.

¹⁵Kai ini bilaneh ku lun sakai. Ngaceku ieh pangeh nemasui nekai, idi amung-amung binaweh kai pana' pangeh nabudneh.

¹⁶Ngaceku amung-amung binaweh luk pangeh ilap Allah ratnan taman kai, ieh ineh luk kai kuan idi luk kuan anak-anak kai teh; idi nekini, do' iko nganau' anun-anun luk pangeh bila Allah namu ineh."

¹⁷⁻¹⁸Idi Yakub netemina' lemubed amé' nan tamanneh déi' bang bawang Kanaan. Idi ieh nenganau' amung-amung anakneh idi awanneh luun unta. Idi ieh nenguit amung-amung aya'neh, idi amung-amung binaweh luk ilapneh déi' Mesopotamia.

- ¹⁹Laban pangeh nenalan iné' muting buluh dumbaneh, idi Rakel nemano akang tamanneh.
- ²⁰Idi Yakub nenalan lulem dengan na nemaré kali' ni Laban.
- ²¹Idi Yakub nenguit amung-amung luk ieh kuan, idi neburo dengan mesaget. Ieh neguta Abpa' Pirat idi nenalan matun Pegkung Giliad.
- ²²Idi pangeh teluh aco lemulun nemada' ni Laban ratnan Yakub pangeh neburo.
- ²³Idi ieh nenguit amung anak itinneh nengerada' ni Yakub tudu' aco kiadoneh, pad ieh nepigket neneh déi Pegkung Giliad.
- ²⁴Iamo' Allah nesilagan ni Laban kareb medacem bang nupineh, kebalaNeh, "Matar do'-do', pad iko na ngesusa' ni Yakub."
- ²⁵Idi Yakub nelupo déi' luun pegkung ineh, idi Laban nelupo déi' luun Pegkung Giliad ineh.
- ²⁶Idi kebala Laban ni Yakub, "Ngudeh iko naluk negku, idi nenguit anak-anakku buro mepad kudeng lun luk tiban baweh?"
- ²⁷Ngudeh iko nenaluk negku, idi neburo dengan na sibada' negku. Kudeng iko nesibada' negku, miak ui nated namu dengan awang niat idi dengan menani, idi uni karing idi gita.
- ²⁸Idi teh iko na nemaré amung-amung mupunku idi anak decurku muen negku idi mala, 'Do' tudo.' Pelaba bacé luk inau'mu ineh.
- ²⁹Ui inan lalud ngedat namu; iamo' malem ina, Allah tamanmu pangeh nemebpeng negku na ngesusa' namu.
- ³⁰Ui kali' iko pangeh nenalan ngaceku pelaba geregan muli'. Iamo' ngudeh iko mano akanku?"
- ³¹Idi kebala Yakub, "Ui matot, ngaceku ui ngerawé kali' rungen iko ngalap anak-anakmu rat negku.

³²Idi rat nidé iko kali' akangmu ineh, na ieh miak mulun teh. Pa kiung amung-amung kinanak tau, do' nakap anun-anun luk iko kuan, idi ngalap ineh." Iamo' na Yakub kali' Rakel luk nemano akang ineh.

³³Laban nesemuet bang lepo Yakub, idi bang lepo Lia, idi bang lepo dueh demulun decur ineh, iamo' na luk nekali'neh. Pangeh ineh ieh iné' bang lepo Rakel.

³⁴Iamo' Rakel pangeh nengalap amung akang ineh inau'neh bang su luk inan tudo pa luun unta, idi ieh netudo luun ineh. Idi Laban nakap bang lepo ineh. Sebuleng pana' nateh nekali'neh.

³⁵Idi kebala Rakel nan tamanneh, "Aleg iko museh negku. Na ui miak tuped pa kiungmu, ngaceku ui macing bulan." Idi Laban nenakap akang ineh, iamo' na luk nekali'neh.

³⁶Idi Yakub megateh niat, kebalahen, "Anun sala'ku idi datku pad iko nengerada' negku?"

³⁷Iko nengeluka'-ngeluka' amung binawehku. Anun luk nekali'mu iko kuan? Ngerareng amung ineh su ini, pa kiung anak itunmu, idi anak itunku. Nima' nedeh mutut ukum arang kiteh.

³⁸Idi pangeh dueh ngepulu' lak ini ui nepamung namu, idi dumbamu, idi amé'kmu iuk amé' mula' idi luk deléi bang riudan dumbamu pana' na luk kinanku.

³⁹Dumba luk pinaté pung, ui nengelibal. Na ui nenguit butungdeh bida'ku namu. Idi luk pino bang kareb macang aco, idi kareb medacem ieh ineh pangeh linibalku.

⁴⁰Kareb macang aco ui mekaneh lau' ratnan idang, idi kareb medacem ui mekaneh teneb, pad ui na medacep mateh.

⁴¹Idi kudeng ineh teh ruked dueh ngepulu' lak ui netudo bang ruma'mu. Ui nengakem pulu' apat lak kuanmu pad ngalap anakmu luk dueh ini, idi anem lak ngaceku aya'mu. Idi macing pulu' kua' iko nengisu' tabparku.

⁴²Kudeng Allah tepunku, luk inan Ibrahim idi Isak nesembayang na ngedengan negku, kali' rungen nekini ui icukmu muli' dengan na uang. Iamo' Allah nekali' derehku idi erur ticu'ku, idi Ieh luk nemebpeng namu ina dacem."

⁴³Idi kebala Laban ni Yakub, "Dueh decur ini anakku, idi amung-amung anak didueh pana' mupunku, idi amung-amung riudan aya' ini ui kuan. Idi amung-amung luk pa kiungmu ui kuan. Iamo' anunké luk miak ruenku kuan anak-anakku idi mupunku?"

⁴⁴Nekini ui temina' penaji' namu. Do' kiteh nganau' aceh bubpun batu mangun ku terawé ratnan jani' kiteh."

⁴⁵Idi Yakub nengalap aceh batu idi nenaped neneh mangun ku aceh terawé.

⁴⁶Idi ieh nengecuk anak itinneh ngamung batu ku aceh bubpun. Idi ideh nekuman iring bubpun batu ineh.

⁴⁷Idi Laban nenganau' ngadan bubpun batu ineh Yagar Saduta. Iamo' Yakub nenganau' ngadanneh Galid.

⁴⁸Idi kebala Laban ni Yakub, "Bubpun batu ini mangun ku aceh terawé arang kiteh." Idi ngaceku ineh ngadan natad ineh Galid.

⁴⁹Idi teh kebala Laban, "Do' Tuhan matar arang kiteh, kareb kiteh mepatad seburur dengan seburur." Idi ngaceku ineh natad ineh titen Mispa teh.

⁵⁰Idi teh kebala Laban, "Kudeng iko ngedereh anakku idi iko ngaweh decur baken, sagan pana' ui na kali', ngerawé do'-do', Allah teh luk kali' arang kiteh.

⁵¹Siruh, bubpun batu luk ku terawé ini luk typedku arangku denganmu.

⁵²Idi bubpun ini idi batu luk ku terawé ini pana', mangun ku tanu', idi ui na miak ngelaba bubpun ini matun namu, idi iko pana' na miak ngelaba bubpun idi batu ini matun negku dengan niat luk dat.

⁵³Idi Allah Ibrahim idi Allah Nahor mangun ku luk mutut arang kiteh." Idi Yakub nepebulung ku ngadan Allah luk inan Isak tamanneh nesembayang.

⁵⁴Idi ieh negeret aceh pung barén kuan Tuhan déi' luun surud ineh, idi ieh nenawar amung-amung pupuneh kuman pamung. Idi pangeh ideh nekuman idi ideh nerudap déi' luun surud ineh.

⁵⁵Idi pekak uka-uka Laban netumui idi nemuen mupuneh idi anakneh idi nepetabi' nedeh, idi ieh nenalan nuli'.

Pudut 32

¹Idi Yakub petacu nalan idi nepapu' dengan melaikat-melaikat Allah.

²Kareb Yakub nenier nedeh, kebalaneh, "Ini baweh Allah!" Idi ieh nenganau' ngadan su ineh Mahanaim.

³Idi Yakub nengecuk tuda'-tuda' lun amé' atun matun kinanakneh Esau déi' bawang Edom.

⁴Idi ieh neperiteteng nedeh, kebalaneh, "Kudeng ini balamu ni Esau, tuanku: Idi kebala demulunmu Yakub, kudeng ini, 'Ui pangeh netudo dengan Laban macing nekini.

⁵Idi ui inan sapi', keladai, amék, dumba, idi demulun. Ini punneh ui ngecuk maré kali' kuan tuan, pelé iko méi' negku.' “

⁶Kareb lun luk icuk ineh nelemubed matun ni Yakub, idi kebaladeh, "Kai pangeh nepapu' ni Esau kinanakmu, idi ieh macing papu' namu, idi inan teh apat ngeratu lemulun maya' neneh.”

⁷Idi Yakub matot idi megegker. Idi amung-amung lemulun luk maya' neneh, idi amung-amung dumba, amék, sapi', idi untaneh pana', bibpatneh dueh babpat.

⁸Ngaceku keterawéneh, "Kudeng Esau macing inan sebuleng babpat idi ngelaya' nedeh, idi babpat luk baken ineh miak buro.”

⁹Idi Yakub nesembayang, "O Allah tepunku Ibrahim, luk Allah tamanku Isak, O Tuhan luk pangeh nepebala negku kudeng ini, 'Muli' iko amé' inan bawangmu idi matun pupumu, idi Ui nganau' do' kuanmu.’

¹⁰Idi ui ini na mayu ngalap sesuut pana' ratnan amung-amung éi' idi awa luk lutep luk pangeh ginala'Mu kuanku, ngaceku dengan aceh rukudku mo' ui neguta Abpa' Yarden; idi nekini ui mangun ku dueh babpat.

¹¹Ui mutuh Namu muit negku rat bang palad kinanakku Esau. Ui matot neneh, kudeng ieh macing ngaté negku idi ngaté decur idi anak-anakdeh.

¹²Naké Tuhan nepebala kudeng ini, 'Ui miak nganau' luk do' kuanmu, idi nganau' inulmu mangun kudeng bada tangeb abpa' rayeh luk na mekiap?' “

¹³⁻¹⁵Idi Yakub nerudap déi' malem ineh. Idi ieh nengalap sebuang aya'neh mangun ku baré kuan kinanakneh Esau: 200 amék tineh idi 20 deléi, 200 dumba tineh idi 20 deléi, 30 unta tineh luk inan anak, 40 sapi' tineh idi 10 deléi, 20 keladai tineh idi 10 deléi.

¹⁶Amung-amung pung ineh biréneh inan demulunneh, manid sengeriudan pitarindeh. Idi kebala Yakub nedeh, "Nalan muyuh atun, idi nganau' riudan pung ineh petala-petala.”

¹⁷Idi ieh nepebala nan luk pun-pun, "Kareb kinanakku Esau ineh papu' namu, kudeng ieh ngitun namu kudeng ini, 'Idéké kuan namu ini? idi 'Amé' iapeh iko?' idi 'Idéké kuan amung-amung luk pa atunmu ini?’

¹⁸iko miak pebala, 'Amung-amung ineh Yakub kuan, ieh ineh aceh baré kuan tuanku Esau, ieh pana' idi pa puet kai.' “

¹⁹Kudeng ineh teh balaneh kuan luk kedueh idi luk keteluh, idi kuan amung-amung luk nenguyut riudan pung ineh, kebalaneh, "Kudeng ineh luk miak belén muyuh kuan Esau kareb muyuh mepapu' neneh.

²⁰Idi muyuh miak pebala teh, 'Matu Yakub demulunmu ineh idi pa puet.' " Ngaceku keterawé Yakub, "Ui sikal ngagka' usehneh ku baré luk tinated atun rat negku. Kareb ui papu' neneh, merapet neneh do' negku.”

²¹Kudeng ineh tinated atun rat neneh; iamo' ieh sebuleng nelupo su ineh.

²²Bang daceh ineh Yakub netumui, idi ieh nengalap dueh awanneh, dueh apidneh, idi pulu' aceh anakneh, idi neguta Abpa' Yabuk.

²³Pangeh ieh nengecuk nedeh guta, idi ieh nengecuk nedeh nguit amung-amung luk ieh kuan teh.

²⁴Iamo' ieh sebuleng neketecan. Idi inan seburur Lemulun luk pekakem neneh kedangan-kedangan pad aco macang.

²⁵Kareb Lemulun ineh nekali' Yakub na miak melaya' ruenneh, idi Ieh nemukut pun tipan Yakub. Idi tipan Yakub pana' nepesiba'.

²⁶Idi kebalaNeh, "Do' ngelegkan Negku, ngaceku malé aco macang." Iamo' kebala Yakub, "Na ui sikal ngelegkan Namu kudeng Iko na ngeperuan negku."

²⁷Idi kebalaNeh neneh, "Idé ngadanmu?" "Yakub," kebalaneh.

²⁸Kebala Lemulun ineh, "Na iko miak tetanen Yakub peh, iamo' Israil, ngaceku iko pangeh mangun kudeng aceh raca' pa kiung Allah, idi pa kiung lemulun pana', idi iko pangeh metueh."

²⁹Idi kebala Yakub, "Do' Iko mada' ngadanMu." Iamo' keburu'Neh, "Anunké punmu ngitun ngadanKu?" Idi Ieh nengeperuan ni Yakub su ineh.

³⁰Idi kebala Yakub, "Ui pangeh nenier Allah kiung dengan kiung, idi ui mulun teh." Idi ieh neneten ngadan su ineh Peniel.

³¹Idi kareb ieh nenalan rat Peniel ineh, idi aco ineh pana' masat, idi Yakub pana' mekiu' ngaceku tipanneh.

³²Ngaceku ineh macing nekini lun Israil na miak kuman urat tipan, ngaceku Ieh nengakem urat tipan Yakub.

Pudut 33

¹Yakub nekali' Esau nacing dengan apat ngeratu anak itinneh. Idi ieh nemabpat anak-anakneh ineh kuan i Lia, Rakel, idi dueh apidneh.

²Idi ieh nenganau' dueh apid ineh dengan anak didueh pa atun, idi Lia dengan anakneh pa mucu.

³Idi Yakub sebuleng nenalan pa atundeh. Idi ieh netekunal luun tana' macing tudu' kua', pad macing muneng inan kinanakneh.

- ⁴Idi Esau nupun matun neneh, idi nengapel neneh, idi nemuen neneh, idi didueh perigéi' nangi.
- ⁵Idi Esau nenier amung-amung decur idi anak-anak ineh, idi kebalaneh, "Idé lemulun luk denganmu ineh?" Idi kebala Yakub, "Ini anak-anak luk pangeh biré Allah kuanku."
- ⁶Idi dueh apidneh ineh dengan anak-anak didueh nacing muneng neneh idi ideh netekunal.
- ⁷Idi Lia dengan anak-anakneh nacing, idi mucu Yusup dengan Rakel nacing, idi netekunal teh.
- ⁸Kebala Esau, "Anunké babpat ineh luk nacing negku ina? Anunké ilungneh?" Kebala Yakub, "Ieh ineh pelé iko miak méi' negku."
- ⁹Iamo' kebala Esau, "Ui inan petap, O kinanakku; ngalap luk iko kuan kuan bururmu sebuleng."
- ¹⁰Idi kebala Yakub, "Na miak kudeng ineh, ui mutuh namu, kudeng iko méi' negku, do' ngalap baréku ini; ngaceku ui pangeh nenier kiungmu mepad kudeng nier ayu Allah, idi iko mawang niat negku.
- ¹¹Do' ngalap baré luk barénku namu, ngaceku Allah pangeh méi' negku pad Ieh nemaré amung-amung luk pianku." Idi ieh nengubuk-ngubuk neneh pad ieh nengalap.
- ¹²Idi kebala Esau, "Do' tau nalan idi ui nalan pa atun muyuh."
- ¹³Iamo' kebala Yakub, "Iko kali' ratnan anak-anak ini melaya', idi teh ui inan amék idi sapi' luk niti' anak. Kudeng ideh uen ngusu bang seaco kinioneh, kali' rungen ideh maté.
- ¹⁴Do' iko nalan pa atun kai, idi ui miak nguyut nedeh ulai-ulai maya' lawé pung luk pa atunku idi maya' lawé anak-anak, pad ui macing namu dei' Edom."
- ¹⁵Idi kebala Esau, "Do' ui necan tuda'-tuda' anak itinku maya' namu." Iamo' kebala Yakub, "Aganeh mo'! Na mekudeh kudeng iko méi' negku."

¹⁶Idi bang aco sineh Esau nuli' maya' dalam amé' déi Edom.

¹⁷Iamo' Yakub iné' Sukot, idi ieh nemudut aceh ruma' kuan bururneh sebuleng idi libung kuan amung-amung pungneh, pad lemulun neneten su ineh Sukot.

¹⁸Idi Yakub nacing déi' bawang Sikem luk bang tana' Kanaan dengan do', maya' dalam rat déi' Mesopotamia, idi ieh nucu' muneng ku bawang.

¹⁹Idi ieh nemelih selaleng tana' inanneh nemudut ruma'neh, ratnan anak-anak Hemor luk taman Sikem, dengan meratu balad pirak.

²⁰Idi ieh nenganau' aceh bubpun déi', idi neneten ngadanneh, "El, ieh ineh Allah Israil."

Pudut 34

¹Idi Dina anak Lia didueh Yakub, neremuat sikal nier decur Kanaan.

²Idi Sikem anak Hemor lun Hiwi luk pengulu bawang ineh nenier neneh, idi ieh nengeruid neneh idi nepasét neneh.

³Idi ieh mawa ku anak decur ineh pad ieh nengubuk neneh.

⁴Idi kebala Sikem nan tamanneh, "Do' ngalap anak adi' ini ku awanku."

⁵Idi Yakub kali' ratnan anakneh Dina pangeh inigu'. Iamo' anak-anakneh luk deléi nematar aya'deh déi' laman, idi Yakub nepirud pad ideh nacing.

⁶Idi Hemor, taman Sikem ineh iné' matun Yakub sikal pegayam neneh.

⁷Idi anak-anak Yakub cacing rat déi' laman. Kareb ideh neninger ratnan ineh, ideh mét niat idi museh, ngaceku Sikem pangeh nenganau' luk dat arang pupu loun Israil, ieh ineh ieh nengeruid anak Yakub.

⁸Idi kebala Hemor nedeh, "Anakku Sikem mawa ku anak decurmu. Ui mutuh namu maré neneh lapenneh ku awanneh.

⁹Do' muyuh paweh dengan kai; idi maré anak decur muyuh kuan kai, idi ngalap anak decur kai kuan muyuh.

¹⁰Idi do' muyuh tudo dengan kai; idi tana' luk pian muyuh miak lapen muyuh. Do' muyuh tudo idi pepua', idi ngalap binaweh kuan burur muyuh sebuleng.”

¹¹Idi teh kebala Sikem kuan taman Dina idi kuan kinanak-kinanakneh, "Do' muyuh méi' kuanku, idi anun-anun luk pian muyuh miak ui maré.

¹²Do' mutuh rat negku tuda'-tuda' ula' purut idi baré pana', idi ui miak maré amung ineh kuan muyuh, mepad kudeng luk pituen muyuh rat negku; iamo' maré anak adi' ineh ku awanku.”

¹³Iamo' anak-anak deléi Yakub nengor bala Sikem idi Hemor tananneh dengan balih, ngaceku Dina kinanakdeh pangeh inigu'neh.

¹⁴Kebaladeh neneh, "Na kai miak nganau' luk kudeng ineh, ieh ineh maré kinanak kai kuan lemulun luk na sinunat, ngaceku ini mangun ku sala' kuan kai.

¹⁵Dengan luk kudeng ini mo' kai miak maya' pian muyuh, ieh ineh kudeng muyuh mepad kudeng kai, idi amung-amung deléi arang muyuh pana' ruen nunat.

¹⁶Pangeh ineh kai miak maré anak-anak kai kuan muyuh, idi anak-anak decur muyuh lapen kai, idi kai miak tudo dengan muyuh, idi tau mangun ku sebuleng pupu.

¹⁷Iamo' kudeng muyuh na ninger bala kai idi na ruen nunat, idi kai miak ngalap kinanak kai, idi buro.”

¹⁸Idi baladeh ineh petulu kuan Hemor idi anakneh Sikem.

¹⁹Idi anak adi' ineh saget nenganau' amung-amung luk biladeh ineh, ngaceku ieh pelaba pian ku anak Yakub ineh. Idi teh ieh luk meluun buren rat arang lun bang ruma'neh.

²⁰Idi Hemor dengan anakneh Sikem iné' munung tanga' bawangdeh, idi kebala didueh kuan amung-amung lun bang bawang ineh,

²¹Lun ini sikal perurum netau; ngaceku ineh do' nima' nedeh tudo arang tau idi nalan pad piandeh, ngaceku tana' ini petap rayeh kuandeh. Idi do' tau ngaweh anak decurdeh, idi teh tau miak maré anak decur tau lapendeh.

²²Iamo' lemulun ini pian tudo dengan tau pad mangun ku aceh pupu, kudeng amung deléi tau uen nunat mepad kudeng ideh.

²³Naké amung-amung sapi', amék, idi amung binawehdeh dengan amung-amung pungdeh kuan tau? Kudeng tau maya' piandeh, idi ideh miak tudo dengan tau.”

²⁴Idi amung-amung lun bang bawang ineh nengamo bala Hemor dengan anakneh Sikem. Idi amung-amung deléideh sinunat.

²⁵Pangeh teluh aco, kareb uned ideh ngeca ét sunat ineh, idi dueh anak Yakub ineh, ieh ineh Simion idi Liwi, kinanak Dina ineh, nengalap pelapet didueh, idi iné' libut bawang ineh dengan lulem idi nengaté amung-amung lun deléi.

²⁶Idi Hemor dengan Sikem pana' pinaté didueh, idi didueh nengalap Dina rat bang ruma' Sikem idi nenguit neneh buro.

²⁷Idi anak-anak Yakub luk baken iné' bang bawang ineh idi nemanu binawehdeh ngua' igu' kinanak didueh.

²⁸Idi amung-amung dimba, amék, sapi', idi amung-amung keladai, idi amung-amung luk idi bang bawang idi luk petatang ku bawang ilapdeh.

²⁹Idi amung-amung binawehdeh, anakdeh, idi awandeh pana' tibandeh, idi amung-amung luk bang ruma'deh ilapdeh.

³⁰Idi kebala Yakub ni Simion idi Liwi, "Medueh pangeh nengesusa' negku, idi nengedat ngadanku arang lun Kanaani idi lun Prisi, idi amung lun baken luk tudo bang bawang ini megateh negku. Tau ini sesuut mo'. Kudeng ideh pamung sikal metueh rat negku, idi na miak na ideh metueh rat negku, idi ngaté negku dengan amung uang tetek ruma'ku pana'.”

³¹Iamo' kebala didueh ineh, "Na tau miak nima' kinanak kai uen ngigu', ayu-ayuneh ieh decur luk ngedeléi.

Pudut 35

¹Kebala Allah ni Yakub, "Do' iko temina' amé' déi' Baitel idi tebawang déi'. Idi nganau' aceh bubpun kuan Allah luk pangeh siniermu kareb iko neburo ratnan kinanakmu Esau."

²Idi kebala Yakub kuan amung uang tetek ruma'neh idi kuan amung-amung lun luk denganneh, "Do' nala' amung-amung akang lun pupu baken luk arang muyuh, idi ngeligan burur muyuh idi ngelibal amung-amung ayung muyuh.

³Do' tau nalan amé' Baitel, ngaceku ui sikal nganau' aceh bubpun déi' kuan Allah luk pangeh nengedengan negku kareb ui bang susa'ku, idi luk idi denganku kareb ui nalan."

⁴Idi ideh namaré kuan Yakub amung-amung akang lun pupu baken luk pangeh ilapdeh ineh, idi amung-amung abédeh. Idi Yakub nenanem amung ineh pa liang lawa kayuh luk meraben luk muneng ku bawang Sikem ineh.

⁵Kareb Yakub idi anak-anakneh nenalan, idi Allah nengacing aceh tot kuan amung-amung bawang luk libutdeh ineh, pad ideh na miak ngerada' nedeh.

⁶Idi Yakub dengan amung-amung lun denganneh nacing déi' Lus luk titen Baitel, luk bang tana' Kanaan.

⁷Idi déi' ieh nemudut aceh bubpun, idi ieh neneten ngadanneh El-Baitel, ngaceku su ineh Allah nengegala' bururNeh kuan Yakub kareb Yakub neburo ratnan kinanakneh Esau.

⁸Idi Debora pana' naté, ieh ineh luk ngasa' ni Ribeka, idi ieh tinanem pa acep aco déi' Baitel, pa liang lawa kayuh luk meraben luk titen "Kayuh luk Meraben luk inan Nangi'."

⁹Idi Allah nesilangan ni Yakub teh, kareb ieh nacing rat déi' Mesopotamia, idi Ieh nengeperuan neneh.

- ¹⁰Kebala Allah neneh, "Ngadanmu ineh Yakub. Iamo' rat pad sini iko tetanen Israil." Idi Allah neneten neneh Israil.
- ¹¹Idi kebalaNeh neneh, "Ui ini Allah luk Meluun Lalud. Do' iko mula' anak. Idi pupu luk mula', idi raca'-raca' pana' miak mangun rat namu.
- ¹²Idi tana' ini luk pangeh biréKu ni Ibrahim idi Isak ineh miak barénKu namu, idi nan anak-anak inulmu teh."
- ¹³Idi Allah nekemikit necan neneh.
- ¹⁴Idi Yakub nenaped aceh batu mangun ku aceh terawé, su luk inan Tuhan nepebala neneh. Idi ieh nengutang baré luk rupen luunneh, dengan umau pana'.
- ¹⁵Idi Yakub neneten su ineh Baitel.
- ¹⁶Idi ideh nenalan rat déi' Baitel; idi kareb lélé macing déi' Eprata, idi Rakel pana' nenganak, idi tenganakneh mikat.
- ¹⁷Idi bang ieh mét nenganak ineh, kebala decur luk mileh ngimet lun nenganak ineh neneh, "Aleg iko matot ngaceku anak mini deléi."
- ¹⁸Idi kareb ieh ibo-ibo niat (ngaceku ieh maté), ieh neneten ngadanneh ineh Binoni, iamo' tamanneh neneten ngadanneh Beniamin.
- ¹⁹Kareb Rakel naté, idi ieh tinanem iring dalam amé' déi' Eprata (ieh ineh Baitlahim).
- ²⁰Idi Yakub nenaped aceh batu ku aceh terawé su ineh; ieh ineh etu tanem Rakel luk idi macing nekini.
- ²¹Idi Yakub nenalan rat déi', idi ieh nelupo bal pudut luk medita' déi' Eder.
- ²²Kareb Yakub tudo bang bawang ineh idi Rubin iné' pamung rudap dengan Bilha, apid tamanneh. Kareb Israil nekali' ratnan ineh, ieh megateh niat. Idi Yakub inan pulu' dueh anak deléi.
- ²³Idi amung anak deléi Lia: ieh ineh Rubin (anak Yakub luk atun), Simion, Liwi, Yahuda, Iskar, idi Sebulon.

- ²⁴Idi amung anak deléi Raket: ieh ineh Yusup idi Beniamin.
- ²⁵Idi anak deléi Bilha luk demulun Raket: ieh ineh Dan idi Naptali.
- ²⁶Idi anak deléi Silpa luk demulun Lia: ieh ineh Gad idi Aser. Idi amung anak deléi ini tinganak déi' Mesopotamia.
- ²⁷Idi Yakub nacing nan tamanneh Isak déi' Mamré, luk muneng ku Hebron, su luk inan Ibrahim idi Isak netebawang.
- ²⁸Idi ulun Isak meratu ualuh ngepulu' lak.
- ²⁹Idi Isak naté kareb ieh mengered. Idi ieh tinanem anak-anakneh, ieh ineh Esau idi Yakub.

Pudut 36

- ¹Idi ini inul Esau, luk titen Edom.
- ²Esau nengaweh decur-decur lun Kanaani, ieh ineh Ada, anak Elun lun Hiti, idi Aholibama anak Ana, luk anak Sibion lun Hiwi ineh,
- ³Idi Basemat anak Ismail, ieh ineh kinanak decur Nebayot.
- ⁴Idi Ada nenganak Elipas. Basemat nenganak Ruel.
- ⁵Idi Aholibama nenganak Yus, Yelam, idi Kora. Idi ini amung anak deléi Esau luk tinganak déi' tana' Kanaan.
- ⁶Idi Esau nenguit amung awanneh, anakneh luk deléi idi decur, dengan amung uang tetek ruma'neh, idi amung luk ilapneh déi' tana' Kanaan. Idi ieh iné' bang bawang luk mado ratnan Yakub, kinanakneh ineh.
- ⁷Ngaceku aya'deh ineh pelaba ula', pad ideh na miak pamung.
- ⁸Idi Esau netudo déi' luun pegkung-pegkung Edom.
- ⁹Idi ini inul Esau luk tepun lun Edom luk déi' luun pegkung-pegkung Edom.
- ¹⁰⁻¹³Elipas ineh anak deléi Ada, awan Esau. Elipas inan limeh anak deléi: ieh ineh Teman, Umar, Sepo, Getam, idi Kenas. Idi ratnan apidneh luk baken, ieh ineh Timna, Elipas inan aceh anak deléi teh, ieh ineh Amalek. Idi Basemat

awan Esau inan aceh anak deléi, ieh ineh Ruel. Ruel inan apat anak: ieh ineh Nahat, Sera, Sama, idi Misa.

¹⁴Awan Esau luk ngadan neh Oholibama, ieh ineh anak Ana idi mupun Sibion, ieh nenganak teluh anak delei: Yus, Yelam idi Kora.

¹⁵Ini luk nangun ku lun rayeh inul Esau: Elifas, anak rayeh Esau, ieh ineh tepun inul-inul pupu luk setecuneh: Teman, Umar, Sefo, Kenas, Kora, Getam, idi Amalek.

¹⁶Amung deh ini inul Ada, awan Esau.

¹⁷Ruel, anak Esau, ieh ineh tepun pupu-pupu luk setecuneh: Nahat, Sera, Sama, idi Misa. Amung deh ineh inul Basmat, awan Esau.

¹⁸Pupu-pupu luk setecuneh neh ieh ineh inul Esau ratnan awanneh luk ngadan neh Oholibama anak Ana: Yus, Yelam, idi Kora.

¹⁹Amung pupu ineh inul Esau.

²⁰⁻²¹Idi lun luk pun-pun tudo bang bawang Edom, bibpat tuda'-tuda' pupu luk kali' ngadan tepundeh macing ku inul Sir, lun Horiti: ieh ineh Lutan, Sobal, Sibion, Ana, Disun, Eser, idi Disan.

²²Idi Lutan ineh tepun inul Hori idi Heman (Lutan inan kinanak decur luk ngadan Timna.)

²³Sobal ineh tepun inul Aluan, Manahot, Ebal, Sepo, idi Onam.

²⁴Sibion inan dueh anak, ieh ineh Aya idi Ana. Idi Ana ineh luk nekali' tuda'-tuda' bued abpa' luk melau' déi' su luk ali-ali, kareb ieh nengasa' amung-amung keladai Sibion tamanneh ineh.

²⁵⁻²⁶Idi Ana ineh taman Disun luk tepun inul Hemdan, Esban, Itran, idi Keran. Idi Ana inan anak decur luk ngadan Aholibama.

²⁷Idi Eser ineh tepun inul Bilhan, Sawan, idi Akan.

²⁸Idi Disan ineh tepun inul Us idi Aran.

29-30 Idi ini inul Horiti bang bawang Edom: Lutan, Sobal, Sibion, Ana, Disun, Eser, idi Disan.

31-39 Idi ini raca'-raca' luk nengimet bawang Edom maya' kiuk inuldeh, kareb nateh inan raca' Israil: Bela Bior, rat Dinaba Yobab Sera, rat Besra Husam, rat babpat lun Teman Hadad Bidad, rat Awit (ieh nengelaya' nelun Midian kareb pebunu' déi' bawang Moab) Samala, rat Masreka Saul, rat Rehobat luk tangeb Abpa' Baal Hana, anak Akbor Hadar, rat Pau (awanneh ineh Metabel, anak Matred idi mupun Mesahab)

40-43 Idi Esau ineh tepun amung pengulu ini: Timna, Alua, Yetet, Aholibama, Ela, Pinon, Kenas, Teman, Mibsar, Magdil, idi Iram. Idi bawang su luk inandeh tudo titen ku ngadan anid-anid pengulu ineh.

Pudut 37

¹Idi Yakub netudo bang bawang Kanaan su luk nan tamanneh netudo.

²Ini bala ratnan inul Yakub. Kareb ulun Yusup pulu' tudu' lak, idi ieh matar aya'deh dengan kinanakneh, luk anak Bilha idi Silpa, apid tamanneh ineh. Idi Yusup nemada' tamanneh ratnan kekamen luk dat luk inau' kinanakneh.

³Idi Israil mawa ku Yusup meluun ratnan anakneh luk baken, ngaceku ieh anakneh bang kareb ieh pangeh mengered. Idi ieh nenganau' kuanneh aceh kuyu' luk kadang langen.

⁴Iamo' kareb kinanakneh nenier tamandeh mawa neneh meluun ratnan amung-amung kinanakneh, idi ideh megateh neneh pad ideh na sikal pebala neneh dengan do'.

⁵Idi Yusup nenginupi, idi kareb ieh nemada' ineh kuan kinanak-kinanakneh idi ideh pelaba gateh neneh.

⁶Kebalaneh nedeh, "Ninger muyuh ratnan nupiku.

⁷Idi kareb tau déi' lati' uned ngangel nunguh padé, idi angelku ineh netumui idi netuped, idi angel dimuyuh ineh pana' nacing muneng iringneh, idi netekunal iring angelku ineh.”

⁸Idi kebala kinanak-kinanakneh neneh, "Miakké iko mangun ku raca' kai? Miakké iko ngimet nekai?" Ngaceku ineh ideh meluun gateh neneh ngaceku balaneh ratnan nupineh ineh.

⁹Idi Yusup nenginupi teh idi ieh nemada' ineh kuan kinanak-kinanakneh, kebalaneh, "Ui inan nupi teh, idi aco idi bulan dengan pulu' aceh gituen netekunal pa kiungku."

¹⁰Idi nupi ini bilaneh nan tamanneh idi kinanak-kinanakneh. Idi tamanneh nemebpong neneh, kebalaneh, "Kudeng apehké nupi ineh? Miakké ui idi tinanmu dengan amung-amung kinanakmu macing idi tekunal pa kiungmu?"

¹¹Idi kinanak-kinanak Yusup mét niat neneh, iamo' tamanneh megéi' ngerawé bala ineh.

¹²Kareb kinanak-kinanak Yusup iné' matar aya' tamandeh déi' Sikem,

¹³Idi kebala Yakub ni Yusup, "Ui pian namu amé' su luk inan kinanakmu ngasa' aya' tau déi' Sikem." Idi kebala Yusup neneh, "Mo, miak ui amé'."

¹⁴Idi kebala Yakub neneh, "Do' iko amé' matun kinanak-kinanakmu, idi nier kudeng ideh do', dengan amung aya' ineh teh, idi iko miak nguit bala kuanku teh." Kudeng ineh Yakub nengecuk neneh nalan rat Ruan Hebron. Idi Yusup iné' dei' Sikem.

¹⁵Idi inan seburur lemulun luk nepapu' neneh déi' kareb ieh nalan-nalan déi' bang laman ineh. Idi kebalaneh neneh, "Anunké luk tekapenmu?"

¹⁶Idi kebala Yusup, "Ui nakap kinanak-kinanakku luk ngasa' aya'deh. Miakké iko mada' negku su apeh luk inandeh?"

¹⁷Idi kebala lemulun ineh, "Ideh pangeh nenalan rat ieni, ngaceku ui neninger baladeh kudeng ini, 'Do' tau amé' déi' Dotan.' " Idi Yusup iné' nakap kinanak-kinanakneh, idi ieh nepapu' nedeh déi' Dotan.

¹⁸Kareb ideh nenier neneh rat mado, kareb nateh ieh nacing nedeh, idi ideh neperurum sikal ngaté neneh.

¹⁹Kebaladeh seburur dengan seburur, "Ini lun luk nginupi di macing peh.

²⁰Idi nekini do' tau amé' ngaté neneh idi nala' neneh bang subuk ini. Idi tau miak pebala ieh pangeh kinan aceh pung luk mesangit. Idi pangeh ineh tau miak nier kudeng apeh nupineh ineh mangun.”

²¹Kareb Rubin neninger baladeh, idi ieh pian muit neneh, kebalaneh, "Aleg tau ngaté neneh.

²²Iamo' do' nala' neneh bang subuk luk bang laman ini, iamo' aleg ngurat neneh." Ieh nepebala kudeng ineh, ngaceku ieh sikal muit ni Yusup rat bang paladdeh, pad ieh miak nguit neneh lemubed matun tamanneh.

²³Idi kareb Yusup nacing inan kinanak-kinanakneh, idi ideh nengelengu kuyu'neh luk kadang langen.

²⁴Idi ideh nengakem neneh idi nala' neneh déi' bang subuk. Iamo' subuk ineh tekering.

²⁵Uneddeh kuman, denak-denak ideh nenier tuda'-tuda' lun Ismail luk nalan pekarur rat Giliad, maya' untadeh. Idi ideh nguit ilu' idi tuda'-tuda' luk do' buen amé' bawang Masir. Ideh nenalan rat Giliad amé' Masir.

²⁶Idi kebala Yahuda nan kinanak-kinanakneh, "Anunké ulek tau ngaté kinanak tau idi ngapung neneh?

²⁷Do' tau masui neneh nelun Ismail ini, pad tau na ngurat neneh, ngaceku ieh kinanak tau luk isuut, idi ieh sebuleng uang idi sebuleng dara' dengan tau." Idi ideh nemaya' balaneh.

²⁸Idi kareb uned lun pepua' luk rat déi' Midian ineh lemaba, idi ideh nenginat usup rat bang subuk ineh, idi nemasui neneh nelun Ismail ineh dengan raga dueh ngepulu' balad pirak. Idi ideh nenguit ni Yusup amé' déi' Masir.

²⁹Kareb Rubin nelemubed iné' ku subuk ineh, idi nenier Yusup na idi bang subuk ineh, idi ieh nengerarek ayungneh.

³⁰Idi ieh nelemubed matun kinanak-kinanakneh, kebalaneh, "Anak ineh na idi. Anunké luk ruenku?"

³¹Idi ideh nengaté sebuleng amék, idi ideh nengerereb kuyu' Yusup ineh bang dara'neh.

³²Idi ideh nenguit kuyu' ineh idi nemada' ineh siren tamandeh, kebaladeh, "Ini luk ilap kai. Do' nier kudeng ini kuyu' anakmu."

³³Idi ieh nengiti ineh, kebalaneh, "Ini kuyu' anakku. Kali' rungen ieh pinaté pung luk mesangit. Kali' rungen Yusup ineh inita' pung."

³⁴Idi Yakub nengerarak ayungneh, idi nenacung. Idi ieh netemido bang tuda'-tuda' aco ngaceku anakneh na idi.

³⁵Idi amung-amung anakneh luk deléi idi decur nacing ngubuk neneh. Iamo' na ieh sikal buken, kebalaneh, "Ngaceku anakku ini na idi, ui temido pad macing bang su inan até." Idi kudeng ineh tangi' tamanneh neneh.

³⁶Idi lun Midian nemasui usup déi' bawang Masir kuan Potipar, seburur lun tareh raca', ieh ineh lun rayeh luk nginita raca'.

Pudut 38

¹Kareb ineh teh Yahuda nenecan kinanak-kinanakneh idi iné' tudo dengan Hira, seburur lun Adulam.

²Idi su ineh, Yahuda nepapu' seburur anak decur lun Kanaani, ngadanneh Sua. Idi ieh nengaweh neneh,

³idi decur ineh mali' idi nenganak aceh anak deléi luk titenneh Er.

⁴Idi ieh mali' baruh teh, idi nenganak aceh anak deléi luk titenneh Onan.

⁵Idi ieh mali' baruh teh, idi nenganak aceh anak deléi luk titenneh Sela. Idi Yahuda tudo déi' Kesib kareb awanneh nenganak Sela ineh.

⁶Idi Yahuda nengalap aceh decur kuan Er, anakneh luk atun ineh, idi ngadan decur ineh Tamar.

⁷Iamo' Er ineh dat pa kiung Tuhan. Ngaceku ineh Tuhan nengaté neneh.

⁸Idi kebala Yahuda ni Onan, "Do' iko amé' pamung dengan awan kinanakmu, idi ngaweh neneh ku libal kinanakmu, pad kinanakmu inan inul."

⁹Iamo' Onan nekali' ratnan inul luk kudeng ineh baken kuan dieh; ngaceku ineh kareb ieh nepamung dengan awan kinanakneh, na ieh nepamung dengan awan kinanakneh, na ieh sikal nganau' inul neneh, ngaceku inul ineh maya' ngadan kinanakneh.

¹⁰Idi amung luk inau'neh ineh dat pa kiung Tuhan. Ngaceku ineh Tuhan negaté neneh teh.

¹¹Idi kebala Yahuda ni Tamar ibanneh ineh, "Do' iko tudo dengan na ngaweh bang ruma' tamanmu, pad macing anakku Sela ineh rayeh"—ngaceku Yahuda matot Sela pana' maté, kudeng dueh kinanakneh ineh. Idi Tamar nuli'.

¹²Muci ratnan ineh, idi anak Sua, luk awan Yahuda ineh, naté. Idi kareb Yahuda pangeh netemido neneh, idi ieh iné' matun nelun luk muting buluh dumbaneh déi' bawang Timna dengan Hira lun Adulam luk rurumneh ineh.

¹³Idi kebala lun ni Tamar, "Ibanmu amé' déi' Timna sikal muting buluh dumbaneh."

¹⁴Idi decur ineh nengelengu ayungneh luk tinula'. Idi ieh nengayung idi nengebpu kiungneh. Idi ieh netudo munung tanga' bawang Enaim, luk muneng ku dalan amé' déi' Timna. Ngaceku ieh nekali' Sela ineh pangeh rayeh, idi nateh ieh biré ku awanneh.

¹⁵Kareb Yahuda nenier neneh, idi ieh nengerawé neneh seburur decur luk mesawa', ngaceku ieh nengebpu kiungneh.

¹⁶Idi Yahuda neguta dalam su luk inan decur ineh, idi kebalaneh, "Do', anun luk pianmu?" Idi na ieh kali' decur ineh ibanneh. Idi kebala decur ineh, "Anunké luk barénmu negku?"

¹⁷Kebala Yahuda, "Ui miak maré aceh anak amék kuanmu." Idi kebala decur ineh, "Do' iko maré aceh taan pad macing iko maré neneh."

¹⁸Idi Yahuda nengitun neneh, "Anunké taan luk barénku namu?" Idi kebala decur ineh, "Do' maré susing etumu dengan abetneh idi rukud luk bang paladmu ineh." Idi ieh nemaré amung ineh neneh. Idi ieh nepamung neneh. Pangeh ineh Tamar mali'.

- ¹⁹Idi ieh nengelengu ebpu kiungneh, idi nengayung ku ayungneh luk tinula'.
- ²⁰Idi Yahuda nemaré anak amék ineh iten lun rurumneh, Hira. Idi ieh nengecuk neneh nguli' taanneh ineh ratnan decur ineh, iamo' na Hira nekali' neneh.
- ²¹Idi kebalaneh nelun bang bawang Enaim, "Iapehké decur luk mesawa' luk tudo dei' iring dalan ineh?" Idi kebaladeh, "Tungé' na luk idi decur luk mesawa'."
- ²²Idi ieh nelemubed iné' ni Yahuda, kebalaneh, "Na ui nepapu' neneh, idi teh kebala lun bang bawang ineh negku, 'Na luk idi decur luk mesawa' tungé'." "
- ²³Idi kebala Yahuda, "Nima' neneh ngimet binaweh ineh kuanneh, pad ideh na situnga netau. Ui nenutun maré amék ini kuanneh, iamo' na iko nepapu' neneh."
- ²⁴Pangeh teluh bulan, idi lun nemada' ni Yahuda, kebaladeh, "Tamar, ibanmu ineh pangeh pasét, idi nekini ieh kebatek." Idi kebala Yahuda, "Do' nguit neneh remuat idi ngeseb neneh."
- ²⁵Kareb ieh inuitdeh, idi decur ineh nengecuk seburur matun ibanneh, kebalaneh, "Ui kebatek ratnan lemulun luk kuan binaweh ini. Siruh, idéké luk kuan susing etu ineh dengan abetneh idi rukud ini?"
- ²⁶Idi Yahuda nengamo, kebalaneh, "Decur ini meluun siri rat negku, ngaceku na ui maré neneh ku awan anakku Sela." Idi na Yahuda pamung rudap neneh peh.
- ²⁷Kareb Tamar malé nenganak, megala' ieh anak rapid.
- ²⁸Idi kareb ieh nenganak, sebuleng anak nengulang ticu'neh, idi decur luk mileh ngimet lun nenganak nengakem ticu'neh, idi ieh nengabet aceh gitian luk mesia', kebalaneh, "Ini luk neremuat atun."
- ²⁹Iamo' anak ineh nenginat ticu'neh lemubed, idi kinanakneh nebpeh. Idi kebala decur luk mileh ngimut lun nenganak ineh, "Metueh tu iko pad iko neremuat!" Ngaceku ineh ideh neneten ngadanneh Paris.

³⁰Pangeh ineh kinanakneh neremuat luk inabet ku gitian mesia' luun ticu'neh. Idi ngadanneh titen Sera.

Pudut 39

¹Idi Yusup inuit lun Ismail iné' déi' Masir, idi nemasui neneh ni Potipar, seburur lun tareh raca', ieh ineh lun rayeh luk nginita raca'.

²Idi Tuhan nengedengan ni Yusup, pad ieh inan peruan bang luk amung-amung. Idi ieh tudo bang ruma' tuanneh luk lun Masir ineh.

³Idi tuanneh nekali' idi Tuhan ngedengan ni Yusup, pad ieh inan peruan bang luk amung-amung.

⁴Idi Potipar mawang niat neneh. Idi ieh nengiding neneh ngimet bang ruma'neh. Idi amung-amung binawehneh biréneh bang palad Yusup.

⁵Rat pad sineh Tuhan nengeperuan tetek ruma' lun Masir ineh ngaceku Yusup. Idi Tuhan nengeperuan amung-amung luk ieh kuan, do' luk bang ruma', idi do' luk déi' lati' pana'.

⁶Idi amung-amung luk ieh kuan biré Potipar bang palad Yusup, pad ieh na mesusa' ratnan anun-anun, iamo' ieh ngerawé akanneh sebuleng mo'. Idi Yusup ineh do' ayu idi metaga.

⁷Mio rat pangeh ineh idi awan tuanneh ineh nileng neneh, kebalaneh, "Do' iko pamung rudap denganku."

⁸Iamo' Yusup ara', kebalaneh, "Idi tuan na mesusa' ratnan anun-anun luk bang ruma'neh, iamo' amung-amung luk ieh kuan pangeh biréneh bang paladku.

⁹Idi bang ruma' ini seburur pana' na luk meluun rayeh rat negku. Idi tuan na sikal ngado binawehneh rat negku, iamo' ratnan iko sebuleng ngaceku iko awanneh. Kudeng apehké ui miak nganau' dat luk kudeng ini rayeh, pad ui nganau' sala' pa kiung Allah?"

¹⁰Sagan pana' decur ineh mutuh ni Yusup anid-anid aco, idi Yusup ara' pamung rudap denganneh.

¹¹Idi bang seaco Yusup nesemuet bang ruma' sikal nganau' kekammeneh, idi seburur pana' nateh bang ruma' kareb ineh.

¹²Idi decur ineh nengakem kuyu' Yusup, kebalanneh, "Do' iko pamung negku." Iamo' Yusup nengelengu kuyu'neh luk inimet decur ineh idi ieh nupun buro rat bang ruma'.

¹³Kareb decur ineh nekali' Yusup ineh nenecan kuyu'neh bang paladneh, idi ieh nupun buro rat bang ruma'.

¹⁴Idi ieh nenawar amung lun duken luk bang ruma'neh idi kebalanneh nedeh, "Siruh, awanku nengalap seburur lun Iberani tudo dengan tau. Idi ieh sikal ngigu' netau, ngaceku ieh iné' negku sikal pamung negku, iamo' ui nengitang.

¹⁵Idi kareb ieh neninger arodku, idi ieh nenecan kuyu'neh su inanku, idi neburu rat bang ruma'."

¹⁶Idi ieh nenganung kuyu' Yusup ineh pad tuanneh macing.

¹⁷Idi ieh nemada' neneh ratnan bala ineh, kebalanneh, "Demulun lun Iberani luk inuitmu iné' tudo netau, iné' negku sikal ngigu' negku.

¹⁸Iamo' kareb ui nengitang idi ieh nenecan kuyu'neh negku, idi nupun buro rat bang ruma'."

¹⁹Kareb tuan Yusup neninger bala ineh, idi ieh pelaba useh.

²⁰Idi ieh nengecuk ngakem ni Yusup, idi nenuet neneh bang tutup su luk inan raca' nutup lunneh luk mesala', idi Yusup tudo déi'.

²¹Iamo' Tuhan nengedengan ni Yusup, idi Ieh nengeperuan neneh, pad lun rayeh luk nginita tutup ineh mawang niat neneh.

²²Idi ieh nemaré amung-amung lun bang tutup ineh bang palad Yusup. Idi amung-amung kekamen bang tutup ineh bang imet Yusup teh.

²³Idi lun rayeh luk nginita tutup ineh, na mesusa' ratnan anun-anun luk bang imet Yusup, ngaceku Tuhan idi dengan Yusup, pad amung-amung kekammeneh inan peruan teh.

Pudut 40

- ¹Muci ratnan ineh lun luk maré luk rupen kuan raca' Masir idi lun rayeh lun luk nganau' ruti nemarké ét niat kuan raca'.
- ²Idi ieh pelaba useh nedidueh,
- ³Idi ieh nenuet nedidueh bang tutup su luk inan Yusup ineh, ieh ineh tutup luk bang ruma' lun rayeh luk nginita raca'.
- ⁴Idi didueh mio bang tutup ineh. Idi lun rayeh nengecuk ni Yusup ngasa' nedidueh. Idi ideh tudo bang tutup tuda'-tuda' io.
- ⁵Idi bang aceh malem didueh nenginupi, ieh ineh lun rayeh luk maré luk rupen idi lun rayeh luk nganau' ruti ineh. Idi nupi didueh na mepad ilung.
- ⁶Idi kareb Yusup nacing nedidueh pekak uka-uka ngikak nedidueh, idi ieh nekali' nedidueh mesusa'.
- ⁷Idi kebalaneh nedidueh, "Ngudehké ayu medueh mesusa' bang aco sini?"
- ⁸Kebala didueh neneh, "Kai dueh pangeh nenginupi, iamo' seburur pana' nateh luk miak kali' ilungneh." Idi kebala Yusup nedidueh, "Allah mo' luk miak ngegala' ineh. Do' mada' nupi medueh negku."
- ⁹Idi kebala lun rayeh lun luk maré luk rupen ineh, "Bang nupiku inan aceh lawa anggur luk pa kiungku.
- ¹⁰Idi anggur ineh inan teluh angkat. Kareb angkat ineh nginulih, idi busakdeh nelusad, idi bua'deh pangeh melak.
- ¹¹Idi sangkir raca' inan bang paladku. Idi ui nengalap bua' anggur ineh idi nemag ineh bang sangkir raca', idi nemarké ineh neneh."
- ¹²Idi kebala Yusup, "Ini ilungneh: teluh angkat ineh, ieh ineh teluh aco.
- ¹³Teluh aco teh raca' miak ngikit namu idi ngelubed namu amé' bang kekamenmu luk atun. Idi iko miak maré sangkir raca' ineh bang paladneh, mepad kudeng luk atun, kareb iko lun luk maré luk rupen ineh.
- ¹⁴Iamo' do' iko ngerawé negku kareb ini mangun kuanmu, do' iko méi' negku, idi maré bala rat negku kuan raca', idi nutun ngeruat negku rat bang tutup ini.

¹⁵Ngaceku ui ini tiban lemulun rat bang bawang lun Iberani. Idi tungé' pana' na ui nenganau' anun-anun luk inandeh nenutup negku bang tutup ini.”

¹⁶Idi kareb lun rayeh lun luk nganau' ruti ineh nekali' ilung nupi ineh do', idi ieh nepebala ni Yusup teh, "Ui pana' inan nupi. Ui nenguit teluh tayen luk panu' ku ruti luun uluhku.

¹⁷Idi bang tayen ineh inan puar-puar ruti luk kenen raca', idi suit nacing nekuman ineh.”

¹⁸Idi kebala Yusup neneh, "Ini ilung nupi ineh: teluh tayen, ieh ineh teluh aco.

¹⁹Teluh aco teh raca' miak ngaleb uluhmu, idi ngekito bururmu luun kayuh pad suit macing kuman uangmu.”

²⁰Pangeh teluh aco, ieh ineh aco luk inan raca' tinganak, ieh nenganau' irau kuan amung-amung lun tarehneh. Idi ieh nengeruat lun rayeh lun luk maré luk rupen idi lun rayeh lun luk nganau' ruti ineh rat bang tutup, idi nenguit nedidueh amé' pa kiung amung-amung lun tarehneh.

²¹Idi raca' nengelubed lun rayeh lun luk maré luk rupen ineh kuan kekamenneh luk atun.

²²Iamo' lun rayeh lun luk nganau' ruti ineh tikitoneh, maya' kudeng luk bila Yusup neneh.

²³Idi na lun rayeh lun luk maré luk rupen ineh ngerawé Yusup, iamo' ieh nekelupan neneh.

Pudut 41

¹Pangeh dueh lak, idi raca' Masir nenginupi. Bang nupineh ieh tuped tangeh Abpa' Nil.

²Idi rat bang Abpa' Nil ineh neremuat tudu' sapi' luk do' ayu idi melamu, nekuman uduh luk tangeb abpa'.

³Idi pangeh ineh, inan tudu' sapi' luk baken neremuat, ayudeh dat idi merugu'. Idi ideh netuped muneng ku sapi' luk atun ineh tangeb abpa'.

- ⁴Idi sapi' luk dat ayu idi merugu' ineh nekuman tudu' sapi' luk do' ayu idi luk melamu ineh. Pangeh ineh raca' nekulat.
- ⁵Idi ieh nerudap teh idi nenginupi aceh kedueh kua'. Idi nelagan tudu' runguh padé nan sebuleng lawa luk do' lio idi melak,
- ⁶Idi mucu tudu' runguh luk mekarang ku bui luk melau' rat pa busat aco.
- ⁷Idi tudu' runguh luk mekarang ineh nenelen runguh luk do' lio ineh. Idi raca' pana' nekulat teh. Ieh nekali' neneh nenginupi mo'!
- ⁸Kareb pekak uka-uka niat raca' ineh megagau. Idi ieh nengecuk nawar amung-amung lun luk mangun idi lun luk mileh bang bawang Masir. Idi ieh nemada' nedeh ratnan nupineh. Iamo' seburur pana' nateh luk kali' ilung nupi ineh.
- ⁹Idi lun rayeh lun luk maré luk rupen ineh iné' ni raca', kebalaneh, "Bang aco sini ui ngamo sala'ku.
- ¹⁰Iko pelaba useh negku, pad ui tinipa bang tutup lun rayeh lun luk nginita raca' dengan lun rayeh lun luk nganau' ruti.
- ¹¹Idi bang sedacem kai dueh nenginupi, idi nupi kai dueh na mepad ilung.
- ¹²Idi seburur anak adi' lun Iberani idi dengan kai dueh, ieh ineh demulun lun rayeh lun luk nginita raca'. Idi kai dueh nemada' nupi kai dueh neneh. Idi ieh nemada' ilungneh kuan kai dueh.
- ¹³Idi maya' kudeng luk bida'neh nekai dueh, kudeng ineh teh luk pangeh mangun. Ui ini linubedmu kuan kekamenku, idi lun denganku ineh pinatému."
- ¹⁴Idi raca' nengecuk nawar ni Yusup, idi ideh petacu nengeruat neneh rat bang tutup. Idi ieh nemingit idi nengelibal ayungneh, idi iné' matun raca'.
- ¹⁵Idi kebala raca' neneh, "Ui pangeh nenginupi, idi seburur pana' nateh luk miak mada' ilungneh negku. Idi ui pangeh neninger, iko mileh mada' ilung nupi."

- ¹⁶Idi kebala Yusup, "Na ui mileh, O raca'; iamo' Allah miak maré or luk do' namu."
- ¹⁷Idi kebala raca', "Bang nupiku, ui tuped tangeb Abpa' Nil.
- ¹⁸Idi inan tudu' sapi' luk do' ayu idi melamu numak rat bang abpa' idi nekuman uduh luk tangeb abpa' ineh.
- ¹⁹Idi pangeh ineh numak tudu' sapi' luk merugu' idi dat ayu idi luk mekebping, tuped tangeb abpa' ineh teh. Nateh ui nekali' sapi' luk kudeng ineh dat bang aput tana' Masir.
- ²⁰Idi sapi' luk merugu' nekuman tudu' sapi' luk melamu ineh.
- ²¹Iamo' ideh mepad kudeng na nekuman, ngaceku ideh merugu' idi dat ayu mepad kudeng rat pun-pun. Idi ui nekulat.
- ²²Idi ui nenginupi teh, idi ui nenier tudu' runguh padé nan sebuleng batang luk do' lio idi melak.
- ²³Idi pangeh ineh inan tudu' runguh luk mekarang ku bui luk melau' rat pa busat aco.
- ²⁴Idi tudu' runguh luk mekarang ineh nenelen tudu' runguh padé luk do' lio ineh. Idi amung-amung ini pangeh bida'ku nelun luk mileh mangun, iamo' seburur pana' nateh luk miak mada' ilungneh negku."
- ²⁵Idi kebala Yusup nan raca', "Dueh nupimu ineh mepad ilung. Allah pangeh nemaré kali' namu luk miak ruenNeh.
- ²⁶Tudu' sapi' luk do', ieh ineh tudu' lak, idi tudu' runguh padé luk do' lio ineh pana' tudu' lak. Nupi ineh mepad ilung.
- ²⁷Idi tudu' sapi' luk merugu' luk numak mucu ineh pana' tudu' lak teh. Idi tudu' runguh padé luk mekarang ku bui luk melau' rat pa busat aco, ieh ineh tudu' lak iru'.
- ²⁸Idi mepad kudeng luk bilaku namu, Allah pangeh nemada' namu ratnan luk miak ruenNeh.
- ²⁹Idi bang tudu' lak inan mela kuan aput-aput bawang Masir.

- ³⁰Iamo' pangeh ineh miak macing tudu' lak luk miru, pad mekelupan lak luk do' bang bawang Masir. Idi iru' ineh miak ngusag bawang.
- ³¹Idi akan luk mula' ineh na miak meterawé, ngaceku iru' luk macing ineh pelaba io.
- ³²Idi nupi ineh linio kuanmu macing dueh kua', ngaceku amung-amung ineh pangeh litep Allah, idi Allah teh miak ngacing ineh dengan mesaget.
- ³³"Idi nekini do' iko mili' seburur lemulun luk do' idi mileh, idi ngikit neneh pad ieh ngimet bawang Masir ini.
- ³⁴Idi do' iko ngikit tuda'-tuda' lun rayeh bang bawang ini, luk miak ngatur bawang Masir bang tudu' lak luk do' ineh.
- ³⁵Idi do' ideh ngamung amung-amung akan bang anid-anid lak luk do' luk macing ini, pelé ideh ngamung padé bang anid-anid bawang, idi pad ideh ngasa' ineh.
- ³⁶Idi amung uli' tana' ini miak mangun ku akan kuan bawang ini bang tudu' lak luk miru' ineh luk macing kuan tana' Masir, pad lun bang bawang ini na maté ngaceku iru' ineh."
- ³⁷Idi amung bala Yusup ineh imo raca' idi lun rayehneh teh.
- ³⁸Idi kebala raca' nedeh, "Tau na miak mili' seburur luk meluun do' ratnan Yusup luk inan Roh Allah bang neneh."
- ³⁹Idi kebala raca' ni Yusup, "Allah pangeh nengegala' amung ineh kuanmu. Ngaceku ineh kali' rungen na luk idi seburur pana' luk meluun do' idi meluun ileh ratnan iko.
- ⁴⁰Idi ui ngikit namu ku lun rayeh bang bawangku, pad amung anak itinku pa liang ukummu, iamo' imetku ini mo' luk tadukku rat namu.
- ⁴¹Idi ui miak ngikit namu mangun ku lun rayeh bang aput tana' Masir."
- ⁴²Idi raca' nengelengu susing ratnan ticu'neh idi nengebpul ineh luun bua' ticu' Yusup. Idi ieh nengayung neneh ku kibung pu luk do'. Idi ieh nengayung dierneh ku bané amas.

⁴³Idi ieh nemaré neneh maya' kerétaneh luk kedueh; idi ideh nengitang pa atunneh, "Ngerayeh neneh!" Kudeng ini raca' nengikit ni Yusup ngimet bang tana' Masir.

⁴⁴Idi kebala raca' neneh, "Ui ini raca', iamo' kudeng iko na pian, seburur pana' na miak nganau' anun-anun bang aput tana' Masir."

⁴⁵Idi ieh nenganau' ngadan Yusup ineh Sapenat Panieh; idi nemaré kuanneh Asenat anak Potipera, imam luk déi' bawang On ku awanneh. Idi Yusup nenalan aput-aput tana' Masir.

⁴⁶Idi ulun Yusup teluh ngepulu' lak kareb ieh nengimun ngakem kuan raca' Masir ineh. Idi ieh nenecan ruma' raca' idi nenalan aput-aput tana' Masir.

⁴⁷Idi bang tudu' lak luk do' tana' ineh nengeruat bua' dengan mela.

⁴⁸Idi Yusup nengamung amung-amung akan bang tudu' lak luk do' ineh, idi ieh nenganug ineh bang anid-anid bawang. Idi peranih anid-anid bawang ineh dinugneh.

⁴⁹Idi ieh nengamung padé mepad kinula' bada luk tangeb abpa' rayeh, pad ieh nugka' ngiap ineh.

⁵⁰Kareb nateh amung lak luk miru' ineh nacing, Yusup inan dueh anak deléi luk tinganak Asenat.

⁵¹Idi kebalaneh, "Allah pangeh nenganau' negku kelupan amung-amung dereh, idi uang telek ruma' tamanku." Idi ieh nenganau' ngadan anakneh luk atun ineh Manasé'.

⁵²Idi teh kebalaneh, "Allah pangeh nemaré anak kuanku bang bawang luk inanku medereh." Idi ieh nenganau' ngadan anakneh luk kedueh ineh Epraim.

⁵³Idi pangeh tudu' lak luk do' bang bawang Masir,

⁵⁴Idi tudu' lak iru' ineh nengimun, maya' kudeng luk bila Yusup. Idi inan iru' bang anid-anid bawang, iamo' aput Masir inan petap.

⁵⁵Kareb lun Masir melau, idi ideh nengitang mutuh akan nan raca'. Idi kebalaneh nelun bawang Masir ineh, "Do' muyuh amé' ni Yusup, idi nganau' anun-anun luk belénneh nemuyuh."

⁵⁶Kareb iru' ineh pangeh nacing apud bawang ineh, idi Yusup nengukab amung lepo padé, idi nemasui padé ineh kuan lun Masir, ngaceku iru' ineh pelaba rayeh bang bawang Masir.

⁵⁷Lemulun iné' déi Masir ratnan anid-anid bawang, pad melih akan rat ni Yusup ngaceku iru' ineh pelaba rayeh apud tana'.

Pudut 42

¹Kareb Yakub neninger ratnan bawang Masir inan akan, idi kebalaneh nan anak-anakneh, "Ngudeh muyuh tudo mo'-mo'?"

²Ui pangeh neninger bala' déi' Masir inan akan. Do' muyuh amé' mulé kuan tau pad tau na maté."

³Idi pulu' kinanak Yusup ineh iné' mulé déi' bawang Masir.

⁴Iamo' Beniamin, kinanak Yusup ineh, na icuk Yakub maya' nedeh, ngaceku ieh matot inan susa' macing neneh lek.

⁵Idi anak-anak Israil ineh nacing arang lun luk melih akan ineh, ngaceku iru' ineh pelaba rayeh déi' bawang Kanaan.

⁶Idi Yusup ineh lun rayeh bang tana' Masir. Idi ieh nemasui akan kuan lemulun rat apud tana'. Idi kinanak-kinanak Yusup ineh nacing idi netekunal pa kiung Yusup pad kiungdeh macing luun tana'.

⁷Idi Yusup nenier kinanak-kinanakneh idi miti nedeh, iamo' ieh siayu na miti nedeh, idi nepebala nedeh dengan metueh, kebalaneh, "Rat iapeh muyuh?" Idi kebaladeh, "Rat bawang Kanaan, idi kai sikal melih akan."

⁸Idi Yusup miti kinanak-kinanakneh, iamo' ideh na miti neneh.

⁹Idi Yusup nengerawé ratnan nupineh nedeh. Idi kebalaneh nedeh, "Muyuh ini lun luk amé' nier bawang, idi kudeng apeh laya' bawang ini."

- ¹⁰Idi kebaladeh neneh, "Na, iamo' kai ini demulunmu luk macing sikal melih akan.
- ¹¹Amung kai ini sebuleng taman mo', idi kai ini lun luk matu, baken kai ini lun luk amé' nier."
- ¹²Idi kebala Yusup nedeh, "Na, iamo' muyuh nacing nier laya' bawang."
- ¹³Idi kebaladeh, "Amung kai ini pulu' dueh dinganak luk sebuleng taman déi' bang bawang Kanaan. Iamo' luk isuut ineh idi dengan taman kai, idi sebuleng na idi."
- ¹⁴Iamo' kebala Yusup nedeh, "Matu balaku nemuyuh, muyuh ini lun luk amé' nier.
- ¹⁵Kudeng ini lawéneh muyuh miak uen nutun: ui pebulung ku ngadan raca', muyuh na miak muli' rat ieni, kudeng kinanak muyuh luk isuut na amé' tungé'.
- ¹⁶Do' ngecuk seburur rat arang muyuh amé' ngalap neneh amé' tungé', iamo' muyuh ini tudo bang tutup, pad bala muyuh miak uen nutun, kudeng bala muyuh matu; kudeng na, ui pebulung ku ngadan raca', muyuh ini lun luk amé' nier."
- ¹⁷Idi ieh nenipa nedeh bang tutup pad macing teluh aco kinioneh.
- ¹⁸Bang aco luk keteluh kebala Yusup nedeh, "Ui ini matot inan Allah, idi muyuh miak mulun kudeng muyuh nganau' kudeng ini:
- ¹⁹kudeng muyuh lun luk matu, do' seburur kinanak muyuh tudo bang tutup, idi muyuh luk baken muli' nguit akan, kuan tetek ruma' muyuh luk melau.
- ²⁰Idi nguit kinanak muyuh luk isuut amé' negku, pelé ui kali' bala muyuh matu, pad ui na ngaté nemuyuh." Idi ideh nengamo nganau' kudeng ineh.
- ²¹Idi kebaladeh seburur dengan seburur, "Idi matu tau ini mesala' ratnan kinanak tau. Kareb tau nenier neneh bang dereh, idi kareb ieh nemutih éi' rat netau, idi na tau neninger. Idi ini punneh dereh ini macing netau."

- ²²Idi kebala Rubin nedeh, "Ui nemebpong nemuyuh na ngesusa' anak ineh. Iamo' na muyuh neninger. Siruh nekini ua' dara'neh macing."
- ²³Idi Yusup kali' baladeh, iamo' na ideh kali', ngaceku Yusup nepegayam nedeh dengan seburur lun luk ngatum buri'.
- ²⁴Idi Yusup neburo rat nedeh idi nangi'. Kareb ieh miak pebala nedeh teh, idi ieh nelemubed, idi nengalap ni Simion rat arangdeh, idi ieh nengaling neneh pa kiungdeh.
- ²⁵Idi Yusup nengecuk muang amung-amung tebpung kinanakneh ku padé, idi ngelubed usindeh anid-anid bang tebpung ineh, idi maré balu'deh. Idi kudeng ineh teh luk inau' kuandeh.
- ²⁶Idi ideh nenganau' padé ineh luun keted keladaideh, idi ideh nenalan.
- ²⁷Idi seburur rat arangdeh nengukab tebpungneh, ngaceku sikal maman keladaineh nan nataad luk inan ucu'. Idi ieh nenier usinneh munung tebpungneh ineh.
- ²⁸Idi kebalaneh nan kinanak-kinanakneh, "Usinku ini linubed. Ini ieh munung tebpungku!" Idi ideh pelaba rapang peh, idi ideh megegker, ekbaladeh seburur dengan seburur, "Kudeng apehké luk inau' Allah ini kuan tau?"
- ²⁹Kareb ideh nacing ni Yakub tamandeh déi' tana' Kanaan, idi ideh nemada' ratnan amung-amung luk pangeh nangun ineh, kebaladeh,
- ³⁰"Lun rayeh bawang ineh pelaba tueh balaneh nekai, ieh nengerawé nekai lun luk iné' ier bawang.
- ³¹Iamo' kebala kai neneh, 'Kai ini lemulun luk matu, baken kai lun luk iné' nier.
- ³²Kai ini pulu' dueh dinganak, luk sebuleng taman; idi seburur rat arang kai luk na idi, idi luk isuut déi' dengan taman kai bang bawang Kanaan.'
- ³³Idi kebala lun rayeh ineh nekai, 'Kudeng ini lawéneh ui kali' nemuyuh lemulun luk matu: do' seburur rat arang muyuh ketecan negku, idi do' muyuh nguit akan kuan uang tetek ruma' muyuh luk melau, idi nalan.

³⁴Nguit kinanak muyuh luk isuut ineh amé' negku, pad ui kali' nemuyuh baken lun luk iné' nier, iamo' lemulun luk matu, idi mucu ui ngelubed kinanak muyuh ineh amé' nemuyuh, idi muyuh pana' miak pepua' bang bawang ini.' “

³⁵Kareb ideh nengeruat uang tebpungdeh, anid-anid bururdeh inan usin bang tebpungdeh. Idi kareb ideh nenier usin ineh idi ideh matot, dengan tamandeh.

³⁶Idi kebala Yakub nedeh, "Muyuh ngesusa' negku. Na mio teh mabud anakku. Ngaceku Yusup na idi, idi Simion pana' na idi teh. Nekini muyuh sikal ngalap Benjamin teh. Ui luk medereh ku ineh.”

³⁷Idi kebala Rubin nan tamanneh, "Miak iko ngaté dueh anakku luk deléi, kudeng ui na ngelubed anak ini kuanmu. Do' maré neneh kuanku mo' kali' rungen ui nguit neneh lemubed amé' namu.”

³⁸Iamo' kebala Yakub, "Anakku na miak maya' nemuyuh, ngaceku kinanakneh luk rayeh pangeh naté, idi ieh ketecan sebuleng denganku. Kian, ieh pitayen arang dalan lek. Kali' rungen ui maté kudeng muyuh ngedereh negku kudeng ineh. Ngaceku ui mengered.”

Pudut 43

¹Idi iru; ineh iuk pelaba dat bang bawang Kanaan.

²Kareb pangeh nabud amung-amung padé luk inuitdeh rat déi bawang Masir ineh, idi kebala Yakub nan anak-anakneh, "Amé muyuh teh, melih sesuut akan kuan tau.”

³Idi kebala Yahuda neneh, "Idi lun rayeh bawang ineh nepebala nekai dengan megateh, kebalaneh, 'Muyuh na miak nier kiungku teh, kudeng na muyuh nguit kinanak muyuh luk isuut ineh amé' negku.’

⁴Ngaceku ineh kudeng iko maré kinanak kai maya' nekai, idi teh kai sikal amé' idi melih akan kuan tau.

⁵Iamo' kudeng iko na maré neneh maya' nekai, kai pana' na miak amé'. Ngaceku kebala tuan ineh nekai, 'Muyuh na miak nier kiungku, kudeng na kinanak muyuh idi dengan muyuh.' “

⁶Idi kebala Yakub, "Ngudeh muyuh ngesusa' negku idi mada' lun rayeh ineh ratnan kinanak muyuh?"

⁷Idi kebaladeh, "Tuan ineh nengitun lio-lío ratnan lawé amung kai, idi ratnan uang tetek ruma' kai, kebalaneh, 'Mulunké taman muyuh teh? Inanké kinanak muyuh luk baken?' Idi kai nengor balaneh ineh. Kudeng apeh kai miak kali' lun rayeh ineh miak ngecuk nekai nguit kinanak kai maya' nekai?"

⁸Idi kebala Yahuda nan tamanneh, "Do' maré anak ini maya' negku, idi kai sikal nalan, pelé amung tau na maté.

⁹Ui pejani' maré ulunku ku libalneh. Iko miak merapet negku ngedengan neneh. Kudeng na ui nguit neneh lemubed amé' namu, kali' rungen ui luk kuan sala' macing raked-raked.

¹⁰Kudeng kai na nesabeng kali' rungen kai pangeh dueh lubed iné'.”

¹¹Idi kebala tamandeh nedeh, "Kudeng pieh kudeng ineh, do' muyuh nganau' kudeng ini: do' muyuh nguit uli' tana' luk meluun do' bang tebpung muyuh mangun ku aceh baré kuan lun rayeh ineh, ieh ineh sesuut ilu', sesuut duru' tebikan, amung-amung luk do' buen, bua' berangan, idi bua' badam.

¹²Idi nguit usin dueh kua' kinula' ratnan luk atun. Ngaceku usin luk pangeh linubedneh bang tebpung-tebpung muyuh ineh, do' muyuh nguit ineh lemubed. Kian ideh sala' baré lek.

¹³Idi nguit kinanak muyuh pana', idi lemubed.

¹⁴Idi do' Allah luk Melalud méi' nemuyuh pa kiung lun rayeh ineh, pad ieh maré kinanak muyuh luk baken ineh, idi Benjamin teh muli' maya' nemuyuh. Idi ratnan ui ini, kudeng anak-anakku metutu', aganeh mo'.”

¹⁵Idi ideh nengalap luk baréndeh ineh, dengan usin luk dueh kua' kinula'neh, idi Benjamin teh. Idi ideh nenalan iné' déi' Masir, idi papu' ni Yusup.

¹⁶Kareb Yusup nenier Benjamin maya' nedeh, idi kebalaneh kuan lun luk ngimet ruma'neh, "Nguit lemulun ini amé' déi' ruma', idi ngeret sebuleng pung idi nanek neneh. Ngaceku ideh kuman denganku kareb muned aco napeh."

¹⁷Idi lemulun ineh nenganau' luk bila Yusup, idi ieh nenguit nedeh semuet bang ruma'neh.

¹⁸Idi ideh matot ngaceku lemulun ineh nenguit nedeh amé' bang ruma' Yusup. Kebaladeh, "Tau ini iten amé' bang ruma' ini ngaceku usin luk pangeh linubed bang tebpung tau kareb lawé luk pun-pun. Ideh pian metueh rat netau, pad tau miak mangun ku demulundeh, idi ideh ngalap keladai tau deh."

¹⁹Idi ideh nepebala nan lemulun luk ngasa' ruma' Yusup, déi' munung tanga'.

²⁰Kebaladeh, "O tuan, kai nacing pun-pun sikal melih akan;

²¹idi kareb kai nacing natad luk inan ucu' idi kai nengukab tebpung kai, idi anid-anid inan usin dengan petap beratneh munung tebpung ineh. Iamo' usin ineh inuit kai lemubed,

²²idi teh inan usin baken inuit kai ku melih akan. Na kai kali' idé luk nenipa usin ineh bang tebpung kai."

²³Kebala lun luk ngasa' ineh nedeh, "Samal kuan muyuh, aleg matot; idi Allah muyuh idi Allah taman muyuh luk nenganau' usin bang tebpung muyuh ineh. Usin muyuh di pangeh ilapku." Idi ieh iné' nengeruat Simion kuandeh.

²⁴Idi lun luk ngasa' ineh nenguit nedeh iné' déi' ruma' Yusup. Idi ieh neparé abpa' ku maru' kukuddeh. Idi kareb ie pangeh nemaman keladaideh,

²⁵idi ideh nenganau' temina' luk baréndeh, idi nganét Yusup macing kareb muned aco. Ngaceku ideh pangeh neninger bala ratnan ideh kuman déi'

²⁶Idi kareb Yusup pangeh nuli' idi ideh nenguit luk baréndeh ineh kuanneh déi' bang ruma'neh, idi ideh netekeradung pa kiugnneh.

²⁷Idi Yusup nengitun ratnan ulundeh, kebalaneh, "Do'ké taman muyuh, lun rayeh luk bila muyuh ineh? Mulunké ieh teh?"

²⁸Kebaladeh, "Taman kai demulunmu ineh mulun idi metueh teh." Idi ideh netekeradung idi nengerayeh neneh.

²⁹Kareb Yusup nenier kinanakneh Benjamin luk sebuleng tinan denganneh, idi kebalaneh, "Iniké kinanak muyuh luk isuut luk pangéh bila muyuh negku? Do' Allah méi' namu, O Asi!"

³⁰Idi Yusup neburo denak-denak, ngaceku pelaba awang niatneh ku kinanakneh luk isuut ineh, pad ieh lélé nangi'. Idi ieh nesemuet bang takep idi nenangi' déi.

³¹Pangéh ineh ieh namaru' kiungneh idi neremuat; dengan ngagka' tangi'neh, kebalaneh, "Do' nguit luk kenen."

³²Idi ideh nenganau' kuan Yusup setau', idi kuan kinanak-kinanakneh setau', idi kuan lun Masir luk pad-pad kuman denganneh setau', ngaceku na lun Masir ineh miak pamung téng dengan lun Iberani, ngaceku ieh ineh aceh bebpeng kuan lun Masir.

³³Idi kinanak Yusup tudo petutup neneh, ieh ineh luk rayeh ineh maya' rayehneh idi luk isuut maya' suutneh teh; pad amungdeh mawa idi nier seburur dengan seburur.

³⁴Idi ideh nengiding babpat Yusup rat pa kiungneh amé' pa kiung kinanak-kinanakneh, iamo' babpat Benjamin ineh limeh kua' ula'neh ratnan babpatdeh luk baken. Idi ideh nengirup idi mawang niat pad-pad dengan Yusup.

Pudut 44

¹Idi kebala Yusup nelun luk ngasa' ruma'neh, "Do' muang amung-amung tebpungdeh ineh ku padé, pad petap luk itendeh, idi nipa usindeh munung tebpungdeh anid-anid.

²Idi nganau' sangkir pirakku munung tebpung kinanak luk isuut ineh, idi usin luk ku raga padéneh pana'." Idi ieh nenganau' luk bila Yusup ineh.

- ³Idi pekak uka-uka, ideh icuk nalan dengan keladaideh.
- ⁴Kareb ideh pangeh nenalan rat bang bawang ineh, na mado tu, idi kebala Yusup nelunluk ngasa' ruma'neh, "Nalan iko idi ngerada' nedeh ineh. Kareb iko mepigket nedeh, do' iko ngitun nedeh kudeng ini, 'Ngudeh muyuh ngua' luk do' ineh dengan luk dat?
- ⁵Bakenké ieh ineh sangkir tuanku, luk inanneh ngirup, idi dengan ineh ieh miak kali' anun-anun luk inalum? Muyuh pangeh nenganau' sala' luk pelaba dat.' “
- ⁶Kareb lun luk ngasa' nengigket nedeh, idi ieh nengacing amung-amung bala ineh.
- ⁷Idi kebaladeh neneh, "Anunké punneh iko mala luk kudeng ineh? Na kai nenganau' luk kudeng ineh!
- ⁸Idi usin luk pangeh nekali' kai munung tebpung kai ineh, pangeh inuit kai lemubed rat bawang Kanaan biré namu. Miakké kai mano amas idi pirak rat bang ruma' tuanmu?
- ⁹Idé-idé rat arang kai ini, kudeng sangkir ineh idi neneh, do' ieh pitayen, idi amung-amung kai luk baken mangun ku demulunmu.”
- ¹⁰Kebalaneh, "Do'. Nidé luk inan sangkir ineh nekali', ieh ineh mangun ku demulunku, iamo' muyuh luk baken na sala'.”
- ¹¹Idi ideh saget-saget nengerareng tebpungdeh luun tana', idi anid-aniddeh nengukab tebpungdeh.
- ¹²Idi lun luk ngasa' ruma' Yusup ineh nenier, ngimun ratnan luk rayeh pad macing nan luk isuut; idi ieh nekali' sangkir ineh bang tebpung Benjamin.
- ¹³Idi ideh nenarek ayungdeh sebuleng ku dat niatdeh, idi nenganau' tebpungdeh luun keladaideh, idi ideh nenalan lemubed iné' bang bawang.
- ¹⁴Idi Yahuda dengan kinanak-kinanakneh numak ruma' Yusup, ngaceku Yusup idi déi' teh. Idi ideh netekunal macing luun tana' pa kiungneh.

¹⁵Idi kebala Yusup nedeh, "Kudeng apehké luk inau' muyuh ineh? Naké muyuh kali' lemulun luk kudeng ui ini miak ngegala' anun-anun luk inalum ineh?"

¹⁶Idi kebala Yahuda, "Anunké luk miak belén kai namu? Kudeng apehké kai pesaad? Idi kudeng apehké kai miak mala burur kai matu? Allah pangeh nekali' sala'-sala' kai. Idi amung-amung kai mangun ku demulunmu, do' amung kai, idi do' ieh luk nengalap sangkir ineh pana'."

¹⁷Idi kebala Yusup, "Na ui miak nganau' kudeng ineh! Iamo' lemulun luk nengalap sangkir ineh mo' mangun ku demulunku. Iamo' muyuh luk baken, nalan dengan do' amé' inan taman muyuh."

¹⁸Idi Yahuda nacing muneng inan Yusu, kebalaneh, "O tuan, nima' negku pebala namu sebuleng, idi aleg iko museh negku; ngaceku iko mepad teh dengan raca'.

¹⁹Idi iko pangeh nengitun nekai, 'Inanké kinanak idi taman muyuh teh?'

²⁰Idi kebala kai namu, 'Inan teh taman kai luk pangeh mengered, idi sebuleng anak deléi luk isuut, luk pangeh ininulneh kareb ieh mengered teh. Idi kinanakneh luk rayeh pangeh naté, idi ieh sebuleng mo' luk ketecan ratnan sebuleng tinan. Idi tamanneh mawa neneh.'

²¹Idi kebalamu kuan kai ini, 'Do' nguit neneh amé' negku, pad ui miak nier neneh.'

²²Idi kebala kai namu, 'Kian, anak ineh na miak necan tamanneh lek. Kudeng ieh necan neneh, kali' rungen tamanneh maté.'

²³Iamo' kebalamu nekai, 'Kudeng kinanak muyuh luk isuut ineh na inuit amé' negku, na muyuh miak amé' negku teh.'

²⁴Kareb kai nelemubed matun taman kai, idi kai nengacing amung-amung balamu neneh.

²⁵Idi kebala taman kai, 'Do' muyuh amé' teh melih sesuut luk kenen kuan tau.'

²⁶Kebala kai, 'Na kai miak amé' baruh. Kudeng kinanak kai luk isuut maya' nekai, kai miak amé'. Ngaceku na kai miak papu' lun rayeh ineh kudeng kinanak kai luk isuut na maya' nekai.'

²⁷Idi kebala taman kai, 'Muyuh kali' awanku Rakel pangeh nenganak dueh anak deléi kuanku.

²⁸Sebuleng pangeh nenecan negku, idi kali' rungen ieh pangeh dirak pung; ngaceku na ui kali' neneh pad macing nekini.

²⁹Kudeng muyuh nguit anak ini rat negku, kian ieh pitayen lek, idi kali' rungen ui maté kudeng muyuh ngedereh negku kudeng ineh. Ngaceku ui mengered.'

³⁰⁻³¹"Ngaceku ineh, kudeng ui macing inan tamanku, idi kinanakku luk isuut na idi denganku, kali' rungen tamanku maté, ngaceku ieh pelaba awa neneh. Idi kali' rungen ieh maté kudeng kai ngedereh neneh kudeng ineh. Ngaceku ieh mengered.

³²Meluun teh ui pangeh nengamo ratnan anak ini pa kiung tamanku, idi kebalaku, 'Kudeng ui na nguit anakmu lemubed amé' namu, kali' rungen ui mabeh sala' raked-raked ulunku.'

³³Idi nekini do' ui ketecan mangun ku demulunmu ku libal anak ineh; idi nima' anak ini nalan pad-pad dengan kinanak-kinanakneh.

³⁴Ngaceku kudeng apeh ui miak papu' tamanku kudeng anak ini na idi denganku? Na ui sikal nier dereh luk miak mangun pa luun tamanku."

Pudut 45

¹Idi Yusup na miak tuman pa kiung amung-amung lun dukenneh; idi ieh nengecuk nedeh buro. Idi na seburur pana' ketecan danganneh kareb Yusup nengegala' bururneh kuan amung kinanakneh.

²Idi ieh nenangi' dengan rayeh tang, pad lun Masir neninger tangi'neh, idi nemada' nelun luk bang ruma' raca'.

- ³Idi kebala Yusup nan kinanak-kinanakneh, "Ui ini Yusup. Mulun tamanku teh?" Iamo' kinanakneh pelaba tot neneh, pad ideh na miak ngor balaneh.
- ⁴Idi kebala Yusup nedeh, "Amé' muyuh muneng negku." Idi ideh iné' neneh. Idi kebalaneh, "Ui ini Yusup, kinanak muyuh luk pangeh pinasui muyuh kuan lun luk amé' Masir.
- ⁵Iamo' nekini aleg muyuh mesusa' idi museh ku burur muyuh. Ngaceku Allah nengecuk negku atun rat nemuyuh, pelé ui ngasa' ulun muyuh.
- ⁶Ngaceku nekini pangeh dueh lak iru' bang bawang ini. Ketecan teh limeh lak, idi kareb ineh na lemulun nibu idi ngeranéh.
- ⁷Allah nengecuk negku amé' pa atun muyuh pelé ui ngasa' nemuyuh, idi pad inul muyuh miak mulun.
- ⁸Ngaceku ineh, baken muyuh luk nengecuk negku amé' tungé', iamo' Allah. Idi Ieh nengikit negku mangun ku taman raca', idi lun rayeh aput bawangneh. Idi ui luk ngimet amung-amung bawang Masir.
- ⁹"Do' muyuh mesaget amé' ni Ama', idi mada' neneh, kebala muyuh, 'Kudeng ini bala anakmu Yusup: "Allah pangeh nenganau' negku mangun ku lun luk ngimet amung bawang Masir; do iko amé' tungé' dengan mesaget.
- ¹⁰Iko miak tudo bang tana' Gosen muneng negku, dengan amung-amung anakmu, mupunmu, amék, idi sapi', idi amung-amung luk iko kuan.
- ¹¹Idi kudeng iko idi déi' Gosen, ui miak ngasa' namu, ngaceku limeh lak teh iru' ini ketecan, ngaceku na ui pian namu idi uang tetek ruma'mu, idi aya'mu pana' melau." ' ' “
- ¹²Idi teh kebala Yusup, "Muyuh sebuleng miak nier, idi kinanakku Benjamin pana' miak nier, kali' rungen ui ini Yusup.
- ¹³Mada' tamanku ratnan amung-amung uburku luk bang bawang Masir, idi amung-amung luk pangeh sinier muyuh ini. Idi do' muyuh miket muli' idi nguit tamanku amé' tungé'.”

- ¹⁴Idi Yusup nengapel ni Benjamin kinanakneh dengan nangi', idi Benjamin pana' nenangi' idi nengapel ni Yusup.
- ¹⁵Idi Yusup nemuen amung-amung kinanakneh dengan nangi'. Pangeh ineh amung-amung kinanakneh nepebala neneh.
- ¹⁶Kareb bala ratnan acing kinanak-kinanak Yusup nekali' bang ruma' raca', idi raca' dengan amung lun rayehneh mawang niat.
- ¹⁷Idi kebalaneh ni Yusup, "Do' ngecuk kinanakmu nganau' babeh luun keladaideh idi muli' amé' déi' bawang Kanaan.
- ¹⁸Idi do' ideh nguit tamandeh idi amung uang tetek ruma'deh amé' tungé'. Ui miak maré kuandeh tana' luk meluun do' bang bawang Masir, pad ideh miak kuman petap.
- ¹⁹Idi ngecuk nedeh ngalap keréta rat bang bawang Masir kuan anakdeh idi awandeh. Idi do' ideh nguit tamandeh amé' tungé'.
- ²⁰Idi aleg ideh mesusa' necan binawehdeh, ngaceku luk pelaba do' bang bawang Masir miak kuandeh.”
- ²¹Idi anak-anak Israil nenganau' kudeng ineh. Idi Yusup nemaré tuda'-tuda' keréta kuandeh maya' kudeng bala raca'. Idi ieh nemaré balu'deh maya' dalan.
- ²²Idi ieh nemaré ayung kuandeh anid-anid burur. Iamo' kuan Benjamin ieh nemaré teluh ngeratu balad usin pirak idi limeh kuyu' teh.
- ²³Idi ieh nengirim kuan tamanneh pulu' keladai luk inan nengerareng binaweh luk meraga rat déi' Masir, idi pulu' keladai luk inan nengerareng padé idi ruti, idi uar-uar akan kuan tamanneh bang dalandeh.
- ²⁴Idi ieh nengecuk kinanak-kinanakneh muli', idi ideh pana' nuli'. Idi kebala Yusup nedeh, "Aleg muyuh pekedaluh arang dalan.”
- ²⁵Idi ideh nenalan rat tana' Masir idi nacing déi' tana' Kanaan inan tamandeh Yakub.

²⁶Idi kebaladeh neneh, "Yusup mulun teh, idi ieh luk mangun ku nguyut bang amung-amung bawang Masir." Idi Yakub megegker niat, ngaceku na ieh manu ku baladeh ineh.

²⁷Iamo' kareb ideh nemada' ni Yakub amung-amung bala Yusup luk bilaneh nedeh, idi kareb Yakub nenier amung keréta luk biré Yusup luk ku nguit neneh amé' bawang Masir, idi ieh pelaba awang niat.

²⁸Idi kebalaneh, "Pangeh petap; anakku Yusup mulun teh! Ui pian amé' papu' neneh kareb nateh ui maté."

Pudut 46

¹Idi Yakub nenipa amung-amung binawehneh, idi ieh iné' Birsiba, idi su ineh ieh nemaré tuda'-tuda' baré kuan Allah tamanneh, Isak.

²Idi Allah nepebala neneh bang aceh luk sinierneh kareb malem, kebalaneh, "O Yakub, Yakub!" Idi kebala Yakub, "Anun idi, Tuhan?"

³Idi kebalaNeh, "Ui ini Allah tamanmu. Aleg iko matot amé' déi' Masir; ngaceku Ui sikal ngelelep namu mangun ku aceh pupu luk rayeh bang bawang ineh.

⁴Ui sebuleng maya' namu amé' Masir; idi Ui sebuleng nguit inulmu muli' teh. Idi Yusup pana' miak nier namu karebmu maté."

⁵Idi Yakub nenalan rat Birsiba. Anak-anakneh nenuet neneh, dengan anak-anakdeh luk isuut, idi awandeh, bang tuda'-tuda' keréta luk biré raca'.

⁶Idi ideh nenguit amung-amung aya' idi binawehdeh luk ilapdeh déi' bawang Kanaan. Idi ideh iné' Masir. Yakub nenguit amung inulneh maya' neneh,

⁷ieh ineh anak-anakneh idi mupunneh luk deléi, idi anak-anak idi mupunneh luk decur.

⁸Ini ngadan inul Yakub luk nemaya' neneh iné' Masir: anak Yakub luk atun, ieh ineh Rubin,

⁹idi anak Rubin luk deléi, ieh ineh Hanok, Palu, Hesron, idi Karmi.

- ¹⁰Idi anak Simion luk deléi, ieh ineh Yemuil, Yamin, Ohad, Yakin, Sohar, idi Saul luk anak ratnan seburur decur lun Kanaani.
- ¹¹Idi anak Liwi luk deléi, ieh ineh Gerson, Kohat, idi Merari.
- ¹²Idi anak Yahuda luk deléi, ieh ineh Er, Onan, Sela, Paris, idi Sera (iamo' Er idi Onan ineh pangeh naté bang bawang Kanaan). Idi anak-anak deléi Paris, ieh ineh Hesron idi Hamul.
- ¹³Idi anak Iskar luk deléi, ieh ineh Tola, Pua, Yob, idi Simron.
- ¹⁴Idi anak Sebulon luk deléi, ieh ineh Sered, Elon, idi Yalil.
- ¹⁵Idi amung ini anak deléi Lia, luk tinganakneh kuan Yakub déi' Mesopotamia, idi teh Dina anakneh luk decur ineh. Idi amung inul Yakub rat ni Lia teluh ngepulu' teluh burur.
- ¹⁶Idi anak Gad luk deléi, ieh ineh Sipion, Hagi, Suni, Isbon, Eri, Arodi, idi Areli.
- ¹⁷Idi anak Aser luk deléi, ieh ineh Imna, Isua, Isui, Beria, idi Sera, kinanakdeh luk decur. Idi anak Beria luk deléi, ieh ineh Iber idi Malkiel.
- ¹⁸Amungdeh luk pulu' anem burur ni inul Yakub rat ni Silpa, luk biré Laban kuan anakneh Lia.
- ¹⁹Idi anak Rakel awan Yakub luk deléi, ieh ineh Yusup idi Benjamin.
- ²⁰Idi Yusup pana' inan anak déi' Masir, ieh ineh Manasé idi Epraim, luk tinganak Asenat, ana Potipera, luk imam déi' On.
- ²¹Idi anak Benjamin luk deléi, ieh ineh Bela, Beker, Asibel, Gera, Naman, Iki, Rus, Mupim, Hupim, idi Ared.
- ²²Idi amungdeh luk pulu' apat burur ini inul Yakub rat ni Rakel.
- ²³Idi anak Dan luk deléi, ieh ineh Husim.
- ²⁴Idi anak Naptali luk deléi, ieh ineh Yasil, Guni, Yeser, idi Silem.
- ²⁵Idi amungdeh luk tudu' burur ini inul Yakub rat ni Bilha, luk biré Laban kuan Rakel.

²⁶Idi kinula' inul Yakub luk iné' Masir, ieh ineh anem ngepulu' anem burur, baken ratnan amung awan anak Yakub ineh.

²⁷Idi anak Yusup luk deléi, luk pangeh tinganak kuanneh déi' Masir ineh, dueh burur; idi kinula' amung uang tetek ruma' Yakub luk iné' Masir ineh tudu' ngepulu' burur.

²⁸Idi Yakub nengecuk ni Yahuda ame atun kidi ni Yusup, pad ieh papu' neneh déi' Gosen. Kareb ideh nacing déi' Gosen ineh,

²⁹Idi Yusup numak bang kerétaneh idi iné' déi' Gosen, pian papu' tamanneh. Kareb ieh nepapu' neneh, idi Yusup nengapel tamanneh, idi ieh nenangi'.

³⁰Idi kebala Yakub ni Yusup, "Miak ui maté nekini, ngaceku ui pangeh nenier kiungmu idi kali' namu mulun teh."

³¹Idi kebala Yusup kuan amung kinanakneh idi kuan amung uang ruma' tamanneh, "Do' ui amé' matun raca', idi mada' neneh ratnan acing kinanakku idi amung uang tetek ruma' tamanku, luk netudo bang bawang Kanaan.

³²Idi ui mada' neneh ratnan kekamen muyuh, ieh ineh ngasa' aya', idi ratnan luk inuit muyuh, ieh ineh amék, dumba, idi sapi, idi teh amung-amung luk muyuh kuan.

³³Idi kareb raca' nawar nemuyuh, idi ngitun kekamen muyuh,

³⁴Idi do' muyuh mala kudeng ini, 'Idi amung kai ini pekalai ngasa' amék, dumba, idi sapi', rat kareb kai isuut pad macing nekini, do' kai idi do' tepun kai,' pad muyuh miak tudo bang tana' Gosen. Ngaceku lun luk matar aya' ineh mangun ku ali' kuan lun Masir."

Pudut 47

¹Idi Yusup nenated limeh kinanakneh amé' papu' raca', kebalaneh, "Tamanku idi amung kinanakku dengan aya'deh idi amung-amung luk ideh kuan pangeh nacing rat déi' bawang Kanaan. Idi nekini ideh déi' bawang Gosen."

²Idi ieh nenguit kinanakneh amé' papu' raca'.

- ³Idi kebala raca' nedeh, "Anunké kekamen muyuh?" Kebaladeh, "Kai lun matar aya', do' kai idi tepun kai pana'.
- ⁴Kai macing bang bawagn ini ngaceku iru' bang bawang Kanaan pelaba io, idi na uduh kenen aya' kai. Nekini kai mutuh namu nima' nekai tudo déi' bawang Gosen.
- ⁵Idi kebala raca' ni Yusup, "Amung kinanakmu idi tamanmu pangeh nacing.
- ⁶Idi tana' Masir ini bang palad muyuh. Do' ideh tudo luun tana' luk meluun do' déi' bawang Gosen. Idi kudeng inan luk mileh arangdeh, do' ngecuk nedeh ngasa' aya'ku."
- ⁷Idi Yusup nenguit tamanneh Yakub matun raca'. Idi Yakub nengeperuan ni raca'.
- ⁸Idi kebala raca' neneh, "Tuda' lak ulunmu?"
- ⁹Idi kebala Yakub ni raca', "Idi ulunku meratu teluh ngepulu' lak; iamo' na mekadang ulunku lek ngaceku mula' dereh. Na ieh mepad kudeng ulun tepunku."
- ¹⁰Idi Yakub nengeperuan ni raca' sekua' teh, idi ieh nenalan.
- ¹¹Idi Yusup nengeletep tamanneh idi kinanak-kinanakneh déi' bawang Masir idi nemaré nedeh tana' luk meluun do' luk muneng ku Ramsis, maya' kudeng luk bila raca'.
- ¹²Idi Yusup nemaré akan kuan tamanneh idi kinanak-kinanakneh, idi amung-amung uang tetek ruma'neh dengan amung anak luk isuut pana'.
- ¹³Idi iru' ineh pelaba io, pad na akan aput bawang, pad amung lun Masir idi lun Kanaani pana' melaya' ngaceku melau.
- ¹⁴Idi ideh nemelih akan, idi Yusup nengamung amung-amung usin luk nekumelih lun padé ineh. Idi ieh nenguit usin ineh macing bang ruma' raca'.
- ¹⁵Kareb amung-amung usin bang bawang Masir idi bawang Kanaan pangeh mabud, idi lun Masir iné' ni Yusup kebaladeh, "Do' maré akan kuan kai, pad

kai ini na maté. Do' iko ngedengan nekai, ngaceku amung usin kai pangeh mabud.”

¹⁶Idi kebala Yusup, "Do' nguit aya' muyuh, pad ui maré akan kuan muyuh ku libal ineh, kudeng usin muyuh mabud.”

¹⁷Idi ideh nenguit aya'deh iné ni Yusup. Idi ieh nemaré akan kuandeh ku libal kuda, amék, dumba, sapi', idi keladaideh ineh. Idi ieh nemaré akan kuandeh bang lak ineh, ngaceku ratnan aya'deh.

¹⁸Kareb mabud lak ineh, ideh iné' neneh, kebaladeh, "Na kai miak naluk namu ratnan kai na usin, idi amung aya' kai kuanmu. Idi na luk ketecan luk barén namu, iamo' burur kai sebuleng idi tana' kai.

¹⁹Aleg nima' nekai maté. Do' ngedengan nekai, pad tana' kai na uen nuso. Do' melih burur kai idi tana' kai mangun ku libal akan luk kuan kai, pad kai mangun ku demulun raca', idi tana' kai kuanneh. Do' iko maré pimara kuan kai pad kai miak mulun, idi tana' kai na mesuso.”

²⁰Idi Yusup nemelih amung tana' Masir kuan raca'. Amung lun Masir nemasui tana'deh, ngaceku ideh pelaba susa' ku iru' ineh. Idi amung-amung tana' ineh raca' kuan.

²¹Idi Yusup nemubuh nelun mula' ratnan sebawang amé' inan luk baken mangun ku demulunneh, aput tana' Masir.

²²Iamo' tana' lun imam mo' na bilihneh. Ngaceku ideh inan tabpar ratnan raca' idi kuan ratnan tabpar luk barén raca' kuandeh. Ineh punneh ideh na nemasui tana'deh.

²³Idi kebala Yusup nelun mula' ineh, "Nekini ui pangeh nemelih burur muyuh idi tana' muyuh kuan raca'. Siruh, ini ilung luk tibuen muyuh bang tana' ini.

²⁴Idi peralihneh na miak na muyuh maré sengebuan ratnan limeh buan kuan raca', idi apat buan ineh kuan muyuh, miak mangun ku pimara, idi kenen muyuh idi amung uang tetek ruma' muyuh.”

²⁵Idi kebaladeh, "Iko pangeh nengulun nekai, O tuan, idi iko do' nekai, idi amung-amung kai miak mangun ku demulun raca'."

²⁶Idi Yusup nenganau' aceh ukum kuan bawang Masir, pad macing kareb ini, idi bang limeh buan, sengebuan kuan raca'. Iamo' tana' lun imam mo' luk na kuan raca'.

²⁷Idi lun Israil netudo bang bawang Masir, déi' tana' Gosen. Idi ideh mangun ku lun do' idi inan mula' anak.

²⁸Idi Yakub tudo déi' Masir pulu' tudu' lak kinioneh pad ulunneh meratu apat ngepulu' tudu' lak.

²⁹Karebneh lélé maté, idi ieh nenawar anakneh Yusup, kebalaneh neneh, "Do' iko ngerareng ticu'mu pa liang tipanku, idi pejani' negku, pad iko na nanem negku bang bawang Masir.

³⁰Ui pian tinamen dengan tepunku. Do' nguit butungku rat bawang Masir ini, idi nanem negku bang lengutandeh." Idi kebala Yusup, "Miak ui nganau' kudeng luk bilamu ineh."

³¹Idi kebala Yakub, "Do' iko penaji' negku." Idi Yusup nepejani' neneh. Idi Yakub pana' netekunal luun pagauneh, idi nengubur Allah.

Pudut 48

¹Muci ratnan ineh kebaladeh ni Yusup, "Mét i tamam." Idi Yusup nenguit dueh anakneh, ieh ineh Manasé idi Epraim maya' neneh iné' nier ni Yakub.

²Idi kebaladeh ni Yakub, "Anakmu Yusup ineh nacing nier namu." Idi Yakub pana' netemueh, idi netudo luun pagauneh.

³Idi kebala Yakub ni Yusup, "Idi Allah luk Melalud nesilagan negku déi' Lus bang bawang Kanaan, idi Ieh nengeperuan negku,

⁴kebalaNeh, 'Ui sikal maré namu mula' anak pad inulmu mangun ku tuda'-tuda' pupu. Idi tana' ini miak barénKu kuan inulmu raked-raked.' "

⁵Idi teh kebala Yakub, "Nekini dueh anakmu, ieh ineh Epraim idi Manasé luk tinganak kuanmu tungé' Masir atun ratnan acingku namu, ui luk kuan nedidueh; ieh ineh mepad kudeng Rubin idi Simion.

⁶Iamo' anak luk iko ngalap mucu rat nedidueh ini, iko luk kuan nedeh. Idi ideh miak ngalap babpat binawehdeh dengan kinanakdeh.

⁷Ui nganau' kudeng ini ngaceku tinanmu Rakel naté déi' tana' Kanaan muneng ku Eprata kareb ui muli' rat Mesopotamia. Idi ui nenanem neneh dengan susa' niatku déi' dalam luk amé' Eprata (ieh ineh Baitlahim)."

⁸Kareb Yakub nenier anak Yusup ineh, idi kebalaneh, "Idé kuan anak ineh?"

⁹Idi kebala Yusup, "Ini anakku luk pangeh biré Allah kuanku tungé' Masir." Idi kebala Yakub, "Do' nguit nedidueh amé' negku, pad ui miak ngeperuan nedidueh."

¹⁰Idi Yakub dat sier, ngaceku ieh pelaba ngered, pad ieh na miak nier do'-do'. Idi Yusup nenganau' nedidueh muneng neneh, pad ieh nemuen nedidueh idi nengapel nedidueh.

¹¹Kebala Yakub ni Yusup, "Idi na ui ngerawé miak nier kiungmu teh; iamo' Allah nemaré negku nier kiung anakmu pana'."

¹²Idi Yusup nengatad nedidueh rat iring aleb tamanneh, idi ieh netekeradung pa kiungneh.

¹³Idi Yusup nenganau' Epraim pa kabing Yakub, idi Manasé inau'neh pa tinueh.

¹⁴Iamo' Yakub pana' nengerareng ticu'neh pa tinueh pa luun uluh Epraim, sagan pana' ieh luk isuut, idi ticu'neh pa kabing luun uluh Manasé, idi dengan luk kudeng ineh ieh nengerareng ticu'neh pegilang, sagan tu pana' Manasé ini anak Yusu luk atun.

¹⁵Idi Yakub nengeperuan ni Yusup, kebalaneh, "Idi do' Allah ngeperuan dueh anak ini, ieh ineh Allah luk inan tepunku Ibrahim idi tamanku Isak merapat. Do' Allah luk pangeh nenguyut negku macing aco sini ngeperuan nedidueh,

¹⁶Do' Melaikat luk nemuit negku ratnan amung-amung luk dat, ngeperuan nedidueh, Idi do' ngadanku, idi ngadan tepunku Ibrahim idi tamanku Isak pana' mebala ngaceku didueh. Idi do' didueh mula' inul."

¹⁷Idi Yusup mesusa' niat kareb ieh nenier tamanneh ngerareng ticu'neh pa tinueh luun uluh Epraim. Idi ieh nengakem ticu' tamanneh sikal mubuh neneh rat luun uluh Epraim amé' luun uluh Manasé.

¹⁸Idi kebalaneh nan tamanneh, "Aleg kudeng ineh, O Ama' ngaceku ini anak luk atun, do' ngerareng ticu'mu pa tinueh luun uluhneh."

¹⁹Iamo' tamanneh na sikal, kebalaneh, "Ui kali' idi Manasé pana' miak mangun ku aceh pupu luk mebala. Iamo' kinanakneh luk isuut meluun mebala rat neneh, idi inulneh miak mangun ku tuda'-tuda' pupu luk mebala."

²⁰Idi Yakub nengeperuan nedidueh bang aco sineh, kebalaneh, "Lun Israil miak neten ngadan medueh kareb ideh maré peruan, kebaladeh, 'Do' Allah nganau' namu mangun mepad kudeng Epraim idi Manasé.' " Idi Yakub nengeluun Epraim ineh ratnan Manasé'.

²¹Idi kebala Yakub ni Yusup, "Na mio teh ui maté. Iamo' Allah miak ngedengan nemuyuh pad Ieh nguit nemuyuh muli' amé' bang bawang tepun muyuh.

²²Idi ui maré setanggal tana' kuanmu meluun ratnan babpat amung-amung kinanakmu, ieh ineh tana' luk mebaleng luk pangeh inaroku rat bang palad lun Amori dengan pelapetku idi binorku."

Pudut 49

¹Yakub nenawar amung-amugn anakneh, kebalaneh, "Pamung muyuh, idi ui miak mada' nemuyuh ratnan luk miak mangun kuan muyuh bang aco luk mucu:

²"Pamung muyuh idi ninger, O anak-anak Yakub. Do' ninger bala taman muyuh Israil.

- 3"O Rubin, iko anakku luk rayeh, tuehku idi bua' laludku luk pun-pun, luk pelaba do' uburneh, idi pelaba do' tuehneh.
- 4"Na lutep mepad kudeng ereb. Na iko miak amé' ku luk rayeh, ngaceku iko nepamung dengan apidku, idi iko nengelutak pagau tamanmu.
- 5"Simion idi Liwi ini dinganak. Pelapet didueh ineh ku ngaté lemulun.
- 6"Ui na pian semuet bang gayam didueh. Ui na pian perurum nedidueh, kareb didueh remasang didueh ngaté lemulun. Didueh narad kukud sapi' ku rot didueh.
- 7"Uen ngediman useh didueh ineh luk mesangit, idi gateh didueh ngaceku sikal ngaté! Ui sikal ngatad nedidueh maput bawang Israil, idi ngatad nedidueh rat arang lun Israil.
- 8"O Yahuda, kinanakmu miak ngubur namu. Idi ticu'mu miak merek dier bunu'mu. Idi amung kinanakmu miak tekunal pa kiungmu.
- 9"Yahuda ineh mepad kudeng balang. Ieh ngaté luk tekapen, idi lemubed amé' su inanneh. Ieh luku idi na seburur mekuu' nui neneh.
- 10"Idi lalud ngimet na miak buro rat ni Yahuda. Idi rukud imet raca' na buro rat neneh, pad Ieh luk kuan rukud ineh miak macing. Idi amung-amung pupu miak maya' Neneh.
- 11"Idi ieh nengabet keladaineh nan lawa anggur, ieh ineh lawa anggur luk pelaba do'. Idi ieh nemupu' kibungneh bang abpa' anggur, luk mesia' kudeng dara',
- 12"Idi matehneh mesia' ku abpa' anggur, idi lipenneh mebuda' ku rata.
- 13"Sebulon miak tudo tangeb abpa' rayeh. Idi ieh miak mangun ku su luk inan kapal mapit. Idi lakanneh macing déi' Sidon.
- 14"Iskar ineh mepad kudeng keladai luk metueh, luk tekeradung arang dueh babehneh.

¹⁵Kareb ieh nenier luk inan ucu' ineh do', idi tana'neh pana' do' ayu, idi ieh nengebeneh tudungneh sikal maan, idi mangun ku demulun luk duken ngakem.

¹⁶"Dan miak ngimet pupuneh, luk mepad kudeng pupu Israil luk baken.

¹⁷Dan ineh miak mangun ku menipeh iring dalan, mepad kudeng aceh menipeh luk megalih iring dalan, luk nicuk tumid kuda, pad lemulun luk nalan maya' kuda ineh mepulid rat luun ketedneh.

¹⁸"Ui nginulat Tuhan ngulun negku.

¹⁹"Gad ineh dinakin aceh babpat bunu'. Iamo' mucu ieh miak ngerada' nedeh.

²⁰"Idi luk kenen Aser ineh pelaba én. Ieh maré luk do' én kuan raca'-raca'.

²¹"Naptali ineh mepad kudeng payo tineh luk meliputi, luk nenganak tuda'-tuda' anak luk do' ayu.

²²"Yusup mepad kudeng aceh angkat luk kebua', ieh ineh sebuleng lawa luk mulun iring bued abpa'. Idi angkat-angatneh rubpé pa luun ar luk medita'.

²³Bunu'neh ngedereh neneh, idi ngerada' neneh, dengan binor idi ilebdeh.

²⁴Iamo' binordeh pinutul Luk Melalud, idi urat langendeh dirak Allah Yakub luk Melalud, ieh ineh Lun Matar, idi Batu lun Israil.

²⁵Allah tamanmu luk ngedengan namu, idi Allah luk Melalud luk sikal maré peruan kuanmu, dengan peruan udan luk rat déi' dita', idi peruan bued abpa' luk pa liang tana', idi peruan ratnan iti' idi nakan,

²⁶peruan ratnan padé idi busak, peruan ratnan pegkung luk mon, idi amung luk do' ratnan surud luk meruked. Nima' peruan ini temurun luun ulun Yusup, ieh ineh luun madu' lemulun luk meluun rayeh ratnan kinanak-kinanakneh.

²⁷"Beniamin ineh mepad kudeng aceh bungalé luk manga, luk kuman bunu'neh kareb pekak, idi mabpat-mabpat luk ilapneh kareb malem."

²⁸Idi amungdeh ineh mangun ku pulu' dueh pupu Israil. Idi ini luk bila tamandeh kareb ieh neperiteteng nan anid-anid anakneh.

²⁹Idi pangeh ineh ieh neperiteteng nan anak-anakneh, kebalaneh, "Ui lélé amé' matun tepunku. Do' nanem negku su luk inan tepunku bang lubang luk déi' luun tana' Epron lun Hiti ineh;

³⁰ieh ineh déi' Makpéla luk muneng ku Mamré déi' bawang Kanaan, luk pangeh bilih Ibrahim dengan natad pana' rat ni Epron lun Hiti ineh pad mangun ku lengutan.

³¹Idi su ineh ideh nenanem ni Ibrahim idi awanneh Sara. Idi su ineh teh ideh nenanem ni Isak idi awanneh Ribeka. Idi su ineh teh ui nenanem ni Lia.

³²Idi lati' ineh dengan lubang luk luun ineh pangeh bilih rat nelun Hiti. Do' nanem negku su ineh."

³³Pangeh Yakub neperiteteng nan anak-anakneh, idi ieh nenginat kukudneh amé' luun pagauneh, idi niatneh neputut.

Pudut 50

¹Idi Yusup nesiluka' luun tamanneh, idi nenangi' neneh, idi nemuen kiungneh.

²Idi Yusup nengecuk nelun luk mileh nganau' butung tamanneh na melu.

³Idi ideh nengakem apat ngepulu' aco kinioneh, maya' lawédeh luk pekalai. Idi lun Masir netemido neneh tudu' ngepulu' aco kinioneh.

⁴Kareb aco temido pangeh nepelaba, idi kebala Yusup nelun tareh raca', "Do' nated balaku ini kuan raca':

⁵Kareb tamanku lélé maté, ieh nengecuk negku penaji' neneh, pad ui nanem neneh bang lengutan luk tinina'neh déi' bawang Kanaan ineh. Ngaceku ineh, do' nima' negku nalan, pad ui miak nanem tamanku, idi ui miak lemubed teh.'
“

⁶Idi kebala raca', "Nalan iko idi nanem tamanmu, maya' kudeng jani'mu neneh.”

⁷Idi Yusup iné' nanem tamanneh. Idi amung lun tareh raca', amung-amung lun rayeh ruma' raca', idi amung-amung lun rayeh déi' bawang Masir nemaya' neneh.

⁸Idi amung uang tetek ruma' Yusup, dengan kinanak-kinanakneh, idi lun bang ruma' tamanneh nemaya' neneh teh. Iamo' anak-anakdeh, idi aya'deh ticandeh déi' bawang Gosen.

⁹Idi inan tuda'-tuda' keréta idi lun luk maya' kuda luk nemaya' neneh teh. Idi amungdeh ineh pelaba ula'.

¹⁰Kareb ideh nacing su luk inan rumik déi' Atad, luk pa busat aco Abpa' Yarden, idi su ineh ideh netemido tu-tu, idi nenganau' aceh tebubpun. Idi Yusup netemido tamanneh tudu' aco kinioneh.

¹¹Kareb lun luk bang bawang Kanaan nekali' tidodeh déi' Atad, kebaladeh, "Ini aceh tido lun Masir luk pelaba rayeh." Ngaceku ineh ideh neneten su ineh Abel Misraim.

¹²Idi anak-anak Yakub nenganau' maya' kudeng bala tamandeh.

¹³Idi ideh nenated butungneh macing déi' bawang Kanaan. Idi ideh nenanem neneh déi' bang lubang batu luun natad Makpéla pa busat aco Mamré, luk bilih Ibrahim rat ni Epron lun Hiti ineh, miak mangun ku lengutandeh.

¹⁴Kareb Yusup pangeh nenanem tamanneh, idi ieh nelemubed iné' bawang Masir dengan kinanak-kinanakneh idi amung-amung lemulun luk nemaya' neneh nanem tamanneh.

¹⁵Kareb tamandeh pangeh naté, idi kebala kinanak-kinanak Yusup, "Kian, Yusup megateh netau lek idi pian ngua' netau ngaceku amung-amung dat tau neneh."

¹⁶Idi ideh nemaré bala ni Yusup, kebaladeh, "Kareb nateh tamanmu naté, kebalaneh kuanmu,

¹⁷Do' maré do' ku sala' kinanak-kinanakmu namu.' Iamo' nekini kai mutuh namu maré do' ku sala' demulun-demulun Allah tamanmu ineh." Idi Yusup nenangi' kareb ieh nengalap baladeh.

¹⁸Pangeh ineh amung-amung kinanak Yusup nacing idi netekeradung pa kiungneh, kebaladeh, "Nekini pian kai ini mangun ku demulunmu."

¹⁹Idi kebala Yusup nedeh, "Aleg muyuh matot! Miakké ui ini mangun ku libal Allah?

²⁰Matu muyuh ini pangeh nenganau' dat kuanku. Iamo' Allah nengisu' ineh mangun ku peruan, pad Ieh ngulun mula' pupu.

²¹Aleg muyuh matot. Ui miak ngasa' nemuyuh idi amung-amung anak muyuh." Idi ieh nengubuk nedeh dengan bala luk do' luk nengegio niatdeh.

²²Yusup netudo déi' Masir dengan amung uang tetek ruma' tamanneh. Idi ulunneh meratu pulu' lak kareb ieh naté.

²³Idi ieh nekali' anak Epraim, idi mupun Epraim pana'. Idi teh kareb anak-anak Makir luk anak Manasé pangeh tinganak, idi ideh nengerareng nedeh bang abin Yusup.

²⁴Idi kebalaneh nan kinanak-kinanakneh, "Ui lélé maté, iamo' Allah miak ngasa' nemuyuh, idi nguit nemuyuh remuat rat bang bawang ini amé' inan tana' luk pinaji'Neh kuan Ibrahim, Isak idi Yakub."

²⁵Idi Yusup nemutuh nelun Israil pebulung, kebalaneh, "Do' muyuh pejani' nguit tulangku kareb Allah nated nemuyuh amé' bang bawang ineh."

²⁶Idi Yusup naté kareb ulunneh meratu pulu' lak. Idi ideh nenganau' butungneh temina' déi' bawang Masir, idi nengerareng neneh bang lungun.

Pura'

Pura' 1

¹Ini ngadan anak-anak Yakub luk nemaya' neneh iné' Masir, anid-anid dawa' ngeruma':

²Rubin, Simion, Liwi, Yahuda,

³Iskar, Sebulon, Beniamin,

⁴Dan, Naptali, Gad, idi Aser.

⁵Kinula'deh luk inul Yakub, ieh ineh tudu' ngepulu' burur, iamo' Yusup nacing atun déi' Masir.

⁶Yusup idi kinanak-kinanakneh naté dengan amung lun ribpet sineh.

⁷Iamo' lun Israil iuk iné' mula', pad ideh metueh idi pelaba ula', pad bawang Masir pinu'deh.

⁸Idi aceh raca' luk mebaruh luk na nepekalai ni Yusup kinikit ngimet bawang Masir.

⁹Idi kebalaneh nelun Masir, "Lun Israil pelaba ula' idi ideh meluun rat netau.

¹⁰Do' tau ngatur nedeh dengan ileh, pad ideh na iuk-iuk amé' mula', idi perurum dengan bunu' tau. Ngaceku ideh sikal metueh rat netau lek, pad ideh buro rat bang bawang tau."

¹¹Idi ideh nemili' tuda'-tuda' lun luk nginita nedeh, pian ngedereh nelun Israil dengan kekamen luk meberat. Idi lun Israil nemudut kuan raca' dueh bawang luk inan nganug akan, ieh ineh Pitum idi Ramsis.

¹²Idi lun Masir iuk ngedereh nedeh, iamo' lun Israil iuk meluun ula' pad ideh nengaput anid bawang, pad lun Masir merapang ku ideh.

¹³Idi dengan rasang lun Masir nengecuk nelun Israil ngakem.

¹⁴Idi ideh ngedereh nedeh ku kekamen luk mesusa'. Idi ideh nengecuk nedeh mudut tuda'-tuda' pudut, idi teh ideh icuk ngakem bang lati'deh. Idi na lun Masir méi' nedeh.

- ¹⁵Idi kebala raca' lun Masir nan bidan lun Iberani, ieh ineh Sipera idi Pua,
- ¹⁶"Kareb medueh ngasa' decur Iberani luk nenganak idi nier anak mebpeh, kudeng pieh deléi, do' muyuh ngaté neneh. Iamo' kudeng ieh decur nima' neneh mulun."
- ¹⁷Iamo' bidan ineh matot inan Allah. Na didueh nemaya' luk icuk raca' nedidueh. Iamo' didueh nengulun amung-amung anak deléi.
- ¹⁸Idi raca' nenawar bidan ineh. Idi kebalaneh nedidueh, "Ngudeh medueh nganau' luk kudeng ineh, idi ngudeh medueh ngulun anak deléi?"
- ¹⁹Idi kebala didueh ni raca', "Decur lun Iberani baken ratnan decur Masir. Ideh malé nenganak. Anak mebpeh kareb nateh bidan macing."
- ²⁰⁻²¹Ngaceku bidan ineh matot inan Allah, idi Ieh nenganau' luk do' kuan didueh. Idi Allah nengula' inul bang tetek ruma' didueh. Idi lun Iberani iuk amé' mula', idi ideh meluun tueh.
- ²²Idi raca' Masir nengecuk amung anak itinneh, kebalaneh, "Do' muyuh nala' amung anak deléi lun Iberani bang Abpa' Nil, iamo' amung anak decurdeh uen ngulun."

Pura' 2

- ¹Seburur lun Liwi nengaweh aceh decur ratnan pupuneh sebuleng.
- ²Idi decur ineh mali' idi ieh nenganak aceh anak deléi. Kareb ieh nenier anak ineh do', idi ieh nengapung neneh teluh bulan kinioneh.
- ³Iamo' na ieh miak mapung teh. Idi decur ineh nengalap aceh pati' inau ratnan bulu' puren, idi ieh nengamut neneh do'-do' pad abpa' na semuet. Idi ieh nenganau' anak ineh bang pati' ineh idi ieh nengerareng neneh iring tangeb abpa' su luk mapet.
- ⁴Kinanakneh aceh rayeh tuped mado nier kudeng apeh luk mangun.
- ⁵Anak decur raca' Masir netemurun amé' diu' bang Abpa' Nil, idi tuda'-tuda' demulunneh lawé-lawé tangeb abpa' ineh. Idi denak-denak ieh nenier aceh

pati' su luk mapet iring tangeb. Idi ieh nengecuk demulunneh luk decur amé' ngalap pati' ineh.

⁶Kareb ieh nengukab ineh idi ieh nenier aceh anak deléi, idi anak ineh nangi'. Idi anak raca' ineh pelaba éi' neneh, kebalaneh, "Ini anak lun Iberani."

⁷Idi kinanak anak ineh nengitun neneh, "Miakké ui amé' mada' aceh decur lun Iberani luk miak niti' anak ineh kuanmu?"

⁸Idi kebala anak raca' neneh, "Miak." Idi decur ineh iné' kidi inan tinan anak ineh.

⁹Idi kebala anak raca' neneh, "Itenmu anak ini, tetienmu kuanku. Ui miak maré tabpar namu." Idi decur ineh nengalap anak ineh idi neniti' neneh.

¹⁰Kareb anak ineh pangeh rayeh, idi ieh inuitneh amé' matun anak raca' ineh. Idi ieh nengasa' neneh mangun ku anakneh. Idi ieh nenganau' ngadanneh Musa, kebalaneh, ngaceku ieh luk ilapku rat bang abpa'."

¹¹Kareb Musa pangeh rayeh, ieh iné' ngikak pupuneh, idi nier kudeng apeh ikat kekamendeh. Idi ieh nenier aceh lun Iberani bebalen lun Masir, ieh ineh seburur lun pupuneh.

¹²Idi ieh nelemiget nier na lemulun. Idi ieh nengaté lun Masir ineh, idi ieh nengapung butungneh liang bada.

¹³Idi kenebpa ieh iné' baruh teh. Idi ieh nenier dueh lun Iberani uned pekedaluh. Idi kebalaneh kuan luk sala' ineh, "Dedatenmu ku anun lun denganmu?"

¹⁴Idi ieh nengor balaneh, "Idéké luk nenganau' namu mangun ku raca' idi lun luk mutut ukum kuan kai? Iko pian ngaté negku teh kudeng patému nelun Masir luk atun di?" Idi Musa matot. Ieh ngerawé ieh pangeh nekali'deh nengaté.

¹⁵⁻¹⁶Idi bala ini nekali' raca' peh. Idi ieh nakap dalam pian ngaté ni Musa. Iamo' Musa neburo iné' bawang Midian. Idi imam bawang Midian inan tudu'

anak decur. Idi kareb Musa netudo muneng ku subuk, idi ideh nacing amé' ngook abpa', ruendeh bang bau' rupen aya' tamandeh.

¹⁷Iamo' nacing tuda'-tuda' lun matar aya' nengusu nedeh. Idi petacu Musa iné' nengan nedeh idi nemaré aya'deh ngirup.

¹⁸Kareb ideh nacing inan tamandeh, kebalaneh nedeh, "Ngudeh muyuh muka muli' aco sini?"

¹⁹Idi kebaladeh, "Inan aceh lun Masir luk nemuit nekai rat nelun matar aya' ineh. Idi teh ieh nengook abpa' kuan kai, idi ieh nemaré abpa' rupen aya' pana'."

²⁰Idi kebala Ruel nedeh, "Tapehké ieh? Ngudeh muyuh nima' neneh déi'? Nawar neneh kuman dengan tau."

²¹Idi Musa pian tebawang déi'. Idi Ruel nemaré anakneh luk ngadan Sipora ku awan Musa.

²²Idi ieh nenganak aceh anak deléi. Idi Musa neneten ngadanneh Gersom, kebalaneh, "Ngaceku pangeh ui mangun ku aceh lun sakai bang bawang baken."

²³Mio pangeh ineh idi raca' Masir naté. Idi lun Israil nengarod idi nengitang, ngaceku kekamendeh meberat. Idi kareb ideh nemutuh mepuit ratnan dereh, tangi'deh pindenger Allah.

²⁴Idi Allah neninger aroddeh ineh, idi Ieh nengerawé jani'Neh dengan Ibrahim, Isak, idi Yakub.

²⁵Idi Ieh nenier dereh lun Israil, idi Ieh temina' muit nedeh.

Pura' 3

¹Idi Musa nengasa' aya' ibanneh Yitro, ieh ineh imam bawang Midian. Idi ieh nenguit aya' ineh iné' su luk ali-ali, idi ieh nacing inan pegkung Allah, ieh ineh Sinai.

²Idi Melaikat Tuhan nesilagan neneh bang budung apui luk udung aceh kayuh luk mebeneh. Idi ieh nenier kayuh ineh mebudung ku apui, iamo' kayuh ineh na meseb.

³Idi keterawé Musa, "Mawa ui! Ngudeh kayuh ineh na meseb? Do' ui amé' nier ineh."

⁴Kareb Tuhan nenier ni Musa amé' muneng, idi Ieh nenawar neneh rat bang ineh, kebalaNeh, "O Musa, Musa!" Idi kebala Musa, "Anun idi, Tuhan?"

⁵Idi kebala Allah, "Aleg iko amé' muneng. Takanmu kasut ratnan kukudmu. Ngaceku su luk inanmu tuper ineh tana' luk meligan.

⁶Ui ini Allah tepunmu, Ibrahim, Isak, idi Yakub." Idi Musa nengebpu kiungneh, ngaceku matot nier Allah.

⁷Idi teh kebala Tuhan, "Ui pangeh nenier amung dereh pupuKu luk icing lun Masir nedeh. Ui pangeh neninger aroddeh mutuh puatin rat nelun luk metueh ngimet nedeh. Ui kali' amung derehdeh.

⁸Idi Ui pangeh netemurun pad muit nedeh ratnan imet lun Masir, pelé Ui nguit nedeh remuat rat bang bawang ineh amé' nan aceh bawang luk rayeh, ieh ineh aceh tana' luk mebaleng, su luk inan lun Kanaani, lun Hiti, lun Amori, lun Prisi, lun Hiwi, idi lun Yebusi.

⁹Ui pangeh neninger tangi' lun Israil. Idi teh Ui nier kudeng apéh ayu dereh lun Israil ruen lun Masir.

¹⁰Idi Ui ngecuk namu amé' papu' raca' Masir, pad iko muit pupuKu lun Israil remuat rat bang bawang Masir."

¹¹Idi kebala Musa nan Allah, "Kudeng apehké ui miak amé' papu' raca' idi nguit nelun Israil remuat rat bang bawang Masir?"

¹²Idi kebala Tuhan, "Ui ngedengan namu. Idi ini miak mangun ku tanu' kuanmu, ratnan tawarKu namu. Kareb pupuKu inuitmu remuat rat bang bawang Masir, idi muyuh miak sembayang inan Allah luun surud ini."

¹³Idi kebala Musa, "Kareb ui amé' papu' nelun Israil idi kebalaku nedeh, 'Allah tepun muyuh nengecuk negku amé' nemuyuh,' idi ideh ngitun negku, 'Idéké ngadanNeh?' kudeng afeh ui ngor baladeh?"

¹⁴Idi kebala Allah, "Ui Idi Luk Ui Idi." Idi teh kebalaNeh, "Do' mala kudeng ini kuan lun Israil: 'UI IDI pangeh nengecuk negku amé' nemuyuh.'

¹⁵Do' mala kudeng ini kuan lun Israil: 'Tuhan, Allah tepun muyuh Ibrahim, Isak, idi Yakub, pangeh nengecuk negku amé' nemuyuh.' Idi ini ngadanKu macing raked-raked, idi miak tetanen macing ku anak inul.

¹⁶Amé' iko idi ngamung lun rayeh-rayeh Israil, idi mada' kuandeh: 'Tuhan, Allah tepun muyuh, Ibrahim, Isak, idi Yakub, nesilangan negku, kebalaNeh, "Ui pangeh nenier nemuyuh idi kali' amung-amung luk ruen lun Masir nemuyuh.

¹⁷Ui pejani' muit nemuyuh remuat ratnan dereh bawang Masir ineh, pad muyuh amé' bawang lun Kanaani, lun Hiti, lun Amori, lun Prisi, lun Hiwi, idi lun Yebusi, ieh ineh tana' luk mebaleng." ‘

¹⁸"PupuKu ineh miak ninger balamu. Idi do' iko amé' papu' raca' Masir dengan lun rayeh-rayeh Israil. Kebala muyuh neneh, 'Tuhan, Allah lun Iberani, pangeh nesilangan nekai. Ngaceku ineh maré amung kai amé' su luk ali-ali tap delanin teluh aco, pad kai maré baré kuan Allah kai.'

¹⁹Iamo' Ui kali' raca' Masir na muit nemuyuh, kudeng na dengan mesaad.

²⁰Iamo' Ui miak ngegala' laludKu, pad Ui ngukum bawang Masir dengan luk katot luk miak ruenKu kuandeh. Pangeh ineh idi ieh miak maré nemuyuh nalan.

²¹"Idi Ui miak maré lun Masir méi' nemuyuh. Kareb muyuh remuat, na muyuh nalan na uang.

²²Ngaceku anid-anid decur miak mutuh nelun luk denganneh idi lun bang tetek ruma'neh, pirak, amas, idi ayung kuan anak-anakdeh luk deléi idi decur teh. Kudeng ini lawé muyuh miak ngaro bawang Masir."

Pura' 4

¹Idi kebala Musa, "Iamo' kudeng lun Israil na manu negku, idi na ninger balaku, anunké luk ruenku, kudeng ideh pebala, 'Na Tuhan nesilagan namu?'"

²Idi kebala Tuhan ni Musa, "Anunké luk bang paladmu?" Idi kebala Musa, "Rukud."

³Idi kebala Tuhan neneh, "Patuh ieh luun tana'." Idi ieh nemepet ineh luun tana'. Petacu ieh nisu' ku menipeh. Idi Musa neburo rat ieneh.

⁴Idi kebala Tuhan ni Musa, "Ngimet iurneh." Idi Musa nengimet iurneh, idi ieh nisu' ku rukud baruh peh.

⁵Idi kebala Tuhan, "Nganau' kudeng ini pad ideh manu Tuhan pangeh nesilagan namu, ieh ineh Allah tepundeh, Ibrahim, Isak, idi Yakub."

⁶Idi teh kebala Tuhan ni Musa, "Nuet ticu'mu pa liang kuyu'mu." Idi ieh nenganau' kudeng ineh. Pangeh ineh ieh nenginat ticu'neh. Idi ticu'neh nekaneh ku ét susud idi mebuda' mepad kudeng salju.

⁷Idi kebala Tuhan neneh, "Nuet ticu'mu pa liang kuyu'mu teh." Idi ieh nenganau' kudeng ineh teh. Idi ieh nenginat neneh, idi ticu'neh mepad kudeng ayuneh luk atun.

⁸Idi kebala Tuhan, "Kudeng ideh na manu namu idi na merapet ku tanu' seluk pun ineh, idi ideh miak manu ku tanu' luk mucu'."

⁹Idi kudeng ideh na manu ku tanu' luk dueh ini idi na ninger balamu, do' iko ngalap abpa' rat Abpa' Nil idi tangenmu ieh luun tana'. Idi abpa' ineh miak misu' ku dara'."

¹⁰Idi kebala Musa, "Mutuh do' Tuhan, ui ini lemulun luk na mileh pebala rat mon idi macing nekini. Kareb Tuhan pebala negku pana' meteh teh balaku."

¹¹Idi kebala Tuhan neneh, "Idéké luk nenganau' tang lemulun? Idéké luk nenganau' lun mebegkeh idi mebengel, nganau' lemulun nier idi mebuser? Ieh ineh Ui ini Tuhan.

¹²Idi nekini do' iko amé'. Ui miak nengan tangmu, idi Ui mada' namu ratnan luk belénmu.”

¹³Idi kebala Musa, "Mutuh do' Tuhan, ngecuk nelun baken.”

¹⁴Idi Tuhan museh ni Musa, kebalaNeh, "Kudeng apéh kinanakmu Arun lun Liwi ineh? Ui kali' neneh mileh pebala. Idi nekini ieh amé' papu' namu. Kareb ieh nier namu, kali' rungen ieh mawang niat.

¹⁵Iko miak mada' neneh ratnan luk belénneh nedeh. Idi Ui miak ngedengan nemedueh kareb medueh pebala, idi mada' nemedueh anun luk ruen medueh.

¹⁶Idi ieh miak pebala inan pupu ineh ku libalmu. Idi teh ieh mangun ku libal tangmu, idi iko mangun ku aceh bala Allah kuanneh.

¹⁷Ngalap rukud ini bang paladmu, ngaceku ratnan ini iko miak nganau' tuda'-tuda' tanu'.”

¹⁸Idi Musa nelemubed iné' nan ibanneh Yitro, kebalaneh, "Nima' negku lemubed amé' inan kinanakku luk déi' Masir, ku idi teh ideh mulun." Idi kebala Yitro ni Musa, "Mesaget iko amé'.”

¹⁹Idi kebala Tuhan ni Musa, kareb ieh idi déi' Midian, "Muli' iko amé' bawang Masir. Amung lemulun luk pian ngaté namu ineh pangeh naté.”

²⁰Idi Musa nengalap awan idi anak-anakneh, idi nenguit nedeh maya' keladai idi nuli' iné' bawang Masir. Idi rukud Allah ineh inuitneh.

²¹Idi kebala Tuhan ni Musa, "Kareb iko lemubed amé' bawang Masir, do' iko nganau' tanu' luk pangeh biréKu namu pa kiung raca'. Iamo' Ui ngetueh niatneh pad ieh na maré pupu ini nalan.

²²Do' iko pebala ni raca', 'Kudeng ini bala Tuhan, Israil, ieh ineh anakKu seluk rayeh.

²³Idi Ui pebala namu, nima' anakKu ineh nalan, pad ieh miak sembayang Negku. Iamo' kudeng iko na nima' neneh nalan Ui miak ngaté anakmu luk rayeh.' “

²⁴Idi tangal dalan su luk inan nelupo, idi Tuhan nesilagan ni Musa ayuneh sikal ngaté neneh.

²⁵Idi Sipora nengalap aceh iyu batu idi ieh nenunat anakneh luk deléi, idi nemepet kubilneh luun kukud Musa, kebalaneh, "Iko nepaweh negku ratnan dara' ineh."

²⁶Sipora nepebala kudeng ineh ngaceku sunat ineh. Idi Tuhan nenima' Musa mulun.

²⁷Idi kebala Tuhan ni Arun, "Amé' iko ni Musa déi' su luk ali-ali." Idi ieh iné' neneh déi' luun pegkung Allah, idi ieh nemuen neneh.

²⁸Idi Musa nemada' ni Arun ratnan amung bala Tuhan neneh, idi amung tanu' luk bida'Neh neneh luk miak ruen.

²⁹Musa idi Arun iné' Masir, idi nengamung lun rayeh-rayeh Israil.

³⁰Idi Arun nemada' bala luk bila Allah ni Musa. Idi Musa nenganau' tanu'-tanu' pa kiung pupu ineh.

³¹Idi ideh manu kareb ideh neninger Tuhan pangeh méi' kuan lun Israil idi nenier derehdeh, pad ideh netekeradung idi sembayang Neneh.

Pura' 5

¹Pangeh ineh Musa idi Arun iné' papu' Raca' Masir, idi kebala didueh neneh, "Kudeng ini bala Tuhan Allah lun Israil. 'Nima' pupuKu ini nalan pad ideh ngelelep aceh aco rayeh kuanKu déi' su luk ali-ali.' "

²Iamo' kebala raca', "Idé-ké Tuhan luk miak bénku bala, pad ui nima' nelun Israil ineh nalan? Na ui kali' Tuhan ineh, idi na ui maré lun Israil nalan."

³Idi kebala didueh, "Allah lun Iberani pangeh nesilagan nekai. Do' nima' nekai nalan tap delanin teluh aco déi' su luk ali-ali, pad kai maré luk barén kuan Tuhan Allah kai, pelé Ieh na ngacing ét idi bunu' kuan kai."

⁴Idi kebala raca' nedidueh, "O Musa idi Arun, ngudeh medueh ngesabeng kekamen pupu ini? Ngecuk nedeh lemubed ngakem teh!"

⁵Idi teh kebala raca', "Pupu ini pelaba ula' bang bawang ini. Idi nekini muyuh pian ugka' ratnan kekamen muyuh!"

⁶Idi kareb aco sineh teh raca' nengecuk nelun rayeh idi lun luk ngimet kekamen pupu ineh, kebalaneh,

⁷"Aleg maré uduh luk tekering peh, ku nganau' batu bata pinudut ratnan tana' salit kudeng luk atun. Nima' nedeh nakap kuandeh sebuleng.

⁸Maré kekamen kuandeh mepad kinula' batu bata luk kikemdeh atun. Aleg ngurang kuandeh, ngaceku ideh mekupé. Idi ideh nengarod, 'Muit nekai idi kai amé' maré luk barén nan Allah kai.'

⁹Maré kekamen luk meluun berat, pad ideh na ninger bala luk mo'-mo'."

¹⁰Idi lun luk icuk ngatur kekamen demulun, idi lun luk ngimet kekamen lun Israil neremuat idi nepebala nelun mula', "Kebala raca', 'Na ui miak maré uduh luk tekering nemuyuh.

¹¹Muyuh sebuleng amé' nakap su apeh luk inan muyuh miak ngalap. Iamo' kekamen muyuh na miak uen ngurang.' "

¹²Idi pupu ineh nurap-nurap maput bawang Masir nakap uduh luk tekering.

¹³Idi lun luk icuk ineh mesaad ngecuk nedeh, pad ideh nganau' batu bata mepad kinula' kudeng luk pekalai anid-anid aco kareb inan uduh tekering teh.

¹⁴Idi amung lun luk ngimet kekamen lun Israil luk kinikit ku kekamen ineh dicatdeh, kebaladeh, "Ngudeh muyuh na nemangeh babpat muyuh nganau' batu bata aco sini mepad kudeng luk atun?"

¹⁵Idi amung lun luk ngimet kekamen lun Israil iné' papu' raca' dengan megateh niat, kebaladeh, "Anun punneh iko ngedereh nekai,

¹⁶idi na nemaré uduh luk tekering kuan kai? Iamo' ideh ngecuk nekai nganau' batu bata ineh! Kai dicat. Iamo' iko luk sala'."

¹⁷Idi kebala raca', "Mekupé muyuh ini, mekupé tu-tu! Ini punneh muyuh pebala, 'Amé' kai maré luk barén inan Tuhan.'

¹⁸Iamo' nekini amé' muyuh ngakem! Uduh luk tekering na miak barén nemuyuh. Iamo' do' muyuh nganau' batu bata mepad ula' kudeng luk icuk!"

¹⁹Idi lun luk ngimet kekamen lun Israil kali' susa' idi dat ngaceku bala raca' nedeh ineh, ratnan na ngurang kinula' batu bata ineh anid-anid aco, iamo' nganau' mepad kudeng luk atun.

²⁰Kareb ideh nenalan, idi ideh nepapu' ni Musa idi Arun luk nganét nedeh.

²¹Idi kebala lun luk ngimet kekamen lun Israil nedidueh, "Tuhan kali' nemedueh idi ngukum nemedueh ngaceku medueh nengedat ngadan kai pa kiung raca' idi pa kiung lun rayehneh. Medueh pangeh nemaré aceh pelapet bang paladdeh, pad ideh ngaté nekai."

²²Idi Musa nenawar Tuhan teh, kesembayangneh, "O Tuhan, ngudeh Iko ngedereh pupuMu ini? Anun punneh Tuhan ngecuk negku amé' tungé'?"

²³Rat kareb ui nepapu' raca' idi ngacing balaMu neneh, megéi' ieh ngedereh nedeh. Iamo' na tu Iko nengedengan nedeh."

Pura' 6

¹Kebala Tuhan ni Musa, "Nekini miak iko nier luk ruenKu kuan raca'. Dengan tueh laludKu Ui miak ngecuk raca' ngusu nedeh rat bawangneh."

²Idi kebala Allah ni Musa, "Ui ini Tuhan.

³Ui nesilangan ni Ibrahim, Isak, idi Yakub, mepad kudeng Allah luk Melalud. Iamo' na diteluh kali' ngadanKu ineh Tuhan.

⁴Iamo' Ui nengelestep jani'Ku nedeh, idi Ui maré kuandeh bawang Kanaan, ieh ineh tana' luk inandeh tudo mepad kudeng sakai.

⁵Idi nekini pangeh Ui neninger arod lun Israil luk tiban lun Masir. Idi Ui ngerawé pejani'Ku.

⁶Ngaceku ineh, mada' nelun Israil, 'Ui ini Tuhan. Idi Ui sikal nguit nemuyuh remuat ratnan dereh lun Masir. Idi Ui miak muit nemuyuh ratnan tabandeh ineh. Idi Ui miak ngukum nedeh dengan lalud ticu'Ku ku dereh luk meluun rayeh, pad muyuh mepuit.

⁷Ui miak ngiding nemuyuh mangun ku pupuKu. Ui mangun ku Allah kuan muyuh, pad muyuh kali' Ui ini Tuhan Allah muyuh luk nemuit nemuyuh ratnan kekamen luk sinaad lun Masir.

⁸Ui nguit nemuyuh amé' bang bawang luk pijani'Ku kuan Ibrahim, Isak, idi Yakub. Idi Ui maré ineh kuan muyuh inan muyuh tebawang. Ui ini Tuhan.' “

⁹Idi Musa nengacing bala ineh nelun Israil. Iamo' na ideh neninger balaneh, ngaceku ideh mesusa' niat ku ideh tiban.

¹⁰Idi kebala Tuhan ni Musa,

¹¹"Amé' iko idi ngecuk raca' Masir ineh maré nelun Israil remuat rat bang bawang Masir.”

¹²Iamo' kebala Musa nan Tuhan, "Lun Israil pana' na ninger balaku. Meluun teh raca' na ninger. Ui selemulun luk meteh buri!”

¹³Idi kebala Tuhan ni Musa, "Mada' nelun Israil idi raca' Masir kudeng ini: Ui luk nengecuk namu nguit nelun Israil remuat rat bang bawang Masir.”

¹⁴Rubin anak Israil luk atun, inan apat anak deléi: Enok, Palu, Hesron, idi Karmi. Amungdeh ineh tepun pupu luk titen ku ngadandeh.

¹⁵Simion inan anem anak deléi: Yemuil, Yamin, Ohad, Yakin, Sohar, idi Saul, anak seburur decur Kanaani. Amungdeh ineh tepun pupu luk titen ku ngadandeh.

¹⁶Liwi inan teluh anak deléi: Gerson, Kohat, idi Merari. Amungdeh ineh tepun pupu luk titen ku ngadandeh. Idi ulun Liwi 137 lak.

¹⁷Gerson inan dueh anak deléi: Libni idi Simi. Idi ideh mula' inul.

¹⁸Kohat inan apat anak deléi: Amram, Isar, Hebron, idi Usil. Idi ulun Kohat 133 lak.

¹⁹Merari inan dueh anak: Mali idi Musi. Amungdeh ini pupu Liwi dengan inuldeh.

²⁰Idi Amram nengaweh ni Yokebed tinan pinakenneh. Idi anakneh Arun idi Musa. Idi ulun Amram 137 lak.

- ²¹Yisar inan teluh anak deléi: Kora, Nepig, idi Sikri.
- ²²Usil inan teluh anak deléi: Misail, Absapan, idi Sitri.
- ²³Arun nengaweh ni Elisiba Aminadab, kinanak Nason. Idi anakneh neneh Nadab, Abihu, Eliasar, idi Itamar.
- ²⁴Kora inan teluh anak deléi: Asir, Elkana, idi Abiasap. Amungdeh ini tepun tuda'-tuda' babpat inul Kora.
- ²⁵Eliasar, anak Arun ineh nengaweh aceh anak decur Putil. Idi anakneh neneh Pinihas. Idi amung ini lun rayeh tetek ruma' idi inul pupu Liwi.
- ²⁶Ini Arun idi Musa luk inan Tuhan Allah nepebala, "Nguit nelun Israil remuat rat bang bawang Masir, maya' ruyuddeh."
- ²⁷Musa idi Arun ineh luk nengecuk raca' Masir muit nelun Israil ineh.
- ²⁸Kareb Tuhan nepebala ni Musa déi' bawang Masir,
- ²⁹kebalaNeh, "Ui ini Tuhan. Do' mada' raca' Masir amung bala luk bilaKu namu ineh."
- ³⁰Idi kebala Musa, "Iko kali' ui ini selemulun luk meteh buri'. Kudeng apehké raca' ninger balaku?"

Pura' 7

- ¹Idi kebala Tuhan, "Ui ngikit namu mepad kudeng Allah kuan raca'. Idi Arun kinanakmu miak mangun ku nabimu.
- ²Iko mada' neneh ratnan amung luk belénKu namu. Idi Arun miak ngecuk ni raca' maré lun Israil remuat rat bang bawangneh.
- ³Iamo' Ui ngetueh niat raca', sagan tu pana' Ui nganau' mula' tanu' luk melalud bang bawang Masir.
- ⁴Idi Ui miak ngedereh bawang Masir. Idi Ui ngeruat bawehKu, ieh ineh pupu Israil, rat bawang Masir.
- ⁵Kareb ineh lun Masir kali' idi Ui ini Tuhan, kareb Ui ngegenang langenKu pa luun bawang Masir, idi nguit nelun Israil remuat rat arangdeh."

- ⁶Musa idi Arun nenganau' luk bila Tuhan Allah nedidueh.
- ⁷Ulun Musa kareb idi 80 lak, idi Arun 83 lak, kareb didueh pegayam ni raca'.
- ⁸Idi kebala Tuhan ni Musa idi Arun,
- ⁹"Kudeng raca' ngecuk nemedueh nganau' aceh tanu' luk melalud, idi do' iko ngecuk ni Arun mepet rukudneh pa kiung raca', pad ineh misu' ku menipeh."
- ¹⁰Musa idi Arun iné' ni raca', idi nenganau' maya' kudeng luk icuk Tuhan. Arun nemepet rukudneh pa kiung raca' idi lun tarehneh, idi rukud ineh nisus' ku menipeh.
- ¹¹Pangeh ineh raca' nenawar nelun luk mileh idi lun luk mangun. Idi dengan bangundeh ideh pana' nenganau' kudeng ineh teh.
- ¹²Anid-aniddeh nemepet rukuddeh, idi rukud-rukuddeh nisus' ku menipeh. Idi rukud Arun nenelen rukud-rukuddeh.
- ¹³Iamo' niat raca' metueh teh, pad ieh na ninger bala didueh, maya' kudeng luk pangeh bila Tuhan.
- ¹⁴Kebala Tuhan ni Musa, "Niat raca' pelaba tueh. Na ieh nima' pupu ini nalan.
- ¹⁵Amé' iko papu' raca' kareb pekak, kareb ieh remuat amé' tangeb abpa'. Nganét neneh tangeb Abpa' Nil ineh. Do' iko nguit rukud luk misu' amé' ku menipeh ineh.
- ¹⁶Idi pebala neneh, 'Tuhan, ieh ineh Allah lun Iberani, nengecuk negku amé' namu dengan bala ini, "Nima' pupuKu ini nalan idi amé' sembayang Negku déi' su luk ali-ali." Iamo' macing nekini nateh iko neninger balaku.
- ¹⁷Idi teh kebala Tuhan, O raca', ratnan ini miak iko kali' Ui ini Tuhan. Nier rukud ini luk bang paladku uenku mabpet Abpa' Nil ini, idi abpa' ineh misu' ku dara'.
- ¹⁸Idi amung lawid luk bang Abpa' Nil ineh maté, pad Abpa' Nil ineh pelaba dat buen. Idi lun Masir pana' na miak ngirup abpa' ineh.' "
- ¹⁹Idi teh kebala Tuhan ni Musa, "Ngecuk ni Arun ngalap rukudneh idi ngegenang ineh pa luun amung abpa' bawang Masir — ieh ineh pa luun

abpa'deh, turukdeh, takungdeh, idi amung su luk apu' abpa'deh — pad amungneh misu' ku dara'. Idi medara', maput amung bawang Masir, do' bang bau' idi bang rubi pana'.”

²⁰Musa idi Arun nenganau' maya' kudeng luk bila Tuhan. Idi Arun nengegenang rukudneh, idi nemabpet Abpa' Nil pa kiung raca', idi pa kiung amung lun tarehneh. Idi amung abpa' nisu' ku dara'.

²¹Idi amung lawid bang abpa' ineh naté. Idi abpa' pelaba dat buen, pad na miak rupen lun Masir. Idi dara' maput amung bawang Masir.

²²Iamo' amung lun luk mileh mangun kuan raca' Masir nenganau' luk kudeng ineh dengan ileh bangundeh pad niat raca' meluun tueh, pad ieh na ninger bala didueh, maya' kudeng luk bila Tuhan.

²³Idi raca' nelumi idi petacu nuli' dengan na merapang ratnan ineh.

²⁴Iamo' lun Masir ineh nengukat libut Abpa' Nil pian nakap abpa' rupen. Ngaceku Abpa' Nil na miak rupen.

²⁵Idi pangeh tudu' aco rat Tuhan nemabpet Abpa' Nil ineh, inan aceh susa' luk baken.

Pura' 8

¹Kebala Tuhan ni Musa, "Amé' iko papu' raca', idi pebala neneh, 'Ini bala Tuhan: Nima' pupuKu nalan amé' sembayang Negku.

²Kudeng iko na nima' nedeh nalan, kali' rungen Ui ngukum amung bawangmu ku atit,

³pad amung Abpa' Nil mepanu' ku atit. Ideh manad idi umak bang ruma'mu, takepmu, idi luun tilemmu, idi bang ruma' amung lun tarehmu idi anak itinmu, bang dapurmu idi bang lacangmu pana'.

⁴Idi atit ineh pana' manad luun bururmu idi luun burur anak itinmu idi luun burur lun tarehmu.' “

⁵Idi teh kebala Tuhan ni Musa, "Ngecuk ni Arun nengegenang rukudneh ineh pa luun amung abpa', turuk, idi takungdeh, pad atit umak bang bawang Masir.”

- ⁶Idi Arun nengegenang rukudneh pa luun amung bawang Masir, idi atit ineh numak nengaput bawang.
- ⁷Idi lun luk mileh mangun pana' nenganau' kudeng ineh dengan ileh bangundeh, pad atit umak luun tana' Masir.
- ⁸Idi raca' nenawar ni Musa idi Arun, kebalaneh, "Do' sembayang mutuh Tuhan ngusu amung atit ini, idi ui miak nima' pupu ineh nalan amé' maré luk barén inan Tuhan."
- ⁹Idi kebala Musa ni raca', "Ngelelep aceh kareb luk inan sembayang kuanmu idi amung tarehmu idi anak itinmu, pad atit ini buro rat namu idi ratnan amung ruma', pad ideh mudeng bang Abpa' Nil."
- ¹⁰Idi kebala raca', "Sembayang kuanku nebpa." Idi kebala Musa, "Ui miak nganau' kudeng luk icukmu, pad iko kali' na luk mepad kudeng Tuhan Allah kai.
- ¹¹Iko, lun tarehmu, idi pupumu miak mepuit ratnan atit ineh. Idi na luk ketecan, iamo' inan bang Abpa Nil."
- ¹²Musa idi Arun neburo rat pa kiung raca'. Idi Musa nesebayang mutuh Tuhan nala' amung atit.
- ¹³Idi Tuhan nenganau' maya' kudeng luk pinutuh Musa. Idi atit ineh naté bang ruma'deh, luun natad, idi luun lati' pana'.
- ¹⁴Idi lun Masir nengamung butungdeh tebuduk-tebuduk, idi bawang ineh pelaba dat buen.
- ¹⁵Kareb raca' nekali' amung atit pangeh naté, idi niatneh metueh teh, pad ieh na ninger bala Arun idi Musa, maya' kudeng luk bila Tuhan.
- ¹⁶Idi teh kebala Tuhan ni Musa, "Ngecuk ni Arun necat tana' ku rukudneh, pad abuh tana' ineh misu' ku tukang apud bawang Masir."
- ¹⁷Idi Arun nenecat tana' ku rukudneh, idi tana' ineh nisu' ku tukang luun burur lemulun idi luun amung pung, apud bawang Masir.

¹⁸Idi lun luk mileh mangun nenutun nganau' luk kudeng ineh teh dengan ileh bangundeh, pad inan tukang. Iamo' na ideh miak nganau' kudeng ineh. Idi tukang ineh iné' luun lemulun idi luun amung pung.

¹⁹Idi kebala amung lemulun luk mileh mangun ni raca', "Ini aceh tanu' ratnan lalud Allah!" Iamo' niat raca' pelaba tueh. Idi na ieh ninger baladeh, maya' kudeng luk bila Tuhan.

²⁰Idi kebala Tuhan ni Musa, "Kulat iko uka-uka, idi amé' papu' raca' kareb ieh amé' tangeb abpa', idi pebala neneh, 'Kudeng ini bala Tuhan: Nima' pupuKu nalan pad ideh sembayang Negku.

²¹Kudeng iko na nima' nedeh nalan, idi Ui ngukum nemuyuh, pad inan laled luun bururmu, tarehmu, idi anak itinmu. Idi teh ruma'-ruma'mu, idi ruma'-ruma' lun Masir mepanu' ku laled. Idi tana' pana' maput ku ideh.

²²Iamo' Ui ngatad bawang Gosen, su luk inan pupuKu mudeng, pad déi' na laled, pad muyuh kali' Ui ini Tuhan luk ngakem bang bawang ini.

²³Idi Ui ngatad pupuKu ratnan pupumu. Idi tanu' ini miak mangun nebpa.' “

²⁴Idi Tuhan nenganau' kudeng ineh. Idi laled nacing pelaba ula' bang ruma' raca', idi ruma' tarehneh, idi aput bawang Masir, pad bawang ineh nedereh ngaceku laled ineh.

²⁵Idi raca' nenawar ni Musa idi Arun, kebalaneh, "Amé' muyuh. Nguit luk barén kuan Allah muyuh bang bawang ini.”

²⁶Idi kebala Musa, "Na kai miak nganau' kudeng ineh, ngaceku pung luk kereten kai kuan Tuhan Allah kai luk ku ali' lun Masir. Kudeng kai maré luk ku ali' lun Masir su sirendeh, kali' rungen ideh mitung nekai ku batu.

²⁷Do' kai amé' déi' su luk ali-ali, tap delanin teluh aco, pad kai miak maré luk barén kuan Tuhan Allah kai maya' kudeng luk icukNeh nekai.”

²⁸Idi kebala raca', "Ui nima' nemuyuh nalan pad nguit luk barén kuan Tuhan Allah muyuh déi' su luk ali-ali. Iamo' aleg muyuh nalan mado. Do' muyuh sembayang kuanku.”

²⁹Idi kebala Musa, "Kareb ui pangeh neburo rat pa kiungmu idi ui miak sembayang mutuh inan Tuhan, pad laled ini buro rat namu, ratnan tarehmu, idi anak itinmu. Iamo' aleg iko mebalih teh, pad iko na nima' pupu ini nalan amé' sembayang inan Tuhan."

³⁰Idi Musa neburo rat pa kiung raca', idi ieh nesembayang inan Tuhan.

³¹Idi Tuhan nenganau' maya' kudeng luk pinutuh Musa. Idi laled ineh neburo rat ni raca', idi amung tarehneh, idi amung anak itinneh. Sebuleng pana' nateh luk neketecan.

³²Iamo' sekua' ini pana' idi niat raca' metueh teh, pad ieh na nima' pupu ineh nalan.

Pura' 9

¹Kebala Tuhan ni Musa, "Amé' papu' raca', idi pebala neneh, 'Kudeng ini bala Tuhan Allah lun Iberani: Nima' pupuKu nalan, pad ideh miak sembayang Negku.

²Iamo' kudeng iko mebpeng nedeh na nalan,

³kali' rungen Ui ngukum namu ku bulau luk macing inan amung aya'mu, ieh ineh kuda, keladai, unta, sapi', dumba, idi amék.

⁴Idi Ui ngatad amung aya' lun Israil ratnan aya' lun Masir, pad aya' lun Israil na maté.

⁵Ui ini Tuhan pangeh nengeletep karebneh, ieh ineh nebpa."

⁶Idi kenebpa Tuhan nenganau' maya' kudeng luk bilaNeh, idi amung aya' lun Masir naté, iamo' ratnan aya' lun Israil sebuleng pana' nateh naté.

⁷Idi raca' nengitun anun luk mangun, idi kebaladeh neneh, "Sebuleng pana' nateh aya' lun Israil naté." Iamo' niat raca' pelaba tueh, pad ieh na nima' nedeh nalan.

⁸Kebala Tuhan ni Musa idi Arun, "Lapenmu abuh rat luun tetel, panu' tuda'-tuda' ragam, idi do' i Musa ngisak ineh arang gawa' pa kiung raca'.

⁹Idi abuh ineh misu' ku kimuh maput bawang Masir. Idi luun lemulun idi luun pung ieh ineh misu' ku kimuh luk menana'."

¹⁰Idi didueh nengalap abuh luk ratnan tetel, idi iné' papu' raca'. Idi Musa nengisak abuh déi' arang gawa', idi abuh ineh nisu' ku kimuh luk menana' kuan lemulun idi pung.

¹¹Idi amung lemulun luk mileh mangun na miak tured pa kiung Musa ngaceku kimuh ineh. Idi inan kimuh luun amung lun luk mangun idi amung lun Masir teh.

¹²Iamo' Tuhan nengetueh niat raca', pad ieh na ninger bala didueh, maya' kudeng luk bila Tuhan ni Musa.

¹³Kebala Tuhan ni Musa, "Do' iko amé' papu' raca' pekak uka-uka, idi pebala neneh, Kudeng ini bala Tuhan Allah lun Iberani: Nima' pupuKu ini nalan, pad ideh sembayang Negku.

¹⁴Ngaceku sekua' ini Ui ngacing ukumKu kuanmu idi kuan amung tarehmu, idi amung anak itinmu, pad iko miak kali' na lun luk mepad kudeng Ui aput tana'.

¹⁵Kudeng Ui pangeh nengegenang langenKu, idi nenecat namu idi amung anak itinmu ku ét, kali' rungen muyuh mabud bang bawang ini.

¹⁶Iamo' Ui nima' namu mulun, pad iko nier tuehKu, pelé ngadanKu tetanen aput tana' ini.

¹⁷Iko medita' niat, pad iko mebpeng pupuKu na nalan!

¹⁸Pekak nebpa, kareb luk kudeng ini, Ui ngacing udan batu luk pelaba ula', luk nateh nekali' Masir rat mon macing aco sini.

¹⁹Idi nekini ngecuk nelun ngamung amung aya'mu — idi anun-anun luk iko kuan bang laman, iamo' amung lemulun idi pung luk bal selipa luk na imung bang ruma', ideh miak maté kareb udan batu ineh!"

²⁰Idi idé-idé rat arang lun tareh raca' luk matot inan bala Tuhan ineh, nengusu amung lun dukenneh idi amung aya'neh semuet bang ruma'.

- ²¹Iamo' amung lemulun luk na nginita bala Tuhan ineh, nenima' amung lun tebarinneh idi amung aya'neh bal selipa.
- ²²Idi kebala Tuhan ni Musa, "Ngiding langemu pad inan udan batu maput bawang Masir, idi pa luun lemulun, idi pung, idi amung-amung tibu apud bawang Masir."
- ²³Idi Musa nengegenang rukudneh, idi Tuhan nenganau' lalam, udan batu, idi kilep luun tana'. Idi Tuhan nenganau'
- ²⁴udan batu ineh puar-puar ku kilep, idi na tu luk kudeng ineh mangun bang bawang Masir rat kareb ideh mangun ku sebuleng pupu.
- ²⁵Idi apud bawang Masir amung-amung luk iléi rat bang ruma' nedat neketukan udan batu ineh, lemulun macing ku pung dengan amung-amung tibu, idi lawa kayuh pana'.
- ²⁶Iamo' bawang Gosen, su luk inan lun Israil tebawang ineh, na udan batu.
- ²⁷Idi raca' nengecuk nawar ni Musa idi Arun, idi kebalaneh nedidueh, "Idi ui sala' tu-tu sekua' ini. Tuhan ineh luk matu. Iamo' ui ini idi anak itinku mesala'.
- ²⁸Do' sembayang inan Tuhan, pad lalam idi udan batu ini ugka'. Ui miak nima' nemuyuh nalan. Na ui ngimet nemuyuh peh."
- ²⁹Idi kebala Musa neneh, "Kareb ui remuat rat bang bawang ini, ui ngegenang ticu'ku mo' pa kiung Tuhan, pad uni lalam ineh ugka', idi udan batu ineh pana' mato, pad iko kali' tana' ini Tuhan kuan.
- ³⁰Iamo' ui kali' namu idi amung lun tarehmu nateh muyuh matot pa kiung Tuhan Allah."
- ³¹Idi amung lawa rami idi ikun nelapi ku udan batu ineh, ngaceku ikun ineh batek riut, idi rami ineh inan tulang.
- ³²Iamo' amung dalé idi binamud na nelapi ngaceku nateh karebneh kebatek.

³³Idi Musa neburo rat pa kiung raca', idi neremuat rat bang bawang ineh. Idi ieh nengegenang langenneh idi sembayang inan Tuhan, idi uni lalam ineh nugka', idi udan batu, idi udan pana' nato peh.

³⁴Idi raca' nenier udan batu idi lalam pangeh nugka', idi ieh lemubed nganau' sala', pad niatneh metueh, do' ieh idi amung lun tarehneh pana'.

³⁵Kudeng ineh tueh niat raca', pad ieh na nima' nelun Israil ineh nalan, maya' kudeng luk bila Tuhan dengan tang Musa.

Pura' 10

¹Kebala Tuhan ni Musa, "Amé' iko papu' raca'. Ui pangeh nengetueh niatneh idi niat amung lun tarehneh pana', pad Ui miak nganau' tanu'Ku ini arangdeh,

²pad ini miak belénmu macing inan anak inulmu ratnan luk inau'Ku kuan lun Masir, kareb Ui nengigu' nedeh dengan tanu' luk inau'Ku arangdeh. Idi amung muyuh miak kali' Ui ini Tuhan."

³Musa idi Arun iné' papu' raca', idi kebala didueh neneh, "Kebala Tuhan Allah lun Iberani, 'Tuda' io teh iko ara' maya' bala Allah. Nima' pupu'Ku ini nalan idi sembayang Negku.

⁴Kudeng iko na nima' nedeh nalan, kali' rungen pekak nebpa Ui ngacing kato aput bawangmu.

⁵Idi kato ineh pelaba' ula', pad mapen tana'. Ideh miak kuman amung-amung luk ketecan kareb udan batu pangeh nato, dengan kayuh pana'.

⁶Idi kato ineh teh ngaput bang ruma'mu, idi amung ruma' lun tarehmu, idi ruma' lun Masir pana'. Luk kudeng ini na tu nekali' taman idi tepun muyuh rat muyuh tinganak pad macing aco sini.' " Idi Musa neburo.

⁷Idi kebala lun tareh raca' neneh, "Tuda' io lun ini ngesusa' netau? Do' iko maré nedeh nalan, pelé ideh sembayang inan Tuhan Allah! Naké iko nekali' bawang Masir ini pangeh nekedat?"

⁸Idi ideh nenguit ni Musa idi Arun lemubed amé' pa kiung raca', idi kebalaneh nedidueh, "Nalan muyuh idi sembayang inan Tuhan Allah muyuh! Iamo' idé luk pian amé'?"

⁹Idi kebala Musa, "Amung kai amé' dengan anak-anak dari idi lun rayeh teh. Kai pian nguit anak-anak kai luk deléi idi decur dengan dumba, amék, idi sapi' kai teh, ngaceku kai pian nganau' aceh irau pad ngerayeh Tuhan."

¹⁰Idi raca' nepebala nedidueh, "Ui pebulung ku ngadan Tuhan: Na ui maré nemuyuh nguit decur idi anak-anak muyuh. Nekini megala' muyuh pian nganau' luk dat.

¹¹Na! Deléi muyuh mo' miak amé' sembayang inan Tuhan, kudeng ini luk pian muyuh." Idi ideh nengusu nedidueh rat pa kiung raca'.

¹²Idi Tuhan nepebala ni Musa, "Ngegenang langenmu pa luun bawang Masir, pad kato ineh umak idi kuman amung-amung tibu luk ketecan luun tana' pangeh udan batu ineh."

¹³Idi Musa nengegenang rukudneh pa luun bawang Masir. Idi Tuhan nengacing aceh barui rat pa busat aco bang bawang Masir seaco idi sedacem kinioneh. Idi pekak uka-uka bui nemalid amung-amung kato.

¹⁴Idi kato ineh numak apud bawang Masir idi netemurun bang anid-anid babpat bawang Masir pelaba ula'. Idi atun na inan kato luk kudeng ini. Idi mucu aco pana' nateh luk kudeng ineh.

¹⁵Ideh nengapud amung tana', pad bawang ineh mepapen. Idi amung tibu-tibu idi luk neketecan pangeh udan batu, nabud kinan kato ineh. Idi sesuut pana' luk mebata' nateh luk ketecan luun batang kayuh, idi luun amung-amung tibu mapud bawang Masir.

¹⁶Idi dengan mesagat raca' nenawar ni Musa idi Arun, kebalaneh, "Ui pangeh mesala' inan Tuhan Allah muyuh idi nemuyuh pana'.

¹⁷Idi nekini maré do' ku sala'ku sekua' ini, idi sembayang inan Tuhan Allah muyuh, pad até ini buro rat negku."

- ¹⁸Idi Musa nenalan rat pa kiung raca', idi ieh nesembayang inan Tuhan.
- ¹⁹Idi Tuhan nenurun bui rat pa acep aco luk pelaba tueh. Idi amung kato ineh pinalidneh idi nebpeh bang Abpa' Pisui. Sebuleng kato pana' nateh luk neketecan aput bawang Masir.
- ²⁰Iamo' Tuhan nengetueh niat raca' teh pad ieh na nima' nelun Israil nalan.
- ²¹Kebala Tuhan ni Musa, "Ngegenang langenmu idi mangun medacem bang bawang Masir, pad lemulun perikekap bang dacem ineh."
- ²²Idi Musa nengegenang langenneh, idi macing dacem luk pelaba pingot aput bawang Masir teluh aco kinioneh.
- ²³Idi seburur pana' na miak nier luk baken. Idi seburur pana' nateh luk nenalan teluh aco kinioneh. Iamo' kuan lun Israil inan acang bang amung su luk inandeh tudo.
- ²⁴Idi raca' nenawar ni Musa, kebalaneh, "Nalan muyuh idi sembayang inan Tuhan. Iamo' amung-amung aya' muyuh aga'deh ketecan ieni. Iamo' decur idi anak-anak muyuh miak amé' maya' nemuyuh."
- ²⁵Iamo' kebala Musa, "Na miak na iko maré pung luk kereten iten kai luk miak barén kai inan Tuhan Allah kai.
- ²⁶Na, kai pian nguit amung aya' kai — sebuleng pana' nateh luk tacin. Kai sebuleng miak mili' pung luk barén kai inan Tuhan Allah kai. Kareb nateh kai macing déi', na kai kali' anun luk miak barén kai Neneh."
- ²⁷Iamo' Tuhan nengetueh niat raca', pad ieh na nima' nedeh nalan.
- ²⁸Idi kebalaneh ni Musa, "Buro iko rat pa kiungku. Aleg iko papu' negku baruh peh. Ngaceku kareb iko nier negku, iko miak maté."
- ²⁹Idi kebala Musa, "Pad pianmu. Na tu-tu iko miak nier negku peh!"

Pura' 11

- ¹Idi kebala Tuhan ni Musa, "Sebuleng teh dereh luk ruenKu ngacing kuan raca' Masir idi anak itinneh. Pangeh ineh ieh miak nima' nemuyuh nalan. Setuneh ieh miak ngusu nemuyuh rat ieni.

²Idi nekini do' ngecuk nelun Israil mutuh rat nelun luk inandeh pekalai, amas idi pirak."

³Idi Tuhan nemaré nedeh ineh inan lun Masir méi'. Meluun teh Musa ineh selemulun luk mebala bang bawang Masir, ieh ineh pa kiung amung tareh raca' idi anak itin raca' pana'.

⁴Idi kebala Musa nan raca', "Bala Tuhan kudeng ini: Kareb tangal dacem Ui sikal remuat ngelibut bawang Masir.

⁵Idi amung anak luk atun bang bawang Masir ineh maté, ratnan anak raca' luk miak ngelibal raca' macing inan anak decur luk demulun luk tupeh déi' lepo, idi amung anak pung luk atun teh.

⁶Idi miak inan tangi' luk rayeh maput bawang Masir, na luk kudeng ineh mangun atun mepad kudeng tido ineh, idi mucu pana' nateh luk kudeng ineh.

⁷Iamo' arang amung lun Israil sebuleng uko' pana' nateh mekuu' mangang, do' inan lemulun, idi inan pung pana', pad muyuh kali' Tuhan nganau' baken arang lun Masir idi lun Israil."

⁸Idi kebala Musa, "Amung lun tarehmu ini miak amé' negku idi tekeradung negku idi pebala, 'Buro iko, dengan amung anak itin luk maya' namu.' Pangeh ineh miak ui buro." Idi Musa neremuat rat pa kiung raca' dengan megateh niat.

⁹Kebala Tuhan ni Musa, "Raca' na tu sikal maya' balamu, pad tanu'-tanu'Ku luk melalud meluun mula' bang bawang Masir."

¹⁰Musa idi Arun pangeh nenganau' mula' tanu' luk melalud pa kiung raca', iamo' Tuhan nengetueh niatneh pad ieh na nemaré nelun Israil remuat rat bang bawangneh.

Pura' 12

¹Kebala Tuhan ni Musa idi Arun déi' bawang Masir,

²"Bulan ini mangun ku bulan luk pun-pun kuan muyuh bang anid-anid lak.

³Mada' kuan amung-amung lun Israil kudeng ini: Kareb pulu' aco bulan ini, do' anid-anid muyuh ngalap sebuleng anak dumba maya' kinula' bang tetek ruma', ieh ineh sebuleng anak dumba kuan seruma'.

⁴Iamo' kudeng setetek na petap ula' ngalap sebuleng dumba, do' ieh pamung dengan lemulun luk pelengit ruma' neneh. Do' maya' kinula' uang ruma', pad dumba ineh mabud kenendeh amung.

⁵Idi do' ngalap aceh anak dumba, kian anak amék lek luk do' ulun, ieh ineh deléi luk ulun selak.

⁶Do' muyuh ngata neneh macing aco luk kepulu' apat bulan ini. Idi do' amung-amung lun Israil ngeret anak dumba ineh kareb malem aco.

⁷Idi dara'neh lapen idi ruen ngisit mop munung tanga' idi pa dita' teh, ieh ineh bang ruma' luk inandeh kuman.

⁸Idi alem ineh do' ideh kuman uang luk didang luun apui dengan ruti luk na pinuar ku lamud idi dengan irin luk mepét.

⁹Aleg muyuh kuman neneh mata' idi tinanek, iamo' do' ieh dedangen dengan uluhneh, kukudneh, idi tinéi' neh.

¹⁰Iamo' aleg muyuh necan tecehneh macing pekak. Do' ngeseb ineh.

¹¹Idi do' muyuh kuman ineh dengan mesaget: dengan awa' muyuh betin, kukud muyuh inan kasut, idi rukud bang palad muyuh. Ieh ineh Irau Paska Tuhan.

¹²"Bang alem ineh Ui lemaba bawang Masir, idi ngaté anak luk atun, lemulun macing ku pung. Ui ngacing ukumKu kuan amung akang lun Masir. Ui ini Tuhan.

¹³Idi dara' luk munung tanga' ineh mangun ku aceh tanu', pad ngegala' anid-anid ruma' su luk inan muyuh. Kareb Ui nier dara' ineh, idi Ui lemaba nemuyuh, pad dereh ineh na miak ngedat nemuyuh kareb Ui ngukum bawang Masir ineh.

¹⁴Idi aco sini mangun ku aceh terawé kuan muyuh. Do' muyuh ngerayeh aco sineh kuan Tuhan macing ruked-ruked.

¹⁵"Do' muyuh kuman ruti luk na pinuar ku lamud tudu' aco kinioneh. Iamo' aco luk pun-pun do' muyuh nala' amung lamud rat bang ruma' muyuh. Ngaceku lemulun luk kuman luk pinuar ku lamud kareb aco luk pun-pun macing aco luk ketudu' ineh, ieh miak uen ngatad rat arang lun Israil.

¹⁶Idi kareb aco luk pun-pun, idi aco luk ketudu' pana', inan teubupun sembayang. Bang aco sineh na muyuh miak ngakem. Iamo' anun luk kenen miak ruen muyuh.

¹⁷Do' ngimet aco luk inan kuman ruti luk na lamud, ngaceku aco sineh Ui nguit amung baweh muyuh remuat rat bang bawang Masir. Iamo' ngimet muyuh aco sineh macing ku anak inul, mangun ku aceh terawé luk meruked.

¹⁸Pulu' apat aco bulan luk pun-pun, kareb malem aco, do' muyuh kuman ruti luk na pinuar ku lamud pad macing dueh ngepulu' aceh aco bulan kareb malem.

¹⁹⁻²⁰Tudu' aco kinioneh na miak inan lamud bang ruma' muyuh, ngaceku idé luk kuman luk pinuar ku lamud, ieh uen ngatad rat arang lun Israil, do' ieh lun sakai, do' ieh lun Israil pana'."

²¹Musa nenawar amung lun rayeh-rayeh Israil, idi kebalaneh nedeh, "Mili' anak dumba kian amék lek, kuan anid-anid ruma' muyuh, kereten ku Irau Paska ineh.

²²Idi lapen muyuh sengangel likudung, idi ngerereb ineh bang dara' luk bang bigan, idi ngisit dara' luk bang bigan ineh pekop tanga' idi pa dita' teh. Idi muyuh na miak remuat rat bang tanga' ruma' macing pekak.

²³Idi kareb Tuhan lemaba bawang Masir idi ngaté nelun Masir, idi Ieh nier inan dara' pekop tanga' idi pa dita' teh, idi Tuhan sikal lemaba tanga' ineh, pad Ieh na maré Luk Ngaté semuet bang ruma' muyuh.

²⁴Do' muyuh idi anak-anak muyuh maya' ukum ini macing ruked-ruked.

- ²⁵Kareb muyuh semuet bang bawang luk barén Tuhan nemuyuh, do' muyuh maya' kudeng luk bilaNeh, na miak na muyuh ngimet dalam ini.
- ²⁶Idi mucu kareb anak-anak muyuh ngitun nemuyuh, 'Anunké ilungneh luk ruen muyuh ini?'
- ²⁷do' muyuh ngor, 'Ini Irau Paska kuan Tuhan luk pangeh lemaba anid ruma' lun Israil bang bawang Masir, kareb Ieh nengaté nelun Masir, iamo' Ieh neméi' netau.' " Idi lun Israil netekeradung idi nesembayang.
- ²⁸Idi ideh iné' idi nenganau' maya' kudeng luk bila Tuhan ni Musa idi Arun.
- ²⁹Idi kareb tangal daceM Tuhan nengaté amung anak luk atun bang bawang Masir, do' anak raca' luk miak ngelibal neneh mangun ku raca' macing ku anak lun luk bang tutup, idi amung anak pung luk atun teh.
- ³⁰Kareb daceM ineh idi raca' nekulat dengan amung lun tarehneh idi amung lun Masir — ngaceku inan tido aput bawang Masir. Ngaceku bang anid-anid tetek ruma' inan lun naté.
- ³¹Idi raca' nenawar ni Musa idi Arun bang alem ineh, kebalaneh, "Gugkang muyuh idi nalan rat arang anak itinku, do' muyuh idi lun Israil, idi sembayang inan Tuhan, maya' kudeng luk pinutuh muyuh.
- ³²Idi amung amék, dumba, idi sapi' muyuh pana' iten, maya' kudeng luk pinutuh muyuh! Amé' muyuh idi sembayang kuanku teh!"
- ³³Idi lun Masir nengecuk nelun mula' ineh remuat rat bang bawang Masir dengan mesaget, kebaladeh, "Kai maté kudeng muyuh na nalan."
- ³⁴Idi lun mula' ineh nenguit banak luk na lamud bang su luk inandeh nganau' ruti, idi tinga luun kibung pa luun tudungdeh.
- ³⁵Idi lun Israil pangeh nenganau' luk icuk Musa, idi pinutuhdeh rat nelun Masir, amas, pirak, idi ayung.
- ³⁶Idi Tuhan nemaré nedeh inan lun Masir méi', pad ideh miak maré luk pinutuhdeh. Kudeng ineh lawéneh lun Israil nengaro binaweh lun Masir.

- ³⁷Idi lun Israil nenalan rat Ramsis macing déi' Sukot, ieh ineh 600,000 lun deléi, baken ratnan decur idi anak.
- ³⁸Idi inan lun pupu baken nemaya' nedeh, idi teh mula' amék, dumba, idi sapi'.
- ³⁹Banak luk inuitdeh rat Masir didang mangun ku ruti luk na lamud. Banak ineh na lamud, ngaceku ideh inusu rat bawang Masir na miak ngisiden. Ngaceku ineh ideh na petap balu'.
- ⁴⁰Kinioneheh lun Israil tudo déi' Masir 430 lak.
- ⁴¹Idi mangun kareb kekiped 430 lak ineh, idi aco sineh neremuat amung baweh Tuhan rat bawang Masir.
- ⁴²Bang daceh ineh, ieh ineh daceh luk inan Tuhan ngingulat pad Ieh miak nated nedeh remuat rat bang bawang Masir. Ieh ineh daceh Tuhan miak uen lun Israil ngerayeh idi uen ngingulat, macing ku anak inul.
- ⁴³Idi kebala Tuhan ni Musa idi Arun, "Ini ukum Paska ineh: Lun pupu baken na miak kuman ineh,
- ⁴⁴iamo' demulun luk bilihmu dengan usin mo' miak kuman ineh kudeng ideh pangeh sinunat.
- ⁴⁵Idi lun sakai idi lun tebarin na miak kuman ineh.
- ⁴⁶Idi do' ineh kenen bang ruma' luk inanneh tinina'. Aleg muyuh nguit uang ineh remuat rat bang ruma' ineh. Idi sebuleng tulang pana' aleg mutul neneh.
- ⁴⁷Do' amung lun Israil ngerayeh irau ineh.
- ⁴⁸Lun luk na sinunat na miak kuman ineh. Kudeng aceh lun pupu baken luk tudo arang muyuh pian ngimet Paska ineh kuan Tuhan, nima' amung deléi uen nunat atun. Ieh pana' mepad kudeng amung lun luk kuan bawang.
- ⁴⁹Inan aceh ukum kuan lun Israil idi lun sakai luk tudo arang muyuh."
- ⁵⁰Idi amung lun Israil nenganau' maya' kudeng luk bila Tuhan ni Musa idi Arun.

⁵¹Kareb aco sineh teh Tuhan nenated amung lun Israil remuat rat bang bawang Masir, maya' bawehdeh.

Pura' 13

¹Kebala Tuhan ni Musa,

²"Ngeligan amung anak deléi luk atun kuanKu. Anid anak deléi lun Israil luk atun, idi anak pung luk atun pana', Ui luk kuan nedeh."

³Idi kebala Musa nelun mula', "Ngerawé muyuh aco sini, ieh ineh aco luk inan muyuh mepura' rat Masir, rat su luk inan muyuh tiban. Dengan laludNeh Tuhan nguit nemuyuh mepura' rat ieni. Ruti luk pinuar ku lamud ineh na miak kenen.

⁴Muyuh remuat rat bang bawang Masir aco sini teh, ieh ineh aceh aco bulan Abib.

⁵Idi Tuhan nepejani' nan tepun muyuh maré tana' lun Kanaani, lun Hiti, lun Amori, lun Hiwi, idi lun Yebusi nemuyuh. Tana' ineh do' idi mebaleng. Kareb ieh nguit nemuyuh semuet bang bawang ineh, idi do' muyuh ngerayeh irau ini bang bulan luk pun-pun anid lak.

⁶Tudu' aco kinioneh, do' muyuh kuman ruti luk na lamud. Idi aco luk ketudu' ineh mangun ku aceh aco rayeh kuan Tuhan.

⁷Tudu' aco kinioneh, do' muyuh kuman ruti luk na lamud. Sesuut pana' luk pinuar ku lamud nateh miak siren muyuh aput bawang muyuh.

⁸Kareb pun irau ineh, do' muyuh mada' kuan anak deléi muyuh, kebala muyuh, 'Amung ini luk inau' Tuhan kuanku kareb ui neremuat rat bang bawang Masir.'

⁹Nima' ini mangun mepad kudeng aceh tanu' luun ticu'mu, idi aceh terawé luun madu'mu — pad iko megéi' pebala ratnan ukum Tuhan — ngaceku dengan laludNeh, Tuhan pangeh nenguit namu remuat rat bang bawang Masir.

¹⁰Do' muyuh ngimet dalam ini luk litep karebneh anid-anid lak."

¹¹"Tuhan miak nguit nemuyuh semuet bang bawang lun Kanaani, maya' kudeng luk pijani' inan tepun muyuh. Kareb bawang ineh pangeh biréNeh nemuyuh,

¹²idi na miak na muyuh maré inan Tuhan amung anak deléi luk atun. Idi teh amung anak deléi aya' muyuh luk atun, Tuhan kuan.

¹³Iamo' amung anak deléi keladai muyuh luk atun uen ngelibal ku anak dumba. Kudeng ayu muyuh na nguli' neneh, na miak na muyuh mutul dierneh. Iamo' ratnan lemulun, amung anak deléi luk atun, do' muyuh nguli'.

¹⁴Idi mucu kareb anak muyuh ngitun nemuyuh, 'Anunké ini?' do' muyuh mada' nedeh, 'Tuhan nenated nekai remuat rat bang bawang Masir rat su luk inan kai tiban ineh ku ticu' luk melalud.

¹⁵Idi kareb raca' Masir pangeh metueh niat na nemarké nekai nalan, idi Tuhan nengaté amung anak deléi luk atun bang bawang Masir, anak lemulun luk atun macing ku anak pung luk atun. Ngaceku ineh ui maré inan Tuhan amung deléi ratnan amung pung luk tinganak pun-pun. Iamo' amung anak deléiku luk atun ineh uenku nguli'.'

¹⁶Nima' ini mangun ku tanu' luun ticu'mu idi ku tanu' siren luun madu'mu, ngaceku Tuhan pangeh nenated nekai remuat rat bang bawang Masir ku ticu' luk melalud.' "

¹⁷Kareb raca' Masir nemarké nelun mula' nalan, idi Allah na nated nedeh maya' dalam bawang lun Pilistin, sagan tu pana' muneng, ngaceku terawé Allah, "Na Ui pian lun mula' ineh nginuud idi lemubed amé' bawang Masir, kareb ideh nier bunu'."

¹⁸Iamo' Allah nenated nedeh inan lisangen dalam luk amé' déi' su luk ali-ali muneng ku Abpa' Pisui. Idi lun Israil ineh pana' nenalan remuat rat bawang Masir dengan ayung pebunu'.

¹⁹Idi Musa nenguit amung tulang Yusup maya' nedeh. Ngaceku Yusup neperiteteng nelun Israil, pad ideh nepejani' nganau' kudeng ineh. Kebala

Yusup, "Kareb Allah muit nemuyuh, do' muyuh nguit tulangku maya' nemuyuh rat ieni."

²⁰Idi ideh nenalan rat Sukot idi nucu' déi' Etam, muneng ku su luk ali-ali ineh.

²¹"Idi kareb acang aco Tuhan nenalan pa atundeh, bang aceh diri laput, pad nguyut nedeh nalan, idi kareb medacem bang aceh diri apui pelé ngacang nedeh pad ideh miak nalan, do' macang idi medacem pana'.

²²Idi diri laput ineh kareb macang aco, idi diri apui ineh kareb medacem na tu milep pa kiung pupu ineh.

Pura' 14

¹Kebala Tuhan ni Musa,

²"Ngecuk nelun Israil lemubed idi lupu pa atun Pi Hakirot, arang Migedol idi Abpa' Pisui, muneng ku Baal Sepon.

³Idi raca' Masir miak ngerawé nelun Israil pangeh neraruh déi' bawang ineh, idi ideh neta su luk ali-ali.

⁴Ui ngetueh niat raca' pad ieh miak ngerada' nedeh, idi Ui ngelaya' neneh idi amung bawehneh. Ui sikal ngegala' laludKu, pad lun Masir ineh kali' Ui ini Tuhan." Idi lun Israil nenganau' maya' kudeng luk bila Tuhan.

⁵Kareb raca' Masir pangeh nekali' pupu ineh pangeh neburo, idi niat raca' idi lun tarehneh nepekisu', kebaladeh, "Anunké luk mau' tau? Tau nenima' demulun tau lun Israil buro."

⁶Idi raca' nengecuk nedeh netemina' ku kerétaneh idi bawehneh.

⁷Idi ieh nenguit anem ngeratu keréta luk meluun do', idi amung keréta luk baken dengan amung lun luk ngimet keréta teh.

⁸Idi Tuhan nengetueh niat raca' Masir, pad ieh nengerada' nelun Israil, kareb ideh nepura' maya' kuyut Tuhan.

⁹Idi lun Masir dengan amung kuda, keréta, lun luk maya' kuda, idi baweh raca', nengerada' nedeh, idi nengigket nedeh kareb ideh nelupo tangeb abpa' muneng ku Pi Hakirot idi Baal Sepon.

¹⁰Kareb lun Israil nenier raca' Masir idi bawehneh amé' matun nedeh, idi ideh pelaba tot, idi ideh ngitang-ngitang nan Tuhan.

¹¹Kebaladeh ni Musa, "Naké inan tanem déi' Masir, pad iko nguit nekai maté déi' su luk ali-ali? Anunk'e luk inau'mu nekai, pad iko nguit nekai remuat rat bang bawang Masir?"

¹²Naké kai nekidi namu déi' bawang Masir, 'Aleg ngagau nekai. Nima' nekai ngakem kuan lun Masir?' Ngaceku meluun do' kai ngakem kuan lun Masir ratnan kai maté déi' su luk ali-ali."

¹³Iamo' kebala Musa nedeh, "Aleg muyuh matot! Tuped meraben, idi nier puit luk ratnan Tuhan luk Ieh maré aco sini kuan muyuh. Ngaceku lun Masir luk muyuh nier aco sini, na muyuh miak nier nedeh raked-raked.

¹⁴Tuhan luk pebunu' libal muyuh, idi muyuh ungeng mo'!"

¹⁵Idi kebala Tuhan ni Musa, "Ngudehké iko ngitang mutuh pedengan? Ngecuk nelun Israil nalan.

¹⁶Ngegenang rukudmu pa luun abpa'. Idi abpa' ineh miak mepatad, pad lun Israil nalan uned abpa' ineh su luk metekering.

¹⁷Iamo' Ui ngetueh niat lun Masir, pad ideh miak ngerada' nelun Israil, idi ngelaya' raca' Masir idi amung bawehneh, kerétaneh, idi lunneh luk maya' kuda.

¹⁸Kareb Ui ngelaya' nedeh, idi lun Masir miak kali' Ui ini Tuhan."

¹⁹Idi melaikat Allah luk nalan pa atun baweh Israil, nemubuh iné' pa puet. Idi teh diri laput ineh pana' nemubuh rat pa atundeh,

²⁰pad diri ineh netuped arang baweh lun Masir idi lun Israil. Laput ineh nengedacem nelun Masir ineh, iamo' ieh nemaré acang nelun Israil, pad baweh dueh pupu ineh na miak mepapu' kedangen-kedangen ineh.

²¹Musa nengegenang tiku'neh pa luun abpa'. Idi Tuhan nengelubed abpa' ineh ku aceh bui luk metueh rat pa busat aco kedangen-kedangen ineh. Idi abpa' pana' nepatad.

²²Idi lun Israil nemaya' su luk netekering ineh. Idi abpa' ineh pa tinueh idi pa kabingdeh mepad kudeng alad.

²³Lun Masir nengerada' nedeh macing ku uned abpa' ineh, dengan amung kuda, keréta, idi lun luk ngimet keréta ineh.

²⁴Iamo' kareb nateh masat aco, idi Tuhan nenier baweh lun Masir rat bang diri apui idi laput ineh. Idi Ieh nengagap baweh lun Masir ineh pad ideh megagau.

²⁵Idi Ieh nengangka' roda amung kerétadeh, pad na miak mawer. Idi kebala lun Masir, "Do' tau buro rat pa kiung lun Israil, ngaceku Tuhan luk pebunu' netau ku libaldeh."

²⁶Kebala Tuhan ni Musa, "Ngegenang langenmu pa luun abpa', pad abpa' ineh lemubed pa luun amung lun Masir dengan amung kerétadeh idi lun luk ngimet keréta ineh."

²⁷Idi Musa nengegenang langenneh pa luun abpa', pad abpa' ineh pana' nepetuneb peh, ieh ineh kareb aco masat. Idi lun Masir nutun buro rat bang abpa' ineh. Iamo' Tuhan nenala' nedeh bang abpa'.

²⁸Kareb abpa' ineh nepetuneb idi amung keréta ineh inereb, dengan lun luk ngimet keréta idi amung baweh raca' Masir luk pangeh nengerada' nelun Israil macing bang abpa' ineh. Sebuleng pana' rat arangdeh nateh luk mulun.

²⁹Iamo' amung lun Israil nenalan su luk netekering uned abpa'. Idi abpa' ineh mangun ku aceh aladdeh pa tinueh idi pa kabingdeh.

³⁰Bang aco sineh Tuhan nemuit nelun Israil rat bang palad lun Masir. Idi lun Israil nenier nelun Masir nabud naté nened bang abpa'.

³¹Idi kareb ideh nenier tanu' luk melalud luk inau' Tuhan kuan lun Masir ineh, idi ideh matot inan Tuhan. Idi ideh manu inan Tuhan idi ni Musa, demulunNeh ineh.

Pura' 15

¹Kareb ineh Musa idi lun Israil nemenani nani ini kuan Tuhan: "Ui sikal menani kuan Tuhan, ngaceku rayeh tu laludNeh; pangeh Ieh nemepet kuda dengan lun luk maya' ineh bang abpa'.

²Tuhan ineh tuehku; idi Ieh luk nengulun negku. Ieh ineh Allahku, idi ui sikal ngubur Neneh. Ieh Allah tamanku, idi ui sikal ngerayeh Neneh.

³Idi Tuhan ineh Lun Rayeh Baweh; Tuhan, ieh ineh ngadanNeh.

⁴"Amung baweh Masir dengan kerétadeh pangeh tila'Neh bang abpa' rayeh. Idi lun rayehneh luk meluun tueh pangeh tiremNeh bang Abpa' Pisui.

⁵Abpa' rayeh pangeh nengereb nedeh. Ideh mepad kudeng tarem batu bang ribaruh.

⁶O Tuhan, rayeh lalud langenMu pa tinueh. Ku ineh Iko pangeh nengelaya' amung bunu'!

⁷Dengan rayeh laludMu, Iko pangeh nengaté amung bunu'Mu. UsehMu mebudung pad ngeseb nedeh, mepad kudeng uduh luk tekering.

⁸Iko nengiuip luun abpa' rayeh, pad abpa' kemubul. Idi abpa' ineh tuped mepad kudeng alad; amung lipak nugkeng uned abpa' ineh.

⁹Idi kebala bunu' ineh, 'Ui ngerada' nedeh, pad ngigket nedeh; ui mabpat binawehdeh, idi ngalap luk pianku. Ui ngangat pelapetku; langenku miak ngaté nedeh.'

¹⁰Iamo' Iko nemebper buiMu, pad lun Masir ineh nened. Ideh neturem mepad kudeng semara' bang lipak luk rayeh.

¹¹"O Tuhan, idé luk mepad kudeng Iko arang amung allah? Idé luk mepad kudeng Iko, luk rayeh bang ligan? Idé luk nganau' tanu' idi kekamen luk melalud mepad kudeng luk inau'Mu?

- ¹²Iko natang langenMu pa tinueh, pad tana' nenelen bunu' kai.
- ¹³Dengan awaMu Iko nguyut pupu luk pangeh inuli'Mu. Dengan tuehMu Iko nguyut nedeh macing inan su luk inanMu luk meligan.
- ¹⁴Amung pupu ninger, pad ideh megegker. Idi lun Pilistin pelaba tot.
- ¹⁵Idi lun rayeh-rayeh Edom matot; idi lun rayeh-rayeh Moab pana' megegker; idi lun Kanaani pana' na mekuu' peh.
- ¹⁶Gagap idi gegker macing nedeh. Ideh nier tuehMu O Tuhan, pad ideh melaya' ku totdeh, pad macing amung pupuMu guta, O Tuhan, idi amung pupuMu semuet bang bawang Kanaan.
- ¹⁷Iko nguit nedeh semuet idi ngeletap nedeh luun surudMu, su luk pijani'Mu inanMu mudeng, O Tuhan, Su luk Meligan luk pangeh riniput ticu'Mu.
- ¹⁸O Tuhan, Iko raca' macing ruked-ruked.”
- ¹⁹Lun Israil nenalan su luk netekering nan uned abpa' ineh. Iamo' kareb keréta lun Masir, dengan kuda idi lun luk ngimet ineh nacing bang abpa', idi Tuhan nengelubed abpa' pa luundeh.
- ²⁰Idi Nabi Miriam, kinanak Arun luk decur ineh, nengalap karingneh, idi amung decur pana' nemaya' neneh, idi ngura' karing idi ngalai.
- ²¹Idi Miriam menani kuandeh, kenanineh, "Ngubur Tuhan ngaceku pelaba rayeh laludNeh. Kuda idi lun luk tudo luunneh, pangeh tila'Neh bang abpa'.”
- ²²Pangeh ineh idi Musa nenguit nelun Israil nalan rat Abpa' Pisui ineh, macing déi' su luk ali-ali luk titen Sur. Idi ideh nenalan déi' su luk ali-ali ineh teluh aco kinioneh. Iamo' na luk idi abpa'.
- ²³Idi ideh nacing déi' Mara, su luk inan abpa' luk mepét pad na miak rupen. Ngaceku ineh ideh neneten ngadan su ineh Mara.
- ²⁴Kareb ineh idi pupu ineh ngedureng ni Musa, kebaladeh, "Anunké luk rupen tau?”

²⁵Idi Musa nesembayang inan Tuhan. Idi Tuhan nemada' su sireenneh aceh kayuh. Idi ieh nenganau' ineh bang abpa'. Petacu abpa' ineh metalang. Idi su ineh Tuhan nemaré ukum nedeh, idi su ineh teh Ieh nenutun nedeh.

²⁶KebalaNeh nedeh, "Kudeng matu-matu muyuh maya' balaKu idi nganau' luk matu pa kiungKu idi ngimet amung ukumKu, na Ui ngukum nemuyuh ku ét luk icingKu kuan lun Masir ineh. Ui ini Tuhan luk ngedo' ét muyuh."

²⁷Idi ideh nacing déi' Elim. Su ineh inan pulu' dueh bued abpa' idi tudu' ngepulu' lawa piasau. Idi ideh nelupo su ineh muneng ku abpa' ineh.

Pura' 16

¹Amung lun Israil nenalan rat Elim, idi pulu' limeh aco bulan luk kedueh litad ideh nenalan rat Masir, idi ideh nacing su luk ali-ali déi' Sin, luk arang Elim idi Sinai.

²Déi' su luk ali-ali ineh amungdeh nengedureng ni Musa idi Arun.

³Kebaladeh nedidueh, "Adui! Meluun do' kai pinaté Tuhan déi' tana' Masir, kareb kai tudo iring periuk luk inan uang, idi kuman ruti pad mebor. Ngaceku medueh nenguit nekai amé' su luk ali-ali, pad ngaté amung kai ini dengan melau."

⁴Kebala Tuhan ni Musa, "Nekini Ui ngebpeh rat langit akan kuan muyuh, idi lun mula' miak remuat idi ngamung anid-anid aco petap kuan seaco pad Ui miak nutun nedeh, ku maya' ideh ukumKu, kian na.

⁵Idi kareb aco luk keanem, kareb ideh ngalak anun luk inuitdeh nuli', idi luk inuitdeh ineh dueh kua' ula' ratnan luk uendeh ngamung seaco."

⁶Idi kebala Musa idi Arun nelun Israil, "Malem ini muyuh miak kali' Tuhan luk pangeh nenguit nemuyuh remuat rat bang bawang Masir,

⁷idi pekak nebpa muyuh kali' rayeh Tuhan. Ieh pangeh neninger dureng muyuh Neneh. Baken muyuh ngedureng nekai dueh. Na kai dueh mekudeh ku ineh."

⁸Idi teh kebala Musa, "Tuhan miak maré nemuyuh kuman uang kareb pa malem, idi kuman ruti pad mebor, macing pekak, ngaceku Ieh pangeh neninger dureng muyuh Neneh. Kareb muyuh ngedureng nekai dueh, setuneh muyuh ngedureng nan Tuhan!"

⁹Idi kebala Musa ni Arun, "Ngecuk amung lun Israil tupid pa kiung Tuhan, ngaceku Ieh pangeh neninger durengdeh."

¹⁰Idi kareb uned Arun mada' nedeh, idi kiungdeh lemiget sium pa su luk ali-ali. Idi denak-denak rasat Tuhan nesilangan bang laput.

¹¹Idi kebala Tuhan ni Musa,

¹²"Ui pangeh neninger dureng lun Israil. Mada' nedeh, kebalamu, 'Idi kareb pun malem, muyuh miak kuman uang, idi kareb pa pekak muyuh miak kuman ruti pad macing mebor, pelé muyuh kali' Ui ini Tuhan Allah muyuh!"

¹³Kareb malem idi suit tetibung nacing, idi nengaput su luk inan nelupo ineh. Idi kareb pekak, inan ipup libut-libut lepodeh.

¹⁴Kareb ipup ineh netekering, idi inan luk ketecan luun tana' luk melipi mepad kudeng rara, kudeng ayu ipup teh.

¹⁵Kareb lun Israil nenier ineh, idi kebaladeh seburur inan seburur, "Anunké ini?" Kebala Musa nedeh, "Ini akan luk biré Tuhan kuan muyuh.

¹⁶Tuhan ngecuk ngamung ineh, anid-anid burur maya' kudeng apeh luk petap kuanneh. Anid-anid muyuh ngalap petap kuan uang leponeh, setangal gatang seburur."

¹⁷Idi lun Israil nenganau' kudeng ineh. Idi ideh nengamung, inan luk mula', inan luk sesuut.

¹⁸Kareb ideh nenguad ineh, idi lemulun luk nengamung mula' na miak uen ngela, idi lun luk nengamung sesuut na miak na petap. Anid-anid lemulun ngamung maya' luk petap.

¹⁹Idi kebala Musa nedeh, "Seburur pana' na miak necan elaneh macing pekak."

- ²⁰Iamo' inan teh luk na maya' bala Musa, idi nenecan elaneh macing pekak, pad inan uled idi mebuen. Idi Musa museh nedeh.
- ²¹Anid pekak ideh nengamung anid-anid burur maya' luk petap. Iamo' kareb aco mét idang, idi ieh nubpa'.
- ²²Idi aco luk keanem ideh nengamung akan ineh dueh kua' ula', segatang kuan anid-anid burur. Idi nacing amung lun rayeh idi nemaré kali' ni Musa.
- ²³Idi kebala Musa nedeh, "Ini luk bida' Tuhan: 'Nebpa Aco luk inan Mudeng, aco luk meligan kuan Tuhan. Akan luk pian muyuh dedangen, nadang neneh. Anun luk pian muyuh tinaken, nanek neneh. Idi amung elaneh nima' ieh su ineh, macing pekak nebpa.' "
- ²⁴Idi ideh nenima' neneh su luk inanneh macing pekak kenebpa kudeng luk bida' Musa nedeh. Idi na luk mebuen, idi na luk inan uled peh.
- ²⁵Idi kebala Musa, "Kuman ineh aco sini, ngaceku aco sini Aco Rayeh kuan Tuhan. Aco sini na muyuh miak ngalap ineh déi' natad.
- ²⁶Kinio anem aco mo' muyuh ngamung ineh. Iamo' kareb aco luk ketudu', ieh ineh Aco luk inan Mudeng, idi akan ineh na mebpeh aco sineh."
- ²⁷Iamo' kareb aco luk ketudu', sebuang lun Israil nenalan pian ngamung akan. Iamo' na luk ilapdeh.
- ²⁸Idi kebala Tuhan ni Musa, "Tuda' io muyuh na maya' balaKu?
- ²⁹Do' ngerawé, Ui ini Tuhan nemaré Aco luk inan Mudeng kuan muyuh. Ini punneh kareb aco anem Ui maré kuan muyuh ruti petap dueh aco. Do' muyuh tudo idi na nalan kareb aco luk ketudu' ineh."
- ³⁰Idi ideh nucu' aco luk ketudu'.
- ³¹Idi lun Israil neneten ngadan akan ineh manna. Ayuneh mepad kudeng aceh ilung luk medari idi mebuda', idi ieh mén mepad kudeng pinaram luk pinuar ku duru'.

³²Idi kebala Musa, "Tuhan nengecuk netau manu' aceh sidangur ku manna luk miak nugen kuan inul tau, pad ideh miak nier akan luk biréNeh kenen tau déi' su luk ali-ali, kareb Ieh nenguit netau remuat rat bang bawang Masir."

³³Kebala Musa ni Arun, "Ngalap aceh sidangur, idi nganau' setangal manna bang ineh. Idi ngerareng ineh pa kiung Tuhan, nugen kuan inul tau."

³⁴Maya' kudeng luk icuk Tuhan ni Musa, Arun nengerareng ineh pa atun Pati' Pejani', pad miak nugen peh.

³⁵Lun Israil nekuman manna apat ngepulu' lak kinioneh pad ideh nacing bawang Kanaan su luk inandeh tebawang.

(³⁶Idi setangal gatang, ieh ineh babpat pulu' uad luk pikaideh kareb ineh.)

Pura' 17

¹Idi amung lun Israil nenalan rat su luk ali-ali déi' Sin. Ideh mubuh maya' ecuk Tuhan. Idi ideh nelupo déi' Repidim. Iamo' na luk idi abpa' rupendeh.

²Idi ideh nengedureng ni Musa, kebaladeh, "Maré abpa' rupen kai." Iamo' kebala Musa nedeh, "Ngudeh muyuh ngedureng negku? Ngudeh muyuh nutun Tuhan?"

³Idi lun Israil pelaba paring. Idi ideh nengedureng ni Musa, kebaladeh, "Ngudehké iko nguit nekai remuat rat bang bawang Masir, pad ngaté nekai, dengan anak-anak kai idi aya' kai ku paring?"

⁴Idi Musa nesembayang inan Tuhan, kesembayangneh, "Anun luk ruenku kuan pupu ini? Na mio ideh mitung negku ku batu!"

⁵Idi kebala Tuhan ni Musa, "Nalan rat pa kiung pupu ineh idi nguit pebaya' namu tuda'-tuda' lun rayeh rat arang lun Israil ineh. Idi teh nguit rukudmu luk nepimabpet Abpa' Nil idi nalan.

⁶Idi Ui tured déi' pa luun pegkung batu luk déi' Sinai. Do' iko necat pegkung batu ineh, idi rat bang ineh abpa' remuat pad pupu ineh miak ngirup." Kudeng ineh luk inau' Musa pa kiung lun rayeh Israil.

⁷Idi su ineh titen "Tutun" idi "Kedalu," ngaceku lun Israil pangeh nepekedalu idi nenutun Tuhan, kebaladeh, "Inanké Tuhan arang tau, kian na?"

⁸Idi lun Amalek nacing idi pebunu' nelun Israil déi' Repidim.

⁹Idi kebala Musa ni Yusak, "Mili' tuda'-tuda' burur iten tau, idi amé' pebunu' nelun Amalek nebpa. Ui miak tupid luun buduk surud ineh, idi ngimet rukud luk biré Allah kuanku."

¹⁰Idi Yusak nenganau' maya' kudeng luk icuk Musa neneh idi iné' pebunu' nelun Amalek. Iamo' Musa, Arun, idi Hur pangeh numak luun buduk surud.

¹¹Idi kareb Musa nengegenang langenneh, lun Israil metueh. Iamo' kareb ieh nengererep langenneh, lun Amalek metueh.

¹²Kareb ticu' Musa merur, idi didueh nengalap sebuleng batu inanneh tudo. Didueh nengegenang langenneh, sebuleng selipa idi sebuleng selipa, pad langenneh na rurep macing aco macep.

¹³Idi Yusak nengelaya' nelun Amalek.

¹⁴Idi kebala Tuhan ni Musa, "Ngayud amung ini mangun ku aceh terawé, idi mada' ni Yusak: Ui miak ngelaya' nelun Amalek pad ideh na teruayen!"

¹⁵Idi Musa nemudut aceh bubpun idi neneten ineh, "Tuhan ineh bedéraKu."

¹⁶Kebalaneh, "Ngegenang ticu'mu pa luun bedéra Tuhan! Tuhan pebunu' nelun Amalek ineh macing ruked-ruked."

Pura' 18

¹Idi Yitro, iban Musa luk imam déi' Midian, neninger ratnan luk inau' Allah kuan i Musa idi kuan lun Israil, kareb Ieh nenguit nedeh remuat rat bang bawang Masir.

²Idi Yitro nenguit ni Sipora, awan Musa, luk ticanne ineh, iné' ni Musa,

³Idi anak deléineh luk dueh, ieh ineh Gersom idi Elieser. (Kebala Musa, "Ui ini mangun ku lun sakai bang bawang baken"; idi ieh neneten ngadan sebuleng anakneh, Gersom.

- ⁴Idi teh kebalaneh, "Allah tamanku nengedengan negku, pad ui nepuit ratnan pelapet raca' Masir"; idi ieh neneten ngadan sebuleng anakneh, Elieser.)
- ⁵Yitro nenated awan idi dueh anak deléi Musa nacing neneh déi' su luk ali-ali, su luk inan Musa nelupo muneng ku pegkung Allah.
- ⁶Ieh pangeh nengecuk mada' ni Musa, "Ui, ibanmu Yitro, amé' namu idi nguit awanmu dengan anakneh luk dueh."
- ⁷Petacu Musa iné' papu' neneh. Idi ieh netekunal pa kiungneh, idi nemuen neneh. Idi didueh nengitun ulun didueh. Idi petacu didueh nesemuet bang lepo Musa.
- ⁸Idi Musa nemada' ni Yitro ratnan amung luk inau' Tuhan kuan raca' Masir idi anak itinneh, pelé Ieh nemuit nelun Israil ratnan amung susa' luk nepetulu nedeh arang dalan, idi kudeng apeh Tuhan nemuit nedeh.
- ⁹Yitro pelaba awang niat kareb ieh neninger bala ineh,
- ¹⁰kebalaneh, "Ngubur Tuhan luk pangeh nemuit nemuyuh ratnan imet raca' Masir idi anak itinneh luk nenaban nemuyuh.
- ¹¹Nekini ui kali' Tuhan meluun rayeh ratnan amung allah baken, ngaceku Ieh pangeh nemuit nelun Israil rat bang imet lun Masir, kareb lun Masir ineh megateh niat nedeh."
- ¹²Idi Yitro nemaré luk sabpen idi luk barén kuan Allah. Idi Arun dengan amung lun rayeh Israil pana' nacing idi nekuman peruyung dengan iban Musa pa kiung Allah.
- ¹³Kenebpa idi Musa nemutut besara' lun mula', rat pekak macing malem.
- ¹⁴Kareb Yitro nenier amung kekamen Musa ineh, idi keburineh, "Anun luk ruenmu kuan lun mula' ineh? Ngudeh iko sebuleng mo' mutut ukum ini, idi amungdeh tured pa kiungmu rat pekak macing malem?"
- ¹⁵Idi kebala Musa, "Ui nganau' kudeng ini, ngaceku lun mula' macing negku pad kali' pian Allah.

¹⁶Idi kudeng dueh burur pekedaluh, idi didueh amé' papu' negku pad ui mutut ukum luk matu kuan didueh, idi mada' nedidueh ratnan dalam idi ukum Allah.”

¹⁷Iamo' kebala Yitro, "Na do' kudeng luk inau' mineh.

¹⁸Iko iuk pelaba erur, do' iko idi pupu ini luk denganmu pana'. Ngaceku kekamen ini pelaba berat kuanmu, ini na mekatau'mu sebuleng.

¹⁹Iamo' nekini ninger iko balaku. Ui sikal ngayud namu. Idi Allah nengan namu! Idi iko tareh pupu ini pa kiung Allah. Iko nguit besara'deh pa kiung Allah.

²⁰Petulu iko mada' nedeh ukum idi bada', idi mada' nedeh dalam luk petulu béndeh, idi amung kekamen luk miak ruendeh.

²¹Iamo' do' iko mili' tuda'-tuda' lun luk mileh mangun ku lun rayeh pa luun meribu burur, meratu burur, limeh ngepulu' burur, idi pulu' burur. Idi do' ideh lun luk matot inan Allah, idi luk inan merapet, ieh ineh lun luk na ngalap suap.

²²Do' nima' nedeh megéi' mutut besara' arang lun mula'. Iamo' amung besara' luk rayeh miak itendeh amé' pa kiungmu. Iamo' amung besara' luk isuut, do' ieh uendeh mutut. Kudeng ineh idi kekamenmu meran. Do' ideh ngalap babpat kekamen denganmu.

²³Kudeng iko nganau' luk kudeng ineh, maya' bala Allah, idi iko miak tuman ngimet kekamen ini, idi amung pupu ini miak muli' dengan pedo'.”

²⁴Idi Musa neninger bala Yitro ineh.

²⁵Idi rat arang lun Israil ineh ieh nemili' tuda'-tuda' lemulun luk mileh, kinikitneh mangun ku lun rayeh pa luun meribu burur, meratu burur, limeh ngepulu' burur, idi pulu' burur.

²⁶Idi ideh megéi' mutut besara' arang pupu ineh. Idi besara' luk rayeh itendeh amé' pa kiung Musa. Iamo' besara' luk isuut uendeh mutut.

²⁷Pangeh ineh Musa nenima' ibanneh ineh muli' amé' bang bawangneh sebuleng.

Pura' 19

¹⁻²Lun Israil nenalan rat Repidim, idi aceh aco bulan luk keteluh rat pangeh ideh neremuat rat bang bawang Masir, ideh nacing su luk ali-ali déi' Sinai. Idi lun Israil nucu', idi nelupo petatang ratnan surud ineh.

³Idi Musa uké surud amé' papu' Allah. Idi Tuhan nenawar neneh rat luun surud, kebalaneh, "Mada' nelun Israil, ieh ineh inul Yakub, kudeng ini,

⁴Muyuh pangeh nenier luk pangeh inau'Ku kuan lun Masir. Ui pangeh nemabeh nemuyuh mepad kudeng kanui nguit anakneh luun iladneh. Idi Ui pangeh nengacing nemuyuh Negku.

⁵Idi nekini, kudeng muyuh maya' balaKu, idi ngimet pejani'Ku, idi muyuh mangun ku pupuKu. Ngaceku amung tana' pana' Ui luk kuan ineh. Iamo' muyuh mangun ku pupu luk pinili'Ku.

⁶Idi muyuh mangun ku sebuleng pupu luk meligan kuanKu. Idi muyuh miak ngakem kekamen imam.' “

⁷Idi Musa netemurun idi nenawar amung lun rayeh pupu ineh. Idi amung bala luk biré Tuhan kuanneh ineh icingneh kuandeh.

⁸Idi amungdeh ineh peranga' nengor, kebaladeh, "Amung bala luk biré Tuhan, ieh ineh bén kai!" Idi Musa nengacing amung bala lun mula' inan Tuhan.

⁹Idi kebalala Tuhan ni Musa, "Ui temurun amé' namu bang aceh laput luk mekapal, idi lun mula' miak ninger kareb Ui pebala namu, pad ideh merapet namu macing ruked-ruked." Idi Musa nengacing amung bala lun mula' ineh inan Tuhan.

¹⁰Idi kebalala Tuhan ni Musa, "Amé' iko nelun mula' ineh. Do' ideh temina' aco sini idi nebpa teh, idi mupu' ayungdeh,

¹¹pad ideh temina' sembayang aco luk keteluh. Ngaceku aco luk keteluh ineh Ui temurun luun Pegkung Sinai idi siren amung-amungdeh.

¹²Ngaceku ineh do' iko nganau' ibpeng libut Pegkung Sinai kuan pupu ineh idi mada', 'Nginita do'-do'. Aleg muyuh uké pegkung ini idi ngeradu' iringneh pana' nateh miak. Idé luk ngeradu' pegkung ini kali' rungen ieh pitayen,

¹³idi sebuleng pana' nateh miak ngakem neneh. Do' ieh bitungin ku batu, kian uen ngelatik ku binor macing maté dengan na kamen, do' pung do' lemulun pana'.' Idi kareb serupit ineh muni, miak ideh uké pegkung ineh.”

¹⁴Idi Musa netemurun rat luun pegkung iné' matun lun mula' ineh. Idi ieh nengecuk nedeh temina' sembayang. Idi ideh nemupu' ayungdeh.

¹⁵Idi kebala Musa nelun mula' ineh, "Temina' muyuh aco luk keteluh. Seburur pana' na miak pamung inan decur.”

¹⁶Idi aco luk keteluh ineh kareb uka-uka inan tuda'-tuda' kilep idi purét pa luun pegkung ineh, idi laput luk mekapal, dengan uni serupit luk meluun rayeh, pad amung lemulun luk bang lepo-lepo megegker.

¹⁷Idi Musa nenguit lun mula' ineh remuat rat bang lepo-lepo sikal maré nedeh amé' papu' Allah. Idi ideh netuped pa beneh pegkung ineh.

¹⁸Idi amung Pegkung Sinai ineh pana' merabpun. Ngaceku Tuhan netemurun ieneh bang apui. Idi rabpunneh kemikit mepad kudeng rabpun bubpun. Idi pegkung ineh meruyuh.

¹⁹Idi kareb uni serupit iuk rayeh, idi Musa nepebala inan Allah. Idi Allah nengor balaneh bang lalam.

²⁰Kareb Tuhan pangeh netemurun nan Pegkung Sinai, idi Tuhan nenawar Musa amé' luun buduk pegkung. Idi ieh iné'.

²¹Idi kebala Tuhan neneh, "Temurun iko ngecuk lun mula' ineh aleg ngusag ar idi amé' muneng inan Tuhan sikal nier Neneh, pad lemulun na maté.

²²Idi do' amung imam luk amé' matun Tuhan ineh ngeligan bururdeh pad Tuhan na museh nedeh.”

²³Idi kebala Musa inan Tuhan, "Lun mula' na miak uké Pegkung Sinai ini, ngaceku Tuhan pangeh nepebala negku kudeng ini, 'Nganau' ibpeng pekelibut pegkung ineh idi ngeligan neneh.' "

²⁴Idi kebala Tuhan ni Musa, "Temurun iko. Muci iko lemubed dengan Arun. Iamo' amung imam idi lun mula' ineh aleg ngusag ar pian amé' matun Tuhan pad ideh na inan Tuhan museh."

²⁵Idi Musa netemurun iné' matun lun mula' ineh, idi ieh nengacing amung bala ineh nedeh.

Pura' 20

¹Idi Allah nemada' amung bala ineh, kebalaNeh,

²"Ui ini Tuhan Allahmu luk pangeh nenguyut namu remuat rat bang bawang Masir, rat su luk inanmu tiban ineh.

³"Aleg iko maya' allah baken rat Negku.

⁴"Aleg iko nganau' akang maya' ayu anun-anun luk i langit, idi luk bang tana', idi luk bang abpa' pana'.

⁵Aleg iko ngubur idi tekeradung sembayang ku ineh. Ngaceku Ui Ini Tuhan Allahmu luk temaruh, luk ngua' sala' amung lemulun macing ku anak idi inul luk keteluh idi luk keapat pana' ratnan amung lemulun luk megateh Negku.

⁶Iamo' Ui ngegala' katuKu kuan ribu-ribu inul luk mawa Negku idi luk ngimet balaKu.

⁷"Aleg neten ngadan Tuhan Allahmu mo'-mo', ngaceku Ui miak ngukum idé'-idé' luk neten ngadanKu mo'-mo'.

⁸"Nginita iko Aco luk inan Mudeng pad iko ngeligan neneh kuan Tuhan.

⁹Anem aco kinioneh iko ngakem kekamen luk kuan bururmu sebuleng.

¹⁰Iamo' aco luk ketudu' ineh, ieh ineh aco luk inan Tuhan Allahmu nudeng. Kareb aco ineh aleg iko ngakem, do' iko, anakmu, idi lun tebarinmu, aya'mu, idi lun sakai luk tudo bang bawangmu.

11Ngaceku bang anem aco kinioneh, Tuhan nemudut langit, tana', idi abpa' rayeh dengan amung uangneh. Idi Tuhan nucu' bang aco luk ketudu'. Ngaceku ineh Tuhan nengeperuan Aco luk inan Mudeng ineh, idi Ieh nengeligan aco ineh kuanNeh.

12"Do' ngedita' tamanmu idi tinanmu, pad ulunmu mekadang bang bawang luk barén Tuhan Allah namu.

13"Aleg iko ngaté.

14"Aleg iko pasét.

15"Aleg iko mano.

16"Aleg iko ngadu' nelun denganmu dengan mebalih.

17"Aleg iko melili ku ruma' lun denganmu. Aleg iko melili ku awanneh, lun tebarinneh, sapi'neh, keladaineh, idi anun-anun binaweh lun luk denganmu."

18Idi lun mula' nekali' lalam, kilep, idi uni serupit, dengan surud luk merabpun ineh. Idi ideh negegker ku totdeh, idi tured mado.

19Idi kebaladeh ni Musa, "Do' iko sebuleng pebala nekai idi kai miak ninger. Iamo' aleg Allah pebala nekai, pad kai na maté."

20Idi kebala Musa nedeh, "Aleg matot, ngaceku Allah pangeh netemurun sikal nutun nemuyuh, pad tot inan Tuhan idi kidi-kidi pa kiung muyuh, pelé muyuh na nganau' sala'."

21Idi lun mula' ineh pana' netured mado. Iamo' Musa muneng ku laput luk medacem su luk inan Allah.

22Idi kebala Tuhan ni Musa, "Do' iko mala kuan lun Israil kudeng ini: 'Muyuh pangeh nenier Negku nepebala nemuyuh rat langit.

23Ngaceku ineh aleg muyuh nganau' akang ratnan pirak idi amas nan muyuh sembayang.

24"Nganau' kuanKu aceh bubpun ratnan tana' idi maré pa luunneh amung baré luk sabpenmu, idi amung baré luk nguit pedo', ieh ineh dumba idi sapi'.

Idi anid-anid su luk uenKu ngeletep luk nan muyuh sembayang Negku, su ineh Ui temurun ngeperuan namu.

²⁵Idi kudeng iko pian nganau' kuanKu aceh bubpun ratnan batu, aleg iko nganau' neneh ratnan batu luk pangeh kinuer, ngaceku kareb iko nguer batu ineh, idi iko ngelutak neneh.

²⁶Idi teh aleg uké ican umak bubpunKu pad luk ku igu'mu na melagan.' "

Pura' 21

¹"Do' maré nelun Israil amung ukum ini:

²Kudeng iko melih aceh demulun lun Iberani, anem lak kinoneh ieh miak ngakem kuanmu. Iamo' bang lak luk ketudu' do' ieh puatin, dengan na ngua' anun-anun.

³Kudeng ieh macing dengan na awan idi ieh remuat dengan na awan teh. Kudeng ieh inan awan, do' awanneh ineh simén maya' neneh muli'.

⁴Kudeng tuanneh pangeh nemaré awan kuanneh, idi decur ineh pangeh nenganak anak deléi idi decur teh, idi decur ineh dengan anak-anakneh kuan tuanneh, idi deléi ineh sebuleng muli'.

⁵Iamo' kudeng demulun ineh pebala dengan megala', "Ui méi' inan tuanku, idi awan, idi anakku. Na ui sikal mepuit,"

⁶Idi do' tuanneh nguit neneh pa kiung Allah, idi nguit neneh amé' munung tanga' ruma'neh kian iring diri tanga'. Idi do' tuanneh nebpek lalidneh, pad ieh mangun ku demulun seruked ulunneh.

⁷Idi kudeng selemulun masui anakneh luk decur, idi na ieh miak mepad kudeng demulun deléi.

⁸Kudeng ieh na pinian tuanneh, luk pangeh nemili' neneh kuan bururneh sebuleng, do' tuanneh ineh nima' neneh uen nguli'. Tuanneh ineh na inan lalud masui neneh kuan lun pupu baken, ngaceku lawéneh ineh na mesiri.

⁹Idi kudeng ieh tinuduk dengan anakneh luk deléi, idi do' ieh ngerawé neneh mepad kudeng anakneh sebuleng.

- 10 Kudeng seburur deléi ngapid, na ieh miak ngetenga' akan awanneh luk atun ineh idi ayungneh, idi na ieh miak ugka' pamung rudap neneh.
- 11 Idi kudeng ieh na nganau' kudeng ini, miak decur ineh muli' dengan na nguli' belih bururneh.
- 12 "Idé'-idé luk necat seburur lemulun macing maté, na miak na ieh pitayen.
- 13 Iamo' kudeng na inau' rungen, ngaceku na ieh sikal ngaté neneh, ieh miak buro amé' su luk litepKu kuan muyuh. Idi su ineh ieh uen ngelibung peh.
- 14 Iamo' kudeng seburur lemulun ngaté lun danganneh dengan inau' rungen, idi na miak na ieh pitayen, sagan pana' ieh buro amé' pa atun bubpunKu pian uen ngulun.
- 15 "Idé'-idé luk necat taman kian tinanneh, kali' rungen ieh pitayen.
- 16 "Idé'-idé luk naban lemulun, kudeng ieh masui neneh, kian kudeng ieh ngimet neneh ku demulunneh, na miak na ieh pitayen.
- 17 "Idé'-idé luk ngediman taman kian tinanneh, na miak na ieh pitayen.
- 18 "Idi kudeng inan lemulun luk pekedaluh idi seburur mitung seburur ku batu kian mukut neneh lek, kudeng ieh na maté, na lun luk ngedereh neneh ineh pitayen. Iamo' kudeng léi luk pidereh ineh mét,
- 19 iamo' na mio teh ieh do', sagan pana' ieh ngerukud, idi lun luk ngedereh neneh ineh na miak na ngelibal aco serukedneh tudo, idi ngasa' neneh pad ieh do'.
- 20 "Idi kudeng selemulun mebal demulunneh deléi, kian decur lek, pad ieh maté, na miak na ieh kumin.
- 21 Iamo' kudeng demulun ineh mulun seaco kian dueh aco lek, idi na ieh kumin, ngaceku petap rugi' tuanneh ku ieh.
- 22 "Kudeng inan lun luk pekedaluh idi necat sebuleng decur luk mali' pad anakneh musul, iamo' na uratneh baken, na miak na lun luk nenecat neneh ineh kumin maya' putuh awanneh, idi luk uen lun luk mutut besara' ngelelep.

- ²³Iamo' kudeng decur ineh murat, idi lun luk nengurat neneh ineh kumin, ieh ineh niat libal niat,
- ²⁴mateh libal mateh, lipen libal lipen, tiku' libal tiku', kukud libal kukud,
- ²⁵angur libal angur, balang libal balang, bara' libal bara'.
- ²⁶"Kudeng selemulun necat mateh demulunneh luk deléi kian decur lek pad mateh demulunneh nedat, na miak na demulun ineh puatin ku ua' matehneh.
- ²⁷Idi kudeng ieh mepag demulunneh, pad lipenneh merukep, na miak na demulun ineh puatin ku ua' lipenneh.
- ²⁸"Kudeng aceh sapi' ngegkul aceh lemulun pad ieh maté, na miak na sapi' ineh bitungin ku batu macing maté. Uangneh na miak kenen. Iamo' luk kuan sapi' ineh na kumin.
- ²⁹Iamo' kudeng sapi' ineh megéi' ngakat, idi nekali' lun luk kuanneh ineh, idi na ieh nginita neneh, idi kudeng sapi' ineh ngaté seburur lemulun, na miak na sapi' ineh bitungin ku batu macing maté, idi lemulun luk kuan ineh pana' pitayen.
- ³⁰Iamo' kudeng léi luk kuan sapi' ineh simén mayar ukum pad ieh mulun, na miak na ieh mayar petap.
- ³¹Iamo' kudeng sapi' ineh ngegkul aceh anak deléi kian decur lek, ukum ineh mepad.
- ³²Kudeng sapi' ineh ngegkul aceh demulun deléi kian decur lek, na miak na luk kuan sapi' ineh ngua' ku usin pirak teluh ngepulu' balad. Idi sapi' ineh pana' bitungin ku batu pad maté.
- ³³"Idi kudeng aceh lubang bang tana' sinima' lun tekerubab, idi lemulun luk ngukat lubang na ngakeb ineh, idi petacu aceh sapi' kian keladai lek peturun bang ineh,
- ³⁴idi na miak na luk kuan lubang ineh maré libalneh, idi mayar raganeh inan lemulun luk kuan aya' ineh. Iamo' butungneh kuanneh.

³⁵Idi kudeng sapi' seburur ngurat sapi' lun danganneh pad ieh maté, na miak na sapi' luk mulun ineh pisuen, idi usin raganeh uen mabpat dueh. Kudeng ineh teh babpat uang sapi' seluk naté ineh.

³⁶Iamo' kudeng sapi' ineh megéi' ngakat, idi na lemulun luk kuan ineh nginita neneh, na miak na ieh libalen dengan petap, sebuleng sapi' libal sebuleng sapi'. Iamo' luk naté ineh kuan dieh.

Pura' 22

¹"Idi kudeng selemulun mano aceh sapi', kian dumba lek, idi ieh ngeret neneh idi masui neneh, na miak na ieh libalen sebuleng sapi' ineh ku limeh sapi', idi sebuleng dumba libalneh apat dumba.

²⁻⁴Na miak na ieh ngelibal luk pinoneh. Kudeng na binawehneh, na miak na bururneh sebuleng pisuen mangun ku demulun, pad ngua' luk pinoneh. Kudeng luk pinoneh ineh idi teh neneh, bang karebneh mulun, do' ieh sapi', keladai kian dumba lek, na mian na ieh maré libalneh dueh kua' kinula'neh. "Kudeng aceh lemulun kamen idi pitayen uned ieh mano kareb medacem, lemulun luk nengaté neneh ineh na mesala'. Iamo' kudeng ieh ngaté neneh kareb macang, idi ieh mesala'.

⁵"Kudeng selemulun nima' aya'neh kuman tibu luk bang lati' idi kabun anggur lun baken macing mabud, ngaceku na ieh nengusu aya'neh, na miak na ieh maré uli' luk meluun do' rat bang lati'neh sebuleng, idi rat bang kabun anggurneh, ku libal rugi' ineh.

⁶Idi kudeng inan apui luk mulun idi ngeseb budud, idi apui ineh meperuit idi ngeseb padé luk tibuduk, idi luk nateh piranidh idi maput lati' ineh neseb, do' lemulun luk pun nengimun apui ineh ngelibal luk iseb ineh dengan petap.

⁷"Kudeng selemulun maré usin idi binaweh-binaweh nugen lun danganneh, idi ieh pino rat bang ruma' lun ineh, kudeng luk nemanu ineh nekali', na miak na ieh mayar dueh kua' kinula'neh.

⁸Kudeng na luk nemanu ineh nekali', do' lemulun luk kuan ruma' ineh iten amé' pa kiung Allah, pelé ngelio kudeng ieh pangeh nemanu binaweh lun danganneh.

⁹"Bang anid-anid besara' ratnan binaweh, do' ratnan sapi', keladai, dumba, kibung, idi binaweh anun-anun luk metutu' luk inan dueh burur singaro, idi do' didueh ineh iten amé' pa kiung Allah. Idi idé luk uen Allah ngesala' miak ngua' kuan lun danganneh libal luk ilapneh dueh kua' kinula'.

¹⁰"Kudeng aceh lemulun maré nelun danganneh sebuleng keladai, kian sapi', dumba, aya' luk baken-baken lek, luk ruenneh ngasa', idi aya' ineh maté idi nurat idi pino dengan na lun nekali',

¹¹idi do' ieh pebulung pa kiung Allah, idi maré luk pinutut arang didueh ineh kudeng ieh nengalap binaweh lun danganneh. Idi kudeng pung ineh na pinoneh, luk kuan aya' ineh merugi'. Lun baken na maré libalneh.

¹²Iamo' kudeng matu ieh pino rat neneh, kali' rungen ieh maré libalneh inan lemulun luk kuan ineh.

¹³Kudeng matu ieh giramit pung luk mesangit, do' butungneh iten mangun ku aceh tanu'. Na ieh miak ngelibal neneh.

¹⁴"Kudeng selemulun mutuh ngiceh sebuleng aya' rat nelun danganneh, idi aya' ineh murat kian maté lek kareb lemulun luk kuan ineh na idi, idi do' ieh ngelibal ineh dengan petap.

¹⁵Iamo' kudeng luk kuan aya' ineh idi, na ieh miak ngelibal ineh. Kudeng aya' ineh maté kareb siniwa', na libal raganeh, ngaceku siwa'neh petap.

¹⁶"Kudeng seburur deléi ngubuk anak luk pun mebaruh luk na inan tuduk idi pamung danganneh, na miak na didueh paweh idi ieh mayar purut.

¹⁷Kudeng tamaneh na tu-tu maré neneh paweh neneh, na miak na ieh maré usin ku purut anak luk pun mebaruh meh.

¹⁸"Aleg iko nima' decur luk mangun ineh mulun.

¹⁹"Idé-idé luk pamung dengan pung na miak na ieh pitayen.

²⁰"Idé-idé luk maré luk sabpen kuan allah baken ratnan Tuhan, do' ieh pitayen.

²¹"Idi aleg iko ngedereh lun sakai idi ngesusa' neneh. Muyuh pana' pangeh mangun ku lun sakai bang bawang Masir.

²²Aleg muyuh ngedereh decur tinula' idi anak maté.

²³Kudeng iko nganau' kudeng ineh, idi ideh nawar Negku, kali' rungen Ui ninger tangdeh.

²⁴Idi Ui museh, pad Ui ngaté nemuyuh bang bunu', idi awan muyuh mangun ku tinula', idi anak muyuh mangun ku anak maté.

²⁵"Kudeng iko maré usin kebiten lun pupuKu luk masi', aleg iko mupud ineh dengan mesaad. Idi aleg ngalap bunga'neh teh.

²⁶Kudeng iko sikal ngalap ayung lun denganmu ku duduk, na miak na iko ngelubed duduk ineh kareb nateh aco macep.

²⁷Ngaceku ini papenneh, ieh ineh ayung luk luun bururneh. Anun luk ku tarubneh kareb ieh rudap? Idi kareb ieh nawar Negku, Ui miak ninger tawarneh. Ngaceku Ui ini méi'.

²⁸"Aleg iko nguyo Allah, idi aleg iko ngediman aceh lun rayeh pupumu.

²⁹"Aleg ngisiden maré babpat pulu' padému, anggurmu, idi umaumu. "Idi do' iko maré kuanKu anak deléimu luk atun.

³⁰Kudeng ineh teh amung sapi' idi dumbamu. Tudu' aco kinioneh nima' ieh pebaya' dengan tinanneh. Idi kareb aco luk kewaluh miak iko maré neneh Negku.

³¹"Muyuh ini pupuKu. Ngaceku ineh aleg muyuh kuman uang pung luk kikem pung luk meliputi bang pulung. Do' muyuh maré ineh kuan uko'.

Pura' 23

¹"Aleg iko nguit bala luk mebalih. Idi aleg iko ngedengan lemulun luk dat idi mangun ku lun nekali' luk na matu.

- ²Aleg iko maya' bala lun mula' nganau' luk dat. Idi aleg iko mangun ku lun nekali' luk mebaken maya' lun mula' ineh, pad na maya' luk matu.
- ³Idi teh aleg iko ngeran sala' lun masi' pa kiung lun luk mutut besara'.
- ⁴Kudeng iko kali' sapi' lun luk museh namu idi keladai luk meraruh, do' iko ngelubed neneh dengan mesaget.
- ⁵Kudeng iko kali' keladaineh meluka' ngaceku berat babehneh, aleg iko nima' neneh. Do' iko nengan neneh idi ngiding luk baben keladai ineh.
- ⁶Aleg mutut besara' lun masi' maya' dalan luk na mesiri.
- ⁷Aleg iko ngadu' lemulun dengan mebalih. Idi aleg maré ukum maté kuan lemulun luk na mesala' idi luk matu. Ngaceku Ui ngukum lemulun luk nganau' luk kudeng ineh.
- ⁸Idi teh aleg iko ngalap suap, ngaceku suap ineh muser mateh lemulun luk mileh, idi ngekilu' bala lemulun luk matu.
- ⁹Idi teh, aleg iko ngedereh nelun sakai. Muyuh kali' niat lun sakai, ngaceku muyuh pana' mangun ku lun sakai bang bawang Masir atun.
- ¹⁰Idi anem lak kinioneh do' iko nganau' lati' idi kabun pana', idi ngalap uli'neh.
- ¹¹Iamo' lak luk ketudu' aleg nganau' lati' idi kabun luun tana'mu ineh, pad lun luk masi' miak kuman luk mulun su ineh. Idi elaneh miak kenen pung luk meliput. Kudeng ineh teh kabun anggurmu idi saitunmu.
- ¹²Do' iko ngakem anem aco kinioneh. Iamo' aco luk ketudu' aleg iko ngadem, pad sapi' idi keladaimu pana' miak ucu'. Idi demulun idi sakaimu pana' miak ngato erurdeh.
- ¹³Ui ini Tuhan. Do' ninger amung balaKu. Aleg sembayang nan allah luk baken, idi aleg neten ngadandeh.
- ¹⁴Teluh kua' selak do' iko nganau' aco rayeh kuanKu.
- ¹⁵Bang bulan Abib, ieh ineh bulan luk inanmu remuat rat bang bawang Masir, do' nginita Aco Rayeh kuman Ruti luk Na Lamud, maya' kudeng luk

bida'Ku namu. Tudu' aco kinioneh do' iko kuman ruti luk na lamud. Aleg amé' pa kiungKu dengan palad luk na uang.

¹⁶"Do' iko nginita Aco Rayeh Ngeranéh téh, ieh inéh kareb pun ngeranéh. "Idi téh do' ngerawé Aco Rayeh Lepo kareb udung lak, kareb iko ngamung uli' rat bang lati'mu.

¹⁷Do' amung lun deléi amé' pa kiung Tuhan Allah teluh kua' selak.

¹⁸"Aleg iko maré ruti luk inan lamud dengan pung luk kereten kuanKu. Idi aleg nima' lemak ratnan luk biré Negku ketecan macing kenebpa.

¹⁹"Amung bua' luk pun ilap ratnan lati'mu do' nguit semuet bang ruma' Tuhan Allahmu. "Aleg iko nanek anak dumba kian amék ku rata tinanneh.

²⁰"Ui ngecuk aceh melaikat amé' pa kiungmu pad matar namu idi nguit namu macing su luk tinina'Ku inéh.

²¹Ninger idi maya' balaneh. Idi aleg muyuh metueh rat neneh, ngaceku na ieh maré do' ku sala' muyuh. Ngaceku ngadanKu idi neneh.

²²Iamo' kudeng iko maya' balaneh, idi nganau' amung luk bida'Ku, idi Ui miak metueh ratnan amung bunu'mu.

²³MelaikatKu inéh miak nalan pa atunmu, pad nguit namu semuet bang bawang lun Amori, lun Hiti, lun Prisi, lun Kanaani, lun Hiwi, idi lun Yebusi. Idi Ui miak ngaté nedeh.

²⁴Aleg iko ngubur idi tekeradung pa kiung allahdeh inéh, idi sembayang nedeh. Aleg iko maya' lawé sembayangdeh inéh. Iamo' do' iko ngusag akangdeh, idi mila' amung ulungdeh.

²⁵Kudeng muyuh sembayang inan Tuhan Allah muyuh, idi Ui miak ngeperuan nemuyuh ku akan idi luk rupen muyuh. Idi Ui ngado amung ét rat arang muyuh.

²⁶Bang bawangmu na decur luk musul anak idi luk na anak. Ui miak maré ulunmu mekadang.

²⁷Ui nganau' pupu luk sikal metueh rat namu matot Negku. Idi Ui miak ngagap pupu luk ulekmu. Idi Ui nganau' amung bunu'mu buro rat namu.

²⁸Idi teh Ui ngagau bunu'mu, idi ngusu amung lun Hiwi, lun Kanaani, idi lun Hiti rat pa atunmu.

²⁹Idi baken bang selak mo' Ui ngusu nedeh, pad bawang ineh na dat ali, idi pad pung luk meliputi na pelaba ula'.

³⁰Dengan ulai-ulai Ui miak ngusu nedeh, pad muyuh iuk amé' mula' idi ngalap bawang ineh.

³¹Ui nganau' lakan bawangmu rat Abpa' Pisui macing Abpa' Pirat, idi rat Abpa' Rayeh macing su luk ali-ali. Ui maré lun bang bawang ineh bang imetmu, pad iko ngusu nedeh rat pa kiungmu.

³²Idi aleg iko nganau' jani' kuandeh idi kuan amung akangdeh.

³³Aleg ideh tudo bang bawangmu, pad ideh na nganau' namu mesala' Negku. Kudeng iko sembayang inan akangdeh, kali' rungen iko mekaneh abpung."

Pura' 24

¹Kebala Tuhan ni Musa, "Mudik iko idi amé' papu' Negku dengan Arun, Nadab, Abihu, idi tudu' ngepulu' lun rayeh Israil, idi tekeradung sembayang rat mado.

²Idi iko sebuleng amé' muneng Negku. Iamo' aleg kuma' baken amé' muneng. Idi aleg lun mula' mudik pegkung pana'."

³Musa iné' mada' nelun mula' amung bala Tuhan. Idi amungdeh peranga' nengor bala ineh, kebaladeh, "Amung ukum ini luk bila Tuhan, kai miak maya!"

⁴Idi Musa nengayud amung bala Tuhan. Idi pekak uka-uka, ieh nenganau' aceh bubpun su buten irang surud ineh, idi ieh nenaped pulu' dueh batu maya' kinula' pulu' dueh pupu Israil.

⁵Idi ieh nengecuk tuda'-tuda' anak adi' lun Israil idi ideh nengeseb baré kuan Tuhan, idi ngeret tuda'-tuda' sapi' deléi mangun ku baré luk nguit pedo' inan Tuhan.

⁶Musa nengalap sebuang dara' ineh idi ieh nenganau' ineh bang tuda'-tuda' bigan, idi sebuang ratnan dara' ineh nekumubpurneh bubpun ineh.

⁷Idi ieh nengalap surat pejani' ineh, idi ieh nemaca' ineh pedingeren pupu ineh. Idi kebaladeh, "Amung luk bida' Tuhan ineh, kai miak maya'."

⁸Pangeh ineh Musa nengalap dara' ineh, idi ieh nengisak ineh luun pupu ineh, idi nepebala, "Ini dara' pejani' luk litep Tuhan kuan muyuh kareb Ieh nemaré amung ukum ini."

⁹Idi Musa mudik dengan Arun, Nadab, Abihu, idi tudu' ngepulu' lun rayeh Israil.

¹⁰Idi ideh nenier Allah lun Israil. Idi pa liang kukudNeh inan aceh luk kudeng tapin ratnan batu luk mebata' langit.

¹¹Allah na nengukum nelun luk nguyut pupu Israil ineh. Iamo' kareb ideh kali' Neneh, idi ideh nekuman idi nengirup.

¹²Idi kebala Tuhan ni Musa, "Mudik iko teh amé' papu' Negku, idi tudo tungé'. Ui sikal maré namu dueh batu tebalad, ieh ineh bala idi ukum luk pangéh inayudKu ku mada' nedeh."

¹³Idi Musa nenalan dengan rurunneh Yusak, idi didueh mudik pegkung Allah ineh.

¹⁴Idi kebala Musa nelun rayeh-rayeh ineh, "Nganét ieni muyuh pad kai lemubed. Arun idi Hur idi dengan muyuh. Idé luk inan luk tunin, do' amé' matun nedidueh."

¹⁵Musa mudik, idi laput netemurun nemapen pegkung ineh.

¹⁶Idi rasat Allah mudeng luun Pegkung Sinai ineh, idi anem aco kinioneh laput nemapen pegkung ineh. Idi aco luk ketudu', Tuhan nenawar ni Musa ratnan uned laput ineh.

¹⁷Rasat Allah melagan mepad kudeng apui luk ngeseb buduk pegkung ineh su siren lun Israil.

¹⁸Idi Musa nesemuet uned-uned laput ineh idi numak pegkung ineh. Idi ieh netudo luun pegkung ineh apat ngepulu' aco idi apat ngepulu' dacem kinioneh.

Pura' 25

¹Idi kebala Tuhan ni Musa,

²"Ngecuk nelun Israil ngamung tuda'-tuda' baré kuanKu ratnan anid-anid lun luk pian maré ineh, idi ngalap ineh kuanKu.

³Idi ini baré luk lapen muyuh rat nedeh: amas, pirak, idi tekaling;

⁴idi kibung luk bata' melaco, sia' merirem, idi sia' melidang, kibung pu luk inuper, idi buluh amék;

⁵idi kubil dumba deléi luk inau' mesia', kubil luk do', kayuh pirur;

⁶umau lapung, umau luk do' buen luk pingumau, idi umau luk meluun do' buen,

⁷idi bau burur idi batu baken luk meraga luk ku kuyu' imam luk meraga, idi kakeb ruuk.

⁸Idi do' lun mula' nganau' aceh Lepo luk meligan kuanKu, pad Ui tudo arangdeh.

⁹Do' muyuh nganau' ineh, idi amung repapehneh, maya' ayu luk dukenKu namu.

¹⁰"Ngecuk nelun mula' nganau' aceh pati' ratnan kayuh pirur, kikadangneh dueh sikuh setangal, pipangneh sesikuh setangal, idi kidita'neh semikuh setangal.

¹¹Idi do' ieh uen ngakep ku amas luk do', pa luun idi bang lubang. Idi do' iko nganau' luun ineh belipid amas pekelibut.

- ¹²Idi ngurai apat kelabung amas ruen luun apat kukudneh, dueh selipa, idi dueh selipa.
- ¹³Idi do' nganau' kayuh pirur ku birirneh, idi ngakep ineh ku amas.
- ¹⁴Idi nuet kayuh birir ineh bang kelabung luk pekop pati' ineh.
- ¹⁵Idi do' kayuh luk ku mirir ineh tutem bang kelabung ineh. Na miak uen ngangat.
- ¹⁶Idi do' iko nganau' bang pati' ineh batu luk tebalad luk inan Pejani' luk barénKu namu.
- ¹⁷"Idi teh nganau' aceh kakeb su luk inan pedo' ratnan amas luk do', kikadangneh dueh sikuh setangal, idi pipangneh semikuh setangal.
- ¹⁸Idi do' nganau' dueh melaikat karub ratnan amas luk tinuno.
- ¹⁹Nganau' dueh melaikat karub ineh pekop paped kakeb ineh petatem luun ineh.
- ²⁰Idi kiung didueh petutup. Idi ilad didueh tegerayap mapen kakeb su luk inan pedo' ineh.
- ²¹Idi do' iko nganau' dueh batu luk tebalad bang pati' ineh, idi nganau' kakeb luk inan pedo' ineh pa luunneh. Idi bang pati' ineh do' iko nganau' Jani' luk barénKu namu.
- ²²Idi su ineh Ui papu' namu. Idi ratnan kakeb luk inan pedo' ineh rat arang dueh melaikat karub luk pa luun pati' pejani' ineh, Ui miak pegayam namu ratnan amung-amung luk bilaKu namu, luk uen ngacing kuan lun Israil.
- ²³"Idi teh do' iko mudut méja ratnan kayuh pirur, dueh sikuh kikadangneh, semikuh pipangneh, idi semikuh setangal kidita'neh.
- ²⁴Do' iko ngakep ineh ku amas luk do', idi nganau' belipid amas pekelibut ineh.
- ²⁵Do' iko nganau' libutneh belipid kiar palad pipangneh, idi iringneh nganau' belipid amas pekelibut.

- ²⁶Idi do' iko nganau' kuan méja ineh apat kelabung amas, idi do' iko nganau' kelabung anid-anid lidung su luk inan kukudneh.
- ²⁷Do' nganau' kelabung ineh muneng iring belipid ineh.
- ²⁸Idi do' iko ngalap kayuh pirur, idi ngakep ineh ku amas, pad méja uen mirir ku ineh.
- ²⁹Idi teh do' nganau' bigan, sangkir, busi', idi sikuan ruandeh baré luk rupen. Idi do' nganau' amung ineh ratnan amas luk do'.
- ³⁰Idi nganau' méja ineh pa atun Pati' Pejani'. Idi nganau' ruti luun méja ineh kidi-kidi pa kiungKu.
- ³¹"Idi do' iko nganau' aceh kukud dawan ratnan amas luk do'. Nganau' puet idi batangneh ratnan amas luk tinuno, idi busak-busakneh, dengan busak luk nateh nelusad pana', tekapit nan batang ineh.
- ³²Idi anem rangat ineh inan iringneh, teluh rangat mulang rat pa selipa idi selipa.
- ³³Anid anem rangat ineh inan teluh busak badam ayuneh dengan busak luk nateh nelusad.
- ³⁴Idi do' kukud dawan ineh pana' inan apat busak mepad kudeng busak badam ayuneh dengan busak luk nateh nelusad.
- ³⁵Do' inan aceh busak luk nateh nelusad pa liang anid dueh rangat ineh.
- ³⁶Idi busak luk nateh nelusad idi amung rangatneh, idi kukud dawan ineh, amung ineh tekapit ratnan aceh amas luk tinuno idi do'.
- ³⁷Idi do' iko nganau' tudu' dawan kuan kukud dawan ineh idi nutud ineh pad ngacang pa atun.
- ³⁸Idi do' amung apitneh idi su luk inan bareh apui pana' ruen ratnan amas luk meluun do'.
- ³⁹Idi do' iko nganau' amung ineh dengan amung repapehneh ratnan limeh ngepulu' anem kati amas luk meluun do'.

⁴⁰Ngerawé do'-do', pad iko nganau' amung ineh maya' ayu luk pangeh bida' namu déi' luun pegkung ineh.

Pura' 26

¹Idi do' nganau' Lepo su luk inan papu' Tuhan ratnan pulu' pekatu kibung ratnan kibung pu luk inuper idi luk do'. Idi ayuneh mebata' melaco, sia' merirem, idi sia' melidang luk tibaruh do'-do' dengan melaikat karub.

²Idi kkadang sepekatu kibung ineh tudu' ngedepéh, idi pipangneh medepéh. Idi amung kibung ineh mepad tari.

³Do' nutum limeh pekatu kibung petutum. Kudeng ineh teh limeh pekatu kibung luk baken.

⁴Do' iko nganau' tuda'-tuda' lalid kibung luk bata' melaco iring sebuleng kibung luk limeh tutum ineh. Idi nganau' kudeng ineh luun iring kibung luk limeh tutum ineh teh.

⁵Do' nganau' limeh ngepulu' lalid paped sepekatu kibung luk limeh tutum ineh, idi teh limeh ngepulu' lalid paped sepekatu kibung luk limeh tutum ineh teh.

⁶Idi teh do' nganau' limeh ngepulu' ood ratnan amas, ku nutum dueh pekatu kibung ineh pad ineh mangun ku Lepo su luk inan papu' Tuhan.

⁷Idi do' nganau' ducungneh ratnan pulu' aceh pekatu kibung luk inau' ratnan buluh amék.

⁸Idi amung ineh mepad kirayeh, ieh ineh tudu' depeh setangal kkadangneh, idi medepéh bétneh.

⁹Do' nutum limeh pekatu kibung ineh petutum. Kudeng ineh teh anem pekatu luk baken. Idi tutum luk keanem do' ieh lapien lepi' dueh munung tanga' ineh.

¹⁰Idi do' nganau' limeh ngepulu' lalid paped sepekatu kibung luk baken ineh teh.

- ¹¹Idi do' nganau limeh ngepulu' ood tekaling, idi nuet ood ineh bang lalid kibung ineh, pad dueh kibung ineh mangun ku sebuleng ducung.
- ¹²Nima' ela tutum seluk keanem tekito pesulak pa keted Lepo.
- ¹³Idi semikuh pa selipa, idi semikuh pa selipa tekito pekop Lepo ku mapen ineh.
- ¹⁴"Idi do' nganau' dueh papen Lepo ineh teh, sebuleng ratnan kubil dumba deléi luk inau' mesia', idi sebuleng ratnan kubil luk do', ku papen luk pa luun.
- ¹⁵"Idi do' nganau' tuda'-tuda' kayuh ku tulang ratnan kayuh pirur kuan Lepo ineh.
- ¹⁶Idi kikadang sepekatu kayuh ineh, dueh depeh setangal, idi pipangneh semikuh setangal.
- ¹⁷Idi do' anid-anid kayuh ineh uen nap pad ideh miak petutum.
- ¹⁸Do' nganau' dueh ngepulu' kayuh ku tulang kuan iring pa kabing busat aco,
- ¹⁹idi apat ngepulu' alen pirak pa liangdeh, dueh alen nan sepekatu kayuh.
- ²⁰Idi nganau' dueh ngepulu' kayuh ku tulang kuan iring luk pa tinueh busat aco,
- ²¹dengan apat ngepulu' alen pirak, dueh alen pa liang sepekatu kayuh.
- ²²Idi iring pa keted, ieh ineh pa acep aco, do' nganau' anem pekatu kayuh ku tulang,
- ²³idi dueh kayuh anid lidung.
- ²⁴Idi kayuh luk ku lidung ineh tinutum rat pa beneh macing pa luun. Idi kayuh luk ku dueh lidung miak ruen kudeng ineh.
- ²⁵Ngaceku ineh, inan ualuh pekatu kayuh ku tulang dengan pulu' anem alen pirak, dueh pa beneh anid-anid kayuh ineh.
- ²⁶"Idi do' nganau' pulu' limeh atang ratnan kayuh pirur, limeh pekatu kuan selipa Lepo ineh,

²⁷Idi limeh pekatu kuan selipa, idi limeh pekatu kuan iring luk pa keted pa acep aco.

²⁸Idi atang luk nan uned, do' ieh macing nan amung kayuh ineh, rat paped selipa suet paped selipa.

²⁹Idi teh do' iko ngakep amung kayuh ineh ku amas, idi nganau' amung kelabung su atang ineh pana' ratnan amas, idi ngakep amung atang ineh ku amas.

³⁰Do' iko mudut Lepo ineh maya' ayu luk bida'Ku namu déi' luun pegkung ineh.

³¹"Idi do' nganau' aceh dicing ratnan kibung luk do', idi kibung pu luk inuper, idi luk ayu bata' melaco, sia' merirem, idi sia' melidang, tibaruh do'-do' ku melaikat karub.

³²Idi ngekito ineh ku ood amas nan apat diri kayuh pirur luk kikep ku amas, idi apat alenneh ratnan pirak.

³³Idi do' ngekito dicing ineh pa liang ood luk iang apo, idi ngerareng Pati' Pejani' luk inan dueh batu luk tebalad ineh pa keted dicing ineh. Idi dicing ineh ku alad arang Su luk Meligan dengan Su luk Meluun Ligan.

³⁴Idi ngerareng kakeb su luk inan pedo' ineh pa luun Pati' Pejani'.

³⁵Idi bal selipa Su luk Meluun Ligan ineh, do' iko ngerareng méja pa tinueh busat aco, idi kukud dawan ineh petutup iring luk pa kabing busat aco.

³⁶"Idi munung tanga' Lepo ineh do' nganau' aceh dicing, ratnan kibung pu luk do', idi luk inuper, ayuneh bata' melaco, sia' merirem, idi sia' melidang; idi luk tibaruh.

³⁷Idi do' nganau' kuan dicing ineh limeh pekatu diri kayuh pirur, uen ngakep ku amas. Idi amung oodneh pana' amas, idi do' ngurai limeh alen tekaling kuan diri ineh.

Pura' 27

- ¹"Idi do' nganau' aceh bubpun luk apat lebping ratnan kayuh pirur, limeh sikuh kadangneh, idi limeh sikuh pipangneh, idi teh teluh sikuh dita'neh.
- ²Idi do' iko nganau' unga anid lidungneh. Idi do' unga ineh mulang rat su ineh. Idi ngakep amung ineh ku tekaling.
- ³Idi teh do' iko nganau' belanga' inan ngerareng abuh, idi luk ku ngook abuh, bigan, serupang, idi su luk inan bareh. Idi do' nganau' amung repapeh ineh ratnan tekaling.
- ⁴Idi nganau' teripin tekaling. Idi anid lidungneh do' nganau' apat kelabung tekaling.
- ⁵Idi nganau' ineh pa liang iring bubpun, pad macing tangalneh.
- ⁶Idi do' iko nganau' kayuh pirur ku mirir bubpun ineh, idi ngakep neneh ku tekaling.
- ⁷Idi nuet kayuh birir ineh bang kelabung ineh, pekop iring bubpun ineh, pad ieh miak uen mirir.
- ⁸Idi nganau' neneh melubang ratnan bangar, maya' kudeng ayu luk bida'Ku namu déi' luun pegkung.
- ⁹"Do' nganau' natad Lepo su luk inan papu' Tuhan, idi ngalad ineh ku dicing ratnan kibung pu luk inuper. Kikadang dicing luk pa kabing busat aco, dueh ngepulu' limeh depeh.
- ¹⁰Idi dueh ngepulu' diri ineh perapu alenneh ratnan tekaling, iamo' amung ood idi repit diri ineh ratnan pirak.
- ¹¹Kudeng ineh teh pa tinueh busat aco.
- ¹²Kikadang dicing luk pa acep aco pulu' dueh depeh setangal, dengan diri idi pulu' alen.
- ¹³Kudeng ineh teh pipang pa atun natad pa busat aco ineh pulu' dueh depeh setangal.
- ¹⁴⁻¹⁵Pekop munung tanga' do' inan teluh depeh teluh sikuh dicing, dengan teluh diri idi teluh alen.

¹⁶Idi tanga' natad ineh inan aceh dicing limeh depeh kikadangneh, ratnan kibung pu luk inuper, ayuneh bata' melaco, sia' merirem, idi sia' melidang luk tibaruh, dengan apat diri idi apat alen.

¹⁷Amung diri pekelibut ineh do' su tutumneh inan bakar pirak, idi ooddeh ratnan pirak teh. Idi alen-alendeh ratnan tekaling.

¹⁸Kikadang natad ineh dueh ngepulu' limeh depeh. Pipangneh pulu' dueh depeh setangal. Idi kidita'neh medepeh semikuh dengan dicing ratnan kibung pu luk do'. Idi alen-alenneh ratnan tekaling.

¹⁹Idi amung repapeh kuan Lepo ineh, dengan papek luk inan ngabet dicing, idi papek luk inan ngabet dicing natad pana', ruen ratnan tekaling.

²⁰"Do' iko ngecuk nelun Israil nguit amé' namu umau saitun luk meluun do' ku umau lapung, pad lapung ineh miak uen nutud anid alem.

²¹Idi bang Lepo su luk inan papu' Tuhan ineh bal selipa dicing luk pa atun Pati' Pejani, do' Arun temina' dengan anak-anakneh pa kiung Tuhan rat malem macing pekak. Idi ini aceh ukum luk meruked kuan lun Israil pad macing ku anak inul.

Pura' 28

¹"Do' neteng kinanakmu Arun, idi anak-anakneh, ieh ineh Nadab, Abihu, Eliasar, idi Itamar. Ngatad nedeh ratnan pupu Israil, pad ideh mangun ku imam kuanKu.

²Idi nganau' kuan kinanakmu Arun ineh ayung luk meligan idi luk buren.

³Do' iko nawar nelun luk mileh nerut, luk pangeh pinu'Ku ku ileh, idi ngecuk nedeh nganau' ayung Arun, pad ieh miak mangun ku imam kuanKu.

⁴Ngecuk nedeh nganau' aceh kakeb ruuk, aceh kuyu' imam, aceh kuyu' buyor, aceh kuyu' luk tibaruh, aceh sigar, idi aceh abet awa'. Idi do' ideh nganau' ayung imam ini kuan kinanakmu Arun idi anak-anakneh, pad ideh mangun ku imam kuanKu.

- ⁵Do' ideh ngalap buluh dumba luk bata' melaco, sia' merirem, idi sia' melidang, kibung pu luk do', idi gitian luk inau' ratnan amas.
- ⁶Do' ideh nganau' kuyu' imam ineh, ratnan buluh dumba luk bata' melaco, sia' merirem, idi sia' melidang, idi gitian luk inau' ratnan amas, idi kibung pu luk do', idi do' ieh uen ngebaruh.
- ⁷Idi kuyu' ineh inan dueh lalid tudungneh luk iteng mop papedneh.
- ⁸Do' abet kuyu' imam ineh uen ngebaruh do'-do', idi pekatu nan kuyu', idi ruen mepad ayu.
- ⁹Idi do' iko ngalap dueh ngilung bau burur idi ngayud luun dueh bau ineh ngadan pulu' dueh anak Yakub,
- ¹⁰ieh ineh anem ngadan luun sebuleng bau, idi anem ngadan luun bau luk baken, maya' aco luk inandeh tinganak.
- ¹¹Do' iko ngayud ngadan anak-anak Yakub luun dueh bau burur ineh, mepad kudeng etu luk inarit, idi dengan ayud lun luk mileh ngarit batu luk meraga. Idi do' iko ngalub ineh ku amas.
- ¹²Do' iko nganau' dueh bau ineh mop lalid kuyu' imam ku terawé ratnan pulu' dueh pupu Israil. Idi do' Arun nguit ngadandeh luk pekop lalid kuyu' ineh, pad Ui ini Tuhan megéi' ngerawé pupuKu.
- ¹³Do' iko nganau' alubneh ratnan amas,
- ¹⁴idi nganau' dueh ratai medari ratnan amas luk do' luk mepad kudeng nuper luk ipid, idi nutum ratai ineh nan alub ineh.
- ¹⁵Do' nganau' aceh kakeb ruuk luk pimada' pian Allah, aceh luk mepad kudeng ayu kuyu' luk tibaruh.
- ¹⁶Idi do' ieh apat lebping idi uen ngelepi' dueh, kikadangneh murek, idi pipangneh pana' murek.
- ¹⁷Idi do' ngalub apat baris batu luk meraga. Luk pun-pun sengilung batu luk sia' merirem, sengilung batu luk mebirar, idi sengilung batu luk mesia'.

- ¹⁸Idi luk kedueh sengilung batu luk bata' uduh, sengilung batu luk bata' langit, idi sengilung batu intan.
- ¹⁹Idi luk keteluh sengilung batu luk mebata', idi sengilung batu luk sia' merirem, idi sengilung batu luk merirem.
- ²⁰Idi luk keapat sengilung batu luk bata' melaco, sengilung bau burur, idi sengilung batu luk mebirar. Idi do' ideh uen ngalub ku amas.
- ²¹Idi anid batu ini nan ngayud ngadan sebuleng anak Yakub ku ngegala' ngadan pupu Israil.
- ²²Idi teh do' nganau' ratai-ratai ratnan amas luk do' luk uen nguper ruen luun kakeb ruuk.
- ²³Nganau' dueh kelabung amas ruen luun iring kakeb ruuk.
- ²⁴Idi nutum dueh ratai ineh nan dueh kelabung luk pekop iring kakeb ruuk ineh.
- ²⁵Idi do' nutum paped abet dueh ratai ineh nan lalid tudung kuyu' imam pa atun.
- ²⁶Idi teh nganau' dueh kelabung amas rangen pekop paped kakeb ruuk, luun iring luk pa selipa kuyu' imam.
- ²⁷Idi nganau' dueh kelabung amas teh, idi nganau' ineh pa liang pekop lalid tudung kuyu' imam, idi muneng ku tutum idi pa luun abet awa' kuyu' imam luk inuper do'-do'.
- ²⁸Pangeh ineh do' kelabung kakeb ruuk ineh betin nan kelabung kuyu' imam ku abet luk bata' melaco, idi kakeb ruuk ineh na miak patad ratnan abet awa' kuyu' imam.
- ²⁹"Kareb Arun semuet bang Su luk Meligan, idi ieh miak ngayung ku kakeb ruuk dengan ngadan pupu-pupu Israil, pad Ui ini Tuhan megéi ngerawé pupuKu.

³⁰Idi do' nganau' Urim idi Tumim bang kakeb ruuk luk pimada' pian Allah, pad Arun nguit ineh kareb ieh amé' pa kiungKu. Kareb ineh, do' ieh megéi' ngayung ku kakeb ruuk ineh, pad ieh miak kali' pianKu kuan pupuKu Israil.

³¹"Idi do' iko nganau' kuyu' buyor imam ineh ratnan buluh dumba luk bata' melaco amung.

³²Idi do' ayud dier kuyu' ineh peringuned, idi do' ieh uen muun iring ku kibung luk tibaruh, pad ieh na medarak.

³³⁻³⁴Idi libut lepi'neh, do' iko nganau' ayu bua' delima luk bata' melaco, merirem, idi melidang, dengan karing-karing amas arangdeh.

³⁵Arun miak ngayung ku ineh kareb ieh nganau' kekamen imam. Kareb ieh semuet bang Su luk Meligan pa kiungKu, idi kareb ieh remuat, uni karing pedingeren, pad ieh na maté.

³⁶"Idi teh do' iko nganau' aceh balad amas luk do' idi ngayud luun ineh, 'Linigan Kuan Tuhan.'

³⁷Do' ngabet ineh luun sigar ineh ku abet luk bata' melaco.

³⁸Do' balad amas ineh rangen luun madu' Arun, pad Ui ini Tuhan miak ngalap amung baré luk barén lun Israil kuanKu, sagan pana' lun mula' sala' baré.

³⁹"Idi do' kuyu' Arun uen ngebaruh ratnan kibung pu luk do'. Idi nganau' sigar ratnan kibung pu luk do', idi abet awa' ratnan tebaruh luk raput-raput ayu.

⁴⁰"Idi teh do' nganau' kuyu'-kuyu', abet awa', idi aduk ku abet uluh kuan anak-anak Arun mangun ku ubur idi tagadeh.

⁴¹Idi amung ineh rangen luun kinanakmu Arun idi anak-anakneh. Pangeh ineh do' iko ngumau nedeh ku umau saitun, pad ngeletep nedeh mangun ku imam kuanKu.

⁴²Nganau' siduar ratnan kibung pu kuandeh, pad ideh na lubpa. Idi kadang siduar ineh rat ku awa' macing ku aleb.

⁴³Idi do' Arun idi anak-anakneh ngayung ku ineh, kareb ideh semuet bang Lepo su luk inan papu' Tuhan, idi kareb ideh muneng ku bubpun pian

nganau' kekamendeh Su luk Meligan, pad ideh na nganau' sala' idi maté. Ini aceh ukum luk lutep macing ruked-ruked kuan Arun idi inulneh.

Pura' 29

¹"Idi ini luk ruenmu kuan Arun idi anak-anakneh ku ngeligan nedeh, pad ideh mangun ku imam kuanKu. Ngalap aceh sapi' deléi luk pegawa' idi dueh dumba deléi luk do'.

²Do' ngalap banak luk meluun do', luk na linamud, idi nganau' ruti luk rinabur ku umau saitun, idi sebuang luk na rinabur ku umau. Idi teh nganau' tinapé luk linusi ku umau.

³Idi do' nganau' amung ineh bang sebuleng kabpang, idi maré ineh kuanKu mangun ku baré, dengan sapi' deléi idi dueh dumba deléi ineh.

⁴"Idi nguit ni Arun idi anak-anakneh amé' muneng ku tanga' Lepo su luk inan papu' Tuhan. Idi do' iko maru' nedeh ku abpa'.

⁵Pangeh ineh do' iko ngayung ni Arun ku ayung imam, ieh ineh kuyu' buyor imam, kuyu' imam dengan kakeb ruuk, idi abet awa' teh.

⁶Idi do' ngerareng sigar ineh luun uluhneh, idi nganau' balad amas luk meligan ineh pa luun sigar ineh.

⁷Idi do' iko ngalap umau luk do' buen ineh idi ngutang ineh luun uluhneh, idi ngumau neneh.

⁸"Do' nguit anak-anakneh amé' muneng idi nganau' kuyu' luundeh.

⁹Idi do' iko ngabet awa'deh ku abet awa' ineh, idi ngabet aduk ineh luun uluhdeh. Kudeng ineh teh do' iko ngelelep Arun idi anak-anakneh, pad ideh idi inuldeh mangun ku imam kuanKu macing ruked-ruked.

¹⁰Do' nguit sapi' pa atun Lepo su luk inan papu' Tuhan, idi ngecuk Arun idi anak-anakneh ngerareng tiku'deh luun uluhneh.

¹¹Idi ngeret sapi' ineh pa kiungKu luk Meligan munung tanga' Lepo su luk inan papu' Tuhan.

- ¹²Idi ngalap sebuang dara' sapi' ineh, idi nganau' luun bua' tiku'mu ruen luun unga bubpun. Idi do' ngutang dara' luk ketecan ineh luun kukud bubpun ineh.
- ¹³Idi do' ngalap amung lemak tinéi' ineh, amung lemak aténeh, dueh betér, idi amung lemak luk luun betér ineh. Idi do' ngeseb ineh luun bubpun ineh teh mangun ku aceh baré kuanKu.
- ¹⁴Iamo' do' uang sapi' ineh, dengan kubilneh idi tinéi'neh, sabpen mado rat su nandeh lupu. Ieh ineh aceh baré luk ngiu' sala' imam.
- ¹⁵"Do' iko ngalap sebuleng dumba deléi ineh, idi ngecuk Arun idi anak-anakneh ngerareng tiku'deh luun uluhneh.
- ¹⁶Do' iko ngeret dumba deléi ineh, idi ngalap dara'neh, idi ngisak ineh pekop iring bubpun ineh.
- ¹⁷Idi do' iko muer dumba deléi ineh, idi maru' tinéi'neh, idi kukudneh, idi nganau' ineh pa luun luk titek-titek ineh idi pa luun uluhneh.
- ¹⁸Idi do' dumba deléi ineh barén sabpen luun bubpun ineh mangun ku aceh baré akan. Ui ini Tuhan, mawang niat ku buen baré ineh.
- ¹⁹"Idi do' iko ngalap dumba deléi luk baken ineh, idi ngecuk Arun idi anak-anakneh ngerareng tiku'deh luun uluhneh.
- ²⁰Do' iko ngeret ineh, idi ngalap sebuang dara'neh, idi ngisit ineh luun lalid Arun pa tinueh idi lalid anak-anakneh pa tinueh teh, idi luun bua' tiku' mebpuh pa tinueh, idi luun bua' kukud mebpuh pa tinueh teh. Idi ngisak dara' luk ketecan ineh pekop iring bubpun ineh.
- ²¹Idi do' iko ngalap sebuang dara' luk pa luun bubpun dengan umau luk ku ngumau ini, idi ngisak ni Arun idi ayungneh. Kudeng ineh teh anak-anakneh, idi ayungdeh, pad Arun, anak-anakneh, idi ayungdeh uen ngeligan kuanKu.
- ²²"Do' ngalap ratnan dumba deléi ineh lemakneh, dengan lemak iurneh, lemak tinéi'neh, lemak luun aténeh, dueh betérneh, dengan lemak luk luunneh, idi tipan pa tinueh. Ngaceku dumba ineh aceh baré ku ngelelep imam.

²³Idi do' iko ngalap dueh balad ruti, idi aceh pinaram luk rinabur ku umau, idi aceh tinapé rat bang kabpang luk inan ruti luk na lamud luk pa kiung Tuhan.

²⁴Do' iko ngerareng akan ineh bang palad Arun idi bang palad anak-anakneh. Do' ideh nicul amung ineh mepad kudeng aceh baré luk tidulen pa kiung Tuhan.

²⁵Idi do' iko ngalap amung ineh rat nedeh idi ngeseb ineh luun bubpun, pa luun baré luk sabpen mangun ku baré akan kuanKu. Ui ini Tuhan, mawang niat ku buen baré ineh.

²⁶"Do' ngalap ruuk dumba deléi ineh, idi nicul ineh ku aceh baré pa kiungKu. Babpat ini kuanmu.

²⁷Kareb seburur imam uen ngelelep, do' iko nicul ruuk idi tipan dumba deléi luk kereten ku ngelelep imam ineh. Idi ineh mangun ku babpat imam-imam.

²⁸Ineh luk mangun ku ukum kuan lun Israil macing raked-raked, kareb ideh maré barédeh luk nguit pedo'. Ruuk idi tipan mangun ku babpat imam-imam. Ini baré lun mula' kuanKu.

²⁹"Do' ayung Arun luk meligan ineh pinul macing ku anak-anakneh luk mucu, pad ideh miak ngayung ku ineh kareb ideh uen ngelelep.

³⁰Ide' rat arang anak-anak Arun luk ngelibal neneh mangun ku imam, idi luk semuet bang Lepo su luk inan papu' Tuhan ineh, pad ngakem kekamen imam Su luk Meligan, do' ngayung ku ineh tudu' aco kinioneh.

³¹"Do' ngalap uang dumba deléi luk baré ku ngelelep Arun idi anak-anakneh, idi nanek ineh su apeh luk meligan.

³²Idi ideh kuman uang ineh dengan ruti luk ketecan bang kabpang luk munung tanga' Lepo su luk inan papu' Tuhan.

³³Idi ideh kuman amung ineh luk biré pad nguit pedo' kareb ideh litep mangun ku imam. Iamo' imam-imam mo' luk kuman ineh, ngaceku akan ineh meligan.

³⁴Kudeng inan luk ketecan ratnan uang, idi ruti ineh macing pekak, do' amung luk ketecan ineh sabpen. Aleg kuman ineh ngaceku amung ineh meligan.

³⁵"Idi do' nganau' kudeng ineh kuan Arun idi anak-anakneh, maya' kudeng luk bida'Ku namu. Seruked tudu' aco do' iko ngeletep nedeh.

³⁶Idi anid-anid aco do' iko maré sebuleng sapi' deléi mangun ku baré luk nguit pedo', pad ngeligan bubpun ineh. Idi do' ngumau bubpun ineh, pad ieh meligan.

³⁷Tudu' aco kinioneh iko nganau' kudeng ineh, pad bubpun ineh meligan tutu. Anun-anun luk mekaneh ku bubpun ineh mangun meligan.

³⁸"Anid-anid aco, macing ruked-ruked, do' maré luun bubpun dueh anak dumba luk ulun selak.

³⁹Do' iko maré sebuleng anak dumba kareb pekak, idi sebuleng pa malem.

⁴⁰Dengan anak dumba luk pun-pun do' maré apat lio banak luk do' luk rinabur ku dueh seréi' umau saitun. Idi teh do' ngutang dueh seréi' abpa' anggur mangun ku baré luk rupen.

⁴¹Do' ngeret anak dumba luk kedueh kareb malem. Idi dengan ineh maré banak, umau saitun, idi abpa' anggur, mepad kinula' baré luk biré kareb pekak. Ieh ineh aceh baré akan kuanKu. Idi Ui mawang niat ku buen baré ineh.

⁴²Do' baré luk sabpen ini barén pa kiungKu, pad macing ku anak inul muyuh, munung tanga' Lepo su luk inan papu' Tuhan, ieh ineh su luk inanKu amé' papu' pupuKu idi pebala namu.

⁴³Idi su ineh Ui amé' matun lun Israil, idi rasatKu ngeligan su ineh.

⁴⁴Idi Ui ngeligan Lepo su luk inan papu' Tuhan idi bubpun ineh pana'. Idi teh Ui ngeligan Arun idi anak-anakneh pad ideh mangun ku imam kuanKu.

⁴⁵Idi Ui tudo arang uned lun Israil. Idi Ui mangun ku Allahdeh,

⁴⁶pad ideh kali' Ui ini Tuhan Allahdeh luk pangeh nenguyut nedeh remuat rat bang bawang Masir, pelé Ui tudo arangdeh, ngaceku Ui ini Tuhan Allahdeh.

Pura' 30

¹"Do' iko nganau' aceh méja luk inan ngeseb uar luk do' buen ratnan kayuh pirur.

²Do' ieh apat lebping, semikuh kadangneh, idi semikuh pipangneh. Idi kidita'neh dueh sikuh, idi do' unganeh pekatu luun ineh.

³Idi ieh uen ngakep ku amas luk do', do' luunneh, iringneh, idi amung unganeh. Idi do' ieh ruen belipid amas pekelibut.

⁴Idi do' nganau' dueh kelabung amas pa liang belipid ineh pekop iringneh, su luk inan kayuh birir, pad ieh miak uen mirir.

⁵Do' iko nganau' kayuh luk ku mirir ineh ratnan kayuh pirur, idi ngakep neneh ku amas.

⁶Idi do' nganau' méja ineh pa atun dicing luk tekito pa atun Pati' Pejani' luk petutup ku kakeb su luk inan pedo' luk pa luun Pati' Pejani' ineh, ieh ineh su luk inanKu papu' namu.

⁷Idi do' Arun ngeseb umau luk do' buen anid-anid pekak luun méja ineh, kareb ieh pangeh nengasa' dawan.

⁸Kudeng ineh teh kareb ieh nutud lapung ineh pa malem, do' ieh ngeseb uar luk do' buen. Dalan ngeseb umau luk do' buen ineh lutep macing ku anak inul.

⁹Aleg muyuh ngeseb uar luk do' buen luk na petulu, baré luk sabpen, idi baré luk kenen, luun bubpun ineh. Idi aleg muyuh ngutang baré luk rupen luunneh.

¹⁰Selak sekua' do' Arun ngisit dara' luk barén ku ngiu' sala' idi nguit pedo' luun apat unga bubpun ineh. Sekua' selak do' ieh nganau' pedo' luun bubpun ineh arang muyuh macing ku anak inul. Do' bubpun ineh meligan tu-tu pa kiungKu.”

¹¹Kebala Tuhan ni Musa,

¹²"Kareb iko ngiap nelun Israil, do' anid-anid deléi maré inan Tuhan usin ku uli' ulundeh, pad na dereh macing nedeh kareb iko ngiap nedeh.

¹³Anid-anid burur luk semuet bang iap ineh na miak na maré usin uli', maya' berat luk litep. Do' ideh maré ineh mangun ku aceh baré kuanKu. Anid-anid burur,

¹⁴ieh ineh luk semuet bang iap lemulun luk ulunneh dueh ngepulu' lak mela, na miak na maré usin uli' ineh.

¹⁵Idi lun luk do' na maré mela, idi lun luk masi' na miak ngetanga' baré ineh kareb ideh maré usin ku uli' ulundeh.

¹⁶Do' ngalap usin ini kuan kekamen Tuhan ineh rat nelun Israil, idi maré ineh ngaceku kekamen bang Lepo su luk inan papu' Tuhan ineh. Ieh ineh usin uli' ulundeh, pad Ui ngerawé idi matar nedeh."

¹⁷Kebala Tuhan ni Musa,

¹⁸"Do' iko nganau' aceh bigan ratnan tekaling, idi kukudneh pana' tekaling. Idi nganau' ineh arang Lepo su luk inan papu' Tuhan dengan bubpun. Idi nganau' abpa' bang ineh.

¹⁹Idi do' Arun idi anak-anakneh maru' ticu' idi kukuddeh ku abpa' luk bang bigan ineh,

²⁰kareb nateh ideh semuet bang Lepo su luk inan papu' Tuhan, idi kareb nateh ideh amé' matun bubpun pian maré baré akan kuan Tuhan, pad ideh na maté.

²¹Idi do' ideh maru' kukud idi ticu'deh, pad ideh na maté. Idi ini aceh ukum luk meruked kuan pupudeh macing ku anak inuldeh."

²²Kebala Tuhan ni Musa,

²³"Do' iko ngalap luk do' buen, ieh ineh umau mur luk mepulut, iwa' kati, idi anit kayuh luk mepaci' luk do' buen, apat kati setangal, keriburo luk do' buen apat kati setangal,

- ²⁴idi anit kadingau iwa' kati (maya' berat luk litep), idi umau saitun, segilin.
- ²⁵Idi ratnan ineh do' iko nganau' umau luk ku ngumau, ieh ineh aceh umau luk meligan luk uen muar mepad kudeng umau luk do' buen.
- ²⁶Idi dengan ineh do' iko ngumau Lepo su luk inan papu' Tuhan, Pati' Pejani',
- ²⁷méja dengan amung repapehneh, kukud dawan ineh dengan amung repapehneh teh, méja luk nan ngeseb uar luk do' buen ineh,
- ²⁸bubpun luk nan ngeseb dengan amung repapehneh, idi bigan dengan kukudneh.
- ²⁹Do' iko ngeligan amung ineh pad ineh meligan tu-tu. Anun-anun luk mekaneh ku ineh miak meligan.
- ³⁰"Do' ngumau ni Arun dengan anak-anakneh ku umau ineh, idi ngeligan nedeh pad ideh mangun ku imam kuanKu.
- ³¹Do' mada' nelun Israil, kebalamu, 'Umau ini mangun ku umau luk meligan kuanKu macing ku anak inul muyuh.
- ³²Aleg ngumau nelun baken ku ineh. Idi aleg muyuh makai umau luk mepad puar. Umau ineh meligan kuanKu.
- ³³Idé luk nganau' umau luk mebuen mepad kudeng ini, idi nganau' pa luun burur lun luk na tabpen, ieh ineh duken buro rat arang pupuneh.' “
- ³⁴Kebala Tuhan ni Musa, "Lapenmu luk do' buen, ieh ineh ilu' para', kerukub girig, idi ilu' luk mebuen dengan tutud uar, amung ineh mepad kinula'.
- ³⁵Idi do' iko muar ineh ku aceh tutud luk do' buen, mepad kudeng nganau' umau luk do' buen. Idi do' ieh uen muar ku tucu' pad ieh meligan.
- ³⁶Do' iko tupeh sebuang ineh idi nguit ineh amé' bang Lepo su luk inan papu' Tuhan, su luk inanKu amé' nemuyuh. Idi ngisak ineh pa atun Pati' Pejani'. Idi uar luk do' buen ineh meligan kuan muyuh.
- ³⁷Aleg nganau' uar ineh kuan burur muyuh sebuleng. Do' uar ineh uen ngeligan kuanKu.

³⁸Idé-idé luk nganau' uar luk kudeng ineh kuan bururneh sebuleng, kali' rungen ieh duken buro rat arang pupuneh."

Pura' 31

¹Kebala Tuhan ni Musa,

²"Ui pangeh nemili' ni Besalel Uri ratnan inul Hur luk pupu Yahuda.

³Ui pangeh nemanu' neneh ku Roh Allah idi ileh luk meriput ratnan amung kekamen ticu' —

⁴pad nganau' arit luk do', ratnan amas, pirak, idi tekaling,

⁵idi arit batu luk meraga rangen su inanneh, idi arit kayuh, dengan amung kekamen luk kudeng ineh.

⁶Ui pangeh nengelelep ni Aholiab Ahisamak ratnan inul Dan, pad ieh ngedengan ni Besalel. Idi teh Ui pangeh nemaré ileh luk meriput kuan tukang-tukang, pad ideh miak nganau' amung luk bida'Ku namu.

⁷Miak ideh nganau' Lepo su luk inan papu' Tuhan, Pati' Pejani', kakeb su luk inan pedo', dengan amung repapeh Lepo ineh,

⁸méja ineh dengan amung repapehneh, kukud dawan luk ratnan amas luk do' dengan amung repapehneh teh, su luk inan ngeseb tutud luk do' buen,

⁹bubpun su luk inan maré baré luk sabpen dengan amung repapehneh, bigan luk inan sibaru' dengan kukudneh,

¹⁰amung ayung imam luk ku ayung Arun idi anak-anakneh bang kekamen imam ineh,

¹¹umau luk ku ngumau idi uar luk do' buen, kuan Su luk Meligan. Idi do' ideh nganau' ineh maya' kudeng luk pangeh bilaKu namu."

¹²Kebala Tuhan ni Musa,

¹³"Mada' nelun Israil, 'Matar do'-do' AcoKu luk inan Mudeng, ngaceku ineh aceh tanu' arangKu dengan muyuh idi amung inulmu, Ui ini Tuhan luk ngeligan nemuyuh.

¹⁴Do' matar Aco luk inan Mudeng, ngaceku aco ineh meligan. Idé luk na nginita aco sineh idi ngakem, na miak na ieh uen ngaté.

¹⁵Do' muyuh ngakem anem aco kinioneh. Iamo' aco luk ketudu', ieh ineh Aco luk inan Mudeng luk linigan kuanKu. Idé luk ngakem kareb aco sineh na miak na uen ngaté.

¹⁶Do' amung lun Israil nginita aco sineh mangun ku aceh tanu' pejani'.

¹⁷Ieh ineh aceh tanu' luk meruked arangKu dengan lun Israil. Ngaceku Ui ini Tuhan pangeh nemudut langit idi tana' bang anem aco kinioneh. Idi Ui nucu' aco luk ketudu' idi nengato erurKu.' “

¹⁸Idi pangeh Tuhan nepebala ni Musa déi' luun Pegkung Sinai, idi Ieh nemaré neneh dueh balad batu luk inan pejani', luk inayud bua' ticu' Allah.

Pura' 32

¹Kareb lun mula' ineh nginulat ni Musa mio macing rat luun pegkung, idi ideh nepamung ni Arun, kebaladeh, "Nganau' aceh akang luk miak nguyut nekai, ngaceku na kai kali' luk mangun kuan Musa luk nenguyut nekai remuat rat bang bawang Masir.”

²Idi kebala Arun nedeh, "Neka amung abé amas luk i lalid awan muyuh idi anak muyuh luk deléi idi decur, idi nguit amé' negku.”

³Idi lun mula' ineh neneka amung abé amas luk i laliddeh idi nenguit amé' ni Arun.

⁴Idi ieh nengalap abé ineh rat nedeh ineh, idi ieh nengurai ineh mangun ku ayu mepad kudeng anak sapi'. Idi kebala lun mula', "O lun Israil, ini allah tau luk nenguit netau remuat rat bang bawang Masir!”

⁵Idi Arun nenganau' aceh bubpun pa atun anak sapi' ineh, idi kebalaneh, "Pekak nebpa inan aceh irau rayeh kuan Tuhan!”

⁶Pekak kenebpa idi ideh nekulat uka-uka, idi ideh nemaré luk sabpen idi nenguit baré luk nguit pedo' teh. Idi ideh netudo kuman idi ngirup. Pangeh ineh idi ideh marot rot luk dat.

⁷Idi kebala Tuhan ni Musa, "Saget lemubed, ngaceku pupumu luk inuitmu rat bawang Masir, pangeh nenganau' sala' idi nengelegkan Negku.

⁸Nekini ideh pangeh lemubed ratnan luk pangeh bilaKu nedeh. Ideh pangeh nenganau' aceh anak sapi' luk inurai idi ideh sembayang neneh, idi ideh maré luk sabpen kuanneh, kebaladeh, 'O lun Israil, ini allah muyuh luk pangeh nenguit nemuyuh remuat rat bang bawang Masir!' “

⁹Kebala Tuhan ni Musa, "Ui pangeh nekali' pupu ini pelaba tueh niat.

¹⁰Aleg mebpeng Negku na ngacing useh nedeh, pad ngaté nedeh. Idi Ui nganau' namu mangun ku aceh pupu luk rayeh.”

¹¹Iamo' kesembayang Musa pa kiung Tuhan Allahneh, "O Tuhan, ngudeh Iko ngacing useh kuan pupuMu luk pangeh inuitMu remuat rat bang bawang Masir dengan tueh idi laludMu?

¹²Aleg nima' nelun Masir pebala kudeng ini, 'Dengan niat luk dat Tuhan nenated nedeh remuat, pad ideh mabud maté luun pegkung.' Ugka' museh nedeh, idi nginuud ratnan dat luk Iko pian ngacing kuan pupuMu.

¹³Do' ngerawé demulunMu Ibrahim, Isak, idi Yakub, luk inanMu nepejani', kebalaMu nedeh, 'Ui ngula' inul muyuh mepad kudeng ula' gituen luk i langit, idi Ui maré tana' luk pangeh bida'Ku nemuyuh, miak mangun ku babpat muyuh raked-raked.' “

¹⁴Idi Tuhan nenginuud ratnan dat luk Ieh pian ngacing kuandeh.

¹⁵Idi Musa nelemubed rat luun pegkung idi nenguit dueh balad batu pejani' luk inayud pekop.

¹⁶Idi dueh balad batu ineh, ieh ineh pudut Allah, idi Ieh Sebuleng luk nengayud luun ineh.

¹⁷Idi Yusak neninger arod lun mula' ineh, idi kebalaneh ni Musa, "Ui ninger arod kudeng ayu lun pebunu' su luk inan nelupo.”

¹⁸Iamo' kebala Musa, "Baken ini arod metueh, idi baken ini arod luk melaya', iamo' pedingerenku kudeng tang lemulun menani!”

¹⁹Kareb Musa muneng nelun mula' idi ieh nenier aceh anak sapi' idi lun mula' ineh ngalai. Idi ieh megateh niat. Idi ieh nemepet dueh balad batu ineh rat bang paladneh, pad ineh nebila' luun buten irang pegkung ineh.

²⁰Idi ieh nengalap anak sapi' luk pangeh inau'deh ineh idi isebneh luun apui. Idi ieh nengerupung neneh pad mangun ku abuh, idi ieh nengisak abuh ineh pa luun abpa', idi nengecuk lun Israil ngirup abpa' ineh.

²¹Idi kebala Musa ni Arun, "Anun luk inau' pupu ini kuanmu, pad iko nengacing sala' luk rayeh ineh kuandeh?"

²²Iamo' kebala Arun, "Aleg iko museh negku. Iko sebuleng kali' pupu ini pian nganau' luk dat.

²³Idi kebaladeh negku, 'Nganau' aceh akang luk miak nguyut nekai, ngaceku na kai kali' luk pangeh mangun kuan i Musa luk pangeh nenguit nekai rat bang bawang Masir.'

²⁴Idi ui nengecuk nedeh nguit abé amas. Idi ideh nemaré ineh negku idi ui nemepet ineh luun apui idi neremuat anak sapi' ini!"

²⁵Idi Musa nekali' i Arun pangeh nenima' nelun mula' maya' piandeh sebuleng, pad ideh inan situnga arang amung bunu'deh.

²⁶Idi ieh netuped munung tanga' su inandeh nelupo, idi kebalaneh, "Idé luk merapet inan Tuhan do' amé' negku!" Idi amung lun Liwi nepamung neneh.

²⁷Idi kebala Musa nedeh, "Kudeng ini bala Tuhan Allah lun Israil, Do' anid-anid muyuh ngabin pelapet idi nalan lemaba su luk inan lupu, rat tanga' selipa macing ku tanga' luk paped selipa, idi do' muyuh ngaté kinanak muyuh, ruruh muyuh, idi lun dengan muyuh."

²⁸Idi lun Liwi nemaya' bala ineh. Idi aco sineh ideh nengaté lélé teluh ngeribu burur deléi.

²⁹Idi kebala Musa nelun Liwi, "Aco sini muyuh pangeh nengeletap burur muyuh mangun ku imam kuan Tuhan, idi muyuh pangeh nengaté anak

muyuh luk deléi idi kinanak muyuh, pad muyuh miak ngalap peruan Tuhan aco sini.”

³⁰Idi pekak kenebpa Musa nepebala kuan pupu ini, "Muyuh ini pangeh nenganau' sala' luk rayeh. Iamo' nekini ui mudik pegkung amé' inan Tuhan. Kian miak ui ngalap pedo' ngaceku sala' muyuh ineh lek.”

³¹Idi Musa iné' matun Tuhan idi nepebala, "Pupu ini pangeh nenganau' aceh sala' luk rayeh, ngaceku ideh pangeh nenganau' akang ratnan amas pad sembayang neneh.

³²Iamo' nekini do' Iko maré do' ku sala'deh, idi kudeng na miak, do' ngiu' ngadanku rat bang surat luk pangeh inayudMu.”

³³Iamo' kebala Tuhan, "Idé luk mesala' pa kiungKu, ngadanneh ineh luk ruenKu ngiu' rat bang suratKu.

³⁴Iamo' nekini do' iko nalan nguyut pupu ineh macing su luk bida'Ku namu. Idi melaikatKu nalan pa kiungmu. Iamo' kareb aco ua' macing Ui miak ngua' sala'deh.”

³⁵Idi Tuhan nengacing aceh ét kuan pupu ineh, ngaceku ideh pangeh nengecuk ni Arun mudut anak sapi' ineh.

Pura' 33

¹Kebala Tuhan ni Musa, "Nalan iko rat ieni, dengan pupu ineh luk pangeh inuitmu rat bawang Masir amé' bawang luk pangeh pijani'Ku ni Ibrahim, Isak, idi Yakub.

²Ui ngecuk aceh melaikat nalan pa atun muyuh, idi Ui ngusu lun Kanaani, lun Amori, lun Hiti, lun Prisi, lun Hiwi, idi lun Yebusi.

³Muyuh amé' nan aceh tana' luk do' idi luk mebaleng. Iamo' Ui na nalan arang muyuh, pad Ui na ngaté nemuyuh arang dalan, ngaceku muyuh aceh pupu luk metueh niat.”

⁴Kareb lun mula' neninger bala ineh, idi ideh nenacung, idi seburur pana' na miak ngayung ku amas.

⁵Idi kebala Tuhan ni Musa, "Mada' nelun Israil, 'Muyuh ini aceh pupu luk metueh niat. Kudeng Ui nalan arang muyuh segageh pana', kali' rungen Ui ngaté nemuyuh. Ngaceku ineh ngelengu ayung muyuh luk meraga, idi Ui miak ngerawé anun luk ruenKu nemuyuh.' "

⁶Idi kareb lun Israil nenalan rat Pegkung Sinai, na ideh nengayung ku ayung amas.

⁷Kareb lun Israil nelupo, idi Musa megéi' mubuh Lepo luk meligan ruen mado ratnan su luk inan lun mula' lupu. Idi ideh neneten ngadanneh Lepo su luk inan papu' Tuhan, idi idé luk pian ngitun inan Tuhan miak remuat idi amé' bang Lepo ineh.

⁸Kareb Musa remuat amé' bang Lepo ineh, amung pupu ineh mudur idi tuped, anid munung tanga' lepodeh, idi ideh nier ni Musa pad macing ieh semuet bang ineh.

⁹Kareb Musa nesemuet, idi diri laput temurun, idi ugka' su tanga' Lepo ineh, idi Tuhan pegayam ni Musa ieneh.

¹⁰Idi kareb amung pupu ineh nier diri laput nugka' su Lepo ineh, idi ideh mudur idi tekeradung sembayang anid-anid munung tanga' lepodeh.

¹¹Idi Tuhan pegayam ni Musa dengan papu' kiung, mepad kudeng selemulun pegayam nelun denganneh. Pangeh ineh idi Musa lemubed su luk inandeh nelupo. Iamo' Yusak Nun anak adi' luk ngedengan neneh, na remuat rat bang Lepo ineh.

¹²Idi kebala Musa nan Tuhan, "Iko nengecuk negku nguit pupu ini macing nan bawang ineh, iamo'na Iko nemada' negku idé luk dukenMu maya' negku, sagan pana' Iko nepebala, 'Ui nemili' namu idi iko pangeh nengalap éi' pa kiungKu.'

¹³Kudeng pieh kudeng ineh, mada' terawéMu negku, pad ui maya' Namu, idi megéi' nganau' luk petulu pa kiungMu. Idi ngerawé pupu ini pangeh pinili'Mu ku pupuMu."

¹⁴Idi kebala Tuhan, "Ui sebuleng ngedengan namu pad maré namu metueh."

¹⁵Idi kebala Musa Neneh, "Kudeng Iko na idi dengan kai, aleg ngecuk nekai nalan rat ieni.

¹⁶Kudeng apehké lemulun miak kali' idi Iko méi' negku idi pupuMu ini, kudeng Iko na idi dengan kai. Kudeng Iko idi dengan kai, kali' rungen kai ini baken ratnan amung pupu luk luun tana' ini."

¹⁷Idi kebala Tuhan ni Musa, "Kali' rungen Ui nganau' luk pinutuhmu ineh. Ngaceku Ui miti namu, idi Ui mawang niat namu."

¹⁸Iamo' kebala Musa, "Do' nima' negku nier rayehMu!"

¹⁹Iamo' kebala Tuhan, "Ui ngetacu do'Ku pa kiungmu, idi neten ngadanKu pa kiungmu, ieh ineh Tuhan. Idi Ui méi' kuan idé luk inanKu méi', idi maré katuKu kuan idé luk pamaranKu katu ineh.

²⁰Na iko miak nier kiungKu, ngaceku na lun luk nier Negku miak mulun.

²¹Siruh, aceh luk inan iringKu, idi ieneh iko tured luun batu.

²²Idi kareb rayehKu lemaba Ui ngerareng namu bang arang batu ineh, idi Ui ngelinged namu ku paladKu pad Ui lemaba.

²³Idi kareb Ui pangeh nginat ticu'Ku, idi iko miak nier ketedKu. Iamo' kiungKu na miak sirenmu."

Pura' 34

¹Kebala Tuhan ni Musa, "Ngelapag dueh balad batu baruh, mepad kudeng luk atun, idi Ui ngayud luun ineh amung bala luk luun dueh balad batu luk atun luk pangeh binila'mu.

²Do' iko temina' pekak uka-uka idi uké Pegkung Sinai, idi papu' Negku luun buduk pegkung ineh.

³Seburur pana' nateh miak maya' namu. Idi seburur pana' nateh miak silagan luun pegkung ineh, idi na dumba idi sapi' miak nakap akan libut pegkung ineh."

⁴Idi Musa nengalapag dueh balad batu mepad kudeng luk atun. Idi pekak uka-uka ieh nuké Pegkung Sinai, maya' kudeng luk bila Tuhan neneh, idi ieh nenguit dueh balad batu ineh.

⁵Idi Tuhan netemurun bang aceh laput, idi tured pelengit neneh, idi Ieh neneten ngadanNeh sebuleng, "Tuhan."

⁶Idi Tuhan nenalan lemaba pa kiungneh, idi Ieh nengitang, "Ui ini Tuhan, Ieh ineh Allah, luk méi' idi mekatu, luk mekadang niat, luk meluun awa idi lutep maya' jani'.

⁷Ei'Ku ineh lutep kuan lun ribu-ribu idi Ui maré do' ku amung kuyo, dat, idi sala', iamo' na tu-tu Ui muit lemulun ratnan ukum, iamo' ngua' kuyo amung taman inan anak idi mupun, macing ku inul luk keteluh idi luk keapat."

⁸Idi dengan mesaget Musa netekeradung,

⁹kesembayangneh, "O Tuhan, kudeng Iko méi' negku, do' Iko nalan arang kai. Sagan pana' pupu ini metueh niat, iamo' maré do' ku kuyo idi sala' kai, idi ngalap nekai mangun ku pupuMu."

¹⁰Kebala Tuhan, "Ui pejani' nan amung pupu Israil, idi pa kiung muyuh Ui nganau' tuda'-tuda' tanu' luk inan mawa luk na nangun bang apud tana' idi arang pupu baken. Idi amung pupu luk libut-libut muyuh miak nier luk ruen Tuhan, ngaceku luk ruenKu kuan muyuh melalud tu-tu.

¹¹Do' iko ngimet amung ukum luk bida'Ku namu aco sini. Ui ngusu amung lun Amori, lun Kanaani, lun Hiti, lun Prisi, lun Hiwi, idi lun Yebusi rat pa kiungmu.

¹²Aleg perurum nelun luk bang bawang luk ulek muyuh ineh, pad ideh na mangun ku aceh abpung kuanmu.

¹³Iamo' do' ngusag amung bubpundeh, mila' amung akangdeh, idi nebpeng amung ulungdeh.

¹⁴"Aleg iko sembayang inan allah baken, ngaceku Ui ini Tuhan luk temaruh.

- ¹⁵Idi aleg iko pejani' nelun luk bang bawang ineh. Ngaceku kareb ideh sembayang idi nguit luk barén inan allahdeh, idi kali' rungen ideh nguit namu, idi iko pana' kuman luk baréndeheh lek.
- ¹⁶Idi kudeng anak deléimu ngaweh decur pupu ineh, kali rungen ideh nguit nedeh maya' allahdeh, pad ideh na lutep maya' Negku.
- ¹⁷"Idi aleg iko nganau' kuanmu sebuleng akang luk inurai.
- ¹⁸"Idi do' iko ngimet Aco Rayeh Ruti luk Na Lamud. Tudu' aco kinioneh do' iko kuman ruti luk na lamud, maya' kudeng luk bilaKu, ieh ineh bang bulan Abib. Ngaceku bang bulan ineh iko nenalan rat bawang Masir.
- ¹⁹"Idi amung anak deléi lemulun idi aya' luk atun ineh Ui kuan.
- ²⁰Idi do' anak keladai luk atun uen nguli' ku aceh anak dumba. Iamo' kudeng iko na nguli' ineh na miak na iko mutul dierneh. Idi do' muyuh nguli' anak deléi muyuh luk atun teh. Idi kareb ineh aleg selemulun amé' Negku dengan na nguit baré.
- ²¹"Anem aco mo' kinioneh iko ngakem. Iamo' aco luk ketudu' ineh, do' iko ucu'. Do' kareb ngelus', do' kareb ngeranih, kudeng ieh aco sineh do' ucu'.
- ²²"Idi teh do' iko ngimet Irau pun Ngeranih, idi teh Irau Lepo kareb ngamung bua'.
- ²³"Idi teluh kua' bang selak do' amung lun deléi luk arang muyuh macing pa kiungKu, ieh ineh Tuhan, Allah lun Israil.
- ²⁴Kareb Ui pangeh nengusu pupu ineh rat pa kiungmu, idi Ui miak ngerayeh bawangmu, pad seburur pana' na luk melili ku bawangmu, kareb iko amé' matun Tuhan Allahmu teluh kua' selak.
- ²⁵"Idi aleg dara' baré luk kuanKu barénmu dengan aceh luk inan lamud. Idi aleg baré luk kirat kareb aco rayeh ketecan macing pekak.
- ²⁶"Luk meluun do' ratnan peranih luk pun ratnan uli' tana'mu, do' itenmu amé' bang ruma' Tuhan. "Idi aleg iko nanek anak amék ku rata tinehneh."

²⁷Idi kebala Tuhan ni Musa, "Iuden amung bala ini, ngaceku maya' uni bala ini, Ui pejani' namu idi nelun Israil."

²⁸Idi Musa idi dengan Tuhan apat ngepulu' aco apat ngepulu' dacek kinioneh. Na ieh kuman. Na ieh ngirup abpa'. Idi Musa nengayud amung bala pejani' ineh, ieh ineh ukum pulu' luun balad batu ineh.

²⁹Kareb Musa nusul rat luun Pegkung Sinai, ieh nengimet pulu' ukum ineh. Idi na ieh kali' kiungneh merasat kareb ieh pangeh nepegayam inan Tuhan.

³⁰Kareb Arun idi amung lun Israil nenier ni Musa, ideh nekali' kiungneh merasat. Idi ideh matot amé' muneng neneh.

³¹Iamo' Musa nenawar nedeh, idi Arun dengan amung lun rayeh-rayeh iné' neneh. Idi Musa nepebala nedeh.

³²Pangeh ineh amung lun Israil nepamung iné' neneh. Idi Musa nengacing amung bala luk bila Tuhan neneh déi' luun Pegkung Sinai.

³³Kareb Musa pangeh nepebala nedeh, idi ieh nengebpu kiungneh.

³⁴Iamo' anid kareb Musa amé' pa kiung Tuhan pian pegayam Neneh, idi ieh necan ebpu kiung ineh pad ieh remuat. Idi kareb ieh remuat, idi ieh mada' nelun Israil anun luk bila Tuhan neneh.

³⁵Kareb lun Israil nier kiung Musa, kiungneh merasat, idi Musa ngebpu kiungneh pad ieh semuet idi pegayam inan Tuhan.

Pura' 35

¹Musa nengecuk amung lun Israil mepamung, idi kebalaneh nedeh, "Ini amung bala luk icuk Tuhan ruen muyuh.

²Anem aco muyuh miak ngakem. Iamo' aco luk ketudu' ineh meligan, ieh ineh aceh Aco luk inan Mudeng kuan Tuhan. Idé luk ngakem kareb aco sineh, ieh miak pitayen.

³Aleg muyuh nutud apui su luk inan muyuh mudeng kareb Aco luk inan Mudeng ineh."

⁴Idi Musa nepebala kuan amung lun Israil, "Ini luk bila Tuhan:

- ⁵Do' muyuh maré aceh baré kuan Tuhan. Anid-anid lun luk mawang niat, miak nguit baré amas, pirak, idi tekaling,
- ⁶idi kibung luk bata' melaco, sia' merirem, idi sia' melidang, kibung pu luk inuper, idi buluh amék,
- ⁷idi kubil dumba deléi luk inau' mesia', kubil luk do', idi kayuh pirur;
- ⁸umau lapung, umau luk do' buen ku ngumau, uar luk do' buen;
- ⁹bau burur, idi batu baken luk meraga luk ku kuyu' Imam Rayeh idi kakeb ruuk.
- ¹⁰"Idi amung tukang luk mileh arang muyuh, do' amé' idi nganau' amung luk bida' Tuhan:
- ¹¹Lepo ineh, dengan papenneh, oodneh, tulangneh, atangneh, dirineh, idi amung alenneh;
- ¹²Pati' Pejani' dengan kayuh birirneh, kakeb su luk inan pedo', dicing luk ku alad kakeb;
- ¹³méja ineh perapu dengan birirneh idi amung repapehneh, idi ruti ubur ineh;
- ¹⁴kukud dawan dengan repapehneh, lapungneh, idi umau luk kuan lapung ineh;
- ¹⁵méja luk inan ngeseb uar luk do' buen perapu birirneh, umau luk ku ngumau, uar luk meluun do' buen; dicing tanga' Lepo ineh;
- ¹⁶bubpun luk inan ngeseb baré perapu dengan teripin tekaling, kayuh birir idi amung repapehneh, bigan luk inan sibaru' dengan kukudneh;
- ¹⁷dicing natad, perapu dirineh idi alenneh, dicing tanga' natad ineh;
- ¹⁸amung papek Lepo dengan abet kuan Lepo idi natadneh,
- ¹⁹idi amung ayung luk do' kuan imam-imam luk ku ayungdeh bang Su luk Meligan, idi amung ayung luk meligan luk ku ayung Arun imam ineh, idi amung ayung anak-anakneh ineh."

- ²⁰Idi amung lun Israil nuli'.
- ²¹Idi amung lun luk nesigio niat nenguit luk barén inan Tuhan piduten ku Lepo su luk inan papu' Tuhan. Idi teh ideh nenguit amung luk petulu kuan kekamen Tuhan idi luk ku nganau' ayung imam.
- ²²Idi idé-idé luk meran niat, do' deléi idi decur, nenguit gerusang, abé, susing, bané, idi ayung amas luk baken. Idi ideh nengeligan ineh kuan Tuhan.
- ²³Idi anid-anid lemulun luk inan kibung luk bata' melaco, sia' merirem, idi sia' melidang, kibung pu luk inuper, idi buluh amék, idi kubil dumba deléi luk inau' mesia', idi kubil luk do', inuitdeh iné' neneh.
- ²⁴Idi idé luk miak nguit aceh baré ratnan pirak idi tekaling, inuitdeh barén kuan Tuhan. Idé luk inan kayuh pirur ku ngedengan pudut ineh, inuitdeh.
- ²⁵Idi amung decur luk mileh nenguit luk inuperdeh ineh, ieh ineh nuper luk bata' melaco, sia' merirem, idi sia' melidang, idi nuper pu.
- ²⁶Idi teh ideh nenguper buluh amék.
- ²⁷Idi lun rayeh-rayeh nenguit bau burur idi batu baken luk meraga ruen luun kuyu' imam luk meligan idi kakeb ruuk;
- ²⁸Idi luk do' buen, umau lapung, umau luk ku ngumau, idi umau luk ku ngeseb uar luk do' buen.
- ²⁹Idi amung lun Israil luk nesigio niat nenguit barédeh kuan amung kekamen luk bida' Tuhan ni Musa.
- ³⁰Kebala Musa nelun Israil, "Tuhan pangeh nemili' besalel Uri ratnan inul Hur, luk pupu Yahuda.
- ³¹Ieh nemanu' neneh ku Roh Allah idi ileh luk meriput ratnan amung kekamen ticu',
- ³²pad nganau' arit luk do' ratnan amas, pirak, idi tekaling,
- ³³Idi arit batu luk meraga rangen su inanneh, idi arit kayuh, dengan amung kekamen luk kudeng ineh.

³⁴Idi Tuhan nemaré neneh ileh mada' nelun baken, do' ieh, idi Aholiab Ahisamak ratnan inul Dan.

³⁵Idi didueh pinu'Neh ku ileh ngakem amung kekamen lun mileh, ieh ineh, ngarit, nganau' kekamen luk do' ayu, ngebaruh kibung luk bata' melaco, sia' merirem, idi sia' melidang, idi teh nganau' nuper pu, idi teh amung kekamen luk kudeng ineh.

Pura' 36

¹"Do' Besalel, Aholiab idi amung lun luk mileh luk nepimaran Tuhan ileh pad nganau' amung kekamen luk do' ayu bang Su luk Meligan ineh, ngimun ngakem maya' amung luk icuk Tuhan."

²Musa nenawar ni Besalel, Aholiab, idi amung lun luk mileh luk nepimaran Tuhan ileh, idi amung lun luk nesigio niat, pad ideh amé' nganau' kekamen ineh.

³Idi ideh nengalap rat ni Musa amung baré luk biré lun Israil ku mudut Su luk Meligan. Iamo' lun Israil nateh nugka' maré baré ni Musa anid-anid pekak.

⁴Idi nacing amung lun luk mileh luk nganau' kekamen ineh,

⁵idi kebaladeh ni Musa, "Lun ini pelaba ula' uit, mela ratnan luk icuk Tuhan."

⁶Idi Musa nengecuk nelun mula' ineh ugka' maré baré kuan Su luk Meligan ineh. Idi ideh nugka' maré.

⁷Ngaceku petap repapeh kuan amung kekamen ineh. Inan teh elaneh.

⁸Idi amung lun luk mileh ineh nenganau' Lepo su luk inan papu' Tuhan ratnan pulu' pekatu kibung bata' melaco, ratnan pu luk inuper, idi ratnan kibung luk bata' melaco, sia' merirem, idi sia' melidang, luk tibaruh ku melaikat karub.

⁹Idi kikadang sepekatu kibung ineh tudu' depeh, idi pipangneh medepeh. Amung kibung ineh mepad tari.

¹⁰Ideh nenutum limeh pekatu kibung. Kudeng ineh teh limeh pekatu kibung luk baken.

- ¹¹Idi ideh nenganau' tuda'-tuda' lalid kibung luk bata' melaco iring sebuleng kibung luk limeh tutum ineh. Idi ideh nenganau' kudeng ineh teh luun iring kibung luk limeh tutum ineh teh.
- ¹²Idi ideh nenganau' limeh ngepulu' lalid paped sepekatu kibung luk limeh tutum ineh teh, idi teh limeh ngepulu' lalid paped sepekatu kibung luk baken luk limeh tutum ineh.
- ¹³Idi ideh nenganau' limeh ngepulu' ood ratnan amas ku nutum dueh pekatu kibung ineh pad ineh mangun ku Lepo su luk inan papu' Tuhan.
- ¹⁴Idi ideh nenganau' ducungneh ratnan pulu' aceh pekatu kibung luk inau' ratnan buluh amék.
- ¹⁵Idi amung ineh mepad kirayeh, ieh ineh, tudu' depeh setangal kikadangneh, idi bétneh medepeh.
- ¹⁶Idi ideh nenutum limeh pekatu kibung ineh. Kudeng ineh teh anem pekatu kibung luk baken.
- ¹⁷Idi ideh nenganau' limeh ngepulu' lalid paped sepekatu kibung, idi teh limeh ngepulu' lalid paped sepekatu kibung luk baken ineh teh.
- ¹⁸Idi ideh nenganau' limeh ngepulu' ood tekaling ku nutum ineh mangun ku sebuleng papen.
- ¹⁹Idi ideh nenganau' dueh papen Lepo ineh teh, sebuleng ratnan kubil dumba deléi luk inau' mesia', idi sebuleng ratnan kubil luk do', ku papen luk pa luun.
- ²⁰Idi ideh nenganau' tuda'-tuda' kayuh ku tulang ratnan kayuh pirur kuan Lepo ineh.
- ²¹Kikadang sepekatu kayuh ineh dueh depeh setangal, idi pipangneh semikuh setangal.
- ²²Idi anid-anid kayuh ineh tinap, pad ideh miak petutum.
- ²³Idi ideh nenganau' dueh ngepulu' kayuh ku tulang kuan iring pa kabing busat aco,
- ²⁴Idi apat ngepulu' alen pirak pa liangdeh, dueh alen nan sepekatu kayuh.

- ²⁵Ideh nenganau' dueh ngepulu' kayuh ku tulang pa tinueh busat aco,
- ²⁶dengan apat ngepulu' alen pirak dueh alen pa liang sepekatu kayuh.
- ²⁷Idi iring pa keted, ieh ineh pa acep aco, ideh nenganau' anem pekatu kayuh ku tulang,
- ²⁸idi dueh kayuh anid lidung.
- ²⁹Idi dueh kayuh luk ku lidung ineh, tinutum rat pa beneh macing pa luun. Idi kayuh luk ku dueh lidung ineh inau' kudeng ineh teh.
- ³⁰Idi kayuh tulang ineh ualuh pekatu dengan pulu' anem alen pirak, dueh pa beneh anid-anid kayuh ineh.
- ³¹Idi ideh nenganau' pulu' limeh atang ratnan kayuh pirur, limeh pekatu kuan Lepo ineh,
- ³²idi limeh pekatu kuan selipa, idi limeh pekatu kuan iring pa keted luk pa acep aco.
- ³³Idi atang luk nan uned ineh macing nan amung kayuh ineh rat paped selipa suet paped selipa.
- ³⁴Idi amung kayuh ineh kikepdeh ku amas. Idi ideh nenganau' amung kelabung su atang ineh pana' ratnan amas, idi atang ineh pana' kikepdeh ku amas.
- ³⁵Idi ideh nenganau' aceh dicing ratnan kibung pu luk do' idi luk inuper, idi luk ayu bata' melaco, sia' merirem, idi sia' melidang, tibaruh do'-do' ku melaikat karub.
- ³⁶Idi ideh nenganau' apat diri ratnan kayuh pirur luk kikepdeh ku amas. Ood-ooddeh pana' ratnan amas. Idi ideh nengurai apat alen ratnan pirak.
- ³⁷Idi munung tanga' Lepo ineh ideh nenganau' aceh dicing ratnan kibung pu luk do' idi luk inuper, ayuneh bata' melaco, sia' merirem, idi sia' melidang, idi luk tibaruh do'-do'.

³⁸Idéh nenganau' kuan dicing ineh limeh pekatu diri perapu dengan amung ooddeh. Idi ideh nengakep papeddeh idi abetdeh ku amas. Idi ideh nengurai limeh alen tekaling kuan diri ineh.

Pura' 37

¹Idi Besalel nenganau' Pati' Pejani' ineh ratnan kayuh pirur. Kikadangneh dueh sikuh setangal, pipangneh semikuh setangal, idi kidita'neh semikuh setangal.

²Idi kikepneh ku amas luk do', pa luun idi bang lubang. Idi ieh nenganau' luun ineh belipid amas pekelibut.

³Idi ieh nengurai apat kelabung amas luun apat kukudneh, dueh selipa, idi dueh selipa.

⁴Idi ieh nenganau' kayuh pirur ku birirneh, kikepneh ku amas.

⁵Idi kayuh birir ineh sinuetneh bang kelabung pekop pati' ineh.

⁶Idi teh ieh nenganau' kakeb su luk inan pedo' ineh ratnan amas luk do', kikadangneh dueh sikuh setangal, pipangneh semikuh setangal.

⁷Idi ieh nenganau' dueh melaikat karub ratnan amas, ieh ineh ratnan amas luk tinuno,

⁸Idi sebuleng melaikat karub pekop paped kakeb ineh petatem luun ineh.

⁹Idi kiung didueh petutup. Idi ilad didueh tegerayap mapen kakeb su luk inan pedo' ineh.

¹⁰Idi ieh nenganau' aceh méja ratnan kayuh pirur, dueh sikuh kikadangneh, semikuh pipangneh, idi semikuh setangal kidita'neh.

¹¹Idi ieh nengakep ineh ku amas luk do' idi nenganau' belipid amas pekelibut ineh.

¹²Idi ieh nenganau' libutneh belipid kiar palad pipangneh, idi iringneh ieh nenangau' belipid amas pekelibut.

- ¹³Idi ieh nenganau' kuan méja ineh apat kelabung amas, idi ieh nenganau' kelabung ineh anid-anid lidung su luk inan kukudneh.
- ¹⁴Idi ieh nenganau' kelabung ineh muneng iring belipid ineh.
- ¹⁵Idi ieh nengalap kayuh pirur idi nengakep ineh ku amas, pad méja uen mirir ku ineh.
- ¹⁶Idi ieh nenganau' amung repapeh luk pa luun méja ineh, ieh ineh bigan, sangkir, busi', idi sikuan. Idi amung ineh inau' ratnan amas luk do'.
- ¹⁷Ieh nenganau' aceh kukud dawan ratnan amas luk do'. Ieh nenganau' puet idi batangneh ratnan amas luk tinuno, idi busak-busakneh dengan busak luk nateh nelusad pana', tekapit nan batang ineh.
- ¹⁸Idi ieh nenganau' anem rangat ineh inan iringneh, teluh rangat mulang rat pa selipa idi selipa.
- ¹⁹Anid anem rangat ineh inan teluh busak badam ayuneh, dengan busak luk nateh nelusad.
- ²⁰Idi kukud dawan ineh pana' inan apat busak mepad kudeng busak badam ayuneh, dengan busak luk nateh nelusad.
- ²¹Idi inan aceh busak luk nateh nelusad, anid pa liang dueh rangat ineh.
- ²²Idi busak luk nateh nelusad, idi amung rangatneh, idi kukud dawan ineh, tekapit ratnan aceh amas luk tinuno idi do'.
- ²³Idi ieh nenganau' tudu' dawan kuan kukud dawan ineh idi apitneh, idi su luk inan bareh apui pana', ratnan amas luk meluun do'.
- ²⁴Idi ieh nenganau' amung ineh ratnan limeh ngepulu' anem kati amas luk meluun do'.
- ²⁵Idi ieh nenganau' aceh méja inan ngeseb luk sabpen luk do' buen ratnan kayuh pirur. Idi ieh nenganau' ineh apat lebping, semikuh kikadangneh, idi semikuh pipangneh. Idi kidita'neh dueh sikuh, idi unganeh pekatu luun ineh.
- ²⁶Idi ieh nengakep ineh ku amas luk do', luunneh, iringneh, idi amung unganeh. Idi ieh nenganau' belipid amas pekelibut.

²⁷Idi ieh nenganau' dueh kelabung amas pa liang belipid ineh pekop iringneh, su luk inan kayuh birir, pad ieh miak uen mirir.

²⁸Idi ieh nenganau' kayuh luk ku mirir ineh ratnan kayuh pirur kikep ku amas.

²⁹Idi ieh nenganau' luk ku ngumau idi luk sabpen luk meluun do' buen, luk pinuar lun luk mileh muar luk do' buen.

Pura' 38

¹Idi ieh nenganau' bubpun luk apat lebping ratnan kayuh pirur, limeh sikuh kadangneh, idi limeh sikuh pipangneh, idi teh teluh sikuh dita'neh.

²Idi ieh nenganau' unga anid lidungneh. Idi unga ineh mulang rat su ineh. Idi ieh nengakep amung ineh ku tekaling.

³Idi teh ieh nenganau' amung repapeh bubpun ineh: belanga' inan ngerareng abuh, idi luk ku ngook abuh, bigan, serupang, idi su luk inan bareh. Amung repapeh ineh inau' ratnan tekaling.

⁴Idi ieh nenganau' aceh teripin tekaling, idi ieh nenganau' ineh pa liang iring bubpun pad macing tangalneh.

⁵Idi ieh nengurai apat kelabung tekaling anid lidung.

⁶Idi ieh nenganau' kayuh pirur ku mirir bubpun ineh, kikepneh ku tekaling.

⁷Idi ieh nenuet kayuh birir ineh bang kelabung ineh pekop iring bubpun ineh pad ieh miak uen mirir. Idi ieh nenganau' ineh melubang, ratnan bangar.

⁸Idi ieh nenganau' aceh bigan ratnan tekaling, idi kukudneh pana' tekaling, ratnan amung sayun tekaling luk inuit decur luk mula' luk ngakem iring tanga' Lepo su luk inan papu' Tuhan.

⁹Idi ieh nenganau' natad Lepo su luk inan papu' Tuhan, idi ngalad ineh ku dicing ratnan kibung pu luk inuper. Kikadang dicing luk pa kabing busat aco, dueh ngepulu' limeh depeh.

¹⁰Idi dueh ngepulu' diri ineh perapu alenneh ratnan tekaling, iamo' amung ood idi repit diri ineh inau' ratnan pirak.

- ¹¹Kudeng ineh teh pa tinueh busat aco.
- ¹²Kikadang dicing luk pa acep aco pulu' dueh depeh setangal, dengan pulu' diri idi pulu' alen. Idi amung ood diri ineh idi amung repit diri ineh inau' ratnan pirak.
- ¹³Kudeng ineh teh pipang pa atun natad pa busat aco ineh pulu' dueh depeh setangal.
- ¹⁴⁻¹⁵Pekop munung tanga' inan teluh depeh teluh sikuh dicing dengan teluh diri idi teluh alen.
- ¹⁶Idi amung kibung dicing natad ineh ratnan kibung pu luk inuper.
- ¹⁷Idi amung alen diri ineh ratnan tekaling, idi ood, idi repitdeh pana' pirak, idi paped diri ineh kikep ku pirak. Idi amung diri pekelibut ineh su tutumneh inan bakar pirak.
- ¹⁸Idi tanga' natad ineh inan aceh dicing, ratnan kibung pu luk inuper, ayuneh bata' melaco, sia' merirem, idi sia' melidang luk tibaruh, kikadangneh limeh depeh, idi kidita'neh medepeh semikuh mepad kudeng dicing natad ineh.
- ¹⁹Idi inan apat diri, idi apat alen ratnan tekaling, idi ooddeh ratnan pirak, papeddeh kikep ku pirak, kudeng ineh teh su tutumdeh bakar pirak.
- ²⁰Idi amung papek Lepo su luk inan papu' Tuhan idi natad pana' ratnan tekaling.
- ²¹Idi ini amung repapeh Lepo su luk inan papu' Tuhan, ieh ineh Lepo su luk inan Pati' Pejani', luk iniap maya' ecek Musa — kekamen lun Liwi pa liang ukum Itamar anak Arun luk imam.
- ²²Idi Besalel Uri ratnan inul Hur, luk pupu Yahuda nenganau' amung luk pangeh bila Tuhan ni Musa.
- ²³Idi lun denganneh ineh Aholiab Ahisamak ratnan inul Dan, lun luk mileh ngarit idi nganau' luk do' ayu, idi mileh ngebaruh kibung luk bata' melaco, sia' merirem, idi sia' melidang, idi kibung pu teh.

²⁴Kinula' amas luk linigan kuan Tuhan ku mudut Su luk Meligan, ieh ineh 16,150 kati maya' luk litep.

²⁵Idi kinula' pirak luk biré lun bang tebubpun ineh, ieh ineh 5,660 kati maya' luk litep.

²⁶Anid-anid burur luk ulunneh mela dueh ngepulu' lak nemaré maya' kinula' luk litep, ieh ineh 603,550 burur amungdeh.

²⁷Idi 5,600 kati pirak inurai ku meratu alen Su luk Meligan idi alen dicing teh, 5,600 kati, ieh ineh aceh alen 56 kati.

²⁸Idi ratnan 38 kati pirak luk ketecan ineh inau'neh ku amung ood nan anid-anid diri ineh. Idi ieh nengakep amung paped diri ku ineh, idi ieh nenganau' ineh su anid tutumneh teh.

²⁹Idi kinula' tekaling luk biré ineh 3,980 kati.

³⁰Ratnan ineh ieh nenganau' amung alen tanga' Lepo su luk inan papu' Tuhan, bubpun tekaling, teripin tekaling luk luun ineh, amung repapeh bubpun ineh,

³¹amung alen dicing natad luk pekelibut, amung alen tanga' natad ineh, amung papek Lepo su luk inan papu' Tuhan, idi amung papek natad pekelibut.

Pura' 39

¹Idi ideh nenganau' amung ayung imam luk ngakem Su luk Meligan ineh, ratnan kibung bata' melaco, sia' merirem, idi sia melidang, luk inau' ratnan buluh dumba. Idi ideh nenganau' ayung imam kuan Arun maya' kudeng luk bila Tuhan ni Musa.

²Idi ideh nenganau' kuyu' imam ineh ratnan kibung pu luk inuper, amas, idi kibung luk bata' melaco, sia' merirem, idi sia' melidang, luk inau' ratnan buluh dumba.

³Idi ideh nenuno amas ineh tebalad idi melipi, idi nemuting ineh mangun ku lawet rireng nan arang kibung luk bata' melaco, sia' merirem, idi sia' melidang, idi arang kibung pu mangun ku aceh tebaruh luk do' ayu.

- ⁴Idi ideh nenganau' luun kuyu' imam ineh lalid tudung luk inabet, idi ieh ineh rinabar pekop papedneh.
- ⁵Ide abet awa' kuyu' imam ineh, inau' do'-do', idi pekatu dengan ineh, ieh ineh ratnan amas, kibung luk bata' melaco, sia' merirem, sia' melidang, idi kibung pu luk inuper, maya' kudeng luk bila Tuhan ni Musa.
- ⁶Idi ideh nengelilid bau burur ku amas idi nengayud ngadan anak-anak Yakub mepad kudeng etu.
- ⁷Idi ideh nengerareng mop lalid tudung kuyu' imam ineh, mangun ku terawé ratnan pulu' dueh pupu lun Israil, maya' kudeng luk bila Tuhan ni Musa.
- ⁸Idi ideh nenganau' kakeb ruuk ineh ratnan kibung luk mepad kudeng ayu kuyu' imam luk tibaruh.
- ⁹Idi ieh apat lebping idi ieh lipi' dueh, kikadangneh murek, pipangneh pana' murek.
- ¹⁰Idi rirengdeh apat baris batu luk meraga. Luk pun-pun sengilung batu luk sia' merirem, sengilung batu luk mebirar, idi sengilung batu luk mesia'.
- ¹¹Idi luk kedueh, sengilung batu luk bata' uduh, sengilung batu luk bata' langit, idi sengilung batu intan.
- ¹²Idi luk keteluh, sengilung batu luk mebata', sengilung batu luk sia' merirem, idi sengilung batu luk merirem.
- ¹³Idi luk keapat, sengilung batu luk bata' uduh, idi sengilung bau burur, idi sengilung batu mebirar. Idi amung batu ini ilub ku amas.
- ¹⁴Idi anid batu ini inan ngadan sebuleng anak Yakub, ku ngegala' ngadan pulu' dueh pupu Israil.
- ¹⁵Idi ideh nenganau' luun kakeb ruuk ineh ratai-ratai ratnan amas luk do' luk inuper.
- ¹⁶Idi ideh nenganau' dueh luk ku ngalub ratnan amas idi dueh kelabung amas, idi dueh kelabung ineh inau' pekop lidung kakeb ruuk ineh.

- ¹⁷Idi ideh nenutum dueh ratai ineh nan dueh kelabung pekop iring kakeb ruuk ineh.
- ¹⁸Idi ideh nenutum paped abet dueh ratai ineh nan lalid tudung kuyu' imam pa atun.
- ¹⁹Idi ideh nenganau' dueh kelabung amas idi rireng pekop paped kakeb ruuk, luun iring luk pa selipa kuyu' imam ineh.
- ²⁰Idi teh ideh nenganau' dueh kelabung amas idi nenganau' ineh pa liang pekop lalid tudung kuyu' imam, idi muneng ku tutum idi pa luun abet awa' kuyu' imam, luk inuper do'-do'.
- ²¹Idi ideh nengabet kelabung kakeb ruuk nan kelabung kuyu' imam, ku abet luk bata' melaco, idi kakeb ruuk ineh na miak patad ratnan abet awa' kuyu' imam, maya' kudeng luk bila Tuhan ni Musa.
- ²²Idi ideh nenganau' kuyu' buyor imam ratnan buluh dumba luk bata' melaco amung.
- ²³Idi ayud dier kuyu' ineh peringuned, idi binuun iring ku kibung luk tibaruh, pad ieh na medarak.
- ²⁴⁻²⁶Idi ideh nenganau' luun lepi'neh ayu bua' delima ratnan kibung pu luk inuper idi kibung luk inau' ratnan buluh dumba luk bata' melaco, sia' merirem, idi sia' melidang, dengan karing-karing amas arangdeh, maya' kudeng luk icuk Tuhan ni Musa.
- ²⁷Idi ideh nenganau' kuyu' kuan Arun idi anak-anakneh,
- ²⁸idi teh sigar idi aduk ku abet uluh, idi siduar kamu' ratnan kibung pu luk inuper,
- ²⁹idi abet awa' ratnan kibung pu luk inuper luk bata' melaco, sia' merirem, idi sia' melidang, idi tibaruh, maya' kudeng luk bila Tuhan ni Musa.
- ³⁰Idi ideh nenganau' balad amas luk meligan ratnan amas luk do' luk inarit, "Linigan Kuan Tuhan."

- ³¹Idi ideh nengabet ineh pa atun sigar ineh ku aceh abet luk bata' melaco, maya' kudeng luk bila Tuhan ni Musa.
- ³²Idi ideh nemangeh amung kekamen mudut Lepo su luk inan papu' Tuhan. Idi lun Israil nenganau' ineh, maya' kudeng luk bila Tuhan ni Musa.
- ³³Idi ideh nenguit Lepo ineh iné' ni Musa dengan amung repapehneh, oodneh, idi amung kayuh tulangneh, atangneh, dirineh, idi amung alen,
- ³⁴Idi teh papen luk ratnan kubil dumba deléi luk inau' mesia', idi papen luk ratnan kubil luk do', idi kibung dicing teh;
- ³⁵Pati' Pejani' perapu kayuh birirneh, idi kakeb su luk inan pedo',
- ³⁶méja ineh perapu amung repapehneh, ruti luk barén kuan Tuhan,
- ³⁷Idi kukud dawan amas luk do' perapu amung lapungneh, idi amung repapehneh dengan umau lapung ineh,
- ³⁸bubpun amas, umau luk ku ngumau, idi luk sabpen luk do' buen, idi kibung dicing tanga' Lepo,
- ³⁹bubpun tekaling perapu teripin tekaling dengan kayuh birir idi amung repapehneh, bigan luk inan sibaru' idi kukudneh,
- ⁴⁰amung kibung dicing natad ineh perapu amung dirineh idi alenneh, idi dicing tanga' natad, idi abetneh, papekneh, idi amung repapeh Lepo su luk inan papu' Tuhan,
- ⁴¹Idi amung ayung imam luk pelaba do' kuan Su luk Meligan ineh, ieh ineh amung ayung luk meligan kuan Arun imam ineh idi kuan anak-anakneh.
- ⁴²Lun Israil nenganau' ineh maya' kudeng amung luk bida' Tuhan ni Musa.
- ⁴³Musa nenier amung kekamen ineh, idi amung ineh pangeh inau'deh maya' kudeng amung luk bila Tuhan. Idi Musa nengeperuan nedeh.

Pura' 40

- ¹Idi kebala Tuhan ni Musa,
- ²"Aceh aco bulan aceh, do' iko nganau' Lepo su luk inan papu' Tuhan.

- ³Idi bang ineh do' iko ngerareng Pati' Pejani' ineh idi nganau' dicing pa atunneh.
- ⁴Idi do' iko nguit méja ineh amé' bang Lepo ineh, idi ngerareng luunneh amung repapehneh. Idi teh do' iko nguit kukud dawan ineh amé' bang Lepo idi nganau' lapungneh luunneh.
- ⁵Do' ngerareng méja amas luk inan ngeseb luk do' buen ineh pa atun Pati' Pejani'. Idi nganau' dicing munung tanga' Lepo su luk inan papu' Tuhan.
- ⁶Idi nganau' bubpun luk inan ngeseb baré ineh pa atun Lepo ineh.
- ⁷Idi do' iko ngerareng bigan luk inan sibaru' ineh arang Lepo dengan bubpun ineh, idi nganau' abpa' bang ineh.
- ⁸Idi do' nganau' dicing libut natad ineh, idi nganau' dicing tanga'neh teh.
- ⁹"Idi do' ngumau Lepo idi amung repapehneh ku umau luk ku ngumau ineh, pad amung ineh meligan.
- ¹⁰Idi teh do' iko ngumau bubpun dengan amung repapehneh, idi ngeligan ineh, pad bubpun ineh meligan tu-tu.
- ¹¹Idi kudeng ineh teh, do' ngeligan bigan luk inan sibaru' perapu dengan kukudneh.
- ¹²"Idi do' nguit ni Arun idi anak-anakneh amé' munung tanga' Lepo su luk inan papu' Tuhan, idi maru' nedeh ku abpa'.
- ¹³Idi do' iko ngayung ni Arun ku ayung imam, idi ngumau idi ngeligan neneh, pad ieh mangun ku imam kuanKu.
- ¹⁴Idi teh do' nguit anak-anakneh idi nganau' kuyu'deh,
- ¹⁵idi ngumau nedeh ineh mepad kudeng iko nengumau tamandeh, pad ideh miak ngakem kekamen imam kuanKu. Idi ideh luk pangeh inumau ineh mangun ku imam luk meruked macing ku anak inul."
- ¹⁶Idi Musa nenganau' amung kekamen ineh maya' kudeng luk bila Tuhan neneh.

- ¹⁷Idi aceh aco bulan aceh, lak luk kedueh, pangeh ideh neremuat rat bang bawang Masir, idi ideh nenganau' Lepo su luk inan papu' Tuhan.
- ¹⁸Idi Musa nengerareng amung alenneh, idi nenaped amung kayuh tulangneh, idi ieh nenganau' amung atangneh, idi nenaped amung dirineh.
- ¹⁹Idi ieh malad papen ineh pa luun Lepo. Idi ieh nengerareng papen luk pa luunneh, maya' kudeng luk bila Tuhan.
- ²⁰Idi ieh nengalap dueh batu luk tebalad ineh, idi nengerareng ineh bang Pati' Pejani', idi ieh nengusong kayuh birir nan kelabung pati' ineh, idi ieh nengerareng kakeb su luk inan pedo' pa luunneh.
- ²¹Idi Pati' Pejani' ineh pana' inuitneh semuet bang Lepo. Idi ieh nenganau' dicing luk ku ngelinged ineh. Kudeng ineh lawéneh ngasa' Pati' Pejani' ineh maya' kudeng luk bila Tuhan.
- ²²Idi ieh nenganau' méja ineh bang Lepo pa tinueh busat aco, bal alad dicing.
- ²³Idi ieh nengerareng ruti luk barén kuan Tuhan luunneh, maya' kudeng luk bila Tuhan.
- ²⁴Idi ieh nenganau' kukud dawan bang Lepo petutup méja ineh, pa kabing busat aco.
- ²⁵Idi ieh nenutud amung lapung ineh pa kiung Tuhan, maya' kudeng luk bila Tuhan.
- ²⁶Idi ieh nenganau' bubpun amas ineh bang Lepo, pa atun alad dicing ineh.
- ²⁷Idi ieh nengeseb luk sabpen luk do' buen luun ineh, maya' kudeng luk bila Tuhan.
- ²⁸Idi ieh nengekito dicing munung tanga' Lepo ineh.
- ²⁹Idi bubpun luk inan ngeseb ineh rirengneh pa atun dicing ineh. Idi ieh nengeseb baré luk sabpen pa luunneh, idi ieh nemaré baré luk kenen, maya' kudeng luk bila Tuhan.
- ³⁰Idi ieh nengerareng bigan luk inan sibiru' ineh arang Lepo dengan bubpun ineh, idi ieh nenganau' abpa' bang ineh.

- ³¹Musa idi Arun dengan anak-anakneh namaru' ticu' idi kukuddeh ku abpa' luk bang bigan ineh.
- ³²Idi kareb ideh semuet bang Lepo, idi kareb ideh amé' iring bubpun, ideh sibiru' maya' kudeng luk bila Tuhan.
- ³³Musa nenganau' dicing libut Lepo idi bubpun ineh. Idi ieh neniting dicing munung tanga' natad ineh. Idi ieh nemangeh amung kekamen ineh.
- ³⁴Idi laput Rayeh Tuhan nemapen Lepo su luk inan papu' Tuhan, pad ieh mepanu' ku ineh,
- ³⁵pad Musa na miak semuet bang Lepo ineh.
- ³⁶Idi kareb laput ineh nekemikit rat pa luun Lepo ineh, idi amung lun Israil nenalan.
- ³⁷Iamo' seruked laput ineh na nekemikit, idi ideh pana' nateh nalan rat ieneh.
- ³⁸Idi laput Rayeh Tuhan ineh idi pa luun Lepo kareb aco macang. Iamo' kareb medacem inan apui luk ngacang pa luun Lepo ineh su siren amung lun Israil ruked ideh nalan.

Ukum

Ukum 1

- ¹Tuhan nenawar ni Musa rat bang Lepo su luk inan papu' Tuhan, kebalaNeh,
- ²"Do' lun Israil maya' bala ini: Kudeng idé rat arang muyuh pian maré aceh baré ratnan aya'neh, ieh ineh sapi', dumba, kian amék lek,
- ³idi kudeng baré ineh aceh baré luk sabpen ratnan sapi' ineh, do' ieh maré aceh sapi' deléi luk do'. Do nguit neneh macing pa atun tanga' Lepo su luk inan papu' Tuhan, pelé Tuhan ngalap ineh.
- ⁴Idi do' ieh ngerareng tiku'neh nan uluh luk barén sabpen ineh, pad ineh mangun ku aceh baré luk nguit pedo' kuanneh.
- ⁵Idi do' ieh ngeret sapi' su ineh. Idi do' anak Arun luk imam-imam maré dara' ineh kuan Tuhan, idi ngisak ineh libut-libut bubpun luk pa atun tanga' Lepo ineh.
- ⁶Idi kubil luk barén sabpen ineh uen mulu'-mulu'.
- ⁷Idi do' imam-imam ineh nganau' kayuh apui luun bubpun idi nutud ineh.
- ⁸Idi do' ideh nganau' uang pung ineh dengan uluhneh idi lemakneh luun apui.
- ⁹Idi do' ieh maru' tinéi' idi kukudneh, idi do' imam ngeseb amung baré ineh luun bubpun, pad mangun ku aceh buen luk do' kuan Tuhan.
- ¹⁰"Idi kudeng luk barén ineh ratnan aya' dumba, kian amék lek, do' ieh maré deléi luk do'.
- ¹¹Idi do' ieh keretenneh pa tinueh busat aco bubpun ineh. Idi do' imam-imam ngisak dara' ineh libut-libut bubpun.
- ¹²Idi do' ieh uen mulu' perapu dengan uluh idi lemakneh, idi imam nganau' ineh luun apui.
- ¹³Idi do' ieh maru' tinéi' idi kukudneh. Idi do' imam ineh ngeseb amung baré ineh luun bubpun, pad mangun ku aceh buen luk do' kuan Tuhan.

¹⁴Idi kudeng luk barén sabpen ineh ratnan suit, idi do' ieh maré suit sukur, kian suit limun lek.

¹⁵Idi do' imam nguit ineh amé' inan bubpun idi ngekaka dierneh, idi ngeseb uluhneh luun bubpun, idi dara'neh uen ngeti luun iring bubpun.

¹⁶Idi do' ieh nala' belunanneh idi mubput buluhneh idi nala' ineh pa busat aco bubpun su luk inan abuh.

¹⁷Idi do' ieh narak su ilad suit ineh, iamo' aleg ngatad bururneh. Idi do' ieh ngeseb amung ineh luun bubpun pad mangun ku aceh buen luk do' kuan Tuhan.

Ukum 2

¹Idi kudeng idé luk maré inan Tuhan aceh baré luk kenen, do' ieh maré banak luk rinaburneh ku umau saitun perapu dengan umau luk do' buen.

²Idi do' amung ineh iten amé' nan anak Arun luk imam-imam. Idi sebuleng imam miak ngalap sengeragam banak ineh, perapu dengan umau saitun idi umau luk do' buen ineh. Idi do' imam ineh ngeseb ineh luun bubpun pad mangun ku aceh buen luk do' kuan Tuhan.

³Idi luk ketecan ratnan baré akan ineh mangun ku babpat imam-imam, idi ieh ineh meluun ligan ngaceku ieh ilap ratnan akan luk barén kuan Tuhan.

⁴Idi kudeng baré ineh pinaram luk uen nadang luun tetel, idi do' ieh na uen ngelamud. Miak muyuh nganau' pinaram luk mekapal luk rinabur ku umau saitun, idi teh pinaram luk melipi luk linusi ku umau saitun.

⁵Idi kudeng baré ineh pinaram luk uen nadang luun belawan, idi do' ieh ratnan banak luk rinabur ku umau saitun idi luk na linamud.

⁶Do' ngareg ineh idi ngelusi ineh ku umau pad ineh mangun ku aceh baré akan.

⁷Idi kudeng baré ineh pinaram luk uen nadang bang periuk, idi do' ieh ratnan banak idi umau saitun.

⁸Do' ieh barén kuan imam ku aceh baré kuan Tuhan. Idi imam nguit ineh amé' nan bubpun.

⁹Idi do' imam ngalap sesuut ratnan baré akan ineh ku babpat luk sabpen luun bubpun kuan Tuhan, pad ineh mangun ku aceh buen luk do' pa kiungNeh.

¹⁰Idi luk ketecan ratnan baré akan ineh mangun ku babpat imam-imam, idi ieh ineh meluun ligan ngaceku ieh ilap ratnan akan luk barén kuan Tuhan.

¹¹"Idi aleg muyuh maré baré akan luk linamud kuan Tuhan. Idi aleg muyuh maré luk linamud idi luk inan duru' kuan Tuhan.

¹²Do' muyuh maré babpat peralih luk pun-pun kuan Tuhan. Iamo' ieh na miak sabpen luun bubpun.

¹³Idi do' muyuh nucu' anid baré akan, ngaceku tucu' ineh pinginud pejani' arang Allah dengan muyuh. (Do' muyuh nucu' amung baré muyuh.)

¹⁴Kareb muyuh maré inan Tuhan aceh baré akan ratnan peralih luk pun-pun, idi do' muyuh maré ilung padé luk mebaruh idi luk didang ku apui, idi teh ilung luk tapen dari-dari.

¹⁵Idi do' iko nganau' umau saitun idi umau luk do' buen luunneh.

¹⁶Idi ratnan babpat luk barén ratnan padé luk tipeh, idi umau saitun perapu umau luk do' buen, do' imam ngeseb sebabpat kuan Tuhan mangun ku aceh baré luk kenen kuanNeh.

Ukum 3

¹"Idi kudeng idé rat arang muyuh maré aceh baré luk nguit pedo', ieh ineh sapi', idi do' ieh maré deléi, kian tineh lek, luk do'.

²Idi do' ieh ngerareng ticu'neh luun uluh luk barénneh ineh, idi ngeret neneh pa atun tanga' Lepo su luk inan papu' Tuhan. Idi do' anak Arun luk imam-imam ineh ngisak dara'neh libut-libut bubpun ineh,

³idi maré inan Tuhan sebabpat baré luk nguit pedo', ieh ineh linuap idi amung lemak luk luun tinéi'neh luk miak sabpen ku baré kuan Tuhan,

- ⁴idi dueh-dueh baterneh idi amung lemak luk luunneh, idi luk nan iungneh, idi babpat luk meluun do' ratnan aténeh.
- ⁵Idi amung ineh sabpen imam-imam luun bubpun ineh dengan amung baré luk sabpen, pad mangun ku aceh buen luk do' kuan Tuhan.
- ⁶"Idi kudeng ieh maré dumba kian amék lek ku baré luk nguit pedo', ieh miak maré deléi idi tineh luk do'.
- ⁷Idi kudeng dumba luk barénneh,
- ⁸do' ieh ngerareng tiku'neh luun uluh luk barén ineh, idi ngeret neneh pa atun tanga' Lepo su luk inan papu' Tuhan. Idi do' imam-imam ngisak dara'neh libut-libut bubpun ineh,
- ⁹idi maré inan Tuhan sebabpat baré luk nguit pedo', ieh ineh lemak idi iurneh luk melamu luk miak uenneh netek birit tulang iung, idi linuap idi amung lemak luk luun tinéi'neh,
- ¹⁰idi dueh-dueh beteneh, idi amung lemak luk luunneh, idi sebabpat luk meluun do' ratnan aténeh.
- ¹¹Idi amung-amung ineh miak sabpen imam luun bubpun mangun ku aceh baré akan kuan Tuhan.
- ¹²"Idi kudeng amék luk barénneh,
- ¹³do' ieh ngerareng tiku'neh luun uluhneh, idi ngeret neneh pa atun Lepo su luk inan papu' Tuhan, idi do' imam-imam ngisak dara'neh libut-libut bubpun ineh,
- ¹⁴idi maré inan Tuhan sebabpat baréneh luk miak sabpen, ieh ineh linuapneh idi amung lemak luk luun tinéi'neh,
- ¹⁵idi dueh-dueh beteneh, idi amung lemak luk luunneh, idi luk nan iungneh, idi babpat luk meluun do' ratnan aténeh.
- ¹⁶Idi amung ineh miak sabpen imam luun bubpun ku aceh baré akan luk petulu kuan Tuhan. Idi amung lemak Tuhan kuan.

¹⁷Idi lun Israil bibpeng na miak kuman lemak idi dara'. Idi ini aceh ukum luk meruked kuan lun Israil iapeh-iapeh pana'."

Ukum 4

¹Kebala Tuhan ni Musa,

²"Kudeng idé rat arang lun Israil mesala' ngaceku ieh nganau' luk bibpeng Tuhan na miak ruen, iamo' na sala' ineh inau' rungen, do' ieh maya' lawé ini.

³"Kudeng Imam Rayeh pangeh mesala' pad ieh ngacing sala' kuan lun mula', do' ieh maré aceh sapi' deléi luk pegawa' luk do', mangun ku baré kuan Tuhan ngaceku sala'neh.

⁴Idi do' ieh nguit sapi' deléi ine amé' pa atun tanga' Lepo su luk inan papu' Tuhan. Idi do' ieh ngerareng ticu'neh luun uluh sapi' ineh, idi ngeret neneh pa kiung Tuhan.

⁵Idi do' Imam Rayeh ineh ngalap sebuang dara' sapi' ineh idi nguit ineh amé' bang Lepo ineh.

⁶Idi do' ieh ngerereb bua' ticu'neh bang dara' ineh tudu' kua' idi ngisak ineh, pa atun dicing Su luk Meligan ineh.

⁷Idi do' ieh nganau' sebuang dara' ineh nan unga méja luk inan ngeseb umau luk do' buen luk bang Lepo su luk inan papu' Tuhan. Idi do' ieh ngutang dara' luk ketecan ineh luun kukud bubpun su luk inan maré luk sabpen, luk pa atun tanga' Lepo ineh.

⁸Idi do' ieh ngalap amung lemak luk luun sapi' ineh, ieh ineh linuapneh idi amung lemak luk luun tinéi'neh,

⁹Idi dueh beterneh idi amung lemak luk luunneh, idi babpat luk meluun do' ratnan aténeh.

¹⁰Idi amung lemak ineh sabpen imam luun bubpun su luk inan maré luk sabpen ineh, mepad kudeng lawéneh ngeseb lemak pung luk kirat ku baré luk nguit pedo'.

- 11**Iamo' kubil sapi' deléi ineh, idi amung uangneh perapu dengan uluhneh, kukudneh, tinéi'neh, idi téi'neh,
- 12**amung ineh itenneh remuat rat su luk inandeh nelupo, amé' su luk meligan, idi su luk inan lun nala' abuh. Idi do' amung ineh sabpen su ineh.
- 13**"Idi kudeng amung lun Israil mesala' ngaceku ideh nganau' luk bibpeng Tuhan na miak ruen, iamo' na sala' ineh inau' rungen;
- 14**kareb sala' ineh megala' kuandeh, idi do' lun mula' ineh maré aceh sapi' deléi luk pegawa' mangun ku baré ngaceku sala', idi do' ideh nguit neneh pa atun Lepo su luk inan papu' Tuhan.
- 15**Idi do' amung lun rayeh-rayeh lun Israil ineh ngerareng ticu'deh luun uluh sapi' ineh idi ngeret neneh su ineh.
- 16**Idi do' Imam Rayeh nguit sebuang dara' sapi' ineh amé' bang Lepo su luk inan papu' Tuhan.
- 17**Idi do' ieh ngerereb bua' ticu'neh bang dara' ineh tudu' kua', idi ngisak ineh pa atun dicing ineh.
- 18**Idi do' ieh nganau' sebuang dara' ineh nan unga méja luk inan ngeseb umau luk do' buen luk bang Lepo su luk inan papu' Tuhan. Idi do' ieh ngutang dara' luk ketecan ineh luun kukud bubpun su luk inan maré luk sabpen, luk pa atun tanga' Lepo ineh.
- 19**Idi do' ieh ngalap amung lemakneh idi ngeseb ineh luun bubpun.
- 20**Idi lawéneh dengan sapi' ini mepad kudeng luk pangeh inau' nan sapi' luk biré ngaceku sala' ineh. Kudeng ineh lawéneh imam nganau' luk nguit pedo' kuan lun mula', pad ideh miak ngalap do' ratnan sala'.
- 21**Pangeh ineh do' ieh nguit sapi' ineh remuat rat su luk inandeh nelupo, idi ngeseb neneh mepad kudeng sapi' luk iseb ngaceku sala'neh sebuleng. Idi ini mangun ku aceh baré ngaceku sala' lun mula'.
- 22**"Idi kudeng seburur lun rayeh mesala' ngaceku ieh nganau' luk bibpeng Tuhan na miak ruen, iamo' na sala' ineh inau' rungen;

²³kareb sala' ineh megala' kuanneh, idi do' ieh nguit aceh amék deléi luk do' mangun ku baréneh.

²⁴Idi do' ieh ngerareng tiku'neh luun uluhneh idi ngeret neneh iring bubpun su luk inan ngeret baré luk sabpen pa kiung Tuhan. Ieh ineh baré ngaceku sala'.

²⁵Idi do' imam ngerereb bua' tiku'neh bang dara' amék, idi do' ieh ngisit ineh luun amung unga bubpun. Idi do' ieh ngutang dara' luk ketecan ineh luun kukud bubpun.

²⁶Idi do' ieh ngeseb amung lemakneh luun bubpun, mepad kudeng lemak ratnan baré luk nguit pedo' ineh. Kudeng ineh lawéneh imam nganau' luk nguit pedo' kuan lun rayeh ineh, pad ieh ngalap do' ratnan sala'.

²⁷"Idi kudeng seburur lemun rat arang lun mula' mesala' ngaceku ieh nganau' luk bibpeng Tuhan na miak ruen, iamo' na sala' ineh inau' rungen;

²⁸kareb sala' ineh megala' kuanneh, idi do' ieh nguit aceh amék tineh luk do' mangun ku baréneh.

²⁹Idi do' ieh ngerareng tiku'neh luun uluhneh, idi ngeret neneh iring bubpun su luk inan ngeret baré luk sabpen.

³⁰Idi do' imam ngerereb bua' tiku'neh bang dara' amék ineh, idi do' ieh ngisit ineh luun amung unga méja luk inan ngeseb umau luk do' buen. Idi do' ieh ngutang dara' luk ketecan luun kukud bubpun ineh.

³¹Idi do' ieh ngalap amung lemakneh, mepad kudeng imam nengalap lemak ratnan baré luk nguit pedo'. Idi do' lemak ineh sabpen imam luun bubpun, idi mangun ku luk do' buen kuan Tuhan. Kudeng ineh lawéneh imam nganau' luk nguit pedo' ngaceku sala' lemulun ineh, idi ieh miak ngalap do' ratnan sala'.

³²"Idi kudeng aceh dumba barénneh ngaceku sala'neh, do' ieh maré aceh tineh luk do'.

³³Idi do' ieh ngerareng ticu'neh luun uluhneh, idi ngeret neneh iring bubpun su luk inan maré luk sabpen ineh.

³⁴Idi do' imam ngerereb bua' ticu'neh bang dara' dumba ineh, idi do' ieh ngisit ineh luun amung unga bubpun. Idi do' ieh ngutang amung dara' luk ketacan luun kukud bubpun ineh.

³⁵Idi do' ieh ngalap amung lemakneh, mepad kudeng imam nengalap lemak dumba ratnan baré luk nguit pedo'. Idi do' lemak ineh sabpen imam luun bubpun, ieh ineh dengan amung-amung baré luk sabpen kuan Tuhan. Kudeng ineh lawéneh imam nganau' luk nguit pedo' ngaceku sala' lemulun ineh, idi ieh miak ngalap do' ratnan sala'.

Ukum 5

¹"Idi kudeng seburur lemulun pangeh tinawar mangun ku lun nekali' ratnan luk sinierneh idi luk nekali'neh, idi na ieh maré kali', ieh mesala' peh.

²"Kudeng seburur lemulun pangeh nepetulu ku luk megani', ieh ineh butung pung luk meliputi idi melayo, idi butung pung luk baken pana', idi na ieh kali' bururneh megani', idi kareb ieh kali', ineh mangun ku sala' kuanneh.

³"Idi kudeng seburur lemulun megani' ku anun-anun pana' luk ratnan lemulun, idi ieh ineh na nekali'neh, iamo' mucu ineh megala' kuanneh, ieh mesala' peh.

⁴"Idi kudeng seburur lemulun pebulung ratnan anun-anun dengan na ngerawe' do'-do' atun, idi kareb ineh megala' kuanneh, ieh mesala' peh.

⁵"Idi kudeng seburur lemulun mesala' dengan dalan luk kudeng ineh, do' ieh ngamo sala' ineh.

⁶Idi do' ieh maré inan Tuhan sebuleng pung tineh, dumba kian amék lek, barén ngaceku sala' luk inau'neh. Idi do' imam nganau' luk nguit pedo' ngaceku sala'neh.

⁷"Iamo' kudeng seburur lemulun masi' pad ieh na miak maré dumba idi amék, do' ieh maré inan Tuhan dueh suit sukur, kian dueh suit limun lek barén

ngaceku sala'neh, ieh ineh sebuleng baré ngaceku sala' idi sebuleng baré luk sabpen.

⁸Idi do' ieh nguit ineh amé' inan imam. Luk pun-pun barénneh, ieh ineh suit luk barén ngaceku sala'. Idi do' imam ngekaka dierneh, iamo' aleg mutut neneh.

⁹Idi do' sebuang dara' ratnan baré ngaceku sala' ini uen ngisak iring bubpun. Idi do' dara' luk ketecan ineh uen ngutang luun kukud bubpun. Ieh ineh baré ngaceku sala'.

¹⁰Idi do' ieh maré suit luk kedueh ineh mangun ku aceh baré luk sabpen maya' dalam luk petulu. Idi kudeng ineh luk ruen imam ku aceh dalam pedo' kuanneh, ngaceku sala'neh, pad ieh ngalap do' ratnan sala'.

¹¹"Iamo' kudeng ieh na miak maré dueh suit sukur kian dueh suit limun lek, idi do' ieh nguit baré ngaceku sala'neh, tudu' lio banak, idi aleg ineh uen ngerabur ku umau idi umau luk do' buen, ngaceku ieh ineh baré ngaceku sala'neh.

¹²Idi do' ieh nguit ineh amé' nan imam, idi imam ngalap sengeragam ku babpat luk barén idi sabpenneh luun bubpun, dengan baré luk sabpen kuan Tuhan. Ieh ineh baré ngaceku sala'.

¹³Idi kudeng ineh imam nganau' luk inan pedo' kuan lemulun ineh ngaceku sala'neh, pad ieh ngalap do' ratnan sala'. Idi luk teceh ineh babpat imam mepad kudeng baré akan teh."

¹⁴Kebala Tuhan ni Musa,

¹⁵"Kudeng seburur lemulun na maré baré luk petulu kuan Tuhan, pad ieh mesala', iamo' na sala' ineh inau' rungen, idi do' ieh maré nan Tuhan aceh dumba deléi, kian amék lek, luk do', ku ngetap baré luk na biré atun. Idi do' ngelelep raga dumba ineh maya' balad pirak Su luk Meligan ineh.

¹⁶Idi do' ieh mayar raga baré luk na biréneh atun ineh, perapu dengan sebabpat limeh, idi do' ieh maré ineh nan imam. Idi imam ineh nganau' luk

inan pedo' kuanneh, idi maré dumba ineh ngaceku sala'neh, pad ieh ngalap do' ratnan sala'.

¹⁷"Idi kudeng seburur lemulun mesala' ngaceku ieh nganau' luk bibpeng Tuhan na miak ruen, iamo' na sala' ineh inau' rungen, ieh mesala' peh, idi ieh teh mabeh ineh.

¹⁸Idi do' ieh nguit amé' nan imam aceh dumba deléi, kian amék lek luk do', mangun ku baré luk pingetap. Idi do' ngelelep raga dumba ineh maya' balad pirak Su luk Meligan. Idi imam ineh nganau' luk inan pedo' kuanneh, idi maré dumba ineh ngaceku sala'neh, pad ieh ngalap do' ratnan sala'.

¹⁹Ieh ineh baré luk pingetap ngaceku sala' luk inau'neh pa kiung Tuhan."

Ukum 6

¹Kebala Tuhan ni Musa,

²"Kudeng seburur lemulun nganau' sala' pa kiung Tuhan, ngaceku ieh naluk lun danganneh ku binaweh duduk, kian binaweh luk biré nan ticu'neh, kian binaweh luk pino, kian binaweh luk inaroneh rat nelun danganneh,

³kian binaweh luk netutu' luk nekali'neh, idi ieh mebalih ratnan ineh, idi pebulung dengan mebalih ratnan anun-anun pana' luk inau'neh, pad ieh mesala',

⁴idi kudeng ieh pangeh nenganau' sala', idi kali' sala'neh, na miak na ieh ngelubed binaweh luk pinoneh, kian binaweh luk pangeh inaroneh, kian luk pangeh biré ku duduk neneh, kian binaweh luk netutu' luk ieh nekali',

⁵kian anun-anun pana' luk inanneh nepebulung dengan mebalih. Idi do' ieh maré raganeh dengan petap ku libalneh, perapu dengan sebabpat limeh. Idi do' ieh ngelubed ineh inan lemulun luk kuan binaweh ineh, ieh ineh bang aco luk inanneh nemaré baré kuan Tuhan ngaceku sala'neh.

⁶Idi do' ieh maré inan Tuhan aceh dumba deléi kian amék lek luk do' mangun ku bar'e luk pingetap pa kiung Tuhan. Idi do' ngelelep raga luk petulu.

⁷Idi imam nganau' luk inan pedo' kuanneh pa kiung Tuhan, pad ieh ngalap do' ratnan sala'neh.”

⁸Kebala Tuhan ni Musa,

⁹"Mada' Arun idi anak-anakneh ratnan dalan maré baré luk sabpen ineh: "Do' baré ineh ketecan luun bubpun idi sabpen kedangan-kedangan macing pekak kenebpa. Idi apui luk luun bubpun ineh do' ieh pitarin.

¹⁰Idi do' imam ineh ngayung ku kuyu' idi siduar kibung pu, idi ngalap abuh baré luk iseb rat luun bubpun ineh idi do' ngerareng ineh iring bubpun ineh teh.

¹¹Pangeh ineh do' ieh ngelibal ayungneh. Idi abuh ineh itenneh remuat rat su luk inandeh nelupo amé' inan su luk meligan.

¹²Idi kudeng ineh teh apui luk luun bubpun ineh uendeh ngasa' kidi-kidi, pad ieh na milep. Idi anid pekak do' imam nganau' apui pa luunneh, idi ngerareng luk sabpen luun ineh teh, idi ngeseb amung lemak ratnan baré luk nguit pedo'.

¹³Idi do' ideh ngasa' apui luk luun bubpun ineh kidi-kidi, pad ieh na maté.

¹⁴"Idi ini dalan maré baré akan. Ieh ineh baré anak-anak Arun kuan Tuhan, pa atun bubpun.

¹⁵Idi imam ngalap sengeragam banak ratnan baré akan dengan amung umau luk do' buen teh. Idi amung ineh sabpenneh luun bubpun mangun ku aceh babpat baré idi luk do' buen kuan Tuhan.

¹⁶Idi elaneh kenen imam ineh, ieh ineh akan luk na linamud idi kenen su luk meligan i natad Lepo su luk inan papu' Tuhan.

¹⁷Idi ieh ineh na miak uen nadang dengan lamud. Idi ieh ineh babpat luk biréKu nedeh ratnan amung luk barén sabpen kuanKu. Ieh ineh luk meluun ligan, mepad kudeng baré ngaceku sala', idi baré luk pingetap.

¹⁸Idi amung inul Arun luk deléi ineh miak kuman babpat ineh macing raked-raked. Idi idé-idé luk ngakem baré ineh kali' rungen ieh meligan.”

¹⁹Idi kebala Tuhan ni Musa,

²⁰"Idi ini baré Arun idi anak-anakneh luk miak baréndeh kuan Tuhan kareb aconeh inumau, ieh ineh tudu' lio banak mepad kudeng baré akan luk pekalai, sebuang barén pekak, idi sebuang barén malem.

²¹Idi ieh ineh uen ngerabur ku umau, idi uen nadang luun belawan. Idi baré ineh uen ngareg, mepad kudeng baré luk kenen, mangun ku aceh buen luk do' kuan Tuhan.

²²Ieh ineh barén inul Arun luk inumau mangun ku Imam Rayeh macing ruked-ruked. Amung ineh sabpen kuan Tuhan.

²³Do' amung baré akan imam ineh sabpen. Baré akan imam ineh na miak kenen."

²⁴Idi kebala Tuhan ni Musa,

²⁵"Mada' Arun idi anak-anakneh ratnan dalan baré ngaceku sala' ineh: "Baré ngaceku sala' kereten pa kiung Tuhan, iring bubpun su luk inan ngeret baré luk sabpen. Ieh ineh baré luk meluun ligan.

²⁶Idi imam luk maré luk barén ngaceku sala' ineh miak kuman ineh, déi' su luk meligan i natad Lepo su luk inan papu' Tuhan.

²⁷Idi idé luk ngakem uangneh ineh kali' rungen ieh meligan. Idi ayung luk nepisit ku dara'neh, do' ieh baruin bang aceh su luk meligan.

²⁸Idi kuden luk inan nenanek ineh do' ieh ruen mila'. Iamo' kudeng ieh tinanek bang kuden tekaling, do' ieh uen ngasa idi uen ngapu' bang abpa'.

²⁹Idi amung deléi' rat arang imam ineh miak kuman luk biré ineh. Ieh ineh luk meluun ligan.

³⁰Iamo' kudeng sebuang dara' inuit semuet bang Lepo su luk inan papu' Tuhan mangun ku luk nguit pedo' déi' Su luk Meligan, amung baré ngaceku sala' ineh na miak kenen. Do' amung ineh sabpen.

Ukum 7

¹"Idi ini dalan baré luk pingetap. Ieh ineh baré luk meluun ligan.

- ²Do' baré ineh kereten iring bubpun su luk inan ngeret baré luk sabpen ineh teh. Idi dara'neh uen ngisak libut-libut bubpun.
- ³Idi ratnan ineh do' ieh maré amung lemakneh idi iurneh luk melamu, idi linuapneh,
- ⁴idi dueh beterneh, idi amung lemak luk luunneh, idi luk nan iungneh, idi sebabpat luk meluun do' ratnan aténeh.
- ⁵Idi amung ineh sabpen imam luun bubpun ku aceh baré akan kuan Tuhan. Ieh ineh baré luk pingetap.
- ⁶Idi amung deléi rat arang imam miak kuman ineh. Idi do' ideh kuman ineh déi' su luk meligan, ngaceku baré ineh meluun ligan.
- ⁷"Do' baré luk pingetap ineh mepad kudeng baré ngaceku sala'. Idi uangneh mangun ku babpat imam, luk pangeh nemaré baré ineh luk nguit pedo'.
- ⁸Idi imam luk maré baré luk sabpen ineh miak ngalap kubil rat luun baré luk pangeh biréneh ineh.
- ⁹Idi amung baré akan luk didang luun tetel, kian bang periuk idi luun belawan lek, ieh ineh mangun ku babpat imam luk maré ineh.
- ¹⁰Amung baré akan luk rinabur ku umau, idi luk tekering teh, luk mata' mangun ku aceh baré luk uen mabpat kuan anak Arun.
- ¹¹"Idi ini dalan baré luk nguit pedo' luk miak barén kuan Tuhan.
- ¹²Idi kudeng lun maré ineh ku baré ubur, idi do' perapu dengan baré ubur ineh maré tuda'-tuda' pinaram luk na linamud luk rinabur ku umau, idi tinapé luk na linamud luk inisit ku umau, idi pinaram ratnan banak luk rinabur ku umau.
- ¹³Idi teh, do' ieh maré pinaram luk na linamud.
- ¹⁴Do' maré aceh babpat ratnan amung-amung baré kuan Tuhan. Idi ieh ineh mangun ku babpat imam luk pangeh nengisak dara' luk nguit pedo' ineh.
- ¹⁵Idi do' uang baré luk nguit pedo' ineh kenen bang aco luk inanneh biré. Idi sesuut pana' elaneh na miak ketecan macing kenebpa.

¹⁶"Iamo' kudeng seburur lemulun maré aceh baré maya' jani'neh, kian aceh baré maya' awang niatneh, idi miak ieh kenen kareb aco luk inanneh biré. Idi elaneh miak kenen pekak kenebpa.

¹⁷Iamo' kudeng inan ela uang baré ineh kareb aco luk keteluh na miak na ieh sabpen.

¹⁸"Idi kudeng uang luk biré inan pedo' ineh kenen kareb aco luk keteluh, idi baré lemulun luk nemaré ineh na petulu idi na ieh petulu kuan Tuhan teh. Ieh ineh mangun ku akan luk dat. Idi lemulun luk kuman ineh ieh sebuleng mabeh sala'neh.

¹⁹"Idi teh uang luk petulu ku aceh luk inan megani', ineh pana' na miak kenen. Iamo' do' ieh sabpen. Iamo' uang luk baken ineh, idé-idé luk meligan miak kuman ineh.

²⁰Iamo' idé luk kuman ratnan baré luk nguit pedo' luk Tuhan kuan kareb ieh nateh linigan, idi lun ineh miak uen ngusu rat arang pupuneh."

²¹Kudeng ineh teh, idé luk ngakem aceh luk inan megani', ieh ineh ratnan lemulun, kian pung lek, idi ieh kuman uang baré luk nguit pedo' luk Tuhan kuan, idi lun ineh miak uen ngusu rat arang pupuneh."

²²Kebala Tuhan ni Musa,

²³"Mada' kuan lun Israil: Aleg muyuh kuman lemak sapi', dumba, idi amék.

²⁴Idi lemak butung pung idi lemak pung luk giramit ineh miak ieh uen makai ku luk baken, iamo' na ieh miak kenen.

²⁵Ngaceku idé luk kuman lemak pung ratnan baré luk sabpen kuan Tuhan, idi lemulun ineh uen ngusu rat arang pupuneh.

²⁶"Idi teh aleg muyuh kuman dara' bang su luk inan muyuh mudeng, do' dara' suit idi dara' pung pana'.

²⁷Kudeng idé luk kuman dara', ieh ineh uen ngusu rat arang pupu Allah."

²⁸Kebala Tuhan ni Musa teh,

²⁹"Mada' kuan lun Israil kudeng ini: Idé luk maré aceh baré pedo', do' ieh sebuleng maré sebabpat baré ineh kuan Tuhan.

³⁰Dengan ticu'neh sebuleng, do' ieh nguit amung-amung luk barén sabpen kuan Tuhan, idi do' ieh nguit lemakneh perapu dengan ruukneh pad ineh tidulen ku aceh baré pa kiung Tuhan.

³¹Idi imam ineh ngeseb lemakneh luun bubpun, iamo' ruukneh mangun ku babpat imam-imam.

³²Do' muyuh maré tipan luk pa tinueh kuan imam ku aceh baré ratnan amung baré muyuh luk nguit pedo',

³³ieh ineh kuan imam luk maré dara' idi lemak luk nguit pedo' ineh.

³⁴Ngaceku ruuk baré luk tidulen idi tipan baré luk iten ineh pangeh Ui nengalap kuanKu sebuleng ratnan amung baré lun Israil luk nguit pedo', idi do' ineh barén lun Israil nelun imam macing raked-raked.

³⁵Idi ieh ineh babpat kuan Arun idi anak-anakneh ratnan amung luk barén sabpen kuan Tuhan, kareb aco luk inandeh inumau mangun ku imam.

³⁶Idi bang aco sineh, Tuhan nengecuk nelun Israil maré babpat ineh kuandeh. Idi ini aceh dalan luk miak Bén lun Israil macing raked-raked.

³⁷"Idi ini dalan baré luk sabpen, baré akan, baré ngaceku sala', baré luk pingetap, baré pingumau, idi baré luk nguit pedo',

³⁸luk biré Tuhan ni Musa luun Pegkung Sinai déi' su luk ali-ali kareb aco luk inan Tuhan nengecuk nelun Israil maré baré kuanNeh."

Ukum 8

¹Kebala Tuhan ni Musa,

²"Do' iko nated Arun idi anak-anakneh amé' munung tanga' Lepo su luk inan papu' Tuhan, idi nguit ayung imam, umau luk ku ngumau, aceh sapi' luk pegawa' luk barén ngaceku sala', dueh dumba deléi dengan aceh tayen pinaram luk na linamud ineh.

³Idi ngamung lun mula' tebubpun su ineh."

⁴Idi Musa nenganau' maya' kudeng luk icuk Tuhan neneh. Idi kareb lun mula' ineh nepamung

⁵Idi kebala Musa nedeh, "Kudeng ini luk icuk Tuhan."

⁶Idi Musa nengecuk Arun idi anak-anakneh amé' muneng, pad ieh miak ngediu' nedeh.

⁷Idi ieh nengayung ni Arun ku kuyu' ineh idi nengabet awa'neh ku abet awa', idi nengayung neneh ku kuyu' buyor, idi kuyu' imam teh, luk inabet ku abet kuyu' imam luk tibaruh do'-do' i awa'neh.

⁸Idi ieh nenganau' kakeb ruuk ineh luunneh, idi nengabet Urim idi Tumiminan kakeb ruuk ineh.

⁹Idi ieh nengerareng sigar ineh nan uluhneh, idi nengabet luun sigar ineh balad amas ineh, ieh ineh pata luk meligan maya' kudeng luk icuk Tuhan ni Musa.

¹⁰Idi Musa nengalap umau luk ku ngumau ineh, idi nengumau nan Lepo su luk inan papu' Tuhan, idi amung repapeh luk bang ineh. Idi ieh nengeligan amung ineh kuan Tuhan.

¹¹Idi ieh nenepek umau ineh tudu' kua' luun bubpun, idi ieh nengumau bubpun dengan amung repapehneh, idi pasu' luk inan sibiru' perapu dengan kukudneh, pad ngeligan ineh.

¹²Idi ieh nengukit umau luk ku ngumau ineh luun uluh Arun, idi ieh nengeligan neneh.

¹³Idi Musa nenguit anak-anak Arun amé' muneng idi nengayung nedeh ku kuyu', idi nengabet awa'deh ku abet awa', idi nengerareng sigar nan uluhdeh, maya' kudeng luk icuk Tuhan ni Musa.

¹⁴Idi Musa nenguit sapi' luk barén ngaceku sala'. Idi Arun idi anak-anakneh nengerareng ticu'deh luun uluhneh.

¹⁵Musa nengeret neneh, idi ieh nengalap sebuang dara'neh. Idi ieh nengisit amung unga bubpun ineh ku bua' ticu'neh. Kudeng ineh ieh nengeligan

bubpun ineh. Idi dara' luk ketecan ineh inukitneh luun kukud bubpun ineh. Kudeng ineh ieh nengeligan ineh, idi ieh nenganau' luk nguit pedo' kuan ineh.

¹⁶Idi Musa nengalap amung lemak luk luun tinéi'neh, idi sebabpat luk meluun do' ratnan aténeh, idi dueh beterneh perapu dengan lemakneh. Idi Musa nengeseb ineh luun bubpun.

¹⁷Iamo' sapi' ineh perapu dengan kubilneh, idi amung uangneh, idi téi'neh isebneh mado ratnan amung-amung lepo, maya' kudeng luk icuk Tuhan ni Musa.

¹⁸Idi Musa nenguit dumba deléi ku baré luk sabpen ineh. Idi Arun dengan anak-anakneh nengerareng ticu'deh luun uluh dumba deléi ineh.

¹⁹Idi Musa nengeret neneh. Idi dara'neh inisakneh libut-libut bubpun ineh.

²⁰⁻²¹Idi ieh nenetek burur dumba ineh. Idi ieh namaru' tinéi' idi tipanneh. Idi ieh nengeseb uluhneh, lemakneh idi amung luk titek ineh luun bubpun, maya' kudeng luk icuk Tuhan ni Musa. Ieh ineh aceh baré luk sabpen luk mangun ku aceh luk do' buen kuan Tuhan.

²²Pangeh ineh idi Musa nenguit dumba deléi luk kedueh ineh luk barén kareb ngumau imam. Idi Arun dengan anak-anakneh nengerareng ticu'deh luun uluhneh.

²³Idi Musa nengeret neneh, idi ieh nengalap sebuang dara'neh, idi ieh nengisit ineh luun ribaran lalid Arun luk pa tinueh, idi bua' ticu' mebpuhneh luk pa tinueh, idi bua' kukud mebpuhneh luk pa tinueh teh.

²⁴Idi ieh nenguit anak-anak Arun, idi ieh nengisit sebuang dara' ineh luun ribaran laliddeh luk pa tinueh, idi bua' ticu' mebpuhdeh luk pa tinueh, idi bua' kukud mebpuhdeh luk pa tinueh teh. Idi ela dara' ineh inisak Musa libut-libut bubpun ineh.

²⁵Idi ieh nengalap lemakneh, idi iurneh luk melamu, idi amung lemak luk luun tinéi'neh, idi sebabpat luk meluun do' ratnan aténeh, idi beterneh luk dueh, perapu dengan lemakneh idi tipanneh luk pa tinueh.

²⁶Idi ratnan tayen pinaram luk na linamud luk linigan kuan Tuhan ineh, ilapneh sebalad pinaram luk na linamud, idi aceh pinaram luk inan umau, idi sebuleng tinapé, idi ieh nengerareng amung ineh luun lemak idi luun tipan luk pa tinueh ineh.

²⁷Idi amung ineh rirengneh bang palad Arun, idi anak-anakneh, pad mangun ku baré luk tidulen pa kiung Tuhan.

²⁸Idi Musa nengalap amung ineh rat bang paladdeh. Idi isebneh luun bubpun, pa luun baré luk sabpen ineh, idi ieh ineh baré luk ku ngumau, ieh ineh aceh baré luk sabpen luk mangun ku luk do' buen kuan Tuhan.

²⁹Idi Musa nengalap ruuk dumba ineh, idi ieh nemaré ineh ku aceh baré luk tidulen pa kiung Tuhan. Idi ieh ineh ku aceh babpat kuan Musa ratnan dumba deléi, ieh ineh baré luk ku ngumau, maya' kudeng luk icuk Tuhan ni Musa.

³⁰Idi teh Musa nengalap sebuang umau luk ku ngumau, idi sebuang dara' luk pa luun bubpun idi ieh nemubpur ni Arun, idi ayungneh, idi anak-anakneh pana', dengan ayungdeh teh. Kudeng ineh Musa nengeligan ni Arun idi ayungneh, idi anak-anakneh dengan ayungdeh teh.

³¹Idi kebala Musa ni Arun idi anak-anakneh, "Nanek uang ini pa atun tanga' Lepo su luk inan papu' Tuhan, idi kuman ineh su ineh, perapu dengan pinaram luk bang tayen ineh, ku baré luk ku ngumau, maya' kudeng bala luk icuk Tuhan negku.

³²Iamo' do' ngeseb teceh uang idi pinaram.

³³Idi aleg muyuh buro ratnan munung tanga' Lepo su luk inan papu' Tuhan ineh, tudu' aco kinioneh pad macing mabud aco luk inan muyuh uen ngumau.

³⁴Idi luk pangeh inau' tau aco sini, nemaya' ecuk Tuhan pelé nganau' luk inan pedo' kuan muyuh.

³⁵Do' muyuh mudeng munung tanga' Lepo su luk inan papu' Tuhan tebaco kedangan tudu' aco kinioneh, maya' kudeng luk icuk Tuhan, pad muyuh na maté. Ngaceku kudeng ineh bala Tuhan negku.”

³⁶Idi Arun idi anak-anakneh nemaya' amung bala luk icuk Tuhan ni Musa.

Ukum 9

¹Idi kareb aco luk kewaluh idi Musa nenawar Arun idi anak-anakneh dengan amung lun rayeh Israil.

²Idi kebalaneh ni Arun, "Ngalap aceh sapi' deléi luk pegawa' luk do', barén ngaceku sala', idi aceh dumba deléi luk do' mangun ku baré luk sabpen, pa kiung Tuhan.

³Idi ngecuk nelun Israil ngalap aceh amék deléi luk barén ngaceku sala', idi sebuleng anak sapi' idi sebuleng anak dumba luk ulundeh selak, ieh ineh luk do' mangun ku baré luk sabpen,

⁴Idi teh sebuleng sapi' deléi idi sebuleng dumba deléi ku baré luk nguit pedo' idi luk miak sabpen pa kiung Tuhan, idi baré akan luk tinina' dengan umau. Ngaceku aco sini Tuhan miak silagan nemuyuh.”

⁵Idi ideh nenguit luk icuk Musa macing pa atun Lepo su luk inan papu' Tuhan. Idi lun mula' ineh nepamung pad sembayang na Tuhan.

⁶Idi kebala Musa, "Kudeng ini ecuk Tuhan nemuyuh, pad ubur Tuhan miak silagan nemuyuh.”

⁷Idi kebala Musa ni Arun, "Amé' iring bubpun, idi temina' ku baré luk barénmu ngaceku sala' idi baré luk sabpen teh, idi nganau' luk nguit pedo' ngaceku bururmu sebuleng idi ngaceku pupumu ini; idi temina' ku baré lun mula' ineh idi nganau' luk nguit pedo' kuandeh, maya' kudeng luk icuk Tuhan.”

⁸Idi Arun iné' iring bubpun. Idi ieh nengeret sapi' luk pegawa' ineh barén ngaceku sala'neh sebuleng.

⁹Idi anak-anak Arun nenguit dara' ineh kuanneh. Idi ieh nengerereb bua' tiku'neh bang dara' ineh, idi nengisit ineh luun unga bubpun. Idi dara' luk ketecan ineh inutangneh luun kukud bubpun ineh.

¹⁰Iamo' amung lemakneh, idi beternih luk dueh, idi sebabpat luk meluun do' ratnan aténeh luk barén ngaceku sala' ineh, isebneh luun bubpun, maya' kudeng luk icuk Tuhan ni Musa.

¹¹Iamo' uangneh idi kubilneh pana' isebneh mado rat su luk inandeh nelupo.

¹²Pangeh ineh ieh nengeret baré luk sabpen ineh. Idi dara'neh inuit anak-anak Arun kuanneh, idi ieh nengisak ineh libut-libut bubpun ineh.

¹³Idi ideh nenguit kuanneh baré luk sabpen luk titek, perapu dengan uluhneh, idi amung ineh isebneh luun bubpun.

¹⁴Idi ieh namaru' tinéi'neh idi tipanneh, idi ieh nengeseb ineh dengan baré luk sabpen luun bubpun ineh.

¹⁵Pangeh ineh idi Arun namaré baré lun mula'. Idi ieh nengalap amék deléi luk barén ngaceku sala' lun mula', idi nengeret neneh idi namaré ineh ngaceku sala' mepad kudeng baré luk pun-pun ineh.

¹⁶Idi ieh nenguit pung luk sabpen ineh idi namaré ineh, maya' kudeng luk icuk Tuhan.

¹⁷Idi ieh nenguit baré akan. Idi ieh nengalap sengeragam idi nengeseb ineh luun bubpun, baken ratnan baré luk iseb kareb pekak.

¹⁸Pangeh ineh, idi ieh nengeret sapi' deléi idi dumba deléi mangun ku baré luk nguit pedo' ngaceku lun mula'. Idi anak-anak Arun pana' nenguit dara' ineh kuanneh, idi Arun nengisak ineh libut-libut bubpun ineh.

¹⁹Iamo' lemak sapi' deléi idi dumba deléi ineh, idi iur luk melamu ineh, idi lemak luk luun tinéi' idi beterdeh, idi sebabpat luk meluun do' ratnan atédeh,

²⁰idi amung lemak ineh rirengdeh luun ruuk baré ineh, idi Arun nengeseb amung lemak ineh luun bubpun.

²¹Iamo' ruuk idi tipan luk pa tinueh ineh tinicul-tinicul Arun pa kiung Tuhan, maya' kudeng luk icuk Musa.

²²Idi Arun nengiding ticu'neh pa luun lun mula' ineh idi ieh nemutuh peruan kuandeh. Kareb ieh pangeh nemaré amung baré ineh, idi ieh netemurun.

²³Musa idi Arun nesemuet bang Lepo su luk inan papu' Tuhan. Kareb didueh neremuat, idi didueh nemutuh peruan kuan lun mula' ineh idi rasat Tuhan pana' melagan siren lun mula' ineh.

²⁴Denak-denak Tuhan nemaré apui luk nengeseb amung baré luk sabpen idi lemak luk luun bubpun ineh. Kareb lun mula' nenier ineh, idi ideh nengitang idi ideh netekunal.

Ukum 10

¹Nadab idi Abihu, anak Arun ineh, nengalap su luk inan bareh apui didueh idi nenganau' apui bang ineh, idi didueh nengerareng umau luk do' buen luun apui ineh, idi bang ineh didueh nenguit apui luk na petulu iten pa kiung Tuhan, idi luk na icuk Tuhan.

²Denak-denak Tuhan nemaré apui luk nengeseb nedidueh, pad didueh naté pa kiung Tuhan.

³Idi kebala Musa ni Arun, "Ini luk pangeh bida' Tuhan, kebalaNeh, 'Ui pian mada' liganKu siren lemulun luk muneng Negku, idi Ui pian uen ngerayeh pa kiung amung-amung lemulun.' " Idi Arun pirud.

⁴Idi Musa nenawar Misail idi Elsapan, anak-anak Usel taman pinaken Arun. Kebalaneh nedeh, "Amé' medueh nguit butung kinanak medueh remuat rat pa atun Su luk Meligan ini idi rat su luk inan nelupo."

⁵Idi didueh iné' nguit butung didueh perapu dengan ayung didueh idi neremuat rat su luk inandeh nelupo, maya' kudeng luk icuk Musa.

⁶Idi kebala Musa ni Arun idi Eliasar idi Itamar, anakneh ineh, "Aleg nima' abpuk muyuh mesasung idi aleg ngerarak ayung muyuh, pad muyuh na mate'

idi ngacing useh luk rayeh kuan lun mula' ini. Iamo' amung kinanak muyuh lun Israil miak temido ngaceku apui ini luk pangeh binudung Tuhan.

⁷Idi teh aleg muyuh buro rat pa atun tanga' Lepo su luk inan papu' Tuhan, pad muyuh na maté. Ngaceku muyuh pangeh inumau Tuhan." Idi ideh nemaya' bala Musa.

⁸Kebala Tuhan ni Arun,

⁹"Aleg iko idi anak-anakmu ngirup abpa' anggur idi luk megalih kareb muyuh semuet bang Lepo su luk inan papu' Tuhan, pad muyuh na maté. Idi ini aceh dalam luk meruked macing ku anak inul.

¹⁰Do' muyuh mili' arang luk meligan idi luk na meligan, idi arang luk melutak idi luk na melutak,

¹¹pad muyuh miak mada' nelun Israil amung dalam luk bida' Tuhan nedeh dengan tang Musa."

¹²Kebala Musa ni Arun idi anakneh Eliasar idi Itamar luk ketecan ineh, "Do' muyuh ngalap baré akan luk ketecan ratnan baré luk sabpen kuan Tuhan. Kuman ineh dengan na linamud muneng ku bubpun. Ngaceku ieh ineh meluun ligan.

¹³Idi do' muyuh kuman ineh bang aceh su luk meligan. Ngaceku ieh ineh babpat luk litep kuanmu idi anakmu pana' ratnan amung baré luk sabpen kuan Tuhan. Ngaceku kudeng ini bala Tuhan kuanku.

¹⁴Iamo' ruuk baré luk tidulen, idi tipan baré luk iten ineh, miak muyuh kuman déi' su luk meligan, ieh ineh iko idi anak-anakmu luk deléi idi decur pana' luk denganmu. Ngaceku ineh pangeh biré kuanmu idi anakmu teh mangun ku babpatmu luk litep ratnan amung baré luk nguit pedo' nelun Israil.

¹⁵Idi tipan baré luk iten idi ruuk baré luk tidulen ineh, do' ieh iten perapu dengan lemak ratnan baré luk sabpen, pad amung ineh tidulen pa kiung Tuhan. Idi ini mangun ku aceh dalam luk meruked kuanmu idi anakmu pana', maya' kudeng luk icuk Tuhan."

¹⁶Idi Musa nengitun ratnan amék deléi luk barén ngaceku sala' ineh. Idi setuneh pangeh nabud iseb! Idi Musa pelaba useh ni Eliasar idi Itamar, anak Arun luk deléi luk ketecan ineh, kebalaneh,

¹⁷"Ngudeh muyuh na kuman baré ngaceku sala' ineh bang Su luk Meligan? Ngaceku ieh ineh luk meluun ligan, idi pangeh biré kuan muyuh, pelé muyuh miak mabeh sala' lun mula' ineh idi muyuh nganau' luk nguit pedo' kuandeh pa kiung Tuhan?"

¹⁸Idi setuneh dara'neh pana' na inuit semuet bang Su luk Meligan ineh. Do' muyuh kuman ineh bang Su luk Meligan maya' kudeng luk bida'ku."

¹⁹Kebala Arun ni Musa, "Setuneh aco sini ideh pangeh nemaré barédeh ngaceku sala', idi barédeh luk sabpen pa kiung Tuhan. Idi susa' luk kudeng ini pangeh mangun kuanku. Idi kudeng ui nekuman luk biré ku sala' aco sini, do' ké ineh pa kiung Tuhan?"

²⁰Kareb Musa neninger bala ini, idi do' ieh bang terawéneh.

Ukum 11

¹Kebala Tuhan ni Musa idi Arun,

²"Mada' ukum ini kuan lun Israil. Ini pung luk miak kenen muyuh rat arang amung pung luk luun tana'.

³Pung luk dueh lisun idi luk ngelua' miak kenen muyuh.

⁴⁻⁶Iamo' muyuh na miak kuman ratnan amung luk ngagat idi ngelua' mo', kian luk dueh lisun mo': kudeng unta, sapan, idi arnab. Amung pung ineh mangun ku gani' kuan muyuh.

⁷Idi teh barek idi baka, ngaceku sagan pana' lisundeh dueh, iamo' na ideh ngagat luk linua', idi ideh mangun ku gani' kuan muyuh.

⁸Aleg muyuh kuman pung ineh. Idi aleg muyuh ngakem butungdeh. Ideh mangun ku gani' kuan muyuh.

⁹"Muyuh miak kuman amung lawid luk inan rahi idi rara, do' luk bang abpa' rayeh idi bang arur pana'.

- 10**Iamo' luk na ragi idi rara bang abpa' rayeh idi bang arur pana' na miak kenen muyuh.
- 11**Lawid ineh mangun ku gani' kuan muyuh. Aleg muyuh kuman uangdeh, idi aleg ngakem butungdeh.
- 12**Amung luk na ragi idi rara bang abpa' ineh mangun ku gani' kuan muyuh.
- 13-19**"Idi aleg muyuh kuman amung-amung suit ini: amung-amung kanui, amung-amung puek, amung-amung bungkek, suit unta, suit luk mebuda' tangeb abpa' rayeh, manuuk, lal lakui, kekalit, idi pawat.
- 20**"Idi amung pung luk inan ilad luk nalan dengan apat kukud mangun ku gani' kuan muyuh.
- 21**Iamo' luk miak uput miak kenen muyuh,
- 22**ieh ineh kato tulang, kato mebpuh, idi kato kesil.
- 23**Iamo' amung pung luk baken luk inan ilad idi luk tekamang mangun ku gani' kuan muyuh.
- 24-28**"Idé-idé luk ngakem butung pung ini mangun melutak macing aco macep: amung pung luk na dueh lisun idi na ngagat luk linua', idi amung pung luk nalan ku palad rat arang pung luk apat kukud. Idé-idé luk mabeh butungdeh, do' ieh mupu' ayungneh, idi ieh melutak macing aco macep.
- 29-30**"Amung-amung labo, amung-amung alé, buayeh, kabuk, kedarat, idi garang, mangun ku gani' kuan muyuh.
- 31**"Amung pung luk tekamang mangun ku gani' kuan muyuh. Idé luk ngakem butungdeh, ideh melutak macing aco macep.
- 32**Idi amung luk neketukan butungdeh, ieh ineh melutak, ieh ineh kayuh, ayung, kubil, tebpung, idi amung binaweh luk ku pakai, idi do' ieh rerebpen bang abpa', idi ineh mangun ku gani' macing aco macep.
- 33**Idi kudeng butung pung ineh mebpeh bang kuden, idi amung uangneh mangun ku gani', do' ieh ruen mila'.

- 34Amung luk kenen luk neketukan ku abpa' rat bang kuden ineh, idi amung luk rupen pana' mangun ku gani' kuan muyuh.
- 35Idi teh binaweh baken luk neketukan butung ineh mangun ku gani', do' tetel idi lacang pana' uen mila'.
- 36Iamo' bued abpa' idi subuk ineh meligan. Iamo' anun-anun luk nepisit ku butung ineh, kali' rungen ieh melutak.
- 37Idi kudeng butung ineh nepisit luun ilung luk uen ngisak, na ieh mangun ku gani'.
- 38Iamo' kudeng ilung ineh bang abpa' idi ieh neketukan ku butung ineh, idi ineh mangun ku gani' kuan muyuh.
- 39"Idi kudeng pung luk miak kenen muyuh maté, idé luk ngakem butung ineh, ieh mangun ku gani' macing aco macep.
- 40Idi teh kudeng idé luk nekuman uang butung ineh, do' ieh mupu' ayungneh, idi ieh mangun ku gani' macing aco macep. Idi idé luk nguit butungneh ineh, do' ieh mupu' ayungneh idi ieh pana' mangun ku gani' macing aco macep.
- 41"Idi aleg muyuh kuman pung luk medari luk tekamang idi suloi luun tana',
- 42do' luk nalan dengan apat kukud, idi luk mula' kukud pana'.
- 43Aleg muyuh ngelutak burur muyuh ku pung luk kudeng ineh.
- 44Ui ini Tuhan Allah muyuh. Do' muyuh meligan, ngaceku Ui ini meligan.
- 45Ui ini Tuhan luk nenated nemuyuh remuat rat bang bawang Masir, pad mangun ku Allah muyuh. Do' muyuh meligan ngaceku Ui ini meligan.
- 46"Idi ini ukum ratnan amung pung, suit, idi pudut luk mulun bang abpa' idi luk nalan luun tana',
- 47pad muyuh mili' rat arang luk mangun ku gani' dengan luk na mangun ku gani', idi rat arang pung luk kenen dengan pung luk na kenen lemulun."

Ukum 12

- 1Kebala Tuhan ni Musa,

²"Mada' ini kuan amung lun Israil: Kareb aceh decur nenganak anak luk deléi, idi ieh mangun ku gani' macing tudu' aco kinioneh, maya' kudeng acing bulan luk inanneh pekalai.

³Idi aco luk kewaluh do' anak ineh uen nunat.

⁴Pangeh ineh decur ineh nganét teluh ngepulu' teluh aco kinioneh, pad dara'neh uen ngeligan. Sebuleng pana' luk meligan na miak kamenneh. Idi na ieh miak semuet bang Su luk Meligan pad mabud aco luk inanneh uen ngeligan.

⁵"Iamo' kudeng ieh nenganak anak decur, idi dueh minggu kinioneh ieh mangun ku gani', maya' kudeng acing bulan luk inanneh pekalai. Pangeh ineh do' ieh mudeng teh anem ngepulu' anem aco kinioneh, pad mabud aco luk inanneh uen ngeligan.

⁶Idi kareb petap aco luk inanneh uen ngeligan, ngaceku anak deléi kian decur ineh, idi do' ieh nguit kuan imam aceh anak dumba luk ulunneh selak luk barén sabpen, idi aceh anak suit limun kian suit sukur luk barén ngaceku sala', pa atun tanga' Lepo su luk inan papu' Tuhan.

⁷Idi imam maré ineh pa kiung Tuhan, idi nganau' luk nguit pedo' kuanneh. Idi ieh meligan ratnan dara'neh. Kudeng ineh ukum kuan decur luk nenganak anak deléi, kian decur lek.

⁸"Kudeng decur ineh na miak maré aceh anak dumba, do' ieh maré dueh suit sukur, kian dueh suit limun lek. Idi sebuleng barén sabpen idi sebuleng barén ngaceku sala'. Idi imam ineh nganau' aceh luk nguit pedo' kuanneh, pad ieh meligan."

Ukum 13

¹Kebala Tuhan ni Musa idi Arun,

²"Kudeng inan bara', kian mungeh, kian belita', luun kubil seburur lemulun luk miak mangun ku susud luun bururneh, do' lemulun ineh iten amé' pa kiung Arun luk imam, kian pa kiung anak-anakneh luk imam pana'.

³Idi imam ineh miak nier do'-do' ét luk luun bururneh ineh. Kudeng buluh su luk inan mét ineh pangeh nisu' mebuda', idi megala' luk mét ineh meluun dalem nan kubil bururneh, ieh ineh susud. Kareb ieh pangeh sinier do'-do', do' imam neten neneh ku gani'.

⁴Iamo' kudeng kubilneh inan belita' idi siren na meluun dalem ratnan kubilneh, idi buluh su luk inanneh na ieh misu' mangun mebuda', idi do' imam ngata lun luk mét ineh tudu' aco kinioneh.

⁵Idi kareb aco luk ketudu', do' imam ineh nier neneh do'-do'. Kudeng matu-matu luk mét ineh lutep, na ieh kuman pelaba dalem luun kubilneh, idi do' imam ineh ngata neneh tudu' aco kinioneh teh.

⁶Idi aco luk ketudu' ineh imam miak nier neneh do'-do' sekedueh kua'. Kudeng megala' luk mét ineh melena' idi na kuman pelaba dalem bang kubilneh, idi do' imam mala neneh meligan. Ieh ineh kererang mo'. Do' lemulun ineh mupu' ayungneh. Idi ieh mangun meligan.

⁷Iamo' kudeng kererang ineh kuman iuk medalem bang kubilneh, kareb ieh pangeh nemada' bururneh siren imam pad ieh miak ruen meligan, do' ieh amé' papu' imam sekedueh kua'.

⁸Idi kudeng imam nier luk mét ineh iuk kuman medalem bang kubilneh, idi do' imam mala neneh ku gani'. Ieh ineh ét susud.

⁹"Idi idé luk neketukan susud ineh, do' ieh iten amé' papu' imam.

¹⁰Kudeng imam nier neneh mebara', mebuda' nan kubilneh, idi bara' ineh ngisu' ayu buluh su luk inanneh, pad ieh mangun mebuda', idi temubu' uang luk dat bang bara' ineh,

¹¹Idi ieh ineh ét susud luk pangeh mio luun kubil bururneh. Idi do' imam mala neneh ku gani'. Idi aleg ieh ngata neneh peh, ngaceku ieh mangun ku gani'.

¹²Iamo' kudeng susud ineh maput luun bururneh, ratnan uluh macing ku kukudneh, su luk sinier imam,

¹³idi do' imam nier neneh sekua' teh, idi kudeng imam kali' amung bururneh maput ku susud ineh, do' imam ineh mala lun ineh meligan, kudeng amung kubilneh pangeh misu' mangun mebuda', meligan tieh.

¹⁴Iamo' kudeng uang luk dat melagan bang susudneh, idi ieh mangun ku gani'.

¹⁵Idi kudeng imam nier uang luk dat ineh, idi do' imam mala neneh ku gani', ngaceku uang luk dat ineh mangun ku gani'. Ieh ineh susud.

¹⁶Iamo' kudeng uang luk dat ineh mepali' idi misu' mangun mebuda', do' lemulun ineh amé' papu' imam,

¹⁷idi imam miak nier neneh, idi kudeng luk mét ineh mangun mebuda', idi do' imam ineh mada' neneh meligan. Ngaceku ieh meligan.

¹⁸"Idi kudeng seburur lemulun mekimuh idi kimuh ineh mepali',

¹⁹iamo' su luk inan pilet kimuh ineh mulun aceh ayu luk mebuda' kian belita' luk mebuda' puar mesia', idi do' ieh badén inan imam.

²⁰Idi kudeng imam nier pilet ineh meluun dalem ratnan kubil ineh, idi buluh su luk inanneh pana' pangeh nisu' mangun mebuda', idi do' imam mala neneh ku gani'. Ieh ineh ét susud luk pangeh mulun su luk inan kimuh ineh.

²¹Iamo' kudeng imam nier neneh na buluh su luk inanneh mebuda', na ieh meluun dalem ratnan kubilneh, iamo' iuk melena', idi do' imam ineh ngata neneh tudu' aco kinioneh.

²²Kudeng ieh kuman pelaba dalem bang kubil ineh, idi do' imam mala neneh ku gani'. Ngaceku ieh ineh ét susud.

²³Iamo' kudeng belita' ineh na iuk amé' rayeh idi na remanat-remanat, ieh ineh pilet kimuh. Do' imam mala neneh meligan.

²⁴"Idi kudeng kubil seburur lemulun nelupuk ku apui, idi piletneh mebuda' puar mesia' kian pelaba buda' lek,

²⁵do' imam ineh nier neneh. Kudeng matu buluh su ineh misu' mangun mebuda', melagan ét ineh pelaba dalem luun kubilneh, idi susud luk mulun

luun lupuk ineh. Idi do' imam ineh mala neneh ku gani', ngaceku ieh mét susud.

²⁶Iamo' kudeng imam nier neneh do'-do' idi na luk idi buluh luk mebuda' luun ét ineh, idi teh na ieh pelaba dalem luun kubilneh, idi ieh iuk-iuk luna', idi do' imam ineh ngata neneh tudu' aco kinioneh.

²⁷Idi kareb aco luk ketudu' ineh, do' imam nier neneh do'-do'. Kudeng ieh iuk kuman medalem bang kubilneh, idi do' imam ineh mala neneh ku gani'. Ngaceku ieh mét susud.

²⁸Iamo' kudeng belita' ineh lutep su inanneh, idi na ieh meperuit luun kubil ineh, iamo' ieh amé'-amé' luna', idi megala' ieh ineh bara' lupuk mo'. Do' imam mala neneh meligan. Ngaceku ieh ineh pilet lupuk mo'.

²⁹"Kudeng aceh deléi kian decur neketukan ét luun uluhneh kian luun adaneh,

³⁰idi do' ieh siren imam do'-do'. Kudeng ieh sirennéh meluun dalem ratnan kubilneh, idi inan abpukneh luk mebirar idi melipi teh, do' imam mala neneh ku gani'. Ngaceku puruh ineh mangun ku susud nan uluh kian luun adaneh.

³¹Iamo' kudeng imam nier puruh luk luun uluhneh na ieh meluun dalem ratnan kubilneh, idi kudeng ieh na abpuk luk mebirar pana', do' imam ngata lun luk mét susud nan uluhneh tudu' aco kinioneh.

³²Idi aco luk ketudu' do' imam nier luk métneh. Kudeng na puruh ineh iuk kuman medalem idi na abpukneh mebirar, idi na ieh melagan medalem bang kubilneh,

³³idi do' ngecuk neneh ngiki uluhneh. Iamo' su luk inan puruh ineh aleg uen ngiki. Do' imam ineh ngata neneh tudu' aco teh.

³⁴Idi aco luk ketudu' do' imam nier puruh ineh. Kudeng na akan luun kubilneh amé' rayeh idi melagan na meluun dalem, idi do' imam mala neneh meligan. Idi do' lemulun ineh mupu' ayungneh pad ieh meligan.

35Iamo' kudeng puruh ineh meperuit luun kubilneh, kudeng bururneh pangeh bida' imam meligan,

36idi do' imam nier neneh sekua' teh. Kudeng puruhneh pangeh neperuit luun kubilneh, nima' imam na nakap abpuk luk mebirar, ngaceku ieh ku gani'.

37Iamo' kudeng ieh nier puruh ineh na iuk medalem idi inan abpuk mitam temubu' luunneh, idi puruh ineh pangeh mepali', idi lemulun ineh meligan. Idi do' imam mala neneh meligan.

38"Kudeng seburur deléi kian decur lek, mebelita' kubil bururneh, idi putok mebuda',

39idi imam nier maput nan kubil bururneh na mebuda' tu, ieh ineh mungeh idi ieh meligan.

40"Idi teh kudeng abpuk selemulun nebubput pad ieh mebutal, idi ieh meligan.

41Idi kudeng nebubput abpuk pa madu'neh, pad ieh mebutal, idi ieh meligan.

42Iamo' kudeng luun uluh luk mebutal inan luk mét mebuda' uar mesia', ieh ineh susud luk mulun su ineh.

43Idi kudeng imam nier luun uluhneh mebuda' uar mesia' ayuneh mepad kudeng susud nan kubil bururneh,

44idi do' imam mala neneh ku gani', ngaceku luk mét ineh inan luun uluhneh.

45"Idi lun luk mét susud luk neketukan ineh dengan matu, do ayungneh deraken idi ngesasung abpukneh idi ngebpu bibirneh. Do' ieh ngitang, 'Megani! Megani!'

46Seruked ieh mét susud, ieh mangun ku gani', idi do' ieh amé' setau', idi mado rat su luk inan lun mula' nelupo.

47"Idi kudeng rapung nepisit luun aceh ayung, do' kibung buluh amék idi buluh kibung pu,

48kian luun gitian luk tupid, kian luun gitian luk tepalang bang pu idi buluh pana', kian kubil, kian luk inau' ratnan kubil lek,

⁴⁹idi kudeng su luk neketukan ineh mebata' kian mesia' ayuneh, ieh ineh rapung. Idi do' ieh badén nan imam.

⁵⁰Kareb imam nier su luk neketukan ineh, idi do' ieh ngecuk nganug luk neketukan ineh tudu' aco kinioneh.

⁵¹Do' ieh nier bang aco luk ketudu' ineh su luk neketukan ineh. Kudeng rapung ineh amé' mula', ieh ineh rapung luk meperuit. Idi ieh ineh ku gani'.

⁵²Idi do' imam ngeseb amung ineh. Ngaceku ineh rapung luk dat. Na miak na ieh sabpen.

⁵³"Iamo' kudeng imam nier dat ineh na neperuit luun amung ineh,

⁵⁴idi do' imam ngecuk nelun mupu' luk nekaneh ku ineh. Do' ieh nugen tudu' aco teh.

⁵⁵Idi kareb imam nier dat ineh pangeh biru' do'-do', idi dat ineh na ieh misu' ayu, idi sagan pana' dat ineh na amé' rayeh, idi ieh ku gani' teh. Idi do' ieh sabpen, sagan pana' luk dat ineh pa luun, kian pa liang lek.

⁵⁶Iamo' kudeng imam nier su luk neketukan ineh pangeh mepileh, idi do' ieh deraken ratnan kibung, kian kubil, idi gitian luk tuper idi gitian luk tepalang.

⁵⁷Iamo' kudeng pangeh ineh idi inan luk kudeng ineh mulun baruh idi do' muyuh ngeseb amung luk dat ineh.

⁵⁸Kudeng muyuh mupu' ineh, idi luk dat ineh buro, idi do' ieh baruin sekua' teh, pad ieh meligan."

⁵⁹Kudeng ini ukum kuan susud luk nan ayung ratnan pu idi kibung buluh, kian gitian luk tuper idi gitian luk tepalang, idi amung repapeh kubil.

Ukum 14

¹Kebala Tuhan ni Musa,

²"Ini mangun ku ukum lemulun luk mét susud. Kareb aco luk inanneh uen ngeligan, idi do' ieh iten amé' papu' imam.

- ³Idi do' imam ineh remuat rat su luk inan nelupo. Kudeng ieh kali' susud ineh pangeh neburo ratnan lemulun ineh,
- ⁴idi do' ieh ngecuk nedeh ngalap kuan lemulun luk uen ngeligan ineh dueh suit luk do', kayuh tumuh, nuper sia' melidang, idi teh likudung.
- ⁵Idi do' imam ngecuk nedeh ngeret aceh suit ineh pa luun aceh lacang luk inan apba' metaro.
- ⁶Idi do' ieh nguit suit seluk mulun ineh, kayuh tumuh, nuper sia' melidang, idi likudung, idi ngerereb amung ineh perapu dengan suit luk mulun ineh bang dara' suit luk pangeh kirat pa luun abpa' luk metaro ineh.
- ⁷Idi do' ieh mubpur lun luk uen ngeligan ratnan susudneh tudu' kua' ku dara' suit ineh. Pangeh ineh do' mala neneh meligan. Idi muit suit luk mulun ineh temulud déi' liang.
- ⁸Idi do' lun luk linigan ineh mupu' ayungneh idi ngiki amung apbukneh, idi diu', pad ieh meligan. Idi ieh miak semuet su luk inan nelupo. Iamo' do' ieh tudo déi' liang lepo kibungneh sebuleng tudu' aco kinioneh.
- ⁹Idi aco luk ketudu', do' ieh ngiki amung abpuk uluhneh, idi buluh adaneh idi madu'neh. Idi do' ieh ngiki uluhneh, idi mupu' ayungneh, idi diu' pad ieh meligan.
- ¹⁰Idi aco luk kewaluh, do' ieh ngalap dueh anak dumba deléi luk do', idi sebuleng dumba tineh luk uluhneh selak, idi luk do', idi teh segatang setangal banak luk rinabur ku umau mangun ku baré akan, idi setangal seréi' umau.
- ¹¹Idi do' imam ngerareng lun luk uen ngeligan ineh idi amung baréneh pa kiung Tuhan pa atun tanga' Lepo su luk inan papu' Tuhan.
- ¹²Idi do' imam ineh ngalap sebuleng anak dumba deléi, idi maré neneh perapu dengan umau luk setangal seréi' ineh ku baré luk pingetap, idi nicul ineh ku baré luk tidulen pa kiung Tuhan.
- ¹³Do' ngeret dumba deléi ineh su luk inan lun ngeret luk barén ngaceku sala', idi baré luk sabpen, ieh ineh su luk meligan, ngaceku mepad kudeng baré ku

sala', kudeng ineh teh baré luk pingetap, ieh ineh babpat imam, luk meluun ligan.

¹⁴Idi do' imam ngalap sebuang dara' anak dumba ineh, idi imam ngisit ineh nan ribaran lalid pa tinueh lun luk uen ngeligan ineh, idi nan bua' ticu' mebpuhneh pa tinueh, idi bua' kukud mebpuhneh pa tinueh.

¹⁵Idi teh do' imam ngalap ratnan umau luk setangal seréi' ineh, idi ngukit ineh luun paladneh pa kabing.

¹⁶Idi do' ieh ngerereb bua' ticu'neh pa tinueh nan umau luk bang ticu'neh pa kabing. Idi ieh ngisit ku bua' ticu'neh sebuang umau ineh tudu' kua' pa kiung Tuhan.

¹⁷Idi do' imam ngisit teceh umau luk bang paladneh luun ribaran lalid pa tinueh lun luk uen ngeligan, idi bua' ticu' mebpuhneh pa tinueh idi bua' kukud mebpuhneh pa tinueh teh, ieh ineh meluun ratnan baré luk pingetap.

¹⁸Idi ela umau luk ketecan bang palad imam ineh, do' ieh ruenneh luun uluh lun luk uenneh ngeligan. Idi imam nganau' luk nguit pedo' kuan lemulun ineh pa kiung Tuhan.

¹⁹Pangeh ineh do' imam maré baré ngaceku sala', idi nganau' luk nguit pedo' kuan lemulun luk uen ngeligan ratnan lutakneh. Pangeh ineh do' ngeret baré luk sabpen ineh.

²⁰Idi baré luk sabpen idi baré akan ineh, do' ineh barén imam luun bubpun. Kudeng ineh teh do' imam nganau' luk nguit pedo' kuanneh, pad ieh meligan.

²¹"Iamo' kudeng lemulun ineh masi' idi na miak maré amung ineh, idi do' ieh ngalap sebuleng anak dumba deléi ku baréneh luk pingetap, ieh ineh baré luk tidulen, pad nganau' luk nguit pedo' kuanneh, idi teh tudu' lio banak luk rinabur ku umau saitun mangun ku baré akan, idi umau saitun setangal seréi',

²²idi dueh suit sukur kian dueh anak suit limun lek, maya' asi'neh. Idi sebuleng barén ngaceku sala', idi sebuleng barén sabpen.

- ²³Idi aco luk kewaluh do' ieh nguit ineh kuan imam, mangun ku liganneh pa kiung Tuhan, pa atun tanga' Lepo su luk inan papu' Tuhan.
- ²⁴Idi do' imam ngalap anak dumba idi maré ineh ku baré luk pingetap dengan umau saitun ineh, pad ineh tidulen pa kiung Tuhan.
- ²⁵Idi do' ieh ngeret anak dumba, ieh ineh baré luk pingetap idi ngalap sebuang dara', idi ngisit ineh luun ribaran lalid lemulun luk uen ngeligan ineh, idi luun bua' ticu' mebpuhneh pa tinueh, idi bua' kukud mebpuhneh pa tinueh teh.
- ²⁶Idi teh do' imam ngukit sebuang umau ineh bang paladneh pa kabing.
- ²⁷Idi do' ieh ngisak sesuut umau ineh ku bua' ticu'neh pa tinueh tudu' kua' pa kiung Tuhan.
- ²⁸Idi ratnan umau luk ketecan bang paladneh do' imam ngisit sesuut nan ribaran lalid pa tinueh lemulun luk uen ngeligan ineh, idi nan bua' ticu' mebpuhneh pa tinueh, idi bua' kukud mebpuhneh pa tinueh teh, su luk inan dara' baré luk pingetap inisit atun.
- ²⁹Idi ela umau luk bang paladneh uenneh ngisit nan uluh lun luk uen ngeligan ineh, pad nganau' luk nguit pedo' kuanneh pa kiung Tuhan.
- ³⁰Pangeh ineh do' ieh temina' ku aceh suit sukur, kian aceh anak limun lek, petulu maya' asi'neh.
- ³¹Sebuleng mangun ku baré luk pingetap, idi sebuleng barén sabpen perapu dengan baré akan ineh. Kudeng ineh imam nganau' luk nguit pedo' kuan lun luk uen ngeligan ineh pa kiung Tuhan.
- ³²Kudeng ini ukum kuan lemulun luk neketukan ét susud, luk na miak maré petap kuan liganneh.”
- ³³Kebala Tuhan ni Musa idi Arun,
- ³⁴"Kareb muyuh semuet bang bawang Kanaan luk barénKu ku babpat muyuh, kareb Ui ngacing rapung kuan sebuleng ruma' bang bawang luk ku babpat muyuh ineh,

- 35do' lun luk kuan ruma' ineh maré kali kuan imam, idi pebala, 'Bang terawéku ruma'ku neketukan ét rapung.'
- 36Idi do' imam ngecuk nelun nganau' ruma' ineh na uang, kareb nateh imam amé' nier ét ineh, pelé amung luk bang ruma' ineh na mangun melutak. Pangeh ineh idi do' imam amé' nier ruma' ineh.
- 37Idi kareb ieh nier ét ineh pelaba dat luun alad ruma' ineh, ieh ineh pileh-pileh mebata' kian mesia', idi melagan pelaba dalem bang alad ineh,
- 38idi do' imam ineh remuat rat bang ruma' ineh. Idi do' ieh ngecuk ngitek tanga' ruma' ineh tudu' aco kinioneh.
- 39Idi aco luk ketudu', idi do' imam ineh lemubed baruh. Kudeng ieh nier luk dat ineh iuk meperuit luun alad ruma' ineh,
- 40idi do' ieh ngecuk nelun nakul batu luk neketukan dat ineh, idi nala' amung batu ineh bang su luk melutak.
- 41Idi do' ieh ngecuk mekud-mekud bang ruma' ineh pekelibut. Idi abuh apur luk bikud ineh do' ieh iten remuat rat bang bawang, idi talan bang su luk melutak.
- 42Pangeh ineh, idi do' ngalap batu luk baken ngelibal batu luk tikul ineh. Idi teh ngalap apur luk baken, idi uen nguda luun ruma' ineh.
- 43"Idi kudeng luk dat ineh mulun bang ruma' ineh, pangeh ideh nenakul batu idi nemekud ruma' ineh, idi nenguda apur,
- 44idi do' imam amé' nier. Kudeng rapung ineh iuk meperuit bang ruma' ineh, kali' rungen ineh melutak.
- 45Idi do' ruma' ineh uen ngusag, idi batu, kayuh, idi amung apur ruma' ineh iten remuat amé' su luk melutak.
- 46Idé-idé luk semuet bang ruma' ineh seruked ruma' ineh initek, lemulun ineh mangun ku gani' macing aco macep.
- 47Idi idé luk rudap idi kuman bang ruma' ineh, do' ieh mupu' ayungneh.

⁴⁸Iamo' kudeng imam pangeh semuet idi nier, kudeng ét ineh na mulun baruh bang ruma' ineh rat pangeh ruma' ini inuda ku apur, idi do' imam mala ruma' ineh meligan, ngaceku ét ineh pangeh neburo.

⁴⁹Do' imam ngalap dueh suit, kayuh tumuh, nuper sia' melidang, idi likudung, pelé ruma' ineh uen ngeligan.

⁵⁰Idi sebuleng suit ineh keretenneh pa luun sebuleng kuden luk inan abpa' metaro.

⁵¹Idi do' ieh ngalap kayuh tumuh, likudung, nuper sia' melidang, idi suit seluk mulun ineh, idi ngerereb amung ineh bang dara' suit luk pangeh kirat, idi bang abpa' luk metaro ineh, idi ngisak ineh luun ruma' tudu' kua'.

⁵²Kudeng ineh lawéneh ngeligan ruma' ineh ku dara' suit, idi abpa' luk metaro perapu dengan suit luk mulun, kayuh tumuh, likudung, idi nuper sia' melidang.

⁵³Idi suit seluk mulun ineh itenneh remuat idi ieh muit neneh temulud déi' liang. Kudeng ineh lawéneh nganau' luk nguit pedo' bang ruma' ineh, pad ineh meligan.”

⁵⁴Idi ini ukum ratnan amung ayu ét susud idi puruh uluh luk dat,

⁵⁵rapung luk luun ayung idi bang ruma',

⁵⁶idi teh bara', mungeh, idi balita',

⁵⁷pad miak mada' kareb luk inan melutak idi kareb luk inan meligan. Idi teh ini ukum ratnan susud.

Ukum 15

¹Kebala Tuhan ni Musa idi Arun,

²"Mada' kuan lun Israil: Kudeng aceh deléi luk mekebabpa', ineh mangun ku gani' kuanneh.

³Kudeng ieh mekebabpa' kian mata babpa', ieh ineh ku gani'.

- ⁴Idi amung pagau idi su luk inan lemulun luk mekebabpa' telubid, ieh ineh ku gani', idi su luk inanneh tudo pana' melutak teh.
- ⁵Idi idé luk ngakem pagau ineh, idi do' ieh mupu' ayungneh idi ngediu' bururneh, idi ieh mangun ku gani' macing aco macep.
- ⁶Idi kudeng idé luk tudo su luk inan lun luk mekebabpa' ineh tudo, do' ieh mupu' ayungneh idi ngediu' bururneh. Idi ieh mangun ku gani' macing aco macep.
- ⁷Idi idé luk ngakem burur lun luk mekebabpa' ineh, do' ieh mupu' ayungneh idi ngediu' bururneh ku abpa'. Idi ieh mangun ku gani' macing aco macep.
- ⁸Idi teh kudeng lun luk mekebabpa' ineh ngelica' aceh lun luk meligan, idi do' lun luk linica' ineh mupu' ayungneh, idi ngediu' bururneh, idi ieh mangun ku gani' macing aco macep.
- ⁹Kudeng ineh teh amung su luk inanneh tudo luun keted keladai, ieh ineh mangun ku gani'.
- ¹⁰Idi idé luk ngakem su luk inanneh tudo ineh, ieh ineh mangun ku gani' macing aco macep. Idi idé luk nguit binaweh ineh do' ieh mupu' ayungneh, idi ngediu' bururneh. Idi ieh mangun ku gani' macing aco macep.
- ¹¹Idé luk pangeh kikem lun luk mekebabpa' ineh dengan na nesibaru' ticu'neh bang abpa' atun, do' ieh mupu' ayungneh idi ngediu' bururneh. Idi ieh mangun ku gani' macing aco macep.
- ¹²Idi teh binaweh ratnan tana' kuden luk pangeh kikem lun luk mekebabpa' ineh, do' ieh uen mila'. Iamo' amung repapeh kayuh, do' ieh uen maru' ku abpa'.
- ¹³Idi kareb lun luk mekebabpa' ineh do' ratnan mekebabpa', idi do' ieh ngiap tudu' aco rat pun aco ieh nedo'. Idi do' ieh mupu' ayungneh idi ngediu' bururneh ku abpa' luk metaro. Idi ieh meligan.

¹⁴Kareb aco luk kewaluh ineh, idi do' ieh ngalap dueh suit sukur, kian dueh anak limun lek. Do' ieh amé' pa kiung Tuhan pa atun tanga' Lepo su luk inan papu' Tuhan idi maré suit ineh kuan imam.

¹⁵Idi do' imam maré ineh, sebuleng suit barén ngaceku sala' idi sebuleng barén sabpen. Kudeng ineh imam nganau' aceh luk nguit pedo' kuanneh pa kiung Tuhan.

¹⁶"Idi kudeng seburur deléi ngeruat luk ku inulneh, do' ieh ngediu' amung bururneh bang abpa'. Idi ieh mangun ku gani' macing aco macep.

¹⁷Idi amung ayung idi kubil luk neketukan luk ku inulneh, do' ieh baruin. Idi ieh ineh mangun ku gani' macing aco macep.

¹⁸Kudeng decur idi deléi pamung do' didueh diu'. Idi didueh mangun ku gani' macing aco macep.

¹⁹"Kudeng seburur decur macing bulan, do' ieh utad tudu' aco kinioneh. Idi idé luk ngakem neneh ieh mangun ku gani' macing aco macep.

²⁰Idi amung su luk inanneh telubid idi tudo kareb ieh macing bulan, ieh ineh mangun ku gani'.

²¹⁻²³Idé luk ngakem su luk inanneh rudap, idi su luk inanneh tudo, do' ieh mupu' ayungneh idi diu', idi ieh mangun ku gani' macing aco macep.

²⁴Kudeng aceh deléi pamung neneh kareb ieh macing bulan, idi tudu' aco kinioneh ieh mangun ku gani'. Idi amung su luk inanneh rudap, idi su luk inanneh telubid pana' mangun ku gani'.

²⁵"Kudeng seburur decur mérat dara' tuda'-tuda' aco kinioneh luk baken bang kareb luk pekalai, idi teh meluun ratnan luk pekalai, idi ieh mangun ku gani' seruked ieh mérat dara'.

²⁶Amung su luk inanneh rudap idi su luk inanneh tudo seruked ieh mérat dara' ineh mangun ku gani'.

²⁷Idi idé luk ngakem binaweh ineh ieh mangun ku gani'. Do' ieh mupu' ayungneh idi diu'. Idi ieh ku gani' macing aco macep.

²⁸Idi kareb ieh do' ratnan mérat dara'neh do' ieh ngiap tudu' aco. Pangeh ineh idi ieh meligan.

²⁹Idi kareb aco luk kewaluh, do' ieh ngalap dueh suit sukur kian dueh suit limun lek idi nguit ineh kuan imam, pa atun tanga' Lepo su luk inan papu' Tuhan.

³⁰Idi do' imam ineh maré sebuleng ku baré ngaceku sala' idi sebuleng barén sabpen. Idi do' imam nganau' luk nguit pedo' kuanneh pa kiung Tuhan.”

³¹Tuhan nengecuk ni Musa mada' kuan lun Israil ineh, pad ideh mepatad ratnan luk ku gani', pelé ideh na ngelutak Lepo su luk inan papu' Tuhan luk uned su luk inandeh nelupo ineh, pad ideh na maté.

³²Idi ini ukum lun luk mekebabpa' idi lun luk ngutat luk ku inulneh,

³³Idi decur luk macing bulan, idi deléi luk pamung dengan decur luk macing bulan.

Ukum 16

¹Kebala Tuhan ni Musa mucu ratnan até dueh anak Arun luk pinaté kareb didueh nenguit apui luk na petulu pa kiung Tuhan,

²Do' iko mada' kuan kinanakmu Arun, aleg ieh semuet bang Su luk Meluun Ligan, maya' pianneh, ieh ineh bal selipa alad dicing macing pa atun su luk nguit pedo' luk pa luun Pati' Pejani' ineh pad ieh na maté. Ngaceku Ui silagan bang laput pa luun kakeb luk nguit pedo' ineh.

³Idi Arun miak semuet bang Su luk Meluun Ligan ineh kudeng ieh nguit binaweh ini: aceh sapi' deléi luk pegawa' barén ngaceku sala', idi sebuleng dumba deléi barén sabpen.

⁴Idi do' ieh diu' idi ngayung ku ayung imam, ieh ineh kuyu', siduar, abet awa', idi sigar ratnan kibung pu luk meligan.

⁵Idi do' lun Israil maré dueh amék deléi ku baré ngaceku sala', idi sebuleng dumba deléi barén sabpen.

⁶"Idi do' Arun maré sapi' deléi barén ngaceku sala' bururneh sebuleng, pad nganau' luk nguit pedo' kuan bururneh sebuleng idi kuan uang ruma'neh pana'.

⁷Idi do' ieh ngalap amék deléi luk dueh ineh, idi naped nedidueh pa kiung Tuhan pa atun tanga' Lepo su luk inan papu' Tuhan.

⁸Idi do' Arun nganau' udi kuan dueh amék deléi ineh, seudi kuan Tuhan idi seudi kuan amék luk uen ngusu.

⁹Do' Arun nguit amék deléi luk nepetulu ku udi kuan Tuhan, barénneh ngaceku sala'.

¹⁰Iamo' amék deléi luk pangeh nepetulu udi ruen ngusu, do' ieh uen naped mulun pa kiung Tuhan pad nganau' luk nguit pedo', idi ideh ngusu amék deléi ineh, idi muit neneh déi' su luk ali-ali.

¹¹"Kareb Arun maré sapi' deléi luk barén ngaceku sala' bururneh sebuleng idi uang ruma'neh pana',

¹²do' ieh ngalap su luk inan bareh panu' ku bareh apui ratnan bubpun, idi dueh ragam umau luk do' buen luk meluun do'. Idi amung ineh iten semuet bang Su luk Meluun Ligan.

¹³Idi do' umau ineh ruen luun apui pa kiung Tuhan, idi rabpun umau ineh mapen kakeb luk nguit pedo' luk pa luun su luk inan Allah pejani', pad ieh na maté.

¹⁴Idi do' ieh ngalap sebuang dara' sapi' deléi idi ngisak dara' ineh ku bua' ticu'neh tudu' kua' pa busat aco kakeb luk nguit pedo', idi pa atun kakeb luk nguit pedo' pana'.

¹⁵"Pangeh ineh do' ieh ngeret amék deléi barén ngaceku sala' lun mula', idi do' ieh nguit dara' ineh semuet bang Su luk Meluun Ligan, idi ngisak ineh luun kakeb luk nguit pedo', idi pa atun Pati' Pejani', mepad kudeng luk inau'neh ku dara' sapi' ineh.

¹⁶Kudeng ineh teh ieh nganau' luk nguit pedo' kuan Su luk Meluun Ligan ineh ngaceku gani' amung lun Israil, idi ngaceku amung datdeh, idi amung sala'deh. Idi kudeng ineh teh do' ieh nganau' kuan Lepo su luk inan papu' Tuhan luk idi arangdeh idi luk linutak ku gani'deh.

¹⁷Idi seburur pana' na miak amé' danganneh bang Lepo su luk inan papu' Tuhan, kareb ieh semuet nganau' luk nguit pedo' bang Su luk Meluun Ligan ineh, pad macing ieh remuat. Kudeng ineh teh ieh nganau' luk nguit pedo' kuan bururneh sebuleng, idi kuan uang ruma'neh, idi amung lun Israil pana'.

¹⁸Idi do' ieh remuat amé' inan bubpun luk pa kiung Tuhan idi nganau' luk nguit pedo' kuan ineh, idi do' ieh ngalap sebuang dara' sapi' deléi, idi sebuang dara' amék deléi ineh, idi ngukit ineh luun unga bubpun ineh pekelibut.

¹⁹Idi do' ieh ngisak bubpun ineh ku sebuang dara' ineh dengan bua' ticu'neh tudu' kua'. Kudeng ineh lawéneh ieh ngeligan bubpun ineh ratnan amung gani' lun Israil.

²⁰Kareb Arun pangeh nenganau' luk nguit pedo' kuan Su luk Meluun Ligan idi kuan Lepo su luk inan papu' Tuhan idi bubpun ineh, idi do' ieh nguit amék deléi luk mulun ineh, pa kiung Tuhan.

²¹Idi do' Arun ngerareng mop ticu'neh nan uluh amék ineh. Idi pa luun amék ineh do' ieh ngamo amung dat lun Israil, idi amung sala'deh. Idi amung-amung ineh rangen luun uluh amék ineh. Idi do' ngecuk nelun luk tinina' ku kekamen ineh nguit amék ineh amé' su luk ali-ali.

²²Idi amék ineh mabeh idi nguit amung datdeh ineh amé' nan aceh bawang luk mali. Idi amék ineh pana' do' ieh suen amé' déi' su luk ali-ali.

²³Pangeh ineh idi do' Arun semuet bang Lepo su luk inan papu' Tuhan. Idi ieh ngelengu ayung kibung pu luk iungen kareb ieh semuet bang Su luk Meluun Ligan idi necan ineh ieneh.

²⁴Idi do' ieh diu' déi' su luk meligan idi ngayung ku ayungneh sebuleng. Pangeh ineh idi do' ieh remuat temina' ku baré luk sabpenneh, idi baré luk

sabpen lun mula' pana'. Idi do' ieh nganau' luk nguit pedo' kuan bururneh sebuleng idi kuan lun mula'.

²⁵Idi do' ieh ngeseb lemak baré ngaceku sala' ineh luun bubpun.

²⁶Idi lun luk nenguit amék deléi luk inusu ineh, do' ieh mupu' ayungneh idi diu', kareb nateh ieh semuet bang su luk inan nelupo ineh.

²⁷Idi sapi' deléi barén ngaceku sala', idi dumba deléi barén ngaceku sala' luk kuan dara' inuit semuet bang Su luk Meluun Ligan, pad nganau' luk nguit pedo', do' ideh iten remuat rat su inan lun mula', idi sabpen, do' kubil, uang, idi tinéi' didueh pana'.

²⁸Idi lemulun luk ngeseb ineh, do' ieh mupu' ayungneh idi diu' kareb nateh ieh semuet bang su luk inan nelupo ineh.

²⁹"Idi ini mangun ku aceh ukum kuan muyuh macing raked-raked. Idi kareb pulu' aco bulan luk ketudu' ineh do' ngebeneh burur muyuh idi mawa' na kuman. Aleg muyuh nganau' anun-anun, do' muyuh luk kuan bawang, idi lun sakai luk tudo arang muyuh pana'.

³⁰Ngaceku aco sineh luk nguit pedo' kuan muyuh miak ruen, pad muyuh meligan ratnan amung sala' muyuh pa kiung Tuhan.

³¹Idi aco sineh mangun kuan muyuh seaco luk inan mudeng pad muyuh ngebeneh burur muyuh. Idi ini aceh ukum luk meruked.

³²Idi luk nguit pedo' ineh miak ruen imam luk pangeh inumau, ieh ineh lemulun luk pangeh litep mangun ku imam ngelibal tamanneh. Idi do' ieh ngayung ku ayung kibung pu, ieh ineh ayung Su luk Meluun Ligan.

³³Idi do' ieh nganau' luk nguit pedo' kuan Su luk Meluun Ligan, idi kuan Lepo su luk inan papu' Tuhan idi bubpun pana', idi teh kuan imam idi kuan lun mula'.

³⁴Idi ini mangun ku aceh ukum luk meruked kuan muyuh, ieh ineh selak sekua' do' muyuh nganau' luk nguit pedo' kuan amung lun Israil ngaceku amung sala'deh."

³⁵Idi Musa nenganau' kudeng luk bida' Tuhan kuanneh.

Ukum 17

¹Kebala Tuhan ni Musa,

²"Mada' kuan Arun idi anak-anakneh, idi kuan amung lun Israil pana' kudeng ini. Ini bala luk bida' Tuhan:

³Idé-idé rat arang lun Israil luk ngeret aceh sapi', dumba, kian amék lek, do' su inan lun nelupo kian mado ratnan su inan nelupo teh,

⁴idi na nguit ineh amé' pa atun tanga' Lepo su luk inan papu' Tuhan, ku aceh baré kuan Tuhan, idi kali' rungen dara'neh ruen lemulun ineh mabeh. Ngaceku ieh pangeh nengeruat dara'. Idi lun ineh pana' duken buro rat arang pupuneh.

⁵Ilungneh ukum ineh pad lun Israil nguit kuan Tuhan baré luk keretendeh déi' liang, idi pad baré ineh itendeh amé' pa atun tanga' Lepo su luk inan papu' Tuhan idi baré kuan imam, idi barén inan Tuhan mangun ku baré luk nguit pedo'.

⁶Idi dara'neh do' uen imam ngisak luun bubpun Tuhan luk pa atun tanga' lepo ineh. Idi do' ieh ngeseb lemakneh mangun ku luk do' buen kuan Tuhan.

⁷Aleg ideh maré luk keretendeh ineh inan sétan luk binaya'deh dengan sétdeh. Idi ini mangun ku aceh dalan luk meruked kuandeh.

⁸"Idé-idé rat arang lun Israil idi rat arang amung lun sakai luk mudeng arang muyuh, kareb ideh maré aceh baré sabpen kian baré kereten lek,

⁹idi na ideh nguit ineh amé' pa atun tanga' Lepo su luk inan papu' Tuhan, pad ieh barén kuan Tuhan, idi lemulun ineh duken buro rat arang pupuneh.

¹⁰"Idi idé-idé rat arang lun Israil, idi rat arang lun sakai luk tudo arangdeh, luk kuman luk medara', idi Ui museh neneh idi ngusu neneh rat arang pupuneh.

¹¹Ngaceku ulun pudut luk inan uang ineh inan bang dara'neh. Idi Ui pangeh nengecuk nemuyuh ngutang dara' ineh luun bubpun, pad nganau' luk nguit pedo' kuan ulun muyuh. Ngaceku dara', ieh ineh luk nganau' luk nguit pedo'.

¹²Idi ngaceku ineh Ui pangeh nepebala kuan amung lun Israil ini, rat arang muyuh seburur pana' aleg kuman dara'. Idi aceh sakai pana' luk tudo arang muyuh aleg kuman dara' teh.

¹³"Idi rat arang lun Israil idi rat arang lun sakai luk tudo arang muyuh, kudeng ieh amé' nganup, idi ngalap aceh pung, kian suit lek, luk miak kenen, do' nala' dara'neh idi do' mapen ineh ku tana'.

¹⁴Ngaceku ulun anid-anid pudut luk inan uang, ieh ineh dara'neh. Ngaceku ineh Ui pangeh neperiteteng kuan lun Israil: Aleg muyuh kuman dara' aceh pudut pana'. Idé-idé luk kuman ineh, ieh miak duken buro.

¹⁵Idi teh do' lun luk kuan bawang idi lun sakai luk kuman aceh butung kian pung luk dirak-dirak lek, do' ieh mupu' ayungneh, idi diu'. Idi ieh mangun ku gani' macing aco macep, pad ieh meligan.

¹⁶Idi kudeng ieh na nganau' kudeng ineh, kali' rungen ieh mabeh sala'neh."

Ukum 18

¹Kebala Tuhan ni Musa,

²"Mada' iko kuan amung lun Israil kudeng ini: Ui ini Tuhan Allah muyuh.

³Aleg muyuh maya' kekamen lun Masir, su luk inan muyuh tudo atun. Idi aleg muyuh maya', kekamen lun bawang Kanaan, su luk inanKu nguit nemuyuh.

⁴Iamo' do' muyuh maya' amung ukumKu idi matar amung bada'Ku. Ui ini Tuhan Allah muyuh.

⁵Idi do' muyuh matar amung bada'Ku idi amung ukumKu. Idé-idé luk nganau' luk kudeng ineh, ieh ineh mulun ngaceku ineh. Ui ini Tuhan.

⁶"Seburur pana' aleg pelengit inan pupuneh luk muneng pian pasét neneh. Ui ini Tuhan.

- ⁷Aleg iko pasét inan tinanmu idi ngigu' tamanmu, ngaceku ieh luk tinanmu. Aleg iko ngigu' neneh.
- ⁸Aleg iko pasét inan awan tamanmu, ngaceku ieh pamung rudap dengan tamanmu.
- ⁹Aleg iko pasét inan kinanak decurmu, ieh ineh anak tamanmu idi anak tinanmu, do' kieh tinganak bang rumamu, kian tinganak mado lek. Aleg iko ngigu' nedeh.
- ¹⁰Aleg iko pasét inan mupunmu luk decur. Ngaceku ini luk ngigu' namu.
- ¹¹Aleg iko pasét inan anak decur awan tamanmu luk tinganak kuan tamanmu, ngaceku ieh kinanakmu luk decur. Aleg iko ngigu' neneh.
- ¹²Aleg iko pasét inan kinanak decur tamanmu ngaceku ieh sebuleng dara' dengan tamanmu.
- ¹³Aleg iko pasét inan kinanak decur tinanmu. Ngaceku ieh sebuleng dara' dengan tinanmu.
- ¹⁴Aleg iko ngigu' kinanak deléi tamanmu ngaceku pasét inan awanneh. Ngaceku ieh tinan pinakenmu.
- ¹⁵Aleg iko pasét inan ibanmu luk decur. Ngaceku ieh awan anakmu. Aleg iko ngigu' neneh.
- ¹⁶Aleg iko pasét inan awam kinanakmu. Ngaceku ieh pamung rudap dengan kinanakmu.
- ¹⁷Aleg iko ngalap aceh decur perapu ku anakneh. Aleg iko ngalap mupunneh, ngaceku ideh sebuleng dara' denganmu. Ineh mangun ku aceh gani' luk pelaba dat.
- ¹⁸Idi aleg iko ngalap aceh decur kinanak awanmu ku awanmu, pad ieh temaruh, idi pamung neneh kareb awanmu mulun.
- ¹⁹"Aleg iko pamung inan aceh decur kareb ieh macing bulan,
- ²⁰idi aleg iko pesipu dengan awan lun denganmu, pad iko mangun melutak ku ieh.

²¹Idi aleg iko maré aceh anakmu kuan akang Molek, idi ngedat ngadan Allahmu. Ngaceku Ui ini Tuhan.

²²Aleg iko pamung dengan aceh deléi maya' ayu decur. Ngaceku ieh ineh aceh dalam luk pelaba dat.

²³Idi teh aleg iko ngegani' bururmu ngaceku pamung dengan pung. Idi seburur decur pana', aleg pamung dengan pung. Ngaceku ieh ineh aceh dalam luk pelaba dat.

²⁴"Aleg muyuh ngegani' burur muyuh ratnan dalam luk kudeng ini. Ngaceku kekamen luk kudeng ineh ngegani' burur amung pupu baken luk dukenKu buro pa kiung muyuh.

²⁵Kudeng ineh bawang linutakdeh, pad na miak na Ui ngua' amung datdeh ineh, pad bawang ineh nenguta' amung lun bang ineh.

²⁶Iamo' do' muyuh matar amung bada'Ku idi amung ukumKu ini. Sesuut pana' ratnan dalam ini luk dat aleg muyuh nganau', do' lun kuan bawang idi lemulun luk tudo arang muyuh,

²⁷(ngaceku amung dalam luk dat ini pangeh inau' lun bang bawang luk pa kiung muyuh ineh, idi bawang ineh pangeh linutakdeh),

²⁸pad bawang ineh na nguta' nemuyuh ngaceku muyuh ngegani' neneh, mepad kudeng ieh pangeh nenguta' pupu luk atun ineh.

²⁹Ngaceku kudeng idé luk nganau' aceh dalam luk kudeng ineh dat, ieh ineh duken buro rat arang pupuneh.

³⁰"Ngaceku ineh do' muyuh matar balaKu. Aleg nganau' sebuleng pana' luk dat idi megani' luk pangeh inau' pupu luk atun rat nemuyuh. Idi aleg muyuh ngegani' burur muyuh ku ineh. Ui ini Tuhan Allah muyuh."

Ukum 19

¹Kebala Tuhan ni Musa,

²"Do' iko mada' kuan amung lun Israil kudeng ini: Do' muyuh meligan, ngaceku Ui ini Tuhan Allah muyuh luk meligan.

³Idi do' anid-anid lemulun ngedita' taman-tinanneh, idi matar aco luk inanKu mudeng. Ui ini Tuhan Allah muyuh.

⁴Aleg muyuh lumi ku akang-akang. Idi aleg muyuh nganau' akang pudut luk inurai. Ui ini Tuhan Allah muyuh.

⁵"Idi kareb muyuh maré kuan Tuhan baré luk nguit pedo', do' muyuh maré ineh maya' bala Tuhan pad Ieh mawang niat nemuyuh.

⁶Idi kareb aco luk inan muyuh maré ineh, kian kenebpa lek, do' ieh kenen. Iamo' luk ketecan macing kesoriak ineh, do' ieh sabpen amung.

⁷Idi kudeng kesoriak muyuh kuman ineh, ieh ineh aceh dalam luk dat idi na petulu pa kiungKu.

⁸Idi idé-idé luk kuman ineh, ieh ineh mabeh sala'neh, ngaceku ieh pangeh nengedat ligan Tuhan. Lemulun ineh miak duken buro rat arang pupuneh.

⁹"Idi kareb muyuh ngeranih, aleg muyuh ngeranih macing iring lati' muyuh. Idi aleg muyuh ngamung luk neketecan ratnan perinien muyuh ineh.

¹⁰Aleg muyuh mureg bua' anggur muyuh macing dueh kua', idi bua' luk neremurug ineh aleg muyuh ngamung. Iamo' do' muyuh nima' ineh ku babpat lun masi' idi lun sakai. Ui ini Tuhan Allah muyuh.

¹¹"Aleg muyuh mano, idi aleg muyuh mebalih. Idi aleg muyuh naluk seburur dengan seburur.

¹²Aleg muyuh pebulung ku ngadanKu pad naluk seburur lemulun. Ngaceku kudeng ineh muyuh ngedat ngadan Allah muyuh. Ui ini Tuhan.

¹³"Aleg iko ngedereh nelun denganmu idi ngaro binawehneh. Aleg maleh tabpar lun tebarinmu macing pekak nebpa.

¹⁴Aleg iko mulung lun luk mebengel, idi aleg ngerareng luk inan metebaceng pa atun lun mebuser. Iamo' do' iko matot inan Allahmu. Ui ini Tuhan.

¹⁵"Aleg mutut besara' dengan na mesiri, idi aleg ngerurum nelun dat idi lun do' kareb iko mutut besara'deh. Iamo' do' iko mutut besara' lun denganmu dengan mepad.

- 16**Aleg iko nalan amé' ngeruma' arang pupumu mepad kudeng lun luk ngatum bala. Idi aleg iko ngalap peruan ku até lun denganmu. Ui ini Tuhan.
- 17**"Idi aleg megateh niat inan kinanakmu. Iamo' do' iko mada' nelun denganmu dengan gala'-gala', pad iko na mabeh sala' ngaceku ieh.
- 18**Aleg iko ngua' luk dat idi tekedamut inan pupumu. Iamo' do' iko méi' nelun denganmu mepad kudeng bururmu sebuleng. Ui ini Tuhan.
- 19**"Do' muyuh maya' ukumKu. Aleg muyuh nima' aya' muyuh ngebaneh pung luk baken. Idi aleg muyuh ngisak lati' muyuh ku dueh ayu ilung. Aleg muyuh ngayung ku ayung tebaruh luk dueh ayu nuper.
- 20**"Idi kudeng selemulun pesipu dengan aceh decur luk demulun idi luk pangeh tinuduk kuan lun baken, iamo' na ieh inuli' idi pinuit, idi do' didueh inan pegayam idi besara'. Iamo' aleg ngaté nedidueh, ngaceku na ieh pinuit.
- 21**Idi do' deléi ineh maré aceh dumba deléi kuan Tuhan ku baré luk pingetap pa atun tanga' Lepo su luk inan papu' Tuhan.
- 22**Idi do' imam nganau' luk nguit pedo' kuanneh. Dumba deléi ineh barén ku baré luk pingetap pa kiung Tuhan, ngaceku sala'neh ineh. Idi Tuhan miak maré do' neneh.
- 23**"Kareb muyuh semuet bang bawang Kanaan, idi muyuh nibu puar-puar bua', idi do' bua' ineh mangun ku ali' teluh lak kinioneh, idi na miak kenen.
- 24**Idi kareb lak luk keapat amung bua'neh meligan, idi mangun ku baré ubur kuan Tuhan.
- 25**Iamo' bang lak luk kelimeh miak muyuh kuman bua'neh, pad uli'neh amé' mula' kuan muyuh. Ui ini Tuhan Allah muyuh.
- 26**"Aleg muyuh kuman uang luk inan dara'. Aleg muyuh mangun idi ngelimu'.
- 27**Aleg muyuh ngiki abpuk muyuh pekelibut pad necan buduk uluh. Aleg muyuh nangal paped buluh ada muyuh.
- 28**Aleg muyuh ngurat burur muyuh kareb lemulun maté. Idi aleg muyuh matik burur muyuh ku aceh arit. Ui ini Tuhan.

29"Aleg nima' anak muyuh luk decur mangun ku decur luk mesawa', pad bawang ineh na mepanu' ku sawa' idi kekamen luk meluun dat.

30"Do' muyuh nginita aco luk inanKu mudeng idi ngedita' Su inanKu luk Meligan. Ui ini Tuhan.

31"Idi aleg muyuh lumi inan lemulun luk mangun idi lemulun luk nawar ada'. Aleg muyuh nakap nedeh ineh, idi ngelutak burur muyuh ku ineh. Ui ini Tuhan Allah muyuh.

32"Do' muyuh ngerayeh idi ngedita' lun luk mengered. Idi do' muyuh matot inan Allah muyuh. Ui ini Tuhan.

33"Kudeng aceh sakai tudo arang muyuh idi bang bawang muyuh, aleg muyuh mekuel nedeh.

34"Nima' lun sakai luk tudo arang muyuh ineh siren muyuh mepad kudeng lun kuan bawang teh, idi méi' nedeh mepad kudeng muyuh méi kuan burur muyuh sebuleng. Ngaceku atun pana' muyuh lun sakai déi' bawang Masir. Ui ini Tuhan Allah muyuh.

35"Aleg muyuh ngisu' tari, uad, idi timang.

36"Idi do' muyuh nganau' timang, betuh, idi uad luk matu. Ui ini Tuhan Allah muyuh, luk nenguit nemuyuh remuat rat bang bawang Masir.

37"Ngaceku ineh do' muyuh maya' amung ukum idi balaKu. Ui ini Tuhan."

Ukum 20

1Kebala Tuhan ni Musa,

2"Mada' kuan amung lun Israil: Idé-idé rat arang lun Israil, idi lun sakai luk tudo arang lun Israil, luk maré anakdeh kuan Molek, lun ineh bitungin lun bang bawang ineh ku batu, pad ieh maté.

3"Ui museh tutu neneh, idi ieh dukenKu buro rat arang pupuneh. Ngaceku ieh nemaré anakneh luk atun kuan Molek, pian ngelutak Su inanKu luk Meligan, idi ngedat ngadanKu luk meligan.

- ⁴Kudeng ayu lun bawang ineh sinakali' kareb lun ineh maré anakneh luk atun kuan Molek, pad ideh na ngaté neneh,
- ⁵idi Ui museh tu-tu nelun ineh idi pupuneh. Idi Ui ngecuk neneh buro rat arang pupuneh, perapu dengan lemulun luk metebaya' ku kekamen Molek ineh, idi luk necan Tuhan.
- ⁶"Kudeng selemulun amé' ngitun nelun luk mangun idi lun luk nawar ada', Ui museh tu-tu neneh, idi ieh dukenKu buro rat arang pupuneh.
- ⁷Ngaceku ineh do' muyuh ngeligan burur muyuh, ngaceku Ui ni Tuhan Allah muyuh.
- ⁸Idi do' muyuh maya' amung ukumKu. Ngaceku Ui ini Tuhan luk ngeligan nemuyuh.
- ⁹"Idé-idé luk mulung idi ngediman tamanneh kian tinanneh lek, miak pitayen. Idi ieh mabeh dara'neh sebuleng.
- ¹⁰"Idi kudeng seburur deléi pasét inan awan lun denganneh, na miak na didueh pitayen.
- ¹¹Kudeng selemulun pamung rudap dengan awan tamanneh idi ngigu' tamanneh, na miak na didueh pitayen. Idi dara' ineh baben didueh sebuleng.
- ¹²Kudeng selemulun pasét inan awan anakneh na miak na didueh pitayen, ngaceku pasét nelun bang tetek ruma'neh. Idi dara' ineh baben didueh sebuleng.
- ¹³Kudeng sedeléi pamung inan deléi, ieh ineh kudeng ayu decur, idi didueh nganau' aceh kekamen luk pelaba dat. Na miak na didueh pitayen. Idi dara' ineh baben didueh sebuleng.
- ¹⁴Idi kudeng selemulun ngalap aceh decur perapu dengan tinanneh ku awanneh, ieh ineh kekamen luk dat. Na miak na ideh sabpen, pad na inan kekamen luk dat arang muyuh.
- ¹⁵Kudeng aceh deléi pasét inan pung, na miak na ieh pitayen. Idi pung ineh pana' pitayen teh.

- ¹⁶Kudeng sedecur pian pasét inan pung idi do' decur ineh idi pung ineh pana' pitayen. Idi dara' ineh baben didueh sebuleng.
- ¹⁷"Kudeng selemulun ngalap kinanakneh luk decur, ieh ineh anak tamanneh kian anak tinanneh, idi do' didueh uen ngigu' pa kiung lun mula' idi duken buro. Ngaceku ieh nepasét nan kinanakneh luk decur idi sala' ineh babenneh sebuleng.
- ¹⁸Idi kudeng selemulun pamung dengan decur kareb ieh macing bulan, idi do' didueh ineh duken buro rat arang pupu didueh, ngaceku didueh nengelaba bala ratnan ngeligan burur.
- ¹⁹Idi teh aleg iko pasét inan tinar pinakenmu, ngaceku ieh ineh pasét nelun bang tetek ruma'mu sebuleng. Didueh sebuleng mabeh sala' didueh.
- ²⁰Idi kudeng selemulun pasét inan awan taman pinakenneh, idi ieh ngigu' taman pinakenneh, idi didueh sebuleng miak mabeh sala' ineh idi miak maté dengan na inul.
- ²¹Idi kudeng selemulun ngalap awan kinanakneh luk deléi, ieh ineh kekamen luk pelaba dat, idi ieh ngigu' kinanakneh. Idi didueh ineh na inul."
- ²²Kebala Tuhan, "Do' muyuh maya' amung ukum bada'Ku, pad bawang su luk inanKu nated nemuyuh na nala' nemuyuh, pad muyuh tudo bang ineh.
- ²³Idi aleg muyuh maya' lawé pupu luk uenKu ngusu rat pa kiung muyuh. Ngaceku ideh pangeh nenganau' amung ineh pad Ui mesukol ku ideh.
- ²⁴Iamo' jani'Ku nemuyuh, 'Muyuh miak ngalap bawang ini luk mebaleng luk barénKu nemuyuh. Ui ini Tuhan Allah muyuh luk pangeh ngatad nemuyuh ratnan amung pupu luk baken.
- ²⁵Ngaceku ineh do' muyuh mili' arang pung luk do' dengan luk ku gani', idi rat arang suit luk do' dengan luk ku gani'. Idi aleg muyuh ngelutak burur muyuh ku pung kian suit, idi pung luk tekamang luun tana' luk pangeh itadKu ku gani' kuan muyuh.

²⁶Idi do' muyuh mangun meligan kuanKu. Ngaceku Ui ini Tuhan luk Meluun Ligan. Idi Ui pangeh nengatad nemuyuh rat arang amung pupu luk baken ineh, pad muyuh mangun ku pupuKu.

²⁷"Idi idé-idé rat arang muyuh, do' deléi idi decur, luk mileh mangun idi nawar ada' na miak na ieh pitayen. Do' ideh bitungin ku batu. Idi dara' ineh babendeh sebuleng."

Ukum 21

¹Kebala Tuhan ni Musa, "Do' iko mada' kuan amung imam idi anak Arun, pad sebuleng imam pana' na ngelutak bururneh ngaceku ngakem butung seburur pupuneh.

²Iamo' ngaceku pupuneh luk muneng, ieh ineh ngaceku tinanneh, tamanneh, anakneh luk deléi, kian anakneh luk decur, kian kinanakneh luk deléi,

³idi kinanakneh luk decur luk tudo denganneh kareb ieh na awan, ngaceku rat nedeh ieh miak ngelutak bururneh.

⁴Idi aleg ieh ngelutak bururneh ngaceku até kinanakneh luk decur luk inan awan.

⁵Idi kareb lemulun maté, aleg imam ngiki uluhdeh idi mingit buluh adadeh, idi ngirit bururdeh.

⁶Idi do' ideh mangun meligan kuan Tuhan. Idi aleg ideh ngedat ngadan Allah. Ngaceku ideh maré baré akan kuan Tuhan. Idi ngaceku ineh do' ideh meligan.

⁷Aleg imam ngaweh decur luk mesawa' idi luk pangeh ngedat lawéneh. Idi aleg ieh ngaweh aceh decur luk pangeh ligkan deléineh. Ngaceku imam ineh meligan kuan Tuhan.

⁸Idi do' muyuh ngerawé imam ineh meligan. Ngaceku ieh maré baré akan kuan Allah muyuh. Ui ini Tuhan luk ngeligan nemuyuh, idi Ui ini meligan.

⁹Idi kudeng anak decur imam mangun ku aceh decur luk mesawa', idi ieh ngedat tamanneh. Na miak na decur ineh sabpen.

¹⁰Idi imam luk rayeh arang amung kinanakneh, luk pangeh inumau uluhneh ku umau luk ku ngumau, idi luk pangeh kinikit ngayung ku ayung luk meligan ineh, na miak ngesasung abpukneh, idi narak-narak ayungneh.

¹¹Aleg ieh amé' muneng iring lun luk naté. Idi aleg ieh ngelutak bururneh, ngaceku taman idi tinanneh pana'.

¹²Idi aleg ieh remuat ratnan Su luk Meligan, pad ieh na ngelutak Su inan Allah luk Meligan, ngaceku umau Allah luk nekungumau neneh idi luunneh. Ui ini Tuhan.

¹³Idi do' ieh ngaweh aceh decur luk pun mebaruh.

¹⁴Aleg ieh ngalap aceh decur tinula', kian luk pangeh ligkan deléineh, idi luk mesawa', iamo' aceh anak luk pun mebaruh ratnan pupuneh sebuleng. Ineh luk apenneh ku awan,

¹⁵pad ieh na ngelutak inulneh arang pupuneh. Ui ini Tuhan luk ngeligan neneh.”

¹⁶Kebala Tuhan ni Musa,

¹⁷"Mada' kuan Arun kudeng ini: Idé-idé luk ratnan inulmu luk dat ayu, ieh ineh na miak amé' muneng maré baré akan Allah ineh. Ini aceh ukum luk meruked.

¹⁸Idi amung lun luk dat ayu ineh, sebuleng pana' nateh amé' muneng, do' lun luk mebuser, kian lun luk meliai idi luk dat ayu, idi luk pelaba rayeh idi luk pelaba isuut,

¹⁹idi lemulun luk nepueg kukud idi nepueg ticu',

²⁰idi lun luk tebukut, idi luk mebuu, idi luk mesaweng, idi luk mebaké, idi luk nepuruh, idi luk melayat.

²¹Idé-idé luk dat ayu rat arang inul Arun luk imam ineh, na miak maré baré akan kuan Tuhan.

²²Idi baré akan Allah miak kenenneh, do' luk meluun ligan, idi luk meligan.

²³Iamo' na ieh miak amé' muneng iring alad dicing, idi na ieh miak amé' muneng iring bubpun, ngaceku bururneh dat, pad ieh na ngedat Su inanKu luk Meligan ineh. Ui ini Tuhan luk ngeligan nedeh."

²⁴Idi Musa nengacing amung bala ini kuan Arun idi kuan anak-anakneh idi kuan amung lun Israil teh.

Ukum 22

¹Kebala Tuhan ni Musa,

²"Mada' kuan Arun idi anak-anakneh, pad ideh matar do'-do' idi ngerayeh amung luk meligan ineh luk biré lun Israil kuanKu, pad ideh na ngedat ngadanKu luk meligan. Ui ini Tuhan.

³Idé-idé ratnan inul muyuh luk amé' muneng iring repapeh luk meligan luk linigan lun Israil kuan Tuhan, kudeng ieh amé' kareb ieh melutak, idi lun ineh duken buro rat pa kiungKu. Ngaceku Ui ini Tuhan.

⁴"Idi ratnan inul Arun amung lun luk mesusud kian mekebabpa', na miak kuman luk meligan, kareb nateh ieh nedo'. Kudeng ineh teh lemulun luk ngakem aceh luk ku gani', idi lemulun luk ngeruat luk ku nginul,

⁵idi lemulun luk ngakem aceh pung luk tekamang luk ngelutak neneh, kian lemulun luk ngelutak neneh, maya' amung luk miak ku gani'.

⁶Idi idé luk ngakem luk kudeng ineh, ieh mangun ku gani' macing aco macep. Aleg ieh kuman luk meligan kudeng nateh ieh nediu'.

⁷Kareb aco pangeh macep, idi teh bururneh meligan. Pangeh ineh miak ieh kuman luk meligan ineh. Ngaceku ineh luk kenenneh.

⁸Idi pung luk maté idi luk dirak pung baken ineh aleg ieh kuman, pad ieh na mangun melutak. Ngaceku Ui ini Tuhan.

⁹"Kudeng ineh teh do' imam maya' ukumKu, pad ideh na mabeh sala' idi mate' ngaceku ngedat ngadanKu ineh. Ngaceku Ui ini Tuhan luk ngeligan nedeh.

¹⁰"Idi lun mula' na miak kuman luk meligan ineh, do' lun sakai idi lun tebarin imam pana'.

- ¹¹Iamo' demulun imam luk bilihneh ku usinneh sebuleng miak kuman ineh. Kudeng ineh teh demulun luk tinganak bang ruma'neh.
- ¹²Iamo' anak decur imam, kudeng ieh inaweh lun baken, na ieh miak kuman luk barén ratnan luk meligan ineh.
- ¹³Iamo' anak decur imam, kudeng ieh tinula', kian ligkan deléi idi na anak, pad ieh nuli' amé' ruma' tamanneh, mepad kudeng kareb ieh isuut, miak ieh kuman ratnan akan tamanneh. Iamo' lun baken na miak kuman ineh.
- ¹⁴"Kudeng selemulun kuman ratnan luk meligan ineh dengan na kali', idi do' ieh maré libalneh sebabpat limeh mela ratnan luk kinanneh kuan imam.
- ¹⁵Idi aleg imam-imam ngedat baré luk meligan ineh luk biré lun Israil kuan Tuhan,
- ¹⁶pad ideh nima' nelun baken kuman barédeh luk meligan, pelé ideh mesala'. Ui ini Tuhan luk ngeligan nedeh."
- ¹⁷Kebala Tuhan ni Musa,
- ¹⁸"Mada' kuan Arun idi anak-anakneh, idi kuan amung lun Israil kudeng ini: Idé-idé rat bawang Israil, idi lun sakai luk tudo arang lun Israil, kudeng ideh maré aceh baré maya' kudeng luk pijani'neh, kian baré ratnan awing niat luk biréneh kuan Tuhan ku baré luk sabpen,
- ¹⁹pad baré muyuh petulu kuan Tuhan, do' muyuh maré deléi luk na mebaké, ieh ineh sapi', dumba, kian amék lek.
- ²⁰Aleg muyuh maré anun-anun luk dat, ngaceku ieh ineh na miak lapen Tuhan.
- ²¹Idi kudeng selemulun maré kuan Tuhan aceh baré luk nguit pedo' pad ngacing pejani'neh kuan Tuhan, kian baré maya' awang niat, ratnan sapi', amék, kian dumba lek, idi do' ieh maré luk do', pad baréneh ineh lapen Tuhan.

²²Idi pung luk mebuser kian nebalang idi mekio', kian mét idi melusung, idi mepuruh, ineh na miak barén muyuh kuan Tuhan ku baré luk sabpen luun bubpun.

²³Iamo' sapi' idi dumba luk pelaba rayeh idi pelaba isuut miak barén muyuh maya' awang niat muyuh. Iamo' na ieh petulu ku baré muyuh maya' jani'.

²⁴Idi pung luk dat ngaceku ilung terurneh pirek, kian dicat, kian nebarut, kian kirat lek, aleg muyuh maré kuan Tuhan. Ngaceku ini pangeh bibpeng bang bawang muyuh.

²⁵"Idi aleg maré pung luk pinasui lun sakai mangun ku baré akan Allah muyuh. Ngaceku pung ineh dat. Idi Tuhan na pian kudeng muyuh maré luk kudeng ineh.

²⁶⁻²⁷"Kudeng sapi' kian dumba idi amék pangeh tinganak, do' ieh mudeng dengan tinehneh tudu' aco kinioneh. Iamo' aco luk kewaluh miak ieh petulu ku baré luk sabpen kuan Tuhan.

²⁸Iamo' aleg muyuh ngeret sapi' kian dumba perapu anakneh peranga' bang seaco.

²⁹Idi kudeng muyuh maré inan Tuhan aceh baré ubur, do' muyuh maré ineh, pad ineh miak lapen Tuhan.

³⁰Idi aco sineh do' ieh kenen. Aleg muyuh necan elaneh macing pekak kenebpa. Ui ini Tuhan.

³¹"Idi do' muyuh maya' ukumKu. Ui ini Tuhan.

³²Idi aleg muyuh ngedat ngadanKu luk meligan ineh, idi Ui uen ngerayeh arang lun Israil. Ui ini Tuhan luk ngeligan nemuyuh,

³³idi luk pangeh nenguit nemuyuh remuat rat bang bawang Masir, pad Ui mangun ku Allah muyuh. Ui ini Tuhan."

Ukum 23

¹Kebala Tuhan ni Musa,

- ²"Mada' kuan lun Israil kudeng ini: Ini aco rayehKu luk uen muyuh ngeletep mangun ku tebubpun luk meligan.
- ³Anem aco kinioneh muyuh miak ngakem, iamo' aco luk ketudu' muyuh ngato erur muyuh pa kiung Tuhan, su luk inan amung muyuh tudo. Ieh ineh Aco luk inan Mudeng kuan aceh tebubpun sembayang. Idi kekamen anun-anun pana' aleg muyuh nganau'.
- ⁴Idi ini amung aco rayeh Tuhan, luk ruen muyuh ngeletep bang kareb luk petulu.
- ⁵"Idi bulan luk pun-pun ieh ineh pulu' apat aco bulan ineh, kareb macep aco inan Aco Rayeh Paska Tuhan.
- ⁶Idi pulu' limeh aco bulan ineh, ieh ineh Irau Ruti luk Na Lamud kuan Tuhan. Do' muyuh kuman ruti luk na linamud tudu' aco kinioneh.
- ⁷Idi kareb aco luk pun-pun ineh, inan aceh tebubpun sembayang. Aceh kekamen anun-anun pana' muyuh na miak nganau'.
- ⁸Idi tudu' aco kinioneh do' muyuh maré baré luk sabpen kuan Tuhan. Idi aco luk ketudu' ineh pana' inan aceh tebubpun sembayang. Aceh kekamen anun-anun pana' muyuh na miak nganau'.
- ⁹⁻¹⁰"Kareb muyuh semuet bang bawang luk barénKu nemuyuh, idi muyuh ngula' uli'neh, do' maré sengangel runguh padé luk litu' muyuh pun-pun ineh kuan imam.
- ¹¹Idi do' imam nicul sengangel ineh pa kiung Tuhan, pelé muyuh petulu kuan Tuhan. Idi do' imam nicul ineh kareb abud Aco luk inan Mudeng ineh.
- ¹²Idi kareb aco luk inan nicul angel ineh, do' muyuh maré aceh anak dumba luk ulun selak idi luk do', barén sabpen kuan Tuhan,
- ¹³Idi teh baré akan segatang banak luk rinabur ku umau, barén sabpen ku aceh buen luk do' kuan Tuhan, idi aceh baré rupen ratnan abpa' anggur seseréi' kinula'neh.

¹⁴Idi aleg muyuh kuman ruti idi padé luk kiriki idi padé baruh kareb aco luk inan muyuh nguit baré ineh kuan Allah muyuh. Ini aceh dalam luk meruked kuan muyuh macing ku anak inul bang amung su luk inan muyuh mudeng.

¹⁵"Idi kareb aco luk kenebpa mucu ratnan Aco luk inan Mudeng ineh, ieh ineh aco luk inan muyuh maré padé mangun ku baré luk tidulen, do' muyuh ngiap macing tudu' minggu,

¹⁶ieh ineh limeh ngepulu' aco macing pekak kenebpa pangeh tudu' minggu ineh, idi kareb aco ineh do' muyuh maré kuan Tuhan aceh baré akan luk mebaruh.

¹⁷Idi do' muyuh nguit dueh balad ruti rat ruma' muyuh mangun ku aceh baré luk tidulen, ieh ineh inau' ratnan segatang banak. Do' ieh tinaken puar ku lamud mangun ku baré luk pun-pun kuan Tuhan.

¹⁸Idi perapu dengan ruti ineh teh do' muyuh maré tudu' anak dumba luk do' luk ulun selak, idi aceh sapi' pegawa' luk do', idi teh dueh amék luk do'. Amung ineh barén sabpen kuan Tuhan perapu dengan baré akan idi luk rupan, idi baré luk sabpen, mangun ku aceh buen luk do' kuan Tuhan.

¹⁹Do' muyuh maré aceh amék deléi barén ngaceku sala', idi dueh anak dumba luk ulun selak ku baré luk nguit pedo'.

²⁰Idi do' imam nicul ineh perapu dengan ruti baré luk pun-pun ineh, mangun ku baré luk tidulen pa kiung Tuhan. Idi amung ineh perapu dengan dueh anak dumba ineh mangun ku baré luk meligan kuan Tuhan luk miak barén imam.

²¹Idi kareb aco ineh teh do' nganau' aceh teubupun rayeh, ieh ineh aceh teubupun sembayang kuan muyuh, idi na ngakem, mepad kudeng Aco luk inan Mudeng. Ieh ineh aceh dalam luk meruked kuan inul muyuh iapeh-iapeh pana' su luk inandeh.

²²"Idi kareb muyuh ngeranéh uli' tana' muyuh, aleg muyuh ngeranéh macing iring lati' muyuh. Idi aleg muyuh ngamung luk neketecan ratnan perinien

muyuh. Iamo' do' ieh tacin kuan lun masi' idi lun sakai. Ui ini Tuhan Allah muyuh.

23-24" Bulan luk ketudu', aceh aco bulan ineh, do' inan aceh aco luk inan mudeng kuan muyuh, mangun ku aceh terawé dengan luk uen nguni, dengan aceh teubupun sembayang.

25 Aleg muyuh ngakem kareb aco ineh. Iamo' do' muyuh maré baré akan kuan Tuhan.

26-27" Kareb pulu' aco bulan luk ketudu' ineh, ieh ineh aco rayeh luk nguit pedo'. Do' nganau' aceh teubupun sembayang kuan muyuh, idi ngebeneh niat muyuh idi maré baré akan kuan Tuhan.

28 Idi kareb aco ineh aleg muyuh ngakem, ngaceku ineh aco luk nguit pedo', pad nganau' luk nguit pedo' kuan muyuh pa kiung Tuhan Allah muyuh.

29 Idi ngaceku ineh idé luk na nengebeneh niatneh idi mawa' na kuman kareb aco ineh, do' ieh duken buro rat arang pupuneh.

30 Idi idé luk ngakem kareb aco sineh, idi Tuhan ngaté neneh rat arang pupuneh.

31 Idi ini aceh ukum luk meruked kuan inul muyuh, iapeh-iapeh su luk inandeh.

32 Rat kareb aco macep iwa' aco bulan ineh macing aco macep kenebpa, ieh ineh aco luk inan muyuh mudeng. Idi do' muyuh ngebeneh niat muyuh idi mawa' na kuman.

33-34" Kareb pulu' limeh aco bulan luk ketudu' ini, do' inan Aco Rayeh Lepo kuan Tuhan tudu' aco kinioneh.

35 Idi kareb aco luk pun-pun ineh, ieh ineh teubupun sembayang. Aleg muyuh ngakem bang aco sineh.

36 Idi tudu' aco kinioneh do' muyuh maré kuan Tuhan tuda'-tuda' baré akan. Idi kareb aco luk kewaluh, do' muyuh nganau' aceh teubupun sembayang

kuan muyuh, idi maré tuda'-tuda' baré akan kuan Tuhan. Idi ini aco sembayang. Aleg muyuh ngakem bang aco sineh.

(³⁷Idi ini amung aco rayeh Tuhan, luk uen muyuh ngelelep ku tebubpun sembayang, pelé muyuh maré kuan Tuhan tuda'-tuda' baré akan, ieh ineh baré luk sabpen, baré luk kenen, baré luk kereten, idi baré luk rupen, anid-anid aco maya' kinula' luk litep bang aco sineh;

³⁸amung ineh baken ratnan Aco luk inan Mudeng, idi baken ratnan amung baré muyuh, jani' muyuh, idi amung baré luk ratnan katu niat luk muyuh pian maré kuan Tuhan.)

³⁹Idi teh kareb pulu' limeh aco bulan luk ketudu', kareb muyuh pangeh nengamung amung uli' tana' muyuh, do' muyuh nganau' aceh lawé rayeh kuan Tuhan tudu' aco kinioneh. Idi kareb aco luk pun-pun do' inan aco luk inan mudeng. Idi kareb aco luk kewaluh pana', do' muyuh ucu' teh.

⁴⁰Idi kareb aco luk pun-pun, do' muyuh ngalap tuda'-tuda' bua' buyo, angat-angat piasau, angat-angat luk mula' don, idi bulu' rat tangeb abpa'. Idi do' muyuh mawang niat pa kiung Tuhan Allah muyuh tudu' aco kinioneh.

⁴¹Idi tudu' aco kinioneh, do' muyuh nganau' lawé rayeh ini kuan Tuhan. Ieh ineh aceh ukum luk meruked kuan inul muyuh. Idi bulan luk ketudu' do' muyuh nganau' ineh.

⁴²Tudu' aco kinioneh do' amung muyuh lun Israil tudo bang lepo,

⁴³pad among inul muyuh kali' ineh mucu. Ngaceku Ui pangeh nengecuk nelun Israil tudo bang lepo ineh kareb Ui nenated nedeh remuat rat bang bawang Masir. Ui ini Tuhan Allah muyuh.”

⁴⁴Kudeng ineh luk bila Musa kuan amung lun Israil, ratnan amung aco rayeh luk litep Tuhan.

Ukum 24

¹Kebala Tuhan ni Musa,

- ²"Ngecuk nelun Israil ineh nguit amé' namu umau saitun luk tipeh idi metaro ruen bang amung-amung lapung, pad amung lapung ineh miak mulun kidi-kidi.
- ³Idi do' Arun temina' ku amung lapung ineh bal dicing luk pa atun Pati' Pejani' ineh luk bang Su luk Meluun Ligan, rat malem macing pekak pa kiung Tuhan. Idi ini aceh ukum luk meruked.
- ⁴Idi do' Arun temina' ku amung lapung ineh luk luun kukudneh luk ratnan amas luk tinuno, pa kiung Tuhan kidi-kidi.
- ⁵"Idi do' iko ngalap anem gatang banak idi nganau' ineh ku ruti pulu' dueh balad.
- ⁶Idi do' iko ngerareng ruti ineh pa kiung Tuhan luun méja amas luk tinuno, dengan dueh atur, ieh ineh anem balad ruti seatur.
- ⁷Idi pa luun dueh atur ineh do' ngerareng umau luk do' buen luk meligan mangun ku aceh terawé ratnan ruti ineh, ieh ineh aceh baré akan kuan Tuhan.
- ⁸Idi anid-anid Aco luk inan Mudeng, do' Arun temina' ku ineh pa kiung Tuhan kidi-kidi. Idi ineh mangun kuan lun Israil ku aceh pejani' luk ruked-ruked.
- ⁹Idi ruti ineh mangun ku babpat Arun idi anak-anakneh, idi miak kenendeh bang aceh su luk meligan. Ngaceku ineh luk meluun ligan kuanneh ratnan amung baré luk sabpen kuan Tuhan. Idi ini aceh ukum luk meruked."
- ¹⁰Idi inan aceh deléi, tinanneh lun Israil, tamanneh lun Masir, idi ieh nacing arang lun Israil. Idi ieh nepekedaluh inan aceh lun Israil su luk inandeh nelupo.
- ¹¹Idi ieh nenguyo ngadan Tuhan ineh dengan kediman teh. Idi ideh nenguit neneh iné' papu' ni Musa. Idi ngadan tinanneh Selomit Dibri ratnan inul Dan.
- ¹²Idi ideh nenipa neneh bang tutup pad ideh kali' pian Tuhan.
- ¹³Kebala Tuhan ni Musa,

14"Nguit lemulun luk nguyo ineh remuat rat su luk inandeh nelupo. Do' amung lun luk pangeh neninger neneh ineh ngerareng ticu'deh luun uluhneh, idi do' lun mula' mitung neneh ku batu.

15Idi teh mada' kuan lun Israil: Idé-idé luk nguyo Allahneh, ieh miak mabeh sala'neh,

16idi miak pitayen. Do' lun sakai idi lun kuan bawang, bitungin ku batu kudeng ieh nguyo ngadan Tuhan.

17"Idé-idé luk ngaté aceh lemulun miak pitayen.

18Idi idé-idé luk ngaté pung lun baken, ieh miak maré libalneh, pung libal pung.

19"Idé-idé luk ngurat burur lun denganneh, idi maya' kudeng luk inau'neh, kudeng ineh teh luk miak ruen kuanneh,

20putul libal putul, mateh libal mateh, lipen libal lipen. Anun dat luk icingneh kuan burur lun baken, kudeng ineh teh luk ruen luun bururneh.

21Idé-idé luk ngaté pung, ieh miak maré libalneh. Iamo' idé luk ngaté lemulun, ieh miak pitayen teh.

22Idi ukum ini kuan amung muyuh, do' kuan lun sakai, idi lun kuan bawang, ngaceku Ui ini Tuhan Allah muyuh."

23Idi Musa nengecuk nelun Israil, idi ideh nenguit lun luk nguyo ineh remuat rat su luk inandeh nelupo, idi nemitung neneh ku batu macing maté. Idi lun Israil nenganau' kudeng ineh maya' kudeng luk bida' Tuhan ni Musa.

Ukum 25

1Kebala Tuhan ni Musa luun Pegkung Sinai,

2"Mada' kuan amung lun Israil kudeng ini: Kareb muyuh semuet bang bawang luk pian barénKu nemuyuh, idi do' bawang ineh inan aceh kareb luk inan ucu' kuan Tuhan.

3Anem lak kinioneh do' muyuh nibu lati' muyuh, idi anem lak kinioneh do' muyuh nutu' angkat anggur muyuh, idi ngamung uli' tana' ineh.

- ⁴Iamo' lak luk ketudu' aceh kareb luk inan ucu' luk meligan kuan bawang ineh. Ieh ineh aceh kareb luk inan mudeng kuan Tuhan. Idi aleg muyuh nibu lati' muyuh idi nutu' angkat anggur muyuh.
- ⁵Idi atab luk mulun ratnan luk piranah muyuh aleg ngeranah. Idi bua' anggur muyuh luk na tinutu' aleg muyuh ngalap. Idi do' lak ineh mangun ku kareb luk inan ucu' luk meligan kuan bawang ineh.
- ⁶Idi uli' tana' muyuh kareb ineh mangun ku akan kuan muyuh, demulun muyuh luk deléi idi decur, lun tebarin muyuh, idi lun sakai, ieh ineh amung-amung luk tudo bang ruma' muyuh,
- ⁷Idi teh pung muyuh luk melayo, idi amung pung luk meliputi luk luun tana' muyuh. Amung uli' tana' ineh mangun ku akandeh.
- ⁸Idi teh do' muyuh ngiap tudu' kua' tudu' lak. Kinula'neh apat ngepulu' iwa' lak.
- ⁹Idi bulan luk ketudu', pulu' aco bulan ineh, ieh ineh aco luk nguit pedo', do' muyuh ngiup serupit libut-libut bawang muyuh.
- ¹⁰Idi lak luk kelimeh ngepulu' ineh do' muyuh ngeligan, idi mada' puit bang bawang muyuh kuan amung lun Israil. Ieh ineh mangun ku aceh Lak luk Kelimeh Ngepulu' kuan muyuh. Na miak na anid-anid burur lun Israil lemubed amé' inan babpatneh sebuleng idi amé' inan inul pupuneh.
- ¹¹Ngaceku ineh aleg muyuh nganau' lati'. Idi aleg muyuh ngeranah padé luk ketecan. Idi aleg muyuh ngalap bua' anggur ratnan lawa luk na tinutu'.
- ¹²Idi do' muyuh ngeligan lak ineh. Idi anun uli' ratnan atab lati' muyuh ineh do' muyuh kuan.
- ¹³Idi Lak luk Kelimeh Ngepulu' ineh, do' anid-anid muyuh muli' amé' inan babpat tana'neh, sagan pana' pangeh pinasui.
- ¹⁴Idi ngaceku ineh kudeng muyuh masui tana' kuan lun dengan muyuh, kian muyuh melih rat nelun dengan muyuh, aleg muyuh muyok seburur dengan seburur.

- ¹⁵Do' ngeletep raga tana' maya' iap lak luk mucu ratnan Lak luk Kelimeh Ngepulu' ineh, dengan ngerawé uli' tana' ineh.
- ¹⁶Maya' kinula' lakneh do' muyuh ngula' belihneh, maya' kiasi' lakneh do' muyuh ngetanga' belihneh, ngaceku maya' iap uli'neh luk pisueneh nemuyuh.
- ¹⁷Aleg muyuh muyok seburur dengan seburur. Iamo' do' muyuh matot nan Allah muyuh. Ngaceku Ui ini Tuhan Allah muyuh.
- ¹⁸"Do' muyuh maya' amung ukumKu idi nginita amung balaKu idi nganau' luk petulu, pad muyuh lutep tudo bang bawang ineh.
- ¹⁹Idi tana' ineh pana' maré uli'neh, idi muyuh kuman uli' ineh pad mebor. Idi muyuh do' udeng.
- ²⁰"Idi kudeng inan lun ngitun, 'Anunké luk kenen kai lak luk ketudu' ineh, ngaceku kai na nganau' lati'?"
- ²¹kali' rungen Ui maré peruan kuan muyuh bang lak luk keanem ineh, pad ieh ngeruat uli' luk mula' kuan muyuh, luk petap kuan teluh lak.
- ²²Idi lak luk kewaluh inan teh akan kuan muyuh ratnan uli' luk atun ineh macing lak luk keiwa'. Idi muyuh kuman luk mon ineh pad uli' luk mebaruh ineh perinien.
- ²³"Idi ngaceku ineh aleg masui tana' ineh raked-raked, ngaceku tana' ineh Ui kuan. Idi muyuh lun sakai idi lun luk tudo denganKu.
- ²⁴Idi apud bawang muyuh, do' nima' tana' ineh uen nguli'.
- ²⁵"Idi kudeng kinanakmu masi', pad ieh masui anun-anun ratnan babpatneh, do' pupuneh luk muneng amé' nguli' luk pangeh pinasui kinanakneh ineh.
- ²⁶Idi kudeng ayuneh selemulun na luk ku nguli', iamo' mucu inan luk apenneh luk petap ku nguli' babpatneh,
- ²⁷idi do' ieh ngiap amung lak rat tana' ineh pangeh pinasui, pad ieh ngelubed elaneh kuan lun ineh luk pangeh nemelih ineh rat neneh. Pangeh ineh miak tana' ineh lemubed kuanneh.

²⁸Iamo' kudeng ieh na inan petap luk ku nguli' ineh kuanneh, idi tana' luk pinasuineh ineh, do' ieh itin lun luk nemelih ineh macing Lak luk Kelimeh Ngepulu' ineh. Iamo' bang lak ineh tana' ineh libacen kuanneh.

²⁹"Kudeng selemulun masui ruma' bang bawang luk inar meraben, idi miak ieh uen nguli' bang lak ineh teh.

³⁰Iamo' kudeng ruma' ineh na uen nguli' bang lak ineh, idi ruma' luk bang ar luk meraben ineh mangun ku babpat lemulun luk nemelih ineh macing ruked-ruked. Idi na ieh miak libacen bang Lak luk Kelimeh Ngepulu' ineh.

³¹Iamo' ruma'-ruma' luk na inar meraben ineh, mepad kudeng tana' luk ku lati' teh. Miak ieh uen nguli' sen. Iamo' kareb Lak luk Kelimeh Ngepulu' na miak na ruma' ineh libacen.

³²Iamo' amung bawang lun Liwi ineh, idi amung ruma' luk bang bawangdeh, idan-idan pana' miak teh uen nguli'.

³³Kudeng seburur lun Liwi na nguli' ruma'neh, kali rungen ruma' luk pinasui bang bawangdeh ineh libacen teh bang Lak luk Kelimeh Ngepulu'. Ngaceku amung ruma' bang bawang-bawang lun Liwi ineh ku babpatdeh macing ku anak inul déi' bawang Israil.

³⁴Iamo' tana' luk libut-libut bawang luk inandeh mudeng na miak uen masui, ngaceku ineh babpatdeh macing ruked-ruked.

³⁵"Kudeng kinanakmu masi', idi na ieh miak tebawang denganmu, do' iko ngedengan neneh, mepad kudeng lun sakai luk mudeng arang muyuh, pad ieh miak mulun denganmu.

³⁶Idi aleg iko ngalap rat neneh bunga' usin idi elaneh teh, iamo' do' iko matot inan Allahmu pad kinanakmu pana' lutep denganmu.

³⁷Aleg iko maré usinmu neneh idi ngalap bunga'neh, idi luk kenenmu pana' aleg iko maré neneh dengan ngalap mula' ua'neh.

³⁸Ini ukum Tuhan Allah muyuh, luk pangeh nenated nemuyuh remuat rat bang bawang Masir, pad Ui maré bawang Kanaan kuan muyuh, idi Ui mangun ku Allah muyuh.

³⁹"Idi kudeng kinanakmu luk denganmu ineh masi', idi ieh masui bururneh kuanmu, aleg iko ngecuk neneh ngakem mepad kudeng demulunmu.

⁴⁰Iamo' do' ieh mudeng denganmu mepad kudeng lun tebarin, idi ngakem kuanmu pad macing Lak luk Kelimeh Ngepulu' ineh.

⁴¹Idi do' ieh patad rat namu, dengan anak-anakneh pana', idi ieh miak lemubed amé' inan pupuneh idi babpat tamanneh.

⁴²Ngaceku ideh ineh demulunKu, luk inuitKu remuat rat bang bawang Masir. Ngaceku ineh aleg masui nedeh.

⁴³Idi aleg iko ngimet nedeh dengan megateh niat. Iamo' do' iko matot inan Allahmu.

⁴⁴Iamo' muyuh miak melih demulun luk deléi idi decur ratnan pupu baken luk tudo libut-libut bawang muyuh.

⁴⁵Kudeng ineh teh muyuh miak melih anak-anak lun sakai luk tudo arang muyuh, idi anak-anak ineh luk tinganak bang bawang muyuh miak mangun ku babpat muyuh.

⁴⁶Idi miak muyuh ngiap nedeh mangun ku lun duken anak-anak muyuh ruked ulundeh. Iamo' aleg muyuh ngedereh pupu muyuh lun Israil ineh.

⁴⁷"Idi kudeng seburur lun sakai kian lun tebarinmu pangeh nengalap mula' binaweh, idi kinanakmu ineh masi' pad ieh masui bururneh kuan lun sakai kian lun tebarinmu ineh lek,

⁴⁸pangeh ieh masui bururneh miak ieh uen nguli'. Kinanakneh,

⁴⁹taman pinakenneh, anak deléi taman pinakenneh, idi pupuneh luk muneng miak nguli' neneh. Kudeng ieh sebuleng inan petap binaweh, do' ieh nguli' bururneh sebuleng.

⁵⁰Idi do' ieh ngiap dengan lun luk pangeh nemelih neneh rat lak luk inanneh nemasui bururneh macing Lak luk Kelimeh Ngepulu' ineh. Idi usin luk ku nguli' ineh maya' kinula' lak ineh, idi aco luk inanneh tudo dengan lun luk nemelih neneh ruen ngiap mepad kudeng kekamen lun tebarin.

⁵¹⁻⁵²Idi kudeng inan tuda'-tuda' lak ketecan macing Lak luk Kelimeh Ngepulu' ineh, do' ieh ngelubed usin maya' kinula' luk nekumelih neneh mangun ku uli'neh, idi petulu dengan lak ineh.

⁵³Do' ieh tudo denganneh mepad kudeng lun tebarinneh anid-anid lak. Idi aleg ngedereh neneh.

⁵⁴Kudeng ieh na inuli' dengan dalan luk kudeng ineh, idi kareb Lak luk Kelimeh Ngepulu' ieh miak puatin dengan anak-anakneh pana'.

⁵⁵Lun Israil ineh demulunKu, ieh ineh demulun luk inuitKu remuat rat bang bawang Masir. Ui ini Tuhan Allahdeh.

Ukum 26

¹"Idi aleg muyuh nganau' akang, ulung, idi batu luk inarit, idi munel sembayang nan ineh. Ui ini Tuhan Allah muyuh.

²Do' muyuh ngerayeh amung aco luk inanKu mudeng idi ngerayeh Su inanKu luk Meligan. Ui ini Tuhan.

³"Kudeng muyuh nginita ukumKu idi maya' balaKu,

⁴idi Ui nurun udanKu kuan muyuh maya' karebneh, idi tana' pana' ngeruat uli'neh idi amung tibu luk bang lati' pana' miak ngeruat bua'.

⁵Idi pangeh muyuh rumik padé idi muyuh mureg bua' anggur. Idi pangeh ngamung bua' anggur idi muyuh nibu. Idi muyuh miak kuman luk kenen muyuh macing mebor, pad muyuh lutep tudo bang bawang muyuh.

⁶"Idi Ui maré do' bang bawang ineh, pad muyuh telubid dengan na gegapin idé-idé pana'. Idi Ui miak ngaté amung pung luk mesangit luk bang bawang muyuh. Idi bunu' pana' nateh.

⁷Idi muyuh miak metueh ratnan bunu' muyuh.

- ⁸Idi limeh burur rat arang muyuh miak ngelaya' meratu. Idi meratu muyuh miak ngelaya' pulu' ngeribu.
- ⁹Idi Ui méi nemuyuh, ngasa' nemuyuh, idi ngula' nemuyuh. Idi Ui ngeriput jani'Ku nemuyuh.
- ¹⁰Idi muyuh lakat kuman luk mon ineh, kareb muyuh ngeranéh. Idi muyuh miak ngeruat luk mon ineh idi nipa luk mebaruh.
- ¹¹Idi Ui tudo arang muyuh idi na Ui ara' nemuyuh.
- ¹²Idi Ui nalan arang muyuh mangun ku Allah muyuh, idi muyuh mangun ku pupuKu.
- ¹³Ngaceku Ui ini Tuhan Allah muyuh, luk pangeh nenguit nemuyuh rat bang bawang Masir, pad muyuh na mangun ku demulundeh peh. Idi Ui nala' babeh muyuh pad muyuh nalan dengan do'.
- ¹⁴"Iamo' kudeng muyuh na maya' amung ukumKu,
- ¹⁵idi kudeng muyuh ngelaba balaKu, idi niat muyuh musam ku bada'Ku, idi na ngerawé jani'Ku,
- ¹⁶idi Ui ngukum nemuyuh. Ui ngacing tot, idi ét luk mebura', dadem luk ngesaweng mateh, pad iko iuk-iuk melaya'. Idi mo'-mo' muyuh nganau' lati', ngaceku amung ineh kenen bunu' muyuh.
- ¹⁷Idi Ui na méi' nemuyuh, pad muyuh uen bunu' muyuh ngelaya'. Idi amung luk megateh nemuyuh miak metueh rat nemuyuh, pad muyuh buro sagan pana' na lemulun ngerada' nemuyuh.
- ¹⁸"Idi kudeng mucu ratnan amung ini na muyuh sikal ninger balaKu, Ui miak ngedereh nemuyuh tudu' kua' ngaceku amung sala' muyuh.
- ¹⁹Idi Ui miak ngebeneh amung dita' idi tueh niat muyuh. Idi Ui nganau' langit mepad kudeng belawan, idi tana' mepad kudeng tekaling.
- ²⁰Idi muyuh merur mo'-mo', idi tana' muyuh ineh na miak maré uli'neh kuan muyuh. Idi amung tibu luk bang lati' pana' nateh ngeruat bua'-bua'deh.

- 21"Idi kudeng muyuh na perurum Negku idi na ninger balaKu, kali' rungen Ui ngacing tuda'-tuda' dereh kuan muyuh, tudu' kua' maya' sala' muyuh.
- 22Idi Ui muit arang muyuh amung pung luk mesangit, pad ideh ngaté anak-anak muyuh, idi ideh miak ngaté aya' muyuh, pad muyuh masi' burur, idi dalam muyuh mali.
- 23"Idi kudeng mucu ratnan amung dereh ini, muyuh na uren iamo' sikal metueh rat Negku,
- 24Ui teh sikal metueh rat nemuyuh, idi Ui sebuleng ngedereh nemuyuh tudu' kua' ngaceku sala' muyuh.
- 25Idi Ui ngacing bunu' kuan muyuh, pad ngua' dat muyuh, ngaceku pejani' ineh. Idi kareb muyuh mepamung bang bawang muyuh, idi Ui maré ét luk mebura' kuan muyuh, idi muyuh pana' barén inan bunu' muyuh.
- 26Idi kareb babpat ruti muyuh ineh lélé mabud ngaceku ukumKu, idi pulu' burur decur miak nganau' rutideh bang sebuleng tetel, idi ideh miak nganid ruti muyuh ineh maya' uadneh. Idi muyuh kuman, iamo' na miak mebor.
- 27"Idi kudeng mucu ratnan ineh teh muyuh na ninger balaKu, idi sikal metueh rat Negku,
- 28Idi Ui pana' sikal metueh rat nemuyuh dengan useh luk mebura', idi Ui ngedereh nemuyuh tudu' kua' ngaceku amung sala' muyuh,
- 29pad muyuh kuman uang anak muyuh sebuleng.
- 30Idi Ui miak ngusag su luk inan muyuh nawar Sétan idi nabpa amung su luk inan ngeseb umau luk do' buen, idi butung muyuh peten pa luun bila' akang muyuh. Idi Ui pana' musam teh nemuyuh.
- 31Idi amung bawang muyuh uenKu mangun dat ali, idi amung su luk inan muyuh sembayang ineh uenKu ngusag. Idi na Ui sikal muen buen luk do' ruen muyuh kuanKu.
- 32Idi tana' muyuh uenKu ngusag, pad bunu' muyuh luk tudo ieneh pelaba awa ku ineh.

³³Idi muyuh sebuleng pana' uenKu ngatad parap-parap rat arang pupu baken, idi Ui munu' nemuyuh. Idi tana' muyuh mangun dat ali idi bawang muyuh uen ngusag.

³⁴⁻³⁵Idi seruked bawang ineh tacin, kareb muyuh tudo bang bawang bunu' muyuh, tana' muyuh na tupu ruen ku lati', pad tana' luk metugeh miak do'.

³⁶"Idi Ui miak nganau' aceh tot kuan muyuh luk ketecan bang bawang bunu' muyuh, pad muyuh matot ku uni don luk mepalid. Idi muyuh miak buro mepad kudeng lun luk buro ku bunu'. Idi muyuh miak meluka' sagan tu pana' na lemulun luk ngerada'.

³⁷Idi muyuh miak metebaceng kareb na lemulun ngerada' nemuyuh. Idi muyuh na miak tuman pa kiung bunu' muyuh.

³⁸Muyuh miak maté arang pupu baken. Idi tana' bunu' muyuh miak nelen nemuyuh.

³⁹Idi lun luk ketecan rat nemuyuh bang bawang bunu' muyuh, iuk-iuk melaya' ngaceku sala' muyuh idi ngaceku sala' tepun muyuh.

⁴⁰"Idi kudeng ideh ngamo amung sala'deh idi sala' tepundeh pana', ngaceku ideh na maya' Negku idi sikal metueh rat Negku,

⁴¹idi pad Ui pana' sikal metueh rat nedeh, idi Ui nenala' nedeh bang bawang bunu'deh, idi kareb niatdeh luk dat ineh mebeneh, idi ideh uren ratnan amung sala'deh,

⁴²idi kareb ineh Ui ngerawé jani'Ku ni Yakub, Isak, idi Ibrahim. Idi Ui ngerawé nedeh, idi bawangdeh pana'.

⁴³Idi tana' ineh tacindeh, idi na tupu ruen ku lati' seruked ieh tacin. Kudeng ineh ideh miak mabeh amung sala'deh. Ngaceku ideh nengelaba ukumKu idi ideh musam ku balaKu.

⁴⁴Idi sagan tu pana' kudeng ineh, kareb ideh semuet bang bawang bunu'deh Ui na nala' nedeh, idi musam ku ideh, pad Ui na ngaté nedeh idi mekelupan jani'Ku nedeh ineh. Ui ini Tuhan Allahdeh.

⁴⁵Iamo' ngaceku ideh ineh, Ui ngerawé jani'Ku dengan tepundeh, kareb Ui nguit nedeh remuat rat bang bawang Masir su siren mateh amung pupu baken, pian mangun ku Allahdeh. Ui ini Tuhan.”

⁴⁶Idi amung ini ukum idi bala luk pangeh bida' Tuhan ni Musa kuan lun Israil luun Pegkung Sinai.

Ukum 27

¹Kebala Tuhan ni Musa,

²"Do' mada' kuan amung lun Israil kudeng ini: Kudeng selemulun pejani' maré raga seburur lemulun kuan Tuhan, do' maya' raga luk litep ini:

³Idi raga seburur deléi luk dueh ngepulu' lak ulunneh, ieh ineh limeh ngepulu' balad pirak.

⁴Idi kudeng seburur decur, raganeh teluh ngepulu' balad pirak,

⁵Idi kudeng lun ineh limeh lak macing dueh ngepulu' lak ulunneh, raga seburur deléi dueh ngepulu' balad pirak, idi seburur decur pulu' balad pirak.

⁶Idi kudeng anak deléi ulunneh sebulan macing limeh lak, raganeh limeh balad pirak, idi decur teluh balad pirak.

⁷Idi kudeng deléi mela anem ngepulu' lak, raganeh pulu' limeh balad pirak, idi decur pulu' balad pirak.

⁸Iamo' kudeng lemulun ineh masi' idi na miak mayar raga luk pangeh litep, do' ieh amé' matun imam dengan lemulun luk pijani'neh ineh, idi imam miak nganau' raganeh maya' asi' lun luk nepejani' ineh.

⁹Idi kudeng aya' luk biré lun inan Tuhan ku baré, anun-anun luk biré inan Tuhan kudeng ineh, ieh ineh meligan.

¹⁰Na ieh miak libalenneh, luk do' ku luk dat, idi luk dat ku luk do'. Iamo' kudeng luk pangeh pijani'neh pangeh linibalneh, idi didueh barén kuan Tuhan.

¹¹Idi kudeng aceh aya' luk ku gani' luk na miak barén lun kuan Tuhan, idi do' nated aya' ineh pa kiung imam.

¹²Idi imam miak nganau' raganeh maya' dat idi do'neh, idi raga luk inau' imam, ieh ineh luk lutep.

¹³Idi kudeng lemulun ineh nguli' neneh, kali' rungen ieh naduk neneh sebabpat limeh mela ratnan raganeh.

¹⁴"Idi kudeng selemulun maré ruma'neh ku aceh ruma' luk meligan kuan Tuhan, do' imam nganau' raganeh maya' do' idi datneh, idi raga luk inau' imam, ieh ineh luk lutep.

¹⁵Idi kudeng lemulun ineh sikal nguli' ruma'neh, do' ieh naduk ineh sebabpat limeh mela ratnan raganeh. Idi ruma' ineh mangun ku babpatneh péh.

¹⁶"Idi kudeng aceh lemulun maré inan Tuhan aceh babpat ratnan tana'neh, idi do' raganeh maya' kinula' pimaraneh, ieh ineh limeh ngepulu' gatang pimara, limeh ngepulu' balad pirak.

¹⁷Kudeng ieh maré tana'neh ngimun rat Lak luk Kelimeh Ngepulu', raganeh maya' luk litep.

¹⁸Idi kudeng ieh maré tana' ineh mucu ratnan Lak luk Kelimeh Ngepulu', idi do' imam nganau' raganeh maya' kinula' lakneh macing Lak luk Kelimeh Ngepulu' ineh, idi raganeh miak uen ngurang.

¹⁹Idi kudeng lun luk pangeh nemaré tana' ineh pian nguli' ineh, do' ieh naduk usin raganeh dengan sebabpat limeh.

²⁰Idi kudeng ieh na nguli' tana'neh ineh, kian kudeng ieh pangeh nemasui tana' ineh nelun baken, idi na ieh miak uen nguli' peh,

²¹idi kareb Lak luk Kelimeh Ngepulu', tana' ineh kuan Tuhan. Idi ineh mangun ku babpat imam.

²²Idi kudeng ieh maré kuan Tuhan aceh tana' luk pangeh bilihneh,

²³idi do' imam nganau' raganeh maya' kinula' lakneh macing Lak luk Kelimeh Ngepulu'. Idi do' ieh maré raga luk litep aco sineh. Idi usin ineh kuan Tuhan.

²⁴Idi kareb Lak luk Kelimeh Ngepulu' miak tana' ineh uen ngelubed kuan lemulun luk nemasui ineh, ieh ineh kuan lemulun luk kuan babpat tana' ineh.

- ²⁵Idi amung raga luk litepmu ineh do' ieh maya' balad pirak Su luk Meligan.
- ²⁶"Iamo' amung anak aya' muyuh luk tinganak pun-pun kuan Tuhan aleg seburur pana' maré ineh ku baré, do' sapi', amék, idi dumba, ngaceku Tuhan mo' luk kuan nedeh.
- ²⁷Iamo' kudeng ieh aya' luk ku gani', idi miak ieh uen nguli' maya' raga luk litep. Idi do' ieh naduk neneh dengan sebabpat limeh. Idi kudeng ieh na inuli' miak ieh pisuen maya' raganeh.
- ²⁸"Iamo' amung luk pangeh litep uen ngatad kuan Tuhan ratnan amung babpatneh, do' lemulun, aya', idi tana' pana', ieh ineh na miak pisuen idi uen nguli'. Amung ineh litep kuan Tuhan.
- ²⁹Amung luk litep uen ngatad ratnan lemulun, ieh ineh na miak uen nguli'. Na miak na ieh ineh pitayen peh.
- ³⁰"Idi amung babpat pulu' uli' tana', do' padé idi bua' pana' Tuhan kuan.
- ³¹Iamo' kudeng selemulun pian nguli' aceh babpat pulu'neh, do' ieh naduk raganeh dengan sebabpat limeh.
- ³²Idi amung babpat pulu' ratnan sapi', amék idi dumba, amung luk iapin lun matar aya' ineh, babpat pulu' ineh Tuhan kuan.
- ³³Aleg ieh mili' ratnan luk do' idi luk dat. Idi teh aleg ieh ngelibal neneh. Iamo' kudeng ieh ngelibal ineh do' ieh ngatad nedidueh kuan Tuhan, do' nekungelibal idi luk linibal teh. Aleg ieh ineh uen nguli'." "
- ³⁴Idi amung ini bada' Tuhan luk biréNeh kuan Musa déi luun Pegkung Sinai luk uen ngacing kuan amung lun Israil.

Lap

Lap 1

¹Kebala Tuhan ni Musa, déi' su luk ali-ali bang Lepo su luk inan papu' Tuhan, aceh aco bulan dueh bang lak luk kedueh, pangeh ideh neremuat rat bang bawang Masir,

²"Do' medueh Arun ngiap kinula' lun Israil dengan amung inul, idi tetek ruma'deh, perapu dengan ngadan anid-anid deléi,

³luk ulun dueh ngepulu' lak idi mela, ieh ineh amung lun Israil luk miak pebunu'.

⁴Idi do' medueh nguit lun rayeh ratnan anid-anid pupudeh."

⁵⁻¹⁵Idi ngadan amung-amung lun luk pinili', ieh ineh: Pupu, Lun Rayeh Inul; Rubin, Elisur Sedur; Simion, Selumil Surisadai; Yahuda, Nasun Aminadab; Iskar, Netanel Suar; Sebulon, Eliab Helon; Epraim, Elisama Amihud; Manasé, Gamalil Pedasur; Beniamin, Abidan Gidioni; Dan, Ahisar Amisadai; Aser, Pagiél Okran; Gad, Eliasap Ruel; Naptali, Ahira Enan.

¹⁶Idi amung ini pinili' rat arang amung lun Israil mangun ku lun rayeh inuldeh idi lun rayeh tuda'-tuda' pupu lun Israil.

¹⁷Musa idi Arun nengalap lemulun luk titen ngadan ineh.

¹⁸Idi didueh nenawar amung lun Israil nepamung, aceh aco bulan dueh, pad ideh nemada' ngadandeh, maya' inuldeh, idi tetek ruma'deh, dengan ngadan amung deléi luk ulun dueh ngepulu' lak idi mela teh,

¹⁹mepad kudeng luk icuk Tuhan ni Musa. Kudeng ineh teh ieh nengiap nedeh déi' su luk ali-ali déi' Sinai.

²⁰⁻⁴⁶Idi ngadan amung deléi luk ulun dueh ngepulu' lak idi mela, luk miak amé' pebunu', inayud maya' inuldeh idi tetek ruma'deh, ngimun ratnan inul Rubin, anak Yakub luk atun. Ini kinula'deh: Pupu, Kinula'deh; Rubin, 46,500; Simion, 59,300; Gad, 45,650; Yahuda, 74,600; Iskar, 54,400; Sebulon,

57,400; Epraim, 40,500; Manasé, 32,200; Benjamin, 35,400; Dan, 62,700; Aser, 41,500; Naptali, 53,400; Kinula'deh:, 603,550.

⁴⁷Iamo' lun Liwi na iniap dengan inul baken,

⁴⁸ngaceku kebala Tuhan ni Musa,

⁴⁹"Aleg iko ngiap nelun Liwi idi aleg ngamung kinula'deh dengan amung lun Israil.

⁵⁰Iamo' ngelelep nelun Liwi ineh mangun ku lun ngimet Lepo su luk inan papu' Tuhan idi amung repapehneh. Idi do' ideh nguit Lepo ineh idi amung repapehneh. Idi do' ngasa' neneh, idi lupu libut Lepo ineh.

⁵¹Idi kareb Lepo ineh uen mubuh, do' lun Liwi nata ineh. Kudeng Lepo ineh piduten, do' lun Liwi mudut neneh. Idi kudeng inan lun baken amé' muneng ku Lepo ineh, ieh miak pitayen.

⁵²Idi do' anid-anid pupu lun Israil lupu su luk inan babpatdeh sebuleng idi muneng ku bedéra'deh.

⁵³Iamo' do' lun Liwi lupu libut Lepo su luk inan papu' Tuhan ineh, pad na useh mangun kuan amung lun Israil. Idi do' Lepo ineh uen lun Liwi nginita."

⁵⁴Idi lun Israil nenganau' ineh maya' kudeng luk icuk Tuhan ni Musa.

Lap 2

¹Kebala Tuhan ni Musa idi Arun,

²"Do' amung lun Israil nganau' lepodeh, anid-anid muneng ku bedéra'deh, dengan tanu' ruma' tamandeh. Idi do' ideh nganau' lepodeh libut Lepo su luk inan papu' Tuhan.

³⁻⁹"Idi do' lun Yahuda lupu pa busat aco su babpatdeh, dengan bedéra'deh, idi lun rayehdeh." Ini kinula'deh: Pupu, Lun Rayeh, Kinula'deh; Yahuda, Nasun Aminadab, 74,600; Iskar, Netanel Suar, 54,400; Sebulon, Eliab Helon, 57,400; Kinula'deh:, 186,400 Babpat Yahuda luk nalan atun.

¹⁰⁻¹⁶Idi lun Rubin lupu pa kabing busat aco su babpatdeh dengan bedéra'deh, idi lun rayehdeh. Ini kinula'deh: Pupu, Lun Rayeh, Kinula'deh; Rubin, Elisur

Sedur, 46,500; Simion, Selumil Surisadai, 59,300; Gad, Eliasap Ruel, 45,650; Kinula'deh:, 151,450 Babpat Rubin luk nalan maya' puet Yahuda.

¹⁷Idi arang dueh babpat ini idi dueh babpat luk mucu, lun Liwi mirir Lepo su luk inan papu' Tuhan. Anid babpatdeh nalan maya' atur kareb ideh lupu dengan bedéra'deh.

¹⁸⁻²⁴Idi lun Epraim lupu pa acep aco, su babpatdeh dengan bedéra'deh, idi lun rayehdeh. Ini kinula'deh: Pupu, Lun Rayeh, Kinula'deh; Epraim, Elisama Amihud, 40,500; Manasé, Gamalil Pedasur, 32,200; Benjamin, Abidan Gidioni, 35,400; Kinula'deh:, 108,100 Babpat Epraim luk nalan maya' puet lun Liwi.

²⁵⁻³¹Idi lun Dan lupu pa tinueh busat aco, su babpatdeh dengan bedéra'deh idi lun rayehdeh. Ini kinula'deh: Pupu, Lun Rayeh, Kinula'deh; Dan, Ahiser Amisadai, 62,700; Aser, Pagiél Okran, 41,500; Naptali, Ahira Enan, 53,400; Kinula'deh:, 157,600 Babpat Dan luk nalan kekiped.

³²Idi ini kinula' lun Israil luk iniap maya' tetek ruma'deh, idi babpatdeh: 603,550.

³³Iamo' lun Liwi na iniap dengan lun Israil, maya' kudeng luk icuk Tuhan ni Musa.

³⁴Idi kudeng ineh luk pangeh inau' lun Israil maya' kudeng amung luk icuk Tuhan ni Musa. Idi ideh nelupo iring bedéra'deh, idi nenalan maya' inuldeh.

Lap 3

¹Idi ini anak inul Arun idi Musa kareb Tuhan nepebala ni Musa déi' luun Pegkung Sinai.

²Idi Arun inan apat anak: Nadab anakneh luk atun, Abihu, Eliasar, idi Itamar.

³Idi ideh inumau idi litep mangun ku imam.

⁴Iamo' Nadab idi Abihu naté kareb didueh nenguit apui luk na petulu pa kiung Tuhan déi' su luk ali-ali déi' Sinai. Idi didueh ineh na inan anak, iamo' Eliasar idi Itamar ngakem kekamen imam seruked Arun taman didueh mulun.

⁵Idi kebala Tuhan ni Musa,

⁶"Nguit lun Liwi ineh amé' pa kiung Arun luk imam, pad ideh miak ngedengan neneh.

⁷Idi do' ideh ngakem bang Lepo su luk inan papu' Tuhan, idi ngedengan lun imam idi lun mula' pana'.

⁸Idi do' ideh nginita amung repapeh Lepo ineh, idi teh ngakem kuan amung lun Israil.

⁹Do' iko maré amung lun Liwi ineh kuan Arun idi anakneh. Ngaceku lun Liwi ineh pangeh biré nedeh rat arang amung lun Israil.

¹⁰Iamo' do' iko ngelelep ni Arun idi anak-anakneh, pad ideh ngakem kekamen imam. Iamo' kudeng inan lun baken nutun ngelibal nedeh, ieh miak pitayen."

¹¹Kebala Tuhan ni Musa,

¹²"Ui pangeh nengalap amung lun Liwi rat arang lun Israil ku libal amung anak lun Israil luk atun. Idi amung lun Liwi ineh Ui kuan.

¹³Ngaceku amung anak luk atun ineh babpatKu. Idi kareb acoKu nengaté amung anak luk atun déi' bawang Masir, kareb aco ineh teh Ui pangeh nengatad amung anak luk atun déi' Israil kuanKu, do' lemulun idi pung pana'. Ui ini Tuhan."

¹⁴Kebala Tuhan ni Musa déi' su luk ali-ali déi' Sinai,

¹⁵"Do' iko ngiap amung anak deléi lun Liwi, maya' tetek ruma'deh luk ulun sebulan idi mela ratnan ineh."

¹⁶Idi Musa nenganau' ineh.

¹⁷⁻²⁰Idi ini ngadan anak deléi Liwi: Gerson, Kohat, idi Merari, luk tepun inul luk inan ngadan ineh. Gerson inan dueh anak, ieh ineh Libni idi Simi. Kohat inan apat anak, ieh ineh Amram, Isar, Hebron, idi Usiel. Merari inan dueh anak, ieh ineh Mali idi Musi. Ieh ineh tetek ruma' luk inan ngadan ineh.

²¹Idi inul Libni idi inul Simi, ieh ineh ratnan inul Gerson.

- ²²Idi kinula' amung anak deléi luk ulun sebulan idi mela luk pangeh iniap, 7,500 burur.
- ²³Idi lun Gerson ineh lupu pa keted Lepo pa acep aco.
- ²⁴Idi lun rayeh inul Gerson, ieh ineh Eliasap Lail.
- ²⁵Idi luk uen anak Gerson nginita, ieh ineh Lepo su luk inan papu' Tuhan, dengan dueh ebpuneh idi dicingneh, luk ku itek tanga',
- ²⁶Idi dicing natad luk libut Lepo, idi bubpun, idi teh dicing luk ku itek tanga' natad ineh. Ideh luk nengasa' amung ineh.
- ²⁷Idi inul Amram, Isar, Hebron, idi Usiel, ieh ineh ratnan inul Kohat.
- ²⁸Idi kinula' amung deléi luk ulun sebulan idi mela, luk pangeh iniap, 8,600 burur.
- ²⁹Idi lun Kohat lupu pa kabing busat aco iring Lepo ineh.
- ³⁰Idi lun rayeh inul Kohat, ieh ineh Elisapan Usiel.
- ³¹Idi luk uen anak Kohat nginita, ieh ineh Pati' Pejani', méja, kukud dawan, amung bubpun, idi amung repapeh luk ku pakai imam bang Su luk Meligan idi dicing luk ku itek Su Luk Meluun Ligan, idi amung luk miak ruen nan ineh.
- ³²Idi lun rayeh lun Liwi, ieh ineh Eliasar anak Arun luk imam ineh, idi ieh lun rayeh amung imam luk ngakem bang Su luk Meligan ineh.
- ³³Idi inul Mali idi Musi, ieh ineh ratnan inul Merari.
- ³⁴Idi kinula' amung anak deléi luk ulun sebulan idi mela, 6,200 burur.
- ³⁵Idi lun rayeh inul Merari, ieh ineh Suril Abihail. Idi ideh ineh lupu pa tinueh busat aco, iring Lepo.
- ³⁶Idi luk uen anak Merari nginita, ieh ineh amung bangar Lepo, amung atang, amung diri, amung alen, idi amung repapehdeh, idi amung luk miak ruen nan ineh,

³⁷Idi teh amung diri luk libut natad, perapu dengan amung alenneh, papekneh, idi abetneh.

³⁸Idi lun luk lupu pa atun Lepo su luk inan papu' Tuhan pa busat aco, ieh ineh Musa idi Arun dengan anak-anakneh. Idi ideh ineh luk ngakem kuan Tuhan bang Su luk Meligan kuan amung lun Israil. Iamo' kudeng inan lun baken nutun ngelibal kekamendeh ineh, ieh miak pitayen.

³⁹Idi kinula' amung lun Liwi luk iniap Musa idi Arun maya' kudeng luk icuk Tuhan idi maya' tetek ruma'deh, ieh ineh amung deléi luk ulun sebulan idi mela, 22,000 burur.

⁴⁰Kebala Tuhan ni Musa, "Do' iko ngiap anak deléi lun Israil luk atun, ieh ineh luk ulun sebulan ini mela. Idi do' ngalap amung ngadandeh.

⁴¹Idi iko miak ngalap lun Liwi kuanKu, ku libal amung anak lun Israil luk atun, idi amung aya' lun Liwi ku libal aya' lun Israil luk atun. Ui ini Tuhan."

⁴²Idi Musa nengiap amung anak deléi lun Israil luk atun maya' kudeng luk icuk Tuhan neneh.

⁴³Idi kinula' amung anak deléi luk atun, luk ulun sebulan idi mela luk pangeh iniap, 22,273 burur.

⁴⁴Kebala Tuhan ni Musa,

⁴⁵"Do' iko ngalap amung lun Liwi ineh ku libal amung anak deléi lun Israil luk atun, idi amung aya' lun Liwi ku libal aya'deh. Ngaceku amung lun Liwi ineh Ui kuan. Ui ini Tuhan.

⁴⁶Idi teh usin luk ku nguli' 273 burur anak Israil luk atun luk mela ratnan amung deléi lun Liwi ineh,

⁴⁷do' ieh ineh limeh balad pirak ku libal seburur, maya' balad pirak Su luk Meligan.

⁴⁸Idi do' iko maré usin ineh kuan Arun idi anak-anakneh."

⁴⁹⁻⁵¹Idi Musa nengalap usin, ieh ineh 1,365 balad pirak. Idi ieh nemaré usin ineh kuan Arun idi anak-anakneh, maya' kudeng luk icuk Tuhan neneh.

Lap 4

¹Kebala Tuhan ni Musa idi Arun,

²"Do' ngiap anak-anak deléi Kohat rat arang amung lun Liwi maya' inuldeh idi tetek ruma'deh,

³rat ulun teluh ngepulu' lak macing limeh ngepulu' lak, idi luk miak ngakembang Lepo su luk inan papu' Tuhan.

⁴Idi kekamendeh, ieh ineh nginita repapeh luk meluun ligan.

⁵"Idi kareb amung pupu ineh nalan, do' Arun idi anak-anakneh pana' amé' bang Lepo ineh, idi ngerurut dicing ineh idi ngakeb Pati' Pejani' ku ineh.

⁶Idi do' ideh ngerareng pa luun dicing ineh aceh ebpu ratnan kubil amék. Pangeh ineh do' ideh malad pa luunneh sepekatu kibung luk bata' melaco. Pangeh ineh do' nganau' kayuh luk ku mirir Pati' ineh.

⁷"Idi do' ideh malad sepekatu kibung luk bata' melaco luun méja ruti luk barén kuan Tuhan idi ngerareng luun ineh amung bigan, kaduit, sikuan luk ku ngutang, idi busi', idi do' inan ruti luun méja ineh kidi-kidi.

⁸Pangeh ineh do' malad sepekatu kibung mesia' pa luun amung ineh idi ngebpu kibung ineh ku kubil amék. Pangeh ineh do' nganau' kayuh luk ku mirir méja ineh.

⁹"Idi do' ngakeb kukud dawan ineh dengan amung lapungneh, apitneh, amung luk ku ngilep, idi amung su luk inan umau lapung ineh ku sepekatu kibung luk mebata'.

¹⁰Idi do' ngebpu kukud dawan ineh idi amung repapehneh ku ebpu ratnan kubil amék, idi do' nganau' kayuh luk ku mirir amung ineh.

¹¹"Idi do' malad sepekatu kibung luk mebata' luun bubpun luk ratnan amas ineh, idi mapen ineh ku ebpu luk ratnan kubil amék. Idi do' nganau' kayuh luk ku mirir bubpun ineh.

¹²Pangeh ineh do' ngalap amung repapeh luk miak ruen bang kekamen Su luk Meligan ineh idi ngebpu ineh ku kibung luk mebata', idi mapen ineh ku ebpu luk ratnan kubil amék. Idi do' nganau' kayuh ineh ku mirir ineh.

¹³Pangeh ineh do' nala' abuh luk luun bubpun ineh idi malad sepekatu kibung luk mesia' luunneh.

¹⁴Idi do' ngerareng luunneh amung repapehneh luk miak ruen bang kekamen ineh, ieh ineh su luk inan amung bareh apui, serupang, luk ku ngook abuh, bigan, idi amung repapeh bubpun ineh. Idi mapen ineh ku ebpu luk ratnan kubil amék. Idi do' nganau' kayuh luk ku mirir ineh.

¹⁵"Kareb amung pupu ineh nalan, do' Arun idi anak-anakneh mapen Su luk Meligan idi amung repapehneh, idi do' inul Kohat ineh amé' mirir ineh. Iamo' aleg ideh ngakem repapeh luk meligan ineh, pad ideh na maté. "Idi ini kekamen inul Kohat kareb Lepo su luk inan papu' Tuhan ruen mirir.

¹⁶"Idi do' Eliasar anak Arun luk imam ineh, nginita umau lapung, umau luk do' buen, baré akan, idi umau luk ku ngumau, idi do' ideh nginita Lepo su luk inan papu' Tuhan dengan amung luk bang ineh luk linigan kuan Tuhan."

¹⁷⁻¹⁹Kebala Tuhan ni Musa idi Arun, "Aleg nima' lun pupu Kohat ineh pitayen ngaceku amé' muneng ku repapeh luk meluun ligan. Do' Arun idi anak-anakneh nguit anid-anid burur lun Kohat su kekamendeh, idi su repapeh luk ruendeh mirir pad ideh na maté.

²⁰Iamo' kudeng lun Kohat amé' nier kareb repapeh luk meligan ineh pipen, kali' rungen ideh maté."

²¹Kebala Tuhan ni Musa,

²²"Do' iko ngiap anak-anak deléi Gerson maya' inuldeh, idi tetek ruma'deh,

²³rat ulun teluh ngepulu' lak macing limeh ngepulu' lak, idi luk miak ngakem bang Lepo su luk inan papu' Tuhan.

²⁴Idi ini luk miak ruen inul Gerson idi luk miak itendeh:

²⁵dicing Lepo su luk inan papu' Tuhan, dueh ebpuneh, idi ebpu luk ratnan kubil amék luk ungen pa luun, idi dicing luk ku itek tanga',

²⁶dicing natad dengan abetdeh idi dicing luk ku itek tanga' natad ineh, luk libut lepo ineh idi bubpun, dengan amung repapeh luk ku nganau' ineh. Idi ideh miak nganau' anun-anun luk petulu miak ruen ratnan amung-amung ineh.

²⁷Amung kekamen anak-anak Gerson bang imet Arun idi anak-anakneh, ieh ineh ratnan amung luk itendeh, idi amung luk ruendeh. Do' Musa mada' amung luk miak itendeh.

²⁸Idi ini kekamen anid tetek ruma' anak Gerson bang Lepo su luk inan papu' Tuhan. Idi Itamar anak Arun luk lun rayehdeh.

²⁹"Idi do' Musa ngiap anak-anak deléi Merari maya' inuldeh idi tetek ruma'deh,

³⁰rat ulun teluh ngepulu' lak macing limeh ngepulu' lak, idi amung luk miak ngakem bang Lepo su luk inan papu' Tuhan.

³¹Ideh miak nguit amung bangar Lepo, atang, idi diri dengan alendeh,

³²idi amung diri dengan alenneh idi papekneh, abetneh, idi amung repapeh luk kuan Lepo ineh. Idi do' iko mada' ngadan repapeh luk miak itendeh.

³³Idi ini kekamen inul Merari bang Lepo su luk inan papu' Tuhan. Idi Itamar Arun luk lun rayehdeh."

³⁴⁻⁴⁸Musa, Arun, idi amung lun rayeh lun Israil ineh nemaya' ecuk Tuhan idi nengiap amung anak deléi lun Kohat maya' inuldeh idi tetek ruma'deh, rat ulun teluh ngepulu' lak macing limeh ngepulu' lak, idi luk miak ngakem bang Lepo su luk inan papu' Tuhan. Idi ini kinula'deh: Kohat, 2,750; Gerson, 2,630; Merari, 3,200; Kinula'deh: 8,580.

⁴⁹Idi anid-anid burur iniap maya' kekammeneh idi luk itenneh, mepad kudeng luk icuk Tuhan ni Musa.

Lap 5

¹Kebala Tuhan ni Musa,

²"Do' ngecuk nelun Israil ngeruat amung lun luk mét susud idi amung lun luk mekebabpa' idi amung lun luk ku gani' ngaceku ngakem butung ratnan su luk inan lun mula' nelupo,

³do' decur idi deléi teh miak ruaten rat bang su luk inan nelupo, pad ideh na ngelutak su luk inan muyuh nelupo. Ngaceku Ui tudo arang muyuh."

⁴Idi lun Israil nemaya' bala Tuhan idi nengecuk nedeh remuat rat su luk inandeh nelupo.

⁵Kebala Tuhan ni Musa,

⁶"Do' mada' kuan lun Israil, kudeng idé-idé luk nganau' sala' pa kiung lun danganneh, pad ieh na lutep maya' Tuhan,

⁷idi do' ieh ngamo sala'neh, idi ngua' anun luk ilapneh rat nelun baken, idi naduk sebabpat limeh.

⁸Idi kudeng lemulun luk sinaluk ineh pangeh naté idi na pupuneh luk ngalap ua' ineh, idi ineh miak barén kuan Tuhan idi kuan imam, dengan dumba deléi luk nguit pedo'.

⁹Idi amung baré lun Israil luk meligan luk itendeh kuan imam, ieh ineh imam kuan.

¹⁰Idi luk biré kuan imam ineh miak lapenneh."

¹¹Kebala Tuhan ni Musa,

¹²"Do' mada' kuan amung lun Israil, kudeng seburur decur luk inan awan, idi ieh na lutep inan awanneh,

¹³idi pamung dengan deléi baken, dengan na kali' awanneh idi lun baken pana', ngaceku ieh pasét dengan lulem,

¹⁴idi kudeng awanneh museh neneh, ku ieh pasét, idi kudeng ieh museh neneh, sagan tu pana' ieh na pasét,

¹⁵Idi do' ieh nguit awanneh amé' papu' imam, idi nguit baré luk petulu kuan awanneh, ieh ineh tudu' lio banak ikun luk na rinabur ku umau, idi na nganau' umau luk do' buen, ngaceku ieh ineh aceh baré ngimaruh luk ku ngegala' luk matu.

¹⁶"Idi do' imam nguit decur ineh amé' muneng, idi naped neneh pa kiung Tuhan.

¹⁷Idi do' imam ngalap abpa' luk meligan bang kuden, idi kipu luk luun tana' bang Lepo su luk inan papu' Tuhan, ruen bang kuden ineh teh.

¹⁸Do' ieh netang abpuk decur ineh, idi maré baré akan bang paladneh. Idi do' imam nguit abpa' luk mepét luk ngacing kediman.

¹⁹Idi do' imam ngecuk neneh pebulung, kebalaneh, 'Kudeng iko na pasét, iko miak mepuit ratnan abpa' luk mepét luk ngacing kediman ini.

²⁰⁻²¹Iamo' kudeng iko pangeh pasét nima' Tuhan nganau' namu ku kediman arang pupumu, idi Tuhan ngerugu' tipanmu idi nganau' batekmu tebuki'.

²²Idi abpa' luk ngacing kediman ini miak semuet bang tinéi'mu pad batekmu tebuki', idi tipanmu merugu'. "Idi do' decur mala, 'Mo.'

²³"Idi do' imam ngayud kediman ini luun surat idi ngerereb ineh bang abpa' luk mepét ineh.

²⁴Idi do' ieh ngecuk decur ineh ngirup abpa' ineh, pad ineh ngacing ét luk mebura' kuanneh.

²⁵Idi do' imam ngalap baré akan rat bang palad decur ineh idi nicul ineh pa kiung Tuhan idi ngerareng ineh luun bubpun.

²⁶Idi do' imam ngalap sengeragam baré akan ineh mangun ku aceh tanu', idi ngeseb ineh luun bubpun. Pangeh ineh, do' ieh maré abpa' ineh rupen decur ineh.

²⁷"Idi kareb ieh pangeh nemarké abpa' ineh inirupneh, kudeng ieh pangeh pasét, idi abpa' luk ngacing kediman ineh miak semuet bang bururneh idi

ngacing ét luk mebura', pad batekneh tebuki', idi tipanneh merugu', idi decur ineh mangun ku aceh kediman arang pupuneh.

²⁸Iamo' kudeng decur ineh na pasét iamo' ieh do', idi ieh miak mepuit idi inan anak teh.

²⁹"Idi ini ukum, kudeng aceh deléi ngimaruh idi nganu awanneh pangeh pasét.

³⁰Decur ineh uen naped pa kiung Tuhan, pad imam nganau' lawé ini.

³¹Idi deléi ineh na mesala', iamo' kudeng sedecur mesala', ieh miak mabeh sala'neh."

Lap 6

¹Kebala Tuhan ni Musa,

²"Do' mada' kuan amung lun Israil, kudeng idé-idé nganau' aceh pejani' lun Nasiri, pian ngatad bururneh kuan Tuhan,

³do' ieh na ngirup abpa' anggur, idi borak, aleg ieh ngirup abpa' luk inau' ratnan bua' anggur, aleg ieh kuan bua'neh, do' luk mebaruh idi luk tekering pana'.

⁴Seruked aco luk pijani'neh, ieh na miak kuan anun-anun luk ratnan bua' anggur, do' ilung idi kulitneh pana'.

⁵Seruked aco luk pijani'neh, ieh na miak muting abpukneh idi mingit pana', pad mabud aco luk pijani'neh kuan Tuhan ieh miak meligan. Do' ieh nima' amung abpukneh mekadang.

⁶Idi aleg ieh amé' muneng ku butung,

⁷sagan tu pana' ieh tamaneh, tinanneh, kinanakneh luk deléi idi decur. Ieh na miak ngelutak bururneh ku butungdeh, ngaceku abpukneh ineh mangun ku tanu' pejani' kuan Allah.

⁸Seruked aco luk pijani'neh ieh meligan kuan Tuhan.

⁹"Iamo' kudeng seburur lemulun maté denak-denak iringneh, pad ieh ngelutak abpukneh luk pijani' ineh, idi do' ieh ngiki uluhneh kareb aco luk inanneh uen ngeligan, ieh ineh aco luk ketudu'.

¹⁰Idi kareb aco luk kewaluh do' ieh nguit dueh suit sukur kian dueh suit limun kuan imam idi barén neneh munung tanga' Lepo su luk inan papu' Tuhan.

¹¹Idi do' imam maré sebuleng mangun ku baré ngaceku sala' idi sebuleng mangun ku baré sabpen, pad nganau' luk nguit pedo' kuanneh, ngaceku ieh pangeh mesala' ku butung ineh. Idi do' ieh ngeligan uluhneh kareb aco sineh teh.

¹²Idi do' ieh ngatad bururneh kuan Tuhan seruked aco luk pijani'neh, idi ieh nguit aceh anak dumba deléi luk ulun selak barén ngaceku kekamen luk dat. Idi amung aco luk atun na miak iapin, ngaceku ieh pangeh nengelutak abpukneh.

¹³"Idi ini ukum lun Nasiri ineh. Idi kareb aco luk pijani'neh mabud, do' ieh iten amé' munung tanga' Lepo su luk inan papu' Tuhan.

¹⁴Idi ieh miak maré aceh baré kuan Tuhan, ieh ineh aceh anak dumba deléi luk ulun selak luk do' mangun ku baré luk sabpen, idi sebuleng dumba tineh luk ulun selak luk do' mangun ku baré ngaceku sala', idi sebuleng dumba deléi luk do' mangun ku baré luk nguit pedo'.

¹⁵Idi do' ieh nguit aceh tayen luk inan ruti luk na linamud, ieh ineh pinaram luk inau' ratnan banak luk rinabur ku umau, idi tinapé luk na linamud luk linusi ku umau perapu ku baré akan idi baré luk rupan.

¹⁶"Idi imam miak maré ineh pa kiung Tuhan idi nguit baré ngaceku sala' idi baré luk sabpen ineh.

¹⁷Idi do' ieh maré kuan Tuhan dumba deléi ineh mangun ku baré luk nguit pedo', perapu dengan tayen luk inan ruti ineh. Idi do' imam maré baré akan idi baré luk rupan teh.

¹⁸Idi do' lun Nasiri ineh ngiki uluhneh munung tanga' Lepo su luk inan papu' Tuhan. Idi do' ieh ngalap abpuk luk pijani'neh ineh, idi ngerareng ineh luun apui luk inan ngeseb baré luk nguit pedo' ineh.

¹⁹"Idi kareb lip dumba deléi ineh pangeh tinanek, do' imam ngalap selipa lip ineh, sebalad pinaram idi sebuleng tinapé luk na linamud rat bang tayen ineh, idi barén bang palad lun Nasiri ineh.

²⁰Idi do' imam nicul ineh mangun ku baré luk tidulen pa kiung Tuhan. Ieh ineh aceh babpat luk meligan kuan imam, perapu dengan ruuk baré luk tidulen, tipan idi lip luk barén. Pangeh ineh lun luk pijani' ineh miak ngirup abpa' anggur.

²¹"Idi ini ukum kuan lun Nasiri luk pejani'. Iamo' kudeng seburur pejani' maré meluun ratnan luk litep miak barén, do' ieh nganau' maya' kudeng luk pijani'neh ineh."

²²Kebala Tuhan ni Musa,

²³"Do' mada' kuan Arun idi anak-anakneh, Kudeng ini dalan muyuh ngeperuan nelun Israil: kebala muyuh,

²⁴Do' Tuhan ngeperuan idi matar nemuyuh.

²⁵Do' Tuhan méi' idi mekatu nemuyuh.

²⁶Do' Tuhan mawa nemuyuh idi maré awang nemuyuh.

²⁷"Kudeng ideh sembayang kudeng ini pa kiung Tuhan kuan lun Israil, idi Ui miak ngeperuan nedeh."

Lap 7

¹Kareb Musa nemangeh Lepo su luk inan papu' Tuhan idi nengumau idi nengeligan ineh dengan amung repapehneh, idi teh bubpun dengan amung repapehneh,

²idi lun rayeh inul, ieh ineh lun rayeh pupu Israil luk nenganau' iap ineh,

³nenguit barédeh iné' pa kiung Tuhan, ieh ineh anem keréta luk inan apo idi pulu' dueh sapi', dueh burur lun rayeh lun Israil maré sebuleng keréta, idi anid bururdeh maré sebuleng sapi'.

⁴Kebala Tuhan ni Musa,

⁵"Do' iko ngalap amung baré ineh ku kekamen Lepo su luk inan papu' Tuhan. Idi maré amung ineh kuan lun Liwi maya' kekamendeh."

⁶Idi Musa nemaré sapi' idi keréta ineh kuan lun Liwi.

⁷Idi dueh keréta idi apat sapi' biréneh kuan lun pupu Gerson.

⁸Idi apat keréta idi ualuh sapi' biréneh kuan lun pupu Merari. Amung kekamendeh ineh pa liang imet Itamar anak Arun luk imam.

⁹Iamo' Musa na nemaré keréta idi sapi' kuan lun Kohat, ngaceku kekamendeh ineh nginita repapeh luk meligan luk ruendeh mirir.

¹⁰Idi lun rayeh-rayeh nemaré baré luk ngeligan bubpun ineh. Kareb ideh nengimun maré barédeh pa atun bubpun,

¹¹Idi kebala Tuhan ni Musa, "Do' ideh maré baré seburur seaco, pad ngeligan bubpun ineh."

¹²⁻⁸³Idih nemaré barédeh maya' lawé ini: Pupu, Lun Rayeh Inul; Yahuda, Nasun Aminadab; Iskar, Netanel Suar; Sebulon, Eliab Helon; Rubin, Elisur Sedur; Simion, Selumil Surisadai; Gad, Eliasap Ruel; Ephraim, Elisama Amihud; Manasé, Gamalil Pedasur; Benjamin, Abidan Gidioni; Dan, Ahiser Amisadai; Aser, Pagiél Okran; Naptali, Ahira Enan. Amung barédeh mepad mo', ieh ineh sebuleng bigan pirak, beratneh 130 balad pirak, idi sebuleng bigan pirak, beratneh 70 balad pirak, maya' balad pirak Su luk Meligan; dueh bigan ineh panu' ku banak luk rinabur ku umau, mangun ku baré akan; idi sebuleng bigan amas beratneh pulu' balad amas panu' ku umau luk do' buen; idi teh sebuleng anak sapi', sebuleng dumba deléi, idi sebuleng anak dumba deléi luk ulun selak mangun ku baré luk sabpen; idi sebuleng amék deléi mangun ku baré ngaceku sala'; idi teh dueh sapi' deléi, limeh dumba deléi,

limeh amék deléi, idi limeh anak dumba deléi luk ulun selak mangun ku baré luk nguit pedo'.

84-88 Kinula' baré luk inuit pulu' dueh burur lun rayeh ineh, luk ku ngeligan bubpun, ieh ineh: — pulu' dueh bigan pirak luk isuut, idi pulu' dueh bigan pirak luk rayeh, beratdeh 130 balad pirak Su luk Meligan — pulu' dueh bigan amas panu' ku umau luk do' buen, beratdeh 120 balad pirak Su luk Meligan — pulu' dueh sapi' deléi, pulu' dueh dumba deléi, idi pulu' dueh anak dumba luk ulun selak perapu dengan baré akan — pulu' dueh amék deléi barén ngaceku sala' — dueh ngepulu' apat sapi' deléi, anem ngepulu' dumba deléi, anem ngepulu' amék, anem ngepulu' anak dumba luk ulun selak ku baré luk nguit pedo'.

89 Idi anid kareb Musa nesemuet bang Lepo su luk inan papu' Tuhan, idi ieh neninger Tuhan pebala neneh rat pa luun kakeb su luk inan pedo', luk nan Pati' Pejani' rat arang dueh burur melaikat karub ineh.

Lap 8

1 Kebala Tuhan ni Musa,

2 "Do' mada' kuan Arun, kareb ieh nutud lapung, idi do' lapung luk tudu' ineh ngacang pa atun kukud dawan ineh."

3 Idi Arun nenganau' kudeng ineh, maya' kudeng luk icuk Tuhan ni Musa.

4 Idi kukud dawan ineh inau' ratnan amas luk tinuno, rat pa luun macing pa beneh maya' kudeng luk icuk Tuhan ni Musa.

5 Kebala Tuhan ni Musa,

6 "Do' ngatad amung lun Liwi rat arang lun Israil idi ngeligan nedeh.

7 Idi kudeng ini lawému ngeligan nedeh. Mubpur nedeh ku abpa' luk ku maru' nedeh ratnan sala'. Do' ideh mingit amung bururdeh idi mupu' ayungdeh pad ideh meligan.

⁸Do' lun Liwi ineh ngalap sebuleng sapi' deléi luk pegawa' perapu dengan banak luk rinabur ku umau mangun ku baré akan, idi iko ngalap sebuleng sapi' deléi teh mangun ku baré ngaceku sala'.

⁹Idi do' iko nguit nelun Liwi ineh pa atun Lepo su luk inan papu' Tuhan, idi do' iko ngamung amung lun Israil.

¹⁰Idi do' lun Israil ngerareng tiku'deh luun uluh lun Liwi ineh.

¹¹Idi Arun miak maré nelun Liwi pa kiungKu, mepad kudeng baré luk tidulen rat nelun Israil, pad ideh miak ngakem kuanKu.

¹²Pangeh ineh lun Liwi miak ngerareng tiku'deh luun uluh dueh sapi' deléi ineh, idi do' iko maré sebuleng mangun ku baré ngaceku sala', idi sebuleng barén ku baré luk sabpen kuan Tuhan, pad nganau' luk nguit pedo' kuan lun Liwi ineh.

¹³"Idi do' iko nguit nelun Liwi ineh amé' pa kiung Arun idi anak-anakneh. Idi do' iko maré nedeh ineh mangun ku baré luk tidulen kuan Tuhan.

¹⁴Kudeng ini lawému ngatad nelun Liwi ineh rat arang lun Israil, pad amung lun Liwi ineh kuanKu.

¹⁵Kareb iko pangeh nengeligan nedeh idi pangeh nemaré nedeh mangun ku baré luk tidulen, do' lun Liwi amé' ngakem bang Lepo su luk inan papu' Tuhan.

¹⁶Ngaceku ideh pangeh biré kuanKu rat arang lun Israil ku libal amung lun Israil luk atun.

¹⁷Ngaceku amung anak lun Israil luk atun Ui kuan, do' lemulun idi aya' pana'. Kareb aco luk inanKu nengaté amung anak luk atun déi bawang Masir, idi Ui pangeh nengeligan nedeh kuanKu.

¹⁸Idi Ui pangeh nengalap nelun Liwi ineh ku libal amung anak lun Israil luk atun.

¹⁹Idi Ui pangeh nemaré nelun Liwi rat arang lun Israil ineh kuan Arun idi anak-anakneh, pad ideh ngakem kuan lun Israil bang Lepo su luk inan papu'

Tuhan, idi nganau' luk nguit pedo' kuandeh, pad na luk idi ét luk mebura' arang lun Israil kareb ideh amé' muneng ku Su luk Meligan.”

²⁰Musa, Arun, idi amung lun Israil nenganau' amung ineh kuan lun Liwi, maya' kudeng luk icuk Tuhan ni Musa.

²¹Idi lun Liwi nengeligan bururdeh ratnan sala' idi nemupu' ayungdeh. Idi Arun nemaré nedeh mepad kudeng baré luk tidulen pa kiung Tuhan. Idi Arun nenganau' luk nguit pedo' kuandeh, pad ideh meligan.

²²Pangeh ineh idi lun Liwi iné' ngakem bang Lepo su luk inan papu' Tuhan, pa liang imet Arun idi anak-anakneh, maya' kudeng luk icuk Tuhan ni Musa.

²³Kebala Tuhan ni Musa,

²⁴"Do' amung lun Liwi luk ulun dueh ngepulu' limeh lak idi mela, ngakem bang Lepo su luk inan papu' Tuhan.

²⁵Iamo' do' amung lun luk ulun limeh ngepulu' lak ugka' ratnan kekamen ineh.

²⁶Iamo' ideh miak ngedengan kinanakdeh luk ngakem bang Lepo su luk inan papu' Tuhan. Kudeng ineh luk ruenmu kuan lun Liwi."

Lap 9

¹Kebala Tuhan ni Musa déi' su luk ali-ali déi' Sinai, bang bulan aceh, lak luk kedueh, kareb lun Israil pangeh neremuat rat bang bawang Masir,

²"Do' lun Israil temina' nganau' Aco Rayeh Paska,

³ieh ineh pa malem pulu' apat aco bulan ini, idi do' maya' amung dalam idi ukum luk pangeh litep.”

⁴Idi Musa nengecuk nelun Israil nganau' kudeng ineh.

⁵Idi ideh nenganau' irau ineh pa malem pulu' apat aco bulan aceh ineh, déi' su luk ali-ali déi' Sinai, maya' kudeng amung luk icuk Tuhan ni Musa.

⁶Iamo' inan tuda'-tuda' burur luk melutak ngaceku nengakem butung lemulun, pad ideh na miak nganau' irau bang aco sineh. Idi ideh iné' papu' ni Musa idi Arun bang aco sineh teh.

⁷Kebaladeh nedidueh, "Kai ini pangeh nelutak ku butung lemulun. Ngudehké kai na miak maré aceh baré kuan Tuhan bang kareb luk litep dengan amung lun Israil?"

⁸Kebala Musa nedeh, "Nganét atun, pad ui ninger kudeng apeh bala Tuhan."

⁹Kebala Tuhan ni Musa,

¹⁰"Do' mada' kuan amung lun Israil, Kudeng inan rat arang muyuh idi rat arang amung anak mupun muyuh luk nelutak ngaceku nengakem butung lemulun, idi kian inan luk pangeh nenalan iné' mado, do' ideh na nganau' Irau Paska bang aco sineh.

¹¹Iamo' pa malem pulu' apat aco bulan dueh, do' ideh irau, idi kuman ruti luk na linamud, idi irin luk mepét teh.

¹²Idi aleg necan elaneh macing kenebpa. Idi teh aleg mutul tulangneh, maya' amung dalan idi ukum Irau ineh.

¹³Iamo' kudeng inan lemulun luk meligan luk tudo, idi na ieh nganau' Irau ineh, ieh miak duken buro rat arang pupuneh, ngaceku na ieh maré baré kuan Tuhan bang kareb luk pangeh litep. Idi ieh miak mabeh sala'neh.

¹⁴"Idi kudeng inan lun sakai luk tudo arang muyuh, do' ieh nganau' Irau Paska kuan Tuhan, maya' dalan idi ukumneh. Idi sebuleng dalan mo' kuan muyuh, do' lun sakai idi muyuh luk kuan bawang teh."

¹⁵⁻¹⁶Idi kareb aco luk inan nemudut Lepo su luk inan papu' Tuhan, idi inan aceh laput nengakeb Lepo ineh. Idi kareb malem, laput ineh mepad kudeng apui.

¹⁷Idi idan-idan kareb laput ineh kemikit rat pa luun Lepo ineh, idi teh lun Israil nalan rat ieneh. Idi su luk inan laput ineh nugka' su ineh teh inan lun Israil nelupo.

¹⁸Idi ratnan ecuk Tuhan lun Israil nalan. Idi ratnan ecuk Tuhan teh ideh nelupo. Idi seruked laput ineh ungeng pa luun Lepo su luk inan papu' Tuhan, ideh pana' tudo teh.

¹⁹Idi sagan tu pana' laput ineh mio su ineh, iamo' lun Israil nemaya' bala Tuhan idi na ideh nalan.

²⁰Rabpu'-rabpu' laput ineh na mio pa luun Lepo ineh, iamo' ideh nelupo maya' ecuk Tuhan, idi nalan maya' ecuk Tuhan teh.

²¹Idi rabpu'-rabpu' laput ineh ugka' sealem mo', idi kareb laput ineh kemikit, ideh nalan. Kareb laput ineh kemikit, do' macang idi medacem teh idi ideh pana' nalan.

²²Sagan pana' dueh aco, sebulan, idi selak kinioneh laput ineh na kemikit, idi lun Israil pana' nateh nalan. Iamo' kareb laput ineh kemikit idi teh ideh nalan.

²³Ratnan ecuk Tuhan ideh nelupo. Idi ratnan ecuk Tuhan teh ideh nalan. Ideh maya' ukum luk bida' Tuhan ni Musa.

Lap 10

¹Kebala Tuhan ni Musa,

²"Do' iko nuno dueh serupit pirak ku nawar nelun Israil idi ku ngecuk nedeh nalan.

³Idi kareb dueh serupit ineh muni amung lun Israil amé' namu pa atun tanga' Lepo su luk inan papu' Tuhan.

⁴Idi kudeng sebuleng serupit muni, do' amung lun rayeh pupu lun Israil amé' namu.

⁵Kareb muyuh ngiup serupit do' ngiup neneh pani'-pani', idi ideh luk tudo pa busat aco nalan.

⁶Idi kareb muyuh ngiup luk kedueh kua', idi ideh luk tudo pa kabing busat aco nalan. Idan-idan kareb iko ngiup kudeng ineh, idi ideh miak nalan.

- ⁷Iamo' kareb muyuh nawar nedeh pamung, muyuh miak ngiup serupit mo', iamo' aleg ngiup pani'-pani'.
- ⁸Idi luk ngiup serupit, ieh ineh anak-anak Arun luk imam. "Idi ini aceh dalam luk meruked macing ku anak inul muyuh.
- ⁹Kareb muyuh amé' pebunu' inan bunu' luk ngedereh nemuyuh bang bawang muyuh, do' ngiup serupit ineh pani'-pani', pad Tuhan Allah muyuh miak ngerawé nemuyuh iding ulun nemuyuh ratnan bunu' muyuh.
- ¹⁰Kudeng ineh teh kareb irau muyuh, bang aco rayeh luk litep, idi pun bulan, do' muyuh ngiup serupit ineh kareb muyuh maré baré luk sabpen, idi baré luk nguit pedo', pad Allah miak ngerawé nemuyuh. Ui ini Tuhan Allah muyuh."
- ¹¹Idi dueh ngepulu' aco bulan dueh, bang lak luk kedueh, idi laput ineh nekemikit rat pa luun Lepo su luk inan papu' Tuhan ineh.
- ¹²Idi lun Israil nenalan rat Sinai déi' su luk ali-ali. Idi laput ineh nugka' déi' su luk ali-ali déi' Paran.
- ¹³Idi ini lawédeh luk pun-pun maya' ecuk Tuhan ni Musa.
- ¹⁴Idi baweh Yahuda dengan bedéra'deh nenalan atun; idi lun rayehdeh, Nason Aminadab.
- ¹⁵Idi lun rayeh baweh Iskar, ieh ineh Netanel Suar.
- ¹⁶Idi lun rayeh baweh Sebulon, ieh ineh Eliab Helon.
- ¹⁷Kareb Lepo ineh pangeh inusag, idi lun Gerson idi lun Merari luk nenguit Lepo ineh nenalan.
- ¹⁸Idi baweh Rubin dengan bedéra'deh nenalan. Idi lun rayehdeh, Elisur Sedur.
- ¹⁹Idi lun rayeh baweh Simion, Selumil Surisadai.
- ²⁰Idi lun rayeh baweh Gad, Eliasap Ruel.

- ²¹Idi lun Kohat nenalan idi nenguit repapeh luk meligan. Idi Lepo su luk inan papu' Tuhan pangeh pinudut kareb nateh ideh nacing.
- ²²Idi baweh Epraim dengan bedéra'deh nenalan idi lun rayehdeh, Elisama Amihud.
- ²³Idi lun rayeh Manasé, ieh ineh Gamalil Pedasur.
- ²⁴Idi lun rayeh Benjamin, ieh ineh Abidan Gidioni.
- ²⁵Idi baweh Dan dengan bedéra'deh pa mucu. Idi lun rayehdeh, Ahisar Amisadai.
- ²⁶Idi lun rayeh Aser, ieh ineh Pagiel Okran.
- ²⁷Idi lun rayeh Naptali, ieh ineh Ahira Enan.
- ²⁸Kudeng ineh lawé baweh lun Israil.
- ²⁹Idi kebala Musa ni Hobab luk anak ibanneh, Ruel lun Midian, "Kai nalan amé' inan bawang luk bida' Tuhan kuan kai. Ngaceku ineh do' amé' maya' nekai. Idi kai miak nganau' luk do' kuanmu. Ngaceku Tuhan pangeh nepejani' nganau' luk do' kuan lun Israil."
- ³⁰Iamo' Hobab nengor balaneh, "Na ui amé'. Ngaceku ui pian muli' amé' bawangku, idi nan pupuku sebuleng."
- ³¹Idi kebala Musa, "Aleg iko necan nekai. Ngaceku iko kali' su luk inan tau lupu déi' su luk ali-ali. Idi iko luk nguyut nekai.
- ³²Idi kudeng iko amé' maya' nekai, anun-anun luk do' luk ruen Tuhan kuan kai kudeng ineh teh luk ruen kai kuanmu."
- ³³Idi ideh nenalan rat pegkung Tuhan teluh aco kinioneh, idi Pati' Pejani' Tuhan iné' atun, pad nier su luk inandeh lupu.
- ³⁴Idi laput Tuhan idi pa luundeh kareb macang, idan-idan kareb ideh nalan rat su luk inandeh nelupo.

³⁵Idi idan-idan, kareb Pati' Pejani' ineh nalan idi Musa pebala, "Miket, O Tuhan! Nima' amung bunu'Mu urap-urap, idi amung luk megateh Namu buro rat pa kiungMu."

³⁶Idi kareb Pati' Pejani' ineh ucu' ieh pebala, "Lemubed, O Tuhan, amé' inan pulu' ngeribu tetek ruma' lun Israil."

Lap 11

¹Idi lun mula' ineh ngedureng pa kiung Tuhan, ngaceku susa'deh. Idi kareb Tuhan neninger durengdeh, idi Ieh museh. Idi apui ratnan Tuhan nulun arangdeh idi nengeseb sebuang lepodeh.

²Idi ideh nengitang nawar ni Musa. Idi Musa nesembayang inan Tuhan. Idi apui ineh pana' milep.

³Idi ideh neneten su ineh Neseb, ngaceku apui ratnan Tuhan nulun arangdeh.

⁴Idi lun baken luk nemaya' nedeh melili ku akan luk do'. Idi lun Israil nenangi' teh, kebaladeh, "Kai pelaba pian ku luk kikid!

⁵Kai ngerawé lawid luk kinan kai déi' bawang Masir dengan na belih, idi amung timun, bua' tecak, bua' bawang luk rayeh, bua' bawang sia', idi bua' bawang buda'.

⁶Iamo' nekini kai pelaba laya'. Idi na luk idi anun-anun luk baken, iamo' manna ini mo' sebuleng."

(⁷Idi manna ineh mepad kudeng ilung binamud, idi kudeng ilu' luk mesilo.

⁸Idi lun Israil iné' ngalap ineh. Idi ideh nenganau' ineh ku banak idi nenanek ineh ku tinapé. Idi énnéh mepad kudeng én ruti luk didang dengan umau saitun.

⁹Idi manna ineh nebpeh perapu dengan ipup, su luk inandeh nelupo, kareb medacem.)

¹⁰Musa neninger amung-amung lun Israil nengedureng, idi ideh tuped munung tanga' lepodeh. Idi Tuhan pelaba useh idi Musa pelaba dat niat.

- ¹¹Idi kebala Musa inan Tuhan, "Ngudehké Iko nganau' luk dat kuanku. Ngudehké Iko na méi' negku, idi na ngalap babeh amung pupu ini rat negku?
- ¹²Uiké tinar pupu ini? Uiké luk nenganak nedeh, pad Iko ngecuk negku ngabin nedeh mepad kudeng decur luk niti' anak, idi nguit nedeh amé' bawang luk pangeh pijani'Mu kuan tamandeh?
- ¹³Idi rat iapeh ui miak ngalap kikid barén kuan amung pupu ini? Ngaceku ideh nangi' negku idi pebala, 'Maré kikid nekai, pad kai miak kuman.'
- ¹⁴Na ui miak mabeh amung pupu ini, ngaceku ineh pelaba berat kuanku.
- ¹⁵Kudeng Iko nganau' kudeng ineh kuanku, meluun do' Iko ngaté negku. Kudeng Iko méi' negku, aleg ngedereh negku."
- ¹⁶Kebala Tuhan ni Musa, "Ngamung tudu' ngepulu' burur rat arang lun rayeh lun Israil kuanKu, ieh ineh lun rayeh luk inanmu merapet, idi nguit nedeh amé' inan Lepo su luk inan papu' Tuhan, pad ideh tured denganmu su ineh.
- ¹⁷Idi Ui miak temurun idi pebala namu ieneh. Idi Ui miak ngalap ratnan Roh luk namu ineh idi ngerareng ineh nedeh, pad ideh ineh mabeh dereh pupu ineh, perapu denganmu, pad iko na mabeh ineh sebuleng.
- ¹⁸Idi do' iko mada' kuan pupu ini, 'Ngeligan burur muyuh kuan pekak nepba. Idi muyuh miak kuman uang. Ngaceku tangi' muyuh pindenger Tuhan, kebala muyuh, "Idéké luk miak maré kikid kenen kai? Idi pelaba do' kai déi' bawang Masir." Ngaceku ineh Tuhan miak maré kikid kenen muyuh. Idi muyuh miak kuman ineh.
- ¹⁹Muyuh na miak kuman ineh seaco, dueh aco, limeh aco, pulu' aco, dueh ngepulu' aco kinione,
- ²⁰iamo' sebulan, pad macing ieh remuat rat bang icung muyuh idi muyuh mesukol ku ineh, ngaceku muyuh pangeh nengedat Tuhan luk arang muyuh, idi muyuh pangeh nengedureng pa kiungNeh, kebala muyuh, "Anun pun kai remuat rat bang bawang Masir?" ' ' “

- ²¹Kebala Musa inan Tuhan, "Kinula' lemulun luk maya' negku 600,000 burur, idi kebala Tuhan, 'Ui miak maré luk kikid kuandeh, tap kenen sebulan!'
- ²²Miakké dumba idi sapi' petap kereten kuandeh? Miakké amung lawid luk bang abpa' petap kuandeh?"
- ²³Iamo' kebala Tuhan ni Musa, "Naké lalud Tuhan petap? Nekini iko miak nier kudeng balaKu matu ku na."
- ²⁴Idi Musa neremuat idi ieh nengacing amung bala Tuhan ineh kuan lun Israil. Idi ieh nengamung tudu' ngepulu' burur rat arang amung lun rayeh pupu ineh. Idi ieh nengecuk nedeh tuped libut Lepo su luk inan papu' Tuhan.
- ²⁵Idi Tuhan netemurun bang laput ineh idi nepebala neneh. Idi Tuhan nengalap ratnan Roh luk ni Musa, idi ieh nemaré ineh kuan tudu' ngepulu' lun rayeh ineh. Kareb Roh ineh pana' iné' nedeh, idi ideh nengimun mada' luk biré Roh. Iamo' ideh nenganau' kudeng ineh sekua' mo'.
- ²⁶Iamo' inan dueh burur rat arang tudu' ngepulu' lun rayeh ineh neketecan su luk inandeh nelupo, ieh ineh Eldad idi Midad. Idi Roh iné' nedidueh, sagan tu pana' didueh na iné' bang Lepo su luk inan papu' Tuhan. Idi didueh ineh nemada' luk biré Roh déi' su luk inandeh nelupo.
- ²⁷Idi seburur anak adi' nupun mada' ni Musa ratnan luk ruen Eldad idi Midad.
- ²⁸Idi Yusak Nun luk ngakem dengan Musa rat isuut, nepebala, "O Musa, do mebpeng nedidueh."
- ²⁹Iamo' kebala Musa neneh, "Ngudehké iko megagau ngaceku ui? Meluun do' amung pupu Tuhan mangun ku nabi, pad Tuhan maré RohNeh nedeh!"
- ³⁰Pangeh ineh idi Musa dengan tudu' ngepulu' lun rayeh lun Israil nelemubed iné' su luk inandeh nelupo.
- ³¹Idi inan aceh bui ratnan Tuhan luk nenguit tuda'-tuda' suit tetibung rat pa acep aco, idi ideh temulud su luk inan lun Israil nelupo, idi kiado inandeh temulud miak delanin bang seaco, idi kidita' tuluddeh rat luun tana' teluh kaki.

³²Idi ideh iné' ngalap suit tetibung ineh tebaco kedangan, idi tebaco kenebpa teh. Ideh luk mulai alap ngalap limeh ngeratu gatang mo'. Idi ideh nemidang ineh libut su luk inandeh nelupo.

³³Idi kareb nateh ideh nekuman suit ineh, idi Tuhan pelaba useh nedeh. Idi Tuhan nengacing aceh ét luk pelaba bura' kuandeh.

³⁴Ngaceku ineh ideh neneten su ineh "Lengutan Lili," ngaceku su ineh ideh nenanem amung lemulun luk melili.

³⁵Idi rat "Lengutan Lili" ineh ideh nenalan iné' déi' Hasirot, idi nelupo su ineh.

Lap 12

¹Idi Miriam idi Arun nengedat ni Musa, ngaceku ieh nengaweh aceh decur lun Kusi.

²Idi kebala didueh "Baken Musa mo' inan Tuhan nepebala. Kiteh pana' inan Tuhan nepebala teh!" Idi Tuhan neninger bala ini.

(³Idi Musa ineh aceh lemulun luk pelaba beneh niat rat nelun baken.)

⁴Idi denak-denak Tuhan nepebala ni Musa, Arun, idi Miriam, "Remuat meteluh amé' bang Lepo su luk inan papu' Tuhan." Idi diteluh pana' neremuat.

⁵Idi Tuhan netemurun bang laput idi netuped munung tanga' Lepo, idi Ieh nenawar ni Arun idi Miriam. Idi didueh iné' pa atunNeh.

⁶Idi kebala Tuhan, "Ninger medueh balaKu ini! Kudeng inan nabi Tuhan arang muyuh, Ui ini Tuhan ngelagan bururKu neneh bang luk sireneeh, idi pebala neneh bang nupineh.

⁷Iamo' demulunKu Musa baken nabi luk kudeng ineh. Iamo' ieh luk inanKu merapet bang ruma'Ku.

⁸Idi Ui pebala petutup neneh, dengan bala luk megala', baken dengan luk pinginud. Idi ieh pangeh nenier ayuKu. Kudeng apeh medueh na matot ngedat ni Musa demulunKu ini?"

⁹Idi Tuhan pelaba useh nedidueh. Idi pangeh ineh Ieh neburo peh.

¹⁰Idi kareb laput ineh nekemikit rat pa luun lepo ineh, idi Miriam neketukan ét susud, idi bururneh mebuda' mepad kudeng salju ku ét ineh. Kareb Arun nelumi nenier ni Miriam, idi ieh nekali' neneh nekaneh ét susud.

¹¹Idi kebala Arun ni Musa, "O Tuan, aleg ngukum nekai ngaceku kai nenganau' luk mebacé idi sala' teh.

¹²Aleg nima' neneh kudeng anak naté, rat bang batek tinanneh, pad supa bururneh melu."

¹³Idi Musa nesembayang nan Tuhan, kebalaneh, "O Allah, ui mutuh Namu ngedo' neneh."

¹⁴Iamo' kebala Tuhan ni Musa, "Kudeng tamanneh pangeh nengelica' kiungneh, naké ieh migu' tudu' aco kinioneh? Ngaceku ineh do' ngata neneh tudu' aco kinioneh petatang rat su luk inan nelupo. Pangeh ineh miak ngalap neneh."

¹⁵Idi Miriam pana' ita tudu' aco kinioneh petatang rat su luk inan nelupo. Idi ideh na nalan rat ieneh kareb nateh Miriam pangeh ilap.

¹⁶Muci ratnan ineh idi ideh nenalan rat Haserot. Idi ideh nelupo déi' Paran déi' su luk ali-ali.

Lap 13

¹Kebala Tuhan ni Musa,

²"Do' iko ngecuk nelun amé' nier bawang Kanaan luk barénKu kuan lun Israil; ratnan anid-anid inul tamandeh, do' iko ngecuk seburur deléi, idi do' amungdeh lun luk mileh nguyut."

³⁻¹⁵Idi Musa nemaya' bala Tuhan ineh, idi rat su luk ali-ali déi' Paran, ieh nengecuk lun rayeh ini nalan: Pupu, Lun Rayeh Inul; Rubin, Samua Sakur; Simion, Sapat Hori; Yahuda, Kaleb Yepuneh; Iskar, Igal Yusup; Epraim, Hosia Nun; Beniamin, Palti Rapu; Sebulon, Gadiel Sodi; Manasé, Gadi Susi; Dan, Amiel Gemali; Aser, Setur Mikail; Naptali, Nahbi Wapsi; Gad, Guel Maki.

¹⁶Idi ini ngadan amung lun luk icuk Musa iné' nier bawang. Idi Hosia Nun titen Musa, Yusak.

¹⁷Kareb Musa nengecuk nedeh nalan, idi kebalaneh nedeh, "Do' muyuh nalan rat ieni amé' Negeb idi uké pegkung,

¹⁸idi nier kudeng apeh ayu bawang ineh, idi kudeng apeh lun luk tudo bang ineh, metueh ku melaya', mula' ku pawa',

¹⁹idi kudeng apeh tana' ineh su luk inandeh, do' ku dat. Idi kudeng apeh bawang ineh su luk inandeh tudo, inan ar ku na,

²⁰idi teh kudeng apeh ayu tana ineh, mebaleng ku metugeh, inan kayuh ku na. Idi do' muyuh mekuu' idi nguit bua' rat bang bawang ineh." (Ngaceku ini kareb bua' anggur pun melak.)

²¹Idi ideh nenalan idi iné' nier tana' ineh rat su luk ali-ali déi' Sin macing déi' Rihab muneng ku bawang Hamat.

²²Ideh nenalan rat Negeb macing Hebron; idi Ahiman, Sesai, idi Talmai luk inul Enak idi déi' Hebron. (Idi bawang Hebron ineh pinudut tudu' lak atun ratnan bawang Soan déi' Masir.)

²³Idi kareb ideh nacing déi' Ruan Eskol, ideh nenutu' sengerunguh bua' anggur. Idi dueh burur nemirir ineh. Idi teh ideh nenguit bua' delima idi bua' gita'.

(²⁴Idi ideh neneten ngadan su ineh Ruan Runguh Bua' Anggur. Ngaceku su ineh inan lun Israil nenutu' sengerunguh bua' anggur.)

²⁵Idi ideh nenier bawang ineh apat ngepulu' aco kinioneh, idi pangeh ineh ideh nelemubed.

²⁶Idi ideh iné' papu' ni Musa idi Arun, idi amung lun Israil déi' su luk ali-ali déi' Paran bang bawang Kadis. Idi ideh nengacing bala kuandeh, idi kuan amung lun Israil, idi nemada' bua' rat bawang ineh sirendeh.

²⁷Idi keburideh ni Musa, "Kai pangeh nacing inan bawang luk icukmu iné' sira' kai, idi tana' su ineh mebaleng. Idi ini bua' ratnan tana' ineh.

²⁸Idi teh lemulun luk tudo bang bawang ineh mesangit, idi bawangdeh pelaba rayeh idi inar teh. Idi teh kai pangeh nenier inul Enak luk rayeh burur idi medita' déi'.

²⁹Idi lun Amalek tudo déi' tana' Negeb. Idi lun Hiti, lun Yebusi, idi lun Amori tudo luun pegkung. Idi lun Kanaani tudo tangeb Abpa' Rayeh idi tangeb Abpa' Yarden teh.”

³⁰Idi Kaleb nengecuk nelun Israil ineh pirud pa kiung Musa, kebalaneh, "Do' tau nalan nekini idi ngaro tana' ineh. Ngaceku kali' rungen tau miak ngelaya' nedeh.”

³¹Iamo' kebaladeh luk iné' maya' ni Kaleb, "Na mepelengit tau pupu ineh. Ngaceku ideh ineh meluun tueh rat netau.”

³²Idi ideh nengacing bala luk dat kuan lun Israil ratnan bawang luk pangeh sinierdeh ineh. Kebaladeh, "Bawang luk iné' sira' kai, ieh ineh aceh bawang luk kuman lemulun. Idi amung lemulun luk sinier kai bang bawang ineh pelaba rayeh burur idi medita'.

³³Idi kai nenier lemulun luk pelaba rayeh burur, ieh ineh inul Enak, idi kai nenier burur kai mepad kudeng kato, idi kudeng ineh teh ayu kai sirendeh.”

Lap 14

¹Idi amung lun Israil nengitang idi nenangi' kedangan-kedangan.

²Idi amungdeh tekedamut ni Musa idi Arun. Kebaladeh nedidueh, "Meluun do' kai maté déi' bawang Masir, idi su luk ali-ali ini.

³Ngudehké Tuhan nguit netau amé' bang bawang ini pad tau pitayen mo'-mo', idi awan tau idi anak tau tebanen lun. Meluun do' tau lemubed amé' bawang Masir.”

⁴Idi kebaladeh arangdeh sebuleng, "Do' tau mili' seburur mangun ku lun rayeh tau idi lemubed amé' bawang Masir.”

⁵Idi kareb ineh Musa idi Arun netekeradung pa kiung amung lun Israil.

- ⁶Iamo' Yusak Nun idi Kaleb Yepuneh luk rat arangdeh luk iné' nier bawang ineh teh nengedarak kuyu' didueh sebuleng,
- ⁷idi kebala didueh kuan lun Israil, "Bawang luk iné' sira' ineh aceh bawang luk pelaba do'.
- ⁸Idi kudeng Tuhan mawang niat ku tau, kali' rungen Ieh nguit netau amé' bawang ineh, idi maré ineh netau. Ieh ineh aceh tana' luk mebaleng.
- ⁹Iamo' aleg muyuh ngedat Tuhan. Idi aleg muyuh matot ku lemulun luk kuan bawang ineh. Tau miak ngelaya' nedeh, ngaceku Tuhan idi dengan tau idi akangdeh pangeh inusagNeh. Aleg muyuh matot nedeh."
- ¹⁰Iamo' amung lun Israil ineh perurum pian mitung nedidueh ku batu. Iamo' lun Israil nenier rasat Tuhan bang Lepo su luk inan papu' Tuhan.
- ¹¹Idi kebala Tuhan ni Musa, "Tuda' ioké pupu ini ngedat Negku? Tuda' io teh ideh na maya' Negku, sagan tu pana' inan mula' tanu' luk inau'Ku arangdeh?"
- ¹²Idi Ui pian ngacing ét luk mebura' kuandeh, idi nala' nedeh. Iamo' Ui nganau' namu mangun ku aceh pupu luk meluun rayeh idi meluun tueh ratnan pupu ini."
- ¹³Idi kebala Musa inan Tuhan, "Kudeng pieh kudeng ineh kali' rungen lun Masir kali' ineh mucu, ngaceku Iko nenguit pupu ini remuat rat arangdeh dengan laludMu.
- ¹⁴Idi ideh miak mada' ineh kuan lun bang bawang ini. Ngaceku Iko, Tuhan, idi arang pupu ini. Idi Iko sinier matehdeh sebuleng. Idi laputMu ungeng pa luundeh. Idi Iko amé' pa atundeh, kudeng laput kareb macang, idi kudeng apui kareb medacem.
- ¹⁵Idi kudeng Tuhan ngaté amung pupu ini, kali' rungen amung pupu baken luk pangeh neninger bala ratnan Iko miak pebala,
- ¹⁶'Ngaceku Tuhan na miak nguit pupu ini amé' bang bawang luk pangeh pijani'Neh nedeh, idi Ieh nengaté nedeh déi' su luk ali-ali.'

¹⁷Idi nekini, nima' lalud Tuhan uen ngerayeh maya' kudeng luk bilaMu, ieh ineh,

¹⁸Ui ini Tuhan mekadang niat idi rayeh awa idi maré do' ku dat idi sala'. Iamo' lemulun luk na mepuit ratnan sala' na miak puatin ratnan ukum. Iamo' dat taman-taman uénKu nan anak-anakneh macing ku inul luk keteluh idi luk keapat.'

¹⁹Maré do' ku amung dat pupu ini maya' éi'Mu luk rayeh. Ngaceku Tuhan pangéh nemaré do' kuan pupu ini rat bawang Masir macing bang bawang ini."

²⁰Idi kebala Tuhan, "Ui pangéh nemaré do' kuandeh maya' kudeng putuhmu ineh.

²¹Iamo' ngaceku Ui ini mulun, idi aput tana' miak mepanu' ku ubur Tuhan.

²²Ngaceku seburur pana' rat arang amung lemulun luk pangéh kali' rasatKu, idi amung tanu' luk pangéh inau'Ku déi' Masir, idi déi' su luk ali-ali, idi luk pangéh nutun Negku macing pulu' kua', idi luk na sikal ninger balaKu,

²³na tu-tu ideh miak nier bawang ineh luk pangéh pijani' kuan tepundeh. Amung lemulun luk pangéh nengedat Negku na miak nier bawang ineh.

²⁴Iamo' ngaceku demulunKu Kaleb inan terawé luk baken, idi ieh pangéh lutep maya' Negku, idi Ui miak nguit neneh amé' bawang luk ulekneh, idi inulneh pana' miak ngimet bawang ineh.

²⁵Idi nekini lun Amalek idi lun Kanaani tudo bang ruan. Do' muyuh lemubed nebpa idi nalan amé' su luk ali-ali matun Abpa' Pisui."

²⁶Kebala Tuhan ni Musa idi Arun,

²⁷"Tuda' ioké pupu luk dat ini tekedamut Negku? Idi amung dureng lun Israil Negku Ui pangéh kali'.

²⁸Mada' kuandeh: Bala Tuhan kudeng ini, 'Ngaceku Ui ini mulun, idi Ui miak nganau' kuan muyuh maya' kudeng bala luk pangéh pindengerKu rat nemuyuh.

²⁹Butung muyuh miak telubid bang su luk ali-ali ini, idi amung muyuh luk pangeh iniap luk rat ulun dueh ngepulu' lak idi mela idi luk netekedamut Negku,

³⁰na tu-tu muyuh miak semuet bang bawang luk pangeh pijani'Ku nemuyuh, iamo' Kaleb Yepuneh idi Yusak Nun luk miak semuet mo'.

³¹Iamo' Ui miak nguit anak-anak muyuh luk bila muyuh miak tebanen, pad ideh kali' bawang luk dinat muyuh ineh.

³²Iamo' muyuh miak maté bang su luk ali-ali ini.

³³Idi anak-anak muyuh miak mangun ku lun matar dumba, apat ngepulu' lak kinioneh tungé' su luk ali-ali ini, idi medereh ku sala' muyuh pad muyuh mabud naté bang su luk ali-ali ini.

³⁴Maya' kinula' aco muyuh luk iné' nier bawang ineh, ieh ineh apat ngepulu' aco, seaco mepad kudeng selak. Ngaceku ineh muyuh miak mabeh sala' muyuh apat ngepulu' lak kinioneh, pad muyuh kali' usehKu.'

³⁵Ngaceku Ui ini Tuhan luk nepebala. Kali' rungen Ui nganau' ini kuan amung pupu luk dat ini luk pangeh perurum ngedat Negku. Ideh miak mabud maté déi' su luk ali-ali ineh."

³⁶Idi amung lun luk icuk Musa iné' nier bawang ineh nenganau' pupu ineh netekedamut inan Tuhan, ngaceku bala luk dat luk inuitdeh.

³⁷Idi Tuhan nemaré aceh ét luk mebura' kuandeh, pad ideh naté.

³⁸Iamo' Yusak Nun idi Kaleb Yepuneh mo' mulun rat arang pulu' dueh burur luk pangeh iné' nier bawang ineh.

³⁹Idi kareb Musa nengacing amung bala ini kuan lun Israil, idi ideh pelaba tangi'.

⁴⁰Idi ideh nekulat uka-uka idi iné' luun pegkung, idi kebaladeh, "Nekini tau sikal amé' inan bawang luk pijani' Tuhan kuan tau. Kali' rungen tau pangeh mesala'."

⁴¹Iamo' kebala Musa, "Ngudehké muyuh pian ngelaba bala Tuhan? Kali' rungen na ulekneh.

⁴²Aleg muyuh amé' ngaceku Tuhan na idi arang muyuh, pad muyuh na uen bunu' muyuh ngelaya'.

⁴³Ngaceku lun Amalek idi lun Kanaani idi pa atun muyuh. Idi muyuh miak pitayendeh, ngaceku Tuhan na idi dengan muyuh. Ngaceku muyuh pangeh neteketed ratnan Tuhan."

⁴⁴Iamo' ideh nesumaad iné' luun pegkung ineh sagan pana' Pati' Pejani' Tuhan idi Musa na nenalan rat su luk inandeh nelupo.

⁴⁵Idi lun Amalek idi lun Kanaani luk tudo luun buduk pegkung netemurun. Idi ideh nepebunu' nedeh idi nengelaya' nedeh idi ideh nengerada' nedeh macing déi' Horma.

Lap 15

¹Kebala Tuhan ni Musa,

²"Mada' kuan lun Israil: Kareb muyuh macing inan bawang luk biréKu nemuyuh,

³Idi muyuh miak maré baré luk sabpen kuan Tuhan, ieh ineh ratnan sapi' kian dumba lek, ieh ineh baré sabpen, baré kereten, baré ngaceku pejani', baré mawang niat, idi baré ngaceku ngerayeh aco, mangun ku luk do' buen kuan Tuhan.

⁴Idi idé luk maré baréneh kuan Tuhan, do' ieh nguit tudu' lio banak luk rinabur ku seseréi' setangal umau luk do'.

⁵Idi dengan anid baré luk sabpen do' iko nguit seseréi' setangal abpa' anggur kuan anid-anid anak dumba luk barén.

⁶Idi kareb iko maré aceh dumba deléi, do' iko nguit segatang banak luk rinabur ku dueh seréi' umau saitun ku baré akan.

⁷Idi kareb iko maré baré luk rupen, do' iko nguit dueh seréi' abpa' anggur. Amung baré ineh mangun ku luk do' buen kuan Tuhan.

⁸Idi kareb iko nguit aceh sapi' deléi ku baré luk sabpen, kian kereten lek, pad maya' aceh jani', idi kareb iko maré baré luk nguit pedo' kuan Tuhan,

⁹do' iko nguit segatang setangal banak luk rinabur ku dueh seréi' setangal umau saitun.

¹⁰Idi kareb iko maré baré luk rupen, do' iko nguit dueh seréi' setangal abpa' anggur ku baré luk sabpen. Baré ineh mangun ku luk do' buen kuan Tuhan.

¹¹"Kudeng ineh lawé muyuh maré sapi' deléi, dumba deléi, anak dumba deléi, idi anak amék deléi teh.

¹²Maya' kinula' luk barén muyuh,

¹³do' amung lun Israil nganau' kudeng ineh, kareb maré baré akan, mangun ku luk do' buen kuan Tuhan.

¹⁴"Idi kudeng aceh lun sakai tudo segageh arang muyuh kian meparud lek, idi kudeng ieh pian maré aceh baré luk sabpen mangun ku aceh buen luk do' kuan Tuhan, do' ieh nganau' maya' kudeng luk ruen muyuh.

¹⁵Idi inan sebuleng dalam mo' kuan muyuh lun Israil idi kuan lun sakai luk tudo arang muyuh, ieh ineh aceh ukum luk meruked. Idi lun sakai pana' mepad kudeng muyuh pa kiung Tuhan.

¹⁶Inan sebuleng ukum idi sebuleng dalam kuan muyuh amung, idi kuan lun sakai luk tudo arang muyuh."

¹⁷Kebala Tuhan ni Musa,

¹⁸"Do' iko mada' kuan amung lun Israil: Kareb muyuh macing bang bawang luk inanKu nated nemuyuh,

¹⁹idi kareb muyuh kuman nuba' bang bawang ineh, do' muyuh maré aceh baré kuan Tuhan.

²⁰Ratnan banak muyuh luk pun-pun, do' maré sebalad pinaram mangun ku aceh baré ratnan su luk inan rumik.

²¹Ratnan banak muyuh luk pun-pun, do' muyuh maré aceh baré kuan Tuhan macing raked-raked.

²²"Iamo' kudeng muyuh meraruh idi na maya' amung ukum ini luk bila Tuhan ni Musa iamo' baken inau' rungen,

²³idi mucu lun mula' na maya' bala luk biré Tuhan ni Musa,

²⁴idi kudeng inan sala' inau'deh, na ieh inau' rungen, do' amung lun Israil maré sebuleng anak sapi' deléi mangun ku aceh baré luk sabpen, idi ku luk do' buen kuan Tuhan, perapu dengan baré akan idi baré luk rupen maya' dalanneh, idi sebuleng amék deléi barén ngaceku sala'.

²⁵Idi do' imam nganau' luk nguit pedo' kuan lun mula', idi ideh miak ngalap do', ngaceku sala'deh baken inau' rungen. Idi ideh pangeh nenguit barédeh pa kiung Tuhan, ieh ineh aceh baré luk sabpen kuan Tuhan, idi aceh baré ngaceku sala', ngaceku raruhdeh ineh.

²⁶Idi amung lun Israil idi lun sakai luk tudo arangdeh miak ngalap do', ngaceku amung pupu ineh pangeh neraruh.

²⁷"Idi kudeng selemulun nganau' sala' dengan na inau' rungen, idi do' ieh maré aceh amék tineh luk ulun selak ku baré ngaceku sala'.

²⁸Idi do' imam nganau' luk nguit pedo' pa kiung Tuhan ngaceku lemulun luk neraruh ineh, pad ieh ngalap do'.

²⁹Inan sebuleng dalam mo' kuan lemulun luk nganau' sala' dengan na inau' rungen, do' kuan muyuh lun Israil idi kuan lun sakai luk tudo arang muyuh pana'.

³⁰"Iamo' lemulun luk nganau' sala' dengan rungen, do' lun Israil idi lun sakai pana', lemulun ineh ngedat Tuhan, idi do' ieh duken buro rat arang pupuneh.

³¹Ngaceku ieh pangeh nengedat bala Tuhan idi nengelaba ukumNeh. Na miak na lun ineh duken buro, idi ieh sebuleng mabeh sala'neh."

³²Idi kareb lun Israil déi' su luk ali-ali idi ideh nekeribpeh aceh lemulun ngalap kayuh kareb Aco luk inan Mudeng.

³³Idi ideh nenguit neneh iné' ni Musa idi Arun idi amung lun Israil teh.

³⁴Idi ideh nenaan neneh ngaceku nateh kali' luk miak ruen kuanneh.

³⁵Idi kebala Tuhan ni Musa, "Do' lemulun ineh pitayen. Idi do' amung lun Israil mitung neneh ku batu petatang rat su luk inan muyuh nelupo."

³⁶Idi amung lun Israil nenguit neneh remuat rat su luk inandeh nelupo, idi nemitung neneh ku batu macing maté, maya' kudeng luk bila Tuhan ni Musa.

³⁷Kebala Tuhan ni Musa,

³⁸"Do' iko ngecuk nelun Israil nganau' lidung kuyu'deh meramoi macing ruked-ruked. Idi do' ngabet ramoineh ku nuper luk bata' melaco.

³⁹Idi ramoineh mangun ku aceh terawé kuan muyuh. Kareb muyuh nier ineh, do' muyuh ngerawé amung bala Tuhan, pad muyuh nganau' ineh. Idi aleg muyuh maya' pinian burur luk dat, pad muyuh na meraruh ngaceku mateh idi niat muyuh.

⁴⁰Ramoi ineh ku etu muyuh ngerawé idi maya' amung balaKu, pad muyuh meligan kuan Allah muyuh.

⁴¹Ngaceku Ui ini Tuhan Allah muyuh luk pangeh nenated nemuyuh remuat rat bang bawang Masir, pad Ui mangun ku Allah muyuh. Ui ini Tuhan Allah muyuh."

Lap 16

¹Idi Kora ineh anak Isar, idi mupun Kohat, luk inul Liwi. Idi Kora nenguit Datan idi Abiram anak Eliab, idi On anak Pelet maya' neneh. Diteluh ineh inul Rubin.

²Idi ideh netuped pa atun Musa, dengan 250 lun rayeh lun Israil luk pangeh pinili' lun mula'. Amungdeh lun luk mebala.

³Idi ideh sikal metueh rat ni Musa idi Arun, kebaladeh, "Pangeh petap kekamen medueh nekini peh! Ngaceku amung lun Israil pana' meligan teh. Idi Tuhan pana' idi arangdeh. Anun punneh medueh ngerayeh burur medueh pa luun amung pupu Tuhan?"

⁴Kareb Musa neninger bala ini, idi ieh netekeradung sembayang.

⁵Idi kebalaneh kuan Kora idi amung lun luk maya' neneh, "Pekak nebpa Tuhan miak maré kali' idé luk pupuNeh, idi idé luk meligan, idi idé luk pinili' Tuhan amé' Neneh iring bubpun.

⁶O Kora, do' muyuh nganau' kudeng ini. Do' ngalap luk inan ngeseb umau luk do' buen,

⁷Idi nganau' apui bang ineh, idi nganau' umau luk do' buen luun apui ineh pa kiung Tuhan, pekak nebpa. Idi idé luk pilin Tuhan, ieh luk meligan. Muyuh pana' pangeh petap kekamen nekini peh! O muyuh lun Liwi!"

⁸Idi kebala Musa ni Kora, "Do' muyuh ninger, O lun Liwi.

⁹Naké petap kekamen kuan muyuh luk pangeh itad Allah Israil rat nelun mula', pad muyuh amé' muneng neneh idi ngakem bang Lepo su luk inan papu' Tuhan, idi ngakem kuan lun Israil teh?

¹⁰Idi Tuhan pangeh nenguit namu amé' muneng Neneh dengan amung kinanak muyuh, lun Liwi. Miakké muyuh nakap kekamen imam teh?

¹¹Ngaceku ineh iko idi amung luk maya' namu pangeh nengedat Tuhan. Kareb muyuh tekedamut ni Arun, setuneh muyuh sikal metueh ratnan Tuhan."

¹²Idi Musa nengecuk seburur nawar ni Datan idi Abiram anak-anak Eliab ineh. Iamo' kebala didueh, "Na kai sikal amé'.

¹³Naké petap uitmu nekai rat tana' luk mebaleng macing tungé su luk ali-ali idi ngaté nekai ieni. Idi teh iko pian mangun ku raca' kai?

¹⁴Idi meluun teh iko na nenguit nekai iné' inan tana' luk mebaleng, idi na nemaré nekai babpat tana' idi kabun anggur. Miakké iko nakul ilung mateh lun ini? Na kai sikal amé'."

¹⁵Idi Musa pelaba useh. Idi kebalaneh inan Tuhan, "Aleg Iko ngalap luk baréndeuh ineh, ngaceku sebuleng keladai pana' nateh luk ilapku rat nedeh. Idi sebururdeh pana' nateh luk piderehku."

¹⁶Idi kebala Musa ni Kora, "Do' iko idi 250 burur lun luk maya' namu, idi Arun amé' pa kiung Tuhan nebpa.

¹⁷Idi do' anid-anid burur muyuh nguit luk inan muyuh ngeseb umau luk do' buen, idi nganau' umau luk do' buen luun idi pa kiung Tuhan."

¹⁸Idi ideh nenguit ineh idi nenganau' apui bang ineh idi umau luk do' buen pa luun apui ineh, idi ideh netuped munung tanga' Lepo su luk inan papu' Tuhan dengan Musa idi Arun.

¹⁹Idi Kora nenguit amung lun luk maya' neneh amé' munung tanga' Lepo ineh ngaceku ideh pian amé' pa luun didueh. Idi rasat Tuhan nesilangan kuan amung lun Israil.

²⁰Kebala Tuhan ni Musa idi Arun,

²¹"Do' medueh mado rat iring lun mula' ineh, pad Ui miak ngaté nedeh dengan segageh mo'."

²²Idi didueh netekeradung, kesembayang didueh, "O Allah, Allah lawa amung ulun! Kudeng seburur mesala', miakké Iko museh kuan lun mula' ini?"

²³Kebala Tuhan ni Musa,

²⁴"Do' ngecuk nelun mula' ineh mado rat su luk inan Kora, Datan, idi Abiram."

²⁵Idi Musa nudur idi iné' ni Datan idi Abiram, idi amung lun rayeh Israil pana' nemaya' neneh.

²⁶Idi kebalaneh kuan lun mula' ineh, "Do' muyuh mado ratnan lepo lemulun luk dat ini. Aleg ngakem anun-anun binawehdeh pad muyuh na maté ngaceku sala'deh."

²⁷Idi ideh neburo rat iring su luk inan Kora, Datan, idi Abiram. Idi Datan idi Abiram neremuat idi netuped munung tanga' lepo didueh dengan awan didueh idi amung-amung anak didueh teh.

²⁸Idi kebala Musa, "Ratnan ineh muyuh miak kali' ui icuk Tuhan, pad ui nganau' amung kekamen ini, idi na ini maya' pianku sebuleng.

- ²⁹Kudeng lun ini maté mét mepad kudeng lun baken, idi na ui icuk Tuhan.
- ³⁰Iamo' kudeng Tuhan nganau' aceh kekamen luk mebaruh, idi tana' mukab, pad amung-amungdeh maté mebpeh bang lubang ineh, dengan amung binawehdeh, idi ideh semuet bang su luk inan até dengan mulun, idi muyuh miak kali' lemulun ini pangeh nengedat Tuhan.”
- ³¹Idi pangeh ieh nepebala kudeng ineh, idi tana' su luk inandeh nekukab denak-denak.
- ³²Idi ideh nebpeh bang ineh dengan amung uang tetek ruma'deh idi amung lun luk maya' ni Kora dengan amung binawehdeh.
- ³³Ideh nesemuet bang su luk inan até dengan mulun, dengan amung binawehdeh. Idi tana' pana' nengakeb nedeh idi ideh netutu'.
- ³⁴Idi amung lun Israil luk libutdeh neburo ku aroddeh, kebaladeh, "Miket, pad tau pana' na mebpeh bang lubang ineh!”
- ³⁵Idi apui ratnan Tuhan neremuat idi nengeseb amungdeh luk 250 burur luk nenguit umau luk do' buen ineh.
- ³⁶Kebala Tuhan ni Musa,
- ³⁷"Do' ngecuk ni Eliasar anak Arun luk imam ngalap amung luk inan ngeseb umau luk do' buen ineh rat arang butungdeh luk iseb ineh, idi ngisak bareh apui luk bang ineh, ngaceku amung ineh meligan.
- ³⁸Idi luk inan ngeseb umau luk do' buen luk inuit lemulun luk pinaté ngaceku sala'deh, do' nuno ineh ku kakeb bubpun. Ngaceku ideh pangeh nemaré ineh pa kiung Tuhan. Idi ngaceku repapeh ineh meligan, idi ineh mangun ku tanu' kuan lun Israil.”
- ³⁹Idi Eliasar luk imam ineh nengalap amung ineh. Ngaceku ideh tekaling. Idi ideh nenuno ineh mangun ku kakeb bubpun.
- ⁴⁰Idi ineh mangun ku terawé kuan lun Israil, pad lemulun luk na titen ku imam, idi lun luk na inul Arun na amé' muneng idi ngeseb umau luk do' buen

pa kiung Tuhan, pad ieh na kudeng Kora idi amung lun luk nemaya' neneh, maya' kudeng luk bila Tuhan ni Eliasar dengan tang Musa.

⁴¹Idi kenebpa amung lun Israil nuseh ni Musa idi Arun, kebaladeh, "Medueh pangeh nengaté sebuang pupu Tuhan."

⁴²Idi kareb lun mula' ineh nepamung ni Musa idi Arun, idi ideh nelumi nenier Lepo su luk inan papu' Tuhan, idi ideh nekali' laput ineh nengakeb neneh idi rasat Tuhan pana' melagan.

⁴³Idi Musa idi Arun iné' pa atun Lepo ineh.

⁴⁴Idi kebala Tuhan ni Musa idi Arun,

⁴⁵"Buro medueh rat arang lun Israil ini, ngaceku dengan segageh Ui miak ngaté nedeh." Idi didueh netekeradung.

⁴⁶Idi kebala Musa ni Arun, "Ngalap luk inanmu ngeseb umau luk do' buen ineh. Idi nganau' apui luk ratnan bubpun bang ineh idi nganau' umau luk do' buen luun apui ineh, idi nguit ineh miket amé' nelun Israil, idi nganau' luk nguit pedo' kuandeh. Ngaceku useh pangeh remuat ratnan Tuhan. Idi ét luk mebura' pana' pangeh nengimun."

⁴⁷Idi Arun nengalap ineh, maya' kudeng luk icuk Musa, idi ieh nupun iné' arangdeh. Ngaceku ét ineh pangeh nengimun. Idi ieh nenganau' umau luk do' buen bang ineh, idi nenganau' luk nguit pedo' kuandeh.

⁴⁸Idi ieh netuped arangdeh luk naté idi luk mulun. Idi ét ineh pana' nugka'.

⁴⁹Idi kinula' amung lun luk naté ku ét ineh 14,700 burur. Idi teh inan luk naté ngaceku sala' Kora ineh.

⁵⁰Kareb ét ineh pangeh nugka' idi Arun nelemubed iné' ni Musa munung tanga' Lepo su luk inan papu' Tuhan.

Lap 17

¹Kebala Tuhan ni Musa,

²"Do' ngecuk nelun Israil maré sebuleng rukud rat anid-anid pupudeh, ieh ineh ratnan anid-anid lun rayehdeh luk pulu' dueh burur ineh. Idi ngayud ngadandeh nan rukuddeh.

³Idi do' ngayud ngadan Arun nan rukud Liwi. Ngaceku anid-anid lun rayeh pupudeh inan sebuleng rukud.

⁴Idi do' iko ngerareng ineh bang Lepo su luk inan papu' Tuhan, pa atun Pati' Pejani' su luk inanKu papu' nemuyuh.

⁵Idi rukud lun luk pinili'Ku ineh miak nginulih. Ratnan luk kudeng ineh Ui miak ngagka' dureng amung lun Israil ngaceku medueh."

⁶Idi Musa nepebala kuan amung lun Israil. Idi amung lun rayehdeh nemaré rukuddeh neneh, ieh ineh ratnan anid-anid lun rayehdeh luk pulu' dueh pupu ineh. Idi rukud Arun pana' idi teh arang amung rukud ineh.

⁷Idi Musa nengerareng amung rukud ineh pa kiung Tuhan, bang Lepo su luk inan papu' Tuhan.

⁸Idi kenebpa Musa iné' bang Lepo ineh, idi rukud Arun luk ku babpat inul Liwi ineh nenginulih idi nekebusak nengeruat bua' berangan.

⁹Idi Musa nenguit amung rukud ineh remuat rat pa kiung Tuhan kuan amung lun Israil. Idi ideh nenier rukud ineh idi anid burur lun rayehdeh nengalap rukudneh ineh.

¹⁰Kebala Tuhan ni Musa, "Do' ngelubed rukud Arun ineh amé' pa atun Pati' Pejani', pad mangun ku aceh tanu' kuan amung-amung lun luk sikal metueh, pad iko ngagka' durengdeh Negku, idi ideh na pitayen."

¹¹Idi Musa nenganau' maya' kudeng luk icuk Tuhan neneh.

¹²Idi kebala lun Israil ni Musa, "Kali' rungen amung-amung kai mabud maté.

¹³Ngaceku idé-idé luk amé' muneng ku Lepo su luk inan papu' Tuhan miak maté. Miakké amung kai mabud maté?"

Lap 18

¹Kebala Tuhan ni Arun, "Iko idi anak-anakmu idi amung lun bang tetek ruma'mu pana' mabeh sala' luk mangun bang Lepo su luk inan papu' Tuhan. Iko idi anak-anakmu pana' mabeh sala' luk mangun kareb muyuh nganau' kekamen imam.

²Idi do' iko ngecuk amung kinanakmu, ieh ineh inul Liwi, amé' denganmu idi ngedengan namu idi anak-anakmu pa atun Lepo su luk inan papu' Tuhan.

³Idi do' ideh ngedengan namu idi nganau' amung luk ruen bang Lepo ineh. Iamo' aleg ideh amé' muneng ku repapeh Su luk Meligan idi bubpun, pad ideh na maté idi iko pana'.

⁴Iamo' ideh miak ngedengan namu idi nganau' amung luk ruen bang Lepo ineh. Idi lun baken na miak amé' muneng namu.

⁵Idi muyuh miak nganau' amung luk ruen bang Su luk Meligan idi ngasa' bubpun, pad usehKu na macing kuan lun Israil.

⁶Idi Ui pangeh nengalap kinanakmu lun Liwi rat arang lun Israil, mangun ku aceh baré kuanmu, idi kuanKu, pad ideh nganau' amung luk ruen bang Lepo su luk inan papu' Tuhan.

⁷Iamo' do' iko idi anak-anakmu pana' ngakem kekamen imam, ieh ineh ngasa' bubpun idi amung luk bang Su luk Meluun Ligan. Idi do' muyuh nganau' kekamen imam luk biréKu nemuyuh. Idi kudeng inan luk baken amé' muneng, ieh miak pitayen."

⁸Kebala Tuhan ni Arun, "Ui pangeh nemaré namu ngimet amung baréKu, ieh ineh amung baré lun Israil luk meligan, mangun ku aceh babpat kuanmu idi kuan anak-anakmu macing raked-raked.

⁹Idi ratnan amung barédeh luk meligan luk sabpen, ineh luk mangun ku babpatmu idi babpat anak-anakmu: ieh ineh amung baré akan, barédeh ngaceku sala', idi barédeh luk pingetap, luk miak barédeh kuanKu.

¹⁰Do' amung deléi luk arang muyuh kuman babpat luk meligan ineh maya' dalam luk petulu.

11"Idi ini pana' mangun ku babpatmu, ieh ineh amung baré luk tidulen lun Israil pangeh biréKu namu idi kuan anak-anakmu luk deléi idi decur teh, mangun ku babpat macing ruked-ruked. Idé luk meligan bang ruma' muyuh miak ideh kuman ineh.

12"Amung umau, bua' anggur, idi padé luk meluun do', ieh ineh amung babpat luk meluun do' luk barénde kuanKu, barénKu nemuyuh.

13Idi amung bua' luk melak atun luk bang bawangdeh, luk barénde kuanKu, miak kuan muyuh. Idé luk meligan bang ruma' muyuh miak ideh kuman ineh.

14"Amung-amung luk barén lun Israil kuan Allah, ieh ineh miak kuan muyuh.

15"Amung anak luk atun, ratnan lemulun idi aya'deh luk barénde Negku, miak kuan muyuh. Iamo' do' muyuh nguli' ineh.

16Idi uli'deh luk ulun sebulan, ieh ineh limeh balad pirak maya' balad pirak Su luk Meligan.

17Iamo' aleg muyuh nguli' anak sapi' luk atun, dumba, idi amék pana', ngaceku ideh meligan. Idi do' ngisak dara'deh luun bubpun. Idi do' iko ngeseb lemakdeh mangun ku aceh buen luk do' kuan Tuhan.

18Idi uangdeh kuan muyuh, dengan ruuk, idi tipan pa tinueh, ku baré luk tidulen.

19"Idi amung baré luk iten lun Israil kuan Tuhan, barénKu kuanmu idi kuan anak-anakmu luk deléi idi decur ku aceh dalan luk meruked. Ieh ineh aceh pejani' tucu' luk meruked kuanmu idi kuan anakmu pa kiung Tuhan."

20Kebala Tuhan ni Arun, "Na iko miak ngalap babpat tana' arangdeh idi sebuleng babpat anun-anun pana' nateh apenmu, ngaceku Ui ini luk babpatmu arang lun Israil.

21"Idi kuan lun Liwi Ui pangeh nemaré amung babpat pulu' lun Israil ku babpatdeh, ku libal kekamendeh bang Lepo su luk inan papu' Tuhan.

²²Idi ngaceku ineh aleg lun Israil amé' muneng ku Lepo ineh, pad ideh na mabeh sala' idi maté.

²³Iamo' lun Liwi, luk miak ngakem bang Lepo ineh, idi nganau' amung kekammeneh. Idi ini aceh ukum luk meruked macing ku inul muyuh. Iamo' lun Liwi na miak ngalap babpat tana' arang lun Israil.

²⁴Idi amung babpat pulu' lun Israil luk miak baréndeh kuan Tuhan, ieh ineh pangeh biréKu nelun Liwi ku babpatdeh. Idi ngaceku ineh Ui pangeh nemala nedeh, ideh na miak ngalap babpat arang lun Israil.”

²⁵Kebala Tuhan ni Musa,

²⁶"Do' iko mada' ini kuan amung lun Liwi, 'Kareb muyuh ngalap babpat pulu' ineh rat nelun Israil mangun ku babpat muyuh, do' muyuh pana' maré babpat pulu' ratnan babpat pulu' luk ilap muyuh ineh kuan Tuhan.

²⁷Idi baré muyuh ineh miak iapin mepad kudeng padé luk rinik, idi mepad kudeng abpa' anggur luk lubpi rat bang su luk inan merek.

²⁸Idi kudeng ineh teh do' muyuh nguit aceh baré kuan Tuhan ratnan amung babpat pulu' muyuh luk ilap muyuh rat nelun Israil. Idi ratnan baré ineh, do' muyuh maré kuan Arun luk imam.

²⁹Idi ratnan amung baré luk ilap muyuh do' muyuh maré luk petulu kuan Tuhan, ieh ineh luk meluun do' ratnan anid-anid baré luk ilap muyuh.

³⁰Kareb muyuh pangeh nemaré luk meluun do' ratnan baré ineh, idi luk ketecan miak kuan muyuh lun Liwi mepad kudeng ula' padé luk rinik idi bua' anggur luk pirek.

³¹Idi muyuh dengan uang tetek ruma' muyuh miak kuan ineh iapeh-iapeh pana', ngaceku ini babpat muyuh luk ngakem bang Lepo ineh.

³²Idi na ini mangun ku sala' kuan muyuh kudeng muyuh maré luk meluun do' kuan Tuhan. Idi aleg muyuh sala' pakai baré lun Israil luk meligan, pad muyuh na maté.' "

Lap 19

- ¹Kebala Tuhan ni Musa idi Arun teh,
- ²"Ngecuk nelun Israil nguit sebuleng sapi' tineh luk mesia' idi luk do', amé' namu, idi luk nateh nengeruid kayuh.
- ³Idi do' iko maré neneh ni Eliasar luk imam, idi ieh miak nguit neneh remuat rat su luk inan nelupo, pad ieh kereten pa kiungneh.
- ⁴Idi do' Eliasar luk imam ngalap sebuang dara'neh ku bua' ticu'neh. Idi ieh ngisak sebuang dara' ineh pa atun Lepo su luk inan papu' Tuhan tudu' kua'.
- ⁵Idi do' sapi' ineh sabpen siren Eliasar, ieh ineh kubilneh, uangneh, dara'neh, idi tinéi'neh.
- ⁶Idi do' imam ngalap kayuh tumuh, likudung, idi nuper mesia', idi petenneh luun uned apui luk inan ngeseb sapi' ineh.
- ⁷Idi do' ieh diu' idi mupu' ayungneh, idi pangeh ineh ieh miak muli' amé' su luk inan nelupo. Idi imam ineh mangun ku gani' macing aco macep.
- ⁸Idi do' lun luk ngeseb sapi' ineh pana' diu' idi mupu' ayungneh, idi ieh pana' mangun ku gani' macing aco macep.
- ⁹Idi do' lemulun luk meligan ngamung abuh sapi' ineh, idi ngerareng neneh petatang rat su luk inan nelupo bang su luk malét. Idi abuh ineh nugen kuan lun Israil, idi ruendeh bang abpa' luk ku maru' nedeh ratnan sala'. Ngaceku sapi' ineh aceh baré ngaceku sala'.
- ¹⁰Idi lemulun luk nengamung abuh sapi' ineh, do' ieh mupu' ayungneh, idi ieh pana' mangun ku gani' macing aco macep. Idi ini aceh dalam luk meruked kuan amung lun Israil idi kuan amung lun sakai luk tudo arang muyuh.
- ¹¹"Idé-idé luk ngakem butung lemulun, idi ieh mangun ku gani' tudu' aco kinioneh.
- ¹²Idi do' ieh baruin ku abpa' ineh kareb aco luk keteluh idi aco luk ketudu', pad ieh meligan. Iamo' kudeng ieh na uen ngiu' ku abpa' ineh kareb aco luk keteluh idi aco luk ketudu', na ieh meligan.

¹³Idé-idé luk ngakem butung lemulun idi ieh na diniu', idi ieh luk ngelutak Lepo su luk inan papu' Tuhan. Idi ieh miak duken buro rat arang lun Israil, ngaceku abpa' luk ku maru' neneh ratnan sala' na inisak luunneh. Idi ieh mangun ku gani'. Idi lutakneh na buro rat neneh.

¹⁴Idi ini dalanneh kudeng aceh lun maté bang aceh lepo, idé-idé luk semuet bang lepo ineh, idi idé-idé luk bang ineh, ieh ineh mangun ku gani' tudu' aco kinioneh.

¹⁵Idi amung repapeh luk mukab luk na kakeb, idi ieh ineh ku gani'.

¹⁶Idi idé-idé luk ngakem lun luk pinaté, idi luk pangeh naté ku ét déi' liang, idi teh tulang butung lemulun, idi tanem, ieh ineh pana' mangun ku gani' tudu' aco kinioneh.

¹⁷Idi ideh luk ku gani' ineh, do' ideh ngalap abuh ratnan sapi' luk biré ngaceku sala' luk pangeh iseb ineh, idi ngutang abpa' metaro luun abuh ineh bang sebuleng kuden.

¹⁸Idi do' aceh lun luk meligan ngalap likudung idi ngarereb neneh bang abpa' ineh, idi ngisak ineh luun lepo, idi luun amung repapeh luk bang lepo ineh, idi luun amung lun luk bang ineh, idi luun lemulun luk pangeh nengakem tulang butung lun luk pinaté, lun luk naté ku ét, idi tanem pana'.

¹⁹Idi do' lun luk meligan ineh ngisak abpa' ineh luun lemulun luk ku gani' ineh kareb aco luk keteluh idi aco luk ketudu'. Idi kareb aco luk ketudu' idi ieh miak ngeligan neneh ratnan sala'neh. Iamo' ieh diu' idi mupu' ayungneh atun. Idi kareb aco macep ieh meligan peh.

²⁰Iamo' lun luk ku gani' luk na diniu' ratnan sala' miak duken buro rat uned tebubpun ineh. Ngaceku ieh nengelutak Lepo su luk inan papu' Tuhan. Ngaceku abpa' luk ku maru' neneh ratnan sala' na inisak luunneh. Idi ieh ku gani'.

²¹Idi ini mangun ku aceh dalam luk meruked kuandeh. Idi do' lun luk pangeh nengisit abpa' luk ku maru' sala' ineh mupu' ayungneh, idi idé-idé luk neketukan abpa' ineh, ieh pana' mangun ku gani' macing aco macep.

²²Idi anun-anun pana' luk kamen lun luk ku gani' ineh, ieh ineh mangun ku gani'. Idi idé-idé luk nengakem ineh teh, ieh pana' mangun ku gani' macing aco macep."

Lap 20

¹Idi amung lun Israil nacing su luk ali-ali déi' Sin bang bulan aceh. Idi ideh tudo déi' Kadis. Idi su ineh Miriam naté. Idi su ineh teh ieh tinanem.

²Idi su ineh na abpa' kuandeh, idi ideh nengedureng idi nepamung sikal ngedat ni Musa idi Arun.

³Kebaladeh ni Musa, "Do' kudeng kai pangeh naté arang kinanak kai kareb ideh naté pa kiung Tuhan.

⁴Ngudehké iko nguit pupu Tuhan amé' su luk ali-ali ini, pad kai maté su ini, dengan aya' kai pana'?

⁵Ngudehké iko ngecuk nekai nalan rat bawang Masir, idi nguit nekai amé' inan tana' luk dat ini? Idi baken su ini luk inan padé mulun idi gita' idi anggur idi bua' delima pana'. Macing ku abpa' rupen pana' nateh luk idi.

⁶Idi Musa didueh Arun nenalan rat pa kiung lun mula' iné' i tanga' Lepo su luk inan papu' Tuhan. Idi didueh netekeradung, idi rasat Allah sinier didueh."

⁷Kebala Tuhan ni Musa,

⁸"Ngalap rukud ineh idi ngamung lun mula', idi do' iko idi Arun pebala kuan batu luk pa kiungdeh ineh. Idi batu ineh miak ngeruat abpa'. Idi iko miak maré apba' kuandeh ratnan batu ineh. Idi iko miak maré lun mula' ineh ngirup, idi amung aya'deh teh."

⁹Idi Musa nengalap rukud ineh rat pa kiung Tuhan, maya' kudeng luk icuk Tuhan.

¹⁰Idi Musa didueh Arun nengamung nelun mula' ineh iring batu ineh. Idi didueh nepebala nedeh, "O muyuh luk sikal metueh, do' ninger. Miakké kai dueh ngeruat abpa' kuan muyuh ratnan batu ini?"

- ¹¹Idi Musa nenecat batu ineh ku rukudneh dueh kua'. Idi abpa' neremuat pelaba ula', pad lun mula' ineh nengirup idi amung aya'deh teh.
- ¹²Kebala Tuhan ni Musa idi Arun, "Medueh na miak nguit lun mula' ini semuet bang bawang luk pangeh biréKu nedeh, ngaceku medueh na manu Negku idi na nengerayeh liganKu pa kiung lun Israil."
- ¹³Idi ini Abpa' Meriba su luk inan lun Israil ngedureng-ngedureng inan Tuhan, idi Tuhan pana' nengegala' liganNeh kuandeh.
- ¹⁴Idi Musa nengecuk tuda'-tuda' lun duken amé' matun raca' Edom rat Kadis, idi kebaladeh neneh, 'Kebala kinanakmu lun Israil kudeng ini, "Iko kali' amung susa' luk pangeh nangun nekai,
- ¹⁵kudeng apeh tepun kai iné' rat bawang Masir idi kai tudo déi' Masir tuda'-tuda' lak kinioneh, idi lun Masir nengedereh nekai idi tepun kai.
- ¹⁶Idi kareb kai nengitang nawar Tuhan idi Tuhan pana' neninger tawar kai. Idi Ieh nengecuk aceh melaikat luk nenguit nekai remuat rat bang bawang Masir. Idi nekini kai tungé' Kadis, aceh bawang luk iring lakan tana'mu.
- ¹⁷Nima' nekai lemaba bawangmu. Idi na kai umai luun lati' muyuh, idi bang kabun anggur muyuh. Idi abpa' subuk muyuh na kai ngirup. Iamo' dalan rayeh luk bén kai. Idi na kai umai amé' pa kabing idi pa tinueh pad kai lemaba lakan tana'mu."
- ¹⁸Iamo' kebala lun Edom nedeh, "Muyuh na miak lemaba bawang kai, pad kai na ngaté nemuyuh."
- ¹⁹Idi kebala lun Israil, "Kai miak nalan maya' dalan rayeh. Kudeng kai idi aya' kai ngirup abpa' muyuh kali' rungen kai maré raganeh. Nima' nekai nalan kukud lemaba bawang muyuh. Kudeng ini luk pian kai."
- ²⁰Iamo' lun Edom nengor baladeh, "Muyuh na miak lemaba bawang ini." Idi raca' Edom neremuat iné' matun nedeh dengan bawehneh luk mula'.
- ²¹Kudeng ini dalan raca' Edom nemebpeng nelun Israil na lemaba bawangneh. Ngaceku ineh lun Israil numai maya' dalan baken.

²²Idi lun Israil nenalan rat Kadis idi nacing déi' Pegkung Hor, ieh ineh lakan bawang Edom.

²³Idi kebala Tuhan ni Musa idi Arun,

²⁴"Idi Arun miak maté', ngaceku na ieh miak semuet bang bawang luk pangeh biréKu kuan lun Israil. Ngaceku medueh pangeh nengelaba balaKu déi' Abpa' Meriba.

²⁵Do' iko nguit ni Arun idi Eliasar anakneh amé' luun Pegkung Hor.

²⁶Idi ngelengu ayung Arun idi maré neneh ni Eliasar. Ngaceku Arun miak maté su ineh."

²⁷Idi Musa nenganau' luk icuk Tuhan. Idi diteluh iné' luun Pegkung Hor pa kiung amung lun Israil ineh.

²⁸Idi Musa nengelengu ayung Arun, idi biréneh ni Eliasar. Idi Arun naté luun pegkung ineh. Idi Musa idi Eliasar nelemubed ratnan pegkung ineh.

²⁹Kareb amung lun Israil nekali' ni Arun pangeh naté, idi amung lun Israil netemido neneh teluh ngepulu' aco kinioneh.

Lap 21

¹Kareb Arad raca' lun Kanaani luk tudo déi' Negeb, neninger bala lun Israil macing maya' dalam Atarim, idi ieh nepebunu' nedeh, idi nenaban tuda'-tuda' rat arangdeh.

²Idi lun Israil nepejani' inan Tuhan, kebaladeh, "Kudeng Tuhan maré pupu ini bang palad kai, idi kai miak ngusag amung bawangdeh."

³Idi Tuhan nengamo putuh lun Israil, idi Ieh nemaré lun Kanaani ineh kuandeh. Idi ideh nengaté nedeh idi nengusag bawangdeh. Idi ideh neneten su ineh Tabpa.

⁴Idi lun Israil nenalan rat Pegkung Hor maya' dalam amé' Abpa' Pisui idi nengelikut bawang Edom. Iamo' ideh mét niat maya' dalam ineh.

⁵Idi kebaladeh inan Allah idi ni Musa, "Ngudehké medueh nguit nekai remuat rat bang bawang Masir, pad kai maté tungé' su luk ali-ali ini. Ngaceku su ini ruti pana' na, abpa' pana' na. Idi kai mesukol ku akan luk dat ini."

⁶Idi kareb ineh Tuhan nengecuk tuda'-tuda' seruang nenicuk nedeh, pad mula' lun Israil naté.

⁷Idi ideh iné' matun ni Musa, kebaladeh, "Kai pangeh nenganau' sala' ngaceku ngedureng-ngedureng inan Tuhan idi namu teh. Do' sembayang mutuh Tuhan pad seruang ini buro rat nekai." Idi Musa nesembayang kuandeh.

⁸Kebala Tuhan ni Musa, "Do' iko mudut aceh seruang ratnan tekaling. Nganau' neneh paped aceh kayuh luk mekadang. Idé-idé luk tinicuk, idi nier ineh, ieh miak mulun."

⁹Idi Musa nemudut aceh seruang ratnan tekaling idi ieh nenganau' ineh luun paped kayuh luk mekadang. Idi idé luk tinicuk seruang, idi nenier seruang tekaling ineh, idi ieh mulun.

¹⁰Lun Israil nenalan rat ieneh, idi ideh nelupo déi' Obot.

¹¹Idi ideh nenalan rat Obot. Idi ideh nelupo déi' Yabarim déi' su luk ali-ali petutup bawang Moab pa busat aco.

¹²Idi ideh nenalan rat ieneh idi ideh nelupo muneng ku Arur Sered.

¹³Idi ideh nenalan rat ieneh, idi ideh nelupo par selipa Abpa' Arnon su luk mali muneng ku lakan bawang lun Amori, ngaceku Arnon ineh lakan bawang Moab idi Amori.

¹⁴Ini punneh pangeh bida' bang Surat Bunu' Tuhan, ratnan "Waheb déi' Supa idi Abpa' Arnon

¹⁵dengan tana' luk mirang, luk amé' matun raked bawang Ar, muneng ku lakan bawang Moab."

¹⁶Idi rat ieneh ideh nenalan iné' Bir, ieh ineh subuk luk inan Tuhan nepebala ni Musa, "Ngamung lun mula' ineh, idi Ui miak maré abpa' rupendeh."

- ¹⁷Idi kareb ineh lun Israil menani kudeng ini: "Kemubul muyuh, O bued abpa'. Do' menani ngubur abpa' ineh!
- ¹⁸Ieh ineh subuk luk inukat lun rayeh-rayeh, idi lun luk mebala rat arang lun mula', ku rukud lun luk nguyut idi rukud raca'." Idi rat su luk ali-ali ini ideh nenalan iné' Matana,
- ¹⁹idi rat Matana iné' Naliel, idi rat Naliel iné' Bamot,
- ²⁰idi rat Bamot iné' Ruan Moab muneng ku buduk Pegkung Pisga luk muneng ku su luk ali-ali.
- ²¹Idi lun Israil nengecuk tuda'-tuda' burur lun duken amé' matun Sihon, raca' lun Amori, idi kebaladeh neneh,
- ²²"Nima' nekai lemaba bawangmu. Idi na kai umai luun lati' muyuh idi bang kabun anggur muyuh. Idi abpa' subuk muyuh na kai ngirup. Iamo' dalam rayeh luk bén kai, pad kai lemaba lakan tana'mu."
- ²³Iamo' Sihon na nenima' nelun Israil lemaba bawangneh. Iamo' ieh nengamung amung anak itinneh, idi ideh iné' matun nelun Israil déi' Yahas su luk ali-ali, idi nepebunu' nedeh.
- ²⁴Iamo' lun Israil nengelaya' nedeh pad mula' lun naté. Idi ideh nengalap bawangdeh rat Arnon macing déi' Yabuk, idi bawang lun Amon. Ngaceku lakan Yahas ineh lakan bawang lun Amon.
- ²⁵Idi lun Israil nengalap amung bawang ineh idi netudo bang amung bawang lun Amori, ieh ineh Hesbon idi amung babpatneh.
- ²⁶Idi Hesbon, ieh ineh bawang Sihon, raca' lun Amori luk nengelaya' raca' lun Moab idi nengalap amung bawangneh macing Arnon.
- ²⁷Idi ngaceku ineh buri' lun luk nganau' buek, "Do' tau amé' Hesbon, idi nier bawang Sihon luk pinudut baruh.
- ²⁸Idi apui mebudung rat Hesbon, ieh ineh bawang Sihon. Ieh ngeseb Ar, ieh ineh bawang lun Moab, luk kuan surud-surud Arnon.

²⁹Mesusa' kuan muyuh, O Moab! Muyuh pangéh linaya', O pupu luk sembayang nan Kamus! Kamus nenganau' anak deléineh mangun ku lun neburo, idi anakneh luk decur lun tiban kuan Sihon, raca' lun Amori.

³⁰Rat Hesbon macing Dibon ideh nabud pinaté kai, ieh ineh rat Nasim macing Nopa, muneng ku Medéba.”

³¹Idi lun Israil netudo bang bawang lun Amori.

³²Idi Musa nengecuk nelun amé' nier bawang Yahas. Idi ideh nengalap amung bawang luk isuut, idi nengusu lun Amori luk tudo ieneh.

³³Idi ideh nelemubed maya' dalam amé' Busan. Idi Og, raca' Basan dengan amung anak itinneh iné' pebunu' nedeh déi' Edri.

³⁴Kebala Tuhan ni Musa, "Aleg iko matot neneh, ngaceku Ui maré neneh dengan anak itinneh idi bawangneh bang paladmu, idi iko miak nganau' kuanneh mepad kudeng luk inau'mu kuan Sihon, raca' lun Amori, luk tudo déi' Hesbon.”

³⁵Idi lun Israil nengaté ni Og idi anakneh idi amung anak itinneh, pad sebuleng pana' nateh luk ketecan. Idi ideh nengalap bawangneh.

Lap 22

¹Idi lun Israil nenalan, idi ideh nelupo luun raked Moab luk pa busat aco Abpa' Yarden luk petutup ku Yeriko.

²Kareb Balak Sipor nenier amung luk inau' lun Israil kuan lun Amori,

³idi lun Moab pelaba tot nelun Israil, ngaceku ideh pelaba ula'.

⁴Kebala lun Moab kuan amung lun rayeh-rayeh déi' Midian, "Idi nekini pupu ini pian kuman amung luk pekelibut nekai, mepad kudeng sapi' luk kuman amung uduh luk mebata'i natad." Idi kareb ineh Balak Sipor raca' lun Moab,

⁵nengecuk nelun amé' nawar ni Bilam Bior déi' Petor, luk i tangeb Abpa' Pirat déi' bawang Amau. Idi kebaladeh neneh, "Kebala Balak, 'Inan aceh pupu luk nacing rat bawang Masir luk pelaba ula' idi ideh nelupo iringku.

⁶Idi nekini do' iko amé' idi ngediman pupu ini kuanku. Ngaceku ideh meluun tueh rat negku, pad ui miak ngelaya' nedeh idi ngusu nedeh rat bang bawang ini. Ngaceku ui kali' luk inau'mu. Idé-idé luk uenmu ngeperuan miak ngalap peruan idi idé-idé luk uenmu ngediman miak uen ngediman.' “

⁷Idi amung lun rayeh Moab idi lun rayeh Midian pana' iné'. Idi usin luk ku tabpar lun luk ngelimu' idi bang paladdeh. Idi ideh nacing ni Bilam, idi nemada' amung bala Balak kuanneh.

⁸Idi kebala Bilam nedeh, "Rudap muyuh malem sini ieni, pad ui miak mada' nemuyuh bala luk belén Tuhan negku." Idi lun rayeh Moab pana' nerudap déi' ruma' Bilam.

⁹Idi Allah iné' ni Bilam, kebalaNeh, "Idéké amung deléi luk denganmu?"

¹⁰Idi kebala Bilam inan Allah, "Balak Sipor, raca' Moab pangeh nengecuk lun dukenneh amé' matun negku. Idi kebaladeh negku,

¹¹Inan ach pupu luk nacing rat bawang Masir luk pelaba ula'. Idi nekini amé' iko ngediman pupu ini kuanku, pad ui miak pebunu' idi ngusu nedeh.' “

¹²Idi kebala Allah ni Bilam, "Aleg iko amé' maya' nedeh. Aleg iko ngediman pupu ineh. Ngaceku ideh miak uen ngeperuan.”

¹³Idi pekak uka-uka Bilam netumui, idi nepebala kuan lun rayeh Balak, "Lemubed muyuh amé' bawang muyuh, ngaceku Tuhan na maré negku maya' nemuyuh.”

¹⁴Idi ideh nelemubed iné' ni Balak, kebaladeh, "Ara' Bilam amé' maya' nekai.”

¹⁵Idi Balak nengecuk tuda'-tuda' lun rayeh luk mileh iné' neneh baruh teh.

¹⁶Idi ideh nacing ni Bilam, kebaladeh neneh, "Kudeng ini bala Balak, 'Aleg iko merapang amé' maya' nekai.

¹⁷Ngaceku ui pian ngubur namu, idi anun-anun pana' luk dukenmu negku, ui miak nganau'. Amé' iko idi ngediman pupu ini kuanku.' “

¹⁸Iamo' kebala Bilam kuan lun luk icuk Balak ineh, "Kudeng ayuneh Balak maré ruma'neh kuanku panu' ku pirak idi amas pana', nateh ui miak ngelaba bala Tuhan Allahku, idi na miak nganau' luk meluun idi luk na petap.

¹⁹Iamo' nekini do' muyuh rudap ieni malem sini teh, pad ui kali' anun bala Tuhan kuanku."

²⁰Idi bang alem sineh teh idi Allah iné' matun Bilam, idi kebalaNeh neneh, "Ngaceku ideh ineh nacing, amé' ngalap namu, do' iko amé' maya' nedeh. Iamo' anun luk belénKu namu na miak na iko maya'."

²¹Idi kareb pekak uka-uka idi Bilam nekulat. Idi ieh nenganau' luk inan tudo luun keted keladaineh. Idi ieh iné' maya' nelun rayeh Moab ineh.

²²Iamo' Allah pelaba useh kareb ieh nalan. Idi Melaikat Tuhan tured iring dalam pian ngesabeng neneh. Idi Bilam maya' keladaineh. Idi dueh burur demulunneh pebaya' neneh.

²³Idi keladai ineh nenier Melaikat Tuhan luk ngimet pelapet luk metadem tured uned dalam. Idi keladai ineh numai ratnan dalam idi maya' nan pulung. Idi Bilam nenecat keladai ineh nganau' neneh lemubed amé' nan dalam rayeh teh.

²⁴Iamo' Melaikat Tuhan ineh netured uned dalam su luk mesip arang kabun anggur, idi pekop dalam ineh inan libung luk meraben.

²⁵Idi kareb keladai ineh nenier Melaikat Tuhan, idi ieh iné' muneng ku libung ineh. Idi kukud Bilam neperitek luun libung ineh. Idi ieh nenecat keladaineh sekua' teh.

²⁶Idi Melaikat Tuhan iné' pa atun idi netured su luk mesip, pad na luk inan umai amé' pa kabing idi amé' pa tinueh.

²⁷Idi kareb keladai ineh nenier Melaikat Tuhan, idi ieh neluku. Idi Bilam pelaba gateh. Idi ieh nenecat keladai ineh ku kayuh.

²⁸Idi kareb ineh Tuhan nengukab tang keladai ineh, idi ieh nepebala ni Bilam, "Anunké sala'ku namu, idi iko necat negku teluh kua'?"

²⁹Idi kebala Bilam inan keladai ineh, "Ngaceku iko nguto negku, kudeng ui inan pelapet kali' rungen iko pitayenku."

³⁰Idi keladai nengor bala Bilam, "Bakenké ui ini keladaimu? Bakenké iko nemaya' negku rat mon macing nekini? Pangehké ui nenganau' luk kudeng ini kuanmu atun?" Idi kebala Bilam, "Na."

³¹Idi kareb ineh Tuhan nengukab mateh Bilam. Idi ieh nenier Melaikat Tuhan luk tupid uned dalam idi ngimet pelapet luk metadem. Idi ieh netemurun, idi netekeradung.

³²Idi kebala Melaikat Tuhan neneh, "Ngudehké iko nenecat keladaimu macing teluh kua'? Ui pangeh nacing pian ngesabeng namu, ngaceku dalam luk ulekmu ini dat.

³³Kareb keladai ineh pangeh nenier Negku, ieh numai nelemaba Negku teluh kua'. Idi kudeng ieh na numai rat Negku, kali' rungen iko pinatéKu. Idi keladai ineh uenKu ngulun."

³⁴Idi kebala Bilam kuan Melaikat Tuhan, "Ui pangeh mesala', ngaceku ui na kali' Namu tupid uned dalam ini, pian ngesabeng negku. Idi kudeng ulek dalam ini dat kali'Mu, miak ui muli'."

³⁵Idi kebala Melaikat Tuhan ni Bilam, "Amé' iko maya' nedeh. Iamo' bala luk belénKu namu, ineh mo' luk miak belénmu." Idi Bilam iné' maya' nelun rayeh Balak ineh.

³⁶Kareb Balak nekali' ni Bilam macing, idi ieh iné' papu' neneh déi' bawang Moab luk tangen Abpa Arnon, ieh ineh lakan tana' luk pa tinueh busat aco.

³⁷Idi kebala Balak ni Bilam, "Ngudehké iko na iné' maya' nedeh luk icukku nawar namu atun di? Naké mebayarku tabparamu?"

³⁸Idi kebala Bilam ni Balak, "Nekini ui iné' namu. Iamo' ui na miak pebala anun-anun dengan laludku sebuleng. Iamo' bala luk badén Tuhan mo' luk miak belénku."

³⁹Idi Bilam iné' maya' ni Balak. Idi didueh nacing déi' bawang Husot.

⁴⁰Idi Balak nengeret tuda'-tuda' sapi' idi dumba mangun ku aceh baréneh, idi nemaré sebuang ni Bilam idi amung lun rayeh luk maya' neneh.

⁴¹Kenebpa idi Balak nenguit ni Bilam, idi iné' luun Pegkung Bamot Baal. Rat su ineh ieh nenier amung pupu ineh.

Lap 23

¹Idi kebala Bilam ni Balak, "Nganau' tudu' bubpun kuanku su ini, idi ngalap tudu' sapi' deléi idi tudu' amék deléi kuanku teh.

²Idi Balak nenganau' kudeng luk pian Bilam. Idi didueh nenganau' sebuleng sapi' idi sebuleng amék ineh luun anid-anid bubpun mangun ku baré luk sabpen.

³Idi kebala Bilam ni Balak, "Do' iko tuped iring baré luk sabpenmu. Ui pian amé' luun su luk medita'. Kian Tuhan miak papu' negku lek. Idi anun-anun bala luk uenNeh ngegala' negku, ui miak mala namu."

⁴Idi Allah nepapu' ni Bilam. Idi kebala Bilam Neneh, "Ui pangeh nemudut tudu' bubpun. Idi luun anid-anid bubpun ineh pangeh ui nemaré sebuleng sapi' deléi idi sebuleng amék deléi."

⁵Idi Tuhan nenganau' balaNeh luun dila' Bilam idi kebala Tuhan, "Lemubed iko amé' ni Balak, idi mala kudeng ini."

⁶Idi ieh nelemubed iné' ni Balak. Idi Raca' Balak idi teh tuped iring baréneh idi amung lun rayeh Moab pana' idi danganneh.

⁷Idi Bilam nengimun mada' bala luk biré Tuhan, kebalaneh, "Idi Balak raca' Moab ineh nenguit negku rat Aram, rat pegkung luk pa busat aco. Kebalaneh, 'Amé' iko ngediman ni Yakub kuanku. Amé' iko maré nelun Israil uen ngedereh!'

⁸Idi kudeng apehké ui ngediman nelun luk na kidiman Allah? Kudeng apehké ui ngedereh nelun luk na pidereh Tuhan?

⁹Ngaceku rat luun buduk pegkung ui ngukum nedeh, idi rat luun surud ui nier nedeh. Ieh ineh aceh pupu luk tudo setau', luk na iniap arang lun pupu baken!

¹⁰Idé miak ngiap inul Yakub, idi idéké miak kali' kinula' lun Israil? Nima' negku maté mepad kudeng até lun luk matu, idi kekipedku mepad kudeng ineh teh!"

¹¹Idi kebala Balak ni Bilam, "Anunké luk ruenmu kuanku? Ui nenawar namu pad iko ngediman bunu'ku. Iamo' na luk inau'mu, iamo' iko ngeperuan nedeh."

¹²Idi kebala Bilam neneh, "Naké ui petulu mada' bala luk inau' Tuhan nan dila'ku?"

¹³Idi kebala Balak ni Bilam, "Do' iko maya' negku amé' iléi teh. Rat ieneh iko miak nier sebuangdeh. Do' iko ngediman nedeh kuanku rat déi'."

¹⁴Idi ieh nenguit neneh iné' luun Natad Sopim luk luun Buduk Pisga. Idi ieh nemudut tudu' bubpun. Idi ieh nemaré aceh sapi' deléi idi sebuleng amék deléi luun anid-anid bubpun ineh.

¹⁵Idi kebala Bilam ni Balak, "Tuped iko iring baré luk isebmu, laba' ui amé' papu' Tuhan déi'."

¹⁶Idi Tuhan nepapu' ni Bilam, idi Ieh nenganau' balaNeh nan dila'neh, kebalaNeh, "Lemubed iko amé' ni Balak, idi pebala kudeng ini."

¹⁷Idi ieh iné' matun ni Balak. Idi Raca' Balak tuped iring baréneh. Idi amung lun rayeh Moab pana' idi teh danganneh. Idi kebala Balak neneh, "Anunké bala Tuhan namu?"

¹⁸Idi Bilam nengimun mada', kebalaneh: "Tuped iko, O Balak, anak Sipor, idi ninger balaku, O anak Sipor:

¹⁹Allah na mebalih mepad kudeng lemulun, Idi na nginuud mepad kudeng anak lemulun; balaNeh matu idi miak uen ngacing.

²⁰Ui pangeh icuk maré peruan. Kudeng Ieh maré peruan, Ui na miak ngisu' ineh.

²¹Ui nier Israil mucu aco, na luk idi dereh idi susa'. Tuhan Allahdeh idi dengandeh, ideh ngamo Neneh raca'deh.

²²Allah nenguit nedeh rat bawang Masir. UngaNeh mepad kudeng unga kerubau luk mesangit.

²³Na luk idi bangun luk metueh rat ni Yakub. Idi na luk idi limu' luk metueh rat nelun Israil. Idi nekini Allah miak buren, ngaceku luk inau'Neh kuan Israil.

²⁴Idi pupu Israil mepad kudeng balang luk mesangit, luk na luku kareb nateh ieh nekuman luk ilapneh, idi kareb nateh nengirup dara' anun-anun luk pinaténeh.”

²⁵Idi kebala Balak ni Bilam, "Kudeng iko na tu-tu miak ngediman nedeh, idi aleg iko ngeperuan nedeh!”

²⁶Idi kebala Bilam ni Balak, "Naké ui nemada' namu, amung luk belén Tuhan, ineh mo' luk miak belénku?”

²⁷Kebala Balak ni Bilam, "Maya' negku amé' su luk iléi teh. Kian, Allah nima' namu ngediman pupu ineh kuanku su ineh lek.”

²⁸Idi Balak nenguit ni Bilam iné' luun Buduk Pior luk muneng ku su luk ali-ali.

²⁹Idi kebala Bilam ni Balak, "Nganau' tudu' bubpun kuanku su ini, idi maré negku tudu' sapi' deléi idi tudu' dumba deléi teh.”

³⁰Idi Balak nenganau' maya' kudeng luk bila Bilam. Idi ieh nemaré sebuleng sapi' deléi idi sebuleng amék deléi luun anid-anid bubpun ineh mangun ku baré luk sabpen.

Lap 24

¹Idi kareb Bilam nekali' idi Tuhan pian ngeperuan nelun Israil, idi na ieh iné' nakap tanu' kudeng lawéneh luk atun. Iamo' ieh nelumi nier su luk ali-ali ineh.

²Idi ieh nenier lepo lun Israil setau' maya' pupudeh. Idi Roh Allah netemurun ni Bilam.

³Idi ieh nengimun mada', kebalaneh, "Ini bala Bilam anak Bior, Idi matehneh pangeh inukab.

⁴Lalidneh ninger bala Allah. Ui nutong pad ui nier kudeng medapo aceh luk sinierku ratnan Allah luk Melalud.

⁵Lepo lun Israil pelaba do' taga,

⁶mepad kudeng raked luk rayeh, idi kabun luk tangeb abpa', mepad kudeng kayuh luk do' buen luk tinibu Tuhan, idi kayuh tumuh luk tangeb arur.

⁷Idi abpa' lubpi ratnan luk ku ngook neneh, idi inulneh mulun su luk inan abpa' luk petap, idi raca'neh medita' rat ni Agag, idi imetneh mebala.

⁸Idi Allah nenguit Israil remuat rat bawang Masir. UngaNeh mepad kudeng unga kerubau luk mesangit. Ideh kuman bunu'deh idi ngareg tulangdeh, idi busudeh pitulen.

⁹Pupu ineh mepad kudeng balang luk mesangit. Kareb ieh rudap, na luk mekuu' ngalat neneh. Lemulun luk ngeperuan Israil miak uen ngeperuan idi lemulun luk ngediman Israil miak uen ngediman.”

¹⁰Idi Balak pelaba useh ni Bilam idi ieh ticul-ticul neneh, kebalaneh, "Ui nenawar namu ngediman bunu'ku. Iamo' iko nengeperuan nedeh teluh kua'.

¹¹Buro iko amé' su luk iratmu nekini. Setuneh ui ngerawé maré tabpar namu. Iamo' Tuhan na nima' namu ngalap tabpar ineh.”

¹²Idi kebala Bilam ni Balak, "Ui nemala kuan lun luk icukmu iné' negku,

¹³'Kudeng ayuneh iko maré ruma'mu kuanku, panu' ku pirak idi amas pana', nateh ui miak ngelaba bala Tuhan idi nganau' luk do' idi luk dat maya' pian niatku sebuleng. Anun luk badén Tuhan ineh teh luk belénku.' “

¹⁴Kebala Bilam ni Balak, "Idi nekini ui lemubed amé' inan pupuku. Idi ui miak mada' namu ratnan luk ruen pupu ini kuan pupumu mucu."

¹⁵Idi ieh nengimun mada' luk biré Allah, kebalaneh, "Ini bala Bilam anak Bior, idi matehneh pangeh inukab,

¹⁶idi lalidneh ninger bala Allah, idi ngalap ileh ratnan Luk Meluun Dita'. Ui nutong pad ui nier kudeng medapo aceh luk sinierku ratnan Allah luk Melalud.

¹⁷Ui nier luk mangun mucu aco, idi ui nier pupu Israil. Sebuleng gituen macing rat ni Yakub, idi sebuleng rukud raca' rat ni Israil. Ieh miak ngareg lun rayeh Moab, idi amung lemulun pesingaro.

¹⁸Edom luk bunu' Israil uenneh ngelaya', pad tana'deh lapenneh, idi Israil luk metueh.

¹⁹Idi Israil miak ngaro bawangdeh, idi ngaté amungdeh luk ketecan."

²⁰Kareb Bilam nenier Amalek, idi ieh nengimun mada' luk biré Allah, kebalaneh, "Pun-pun pupu Amalek luk metueh, iamo' mucu pupu ineh miak mabud."

²¹Kareb ieh nenier nelun Kain idi ieh nengimun mada' luk biré Allah, kebalaneh: "Su luk inan muyuh mudeng meraben, idi arar muyuh rireng luun batu,

²²idi bawang Kain miak sabpen, kareb Asur naban nemuyuh."

²³Idi ieh nengimun mada' teh, kebalaneh, "Idéké luk mepamung pa tinueh busat aco?

²⁴Idi baweh maya' kapal rat bawang lun Kitim. Ideh ngelaya' nelun Asur idi Babil, idi ideh pana' miak maté."

²⁵Idi Bilam nuli' iné' ruma'neh, idi Balak pana' nuli' teh.

Lap 25

¹Kareb lun Israil nelupo déi' Sitim, idi ideh nepasét inan decur Moab.

- ²Decur ineh nenawar nelun Israil kareb ideh maré luk barén kuan akangdeh. Idi ideh nekuman idi netekeradung inan akangdeh.
- ³Idi lun Israil nesembayang inan akang Pior. Idi Allah pelaba useh nedeh.
- ⁴Idi kebala Tuhan ni Musa, "Ngalap amung lun rayehdeh, idi ngekito nedeh luun ét idang pa kiung Tuhan, pad useh Tuhan miak ugka' kuan lun Israil."
- ⁵Idi kebala Musa kuan amung lun luk mutut besara' lun Israil, "Do' ngaté amung lun luk pangeh nemaya' akang Pior."
- ⁶Idi inan aceh lun Israil nenguit sebuleng decur lun Midian iné' leponeh pa kiung Musa idi pa kiung amung lun Israil, kareb ideh nangi' munung tanga' Lepo su luk inan papu' Tuhan.
- ⁷Idi kareb Pinihas Eliasar luk mupun Arun luk imam nenier nedidueh, idi ieh nudur rat arangdeh, idi nengalap busuneh.
- ⁸Idi ieh iné' maya' puet didueh macing bang lepo sedeléi. Idi ieh nemayung nedidueh perapu. Idi kareb ineh idi ét lun Israil nugka'.
- ⁹Iamo' amung lun luk naté ku ét ineh 24,000 burur.
- ¹⁰Idi kebala Tuhan ni Musa,
- ¹¹"Idi Pinihas ineh pangeh nengagka' usehKu nelun Israil. Ngaceku ieh pana' museh nedeh, pad Ui na ngaté nelun Israil maya' gatehKu.
- ¹²Ngaceku ineh do' mala neneh, 'Ui maré pejani' ulun neneh:
- ¹³Idi pejani' ini kuanneh idi kuan inulneh, idi ideh mangun ku imam macing ruked-ruked. Ngaceku ieh mepicet maya' Allah. Idi ieh nenganau' luk nguit pedo' kuan lun Israil.' "
- ¹⁴Idi ngadan deléi lun Israil luk pinaté dengan decur Midian ineh, ieh ineh Simari Salu, ieh ineh aceh lun rayeh inul Simion.
- ¹⁵Idi ngadan decur Midian luk pinaté ineh, Kosbi anak Sur, ieh ineh aceh lun rayeh pupu Midian.
- ¹⁶Idi kebala Tuhan,

¹⁷"Do' iko pebunu' nelun pupu Midian idi ngedereh idi ngaté nedeh.

¹⁸Ngaceku ideh nengedereh nemuyuh, idi nenaluk nemuyuh déi' Pior, ngaceku ratnan lawé Kosbi, luk pinaté kareb ét luk mangun ngaceku akang Pior."

Lap 26

¹Idi pangeh ét ineh, kebala Tuhan ni Musa idi Eliasar Arun ineh,

²"Do' ngiap kinula' amung lun Israil, luk ulun dueh ngepulu' lak idi mela, maya' pupuneh, ieh ineh amung lun Israil luk miak pebunu'."

³⁻⁴Idi Musa idi Eliasar neneteng lemulun luk ulundeh dueh ngepulu' lak idi mela, ieh ineh lun luk miak pebunu'. Ideh nengamung nedeh luun raked Moab i tangeb Abpa' Yarden muneng ku Yeriko. Idi ini lun Israil luk neremuat rat bang bawang Masir:

⁵(Pupu Rubin anak Yakub luk atun): inul Henok, Palu,

⁶Esrone, idi Kami.

⁷Kinula'deh 43,730 burur deléi.

⁸Idi inul Palu, ieh ineh Eliab,

⁹Idi anak Eliab: Nemuil, Datan, idi Abiram. Datan idi Abiram pinili' rat arang lun Israil, idi didueh luk nengedat ni Musa idi Arun kareb didueh perurum ni Kora luk nengedat Tuhan.

¹⁰Idi tana' su luk inandeh nekukab idi didueh nebpeh bang ineh dengan Kora idi lun luk nemaya' neneh kareb 250 burur ineh neseb, idi ideh mangun ku aceh bada' kuan lun mula'.

¹¹Iamo' anak Kora ineh na naté kareb ineh.

¹²Pupu Simion: inul Nemuil, Yamin, Yakin,

¹³Sera, idi Saul.

¹⁴Kinula'deh 22,200 burur deléi.

¹⁵Pupu Gad: inul Sepon, Hagi, Suni,

¹⁶Osni, Eri,

¹⁷Arod, idi Areli.

¹⁸Kinula'deh 40,500 burur deléi.

¹⁹Pupu Yahuda (dueh anak deléi Yahuda, ieh ineh Er idi Onan naté déi' bawang Kanaan):

²⁰inul Sela, Paris, Sera,

²¹Hesron, idi Hamul.

²²Kinula'deh 76,500 burur deléi.

²³Pupu Iskar: inul Tola, Pua,

²⁴Yasub, idi Simron.

²⁵Kinula'deh 64,300 burur deléi.

²⁶Pupu Sebulon: inul Sered, Elon, idi Yael.

²⁷Kinula'deh 60,500 burur deléi.

²⁸Pupu Yusup luk inan dueh anak deléi, ieh ineh Manasé idi Epraim.

²⁹Pupu Manasé: Makir anak Manasé nenginul Giliad. Idi ini inul Giliad:

³⁰inul Yeser, Helek,

³¹Asriel, Sekem,

³²Semidai, idi Hiper.

³³Idi Selopehad, anak Hiper ineh na anak deléi iamo' anak decur mo'. Idi ngadandeh, ieh ineh Makela, Noa, Hogela, Milka, idi Tirsa.

³⁴Kinula'deh 52,700 burur deléi.

³⁵Pupu Epraim: inul Sutela, Beker, idi Tahan,

³⁶idi ini inul Sutela, ieh ineh inul Eran.

³⁷Kinula'deh 32,500 burur deléi.

³⁸Pupu Benjamin: inul Bela, Asbel, Ahiram,

- ³⁹Sesupam, idi Hupam.
- ⁴⁰Idi inul Bela, ieh ineh inul Ared idi Naaman.
- ⁴¹Kinula'deh, 45,600 burur deléi.
- ⁴²Pupu Dan: inul Husim,
- ⁴³kinula'deh 64,400 burur deléi.
- ⁴⁴Pupu Aser: inul Imna, Isui, idi Beria.
- ⁴⁵Idi inul Beria, ieh ineh inul Heber idi Malkiel.
- ⁴⁶(Idi ngadan anak decur Aser ineh Sera.)
- ⁴⁷Kinula'deh, 53,400 burur deléi.
- ⁴⁸Pupu Naptali: inul Yasel, Guni,
- ⁴⁹Yeser, idi Silem.
- ⁵⁰Kinula'deh, 45,400 burur deléi.
- ⁵¹Idi kinula' amung lun Israil, ieh ineh 601,730 burur deléi.
- ⁵²Idi kebala Tuhan ni Musa,
- ⁵³"Tana' ineh uen mabpat kuandeh maya' kinula'deh.
- ⁵⁴⁻⁵⁶Do' mabpat tana' dengan nala' udi. Idi do' iko maré babpat luk rayeh kuan pupu luk mula'. Idi maré babpat luk isuut kuan pupu luk masi'."
- ⁵⁷Pupu Liwi, ieh ineh inul Gerson, Kohat, idi Merari.
- ⁵⁸Idi inan tetek ruma' lun Liwi luk baken, ieh ineh inul Libni, Hebron, Mali, Musi, idi Kora. Idi Kohat ineh taman Amram.
- ⁵⁹Idi ngadan awan Amram ineh Yokebed luk anak Liwi luk tinganak déi' Masir. Idi anak didueh, ieh ineh Arun, Musa, idi Miriam.
- ⁶⁰Idi anak Arun, ieh ineh Nadab, Abihu, Eliasar, idi Itamar.
- ⁶¹Iamo' Nadab idi Abihu naté kareb didueh nenguit apui luk na petulu pa kiung Tuhan.

⁶²Kinula' lun Liwi luk ulun sebulan idi mela, 23,000 burur deléi. Idi na ideh iniap perapu dengan amung lun Israil ngaceku ideh na nepimaran babpat tana' lun Israil.

⁶³Idi ini amung ngadan lun Israil luk iniap Musa idi Eliasar luk imam déi' luun Raked Moab luk tangeb Abpa' Yarden muneng ku Yeriko.

⁶⁴Idi seburur pana' nateh neketecan rat arang lun luk iniap Musa idi Arun déi' su luk ali-ali déi' Sinai atun.

⁶⁵Ngaceku kebala Tuhan nedeh, ideh miak maté déi' su ali-ali. Iamo' Kaleb Yepuneh idi Yusak Nun mo' miak mulun.

Lap 27

¹Idi ngadan anak decur Selopehad luk anak Hiper, luk inul Giliad, Makir, Manasé, idi Yusup, ieh ineh Makela, Noa, Hogela, Milka, idi Tirsa.

²Idi amungdeh iné' matun ni Musa munung tanga' Lepo su luk inan papu' Tuhan. Idi ideh netuped pa atun Musa, Eliasar luk imam, amung lun rayeh, idi amung lun Israil. Kebaladeh,

³"Idi taman kai pangeh naté déi' su luk ali-ali. Iamo' na ieh neperurum nedeh luk ngedat Tuhan maya' aket Kora, iamo' ieh pangeh naté ngaceku sala'neh sebuleng, idi ieh na anak deléi.

⁴Miak ngadan taman kai talan rat arang pupuneh, ngaceku ieh na anak deléi? Maré aceh babpat tana' kuan kai mepad kudeng babpat kinanak taman kai."

⁵Idi Musa nengacing luk biladeh kuan Tuhan.

⁶Idi kebala Tuhan ni Musa,

⁷"Matu bala anak decur Selopehad. Do' iko maré babpatdeh, idi binaweh anun pana' luk kinanak tamandeh kuan. Idi babpat tamandeh do' barén muli' amé' nedeh.

⁸Mada' ini kuan amung lun Israil, 'Kudeng aceh lun maté na anak deléineh, do' maré babpatneh kuan anak decurneh.

⁹Kudeng ieh na anak decur do' muyuh maré babpatneh kuan kinanak deléi ineh.

¹⁰Kudeng ieh na kinanak deléi, do' muyuh maré babpatneh kuan taman pinakenneh.

¹¹Kudeng ieh na taman pinaken, do' muyuh maré babpatneh kuan pupuneh luk muneng neneh. Idi ini miak mangun ku aceh ukum kuan lun Israil maya' kudeng luk bila Tuhan ni Musa.' “

¹²Kebala Tuhan ni Musa, "Amé' iko luun Pegkung Abarim idi nier tana' luk barénKu kuan lun Israil ineh.

¹³Kudeng iko pangeh nenier ineh, iko miak maté mepad kudeng kinanakmu Arun luk naté.

¹⁴Ngaceku medueh pangeh nengelaba balaKu déi' su luk ali-ali déi' Sin, kareb lun mula' ngedureng-ngedureng. Na medueh nengerayeh Negku pa kiungdeh tangeb abpa' ineh, ieh ineh Abpa' Meriba luk muneng ku Kadis déi' su luk ali-ali déi' Sin.

¹⁵Idi kebala Musa kuan Tuhan,

¹⁶"Do' Tuhan luk Lawa Ulun amung lemulun, mili' seburur lun rayeh kuan pupu ini,

¹⁷luk miak nguyut nedeh bang amung lawédeh, pad pupu Tuhan na mepad kudeng aceh riudan dumba luk na lun matar nedeh.”

¹⁸Idi kebala Tuhan ni Musa, "Ngalap ni Yusak Nun, luk inan Roh bang niatneh, idi ngerareng tiku'mu luunneh.

¹⁹Idi ngecuk neneh tuped pa atun Eliasar luk imam idi amung pupu ini. Idi ngikit neneh pa kiungdeh.

²⁰Idi maré sebuang laludmu neneh, pad amung lun Israil miak maya' balaneh.

²¹Idi do' ieh tuped pa kiung Eliasar luk imam, pad Eliasar miak ngitun ukum Urim idi Tumim kuanneh pa kiung Tuhan. Idi ideh miak maya' balaneh bang amung lawédeh, do' Yusak idi amung lun Israil pana'.”

²²Idi Musa nenganau' maya' kudeng luk bila Tuhan neneh. Idi ieh nenaped ni Yusak pa atun Eliasar luk imam idi amung pupu ineh.

²³Idi ieh nengerareng ticu'neh luun ulun Yusak. Idi ieh nengikit neneh maya' kudeng luk bila Tuhan neneh.

Lap 28

¹Kebala Tuhan ni Musa,

²"Do' ngecuk nelun Israil kudeng ini: Baré luk barén kuanKu ieh ineh baré akan idi baré luk sabpen, ieh ineh aceh buen luk do' kuanKu. Idi do' muyuh maré ineh kuanKu bang kareb luk pangeh litep.

³"Ini baré luk sabpen luk barén muyuh kuan Tuhan, ieh ineh do' maré dueh anak dumba luk do' luk ulun selak anid-anid aco.

⁴Sebuleng anak dumba ineh barén kareb pekak, idi sebuleng barén kareb malem,

⁵idi tudu' lio banak ku baré akan luk rinabur ku aceh seréi' umau saitun.

⁶Ini baré luk sabpen luk pangeh bida' Tuhan déi' Pegkung Sinai. Ieh ineh baré luk sabpen mangun ku aceh buen luk do' pa kiungNeh.

⁷Idi baré luk rupen ineh aceh seréi' dengan anid sebuleng anak dumba. Idi do' ngutang abpa' anggur bang Su luk Meligan.

⁸Idi sebuleng anak dumba ineh barén kareb malem dengan baré akan, idi baré luk rupen mepad kudeng baré kareb pekak, ieh ineh baré luk sabpen mangun ku luk do' buen kuan Tuhan.

⁹Kareb Aco luk inan Mudeng do' maré dueh anak dumba luk do' luk ulun selak, idi segatang banak luk rinabur ku umau saitun mangun ku baré akan idi dengan baré luk rupen.

¹⁰Idi ini baré luk sabpen kareb Aco luk inan Mudeng, baken ratnan baré luk sabpen luk pekalai idi baré luk rupen.

- 11"Idi anid-anid pun bulan, do' muyuh maré baré luk sabpen kuan Tuhan, ieh ineh dueh sapi' deléi luk pegawa', sebuleng dumba deléi, idi tudu' anak dumba luk do' luk ulun selak.
- 12Idi segatang setangal banak luk rinabur ku umau saitun mangun ku baré dengan anid sebuleng sapi' deléi, idi segatang banak luk rinabur ku umau saitun mangun ku baré akan dengan anid sebuleng dumba deléi.
- 13Idi tudu' lio banak luk rinabur ku umau saitun mangun ku baré akan dengan anid sebuleng anak dumba, ieh ineh baré luk sabpen mangun ku luk do' buen kuan Tuhan.
- 14Idi barédeh luk rupen, do' ieh ineh dueh seréi' abpa' anggur dengan sebuleng sapi' deléi, idi dueh seréi' abpa' anggur dengan sebuleng dumba deléi, idi aceh seréi' abpa' anggur dengan sebuleng anak dumba. Ini baré luk sabpen anid-anid pun bulan.
- 15Idi teh sebuleng amék deléi barén kuan Tuhan mangun ku baré ngaceku sala', baken ratnan baré luk sabpen luk pekalai idi baré luk rupen.
- 16"Idi kareb pulu' apat aco bulan luk pun ieh ineh Aco Paska kuan Tuhan.
- 17Idi pulu' limeh aco bulan ineh, ieh ineh irau rayeh. Idi tudu' aco kinioneh, do' ideh kuman ruti luk na linamud.
- 18Idi aco luk pun-pun, ieh ineh aceh tebubpun sembayang. Aleg muyuh ngakem bang aco sineh.
- 19Do' muyuh maré kuan Tuhan aceh baré luk sabpen, ieh ineh dueh sapi' deléi luk pegawa', idi sebuleng dumba deléi, idi tudu' anak dumba luk ulun selak, luk do'.
- 20Idi teh baré akan, ieh ineh banak luk rinabur ku umau saitun, segatang setangal dengan sebuleng sapi' ineh idi segatang dengan dumba ineh,
- 21idi tudu' lio dengan anid sebuleng anak dumba ineh,
- 22idi sebuleng amék deléi mangun ku baré ngaceku sala', pad nguit pedo' kuan lun mula'.

²³Baré ini baken ratnan baré luk sabpen anid-anid pekak.

²⁴Kudeng ineh teh muyuh maré bang tudu' aco kinioneh, baré akan luk sabpen mangun ku aceh buen luk do' kuan Tuhan. Baré ineh baken ratnan baré luk sabpen luk pekalai, idi baré luk rupan.

²⁵Idi aco luk ketudu', ieh ineh aceh teubupun sembayang kuan muyuh. Aleg muyuh ngakem bang aco sineh.

²⁶"Idi bang aco luk pun-pun kareb Irau Pangeh Ranih, kareb muyuh maré padé ku baré akan kuan Tuhan, do' muyuh nganau' aceh teubupun sembayang. Idi aleg muyuh ngakem bang aco sineh.

²⁷Idi do' muyuh maré dueh sapi' deléi idi sebuleng dumba deléi idi tudu' anak dumba luk ulun selak, ku baré luk sabpen mangun ku aceh buen luk do' kuan Tuhan,

²⁸idi teh banak luk rinabur ku umau mangun ku baré akan, ieh ineh segatang setangal dengan sebuleng sapi' deléi ineh, idi segatang dengan dumba deléi ineh,

²⁹idi tudu' lio dengan anid sebuleng anak dumba ineh,

³⁰idi sebuleng amék deléi mangun ku baré ngaceku sala' pad nguit pedo' kuan lun mula'.

³¹Do' muyuh maré amung ineh, dengan baré luk rupan, baken ratnan baré luk sabpen idi baré akan luk pekalai.

Lap 29

¹Idi bang aco luk pun-pun bulan luk ketudu' do' muyuh nganau' aceh teubupun sembayang. Aleg muyuh ngakem bang aco sineh. Idi ineh aceh aco luk inan muyuh ngiup suling.

²Idi do' muyuh nguit sebuleng sapi' deléi, sebuleng dumba deléi, idi tudu' anak dumba luk ulun selak luk do', ku baré luk sabpen mangun ku aceh buen luk do' kuan Tuhan,

³idi teh banak luk rinabur ku umau saitun, ku baré akan segatang setangal dengan sapi' ineh, idi segatang dengan dumba ineh,

⁴idi tudu' lio dengan anid sebuleng anak dumba,

⁵idi sebuleng amék deléi mangun ku baré ngaceku sala', pad nguit pedo' kuan lun mula',

⁶baken ratnan baré luk sabpen kareb pun bulan dengan baré akanneh, idi baré luk sabpen luk pekalai dengan baré akanneh, idi baré luk rupen maya' kudeng luk bila kuan muyuh. Iamo' ieh ineh baré luk sabpen mangun ku aceh luk do' buen kuan Tuhan.

⁷"Idi pulu' aco bulan luk ketudu' ineh, do' muyuh nganau' aceh tebubpun sembayang. Do' muyuh mawa' na kuman, idi na ngakem bang aco sineh.

⁸Idi do' muyuh maré sebuleng sapi' deléi, idi sebuleng dumba deléi, idi tudu' anak dumba luk ulun selak, luk do' ku baré luk sabpen mangun ku luk do' buen kuan Tuhan,

⁹idi teh banak luk rinabur ku umau saitun ku baré akan, segatang setangal dengan sapi' ineh, idi segatang dengan dumba ineh,

¹⁰idi tudu' lio dengan anid sebuleng anak dumba,

¹¹idi sebuleng amék deléi mangun ku baré ngaceku sala', baken ratnan baré ngaceku sala' luk nguit pedo' ineh, idi baré luk sabpen luk pekalai, dengan baré akanneh idi baré luk rupen.

¹²"Idi pulu' limeh aco bulan luk ketudu' ineh do' muyuh nganau' aceh tebubpun sembayang. Aleg muyuh ngakem bang aco sineh. Iamo' tudu' aco kinioneh do' muyuh nganau' aco rayeh kuan Tuhan.

¹³Idi bang aco luk pun-pun do' muyuh maré pulu' teluh sapi' deléi idi dueh dumba deléi, idi pulu' apat anak dumba luk ulun selak luk do', ku baré luk sabpen mangun ku luk do' buen kuan Tuhan,

14idi teh banak luk rinabur ku umau saitun ku baré akan, segatang setangal dengan sebuleng sapi' deléi, idi segatang dengan anid sebuleng dumba deléi ineh,

15idi tudu' lio dengan anid sebuleng anak dumba ineh,

16idi sebuleng amék deléi mangun ku baré ngaceku sala', baken ratnan baré luk sabpen luk pekalai idi baré akan, idi baré luk rupen.

17"Idi kareb aco luk kedueh ineh do' maré pulu' dueh sapi' deléi, idi dueh dumba deléi, idi pulu' apat anak dumba luk ulun selak luk do',

18-19Maré amung ineh dengan baré luk litep kuan aco luk pun-pun.

20"Idi kareb aco luk keteluh ineh do' maré pulu' aceh sapi' deléi, dueh dumba deléi, idi pulu' apat anak dumba luk ulun selak luk do',

21-22Maré amung ineh dengan baré luk litep kuan aco luk pun-pun.

23"Idi kareb aco luk keapat ineh do' maré pulu' sapi' deléi, dueh dumba deléi idi pulu' apat anak dumba luk ulun selak, luk do',

24-25Maré amung ineh dengan baré luk litep kuan aco luk pun-pun.

26"Idi kareb aco luk kelimeh ineh, do' maré iwa' sapi' deléi, dueh dumba deléi, idi pulu' apat anak dumba luk ulun selak luk do',

27-28Maré amung ineh dengan baré luk litep kuan aco luk pun-pun.

29"Idi kareb aco luk keanem ineh do' maré ualuh sapi' deléi, dueh dumba deléi, idi pulu' apat anak dumba luk ulun selak luk do',

30-31Maré' amung ineh dengan baré luk litep kuan aco luk pun-pun.

32"Idi kareb aco luk ketudu' ineh, do' maré tudu' sapi' deléi, dueh dumba deléi, idi pulu' apat anak dumba luk ulun selak luk do',

33-34Maré amung ineh dengan baré luk litep kuan aco luk pun-pun.

35"Idi kareb aco luk kewaluh do' muyuh nganau' aceh teubupun sembayang, aleg muyuh ngakem bang aco sineh.

³⁶Idi do' muyuh maré sebuleng sapi' deléi, sebuleng dumba deléi, idi tudu' anak dumba luk ulun selak luk do', ku baré luk sabpen, mangun ku luk do' buen kuan Tuhan,

³⁷⁻³⁸Maré amung ineh dengan baré luk litep kuan aco luk pun-pun.

³⁹"Idi amung ini do' muyuh maré kuan Tuhan, bang anid aco rayeh muyuh luk litep, ieh ineh baré luk sabpen muyuh, baré akan muyuh, idi baré muyuh luk rupen, idi baré muyuh luk nguit pedo', baken ratnan baré ngaceku pejani' muyuh, idi amung baré ratnan katu niat muyuh."

⁴⁰Idi Musa nengacing amung-amung bala luk bila Tuhan neneh kuan lun Israil.

Lap 30

¹Idi kebala Musa kuan amung lun rayeh pupu Israil,

²"Kudeng seburur deléi pangeh nepejani' inan Tuhan, kian nepebulung lek, pian ngado bururneh ratnan anun-anun, idi aleg ieh ngelaba jani'neh, iamo' maya' amung luk bilaneh.

³Iamo' kudeng seburur decur pejani' inan Tuhan pian ngado bururneh ratnan anun-anun kareb ieh bang ruma' tamanneh kareb ieh anak adi',

⁴Idi kudeng jani'neh ineh nekali' tamanneh, idi tamanneh ungeng neneh ratnan ineh, idi na ieh miak ngelaba jani'neh, iamo' do' ieh maya' amung luk bilaneh.

⁵Iamo' kudeng tamanneh mala neneh na petap terawé kareb ieh ninger jani'neh, do' ieh na maya' jani' ineh, idi Tuhan miak maré do' neneh, ngaceku tamanneh nemebpeng neneh.

⁶Idi kudeng decur ineh inaweh lun, kareb nateh jani' ineh binaya'neh,

⁷Idi awanneh kali' ratnan ineh idi ieh ungeng neneh idi decur ineh na miak ngelaba jani'neh, iamo' do' ieh maya' amung luk bilaneh.

⁸Iamo' kudeng awanneh mala neneh na petap terawé kareb ieh ninger jani'neh, do' ieh na maya' jani'neh, ngaceku awanneh nemebpeng neneh, idi Tuhan maré do' neneh.

⁹Iamo' jani' decur tinula' idi decur luk ligkan, na miak uenneh ngelaba.

¹⁰Iamo' kudeng seburur decur bang ruma' deléineh pangeh pejani' pian ngado bururneh ratnan anun-anun,

¹¹idi awanneh ninger ineh, idi ieh pirud neneh idi na mebpeng neneh, idi do' decur ineh maya' jani'neh ineh.

¹²Iamo' kudeng awanneh mebpeng neneh kareb ieh ninger ineh, idi amung luk pangeh bilaneh na miak ruenneh maya' ngaceku awanneh nemebpeng neneh, idi Tuhan pana' miak maré do' neneh.

¹³Idi amung bulung idi jani' luk inau' decur ineh miak ruen awanneh mebpeng, kian ruenneh ngelelep lek.

¹⁴Iamo' kudeng awanneh pirud neneh seaco kinioneh, idi ieh nengelelep jani' awanneh, ngaceku ieh pirud neneh kareb ieh neninger jani' ineh.

¹⁵Iamo' kudeng ieh mebpeng neneh pangeh ineh, ieh miak mabeh sala' awanneh, ngaceku ieh na maya' jani'."

¹⁶Idi amung ini dalam luk bida' Tuhan ni Musa, arang deléi dengan awanneh, idi arang aceh taman dengan anak decurneh luk anak adi' bang ruma' tamanneh.

Lap 31

¹Kebala Tuhan ni Musa,

²"Ngu'a' dereh lun Israil luk inau' lun Midian. Pangeh ineh idi iko miak maté."

³Idi kebala Musa nelun mula' ineh, "Do' mili' tuda'-tuda' burur rat arang muyuh amé' pebunu' nelun Midian, pad ngacing ukum luk inau' Tuhan kuandeh ineh.

⁴Idi ratnan anid-anid inul pupu lun Israil, do' ngecuk meribudeh amé' pebunu'."

- ⁵Idi kinula' luk pinili' ratnan sebuleng inul lun Israil amé' pebunu', ieh ineh meribu burur, idi amungdeh pulu' dueh ngeribu burur.
- ⁶Idi Musa nengecuk nedeh amé' pebunu' dengan Pinihas anak Eliasar luk imam. Idi ieh luk ngimet binaweh Su luk Meligan idi amung tawak luk ruen nateg maré kali' kareb pebunu'.
- ⁷Idi ideh nepebunu' nelun Midian, maya' kudeng luk bila Tuhan ni Musa, idi amung deléi pinatédeh.
- ⁸Idi teh ideh nengaté amung raca' lun Midian, ieh ineh Iwi, Rekem, Sur, Hur, idi Reba, limeh burur raca' Midian, idi teh Bilam Bior.
- ⁹Idi lun Israil nenaban amung decur lun Midian idi amung anak-anakdeh. Idi amung aya'deh idi binawehdeh ilapdeh.
- ¹⁰Idi amung bawang idi ruma' luk inandeh, idi amung lepodeh tinutungdeh.
- ¹¹Idi ideh nengaro amung binaweh idi aya'deh, idi nenaban lemulun teh.
- ¹²Idi ideh nenguit amung luk ilapdeh iné' ni Musa idi ni Eliasar idi amung lun Israil, déi' su luk inandeh nelupo déi' Raked Moab luk tangeb Abpa' Yarden luk muneng ku Yeriko.
- ¹³Musa, Eliasar luk imam, idi amung lun rayeh lun Israil ineh neremuat rat su luk inandeh nelupo idi iné' papu' nedeh.
- ¹⁴Idi Musa pelaba useh nelun rayeh luk nguyut nedeh pebunu', idi do' lun rayeh luk nguyut bang meribu, idi lun rayeh luk nguyut bang meratu luk nacing rat pebunu'.
- ¹⁵Idi kebala Musa nedeh, "Ngudeh muyuh ngulun amung decur ini?"
- ¹⁶Ngaceku ideh ineh luk nenganau' nelun Israil nelemubed ratnan Tuhan, kareb ideh nemaya' bala Bilam idi nesembayang déi' Pior, pad ét ineh nacing nan pupu Tuhan.
- ¹⁷Ngaceku ineh do' ngaté amung deléi rat arang anak-anak ineh, idi ngaté amung decur luk pangeh nepamung inan deléi.
- ¹⁸Iamo' do' ngulun amung decur luk na nepamung inan deléi kuan muyuh.

¹⁹Idé-idé luk pangeh nengaté lemulun idi idé-idé luk pangeh nengakem lun luk pinaté ineh na miak semuet bang su luk inan nelupo tudu' aco kinioneh, idi kareb aco luk keteluh idi aco luk ketudu' do' muyuh ngeligan burur muyuh idi burur lun luk tiban muyuh.

²⁰Idi teh do' muyuh ngeligan amung ayung idi amung luk inau' ratnan kubil idi luk ratnan buluh amék, idi luk ratnan kayuh teh.”

²¹Idi kebala Eliasar luk imam ineh kuan amung lun pebunu' luk pangeh nacing ratnan pebunu', "Ini ukum luk bila Tuhan ni Musa:

²²⁻²³Idi amung amas, pirak, tekaling, belawan, semara' buda', idi semara' item, luk tuman ku apui, do' muyuh ngeligan ineh ku apui. Idi teh amung ineh baruin bang abpa' luk ku maru' sala'. Idi amung binaweh luk baken miak uen ngeligan ku abpa'.

²⁴Idi teh do' muyuh mupu' ayung muyuh kareb aco luk ketudu' ineh pad muyuh meligan. Pangeh ineh muyuh miak semuet bang su luk inan nelupo.”

²⁵Kebala Tuhan ni Musa,

²⁶"Do' iko idi Eliasar dengan lun rayeh pupu Israil ngiap amung aya' idi lemulun luk tiban.

²⁷Idi nganau' amung ineh dueh babpat, sebuleng babpat kuan lun luk iné' pebunu', idi sebuleng babpat kuan lemulun luk na iné'.

²⁸Idi do' ngalap aceh babpat kuan Tuhan rat nelun luk iné' pebunu', ieh ineh sebuleng ratnan limeh ngeratu, do' lemulun, sapi', keladai, idi dumba pana'.

²⁹Idi maré ineh ni Eliasar luk imam mangun ku aceh baré kuan Tuhan.

³⁰Idi ratnan babpat lun luk na iné' pebunu', do' ngalap sebuleng ratnan limeh ngepulu', do' lemulun, idi pung, ieh ineh sapi', keladai, idi dumba pana'. Idi amung ineh barén kuan lun Liwi luk ngimet kekamen bang Lepo su luk inan papu' Tuhan.”

³¹Idi Musa didueh Eliasar luk imam nenganau' maya' kudeng luk bila Tuhan ni Musa.

32-35 Idi amung luk ilap lun luk pebunu' ineh perapu dengan luk dinug bururdeh sebuleng: 675,000 dumba, 72,000 sapi', 61,000 keladai, idi 32,000 decur luk na nepamung nan deléi.

36-40 Idi babpat dumba kuan lun luk iné' pebunu' ineh, 337,500, idi babpat dumba kuan Tuhan, ieh ineh 675; idi sapi' kuan lun pebunu', 36,000, idi babpat sapi' kuan Tuhan, 72; idi keladai kuan lun pebunu', 30,500, idi babpat keladai kuan Tuhan, 61; idi decur luk na nepamung nan deléi kuan lun pebunu', 16,000, idi babpat decur ineh teh kuan Tuhan, 32.

41 Idi Musa nemaré babpat luk barén ni Eliasar luk imam, maya' kudeng luk bila Tuhan ni Musa.

42-46 Idi babpat lun luk na iné' pebunu' ineh mepad mo': 337,500 dumba, 36,000 sapi', 30,500 keladai, idi 16,000 decur luk na nepamung nan deléi.

47 Idi Musa nengalap ratnan babpat lun Israil luk na iné' pebunu', sebuleng ratnan limeh ngepulu', do' lemulun idi pung, idi nemaré ineh nelun Liwi luk ngimet kekamen bang Lepo su luk inan papu' Tuhan, maya' kudeng luk bila Tuhan ni Musa.

48 Idi amung lun rayeh baweh iné' matun ni Musa.

49 Idi kebaladeh neneh, "Kai pangeh nengiap lun luk iné' pebunu' luk pa liang imet kai, idi seburur pana' nateh luk na idi.

50 Idi ngaceku ineh kai nenguit aceh baré kuan Tuhan, maya' anun-anun luk ilap kai luk inau' ratnan amas, ieh ineh pakal, leku', susing, abé, idi bané, pad nganau' luk nguit pedo' kuan kai pa kiung Tuhan."

51 Idi Musa idi Eliasar ineh nengalap amas ineh rat nelun rayeh baweh. Amung ineh inurai lun luk mileh.

52 Idi berat amung amas luk birédeh kuan Tuhan, ieh ineh teluh ngeratu kati mela.

53 Idi amungdeh luk anak itin nenganug luk ilapdeh.

⁵⁴Musa idi Eliasar nengalap amung amas ineh, idi nenguit ineh iné' bang Lepo su luk inan papu' Tuhan mangun ku aceh terawé Tuhan kuan lun Israil.

Lap 32

¹Inul Rubin idi inul Gad mula' aya'. Idi ideh nenier tana' Yaser idi tana' Giliad, idi dueh bawang ineh do' inan nganau' aya'.

²Idi ideh iné' ni Musa, Eliasar luk imam, idi lun rayeh pupu Israil ineh, kebaladeh,

³⁻⁴"Amung bawang luk ilap Tuhan kuan lun pupu Israil, ieh ineh Atarot, Dibun, Yaser, Nimra, Hesbon, Aliala, Sebam, Nebo, idi Bion, ieh ineh aceh tana' luk do' inan nganau' aya'. Idi kai inan mula' aya'.

⁵Do' maré tana' ini kuan kai. Idi aleg ngecuk nekai guta Abpa' Yarden."

⁶Iamo' kebala Musa nedeh, "Pianké muyuh tudo ieni kareb kinanak-kinanak muyuh amé' pebunu'?

⁷Idi ngudehké muyuh ngerapang niat lun Israil, pad ideh na sikal guta amé' bang bawang luk pangeh biré Tuhan kuandeh?

⁸Idi kudeng ineh teh kekamen taman-taman muyuh kareb ui nengecuk nedeh rat Kadis Barnia iné' nier bawang ini.

⁹Kareb ideh iné' idi nacing Ruan Eskol, idi nenier bawang ineh, idi ideh nengerapang niat lun Israil, pad ideh na iné' bang bawang luk biré Tuhan kuandeh.

¹⁰Idi Tuhan pelaba useh nedeh kareb ineh. Idi Ieh nepebulung, kebulungNeh,

¹¹'Kali' rungen seburur pana' rat arang lun luk nepura' rat Masir luk ulun dueh ngepulu' lak idi mela na miak kali' bawang luk pangeh pijani'Ku kuan tepun muyuh, ieh ineh kuan Ibrahim, Isak, idi Yakub, ngaceku ideh na lutep maya' Negku.

¹²Iamo' Kaleb Yepuneh lun Kenisi idi Yusak Nun mo' miak kali' bawang ineh ngaceku didueh pangeh lutep maya' Negku.'

¹³Idi Tuhan pelaba useh nelun Israil, pad Ieh nengecuk nedeh nalan-nalan déi' su luk ali-ali, apat ngepulu' lak kinioneh, pad amung lemulun luk nenganau' sala' pa kiung Tuhan maté.

¹⁴Idi nekini muyuh pana' maya' lawé taman muyuh, aceh inul luk mesala', pian ngula' useh Tuhan kuan lun Israil!

¹⁵Kudeng muyuh lemubed ratnan Tuhan, kali' rungen Ieh nima' pupu ini mio déi' su luk ali-ali. Idi muyuh luk ngacing susa' kuan pupu ini.”

¹⁶Idi ideh nengelio putuhdeh baruh teh kebaladeh, "Kai pian nganau' libung su ini kuan dumba kai, idi bawang luk linibung kuan anak kai.

¹⁷Iamo' kai miak temina' idi amé' pa atun lun Israil, pad macing inan bawangdeh. Iamo' kareb ineh, anak kai miak tudo bang bawang luk meraben libung pad ideh na susa' ku lun bang bawang ineh.

¹⁸Idi kai na miak lemubed kudeng nateh anid-anid burur lun Israil nacing inan bawangdeh.

¹⁹Idi na kai miak ngalap babpat dengandeh déi' dipar Abpa' Yarden idi luk mado pana', ngaceku babpat kai dipar Abpa' Yarden selipa luk pa busat aco.”

²⁰Idi kebala Musa nedeh, "Kudeng muyuh maya' jani' muyuh idi amé' pebunu' pa kiung Tuhan,

²¹idi amung lun pebunu' luk arang muyuh miak guta Abpa' Yarden pa kiung Tuhan idi ngusu amung bunu'Neh rat pa kiungNeh.

²²Idi kudeng bawang ineh pangeh linaya' tu-tu pa kiung Tuhan, pangeh ineh idi teh muyuh miak lemubed, idi muyuh mepuit ratnan jani' muyuh inan Tuhan idi nelun Israil. Idi tana' ini pana' miak mangun ku babpat muyuh pa kiung Tuhan.

²³Iamo' kudeng muyuh na maya' jani' muyuh, kali' rungen muyuh mesala' pa kiung Tuhan, idi sala' muyuh miak migket nemuyuh.

²⁴Do' muyuh mudut bawang kuan anak muyuh idi libung kuan aya' muyuh, idi nganau' maya' kudeng luk bila muyuh.”

- ²⁵Idi kebala inul Gad idi inul Rubin ni Musa, "Kai miak nganau' maya' kudeng luk bilamu nekai.
- ²⁶Anak kai idi awan kai idi amung aya' kai miak ketecan bang bawang Giliad ini.
- ²⁷Iamo' kai miak guta, ieh ineh amung kai luk amé' pebunu' pa kiung Tuhan, maya' kudeng luk bilamu."
- ²⁸Idi kebala Musa ni Eliasar idi ni Yusak Nun idi inan amung lun rayeh pupu Israil,
- ²⁹"Kudeng inul Gad idi inul Rubin guta Abpa' Yarden pebaya' nemuyuh, ieh ineh amung lun luk amé' pebunu' pa kiung Tuhan, idi kudeng bawang ineh pangeh linaya' pa kiung muyuh, idi do' muyuh maré nedeh tana' Giliad ku babpatdeh.
- ³⁰Iamo' kudeng ideh na amé', idi ideh miak ngalap babpat dengan muyuh bang bawang Kanaan."
- ³¹Idi inul Gad idi inul Rubin nengor balaneh, "Kai miak nganau' maya' luk bila Tuhan nekai.
- ³²Kai miak guta amé' pebunu' pa kiung Tuhan bang bawang Kanaan. Idi babpat tana' luk i dipar Abpa' Yarden ini lutep kuan kai."
- ³³Idi Musa nemaré kuan inul Gad idi inul Rubin, idi sebuang inul Manasé anak Yusup, bawang lun Amori luk bang imet Sihon raca' lun Amori, bawang Basan luk bang imet Raca' Og, dengan amung luk bang bawang ineh.
- ³⁴Idi inul Gad nemudut bawang Dibon, Atarot, Arur,
- ³⁵Atarot Sopan, Yasar, Yok Biha,
- ³⁶Bait Nimra, idi Bait Haran, amung ineh bawang luk meraben, dengan libung aya'deh pana'.
- ³⁷Idi inul Rubin nemudut Hesbon, Eliala, Kiriataim,
- ³⁸Nebo, Baal Mion (idi ngadandeh uen ngelibal), idi Sibma. Idi ideh nenganau' ngadan luk mebaruh kuan bawang luk pinudutdeh.

³⁹Idi anak-anak Makir, luk inul Manasé pana' iné' Giliad idi nengaro bawang ineh idi nengusu lun Amori luk bang bawang ineh.

⁴⁰Idi Musa nemaré Giliad ineh kuan Makir luk inul Manasé, idi ieh netudo déi'.

⁴¹Idi Yair luk inul Manasé pana' iné' ngaro amung bawangdeh luk isuut, idi ieh neneten ngadan bawang ineh Hawat Yair.

⁴²Idi Noba pana' iné' ngaro bawang Kenat idi amung babpatneh, idi ieh neneten ngadan bawang ineh Noba nemaya' ngadanneh sebuleng.

Lap 33

¹Idi ini amung su luk inan lun Israil nelupo, kareb ideh nenalan rat bawang Masir dengan amung bawehdeh luk bang imet Musa idi Arun.

²Idi Musa nengayud amung su luk inandeh nelupo, maya' kudeng luk bila Tuhan. Idi ini amung su luk inandeh nelupo rat pundeh nenalan.

³Idi ideh nenalan rat Ramsis pulu' limeh aco bulan luk pun-pun, idi seaco rat pangeh Irau Paska. Idi lun Israil nenalan dengan mawang niat pa kiung lun Masir,

⁴laba' lun Masir nanem amung anakdeh luk atun luk pinaté Tuhan kareb Ieh nengukum allahdeh.

⁵Idi lun Israil nenalan rat Ramsis. Idi ideh nelupo déi' Sukot.

⁶Idi ideh nenalan rat Sukot, idi ideh nelupo déi' Etam luk iring su luk ali-ali.

⁷Idi ideh nelemubed rat Etam idi iné' Pi Hakirok luk pa busat aco Baal Sepon. Idi ideh nelupo petutup Migdol.

⁸Idi ideh nenalan rat Pi Hakirok idi neguta Abpa' Pisui petacu iné' su luk ali-ali. Idi ideh nenalan teluh aco kiadoneh déi' su luk ali-ali déi' Etam. Idi ideh nelupo déi' Mara.

⁹Idi ideh nenalan rat Mara idi nacing Elim. Idi Elim ineh inan pulu' dueh bued abpa' idi tudu' ngepulu' lawa piasau. Idi ideh nelupo su ineh.

- ¹⁰Idi ideh nenalan rat Elim idi nelupo tangeb Abpa' Pisui.
- ¹¹Rat ieneh ideh iné' lupu déi' su luk ali-ali déi' Sin.
- ¹²Pangeh ineh ideh nelupo déi' Dopka.
- ¹³Idi pangeh ineh ideh iné' déi' Alus.
- ¹⁴Pangeh ineh ideh nelupo déi' Repidim. Idi su ineh na luk idi abpa' rupendeh.
- ¹⁵⁻³⁷Rat Repidim macing Pegkung Hor ideh nelupo su ini, ieh ineh: su luk ali-ali déi' Sinai, Kibrot Hatawa, Hasirot, Ritma, Rimon Peris, Libna, Risa, Kehelata, Pegkung Seper, Harada, Makelot, Tahat, Tira, Mitka, Hasmona, Moserot, Beni Yakan, Hor Gidgad, Yotbata, Abrona, Esion Giber, su luk ali-ali déi' Sin, (ieh ineh Kadis), idi Pegkung Hor iring tana' Edom.
- ³⁸⁻³⁹Idi Arun luk imam ineh iné' luun Pegkung Hor maya' bala Tuhan. Idi ieh naté déi' kareb ulunneh 123 lak, bang aceh aco bulan luk kelimeh bang lak luk keapat ngepulu' mucu ratnan lun Israil nepura' rat bawang Masir.
- ⁴⁰Idi raca' bawang Arad, luk tudo déi' tana' Negeb bang bawang Kanaan, neninger bala lun Israil macing.
- ⁴¹⁻⁴⁹Idi ideh nenalan rat Pegkung Hor idi nelupo su ini, ieh ineh: Salmona, Punon, Obot, Ruma' Tican déi' Abarim bang tana' Moab, Dibon Gad, Alemon Diblataim, Pegkung Abarim luk petutup Nebo, idi déi' Raked Moab dipar Abpa' Yarden déi' Yeriko, arang Bait Yesimot dengan Raked Abel Sitim.
- ⁵⁰Idi kebala Tuhan ni Musa déi' raked Moab i tangeb Abpa' Yarden déi' Yeriko,
- ⁵¹"Do' mada' nelun Israil: Kareb muyuh pangeh neguta Abpa' Yarden idi semuet bang bawang Kanaan,
- ⁵²do' muyuh ngusu amung lun bang bawang ineh rat pa kiung muyuh idi mila' amung akangdeh luk ratnan batu, idi ngareg amung akangdeh luk inurai, idi ngusag amung su luk inandeh sembayang.

⁵³Idi do' muyuh ngalap tana' ineh idi tudo déi'. Ngaceku tana' ineh pangeh biréKu nemuyuh.

⁵⁴Idi do' muyuh mabpat tana' ineh kuan pupu muyuh, dengan nala' udi. Idi do' maré babpat luk rayeh kuan inul luk mula', idi babpat luk isuut kuan inul luk pawa'.

⁵⁵Iamo' kudeng muyuh na ngusu lun bang bawang ineh rat pa kiung muyuh, kali' rungen ideh mangun ku aceh usi' bang mateh muyuh idi tabpa' su sigarang muyuh. Idi ideh miak ngesusa' nemuyuh.

⁵⁶Idi kudeng muyuh na ngusu nedeh, Ui miak ngukum nemuyuh, mepad kudeng Ui nengerawé ngukum nedeh."

Lap 34

¹Idi kebala Tuhan ni Musa,

²"Do' mada' nelun Israil: Kareb muyuh semuet bang bawang Kanaan, do' ngeletep lakan tana' muyuh kudeng ini.

³Idi lakan muyuh luk pa kabing busat aco, ieh ineh rat su luk ali-ali déi' Sin, iring tana' Edom. Idi lakanneh pa busat aco, ieh ineh rat paped Abpa' Paci' luk pa busat aco.

⁴Idi rat ieneh lakanneh amé' pa kabing busat aco Ruan Akrabim macing déi' Sin, idi suet pa kabing busat aco Kadis Barnia. Idi rat ieneh lakanneh amé' déi' Hasar Adar idi petacu macing Asmon.

⁵Idi lakanneh kemilu' rat Asmon suet Abpa' Masir, idi papedneh déi' Abpa' Rayeh.

⁶"Idi lakan muyuh pa acep aco ineh Abpa' Rayeh.

⁷"Idi lakan muyuh pa tinueh busat aco, ieh ineh rat Abpa' Rayeh. Do' muyuh ngetu iringneh macing Pegkung Hor.

⁸Idi rat Pegkung Hor ineh do' muyuh ngetu iringneh macing déi' Hamat. Idi paped lakan ineh macing déi' Sedad.

⁹Idi rat ieneh lakan ineh macing déi' Sipron idi papedneh déi' Hasar Enan.

¹⁰"Idi do' muyuh ngetu lakan muyuh pa busat aco rat Hasar Enan macing Sepam.

¹¹Idi lakan ineh musul rat Sepam amé' Ribla pa busat aco Ain. Idi lakan ineh musul teh macing tangeb Takung Galilia pa busat aco.

¹²Idi rat ieneh lakan ineh musul teh macing Abpa' Yarden, idi papedneh déi' Abpa' luk Mepaci'. Ini tana' muyuh dengan lakanneh."

¹³Idi kebala Musa nelun Israil, "Ini tana' luk ruen muyuh mabpat dengan nala' udi, idi luk pangeh bila Tuhan barénNeh kuan inul pupu luk liwa' setangal ineh.

¹⁴Ngaceku pupu Rubin, idi Gad, idi sebuang pupu Manasé pana' pangeh nengalap babpatdeh

¹⁵déi' dipar Abpa' Yarden petutup ku Yeriko pa busat aco."

¹⁶Idi kebala Tuhan ni Musa,

¹⁷"Idi ini ngadan amung lun luk mabpat tana' ineh kuan muyuh, ieh ineh Eliasar luk imam idi Yusak Nun.

¹⁸Idi do' muyuh ngecuk sebuleng lun rayeh rat anid-anid pupu mabpat tana' ineh kuandeh."

¹⁹⁻²⁸Idi ini ngadan lun rayeh luk pinili' Tuhan: Pupu, Lun Rayeh Inul; Yahuda, Kaleb Yepuneh; Simion, Selumil Amihud; Benjamin, Elidad Kision; Dan, Buki Jogli; Manasé, Haniel Epod; Epraim, Kemuel Siptan; Sebulon, Elisapan Panak; Iskar, Paltiel Asan; Aser, Akihud Selomi; Naptali, Padahil Amihud.

²⁹Ini amung lun luk icuk Tuhan mabpat tana' kuan lun Israil bang bawang Kanaan.

Lap 35

¹Idi kebala Tuhan ni Musa déi' raked Moab dipar Abpa' Yarden déi' Yeriko,

²"Ngecuk nelun Israil maré tuda'-tuda' babpat bawangdeh kuan lun Liwi, dengan laman teh.

- ³Idi amung bawang ineh miak inan lun Liwi tudo, idi laman ineh inan aya'deh.
- ⁴Idi laman luk iko maré kuan lun Liwi ineh, ieh ineh rat anid lidung ar bawang 250 depeh.
- ⁵Idi do' muyuh nari rat ku ar bawang ineh rat lidung pa busat aco, 500 depeh, idi rat ku lidung pa kabing busat aco 500 depeh, idi rat ku lidung pa acep aco, 500 depeh, idi rat ku lidung pa tinueh busat aco, 500 depeh, idi bawang ineh luun unedneh. Ieh ineh laman bawangdeh.
- ⁶"Idi rat arang amung bawang luk barén muyuh nelun Liwi, do' inan anem bawang luk inan sigapung, pad lemulun luk ngaté lemulun baken dengan rungen, miak buro amé' déi'. Idi baken ratnan ineh do' muyuh maré apat ngepulu' dueh bawang baruh teh.
- ⁷Idi kinula' amung bawang dengan lamandeh, apat ngepulu' ualuh.
- ⁸Kinula' bawang lun Liwi arang anid pupu uen ngelelep maya' kirayeh tana'deh."
- ⁹Kebala Tuhan ni Musa,
- ¹⁰"Do' mada' nelun Israil: Kareb muyuh pangeh guta Abpa' Yarden macing bawang Kanaan,
- ¹¹do' muyuh mili' tuda'-tuda' bawang su luk inan lun luk ngaté lemulun, baken dengan rungen, miak sigapung.
- ¹²Idi bawang-bawang ineh inanneh sigapung ratnan pupu lun luk pinaté ineh luk pian ngua' até kinanakdeh, pad ieh na pitayen kareb nateh ideh besara'.
- ¹³Do' mili' anem bawang, ieh ineh
- ¹⁴teluh bawang pa busat aco Abpa' Yarden, idi teluh déi' bawang Kanaan.
- ¹⁵Idi anem bawang ineh mangun ku su luk inan sigapung, pad lemulun luk nengaté dengan na inau' rungen, miak buro amé' déi', do' lun Israil idi lun sakai pana'.

16-18"Kudeng aceh lemulun maper aceh lun ku belawan, batu kian kayuh lek, pad ieh maté, idi ieh ineh selemulun luk ngaté dengan rungen. Na miak na ieh pitayen.

19Idi lun luk ngua' até ineh miak ngaté neneh, iapeh su inanneh papu' neneh.

20"Idi teh kudeng aceh lemulun nenebpek aceh lun ku gateh niatneh, kian nemitung neneh macing maté lek,

21kian dengan gateh niatneh ku temaruh ieh pangeh nemukut neneh pad macing maté, na miak na ieh pitayen, ngaceku ieh selemulun luk ngaté dengan rungen. Idi lun luk ngua' até ineh miak ngaté neneh iapeh su inanneh papu' neneh.

22"Iamo' kudeng inan lemulun naté netarad lun baken dengan na inau' rungen, kian nebitungneh ku anun-anun dengan na inau' rungen,

23idi kudeng inan aceh lemulun luk neritep ku batu luk linubid lun baken dengan na nekali', iamo' baken ieh mét niat neneh idi pian nganau' luk dat kuanneh;

24idi do' lun mula' ineh mutut ukum idi méi' nelun luk pangeh nengaté ineh meluun ratnan lemulun luk pian ngua' até ineh.

25Idi do' lun mula' ineh matar nelun luk nengaté ineh ratnan lemulun luk pian ngua' até ineh, idi nated neneh lemubed amé' bang bawang luk inan sigapung, luk inanneh neburo atun. Idi do' ieh tudo déi', pad Imam Rayeh ineh maté.

26Iamo' kudeng lun luk nengaté ineh remuat rat bang bawang luk inanneh sigapung,

27idi kudeng ieh papu' nelun luk ngua' até ineh, idi miak lun luk ngua' até ineh ngaté neneh, idi lun luk ngua' até ineh na mesala'.

28Lun luk ngaté na miak remuat rat bang bawang luk inanneh sigapung kareb nateh Imam Rayeh maté. Iamo' mucu ratnan até Imam Rayeh, ieh miak muli' amé' inan bawangneh sebuleng.

²⁹Idi ini aceh ukum kuan muyuh macing ku anak inul muyuh bang anid-anid bawang muyuh.

³⁰"Anid-anid lemulun luk ngaté lemulun, do' ieh pitayen maya' bala lun luk nekali'. Iamo' kudeng seburur lun luk nekali' mo', na ieh miak pitayen.

³¹Idi aleg muyuh ngalap usin luk ku nguli' nelun luk nengaté ineh. Iamo' do' ieh pitayen.

³²Kudeng ineh teh aleg muyuh ngalap usin luk ku nguli' lemulun luk pangeh neburo iné' bang bawang luk inan sigapung, pad ieh miak muli' amé' bang bawangneh sebuleng kareb nateh Imam Rayeh maté,

³³pelé muyuh ngedat bawang luk inan muyuh tudo. Ngaceku dara' lemulun ineh ngedat bawang. Idi bawang ineh na miak ngalap do' kudeng na ngeruat dara' lemulun luk ngaté ineh.

³⁴Idi aleg muyuh ngelutak bawang luk inan muyuh tudo, ngaceku Ui pana' luk tudo bang ineh. Ui ini Tuhan luk tudo arang uned lun Israil."

Lap 36

¹Idi amung lun rayeh tetek ruma' inul pupu Giliad, anak Makir luk mupun Manasé ratnan inul Yusup ineh iné' matun ni Musa, idi amung lun rayeh lun Israil, kebaladeh,

²"Tuhan nengecuk namu mabpat tana' ineh kuan lun Israil ku babpatdeh dengan nala' udi. Idi teh Tuhan nengecuk namu maré babpat Selopehad luk kinanak kai kuan anak-anakneh luk decur.

³Iamo' kudeng ideh lapen lun pupu Israil luk baken, kali' rungen babpatdeh lapen lun luk ngaweh nedeh, idi babpat kai lun Giliad iuk amé' isuut.

⁴Idi kareb Lak luk Kelimeh Ngepulu' bang bawang Israil, babpatdeh uen nuet dengan babpat inul awandeh ineh. Iamo' babpat kai lun Giliad isuut peh."

⁵Idi kebala Musa nelun Israil, maya' ecuk Tuhan, "Matu bala inul Manasé ini.

⁶Idi ini bala Tuhan ratnan anak-anak decur Selopehad, 'Ideh miak lapen idé-idé luk piandeh, kudeng ieh ratnan pupudeh sebuleng,

⁷pad babpat lun Israil ineh na mubuh ratnan aceh inul amé' inan aceh inul luk baken.

⁸Idi do' anid-anid anak decur luk ngalap babpat arang amung inul lun Israil, lapen deléi ratnan pupuneh sebuleng, pad lun Israil miak matar anid-anid babpat tepundeh,

⁹idi babpat aceh pupu na mubuh amé' inan aceh pupu baken; ngaceku anid-anid inul lun Israil matar babpatdeh sebuleng.' “

¹⁰⁻¹¹Idi anak-anak decur Selopehad, ieh ineh Makela, Tirsa, Hogela, Milka, idi Noa, nemaya' kudeng luk bila Tuhan ni Musa, idi ideh nengaweh, idi ilap anak-anak deléi taman pinakendeh,

¹²ieh ineh deléi rat inul Manasé luk anak Yusup pad babpatdeh lutep kuan inul tamandeh.

¹³Ini amung ukum luk bida' Tuhan kuan amung lun Israil dengan tang Musa luun raked Moab dipar Abpa' Yarden déi' Yeriko.

Bada' Ratnan Ukum

Bada' Ratnan Ukum 1

¹Idi ini amung bala luk bida' Musa nelun Israil dipar Abpa' Yarden, déi' su luk ali-ali, ieh ineh déi' luun Raked Yarden luk petutup ku Sup, arang Paran dengan Topel, Laban, Haserot, idi Disahab.

²(Idi pulu' aceh aco mo' kiado lawédeh rat Pegkung Sinai maya' pegkung-pegkung Sir macing déi' Kadis Barnia.)

³Idi aceh aco bulan pulu' aceh, bang lak luk keapat ngepulu', mucu ratnan ideh nenalan rat Masir, idi Musa nepebala nelun Israil, maya' kudeng luk icuk Tuhan,

⁴Idi mucu ratnan ieh pangeh nengelaya' ni Sihon, raca' lun Amori luk tudo déi' Hesbon, idi Og raca' Basan luk tudo bang bawang Asterot déi' tana' Edri.

⁵Idi dipar Abpa' Yarden, déi' bawang Moab, Musa nengimun ngegala' ukum idi bada' Allah. Kebalaneh,

⁶"Idi Tuhan Allah tau pangeh nepebala netau déi' Sinai, kebalaNeh, 'Petap io muyuh tudo luun pegkung ini.

⁷Idi do' muyuh nalan rat ieni amé luun pegkung lun Amori, idi amé dengandeh luk tudo déi' luun Raked Yarden, do' luk luun raked, do' luk luun pegkung idi luk déi' Negeb, idi luk tudo déi' tangeb Abpa' Rayeh, ieh ineh amung tana' lun Kanaani idi Lebanon, macing abpa' luk rayeh, ieh ineh Abpa' Pirat.

⁸Ieh ineh tana' luk Ui ini Tuhan nepejani' maré kuan tepun muyuh, ieh ineh Ibrahim, Isak, Yakub, idi inuldeh. Amé' muyuh tebawang su ineh.' “

⁹Kebala Musa, "Kareb ineh ui nepebala nemuyuh, 'Ui sebuleng na miak mabeh nemuyuh.

¹⁰Tuhan Allah muyuh pangeh nengula' nemuyuh, pad kinula' muyuh mepad kudeng gituen luk i langit.

- 11**Do' Tuhan, Ieh ineh Allah tepun muyuh, ngula' nemuyuh meribu kua'. Do' Ieh maré peruan nemuyuh, maya' kudeng luk pijani' Tuhan nemuyuh!
- 12**Iamo' kudeng apehké ui sebuleng miak mabeh amung susa' idi dureng muyuh?
- 13**Do' muyuh mili' lemulun luk mileh idi luk do' kali', idi luk pekalai nguyut ratnan inul-inul muyuh, pad ui miak ngikit nedeh mangun ku lun rayeh muyuh.'
- 14**Idi kebala muyuh, 'Matu bala mineh.'
- 15**Idi ui nengalap lun rayeh ratnan inl muyuh, ieh ineh lemulun luk mileh idi luk pekalai nguyut, idi ui nengikit nedeh mangun ku lun rayeh muyuh, ieh ineh rayeh pa luun meribu burur, pa luun meratu burur, pa luun limeh ngepulu' burur, pa luun pulu' burur, idi pa luun amung inul muyuh.
- 16**"Idi ui neperiteteng nedeh, kebalaku, 'Do' muyuh ninger ratnan amung lawé kinanak muyuh idi mutut ukum luk muned arang seburur dengan kinanakneh, idi lun sakai pana'.
- 17**Idi aleg muyuh mili' lemulun, do' lun dat, idi lun do' pana'. Aleg muyuh matot ku lemulun, ngaceku ukum ineh Allah kuan. Iamo' besara' luk pelaba ikat uen muyuh mutut, do' muyuh nguit amé' negku, pad ui miak mutut ineh.'
- 18**Idi kareb ineh teh ui pangeh nemada' ratnan amung luk miak ruen muyuh.
- 19**"Idi tau nenalan rat Sinai idi nemaya' su luk ali-ali, ieh ineh su luk rayeh luk inan matot, luk pangeh sinier muyuh, idi iné' déi' luun pegkung lun Amori maya' kudeng luk icuk Tuhan kuan tau. Idi tau nacing déi' Kadis Barnia.
- 20**Idi kebalaku nemuyuh, 'Idi nekini muyuh pangeh nacing pegkung lun Amori luk pangeh biré Tuhan Allah tau kuan tau.
- 21**Tuhan Allah tepun muyuh pangeh nemaré tana' ineh kuan muyuh. Amé' tebawang su ineh, maya' kudeng luk icukNeh. Aleg muyuh matot idi merapang.'

- 22"Idi muyuh iné' negku, kebala muyuh, 'Do' tau ngecuk tuda'-tuda' burur amé' pa atun tau, pad ideh nier tana' ineh kuan tau idi nguit bala ratnan dalam sapeh luk do' bén tau, idi ratnan bawang-bawang luk ulek tau.'
- 23"Idi bala ineh do' kali'ku. Idi ui nengalap seburur ratnan anid-anid inul muyuh, ieh ineh pulu' dueh burur.
- 24Idi ideh nenalan nuké pegkung idi nacing Ruan Eskol.
- 25Idi ideh nengalap bua'-bua' ratnan tana' ineh, idi nenguit kuan tau, kebaladeh, 'Idi do' tu tana' luk pangeh biré Tuhan Allah tau kuan tau.'
- 26"Iamo' na muyuh sikal nalan amé' déi'. Iamo' muyuh megateh ku bala Tuhan Allah muyuh.
- 27Idi muyuh dureng-dureng bang lepo muyuh, kebala muyuh, 'Ngaceku gatehNeh kuan tau idi Tuhan pangeh nenguit netau remuat rat bang bawang Masir, pian maré netau bang palad lun Amori, pad tau pederen.
- 28Kudeng apehké bawang luk ulek tau? Kali' rungen tau matot? Lun luk icuk ineh nepebala, "Idi ieh ineh aceh pupu luk rayeh idi metueh rat netau. Idi bawang-bawangdeh pana' rayeh muyuh.' Idi kebala muyuh, 'Matu langit. Idi teh kai pangeh nenier inul lun Enak luk rayeh burur déi.'" ‘
- 29"Idi kebalaku nemuyuh, 'Aleg muyuh matot nedeh.
- 30Tuhan Allah muyuh luk nalan pa atun muyuh miak pebunu' libal muyuh, mepad kudeng luk inau'Neh kuan muyuh déi' bawang Masir,
- 31idi déi' su luk ali-ali. Muyuh sebuleng pana' nenier kudeng apeh Ieh pangeh nengabin nemuyuh mepad kudeng selemulun ngabin anakneh, bang amung lawé luk pangeh dinalan muyuh pad muyuh macing su ini.'
- 32Iamo' sagan tu pana' kudeng ineh, nateh muyuh manu inan Tuhan Allah muyuh
- 33luk pangeh nenalan pa atun muyuh, idi luk nenicul su luk do' inan muyuh nelupo. Kareb malem Ieh nenalan bang apui idi kareb acang aco pana' bang laput, pad muyuh miak nier dalam luk bén muyuh.

- 34"Idi kareb Tuhan neninger dureng muyuh Ieh pelaba useh. Idi ieh nepebulung, kebulungNeh,
- 35'Seburur pana' rat arang pupu luk dat ini nateh miak nier tana' luk do' luk pangeh pijani'Ku kuan tepun-tepun muyuh.
- 36'Iamo' Kaleb Yepuneh mo' miak nier ineh. Ui maré tana' luk pangeh ridu'neh kuan Kaleb idi kuan anak-anakneh pana', ngaceku ieh pangeh lutep maya' Tuhan.'
- 37'Idi Tuhan museh negku ngaceku muyuh. Idi kebalaNeh, 'Iko pana' na miak semuet bang bawang ineh.
- 38'Iamo' Yusak Nun luk ngedengan namu, miak semuet bang bawang ineh. Do' iko ngetueh neneh, ngaceku ieh luk miak nguyut nelun Israil, pad ideh tebawang su ineh.'
- 39"Idi kebala Tuhan netau, 'Idi anak-anak muyuh luk pangeh tirawé muyuh miak mangun ku demulun, idi anak-anak muyuh luk isuut luk nateh nekali' do' idi dat, miak tebawang su ineh. Idi Ui miak maré bawang ineh kuandeh.
- 40'Iamo' do' muyuh lemubed idi amé' su luk ali-ali maya' dalam luk amé' matun Abpa' Pisui.'
- 41"Idi muyuh nengor balaku, 'O Musa, kai pangeh mesala' inan Tuhan. Idi kai pian amé' pebunu' maya' amung bala Tuhan Allah kai nekai.' Idi anid-anid muyuh ngayung ku ayung pebunu', ngaceku muyuh mekuu' pian umak pegkung ineh.
- 42'Iamo' kebala Tuhan negku, 'Do' mada' nedeh, Aleg muyuh amé' idi aleg pebunu', ngaceku Ui na idi arang muyuh, pad muyuh na uen amung bunu' muyuh ngelaya'.'
- 43'Idi ui nepebala nemuyuh iamo' muyuh na neninger. Iamo' muyuh megateh ku bala Tuhan, idi dengan dita' niat, muyuh nuké pegkung ineh.
- 44'Idi lun Amori luk tudo luun pegkung ineh iné' ngerada' nemuyuh mepad kudeng tebikan idi nengelaya' nemuyuh déi' bawang Edom macing Horma.

⁴⁵Idi muyuh nelemubed idi nenangi' pa kiung Tuhan. Iamo' na Ieh neninger arod muyuh.

⁴⁶Idi ngaceku ineh muyuh mio tudo déi' Kadis ineh.

Bada' Ratnan Ukum 2

¹"Idi tau nelemubed iné' su luk ali-ali maya' dalam amé' Abpa' Pisui, maya' kudeng luk icuk Tuhan negku. Idi tau nenalan nengelibut pegkung-pegkung Edom tuda'-tuda' lak kinioneh.

²"Idi kebala Tuhan negku,

³Pangeh petap lawé muyuh nengelibut pegkung ini. Do' muyuh lemubed amé' pa tinueh busat aco.

⁴Do' mada' kuan pupu ini: Idi na mio teh muyuh lemaba lakan bawang kinanak muyuh, ieh ineh inul Esau, luk tudo déi' Edom. Ideh matot nemuyuh, iamo' nginita burur muyuh do'-do' rat nedeh ineh.

⁵Aleg muyuh nganau' luk inandeh pebunu'. Ngaceku ratnan tana'deh ineh na Ui maré nemuyuh kirayeh lengayan kukud muyuh pana', ngaceku pegkung-pegkung Edom ineh pangeh biré kuan inul Esau.

⁶Idi do' muyuh melih akan idi abpa' pana' rat nedeh.'

⁷"Tuhan Allah muyuh pangeh nengeperuan nemuyuh bang amung-amung luk ruen muyuh. Idi Ieh pangeh nengasa' nemuyuh raked dalam muyuh déi' su luk ali-ali, luk pelaba rayeh ineh. Idi apat ngepulu' lak ini Tuhan Allah muyuh idi dengan muyuh. Idi muyuh megéi' inan petap.

⁸"Idi tau nenalan idi nenecan bawang kinanak tau, ieh ineh pupu Esau luk tudo déi' Edom. Tau nenecan Raked Yarden idi dalam rat Elat idi Esion Geber. Idi tau numai iné' su luk ali-ali déi' Moab.

⁹"Idi kebala Tuhan negku, 'Aleg muyuh nganau' luk inan lun Moab pebunu'. Ngaceku ratnan tana'deh sesuut pana' nateh barénKu nemuyuh, ngaceku bawang Ar pangeh biréKu kuan pupu Lut.' "

(¹⁰Idi atun lun Emim tudo déi' Ar, ieh ineh aceh pupu luk rayeh, idi ideh medita' mepad kudeng pupu Enak ineh.

¹¹Idi ideh titen lun Repaim mepad kudeng lun Enak ineh, iamo' lun Moab neten nedeh pupu Emim.

¹²Idi lun Hori tudo déi' Edom atun, iamo' pupu Esau nengusu nedeh rat bang bawang ineh idi nengaté nedeh. Idi pupu Esau tudo ieneh, mepad kudeng luk inau' lun Israil mucu nan tana' luk pangeh biré Tuhan kuandeh ineh.)

¹³"Idi tau amung neguta Arur Sered ineh, maya' kudeng luk icuk Tuhan netau.

¹⁴Idi kinioneh tau nalan rat Kadis macing tau guta Arur Sered ineh, ieh ineh teluh ngepulu' ualuh lak, pad amung lun pebunu' mabud maté, maya' kudeng luk bila Tuhan kuandeh.

¹⁵Idi Tuhan nemunu' nedeh, idi nengaté amung-amungdeh.

¹⁶"Idi kareb amung lun pebunu' ineh nabud naté,

¹⁷idi kebala Tuhan negku,

¹⁸Aco sini do' muyuh nalan lemaba lakan Moab déi' bawang Ar.

¹⁹Idi kareb muyuh macing bawang lun Amon luk inul Lut, aleg muyuh nganau' luk inandeh pebunu'. Ngaceku ratnan tana' pupu Amon sesuut pana' nateh Ui maré ku babpat muyuh. Ngaceku bawang ineh pangeh biréKu nedeh.'

²⁰(Idi bawang ini titen tana' lun repaim. Ngaceku atun lun Repaim tudo ieneh. Iamo' lun Amon neten nedeh pupu Samsuim,

²¹ieh ineh aceh pupu luk rayeh, idi medita' mepad kudeng pupu Enak teh. Iamo' Tuhan nengaté nedeh pa kiung lun Amon luk nengalap tana'deh idi tudo déi' pesua nedeh,

²²mepad kudeng luk inau' Tuhan kuan pupu Esau luk tudo déi' luun pegkung-pegkung Edom, kareb Ieh nengaté lun Hori pa kiungdeh, pad pupu Esau nengalap tana' ineh ku babpatdeh. Idi ideh tudo ieneh pesua nedeh pad macing nekini.

- ²³Idi lun Awi luk tudo bang bawang isuut macing déi' Gasa ineh, pangeh pinaté lun Kriti luk rat pulau Kriti. Idi ideh netudo déi' pesua nedeh.)
- ²⁴"Idi kebala Tuhan, 'Do' muyuh nalan idi guta Arur Arnon. Ui pangeh namaré Sihon, raca' Hesbon, lun Amori ineh dengan bawangneh bang palad muyuh. Do' muyuh pebunu' nedeh, idi ngalap bawangdeh.
- ²⁵Aco sini teh Ui ngimun ngacing tot nemuyuh kuan amung pupu iapeh-iapeh pana'. Kareb ideh ninger bala rat nemuyuh, ideh megegeker idi matot.'
- ²⁶"Idi Ui nengecuk tuda'-tuda' lun duken rat su luk ali-ali déi' Kedimot amé' matun Sihon, raca' Hesbon, pad ngacing bala pedo', kebaladeh,
- ²⁷Maré nekai lemaba bawangmu. Kai sikal maya' dalan rayeh. Na kai umai ratnan dalan.
- ²⁸Idi do' iko masui akan ineh kuan kai, pad kai kuman, idi abpa' pana' pisuen kuan kai, pad kai ngirup. Iamo' nima' nekai nalan lemaba bawangmu,
- ²⁹mepad kudeng luk pangeh inau' pupu Esau luk tudo déi' Edom kuan kai, idi lun Moab pana' luk tudo déi' bawang Ar, pad kai guta Abpa' Yarden idi semuet bang bawang luk pangeh biré Tuhan Allah kai kuan kai.'
- ³⁰"Iamo' Raca' Sihon na namaré netau lemaba bawangneh. Ngaceku Tuhan Allah muyuh nengetueh niatneh, pad Ieh namaré neneh bang palad muyuh mepad kudengluk pangeh mangun nekini.
- ³¹"Idi kebala Tuhan negku, 'Ui pangeh nengimun maré ni Sihon perapu bawangneh kuan muyuh. Do' muyuh ngimun ngalap bawangneh, mangun ku babpat muyuh.'
- ³²Idi Sihon dengan amung bawehneh iné' pebunu'netau déi' Yahas.
- ³³Idi Tuhan Allah tau namaré neneh bang palad tau. Idi tau nengaté ni Sihon, idi anak-anakneh idi amung anak itinneh.
- ³⁴Kareb ineh tau nengalap amung bawangneh. Idi tau nengusag amung bawangdeh idi nengaté amung lun deléi' idi decur, idi amung anakdeh. Seburur pana' nateh neketecan.

³⁵Idi amung aya'deh ilap tau kuan burur tau sebuleng, idi amung binaweh bang bawangdeh luk pangeh linaya' tau.

³⁶Rat Arur luk i tangeb Arur Arnon, idi rat bawang luk i tangeb arur ineh suet déi' Giliad, sebuleng bawang pana' nateh luk na linaya' tau, ngaceku Tuhan Allah tau nemaré amung ineh kuan tau.

³⁷Iamo' na tau iné' muneng ku bawang lun Amon, idi amung tangeb Arur Yabuk idi amung bawang luk luun pegkung, idi iapeh-iapeh luk bibpeng Tuhan Allah tau.

Bada' Ratnan Ukum 3

¹"Pangeh ineh tau numai maya' dalam amé' déi' Basan. Idi Og, raca' Basan iné' pebnu' netau perapu dengan amung anak itinneh déi' Edri.

²Iamo' kebala Tuhan negku, 'Aleg iko matot neneh, ngaceku Ui pangeh nemaré neneh bang paladmu perapu amung anak itinneh, idi amung bawangneh teh. Idi do' iko ngaté neneh mepad kudeng iko nengaté ni Sihon, raca' lun Amori, luk tudo déi' Hesbon.'

³"Idi Tuhan Allah tau nemaré Og, raca' Basan, idi amung anak itinneh pana' bang palad tau. Idi tau nepebunu' nedeh, pad seburur pana' nateh luk neketecan.

⁴Idi tau nengalap amung bawangneh. Sebuleng bawang pana' nateh luk na ilap rat nedeh, ieh ineh anem ngepulu' bawang maput babpat Argob, ieh ineh imet Og déi' Basan.

⁵Idi amung bawang rayeh ineh inau'deh meraben dengan libung batu luk medita'; idi tanga' ar inan palin, idi inan teh mula' bawang luk isuut luk na linibung.

⁶Tau nengusag amung bawang ineh, mepad kudeng tau pangeh nengusag bawang Sihon, raca' Hesbon; idi tau nengaté amung lun deléi' idi decur idi amung anakdeh.

⁷Iamo' amung aya' idi amung binaweh bang bawangdeh pangeh ilap tau kuan burur tau sebuleng.

⁸"Idi kudeng ineh luk inau' tau kareb tau nengalap tana' luk i dipar Abpa' Yarden ineh rat bang palad dueh raca' Amori, ieh ineh rat Arur Arnon macing Pegkung Hermon,

⁹(idi lun Sidoni neten Pegkung Hermon ineh Sirion. Idi lun Amori neten ineh Senir.)

¹⁰Idi amung bawang tana' raked, idi aput bawang Giliad, idi maput bawang Basan macing déi' Salka idi Edri, ieh ineh amung bawang bang imet Og déi' Basan."

(¹¹Idi Raca' Og mo' luk neketecan ratnan amung lun Repaim. Pagauneh luk inau' ratnan belawan idi déi' bawang Raba pupu Amon. Kikadangneh dueh depeh mela, idi pipangneh medepéh.)

¹²"Kareb tau nengalap tana' ineh, rat arur luk i tangeb Abpa' Arnon idi sebuang pegkung bawang Giliad perapu ku amung bawangdeh pangeh biréku kuan lun Rubin idi kuan lun Gad.

¹³Idi tana' Giliad luk ketecan idi aput bawang Basan luk bang imet Og ineh, ieh ineh maput babpat Argob, biréku kuan setangal inul Manasé." (Idi aput bawang Basan ineh, ieh ineh titen tana' lun Repaim.

¹⁴Idi Yair anak Manasé ineh nengalap aput babpat Argob, macing lakan bawang lun Gesori idi lun Makati. Idi bawang ineh, ieh ineh Basan, titenneh Bawang Lepo Yair, maya' ngadanneh sebuleng macing aco sini.)

¹⁵"Idi ui nemaré Giliad kuan inul Makir.

¹⁶Idi kuan lun Rubin idi lun Gad pangeh biréku aceh babpat Giliad macing Abpa' Arnon. Idi uned abpa' mangun ku lakandeh pa kabing busat aco, idi lakandeh pa tinueh busat aco, ieh ineh Abpa' Yabuk luk mangun ku sekamu' lakan bawang pupu Amon.

¹⁷Idi teh pa acep aco Abpa' Yarden mangun ku lakandeh, rat Takung Galilia pa tinueh busat aco macing i tangeb Abpa' Luk Mepaci' pa kabing busat aco, idi macing iang Pegkung Pisga pa busat aco.

¹⁸"Idi kareb ineh teh kebalaku nedeh kudeng ini, 'Tuhan Allah tau pangeh nemaré tana' ini luk pa busat aco Abpa' Yarden mangun ku babpat muyuh. Ngaceku ineh do' amung lun luk mesangit rat arang muyuh guta pa atun amung kinanak muyuh lun Israil.

¹⁹Iamo' awan idi anak muyuh idi amung aya' muyuh — idi ui kali' mula' aya' muyuh — amung ineh miak tacin bang bawang luk pangeh biréku nemuyuh,

²⁰pad Tuhan maré amung kinanak muyuh do' udeng mepad kudeng muyuh teh, idi ideh miak tudo bang bawang luk biré Tuhan Allah muyuh kuandeh i dipar Abpa' Yarden. Pangeh ineh do' amung muyuh muli' amé' inan babpat luk biréku nemuyuh.'

²¹"Idi kareb ineh kebalaku ni Yusak, 'Muyuh pangeh nenier amung luk inau' Tuhan Allah muyuh kuan dueh burur raca' ini. Idi kudeng ineh teh luk miak ruen Tuhan kuan amung bawang, su luk ulek muyuh.

²²Aleg muyuh matot nedeh, ngaceku Tuhan Allah muyuh luk pebunu' ku libal muyuh.'

²³"Idi bang kareb ineh ui nesembayang, kesembayangku,

²⁴'O Tuhan Allah, Iko nengimun nicul kuanku kekamenMu luk rayeh idi luk melalud. Na luk idi allah baken bang langit idi bang tana' ini luk miak nganau' mepad kudeng luk inau'Mu.

²⁵Nima' negku guta, pad ui miak nier tana' mebaleng luk i dipar Abpa' Yarden, ieh ineh pegkung luk do' ineh idi Pegkung Lebanon pana'.'

²⁶"Iamo' Tuhan museh negku ngaceku muyuh. Idi na Ieh nengua' putuhku. Iamo' kebala Tuhan negku, 'Petap! Aleg iko mutuh baruh.

²⁷Uké iko amé' luun Pegkung Pisga, idi nier pa acep aco idi pa tinueh busat aco, idi pa kabing busat aco, idi pa busat aco. Nier do'-do'! Iamo' na iko miak guta Abpa' Yarden ini.

²⁸Do' maré kekamenmu kuan i Yusak, idi ngelelep idi ngeraben neneh. Ngaceku ieh luk miak guta pa atun pupu ini. Idi ieh teh miak nguyut nedeh ngalap tana' luk siniermu ineh.'

²⁹"Idi ngaceku ineh tau tudo teh bang ruan luk petutup Bait Pior."

Bada' Ratnan Ukum 4

¹Kebala Musa nelun mula', "O lun Israil, do' muyuh maya' amung ukum luk bida'ku nemuyuh, pad muyuh miak mulun idi tebawang bang bawang luk biré Tuhan Allah tepun muyuh nemuyuh.

²Idi aleg muyuh ngeluun aceh bila' balaku ini. Idi aleg muyuh ngurang ineh. Iamo' nginita amung ukum Tuhan Allah muyuh luk bida'ku nemuyuh.

³Idi muyuh pangeh nenier amung luk pangeh inau' Tuhan déi' Pegkung Pior. Ieh nengaté nelun rat arang muyuh luk nemaya' Baal su ineh.

⁴Iamo' amung muyuh luk lutep inan Tuhan Allah muyuh, mulun macing nekini.

⁵Idi ui pangeh nemada' nemuyuh amung ukum maya' kudeng luk icuk Tuhan Allahku negku, pad muyuh miak nganau' luk matu, kareb muyuh semuet bang bawang luk inan muyuh miak tebawang.

⁶Idi do' muyuh lutep maya' ukum ineh, ngaceku ieh ineh mangun ku ileh muyuh, pa kiung amung pupu. Kareb ideh ninger amung ukum ini, idi ideh miak pebala, 'Pupu luk rayeh ini, ieh ineh aceh pupu luk mileh idi luk do' kali.'

⁷"Na luk idi pupu baken, sagan tu pana' rayeh, luk inan allah luk muneng nedeh, mepad kudeng Tuhan Allah tau luk ngua' putuh tau, kareb mutuh pedengan.

⁸Na luk idi pupu baken, sagan tu pana' rayeh, luk inan ukum luk mesiri mepad kudeng amung ukum luk biréku nemuyuh bang aco sini.

⁹Matar do'-do', idi aleg kelupan amung-amung luk pangeh sinier muyuh, pad amung ineh na mekelupan ruked ulun muyuh. Idi do' muyuh maré kali' kuan anak-anak muyuh idi kuan mupun-mupun muyuh,

¹⁰ratnan aco muyuh iné' pa kiung Tuhan Allah muyuh déi' Sinai, kareb Tuhan nepebala negku kudeng ini, 'Ngamung lun mula' ineh kuanKu pad Ui maré nedeh ninger amung balaKu, idi ideh miak matot Negku seruked ideh mulun luun tana', idi ideh miak mada' anak-anakdeh teh.'

¹¹"Do' mada' nedeh ratnan kudeng apeh muyuh iné' muneng idi tuped iang pegkung, idi pegkung ineh pana' mebudung ku apui macing déi' langit, idi inan rabpun luk mitem idi dacek luk mepingot.

¹²Idi Tuhan nepebala nemuyuh rat bang apui ineh. Idi uni bala ineh pangeh pindenger muyuh. Iamo' na muyuh nenier aceh ayu anun-anun, iamo' neninger uni tang mo' sebuleng.

¹³Idi Ieh nemaré kali' nemuyuh pejani'Neh luk dukenNeh uen muyuh maya', ieh ineh pulu' ukum luk pangeh inayudNeh luun dueh balad batu.

¹⁴Idi Tuhan nengecuk negku mada' nemuyuh amung ukum luk miak bén muyuh bang bawang luk ulek muyuh inan muyuh tebawang.

¹⁵"Do' muyuh matar do'-do', ngaceku aceh ayu pana' nateh luk sinier muyuh kareb Tuhan nepebala nemuyuh déi' Sinai rat uned apui ineh.

¹⁶Idi aleg muyuh nganau' luk dat. Idi aleg nganau' akang luk inarit mepad kudeng ayu deléi idi decur,

¹⁷pung idi suit,

¹⁸pung luk suloi luun tana', idi lawid.

¹⁹Idi aleg muyuh meraruh pad muyuh tekeradung sembayang nan luk siren muyuh i langit — aco, bulan, idi gituen. Amung ineh pangeh biré Tuhan Allah muyuh kuan amung pupu luk liang langit ku babpatdeh.

²⁰Iamo' Tuhan pangeh nengiding nemuyuh idi nenguit nemuyuh remuat rat bang tetel belawan, ieh ineh bawang Masir, pad muyuh mangun ku pupu Tuhan, mepad kudeng luk pangeh nangun nekini.

²¹Idi Tuhan museh negku ngaceku muyuh. Idi Ieh nepebulung pad ui na miak guta Abpa' Yarden. Idi na ui miak semuet bang bawang luk do' luk pangeh biré Tuhan kuan muyuh ku babpat muyuh sebuleng.

²²Ui maté bang bawang ini. Idi na ui guta Abpa' Yarden. Iamo' muyuh guta ineh idi tebawang su ineh luun tana' luk mebaleng.

²³Matar do'-do', pad muyuh na kelupan jani' Tuhan Allah muyuh, pelé muyuh na nganau' akang luk inarit mepad kudeng ayu anun-anun pana'.

²⁴Ngaceku Tuhan Allah muyuh ineh aceh apui luk mebudung, ieh ineh aceh Allah luk temaruh.

²⁵"Idi kareb muyuh inan anak idi ngimupun, idi muyuh pangeh mio bang bawang ineh, idi aleg muyuh mesala' pad muyuh nganau' aceh akang luk inarit mepad kudeng ayu anun-anun pana'. Lawé luk kudeng ineh pelaba dat pa kiung Tuhan Allah muyuh, idi ngacing usehNeh.

²⁶Kudeng muyuh nganau' kudeng ineh, idi aco sini teh ui nawar langit idi tana' maré kali' rat nemuyuh, idi denga segageh muyuh miak metutu' rat bang bawang ineh. Idi na muyuh mio tebawang bang bawang luk i dipar Abpa' Yarden luk ulek muyuh. Iamo' muyuh mabud maté.

²⁷Idi Tuhan miak ngatad nemuyuh amé' arang pupu baken, pad inan sesuut mo' rat arang muyuh luk ketecan déi'.

²⁸Idi muyuh miak sembayang inan allah-allah luk pinudut ticu' lemulun, ieh ineh akang luk inau' ratnan kayuh idi batu luk na nier, na ninger, na kuman, idi na muen pana'.

²⁹Idi bang bawang ineh muyuh miak nakap Tuhan Allah muyuh. Idi muyuh miak kali' Neneh, kudeng muyuh nakap Neneh dengan amung niat muyuh idi amung burur muyuh.

30Kareb muyuh bang susa' idi amung ini mangun kuan muyuh mucu aco, idi muyuh miak lemubed amé' inan Tuhan Allah muyuh idi maya' balaNeh.

31Idi Tuhan Allah muyuh ineh Allah luk méi'. Na Ieh miak necan nemuyuh, idi na Ieh ngedat nemuyuh, idi na Ieh kelupan pejani'Neh luk pangeh pijani'Neh kuan tepun muyuh.

32"Idi do' ngitun ratnan kareb luk atun rat nemuyuh, ieh ineh rat kareb Allah nemudut lemulun luun tana', idi do' nakap rat iring langit amé' iring langit luk selipa, kudeng inan aceh kekamen luk kudeng ini rayeh, luk pangeh sinier idi pindenger.

33Inanké aceh pupu baken luk pangeh neninger tang aceh allah luk pebala rat neninger tang aceh allah luk pebala rat bang apui, mepad kudeng luk pindenger muyuh, idi luk mulun teh?

34Inanké allah baken luk mekuu' ngiding kuan bururneh sebuleng aceh pupu rat arang pupu baken, mepad kudeng luk pangeh inau' Tuhan Allah muyuh kareb muyuh déi' Masir? Pa kiung muyuh Ieh nengegala' lalud idi tuehNeh, pad Ieh nengacing kaca idi bunu'. Ieh nenganau' tanu' idi kekamen luk nan mawa. Idi teh Ieh nengacing luk nan matot.

35Idi ieh ineh tinicul kuan muyuh, pad muyuh kali' Tuhan sebuleng ineh Allah, idi na luk baken rat Neneh.

36Idi Ieh nenima' nemuyuh ninger arodNeh rat bang langit, pad Ieh mada' nemuyuh. Idi Ieh pangeh nemaré nemuyuh nier apuiNeh luk rayeh ineh pa luun tana'. Idi muyuh neninger balaNeh rat bang apui ineh.

37Idi ngaceku Ieh méi' kuan tepun muyuh idi nemili' inuldeh, idi Ieh sebuleng nenguit nemuyuh remuat rat bang bawang Masir dengan laludNeh luk rayeh.

38Idi Ieh nengusu tuda'-tuda' pupu luk meluun rayeh idi meluun tueh rat nemuyuh pa kiung muyuh, pad Ieh miak maré bawangdeh ineh ku babpat muyuh, mepad kudeng luk pangeh mangun nekini.

39Idi nekini do' muyuh ngerawé, idi Tuhan ineh Allah pa luun langit idi pa luun tana'. Idi na luk baken ratnan Allah.

⁴⁰Do' muyuh nginita amung ukumNeh luk bida'ku nemuyuh nekini, pad muyuh idi anak-anak muyuh do' udeng, idi pad ulun muyuh mekadang bang bawang luk biré Tuhan Allah kuan muyuh raked-raked.”

⁴¹Idi Musa nengatad teluh bawang luk déi' dipar Abpa' Yarden luk pa busat aco.

⁴²Idi lun luk ngaté lemulun dengan na inau' rungen miak buro amé' bang sebuleng bawang ineh, kudeng na ieh megateh nan lemulun ineh rat mon, pad ieh miak mulun.

⁴³Bawang luk litep ineh: Bisar déi' su luk ali-ali déi' tana' raked kuan lun Rubin, Ramot déi' bawang Giliad kuan lun Gad, idi Golan déi' bawang Basan kuan lun Manasé.

⁴⁴Idi ini ukum Allah luk biré Musa kuan lun Israil.

⁴⁵Idi ini bada' ratnan ukum luk biré Musa kuan lun Israil kareb ideh neremuat rat bang bawang Masir,

⁴⁶ieh ineh dipar Abpa' Yarden déi' ruan luk petutup ku Bait Pior déi' tana' Sihon, raca' lun Amori, luk tudo déi' Hesbon, idi luk linaya' Musa idi lun Israil kareb ideh neremuat rat bawang Masir.

⁴⁷Idi ideh netebawang luun tana' Sihon ineh idi luun tana' Og, raca' Basan. (Ieh ineh didueh raca' lun Amori luk dipar Abpa' Yarden, luk pa busat aco.)

⁴⁸Tana' luk ilapdeh ineh rat bawang Arur luk tangeb Abpa' Arnon macing Pegkung Sirion, ieh ineh Pegkung Hermon.

⁴⁹Idi amung tana' luk pa busat aco Abpa' Yarden, macing Abpa' Luk Mepaci' luk luun surud iang Pegkung Pisga.

Bada' Ratnan Ukum 5

¹Idi Musa nengamung amung lun Israil, idi kebalaneh nedeh, "Ninger muyuh, O lun Israil, amung bada' ratnan ukum luk belénku nemuyuh aco sini. Idi do' muyuh nginita amung ineh idi maya' ineh.

²Tuhan Allah tau pangeh nenganau' aceh pejani' kuan tau déi' Pegkung Sinai.

- ³Baken kuan tepun tau mo' Tuhan nenganau' pejani' ineh, iamo' kuan tau luk mulun nekini pana'
- ⁴Idi Tuhan nepebala petutup pa kiung muyuh déi' luun pegkung idi rat bang apui ineh.
- ⁵Idi kareb ineh ui tured arang Tuhan dengan muyuh, idi nemada' nemuyuh ku bala Tuhan, ngaceku muyuh matot ku apui ineh. Idi muyuh na sikal uké pegkung. "Idi kebalaNeh,
- ⁶Ui ini Tuhan Allahmu luk pangeh nenguyut namu remuat rat bang bawang Masir, rat su luk inanmu tiban ineh.
- ⁷" 'Aleg iko maya' allah baken rat Negku.
- ⁸" 'Aleg iko nganau' akang maya' ayu anun-anun luk déi' langit, idi luk bang tana', idi luk bang abpa' pana'.
- ⁹Aleg iko ngubur idi tekeradung sembayang ku ineh. Ngaceku Ui ini Tuhan Allahmu luk temaruh, luk ngua' sala' amung taman macing ku anak, idi inul luk keteluh idi luk keapat ratnan amung lemulun luk megateh Negku.
- ¹⁰Iamo' Ui ngegala' katuKu kuan ribu-ribu inul luk mawa Negku idi luk ngimet balaKu.
- ¹¹" 'Aleg iko neten ngadan Tuhan Allahmu mo'-mo'. Ngaceku Ui miak ngukum idé'-idé' luk neten ngadanKu mo'-mo'.
- ¹²" 'Do' iko nginita Aco luk inan Mudeng, pad iko ngeligan ineh, maya' kudeng bala Tuhan Allah namu.
- ¹³Anem aco kinioneh iko miak ngakem.
- ¹⁴Iamo' aco luk ketudu' ineh, ieh ineh aco luk inan Tuhan Allahmu nudeng. Kareb aco ineh aleg iko ngakem, do' iko idi anakmu deléi idi decur pana'; idi lun tebarinmu deléi idi decur teh, aya'mu, idi lun sakai luk tudo bang bawangmu, pad lun dukenmu luk deléi idi decur miak ucu' ngato erurdeh mepad kudeng iko teh.

¹⁵Do' iko ngerawé iko pana' lun tebarin déi' bawang Masir. Idi Tuhan Allahmu pangeh nenguit namu remuat dengan lalud idi tuehNeh luk rayeh. Ngaceku ineh Tuhan Allahmu nengecuk namu nginita Aco luk inan Mudeng.

¹⁶" 'Do' ngedita' tamanmu idi tinanmu, maya' kudeng luk icuk Tuhan Allahmu namu' pad ulunmu mekadang, idi iko do' udeng bang bawang luk biré Tuhan Allahmu namu.

¹⁷" 'Aleg iko ngaté lemulun.

¹⁸" 'Aleg iko pasét.

¹⁹" 'Aleg iko mano.

²⁰" 'Aleg iko ngadu' nelun denganmu dengan mebalih.

²¹" ' Aleg iko melili ku awan lun denganmu. Aleg iko melili ku ruma'neh, tana'neh, lun tebarinneh, sapi'neh, keladaineh, idi binawehneh luk baken.'

²²"Idi amung bala ini bida' Tuhan kuan muyuh dengan arod luk rayeh déi' luun pegkung rat bang apui idi rat bang laput luk medacem. Idi Ieh nengayud bala ineh luun dueh balad batu, idi Ieh nemaré ineh negku.

²³"Idi kareb muyuh neninger uni tang ineh ratnan dacem, idi pegkung ineh pana' mebudung ku apui, idi muyuh iné' negku, ieh ineh amung lun rayeh pupu muyuh idi teh amung lun rayeh lun mula'.

²⁴Kebaladeh, 'Tuhan Allah tau pangeh nengegala' kuan kai ubur idi rayehNeh, idi kai pangeh neninger arodNeh rat bang apui. Idi aco sini pana' kai pangeh nekali' Allah nepebala kuan lemulun, idi ieh mulun teh.

²⁵Iamo' mekudeh kai maté ku apui luk rayeh ineh? Kudeng kai mio ninger arod Tuhan Allah tau, kali' rungen kai maté.

²⁶Idéké rat arang amung lemulun pangeh neninger arod Allah luk mulun ineh, luk nepebala rat bang apui, mepad kudeng luk pindenger kai ini, idi ieh muluh teh?

²⁷O Musa, do' iko amé' matun Neneh idi ninger amung bala luk badén Tuhan Allah tau. Idi do' iko mada' kuan kai amung bala luk badén Tuhan Allah tau namu. Idi kai pian ninger idi maya' ineh.'

²⁸"Kareb Tuhan neninger bala ineh, idi kebalaNeh negku, 'Ui pangeh neninger bala pupu ini, idi amung baladeh matu.

²⁹Idi meluun do' ideh megéi' matot Negku idi nginita amung balaKu, pad ideh idi anak-anakdeh do' udeng macing raked-raked!

³⁰Do' iko amé' ngecuk nedeh muli' amé' lepodeh.

³¹Iamo' do' Musa tured su ini denganKu pad Ui mada' namu amung ukum idi bala luk miak badénmu nedeh, pad ideh maya' ineh bang bawang luk barénKu nedeh.'

³²"Idi matar do'-do', pad muyuh maya' amung-amung luk icuk Tuhan Allah nemuyuh. Idi aleg ngebala balaNeh.

³³Idi do' muyuh maya' amung dalam luk tinicul Tuhan Allah nemuyuh, pad ulun muyuh mekadang idi muyuh do' udeng bang bawang luk inan muyuh tebawang.

Bada' Ratnan Ukum 6

¹"Idi ini amung ukum luk pangeh icuk Tuhan Allah muyuh negku badén nemuyuh, pad muyuh maya' ineh bang bawang luk inan muyuh tebawang,

²pad muyuh matot inan Tuhan Allah muyuh, do' muyuh idi anak-anak muyuh, idi mupun muyuh, raked ulun muyuh, pad ulun muyuh mekadang.

³Idi ngaceku ineh ninger muyuh, O lun Israil, idi nginita do'-do' idi maya' amung ineh, pad muyuh do' udeng, idi muyuh amé' mula' bang bawang luk mebaleng ineh, mepad kudeng Tuhan Allah tepun muyuh pangeh nepejani' nemuyuh.

⁴"Ninger muyuh, O lun Israil! Tuhan Ieh ineh Allah tau. Ieh ineh Tuhan tau luk sebuleng.

- ⁵Idi do' muyuh mawa inan Tuhan Allah muyuh dengan amung niat muyuh, idi amung burur muyuh, idi amung tueh muyuh.
- ⁶Idi do' nganug bang niat muyuh amung bala luk biréKu nemuyuh aco sini.
- ⁷Idi mada' ini do'-do' kuan anak-anak muyuh, idi do' megéi' mada' amung-amung bala ineh kareb muyuh tudo bang ruma' muyuh, idi kareb muyuh nalan, idi kareb muyuh tudo, idi kareb muyuh ngakem.
- ⁸Idi do' muyuh ngabet bala ineh nan pengan muyuh, mangun ku aceh terawé, idi do' ineh mangun ku etu luun madu' muyuh.
- ⁹Idi do' ngayud ineh luun diri tanga' ruma' muyuh, idi luun amung tanga' muyuh.
- ¹⁰"Tuhan Allah tau nguit nemuyuh semuet bang bawang luk pijani'Neh kuan tepun muyuh Ibrahim, Isak, idi Yakub, ieh ineh bawang luk rayeh idi luk do' luk baken pinudut muyuh.
- ¹¹Idi amung ruma' bang bawang ineh panu' ku binaweh luk do' luk baken inau' muyuh, idi inan tuda'-tuda' subuk luk baken inukat muyuh, idi tuda'-tuda' kabun anggur idi kabun lawa saitun luk baken tinibu muyuh; idi kareb muyuh kuman pad mebor,
- ¹²matar do'-do' pad muyuh na mekelupan Tuhan luk pangeh nenguit nemuyuh remuat rat bang bawang Masir, rat su luk inan muyuh mangun ku demulun ineh.
- ¹³Do' muyuh matot inan Tuhan Allah muyuh, idi sembayang Neneh sebuleng mo', idi pebulung ku ngadanNeh teh.
- ¹⁴Aleg muyuh maya' allah pupu baken luk tudo libut-libut muyuh,
- ¹⁵pele' useh Tuhan na macing nemuyuh mepad kudeng apui idi ngaté nemuyuh. Ngaceku Tuhan Allah muyuh luk idi dengan muyuh kali' rungen temaruh peh.
- ¹⁶"Aleg muyuh nutun Tuhan Allah muyuh mepad kudeng luk inau' muyuh déi' Masa.

- ¹⁷Do' muyuh megéi' maya' amung ukum luk biréNeh nemuyuh.
- ¹⁸Do' nganau' luk matu idi luk do' pa kiung Tuhan Allah muyuh, pad muyuh do' udeng, kareb muyuh semuet idi ngalap bawang luk do', luk pangeh pijani' Tuhan kuan tepun muyuh,
- ¹⁹pelé amung bunu' muyuh uen muyuh ngusu, maya' kudeng luk bila Tuhan.
- ²⁰"Idi kali' rungen anak muyuh ngitun nemuyuh mucu, kebaladeh, 'Ngudehké Tuhan Allah tau nengecuk nemuyuh maya' amung ukum ini?'
- ²¹Do' muyuh mada' kuan anak muyuh ineh, 'Idi atun kai ini lun duken raca' Masir. Iamo' tau inuit Tuhan remuat rat bang bawang Masir ineh ku laludNeh luk rayeh.
- ²²Idi Tuhan pangeh nenganau' kekamen luk nan mawa idi tanu'-tanu' luk rayeh luk ngacing susa' kuan lun Masir idi kuan raca'deh idi kuan tetek ruma'neh pa kiung tau.
- ²³Iamo' tau inuitNeh remuat rat bang bawang Masir, pad Ieh miak nguit netau semuet bang bawang luk pangeh pijani'Neh kuan tepun tau.
- ²⁴Idi Tuhan Allah tau nengecuk netau maya' amung ukum ini, idi matot Neneh, pad tau megéi' do' udeng, idi pad Ieh ngulun netau mepad kudeng nekini.
- ²⁵Idi ini luk matu kuan tau, kudeng tau nginita do'-do' idi maya' amung ukum ini pa kiung Tuhan Allah tau, mepad kudeng luk pangeh bila Tuhan kuan tau.'

Bada' Ratnan Ukum 7

- ¹"Tuhan Allah muyuh nguit nemuyuh amé' bang bawang luk ulek muyuh, idi kareb muyuh nalan Ieh miak ngusu pupu-pupu luk meluun rayeh idi melalud rat nemuyuh, ieh ineh amung lun Hiti, Girgasi, Amori, Kanaani, Prisi, Hiwi, idi Yebusi.

- ²Idi kareb Tuhan Allah muyuh pangeh nemaré nedeh bang palad muyuh, idi muyuh pangeh nengelaya' nedeh, do' muyuh ngaté amungdeh. Aleg muyuh pejani' nedeh. Idi aleg muyuh méi' nedeh.
- ³Aleg muyuh ngaweh nedeh. Idi teh aleg nima' anak muyuh ngaweh nedeh.
- ⁴Ngaceku ideh miak ngeraruh anak muyuh rat Negku, pad ideh maya' allah baken, idi pad Tuhan museh nemuyuh, idi ngaté nemuyuh denak-denak.
- ⁵Iamo' do' muyuh nganau' kudeng ini nedeh. Mila' amung bubpundeh idi ngareg amung diri luk pangeh tipeddeh, idi temara' amung pulungdeh idi ngerupung amung akangdeh ku apui pad macing mabud.
- ⁶Ngaceku muyuh ini aceh pupu luk meligan kuan Tuhan Allah muyuh idi luk pangeh pinili' Tuhan Allah muyuh ratnan amung pupu luk pa luun tana', pad muyuh mangun ku pupuNeh.
- ⁷Baken ngaceku muyuh meluun ula' ratnan amung lun luk baken, idi Tuhan méi' nemuyuh, pad Ieh nemili' nemuyuh. Ngaceku muyuh pawa' ratnan amung pupu ineh.
- ⁸Iamo' Tuhan mawa nemuyuh pad Ieh ngacing jani'Neh kuan tepun muyuh. Idi Tuhan nenguit nemuyuh remuat ku laludNeh luk rayeh, idi nemuit nemuyuh ratnan bawang su luk inan muyuh tiban idi rat bang palad raca' Masir.
- ⁹Ngaceku ineh do' muyuh kali' Tuhan Allah muyuh ineh Allah luk matu idi lutep maya' jani'Neh, idi mekatu kuan amung lemulun luk mawa Neneh idi luk nginita ukumNeh, ieh ineh macing nan tuda'-tuda' ngeribu anak inuldeh.
- ¹⁰Iamo' Ieh petacu ngua' amung dat lemulun luk megateh Neneh, idi ngaté nedeh.
- ¹¹Idi do' muyuh maya' amung bala luk bida' nemuyuh, idi maya' amung ukum luk biréku nemuyuh aco sini.

¹²Idi kudeng muyuh maya' amung bala ini idi nginita amung ukum ineh, idi Tuhan Allah muyuh pana' miak ngeletep kuan muyuh pejani'Neh idi katuNeh luk pangeh pijani'Neh kuan tepun muyuh.

¹³Idi Ieh mawa nemuyuh, idi Ieh ngeperuan nemuyuh idi ngula' nemuyuh, pad muyuh mula' anak. Idi Ieh nengeperuan ulu' tana' muyuh, pad muyuh inan petap padé, abpa' anggur, idi umau saitun pana'. Anak sapi' idi anak dumba muyuh pana' uenNeh ngeperuan. Amung peruan ini miak barénNeh bang bawang luk pangeh pijani'Neh kuan tepun muyuh.

¹⁴Idi muyuh uen ngeperuan meluun ratnan amung pupu baken. Idi rat arang muyuh seburur pana' nateh luk na anak. Idi sebuleng aya' pana' nateh luk na anak.

¹⁵Idi Tuhan teh luk ngado amung ét rat nemuyuh. Idi amung kaca luk iko kali' déi' bawang Masir na miak macing nemuyuh peh. Iamo' ét ineh uenNeh ngacing kuan amung bunu' muyuh.

¹⁶Idi muyuh miak ngabud amung pupu luk barén Tuhan Allah muyuh nemuyuh. Aleg muyuh méi' nedeh. Idi aleg muyuh sembayang nan allahdeh. Ngaceku ieh ineh mangun ku aceh abpung kuan muyuh.

¹⁷'Aleg pebala bang niat muyuh, 'Pupu ineh meluun ula' rat netau ini, kudeng apeh tau ngusu nedeh?'

¹⁸Idi aleg muyuh matot nedeh. Do' megéi' ngerawé luk pangeh inau' Tuhan Allah muyuh kuan raca' Masir idi amung anak itinneh.

¹⁹Do' ngerawé ratnan tutun luk rayeh luk pangeh sinier muyuh, idi amung tanu', kekamen luk nan mawa, lalud, idi tueh Tuhan Allah muyuh, kareb Ieh nemuit nemuyuh. Idi kudeng ineh teh luk miak ruen Tuhan Allah muyuh kuan amung pupu luk inan muyuh matot.

²⁰Meluun teh Tuhan Allah muyuh miak maré aceh luk ngedereh arangdeh, pad amung lun luk ketecan idi luk nesigapung metutu' rat pa kiung muyuh.

²¹Aleg muyuh megegker pa kiungdeh. Ngaceku Tuhan Allah muyuh idi dengan muyuh. Ieh Ineh Allah luk meluun rayeh idi luk inan matot.

²²Idi dengan ulai-ulai Ieh miak nala' amung pupu ini rat pa kiung muyuh. Idi na muyuh petacu ngelaya' nedeh, pad na pung luk mesangit meluun ula' rat nemuyuh.

²³Iamo' Tuhan miak maré bunu' ineh bang palad muyuh, idi ngagap nedeh pad ideh mabud maté.

²⁴Idi raca'-raca'deh ineh miak barén bang palad muyuh, idi muyuh pana' miak nala' ngadandeh rat pa liang langit. Seburur pana' nateh miak tuman pa kiung muyuh, pad muyuh ngaté amungdeh.

²⁵Idi do' muyuh ngerupung amung akangdeh. Aleg muyuh melili ku amas idi pirak luk nedeh idi pian ngalap ineh kuan burur muyuh sebuleng, pad muyuh na mepabpung ku ineh. Ngaceku ieh ineh binaweh inan Tuhan Allah muyuh megateh.

²⁶Idi aleg muyuh nguit binaweh luk ku gateh ineh amé' bang ruma' muyuh, pad kediman luk luun binaweh ineh na macing nemuyuh. Do' muyuh megateh neneh, ngaceku binaweh ineh pangeh kidiman Tuhan.

Bada' Ratnan Ukum 8

¹"Do' muyuh lutep maya' amung luk pangeh bilaku nemuyuh aco sini. Pad muyuh miak mulun, idi muyuh uen ngula', pad muyuh miak tebawang bang bawang luk pijani' Tuhan kuan tepun muyuh.

²Idi do' muyuh ngerawé kuyut Tuhan Allah muyuh nemuyuh déi' su luk ali-ali, apat ngepulu' lak kinioneh, pad Ieh nengebeneh niat muyuh idi nenutun nemuyuh, pad Ieh kali' anun luk bang niat muyuh, kudeng muyuh maya' balaNeh kian na lek.

³Idi Ieh nengebeneh niat muyuh, idi nenganau' nemuyuh melau. Idi Ieh nemané manna kenen muyuh luk na inan muyuh nepekalai, idi luk na inan tepun muyuh nepekalai teh, pad muyuh kali', baken ratnan akan mo' lemulun miak mulun. Iamo' lemulun mulun ratnan amung bala luk remuat ratnan tang Tuhan.

- ⁴Idi bang apat ngepulu' lak ayung muyuh na melu luun burur muyuh. Idi kukud muyuh pana' nateh mebara'.
- ⁵Idi do' muyuh ngerawé, Tuhan pangeh nemada' nemuyuh mepad kudeng aceh taman mada' anakneh.
- ⁶Idi do' muyuh nginita amung bala Tuhan Allah muyuh pad muyuh maya' dalamNeh idi matot Neneh.
- ⁷Ngaceku muyuh pana' iten Tuhan Allah muyuh amé' inan tana' luk do', aceh tana' su luk inan arur, bued abpa', idi abpa' luk remuat rat bang tana' bang ruan, idi luun pegkung pana';
- ⁸ieh ineh tana' luk inan padé, dalé, anggur, gita', idi bua' delima, umau saitun, idi duru'.
- ⁹Su ineh muyuh na melau. Idi na muyuh masi' ku anun-anun. Inan belawan bang batu bawang ineh, idi rat pegkung-pegkungneh muyuh miak ngukat tekaling.
- ¹⁰Muyuh miak kuman pad macing mebor, pelé muyuh ngubur Tuhan Allah muyuh ngaceku tana' luk do' luk pangeh biréNeh kuan muyuh.
- ¹¹"Matar do'-do', pad muyuh na mekelupan Tuhan Allah muyuh, idi pad muyuh na ngelaba ukumNeh luk biréku nemuyuh aco sini.
- ¹²Kareb muyuh pangeh kuman pad macing mebor, idi pangeh nemudut idi tudo bang ruma' luk do',
- ¹³idi sapi' idi dumba muyuh pana' pangeh mula', idi muyuh pangeh nengalap mula' amas, pirak, idi amung binaweh luk meraga,
- ¹⁴aleg muyuh medita' niat, pad muyuh na mekelupan Tuhan Allah muyuh luk nenguit nemuyuh remuat rat bang bawang Masir, su luk inan muyuh tiban ineh.
- ¹⁵Ieh nenguyut nemuyuh maya' su luk ali-ali, ieh ineh tana' luk rayeh idi luk inan matot. Inan menipeh luk megalih idi menipal kara'. Idi su ineh tekering

ngaceku na abpa'. Ieh teh luk nengacing abpa' kuan muyuh rat bang batu luk metueh.

¹⁶Idi déi' su luk ali-ali Ieh nemaré manna kuan muyuh luk na inan tepun muyuh nepekalai, pad Ieh miak ngebeneh niat muyuh idi nutun nemuyuh, pad Ieh miak ngeperuan nemuyuh mucu.

¹⁷Idi aleg muyuh ngerawé, 'Idi dengan lalud idi tueh kai sebuleng kai pangeh nengalap amung binaweh ini.'

¹⁸Iamo' do' muyuh megéi' ngerawé Tuhan Allah muyuh luk maré lalud nemuyuh, pad muyuh ngalap mula' binaweh, ngaceku Ieh pian ngacing luk pangeh pijani'Neh kuan tepun muyuh mepad kudeng luk pangeh mangun nekini.

¹⁹Aleg muyuh mekelupan Tuhan Allah muyuh idi maya' allah baken, idi tekeradung sembayang nedeh, pad muyuh na maté kumin Tuhan maya' kudeng luk bilaku.

²⁰Kudeng muyuh na maya' ukum Tuhan, idi muyuh pana' miak pitayen, mepad kudeng lun pupu baken miak pitayen Tuhan pa kiung muyuh.

Bada' Ratnan Ukum 9

¹"Ninger, O lun Israil! Nekini muyuh guta Abpa' Yarden, pad ngelaya' tuda'-tuda' pupu luk meluun rayeh idi meluun tueh rat nemuyuh. Idi bawangdeh pelaba rayeh idi libung bawangdeh pana' macing langit.

²Pupu ineh lun luk medita' idi rayeh burur. Idi muyuh pangeh neninger bala rat nedeh kudeng ini, seburur pana' nateh luk miak metueh rat nedeh.

³Iamo' muyuh miak kali' aco sini pana' Tuhan Allah muyuh luk nalan pa atun muyuh mepad kudeng apui. Idi Ieh miak ngelaya' nedeh pa kiung muyuh, pad muyuh ngusu nedeh, idi ngaté nedeh dengan mesaget, maya' kudeng luk bilaNeh nemuyuh.

⁴"Kareb Tuhan Allah muyuh pangeh ngusu nedeh rat pa kiung muyuh, aleg muyuh ngerawé kudeng ini, 'Ngaceku lalud kai sebuleng idi Tuhan pangeh

nenguit nekai semuet idi tudo bang tana' ini.' Iamo' Tuhan luk ngusu nedeh pa kiung muyuh, ngaceku pupu ineh dat.

⁵Idi baken ngaceku muyuh matu idi teteb niat muyuh, idi muyuh semuet bang bawangdeh, iamo' ngaceku dat pupu-pupu ineh idi Tuhan Allah muyuh ngusu nedeh rat pa kiung muyuh, pad Ieh ngacing bala luk pangeh pijani'Neh kuan tepun muyuh Ibrahim, Isak, idi Yakub.

⁶Iamo' do' muyuh kali' Tuhan Allah muyuh maré tana' luk do' ineh kuan muyuh, baken ngaceku muyuh matu. Ngaceku muyuh aceh pupu luk metueh niat.

⁷Aleg muyuh kelupan amung kekamen muyuh luk nengeruat useh Tuhan Allah muyuh déi' su luk ali-ali, ieh ineh ngimun rat aco muyuh neremuat rat bang bawang Masir, pad muyuh macing su ini, muyuh megateh inan Tuhan.

⁸Déi' Pegkung Sinai pana' muyuh pangeh nengeruat useh Tuhan, pad Ieh pian ngaté amung muyuh.

⁹Ui nuké luun pegkung idi nengalap dueh balad batu, ieh ineh balad batu pejani' luk pangeh inau' Tuhan kuan muyuh, idi ui tudo luun pegkung ineh apat ngepulu' aco apat ngepulu' dacek kinioneh. Ruti pana' nateh kinanku, abpa' pana' nateh inirupku.

¹⁰Idi Tuhan nemaré negku dueh balad batu ineh, inayud ku ticu'Neh, idi luun ineh pangeh inayud amung bala luk bida' Tuhan nemuyuh déi' luun pegkung rat uned apui, kareb lun mula' ineh nepamung.

¹¹Idi pangeh apat ngepulu' aco apat ngepulu' dacek ineh Tuhan nemaré kuanku dueh balad batu, ieh ineh balad batu pejani' ineh.

¹²"Idi kebala Tuhan negku, 'Mudur iko, musul rat ieni dengan mesaget, ngaceku pupumu luk pangeh inuitmu remuat rat bang bawang Masir ineh pangeh nenganau' luk dat idi pangeh numai ratnan dalam luk inanKu neperiteteng namu. Ideh pangeh nemudut aceh akang luk inurai.'

¹³"Idi teh kebala Tuhan negku, 'Ui kali' pupu ini aceh pupu luk metueh niat.

- ¹⁴Nima' Negku pad Ui ngaté nedeh idi nala' ngadandeh rat pa liang langit. Idi Ui pian nganau' namu ku aceh pupu luk meluun tueh idi meluun ula' ratnan pupu ini.'
- ¹⁵"Pangeh ineh idi ui nelemubed idi musul ratnan pegkung. Idi pegkung ineh pana' mebudung ku apui. Idi dueh balad batu ineh idi bang paladku.
- ¹⁶Idi ui nenier nemuyuh petacu na maya' bala Tuhan Allah muyuh, pad muyuh nemudut aceh anak sapi' luk inurai ku akang muyuh.
- ¹⁷Idi ui nemepet batu luk dueh balad ineh idi ineh nebila' pa kiung muyuh.
- ¹⁸Idi ui netekeradung sembayang pa kiung Tuhan maya' kudeng luk atun, apat ngepulu' aco apat ngepulu' dacem kinioneh. Na ui nekuman idi nengirup anun-anun pana', ngaceku ratnan amung sala' luk inau' muyuh, pad ngeruat useh Tuhan.
- ¹⁹Ui matot ku useh Tuhan nemuyuh, ngaceku Ieh pian ngaté nemuyuh amung. Iamo' Tuhan neninger negku sekua' ini teh.
- ²⁰Idi Tuhan pana' meluun useh ni Arun, pad Ieh pian ngaté neneh. Iamo' bang kareb ineh pana', ui nesembayang kuan Arun.
- ²¹Idi pudut luk ku sala' muyuh, ieh ineh anak sapi' luk pangeh inau' muyuh, ilapku idi ui nengeseb ineh idi inaregku bunek-bunek, idi abuhneh tila'ku bang arur luk manud ratnan pegkung ineh.
- ²²"Idi déi' Tabera, Masa, idi Kibrot Hatawa pana' muyuh nengeruat useh Allah.
- ²³Idi kareb Tuhan nengecuk nemuyuh nalan rat Kadis Barnia, pad ngalap tana' luk barénNeh nemuyuh, idi muyuh metueh niat idi na maya' bala Tuhan Allah muyuh. Na muyuh manu Neneh.
- ²⁴Muyuh megateh inan Tuhan rat aco ui nengiti nemuyuh.
- ²⁵"Idi ui netekeradung sembayang inan Tuhan apat ngepulu' aco apat ngepulu' dacem kinioneh, ngaceku Tuhan pian ngaté nemuyuh.

²⁶Kesembayangku, 'Tuhan Allah, aleg ngaté pupuMu idi babpatMu, luk pangeh inuli' ngaceku rayehMu, luk pangeh inuitMu remuat rat bang bawang Masir ku laludMu sebuleng.

²⁷Ngerawé demulunMu Ibrahim, Isak, idi Yakub. Aleg Iko nier tueh niat pupu ini, idi datdeh idi sala'deh,

²⁸pad lun Masir na pebala, "Tuhan na miak nguit nedeh ineh semuet bang bawang luk pangeh pijani'Neh kuandeh. Idi ngaceku usehNeh nedeh, idi Ieh nenguit nedeh remuat pad Ieh miak ngaté nedeh déi' su luk ali-ali."

²⁹Ngaceku ideh pupuMu, idi babpatMu luk pangeh inuitMu remuat ngaceku tueh idi laludMu luk rayeh.'

Bada' Ratnan Ukum 10

¹"Idi kebala Tuhan negku, 'Do' iko ngabang dueh balad batu, mepad kudeng luk atun ineh, idi uké amé' luun pegkung matun Negku. Idi do' iko mudut aceh pati' ratnan kayuh.

²Idi Ui miak ngayud luun balad batu ineh amung bala luk luun dueh balad batu luk atun luk pangeh binila'mu ineh. Idi do' iko ngerareng ineh bang pati' ineh.'

³"Idi ui nemudut aceh pati' ratnan kayuh pirur. Idi ui nengabang dueh balad batu mepad kudeng luk atun di. Pangeh ineh idi ui nuké iné' luun pegkung idi nenguit dueh balad batu ineh.

⁴Idi Tuhan nengayud luun batu ineh bala luk mepad kudeng ayud luk atun, ieh ineh ukum pulu' luk pangeh bida'Neh kuan muyuh rat luun pegkung idi rat uned apui kareb lun mula' ineh nepamung. Idi Tuhan nemaré dueh balad batu ineh negku.

⁵Idi ui nelemubed idi musul ratnan pegkung. Idi dueh balad batu ineh rirengku bang pati' luk pangeh pinudutku, maya' kudeng hak bila Tuhan negku."

- ⁶(Idi lun Israil nenalan rat subuk-subuk lun Yakan iné' Mosera. Idi Arun naté, idi tinanem su ineh. Idi anakneh Eliasar mangun ku imam ku libalneh.
- ⁷Idi rat su ineh ideh nenalan iné' Gudgoda idi rat Gudgoda nacing déi' Yotbata, ieh ineh tana' luk mula' abpa'.
- ⁸Idi kareb ineh Tuhan nengatad inul Liwi, pad ideh mirir Pati' Pejani' Tuhan, pelé ideh tupid pa kiung Tuhan idi sembayang Neneh, idi maré peruan idi neten ngadanNeh macing aco sini.
- ⁹Idi ngaceku ineh lun Liwi na ngalap babpat tana' dengan amung kinanakdeh. Iamo' Tuhan mangun ku babpatdeh maya' kudeng luk pijani' Tuhan Allah muyuh nedeh.)
- ¹⁰"Idi ui netudo luun pegkung ineh apat ngepulu' aco apat ngepulu' dacek kinoneh, mepad kudeng luk atun. Idi Tuhan neninger negku sekua' teh, pad Ieh na sikal ngaté nemuyuh.
- ¹¹Idi kebala Tuhan negku, 'Do' iko lemubed idi nguyut pupu ineh, pad ideh miak semuet idi ngalap tana' luk pangeh pijani'Ku kuan tepundeh.'
- ¹²"Idi nekini pana', ninger O Israil, anunké luk pian Tuhan Allah muyuh ruen muyuh? Do' muyuh matot inan Tuhan idi maya' amung balaNeh. Idi mawa Neneh. Idi maya' Neneh dengan amung niat muyuh idi amung terawé muyuh.
- ¹³Idi do' muyuh nginita amung ukumNeh idi amung balaNeh luk pangeh bida'ku nemuyuh aco sini, mangun ku luk do' kuan muyuh.
- ¹⁴Idi Tuhan luk kuan langit luk meluun dita' pana', idi Ieh luk kuan tana' idi uangneh teh.
- ¹⁵Iamo' Tuhan pangeh méi' kuan tepun muyuh, idi Ieh mawa nedeh, pad Ieh nemili' nemuyuh rat arang amung pupu, mepad kudeng luk pangeh mangun nekini.
- ¹⁶Ngaceku ineh do' muyuh maya' bala Tuhan, idi aleg muyuh metueh niat.

¹⁷Tuhan Allah muyuh ineh Allah pa luun amung allah, idi pa luun amung lalud. Ieh ineh luk meluun rayeh, idi melalud. Idi teh Ieh luk buren. Ieh na mili' lemulun, idi na ngalap suap.

¹⁸Ieh mutut ukum luk matu kuan anak maté, idi decur tinula' pana'. Ieh méi' kuan lun sakai, idi maré akan idi ayung kuandeh.

¹⁹Ngaceku ineh do' muyuh mawa nelun sakai. Ngaceku muyuh pana' atun mangun ku lun sakai bang bawang Masir.

²⁰Do' muyuh matot inan Tuhan Allah muyuh idi sembayang Neneh idi lutep Neneh, idi pejani' ku ngadanNeh sebuleng mo'.

²¹Ngubur Neneh! Ieh ineh Allah muyuh. Idi amung kekamen luk rayeh idi luk nan mawa luk inau'Neh kuan muyuh pangeh sinier muyuh.

²²Kareb tepun muyuh iné' bawang Masir amungdeh tudu' ngepulu' mo'. Iamo' nekini Tuhan Allah muyuh pangeh nengula' nemuyuh mepad kudeng gituen luk déi' langit.

Bada' Ratnan Ukum 11

¹"Do' muyuh mawa inan Tuhan Allah muyuh, idi megéi' maya' amung ukumNeh.

²Do' muyuh ngerawé nekini ratnan amung luk kali' muyuh ratnan Tuhan. Baken anak-anak muyuh, iamo' muyuh sebuleng luk pangeh nekali' amung ineh. Muyuh nenier rayeh Tuhan dengan lalud idi tuehNeh,

³idi tanu'-tanu'Neh pana'. Muyuh nenier luk pangeh inau'Neh kuan raca' Masir idi amung imetneh.

⁴Muyuh nenier Tuhan nengusag baweh Masir, dengan amung kudadeh idi amung kerétadeh, ngaceku Ieh nengened nedeh bang Abpa' Pisui, kareb ideh nengerada' nemuyuh.

⁵Muyuh kali' luk inau' Tuhan kuan muyuh déi' su luk ali-ali, kareb nateh muyuh nacing su ini.

⁶Muyuh kali' luk inau'Neh kuan Datan idi Abiram luk anak Eliab luk inul Rubin. Tana' ineh netenganga' idi nenelen ruma'deh idi lepodeh, dengan amung demulun idi aya'deh.

⁷Matu muyuh luk pangeh nenier amung kekamen luk rayeh luk inau' Tuhan.

⁸"Do' muyuh maya' amung ukum luk bida'ku nemuyuh aco sini, pad muyuh metueh idi semuet bang bawang luk inan muyuh miak tebawang.

⁹Idi muyuh mio tebawang bang bawang luk pangeh pijani' Tuhan kuan tepun muyuh idi inuldeh, ieh ineh aceh tana' luk mebaleng.

¹⁰Bawang luk ulek muyuh nekini baken kudeng bawang Masir, su luk inan muyuh tudo atun idi luk inisak muyuh ku ilung idi luk binubpur muyuh sebuleng, mepad kudeng kabun irin.

¹¹Iamo' tana' luk ulek muyuh ieh ineh tana' luk mula' pegkung idi ruan, luk meba'ku udan.

¹²Ieh ineh tana' luk isa' Tuhan Allah muyuh raked lak.

¹³"Do' muyuh maya' amung ukum luk bida'ku nemuyuh aco sini, pad muyuh mawa inan Tuhan Allah muyuh idi maya' Neneh dengan amung niat muyuh idi amung terawé muyuh teh,

¹⁴pad Ieh maré udah luun tana' muyuh maya' karebneh, ieh ineh udah luk pun idi udan luk kekiped, pad muyuh ngamung padé, abpa' anggur, idi umau saitun muyuh.

¹⁵Idi Ieh miak maré uduh kuan amung aya' muyuh, idi muyuh miak kuman macing mebor.

¹⁶Matar do'-do' pad muyuh na saluken, pelé muyuh na teketed idi lemubed maya' allah baken idi sembayang nedeh.

¹⁷pelé Tuhan na museh nemuyuh idi Ieh na ngitek langit pad na mudan, idi tana' pana' na miak inan uli', pad muyuh na metutu' ratnan bawang luk do' luk biré Tuhan kuan muyuh.

- 18**"Do' muyuh ngerawé amung ukum ini, idi nuet ineh bang niat muyuh. Ngabet ineh nan pengan muyuh, idi luun madu' muyuh pad muyuh megéi' ngerawé ineh.
- 19**Idi do' mada' ini kuan anak-anak muyuh idi do' muyuh megéi' mada' amung bala ineh kareb muyuh tudo bang ruma' muyuh, idi kareb muyuh nalan, idi kareb muyuh telubid pian rudap, idi kareb kulat pana'.
- 20**Do' ngayud ineh luun diri tanga' ruma' muyuh idi luun amung tanga' muyuh,
- 21**pad ulun muyuh idi ulun anak-anak muyuh mekadang bang bawang luk pijani' Tuhan kuan tepun muyuh, ieh ineh seruked langit pa luun tana' ini.
- 22**"Matar do'-do' idi maya' amung ukum luk bida'ku kuan muyuh. Mawa inan Tuhan Allah muyuh, idi maya' amung dalanNeh, idi do' muyuh lutep Neneh.
- 23**Idi Tuhan miak ngusu amung pupu ini rat pa kiung muyuh, idi muyuh pana' miak ngalap bawang tuda'-tuda' pupu luk meluun rayeh, idi meluun tueh rat nemuyuh.
- 24**Amung su luk delanin muyuh ieh ineh kuan muyuh, rat su luk ali-ali macing déi' Lebanon, idi Abpa' Pirat macing Abpa' Rayeh luk pa acep aco.
- 25**Idi seburur pana' nateh miak ngagka' nemuyuh. Tuhan Allah muyuh miak ngacing gegker idi tot nemuyuh pa luun amung tana' luk pangeh nedalan muyuh, maya' kudeng luk pijani' Tuhan nemuyuh.
- 26**"Idi aco sini teh ui nganau' pa kiung muyuh peruan idi kediman,
- 27**ieh ineh peruan kudeng muyuh maya' amung ukum Tuhan Allah muyuh luk bida'ku nemuyuh aco sini,
- 28**idi kediman kudeng muyuh na maya' ukum Tuhan Allah muyuh, idi kudeng muyuh umai ratnan dalan luk bida'ku nemuyuh aco sini, pad muyuh maya' allah baken luk na inan muyuh nepekalai.

²⁹Idi kareb Tuhan Allah muyuh pangeh nenguit nemuyuh amé' bang bawang luk ulek muyuh, idi do' muyuh mada' peruan ineh rat luun Surud Gerisim, idi kediman ineh rat Surud Ibal.

³⁰(Dueh surud ineh pa acep aco Abpa' Yarden, iring dalam rayeh pa acep aco tana' lun Kanaani, luk tudo déi' luun Raked Yarden petutup ku bawang Gilgal muneng ku kayuh luk meraben déi' Moré.)

³¹Nekini muyuh miak amé' guta Abpa' Yarden idi tebawang luun tana' luk barén Tuhan Allah nemuyuh. Idi kareb muyuh ngalap tana' ineh idi tudo ieneh,

³²do' muyuh matar do'-do', idi maya' amung ukum luk bida'ku nemuyuh aco sini.

Bada' Ratnan Ukum 12

¹"Do' ninger amung ukum luk miak bén muyuh bang bawang luk biré Tuhan Allah tepun muyuh nemuyuh, seruked ulun muyuh bang bawang ineh.

²Do' muyuh ngusag amung su luk inan pupu baken sembayang inan allahdeh bang bawang luk lapen muyuh, do' luun pegkung luk medita' idi luun surud, idi liang lawa kayuh pana'.

³Ngusag amung bubpundeh, mila' amung diri akangdeh, ngeseb amung ulung luk inandeh sembayang, idi nangal amung akangdeh, pad ideh na sembayang su ineh peh.

⁴"Aleg muyuh sembayang nan Tuhan Allah muyuh maya' dalam pupu ini.

⁵Iamo' do' muyuh amé' su luk pilin Tuhan Allah muyuh ratnan babpat amung inul pupu muyuh. Ngaceku Ieh miak ngelelep ngadanNeh idi tudo ieneh.

⁶Idi su ineh teh do' muyuh nguit amung baré luk sabpen muyuh, baré luk kereten muyuh, babpat pulu', baré luk iten muyuh, baré luk pijani' muyuh, baré muyuh ratnan katu niat, idi amung anak sapi' idi dumba muyuh luk atun.

⁷Idi su ineh, do' muyuh idi uang tetek ruma' muyuh kuman pa kiung Tuhan Allah muyuh dengan mawang niat, ngaceku Tuhan Allah muyuh pangeh nengeperuan nemuyuh bang amung-amung luk ruen muyuh.

⁸Aleg muyuh nganau' maya' kudeng luk inau' muyuh su ini, ieh ineh anid-anid burur nganau' luk matu maya' terawédeh sebuleng.

⁹Ngaceku nekini nateh muyuh nacing su luk inan muyuh ucu' idi bang bawang luk biré Tuhan Allah nemuyuh.

¹⁰Iamo' muyuh miak guta Abpa' Yarden idi tudo bang bawang luk biré Tuhan Allah nemuyuh, idi kareb Ieh muit nemuyuh ratnan amung bunu' muyuh, kali' rungen muyuh do' udeng.

¹¹Idi do' muyuh nguit amung luk pangeh bida'ku nemuyuh amé' su luk pilin Tuhan Allah muyuh, pad Ieh miak ngelelep ngadanNeh su ineh, do' baré muyuh luk sabpen, baré muyuh luk kereten, babpat pulu', baré luk iten muyuh, idi amung binaweh luk do', idi baré luk pijani' muyuh inan Tuhan.

¹²Idi do' muyuh geriguen pa kiung Tuhan Allah muyuh, do' muyuh dengan amung anak muyuh, amung lun tebarin muyuh, idi amung lun Liwi pana' luk tudo bang anid bawang muyuh. (Do' ngerawé lun Liwi luk na miak ngalap babpat tana' mepad kudeng muyuh.)

¹³Aleg maré baré luk sabpen muyuh iapeh-iapeh luk pian muyuh;

¹⁴iamo' su luk pilin Tuhan ratnan amung babpat inul pupu muyuh, su ineh do' muyuh maré baré luk sabpen muyuh, idi do' muyuh nganau' amung-amung luk badénku nemuyuh su ineh.

¹⁵Iamo' muyuh miak ngeret pung idi kuman uang maya' luk pian muyuh maya' kudeng luk barén Tuhan Allah muyuh bang amung su luk inan muyuh tudo' do' lun luk ku gani' idi lemulun luk meligan miak kuman ineh, ieh ineh talau idi payo.

¹⁶Iamo' aleg muyuh kuman dara'. Do' muyuh ngutang ineh luun tana' mepad kudeng abpa'.

¹⁷Idi bang bawang luk inan muyuh tudo na muyuh miak kuman babpat pulu' ratnan padé, abpa' anggur, umau saitun, sapi' idi dumba muyuh luk atun, binaweh luk pangeh pijani' muyuh, baré muyuh ratnan katu niat, idi baré luk iten muyuh.

¹⁸Iamo' do' muyuh kuman ineh pa kiung Tuhan Allah muyuh su luk pilinNeh ineh, do' muyuh idi anak muyuh, lun tebarin muyuh, idi lun Liwi luk tudo bang bawang muyuh. Do' muyuh geriguen pa kiung Tuhan Allah muyuh bang amung-amung luk ruen muyuh.

¹⁹Aleg kelupan nelun Liwi seruked muyuh tudo bang bawang ineh.

²⁰"Kareb Tuhan Allah muyuh pangeh nengiuk lakan bawang muyuh maya' kudeng luk pijani'Neh nemuyuh, idi muyuh miak kuman uang pung maya' pian niat muyuh.

²¹Idi kudeng su luk pilin Tuhan Allah muyuh inan sembayang mado rat su inan muyuh, miak muyuh ngeret ratnan sapi' idi dumba muyuh luk biré Tuhan nemuyuh, kenen su luk inan muyuh tudo maya' pian niat muyuh mepad kudeng luk bida'ku nemuyuh.

²²Mepad kudeng talau idi payo miak kenen, kudeng ineh teh do' muyuh kuman ineh, do' lun luk ku gani' idi lun luk meligan miak kuman ineh.

²³Iamo' aleg kuman dara'. Ngaceku dara' ieh ineh ulun. Idi na muyuh miak kuman uang dengan ulunneh.

²⁴Aleg muyuh kuman dara', iamo' ngutang ineh luun tana' mepad kudeng abpa'.

²⁵Aleg muyuh kuman ineh, pad muyuh do' udeng idi anak inul muyuh pana' ngaceku muyuh nganau' luk matu pa kiung Tuhan.

²⁶Do' muyuh nguit baré muyuh luk meligan, idi baré luk pijani' muyuh pana', amé' su luk pilin Tuhan.

²⁷Idi maré baré luk sabpen muyuh, do' uangneh idi dara'neh luun bubpun Tuhan Allah muyuh. Do' ngutang dara' amung baré luk kereten muyuh luun bubpun Tuhan Allah muyuh. Iamo' uangneh miak kenen muyuh.

²⁸Do' muyuh lutep maya' amung luk bida'ku nemuyuh, pad muyuh do' udeng idi anak inul muyuh pana' macing raked-raked, ngaceku muyuh nganau' luk do' idi luk matu pa kiung Tuhan Allah muyuh.

²⁹"Tuhan Allah muyuh miak ngelaya' amung pupu ineh kareb muyuh ngerieng bawangdeh, idi muyuh miak tebawang su ineh.

³⁰Kareb ideh pangeh linaya' Tuhan, matar do'-do', idi na maya' lawé sembayangdeh, pad muyuh na meraruh idi aleg ngitun ratnan lawé sembayangdeh, pad muyuh na nginud lawé ineh.

³¹Aleg muyuh sembayang nan Tuhan Allah muyuh maya' lawé sembayangdeh ineh. Ngaceku amung luk ruendeh kuan allahdeh, ieh ineh pelaba dat pa kiung Tuhan, pad ideh ngeseb anakdeh pana' luun bubpundeh.

³²"Do' maya' amung luk bida'ku nemuyuh. Aleg muyuh ngeluun, idi aleg muyuh ngurang bala ineh.

Bada' Ratnan Ukum 13

¹"Kudeng inan arang muyuh aceh nabi, kian lemulun luk nginupi lek, luk maré tanu' kian kekamen luk nan mawa lek,

²pad ngubuk nemuyuh sembayang nan allah baken luk na inan muyuh nepekalai, sagan tu pana' luk pijani'neh ineh mangun,

³aleg muyuh ninger balaneh. Ngaceku muyuh tetunin Tuhan Allah muyuh, pad Ieh kali' kudeng matu-matu muyuh mawa Neneh dengan amung niat muyuh.

⁴Do' maya' Tuhan Allah muyuh, matot Neneh, nginita balaNeh, ninger uni tangNeh, idi lutep sembayang Neneh.

⁵Iamo' nabi, kian lun luk nginupi ineh na miak na ieh pitayen, ngaceku ieh pangeh nenganau' nemuyuh neteketed ratnan Tuhan Allah muyuh luk pangeh

nenguit nemuyuh remuat rat bang bawang Masir, idi luk pangeh nenguli' nemuyuh rat su ulek muyuh tiban ineh, idi nabi ineh nenganau' nemuyuh umai ratnan dalam luk icuk Tuhan Allah delanin muyuh. Idi do' muyuh nala' luk dat ineh rat arang muyuh.

⁶"Idi kudeng kinanakmu luk sebuleng tinan namu, kian anakmu deléi, kian anak decurmu, kian awan luk gipalinmu, kian lun denganmu luk inan niatmu mawa ngubuk namu dengan lulem, kebalaneh, 'Amé' kiteh sembayang inan allah baken,' luk na inanmu idi tepunmu nepekalai,

⁷ieh ineh allah amung pupu luk libut-lubut muyuh, do' luk muneng, do' luk mado rat iring tana' macing iring selipa,

⁸aleg iko maya' ubukneh. Idi aleg ninger balaneh. Aleg iko méi' neneh. Idi aleg mawa neneh. Idi aleg ngelinged sala'neh.

⁹Do' ngaté neneh. Iko luk pun-pun mitung neneh ku batu. Pangeh ineh idi lun baken mitung neneh teh.

¹⁰Do' muyuh mitung neneh ku batu pad ieh maté, ngaceku iko pangeh tinutunneh nelemubed ratnan Tuhan Allahmu luk pangeh nenguit nemuyuh remuat rat bang bawang Masir, ieh ineh bawang luk inan muyuh tiban ineh.

¹¹Idi amung lun Israil miak ninger idi mator, pad ideh na mekuu' maya' dalam luk dat kudeng ineh arang muyuh.

¹²"Idi kudeng muyuh ninger bala bang aceh bawang luk barén Tuhan Allah nemuyuh

¹³ratnan lun luk dat luk remuat rat arang muyuh, idi ideh nengubuk amung lun bawang ineh, kebaladeh, 'Amé' tau sembayang inan allah baken,' luk inan muyuh na nepekalai,

¹⁴idi do' muyuh ngitun idi ngelio do'-do'. Idi kudeng inan kekamen luk dat arang muyuh,

¹⁵idi do' muyuh ngaté amung lun luk bang bawang ineh. Idi ngusag bawang ineh dengan amung luk mudeng bang ineh, idi amung aya'deh pana'.

¹⁶Do' ngamung amung binawehdeh luun natad. Idi do' nutung bawang ineh idi amung binawehdeh mangun ku aceh baré kuan Tuhan Allah muyuh. Idi bawang ineh pana' musag macing raked-raked idi na miak piduten baruh peh.

¹⁷Idi aleg muyuh ngalap binaweh anun-anun luk pangeh kidiman ineh, pad Tuhan ugka' ratnan usehNeh, idi Ieh miak mada' katuNeh kuan muyuh, idi Ieh miak méi' nemuyuh idi ngula' nemuyuh maya' kudeng luk pijani'Neh kuan tepun muyuh,

¹⁸kudeng muyuh maya' amung ukumNeh luk bida'ku nemuyuh aco sini idi nganau' luk matu pa kiung Tuhan Allah muyuh.

Bada' Ratnan Ukum 14

¹"Muyuh ineh anak-anak Tuhan Allah muyuh. Ngaceku ineh aleg muyuh ngurat burur muyuh, idi mingit buluh madu' muyuh kareb inan lun luk maté.

²Muyuh ineh aceh pupu luk meligan kuan Tuhan Allah muyuh. Idi muyuh pangeh pinili' Tuhan rat arang muang pupu luk luun tana' pad muyuh mangun ku pupuNeh sebuleng.

³"Aleg muyuh kuman aceh luk ku gani'.

⁴Ini pung luk miak kenen muyuh, ieh ineh sapi', dumba, amék,

⁵payo, talau, pelanuk, amék luk meliputi, idi dumba luk meliputi.

⁶Idi amung pung luk dueh lisun, idi luk ngelua' miak kenen muyuh.

⁷Iamo' pun luk na ngelua', idi luk na dueh lisun na miak kenen, ieh ineh unta, arneb, idi sapan, ngaceku sagan pana' ideh ngelua', iamo' lisundeh na dueh, idi ideh mangun ku gani' kuan muyuh.

⁸Aleg kuman barek idi baka, ngaceku sagan pana' lisundeh dueh, iamo' na ideh ngelua', idi ideh mangun ku gani' kuan muyuh. Aleg muyuh kuman uangdeh, idi aleg ngakem butungdeh.

⁹"Muyuh miak kuman amung lawid luk inan raga idi rara.

- ¹⁰Iamo' amung pung bang abpa' luk na ragi idi na rara na miak kenen muyuh. Ideh mangun ku gani' kuan muyuh.
- ¹¹"Amung suit luk meligan miak kenen muyuh.
- ¹²⁻¹⁸Iamo' aleg muyuh kuman amung suit ini: amung-amung kanui, amung-amung puek, amung-amung bungkak, suit unta, suit luk mebuda' tangeb abpa' rayeh, manuuk, lal lakui, kekalit, idi pawat.
- ¹⁹"Idi teh amung pung luk inan ilad luk nalan dengan apat kukud mangun ku gani' kuan muyuh, idi na miak kenen.
- ²⁰Iamo' amung pung luk inan ilad luk apat kukudneh, luk meligan miak kenen muyuh.
- ²¹"Aleg muyuh kuman butung anun-anun. Iamo' maré ineh kuan lun pupu baken luk tudo arang muyuh pad ieh kenendeh, idi miak pisuen muyuh kuandeh. Ngaceku muyuh ineh aceh pupu luk meligan kuan Tuhan Allah muyuh. "Idi aleg muyuh nanek anak amék bang abpa' rata tinanneh.
- ²²"Idi do' iko maré babpat pulu' anid lak ratnan amung uli' lati'mu.
- ²³Idi amé' su luk pilin Tuhan Allah inan sembayang, idi do' iko kuman amung babpat pulu' padému, abpa' anggurmu, umau saitunmu, idi anak sapi' idi dumbamu luk atun, pad iko sibada' matot inan Tuhan Allahmu anid-anid aco.
- ²⁴Iamo' kudeng iko pelaba ado pad iko na miak nguit babpat pulu' ratnan uli'mu amé' su luk inan sembayang ineh, do' iko nganau' kudeng ini:
- ²⁵Do' iko ngelibal babpat pulu' ineh ku usin, idi usin ineh miak itenmu amé' su luk inan sembayang ineh.
- ²⁶Do' iko maré usin ineh ku libal amung binaweh luk pian niatmu, ieh ineh sapi', dumba, abpa' anggur, luk rupen luk megalih, idi amung luk pian niatmu. Idi kudeng ineh teh do' iko peruyung kuman pa kiung Tuhan Allahmu. Idi do' iko mawang niat dengan amung uang tetek ruma'mu.
- ²⁷Idi aleg kelupan lun Liwi luk tudo bang bawangmu. Ngaceku na ideh ngalap babpat tana' mepad kudeng muyuh.

²⁸"Kareb pangeh teluh lak, do' iko ngeruat amung babpat pulu' peranihmu, idi uen ngamung bang bawangmu sebuleng.

²⁹Idi lun Liwi luk na miak ngalap babpat tana' mepad kudeng iko, idi teh lun sakai, anak maté, idi decur tinula' luk tudo bang bawangmu, miak amé' kuman pad macing mebor, pad Tuhan Allahmu miak ngeperuan namu bang amung-amung luk ruenmu.

Bada' Ratnan Ukum 15

¹"Kareb pangeh tudu' lak aleg iko mupud baleh.

²Idi kudeng ini lawéneh. Anid-anid lun luk maré kebiten kuan lun danganneh, do' nima' neneh, idi aleg mupud baleh ineh, ngaceku puit ineh ratnan Tuhan.

³Miak iko mupud baleh lun pupu baken. Iamo' anun-anun luk pangeh birému inicheh lun denganmu, do' nima' neneh.

⁴"Kareb ineh na luk idi lun masi' arang muyuh, (ngaceku kali' rungen Tuhan ngeperuan nemuyuh mucu bang bawang luk barén Tuhan Allah muyuh nemuyuh,

⁵kudeng muyuh maya' bala Tuhan Allah muyuh idi nginita amung ukum ini luk bida'ku nemuyuh aco sini.)

⁶Tuhan miak ngeperuan nemuyuh maya' kudeng luk pijani'Neh nemuyuh. Idi muyuh miak maré kebiten kuan tuda'-tuda' pupu. Iamo' muyuh sebuleng na miak ngabit. Idi muyuh miak ngimet tuda'-tuda' pupu. Iamo' ideh na miak ngimet nemuyuh.

⁷"Idi kudeng inan arang muyuh aceh lun masi', ieh ineh seburur kinanakmu luk tudo iapeh-iapeh bang bawangmu luk barén Tuhan Allahmu namu, idi aleg iko metueh niat, idi meramen inan kinanakmu luk masi' ineh.

⁸Iamo' do' iko mekatu maré kebitenneh anun-anun luk pianneh.

⁹Matar do'-do' pad na luk idi terawé luk dat bang niatmu, pad iko pebala kudeng ini, 'Idi muneng lak luk ketudu', ieh ineh lak puit,' idi iko meramen

inan kinanakmu luk masi' ineh, idi na iko maré anun-anun kuanneh, pad ieh na ngilang namu pa kiung Tuhan, idi ieh ineh na mangun ku sala' kuanmu.

¹⁰Do' iko mekatu maré kuanneh. Idi aleg iko meramen kareb iko maré neneh. Ngaceku kudeng iko mekatu, Tuhan Allahmu miak ngeperuan namu bang amung-amung luk ruenmu.

¹¹Ngaceku megéi' inan lun masi' arang muyuh. Idi ui periteteng namu: Do' iko mekatu maré kuan kinanakmu, ieh ineh lun masi' luk tudo bang bawangmu idi lemulun luk inan susa'.

¹²"Idi kudeng kinanakmu, ieh ineh aceh lun Iberani luk deléi kian decur luk pangeh pinasui namu, idi ieh miak ngakem kuanmu anem lak kinioneh, idi bang lak luk ketudu' do' iko muit neneh.

¹³Idi kareb iko muit neneh aleg muit neneh dengan na uang.

¹⁴Idi do' iko maré neneh baré luk do' ratnan amung-amung luk biré Tuhan namu, ieh ineh dumba, padé, idi abpa' anggur.

¹⁵Idi do' iko ngerawé iko pana' lun tebarin atun bang bawang Masir, idi iko inuli' Tuhan Allahmu. Idi aco sini ui mada' dalan ini kuanmu.

¹⁶"Iamo' kudeng demulunmu pebala namu kudeng ini, 'Na ui sikal mepuit rat namu,' ngaceku ieh mawa namu idi muang uang tetek ruma'mu pana', idi do' udengneh tudo denganmu,

¹⁷Idi do' iko ngalap langan, idi nebpek lalidneh luun tanga', idi ieh mangun ku lun dukenmu seruked ulunneh. Idi nganau' kudeng ineh teh kuan demulun decur.

¹⁸Idi aleg iko mesusa' niat kareb iko muit neneh, ngaceku ieh pangeh ngakem kuanmu anem lak kinioneh mepad kudeng aceh lun tebarin luk ngalap setangal tabparneh mo'. Idi Tuhan Allahmu miak ngeperuan namu bang amung-amung luk ruenmu.

¹⁹"Do' iko maré amung anak sapi' idi dumbamu luk atun kuan Tuhan Allahmu: aleg iko makai sapi' ineh, idi aleg muting buluh dumba ineh pana'.

²⁰Idi do' iko kuman ineh anid lak pa kiung Tuhan Allahmu su luk pilinNeh, dengan amung uang tetek ruma'mu.

²¹Iamo' kudeng inan datneh, kudeng meliai, kian mebuser, kian mebaké idi dat luk baken lek, aleg iko maré ineh kuan Tuhan Allahmu.

²²Muyuh miak kuman ineh bang ruma' muyuh, do' lun luk ku gani' idi lun luk meligan pana', mepad kudeng lawé muyuh kuman talau idi payo.

²³Aleg iko kuman dara'neh, iamo' ngutang ineh luun tana' mepad kudeng abpa'.

Bada' Ratnan Ukum 16

¹"Idi do' muyuh nganau' Irau Paska kuan Tuhan Allah muyuh bang bulan Abib. Ngaceku bang bulan Abib ineh Tuhan Allah muyuh nenguit nemuyuh remuat rat bang bawang Masir kareb medacem.

²Idi kareb Aco Rayeh Paska ineh do' iko ngeret sapi' idi dumba kuan Tuhan Allahmu su luk pilin Tuhan inan sembayang.

³Idi aleg iko kuman ruti luk linamud dengan ineh. Tudu' aco kinioneh, do' iko kuman ruti luk na linamud, ngaceku dengan tepapeh-tepapeh iko pangeh neremuat rat bang bawang Masir. Kuman ruti ineh pad iko ngerawé derehmu ineh, pelé iko na mekelupan acomu neremuat rat bawang Masir ineh raked ulunmu.

⁴Seburur pana' bang bawang muyuh nateh luk inan lamud bang ruma'neh tudu' aco kinioneh; idi uang pung luk kereten muyuh malem luk pun-pun na miak ketecan macing kenebpa.

⁵"Idi aleg ngeret pung luk ku baré Paska ineh iapeh-iapeh bang bawang muyuh luk barén Tuhan Allah muyuh kuan muyuh.

⁶Iamo' ngeret ineh bang su luk pilin Tuhan inan sembayang, kareb macep aco, bang jam luk petulu dengan kareb muyuh neremuat rat bang bawang Masir.

- ⁷Do' iko nanek idi kuman ineh su luk pilin Tuhan inan sembayang, idi pekak kenebpa miak iko muli'.
- ⁸Idi anem aco kinioneh do' iko kuman ruti luk na linamud. Idi aco luk ketudu' ineh, ieh ineh aco rayeh kuan Tuhan Allahmu. Bang aco ineh na iko miak ngakem.
- ⁹"Idi do' iko ngiap tudu' minggu, ieh ineh rat pun-pun iko ngeranih.
- ¹⁰Idi do' iko nganau' aco rayeh minggu ineh kuan Tuhan Allahmu, idi do' nguit baré dengan katu niat maya' peruan luk uen Tuhan Allahmu ngacing namu.
- ¹¹Idi do' iko geriguen pa kiung Tuhan Allahmu dengan anakmu, lun dukenmu, idi lun Liwi, lun sakai, anak maté, idi decur tinula' luk tudo bang bawang muyuh, ieh ineh su luk pilin Tuhan inan sembayang.
- ¹²Do' muyuh ngerawé, muyuh pana' lun tebarin atun bang bawang Masir. Idi do' muyuh nginita idi maya' amung ukum ini.
- ¹³"Kareb iko pangeh nengamung amung uli' su luk inanmu rumik padé idi su luk inan ngeradu' anggur, do' iko nganau' Aco Rayeh Lepo tudu' aco kinioneh.
- ¹⁴Idi bang aco sineh iko geriguen dengan anakmu, lun tebarinmu, idi lun Liwi, lun sakai, anak maté, idi decur tinula' luk tudo bang bawang muyuh.
- ¹⁵Idi tudu' aco kinioneh do' iko nganau' aco rayeh kuan Tuhan Allahmu su luk pilin Tuhan inan sembayang, ngaceku Tuhan Allahmu ngeperuan amung uli' tana'mu, idi amung-amung luk ruenmu, pad iko mawang niat.
- ¹⁶"Do' amung lun deléi rat arang muyuh amé' pa kiung Tuhan Allahmu su luk pilin Tuhan inan sembayang, teluh kua' bang selak, ieh ineh kareb Irau Paska, Irau Pangeh Ranih, idi Aco Rayeh Lepo. Aleg seburur lemulun amé' pa kiung Tuhan dengan na luk barén.
- ¹⁷Do' maré anid-anid maya' kudeng peruan luk barén Tuhan Allah nemuyuh.
- ¹⁸"Idi do' muyuh ngikit tuda'-tuda' lun luk mutut besara' idi teh tuda'-tuda' lun rayeh bang amung bawang muyuh luk barén Tuhan Allah muyuh nemuyuh,

rat anid pupu muyuh. Idi ideh miak mutut besara' kuan lun mula' ku ukum luk muned.

¹⁹Aleg ideh ngelipa ukum. Aleg ideh mili' lemulun. Aleg ideh ngalap suap. Ngaceku baré ineh ngebuser mateh lun luk mileh idi ngekilu' bala lun luk matu.

²⁰Do' muyuh maya' luk muned, pad muyuh tebawang bang bawang luk barén Tuhan Allah muyuh nemuyuh.

²¹"Kareb muyuh mudut bubpun kuan Tuhan Allah muyuh, aleg naped ulung luk inan sembayang iringneh.

²²Idi aleg iko ngabpen diri akang luk inan Tuhan Allah muyuh megateh.

Bada' Ratnan Ukum 17

¹"Aleg maré kuan Tuhan Allah muyuh sapi' idi dumba luk dat; ngaceku ineh luk inan Tuhan Allah megateh.

²"Idi kudeng inan arang muyuh bang aceh bawang muyuh, aceh deléi kian decur lek luk pangeh nenganau' luk dat pa kiung Tuhan Allah, idi luk ngelaba jani'Neh,

³pad ieh sembayang inan allah baken idi tekeradung nedeh, kian inan aco, kian inan bulan, kian inan amung baweh luk déi' langit, luk pangeh bibpengKu,

⁴idi iko ninger bala luk kudeng ineh, idi do' iko ngelio do'-do'. Idi kudeng ieh matu idi megala' kekamen luk ku gateh pangeh mangun arang lun Israil,

⁵idi do' iko nguit lemulun luk pangeh nenganau' luk dat ineh remuat rat bang bawang. Idi do' iko mitung lun deléi' kian decur ineh ku batu macing maté.

⁶Idi kudeng inan dueh kian teluh burur luk nekali', do' lemulun luk inadu' ineh pitayen. Iamo' kudeng sebuleng mo' luk nekali', na ieh pitayen.

⁷Idi lun luk nekali' luk pun-pun mitung neneh ku batu, idi lun baken pangeh ineh, pad muyuh nala' luk dat ineh rat arang muyuh.

- ⁸"Kudeng inan luk pelaba ikat ruen muyuh mutut, kian ratnan ngaté lemulun, ratnan tana', ratnan ngurat, idi anun-anun pana' luk inan muyuh besara', idi do' iko amé' su luk pilin Tuhan inan sembayang.
- ⁹Idi do' iko amé' papu' imam-imam lun Liwi idi lun luk mutut besara' luk ngimet kekamen bang kareb ineh. Idi ngitun nedeh, idi ideh miak mutut ineh.
- ¹⁰Idi do' iko maya' luk uendeh mutut. Matar do'-do', pad iko nganau' amung luk badén.
- ¹¹Do' maya' luk badéndeh namu idi maya' ukumdeh teh.
- ¹²Idi lemulun luk metueh niat luk na ninger bala imam, idi lun luk mutut besara', na miak na ieh pitayen. Kudeng ineh teh lawé muyuh nala' lun luk dat ineh rat arang lun Israil.
- ¹³Idi bala ineh pedingeren lun mula', pad ideh miak matot. Idi seburur pana' na mekuu' ngelaba baladeh baruh.
- ¹⁴"Idi kareb muyuh semuet bang bawang luk barén Tuhan Allah nemuyuh, idi tebawang su ineh, idi muyuh sikal ngikit aceh raca' pa luun muyuh, mepad kudeng amung pupu luk tudo libut-libut muyuh;
- ¹⁵ngerawé do'-do' pad muyuh mili' aceh raca' luk pinili' Tuhan. Idi do' ieh pilin rat arang pupu muyuh. Aleg muyuh ngikit lun pupu baken ku raca' muyuh.
- ¹⁶Idi raca' ineh na miak ngalap mula' kuda kuan bawehneh, idi na ieh miak ngecuk nelun dukenneh amé' bawang Masir pad ngalap mula' kuda. Ngaceku Tuhan mebpeng pupuNeh na miak amé' déi'.
- ¹⁷Idi teh aleg ieh ngalap mula' awanneh, pad ieh na meraruh. Idi aleg ieh ngalap mula' amas idi pirak.
- ¹⁸"Idi kareb ieh mangun ku raca', do' ukum ini uen nalin kuanneh ratnan surat imam-imam Liwi.
- ¹⁹Idi do' ieh ngimet surat ineh kidi-kidi. Idi do' ieh maca' ineh ruked ulunneh, pad ieh sibada' matot inan Tuhan Allahneh, idi maya' amung bala ukum ini,

²⁰pad ieh na medita' niat arang kinanak-kinanakneh, idi pad ieh na umai ratnan ukum ineh, pelé ieh mio ngimet nelun Israil, idi inulneh pana'.

Bada' Ratnan Ukum 18

¹Idi imam-imam lun Liwi, ieh ineh amung inul lun Liwi na inan babpat mepad kudeng lun Israil. Iamo' amung baré luk sabpen kuan Tuhan, idi babpatdeh sebuleng mo' kenendeh.

²Iamo' na ideh ngalap babpat tana' rat arang lun Israil. Ngaceku Tuhan luk mangun ku babpatdeh, maya' kudeng luk pijani'Neh.

³Idi ini babpat imam rat nelun mula' ineh, ratnan amung baré, do' sapi' idi dumba; idi do' ideh maré lip idi mop pingitneh idi bitueh kuan imam.

⁴Idi do' imam ngalap amung peranih luk atun ratnan padé muyuh, abpa' anggur muyuh pana', idi umau muyuh, idi amung buluh dumba muyuh luk binuting atun.

⁵Ngaceku lun Liwi idi inuldeh pangeh pinili' Tuhan ratnan amung inul muyuh, pad ideh tuped idi sembayang ku ngadan Tuhan macing raked-raked.

⁶Idi kudeng aceh lun Liwi remuat ratnan aceh bawang muyuh su inanneh tudo arang lun Israil, idi amé' matun su luk pilin Tuhan inan sembayang,

⁷idi ieh miak ngakem bang ngadan Tuhan Allahneh mepad kudeng amung kinanakneh, ieh ineh lun Liwi luk ngakem kuan Tuhan su ineh.

⁸Idi do' ideh ngalap babpat akan luk mepad. Ieh ineh meluun ratnan anun-anun luk lapen ratnan pupu tamanneh.

⁹Kareb muyuh semuet bang bawang luk barén Tuhan Allah muyuh nemuyuh, aleg muyuh maya' kekamen luk dat luk inau' pupu ineh.

¹⁰Aleg seburur rat arang muyuh ngeseb anakneh mangun ku baré luk sabpen. Idi aleg seburur pana' mangun ku lun luk ngelimu', lun luk mangun, lun luk nier bang semayau, lun luk ngilo',

¹¹lun luk ngelamai, lun luk inan lapad idi gimet, idi lun luk nawar nelun luk naté.

¹²Ngaceku Tuhan megateh inan amung lun luk nganau' luk kudeng ineh. Idi ngaceku kekamen luk dat luk kudeng ineh Tuhan Allah muyuh ngusu nedeh ineh rat pa kiung muyuh.

¹³Idi do' muyuh lutep inan Tuhan Allah muyuh dengan na perapid terawé.

¹⁴Idi teh kebala Musa, "Pupu luk kuan bawang miak lapen muyuh megéi' ninger bala lun luk mangun idi lun luk ngelimu'. Iamo' na Tuhan Allah muyuh maré nemuyuh nganau' kudeng ineh.

¹⁵Ngaceku ineh Ieh maré kuan muyuh aceh Nabi rat arang uned kinanak-kinanak muyuh luk mepad kudeng ui ini, idi do' muyuh ninger Neneh.

¹⁶"Kareb muyuh nepamung déi' Pegkung Sinai, kebala muyuh, 'Na kai pian ninger uni tang Tuhan Allah kai. Idi apui luk rayeh ini na kai pian nier teh, pad kai na maté.'

¹⁷Idi kebala Tuhan negku, 'Matu baladeh ineh.

¹⁸Idi Ui sikal nguit kuandeh ineh aceh Nabi rat arang uned kinanak-kinanak luk mepad kudeng iko. Idi Ui miak maré amung balaKu bang tangNeh. Idi Ieh miak mada' kuandeh amung luk icukKu Neneh.

¹⁹Idi idé luk na sikal ninger amung balaKu luk badénNeh dengan ngadanKu, kali' rungen Ui mupud ineh mucu rat neneh.

²⁰Iamo' nabi luk ngedita' bururneh idi mada' bala dengan ngadanKu luk na icukKu mada', idi luk mada' dengan ngadan allah baken, kali' rungen nabi ineh pitayen.'

²¹"Kian muyuh ngerawé lek, mikat kali' bala nabi sapeh luk baken ratnan Tuhan.

²²Kareb aceh nabi pebala dengan ngadan Tuhan, idi luk bida'neh ineh na mangun, ieh ineh baken bala Tuhan. Idi nabi ineh pangeh pebala dengan dita' niatneh. Aleg iko matot neneh.

Bada' Ratnan Ukum 19

¹"Kareb Tuhan Allah muyuh ngelaya' amung pupu luk kuan tana' miak barénNeh nemuyuh, pad muyuh ngalap bawangdeh idi ruma'deh idi muyuh tebawang su ineh,

²do' muyuh ngelelep teluh bawang ineh.

³Idi do' muyuh mabpat tana' luk barén Tuhan Allah ineh teluh babpat, idi ngasa' dalam pad anid-anid lun luk ngaté lemulun miak buro amé' déi', idi pitarin bang aceh bawang ineh.

⁴Kudeng aceh lemulun ngaté lemulun dengan na mau' rungen, ieh miak buro sigapung bang bawang ineh, pad ieh mulun.

⁵Kian, kudeng lun luk pangeh semuet bang pulung perapu lun denganneh sikal amé' ngelaleb kayuh, idi dengan tiku'neh nengegenang uai sikal nebpeng lawa kayuh, idi pengu uai ineh nepangat ratnan paca'neh, idi nebpeh luun lun denganneh pad ieh maté, idi lun ineh miak buro amé' matun bawang sapeh luk ulekneh,

⁶pad lun luk ngua' até ineh na ngerada' neneh dengan gathéh niatneh, idi ngakem neneh ngaceku pelaba ado perada'neh, idi ngaté neneh, sagan tu pana' ieh na miak pitayen, ngaceku na ieh museh neneh atun.

⁷Ineh punneh ui pebala nemuyuh do' muyuh ngatad teluh bawang ineh.

⁸"Kareb Tuhan Allah muyuh ngerayeh tana' muyuh, maya' kudeng luk pangeh pijani'Neh kuan tepun muyuh, idi Ieh maré nemuyuh amung tana' luk pangeh pijani'Neh kuan tepun muyuh,

⁹idi kudeng muyuh nginita amung ukum luk bida'ku aco sini, idi muyuh mawa inan Tuhan Allah muyuh idi maya' amung dalamNeh anid-anid aco, idi do' muyuh nengan teluh bawang ineh ku teluh bawang baken teh,

¹⁰pad muyuh na mesala' idi na ngaté lemulun luk matu bang bawang luk barén Tuhan Allah muyuh nemuyuh.

¹¹"Iamo kudeng aceh lemulun museh nelun idi ieh ngabang idi necat neneh pad ieh maté, idi kudeng lun ineh buro amé' nan aceh bawang ineh,

¹²Idi do' amung lun rayeh bawangneh ngecuk nelun amé' ngalap neneh rat déi', idi maré neneh kuan lun luk ngua' até pad ieh pitayen.

¹³Aleg muyuh méi' neneh. Iamo' do' nala' lun luk ngaté ineh rat arang lun Israil, pad muyuh inan peruan.

¹⁴"Aleg iko ngiuk lakan tana' lun denganmu luk pangeh litep tepunmu bang babpat luk lapenmu bang bawang luk barén Tuhan Allahmu.

¹⁵"Kudeng seburur lemulun luk nekali' ratnan anun-anun sala' aceh lemulun, ieh ineh na petap. Iamo' kudeng dueh burur luk nekali', kian teluh burur lek, idi miak ngadu' lemulun ineh.

¹⁶Idi kudeng seburur luk nekali' dengan ét niat ngadu' seburur lemulun ratnan anun-anun sala',

¹⁷Idi do' didueh luk kali' ria' ineh tured pa kiung Tuhan idi pa kiung amung imam idi lun luk mutut besara' luk idi bang kareb ineh.

¹⁸Idi lun luk mutut besara' ineh miak ngelio do'-do'. Idi kudeng megala' lun luk nekali' ineh ngadu' kinanakneh dengan mebalih,

¹⁹Idi do' iko ngua' neneh maya' kudeng luk inau'neh kuan kinanakneh. Kudeng ineh teh miak iko nala' dat ineh rat arang muyuh.

²⁰Idi kareb lun baken ninger, ideh miak matot, pad ideh na mekuu' nganau' dalam luk dat kudeng ineh peh.

²¹Idi aleg iko méi' neneh, iamo' niat libal niat, mateh libal mateh, lipen libal lipen, ticu' libal ticu', idi kukud libal kukud teh.

Bada' Ratnan Ukum 20

¹"Kareb muyuh remuat sikal pebunu', idi muyuh nier kuda idi keréta, idi baweh luk metueh rat nemuyuh, aleg muyuh matot nedeh. Ngaceku Tuhan Allah muyuh idi dengan muyuh. Ieh ineh luk nenguit nemuyuh rat bawang Masir.

²Idi kareb muyuh muneng amé' pebunu', idi do' imam amé' pebala kuan lun mula',

³kudeng ini balaneh, 'Do' muyuh ninger, O lun Israil! Aco sini muyuh temina' amé' pebunu'. Aleg muyuh metalang niat. Aleg muyuh matot. Aleg megegker. Idi aleg muyuh merapang.

⁴Ngaceku Tuhan Allah muyuh idi dengan muyuh, idi Ieh maré nemuyuh metueh.'

⁵"Pangeh ineh do' amung lun rayeh lun pebunu' mada' kuan lun mula' kudeng ini, 'Idé-idé luk pangeh nemudut ruma' baruh idi nateh netudo bang ineh, do' ieh lemubed muli' amé' i ruma'neh, pad ieh na maté bang pebunu', idi na aceh lun baken tudo bang ruma' ineh.

⁶Idi idé-idé luk pangeh nenibu anggur idi nateh nekuman bua'neh, do' ieh lemubed muli' amé' i ruma'neh, pad ieh na maté bang pebunu' idi pad lun baken na kuman bua' anggurneh.

⁷Idi idé-idé luk nenuduk aceh decur nateh ieh nepaweh neneh, do' ieh lemubed muli' amé' i ruma'neh pad ieh na maté bang pebunu', idi lun baken na nengalap decur ineh ku awanneh.'

⁸Idi teh do' lun rayeh pebunu' ineh petacu pebala kudeng ini, 'Idé-idé luk matot idi luk metalang niatneh, do' ieh lemubed muli' amé' i ruma'neh, pad niat kinanak-kinanakneh na mangun metalang mepad kudeng niatneh ineh.'

⁹Idi kareb lun rayeh ineh pangeh nepebala kuan lun mula' ineh, do' ngikit tuda'-tuda' lun luk mangun ku lun rayeh baweh ineh.

¹⁰"Kareb muyuh amé' matun aceh bawang sikal ngaro ineh, miak muyuh mutuh bawang ineh pedo' nemuyuh atun.

¹¹Idi kudeng bawang ineh pedo' nemuyuh idi ngukab tanga' kuan muyuh, idi amung lun luk bang ineh miak ngakem kuan muyuh idi mangun ku lun duken muyuh.

¹²Iamo' kudeng ideh na pedo' nemuyuh, iamo' ideh sikal pebunu'nemuyuh teh, idi do' muyuh ngelibut bawang ineh lengit-lengit.

¹³Idi kareb bawang ineh barén Tuhan Allah muyuh ineh bang palad muyuh, do' muyuh ngaté amung lun deléi luk bang ineh.

¹⁴Iamo' lun decur idi amung anak-anak idi aya', idi amung binaweh bang bawang ineh, do' muyuh ngalap ineh. Idi do' muyuh mawang niat ku binaweh bunu' luk pangeh biré Tuhan Allah nemuyuh.

¹⁵Idi kudeng ineh teh do' muyuh nganau' kuan amung bawang luk meluun ado rat su inan muyuh, idi luk baken ratnan bawang pupu luk libut-libut muyuh.

¹⁶"Iamo' bang bawang pupu ini luk barén Tuhan Allah nemuyuh, do' muyuh ngaté anun-anun luk nginiat.

¹⁷Iamo' do' muyuh ngaté amung lun Hiti, Amori, Kanaani, Prisi, Hiwi, idi Yebusi, maya' kudeng bala Tuhan Allah nemuyuh,

¹⁸pad ideh na nguit nemuyuh maya' amung dalandeh luk pelaba dat, idi luk béndeh kareb ideh sembayang inan allahdeh, pad muyuh na mesala' pa kiung Tuhan Allah muyuh.

¹⁹"Kareb muyuh ngelibut aceh bawang tuda'-tuda' aco kinioneh, idi muyuh pebunu' sikal ngaro bawang ineh, aleg muyuh nebpeng kayuhdeh, ngaceku ieh ineh tibu luk miak kenen muyuh. Aleg muyuh nebpeng ineh. Bua' ineh baken bunu' muyuh.

²⁰Muyuh miak nebpeng kayuh baken, luk baken bua', idi nganau' ineh ku repapeh pad ngerieng bawang ineh pelé ieh lapen muyuh.

Bada' Ratnan Ukum 21

¹"Kudeng muyuh kali' aceh lemulun luk pinaté lun bang bawang luk barén Tuhan Allah muyuh nemuyuh, idi lun luk naté ineh telubid luun natad idi na lun kali' idé luk nengaté neneh,

²idi do' amung lun rayeh idi lun luk mutut besara' muyuh amé' nari rat su ineh macing inan bawang luk libut su inan lun luk pinaté ineh.

³Idi kudeng pangeh megala' bawang sapeh luk muneng ku su inan lun luk pinaté ineh, idi do' amung lun rayeh bawang ineh ngalap aceh anak sapi' tineh luk nateh inuit amé' ngakem.

⁴Idi do' amung lun rayeh bawang ineh nguit anak sapi' ineh amé' inan aceh arur luk na meket, idi tana' ineh luk nateh inan nenibu, kian inisak. Idi do' ideh mutul dier anak sapi' ineh su ineh.

⁵Idi do' imam lun Liwi amé' muneng, ngaceku ideh luk pinili' Tuhan Allah muyuh, pad ideh ngakem kuanNeh idi maré peruan dengan ngadan Tuhan, idi ideh luk miak mutut ukum kuan lun luk pekedaluh idi lun luk ngaté.

⁶Idi do' amung lun rayeh bawang luk muneng su inan lun luk pinaté ineh, maru' ticu'deh pa luun anak sapi' luk pinaté bang arur ineh.

⁷Idi kebaladeh kudeng ini, 'Baken ticu' kai nengeruat dara' ini, idi mateh kai pana' nateh nenier.

⁸Maré do', O Tuhan, kuan pupuMu Israil, luk pangeh inuli'Mu. Aleg nima' nekai mabeh sala' ngaceku ngaté lemulun luk na mesala'. Iamo' maré do' nekai.'

⁹Idi kudeng ineh dalanneh sala' ngaté lemulun luk na mesala' miak talan rat arang muyuh, ngaceku dengan ineh muyuh pangeh nenganau' luk matu pa kiung Tuhan.

¹⁰"Kareb muyuh amé' pebunu', idi Tuhan maré bunu' muyuh bang palad muyuh, idi muyuh nguit rat nedeh tuda'-tuda' lun tebanen,

¹¹idi rat arang lun ineh iko nier aceh decur luk do' taga, pad iko méi' neneh idi sikal ngalap neneh ku awanmu,

¹²idi do' iko nguit neneh amé' bang ruma'mu, idi do' ieh ngiki uluhneh idi ngapil lisunneh.

¹³Idi do' ieh ngelibal ayungneh, idi do' ieh tudo bang ruma'mu idi temido inan taman-tinanneh sebulan kinione. Pangeh ineh miak iko ngalap neneh ku awanmu.

¹⁴Idi kudeng ayuneh na iko pian neneh, na miak na iko muit neneh. Iamo' na iko miak masui neneh, idi nganau' neneh mepad kudeng demulun, ngaceku pangeh iko nepamung neneh.

¹⁵"Idi kudeng aceh deléi inan dueh awanneh, sebuleng luk inanneh mawa, sebuleng luk inanneh megateh, idi didueh pana' inan anak deléi kuanneh, idi anak deléi luk atun ineh ratnan awan luk inanneh megateh,

¹⁶idi kareb ieh maré babpat kuan anak-anakneh ratnan binawehneh, ieh na miak maré babpat anak luk atun kuan anak awan luk inanneh mawa pelibal anak awan luk inanneh megateh, ngaceku ieh anak luk atun.

¹⁷Iamo' do' ieh ngamo anak luk atun, kudeng ieh anak awan luk inanneh megateh tu pana', idi do' ieh maré dueh kua' kinula' ratnan amung binawehneh, ngaceku ieh anak tuneh, idi ieh luk miak ngalap babpat anak luk atun.

¹⁸"Idi kudeng aceh burur inan anak deléi luk melalid, luk na sikal ninger bala tamanneh idi bala tinanneh, idi pangeh didueh nemada' neneh na tieh ninger,

¹⁹idi do' taman-tinanneh nguit neneh remuat amé' papu' lun rayeh-rayeh bawang, munung tanga' bawang ineh,

²⁰idi do' ideh mala kuan lun rayeh bawang kudeng ini, 'Anak kai ini melalid idi dat teh, na ieh sikal ninger bala kai dueh. Idi ieh manga idi megéi' mabuk.'

²¹Idi do' amung lun bang bawang ineh mitung neneh ku batu pad ieh maté. Kudeng ineh dalanneh muyuh nala' luk dat ineh rat arang muyuh, idi kareb amung lun Israil kali' ineh, ideh miak matot.

²²"Idi kudeng seburur pangeh nenganau' sala' luk miak kumin maté, ukumneh uen ngekito,

²³idi aleg nima' butungneh sedacem luun kayuh ineh, iamo' do' muyuh nanem neneh bang aco sineh teh. Ngaceku lemulun luk tekito ineh kediman kuan Allah. Idi ngaceku ineh aleg muyuh ngelutak tana' luk pangeh biré Tuhan Allah muyuh nemuyuh.

Bada' Ratnan Ukum 22

- ¹"Kareb iko nier sapi' kian dumba kinanakmu neraruh ratnan riudanneh, aleg iko sinakali'. Iamo' na miak na iko nengan kinanakmu ineh.
- ²Idi kudeng kinanakmu ineh na muneng namu, kian na iko miti neneh lek, do' iko nguit pung ineh amé' lepomu, pad ieh mudeng namu, pelé kinanakmu macing ngitun neneh, idi iko pana' miak ngelubed ineh kuanneh.
- ³Kudeng ineh teh kareb iko kali' aceh keladai, ayung, idi anun-anun luk netutu' rat nelun Israil.
- ⁴"Idi kareb iko kali' keladai kinanakmu, kian sapi'neh neluka' iring dalan, aleg iko sinakali'. Iamo' na miak na iko nengan kinanakmu nui ineh teh.
- ⁵"Idi decur na miak ngayung ku ayung deléi. Idi deléi pana' na miak ngayung ku ayung decur. Ngaceku idé luk nganau' kudeng ineh, ieh ineh luk inan Tuhan Allah muyuh megateh.
- ⁶"Kareb iko nekali' arar suit iring dalan déi' udung kayuh, kian luun tana'lek, kian bang ineh inan anak suit, kian terurneh lek, na iko miak ngalap tinehneh idi anakneh tu pana'.
- ⁷Na iko miak ngalap tinehneh, iamo' miak iko ngalap anakneh, pad iko do' udeng idi do' ulun.
- ⁸"Idi kareb muyuh mudut ruma' luk mebaruh, do' muyuh nganau' libung luunneh, pad muyuh na mabeh sala', kudeng ayuneh seburur mekesiad idi mebpeh rat i dita', pad ieh maté.
- ⁹"Aleg iko nibu ilung luk baken bang kabun anggurmu, pad na metutu' uli' ilung luk tinibumu mucu, idi uli' bua' anggurmu pana' lapen imam.
- ¹⁰"Aleg iko ngeradu ku sapi' idi ku keladai pad-pad.
- ¹¹"Aleg iko ngayung ku ayung luk tibaruh ku dueh ayu nuper, ieh ineh nuper buluh puar nuper pu.
- ¹²"Idi do' iko nganau' apat ramoi iring kuyu' buyormu.

13"Idi kudeng seburur deléi ngalap aceh awan, idi pamung danganneh, idi mucu ieh megateh neneh,

14pad ieh ngadu' neneh idi ngedat neneh, kebalaneh, 'Ui pangeh nengalap decur ini ku awanku, idi baken ieh anak baruh,'

15idi do' tamantinan anak adi' ineh mada' tanu'-tanu' ieh anak adi' siren lun rayeh-rayeh bawang munung tanga' bawang ineh.

16Idi do' taman anak adi' ineh mala kuan amung lun rayeh-rayeh kudeng ini, 'Ui pangeh nemané anak ku kuan lun ini ku awanneh, idi ieh ara' neneh,

17idi ieh pangeh nengadu' neneh dengan mebalih, kebalaneh, "Ui na nengalap tanu' anakmu ini anak baruh." Siruh ini tanu', anakku ineh anak baruh.' Idi ieh malad kibung ineh pa kiung amung lun rayeh bawang.

18Idi do' lun rayeh bawang ngalap deléi ineh idi mebal neneh.

19Idi nganau' ukumneh meratu balad pirak, ieh ineh barén kuan taman anak adi' ineh, ngaceku ieh nengedat ngadan anak baruh lun Israil pa kiung lun mula', idi ieh mangun ku awanneh. Na ieh miak ngelegkan neneh seruked ulunneh.

20"Iamo' kudeng megala' adu' ineh matu idi na luk idi tanu' ku ieh anak baruh,

21idi do' nguit anak adi' ineh remuat rat bang ruma' tamanneh, idi do' lun bang bawangneh mitung neneh ku batu, pad ieh maté, ngaceku ieh pangeh nenganau' luk mebacé arang lun Israil, idi ieh nepamung dengan deléi kareb ieh tudo bang ruma' tamanneh. Kudeng ineh dalanneh muyuh miak nala' luk dat ineh rat arang muyuh.

22"Kudeng iko nekali' aceh burur uned pamung ku awan lun baken na miak na didueh pitayen. Kudeng ineh dalanneh iko miak nala' luk dat ineh rat arang lun Israil.

23"Kudeng aceh deléi pamung nan anak adi' luk tinuduk sebuleng deléi,

²⁴Idi do' nguit nedidueh remuat rat bang bawang, idi mitung nedidueh ku batu macing maté, ngaceku anak adi' ineh na nengitang bang bawang rayeh ineh, idi ngaceku deléi ineh pangeh nepasét inan decur luk tinuduk lun danganneh. Kudeng ineh dalanneh muyuh miak nala' luk dat ineh rat arang muyuh.

²⁵Iamo' kudeng aceh deléi nekali' anak adi' luk tinuduk ineh, kareb ieh bang pulung idi ngeruid neneh idi pamung danganneh, idi deléi ineh luk nepamung neneh ineh miak pitayen.

²⁶Iamo' anak adi' decur ineh, sesuut pana' aleg muyuh ngukum neneh, ngaceku ieh na sala' luk inanneh pitayen, ngaceku kekamen ini mepad kudeng kekamen aceh deléi ngelaya' lun danganneh idi ngaté neneh.

²⁷Ngaceku ieh pangeh nekali' neneh bang pulung, idi anak adi' decur luk tinuduk ineh pana' pangeh nengitang. Iamo' seburur pana' nateh luk nengedengan neneh.

²⁸Idi kudeng aceh deléi' papu' aceh anak adi' decur luk na tuduk, idi ieh ngakem neneh idi pamung neneh, idi didueh nekali' lun,

²⁹Idi do' deléi ineh maré limeh ngepulu' balad pirak kuan taman anak adi' decur ineh, idi ieh mangun ku awanneh. Idi ngaceku ieh pangeh nengeruid neneh, na ieh miak ngelegkan neneh seruked ulunneh.

³⁰Idi seburur deléi pana' na miak pamung dengan awan tamanneh.

Bada' Ratnan Ukum 23

¹Idi lun luk inurat terurneh, idi lun luk pinani', seburur pana' nateh miak semuet bang teubupun Tuhan.

²Lun luk anak batek pana' nateh miak semuet bang teubupun Tuhan. Kudeng anak mupunneh macing pulu' inul tu pana' nateh miak semeut bang teubupun Tuhan.

³"Seburur lun Amon idi seburur Moab pana' na miak semuet bang tebubpun Tuhan. Kudeng anak mupundeh macing pulu' inul tu pana' nateh miak semuet bang tebubpun Tuhan macing ruked-ruked.

⁴Ngaceku na ideh maré ruti idi abpa' nemuyuh maya' dalam, kareb muyuh remuat rat bang bawang Masir, idi ideh nenabpar ni Bilam anak Bior rat Pétor amé' Mesopotamia pad ieh ngediman nemuyuh.

⁵Iamo' Tuhan Allah muyuh na sikal ninger ni Bilam ineh. Iamo' Ieh nengisu' kediman ineh mangun ku peruan ngaceku Ieh mawa nemuyuh.

⁶Idi ruked muyuh mangun ku aceh pupu, aleg muyuh perurum nedeh, pad ideh na inan peruan macing ruked-ruked.

⁷"Idi aleg muyuh museh nelun Edom, ngaceku ideh kinanak muyuh. Idi teh aleg muyuh museh nelun Masir, ngaceku muyuh pana' pangeh mangun ku lun sakai bang bawangdeh atun.

⁸Idi anak inuldeh luk keteluh miak semuet bang tebubpun Tuhan.

⁹"Idi kareb muyuh amé' pebunu', idi do' nginita burur muyuh ratnan amung dalam luk dat.

¹⁰Kudeng arang muyuh inan aceh deléi luk melutak ratnan luk mangun kuan bururneh kareb medacem, do' ieh remuat ratnan su luk inan nelupo. Idi aleg ieh semuet arang lun mula' ineh.

¹¹Iamo' do' ieh ngediu' bururneh malem aco sineh. Kareb aco pangeh macep miak ieh semuet arang lun mula'.

¹²"Idi do' muyuh nganau' su luk inan muyuh ketéi' mado rat su luk inan muyuh lupu.

¹³Idi dengan repapeh baken ratnan binaweh luk iten muyuh, do' muyuh nguit sebuleng sukup luk isuut. Idi kareb iko amé' ketéi', miak muyuh ngukat lubang ku sukup ineh, idi mapen téi' muyuh ineh.

¹⁴Tuhan Allah muyuh idi arang muyuh, pian muiit nemuyuh ratnan susa' idi maré bunu' muyuh bang palad muyuh. Ngaceku ineh do' ngeligan su luk inan

muyuh lupu, pad Tuhan na nier arang muyuh anun-anun luk na petulu, pad Ieh pana' na lumuut rat nemuyuh.

15"Kudeng aceh lun duken buro ratnan tuanneh amé' namu, aleg iko ngecuk neneh lemubed amé' inan tuanneh baruh peh.

16Iamo' do' ieh tudo namu idi arang muyuh su apeh luk pianneh. Idi aleg muyuh ngedereh neneh.

17"Idi aleg aceh anak decur lun Israil mangun ku aceh decur luk mesawa' bang ruma' sembayang. Idi aleg aceh anak deléi' lun Israil pana' mangun ku lun luk pasét bang ruma' sembayang.

18Idi aleg nguit tabpar deléi' idi decur luk mesawa' ineh amé' bang ruma' sembayang Tuhan Allah muyuh, ku raga luk pangeh pijani', ngaceku didueh ineh luk inan Tuhan megateh.

19"Idi na iko miak ngalap bunga' ratnan kinanakmu, do' ieh bunga' usin, do' ieh bunga' akan, idi anun-anun luk miak inan ngalap bunga'.

20Idi rat nelun pupu baken miak iko ngalap bunga'. Iamo' ratnan kinanakmu iko na miak ngalap, pad Tuhan Allahmu ngeperuan namu bang amung luk ruenmu bang bawang luk ulekm.

21"Idi kudeng iko pangeh nepejani' ku anun-anun pa kiung Tuhan Allahmu, aleg iko mio maya' jani'mu ineh; ngaceku kali' rungen Tuhan Allahmu miak mupud ineh namu, pad ieh ineh mangun ku sala' kuanmu.

22Iamo' kudeng iko na nepejani', idi ieh ineh na mangun ku sala'mu.

23Iamo' kudeng iko pejani' dengan mawang niat pa kiung Tuhan Allahmu, do' iko ngerawé luk pangeh bilamu, idi nganau' luk pangeh pijani'mu ineh.

24"Kareb iko lemaba kabun anggur lun denganmu, miak iko kuman bua'neh pad pian niatmu macing mebor. Iamo' sebuleng pana' nateh iko miak nguit bang tayenmu rat ieneh.

25Idi kareb iko lemaba lati' lun denganmu miak iko ngatu' ku ticu'mu. Iamo' aleg iko ngacing aling nan lati' lun denganmu ineh.

Bada' Ratnan Ukum 24

¹"Idi kudeng aceh deléi ngalap awan, idi na ieh pian neneh, ngaceku ieh nekali' aceh sala' neneh, idi kudeng ieh ngayud kuanneh aceh surat patad, idi maré ineh neneh, idi ngecuk neneh buro,

²idi kudeng decur ineh buro idi lapen lun baken,

³idi lun ini pana' megateh neneh, idi ngayud kuanneh surat patad, idi maré surat ineh neneh idi ngecuk neneh buro, kian kudeng deléi luk mucu ini maté lek kareb ieh pangeh nengalap decur ineh,

⁴idi na miak awanneh luk pun luk pangeh nengecuk neneh buro ngalap neneh lemubed ku awanneh baruh. Ngaceku ieh pangeh nenima' neneh uen ngelutak. Idi Tuhan megateh inan kekamen luk kudeng ineh. Idi aleg iko ngacing sala' bang bawang luk barén Tuhan Allahmu namu.

⁵"Idi kareb seburur deléi aweh baruh, aleg ieh amé' pebunu' idi nakap kekamen luk mado. Iamo' do' ieh tudo idi tebawang selak kinioneh, pad ieh mawang niat inan awanneh.

⁶"Aleg seburur ngalap iung mangun ku duduk. Ngaceku ieh ineh mepad kudeng ngalap ulun lemulun.

⁷"Idi kudeng selemulun mano seburur rat arang kinanakneh, ieh ineh ratnan inul lun Israil, idi ieh nganau' neneh mangun ku lun duken, idi masui neneh, na miak na lun luk mano ineh pitayen. Idi kudeng ineh dalam nala' luk dat ineh rat arang muyuh.

⁸"Matar do'-do' ratnan ét susud, pad iko nginita do'-do' amung-amung luk bida' imam-imam Liwi kuanmu, idi mepad kudeng ui memada' nedeh, kudeng ineh teh do' iko mada' kuandeh.

⁹Do' iko ngerawé ratnan luk pangeh inau' Tuhan Allahmu kuan Miriam arang dalam kareb muyuh neremuat rat bang bawang Masir.

¹⁰"Idi kareb iko maré luk kebiten kuan lun denganmu, aleg iko semeut bang ruma'neh pian ngalap ayungneh ku duduk rat neneh.

- 11**Iamo' do' iko tupid i natad, idi nima' neneh ineh amé' namu.
- 12**Idi kudeng ieh masi', aleg iko ngimet duduk ineh sedacem.
- 13**Iamo' na miak na dudukneh libacenmu amé' neneh kareb aco macep, pad ieh ngayung ku duduk ineh kareb ieh rudap, pelé ieh ngeperuan namu. Idi lawé ineh mangun ku luk matu kuanmu pa kiung Tuhan Allahmu.
- 14**"Aleg iko ngedereh lun tebarin luk masi', do' kinanakmu, kian lun sakai luk tudo bang bawangmu lek.
- 15**Idi kareb aco sineh teh do' iko maré tabparneh kareb nateh aco macep, ngaceku ieh masi', idi niatneh pana' geriguen ku ineh, pad ieh na ngadu' namu pa kiung Tuhan pelé ineh na mangun ku sala' kuanmu.
- 16**"Idi taman na miak pitayen ngaceku sala' anakneh. Idi anak na miak pitayen ngaceku sala' tamanneh. Iamo' anid-anid burur miak pitayen ngaceku sala' bururdeh sebuleng.
- 17**"Aleg iko mutut ukum luk na petulu kuan lun sakai idi anak maté'. Idi aleg iko ngalap ayung decur tinula' ku duduk.
- 18**Iamo' do' muyuh ngerawé muyuh pana' pangeh mangun ku demulun déi' bawang Masir atun, idi Tuhan Allah nenguli' nemuyuh rat déi'. Idi ngaceku ineh ui ngecuk nemuyuh nganau' kudeng ineh.
- 19**"Idi kareb iko ngeranih lati'mu idi iko mekelupan aceh runguh luk ketecan bang lati'mu, aleg iko lemubed amé' ngalap ineh. Ngaceku ieh ineh babpat lun sakai, idi anak maté, idi decur tinula', pad Tuhan Allah maré peruan namu bang amung luk ruenmu.
- 20**Idi kareb iko ngegkar saitunmu, mucu ratnan ineh, aleg iko nimu' bua'-bua'neh luk ketecan. Ngaceku ieh ineh babpat lun sakai, anak maté, idi decur tinula'.
- 21**Idi kareb iko ngamung bua' anggurmu aleg iko lubed-lubed ngamung bua'neh luk ketecan, ngaceku ieh ineh babpat lun sakai, anak maté, idi decur tinula'.

²²Aleg muyuh mekelupan ratnan muyuh sebuleng pana' pangeh mangun ku demulun déi' bawang Masir atun. Idi ngaceku ineh ui ngecuk nemuyuh nganau' kudeng ineh teh.

Bada' Ratnan Ukum 25

¹"Kudeng dueh burur lun Israil luk pekedaluh amé' besara', seburur arang didueh mesala' idi seburur matu.

²Idi kudeng lun luk mesala' kumin, do' lun luk mutut besara' ineh ngecuk neneh tekulub pad ieh bebalen maya' kinula' sala'neh.

³Idi muyuh miak mebal neneh na meluun ratnan apat ngepulu' kua', pad ieh na migu' pa kiung muyuh.

⁴"Idi aleg iko ngabet tang sapi' luk uned rumik padé.

⁵"Kudeng inan dueh dinganak pamung bang sebuleng ruma' idi seburur maté na anak, awan lun luk naté ineh na miak mangun ku awan lun baken. Iamo' do' langu'neh ngalap neneh ku awanneh.

⁶Idi do' anak deléi luk uenneh nenganak pun-pun ineh tetanen maya' ngadan kinanakneh luk naté ineh, pad ngadan kinanakneh na metutu' rat arang lun Israil.

⁷Iamo' kudeng lun ineh na sikal ngalap awan kinanakneh ku awanneh, do' awan kinanakneh ineh amé' i tanga' bawang, idi pelaba pa kiung amung lun rayeh, 'Ara' langu'ku nginul ngadan kinanakneh arang lun Israil. Na ieh sikal ngalap negku ku awanneh.'

⁸Idi do' lun rayeh bawang ineh nawar neneh, idi pelaba neneh. Kudeng balaneh lutep, 'Ui na sikal ngalap neneh,'

⁹do' awan kinanakneh amé matun neneh pa kiung amung lun rayeh, idi ngelengu kasut ratnan selipa kukud langu'neh idi ngelica' kiungneh idi pebala, "Ini miak ruen kuan lun luk na sikal nginul ngadan kinanakneh.'

¹⁰Idi do' neten ngadanneh arang lun Israil, 'Ruma' lun luk lingu kasut.'

¹¹"Idi kudeng dueh burur deléi pekedaluh, idi awan seburur amé' ngatad awanneh rat nelun luk mebal neneh, idi decur ineh nenatang langenneh idi nengakem luk ku igu'neh,

¹²na miak na langen decur ineh uen natek. Na iko miak méi' neneh.

¹³⁻¹⁴"Aleg iko muyok kareb iko nimang idi nguad.

¹⁵Iamo' do' iko inan timang idi uad luk matu, pad ulunmu mekadang bang bawang luk barén Tuhan Allahmu namu.

¹⁶Ngaceku idé-idé luk nganau' luk na matu, ieh ineh luk inan Tuhan Allahmu megateh.

¹⁷"Idi do' iko ngerawé ratnan luk inau' lun Amalek kuan muyuh arang dalan, kareb muyuh neremuat rat bang bawang Masir.

¹⁸Ideh nengelaya' nemuyuh kareb muyuh arang dalan, kareb muyuh pelaba erur idi melaya' burur. Idi ideh nengaté amung lun luk mulai nalan maya' puet. Idi na ideh matot inan Allah.

¹⁹Idi kareb Tuhan Allah muyuh pangeh nengelaya' amung bunu' luk libut-libut muyuh, bang bawang luk barén Tuhan Allah muyuh nemuyuh, idi do' muyuh ngaté amung lun Amalek. Aleg muyuh mekelupan!

Bada' Ratnan Ukum 26

¹"Kareb muyuh pangeh nesemuat bang bawang luk barén Tuhan Allah muyuh nemuyuh pad muyuh tebawang su ineh,

²idi do' anid-anid burur muyuh ngalap sebuang ratnan bua' luk atun ratnan tana' muyuh. Idi ngerareng ineh bang tayen. Idi nguit ineh amé' su luk pilin Tuhan inan sembayang.

³Idi do' iko amé' matun imam luk ngimet bang kareb ineh. Idi iko miak pebala neneh, 'Bang aco sini ui ngamo dengan megala' pa kiung Tuhan Allahku, ngaceku ui pangeh nacing bang bawang luk pangeh pijani' Tuhan kuan tepun kai.'

⁴"Idi imam miak ngalap tayen ineh rat namu, idi ngerareng ineh pa atun bubpun Tuhan Allahmu.

⁵Idi do' pebala pa kiung Tuhan Allahmu, 'Tamanku aceh lun Arami luk nepura', idi ieh iné' déi' Masir, idi tudo déi' mepad kudeng lun sakai. Idi teh ideh pawa'. Idi su ineh ieh pana' mangun ku aceh pupu luk rayeh idi pelaba ula'.

⁶Iamo' lun Masir ineh nengedereh nekai, idi nenganau' nekai mangun ku demulun.

⁷Idi kai nengitang inan Tuhan, ieh ineh Allah tepun kai, idi Tuhan neninger arod kai, idi ieh nenier dereh idi susa' kai kareb kai mangun ku demulun.

⁸Idi Tuhan nenguit nekai remuat rat bang bawang Masir ku tueh idi laludNeh luk rayeh. Ieh nenganau' tuda'-tuda' tanu' idi kekamen luk nan mawa pad ngacing mula' luk katot.

⁹Idi Ieh nenguit nekai iné' su ini. Idi Ieh nemaré tana' luk mebaleng ini kuan kai.

¹⁰Idi nekini ui nguit bua' luk atun ratnan tana' ini luk pangeh biré Tuhan negku.' "Idi do' iko ngerareng tayen ineh pa kiung Tuhan. Idi sembayang su ineh.

¹¹Idi do' iko mawang niat ngaceku amung do' luk biré Tuhan Allahmu kuanmu idi kuan uang tetek ruma'mu. Idi nima' nelun Liwi idi lun sakai luk tudo dengan muyuh pad-pad sembayang dengan muyuh.

¹²"Idi kareb iko pangeh nenguit amung babpat pulu' uli'mu bang lak luk keteluh, ieh ineh lak luk inan maré babpat pulu', idi do' iko maré kuan lun Liwi, lun sakai, anak maté, idi decur tinula', pad ideh pana' ngalap akan luk petap bang bawangmu.

¹³Idi do' iko pebala inan Tuhan Allahmu, 'Ui pangeh nengeruat babpat luk meligan ineh rat bang ruma'ku. Idi teh ui pangeh nemaré ineh kuan lun Liwi, lun sakai, anak maté, idi decur tinula' maya' kudeng luk icukMu negku. Idi ratnan amung balaMu sebuleng pana' nateh ui nengelaba idi nekelupan.

¹⁴Idi na ui nekuman ratnan babpat pulu' ineh bang kareb susa'ku, idi na ui nenala' sebuleng pana' ratnan ineh kaerbku melutak. Idi na ui nemaré anun-anun ratnan babpat pulu' ineh kuan lun maté. Iamo' ui pangeh nemaya' bala Tuhan Allahku. Idi ui pangeh nenganau' amung luk icukMu negku.

¹⁵Idi nier ratnan su inanMu luk meligan déi' Surga, idi maré peruan kuan pupumu lun Israil, idi kuan tana' luk mebaleng luk pangeh biréMu kuan kai, maya' kudeng luk pijani'Mu kuan tepun kai.'

¹⁶"Idi aco sini teh Tuhan Allahmu ngecuk namu maya' amung ukumNeh. Ngaceku ineh do' iko maya' amung bala ineh dengan amung niatmu idi amung terawému.

¹⁷Idi aco sini teh iko pangeh nepejani' inan Tuhan, idi Tuhan ineh Allahmu idi iko pian maya' Neneh idi nginita amung ukumNeh.

¹⁸Idi aco sini teh Tuhan pangeh nepejani' namu, iko mangun ku pupuNeh sebuleng maya' kudeng balaNeh namu, idi iko pana' miak nginita amung ukumNeh.

¹⁹Idi Ieh miak ngegenang namu medita' ratnan amung pupu luk pangeh pinudutNeh, pad iko ngacing ubur idi dita' kuan Tuhan, idi pad iko mangun ku aceh pupu luk meligan kuan Tuhan Allahmu, maya' kudeng balaNeh namu."

Bada' Ratnan Ukum 27

¹Idi Musa idi amung lun rayeh Israil nengecuk nelun mula' kudeng ini, "Do' muyuh nginita amung ukum luk bida'ku nemuyuh aco sini.

²Kareb muyuh pangeh neguta Abpa' Yarden idi pangeh nesemuet bang bawang luk biré Tuhan Allah muyuh nemuyuh, do' muyuh naped batu luk mekara, idi ngelusi ineh ku tana' luk mebuda'.

³Idi do' muyuh ngayud nan ineh amung bala ukum ini, kareb muyuh pangeh semuet bang tana' luk mebaleng luk barén Tuhan Allah muyuh nemuyuh, maya' kudeng bala Tuhan Allah tepun muyuh nemuyuh.

⁴Idi kareb muyuh pangeh neguta Abpa' Yarden do' muyuh naped batu ini luun Surud Ibal mepad kudeng balaku nemuyuh aco sini, idi do' muyuh ngelusi ineh ku tana' luk mebuda'.

⁵Idi do' muyuh naped ieneh aceh bubpun ratnan batu kuan Tuhan Allah muyuh. Idi aleg muyuh ngelebping ineh ku belawan.

⁶Iamo' ratnan batu luk mekara do' muyuh nganau' bubpun Tuhan Allah muyuh. Idi pa luunneh do' muyuh maré baré luk sabpen.

⁷Idi su ineh teh do' muyuh ngeret idi kuman baré luk nguit pedo'. Idi do' muyuh geriguen pa kiung Tuhan Allah muyuh.

⁸Idi luun batu luk linusi ku tana' luk mebuda' ineh do' muyuh ngayud amung bala ukum ini dengan ayud luk megala'."

⁹Idi kebala Musa idi imam-imam lun Liwi ineh kuan amung lun Israil, "Do' pirud idi ninger, O lun Israil. Bang aco sini teh muyuh pangeh mangun ku pupu Tuhan Allah muyuh.

¹⁰Idi ngaceku ineh ninger muyuh bala Tuhan Allah muyuh, idi maya' amung ukum luk bida'ku nemuyuh aco sini."

¹¹Idi Musa nengecuk nelun Israil, kebalaneh,

¹²"Kareb muyuh pangeh neguta Abpa' Yarden, do' amung pupu ini tuped luun Surud Gerisim pad maré peruan kuan lun mula' ineh, ieh ineh Simion, Liwi, Yahuda, Iskar, Yusup, idi Beniamin.

¹³Idi do' amung pupu ini tuped luun Surud Ibal mada' kediman, ieh ineh Rubin, Gad, Aser, Sebulon, Dan, idi Naptali.

¹⁴Idi do' lun Liwi pebala dengan arod luk rayeh kudeng ini:

¹⁵" 'Kediman kuan lun luk nganau' akang luk inarit idi inurai pad sembayang neneh dengan lulem. Ieh ineh luk inan Tuhan megateh.' Idi lun mula' ineh miak pebala, 'Mo.'

¹⁶" 'Kediman kuan lun luk ngedat tamanneh, kian tinanneh.' Idi lun mula' ineh miak pebala, 'Mo.'

- 17" 'Kediman kuan lun luk mubuh lakan tana' lun danganneh.' Idi lun mula' ineh miak pebala, 'Mo.'
- 18" 'Kediman kuan lun luk ngeraruh nelun mebuser bang lawéneh.' Idi lun mula' ineh miak pebala, 'Mo.'
- 19" 'Kediman kuan lun luk mutut ukum luk na petulu kuan lun sakai, anak maté, idi decur tinula.' Idi lun mula' ineh miak pebala, 'Mo.'
- 20" 'Kediman kuan lun luk pamung dengan awan tamanneh, ngaceku pangeh ieh nengigu' tamanneh.' Idi lun mula' ineh miak pebala, 'Mo.'
- 21" 'Kediman kuan lun luk pamung dengan pung.' Idi lun mula' ineh miak pebala, 'Mo.'
- 22" 'Kediman kuan lun luk pamung dengan kinanakneh luk decur luk pamung taman, kian tinan lek.' Idi lun mula' ineh miak pebala, 'Mo.'
- 23" 'Kediman kuan lun luk pamung dengan iban decurneh.' Idi lun mula' ineh miak pebala, 'Mo.'
- 24" 'Kediman kuan lun luk ngaté nelun danganneh dengan lulem.' Idi lun mula' miak pebala, 'Mo.'
- 25" 'Kediman kuan lun luk ngalap suap, pad ieh ngaté lemulun luk na sala.' Idi lun mula' ineh miak pebala, 'Mo.'
- 26" 'Kediman kuan lun luk na maya' amung bala idi bada' ini.' Idi lun mula' ineh miak pebala, 'Mo.'

Bada' Ratnan Ukum 28

- 1"Kudeng muyuh ninger bala Tuhan Allah muyuh, idi nginita amung ukumNeh luk pangeh bida'ku nemuyuh bang aco sini kali' rungen Tuhan Allah muyuh miak ngikit nemuyuh medita' ratnan amung pupu luk luun tana'.
- 2"Idi amung peruan ini miak macing nemuyuh, kudeng muyuh maya' bala Tuhan Allah muyuh:
- 3"Peruan kuanmu bang bawang rayeh idi peruan kuanmu bang lati'mu.

- 4"Peruan kuan anak-anakmu, uli' tana'mu, inul pungmu, batek sapi'mu, idi tanganak dumbamu.
- 5"Peruan kuan lati'mu idi téngmu.
- 6"Peruan kuanmu kareb iko nalan, idi kareb iko muli'.
- 7"Idi Tuhan Allah muyuh miak ngelaya' amung bunu' muyuh luk amé' pebunu' nemuyuh. Ideh macing nemuyuh maya' sebuleng dalan, idi dalan luk béndeh buro rat nemuyuh tudu'.
- 8"Tuhan Allah muyuh miak maré peruan bang lepo padé muyuh, idi amung luk ruen muyuh. Idi Ieh ngeperuan nemuyuh bang bawang luk barénNeh nemuyuh.
- 9"Idi Tuhan miak ngelelep nemuyuh mangun ku aceh pupu luk meligan kuan bururNeh, maya' kudeng luk pijani'Neh nemuyuh, kudeng muyuh nginita ukum Tuhan Allah muyuh, idi maya' amung balaNeh.
- 10Idi amung lun luk bang tana' ini miak kali' Tuhan pangeh nemili' nemuyuh mangun ku pupuNeh sebuleng. Idi ideh miak matot nemuyuh.
- 11Idi Tuhan miak maré nemuyuh mula' anak, sapi', idi uli' lati' muyuh bang bawang luk pijani' Tuhan Allah muyuh kuan tepun muyuh.
- 12Idi Ieh miak maré udan maya' kareb luk petulu, idi Ieh miak ngeperuan amung luk ruen muyuh, pad muyuh miak maré kebiten kuan tuda'-tuda' pupu. Iamo' muyuh na miak ngabit.
- 13"Idi Tuhan pana' miak ngelelep namu pad iko megéi' pa atun idi baken pa mucu. Idi iko mo' luk raked-raked pa luun idi baken pa liang, ieh ineh kudeng iko maya' amung ukum Tuhan Allahmu, luk bilaku namu aco sini idi kudeng iko nginita bada' ineh,
- 14iamo' aleg iko umai ratnan amung bada' luk bida'ku namu bang aco sini, idi aleg maya' allah baken idi sembayang nedeh.

15" Iamo' kudeng iko na maya' bala Tuhan Allahmu, idi na nginita amung ukumNeh idi dalamNeh luk bida'ku namu aco sini, idi amung kediman ini miak macing namu:

16" Tuhan ngediman namu bang bawang rayeh idi lati'mu.

17" Tuhan ngediman padému idi téngmu.

18" Tuhan ngediman namu idi anakmu, uli'tana'mu, batek sapi' mu, idi tanganak dumbamu pana'.

19" Tuhan ngediman namu bang amung-amung luk ruenmu.

20" Idi Tuhan miak ngacing kediman, dereh, idi ét namu bang amung luk ruenmu, pad iko saget maté ngaceku ratnan dat kekamenmu idi ngaceku iko necan Negku.

21" Idi Tuhan na ugka' ngacing kaca nemuyuh, pad muyuh mabud maté bang bawang luk ulek muyuh nekini.

22" Idi Tuhan miak ngacing aceh ét luk mebura' namu idi dadem, kimuh, lau', iru', bui luk melau', idi rapung. Idi ieh ineh miak ngedereh namu pad macing iko maté.

23" Idi langit luk pa luunmu ineh miak mangun ku tekaling, idi tana' luk pa liangmu miak mangun ku belawan.

24" Idi Tuhan miak maré kipu idi bada mepad kudeng udan pad ngedereh namu.

25" Idi Tuhan pana' miak maré nemuyuh melaya' pa kiung amung bunu' muyuh. Muyuh ngerieng nedeh, maya' sebuleng dalam idi buro rat nedeh maya' tudu' dalam. Idi muyuh pana' miak mangun ku gani' kuan amung imet luk bang tana'.

26" Idi butung muyuh miak mangun ku akan suit luk arang gawa' idi pung luk luun tana'. Idi seburur pana' nateh miak ngusu nedeh.

27" Idi Tuhan pana' miak mebal nemuyuh ku kimuh lun Masir, idi kuri, lusung, idi puruh luk na miak uen ngubat.

- ²⁸Idi Tuhan pana' miak mebal nemuyuh ku ruden, buser, idi raruh niat.
- ²⁹Idi kareb muned aco iko miak ngakap mepad kudeng lun mebuser ngakap bang dacem. Idi iko pana' na inan peruan bang lawému. Iamo' iko miak uen ngedereh idi uen ngaro mo' anid-anid aco. Idi seburur pana' nateh luk ngedengan namu.
- ³⁰Iko miak ngalap awan. Iamo' lun baken miak pamung rudap neneh. Iko miak mudut ruma', iamo' na iko mudeng bang idi. Iko miak nibu kabun anggur, iamo' na iko kuman bua'neh.
- ³¹Idi sapi'mu miak pitayen pa kiungmu. Iamo' na iko kuman ineh. Keladaimu miak uen ngaro rat pa kiungmu. Idi na tu ieh miak lemubed amé' namu. Amung riudan aya'mu miak barén kuan bunu'mu. Idi na luk miak ngedengan namu.
- ³²Amung anakmu luk deléi idi decur miak barén kuan pupu baken pa kiungmu idi iko miak ngerawé nedeh anid-anid aco. Idi anun-anun pana' nateh miak ruenmu.
- ³³Uli' tana'mu idi uli' amung kekamenmu miak mabud kenen aceh pupu luk na iko miti. Idi iko miak pederen anid-anid aco,
- ³⁴pad iko miak mangun meruden ngaceku ratnan luk siren matehmu.
- ³⁵Idi iko pana' dedaten Tuhan ku kimuh luk dat nan alebmu idi nan batimu luk na miak mubat, idi teh ratnan daparmu macing luun uluhmu.
- ³⁶"Idi Tuhan miak nguit nemuyuh dengan raca' luk pangeh kinikit muyuh amé' inan aceh pupu luk na miti muyuh, idi luk na miti tepun muyuh pana'. Idi déi' muyuh miak sembayang inan allah baken, luk inau' ratnan kayuh idi batu, ieh ineh akang.
- ³⁷Idi muyuh pana' mangun ku gani', buek, idi tulu arang amung pupu su luk inan Tuhan nguit nemuyuh.
- ³⁸"Sagan tu pana' muyuh nguit mula' luk pimara amé' luun lati' muyuh, sesuut teh peranihneh, ngaceku kato miak kuman ineh macing mabud.

³⁹Kudeng iko nibu kabun anggur, idi ngasa' neneh do'-do' pana', nateh iko miak ngirup abpa' anggur ineh, idi ngamung bua'neh. Ngaceku uled miak kuman ineh.

⁴⁰Sagan tu pana' inan lawa saitun bang apud bawangmu, nateh iko ngumau bururmu ku uma'neh, ngaceku lawa saitunmu ineh pana' remurug bua'neh.

⁴¹Kudeng iko inan anak deléi idi decur tu pana', nateh ideh kuanmu, ngaceku ideh miak tebanen pupu baken.

⁴²Amung bua'mu idi amung uli' tana'mu miak kenen kato.

⁴³"Idi lun sakai luk tudo arang muyuh ineh miak amé' pa luun muyuh, idi iuk-iuk muyuh amé' pa liang.

⁴⁴Idi ideh pana' miak maré kebiten muyuh. Iamo' muyuh na miak maré kebitendeh. Ideh luk pa atun, idi muyuh luk pa mucu.

⁴⁵"Amung kediman ini miak macing nemuyuh idi ngerada' nemuyuh pad ngedereh nemuyuh, ngaceku muyuh na ninger bala Tuhan Allah muyuh, idi na maya' amung ukum idi dalamNeh luk pangeh bida'Neh nemuyuh.

⁴⁶Idi ieh ineh miak mangun ku aceh tanu' ukum Allah kuan muyuh, idi kuan inul muyuh pana' macing raked-raked.

⁴⁷Muyuh na sembayang inan Tuhan Allah muyuh dengan niat luk mawang idi geriguen, sagan tu pana' Tuhan pangeh nengeperuan nemuyuh.

⁴⁸Ngaceku ineh muyuh miak mangun ku demulun amung bunu' muyuh luk icuk Tuhan, pad muyuh melau, meparang, lubpa, idi na petap anun-anun. Idi Tuhan miak ngerareng paga' belawan nan pudak muyuh, pad Ieh ngaté nemuyuh.

⁴⁹Idi Tuhan pana' miak nguit aceh pupu amé' nemuyuh rat mado, luk macing rat iring tana', mepad kudeng tulud kanui balang, aceh pupu luk na muyuh kali' baladeh,

⁵⁰Idi kiungdeh tekedamut idi na ideh méi' ku lun mengered idi anak baruh pana'.

⁵¹Idi bunu' ineh miak kuman amung uli' aya' muyuh mucu idi uli' tana' muyuh, pad ngedereh nemuyuh, ngaceku na ideh necan kuan muyuh padé, abpa' anggur, umau saitun, inul sapi' muyuh, idi anak dumba muyuh, pad ideh ngaté nemuyuh.

⁵²Idi ideh miak ngelibut nemuyuh bang amung bawang muyuh idi ngusag amung libung muyuh luk medita' idi luk meraben, luk inan muyuh merapet ineh bang aput bawang muyuh luk biré Tuhan Allah muyuh nemuyuh.

⁵³Kareb bunu' muyuh ngelibut idi ngedereh nemuyuh, muyuh miak kuman anak burur muyuh sebuleng, ieh ineh uang anak muyuh luk deléi idi decur luk pangeh biré Tuhan Allah muyuh nemuyuh.

⁵⁴Idi deléi luk melaya' idi luk mepili' arang muyuh ngibpang akan kuan kinanakneh idi awan luk inanneh pegapel, idi anakneh luk ketecan,

⁵⁵pad ieh na miak maré kuan idé-idé pana' ratnan uang anakneh luk kenenneh, ngaceku na luk miak kuanneh bang dereh luk bang bawang muyuh ngaceku linibut bunu' muyuh.

⁵⁶Idi teh decur luk melaya' idi mepili' arang muyuh, luk na pekalai nalan, ngaceku ieh linulu idi ngaceku do', ngibpang akan kuan awan luk inanneh pegapel, idi anakneh luk deléi idi decur teh,

⁵⁷pad ieh na miak maré kuandeh ratnan pued luk remuat rat neneh, idi anak luk pangeh tinganakneh, ngaceku ieh sebuleng kuman neneh dengan lulem ngaceku na luk miak kuanneh bang dereh luk bang bawang muyuh ngaceku linibut bunu' muyuh.

⁵⁸"Idi kudeng iko na nginita idi na maya' amung bada' ukum luk inayud bang surat ini, idi na ngerayeh ngadan Tuhan Allahmu luk mebala idi luk inan matot,

⁵⁹idi Tuhan pana' miak ngacing kuanmu idi kuan anakmu, tuda'-tuda' kaca luk pelaba dat idi tuda'-tuda' ét luk pelaba bura', idi luk na miak uen ngedo'.

⁶⁰Idi Ieh ngacing kuanmu amung kaca lun bawang Masir, luk inanmu matot, pad iko na miak uen ngedo'.

⁶¹Idi amung kaca idi ét luk nateh titen bang surat ukum ini, miak Tuhan ngacing kuan muyuh, pad muyuh maté.

⁶²Idi sesuut mo' miak ketecan rat arang muyuh. Sagan pana' muyuh mula' atun mepad kudeng gituen déi' langit, ngaceku na muyuh maya' bala Tuhan Allah muyuh.

⁶³Idi mepad kudeng luk atun Tuhan pian nganau' do' nemuyuh, idi ngula' nemuyuh, kudeng ineh teh Tuhan pian ngedereh idi ngaté nemuyuh kareb ineh. Idi muyuh pana' miak bebuen rat bang bawang luk ulek muyuh.

⁶⁴"Idi Tuhan miak ngatad nemuyuh arang amung pupu, rat iring tana' macing iring selipa. Idi su ineh muyuh miak sembayang inan allah baken luk inau' ratnan kayuh idi batu, ieh ineh akang, luk na miti muyuh atun, idi luk na miti tepun muyuh pana'.

⁶⁵Idi muyuh na miak mawang niat arang pupu ineh, idi na do' udeng ngaceku na luk inan muyuh lutep. Iamo' su ineh Tuhan maré nemuyuh megagau, mesawang, idi meberat niat.

⁶⁶Idi ulun muyuh na tabpen, idi muyuh miak matot, do' macang idi medacem, pad muyuh na lutep ruked ulun muyuh.

⁶⁷Idi pekak muyuh pebala, 'Adui, io peh alem!' Idi malem muyuh pebala, 'Adui, io peh acang!' Ngaceku ratnan tot niat muyuh, idi ngaceku amung kekamen luk dat luk siren muyuh.

⁶⁸Idi Tuhan miak nguit nemuyuh lemubed amé' bawang Masir maya' alud, sagan tu pana' Ieh nepejani' muyuh na miak lemubed amé' déi'. Idi su ineh muyuh pian masui burur muyuh kuan bunu' muyuh mangun ku demulun deléi idi decur mo'. Iamo' na lun melih nemuyuh."

Bada' Ratnan Ukum 29

¹Idi ini bala pejani' luk icuk Tuhan ni Musa ruen kuan lun Israil déi' tana' Moab, baken ratnan pejani' luk pangeh inau'Neh kuandeh déi' Pegkung Sinai.

²Idi Musa nenawar amung lun Israil idi nepebala nedeh, "Muyuh pangeh nenier luk pangeh inau' Tuhan pa kiung muyuh bang bawang Masir, kuan raca' Masir idi kuan amung tarehneh idi amung bawangneh.

³Muyuh nenier tutun luk rayeh idi tanu' luk nan mawa idi kekamen luk melalud luk inau' Tuhan.

⁴Iamo' macing nekini pana' Tuhan nateh nemaré ileh nemuyuh pad muyuh miak kali', idi mateh muyuh miak nier, idi lalid muyuh miak ninger.

⁵"Tuhan pangeh nenated nemuyuh déi' su luk ali-ali, apat ngepulu' lak kinioneh. Idi ayung muyuh na nerupa' luun burur muyuh. Idi kasut muyuh pana' nateh nerupa' luun kukud muyuh.

⁶Idi ruti na kinan muyuh idi abpa' anggur idi borak nateh inirup muyuh, pad muyuh kali' Tuhan, ieh ineh Allah muyuh.

⁷Idi kareb iko pangeh nacing su ini, idi Sihon, raca' Hesbon idi Og, raca' Basan, nacing pian pebunu' netau, idi tau pana' nengelaya' nedeh.

⁸Idi tau nengaro tana'deh. Idi tau nemaré ineh kuan lun Rubin, lun Gad, idi sebuang inul Manasé.

⁹Idi ngaceku ineh do' muyuh nginita amung bala pejani' ini, pad muyuh ngalap peruan bang amung-amung luk ruen muyuh.

¹⁰"Idi aco sini amung muyuh tuped pa kiung Tuhan Allah muyuh, do' amung pengulu, lun rayeh, lun luk ngimet ukum, amung lun Israil,

¹¹amung anak idi awan muyuh, lun sakai luk tudo arang muyuh, lun luk ngapak kayuh apui macing ku lun luk ngereb abpa' rupan muyuh.

¹²Aco sini muyuh ngimun maya' jani' inan Tuhan Allah muyuh, luk litepNeh kuan muyuh,

¹³pad Ieh ngeletep nemuyuh mangun ku pupuNeh, idi Ieh pana' mangun ku Allah muyuh, maya' kudeng luk pijani'Neh nemuyuh, idi maya' kudeng luk pijani' Neh kuan tepun muyuh Ibrahim, Isak, idi Yakub.

¹⁴Idi baken Tuhan ngeletep pejani' ini kuan muyuh mo',

- 15**iamo' kuan idé-idé mo' luk idi dengan tau ieni aco sini, pa kiung Tuhan Allah tau.
- 16**"Ngaceku muyuh kali' kareb tau tudo bang bawang Masir atun, idi kudeng apéh tau nalan lemaba amung pupu luk pangeh liba tau bang bawangdeh.
- 17**Idi muyuh pangeh nenier amung luk inau'deh luk inan Tuhan megateh, idi akangdeh ratnan kayuh, batu, pirak, idi amas luk arangdeh ineh.
- 18**Matar do'-do' pad na luk idi seburur deléi idi decur, inul idi pupu luk teketed ratnan Tuhan Allah tau aco sini idi luk pian amé' sembayang inan akang pupu ineh, pad aceh uat luk mepét na mulun arang muyuh,
- 19**idi kareb ieh ninger bala pejani' ini, idi ieh ngawang niatneh, kebalaneh, 'Ui miak uen ngulun, sagan tu pana' ui maya' pinian bururku luk dat idi dengan abukku ui pian ngato paring.'
- 20**Idi Tuhan na sikal maré do' neneh. Iamo' useh idi temaruh Tuhan pelaba bura' kuan lun ineh. Idi amung kediman luk inayud bang surat ini miak macing neneh. Idi Tuhan pana' miak ngiu' ngadanneh rat luun tana'.
- 21**Idi Tuhan pana' miak ngatad neneh ratnan amung inul lun Israil pad ieh pederen, petulu ku amung kediman luk titen bang ukum surat ini.
- 22**"Idi anak inul muyuh luk mucu, idi lun sakai luk macing rat bawang luk mado, miak nier dereh idi ét luk uen Tuhan ngacing kuan bawang ini.
- 23**Amung tana' pangeh netugeh ku batu apui idi tucu', pad ieh na miak inan nibu, idi uduh pana' na mulun kuanneh, mepad kudeng usag bawang Sodom, Gemora, Adama, idi Seboim luk pangeh inusag Tuhan ku usehNeh luk pelaba bura'.
- 24**Idi amung pupu miak ngitun, 'Ngudehké Tuhan pangeh nenganau' kudeng ineh kuan bawang ini? Anunké punneh Ieh pelaba useh?'
- 25**Idi ideh miak ngor, 'Ngaceku ideh pangeh nengelaba pejani' Tuhan Allah tepunde, luk pangeh inau'Neh kuandeh, kareb Ieh nenguit nedeh remuat rat bang bawang Masir.

²⁶Idi ideh nesembayang inan allah baken luk na mitideh, idi luk bibpeng Allah inandeh sembayang.

²⁷Ngaceku ienh Tuhan pelaba useh kuan bawang ini, pad Ieh ngacing amung kediman luk titen bang surat ini.

²⁸Idi Tuhan pana' pangeh mubuh nedeh rat bang bawangdeh dengan usehNeh idi rasangNeh, idi gatehNeh luk pelaba bura', idi nenala' nedeh ineh bang bawang luk baken, mepad kudeng aco sini.'

²⁹"Inan dalan luk inalum, idi luk na ginala' Tuhan Allah tau. Iamo' Ieh pangeh nengegala' ukumNeh, pelé tau idi anak-anak tau maya' ineh macing raked-ruked.

Bada' Ratnan Ukum 30

¹"Ui nima' nemuyuh mili' arang peruan dengan kediman. Idi kareb amung ini mangun kuan muyuh, bang bawang luk inan muyuh tebawang arang amung pupu, su luk inan muyuh pangeh pitad Tuhan Allah muyuh, idi muyuh miak ngerawé luk bilaku.

²Idi muyuh dengan inul muyuh miak lumi inan Tuhan Allah muyuh, dengan amung niat muyuh idi terawé muyuh, pad muyuh maya' ukumNeh luk barénku nemuyuh aco sini.

³Idi Tuhan Allah muyuh miak ngeperuan nemuyuh, idi méi' nemuyuh, idi ngelubed nemuyuh rat arang amung pupu su luk inan Tuhan Allah muyuh nengatad nemuyuh.

⁴Sagan tu pana' muyuh pangeh pitad macing iring tana', rat ienh teh Tuhan Allah muyuh miak ngamung nemuyuh,

⁵Idi nguit nemuyuh amé' bang bawang luk ilap tepun muyuh ku babpatdeh, idi muyuh pana' miak ngalap ineh ku babpat muyuh. Idi Tuhan pana' miak ngeperuan nemuyuh idi ngula' nemuyuh meluun ratnan tepun muyuh.

⁶Idi Tuhan Allah muyuh pana' miak nunat niat muyuh idi niat amung anak inul muyuh, pelé muyuh méi' inan Tuhan Allah dengan amung niat muyuh, idi terawé muyuh, pad muyuh mulun.

⁷Teh miak ngacing amung kediman ini kuan bunu' muyuh luk megateh nemuyuh idi luk nengedereh nemuyuh.

⁸Idi muyuh miak maya' Neneh idi nginita amung ukumNeh luk bida'ku nemuyuh aco sini.

⁹Idi Tuhan pana' miak ngeperuan nemuyuh bang amung-amung luk ruen muyuh, pad muyuh mula' anak, mula' aya', idi mula' uli' lati' muyuh. Ngaceku Ieh geregan ngacing peruan baruh kuan muyuh, mepad kudeng Ieh nengeperuan tepun muyuh.

¹⁰Iamo' do' muyuh maya' balaNeh idi nginita amung ukumNeh luk pangeh inayud bang Surat Ukum ini. Idi do' muyuh lumi Neneh dengan amung niat muyuh idi terawé muyuh.

¹¹"Ukum luk bida'ku nemuyuh aco sini, baken pelaba ikat bén muyuh, idi na ieh mado.

¹²Baken ieh bang langit pad lemulun miak ngitun, 'Idéké miak umak langit ngaceku tau, idi miak nguit ukum ineh amé' netau, pad ieh kali' tau, idi pad tau miak maya' ineh?'

¹³Idi teh baken ieh déi' dipar abpa' rayeh, pad lun pebala, 'Idé miak guta abpa' rayeh ngaceku tau, idi miak nguit ukum ineh amé' netau pad ieh kali' tau, idi pad tau miak maya' ineh?'

¹⁴Iamo' bala ineh meluun muneng namu. Ieh ineh bang tangmu, idi bang niatmu, pad iko miak maya' ineh.

¹⁵"Idi aco sini ui nima' nemuyuh mili' arang ulun idi peruan dengan até idi usag.

¹⁶Idi aco sini ui ngecuk namu méi' inan Tuhan Allahmu idi maya' dalanNeh, idi nginita, ukumNeh idi bada'Neh, pelé iko miak mulun idi amé' mula', idi pad Tuhan Allahmu ngeperuan namu bang bawang luk ulekmu ineh.

¹⁷Iamo' kudeng iko lemubed, idi na ninger, iamo' iko buken, pad iko tekeradung sembayang inan allah baken,

¹⁸Idi ui maré kali' namu aco sini, kali' rungen iko miak maté, idi na ulunmu mekadang bang bawang luk ulekmu nekini déi' dipar Abpa' Yarden.

¹⁹Idi aco sini teh ui nawar langit idi tana' mangun ku luk nekali' namu. Ui nima' namu mili' arang ulun idi até, peruan idi kediman. Do' iko mili' ulun ineh, pad iko idi amung anakmu miak mulun.

²⁰Do' mawa inan Tuhan Allahmu, idi nginita amung ukumNeh, idi merapet Neneh, pad ulunmu mekadang bang bawang luk pangeh pijani' Tuhan kuan tepunmu, Ibrahim, Isak, idi Yakub. Ngaceku Tuhan Allah luk mangun ku ulunmu."

Bada' Ratnan Ukum 31

¹Idi Musa nenutum bada'Neh nelun Israil.

²Kebalaneh nedeh, "Nekini ulunku meratu dueh ngepulu' lak. Na ui miak ngimet nemuyuh, ngaceku bala Tuhan negku, 'Na iko miak guta Abpa' Yarden ini.'

³Idi Tuhan Allah muyuh luk, miak guta pa atun muyuh. Idi Ieh pana' miak ngaté amung pupu ini pa atun muyuh, pad muyuh ngalap bawangdeh. Idi Yusak miak guta pa atun muyuh petulu ku bala Tuhan.

⁴Idi Tuhan miak ngaté nedeh mepad kudeng Ieh nengelaya' ni Sihon idi Og, didueh raca' lun Amori ineh, idi Ieh nengusag bawangdeh.

⁵Idi Tuhan miak maré nedeh bang palad muyuh. Idi muyuh pana' miak nganau' kuandeh petulu ku amung ukum luk pangeh bida'ku nemuyuh.

⁶Do' muyuh metueh idi mekuu'. Aleg muyuh matot pa kiungdeh. Ngaceku Tuhan Allah muyuh luk nalan dengan muyuh. Na Ieh miak nima' nemuyuh melaya', idi na Ieh necan nemuyuh."

⁷Idi Musa nenawar ni Yusak, kebalaneh neneh pa kiung amung lun Israil, "Do' iko metueh idi mekuu', ngaceku iko miak amé' dengan pupu ini bang bawang luk pangeh pijani' Tuhan nan tepunmu. Do' iko nguyut nedeh ngalap bawang ineh.

⁸Tuhan sebuleng nalan pa atunmu idi Ieh miak ngedengan namu. Idi na Ieh nima' namu melaya', idi na Ieh necan namu. Aleg iko matot. Aleg iko megagap."

⁹Idi Musa nengayud Ukum Allah ini, idi nemaré kuan imam-imam lun Liwi, luk mirir Pati' Pejani' Tuhan, idi kuan amung lun rayeh pupu Israil.

¹⁰Idi Musa neperiteteng nedeh, kebalaneh, "Bang anid tudu' lak, kareb lak puit ineh, do' maca' Ukum ini kareb Aco Rayeh Lepo.

¹¹Kareb amung lun Israil amé' pa kiung Tuhan Allah muyuh, su luk pilinNeh, do' muyuh maca' Ukum ini pedingeren amung lun Israil.

¹²Do' nawar lun mula' ineh teubupun, do' decur idi deléi teh, do' amung anak idi lun sakai luk bang bawang muyuh, pelé ideh ninger idi matot inan Tuhan Allah muyuh, pad ideh nginita amung bala Ukum ini.

¹³Kudeng ineh teh anak-anak muyuh luk nateh nekali' anun-anun miak ninger idi matot inan Tuhan Allah muyuh, seruked muyuh tudo bang bawang luk ulek muyuh déi' dipar Abpa' Yarden."

¹⁴Kebala Tuhan ni Musa, "Na mio teh iko maté. Nawar ni Yusak idi do' medueh tupered bang Lepo su luk inan papu' Tuhan, pad Ui ngeletep neneh." Idi Musa didueh Yusak iné' tupered bang Lepo ineh.

¹⁵Idi Tuhan nesilangan nedidueh su ineh, ieh ineh bang diri laput. Idi diri laput ineh tupered iring tanga' Lepo ineh.

¹⁶Kebala Tuhan ni Musa, "Iko malé maté. Idi pupu ini miak meraruh idi nakap allah pupu baken bang bawang luk ulek muyuh nekini. Idi ideh miak necan Negku idi ngelaba pejani'Ku nedeh.

¹⁷Kareb ineh Ui pelaba gateh nedeh. Ui miak necan nedeh, idi mapen kiungKu rat nedeh, pad ideh pederen ku tuda'-tuda' ét idi susa', pelé ideh pebala, 'Bakenké dereh ini macing netau ngaceku Allah tau na idi arang tau?'

¹⁸Idi Ui miak mapen kiungKu ngaceku amung dat luk pangeh inau'deh. Ngaceku ideh pangeh nelumi inan allah baken.

¹⁹Ngaceku ineh do' ngayud nani ini, idi mada' ineh kuan lun Israil, pad ineh mangun ku aceh bada' luk rat Negku kuandeh.

²⁰Ui nguit nedeh amé' nan tana' luk mebaleng luk pangeh pijani'Ku nan tepundeh, idi ideh miak kuman pad mebor idi do' udeng, iamo' ideh pian lumi idi sembayang inan allah baken. Idi Ui uendeh ngedat, idi pejani'Ku pana' labéndeh.

²¹Idi kareb amung dereh idi susa' ineh pangeh mangun kuandeh, idi nani ini miak mangun ku aceh bada' rat Negku kuandeh, ngaceku mupundeh na miak mekelupan ratnan nani ini. Ngaceku Ui kali' luk pian niatdeh aco sini, kareb nateh Ui nenguit nedeh semuet bang bawang luk pangeh pijani'Ku nedeh."

²²Idi aco sineh Musa nengayud nani ineh idi nemaré ineh kuan amung lun Israil uendeh ngapal.

²³Idi Tuhan nengelelep ni Yusak Nun, kebalaNeh, "Do' iko metueh idi mekuu'. Ngaceku iko miak nguit nelun Israil semeut bang bawang luk pangeh pijani'Ku nedeh. Idi Ui pana' idi denganmu."

²⁴Kareb Musa pangeh nengayud amung bala Ukum ini bang aceh surat macing abudneh,

²⁵idi ieh neperiteteng kuan lun Liwi luk mirir Pati' Pejani' Tuhan, kebalaneh,

²⁶Lapen muyuh surat Ukum Allah ini, ngerareng ineh luun iring Pati' Pejani' Tuhan Allah muyuh, pelé rat su ineh, ieh ineh mangun ku aceh bada' kuan pupuNeh.

²⁷Ngaceku pangeh ui nekali' tueh niatdeh idi gatehdeh. Idi kareb ui mulun arangdeh idi ideh pangeh nengedat Tuhan, meluun teh karebku maté!

²⁸Darin muyuh amung lun rayeh pupu ini idi amung lun luk ngimet ukum, pelé amung bala ini badénku pedingerendeh. Idi ui nawar langit idi tana' miak mangun ku luk maré kali' rat nedeh.

²⁹Ui kali' kareb ui maté na miak na muyuh ngedat lawé muyuh. Idi muyuh miak umai ratnan dalam luk icukku Bén muyuh, idi luk dat miak macing kuan muyuh mucu ngaceku muyuh miak nganau' luk dat pa kiung Tuhan, pad Ieh megateh nemuyuh ngaceku amung-amung luk ruen muyuh.”

³⁰Idi Musa nemada' pedingeren amung lun Israil amung bala nani ini macing kekipedneh:

Bada' Ratnan Ukum 32

¹Ninger balaku, O langit, Ninger iko, O tana', amung luk belénku.

²Bada'ku tapek-tapek mepad kudeng udan; idi balaku mepad kudeng ipup, mepad kudeng udan puré-puré luun uduh, idi tapek-tapek luun tibu-tibu.

³Ngaceku ui miak neten ngadan Tuhan, idi do' muyuh ngerayeh Allah tau!

⁴Kekamen Pegkung Batu ineh meriput, ngaceku amung lawéNeh mesiri, Allah lutep maya' jani' idi na sala'Neh, Ieh mesiri idi matu.

⁵Muyuh nganau' luk tekilu' pa kiungNeh, muyuh na mayu mangun ku pupuNeh, muyuh aceh inul luk tekilu' idi neraruh.

⁶Kudeng inehké ua' muyuh inan Tuhan, O muyuh pupu luk mebacé idi meruden? Ieh ineh taman muyuh luk nemudut nemuyuh, luk nenganau' nemuyuh idi nengeletep nemuyuh.

⁷"Ngerawé iko ratnan kareb luk mon, idi ngerawé ulun tepunmu. Ngitun tamanmu, idi ieh miak mada' namu; ngitun tepun-tepunmu idi ideh pana' miak mada' namu.

⁸Kareb Allah luk Meluun Dita' nengelelep babpat amung pupu, kareb Ieh nengatad anak-anak lemulun, idi Ieh nengelelep su luk inandeh tudo maya' kinula' anak-anak Israil,

⁹ngaceku inul Yakub pinili' ku babpatNeh sebuleng.

¹⁰"Ieh nekali' nedeh déi' su luk ali-ali, ieh ineh tana' luk dat ali. Ieh nematar nedeh idi nengasa' nedeh, mepad kudeng matchNeh sebuleng.

¹¹Mepad kudeng kanui ngerukub ararneh, idi semiling-semiling pa luun anakneh, idi ngukab iladneh, idi ngalap nedeh, idi nguit nedeh pa luun iladneh.

¹²Tuhan sebuleng nenated pupuNeh idi na dinengan allah baken.

¹³"Ieh nenima' nedeh ngimet surud-surud, pad ideh kuman ratnan uli' tana' ineh. Ieh nemaré nedeh ngirup duru' rat bang pegkung batu; idi umau rat bang batu luk meluun tueh.

¹⁴Kaket rata sapi' idi rata amék pelaba ula'; idi dumba, amék, idi sapi'deh pelaba do'; kudeng ineh teh padé idi abpa' anggurdeh.

¹⁵"Pupu Tuhan iuk mula' binaweh, iamo' ideh sikal metueh; ideh melamu idi megéi' mebor. Ideh nenecan Allah luk nemudut nedeh, idi nesitunga nan Pegkung Batu ulundeh.

¹⁶Ideh nenganau' Tuhan ngimaruh ku allah-allah baken, idi nengacing usehNeh ku kekamendeh luk inanNeh megateh.

¹⁷Ideh nemaré baré kuan ada' pupu baken, luk na matu, idi kuan allah baken luk na mitideh, ieh ineh allah baruh luk na katot tepundeh.

¹⁸Ideh nenecan Pegkung Batu luk nemudut nedeh, idi nekelupan Allah luk nenganak nedeh.

- ¹⁹"Kareb Tuhan nenier ineh idi Ieh pelaba useh, pad Ieh nenala' anak-anakNeh.
- ²⁰KebalaNeh, 'Ui mapen kiungKu rat nedeh, idi nier kudeng apeh kekipeddeh, ngaceku ideh aceh inul luk naluk idi na lutep.
- ²¹Ideh nenganau' Negku ngimaruh ku akangdeh, idi nengacing usehKu ngaceku allahdeh. Pad Ui pana' nganau' nedeh ngimaruh ku pupu luk na mebala, idi museh nan pupu luk mebacé.
- ²²UsehKu mebudung kudeng apui, pad ngeseb amung-amung luk bang tana'. GatehKu macing bang su luk inan até, pad ngerupung amung pegkung macing bang tana' pana'.
- ²³" 'Idi Ui ngamung dereh kuandeh, idi amung ilebKu ku ngelatik nedeh.
- ²⁴Ideh maté ku lau idi dadem, idi maté ku ét luk mebura'. Ui ngecuk pung luk mesangit ngeramit nedeh, idi menipeh luk megalih ngatep nedeh.
- ²⁵Inan luk ngaté déi' natad idi bang ruma' pana' inan luk katot. Anak adi' deléi idi decur maté, anak niti' idi lun mengered pana' miak pitayen.
- ²⁶Ui pian ngaté nedeh amung, pad ideh na miak teruayen lemulun.
- ²⁷Iamo' Ui na nima' bunu'deh medita' niat, pad ideh miak pebala, "Kai pangeh nengelaya' nedeh." Setuneh Ui ini luk nengedereh nedeh.'
- ²⁸"Israil ineh aceh pupu luk na mileh, idi na kali' anun-anun.
- ²⁹Kudeng ideh mileh, kali' rungen ideh kali' amung ineh, idi miak kali' kekipeddeh.
- ³⁰Ngudehké seburur ngerada' meribu burur, idi dueh burur ngusu pulu' ngeribu burur, kudeng na ideh pinasui Pegkung Batudeh ineh, idi kudeng na ideh tila' Tuhan?
- ³¹Ngaceku Pegkung Batu tau baken pegkung batu didih, idi bunu' tau teh luk kali'.
- ³²Bunu'deh mepad dat kudeng Sodom idi Gemora, ieh ineh lawa anggur luk ngeruat bua' luk mepét idi megalih,

- 33mepad kudeng abpa' anggur luk inau' ratnan aka' menipeh.
- 34"Tuhan ngerawé ratnan luk inau' bunu'deh; Ieh nganét kareb luk petulu, pad Ieh miak ngukum nedeh.
- 35Tuhan miak ngua' idi ngukum nedeh, tarekdeh macing idi ideh mebpeh, aco ukumdeh pangeh muneng.
- 36Tuhan miak muit pupuNeh, idi méi' inan demulunNeh, kareb Ieh nier amung tuehdeh neburo, idi pawa' lemulun luk ketecan.
- 37Tuhan miak pebala nan pupuNeh, 'Iapehké allah-allah ineh idi batu luk inandeh merapet ineh,'
- 38luk nekuman lemak baré luk kirat muyuh ineh, idi luk nengirup abpa' anggur baré luk rupen ineh? Do' ideh ngedengan nemuyuh, pad muyuh inan luk inan sigapung.
- 39" 'Ui ini sebuleng mo' luk Allah, idi na luk idi allah baken rat Negku. Ui ini luk ngaté idi luk ngulun, ngurat idi ngedo'. Seburur pana' nateh luk metueh rat Negku.
- 40Ui ngegenang langenKu i langit, idi pebulung ku ulunKu luk meruked.
- 41KebulungKu, Ui ngalaan tadem pelapetKu, pad ngacing ukum luk mesiri. Ui ngua' dereh kuan amung bunu'Ku, idi ngukum amung lun luk megateh Negku.
- 42Dara'deh temapek ratnan ilebKu, idi pelapetKu ngaté lun luk sikal metueh rat Negku. Na Ui méi' inan lemulun luk munu' Negku; lun luk nurat idi lun tiban pana' maté.'
- 43"O amung pupu baken, do' ngubur pupu Tuhan, Ieh ngukum amung lun luk ngaté nedeh, idi ngua' amung bunu'Neh, idi Ieh nganau' luk nguit pedo' kuan tana' pupuNeh."
- 44Musa idi Yusak Nun nengapal nani ini pedingeren lun Israil ineh.
- 45Kareb Musa pangeh nemada' bala Allah ineh nelun Israil,

⁴⁶Idi kebalaneh nedeh, "Ngerawé muyuh do'-do' amung bala luk bida'ku nemuyuh aco sini, pelé muyuh ngecuk anak-anak muyuh nginita idi maya' amung bala Allah ini.

⁴⁷Ngaceku baken bala ini mo'-mo' kuan muyuh, iamo' ieh ineh ulun muyuh. Maya' bala ini pad ulun muyuh miak uen ngekadang bang bawang déi' dipar Abpa' Yarden luk ulek muyuh nekini."

⁴⁸Idi Tuhan nepebala ni Musa aco sineh teh,

⁴⁹"Uké iko Pegkung Abarim, ieh ineh Pegkung Nebo, luk déi' tana' Moab, petutup ku Yeriko, idi nier tana' Kanaan luk barénKu kuan lun Israil.

⁵⁰Idi iko maté luun pegkung luk ikému ineh, mepad kudeng kinanakmu Arun teh pangeh naté déi' luun Pegkung Hor.

⁵¹Ngaceku medueh pangeh mesala' Negku arang amung lun Israil déi' Meriba Kadis, ieh ineh su luk ali-ali déi' Sin, ngaceku na medueh nengedita' Negku arang lun Israil.

⁵²Iko miak nier tana' ineh rat mado. Iamo' na iko miak semuet bang bawang luk barénKu kuan amung lun Israil."

Bada' Ratnan Ukum 33

¹Idi ini peruan luk pangeh biré Musa, nabi Allah, kuan amung lun Israil kareb nateh ieh naté.

²Idi kebalaneh: "Tuhan nacing rat Pegkung Sinai, idi merasat rat Edom, Ieh nesilangan rat Pegkung Paran Ieh linibut pulu' ngeribu melaikat luk meligan, dengan apui mekilep pa tinuehNeh.

³Tuhan méi' inan pupuNeh; amung lun luk liniganNeh idi bang paladNeh. Ideh nemaya' dalanMu, idi bada'Mu.

⁴Idi Musa nengacing ukum ineh kuan kai, mangun ku bada' luk do' kuan tebubpun Yakub.

⁵Tuhan mangun ku raca' lun Israil, kareb amung pupu ineh nepamung, dengan lun rayehdeh."

- ⁶Idi kebala Musa ratnan inul Rubin: "Nima' Rubin mulun, idi na maté, saban tu pana' ideh pawa'."
- ⁷Idi kebalaneh ratnan inul Yahuda: "Ninger, O Tuhan, arod lun Yahuda, idi nguit nedeh perurum nan pupu Israil luk baken. Do' ticu' Tuhan ngedengan endeh, idi ngelaya' bunu'deh."
- ⁸Idi kebalaneh ratnan inul Liwi: "O Tuhan, ngegala' pianMu kuan lun Liwi. Ideh ineh pupuMu luk lutep luk tinutunMu déi' Masa idi Meriba.
- ⁹Ideh meluun lutep Namu idi ngerawé Namu meluun ratnan taman-tinan, kinanak idi anak pana'. Ideh nemaya' amung balaMu, idi nengimet jani'Mu.
- ¹⁰Ideh miak mada' UkumMu kuan lun Israil; idi maré baré luun bubpunMu.
- ¹¹O Tuhan, ngeperuan nedeh pad ideh metueh, idi ngamo amung kekamen ticu'deh. Ngelaya' bunu'deh, pad ideh na miak tumui peh."
- ¹²Idi kebalaneh ratnan inul Benjamin "Tuhan mawa idi matar pupu ini, Allah ngelinged nedeh bang anid aco, pad ideh do' udeng."
- ¹³Idi kebalaneh ratnan inul Yusup: "Tuhan ngeperuan tana'deh dengan udan, idi bued abpa' rat pa liang tana'.
- ¹⁴Idi amung uli' match aco luk do' idi bua' bulan luk pun,
- ¹⁵idi bua' luk do' rat luun pegkung luk mon.
- ¹⁶Do' manu' tana'deh ku amung luk do', ratnan éi' Tuhan luk pebala bang amug luk mebudung ku apui. Ngacing amung do' ineh kuan inul Yusup, ngaceku ieh ineh lun rayeh rat arang kinanakneh.
- ¹⁷Yusup metueh mepad kudeng sapi' deléi, idi unganéh mepad kudeng unga kelio, luk ngegkul tuda'-tuda' pupu, pad ideh buro macing iring tana', ieh ineh tuda'-tuda' pulu' ngeribu lun Epraim, idi tuda'-tuda' pulu' ngeribu lun Manasé."
- ¹⁸Idi kebalaneh ratnan inul Sebulon, idi Iskar: "Do' Sebulon uen ngeperuan kareb ieh pepua', idi do' Iskar uen ngeperuan bang leponeh.

- ¹⁹Ideh nawar pupu baken amé' nan pegkungdeh. Su ineh ideh maré baré luk matu. Ideh nengalap luk do' ratnan abpa' rayeh idi binaweh luk inapung bang bada.”
- ²⁰Idi kebalaneh ratnan inul Gad: "Ngubur Allah luk ngula' tana' kuan Gad; ieh luku mepad kudeng balang luk rayeh idi ngerekem ticu' idi buduk uluh.
- ²¹Ieh nemili' babpat tana' luk meluun do', idi babpat lun rayeh tinina' kuanneh. Ieh iné' inan lun rayeh pupu-pupu ineh, idi nemaya' amung ukum idi bala Tuhan dengan lun Israil.”
- ²²Idi kebalaneh ratnan inul Dan: "Idi Dan ineh balang luk pegawa', idi ieh pana' uput remuat rat Basan.”
- ²³Idi kebalaneh ratnan inul Naptali: "Naptali mebor ku katu idi peruan Tuhan, idi babpatneh rat abpa' rayeh macing pa kabing busat aco.”
- ²⁴Idi kebalaneh ratnan inul Aser: "Pelaba samal Aser rat arang pupu Israil. Nima' neneh inan amung kinanakneh mawa, idi nima' neneh ngerereb kukudneh bang umau saitun pana'.
- ²⁵Do' palinmu ruen ratnan belawan idi tekaling, idi do' iko uen ngeperuan raked ulunmu.”
- ²⁶O lun Israil na allah baken ratnan Allah muyuh, luk nalan déi' langit dengan rayehNeh, luk nalan luun laput pian ngedengan namu.
- ²⁷Rat mon Allah megéi' ngelibung namu, idi iang bururmu inan ticu' Tuhan luk meruked. Ieh nengusu bunu' rat pa kiung muyuh, kebalaNeh nemuyuh, 'Ngaté nedeh.'
- ²⁸Idi inul Yakub do' udeng, bang bawang luk mula' padé idi anggur; idi langit pana' megéi maré udah.
- ²⁹O Israil iko pelaba samal! Idé luk mepad kudeng iko? Iko aceh pupu luk inuli' Tuhan. Ieh ineh utap luk ngedengan namu, idi pelapet luk maré namu metueh! Amung bunu'mu miak ngebeneh bururdeh namu, idi iko miak ngeradu' suruddeh luk medita'.

Bada' Ratnan Ukum 34

¹Idi Musa nenalan rat Patar Moab amé' Pegkung Nebo, ieh ineh luun Buduk Pisga, luk petutup ku Yeriko. Idi Tuhan nemada' sirennéh aput-aput tana' Giliad macing déi' Dan,

²idi aput-aput tana' Naptali, Epraim, idi Manasé; idi aput-aput tana' Yahuda macing Abpa' Rayeh luk pa acep aco,

³idi Negeb, idi tana' raked, ieh ineh Patar Yeriko, bawang piasau macing déi' Soar.

⁴Idi kebala Tuhan ni Musa, "Ini tana' luk pangeh pijani'Ku kuan Ibrahim, Isak, idi Yakub, kebalaKu, 'Ui pian maré ineh kuan inulmu.' Idi Ui maré namu nier ineh ku matehmu. Iamo' na iko miak guta amé' déi'."

⁵Idi Musa demulun Tuhan ineh naté su ineh déi' tana' Moab maya' kudeng bala Tuhan.

⁶Idi Tuhan nenanem neneh bang aceh ruan déi' tana' Moab petutup ku Bait Pior. Idi seburur pana' nateh kali' tanemneh macing aco sini.

⁷Idi kareb Musa naté, ulunneh meratu dueh ngepulu' lak, idi matehneh nateh nesaweng, tuehneh pana' nateh nekurang.

⁸Idi Musa pana' tinido' amung lun Israil déi' Patar Moab teluh ngepulu' aco kinioneh. Idi petap amung aco tangi' idi tido ngaceku Musa ineh.

⁹Idi Yusak Nun ineh, mepanu' ku Roh ileh, ngaceku Musa pangeh nengerareng ticu'neh luunneh. Idi amung lun Israil pana' nemaya' balaneh, idi nemaya' kudeng luk icuk Tuhan ni Musa.

¹⁰Idi rat arang lun Israil na luk idi seburur nabi pana' luk mepad kudeng Musa luk nepapu' Tuhan kiung dengan kiung,

¹¹ku amung tanu' luk inan mawa idi kekamen luk melalud luk inau'neh déi' bawang Masir maya' bala Tuhan, pa kiung raca' Masir idi amung tarehneh, aput amung bawangneh,

¹²idi ku ticu' luk melalud idi ku amung dalan luk katot idi rayeh luk inau'
Musa pa kiung amung lun Israil.

Yusak

Yusak 1

¹Kareb pangeh até Musa lun duken Tuhan ineh, idi Tuhan nepebala ni Yusak Nun, lun duken Musa ineh, kebalaNeh,

²"DemulunKu Musa pangeh naté. Nekini do' iko gugkang idi nalan amé' guta Abpa' Yarden ineh dengan amung lun Israil, idi amé' bang bawang luk barénKu nemuyuh.

³Amung su luk ridu' kukud muyuh ineh pangeh biréKu nemuyuh, maya' kudeng luk bilaKu ni Musa.

⁴Idi lakan muyuh ineh rat su luk ali-ali luk pa kabing busat aco macing Pegkung Lebanon luk pa tinueh busat aco; rat Abpa' Pirat luk pa busat aco, idi aput tana' lun Hiti, idi suet Abpa' Rayeh luk pa acep aco.

⁵Seburur pana' nateh luk miak ngelaya' namu, raked ulunmu. Mepad kudeng Ui idi dengan Musa, kudeng ineh teh Ui miak ngedengan namu. Na ui miak necan namu.

⁶Do' iko metueh idi mekuu', ngaceku iko miak nguyut pupu ini ngalap tana' ini luk pangeh pijani'Ku kuan tepundeh.

⁷Do' iko metueh idi mekuu', idi mekél maya' amung ukum luk bida' demulunKu Musa namu. Aleg iko umai ratnan ineh, pelé iko inan peruan iapeh-iapeh su luk ulekmu mucu.

⁸Aleg tu-tu iko kelupan surat Ukum ini, iamo' maca' ineh kareb macang idi medacem, pelé iko mekél maya' amung luk inayud bang ineh. Ngaceku kudeng ineh iko uen ngeperuan.

⁹Ngerawé bala Kini, "Do' iko metueh idi mekuu'. Idi aleg iko matot, idi merapang Ngaceku Tuhan Allahmu idi denganmu iapeh-iapeh luk ulekmu." "

¹⁰Mucu ratnan ineh Yusak nengecuk amung lun rayeh pupu ineh, kebalaneh,

¹¹"Amé' muyuh arang lepo muyuh ineh idi ngecuk nelun mula' ineh kudeng ini, 'Temina' nguit balu' muyuh. Kareb mabud teluh aco, idi amung muyuh

miak guta Abpa' Yarden ini pad ngalap tana' luk biré Tuhan Allah muyuh ku babpat muyuh.' “

¹²Idi kebala Yusak nelun Rabin, nelun Gad, idi nan sebuang inul Manasé,

¹³"Ngerawé muyuh bala luk biré Musa lun duken Tuhan ineh kuan muyuh, kebalaneh, 'Tuhan Allah muyuh maré tana' ini inan muyuh ucu.'

¹⁴Nima' awan, anak, idi aya' muyuh tudo luun tana' luk biré Musa nemuyuh pa busat aco Abpa' Yarden. Iamo' do' lun pebunu' muyuh guta pa atun kinanak muyuh, pad ngadengan nedeh bang bunu'deh,

¹⁵pelé Tuhan maré tana' inan kinanak muyuh ucu' mepad kudeng muyuh. Pangeh ineh do' muyuh lemubed amé' nan babpat tana' muyuh luk biré Musa lun duken Tuhan ineh nemuyuh, tungé' pa busat aco Abpa' Yarden.”

¹⁶Idi ideh nengor bala Yusak ineh, kebaladeh, "Amung luk icukmu nekai ineh pian kai maya', idi iapeh-iapeh pana' iko ngecuk nekai, kai pana' amé' teh.

¹⁷Mepad kudeng kai pangeh nemaya' bala Musa kudeng ineh teh kai maya' balamu, kudeng Tuhan Allahmu miak ngedengan namu, mepad kudeng Ieh nengedengan ni Musa.

¹⁸Idé luk na sikal maya' balamu idi luk ngelaba balamu bang anun-anun luk dukenmu nedeh, ieh ineh pitayen. Do' iko metueh idi mekuu' teh."

Yusak 2

¹Idi Yusak nelulem ngecuk dueh burur rat Sitim amé' nier, kebalaneh, "Amé' medueh ngikak tana' ineh, idi bawang Yeriko." Idi didueh nesemuet bang ruma' seburur decur luk mesawa', ngadanneh Rahab, idi didueh netudo déi'.

²Idi lun nemada' ni raca' Yeriko, kebaladeh, "Malem ini lun Israil nacing tungé' pian nier bawang ini.”

³Idi raca' Yeriko nengacing bala ini ni Rahab, "Iten remuet lun luk pangeh nacing namu. Ngaceku ideh luk amé' tungé' ineh pian nier amung bawang.”

⁴Iamo' decur ineh pangeh nengapung dueh deléi ineh. Idi kebalaneh, "Kali' rungen lun ineh pangeh nacing negku. Iamo' na ui kali' rat iapeh didueh.

⁵Idi kareb nateh lun nemalin tanga' bawang idi aco pana' medacem idi didueh neremuat. Na ui kali' iné' iapeh didueh. Do' muyuh mesaget ngerada' nedidueh pelé muyuh ngigket nedidueh.”

⁶(Iamo' decur ineh pangeh nengecuk nedidueh umak amé' luun apo ruma'neh, idi ieh pangeh nengapung nedidueh pa liang nuper pu luk pangeh rirengneh pa luun apo ineh.)

⁷Kareb ideh luk ngerada' ineh neremuat, idi ideh nemalin tanga' bawang ineh. Idi ideh iné' ngerada' nedidueh maya' dalam luk guta Abpa' Yarden.

⁸Idi Kareb nateh didueh nerudap, idi decur ineh numak iné' luun apo.

⁹Idi kebalaneh nedidueh ineh, "Ui kali' tana' ini pangeh biré Tuhan nemuyuh, idi kali' rungen amung kai matot nemuyuh.

¹⁰Ngaceku kai pangeh neninger ratnan kudeng apeh Tuhan nengeket Abpa' Pisui pa kiung muyuh, kareb muyuh neremuat rat bang bawang Masir. Idi teh kai neninger ratnan kudeng apeh muyuh nengaté raca' Amori, ieh ineh Sihon idi Og dengan bawehdeh pa busat aco Abpa' Yarden.

¹¹Kareb kai neninger amung ineh, idi kai matot. Seburur pana' nateh luk mekuu' ngaceku muyuh. Tuhan Allah muyuh, Ieh ineh Allah bang langit idi bang tana' pana'.

¹²Idi nekini do' medueh pejani' negku ku bulung ku ngadan Tuhan. Ngaceku ui pangeh nenganau' do' kuan medueh. Idi medueh pana' miak nganau' do' kuan tetek ruma'ku. Idi teh maré kuanku aceh tanu'.

¹³Do' ngulun taman-tinanku, idi kinanak-kinanakku, idi amung uang tetek ruma'deh! Aleg nima' nekai pitayen!”

¹⁴Idi kebala didueh neneh, "Kai temina' maté kuanmu! Kudeng iko na mada' lawé kai dueh ini, kali' rungen kai maya' jani' kai kareb Tuhan maré bawang ini kuan kai.”

¹⁵Idi ieh nengurur nedidueh ku kalat rat bang gisumen ruma'neh, ngaceku ruma' Rahab bang libung ar bawang.

¹⁶Idi kebalaneh nedidueh, "Nalan medueh amé' nan pegkung, pelé medueh na mepapu' nelun luk ngerada' nemedueh. Idi do' sigapung déi' teluh aco kinioneh, pad lun luk iné' ngerada' ineh lemubed. Pangeh ineh miak medueh maya' dalam medueh pun di."

¹⁷Kebala didueh ni Rahab, "Kai miak maya' jani' kai luk icukmu di.

¹⁸Ninger do'-do'! Kareb kai samuet bang bawangmu, do' iko ngabet nuper ini luk mesia' nan gisumen luk dalam kai dueh inururmu ineh. Idi do' iko ngamung taman-tinanmu, kinanak-kinanakmu, idi amung lun bang tetek ruma'mu bang ruma' ini.

¹⁹Kudeng idé-idé remuat rat bang ruma'mu idi pitayen, kali' rungen ieh kuan sala', idi kai na mesala'. Iamo kudeng idé luk bang ruma'mu murat, kai mesala'.

²⁰Iamo' kudeng iko ngegala' lawé kai dueh ini idi na kai dueh miak maya' jani' kai."

²¹Kebala decur ineh, "Matu bala medueh ini. Do' kudeng ineh." Idi ieh nenima' nedidueh nalan, idi nuper luk mesia' ineh pana' inabetneh nan gisumenneh.

²²Idi didueh nenalan macing nan pegkung idi sigapung déi' teluh aco kinioneh. Idi lun luk icuk raca' ngerada' ineh nenakap nedidueh ineh bang anid dalam idi nateh luk kali'deh. Idi ideh nelemubed iné' Yeriko.

²³Idi didueh nelemubed ratnan pegkung ineh idi neguta Abpa' Yarden, idi nacing ni Yusak. Idi didueh nemada' amung luk pangeh nangun.

²⁴Kebala didueh ni Yusak, "Kali' rungen Tuhan pangeh nemaré amung tana' ini bang palad tau. Ngaceku niat amung lun bang bawang ineh megagau, ngaceku matot netau."

Yusak 3

¹Idi pekak uka-uka Yusak netemui, idi nenalan rat Sitim dengan amung lun Israil, idi nacing déi' Abpa' Yarden. Idi ideh nelupo ieneh kareb nateh ideh neguta.

²Pangeh teluh aco idi lun rayeh pupu ineh lawé-lawé su luk inandeh nelupo,

³idi nemada' nelun mula' ineh, kebaladeh, "Kareb muyuh nier Pati' Pejani' Tuhan Allah muyuh idi amung imam lun Liwi mirir ineh, do' muyuh nalan rat su inan muyuh idi pebaya' Pati' ineh,

⁴pad muyuh miak kali' dalan luk miak bén muyuh, ngaceku muyuh na maya' dalan ini atun. Aleg muyuh muneng ku Pati' ineh, iamo' nima' setangal batu arang muyuh rat ku Pati' ineh.”

⁵Kebala Yusak nelun mula' ineh, "Ngeligan burur muyuh, ngaceku pekak nebpa Tuhan pian nganau' kekamen luk rayeh arang muyuh.”

⁶Idi kebala Yusak nelun imam, "Kedingen muyuh Pati' Pejani' ineh, idi nalan pa atun lun mula'." Idi ideh nenganau' maya' kudeng luk bilaneh.

⁷Idi kebala Tuhan ni Yusak, "Aco sini Ui pian ngimun ngerayeh namu pa kiung amung lun Israil, pelé ideh kali', mepad kudeng Ui nengedengan ni Musa atun, kudeng ineh teh Ui ngedengan namu.

⁸Idi do' iko ngecuk nelun imam luk mirir Pati' Pejani' ineh, kebalamu, 'Kareb muyuh macing Abpa' Yarden, do' muyuh tuper bang Abpa' Yarden ineh muneng ku tangeb.' “

⁹Idi kebala Yusak nelun Israil, "Amé' amung muyuh ninger bala Tuhan, Allah muyuh.

¹⁰Aco sini muyuh miak kali' Allah mulun arang muyuh. Idi Ieh miak ngusu amung lun Kanaani, lun Hiti, lun Hiwi, lun Prisi, lun Girgasi, lun Amori, idi lun Yebusi rat pa kiung muyuh.

¹¹Pati' Pejani' Tuhan luk kuan amung tana' ini miak guta Abpa' Yarden pa atun muyuh.

¹²Do' muyuh mili' pulu' dueh burur, seburur ratnan anid inul lun Israil.

¹³Idi kareb lengayen kukud amung imam luk mirir Pati' Pejani' Allah Tuhan luk kuan amung tana' ini ucu' bang Abpa' Yarden, idi abpa' Yarden ined mepatad, idi abpa' luk manud rat pa dayeh ineh miak ugka' mangun ku aceh leleng.”

¹⁴Idi kareb ngeranih, amung tangeb Abpa' Yarden mereb. Idi lun mula' ineh nengusag lepo-lepodeh pian guta Abpa' Yarden. Idi imam-imam nemirir Pati' Pejani' pa atun lun mula' ineh.

¹⁵Kareb ideh macing tangeb abpa' ineh, idi kukuddeh pun rureb bang abpa' ineh,

¹⁶Idi abpa' luk manud rat pa dayeh mepamung mado suet bawang Adam luk pa Saretan, idi abpa' luk manud luk amé' luun patar, ieh ineh Abpa' luk Mepaci' itad pad nacing melena' tu-tu. Idi lun mula' ineh guta tutup Yeriko.

¹⁷Idi amung imam luk mirir Pati' Pejani' Tuhan ineh tuped su luk nekeket uned Abpa' Yarden, laba' amung lun Israil guta maya' su luk tekering ineh, pad amung lun mula' ineh nabud neguta.

Yusak 4

¹Idi kareb lun mula' ineh pangeh neguta Abpa' Yarden, idi kebala Tuhan ni Yusak,

²"Mili' pulu' dueh burur, seburur ratnan anid inul lun Israil,

³Idi ngecuk nedeh, kebalamu, 'Ngalap muyuh rat uned Abpa' Yarden, su luk ridu' amung imam ineh, pulu' dueh batu, iten muyuh amé' déi' dipar, idi ngerareng ineh su luk inan muyuh lupu malem ini.' “

⁴Idi Yusak nenawar pulu' dueh burur luk pinili'neh ineh.

⁵Kebalaneh nedeh, "Nalan muyuh pa atun Pati' Pejani' Tuhan Allah muyuh suet uned Abpa' Yarden. Idi do' anid-anid burur muyuh maan sebuleng batu maya' kinula' amung inul lun Israil.

⁶Idi batu ineh mangun ku aceh terawé arang muyuh, kareb anak muyuh ngitun, kebaladeh, 'Anunké ilung amung batu ini kuan muyuh?’

⁷do' muyuh mada' nedeh ratnan kudeng apeh Abpa' Yarden ineh pangeh nepatad pa atun Pati' Pejani' Tuhan kareb Pati' ineh nepegata Abpa' Yarden idi abpa' ineh nepatad, idi batu-batu ini mangun ku aceh terawé ratnan dalam ineh kuan amung lun Israil macing idan-idan pana'."

⁸Idi lun Israil nenganau' maya' kudeng luk bida' Yusak nedeh, idi ideh nenguit pulu' dueh batu rat uned Abpa' Yarden maya' kudeng bala Tuhan ni Yusak, sebuleng kuan anid inul lun Israil. Idi inuitdeh iné' su luk inandeh nelupo. Idi ideh nenaped ineh su ineh.

⁹Idi Yusak nenaped pulu' dueh batu luk baken teh uned Abpa' Yarden, ieh ineh su luk ridu' amung imam luk mirir Pati' Pejani' ineh, idi batu ineh idi teh su ineh macing aco sini.

¹⁰Idi amung imam ineh tuper uned Abpa' Yarden pad pangeh mangun amung-amung luk pangeh icuk Tuhan ni Yusak badén kuan lun mula' ineh, maya' kudeng amung luk inan Musa neperiteteng ni Yusak. Idi lun mula' ineh pana' neguta saget-saget.

¹¹Kareb lun mula' ineh pangeh neguta, idi Pati' Pejani' pana' idi amung imam nenalan pa atun lun mula' ineh.

¹²Idi inul Rubin, inul Gad, idi sebuang inul Manasé nenalan pa atun amung lun Israil. Idi ideh temina' pebunu' maya' kudeng luk bida' Musa nedeh.

¹³Idi 40,000 lun luk temina' pebunu' neguta abpa' pa kiung Tuhan amé' nan patar muneng ku Yeriko.

¹⁴Idi kareb aco sineh teh Tuhan nengerayeh ni Yusak pa kiung amung lun Israil. Idi ideh matot neneh, mepad kudeng ideh matot ni Musa atun.

¹⁵Idi kebala Tuhan ni Yusak,

¹⁶"Ngecuk amung imam luk mirir Pati' Pejani' ineh umak rat bang Abpa' Yarden."

¹⁷Idi Yusak nenganau' kudeng ineh.

¹⁸Idi kareb amung imam ineh numak rat bang Abpa' Yarden, idi kareb kukud amung imam pun nengeradu' tana' luun, idi Abpa' Yarden ineh nepetuneb idi manud mepad kudeng atun ngereb amung tangebneh.

¹⁹Idi kareb lun mula' inul numak rat bang Abpa' Yarden, ieh ineh pulu' aco bulan apat, ieh ineh bulan luk pun, idi ideh nemudut lepodeh déi' Gilgal, ieh ineh lakan Yeriko pa busat aco.

²⁰Idi pulu' dueh batu luk inuit rat bang Abpa' Yarden ineh typed Yusak déi' Gilgal.

²¹Idi kebalaneh nelun Israil, "Kareb anak muyuh ngitun tamandeh mucu aco, 'Anunké ilungneh amung batu ini?'

²²do' muyuh mada' nedeh ratnan kudeng akeh lun Israil pangeh neguta Abpa' Yarden nenalan maya' luun.

²³Tuhan Allah muyuh pangeh nengeket Abpa' Yarden ini pa atun muyuh, pad muyuh pangeh neguta, mepad kudeng luk inau' Tuhan Allah muyuh atun déi' Abpa' Pisui, luk kiketNeh pa atun kai, pad kai pangeh neguta ineh;

²⁴pelé amung pupu aput tana' miak kali' lalud Tuhan, idi pad muyuh pana' matot inan Tuhan, Allah muyuh macing raked-raked."

Yusak 5

¹Amung raca' lun Amori luk pa acep aco déi' Abpa' Yarden, idi amung raca' lun Kanaan luk tangeb Abpa' Rayeh nekali' bala Tuhan pangeh nengeket Abpa' Yarden pa kiung amung lun Israil, pad lun Israil neguta. Idi ideh matot idi na mekuu' ngaceku lun Israil.

²Idi kebala Tuhan ni Yusak, "Nganau' tuda'-tuda' iyu ratnan batu luk metueh idi nunat nelun Israil sekedueh kua'."

³Idi Yusak nenganau' iyu ineh, idi ieh nenunat nedeh déi' luun Surud Nunat.

⁴Ieh nenganau' kudeng ineh, ngaceku amung deléi luk mileh pebunu' kareb ideh nenalan rat bawang Masir pangeh naté déi' su luk ali-ali bang lawédeh.

- ⁵Sagan pana' amung deléi luk nenalan rat Masir pangeh sinunat, amung deléi luk tinganak déi' su luk ali-ali nateh sinunat.
- ⁶Ngaceku apat ngepulu' lak kinioneh, amung lun Israil nalan déi' su luk ali-ali, pad lun luk pebunu' luk nenalan rat Masir nabud naté ngaceku ideh na sikal ninger bala Tuhan. Idi Tuhan nemada' nedeh, ratnan kudeng apeh ideh na miak nier tana' luk mebaleng luk pangeh pijani' Tuhan kuan tepundeh.
- ⁷Iamo' anakdeh luk nengelibal nedeh nateh sinunat déi' su luk ali-ali. Idi inul luk mebaruh ini luk sinunat Yusak.
- ⁸Kareb ideh pangeh sinunat, idi amung lun Israil mudeng su luk inan nelupo pad amungdeh do'.
- ⁹Idi kebala Tuhan ni Yusak, 'Idi aco sini teh Ui nala' rat nemuyuh igu' ngaceku muyuh titen lun Masir 'demulun'." Idi ngaceku ineh su ineh pana' tetanen Gilgal macing aco sini.
- ¹⁰Idi kareb lun Israil nelupo déi' Gilgal, idi ideh nenganau' Irau Paska bang pulu' apat aco bulan ineh kareb aco malem déi' patar muneng ku Yeriko.
- ¹¹Idi kenebpa, ideh nekuman uli' ratnan tana' Kanaan, idi ruti luk na linamud, idi dalé luk iseb.
- ¹²Muci ratnan ineh, manna kuan lun Israil na luk idi peh. Iamo' ideh nekuman uli' ratnan tana' Kanaan bang lak ineh peh.
- ¹³Idi kareb Yusak muneng ku Yeriko, idi ieh nenier aceh Burur luk ngimet aceh pelapet pa atunNeh. Idi Yusak iné' matun Neneh, kebalaneh, "Iko lun dengan kaiké, kian lun munu' lek?"
- ¹⁴Idi kebalaNeh, "Baken; iamo' Ui ini Lun Rayeh Baweh Tuhan. Idi nekini Ui pangeh nacing." Idi Yusak pana' netekeradung idi sembayang Neneh, kesembayangneh, "Anunké bala Tuhan kuan lun dukenNeh?"
- ¹⁵Idi kebala Lun Rayeh Baweh Tuhan ni Yusak, "Neka kasut ratnan kukudmu. Ngaceku su luk inanmu tuped ineh meligan." Idi Yusak nenganau' kudeng ineh.

Yusak 6

¹Idi tanga' bawang Yeriko pangeh pilin pa atun lun Israil. Seburur pana' na miak semuet idi remuat.

²Idi kebala Tuhan ni Yusak, "Kali' rungen Ui maré bawang Yeriko ini perapu ku raca'neh idi amung lun luk mesangit kuanmu.

³Idi do' iko nalan ngelibut bawang ineh dengan amung lun pebunu', ieh ineh sekua' bang seaco. Do' iko nganau' kudeng ineh bang anem aco kinioneh.

⁴Idi do' tudu' burur lun imam ngiup tudu' serupit ratnan unga dumba deléi, idi ualan pa atun Pati' Pejani'. Idi kareb aco luk ketudu' do'muyuh nalan tudu' kua' ngelibut bawang ineh, kareb lun imam ngiup serupitdeh.

⁵Idi mucu miak mangun, kareb serupit ineh muni peranga', idi kareb muyuh ninger uni serupit ineh, do' amung-amung muyuh ineh ngitang, pad libung bawang ineh miak metabpa. Idi anid-anid burur muyuh miak umak su tuludeh.”

⁶Idi Yusak nenawar amung imam, kebalaneh nedeh, "Kedingen muyuh Pati' Pejani' ineh. Idi do' tudu' burur imam ngiup tudu' serupit luk ratnan unga dumba deléi, idi nalan pa atun Pati' Pejani' Tuhan.”

⁷Idi kebalaneh nelun mula' ineh, "Do' muyuh nalan ngelibut bawang. Idi do' lun pebunu' nalan pa atun Pati' Pejani' Tuhan.”

⁸Idi maya' kudeng luk icuk Yusak, tudu' lun imam luk ngiup serupit luk ratnan unga dumba deléi nenalan pa atun Pati' Pejani' Tuhan.

⁹Idi lun pebunu' nenalan pa atun imam luk ngiup serupitdeh. Idi lun pebunu' luk baken luk matar, maya' puetdeh kareb lun nengiup serupit ineh.

¹⁰Idi Yusak nemebpeng nelun mula' na ngitang idi na meria', pad macing ieh ngecuk.

¹¹Idi ieh nengecuk nelun imam nguit Pati' Pejani' Tuhan ngelibut bawang sekua' mo'. Idi ideh nelemubed iné' su luk inandeh nelupo idi nerudap ieneh.

- ¹²Idi pekak uka-uka Yusak nekulat, idi amung imam nengalap Pati' Pejani' Tuhan ineh.
- ¹³Idi tudu' burur imam luk ngiup tudu' serupit luk ratnan unga dumba deléi ineh nenalan atun. Idi lun pebunu'nenalan pa atundeh, idi lun pebunu' luk baken luk matar, maya' puetdeh. Idi ideh nengiup serupitdeh kidi-kidi.
- ¹⁴Idi kudeng ineh teh ideh nenalan ngelibut bawang ineh sekua' mo' bang aco luk kedueh. Idi ideh nelemubed iné' su luk inandeh nelupo. Idi kudeng ineh luk inau'deh bang anem aco kinioneh.
- ¹⁵Idi kareb aco luk ketudu' idi ideh nekulat kareb aco masat. Idi ideh nenalan libut bawang ineh tudu' kua' dengan lawé luk mepad. Iamo' kareb aco ini mo' ideh nenalan ngelibut bawang ineh tudu' kua'.
- ¹⁶Idi luk ketudu' kua', amung imam nengiup serupitdeh. Idi Yusak nepebala nelun mula', "Ngitang muyuh, ngaceku bawang ineh barén Tuhan nemuyuh.
- ¹⁷Idi bawang ineh uen ngusag ngaceku Tuhan, do' bawangdeh idi amung luk bang ineh. Iamo' do' Rahab, decur luk mesawa' ineh dengan lun luk bang tetek ruma'neh uen ngulun. Ngaceku ieh nengapung lun luk iné' nier luk pangeh icuk tau.
- ¹⁸Iamo' do' muyuh nginita burur muyuh ratnan binaweh luk uen ngusag ineh, pad na kediman macing nemuyuh ngaceku ngalap aceh binaweh luk miak sagen, pad muyuh na ngacing susa' idi dereh kuan baweh lun Israil.
- ¹⁹Idi amung amas, pirak, idi amung binaweh ratnan tekaling idi belawan, ineh miak meligan kuan Tuhan. Do' ieh ineh uen nuet arang binaweh Tuhan.”
- ²⁰Idi imam-imam nengiup serupit, Kareb lun mula' ineh nekali' uni serupit, idi amungdeh nengitang. Idi libung bawang ineh netabpa. Idi lun mula' nengalap bawang ineh, anid-anid nemaya' su tuludeh. Idi ideh nengaro bawang ineh.
- ²¹Idi ideh nengaté amung-amung luk bang bawang ineh, do' deléi idi decur, do' anak baruh idi lun merar, amung sapi, dumba, idi keladai pana'.

²²Kebala Yusak nedidueh luk iné nier bawang ineh, "Amé' medueh déi' ruma decur luk mesawa' ineh, idi nguit decur ineh rat déi', idi amung lun luk bang tetek ruma'neh, maya' kudeng jani' medueh neneh atun."

²³Idi didueh nenguit Rahab neremuat dengan taman-tinaneh, kinanak-kinanakneh, idi amung-amung luk ieh kuan. Amungdeh ineh inuit didueh remuat, idi ideh nenganau' lepodeh setau'.

²⁴Idi ideh nengesepe bawang ineh dengan amung uangneh. Iamo' amas, pirak, idi amung binaweh tekaling idi belawan biré ku binaweh bang Ruma' Tuhan.

²⁵Iamo' Yusak nengulun Rahab decur luk mesawa' ineh, idi amung lun bang tetek ruma'neh, idi amung-amung luk ieh kuan. Idi ideh tudo arang uned lun Israil macing aco sini, ngaceku ieh nengapung dueh lun luk pangeh icuk Yusak iné' nier bawang yeriko.

²⁶Idi bang kareb ineh teh idi Yusak nepebulung, kebulungneh, "Kediman pa kiung Tuhan, idé luk amé' naped bawang Yeriko ini! Idé-idé luk ngimun mudut bawang ini, anak deléineh luk atun kali' rungen maté. Idi idé-idé luk mudut tanga'neh, anak deléineh luk isuut kali' rungen maté."

²⁷Idi Tuhan idi dengan Yusak. Idi ngadanneh nebala bang aput-aput bawang.

Yusak 7

¹Israil nengelaba bala Tuhan ratnan na ngalap binaweh luk uen ngusag. Ngaceku Akan Karmi, luk mupun Sabdi, ratnan inul Sera, ratnan pupu Yahuda ineh nengalap binaweh luk bibpeng na miak lapen. Idi ngaceku ineh Tuhan mebura' useh kuan amung lun Israil.

²Idi Yusak nengecuk lun rat Yeriko amé' déi' Ai, luk muneng ku Bait Awen pa busat aco Baitel, pelé ideh nier bawang ineh. Idi ideh iné' nier bawang Ai.

³Kareb ideh nelemubed iné' ni Yusak, kebaladeh, "Aleg mula' tu amé' déi'. Iamo' do' ngecuk dueh kian teluh ngeribu burur amé' ngaro bawang Ai. Aleg ngecuk nedeh amé' amung, ngaceku ideh masi' burur."

⁴Idi 3,000 burur lun Israil iné' déi'. Iamo' ideh pinasut lun Ai pad ideh lemubed.

⁵Idi lun bang bawang Ai nengaté 36 burur rat arangdeh. Idi ideh nengerada' nedeh rat tanga' bawangdeh macing su luk inan ngalap batu. Idi ideh nengaté nedeh kareb ideh musul irang. Idi lun Israil megegker niat, pad ideh matot.

⁶Idi Yusak narak-narak ayungneh ngaceku ieh mesusa' niat, idi netekunal pa atun Pati' Pejani' Tuhan macing aco malem, dengan amung lun rayeh Israil, idi ideh nemubpur uluhdeh ku abuh.

⁷Idi kesembayang Yusak, "O Tuhan Allah, kudeng apeh Iko ngecuk lun mula' ini guta Abpa' Yarden, pad kai biré bang palad lun Amoriké, pad kai uen ngederehké? Adui, do' teh kai neketecan déi' dipar Abpa' Yarden!"

⁸O Tuhan, anunké luk miak balénku, ngaceku lun Israil lumuut rat pa kiungdeh?

⁹Idi lun Kanaani idi amung lun bang bawang ini miak kali' ratnan ini, idi ideh miak ngelibut nekai idi ngaté nekai! Idi anunké miak ruenMu ratnan ngadanMu luk rayeh ineh?"

¹⁰Idi kebala Tuhan ni Yusak, "Mudur iko, anun ulekneh iko tekunal kudeng ini?"

¹¹Lun Israil pangeh nenganau' sala'. Idi teh pejani'Ku luk bida'Ku nedeh, ineh pangeh linabadeh. Idi ideh nengalap binaweh luk bibpeng na lapen, idi pinodeh. Idi ideh pana' mebalih. Idi ideh nenganau' binaweh ineh puar dengan binaweh bang lepodeh.

¹²Ngaceku ineh lun Israil na miak tuman pa kiung bunu'deh. Idi ideh lumuut rat nedeh, ngaceku ideh pana' mangun ku babpat luk uen ngusag. Kudeng na muyuh nala' luk bibpeng na lapen ineh rat arang muyuh, Ui na miak ngedengan nemuyuh.

¹³Mudur iko! Ngeligan pupu ini, pad ideh temina' papu' Negku. Ngecuk nedeh temina' papu' Negku nebpa. Ngaceku Ui ini Allah lun Israil pebala, 'Inan aceh luk bibpeng na lapen arang muyuh, O Israil. Idi na muyuh miak tuman tuped

pa kiung bunu' muyuh kudeng muyuh na nala' luk bibpeng na lapen ineh rat arang muyuh!'

¹⁴Idi pekak nebpa muyuh miak iten amé' muneng maya' inul muyuh. Idi do' inul luk tidulen Tuhan amé' muneng dengan uang ruma'deh. Idi ruma' luk tinicul Tuhan, do' amungdeh luk deléi' amé' muneng tesebuleng-sebuleng.

¹⁵Idi lun luk tinicul luk nengalap luk uen ngusag ineh, do' ieh sabpen dengan amung-amung luk ieh kuan. Ngaceku ieh nengelaba pejani' Tuhan, idi nenganau' luk ku gateh arang lun Israil."

¹⁶Idi pekak uka-uka Yusak netumui, idi ieh nengecuk nelun Israil amé' muneng dengan inuldeh. Idi inul Yahuda luk tinicul.

¹⁷Idi Yusak nengecuk pupu Yahuda amé' muneng, idi pupu Sera luk tinicul. Idi ieh nengecuk pupu Sera ineh amé' muneng dengan uang ruma'neh. Idi pupu Sabdi luk tinicul.

¹⁸Idi ieh nengecuk uang ruma' Sabdi amé' muneng tesebuleng-sebuleng lun deléi. Idi Akan Karmi, luk mupun Sabdi luk tinicul.

¹⁹Idi kebala Yusak ni Akan, "O anakku, ngerayeh Tuhan Allah lun Israil, do' iko ngamo sala'mu Neneh, idi maré kali' negku anun luk pangeh inau'mu ineh. Aleg iko ngapung ineh negku."

²⁰Idi kebala Akan, "Matu ui pangeh nenganau' sala' inan Tuhan Allah lun Israil. Idi kudeng ineh kudeng ini kekamenku.

²¹Ngaceku ui nenier bang binaweh luk inaro ineh seputut kibung rat bawang Babil luk do' ayu, idi anem kati pirak, idi dueh kati amas. Idi ui melili ku ineh. Idi ui nengalap ineh idi nengapung ineh bang tana' uned lepoku. Idi pirak ineh pana' idi teh pa liang ineh."

²²Idi Yusak nengecuk nelun amé' nan lepo ineh. Idi matu binaweh ineh inapungneh bang leponeh. Idi amung pirak ineh idi pa liangneh.

²³Idi ideh nengalap ineh rat bang leponeh idi inuitdeh iné' matun Yusak idi amung lun Israil, idi rirengdeh pa kiung Tuhan.

²⁴Idi Yusak idi amung lun Israil nengalap ni Akan, idi amung pirak, idi kibung luk do' ayu, idi amas, dengan amung anak deléi idi anak decur, amung sapi'deh, keladaideh, dombadeh, lepodeh, idi amung-amung luk ideh kuan. Idi amung ineh inuitdeh amé' Ruan Susa'.

²⁵Idi kebala Yusak, "Ngudehké iko ngacing dat kuan kai? Idi Tuhan ngedereh namu aco sini." Idi amung lun Israil nemitung ni Akan ku batu, idi nengeseb amung uang tetek ruma'neh, kareb ideh pangeh nemitung nedeh ku batu.

²⁶Idi ideh nenaped pa luundeh aceh perupun batu luk rayeh luk idi macing aco sini. Idi ngaceku ineh ideh neten su ineh Ruan Susa' macing aco sini. Idi Tuhan nugka' ratnan usehNeh.

Yusak 8

¹Kebala Tuhan ni Yusak, "Aleg iko matot, idi aleg megegker, lapenmu amung lun pebunu' idi nalan amé' bawang Ai. Ui maré raca' Ai idi amung anak itinneh, bawangneh, idi tana'neh kuanmu.

²Do' iko nganau' kuan bawang Ai idi kuan raca'neh mepad kudeng luk inau'mu kuan bawang Yeriko idi kuan raca'neh. Iamo' binaweh luk inaro idi amung aya'deh pana' miak iko ngaro kuan burur muyuh. Do' iko ngecuk tuda'-tuda' lun temina' ngabang pa keted bawang ineh."

³Idi Yusak netemina' amé' Ai dengan amung lun pebunu'. Idi Yusak nemili' 30,000 lun luk mesangit, luk icukneh kareb medacem.

⁴Idi ieh nemada' lawédeh, kebalaneh, "Do' muyuh ngabang bawang ineh rat pa keted. Aleg muyuh pelaba ado rat ku bawang ineh. Do' amung muyuh temina' kidi-kidi.

⁵Idi ui dengan amung lun luk maya' negku amé' ngerieng bawang ineh. Idi kareb ideh remuat amé' matun nekai, kai buro rat pa kiungdeh mepad kudeng luk atun.

⁶Idi ideh miak ngerada' nekai, pad kai pangeh ngatad nedeh ratnan bawangdeh. Ngaceku ideh ngerawé nekai buro rat pa kiungdeh mepad kudeng luk atun.

⁷Pangeh ineh do' muyuh remuat ratnan abang muyuh, idi semuet ngaro bawang ineh. Ngaceku Tuhan Allah muyuh miak maré bawang ineh kuan muyuh.

⁸Idi kareb muyuh pangeh nengalap bawang ineh, do' muyuh nutung ineh maya' kudeng luk bila Tuhan.”

⁹Idi Yusak nengecuk nedeh. Idi ideh iné' su luk inandeh ngabang. Idi ideh netudo arang Baitel dengan Ai pa acep aco bawang Ai. Iamo' Yusak netudo malem ineh su luk inan lun mula' nelupo.

¹⁰Idi pekak uka-uka Yusak nekulat. Idi ieh nengamung amung baweh, idi Yusak idi amung lun rayeh Israil nenguyut nedeh iné' bawang Ai.

¹¹Idi amung lun pebunu' luk denganneh ineh nenalan. Idi ideh iné' muneng ku bawang idi petutup nedeh. Idi ideh nugka' pa tinueh busat aco bawang Ai, pad inan aceh alung arangdeh dengan Ai.

¹²Idi teh ieh nengalap 5,000 lemulun idi nengecuk nedeh ngabang arang Baitel dengan Ai, pa acep aco bawang ineh.

¹³Kudeng ineh lawéneh ngatur lun pebunu', pad amung baweh ineh iné' pa tinueh busat aco bawang ineh, idi luk ngabang pa acep aco bawang ineh. Idi bang alem sineh idi Yusak nenalan suet ku alung ineh.

¹⁴Kareb raca' Ai nekali' nedeh, dengan tapapeh-tepapeh ideh temina', idi ieh neremuat dengan anak itinneh iné' munu' nelun Israil, su luk pangeh litepneh petutup ku Raked Yarden. Ngaceku na ieh kali' lun Israil ngabang pa keted bawang.

¹⁵Yusak idi amung lun Israil pana' ayu-ayu melaya' pa kiungdeh. Idi ideh nupun maya' dalam iné' su luk ali-ali.

¹⁶Idi kareb ineh raca' nenawar amung lun Ai amé' ngerada' nedeh ineh. Idi ideh nengerada' ni Yusak pad ideh nepetatang ratnan bawangdeh.

¹⁷Seburur pana' nateh neketecan bang bawang Ai idi bang bawang Baitel, luk na nengerada' nelun Israil. Idi bawangdeh ticandeh laba' ideh ngerada' nelun Israil.

¹⁸Idi kebala Tuhan ni Yusak, "Ngegenang gaman luk bang paladmu ineh pa bawang Ai. Ngaceku Ui maré bawang ineh kuanmu." Idi Yusak nengegenang gaman luk bang paladne ineh pa bawang Ai.

¹⁹Idi kareb ieh pangeh nengegenang gaman ineh dengan saget-saget, idi lun luk ngabang ineh nudur rat su inandeh idi nupun iné' bang bawang ineh idi nengaro idi nenutung bawang ineh dengan saget-saget.

²⁰Kareb amung lun Ai ineh nelumi nier pa puet, idi ideh nenier rabpun bawang ineh. Idi na luk idi dalandeh buro. Ngaceku lun mula' luk pangeh nupun iné' su luk ali-ali ineh nelemubed iné' ngaté nedeh.

²¹Kareb Yusak idi lun denganneh nenier idi amung lun Israil luk ngabang ineh pangeh nesemuet bang bawang, idi teh ideh nenier rabpun bawang ineh, idi ideh nelemubed idi nengaté nelun bang bawang Ai.

²²Idi lun luk pangeh nesemuet bang bawang ineh pana' iné' matun nedeh, pad amung lun bang bawang Ai ineh arang uned lun Israil. Inan luk bal pa déi'. Inan luk pa tungé'. Idi lun Israil nengaté lun bang bawang Ai ineh, pad seburur pana' na luk miak buro idi mepuit.

²³Idi ideh nengakem raca' Ai ineh, idi ideh nenguit neneh amé' matun ni Yusak.

²⁴Idi lun Israil nengaté amung lun bang bawang Ai luk mado déi' su luk ali-ali su luk inandeh nengerada' nedeh ineh. Idi amung lun Israil nelemubed iné' bawang Ai, idi nengaté lun bang bawang ineh.

²⁵Idi amung lun luk naté kareb aco ineh deléi idi decur,
12,000 burur, ieh ineh amung lun bang bawang Ai.

²⁶Idi Yusak pana' nateh nengererep gamanneh luk pangeh tigenangneh, pad amung lun bang bawang Ai pinatédeh.

²⁷Iamo' amung pung idi repapeh binaweh bawang ineh inaro lun Israil kuandeh, maya' kudeng luk bila Tuhan ni Yusak.

²⁸Idi Yusak nenutung bawang Ai ineh, idi nengisu' ineh ku aceh perupun batu macing raked-raked idi aceh tabpa macing aco sini.

²⁹Idi ieh nengekito raca' Ai ineh nan sepekatu kayuh macing kareb malem. Kareb aco macep Yusak nengecuk ngerurut butungneh ratnan kayuh ineh. Idi butung ineh pipetdeh pa atun tanga' bawang ineh. Idi ideh nenaped pa luunneh aceh perupun batu luk rayeh luk idi su ineh macing aco sini.

³⁰Idi Yusak nenganau' aceh bubpun kuan Tuhan Allah lun Israil luun Surud Ibal,

³¹maya' kudeng luk bida' Musa demulun Tuhan kuan lun Israil, petulu ku luk inayud bang Ukum Musa, ieh ineh aceh bubpun ratnan batu mekara, luk na inan nengerareng belawan. Idi pa luun bubpun ineh ieh nemaré baré luk sabpen kuan Tuhan, idi baréneh ineh luk nguit pedo'

³²Idi ieneh, pa kiung lun Israil Yusak nengayud luun batu aceh ukum luk inayud Musa.

³³Idi amung lun Israil, amung lun rayehdeh, amung lun luk ngimet ukum, idi lun luk mutut besara'deh, tuper pa kabing idi pa tinueh Pati' Pejani' Tuhan, pa kiung amung imam lun Liwi luk mirir Pati' Pejani' Tuhan ineh, do' lun sakai idi lun kuan bawang. Sebuangdeh petutup ku Surud Gerisim. Idi sebuangdeh petutup ku Surud Ibal, maya' kudeng luk bila Musa demulun Tuhan atun, pelé lun Israil uen ngeperuan.

³⁴Idi Yusak nemaca' amung bala Ukum peruan idi kediman petulu ku amung luk inayud bang surat Ukum ineh.

³⁵Ratnan amung bala Musa sebila' bala pana' nateh luk na bica' Yusak kuan amung tebubpun Israil, dengan amung decur, anak-anak, idi lun sakai luk tudo arangdeh ineh.

Yusak 9

¹Idi bala ini nekali' amung raca' luk tudo pa acep aco Abpa' Yarden, luun pegkung idi luun tana' raked, idi nan amung ducur Abpa' Rayeh suet pa Lebanon, ieh ineh lun Hiti, lun Amori, lun Kanaani, lun Prisi, lun Hiwi, idi lun Yebusi.

²Idi ideh nepamung, idi perurum pian munu' ni Yusak idi lun Israil.

³Kareb lun bawang Gibion kali' ratnan luk inau' Yusak déi' Yeriko idi bawang Ai,

⁴Idi ideh sikal naluk ni Yusak, idi ideh netemina' ku balu'. Idi ideh nengerareng tebpung luk mon-mon luun keladaideh idi seréi' kubil luk inan nganau' abpa' anggur luk rapuk-rapuk luk mesong idi binubpul,

⁵Idi kasut luk medarak luk pangeh binubpul luun kukuddeh. Idi ideh nengayung ku ayung luk medarak. Idi amung ruti balu'deh ineh temueh idi meluping.

⁶Idi ideh iné' papu' ni Yusak su luk inandeh nelupo déi' Gilgal. Kebaladeh neneh, idi nelun Israil teh, "Kai ini pangeh nacing rat bawang luk mado. Idi nekini do' muyuh nganau' jani' kuan kai."

⁷Idi kebala lun Israil, "Kian, muyuh tudo arang kai lek. Kudeng apeh kai nganau' jani' kuan muyuh?"

⁸Idi kebaladeh ni Yusak, "Amung kai ini lun dukenmu." Idi kebala Yusak nedeh, "Idéké muyuh ini? Idi rat iapehké muyuh?"

⁹Idi kebaladeh neneh, "Kai ini pangeh nacing rat bawang luk pelaba ado ngaceku kai pangeh neninger ratnan Tuhan Allah muyuh. Idi kai pangeh neninger bala ratnan amung luk pangeh inau'Neh bang bawang Masir,

¹⁰Idi amung luk inau'Neh kuan didueh raca' lun Amori luk tudo pa busat aco Abpa' Yarden, idi kuan Sihon, raca' Hesbon, idi Og, raca' Basan, luk déi' Astarot.

- ¹¹Kebala amung lun rayeh kai idi amung lun bang bawang kai nekai, 'Ngalap balu' muyuh idi nalan. Amé' matun nedeh idi mada' nedeh, "Amung kai ini lun dukenmu. Ngaceku ineh nganau' kuan kai aceh pejani'." ‘
- ¹²Idi ruti kai ini melau' kareb kai nenguit ineh rat ruma' kai, kareb kai nalan sikal amé' matun namu. Idi nekini siruh, ieh netemueh idi meluping peh.
- ¹³Idi seréi kubil luk pinuang kai ku abpa' anggur ini pana' mebaruh teh. Siruh, tuda' teh songdeh. Idi ayung kai ini, idi kasut kai ini nedarak ngaceku ratnan lawé luk pelaba ado.”
- ¹⁴Idi lun Israil nengalap sesuatu balu'deh, iamo' na ideh nengitun pinian Tuhan.
- ¹⁵Idi Yusak nepedo' nedeh. Idi ieh nepejani' ngulun nedeh. Kudeng ineh teh amung lun rayeh tebubpun ineh nepebulung nedeh.
- ¹⁶Idi teluh aco rat pangeh ideh nepejani' nedeh, idi lun Israil neninger bala idi ideh tudo muneng nedeh.
- ¹⁷Idi lun Israil nenalan, idi kareb aco luk keteluh ideh nacing bang bawangdeh, ieh ineh Gibion, Kepira, Bairut, idi Kiriati Yarim.
- ¹⁸Iamo' na ideh pinaté lun Israil, ngaceku lun rayehdeh pangeh nepejani' nedeh dengan bulung ku ngadan Tuhan Allah lun Israil. Idi amung lun Israil ineh dureng-dureng inan amung lun rayeh ineh.
- ¹⁹Iamo' kebala lun rayeh ineh, "Tau pangeh nepejani' ku bulung dengan ngadan Tuhan Allah lun Israil. Ngaceku ineh nekini na tau miak mekuel nedeh.
- ²⁰Idi do' tau ngulun nedeh pad Tuhan na ngukum netau, ngaceku tau pangeh nepejani' nedeh.”
- ²¹Nima' nedeh mulun, pad ideh ngapak kayuh idi ngereb abpa' kuan tau." Idi kudeng ineh bala lun rayeh kuandeh.
- ²²Idi Yusak nenawar nelun Gibion, kebalaneh, "Anun punneh muyuh nenaluk nekai, kebala muyuh, 'Kai nacing rat mado,' iamo' muyuh idi arang kai?

²³Ngaceku ineh muyuh kumin Allah. Idi rat pad sini sebuang muyuh megéi mangun ku lun duken ngapak kayuh idi ngereb abpa' kuan Ruma' Allahku.”

²⁴Idi kebala lun Gibion ineh ni Yusak, "O tuan, kai nenganau' kudeng ineh ngaceku kai nesibada' ratnan bala Tuhan Allah muyuh ni Musa, ratnan Ieh pian maré aput tana' ini nemuyuh, idi pian ngaté amung lun luk mudeng bang bawang ini pa kiung muyuh, pad kai pelaba tot pitayen muyuh.

²⁵Idi nekini amung kai ini bang imetmu. Do' iko nganau' kuan kai anun luk do' pa kiungmu.”

²⁶Idi Yusak nemuit nedeh ratnan useh Israil, pad ideh na ngaté nedeh.

²⁷Idi kareb aco sineh teh Yusak nenganau' nedeh mangun ku lun duken ngapak kayuh, idi ngereb abpa' kuan lun mula' ineh idi kuan bubpun Tuhan, su luk pinili' Tuhan macing aco sini pana'.

Yusak 10

¹Idi Adonisadak, raca' Yerusalim, nekali' idi bawang Ai pangeh inaro idi inusag Yusak, idi raca'neh pangeh pinaté, mepad kudeng luk inau' kuan Yeriko idi kuan raca'neh. Idi teh ieh nekali' amung lun Gibion pangeh nepedo' nelun Israil, idi ideh tudo arangdeh.

²Idi lun Yerusalim pelaba tot, ngaceku bawang Gibion ineh bawang luk rayeh ratnan Ai. Idi amung deléi pana' lun mesangit.

³Ngaceku ineh Adonisadak, raca' Yerusalim ineh, nengecuk Hoham, raca' Hebron, Piram, raca' Yarmut, Yapia, raca' Lakis, idi Debir, raca' Eglon,

⁴kebalaneh, "Amé' ngedengan negku pelé tau ngaro bawang Gibion, ngaceku pangeh ieh nepedo' ni Yusak idi amung lun Israil.”

⁵Ngaceku ineh limeh burur raca' Amori nepamung, ieh ineh raca' Yerusalim, raca' Hebron, raca' Yarmut, raca' Lakis, idi raca' Eglon dengan amung bawehdeh. Idi ideh nengelibut Gibion idi nemunu' nedeh.

⁶Iamo' lun Gibion ineh nemaré kali' ni Yusak déi' su luk inan nelupo déi' Gilgal, kebaladeh, "Aleg iko necan nekai. Do' iko saget ngedengan nekai, idi

ngulun nekai. Ngaceku amung raca' lun Amori luk tudo déi' luun surud ineh pangeh neperurum pian munu' nekai.”

⁷Idi Yusak nenalan dengan bawehneh rat Gilgal.

⁸Idi kebala Tuhan ni Yusak, "Aleg iko matot nedeh, ngaceku ideh pangeh biréKu namu. Idi seburur pana' nateh metueh rat namu.”

⁹Idi Yusak nenalan rat Gilgal kedangan-kedangan ineh iné' ngedenak nedeh.

¹⁰Idi Tuhan nengagau nedeh pa kiung amung lun Israil, pad mula' rat arangdeh pinaté déi' Gibion, idi ideh pirada' seruked dalam uké Bait Haran, idi lun Israil nengaté nedeh pad macing déi' Aseka idi déi' Makeda.

¹¹Kareb ideh upun matot nelun Israil, maya' dalam luk musul rat Bait Horon amé' Aseka, idi Tuhan nemaré udan batu, pad ideh naté. Idi lun luk naté neketukan udan batu ineh meluun ula' ratnan lun luk pinaté lun Israil ku pelapet.

¹²Idi Yusak nepebala inan Tuhan kareb aco Tuhan nemaré amung lun Amori ineh kuan lun Israil. Ieh nemada' pedingeren amung lun Israil, kebalaneh, "O mateh aco, ugka' iko pa luun bawang Gibion, Idi iko, O bulan, pa luun Ruan Aijalon.”

¹³Idi mateh aco pana' nugka' idi bulan pana' lutep, pad lun mula' ineh pangeh nengua' kuan bunu'deh. Bakenké dalam ini inayud bang Surat Yasar? Idi mateh aco pana' nugka' uned langit, idi ieh na macep ruked aco ineh.

¹⁴Idi na luk idi aco kudeng ineh atun idi mucu, kareb Tuhan nemaya' bala selemulun kudeng ineh, ngaceku Tuhan pebunu' libal lun Israil.

¹⁵Idi Yusak nelemubed dengan bawehneh ineh su luk inandeh nelupo déi' Gilgal.

¹⁶Idi limeh burur raca' ineh neburo idi sigapung bang lubang batu luk déi' Makeda.

¹⁷Idi lun nemaré kali' ni Yusak, ratnan ideh nesigapung.

¹⁸Idi kebala Yusak, "Ngelubid batu luk rayeh amé' bang lubang batu ineh. Idi ngecuk nelun ngabang munung ineh.

¹⁹Iamo' aleg muyuh nganér su ineh. Do' ngerada bunu' muyuh, idi ngerieng nedeh. Aleg maré nedeh semuet bang bawangdeh. Ngaceku Tuhan Allah muyuh pangeh nemaré nedeh kuan muyuh.

²⁰Yusak idi amung lun Israil nengaté nedeh, idi amung lemulun luk na pinaté ineh neburo idi nesemuet bang libung bawang.

²¹Idi baweh ineh nelemubed dengan do' iné' su luk inandeh nelupo matun ni Yusak déi' Makeda. Idi seburur pana' nateh mekuu' ngedat seburur pana' rat arang amung lun Israil.

²²Idi kebala Yusak, "Kabin muyuh kakeb lubang batu ineh idi ngeruat raca' luk limeh burur ineh rat bang lubang batu ineh, idi nguit nedeh amé' negku."

²³Idi ideh nenganau' kudeng ineh idi nenguit limeh burur raca' ineh rat bang lubang batu ineh, ieh ineh raca' Yerusalim, raca' Hebron, raca' Yarmut, raca' Lakis, idi raca' Eglon.

²⁴Kareb ideh pangeh nenguit raca'-raca' ineh remuat amé' ni Yusak, idi Yusak nenawar amung lun Israil tebubpun. Idi kebalaneh kuan amung lun rayeh lun pebunu' luk pangeh nenalan maya' neneh, "Amé' muyuh ngerareng kukud muyuh luun batang dier raca'-raca' ini." Idi ideh nenganau' kudeng ineh.

²⁵Idi kebala Yusak nedeh, "Aleg muyuh mator idi megegker. Do' muyuh metueh idi mekuu'. Ngaceku kudeng ineh ayu kekamen Tuhan mucu kuan amung bunu' muyuh."

²⁶Pangeh ineh Yusak nengaté raca' ineh idi nengekito nedeh luun limeh pekatu kayuh. Idi ideh tekito luun kayuh ineh macing malem aco.

²⁷Idi kareb aco macep Yusak nengecuk ngerurut nedeh ratnan kayuh ineh idi nala' nedeh bang lubang batu su luk inandeh nesigapung ineh. Idi ideh nengerareng tuda'-tuda' batu luk rayeh munung lubang batu ineh, idi macing aco sini pana', idi tieh su ineh.

²⁸Idi aco sineh teh Yusak nengaro bawang Makeda, idi ieh nengaté raca' idi lun luk bang bawang ineh. Idi seburur pana' nateh luk mulun. Idi ieh nenganau' kuan raca' Makeda ineh mepad kudeng luk inau'neh kuan raca' Yeriko.

²⁹Idi Yusak petacu nenalan rat Makeda iné' Libna. Idi amung lun Israil teh nemaya' neneh, idi ideh nengerieng nelun Libna.

³⁰Idi Tuhan nemaré bawang ineh dengan raca'neh kuan lun Israil. Idi ideh nengaté amung lun luk mudeng bang bawang ineh. Idi Yusak nenganau' kuan raca' Libna mepad kudeng tau'neh kuan raca' Yeriko.

³¹Pangeh ineh Yusak nenalan rat Libna iné' Lakis. Idi amung lun Israil teh nemaya' neneh, idi nengelibut bawang ineh, idi ideh nemunu' nedeh.

³²Idi Tuhan nemaré' Lakis teh kuan lun Israil. Idi Yusak nengelaya' nedeh bang aco luk kedueh. Ieh nemunu' nedeh idi nengaté amung lun luk mudeng bang bawang ineh, mepad kudeng amung luk pangéh inau'neh kuan Libna.

³³Idi kareb ineh nacing Horam, raca' Giser ineh, pian ngedengan lakis, Iamo' Yusak nengelaya' neneh idi anak itinneh, pad seburur pana' nateh luk mulun.

³⁴Idi Yusak dengan bawehneh nenalan rat lakis iné' Eglon. Idi ideh nengelibut bawang ineh idi nemunu' nedeh.

³⁵Idi ideh nengelaya' bawang ineh kareb aco sineh teh. Idi ideh nengaté amung lun luk tudo bang bawang ineh, mepad kudeng amung luk inau' Yusak déi' Lakis.

³⁶Idi Yusak dengan bawehneh nenalan rat Eglon iné' Hebron, idi ideh nemunu' nedeh.

³⁷Idi ideh nengaro bawang ineh idi nengaté raca'neh idi amung lun bang bawang ineh, idi amung luk muneng ku bawang ineh teh. Seburur pana' nateh luk mulun, mepad kudeng luk inau' Yusak kuan Eglon.

³⁸Idi Yusak dengan bawehneh nelemubed iné' Debir, idi ideh nengerieng nedeh.

³⁹Idi ideh nengaro bawang ineh idi nengaté raca'neh idi amung lun bang bawang ineh, idi luk muneng ku bawang ineh teh. Seburur pana' nateh luk mulun déi' Debir mepad kudeng luk pangeh inau' Yusak kuan Hebron idi Libna dengan raca'deh.

⁴⁰Idi Yusak nengaro amung bawang ineh, do' luk luun pegkung, idi luk déi' Negeb, idi luk luun raked, idi luk iang pegkung pana'. Idi ieh nengaté raca'deh dengan amung lun luk bang bawang-bawang ineh. Seburur pana' nateh luk mulun, mepad kudeng luk icuk Tuhan Allah lun Israil ineh.

⁴¹Idi Yusak nengaro amung bawang ineh rat Kadis Barnia macing déi' Gasa, idi teh maput bawang Gosen macing déi' Gibion.

⁴²Idi amung raca' idi amung bawang ineh teh linaya' Yusak bang lawé ineh mo, ngaceku Tuhan Allah lun Israil nepebunu' libal lun Israil.

⁴³Idi Yusak nelemubed dengan bawehneh iné' su luk inandeh nelupo déi' Gilgal.

Yusak 11

¹Idi bala ratnan lawé ineh nekali' Yabin, raca' Hasor. Idi ieh nengecuk amé' mada' Yubab, raca' Akasap,

²Idi raca'-raca' luk luun pegkung-pegkung luk pa tinueh busat aco, idi luk luun Raked Yarden luk pa kabing busat aco Takung Galilia, idi luk luun tana' patar, idi luk tangeb abpa' rayeh muneng ku Dor.

³Idi ieh nengecuk amé' mada' lun Kanaani luk pa busat aco, idi luk pa acep aco, idi lun Amori, lun Hiti, lun Prisi, lun Yebusi, idi lun luk luun pegkung, idi lun luk liang Pegkung Hermon bang bawang Mispa.

⁴Idi ideh iné' dengan amung bawehdeh, ieh ineh anak itindeh mepad kudeng kinula' bada luk tangeb abpa' rayeh. Idi ideh inan mula' kuda idi keréta teh.

⁵Idi amung anak itindeh ineh nepamung. Idi ideh nelupo tangeb Arur Merom, pian pebunu' nelun Israil.

⁶Idi kebala Tuhan ni Yusak, "Aleg iko matot nedeh, ngaceku pekak nebpa bang kareb luk kudeng ini Ui ngaté amungdeh ineh kuan lun Israil. Do' iko narad urat tumid amung kudadeh, idi ngeseb amung kerétadeh."

⁷Idi Yusak dengan amung lun luk pebunu' teh nacing déi' Arur Merom. Idi denak-denak ieh nemunu' nedeh ineh.

⁸Idi Tuhan nemaré nedeh bang palad lun Israil. Idi ideh nengelaya' idi nengerada' nedeh macing déi' Sidon, idi Misrepot Maim pa busat aco, idi déi' Mispa pana'. Idi ideh nepebunu' nedeh, pad seburur pana' nateh luk mulun.

⁹Idi Yusak nenganau' kuandeh ineh mepad kudeng luk icuk Tuhan. Idi ieh nenarad urat tumid amung kudadeh, idi nengeseb amung kerétadeh teh.

¹⁰Yusak nelemubed, idi ieh nengaro bawang Hasor idi nengaté raca'neh. Kareb ineh bawang Hasor ineh meluun rayeh ratnan amung imet raca' luk baken.

¹¹Idi ideh nengaté amung lun luk tudo bang bawang ineh, pad seburur pana' nateh luk mulun. Idi bawang ineh tinutungdeh teh.

¹²Idi amung bawang raca'-raca' ineh ilap Yusak. Idi amung raca'deh pana' tibanneh. Idi ieh nengaté nedeh maya' kudeng luk bila Musa demulun Tuhan ineh.

¹³Iamo' baken amung bawang luk luun surud ineh nabud iseb lun Israil. Iamo' Hasor mo' luk iseb Yusak.

¹⁴Idi amung binaweh bawang ineh idi amung aya'deh inaro lun Israil kuandeh. Iamo' amung lemulun ineh pinatédeh, pad seburur pana' nateh luk mulun.

¹⁵Idi maya' kudeng luk bila Tuhan ni Musa, demulunNeh, kudeng ineh teh luk inau' Yusak. Sebuleng pana' nateh luk linaba ratnan amung bala Tuhan luk ni Musa.

¹⁶Idi Yusak nengelaya' amung bawang ineh, ieh ineh pegkung-pegkung, maput Negeb, idi maput bawang Gosen, idi amung tana', raked, idi Raked Yarden, idi pegkung-pegkung Israil, idi amung tana'deh luk mebeneh,

¹⁷rat Pegkung Halak luk muneng ku Edom, macing déi' Baal Gad luun raked Lebanon luk pa kabing busat aco Pegkung Hermon. Idi ieh nengaté amung raca'deh.

¹⁸iamo' tuda'-tuda' io ieh nemunu' nedeh.

¹⁹Aceh bawang pana' nateh nepedo' nelun Israil, iamo' lun Hiwi mo' luk tudo déi' Gibion luk nepedo' nedeh, idi amung luk baken linaya' bang bunu' ineh.

²⁰Tuhan pangeh nengetueh niatdeh pad ideh nengerieng nelun Israil bang bunu', pad ideh sebuleng pinaté dengan na inan éi' kuandeh, ieh ineh maya' kudeng luk bila Tuhan ni Musa.

²¹Idi bang kareb ineh teh Yusak iné' ngaté nelun enak luk tudo nan pegkung déi' Hebron, Debir, Anab, idi amung pegkung Yahuda idi Israil. Yusak nengaté nedeh idi nengusag bawangdeh.

²²Seburur lun enak pana' nateh luk ketecan bang bawang lun Israil. Iamo' inan teh lun Enak ketecan déi' gasa, Gat, idi Asdod teh.

²³Idi amung bawang ineh linaya' Yusak, maya' kudeng luk icuk Tuhan ni Musa. Idi Yusak nemaré tana' ineh kuan lun Israil mangun ku babpatdeh maya' inul pupudeh. Idi ideh nugka pebunu' peh.

Yusak 12

¹Lun Israil nengalap tana' luk dipar Abpa' Yarden pa busat aco, rat Raked Arnon macing déi' Pegkung Hermon, idi amung raked luk pa busat aco. Idi ideh nengelaya' dueh burur raca':

²ieh ineh Sihon, raca' lun Amori, luk tudo déi' Hesbon, imetneh rat Arur luk tangeb Abpa' Arnon, idi macing tangal arur ineh idi arang Giliad macing Abpa' Yabuk, lakan tana' lun Amon, ieh ineh seupa tana' Giliad,

³pa busat aco Raked Yarden, rat Takung Galilia macing Bait Yesimot, ieh ineh pa busat aco Abpa' luk Mepaci', idi macing pa kabing busat aco, ieh ineh iang Pegkung Pisga.

⁴Idi ideh nengelaya' ni Og, raca' Basan, ratnan lun Repaim luk ketecan, luk tudo déi' Astarot idi déi' Edri.

⁵Idi imetneh macing déi' Pegkung Hermon, idi déi' Salka, idi amung bawang Basan, macing uned tana' lun Gesuri idi lun Makati, idi seupa Giliad macing tana' sihon, raca' Hesbon.

⁶Idi Musa idi lun Israil nengelaya' nedeh. Idi Musa demulun Tuhan nemaré bawangdeh kuan lun Rubin, lun Gad, idi sebuang pupu Manasé mangun ku babpatdeh.

⁷Yusak idi lun Israil nengelaya' amung raca' pa acep aco Abpa' Yarden, rat Baal Gad luk luun raked lebanon macing pegkung Halak, luk muneng ku Edom. Yusak nemaré ineh kuan amung inul lun Israil ku babpatdeh maya' inul pupudeh.

⁸Tana' luk bibpat Yusak, ieh ineh pegkung-pegkung, tana' raked, Raked Yarden, iang pegkung-pegkung, su luk ali-ali, idi Negeb. Tana' ini, ieh ineh bawang lun Hiti, lun Amori, lun Kanaani, lun Prisi, lun Hiwi, idi lun Yebusi.

⁹Amung raca' ini pangeh linaya' lun Israil: raca' Yeriko, raca' Ai luk muneng ku Baitel,

¹⁰raca' Yerusalim, raca' Hebron,

¹¹raca' Yarmut, raca' Lakis,

¹²raca' Eglon, raca' Giser,

¹³raca' Debir, raca' Geder,

¹⁴raca' Horma, raca' Arad,

¹⁵raca' Libna, raca' Adulam,

¹⁶raca' Makeda, raca' Baitel,

- ¹⁷raca' Tapua, raca' Heper,
¹⁸raca' Apek, raca' Lasaron,
¹⁹raca' Madon, raca' Hasor,
²⁰raca' Simron Meron, raca' Arkesap,
²¹raca' Tanak, raca' Megido,
²²raca' Kedes, raca' Yokniam déi' Karmel,
²³raca' Dor luk tangeb abpa' rayeh, raca' Goyim luk déi' Gilgal,
²⁴idi raca' Tirsá. Idi amung-amung raca' ineh teluh ngepulu' aceh burur.

Yusak 13

- ¹Idi Yusak pana' mengered peh. Idi kebala Tuhan neneh, "Iko pangeh mengered, idi mula' teh tana' ketecan luk miak lapen.
²Idi ini tana' luk ketecan: amung tana' lun Pilistin, idi amung tana' Gesuri
³(rat Asur Sikor, luk bal pa Masir macing lakan Ekron luk pa tinueh busat aco, amung ineh tirawé kuan lun Kanaani, idi raca' lun Pilistin tudo déi' Gasa, Asdod, Askelon, Gat, idi Ekron), idi teh bawang lun Awin,
⁴rat pa kabing busat aco, amung tana' ineh lun Kanaani kuan, kudeng ineh teh Mira luk babpat lun Sidon, macing déi' Apek idi macing lakan bawang lun Amori;
⁵idi teh tana' lun Gebali, idi amung Lebanon, pa busat aco, rat Baal Gad luk liang Pegkung Hermon macing iring bawang Hamat.
⁶Idi Ui miak ngusu amung lun luk tudo luun pegkung rat Lebanon, macing déi' Misrepot Maim, idi teh amung lun Sidoni ratnan babpatdeh pa kiung amung lun Israil. Iko miak mabpat babpat ineh maya' kudeng bala Tuhan namu.
⁷Idi nekini teh mabpat tana' ineh mangun ku babpat kuan iwa' pupu luk baken, idi sebuang inul Manasé."

- ⁸Sebuang inul Manasé dengan lun Rubin idi lun Gad pangeh nengalap babpatdeh luk biré Musa nedeh déi' dipar Abpa' Yarden pa busat aco, maya' kudeng luk pangeh litep Musa, demulun Tuhan kuandeh,
- ⁹ieh ineh rat Arur luk iring Raked Arnon, idi bawang luk uned raked ineh, idi amung tana' raked rat Mediba macing déi' Dibon,
- ¹⁰idi amung bawang Sihon, raca' lun Amori, luk raca déi' Hesbon macing lakan bawang pupu Amon,
- ¹¹idi Giliad idi tana' lun Gesuri idi lun Makati, idi amung Pegkung Hermon, idi amung tana' Basan macing déi' Salka,
- ¹²idi amung bawang Raca' Og, luk ngimet déi' Astarot idi déi' Edri, (idi ieh pana' teceh ratnan lun Repaim). Musa nengelaya' idi nemasut nedeh ineh.
- ¹³Iamo' na lun Israil nengusu lun Gesuri idi lun Makati ratnan babpatdeh. Iamo' ideh tudo arang lun Israil macing aco sini.
- ¹⁴Iamo' Musa na nemaré babpat tana' kuan inul Liwi. Idi amung baré luk sabpen kuan Tuhan Allah lun Israil, ieh ineh babpatdeh, maya' kudeng balaNeh ni Musa.
- ¹⁵Musa nemaré babpat tana' kuan anid-anid tetek ruma' pupu Rubin.
- ¹⁶Idi lakan tana'deh rat Arur, luk iring Raked Arnon idi bawang uned raked ineh, idi amung tana' raked luk pelengit Mediba,
- ¹⁷idi Hesbon, dengan amung bawangneh luk déi' tana' raked, Dibon, Bamot Baal, idi Bait Baal Mion,
- ¹⁸Yahas, Kedemot, idi Mepaat,
- ¹⁹Kiriataim, Sibma, idi Seret Sahan, nan surud luk luun raked ineh,
- ²⁰Bait Pior, Irang Pegkung Pisga, idi Bait Yesimot,
- ²¹idi amung bawang tana' raked, idi amung bawang Sihon, raca' lun Amori, luk ngimet déi' Hesbon luk linaya' Musa, do' Sihon idi amung raca' Midian, ieh ineh Ewi, Reken, Sur, Hur, idi Reba luk pa liang Raca' Sihon. Amungdeh tudo déi' tana' ineh.

- ²²Idi lun Israil nengaté Bilam Bior, lun luk mileh mangun ineh, idi mula' lun baken teh.
- ²³Idi lakan tana' lun Rubin ineh Abpa' Yarden. Idi amung tana' luk i tangebneh, amung ini babpat inul Rubin maya' anid-anid tetek ruma'deh, amung bawang idi barardeh.
- ²⁴Idi Musa pangeh nemaré babpat kuan inul Gad maya' tetek ruma'deh.
- ²⁵Idi tana'deh, ieh ineh Yaser, idi amung bawang Giliad idi seupa tana' inul Amon macing Arur luk tutup Raba,
- ²⁶Idi rat Hesbon macing déi' Ramat Mispa idi Betonim, idi rat Mahanaim macing lakan tana' Lodebar,
- ²⁷Idi teh luun Raked Yarden, Bait Haram ineh, idi Bait Nimra, Sukot, idi Sapon, tana' luk ketecan ratnan bawang Sihon, raca' Hesbon. Idi lakanneh Abpa' Yarden, macing Takung Galilia pa tinueh busat aco. Idi amung tana' ineh pa busat aco Abpa' Yarden.
- ²⁸Idi ini babpat lun Gad maya' tetek ruma'deh, ieh ineh amung bawang idi barardeh.
- ²⁹Idi Musa pangeh nemaré babpat kuan sebuang inul Manasé maya' tetek ruma'deh.
- ³⁰Tana'deh rat Mahanaim idi amung bawang Basan, idi amung bawang Og raca' Basan ineh, idi amung bawang Yair luk déi' Basan ineh, anem ngepulu' kinula'deh.
- ³¹Idi seupa Giliad, dengan Astarot idi Edri, ieh ineh bawang Raca' Og déi' Basan pangeh biré kuan sebuang inul Makir anak Manasé, maya' tetek ruma'deh.
- ³²Idi raked-raked Moab luk déi' dipar Abpa' Yarden tutup Yeriko pa busat aco bibpat Musa kuandeh.
- ³³Iamo' Musa na nemaré babpat tana' kuan inul Liwi ngaceku Tuhan Allah lun Israil luk ku babpatdeh ineh, maya' kudeng bala Tuhan nedeh.

Yusak 14

¹Idi ini luk ilap lun Israil ku babpat déi' bawang Kanaan luk bibpat-bibpat Eliasar luk imam, idi Yusak Nun, idi amung lun rayeh pupu ku babpat lun Israil,

²dengan nala' udi ngelelep babpatdeh maya' kudeng bala Tuhan ni Musa kuan iwa' setangal inul ineh.

³Ngaceku Musa pangeh nengelelep tangal teluh babpat ineh déi' dipar Abpa' Yarden, idi na ieh nemaré babpat tana' kuan lun Liwi.

⁴Inul Yusup ineh mangun ku dueh babpat, ieh ineh Manasé idi Epraim. Ngaceku ineh na ieh nemaré babpat ratnan tana' ineh kuan lun Liwi, iamo' tuda'-tuda' bawang pad ideh tudo bang ineh perapu ku tana' libut ineh kuan aya'deh ineh.

⁵Maya' kudeng bala Tuhan ni Musa, kudeng ineh teh luk inau' lun Israil.

⁶Idi lun Yahuda iné' matun Yusak déi' Gilgal. Idi kebala Kaleb Yepuneh lun Kenisi ineh kuandeh, "Iko teh luk nekali' bala Tuhan luk ni Musa demulun Tuhan ineh ratnan ui idi iko déi' Kadis Barnia.

⁷Idi ulunku kareb idi apat ngepulu' lak, kareb ui icuk Musa lun duken Tuhan ineh rat Kadis Barnia amé' nier bawang Kanaan ineh. Idi ui teh nenguit bala kuanneh mepad kudeng luk sinierku.

⁸Iamo' amung kinanakku luk iné' maya' negku, ieh ineh nengetalang niat lun mula'. Iamo' ui nemaya' Tuhan Allahku dengan amung niatku.

⁹Idi Musa nepejani' negku, kebalaneh, 'Idi na miak na tana' luk pangeh ridu' kukudmu ineh mangun ku babpatmu idi babpat anak-anakmu teh macing raked-raked. Ngaceku iko pangeh nelutep maya' bala Tuhan Allahku.' “

¹⁰Idi Kaleb nepebala teh, "Tuhan pangeh nengulun negku maya' kudeng balaNeh. Idi nekini apat ngepulu' limeh lak rat kareb Tuhan nepebala kudeng ineh kuan Musa, kareb lun Israil lawé-lawé déi' su luk ali-ali. Idi nekini ulunku pangeh ualuh ngepulu' limeh lak.

¹¹Idi aco sini teh tuehku mepad kudeng tuehku kareb aco Musa nengecuk negku, do' bang pebunu', idi amung-amung luk ruenku.

¹²Idi ngaceku ineh do' maré kuanku tana' pegkung luk pangeh bida' Tuhan negku kareb aco sineh. Iko pana' pangeh neninger ratnan lun Enak idi déi' bang tuda'-tuda' bawang luk meraben libung. Kudeng Tuhan ngedengan negku ui miak ngusu nedeh, maya' kudeng bala Tuhan ineh.”

¹³Idi Yusak nengeperuan ni Kaleb Yepuneh. Idi ieh nemaré bawang Hebron ku babpatneh.

¹⁴Idi Hebron mangun ku babpat Kaleb Yepuneh lun Kenisi ineh, macing aco sini, ngaceku ieh nelutep maya' bala Tuhan Allah lun Israil.

¹⁵Idi atun ngadan bawang Hebron ineh Kiriati Arba, ieh ineh ngadan seburur lun rayeh arang amung lun Enak. Idi bang kareb ineh bawang ineh nugka' pebunu'.

Yusak 15

¹Idi tetek ruma' pupu Yahuda nengalap babpat tana' kudeng ini: Ieh ineh lakan tana' Edom su luk ali-ali déi' Sin, pa kabing busat aco, idi luk pelengit tu-tu pa kabing busat aco.

²Idi lakan tana'deh ineh pa kabing busat aco pelengit Abpa' luk Mepaci'.

³Idi rat Akrabim lemaba pa kabing busat aco macing Sin. Idi rat Negeb mudik amé' Kadis Barnia, lemaba Hesron idi mudik amé' Adar, idi kemilu' amé' Karka,

⁴macing bawang Asmon idi maya' arur lakan macing Masir. Kekiped lakan ineh macing Abpa' Rayeh, ieh ineh lakan tana' Yahuda pa kabing busat aco.

⁵Idi lakan tana'deh pa busat aco ieh ineh Abpa' luk Mepaci', macing lung Abpa' Yaren. Idi lakan tana' pa tinueh busat aco mudik

⁶Bait Hogla suet pa tinueh busat aco Bait Arba. Idi lakan ineh macing Batu Bohan. (Bohan, ieh ineh anak Rubin),

⁷rat Ruan Susa' lakandeh macing déi' Debir, idi kemilu' amé' pa tinueh busat aco macing déi' Gilgal, luk petutup ku dalan Adumim, luk pa kabing busat aco arur luk déi'. Idi lakan ineh suet bued abpa' Ensemes, idi mulang ku Enrugel.

⁸Idi rat lakan ineh mudik Ruan Hinom pa kabing busat aco pegkung lun Yebusi (ieh ineh Yerusalim); idi lakan ineh mudik macing luun pegkung luk pa atun Ruan Hinom pa acep aco, idi paped Ruan Repaim pa tinueh busat aco.

⁹Idi rat buduk pegkung ineh lakan ineh macing déi' Bued Abpa' Neptua, idi mulang ku bawang-bawang luk muneng ku Pegkung Epron. Idi lakan ineh kemilu' amé' Baala (ieh ineh Kiriati Yarim.)

¹⁰Idi lakan ineh kemilu' rat Baala amé' pegkung-pegkung Edom, amé' muneng ku Pegkung Yarim pa tinueh busat aco (ieh ineh Kesalon), idi musul amé' Bait Semes, idi lemaba Timna.

¹¹Idi lakan ineh macing pa tinueh busat aco iring Ekron, idi kemilu' amé' Sikron, idi lemaba Pegkung Baala, idi mulang déi' Yamnia. Idi kekiped lakan ineh Abpa' Rayeh.

¹²Idi lakan tana'deh pa acep aco, ieh ineh tangeb Abpa' Rayeh. Idi amung ini lakan tana' lun Yahuda maya' tetek ruma'deh.

¹³Idi kuan Kaleb Yepuneh inan nemaré aceh babpat rat arang lun Yahuda, maya' kudeng bala Tuhan ni Yusak, ieh ineh bawang Arba taman Enak, ieh ineh Hebron.

¹⁴Idi rat déi' Kaleb nengusu teluh anak deléi Enak ineh, ieh ineh Sesai, Akiman, idi Talmi.

¹⁵Idi rat ieneh ieh nenalan iné' matun lun bang bawang Debir. Idi atun ngadan Debir ineh Kiriati Seper.

¹⁶Idi kebala Kaleb, "Ide luk munu' Kiriati Seper ineh, idi ngelaya' neneh, ui miak maré kuanneh Aksa, anakku, ku awanneh."

- ¹⁷Idi bawang ineh linaya' Otniel anak Kenas, kinanak Kaleb. Idi ieh namaré Aksa, anakneh, kuanneh mangun ku awanneh.
- ¹⁸Idi kareb decur ineh nacing neneh, idi ieh nengubuk ni Otniel pelé ieh iné' mutuh selalang tana' nan tamanneh. Idi ieh netemurun ratnan keladaineh. Idi Kaleb nengitun neneh, "Anun pianmu?"
- ¹⁹Idi ieh nengor balaneh, "Maré kuanku aceh peruan, ngaceku iko namaré kuanku tana' luk déi' Negeb. Idi teh maré kuanku tuda'-tuda' bued abpa'." Idi Kaleb namaré kuanneh tuda'-tuda' bued abpa' luk déi' luun, idi luk déi' beneh.
- ²⁰Idi ini babpat inul Yahuda maya' tetek ruma'deh.
- ²¹Idi bawang lun Yahuda luk mado pa kabing busat aco, muneng ku lakan Edom, ieh ineh Kabsil, Eder, Yagur,
- ²²Kina, Dimona, Adada,
- ²³Kedes, Hasor, Itnan,
- ²⁴Sip, Telem, Baalot,
- ²⁵Hasor Hadata, idi Keriot Hesron (luk titen Hasor teh),
- ²⁶Amam, Sema, Molada,
- ²⁷Hasar, Gada, Hesmon, Bait Palet,
- ²⁸Hasar Sual, Birsiba, Bisiotia,
- ²⁹Baala, Iim, Esem,
- ³⁰Eltolad, Kesil, Horma,
- ³¹Siklag, Madmana, Sansana
- ³²Lebaut, Silhim, Ain, idi Rimon. Amung bawang ineh dueh ngepulu' iwa' perapu ku babpatdeh.
- ³³Idi bawang luk luun raked, ieh ineh Estaul, Sora, Asna,
- ³⁴Sanua, Enganim, Tapua, Enam,
- ³⁵Yarmut, Adulam, Soko, Aseka,

- ³⁶Saraim, Aditaim, Gedera, idi Gederotaim: Amung bawang ineh pulu' apat perapu ku babpatdeh.
- ³⁷Idi teh Senan, Hadasa, Migdalgad,
- ³⁸Dilian, Mispa, Yoktil,
- ³⁹lakis, Boskat, Eglon,
- ⁴⁰Kabon, Lamam, Kitlis,
- ⁴¹Gederot, Bait Dagon, Naama, idi Makeda: Amung bawang ineh pulu' anem perapu ku babpatdeh.
- ⁴²Idi teh Libna, Eter, Asan,
- ⁴³Ipta, Asna, Nesib,
- ⁴⁴Kila, Aksib, idi Maresa: Amung bawang ineh iwa' perapu ku babpatdeh.
- ⁴⁵Idi teh Ekron, perapu ku bawang idi babpatneh,
- ⁴⁶idi amung bawang idi babpatdeh muneng ku Asdod, rat Ekron macing ku Abpa' Rayeh.
- ⁴⁷Idi teh Asdod idi Gasa perapu bawang idi babpatdeh, macing ku arur luk lakan Masir, idi tangeb Abpa' Rayeh.
- ⁴⁸Idi teh luun pegkung-pegkung, Samir, Yatis, Soko,
- ⁴⁹Dana, Kiriati Seper (ieh ineh Debir),
- ⁵⁰Anab, Estemua, Anim,
- ⁵¹Gosen, Holon, idi Gilo. Amung bawang ineh pulu' aceh perapu ku babpatdeh.
- ⁵²Idi teh Arab, Duma, Esan,
- ⁵³Yanim, Bait Tapua, Apeka,
- ⁵⁴Humta, Hebron, idi Sior: Amung bawang ineh iwa' perapu ku babpatdeh.
- ⁵⁵Idi teh Maun, Karmel, Sip, Yuta,
- ⁵⁶Yesril, Yokdiam, Sanua,

⁵⁷Kain, Gibia, idi Timna: Amung bawang ineh pulu' perapu ku babpatdeh.

⁵⁸Idi Halhul, Bait Sur, Gedor,

⁵⁹Maarat, Bait Anot, idi Eltekon. Amung bawang ineh anem perapu ku babpatdeh.

⁶⁰Idi teh Kiriati Baal (ieh ineh Kiriati Yarim), idi Raba: dueh bawang perapu ku babpatdeh.

⁶¹Idi teh déi' su luk ali-ali Bait Araba, Midin, Sekeka,

⁶²Nibsan, bawang Tucu', idi Enggedi: anem bawang perapu ku babpatdeh.

⁶³Iamo' lun Yahuda na miak ngusu nelun Yebusi, lun bang bawang Yerusalim, rat bang su luk inandeh. Ngaceku ineh lun Yebusi tudo perapu dengan lun Yahuda déi' Yerusalim macing aco sini.

Yusak 16

¹Idi babpat luk litep kuan inul Yusup, ieh ineh rat Abpa' Yarden muneng ku Yeriko, macing pa busat aco bued abpa' Yeriko, idi lemaba déi' su luk ali-ali, mudik rat Yeriko amé' pegkung macing déi' Baitel.

²Idi rat Baitel macing déi' Lus, idi lemaba bawang Atarot Adar, tana' lun Arki,

³idi amé pa acep aco lemaba tana' lun Yapleti macing pa lod Bait Horon, idi lemaba Giser, idi kekiped lakan ineh pa Abpa' Rayeh.

⁴Kudeng ineh teh inul Yusup, ieh ineh Manasé idi Epraim nengalap babpatdeh.

⁵Idi ini lakan tana' inul Epraim maya' tetek ruma'deh: lakan tana' luk pa busat aco, ieh ineh Atarot Adar macing déi' Bait Horon pa dayeh.

⁶Idi rat déi' lakan ineh macing Abpa' Rayeh. Idi Mikmetat, ieh ineh pa tinueh busat aco. Idi pa busat aco lakan ineh kemilu' macing déi' Tanat Silo, idi lemaba pa busat aco macing Yanua,

⁷idi musul rat Yanua macing Atarot idi Nara, pad macing Yeriko, idi kekiped lakan ineh Abpa' Yarden.

⁸Idi rat Tapua lakan tana' ineh amé' pa acep aco macing Arur Kana, idi kekiped lakan ineh Abpa' Rayeh. Idi amung ini babpat inul lun Epraim maya' tetek ruma'deh.

⁹Idi bal selipa lakan tana'deh inan teh tuda'-tuda' bawang arang lun Epraim bang babpat lun Manasé, do' bawang-bawang, do' barardeh pana'.

¹⁰Iamo' na ideh nengusu lun Kanaani luk tudo déi' Giser, pad lun Kanaani ineh mudeng arang lun Epraim macing aco sini. Iamo' ideh mangun ku lun duken luk sinaad ngakem kuandeh.

Yusak 17

¹Idi inul Manasé teh nengalap babpat luk litep, ngaceku ieh ineh anak Yusup luk atun. Makir, ieh ineh taman Giliad anak Manasé lu atun, nengalap bawang Giliad idi Basan mangun ku babpatneh, ngaceku ieh seburur lun luk pebunu'.

²Idi tana' luk pa acep aco Abpa' Yarden pangeh biré kuan amung anak Manasé luk baken, maya' tetek ruma'deh: Abiser, Helek, Asriel, Sikem, Heper, idi Semida. Amung ini anak deléi Manasé Yusup luk lun rayeh tetek ruma'deh.

³Iamo' Selopehad, anak Heper, anak Giliad, anak Makir, anak Manase ineh, na anak deléi, aimo' decur petala. Idi ini ngadan anak-anakneh: Makla, Noa, Hogila, Milka, idi Tirsa.

⁴Idi deh iné' matun Eliasar luk imam idi papu' ni Yusak Nun pa kiung amung lun rayeh, kebaladeh, "Tuhan pangeh nengecuk ni Musa maré kuan kai aceh babpat arang kinanak kai." Ngaceku ineh idi ieh nemaré kuandeh aceh babpat arang amung kinanak tamandeh, maya' kudeng bala Tuhan ineh.

⁵Kudeng ineh lawéneh Manasé nengalap pulu' babpat baken ratnan tana' Giliad idi Basan luk dipar Abpa' Yarden.

⁶Ngaceku amung anak decur Manasé pana' nengalap babpat perapu ku anak deléineh. Idi tana' Giliad ineh mangun ku babpat amung anak Manasé luk baken.

⁷Idi tana' Manasé, ieh ineh rat Aser macing déi' Mikmetat, luk pa busat aco bawang Sikem. Idi lakan ineh macing pa kabing busat aco su luk inan lun Tapua.

⁸Idi tana' Tapua ineh Manasé kuan. Iamo' bawang Tapua luk iring lakan ineh pupu Epraim kuan.

⁹Idi lakan ineh musul amé' Arur Kana. Idi bawang-bawang ini luk pa kabing busat aco arur ineh Epraim kuan, sagan tu pana' bawang ineh arang uned amung bawang Manasé. Idi lakan Manasé', ieh ineh pa tinueh busat aco arur ineh, idi kekiped lakan ineh Abpa' Rayeh.

¹⁰Luk pa kabing busat aco ineh Epraim kuan. Idi pa tinueh busat aco ineh Manasé kuan. Idi Abpa' Rayeh ineh lakan didueh. Idi pa tinueh busat aco ideh macing Aser. Idi pa kabing busat aco ideh macing Iskar.

¹¹Idi bang bawang Iskar idi Aser, Manasé ngimet Bait Sian idi Ibliam perapu ku bawangdeh, ieh ineh Dor, luk tangeb abpa' rayeh, Endor, Taana, idi Megido.

¹²Iamo' lun Manasé na miak ngusu lemulun rat bang bawang-bawang ineh. Ngaceku ineh lun Kanaani tudo déi'.

¹³Idi kareb lun Israil mangun meluun tueh, idi ideh nengalap lun Kanaani ineh mangun ku lun dukendeh. Iamo' na ideh nengusu nedeh.

¹⁴Idi kebala inul Yusup ni Yusak, "Ngudehké iko maré sebuleng babpat mo' kuan kai. Iamo' kai ini mula' burur ngaceku peruan luk biré Tuhan kuan kai macing nekini?"

¹⁵Idi kebala Yusak nedeh, "Kudeng matu muyuh aceh pupu luk mula' do' muyuh amé' luun pulung, idi ngala déi' su luk inan babpat muyuh luun tana' lun Prisi idi Repaim, kudeng ayuneh pegkung-pegkung Epraim pelaba isuut kuan muyuh."

¹⁶Idi kebala inul Yusup, "Na tana' pegkung ineh petap kuan kai. Idi amung lun Kanaani luk tudo luun raked ineh inan keréta belawan, do' luk tudo bang Bait Sian idi bang babpat-babpatdeh, do' luk tudo' déi' Raked Yesril pana'."

¹⁷Idi kebala Yusak kuan inul Epraim idi Manasé, "Kali' rungen muyuh aceh pupu luk mula' burur idi muyuh meluun tueh. Muyuh miak ngalap mela ratnan sebuleng babpat.

¹⁸Idi pegkung ineh muyuh kuan, sagan tu pana' ineh pulung. Temara' ineh idi ngalap kuan muyuh macing iringneh. Ngaceku muyuh miak ngusu lun Kanaani ineh rat su inandeh sagan tu pana' ideh inan keréta belawan, idi metueh teh."

Yusak 18

¹Kareb ideh pangeh nengelaya' amung bawang luk pa atundeh, amung lun Israil nepamung déi' Silo, idi ideh nemudut Lepo su luk inan papu' Tuhan.

²Idi teh ketecan arang lun Israil tudu' pupu luk nateh nengalap babpatdeh.

³Idi kebala Yusak nelun Israil, "Tuda' ioké muyuh na iné' ngalap tana' ineh ku babpat muyuh luk pangeh biré Tuhan Allah tepun muyuh nemuyuh?"

⁴Maré teluh burur rat anid-anid pupu. Idi ui ngecuk nedeh nalan amé' aput- aput tana' ineh idi ngayud ayuneh maya' anid-anid babpat. Idi ideh miak lemubed amé' negku.

⁵Idi ideh miak mabpat tana' ineh tudu' babpat. Idi Yahuda miak ketecan na tana' ineh luk pa kabing busat aco. Idi amung lun bang ruma' Yusup miak ketecan nan tana' ineh luk pa tinueh busat aco.

⁶Idi do' muyuh ngayud ayu tudu' babpat tana' ineh, idi nguit luk inayud muyuh ineh amé' negku. Idi ui miak nala' udi ngaceku muyuh pa kiung Tuhan Allah tau.

⁷Lun Liwi ineh na ngalap babpat arang muyuh, ngaceku babpatdeh ineh kekamen imam kuan Tuhan. Idi inul Gad idi Rubin idi sebuang inul Manasé ineh pana' pangeh nengalap babpatdeh pa busat aco Abpa' Yarden, luk pangeh biré Musa lun duken Tuhan ineh kuandeh."

⁸Idi ideh iné' ngayud ayu tana' ineh, idi kebala Yusak nedeh, "Amé' muyuh nalan aput-aput tana' ineh idi ngayud ayuneh, idi lemubed amé' negku, pelé ui nala' udi ngaceku muyuh pa kiung Tuhan déi' Silo."

⁹Idi ideh nenalan aput-aput tana' ineh, idi nengayud ayu tudu' babpat bawang ineh bang aceh surat. Idi ideh nelemubed iné' ni Yusak su luk inandeh nelupo déi' Silo.

¹⁰Idi Yusak nenala' udi ngaceku ideh déi' Silo pa kiung Tuhan. Idi tana' ineh teh bibpat Yusak kuan anid-anid pupu lun Israil.

¹¹Idi inul Benjamin maya' tetek ruma'deh, nengalap tana' arang pupu Yahuda dengan inul Yusup.

¹²Idi lakandeh pa tinueh busat aco, ieh ineh Abpa' Yarden. Idi lakan ineh mudik pa Yeriko amé' pa tinueh busat aco, lemaba pegkung pa acep aco, idi maki' amé' su luk ali-ali déi' Bait Awin.

¹³Idi lakan ineh lemaba pa kabing busat aco amé' surud Lus, su inan Baitel nekini. Idi lakan ineh musul amé' Atarot Adar, macing luun pegkung luk pa kabing busat aco déi' Bait Horon pa lod.

¹⁴Idi lakan ineh kemilu' amé' iring pa acep aco amé' pa kabing busat aco pegkung luk petutup ku Bait Horon pa kabing busat aco, idi umai amé' Kiriati Baal (ieh ineh Kiriati Yarim), aceh bawang lun Yahuda, ieh ineh lakanneh pa acep aco.

¹⁵Idi lakanneh pa kabing busat aco ngimun rat iring Kiriati Yarim idi amé' pa acep aco, idi umai amé' Bued Abpa' Neptua.

¹⁶Idi lakan ineh musul paped pegkung luk petutup ku Ruan Hinom, ieh ineh bang Ruan Repaim, pa tinueh busat aco, idi musul teh lemaba Ruan Hinom, pa kabing busat aco Surud Yebusi, idi musul amé' Enrugel.

¹⁷Idi pa tinueh busat aco lakan ineh umai amé' Ensemes, idi pangeh ineh amé' Gelilot, luk petutup ku dalan Pegkung Adumim, idi musul macing Batu Bohan (Bohan, ieh ineh anak Rubin),

- ¹⁸Idi lemaba pa tinueh busat aco Surud Araba, idi musul amé' Raked Yarden.
- ¹⁹Idi lakan ineh petacu amé' pa tinueh busat aco surud Bait Hogla. Abpa' luk Mepaci' ieh ineh paped lakan pa kabing busat aco Abpa' Yarden, ieh ineh lakan tana'deh luk pa kabing busat aco.
- ²⁰Idi Abpa' Yarden, ieh ineh lakandeh pa busat aco. Amung ini lakan tana' inul beniamin maya' tetek ruma'deh.
- ²¹Idi bawang-bawang inul Beniamin maya' tetek ruma'deh, ieh ineh Yeriko, Bait Hogla, Emek Kasis,
- ²²Bait Araba, Semaraim, Baitel,
- ²³Hawin, Para, Opra,
- ²⁴Keparamoni, Opni, idi Giba — amung bawang ineh pulu' dueh perapu ku babpatdeh.
- ²⁵Idi teh Gibion, Rama, Berot,
- ²⁶Mispa, Kepira, Mosa,
- ²⁷Rekem, Iripil, Tarala,
- ²⁸Sela, Hailep, Yebusi (ieh ineh Yerusalim), Gibia idi Kiriati Yarim — amung bawang ineh pulu' apat perapu ku babpatdeh. Idi ini babpat inul Beniamin maya' tetek ruma'deh.

Yusak 19

- ¹Idi babpat luk kedueh ineh litep kuan inul Simion, maya' tetek ruma'deh. Idi tana'deh, ieh ineh uned tana' lun Yahuda.
- ²Idi tana' babpatdeh ineh, ieh ineh bawang Bisiba, Siba, Molada,
- ³Hasa Sual, Bala, Esem,
- ⁴Eltolad, Betul, Horma,
- ⁵Siklag, Bait Makabot, Hasar Susa,
- ⁶Bait Lebaut, idi Saruhen — amung bawang ineh pulu' teluh perapu ku babpatdeh.

- ⁷Idi teh Ain, Rimon, Eter idi Asan — apat bawang perapu ku babpatdeh,
- ⁸idi teh amung barar luk pekelibut bawang-bawang ineh macing Baalat Bir (ieh ineh Rama) luk pa kabing busat aco. Idi ini babpat tana' inul Simion maya' tetek ruma'deh.
- ⁹Babpat lun Simion ineh semuet babpat luk litep kuan lun Yahuda. Ngaceku babpat lun Yahuda ineh meluun rayeh kuandeh. Ngaceku ineh lun Simion nengalap babpat rat nedeh.
- ¹⁰Idi babpat luk keteluh ineh litep kuan inul Sebulon maya' tetek ruma'deh. Idi lakan tana' babpatdeh, ieh ineh suet déi' Sarid.
- ¹¹Idi lakan tana'deh mudik amé' pa acep aco macing Marala, idi pelengit ku Dabeset, idi ku arur luk pa busat aco Yokniam.
- ¹²Idi rat pa selipa Sarid, lakan amé' pa busat aco macing lakan Kislot Tabor idi amé' Daberat, idi mudik amé' Yapia.
- ¹³Rat déi', lakan amé' pa busat aco petacu amé' Gat Heper, amé' Etkasin, idi kemilu' amé' Nia idi petacu matun Rimon.
- ¹⁴Pa tinueh busat aco lakan ineh kemilu' amé' Naton, idi papedneh bang Ruan Iptahil,
- ¹⁵idi teh Katat, Nahalal, Simron, Idala, idi Baitlahim — pulu' dueh bawang perapu ku babpatdeh.
- ¹⁶Idi ini babpat tana' lun Sebulon, maya' tetek ruma'deh — amung bawang ineh perapu ku babpatdeh.
- ¹⁷Idi babpat luk keapat ineh litep kuan inul pupu Iskar, ieh ineh maya' tetek ruma'deh.
- ¹⁸Idi lakandeh, ieh ineh Yesril, Kesulot, Sunem,
- ¹⁹Haparaim, Sion, Anaharat,
- ²⁰Rabit, Kision, Ebes,
- ²¹Remet, Enganim, Enhada, idi Bait Pases.

- ²²Idi lakan ineh pelengit ku Tabur, Sahasuma, idi Bait Semes. Idi kudeng ineh paped lakandeh ineh déi' Abpa' Yarden — amung bawang pulu' anem perapu ku babpatdeh.
- ²³Idi ini babpat pupu Iskar, maya' tetek ruma'deh — amung bawang ineh perapu ku babpatdeh.
- ²⁴Idi babpat luk kelimeh ineh litep kuan inul Aser, maya' tetek ruma'deh.
- ²⁵Idi lakandeh, ieh ineh Helkat, Hali, Béten, Aksap,
- ²⁶Alam Melek, Amad, idi Misal. Idi lakan ineh pelengit ku Karmel, idi Sikor Libnat, pa acep aco,
- ²⁷Idi kemilu' amé' pa busat aco, amé' Bait Dagon, idi pelengit ku Sebulon idi ku Ruan Iptahil, idi pa tinueh busat aco amé' Bait Emek idi Niel, idi umai pa tinueh busat aco amé' Kabul,
- ²⁸Ebron, Rehob, Hamon, idi Kana, macing déi' Sidon.
- ²⁹Idi lakan ineh kemilu' amé' Rama, macing bawang Sur luk meraben libung idi kemilu' amé' Hosa, idi papedneh déi' Abpa' Rayeh; idi teh Mahalab, Aksib,
- ³⁰Uma, Apek, idi Rehob — amung bawang ineh dueh ngepulu' dueh perapu ku babpatdeh.
- ³¹Idi ini bawang perapu ku babpatdeh luun tana' luk ilap inul Aser, maya' tetek ruma'deh.
- ³²Idi babpat luk keanem ineh litep kuan inul Naptali, maya' tetek ruma'deh.
- ³³Idi lakan tana'deh, ieh ineh rat Helep, idi rat lawa kayun luk meraben déi' Sananim, rat Adaminekeb idi Yamnia, macing déi' Lakum, idi mulang Abpa' Yarden.
- ³⁴Idi lakan ineh kemilu' amé' pa acep aco amé' Asnot Tabur. Idi rat déi' ieh amé' Hukok, idi pelengit ku tana' Sebulon pa kabing busat aco, idi tana' Aser pa acep aco, idi tana' Yahuda tangeb Abpa' Yarden pa busat aco.
- ³⁵Idi bawang-bawang luk meraben libung ineh Sidim, Ser, Hamat, Rakat, Kineret,

³⁶Adama, Rama, Haso,

³⁷Kedes, Edri, Enhasor,

³⁸Yiron, Migdadel, Horem, Bait Anat, idi Bait Semes — amung bawang ineh pulu' iwa' perapu ku babpatdeh.

³⁹Idi ini babpat pupu Naptali, maya' tetek ruma'deh — amung bawang ini perapu ku babpatdeh.

⁴⁰Idi babpat luk ketudu' ineh litep kuan inul Dan, maya' tetek ruma'deh.

⁴¹Idi lakan babpatdeh ieh ineh Sora, Estaul, Irsemes,

⁴²Salbim, Aijalon, Itla,

⁴³Elon, Timna, Ekron,

⁴⁴Elteka, Gibeton, Balat,

⁴⁵Yehud, Beneberak, Gatrimon,

⁴⁶Mejakon, Rakon, idi babpat luk petutup ku Yopa.

⁴⁷Kareb tana' Dan ilap rat nedeh, lun Dan iné' pebunu' bawang Lais. Kareb ideh pangeh nengelaya' bawang Lais ideh nengaté lun bang bawang ineh. Idi ideh nengalap bawang ineh idi netudo déi'. Idi ideh nengisu' ngadan Lais mangun ku Dan, maya' ngadan tepundeh.

⁴⁸Idi ini babpat pupu Dan, maya' tetek ruma'deh — amung bawang ini perapu ku babpatdeh.

⁴⁹Idi kareb lun Israil pangeh nemabpat tana' ineh, idi ideh nemaré kuan Yusak Nun aceh babpat kuanneh sebuleng.

⁵⁰Idi maya' kudeng bala Tuhan, birédeh neneh bawang luk pinianneh, ieh ineh Timnat Sera luun pegkung-pegkung Epraim. Idi ieh nemudut bawang ineh teh idi netudo bang ineh.

⁵¹Idi ini babpat luk bibpat Eliasar luk imam idi Yusak Nun, idi amung lun rayeh pupu kuan amung inul pupu lun Israil dengan nenala' udi déi' Silo pa

kiung Tuhan, pa atun Lepo su luk inan papu' Tuhan. Kudeng ineh ideh nemangeh babpat-babpat tana' ineh.

Yusak 20

¹Idi kebala Tuhan ni Yusak,

²"Mada' kuan lun Israil kudeng ini, "Ngeletep tuda'-tuda' bawang luk inan sigapung kuan muyuh, luk pangeh icukKu ni Musa mada' nemuyuh.

³Kudeng seburur lemulun ngaté nelun dengan na inau' rungen, iamo' nekasipalanneh, do' bawang ineh mangun ku luk inan sigapung kuanneh ratnan lemulun luk ngua' aténeh.

⁴Idi kudeng lun ineh buro amé' inan aceh bawang ineh, do' ieh tuped munung tanga' bawang ineh atun, idi maré kali' anun pun lawéneh kuan lun rayeh bawang ineh. Idi do' ideh nganak lemulun ineh, idi maré su luk inanneh tudo bang bawang ineh.

⁵Kudeng lun luk ngua' até ngerada' neneh idi aleg ideh maré lun luk nengaté ineh bang paladneh, iamo' ngapung neneh ngaceku na ieh nengaté lun denganneh ngaceku ieh megateh neneh, iamo' nekasipalanneh.

⁶Idi ieh miak tudo bang bawang ineh peh, pad ieh pangeh papu' nelun rayeh luk miak mangeh ukumneh. Kareb Imam Rayeh luk ngimet bang kareb ineh maté, idi teh ieh miak muli' amé' bang bawangneh luk iratneh neburo.' “

⁷Idi ideh nengatad bawang Kedes déi' Galilia luun pegkung-pegkung Naptali, Sikem luk luun pegkung-pegkung Epraim, idi Kiriath Arba (ieh ineh Hebron) luk luun pegkung-pegkung Yahuda.

⁸Idi déi' dipar Abpa' Yarden pa busat aco bawang Yeriko litepdeh bawang Besar déi' su luk ali-ali luun tana' raked inul Rubin, Ramot déi' Giliad, tana' inul Gad, idi Golan déi' Basan, tana' inul Manasé.

⁹Idi amung bawang ini litep kuan amung lun Israil idi kuan lun sakai luk tudo arangdeh teh, pelé ideh miak buro amé' déi', ieh ineh lemulun luk pangeh

nengaté lemulun dengan na inau'neh rungen, pad ieh na pitayen lun luk ngua' até, idi ieh miak papu' nelun rayeh luk miak mangeh ukumneh.

Yusak 21

¹Idi lun rayeh inul pupu lun Liwi pana' iné' matun ni Eliasar luk imam idi Yusak Nun, idi amung lun rayeh pupu lun Israil.

²Kebaladeh nedeh déi' Silo bang bawang Kanaan, "Tuhan pangeh nepebala ni Musa. Ieh nengecuk maré bawang kuan kai inan tudo, idi laman kuan aya' kai pana'."

³Idi maya' kudeng bala Tuhan, lun Israil nemaré kuan lun Liwi ratnan babpatdeh sebuleng, ieh ineh bawang-bawang ini perapu ku laman.

⁴Idi bawang-bawang pupu lun Kohat luk pun-pun litep. Idi lun Liwi luk inul Arun luk imam nengalap pulu' teluh bawang rat inul Yahuda, Simion, idi Beniamin.

⁵Idi lun Kohat luk baken ineh nengalap pulu' bawang ratnan inul pupu Epraim, idi ratnan inul Dan, idi ratnan sebuang inul Manasé.

⁶Idi lun Gerson nengalap pulu' teluh bawang ratnan inul Iskar, Aser, Naptali, idi ratnan sebuang inul Manasé déi' Basan.

⁷Idi lun Merari, maya' tetek ruma'deh, nengalap pulu' dueh bawang ratnan inul Rubin, inul Gad, idi Sebulon.

⁸Dengan nala' udi lun Israil nemaré bawang ini perapu ku laman kuan lun Liwi maya' kudeng bala Tuhan ni Musa.

⁹Idi ini ngadan bawang ratnan inul Yahuda idi Simion luk biré

¹⁰kuan inul Arun luk ratnan pupu Kohat, ieh ineh sebabpat lun Liwi. Idi babpat dideh luk biré pun-pun.

¹¹Idi ideh nemaré nedeh ineh bawang Kiriat Arba (Arba ineh taman lun Enak), ieh ineh Hebron luun pegkung-pegkung Yahuda, do' bawangdeh, idi laman luk pekelibutneh.

- ¹²Iamo' tana' bawang ineh luk ku laman idi bawang-bawangneh luk isuut biré kuan Kaleb Yepuneh ku babpatneh.
- ¹³Ideh nemaré bawang ini kuan pupu Arun luk imam: Hebron bawang luk inan sigapung lun luk ngaté, perapu ku laman, idi teh Libna,
- ¹⁴Yatir, Esemua,
- ¹⁵Holon, Debir,
- ¹⁶Ain, Yuta, idi Bait Semes perapu ku laman, ieh ineh iwa' bawang ratnan dueh inul ineh.
- ¹⁷Idi ratnan inul Benjamin ideh nemaré bawang Gibion, Giba,
- ¹⁸Anatot, idi Almon perapu ku laman — amungdeh apat bawang.
- ¹⁹Amung bawang inul Arun luk imam ineh, pulu' teluh perapu ku lamandeh.
- ²⁰Idi teh inul pupu Kohat luk baken arang lun Liwi ineh nengalap babpatdeh rat inul Epraim.
- ²¹Idi ideh nemaré kuandeh ineh Sikem perapu ku laman luun pegkung-pegkung Epraim bawang luk inan lun ngaté sigapung, idi Giser,
- ²²Kibsaim, idi Bait Horon perapu ku laman, ieh ineh apat bawang.
- ²³Idi ratnan inul Dan, bawang Eltekeh, Gibeton,
- ²⁴Aijalon, idi Gat Rimon perapu ku laman — ieh ineh apat bawang.
- ²⁵Idi ratnan sebuang inul Manasé bawang Tanak idi Gat Rimon perapu ku laman — ieh ineh dueh bawang.
- ²⁶Amung bawang babpat inul pupu Kohat luk baken ineh, ieh ineh pulu' bawang perapu ku laman.
- ²⁷Idi lun Gerson, rat arang pupu lun Liwi, nengalap ratnan sebuang inul Manasé dueh bawang, ieh ineh Golan déi' Basan (su luk inan lun ngaté sigapung), idi Bestera, perapu ku laman.
- ²⁸Idi ratnan inul Iskar ideh nengalap bawang Kision, Daberat,
- ²⁹Yarmut, idi Engamin perapu ku laman — ieh ineh apat bawang.

- ³⁰Idi ratnan inul Aser ideh nengalap bawang Misal, Abdon,
- ³¹Helkat, idi Rehob perapu ku laman — ieh ineh apat bawang.
- ³²Idi ratnan inul Naptali, bawang Kedes déi' Galilia perapu ku laman (su luk inan lun ngaté sigapung), idi Hamot Dor, idi Kartan perapu ku laman — ieh ineh teluh bawang.
- ³³Amung bawang lun Gerson maya' tetek ruma'deh, ieh ineh pulu' teluh bawang perapu ku laman.
- ³⁴Idi pupu Merari, ieh ineh lun Liwi luk ketecan teh, nengalap ratnan inul Sebulon bawang Yokniam, Karta,
- ³⁵Dimna, idi Nahalal perapu ku lamandeh — ieh ineh apat bawang.
- ³⁶Idi ratnan inul Rubin, bawang Beser, Yahas,
- ³⁷Kedemot, idi Mepaat perapu ku lamandeh — ieh ineh apat bawang.
- ³⁸Idi ratnan inul Gad, bawang Ramot déi' Giliad perapu ku laman (su luk inan ngaté sigapung), Mahanaim,
- ³⁹Hesbon, idi Yaser perapu ku lamandeh — ieh ineh apat bawang.
- ⁴⁰Idi lun Merari, ieh ineh pupu lun Liwi luk ketecan teh maya' tetek ruma'deh, nengalap pulu' dueh bawang.
- ⁴¹Idi amung bawang lun Liwi arang babpat lun Israil, ieh ineh apat ngepulu' ualuh bawang perapu ku lamandeh.
- ⁴²Idi anid-anid bawang ineh inan laman pekelibut.
- ⁴³Kudeng ineh ayu Tuhan maré kuan Israil amung tana' luk pangeh pijani'Neh kuan tepundeh ineh, idi ideh pana' nengalap ineh idi tebawang su ineh.
- ⁴⁴Idi Tuhan nemaré pedo' kuandeh apat bawang ineh, maya' kudeng luk pijani'Neh kuan tepundeh ineh. Idi ratnan amung bunu'deh seburur pana' nateh miak metueh rat nedeh. Amung bunu' ineh pangeh biré Tuhan bang paladdeh.

⁴⁵Idi sebila' bala pana' na netutu' ratnan amung bala luk do' luk pangeh bida' Tuhan kuan amung lun Israil.

Yusak 22

¹Idi Yusak nenawar nelun Rubin idi lun Gad, idi sebuang inul Manasé,

²kebalaneh nedeh, "Muyuh pangeh nenganau' amung luk bida' Musa demulun Tuhan ineh kuan muyuh. Idi muyuh pangeh nemaya' amung balaku.

³Idi na muyuh nenecan kinanak muyuh tuda'-tuda' lak kinioneh macing aco sini. Idi muyuh pangeh nemaya' amung bala Tuhan Allah muyuh.

⁴Idi nekini Tuhan Allah muyuh pangeh nemaré pedo' kuan amung kinanak muyuh, maya' kudeng amung bala Tuhan nedeh. Ngaceku ineh do' muyuh muli' nekini amé' lepo muyuh idi babpat muyuh luk pangeh biré Musa lun duken Tuhan ineh kuan muyuh dipar Abpa' Yarden.

⁵Iamo' nginita muyuh do'-do' bala idi ukum luk bida' Musa demulun Tuhan ineh kuan muyuh. Do' muyuh mawa inan Tuhan Allah muyuh, idi maya' pianNeh, idi nginita amung balaNeh, idi merapet inan Tuhan, idi ngakem kuanNeh dengan amung niat muyuh idi amung terawé muyuh."

⁶Idi Yusak nemaré peruan nedeh, idi ieh nenima' nedeh nalan. Idi ideh nuli' peh.

⁷Idi Musa pangeh nemaré babpat kuan sebuang inul Manasé déi' Basan, iamo' Yusak pangeh nemaré tana' pa acep aco Abpa' Yarden kuan inul Manasé luk baken, perapu pupu Israil luk baken. Idi kareb Yusak nengecuk nedeh muli', ieh nemaré peruan nedeh,

⁸kebalaneh nedeh, "Muyuh muli' dengan mula' binaweh idi mula' aya', dengan amas, pirak, tekaling, idi belawan, idi dengan mula' ayung. Mabpat amung binaweh luk ilap ratnan bunu' muyuh ineh kuan kinanak-kinanak muyuh."

⁹Idi amung inul Rubin nuli' idi inul Gad idi sebuang inul Manasé. Idi ideh nenecan nelun Israil déi' Silo luk tana' Kanaan idi nuli' tana' Giliad, ieh ineh tana' luk pangeh biré nedeh, maya' kudeng bala Tuhan ni Musa.

- ¹⁰Kareb ideh macing Gelilot, bang bawang Kanaan déi' dipar Abpa' Yarden, idi ideh nemudut aceh bubpun luk rayeh su ineh tangeb Abpa' Yarden.
- ¹¹Idi lun Israil luk baken neninger bala, "Siruh! Lun inul Rubin, inul Gad, idi sebuang inul Manasé pangeh nemudut aceh bubpun déi' Gelilot muneng ku lakan tana Kanaan tangeb Abpa' Yarden, bang babpat tau."
- ¹²Kareb lun Israil neninger bala ineh, idi amungdeh nepamung déi' Silo, pian amé' munu' nedeh.
- ¹³Idi lun Israil nengecuk Pinihas anak Eliasar luk imam, amé' matun inul Rubin, inul Gad, idi sebuang inul Manasé.
- ¹⁴Idi teh pulu' lun rayeh maya' neneh, seburur rat anid-anid pupu lun Israil. Amungdeh ineh lun rayeh ruma' pupudeh.
- ¹⁵Idi ideh nacing nan inul Rubin, inul Gad, idi sebuang inul Manasé déi' tana' Giliad. Idi kebaladeh nedeh,
- ¹⁶"Kudeng ini bala amung pupu Tuhan, 'Ngudehké muyuh nenganau' kekamen luk dat ini idi ngedat Allah lun Israil. Idi nekini muyuh pangeh nelemubed ratnan Tuhan, idi nemudut aceh bubpun kuan muyuh, pad aco sini pana' muyuh pangeh mangun, ku bunu' Tuhan?
- ¹⁷Ngerawé sala' déi' Pior kareb Tuhan nengukum pupuNeh. Macing aco sini, tau medereh ngaceku ineh. Naké sala' ineh petap?
- ¹⁸Pianké muyuh lemubed ratnan Tuhan? Kudeng muyuh nekini mangun ku bunu' Tuhan, kali' rungen pekak nebpa usehNeh mebura' kuan amung lun Israil.
- ¹⁹Idi nekini kudeng babpat tana' muyuh ineh dat, do' amé' matun babpat tana' Tuhan su luk inan Lepo Tuhan idi ngalap babpat rat arang kai. Iamo' aleg muyuh ngedat Tuhan. Idi aleg nguyo nekai idi nganau' kuan muyuh aceh bubpun baken ratnan bubpun Tuhan Allah tau.

²⁰Kareb Akan Sera nenganau' sala' dengan rungen ku binaweh luk bibpeng na lapen, bakenké useh ineh mangun pa luun amung lun Israil? Idi baken ieh sebuleng luk naté ngaceku sala'neh?' “

²¹Idi inul Rubin, inul Gad, idi sebuang inul Manasé nengor bala lun rayeh Israil kudeng ini,

²²"Idi Allah luk Melalud. Ieh ineh Tuhan! Idi Allah luk Melalud. Ieh ineh Tuhan! Ieh meluun kali'. Idi do' Israil pana' kali' teh. Kudeng kai ini bunu' Tuhan idi ngelaba ukumNeh, do' muyuh na méi' nekai.

²³Kudeng ayuneh kai nenganau' bubpun kuan kai, pian lemubed ratnan Tuhan, kian kudeng ayu kai maré baré luk sabpen kian maré baré luk nguit pedo' pa luunneh, do' Tuhan ngua' kuan kai.

²⁴Na, iamo' kai nenganau' ineh ngaceku matot anak muyuh pebala kuan kai mucu aco, 'Kapeh rorum muyuh ku Tuhan Allah lun Israil?

²⁵Bakenké Tuhan nenganau' Abpa' Yarden ini ku lakan arang kai nemuyuh? O inul Rubin idi inul Gad, muyuh na kuan babpat dengan Tuhan,' pad anak muyuh ngesaad anak-anak kai mucu ugka' ratnan nganau' sembayang nan Tuhan.

²⁶Ngaceku ineh kai nepebala, 'Do' kai nganau' anun luk pian kai, idi nganau' bubpun ini. Baken ieh ku baré sabpen kian baré kereten,

²⁷iamo' pelé bubpun ineh ku aceh luk maré kali' arang kai nemuyuh idi arang anak mupun tau luk mucu rat netau luk dueh babpat, idi kai teh miak sembayang nan Tuhan pa kiungNeh dengan baré luk sabpen kai, idi baré luk kereten kai, idi baré luk nguit pedo' kuan kai, pad anak muyuh na pebala kuan anak kai mucu, "Muyuh na inan babpat dengan Tuhan." ‘

²⁸Idi kudeng ini terawé kai, kudeng ayuneh bala ineh kuan kai mucu, idi kuan anak mupun kai, idi kai miak ngor, 'Nier muyuh ayu bubpun Tuhan ini, luk pangeh inau' tepun kai. Baken ieh ku baré sabpen. Baken ieh ku baré kereten, iamo' ku aceh tanu' arang kai nemuyuh.’

²⁹Na tu-tu kai ngedat Tuhan, idi na kai lemubed ratnan Tuhan dengan nenganau' aceh bubpun ku baré sabpen, baré akan, idi baré kereten baken ratnan bubpun Tuhan Allah kai luk pa atun LepoNeh!"

³⁰Pinihas luk imam idi amung lun rayeh, ieh ineh lun rayeh ruma' pupu Israil neninger amung bala ini luk bida' lun Rubin, lun Gad, idi lun Manasé, idi ideh mawang niat.

³¹Idi kebala Pinihas Eliasar luk imam kuan lun Rubin, lun Gad, idi lun Manasé, "Nekini kai kali' ratnan Tuhan idi arang tau, ngaceku na muyuh mesala' idi na mangun ku bunu' Tuhan. Idi nekini pana' muyuh pangeh nemuit nelun Israil ratnan useh Tuhan."

³²Idi Pinihas idi lun rayeh ruma' pupu Israil nelemubed rat tana' Giliad iné' tana' Kanaan, kuan amung lun Israil, idi nemaré kali' nedeh.

³³Idi lun Israil mawang niat ku bala ineh. Idi lun Israil pana' nengubur Allah. Idi na ideh pegayam pian amé' munu' nelun Rubin, lun Gad, idi ngusag bawang luk inandeh mudeng.

³⁴Idi lun Rubin idi lun Gad neneten bubpun ineh "Luk Maré Kali", ngaceku kebaladeh, "Ieh ineh aceh luk maré kali' arang tau ratnan Tuhan ineh, Allah.

Yusak 23

¹Mio pangeh ineh, kareb Tuhan Allah pangeh nemaré kuan lun Israil pedo' ratnan amung bunu'deh pekelibut, idi Yusak pana' mengered.

²Idi Yusak nenawar amung lun Israil, dengan amung lun mengered, idi lun rayeh, idi luk mutut ukum idi luk ngimet nedeh ineh. Idi kebalaneh nedeh, "Ui pangeh mengered.

³Idi muyuh pangeh nenier amung-amung luk pangeh inau' Tuhan Allah muyuh kuan amung pupu ni ngaceku muyuh. Idi Tuhan Allah muyuh teh luk pangeh nepebunu' ngaceku muyuh.

⁴Idi ui pangeh nemabpat pupu-pupu luk ketecan ini kuan muyuh maya' babpat inul muyuh, mepad kudeng amung pupu luk pangeh ilap rat Abpa' Yarden, pa busat aco suet Abpa' Rayeh luk pa acep aco.

⁵Idi Tuhan Allah muyuh teh miak ngusu nedeh ineh mucu rat pa kiung muyuh. Idi muyuh teh miak ngalap tana'deh ineh ku babpat muyuh, maya' kudeng bala Tuhan Allah muyuh nemuyuh.

⁶Ngaceku ineh do' muyuh maya' idi nganau' anun-anun luk inayud bang surat Ukum Musa, idi aleg ngelaba ineh,

⁷pad muyuh na perurum nan pupu luk tudo arang muyuh. Idi aleg muyuh neten ngadan allahdeh. Idi aleg pebulung ku ngadandeh. Idi aleg ngakem kuandeh idi tekeradung sembayang nedeh.

⁸Iamo' do' muyuh merapat inan Tuhan Allah muyuh, mepad kudeng luk pangeh inau' muyuh macing aco sini.

⁹Tuhan pangeh nengusu tuda'-tuda' pupu luk rayeh idi luk metueh ratnan babpatdeh rat pa kiung muyuh.

¹⁰Idi seburur muyuh miak ngerada' meribu bururdeh, ngaceku Tuhan Allah muyuh luk pebunu' kuan muyuh, maya' kudeng luk pangeh pijani'Neh kuan muyuh.

¹¹Idi ngaceku ineh nginita do'-do', pelé muyuh mawa inan Tuhan Allah muyuh.

¹²Kudeng muyuh lemubed idi maya' pupu-pupu luk na tabpen ini, luk mudeng arang muyuh, idi muyuh paweh nedeh,

¹³kali rungen Tuhan Allah muyuh na ngusu pupu-pupu ini rat pa kiung muyuh. Iamo' mucu ideh miak mangun ku aceh dereh kuan muyuh idi ku abpung idi lubang idi kudeng ét bebpet luun keted muyuh idi kudeng tabpa' bang mateh muyuh, pad muyuh maté bang bawang luk do' luk pangeh biré Tuhan Allah muyuh kuan muyuh ineh.

¹⁴"Idi nekini ui malé maté. Idi muyuh kali' dengan amung niat muyuh idi amung terawé muyuh, idi sebila' bala pana' na metutu' ratnan amung bala luk do' luk pangeh bida' Tuhan Allah muyuh ratnan lawé muyuh. Idi amungneh pangeh nangun kuan muyuh. Idi sebila' bala pana' na netutu' ratnan amung ineh.

¹⁵Iamo' miak mangun mucu mepad kudeng luk pangeh nangun kuan muyuh amung-amung luk do' luk bida' Tuhan Allah muyuh ratnan lawé muyuh. Kudeng ineh teh miak Tuhan ngukum nemuyuh, pad Ieh ngaté nemuyuh idi pad seburur pana' nateh luk ketecan bang bawang luk do' luk pangeh biré Tuhan Allah kuan muyuh.

¹⁶Kudeng muyuh ngelaba pejani' Tuhan Allah muyuh luk pangeh inau'Neh kuan muyuh, idi muyuh teh amé' nganau' kekamen kuan allah baken, idi tekeradung sembayang nedeh, kali' rungen useh Tuhan miak mebura' kuan muyuh."

Yusak 24

¹Mucu ratnan ineh idi Yusak nengamung amung inul pupu lun Israil déi' Sikem. Idi ieh nenawar amung lun Israil luk mengered, idi amung lun rayeh, idi lun luk mutut ukum, idi luk ngimet nedeh ineh. Idi ideh nacing tuped pa kiung Tuhan.

²Idi kebala Yusak nelun mula' ineh, "Kudeng ini bala Tuhan Allah lun Israil, 'Rat mon tepun muyuh mudeng i dipar Abpa' Pirat, ieh ineh Tira, taman Ibrahim idi taman Nahor. Idi ideh teh pangeh nesembayang nan allah baken.

³Idi taman muyuh Ibrahim ilapKu rat déi' dipar Abpa' Pirat, idi Ui nenguyut neneh nalan aput tana' Kanaan. Idi Ui namaré mula' inulneh, idi namaré Isak kuanneh.

⁴Idi kuan Isak Ui namaré Yakub idi Esau. Idi kuan Esau Ui namaré pegkung-pegkung Edom ku babpatneh. Iamo' Yakub perapu amung anak-anakneh netemurun iné' bawang Masir.

⁵Pangeh ineh Ui nengecuk ni Musa idi Arun, idi Ui nenecat Masir mepad kudeng luk pangeh inau'Ku arangdeh. Idi Ui nenguyut nemuyuh remuat.

⁶Kareb Ui pangeh nenated tepun muyuh neremuat rat bang bawang Masir, idi ideh nacing Abpa' Pisui. Idi lun Masir nengerada' tepun muyuh rat pa puet, maya' keréta idi maya' kuda macing abpa' ineh.

⁷Idi kareb ideh nenawar Negku, idi Ui nenganau' aceh dacem arangdeh idi arang amung lun Masir ineh. Idi Ui nengelubed abpa' ineh pa luundeh, idi nengakeb nedeh amung. Match muyuh pana' nenier anun luk pangeh inau'Ku kuan Masir. " 'Pangeh ineh muyuh netudo déi' su luk ali-ali tuda'-tuda' lak kinioneh.

⁸Idi Ui nenguit nemuyuh iné' bawang lun Amori, luk tudo pa busat aco Abpa' Yarden. Idi ideh nepebunu' nemuyuh. Iamo' Ui nemaré nedeh bang palad muyuh, pad muyuh nengalap tana'deh ku babpat muyuh. Idi Ui nengaté nedeh pa kiung muyuh.

⁹Idi Balak Sipor, raca' Moab teh, iné' pebunu' nelun Israil. Idi ieh nengecuk nelun nawar ni Bilam Bior, pelé ieh ngediman nemuyuh.

¹⁰Iamo' na Ui sikal ninger Bilam ineh, pad ieh ngeperuan nemuyuh teh. Idi Ui teh nemuit nemuyuh rat bang palad Balak.

¹¹Pangeh ineh idi muyuh neguta Abpa' Yarden. Kareb pangeh macing déi' Yeriko idi lun bang bawang Yeriko nepebunu' nemuyuh, ieh ineh lun Amori, lun Prisi, lun Kanaani, lun Hiti, lun Gergasi, lun Hiwi, idi lun Yebusi. Idi amungdeh ineh biréKu bang palad muyuh.

¹²Idi Ui nengecuk surun ngedereh pa kiung muyuh, luk miak ngusu dueh raca' Amori rat pa atun muyuh, ieh ineh baken dengan pelapet muyuh idi gaman muyuh.

¹³Ui nemaré nemuyuh aceh tana' luk na kikem muyuh, idi tuda'-tuda' bawang luk na pinudut muyuh. Idi nekini muyuh tudo bang ineh. Idi muyuh kuman uli' kabun anggur idi lawa saitun luk na tinibu muyuh.' “

¹⁴Idi teh kebala Yusak, "Idi ngaceku ineh do' muyuh sembayang inan Tuhan idi nganau' kekamen kuanNeh dengan niat luk lutep idi matu. Idi necan amung allah luk inubur tepun-tepun muyuh luk dipar Abpa' Pirat idi déi' Masir pana'. Iamo' do' muyuh mepicet maya' Tuhan.

¹⁵Idi kudeng muyuh na sikal mepicet maya' Tuhan, do' nekini muyuh mili' idé' luk pian bén muyuh, allah luk inubur tepun muyuh dipar Abpa' Pirat, kian allah lun Amori bang tana' luk inan muyuh tudo nekini. Iamo' ui idi lun bang tetek ruma'ku sikal maya' Tuhan."

¹⁶Idi kebala lun mula', "Na kai sikal necan Tuhan idi maya' allah baken.

¹⁷Ngaceku Tuhan Allah kai, Ieh ineh luk pangeh nemuit nekai idi tepun kai ratnan kekamen demulun déi' bawang Masir, idi luk pangeh nenganau' tanu' luk do' luk meluun rayeh su siren kai, idi luk pangeh nengasa' nekai seruked dalam luk bén kai, idi arang amung pupu luk pangeh linaba kai.

¹⁸Idi Tuhan teh pangeh nengusu amung pupu ineh rat pa atun kai. Kudeng ineh teh kuan amung lun Amori, ieh ineh lun bang bawang ini. Idi kai ini pana' sikal maya' Tuhan teh, ngaceku Ieh ineh Allah kai."

¹⁹Idi kebala Yusak nelun mula' ineh, "Muyuh na miak maya' Tuhan, ngaceku Ieh ineh Allah luk meligan, idi Allah luk temaruh. Idi na Ieh miak maré do' ku sala' muyuh idi kekamen muyuh luk dat.

²⁰Kudeng muyuh necan Tuhan idi maya' allah luk baken, idi Ieh pana' miak teketed idi ngukum nemuyuh, nekini Ieh miak ngaté nemuyuh sagan tu pana' Ieh do' nemuyuh atun."

²¹Idi kebala lun mula' ineh ni Yusak, "Baken! Iamo' kai sikal maya' Tuhan teh."

²²Idi kebala Yusak nedeh, "Muyuh mangun ku luk maré kali' kuan burur muyuh sebuleng ratnan muyuh pangeh nemili' Tuhan." Idi kebaladeh, "Kai ini lun luk maré kali'."

²³Idi kebala Yusak nedeh, "Nekini teh talan muyuh amung akang lun pupu baken luk arang muyuh. Idi do' muyuh merapet inan Tuhan Allah lun Israil."

²⁴Idi kebala lun mula' ni Yusak, "Kai sikal maya' Tuhan Allah kai, idi maya' balaNeh."

²⁵Idi aco sineh teh Yusak nenganau' aceh pejani' kuan lun mula' ineh déi' Sikem. Idi ieh nemarké kuandeh tuda'-tuda' ukum idi bada'.

²⁶Idi amung bala ineh inayud Yusak bang surat Ukum Allah. Idi ieh nengalap aceh batu luk rayeh. Idi tipedneh déi' liang lawa kayuh luk meraben luk muneng ku Su luk Meligan kuan Tuhan.

²⁷Idi kebala Yusak nelun mula' ineh, "Siruh! Batu ini mangun ku luk maré kali' kuan tau. Ngaceku batu ini pangeh neninger amung bala Tuhan luk bilaNeh netau. Ieh ini pana' miak mangun ku luk maré kali' kuan muyuh, pad muyuh na teketed ratnan Allah muyuh."

²⁸Idi Yusak nengecuk nelun mula' ineh muli' amé' anid-anid su babpatdeh.

²⁹Idi mucu ratnan ineh Yusak Nun, demulun Tuhan ineh naté kareb ulunneh meratu pulu' lak.

³⁰Idi ideh nenanem neneh nan tana' babpatneh déi' Timnat Sera, luun pegkung-pegkung Epraim, pa tinueh busat aco Pegkung Gaas.

³¹Idi lun Israil pana' nemaya' Tuhan seruked ulun Yusak, idi seruked ulun amung lun mengered mucu rat ni Yusak, luk pangeh nekali' amung kekamen Tuhan luk inau'Neh kuan lun Israil ineh.

³²Idi teh tulang-tulang Yusup luk pangeh inuit lun Israil maya' nedeh rat Masir, tinanemdeh déi' Sikem bang tana' luk pangeh bilih Yakub rat nelun Hamor taman Sikem ku meratu balad pirak. Ngaceku ieh ineh pangeh nangun ku babpat inul Yusup.

³³Idi teh Eliasar Arun naté. Idi ideh nenanem neneh luun surud luk pangeh biré kuan anakneh Pinihas déi' luun pegkung-pegkung Epraim.

Lun Luk Nguyut

Lun Luk Nguyut 1

- ¹Kareb Yusak pangeh natée, idi lun Israil nengitun Tuhan, kebaladeh, "Idéekée rat arang kai miak nalan atun amée' munu' nelun Kanaani?"
- ²Idi kebala Tuhan, "Do' pupu Yahuda nalan atun, idi Ui miak marée bawang ineh bang paladdeh."
- ³Idi kebala lun Yahuda nelun pupu Simion, "Amée' maya' nekai ngalap bawang luk litep kuan kai, idi do' tau amée' munu' nelun Kanaani. Idi kai pana' miak nalan maya' nemuyuh ngalap bawang luk litep kuan muyuh." Idi lun pupu Simion pana' nenalan maya' nedeh.
- ⁴Idi lun Yahuda nenalan pad-pad dengandeh, idi Tuhan nemarée tueh kuandeh pad ideh nengelaya' 10,000 burur lun Kanaani idi lun Prisi déei' bawang Besek.
- ⁵Idi ideh nepapu' Adonibesek ineh idi nemunu' neneh, idi ideh nengelaya' nelun Kanaani idi lun Prisi ineh.
- ⁶Adonibesek neburo. Idi ideh nengerada' neneh idi nengakem neneh, idi ideh nenetek bua' ticu' mebpuh idi bua' kukud mebpuhneh.
- ⁷Idi kebala Adonibesek, "Inan tudu' ngepulu' burur lun raca' luk titek bua' ticu' mebpuh idi bua' kukud mebpuhdeh ngamung areg-areg nuba' iring téngku. Idi Allah pangeh nengua' kuanku maya' kudeng luk inau'ku nedeh." Idi ideh nenguit Adonibesek inée' Yerusalim, idi ieh natée déei'.
- ⁸Pupu Yahuda nengaro bawang Yerusalim, idi nengalap ineh. Idi ideh nengatée amung lun bang bawang ineh idi nenutung amung ruma'deh.
- ⁹Pangeh ineh idi ideh inée' munu' nelun Kanaani luk tudo luun pegkung déei' Negeb idi luk luun raked teh.
- ¹⁰Idi teh lun Yahuda inée' munu' nelun Kanaani luk tudo déei' Hebron. Idi atun ngadan bawang Hebron ineh Kiriat Arba. Idi ideh nengelaya' pupu Sesai, Ahiman, idi Talmi.

- ¹¹Idi rat Hebron ideh nenalan inée' munu' lun bang bawang Debir. Idi atun ngadan bawang Debir ineh Kiriati Seper.
- ¹²Idi kebala Kaleb, "Ui miak marée anakku luk decur, ngadanneh Aksa ku awan lemulun luk ngelaya' Kiriati Seper."
- ¹³Idi bawang ineh linaya' Otniel anak Kenas, kinanak Kaleb luk isuut. Idi Kaleb nemarée anakneh luk ngadanneh Aksa ku awanneh.
- ¹⁴Idi kareb decur ineh nacing, idi Otniel nengecuk neneh mutuh selang tana' ratnan tamanneh. Idi decur ineh netemurun rat luun keladaineh, idi Kaleb nengitun neneh, "Anun luk pianmu?"
- ¹⁵Idi ieh nengor balaneh, "Marée aceh peruan kuanku. Ngaceku iko nemarée tana' luk tekering kuanku, do' marée tuda'-tuda' bued abpa' teh." Idi ieh nemarée kuanneh bued abpa' luk pa dayeh idi luk pa lod teh.
- ¹⁶Idi inul iban Musa, ieh ineh lun Keni inée' maya' nelun Yahuda rat bawang piasau inée' su luk ali-ali déei' Yahuda, pa kabing busat aco déei' Arad. Idi ideh netudo dengan lun Amalek.
- ¹⁷Idi lun Yahuda nemaya' pupu Simion, idi ideh nengelaya' nelun Kanaani luk tudo déei' Sepat. Idi ideh nengediman bawang ineh idi nengusag ineh. Idi ideh neneten ngadan bawang ineh "Inusag."
- ¹⁸Idi lun Yahuda na nengelaya' Gasa, Askelon, idi Ekron perapu ku amung babpatdeh.
- ¹⁹Idi Tuhan nengedengan nelun Yahuda, pad ideh nengalap amung tana' pegkung. Iamo' na ideh nengusu lun luk tudo tangeb abpa' rayeh. Ngaceku ideh inan keréeta belawan.
- ²⁰Idi Hebron ineh birée kuan Kaleb, maya' kudeng luk bila Musa. Idi ieh nengusu rat déei' teluh burur anak deléei Enak.
- ²¹Iamo' pupu Benjamin ineh na nengusu lun Yebusi luk tudo déei' bawang Yerusalim. Iamo' lun Yebusi ineh tudo bang bawang Yerusalim dengan pupu Benjamin macing aco sini.

22-23 Idi pupu Epraim idi Manasée nenalan inée' ngaro bawang Baitel. Idi atun ngadan bawang ineh Lus. Idi Tuhan nengedengan nedeh. Idi ideh nengecuk tuda'-tuda' bururdeh amée' nier bawang Baitel.

24 Idi lun luk inée' nier ineh nenier aceh burur deléei remuat rat bang bawang ineh. Idi kebaladeh neneh, "Mada' nekai su apeh dalam semuet amée' bang bawang ini, pad kai na ngatée' namu."

25 Idi ieh nemada' nedeh dalam semuet bang bawang ineh. Idi ideh nengatée' amung lun bang bawang ineh. Iamo' léei sineh perapu ku uang tetek ruma'neh sinima'deh.

26 Idi ieh inée' tana' lun Hiti. Idi ieh nemudut aceh bawang, idi nenganau' ngadanneh Lus macing aco sini.

27 Idi pupu Manasée na nengusu nelun luk tudo bang bawang Bait Sian, Taanak, Dor, Ibliam, Megido, idi bawang luk muneng ku bawang ineh pana'. Ngaceku lun Kanaani lutep tudo luun tana' ineh.

28 Idi kareb lun Israil mangun metueh, ideh nengesaad nelun Kanaani ngakem, iamo' na ideh nengusu nedeh amung rat bang bawang ineh.

29 Kudeng ineh teh Epraim na nengusu nelun Kanaani luk tudo déei' Giser. Iamo' lun Kanaani ineh netudo dengandeh bang bawang ineh teh.

30 Idi pupu Sebulon pana' na nengusu nelun luk tudo bang bawang Kitron, idi Nahalal. Iamo' lun Kanaani netudo dengandeh idi sinaad ngakem kuandeh.

31 Idi pupu Aser pana' na nengusu nelun luk tudo bang bawang Ako, Sidon, Alab, Aksib, Helba, Apik, idi Rehob.

32 Iamo' lun Aser ineh netudo arang lun Kanaani luk mudeng bang bawang ineh, ngaceku na ideh inusudeh.

33 Idi Naptali pana' na nengusu nelun luk tudo bang bawang Bait Semes, idi Bait Anat. Iamo' ideh netudo arang lun Kanaani luk mudeng bang bawang ineh, idi ideh sinaad ngakem kuandeh.

³⁴Idi lun Amori pana' nengusu nelun Dan amée' luun pegkung. Na ideh nemarée nedeh amée' luun raked.

³⁵Idi teh lun Amori ineh lutep tudo déei' luun Pegkung Heres, déei' Aijalon, idi déei' Salbim. Iamo' pupu Epraim idi Manasée metueh ngimet nedeh idi nengesaad nedeh ngakem kuandeh.

³⁶Idi lakan bawang lun Amori ineh mudik rat Ruan Menipal Kara' luk pa luun Batu Sela.

Lun Luk Nguyut 2

¹Idi Melaikat Tuhan nacing rat Gilgal inée' Bokim. KebalaNeh nelun Israil, "Ui nenguit nemuyuh remuat rat bang bawang Masir, idi nenated nemuyuh semuet bang bawang luk pangeh pijani'Ku kuan tepun muyuh. KebalaKu, 'Na Ui miak ngelaba jani'Ku nemuyuh macing raked-raked.

²Aleg muyuh pejani' nelun bang bawang ini. Do' muyuh ngusag amung bubpundeh.' Iamo' na muyuh nemaya' balaKu. Nier luk inau' muyuh!

³Ngaceku ineh Ui mada' nemuyuh nekini, na Ui miak ngusu pupu ineh rat pa atun muyuh. Iamo' ideh miak mangun ku bunu' muyuh. Idi akangdeh mangun ku abpung kuan muyuh."

⁴Idi kareb Melaikat Tuhan nepebala kudeng ini, amung lun Israil nenangi'.

⁵Idi ineh pundeh neneten ngadan su ineh "Lun Luk Nangi'." Idi su ineh ideh nemarée barée kuan Tuhan.

⁶Yusak nengecuk nelun Israil ineh muli', idi anid-anid bururdeh inée' ngalap babpat tana'deh sebuleng.

⁷Idi lun Israil mepicet maya' Tuhan raked ulun Yusak idi teh raked ulun lun rayeh luk mucu rat ni Yusak, luk pangeh nekali' amung luk pangeh inau' Tuhan kuan lun Israil.

⁸Idi Yusak Nun demulun Tuhan ineh natée kareb ulunneh 110 lak.

⁹Idi ieh tinanemdeh luun tana' luk babpatneh luk déei' Timnat Heres, luun aceh surud Epraim pa tinueh busat aco Pegkung Gaas.

- ¹⁰Idi amung pupu ineh pana' natée. Idi inul luk mucu rat nedeh, na nengerawée Tuhan idi kekamen luk pangeh inau'Neh kuan lun Israil.
- ¹¹Idi lun Israil nenganau' sala' pa kiung Tuhan idi nesembayang inan Baal.
- ¹²Idi ideh nugka' sembayang inan Tuhan, Allah tepundeh, luk pangeh nenguit nedeh remuat rat bang bawang Masir. Idi ideh nengimun sembayang inan allah baken, ieh ineh allah pupu luk libut-libutdeh. Idi ideh netekeradung sembayang nedeh, idi nenganau' Tuhan méet niat.
- ¹³Ideh nugka' sembayang inan Tuhan idi ideh nesembayang inan Baal idi Asterot.
- ¹⁴Idi Tuhan pelaba useh nelun Israil, pad Ieh nenima' nelun luk dat ngaro bawang idi ngalap binawehdeh. Ieh nenima' amung bunu' luk libut-libutdeh ngelaya' nedeh, pad ideh na tuman matar bururdeh sebuleng.
- ¹⁵Anid karebdeh inée' pebunu', Tuhan mangun ku bunu'deh maya' kudeng luk bilaNeh, pad ideh pelaba susa'.
- ¹⁶Idi Tuhan nemarée tuda'-tuda' lun luk nguyut luk metueh kuan lun Israil, luk nemuit nedeh ratnan lemulun luk dat.
- ¹⁷Iamo' na ideh nemaya' nelun luk nguyut nedeh. Idi ideh na lutep maya' Tuhan, iamo' ideh nesembayang inan allah baken. Tamandeh pangeh nemaya' bala Tuhan, iamo' pupu ini mesaget nugka' nganau' luk kudeng ineh.
- ¹⁸Idi kareb Tuhan pangeh nemarée lun luk nguyut nedeh, Tuhan miak ngedengan neneh, idi miak muit pupu ineh ratnan bunu'deh raked ulun lun luk nguyut ineh. Tuhan méei' nedeh ngaceku ideh nengarod ku susa' idi derehdeh.
- ¹⁹Iamo' kareb lun luk nguyut ineh natée, lun Israil nelemubed maya' dalam luk mon, idi nenganau' kekamen luk meluun dat ratnan kekamen tamandeh. Ideh nemaya' allah baken, idi nesembayang nedeh, idi nengubur nedeh. Ideh metueh sikal maya' dalandeh luk dat.

²⁰Ngaceku ineh Tuhan pelaba useh nelun Israil, kebalaNeh, "Pupu ini pangeh nengelaba jani'Ku, luk pangeh bida'Ku kuan tepundeh. Idi na ideh neninger arodKu.

²¹Ngaceku ineh Ui pana' na sikal ngusu sebuleng pupu luk tican Yusak bang tana' ineh kareb ieh natée.

²²Ratnan luk kudeng ineh Ui miak nier kudeng lun Israil sikal maya' dalanKu, mepad kudeng tepundeh."

²³Idi Tuhan nenima' amung pupu ineh luk baken bang imet Yusak tudo arangdeh. Na Ieh petacu nengusu nedeh.

Lun Luk Nguyut 3

¹Idi ini amung lun pupu baken luk sinima' Tuhan, pad ideh nutun nelun Israil luk nateh nekali' pebunu' bang bawang Kanaan.

²Ieh nenganau' kudeng ineh pelée amung lun Israil miak pekalai pebunu', meluun teh kuan lun luk nateh nepebunu' atun.

³Idi luk neketecan, ieh ineh limeh burur raca' lun Pilistin, idi amung lun Kanaani, lun Sidon, idi lun Hiwi, luk tudo luun Pegkung Lebanon, rat Pegkung Baal Hermon macing Ruan Hamat.

⁴Ideh ineh ku nutun nelun Israil, pad nier nedeh, kudeng ideh maya' ukum luk birée Tuhan kuan tepundeh dengan tang Musa.

⁵Idi lun Israil netudo arang lun Kanaani, lun Hiti, lun Amori, lun Prisi, lun Hiwi, idi lun Yebusi.

⁶Idi ideh nengaweh nedeh idi nesembayang inan allahdeh.

⁷Idi lun Israil na nengerawée Tuhan Allahdeh. Ideh nenganau' sala' pa kiungNeh. Idi ideh nesembayang inan Baal idi Asterot.

⁸Idi Tuhan museh nelun Israil. Idi Ieh nenima' Kusan Risataim, luk raca' Mesopotamia ngelaya' nedeh. Idi lun Israil bang imet raca' ineh ualuh lak kinioneh.

- ⁹Idi lun Israil nengitang nawar Tuhan, idi Tuhan nemarée seburur lemulun luk nemuit nelun Israil, ieh ineh Otniel anak Kenas, kinanak Kaleb luk isuut.
- ¹⁰Idi Roh Tuhan netemurun luunneh, pad ieh mangun ku lun nguyut nelun Israil. Idi Otniel inée' pebunu'. Idi Tuhan nemarée tueh kuanneh kareb ieh nepebunu' inan raca' Mesopotamia.
- ¹¹Idi bawang ineh na inan bunu' apat ngepulu' lak kinioneh. Idi Otniel Kenas natée.
- ¹²Idi sekua' teh lun Israil nenganau' sala' pa kiung Tuhan. Ngaceku ineh Tuhan nenganau' Eglon, raca' lun Moab, metueh rat nelun Israil.
- ¹³Idi Eglon nepamung dengan lun Amon idi lun Amalek. Idi ideh nengelaya' nelun Israil idi nengalap Bawang Piasau.
- ¹⁴Idi lun Israil bang imet Eglon, pulu' ualuh lak kinioneh.
- ¹⁵Idi lun Israil nengitang nawar Tuhan, idi Ieh nemarée seburur lemulun luk nemuit nedeh, ieh ineh Ehud Gera, ratnan inul Benjamin. Idi ieh seburur lun luk mekabing. Idi lun Israil nengecuk neneh nguit usin pupuk kuan Eglon, raca' lun Moab ineh.
- ¹⁶Idi Ehud nenganau' aceh pelapet luk tadem pekop, sesikuh kikadangneh, idi nengapung ineh pa liang kuyu'neh pa tinueh.
- ¹⁷Idi ieh nenated usin pupuk ineh kuan Eglon, ieh ineh seburur lemulun luk pelaba lamu.
- ¹⁸Idi kareb Ehud pangeh nemarée usin pupuk ineh idi ieh nengecuk nelun luk inée' maya' neneh muli'.
- ¹⁹Idi ieh sebuleng nelemubed rat ku batu luk inarit luk muneng ku Gilgal, idi ieh inée' papu' raca', kebalaneh neneh, "O tuanku, inan sebila' bala luk pian beléenku namu dengan lulem." Idi kebala raca' kuan luk dukenneh, "Buro muyuh." Idi amung-amungdeh neremuat.

²⁰Idi Ehud inée' matun raca' kareb ieh tudo bang takepneh luk do' bui. Idi kebala Ehud neneh, "Inan aceh bala ratnan Allah kuanmu." Idi raca' ineh nudur.

²¹Idi Ehud nengalap pelapetneh ku ticu'neh pa kabing, luk inapungneh i awa'neh pa tinueh. Idi ieh nenebpek batek raca',

²²pad tunanneh pana' nesemuet bang bururneh perapu uangneh. Idi tunanneh nebpu ku lemakneh, ngaceku ieh na nengangat neneh. Idi pelapet nepesut su puetneh.

²³Idi Ehud neremuat, idi nemasak tanga' ineh.

²⁴Idi ieh neburo. Idi lun duken raca' nacing, idi ideh nenier tanga' ineh pinasak. Idi keterawéedeh, ieh bubpa' bang takep ineh.

²⁵Idi ideh nenganéet neneh, iamo' na ieh nengukab tanga'. Idi ideh nengalap taka tanga' ineh idi nengukab ineh idi ideh nenier tuandeh pangeh natée.

²⁶Idi laba' ideh nganéet munung tanga' ineh idi Ehud neburo. Idi ieh nelemaba batu luk inarit ineh inée' déei' Sira.

²⁷Kareb ieh nacing déei', idi ieh nengiup unga dumbaneh luun pegkung-pegkung Epraim nawar nelun Israil amée' pebunu'. Idi ieh nenguit nedeh musul pegkung ineh.

²⁸Kebalaneh nedeh, "Maya' negku. Ngaceku Tuhan marée nemuyuh metueh ratnan bunu' muyuh lun Moab." Idi amungdeh nemaya' neneh. Idi ideh nengalap su luk inan lun Moab guta Abpa' Yarden. Na ideh nemarée seburur pana' guta ieneh.

²⁹Idi kareb ineh ideh nengatée 10,000 burur lun Moab luk metueh. Idi seburur pana' nateh luk nepuit.

³⁰Idi lun Israil nengelaya' Moab bang aco sineh, idi bawang ineh na inan bunu' ualuh ngepulu' lak kinioneh peh.

³¹Idi lun nguyut luk mucu rat ni Ehud, ieh ineh Samgar anak Anat, luk nengatéé 600 burur lun Pilistin ku rukud lun ngasa' sapi'. Ieh pana' nemuit nelun Israil.

Lun Luk Nguyut 4

- ¹Kareb Ehud pangéh natée, idi lun Israil nenganau' sala' pa kiung Tuhan teh.
- ²Ngaceku ineh Tuhan nenima' nedeh linaya' Yabin, seburur raca' lun Kanaani, luk ngimet bawang Hasor, idi lun rayeh bawehneh, ieh ineh Sisera, luk tudo déei' Haroset, Bawang Lun Pupu Baken.
- ³Idi kareb ineh lun Israil nengitang nawar Tuhan, ngaceku raca' ineh inan 900 keréeta belawan. Idi teh ieh pangéh nengedereh nelun Israil dengan gatehneh dueh ngepulu' lak kinioneh.
- ⁴Debora, ieh ineh seburur nabi luk decur luk awan Lapidot, nguyut nelun Israil bang kareb ineh.
- ⁵Idi ieh netudo liang lawa piasau luk arang Rama dengan Baitel luun pegkung-pegkung Epraim. Idi lun Israil pana' inée' ngitun neneh.
- ⁶Idi ieh nengecuk nelun ngalap Barak Abinoam rat Kedes Naptali. Kebalaneh neneh, "Bala Tuhan Allah lun Israil kudeng ini, 'Do' iko nguit 10,000 burur pupu Naptali idi Sebulon amée' Pegkung Tabor.
- ⁷Ui miak nguit Sisera lun rayeh baweh Yabin amée' pebunu' nemuyuh déei' Abpa' Kison. Kali' rungen ieh inan keréeta idi mula' lun pebunu' teh, iamo' Ui ngetueh nemuyuh.' “
- ⁸Kebala Barak ni Debora, "Ui miak amée' kudeng iko maya' negku. Kudeng iko na amée', ui pana' nateh amée'.”
- ⁹Kebala Debora, "Mo, ui miak maya' namu. Iamo' iko na miak buren ku tuehmu, ngaceku Tuhan miak marée Sisera bang palad seburur decur." Idi Debora maya' neneh inée' Kedes.
- ¹⁰Idi Barak nenawar pupu Sebulon idi Naptali amée' Kedes, idi ieh nenguit 10,000 burur maya' neneh. Idi Debora pana' nemaya' neneh.

¹¹Idi Heber lun Keni ineh nepatad rat nelun Keni luk baken ratnan inul Hobab, luk iban Musa. Idi ideh nelupo muneng ku Kedes luk iring kayuh luk meraben déei' Sananim.

¹²Idi ideh nemada' ni Sisera ratnan i Barak Abinoam inée' luun Pegkung Tabor.

¹³Idi Sisera nenawar amung bawehneh dengan 900 keréeta belawan, idi nengecuk nedeh nalan, rat Haroset Bawang Lun Pupu Baken amée' Abpa' Kison.

¹⁴Idi kebala Debora ni Barak, "Do' iko nalan! Ngaceku aco sini Tuhan marée ni Sisera bang paladmu. Tuhan luk nguyut namu." Idi Barak neremuru rat luun Pegkung Tabor ineh dengan lun luk pulu' ngeribu ineh.

¹⁵Kareb Barak idi bawehneh nacing, idi Tuhan nengagau ni Sisera dengan bawehneh idi keréetaneh, idi Sisera netemurun rat bang keréetaneh, idi nupun buro.

¹⁶Idi Barak nengerada' amung keréeta idi bawehneh ineh macing déei' Haroset Bawang Lun Pupu Baken. Idi amung baweh Sisera ineh pinatée, pad seburur pana' nateh luk ketecan.

¹⁷Iamo' Sisera neburo inée' lepo Yael, awan Heber, lun Keni ineh, ngaceku Yabin, raca' Hasor pangeh nepedo' dengan amung uang tetek ruma' Heber.

¹⁸Idi Yael neremuat inée' papu' ni Sisera, kebalaneh, "Do' iko semuet bang lepoku. Aleg matot." Idi ieh nesemuet. Idi Yael nenarub neneh.

¹⁹Kebala Sisera neneh, "Marée aceh abpa' rupenku, ngaceku ui meparing." Idi ieh nengukab seréei' kubil luk inan abpa' rata idi nemarée rupenneh. Pangeh ineh idi ieh nenarub neneh teh.

²⁰Idi kebala Sisera neneh teh, "Do' iko tured munung tanga'. Idi kudeng inan lun macing ngitun namu, 'Inankée lun tungée'?' do' iko ngor, 'Na lemulun tungée'.' “

²¹Pangeh ineh Sisera nerudap lelek-lelek ngaceku merur. Idi Yael, awan Heber ineh, nengalap aceh papek leponeh idi tuno. Idi ieh inée' saak-saak matun neneh. Idi ieh nemaper papek ineh luun madu'neh, pesut luun tana'. Idi ieh natée.

²²Kareb Barak nacing nakap ni Sisera, idi Yael inée' papu' neneh, kebalaneh neneh, "Amée' tungée'. Ui pian mada' namu lun luk tekapenmu ineh." Idi ieh inée' maya' neneh. Idi kareb ieh nesemuet bang lepo ineh idi ieh nenier ni Sisera pangeh natée. Idi papek ineh pana' idi teh bang madu'neh.

²³Idi kareb ineh Allah nengelaya' ni Yabin, raca' Kanaan ineh, kuan amung lun Israil.

²⁴Idi lun Israil meluun tueh nengerieng ni Yabin, raca' Kanaan, pad macing ideh nengatée neneh.

Lun Luk Nguyut 5

¹Idi bang aco sineh teh Debora idi Barak Abinoam nemenani nani ini:

²"Ngubur Tuhan! Lun rayeh Israil geregan pebunu'; idi anak itin pana' inée' dengan mawang niat!

³Ninger muyuh, O raca'-raca'! Idi ngeten lalid muyuh, O muyuh lun rayeh-rayeh! Ui pian menani idi marée ubur kuan Tuhan Allah lun Israil!

⁴O Tuhan, kareb Iko nenalan rat pegkung-pegkung Sir, idi nelemaba raked Edom, idi tana' neruyuh, idi udan pana' nebpeh, idi laput pana' nengeruat abpa'.

⁵Idi amung pegkung neruyuh pa kiung Tuhan déei' Pegkung Sinai, ieh ineh pa kiung Tuhan, Allah lun Israil.

⁶Idi bang kareb Samgar Anat, idi Yael teh, na mula' lemulun maya' dalam rayeh, idi ideh luk nalan nemaya' dalam baken.

⁷Idi mula' bawang lun Israil pangeh tican, O Debora, idi pelaba dat ali, kareb nateh iko nacing, idi mangun ku tinan amung lun Israil.

⁸Kareb ideh nemili' allah luk mebaruh inankée bunu' bang bawangdeh? Inankée lun ngimet utap idi gaman arang apat ngepulu' ribu lun Israil?

⁹Idi ui pian ku amung lun rayeh baweh lun Israil idi anak itindeh luk inée' dengan mawang niat. Ngubur Tuhan!

¹⁰O amung muyuh luk maya' keladai luk mebuda', idi luk tudo luun tapin luk meluun do', idi muyuh luk nalan maya' tana', do' mada' ineh.

¹¹Do' ninger ria' lun mula' luk iring subuk, luk mada' ratnan tueh Tuhan, idi ratnan tueh lun Israil. "Idi pupu Tuhan nenalan rat bawangdeh.

¹²Kulat, kulat, O Debora! Kulat, kulat, do' iko menani! Nalan, O Barak, anak Abinoam, nguit lun luk tibanmu ineh.

¹³Lemulun luk lutep maya' Tuhan inée' negku. Idi ideh temina' maya' lun rayehdeh amée' pebunu'.

¹⁴Ideh nenalan rat Epraim macing luun raked maya' puet pupu Benjamin. Idi lun rayeh-rayehdeh nacing rat Makir, lun luk nguyut nedeh nacing rat Sebulon.

¹⁵Idi lun rayeh-rayeh Iskar inée' maya' ni Debora; idi Iskar pana' inée' idi Barak teh. Ideh nemaya' neneh macing luun raked. Iamo' pupu Rubin, mepedueh niat, idi na ideh inée' maya' nedeh.

¹⁶Ngudeh ideh netudo dengan dawa' dumba di, idi ninger tawar lun luk matar dumba ineh lek? Kali' rungen pupu Rubin mepedueh niat, idi na ideh inée' maya' nedeh.

¹⁷Idi lun Giliad netudo pa busat aco Abpa' Yarden ineh, idi pupu Dan netudo bang laman. Idi pupu Aser netudo tangeb abpa' rayeh.

¹⁸Iamo' pupu Sebulon idi Naptali na matot matée kareb pebunu'.

¹⁹"Idi amung raca' nacing idi nepebunu', déei' Tanak, tangeb Abpa' Megido. Idi amung raca' Kanaan nepebunu' teh, iamo' sebalad pirak pana' nateh luk nekarodeh.

²⁰Idi gituen pana' nepebunu' ni Sisera rat déei' langit.

²¹Idi Abpa' Kison pana' netemubu' idi nenganud nedeh. Ui miak nalan petacu dengan tueh!

²²Idi amung kuda pana' nupun, idi apundeh pelaba karu'.

²³"Ngediman Meros, kebala melaikat Tuhan. Ngediman amung lun luk mudeng su ineh. Ideh na nacing ngedengan Tuhan, bang bunu'Neh.

²⁴"Luk ngalap peruan meluun ratnan amung decur, ieh ineh Yael, awan Heber lun Keni ineh. Idi ieh luk ngalap peruan meluun ratnan amung decur, luk tudo bang lepo kibung.

²⁵Sisera nemutih abpa', iamo' ieh nemarée rata sapi', ieh nemarée ineh bang sangkir luk meluun do'.

²⁶Idi ieh nengalap aceh papek, idi tuno teh. Idi ieh nenecat ni Sisera, idi nemila' uluhneh.

²⁷Idi ieh petacu neluka', idi natée iring kukudneh.

²⁸"Idi tinan Sisera nenier rat bang tabuk, kebalaneh. 'Ngudeh keréetaneh pelaba io macing? Ngudeh kudaneh pelaba ulai lemubed?'

²⁹Idi decur luk meluun ileh nengor balaneh, idi ieh pana' nepebala kudeng ini,

³⁰'Kian, ideh nakap binaweh kuandeh lek, idi nakap decur maniddeh, idi kibung luk do', idi abet dier luk tibaruh kuan tinan raca.'

³¹"Dengan luk kudeng ineh nima' amung bunu'Mu matéé, O Tuhan. Iamo' do' lun rurunMu merasat mepad kudeng asat aco." Idi bawang ineh na inan bunu' apat ngepulu' lak kinioneh.

Lun Luk Nguyut 6

¹Idi lun Israil nenganau' sala' pa kiung Tuhan. Idi Tuhan nemarée nedeh bang imet lun Midian tudu' lak kinioneh.

²Idi lun Midian metueh rat nelun Israil, idi lun Israil nesigapung bang lubang-lubang batu idi iapeh-iapeh pana', ngaceku matot nelun Midian.

³Kareb lun Israil nenganau' lati', idi lun Midian dengan lun Amalek idi pupu rat su luk ali-ali megéei' pebunu' nedeh.

⁴Idi ideh nelupo petutup nedeh, idi ideh nengalap tibudeh pad macing libut bawang Gasa. Sesuut pana' nateh luk ticandeh kuan lun Israil, do' ratnan améek, dumba, sapi', idi keladai, sebuleng pana' nateh luk ketecan.

⁵Ideh megéei' amée' idi nguit lepo kibungdeh dengan amung aya'deh. Idi kinula'deh mepad kudeng kato, idi dengan untadeh ideh na miak mekiap. Idi ideh nacing pian ngusag bawangdeh.

⁶Idi lun Israil pelaba laya' rat nedeh. Idi ideh nenawar Tuhan mutuh pedengan.

⁷Kareb lun Israil nengitang nawar Tuhan ngaceku lun Midian ineh,

⁸idi Tuhan nengecuk aceh nabiNeh kuandeh, kebalaneh, "Ini bala Tuhan Allah lun Israil: Ui nenguit nemuyuh remuat rat bang bawang Masir, su luk inan muyuh tiban.

⁹Ui nemuit nemuyuh ratnan imet lun Masir idi rat nelun luk pebunu' nemuyuh ieni. Idi Ui nengusu nedeh rat pa kiung muyuh. Idi tana'deh pana' pangeh biréeKu nemuyuh.

¹⁰Ui pangeh nemada' nemuyuh, 'Ui ini Tuhan Allah muyuh, aleg muyuh sembayang inan allah lun Amori, luk kuan tana' luk inan muyuh tudo nekini. Iamo' na muyuh neninger balaKu.' “

¹¹Melaikat Tuhan nacing idi netudo iang kayuh luk meraben luk déei' Opira idi luk kuan Yoas lun Abieser. Idi anakneh Gidion sigapung rumik padée bang su luk inan mureg bua' anggur, ngaceku matot nelun Midian.

¹²Idi Melaikat Tuhan nesilangan neneh, kebalaNeh, "Tuhan idi denganmu, O, iko luk metueh idi mekuu'.”

¹³Iamo' kebala Gidion Neneh, "Kian lek, kudeng ayuneh Tuhan idi dengan kai, kudeng apeh amung ini mangun kuan kai. Kudeng apehkée amung kekamenNeh luk do' luk bila tepun kai nekai, kebaladeh, 'Tuhan teh pangeh

nenated nekai remuat rat bang bawang Masir.' Iamo' nekini Tuhan pangeh nenecan nekai, idi pangeh nemarée nekai bang palad lun Midian.”

¹⁴Idi Tuhan nengecuk neneh, kebalaNeh, "Amée' iko dengan amung tueh luk namu, idi muit nelun Israil rat nelun Midian. Ui ini luk ngecuk namu.”

¹⁵Idi kebalaneh Neneh, "O Tuhan kudeng apehkée ui miak muit nelun Israil, ngaceku lun bang tetek ruma'ku pelaba laya' arang pupu Manasée. Idi ui luk isuut rat arang anak i Ama'.”

¹⁶Idi kebala Tuhan neneh, "Iko miak nganau' kudeng ineh, ngaceku Ui miak ngedengan namu. Iko miak ngelaya' nelun Midian, mepad kudeng ngelaya' seburur lemulun.”

¹⁷Idi Gidion nengor balaNeh, "Kudeng Iko mawang niat, marée aceh tanu' kuanku, pad ui kali' Tuhan luk pebala negku.

¹⁸Aleg Tuhan buro rat ieni, kareb nateh ui macing nguit aceh barée luk kenen kuanMu." Idi kebalaNeh, "Ui miak nganéet pad iko macing.”

¹⁹Idi Gidion nesemuet bang ruma'neh. Idi ieh nenanek anak améek luk pangeh tinina'neh, idi ieh nenganau' apat gatang setangal banak luk na linamud ku ruti. Idi uangneh ieh nenganau' bang tayen, abpa'neh inau'neh bang lacang, idi ieh nenguit ineh amée' iang kayuh luk meraben, idi nemarée amung ineh kuan Melaikat Tuhan ineh.

²⁰Idi kebala Melaikat Tuhan neneh, "Ngerareng uang idi ruti ineh luun batu ini, idi ngutang abpa' ineh luunneh." Idi ieh nenganau' kudeng ineh teh.

²¹Idi Melaikat Tuhan nengegenang rukudNeh: idi nengisit papedneh luun uang idi ruti ineh. Idi apui neremuat rat bang batu ineh idi nengeseb uang idi ruti ineh. Idi Melaikat Tuhan ineh neburo peh.

²²Pangeh ineh idi Gidion nekali' ineh Melaikat Tuhan luk pangeh sinierneh. Idi kebalaneh, "Adui, O Tuhan Allah! Ngaceku ui pangeh nenier Melaikat Tuhan.”

²³Iamo' kebala Tuhan neneh, "Aleg matot. Na iko mekudeh. Na iko matée.”

²⁴Idi Gidion nemudut aceh bubpun kuan Tuhan su ineh. Idi ieh nenganau' ngadan su ineh "Tuhan Lawa Awang." Idi bubpun ineh idi teh nekini déei' Opira, bawang lun Abieser.

²⁵Idi bang malem ineh teh, Tuhan nengecuk neneh, kebalaneh, "Ngalap aceh sapi' deléi i tamam, idi ngalap sebuleng teh luk tudu' lak ulunneh. Idi nabpa bubpun i tamam luk kuan Baal ineh, idi nebpeng ulung luk iringneh.

²⁶Pangeh ineh mudut aceh bubpun luk do' kuan Tuhan Allahmu luun buduk surud ini. Idi ngalap sapi' luk kedueh ineh, idi ngeseb neneh mangun ku aceh barée dengan ulung luk pangeh tibpengmu ineh."

²⁷Gidion nenguit pulu' burur lun dukenneh. Idi ieh nenganau' luk bila Tuhan kuanneh. Iamo' ngaceku ieh matot nelun bang tetek ruma' tamanneh, idi lun bang bawang ineh, na ieh nenganau' amung ineh kareb macang aco, iamo' kareb medacem.

²⁸Idi kareb pekak uka-uka lun bang bawang ineh nekulat, ideh mawa. Idi bubpun Baal pangeh netabpa. Idi ulung luk muneng ku ineh pangeh tibpeng. Idi sapi' luk kedueh ineh pana' pangeh iseb luun bubpun luk pinudut su ineh.

²⁹Idi kebaladeh seburur dengan seburur, "Idéekée luk nenganau' ini?" Kareb ideh pangeh nengelio idi nengitun ratnan ineh idi ideh nekali', ieh ineh Gidion Yoas luk nenganau' idi."

³⁰Idi kebaladeh ni Yoas, "Nnguit anakmu ineh remuat amée' tungée' pad ieh pitayen kai. Ngaceku ieh pangeh nenabpa bubpun luk kuan Baal, idi nenebpeng ulung luk iringneh pana'."

³¹Iamo' kebaladeh ni Yoas kuan amung lun luk inée' neneh, "Matukée muyuh pian perurum ni Baal? Matukée muyuh pian ngedengan neneh? Idée luk pian perurum ni Baal, ieh miak pitayen kareb nateh aco macang. Kudeng Baal ineh allah, nima' neneh ngerayeh bururneh sebuleng, ngaceku bubpun dieh luk pangeh tibpa Gidion."

³²Idi kareb aco sineh, ideh nenganau' ngadan Gidion, Yerubaal, ilungneh, "Nima' Baal ngerayeh bururneh sebuleng ngaceku bubpun dieh luk pangéh tibpa Gidion."

³³Idi amung lun Midian idi lun Amalek idi pupu rat déei' su luk ali-ali nepamung teh, idi ideh neguta Abpa' Yarden. Idi ideh nelupo bang Ruan Yesril.

³⁴Idi bang kareb ineh Roh Tuhan netemurun luun Gidion. Idi ieh ngengiup unga dumba nawar nelun Abieser maya' neneh.

³⁵Idi teh ieh nengecuk nelun duken amée' mada' pupu Manasée, pad ideh maya' neneh. Kudeng ineh teh ieh nengecuk tuda'-tuda' lun duken amée' déei' bawang Aser, Sebulon, idi Naptali. Idi amungdeh ineh pana' inée' maya' neneh.

³⁶Idi kebala Gidion inan Allah, "KebalaMu Iko pian negku muit nelun Israil.

³⁷Mo, kudeng Iko pian makai negku ui miak malad kubil dumba ini luun tana' su luk inan kai rumik padée. Kudeng inan ipup luun kubil ini pekak di, idi tana' libut ineh metekering, idi ui miak kali' Iko pian negku muit nelun Israil."

³⁸Idi kudeng ineh teh luk nangun. Idi kareb pekak kenebpa idi ieh nekulat uka-uka idi ieh nemaag kubil ineh idi nengekaka neneh, pad abpa' ipup ineh panu' aceh bigan.

³⁹Idi kebala Gidion inan Allah, "Aleg museh negku. Nima' negku pebala sekua' teh. Do' nima' negku nutun kubil ini sekua' teh. Nima' ini tekering idi ipup ruen luun tana' mo'."

⁴⁰Idi Tuhan Allah nenganau' kudeng ineh bang dacem ineh. Idi kubil ineh tekering. Iamo' luun tana' meba'.

Lun Luk Nguyut 7

¹Idi Gidion idi amungdeh luk maya' neneh nekulat uka-uka. Idi ideh nelupo tangeb Abpa' Harod. Idi lepo lun Midian bang ruan pa tinueh busat aco muneng ku Surud Morée.

²Idi kebala Tuhan ni Gidion, "Pelaba ula' lemulun maya' namu, meluun ratnan luk pianKu. Ngaceku ineh na Ui marée nedeh ngelaya' nelun Midian. Kudeng Ui nima' nedeh, kali' rungen ideh ngerawée tuehdeh sebuleng, idi na ngubur Negku.

³Do' marée kali' kuandeh, 'Idée-idée luk matot idi metalang niatneh, do' ieh muli' rat Pegkung Gilboa.' " Idi 22,000 burur nuli'. Idi 10,000 burur neketecan.

⁴Idi kebala Tuhan ni Gidion, "Lakat mula' teh lemulun meluun ratnan luk pianKu. Do' nguit nedeh amée' déei' abpa' idi ieneh Ui mabpat nedeh kuanmu. Kudeng Ui mala idée luk maya' namu, ieh miak amée'. Idi kudeng Ui mala idée luk na amée' maya' namu, ieh na miak amée'."

⁵Idi Gidion nenguit nedeh inée' déei' abpa'. Idi kebala Tuhan neneh, "Do' ngatad lemulun luk ngirup mepad kudeng irup uko' rat nedeh luk tekeradung ngirup."

⁶Idi kinula' lemulun luk nengirup dengan inook tiku'deh, 300 burur. Idi amung lun luk baken ineh ngirup netekeradung.

⁷Idi kebala Tuhan ni Gidion, "Ui miak muit nemuyuh idi marée nemuyuh metueh rat nelun Midian dengan baweh luk 300 burur ini luk pangeh nengirup dengan inook tiku'deh. Do' ngecuk nelun luk baken ineh muli'."

⁸Idi ieh nengecuk nelun Israil ineh muli'. Idi ideh luk 300 burur mo' ketecan. Iamo' ideh nengalap amung balu'deh idi uang dumbadeh. Idi lepo lun Midian ineh pa benehdeh luun raked ineh.

⁹Idi bang daceh ineh teh kebala Tuhan ni Gidion, "Tumui iko, idi amée' ngeriang baweh ineh. Ngaceku Ui pangeh nemarée nedeh bang paladmu.

¹⁰Iamo' kudeng iko matot amée' ngeriang nedeh, do' iko amée' nier lepo lun Midian ineh dengan i Pura lun dukenmu ineh.

¹¹Idi iko miak ninger anun luk beléendeh pad iko mekuu' ngerieng nedeh." Idi ieh inée' dengan i Pura lun dukenneh ineh macing iring lepo bunu'deh.

¹²Idi lun Midian, lun Amalek, idi amung pupu rat déei' su luk ali-ali patad-patad lubid luun raked ineh, mepad kudeng kato kinula'deh. Idi amung untadeh mepad kudeng bada luk tangeb abpa' rayeh.

¹³Idi kareb Gidion nacing, inan seburur uned mada' nupineh kuan lun danganneh, kebalaneh, "Ui pangéh nenginupi. Inan aceh pinaram ikun. Idi ieh nelubid arang lepo tau. Idi ieh nengeradung sebuleng lepo pad ieh nebelakad."

¹⁴Idi kebala lun danganneh, "Na luk baken iamo' pelapet Gidion Yoas, lun Israil. Ieh ineh ilungneh, Allah pangéh nemarée nelun Midian idi amung baweh tau bang paladneh."

¹⁵Kareb Gidion neninger nupi ineh idi dengan ilungneh, idi ieh netekeradung sembayang. Idi ieh nelemubed inée' lepo lun Israil, kebalaneh, "Tumui muyuh. Ngaceku birée Tuhan lun Midian bang palad muyuh."

¹⁶Idi ieh nemabpat nedeh luk 300 burur ineh teluh babpat. Idi ieh nemarée anid-anid bururdeh ineh sebuleng unga dumba, sebuleng sidangur, idi sengapak ilu' bang sidangur ineh.

¹⁷Idi kebalaneh nedeh, "Nier negku. Maya' luk ruenku kareb ui macing iring lepodeh ineh.

¹⁸Kareb ui idi amung lun denganku ngiup unga, do' amung muyuh ngiup unga muyuh teh libut lepo ineh idi ngitang kudeng ini, 'Kai ini Tuhan kuan, idi Gidion kuan!' "

¹⁹Gidion idi meratu lun luk maya' neneh nacing iring lepodeh kareb malée tangal daceh, kareb lun Midian pelibal matar. Idi ideh nengiup ungadeh idi nemila' sidangur luk inuitdeh.

²⁰Idi amungdeh luk teluh babpat ineh nengiup ungadeh, idi nemila' sidangurdeh. Idi ticu'deh pa kabing ngimet ilu'. Idi ticu'deh pa tinueh ngimet unga. Idi amungdeh ineh nengitang, "Kai ini Tuhan kuan idi Gidion kuan!"

²¹Idi amung lun Israil ineh tured anid-anid su inandeh idi nengelibut lepo bunu'deh. Idi baweh ineh nepesag, idi ideh nengitang buro.

²²Kareb ideh luk 300 ineh nengiup ungadeh, idi Tuhan nenganau' nelun Midian pepatée nedeh sebuleng, pad baweh ineh neburo inée' Bait Sita suet déei' Serera, macing Abel Mehola, luk muneng ku Tabat.

²³Idi lun Israil rat Naptali idi rat Aser, idi amung lun Manasée tinawar ngerada' nelun Midian.

²⁴Idi Gidion nengecuk nelun duken amée' inan amung pegkung Epraim, kebaladeh, "Amée' muyuh pebunu' nelun Midian. Ngabang Abpa' Yarden idi arur luk déei' Bait Bara teh, pad lun Midian na miak guta." Idi amung lun Epraim nepamung, idi ideh nengabang Abpa' Yarden idi arur luk déei' Bait Bara teh.

²⁵Idi ideh nengakem dueh lun rayeh lun Midian, ieh ineh Oreb idi Sib, luk pinatédeh bang su luk inan mureg anggur déei' Sib. Idi ideh nengerada' amung lun Midian ineh. Idi ideh nenguit uluh Oreb idi Sib ineh kuan Gidion luk pa busat aco Abpa' Yarden.

Lun Luk Nguyut 8

¹Kebala lun Epraim ni Gidion, "Ngudehkée iko na nenawar nekai kareb iko inée' pebunu' nelun Midian? Ngudehkée iko nenganau' nekai kudeng ini?" Idi ideh ngedureng-ngedureng neneh.

²Iamo' kebala Gidion nedeh, "Luk inau'ku na miak uen maad dengan luk inau'muyuh. Sesuut luk inau' muyuh lun Epraim meluun do' ratnan amung-amung luk inau' lun bang tetek ruma'ku.

³Allah pangeh nemarée dueh burur lun rayeh lun Midian, ieh ineh Oreb idi Sib bang palad muyuh. Anun luk inau'ku luk miak uen maad dengan kekamen muyuhkée?" Kareb ieh nemala ini idi ideh nugka' museh neneh.

⁴Kareb Gidion idi lun luk 300 luk danganneh nacing déei' Abpa' Yarden, idi ideh neguta. Idi sagan pana' ideh merur, ideh na ugka' ngerada' bunu'deh.

⁵Idi ieh nemutuh ruti nelun bawang Sukot, "Marée ruti tuda'-tuda' balad kuan lun luk maya' negku. Ngaceku ideh merur. Ngaceku kai ngerada' Séeba idi Salmuna, raca' Midian ineh."

⁶Iamo' kebala amung lun rayeh bawang Sukot ineh, "Kudeng apéh kai miak marée ruti kuan muyuh ngaceku nateh Séeba idi Salmuna kikem muyuh?"

⁷Idi kebala Gidion, "Do', kudeng pieh kudeng ineh, kareb Tuhan pangeh nemarée Séeba idi Salmuna bang paladku, kali' rungen ui mebal nemuyuh ku tabpa' rat déei' su luk ali-ali."

⁸Idi Gidion nepetacu nacing déei' Peniel, idi nemutuh mepad kudeng ineh teh. Idi lun bang bawang Peniel pana' nengor balaneh mepad kudeng or lun Sukot.

⁹Idi kebalaneh nedeh, "Ui miak lemubed dengan do', idi kareb ineh kali' rungen ui miak ngusag pudut luk medita' ini."

¹⁰Séeba idi Salmuna ineh idi déei' Karkor dengan baweh didueh. Ratnan amung baweh pupu rat déei' su luk ali-ali inan 15,000 burur ketecan. Idi 120,000 lun pebunu' pinatée.

¹¹Idi Gidion nemaya' dalan luk iring déei' su luk ali-ali pa busat aco Noba idi Yokbeha. Idi ieh nengedenak baweh ineh.

¹²Séeba idi Salmuna raca' Midian ineh neburo. Iamo' ieh nengerada' nedidueh. Idi ieh nengakem nedidueh idi ieh nengusag amung bawehdeh.

¹³Gidion Yoas nuli' rat pebunu' idi nemaya' Ruan Heres.

¹⁴Idi ieh nengakem seburur anak adi' rat bawang Sukot. Idi ieh nengitun neneh. Idi anak adi' ineh nengayud ngadan tudu' ngepulu' tudu' burur lun rayeh Sukot kuan Gidion.

¹⁵Idi Gidion inée' nedeh lun Sukot, keburineh, "Ngerawée muyuh bala muyuh di teh. Kebala muyuh, muyuh na marée ruti kuan bawehku luk merur, ngaceku ui nateh nengakem ni Séeba idi Salmuna. Mo! Nekini didueh pangeh kikem kai."

- ¹⁶Idi ieh nengalap tabpa' luk rat déei' su luk ali-ali, idi nemebal nelun rayeh lun Sukot ineh ku ineh.
- ¹⁷Idi ieh nengusag pudut Peniel luk medita', idi lun bang bawang ineh pana' pinatéeneh.
- ¹⁸Pangeh ineh idi Gidion nengitun ni Séeba idi Salmuna, "Kudeng apéh ayu lemulun luk pangéh pinatéé medueh déei' Tabor di?" Kebala didueh, "Mepad kudeng iko ni teh ideh. Amungdeh mepad kudeng ayu anak raca'."
- ¹⁹Idi kebala Gidion, "Ideh ineh kinanakku, kai sebuleng tinan mo'. Idi ui pebulung, kudeng medueh na nengatéé nedeh, ui pana' nateh ngatéé nemedueh."
- ²⁰Idi keburu' Gidion ni Yeter, anak deléineh luk rayeh, "Amée' iko ngatéé nedidueh." Iamo' anak ineh matot ngangat pelapetneh ngaceku ieh isuut.
- ²¹Idi keburu' Séeba idi Salmuna, "Do' iko sebuleng ngatéé nekai dueh. Ngaceku lun rayeh mo' miak nganau' kekamen lun rayeh." Idi Gidion nengatéé nedidueh. Idi ieh nengalap amas luk kudeng bulan luk i dier unta didueh.
- ²²Idi kebala lun Israil ni Gidion, "Do' iko mangun ku lun rayeh kai, do' iko idi anakmu idi anak mupunmu. Ngaceku iko pangéh nemuit nekai rat bang palad lun Midian."
- ²³Iamo' Gidion nengor baladeh, "Ui na miak mangun ku lun rayeh muyuh, idi anakku pana'. Iamo' Tuhan sebuleng mangun ku Lun Rayeh muyuh."
- ²⁴Idi ieh nepebala nedeh teh, "Sebuleng mo' luk pianku rat nemuyuh. Ieh ineh do' anid-anid burur muyuh marée luk ilap muyuh kuanku." (Lun Midian ineh inan abée amas ngaceku ideh lun rat déei' su luk ali-ali.)
- ²⁵Idi kebaladeh neneh, "Kai pelaba awang niat marée ineh namu." Idi ideh nemalad seputut kibung, idi anid-anid bururdeh nengerareng abée luk ilapdeh ineh luun kibung ineh.

²⁶Idi berat amung abée amas luk pangeh pinutihneh ineh apat ngepulu' limeh kati. Idi luk baken na iniap dengan banée ineh, ieh ineh amung amas luk kudeng bulan, idi banée idi ayung sia' merirem luk pangeh inayung raca'-raca' Midian, idi amung ayung luk luun dier untadeh.

²⁷Idi Gidion nenganau' aceh akang ku amas ineh. Idi ieh nenganau' ineh bang bawangneh déei' Opira. Idi amung lun Israil nelemubed idi nesembayang inan akang ineh. Idi ineh mangun ku aceh abpung kuan Gidion idi kuan amung lun bang tetek ruma'neh.

²⁸Idi lun Midian linaya' lun Israil pad na luk inan matot nedeh peh. Idi bawang ineh na inan bunu' apat ngepulu' lak kinioneh bang kareb Gidion mulun.

²⁹Gidion nuli' idi netudo bang ruma'neh sebuleng.

³⁰Idi ieh inan tudu' ngepulu' anak deléei, ngaceku ieh mula' awan.

³¹Idi apidneh luk déei' Sikem nenganak aceh anak deléei, idi ieh nenganau' ngadanneh Abimelek.

³²Idi Gidion Yoas natée ngaceku ulunneh petap kadang. Idi ideh nenanem neneh bang lengutan Yoas tamanneh ineh luk déei' Opira, bawang lun Abieser.

³³Muci ratnan atée Gidion, idi lun Israil na lutep maya' Allah iamo' ideh nelemubed sembayang inan Baal. Idi ideh nenganau' Baal ku allahdeh luk inandeh Pejani'.

³⁴Idi na ideh nengerawée Tuhan Allahdeh luk pangeh nemuit nedeh ratnan amung bunu'deh luk libutdeh ineh.

³⁵Idi na ideh nengua' do' kuan lun bang tetek ruma' Gidion, ku amung luk do' luk pangeh inau'neh kuandeh.

Lun Luk Nguyut 9

¹Abimelek Gidion inée' déei' Sikem, su luk inan amung pupu tinanneh tudo. Idi ieh nengecuk nedeh,

²ngitun nelun bang bawang Sikem, "Sapeh luk pian muyuh, ideh luk tudu' ngepulu' anak deléei Gidion mangun ku lun luk ngimet nemuyuh, ku sebuleng mo'? Do' muyuh ngerawée ngaceku ui ini inul muyuh."

³Idi amung pupu tinanneh nepegayam nelun Sikem ratnan ineh. Idi amungdeh nengamo maya' ni Abimelek, ngaceku ieh pupudeh.

⁴Idi ideh nemarée kuanneh tudu' ngepulu' balad pirak rat bang ruma' Baal luk inandeh Pejani'. Idi Abimelek nemarée usin kuan tuda'-tuda' lemulun luk dat, pad ideh miak maya' neneh.

⁵Idi ieh inée' ruma' tamanneh luk déei' Opira ineh. Idi ieh nengatée amung kinanakneh luk tudu' ngepulu' burur luun sebuleng batu. Iamo' Yotam kinanakneh luk isuut ineh na pinatéeneh ngaceku ieh nesigapung.

⁶Pangeh ineh idi amung lun bang bawang Sikem idi amung lun ruma' Bait Milo nepamung. Idi ideh inée' ngikit ni Abimelek mangun ku raca', muneng ku lawa kayuh luk meraben déei' Sikem.

⁷Kareb Yotam neninger ratnan amung ineh, idi ieh inée' tuped luun buduk Surud Gerisim. Idi ieh nengitang, kebalaneh, "Ninger negku, O muyuh lun Sikem, idi Allah miak ninger nemuyuh teh.

⁸Inan aceh kareb idi amung lawa kayuh inée' mili' aceh raca' kuandeh. Idi kebaladeh kuan lawa saitun, 'Do' iko mangun ku raca' kai.'

⁹Iamo' lawa saitun nengor baladeh ineh, 'Na ui pian amée' ngimet nemuyuh idi necan umauku luk buren amung allah idi amung lemulun teh.'

¹⁰Idi kebala amung lawa kayuh ineh kuan lawa gita', 'Amée' iko mangun ku raca' kai.'

¹¹Iamo' lawa gita' nengor baladeh, 'Na ui amée' ngimet nemuyuh idi necan amung bua'ku luk mepaci.'

¹²Idi amung lawa kayuh ineh nepebala kuan lawa anggur, 'Amée' iko mangun ku raca' kai.'

¹³Iamo' lawa anggur nengor baladeh, 'Na ui pian amée' ngimet nemuyuh idi necan abpa'ku luk mepaci' luk ngawang niat amung allah idi lemulun teh.'

¹⁴Idi kebala amung lawa kayuh ineh kuan lawa tabpa', 'Amée' iko mangun ku raca' kai.'

¹⁵Idi lawa tabpa' nengor baladeh, 'Kudeng matu muyuh ngikit negku mangun ku raca' muyuh, amée' amung muyuh silungung liang lungungku. Iamo' kudeng muyuh na amée', apui miak remuat ratnan lawa tabpa' idi ngeseb amung tumuh luk déei' Lebanon.'

¹⁶Idi keburu' Yotam teh, "Matukée muyuh nganau' ni Abimelek mangun ku raca' dengan niat luk do' idi matu? Matukée muyuh nganau' do' kuan Gidion idi kuan uang tetek ruma'neh? Matukée muyuh ngua' kuanneh maya' kudeng luk inau'neh?

¹⁷Do' ngerawée tamanku luk inée' pebunu' ngaceku muyuh. Na ieh matot matéé kareb ieh muit nemuyuh rat nelun Midian.

¹⁸Iamo' aco sini muyuh pangeh nelemubed sikal metueh rat nelun bang ruma' tamanku. Muyuh pangeh nengatée amung anak deléeineh luk tudu' ngepulu' burur nan aceh batu. Idi muyuh pangeh nengikit ni Abimelek, anak demulun tamanku, mangun ku raca' Sikem ngaceku ieh pupu muyuh.

¹⁹Idi kudeng muyuh pangeh nenganau' luk do' idi luk matu aco sini kuan Gidion idi kuan lun bang tetek ruma'neh, do' muyuh mawang niat ni Abimelek idi ieh pana' mawang niat nemuyuh.

²⁰Iamo' kudeng na pieh kudeng ineh, nima' apui remuat rat ni Abimelek idi ngeseb amung lun bang bawang Sikem idi bang bawang Bait Milo. Idi teh nima' apui remuat rat nelun bang bawang Sikem idi ratnan bawang Bait Milo idi ngeseb ni Abimelek."

²¹Idi Yotam neburo idi inée' tudo déei' Bir. Ngaceku ieh matot kinanakneh Abimelek.

²²Idi Abimelek nengimet nelun Israil teluh lak kinioneh.

- ²³Idi Allah nenganau' aceh terawée luk dat arang Abimelek idi lun bawang Sikem, pad lun bawang Sikem metueh rat ni Abimelek.
- ²⁴Amung ini nangun, pad ngua' dat Abimelek idi lun Sikem luk nemaya' neneh inée' ngatéé tudu' ngepulu' anak Gidion.
- ²⁵Idi lun bawang Sikem nengecuk tuda'-tuda' burur inée' ngabang ni Abimelek luun buduk pegkung. Idi ideh nemano binaweh lemulun luk maya' dalam ineh. Idi Abimelek nekali' ratnan luk inau'deh.
- ²⁶Idi Gaal Ebed nepura' inée' Sikem dengan amung kinanakneh. Idi lun bang bawang Sikem pana' merapet neneh.
- ²⁷Idi ideh inée' déei' lati' idi nengalap bua' anggur rat bang kabundeh, idi nengalap abpa'neh. Idi ideh nenganau' aceh irau. Idi ideh inée' bang ruma' allahdeh, idi nekuman idi nengirup, idi nesitunga ni Abimelek.
- ²⁸Idi keburu' Gaal, "Ngudeh tau maya' ni Abimelek? Kudeng apeh ayu tau lun Sikem? Idi kudeng apeh ayuneh? Ieh anak Gidion! Idi Sebul maya' neneh! Ngudeh tau maya' neneh? Meluun do' muyuh maya' tepun muyuh Hamor luk nenginul nemuyuh.
- ²⁹Kudeng ui ngimet pupu ini, kali' rungen ui nala' ni Abimelek. Idi ui miak mala kuanneh, 'Kudeng iko inan baweh, nguit nedeh amée' munu' negku!' "
- ³⁰Idi bala Gaal Ebed ineh nekali' Sebul lun rayeh bawang ineh. Idi ieh megateh niat.
- ³¹Idi ieh nengecuk nelun duken amée' ni Abimelek déei' Aruma, kebaladeh, "Gaal Ebed idi amung kinanakneh pangeh nacing déei' Sikem. Idi ideh na nima' namu semuet bang bawang ineh.
- ³²Ngaceku ineh, do' iko idi bawehmu amée' kareb medacem, idi sigapung luun lati'.
- ³³Idi pekak nebpa kareb masat aco, do' iko amée' ngedenak nedeh bang bawang ineh. Idi kareb Gaal idi bawehneh remuat idi munu' nemuyuh, do' muyuh munu' nedeh dengan amung tueh muyuh."

- ³⁴Idi Abimelek dengan apat babpat bawehneh inée' kareb medacem, idi nesigapung libut bawang Sikem.
- ³⁵Gaal neremuat idi netuped munung tanga' bawang ineh. Idi Abimelek dengan amung bawehneh neremuat rat su luk inandeh sigapung ineh.
- ³⁶Kareb Gaal nekali' nedeh, idi ieh nekidi ni Sebul, "Nier! Inan lemulun musul ratnan pegkung!" Idi Sebul nengor balaneh, "Na ineh lemulun. Aca' pegkung ineh!"
- ³⁷Idi keburu' Gaal teh, "Nier, inan mula' lemulun musul maya' ruanneh. Idi inan sebabpat macing rat pa kayuh luk meraben su luk inan mangun."
- ³⁸Idi keburu' Sebul neneh, "Peh tueh tang midi peh. Iko luk nengitun ngudeh tau maya' ni Abimelek ineh? Lemulun ini luk inanmu nesitunga. Remuat iko nekini idi pebunu' nedeh."
- ³⁹Idi Gaal nenguit nelun Sikem remuat idi nepebunu' ni Abimelek.
- ⁴⁰Abimelek nengerada' neneh, idi Gaal nupun buro. Idi lun Sikem mula' nurat idi natée pad macing tanga' bawang ineh.
- ⁴¹Idi Abimelek nuli' inée' Aruma. Idi Sebul nengecuk ni Gaal buro dengan amung kinanakneh, pad ideh na miak tudo déei' Sikem teh.
- ⁴²Idi kenebpa lun Sikem neremuat inée' déei' lati'. Idi Abimelek nekali' ratnan ineh.
- ⁴³Idi ieh nengamung amung bawehneh, idi ieh nemabpat nedeh teluh babpat. Idi ideh nesigapung luun lati' nganéet nedeh. Kareb Abimelek nenier nelun mula' ineh remuat rat bang bawang Sikem, idi ieh inée' ngatée nedeh.
- ⁴⁴Abimelek dengan dieh babpat nupun inée' ngabang tanga' bawang lun Sikem. Idi dueh babpat luk baken ineh nemunu' nedeh déei' luun lati' idi nengatée nedeh amung-amung.
- ⁴⁵Idi Abimelek nemunu' nedeh luk bang bawang ineh tebaco-tebaco. Idi ieh nengalap bawang ineh idi nengatée amungdeh. Idi ieh nengusag bawang ineh, idi ieh nengisak bawang ineh ku tucu'.

⁴⁶Kareb amung lun rayeh luk bang Pudut Sikem Luk Medita' nekali ratnan ineh, idi ideh inée' sigapung bang su luk meraben bang ruma' Baal luk inandeh Pejani'.

⁴⁷Idi Abimelek nekali' nedeh pangeh nepamung.

⁴⁸Idi ieh inée' luun Pegkung Salmon dengan amung bawehneh. Idi Abimelek nengalap aceh uai. Idi ieh nenutu' aceh angkat, idi nemaan ineh. Idi ieh nengecuk amung bawehneh nganau' kudeng ineh teh.

⁴⁹Idi ideh nenganau' kudeng ineh idi nemaya' neneh. Idi ideh nengamung amung angkat ineh iring su luk meraben ineh idi nengeseb neneh, pad amung lun luk bang Pudut Sikem ineh natée, ieh ineh 1,000 lun luk deléei idi decur teh.

⁵⁰Idi Abimelek inée' Tebes idi nengelibut bawang ineh. Idi bawang ineh ilapneh.

⁵¹Iamo' nan uned-uned bawang ineh inan aceh pudut luk medita' luk meraben. Idi amung lemulun, do' deléei idi decur idi amung lun rayeh bawang ineh pana' neburo inée' bang ineh, idi nemasak tanga'neh. Idi ideh numak inée' luun budukneh.

⁵²Kareb Abimelek nacing nan pudut luk medita' ineh idi ieh inée' munung tanga'neh pian ngeseb nedeh.

⁵³Iamo' aceh decur nemitung aceh batu rayeh luun uluh Abimelek, pad perupuk uluhneh nebila'.

⁵⁴Dengan mesaget Abimelek nenawar seburur luk nguit repapehneh. Idi keburu'neh neneh, "Ngangat pelapetmu idi ngatée negku, pad ideh na mala ui pinatée seburur decur." Idi lun luk nguit repapehneh pana' nenebpek neneh pad ieh natée.

⁵⁵Kareb lun Israil pangeh nenier ni Abimelek ineh pangeh natée, idi amungdeh nuli'.

⁵⁶Kudeng ineh lawéeneh Allah nengua' dat Abimelek ku ieh nengedat tamanneh idi nengatée tudu' ngepulu' kinanakneh.

⁵⁷Idi teh Allah nengedereh nelun Sikem ngaceku datdeh, mepad kudeng bala Yotam Gidion ineh kareb ieh nengediman nedeh.

Lun Luk Nguyut 10

¹Muci rat ni Abimelek, Tola Puah mupun Dodo, inée' muiit nelun Israil. Idi ieh seburur lun pupu Iskar, idi ieh tudo déei' Samir luun pegkung-pegkung Epraim.

²Idi ieh nenguyut nelun Israil dueh ngepulu' teluh lak kinioneh. Idi ieh natée idi tinanem déei' Samir.

³Idi mucu rat ni Tola nacing Yair lun Giliad ineh. Ieh nenguyut nelun Israil dueh ngepulu' dueh lak kinioneh.

⁴Idi ieh inan teluh ngepulu' anak deléei luk nalan maya' teluh ngepulu' keladai. Idi ideh inan teluh ngepulu' bawang déei' tana' Giliad, luk titendeh Lepo Yair macing aco sini.

⁵Idi Yair natée. Idi ieh tinanem déei' Kamon.

⁶Lun Israil nenganau' sala' pa kiung Tuhan teh. Idi ideh nesembayang inan Baal idi Asterot, idi amung akang bawang Sain, Sidon, Moab, Amon, idi Pilistin. Idi ideh nelemubed ratnan Tuhan, idi nugka' sembayang Neneh.

⁷Ngaceku ineh Tuhan museh nelun Israil. Idi Ieh nenima' nelun Pilistin, idi lun Amon nengelaya' nedeh.

⁸Idi rat lak ineh pupu ineh nengedereh nelun Israil luk tudo déei' dipar Abpa' Yarden luun tana' lun Amori, ieh ineh déei' Giliad, pulu' ualuh lak kinioneh.

⁹Idi lun Amon pana' neguta Abpa' Yarden inée' pebunu' nelun pupu Yahuda, Benjamin, idi Epraim teh pad amung lun Israil ineh pelaba susa'.

¹⁰Idi bang kareb ineh lun Israil nengitang idi nenawar Tuhan, kebaladeh, "Kai pangeh nenganau' sala' pa kiungMu, ngaceku kai pangeh nenecan Namu Allah kai, idi nesembayang inan Baal."

- ¹¹Iamo' kebala Tuhan nedeh, "Ui pangeh nemuit nemuyuh rat bang palad lun Masir, lun Amori, lun Amon, lun Pilistin,
- ¹²lun Sidoni, lun Amalek, idi lun Mauni luk nengedereh nemuyuh, kareb muyuh nenawar Negku.
- ¹³Iamo' nateh muyuh nemaya' Negku. Idi muyuh nesembayang inan allah baken. Ngaceku ineh Ui na pian muit nemuyuh baruh teh.
- ¹⁴Do' muyuh amée' nawar allah luk pinili' muyuh. Kareb muyuh inan susa' do' ideh muit nemuyuh."
- ¹⁵Iamo' kebala lun Israil inan Tuhan, "Kai pangeh nenganau' sala'. Do' Tuhan nganau' anun-anun luk pianMu kuan kai. Iamo' muit nekai aco sini."
- ¹⁶Idi ideh nenala' amung allahdeh idi nesembayang inan Tuhan. Idi Tuhan mesusa' ku lun Israil.
- ¹⁷Idi bang kareb ineh baweh lun Amon nepamung idi nelupo déei' Giliad. Idi lun Israil nepamung idi nelupo déei' Mispa.
- ¹⁸Idi lun mula' idi lun rayeh lun Giliad nengitun arangdeh sebuleng, "Idée luk miak mangun ku lun nguyut amée' pebunu' nelun Amon ineh? Idi ieh teh miak mangun ku lun nguyut amung lun luk tudo déei' Giliad."

Lun Luk Nguyut 11

- ¹Idi Yepta anak Giliad ineh seburur lun luk mesangit. Iamo' ieh anak batek seburur decur luk mesawa'. Idi ieh rat bang bawang Giliad.
- ²Idi awan tu Giliad pana' inan tuda'-tuda' anak deléei. Kareb anak awan tuneh pangeh rayeh, idi ideh nengecuk ni Yepta buro, kebaladeh, "Na iko miak ngalap babpat dengan lun bang ruma' taman kai. Ngaceku iko anak ratnan decur baken."
- ³Idi Yepta neburo rat pa kiung amung kinanakneh idi netudo bang bawang Tob. Idi ieh nengerurum tuda'-tuda' lemulun luk dat denganneh idi ideh nemaya' neneh.
- ⁴Idi mucu ratnan ineh lun Amon inée' pebunu' nelun Israil.

- ⁵Kareb ineh lun rayeh-rayeh Giliad inée' ngalap ni Yepta idi nenguit neneh lemubed rat bawang Tob.
- ⁶Kebaladeh neneh, "Do' iko amée' mangun ku lun nguyut nekai, pad kai miak pebunu' nelun Amon ineh."
- ⁷Iamo' Yepta nengor baladeh, "Na ui kelupan dat muyuh negku, ngaceku muyuh nengecuk negku buro rat bang ruma' tamanku. Amée' ngudeh teh muyuh negku, kareb muyuh inan susa'?"
- ⁸Idi keburideh neneh, "Inan peh kai amée' ngalap namu nekini, ngaceku kai pian namu maya' nekai amée' pebunu' nelun Amon. Idi iko miak mangun ku lun nguyut amung-amung lun Giliad."
- ⁹Idi kebala Yepta nedeh, "Kudeng muyuh ngalap negku lemubed idi amée' pebunu' nelun Amon, idi kudeng Tuhan marée tueh negku, ui miak mangun ku lun rayeh muyuh."
- ¹⁰Idi kebaladeh neneh, "Kai miak nganau' mepad kudeng balamu. Tuhan mo' luk miak nier netau."
- ¹¹Idi Yepta inée' maya' nelun rayeh Giliad, idi lun mula' ineh nenganau' neneh mangun ku lun ngimet idi lun nguyut nedeh. Idi Yepta nemada' amung terawéeneh nedeh, pa kiung Tuhan déei' Mispá.
- ¹²Idi Yepta nengecuk nelun duken amée' inan raca' lun Amon pad ngitun neneh, "Anun inanmu museh nekai? Ngudehkée iko semuet bang bawangku?"
- ¹³Idi kebala raca' lun Amon nelun luk icuk Yepta ineh, "Kareb lun Israil nacing rat bawang Masir, ideh nengaro tana'ku rat Abpa' Arnon macing Abpa' Yabuk, idi macing Abpa' Yarden teh. Idi do' muyuh marée ineh lemubed kuanku dengan na pebunu'."
- ¹⁴Iamo' Yepta nengecuk nelun dukenneh amée' inan raca' lun Amon teh,
- ¹⁵pad marée kali', "Kudeng ini bala Yepta: Lun Israil na nengaro tana' lun Moab idi tana' lun Amon pana.

¹⁶Kareb lun Israil nenalan rat bawang Masir, ideh nemaya' déei' su luk ali-ali suet Abpa' Pisui, idi nacing déei' Kadis.

¹⁷Idi lun Israil nengecuk nelun dukendeh inée' papu' raca' Edom mutuh lemaba bawangneh. Iamo' raca' Edom ineh na nenima' nedeh. Idi ideh nemutuh raca' Moab teh. Iamo' ieh pana' na nenima' nedeh. Ngaceku ineh lun Israil netudo déei' Kadis.

¹⁸Pangeh ineh idi ideh nenalan maya' déei' su luk ali-ali. Idi ideh nengelibut tana' Edom idi tana' Moab, idi nacing pa busat aco tana' Moab, déei' dipar Abpa' Arnon. Idi ideh nelupo su ineh. Iamo' na ideh neguta Abpa' Arnon ineh, ngaceku ineh lakan tana' lun Moab.

¹⁹Idi lun Israil nengecuk nelun dukendeh amée' papu' ni Sihon raca' lun Amori luk raca' déei' Hesbon. Idi ideh nemutuh lemaba bawangneh amée' inan bawangdeh sebuleng.

²⁰Iamo' Sihon na nenima' nedeh lemaba. Idi Sihon nengamung amung bawehneh, idi nelupo déei' Yahas, idi nemunu' nelun Israil.

²¹Iamo' Tuhan Allah lun Israil nemarée nelun Israil metueh rat ni Sihon idi amung bawehneh. Idi lun Israil nengalap amung tana' lun Amori luk tudo bang bawang ineh.

²²Idi ideh nengalap aput tana' lun Amori rat Abpa' Arnon suet Abpa' Yabuk, idi rat su luk ali-ali suet Abpa' Yarden.

²³Ieh ineh Tuhan Allah lun Israil luk nengusu nelun Amori kuan pupuNeh, lun Israil. Piankéé iko nutun ngalap tana' ineh lemubed?

²⁴Iko miak ngimet tana' luk birée Kemos, luk allahmu ineh. Iamo' kai miak ngimet tana' luk ilap Tuhan Allah kai kuan kai.

²⁵Iko ngerawée iko luk meluun do' rat ni Balak Siporkée, luk raca' lun Moab ineh? Na ieh sikal metueh rat nelun Israil, idi na ieh nemunu' nedeh.

²⁶Lun Israil pangeh nengimet bawang Hesbon, Arur, idi bawang luk libut ineh, idi amung bawang luk tangeb Abpa' Arnon teluh ngeratu lak kinioneh. Ngudeh iko na nengalap ineh lemubed kareb idi?

²⁷Setuneh na ui dat namu. Iamo' iko luk nganau' dat idi sikal metueh rat negku. Tuhan ineh Lun luk Mutut. Ieh miak mili' arang lun Israil dengan lun Amon aco sini.”

²⁸Iamo' raca' lun Amon na sikal ninger bala Yepta luk bila lun luk icukneh ineh.

²⁹Idi bang kareb ineh Roh Tuhan netemurun luun Yepta. Idi ieh nelemaba bawang Giliad idi Manasée. Idi ieh nelemubed inée' Mispaluk déei' Giliad. Idi rat Mispaluk ieh petacu inée' Amon.

³⁰Idi Yepta nepejani' inan Tuhan, kebalaneh, "Kudeng Iko marée tueh negku rat nelun Amon,

³¹ui miak ngeseb idée-idée luk remuat atun rat bang ruma'ku amée' papu' negku mangun ku aceh barée kuanMu, kareb ui lemubed rat pebunu' dengan do'.”

³²Idi Yepta neguta Abpa' Arnon ineh inée' pebunu' nelun Amon. Idi Tuhan nemarée tueh neneh.

³³Idi ieh nengerieng nedeh rat bawang Arur macing tana' luk libut Minit, ieh ineh dueh ngepulu' bawang, idi suet déei' Arur Keramim. Idi pelaba ula' lemulun pinatéedeh. Idi lun Amon pangeh linaya' lun Israil.

³⁴Kareb Yepta nuli' inée' ruma'neh déei' Mispaluk, idi anakneh luk decur neremuat inée' papu' neneh dengan ngalai idi ngura' karing. Idi ieh mo' luk anakneh sebuleng. Na luk idi kinanakneh deléei' idi decur baken.

³⁵Kareb Yepta nenier neneh, idi ieh nengerarak ayungneh sebuleng ku dat niatneh, kebalaneh, "O, anakku! Iko luk ngesusa' niatku. Ngudeh iko inée' papu' negku. Ngaceku ui pangeh nepejani' inan Tuhan, idi ui na miak ngelubed jani'ku Neneh.”

³⁶Idi kebala anakneh neneh, "O Ama', kudeng iko pangeh nepejani' inan Tuhan, nganau' mo' luk pijani'mu inan Tuhan kuanku. Tuhan nengedengan namu, pad iko nengua' kuan bunu'mu, lun Amon."

³⁷Iamo' ieh nemutuh inan tamanneh, "Ini luk pituenku namu. Nima' negku amée' nangi' luun pegkung dengan lun rurumku dueh bulan kinioneh, ngaceku ui matéé na awan."

³⁸Idi tamanneh nengecuk neneh amée' dueh bulan kinioneh. Idi ieh inée' dengan amung rurumneh idi nangi' luun pegkung, ngaceku ieh matéé na awan.

³⁹Pangeh dueh bulan, idi ieh nuli' inée' inan tamanneh. Idi tamanneh nenganau' luk pijani'neh inan Tuhan. Idi anakneh ineh natée kareb ieh decur luk pun mebaruh. Idi ini mangun ku aceh adat lun Israil:

⁴⁰Anid lak amung anak decur lun Israil amée' temido anak Yepta lun Giliad ineh apat aco kinioneh.

Lun Luk Nguyut 12

¹Idi lun Epraim nepamung, idi ideh neguta Abpa' Yarden inée' Sapon. Idi kebaladeh ni Yepta, "Ngudeh iko inée' pebunu' nelun Amon idi na nenguit nekai? Nekini kai sikal nutung ruma'mu."

²Idi kebala Yepta nedeh, "Ui dengan pupuku nepekedaluh dengan lun Amon. Idi pangeh ui nenawar nemuyuh. Iamo' na muyuh inée' muiit negku rat nedeh.

³Kareb ui pangeh nenier nemuyuh na inée' muiit negku, na ui matot inée' pebunu' nelun Amon. Ngaceku Tuhan nemarée tueh negku. Ngudeh muyuh pian pebunu' negku nekini?"

⁴Idi Yepta nengamung amung lun Giliad luk deléi idi nemunu' nelun Epraim, idi nengelaya' nedeh. Ngaceku lun Epraim nepebala, "Muyuh lun Giliad luk bang bawang Epraim idi Manasée pangeh neburo rat Epraim."

⁵Idi lun Giliad nengabang gitan Abpa' Yarden, pad lun Epraim na miak guta. Idi kareb lun Epraim luk buro mutuh guta, idi lun Giliad ngitun nedeh, "Iko lun Epraimkée?" Kudeng ideh mala, "Na",

⁶Idi ideh miak ngecuk nedeh neten 'Shibboleth', idi kudeng ideh mala 'Sibboleth', ideh miak kamen idi pitayen ieneh, ngaceku ideh na mileh neten ineh. Idi kareb ineh 42,000 burur lun Epraim pinatée.

⁷Idi Yepta lun Giliad nengimet nelun Israil anem lak kinione. Idi ieh natée. Idi ieh tinanem bang bawangneh déei' Giliad.

⁸Muci rat ni Yepta, idi Ibsan rat Baitlahim nenguyut nelun Israil.

⁹Ieh inan teluh ngepulu' anak deléei, idi teluh ngepulu' anak decur. Idi ieh nemarée amung anak decurneh inaweh inulneh luk mado. Idi ieh nengalap teluh ngepulu' anak decur ratnan inul luk mado kuan anakneh luk deléei. Idi Ibsan nenguyut nelun Israil tudu' lak kinione.

¹⁰Idi ieh natée. Idi ieh tinanem déei' Baitlahim.

¹¹Muci rat ni Ibsan, idi Elon lun Sebulon nenguyut nelun Israil pulu' lak kinione.

¹²Idi ieh natée. Idi ieh tinanem déei' Aijalon bang bawang Sebulon.

¹³Muci rat ni Elon, idi Abdon anak Hilel lun Piraton nenguyut nelun Israil.

¹⁴Idi ieh inan apat ngepulu' anak deléei idi teluh ngepulu' mupun deléei, luk nalan maya' tudu' ngepulu' keladai. Idi ieh nenguyut nelun Israil ualuh lak kinione.

¹⁵Idi ieh natée. Idi ieh tinanem déei' Piraton bang bawang Epraim, luun pegkung lun Amalek.

Lun Luk Nguyut 13

¹Idi lun Israil nenganau' sala' pa kiung Tuhan teh. Ngaceku ineh Tuhan nenima' nelun Pilistin ngimet nedeh apat ngepulu' lak kinione.

²Idi inan seburur deléei ngadanneh Manua. Idi ieh rat bawang Sora, idi ieh seburur lun Dan, idi awanneh na anak.

³Idi Melaikat Tuhan nesilagan inan awanneh, kebalaneh, "Iko na anak. Iamo' na mio teh iko miak mali', idi nenganak aceh anak deléi.

⁴Ngaceku ineh aleg iko ngirup abpa' anggur idi anun-anun luk megalih idi aleg kuman anun-anun luk bibpeng na miak kenen.

⁵Ngaceku iko miak mali' idi nenganak aceh anak deléi. Idi muyuh na miak muting abpukneh, ngaceku rat aconeh tinganak, ieh miak baréen kuan Allah mangun ku seburur luk pitad. Idi ieh miak ngimun muit nelun Israil rat nelun Pilistin."

⁶Idi decur ineh nemada' bala Melaikat ineh inan awanneh, kebalaneh, "Inan Lun icuk Allah inée' negku. AyuNeh miak inan matot kudeng Melaikat Allah. Idi na ui nengitun Neneh rat iapeh Ieh. Idi Ieh pana' na nemada' ngadanNeh negku.

⁷Iamo' Ieh nemada' negku, ui miak mali', idi nenganak aceh anak deléi. Idi teh Ieh nemebpeng negku na ngirup abpa' anggur idi anun-anun luk megalih, idi na kuman anun-anun luk bibpeng na miak kenen. Ngaceku anak ineh baréen kuan Allah idi mangun ku seburur luk pitad raked ulunneh."

⁸Idi Manua nesembayang inan Tuhan, kesembayangneh, "O Tuhan, do' nima' Lemulun luk icuk Allah ineh amée' nekai dueh teh, idi mada' nekai dueh anun luk miak ruen kai dueh kuan anak ineh kareb awanku nenganak neneh."

⁹Idi Allah nenginger sembayang Manua. Idi Melaikat Tuhan ineh inée' inan awanneh, kareb ieh tudo déei' lati'. Iamo' Manua na idi danganneh.

¹⁰Idi ieh petacu nupun inée' inan awanneh, kebalaneh, "Miket amée' nier Lemulun luk nesilagan negku atun di. Idi Ieh peh."

¹¹Manua inée' maya' awanneh. Idi kareb Manua nepapu' Neneh, idi ieh nengitun, "Iko nepegayam inan awan kidi?" Kebala Melaikat ineh, "Mo, Ui idi."

¹²Idi kebala Manua, "Kudeng apeh! Kareb luk pangeh bilaMu ineh mangun, anun luk ruen anak ineh? Anun kekamenneh?"

- ¹³Idi Melaikat Tuhan nengor balaneh, "Do' awanmu nginita amung luk bida'Ku neneh.
- ¹⁴Ieh na miak kuman anun-anun luk inau' ratnan bua' anggur, idi na ngirup abpa' anggur pana' idi anun-anun luk megalih, idi na kuman anun-anun luk bibpeng na miak kenen. Idi do' nginita amung balaKu neneh."
- ¹⁵Idi kebala Manua inan Melaikat Tuhan, "Kai dueh sikal ngimet Namu, pad kai dueh ngeret aceh anak améek kuanMu."
- ¹⁶Iamo' kebala Melaikat neneh, "Kudeng tudo tu pana', Ui na miak kuman luk kenenmu. Iamo' kudeng iko pian nganau' luk kuanKu, ngeseb ineh mangun ku aceh barée kuan Tuhan." Idi na Manua kali' Neneh Melaikat Tuhan.
- ¹⁷Idi kebala Manua inan Melaikat Tuhan, "Mada' ngadanMu nekai dueh, pelée kai dueh miak ngubur Namu, kareb luk bilaMu ineh mangun?"
- ¹⁸Idi Melaikat Tuhan nengitun neneh, "Ngudeh iko pian kali' ngadanKu? Ieh ineh luk inalum."
- ¹⁹Idi Manua nengalap aceh anak améek idi bera. Idi ieh nemarée ineh luun bubpun batu kuan Tuhan luk nganau' luk inan mawa.
- ²⁰Kareb bubpun ineh mebudung, Manua idi awanneh nenier Melaikat Tuhan ineh kemikit inée' surga luun budung bubpun ineh. Idi didueh netekulub luun tana'.
- ²¹Manua idi awanneh na kali' Melaikat Tuhan ineh baruh peh. Idi Manua kali' Lemulun ineh Melaikat Tuhan.
- ²²Idi kebala Manua inan awanneh, "Kali' rungen kitech matéé ngaceku kitech pangeh nenier Allah!"
- ²³Iamo' kebala awanneh, "Kudeng Tuhan sikal ngatée nekitech, kali' rungen na Ieh nengalap barée kitech di, idi na nengegala' amung ini nekitech, idi na nemada' luk kudeng ini nekitech."
- ²⁴Idi decur ineh nenganak aceh anak deléei, idi ieh nenganau' ngadanneh Samson. Idi anak ineh pana' iuk amée' rayeh idi Tuhan nengeperuan neneh.

²⁵Idi Roh Tuhan nengimun ngegio niatneh, kareb ieh déei' Lepo Dan, arang Sora idi Estaul.

Lun Luk Nguyut 14

¹Idi Samson inée' déei' Timna, idi ieh nepapu' seburur decur lun Pilistin.

²Idi ieh nuli' idi nemada' taman-tinanneh, kebalaneh, "Déei' Timna ui nepapu' seburur decur lun Pilistin. Do' medueh ngalap neneh ku awanku."

³Iamo' kebala taman-tinanneh neneh, "Ngudeh iko pian ngalap awan rat nelun Pilistin luk na sinunat? Na metakapmu decur arang inulmu luk arang pupu tau?" Idi keburu' Samson inan tamanneh, "Ieh luk pianku lapenmu kuanku. Ieh luk inanku mawa."

⁴Idi taman-tinanneh na kali' Tuhan luk nenguyut Samson nganau' kudeng ineh, ngaceku Tuhan nenakap dalam pebunu' nelun Pilistin. Ngaceku bang kareb ineh lun Pilistin luk nengimet nelun Israil.

⁵Idi Samson dengan taman-tinanneh inée' déei' Timna. Kareb ideh nacing bang kabun anggur déei' Timna, denak-denak aceh balang ngenger neneh.

⁶Iamo' Roh Tuhan nengetueh ni Samson ngaceku ieh na karit, pad ieh nenarak balang ineh ku ticu'neh sebuleng mepad kudeng lun narak anak améek. Iamo' na ieh nemada' taman-tinanneh ratnan luk inau'neh.

⁷Idi ieh inée' pegayam inan decur ineh idi ieh mawa neneh.

⁸Pangeh tuda'-tuda' aco idi ieh inée' ngaweh decur ineh. Idi ieh umai inée' nier butung balang ineh. Idi bang burur balang ineh inan aceh tebikan luk inan duru'.

⁹Idi ieh nengalap duru' ineh. Idi ieh nekuman ineh maya' dalam. Kareb ieh inée' inan taman-tinanneh, idi ieh na mada' nedidueh duru' ineh ilapneh rat bang butung balang.

¹⁰Idi tamanneh inée' ruma' decur ineh, idi Samson nenganau' aceh irau paweh su ineh. Ngaceku ini adat kuan anak adi' deléei.

¹¹Idi kareb lun Pilistin nenier neneh, idi ideh nenguit teluh ngepulu' anak adi' deléi tudo danganneh.

¹²Idi kebala Samson nedeh, "Ui marée aceh balée' kuan muyuh. Kudeng tudu' aco bang irau ini muyuh miak kali' ilungneh idi marée kali' negku, idi ui miak marée teluh ngepulu' kuyu' luk meputeng nemuyuh idi teh teluh ngepulu' kuyu' luk mebuyor teh.

¹³Idi kudeng muyuh na kali' ilungneh na miak na muyuh marée teluh ngepulu' kuyu' luk meputeng idi teluh ngepulu' kuyu' luk mebuyor negku." Idi kebaladeh neneh, "Mala balée' midi pedingeren kai."

¹⁴Kebalaneh, "Luk ngita' nengeruat luk kenen, luk metueh nengeruat luk mepaci'." Idi bang teluh aco nateh ideh kali' ilungneh.

¹⁵Idi kareb aco luk keapat idi ideh nekidi inan awan Samson, "Do' iko ngubuk awanmu, pad ieh mada' nekai ilung balée' ineh. Kudeng na, kai ngeseb namu dengan ruma' tamanmu. Kian, medueh nenawar nekai pian ngalap binaweh kai lek?"

¹⁶Idi awan Samson ineh inée' neneh dengan nangi'. Idi keburineh, "Megala' iko dat negku, idi na mawa negku. Ngaceku iko pangeh nemala aceh balée' kuan rurumku. Idi iko na nemada' ilungneh negku." Idi kebala Samson, "Idi taman-tinan ku tu pana', nateh ui nemada' ilungneh nedidueh, kudeng ineh teh ui na miak mada' ilungneh namu."

¹⁷Idi ieh na ugka' nangi' tudu' aco raked irau ineh. Iamo' aco luk ketudu' ieh nemada' ilungneh neneh. Ngaceku ieh mesaad ngitun neneh. Idi decur ineh nemada' ilungneh kuan lun rurumneh.

¹⁸Idi aco luk ketudu' kareb nateh aco macep, idi ideh nemada' ilungneh ni Samson, "Anunkée luk meluun paci' ratnan duru'? Anunkée luk meluun tueh ratnan balang?" Idi kebala Samson nedeh, "Kudeng muyuh na nengeradu ku sapi'ku, kali' rungen muyuh na kali' ilung balée'ku."

¹⁹Idi bang kareb ineh Roh Tuhan nengetueh ni Samson. Idi ieh inée' déei' Askelon. Idi ieh nengatée teluh ngepulu' burur lemulun, idi nengalap amung

ayungdeh idi nemarée ineh kuandeh luk pangeh nekali' balée'neh. Iamo' ieh nuli' dengan megateh niat.

²⁰Idi awan Samson pana' birée kuan lun rurumneh.

Lun Luk Nguyut 15

¹Muci ratnan ineh idi Samson inée' ngikak awanneh kareb ngeranéh. Idi ieh nenguit aceh anak améék, idi kebalaneh kuan ibanneh, "Ui pian amée' bang takep awanku." Iamo' ibanneh na nemarée neneh semuet.

²Keburi'neh ni Samson, "Ui ngerawée iko museh neneh. Ngaceku ineh ui nemarée neneh kuan lun rurummu. Iamo' kinanakneh luk isuut do' taga rat neneh. Do' ieh lapenmu ku libalneh."

³Idi keburu' Samson, "Sekua' ini ui na mesala' kudeng ui ngua' dat lun Pilistin."

⁴Idi ieh inée' ngakem teluh ngeratu bungalée. Idi ieh nenganau' bungalée ineh tedueh-tedueh idi nengabet iurdeh pamung, idi ieh nenganau' sengapak ilu' arang iurdeh ineh.

⁵Idi ieh nenutud ilu' ineh. Idi ieh nemuit amung bungalée ineh luun lati' lun Pilistin idi nengeseb amung padée luk pangeh piranéh, idi luk na piranéh pana', idi kabun saitun pana' neseb teh.

⁶Idi lun Pilistin nengitun, "Idéékée nenganau' ini?" Idi kebaladeh, "Teh ineh Samson, ngaceku ibanneh, lun Timna ineh pangeh nemarée awanneh kuan lun rurumneh." Ngaceku ineh lun Pilistin inée' ngeseb ruma' taman decur ineh idi nengeseb decur ineh teh.

⁷Iamo' kebala Samson nedeh, "Kudeng inikée kekamen muyuh? Kali' rungen ui na ugka' kudeng ui na nengua' kuan muyuh."

⁸Idi ieh nemunu' nedeh tutu, pad mula' ideh pinatéeneh. Pangeh ineh idi ieh inée' tudo bang aceh lubang batu déei' Etam.

⁹Idi lun Pilistin inée' idi nelupo déei' Yahuda. Idi ideh nemunu' bawang Leki.

¹⁰Idi lun Yahuda nengitun nedeh, "Ngudeh muyuh munu' nekai?" Keburi'deh, "Kai amée' ngalap ni Samson idi ngedereh neneh, mepad kudeng ieh nengedereh nekai."

¹¹Idi 3,000 burur lun Yahuda inée' déei' lubang batu Etam, idi kebaladeh ni Samson, "Nakée iko kali' kai bang imet lun Pilistin? Ngudeh iko nenganau' nekai kudeng ini?" Idi Samson nengor baladeh, "Ui nenganau' kuandeh maya' kudeng luk inau'deh kuanku."

¹²Idi keburid'deh neneh, "Kai inée' tungée', pian ngaling namu idi marée namu nelun Pilistin." Idi Samson nengor baladeh, "Pejani' negku idi pad muyuh na ngatée negku."

¹³Idi keburid'deh, "Na kai ngatée namu. Iamo' kai pian ngaling namu mo' idi marée namu nedeh." Idi ideh nengabet neneh ku dueh nuper luk mebaruh, idi nenginat neneh rat bang lubang batu ineh idi nenguit neneh.

¹⁴Kareb Samson nacing déei' Leki, idi lun Pilistin nupun inée' neneh idi nengitang ku ieh. Idi Roh Tuhan nengetueh ni Samson. Idi ieh nemutut kalingneh mepad kudeng gitian luk neseb.

¹⁵Idi ieh nekali' aceh tulang ada keladai luk mebaruh luun tana' idi ieh nengalap ineh. Idi ieh nengatée 1,000 lemulun ku ineh.

¹⁶Pangeh ineh idi Samson nemenani, "Ku tulang ada keladai ui nengatée meribu lemulun, Ku tulang ada keladai ui nengamung butung pebuun-pebuun."

¹⁷Pangeh ineh, idi ieh nenala' tulang ada ineh. Idi ieh nenganau' ngadan su ineh "Surud Tulang Ada."

¹⁸Idi Samson meparing. Ngaceku ineh ieh nengitang nawar Tuhan Allah, kebalaneh, "Iko pangeh nemarée tueh negku. Idi nekini ui léelée matée ku paring, idi miak kamen lun Pilistin luk na sinunat ineh."

¹⁹Idi Allah nengukab aceh lubang luun natad déei' Leki. Idi abpa' neremuat rat bang lubang ineh. Idi Samson nengirup ineh. Idi ieh metueh peh. Idi

ngaceku ineh, ieh nenganau' ngadan bued abpa' ineh "Lun Luk Nawar." Bued ineh idi déei' Leki macing nekini.

²⁰Idi Samson nenguyut nelun Israil dueh ngepulu' lak kinioneh bang kareb imet lun Pilistin.

Lun Luk Nguyut 16

¹Idi Samson inée' déei' Gasa. Idi ieh nenier aceh decur luk mesawa'. Idi ieh nepamung neneh.

²Idi lun Gasa nekali' Samson idi bang bawangdeh. Idi ideh nengelibut bawang idi nengabang neneh kedangan-kedangan ineh munung tanga' bawang ineh. Iamo' ideh tudo kedangan-kedangan, keburideh, "Kareb pekak uka-uka kali' rungen tau ngatéé neneh."

³Iamo' Samson rudap macing tangal dacem. Idi ieh nekulat, idi nengalap itek tanga' bawang ineh dengan dirineh. Idi ieh nemaan ineh dengan palinneh, inée' luun buduk surud luk petutup ku Hebron ineh.

⁴Pangeh ineh Samson mawa inan aceh decur luk tudo muneng ku Abpa' Sorek. Idi ngadan decur ineh Delila.

⁵Idi limeh burur lun rayeh lun Pilistin inée' inan decur ineh, kebaladeh, "Do' iko naluk neneh pelée iko miak kali' anun punneh metueh, idi kudeng apehkée kai miak metueh rat neneh, idi ngaling neneh, pad ieh uen ngelaya'. Idi anid-anid kai miak marée namu 1,100 balad pirak."

⁶Idi ngaceku ineh Delila nengitun ni Samson, "Mada' negku anun punmu pelaba tueh, idi anun luk miak ku ngaling namu, pad iko melaya'."

⁷Idi kebala Samson, "Kudeng lun ngabet negku ku tudu' nuper luk mebaruh, ieh ineh luk na pikai, kali' rungen ui melaya', idi mangun mepad kudeng lun baken."

⁸Idi lun Pilistin inée' idi nenguit tudu' nuper luk mebaruh ieh ineh luk na pikai. Idi Delila nengaling ni Samson ku ineh.

⁹Idi lun luk ngabang tudo bang takepneh selipa. Idi kebala decur neneh, "O Samson, lun Pilistin macing amée' ngakem namu!" Idi ieh nemutut amung nuper luk nepingaling neneh mepad kudeng gitian luk neseb. Ngaceku ineh nateh ideh nekali' anun punneh metueh.

¹⁰Idi kehuri' Delila ni Samson, "Ngudeh iko nguto negku, idi mebalih negku. Mada' negku anun luk miak ku ngaling namu."

¹¹Idi kebala Samson neneh, "Kudeng ui kalingen picet-picet ku kalat luk mebaruh luk na nekungabet, kali' rungen ui melaya' mepad kudeng lun baken.

¹²Idi Delila nengalap aceh kalat luk mebaruh, idi nengaling neneh ku ineh. Keburi' Delila, "O Samson, lun Pilistin macing amée' ngakem namu!" Idi lun luk ngabang ineh tudo bang takepneh selipa. Idi Samson nemutut kalat ineh ratnan penguaneh mepad kudeng gitian.

¹³Idi kehuri' Delila ni Samson, "Ngudeh iko ucet nguto negku, idi mebalih teh? Mada' negku dengan megala' anun luk miak ku ngaling namu." Idi Samson nengor balaneh, "Kudeng iko ngebaruh abpukku dengan pu luun iad tebaruh idi micet neneh kali rungen ui mangun melaya' mepad kudeng amung lun baken."

¹⁴Kareb ieh rudap idi Delila nengebaruh abpukneh dengan pu ineh. Idi ieh nemicet neneh. Keburi' Delila, "O Samson, lun Pilistin macing amée' ngakem namu!" Idi petacu ieh netemui idi nenginat abpukneh ratnan iad tebaruh ineh.

¹⁵Idi kehuri' Delila neneh, "Ngudeh iko megéei' mala iko mawa negku, iamo' iko mebalih? Iko pangeh mebalih negku teluh kua', idi nateh iko nemada' negku anun punmu metueh."

¹⁶Idi na ieh ugka' ngitun neneh anid-anid aco. Idi Samson musam tuninneh ratnan ineh, pad ieh ngerawée meluun do' matée.

¹⁷Idi ieh nemada' neneh peh, kehuri'neh, "Abpukku nateh binuting. Ngaceku ui pangeh birée kuan Allah mangun ku seburur luk pitad rat acoku tinganak.

Iamo' kudeng abpukku binuting, kali' rungen tuehku ineh buro rat negku, idi ui melaya' mepad kudeng lun baken.”

¹⁸Kareb Delila neninger balaneh matu, idi ieh nemarée kali' nelun rayeh lun Pilistin, keburineh, "Do' muyuh amée' sekua' ini peh, ngaceku ieh nemada' negku dengan matu." Idi amung lun rayeh lun Pilistin inée', idi ideh nenguit usin kuan Delila.

¹⁹Idi Delila nenaso ni Samson bang abinneh pad ieh nerudap. Idi ieh nenawar seburur inée' muting abpukneh. Idi ieh nenutun ngalat neneh. Iamo' tuehneh pangeh neburo rat neneh.

²⁰Idi Delila nengitang, "O Samson, lun Pilistin macing amée' ngakem namu!" Idi ieh petacu nekulat. Idi keterawéeneh, "Ui miak mepuit mepad kudeng atun." Iamo' na ieh kali' Tuhan nenecan neneh.

²¹Idi lun Pilistin nengakem neneh. Idi ideh nenakul ilung matehneh dueh-dueh. Idi ideh nenguit neneh amée' déei' Gasa, idi nengaling neneh ku ratai tekaling. Idi ieh icuk tupeh banak bang tutup.

²²Idi mio pangeh ineh idi abpukneh mekadang.

²³Idi lun rayeh lun Pilistin nepamung pian marée aceh barée luk rayeh kuan Dagon akangdeh ineh dengan mawang niat. Idi ideh nemenani, "Akang tau pangeh nemarée tueh netau ratnan bunu' tau Samson!"

²⁴Kareb lun mula' ineh nenier neneh idi ideh nemenani ngubur akangdeh, kebaladeh, "Akang tau pangeh nemarée tueh netau, ratnan bunu' tau luk pangeh nengedat bawang tau, idi luk pangeh nengatée tuda'-tuda' burur arang tau!"

²⁵Idi kareb ideh marot, kebaladeh, "Nawar ni Samson amée' tungée', pad tau situnga neneh!" Idi ideh nenguit ni Samson remuat rat bang tutup. Idi ideh nesitunga neneh. Idi ideh nenganau' neneh tuped arang diri ruma' ineh.

²⁶Idi kebala Samson inan anak deléei luk nguyut neneh, "Nguit negku amée' ngakem diri ruma' ini, ngaceku ui pian pusad luun ineh.”

²⁷Idi ruma' ineh panu' ku lemulun, do' deléei idi decur teh. Amung lun rayeh lun Pilistin idi teh. Idi luun apo ruma' ineh pana' inan 3,000 burur deléei idi decur luk nier Samson idi situnga neneh.

²⁸Idi Samson nesembayang, kesembayangneh, "O Tuhan Allah, do' ngerawée negku, idi ngetueh negku sekua' ini mo', O Allahku, pad ui miak ngua' kuan lun Pilistin ku ideh nenakul matehku."

²⁹Idi Samson nengakem dueh diri ruma' ineh. Idi ieh netemueh.

³⁰Idi ieh nengitang, "Do' ui matée dengan amung lun Pilistin ini." Idi ieh nengarung diri ineh dengan tuehneh. Idi ruma' ineh netabpa pad nengeritep amung lun rayeh lun Pilistin, idi amungdeh luk bang ruma' ineh teh. Kareb atéeneh ineh Samson nengatée meluun ula' ratnan luk pinatéeneh kareb ieh mulun.

³¹Idi amung-amung kinanakneh idi amung lun bang tetek ruma'neh inée' ngalap butungneh. Idi ideh nenguit neneh idi nenanem neneh arang bawang Sora idi Estaul bang tanem Manua tamanneh. Idi Samson nenguyut nelun Israil dueh ngepulu' lak kinioneh.

Lun Luk Nguyut 17

¹Idi inan aceh deléei rat luun pegkung-pegkung Epraim, ngadanneh Mika.

²Idi kebalaneh inan tinanneh, "Kareb 1,100 balad pirak pino rat namu, iko nengediman lun luk mano ineh pindengerku. Nier usin ineh idi negku, ngaceku ui luk nengalap idi." Idi kebala tinanneh, "Do' Tuhan ngeperuan namu, O anakku!"

³Idi ieh nemarée 1,100 balad pirak ineh lemubed kuan tinanneh. Iamo' kebala tinanneh, "Ui marée pirak ineh kuan Tuhan, pad kediman ineh na mebpeh luun anakku, idi pirak ineh ruen luun akang kayuh. Idi ngaceku ineh, nekini ui ngelubed ineh amée' namu."

⁴Idi Mika nengelubed pirak ineh. Iamo' tinanneh nengalap dueh ngeratu balad mo', idi nemarée ineh inan tukang amas ruenneh ku akang. Idi akang ineh inau'deh bang ruma' Mika.

⁵Idi Mika inan ruma' luk inanneh sembayang. Idi ieh nenganau' tuda'-tuda' akang dengan ebpudeh. Idi ieh nemili' sebuleng anak deléineh mangun ku imamneh.

⁶Idi bang kareb ineh na luk idi raca' bang bawang Israil. Ngaceku ineh anid-anid bururdeh nenganau' maya' kudeng luk piandeh sebuleng.

⁷Idi inan aceh anak adi' deléei luk tudo déei' Baitlahim bang tana' Yahuda. Idi ieh ineh lun Liwi rat Yahuda.

⁸Idi ieh nenalan rat Baitlahim, pian nakap bawang baken inanneh tebawang. Idi kareb ieh nalan ieh nacing ruma' déei' luun pegkung-pegkung Epraim.

⁹Idi Mika nengitun neneh, "Rat iapeh iko?" Idi ieh nengor balaneh, "Ui ini seburur lun Liwi rat Baitlahim luk bang tana' Yahuda. Ui nakap bawang inanku tebawang."

¹⁰Idi kebala Mika neneh, "Do' tudo denganku, idi mangun ku lun mada' negku idi ku imam. Idi ui marée kuanmu pulu' balad pirak bang selak, dengan ayung luk petap, idi akan teh."

¹¹Idi lun Liwi ineh nengamo tudo denganneh. Idi ieh mepad kudeng anakneh sebuleng.

¹²Idi Mika nenganau' neneh mangun ku imamneh. Idi teh ieh netudo bang ruma' Mika.

¹³Idi kebala Mika, "Nekini ui kali' Tuhan miak ngeperuan negku, ngaceku inan lun Liwi mangun ku imamku."

Lun Luk Nguyut 18

¹Idi bang kareb ineh nateh raca' lun Israil. Idi bang kareb ineh teh lun pupu Dan nenakap tana' luk inandeh tebawang. Ngaceku macing aco sineh nateh ideh nengalap tana' ku babpatdeh arang lun pupu Israil.

²Idi lun pupu Dan nemili' limeh burur lun luk mileh rat arang pupudeh, idi nengecuk nedeh nalan rat bawang Sora idi Estaul, pad ideh miak nier aput

tana' ineh. Idi kebaladeh nedeh, "Amée' muyuh idi nier bawang ineh." Idi ideh inée' déei' luun pegkung-pegkung Epraim, idi netudo bang ruma' Mika.

³Idi kareb ideh tudo ieneh, idi ideh miti bala lun Liwi luk anak adi' ineh. Idi ideh nengitun neneh, kebaladeh, "Anun kekamenmu tungée'? Idée nenguit namu inée' tungée'?"

⁴Idi ieh nengor baladeh, "Ui nepejani' ni Mika. Ui mangun ku imamneh, idi ieh mayar tabparku."

⁵Idi kebaladeh neneh, "Do' iko ngitun Allah, pelée kai kali' kudeng kai inan peruan bang lawée kai ini."

⁶Idi kebala imam ineh, "Na luk ku rapang muyuh. Ngaceku Tuhan matar nemuyuh bang lawée muyuh ini."

⁷Idi ideh luk limeh burur ineh nenalan idi inée' bawang Lais. Idi ideh nenier nelun bang bawang ineh do' udeng, mepad kudeng lun Sidon. Idi ideh na pebunu' idi na inan kedaluh dengan lun baken. Idi ideh inan petap akan. Idi su luk inandeh mado rat nelun Sidon. Idi na ideh pepua' dengan lun pupu baken.

⁸Kareb ideh luk limeh burur ineh nelemubed inée' bawang Sora idi Estaul, idi pupudeh nengitun nedeh, "Anunkée luk sinier muyuh déei'?"

⁹Idi ideh nengor baladeh, "Do' tau amée' munu' nedeh. Kai pangeh nenier tana' ineh pelaba do'neh. Anun ulek tudo ieni mo'-mo'? Miket! Nalan idi ngalap bawang ineh.

¹⁰Kareb muyuh amée', muyuh miak kali' lemulun ineh na ngerawée ratnan bunu'. Idi bawangdeh ineh rayeh. Idi ideh miak ngalap anun-anun luk pian lun, idi Allah pangeh nemarée ineh nemuyuh."

¹¹Idi 600 burur lun pupu Dan nenalan rat Sora idi Estaul inée' pebunu'.

¹²Idi ideh mudik idi nelupo pa acep aco bawang Yarim luk bang tana' Yahuda. Ngaceku ineh ideh neneten su ineh Lepo Dan macing aco sini.

- ¹³Idi ideh nenalan rat ieneh inée' ruma' Mika luk luun pegkung-pegkung Epraim.
- ¹⁴Idi ideh luk limeh burur ineh luk inée' nier libut bawang Lais ineh nengitun nelun rurumdeh, "Kali' muyuh bang ruma' ini, inan aceh akang luk kikep ku pirak? Idi inan teh tuda'-tuda' akang luk baken dengan ebpudeh? Anun luk miak ruen tau bang terawée muyuh?"
- ¹⁵Idi ideh numai inée' ruma' Mika su luk inan lun Liwi ineh tudo. Idi ideh nengitun neneh kudeng apeh ulunneh.
- ¹⁶Idi 600 burur lun pupu Dan luk amée' pebunu' netuped munung tanga'.
- ¹⁷Idi limeh bururdeh luk inée' nier bawang ineh petacu numak, idi nengalap akang luk kikep ku pirak, idi amung akang luk baken teh dengan ebpudeh. Idi imam ineh netuped munung tanga' dengan 600 burur lun luk amée' pebunu' ineh.
- ¹⁸Litad ideh numak ruma' Mika idi nengalap amung akang ineh, idi imam ineh nengitun nedeh, "Anun luk ruen muyuh ni?"
- ¹⁹Idi keburideh neneh, "Pirud! Na pebala! Amée' maya' nekai, mangun ku lun mada' nekai idi imam kai. Nakée iko do' mangun ku imam kuan pupu lun Israil, ratnan iko mangun ku imam kuan aceh tetek ruma' mo'?"
- ²⁰Idi imam ineh pelaba awang niat, idi ieh nengalap amung akang ineh, idi inée' maya' nedeh.
- ²¹Idi ideh nelemubed ratieneh inée' maya' dalan rayeh. Idi ideh nenganau' amung anak-anakdeh, idi amung aya'deh, idi amung binawehdeh teh pa atundeh.
- ²²Kareb ideh mado rat ruma' Mika, idi Mika nenawar amung lun denganneh amée' ngerada' nelun Dan. Idi kareb ideh nepigket nelun Dan ineh,
- ²³idi ideh nengitang nedeh. Idi lun Dan nelumi idi nengitun ni Mika, "Ngudeh muyuh pelaba ula'? Anun susa' muyuh?"

²⁴Kebala Mika, "Muyuh ngalap amung akangku luk inau'ku ineh idi imamku pana' idi petacu nalan. Anun luk ketecan negku peh? Ngudeh muyuh mala, 'Anun susa?' "

²⁵Iamo' kebala lun Dan, "Meluun do' iko na pebala anun-anun, pad kai na megateh niat idi munu' namu, pad iko na matée dengan amung uang tetek ruma'mu."

²⁶Idi lun Dan pana' nenalan. Idi Mika nekali' nedeh meluun tueh rat neneh, idi ieh nelemubed.

²⁷Idi lun Dan nengalap amung luk inau' Mika, idi imamneh teh. Idi ideh inée' idi nemunu' Lais, aceh bawang lun luk do' udeng idi luk na pebunu'. Idi ideh nengatéé nedeh, idi nenutung bawangdeh.

²⁸Idi seburur pana' na luk nengedengan nedeh ineh, ngaceku bawangdeh mado rat Sidon. Idi na lun ineh pepua' dengan pupu baken. Idi bawangdeh bang ruan muneng ku Bait Rehob. Idi lun Dan nemudut bawang ineh baruh, idi ideh netebawang ieneh.

²⁹Idi ideh nenganau' ngadan bawang ineh Dan maya' ngadan tepundeh Dan luk anak Yakub. Iamo' atun ngadan bawang ineh Lais.

³⁰Idi lun Dan nenaped akang ineh inandeh sembayang. Idi Yonatan Gerson, luk mupun Musa mangun ku imam kuan luk Dan, idi inulneh mangun ku imamdeh, pad macing pupu ineh tiban.

³¹Idi akang Mika neketecan déei' seruked Lepo Allah idi déei' Silo.

Lun Luk Nguyut 19

¹Idi kareb ineh teh, lun Israil na raca' idi inan aceh lun Liwi luk tudo déei' punang abpa' luun pegkung-pegkung Epraim. Idi ieh nengalap seburur decur rat bawang Baitlahim bang tana' Yahuda ku apidneh.

²Iamo' decur ineh museh neneh, idi nuli' inée' ruma' tamanneh déei' Baitlahim. Idi ieh netudo déei' apat bulan kinioneh.

³Muci ratnan ineh idi lun Liwi inée' ngalap neneh, idi pian ngubuk neneh muli' maya' neneh. Idi ieh nenguit seburur demulunneh, idi dueh keladai. Idi kareb ieh nacing ruma' ibanneh, idi decur ineh nenguit neneh semuet bang ruma' tamanneh. Idi kareb taman decur ineh nenier neneh, idi ieh pelaba awang niat papu' neneh.

⁴Idi ibanneh nengiteng neneh pad ieh tudo teluh aco. Idi didueh tudo déei' bang teluh aco ineh.

⁵Idi pekak aco luk keapat, idi didueh netumui uka-uka, idi gugkang. Idi kebala taman decur ineh inan ibanneh, "Do' iko kuman atun idi teh medueh nalan."

⁶Idi taman decur ineh idi ibanneh netudo. Idi didueh pana' nekuman idi ngirup. Idi kebala taman decur ineh kuan ibanneh, "Do' tudo aco sini teh, pad tau do' ria'."

⁷Idi pangeh akan didueh idi ieh pian nalan. Iamo' taman decur ineh mesaad ngiteng neneh aco sineh teh.

⁸Idi aco luk kelimeh pekak uka-uka, ieh netumui pian nalan. Iamo' kebala ibanneh, "Do' kuman atun. Idi napeh medueh miak nalan." Idi ibanneh nekuman danganneh.

⁹Idi pangeh akan didueh, ieh pian nalan dengan apidneh idi demulunneh. Idi kebala ibanneh, "Nier, malem aco ni peh. Do' rudap malem sini teh pad tau do' ria'. Na mio macep aco ni. Idi pekak nebpa iko miak nalan uka-uka."

¹⁰Iamo' na ieh sikal rudap peh, idi ieh nudur idi nenalan dengan apidneh, idi dueh keladai luk nguit babehneh. Idi ieh nacing su luk petutup ku Yebus, ieh ineh Yerusalim.

¹¹Kareb ideh malée macing Yebus, idi aco pana' malée macep. Idi keburu' demulun inan tuanneh, "Do' tau rudap bang bawang ini."

¹²Iamo' kebala tuanneh neneh, "Tau na miak rudap bang bawang ini, ngaceku ini baken bawang lun Israil. Do' tau petacu amée' Gibia.

- ¹³Tau miak ngiuk sesuut teh idi rudap déei' Gibia kian Rama lek.”
- ¹⁴Idi ideh nelemaba Yebus. Idi kareb ideh nacing déei' Gibia luk bang bawang pupu Benjamin, idi aco pana' macep.
- ¹⁵Idi ideh numak pian rudap déei'. Lun Liwi ineh nesemuet idi netudo luun natad, iamo' seburur pana' nateh luk nenganak nedeh.
- ¹⁶Idi kareb ineh seburur lun mengered nuli' rat lati'neh. Idi ieh seburur lun nepura' rat luun pegkung-pegkung Epraim luk tudo déei' Gibia. Iamo' lun bang bawang ineh ratnan pupu Benjamin.
- ¹⁷Idi lun mengered ineh miti nedeh lun sakai ku ideh tudo luun natad di. Idi ieh nengitun nedeh, "Rat iapeh muyuh ni? Amée' iapeh muyuh?"
- ¹⁸Idi lun Liwi ineh nengor balaneh, "Kai muli' rat Baitlahim luk bang tana' Yahuda amée' déei' punang abpa' luun pegkung-pegkung Epraim, su inan bawangku. Idi rat déei' ui inée' Baitlahim Yahuda. Idi nekini ui pian muli'. Iamo' na lemulun nganak negku.
- ¹⁹Idi kai inan petap balu' kenen keladai idi kuan kai teh.”
- ²⁰Idi kebala lun mengered ineh, "Do' muyuh amée' ruma'ku. Ui miak ngasa' nemuyuh. Ngaceku na do' muyuh rudap luun natad ini.”
- ²¹Idi ieh nenguit nedeh inée' ruma'neh. Idi ieh nemaman keladaideh. Idi sakaineh ineh nesibaru'. Pangeh ineh ideh nengirup idi nekuman.
- ²²Idi kareb ideh tudo, denak-denak inan lemulun luk dat rat bang bawang ineh nengelibut ruma' ineh, idi ideh ngemeg-ngemeg tanga'. Idi keburideh inan lun mengered ineh, "Nnguit deléei luk nemaya' namu ina di remuat, kai pian paséet neneh!”
- ²³Idi lun mengered ineh neremuat idi nepebala nedeh, "O kinanakku, aleg muyuh nganau' luk dat. Deléei ini sakaiku.
- ²⁴Ieh inan apid, idi ui inan anak decur teh. Ui miak nguit nedidueh kuan muyuh pad tau' muyuh nedidueh nekini. Aganeh muyuh paséet nedidueh, idi

nganau' anun-anun luk do' bang terawée muyuh. Iamo' aleg muyuh nganau' luk dat kuan deléei ineh!"

²⁵Iamo' lemulun luk dat na sikal ninger balaneh. Idi lun Liwi ineh nengalap apidneh idi nenganau' neneh déei' liang dengandeh. Idi ideh sua-sua nepaséet neneh kedangan-kedangan ineh pad macing macang.

²⁶Idi kareb aco macang, idi decur ineh numak, idi ieh neluka' munung tanga' ruma' ineh, su inan awanneh tudo, idi ieh netelubid su ineh pad macing aco masat.

²⁷Pekak ineh idi awanneh netumui, idi kareb ieh nengukab tanga' ineh pian nalan, idi ieh nenier apidneh telubid munung tanga' ineh. Idi ticu'neh mop lidung tanga' ineh.

²⁸Idi kebala deléei ineh neneh, "Tumui! Nalan tau!" Iamo' na balaneh. Idi ieh nenganau' butungneh luun keted keladaineh, idi nenalan.

²⁹Kareb ieh nacing ruma'neh, idi ieh nengalap aceh iyu. Idi ieh nenangal butung apidneh ineh. Idi ieh nenangal butungneh pulu' dueh tangal. Idi ieh nemarée tangal ineh kuan anid babpat bawang lun Israil.

³⁰Idi amung lun luk nenier ineh nepebala, "Nateh kai nekali' luk kudeng ini! Nateh luk nangun mepad kudeng ini rat kareb lun Israil neremuat rat bang bawang Masir! Do' ngerawée do'-do'! Anun luk miak ruen tau ratnan ineh?"

Lun Luk Nguyut 20

¹Idi amung lun Israil rat bawang Dan macing bawang Birsiba, idi rat bawang Giliad inée' ku teteng ineh, idi nepamung pa kiung Tuhan déei' Mispa dengan sebuleng terawée.

²Amung lun rayeh pupu Israil idi teh bang tebubpun ineh. Amungdeh luk amée' pebunu' 400,000 kinula'deh.

³Idi lun pupu Benjamin nekali' bala amung lun Israil pangeh nenalan inée' Mispa. Idi kareb lun Israil nacing Mispa, idi ideh nengitun, "Mada' nekai kudeng apeh kekamen luk dat ini pangeh nangun?"

- ⁴Idi lun Liwi, awan decur luk pangeh pinatée nengor baladeh, "Ui idi apidku inée' déei' bawang Gibia luk bang babpat Benjamin sikal rudap déei'.
- ⁵Idi lun Gibia sikal ngalap negku, idi ideh nengelibut ruma' luk inanku kareb medacem. Ideh pian ngatée negku, iamo' ideh nepaséet inan apidku pad ieh natée.
- ⁶Idi ui nengalap butungneh, idi nenangal neneh. Idi tangalneh biréeku kuan amung babpat tana' lun Israil. Ngaceku ideh nenganau' aceh kekamen luk meluun dat idi melutak arang tau.
- ⁷Idi amung muyuh luk nacing ni lun Israil petala. Anun luk miak ruen tau ratnan ineh?"
- ⁸Idi amung lun Israil ineh netuped idi nepebala, "Na tu-tu tau muli', do' luk tudo bang lepo, idi luk bang ruma' pana'.
- ⁹Ini luk miak ruen tau. Tau miak mili' sebuang tau amée' pebunu' nelun Gibia.
- ¹⁰Idi tau miak ngalap pulu' burur bang meratu ratnan amung inul pupu lun Israil luk miak nguit balu' kuandeh luk pebunu'. Ideh luk baken miak amée' ngukum nelun Gibia, ngaceku kekamendeh luk dat luk pangeh inau'deh bang bawang lun Israil."
- ¹¹Ngaceku ineh anid-anid burur lun Israil nepebaya' dengan sebuleng niat inée' munu' bawang ineh.
- ¹²Idi amung pupu lun Israil ineh nengecuk tuda'-tuda' lun duken amée' anid-anid ruma' bang bawang pupu Benjamin, kebaladeh, "Kudeng apeh kekamen luk dat luk pangeh inau' muyuh?
- ¹³Idi nekini marée kuan kai amungdeh luk dat luk bang bawang Gibia ini, pelée kai ngatée nedeh, idi nala' dat ineh rat arang lun Israil." Iamo' lun pupu Benjamin na sikal ninger bala lun Israil luk baken ineh.
- ¹⁴Iamo' amung lun Benjamin pamung déei' Gibia pian pebunu' nelun Israil.

- ¹⁵Kareb aco sineh teh ideh nenawar 26,000 lun pebunu' rat bang bawangdeh. Baken ratnan ineh, lun Gibia nengamung 700 burur lun pinili'.
- ¹⁶Idi arang lun mula' ineh inan 700 burur lun pinili' luk mekabing. Idi amungdeh ineh mileh mitung ku batu. Ideh miak mitung sengurat abpuk pana', mekaneh teh, na luk mala'.
- ¹⁷Lun Israil na nengiap kinula' lun Benjamin, iamo' ideh nengamung 400,000 lun pebunu' luk mileh.
- ¹⁸Idi lun Israil inée' sembayang déei' Baitel. Idi ideh nengitun Allah, kebaladeh, "Pupu sapeh amée' munu' nelun pupu Benjamin atun?" Idi Tuhan nengor baladeh, "Pupu Yahuda atun."
- ¹⁹Idi amung lun Israil nenalan pekak uka-uka, idi ideh nelupo pelengit Gibia.
- ²⁰Ideh inée' munu' nelun pupu Benjamin. Idi ideh nepelalad matun bawang ineh.
- ²¹Idi baweh lun Benjamin neremuat rat bang bawangdeh. Idi ideh nengatée 22,000 burur lun Israil kareb nateh aco macep.
- ²²⁻²³Idi lun Israil inée' su luk inandeh sembayang idi nenangi' pa kiung Tuhan pad macing malem. Idi ideh nengitun Neneh, kebaladeh, "Miakkée kai amée' pebunu' inan kinanak kai lun Benjamin baruh teh?" Idi Tuhan nengor baladeh, "Mo, miak muyuh amée'." Idi baweh lun Israil mawang niat peh. Idi ideh nepelalad sekua' teh, su luk inandeh atun.
- ²⁴Idi lun Israil inée' pebunu' nelun Benjamin sekedueh kua'.
- ²⁵Idi bang luk kedueh kua' ineh lun Benjamin neremuat rat Gibia, idi ideh nengatée 18,000 burur lun pebunu' lun Israil luk mileh teh.
- ²⁶Pangeh ineh idi amung lun Israil inée' Baitel idi nenangi'. Idi ideh netudo ieneh pa kiung Tuhan idi na nekuman pad macing malem. Idi ideh nemarée barée luk sabpen idi barée luk nguit pedo pa kiung Tuhan.
- ²⁷Idi lun Israil nengitun Tuhan. (Kareb idi Pati' Pejani' Allah idi déei' Baitel,

²⁸Idi Pinihas anak Eliasar luk mupun Arun nematar ineh.) Kebaladeh, "Miak kai amée' pebunu' inan kinanak kai lun Benjamin baruh teh, ku na?" Idi kebala Tuhan, "Amée' mo'. Nebpa Ui marée nemuyuh metueh rat nedeh."

²⁹Idi lun Israil nengecuk tuda'-tuda' bururdeh ngabang libut bawang Gibia.

³⁰Idi aco luk keteluh amung lun Israil nenalan inée' pebunu' nelun Benjamin. Idi ideh nepelalad matun Gibia, mepad kudeng atun.

³¹Idi lun Benjamin neremuat inée' pebunu' nedeh. Idi kareb ideh nepetad ratnan bawangdeh mepad kudeng atun, idi ideh nengatée nelun Israil luun dalam luk amée' Baitel, idi luun dalam luk amée' Gibia macing su na inan ruma'. Idi luk pinatédeh teluh ngepulu' burur lun Israil.

³²Idi keburu' lun Benjamin, "Ideh pangeh nelaya' mepad kudeng luk atun teh!" Iamo' kebala lun Israil, "Do' tau buro idi nayan nedeh rat bang bawangdeh pad macing dalam rayeh."

³³Idi baweh lun Israil luk mula' nugka' peranga' idi nepelalad pebunu' déei' Baal Tamar. Idi teh amung lun Israil luk ngabang ineh pana' nupun rat su inandeh, ngabang libut bawang Gibia.

³⁴Idi 10,000 burur lun Israil luk pinili' ineh nesemuet bang bawang Gibia idi ideh nepebunu' nedeh luk ketecan. Iamo' lun Benjamin na kali' lun Israil miak metueh rat nedeh.

³⁵Idi Tuhan nengetueh nelun Israil ratnan baweh lun Benjamin, pad ideh nengatée 25,100 lun Benjamin aco sineh.

³⁶Idi lun Benjamin nekali' ideh pangeh linaya'. Lun Israil nelumuut rat nelun Benjamin, ngaceku ideh merapet nedeh luk ngabang libut Gibia.

³⁷Idi ideh luk ngabang nupun inée' Gibia. Idi ideh nurap idi nengatée amung lun bang bawang ineh.

³⁸Idi baweh Israil pangeh nepegayam nedeh luk ngabang ineh nganau' aceh tanu'. Kareb ideh nenier rabpun luk pelaba ula' rat bang bawang ineh,

³⁹Idi lun Israil miak lemubed. Idi bang kareb ineh lun Benjamin pangeh nengatée teluh ngepelu' burur lun Israil, keterawéedeh, ideh miak ngelaya' nedeh mepad kudeng atun teh.

⁴⁰Idi denak-denak inan rabpun luk pelaba ula' rat bang bawang ineh, ieh ineh tanu'deh luk nengabang. Idi lun Benjamin nelumi idi mawa nier bawangdeh meseb.

⁴¹Idi lun Israil pana' nelemubed munu' nedeh. Idi amung lun Benjamin megagau ngaceku ideh kali' ideh pangeh linaya'.

⁴²Idi ideh nelumuut rat nelun Israil idi nupun inée' su luk ali-ali. Iamo' na ideh miak mepuit. Ideh linibut baweh luk mula' ineh dengandeh luk nengabang luk macing rat bang bawang. Idi ideh pinatée.

⁴³Idi lun Israil nengelibut nelun Benjamin, idi nengerada' nedeh macing pa busat aco Gibia, idi nengatée nedeh arang dalan.

⁴⁴Idi kinula' lun Benjamin luk pinatée, ieh ineh 18,000 burur, amungdeh lun pebunu' luk mesangit.

⁴⁵Idi ideh lun Benjamin luk baken neburo inée' su luk ali-ali macing Batu Rimon. Idi 5,000 burur pinatée maya' dalan. Idi lun Israil nengerada' nedeh luk ketecan, idi nengatée nedeh. Amungdeh 2,000 burur.

⁴⁶Idi amung lun Benjamin luk pinatée aco sineh 25,000 burur. Amungdeh ineh lun mesangit.

⁴⁷Iamo' 600 burur lun Benjamin luk neburo inée' su luk ali-ali macing Batu Rimon netudo déei' apat bulan.

⁴⁸Idi lun Israil pana' nelemubed inée' pebunu' nelun Benjamin luk neketecan, idi nengatée nedeh, ieh ineh amung deléei idi aya', idi anun-anun luk kali'deh déei'. Idi ideh nenutung amung bawang bang babpat ineh.

Lun Luk Nguyut 21

¹Idi lun Israil pangeh nepejani' inan Tuhan déei' Mispa, kebaladeh, "Kai na miak marée anak decur kai lapen lun Benjamin."

- ²Idi ideh inée' déei' Baitel idi netudo pa kiung Allah pad macing malem. Idi ideh pelaba tangi',
- ³kebaladeh, "O Tuhan Allah lun Israil. Ngudeh inan luk mangun kudeng ini kuan kai? Ngudeh sebuleng pupu lun Israil na idi?"
- ⁴Idi pekak kenebpa idi lun Israil nekulat uka-uka. Idi ideh nenganau' aceh bubpun su ineh. Idi ideh nemarée barée luk sabpen idi barée luk nguit pedo'.
- ⁵Idi ideh nepitun, 'Idéekée rat arang amung pupu lun Israil na nacing inan tebubpun luk pa kiung Tuhan ini?' Ngaceku ideh pangeh nepebulung idi idée-idée luk na nacing inan Tuhan déei' Mispa, ideh miak pitayen."
- ⁶Iamo' lun Israil méei' kuan kinanakdeh lun Benjamin. Kebaladeh, "Bang aco sini sebuleng pupu lun Israil na idi.
- ⁷Kudeng apeh tau miak marée awan kuandeh luk neketecan. Ngaceku tau pangeh nepejani' inan Tuhan, na miak marée anak decur tau ku awandeh."
- ⁸Idi ideh nepitun, "Idéekée rat arang amung pupu lun Israil na nacing inan Tuhan déei' Mispa?" Idi ideh nekali' seburur pana' nateh luk nacing rat Yabis luk déei' Giliad ineh netebubpun dengandeh déei' su luk inandeh nelupo.
- ⁹Kareb ideh pangeh nengamung nelun mula' ineh, seburur pana' nateh luk rat Yabis.
- ¹⁰Idi amungdeh luk tebubpun ineh nengecuk 12,000 lun luk mesangit amée' ngatée amung lun bang bawang Yabis, perapu decur idi anak, keburideh,
- ¹¹"Do' nganau' kudeng ini: ngatée amung deléei idi amung decur luk pamung dengan deléei."
- ¹²Idi ideh nengalap 400 anak decur rat arang lun Yabis luk déei' Giliad ineh. Idi ideh nenguit nedeh inée' su luk inandeh nelupo déei' Silo, luk bang tana' Kanaan.
- ¹³Idi amung tebubpun ineh nengecuk tuda'-tuda' lun amée' nated bala nelun Benjamin déei' Batu Rimon. Idi ideh sikal pedo'.

- ¹⁴Idi lun Benjamin nelemubed, idi lun Israil luk baken nemarée kuandeh decur luk rat Yabis luk na pinatéedeh ineh. Iamo' na ideh maniddeh.
- ¹⁵Idi lun mula' ineh méei' nelun Benjamin ngaceku Tuhan pangeh nengusag rorum pupu Israil.
- ¹⁶Idi kebala lun rayeh-rayehdeh, "Na luk idi decur rat pupu Benjamin peh. Kudeng apeh tau miak marée awan kuandeh luk ketecan.
- ¹⁷Tau na miak nala' sebuleng pupu tau. Do' tau nakap dalan pad pupu Benjamin miak amée' mula'.
- ¹⁸Iamo' tau na miak marée anak decur tau ku awandeh." Ngaceku amung lun Israil pangeh nepejani' ku bulung, kebaladeh, "Kediman kuan lemulun luk marée anak decurdeh ku awan lun Benjamin."
- ¹⁹Idi kebaladeh, "Inan aceh aco rayeh kuan Tuhan déei' Silo anid-anid lak." Silo, ieh ineh pa tinueh busat aco Baitel, idi pa kabing busat aco Lebona idi pa busat aco dalan rat Baitel amée' Sikem.
- ²⁰Idi ideh nekidi nelun Benjamin, kebaladeh, "Amée' muyuh sigapung bang kabun-kabun anggur,
- ²¹idi nier do'-do'. Kareb anak-anak decur rat Silo remuat amée' ngalai kareb aco rayeh ineh, do' muyuh remuat rat bang kabun anggur ineh, idi anid-anid burur muyuh naban nedeh ku awan muyuh idi muli' amée' bawang Benjamin.
- ²²Idi kudeng taman-taman idi kinanak-kinanakdeh amée' museh nekai, idi kai miak pebala nedeh kudeng ini, "Nima' nekai ngalap nedeh ngaceku na kai nengalap nedeh rat nemuyuh ku awan kai dengan pebunu'. Idi ngaceku na muyuh nemarée nedeh nekai, muyuh na mesala' ku jani' muyuh."
- ²³Idi lun Benjamin nenganau' kudeng ineh. Anid-anid bururdeh nemili' rat arang decur luk nengalai ineh ku awandeh, idi nenguit nedeh muli'. Idi ideh nelemubed inée' bawangdeh sebuleng idi nenuneb bawangdeh, idi netudo déei'.

²⁴Idi kareb ineh amung lun Israil nuli' rat ieneh inée' inan pupu idi ruma'deh sebuleng.

²⁵Idi bang kareb ineh na luk idi raca' bang bawang Israil. Ngaceku ineh anid-anid bururdeh nenganau' maya' kudeng luk piandeh sebuleng.

Rut

Rut 1

¹Idi kareb bawang Israil bang imet lun luk nguyut, idi inan aceh iru' bang bawang ineh. Idi ngaceku ineh inan aceh deléi rat Baitlahim luk bang tana' Yahuda, idi ieh iné' tudo déi bawang Moab, dengan awanneh idi dueh anakneh luk deléi.

²Idi ngadan deléi ineh Elimalek, idi ngadan awanneh Naomi. Idi ngadan anak didueh luk dueh ineh Malun idi Kilion. Ideh lun Eprata rat Baitlahim luk bang tana' Yahuda. Idi ideh iné' bawang Moab idi ideh netebawang déi'.

³Idi Elimalek naté. Idi Naomi dengan anakneh luk dueh ineh ketecan.

⁴Idi didueh nengalap decur lun Moab ku awan didueh. Ngadan sebuleng Orpa. Idi ngadan sebuleng Rut. Idi ideh tudo déi' pulu' lak kinioneh.

⁵Idi Malun didueh Kilion naté. Idi Naomi ketecan sebuleng dengan na anak idi awan.

⁶Idi Naomi gugkang dengan dueh ibanneh ineh pian lemubed amé' bawang Baitlahim, ngaceku ieh neninger Tuhan pangeh nengedengan pupuneh idi nemaré petap akan kuandeh.

⁷Idi diteluh nenalan pian muli' amé' tana' Yahuda.

⁸Kareb ideh arang dalan Naomi nekidi inan ibanneh, "Do' medueh muli' amé' tudo dengan tinan medueh. Idi Tuhan ngedengan nemedueh, mepad kudeng medueh pangeh nengedengan negku idi nedidueh luk naté ineh.

⁹Merapet Tuhan maré awan nemedueh, pad medueh inan ruma'." " Idi Naomi nepetabi' nedidueh. Idi didueh pelaba tangi'.

¹⁰Idi kebala didueh neneh, "Ara' kai dueh lemubed. Iamo' kai dueh pian amé' maya' namu amé' inan pupumu'."

¹¹Iamo' kebala Naomi, "Lemubed mo' medueh iban. Ngudeh medueh pian amé' maya' negku? Na anakku luk ngalap nemedueh peh.

¹²Lemubed mo' medueh. Ngaceku ui mengered idi na lun pian ngalap negku peh. Idi kudeng ui merapet miak lapen lun, idi kudeng ui lapen lun malem ini pana', idi ui inan anak teh,

¹³miak medueh nganet nedidueh rayeh? Miak medueh tuman na lapen lun baken? Kali' rungen medueh na tuman. Tuhan pangeh nenecan negku, idi ui pelaba méi' nemedueh.”

¹⁴Idi didueh pelaba tangi'. Idi Orpa nepetabi' inan ibanneh, idi nelemubed iné' inan pupuneh. Iamo' Rut ara' patad rat neneh.

¹⁵Idi kebala Naomi inan ibanneh Rut, "Siruh, seruaimu pangeh nuli' iné' matun pupuneh idi akangneh. Do' iko pana' muli' maya' seruaimu.”

¹⁶Iamo' kebala Rut, "Aleg ngesaad negku necan namu idi mebpeng negku na amé' maya' namu. Ngaceku iapeh-iapeh suetmu, ui maya' namu. Idi iapeh-iapeh inanmu tudo, ieneh teh inanku tudo. Idi pupumu, ineh teh pupuku. Idi Allahmu, ineh teh Allahku.

¹⁷Iapeh-iapeh inanmu maté, su ineh teh inanku maté, idi su ineh teh inan nanem negku. Do' ukum Tuhan macing luunku kudeng ui necan namu. Iamo' até' mo' luk ngatad negku rat namu!”

¹⁸Kareb Naomi nekali' ni Rut mesaad amé' maya' neneh, idi ieh nugka' pebala neneh.

¹⁹Idi didueh nenalan pad macing déi' Baitlahim. Kareb didueh nacing bawang Baitlahim amung lun bang bawang ineh negagap. Kebala dawa' decur, "Ini Naomiké?”

²⁰Idi kebala Naomi nedeh, "Aleg neten negku Naomi. Ilung Naomi ineh 'mawang niat.' Iamo' do' neten negku Mara ngaceku ilung Mara 'mesusa' niat.' Idi Allah luk Melalud ineh pangeh nengedereh negku tu-tu.

²¹Kareb kai nenalan rat ieni kai mula'. Iamo' Tuhan nenguit negku lemubed dengan na anun-anun. Ngudeh muyuh neten negku 'Mawang Niat', ngaceku Tuhan luk Melalud pangeh nengukum negku idi nengedereh negku.”

²²Idi kudeng ini lawéneh Naomi nuli' rat Moab dengan i Rut, luk ibanneh, ieh ineh lun Moab. Idi didueh nacing Baitlahim kareb pun ngeranih ikun.

Rut 2

¹Idi Elimalek luk awan Naomi inan aceh pupu lun do', ngadanneh Boas.

²Idi kebala Rut ni Naomi, "Do' ui amé' lati' idi ngamung ikun luk tacin idi luk mebpeh pa puet idé luk méi' negku." Idi Naomi nengor balaneh, "Amé' mo' iko."

³Idi Rut iné' lati'. Idi ieh nengamung ikun luk tican idi luk nebpeh pa puet lun luk ngeranih ineh. Idi ieh nepetulu nan lati' Boas luk pupu Elimalek.

⁴Idi Boas nacing rat Baitlahim. Idi kebalaneh kuan lun luk ngeranih ineh, "Do' Tuhan ngedengan nemuyuh." Idi ideh nengor balaneh, "Do' Tuhan ngeperuan namu."

⁵Idi Boas nengitun lun dukenneah luk rayeh, "Idé luk kuan anak adi' decur ineh?"

⁶Idi lun rayeh ineh nengor balaneh, "Ineh anak decur sakai luk nemaya' ni Naomi rat bawang Moab.

⁷Idi ieh nemutuh negku, kebalaneh, 'Nima' negku ngamung ikun luk racin idi mebpeh pa puet lun luk ngeranih.' Idi ieh iné' ngeranih ineh rat pekak macing malem. Idi ina ieh nucu' segageh bang lepo."

⁸Idi kebala Boas ni Rut, "Ninger bala kini, Amu'. Aleg iko amé' ngeranih lati' dulun. Iamo' do' iko lutep ngeranih dengan lun dukenku luk decur.

⁹Do' nier su apeh inandeh ngeranih, idi iko amé' maya' nedeh. Ngaceku ui pangeh nemaré kali' nelun dukenku ratnan lawému, pelé ideh na nguto namu. Idi kareb iko meparang do' amé ngirup abpa' bang ruadeh."

¹⁰Idi Rut netekeradung pa kiungneh. Idi keburi'neh ni Boas, "Ngudeh iko méi' negku, ngaceku ui ini lun sakai."

¹¹Idi Boas nengor balaneh, "Ui pangeh nekali' ratnan amung-amung luk inau'mu kuan ibanmu rat pangeh até awanmu. Ui kali' lawému nenecan

taman idi tinanmu idi bawangmu pana', idi iné' tudo arang pupu luk na inanmu pek, lai atun.

¹²Do' Tuhan ngua' ratnan luk inau'mu. Do' Tuhan Allah lun Israil luk nematar namu iang iladNeh, ngua' kuanmu dengan petap.”

¹³Idi kebala Rut, "Pelaba do'mu negku. Iko pangeh nengubuk negku dengan bala luk do', sagan pana' ui na mepad kudeng lun dukenmu.”

¹⁴Idi kareb ideh kuman idi Boas nenawar neneh, "Amé' tungé' ngalap ruti ini, idi ngerereb ineh bang abpa' luk malam ni." Idi Rut netudo dengan lun luk ngeranih. Idi Boas nemaré aceh ikun luk kiriki neneh, idi Rut nekuman macing mebor. Inan teh tecehneh.

¹⁵Idi kareb Rut nenalan iné' ngeranih, idi Boas nepebala nelun dukenneh, "Nima' neneh ngeranih idi ngalap sebuang ratnan luk inangel muyuh, idi aleg muyuh ngedat neneh.

¹⁶Iamo' do' muyuh necan sesuut ratnan luk inangel muyuh lapenneh. Idi aleg muyuh mebpeng neneh.”

¹⁷Idi Rut nengeranih pad macing malem. Idi ieh netupeh luk piranihneh ineh, amungneh lélé apat gatang.

¹⁸Idi ieh nemabeh ineh dengan teceh luk kinanneh déi' lati' nuli' amé' ruma'. Idi kareb ieh nacing ruma' idi ieh nemada' ikun ineh siren ibanneh, idi ieh nemaré teceh luk kinanneh déi' lati' kuanneh.

¹⁹Idi kebala ibanneh, "Nengeranih iapeh iko aco sini? Do' Allah ngeperuan lemulun luk méi' namu." Idi ieh nemada' ngadan lemulun luk inanneh ngeranih, ieh ineh Boas.

²⁰Idi kebala Naomi inan ibanneh, "Do' Tuhan luk lutep maya' jani'Neh kuan lun luk mulun idi lun luk naté, ngeperuan neneh." Idi teh kebala Naomi neneh, "Lun ineh pupu tau luk muneng. Idi miak ieh ngedengan netau.”

²¹Idi keburu' Rut, "Idi teh kebalaneh negku, 'Do' iko pebaya' nelun dukenku teh pad mabud lati'ku periniendeh.' “

²²Idi kebala Naomi ni Rut, "Mo, iban, do' iko pebaya' dengan lun duken i Boas, pad iko na uen lun ngedat luun lati' dulun."

²³Idi Rut nengeranih dengan lun luk duken i Boas, pad macing mabud lati'neh. Idi ieh tudo dengan ibanneh kidi-kidi.

Rut 3

¹Idi kebala Naomi ni Rut, "O iban, do' ui nakap aceh deléi kuanmu, pad iko inan ruma'.

²Idi kudeng apeh i Boas luk pupu tau, luk kuan lati' luk piranih muyuh? Malem ini ieh rumik ikunneh.

³Ngaceku ineh do' iko diu', idi ngumau ku umau luk do' buen, idi ngayung ku ayung luk mebaruh, idi amé' su luk inanneh rumik ineh. Iamo' aleg iko silagan sirennéh, pad ieh pangeh akan.

⁴Idi kareb ieh amé' telubid, do' nier su inanneh idi iko amé' ngukab tarub pa kukudneh idi telubid. Idi ieh miak mada' namu luk miak ruenmu."

⁵Idi Rut nengor balaneh, "Amung balamu ui miak maya'."

⁶Idi Rut iné' su luk inan Boas rumik. Idi ieh nemaya' amung luk icuk ibanneh.

⁷Idi pangeh Boas kuman idi ngirup, idi ieh mawang niat. Idi ieh iné' telubid iring aceh bubpun ikun. Idi Rut iné' saak-saak. Idi ieh nengukab tarubneh pa kukud. Idi ieh netelubid.

⁸Idi kareb tangal daceh idi Boas nekulat, idi ieh netebiring selipa. Idi ieh negagap nenier aceh decur telubid iring kukudneh!

⁹Idi ieh nengitun neneh, "Idé' iko ni?" Ui ini Rut, ieh ineh lun dukenmu. Ngaceku iko pupu luk muneng negku idi luk miak ngedengan negku, do' iko ngalap negku ku awanmu."

¹⁰Idi Boas nengor balaneh, "O Amu, do' Tuhan ngeperuan namu. Do'mu luk nekini meluun rayeh ratnan luk atun. Na iko mili' anak adi', do' luk mula' binaweh, idi luk masi'.

¹¹Idi nekini, O Amu, aleg iko matot. Idi ui miak nganau' anun-anun luk pianmu, ngaceku amung lun luk bang bawang ini kali' iko aceh decur luk do'.

¹²Idi matu teh ui pupu luk muneng, idi miak ngedengan namu. Iamo' inan teh luk meluun muneng rat negku.

¹³Do' rudap ieni dacem ini. Idi pekak nebpa, kitech miak ngitun neneh kudeng ieh pian ngalap namu. Kudeng ieh pian ngalap namu do' tieh, kudeng na ieh sikal ngalap namu, ui pebulung ku ngadan Allah luk mulun, ui miak ngalap namu. Nekini do' iko rudap.”

¹⁴Idi Rut nerudap iring kukudneh macing macang. Idi ieh nekulat kareb acang dat-dat. Ngaceku kebala Boas, "Aleg nima' lun baken kali' namu iné' tungé'.”

¹⁵Idi kebala Boas neneh, "Nguit kibung luk ku pakaimu ineh amé' tungé' idi malad ineh." Idi Rut nenganau' kudeng ineh. Idi Boas nengutang lélé ualuh gatang ikun luun ineh. Idi ieh nengiding neneh kuanneh. Idi Rut nuli',

¹⁶Idi kareb ieh nacing inan ibanneh, idi keburu' Naomi neneh, "Kudeng afeh lawému, Amu?" Idi Rut nemada' amung-amung luk inau' Boas kuanneh.

¹⁷Idi teh kebalaneh, "Amung ikun ini biréneh negku teh. Ngaceku kebalaneh negku, 'Iko na miak muli' dengan na anun-anun.' “

¹⁸Idi kebala Naomi, "O Amu, do' mulai niat, pad iko kali' anun luk miak mangun. Ngaceku Boas na miak ugka', pad ieh mangeh ratnan lawé ini aco sini."

Rut 4

¹Idi Boas iné' su luk inan pegayam munung tanga' bawang ineh, idi netudo ieneh. Idi pupu Elimalek luk muneng luk pangeh bila Boas ineh nelemba. Idi Boas nenawar, "Tungé' iko, tudo ieni." Idi ieh iné' ku tawarneh.

²Idi Boas nenawar pulu' burur lun rayeh bawang ineh, kebalaneh, "Tudo ieni." Idi ideh netudo.

³Idi kebala Boas inan pupu Elimalek luk muneng ineh, "Nekini Naomi pangeh nelemubed rat Moab. Idi ieh pian masui tana' Elimalek luk pupu tau.

⁴Idi nekini ui mada' ineh namu. Idi kudeng iko pian ku tana' ineh do' iko melih ineh nekini pa kiung amung lun luk tudo ieni idi pa kiung lun rayeh tau. Iamo' kudeng iko na pian ku ineh maré kali' kuanku, ngaceku setuneh iko luk petulu inan mada' ineh atun. Kudeng iko na pian ku ini, ui luk petulu miak ngalap ineh teh." Idi lun ineh nengor balaneh, "Ui pian melih tana' ineh."

⁵Idi kebala Boas, "Kudeng iko melih tana' ineh rat ni Naomi, idi i Rut lun Moab luk tinula' ineh mangun ku awanmu, pad tana' ineh lutep kuan inul Elimalek."

⁶Idi lun ineh nengor balaneh, "Kudeng ineh peh lawéneh ruenmu, na ui pian melih tana' ineh peh, ngaceku na ui pian ngurang babaptku sebuleng. Do' iko melih tana' ineh ku libalku. Ngaceku na ui pian."

⁷Kudeng ini adat lun Israil kareb ideh melih tana' idi ngelibal teh: Lun luk masui ngelengu kasutneh, idi maré ineh kuan lun luk melih. Kudeng ini dalam lun Israil mutut ratnan lawé masui tana'.

⁸Ngaceku ineh kareb lun ineh nepebala ni Boas, "Do' iko melih ineh, "Idi ieh nengelengu kasutneh, idi nemaré ineh ni Boas.

⁹Idi kebala Boas inan amung lun rayeh idi lun mula' ineh, "Idi bang aco sini amung muyuh mangun ku lun luk nekali' ratnan ui pangeh nengalap rat ni Naomi amung-amung luk Elimalek kuan, idi amung luk Kilion idi Malun kuan.

¹⁰Idi teh Rut lun Moab, ieh ineh awan Malun teh miak mangun ku awanku, pad amung binaweh ineh lutep kuan lun luk naté ineh, pad ngadanneh tetanen meruked arang pupuneh, idi bang bawangneh. Idi aco sini amung muyuh mangun ku lun nekali'."

¹¹Idi kebala lun mula', "Amung kai mangun ku lun nekali'." Idi kebala amungdeh luk lun rayeh, "Idi do' Tuhan nganau' decur ini luk amé' bang

ruma'mu, mepad kudeng Rakel idi kudeng Lia luk pangeh nenginul nelun Israil. Merapet namu mangun ku lun do' bang bawang Eprata, idi mebala bang bawang Baitlahim.

¹²Do' anak luk barén Tuhan namu ratnan decur ineh mepad kudeng inul Paris luk anak Yahuda didueh Tamar.”

¹³Idi Boas pana' nengalap ni Rut ku awanneh idi pamung neneh. Idi Tuhan teh nengedengan neneh pad ieh mali' idi nenganak aceh anak deléi.

¹⁴Idi kareb ineh amung lun decur nepebala ni Naomi, "Ngubur Tuhan! Ieh pangeh nemaré aceh mupun kuanmu aco sini, luk miak ngasa' namu. Merapet anak ini mebala bang bawang Israil.

¹⁵Idi do' ieh ngawang niatmu idi ngasa' namu macing mengered. Ibanmu luk nenganak neneh luk méi' namu, meluun do' ratnan tudu' burur anak deléi.”

¹⁶Idi Naomi nengalap anak ineh idi nengabin neneh idi nengasa' neneh.

¹⁷Idi amung decur luk bang bawang ineh nenganau' ngadan anak ineh Obed, kebaladeh, "Anak ini tinganak kuan Naomi." Idi ieh mangun ku taman Isai luk taman Daud.

¹⁸⁻²²Idi ini inul Paris macing Daud: Paris, Ebron, Aram, Aminadab, Nasun, salmun, Boas, Obed, Isai, Daud.

Semuil Luk Pun-Pun

Semuil Luk Pun-Pun 1

¹Inan aceh deléi rat pupu Epraim, ngadanneh Elkana luk tudo déi' Rama luun pegkung-pegkung Epraim. Ieh ineh Yeroham Elihu, ratnan tetek ruma' Tohu idi inul Sup.

²Elkana inan dueh awan. Ngadan sebuleng Hanna. Ngadan sebuleng Penina. Idi Penina ineh inan anak. Iamo' Hanna na anak.

³Idi anid-anid lak Elkana iné' rat bawangdeh pian sembayang idi maré luk barén kuan Tuhan luk Melalud déi' Silo. Idi déi' inan dueh imam Tuhan, ieh ineh Hopni idi Pinihas Eli.

⁴Idi anid kua' Elkana nemaré baré, ieh nemaré aceh babpat kuan Penina awanneh idi kuan amung anakneh.

⁵Iamo' kuan i Hanna ieh nemaré aceh babpat mo', sagan tu pana' ieh méi' kuanneh, ngaceku Tuhan nateh nemaré anak neneh.

⁶Idi apid Elkana megéi' nganau' niat Hanna mesusa', pad niatneh megateh, ngaceku Tuhan nateh nemaré anak neneh.

⁷Idi kudeng ini lawéneh anid-anid lak, anid kua' Hanna iné' bang Ruma' Tuhan idi Penina nengesusa' niatneh, pad ieh nangi' idi na sikal kuman.

⁸Idi kebala awanneh Elkana, "O Hanna, ngudeh iko nangi'? Anun punmu na kuman? Anun luk inanmu dat niat? Naké ui ini meluun do' ratnan pulu' anak deléi?"

⁹Inan sekua' kareb ideh déi' Silo, idi ideh pangeh nekuman, idi Hanna netuped. Idi Eli imam ineh tudo munung tanga' Ruma' Tuhan.

¹⁰Hanna nesembayang inan Tuhan idi nenangi' singap-singap, ngaceku ieh pelaba susa' niat.

¹¹Idi ieh nepejani', kebalaneh, "O Tuhan luk Melalud, do' Iko nier dereh demulunMu ini, idi ngerawé negku. Aleg kelupan negku. Kudeng Iko maré

kuanku aceh anak deléi, ui miak maré neneh kuanMu ruked ulunneh. Idi abpukneh na miak uen muting.”

¹²Hanna mio sembayang pa kiung Tuhan, idi Eli nenier bibir tangneh.

¹³Ngaceku Hanna nepebala bang niatneh, bibirneh mo' sikima', iamo' balaneh na pedingeren. Idi Eli ngerawé neneh mabuk.

¹⁴Idi kebala Eli neneh, "Do' ugka' ngirup. Buro pad abukmu ugka'.”

¹⁵Iamo' kebala Hanna, "Baken kudeng ineh, Imam. Iamo' ui ini aceh decur luk mesusa' niat. Na ui nengirup. Iamo' ui pelaba susa' niat pad ui sembayang maré amung terawéku kuan Tuhan.

¹⁶Aleg iko ngerawé negku seburur decur luk dat. Ui sembayang kudeng ini ngaceku ui pelaba susa' niat.”

¹⁷Idi kebala Eli neneh, "Amé' iko dengan mawang niat, idi do' Allah lun Israil maré namu anun luk pinutuhmu.”

¹⁸Idi keburu' Hanna, "Do' iko méi' negku." Pangeh ineh idi ieh nenalan. Idi ieh nekuman. Pangeh ineh idi na ieh mesusa' niat peh.

¹⁹Idi kenebpa Elkana idi uang tetek ruma'neh nekulat uka-uka idi nesembayang pa kiung Tuha. Idi ideh nuli' iné' Rama. Idi kareb Elkana nepamung dengan awanneh Hanna, idi Tuhan nengua' sembayangneh,

²⁰pad Hanna mali'. Idi ieh nenganak aceh anak deléi luk ngadenneh Semuil. Idi kebalaneh, "Ieh luk pinutuhku ratnan Tuhan.”

²¹Idi Elkana idi amung lun bang tetek ruma'neh iné' pian maré kuan Tuhan baré luk pekalai anid lak, idi amung luk pangeh pijani'neh.

²²Iamo' Hanna na iné'. Kebalaneh inan awanneh, "Kareb anak ini ugka' niti', ui sikal nguit neneh amé' pa kiung Tuhan, pad ieh tudo déi' seruked ulunneh.

²³Idi kebala Elkana neneh, "Nganau' anun luk do' kali'mu, pad iko pangeh niti' neneh. Iamo' nima' Tuhan ngacing jani'Neh namu." Idi decur ineh niti' anakneh pad ieh nugka' niti'.

²⁴Idi kareb Hanna pangeh neniti' anakneh, idi ieh nenguit neneh, dengan sebuleng sapi' deléi, luk ulunneh teluh lak, idi ualuh gatang banak, idi sengseréi' abpa' anggur, idi iné' bang ruma' Tuhan déi' Silo. Idi anak ineh pelaba isuut.

²⁵Idi ideh nengeret sapi' pegawa' ineh, idi nenguit anak ineh iné' matun Eli.

²⁶Idi kebala Hanna, "Mutuh do' Imam. Ngerawé iko negku teh? Ui ini decur luk netuped ieni idi nesembayang inan Tuhan.

²⁷Idi ui nemutuh anak ini. Idi Tuhan pangeh nemaré luk pinutuhku ineh.

²⁸Ngaceku ineh ui pian maré neneh kuan Tuhan ruked ulunneh." Idi ideh netekeradung sembayang inan Tuhan.

Semuil Luk Pun-Pun 2

¹Idi Hanna nesembayang, kesembayangneh, "Ui mawang niat inan Tuhan, ngaceku Tuhan pangeh nengetueh negku. Idi ui meriruh nan bunu'ku, idi ui mawang niat ngaceku pedenganMu.

²"Seburur pana' nateh luk meligan mepad kudeng Tuhan. Ngaceku na luk baken iamo' Iko mo' sebuleng. Na luk idi pegkung batu mepad kudeng Allah tau.

³Aleg muyuh mesido' niat, pad muyuh pebala dengan medita' niat. Ngaceku Tuhan ineh Allah luk kali', idi Ieh nutun amung kekamen lemulun.

⁴Idi binor lun luk metueh pinutulNeh, idi lemulun luk melaya' mangun metueh.

⁵Lun luk mebor atun masui bururdeh ku akan. Idi lun luk melau na melau peh. Decur luk na anak miak nenganak tudu' anak. Idi luk mula' anak na inan anak ketecan.

⁶Tuhan ineh luk ngaté idi luk ngulun; Tuhan teh luk nipa bang su luk inan até, idi luk nui teh.

⁷Tuhan luk nganau' lun masi' idi lun do'; Ieh luk ngebeneh, idi luk ngedita'.

⁸Lun masi' kedinganNeh rat bang abuh. Idi lun luk mesusa' kedinganNeh ratnan derehdeh. Ieh nganau' nedeh ku rorum raca'; idi Ieh nganau' nedeh buren. Ngaceku amung diri tana' ini Tuhan kuan, idi Tuhan teh luk nemudut tana' ini.

⁹"Ieh nginita ulun lemulun luk manu Neneh. Iamo' lemulun luk dat maté bang daceh. Lemulun na metueh ngaceku tuehneh sebuleng.

¹⁰Bunu' Tuhan miak pitayeh; Ieh melalam pa luundeh, rat i langit; Tuhan ngukum aput tana', idi maré tueh kuan Raca'Neh, idi ngerayeh Raca' luk pinili'Neh."

¹¹Idi Elkana nuli' iné' Rama. Iamo' anak ineh tudo déi' Silo idi ngakem kuan Tuhan pa liang Imam Eli.

¹²Idi anak-anak deléi Eli ineh lemulun luk dat. Na didueh ngerawé Tuhan.

¹³Idi didueh nengelaba ukum ratnan luk lapen imam. Kareb seburur lemulun maré baré, idi laba' uang ineh uen nanek, lun duken imam ineh macing dengan serupang luk teluh tebpek.

¹⁴Idi ieh nebpek bang periuk idi lacang. Anun-anun luk mepabpul luun serupang ineh miak lapen imam. Idi kudeng ineh lawé didueh, kareb amung lun Israil nacing déi' Silo pian maré baré.

¹⁵Meluun teh kareb nateh lemak ineh ilap idi iseb, lun duken imam macing, idi pebala nan lemulun luk maré baré, "Maré sebuang uang ineh uen nadang kuan imam. Na ieh pian ku uang luk tinanek, iamo' luk mata'."

¹⁶Idi kudeng lun ineh ngor balaneh, "Nima' lemak ineh sabpen atun, idi mucu ngalap anun luk pianmu," idi lun duken ineh pebala neneh, "Na, maré ieh nekini. Kudeng na, kali' rungen ui ngaro ineh."

¹⁷Pelaba rayeh sala' anak-anak Eli pa kiung Tuhan, ngaceku didueh nengedat baré luk barén kuan Tuhan.

¹⁸Semuil anak ineh ngakem kuan Tuhan. Idi ieh nengayung ku kakeb ruuk ratnan kibung pu.

- ¹⁹Idi anid lak tinanneh nenganau' aceh kuyu' puteng, iten kuanneh kareb ieh nemaya' awanneh anid lak pelé maré baré kuan Tuhan.
- ²⁰Idi Eli nengeperuan ni Elkana dengan awanneh, kebalaneh, "Do' Tuhan maré kuanmu inul ratnan decur ini, ngaceku ieh pangeh nemaré kuan Tuhan luk pangeh pinutuhneh rat Neneh." Idi didueh nuli'.
- ²¹Idi Tuhan nengeperuan ni Hanna, pad ieh nenganak teluh deléi idi dueh decur teh. Idi Semuil anak ineh temubu' amé' rayeh bang kekamen Tuhan.
- ²²Idi Eli pangeh mengered. Kareb ieh neninger bala ratnan kekamen anakneh arang lun Israil, idi kudeng apeh didueh ineh pamung dengan decur-decur luk ngakem iring tanga' Lepo su luk inan papu' Tuhan,
- ²³idi kebalaneh nedidueh, "Ngudeh medueh nganau' kekamen luk kudeng ineh? Ngaceku lun mula' ini nemada' negku ratnan kekamen medueh luk dat.
- ²⁴Aleg medueh kudeng ineh. Pelaba dat bala luk pindengerku.
- ²⁵Kudeng seburur lemulun mesala' nelun denganneh kali' rungen Allah mutut ukum. Iamo kudeng seburur lemulun mesala' inan Tuhan idéké mangun ku gatum arang didueh?" Iamo' na didueh neninger bala taman didueh. Ngaceku pian Tuhan ngaté nedidueh.
- ²⁶Idi Semuil anak ineh, iuk amé' rayeh, idi ieh do' pa kiung Tuhan idi pa kiung lemulun pana'.
- ²⁷Idi seburur nabi iné' matun ni Eli dengan bala ratnan Tuhan, kebalaneh, "Kareb tepunmu Arun idi lun bang tetek ruma'neh ineh demulun raca' Masir, idi Ui nengegala' bururKu ni Arun.
- ²⁸Idi Ui nemili' neneh rat arang amung pupu Israil, pad ieh mangun ku imam kuanKu, pelé ieh maré baré luun bubpunKu, ngeseb umau luk do' buen, idi ngayung ku kakeb ruuk pa kiungKu. Idi Ui nemaré kuandeh aceh babpat ratnan amung baré luk sabpen lun Israil.

²⁹Ngudeh muyuh manga ku amung baré luk icukKu barén lun Israil. O Eli, ngudeh iko ngedita' anak-anakmu meluun rat Negku pad didueh ngelamu burur didueh ku babpat luk meluun do' ratnan baré pupuKu lun Israil?

³⁰Ui ini Tuhan Allah lun Israil pangeh nepejani', pad lun bang tetek ruma'mu idi inulmu pana' miak mangun ku imam kuanKu macing ruked-ruked. Iamo' nekini Ui ini Tuhan pebala, "Na Ui nganau' kudeng ineh! Iamo' idé-idé luk ngubur Negku miak burem. Idi idé-idé luk ngesala' Negku, ieh ineh miak uen ngedereh.

³¹Idi mucu Ui miak ngaté amung lun bang tetek ruma'mu idi inulmu pana', pad seburur pana' nateh luk mengered ketecan bang ruma'mu.

³²Idi iko miak nier dengan mesusa' niat, pad iko melili ku amung do' luk barénKu kuan Israil. Iamo' seburur lun mengered pana' nateh ketecan bang ruma'mu macing ruked-ruked.

³³Idi seburur mo' rat arang pupumu luk na pitayenKu luk nganau' kekamen imam kuanKu. Iamo' ieh ineh miak mesaweng idi melaya' burur. Idi amung inulneh melaya' teh pad ideh maté.

³⁴Idi kareb dueh anakmu Hopni idi Pinihas maté bang seaco mo', idi ini mangun ku tanu' kuanmu, ratnan balaKu ini.

³⁵Idi Ui miak mili' aceh imam luk lutep Negku luk nganau' anun-anun luk pianKu. Idi Ui maré kuanneh aceh inul luk meruked luk megéi' ngakem pa kiung raca' luk pinili'Ku.

³⁶Idi idé-idé luk ketecan bang tetek ruma'mu, miak amé' tekeradung mutuh usin idi akan ku libal kekamendeh kuan imam."

Semuil Luk Pun-Pun 3

¹Idi Semuil anak ineh nengakem kuan Tuhan pa liang Eli. Idi Tuhan na megéi' pebala bang kareb ineh, ngaceku kareb idi merabpu' mo' inan bala luk linio.

²Idi kareb mateh Eli mesaweng idi ieh netelubid bang takepneh.

³Idi Semuil pana' rudap bang Su luk Meligan, ieh ineh su luk inan Pati' Pejani' Allah.

⁴Idi Tuhan nenawar, "Semuil! Semuil!" Idi kebala Semuil, "Anun idi, Ama'?"

⁵Idi lapung nateh nilep. Idi ieh iné' matun ni Eli, kebalaneh, "O Ama! Iko nawar negku. Ini ui." Iamo' kebala Eli, "Na ui nenawar namu. Do' iko amé' telubid teh." Idi ieh iné' telubid.

⁶Idi Tuhan nenawar ni Semuil teh. Idi Semuil nekulat idi iné' matun ni Eli, kebalaneh, "Anun idi, Ama'? Iko nawar negku. Ini ui." Iamo' kebala Eli, "O Asi, na ui nawar namu, lemubed iko amé' telubid teh."

⁷(Semuil ineh nateh miti Tuhan, ngaceku Tuhan nateh nepebala neneh atun.)

⁸Idi Tuhan nenawar ni Semuil seketeluh kua'. Idi ieh iné' matun ni Eli, kebalaneh, "Anun idi Ama'? Iko nawar negku. Ini ui." Idi bang kareb ineh idi megala' kuan Eli, Tuhan luk nawar anak ineh.

⁹Idi kebala Eli ni Semuil, "Amé' iko telubid teh, idi kareb Ieh nawar namu teh, do' iko pebala kudeng ini, 'Do' Tuhan pebala pedingeren lun dukenMu ini.' Idi Semuil iné' telubid teh.

¹⁰Idi Tuhan nacing idi netuped ieneh, idi nenawar neneh mepad kudeng luk atun, "Semuil! Semuil!" Idi Semuil nengor balaNeh, "Do' Tuhan pebala pedingeren lun dukenMu ini."

¹¹Idi kebala Tuhan ni Semuil, "Ui nganau' aceh kekamen luk inan megagap arang lun Israil, pad idé-idé luk ninger ineh pelaba tot.

¹²Kareb ineh Ui miak ngacing kuan Eli amung-amung ukum luk pangeh bida'Ku kuan uang tetek ruma'neh, rat pun macing kekipedneh.

¹³Ui pangeh nemada' neneh, ratnan Ui ngukum amung lun bang tetek ruma'neh macing ruked-ruked, ngaceku dat luk pangeh nekali'neh, ngaceku kareb anakneh luk dueh nguyo, na ieh nemebpeng nedidueh.

¹⁴Idi Ui pangeh nepebulung kuan lun bang tetek Eli na tu-tu datdeh mekiu' ku baré luk sabpen idi ku baré anun-anun pana' macing ruked-ruked."

¹⁵Idi Semuil rudap macing pekak. Idi ieh nengukab tanga' ruma' Tuhan. Iamo' matot i Semuil maré kali' luk sinierneh ineh ni Eli.

¹⁶Iamo' Eli nenawar ni Semuil, kebalaneh, "O anakku Semuil." Idi Semuil nengor balaneh, "Anun idi, Ama'?"

¹⁷Idi kebala Eli neneh, "Anunké bala luk icing Tuhan namu? Aleg iko ngalum ineh negku. Kudeng ineh Allah ngua' kuanmu idi meluun teh, kudeng iko ngalum negku sebila' bala pana' ratnan amung bala ineh luk pangeh icingNeh namu."

¹⁸Idi Semuil nemada' amung bala ineh neneh. Sebila' bala pana' nateh inalumneh. Idi kebala Eli neneh, "Teh ineh Tuhan. Nima' Neneh nganau' anun-anun luk do' pa kiungNeh."

¹⁹Idi Semuil iuk amé' rayeh idi Tuhan pana' idi denganneh. Idi sebila' bala pana' ratnan bala Semuil ineh nateh luk na icing Tuhan. Idi amung lun Israil rat Dan macing déi' Birsiba pana' kali' ratnan Semuil pangeh kinikit ku nabi Tuhan.

²⁰Idi amung lun Israil rat Dan macing déi' Birsiba pana' kali' ratnan Semuil pangeh kinikit ku nabi Tuhan.

²¹Idi teh Tuhan nesilangan déi' Silo. Ngaceku Tuhan nengegala' bururNeh ni Semuil déi' Silo dengan balaNeh. Idi kareb Semuil pebala amung lun Israil neninger.

Semuil Luk Pun-Pun 4

¹Idi lun Israil iné' pebunu' nelun Pilistin. Idi ideh nelupo muneng ku Ebeniser. Iamo' lun Pilistin muneng ku Apek.

²Idi lun Pilistin netemina' pebunu' idi iné' ngerieng nelun Israil. Idi lun Israil linaya'deh, idi 4,000 burur lun Israil naté.

³Idi kareb baweh Israil ineh nelemubed iné' su iratdeh, kebala amung lun rayeh Israil, "Ngudeh Tuhan nganau' netau melaya' aco sini pa kiung lun

Pilistin? Amé' tau ngalap Pati' Pejani' Tuhan déi' Silo. Do' ieh idi arang tau pelé ieh muit netau rat bang palad bunu' tau.”

⁴Idi ideh nengecuk nedeh amé' déi' Silo. Idi ideh nenguit rat déi', Pati' Pejani' Tuhan luk Melalud luk tudo arang kerusi melaikat karub. Idi dueh anak Eli, ieh ineh Hopni idi Pinihas teh idi dengan Pati' Pejani' ineh.

⁵Idi kareb Pati' Pejani' Tuhan ineh nacing, idi amung lun Israil nengudub ranga'-ranga', pad tana' melinguh.

⁶Idi udub ineh pindenger lun Pilistin, idi kebaladeh, "Udub anun luk arang baweh lun Iberani ineh?" Idi ideh kali' Pati' Pejani' Tuhan pangeh nacing su luk inan lun Iberani nelupo.

⁷Ideh matot, kebaladeh, "Tuhan pangeh nacing arang baweh ineh. Mesusa' kuan tau! Ngaceku nateh luk mangun kudeng ini atun!

⁸Idé luk miak muit netau rat bang palad Allah luk Melalud? Idi teh ini lalud Allah luk pangeh nengedereh nelun Masir ku kaca déi' su luk ali-ali.

⁹O lun Pilistin! Do' muyuh metueh idi mekuu', pelé muyuh na meperieng lun Iberani ineh, mepad kudeng muyuh metueh pebunu' kudeng deléi luk mesangit.”

¹⁰Idi lun Pilistin nepebunu', idi ideh nengelaya' nelun Israil, pad ideh neburo iné' su luk inandeh nelupo. Idi mula' tu-tu lun Israil naté. Amungdeh 30,000 burur.

¹¹Idi teh Pati' Pejani' Allah inaro bunu' ineh, idi dueh anak Eli, ieh ineh Hopni idi Pinihas teh pinaté.

¹²Idi seburur lun Benjamin neburo rat uned baweh ineh, idi ieh nacing déi' Silo kareb aco sineh teh. Ayungneh darak-darak, idi kipu teh inan luun uluhneh.

¹³Kareb ieh nacing, Eli tudo luun krusineh iring dalan, idi nengeligak. Ngaceku niatneh mesusa' ku Pati' Pejani' Allah. Idi lun Benjamin ineh nacing

nenguit bala amé' bang bawang ineh. Idi amung lun bang bawang ineh nengarod.

¹⁴Arod ineh pindenger Eli, idi kebalaneh, "Anunké ria' ineh?" Idi dengan mesaget ideh nacing iné' mada' bala ineh ni Eli.

¹⁵(Idi ulun Eli ineh iwa' ngepulu' ualuh lak. Idi ieh nebuser.)

¹⁶Idi kebala lun Benjamin ineh ni Eli, "Ui ini nacing rat nepebunu'. Idi aco sini teh ui pangeh neburo rat arang baweh." Idi kebala Eli, "O Asi, kudeng apehké ayu déi'?"

¹⁷Idi kebala lun Benjamin ineh, "Lun Israil pangeh neburo rat pa kiung lun Pilistin. Idi mula' tu-tu lun Israil pangeh naté. Meluun teh dueh anakmu, Hopni idi Pinihas teh pangeh naté. Idi Pati' Pejani' Allah pana' pangeh inaro bunu' ineh."

¹⁸Kareb lun Benjamin ineh nemada' ratnan Pati' Pejani' Allah ineh, idi Eli neluka' rat luun krusineh, munung tanga', idi neputul dieneh idi ieh naté, ngaceku ieh pangeh mengered, idi teh ieh lun melamu. Idi ieh pangeh nengimet nelun Israil apat ngepulu' lak kinioneh.

¹⁹Idi kareb ineh iban Eli, ieh ineh awan Pinihas batek rayeh. Idi bala ineh nacing neneh mada' Pati' Pejani' Allah pangeh inaro bunu'. Idi ibanneh pana' pangeh naté. Kudeng ineh teh awanneh. Idi decur ineh netebekuel ngaceku denak-denak ieh mét nenganak.

²⁰Idi kareb ieh lélé maté kebala amung decur luk nengimet neneh, "Aleg iko merapang ngaceku iko nenganak aceh anak deléi." Iamo' na ieh neninger idi nengor baladeh.

²¹Iamo' ieh neneten anak ineh Ikabod, kebalaneh, "Ubur lun Israil pangeh neburo!" Ngaceku Pati' Pejani' Allah pangeh inaro, idi ngaceku ibanneh idi awanneh teh pangeh naté.

²²Idi teh ieh nepebala, "Ubur lun Israil pangeh neburo, ngaceku Pati' Pejani' Allah pangeh inaro."

Semuil Luk Pun-Pun 5

¹Idi lun Pilistin nengalap Pati' Pejani' Allah ineh idi nenguit ineh rat Ebeniser amé' déi' Asdod.

²Idi lun Pilistin nenguit Pati' Pejani' ineh iné' bang ruma' akang Dagon, idi rirengdeh iringneh.

³Kareb lun Asdod kulat pekak kenebpa, ideh nenier Dagon pangeh nebpeh mukit, pa kiung Pati' Pejani' Allah. Idi ideh nengiding neneh amé' su luk inanneh,

⁴Idi uka-uka pekak kenebpa, ideh nekulat idi ideh mawa ngaceku Dagon ineh mukit teh pa kiung Pati' Pejani' Tuhan. Iamo' uluh Dagon idi ticu'neh mop pangeh neputul, idi netekatul iné' munung tanga'. Iamo' bururneh mo' neketecan.

⁵(Ineh punneh imam Dagon idi amung lun baken luk semuet bang ruma' Dagon ineh na ngeradu' munung tanga' ruma' Dagon luk déi' Asdod macing aco sini.)

⁶Idi Tuhan nengukum nelun Asdod idi nengatot nedeh. Idi Ieh nengedereh nedeh dengan lemulun luk libut-libut bawang ineh pad ideh inan kimuh.

⁷Kareb lun Asdod nekali' dereh luk kudeng ineh, idi kebaladeh, "Aleg Pati' Pejani' tudo arang tau, ngaceku Allah lun Israil ngukum netau idi Dagon akang tau pana'."

⁸Idi ngaceku ineh ideh nengecuk limeh raca' lun Pilistin nepamung, kebaladeh, "Kudeng apeh tau ku Pati' Pejani' Allah lun Israil?" Idi kebaladeh, "Do' ieh bebuen amé' bawang Gat." Idi ideh nemubuh Pati' Pejani' ineh iné' déi'.

⁹Kareb Pati' ineh nacing déi', idi Tuhan nengukum bawang ineh idi nengagap nedeh. Idi ideh neketukan ku kimuh, do' anak idi lun merar pana'.

¹⁰Idi ideh nemubuh Pati' Pejani' ineh iné' déi' Ekron. Iamo' kareb ieh nacing déi', idi lun bang bawang ineh nengitang, kebaladeh, "Ideh nenguit Pati' Pejani' Allah lun Israil ineh amé' netau, pad tau maté."

¹¹Idi ideh nengecuk nelun ngamung amung raca' lun Pilistin, kebaladeh, "Amé' taca' muyuh Pati' Pejani' lun Israil ineh lemubed amé' su iratneh, pelé ieh na ngaté netau idi inul tau." Ngaceku Allah metueh ngukum nedeh, pad ideh pelaba gagap.

¹²Idé-idé luk na naté, ieh ineh pederen ku kimuh, pad ideh nengarod mutuh pedengan ratnan akangdeh.

Semuil Luk Pun-Pun 6

¹Idi Pati' Pejani' Tuhan idi bang bawang lun Pilistin tudu' bulan kinioneh.

²Idi lun rayeh-rayeh nenawar amung imam, idi lun luk mileh mangun, kebaladeh, "Kudeng apehké kai ku Pati' Pejani' Tuhan ineh. Anunké luk barén kai maya' ineh lemubed amé' su iratneh."

³Idi kebaladeh, "Kudeng muyuh sikal amé' nated Pati' Pejani' Allah lun Israil aleg muyuh maré ineh mo'-mo'. Iamo' do' muyuh maré aceh baré maya' ineh ku baré mabeh sala', pad muyuh miak uen ngedo' idi kali' anun punneh Allah na ugka' ngukum nemuyuh."

⁴Idi ideh nengitun, "Anunké luk barén kai Neneh?" Idi kebaladeh, "Limeh kimuh amas idi limeh labo amas, kuan anid lun rayeh lun Pilistin. Ngaceku mepad mo' kaca luk nacing kuan muyuh idi kuan limeh lun rayeh lun Pilistin ineh.

⁵Do' muyuh nganau' ayu kimuh idi ayu labo luk ngedat bawang muyuh, idi ngamo sala' muyuh pa kiung Allah lun Israil. Kian Ieh ugka' ngukum nemuyuh, akang muyuh, idi tana' muyuh lek.

⁶Anun pun muyuh metueh niat mepad kudeng lun Masir idi raca' Masir? Naké Tuhan nenguto nedeh, pad ideh nengecuk pupu ineh nalan?

⁷Idi nekini do' nganau' aceh keréta luk mebaruh idi ngalap dueh sapi' tineh luk niti' anak, idi luk na pekalai nan nengacang paga'. Nganau' sapi' ineh nan keréta ineh, idi nguit anak didueh lemubed rat i puet didueh amé' bang libung.

⁸Pangeh ineh lapen muyuh Pati' Pejani' Tuhan tipan bang keréta ineh, idi ngerareng bang aceh pati' pelengit iring repapeh luk inan amas luk barén muyuh kuanNeh ku baré ngaceku mabeh sala', idi nima' Pati' ineh amé' iapeh-iapeh pana' maya' pianneh.

⁹Do' nginita keréta ineh nalan. Kudeng ieh maya' dalam amé' Bait Semes, idi megala' Ieh ineh luk nengacing kaca luk mebura' ini kuan tau. Iamo' kudeng na ieh amé' déi', idi tau kali' baken Ieh luk ngedereh netau, iamo' ineh aceh ét luk pekalai mo'."

¹⁰Idi ideh nenganau' kudeng ineh. Ideh nengalap dueh sapi' luk niti' anak, idi nengabet nedidueh pa atun keréta ineh. Idi ideh nengata anak didueh bang libung.

¹¹Idi ideh nenipa Pati' Pejani' Tuhan idi pati' luk inan labo amas idi ayu kimuh pa luun pati' ineh.

¹²Idi sapi' ineh petacu nemaya' dalam rayeh iné' déi' Bait Semes, dengan na umai. Idi didueh muni maya' dalam. Idi limeh raca' lun Pilistin ineh nemaya' puet didueh macing lakan Bait Semes.

¹³Idi lun Bait Semes uned ngeranih luun raked. Denak-denak ideh netukag idi nenier Pati' Pejani' ineh. Idi ideh pelaba awang niat.

¹⁴Idi keréta ineh nacing luun lati' Yusak lun Bait Semes ineh idi nucu' déi'. Idi déi' inan aceh batu rayeh. Idi ideh nemila' kayuh keréta ineh idi nengeret dueh sapi' ineh ku baré sabpen kuan Tuhan.

¹⁵Idi lun Liwi nengeruat Pati' Pejani' Tuhan, idi pati' luk inan binaweh amas luk iringneh ineh, idi negerareng ineh luun batu rayeh ineh. Idi bang aco sineh teh amung lun Bait Semes nemaré kuan Tuhan baré sabpen idi baré kereten.

¹⁶Idi limeh raca' lun Pilistin nenier luk mangun ineh. Idi ideh nelemubed iné' Ekron aco sineh teh.

¹⁷Idi lun Pilistin nemaré limeh kimuh amas kuan Tuhan ku baré ngaceku mabeh sala', sebuleng kuan aceh bawang, ieh ineh Asdod, Gasa, Askelon, Gat, idi Ekron.

¹⁸Idi teh ideh nemaré labo amas, sebuleng kuan anid bawang luk inimet limeh raca' lun Pilistin, do' bawang luk meraben libung macing bawang luk isuut pana'. Idi batu rayeh, luk luun lati' Yusak lun Bait Semes ineh, su luk inan nengerareng Pati' Pejani' Tuhan, mangun ku tanu' ratnan luk nangun macing aco sini.

¹⁹Idi Tuhan nengaté tuda'-tuda' burur lun Bait Semes, ngaceku ideh iné' nier bang Pati' Pejani' Tuhan. Ieh nengté tudu' ngepulu' burur rat arangdeh. Idi bang kareb ineh lun mula' netemido ngaceku Tuhan nengukum nedeh.

²⁰Idi kebala lun Bait Semes, "Idé miak tuped pa kiung Tuhan Allah luk Meligan ini? Idi idéké miak inan tau maré Pati' Pejani' ini, pad tau mepuit rat Neneh?"

²¹Idi ideh nengecuk nelun duken amé' nelun bang bawang Kiriati Yarim, kebaladeh, "Lun Pilistin pangeh nenguit nuli' Pati' Pejani' Tuhan. Do' muyuh amé' ngalap ineh kuan muyuh."

Semuil Luk Pun-Pun 7

¹Idi lun Kiriati Yarim ineh nacing ngalap Pati' Pejani' Tuhan, idi inuitdeh iné' bang ruma' Abinadab luk luun surud. Idi ideh nengeletep Eliasar, anakneh pad ieh matar ineh.

²Idi Pati' Pejani' Tuhan ineh idi déi' Kiriati Yarim, dueh ngepulu' lak kinioneh. Idi kareb ineh lun Israil nenginuud mutuh pedengan ratnan Tuhan.

³Idi kebala Semuil nelun Israil, "Kudeng muyuh lumi inan Tuhan dengan maung niat muyuh, do' muyuh nala' amung akang pupu baken idi Asterot rat arang muyuh. Ngeligan burur muyuh kuan Tuhan, idi sembayang Neneh mo', pelé Ieh muit nemuyuh rat bang palad lun Pilistin."

⁴Idi lun Israil nenala' amung akang Baal idi Asterot. Idi ideh nesembayang nan Tuhan mo'.

⁵Idi kebala Semuil, "Mungen muyuh amung lun Israil déi' Mispa. Ui sikal sembayang kuan muyuh inan Tuhan."

⁶Idi ideh netebubpun déi' Mispa. Idi ideh nengook abpa'. Idi inisakdeh pa kiung Tuhan. Idi kareb aco sineh teh ideh mawa', kebaladeh, "Kai pangeh mesala' inan Tuhan." Idi Semuil tudo déi' Mispa idi nengimet nelun Israil.

⁷Kareb lun Pilistin nekali' nelun Israil netebubpun déi' Mispa, idi limeh raca' lun Pilistin iné' ngerieng nelun Israil. Kareb lun Israil nekali' bala ineh, ideh matot.

⁸Kebaladeh ni Semuil, "Aleg iko ugka' sembayang inan Tuhan Allah tau pad Ieh muit netau rat bang palad lun Pilistin."

⁹Idi Semuil nengalap aceh anak dumba, idi biréneh kuan Tuhan ku baré sabpen. Idi Semuil nesembayang inan Tuhan kuan lun Israil. Idi Tuhan neninger putuhneh.

¹⁰Idi laba' Semuil maré baré sabpen ineh, denak-denak lun Pilistin nacing ngerieng nelun Israil. Iamo' kareb aco sineh teh Tuhan nengelalam idi nengatot nelun Pilistin. Ieh nengagap nedeh pad ideh neburo.

¹¹Idi lun Israil nenalan rat Mispa. Idi ideh nengerada' nelun Pilistin, macing déi' Bait Kar, idi nengaté nedeh arang dalan.

¹²Idi Semuil nengalap aceh batu. Idi ieh nenaped ineh arang Mispa dengan Sen. Idi ieh neneten batu ineh "Batu Pedengan", kebalaneh, "Macing ieni Tuhan pangeh nengedengan netau."

¹³Kudeng ini lawé lun Pilistin linaya'. Idi Tuhan nengagka' nedeh pad ideh na ngerieng tana' Israil raked ulun i Semuil.

¹⁴Idi amung bawang luk pangeh inaro lun Pilistin rat nelun Israil ineh pana' linubed teh kuan lun Israil rat Ekron macing déi' Gat. Kudeng ineh teh amung tana'deh ilap lun Israil rat bang palad lun Pilistin. Idi lun Israil idi lun Amori pedo' peh.

¹⁵Idi Semuil nengimet nelun Israil raked ulunneh.

¹⁶Idi anid lak ieh nalan-nalan amé' Baitel, Gilgal, idi Mispa. Idi ieh nengimet nelun Israil bang teluh bawang ineh.

¹⁷Pangeh ineh idi ieh muli' amé' Rama. Ngaceku déi' inan ruma'neh. Idi déi' teh ieh nengimet nelun Israil. Idi déi' teh ieh nenganau' aceh bubpun kuan Tuhan.

Semuil Luk Pun-Pun 8

¹Kareb Semuil mengered idi ieh nengikit dueh anak deléineh mangun ku lun luk ngimet nelun Israil.

²Idi ngadan anakneh luk atun ineh Yoel. Idi ngadan anakneh luk isuut ineh Abia. Didueh ineh mangun ku lun luk ngimet déi' Birsiba.

³Iamo' anakneh ineh na maya' lawé taman didueh. Iamo' didueh melili ku usin. Idi didueh nengalap suap, idi mutut ukum luk na petulu.

⁴Idi amung lun rayeh Israil nepamung idi iné' matun ni Semuil déi' Rama.

⁵Idi kebaladeh neneh, "Iko pangeh mengered. Idi anakmu ineh na maya' lawému. Ngaceku ineh do' iko ngikit aceh raca' kuan kai, pelé ieh miak ngimet nekai mepad kudeng amung pupu baken."

⁶Idi Semuil dat niat ku baladeh mutuh raca'. Idi ieh nesembayang inan Tuhan.

⁷Idi kebala Tuhan, "Do' ninger bala pupu ini namu. Ngaceku baken iko luk tila'deh. Iamo' ideh nenecan Negku, pele' Ui na mangun ku raca'deh.

⁸Rat kareb Ui nenguit nedeh remuat rat bang bawang Masir macing aco sini, ideh teketed rat Negku idi sembayang nan allah baken. Kudeng ineh teh kekamendeh kuanmu.

⁹Idi nekini do' iko ninger baladeh. Iamo' mada' nedeh do'-do', idi maré kali' nedeh ratnan kekamen raca'-raca' luk miak ngimet nedeh mucu."

¹⁰Idi Semuil nengacing amung bala Tuhan ineh kuan lun mula' luk nemutuh aceh raca' rat neneh.

¹¹Kebalaneh, "Kudeng ini kekamen raca' luk miak ngimet nemuyuh mucu: ieh miak ngalap anak-anak deléi muyuh amé' ngimet kerétaneh idi kudaneh, idi nalan pa atun kerétaneh.

¹²Idi ieh miak nganau' nedeh mangun ku lun rayeh pa luun lun meribu, idi pa luun lun limeh ngepulu'; idi sebuang ngeradu lati'neh, idi sebuang ngeranih padéneh, idi sebuang nganau' pelapetneh, idi amung repapeh kerétaneh.

¹³Idi anak-anak decur muyuh lapenneh amé' ku lun ngelak, idi sebuang nganau' ruti, idi sebuang nganau' umau luk do' buen.

¹⁴Idi lati' muyuh kabun anggur muyuh, idi kabun lawa saitun muyuh luk meluun do', miak lapenneh mucu idi barénneh kuan lun dukenneh.

¹⁵Idi babpat pulu' ratnan padé muyuh idi bua' anggur muyuh miak lapenneh kuan amung lun rayehneh idi lun dukenneh luk baken.

¹⁶Meluun teh lun duken muyuh luk deléi idi decur, sapi' muyuh, idi keladai muyuh luk meluun do' pana', miak lapenneh ku pakaineh.

¹⁷Idi babpat pulu' ratnan amung aya' muyuh miak lapenneh, idi muyuh mangun ku demulunneh.

¹⁸Kareb ineh muyuh miak ngedureng ngaceku raca' muyuh luk pangeh pinili' muyuh ineh. Iamo' nateh Tuhan pian ninger dureng muyuh ineh."

¹⁹Idi lun mula' na sikal ninger bala Semuil. Iamo' kebaladeh, "Aganeh kai aceh raca'.

²⁰Nima' nekai teh mepad kudeng amung pupu baken. Raca' kai miak ngimet nekai idi nalan pa atun kai idi nguyut nekai amé' pebunu'."

²¹Idi Semuil neninger bala lun mula' ineh, idi ieh nengacing amung bala ineh kuan Tuhan.

²²Idi kebala Tuhan ni Semuil, "Ninger iko baladeh, idi ngikit aceh raca' kuandeh." Idi Semuil nengecuk nelun Israil muli'.

Semuil Luk Pun-Pun 9

- ¹Idi inan seburur ratnan inul Beniamin, ngadanneh Kis Abiel, luk mupun Seror luk inul Bekorat Apia, ieh ineh seburur lun Beniamin luk mula' binaweh.
- ²Idi lun ineh inan aceh anak deléi, ngadanneh Saul, seburur anak adi' luk metaga rat arang amung lun Israil. Idi ieh meluun dita' rat nelun baken.
- ³Idi tuda'-tuda keladai Kis pangeh neraruh. Idi kebala Kis ni Saul, "Do' iko nguit seburur lun duken maya' namu amé' nakap keladai ineh."
- ⁴Idi didueh nenalan lemaba pegkung-pegkung Epraim, idi nelemaba bawang Salisa, iamo' na tieh nekali' didueh. Pangeh ineh didueh nenalan lemaba bawang Salim. Iamo' keladaideh na idi. Idi didueh nelemaba tana' Beniamin. Nateh ideh nekali' didueh.
- ⁵Kareb didueh nacing déi' bawang Sup, idi kebala Saul nelun dukenneh luk maya' neneh, "Do' kita muli', ngaceku napeh i Ama' ugka' ngerawé keladai ineh idi ngimun ngerawé nekiteh."
- ⁶Idi kebala lun duken ineh, "Inan aceh nabi Allah bang bawang ini luk mebala. Idi na miak na amung balaneh mangun. Do' kiteh amé' matun neneh, pelé ieh miak nicul dalam luk miak bén kiteh."
- ⁷Idi kebala Saul, "Iamo' kudeng kiteh amé', anun luk miak barén kiteh neneh? Ngaceku nabud ruti kiteh peh. Idi na luk barén kiteh neneh. Anunké luk ketecan kuan kiteh teh?"
- ⁸Kebala lun duken ineh, "Ui inan aceh balad pirak luk isuut barénku neneh, pad ieh mada' nekiteh su apeh luk inan nakap nedeh."
- ⁹⁻¹¹Idi kebala Saul, "Matu bala mini. Do' kiteh amé'." Idi didueh iné' bawang su luk inan nabi Allah ineh. Idi laba' didueh mudik irang amé' matun bawang ineh, didueh nepapu' tuda'-tuda' anak adi' decur luk amé' ngereb abpa'. Idi didueh nengitun nedeh, "Inanké lun nier ieni?" (Mon lawé arang lun Israil kareb lun amé' ngitun Allah, kebaladeh, "Amé' tau matun nelun luk nier," ngaceku kareb ineh, lun luk titen nabi nekini, ieh ineh titen lun luk nier.)

¹²Idi kebaladeh ineh, "Inan. Siruh, idi ieh pa atun medueh. Do' medueh mesaget. Ngaceku aco sini teh ieh nacing bang bawang ini, ngaceku lun mula' maré baré luun bubpun luun surud ineh.

¹³Kareb medueh semuet bang bawang ineh miak medueh papu' neneh, kareb nateh ieh umak amé' luun surud sikal kuman. Lun mula' na kuman atun, kareb nateh ieh macing. Ngaceku ieh luk ngeperuan baré ineh. Pangeh ineh idi amung lun luk tinawar kuman. Do' medueh umak nekini. Ngaceku kali' rungen medueh papu' neneh."

¹⁴Idi didueh numak iné' bang bawang ineh. Kareb didueh nesemuet bang bawang idi Semuil neremuat papu' nedidueh ineh kareb nateh ieh numak iné' luun surud ineh.

¹⁵Idi Tuhan pangeh nemaré kali' ni Semuil aco luk atun ratnan acing Saul, kebalaNeh.

¹⁶"Pekak nebpa kareb kudeng ini Ui ngecuk amé' namu seburur deléi rat babpat Benjamin. Do' iko ngumau neneh ku umau mangun ku raca' pupuKu Israil. Idi teh ieh miak muit pupuKu rat bang palad lun Pilistin. Ui pangeh nenier dereh pupuKu ngaceku putuhdeh pangeh nacing Negku."

¹⁷Kareb Semuil nenier ni Saul, idi bala Tuhan nacing neneh, "Ini lun luk pangeh bida'Ku namu! Ieh luk miak ngimet pupuKu."

¹⁸Idi Saul iné' matun ni Semuil munung tanga' bawang, kebalaneh, "Mada' kuanku iapeh ruma' lun luk nier ineh?"

¹⁹Idi Semuil nengor bala Saul, "Ini ui luk nier di. Do' iko amé' su luk inan sembayang ineh atun. Ngaceku aco sini iko miak peruyung kuman denganku. Idi pekak nebpa ui nima' namu nalan. Idi amung-amung luk bang niatmu pana' miak ui mala kuanmu.

²⁰Idi ratnan keladaimu luk pangeh netutu' ineh pangeh teluh aco atun, aleg iko mesusa' niat ku ineh, ngaceku ideh pangeh ilap. Idéké luk pian lun Israil? Ieh ineh iko idi amung lun bang tetek ruma' tamanmu."

²¹Idi kebala Saul, "Ui ini lun inul Benjamin luk meluun pawa' arang lun Israil? Idi tetek ruma'ku pana' luk meluun dat arang lun Benjamin. Kudeng apehké iko pebala negku kudeng ineh?"

²²Idi Semuil nenguit ni Saul idi lun dukenneh iné' bang takep luk rayeh. Idi ieh nemaré luk inan kuan didueh paped téng, pa atun amung lun luk tinawar ineh, kinula'deh lélé teluh ngepulu' burur.

²³Idi kebala Semuil nelun luk ngelak, "Nnguit babpat luk pangeh bida'ku namu, 'Rangenmu ieh setau'." "

²⁴Idi lun ngelak ineh nenguit aceh tipan perapu amung iungneh idi nengerareng ineh pa kiung Saul. Idi kebala Semuil, "Ini luk pangeh tican kuanmu. Kenen ieh, ngaceku ini pangeh dinug kuanmu bang irau ini, kareb ui nenawar nelun mula' ineh." Idi Saul peruyung kuman dengan Semuil kareb aco sineh.

²⁵Pangeh ineh idi didueh netemurun rat su luk inan sembayang ineh idi iné' bang bawang. Idi ideh nemalad ugam kuan i Saul déi' parung. Idi ieh nerudap ieneh.

²⁶Kareb aco masat idi Semuil nenawar ni Saul luun parung, kebalaneh, "Kulat iko. Miak ui amé' nated namu." Idi Saul nekulat. Idi didueh negug kang.

²⁷Kareb didueh muneng ku bawang, idi kebala Semuil ni Saul, "Ngecuk lun dukenmu nalan atun rat nekiteh. Idi kareb lun duken ineh pangeh nenalan, do' iko tudo segageh ieni, pelé ui maré kali' namu ratnan bala Allah."

Semuil Luk Pun-Pun 10

¹Idi Semuil nengalap aceh seréi' umau, idi ieh nengutang umau ineh luun uluh Saul. Idi ieh nemuen neneh, kebalaneh, "Naké Tuhan pangeh nengumau namu pad iko mangun ku raca' lun Israil? Iko miak ngimet pupu Tuhan. Idi iko miak muit nedeh rat bang palad bunu' pekelibut. Idi ini mangun ku tanu' kuanmu, idi Tuhan pangeh nengumau namu mangun ku raca' amung babpatNeh.

²Kareb iko necan negku aco sini, iko miak papu' dueh burur muneng ku lengutan Rakel nan lakan tana' Beniamin déi' Selsa. Idi lun ineh miak pebala namu, 'Idi keladai luk tekapenmu ineh pangeh ilap. Idi nekini tamanmu pangeh kelupan ratnan keladai ineh. Idi ieh ngerawé namu, kebalaneh, "Anunké luk ruenku kuan anakku?" ' ‘

³Iko miak nalan rat ieneh macing Kayuh luk Meraben déi' Tabor, idi iko miak papu' teluh burur luk amé' matun Allah déi' Baitel. Sebuleng nguit teluh amék isuut. Sebuleng nguit ruti teluh balad. Idi seburur nguit sebuleng seréi' kubil abpa' anggur.

⁴Diteluh ineh miak petabi' namu idi maré dueh balad ruti namu. Do' ngalap ineh.

⁵Pangeh ineh iko miak macing luun surud Allah déi' Gibia, su luk inan lun Pilistin nelupo. Kareb iko semuet bang bawang ineh, iko miak papu' tuda'-tuda' lun nabi uned musul rat luun surud dengan giula', tawak bulu', suling, idi tapi'. Amungdeh miak mada' luk barén Tuhan.

⁶Idi Roh Tuhan miak temurun pa luunmu, pad iko teh miak mada' peruyung nedeh. Idi iko miak misu' mangun ku lun baken.

⁷Kareb amung tanu' ini pangeh mangun, do' iko nganau' anun-anun luk badén Allah miak ruenmu.

⁸Idi do' iko amé' déi' Gilgal atun rat negku. Idi ui amé' papu' namu idi maré baré luk sabpen idi baré luk nguit pedo'. Idi tudu' aco kinioneh, oi' iko nganét, pad ui macing namu idi maré kali' namu anun luk miak ruenmu.”

⁹Idi kareb Saul neteketed necan ni Semuil, idi Tuhan Allah nengisu' niatneh. Idi amung tanu' ineh mangun bang aco sineh teh.

¹⁰Kareb Saul idi lun dukenneh nacing déi' Gibia, idi nepetulu tuda'-tuda' lun nabi. Idi Roh Tuhan netemurun pa luun i Saul pad ieh mada' luk biré Tuhan arang amungdeh ineh.

- ¹¹Idi amung lemulun luk pekalai neneh mawa nier neneh nganau' kudeng ineh. Idi ideh nepebala seburur dengan seburur, "Anunké luk pangeh mangun kuan anak Kis ineh? Matuké i Saul pana' arang lun nabi?"
- ¹²Idi kebala seburur rat bang bawang ineh, "Idéké tamandeh?" Idi ideh ineh mangun ku aceh bala, "Matuké i Saul pana' arang lun nabi?"
- ¹³Kareb Saul pangeh nemada' luk biré Tuhan idi ieh iné' matun bubpun luk luun surud ineh.
- ¹⁴Idi kebala taman pinaken Saul neneh idi nelun dukenneh ineh, "Iné' iapeh medueh?" Idi kebala Saul, "Kai iné' nakap keladai ineh. Kareb kai nenier na ideh idi, idi kai iné' matun ni Semuil."
- ¹⁵Idi kebala taman pinaken Saul, "Anun bala Semuil nemedueh?"
- ¹⁶Idi kebala Saul kuan taman pinakenneh, "Ieh nemada' nekai matu keladai ineh pangeh ilap." Iamo' ratnan mangun ku raca' luk pangeh bida' Semuil ineh, na ieh nemada' ineh neneh.
- ¹⁷Idi Semuil nenawar nelun mula' ineh mepamung pa kiung Tuhan déi' Mispa.
- ¹⁸Idi kebalaneh nedeh, "Kebala Allah lun Israil, 'Ui pangeh nenguit nemuyuh remuat rat bang bawang Masir. Idi teh Ui nemuit nemuyuh rat bang palad lun Masir, idi pupu baken luk nengedereh nemuyuh.
- ¹⁹Iamo' aco sini muyuh pangeh nenecan Allah muyuh luk pangeh nemuit nemuyuh ratnan amung dereh idi susa' muyuh. Idi muyuh pangeh nemutih Neneh kudeng ini, "Ngikit aceh raca' pa luun kai." Idi ngaceku ineh amé' muyuh pa kiung Tuhan maya' kinula' inul idi pupu muyuh."
- ²⁰Idi Semuil nengecuk amung inul pupu Israil amé' muneng, idi Tuhan nemili' pupu Benjamin.
- ²¹Idi Semuil nengecuk pupu Benjamin amé' muneng maya' inuldeh idi pupu Matri nepili'. Kekipedneh ieh nengecuk pupu Matri amé' muneng tesebuleng-tesebuleng. Idi Saul anak Kis luk nepili'. Iamo' kareb ieh tikapdeh, na ieh nekali'deh.

²²Idi ideh nengitun Tuhan teh, "Tungé'ké léi sineh?" Idi Tuhan nengor baladeh, "Ieh sigapung arang amung repapeh."

²³Idi ideh nupun iné' ngalap neneh rat déi'. Idi kareb ieh netuped arang lun mula' ineh, ieh meluun dita' ratnan amung lun baken.

²⁴Idi kebala Semuil kuan lun mula' ineh, "Nier muyuh lun luk pangeh pinili' Tuhan. Ngaceku seburur pana' nateh luk mepad kudeng ieh." Idi lun mula' ineh nengudub, "Mipu ulun raca!"

²⁵Idi Semuil nemada' kuan lun mula' ineh ratnan kekamen idi lalud raca'. Idi ieh nengayud ineh bang aceh surat luk rirengneh pa kiung Tuhan. Pangeh ineh Semuil nengecuk nelun mula' ineh muli' amé anid-anid ruma'deh.

²⁶Idi Saul pana' nuli' iné' ruma'neh luk déi' Gibia. Idi tuda'-tuda' lemulun luk mesangit idi luk tigio Tuhan niatdeh nemaya' neneh.

²⁷Iamo' kebala tuda'-tuda' lun luk dat, "Kudeng apeh lemulun ini miak muit netau?" Idi ideh nenecan neneh idi na nemaré baré kuanneh. Iamo' i Saul sibengel.

Semuil Luk Pun-Pun 11

¹Idi Nahas lun Amon iné' nengelibut bawang Yabis Giliad. Idi kebala amung lun bang bawang Yabis ineh ni Nahas, "Do' iko pejani' nekai, idi kai mangun ku lun dukenmu."

²Iamo' kebala Nahas nedeh, "Ui pian pejani' nemuyuh dengan sebuleng ukum. Mateh muyuh pa tinueh tekulanku pelé lun Israil uen ngigu'."

³Kebala amung lun rayeh Yabis neneh, "Nima' nekai tudu' aco kinioneh, pelé kai ngecuk nelun duken amé' bang amung babpat lun Israil. Kudeng ayuneh seburur pana' nateh luk muit nekai, idi kai miak maré burur kai namu."

⁴Kareb lun luk icuk ineh nacing déi' Gibia, ieh ineh bawang Saul, idi ideh nemada' amung bala ineh nelun mula'. Idi lun mula' ineh nenangi'.

⁵Idi Saul muli' pebaya' dengan sapi'neh. Idi kebalaneh, "Anun susa' lun mula' ineh, pad ideh nangi'?" Idi ideh nemada' neneh amung bala lun Yabis ineh.

⁶Idi kareb bala ineh nekali' Saul idi netemurun Roh Allah pa luuneh. Idi ieh pelaba useh.

⁷Idi ieh nengalap dueh sapi' idi nenetek nedidueh. Idi lun dukenneh nemaré tetek-tetek ineh kuan amung babpat bawang Israil, kebaladeh, "Idé-idé luk na pian remuat amé' maya' ni Saul idi Semuil, idi kudeng ineh teh luk ruen mucu kuan sapi'neh!" Idi lun Israil ineh pelaba tot nan Tuhan. Idi amungdeh ineh neremuat dengan sebuleng niat.

⁸Idi Saul nengamung nedeh déi' Bisek. Idi inan 300,000 burur lun Israil, idi 30,000 burur lun Yahuda.

⁹Idi kebaladeh nelun luk icuk luk pangeh nacing ineh, "Do' muyuh mada' pupu muyuh, pekak nebpa kareb pun mét idang muyuh miak uen ngedengan." Kareb lun Yabis neninger bala ineh, idi ideh pelaba awang niat.

¹⁰Idi kebaladeh ni Nahas, "Pekak nebpa kai miak remuat amé' matun nemuyuh. Miak muyuh nganau' kuan kai anun luk do' bang terawé muyuh."

¹¹Idi pekak kenebpa idi saul nemabpat nelun mula' ineh teluh babpat. Idi kareb masat aco ideh nupun iné' arang bunu' ineh. Idi ideh nemunu' nelun Amon pad macing muned aco. Idi amung lun luk tecehdeh nepatad-nepatad tesebuleng.

¹²Idi kebala lun mula' ineh ni Semuil, "Idé' luk nepebala, 'Miakké i Saul ngimet netau?' Nguit lemulun ineh amé' tungé' pad kai ngaté nedeh."

¹³Iamo' kebala Saul, "Aco sini seburur pana' nateh miak pitayen. Ngaceku aco sini teh Tuhan pangeh nemuit nelun Israil."

¹⁴Idi kebala Semuil nelun mula' ineh, "Do' tau amé' déi' Gilgal idi ngelelep baruh imet raca' déi'."

¹⁵Idi amungdeh iné' déi' Gilgal ngikit ni Saul mangun ku raca' pa kiung Tuhan déi'. Idi ideh nemaré baré luk nguit pedo' déi' pa kiung Tuhan. Idi déi' i Saul mawang niat pamung dengan lun Israil.

Semuil Luk Pun-Pun 12

- ¹Kebala Semuil nelun Israil, "Ui pangeh neninger putuh muyuh. Idi ui pangeh nengikit seburur mangun ku raca' muyuh.
- ²Idi nekini miak muyuh kiuten raca'. Nekini ui mengered, idi mebuda' abpuk. Idi anak deléiku luk dueh idi arang muyuh. Idi ui luk nenguyut memuyuh rat ui isuut macing aco sini.
- ³Idi nekini ui idi. Kudeng ui pangeh nenganau' sala', do' ngadu' negku pa kiung Tuhan idi pa kiung raca' luk pinili'Neh. Idé kuan sapi' idi keladai luk pangeh ilapku? Idi idé luk pangeh sinalukku? Idi idé luk pangeh piderehku? Idi rat arang idé luk inanku nengalap suap? Kudeng ui pangeh nenganau' luk kudeng ineh, ui miak ngua' amung ineh."
- ⁴Idi lun mula' ineh nengor balaneh, "Na iko nenaluk nekai. Idi na iko nengedereh nekai. Na iko nengalap aceh anun-anun rat bang palad seburur pana'."
- ⁵Idi kebala Semuil, "Aco sini Tuhan idi raca' luk pinili'Neh mangun ku lun nekali' kuan amung muyuh, idi muyuh kali' ui na mesala'." Idi kebala lun mula' ineh, "Tuhan ineh mangun ku Lun luk Nekali'."
- ⁶Idi teh kebala Semuil, "Tuhan ineh luk nemili' ni Musa idi i Arun, idi luk nenguit amung tepun muyuh remuat rat bang bawang Masir.
- ⁷Idi nekini, amé' muyuh tupid ieni pa kiung Tuhan, pad ui miak ngadu' nemuyuh, pelé muyuh ngerawé kekamen luk melalud luk inau' Tuhan pad Ieh ngulun nemuyuh idi tepun muyuh pana'.
- ⁸Kareb Yakub dengan amung uang tetek ruma'neh iné' déi' Masir idi lun Masir nengedereh nedeh, idi tepun muyuh nengitang mutuh pedengan ratnan Tuhan pad Ieh nengecuk ni Musa idi Arun luk nenguit nedeh remuat rat bang bawang Masir, pad ideh tudo bang bawang ini.
- ⁹Iamo' ideh nekelupan Tuhan Allahdeh. Idi Tuhan nemaré nedeh bang palad Sisera lun rayeh pebunu' luk déi' Hasor ineh, idi bang palad lun Pilistin, idi raca' lun Moab luk pebunu' nedeh.

¹⁰Idi ideh nengitang nawar Tuhan, kebalaneh, 'Kai pangeh nenganau' sala'. Ngaceku kai pangeh nenecan Tuhan, idi pangeh nemaya' akang Baal idi akang Asterot. Idi nekini muit nekai rat bang palad bunu' kai. Idi kai miak maya' Namu peh.'

¹¹Idi Tuhan nengecuk Gidion, Barak, Yepta, idi Semuil pad muit nemuyuh rat bang palad amung bunu' muyuh, pelé muyuh do' udeng.

¹²Idi kareb muyuh nenier ni Nahas, raca' lun Amon macing pebunu' nemuyuh, idi muyuh na pian ku Tuhan mangun ku raca' muyuh. Kebala muyuh, 'Do' aceh raca' ngimet nekai.'

¹³"Idi nekini, nier muyuh raca' luk pangeh pinili' muyuh, idi luk pangeh pinutuh muyuh. Tuhan pangeh nengikit seburur raca' kuan muyuh.

¹⁴Kudeng muyuh matot inan Tuhan idi sembayang Neneh, idi ninger bada'Neh, idi kudeng muyuh idi raca' luk ngimet nemuyuh maya' Neneh, kali' rungen muyuh do' udeng.

¹⁵Iamo' kudeng muyuh na ninger bada' Tuhan, idi ngelaba ukumNeh, Tuhan miak ngukum nemuyuh idi raca' muyuh pana'.

¹⁶Ngaceku ineh do' muyuh tupid ieni. Nier muyuh tanu' luk rayeh luk ruen Tuhan pa kiung muyuh.

¹⁷Naké nekini kareb merikan? Idi ui sikal nawar Tuhan, idi Ieh pana' nganau' lalam idi udan. Kudeng ineh megala' kuan muyuh idi miak kali' muyuh, idi meluun dat luk pangeh inau' muyuh pa kiung Tuhan. Ngaceku muyuh pian ku aceh raca' kuan muyuh."

¹⁸Idi Semuil nenawar Tuhan. Idi Tuhan nenganau' lalam idi udan bang aco sineh teh. Idi lun mula' ineh pelaba tot inan Tuhan idi ni Semuil pana',

¹⁹idi kebaladeh ni Semuil, "Sembayang iko mutuh inan Tuhan Allahmu kuan kai ini, pelé kai na maté. Ngaceku kai pangeh nengula' sala' ineh ku kai nemutuh aceh raca'."

²⁰Idi kebala Semuil, "Aleg muyuh matot. Sagan tu pana' muyuh pangeh nenganau' amung kekamen luk dat ini, aleg muyuh lemubed ratnan Tuhan. Iamo' do' muyuh sembayang nan Tuhan dengan amung niat muyuh.

²¹Aleg muyuh umai pian maya' allah luk mo'-mo' luk na ulek idi luk na miak ngedengan. Ngaceku mo'-mo' mo' ineh.

²²Na Tuhan necan nemuyuh ngaceku Ieh pangeh nepejani'. Idi Ieh mawang niat ngalap nemuyuh ku pupuNeh.

²³Idi kuanku, Ieh miak ngado negku ratnan nganau' sala' ini kuan Tuhan, ieh ineh kudeng ui ugka' sembayang kuan muyuh. Iamo' ui sikal mada' nemuyuh teh dalam luk do' idi matu.

²⁴Do' muyuh matot inan Tuhan idi sembayang Neneh dengan amung niat muyuh. Do' muyuh ngerawé kudeng apeh rayeh kekamen luk pangeh inau'Neh kuan muyuh.

²⁵Iamo' kudeng muyuh lutep nganau' sala', kali rungen muyuh miak kumin, dengan raca' muyuh pana'."

Semuil Luk Pun-Pun 13

¹Saul pangeh tuda'-tuda' lak ulunneh kareb ieh mangun ku raca' idi ieh nengimet nelun Israil tuda'-tuda' lak teh.

²Idi Saul nemili' 3,000 burur lun Israil, idi nengecuk amung lun baken nuli'; 2,000 burur idi dengan Saul déi Mikmas idi déi' luun Pegkung Baitel, idi 1,000 burur dengan Yonatan déi' Gibia luk bang bawang Beniamin.

³Idi Yonatan nengelaya' baweh lun Pilistin luk déi' Giba. Idi lun Pilistin nekali' bala ineh, idi Saul nengiup serupit bang anid babpat bawang, pad nawar nelun Iberani amé' pebunu'.

⁴Idi bala ineh nekali' amung lun Israil, Saul pangeh nengelaya' baweh lun Pilistin. Idi teh lun Israil pangeh mangun ku buen luk ku gani' kuan lun Pilistin. Idi lun mula' ineh tinawar teubupun ni Saul déi' Gilgal.

⁵Idi amung lun Pilistin pana' nepamung pian pebunu' nelun Israil. Idi ideh inan 30,000 keréta, idi 6,000 burur luk maya' kuda, idi bawehdeh mepad kinula' bada luk i tangeb abpa' rayeh. Idi ideh iné' lupu déi' Mikmas pa busat aco Bait Awen.

⁶Idi lun Israil pelaba susa' ngaceku bunu'deh metueh nengerieng nedeh. Idi ideh iné' sigapung arang batu, bang lubang, luun pegkung batu, bang lengutan, idi bang subuk pana'.

⁷Idi sebuang lun Israil neguta Abpa' Yarden iné' bawang Gad idi Giliad. Iamo' i Saul neketecan déi' Gilgal, idi lun luk nemaya' neneh ineh pelaba tot.

⁸Idi Saul nenganét tudu' aco kinioneh, pad macing kareb luk pangeh bida' Semuil. Iamo' Semuil nateh nacing déi' Gilgal. Idi baweh ineh nengimun patad rat neneh.

⁹Idi kebala Saul, "Maré kuanku baré sabpen, idi baré luk nguit pedo'." Idi ieh nemaré baré sabpen ineh.

¹⁰Idi kareb ieh pangeh nemaré baré luk sabpon ineh, denak-denak Semuel nacing. Idi Saul iné' papu' neneh.

¹¹Iamo' kebala Semuil, "Anun kekamenmu ineh?" Kebala Saul, "Ngaceku ui nenier nelun mula' ineh nepatad rat negku, idi iko pana' nateh nacing kareb aco luk bida'mu ineh. Idi teh amung lun Pilistin nepamung déi' Mikmas.

¹²Idi ui nengerawé, 'Na mio lun Pilistin macing amé' munu' negku déi' Gilgal. Idi nateh ui nesembayang pa kiung Tuhan.' Ngaceku ineh ui mekuu' maré baré luk sabpen ineh."

¹³Idi kebala Semuil, "Kekamenmu ini mebacé. Na iko nemaya' bala Tuhan Allahmu namu. Kudeng iko nemaya' balaNeh, kali' rungen Ieh ngeletep imetmu pa luun lun Israil macing raked-raked.

¹⁴Iamo' imetmu nekini na lutep. Idi Tuhan nakap seburur luk petulu dengan pinianNeh sebuleng, pad Ieh ngeletep neneh mangun ku raca' pupuNeh ini. Ngaceku na iko nenginita bala Tuhan luk namu ineh."

- ¹⁵Idi Semuil negugkang nalan rat Gilgal iné' Gibia luk bang bawang Beniamin. Idi Saul nengiap amung baweh luk idi neneh, kinula'deh 600.
- ¹⁶Saul idi anakneh Yonatan idi amung baweh luk maya' neneh tudo déi' Gibia luk bang bawang Beniamin. Iamo' lun Pilistin nelupo déi' Mikmas.
- ¹⁷Idi teluh babpat lun pebunu' ineh neremuat rat baweh lun Pilistin. Aceh babpat nemaya' dalam amé' Opira déi' Bawang Saul.
- ¹⁸Idi aceh babpat nemaya' dalam amé' Bait Horon. Idi aceh babpat nemaya' dalam amé' lakan bawang luk petutup Ruan Seboim déi' su luk ali-ali.
- ¹⁹Idi seburur lun mileh nuno pana' nateh nekali' bang apud bawang Israil. Ngaceku lun Iberani bibpeng lun Pilistin, na miak nganau' pelapet idi gaman.
- ²⁰Iamo' lun Israil iné' matun nelun Pilistin pelé anid-aniddeh miak ngir iyu radu, sakol, uai, idi alingdeh.
- ²¹Iamo' tabpardeh ineh, sebalad usin ku ngir uai idi ku nitip luk pinebpek, idi teh dueh balad usin ku ngir iyu radu, idi sakol.
- ²²Idi kareb bunu' ineh, aceh pelapet idi aceh gaman pana' nateh luk bang palad amung baweh luk maya' ni Saul idi Yonatan. Iamo' Saul idi anakneh Yonatan mo' inan.
- ²³Idi aceh baweh lun Pilistin iné' ngabang bal Ruan Mikmas.

Semuil Luk Pun-Pun 14

- ¹Idi kebala Yonatan kuan anak adi' luk nguit pelapetneh, "Amé' kiteh munu' nelun Pilistin su luk inandeh lupu." Idi na ieh nemaré kali' kuan tamanneh.
- ²Saul lupu muneng ku Gibia iang lawa kayuh delima luk déi' Migron. Idi amung baweh luk maya' neneh, kinula'deh 600 burur.
- ³(Ahiya, ieh ineh anak Ahitub luk kinanak Ikabod anak Pinihas luk mupun Eli, ieh ineh imam Tuhan déi' Silo luk ngayung ku kakeb ruuk.) Iamo' lun mula' ineh na kali' Yonatan pangeh iné'.

⁴Bang ruan luk linaba Yonatan kareb ieh iné' su luk inan lun Pilistin lupu ineh, inan dueh batu luk metadem pekop ruan ineh. Ngadan sebuleng Bosis. Idi ngadan sebuleng Senih.

⁵Idi sebuleng batu luk pa tinueh busat aco petutup ku Mikmas. Idi sebuleng luk pa kabing busat aco petutup ku Gibia.

⁶Idi kebala Yonatan kuan anak adi' ineh, "Amé' kiteh pebunu' inan baweh lun Pilistin luk na manu ineh, pelé tau uen Tuhan ngedengan. Ngaceku Tuhan na susa' ngedengan nelun mula' idi lun pawa' pana'."

⁷Idi kebala anak adi' ineh, "Do' nganau' luk pianmu. Ui idi denganmu."

⁸Idi kebala Yonatan, "Do' kiteh amé' silagan sirendeh.

⁹Kudeng ideh ngecuk nekiteh nganét acingdeh, do' kiteh tuped ieni.

¹⁰Iamo' kudeng ideh ngecuk nekiteh amé' nedeh, do' kiteh amé'. Ngaceku ini mangun ku tanu' idi Tuhan pangeh nemaré nedeh bang palad kiteh."

¹¹Idi didueh nesilagan nelun Pilistin. Idi kebala lun Pilistin, "Siruh! Lun Iberani ineh pangeh neremuat rat bang batu su luk inandeh nesigapung."

¹²Idi lun Pilistin nenawar ni Yonatan idi anak adi' ineh, kebaladeh, "Amé' matun nekai. Inan luk badén kai nemedueh!" Idi kebala Yonatan kuan anak adi' ineh, "Amé' kiteh. Ngaceku Tuhan pangeh nemaré nedeh bang palad lun Israil."

¹³Idi Yonatan nuké tekamang. Idi anak adi' ineh nemaya' neneh. Idi Yonatan nemunu' nelun Pilistin pad ideh neluka', idi ideh pinaté anak adi' ineh.

¹⁴Bang bunu' luk pun-pun ineh Yonatan idi anak adi' ineh nengaté lélé dueh ngepulu' burur. Idi ieh ineh bang aceh inan luk kirayehneh setangal ékar.

¹⁵Idi mangun aceh tot arang baweh su luk inan lun Pilistin nelupo, idi déi' natad, arang lun mula' idi lun pebunu' pana'. Tana' pana' meruyuh, pad ieh ineh mangun ku aceh tot ratnan Allah.

¹⁶Idi baweh Saul luk matar déi' Gibia luk bang bawang Beniamin nenier lun Pilistin megagau.

¹⁷Idi kebala Saul kuan bawehneh, "Iapin muyuh amung baweh idi ngitun idé' luk na idi arang tau." Idi ideh nengiap nelun mula'. Idi Yonatan idi anak adi' luk nguit pelapetneh ineh na idi.

¹⁸Idi kebala Saul ni Ahiya, "Nguit amé' tungé' Pati' Pejani' Allah." Ngaceku kareb ineh Pati' Pejani' ineh iné' pa atun lun Israil.

¹⁹Idi laba' Saul pebala kuan imam ineh, iuk-iuk mula' ria' arang baweh lun Pilistin. Idi kebala Saul kuan imam ineh, "Aganeh!"

²⁰Idi Saul dengan bawehneh iné' pebunu'. Iamo' lun Pilistin ineh nepebunu' arangdeh sebuleng idi mula' ria.

²¹Idi tuda'-tuda' lun Iberani luk pangeh nemaya' nelun Pilistin iné' pebunu' rat mon, nelumi inan baweh lun Israil luk nemaya' ni Saul idi Yonatan.

²²Idi kareb lun Israil luk sigapung luun pegkung-pegkung Epraim ineh nekali' nelun Pilistin neburo, idi ideh nengerada' nedeh ineh, idi nepebunu' nedeh.

²³Tuhan nengedengan nelun Israil bang aco sineh. Idi bunu' ineh nacing déi' Bait Awen.

²⁴Idi lun Israil merur bang aco sineh, ngaceku Saul nemulung nelun mula' ineh, kebalaneh, "Kediman kuan lun luk kuman luk anun-anun bang aco sini, kareb nateh ui nengua' kuan bunu'ku." Idi ngaceku ineh lun mula' na kuman anun-anun.

²⁵Idi amung lemulun ineh nesemuet bang pulung. Idi luun tana' ineh inan duru' tebikan.

²⁶Iapeh-iapeh pana' bang pulung, inan duru' tebikan. Iamo' seburur pana' nateh kuman ineh. Ngaceku ideh matot ku bulung ineh.

²⁷Iamo' Yonatan na neninger kareb tamanneh nemulung nelun mula' ineh. Idi ieh nengusong paped rukud luk bang paladneh, idi nengelusi luun tapi tebikan. Idi ieh nengisit ticu'neh luun tangneh. Idi ieh metueh peh.

²⁸Idi kebala seburur rat arang baweh ineh neneh, "Idi Tamam pangeh nemulung nelun mula'. Kediman kuan lun luk kuman luk anun-anun bang aco sini. Ngaceku ineh amung kai melaya' burur."

²⁹Idi kebala Yonatan, "I Ama' ngesusa' nelun mula'. Nier kudeng apeh tuehku kareb ui nengil sesuut mo' duru' tebikan ini.

³⁰Meluun do' aco sini lun mula' simén kuman ratnan akan luk inaro ratnan bunu', pad mula' lun Pilistin pitayendeh."

³¹Idi aco sineh teh ideh nengaté nelun Pilistin rat Mikmas macing déi' Aijalon. Iamo' lun mula' ineh pelaba laya'.

³²Pangeh ineh idi ideh pesingaro ku binaweh luk ilapdeh, sapi', amék, idi anak sapi' luk kiratdeh luun tana' idi kinandeh perapu dara'neh.

³³Idi lun nemada' ni Saul, "Baweh ineh mesala' inan Tuhan, ngaceku ideh nekuman uang perapu dara'neh." Idi kebala Saul, "Pelaba rayeh sala' ineh. Do' ngelubid aceh batu rayeh amé' negku."

³⁴Idi teh kebala Saul, "Do' amé' arang lun mula' idi ngecuk nedeh nguit amé' negku amung sapi'deh idi amékdeh, pad ideh miak kereten tungé idi kenen, pad ideh na mesala' inan Tuhan, ngaceku kuman uang perapu dara'neh." Idi bang daceh ineh teh amung lun mula' nenguit sapi'deh idi kiratdeh déi'.

³⁵Idi Saul nenganau' aceh bubpun kuan Tuhan. Idi ini bubpun luk pinudutneh pun-pun kuan Tuhan.

³⁶Idi kebala Saul teh, "Amé' tau ngerada' nelun Pilistin kareb medaceh, idi ngeriang nedeh pad aco masat. Idi aleg tau necan seburur pana' rat arangdeh." Idi kebaladeh ineh, "Do' iko nganau' luk matu bang terawému." Iamo' kebala imam, "Amé' tau ngitun Allah atun."

³⁷Idi Saul nengitun Allah, "Miakké ui amé' ngerada' nelun Pilistin? Miak Iko maré nedeh bang palad kai?" Iamo' aco sineh na Ieh nengua' putuhneh.

³⁸Idi kebala Saul, "O amung lun rayeh baweh, do' muyuh amé' tungé', pad tau kali' anun sala' luk kikem bang aco sini.

³⁹Ui pebulung ku Tuhan luk mulun, idi luk muit nelun Israil, sagan tu pana' anakku Yonatan, kali' rungen ieh pitayen." Idi seburur pana' nateh nepebala.

⁴⁰Idi kebala Saul kuan amung lun Israil, "Do' amung muyuh tuped bal selipa idi ui dengan anakku Yonatan selipa." Idi kebala lun mula' ni Saul, "Do' iko nganau' luk matu bang terawému."

⁴¹Idi kebala Saul, "O Tuhan Allah lun Israil, anun punneh Iko na ngor balaku aco sini? Kudeng ui, kian, anakku Yonatan inan sala', O Tuhan Allah lun Israil, maré Urim kareb kai nala' udi. Kudeng lun Israil inan sala' do' maré Tumim." Iamo' Yonatan idi Saul nepetulu. Lun mula' ineh na nepetulu.

⁴²Idi kebala Saul, "Nala' udi arangku dengan anakku Yonatan." Idi Yonatan luk nepetulu.

⁴³Idi kebala Saul ni Yonatan, "Mada' negku anunké luk inau'mu." Idi kebala Yonatan neneh, "Ui nekuman sesuut duru tebikan. Ini ui, ui temina' maté."

⁴⁴Idi Saul nepebulung pa kiung Tuhan, kebalaneh, "Kali' rungen Yonatan miak pitayen."

⁴⁵Iamo' kebala lun mula' ni Saul, "Miakké Yonatan maté luk pangeh nemuit nelun Israil? Na tu-tu! Kai pebulung ku Tuhan luk mulun. Sebuleng pana' nateh abpukneh mebbeh, ngaceku lalud Allah nengedengan neneh aco sini." Idi lun mula' ineh nemuit ni Yonatan pad ieh na pitayen.

⁴⁶Idi Saul nuli' nenecan nelun Pilistin. Idi lun Pilistin nuli' teh.

⁴⁷Kareb Saul mangun ku raca' lun Israil, idi ieh nepebunu' inan amung bunu'neh pekelibut, ieh ineh nelun Moab, Amon, lun Edom, raca'-raca' Soba, idi lun Pilistin; idi ieh luk metueh.

⁴⁸Idi ieh pebunu' dengan mekuu' pad ieh nengelaya' nelun Amalek. Idi ieh nemuit nelun Israil rat bang palad amung lun luk nengedereh nedeh.

⁴⁹Idi anak deléi Saul, ieh ineh Yonatan, Yiswi, idi Malkisua. Idi ngadan dueh anakneh luk decur, ieh ineh seluk rayeh ngadanneh Merab idi luk isuut ngadanneh Mikal.

⁵⁰Idi ngadan awan Saul ineh Ahinoam Ahimas. Idi ngadan lun rayeh bawehneh, ieh ineh Abner anak Ner, taman pinaken Raca' Saul.

⁵¹Idi Kis, taman Saul ineh, idi Ner taman Abner, ieh ineh anak Abiel.

⁵²Idi seruked ulunneh Saul metueh munu' nelun Pilistin. Idi Saul nengamung amung lun luk metueh idi luk mesangit kuan bawehneh.

Semuil Luk Pun-Pun 15

¹Kebala Semuil ni Saul, "Ui luk pangeh icuk Tuhan ngikit namu ku raca' pupuNeh, lun Israil. Idi nekini do' iko ninger bala Tuhan luk Melalud.

²Ieh pian ngua' anun luk pangeh inau' lun Amalek kuan lun Israil. Ngaceku ideh negesabeng nedeh arang dalan kareb ideh nacing rat bawang Masir.

³Idi nekini do' iko amé' ngelaya' nelun Amalek ineh, idi ngaté amung-amung luk nedeh, idi aleg méi' nedeh. Do' ngaté amung-amung deléi, decur, do' anak isuut idi anak luk niti' pana', sapi' idi amék, unta idi keladai."

⁴Saul nengamung amung bawehneh, idi ieh nengiap nedeh déi' Telem. Idi inan 200,000 burur rat Israil idi 10,000 burur rat Yahuda.

⁵Idi ieh iné' bawang lun Amalek dengan bawehneh, idi nengabang déi' bang puru'.

⁶Idi kebalaneh nelun Keni, "Do' muyuh lumuut idi remuat rat arang lun Amalek, pelé ui na ngaté nemuyuh perapu dengandeh ineh. Naké muyuh méi' nelun Israil kareb ideh nacing rat bawang Masir." Idi lun Keni nelumuut rat arang lun Amalek.

⁷Idi Saul nengelaya' amung lun Amalek, rat Hawila macing déi' Sur luk pa busat aco bawang Masir.

⁸Idi ieh nenganep ni Agag raca' lun Amalek ineh mulun, iamo' amung bawehneh pinatédeh.

⁹Iamo' Saul idi amung bawehneh méi' ni Agag, idi teh amung sapi' idi amék luk do', idi amung anak dumba, idi anun-anun luk do'. Iamo' amung luk dat pinatédeh.

¹⁰Idi kebala Tuhan ni Semuil,

¹¹"Ui nginuud ngaceku i Saul pangeh kinikitKu ku raca'. Ngaceku ieh nelemubed rat Negku, idi na maya' balaKu." Idi Semuil pelaba susa' niat. Idi ieh nengitang nawar Tuhan kedangan-kedangan ineh.

¹²Idi kenebpa pekak uka-uka Semuil iné' nakap ni Saul. Ieh neninger bala ratnan Saul pangeh iné' Karmel, idi ieh nenaped aceh luk ku terawé ratnan bururneh sebuleng. Pangeh ineh ieh iné' Gilgal.

¹³Idi Semuil iné' papu' ni Saul. Idi kebala Saul neneh, "Do' Tuhan ngeperuan namu; ngaceku ui pangeh nemaya' balaNeh."

¹⁴Idi kebala Semuil, "Anunké uni dumba ini, idi uni sapi' luk pedingerenku?"

¹⁵Idi Saul nengor balaneh, "Bawehku pangeh nenguit nedeh rat nelun Amalek. Ngaceku ideh méi' inan sapi' idi amékdeh luk do', idi baréndeh ku baré kuan Tuhan Allahmu. Iamo' amung luk baken ineh pangeh kai nengaté."

¹⁶Idi kebala Semuil ni Saul, "Pirud iko, pad ui maré kali' kuanmu bala Tuhan luk pangeh bida'Neh negku ina dacem!" Idi kebala Saul neneh, "Mada' ieh."

¹⁷Idi kebala Semuil, "Kareb iko isuut bang terawému sebuleng, iko mangun ku lun rayeh amung inul pupu Israil. Idi iko kinikit Tuhan ku raca' amung lun Israil.

¹⁸Idi Ieh nengecuk namu nalan, kebalaNeh, 'Amé' iko ngaté lun mesala' ineh, ieh ineh amung lun Amalek. Munu' nedeh macing ideh mabud.'

¹⁹Ngudehké iko na ninger bala Tuhan? Ngudeh iko pangeh nengaro binaweh, idi iko pangeh nenganau' luk dat pa kiung Tuhan?"

²⁰Idi kebala Saul ni Semuil, "Ui pangeh nemaya' bala Tuhan. Ui pangeh nengetacu dalam luk icuk Tuhan negku. Iamo' Agag raca' lun Amalek inuitku iné' tungé'. Iamo' amung lun Amalek ineh pangeh pinatéku.

²¹Iamo' kudeng anak itin ineh pangeh nengalap sapi' idi dumba luk meluun do' ratnan binaweh luk inaro, ieh ineh ngaceku pian baréndeh kuan Tuhan Allahmu déi' Gilgal."

²²Idi kebala Semuil, "Pianké Tuhan ku luk barén sabpen idi luk kereten mepad kudeng Ieh pian ku lun luk maya' bala Tuhan? Setuneh baya' ineh meluun do' ratnan baré, idi benéh niat meluun do' ratnan ngeret dumba luk do'.

²³Ngaceku tueh na maya' bada'Neh mepad kudeng sala' mangun, idi dita' niat mepad kudeng sembayang inan akang. Idi ngaceku iko pangeh nengarung bala Tuhan, Tuhan pangeh nengarung namu pelé na iko ku raca' peh."

²⁴Idi kebala Saul, "Ui pangeh mesala', ngaceku ngelaba bala Tuhan idi bala diko teh. Ngaceku matot ui ku amung anak itinku. Idi ui nemaya' baladeh ineh.

²⁵Idi nekini maré do' ku sala'ku, idi lemubed maya' negku, pelé ui tekeradung sembayang inan Tuhan."

²⁶Iamo' kebala Semuil, "Na ui sikal lemubed maya' namu. Ngaceku iko pangeh nengarung bala Tuhan. Idi Tuhan pana' pangeh nengarung namu, pad iko na mangun ku raca' lun Israil."

²⁷Idi kareb Semuil nelumi pian nalan, idi Saul nengimet iring kuyu'neh, pad ieh nedarak.

²⁸Idi kebala Semuil neneh, "Idi aco sini teh Tuhan pana' ngerarak imet raca' Israil ineh rat namu, idi barénneh kuan lun luk meluun do' rat namu.

²⁹Idi Allah luk mangun ku Ubur lun Israil ineh na mebalih idi na Ieh nginuud. Ngaceku baken Ieh lemulun pad Ieh nginuud."

³⁰Idi kebala Saul, "Ui pangeh mesala'. Iamo' ngedita' negku pa kiung amung lun rayeh lun pupuku idi pa kiung amung lun Israil. Do' lemubed maya' negku, pelé ui tekeradung sembayang inan Tuhan Allahmu."

³¹Idi Semuil nelemubed maya' ni Saul. Idi Saul netekeradung sembayang inan Tuhan.

³²Idi kebala Semuil, "Nguit ni Agag, raca' lun Amalek ineh amé' matun negku." Idi Agag iné' matun neneh dengan megegker niat, terawéneh, "Até ineh pelaba susa'."

³³Idi kebala Semuil, "Mepad kudeng pelapetmu pana' pangeh nenganau' tuda'-tuda' lun decur na anak, kudeng ineh teh tinanmu pana' na anak." Idi Semuil nengaté ni Agag, titek-titekneh pa kiung Tuhan déi' Gilgal.

³⁴Idi Semuil iné' déi' Rama. Idi Saul nuli' iné' Gibia.

³⁵Idi na Semuil nenier ni Saul macing ieh naté. Iamo' Semuil mesusa' ku Saul teh. Idi Tuhan nenginuud ngaceku Ieh nenganau' ni Saul ku raca' lun Israil.

Semuil Luk Pun-Pun 16

¹Kebala Tuhan ni Semuil, "Tuda' ioké iko mesusa' ku Saul luk pangeh tila'Ku pad ieh na mangun ku raca'? Do' ngalap umau saitun idi nalan. Ui ngecuk namu amé' ni Isai luk déi' Baitlahim. Ngaceku Ui pangeh nemili' sebuleng anakneh mangun ku raca'."

²Idi kebala Semuil, "Kudeng apeh ui miak amé'? Kudeng dalam ini nekali' Saul, kali' rungen ui pitayenneh." Idi kebala Tuhan, "Itenmu aceh anak sapi' idi mala, 'Ui ini amé' tungé' pian maré baré kuan Tuhan.'

³Do' iko nawar ni Isai amé' matun baré ineh. Idi Ui miak mada' namu anun luk miak ruenmu. Idi do' iko ngumau kuanKu lemulun luk badénKu namu."

⁴Idi Semuil nenganau' luk bida' Tuhan. Idi ieh iné' déi' Baitlahim. Idi nacing amung lun rayeh bawang ineh iné' papu' neneh dengan megegker, idi kebaladeh, "Do'ké acingmu ini?"

⁵Idi kebalaneh, "Do'. Lawéku ini pian maré baré kuan Tuhan. Ngeligan burur muyuh idi maya' negku." Idi ieh nengeligan ni Isai idi amung anak deléineh. Idi ieh nenawar nedeh amé' su luk inan maré ineh.

⁶Kareb ideh nacing idi Semuil nenier ni Eliab Isai. Idi keterawéneh, "Ineh ieh luk uen ngumau kuan Tuhan di lek."

⁷Iamo' kebala Tuhan neneh, "Aleg iko nier taganeh, idi kidita'neh, ngaceku na ui nemili' neneh. Idi luk siren Tuhan baken kudeng luk siren lemulun. Lemulun nier luk siren mateh mo'. Iamo' Tuhan nier anun-anun luk bang niat."

⁸Idi Isai nenawar ni Aminadab amé' papu' ni Semuil. Iamo' kebala Semuil, "Ieh ini pana' baken luk pinili' Tuhan."

⁹Idi Isai nenguit ni Sama papu' neneh. Iamo' kebala Semuil, "Ieh ini pana' baken luk pinili' Tuhan."

¹⁰Kudeng ineh teh Isai nengecuk tudu' burur anak deléineh papu' ni Semuil. Iamo' kebala Semuil ni Isai, "Idi amung ini baken luk pinili' Tuhan."

¹¹Idi Semuil nengitun neneh, "Iniké amung anakmu?" Kebala Isai, "Inan teh ieh luk isuut. Iamo' ieh matar dumba." Idi kebala Semuil ni Isai, "Ngecuk nelun nguit neneh. Ngaceku na tau maré baré ineh kudeng na ieh macing tungé'."

¹²Idi Isai nengecuk nelun nakap neneh. Idi anak adi' ineh do' taga, pingitneh mesia', idi do' matehneh. Idi kebala Tuhan ni Semuil, "Ini ieh luk pilinKu. Do' iko ngumau neneh!"

¹³Idi Semuil nengalap umau saitun ineh. Idi ieh nengumau neneh arang amung kinanakneh. Idi Roh Tuhan netemurun pa luun Daud dengan lalud rat aco sineh. Pangeh ineh idi Semukil nuli' iné' déi' Rama.

¹⁴Idi Roh Tuhan pana' neburo rat ni Saul, idi seburur sétan sinima' Tuhan ngagap neneh.

¹⁵Idi kebala amung lun tareh Saul neneh, "Idi seburur sétan sinima' Allah ngagap namu.

¹⁶Do' iko ngecuk nekai ini nakap aceh lun luk mileh nateg giula', idi kareb Sétan macing namu, miak ieh natég giula' ineh, idi iko miak do'."

¹⁷Idi kebala Saul nedeh, "Do' muyuh nakap kuanku seburur luk mileh nateg giula' idi nguit neneh amé' negku."

¹⁸Idi kebala seburur lun tareh Saul, "Ui pangéh nenier seburur anak Isai lun Baitlahim ineh luk mileh nateg giula'. Ieh seburur luk mekuu' idi metueh, idi teh ieh metaga idi mileh pegayam. Idi Tuhan pana' idi danganneh."

¹⁹Idi Saul nengecuk nelun dukenneh amé' matun ni Isai, kebaladeh, "Ngecuk anakmu amé' negku, ieh ineh Daud luk matar dumba ineh."

²⁰Idi Isai nengalap sebuleng anak keladai, idi teh ruti idi aceh seréi' abpa' anggur idi sebuleng anak amék luk inuit Daud kuan Saul.

²¹Kudeng ineh acing Daud ni Saul. Idi ieh nengimun ngakem kuan raca'. Idi Saul pana' méi' neneh, pad Daud mangun ku lun luk nguit pelapetneh.

²²Idi Saul nengecuk nelun duken amé' ni Isai, "Nima' Daud ngakem kuanku kidi-kidi, ngaceku ui pelaba éi' neneh."

²³Idi kareb sétan luk sinima' Allah amé' matun ni Saul, idi Daud nateg giula'neh. Idi Saul ngalap awang idi mangun do' teh. Idi sétan ineh pana' buro rat neneh.

Semuil Luk Pun-Pun 17

¹Idi lun Pilistin nepamung sikal pebunu' déi' Suko luk bang babpat Yahuda. Idi ideh nelupo arang Suko dengan Aseka, ieh ineh Lakan Dara'.

²Saul idi amung lun Israil pana' nepamung idi nelupo bang Ruan Kayuh Luk Meraben. Idi ideh netemina' munu' nelun Pilistin.

³Idi lun Pilistin netuped luun surud luk bal déi'. Idi lun Israil netuped luun surud bal tungé'. Idi ruan ineh arangdeh.

⁴Idi rat arang baweh lun Pilistin neremuat seburur luk mesangit, ngadanneh Goliat, rat bawang Gat, kidita' bururneh tudu' kaki.

⁵Idi luun uluhneh inan tupi tekaling. Idi ieh nengayung ku kuyu' tekaling luk merara. Idi berat kuyu' ineh 110 kati.

⁶Idi teh inan ebpu tekaling mop kukudneh idi iyu tekaling arang mop tudungneh.

⁷Idi etun busuneh ineh mepad kudeng kayuh luk inan lun ngebaruh ngelilid. Idi berat uang busuneh ineh pulu' limeh kati. Idi inan seburur luk nguit utap pa atunneh.

⁸Idi lun mesangit ineh netuped idi nenawar baweh lun Israil, kebalaneh nedeh, "Ngudeh muyuh pian pebunu'? Naké ui ini seburur lun Pilistin, idi amung muyuh lun tebarin Saul? Mili' rat arang muyuh seburur luk miak papu' negku.

⁹Kudeng ieh metueh rat negku idi ngaté negku idi amung kai mangun ku demulun muyuh. Iamo' kudeng ui ngelaya' neneh idi ngaté neneh, idi amung muyuh mangun ku demulun idi ngakem kuan kai."

¹⁰Idi teh kebala lun Pilistin ineh, "Aco sini ui situnga ku amung lalud lun Israil; maré nekini aceh deléi amé' negku pad kai dueh pakub sebuleng."

¹¹Idi kareb balaneh nekali' Saul idi amung lun Israil, idi ideh mawa idi pelaba tot.

¹²Daud, ieh ineh anak seburur lun Eprata rat Baitlahim Yahuda, ngadanneh Isai. Ieh inan ualuh anak deléi. Idi bang kareb imet Saul, Isai pangeh mengered idi melaya' burur.

¹³Idi teluh anak Isai luk rayeh ineh pangeh nemaya' ni Saul iné' pebunu'. Idi ngadan diteluh anak ineh: Eliab luk rayeh, idi luk kedueh ineh Abinadab, idi luk keteluh ineh Sama.

¹⁴Idi Daud ineh luk isuut. Iamo' diteluh luk rayeh ineh pangeh iné' maya' ni Saul.

¹⁵Iamo' Daud megéi' muli' necan ni Saul ngaceku ieh sikal matar dumba tamanneh déi' Baitlahim.

¹⁶Pekak idi malem apat ngepulu' aco kinioneh lun Pilistin ineh nacing idi tuped pa atun lun Israil.

¹⁷Idi kebala Isai ni Daud, "Ngalap kuan kinanakmu apat gatang setangal padé luk kiriki ini idi pulu' balad ruti ini. Idi nguit ineh mesaget amé' su luk inan nelupo kuan kinanakmu.

¹⁸Iamo' do' iko nguit pulu' agkeng rata ini kuan lun rayeh luk meribu ineh. Idi ngitun kudeng afeh ulun kinanakmu ineh. Idi nguit bala rat nedeh.

¹⁹Raca' Saul dengan kinanakmu, idi amung lun Israil pana' déi' bang Ruan Kayuh Luk Meraben, uned pebunu' nelun Pilistin.

²⁰Idi pekak uka-uka kenebpa, Daud nekulat. Idi ieh nenecan amung dumba ineh dengan lun matar nedeh. Idi ieh nenguit balu' ineh, idi nenalan maya' kudeng luk icuk Isai neneh. Idi ieh nacing déi' su luk inandeh nelupo, kareb baweh lun Israil ineh neremuat. Idi ideh pana' ngudub pian pebunu'.

²¹Lun Israil idi lun Pilistin nebaris petutup pian pebunu'.

²²Idi Daud nenecan balu' luk inuitneh bang palad lun luk matar amung binaweh. Idi ieh nupun iné' su luk inan pebunu'. Idi ieh nengitun ratnan ulun kinanakneh ineh.

²³Idi laba' ieh pebala nedeh, denak-denak Goliat nacing rat bang bunu' lun Pilistin. Idi ieh nemada' amung bala luk bilaneh atun pad ineh pedingeren i Daud.

²⁴Idi kareb lun Israil nenier ni Goliat, idi ideh neburo matot.

²⁵Kebaladeh, "Pangehké iko nenier nelun luk nacing tungé' ineh? Inan peh acingneh iné' tungé', ieh ineh pian situnga nelun Israil. Idi idé luk miak ngaté neneh, ieh miak inan raca' maré binaweh luk mula'. Idi ieh maré anakneh kuanneh ku awanneh. Idi lun bang tetek ruma' tamanneh miak uen ngagka' ratnan amung kekamen kuan raca'."

²⁶Idi kebala Daud nelun luk tupered iringneh ineh, "Anunké luk mangun kuan lun luk ngaté nelun Pilistin ini, idi luk ngiu' igu' ratnan kiung lun Israil. Idéké lun Pilistin ini luk na manu, luk mekuu' situnga ku baweh Allah luk mulun ineh?"

²⁷Idi lun mula' ineh perigéi' mala bala luk ina di, kebaladeh, "Kudeng ineh luk ruen kuan lemulun luk ngaté neneh ineh mucu."

²⁸Idi Eliab, kinanak Daud luk rayeh neninger luk bilaneh kuan lun luk mula' ineh. Idi ieh megateh ni Daud, kebalaneh, "Ngudeh iko amé' tungé? Ticanmu nidé dumba luk bang laman di? Ngaceku ui kali' kuu'mu idi niatmu luk dat. Inan peh iko iné' tungé' sikal nier bunu mo'."

²⁹Idi kebala Daud neneh, "Anun kekamenku luk dat? Ui ngitun mo'?"

³⁰Idi ieh neسيوم pa nelun baken, idi ieh nemala bala ina di. Idi lun mula' nengor balaneh mepad kudeng baladeh luk atun di.

³¹Kareb bala luk bida' Daud pindengerdeh, idi ideh nemala ineh ni Saul. Idi Saul nengecuk nawar neneh.

³²Idi kebala Daud ni Saul, "Seburur pana' aleg metalang niatneh. Ngaceku ui sikal amé' pebunu' nelun Pilistin ineh."

³³Iamo' kebala Saul, "Na iko miak amé' pebunu' neneh, ngaceku iko ineh isuut teh. Idi ieh teh lun pebunu' rat isuut."

³⁴Iamo' kebala Daud ni Saul, "Inan aceh kareb laba' ui matar dumba tamanku, nacing aceh balang, idi teh aceh beruang nengakem sebuleng dumba ratnan riudan ineh.

³⁵Idi ui iné' ngerada' neneh idi nenecat neneh. Idi ui nenginat dumba ineh rat bang tangneh. Idi kareb ieh sikal ngeramit negku, idi ui nengakem buluh tangneh, idi ui nenecat idi nengaté neneh.

³⁶Balang idi beruang ineh pana' pinatéku. Kudeng ineh teh lawé lun Pilistin luk na manu ineh mucu, mepad kudeng pung ineh. Ngaceku ieh nesitunga nan baweh Allah luk mulun."

³⁷Idi teh kebala Daud, "Tuhan luk pangeh nemuit negku ratnan kerakem balang idi beruang ineh, Ieh teh miak muit negku mucu rat bang palad lun Pilistin ineh." Idi kebala Saul ni Daud, "Amé' iko, idi Tuhan miak ngedengan namu!"

³⁸Idi Saul nengayung ni Daud ku ayungneh sebuleng. Idi ieh nengerareng tupi tekaling luun uluhneh, idi luun batekneh kuyu' tekaling luk merara.

³⁹Idi Daud teh nengabet remiri binan pelapetneh pa luun ayungneh idi ieh nenutun nalan, iamo' na ieh pekalai. Idi Daud nepebala ni Saul, "Ui na miak nalan ku ini, ngaceku nateh ui nepekalai ku ini atun." Idi Daud nengelengu ayung ineh peh.

⁴⁰Idi ieh nengalap rukudneh. Idi ieh nemili' limeh batu luk mesalud rat bang arur, rirengneh bang tebpungneh. Idi ieh nengalap latikneh, idi iné' matun nelun Pilistin ineh.

⁴¹Idi lun Pilistin ineh iné' matun ni Daud. Idi lun luk nguit utapneh pana' nenalan pa atunneh.

⁴²Kareb lun Pilistin ineh nenier ni Daud idi ieh nesitunga neneh, ngaceku ieh isuut teh. Idi mesia' pingitneh idi do' taganeh.

⁴³Idi kebalaneh ni Daud, "Iko ngerawé negku uko'ké, idi iko amé' matun negku nguit rukud?" Idi ieh nengediman ni Daud ku akangneh.

⁴⁴Idi ieh nenguto ni Daud kebalaneh, "Amé' matun negku, idi ui maré uang bururmu kuan suit luk arang gawa' idi kuan pung luk bang pulung."

⁴⁵Iamo' kebala Daud, "Inan peh Iko amé' matun negku dengan pelapet idi busu. Iamo' ui ini amé' matun namu dengan ngadan Tuhan luk Melalud, ieh ineh Allah amung baweh lun Israil luk inanmu situnga ineh.

⁴⁶Idi bang aco sini teh Tuhan maré namu bang paladku. Idi ui miak ngaté namu, idi ngaleb uluhmu. Idi bang aco sini teh ui maré butung amung baweh lun Pilistin kenen suit idi pung, pad amung uang tana' miak kali', idi lun Israil inan Allah.

⁴⁷Idi amung lemulun ini miak kali' kudeng apeh lawé Tuhan ngedengan pupuNeh, baken dengan pelapet, idi baken dengan busu, iamo' bunu' ineh Tuhan kuan. Idi Ieh teh miak maré nemuyuh bang palad kai."

⁴⁸Idi Goliat nenalan amé' matun ni Daud, idi Daud saget nupun iné' su inan lun Pilistin pebunu', pian munu' neneh.

⁴⁹Idi Daud nenuet ticu'neh bang tebpungneh, idi ieh nengalap aceh batu. Idi ieh nengiber-ngiber batu ineh, idi madu' Goliat nekaneh. Petacu batu ineh petanem luun madu'neh. Idi ieh neluka' tekulub.

⁵⁰Kudeng ineh lawéneh Daud nengelaya' ni Goliat ku luk uen ngiber-ngiber ineh, idi dengan batu ieh nengaté nelun Pilistin ineh. Iamo' na pelapetneh.

⁵¹Idi ieh nupun idi tuped iring bururneh. Idi ieh nengalap pelapet Goliat ineh. Idi ieh nengaleb uluhneh. Kareb amung lun Pilistin nenier lun luk mesangit ineh pangeh naté, idi amungdeh neburo.

⁵²Idi amung lun Israil idi lun Yahuda nengudub idi nengerada' nedeh macing déi' Gat idi déi' tanga' Ekron. Idi amung lun Pilistin nurat pad ideh neluka' luun dalam Saraim macing déi' Gat idi Ekron.

⁵³Idi lun Israil nelemubed rat nengerada' nelun Pilistin idi nengaro amung su luk inandeh nelupo.

⁵⁴Idi Daud nengalap uluh lun Pilistin ineh, inuitneh iné' déi' Yerusalim. Iamo' amung repapeh Goliat inau'neh bang leponeh sebuleng.

⁵⁵Kareb Saul nenier ni Daud amé' matun ni Goliat, idi kebalaneh ni Abner lun rayeh bawehneh, "Abner, idéké anak ineh?" Idi kebala Abner, "O tuanku, ui na kali' anak idé ini."

⁵⁶Idi kebala Saul, "Do' ngitun ku anak idé ineh."

⁵⁷Idi kareb Daud nelemubed rat nengaté ni Goliat, idi Abner nepapu' neneh, idi ieh nenguit neneh amé' matun ni Saul. Idi uluh lun Pilistin ineh idi teh bang paladneh.

⁵⁸Idi kebala Saul neneh, "Anak idé iko ni?" Idi Daud nengor balaneh, "Ui ini anak Isai lun dukenmu, ieh ineh lun Baitlahim."

Semuil Luk Pun-Pun 18

- ¹Idi kareb Daud pangeh nepebala ni Saul, idi niat Yonatan perurum denga Daud. Idi Yonatan méi' neneh mepad kudeng bururneh sebuleng.
- ²Idi Saul nengalap neneh aco sineh teh. Na ieh pian maré neneh muli'.
- ³Idi Yonatan nepejani' ni Daud, ngaceku ieh mawa neneh.
- ⁴Idi ieh nengelengu kuyu' luk luunneh, idi ieh nemaré ineh ni Daud. Kudeng ineh teh amung ayungneh macing ku pelapet binor idi abet awa'neh pana'.
- ⁵Idi kareb Daud remuat amé' iapeh-iapeh luk duken Saul neneh, amung kekammeneh do'. Idi ngaceku ineh Saul nenganau' neneh ku aceh lun rayeh bunu'. Idi ieh petulu pa kiung lun mula', idi teh pa kiung amung lun rayeh-rayeh.
- ⁶Idi kareb lun pebunu' nacing, idi Daud pana' nuli' rat nengaté ni Goliat, idi neremuat tuda'-tuda' lun decur rat bang amung bawang lun Israil, idi ideh menani dengan mawang niat idi ngalai iné' ngapu' Raca' Saul dengan tawak bulu' idi dengan amung-amung luk tetagkendeh.
- ⁷Idi amung decur ineh menani, dengan mawang niat, kenanideh, "I Saul pangeh nengaté ribu-ribu. Iamo' i Daud nengaté tuda'-tuda' ngepulu' ribu."
- ⁸Idi Saul megateh niat, idi dat bala neneh. Idi kebalaneh, "Daud luk ruendeh nengaté tuda'-tuda' ngepulu' ribu. Iamo' ui nengaté ribu-ribu mo'. Idi kali rungen kekipedneh ieh mangun ku raca'."
- ⁹Idi rat aco sineh teh Saul temaruh ni Daud.
- ¹⁰Idi kenebpa, denak-denak aceh sétan luk sinima' Allah nacing ni Saul, pad ieh ironeh bang ruma'neh. Idi Daud nenateg giula'neh mepad kudeng anid-anid aco. Idi busu pana' bang palad Saul.
- ¹¹Idi i Saul nemayung busuneh, kebalaneh, "Do' ui mayung ni Daud pad busuku mepesut luun alad." Iamo' Daud nekuming macing dueh kua'.
- ¹²Idi Saul matot ni Daud ngaceku Tuhan idi denganneh. Iamo' Tuhan pangeh nenecan ni Saul.

- ¹³Idi Saul nengecuk Daud amé' mado pad ieh mangun ku lun rayeh pa luun meribu lemulun. Idi Daud nenguyut bawehneh amé' pebunu'.
- ¹⁴Idi kekamen Daud do' bang amung lawéneh, ngaceku Tuhan idi denganneh.
- ¹⁵Idi kareb Saul nenier amung kekamen Daud do', idi ieh pelaba tot neneh.
- ¹⁶Iamo' amung lun Israil idi lun Yahuda mawa ni Daud, ngaceku kuyutneh pelaba do'.
- ¹⁷Idi kebala Saul ni Daud, "Ini anakku luk rayeh, ngadanneh Merab. Ui pian maré neneh ku awanmu kudeng iko mekuu' idi nganau' bunu' Tuhan kuanku." (Ngaceku terawé Saul, Na ticu'ku sebuleng ngaté neneh, iamo' ticu' lun Pilistin mo'.)
- ¹⁸Idi kebala Daud ni Saul, "Idéké ui ini. Idi idéké uang tetek ruma'ku, pad ui mangun ku ibanmu?"
- ¹⁹Idi setuneh bang kareb luk miak maré Merab ni Daud, ieh pangeh biré Saul ku awan Adriel rat Mehola.
- ²⁰Iamo' Mikal anak Saul ineh mawa ni Daud. Idi Saul mawang niat ninger bala ineh.
- ²¹Idi terawé Saul, "Do' ui maré Mikal ni Daud, pad mangun ku abpung kuanneh, pelé ieh pitayen lun Pilistin." Idi kebala Saul ni Daud sekedueh kua', "Do' iko mangun ku ibanku."
- ²²Idi Saul nengecuk amung lun tarehneh kebalaneh, "Mada' ni Daud sebuleng. 'Idi raca' pian namu idi amung tarehneh pana' méi' namu. Idi do' iko ngalap anakneh.' "
- ²³Kareb amung tareh Saul ngacing bala ineh ni Daud, idi kebala Daud nedeh, "Malé mo' bang terawé muyuh ui mangun ku iban raca'. Iamo' ui ini lun masi' idi na mebala."
- ²⁴Idi tareh Saul nengacing bala Daud ni Saul.

²⁵Idi Saul nengecuk nedeh mada' ni Daud, "Idi raca' na sikal ku purut baken ratnan meratu kubil lun Pilistin luk na sinunat peh, pelé ngacing ua' kuan bunu' raca'." (Ngaceku ulek Saul ngerawé Daud pitayen lun Pilistin.)

²⁶Idi tareh ineh nengacing bala ini ni Daud. Idi ieh mawang niat mangun ku iban raca'. Idi kareb nateh aconeh petap,

²⁷Idi Daud nenalan dengan lun dieh. Idi ieh nengaté rat nelun Pilistin dueh ngeratu burur deléi. Idi Daud nemaré amung kubildeh ineh kuan raca', maya' luk pinutuhneh, pad ieh mangun ku iban raca'. Idi Saul nemaré ni Mikal anakneh mangun ku awan Daud.

²⁸Idi Saul nekali' Tuhan idi dengan Daud, idi amung lun Israil mawa neneh.

²⁹Idi meluun tot Saul ni Daud, pad Saul mangun ku bunu' Daud raked-raked ulunneh.

³⁰Idi anid-anid kua' baweh lun Pilistin nalan pian pebunu', i Daud meluun tueh ratnan amung lun tebarin Saul luk iné' munu' nedeh, pad ieh mebala.

Semuil Luk Pun-Pun 19

¹Kebala Saul ni Yonatan anakneh, idi nan amung-amung tarehneh, "Ui pian ngaté ni Daud." Iamo' Yonatan anak Saul ineh meluun awa ni Daud.

²Idi Yonatan nemada' ni Daud, kebalaneh, "Tamanku sikal ngaté namu. Ngaceku ineh nginita iko bururmu pekak nebpa. Do' iko sigapung su luk melinged, pad iko na kali' lun.

³Idi ui miak amé' tupid iring tamanku déi' natad su luk inanmu. Idi ui miak pegayam neneh ratnan kekamenmu, pian kali' anun luk mangun. Idi ui miak maré kali' namu."

⁴Idi Yonatan nengubur ni Daud kuan Saul, kebalaneh neneh, "Aleg iko nganau' luk dat kuan Daud lun dukenmu ineh. Ngaceku ieh teh na sala' pa kiungmu. Iamo' kekammeneh petulu maya' luk pianmu.

⁵Ngaceku na ieh matot maté kareb ieh nengaté Goliat, idi Tuhan nemaré tueh kuan amung pupu Israil. Iko pangéh nenier ineh dengan awang niatmu. Anun

pun iko pian nganau' sala' kuan lemulun luk na sala' idi ngaté Daud dengan na tabpen-tabpen?"

⁶Idi Saul neninger bala Yonatan, idi ieh nepebulung ku ngadan Tuhan, "Na tu ui ngaté ni Daud."

⁷Idi Yonatan nenawar ni Daud idi ieh nemaré kali' neneh amung bala ineh. Idi ieh nenated ni Daud amé' ni Saul. Idi Daud iné' ngakem kuan raca' mepad kudeng luk atun.

⁸Muci ratnan ineh idi inan bunu' teh. Idi Daud iné' pebunu' nelun Pilistin. Idi ieh nengelaya' nedeh dengan tuehneh pad ideh neburo rat pa kiungneh.

⁹Idi denak-denak sétan luk sinima' Tuhan nacing ni Saul, kareb ieh tudo bang ruma'neh, idi busu pana' bang paladneh. Idi Daud nenateg giula'.

¹⁰Idi Saul nenutun mayung ni daud, pad busuneh nepesut luun alad. Iamo' Daud nekuming, pad busu Saul nekaneh luun alad mo'. Idi Daud nupun buro.

¹¹Idi kareb daceh ineh Saul nengecuk tuda'-tuda' lun amé' ruma' Daud, pelé ideh ngabang neneh idi ngaté neneh kareb pekak. Iamo' Mikal awanneh nemada' ni Daud, kebalaneh, "Kudeng iko na buro malem ini, kali' rungen nebpa iko maté."

¹²Idi Mikal nengurur ni Daud remuat maya' gisumen ruma'neh. Idi ieh nupun buro pad ieh nepuit.

¹³Idi Mikal nengalap aceh akang, rirengneh su luk inanneh rudap, idi aceh kubil amék inau'neh ku laganeh, idi ieh nenarub neneh.

¹⁴Idi kareb Saul nengecuk lun amé' ngalap ni Daud, kebala Mikal, "Ieh mét."

¹⁵Idi Saul nengecuk nelun amé' nier ni Daud, kebalaneh, "Nguit neneh amé' negku perapu amung luk inanneh rudap, pelé ui miak ngaté neneh."

¹⁶Kareb ideh nacing idi inan aceh akang bang su luk inanneh rudap, idi kubil amék ku laganeh.

¹⁷Idi kebala Saul ni Mikal, "Ngudeh iko nenaluk negku kudeng ini, pad iko nima' bunu'ku buro?" Idi kebala Mikal ni Saul, "Kebalaneh negku, 'Kudeng iko na muit negku, ui ngaté namu.' "

¹⁸Idi Daud neburo, idi iné' ni Semuil déi' Rama. Idi ieh nemada' neneh amung-amung luk pangeh inau' Saul kuanneh. Idi Daud didueh Semuil iné' tudo déi' Nayot.

¹⁹Idi lun nemada' ni Saul, kebaladeh, "Daud idi déi' Nayot luk déi' Rama."

²⁰Idi Saul nengecuk nelun duken amé' ngalap ni Daud rat déi'. Kareb ideh nacing ideh nenier aceh tebubpun lun nabi uned mada' luk biré Allah. Idi Semuil luk lun rayehdeh. Idi Roh Allah netemurun pa luun amung lun luk icuk Saul ineh, pad ideh pana' mada' teh.

²¹Idi ineh pana' bida' lun ni Saul. Idi Saul nengecuk tuda'-tuda' lun baken. Iamo' ideh pana' mada' luk biré Tuhan teh. Idi Saul nengecuk tuda'-tuda' lun duken luk keteluh kua'. Iamo' lun ineh pana' mada' luk biré Tuhan teh.

²²Idi ieh sebuleng iné' déi' Rama. Idi ieh nacing déi' subuk rayeh luk déi' Seku. Idi ieh nengitun, "Iapehké Semuil didueh Daud?" Idi kebaladeh, "Déi' Nayot luk déi' Rama."

²³Idi ieh pana' iné' déi'. Idi Roh Allah netemurun pa luun Saul teh, idi laba' ieh nalan ieh pana' mada' luk biré Allah, pad ieh macing déi' Nayot luk déi' Rama.

²⁴Idi ieh nengelengu ayungneh. Idi ieh sebuleng pana' mada' pa kiung Semuil. Idi ieh netelubid lubpa setebaco sekedangan. Idi ngaceku ineh kebala lun, "Idiké Saul arang nabi-nabi?"

Semuil Luk Pun-Pun 20

¹Idi Daud neburo rat Nayot luk déi' Rama ineh. Idi ieh iné' matun ni Yonatan, kebalaneh, "Anunké luk inau'ku, idi anunké datku? Idi anun sala'ku pa kiung tamanmu, pad ieh pian ngaté negku?"

²Idi kebala Yonatan neneh, "Na miak kudeng ineh, na iko miak uen ngaté. Ngaceku tamanku na nganau' anun-anun, do' luk rayeh idi luk isuut luk na ginala'neh negku atun. Na miak i Ama' ngalum dalam luk kudeng ineh rat negku. Na ieh kudeng ineh."

³Idi kebala Daud neneh, "I tamam pangeh kali' do'-do' ratnan iko méi' negku. Idi ngaceku ineh terawéneh, 'Do' Yonatan na kali' ratnan lawé ini, pelé ieh na mesusa' niat.' Iamo' ui pebulung ku ngadan Tuhan luk mulun idi ku ulunmu sebuleng pana', iamo' seakang mo' arangku dengan até."

⁴Idi kebala Yonatan ni Daud, "Anun luk pianmu duken ui miak nganau'?"

⁵Idi kebala Daud, "Idi nebpa Irau Bulan Baruh, idi pekalai aco sineh kuman pamung dengan raca'. Idi nekini do' iko nima' negku amé' sigapung déi' luun amug macing aco luk keteluh kareb malem.

⁶Idi kudeng i tamam ngitun namu, 'Iapeh i Daud?' do' iko mada' kudeng ini, 'Ieh nemutuh negku nima' neneh muli' amé' Baitlahim dengan miket, ngaceku déi' inan baré kuan pupuneh, kudeng luk pekalai anid-anid lak.'

⁷Idi kudeng bala raca', 'Do',' idi inan peruan kuanku ini. Iamo' kudeng ieh dat useh, idi iko kali' i tamam pian nganau' luk dat.

⁸Idi do' iko nganau' luk do' kuanku, ngaceku iko pangeh nengeraben jani' negku pa kiung Tuhan. Iamo' kudeng ui inan sala' anun-anun, do' iko ngaté negku. Ngudeh iko nima' ni tamam nganau' ineh?"

⁹Idi kebala Yonatan, "Na miak kudeng ineh! Ngaceku kudeng ui kali' tamanku pian nganau' luk dat, ui miak maré klai' namu."

¹⁰Idi kebala Daud, "Idéké miak maré kali' negku kudeng i tamam dat bala namu?"

¹¹Idi kebala Yonatan, "Do' kiteh remuat amé' i natad." Idi didueh iné'.

¹²Idi kebala Yonatan ni Daud, "Ui pebulung ku ngadan Tuhan Allah lun Israil, ui sikal amé' ngitun ni Ama' seketeluh kua' nebpa kareb kudeng ini. Idi kudeng ayuneh do' kuanmu ui miak ngecuk nelun maré kali' namu?"

¹³Idi kudeng tamanku pian nganau' luk dat, idi Tuhan miak ngukum negku kudeng na ui maré kali' namu, idi nima' namu nalan dengan do'. Idi do' Tuhan idi denganmu, mepad kudeng ieh nengedengan tamanku atun.

¹⁴Idi kudeng ui mulun teh, do' iko méi' negku, maya' kudeng luk pian Tuhan, pelé ui na maté.

¹⁵Idi aleg iko ngagka' do'mu kuan uang tetek ruma'ku macing raked-raked. Idi teh kareb Tuhan pangeh ngaté amung-amung bunu' Daud rat aput tana',

¹⁶aleg nima' ngadan Yonatan talan rat bang tetek ruma' Daud. Idi do' Tuhan ngua' kuan amung bunu' Daud.

¹⁷Idi Yonatan nengecuk Daud pebulung ku awaneh neneh, ngaceku ieh mawa neneh mepad kudeng bururneh sebuleng.

¹⁸Idi kebala Yonatan neneh, "Nebpa Irau Bulan Baruh idi kali' rungen lun ngitun namu, ngaceku kali'deh su inanmu ineh na uang.

¹⁹Iamo' soriak ideh ngitun namu dengan matu, ngaceku ineh do' iko amé' su luk inanmu sigapung luun amug. Idi do' iko tudo bal selipa surud batu ineh.

²⁰Idi ui miak ngelatik teluh ileb iring batu ineh, ayu-ayu ui ngelatik aceh luk inan kai perisiu'.

²¹Idi ui miak ngecuk nelun dukenku amé' ngalap ileb binor ineh. Idi kudeng ui mala kuan anak ineh, 'Nier ileb ineh iringmu selipa, ngalap ieh, do' iko amé' matun negku, ngaceku ui pebulung ku Tuhan luk mulun, iko pana' miak mulun teh idi na luk idi susa' anun-anun.

²²Iamo' kudeng ui mala kuan anak ineh, 'Nier ileb ineh mado rat namu,' do' iko buro ngaceku Tuhan luk ngecuk namu.

²³Idi ratnan pejani' arang kiteh, kali' rungen Tuhan ngelelep jani' ineh."

²⁴Idi Daud nesigapung luun amug. Idi kareb Irau Bulan Baruh raca' tudo pian kuman.

²⁵Idi ieh tudo luun kerusineh kudeng luk pekalai su luk muneng ku alad. Idi Yonatan tudo petutup, idi Abner tudo iring Saul. Iamo' su luk inan Daud mo' luk na uang. Idi Saul na nepebala anun-anun bang aco sineh.

²⁶Ngaceku terawéneh, "Kian inan bayengneh idi na ieh meligan lek."

²⁷Idi kenebpa, ieh ineh seaco pangeh Irau Bulan Baruh ineh, kareb ideh kali' su luk inan Daud ineh na uang, idi kebala Saul ni Yonatan, "Anun pun anak Isai ineh na iné' bang irau i nalem idi aco sini pana'?"

²⁸Idi kebala Yonatan, "Ngaceku Daud pangeh nemutuh negku nima' neneh amé' Baitlahim.

²⁹Kebalaneh, 'Nima' negku amé'. Ngaceku inan baré kuan pupuku bang bawang kai. Idi kinanakku pangeh neneteng negku. Ngaceku ineh kudeng iko méi' negku, nima' negku nalan amé' ngikak kinanak-kinanakku! Idi ineh punneh ieh na nacing bang iraumu."

³⁰Idi Saul pelaba gathé ni Yonatan. Idi kebalaneh neneh, "O anak luk mebacé! Ui kali' namu ngedengan ni Daud, pad ngacing igu' kuanmu idi kuan tinanmu pana'!

³¹Ngaceku seruked Daud mulun kali' rungen iko idi imetmu pana' na miak lutep. Idi nekini ngecuk nelun nawar neneh, idi nguit neneh amé' negku. Ngaceku kali' rungen ieh pitayen."

³²Idi kebala Yonatan, "Anun punneh pitayen? Anun luk pangeh inau'neh?"

³³Idi Saul nengikang ku busuneh sikal mayung neneh. Petacu Yonatan kali', ngaceku pangeh megala' tamanneh sikal ngaté ni Daud.

³⁴Idi Yonatan netuped idi neburo ratnan irau dengan megathé niat. Idi aco luk kedueh bang Irau Bulan Baruh ineh na ieh nekuman ngaceku niatneh pelaba éi' ni Daud ngaceku tamanneh pangeh nengigu' neneh.

³⁵Idi pekak kenebpa Yonatan iné' luun amug pian papu' ni Daud maya' jani' didueh ineh. Idi seburur anak nemaya' neneh.

³⁶Idi kebalaneh kuan anak ineh, "Amé' iko nakap ileb luk linatikku ineh." Idi anak ineh nupun, idi Yonatan nengelatik sebuleng ileb lemaba buduk uluhneh.

³⁷Idi anak ineh nacing su inan ileb luk pangeh linatik Yonatan ineh. Idi Yonatan nenawar anak ineh, kebalaneh, "Mado ileb ineh rat namu!

³⁸Saget iko! Upun mo! Aleg ugka!" Idi anak ineh nengalap ileb ineh, idi ieh nelemubed amé' ni Yonatan.

³⁹Idi sesuut pana' nateh kali' anak ineh lawéneh. Iamo' Yonatan idi Daud mo' luk kali'.

⁴⁰Idi Yonatan nemaré binorneh kuan anak ineh, kebalaneh, "Amé' iko nguit ini amé' bang bawang."

⁴¹Kareb anak ineh iné', idi Daud netuped rat iring surud batu ineh. Idi ieh netekunal teluh kua' idi didueh nepebuen idi nangi'. Iamo' Daud luk pelaba tangi'.

⁴²Idi keburu' Yonatan ni Daud, "Do' Allah ngedengan namu. Kiteh pangeh nepejani' dengan ngadan Tuhan, kudeng ini, 'Tuhan idi arang kiteh idi arang pupuku dengan pupumu. Nima' jani' ineh meraben macing raked-raked.' " Pangeh ineh idi Daud negugkang nalan. Idi Yonatan nelemubed iné' bang bawang rayeh.

Semuil Luk Pun-Pun 21

¹Idi Daud nacing déi' Nob idi iné' inan Imam Ahimalek. Idi Ahimalek iné' papu' ni Daud dengan megegker niat, kebalaneh, "Ngudeh iko buleng-buleng idi na lun baken denganmu?"

²Idi kebala Daud, "Ngaceku raca' nemaré aceh kekamen kuanku, idi nengecuk negku aleg nima' seburur pana' kali' sesuut ratnan kekamen luk pangeh bida'neh negku ineh. Idi ui pangeh nengecuk nelun dukenku amé' bang aceh bawang.

- ³Inankké akanmu tungé? Maré limeh balad ruti kuanku, kian meluun ratnan ineh kudeng mo' inan.”
- ⁴Idi imam nengor bala Daud, kebalaneh, "Na ruti luk baken negku, iamo' ruti ligan mo' luk inan, kudeng anak adi' ineh pangeh nengimet bururdeh ratnan decur.”
- ⁵Idi kebala Daud, "Kali' rungen decur na iné' nekai, ngaceku ini adat kai kareb amé' pebunu'. Idi burur lun anak adi' ineh meligan kareb lawé luk pekalai. Meluun teh aco sini bururdeh meligan.”
- ⁶Idi imam nemaré ruti luk meligan ineh neneh, ngaceku na ruti baken, iamo' ruti ubur Tuhan luk miak lapen rat pa kiung Tuhan idi uen ngelibal ku ruti baruh, kareb luk baken ineh lapen.
- ⁷Idi aco sineh inan seburur rat arang lun duken Saul uned ngakem kuan Tuhan su ineh. Idi ngadanneh Doeg lun Edom, ieh ineh lun rayeh amung lun luk matar aya' Saul.
- ⁸Idi kebala Daud ni Ahimalek, "Inanké busu kian pelapet lek? Na ui nenguit pelapet idi busu, ngaceku raca' nengecuk negku miket.”
- ⁹Idi kebala imam ineh, "Pelapet Goliat lun Pilistin luk pangeh pinatému déi' Ruan Kayuh Luk Meraben ineh, idi linilid ku kibung pa keted kakeb ruuk imam. Kudeng iko sikal ngalap ineh, ngalap mo'. Ngaceku tungé' na luk baken." Idi kebala Daud, "Na luk meluun do' ratnan ineh. Maré mo' ineh kuanku.”
- ¹⁰Idi Daud nupun buro rat pa kiung Saul. Idi ieh nacing ni Akis raca' déi' bawang Gat.
- ¹¹Iamo' kebala amung tareh Akis kuanneh, "Naké ieh ini Daud raca' bawang ineh? Naké lun mula' pangeh nemenani ngubur neneh, kebaladeh, 'Saul pangeh nengaté ribu-ribu lemulun. Iamo' Daud nengaté pulu' ribu?' “
- ¹²Idi Daud nekali' amung bala ini idi ieh pelaba tot pa kiung Akis raca' Gat ineh.

¹³Idi Daud siruden pa kiungdeh, idi ngirit-ngirit luun alad tanga' idi nima' aka'neh semarok luun buluh adaneh.

¹⁴Idi kebala Akis kuan amung lun tarehneh, "Naké muyuh kali' lun ini meruden, ngudeh muyuh nguit neneh amé' negku?"

¹⁵Naké petap lun meruden kali'ku teh. Ngudeh muyuh nguit neneh amé' pa kiungku? Miakké lun luk kudeng ini semuet bang ruma'ku?"

Semuil Luk Pun-Pun 22

¹Idi Daud neburo rat déi' idi sigapung bang lubang batu Adulan. Idi kareb balaneh nekali' amung kinanakneh idi amung lun bang tetek ruma' tamanneh, idi amungdeh ineh iné' matun neneh.

²Idi amung lun luk bang dereh, lun luk inan baleh, idi lun luk mét niat nepamung neneh. Idi Daud mangun ku lun rayehdeh ineh. Idi mula' lun luk denganneh ineh, ieh ineh 400 burur deléi.

³Idi Daud nenalan rat déi' iné' Mispa déi' Moab. Idi kebalaneh kuan raca' lun Moab ineh, "Nima' taman-tinanku mudeng denganmu, pad ui kali' anun luk ruen Allah kuanku."

⁴Idi Daud nenecan taman-tinanneh dengan raca' Moab ineh. Idi didueh tudo denganneh raked Daud tudo bang lubang batu.

⁵Iamo' kebala Nabi Gad ni Daud, "Aleg iko tudo bang lubang batu ineh, iamo' do' iko mepura' amé' déi' tana' Yahuda." Idi Daud nepura' idi ieh iné' pulung Herit.

⁶Idi Saul neninger inan bala ratnan Daud, idi lun luk denganneh. Idi Saul tudo luun surud déi' Gibia liang lawa kayuh. Idi busu inan bang paladneh. Idi amung lun rayehneh pana' tuped iringneh.

⁷Idi kebalaneh nelun rayehneh, "Ninger muyuh, O lun Beniamin, "Miak Daud maré nemuyuh amung tana' idi kabun anggur? Matuké ieh miak nganau' nemuyuh amung ku lun rayeh baweh?"

⁸Idi amung muyuh serurum sikal ngelaya' negku. Idi seburur pana' nateh luk maré kali' negku. Idi anakku sebuleng pangeh nepejani' dengan Daud, idi seburur pana' nateh luk mé' negku, idi maré kali' negku ratnan anakku luk pangeh nengubuk ni Daud pad ieh ngabang negku.”

⁹Idi kebala Doeg lun Edom luk tuped dengan amung lun rayeh Saul ineh, "Ui pangeh nenier ni Daud iné' matun Ahimalek Ahitub déi' Nob.

¹⁰Ahimalek nengitun Tuhan ratnan lawé Daud, idi nemaré balu' kuanneh. Idi teh ieh nemaré pelapet Goliat lun Pilistin ineh neneh.”

¹¹Idi Saul nengecuk nelun amé' nawar Imam Ahimalek Ahitub, idi amung lun bang tetek ruma'neh, ieh ineh amung imam luk déi' Nob. Idi amungdeh ineh iné' papu' raca'.

¹²Idi kebala Saul, "Ninger iko O Ahimalek." Idi ieh nengor balaneh, "Anun idi, tuanku?”

¹³Idi kebala Saul neneh, "Ngudeh amung muyuh serurum sikal ngelaya' negku? Do' iko idi Daud pana', pad muyuh pana' nemaré ruti neneh idi pelapet ineh. Idi muyuh pangeh nengitun Allah ratnan lawéneh, pad ieh ngedat negku, idi ngabang negku.”

¹⁴Idi kebala Ahimalek, "Idi ratnan amung lun dukenmu, idé luk lutep kudeng Daud, ieh ineh ibanmu. Ieh mangun ku lun rayeh lun luk matar raca' idi ieh pana' buren bang ruma' raca'.

¹⁵Baken sekua' ini mo' ui nengitun Allah ratnan lawéneh. Aleg iko ngadu' negku idi lun bang tetek ruma'ku. Ngaceku sesuut pana' nateh kali'ku ratnan amung ineh.”

¹⁶Iamo' kebala raca', "O Ahimalek, na miak na iko pitayen, dengan amung lun bang tetek ruma'mu.”

¹⁷Idi kebalaneh kuan amung lun luk matar neneh luk tuped iringneh, "Do' muyuh ngaté amung imam Tuhan ineh ngaceku ideh ineh serurum dengan Daud, idi ngaceku ideh nekali' neneh neburo, iamo' na ideh nemaré kali'

negku." Iamo' amung lun duken raca' ineh ara' ngegenang ticu'deh ngaté amung imam Tuhan ineh.

¹⁸Idi kebala raca' ni Doeg, "Do' iko ngaté amung imam ineh." Idi Doeg lun Edom ineh nengaté nedeh. Idi aco sineh ieh nengaté 85 burur imam Tuhan.

¹⁹Idi Saul nengaté amung lun bang bawang Nob, ieh ineh bawang imam ineh, do' deléi idi decur, do' anak adi' idi anak isuut luk niti', do' amung sapi', keladai, idi amék pana'.

²⁰Iamo' seburur rat arang amung anak Ahimalek Ahitub nepuit, ngadanneh Abiatar. Idi ieh nupun maya' ni Daud.

²¹Kareb Abiatar nemada' ni Daud ratnan amung imam Tuhan pinaté Saul,

²²idi kebala Daud neneh, "Kali' ku aco sineh Doeg lun Edom ineh déi', idi na miak na badénneh lawé ineh kuan Saul mucu. Idi amung lun bang tetek ruma' tamam pangeh pinaté ngaceku ideh nengedengan negku.

²³Idi nekini, do' iko tudo denganku. Aleg iko matot. Ngaceku lun luk sikal ngaté negku, kali' rungen ieh luk sikal ngaté namu teh. Iamo' kudeng iko maya' negku na iko mesusa'."

Semuil Luk Pun-Pun 23

¹Daud neninger bala ratnan lun Pilistin ngerieng bawang Kila, idi ratnan ideh nengaro padédeh.

²Idi Daud nengitun inan Tuhan, kebalaneh, "Miakké ui amé' ngelaya' nelun Pilistin ineh?" Idi kebala Tuhan neneh, "Amé' mo'. Idi iko miak ngelaya' nelun Pilistin ineh, idi muit Kila rat nedeh."

³Iamo' kebala lun luk maya' ni Daud, "Su ini tana' Yahuda luk katot tau. Meluun teh bawang Kila luk ulek tau amé' pebunu' nelun Pilistin."

⁴Idi Daud nengitun inan Tuhan sekua' teh. Idi kebala Tuhan neneh, "Nalan iko idi amé' déi' Kila. Ngaceku amung lun Pilistin ineh barénKu bang paladmu."

⁵Idi Daud iné déi' Kila dengan amung lun denganneh. Idi ieh nepebunu' nelun Pilistin idi nengalap amung sapi'deh idi pelaba ula' lun Pilistin pinatédeh, pad Daud nemuit nelun bang bawang Kila ineh rat nedeh.

⁶Idi kareb Abiatar Ahimalek ineh neburo, idi ieh iné' déi' Kila matun ni Daud, idi ieh nenguit kakeb ruuk imam ineh teh.

⁷Saul neninger bala ratnan Daud pangeh nacing déi' Kila, idi kebalaneh, "Allah pangeh nemaré neneh bang paladku, ngaceku ieh pangeh linibung bang bawang luk meraben tanga' idi pilin."

⁸Idi Saul nengecuk ngamung anak itinneh amé' ngerieng bawang Kila pad ngabang ni Daud idi amung lun denganneh.

⁹Kareb Daud nekali' Saul pian nganau' luk dat kuanne, idi kebalaneh inan Imam Abiatar, "Nguik kakeb ruuk imam ineh amé' tungé'."

¹⁰Kebala Daud, "O Tuhan Allah lun Israil, ui pangeh neninger bala ratnan Saul pian amé' tungé' Kila, sikal ngusag bawang ngaceku ui.

¹¹Matuké lun bang bawang Kila ineh pian maré negku bang paladneh? Matuké Saul sikal amé' mepad kudeng luk pindengerku? O Tuhan Allah lun Israil, maré kali' kuanku." Idi kebala Tuhan, "Matu Saul amé'."

¹²Idi kebala Daud teh, "Matuké lun bang bawang Kila ini pian maré negku idi amung lun denganku bang palad Saul?" Idi kebala Tuhan, "Matu, ideh pian maré namu."

¹³Idi Daud dengan 600 lun denganneh negugkang rat Kila, idi nenalan. Kareb Saul neninger bala ratnan Daud pangeh neburo rat Kila, idi na ieh iné' pebunu' neneh.

¹⁴Idi Daud tudo bang lubang batu déi' su luk ali-ali, luun Pegkung Sip. Idi anid aco Saul nakap neneh, iamo' na Allah nemaré ni Daud bang paladneh.

¹⁵Idi Daud matot ngaceku Saul sikal ngaté neneh. Idi Daud tudo déi' Hores déi' su luk ali-ali déi' Sip.

¹⁶Idi Yonatan iné' ni Daud déi' Hores, idi ieh nengetueh anuneh inan Allah.

¹⁷Kebalaneh neneh, "Aleg iko matot, ngaceku tamanku Saul na miak ngesusa' namu. Iamo' iko teh miak mangun ku raca' mucu pa luun lun Israil. Idi ui mangun ku luk kedueh pa liangmu. Idi kali' tamanku Saul lawé ineh do'-do' teh."

¹⁸Idi didueh teh nepejani' pa kiung Tuhan. Idi Daud tudo déi' Hores. Iamo' Yonatan nuli'.

¹⁹Iamo' tuda'-tuda' lun Sip iné' matun ni Saul déi' Gibia, kebaladeh, "Daud sigapung muneng nekai bang lubang batu déi' Hores, luun Surud Hakila, déi' su luk ali-ali Yahuda luk pa kabing busat aco.

²⁰O raca', kai kali' iko pian ngakem neneh. Do' iko petacu amé'. Idi amung kai ini miak maré neneh bang paladmu."

²¹Idi kebala Saul, "Do' Tuhan ngeperuan nemuyuh ngaceku muyuh méi' negku.

²²Idi nekini do' muyuh amé' nakap neneh tu-tu, idi nier do'-do' iapeh luk inanneh, idi idé luk pangeh nekali' neneh déi', ngaceku keburu'deh, ieh pelaba ileh.

²³Idi teh nier do'-do', idi ngiti amung luk inanneh sigapung nekini. Idi do' muyuh lemubed amé' negku dengan bala luk melio. Idi ui amé' maya' nemuyuh mucu. Idi kudeng ieh bang bawang ineh, kali' rungen ui nakap neneh aput Yahuda."

²⁴Idi ideh negugkang idi iné' déi' Sip pa atun Saul. Idi Daud idi amung lun denganneh idi déi' su luk ali-ali déi' Maun, déi' Ruan Yarden luk pa kabing busat aco.

²⁵Saul idi amung lun denganneh iné' nakap ni Daud. Idi ideh nemaré kali' ni Daud. Idi ieh iné' luun pegkung idi tudo déi' su luk ali-ali déi' Maun. Idi balaneh nekali' Saul. Idi ieh nengerada' ni Daud déi' su luk ali-ali déi' Maun ineh.

²⁶Idi Saul nemaya' bal selipa pegkung ineh. Idi Daud dengan amung lun denganneh nemaya' bal selipa. Idi saget-saget Daud sikal buro rat ni Saul.

Iamo' Saul idi amung lun danganneh nutun ngelibut ni Daud idi amung lun danganneh sikal ngakem neneh.

²⁷Idi denak-denak aceh lun icuk iné' matun ni Saul, kebalaneh, "Do' iko amé' dengan mesaget. Ngaceku lun Pilistin pangeh nengaro bawang tau."

²⁸Idi Saul nelemubed ratnan ngerada' ni Daud, idi iné' pebunu' nelun Pilistin. Idi ngaceku ineh ideh neneten su ineh "Surud Batu Muit."

²⁹Idi Daud nenalan rat déi' idi iné' Enggedi, idi nesigapung déi'.

Semuil Luk Pun-Pun 24

¹Kareb Saul nelemubed ratnan ngerada' nelun Pilistin ineh, idi lun nemada' neneh, kebaladeh, "Daud idi déi' su luk ali-ali muneng ku Enggedi."

²Idi Saul nengalap 3,000 burur lun pebunu' luk pinili' ratnan amung lun Israil, idi iné' nakap ni Daud idi lun danganneh pa busat aco Surud Batu Amék luk Meliput.

³Idi ieh nacing déi' libung dumba luk iring dalan idi inan aceh lubang batu. Idi Saul nesemuet bang ineh sikal bubpa'. Idi Daud idi amung lun danganneh teh tudo bang lubang batu ineh su luk medalem.

⁴Idi lun danganneh nepebala ni Daud, "Aco luk bila Tuhan ineh pangeh nacing. Ieh pangeh nemaré bunu'mu bang paladmu, pad iko nganau' anun luk pianmu kuanneh." Idi Daud nudur idi ungeng, idi ieh nemulu' iring kuyu' Saul.

⁵Iamo' mucu ratnan ineh idi Daud nginuud.

⁶Idi kebalaneh kuan lun danganneh, "Na petulu pa kiung Tuhan kudeng ui ngesusa' raca' luk pangeh pinili' Tuhan."

⁷Idi Daud nemebpeng nelun danganneh ku bala luk kudeng ini. Na ieh nemaré nedeh ngedat ni Saul. Idi Saul netuped idi neremuat rat bang lubang batu ineh.

⁸Idi Daud nudur teh idi neremuat rat bang lubang batu ineh. Idi ieh nengitang rat pa puet Saul, kebalaneh, "O tuanku, O raca'ku!" Idi Saul nelumi. Idi Daud netekeradung pa kiung raca',

⁹Idi kebalaneh ni Saul, "Ngudehké iko ninger bala dulun luk mala, Daud sikal ngedat namu?"

¹⁰Idi aco sini iko sebuleng pangeh nekali' kudeng apeh Tuhan nemaré namu bang paladku bang lubang batu ini. Idi ui inubuk lun teh sikal ngaté namu. Iamo' ui méi' namu. Idi kebalaku, 'Na ui miak ngesusa' namu, ngaceku iko pangeh inumau Tuhan.

¹¹O Ama', siruh iring kuyu'mu bang paladku. Kareb ui nemulu' ini, na iko pinatéku. Idi nekini iko kali' ui na pian metueh rat namu idi ngesusa' namu. Sagan pana' iko ngerada' negku sikal ngaté negku, na ui nenganau' sala' namu.

¹²Idi Tuhan miak mutut ukum arangku denganmu. Idi teh Ieh miak ngua' sala'mu negku, ngaceku na tu ui miak ngesusa' namu.

¹³Iko kali' bala lun luk mon, ieh ineh, 'Lun luk dat nganau' luk dat teh.' Iamo' na ui miak ngesusa' namu.

¹⁴O raca' lun Israil, idéké luk rinada'mu? Aceh butung uko'ké? Aceh kutuké?

¹⁵Iamo' Tuhan miak mutut ukum arangku denganmu. Idi ieh teh miak ngelio kekamenku idi ngedengan negku, idi muit negku rat bang paladmu."

¹⁶Kareb Daud pangeh nemada' amung bala ini ni Saul, idi kebala Saul neneh, "Iniké iko, O Daud, anakku?" Idi Saul nenangi'.

¹⁷Idi kebalaneh ni Daud, "Iko luk meluun matu rat negku, ngaceku iko pangeh nenganau' do' kuanku. Iamo' ui pangeh nenganau' dat kuanmu.

¹⁸Idi aco sini teh iko nenganau' luk pelaba do' kuanku, ngaceku Tuhan nemaré negku bang paladmu, idi na iko nengaté negku.

¹⁹Kudeng seburur pangeh nengigket bunu'neh na ieh muit neneh dengan do'. Idi ngaceku ineh Tuhan ngua' do' luk pangeh inau'mu kuanku aco sini.

²⁰Idi nekini ui kali' na miak na iko mangun ku raca', idi imet lun Israil pana' uenmu ngelelep.

²¹Idi ngaceku ineh do' iko pebulung kuanku nekini ku ngadan Tuhan, iko na miak ngaté inulku, pad iko na ngiu' ngadanku rat bang tetek ruma' tamanku.”

²²Idi Daud nepebulung ni Saul. Idi Saul nuli'. Iamo' Daud idi amung lun danganneh iné' bang lubang batu ineh.

Semuil Luk Pun-Pun 25

¹Semuil naté, idi amung lun Israil nepamung temido neneh. Idi ieh tinanemdeh bang ruma'neh déi' Rama. Idi Daud negugkang idi iné' su luk ali-ali déi' Paran.

²⁻³Idi inan seburur lun luk inul Kaleb déi' Maun, ngadanneh Nabal. Ieh inan tana' déi' Karmel. Idi ieh lun do'. Ieh inan 3,000 dumba, idi 1,000 amék. Idi ngadan awanneh Abigail. Idi decur ineh mileh idi metaga teh. Iamo' awanneh dat buri', idi kekamenneh pana' dat. Idi Nabal nemuting dumbaneh déi' Karmel.

⁴Idi Daud nekali' balaneh.

⁵Idi ieh nengecuk pulu' anak adi' amé' Karmel nakap ni Nabal idi maré tabi' kuanneh.

⁶Idi ieh nengecuk nedeh pebala ni Nabal "Kebala Daud, 'Samal kuanmu, samal kuan tetek ruma'mu, idi samal kuan amung-amung luk namu.

⁷Ui pangeh nekali' bala iko inan tuda'-tuda' lun muting buluh dumba. Idi seruked amung lun matar dumbamu dengan kai, na kai nenguto nedeh, idi sebuleng pana' nateh netutu' serukeddeh ineh déi' Karmel.

⁸Idi do' iko ngitun lawé ineh nelun denganmu. Kali' rungen ideh mada' lawédeh namu. Idi ngaceku ineh do' iko méi' kuan kai. Ngaceku kai amé' matun namu kareb aco rayeh. Do' maré anun luk inan namu idi kuan anakmu Daud.' “

- ⁹Idi lun dengan Daud ineh nacing idi nemada' kuan Nabal amung bala ini dengan ngadan Daud. Pangeh ineh idi ideh nungeng.
- ¹⁰Idi kebala Nabal nedeh, "Idéké Daud ineh? Idi idéké anak Isai ineh? Idi nekini mula' lun duken luk buro ratnan tuandeh.
- ¹¹Na ui pian ngalap rutiku, luk rupenku, idi uang pungku luk pangeh kiratku kuan lun muting dumbaku. Naké ui maré ineh kuan lun luk na kali'ku."
- ¹²Idi lun luk icuk Daud ineh nelemubed idi nemaré kali' amung bala ineh ni Daud.
- ¹³Idi kebala Daud, "Do' anid-anid muyuh ngabin pelapet!" Idi ideh nengabin pelapetdeh ineh. Idi Daud sebuleng pana' nengabin pelapetneh. Idi amungdeh ineh nalan maya' ni Daud, 400 kinula'deh. Idi 200 burur ketecan matar amung repapehdeh.
- ¹⁴Iamo' kebala seburur demulun Nabal ni Abigail awan Nabal ineh, "Daud pangeh nengecuk nelun rat su luk ali-ali maré tabi' kuan tuan kai. Iamo' tuan kai museh nedeh.
- ¹⁵Idi lun ineh pelaba do' nekai, pad kai na inuto. Idi sebuleng anun-anun pana' nateh netutu' seruked kai tudo dengandeh déi' su luk ali-ali ineh.
- ¹⁶Idi ideh mepad kudeng aceh libung luk meraben libut-libut kai, do' macang idi medacem idi seruked kai dengandeh, matar dumba kai.
- ¹⁷Idi nekini do' iko ngerawé do'-do' anun luk do' ruenmu. Ngaceku ideh pian nganau' luk dat kuan tuan kai idi amung tetek ruma'neh. Idi tuan kai selemulun luk dat idi na miak badén."
- ¹⁸Idi dengan mesaget Abigail nengalap ruti 200 balad, idi dueh seréi' abpa' anggur, idi limeh dumba luk didang, idi padé keriki pulu' anem gatang, idi kireng bua' anggur 100 tanga, idi bua' gita' 200 tanga. Amung ineh inau'neh luun keted keladai.

¹⁹Idi kebalaneh nelun dukenneh, "Nalan muyuh pa atunku. Idi ui amé' maya' puet." Idi anun-anun pana' nateh bida'neh ni Nabal awanneh ratnan lawé ineh.

²⁰Idi ieh sebuleng teh nemaya' keladai. Kareb ieh pangeh nusul rat luun pegkung idi nemaya' bang ruan, denak-denak Daud nacing, dengan amung lun danganneh iné' papu' neneh.

²¹Idi keterawé Daud, "Setuneh mo'-mo' ui nematar amung binaweh idi aya' lun ineh déi' su luk ali-ali, pad sebuleng anun-anun pana' nateh netutu' ratnan amung binawehneh. Idi ieh pangeh nengua' do'ku ku luk dat.

²²Idi do' Allah ngukum negku, kudeng ui necan seburur deléi' luk mulun macing pekak nebpa."

²³Kareb Abigail nenier ni Daud, idi ieh netemurun dengan mesaget rat luun keladai ineh. Idi ieh netekeradung pa kiung Daud.

²⁴Kebalaneh, "O tuan, ui sebuleng mo' luk mabeh sala' ini. Nima' negku pebala namu idi ninger balaku namu.

²⁵Aleg iko ngerawé bala Nabal lun luk dat ineh, ngaceku ilung ngadanneh ineh mebacé. Idi ieh pana' mebacé teh. Iamo' nateh ui nenier nelun dukenmu ineh.

²⁶Idi nekini, O tuan, ui pebulung ku Tuhan luk mulun, idi ku ulunmu sebuleng. Tuhan pangeh nemebpeng namu na ngeruat dara', idi na ngua' dengan ticu'mu sebuleng. Idi amung bunu'mu, idi amung lun luk pian nganau' dat namu miak kumin mepad kudeng Nabal.

²⁷Idi luk barénku namu ini, ieh ineh kuan lun luk denganmu luk maya' namu.

²⁸Idi maré do' ku sala'ku, lun dukenmu. Ngaceku kali' rungen. Tuhan nganau' namu ku aceh ruma' luk meruked, ngaceku iko pebunu' kuan Tuhan. Idi iko na miak nganau' luk dat ruked ulunmu.

²⁹Idi kudeng seburur sikal ngerada' namu idi ngaté namu rungen, idi do' ulunmu ruen bang tanga lun luk mulun pa kiung Tuhan Allahmu. Iamo' niat amung bunu'mu miak biren rat bang luk ku ngiber.

³⁰Idi kareb Tuhan pangeh nenganau' kuanmu amung do' luk pangeh pinaji'Neh namu, idi iko pangeh litepNeh mangun ku raca' lun Israil,

³¹Idi na iko mesusa' niat, ngaceku iko pangeh nengeruat dara' dengan na tabpen, idi nengua' dengan ticu'mu sebuleng. Idi kareb Tuhan nganau' luk do' kuanmu, do' iko ngerawé negku.”

³²Idi kebala Daud ni Abigail, "Amung ubur kuan Tuhan Allah lun Israil luk nengecuk namu amé' matun negku aco sini.

³³Idi samal kuanmu ngaceku do'mu idi bada'mu, ngaceku aco sini iko pangeh nemebpeng negku na ngeruat dara' idi na ngua' dereh luk macing negku!

³⁴Ngaceku ui pebulung ku ngadan Tuhan Allah lun Israil luk mulun luk pangeh nemebpeng negku na nganau' luk dat namu, kudeng na iko iné' matun negku dengan mesaget, kali' rungen pekak nebpa seburur deléi pana' nateh luk ketecan ni Nabal.”

³⁵Idi Daud nengalap rat neneh binaweh luk pangeh tinatedneh kuanneh. Idi kebalaneh neneh, "Muli' iko dengan do'. Ngaceku ui pangeh neninger balamu, idi ui maya' balamu.”

³⁶Idi kareb Abigail nacing ni Nabal, idi inan irau bang ruma'neh mepad kudeng irau raca'. Idi Nabal pelaba awang niat ngaceku ieh mabuk. Idi ngaceku ineh sebila' bala pana' naneh bida' Abigail neneh macing pekak kenebpa.

³⁷Idi pekak kareb abuk abpa' anggur pangeh mato rat ni Nabal ineh, idi Abigail nemada' amung bala ineh neneh. Idi Nabal nelepu, idi telubid mepad kudeng batu.

³⁸Idi pulu' aco pangeh ineh, idi Tuhan nenecat ni Nabal pad ieh naté.

³⁹Idi kareb Daud nekali' bala Nabal pangeh naté, kebalaneh, "Amung ubur kuan Tuhan luk pangeh nengua' dat luk nacing negku rat ni Nabal, idi luk nemebpeng negku na nganau' luk dat. Idi Tuhan pangeh nengua' dat Nabal ineh." Idi Daud nengecuk nelun amé' pegayam ni Abigail ratnan ieh pian ngalap neneh ku awanneh.

⁴⁰Idi kareb lun luk icuk Daud ineh nacing ni Abigail déi' Karmel, idi ideh nengitun neneh, kebaladeh, "Daud pangeh nengecuk nekai ini, ngaceku ieh pian ngalap namu ku awanneh."

⁴¹Idi Abigail netekeradung, kebalaneh, "Nima' negku maru' kukud lun duken tuanku."

⁴²Idi mesaget Abigail nenalan maya' keladai, idi limeh demulun anak decur nemaya' neneh. Idi ieh nemaya' nelun luk icuk Daud ineh, idi mangun ku awanneh.

⁴³Idi teh Daud pangeh nengalap Ahinoam rat Yesril. Idi nekini Abigail mangun ku awanneh teh.

⁴⁴Ngaceku Saul pangeh nemaré anakneh Mikal awan Daud ineh kuan Palti Lais luk rat bawang Galim.

Semuil Luk Pun-Pun 26

¹Idi lun Sip ineh iné' matun ni Saul déi' Gibia, kebaladeh, "Naké Daud ineh sigapung luun Surud Hakila, iring su luk ali-ali?"

²Idi Saul iné' su luk ali-ali déi' Sip dengan 3,000 lun pebunu' luk pinili' rat arang lun Israil, sikal nakap ni Daud.

³Idi Saul nelupo luun Surud Hakila iring dalan. Iamo' Daud idi déi' su luk ali-ali. Kareb Daud nekali' Saul ngerada' neneh,

⁴idi ieh nengecuk tuda'-tuda' lun luk nier, pad ideh kali' do'-do' ratnan Saul idi déi'.

⁵Idi ieh nenalan idi nacing su luk inan Saul nelupo. Idi Daud nenier su luk inan Saul telubid ineh, dengan Abner Ner, lun rayeh baweh Saul ineh. Idi

Saul telubid rudap bang su luk inandeh nelupo ineh. Idi amung anak itinneh telubid libut-libutneh.

⁶Idi kebala Daud ni Ahimalek lun Hiti ineh, idi ni Abisai anak Seruya kinanak Yoab ineh, "Idé' sikal maya' negku amé' matun ni Saul su luk inandeh nelupo ineh?" Idi kebala Abisai, "Ui sikal amé'."

⁷Daud idi Abisai nacing inan baweh ineh kareb medacem. Idi Saul telubid rudap bang su luk inandeh nelupo ineh. Idi busuneh ibpen luun tana' pa uluhneh. Idi Abner idi amung bawehneh teh telubid rudap libut-libutneh.

⁸Kebala Abisai ni Daud, "Bang aco sini bunu'mu pangeh biré Allah bang paladmu. Do' ui mayung neneh sekua' mo' ku busuneh ineh, pad ieh petatem luun tana', idi ieh petacu maté."

⁹Iamo' kebala Daud ni Abisai, "Aleg iko ngaté neneh. Ngaceku Tuhan ngukum lemulun luk ngaté lun luk pinili'Neh ku raca"

¹⁰Idi kebala Daud, "Ui pebulung ku ngadan Tuhan luk mulun. Idi Tuhan miak ngukum ni Saul, pad ieh maté. Kian ieh maté kareb pebunu' lek.

¹¹Tuhan mebpeng negku na ngurat nelun luk pangeh pinili'Neh ku raca'. Idi nekini ngalap busu luk pa uluhneh, idi sidangur luk ruan abpa', idi do' tau nalan."

¹²Idi Daud nengalap busu idi sidangur ineh rat pa uluh Saul, idi didueh nenalan. Idi seburur pana' nateh lun nekali' nedidueh, idi seburur pana' nateh luk nginita. Amungdeh rudap, ngaceku rudap luk melelek pangeh icing Tuhan kuan amungdeh ineh.

¹³Kareb Daud pangeh nacing bal pa déi', idi ieh netuped luun buduk surud luk mado rat nedeh.

¹⁴Idi ieh nengitang nawar amung baweh ineh idi Abner Ner pana', kebalaneh, "Naké iko miak ngor, O Abner?" Idi Abner nengor balaneh, "Idéké iko luk nawar raca'?"

15Idi kebala Daud ni Abner, "Naké iko lun deléi? Idéké luk mepad kudeng iko rat arang amung lun Israil? Anun punneh iko na nginita tuanmu, raca' ineh? Ngaceku ina seburur rat arang lun mula' nacing sikal ngaté tuanmu, raca' ineh.

16Kekamenmu na do'. Ui pebulung ku ngadan Tuhan luk mulun, petulu iko maté, ngaceku na iko nginita tuanmu, raca luk pangeh pinili' Tuhan ku raca'. Idi nekini amé' iko nier iapeh busu raca' idi sidangur luk pa uluh raca' ineh?"

17Idi Saul miti arod Daud, kebalaneh, "Iniké balamu, O Daud, anakku?" Idi Daud nengor balaneh, "O raca', ini ui."

18Idi teh kebalaneh, "Anun punneh ikongerada' negku kudengineh? Idianunké luk inau'ku? Idi dat anunké luk nekali'mu?"

19Idi nekini do' raca' ninger balaku ini. Kudeng Tuhan luk ngecuk namu ngerada' negku, do' Ieh ngalap aceh baré rat negku. Iamo' kudeng lemulun luk pian ngerada' negku, nima' nedeh uen ngediman pa kiung Tuhan. Ngaceku ideh nengusu negku aco sini, pad ui na miak ngalap babpat tana'ku ratnan Tuhan, kebaladeh, 'Amé' iko sembayang nan allah baken.'

20Aleg nima' negku pitayen bang bawang luk mado ratnan Tuhan. Ngudehké raca' lun Israil remuat sikal nakap negku mepad kudeng kutu idi suit luk meliput?"

21Idi kebala Saul, "Ui pangeh mesala'. Muli' O anakku Daud. Ngaceku na ui sikal nganau' dat peh kuanmu. Ngaceku aco sini, iko méi' negku. Ui mebacé idi neraruh!"

22Idi kebala Daud, "Siruh, ini busumu. Nekini ngecuk seburur rat arang bawehmu amé' tungé' ngalap ineh.

23Iamo' Tuhan ngua' do' idi baya' anid-anid burur lemulun, ngaceku Tuhan nemaré namu bang paladku aco sini. Iamo' na ui ngurat namu luk pinili' Tuhan ku raca'.

24Idi mepad kudeng ui méi' namu aco sini, kudeng ineh teh do' Tuhan méi' negku. Idi do' Ieh muit negku ratnan amung dereh."

²⁵Idi kebala Saul ni Daud, "Samal kuanmu O anakku Daud! Anun-anun luk ruenmu miak mangun." Idi Daud nelemubed. Idi Saul pana' nuli'.

Semuil Luk Pun-Pun 27

¹Idi keterawé Daud, "Kali' rungen ui pitayen Saul mucu. Meluun do' ui buro amé' bawang lun Pilistin, pelé Saul na nakap negku peh bang bawang Israil. Idi ui miak mepuit rat bang paladneh."

²Idi Daud petacu nenalan dengan 600 burur lun luk maya' neneh, iné' matun ni Akis Mauk raca' bawang Gat.

³Idi Daud tudo dengan Akis déi' Gat dengan anak itinneh, idi amung uang tetek ruma'neh, idi dueh awan Daud idi denganneh, ieh ineh Ahinoam lun Yesril idi Abigail luk tinula' Nabal lun Karmel.

⁴Kareb Saul nekali' Daud pangeh neburo iné' déi' Gat, idi ieh nugka' nakap neneh.

⁵Idi kebala Daud ni Akis, "Kudeng iko méi' negku, do' iko maré aceh bawang luk isuut inanku tudo. Ngaceku na petulu ui tudo denganmu bang bawang raca' ini."

⁶Idi Akis nemaré bawang Siklag kuanneh. Idi punneh bawang Siklag ineh mangun ku babpat raca'-raca' Yahuda macing aco sini.

⁷Idi Daud tudo bang bawang lun Pilistin selak apat bulan kinioneh.

⁸Idi Daud megéi' nalan dengan anak itinneh, idi nemunu' nelun Gesur, lun Girsi, idi lun Amalek, ngaceku amungdeh ineh lun kuan bawang ineh rat mon, ieh ineh rat Sur macing déi' Masir.

⁹Idi Daud nengaro bawang ineh. Deléi, decur pana' nateh inulunneh. Idi teh ieh nengaro amung dumba, sapi', keladai, unta, idi ayungdeh. Idi ieh nelemubed iné' matun ni Akis.

¹⁰Kareb Akis nengitun neneh, "Iné' pebunu' iapeh iko sekua' ini?" Idi kebala Daud, "Déi' Negeb bang bawang Yahuda," kian, "Déi' Negeb bang bawang lun Yeramil," kian, "Déi' Negeb bang bawang lun Keni."

¹¹Idi na Daud nengulun deléi idi decur, ara' nedeh nguit bala amé' déi' Gat, pad ideh na ngacing bala luk ngedat neneh idi anak itinneh pana'. Idi kudeng ineh luk inau' Daud kareb ieh tudo bang bawang lun Pilistin.

¹²Idi Akis merapet ni Daud, keterawéneh, "Teh pangeh nenganau' luk inan pupuneh lun Israil megateh neneh. Idi ngaceku ineh ieh miak mangun ku lun dukenku macing raked-raked."

Semuil Luk Pun-Pun 28

¹Idi mucu' ratnan ineh lun Pilistin nengamung bawehdeh pian amé' munu' nelun Israil. Idi kebala Akis ni Daud, "Kali'mu na miak na iko maya' negku bang baweh ineh, do' iko, idi amung anak itinmu."

²Idi kebala Daud ni Akis, "Do', iko miak nier mucu' anun luk miak ruenku." Idi kebala Akis ni Daud, "Mo, iko miak nginita bururku raked ulunku."

³Idi Semuil ineh pangeh naté, idi amung lun Israil pangeh netemido neneh idi nenanem neneh déi' Rama, ieh ineh bang bawangneh sebuleng. Idi Saul pangeh nengusu rat bang bawang Israil amung lun luk mileh ngelimu' idi amung lun luk mileh mangun.

⁴Idi lun Pilistin nepamung idi ideh nelupo déi' Sunem. Idi Saul pana' nengamung amung lun Israil, idi ideh nelupo déi' Pegkung Gilboa.

⁵Idi kareb Saul nenier baweh lun Pilistin, idi ieh matot, idi niatneh pelaba gegker.

⁶Idi ieh nengitun Tuhan. Iamo' na Tuhan nengor balaneh, do' dengan tang nabi, dengan nupi, idi udi pana'.

⁷Idi kebala Saul nelun dukenneh, "Nakap seburur decur luk mileh mangun kuanku, pelé ui ngitun neneh." Idi lun dukenneh nengor balaneh, "Déi' Endor inan seburur decur luk mileh mangun."

⁸Idi Saul nengisu' ayuneh idi nengelibal ayungneh. Idi ieh nenalan dengan dueh burur anak itinneh. Idi diteluh nacing inan decur ineh kareb medacem.

Idi kebala Saul, "Mangun iko kuanku. Ngacing kuanku ada' lemulun luk belénku namu."

⁹Idi kebala decur ineh, "Kali' rungen iko teh kali' luk inau' Saul. Ieh pangeh nengusu rat bang bawang ini amung lun luk mileh ngelimu', idi amung lun luk mileh mangun. Ngudehké iko tumen abpung kuanku pian ngaté negku."

¹⁰Idi Saul nepebulung neneh ku ngadan Tuhan, kebulungneh, "Ui pebulung ku ngadan Tuhan luk mulun. Na tu-tu ikko ngalap susa' ngaceku kekamenmu ini."

¹¹Idi kebala decur ineh, "Idéké luk pianmu uen ngacing namu?" Kebalaneh, "Ngacing Semuil kuanku."

¹²Idi decur ineh nenier ni Semuil. Idi ieh nengitang, kebalaneh ni Saul, "Ngudeh iko naluk negku? Ngaceku iko ini Raca' Saul."

¹³Idi kebala raca' neneh, "Aleg iko matot. Anun luk siniermu ineh?" Idi kebala decur ineh, "Ui nier inan aceh ada' remuat rat bang tana'."

¹⁴Idi kebala Saul neneh, "Kudeng apeh ayuneh?" Kebala decur ineh, "Luk macing ineh seburur lun mengered luk ubpu ku tarub." Idi Saul nekali' ieh ineh Semuil. Idi ieh netekeradung pa kiungneh.

¹⁵Kebala Semuil ni Saul, "Ngudeh iko nengegio negku idi nui negku?" Idi kebala Saul, "Ui pelaba tot, ngaceku lun Pilistin pebunu' negku. Idi Allah pangeh neburo rat negku. Na Ieh maré or kuanku, do' dengan tang nabi idi dengan nupi pana'. Idi ui pangeh nenawar namu, pad iko maré kali' anun luk miak ruenku."

¹⁶Idi kebala Semuil, "Ngudeh iko ngitun negku? Ngaceku Tuhan pangeh nenecan namu idi pangeh mangun ku bunu'mu.

¹⁷Idi Tuhan pangeh nenganau' luk bida'Neh atun ku tangku. Ieh pangeh nengaro imet ineh rat namu, idi biréNeh kuan lun denganmu, ieh ineh kuan i Daud.

¹⁸Iko na nemaya' bala Tuha, idi na iko ngacing usehNeh kuan lun Amalek ineh. Ngaceku ineh, Tuhan nganau' kudeng ineh kuanmu bang aco sini.

¹⁹Tuhan miak maré amung lun Israil denganmu bang palad lun Pilistin. Idi nebpa iko idi amung anak deléimu idi ieni. Idi teh Tuhan maré baweh lun Israil bang palad lun Pilistin.”

²⁰Idi petacu Saul neluka' tekulub, ngaceku ieh pelaba tot ku bala Semuil ineh. Idi na luk idi tueh neneh. Ngaceku tebaco kedangan ineh sesuut pana' nateh luk kinanneh.

²¹Idi decur ineh iné' ni Saul. Idi ieh nenier neneh pelaba gagap. Idi kebalaneh neneh, "Ui pangeh nemaya' bada'mu, idi na ui matot maté, kareb ui neninger balamu negku.

²²Idi nekini do' iko maya' balaku. Nima' negku nganau' sekayad ruti pa kiungmu. Do' iko kuman, pad iko miak metueh idi miak nalan peh.”

²³Iamo' na Saul pian, kebalaneh, "Ara' ui kuman." Idi lun duken nengubuk neneh, idi decur ineh teh, pad ieh nemaya' ubukdeh ineh. Idi ieh nudur rat luun tana', idi tudo luun bitaran.

²⁴Idi decur ineh inan sebuleng anak sapi' luk melamu. Idi dengan mesaget ieh nengeret neneh, idi ieh nengalap banak luk rinaburneh, idi isebneh ku ruti luk na linamud.

²⁵Idi amung ineh rirengneh pa kiung Saul idi lun dukenneh. Idi ideh nekuman. Pangeh ineh idi ideh nudur idi ideh nenalan bang daceh ineh peh.

Semuil Luk Pun-Pun 29

¹Idi lun Pilistin ineh nengamung amung bawehdeh déi' Apek. Idi lun Israil pana' nelupo iring bued abpa' luk déi' Raked Yesril.

²Idi kareb amung raca' lun Pilistin nelemaba pa atun dengan tuda'-tuda' ngeratu idi tuda'-tuda' ngeribu baweh, idi Daud pebaya' dengan amung bawehneh maya' pa puet Akis.

³Idi kebala raca' lun Pilistin, "Anun luk ruen lun Iberani ini?" Idi kebala Akis inan raca'-raca' lun Pilistin ineh, "Ini Daud, lun duken Saul, raca' lun Israil luk pangeh nemaya' negku mela selak. Idi sesuut pana' nateh sala' kali'ku neneh rat acingneh negku macing aco sini pana'."

⁴Iamo' pelaba useh amung raca' lun Pilistin ineh ni Akis. Idi kebaladeh neneh, "Ngecuk neneh muli' amé' su luk pangeh litepmu kuanneh. Aleg ieh amé' pebunu' maya' netau, pelé na ieh pakub netau bang bunu'. Ngaceku dengan anunké ieh miak ngawang niat tuanneh? Kali' rungen dengan ngaté netau lun Pilistin?"

⁵Naké ieh ini Daud luk inan lun menani idi ngalai, 'Saul pangeh nengelaya' ribu-ribu lemulun. Iamo' Daud nengelaya' pulu'-pulu' ribu?' “

⁶Idi Akis nenawar ni Daud, kebalaneh neneh, "Ui pebulung ku ngadan Tuhan luk mulun, idi niatmu lutep negku. Idi ui mawang niat kudeng iko maya' negku amé' pebunu' aco sini. Ngaceku na ui kali' datmu rat aco iko iné' matun negku macing aco sini. Iamo' amung raca' ineh na mawang niat namu.

⁷Ngaceku ineh do' iko muli' nekini idi nalan dengan do', pelé iko na nganau' luk dat pa kiung amung raca' lun Pilistin.”

⁸Idi kebala Daud ni Akis, "Anunké luk inau'ku? Idi anun luk pangeh nekali'mu negku rat aco ui iné' matun namu macing aco sini, pad ui na miak amé' ngaté bunu'mu?"

⁹Idi kebala Akis ni Daud, "Ui kali' namu na sala' pa kiungku, iamo' iko mepad kudeng melaikat Allah. Iamo' amung raca' lun Pilistin nepebala, 'Aleg maré neneh maya' netau amé' pebunu'.'

¹⁰Ngaceku ineh do' iko kulat pekak uka-uka dengan amung anak itinmu luk nenecan ni Saul idi luk nacing maya' negku, idi nalan kareb masat aco.”

¹¹Idi Daud nenalan uka-uka dengan amung anak itinneh idi nelemubed iné' bawang lun Pilistin. Iamo' lun Pilistin ineh iné' déi' Yesril.

Semuil Luk Pun-Pun 30

- ¹Idi pangeh teluh aco, kareb Daud idi amung anak itinneh nacing déi' Siklag, lun Amalek pangeh nengaro Negeb idi Siklag. Idi ideh pangeh nenutung amung bawang ineh.
- ²Idi amung decur luk bang bawang ineh tibandeh. Seburur pana' nateh pinatédeh. Iamo' amungdeh tibandeh nuli'.
- ³Kareb Daud idi anak itinneh nuli', idi ideh kali' bawang ineh pangeh neseb. Idi amung awan idi amung anakdeh ineh, deléi idi decur pangeh tiban.
- ⁴Daud idi amung anak itinneh pana' nenangi', pad na luk idi tuehdeh.
- ⁵Idi dueh awan Daud ineh pana' pangeh tiban, ieh ineh Ahinoam idi Abigail.
- ⁶Idi Daud pelaba dereh, ngaceku lun mula' ineh pegayam sikal mitung neneh ku batu, ngaceku ideh mét niat ku anakdeh luk tiban ineh. Iamo' Tuhan Allahneh nengelelep niat Daud pad ieh mekuu'.
- ⁷Idi kebala Daud inan Imam Abiatar Ahimalek, "Nguít kakeb ruuk imam ineh kuanku." Idi Abiatar nenguít ineh kuanneh.
- ⁸Idi Daud nengítun Tuhan, kebalaneh, "Kudeng ui ngerada' baweh ineh miak ideh mepigketku?" Idi Tuhan nengor balaneh, "Ngerada' mo' nedeh, ngaceku na miak na iko ngepigket nedeh. Idi kali' rungen iko miak muiit amungdeh luk tiban ineh."
- ⁹Idi Daud iné' dengan 600 burur lun luk maya' neneh, idi nacing déi' Arur Besar su luk inan lemulun luk merur nucu'.
- ¹⁰Iamo' Daud petacu nengerada' dengan 400 burur lun denganneh. Idi luk 200 ineh nucu', ngaceku pelaba erurdeh, pad ideh na miak guta Arur Besar ineh.
- ¹¹Idi anak itin Daud nepapu' seburur anak adi' lun Masir déi' su luk ali-ali. Idi ideh nenguít neneh amé' matun ni Daud. Idi ideh nemaré ruti kenenneh. Idi ideh nemaré abpa' rupenneh.

¹²Idi teh ideh nemaré neneh setangal ratnan tanga bua' gita' idi dueh tanga kireng bua' anggur kenenneh. Petacu ieh metueh baruh. Ngaceku bang teluh aco idi teluh dacek kinioneh ieh na nekuman.

¹³Idi Daud nengitun neneh, kebalaneh, "Idé kuan namu ini? Idi rat iapeh iko?" Idi kebala lun Masir ineh, "Ui ini seburur demulun lun Amalek. Idi ui tican tuanku ngaceku ui mét. Idi nekini pangeh mela teluh aco.

¹⁴Kai pangeh nengaro bawang lun Kereti, lun Yahuda, idi lun Kaleb luk déi' Negeb. Idi kai pangeh nenutung Siklag teh."

¹⁵Idi kebala Daud neneh, "Miakké iko nated negku amé' papu' baweh ineh?" Idi ieh nengor bala Daud, "Kudeng iko pebulung kuanku ku ngadan Allah, na iko ngaté negku, idi na iko maré negku bang palad tuanku, idi miak ui amé' nated namu amé' papu' baweh ineh."

¹⁶Idi ieh nenated ni Daud macing inan baweh ineh. Idi ideh urap-urap luun natad kuman idi ngirup, idi sebuangdeh ngalai ngaceku amung binaweh luk inarodeh rat bawang lun Pilistin idi rat tana' Yahuda.

¹⁷Idi kenebpa Daud nemunu' nedeh ineh rat pekak macing malem aco. Idi rat nedeh ineh seburur pana' nateh nepuit, iamo' 400 lun anak adi' luk neburo nemaya' unta mo'.

¹⁸Daud nemuit amung-amung luk pangeh inaro lun Amalek ineh. Idi teh ieh nengalap awanneh luk dueh ineh rat nedeh.

¹⁹Idi sebuleng pana' nateh netutu' rat arangdeh, do' lun rayeh idi anak isuut, do' anak deléi idi anak decur pana'. Idi ratnan binaweh pana' luk inaro bunu' rat nedeh ineh, amung ineh linubed Daud.

²⁰Idi teh Daud nengalap amung amék, dumba, idi sapi'. Idi ideh nemabpet puet amung aya' ineh, kebaladeh, "Ini binaweh Daud."

²¹Kareb Daud pangeh nacing nedeh luk 200 burur luk pelaba erur atun, pad ideh na miak maya' ni Daud, idi luk pangeh ticanneh i tangeb Arur Besor ineh, idi ideh iné' ngapu' ni Daud dengan amung lun luk maya' neneh. Idi Daud nacing muneng nelun mula' ineh idi petabi' nedeh.

²²Iamo' kebala sebuang lun luk dat luk pangeh nenalan maya' ni Daud, "Ngaceku ideh ineh na iné' maya' netau, idi na tau miak maré nedeh ratnan binaweh luk pangeh inaro tau ineh, iamo' anid-aniddeh miak ngalap awandeh idi anakdeh idi nalan."

²³Iamo' kebala Daud, "Aleg muyuh nganau' kudeng ineh, O kinanak-kinanakku. Binaweh ini pangeh biré Tuhan kuan tau, idi Tuhan pangeh nengasa' netau, idi Ieh nemare baweh luk pangeh nacing munu' netau ineh bang palad tau.

²⁴Na kai pian maya' bala muyuh. Ngaceku mepad kudeng babpat lun luk pangeh iné' pebunu' ineh, kudeng ineh teh babpat lun luk neketecan matar binaweh."

²⁵Daud nengelelep ukum ineh pad ineh mangun ku aceh ukum arang lun Israil macing aco sini.

²⁶Kareb Daud nacing déi' Siklag, idi ieh nemaré ratnan binaweh ineh kuan amung lun rayeh Yahuda luk rurunneh, kebalaneh, "Ini aceh samal luk icing kuan muyuh ratnan binaweh bunu' Tuhan,"

²⁷ieh ineh kuan lun rayeh luk déi' Baitel, Ramot luk déi' Negeb, Yatir,

²⁸Arur, Sipmot, Estemoa,

²⁹Rakel, idi kuan lun rayeh luk déi' bawang-bawang lun Yeramil, bawang-bawang lun Keni,

³⁰idi kuan lun rayeh luk déi' Horma, Borasan, Atak,

³¹Hebron, idi kuan amung su luk inan Daud pangeh nenalan atun dengan amung anak itinneh.

Semuil Luk Pun-Pun 31

¹Lun Pilistin nepebunu' nelun Israil luun Pegkung Gilboa. Idi mula' lun Israil pinaté su ineh, idi lun baken neburo.

²Idi lun Pilistin nemigket ni Saul idi anakneh. Idi ideh nengaté ni Yonatan, Abinadab, idi Malkisua, anak Saul ineh.

- ³Idi iuk-iuk mula' lun nengerieng ni Saul, idi ieh nekaneh ileb binor, pad ieh nurat.
- ⁴Idi kebala Saul kuan lun luk ngimet pelapetneh, "Ngangat pelapetmu idi ngaté negku pelé lun Pilistin luk na manu ineh na situnga idi ngaté negku." Iamo' anak adi' ineh na sikal, ngacekku ieh matot. Ngaceku, ineh Saul sebuleng nengalap pelapetneh, idi ieh nesiluka' luun ineh.
- ⁵Idi kareb anak adi' nenier Saul pangeh naté, idi ieh pana' nesiluka' luun pelapetneh, idi ieh naté pebaya' raca'.
- ⁶Idi kudeng ineh até Saul, teluh anakneh, anak adi' ineh, idi amung anak itinneh luk nemaya' neneh aco sineh.
- ⁷Idi kareb lun Israil luk bal déi' Raked Yesril idi luk par déi' Abpa' Yarden ineh nenier nelun Israil pangeh neburo, idi Saul dengan anakneh pana' pangeh naté, idi ideh nenecan amung bawangdeh, idi neburo peh. Idi lun Pilistin nacing idi netudo bang bawang ineh.
- ⁸Idi kenebpa kareb lun Pilistin nacing ngaro amung lun luk pinaté ineh, ideh nekali' butung Saul idi diteluh anakneh teh luun Pegkung Gilboa.
- ⁹Idi ideh nengaleb ni Saul idi nengalap amung repapehneh, idi ideh nengecuk nelun nguit bala ineh kuan aput-put bawang lun Pilistin, pelé ideh mada' bala ineh bang amung ruma' akangdeh, idi kuan amung lun pupudeh.
- ¹⁰Idi amung repapeh Saul ineh rirengdeh bang ruma' akang decur Asterot, idi butungneh tinapekdeh luun libung bawang Bait San.
- ¹¹Kareb lun bang bawang Yabis Giliad neninger luk inau' lun Pilistin kuan Saul ineh,
- ¹²Idi amung lun luk mesangit negugkang, idi nalan kedangan-kedangan ineh. Idi ideh nenguit butung Saul idi butung anakneh luk teluh ineh ratnan libung Bait San ineh. Kareb ideh nacing déi' Yabis, idi ideh nengerupung amung butung ineh déi'.

¹³Idi ideh nengalap amung tulangdeh, idi nenanem nedeh liang lawa kayuh luk déi' Yabis. Idi ideh nemawa' tudu' aco kinioneh.

Semuil Luk Kedueh

Semuil Luk Kedueh 1

¹Idi mucu ratnan até Saul kareb Daud nelemubed rat nengelaya' nelun Amalek ineh idi Daud netudo déi' Siklag dueh aco kinioneh.

²Kenebpa seburur anak adi' rat arang baweh Saul ineh nacing. Idi ayungneh nedarak idi abuh pana' inan teh luun uluhneh. Idi kareb ieh nacing ni Daud idi ieh netekeradung pa kiungneh.

³Kebala Daud neneh, "Rat iapeh iko?" Kebalaneh neneh, "Ui neburo ratnan baweh lun Israil."

⁴Idi kebala Daud neneh, "Anun luk mangun bang bunu' ineh?" Idi ieh nemada' neneh kudeng apeh lun mula' ineh pangeh neburo ratnan bunu' idi mula' anak itin luk pangeh pinaté. Idi teh Saul idi Yonatan anakneh teh pangeh pinaté.

⁵Idi kebala Daud kuan anak adi' luk nenguit bala ineh kuanneh, "Kudeng apeh iko kali' lawé Saul idi Yonatan anakneh pangeh naté?"

⁶Idi kebala anak adi' ineh, "Ngaceku ui nepetulu nacing luun Pegkung Gilboa. Idi Saul pucang luun busuneh, idi tuda'-tuda' keréta idi lun maya' kuda teh nengerieng neneh.

⁷Idi ieh nelumi idi nenier negku. Idi ieh nenawar negku. Idi kebalaku, 'Anun idi?'

⁸Idi kebalaneh negku, 'Idéké iko?' Idi kebalaku neneh, 'Ui ini seburur lun Amalek.'

⁹Idi kebalaneh negku, 'Amé' iko ngaté negku. Ngaceku ui pelaba dereh, ngaceku nateh niatku neputut!'

¹⁰Idi ui nengaté neneh. Ngaceku ui kali' na ieh miak mulun peh. Idi ui nengalap pata luk luun uluhneh, idi leku' luk luun penganneh, idi inuitku kuanmu."

11Idi Daud nenarak ayungneh sebuleng. Kudeng ineh teh luk inau' anak itinneh.

12Idi amungdeh ineh nenangi' idi netemido idi mawa' macing malem aco, ngaceku Saul idi Yonatan anak raca' ineh, idi ngaceku pupu Tuhan, idi ngaceku amung uang tetek ruma' Israil luk pinaté.

13Idi kebala Daud inan anak adi' luk nenguit bala ineh kuanneh, "Rat iapeh iko?" Kebalaneh, "Ui ini anak lun Amalek luk tudo bang bawangmu."

14Idi kebala Daud neneh, "Kudeng apeh iko na matot ngaté raca' luk pinili' Tuhan?"

15Idi Daud nenawar seburur lun dukenneh, idi kebalaneh, "Do' ngaté neneh." Idi ieh nengaté nelun Amalek.

16Idi kebala Daud neneh, "Iko nengacing atému sebuleng, ngaceku iko nengukum bururmu sebuleng kareb iko nengamo ratnan iko nengaté raca' luk pinili' Tuhan ineh."

17Idi Daud netemido kuan Saul idi kuan Yonatan.

18Idi ieh nengecuk nedeh mada' tido ineh kuan lun Yahuda. (Idi nani ineh inayud bang Surat Yasar.)

19"Lun rayeh tau pangeh naté luun pegkung Israil! Amung lun mesangit pangeh naté!

20Aleg mada' bala ineh dé' Gat, idi luun dalan Askelon, pad decur lun Pilistin mawang niat. Aleg nima' anak lun na manu ineh do' ria'.

21"Aleg nima' udan idi ipup mebpeh luun surud Gilboa. Do' lati'neh na inan uli'. Ngaceku utap lun mesangit inigu' déi', idi utap Saul metugor.

22Binor Yonatan megéi' ngate'. Pelapet Saul pana' na méi', pad bunu' luk metueh pinaté didueh.

23"Saul idi Yonatan luk inan tau mawa, idi luk pelaba do'; bang ulun idi até pana' nateh didueh nepatad. Meluun awer ratnan kanui, metueh ratnan balang.

²⁴"Do' decur lun Israil temido ni Saul! Ieh nengayang nemuyuh ku kuyu' luk mesia', amas, idi batu luk meraga.

²⁵"Lun luk mekuu' pangeh naté bang bunu', Yonatan, naté luun surud.

²⁶"Ui temido namu, O kinanaku Yonatan, ngaceku iko luk inanku mawa. Awamu negku meluun do' ratnan awa decur.

²⁷"Lun luk mesangit pangeh naté, repapeh didueh na ulek peh."

Semuil Luk Kedueh 2

¹Muci ratnan ineh Daud nengitun Tuhan, kebalaneh, "Miakké ui amé' ngalap aceh bawang Yahuda?" Idi kebala Tuhan neneh, "Miak." Idi kebala Daud, "Bawang sapeh luk miak ulekku?" Idi kebala Tuhan, "Hebron."

²Idi Daud iné' déi' Hebron dengan dueh awanneh, ieh ineh Ahinoam lun Yesril, idi Abigail luk tinula' Nabal, lun Karmel ineh.

³Idi teh Daud nenguit amung anak itinneh, dengan uang tetek ruma'deh. Idi ideh netudo bang bawang-bawang Hebron.

⁴Idi lun Yahuda nacing, idi ideh nengumau ni Daud mangun ku raca' amung lun Yahuda. Kareb Daud nekali' bala ratnan lun Yabis idi lun Giliad pangeh nenanem butung Saul,

⁵Idi ieh nengecuk nelun duken nguit bala kuandeh, kebaladeh nedeh, "Samal kuan muyuh ratnan Tuhan, ngaceku muyuh pangeh lutep ngakem kuan tuan muyuh, ieh ineh kuan Saul pad muyuh nenanem neneh.

⁶Idi nekini pana' do' Tuhan ngeperuan idi méi' nemuyuh teh! Idi teh ui miak méi' nemuyuh ngaceku luk inau' muyuh.

⁷Do' muyuh metueh idi mekuu'. Raca' muyuh Saul pangeh naté, idi teh lun Yahuda pangeh nengumau negku ku raca'deh."

⁸Iamo' Abner Ner lun rayeh baweh Saul ineh pangeh nengalap Isboset Saul, idi ieh nenguit neneh iné' déi' dipar Abpa' Yarden déi' Mahanaim.

⁹Idi ieh nengikit neneh ku raca' lun Giliad, lun Aser, lun Yesril, lun Epraim, lun Benjamin, idi amung lun Israil.

¹⁰Idi ulun Isboset kareb ieh mangun ku raca' kuan lun Israil ineh apat ngepulu' lak. Idi ieh nengimet kekamen raca' dueh lak kinioneh. Iamo' lun Yahuda ineh nemaya' ni Daud.

¹¹Idi ieh nengimet nedeh déi' Hebron, tudu' lak setangal.

¹²Idi Abner nenalan dengan amung lun duken Isboset rat Mahanaim iné' Gibion.

¹³Idi Yoab anak Seruya dengan amung lun duken Daud teh nenalan, idi nepapu' nedeh iring takung Gibion. Idi ideh netudo déi', aceh bubpun iring selipa takung ineh, idi aceh bubpun iring selipa.

¹⁴Idi kebala Abner ni Yoab, "Do' tau ngecuk tuda'-tuda' anak adi' mudur amé' marot pelapet pa kiung tau." Kebala Yoab, "Do ineh."

¹⁵Idi pulu' dueh burur lun pebunu' Isboset rat pupu Benjamin iné' pebunu' nan pulu' dueh burur anak itin Daud.

¹⁶Idi anid-aniddeh nengakem uluh lun luk inandeh papu' idi nenebpek ruukdeh ku pelapet, pad amungdeh naté. Idi ngaceku ineh ideh neneten su ineh "Nataad Tadem Pelapet" luk déi' Gibion.

¹⁷Idi aco sineh ideh pelaba tueh pebunu'. Idi Abner idi amung lun Israil linaya' baweh Daud.

¹⁸Idi su ineh inan teluh anak deléi Seruya, ieh ineh Yoab, Abisai, idi Asahel. Idi Asahel ineh mawer mepad kudeng talau.

¹⁹Idi Asahel nengerada' ni Abner dengan na umai.

²⁰Idi Abner nelumi idi nengitun, kebalaneh, "Iniké iko, O Asahel?" Kebalaneh, "Ui ini."

²¹Idi kebala Abner neneh, "Aleg ngerada' negku. Do' iko ngerada' seburur lun pebunu' idi ngaro anun-anun luk neneh." Iamo' Asahel na sikal ugka' ngerada' neneh.

²²Idi kebala Abner neneh, "Aleg ngerada' negku. Ngudeh iko nganau' negku ngaté namu? Kudeng afeh ui miak nier kiung Yoab kinanakmu ineh mucu?"

²³Iamo' Asahel na sikal ugka'. Idi Abner nenepeh neneh ku etun busuneh, idi nekaneh batekneh, pad etun ineh nepesut pa ketedneh. Idi ieh neluka' idi naté su ineh peh. Idi amung lun luk nacing su luk inanneh naté ineh nugka'.

²⁴Iamo' Yoab idi Abisai nengerada' ni Abner. Idi aco pana' macep kareb ideh nacing surud Ama luk petutup bawang Gia, maya' dalam amé' su luk ali-ali déi' Gibion.

²⁵Idi amung lun Benjamin nemaya' ni Abner, mangun ku aceh baweh. Idi amungdeh netuped luun aceh surud.

²⁶Idi Abner nenawar ni Yoab, kebalaneh, "Miakké tau pebunu' kidi-kidi? Na iko kali' kekipedneh mesusa'? Idanké iko ngecuk nelun mula' ineh lemubed ratnan ngerada' kinanakdeh?"

²⁷Idi kebala Yoab, "Ui pebulung ku ngadan Tuhan luk mulun. Kudeng na iko nepebala, kali' rungen ideh na ugka' pad macing pekak nebpa."

²⁸Idi Yoab nengiupe serupit. Idi lun mula' ineh nugka'. Idi na ideh nengerada' nelun Israil peh. Idi na ideh nepebunu' peh.

²⁹Idi Abner idi amung lun danganneh teh nemaya' Raked Yarden kedangan-kedangan, idi ideh neguta Abpa' Yarden, idi nenalan rat muned aco macing malem, pad ideh nacing déi' Mahanaim.

³⁰Idi Yoab nelemubed rat nengerada' ni Abner. Idi ieh nengamung amung anak itinneh. Idi rat arang lun duken Daud ineh pulu' iwa' burur na idi, idi teh Asahel.

³¹Iamo' lun duken Daud pangeh nengaté 360 burur anak itin Abner ratnan pupu Benjamin.

³²Idi Yoab idi amung lun danganneh nenguit butung Asahel, idi nenanem neneh bang lengutan tamanneh luk déi' Baitlahim. Idi ideh nenalan kedangan-kedangan ineh. Idi ideh nacing déi' Hebron kareb aco masat.

Semuil Luk Kedueh 3

- ¹Idi tetek ruma' Saul idi tetek ruma' Daud mio bang bunu' idi Daud iuk metueh. Iamo' tetek ruma' Saul iuk melaya'.
- ²Idi déi' hebron ineh Daud nenginul tuda'-tuda' anak deléi. Luk atun ineh Amnon, anak Ahinoam decur Yesril ineh.
- ³Idi luk kedueh ineh Kiliab, anak Abigail luk tinula' Nabal lun Karmel ineh. Idi luk keteluh ineh Absalom, anak Maka anak Talmai raca' Gesur.
- ⁴Idi luk keapat ineh Adonia, anak Hajit. Idi luk kelimeh ineh Sepatia, anak Abital.
- ⁵Idi luk keanem Itriam, anak Egla awan Daud. Amung anak deléi ini tinganak déi' Hebron.
- ⁶Idi seruked bunu' arang tetek ruma' Saul dengan tetek ruma' Daud, idi Abner iuk-iuk metueh bang ruma' Saul.
- ⁷Idi atun Saul inan aceh apidneh ngadanneh Rispa Aya. Idi kebala Isboset ni Abner, "Ngudeh iko nepamung dengan apid tamanku?"
- ⁸Idi Abner pelaba gathé ku bala Isboset ineh, kebalaneh, "Bacukké ui ini, arang lun Yahuda? Idi macing aco sini ui pangeh nenganau' luk do' kuan uang tetek ruma' Saul tamanmu, ieh ineh kuan kinanak-kinanakneh idi kuan lun rurumneh. Idi na ni nemaré namu bang palad Daud. Idi nekini iko sikal ngilang negku ratnan seburur decur.
- ⁹Ui pebulung ku ngadan Allah, idi nekini ui sikal nganau' kuan i Daud luk pangeh pijani' Tuhan kuanneh.
- ¹⁰Ui sikal mubuh imet ineh rat bang uang tetek ruma' Saul idi naped kerusi imet Daud pa luun lun Israil idi kuan lun Yahuda rat Dan macing déi' Birsiba."
- ¹¹Idi sebila' bala pana' nateh Isboset miak ngor kuan Abner, ngaceku ieh matot neneh.

¹²Idi Abner nengecuk tuda'-tuda' lun duken amé' matun ni Daud déi' Hebron, kabalaneh, "Idéké kuan tana' ini? Do' iko pejani' negku, idi kali' rungen ui ngedengan namu, pelé ngelubed amung lun Israil kuanmu."

¹³Idi kebala Daud, "Do', ui sikal pejani' namu. Iamo' aceh luk belénku namu, iko na miak amé' negku kareb nateh iko nated ni Mikal anak Saul ineh."

¹⁴Idi teh Daud nengecuk nelunduken amé' matun Isboset anak Saul ineh, kebalaneh, "Maré negku Mikal luk pangeh ilapku ku awanku dengan meratu kubil lun Pilistin."

¹⁵Idi Isboset nengecuk nelun amé' ngalap neneh ratnan awanneh, Paltiel Lais.

¹⁶Idi awanneh nenalan maya' puetneh idi ieh nenangi' macing déi' Bahurim. Idi kebala Abner neneh, "Do' iko muli'." Idi ieh nuli'.

¹⁷Idi Abner iné' nelun rayeh Israil, kebalaneh, "Pangeh mio muyuh pian ni Daud mangun ku raca' muyuh.

¹⁸Idi nekini do' ngacing luk pinian muyuh ineh. Ngaceku kebala Tuhan ni Daud, 'Dengan ticu' Daud lun dukenKu mo' Ui miak muit pupu Israil rat bang palad lun Pilistin, idi rat bang palad amung bunu'deh.' "

¹⁹Kudeng ineh teh bala Abner nelun Benjamin. Idi Abner iné' déi' Hebron idi nengacing amung bala ineh ni Daud, ratnan luk pian lun Benjamin idi lun Israil pana'.

²⁰Idi Abner iné' matun ni Daud déi' Hebron dengan dueh ngepulu' burur lun danganneh. Idi Daud nenganau' aceh irau kuandeh.

²¹Idi kebala Abner ni Daud, "Nekini ui pian amé' ngamung amung lun Israil kuanmu, pad amungdeh ineh pejani' namu, idi iko pana' miak ngimet amung-amung luk pian niatmu." Idi Daud nenima' Abner nalan. Idi ieh nenalan dengan do'.

²²Idi denak-denak amung lun duken Daud nacing dengan Yoab rat iné' munu'. Idi ideh nenguit mula' binaweh maya' nedeh. Idi Abner na idi déi' Hebron dengan Daud, ngaceku ieh pangeh nenima' neneh nalan dengan do'.

²³Idi kareb Yoab nacing dengan amung baweh ineh, idi ieh neninger bala ratnan Abner pangeh iné' matun raca' idi ieh pangeh nenima' neneh nalan dengan do'.

²⁴Idi Yoab iné' matun raca'kebalaneh, "Anunké luk inau'mu? Abner pangeh iné' matun namu. Ngudeh iko nenima' neneh nalan pad ieh nenalan dengan do'?"

²⁵Idi iko teh kali' Abner pangeh nacing naluk namu, ieh pian kali' lawému remuat idi semuet, idi pian kali' amung luk ruenmu teh!"

²⁶Idi Yoab neremuat rat pa kiung Daud. Idi ieh nengecuk nelun ngerada' ni Abner, idi ideh nenguit neneh lemubed rat subuk Sira. Iamo' Daud na tu kali' lawé ineh.

²⁷Kareb Abner nelemubed iné' Hebron, idi Yoab nengaki' neneh iring tanga' bawang pian pegayam neneh dengan lulem. Idi ieh nenepéh neneh idi nekaneh batekneh pad ieh naté, ngaceku Yoab sikal ngua' até Asahel kinanakneh ineh.

²⁸Kareb Daud nekali' bala ineh idi ieh nepebala, "Tuhan kali' negku idi anak itinku na mesala' ratnan até Abner ineh.

²⁹Do' ukum ineh mebbeh kuan Yoab idi tetek ruma'neh, pad bang ruma' Yoab ineh na miak na inan lun luk mérat dara' idi mét susud, lun luk miak nganau' kekamen decur mo', lun luk miak teraden ku pelapet, idi lun luk masi' akan pana'."

³⁰(Idi kudeng ineh lawé Yoab idi Abisai kinanakneh nengaté Abner ngaceku Abner pangeh nengaté Abner ngaceku Abner pangeh nengaté Asahel bang bunu' luk dé' Gibion ineh.)

³¹Idi Daud nengecuk ni Yoab idi amung anak itinneh narak ayungdeh, idi nacung, pad ideh temido ni Abner. Idi Raca' Daud sebuleng pana' nemaya' lungunneh.

³²Idi Abner tinanem déi' Hebron. Idi raca' netemido iring tanemneh dengan lun mula' pana'.

³³Idi Daud nenganau' aceh tido kuan Abner, ketidoneh, Ngudeh Abner naté mepad kudeng lun luk mebacé?

³⁴Ticu'neh na inabet, idi kukudneh na kiling; ieh naté mepad kudeng lun luk pinaté lun luk dat." Idi lun mula' ineh nenangi' neneh teh.

³⁵Pangeh ineh idi lun mula' nacing ngubuk ni Daud kuman ruti kareb nateh aco macep. Iamo' ieh nepebulung, kebulungneh, "Do' Allah ngukum negku kudeng ui kuman ruti idi anun akan luk baken atun ratnan aco macep!"

³⁶Idi lun mula' pangeh neninger bala ineh, idi ideh mawang niat. Idi amung-amung luk ruen raca' ineh matu pa kiung lun mula' ineh.

³⁷Idi amung anak itin Daud idi amung lun Israil pana' nekali' baken raca' luk pian ngaté Abner ineh.

³⁸Idi kebala raca' kuan amung lun tarehneh, "Naké muyuh kali' aco sini aceh burur lun rayeh pangeh naté arang amung lun Israil?"

³⁹Iamo' sagan tu pana' ui ini raca' luk pinili' Allah, ui melaya' aco sini. Ngaceku anak Seruya ineh pelaba sangit. Do' Tuhan ngua' kuan lun luk dat ineh maya datdeh!"

Semuil Luk Kedueh 4

¹Idi kareb Isboset anak Saul nekali' bala Abner pangeh naté déi' Hebron, idi niatneh melaya', idi amung lun Israil megagau.

²Idi Isboset ineh inan dueh burur lun rayeh bang dueh babpat bunu'. Ngadan sebuleng Baana, idi sebuleng Rekab. Di dueh ineh anak Rimon lun Benjamin rat Birot. (Birot pana' semuet bang iap Benjamin.

³Idi atun lun Birot ineh pangeh neburo iné' Gitaim. Idi ideh tudo déi' macing aco sini.)

⁴Idi Yonatan Saul inan anak deléi luk mekió'. Idi ngadanneh Mepisobet. Idi ulunneh limeh lak kareb bala ratnan até Saul idi Yonatan nacing rat Yesril. Idi decur luk nengasa' neneh nenguit neneh buro. Idi kareb ieh upun buro, denak-denak ieh nebpeh idi ieh mekió'.

⁵Idi Rekab idi Baana iné' ruma' Isboset kareb mét idang. Idi Isboset netelubid kareb muned aco.

⁶Idi decur luk nginita tanga' idi uned tunap padé. Iamo' ieh nepetuep idi petacu rudap. Rekab idi Baana petacu nesemuet bang ruma'.

⁷Idi kareb didueh nesemuet bang ruma' ineh, idi didueh nemayung neneh su luk inanneh rudap, idi nengaté neneh, idi nengaleb neneh. Idi didueh nenguit uluhneh nuli' maya' Raked Yarden kedangan-kedangan ineh.

⁸Idi didueh nenguit ulu Isboset ineh kuan Daud déi' Hebron. Kebala didueh inan raca'. "Ini uluh Isboset anak bunu'mu Saul, luk sikal ngaté namu. Idi aco sini Tuhan pangeh nengua' dat i Saul idi inulneh kuanmu."

⁹Iamo' kebala Daud nedidueh, "Ui pebulung ku ngadan Tuhan luk mulun luk pangeh nemuit negku ratnan amung dereh.

¹⁰Kareb lun nemada' negku, Saul pangeh naté, ieh nengerawé nguit bala luk do' iamo' ui nengakem neneh idi nengaté neneh déi' Siklag. Ineh tabpar luk biréku ku balaneh.

¹¹Meluun teh kareb lemulun luk dat pangeh nengaté seburur luk matu bang ruma'neh idi su luk inanneh rudap, naké ui ngua' aténeh nemedueh pad ui ngaté nemedueh?"

¹²Idi Daud nengecuk nelun dukenneh ngaté nedidueh. Idi ideh nenetek kukud idi ticu' didueh. Idi ideh nengekito burur didueh iring takung luk déi' Hebron. Iamo' ideh nengalap uluh Isboset ineh, idi nenanem neneh déi' Hebron bang tanem Abner.

Semuil Luk Kedueh 5

¹Idi amung inul pupu Israil iné' matun ni Daud déi' Hebron. Idi kebaladeh neneh, "Tau ini sebuleng inul.

²Idi mon kareb Saul mangun ku raca' kai, iko teh luk nguit nekai lun Israil pebunu'. Idi kebala Tuhan namu, 'Iko teh miak matar pupuKu Israil. Idi iko miak mangun ku raca'deh.' “

³Kudeng ineh teh amung lun rayeh Israil iné' matun raca' déi' Hebron. Idi Daud nepejani' nedeh ineh pa kiung Tuhan. Idi ideh nengumau ni Daud mangun ku raca' pa luun Israil.

⁴Idi ulun Daud teluh ngepulu' lak kareb ieh mangun ku raca'. Idi apat ngepulu' lak kinioneh ieh bang kekamen raca'.

⁵Idi déi' Hebron ieh nengimet nelun Yahuda tudu' lak setangal, idi déi' Yerusalim ieh nengimet amung lun Israil idi lun Yahuda teluh ngepulu' teluh lak kinioneh.

⁶Idi Raca' Daud dengan amung anak itinneh iné' ngerieng Yerusalim. Idi kebala lun Yebusi luk tudo bang bawang ineh ni Daud, "Na iko miak amé' tungé', iamo' lun mebuser idi lun mekio' miak ngusu namu. Keterawédeh, Daud na miak ngelaya' bawangdeh."

⁷(Iamo' Daud nengelaya' bawang Sion, pad ieh mangun ku bawangneh).

⁸Idi aco sineh kebala Daud nan anak itinneh, "Idé-idé luk ngaté nelun Yebusi, do' ieh maya' dalan su luk inan ngalap abpa', idi ngaté nelun mebuser idi lun luk mekio' ineh luk inan Daud megateh niat." (Ngaceku ineh kebaladeh, "Na lun mebuser idi lun mekio' miak semuet bang ruma' Tuhan.")

⁹Idi Daud nengalap idi netudo bang bawang luk meraben ineh. Idi ieh neneten bawang ineh, "Bawang Daud." Idi ieh nemudut bawang libut-libutneh rat su luk inan tana' luk pinaad pa busat aco surud ineh.

¹⁰Idi Daud iuk metueh, ngaceku Tuhan luk Melalud idi denganneh.

¹¹Idi Hiram raca' Sur nengecuk nelun duken amé' matun ni Daud idi nguit kayuh tumuh, idi tuda'-tuda' lun luk mileh ngakem kayuh, idi lun luk mileh ngakem batu. Idi ideh nemudut aceh ruma' kuan Daud.

¹²Idi Daud nekali' Tuhan pangeh nengikit neneh ku raca' amung lun Israil, idi nengeperuan imetneh ngaceku pupuNeh lun Israil.

¹³Kareb ieh nacing rat Hebron idi Daud nengalap tuda'-tuda' apid idi awan kuan bururneh sebuleng rat Yerusalim. Idi ieh nenginul tuda'-tuda' anak deléi idi decur.

¹⁴Idi ini ngadan amung anak luk tinganak kuanneh déi' Yerusalim: Samua, Sobab, Natan, Selimun,

¹⁵Ibkar, Elisua, Nepeg, Yapia

¹⁶Elisma, Eliada, idi Elipelet.

¹⁷Idi kareb lun Pilistin neninger bala ratnan Daud inumau mangun ku raca' lun Israil, idi amung lun Pilistin ineh negug kang sikal ngakem ni Daud. Kareb Daud neninger bala ineh, idi ieh iné' bang libung luk meraben.

¹⁸Idi lun Pilistin nacing, idi ideh nepamung bang Ruan Lun Luk Medita'.

¹⁹Idi Daud nengitun Tuhan, kebalaneh, "Miakké ui amé' ngelaya' nelun Pilistin? Miakké Tuhan maré nedeh bang paladku?" Idi kebala Tuhan neneh, "Amé' iko. Ngaceku Ui maré nedeh ineh bang paladmu."

²⁰Idi Daud nacing déi' "Tuhan Luk Nemasut." Idi ieh nengelaya' nelun Pilistin déi', kebalaneh, "Idi Tuhan pangeh nemasut amung bunu'ku rat pa kiungku, mepad kudeng ereb." Idi ngaceku ineh ieh neneten su ineh, "Tuhan Luk Nemasut."

²¹Idi lun Pilistin nenecan amung akangdeh déi'. Idi Daud idi amung lun denganneh nenguit nedeh buro.

²²Idi lun Pilistin nacing baruh teh, idi ideh inurap bang Ruan Lun Luk Medita'.

²³Idi kareb Daud nengitun Tuhan, kebala Tuhan neneh, "Aleg iko amé' matun nedeh. Iamo' do' iko munu' nedeh rat pa keted, idi iko amé' matun nedeh rat bal lawa kayuh telatang ineh.

²⁴Idi kareb iko ninger gara lun nalan udung kayuh telatang ineh, do' iko mesaget nalan, ngaceku kareb ineh Tuhan remuat nalan pa atun muyuh, sikal ngelaya' baweh lun Pilistin."

²⁵Idi Daud nenganau' maya' kudeng luk icuk Tuhan neneh. Idi ieh nengelaya' amung lun Pilistin ineh rat Gibia macing déi' Giser.

Semuil Luk Kedueh 6

¹Idi Daud nengamung amung lun mesangit rat arang lun Israil baruh teh, ieh ineh 30,000 burur kinula'deh.

²Idi ieh nenguyut nedeh iné' Baala déi' Yahuda, sikal ngalap Pati' Pejani' Allah rat déi'. Idi pati' ineh titen ku ngadan Tuhan luk Melalud luk tudo arang melaikat karub.

³Idi ideh nengiding Pati' Pejani' Allah ineh bang aceh keréta luk mebaruh. Idi keréta luk mebaruh ineh tinated Usa idi Ahio, anak deléi Abinadab.

⁴Idi kareb didueh nenated ineh rat bang ruma' Abinadab luk luun surud ineh dengan Pati' Pejani' Allah, idi Ahio nenalan pa atun Pati' ineh.

⁵Idi Daud idi amung lun Israil pana' ngalai idi menani pa kiung Tuhan dengan manid-manid luk muni idi uni ratnan tapi', giula', karing, suling, idi kelinang.

⁶Idi kareb ideh nacing su luk inan Nakon rumik, denak-denak Usa nenatang ticu'neh idi nengimet Pati' Pejani' Allah, ngaceku sapi' ineh netekiai.

⁷Idi Tuhan museh ni Usa, idi Ieh nengaté neneh ngaceku ieh nengakem Pati' ineh. Idi ieh naté déi' iring Pati' Pejani' Allah.

⁸Idi Daud dat niat ngaceku Tuhan pangeh nengukum ni Usa. Idi ideh neneten su ineh, "Usa Inukum" macing aco sini.

⁹Idi Daud matot inan Tuhan, kebalaneh, "Kudeng apeh Pati' Pejani' Tuhan ineh amé' taca' negku?"

¹⁰Idi ieh na sikal ku Pati' Pejani' Tuhan amé' taca' neneh bang bawang Daud. Ngaceku ineh ieh nenguit neneh amé' bang ruma' Obed lun Edom rat Gat.

¹¹Idi Pati' Pejani' Tuhan tican bang ruma' Obed teluh bulan kinioneh. Idi Tuhan nengeperuan ni Obed idi amung uang tetek ruma'neh.

¹²Raca' Daud neninger bala ratnan Tuhan nengeperuan uang tetek ruma' Obed idi amung-amung luk ieh kuan ngaceku Pati' Pejani' ineh. Idi Daud iné' ngalap ineh rat bang ruma' Obed, idi inuitneh iné' Yerusalim dengan mawang niat.

¹³Idi kareb lun luk nemirir Pati' Pejani' Tuhan ineh pangeh nenalan anem akang kiadodeh, idi Daud nemaré aceh sapi' idi aceh dumba deléi luk melamu kuan Tuhan.

¹⁴Idi Daud nengalai uput-uput dengan abud tuehneh pa kiung Tuhan. Idi ieh nengayung ku abpar ratnan kibung pu.

¹⁵Idi kudeng ineh lawé Daud idi amung lun Israil nenguit Pati' Pejani' Tuhan dengan ngudub mawang niat idi uni serupit.

¹⁶Kareb Pati' ineh nacing bang bawang, denak-denak Mikal Saul nenier rat bang tabuk ruma'neh. Idi ieh nenier Raca' Daud ngalai uput-uput pa kiung Tuhan, idi ieh nengia' neneh bang niatneh.

¹⁷Kareb ideh nenguit Pati' Pejani' ineh semuet, bang Lepo luk pinudut Daud kuan ineh, idi Daud nemaré baré luk sabpen idi baré luk nguit pedo' pa kiung Tuhan.

¹⁸Kareb ieh pangeh nemaré baré ineh, idi ieh nengeperuan nelun mula' ineh ku ngadan Tuhan luk Melalud.

¹⁹Idi ieh nenganid kuan lun Israil do' deléi idi decur, sebalad ruti, idi sengbulu' uang, idi setanga kireng buah' anggur. Idi ideh nuli'.

²⁰Idi Daud nuli' sikal ngeperuan nelun bang ruma'neh, idi Mikal Saul neremuat sikal amé' papu' ni Daud, kebalaneh, "Kudeng apeh raca' lun Israil rinayeh aco sini, pad bururneh nelungu su siren amung anak adi' decur lun dukenneh, mepad kudeng seburur lun dat netekelala dengan na migu'."

²¹Idi kebala Daud ni Mikal, "Ui nenganau' ineh pa kiung Tuhan luk pangeh nemili' negku ku libal i tamam, idi tetek ruma'neh, pad ui mangun ku lun nguyut amung pupuNeh lun Israil. Idi ui pian ngalai teh pad ngerayeh Tuhan.

²²Idi ui pian ngebeneh bururku meluun ratnan ineh teh. Idi ui uen ngebeneh su sirenmu, iamo' ratnan anak adi' decur luk bida'mu ineh, ideh miak ngerayeh negku!"

²³Idi Mika Saul ineh na ieh inan anak macing ieh maté.

Semuil Luk Kedueh 7

¹Idi imet Raca' Daud pangeh litep, idi Tuhan nematar neneh ratnan amung bunu'neh.

²Idi kebala Daud kuan Nabi Natan, "Ui ini tudo bang aceh ruma' ratnan kayuh tumuh, iamo' Pati' Pejani' Allah ineh tudo bang lepo kibung."

³Idi kebala Natan ni Daud, "Do' iko nganau' luk pianmu, ngaceku Tuhan idi denganmu."

⁴Iamo' bang malem ineh teh Tuhan nepebala ni Natan,

⁵"Amé' iko mada' balaKu kuan demulunKu Daud, 'Pianmu mudut aceh ruma' kuanKu pelé Ui tudo bang ineh?"

⁶Idi nateh Ui netudo bang aceh ruma' rat aco Ui nenguit nelun Israil neremuat rat Masir macing aco sini. Iamo' Ui lawé-lawé, idi lepo kibung mo' ruma'Ku.

⁷Idi seruked Ui nalan dengan pupuKu Israil, nateh Ui nengitun nelun rayeh luk icukKu ngasa' nedeh, kebalaKu, "Ngudeh muyuh na nganau' aceh ruma' kuanKu ratnan kayuh tumuh?" ‘

⁸"Idi nekini do' iko mada' kuan demulunKu Daud, Ini bala Tuhan luk Melalud, 'Ui pangeh nengikit namu rat bang laman idi ratnan matar dumba, mangun ku lun nguyut amung pupuKu lun Israil.

⁹Idi Ui idi denganmu iapeh-iapeh luk ulekmu. Idi pangeh Ui nengaté amung bunu'mu. Idi Ui miak ngerayeh ngadanmu mepad kudeng ngadan lun luk meluun rayeh luk luun tana'.

- ¹⁰Idi Ui miak ngeletep aceh luk inan kuan pupuKu Israil, pad ideh tudo su luk litep ineh, idi na ideh uen ngagap, idi teh na ideh uen pupu luk dat ngesusa', mepad kudeng luk atun,
- ¹¹Idi rat kareb Ui nengecuk nelun luk muit pupuKu Israil. Iamo' Ui miak maré pedo' ratnan amung bunu'mu. Idi teh Tuhan miak ngeletep inulmu mucu.
- ¹²Idi kareb iko maté idi tinamen dengan tepunmu, Ui miak ngikit sebuleng anakmu mangun ku raca'. Idi Ui miak ngeletep imetneh.
- ¹³Idi ieh luk miak mudut aceh ruma' kuanKu. Idi Ui miak ngeletep inulneh ngimet macing raked-raked.
- ¹⁴Idi Ui mangun ku Tamannah. Idi ieh teh mangun ku anakKu. Idi kareb ieh dat, Ui miak mada' nene ku babal idi urat lemulun.
- ¹⁵Iamo' na Ui necan neneh, mepad kudeng Ui nenecan ni Saul luk pangeh tila'Ku pelé iko mangun ku raca'.
- ¹⁶Iamo' tetek ruma'mu meruked, idi imetmu macing raked-raked teh.' “
- ¹⁷Idi amung luk linio Allah ni Natan bida'neh ni Daud.
- ¹⁸Idi Raca' Daud nesemuet bang Lepo idi tudo pa kiung Tuhan, kesembayangneh, "O Tuhan Allah, ui na mayu ngalap amung peruan luk biréMu kuanku idi kuan tetek ruma'ku.
- ¹⁹Iamo' Iko ngula' peruanMu kuanku, pad Iko nepejani' ngeperuan inulku mucu. Idi Iko nengegala' ini kuan lemulun, O Tuhan Allah!
- ²⁰Idi anun teh miak belénku Namu! Ngaceku Iko teh luk ngiti negku.
- ²¹Ini pianMu sebuleng; idi Iko nengelio amung kekamen ini luk rayeh kuanku.
- ²²O Tuhan Allah, Iko luk rayeh tu-tu! Na Allah baken ratnan Iko. Idi kai pangeh nekali' ineh.
- ²³Idi pupu sapeh bang tana' ini mepad kudeng pupuMu, lun Israil, luk pangeh inuli'Mu rat Masir mangun ku pupuMu. Idi Iko mebala, ngaceku Iko

nenganau' kekamen luk melalud idi luk inan mawa kuandeh, kareb Iko nengusu tuda'-tuda' pupu dengan akangdeh rat pa kiung pupuMu ineh?

²⁴Idi Iko pangeh nengeletep pupuMu Israil mangun ku aceh pupuMu macing raked-raked. Idi Iko, O Tuhan, pangeh mangun ku Allahdeh.

²⁵"Idi nekini O Tuhan Allah, nganau' kuanku idi kuan tetek ruma'ku maya' kudeng luk pijani'Mu,

²⁶pad ngadanMu uen ngerayeh macing raked-raked, pelé lemulun miak mala, 'Tuhan luk Melalud, Ieh ineh Allah lun Israil,' idi inulku miak ngimet macing raked-raked.

²⁷O Tuhan luk Melalud, Allah lun Israil, Iko pangeh nengegala' ratnan inulku mangun ku raca'. Idi ngaceku ineh ui mekuu' ngacing sembayang ini pa kiungMu.

²⁸"Idi nekini O Tuhan Allah, Iko mo' Allah luk matu. Idi amung balaMu pana' matu teh. Idi Iko nengacing pejani' ini luk pelaba do' kuanku.

²⁹Idi nekini teh, do' Iko ngeperuan uang tetek ruma'ku, pelé ideh lutep pa kiungMu macing raked-raked. O Tuhan Allah, Iko pangeh nepejani', idi kali' rungen ruma'ku miak uen ngeperuan macing raked-raked.

Semuil Luk Kedueh 8

¹Muci ratnan ineh idi Daud nengelaya' nelun Pilistin. Idi ieh nemuit bawangneh ratnan imetdeh.

²Idi teh ieh nengelaya' nelun Moab. Idi ieh nengecuk nedeh tekulub luun tana'. Idi ieh nenari nedeh ku teluh tari, dueh tari uen ngaté idi setari uen ngulun. Kudeng ineh lun Moab ineh mangun ku demulun Daud idi nemarké pupuk.

³Idi teh Daud nengelaya' Hadadeser anak Rihob raca' Soba, kareb ieh iné' ngeletep imetneh déi' Abpa' Pirat.

⁴Idi Daud nengaro rat nedeh 1,700 lun luk maya' kuda, idi 20,000 lun luk nalan kukud. Idi Daud nenetek amung urat tumod kuda keréta. Idi ieh nenecan petap kuan meratu keréta mo'.

⁵Idi lun Siria nacing rat Damsik pian ngedengan Hadadeser raca' Soba. Iamo' Daud nengaté 22,000 burur lun Siria ineh.

⁶Idi ieh nengeletep tuda'-tuda' baweh bang bawang-bawangdeh. Idi lun Siria ineh mangun ku anak itin Daud, idi nemaré pupuk neneh. Idi Tuhan nemaré tueh ni Daud, iapeh-iapeh pana' ulekneh.

⁷Idi Daud nengalap amung utap amas luk pangeh inuit lun duken Hadadeser. Idi ieh nenguit ineh iné Yerusalim.

⁸Idi ieh nengalap mula' tekaling rat Bata idi Berotai, dueh bawang luk bang imet Hadadeser.

⁹Idi Tui raca' Hamat pangeh neninger bala ratnan Daud nengelaya' amung baweh Hadadeser.

¹⁰Idi ieh nengecuk anakneh Yoram amé' papu Raca' Daud, pad ieh petabi' neneh idi ngubur neneh, ngaceku Daud pangeh nengelaya' ni Hadadeser, ngaceku Hadadeser ineh megéi' pebunu' ni Tui. Idi Yoram nenguit kuanneh tuda'-tuda' binaweh pirak, amas, idi tekaling.

¹¹Idi binaweh ineh linigan Raca' Daud kuan Tuhan dengan amung amas idi pirak luk pangeh ilapneh ratnan amung pupu baken luk pangeh linaya'neh,

¹²ieh ineh rat nelun Edom, Moab, Amon, Pilistin, idi Amalek, idi ratnan binaweh Hadadeser teh.

¹³Idi Daud iuk mebala, ngaceku ieh nengelaya' nelun Edom bang Ruan Tucu', kareb ieh nengaté 18,000 burur.

¹⁴Idi ieh nengeletep tuda'-tuda' baweh apud bawang Edom, idi lun Edom mangun ku anak itin Daud. Idi Tuhan nemaré tueh kuan Daud iapeh-iapeh pana' ulekneh.

¹⁵Idi Daud nengimet amung lun Israil. Idi ieh nenganau' luk do' idi mepiteb kuan amung pupuneh.

¹⁶Idi Yoab anak Seruya, ieh ineh lun rayeh baweh. Idi Yosapat Ahilud, ieh ineh lun luk ngayud.

¹⁷Idi Saduk Ahitub idi Ahimalek Abiatar ieh ineh imam. Idi Seraya, ieh ineh lun luk ngayud.

¹⁸Idi Benaya Yoyada, ieh ineh lun rayeh amung lun luk matar kuan Daud; idi amung anak Daud mangun ku imam.

Semuil Luk Kedueh 9

¹Idi Daud nengitun, kebalaneh, "Inanké lun neketecan rat bang tetek ruma' Saul, pelé ui miak méi neneh ngaceku Yonatan?"

²Idi inan seburur lun duken bang ruma' Saul, ngadanneh Siba. Idi ideh nenawar neneh amé' papu' ni Daud. Idi kebala Daud neneh, "Iko ini Siba?" Kebalaneh, "Ui ini, tuan."

³Idi kebala Daud, "Inanké lun rat bang ruma' Saul luk inanku méi' ngaceku janiku pa kiung Allah?" Idi kebala Siba kuan raca', "Inan aceh anak Yonatan, idi ieh mekió'."

⁴Idi kebala Daud neneh, "Iapehké ieh?" Idi kebala Siba, "Idi tieh bang ruma' Makis Amiel déi' Lodebar."

⁵Idi Raca' Daud nengecuk seburur amé' nguit neneh.

⁶Idi Mepiboset Yonatan, mupun Saul ineh nacing iné' matun ni Daud. Idi ieh netekeradung pa kiungneh. Idi kebala Daud, "Mepiboset." Idi kebala Mepiboset, "Anun idi tuanku?"

⁷Idi kebala Daud neneh, "Aleg iko matot, ngaceku ui méi' namu ngaceku tamanmu Yonatan. Idi ui sikal nguli' amé' namu amung tana' Saul tepunmu ineh. Idi iko miak peruyung kuman denganku."

⁸Idi Mepiboset netekunal, kebalaneh, "Idéké ui ini, pad iko méi' negku luk mepad kudeng uko' luk naté?"

⁹Idi Daud nenawar ni Siba, lun duken Saul ineh, idi kebalaneh neneh, "Ui maré kuan Mepiboset amung-amung binaweh luk ni Saul idi tetek ruma'neh atun.

¹⁰Do' iko idi amung deléimu idi amung lun dukenmu pana' miak nganau' lati' kuanneh idi nguit semuet ulu'neh, pelé anak tuanmu Saul ineh ngalap akandeh. Iamo' do' Mepiboset megéi' kuman denganku." (Idi Siba ineh inan pulu' limeh anak deléi idi dueh ngepulu' lun dukenneh.)

¹¹Idi kebala Siba ni Daud, "Amung bala raca' negku ini ui miak maya." Idi Mepiboset ineh tudo pamung akan dengan Raca' Daud mepad kudeng anak burur Daud.

¹²Idi Mepiboset ineh inan aceh anak deléineh luk isuut ngadanneh Mika. Idi amung lun luk tudo bang ruma' Siba ineh mangun ku lun duken Mepiboset.

¹³Idi Mepiboset tudo déi' Yerusalim, ngaceku ieh megéi' pamung akan dengan Raca' Daud. Idi mop kukudneh mekió'.

Semuil Luk Kedueh 10

¹Muci ratnan ineh Nahas raca' Amon naté. Idi anakneh Hanun mangun ku raca' libalneh.

²Idi kebala Daud, "Ui sikal nganau' luk do' kuan Hanun Nahas. Ngaceku tamanneh nenganau' do' kuanku atun." Idi Daud nengecuk nelun dukenneh ngubuk neneh ngaceku até tamanneh idi ideh iné' déi' bawang lun Amon.

³Iamo' kebala amung lun rayeh Amon kuan Hanun, tuandeh ineh, "Matuhké iko ngerawé Daud nengecuk lun ngubuk namu, ngaceku ieh ngerayeh tamanmu? Naké Daud nengecuk nelun dukenneh amé' namu, pad ideh miak nier bawang idi ngelaya' ineh."

⁴Idi Hanun nengalap amung lun duken Daud ineh. Idi ieh nengiki sebuang buluh adadeh, idi nemulu' setangal ayungdeh macing i tipandeh. Idi ieh nengecuk nedeh muli'.

⁵Kareb i Daud nekali' bala ineh, idi ieh nengecuk nelun amé' mada' nedeh, ngaceku ideh pelaba igu'. Idi kebala Daud, "Meluun do' muyuh tudo déi' Yeriko, pad buluh ada muyuh mulun idi teh muyuh muli'."

⁶Idi kareb lun Amon nekali' ideh pangeh nenganau' luk dat pa kiung Daud, idi ideh nenabpar nelun Siria rat Bait Rihob idi lun Siria rat Soba, amungdeh 20,000 burur luk nalan kukud, idi rat raca' Maaka 1,000, idi rat lun Tob 12,000 burur.

⁷Kareb bala ineh pangeh nekali' Daud, idi ieh nengecuk ni Yoab dengan amung lun luk mesangit amé' munu' nedeh.

⁸Idi lun Amon neremuat idi nengelalad bawehdeh pa atun tanga' bawang. Iamo' amung lun Siria rat Soba idi Rihob, idi amung lun rat Tob idi Maaka ineh tured su inandeh sebuleng déi' natad.

⁹Idi kareb Yoab nenier lawé' baweh ineh amé' matun neneh rat pa atun, idi rat pa puet, idi ieh nengalap sebuang lun mesangit luk pinili' rat arang lun Israil. Idi ieh nengerareng nedeh petutup nelun Siria,

¹⁰Idi ela anak itinneh ineh biréneh bang palad kinanakneh Abisai, luk ngelalad bawehneh petutup nelun Amon.

¹¹Idi kebala Yoab neneh, "Kudeng lun Siria ineh ngelaya' negku, do' iko amé' ngedengan negku. Idi kudeng lun Amon ineh ngelaya' namu, kali' rungen ui amé' ngedengan namu.

¹²Do' tau mekuu' pebunu' kuan pupu tau, idi kuan amung bawang Allah tau, pad Tuhan nganau' anun luk do' pa kiungNeh."

¹³Yoab idi amung anak itin luk maya' neneh ineh iné' pa atun sikal pebunu' nelun Siria. Idi lun Siria neburo.

¹⁴Kareb lun Amon nenier nelun Siria neburo, idi ideh pana' neburo rat pa kiung Abisai idi nesemuet bang bawang. Idi Yoab nelemubed rat nengelaya' nelun Amon, idi ieh nuli' iné' Yerusalim.

¹⁵Kareb lun Siria nekali' ideh pangeh linaya' lun Israil, idi ideh nepamung teh.

¹⁶Idi Raca' Hadadeser nengecuk amung lun Siria luk i dipar Abpa' Pirat ineh amé' neneh. Idi ideh nacing déi' Helam, dengan Sobak lun luk nguyut baweh Hadadeser ineh.

¹⁷Idi kareb bala ineh nekali' Daud, idi ieh nengamung amung lun Israil, idi guta Abpa' Yarden petacu iné' déi' Helam. Idi lun Siria ineh nengelalad amung bawehdeh pa atun Daud. Idi ideh nepebunu'.

¹⁸Iamo' lun Siria ineh neburo rat pa kiung lun Israil. Idi Daud dengan anak itinneh nengaté 700 lun luk ngimet keréta lun Siria, idi 40,000 lun maya' kuda. Meluun teh ideh nengurat Sobak lun rayeh baweh bunu'deh ineh, idi ieh naté déi'.

¹⁹Idi kareb amung raca' luk bang imet Hadadeser nekali' ideh linaya' lun Israil, idi ideh nepedo' nelun Israil idi mangun ku demulundeh. Idi lun Siria ineh matot ngedengan nelun Amon peh.

Semuil Luk Kedueh 11

¹Idi kareb kayuh pun kebusak, kareb amung raca' remuat amé' pebunu', idi Daud nengecuk ni Yoab idi amung lun rayehneh idi amung baweh lun Israil amé' ngelaya nelun Amon idi ngerieng bawang Raba. Iamo' Daud tudo déi' Yerusalem.

²Idi aceh alem Daud netumui rat su inanneh rudap idi iné' luun apo ruma'neh, idi ieh nenier rat déi' inan aceh decur uned diu'. Idi decur ineh do' taga.

³Idi Daud nengecuk nelun ngitun ku idé' decur ineh. Kebaladeh, "Ieh ini Batsiba Eliam, awan Uria lun Hiti ineh."

⁴Idi Daud nengecuk nelun amé' ngalap neneh. Idi decur ineh iné' neneh, idi Daud nepamung neneh. (Idi decur ineh uned ngeligan bururneh ratnan acing bulanneh.) Pangeh ineh idi ieh nuli'.

⁵Idi ieh mali'. Idi ieh nengecuk maré kali' ni Daud.

- ⁶Idi Daud nengecuk nelun amé' matun ni Yoab, kebalaneh, "Ngecuk Uria lun Hiti ineh amé' matun negku." Idi Yoab nengecuk Uria amé' neneh.
- ⁷Kareb Uria nacing, idi Daud nengitun ratnan ulun Yoab idi amung lun pebunu' teh, idi ratnan kudeng apeh bunu' ineh.
- ⁸Idi kebala Daud ni Uria, "Muli' iko idi ngato erurmu." Idi kareb Uria nenalan, idi Daud nengecuk nelun nguit aceh baré kuanneh.
- ⁹Iamo' Uria ineh na nuli'. Ieh netelubid munung tanga' ruma' raca' pad-pad dengan amung lun luk matar raca'.
- ¹⁰Idi kareb bala ineh nekali' Daud, idi kebala Daud ni Uria, "Mioké iko na nuli'? Ngudeh iko na muli'?"
- ¹¹Idi kebala Uria ni Daud, "Lun Israil idi lun Yahuda uned pebunu'. Idi Pati' Pejani' Tuhan pana' idi déi'. Idi teh lun rayehku Yoab idi amung lun tarehneh lupu déi' luun natad. Kudeng apehké ui miak semuet bang ruma'ku, idi kuman, ngirup, idi telubid dengan awanku? Ui pebulung ku ulunmu. Na tu-tu ui miak nganau' luk kudeng ineh!"
- ¹²Idi kebala Daud ni Uria, "Do' iko tudo tungé' aco sini teh. Idi nebpa ui nima' namu nalan." Idi Uria tudo déi' Yerusalim bang aco sineh idi kenebpa teh.
- ¹³Idi Daud nenawar neneh kuman, idi nengabuk neneh. Iamo' na Uria nuli' malem ineh teh. Iamo' ieh nerudap su luk inan amung lun luk matar raca'.
- ¹⁴Idi pekak kenebpa Daud nengayud aceh surat kuan Yoab, inuit Uria.
- ¹⁵Kebalaneh, "Ruenmu Uria ineh pa atun baweh, su luk inan mula' bunu'. Idi do' muyuh petetang rat neneh, pelé ieh pitayen."
- ¹⁶Idi kareb Yoab nengaro bawang, idi ieh nengerareng ni Uria su luk kali'neh mula' lun luk mesangit.
- ¹⁷Idi lun bang bawang ineh neremuat idi nepebunu' ni Yoab, idi nengaté tuda'-tuda' anak itin Daud. Idi Uria pana' naté.
- ¹⁸Idi Yoab nengecuk nelun ngacing bala kuan Daud, ratnan amung bunu' ineh.

¹⁹Idi balaneh kuan lun luk icuk ineh, "Kareb iko pangeh nemada' amung bala ratnan bunu' ineh kuan Raca' Daud,

²⁰kudeng Raca' Daud museh namu idi pebala namu, 'Ngudeh muyuh amé' muneng ku bawang ineh? Naké muyuh kali' na miak na lun ngelatik ku binor rat luun libung batu?

²¹Idéké luk nengaté Abimalek anak Yerub Beset atun? Naké seburur decur pangeh nengabpa aceh batu luunneh rat luun libung batu pad ieh naté' déi' Tibis? Ngudeh muyuh iné' pelaba uneng ku libung batu ineh?' Idi do' iko ngor, 'Lun dukenmu Uria lun Hiti ineh pana' naté teh.' “

²²Idi lun luk icuk ineh pana' nenalan idi iné' mada' ni Daud amung bala luk bida' Yoab neneh.

²³Idi kebalaneh ni Daud, "Lun ineh metueh rat nekai amung-amung. Idi ideh iné' matun nekai déi' natad, iamo' kai nengusu nedeh lemubed macing tanga' bawang ineh.

²⁴Idi ideh ngelatik nekai rat luun libung batu, pad tuda'-tuda' burur rat nekai naté. Idi teh lun dukenmu Uria lun Hiti ineh pana' naté.”

²⁵Idi kebala Daud kuan lun luk icuk ineh, "Ngubuk ni Yoab idi ngecuk neneh na megagau. Ngaceku tau na kali' idé' luk miak pitayen bang bunu'. Idi ngecuk neneh ngekgang bawehneh pad ngelaya' idi ngalap bawang ineh.”

²⁶Idi kareb Batsiba nekali' ratnan awanneh pangeh naté, idi ieh netemido neneh.

²⁷Idi kareb petap amung aco tido ineh, idi Daud nengecuk nguit neneh amé' bang ruma' raca', pad ieh ngaweh neneh. Idi Batsiba nenganak aceh anak deléi kuan Daud. Iamo' amung-amung luk pangeh inau' Daud ineh dat pa kiung Tuhan.

Semuil Luk Kedueh 12

¹Idi Tuhan nengecuk ni Natan amé' matun ni Daud. Idi ieh iné' neneh, kebalaneh, "Bang aceh bawang inan dueh burur, seburur lun do', seburur lun masi'.

²Idi lun do' ineh inan mula' sapi' idi dumba.

³Iamo' lun masi' ineh na luk idi. Iamo' sebuleng mo' anak dumba luk pangeh bilih isa'neh, pad ieh nengasa' neneh dengan anak bururneh sebuleng pana'. Idi ieh kuman akan rat neneh, idi ngirup ratnan sangkirneh, idi rudap bang abinneh. Idi ieh mepad kudeng anak decurneh.

⁴Idi inan aceh lun sakai nacing idi numak nelun do' ineh. Idi lun do' ineh na sikal ngeret aya'neh sebuleng kenen lun sakai ineh. Iamo' ieh nengalap dumba lun luk masi' ineh, kiratneh kikirid lun luk numak neneh."

⁵Idi Daud megateh nelun ineh. Idi kebalaneh ni Natan, "Ui pebulung ku ngadan Tuhan luk mulun, lun luk pangeh nenganau' luk kudeng ineh miak uen ngaté.

⁶Na miak na ieh maré apat anak dumba ku libal anak dumba ineh neneh. Ngaceku ieh pangeh nenganau' kudeng ineh, idi na méi'."

⁷Idi kebala Natan ni Daud, "Iko luk kudeng ineh. Idi ini bala Tuhan Allah lun Israil. Ui nengumau namu mangun ku raca' lun Israil, idi Ui nemuit namu rat bang palad Saul

⁸Imetneh idi awanneh biréKu namu. Ui nengikit namu mangun ku raca' Israil idi Yahuda. Idi kudeng ayuneh amung ini na petap, kali' rungen ui miak maré dueh kua' kinula'neh.

⁹Ngudeh iko nengelaba ukum Tuhan idi nenganau' luk dat? Iko nengecuk pad Uria pinaté. Iko nenima' nelun Amon ngaté neneh ku pelapet. Idi awanneh ilapmu ku awanmu.

¹⁰Idi nekini pelapet ineh na miak buro rat bang tetek ruma'mu, ngaceku iko nengelaba ukumKu, idi nengalap awan Uria.

- ¹¹Idi Ui pebulung, na miak na Ui ngacing susa' kuanmu rat bang tetek ruma'mu sebuleng. Idi Ui miak ngalap awan-awanmu rat pa kiungmu idi maré nedeh kuan lun baken, pad ieh pamung nedeh kareb macang aco.
- ¹²Iko nenganau' sala' dengan lulem. Iamo' Ui ngacing ukum ini pa kiung amung lun Israil, idi kareb macang aco.”
- ¹³Idi kebala Daud ni Natan, "Ui pangeh mesala' pa kiung Tuhan." Idi kebala Natan ni Daud, "Tuhan maré do' namu, pad iko na maté
- ¹⁴Iamo' ngaceku dengan kekamenmu ini iko nengedat Tuhan, anakmu miak maté.”
- ¹⁵Idi Natan nuli'. Idi Tuhan nengacing aceh ét kuan anak luk tinganak awan Uria ineh kuan Daud.
- ¹⁶Idi Daud nemutuh Allah ngedo' anak ineh. Idi ieh mawa'; idi anid alem ieh nesemuet bang takepneh idi tekulub luun tana' kedangan-kedangan.
- ¹⁷Idi lun tarehneh iné' matun raca' sikal ngiding neneh rat luun tana'. Iamo' na ieh sikal. Idi teh na ieh sikal kuman.
- ¹⁸Idi aco luk ketudu' anak ineh naté. Idi lun tareh Daud matot mada' bila ineh neneh. Ngaceku kebaladeh, "Kareb anak ineh mulun, na ieh sikal ngor bala tau. Kudeng apeh tau mada' neneh ratnan anakneh naté! Kian napeh ieh meraruh niat lek.”
- ¹⁹Kareb Daud kali' nedeh payek-payek seburur dengan seburur, idi ieh kali' anak ineh pangeh naté. Idi kebalaneh nedeh, "Pangehké anak ineh naté?" Idi kebaladeh, "Pangeh.”
- ²⁰Idi Daud nudur rat luun tana' idi nediu' idi nemabpa. Idi ieh nengelibal ayungneh. Pangeh ineh ieh nesemuet bang ruma' Tuhan idi nesembayang. Kareb ieh nuli', idi ieh nemutuh akan. Idi ieh nekuman.
- ²¹Idi kebala lun tarehneh neneh, "Kudeng apehké luk inau'mu ini? Ngaceku kareb anak ineh mulun, iko mawa' idi nangi'. Pangeh anak ineh naté, idi iko netumui idi petacu kuman.”

²²Idi kebala raca', "Mo, inan peh ui mawa' idi nangi' kareb anak ineh mulun, keterawéku, 'Idé kali', kian Tuhan méi' negku idi ngulun anak ineh baruh lek?'

²³Iamo' nekini anak ineh pangeh naté. Anun punku mawa' peh? Miakké ui ngalap neneh teh? Setuneh mucu ui amé' neneh. Iamo' na ieh miak lemubed amé' negku."

²⁴Idi Daud nengubuk ni Batsiba awanneh ineh. Idi ieh iné' pamung neneh. Idi Batsiba nenganak aceh anak deléi luk titenneh Selimun. Idi Tuhan pana' mawa nan anak ineh.

²⁵Idi Ieh nengecuk Nabi Natan neten ngadanneh, "Inan Tuhan Mawa."

²⁶Idi Yoab nemunu Raba teh bawang lun Amon. Idi ieh nengelaya' bawang raca' ineh.

²⁷Idi ieh nengecuk tuda'-tuda' lun duken amé' mada' ni Daud, kebalaneh, "Ui pangeh nemunu' Raba, idi ui pangeh nengelaya' bawang luk tangeb abpa' ineh.

²⁸Idi nekini do' iko ngamung amung-amung anak itin luk ketecan ineh idi ngelibut bawang ineh, idi do' iko sebuleng ngelaya' neneh. Ui na pian ngelaya' bawang ineh, pad ngadanku na mebala ku ineh."

²⁹Idi Daud nengamung amung anak itin ineh, idi nenalan iné' Raba. Idi ieh nemunu' bawang ineh idi nengelaya' neneh.

³⁰Idi Daud nengalap pata amas ratnan uluh akang Milkom ineh, kiberatneh lélé 57 kati. Idi luunneh inan aceh batu luk meraga luk rireng Daud luun uluhneh sebuleng. Idi teh raca' nenguit mula' binaweh rat bang bawang ineh.

³¹Idi ieh nenguit amung lun bang bawang ineh amé' ngakem ku radi', sakol, idi uai, pad ideh ngelebping batu. Kudeng ineh luk inau'neh bang amung bawang lun Amon. Pangeh ineh idi Daud dengan amung anak itinneh nuli' iné' Yerusalim.

Semuil Luk Kedueh 13

- ¹Idi Absalom Daud inan aceh kinanak decurneh luk metaga, ngadanneh Tamar. Idi Amnon Daud mawa neneh.
- ²Idi Amnon pelaba geregan pad ieh mét ratnan ngerawé Tamar kinanakneh ineh. Ngaceku Tamar anak luk pun mebaruh. Idi bang terawé Amnon na miak nganau' anun-anun neneh.
- ³Iamo' Amnon inan aceh rurunneh, ngadanneh Yonadab ineh lun luk mileh ku ileh luk bang tana' ini.
- ⁴Idi kebalaneh ni Amnon, "Iko ineh anak raca', ngudeh anid-anid pekak iko iuk-iuk mesusa' niat? Do' maré kali' negku?" Kebala Amnon neneh, "Ngaceku ui mawa ni Tamar kinanak decur Absalom kinanakku."
- ⁵Idi kebala Yonadab neneh, "Do' iko telubid su luk inanmu rudap idi siét. Idi kareb i tamam amé' ngikak namu, do' iko pebala, 'Maré kinanakku Tamar ineh amé' maman negku ku pinaram luk ruenneh su sirenku.' "
- ⁶Idi Amnon netelubid idi siét. Kareb raca' iné' ngikak neneh, idi kebala Amnon neneh, "Ngecuk kinanakku Tamar ineh amé' tungé' nganau' dueh balad pinaram su sirenku, pelé ui kuman luk barénneh."
- ⁷Idi Daud nengecuk nelun amé' mada' ni Tamar kebalaneh, "Do' iko amé' bang ruma' kinanakmu Amnon, nganau' akan kuanneh."
- ⁸Idi Tamar iné' bang ruma' Amnon kinanakneh. Idi Amnon telubid luun bitaranneh. Idi Tamar nengalap banak luk rinabur, idi ieh nenganau' pinaram su sirenneh.
- ⁹Idi ieh nengiding periuk, idi nengado neneh pa kiung Amnon. Iamo' ieh ara' kuman. Idi kebala Amnon, "Ngecuk amung lun remuat rat pa kiungku." Idi amung lemulun neremuat rat bang takepneh.
- ¹⁰Idi kebala Amnon ni Tamar, "Amu', do' iko nguit akan ineh amé' iringku, pelé' ui miak kuman luk barénmu." Idi Tamar nengalap pinaram luk pangeh inau'neh ineh, idi iné' iringneh.

- ¹¹Kareb ieh nemaré pinaram ineh neneh, idi Amnon nengakem neneh, kebalaneh, "Do' iko pamung lubid negku."
- ¹²Iamo' kebala Tamar, "Aleg nganau' luk kudeng ineh, aleg ngesaad negku. Dat kekamen ineh!
- ¹³Kudeng apeh ui ngapung igu'ku? Idi iko sebuleng pana' migu' pa kiung lun Israil. Do' iko mutuh teh luk pianmu ratnan raca'. Kali' rungen na ieh ngibpang namu."
- ¹⁴Iamo' Amnon na sikal ninger balaneh. Idi ngaceku ieh meluun tueh, idi ieh nengesaad neneh, idi nepamung neneh.
- ¹⁵Pangeh ineh idi Amnon megateh neneh. Gatehneh ineh meluun ratnan awaneh luk atun. Kebalaneh neneh, "Buro iko!"
- ¹⁶Iamo' kebala Tamar, "Aleg kudeng ineh, ngaceku dat ini meluun rayeh ratnan dat luk pangeh inau'mu kuanku ineh." Iamo' nateh ieh sikal ninger balaneh.
- ¹⁷Idi ieh nenawar lun dukenneh sebuleng, kebalaneh, "Nala' decur ini nekini rat negku. Idi malin tanga' raben-raben!"
- ¹⁸Idi Tamar ineh nengayung ku kuyu' luk kadang langen. Ngaceku kudeng ineh ayung amung anak raca' luk anak adi'. Idi lun duken Amnon ineh pana' nenated neneh neremuat. Idi ieh nemalin tanga' ineh.
- ¹⁹Idi Tamar nenganau' abuh luun uluhneh. Idi ieh nenarak kuyu'neh, idi ieh nengerareng ticu'neh luun uluhneh idi nenalan dengan nangi'.
- ²⁰Idi kebala Absalom kinanakneh luk rayeh neneh, "Inanké Amnon kinanakmu nepamung namu? Ungeng mo', ngaceku ieh kinanakmu. Aleg pelaba susa' niat." Idi i Tamar tudo buleng-buleng dengan mesusa' niat bang ruma' Absalom.
- ²¹Kareb raca' Daud nekali' bala ini, idi ieh pelaba useh.

²²Iamo' Absalom na pebala ni Amnon ratnan luk do' idi luk dat. Iamo' Absalom megateh ni Amnon, ngaceku ieh pangeh nengesaad ni Tamar kinanakneh luk isuut.

²³Idi pangeh dueh lak Absalom muting buluh dumba déi' Baal Hasor muneng ku Epraim. Idi Absalom nenawar amung anak raca'.

²⁴Idi Absalom iné' papu' raca', kebalaneh, "Ui uned muting buluh dumba. Idi do' iko idi lun dukenmu maya' negku."

²⁵Iamo' kebala raca' ni Absalom, "Na kai amé' amung, Asi, pad kai na maré susa' namu." Idi ieh nengubuk tamanneh. Iamo' nateh ieh sikal amé'. Iamo' raca' nepetabi' neneh.

²⁶Idi kebala Absalom, "Kudeng iko na amé', idi do' maré Amnon kinanakku amé' maya' nekai." Idi kebala raca' neneh, "Amé' ngudeh ieh maya' nemuyuh?"

²⁷Iamo' Absalom nengubuk neneh pad ieh nemaré Amnon idi amung anak raca' amé' maya' neneh. Idi Absalom nenganau' aceh irau luk petulu kuan raca'.

²⁸Idi kebalaneh kuan lun dukenneh, "Matar do'-do' kareb Amnon mabuk. Kareb ui ngecuk, do' muyuh ngaté neneh. Aleg matot. Ngaceku ui sebuleng mabeh ineh. Do' muyuh metueh idi mekuu!"

²⁹Idi lun duken ineh nengaté ni Amnon maya' kudeng luk bida' Absalom nedeh. Idi amung anak raca' nupun buro maya' keladaideh.

³⁰Idi laba' ideh nalan, bala ini nacing ni Daud, ratnan Absalom pangeh nengaté amung anak raca'. Seburu pana' nateh luk inuluneh.

³¹Idi raca' nudur idi nenarak ayungneh idi netelubid luun tana'. Idi amung lun duken raca' pana' netuped idi nenarak ayungdeh teh.

³²Iamo' kebala Yonadab anak Simia kinanak Daud, "O raca', aleg iko ngerawé amung anak raca' pangeh pinaténeh. Iamo' Amnon mo' luk naté. Ngaceku megala' kekamen ini pangeh litep Absalom rat aco ieh nengesaad kinanakneh Tamar.

³³Aleg iko pelaba susa' ngerawé amung-amung anak raca' pangeh naté. Ngaceku Amnon mo' luk pinaté.”

³⁴Iamo' Absalom neburo. Idi lun pebunu' luk nginita ineh netukag. Idi ieh nenier mula' lun macing maya' dalam luk pa ketedneh rat bal pegkung.

³⁵Idi kebala Yonadab kuan raca', "Nier amung anakmu macing, kudeng balaku namu.”

³⁶Idi kareb ieh pangeh nepebala, amung anak raca' nacing, idi ideh nenangi'. Kudeng ineh teh raca', idi amung lun dukenneh pana' nangi' teh.

³⁷Idi Absalom neburo idi iné' ni Talmai Amihud, raca' Gesur. Iamo' Daud temido anakneh Amnon anid-anid aco.

³⁸Idi Absalom netudo déi' Gesur teluh lak kinioneh.

³⁹Idi Raca' Daud geregan sikal papu' ni Absalom. Ngaceku ieh pangeh inubuk ratnan Amnon luk naté ineh.

Semuil Luk Kedueh 14

¹Idi Yoab anak Seruya nekali' ratnan raca' megéi ngerawé ni Absalom.

²Idi Yoab nengecuk amé' déi' Tekoa, idi nguit rat déi' seburur decur luk mileh. Idi ieh nepebala neneh, "Do' iko sidat niat idi ngayung ku kibung luk ku nacung. Aleg iko mabpa. Iamo' siayu kudeng decur luk mio nacung.

³Idi do' iko amé' papu' raca' idi mada' bala ini kuanneh." Idi kudeng ineh Yoab nemada' bala luk badénneh kuan raca'.

⁴Idi decur rat Tekoa ineh netekeradung pa kiung raca', kebalaneh, "O raca', nengan negku.”

⁵Idi raca' Daud nengitun neneh, "Anun susa'mu?" Idi kebalaneh, "Ui ini seburur decur tinula'. Awanku pangeh naté.

⁶Idi ui inan dueh anak deléi. Idi didueh ineh pekedaluh bang pulung. Idi seburur lun baken pana' nateh luk miak matad nedidueh. Idi seburur nenecat seburur pad ieh naté.

⁷Idi nekini amung pupuku museh negku, kebaladeh, 'Nguit léi luk nengaté kinanakneh ineh, pelé kai miak ngaté neneh ku libal kinanakneh luk pangeh pinaténeh.' Idi kudeng ineh teh ideh pian ngaté inulku luk ketecan, pad ngadan awanku na idi luun tana' ini ngaceku na inul."

⁸Idi kebala raca', "Muli' iko. Ui miak nganau' luk petulu kuanmu."

⁹Idi kebala decur ineh, "O raca', nima' negku, idi uang tetek ruma' tamanku mabeh sala' ini. Iamo' do' iko idi kerusi imetmu meligan ratnan sala'."

¹⁰Idi kebala raca', "Idé-idé luk ngedureng namu, nguit neneh amé' negku, pad ieh na mekuel namu."

¹¹Idi kebala decur ineh, "Do' iko nawar Tuhan Allahmu pelé lun luk ngua' até ineh na ngaté, pad anakku na pitayen." Idi kebala raca' Daud, "Ui pebulung ku ngadan Tuhan luk mulun, sengurat abpuk pana' nateh mebubput ratnan uluh anakmu."

¹²Idi kebala decur ineh, "Maré negku mada' sebila' bala teh kuanmu." Idi kebala raca', "Mada' mo'."

¹³Idi kebala decur ineh, "Ngudehké iko nganau' sala' luk kudeng ineh pa kiung amung pupu Allah? Ngaceku na iko maré anak luk tila'mu ineh lemubed. Idi iko nengedat bururmu sebuleng ku bala luk bilamu ina di.

¹⁴Idi kareb tau maté amung tau mepad kudeng abpa' luk inutang luun tana' luk na miak uen ngamung baruh. Iamo' Allah na nui lemulun luk pangeh naté, iamo' raca' miak nakap dalan, pad lun luk inusuneh miak lemubed.

¹⁵Idi ui ini macing mada' amung bala ini kuanmu, ngaceku lun mula' ineh pangeh nengatot negku. Idi keterawéku, 'Do' ui amé' mada' lawé ineh kuan raca'. Kian raca' miak ninger balaku lek.

¹⁶Ui nengerawé raca' miak ninger balaku idi miak muit negku rat nelun luk sikal ngaté negku idi anakku pad kai talan ratnan tana' luk biré Allah kuan pupuNeh.

¹⁷Idi keterawéku, 'Bala raca' miak ngawang niatku'; ngaceku iko mepad kudeng seburur malaikat Allah miak kali' do' idi dat. Do' Tuhan Allahmu ngedengan namu!"

¹⁸Idi kebala raca', "Aleg iko ngapung anun-anun luk tuninku namu." Idi kebala decur ineh, "Do' iko pebala."

¹⁹Idi raca' nengitun, "Inanké Yoab nengecuk namu nganau' kudeng ini?" Kebala decur ineh, "Ui pebulung ku ulunmu, O raca', ui na miak na ngor balamu ineh. Setuneh lun dukenmu Yoab nengecuk negku mada' amung bala ini luk bida'ku namu.

²⁰Ieh nenganau' kudeng ini pad terawému misu'. Iamo' iko mileh mepad kudeng seburur malaikat Allah, idi miak kali' amung-amung luk mangun bang tana' ini."

²¹Pangeh ineh raca' nepebala ni Yoab, "Ui maya' luk bilamu. Amé' iko ngalap ni Absalom anak adi' ineh lemubed."

²²Idi Yoab netekeradung pa kiung raca' idi nengerayeh neneh. Idi kebala Yoab, "Idi aco sini teh ui kali' iko méi' negku, O raca'ku, ngaceku iko luk nemaya' balaku ini."

²³Idi Yoab nenalan iné' Gesur, idi nenguit ni Absalom iné' Yerusalim.

²⁴Iamo' kebala Raca' Daud, "Do' ieh muli' amé' ruma'neh. Aleg ieh amé' papu' negku." Idi Absalom tudo bang ruma'neh sebuleng. Na ieh iné' papu' raca'.

²⁵Idi arang amung lun Israil seburur pana' nateh luk metaga kudeng Absalom. Rat buduk uluhneh macing iang daparneh nateh luk langen neneh.

²⁶Idi anid-anid udung lak ieh muting abpukneh ngaceku abpukneh meberat. Idi berat abpukneh ineh mela apat kati.

²⁷Idi Absalom inan teluh anak deléi, idi sebuleng decur luk do' taga, ngadanneh Tamar.

²⁸Idi dueh lak Absalom tudo déi' Yerusalim, idi na ieh nepapu' raca'.

²⁹Ngaceku ineh Absalom nengecuk nawar ni Yoab, pad Yoab miak nguit bala kuan raca'. Iamo' na Yoab sikal amé'. Idi ieh nengecuk nawar neneh sekedueh kua'. Nateh ieh sikal amé'.

³⁰Idi kebala Absalom nelun dukenneh, "Tana' Yoab ineh pelengit ku tana'ku. Idi ieh inan ikun déi'. Amé' muyuh nutung ineh." Idi lun duken Absalom nenutung lati' ineh.

³¹Idi Yoab iné' ni Absalom déi' ruma'neh. Idi ieh nengitun neneh, "Ngudeh lun dukenmu nenutung lati'ku?"

³²Idi Absalom nengor balaneh, "Ui nengecuk nawar namu, pad ui ngecuk namu amé' papu' Raca' Daud idi ngitun anun punneh ui pangeh nacing rat Gesur? Meluun do' ui netudo déi'. Idi punku pian papu' raca'. Idi kudeng inan anun-anun sala' negku, do' ieh ngaté negku."

³³Idi Yoab iné' matun Raca' Daud idi nemada' neneh. Idi Daud nenawar ni Absalom. Idi Absalom iné' matun raca' idi netekeradung pa kiungneh. Idi raca' Daud nemuen neneh.

Semuil Luk Kedueh 15

¹Muci ratnan ineh Absalom nengalap keréta idi tuda'-tuda' kuda, idi teh limeh ngepulu' burur luk upun pa atunneh.

²Idi anid-anid pekak Absalom kulat uka-uka idi tuper iring dalan munung tanga' bawang. Idi ieh nenawar anid-anid lemulun luk pian amé' matun raca', pad ieh mutut ukum kuanneh, kebalaneh, "Iapeh bawangmu?" Kareb ieh neten ngadan pupuneh, "Ui ini rat bawang ini idi rat bawang Israil,"

³Idi kebala Absalom neneh, "Putuhmu ineh matu idi do'. Iamo' rat pa babpat raca' seburur pana' nateh lutep ninger balamu."

⁴Idi teh kebala Absalom, "Meluun do' ui mangun ku lun mutut besara' bang bawang ini, pad anid-anid lemulun luk inan besara' amé' negku, pad ui mutut luk petulu kuanneh."

- ⁵Idi kareb lun macing tekeradung neneh, idi ieh natang langenneh idi petabi' idi muen neneh.
- ⁶Kudeng ineh luk inau' Absalom dengan amung lun Israil luk macing mutuh raca' mutut ukum. Idi Absalom nengeruid niat lun Israil maya' neneh.
- ⁷Idi pangeh apat lak, idi kebala Absalom kuan Raca' Daud, "Do' iko maré negku amé' déi' Hebron ngacing jani' luk pangeh pijani'ku kuan Tuhan.
- ⁸Ngaceku kareb ui tudo déi' Gesur bang bawang Aram, ui nepejani', kebalaku, 'Kudeng Tuhan nguit negku amé' Yerusalim, idi ui miak ngubur Tuhan déi' Hebron.' “
- ⁹Idi kebala raca' neneh, "Amé' iko dengan do'." Idi Absalom nenalan iné' Hebron.
- ¹⁰Iamo' ieh nengecuk tuda'-tuda' lun duken amé' dengan lulem kuan amung inul pupu lun Israil, pad mada', "Kareb muyuh ninger uni serupit, do' muyuh pebala, 'Absalom pangeh mangun ku raca' déi' Hebron!' “
- ¹¹Idi inan 200 burur luk tinawar maya' ni Absalom rat Yerusalim. Idi amungdeh iné' dengan do' niat, ngaceku na ideh kali' ratnan luk tirawé Absalom ineh.
- ¹²Laba' ieh maré baréneh idi Absalom nengecuk nawar Ahitopel lun Gilo, tareh Daud. Idi aketdeh ineh iuk amé' rayeh ngaceku lun luk maya' ni Absalom ineh luk amé' mula'.
- ¹³Idi nacing seburur luk nguit bala iné' ni Daud, kebalaneh, "Amung lun Israil perurum ni Absalom pian maya' neneh.”
- ¹⁴Idi kebala Daud kuan amung lun tareh luk idi denganneh déi' Yerusalim, "Mudur muyuh amung. Do' tau upun buro. Ngaceku na dalan baken inan tau mepuit rat ni Absalom. Saget muyuh nalan, pad ieh na ngigket netau idi ngedereh netau, idi ngaté amung lun bang bawang ini.”
- ¹⁵Idi kebaladeh, "Mo, amung balamu kai maya'.”

- ¹⁶Idi Raca' Daud neburo dengan lun tarehneh idi amung uang tetek ruma'neh. Iamo' ieh nenecan pulu' burur lun apidneh nginita ruma'.
- ¹⁷Idi raca' neremuat. Idi lun mula' ineh nemaya' neneh. Idi ideh nucu' déi' ruma' luk kekiped.
- ¹⁸Idi amung lun tarehneh netuped iringneh kareb amung lun luk matar raca' nelemaba neneh idi iné' pa atunneh. Idi 600 burur anak itinneh luk nemaya' neneh rat Gat nelemaba raca' idi nenalan pa atun teh.
- ¹⁹Idi kebala raca' kuan Itai luk lun rayeh lun Gat ineh, "Ngudeh iko amé' maya' nekai. Do' amé' idi tudo dengan raca' luk mebaruh. Ngaceku iko ini lun sakai luk pangeh nenecan bawangmu sebuleng.
- ²⁰Iko nacing baruh. Miakké ui nguit namu lawé-lawé maya' nekai? Ngaceku ui na kali' iapeh ulekku. Iamo' do' iko lemubed idi nguit kinanak-kinanakmu ineh maya' namu. Idi do' Tuhan ngegala' awaNeH luk lutep kuanmu."
- ²¹Iamo' kebala Itai, "Ui pebulung ku ngadan Tuhan luk mulun, idi iapeh pana' ulekmu, ui sikal amé', sagan pana' maté."
- ²²Idi kebala Daud ni Itai, "Kudeng pieh kudeng ineh, amé' iko nalan pa atunku." Idi Itai lun Gat ineh idi amung lun dieh macing ku amung anak-anak pana' luk pebaya' neneh ineh nenalan atun.
- ²³Idi amung lun bang bawang luk libadeh ineh nangi'. Idi Raca' Daud neguta Abpa' Kidron. Idi amungdeh ineh pana' guta idi nemaya' dalam amé' su luk ali-ali.
- ²⁴Idi Saduk pana' idi déi', idi amung lun Liwi pana' luk maya' neneh mirir Pati' Pejani' Allah ineh, idi ideh nengerareng Pati' pejani' ineh iring Abiatar, pad amung lun ineh nabud neremuat rat bang bawang.
- ²⁵Idi kebala Raca' Daud ni Saduk, "Iten muyuh Pati' Pejani' Allah ineh lemubed amé' bang bawang. Kudeng Tuhan méi' negku, Ieh miak ngelubed negku mucu, idi Ieh miak maré negku nier ineh, idi su luk inanneh pana'.

- ²⁶Iamo' kudeng Ieh na pian negku, idi ui temina' nima' Neneh nganau' kuanku anun luk do' su sirenNeh.”
- ²⁷Idi teh kebalaneh ni Saduk luk imam ineh, "Do' iko idi Abiatar lemubed amé' bang bawang dengan do'. Kudeng ineh teh dueh anak medueh Ahimas anakmu, idi Yonatan anak Abiatar teh maya' nemedueh.
- ²⁸Idi ui miak nganét déi' su gitan luk metutun déi' su luk ali-ali, pad muyuh miak maré bala kuanku.”
- ²⁹Idi Saduk idi Abiatar nenguit Pati' Pejani' Allah ineh lemubed amé' déi' Yerusalim. Idi didueh tudo déi'.
- ³⁰Idi Daud nuké Pegkung Saitun, idi nangi' idi nengebpu uluhneh. Idi ieh nenalan kukud tekelala. Idi amung lun luk nemaya' neneh ineh pana' nengebpu uluhdeh. Idi ideh mudik, dengan nangi'.
- ³¹Idi kebaladeh ni Daud, "Ahitopel pana' idi arang lun rurum Absalom." Idi kesembayang Daud, "O Tuhan ngisu' bala Ahitopel, pad balaneh mebacé!”
- ³²Idi kareb Daud pangeh nacing luun buduk surud su luk inan sembayang inan Allah, idi Usai lun Arki ineh nepapu' neneh luk ngayung ku ayung luk nedarak. Idi abuh pana' inan luun uluhneh.
- ³³Idi kebala Daud neneh, Kudeng iko nalan maya' negku, kali' rungen iko ngesusa' negku mucu.
- ³⁴Iamo' kudeng iko lemubed amé' bang bawang, idi iko pebala kuan Absalom, 'Ui mangun ku lun dukenmu, O raca', mepad kudeng ui lun duken tamanmu atun.' Dengan luk kudeng ineh iko miak ngisu' kuanku bala Ahitopel ineh.
- ³⁵Saduk idi Abiatar imam ineh idi denganmu déi'. Idi amung luk nekali'mu bang ruma' raca' ineh miak uenmu ngegala' nedidueh.
- ³⁶Idi dueh anak didueh idi déi'. Idi do' iko ngecuk nedidueh nguit amung bala luk pangeh pindengermu ineh.”
- ³⁷Idi Usai lun rurum Daud ineh nacing bang bawang ineh, kareb Absalom nacing déi' Yerusalim.

Semuil Luk Kedueh 16

¹Kareb Daud pangeh neremuru sekamu' rat luun buduk surud ineh, idi ieh nepapu' ni Siba lun duken Mepiboset ineh dengan dueh keladai luk inan apin, luk inanneh nipa dueh ngeratu balad ruti, kireng anggur meratu tanga, bua' gita' meratu tanga, idi abpa anggur aceh seréi.

²Idi kebala raca' ni Siba, "Ngudeh iko nguit binaweh ini?" Idi kebala Siba, "Keladai ini ku pakai lun bang ruma' raca'. Ruti idi bua' ini miak kenen amung lun duken raca'. Idi abpa' anggur rupen lun luk merur déi' su luk ali-ali."

³Idi kebala raca', "Iapehké anak tuanmu?" Idi kebala Siba kuan raca', "Ieh tudo déi' Yerusalim. Ngaceku kebalaneh, 'Aco sini teh lun bang uang tetek ruma' Israil miak maré imet raca' lemubed kuanku.' "

⁴Idi kebala raca' ni Siba, "Amung-amung luk Mepiboset kuan iko kuan." Kebala Siba, "Ui ngerayeh namu. Do' iko méi' negku, O raca'."

⁵Kareb Raca' Daud nacing déi' Bahurim, neremuat seburur deléi rat bang tetek ruma' Saul, ngadanneh Simi Gira. Idi ieh iné' ngediman raca'.

⁶Idi ieh nemitung ni Daud idi lun tarehneh pana' ku batu, sagan tu pana' ieh linibut bawehneh idi lun matar neneh.

⁷Idi Simi nengediman neneh, kebalaneh, "Buro iko, O iko luk ngeruat dara', idi lun luk dat:

⁸Tuhan ngukum namu ngaceku iko nengaté nelun bang tetek ruma' Saul, idi iko nengaro imetneh. Idi nekini Tuhan pangeh nemaré imet ineh bang palad anakmu Absalom. Iko bang dereh ini ngaceku iko nengaté lemulun."

⁹Idi kebala Abisai anak Seruya kuan raca', "Ngudeh uko' naté ini ngediman namu? Nima' negku amé' ngaleb neneh."

¹⁰Iamo' kebala raca' ni Abisai, "Na ini kekamenmu. Nima' neneh ngediman negku. Kudeng ieh icuk Tuhan, idéké miak ngitun, 'Ngudeh iko nganau' kudeng ineh?' "

¹¹Idi teh kebala Daud ni Abisai idi lun tarehneh, "Kudeng anak bururku sebuleng pian ngaté negku, meluun teh lun Benjamin ini. Nima' neneh ngediman negku, ngaceku ieh icuk Tuhan lek.

¹²Kian, Tuhan nier derehku lek idi Ieh miak ngua' do' kuanku ku libal kedimanneh."

¹³Daud idi anak itinneh nenalan teh. Idi Simi pana' nenalan maya' iring surud luk petutup ni Daud dengan ngediman idi mitung neneh ku batu idi abuh.

¹⁴Idi raca' nucu' déi' Abpa' Yarden dengan amung anak itinneh. Ngaceku ideh pelaba erur.

¹⁵Absalom idi amung lun Israil nacing déi' Yerusalim. Idi Ahitopel pana' nemaya' nedeh.

¹⁶Kareb Usai luk rurum Daud ineh nepapu' ni Absalom, kebalaneh, "Do' raca' mipu ulun!"

¹⁷Iamo' kebala Absalom ni Usai, "Iniké awamu inan rurummu? Ngudeh iko na amé' maya' rurummu ineh?"

¹⁸Idi kebala Usai ni Absalom, Na tu! Ui maya' nelun luk pinili' Tuhan idi anak itin ini dengan amung lun Israil. Ui pian maya' namu.

¹⁹Idi idé teh inanku maré bururku? Naké kuan anak raca'? Mepad kudeng ui pangeh nengakem kuan i tamam, kudeng ineh teh ui miak ngakem kuanmu."

²⁰Idi kebala Absalom ni Ahitopel, "Do' iko mada' anun luk petulu ruen tau."

²¹Idi kebala Ahitopel ni Absalom, "Do' iko pamung dengan amung apid i tamam, luk pangeh ticanneh nginita bang ruma', pad amung lun Israil miak kali' namu mangun ku bunu' i tamam. Idi teh anak itinmu metueh."

²²Idi ideh nemudut aceh lepo kuan Absalom luun apo ruma'. Idi ieh nepamung dengan amung apid tamanneh, pa kiung amung lun Israil.

²³Idi kareb ineh bala luk biré Ahitopel ineh bén Daud idi Absalom mepad kudeng bala Allah.

Semuil Luk Kedueh 17

- ¹Kebala Ahitopel ni Absalom, "Nima' negku mili' 12,000 burur pad ui ngerada' ni Daud bang dacem ini teh,
- ²pelé ui ngigket neneh kareb ieh merur idi melaya' burur. Idi ui miak ngagap neneh pad amung anak itin luk maya' neneh ineh buro. Idi ui miak ngaté burur raca' sebuleng.
- ³Idi amung anak itinneh uenku ngelubed kuanmu, mepad kudeng decur luk pian paweh amé' inan awanneh sebuleng. Iko nakap seburur mo' luk miak pitayenmu, idi amung lun mula' ineh miak uen ngulun."
- ⁴Idi matu bala ineh pedingeren Absalom idi amung lun rayeh Israil.
- ⁵Kebala Absalom, "Darin muyuh Usai. Do' tau ninger anun luk belénneh."
- ⁶Kareb Usai nacing, idi kebala Absalom neneh, "Kudeng ini bala Ahitopel. Do' tau maya' balaneh, kian na lek? Do' iko mada' nekai."
- ⁷Idi kebala Usai, "Bala luk bila Ahitopel sekua' ini na do.
- ⁸Iko kali' ni tamam idi anak itinneh teh lun mesangit mepad kudeng beruang tineh luk neraruh anak. Idi teh i tamam seburur luk pekalai pebunu', idi na ieh rudap dacem dengan amung anak itinneh.
- ⁹Nekini ieh sigapung bang aceh lubang batu lek, kian bang aceh luk inan baken. Kareb Daud ngerieng bawehmu idi idé-idé luk ninger bala ineh miak pebala, "Anak itin Absalom pangeh linaya'.
- ¹⁰Idi lun luk mekuu' mepad kudeng balang pana' miak matot. Ngaceku amung lun Israil pangeh nekali' ratnan lawé i tamam, ieh aceh lun luk mesangit. Idi teh amung lun luk maya' neneh ineh mekuu'.
- ¹¹Iamo' ui ngerawé, do' iko mesaget ngamung amung lun Israil rat Dan suet déi' Birsiba mepad kinula' bada i tangeb abpa'. Idi do' iko sebuleng teh nguyut nedeh amé' pebunu'.
- ¹²Idi amung tau ngerieng ni Daud su apeh pana' ulekneh, mepad kudeng ipup luk mebpeh luun tana', pad Daud idi amung anak itinneh pana' maté.

¹³Idi kudeng ieh buro amé' bang aceh bawang rayeh, do' amung lun Israil nguit nuper amé' bang bawang ineh. Idi tau miak ngusag bawang ineh, pad sebuleng batu isuut pana' nateh luk ketecan luun surud ineh."

¹⁴Idi kebala Absalom idi amung lun Israil ineh, "Bala Usai ineh meluun do' ratnan bala Ahitopel." Iamo' Tuhan pangeh nengeletep kudeng ineh, ngaceku Ieh pian ngisu' bala Ahitopel luk do' ineh pad Tuhan ngacing dereh kuan Absalom.

¹⁵Idi Usai nemada' ni Saduk idi Abiatar didueh imam ineh ratnan bada'neh ni Absalom idi lun rayeh Israil, idi teh ratnan bada' Ahitopel ni Absalom.

¹⁶Idi kebala Usai, "Do' medueh miket mebpeng ni Daud na rudap malem iring gitan luk déi' su luk ali-ali. Iamo' do' ieh saget guta pad ieh idi anak itinneh na kamen idi pitayen."

¹⁷Yonatan Abiatar idi Ahimas Saduk ineh nenganét déi' Enrogel. Idi seburur anak adi' decur megéi' ngacing bala kuan didueh, pad didueh miak amé' mada' bala ineh kuan Raca' Daud. Ngaceku na didueh miak silagan bang bawang.

¹⁸Iamo' seburur anak deléi nekali' nedidueh, idi ieh nemada' ni Absalom. Idi didueh nenalan dengan mesaget idi nacing ruma' seburur lun déi' Bahurim luk inan aceh subuk i natadneh. Idi didueh iné' bang subuk ineh.

¹⁹Idi decur ineh nengalap kakebneh idi nengakeb munung subuk ineh. Idi ieh nengakar padé luk uenneh midang, pad seburur pana' na miak kali' nedidueh bang ineh.

²⁰Idi lun duken Absalom nacing ngitun decur ineh bang ruma'neh, kebaladeh, "Iapehké Ahimas idi Yonatan ineh?" Idi kebala decur ineh nedeh, "Didueh pangeh neguta arur ineh." Idi ideh iné' nakap nedidueh idi na luk nekali'deh. Idi ideh nelemubed iné' Yerusalim.

²¹Kareb ideh pangeh nuli' idi didueh neremuat rat bang subuk ineh idi nenalan iné' mada' bala kuan Raca' Daud, kebala didueh, "Do' iko nalan idi

guta abpa' dengan mesaget. Ngaceku kudeng ini bala Ahitopel ratnan lawému.”

²²Idi Daud neguta Abpa' Yarden dengan anak itinneh. Idi kareb aco masat seburur pana' nateh luk neketecan luk na neguta Abpa' Yarden ineh.

²³Idi kareb Ahitopel ineh nekali' ratnan ideh na nemaya' balaneh, idi ieh nengerareng apin luun keted keladaineh idi nuli'. Kareb ieh pangeh neperiteteng kuan uang tetek ruma'neh, idi ieh neperieret pad ieh naté. Idi ieh tinanem bang tanem tamanneh.

²⁴Daud pangeh nacing déi' Mahanaim kareb Absalom neguta Abpa' Yarden dengan amung anak itinneh.

²⁵(Idi Absalom pangeh nengikit Amasa ku lun rayeh baweh libal Yoab. Idi Amasa ineh anak Itera lun Ismail luk pangeh nengaweh Abigail anak Nahas, kinanak Seruya luk decur, tinan Yoab ineh.)

²⁶Idi lun Israil idi Absalom nelupo déi' tana' Giliad.

²⁷Kareb Daud nacing déi' Mahanaim, ieh nepapu' Sobi Nahas rat Raba bawang lun Amon, makir Amiel rat Lodebar, idi Barsilai lun Giliad rat Rogelim.

²⁸Ideh nenguit tilem, bigan, kuden, dalé, ikun, banak, padé kiriki, bua' peretek, peretek binan,

²⁹duru', lemak sapi', dumba, idi kakat rata sapi' kuan Daud idi anak itinneh, ngaceku kebaladeh, "Ideh melau, merur, idi meparing déi' su luk ali-ali."

Semuil Luk Kedueh 18

¹Raca' Daud nengamung anak itinneh, idi ieh nengikit tuda'-tuda' lun mangun ku lun rayeh pa luun meribu idi pa luun meratu.

²Idi ieh nengecuk bawehneh ineh remuat, sebabpat teluh bang imet Yoab, sebabpat teluh bang imet Abisai anak Seruya kinanak Yoab, idi sebabpat teluh bang imet Itai lun Gat ineh. Idi kebala Raca' Daud kuan amung baweh ineh, "Ui sebuleng teh miak maya' nemuyuh.”

³Iamo' kebaladeh, "Aleg iko remuat! Ngaceku kudeng amung kai ini buro tu pana' na ideh pian nekai. Kudeng rat arang kai maté sebuang pana' idi nateh ideh ngerawé nekai. Iamo' tuanku raca' ineh mepad raga 10,000 kai ini. Idi meluun do' iko tudo bang bawang idi maré anun luk ku ngedengan nekai."

⁴Idi kebala raca' nedeh, "Ui pian maya' anun luk do' bang terawé muyuh." Idi ieh tuped munung tanga' laba' amung anak itin ineh remuat ratu-ratu idi ribu-ribu.

⁵Idi ieh nengecuk ni Yoab, Abisai, idi Itai, kebalaneh, "Méi' ni Absalom anak baruh ineh." Idi amung baweh nekali' bala raca' ratnan Absalom kuan amung lun rayeh bunu' ineh.

⁶Idi baweh Daud neremuat idi iné' pebunu' nelun Israil bang pulung Epraim.

⁷Idi lun Israil ineh linaya' baweh Daud déi'. Idi aco sineh pelaba ula' lun pinaté, ieh ineh 20,000 burur.

⁸Idi iuk mula' bunu' aput-apat bawang, pad lun luk naté bang pulung meluun ula' ratnan lun luk naté bang bunu'.

⁹Idi denak-denak Absalom nepapu' inan tuda'-tuda' lun duken Daud. Idi ieh nemaya' keladai'. Kareb keladai ineh iné' liang lawa kayuh luk meraben luk rayeh idi uluh Absalom nepalak arang angkat kayuh ineh. Idi ieh tekito. Idi keladai ineh pana' nupun rat ieneh.

¹⁰Idi seburur anak itin Daud nenier neneh. Idi ieh nemaré kali' ni Yoab, kebalaneh, "Ui nekali' Absalom tekito arang angkat kayuh luk meraben."

¹¹Idi kebala Yoab nelun ineh, "Matuké iko nekali' neneh! Ngudeh iko na petacu ngaté neneh, pad ui maré namu pulu' balad pirak idi sebuleng abet awa'."

¹²Iamo' kebala lun ineh ni Yoab, "Sagan tu pana' iko maré negku meribu balad pirak, na tu ui ngacing ticu'ku kuan anak raca. Amung kai neninger bala raca' kuanmu, Abisai, idi Itai, kebalaneh, 'Do' muyuh méi' kuan Absalom luk anak baruh ineh.'

¹³Kudeng ui nengelaba bala raca' pad ui nengaté neneh, kali' rungen amung ineh na miak mapung ratnan raca'. Idi iko sebuleng pana' na pian ngedengan negku.”

¹⁴Idi kebala Yoab, "Na ui pian mio pegayam namu ieni." Idi ieh nengalap teluh busu idi ieh nenepéh ruuk Absalom macing luun pusu'neh, kareb ieh lakat mulun idi nepalak arang angkat kayuh luk meraben ineh.

¹⁵Idi pulu' burur lun pebunu' Yoab ineh ngelibut neneh, idi nengaté neneh.

¹⁶Idi Yoab nengiuip serupit. Idi ieh nengecuk amung baweh nelemubed ngerada' nelun Israil.

¹⁷Idi ideh nemirir butung Absalom idi nenala' ineh bang aceh lubang rayeh luk bang pulung. Idi ideh nengerupun su ineh ku aceh perupun batu luk meluun rayeh. Idi amung lun Israil pana' neburo iné' anid-anid ruma'deh.

¹⁸Idi kareb Absalom mulun, ieh pangéh nenaped aceh diri ku etuneh bang Ruan Raca'. Ngaceku kebalaneh, "Na anak deléiku luk nginul ngadanku." Idi ieh nenganau' ngadan diri ineh maya' ngadanneh sebuleng. Ngaceku ineh ideh neten ineh ku Etu Absalom macing aco sini.

¹⁹Idi kebala Ahimas Saduk, "Nima' negku amé' mada' raca', ratnan Tuhan pangéh nemuit neneh rat bang palad bunu'neh.”

²⁰Iamo' kebala Yoab neneh, "Aleg iko nguit bala luk do' aco sini. Miak iko nguit bala mucu aco. Ngaceku aco sini anak raca' pangéh naté'.”

²¹Idi kebala Yoab kuan demulunneh lun Sudan, "Amé' iko mada' kuan raca' anun luk siniermu ineh." Idi lun Sudan ineh netekeradung pa kiung Yoab, idi nenalan.

²²Iamo' ubu'-ubu' bala Ahimas Saduk ni Yoab, "Sagan tu pana' kudeng ineh, nima' negku amé' maya' nelun Sudan." Idi kebala Yoab, "Anun punneh iko amé', O anakku? Ngaceku na raca' mawang niat ninger balamu.”

²³Kebala Ahimas, "Sagan tu pana' kudeng ineh. Simén mo' ui amé'." Idi kebala Yoab, "Amé' mo' iko." Idi Ahimas nupun maya' raked, pad ieh pa atun lun Sudan ineh.

²⁴Idi Daud netudo arang dueh tanga' bawang. Idi lun luk matar bawang umak iné' luun apo tanga' iring libung bawang. Idi ieh netukag idi ieh nenier seburu deléi upun buleng-buleng.

²⁵Idi lun luk matar bawang ineh nengitang maré kali' kuan raca'. Idi kebala raca', "Kudeng ieh sebuleng mo' kali' rungen ieh amé' nated bala luk do'." Idi lun ineh iuk-iuk amé' muneng.

²⁶Pangeh ineh idi lun luk matar bawang ineh nenier aceh lun baken upun teh. Idi ieh nengitang kuan lun luk matar tanga', kebalaneh, "Inan teh seburur, ieh nalan buleng-buleng teh." Idi kebala raca', "Lun ineh pana' nated bala luk do'."

²⁷Idi kebala lun luk matar bawang ineh, "Ui nier lawé lun luk atun ineh kudeng lawé Ahimas Saduk." Idi kebala raca', "ieh ineh lun luk do'. Kali' rungen ieh macing nguit bala luk do'."

²⁸Idi Ahimas nengitang nawar raca', kebalaneh, "Tabi'." Idi ieh netekeradung pa kiung raca', kebalaneh, "Amung ubur kuan Tuhan Allahmu. Ngaceku Ieh pangeh nengelaya' amung lun luk sikal metueh rat namu."

²⁹Idi kebala raca', "Do'ké Absalom anak adi' ineh?" Idi kebala Ahimas, "Ui pangeh nenier ria' rayeh kareb Yoab pangeh nengecuk negku. Iamo' na ui kali' anun tuneh."

³⁰Idi kebala raca', "Lumuut iko idi tuped su ineh." Idi ieh nelumuut idi netuped su ineh.

³¹Idi lun Sudan pana' nacing. Idi kebalaneh inan raca', "Do' bala kuan raca'! Aco sini Tuhan pangeh nemuit namu rat bang palad amung lun luk sikal metueh rat namu."

³²Idi kebala raca' neneh, "Do'ké Absalom anak adi' ineh?" Idi kebala lun Sudan, "Nima' amung bunu'mu idi amung lun luk sikal metueh rat namu mangun mepad kudeng anakmu ineh."

³³Idi raca' pelaba susa' niat, idi ieh numak luun parung pa luun tanga' idi nangi', idi laba' ieh umak, kebalaneh, "O anakku Absalom, anakku, O anakku Absalom! Adoi! Meluun do' ui pangeh naté libalmu. O Absalom anakku, O anakku!"

Semuil Luk Kedueh 19

¹Idi Yoab neninger bala ratnan Raca' Daud nangi' idi temido ni Absalom

²Tuehdeh kareb aco sineh pangeh nisu' kuan lun mula' ku aceh tido. Ngaceku ideh nekali' bala ratnan raca' na miak buken ratnan anakneh.

³Idi ideh lulem-lulem semuet bang bawang. Ngaceku ideh sigapung ku igu'deh, ayudeh ineh mepad kudeng lun luk neburo rat pebunu'.

⁴Idi raca' nengebpu kiungneh, idi nengitang dengan rayeh tang, "O anakku Absalom, O Absalom anakku, O anakku!"

⁵Idi Yoab iné' matun raca' bang ruma'neh, kebalaneh, "Aco sini iko nengigu' amung anak itinmu. Aco sini teh ideh pangeh nengulun namu idi anakmu luk deléi idi decur, idi amung awanmu, idi apidmu pana'.

⁶Iko méi' nelun luk megateh namu. Idi iko megateh nelun luk méi' namu. Aco sini iko nengegala' ratnan iko na ngerawé amung lun rayeh idi amung anak itinmu ineh. Ngaceku ui kali' kudeng Absalom mulun idi amung kai pangeh naté aco sini, ayunneh iko mawang niat.

⁷Idi nekini do' iko amé' ngubuk amung anak itinmu. Ngaceku ui pebulung ku ngadan Tuhan, kudeng iko na ngubuk nedeh, kali' rungen seburur pana' nateh luk ketecan maya' namu bang dacem ini. Idi dereh ini meluun rayeh kuanmu ratnan luk pangeh mangun kuanmu rat isuut macing nekini."

⁸Idi raca' nudur idi tudo munung tanga' bawang. Idi anak itinneh nekali' bala ratnan ieh idi déi'. Idi ideh iné' matun neneh. Iamo' amung lun Israil pangeh neburo iné' anid-anid ruma'deh.

⁹Idi aput bawang lun mula' dureng-dureng arangdeh sebuleng, kebaladeh, "Raca' Daud pangeh nemuit netau rat bang palad amung bunu' tau. Idi ieh nemuit netau teh rat bang palad lun Pilistin. Idi nekini ieh pangeh neburo rat bang bawang ngaceku Absalom.

¹⁰Idi Absalom luk inumau tau mangun ku raca' pangeh naté bang bunu'. Nekini ngudeh seburur na nutun nguit Raca' Daud lemubed?"

¹¹Idi Raca' Daud nekali' bala lun Israil ineh. Idi ieh nemaré bala kuan Saduk idi Abiatar, didueh imam ineh, kebalaneh, "Mada' medueh kuan amung lun rayeh Yahuda ini, 'Ngudeh muyuh mucu ngelubed raca' amé' bang ruma'neh ngaceku bala amung lun Israil ineh pangeh nacing negku.

¹²Amung muyuh kinanakku seuang idi sedara' negku. Ngudeh muyuh mucu amé' ngalap negku?' “

¹³Idi Daud nengecuk nedidueh mada' ni Amasa kudeng ini, "Naké iko seuang idi sedara' negku? Do' Allah ngukum negku kudeng iko na mangun ku lun nguyut bunu' pa kiungku raked-raked ku libal Yoab ineh.”

¹⁴Idi kudeng ineh lawé niat amung lun Yahuda rinuidneh mepad kudeng niat seburur mo'. Idi ideh nemaré bala nan raca', kebaladeh, "Do' iko lemubed maya' amung lun tarehmu.”

¹⁵Idi raca' nelemubed idi nacing tangeb Abpa' Yarden. Idi lun Yahuda nacing déi' Gilgal iné' papu' raca' pian amé' nated raca' guta Abpa' Yarden.

¹⁶Idi Simi Gira lun Benjamin rat Bahurim saget-saget nalan maya' amung lun Yahuda amé' papu' Raca' Daud.

¹⁷Idi inan 1,000 lun rat Benjamin teh nemaya' neneh, idi teh Siba lun duken bang ruma' Saul idi anak deléineh pulu' limeh burur, idi lun duken dueh ngepulu' burur iné' ngata nedeh guta Abpa' Yarden

- ¹⁸pad ngawang niat raca'. Idi kareb nateh raca' guta Abpa' Yarden ini Simi Gira netekeradung pa kiungneh,
- ¹⁹idi kebalaneh kuan raca', "Aleg iko ngerawé sala'ku. Idi aleg iko ngerawé luk inau'ku kareb iko remuat rat déi' Yerusalim.
- ²⁰Ngaceku ui kali' do'-do' ui pangeh mesala'. Iamo' setuneh aco sini ui nacing atun ratnan amung lun bang ruma' Yusup sikal amé' papu' namu."
- ²¹Idi kebala Abisai anak Seruya, "Petulu Simi pitayen, ngaceku ieh pangeh nengediman nelun luk inumau kuan Tuhan."
- ²²Iamo' kebala Daud ni Abisai idi kinanakneh Yoab, "Na ui nengitun terawé medueh. Idi aco sini medueh mangun ku bunu'ku. Miakké seburur rat nelun Israil pitayen aco sini? Ngaceku nekini ui kali' ui mangun ku raca' pa luun amung lun Israil."
- ²³Idi kebalaneh ni Simi, "Na iko miak pitayen." Idi raca' nepebulung neneh.
- ²⁴Idi Mepiboset mupun Saul ineh iné' papu' raca'. Idi na ieh nenganau' kasut, na ieh nemuting buluh adaneh, idi na ieh nemupu' ayungneh, rat aco raca' pangeh iné', pad macing aco raca' nelemubed dengan do'.
- ²⁵Kareb Mepiboset nacing papu' raca' déi' Yerusalim, idi kebala raca' neneh, "Anun punmu na nemaya' negku atun, O Mepiboset?"
- ²⁶Kebalaneh, "O raca', ui pangeh sinaluk lun dukenku. Ngaceku kebalaku neneh, 'Do' ngapin aceh keladai kuanku pad ui tudo luunneh idi amé' maya' raca'. Ngaceku ui ini mekió'."
- ²⁷Meluun teh ieh nengesala' negku pa kiungmu. Iamo' iko kudeng aceh melaikat Allah. Do' iko nganau' anun luk do' pa kiungmu.
- ²⁸Ngaceku amung lun luk bang tetek ruma' tamanku petulu pitayenmu. Iamo' iko teh pangeh nengiding negku arang lun luk kuman peruyung namu. Idi na petulu ui mutuh namu méi' negku teh."
- ²⁹Idi kebala raca' neneh, "Anun punmu pebala ratnan lawému ineh baruh. Ini ukumku. Do' iko mabpat tana' ineh babpat dueh kuan Siba."

- ³⁰Idi kebala Mepiboset kuan raca', "Aganeh apenneh amung, ngaceku iko pangeh nuli' dengan do'."
- ³¹Idi Barsilai lun Giliad ineh iné' rat Rogelim, idi nemaya' raca' pian nguyut neneh guta Abpa' Yarden.
- ³²Idi Barsilai ineh pelaba ngered, ieh ineh selemulun luk ulun ualuh ngepulu' lak. Idi ieh pangeh nengasa' raca' kareb raca' tudo déi' Mahanaim, ngaceku ieh seburur lun do'.
- ³³Idi kebala raca' ni Barsilai, "Do' iko maya' negku. Idi ui miak nginita namu déi' Yerusalim."
- ³⁴Iamo' kebala Barsilai kuan raca', "Tuda' lak teh io ulunku, pad ui miak nalan maya' namu amé' déi' Yerusalim.
- ³⁵Nekini ulunku pangeh ualuh ngepulu' lak. Na ui kali' luk do' idi luk dat. Na ui kali' én luk kenenku idi luk rupenku. Idi na ui kali' arod deléi luk menani idi decur pana'. Anun punneh ui mangun ku aceh babeh luk meberat kuanmu?
- ³⁶Iamo' ui miak nalan maya' namu sekamu' mo' rat Abpa' Yarden. Idi na petulu iko maré anun-anun kuanku.
- ³⁷Maré negku muli' pelé ui maté bang bawanku pelengit lengutan taman-tinanku. Iamo' ini anakku i Kiman. Nima' neneh maya' namu amé' déi'. Idi do' iko nganau' kuanneh anun luk do' sirenmu."
- ³⁸Idi kebala raca', "Do' Kiman maya' negku. Idi ui miak nganau' kuanneh luk do' sirenmu. Idi anun pana' luk pituenmu, ui miak nganau' kuanmu."
- ³⁹Kareb amungdeh ineh pangeh neguta Abpa' Yarden, idi raca' pana' pangeh neguta, idi ieh nemuen Barsilai idi nengeperuan neneh. Idi Barsilai nuli'.
- ⁴⁰Idi raca' petacu iné' Gilgal. Idi Kiman pana' nemaya' neneh. Kudeng ineh teh amung lun Yahuda idi sebuang lun Israil iné' nated raca'.

⁴¹Idi amung lun Israil iné' papu' raca', kebaladeh, "Ngudeh kinanak-kinanak tau, lun Yahuda nemanu namu idi nenated namu idi amung lun bang tetek ruma'mu, idi amung lun dukenmu pana' guta Abpa' Yarden?"

⁴²Idi kebala lun Yahuda nelun Israil, "Ngaceku raca' ratnan inul kai, ngudeh muyuh museh nekai ini? Na kai nengalap akan rat neneh. Idi na luk biréneh nekai."

⁴³Kebala lun Israil nelun Yahuda, "Kai inan pulu' babpat ratnan raca', ieh ineh ratnan Raca' Daud. Idi kai meluun rayeh rat nemuyuh. Ngaceku ineh ngudeh muyuh ngedat nekai. Kai luk pun-pun nengitun ratnan nguit raca' lemubed?" Iamo' bala lun Yahuda ineh meluun tueh ratnan bala lun Israil ineh.

Semuil Luk Kedueh 20

¹Idi inan aceh lun luk dat nacing, ngadanneh Siba Bikri, seburur lun Beniamin. Idi ieh nengiuip serupit, kebalaneh, "Nala' ni Daud. Na tau maya' neneh! O lun Israil do' tau muli!"

²Idi amung lun Israil nelumuut rat maya' ni Daud, idi iné' maya' ni Siba Bikri. Iamo' amung lun Yahuda ineh lutep maya' raca'deh ineh rat Abpa' Yarden macing déi' Yerusalim.

³Kareb Daud nacing ruma'neh déi' Yerusalim, idi ieh nengalap pulu' apidneh ineh luk ticanneh atun ngita ruma'. Idi ieh nenganau' nedeh ineh bang aceh ruma' setau'. Iamo' ideh pinatar idi isa' raca'. Iamo' na raca' iné' nedeh. Ideh ineh linibung déi' macing maté, mepad kudeng decur tinula'.

⁴Idi kebala raca' ni Amasa, "Nekini darin muyuh amung lun Yahuda pamung bang teluh aco ini. Pangeh ineh do' iko amé' tungé teh."

⁵Idi Amasa iné' nawar amung lun Yahuda. Iamo' na ieh nelemubed maya' kareb luk pangeh litep kuanneh.

⁶Idi kebala Daud ni Abisai, "Nekini Siba Bikri ineh miak nganau' dat kuan tau meluun ratnan Absalom. Lapenmu amung lun dukenku idi ngerada' neneh, pelé ieh na miak ngala bawang luk linibung meraben, idi nganau' dereh kuan tau."

⁷Idi anak itin Yoab, ieh ineh lun luk matar raca' idi amung lun pebunu' luk baken nemaya' ni Abisai. Idi ideh neremuat rat Yerusalim sikal ngerada' ni Siba Bikri ineh.

⁸Kareb ideh nacing batu rayeh luk déi' Gibion ineh, idi Amasa nacing papu' nedeh ineh. Idi Yoab ineh nengayung ku kuyu' lun pebunu'. Idi ieh nengapung pelapetneh iang abet awa'neh. Idi kareb ieh iné' matun ni Amasa, pelapet ineh nebpeh.

⁹Idi kebalaneh ni Amasa, "Do' teh iko kinanakku?" Idi yoab nengimet buluh ada Amasa ku ticu'neh pa tinueh sikal muen neneh.

¹⁰Idi na Amasa kali' pelapet luk bang palad Yoab ineh. Idi Yoab nenepéh batekneh, pad tinéi'neh neremuat luun tana'. Idi na ieh nenepéh neneh sekedueh kua', ngaceku ieh pangeh naté. Pangeh ineh idi Yoab idi Abisai kinanakneh nengerada' ni Siba Bikri ineh.

¹¹Iamo' seburur rat arang lun duken Yoab ineh netuped iring butung Amasa, kebalaneh, "Idé luk méi' ni Yoab, idi idé luk lutep ni Daud, do' ieh maya' ni Yoab."

¹²Idi butung Amasa ineh telubid luun dara'neh uned dalam rayeh. Idi anid-anid lemulun luk lemaba su ineh nugka'. Kareb lun duken Yoab ineh nenier amungdeh nugka', idi ieh nenguit butung Amasa rat dalam rayeh amé' mado rat ku dalam ineh. Idi ieh nenganau' ayung luun butung Amasa.

¹³Kareb butung ineh pangeh kiniding rat dalam ineh, idi amungdeh ineh nenalan maya' ni Yoab, sikal ngerada' ni Siba Bikri ineh.

¹⁴Idi Siba nengelaba amung inul pupu Israil macing déi' Abel idi Bait Maka. Idi amung lun Bikri nepamung sikal maya' neneh semuet bang bawang.

¹⁵Idi amung lun luk maya' ni Yoab nacing ngelibut neneh bang bawang Abel Bait Maka. Idi ideh nengebuduk tana' pelengit bawang ineh, pad macing libung bawang. Idi ideh nenepéh libung batu ineh sikal ngusag ineh.

¹⁶Idi inan seburur decur luk mileh, nengitang rat bang bawang ineh, "Ninger muyuh, ninger idi ngecuk Yoab amé' tungé', pelé' ui pebala neneh."

¹⁷Idi Yoab iné' muneng. Idi decur ineh nepebala, "Ikoké Yoab?" Kebalaneh, "Ui ini." Kebala decur ineh, "Ninger balaku ini." Kebalaneh, "Mo, ui ninger."

¹⁸Idi kebala decur ineh, "Bang kareb luk mon pekalai lun pebala kudeng ini, 'Nima' lun amé' ngitun déi' Abel.' Pangeh ineh idi teh ideh ngeletep lawédeh.

¹⁹Idi ini aceh bawang luk meteteb ratnan amung luk lutep arang lun Israil. Idi iko nakap dalam pian ngedat aceh bawang luk mepad kudeng aceh tinan arang lun Israil. Ngudeh iko pian ngedat babpat Tuhan?"

²⁰Idi kebala Yoab, "Na tu-tu ui ngedat idi ngedereh bawangmu ineh!

²¹Na ineh terawé kai. Iamo' seburur rat Pegkung Epraim, ngadanneh Siba Bikri ineh pangeh nengedat Raca' Daud. Ieh mo' barénmu. Idi ui lemubed rat bawang ini." Idi kebala decur ni Yoab, "Idi uluhneh miak peten namu rat bal libung ini."

²²Pangeh ineh, idi decur ineh iné' mada' nelun mula'. Idi ideh nengaleb ni Siba Bikri, idi nemepet uluhneh kuan Yoab. Idi Yoab nengiup serupit. Idi ideh nurap muli'. Idi Yoab pana' nelemubed iné' déi' Yerusalim idi iné' matun Raca' Daud.

²³Idi Yoab ineh lun rayeh amung baweh lun Israil. Idi Benaya Yoyada ineh lun rayeh amung lun pebunu' luk matar Raca' Daud.

²⁴Idi Adoram ineh lun rayeh lun luk icuk ngakem. Idi Yehosapat Ahilud ineh lun luk ngimet usin.

²⁵Idi Siwa ineh lun luk ngayud. Idi Saduk idi Abiatar, didueh ineh imam.

²⁶Idi teh Ira lun Yair ineh imam i Daud.

Semuil Luk Kedueh 21

¹Idi bang kareb Daud inan iru' teluh lak kinioneh. Ngaceku ineh Daud nemutuh pa kiung Tuhan, idi Tuhan nepebala, "Ieh ineh ngaceku Saul idi ngaceku uang tetek ruma'neh nengeruat dara'. Ngaceku ideh pangeh nengaté nelun Gibion ineh."

²(Idi Lun Gibion ineh baken ratnan inul lun Israil, iamo' ratnan teceh lun Amori. Idi lun Israil pangeh nepejani' ngulun nedeh. Iamo' Saul nakap dalam sikal ngaté nedeh ineh, ngaceku meluun ngerawé nelun Israil idi lun Yahuda.)

³Idi Daud nenawar nelun Gibion ineh, kebalaneh, "Anunké luk ruenku kuan muyuh? Idi dengan anunké ui miak nganau' pedo', pad muyuh ngeperuan pupu Tuhan?"

⁴Idi kebaladeh neneh, "Baken kedaluh ini uen ngedo' ku amas idi pirak rat ni Saul idi uang tetek ruma'neh. Idi teh na kai pian ngaté seburur rat arang lun Israil." Idi kebala raca', "Anun luk pian pituen muyuh rat negku?"

⁵Idi kebaladeh, "Saul sikal ngaté nekai, pad kai na miak mulun bang apud bawang lun Israil.

⁶Do' maré kuan kai tudu' inulneh luk deléi pad kai ngekito nedeh pa kiung Tuhan déi Gibia, bawang Saul luk pinili' Tuhan." Idi kebala raca', "Miak ui maré nedeh."

⁷Iamo' raca' méi' ni Mepiboset Yonatan, mupun Saul, ngaceku bulung ku ngadan Tuhan luk arang didueh, ieh ineh Daud idi Yonatan ineh.

⁸Iamo' ieh nengalap dueh anak deléi Rispa anak Aya luk pangeh tinganakneh kuan Saul, ieh ineh Armoni idi Mepiboset, idi teh limeh anak delei Merab Saul, luk pangeh tinganak kuan Adriel anak Barsilai lun Mehola ineh.

⁹Idi Daud nemaré amungdeh ineh bang palad lun Gibion luk nengekito nedeh ineh luun surud pa kiung Tuhan. Idi tudu' burur ineh pitayen peranga', bang aco luk pun ngeranah, ieh ineh pun ngeranah ikun.

¹⁰Idi Rispa Aya nengalap sepekatu kibung, idi ieh nemalad ineh luun batu su luk inanneh telubid rat pun ngeranah pad macing kareb mudan. Idi na ieh nima' nedeh ineh inan suit rat arang gawa' ucep kareb aco macang, idi pung rat bang pulung kareb medacem.

¹¹Idi kareb Daud nekali' bala ratnan kekamen Rispa ineh,

¹²Idi ieh iné' ngalap amung tulang Saul idi Yonatan rat nelun bang bawang Yabis déi' Giliad. (Ideh pangeh nemanu tulang ineh rat natad bawang Bait San, su luk inan lun Pilistin nengekito nedeh kareb lun Pilistin ineh pangeh nengaté ni Saul luun Pegkung Gilboa.)

¹³Idi Daud nenguit amung tulang Saul idi Yonatan. Idi ieh nengamung teh amung tulang tudu' burur lun luk tikito ineh.

¹⁴Idi ideh nenanem amung tulang Saul idi Yonatan déi' tana' Beniamin déi' Sila, bang tanem tamanneh Kis. Idi ideh nenganau' maya' kudeng luk icuk raca' ineh, idi pangeh ineh Allah neninger sembayang lun bang bawang ineh.

¹⁵Idi inan aceh bunu' teh arang lun Pilistin dengan lun Israil. Idi Daud iné' dengan anak itinneh, idi nepebunu' nelun Pilistin pad Daud pelaba erur.

¹⁶Idi Isbi Benod rat inul lun luk rayeh buru, inan busu luk beratneh ualuh kati, idi teh ieh nengabin pelapet luk mebaruh. Idi ieh sikal ngaté ni Daud.

¹⁷Iamo' Daud dinengan Abisai anak Seruya. Idi ieh nemunu' nelun Pilistin ineh, pad ieh naté. Pangeh ineh, idi amung anak itin Daud nemutih jani' rat neneh, pad ieh na amé' maya' nedeh pebunu' teh, pelé lapung Israil na milep.

¹⁸Muci ratnan ineh inan aceh bunu' dengan lun Pilistin déi' Gob. Kareb ineh Sap luk ratnan inul lun rayeh burur pinaté Sibkai lun Husai.

¹⁹Idi teh inan teh aceh bunu' dengan lun Pilistin déi' Gob. Idi Elhanan anak Yair lun Baitlahim, nengaté Goliat lun Gat ineh. Idi kirayeh etun busuneh mepad kudeng kayuh luk inan lun ngebaruh.

²⁰Idi teh inan aceh bunu' déi' Gat. Déi' inan aceh deléi luk pelaba rayeh burur. Idi bua' ticu' idi bua' kukudneh anem mop-mop ieh ineh dueh ngepulu' apat kinula'deh. Idi lun ineh pana' ratnan inul lun luk rayeh burur.

²¹Idi ieh nesitunga nelun Israil, iamo' ieh pinaté Yonatan Simia kinanak Daud.

²²Idi ideh luk apat burur ineh ratnan inul lun luk rayeh burur déi' Gat. Idi ideh ineh pinaté Daud idi anak itinneh.

Semuil Luk Kedueh 22

- ¹Idi Daud nemenani kuan Tuhan amung bala nani ini, kareb Tuhan pangeh nemuit neneh rat bang palad amung bunu'neh, idi rat bang palad Saul teh.
- ²Kebalaneh, "Tuhan, ieh ineh Lun Nengulun negku, Ieh mepad kudeng batu idi libung luk meraben.
- ³Allahku luk ngelibung negku, idi Ieh nginita negku. Ieh ngelinged negku mepad kudeng utap, Ieh matar idi ngulun negku. Ieh ineh Lun Nengulun negku; Ieh matar idi muih negku ratnan luk ngaté.
- ⁴Ui nawar Tuhan, idi Ieh ngulun negku ratnan amung bunu'ku. Ngubur Tuhan!
- ⁵"Ribut até nengelibut negku, idi abpa' tubu' belen nenganud negku.
- ⁶Até nengelibut negku dengan abetneh luk mepicet, idi tanem temina' mepad kudeng abpung kuanku.
- ⁷Idi bang susa'ku ui nenawar Tuhan; Ui nenawar Allahku mutuh pedengan. Bang ruma'Neh, Ieh neninger tawarku. Tawarku mutuh pedengan nesemuat bang lalidNeh.
- ⁸"Idi tana' neruyuh idi nesigio, idi diri langit nesigio teh, ngaceku useh Allah.
- ⁹Rabpun neremuat rat bang icungNeh, bareh idi budung apui luk ngeseb, neremuat rat bang tangNeh.
- ¹⁰Tuhan nengebiring langit, idi Ieh netemurun, idi dacek luk mepingot iang kukudNeh.
- ¹¹Idi Ieh tudo lun keted melaikat karub luk temulud, idi Ieh temulud siling-siling luun ilad bui.
- ¹²Dacem mangun ku tarubNeh; laput luk mekapal idi mitem nengelibut Neneh.
- ¹³Bareh apui neremuat rat bang kilep pa atunNeh.
- ¹⁴"Tuhan nepebala rat bang langit mepad kudeng lalam; idi tang Allah Luk Meluun Dita' pedingeren.

- ¹⁵Ieh nemayung busu-busuNeh, pad bunu'Neh neburo, idi Ieh nengeruat kilep taca-taca, pad bunu' ineh nepatad.
- ¹⁶Idi puet ribaruh luk bang abpa' rayeh melagan peh, idi luk pa liang tana' pana' melagan teh, ngaceku usehMu, O Tuhan, idi ngaceku gatehMu.
- ¹⁷"Tuhan ngawal ngalap negku rat Surga, idi nginat negku rat bang abpa' luk medalem.
- ¹⁸Ieh nemuit negku ratnan bunu'ku luk metueh, idi ratnan amung-amung luk megateh negku— ideh luk meluun tueh rat negku!
- ¹⁹Kareb ui bang susa', ideh nemunu' negku, iamo' Tuhan nengelibung negku.
- ²⁰Ieh nemuit negku ratnan derehku. Ieh nengulun negku, ngaceku Ieh mawang niat negku.
- ²¹"Tuhan méi' negku ngaceku ui luk matu, Ieh nengeperuan negku ngaceku ui na mesala'.
- ²²Ui pangeh nemaya' ukum Tuhan; idi na ui nelemubed ratnan Allahku.
- ²³Ui pangeh nemaya' amung-amung ukumNeh. Ui na nengelaba balaNeh.
- ²⁴Ieh kali ui na mesala', idi ui nematar buruku ratnan luk dat.
- ²⁵Ieh maré tabpar kuanku ngaceku ui luk matu, ngaceku ui na mesala' pa kiungNeh.
- ²⁶"Iko lutep maya' jani' kuan lemulun luk lutep maya' Namu, idi pelaba do' kuan lemulun luk nganau' luk do'.
- ²⁷Iko ngegala' liganMu kuan lemulun luk meligan, iamo' gatehMu kuan lemulun luk tekilu'.
- ²⁸Iko ngulun lemulun luk mebeneh niat, iamo' Iko ngebeneh lemulun luk medita' niat.
- ²⁹"Iko ineh lapungku, O Tuhan, idi Iko ngecuk daceмку buro.
- ³⁰Iko maré tueh negku kareb ui amé' pebunu', idi laludMu, pad ui miak ngusag libungdeh.

- 31"Kekamen Allah meluun meriput. BalaNeh luk inan merapet! Ieh mepad kudeng utap kuan amung-amung luk pian peringucung Neneh.
- 32Tuhan sebuleng mo' luk Allah, Allah sebuleng mo' luk Batu Libung tau.
- 33Allah ineh libungku luk meraben, idi Ieh matar lawéku.
- 34Ieh matar negku luun pegkung, idi nganau' negku upun mepad kudeng talau.
- 35Ieh ngekalai ticu'ku, pad ui metueh ngiber busu.
- 36"Iko maré utap ulun kuanku. Ratnan pedenganMu ui mangun ku lun rayeh.
- 37Iko nematar negku pad ui na tiban, idi na tu-tu ui linaya' bunu'ku.
- 38Ui ngerada' bunu'ku idi ngaté nedeh. Na ui ugka' kudeng ideh na linaya'ku.
- 39Ui narad idi ideh na miak tumui, pad ideh telubid iring kukudku.
- 40Iko maré tueh negku kareb ui pebunu', pad ui metueh ratnan bunu'ku.
- 41Iko ngusu bunu'ku rat negku. Ui ngaté lemulun luk megateh negku.
- 42Ideh ngitang mutuh pedengan, iamo' seburur pana' nateh miak ngulun nedeh. Ideh nawar Tuhan, iamo' na Ieh ngor.
- 43Ui tupeh nedeh pad ideh mebunak, ui ngeradu' nedeh mepad kudeng buri luk luun dalan.
- 44"Iko muit negku ratnan lemulun luk sikal ngelibal negku, pad ui mangun ku raca' kuan tuda'-tuda' pupu. Lemulun luk na mitiku mangun ku anak itinku.
- 45Pupu baken pana' tekeradung pa kiungku. Kareb ideh ninger balaku, petacu ideh maya'.
- 46Ngaceku ideh na mekuu', ideh remuat dengan megegker, rat bang libungdeh luk meraben.
- 47"Mulun Tuhan! Ngubur Neneh luk mangun ku Batu Libungku, Allah, Ieh ineh Lun Nengulun negku luk melalud. Do' mada' laludNeh.
- 48Ieh maré negku metueh ratnan bunu'ku; Ieh ngebeneh tuda'-tuda' pupu rat negku.

⁴⁹Ieh muit negku ratnan lemulun luk megateh negku. Iko maré negku metueh ratnan bunu'ku, idi ngelibung negku ratnan lemulun luk mesangit.

⁵⁰"Ngaceku ineh, Tuhan, ui miak ngubur Namu. arang tuda'-tuda' pupu. Ui miak menani ngubur Namu.

⁵¹Allah megéi' maré tueh kuan raca'Neh. Ieh ngegala' awaNeh luk lutep kuan lemulun luk pinili'Neh, ieh ineh kuan Daud idi inulneh macing raked-raked."

Semuil Luk Kedueh 23

¹Idi ini bala Daud luk kekiped, ieh ineh Daud luk anak Isai luk kinikit Allah, idi luk pinili' Allah Yakub mangun ku raca', idi luk mileh nganau' nani kuan lun Israil. Kebala Daud.

²"Roh Tuhan pebala maya' tangku; idi balaNeh idi luun dila'ku.

³Allah lun Israil pangeh pebala, Pegkung Batu lun Israil nepejani' negku. Raca' luk ngimet dengan mesiri, idi luk matot inan Allah,

⁴mepad kudeng rasat aco kareb pekak, idi na laput, luk nganau' uduh mesidak kareb pangeh nudan.

⁵Kudeng ineh lawé Allah miak ngeperuan inulku. Ngaceku Ieh nenganau' jani' kuanku, luk meruked idi lutep. Ineh mo' luk pianku; ineh luk mangun ku tuehku; idi Allah luk miak ngacing peruan ineh.

⁶Iamo' lun luk na manu mepad kudeng tabpa' luk talan, ngaceku ideh na miak itin ticu'.

⁷Iamo' tabpa' ineh lapen ku belawan idi busu, pad ideh sabpen."

⁸Idi ini ngadan lun pebunu' Daud luk mebala: Yoseb Basebet lun Takemon luk lun rayeh "Teluh Burur." Ieh teh mebala mayung ku busu, ngaceku ieh nemayung 800 burur bang sekua' lawé' iné' pebunu'.

⁹Idi luk kedueh, ieh ineh Eliasar Dodo, mupun Ahohi arang teluh lun rayeh ineh. Ieh luk maya' ni Daud kareb ideh situnga nelun Pilistin luk nepamung sikal pebunu', ngaceku lun Israil pangeh neburo.

¹⁰Idi ieh netuped idi nemunu' nelun Pilistin pad ticu'neh merur. Idi paladneh ineh tutem luun tunan pelapetneh. Idi Tuhan nenganau' aceh tueh rayeh kareb aco sineh, pad amung anak itin luk maya' neneh nelemubed ngaro anun-anun luk luun butung.

¹¹Idi luk keteluh, ieh ineh Sama anak Agi lun Harar. Lun Pilistin nepamung déi' Lehi, idi déi' inan aceh lalang kabun maput ku peretek luk mesia'. Idi lun Israil neburo rat pa kiung lun Pilistin.

¹²Iamo' Sama netuped uned kabun ineh idi nengelaya' nelun Pilistin, pad ideh na ngaro kabun ineh. Idi Tuhan nemaré nelun Israil metueh bang aco sineh.

¹³Idi teh teluh burur arangdeh luk "Teluh Ngepulu" lun rayeh ineh iné' matun ni Daud kareb ngeranih bang Lubang Batu Adulam. Idi inan aceh baweh lun Pilistin nelupo bang Ruan Repairim.

¹⁴Idi kareb ineh Daud déi' bang su luk na mekelengit. Idi baweh lun Pilistin idi déi' Baitlahim.

¹⁵Idi Daud melili ku luk rupan, kebalaneh, "Adoi, ui pelaba pian ngirup abpa' rat bang subuk luk déi' Baitlahim luk iring tanga' bawang!"

¹⁶Idi diteluh luk mebala ineh iné' matun su luk inan baweh Pilistin idi nengook abpa' luk bang subuk luk déi' Baitlahim iring tanga' bawang. Idi ideh nelemubed nenguit abpa' ineh kuan Daud. Iamo' Daud ara' ngirup ineh. Iamo' ieh nengutang ineh ku aceh baré kuan Tuhan.

¹⁷Kebalaneh, "O Tuhan, na tu-tu ui miak ngirup abpa' ini, ieh ineh mepad kudeng ui ngirup dara' lun ini luk pangeh iné' dengan na matot maté!" Idi na ieh sikal ngirup abpa' ineh. Kudeng ineh kekamen diteluh luk mebala ineh.

¹⁸Idi Abisai anak Seruya, kinanak Yoab, ieh ineh lun rayeh teluh ngepulu' burur ineh. Idi ieh nengaté 300 burur ku busuneh. Ngaceku ineh ieh mebala arangdeh luk "Teluh Ngepulu" ineh.

¹⁹Idi ratnan "Teluh Ngepulu' Burur" ineh, ieh ineh luk mebala, idi luk mangun ku lun rayehdeh. Iamo' na ieh iapin dengan lun luk "Teluh Burur" ineh.

²⁰Idi teh Benaya Yoyada rat Kabsil ineh mebala. Ieh nengaté dueh burur lun luk mesangit rat Moab. Idi teh ieh nengaté sebuleng balang bang lubang kareb meteneb.

²¹Idi teh ieh nengaté seburur lun Masir luk rayeh burur luk ngimet busu. Benaya iné' munu' neneh ku kayuh mo'. Idi ieh nemubput busu ineh rat nelun Masir ineh idi nengaté neneh ku ineh.

²²Kudeng ineh luk inau' Benaya Yoyada luk pelaba kuu'. Idi ieh mebala arang lun luk "Teluh Ngepulu" ineh.

²³Iamo' na ieh iapin dengan lun luk "Teluh Burur" luk atun ineh. Idi Daud nengikit neneh mangun ku lun rayeh lun luk matar raca'.

²⁴⁻³⁹Idi rat arang "Teluh Ngepulu" ineh, ini ngadandeh: Asahel kinanak Yoab Elhanan Dodo rat Baitlahim Sama idi Elika rat Harod Heles rat Pelet Ira Ikes rat Tekoa Abieser rat Anatot Mebunai rat Husa Salmun rat Aho Maharai idi Heleb Baana rat Netopa Itai Ribai rat Gibia déi' bawang Benjamin Benaya rat Piraton Hidai rat Arur Gaas Abialbon rat Araba Asmawit rat Bahurim Eliaba rat Saalbon Anak-anak Yasen Yonatan Sama idi Ahian Sarar rat Harar Elipelet Ahasbai rat Maka Eliam Ahitopel rat Gilo Hesro rat Karmel Paarai rat Arab Igal Natan rat Soba Bani rat Gad Selek rat Amon Naharai (luk nguit repapeh Yoab anak Seruya) rat Birot Ira idi Gareb rat Yatir Uria lun Hiti. Amungdeh teluh ngepulu' tudu' burur lun pebunu' luk mebala.

Semuil Luk Kedueh 24

¹Idi Tuhan museh nelun Israil teh, idi Ieh nengubuk ni Daud ku akubdeh ineh, kebalaNeh, "Iapinmu lun Israil idi lun Yahuda."

²Idi kebala Daud ni Yoab, lun rayeh bawehneh ineh, "Do' nguit lun tarehmu, idi nalan aput bawang lun Israil rat Dan macing déi' Birsiba, idi ngiap nelun mula' ineh pad ui kali' kinula'deh."

³Idi kebala Yoab kuan raca', "Do' Tuhan Allahmu ngula' pupu ini dengan tuda'-tuda' ula' macing meratu kua' kinula', kareb nateh iko maté. Iamo' ngudehké iko pian ku dalan luk kudeng ini?"

⁴Iamo' raca' mesaad pad Yoab idi amung lun tarehneh nemaya' balaneh. Idi ideh neremuat rat pa kiung raca' iné' ngiap nelun Israil.

⁵Ideh neguta Abpa' Yarden, idi nelupo pa kabing busat aco Arur, ieh ineh bawang luk uned ruan bang tana' Gad. Rat ieneh ideh iné' pa tinueh busat aco amé' Yaser.

⁶Idi ideh nacing déi Giliad idi Kadis bang bawang lun Hiti. Ideh iné' déi' Dan, idi rat Dan ideh nelemiud iné' Sidon.

⁷Idi ideh iné' pa kabing busat aco amé' Sur luk inan libung luk meraben, idi aput bawang lun Hiwi idi lun Kanaani, pad ideh nacing Birsiba déi' Negeb luk bang bawang Yahuda.

⁸Idi kareb ideh pangeh nenalan libut-libut amung bawang ineh, iwa' bulan dueh ngepulu' aco kinioneh, idi ideh nelemubed iné' Yerusalim.

⁹Idi kinula' amung lun luk iniap ineh biré Yoab kuan raca': rat arang lun Israil 800,000 lun luk pebunu', idi rat arang lun Yahuda 500,000 burur.

¹⁰Iamo' kareb ideh pangeh nengiap nelun mula' ineh, idi Daud meberat niat. Idi Daud nesembayang inan Tuhan, "Idi ui pangeh mesala' bang kekamen luk kudeng ineh. Iamo' nekini O Tuhan, nala' sala'ku ini. Ngaceku kekamenku ini pelaba dat."

¹¹Idi kareb Daud nekulat pekak uka-uka, idi kebala Tuhan inan Nabi Gad luk ngelio kuan Daud ineh,

¹²"Amé' iko mada' ni Daud, 'Kudeng ini bala Tuhan, teluh dalam ini barénKu namu. Mili' iko rat arang Teluh ineh, pad Ui nganau' kuanmu.' "

¹³Idi Gad iné' ni Daud, idi nemada' neneh bala Tuhan ineh, kebalaneh, "Sikalké iko ku aceh iru' teluh lak kinioneh bang bawangmu? Kian, sikalké iko buro rat pa kiung bunu'mu luk ngerada' namu teluh bulan kinioneh? Sikalké iko ku aceh kaca teluh aco kinioneh bang bawangmu? Nekini do' iko ngerawé, idi kudeng apeh ormu itenku kuanNeh Luk nengecuk negku."

14Idi kebala Daud ni Gad, "Ui pelaba gagau. Do' tau mebpeh bang palad Tuhan, ngaceku katuNeh pelaba rayeh. Iamo' aleg ui mebpeh bang palad lemulun."

15Idi Tuhan nengacing aceh kaca arang lun Israil rat pekak macing kareb luk pangeh litep. Idi rat arang lun mula' ineh naté 70,000 burur rat Dan macing déi' Birsiba.

16Idi kareb melaikat ineh temina' ngusag bawang Yerusalim, idi Tuhan nginuud ku dat ineh. Idi kebalaNeh kuan melaikat luk ngaté lun mula' ineh, "Petap mo' kudeng ineh. Nekini nginat ticu'mu." Idi melaikat Tuhan ineh muneng ku su luk inan Arauna lun Yebusi ineh rumik.

17Kareb Daud nenier melaikat ineh luk ngaté nelun mula' ineh, idi kebalaneh inan Tuhan, "Ui luk mesala'. Idi ui luk nenganau' luk dat. Iamo' anunké luk inau' lun mula' ini? Meluun do' Iko ngukum negku idi uang tetek ruma'ku pana'."

18Idi aco sineh Gad iné' matun ni Daud. Kebalaneh neneh, "Do' iko nalan, idi mudut kuan Tuhan aceh bubpun su luk inan Arauna lun Yebusi ineh rumik."

19Idi Daud iné' maya' bala Gad petulu ku bala Tuhan.

20Idi kareb Arauna nengeligak, idi ieh nenier raca' macing amé' matun neneh dengan amung lun tarehneh. Idi Arauna netekeradung pa kiung raca'.

21Kebalaneh, "Anunké punneh iko macing amé' matun negku ini?" Idi kebala Daud, "Ui pian melih su luk inanmu rumik ini, pad ui miak mudut aceh bubpun kuan Tuhan, pelé kaca ini buro rat nelun mula' ini."

22Idi kebala Arauna ni Daud, "Do' raca' ngalap idi maré binaweh luk do' sirenmu. Ini sapi' ku baré luk sabpen, idi luk inan rumik idi paga' ku dier sapi' ku kayuh apui.

23Idi Arauna nemaré amung ineh kuan raca'." Idi kebala Arauna inan raca', "Do' Tuhan Allahmu ngalap luk barénmu ineh."

²⁴Iamo' kebala raca' kuan Arauna, "Aleg kudeng ineh. Iamo' ui sikal melih amung ineh rat namu. Na ui sikal maré baré luk sabpen kuan Tuhan Allahku dengan na raga." Idi Daud nemelih su luk inan rumik idi sapi' ineh ku limeh ngepulu' balad pirak.

²⁵Idi Daud nemudut aceh bubpun kuan Tuhan su ineh. Idi ieh nemaré luk sabpen idi baré luk nguit pedo'. Idi Tuhan neninger sembayangneh kuan bawang ineh. Idi kaca ineh pana' nugka' rat arang lun Israil.

Raca'-Raca' Luk Pun-Pun

Raca'-Raca' Luk Pun-Pun 1

¹Kareb Raca' Daud pebala ngered, idi ideh nenarub neneh ku tuda'-tuda' pekatu kibung. Nateh ieh melau'.

²Idi kebala lun tarehneh, "Do' tau nakap aceh anak adi' decur luk pun mebaruh, luk miak tudo namu idi ngasa' namu, idi ieh rudap denganmu, pad iko do' lau'."

³Idi ideh nenakap bang amung babpat bawang Israil seburur anak adi' decur luk do' taga. Idi ideh nekali' Abisag, seburur decur Sunam. Idi ideh nenated neneh amé' nan raca'.

⁴Idi anak adi' decur ineh meluun taga, idi ieh nengasa' raca'. Iamo' na tu raca' pamung neneh.

⁵⁻⁶Idi Adonia anak Daud didueh Hagit ineh pelaba do' taga. Idi ieh pian mangun ku raca'. Ieh tinganak mucu ratnan Absalom. Idi na tu-tu Daud museh neneh. Idi tuda'-tuda' keréta idi lun maya' kuda ilapneh dengan limeh ngepulu' burur luk maya' neneh.

⁷Idi ieh nepegayam ni Yoab anak Seruya idi Imam Abiatar. Didueh ineh nengamo ngedengan neneh.

⁸Iamo' Imam Saduk, idi Benaya Yoyada, Nabi Natan, Simi, idi Rei, dengan amung lun luk matar ni Daud ineh na perurum ni Adonia.

⁹Idi Adonia nemaré tuda'-tuda' dumba, sapi', idi anak sapi' luk melamu ku baré sabpen muneng ku Batu Menipeh luk iring bued abpa' déi' Enrogel. Idi ieh nenawar amung kinanakneh, ieh ineh amung anak raca' idi amung lun tareh raca' luk rat Yahuda.

¹⁰Iamo' na ieh nenawar Nabi Natan, Benaya, lun luk matar raca', idi Selimun kinanakneh luk isuut.

¹¹Idi kebala Natan ni Batsiba tinan Selimun, "Naké iko kali' idi Adonia anak Hagit ineh mangun ku raca', idi Raca' Daud pana' nateh kali' ratnan ineh?"

- ¹²Idi nekini ui mada' bala namu pad iko mulun dengan anakmu Selimun teh.
- ¹³Amé' iko matun Raca' Daud, idi ngitun neneh, 'Naké iko nepebulung negku ratnan anakku Selimun ineh mangun ku raca' ku libalmu mucu? Ngudehké Adonia mangun ku raca' nekini?'
- ¹⁴Idi laba' iko pebala inan raca' ineh, idi ui miak semuet idi ngamo amung balamu ineh."
- ¹⁵Idi Batsiba iné' matun raca' bang takepneh. Iamo' raca' pelaba ngered, idi Abisag, decur Sunam ineh, ngasa' neneh.
- ¹⁶Batsiba netekeradung pa kiung raca'. Idi kebala raca', "Anun luk pianmu?"
- ¹⁷Kebala Batsiba neneh, "O raca', naké iko nepebulung negku ku ngadan Tuhan Allahmu, ratnan anakku Selimun ineh mangun ku raca' ku libalmu mucu?"
- ¹⁸Iamo' nekini Adonia pangeh mangun ku raca', iamo' iko na kali' ratnan ineh.
- ¹⁹Idi ieh pangeh nemaré tuda'-tuda' sapi' deléi, dumba, idi anak sapi' luk melamu ku baré sabpen. Idi ieh nenawar amung anak raca', Imam Abiatar, idi Yoab lun rayeh bawehmu ineh. Iamo' na ieh nenawar anakmu Selimun.
- ²⁰O raca', amung lun Israil nganét namu mada' nedeh ratnan idé luk mangun ku raca' libalmu.
- ²¹Iamo' kudeng na pieh kudeng ineh, kareb iko pangeh naté idi ui idi anakku Selimun ineh miak iapin mepad kudeng lun mesala' peh."
- ²²Idi laba' Batsiba pebala inan raca', idi Nabi Natan pana' nacing.
- ²³Idi kebaladeh, "Tungé' Nabi Natan." Idi ieh iné' papu' raca' idi netekeradung pa kiungneh.
- ²⁴Kebalaneh, "O raca', matuké iko pangeh mala Adonia miak mangun ku raca' libalmu?"
- ²⁵Ngaceku aco sini teh ieh pangeh iné' maré tuda'-tuda' sapi' deléi, dumba, idi anak sapi' luk melamu, idi ieh pangeh nenawar amung anak raca', Yoab lun

rayeh baweh, idi Imam Abiatar. Idi nekini amungdeh ineh ngirup idi kuman pa kiungneh, kebaladeh, 'Do' Raca' Adonia mipu ulun!'

²⁶Iamo' na ieh nenawar negku, idi Imam Saduk, Benaya Yoyada, idi anakmu Selimun.

²⁷Inanké bala ini icingmu, idi iko na nemaré kali' inan lun tarehmu idi lun luk petulu ngelibal namu mangun ku raca'?"

²⁸Idi kebala Raca' Daud, "Nawar Batsiba amé' negku." Idi ieh iné' matun raca'. Idi ieh tuped pa kiungneh.

²⁹Idi kebalaneh neneh, "Ui pebulung ku ngadan Tuhan luk mulun, luk pangeh nenguli' negku ratnan amung-amung dereh,

³⁰idi aco sini ui miak ngacing jani' luk pijani'ku namu ku ngadan Tuhan Allah lun Israil, ratnan anakmu Selimun miak mangun ku raca' libalku."

³¹Batsiba netekeradung pa kiung raca', kebalaneh, "Do' Raca' Daud mipu ulun!"

³²Idi Raca' Daud nengecuk nawar Imam Saduk, Nabi Natan, idi Benaya Yoyada amé' neneh. Kareb diteluh nacing,

³³idi kebalaneh nediteluh, "Nguit lun tarehku maya' nemuyuh, idi ngikit anakku Selimun luun keladaiku, idi do' muyuh nated neneh amé' déi' Gihun.

³⁴Idi do' Imam Saduk idi Nabi Natan ngumau neneh déi' mangun ku raca lun Israil. Pangeh ineh do' muyuh ngiup serupit idi ngitang, 'Do' Raca' Selimun mipu ulun!'

³⁵Idi do' muyuh nguit neneh amé' tungé', pad ieh tudo luun kerusi raca' idi mangun ku raca' libalku. Ngaceku ui pangeh nengelelep neneh mangun ku lun nguyut nelun Israil idi lun Yahuda."

³⁶Idi kebala Benaya Yoyada kuan raca', "Mo! Do' Tuhan Allahmu ngelelep ineh.

³⁷Idi mepad kudeng Tuhan pangeh nengedengan namu, kudeng ineh teh do' Ieh ngedengan ni Selimun, idi nganau' imetneh meluun rayeh ratnan imetmu ineh.”

³⁸Idi pangeh ineh Imam Saduk, Nabi Natan, Benaya Yoyada, idi lun luk matar raca' netemurun idi nengiding Selimun luun keted keladai Raca' Daud, idi nenated neneh amé' déi' Gihun.

³⁹Idi Saduk nengalap unga luk inan umau rat bang Lepo Tuhan ineh, idi ieh nengumau ni Selimun. Idi ideh nengiup serupit. Idi amung lun mula' ineh pana' nengitang, kebaladeh, "Do' Raca' Selimun mipu ulun!”

⁴⁰Idi lun mula' ineh iné' nguyut raca', idi nengiup suling, idi mawang niat idi do' ria', pad tana' kudeng metabpa ku aroddeh.

⁴¹Idi uni ineh nekali' Adonia idi amung lun luk tinawar danganneh, kareb ideh malé pangeh akan. Idi kareb uni serupit ineh nekali' Yoab, kebalaneh, "Anun punneh mula' uni bang bawang ineh?”

⁴²Idi laba' ieh pebala, idi Yonatan anak Abiatar luk imam nacing. Idi kebala Adonia, "Semuet iko, ngaceku iko lemulun luk do', idi iko maré bala luk do' kuan kai.”

⁴³Idi kebala Yonatan, "Na ieh bala do', iamo' Raca' Daud pangeh nengikit ni Selimun mangun ku raca'.

⁴⁴Idi ieh nengecuk Imam Saduk, Nabi Natan, Benaya Yoyada, idi lun luk matar raca' maya' neneh. Idi ideh nengiding neneh luun keladai Raca' Daud.

⁴⁵Idi ieh pangeh inumau Imam Saduk idi Nabi Natan déi' Gihun mangun ku raca'. Idi amungdeh ineh nenalan rat déi' dengan mawang niat, pad aput bawang meria'. Idi ineh uni luk pangeh pindenger muyuh ineh.

⁴⁶Idi teh Selimun pangeh mangun ku raca' nekini.

⁴⁷Meluun teh amung lun tareh raca' pangeh iné' ni Daud pian ngeperuan neneh kebaladeh, 'Do' Allahmu ngebala ngadan Selimun meluun ratnan

ngadanmu, idi ngerayeh imetneh meluun ratnan imetmu. Idi Raca' Daud pana' nemunel idi sembayang luun pagauneh,

⁴⁸kesembayangneh, 'Amung ubur kuan Tuhan Allah lun Israil, luk pangeh nemaré seburur anakku aco sini mangun ku raca' libalku, pad matehku sebuleng nier neneh.' “

⁴⁹Idi kareb ineh amung lun luk tinawar Adonia matot. Idi ideh netuped idi perigéi' buro.

⁵⁰Idi Adonia matot ni Selimun. Idi ieh neburo idi iné' ngimet unga bubpun su luk inan maré baré kuan Tuhan.

⁵¹Idi ideh nemada' ni Selimun, ratnan Adonia matot neneh, pad ieh ngimet unga bubpun, kebalaneh, "Nima' raca' Selimun pejani' negku, pad ieh na ngaté negku.”

⁵²Idi kebala Selimun, "Kudeng ieh selemulun luk mayu, idi sengurat abpuk pana' nateh mebubput ratnan uluhneh. Iamo' kudeng ieh dat niat, kali' rungen ieh teh pitayen mucu.”

⁵³Idi Raca' Selimun nengecuk nelun nguit neneh ratnan bubpun ineh. Idi ieh nacing tekeradung pa kiung raca'. Idi kebala raca' neneh, "Muli' iko.”

Raca'-Raca' Luk Pun-Pun 2

¹Kareb Daud lélé maté, idi ieh neperiteteng kuan anakneh Selimun, kebalaneh,

²"Tarekku pangeh nacing. Ngaceku ineh do' iko lutep idi mekuu',

³idi nganau' amung luk duken Tuhan Allahmu idi maya' amung bala idi ukumNeh, petulu ku amung-amung luk inayud bang Surat Ukum Musa, pad iko uen ngeperuan bang amung-amung luk ruenmu, idi amung lawému,

⁴pelé Tuhan ngacing jani'Neh negku ratnan inulku miak ngimet Israil, seruked ideh maya' balaNeh dengan amung niatdeh idi amung terawédeh.

⁵"Idi teh iko kali' ratnan luk pangeh inau' Yoab kuanku, kareb ieh nengaté dueh lun rayeh baweh Israil, ieh ineh Abner Ner, idi Amasa Yeter ineh. Ieh

nengaté nedidueh ineh bang kareb luk na inan bunu' ku ngua' até lun luk pinaté didueh kareb pebunu'. Idi ieh nengedara' abet awa'ku, idi kasutku ku dara' lemulun luk na mesala'.

⁶Iko kali' luk petulu ruenmu. Aleg iko nima' neneh maté ku ngeredneh.

⁷Iamo' do' iko méi' kuan anak-anak Barsilai lun Giliad ineh, idi ngasa' nedeh. Ngaceku ideh pelaba do' negku kareb ui neburo rat pa kiung kinanakmu Absalom.

⁸Idi Simi Gira lun Beniamin rat Bahurim ineh idi denganmu. Ieh nengediman negku ku kediman luk pelaba bura' kareb ui iné' déi' Mahanaim. Iamo' kareb ieh nepapu' negku déi' tangeb Abpa' Yarden, idi ui nepebulung neneh, na ui ngaté neneh.

⁹Iamo' aleg iko ngiap neneh meligan ratnan sala'. Iko kali' luk petulu ruenmu. Idi do' iko ngecuk nelun ngaté neneh.”

¹⁰Idi Daud naté. Idi ieh tinanem déi' Yerusalim.

¹¹Idi kinio Daud mangun ku raca' lun Israil ineh apat ngepulu' lak, ieh ineh tudu' lak déi' Hebron, idi teluh ngepulu' teluh lak déi' Yerusalim.

¹²Idi Selimun nengelibal tamanneh Daud mangun ku raca'. Idi imetneh lutep.

¹³Idi Adonia anak Hagit ineh iné' papu' ni Batsiba tinan Selimun. Idi kebala Batsiba neneh, "Iko lawé do'ké?" Kebalaneh, "Mo, lawé do'.”

¹⁴Idi kebalaneh, "Inan aceh itunku namu." Idi kebala Batsiba, "Mada' ieh.”

¹⁵Kebalaneh, "Iko teh pangeh kali', imet ineh pangeh litep kuanku ini, idi amung lun Israil teh pangeh pian negku mangun ku raca'. Idi imet ineh linubed kuan kinanakku. Ngaceku litep Tuhan kuanneh.

¹⁶Idi nekini ui pian mutuh namu. Aleg iko ngarung putuhku ineh.”

¹⁷Idi kebala Batsiba, "Mada' ieh." Idi kebalaneh, "Do' iko mutuh Raca' Selimun — na ieh ngarung putuhmu — pad Abisag decur Sunam ineh barénneh negku ku awanku.”

¹⁸Idi kebala Batsiba, "Do'! Ui miak mutuh neneh kuanmu.”

¹⁹Idi Batsiba iné' matun raca' sikal pegayam neneh ratnan putuh Adonia ineh. Idi raca' netuped papu' tinanneh, idi ieh netekunal pa kiungneh. Idi ieh netudo luun kerusi raca'. Idi ieh nengecuk ngerareng kerusi kuan tinanneh. Idi ieh netudo pa tinueh raca'.

²⁰Idi kebala Batsiba, "Inan sesuut itunku namu. Aleg iko ngarung putuhku." Idi kebala raca', "O Ina' mutuh mo'. Idi na ui ngarung putuhmu Ina'."

²¹Idi kebala Batsiba, "Nima' Abisag decur Sunam ineh barén kuan Adonia kinanakmu ku awanneh."

²²Idi kebala raca', "Ngudeh iko mutuh Abisag decur lun Sunam ineh kuan Adonia? Mutuh mo' imet raca' ini kuanneh teh. Ngaceku ieh teh kinanakku luk rayeh, idi Abiatar luk imam idi Yoab anak Seruya pana' mangun serurum danganneh."

²³Idi Selimun nepebulung ku ngadan Tuhan, kebalaneh, "Do' Allah ngukum negku kudeng putuh ini na ngacing até kuan Adonia!

²⁴Idi ui pebulung ku ngadan Tuhan luk mulun idi luk pangeh nengikit negku idi luk nengetudo negku luun kerusi imet tamanku Daud, idi luk pangeh nenganau' ruma'ku petulu dengan balaNeh, idi Adonia miak pitayen aco sini peh."

²⁵Idi raca' nengecuk Benaya Yoyada, amé' ngaté ni Adonia.

²⁶Idi kebala raca' kuan Imam Abiatar, "Muli' iko amé' déi' Anatot. Ngaceku petulu iko pitayen teh. Iamo' ui na sikal ngaté namu nekini, ngaceku iko nemirir Pati' Pejani' Tuhan Allahku pa kiung tamanku Daud, idi ngaceku iko teh idi danganneh bang amung derehneh."

²⁷Idi Selimun ngagka' ni Abiatar ratnan kekamen imam kuan Tuhan, pad ieh ngacing bala Tuhan luk pangeh bida'Neh atun déi' Silo, ratnan lawé lun bang tetek ruma' Eli ineh.

²⁸Kareb bala ineh nekali' Yoab, ngaceku Yoab pangeh nengedengan ni Adonia, sagan pana' ieh na nengedengan ni Absalom atun, idi ieh neburo iné' bang Lepo Tuhan idi nengimet unga bubpun.

²⁹Kareb Raca' Selimun nekali' bala ratnan Yoab pangeh neburo iné' bang Lepo Tuhan, idi ieh tudo iring bupun, idi Selimun nengecuk Benaya Yoyada amé' ngaté neneh.

³⁰Idi Benaya iné' bang Lepo Tuhan. Idi kebalaneh ni Yoab, "Raca' ngecuk namu remuat!" Iamo' kebala Yoab, "Na, ui sikal maté su ini." Idi Benaya iné' mada' raca' ratnan luk bila Yoab.

³¹Idi kebala Selimun neneh, "Ruenmu kudeng luk bilaneh ineh. Ngaté neneh, idi nanem neneh, pelé iko nala' rat negku idi ratnan tetek ruma'ku amung dara' lemulun luk na mesala' luk pangeh rinuat Yoab.

³²Idi Tuhan miak ngua' dara' luk pangeh rinuatneh ineh luun uluhneh sebuleng. Ngaceku ieh pangeh nengaté dueh burur luk meluun matu idi meluun do' ratnan bururneh sebuleng, idi ieh nengaté nedidueh dengan na kali' tamanku Daud, ieh ineh Abner lun rayeh baweh lun Israil, idi Amasa lun rayeh baweh lun Yahuda.

³³Kudeng ineh dara' didueh ineh uen ngelubed kuan uluh Yoab idi kuan inulneh pana'. Iamo' inul Daud, idi kerusi imetneh pana', miak ruen Tuhan ngeperuan macing raked-raked."

³⁴Idi Benaya Yoyada iné' bang Lepo Tuhan. Idi ieh nengaté ni Yoab. Idi ieh tinanem iring ruma'neh luk mado rat bawang rayeh.

³⁵Idi raca' nengikit Benaya Yoyada mangun ku lun rayeh baweh libal Yoab. Idi ieh nengikit Imam Saduk ku libal Abiatar.

³⁶Pangeh ineh idi raca' nengecuk nawar ni Simi. Idi kebalaneh neneh, "Pidutenmu aceh ruma' déi' Yerusalim, idi do' iko tudo bang ineh, idi aleg iko remuat rat déi' amé' iapeh-iapeh.

³⁷Kudeng iko remuat rat déi' idi guta Abpa' Kidron, kali' rungen iko maté. Idi iko mabeh atému sebuleng."

³⁸Idi kebala Simi, "Mo, Raca'! Miak ui maya' balamu." Idi ieh tudo déi' Yerusalim tuda'-tuda' io.

³⁹Iamo' udung lak luk keteluh, dueh demulun Simi neburo iné' ni raca' Gat, Akis Maaka. Kareb Simi nekali' bala ratnan didueh idi déi' Gat,

⁴⁰idi ieh nengerareng apin luun keladaineh, idi ieh nenalan iné' déi' Gat pian papu' ni Akis pad nakap dueh demulun ineh. Idi ieh nenguit nedidueh nuli'.

⁴¹Kareb Selimun nekali' bala ratnan luk inau' Simi,

⁴²idi ieh nengecuk nawar ni Simi. Idi kebalaneh neneh, "Naké ui pangeh nemulung namu ku ngadan Tuhan, idi pangeh nemada' namu, pad iko na remuat rat Yerusalim, pelé iko na maté. Naké iko nepejani' maya' balaku ineh?

⁴³Ngaceku ineh ngudeh iko na nginita bulungmu ineh ku ngadan Tuhan idi bebpengku namu?

⁴⁴Iko teh kali' do'-do' bang niatmu sebuleng amung-amung dat luk pangeh inau'mu kuan tamanku Daud. Idi ngaceku ineh Tuhan ngelubed datmu ineh luun uluhmu sebuleng.

⁴⁵Iamo' Ieh miak ngeperuan negku idi ngeletap imet Raca' Daud macing ruked-ruked."

⁴⁶Idi raca' nengecuk Benaya Yoyada amé' ngaté ni Simi. Idi dengan luk kudeng ineh imet raca' litep bang palad Raca' Selimun.

Raca'-Raca' Luk Pun-Pun 3

¹Idi Selimun nengalap anak decur raca' Masir mangun ku awanneh, pad nganau' aceh ruruh dengan raca' ineh. Idi ieh nenguit neneh amé' bang Bawang Daud, ngaceku ieh pian mangeh pudut ruma'neh idi Ruma' Allah pana', idi teh libung bawang Yerusalim pekelibut.

²Idi kareb ineh lun mula' maré baré luun tuda'-tuda' bubpun, ngaceku nateh Ruma' Allah pinudut.

³Idi Selimun mawa inan Tuhan idi nemaya' amung ukum luk litep tamanneh Daud. Iamo' ieh nemaré baré sabpen luun tuda'-tuda' bubpun.

⁴Idi bang seaco ieh iné' déi' Gibion pian maré baré sabpen su ineh, ngaceku bubpun ineh mebala. Ieh pangeh nemaré tuda'-tuda' ngeratu baré sabpen luun bubpun ineh.

⁵Idi dacep sineh Tuhan nesilangan neneh bang nupi. Idi kebalaNeh neneh, "Mutuh iko anun luk pianmu, idi miak Ui maré kuanmu."

⁶Idi kebala Selimun, "Iko pangeh nengegala' awamu luk rayeh idi lutep kuan tamanku Daud, ngaceku ieh pangeh mulun pa kiungmu dengan niat luk lutep, idi matu, idi mesiri. Idi awamu luk rayeh ineh pangeh litepMu kuanneh, pad iko nemaré kuanneh aceh anak luk miak tudo luun kerusi imetneh mepad kudeng luk idi aco sini.

⁷Idi nekini O Tuhan Allahku, Iko pangeh nenganau' negku ini mangun ku raca' libal tamanku Daud. Idi ui mangud idi na mileh ngimet.

⁸Idi ui ini arang uned pupu luk pinili'Mu kuanMu, aceh pupu luk mula' luk na mekiap.

⁹Ngaceku ineh maré ileh kuanku pad ui miak ngimet pupuMu dengan mesiri. Ngaceku mesusa' kuanku ngimet pupuMu luk pelaba ula' ini."

¹⁰Idi Tuhan mawang niat ngaceku Raca' Selimun pangeh nemutuh ileh.

¹¹Idi kebalaNeh neneh, "Idi ngaceku iko nemutuh ileh pad iko ngimet dengan mesiri, idi na iko nemutuh kuanmu mekadang ulun, mula' binaweh, idi até amung bunu'mu,

¹²idi Ui nganau' luk pinutuhmu. Idi Ui maré namu niat luk mileh idi luk kali' ngelio, pad na luk idi luk mepad kudeng iko atun rat namu, idi mucu teh.

¹³Idi teh anun luk na pinutuhmu Ui miak maré kuanmu, do' mula' binaweh, do' ubur, macing raked ulunmu. Seburur pana' nateh mepad namu rat arang amung raca'.

¹⁴Idi kudeng iko maya' amung bala idi ukumKu mepad kudeng tamanmu Daud, idi Ui miak ngekadang ulunmu peh."

¹⁵Kareb Raca' Selimun nekulat, idi ieh kali' ieh ineh nupi ratnan Tuhan. Idi ieh iné' déi' Yerusalim, idi netuped pa atun Pati' Pejani' Tuhan, idi nemaré tuda'-tuda' baré luk sabpen idi tuda'-tuda' baré luk nguit pedo'. Idi ieh nenganau' aceh irau kuan amung lun tarehneh.

¹⁶Idi dueh burur decur luk mesawa' iné' papu' raca'.

¹⁷Idi kebala seburur decur ineh, "O raca', idi ui idi decur ini pamung ruma'. Idi ui nenganak kareb ieh idi denganku bang ruma' ineh.

¹⁸Idi teluh aco rat pangeh ui nenganak, decur ineh pana' nenganak teh. Idi seburur lun baken pana' nateh dengan kai dueh bang ruma' ineh.

¹⁹Idi anak deléineh ineh pangeh naté dacein ina, ngaceku neritepneh.

²⁰Idi decur ini nekulat kareb tangal dacein, kinidingneh dui anak deléi rat iringku laba' ui rudap. Idi ieh nenganau' anakku ineh telubid iringneh. Idi dieh anak luk naté ineh inau'neh telubid iringku.

²¹Kareb ui nekulat uka-uka sikal niti' anakku, ieh pangeh naté. Iamo kareb ui nier neneh kareb macang megala' anak ini baken anak dui luk pangeh tinganakku ineh."

²²Iamo' kebala decur luk baken ineh, "Na! Anak luk mulun ineh ui kuan. Idi luk naté ineh anakmu." Iamo' kebala decur ini, "Baken! Iamo' luk naté ineh anakmu. Idi luk mulun ineh ui kuan." Idi didueh pesaad-pesaad pa kuing raca'.

²³Idi kebala Raca' Selimun, "Kebala seburur, 'Ini anakku luk mulun ineh. Iamo' anakmu ineh pangeh naté.' Idi kebala seburur, 'Na! Luk naté ineh anakmu. Idi luk mulun ineh ui kuan.' "

²⁴Idi kebala raca', "Amé' ngalap aceh karit kuanku." Idi ideh nemaré aceh karit neneh.

²⁵Idi kebalaneh, "Upanmu luk mulun ineh mangun dueh upa. Idi maré seupa kuan sebuleng decur idi seupa kuan sebuleng."

²⁶Iamo' decur luk kuan anak luk mulun ineh nepebala kuan raca', ngaceku ieh méi' kuan anakneh, "O raca', maré mo' anak luk mulun ineh kuanneh. Aleg iko ngaté neneh." Iamo' kebala decur luk baken ineh, "Nima' anak ineh baken iko kuan, baken ui kuan. Do' ieh upanmu."

²⁷Idi kebala raca', "Maré anak luk mulun ineh kuan decur ineh. Aleg iko ngaté neneh. Ngaceku ieh ineh tinan anak ineh."

²⁸Idi kekiped ukum luk pingeh raca' ini nekali' amung lun Israil. Idi ideh matot pa kiung raca' ngaceku ideh kali' ileh Allah luk biré neneh, pad ieh nganau' luk mepiteb.

Raca'-Raca' Luk Pun-Pun 4

¹Idi Selimun ineh raca' aput lun Israil.

²⁻⁶Idi ini amung lun tarehneh: Imam Rayeh: Asaria Saduk Lun luk ngayud: Elihorep idi Ahia anak-anak Sisa Lun luk ngimet usin: Yosapat Ahilud Lun rayeh baweh: Benaya Yoyada Imam-imam: Saduk idi Abiatar Lun rayeh luk pa luun lun luk ngimet anid babpat bawang: Asaria Natan Lun luk mada' raca': Imam Sabud Natan Lun rayeh ruma' raca': Ahisar Lun rayeh lun luk icuk ngakem: Adoniram Abda.

⁷Idi teh Selimun inan pulu' dueh lun luk ngimet anid babpat Israil, luk maré akan kuan raca' idi amung lun bang ruma' raca'. Idi sekua' selak, raked sebulan anid-aniddeh nguit akan.

⁸⁻¹⁹Idi ini ngadandeh: Ben Hur: Pegkung Epraim Ben Dekar: Bawang-bawang Makas, Salbum, Bait Simes, Elon, idi Bait Hanan Ben Hese: Bawang-bawang Arubot, Suko, idi aput tana' Hiper Ben Adinadab luk awan Tapat, anak Selimun: aput bawang Dor Bana Ahilud: Bawang-bawang Tanak, Megido, idi aput Bait Sian luk pelengit Saretan luk pa kabing busat aco Yesril macing bawang Abel Mehola idi bawang Jukmiam Ben Giber: Ramot Giliad, amung bawang Yair (luk anak Manasé) luk déi' Giliad, aput bawang Argob luk déi' Basan dengan anem ngepulu' bawang luk meraben libung luk inan palin tekaling Ahinadab Ido: Mahanaim Ahimas luk awan Basimat, anak Selimun

luk baken: Naptali Bana Usai: Aser idi Bialot Yosapat Parua: Iskar Simi Ela: Beniamin Geber Uri: Giliad dengan amung bawang Sinon, raca' lun Amon, idi Og, raca' Basan Idi inan teh sebuleng lun luk ngimet déi' bawang Yahuda.

²⁰Idi kinula' lun Yahuda idi lun Israil ineh mepad kudeng bada luk i tangeb abpa' rayeh. Idi ideh kuman idi ngirup dengan mawang niat.

²¹Idi Selimun nengimet amung pupu rat Abpa' Pirat pa acep aco macing bawang lun Pilistin pa busat aco idi macing lakan tana' lun Masir. Idi ideh nemaré pupuk kuan Selimun. Idi ideh ineh pa liang imetneh raked ulun Selimun.

²²⁻²³Idi akan Selimun bang seaco 1,200 gatang banak luk do', idi 2,400 gatang banak luk pekalai, 10 sapi' luk melamu, 20 sapi' ratnan laman, 100 dumba, idi teh payo, talau, pelanuk, idi lal.

²⁴Selimun nengimet amung-amung bawang luk pa acep aco Abpa' Pirat ineh, rat Tipsa macing déi' Gasa. Amung raca' luk pa acep aco Abpa' Pirat ineh pa liang imetneh. Idi ideh do' udeng idi na inan susa' iapeh-iapeh pana'.

²⁵Idi seruked ulun Selimun amung lun Yahuda idi Israil teh do' udeng, liang lawa anggurdeh, idi liang lawa gita'deh, rat Dan macing déi' Birsiba.

²⁶Selimun inan 40,000 kuda kuan keréta pebunu'neh, idi 12,000 lun luk maya' kuda ineh.

²⁷Idi pulu' dueh lun ngimet ineh anid-anid bulan ngasa' Raca' Selimun idi amung lun luk peruyung akan neneh, idi sebuleng pana' nateh luk na petap.

²⁸Idi teh ikun idi uduh luk tekering luk kuan amung kuda idi kuda keréta, itendeh amé' su luk pian raca', maya' kinula' luk bida'neh.

²⁹Idi Allah nemaré kuan Selimun ileh luk meluun, idi luk meluun do' kali', idi terawé luk meluun rayeh mepad kudeng bada luk i tangeb abpa' rayeh kinula'neh.

³⁰Idi Selimun ineh meluun ileh ratnan lun luk mileh luk rat pa busat aco, idi teh ratnan lun luk mileh rat Masir.

³¹Ieh meluun ileh ratnan amung lun baken: ieh ineh meluun ileh ratnan Etan lun Esrahi, idi Himan, Kalkol, idi Darda, diteluh anak deléi Mahul. Idi ngadanneh mebala apud bawang luk pekelibut.

³²Idi ieh nenulu 3000 balé'. Idi amung nani raca' ineh mela meribu.

³³Ieh nemada' ratnan ulun amung lawa kayuh ratnan kayuh tumuh luk déi' luun Pegkung Lebanon, idi likudung luk mulun luun libung batu. Idi teh ieh nemada' ratnan ulun amung pung, suit, menipeh, idi lawid.

³⁴Idi raca'-raca' rat apud tana' nekali' bala ratnan ilehneh, pad ideh nengecuk lun dukendeh amé' ninger balaneh.

Raca'-Raca' Luk Pun-Pun 5

¹Raca' Hiram rat Sur nengecuk tuda'-tuda' lun duken amé' papu' Raca' Selimun. Ngaceku ieh pangéh neninger bala ratnan Selimun pangéh mangun ku raca' libal tamanneh. Ngaceku atun Raca' Hiram ineh mawa inan Raca' Daud.

²Idi Selimun teh nengecuk mada' Raca' Hiram, kebalaneh,

³"Iko teh kali' idi tamanku Daud na miak mudut aceh Ruma' kuan ngadan Tuhan Allahneh, ngaceku amung bunu' luk inau'deh pekelibut, pad Tuhan nemaré neneh metueh ratnan amung bunu'neh.

⁴Iamo' nekini Tuhan Allahku pangéh nemaré do' udeng pekelibut. Seburur pana' nateh luk munu' negku. Idi anun-anun dat pana' nateh macing negku.

⁵Idi ui sikal mudut aceh Ruma' kuan Tuhan Allahku, maya' kudeng bala Tuhan kuan tamanku Daud, kebalaneh, 'Idi anakmu luk uenKu ngetudo mucu luun kerusi imet ku libalmu, ieh miak mudut Ruma' ineh kuanKu.

⁶Ngaceku ineh, do' iko ngecuk nelun amé' nebpeng tuda'-tuda' tumuh kuanku déi' luun Pegkung Lebanon. Idi amung lun dukenku maya' nelun dukenmu. Idi tabpar amung lun dukenmu ineh ui miak maré namu, maya' kudeng luk belénmu mucu. Ngaceku iko kali' arang amung tau seburur pana' nateh mileh nebpeng kayuh mepad kudeng lun dukenmu ineh."

⁷Kareb Raca' Hiram neninger bala Selimun ineh, idi ieh mawang niat, kebalaneh, "Amung ubur kuan Tuhan bang aco sini teh. Ngaceku Ieh pangeh nemaré kuan Daud aceh anak luk mileh ngimet pupu luk mebala ini."

⁸Idi Hiram nengor bala Selimun, kebalaneh, "Ui pangeh neninger bala luk bida'mu negku. Idi ui miak maya' amung pianmu ratnan kayuh tumuh idi kayuh tongor.

⁹Idi amung lun dukenku miak nguit batang rat déi' Lebanon suet abpa' rayeh, idi ruendeh ku rét pad ideh maya' ineh bang abpa' rayeh macing su luk litepmu. Su ineh ideh neka rét ineh, pad iko miak ngalap batang ineh rat su ineh. Idi teh do' iko maré akan kuan ruma'ku idi anak itinku."

¹⁰Idi Hiram nemaré kuan Selimun kayuh tumuh idi kayuh tongor luk pian raca'.

¹¹Idi anid-anid lak Selimun nemaré kuan Hiram 800,000 gatang padé ku akan anak itinneh, idi 110,000 gilin umau saitun.

¹²Idi Tuhan nemaré ileh kuan Selimun maya' kudeng luk pijani'Neh neneh. Idi Hiram idi Selimun neperurum pad didueh nepejani' seburur dengan seburur.

¹³Idi Raca' Selimun nengesaad 30,000 lun Israil ngakem.

¹⁴Idi ieh nengecuk nedeh amé' déi' Lebanon, idi anid bulan inan meribu lun luk icuk ineh ngakem. Sebulan ideh déi' bawang Lebanon, idi dueh bulan i ruma'deh. Idi Adoniram ineh lun rayeh amung lun luk icuk ineh.

¹⁵Idi teh Selimun inan 80,000 lun luk ngelebping batu déi' luun pegkung, idi 70,000 lun luk nguit batu ineh.

¹⁶Ieh nengeletep 3,300 lun luk ngimet kekamendeh.

¹⁷Idi Raca' Selimun nengecuk nedeh ngelebping batu rayeh ku tapin Ruma' Allah ineh.

¹⁸Idi lun duken Selimun idi Hiram, idi lun rat Gebal pana' ngelebping batu ineh, idi nemipil amung kayuh kuan Ruma' ineh.

Raca'-Raca' Luk Pun-Pun 6

- ¹Idi 480 lak mucu rat nelun Israil remuat rat bang bawang Masir, ieh ineh lak keapat bang imet Raca' Selimun pa luun Israil, kareb bulan Sib, ieh ineh bulan luk kedueh, Selimun nengimun mudut Ruma' Allah.
- ²Idi bang Ruma' ineh kadangneh 15 depeh, pipangneh 5 depeh, idi dita'neh 7 depeh setangal.
- ³Idi tador luk pa atun ruma' ineh 2 depeh setangal kadangneh idi 5 depeh pipangneh maya' pipang Ruma' ineh.
- ⁴Idi alad Ruma' ineh inan tuda'-tuda' tabuk luk maré acang sesuut.
- ⁵Idi pekop iring alad Ruma' ineh idi pa keted teh ieh nemudut tuda'-tuda' takep dengan teluh tutul, aceh tutul mela medepeh.
- ⁶Anid takep luk pa beneh mela medepeh pipangneh. Idi luk uned ineh medepeh setangal, idi luk pa luun lélé dueh depeh pipangneh. Ngaceku libut-libut Ruma' ineh ieh nenganau' tatak-tatak luun alad pad paled-paled ineh na mulang bang ruma' ineh.
- ⁷Idi Ruma' ineh pinudut ratnan batu luk pangeh inau' temina' déi' su luk inan ngelebping, pad na ninger pek tuno, kapak, idi belawan kareb mudut Ruma' Allah ineh.
- ⁸Idi tanga' takep luk pa beneh ineh pa kabing busat aco Ruma' ineh. Idi inan ican parung amé' inan tutul luk kedueh idi keteluh.
- ⁹Idi Selimun nemangeh pudut ineh. Idi ieh nengapin iang parung ruma' ineh ku bangar tumuh.
- ¹⁰Idi pudut luk teluh tutul ineh pinudutneh balalad Ruma' Allah. Idi ieh nenutum ruma' ineh ku kayuh tumuh. Kidita' anid tutul ineh mela medepeh.
- ¹¹Idi kebala Tuhan ni Selimun,
- ¹²"Kudeng iko maya' amung bala idi ukumKu, idi Ui ngeletap pejani'Ku namu, luk pangeh pijani'Ku inan tamanmu Daud.
- ¹³Idi Ui miak tudo bang Ruma' ini arang pupuKu lun Israil. Idi na Ui necan nedeh."

- ¹⁴Kudeng ineh Raca' Selimun nemangeh pudut ineh.
- ¹⁵Idi alad pa bang Ruma' binuunneh ku bangar kayuh tumuh, ratnan apin Ruma' ineh macing nan apo. Idi apin Ruma' ineh binuunneh ku kayuh tongor.
- ¹⁶Idi takep luk déi' dalem, luk titen Su luk Meluun Meligan pinudut pa puet bang Ruma' Allah ineh. Kadangneh 5 depeh, idi alad pa bang Ruma' inau' ratnan bangar kayuh tumuh ratnan apin macing ku apo.
- ¹⁷Idi kadang Su luk Meligan luk pa atun ineh 10 depeh.
- ¹⁸Idi kayuh tumuh luk pa bang Ruma' ineh, amung ineh inarit ku arit busak idi buah'. Amungneh kayuh tumuh, sesuut alad batu pana' nateh melagan.
- ¹⁹Idi ieh nenganau' Su luk Meluun Meligan ineh pa bang Ruma', idi nengerareng Pati' Pejani' Tuhan bang ineh.
- ²⁰Idi tari Su luk Meluun Meligan ineh 5 depeh kadangneh, 5 depeh pipangneh, idi 5 depeh dita'neh. Idi amung ineh kikep ku amas tinuno. Idi teh ieh nenganau' bubpun ratnan kayuh tumuh.
- ²¹Idi Selimun nengakep pa bang lubang Ruma' ku amas tinuno. Idi ieh nenganau' ratai amas i munung Su luk Meluun Meligan, luk kikep ku amas ineh.
- ²²Idi amung Ruma' ineh kikep ku amas luun amung babpatneh idi amung bubpun luk pelengit Su luk Meluun Meligan ineh pana' kikepneh ku amas.
- ²³Idi bang Su luk Meluun Meligan ineh, ieh nemudut dueh melaikat karub ratnan kayuh saitun, 2 depeh setangal dita'neh.
- ²⁴⁻²⁶Ayu idi kirayeh dueh melaikat karub ineh mepad mo'. Idi kadang ilad didueh mop-mop mela medepeh. Idi ratnan paped ilad selipa macing paped ilad selipa, kikadangneh 2 depeh setangal.
- ²⁷Idi ieh nengerareng melaikat karub luk dueh ineh peringuned su luk pa bang lubang. Idi melaikat karub luk dueh ineh tegeyap ilad, pad ilad aceh melaikat karub ineh macing inan alad. Idi ilad melaikat karub luk baken ineh macing luun alad selipa. Idi ilad didueh luk pa uned ineh petutup.

- ²⁸Idi melaikat karub luk dueh ineh pana' kikepneh ku amas.
- ²⁹Idi alad Su luk Meligan idi Su luk Meluun Meligan ineh inarit maya' ayu melaikat karub, lawa piasau, idi ayu busak nelusad pekelibut.
- ³⁰Idi teh apin pana' kikepneh ku amas.
- ³¹Idi tanga' Su luk Meluun Meligan luk dueh itek ineh inau' ratnan bangar kayuh saitun, idi atang pa luun itek tanga' ineh meriut.
- ³²Idi teh dueh itek ineh inaritneh kudeng ayu melaikat karub, lawa piasau, idi busak nelusad. Idi kikepneh ku amas. Idi amung melaikat karub idi lawa piasau ineh kikepneh ku amas teh.
- ³³Kudeng ineh teh ieh nenganau' tanga' Su luk Meligan ineh. Diri tanga' ineh ratnan kayuh saitun. Pudutneh lebping apat.
- ³⁴Idi dueh itekneh ratnan kayuh tongor. Bangar itek ineh petutup, sebuleng uen ngelaked amé' selipa, idi sebuleng amé' selipa.
- ³⁵Idi itek ineh pana' inarit maya' ayu melaikat karub, lawa piasau, idi busak nelusad, luk kikepneh ku amas.
- ³⁶Idi ieh nenganau' natad pa bang lubang ineh dengan teluh buun batu luk libping, idi aceh buun ratnan kayuh tumuh.
- ³⁷Idi apin Ruma' Allah pinudut bang bulan dueh, ieh ineh bulan Sib, bang lak luk keapat kareb imet Selimun.
- ³⁸Idi bang bulan ualuh, ieh ineh bulan Bul, bang lak luk keputu' aceh kareb imet Selimun, ideh nemangeh pudut Ruma' ineh maya' kudeng luk pangeh litep raca'. Idi tudu' lak kinioneh Selimun nemudut Ruma' ineh.

Raca'-Raca' Luk Pun-Pun 7

- ¹Idi teh Selimun nemudut aceh ruma' kuan bururneh sebuleng. Idi pulu' teluh lak kinioneh ieh nemudut ineh.
- ²⁻³Idi teh ieh nenganau' Ruma' Pulung Lebanon, kikadangneh 25 depeh, pipangneh 12 depeh setangal, dita'neh 7 depeh setangal. Inan teluh atur diri ratnan kayuh tumuh. Bang seatur 15 diri dengan atang ratnan kayuh tumuh.

Idi apin parungneh inau' ratnan kayuh tumuh, idi pekatu macing su takep luk inan nganug binaweh luk pinudut luun diri ineh.

⁴Pekop ruma' ineh inan teluh atur tabuk.

⁵Idi amung diri tanga' idi diri tabuk ineh apat lebbing, idi amung tabuk ineh pana' teluh atur, idi petutup-petutup.

⁶Idi ieh nemudut Sikang Diri Batu. Kadangneh 12 depeh setangal, pipangneh 7 depeh setangal dengan tador luk pa atunneh. Idi amung diri tador ineh kikeb ku apo.

⁷Idi teh ieh nemudut Bitaran Kerusi Raca' su luk inan raca' tudo mutut ukum, ieh ineh Bitaran Ukum, luk binuun ku kayuh tumuh rat ku apin macing ku nurur.

⁸Iamo' ruma' su luk inan raca' tudo pinudut luun natad pa keted Bitaran Ukum ineh. Ieh ineh pudut luk mepad. Idi teh Selimun nenganau' aceh ruma' luk mepad kudeng Bitaran ineh kuan anak raca' Masir luk ilapneh ku awanneh.

⁹Idi amung pudut ratnan tapin macing ku ilek, inau' ratnan batu luk meluun do', luk libping maya' tarineh su luk inan mila' batu, idi rinadi' bal selipa idi pa bang lubang.

¹⁰Amung tapinneh pana' inau' ratnan batu luk mekara luk libping. Inan luk 2 depeh kadangneh. Idi inan teh luk 2 depeh setangal.

¹¹Idi pa luun inan batu luk lipag maya' tari, idi paled ratnan kayuh tumuh.

¹²Idi natad ruma' raca', natad pa bang lubang, idi tador Ruma' Allah inan teluh buun batu luk libping idi seatur buun ratnan kayuh tumuh.

¹³Raca' Selimun nengecuk nguit ni Huram rat Sur.

¹⁴Ieh ineh anak seburur decur tinula' rat inul Naptali. Iamo' tamanneh lun Sur. Huram ineh seburur lun mileh nganau' luk ratnan tekaling. Ieh do' kali' ngakem amung kekamen ratnan tekaling. Idi ieh iné' matun Raca' Selimun. Idi ieh mangun ku lun rayeh lemulun luk ngakem ratnan tekaling.

- ¹⁵Idi Huram nenganau' dueh diri tekaling, dita' sebuleng 4 depeh setangal. Idi pekelibutneh 3 depeh, typedneh munung tanga' Ruma' Allah.
- ¹⁶Idi teh ieh nenganau' dueh riwak ratnan tekaling luk rirengneh luun paped diri ineh. Kidita' sebuleng riwak mela medepeh.
- ¹⁷Idi ieh nenganau' berawang-berawang idi abet ratai luun riwak luk paped diri ineh.
- ¹⁸Idi teh ieh nenganau' dueh atur bua' delima.
- ¹⁹Idi riwak luk paped diri ineh, mepad kudeng ayu busak luk lusad, medepeh dita'neh.
- ²⁰Idi riwak inan luun paped dueh diri ineh idi pa luun laga luk iring berawang ineh. Idi inan dueh atur bua' delima, ieh ineh dueh ngeratu kinula'neh pekelibut dueh riwak ineh.
- ²¹Huram nenaped dueh diri ineh pelengit iring munung tanga' Ruma' Allah ineh. Luk pa kabing busat aco, ngadanneh Yakin, idi luk pa tinueh busat aco, ngadanneh Boas.
- ²²Idi riwak tekaling luk paped diri ineh mepad kudeng busak luk lusad. Kudeng ineh ideh mangeh kekamen nganau' diri ineh.
- ²³Idi teh Huram nenganau' takung luk melibuh ratnan tekaling. Kidalemneh mela medepeh, pipangneh 2 depeh setangal, idi kkadang pekelibut ineh 7 depeh setangal.
- ²⁴Idi pekelibut takung ineh inan dueh buun bua' tabu, luk inurai peranga' dengan takung ineh.
- ²⁵Idi takung ineh baben pulu' dueh sapi', idi teluh sapi' sium pa tinueh busat aco, teluh pa acep aco, teluh pa kabing busat aco, idi teluh pa busat aco. Idi puet amung sapi' ineh petutup.
- ²⁶Idi kikapal iring takung ineh kikapal palad. Idi iring pa luunneh mepad kudeng iring sangkir kudeng ayu busak luk lusad. Idi kinula' abpa' luk semuet bang ineh 10,000 gilin.

- ²⁷Idi teh Huram nenganau' pulu' keréta ratnan tekaling, kkadang sebuleng medepeh, pipangneh medepeh, idi dita'neh na macing medepeh.
- ²⁸Idi keréta ineh inau' ratnan balad tekaling luk melebping luk ript ku tulang ratnan tekaling teh.
- ²⁹Idi luun balad ineh inan gambar idi arit, ieh ineh balang, sapi', idi melaikat karub. Idi kudeng ineh teh luun tulangneh, pa luun idi pa liang pana' inan balang idi sapi' dengan arit busak pekilibut.
- ³⁰Idi anid-anid keréta ineh inan apat roda tekaling idi takedneh pana' tekaling. Idi apat lidung inan kaleng su inan maru'. Idi kaleng ineh inan arit busak tekelabung.
- ³¹Idi munungneh luk pa luun melibuh ku su inan maru'. Kidita'neh sekaki setangal rat ku keréta. Idi murek kidalem bang keréta ineh, inan arit pekelibutneh.
- ³²Idi apat roda ineh pa liang balad ineh. Idi amung taked roda ineh pekatu ku keréta ineh. Idi anid-anid roda ineh mela dueh kaki kidita'neh.
- ³³Idi pudut roda ineh mepad kudeng roda keréta pebunu' teh. Idi amung batang rodadeh, takeddeh, libutdeh, idi géngdeh inurai ratnan tekaling.
- ³⁴Idi inan apat kaleng luun apat lidung nan sebuleng keréta, luk mepad urai dengan keréta ineh.
- ³⁵Idi pa luun keréta libut iringneh, dita'neh iwa' inci. Ineh pana' melibuh. Idi teh pa luun anid-anid keréta ineh inan rapitneh inurai pad-pad dengan keréta ineh.
- ³⁶Idi luun rapit ineh pana' inarit maya' ayu melaikat karub, balang, idi lawa piasau, mepad arangdeh. Idi arit busak tekelabung pekelibut mepad kudeng luk iringneh ineh.
- ³⁷Kudeng ineh lawéneh nenganau' pulu' keréta ineh. Kirayeh idi ayudeh mepad mo'.

³⁸Idi teh Huram nenganau' pulu' su luk inan maru'. Sebuleng nan anid-anid keréta luk miak semuet 200 gilin abpa'. Idi pipeng anid-anid su inan maru' ineh medepeh.

³⁹Idi ieh nengerareng limeh keréta pa kabing busat aco Ruma' Allah, idi limeh keréta pa tinueh busat aco. Iamo' takung ineh rirengneh lidung Ruma' Allah luk arang pa busat aco dengan pa kabing busat aco.

⁴⁰⁻⁴⁵Idi teh Huram nenganau' amung belanga', luk ku ngook abuh, idi bigan. Idi ieh nemangeh amung repapeh maya' kudeng jani' luk inau'neh kuan Raca' Selimun idi Ruma' Allahneh, ieh ineh: Dueh diri Dueh riwak mepad kudeng ayu bigan luk paped diri ineh Ratai ratnan arit belipid luk luun riwak ineh Apat ngeratu bua' delima ratnan tekaling, inau'deh dueh buun pekelibut riwak ineh Pulu' kereta Pulu' bigan Takung Pulu' dueh sapi' luk mabeh takung ineh Belanga', luk ku ngook abuh, idi bigan Amung repapeh ineh inau' Huram kuan Ruma' Allah ineh ratnan tekaling luk mesilo, maya' kudeng luk bida' Raca' Selimun.

⁴⁶Idi raca' nengecuk nganau' amung ineh bang tana' salit luk arang Sukot idi Saretan luun Raked Yarden.

⁴⁷Idi na ideh kali' berat amung tekaling ineh, ngaceku na tinimang Selimun, ngaceku pelaba ula'.

⁴⁸Idi Selimun nengecuk nganau' amung repapeh luk bang Ruma Allah, ieh ineh bubpun amas, méja amas luk inan ruti ubur ineh,

⁴⁹limeh kukud dawan amas pa tinueh idi limeh pa kabing, pa atun Su luk Meluun Meligan, busak amas, lapung amas, idi apit amas pana',

⁵⁰Idi teh sangkir, luk ku ngilep lapung, bigan, su luk inan umau luk do' buen, idi su luk inan bareh apui. Amung ineh ratnan amas. Kudeng ineh teh amung itek tanga' Su luk Meluun Meligan, idi Su luk Meligan pana'.

⁵¹Kareb Raca' Selimun nemangeh Ruma' Allah ineh, idi ieh nenguit amung repapeh luk linigan tamanneh Daud amé' bang Ruma' Allah ineh, ieh ineh amung amas, pirak, idi binaweh luk baken.

Raca'-Raca' Luk Pun-Pun 8

¹Raca' Selimun nengamung lun ngimet idi lun rayeh pupu Israil, macing amé' matun neneh déi' Yerusalim, pad ideh nguit Pati' Pejani' Tuhan rat Sion bawang Daud amé' bang Ruma' Allah.

²Idi ideh nepamung kareb Irau Lepo bang bulan Etanim, ieh ineh bulan luk ketudu'.

³Kareb amung lun rayeh nepamung, idi amung imam nengiding Pati' Pejani' ineh.

⁴Idi lun Liwi nengedengan nedeh nguit ineh amé' bang Ruma' Allah dengan Lepo su luk inan papu' Tuhan, idi amung repapeh Lepo ineh.

⁵Raca' Selimun idi amung lun Israil nepamung pa atun Pati' Pejani' ineh, idi ideh nemaré sapi', idi dumba luk na mekiap kinula'deh ku baré.

⁶Idi imam-imam nenguit Pati' Pejani' Tuhan ineh amé' bang Su luk Meluun Meligan bang Ruma' ineh pa liang ilad dueh melaikat karub ineh.

⁷Ilad didueh ineh bulad pa luun Pati' Pejani' ineh, dengan kayuh birirneh pana'.

⁸Idi kayuh luk ku mirir ineh luk idi déi' macing aco sini, mekadang pad papedneh melagan rat Su luk Meligan luk pa atun Su luk Meluun Meligan. Iamo' na ieh melagan rat bal selipa.

⁹Idi sebuleng anun-anun pana' nateh luk bang Pati' ineh, iamo' dueh balad batu ukum mo' luk pangeh inau' Musa bang ineh déi' Sinai, kareb Tuhan nepejani' nelun Israil kareb ideh pangeh neremuat rat bang bawang Masir.

¹⁰Kareb amung imam ineh remuat rat bang Ruma' Allah denak-denak aceh laput mapen neneh,

¹¹pad ideh na miak lemubed nganau' kekamendeh, ngaceku ubur Tuhan panu' bang Ruma' ineh.

¹²Idi kesembayang Raca' Selimun: "O Tuhan, Iko pangeh nenganau' aco bang langit, iamo' Iko pian tudo bang laput idi su luk medacem.

- ¹³Ui pangeh nemudut aceh Ruma' luk do' inanMu tudo raked-raked.”
- ¹⁴Pangeh ineh idi raca' nelumi, idi ieh nengeperuan amung lun Israil laba' ideh tuped su ineh.
- ¹⁵Idi kebalaneh, "Amung ubur kuan Tuhan Allah lun Israil luk pangeh nengacing jani'Neh kuan tamanku Daud, kebalaNeh,
- ¹⁶Rat aco Ui nenguit pupuKu Israil remuat rat bawang Masir, na Ui nemili' bawang sapeh arang amung pupu Israil inanKu mudut aceh Ruma' su luk inan lemulun sembayang Negku. Iamo' Ui pangeh nemili' ni Daud mangun ku lun nguyut pupuKu Israil ineh.' “
- ¹⁷Idi teh kebala Selimun, "Tamanku Daud sikal mudut aceh Ruma' luk inan sembayang nan Tuhan Allah lun Israil.
- ¹⁸Iamo' kebala Tuhan ni Daud, 'Idi iko sikal mudut aceh Ruma' kuanKu. Idi terawému ineh do'.
- ¹⁹Iamo' na iko miak mudut Ruma' ineh, iamo' anakmu mucu miak mudut Ruma' ineh kuanKu.’
- ²⁰"Idi nekini Tuhan pangeh nengacing jani'Neh ngaceku ui mangun ku raca' lun Israil ku libal tamanku Daud. Idi ui teh pangeh nemudut aceh Ruma' su luk inan sembayang nan Tuhan Allah lun Israil.
- ²¹Idi ui pangeh netemina' bang Ruma' ineh aceh su inan Pati' Pejani' luk inan nenipa pejani' Tuhan luk inau'Neh ku ngadan tepun tau, kareb Ieh nenguit nedeh ineh remuat rat bawang Masir.”
- ²²Idi Selimun netuped pa atun bubpun Tuhan idi amung lun Israil. Idi ieh nenatang ticu'neh,
- ²³kesembayangneh, "O Tuhan Allah lun Israil. Na Allah baken, iamo' Iko mo', do' bang langit idi bang tana' pana'. Iko mo' luk maya' jani' idi luk mekatu kuan amung lun dukenmu luk maya' amung balaMu.
- ²⁴Idi aco sini Iko pangeh nengacing jani'Mu kuan tamanku Daud, demulunMu ineh.

²⁵Idi nekini pana' O Tuhan Allah lun Israil, ngacing mo' anun-anun luk pangeh pijani'Mu kuan demulunMu tamanku Daud. KebalaMu, 'Ui miak maré inulmu ngimet nelun Israil mucu rat namu, kudeng inulmu ineh maya' balaKu mepad kudeng iko.'

²⁶Idi nekini pana' O Allah lun Israil, ui mutuh Namu maya' jani' luk pijani'Mu nan demulunMu tamanku Daud.

²⁷"Iamo' miakké Allah tudo luun tana'? Langit pana' na miak mapen Namu, meluun teh Ruma' luk pangeh pinudutku ini.

²⁸Iamo' do' Iko ngerawé putuh sembayangku, O Tuhan Allahku, idi ninger anun luk pituenku bang sembayang aco sini.

²⁹Do' Iko nier Ruma' ini macang idi medacem, ngaceku Iko pangeh nemili' ineh ku su luk inan sembayang Namu. Idi do' Iko megéi' ninger sembayang bang Ruma' ini.

³⁰Do' ninger putuhku idi putuh pupuMu lun Israil kareb ideh sembayang bang Ruma' ini. Ninger rat déi' surga su luk inanMu tudo, idi maré do' ratnan sala' kai.

³¹"Kudeng seburur pangeh nenganau' sala' nelun danganneh, idi ieh nepebulung neneh pa atun bubpunMu bang Ruma' ini,

³²Idi do' Iko ninger rat déi' surga idi mutut ukum arang demulunMu ini, pad luk mesala' ineh uen ngesala', idi lun luk matu pana' ruen matu.

³³"Kareb pupuMu lun Israil melaya' pa atun bunu'deh ngaceku pangeh mesala' Namu, idi ideh lumi Namu idi ngubur Namu, idi sembayang mutuh do' bang Ruma' ini,

³⁴Idi do' Iko ninger rat déi' surga idi maré do' ku sala' pupuMu, idi nguit nedeh lemubed amé' bang bawang luk pangeh biréMu kuan tepundeh.

³⁵"Kareb langit initek pad na inan udan, ngaceku ideh pangeh mesala' Namu, idi ideh uren sium pa Ruma' ini dengan sembayang idi ngubur Namu,

³⁶idi do' Iko ninger rat déi' surga, idi maré do' ku sala' raca' idi pupuMu lun Israil. Mada' nedeh ratnan dalam luk petulu béndeh, idi do' Iko maré udan luun tana'Mu luk pangeh biréMu kuan pupuMu ku babpatdeh ruked-ruked.

³⁷"Kudeng bang bawang ineh inan iru', kaca, bangas, rapung, bui luk melau', kato, idi uled, idi kudeng bunu'deh ngelibut bawangdeh; kian kaca idi ét macing lek,

³⁸do' Iko ninger sembayangdeh. Kudeng idé-idé rat arang pupuMu lun Israil nginuud tu-tu pad ideh natang tiku'deh pa Ruma' ini idi sembayang,

³⁹do' Iko ninger sembayangdeh. Ninger putuhdeh rat déi' surga su luk inanMu tudo ineh, idi maré do' ratnan sala'deh, idi nganau' luk petulu. Iko sebuleng kali' terawé amung lemulun. Do' Iko ngua' kuan anid-anid lemulun maya' kekamendeh,

⁴⁰pelé pupuMu ineh matot Namu ruked ulundeh bang bawang luk pangeh biréMu kuan tepun kai.

⁴¹⁻⁴²"Idi kudeng seburur lun pupu baken pana' kali' ratnan laludMu idi kekamen luk rayeh luk inau'Mu kuan pupuMu ini, pad ieh macing rat bawang luk mado pian sembayang Namu idi mutuh rat Namu bang Ruma' ini,

⁴³do' Iko ninger sembayangneh. Ninger neneh rat déi' surga su luk inanMu tudo ineh, idi do' Iko ngua' amung luk pitueneh Namu, pad amung pupu aput tana' kali' Namu idi matot Namu, mepad kudeng pupuMu sebuleng, pelé ideh kali' Ruma' luk pangeh pinudutku, ieh ineh su luk inan lemulun sembayang Namu.

⁴⁴"Kareb Iko ngecuk pupuMu amé' pebunu', idi ideh pana' sembayang inan Tuhan sium pa bawang ini luk pinili'Mu idi Ruma' luk pinudutku ini kuanMu,

⁴⁵do' Iko ninger sembayangdeh. Ninger nedeh rat déi' surga idi maré nedeh metueh ratnan bunu'deh.

⁴⁶"Kareb pupuMu mesala' Namu — idi seburur pana' nateh luk na sala' — idi Iko museh nedeh, pad Iko maré nedeh bang palad bunu'deh, pelé ideh tebanen amé' bang bawang baken, sagan tu pana mado,

⁴⁷do' Iko ninger sembayang pupuMu ineh. Idi kudeng bang bawang ineh ideh uren, idi sembayang idi ngamo sala' idi kekamendeh luk dat, do' ninger sembayangdeh O Tuhan.

⁴⁸Idi kudeng ideh uren matu-matu bang bawang ineh idi sembayang Namu sium pa bawang luk pangeh biréMu kuan tepundeh, ieh ineh bawang luk pinili'Mu, idi Ruma' ini luk pinudutku kuanMu,

⁴⁹idi do' Iko ninger sembayangdeh. Ninger nedeh rat déi' surga su luk inanMu tudo ineh, idi méi' nedeh.

⁵⁰Maré do' ku sala'deh, idi ku amung dat luk pangeh inau'deh Namu, idi maré bunu'deh méi' nedeh.

⁵¹Ideh ineh pupuMu idi babpatMu, luk pangeh tinatedMu remuat rat bang bawang Masir, rat uned tetel belawan.

⁵²"O Tuhan Allah, do' Iko megéi' méi' nan pupuMu lun Israil idi raca' pana', idi ninger putuhdeh idan-idan karebdeh nawar Namu mutuh pedengan.

⁵³Iko nengatad nedeh kuanMu ratnan amung pupu luk luun tana', mepad kudeng luk pangeh bida'Mu dengan tang Musa demulunMu ineh, kareb Iko nenated tepun kai remuat rat Masir, O Tuhan Allah."

⁵⁴Kareb Selimun nemangeh amung sembayang ini inan Tuhan, idi ieh nudur pa atun bubpun Tuhan su luk inanneh netekeradung, idi ieh nengegenang tiku'neh.

⁵⁵Idi ieh netuped idi nengeperuan amung lun Israil dengan rayeh arod, kebalaneh,

⁵⁶"Amung ubur kuan Tuhan luk pangeh nemaré do' udeng kuan pupuNeh lun Israil, maya' kudeng amung luk pangeh pijani'Neh. Sebila' bala pana' nateh netutu' ratnan amung jani'Neh luk do' luk pangeh bida'Neh dengan tang demulunNeh Musa.

⁵⁷Do' Tuhan Allah idi dengan kai mepad kudeng Ieh nengedengan tepun kai atun. Aleg Ieh necan nekai.

⁵⁸Iamo' do' Ieh ngelelep niat kai Neneh, pad kai mulun maya' pianNeh, idi nginita amung ukum idi balaNeh luk pangeh bida'Neh kuan tepun kai.

⁵⁹Do' Tuhan Allah kai megéi' ngerawé sembayang ini idi putuhku Neneh. Do' Ieh megéi' méi' nelun pupu Israil idi raca'deh, idi maré luk petulu anid-anid aco,

⁶⁰pad amung pupu luk luun tana' ini miak kali' idi Tuhan mo' luk Allah, idi na luk baken.

⁶¹O lun pupu Israil do' muyuh lutep maya' Tuhan Allah tau, pad muyuh maya' ukumNeh idi nginita balaNeh, mepad kudeng aco sini.”

⁶²Raca' Selimun dengan amung lun Israil nemaré baré kuan Tuhan.

⁶³Idi baré luk nguit pedo' luk biré raca' kuan Tuhan ineh, ieh ineh sapi'

22,000, idi dumba 120,000. Kudeng ineh raca' idi lun mula' nengeligan Ruma' Allah ineh.

⁶⁴Idi aco sineh teh raca' nengeligan uned natad luk pa atun Ruma' Allah. Ieh nemaré amung baré luk sabpen su ineh, ieh ineh baré akan, idi teh lemak ratnan baré luk nguit pedo', ngaceku bubpun tekaling luk pa kiung Tuhan ineh pelaba isuut inan nipa amung baré ineh.

⁶⁵Pangeh ineh Selimun dengan amung lun Israil rat Ruan Hamat luk pa tinueh busat aco, macing nan lakan Masir luk pa kabing busat aco, nenganau' Irau Lepo pa kiung Tuhan Allah tau tudu' aco kinioneh.

⁶⁶Idi kareb aco luk kewaluh Selimun nengecuk nelun mula' ineh muli'. Idi amungdeh ineh nengubur raca'. Idi ideh nuli' dengan mawang niat ku amung do' luk pangeh inau' Tuhan kuan demulunNeh Daud idi pupuNeh lun Israil.

Raca'-Raca' Luk Pun-Pun 9

¹Kareb Raca' Selimun pangeh nemudut Ruma' Allah, ruma'neh sebuleng, idi amung-amung luk piniannah piduten,

²idi Tuhan nesilangan neneh sekedueh kua' mepad kudeng Ieh nesilangan neneh déi' Gibion.

³Idi kebala Tuhan neneh, "Ui pangeh neninger sembayangmu. Idi Ui pangeh nengelian Ruma' luk pinudutmu ineh, mangun ku luk inan sembayang Negku macing raked-raked. Ui miak ngasa' idi matar ineh raked-raked.

⁴Idi kudeng iko maya' Negku mepad kudeng tamanmu Daud dengan matu idi mepiteb niat, idi kudeng iko nganau' amung-amung luk pangeh bida'Ku namu, pad iko nginita amung ukumKu,

⁵Idi Ui miak ngacing luk pijani'Ku nan tamanmu Daud, ieh ineh, 'Inulmu miak ngimet Israil macing raked-raked.'

⁶Iamo' kudeng iko idi inulmu lemubed rat Negku, pad muyuh na nginita ukum idi bala'Ku luk pangeh biré'Ku nemuyuh ineh, iamo' muyuh maya' allah baken, idi sembayang nedeh,

⁷kali' rungen Ui nala' nelun Israil rat bang bawang luk pangeh biré'Ku kuandeh, idi Ruma' ini luk pangeh linigan'Ku mangun ku luk inan sembayang Negku, pad lun pupu baken miak situnga nan Israil aput-aput tana'.

⁸Idi Ruma' ini miak mangun ku usag, pad idé-idé luk lemaba su ineh miak mawa idi situnga, kebaladeh, 'Anun pun Tuhan pangeh nenganau' kudeng ini kuan bawang ini idi kuan Ruma' ini?'

⁹Idi lun baken miak ngor kudeng ini, 'Ngaceku ideh pangeh nenecan Tuhan Allahdeh luk pangeh nenated tepundeh ineh remuat rat bang bawang Masir, idi ideh nesembayang inan allah baken, idi netekeradung pa kiungdeh; idi ngaceku ineh Tuhan nengacing dereh ini kuandeh.' "

¹⁰Idi raked dueh ngepulu' lak Selimun nemudut Ruma' Allah idi ruma'neh sebuleng pana'.

¹¹Idi Hiram, raca' Sur ineh nengedengan neneh ku kayuh tumuh, kayuh tongor, idi amas, maya' pianneh. Idi Raca' Selimun nemaré kuan Raca' Hiram dueh ngepulu' bawang déi' tana' Galilia.

¹²Idi Hiram iné' nier bawang ineh, idi na ieh mawang niat ku ineh.

¹³Idi kebalaneh ni Selimun, "O kinanakku, kudeng apeh bawang ini luk pangeh birému negku?" Idi ideh neneten ineh "Bawang Metugeh" macing aco sini.

¹⁴Ngaceku Hiram pangeh nemaré kuan Selimun ualuh ngepulu' pikul balad amas.

¹⁵Raca' Selimun nengecuk nelun duken mudut Ruma' Allah idi ruma'neh sebuleng, idi teh maad tana' pa busat aco bawang Yerusalim dengan mudut libungneh. Idi lun ineh teh icukneh mudut baruh bawang Hasor, Megido, idi Giser.

(¹⁶Raca' Masir ineh pangeh nengelaya' bawang Giser. Idi ieh nengaté amung lun bang bawang ineh, idi ieh nengeseb bawang ineh teh. Idi ieh nemaré bawang ineh kuan anakneh, ieh ineh awan Selimun, mangun ku aceh baré maya' neneh.

¹⁷Idi Raca' Selimun nemudut Giser baruh.) Selimun nemudut Bait Horon luk pa lod ineh teh,

¹⁸Balat, Tamar déi' su luk ali-ali déi' Yahuda,

¹⁹amung bawang luk inan nganug akanneh, amung bawang luk inan kuda idi kerétaneh, idi anun-anun luk pian pidutenneh déi' Yerusalim, Lebanon, idi aput-aput imetneh ineh.

²⁰Amung lun luk neketecan rat arang lun Amori, Hiti, Prisi, Hiwi, idi Yebusi, luk baken rat nelun Israil,

²¹amung anak inuldeh luk neketecan bang bawang ineh — idi luk na pinaté lun Israil atun — amung ineh ilap Selimun mangun ku demulunneh macing aco sini.

²²Iamo' pupu Israil na ilap Selimun mangun ku demulunneh. Iamo' ideh ineh mangun ku lun pebunu', lun tareh, lun rayeh, lun rayeh baweh, lun rayeh pa luun amung kerétaneh, idi lun luk maya' kudaneh.

²³Inan 550 burur luk ngimet amung anak itin luk icuk Selimun mudut amung luk pian pidutenneh.

²⁴Selimun maad tana' luk pa busat aco bawang, kareb awanneh luk anak raca' Masir pangeh nemubuh rat Bawang Daud amé' bang ruma' luk pinudut Selimun kuanneh.

²⁵Idi bang selak teluh kua' Selimun nemaré tuda'-tuda' baré luk sabpen, idi baré luk nguit pedo' pa luun bubpun luk pangeh pinudutneh kuan Tuhan. Idi ieh nengeseb umau luk do' buen luun bubpun ineh teh. Kudeng ineh lawéneh nemangeh pudut Ruma' Allah ineh.

²⁶Raca' Selimun nemudut tuda'-tuda' kapal déi' Esion Geber luk muneng ku Elot, su lidung Akaba déi' bawang Edom.

²⁷Raca' Hiram nengecuk tuda'-tuda' lun luk mileh maya' kapal luun abpa' rayeh pebaya' dengan lun duken Selimun.

²⁸Ideh nacing déi' Opir. Idi ideh nengalap rat déi' 250 pikul amas, inuitdeh kuan Selimun.

Raca'-Raca' Luk Pun-Pun 10

¹Idi raca' decur bang bawang Siba neninger ratnan Raca' Selimun luk mebala ineh, idi ieh iné' déi' Yerusalim sikal nutun neneh dengan tuda'-tuda' itun.

²Ieh nacing déi' Yerusalim dengan anak itin luk mula', dengan tuda'-tuda' unta luk nguit amung-amung luk do' buen idi mula' amas idi batu luk meraga. Idi ieh nepapu' ni Selimun, idi nengitun neneh ratnan amung terawéneh.

³Idi Selimun nengor amung itunneh. Na luk na kali'neh.

⁴Kareb raca' decur ineh pangeh nekali' amung ileh Selimun, idi teh ruma' luk pinudutneh,

⁵akan luk luun téngneh, amung lun tarehneh, amung lun dukenneh idi ayungdeh ineh, idi demulun luk maré luk rupenneh, idi baré luk sabpen bang Ruma' Allah, idi ieh pelaba awa.

⁶Idi kebalaneh kuan Raca' Selimun, "Matu bala luk pindengerku déi' bang bawangku rat namu idi ilehmu.

⁷Iamo' na ui manu ku bala kareb nateh ui iné' tungé', pad matehku sebuleng nier amung ineh. Idi setuneh sebuang teh na bida' negku. Ngaceku iko meluun ileh ratnan luk biladeh.

⁸Samal amung awanmu! Idi amal amung lun dukenmu ini luk megéi' idi pa kiungmu idi luk ninger bada'mu luk mileh ineh!

⁹Amung ubur kuan Tuhan Allahmu luk mawang niat namu, pad Ieh nengikit namu mangun ku raca' Israil. Tuhan méi' nelun Israil macing raked-raked. Ngaceku ineh Ieh nengikit namu mangun ku raca' pad iko nganau' luk matu idi luk mesiri."

¹⁰Idi raca' decur bawang Siba nemaré kuan Selimun 80 pikul amas, idi pelaba ula' luk do' buen, idi batu luk meraga. Idi rat pad sineh na lun miak nguit amung-amung luk do' buen luk kudeng ineh ula'

(¹¹Idi teh amung kapal Hiram luk nenguit amas rat Opir, ieh ineh nenguit rat ieneh mula' kayuh lisuan, idi batu luk meraga.

¹²Idi kayuh lisuan ineh inau' raca' ku diri Ruma' Allah, diri ruma'neh sebuleng teh, giula', idi gita amung lun luk menani. Idi rat pad sineh na lun nguit kayuh lisuan luk kudeng ineh amé' bawang Israil, idi na luk kali'deh.)

¹³Raca' Selimun nemaré kuan raca' decur Siba amung luk pitueneh, dengan amung luk biré raca' neneh maya' do'neh. Idi ieh nuli' iné' bawang Siba dengan amung lun dukenneh.

¹⁴Idi berat amung amas luk inuit amé' inan raca' Selimun bang selak, ieh ineh 400 pikul,

¹⁵dengan amung pupuk luk barén lun luk pepua' idi utung pepua' pana', pupuk luk barén amung raca' Arab idi lun luk ngimet babpat-babpat luk baken.

- ¹⁶Selimun nenganau' 200 utap luk rayeh ratnan amas luk tinuno. Sebuleng utap ineh kikep ku pulu' aceh kati amas.
- ¹⁷Idi teh ieh nenganau' 300 utap luk isuut. Sebuleng utap ineh kikep ku teluh kati amas luk tinuno. Idi ieh nenganug amung utap ineh bang Ruma' Pulung Lebanon.
- ¹⁸Idi teh ieh nenganau' sebuleng kerusi raca' luk rayeh ratnan gading luk kikep ku amas luk meluun do'.
- ¹⁹⁻²⁰Idi luun kerusi ineh inan anem tatak. Idi pekop iring tatak ineh inan balang, amungdeh pulu' dueh. Idi pa keted kerusi ineh teh inan aceh uluh anak sapi', idi pekop kerusi ineh inan su luk inan ngerareng ticu', idi inan dueh balang tuped su luk inan ngerareng ticu' ineh. Idi na luk kudeng ineh inau' bang imet raca' bawang baken.
- ²¹Idi amung sangkir Selimun inau' ratnan amas. Idi amung bigan bang ruma' Pulung Lebanon inau' ratnan amas luk meluun do'. Sebuleng pana' nateh ratnan pirak. Ngaceku bang kareb Selimun, pirak ineh na pian lun.
- ²²Idi kapal-kapal raca' iné' Tarsis dengan kapal-kapal Hiram luk maya' abpa' rayeh. Idi sekua' bang teluh lak amung kapal ineh lemubed nguit amas, pirak, gading, kuyad, idi tuau.
- ²³Raca' Selimun inan meluun ula' binaweh, idi ieh meluun ileh ratnan amung raca' bang tana' ini.
- ²⁴Idi amung lun aput tana' ineh ngitun neneh, ngaceku pian ninger balaneh luk mileh luk pangeh biré Allah neneh.
- ²⁵Idi anid-aniddeh nenguit baré, ieh ineh binaweh amas, pirak, ayung, repapeh pebunu', amung-amung luk do' buen, kuda, idi keladai, anid-anid lak.
- ²⁶Selimun nengamung 1,400 keréta idi 12,000 lun maya' kuda, idi nengerareng nedeh bang anid-anid bawang rayeh su inan keréta idi déi' Yerusalim muneng ku raca'.

²⁷Idi déi' Yerusalim raca' nenganau' pirak ineh mepad kinula' batu, idi kayuh tumuh mepad kinula' lawa gita' luk déi' Sepila.

²⁸Idi Selimun nenguit kuda rat Musri idi Silisia. Idi lun duken raca' nemelih kuda ineh rat Musri idi Silisia maya' raga luk litep.

²⁹Idi raga aceh keréta rat Masir 600 balad pirak. Idi raga aceh kuda 150 balad pirak. Idi lun duken raca' Selimun masui ineh kuan raca' lun Hiti idi kuan raca' Siria pana'.

Raca'-Raca' Luk Pun-Pun 11

¹Raca' Selimun mawa inan mula' decur pupu baken, ieh ineh anak raca' Masir, decur-decur Moab, Amon, Edom, Sidon, idi Hiti.

²Ieh nengaweh decur ineh sagan tu pana' Tuhan nemebpeng nelun Israil na ngaweh decur pupu baken, pad ideh na nguit nedeh maya' allah baken.

³Selimun inan 700 awan. Amungdeh ineh anak raca'-raca', idi 300 apid. Idi amung decur ineh nenguit ni Selimun teketed ratnan Tuhan.

⁴Idi kareb ieh pangeh mengered, ieh inuitdeh sembayang inan allah pupu baken, pad niatneh na lutep inan Tuhan Allahneh mepad kudeng tamanneh Raca' Daud.

⁵Selimun nesembayang nan Asterot, akang decur lun Sidon, idi Milkom, akang lun Amon luk pelaba dat ineh.

⁶Selimun nenganau' luk dat pa kiung Tuhan, idi na ieh lutep maya' Tuhan mepad kudeng tamanneh Raca' Daud.

⁷Idi ieh nemudut aceh bubpun kuan Kemos, akang lun Moab luk pelaba dat, idi kuan Milkom, akang lun Amon luk pelaba dat teh, luun surud luk pa busat aco Yerusalim.

⁸Idi teh ieh nenganau' bubpun kuan amung awanneh luk ratnan pupu baken ineh, pad ideh ngeseb umau luk do' buen idi maré baré kuan allahdeh ineh.

⁹Idi Tuhan museh inan Raca' Selimun, ngaceku niatneh nelemubed ratnan Tuhan Allah lun Israil, luk pangeh nesilangan neneh macing dueh kua',

- ¹⁰Idi luk pangeh neperiteteng neneh, pad ieh na maya' allah bakén. Iamo' na ieh nemaya' bala Tuhan ineh.
- ¹¹Idi kebala Tuhan neneh, "Ngaceku iko pangeh nenganau' kudeng ini, idi iko na nginita pejani'Ku idi amung balaKu luk pangeh bida'Ku namu, kali' rungen Ui ngalap imet ini mucu rat namu, idi maré neneh kuan lun tebarinmu.
- ¹²Iamo' seruked ulunmu na Ui nganau' kudeng ineh ngaceku tamanmu Daud, iamo' Ui ngalap ineh mucu ratnan anakmu.
- ¹³Iamo' na Ui miak ngalap amung imet ineh, iamo' sebabpat pupu mo' miak barénKu kuan anakmu, ngaceku lun dukenKu Daud, idi ngaceku Yerusalim luk pangeh pinili'Ku."
- ¹⁴Idi Tuhan nenganau' aceh lun mangun ku bunu' kuan Raca' Selimun, ieh ineh Hadad luk ratnan inul raca' Edom.
- ¹⁵⁻¹⁶Mio atun ratnan ineh, kareb Daud pangeh nengelaya' bawang Edom, idi Yoab lun rayeh bawehneh iné' déi' Edom pad nanem amung lun luk pinaté ineh. Idi Yoab dengan anak itinneh tudo déi' anem bulan kinioneh. Idi ideh nengaté amung deléi lun Edom.
- ¹⁷Iamo' Hadad neburo iné' Masir dengan tuda'-tuda' lun Edom rat nelun duken tamanneh, idi bang kareb ineh Hadad anak isuut teh.
- ¹⁸Idi ideh nenalan rat Midian iné' déi' Paran. Idi rat Paran ineh Hadad nenguit tuda'-tuda' lun maya' neneh, idi ideh iné' Masir. Idi raca' Masir nemaré aceh tana' idi ruma' ni Hadad, dengan akan pana'.
- ¹⁹Idi raca' Masir méi' ni Hadad pad ieh nemaré langu'neh, ieh ineh kinanak Tapis raca' decur ineh ku awanneh.
- ²⁰Idi ieh nenganak aceh anak deléi kuanneh, ngadanneh Genubat luk isa' Tapis bang ruma' raca' Masir dengan amung anak raca'.
- ²¹Idi kareb Hadad neninger bala déi' bawang Masir ratnan Raca' Daud pangeh naté, idi Yoab lun rayeh bawehneh teh pangeh naté, idi kebalaneh nan raca', "Nima' negku muli'."

²²Iamo' kebala raca' Masir neneh, "Ngudehké iko pian muli'? Inanké luk nateh biréku namu?" Iamo' kebala Hadad neneh, "Nima' negku amé'." Hadad, raca' Edom ineh aceh bunu' luk megateh inan Israil.

²³Idi Allah nenganau' aceh lun mangun ku bunu' Raca' Selimun teh, ieh ineh Reson Eliada luk pangeh neburo ratnan tuanneh, ieh ineh ratnan Hadadeser, raca' Soba.

²⁴Idi ieh mangun ku lun rayeh aceh baweh lun luk dat. (Ieh ineh kareb Raca' Daud pangeh nengelaya' ni Hadadeser idi rurunneh lun Siria pana'.) Reson dengan bawehneh ineh iné' bawang Damsik. Idi ideh nenganau' neneh ku raca' bawang Siria.

²⁵Idi ieh teh bunu' lun Israil seruked ulun Selimun.

²⁶Idi Yerebom Nibat, ieh ineh lun Epraim rat Serida idi lun duken Selimun sikal metueh rat neneh. Tinanneh decur tinula', idi ngadanneh Serua.

²⁷Ini bala ratnan ria' luk pangeh nangun. Selimun maad tana' luk pa busat aco Yerusalim idi ngiuk libung bawang luk meraben ineh.

²⁸Idi Yerebom ineh seburur anak adi' luk mileh. Idi kareb Selimun nenier neneh megéi' ngakem, idi ieh nengikit neneh mangun ku lun rayeh pa luun amung lun dukenneh bang bawang lun Manasé idi lun Epraim.

²⁹Idi kareb Yerebom neremuat rat Yerusalim, idi Nabi Ahiya lun Silo ineh nepapu' neneh arang dalan kareb na lemulun. Idi Ahiya nengayung ku kuyu' luk mebaruh.

³⁰Idi Ahiya nengelengu kuyu'neh luk mebaruh ineh dirakneh pulu' dueh darak.

³¹Idi kebalaneh ni Yerebom, "Lapenmu pulu' babpat ini, ngaceku bala Tuhan Allah lun Israil kudeng ini, 'Ui ngalap imet ineh rat bang palad Raca' Selimun mucu, idi pulu' inul pupuneh barénKu namu.

³²Iamo' aceh babpat pupu mo' miak luteh kuanneh, ngaceku lun dukenKu Daud idi ngaceku Yerusalim, ieh ineh bawang luk pangeh pinili' ratnan amung inul pupu Israil.

³³Ui nganau' kudeng ini ngaceku Selimun pangeh nenecan Negku, idi netekeradung sembayang inan Asterot akang decur lun Sidon, Kemos akang lun Moab, idi Milkom akang lun Amon ineh. Selimun pangeh nengelaba balaKu. Ieh pangeh nenganau' sala', idi na ieh maya' amung bala idi ukumKu, mepad kudeng tamanneh Daud.

³⁴Iamo' na Ui ngalap amung imet ineh rat neneh. Idi Ui nima' neneh mangun ku raca' seruked ulunneh, ngaceku demulunKu Daud luk pangeh pinili'Ku, idi luk pangeh nemaya' amung ukum idi balaKu.

³⁵Iamo' Ui miak ngalap imet ineh rat bang palad anak Selimun. Idi pulu' inul miak barénKu namu.

³⁶Idi aceh inul miak barénKu kuan anakneh, pelé megéi' inan lapung pa kiungKu kuan demulunKu Daud déi' Yerusalim, ieh ineh bawang luk pangeh pinili'Ku ku su luk inan sembayang Negku.

³⁷Idi Ui miak ngikit namu, O Yerebom, pad iko ngimet amung tana' luk pianmu.

³⁸Kudeng iko maya' amung balaKu, idi luteh maya' ukumKu, idi nganau' luk petulu maya' pinianKu mepad kudeng demulunKu Daud, kali' rungen Ui idi denganmu idi miak ngelelepeh kuanmu aceh imet luk meruked, mepad kudeng luk pangeh litepKu kuan Daud. Idi Ui miak maré nelun Israil ineh kuanmu.

³⁹Idi ngaceku sala' Selimun Ui miak ngukum inul Daud, iamo' baken macing ruked-ruked.' “

⁴⁰Idi Selimun nakap dalam pian ngaté ni Yerebom. Iamo' Yerebom neburo iné' matun ni Sisak raca' Masir. Idi ieh tudo déi' Masir pad macing Selimun naté.

⁴¹Idi amung kekamen Selimun luk baken, idi amung ilehneh, pangeh inayud bang Surat Kekamen Raca' Selimun.

⁴²Idi Selimun mangun ku raca' lun Israil déi' Yerusalim apat ngepulu' lak kinioneh.

⁴³Idi ieh naté, idi tinanem déi' Yerusalim, idi anakneh Rehebom mangun ku raca' libalneh.

Raca'-Raca' Luk Pun-Pun 12

¹Idi Rehebom iné' déi' Sikem, ngaceku amung lun Israil nepamung sikal ngikit neneh ku raca'.

²Idi bala ini nekali' Yerebom Nibat kareb ieh déi' bawang Masir (ngaceku ieh pangeh neburo rat pa kiung Raca' Selimun), idi ieh nelemubed rat bawang Masir.

³Idi lun Israil neneteng neneh. Idi ideh iné' matun ni Rehebom, kebaladeh,

⁴"Tamanmu nengeberat amung kekamen kai ini. Kudeng iko ngeran kekamen kai pad kai na mesusa', idi amung kai ini miak lutep maya' namu."

⁵Idi kebala Rehebom nedeh, "Muli' muyuh atun. Idi teluh aco baruh do' muyuh lemubed amé' negku." Idi ideh nuli'.

⁶Idi Rehebom nengitun amung lun rayeh luk nengedengan ni Selimun tamaneh kareb ieh mulun, kebalaneh, "Kudeng apehké ui miak ngor bala lun mula' ini?"

⁷Idi kebaladeh neneh, "Kudeng iko méi' nelun mula' ineh, idi maya' piniandeh, idi do' bala nedeh, kali' rungen amungdeh ineh mangun ku lun dukenmu raked-raked."

⁸Iamo Rehebom nenecan bada' amung lun rayeh ineh neneh. Idi ieh nengitun nelun anak adi' luk mepad rayeh neneh idi luk idi denganneh rat pun.

⁹Kebalaneh, "Kudeng apehké tau miak ngor bala lun mula' ini luk pangeh nemutih negku ngeran babeh luk pangeh rireng tamanku pa luunde?"

¹⁰Idi kebaladeh, "Do' iko pebala nedeh, 'Bua' ticu' angi'ku ini meluun rayeh ratnan awa' tamanku.

11Idi kudeng i Ama' pangeh nengerareng pa luun muyuh aceh babeh luk meberat, kali' rungen ui ngula' kekamen muyuh ineh baruh teh. Ieh nemabpet nemuyuh ku ué, kali' rungen ui mabpet nemuyuh mucu ku kayuh.' “

12Pangeh teluh aco idi Yerebom dengan lun mula' ineh iné' ni Rehebom, maya' kudeng balaneh nedeh.

13Idi raca' nengor baladeh ineh dengan gateh niatneh, ngaceku ieh na nemaya' bada' lun luk mengered ineh.

14Idi ieh nepebala nedeh ineh maya' kudeng bala anak adi' ineh, kebalaneh, "Idi i Ama' pangeh nengeberat kekamen muyuh. Iamo' ui miak ngula' ineh teh. Idi i Ama' pangeh nemabpet nemuyuh ku ué. Iamo' ui mabpet nemuyuh ku kayuh.”

15Idi na raca' neninger bala lun mula' ineh. Ngaceku isu' ini icing Tuhan, pad Ieh ngacing amung luk pangeh bilaNeh kuan Yerebom Nibat dengan tang Ahiya.

16Kareb lun mula' kali' raca' na sikal ninger baladeh ineh, idi ideh nengitang, kebaladeh, "Na kai pian maya' inul Daud. Anunké luk pangeh inau'deh kuan kai? O lun Israil, do' tau muli'. Nima' Rehebom matar tetek ruma'neh sebuleng!" Idi amung lun Israil neburo rat ni Rehebom.

17Iamo' Rehebom nengimet nelun luk tudo bang bawang-bawang Yahuda mo'.

18Idi Raca' Rehebom nengecuk ni Adoram, ieh ineh lun rayeh lun duken raca' amé' nelun Israil. Iamo' ideh nemitung neneh ku batu pad ieh naté. Idi Raca' Rehebom dengan mesaget numak bang aceh keréta, idi neburo iné' Yerusalim.

19Rat kareb ineh amung pupu rat pa tinueh busat aco imet Israil na maya' inul Daud.

20Kareb lun Israil nekali' Yerebom pangeh nuli' rat Masir, idi ideh nenawar neneh amé' bang tebubpundeh. Idi ideh nengikit neneh mangun ku raca'deh. Idi pupu Yahuda mo' nemaya' inul Daud.

²¹Kareb Rehebom nacing déi' Yerusalim, idi ieh nengamung 18,000 burur lun pebunu' luk meluun sangit ratnan pupu Benjamin idi Yahuda. Ieh pian pebunu' nelun Israil luk pa tinueh busat aco, pelé imet ineh lemubed amé' neneh.

²²Iamo' Allah nengecuk Nabi Semaya, kebalaNeh,

²³"Amé' matun Rehebom, raca' Yahuda ineh idi mada' neneh idi amung lun Yahuda idi lun Benjamin,

²⁴ratnan luk bila Tuhan, ieh ineh, 'Aleg muyuh amé' pebunu' inan kinanak muyuh, ieh ineh pupu Israil. Iamo' do' anid-anid muyuh muli', ngaceku isu' ineh pangeh nangun maya' pinianKu.' " Idi ideh neninger bala Tuhan ini. Idi ideh nuli'.

²⁵Yerebom raca' Israil ineh nemudut Sikem luun pegkung-pegkung Epraim. Idi ieh tudo su ineh gageh. Idi ieh nenalan idi nemudut Penuel.

²⁶⁻²⁷Idi ieh nepebala bang niatneh, "Ayuneh, kudeng anak itinku amé' Yerusalim pad maré barédeh kuan Tuhan bang Ruma' Allah déi', kali' rungen ideh lumi inan Rehebom raca' Yahuda idi ngaté negku."

²⁸Pangeh ieh nengerawé ratnan ineh, idi ieh nenganau' dueh anak sapi' deléi ratnan amas. Idi kebalaneh inan anak itinneh, "Mesusa' kuan muyuh amé' déi' Yerusalim. O lun Israil, siruh, ini allah muyuh luk pangeh nenated nemuyuh remuat rat bang bawang Masir!"

²⁹Idi ieh nenganau' sebuleng sapi' déi' Baitel, idi sebuleng déi' Dan.

³⁰Idi lun Israil nenganau' sala', ngaceku ideh iné' sembayang déi' Baitel idi Dan.

³¹Idi teh Yerebom nemudut tuda'-tuda' su luk inan sembayang luun surud. Idi ieh nemili' imam ratnan amung pupu luk baken ratnan inul Liwi.

³²Idi Yerebom nengeletap aceh aco rayeh bang pulu' limeh aco bulan ualuh, mepad kudeng aco rayeh luk déi' Yahuda ineh. Idi ieh nemaré baré luun bubpun Baitel kuan sapi' deléi luk inau'neh ratnan amas. Idi teh déi' Baitel

pana' ieh nengelelep imam luk ngakem déi' su luk inan sembayang luk pangeh inau'neh.

³³Idi ieh nemaré baré luun bubpun luk pangeh inau'neh déi' Baitel, pulu' limeh aco bulan ualuh, ieh ineh aco luk litepneh kuan aco rayeh lun Israil.

Raca'-Raca' Luk Pun-Pun 13

¹Idi nacing aceh nabi rat Yahuda iné' Baitel, maya' kudeng luk bila Tuhan, laba' Yerebom tured iring bubpun ineh pian maré baré.

²Idi lun ineh nengitang ngedat bubpun ineh maya' bala Tuhan, "O bubpun, O bubpun, kudeng ini bala Tuhan: Aceh anak, ngadanneh Yosia, miak uen nenganak kuan inul Daud. Idi ieh miak ngeret luunmu amung imam luk maré baré luun bubpun allah baken, idi luunmu ieh miak ngeseb tulang-tulang lemulun."

³Idi teh kebala nabi ineh, "Bubpun ini miak musag. Idi abuh luk luunneh ineh uen ngisak pad iko kali' balaku ini ratnan Tuhan."

⁴Kareb Raca' Yerebom neninger bala ini, idi ieh nenicul nabi ineh, kebalaneh, "Ngakem neneh!" Iamo' tiku' raca' petetem tugking, pad na miak natin lemubed peh.

⁵Idi bubpun ineh pana' nekusag. Idi abuh ratnan bubpun ineh nutat, maya' kudeng luk bila nabi dengan ngadan Tuhan ineh.

⁶Idi kebala Yerebom inan nabi ineh, "Sembayang mutuh Tuhan Allahmu méi' negku pelé tiku'ku ini miak uen ngeluut peh!" Idi nabi ineh nesembayang pa kiung Tuhan, idi langen raca' nedo'.

⁷Idi kebala raca' inan nabi ineh, "Do' muli' maya' negku amé' kuman, idi ui miak maré aceh luk barén kuanmu."

⁸Iamo' kebala nabi ineh, "Kudeng iko maré negku setangal binawehmu tu pana', idi nateh ui amé' maya' namu. Idi na ui miak maya' namu kuman idi ngirup pana'.

- ⁹Kebala Tuhan negku, 'Aleg iko kuman idi ngirup anun-anun pana'. Idi aleg iko muli' maya' dalam luk binaya'mu ina.' “
- ¹⁰Idi ieh nenalan maya' dalam baken. Na ieh nuli' maya' dalam luk nedalanneh atun.
- ¹¹Idi déi' Baitel ineh inan aceh nabi luk mengered. Idi anak-anakneh nacing nemada' neneh ratnan amung-amung luk inau'neh déi' Baitel bang aco sineh, idi teh luk pangeh bilaneh inan Raca' Yerebom.
- ¹²Idi kebala nabi luk mengered ineh, "Dalan sapeh luk nedalan lun ineh?" Idi ideh nemada' sireenneh dalam ineh.
- ¹³Idi ieh nengecuk nedeh ngerareng tapin luun keladaineh. Idi ideh nenganau' kudeng ineh. Idi ieh nuké luun ineh.
- ¹⁴Idi ieh nenalan maya' puet nabi rat Yahuda ineh. Idi ieh nepigket neneh tudo liang kayuh luk meraben. Idi kebalaneh neneh, "Ikoké nabi Allah rat Yahuda ineh?" Kebalaneh, "Ui ini.”
- ¹⁵Idi kebalaneh neneh, "Maya' negku muli' idi kuman.”
- ¹⁶Iamo' kebala nabi rat Yahuda ineh, "Na ui miak maya' namu, idi umak namu. Idi teh na ui miak kuman idi ngirup bang bawang ini,
- ¹⁷ngaceku Tuhan nemebpeng negku na kuman ruti idi na ngirup déi', idi na lemubed maya' dalam luk nedalanku pun ineh.”
- ¹⁸Idi kebala nabi rat Baitel neneh teh, "Ui ini teh aceh nabi mepad kudeng iko. Idi maya' bala Tuhan seburur melaikat nengecuk negku nguit namu muli', pelé iko kuman idi ngirup!" Iamo' nabi' ineh mebalih.
- ¹⁹Idi nabi rat Yahuda ineh nelemubed maya' neneh, idi nekuman denganneh.
- ²⁰Idi kareb didueh tudo iring téng, denak-denak Tuhan nepebala inan nabi luk mengered ineh,
- ²¹pad ieh nepebala nan nabi rat Yahuda ineh, "Kudeng ini bala Tuhan: Ngaceku iko pangeh nengelaba bala Tuhan, idi na maya' ukumNeh,

²²iamo' iko nelemubed idi nekuman su luk bibpengNeh namu na kuman, idi iko miak pitayen, idi butungmu na tinamen bang tanem tetek ruma'mu."

²³Kareb didueh pangeh nekuman, idi nabi luk mengered nenapin keted keladai nabi rat Yahuda ineh.

²⁴Idi ieh nenalan. Idi ieh nepapu' aceh balang luk nengaté neneh arang dalan. Idi butungneh telubid luun dalan. Keladai idi balang pana' tuped iring butung ineh.

²⁵Idi lemulun luk lemaba su ineh nekali' butung ineh telubid luun dalan. Idi aceh balang tuped iringneh. Idi lun ineh iné' Baitel idi nemada' luk nekali'deh.

²⁶Kareb bala ineh nekali' nabi luk mengered ineh, kebalaneh, "Ieh ineh nabi luk nengelaba bala Tuhan. Idi ngaceku ineh Tuhan nemaré neneh kuan balang luk nengaté neneh idi nengerakem neneh maya' kudeng bala Tuhan neneh."

²⁷Idi kebalaneh inan anak-anakneh, "Napin keted keladai kuanku." Idi ideh nenganau' kudeng ineh.

²⁸Idi ieh nenalan. Idi ieh nekali' butung ineh telubid luun dalan. Idi keladai idi balang ineh tuped teh iring butung ineh. Iamo' balang ineh na nekuman butung ineh idi na nengerakem keladai ineh teh.

²⁹Idi nabi luk mengered ineh nengiding butung ineh, idi ieh nengerareng neneh luun keted keladai ineh, idi inuitneh nuli' iné' bang bawangneh. Idi ieh netemido neneh idi nenanem neneh.

³⁰Idi butung ineh pana' rirengneh bang tanemneh sebuleng. Idi ketidodeh, "Adui kinanakku!"

³¹Kareb ideh pangeh nenanem neneh idi kebalaneh inan anak-anakneh, "Kareb ui maté, do' muyuh nanem negku bang tanem ini, idi ngerareng tulang-tulangku pelengit iring tulang-tulangneh ineh.

³²Ngaceku na miak na mangun ukum Tuhan kuan bubpun luk déi' Baitel ineh, idi amung su luk inan sembayang bang bawang-bawang Samaria.”

³³Iamo' Yerebom nateh nugka' ratnan lawéneh luk dat ineh, iamo' ieh nemili' teh tuda'-tuda' imam kuan su luk inan sembayang luk pinudutneh ineh. Idé-idé luk sikal, ieh ineh teh kinikitneh mangun ku imam.

³⁴Idi sala'neh ineh nengacing usag kuan imet Yerebom pad ideh talan rat bang kekamen raca'.

Raca'-Raca' Luk Pun-Pun 14

¹Kareb ineh Abia Yerebom ineh mét.

²Idi kebala Yerebom kuan awanneh, "Nekini do' iko ngisu' ayu bururmu, pad lun na miti namu awanku. Idi do' iko amé' déi' Silo, ngaceku déi' inan Nabi Ahiya luk pangeh nemada' negku atun, ratnan ui mangun ku raca' Israil.

³Idi do' iko nguit pulu' balad ruti, tuda'-tuda' pinaram, idi sebuleng seréi' duru', idi amé' matun neneh. Idi ieh miak maré kali' namu anun luk miak mangun mucu kuan anak kiteh ini.”

⁴Idi decur ineh iné' ruma' Ahiya déi' Silo. Idi Ahiya ineh nebuser, ngaceku ieh mengered.

⁵Iamo' kebala Tuhan ni Ahiya, "Awan Yerebom ineh macing sikal ngitun namu ratnan lawé anakneh luk mét. Ngaceku ieh mét. Idi do' iko pebala neneh maya' balaKu ini." Kareb awan Yerebom nacing, idi ieh nesiyu kudeng decur baken.

⁶Idi Ahiya neninger baketneh kareb ieh nesemuet. Idi kebalaneh, "Semuet O awan Yerebom. Ngudeh iko siayu kudeng lun baken? Ui pangeh icuk ngacing bala luk ngesusa' namu.

⁷Amé' iko mada' ni Yerebom, 'Kudeng ini bala Tuhan Allah lun Israil: Ui nengikit namu rat arang lun mula' ineh, idi Ui nenganau' namu nguyut amung pupuKu Israil.

⁸Ui nengalap imet ineh ratnan inul Daud, idi nemaré ineh namu. Iamo' na iko nenganau' kudeng lun dukenKu Daud luk lutep maya' Negku, luk nemaya' amung balaKu, idi luk nenganau' luk petulu maya' pinianKu.

⁹Iko pangeh nenganau' sala' luk meluun rayeh ratnan sala' amung raca' luk atun rat namu. Idi iko neteketed rat Negku, idi nengacing usehKu, ngaceku iko nenganau' allah baken idi akang luk inurai idi sembayang nan ineh.

¹⁰Ngaceku ineh Ui ngacing dereh mucu kuan imetmu, pad Ui ngaté amung inulmu luk deléi, do' luk mengered idi luk anak adi' pana'. Ui pian nala' amung uang tetek ruma'mu mepad kudeng lun nala' téi'.

¹¹Idé rat arang uang tetek ruma'mu luk maté bang bawang, ieh ineh miak kenen uko'. Luk maté luun lati', ieh ineh miak kenen kanui. Ui ini Tuhan pangeh nepebala.' “

¹²Idi teh kebala Ahiya nan awan Yerebom, "Nekini, do' iko muli'. Kareb kukudmu semuet bang bawangmu idi anakmu ineh pana' miak maté.

¹³Idi amung lun Israil miak temido neneh idi nanem neneh. Ngaceku ratnan anak inul Yerebom Abia mo' miak tinamen dengan do', ngaceku ieh sebuleng mo' luk inan Tuhan Allah lun Israil mawang niat.

¹⁴Idi Tuhan miak ngikit aceh raca' kuan lun Israil luk miak ngaro imet Yerebom ineh.

¹⁵Idi Tuhan miak necat nelun Israil teh mepad kudeng uduh luk gué-gué bang abpa', idi Ieh miak ngusu nelun Israil rat bang bawang luk do' luk pangeh biréNeh kuan tepundeh, idi Ieh miak ngatad nedeh ineh pad macing bal selipa Abpa' Pirat, ngaceku amung ulung luk pangeh inau'deh, pad ngeruat useh Tuhan.

¹⁶Idi teh Tuhan miak necan nelun Israil, ngaceku sala' luk inau' Yerebom ineh, luk pangeh nengubuk nelun Israil teh pad ideh nenganau' sala'.”

¹⁷Idi awan Yerebom ineh petacu nuli' iné' Tirsa. Idi kareb ieh pun ngeradu' lawen tanga' ruma', idi anak ineh naté.

- ¹⁸Idi ieh tinanem lun Israil. Idi ideh netemido neneh, maya' kudeng luk bila Tuhan, dengan tang demulunNeh Nabi Ahiya.
- ¹⁹Idi kekamen Yerebom luk baken, kudeng apeh ieh nengimet bawang, idi kudeng apeh ieh nepebunu', amung ineh pangeh bida' bang Surat Kekamen Raca'-Raca' Lun Israil.
- ²⁰Idi Yerebom nengimet nelun Israil dueh ngepulu' dueh lak kinioneh. Idi ieh naté. Idi Nadab Yerebom mangun ku raca' libalneh.
- ²¹Ulun Rehebom Selimun kareb ieh mangun ku raca' Yahuda, apat ngepulu' aceh lak. Idi pulu' tudu' lak kinioneh ieh nengimet déi' Yerusalim, ieh ineh bawang luk pinili' Tuhan rat arang amung tana' lun Israil ku su luk inan lemulun sembayang Neneh. Idi ngadan tinan Rehebom ineh Naama seburur lun Amon.
- ²²Idi lun Yahuda nenganau' sala' pa kiung Tuhan pad ideh nengeruat useh Tuhan, ngaceku sala'deh meluun dat ratnan sala' tepundeh.
- ²³Ideh nemudut tuda'-tuda' su luk inan sembayang nan allah baken. Idi akang idi ulung-ulung typeddeh luun amung surud idi liang kayuh luk mebata'.
- ²⁴Luk meluun dat, inan lun luk pad-pad deléi luk pasét déi' su luk inan sembayang ineh. Idi lun Yahuda nenganau' amung kekamen luk dat luk inau' pupu baken luk inusu Tuhan rat bang bawangdeh kareb lun Israil nacing.
- ²⁵Idi kareb lak luk kelimeh bang imet Rehebom, Sisak raca' Masir nengerieng bawang Yerusalim.
- ²⁶Idi ideh nengaro amung binaweh luk meraga bang Ruma' Allah idi ruma' raca' pana', dengan utap amas luk inau' Selimun.
- ²⁷Idi Raca' Rehebom nenganau' tuda'-tuda' utap tekaling ku libaldeh. Idi ieh nemaré ineh itin lun rayeh lun matar luk nginita tanga' ruma' raca'.
- ²⁸Idi anid-anid kua' raca' iné' déi' Ruma' Allah, utap ineh pana' panen amung lun luk nginita ineh. Pangeh ineh ideh nengelubed utap-utap ineh amé' bang takep lun matar ineh.

²⁹Idi kekamen Rehebom luk baken pangeh inayud bang Surat Kekamen Raca'-Raca' Lun Yahuda.

³⁰Idi inan bunu' arang Rehebom dengan Yerebom raked ulun didueh.

³¹Idi Rehebom naté, idi tinanem déi' Yerusalim. Idi anakneh Abia mangun ku raca' libalneh.

Raca'-Raca' Luk Pun-Pun 15

¹Kareb lak luk kepulu' ualuh bang imet Yerebom raca' Israil, idi Abia mangun ku raca' lun Yahuda.

²Idi ieh nengimet teluh lak déi' Yerusalim. Idi ngadan tinanneh ineh Maka Absalom.

³Idi raca' ineh nemaya' amung sala' luk inau' tamanneh atun. Idi na ieh lutep inan Tuhan Allahneh, mepad kudeng tepunneh Daud.

⁴Iamo' ngaceku Daud teh, Tuhan nemaré inul kuanneh déi' bawang Yerusalim, idi nengelelep anakneh mucu rat neneh, pad imet Yerusalim pana' uen ngelelep.

⁵Ngaceku Daud pangeh nenganau' luk do' pa kiung Tuhan, idi na ieh nengelaba balaNeh seruked ulunneh, iamo' sebuleng mo' sala'neh, ratnan lawé Uria lun Hiti ineh.

⁶Idi inan bunu' arang Abia dengan Yerebom seruked imet Abia.

⁷Idi kekamen Abia luk baken pangeh inayud bang Surat Kekamen Raca'-Raca' Yahuda.

⁸Idi Abia naté. Idi ieh tinanem déi' Yerusalim. Idi anakneh Asa mangun ku raca' libalneh.

⁹Idi kareb lak luk kedueh ngepulu' bang imet Yerebom raca' lun Israil, idi Asa mangun ku raca' lun Yahuda.

¹⁰Idi ieh nengimet apat ngepulu' aceh lak déi' Yerusalim. Idi ngadan tepunneh ineh Maka Absalom.

- ¹¹Idi Asa nenganau' luk matu pa kiung Tuhan, mepad kudeng Daud tepunneh ineh.
- ¹²Ngaceku ieh nengusu amung lun luk pasét deléi dengan deléi rat bang bawang ineh. Idi ieh nenala' amung akang luk pangeh inau' tepunneh,
- ¹³pad tepunneh Maka pana' tila' ratnan kekamen tinan raca', ngaceku ieh pangeh nenganau' aceh akang Asera luk ngacing igu'. Idi Asa nenabpa akang ineh, idi nengeseb neneh tangeb Abpa' Kidron.
- ¹⁴Sagan pana' amung su luk inan sembayang inan allah baken nateh tila', Asa lutep inan Tuhan seruked ulunneh.
- ¹⁵Idi ieh nenguit iné' bang Ruma' Allah amung binaweh luk pangeh linigan tamanneh kuan Allah dengan amung binaweh luk pangeh liniganneh sebuleng, ieh ineh amas, pirak, idi amung repapeh luk baken pana'.
- ¹⁶Idi inan bunu' arang Asa dengan Basa, raca' lun Israil ineh, seruked imet didueh.
- ¹⁷Basa pangeh iné' pebunu' nelun Yahuda. Idi ieh nengeraben bawang Rama pad seburur pana' na barénneh semuet idi remuat amé' matun Asa raca' lun Yahuda.
- ¹⁸Idi Asa nengalap amung amas idi pirak luk neketecan ratnan amung binaweh luk bang Ruma' Allah, idi amung binaweh luk bang ruma' raca'. Idi biréneh nelun tarehneh. Idi Asa nengecuk nedeh amé' Damsik matun Benhadad raca' Siria luk anak Tabrimon Hesion, kebalaneh,
- ¹⁹"Do' kitech perurum mepad kudeng taman kitech atun. Idi ui maré amas idi pirak ini namu. Do' iko ngagka' jani'mu dengan Basa raca' lun Israil ineh, pad ieh nguit bawehneh buro rat negku."
- ²⁰Idi kareb Benhadad neninger bala Raca' Asa, idi ieh nengecuk lun rayeh bawehneh amé' munu' bawang-bawang lun Israil. Idi ieh nengelaya' bawang Iyon, Dan, Abel Bait Maka, idi aput bawang luk muneng ku Takung Galilia, idi aput bawang Naptali.

- ²¹Idi bala ineh nekali' Basa. Idi ieh nugka' ratnan ngeraben bawang Rama. Idi ieh tudo déi' Tirsa.
- ²²Pangeh ineh idi Raca' Asa nengecuk amung lun Yahuda ngiding amung batu idi kayuh luk pangeh inau' Basa ku libung luk meraben ineh. Seburur pana' na miak na maya' balaneh idi dengan ineh teh Raca' Asa nengeraben bawang Giba luk bang babpat Benjamin idi bawang Mispa pana'.
- ²³Idi amung kekamen Asa luk baken, idi amung kuu'neh, idi amung bawang luk rinabenneh pangeh inayud bang Surat Kekamen Raca'-Raca' Lun Yahuda. Idi kareb ieh mengered, idi mop kukudneh mét.
- ²⁴Idi Asa naté, idi ieh tinanem déi' Yerusalim. Idi anakneh Yosapat mangun ku raca' libalneh.
- ²⁵Kareb lak luk kedueh bang imet Asa, raca' lun Yahuda, idi Nadab Yerebom ineh mangun ku raca' lun Israil. Idi ieh nengimet nelun Israil dueh lak kinioneh.
- ²⁶Idi ieh nenganau' sala' pa kiung Tuhan. Idi ieh nenguit nelun Israil nganau' sala' teh, mepad kudeng luk inau' tamanneh atun.
- ²⁷Idi Basa Ahiya ratnan pupu Iskar nenganau' aceh rorum sikal ngaté ni Nadab. Idi ieh nengaté neneh kareb ieh nenguit bawehneh ngerieng Gibeton luk bang bawang lun Pilistin.
- ²⁸Ini nangun kareb lak luk keteluh bang imet Asa raca' lun Yahuda. Idi Basa nengelibal Nadab mangun ku raca' Israil.
- ²⁹Idi ieh petacu nengaté amung lun bang tetek ruma' Yerebom. Seburur pana' nateh inulunneh ratnan amung lun Yerebom ineh, maya' kudeng bala Tuhan luk pangeh bida' dengan tang demulunNeh, Nabi Ahiya lun Silo ineh.
- ³⁰Ini nangun ngaceku Yerebom nengacing useh Tuhan Allah lun Israil, kareb ieh nenganau' sala' idi kareb ieh nenguit nelun Israil nganau' sala' teh.
- ³¹Idi amung kekamen Nadab luk baken pangeh inayud bang Surat Kekamen Raca'-Raca' Lun Israil.

³²Idi inan bunu' arang Asa dengan Basa raca' lun Israil ineh seruked imet didueh.

³³Kareb lak luk keteluh bang imet Asa raca' lun Yahuda, idi Basa Ahiya mangun ku raca' Israil. Idi ieh nengimet dueh ngepulu' apat lak déi' Tirsa.

³⁴Idi ieh teh nenganau' sala' pa kiung Tuhan, idi nenguit nelun Israil nganau' sala', mepad kudeng luk inau' Yerebom.

Raca'-Raca' Luk Pun-Pun 16

¹Idi Tuhan nemada' ni Yihu Hanani ratnan lawé Basa, kebalaneh,

²"Ui nengiding namu ratnan abuh, idi Ui nengelelep namu mangun ku lun nguyut pupuKu Israil, iamo' iko pangeh nemaya' lawé Yerebom, idi nenguit pupuKu Israil nganau' sala', pad ngacing usehKu ngaceku amung sala'deh.

³Ngaceku ineh Ui miak nala' namu, idi amung uang tetek ruma'mu mepad kudeng luk inau'Ku kuan Yerebom.

⁴Idé-idé rat nelun Basa luk maté bang bawang, ieh ineh miak kenen uko'. Idi idé-idé luk maté luun lati', ieh ineh miak kenen kanui."

⁵Idi amung kekamen Basa luk baken, idi amung kuu'neh, pangeh inayud bang Surat Kekamen Raca'-Raca' Lun Israil.

⁶Idi Basa naté. Idi ieh tinanem déi' Tirsa. Idi anakneh Ela mangun ku raca' libalneh.

⁷Bala Tuhan ratnan Basa idi tetek ruma'neh pangeh bida' Nabi Yihu Hanani ngaceku amung sala' luk inau' Basa pa kiung Tuhan. Ieh nengacing useh Tuhan ngaceku sala' luk inau'neh luk mepad kudeng sala' luk inau' Raca' Yerebom atun, idi ngaceku ieh pangeh nengaté Yerebom idi amung uang tetek ruma'neh.

⁸Kareb lak luk kedueh ngepulu' anem bang imet Asa raca' lun Yahuda, idi Ela Basa ineh mangun ku raca' Israil. Idi ieh nengimet dueh lak déi' Tirsa.

- ⁹Idi Simri seburur lun tarehneh, luk ngimet sebuang keréta raca' nepegayam sikal ngaté neneh. Idi bang seaco déi' Tirsa Raca' Ela ineh nengirup déi' ruma' Arsa luk ngasa' ruma' raca' pad ieh mabuk.
- ¹⁰Simri numak ruma' idi nengaté neneh, kareb lak luk kedueh ngepulu' tudu' bang imet Asa raca' Yahuda. Idi Simri ineh mangun ku raca' libalneh.
- ¹¹Kareb Simri mangun ku raca', idi ieh nengaté amung lun bang tetek ruma' Basa. Ieh nengaté amung pupuneh luk deléi idi amung lun rurumneh pana'.
- ¹²Kudeng ineh paté Simri amung uang tetak ruma' Basa, maya' kudeng luk bida' Tuhan ratnan lawé Basa ineh dengan tang Nabi Yihu,
- ¹³Basa idi anakneh Ela nenguit nelun Israil nganau' sala', pad ngacing useh Tuhan Allah lun Israil, ngaceku akangdeh ineh.
- ¹⁴Idi amung kekamen Ela luk baken pangeh inayud bang Surat Kekamen Raca'-Raca' Lun Israil.
- ¹⁵Kareb lak luk kedueh ngepulu' tudu' bang imet Asa raca' Yahuda, idi Simri nengimet nelun Israil tudu' aco déi' Tirsa. Idi baweh lun Israil uned ngerieng bawang Gibeton luk bang imet lun Pilistin.
- ¹⁶Kareb baweh lun Israil ineh nekali' bala ratnan Simri pangeh pegayam idi nengaté raca', petacu ideh nengikit Omri, lun rayeh bawehdeh, mangun ku raca' Lun Israil.
- ¹⁷Idi Omri idi amung baweh ineh nenalan rat Gibeton idi nengelibut bawang Tirsa.
- ¹⁸Kareb Simri nenier bawang ineh pangeh linaya', idi ieh nesemuat bang su luk meraben bang ruma' raca'. Idi ieh nenutung ruma' raca', pad ieh naté.
- ¹⁹Ini nangun ngaceku amung sala' luk inau'neh pa kiung Tuhan, ngaceku lawéneh mepad kudeng lawé Yerebom luk nenguit nelun Israil nganau' sala'.
- ²⁰Idi amung kekamen Simri luk baken, idi gayam luk pangeh inau'neh, pangeh inayud bang Surat Kekamen Raca'-Raca' Lun Israil.

- ²¹Idi kareb ineh inan dueh babpat pupu Israil. Sebuangdeh nemaya' Tibni Ginat, pian ngikit neneh ku raca'. Idi sebuangdeh nemaya' ni Omri.
- ²²Iamo' lun luk nemaya' ni Omri ineh nengelaya' nelun luk nemaya' ni Tibni, pad Tibni naté. Idi Omri mangun ku raca'.
- ²³Idi kareb lak luk keteluh ngepulu' aceh bang imet Asa raca' Yahuda, idi Omri mangun ku raca' Israil. Idi ieh nengimet nedeh pulu' dueh lak kinioneh. Iamo' anem lak kinioneh ieh nengimet déi' Tirsá.
- ²⁴Pangeh ineh ieh nemelih surud Samaria rat ni Semer ku 6,000 balad pirak. Idi ieh nemudut aceh bawang luk meraben luun surud ineh. Idi ieh nenganau' ngadanneh Samaria maya' ngadan Semer luk kuan surud ineh.
- ²⁵Sala' Omri pa kiung Tuhan meluun dat ratnan sala' amung lun luk atun rat neneh.
- ²⁶Lawéneh mepad kudeng lawé Yerebom luk nenguit nelun Israil nganau' sala', pad ieh nengacing useh Tuhan Allah lun Israil ngaceku akangdeh ineh.
- ²⁷Idi amung kekamen Omri idi amung kuu'neh, pangeh inayud bang Surat Kekamen Raca'-Raca' Lun Israil.
- ²⁸Idi Omri naté, idi ieh tinanem déi' Samaria. Idi anakneh Akab mangun ku raca' libalneh.
- ²⁹Kareb lak luk keteluh ngepulu' ualuh bang imet Asa raca' Yahuda, idi Akab Omri ineh mangun ku raca' lun Israil. Idi ieh nengimet dueh ngepulu' dueh lak déi' Samaria.
- ³⁰Idi sala' Akab pa kiung Tuhan meluun dat ratnan sala' amung lun luk atun rat neneh.
- ³¹Idi na ieh musam nganau' sala' maya' kudeng luk inau' Raca' Yerebom. Iamo' ieh nengeluun sala'neh idi ieh nengalap Isabel anak Etbaal raca' Sidon ku awanneh. Idi ieh nesembayang inan Baal.
- ³²Idi ieh nemudut aceh bubpun kuan akang ineh bang ruma' Baal luk pinudutneh déi' Samaria.

³³Idi teh ieh nenganau' aceh ulung. Idi ieh nenganau' luk meluun dat ratnan amung raca' lun Israil luk atun rat neneh, pad nengeruat useh Tuhan Allah lun Israil.

³⁴Idi kareb imetneh, Hiel lun Baitel ineh nemudut baruh bawang Yeriko. Idi kareb ieh nenapin bawang ineh, Abiram anak deléineh luk atun naté. Idi kareb ieh nenganau' tanga' bawang ineh, Segub anak deléineh luk isuut pana' naté maya' kudeng luk bila Tuhan atun dengan tang Yusak Nun.

Raca'-Raca' Luk Pun-Pun 17

¹Idi kebala Nabi Elia, lun Tisbi rat tana' Giliad ni Akab, "Ui ini demulun Tuhan. Idi ui pebulung ku ngadan Tuhan Allah lun Israil luk mulun: Na miak mudan, idi na ipup tuda'-tuda' lak, kudeng ui na pebala'."

²Idi kebala Tuhan ni Elia,

³"Nalan iko rat ieni amé' pa busat aco. Idi do' iko sigapung muneng ku Arur Kerit luk pa busat aco Abpa' Yarden ineh.

⁴Idi iko miak ngirup abpa' arur ineh. Idi Ui pangeh nengecuk suit bungkek ngasa' namu déi'."

⁵Idi Elia nemaya' bala Tuhan ineh, idi ieh iné' tudo muneng ku Arur Kerit ineh.

⁶Idi bungkek nenguit ruti idi uang anid pekak idi anid alem kuanneh. Idi teh ieh nengirup abpa' rat bang arur ineh.

⁷Idi mucu ratnan ineh arur ineh nekeket. Ngaceku na udan su ineh.

⁸Idi kebala Tuhan ni Elia,

⁹"Do' iko amé' déi' Sarepat luk muneng ku Sidon ineh, idi tudo déi'. Ngaceku Ui pangeh nengecuk aceh decur tinula' ngasa' namu déi'."

¹⁰Idi Elia iné' déi' Sarepat. Idi kareb ieh nacing munung tanga' bawang, idi ieh nepapu' seburur decur tinula' luk ngalap kayuh apui. Idi kebala Elia neneh, "Maré negku sesuut abpa' rupen."

- ¹¹Laba' decur ineh amé' ngalap abpa' idi Elia nenawar neneh teh, kebalaneh, "Maré sepuri' ruti kuanku teh."
- ¹²Iamo' kebala decur ineh neneh, "Ui pebulung ku ngadan Tuhan Allahmu luk mulun ineh, idi sepuri' ruti pana' nateh negku. Iamo' aceh ragam banak mo' bang tayenku, idi sesuut mo' umau bang seréi'. Idi ui ngalap sesuut kayuh apui nekini pad ui temina' ku ineh kuan bururku sebuleng, idi kuan anak deléiku ineh, pelé kai dueh kuman. Pangeh ineh idi kai maté."
- ¹³Idi kebala Elia neneh, "Aleg iko matot! Amé' mo' iko idi nganau' kudeng luk bila mineh. Iamo' nganau' kuanku atun setebalu' isuut ratnan ineh. Idi nguit ineh kuanku. Pangeh ineh miak iko nganau' kuanmu idi kuan anakmu teh.
- ¹⁴Ngaceku kudeng ini bala Tuhan Allah lun Israil ineh, 'Banak luk bang tayen ineh na miak mabud. Idi umau luk bang seréi' ineh pana' na miak mabud macing kareb aco Tuhan maré udan luun tana' ini.' "
- ¹⁵Idi decur ineh iné' maya' kudeng luk icuk Elia ineh. Idi ideh nekuman, do' ieh idi decur ineh dengan anakneh pana' tuda'-tuda' io.
- ¹⁶Idi banak luk bang tayen ineh na mabud. Idi umau luk bang seréi' ineh pana' nateh nepetanga' maya' kudeng bala Tuhan ni Elia ineh.
- ¹⁷Idi mucu ratnan ineh, idi anak decur tinula' ineh mét; idi iuk-iuk ieh mebura' ét, pad niatneh neputut.
- ¹⁸Idi kebalaneh ni Elia, "Ngudeh iko ngesusa' negku, O nabi Allah? Pangeh iko numak ruma'ku pian ngerawé sala'ku idi ngaté anakku!"
- ¹⁹Idi kebala Elia neneh, "Maré anakmu ineh negku." Idi ieh nengalap anak ineh rat bang abinneh, idi ieh nenguit neneh umak iné' luun parung, idi ieh nenganau' neneh telubid luun bitaran.
- ²⁰Idi ieh nesembayang rayeh bala, kesembayangneh, "O Tuhan Allahku, inanké Iko ngacing susa' kuan decur tinula' luk nengasa' negku ini, pad anakneh pinatéMu?"

²¹Idi Elia netekulub luun anak ineh teluh kua'. Idi ieh nesembayang mutuh Tuhan, kesembayangneh, "O Tuhan Allahku, maré niat anak ini lemubed amé' neneh."

²²Idi Tuhan neninger sembayang Elia ineh. Idi niat anak ineh nelemubed amé' neneh pad ieh mulun.

²³Idi Elia nenguit anak ineh temurun amé' nan tinanneh, kebalaneh neneh, "Siruh, anakmu ini pangeh mulun!"

²⁴Idi kebala decur ineh, "Idi nekini ui kali' namu nabi Allah. Idi bala Tuhan luk bilamu ineh matu peh."

Raca'-Raca' Luk Pun-Pun 18

¹Muci ratnan ineh, bang lak luk keteluh kareb rikan ineh, idi kebala Tuhan ni Elia, "Amé' iko ngelagan bururmu ni Akab, idi Ui miak maré udan."

²Idi Elia iné'. Idi inan iru' luk meluun rayeh déi' bawang Samaria.

³Idi Akab nenawar Obadia luk ngasa' ruma' raca' ineh. (Idi Obadia ineh mepicet maya' Tuhan,

⁴idi kareb Isabel nengaté amung nabi Tuhan, idi Obadia nengalap meratu lun nabi, idi ieh nengapung nedeh ineh, limeh ngepulu' burur bang aceh lubang batu. Idi ieh nemaman nedeh ineh ku ruti idi abpa'.)

⁵Idi kebala Akab ni Obadia, "Do' kiteh lawé-lawé aput bawang, amé' inan amung bued abpa' idi amung arur luk mekeket ineh. Idi nakap uduh pekelibut pad amung kuda idi keladai miak mulun, pelé aya' kai na pitayen kai."

⁶Idi didueh nepegayam idi nematad lawé didueh, pad didueh perigéi' nalan.

⁷Idi laba' Obadia ineh nalan, denak-denak ieh nepapu' ni Elia. Idi ieh miti neneh. Idi ieh netekeradung, kebalaneh, "Ikoké ini O Elia?"

⁸Idi kebala Elia, "Mo, ui ini. Amé' iko mada' kuan tuanmu, 'Elia idi ieni.' "

⁹Iamo' kebala Obadia, "Anunké sala'ku, pad iko maré negku bang palad Akab pelé ieh ngaté negku?"

10Ui pebulung ku ngadan Tuhan Allahmu luk mulun ineh: Raca' Akab pangeh nenakap namu arang anid-anid pupu idi imet pana'. Idi kareb ideh pebala, 'Na ieh idi tungé,' idi ieh ngecuk lun luk ngimet bawang ineh pebulung ratnan iko na nekali'deh.

11Idi nekini iko ngecuk negku amé' mada' neneh ratnan iko idi ieni.

12Kian kareb ui pangeh nenecan namu, denak-denak Roh Tuhan miak macing idi nguit namu mado rat ieni. Idi kareb ui macing maré kali' ni Akab, kudeng iko na nekali'neh, kali' rungen ieh ngaté negku, sagan tu pana' ui ini mepicet maya' Tuhan rat ui isuut.

13Naké iko nekali' ratnan luk pangeh inau'ku kareb Isabel nengaté amung nabi Tuhan. Ngaceku ui nengapung meratu burur nabi Tuhan ineh, limeh ngepulu' burur bang aceh lubang batu. Idi ui nemaman nedeh ku ruti idi abpa'.

14Ngudehké iko ngecuk negku amé' mada' raca' ratnan iko idi ieni. Kali' rungen ieh ngaté negku!”

15Idi kebala Elia, "Ui ini demulun Tuhan. Idi ui pebulung ku ngadan Tuhan luk Melalud, na miak na aco sini teh ui ngelagan bururku nan raca'.”

16Idi Obadia iné' matun ni Akab. Idi ieh nengacing bala ineh neneh. Idi Akab pana' iné' matun ni Elia.

17Kareb Akab nenier ni Elia ineh, idi kebalaneh neneh, "Ikoké tungé', O iko luk ngacing susa' nelun Israil?”

18Idi kebala Elia neneh, "Na ui ngesusa' nelun Israil. Iamo' iko idi uang tetek ruma' i tamam. Ngaceku muyuh pangeh nekelupan bala Tuhan, idi nemaya' akang Baal.

19Idi nekini ngecuk nelun ngamung amung lun Israil amé' negku luun Pegkung Karmel, idi teh 450 burur nabi Baal, idi 400 lun nabi ulung luk kuman akan rat luun téng Isabel ineh.”

²⁰Idi Akab nenawar amung lun Israil idi amung nabi Baal ineh pamung luun Pegkung Karmel.

²¹Idi Elia iné' nelun mula' ineh, kebalaneh, "Tuda' ioké muyuh perapid terawé? Kudeng Tuhan ineh Allah, do' muyuh maya' Neneh. Iamo' kudeng Baal ineh Allah, do' muyuh maya' neneh. Idi sebila' bala pana' nateh inor lun mula' ineh neneh.

²²Idi kebala Elia, "Ui ini mo' nabi Tuhan luk neketecan sebuleng. Iamo' nabi Baal ineh 450 burur.

²³Do' nguit dueh sapi' deléi. Nima' nedeh ngalap sebuleng idi mulu' neneh, idi ngerareng ineh luun kayuh. Iamo' aleg nganau' apui. Idi ui pana' nganau' kudeng ineh teh.

²⁴Idi do' amung nabi Baal ngitang nawar ngadan allahdeh. Idi ui miak ngitang nawar ngadan Tuhan. Idi sapeh luk ngor idi maré apui, Ieh ineh mo' Allah." Idi amung lun mula' ineh nengitang, kebaladeh, "Balamu ineh do'."

²⁵Idi kebala Elia kuan amung nabi Baal ineh, "Mili' muyuh sebuleng sapi' deléi, idi temina' ku ineh atun, ngaceku muyuh luk mula'. Idi do' muyuh ngitang nawar Baal muyuh. Iamo' aleg muyuh nganau' apui luun ineh."

²⁶Idi ideh nengalap sebuleng sapi' deléi luk inuit kuandeh. Idi ideh netemina' ku ineh. Idi ideh nengitang nawar ngadan Baal rat pekak macing muned aco, kebaladeh, "O Baal, maré or kuan kai!" Iamo' sebila' bala pana' nateh inorneh. Idi ideh uput-uput libut bubpun luk pangeh inau'deh ineh.

²⁷Kareb muned aco idi Elia nguto-nguto nedeh ineh, kebalaneh, "Do' muyuh nawar dengan arod luk meluun rayeh. Ngaceku ieh ineh melalud teh. Kian ieh ngerawé atun lek. Kian inan aceh kekammeneh lek. Kian ieh nalan lek. Kian ieh rudap lek, idi petulu ieh uen ngalat atun."

²⁸Idi ideh nenawar dengan arod luk meluun rayeh, idi ngirit-ngirit bururdeh ku iyu idi ku karit maya' adatdeh, pad dara'deh remuat luunde.

²⁹Ngaceku pangeh nepelaba muned aco. Idi ideh nengarod-nengarod macing kareb maré baré luk kenen. Iamo' sebila' bala pana' nateh nacing. Luk pindenger pana' nateh.

³⁰Idi kebala Elia nelun mula' ineh, "Amé' amung muyuh muneng negku." Idi amungdeh ineh iné' muneng neneh. Idi ieh nenuneb bubpun Tuhan luk pangeh inusag ineh.

³¹Idi ieh nengalap pulu' dueh batu maya' kinula' amung inul pupu Yakub. Ngaceku bala Tuhan pangeh nacing ni Yakub, kebalaNeh, "Idi Israil mangun ku ngadanmu."

³²Idi batu-batu ineh inau'neh ku bubpun ineh dengan ngadan Tuhan. Pangeh ineh idi ieh nengukat abang libut bubpun ineh, kirayehneh miak inan apat gatang padé.

³³Idi ieh nengerareng kayuh apui luunneh. Idi ieh nemulu' sapi' ineh. Idi ieh nengerareng amung luk binulu' ineh luun kayuh apui ineh, kebalaneh, "Rabpen muyuh apat rua abpa', idi ngutang ineh luun baré luk sabpen idi luun kayuh apui ineh."

³⁴Idi kebalaneh, "Nganau' kudeng ineh sekedueh kua'." Idi ideh nenganau' kudeng ineh. Kebalaneh, "Nganau' kudeng ineh seketeluh kua'." Idi ideh nenganau' kudeng ineh teh,

³⁵pad abpa' ineh pana' manud luun bubpun ineh. Kudeng ineh teh abang ineh panu' ku abpa'.

³⁶Idi kareb luk petulu inan maré baré malem, idi Nabi Elia iné' muneng ku bubpun idi nesembayang, kesembayangneh, "O Tuhan Allah Ibrahim, Isak, idi Yakub, bang aco sini do' ngegala', idi Iko Allah arang lun Israil, idi ui ini demulunMu luk pangeh nenganau' amung ini maya' balaMu.

³⁷Ngua' sembayangku O Tuhan. Ngua' sembayangku, pad lun mula' ini kali' Namu O Allah, idi Iko mo' Allah sebuleng luk ngelubed nedeh amé' Namu."

³⁸Idi bang kareb ineh apui netemurun ratnan Tuhan nengeseb amung baré dengan kayuh apui ineh, amung batu, tana', idi abpa' pana' luk bang abang ineh.

³⁹Kareb lun mula' ineh nenier luk kudeng ineh, idi ideh netekeradung luun tana', kebaladeh, "Tuhan Ieh ineh Allah! Tuhan Ieh ineh Allah!"

⁴⁰Idi kebala Elia nelun mula' ineh, "Kamen muyuh amung nabi Baal ineh. Aleg nima' seburur mepuit." Idi ideh nengakem nedeh. Idi Elia nenguit amungdeh amé' déi' Arur Kison. Idi ieh nengaté nedeh déi'.

⁴¹Idi kebala Elia ni Akab, "Amé' iko kuman. Ngaceku inan beri udan luk mula' macing."

⁴²Idi Akab iné' kuman. Iamo' Elia nuké iné' luun Pegkung Karmel. Idi ieh netekunal.

⁴³Idi kebalaneh nan lun dukenneh, "Nalan nekini amé' nier pa abpa' rayeh." Idi lun dukenneh ineh iné' nier idi nelemubed, kebalaneh, "Na anun-anun nekali'ku déi'." Idi kebala Elia, "Amé' teh." Idi kudeng ineh teh ieh nengecuk neneh macing tudu' kua'.

⁴⁴Idi bang luk ketudu' kua' ineh, kebala lun duken ineh, "Siruh inan aceh laput isuut kiar palad lemulun mo' luk kemikit rat pa abpa' rayeh." Idi kebala Elia, "Amé' iko mada' ni Akab, idi ngecuk neneh temina' ku kudaneh idi nalan, pad ieh na mepigket udan."

⁴⁵Idi langit pana' iuk medacem ngaceku laput idi bui. Idi udan pelaba ula'. Idi Akab nenalan iné' déi' Yesril.

⁴⁶Idi lalud Tuhan idi dengan Elia, pad ieh nengalak paped kuyu' boyorneh luun awa'neh; idi ieh nupun pa atun Akab, pad ieh nacing déi' Yesril.

Raca'-Raca' Luk Pun-Pun 19

¹Raca' Akab nemada' ni Isabel ratnan amung-amung luk inau' Elia, idi teh ratnan ieh nengaté amung nabi Baal ineh.

²Idi Isabel nengecuk nelun dukenneh mada' ni Elia, kebalaneh, "Nima' amung allah ngaté negku, kudeng ui na ngaté namu, mepad kudeng iko nengaté nabi ineh bang kareb luk kudeng ini nebpa."

³Elia matot. Idi ieh neburo. Idi kareb ieh nacing déi' Birsiba déi' tana' Yahuda, idi ieh nenecan lun dukenneh déi'.

⁴Iamo' Elia sebuleng iné' déi' su luk ali-ali, kiado delanin seaco. Idi ieh netudo iang kayuh aru'. Idi ieh nesembayang mutuh Tuhan ngalap niatneh, kesembayangneh, "Petap derehku nekini, O Tuhan! Ngalap mo' niatku. Meluun do' ui maté!"

⁵Idi ieh netelubid, idi rudap liang kayuh aru' ineh. Idi denak-denak aceh melaikat nengakem neneh, kebalaneh, "Kulat iko idi kuman."

⁶Idi ieh nenier pa uluhneh inan aceh pinaram luk iseb luun batu luk melau', idi aceh sidangur abpa'. Idi ieh nekuman idi nengirup. Pangeh ineh idi ieh netelubid.

⁷Idi melaikat Tuhan iné' neneh sekua' teh, idi nengakem neneh, kebalaneh, "Tumui iko idi kuman. Ngaceku meluun ado delaninmu."

⁸Elia netumui idi nekuman idi nengirup. Ngaceku tueh luk ilapneh ratnan akanneh ineh, idi ieh nenalan apat ngepulu' aco apat ngepulu' daceh, pad ieh nacing déi' surud Allah, ieh ineh Sinai.

⁹Idi ieh nesemuet bang aceh lubang batu idi nerudap daceh su ineh. Idi denak-denak Tuhan nepebala neneh, "Anunké luk ruenmu su ini, O Elia?"

¹⁰Idi kebala Elia, "O Tuhan Allah luk Melalud, rat mon ui ngakem kuanMu sebuleng mo'. Iamo' lun Israil pangeh nengelaba jani'deh Namu. Ideh nengusag amung bubpunMu idi nengaté amung nabiMu. Idi ui mo' sebuleng ketecan. Idi ideh sikal ngaté negku."

¹¹Idi kebala Tuhan neneh, "Remuat iko, tupid luun surud ini pa kiungKu." Idi Tuhan nelemaba. Idi inan barui idi libuleh luk mila' surud idi batu pa kiung Tuhan. Iamo' Tuhan na idi bang libuleh ineh. Muci ratnan libuleh barui ineh inan ruyuh tana'. Iamo' Tuhan na idi bang ruyuh tana' ineh teh.

- ¹²Idi pangeh ruyuh tana' ineh inan apui. Iamo' nateh Tuhan bang apui ineh. Pangeh apui ineh inan aceh arod medengeli.
- ¹³Kareb Elia neninger arod ineh, idi ieh nengebpu kiungneh ku tarubneh. Idi ieh neremuat idi netuped munung lubang batu ineh. Idi inan aceh tang nepebala neneh, "Anunké luk ruenmu su ini, O Elia?"
- ¹⁴Idi kebala Elia, "O Tuhan Allah luk Melalud, rat mon ui ngakem kuanMu sebuleng mo'. Iamo' lun Israil pangeh nengelaba jani'deh Namu. Ideh nengusag amung bubpunMu, idi nengaté amung nabiMu. Idi ui mo' sebuleng ketecan. Idi ideh sikal ngaté negku."
- ¹⁵Idi kebala Tuhan neneh, "Lemubed iko amé' déi' su luk ali-ali muneng ku Damsik. Amé' déi' idi ngumau Hasel mangun ku raca' bawang Siria.
- ¹⁶Idi do' iko ngumau Yihu Nimsi mangun ku raca' lun Israil. Idi do' iko ngumau Elisa Sapat rat Abel Mehola mangun ku nabi libalmu.
- ¹⁷Idi idé-idé luk mepuit ratnan pelapet Hasel, ieh ineh miak pitayen Yihu. Idi idé-idé luk mepuit ratnan pelapet Yihu ineh, ieh ineh miak pitayen Elisa.
- ¹⁸Iamo' ui miak necan arang lun Israil 7,000 burur luk nateh netekeradung pa kiung akang Baal, ieh ineh amung-amung luk nateh nemuen akangneh ineh."
- ¹⁹Idi Elia nenalan, idi ieh nepapu' ni Elisa Sapat uned ngeradu ku dueh ngepulu' apat sapi'. Idi ieh pebaya' dengan dueh sapi' luk pa mucu. Idi kareb Elia nelemaba neneh, idi ieh nemepet kuyu'neh neneh.
- ²⁰Idi Elisa nenecan amung sapi' ineh, idi nupun maya' ni Elia, kebalaneh, "Nima' negku petabi' inan taman-tinanku atun. Pangeh ineh idi miak ui maya' namu." Idi kebala Elia, "Amé' mo' iko, ngaceku na ui ngibpang namu."
- ²¹Idi Elisa nelemubed rat neneh. Idi ieh nengalap dueh sapi' ineh idi ieh nengaté idi nenaneh uang didueh. Idi paga' sapi' ineh nepingabaneh ineh. Idi ideh nekuman. Pangeh ineh idi Elisa nemaya' ni Elia, idi mangun ku anak sekola'neh.

Raca'-Raca' Luk Pun-Pun 20

¹Benhadad raca' bawang Siria ineh nengamung amung bawehneh. Amung luk maya' neneh teluh ngepulu' dueh burur raca' idi tuda'-tuda' kuda idi keréta. Idi ieh nenalan idi bawehneh nengelibut Samaria idi ideh nepebunu' nelun bang bawang ineh.

²Idi ieh nengecuk nelun dukenneh amé' matun ni Akab raca' lun Israil, kebalaneh,

³"Kudeng ini bala raca' Benhadad: 'Idi amung amas idi pirakmu ineh kuanku. Kudeng ineh teh amung awanmu idi anakmu luk meluun tueh.' "

⁴Idi kebala raca' lun Israil, "Matu balamu. Ui pana' kuanmu dengan amung luk ui kuan."

⁵Idi lun luk icuk ineh iné' sekua' teh, kebaladeh, "Kudeng ini bala Raca' Benhadad, 'Idi ui pangeh nengecuk nelun duken amé' matun namu mada': 'Amas, pirak, idi amung anak idi awanmu na miak na barénmu negku.' "

⁶Iamo' pekak nebpa, bang kareb luk kudeng ini ui miak ngecuk nelun dukenku amé' namu pelé ideh nier bang ruma'mu, idi ruma' amung lun tarehmu. Idi kali' rungen amung-amung luk piandeh miak rawendeh.' "

⁷Idi raca' lun Israil nenawar amung lun rayeh bawang. Idi ieh nepebala nedeh, "Kali' muyuh lun ini nganau' susa' kuan tau. Ngaceku pangeh ieh nengecuk nelun dukenneh mutuh negku maré amung awan idi anakku, pirakku idi amasku pana'. Idi na ui ngibpang neneh."

⁸Idi kebala amung lun rayeh idi lun mula' ineh teh, "Aleg iko ninger balaneh idi ngamo putuhneh."

⁹Idi ngaceku ineh Akab nepebala kuan lun luk icuk Benhadad ineh, "Mada' kuan raca' muyuh kudeng ini, 'Amung-amung luk pinutuhmu atun, kai miak maré. Iamo' luk pinutuhmu nekini ui na miak ngamo.' " Idi lun luk icuk ineh nenalan idi nelemubed nguit bala luk baken

¹⁰ratnan Benhadad, kebalaneh, "Nima' amung allah ngaté negku, kudeng ui na nguit petap ula' lemulun ngusag bawangmu ini, pad ideh miak naban amung usagneh."

¹¹Kebala Akab nelun duken ineh, "Mada' ini kuanneh, 'Lun luk ngabin pelapetneh aleg medita' niat, mepad kudeng lemulun luk pangeh metueh.' "

¹²Idi kareb Benhadad neninger bala ini laba' ieh tudo ngirup dengan amung raca' ineh bang lepodeh, idi kebalaneh kuan anak itinneh, "Temina' muyuh idi amé' munu' bawang ineh." Idi ideh nenganau' kudeng ineh.

¹³Idi inan aceh nabi luk iné' matun ni Akab raca' lun Israil, kebalaneh, "Kudeng ini bala Tuhan, 'Aleg matot ku baweh luk rayeh ineh. Ngaceku aco sini teh Ui maré nedeh bang paladmu, pad iko kali' Ui ini mo' Tuhan.' "

¹⁴Idi kebala Akab, "Idéké luk miak ngedengan nekai pebunu'?" Idi kebala nabi neneh, "Kudeng ini bala Tuhan, 'Anak adi' luk pa liang lun luk ngimet anid babpat Israil.' " Idi kebala raca', "Idéké miak ngimun bunu' ineh?" Idi kebala nabi ineh, "Iko."

¹⁵Idi raca' nengamung amung anak adi' luk pa liang lun luk ngimet anid babpat Israil ineh. Kinula'deh 232 burur. Muci ratnan ineh ieh nengamung baweh lun Israil. Kinula'deh 7,000 burur.

¹⁶Idi ideh iné' pebunu' kareb muned aco, laba' Benhadad ngirup dengan teluh ngepulu' dueh burur raca' bang su luk inandeh nelupo. Idi ideh ngirup macing mabuk.

¹⁷Idi anak adi' ineh nenalan atun. Idi kebala lun duken Benhadad luk iné' nier, 'Inan tuda'-tuda' lemulun neremuat rat Samaria."

¹⁸Idi kebala raca' nedeh, "Kudeng ideh remuat pian pedo', do' muyuh ngakem nedeh mulun. Kudeng ideh remuat sikal pebunu' pana', ngakem nedeh mulun teh."

¹⁹Idi anak adi' ineh nenalan atun, idi baweh lun Israil nemaya' puetdeh.

²⁰Idi anid-anideh ineh nengaté akubdeh, pad amung lun Siria inusu lun Israil rat pa puet. Idi Benhadad raca' Siria ineh neburo dengan kudaneh idi sebuang lun luk maya' kuda.

- ²¹Idi raca' Akab pana' neremuat, idi nengalap kuda idi kerétadeh. Idi ieh nengelaya' nelun Siria ineh.
- ²²Idi kebala nabi inan Raca' Akab, "Lemubed iko idi nuneb bawehmu ineh, idi ngerawé do'-do' ratnan luk miak ruenmu, ngaceku raca' Siria miak pebunu' namu lak baruh teh."
- ²³Idi kebala lun tareh Raca' Benhadad neneh, "Allah-allah lun Israil, ieh ineh allah-allah pegkung. Ngaceku ineh ideh meluun tueh rat netau. Iamo' kudeng tau pebunu' nedeh luun tana' luk meraked, kali' rungen amung tau miak ngelaya' nedeh.
- ²⁴Idi do' iko ngagka' amung raca' ineh ratnan imetdeh, idi nganau' tuda'-tuda' lun rayeh baweh ku libaldeh.
- ²⁵Idi do' iko ngamung aceh baweh luk mepad ula' dengan bawehmu luk pangeh linaya' ineh, idi lun luk maya' kuda pana' luk mepad ula' teh. Idi do' tau pebunu' nedeh luun raked, pad tau ngelaya' nedeh sekua' ini." Idi raca' nengamo putuhdeh ineh. Idi ieh nemaya' baladeh.
- ²⁶Idi pangeh selak Benhadad nengamung anak itinneh. Idi ideh nenalan iné' déi' Apek sikal pebunu' nelun Israil.
- ²⁷Idi lun Israil pana' nepamung idi ideh netemina' ku balu' idi repapeh luk baken teh. Idi ideh iné' lupu petutup nelun Siria mepad kudeng dueh riudan amék luk masi'. Iamo' lun Siria maput bawang ineh.
- ²⁸Idi seburur nabi Allah iné' ni Raca' Akab, kebalaneh, "Kudeng ini bala Tuhan: 'Ngaceku lun Siria pangeh neneten Negku Allah pegkung, idi baken Allah raked, idi Ui maré lun luk meluun ula' ineh bang paladmu mucu, pad amung muyuh kali' Ui ini Tuhan.' "
- ²⁹Idi dueh baweh ineh tudo tudu' aco kinioneh. Idi kareb aco luk ketudu' idi ideh nepebunu'. Idi lun Israil nengaté 100,000 lun Siria bang seaco.
- ³⁰Idi ideh luk neketecan ineh neburo iné' bawang Apek. Iamo' libung batudeh netabpa nengeritep 27,000 burur luk neketecan ineh. Idi Benhadad neburo' iné' bang bawang, idi ieh nuta bang takep.

³¹Idi kebala lun tarehneh neneh, "Kai ini pangeh neninger amung raca' lun Israil ineh do' niat idi méi'. Ngaceku ineh do' nima' nekai ngayung ku kibung guni idi nganau' nuper luun dier kai, idi amé' matun raca' Israil, pelé ieh na ngaté namu."

³²Idi ideh nengayung ku kibung guni, idi nenganau' nuper luun dierdeh. Idi ideh iné' matun raca' Israil, kebaladeh, "Demulunmu Benhadad mutuh namu ngulun neneh." Idi kebala Akab, "Mulun tiehké? Do'! Ieh mepad kudeng kinanakku."

³³Idi lun tareh Benhadad nenganét tanu' luk do' kudeng ineh, idi ideh nengor dengan mesaget, kebaladeh, "Matu Benhadad kinanakmu." Idi kebala Akab, "Do' nguit neneh amé' tungé'." Idi Benhadad iné' matun raca'. Idi Akab nengecuk neneh uké luun kerétaneh.

³⁴Idi kebala Benhadad neneh, "Amung bawang luk inaro tamanku ratnan tamanmu, ieh ineh libacenu idi miak teh iko nganau' kadai bang bawang Damsik, mepad kudeng luk pangeh inau' tamanku bang bawang Samaria." Idi Akab nengor balaneh, "Ui miak muit namu maya' jani'mu ini." Idi didueh nepejani'. Idi Akab nenima' neneh amé'.

³⁵Idi kebala seburur rat arang amung anak nabi kuan lun denganneh, dengan bala Allah, "Dedatenmu ui." Iamo' lun ineh na sikal necat neneh.

³⁶Idi kebalaneh neneh, "Ngaceku iko na maya' bala Tuhan, kareb iko nalan rat ieni inan aceh balang miak ngaté namu." Idi kareb ieh nenalan rat ieneh, idi petacu ieh nepapu' aceh balang luk nengaté neneh.

³⁷Idi nabi ineh nepapu' aceh lun baken, idi kebalaneh, "Dedatenmu ui." Idi lun ineh nenecat neneh pad ieh nurat.

³⁸Idi nabi ineh iné' tuper iring dalan nganét raca'. Idi ieh nesiyu kudeng lun baken idi nengebpu kiungneh.

³⁹Idi kareb raca' nelemaba, idi nabi ineh nengitang nawar neneh, kebalaneh, "Ui ini pangeh iné' arang uned bunu'. Idi seburur lun pebunu' nenguit seburur lemulun iné' negku, kebalaneh, 'Do' iko nginita lun ini. Idi kudeng ieh buro,

kali' rungen niatmu miak ku libal niatneh, kudeng iko na maré kuanku 3,000 balad pirak.'

⁴⁰Idi kareb ui ini mesaso ku kekamenku idi lun ini na idi peh." Idi kebala raca' lun Israil, "Ini ukummu. Iko sebuleng pangeh nemutut ineh.

⁴¹Idi dengan mesaget nabi ineh nengalap ebpu ineh ratnan kiungneh. Idi raca' lun Israil miti neneh seburur rat arang nabi.

⁴²Idi kebala nabi ineh neneh, "Kudeng ini bala Tuhan: 'Ngaceku iko pangeh nemuit seburur lun luk pangeh itadKu miak pitayen, idi niatmu miak ku libal niatneh. Idi pupumu pana' miak ku libal pupuneh.' "

⁴³Idi raca' lun Israil nuli' iné' Samaria dengan meberat niat.

Raca'-Raca' Luk Pun-Pun 21

¹Idi Nabot lun Yesril inan aceh kabun anggur déi' Yesril muneng ku ruma' Akab raca' Samaria ineh.

²Idi kebala raca' ni Nabot, "Maré kabun anggurmu ineh kuanku, inanku nibu irin. Ngaceku kabun ineh muneng ku ruma'ku. Idi ui miak maré kuanmu aceh kabun anggur ku libalneh luk meluun do' ratnan ini. Idi kudeng iko ara' ku ineh ui maré usin luk petap namu."

³Iamo' kebala Nabot, "Ui pebulung ku ngadan Tuhan. Na tu ui pian maré babpat luk ilap ratnan tepunku ini namu."

⁴Idi Akab nuli' dengan mét niat ngaceku bala Nabot ineh. Idi ieh netelubid idi nesemingun na nekuman.

⁵Idi kebala Isabel neneh, "Anun punmu mét niat, pad iko na kuman?"

⁶Idi kebalaneh, "Ngaceku bala Nabot negku. Ui nemutuh melih kabun anggurneh. Kian, kudeng ieh pian ui miak maré aceh kabun anggur ku libalneh. Iamo' kebalaneh, 'Ara' ui maré ineh.' "

⁷Idi kebala Isabel neneh, "Matuké iko raca' lun Israil? Tumui idi kuman, idi ngawang niatmu. Ui miak maré kabun anggur Nabot kuanmu."

⁸Idi Isabel nengayud tuda'-tuda' surat dengan ngadan Akab. Idi ieh nenganau' etu ticu' raca' luun ineh idi nemaré surat ineh kuan amung lun rayeh-rayeh bang bawang Yesril ineh.

⁹Idi bala amung surat ineh kudeng ini: "Do' muyuh ngeletep aceh aco, pad amung lun mawa'. Idi do' Nabot tudo su luk medita' pa atun amung lemulun.

¹⁰Idi ngecuk dueh burur lun dat tudo pa atunneh, pelé didueh mangun ku lun nekali' luk mebalih rat neneh. Idi do' didueh pebala, 'Iko pangeh nenguyo inan Allah idi inan raca' pana'.' Idi nguit neneh remuat idi mitung neneh ku batu pad ieh maté."

¹¹Idi lun rayeh-rayeh bawang Yesril ineh, nenganau' mepad kudeng luk bila Isabel nedeh.

¹²Idi ideh nengeletep aceh aco luk inan lun mawa', idi ideh nenganau' Nabot tudo su luk medita' pa atun lun mula' ineh.

¹³Idi dueh burur luk dat ineh netudo pa atunneh. Idi didueh nengadu' ni Nabot pa kiung lun mula', kebala didueh, "Nabot ini pangeh nenguyo inan Allah idi inan raca' pana'." Idi ideh nenguit neneh remuat rat bang bawang, idi ideh nemitung neneh ku batu pad ieh naté.

¹⁴Idi ideh nengecuk nelun amé' mada' ni Isabel, "I Nabot ineh pangeh naté binitung ku batu."

¹⁵Kareb Isabel neninger bala ineh, idi ieh nepebala ni Akab, "Do' iko amé' ngalap kabun anggur Nabot lun Yesril ineh kuanmu, ieh ineh kabun luk dibpinneh pisuen namu. Ngaceku i Nabot ineh pangeh naté."

¹⁶Idi petacu Akab iné' ngalap kabun ineh kuanneh.

¹⁷Iamo' kebala Tuhan ni Elia, lun nabi rat Tisbi ineh,

¹⁸"Do' iko amé' papu' Raca' Akab luk ngimet déi' Samaria ineh. Ngaceku ieh idi bang kabun anggur Nabot, idi ieh pian ngalap ineh kuanneh.

¹⁹Idi mada' kuanneh, 'Kudeng ini bala Tuhan, "Pangehké iko nengaté lemulun idi nengaro binawehneh?" ' Idi teh do' iko mada' neneh, 'Kudeng ini bala

Tuhan: "Su luk inan uko' pangeh nengil dara' Nabot ineh, su ineh teh inan uko' ngil dara'mu!" ' ' “

²⁰Idi kebala Akab ni Elia, "Pangehké iko kali' negku, O bunu'ku!" Idi kebala Elia, "Matu ui kali' namu. Iamo' iko pangeh nemasui bururmu idi pangeh nenganau' luk dat pa kiung Tuhan.

²¹Idi kebala Tuhan namu, 'Ui miak ngacing dat kuanmu, idi Ui miak ngaté amung lun deléi ratnan inul Akab, ieh ineh amung lun do' idi lun dat pana',

²²pad tetek ruma'mu mepad kudeng tetek ruma' Yerebom Nibat idi tetek ruma' Basa Ahiya, ngaceku iko nengeruat usehKu, kareb iko nenguit nelun Israil nganau' sala.'

²³Idi kebala Tuhan ratnan Isabel, ieh miak kenen uko' bang bawang Yesril.

²⁴Idi idé-idé ratnan inul Akab luk maté bang bawang, ieh miak kenen uko'. Idi idé-idé luk maté mado rat bang bawang, ieh miak kenen suit.”

²⁵(Idi na lemulun mepad kudeng Akab luk nemasui bururneh idi nenganau' luk dat pa kiung Tuhan, ngaceku inubuk Isabel awanneh ineh.

²⁶Idi ieh nenganau' sala' luk meluun dat, ngaceku ieh nesembayang inan akang mepad kudeng luk pangeh inau' lun Amori atun, luk pangeh tila' Allah rat bang bawangdeh pa kiung amung lun Israil.)

²⁷Idi kareb Akab neninger amung bala ini, idi ieh nenarak ayungneh. Idi ieh nengayung ku kibung guni ineh. Idi ieh na kuman. Idi ieh rudap dengan kibung guni ineh. Idi ieh nenalan dengan meberat niat.

²⁸Idi kebala Tuhan ni Elia,

²⁹"Pangehké iko nenier Akab nengebeneh bururneh pa kiungKu? Na Ui ngacing dat ineh seruked ulunneh, ngaceku ieh pangeh nengebeneh bururneh pa kiungKu. Iamo' bang kareb anakneh mucu Ui ngacing dat ineh kuan uang tetek ruma'neh."

Raca'-Raca' Luk Pun-Pun 22

¹Idi bang teluh lak na inan bunu' arang bawang Siria dengan lun Israil.

²Iamo' bang lak luk keteluh Yosapat raca' lun Yahuda iné' papu' ni Akab raca' lun Israil ineh.

³Idi kebala Akab nan lun tarehneh, "Kali' muyuh idi Ramot Giliad ineh tau kuan idi tau ungeng mo', na tau ngaro bawang ineh rat bang palad raca' bawang Siria?"

⁴Idi kebalaneh kuan Raca' Yosapat, "Pian iko maya' negku amé' pebunu' dei' Ramot Giliad?" Idi kebala Yosapat, "Kudeng iko temina', ui pana' temina' dengan lun pebunu'ku idi teh kuda.

⁵Iamo' do' iko ngitun Tuhan atun."

⁶Idi Akab nenawar amung nabi, lélé apat ngeratu kinula'deh. Kebalaneh nedeh, "Miakké ui amé' pebunu' déi' bawang Ramot, kian na lek?" Idi kebala nabi-nabi ineh, "Do' iko amé', ngaceku Tuhan miak maré nedeh bang paladmu."

⁷Iamo' kebala Yosapat, "Inanké nabi Tuhan baken tungé', luk miak tunin tau?"

⁸Kebala Raca' Akab, "Inan teh seburur luk miak tunin tau, ieh ineh Mikaya Imla, iamo' ui megateh neneh, ngaceku sesuut pana' nateh balaneh do' negku. Iamo' ieh pelaba dat bala." Idi kebala Yosapat, "Aleg iko pebala kudeng ineh."

⁹Idi Raca' Akab nenawar seburur lun tarehneh, kebalaneh, "Amé' iko nguit Mikaya Imla ineh amé' tungé' dengan mesaget."

¹⁰Idi dueh raca' ineh tudo luun kerusi imet dengan ayung raca' déi' su luk inan rumik munung tanga' bawang Samaria. Idi amung nabi mada' pa kiung raca'.

¹¹Idi Nabi Sedekia Kenana pangeh nenganau' unga belawan. Idi kebalaneh ni Akab, "Kudeng ini bala Tuhan: 'Idi kudeng ini teh lawému miak ngegkul-ngegkul nelun bawang Siria ineh, pad iko ngaté nedeh ineh.' "

¹²Idi kudeng ineh teh bada' amung nabi ineh, kebaladeh, "Do' iko amé' déi' Ramot idi kali' rungen iko metueh. Ngaceku Tuhan miak maré nedeh bang paladmu."

- ¹³Idi lun luk icuk amé' nawar ni Mikaya ineh, nepebala neneh, "Amung nabi baken mada' luk do' kuan raca'. Do' iko pana' mada' kudeng ineh teh."
- ¹⁴Iamo' kebala Mikaya, "Ui pebulung ku ngadan Tuhan luk mulun, idi anun luk belén Tuhan negku, ineh teh luk belénku."
- ¹⁵Kareb ieh nacing inan raca', idi raca' nengitun neneh, kebalaneh, "O Mikaya, miakké kai amé' pebunu' déi' Ramot ineh, kian na lek?" Idi kebala Mikaya, "Do' iko amé'. Miak iko metueh. Tuhan maré amungdeh ineh bang paladmu."
- ¹⁶Iamo' kebala Akab neneh, "Tuda' kua' ui nemebpong namu na miak pebala luk na matu dengan ngadan Tuhan?"
- ¹⁷Idi kebala Mikaya neneh, "Ui pangeh nenier amung lun Israil urap-urap luun pegkung, mepad kudeng dumba luk na lun matar. Idi Tuhan nepebala, 'Ideh ini na inan lun nguyut, ngaceku ineh nima' anid-aniddeh muli' dengan do'.' "
- ¹⁸Idi kebala Akab ni Yosapat, "Naké ui nepebala namu, sesuut pana' nateh balaneh do' negku. Iamo' ieh pelaba dat bala?"
- ¹⁹Idi kebala Mikaya, "Ninger iko bala Tuhan. Ui pangeh nenier Tuhan tudo luun kerusiNeh. Idi amung melaikat luk déi' surga tuped pekop iringNeh.
- ²⁰Idi Tuhan nengitun, 'Idé miak ngubuk ni Akab pelé ieh amé' pitayen déi' Ramot ineh?' Idi sebuang melaikat ineh pebala kudeng ini, idi luk baken nepebala kudeng ineh.
- ²¹Idi aceh ada' iné' pa kiung Tuhan, kebalaneh, 'Ui miak ngubuk neneh.' Idi Tuhan nengitun neneh, 'Dengan anun?'
- ²²Idi kebala ada' ineh, 'Ui miak mangun ku ada' luk mebalih bang tang amung nabi Akab ineh.' Idi Tuhan nepebala, 'Amé' naluk nedeh. Luk bilamu miak mangun.'
- ²³"Idi nekini Tuhan pangeh nemaré ada' luk mebalih bang tang amung nabimu ini. Idi Tuhan pangeh nengeletep susa' kuanmu."

- ²⁴Idi Sedekia nemepag kiung Mikaya, kebalaneh, "Kudeng apéh Roh Tuhan ineh mubuh rat negku pad ieh pebala namu?"
- ²⁵Kebala Mikaya, "Iko teh miak kali' kareb iko buro amé' sigapung bang takep."
- ²⁶Idi kebala Raca' Akab, "Ngakem Mikaya idi nguit neneh lemubed amé' ni Amon lun rayeh bawang idi ni Yoas anak raca' ineh.
- ²⁷Idi ngecuk nedidueh, Kebala raca', 'Nipa lemulun ini bang tutup. Idi maré neneh sesuut ruti idi abpa' mo' pad macing ui muli' dengan do'. " "
- ²⁸Idi kebala Mikaya, "Kudeng iko muli' dengan do', kali rungen na Tuhan nepebala negku." Idi teh kebalaneh, "Ninger O amung muyuh!"
- ²⁹Idi raca' lun Israil idi Yosapat raca' lun Yahuda iné' ngerieng Ramot Giliad ineh.
- ³⁰Idi kebala Akab ni Yosapat, "Ui sikal ngisu' ayuku, idi amé' pebunu'. Iamo' do' iko ngayung ku ayung raca' teh." Idi raca' lun Israil nengelibal ayungneh idi iné' pebunu'.
- ³¹Idi raca' bawang Siria ineh nemebpeng amung lun rayeh keréta, teluh ngepulu' dueh burur kinula'deh, kebalaneh, "Aleg muyuh pebunu' nelun baken, iamo' raca' lun Israil mo' sebuleng luk uen munu'."
- ³²Kareb lun rayeh keréta ineh nenier Raca' Yosapat, idi ideh nengerawé neneh raca' lun Israil. Idi ideh iné' munu' neneh. Iamo' kareb Raca' Yosapat nengitang,
- ³³lun rayeh keréta nenier baken ieh ineh raca' lun Israil. Idi ideh neburo rat neneh.
- ³⁴Idi inan seburur nemayung busuneh dengan na inau' rungen, idi raca' lun Israil nekaneh su sulak kuyu' belawanneh. Idi raca' nepebala kuan lun luk ngimet kerétaneh, "Ngeliud keréta idi nated negku remuat rat arang bunu' ngaceku mebura' uratku."

³⁵Idi kareb ideh pebunu' teh, idi ideh nenganau' Akab pusad bang kerétaneh petutup dengan lun bawang Siria. Idi aco malé medacem idi raca' naté. Idi dara' ratnan uratneh temakung luun apin keréta.

³⁶Idi kareb aco lélé macep, inan seburur nengitang arang uned baweh ineh, kebalaneh, "Do' anid-anid burur muli' amé' bang bawangneh sebuleng!"

³⁷Idi Raca' Akab naté, idi ideh nenguit butungneh iné' déi' Samaria idi nenanem neneh déi'.

³⁸Idi ideh namaru' kerétaneh ineh iring Takung Samaria. Idi inan tuda'-tuda' uko' ngil dara'neh, su luk inan decur luk mesawa' pekalai diu', maya' kudeng bala Tuhan.

³⁹Idi amung kekamen Raca' Akab luk baken ineh, ruma' luk pinudut raca' ratnan gading idi amung bawang luk pangeh pinudut raca', pangeh inayud bang Surat Kekamen Raca'-Raca' Lun Israil.

⁴⁰Idi Akab naté, idi anakneh Ahasia mangun ku raca' libal tamanneh.

⁴¹Idi Raca' Yosapat Asa ineh mangun ku raca' lun Yahuda kareb lak luk keapat bang imet Raca' Akab nelun Israil.

⁴²Idi ulun Yosapat teluh ngepulu' limeh lak kareb ieh mangun ku raca', idi ieh nengimet déi' Yerusalim dueh ngepulu' limeh lak kinioneh. Idi ngadan tinan raca' ineh Asuba Sili.

⁴³Idi ieh nemaya' amung lawé tamanneh Asa. Idi ieh nenganau' luk matu pa kiung Tuhan. Iamo' nateh amung su luk inan sembayang inan allah baken inusagneh, iamo' lun mula' maré baré idi ngeseb umau luk do' buen su ineh.

⁴⁴Idi Raca' Yosapat nepedo' dengan raca' lun Israil.

⁴⁵Idi amung kekamen Yosapat luk baken, idi amung kuu'neh, idi amung bunu'neh pangeh inayud bang Surat Kekamen Raca'-Raca' Lun Yahuda.

⁴⁶Idi ieh nengusu amung lun luk pasét deléi dengan deléi luk neketecan rat bang kareb Asa tamanneh rat bang bawang ineh.

⁴⁷Idi na luk idi raca' bawang Edom, iamo' inan aceh tareh raca' Yahuda mo'.

⁴⁸Idi Raca' Yosapat nenganau' tuda'-tuda' kapal, ngaceku ieh pian ngalap amas rat Opir. Iamo' natieh nutad nalan. Ngaceku kapal ineh nekedit déi' Esion Giber.

⁴⁹Idi kebala Raca' Ahasia Akab kuan Raca' Yosapat, "Do' anak itinku maya' anak itinmu bang kapal ineh." Iamo' Raca' Yosapat na sikal.

⁵⁰Idi Raca' Yosapat naté idi ieh tinanem déi' bawang Yerusalim. Idi anakneh Yoram mangun ku raca' libalneh.

⁵¹Idi Ahasia Akab ineh mangun ku raca' lun Israil déi' bawang Samaria kareb lak luk kepulu' tudu' bang imet Yosapat nelun Yahuda. Idi ieh nengimet nelun Israil dueh lak kinioneh.

⁵²Idi ieh nenganau' sala' pa kiung Tuhan. Idi ieh nemaya' lawé tamanneh idi tinanneh idi lawé Yerebom Nibat luk pangeh nenguit nelun Israil nganau' sala'.

⁵³Idi ieh netekeradung sembayang inan akang Baal idi nemaya' amung-amung luk inau' tamanneh pad ieh nengeruat useh Tuhan Allah lun Israil.

Raca'-Raca' Luk Kedueh

Raca'-Raca' Luk Kedueh 1

¹Idi pangeh até Akab, raca' Israil, idi lun Moab ineh sikal mepuit ratnan imet lun Israil.

²Idi Raca' Ahasia nebpeh rat luun tador luk pa luun apo ruma'neh déi' bawang Samaria, idi ieh mebura' ebpeh. Idi ieh nengecuk nelun dukenneh, kebalaneh nedeh, "Amé' muyuh ngitun Baalsebub, akang lun Ekron ineh kudeng ui miak do' ratnan ét ini."

³Iamo' melaikat Tuhan nengecuk Nabi Elia lun Tisbi ineh amé' nelun luk icuk Raca' Ahasia idi ngitun nedeh, "Naké Allah arang lun Israil, pad muyuh amé' ngitun Baalsebub akang lun Ekron ineh?"

⁴Mada' raca' ratnan luk bila Tuhan, kebalaneh, 'Na iko miak do' ratnan étmu. Iamo' kali' rungen iko maté.' " Idi Elia nemaya' luk icuk Tuhan,

⁵idi lun duken ineh nelemubed iné' inan raca'. Idi raca' nengitun nedeh, kebalaneh, "Anun pun muyuh nelemubed?"

⁶Idi kebaladeh neneh, "Inan seburur lemulun nepapu' nekai, idi ieh nengecuk nekai lemubed amé' mada' namu ratnan luk bila Tuhan, kebalaneh, 'Ngudehké iko ngecuk nelun duken amé' ngitun Baalsebub, akang lun Ekron ineh? Naké Allah arang lun Israil? Na iko miak do' ratnan étmu. Iamo' kali' rungen iko maté.' "

⁷Idi kebalaneh, "Kudeng apeh ayu lun ineh?"

⁸Idi kebaladeh, "Ieh lun luk ngayung ku kibung luk mebuluh, idi abet awa'neh ratnan kubil pung." Idi kebalaneh, "Ieh ineh Elia."

⁹Idi ieh nengecuk seburur lun rayeh baweh dengan limeh ngepulu' burur anak itinneh amé' ngakem ni Elia. Idi lun rayeh baweh ineh kali' neneh, idi Elia tudo luun surud. Idi kebalaneh lun rayeh baweh ineh neneh, "O nabi Allah, raca' ngecuk namu temurun."

¹⁰Iamo' kebala Elia, "Kudeng ui ini nabi Allah, do' apui temurun rat i langit ngeseb amung muyuh." Idi apui pana' netemurun rat i langit idi nengeseb amungdeh.

¹¹Idi sekua' teh raca' nengecuk seburur lun rayeh baweh luk baken dengan limeh ngepulu' burur anak itinneh. Idi kebalaneh ni Elia, "O nabi Allah, raca' ngecuk namu temurun dengan mesaget."

¹²Idi kebala Elia neneh, "Kudeng ui ini nabi Allah do' apui temurun rat i langit ngeseb amung muyuh." Idi apui pana' netemurun rat i langit idi nengeseb amungdeh.

¹³Idi seketeluh kua' raca' nengecuk seburur lun rayeh baweh dengan limeh ngepulu' burur anak itinneh. Idi ieh nuké surud ineh, idi netekeradung pa kiung Elia idi nemutih neneh, kebalaneh, "O nabi Allah, do' méi' negku, idi amung anak itinku pana'.

¹⁴Dueh lun rayeh baweh luk atun di dengan anak itindeh pangeh iseb ku apui rat i langit. Iamo' nekini do' iko méi' negku."

¹⁵Idi kebala malaikat Tuhan ni Elia, "Temurun iko maya' neneh. Aleg matot!" Idi Elia nenalan maya' neneh iné' papu' raca'.

¹⁶Idi kebalaneh kuan raca', "Kudeng ini bala Tuhan, 'Anun punmu pangeh nengecuk nelun amé' ngitun Baalsebub akang lun Ekron ineh, naké Allah arang lun Israil luk miak tuninmu? Na iko miak do' ratnan étmu. Iamo' kali' rungen iko maté.' "

¹⁷Ahasia naté maya' kudeng luk bila Tuhan ni Elia. Idi kinanakneh Yoram mangun ku raca' libalneh bang lak luk kedueh kareb imet Yoram Yosapat nelun Israil, ngaceku Raca' Ahasia na anak.

¹⁸Idi amung kekamen Ahasia luk baken pangeh inayud bang Surat Kekamen Raca'-Raca' Lun Israil.

Raca'-Raca' Luk Kedueh 2

¹Kareb Tuhan pian ngalap ni Elia kemikit amé' surga bang libuleh bui, idi Elia nenalan dengan Elisa rat Gilgal.

²Idi kebala Elia ni Elisa, "Do' iko ketecan ieni. Ngaceku ui pangeh icuk Tuhan amé' déi' Baitel." Iamo' kebala Elisa, "Ui pebulung ku ngadan Tuhan luk mulun, idi ulunmu pana', na tu ui sikal patad rat namu." Pangeh ineh idi didueh nenalan iné' déi' Baitel.

³Idi anak sekola' nabi luk déi' Baitel iné' ni Elisa, kebaladeh, "Kali'mu idi aco sini lun rayehmu lapen Tuhan rat namu?" Idi kebala Elisa, "Ui kali'. Pirud muyuh."

⁴Idi kebala Elia ni Elisa, "Do' iko ketecan ieni, ngaceku ui icuk Tuhan amé' Yeriko. Iamo' kebala Elisa, "Ui pebulung ku ngadan Tuhan luk mulun, idi ulunmu pana', na tu ui sikal patad rat namu." Idi didueh iné' déi' Yeriko.

⁵Idi anak sekola' nabi luk déi' Yeriko iné' ni Elisa, kebaladeh, "Kali'mu aco sini lun rayehmu lapen Tuhan rat namu?" Idi kebala Elisa, "Ui kali'. Pirud muyuh."

⁶Idi kebala Elia ni Elisa, "Do' iko ketecan ieni, ngaceku ui pangeh icuk Tuhan amé' déi' Abpa' Yarden." Iamo' kebala Elisa, "Ui pebulung ku ngadan Tuhan luk mulun, idi ulunmu pana', na tu ui sikal patad rat namu." Idi didueh nenalan.

⁷Idi limeh ngepulu' burur ratnan anak sekola' nabi ineh iné' tuped mado rat nedidueh ineh. Idi didueh nabi ineh netuped i tangeb Abpa' Yarden.

⁸Idi Elia nengalap kuyu' buyorneh, idi nengelulun neneh idi nenecat abpa' ku ineh. Idi abpa' ineh nepatad. Idi didueh nenalan maya' su luk na abpa' ineh.

⁹Kareb didueh nepegeta, idi kebala Elia ni Elisa, "Mutuh iko anun luk miak ruenku kuanmu atun kareb nateh ui lapen Tuhan rat iringmu." Idi kebala Elisa, "Do' iko maré dueh babpat laludmu negku."

¹⁰Idi kebala Elia neneh, "Luk pinutuhmu ineh mikat tu. Kudeng iko nier negku kareb ui lapen rat iringmu, idi miak mangun kuanmu kudeng ineh. Iamo' kudeng na, idi ineh na miak mangun peh."

¹¹Idi laba' didueh nalan idi pegayam-pegayam denak-denak aceh keréta luk kudeng apui ngatad seburur ratnan seburur. Idi kudeng ini lawé Elia nekemikit maya' libuleh bui iné' surga.

¹²Idi Elisa nenier ineh idi ieh nengitang, "O ama! O ama! Siruh keréta Israil idi lun luk maya' kuda!" Idi ieh na kali'neh peh. Idi Elisa nenarak kuyu'neh upa dueh.

¹³Idi ieh nengalap kuyu' buyor luk pangeh nebpeh rat ni Elia ineh, idi iné' tuped tangeb Abpa' Yarden.

¹⁴Idi ieh nemabpet abpa' ineh ku kuyu' Elia. Idi kebalaneh, "Iapehké Tuhan Allah Elia ineh?" Idi kareb ieh pangeh nenecat abpa' ineh, idi abpa' nepatad. Idi Elisa neguta.

¹⁵Kareb anak sekola' nabi luk déi' Yeriko nenier i dipar ineh, idi kebaladeh, "Roh Elia ineh idi ni Elisa peh." Idi ideh iné' papu neneh. Idi ideh netekunal pa kiungneh.

¹⁶Kebaladeh neneh, "Idi kai luk limeh ngepulu' burur ini luk metueh. Do' kai amé' nakap lun rayehmu, kian Roh Tuhan nengikit neneh idi nengabpa neneh luun surud lek, kian bang ruan lek." Iamo' kebala Elisa, "Aleg muyuh amé' nakap neneh."

¹⁷Iamo' ideh pelaba saad pad ieh migu'. Idi kebalaneh, "Amé' mo'." Idi limeh ngepulu' burur ineh nenakap neneh teluh aco kinioneh. Idi na ieh nekali'deh.

¹⁸Idi ideh nelemubed iné' ni Elisa, luk tudo nganét nedeh déi' Yeriko. Idi kebala Elisa nedeh, "Pangeh ui nemala nemuyuh, 'Aleg muyuh amé'.' "

¹⁹Idi lun rat bawang Yeriko iné' ni Elisa, kebaladeh, "Su inan bawang ini do' tu. Iko pana' kali' teh. Iamo' abpa'neh na do'. Idi decur luk mali' megéi' musul."

²⁰Idi kebala Elisa, "Ngalap aceh bigan baruh kuanku, idi nganau' sesuut tucu' bang idi." Idi ideh nenguit bigan ineh iné' neneh.

²¹Idi Elisa iné' déi' bued abpa', idi ieh nengutang amung tucu' ineh bang idi. Kebalaneh, "Kudeng ini bala Tuhan, 'Abpa' ini pangeh dino'Ku. Idi ngaceku ineh na luk miak mangun ku luk inan maté, idi na anak musul teh.' "

²²Idi abpa' ineh pana' do' macing aco sini, maya' kudeng bala Elisa.

²³Idi rat ieneh Elisa nenalan iné' Baitel. Idi laba' ieh nalan inan tuda'-tuda' anak adi' deléi neremuat rat bang bawang Baitel idi nesitunga neneh, kebaladeh, "O butal, buro! O butal, buro!"

²⁴Elisa nelumi idi nenutong nedeh. Idi ieh nengediman nedeh dengan ngadan Tuhan. Idi nacing dueh beruang tineh rat bang pulung idi nengeramit apat ngepulu' dueh bururdeh.

²⁵Idi Elisa iné' luun Pegkung Karmel. Idi rat ieneh ieh nelemubed iné' bawang Samaria.

Raca'-Raca' Luk Kedueh 3

¹Kareb lak luk kepulu' ualuh bang imet raca' Yahuda, idi Yoram Akab mangun ku raca' Israil. Idi ieh nengimet déi' Samaria pulu' dueh lak.

²Idi ieh nenganau' sala' pa kiung Tuhan, iamo' baken mepad kudeng taman idi tinanneh Isabel. Ieh nengecuk nala' ulung Baal luk pinudut tamanneh ineh.

³Iamo' ieh nemaya' sala' Yerebom Nibat luk pangeh nenguit nelun Israil nganau' sala'. Idi na ieh pian ugka'.

⁴Idi Mesa raca' lun Moab ineh inan mula' dumba. Idi anid lak ieh maré kuan raca' lun Israil 100,000 anak dumba idi buluh ratnan 100,000 dumba luk mekara.

⁵Iamo' kareb Akab raca' Israil naté, idi Mesa sikal mepuit ratnan imet raca' lun Israil.

⁶Ngaceku ineh Raca' Yoram neremuat bang kareb ineh rat Samaria. Idi ieh nengamung bawehneh.

⁷Idi ieh namaré bala ni Yosapat raca' lun Yahuda, kebalaneh, "Raca' lun Moab ineh sikal mepuit ratnan imetku. Sikalké iko nalan maya' negku amé' munu' neneh?" Idi kebala Raca' Yosapat, "Amé' ui. Ui maya' pianmu. Kudeng ineh teh lun pebunu'ku dengan kudadeh."

⁸Idi Raca' Yosapat nengitun, "Maya' dalan sapeh tau?" Idi kebala Yoram, "Maya' su luk ali-ali déi' Edom."

⁹Idi Raca' Yoram dengan raca' Yahuda idi raca' Edom nenalan. Kareb ideh nemaya' aceh dalan luk mado tudu' aco kinioneh, idi na abpa' rupen amung anak itin idi amung aya' luk nemaya' nedeh ineh,

¹⁰Idi kebala Raca' Yoram, "Mesusa' tu-tu, Tuhan maré netau teluh bang palad lun Moab."

¹¹Idi Raca' Yosapat nengitun, "Inanké nabi Tuhan tungé' luk miak tunin tau?" Idi kebala seburur lun tareh Raca' Yoram, "Inan tungé' Elisa Sapat. Atun ieh luk mubpur tiku' Elia kareb sibaru'."

¹²Idi kebala Raca' Yosapat, "Ieh ineh nabi luk matu." Idi teluh raca' ineh iné' neneh.

¹³Idi kebala Elisa inan raca' lun Israil, "Ngudeh iko ngitun negku? Do' iko amé' inan nabi taman-tinanmu ineh." Iamo' kebala Yoram, "Aleg mala kudeng ineh! Tuhan luk pangeh nenawar nekai teluh raca' ini, pian maré nekai bang palad lun Moab."

¹⁴Idi kebala Elisa, "Ui ini demulun Tuhan idi ui pebulung ku ngadan Tuhan luk mulun. Kudeng na ui ngerawé Yosapat raca' Yahuda ineh, kali' rungen na ui pian ngedengan namu.

¹⁵Idi nekini do' nguit seburur luk mileh nateg gita amé' negku." Idi uned lun ineh nateg gita, idi lalud Tuhan nacing ni Elisa,

¹⁶pad ieh nemada', "Kudeng ini bala Tuhan, 'Ngukat abang bang arur luk nekeket ini.

¹⁷Sagan tu pana' muyuh na miak nier bui idi udan, idi arur ini mepanu' ku abpa' mucu, pad amung muyuh miak ngirup abpa' dengan amung sapi' muyuh idi amung aya' luk mabeh pana'.' “

¹⁸Idi kebala Elisa, "Idi tanu' ini isuut mo' siren Tuhan. Idi Ieh miak maré amung lun Moab bang palad muyuh.

¹⁹Idi amung bawang luk meraben libung miak uen muyuh ngelaya'. Kudeng ineh teh amung bawang luk do', idi amung lawa bua'-bua'deh miak tebangan muyuh. Idi amung bued abpa' miak angiin muyuh. Idi amung lalang tana' luk do' miak uen muyuh mapen ku batu.”

²⁰Idi kenebpa kareb lun maré baré pekak, denak-denak abpa' nacing rat pa dalam amé' Edom, pad amung tana' ineh mereb ku abpa' peh.

²¹Kareb lun Moab neninger, idi teluh raca' ineh pangeh nacing sikal pebunu' nedeh, idi luk mileh pebunu', do' luk isuut idi luk mengered, tinawar amé' pebunu' déi' lakan tana'.

²²Iamo' kareb ideh pangeh kulat pekak, idi aco pangeh masat pa luun abpa', idi lun Moab nenier abpa' ineh mesia' kudeng dara' ayuneh.

²³Idi kebaladeh, "Dara' mo' ini. Kali' rungen amung raca' ineh pangeh pepaté. Do' tau amé' ngaro binawehdeh!”

²⁴Iamo' kareb ideh nacing arang lun Israil ineh, idi lun Israil nemunu' nedeh, pad ideh neburo. Idi lun Israil nengerada' nedeh idi nengaté nelun Moab ineh.

²⁵Idi ideh nengusag bawangdeh. Idi kareb ideh lemaba su tana' luk mebaleng idi ideh nemepet batu luun ineh, pad amung tana' luk mebaleng maput ku batu. Idi amung bued abpa' pana' inangdeh. Idi amung lawa bua' pana' tibpengdeh, pad Kir Heres mo' luk ketecan. Idi bawang ineh pana' linibut lun Israil luk nengerieng nedeh.

²⁶Kareb raca' Moab nekali' bunu' ineh metueh rat neneh, idi ieh nengalap 700 lun luk mileh petarad ku pelapet, pian lemaba bunu', pad ideh macing nan raca' Siria, iamo' ideh na miak.

²⁷Idi ieh nengalap anakneh luk atun luk miak ku libalneh mangun ku raca', idi ieh nemaré neneh ku baré sabpen luun libung batu bawang ineh kuan akang Moab. Idi lun Israil matot pad ideh nelemuut idi nuli' iné' bawangdeh sebuleng.

Raca'-Raca' Luk Kedueh 4

¹Inan seburur decur tinula' luk awan seburur anak sekola' nabi ineh. Idi ieh iné' ni Elisa, kebalaneh, "O nabi, awanku pangeh naté. Idi iko teh kali' neneh mepicet maya' Tuhan. Idi nekini lun luk inanneh nepebaleh pangeh nacing sikal ngalap dueh anakku luk deléi ku lun dukenneh."

²Idi kebala Elisa neneh, "Anunké miak ruenku kuanmu? Mada' negku anun luk bang ruma'mu." Idi kebalaneh, "Na luk anun-anun bang ruma'ku, iamo' sebuleng mo' sidangur umau saitun."

³Idi kebala Elisa, "Do' iko mutuh tuda'-tuda' sidangur rat nelun denganmu, ieh ineh luk na uang. Do' mutuh mula'.

⁴Idi do' iko semuet bang ruma' dengan dueh anakmu ineh, idi ngitek tanga'. Pangeh ineh ngutang umau saitun bang amung sidangur ineh. Luk panu' ruen selipa."

⁵Idi decur ineh nesemuet bang ruma'neh dengan dueh anakneh idi ieh nengitek tanga'. Idi anak-anakneh nemaré sidangur ineh neneh. Idi decur ineh nengutang umau bang ineh.

⁶Kareb amung sidangur ineh pangeh panu', idi kebalaneh nan anakneh, "Inanké sidangur teh?" Idi kebala anak ineh neneh, "Na luk idi peh." Idi umau ineh pana' nugka'.

⁷Idi ieh iné' ni Elisa. Idi kebala nabi neneh, "Amé' iko masui umau ineh ku ngua' balehmu. Idi elaneh kuanmu sebuleng idi kuan anak-anakmu."

⁸Idi bang seaco Elisa iné' bawang Sunam, su luk inan seburur decur lun do' luk nengubuk neneh umak kuman. Anid-anid ieh lemaba, ieh umak neneh idi kuman.

⁹Idi kebala decur ineh inan awanneh, "Ui kali nabi Allah luk megéi' lemaba bawang tau ineh, ieh ineh seburur lun luk meligan.

¹⁰Do' kitech nganau' aceh takep isuut luun parung. Idi bang ineh kitech nganau' bitaran, méja, kerusi, idi lapung, pad ieh miak tudo déi' kareb ieh ngikak."

¹¹Bang seaco, Elisa nelemubed iné' déi' Sunam. Idi ieh iné' bang takep ineh ngato erurneh.

¹²Idi ieh nengecuk nelun dukenneh Gehasi nawar decur ineh. Kareb ieh iné' su inan Elisa ineh,

¹³Idi kebala Elisa ni Gehasi, "Ngitun neneh, anun luk pianneh rat negku pingua' do'neh nekitech. Inanké putuhneh luk miak uenku ngacing inan raca', kian inan lun rayeh baweh lek?" Idi kebala decur ineh, "Ui inan petap anun-anun arang pupuku sebuleng."

¹⁴Idi kebala Elisa, "Kian anun luk miak ruenku kuan decur ini?" Idi ieh nengor balaneh, "Na ieh inan anak deléi, idi awanneh pana' pangeh mengered."

¹⁵Idi kebala Elisa, "Nawar neneh." Idi ieh nenawar neneh. Idi ieh netuped munung tanga'.

¹⁶Idi kebala Elisa neneh, "Lak baruh, kareb luk kudeng ini, iko inan anak deléi." Idi kebala decur ineh, "O nabi Allah aleg iko naluk negku ini."

¹⁷Idi decur ineh mali' maya' kudeng luk bila Elisa. Idi ieh nenganak aceh anak deléi, maya' kudeng luk tinarekneh.

¹⁸Kareb anak ineh rayeh. Idi ieh iné' matun tamanneh luk ngeranah dengan amung lun luk dukenneh ngeranah.

¹⁹Idi denak-denak ieh nengitang kuan tamanneh, "Mét uluh ku! Mét uluhku!" Idi kebala tamanneh kuan seburur lun dukenneh, "Nated neneh amé' nan tinanneh."

²⁰Idi ieh nengiding neneh, idi nenguit neneh iné' nan tinanneh. Idi anak ineh tudo bang abinneh macing muned aco. Idi ieh naté.

²¹Idi decur ineh numak nenguit anak ineh iné' bang takep Elisa. Idi ieh nenganau' neneh telubid luun bitaranneh. Idi ieh neremuat idi nengitek tanga'.

²²Idi ieh nenawar awanneh, idi kebalaneh, "Ngecuk seburur lun duken amé' negku, dengan sebuleng keladai, pelé ui mesaget amé' matun Nabi Elisa ineh. Pangeh ineh ui miak lemubed."

²³Idi kebala deléineh neneh, "Ngudeh iko amé' neneh aco sini? Na ieh Bulan Baruh. Na ieh Aco luk inan Mudeng." Idi kebalaneh, "Na mekudeh."

²⁴Idi ieh nenapin keted keladaineh ineh. Idi kebalaneh kuan lun dukenneh, "Do' tau mawer. Kareb ui pian ucu' miak ui maré kali'."

²⁵Idi ieh nenalan peh, idi nacing inan Nabi Elisa luun Pegkung Karmel. Kareb Elisa nenier neneh rat mado, idi kebalaneh ni Gehasi, lun dukenneh ineh, "Nier, decur Sunam ineh macing.

²⁶Do' iko mesaget amé' papu' neneh, idi ngitun neneh, 'Do' ikoké? Idi do'ké ulun awanmu idi anakmu?' " Idi kebala decur ineh, "Do'."

²⁷Kaerb ieh nacing ni Elisa, idi ieh netekeradung, idi ieh nengapel kukudneh. Iamo' Gehasi sikal ngarung neneh. Idi kebala Elisa, "Nima' neneh. Ngaceku ieh pelaba dat niat. Idi Tuhan nateh nemada' negku ratnan susa'neh."

²⁸Idi kebala decur ineh, "Inanké ui pangeh nemutuh seburur anak rat namu? Naké ui nemebpeng namu na naluk negku?"

²⁹Idi kebala Elisa ni Gehasi, "Miket! Nguit rukudku idi nalan. Kudeng inan seburur papu' namu aleg iko petabi' neneh. Kudeng seburur petabi' namu aleg iko ngor balaneh. Idi ngerareng rukudku ini luun kiung anak ineh."

³⁰Iamo' kebala decur ineh ni Elisa, "Ui pebulung ku ngadan Tuhan luk mulun luk inanku merapet, idi ku ulunmu pana', na ui sikal necan namu!" Idi ngaceku ineh Elisa nenalan maya' neneh.

³¹Idi Gehasi ineh nenalan atun rat nedidueh. Idi ieh nengerareng rukud ineh luun anak ineh. Iamo' bala pana' nateh. Idi na anak ineh nesigio. Idi ieh nelemubed iné' papu' ni Elisa, kebalaneh, "Na anak ineh sigio peh."

³²Kareb Elisa nesemuet bang ruma' idi ieh nekali' butung anak ineh telubid luun bitaranneh.

³³Idi ieh nengitek tanga', idi nesembayang mutuh pedengan ratnan Tuhan.

³⁴Idi ieh netekulub luun anak ineh. Idi ieh petutup tang luun tang anak ineh. Idi matehneh pana' luun mateh anak ineh. Idi ticu'neh pana' nan ticu' anak ineh. Idi kareb ieh telubid luun anak ineh, idi burur anak ineh melau' peh.

³⁵Elisa netumui idi ieh nesemayo' bang ruma'. Pangeh ineh idi ieh netekulub luunneh teh. Idi anak ineh nepia' tudu' kua'. Idi matehneh nekulat.

³⁶Idi Elisa nenawar ni Gehasi, kebalaneh, "Darinmu decur Sunam ineh." Idi ieh nenawar neneh. Kareb ieh nacing idi Elisa nengecuk neneh ngalap anakneh.

³⁷Idi ieh netekeradung i kukudneh. Idi ieh nengalap anakneh, idi ieh neremuat.

³⁸Idi Elisa iné' déi' Gilgal kareb inan iru' bang bawang ineh. Idi amung anak sekola' nabi ineh tudo pa kiungneh. Idi ieh nengecuk nelun dukenneh, kebalaneh, "Ngeludung lacang rayeh ineh, idi ngikid kuan amung anak sekola' nabi ineh."

³⁹Idi neremuat sebururdeh iné' ngarin. Idi ieh nekali' aceh lawa tabu. Idi ieh nemureg bua'neh tap itenneh. Idi ieh nuli' idi nengayad-ngayad ineh idi nenipa ineh bang lacang luk inan ngikid ineh. Idi na ieh miti bua' ineh.

⁴⁰Kareb ideh nganid akan ineh, denak-denak kareb ideh kuman kikid ineh idi ideh nengitang, kebaladeh, "Até inan bang lacang ineh, O nabi Allah!" Idi na ideh miak kuman ineh.

⁴¹Idi Elisa nemutuh sesuut banak. Idi ieh nengukit banak ineh bang lacang ineh, kebalaneh, "Nganid ieh kuan lun mula' ini, pad ideh kuman." Idi sesuut pana' nateh luk dat bang lacang ineh peh.

⁴²Idi seburur deléi rat Baal Salisa nenguit kuan Elisa tuda'-tuda' pinaram padé baruh, dueh ngepulu' balad pinaram ikun, idi teh dalé luk isebneh. Idi kebala Elisa, "Maré ineh kenen lun mula' ini."

⁴³Iamo' kebalaneh, "Na ineh miak kuandeh luk meratu ini." Idi kebala Elisa, "Maré mo' ieh kenendeh. Ngaceku bala Tuhan kudeng ini, 'Ideh miak kuman. Pangeh ineh inan teh elaneh.' "

⁴⁴Idi ieh nenganid ineh kuandeh. Idi ideh nekuman. Idi inan teh elaneh, maya' kudeng luk bida' Tuhan.

Raca'-Raca' Luk Kedueh 5

¹Naaman, lun rayeh baweh raca' bawang Siria, ieh ineh seburur lun rayeh pa kiung raca', idi teh ieh mebala. Ngaceku ineh Tuhan pangeh nemaré tueh kuan lun Siria. Idi teh ieh seburur lun mesangit. Iamo' ieh mét susud.

²Idi inan aceh kareb idi lun Siria iné' pebunu'. Idi ideh nenaban seburur anak adi' decur rat bawang Israil. Idi anak adi' ineh nengasa' awan Naaman ineh.

³Idi kebalaneh kuan awan Naaman, "Kudeng Naaman amé' papu' nabi luk déi' Samaria ineh, kali' rungen ieh do' ratnan ét susudneh ineh."

⁴Kareb Naaman kali' bala ineh, idi ieh iné' nan raca' idi nemada' neneh ratnan luk bila decur ineh.

⁵Idi kebala raca' Siria, "Amé' iko idi ui miak maré aceh surat kuan raca' lun Israil ineh." Idi Naaman nenalan. Idi ieh nenguit 30,000 balad pirak, idi amas 6,000 balad, idi pulu' kuyu' buyor luk meluun do'.

⁶Idi kebala raca' Siria bang surat ineh, "Kareb surat luk biréku ini macing namu, iko kali' negku pangeh nengecuk Naaman lun dukenku amé' papu' namu, pelé iko ngedo' neneh ratnan ét susudneh."

⁷Kareb raca' lun Israil nemaca' surat ineh, idi ieh nenarak ayungneh kebalaneh, "Allah, ui iniké, miak ui ngaté idi ngulun nelun? Anun pun raca' nengecuk nelun amé' ruenku ngedo' ratnan ét susudneh? Megala' idi lun ineh nakap luk inan pekedaluh negku."

⁸Kareb Nabi Elisa neninger bala ineh, idi ieh nengecuk nelun amé' mada' raca' kudeng ini, "Anun punneh iko nenarak ayungmu? Ngecuk lun ineh amé' negku, pad ieh kali' inan nabi arang lun Israil!"

⁹Idi Naaman iné' dengan amung kudaneh idi kerétaneh, idi nugka' munung tanga' ruma' Elisa.

¹⁰Idi Elisa nengecuk lun dukenneh amé' ngecuk ni Naaman unub tudu' kua' bang Abpa' Yarden, pad bururneh miak petuneb kudeng luk pun-pun, idi ieh miak meligan.

¹¹Iamo' Naaman museh. Idi ieh neburo. Kebalaneh, "Ui pangeh nengerawé, na miak na ieh remuat idi tupid iringku idi neten ngadan Tuhan Allahneh idi nicul su luk mét ineh ku ticu'neh, idi ngedo' negku.

¹²Naké Abpa' Abana idi Abpa' Papar déi' Damsik ineh meluun do' ratnan amung abpa' Israil? Ngudeh ui na miak diu' bang ineh idi mangun meligan?"

¹³Iamo' lun dukenneh iné' neneh, kebaladeh, "O Naaman, kudeng nabi ineh ngecuk namu nganau' aceh kekamen luk mikat ruen, kali' rungen iko nganau' ineh. Ngudeh iko na amé' diu' maya' kudeng balaneh, pad iko uen ngedo'?"

¹⁴Ngaceku ineh Naaman netemurun idi nunub bang Abpa' Yarden macing tudu' kua', maya' kudeng bala Elisa ineh. Idi bururneh nepetuneb kudeng luk pun-pun, mepad kudeng burur anak adi'.

¹⁵Idi ieh nelemubed iné' ni Elisa dengan amung bawehneh, kebalaneh, "Nekini ui kali' aput tana' ini na luk idi Allah baken, iamo' Allah lun Israil mo'. Idi nekini do' iko ngalap aceh baré rat negku."

¹⁶Iamo' kebala Elisa, "Ui ini demulun Tuhan idi ui pebulung ku ngadan Tuhan luk mulun ineh. Na tu-tu ui miak ngalap baré ineh." Idi Naaman mesaad ngubuk neneh. Iamo' ara' ieh.

¹⁷Idi kebala Naaman, "Kudeng iko na pian, do' iko maré tana' kuanku tap iten dueh keladai. Ngaceku nekini na ui maré baré luk sabpen idi baré luk kereten kuan allah baken, iamo' kuan Tuhan mo'.

¹⁸Idi do' Tuhan maré do' kuanku, kareb raca' ku amé' sembayang bang ruma' Rimun, idi kareb ieh ngimet ticu'ku, idi ui tekeradung bang ruma' Rimun ineh, do' Tuhan maré do' kuanku."

¹⁹Idi kebala Elisa neneh, "Amé' iko dengan do'." Idi Naaman nenalan. Idi kareb Naaman pangeh nenalan na mado tu,

²⁰Idi Gehasi lun duken Elisa nabi Allah ineh nengerawé, "Lun rayehku Elisa pangeh méi' ni Naaman lun Siria ineh, pad ieh na sikal ngalap rat neneh anun luk tinatedneh neneh. Iamo' ui pebulung ku ngadan Tuhan luk mulun, idi ui sikal maya' puetneh idi ngalap aceh binaweh rat neneh."

²¹Idi Gehasi nengerada' ni Naaman. Kareb Naaman nekali' Gehasi maya' puetneh, idi ieh netemurun rat bang kerétaneh. Idi ieh iné' neneh, kebalaneh, "Anunké susa'mu?"

²²Kebalaneh, "Na susa'. Iamo' lun rayehku ngecuk negku mada': 'Idi nacing ina dueh burur anak adi' rat arang anak sekola' nabi, ieh ineh rat pegkung-pegkung Epraim. Idi do' iko maré 3,000 balad pirak nedidueh ineh idi dueh kuyu' buyor luk do'.' "

²³Idi kebala Naaman, "Amé' tungé' idi ngalap 6,000 balad pirak. Idi ieh nengubuk-ngubuk neneh. Idi ieh nengabet pirak ineh bang dueh tebpung, idi teh dueh kuyu' buyor luk do'. Amung ineh panen dueh lun dukenneh luk maan ineh pa atunneh.

²⁴Kareb Gehasi pangeh nacing luun surud ineh, idi ieh nengalap amung binaweh ineh rat bang palad didueh ineh, idi rirengneh bang ruma'. Idi ieh nengecuk nedidueh ineh nalan.

²⁵Idi Gehasi nesemuat bang ruma', idi kebala Elisa neneh, "O Gehasi, rat iapeh iko?" Kebalaneh, "Na ui iné' iapeh-iapeh."

²⁶Iamo' kebala Elisa neneh, "Idi rohku pangeh nekali' namu ina kareb Naaman netemurun rat bang kerétaneh idi iné' papu' namu. Iniké kareb luk petulu miak ngalap pirak, ayung, kabun saitun, kabun anggur, sapi', dumba, idi lun duken teh?

²⁷Idi ngaceku ineh ét susud Naaman ineh meperuit amé' namu idi kuan anak mupunmu teh macing raked-raked." Idi Gehasi neremuat rat pa kiungneh. Idi ieh neketukan susud mepad kudeng buda' salju.

Raca'-Raca' Luk Kedueh 6

¹Idi inan aceh kareb amung anak sekola' nabi ineh nepebala ni Elisa, "Nier su inan kai tudo ineh pelaba pari' kuan kai.

²Nima' nekai amé' déi' Abpa' Yardeh, idi nebpeng kayunh ruen ku ruma' déi'." Idi kebala Elisa, "Amé' mo'."

³Idi kebala sebururdeh, "Do' iko amé' maya' nekai." Kebala Elisa, "Mo, miak ui amé'."

⁴Idi ideh nenalan. Kareb ideh nacing déi' Abpa' Yarden, idi ideh nenebpeng tuda'-tuda' kayuh.

⁵Idi kareb sebururdeh nebpeng kayuh rayeh ineh, idi uaineh nelulu' nebpeh bang abpa'. Idi ieh nengitang. Kebalaneh, "O Guru', uai ini inicehku."

⁶Idi kebala nabi Allah ineh, "Nebpeh su apeh ieh?" Idi ieh nenicul su idi neneh. Ieh nenutu' aceh angkat kayuh, idi ieh nemepet neneh su idi. Idi uai ineh nelupung.

⁷Kebala Elisa, "Ngalap ieh." Idi ieh nengalap ineh.

⁸Kareb raca' bawang Siria nepebunu' nelun Israil, idi kebalaneh kuan lun tarehneh, "Bawang kaceh pianku inan tau lupu."

⁹Iamo' Elisa nemebpeng raca' Israil na amé' su ineh, ngaceku lun Siria nengabang déi'.

¹⁰Idi raca' Israil mada' nelun luk tudo su ineh pad ideh matar do'-do'. Idi megéi' kua' inan luk kudeng ineh.

11Idi ngaceku ineh raca' Siria pelaba gateh niat. Idi ieh nenawar amung lun tarehneh, kebalaneh, "Idéké rat arang tau luk perurum dengan raca' lun Israil?"

12Idi kebala seburur lun dukenneh, "Na luk idi O raca'. Iamo' Nabi Elisa mada' kuan raca' Israil amung bala luk bilamu bang takepmu pana'."

13Idi kebala raca', "Amé' muyuh nier su inanneh, pad ui miak ngecuk nelun amé' ngakem neneh." Idi kareb raca' neninger ratnan Elisa idi déi' Dotan,

14Idi ieh nengecuk aceh baweh luk rayeh amé' déi' dengan tuda'-tuda' kuda idi keréta. Idi ieh nacing déi' kareb medacem. Idi ideh nengelibut bawang ineh.

15Idi kareb lun duken nabi Allah ineh nekulat pekak uka-uka idi ieh neremuat. Idi ieh mawa ngaceku bawang ineh linibut baweh dengan tuda'-tuda' kuda idi keréta. Idi kebala lun duken ineh ni Elisa, "O nabi! Mesusa' kiteh! Anunké luk ruen kiteh?"

16Idi kebala Elisa, "Aleg matot, ngaceku luk ngedengan nekiteh ineh meluun ula'deh ratnan luk ngedengan nedeh."

17Idi kesembayang Elisa, "O Tuhan, ngalat matehneh pelé ieh pana' miak nier." Idi Tuhan nengalat mateh lun dukenneh ineh pad ieh miak nier. Ieh mawa, ngaceku pegkung ineh panu' ku kuda luk kudeng apui idi keréta luk kudeng apui libut Elisa.

18Idi kareb lun Siria iné' munu' ni Elisa, idi ieh nesembayang mutuh Tuhan, kesembayangneh, "Necat amungdeh ini ku saweng mateh." Idi Tuhan nenecat nedeh ineh ku saweng mateh, maya' kudeng sembayang Elisa ineh.

19Idi kebala Elisa nedeh, "Ini baken dalan luk petulu, idi ini baken bawang luk ulek muyuh. Maya' negku mo', idi ui miak nated nemuyuh amé' nelun luk tekapen muyuh." Idi ieh nenated nedeh ineh iné' Samaria.

20Kareb ideh nacing déi' Samaria, kesembayang Elisa, "O Tuhan, ngalat matehdeh ineh pelé ideh miak nier." Idi Tuhan nengalat matehdeh ineh, pad ideh miak nier. Idi ideh mawa ngaceku ideh bang bawang Samaria.

- ²¹Kareb raca' Israil nekali' nedeh, idi ieh nengitun ni Elisa, "Miakké ui ngaté nedeh?"
- ²²Kebala Elisa, "Na! Muyuh na ngaté lemulun luk tiban bang bunu' pana'. Do' maman nedeh, pelé ideh kuman idi lemubed amé' inan raca'deh."
- ²³Idi raca' Israil nenganau' aceh irau rayeh kuandeh. Idi ideh nekuman idi nengirup, idi raca' nengecuk nedeh nalan. Idi ideh nelemubed iné' inan raca'deh. Muci ratnan ineh na luk idi baweh lun Siria nacing munu' nelun Israil peh.
- ²⁴Muci ratnan ineh Benhadad raca' Siria ineh nengamung amung bawehneh, idi ieh nenalan, idi nengelibut bawang Samaria.
- ²⁵Idi inan iru' luk rayeh déi' bawang Samaria. Idi bawang ineh linibut lengit-lengit, pad raga sebuleng uluh keladai ualuh ngepulu' balad pirak, idi aceh lio bua' bawang, raga limeh balad pirak.
- ²⁶Idi kareb raca' lun Israil nalan luun libung batu bawang ineh inan aceh decur nengitang nawar raca', kebalaneh, "O raca', ngedengan negku!"
- ²⁷Idi kebala raca', "Kudeng Tuhan na miak ngedengan namu, kudeng apeh ui miak ngedengan namu? Inanké padé idi abpa' anggurku?"
- ²⁸Idi anunké susa'mu?" Kebalaneh, "So nilad kebala decur ini, 'Do' kiteh kuman anakmu ineh aco sini. Idi nebpa kiteh kuman anakku.'
- ²⁹Ngaceku ineh kai dueh nenanek anakku, idi kai nekuman. Iamo' kenebpa kareb ui nepebala neneh, 'Do' kiteh kuman anakmu nekini,' iamo' ieh nengapung neneh."
- ³⁰Kareb raca' neninger bala ineh, idi ieh nenarak-narak ayungneh. Idi lun mula' luk muneng ku libung batu ineh nenier raca' nengayung ku kibung guni pa liang kuyu'neh.
- ³¹Idi kebala raca', "Do' Tuhan ngaté negku, kudeng na uluh Elisa Sapat ineh kelebpen aco sini."

³²Idi ieh nengecuk nelun duken nguit ni Elisa. Idi Elisa tudo bang ruma'neh, dengan tuda'-tuda' lun rayeh bawang Israil. Kareb nateh lun luk icuk raca' nacing, idi kebala Elisa nelun rayeh-rayeh ineh, "Lun luk ngaté ineh pangeh nengecuk nelun ngaleb uluhku. Nginita muyuh kareb lun luk icuk ineh macing napeh. Do' muyuh ngitek tanga', pad ieh na semuet. Raca' sebuleng maya' puetneh!"

³³Idi laba' ieh pebala nedeh, denak-dentak raca' ineh nacing. Idi kebalaneh, "Susa' ini ratnan Tuhan mo'! Anun ulek ui merapet inan Tuhan peh?"

Raca'-Raca' Luk Kedueh 7

¹Idi kebala Elisa, "Ninger iko bala Tuhan! Pekak nebpa bang kareb luk kudeng ini aceh gatang banak luk do' idi dueh gatang ikun mepad raga, ieh ineh aceh balad pirak, pisuen munung tanga' bawang Samaria."

²Iamo' kebala lun tareh luk megéi' maya' raca' ni Elisa, "Kudeng Tuhan nganau' bubpu' langit pana', luk kudeng ineh na miak mangun." Idi kebala Elisa, "Iko miak nier ku matehmu sebuleng. Iamo' na iko miak kuman ratnan ineh."

³Idi bal tanga' bawang ineh inan apat burur lun mét susud. Idi kebaladeh seburur dengan seburur, "Anun punneh tau tudo ieni idi maté?"

⁴Na ulekneh tau amé' bang bawang, pad tau maté ku lau su ineh mucu. Iamo' kudeng tau tudo ieni na miak na tau maté teh. Ngaceku ineh do' tau amé' ubpen arang baweh lun Siria. Kudeng tau uendeh ngulun miak tau mulun. Idi kudeng ideh ngaté netau na miak na tau maté."

⁵Idi kareb saweng-saweng, idi ideh iné' matun baweh lun Siria ineh. Kareb ideh nacing iring su inandeh nelupo, ideh mawa. Seburur pana' nateh idi déi'.

⁶Ngaceku Tuhan pangeh nenganau' baweh lun Siria ineh ninger tuda'-tuda' uni keréta, idi kuda, dengan baweh luk mula', pad lun Siria nengerawé raca' Israil pangeh nenabpar raca'-raca' lun Hiti idi raca'-raca' lun Masir pad ideh munu' nedeh.

⁷Idi lun Siria ineh neburo bang malem ineh. Idi ideh nenecan amung lepo, kuda, idi keladaideh. Idi ideh neburo.

⁸Idi kareb lun mét susud ineh nacing iring su inan baweh nelupo, idi ideh nesemuat bang aceh lepo idi nekuman idi nengirup. Idi ideh nengalap amas, pirak, idi kibung. Idi ideh nengapung ineh. Pangeh ineh ideh nelemubed iné' bang lepo luk baken. Idi ideh nengalap teh idi nengapung ineh teh.

⁹Iamo' kebaladeh seburur dengan seburur, "Kekamen tau ini na petulu. Aco sini inan bala luk do'. Idi tau ungeng mo'. Kudeng tau nganét aco macang, kali' rungen tau kali'deh mesala'. Ngaceku ineh amé' tau nguit bala amé' bang ruma' raca'."

¹⁰Idi ideh nenalan idi me' nawar lun luk nginita tanga' bawang, kebaladeh, "Kai pangeh iné' su luk inan baweh lun Siria ineh. Kai mawa. Seburur pana' nateh idi déi'. Ria' pana' nateh luk idi. Iamo' inan tuda'-tuda' kuda idi keladai inabet, idi amung lepo pana' tican teh."

¹¹Idi amung lun luk nginita tanga' ineh pana' nengitang mada' bala ini, pad bala ini nekali' bang ruma' raca'.

¹²Idi raca' netumui kareb medacem. Idi kebalaneh kuan lun tarehneh, "Nekini ui sikal maré kali' nemuyuh, ratnan luk tinina' lun Siria ineh. Ideh kali' netau melau. Ngaceku ineh ideh nenecan su inandeh nelupo, idi ideh iné' sigapung bang pulung, keterawédeh, kali' rungen tau necan bawang pad nakap akan, idi ideh miak ngakem netau mulun idi ngalap bawang ini."

¹³Idi kebala seburur lun tareh raca', "Do' ngalap limeh kuda rat arang kuda luk neketecan ineh, ngaceku lemulun luk ketecan su ini na miak na ideh maté mepad kudeng ula' lun Israil luk pangeh naté. Do' tau ngecuk nelun amé' nier."

¹⁴Idi raca' nengecuk dueh burur lun maya' kuda, ngerada' baweh lun Siria ineh, kebalaneh, "Amé' medueh nier nedeh."

¹⁵Idi didueh nemaya' puet lun Siria macing déi' Abpa' Yarden. Idi raked dalam inan mula' kibung idi amung repapeh luk pangeh tila'deh kareb ideh nupun buro. Idi lun icuk ineh nelemubed, idi nemada' ratnan ineh kuan raca'.

¹⁶Idi lun mula' ineh neremuat idi nepesingaro amé' su luk inan lun Siria nelupo. Idi aceh gatang banak luk do' idi dueh gatang ikun mepad raga, ieh ineh sebalad pirak, maya' kudeng luk bila Tuhan ineh.

¹⁷Idi lun tareh luk megéi' maya' raca' pangeh icukneh iné' nginita tanga' bawang. Idi lun nengeradu'-nengeradu' neneh munung tanga' ineh pad ieh naté, maya' kudeng luk bila Elisa kareb raca' iné' matun neneh.

¹⁸Elisa pangeh nemada' raca', kudeng ini, "Aceh gatang banak luk do' idi dueh gatang ikun mepad raga, ieh ineh sebalad pirak pisuen nebpa bang kareb luk kudeng ini munung tanga' bawang Samaria,"

¹⁹Idi lun tareh raca' ineh nengor balaneh, kebalaneh, "Kudeng Tuhan nganau' bubpu' langit, idi teh na miak mangun kudeng balamu ini." Idi kebala Elisa neneh, "Iko miak nier ku matehmu sebuleng, iamo' na iko miak kuman ratnan ineh."

²⁰Idi kudeng ineh teh luk mangun neneh, ngaceku lun mula' nengeradu' neneh munung tanga' bawang pad ieh naté.

Raca'-Raca' Luk Kedueh 8

¹Idi kebala Elisa inan decur luk kuan anak luk tinuineh, "Tumui iko idi nalan muyuh ua' ngeruma' amé' nakap su apeh luk do' inan muyuh. Ngaceku Tuhan pangeh nenganau' aceh iru' luk miak mangun bang bawang ini tudu' lak kinioneh."

²Idi decur ineh nenalan maya' kudeng luk bida' Elisa. Idi ieh nenguit amung lun bang tetek ruma'neh, idi tudo bang bawang lun Pilistin tudu' lak kinioneh.

³Idi abud lak luk ketudu' ineh idi decur ineh nuli' rat bawang lun Pilistin. Idi ieh iné' mutuh raca', pad ngalap tana' idi ruma'neh lemubed.

⁴Idi raca' uned pegayam ni Gehasi lun duken Elisa ineh, kebalaneh, "Mada' negku amung kekamen luk rayeh luk pangeh inau' Elisa ineh."

⁵Idi laba' ieh mada' inan raca' kudeng apeh Elisa pangeh nenui seburur lun naté, denak-denak decur ineh nacing, idi ieh nemutuh raca' ngalap ruma' idi tana'neh lemubed. Idi kebala Gehasi nan raca', "O raca', ini decur ineh. Idi ini anakneh luk pangeh tinui Elisa ineh."

⁶Idi raca' nengitun decur ineh. Idi ieh nemada' neneh rat pun-pun. Idi raca' nengecuk seburur lun dukenneh ngedengan neneh, kebalaneh, "Ngelubed kuanneh amung luk ieh kuan, idi teh amung uli' tana'neh rat aco ieh nenecan bawang ini macing aco sini."

⁷Idi Elisa iné' déi' Damsik kareb Benhadad raca' bawang Siria ineh mét. Idi kebaladeh kuan raca', "Nabi Allah idi tungé'."

⁸Idi kebala raca' ni Hasel seburur lun tarehneh, "Nguit aceh luk barén kuan nabi Allah ineh, pad ieh ngitun Tuhan kudeng ui miak do' ratnan ét ini?"

⁹Idi Hasel nenguit aceh luk barén, ieh ineh aceh binaweh luk meluun do' rat bawang Damsik luk iten apat ngepulu' unta. Idi ieh iné' matun ni Elisa, kebalaneh, "Ui ini icuk demulunmu Raca' Benhadad ngitun namu kudeng ieh miak do' ratnan étneh?"

¹⁰Idi kebala Elisa neneh, "Amé' iko mada' neneh, 'Miak ét ini mé' do', iamo' Tuhan pangeh nemada' negku ieh miak maté'."

¹¹Idi Elisa nenutong ni Hasel, pad ieh migu'. Idi Elisa nangi'.

¹²Idi kebala Hasel, "Ngudeh iko nangi'?" Kebala Elisa neneh, "Ngaceku ui kali' amung dat luk ruenmu nelun Israil mucu. Ngaceku iko miak nutung bawangdeh luk linibung meraben, idi ngaté lun anak adi'deh, idi mabpet anakdeh pad ideh maté, idi muer decurdeh luk mali'."

¹³Idi kebala Hasel, "Kudeng apehké ui nganau' luk kudeng ineh? Na ui lun mebala!" Idi kebala Elisa, "Pangeh ginala' Tuhan kuanku, idi iko miak mangun ku raca' bawang Siria."

- 14**Idi Hasel iné' matun Raca' Benhadad, luk nengitun neneh, "anunké bala Elisa namu?" Idi kebalaneh, "Kebala Elisa, 'Et ini miak amé' do.'" "
- 15**Iamo' kenebpa, Hasel nengalap tarub, idi nengerereb ineh bang abpa', idi nemalad ineh luun kiung raca', pad ieh maté. Idi Hasel mangun ku raca' Siria libalneh.
- 16**Kareb lak luk kelimeh bang imet Yoram Akab ineh nelun Israil, idi Yoram Yosapat ineh mangun ku raca' lun Yahuda.
- 17**Idi ulunneh teluh ngepulu' dueh lak. Idi ieh nengimet ualuh lak déi' bawang Yerusalim.
- 18**Idi ieh nemaya' kekamen raca'-raca' lun Israil, maya' kudeng luk inau' amung lun bang tetek ruma' Akab, ngaceku ieh pangeh nengaweh anak Akab. Idi ieh nenganau' luk dat pa kiung Tuhan.
- 19**Iamo' nateh Tuhan sikal ngaté amung lun Yahuda ngaceku demulunNeh Daud, maya' kudeng luk bilaNeh neneh, ratnan Ieh maré inul kuanneh, pad ideh ngimet macing raked-raked.
- 20**Bang kareb imet Yoram ineh, idi lun Edom sikal mepuit ratnan imet lun Yahuda, pad ideh nengikit seburur mangun ku raca'deh.
- 21**Idi Yoram nenalan iné' déi' bawang Sair dengan amung keréta bunu'neh. Idi lun Edom nengelibut nede. Idi kareb medacem Yoram idi lun luk ngimet kerétaneh neburo nuli'.
- 22**Idi lun Edom nepuit ratnan imet Yahuda macing aco sini. Idi kareb ineh pana' bawang Libna nepuit ratnan imetneh.
- 23**Idi amung kekamen Raca' Yoram luk baken pangeh inayud bang Surat Kekamen Raca'-Raca' Lun Yahuda.
- 24**Idi Yoram naté idi ieh tinanem bang tanem raca' déi' bang bawang Daud, idi anakneh Ahasia mangun ku raca' libalneh.
- 25**Kareb lak luk kepulu' dueh bang imet Yoram Akab nelun Israil, idi Ahasia Yoram mangun ku raca' lun Yahuda.

²⁶Idi ulun Raca' Ahasia kareb ieh mangun ku raca' dueh ngepulu' dueh lak. Idi ieh nengimet selak déi' Yerusalim. Idi ngadan tinanneh Atalia mupun Omri raca' lun Israil.

²⁷Ahasia pana' nemaya' kekamen amung lun bang tetek ruma' Akab ineh, idi ieh nenganau' luk dat pa kiung Tuhan ngaceku ieh dingiban nelun bang tetek ruma' Akab ineh.

²⁸Raca' Ahasia nemaya' Raca' Yoram Akab iné' déi' Ramot Giliad pian munu' Hasel raca' bawang Siria ineh. Idi lun Siria nengurat Raca' Yoram.

²⁹Idi ieh nelemubed iné' déi' Yesril pad ngubat uratneh. Idi Ahasia iné' ngikak neneh.

Raca'-Raca' Luk Kedueh 9

¹Bang kareb ineh Elisa nenawar seburur anak sekola' nabi. Kebalaneh neneh, "Do' iko temina' idi nguit seréi' umau ineh, idi amé' déi' Ramot Giliad.

²Kareb iko macing déi, nakap ni Yihu anak Yosapat Nimsi. Idi nguit neneh amé' bang takep setau' rat nelun rurumneh.

³Idi ngalap seréi' ineh, idi ngukit umau ineh luun uluhneh, kebalamu, "Tuhan ngumau namu mangun ku raca' lun Israil.' Pangeh ineh do' iko upun buro."

⁴Idi anak sekola' nabi ineh iné' Ramot Giliad.

⁵Idi ieh nekali' amung lun rayeh baweh pegayam. Idi kebalaneh ni Yihu, "Inan aceh bala luk belénku namu." Idi kebala Yihu, "Kuan idé'?" Kebalaneh, "Kuan diko, O iko lun rayeh baweh."

⁶Idi didueh iné' bang ruma'. Idi anak sekola' nabi' ineh nengutang umau ineh luun uluh Yihu, kebalaneh, "Kebala Tuhan Allah lun Israil, 'Ui ngumau namu mangun ku raca' amung pupu Tuhan, ieh ineh lun Israil.

⁷Idi iko ngaté amung lun bang tetek ruma' Akab raca'mu, pelé Ui ngakat até amung nabi luk icukKu, idi amung demulunKu, ngaceku kekamen Isabel luk dat ineh.

⁸Amung lun bang tetek ruma' Akab ineh miak pitayen. Idi Ui pian nala' amung inul Akab luk deléi idi demulundeh pana'.

⁹Idi Ui miak nganau' ruma' Akab mepad kudeng ruma' Yerebom Nibat idi mepad kudeng ruma' Basa Ahiya.

¹⁰Idi teh Isabel miak kenen uko' bang bawang Yesril. Idi seburur pana' nateh pian nanem neneh.' " Idi anak sekola' nabi ineh neburo.

¹¹Idi Yihu nelemubed iné' matun amung lun rayeh baweh ineh. Idi kebaladeh neneh, "Kudeng apeh, bala do'ké? Ngudeh lun meruden ini iné' namu?" Idi kebala Yihu nedeh, "Muyuh kali' lemulun ineh idi balaneh."

¹²Iamo' kebaladeh, "Na kali' kai, mada' nekai nekini." Idi kebalaneh, "Kudeng ini luk bilaneh negku, 'Kudeng ini bala Tuhan, Ui ngumau namu mangun ku raca' lun Israil.' "

¹³Idi ideh saget-saget nengalap kuyu'deh, idi ideh nemalad ineh su dalanneh. Idi ideh nengiuip serupit, kebaladeh, "Yihu pangéh inau' ku raca'."

¹⁴Idi Yihu nepeg gayam sikal munu' Raca' Yoram.

¹⁵Idi Yoram pangéh nelemubed iné' Yesril sikal ngubat uratneh luk inurat kareb ieh nepebunu' ni Hasel raca' Siria. Idi kebala Yihu nelun rayeh baweh ineh, "Kudeng peh ini pian muyuh, aleg nima' seburur remuat rat Ramot amé' mada' bala ini déi' Yesril."

¹⁶Idi Yihu nemaya' keréta iné' déi' Yesril. Ngaceku Yoram idi déi', idi uratneh nateh nedo'. Idi Ahasia raca' Yahuda pana' pangéh iné' déi' ngikak Raca' Yoram.

¹⁷Idi lun luk nginita bawang Yesril ineh netuped su luk inanneh nginita, idi ieh nenier baweh Yihu macing, kebalaneh, "Ui nier inan aceh baweh macing." Idi kebala Yoram, "Ngecuk seburur lun maya' kuda amé' nier nedeh, idi ngitun ku lawé do' ideh."

¹⁸Idi lun maya' kuda ineh iné' papu' ni Yihu, kebalaneh, "Kebala raca', 'Lawé do' muyuh ni?' " Kebala Yihu, "Anun punmu ngitun lawé kai? Do' iko maya'

puetku." Idi lun luk nginita bawang ineh nemaré kali' ratnan lawéneh, kebalaneh, "Lun luk icuk ineh pangeh nacing nedeh, iamo' na ieh lemubed."

¹⁹Idi ieh nengecuk seburur lun baken amé' teh. Kareb ieh nacing nedeh, kebalaneh, "Kebala raca' 'Lawé do' muyuh ni?' " Kebala Yihu, "Anun punmu ngitun lawé kai? Do' iko maya' puetku."

²⁰Idi lun luk nginita bawang ineh nemaré kali' ratnan lawéneh, kebalaneh, "Lun luk icuk ineh pangeh nacing nedeh, iamo' na ieh lemubed teh. Idi lawé lun luk nguyut nedeh mepad kudeng lawé Yihu. Ngaceku lawéneh mepad kudeng lun meruden."

²¹Idi kebala Raca' Yoram, "Do' temina' ku keréta." Idi ideh netemina'. Idi Yoram idi Ahasia nenalan, idi didueh manid keréta, pian papu' ni Yihu. Idi didueh nepapu' neneh déi' kabun Nabot.

²²Idi kebala Yoram neneh, "Lawé do' iko ni, Yihu?" Kebalaneh, "Na lawé kai ini do', ngaceku sét tinanmu Isabel, idi bangunneh pelaba ula'."

²³Idi Raca' Yoram nengeliud kerétaneh. Idi ieh neburo, kebalaneh ni Ahasia, "Naluk ieh, pian ngalap imetku, O Ahasia!"

²⁴Idi Yihu nenganau' ileb luun binorneh. Idi ieh nengelatik ileb amé' inan Raca' Yoram idi nekaneh su paped gualenneh, pad ileb binor ineh pesut bang pusu'neh. Idi raca' neluka' bang kerétaneh.

²⁵Idi kebala Yihu ni Bidekar, seburur lun luk ngedengan neneh, "Ngiding idi mepet ieh luun tana' Nabot. Kali'mu atun kareb kitech nepebaya' tamanneh Raca' Akab bang keréta, Tuhan nemada' bala ini ratnan Akab:

²⁶Ui pangeh nenier dara' Nabot idi dara' anak-anakneh luun tana' ini nalem, idi teh Ui miak ngua' atédéh namu luun tana' ini teh.' Idi nekini nala' butung Yoram luun tana' Nabot ineh, maya' kudeng bala Tuhan ineh."

²⁷Kareb Ahasia raca' lun Yahuda nenier luk inau'deh ineh, idi ieh neburo maya' dalam amé' Bait Hagan. Iamo' Yihu nengerada' neneh, kebalaneh, "Ngaté neneh teh." Idi ieh nengelatik ilebneh amé' neneh kareb ieh tudo bang

kerétaneh, kareb ieh mudik surud déi' Gur, luk muneng ku Ibliam. Idi ieh neburo iné' Megido. Idi ieh naté déi'.

²⁸Idi lun tarehneh nenguit neneh amé' Yerusalim idi ideh nenanem neneh bang tanem raca'-raca' bang bawang Dadu, déi' Yerusalim luk mon.

²⁹Idi bang lak luk kepulu' aceh kareb imet Yoram Akab ineh, idi Ahasia ineh pangeh mangun ku raca' lun Yahuda.

³⁰Kareb Isabel neninger bala Yihu nacing déi' Yesril, idi ieh nemadak kiungneh. Idi ieh nenganau' pataneh, idi nenier rat munung tabuk.

³¹Idi kareb Yihu nesemuet bang tanga' bawang, idi kebala Isabel, "Anun bala, O Simri, iko luk nengaté raca'mu?"

³²Idi Yihu netengook nenier tabuk ineh, kebalaneh, "Idé pian maya' negku?" Idi inan dueh kian teluh burur lun ngasa' bang ruma' raca' nenier neneh.

³³Idi kebala Yihu nedeh, "Ngabpa decur ineh rat déi' dita'." Idi ideh nengabpa neneh rat déi' dita', pad dara'neh nuput luun libung batu idi luun kudaneh. Idi kuda ineh nengeradu' neneh.

³⁴Idi Yihu nesemuet bang ruma' raca', idi nekuman, kebalaneh, "Amé' muyuh ngalap butung decur luk kidiman ineh, idi nanem neneh. Ngaceku ieh anak raca'."

³⁵Iamo' kareb ideh iné' ngalap butungneh tinamen, na ieh idi iamo' perupukneh, mop kukudneh idi paladneh mo' neketecan.

³⁶Kareb ideh nelemubed idi nemaré kali' ni Yihu, idi kebalaneh, "Kudeng ineh bala Tuhan luk bida' demulunNeh Elia, kebalaNeh, 'Luun tana' Yesril, uko' miak kuman butung Isabel.

³⁷Idi butung Isabel ineh mangun ku rimuk tana' luun tana' Yesril, pad na lun mala, Su ini tanem Isabel.' "

Raca'-Raca' Luk Kedueh 10

¹Raca' Akab inan tudu' ngepulu' anak deléi' déi' bawang Samaria. Ngaceku ineh Yihu nengayud tuda'-tuda' surat luk barén déi' bawang Samaria kuan

amung lun rayeh Yesril, idi kuan amung lun rayeh ruma', idi kuan amung luk nginita anak Akab, kebalaneh,

²⁻³"Kareb surat ini macing, do' muyuh mili' anak Akab luk meluun do' mangun ku raa' muyuh. Idi do' muyuh temina' pebunu' kuan imetneh. Ngaceku muyuh inan tuda'-tuda' keréta idi kuda, idi aceh bawang luk meraben libung, idi teh repapeh pebunu'."

⁴Iamo' lun rayeh-rayeh bawang Samaria pelaba tot, kebaladeh, "Raca' Yoram idi Raca' Ahasia pana' na tuman pa kiungneh. Tau pana' nateh tuman!"

⁵Idi amung lun luk ngasa' bang ruma' raca', idi lun rayeh bawang, idi amung lun tareh, idi lun luk nginita anak Akab nemaré kali' ni Yihu, "Idi amung kai ini demulunmu. Idi amung balamu kai maya'. Seburur pana' nateh ruen kai ku raca'. Do' iko nganau' luk matu maya' pianmu."

⁶Idi Yihu nemaré aceh surat kuandeh teh, kebalaneh, "Kudeng matu muyuh sebuleng niat negku idi maya' balaku, amé' muyuh ngalap uluh amung anak raca' muyuh idi amé' matun negku déi' Yesril nebpa, bang kareb luk kudeng ini." Idi tudu' ngepulu' burur anak raca' ineh tudo bang bawang dengan amung lun rayeh-rayeh luk ngasa' nedeh.

⁷Kareb surat Yihu nacing, idi ideh nengaté tudu' ngepulu' burur anak raca' ineh. Idi ideh nenipa amung uluhdeh ineh bang tuda'-tuda' kelupit, idi ideh nengecuk nelun nated uluh ineh kuan Yihu déi' Yesril.

⁸Idi kareb Yihu neninger bala ineh, idi ieh nengecuk nedeh ngamung uluh ineh dueh bubpun iring tanga' bawang macing kenebpa.

⁹Idi pa pekak Yihu iné' tanga' bawang. Ieh nengitun nelun mula' ineh, "Ui ini sikal metueh ratnan Raca' Yoram pad ui nengaté neneh. Muyuh na inan sala'. Iamo' idéké pangeh nengaté amungdeh ini?"

¹⁰Kekamen ini ngegala' ratnan amung luk bila Tuhan ratnan inul Akab na miak na mangun. Ngaceku Tuhan pangeh nengacing luk pijani'Neh maya' kudeng luk pangeh bida' nabiNeh Elia."

¹¹Idi Yihu nengaté amung pupu Akab luk tudo déi' Yesril, idi amung tarehneh, amung rorumneh, idi amung imamneh, pad seburur pana' nateh luk ketecan.

¹²Idi Yihu iné' déi' bawang Samaria. Kareb ieh nacing déi' "Lepo Lun luk Matar Dumba,"

¹³Idi ieh nepapu' sebuang pupu maté Ahasia raca' lun Yahuda. Idi kebalaneh nedeh, "Idéké muyuh ini?" Idi kebaladeh ineh, "Amung kai ini pupu Raca' Ahasia. Idi kai amé' ngikak amung anak raca' idi anak tinan raca' pana'."

¹⁴Idi kebala Yihu, "Do' ngakem nedeh." Idi ideh nengakem apat ngepulu' dueh burur deléi ineh idi nengaté nedeh iring lubang luk muneng ku Lepo ineh. Seburur pana' nateh inulundeh.

¹⁵Kareb Yihu nenalan rat ieneh, idi ieh nepapu' ni Yonadab Rikab luk macing amé' papu' neneh. Idi didueh nepetabi'. Idi kebala Yihu, "Do'ké niatmu negku, mepad kudeng do'ku namu?" Idi kebala Yonadab, "o, do'." "Kudeng ineh pieh, maré ticu mu negku idi ui nginat namu amé' denganku bang keréta ini."

¹⁶Idi kebala Yihu, "Amé' maya' negku idi nier tuehku ngaceku Tuhan." Idi didueh nenalan maya' kerétaneh.

¹⁷Kareb Yihu nacing déi' bawang Samaria, idi ieh nengaté amung inul Raca' Akab luk ketecan bang bawang ineh, maya' kudeng luk bila Tuhan ni Elia.

¹⁸Yihu nengamung nelun Samaria ineh, kebalaneh nedeh, "Idi Raca' Akab nemaya' akang Baal ineh, iamo' na ieh mepicet tu-tu. Iamo' ui sikal mepicet maya' neneh.

¹⁹Do' muyuh nawar amung nabi Baal, idi amung lun luk sembayang neneh idi amung imamneh amé' negku. Seburur pana' aleg na macing. Ngaceku ui nganau' aceh baré luk rayeh kuan Baal. Idé luk na macing, ieh ineh na miak mulun peh." Iamo' Yihu nenaluk nedeh ineh pad ieh miak ngaté amung lun luk sembayang inan Baal ineh.

²⁰Idi kebala Yihu, "Do' nganau' aceh teubupun rayeh kuan Baal." Idi ideh nengeletap aceh aco rayeh kuan teubupun ineh.

²¹Idi Yihu neneteng amung lun luk sembayang inan Baal rat aput bawang Israil. Seburur pana' nateh luk na nacing. Idi amungdeh ineh nesemuet bang ruma' Baal, pad ruma' ineh mepanu'.

²²Idi Yihu nengecuk nelun luk ngasa' ayung nguit ayung amung lun luk sembayang inan Baal ineh.

²³Idi Yihu dengan Yonadab Rikab ineh nesemuet bang ruma' Baal. Idi kebala Yihu kuan lun luk sembayang inan Baal ineh, "Nier do'-do', pad na luk idi lun luk sembayang inan Tuhan arang muyuh."

²⁴Idi didueh nesemuet idi nemaré baré luk kereten idi baré luk sabpen. Yihu pangeh nengecuk ualuh ngepulu' burur tured bal ruma' Baal ineh, kebalaneh, "Kudeng idé-idé luk muit seburur rat arang amungdeh ini, kali' rungen ieh pitayen."

²⁵Kareb Yihu pangeh nemaré baré luk sabpen ineh, idi ieh nengecuk amung lun luk nginita idi lun rayeh baweh ineh, kebalaneh, "Semuet idi ngaté nedeh. Aleg nima' seburur pana' mepuit." Idi ideh nengaté amung-amungdeh. Idi amung lun luk nginita idi lun rayeh baweh ineh nenala' butungdeh, idi ideh nesemuet bang takep ruma' Baal ineh.

²⁶Idi ideh nenguit ulung luk bang ruma' Baal ineh. Idi ideh nengeseb ineh.

²⁷Idi ideh nengusag akang Baal idi ruma'neh pana'. Idi ideh nenganau' su ineh ku su luk inan ketéi macing aco sini.

²⁸Idi kudeng ineh lawé Yihu nengagka' nelun Israil sembayang inan Baal.

²⁹Iamo' Yihu na ugka' maya' sala' Yerebom Nibat luk pangeh nenguit nelun Israil nganau' sala' sembayang inan sapi' amas luk déi' Baitel idi luk déi' Dan pana'.

³⁰Idi kebala Tuhan ni Yihu, "Iko pangeh nenganau' luk pianKu kuan inul Akab. Ngaceku ineh Ui pejani' maré inulmu macing keapat ngimet nelun Israil."

³¹Iamo' Yihu na lutep maya' ukum Tuhan Allah lun Israil dengan amung niatneh, ngaceku na ieh nugka' ratnan sala' Yerebom luk pangeh nenguit nelun Israil nganau' sala'.

³²Idi bang kareb ineh teh Tuhan nengimun ngiuk lakan tana' lun Israil pad ieh isuut. Idi Hasel nengelaya' amung tana' lun Israil.

³³Rat Abpa' Yarden pa busat aco, macing bawang Arur luk i tangeb Abpa' Arnon, ieh ineh Giliad idi Basan luk bawang lun Gad, Rubin, idi Manasé.

³⁴Idi amung kekamen Yihu luk baken, idi amung kuu'neh pangeh inayud bang Surat Raca'-Raca' Lun Israil.

³⁵Idi Yihu naté idi ieh tinanem déi' Samaria. Idi Yuahas anak Yihu mangun ku raca' libalneh.

³⁶Idi Yihu raca' Israil nengimet dueh ngepulu' ualuh lak déi' Samaria.

Raca'-Raca' Luk Kedueh 11

¹Kareb Atalia tinan Ahasia nekali' anakneh pangeh naté, idi ieh nengaté amung anak inul raca'.

²Iamo' Yoseba, anak decur Raca' Yoram, kinanak Ahasia ineh nengalap ni Yuas Ahasia, idi nenguit neneh lulem rat arang amung anak raca' luk pitayen. Idi ieh nenganau' neneh bang takep luk inan rudap dengan decur luk ngasa' neneh. Idi ieh nengapung neneh rat ni Atalia pad ieh na pitayen.

³Idi ieh nesigapung bang ruma' sembayang anem lak kinioneh, laba' Atalia ngimet bawang.

⁴Iamo' kareb lak luk ketudu' Imam Yoyada nengecuk nawar amung lun rayeh lun luk meratu burur ineh, ieh ineh lun Kari idi amung lun luk nginita. Idi ieh nenawar nedeh amé' papu' neneh bang Ruma' Allah idi ieh nepejani' nedeh. Ieh nengecuk nedeh ineh pebulung bang Ruma' Allah. Idi ieh nemada' anak raca' sirendeh.

- ⁵Idi ieh neperiteteng nedeh, kebalaneh, "Kareb muyuh amé' nginita bang ruma' raca' kareb Aco luk inan Mudeng, do' muyuh teluh babpat; idi sebabpat amé' nginita bang ruma' raca',
- ⁶idi sebabpat do' amé' i tanga' bawang Sur, idi sebabpat teh i tanga' bawang bal selipa su inan lun nginita.
- ⁷Idi dueh babpat muyuh luk ucu' kareb Aco luk inan Mudeng ini miak nginita Ruma' Allah pad matar raca'.
- ⁸Do' muyuh matar raca', anid-anid muyuh ngimet pelapet. Idi idé'-idé luk amé' matun nemuyuh miak pitayen."
- ⁹Idi lun rayeh lun luk meratu burur ineh nemaya' amung bala Imam Yoyada. Idi ideh nenguit anid-anid lun luk ugka' kareb Aco luk inan Mudeng dengan amung lun luk ngakem kareb Aco luk inan Mudeng pana' iné' papu' ni Yoyada.
- ¹⁰Idi ieh nemaré kuan amung lun rayeh ineh amung busu idi utap Raca' Daud luk bang Ruma' Allah.
- ¹¹Idi teh anid-anid lun luk nginita perigéi' tuped ngimet rat pa tinueh Ruma' Allah ineh suet pa kabing, ieh ineh libut bubpun idi Ruma' Allah.
- ¹²Idi Yoyada nenguit ni Yuas remuat, idi nenganau' pata raca' luun uluhneh. Idi ieh nemaré ukum Allah kuan raca' neneh. Idi Yuas inumau mangun ku raca'. Lun mula' nemepag palad idi ngudub, "Do' raca' mipu ulun!"
- ¹³Kareb Atalia neninger arod amung lun matar idi lun mula' ineh, idi ieh iné' dengan mesaget bang Ruma' Allah su luk inan lun mula'.
- ¹⁴Idi ieh nenier raca' luk mebaruh tuped iring diri maya' lawé raca', idi amung lun rayeh dengan lun luk ngiup suling pana' iring raca'. Idi amung lun mula' pana' ngitang mawang niat idi ngiup sulingdeh. Idi Atalia nenarak ayungneh, idi nengitang, "Ieh ngaro imetku! Ieh ngaro imetku!"

¹⁵Yoyada nengecuk amung lun rayeh baweh, kebalaneh, "Nguait decur ineh amé' arang lun luk nginita, idi ngaté idé' luk maya' neneh." Ngaceku kebala imam, "Na ieh miak pitayen bang Ruma' Allah."

¹⁶Idi ideh nengakem neneh, idi nenguait neneh maya' Tanga' Kuda amé' ruma' raca'. Idi ideh nengaté neneh déi'.

¹⁷Yoyada nenganau' aceh pejani' arang Tuhan dengan raca' idi lun mula' ineh, pelé' ideh mangun ku pupu Tuhan, idi teh ieh nenganau' aceh jani' arang raca' dengan lun mula' ineh.

¹⁸Pangeh ineh idi lun mula' iné' ruma' Baal. Idi ideh nengusag ruma'neh idi bubpunneh, idi nemila' amung akangneh. Idi ideh nengaté ni Matan, imam Baal ineh pa atun bubpun. Idi Yoyada nengeletap lun nginita bang Ruma' Allah.

¹⁹Idi ieh nengalap amung lun rayeh lun luk merata ineh, lun Kari, lun luk nginita idi lun mula' ineh, idi ideh nenguait raca' temurun rat bang Ruma'Allah. Idi ideh nenalan maya' tanga' su luk inan lun luk nginita, amé' ruma' raca'. Idi raca' ineh netudo luun kerusi imet raca'.

²⁰Idi lun mula' mawang niat. Idi bang bawang ineh na ria' peh, ngaceku ideh pangeh nengaté ni Atalia bang ruma' raca'.

²¹Idi ulun Yuas ineh tudu' lak kareb ieh mangun ku raca' Yahuda.

Raca'-Raca' Luk Kedueh 12

¹Idi kareb lak luk ketudu' bang imet Yihu, Yuas mangunku raca' Yahuda. Idi ieh nengimet apat ngepulu' lak déi' bawang Yerusalim. Idi ngadan tinanneh Sibia rat Birsiba.

²Idi Yuas nenganau' luk matu pa kiung Tuhan seruked ulunneh, maya' kudeng luk bida' Imam Yoyada neneh.

³Iamo' amung su luk inan sembayang inan allah baken, na tila'neh. Idi lun mula' nemaré baré idi negeseb umau' luk do' buen su ineh.

⁴Yuas neneteng imam-imam idi nengecuk nedeh ngamung usin luk biré dengan baré bang Ruma' Allah, ieh ineh usin luk biré dengan amung baré luk pekalai, idi amung usin luk biré dengan ran niat.

⁵Ieh nengecuk amung imam ngalap usin ineh rat nelun luk inanneh pekalai, ku ngedo' anun-anun luk nekusag bang Ruma' Allah ineh.

⁶Iamo' kareb Yuas paneh nengimet dueh ngepulu' teluh lak, idi nateh imam-imam nengedo' Ruma' Allah ineh.

⁷Ngaceku ineh ieh nenawar ni Yoyada idi amung imam baken, idi nengitun nedeh, kebalaneh, "Ngudeh muyuh na ngedo' Ruma Allah ineh? Rat pad sini aleg muyuh ngimet usin luk ilap muyuh. Iamo' maré ineh ku ngedo' Ruma' luk inusag ineh."

⁸Idi amung imam ineh nengamo' maya' bala raca', pad ideh miak ngedo' Ruma' Allah ineh peh.

⁹Idi Yoyada nengalap aceh pati'. Idi ieh nenganau' lubang luun kakebneh. Idi ieh nengerareng pati' ineh pa tinueh bubpun su inan lun semuet bang Ruma' Allah. Idi amung imam luk nginita amung tanga' ineh nengerareng bang pati' ineh amung usin luk inuit lun amé' bang Ruma' Allah ineh.

¹⁰Kareb inan mula' usin bang pati' ineh, idi lun luk ngayud kuan raca' idi Imam Rayeh nacing. Idi didueh nengiap amung usin ineh idi tinipa bang tebpung.

¹¹Pangeh ieh tinimang do'-do', idi usin ineh biré bang palad amung lun luk ngimet kekamen bang Ruma' Allah. Idi ideh nabpar amung tukang kayuh, lun luk mudut ruma',

¹²lun luk mileh mudut ruma' batu, idi lun luk mila' batu teh. Idi teh ideh melih kayuh, idi batu ku ngedo' Ruma' Allah, idi anun-anun luk baken teh.

¹³Iamo' usin ineh nateh pikaideh ku nganau' bigan pirak, luk ku ngilep, busi', serupit, idi anun-anun repapeh amas idi pirak pana'.

¹⁴Iamo' usin ineh pikai ku nabpar lun luk ngakem ineh, idi ku melih anun-anun luk ku ngedo' Ruma' Allah.

¹⁵Idi lun luk ngimet kekamen ineh inan merapat, idi na ideh nengitun ratnan kudeng apéh ideh maré usin luk birédeh ineh.

¹⁶Idi usin baré ngaceku mabeh sala' idi usin baré ngaceku sala'deh, ieh ineh na inuit semuet bang Ruma' Allah. Ngaceku amung ineh kuan amung imam.

¹⁷Kareb ineh Hasel raca' Siria iné' pebunu' nelun Gat. Idi ieh nengelaya' bawang ineh. Idi teh ieh pian amé' ngerieng bawang Yerusalim.

¹⁸Iamo' Yuas raca' Yahuda nengalap amung baré luk pangeh linigan tepunneh, ieh ineh Yosapat, Yoram, idi Ahasia, idi teh amung baré luk liniganneh sebuleng, idi amung amas luk bang su luk inan nganug binaweh bang Ruma' Allah idi bang ruma' raca'. Idi ieh nemaré ineh kuan Hasel raca' Siria. Idi ngaceku ineh Hasel nelemubed rat Yerusalim.

¹⁹Idi amung kekamen Raca' Yuas luk baken pangeh inayud bang surat Kekamen Raca'-Raca' Lun Yahuda.

²⁰⁻²¹Idi lun tareh Yuas nepegayam sikal metueh rat neneh. Idi Yosakar Simiat idi Yosabad Somer nengaté neneh bang ruma' luk pinudut luun tana' luk pinaad luk pa busat aco Yerusalim ineh, iring dalam luk amé' déi' Sila. Idi Yuas tinanem bang tanem raca'-raca' bang bawang Daud, ieh ineh Yerusalim luk mon. Idi anakneh Amasia mangun ku raca' libalneh.

Raca'-Raca' Luk Kedueh 13

¹Kareb lak luk kedueh ngepulu' teluh bang imet Yuas Ahasia raca' Yahuda, idi Yuahas Yihu mangun ku raca' lun Israil. Idi ieh nengimet pulu' tudu' lak déi' Samaria.

²Idi ieh mepad kudeng Raca' Yerebom. Ieh nenganau' sala' pa kiung Tuhan. Idi teh ieh nenguit nelun Israil nganau' sala'. Idi na ieh nenecan sala' ineh.

³Idi Tuhan museh nelun Israil. Idi tuda'-tuda' kua' Ieh nemaré nedeh bang palad Hasel raca' Siria idi bang palad Benhadad Hasel teh.

- ⁴Iamo' Yuahas nesembayang inan Tuhan. Idi Tuhan neninger putuhneh, ngaceku Ieh nenier dereh lun Israil luk pidereh raca' Siria ineh.
- ⁵Idi Tuhan nemaré nelun Israil seburur lun luk nguyut, pad ideh remuat rat bang palad lun Siria. Idi lun Israil na inan susa', iamo' ideh do' udeng mepad kudeng atun mo'.
- ⁶Iamo' nateh ideh nenecan sala' lun bang tetek ruma' Yerebom luk pangeh nenguit nelun Israil nganau' sala'. Iamo' ideh nemaya' sala' ineh teh. Idi akang Asera ineh idi teh déi' Samaria.
- ⁷Idi lélé na baweh ketecan ni Yuahas, iamo' luk ketecan limeh ngepulu' burur lun luk maya' kuda idi pulu' keréta, idi 10,000 lun luk nalan kukud. Ngaceku amung luk baken ineh pangeh ridu' raca' Siria mepad kudeng abuh.
- ⁸Idi amung kekamen Raca' Yuahas luk baken idi kuu'neh pangeh inayud bang Surat Kekamen Raca'-Raca' Lun Israil.
- ⁹Idi ieh naté. Idi ieh tinanem bang tanem raca'-raca' déi' Samaria. Idi anakneh Yoas mangun ku raca' libalneh.
- ¹⁰Idi kareb lak luk keteluh ngepulu' tudu' bang imet Yuas raca' Yahuda idi Yoas Yuahas mangun ku raca' Israil. Idi ieh nengimet pulu' anem lak déi' Samaria.
- ¹¹Idi ieh nenganau' sala' pa kiung Tuhan. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.
- ¹²Idi amung kekamen Raca' Yoas luk baken idi kuu' bang bunu' dengan Amasia raca' lun Yahuda, pangeh inayud bang Surat Kekamen Raca'-Raca' Lun Israil.
- ¹³Idi Yoas naté, idi ieh tinanem bang tanem raca'-raca' déi' Samaria. Idi Yerebom luk kedueh mangun ku raca' libalneh.
- ¹⁴Idi Nabi Elisa mét lélé maté, idi Yoas raca' Israil iné' ngikak neneh. Idi ieh nenangi', kebalaneh, "O ama! O ama! Keréta lun Israil dengan luk maya' Kuda!"

- ¹⁵Idi kebala Elisa neneh, "Ngalap binor dengan ilebneh." Idi Yoas nengalap ineh.
- ¹⁶Idi Elisa nengecuk neneh temina' ngelatik. Idi raca' nemaya' balaneh, idi Elisa nengerareng ticu'neh luun ticu' raca'.
- ¹⁷Idi kebala Elisa, "Ngukab tabuk luk petutup ku bawang Siria, idi ngelatik ileb ineh, ineh." Kareb raca' pangeh nengelatik ileb ineh, idi kebala Elisa neneh, "Iko ineh ileb Tuhan luk meluun tueh idi ileb luk ngelaya' nelun Siria. Ngaceku lun Siria ineh miak uenmu munu' déi' Apek pad ideh uenmu ngelaya'."
- ¹⁸Idi Elisa nengecuk raca' ngalap amung ileb ineh idi necat tana'ku ineh. Idi raca' nenecat tana' teluh kua', idi ieh nugka'.
- ¹⁹Idi Elisa museh neneh, kebalaneh neneh, "Kudeng iko nenecat limeh anem kua', kali' rungen mucu iko miak ngelaya' nelun bawang Siria pad ideh mabud maté. Iamo' nekini iko miak ngelaya' nelun Siria ineh teluh kua' mo'."
- ²⁰Elisa naté. Idi ieh tinanem. Idi anid-anid lak tuda'-tuda' baweh lun Moab ngerieng bawang Israil.
- ²¹Idi kareb ideh nenanem seburur lemulun, denak-denak ideh nenier aceh baweh, idi ideh nemepet lun naté ineh déi' bang tanem Elisa. Idi kareb lun naté nesemuet bang ineh idi ieh nepisit luun butung Elisa ineh, idi lemulun ineh mulun idi ieh netuped.
- ²²Idi Hasel raca' Siria ineh nengedereh nelun Israil seruked ulun Yuahas.
- ²³Iamo' Tuhan méi' nedeh. Idi Ieh nelumi nedeh ngaceku pejani'Neh ni Ibrahim, Isak, idi Yakub. Na Ieh sikal ngedat idi nala' nedeh ineh rat pa kiungNeh macing nekini.
- ²⁴Kareb Hasel raca' bawang Siria ineh naté, idi Benhadad anakneh mangun ku raca' libalneh.
- ²⁵Idi Yoas Yuahas nengaro rat ni Benhadad Hasel maung bawang luk pangeh inaroneh kareb pebunu' bang imet tamanneh Yuahas. Idi Yoas raca' Israil ineh

nengelaya' nedeh macing teluh kua'. Idi ieh nengalap lemubed amung bawang ineh kuan lun Israil.

Raca'-Raca' Luk Kedueh 14

¹Kareb lak luk kedueh bang imet Yoas Yuahas raca' Israil, idi Amasia Yuas mangun ku raca' Yahuda.

²Idi ulunneh dueh ngepulu' limeh lak kareb ieh mangun ku raca'. Idi ieh nengimet dueh ngepulu' iwa' lak déi' Yerusalim. Idi ngadan tinan raca' ineh Yuadin rat Yerusalim.

³Idi Amasia nenganau' luk matu pa kiung Tuhan, iamo' baken mepad kudeng kekamen tepunneh Daud. Iamo' amung kekammeneh, ieh ineh mepad kudeng luk inau' tamanneh Yuas.

⁴Iamo' amung su inan sembayang inan akang nateh tila'neh. Iamo' lun mula' maré baré idi ngeseb umau luk do' buen luun ineh.

⁵Idi kareb Amasia lutep bang imetneh, idi ieh nengaté amung lun tarehneh luk nengaté tamanneh.

⁶Iamo' na ieh nengaté anak-anak lun luk nengaté ineh, maya' kudeng bala Tuhan luk pangeh inayud bang Surat Ukum Musa, kebalaneh, "Na taman pitayen ngaceku sala' anakneh idi anak na pitayen ngaceku sala' tamanneh. Iamo' anid-anid lemulun miak pitayen ngaceku sala'neh sebuleng."

⁷Raca' Amasia nengaté 10,000 burur lun Edom déi' Ruan Tucu'. Idi teh ieh nengalap bawang Sela. Idi ieh neneten ngadan bawang ineh Yoktil. Kudeng ineh teh ngadanneh macing aco sini.

⁸Idi Raca' Amasia nengecuk tuda'-tuda' lun duken amé' ni Yoas raca' Israil, kebalaneh, "Do' kiteh pebunu'."

⁹Iamo' Raca' Yoas nengecuk nelun duken pebala ni Amasia, "Aceh lawa tabpa' luk luun Pegkung Lebanon ineh nemutih kayuh tumuh luk luun Lebanon ineh teh, keputuhneh, 'Maré anakmu ku awan anakku luk deléi.' Iamo' kareb

ineh, idi inan aceh pung luk meliputi luun Lebanon ineh nelemaba idi nengeradu' lawa tabpa' ineh.

¹⁰O Amasia, iko pangeh nengelaya' nelun Edom ineh. Ngaceku ineh niatmu mesido'. Do' iko tudo déi' ruma'mu. Petap uburmu. Ngudeh iko pian ngacing susa' pad iko mebpeh dengan amung lun Yahuda pana'?"

¹¹Iamo' Amasia na sikal ninger. Ngaceku ineh Yoas raca' Israil idi Amasia, raca' Yahuda nepebunu' déi' Bait Semes luk déi' tana' Yahuda ineh.

¹²Idi baweh Amasia linaya'. Idi amung lun pebunu'neh neburo nuli'.

¹³Idi Yoas, nenaban ni Amasia. Idi ieh iné' Yerusalim. Idi ieh nengusag libung bawang Yerusalim rat Tanga' Epraim macing i Tanga' Lidung, ieh ineh malé meratu depeh kadangneh.

¹⁴Idi ieh nengalap amung amas, pirak, idi amung repapeh luk bang Ruma' Allah idi bang ruma' raca', idi teh tuda'-tuda' lun luk tiban ineh. Idi ieh nuli' iné' déi' Samaria.

¹⁵Idi amung kekamen Yoas luk baken idi kuu'neh, idi ratnan lawé bunu'neh dengan Amasia raca' lun Yahuda pangeh inayud bang Surat Kekamen Raca'-Raca' Lun Israil.

¹⁶Idi Yoas naté, idi ieh tinanem bang tanem raca'-raca' déi' Samaria. Anakneh Yerebom mangun ku raca' libalneh.

¹⁷Idi mucu ratnan até Yoas, raca' Israil, idi Amasia raca' Yahuda mulun pulu' limeh lak kinioneh.

¹⁸Idi amung kekamen Amasia luk baken pangeh inayud bang Surat Kekamen Raca'-Raca' Lun Yahuda.

¹⁹Idi ideh nepegayam déi' Yerusalim sikal ngaté ni Amasia. Idi ieh neburo iné' déi' Lakis. Iamo' ideh nengerada' neneh idi nengaté neneh déi'.

²⁰Idi ideh nenguit butungneh maya' kuda. Idi ieh tinanem bang tanem raca'-raca' bang bawang Daud, ieh ineh Yerusalim luk mon.

²¹Idi lun Yahuda nengalap ni Usia luk ulun pulu' anem lak mangun ku raca' libal Amasia tamanneh.

²²Pangeh até Amasia, idi Usia nengalap bawang Elat ineh lemubed. Idi ieh nemudut ineh baruh.

²³Kareb lak luk kepulu' limeh bang imet Amasia Yuas raca' Yahuda, idi Yerebom Yoas mangun ku raca' Israil. Idi ieh nengimet apat ngepulu' aceh lak déi' Samaria.

²⁴Idi ieh nenganau' sala' pa kiung Tuhan. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.

²⁵Idi ieh nengalap amung tana' lun Israil lemubed rat Ruan Hamat pa tinueh busat aco macing Abpa' luk Mepaci' pa kabing busat aco, maya' kudeng luk pijani' Tuhan Allah lun Israil idi luk pangeh bida' demulunNeh Nabi Yunus Amitai rat Gat Eper.

²⁶Tuhan pangeh nenier dereh lun Israil ineh pelaba bura'. Ngaceku seburur pana' nateh luk miak ngedengan nedeh.

²⁷Iamo' na Tuhan pian ngiu' ngadan lun Israil rat liang langit. Iamo' Ieh nengedengan nedeh ineh ku ticu' Raca' Yerebom luk kedueh ineh.

²⁸Idi kekamen Raca' Yerebom luk kedueh luk baken, kuu'neh bang bunu', idi kudeng apeh ieh nengelubed kuan Israil, Damsik idi Hamat pangeh inayud bang Surat Kekamen Raca'-Raca' Lun Israil.

²⁹Idi Yerebom naté idi ieh tinanem bang tanem raca'-raca', idi anakneh Sekaria mangun ku raca' libalneh.

Raca'-Raca' Luk Kedueh 15

¹Kareb lak luk kedueh ngepulu' tudu' bang imet Raca' Yerebom luk kedueh nelun Israil, idi Usia Amasia mangun ku raca' Yahuda.

²Idi ulunneh pulu' anem lak. Idi ieh nengimet limeh ngepulu' dueh lak déi' Yerusalim. Idi tinanneh ineh Yekolia rat Yerusalim.

- ³Idi ieh nenganau' luk matu pa kiung Tuhan, maya' kudeng amung kekamen tamanneh.
- ⁴Iamo' amung su luk inan sembayang inan akang nateh tila'. Idi lun mula' na nugka' maré baré idi ngeseb umau luk do' buen su ineh.
- ⁵Idi Tuhan nengedereh ni Usia ku ét susud, pad macing ieh naté. Ngaceku ineh raca' tudo bang ruma' luk setau'. Idi Yotam anak raca' nengelibal neneh bang amung kekamen ngimet bawang.
- ⁶Idi amung kekamen Usia luk baken pangeh inayud bang Surat Kekamen Raca'-Raca' Lun Yahuda.
- ⁷Idi Usia naté, idi ieh tinanem bang tanem raca'-raca' bang bawang Daud, ieh ineh Yerusalim luk mon. Idi anakneh Yotam mangun ku raca' libalneh.
- ⁸Kareb lak luk keteluh ngepulu' ualuh bang imet Usia nelun Yahuda, idi Sekaria anak Yerebom luk kedueh mangun ku raca' Israil. Idi ieh nengimet anem bulan déi' Samaria.
- ⁹Idi ieh nenganau' sala' pa kiung Tuhan, mepad kudeng raca'-raca' luk atun rat neneh. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.
- ¹⁰Idi Salum Yabis nepegayam sikal mepuit ratnan imetneh. Idi ieh nengaté neneh déi' Ibliam. Idi ieh mangun ku raca' libalneh.
- ¹¹Idi amung kekamen Sekaria luk baken pangeh inayud bang Surat Kekamen Raca'-Raca' Lun Israil.
- ¹²Idi kudeng ineh teh bala Tuhan luk pangeh bida' atun kuan Yihu, kebalaNeh, "Idi anak inulmu miak tudo luun kerusi imet lun Israil macing inul luk keapat."
- ¹³Idi Salum Yabis ineh mangun ku raca' kareb lak luk keteluh ngepulu' iwa' bang imet Usia nelun Yahuda. Idi ieh nengimet sebulan mo' déi' Samaria.
- ¹⁴Idi Menahim Gadi nenalan rat Tirsa iné' Samaria. Idi ieh nengaté ni Salum. Idi ieh mangun ku raca' libalneh.

- ¹⁵Idi amung kekamen Salum luk baken idi gayam luk inau'neh pangeh inayud bang Surat Kekamen Raca'-Raca' Lun Israil.
- ¹⁶Idi kareb Menahim nenalan rat Tirsa, idi ieh nengusag bawang Tapua. Idi ieh nengaté amung lun bang bawang ineh, ngaceku ideh na nengukab tanga' bawang kuanneh. Idi ieh nengibpu' batek decur luk mali' pana'.
- ¹⁷Kareb lak luk keteluh ngepulu' iwa' bang imet Usia nelun Yahuda, idi Menahim Gadi mangun ku raca' lun Israil. Idi ieh nengimet pulu' lak déi' Samaria.
- ¹⁸Idi ieh nenganau' sala' pa kiung Tuhan seruked ulunneh. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.
- ¹⁹Idi bang kareb ineh Tiglat Piliser, raca' Asur, iné munu' bawang Israil. Idi Menahim nemaré 3,000,000 balad pirak neneh, pelé ieh ngedengan neneh ngelestep imetneh nelun Israil.
- ²⁰Menahim nengalap usin rat nelun Israil, ieh ineh ratnan anid-anid burur lun do' limeh ngepulu' balad pirak. Idi Tiglat Piliser ineh nuli'.
- ²¹Idi amung kekamen Menahim luk baken pangeh inayud bang Surat Kekamen Raca'-Raca' Lun Israil.
- ²²Idi ieh naté idi ieh tinanem. Idi anakneh Pekaya mangun ku raca' libalneh.
- ²³Kareb lak luk kelimeh ngepulu' bang imet Usia nelun Yahuda, idi Pekaya Menahim mangun ku raca' lun Israil. Idi ieh nengimet dueh lak déi' Samaria.
- ²⁴Idi ieh nenganau' sala' pa kiung Tuhan. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.
- ²⁵Idi Peka Remalia, seburur lun rayeh baweh raca' nenganau' aceh gayam dengan limeh ngepulu' burur lun Giliad. Idi ideh nengaté neneh bang takep ruma' raca' déi' Samaria. Idi Peka mangun ku raca' libalneh.
- ²⁶Idi amung kekamen Pekaya luk baken pangeh inayud bang Surat Kekamen Raca'-Raca' Lun Israil

²⁷Kareb lak luk kelimeh ngepulu' dueh bang imet Usia nelun Yahuda, idi Raca' Peka Remalia mangun ku raca' Israil. Idi ieh nengimet dueh ngepulu' lak déi' Samaria.

²⁸Idi ieh nenganau' sala' pa kiung Tuhan. Idi ieh nemaya' amung sala' Yerebom Nibat luk pangeh nenguit nelun Israil nganau' sala'.

²⁹Idi kareb Peka ngimet nelun Israil, Tiglat Piliser raca' Asur iné' ngaro bawang Iyon, Abel Bait Maka, Yanua, Kedes, idi Hasor, idi teh babpat Giliad, Galilia, idi Naptali. Ieh nenaban amung lun luk bang bawang ineh iné' déi' Asur.

³⁰Bang lak luk kedueh ngepulu' kareb imet Yotam Usia raca' Yahuda, idi Hosia Ela nenganau' aceh gayam sikal mepuit ratnan imet Peka. Idi ieh nengaté neneh. Idi ieh mangun ku raca' libalneh.

³¹Idi amung kekamen Raca' Peka luk baken pangeh inayud bang Surat Kekamen Raca'-Raca' Lun Israil.

³²Kareb lak luk kedueh bang imet Peka Remalia nelun Israil, idi Yotam Usia mangun ku raca' lun Yahuda.

³³Idi ulunneh dueh ngepulu' limeh lak. Idi ieh nengimet pulu' anem lak déi' Yerusalim. Idi ngadan tinan raca' ineh Yerusa Saduk.

³⁴Idi Yotam nenganau' luk matu pa kiung Tuhan, mepad kudeng luk inau' Usia tamanneh.

³⁵Iamo' amung su luk inan sembayang inan akang nateh tila'neh. Idi lun mula' na nugka' maré baré idi ngeseb umau luk do' buen su ineh. Idi Yotam nenganau' Tanga' Pa Tinueh Busat Aco bang Ruma' Allah.

³⁶Idi amung kekamen Raca' Yotam luk baken pangeh inayud bang Surat Kekamen Raca'-Raca' Lun Yahuda.

³⁷Idi bang kareb ineh Tuhan nengimun ngecuk Resin raca' Siria idi Peka Remalia amé' bawang Yahuda.

³⁸Idi Yotam naté. Idi ieh tinanem bang tanem raca'-raca' bang bawang Daud, ieh ineh Yerusalim luk mon. Idi anakneh Akas mangun ku raca' libalneh.

Raca'-Raca' Luk Kedueh 16

¹Kareb lak luk kepulu' tudu' bang imet Peka Remalia idi Akas Yotam mangun ku raca' Yahuda.

²Idi ulun Akas dueh ngepulu' lak. Idi ieh nengimet pulu' anem lak déi' Yersalim. Idi na ieh nenganau' luk matu pa kiung Tuhan Allahneh, mepad kudeng tepunneh Daud.

³Idi ieh nemaya' amung lawé raca'-raca' Israil. Idi teh ieh nemaré anakneh ku baré sabpen kuan akang, maya' kekamen luk dat luk pangeh inau' amung pupu baken luk pangeh inusu Tuhan ratnan babpatdeh pa kiung lun Israil.

⁴Idi teh ieh nemaré baré idi nengeseb umau luk do' buen luun su luk inan sembayang idi surud, idi liang amung lawa kayuh.

⁵Resin raca' Siria idi Peka raca' Israil iné' munu' bawang Yerusalim. Idi ideh nengelibut bawang ineh, iamo' na ideh miak ngelaya' ni Akas.

(⁶Idi bang kareb ineh raca' Edom nengalap bawang Elat lemubed. Idi ieh nengusu nelun Yahuda luk tudo su ineh. Idi lun Edom iné' tebawang déi', idi ideh tudo déi' Elat macing aco sini.)

⁷Idi Akas nengecuk tuda'-tuda' lun duken amé' matun Tiglat Piliser raca' Asur, kebalaneh, "Ui ini demulunmu idi anakmu. Do' iko amé' muit negku rat bang palad raca' Siria, idi raca' Israil luk munu' negku."

⁸Idi Akas nengalap amung amas idi pirak luk ilap bang Ruma' Allah idi binaweh luk do' bang ruma' raca', idi nemaré ineh kuan raca' Asur ineh.

⁹Idi Tiglat Piliser nemaya' putuh Akas ineh. Idi ieh negugkang iné' ngaro bawang Damsik. Idi ieh nenaban nelun bang bawang ineh amé' déi' Kir. Idi ieh nengaté Raca' Resin.

¹⁰Kareb Raca' Akas iné' Damsik papu' Raca' Tiglat Piliser, idi ieh nenier aceh bubpun. Idi ieh nemaré aceh pudut luk mepad ayu kudeng bubpun ineh dengan ayu repapehneh, kuan Imam Uria.

¹¹Idi Uria nemudut aceh bubpun mepad kudeng ineh, kareb nateh Akas nuli'.

¹²Kareb ieh pangeh nuli' rat Damsik idi Akas nenier bubpun ineh, idi ieh iné' muneng ku bubpun ineh luk pangeh pinudut.

¹³Idi ieh nengeseb baré luk sabpen idi baré akan luun ineh. Idi ieh nengutang baréneh luk rupen. Idi ieh nengisak dara' luk nguit pedo' luun bubpun ineh.

¹⁴Idi bubpun tekaling luk linigan kuan Tuhan ineh binubuhneh mado rat ku ruma' ineh, rat arang bubpunneh dengan Ruma' Allah. Idi ieh nengerareng ineh iring bubpun ineh pa tinueh busat aco.

¹⁵Idi kebalaneh ni Uria, "Luun bubpun rayeh ineh, do' ngeseb baré luk sabpen pekak, idi baré luk kenen malem, idi baré raca' luk sabpen, idi baré raca' luk kenen, dengan baré luk sabpen idi baré luk kenen amung lun bang bawang, idi amung barédeh luk rupen ineh. Idi ngisak dara' baré luk sabpen, idi dara' baré luk kereten luun amung ineh. Iamo' bubpun tekaling, ieh ineh su luk inanku ngelio."

¹⁶Idi Imam Uria nenganau' amung ineh maya' bada' Raca' Akas.

¹⁷Raca' Akas nenangal belipid luk libut-libut amung raken ineh idi nengalap amung su luk inan maru' rat pa luunneh. Idi takung ineh pana' icukneh bebuen rat luun sapi' tekaling luk pa liangneh, idi ieh nengerareng ineh luun apin batu.

¹⁸Idi su luk inan raca' tudo, idi tanga' raca' binubuhneh ratnan Ruma' Allah, maya' pian raca' Asur ineh.

¹⁹Idi amung kekamen Raca' Akas luk baken pangeh inayud bang Surat Kekamen Raca'-Raca' Lun Yahuda.

²⁰Idi Akas naté. Idi ieh tinanem bang tanem raca'-raca' bang bawang Daud, ieh ineh Yerusalim luk mon. Idi anakneh Hesehia mangun ku raca' libalneh.

Raca'-Raca' Luk Kedueh 17

¹Kareb lak luk kepulu' dueh bang imet Akas nelun Yahuda, idi Hosia Ela mangun ku raca' lun Israil. Idi ieh nengimet iwa' lak déi' Samaria.

²Idi ieh nenganau' sala' pa kiung Tuhan, iamo' baken mepad kudeng amung raca' lun Israil luk atun rat neneh.

³Idi Salmaniser raca' Asur iné' munu' neneh. Idi Hosia nepedo' neneh. Idi ieh nemaré pupuk neneh.

⁴Iamo' bang aceh lak Hosia nengecuk nelun dukenneh amé' mutuh pedengan rat ni So raca' Masir. Idi na ieh nemaré pupuk kuan raca' Asur kudeng luk pekalai bang anid-anid lak. Idi ngaceku ineh Salmaniser nengakem ni Hosia idi nenutup neneh.

⁵Idi Salmaniser nengerieng bawang Israil, macing Samaria. Idi ieh nengelikut Samaria teluh lak kinioneh.

⁶Idi kareb lak luk keiwa' bang imet Hosia, idi raca' Asur nengelaya' bawang Samaria. Ieh nenaban nelun Israil ineh amé' bawang Asur. Idi ieh nengecuk nedeh tudo déi' Hala, idi i tangeb Abpa' Habor, déi' Gosan, idi bang bawang-bawang Midia.

⁷Samaria netabpa ngaceku lun Israil pangeh nenganau' sala' inan Tuhan Allahdeh, luk pangeh nemuit nedeh rat bang palad raca' Masir, idi luk pangeh nenguit nedeh remuat rat bang bawang Masir ineh. Idi ideh pangeh nesembayang inan allah baken.

⁸Ideh nemaya' lawé lun luk na manu luk pangeh inusu Tuhan rat pa kiung lun Israil, idi lawé raca'-raca' lun Israil.

⁹Idi lun Israil nelulem nganau' kekamen luk dat pa kiung Tuhan Allahdeh. Idi ideh nemudut su luk inan sembayang inan akang bang amung bawang luk isuut idi luk rayeh pana'.

¹⁰Idi ideh nemudut ulung idi akang Asera luun amung surud, idi liang amung lawa kayuh.

¹¹Idi ideh nengeseb umau luk do' buen luun amung bubpun akang maya' kudeng luk inau' amung lun luk na manu luk pangeh inusu Tuhan rat pa kiungdeh ineh. Idi ideh nenganau' kekamen luk dat pad Tuhan museh nedeh.

¹²Idi ideh nesembayang inan akang luk bibpeng Tuhan.

¹³Iamo' Tuhan pangeh nengecuk nelun dukenNeh idi nabi-nabi, mada' nelun Israil idi lun Yahuda, kebalaNeh, "Uren muyuh ratnan kekamen muyuh luk dat ineh, idi nginita amung balaKu maya' amung ukum luk bida'Ku kuan tepun muyuh idi luk pangeh icingKu nemuyuh teh dengan bada' amung lun dukenKu, ieh ineh amung-amung nabi.

¹⁴Iamo' na ideh sikal ninger. Ideh metueh niat mepad kudeng amung tepundeuh luk na manu inan Tuhan Allahdeh.

¹⁵Idi na ideh nemaya' balaNeh idi ideh nengedat pejani' luk pangeh inau' Tuhan kuan tepundeuh ineh, idi amung bada' luk pangeh icing nedeh ineh idi ideh nemaya' akang luk na ulek, pad ideh pana' na ulek teh. Idi ideh nemaya' lawé amung pupu luk tudo libut-libutdeh ineh, ieh ineh luk bibpeng Tuhan na miak ruen.

¹⁶Ideh nengelaba amung ukum Tuhan Allahdeh, pad ideh nenganau' akang luk inurai, ieh ineh dueh sapi' déléi. Idi teh ideh nenganau' aceh akang Asera. Idi ideh netekeradung sembayang inan gituen, idi ideh nesembayang inan Baal teh.

¹⁷Idi ideh nemaré anakdeh luk deléi idi decur ku baré sabpen kuan allah baken. Idi ideh nemakai bangun idi nengitun ada'. Idi ideh nenganau luk dat pa kiung Tuhan, dengan abud tuehdeh pad Ieh museh nedeh.

¹⁸ Tuhan pelaba gateh nelun Israil, pad Ieh nemubuh nedeh rat pa kiungNeh. Na luk neketecan peh, iamo' inul Yahuda mo' sebuleng.

¹⁹Idi lun Yahuda pana' na nginita bala Tuhan Allahdeh. Iamo' ideh nemaya' lawé-lawé lun Israil.

²⁰Idi Tuhan nenala' amung inul Israil. Idi Ieh nengedereh nedeh idi nemaré nedeh bang palad lun luk ngaro bawang, pad ideh pangeh tila' rat pa kiungNeh.

²¹Pangeh Tuhan nengatad nelun Israil rat bang ruma' Daud, idi lun Israil nengikit Yerebom Nibat mangun ku raca'. Idi Yerebom nenguit nelun Israil neraruh ratnan Tuhan. Idi ieh nenguit nedeh nganau' sala' luk pelaba dat.

²²Ideh nemaya' amung sala' Yerebom, idi na nugka' ratnan ineh,

²³pad Tuhan nemubuh nelun Israil rat pa kiungNeh, petulu ku amung bala luk pangeh bida'Neh atun dengan tang amung lun dukenNeh, ieh ineh nabi-nabi'. Idi lun Israil pana' tiban rat bang bawang-bawangdeh iné' bang bawang Asur macing aco sini.

²⁴Raca' Asur ineh nemubuh nelun rat Babil, Kut, Iwa, Hamat, idi Sepawaim. Ieh nengecuk nedeh tudo bang amung bawang Samaria ku libal amung lun Israil. Idi ideh nengalap bawang Samaria ineh ku babpatdeh. Idi ideh netudo aput bawang ineh.

²⁵Idi kareb ideh pun tudo déi' idi na ideh matot inan Tuhan, idi Tuhan nengecuk tuda'-tuda' balang amé' nedeh luk nengaté tuda'-tuda' rat arangdeh.

²⁶Idi kebaladeh inan raca' Asur, "Idi amung pupu luk pangeh pinura'mu tudo bang bawang Samaria na kali' ukum Allah bawang ineh. Ngaceku ineh Ieh nengecuk tuda'-tuda' balang amé' ngaté nedeh."

²⁷Idi kebala raca' Asur, "Ngecuk seburur rat arang amung imam luk pangeh inuit muyuh rat déi', pelé ieh amé' tudo déi' idi mada' nedeh ratnan ukum Allah bawang ineh."

²⁸Idi seburur imam rat nelun Israil luk pangeh inuitdeh rat bawang Samaria iné' tudo déi' Baitel. Idi ieh nemada' pupu ineh ratnan lawé sembayang inan Tuhan.

²⁹Iamo' anid-anid pupu luk tudo déi' Samaria ineh na ugka' nganau' akangdeh, idi ideh nenganau' nedeh bang su luk inan sembayang inan akang

luk pinudut lun Israil. Anid babpatdeh nenganau' akang bang bawang-bawang luk inandeh tudo ineh.

³⁰Idi lun luk rat Babil nemudut akang-akang Sukot Benot, idi lun luk rat Kut nemudut akang-akang Nergal. Idi lun luk rat Hamat nemudut akang-akang Asima.

³¹Idi lun Iwa nemudut akang-akang Nibas idi Tartak. Idi lun Sepawaim nemaré anakdeh ku baré luk sabpen kuan akang-akang Adramalek idi Anamelek.

³²Idi teh ideh nesembayang inan Tuhan. Idi ratnan anid-anid babpatdeh ideh nengikit tuda'-tuda' imam luk nengakem déi' su luk inan sembayang inan akang ineh, pad ideh maré baré su ineh.

³³Ideh nesembayang inan Tuhan, iamo' ideh na ugka' sembayang inan akangdeh, maya' kudeng luk inau' amung pupu bang bawang luk inandeh atun.

³⁴Idi macing aco sini teh ideh maya' lawédeh luk atun. Ideh na matot inan Tuhan, idi na ideh maya' ukum idi bala luk pangeh icing Tuhan kuan amung inul Yakub luk titenNeh Israil.

³⁵Tuhan pangeh nepejani' nedeh, kebalaNeh, "Aleg muyuh sembayang inan allah baken. Idi aleg muyuh tekeradung pa kiungdeh. Idi aleg muyuh ngakem kuandeh. Idi aleg muyuh maré baré kuandeh.

³⁶Do' muyuh matot Negku, ieh ineh Tuhan luk nenguit nemuyuh remuat rat bang bawang Masir dengan lalud luk rayeh idi tuehKu. Do' muyuh tekeradung pa kiungKu. Idi do' muyuh maré baré Negku.

³⁷Do' muyuh nginita amung ukum idi bala luk pangeh inayudKu kuan muyuh. Idi aleg muyuh sembayang inan allah baken,

³⁸idi aleg muyuh mekelupan pejani' luk pangeh bida'Ku nemuyuh.

³⁹Do' muyuh matot Negku, ieh ineh Tuhan Allah muyuh. Idi Ui miak muit nemuyuh ratnan bunu' muyuh."

⁴⁰Iamo' na ideh neninger, iamo' ideh nemaya' lawédeh luk atun ineh.

⁴¹Idi amung pupu ineh nesembayang inan Tuhan, iamo' ideh sembayang inan akangdeh teh. Kudeng ineh teh amung anak inuldeh pana'.

Raca'-Raca' Luk Kedueh 18

¹Kareb lak luk keteluh bang imet Hosia Ela raca' Israil, idi Hesehia Akas mangun ku raca' lun Yahuda.

²Idi ulunneh kareb ieh mangun ku raca' dueh ngepulu' limeh lak. Idi ieh nengimet dueh ngepulu' iwa' lak déi' Yerusalim. Idi ngadan tinanneh ineh Abia seburur anak Sekaria.

³Idi ieh nenganau' luk matu pa kiung Tuhan, maya' kudeng luk inau' tepunneh Raca' Daud.

⁴Idi ieh nenala' amung su luk inan sembayang inan akang. Idi ieh nemila' amung akang batu. Idi ieh nengusag amung ulung luk inau' kuan akang Asera. Idi ieh nengusag menipeh tekaling luk inau' Musa ineh. Ngaceku macing aco sineh lun Israil nengeseb umau luk do' buen kuanneh. Idi ideh neneten ngadanneh Nehustan.

⁵Idi Raca' Hesehia manu inan Tuhan Allah lun Israil, pad seburur pana' nateh mepad neneh rat arang amung raca' lun Yahuda luk atun idi luk mucu pana'.

⁶Ngaceku ieh lutep inan Tuhan idi na nengelaba balaNeh. Iamo' ieh nemaya' amung ukum luk bida' Tuhan ni Musa.

⁷Idi Tuhan nengedengan neneh, pad ieh uen ngeperuan bang anun-anun luk ruenneh. Idi ieh nepuit ratnan imet raca' Asur, ngaceku ieh na pian pa liangneh.

⁸Idi ieh nengelaya' nelun Pilistin idi nengaro bawangdeh luk isuut idi luk rayeh pana', macing déi' Gasa idi bawang luk libut-libutneh.

⁹Kareb lak luk keempat bang imet Hesehia, ieh ineh lak luk ketudu' bang imet Hosia Ela nelun Israil, idi Salmaniser raca' Asur iné' ngerieng bawang Israil. Idi ideh nengelibut Samaria.

¹⁰Idi ieh nengelaya' nedeh udung lak luk keteluh, ieh ineh kareb lak luk keanem bang imet Hesehia, idi lak luk keiwa' bang imet Hosia.

¹¹Idi raca' Asur nenaban nelun Israil amé' bawang Asur. Idi ieh nengecuk nedeh tudo déi' Hala, idi tangeb Abpa' Habor déi' Gosa, idi bang bawang-bawang Midia.

¹²Samaria linaya' ngaceku lun Israil na nemaya' bala Tuhan Allahdeh. Iamo' ideh nengelaba pejani'Neh, meluun teh amung-amung luk pangeh bida' Musa, demulun Tuhan ineh. Na ideh sikal ninger. Idi na ideh sikal maya' ineh.

¹³Kareb lak luk kepulu' apat bang imet Hesehia, idi Senakerib raca' Asur iné' munu' amung bawang lun Yahuda luk meraben libung, idi ieh nengelaya' nedeh.

¹⁴Idi Hesehia nemaré bala ni Senakerib déi' Lakis, kebalaneh, "Ui pangeh nenganau' sala'. Do' iko buro rat negku. Idi anun luk iko pian mutuh rat negku, ineh barénku." Idi raca' Asur nemutuh ni Hesehia maré 900,000 balad pirak idi 90,000 balad amas.

¹⁵Idi Hesehia nemaré amung pirak luk bang Ruma' Allah idi bang su luk inan nganug binaweh bang ruma' raca' pana' neneh.

¹⁶Idi ieh nenangal amung amas rat munung tanga' Ruma' Allah, idi ratnan dirineh luk pangeh kikepneh sebuleng, idi ieh nemaré ineh ni Senakerib.

¹⁷Idi raca' Asur nengecuk aceh baweh rayeh rat Lakis amé' munu' Hesehia déi' Yerusalim. Idi baweh ineh pa liang imet teluh lun pebunu' luk meluun rayeh. Kareb ideh macing déi' Yerusalim, idi ideh nugka' muneng ku abang abpa' luk dalam ratnan takung luk medita' luk iring dalam rayeh su luk inan lun mileh nganau' kibung.

¹⁸Ideh nenawar Raca' Hesehia, idi teluh burur lun tarehneh iné' papu' nedeh, ieh ineh Eliakim Hilkia, lun luk ngasa' ruma' raca', Sebna, lun luk ngayud kuan raca', idi Yua Asap lun luk ngimet usin.

¹⁹Idi kebala seburur lun rayeh rat Asur ineh nedeh, "Raca' Asur ngitun anun punneh Raca' Hesehia pelaba rapet."

²⁰Idi teh kebalaneh, "Matuké iko ngerawé balamu miak ngelibal ileh idi kuu' bang bunu'? Idéké inanmu merapet miak ngedengan namu' pad iko metueh rat negku?

²¹Iko merapet inan rukud bulu' luk neputul, ieh ineh bawang Masir luk miak nebpek ticu' idé' luk pucang neneh. Kudeng ineh teh raca' Masir kuan amung lemulun luk merapet neneh."

²²Idi teh kebalaneh, "Matuké muyuh pebala negku, 'Idi kai manu inan Tuhan Allah kai?' Iamo' Heskia pangeh nengusag amung su luk inan sembayang, idi bubpun Tuhan. Idi ieh nengecuk nelun Yahuda idi lun bang bawang Yerusalim sembayang pa atun bubpun ini déi' Yerusalim?

²³O Heskia, amé' iko nekini petaan inan raca'ku, idi ui sikal maré namu 2,000 kuda, kudeng iko miak nakap nelun luk maya' ineh.

²⁴Iko na miak uen maad dengan seburur lun Asur luk mebeneh kekamen pana'. Iamo' iko merapet ku keréta Masir idi lun luk maya' kuda.

²⁵Matuké iko ngerawé ui ngusag bawang ini dengan na kali' Tuhan? Ngaceku kebala Tuhan negku, 'Amé' iko munu' bawang ineh idi ngusag ineh.' "

²⁶Idi kebala Eliakim, Sebna, idi Yua kuan lun rayeh Asur ineh, "Do' iko pebala nekai ini dengan bala Arami. Ngaceku kai kali' ilung bala ineh. Aleg iko pebala-pebala nekai dengan bala Iberani, pedingeren lun mula' luk luun libung ini."

²⁷Iamo' kebalaneh nedeh, "Raca'ku na nengecuk negku ngacing amung bala ini inan tuanmu idi namu mo', iamo' kuan amung lun luk tudo luun libung teh. Ngaceku mucu ideh miak kuman téi'deh idi ngirup babpa'deh mepad kudeng muyuh."

²⁸Idi ieh netuped ngitang dengan bala Iberani, "Ninger muyuh bala raca' bawang Asur luk meluun rayeh.

²⁹Kebala raca' 'Aleg muyuh saluken Heskia. Ngaceku na ieh miak muit nemuyuh rat bang paladku.

³⁰Idi teh aleg muyuh bukenneh, pad muyuh merapet inan Tuhan. Aleg ngerawé Tuhan miak muit nemuyuh, pad raca' Asur na ngalap bawang muyuh.'

³¹Aleg muyuh ninger bala Hesehia ineh. Ngaceku raca' Asur ngecuk nemuyuh remuat rat bang bawang muyuh idi pedo'. Idi muyuh miak kuman bua' anggur, idi bua' gita' muyuh, idi ngirup abpa' rat bang subuk muyuh,

³²pad macing raca' nguit nemuyuh amé' inan aceh bawang luk mepad kudeng bawang muyuh ini, ieh ineh aceh bawang luk mula' padé idi abpa' anggur, aceh bawang luk mula' ruti, idi kabun anggur, idi duru', aceh bawang luk mula' saitun idi umau saitun. Kudeng muyuh maya' balaneh, idi muyuh na maté. Aleg muyuh saluken Hesehia, pad muyuh ngerawé Tuhan miak muit nemuyuh.

³³Inanké allah pupu baken luk pangeh muit bawangdeh rat bang palad raca' bawang Asur?

³⁴Iapehké allah lun Hamat idi Arpad? Iapehké allah lun Sepawaim, Hina, idi Iwa? Pangehké allah ineh nemuit bawang Samaria rat bang paladku?

³⁵Idéké rat arang allah bawang ineh pangeh nemuit bawangdeh rat bang paladku? Anun punneh muyuh ngerawé Tuhan miak muit Yerusalim rat bang paladku ini?"

³⁶Idi amung anak itin ineh pirud maya' kudeng luk bila Raca' Hesehia. Sebila' bala nateh inordeh neneh.

³⁷Idi Eliakim Sebna, idi Yua nenarak ayungdeh, idi ideh iné' matun Raca' Hesehia idi nemada' neneh ratnan amung bala lun rayeh Asur ineh.

Raca'-Raca' Luk Kedueh 19

¹Kareb Raca' Hesehia neninger baladeh, idi ieh nengerarak ayungneh ku susa' niatneh. Idi ieh nenacung idi iné' bang Ruma' Allah.

²Idi ieh nengecuk ni Eliakim lun rayeh luk ngasa' ruma' raca' idi Sebna lun luk ngayud kuan raca', idi imam-imam luk mengered amé' papu' Nabi Yesaya Amos. Ideh pana' nenacung.

³Kebaladeh ni Yesaya, "Kudeng ini bala Hesehia, Aco sini, ieh neh aco dereh' tau bida' idi inigu'. Tau mepad kudeng decur luk malé nenganak, iamo' ieh pelaba laya', pad anak na mebpeh.

⁴Raca' Asur pangeh nengecuk lun rayehneh amé' ngedat Allah luk mulun. Do' Tuhan Allahmu ninger bala luk dat ini, idi ngukum lemulun luk nepebala kudeng ineh. Do' iko sembayang nan Allah mutuh kuan pupu tau luk ketecan."

⁵Kareb Yesaya nekali' bala Raca' Hesehia,

⁶idi ieh nengelubed bala ineh, "Kudeng ini bala Tuhan: Aleg muyuh megagau ku bala lun Asur luk nengedat Negku.

⁷Ui miak nganau' raca' ninger aceh bala, pelé ieh muli' idi pitayen bang bawangneh sebuleng."

⁸Kareb lun rayeh Asur ineh neninger bala ratnan raca' Asur pangeh nenalan rat Lakis idi pebunu' muneng ku bawang Libna, idi ieh iné' ngitun neneh.

⁹Ngaceku raca' Asur neninger bala ratnan Tirhaka raca' Sudan luk amé' pebunu' neneh. Idi kareb ieh neninger bala ineh, idi ieh nemarké aceh surat kuan Hesehia, kebalaneh,

¹⁰"Allah luk inan Hesehia raca' Yahuda merapet nepejani' na maré Yerusalim bang palad raca' Asur. Iamo' aleg iko saluken ku bala ineh.

¹¹Iko pangeh neninger luk inau' raca' Asur kuan amung bawang luk pian uenneh ngusag. Miakké iko mepuit?

¹²Tepunku nengusag bawang Gosan, Haran, idi Resep idi nengaté nelun Baiteden luk tudo déi' Telasar, idi seburur pana' rat arang allahdeh nateh luk miak ngulun nedeh.

¹³Iapehké raca'-raca' Hamat, Arpad, Sepawaim, Hina, idi Iwa?"

- ¹⁴Raca' Hesehia nengalap surat rat nelun duken ineh idi nemaca' ineh. Idi ieh iné' bang Ruma' Allah. Idi ieh nengerareng surat ineh pa kiung Tuhan,
- ¹⁵kesembayangneh, "O Tuhan luk Melalud, Allah lun Israil luk tudo luun kerusiMu. Iko mo' Allah luk matu. Idi Iko luk pa luun amung imet bang tana' ini. Iko luk nemudut tana' idi langit.
- ¹⁶O Tuhan, nier nekai idi ninger bala kai. Ninger amung luk belén Senakerib raca' Asur luk ngedat Namu, ieh ineh Allah luk Mulun.
- ¹⁷O Tuhan, kai kali' raca' Asur pangeh nengusag mula' imet, pad bawangdeh mangun ku su luk ali-ali.
- ¹⁸Idi ideh nengeseb akangdeh luk baken allah luk matu, iamo' amung ineh pinudut lemulun ratnan kayuh idi batu.
- ¹⁹O Tuhan Allah kai, muiit nekai rat nelun Asur, pelé amung raca' aput tana' kali' Iko mo' Allah luk matu."
- ²⁰Idi lun duken Yesaya nenated bala kuan Raca' Hesehia, ratnan or Tuhan kuan sembayangneh.
- ²¹Kebala Tuhan, "O Senakerib! Bawang Yerusalim meriruh idi situnga namu.
- ²²Idéké lun luk inanmu nesitunga idi luk inau'mu ngedat? Iko nengedat Negku, ieh ineh Allah Israil luk Meligan.
- ²³Iko nengecuk lun dukenmu nguto Negku, kebalamu, 'Dengan amung kerétaku, ui nuké pegkung luk medita; pad macing punang arur déi' Lebanon, idi ui nenebpeng amung tumuh luk medita' idi amung tongor luk meluun do'. Idi ui pangeh nacing bang pulung kara luk mado.
- ²⁴Ui pangeh nengukat subuk idi nengirup abpa' bang bawang baken. Bawehku pangeh nengeket amung abpa' Masir ku dapardeh.'
- ²⁵"Naké iko kali', Ui pangeh nengelelep amung ini rat mon. Idi nekini Ui pangeh nengacing amung ineh. Ui luk nemaré lalud namu, pad iko nenabpa amung libung bawang luk meraben, pelé bawang ineh mangun ku tuda'-tuda' bubpun batu mo'.

²⁶Idi amung lun bang bawang ineh melaya' peh pad ideh negagap idi migu' teh. Ideh mepad kudeng luk tinibu nan lati' idi teh kudeng uduh luk mulun luun apo, luk nelayuh ku bui luk melau' rat pa busat aco.

²⁷"Ui kali' kareb iko tumui idi kareb iko tudo' kareb iko remuat, idi kareb iko semuet. Idi teh Ui kali' gateh niatmu Negku.

²⁸Ui kali' gateh niat idi dita' niatmu Negku. Ngaceku ineh Ui miak nganau' kinar luun icungmu, idi belawan bang tangmu. Idi Ui nated namu lemubed maya' dalam luk nedalanmu iné' tungé' atun."

²⁹Idi kebala Yesaya nan Raca' Heskia, "Ini aceh tanu' ratnan luk miak mangun. Bang lak ini idi lak baruh muyuh miak kuman bua' atab tibu muyuh idi anun-anun luk mulun mo'-mo'. Iamo' bang lak sedéi' bang lak luk kedueh, muyuh miak nibu padé idi ngeranih, idi nibu anggur, idi kuman bua'deh.

³⁰Ngaceku lun pupu Yahuda luk neketecan ineh miak inan uat pa liang tana', pad ideh ngeruat bua' luk do'.

³¹Rat Yerusalim idi rat Pegkung Sion inan teh lun luk ketecan ngaceku Tuhan luk Melalud miak nganau' ineh."

³²Kudeng ini bala Tuhan ratnan raca' Asur ineh: "Na tu-tu ieh miak semuet bang bawang ini, idi ngelatik sebuleng ileb binorneh pana'. Idi na ieh miak ngerieng bawang ineh ku utap. Idi na ieh miak nganau' aceh dalam umak amé' luun libung batu ineh.

³³Idi teh ieh miak lemubed maya' dalam luk nedalanneh atun. Iamo' na ieh miak semuet bang bawang ini. Ui ini Tuhan pangeh nepebala.

³⁴Ui miak ngelibung idi matar bawang ini, ngaceku ngadanKu idi ngaceku jani'Ku nan demulunKu Daud.

³⁵Kareb dacem ineh seburur melaikat Tuhan iné' su luk inan baweh Asur nelupo idi nengaté 185,000 lun pebunu'. Kareb masat aco amung butungdeh miak siren lun luun natad.

³⁶Idi Senakerib raca' Asur nebuo idi nuli' iné' Ninewé.

³⁷Bang seaco kareb ieh sembayang bang ruma' akang Nisrok, dueh anakneh Adramalek idi Sariser nengaté neneh. Idi didueh neburo iné' tana' Ararat. Idi anakneh luk baken, ieh ineh Esarhadon mangun ku raca' libalneh.

Raca'-Raca' Luk Kedueh 20

¹Kareb ineh Hesehia mebura' ét lélé maté. Idi Nabi Yesaya Amos iné' neneh, kebalaneh, "Kudeng ini bala Tuhan, Periteteng iko kuan uang tetek ruma'mu, ngaceku iko lélé maté. Ngaceku na ét mini amé' do'."

²Idi Hesehia nesemium pa alad, idi nesembayang mutuh Tuhan, keputuhneh,

³"O Tuhan, do' Iko ngerawé ratnan ui pangeh nenalan pa kiungMu dengan amung do' idi letep niatku. Idi pangeh ui nenganau' luk matu pa kiungMu." Idi ieh pelaba tangi'.

⁴Idi kareb nateh Yesaya neremuat ratnan natad luk uned ineh, denak-denak Tuhan nepebala neneh.

⁵"Do' iko mada' ni Hesehia luk nguyut pupuKu. Kudeng ini bala Tuhan Allah tepun muyuh Daud, Ui neninger sembayangmu. Idi Ui nekali' abpa' matehmu. Idi Ui miak ngedo' namu. Idi kareb aco luk keteluh iko miak umak idi semuet bang Ruma' Allah.

⁶Ui miak ngekadang ulunmu pulu' limeh lak baruh. Idi Ui miak muit namu idi bawang Yerusalim rat bang palad raca' Asur. Idi Ui miak nginita bawang ini, ngaceku ngadanKu idi ngaceku jani'Ku kuan demulunKu Daud."

⁷Idi kebala Yesaya, "Do' muyuh ngalap sengapil bua' gita', idi ngerareng ineh luun kimuh raca', pad ieh do'."

⁸Idi kebala Hesehia, "Anunké tanu' luk ngegala' ratnan Tuhan ngedo' negku, pad aco luk keteluh ui miak umak idi semuet bang Ruma' Allah?"

⁹Idi kebala Yesaya, "Idi ini tanu' luk barén Tuhan namu ratnan Ieh ngacing jani'Neh namu. Sikalké iko aca' ineh amé' pa atun pulu' ngakang, kian lemubed amé' pa puet pulu' ngakang?"

¹⁰Idi kebala Hesehia, "Malé mo' aca' ineh amé' pa atun pulu' ngakang. Aleg nganau' kudeng ineh. Iamo' do' aca' ineh lemubed amé' pa puet pulu' ngakang."

¹¹Idi Nabi Yesaya nesembayang mutuh inan Tuhan. Idi Tuhan nengelubed aca' ineh amé' pa puet pulu' ngakang luun luk ku etu lawé aco luk inau' Akas.

¹²Bang kareb ineh teh Merodak Baladan raca' Babil nemaré surat idi baré kuan Raca' Hesehia, ngaceku ieh nekali' Raca' Hesehia mét.

¹³Idi Hesehia nenganak lun luk duken ineh, idi nemada' sirendeh amung binawehneh, ieh ineh amas, pirak, remumu', umau luk do' buen, idi teh repapeh pebunu'. Idi bang ruma'neh idi bang aput imetneh sebuleng pana' nateh luk na bida' Raca' Hesehia nedeh.

¹⁴Idi Nabi Yesaya iné' ni Raca' Hesehia, idi nengitun neneh, "Anun luk bila lun ini? Idi rat iapeh ideh?" Kebala Hesehia, "Ideh nacing rat bawang luk mado, ieh ineh Babil."

¹⁵Idi kebala Yesaya, "Anun luk sinierdeh bang ruma'mu?" Idi kebala Hesehia, "Ideh pangeh nenier amung luk bang ruma'ku. Sebuleng pana' luk bang amung takepku nateh luk na bida'ku nedeh."

¹⁶Idi kebala Yesaya inan raca', "Do' iko ninger bala Tuhan luk Melalud.

¹⁷Muci aco amung-amung binawehmu idi binaweh tepunmu luk pangeh dinug macing aco sini, ineh miak iten amé' déi' Babil. Sebuleng pana' na miak ketecan.

¹⁸Sebuang inul bururmu sebuleng miak tebanen idi uen mani', pad ideh mangun ku demulun raca' Babil."

¹⁹Idi kebala Raca' Hesehia ni Yesaya, "Matu bala Tuhan luk belénmu ini." Ngaceku terawé raca', "Ngudeh ieh na matu, ngaceku inan do' idi awang raked ulunku?"

²⁰Idi amung kekamen Raca' Hesehia luk baken, idi kuu'neh, idi kudeng apéh ieh pangeh nenganau' takung idi abang abpa', pad nenganau' abpa' ineh amé' bang bawang, pangeh inayud bang Surat Kekamen Raca'-Raca' Lun Yahuda.

²¹Idi Hesehia naté. Idi anakneh Manasé mangun ku raca' libalneh.

Raca'-Raca' Luk Kedueh 21

¹Ulun Manasé kareb ieh mangun ku raca' pulu' dueh lak. Idi ieh nengimet limeh ngepulu' limeh lak déi' Yerusalim. Idi ngadan tinan raca' ineh Hepsiba.

²Idi ieh nenganau' sala' pa kiung Tuhan maya' amung kekamen lun pupu baken luk pelaba dat, luk pangeh inusu Tuhan ratnan babpatdeh rat pa kiung amung lun Israil.

³Manasé nemudut baru amung su luk inan sembayang inan akang luk pangeh inusag Hesehia tamanneh. Idi teh ieh nemudut tuda'-tuda' bubpun Baal. Idi ieh nenganau' ulung teh maya' kudeng luk inau' Akab raca' Israil ineh. Idi Manasé nesembayang inan gituen.

⁴Idi ieh nemudut bubpun allah baken bang Ruma' Allah. Idi ratnan Ruma' ineh Tuhan pangeh nepebala, "Idi déi' Yerusalim inan lun sembayang Negku."

⁵Idi ieh nemudut tuda'-tuda' bubpun pad sembayang nan gituen luun dueh natad Ruma' Allah.

⁶Idi ieh nemaré anakneh ku baré luk sabpen. Idi ieh nemangun makai ubat Sétan, idi nenawar ada', idi nengitun lun luk mileh mangun. Idi ieh nenganau' luk dat pa kiung Tuhan pad Tuhan museh neneh.

⁷Idi teh ieh nengerareng aceh akang Asera bang Ruma' Allah. Ratnan su ineh Tuhan pangeh nepebala ni Daud idi anakneh Selimun, "Ruma'Ku ini déi' Yerusalim luk pangeh pinili'Ku ratnan amung tana' pulu' dueh pupu Israil, mangun ku su luk inan lemulun sembayang Negku.

⁸Idi na Ui miak mubuh nelun Israil ratnan tana' luk pangeh litepKu kuan tepunde, kudeng ideh maya' balaKu idi nginita amung-amung ukum luk biré demulunKu Musa nedeh."

⁹Iamo' lun Yahuda na nemaya' bala Tuhan ineh. Iamo' Manasé nengeraruh nedeh, pad kekamendeh meluun dat ratnan kekamen amung lun pupu baken luk pangeh inusu Tuhan pa kiung amung lun Israil.

¹⁰Idi kebala Tuhan dengan tang amung demulunNeh, ieh ineh nabi-nabi,

¹¹"Raca' Manasé pangeh nenganau' amung kekamen ini luk pelaba dat, idi luk meluun dat ratnan luk inau' lun Amori luk atun rat neneh, idi ieh nenguit nelun Yahuda nganau' sala' maya' akangneh.

¹²Ngaceku ineh, Ui ini Allah lun Israil miak ngacing dereh kuan Yerusalim idi Yahuda, pad amung lemulun luk ninger ineh megagap idi mawa.

¹³Ui miak ngukum Yerusalim mepad kudeng Ui nengukum Samaria, idi mepad kudeng Ui nengukum Akab raca' Israil idi lun bang tetek ruma'neh. Ui miak maru' Yerusalim mepad kudeng lun maru' bigan, idi ngekulub neneh.

¹⁴Idi Ui miak nala' pupuKu luk ketecan idi maré neneh bang palad amung bunu'deh, pad ideh tebanen dengan binawehdeh.

¹⁵Ui miak nganau' luk kudeng ineh kuan pupuKu, ngaceku ideh nenganau' sala' pa kiungKu, pad Ui pelaba useh rat aco tepunde ineh neremuat rat bawang Masir pad macing aco sini."

¹⁶Idi Manasé nengaté mula' lemulun luk na mesala', pad ieh nemanu' aput bawang Yerusalim ku dara'deh. Meluun teh ieh luk nenguit nelun Yahuda nganau' sala' pa kiung Tuhan.

¹⁷Idi amung kekamen Manasé luk baken idi amung sala' luk pangeh inau'neh pangeh inayud bang Surat Kekamen Raca'-Raca' Lun Yahuda.

¹⁸Idi Manasé naté. Idi ieh tinanem bang kabunneh, ieh ineh kabun Usa. Idi anakneh Amon mangun ku raca' libalneh.

¹⁹Ulun Amon kareb ieh mangun ku raca' dueh ngepulu' dueh lak. Idi ieh nengimet dueh lak déi' Yerusalim. Idi tinan raca' ineh Mesulemet Harus rat Yotba.

²⁰Idi ieh nenganau' sala' pa kiung Tuhan, mepad kudeng luk inau' tamanneh Manasé.

²¹Idi ieh nemaya' amung lawé tamanneh, idi ideh nesembayang inan akang luk inan tamanneh nesembayang.

²²Idi ieh nenecan Tuhan Allah amung tepunneh. Idi na ieh nemaya' ukumNeh.

²³Idi amung tareh Amon nepegayam sikal ngaté neneh. Idi ideh nengaté neneh bang ruma' raca'.

²⁴Iamo' lun Yahuda nengaté lemulun luk nengaté Raca' Amon ineh. Idi ideh nengikit anakneh Yosia mangun ku raca' libalneh.

²⁵Idi amung kekamen Amon luk baken pangeh inayud bang Surat Kekamen Raca'-Raca' Lun Yahuda.

²⁶Idi Amon tinanem bang kabun Usa. Idi anakneh Yosia mangun ku raca' libalneh.

Raca'-Raca' Luk Kedueh 22

¹Ulun Yosia kareb ieh mangun ku raca' ualuh lak. Idi ieh nengimet teluh ngepulu' aceh lak déi' Yerusalim. Idi tinanneh ineh Yedida Adaya rat Boskat.

²Idi Yosia nenganau' luk matu pa kiung Tuhan. Idi ieh nemaya' lawé Raca' Daud tepunneh dengan na umai.

³Kareb lak luk kepulu' ualuh bang imetneh, idi Yosia nengecuk ni Sapan Asalia, ieh ineh mupun Mesulam, lun luk ngayud kuan raca' amé' Ruma' Allah, kebalaneh,

⁴"Amé iko ni Hilkia Imam Rayeh idi ngecuk neneh ngiap usin luk pangeh inuit semuet bang Ruma' Allah, luk pangeh imung amung lun luk nginita tanga' ineh rat nelun mula'.

⁵Ngecuk neneh maré usin ineh kuan amung lun luk ngimet kekamen bang Ruma' Allah, pad ieh barén kuan lemulun luk ngedo' Ruma' Allah ineh, ku mayar amung tukang kayuh,

⁶lun luk mileh mudut ruma', idi lun luk mila' batu, idi teh ku melih kayuh idi batu ku ngedo' ruma' ineh.

⁷Idi lemulun luk ngimet kekamen ineh inan merapet. Na sa ngitun ratnan lawé usin ineh.”

⁸Idi Sapan nemada' bala raca' ni Hilkia. Idi Hilkia nemada' neneh ratnan ieh pangeh nekali' Surat Ukum ineh bang Ruma' Allah. Idi Hilkia nemaré surat ineh ni Sapan. Idi Sapan nemaca' ineh.

⁹Idi ieh iné' matun raca'. Idi kebalaneh neneh, "Idi kai ini pangeh nengalap usin luk bang Ruma' Allah, idi ineh pangeh biré kuan lun luk ngimet kekamen ineh.”

¹⁰Idi teh kebala Sapan, "Idi Hilkia pangeh nemaré negku aceh surat." Idi ieh nemaca' surat ineh pa kiung raca'.

¹¹Kareb raca' neninger bala bang Surat Ukum ineh, idi ieh nenarak ayungneh ku dat niatneh.

¹²Idi kebalaneh kuan Hilkia, Sapan, Ahikam Sapan, Akbor Mikaya, idi Asaya lun duken raca',

¹³"Amé' muyuh ngitun Tuhan ratnan bala surat ini kuanku idi kuan lun mula'. Ngaceku Tuhan pelaba useh netau. Ngaceku tepun tau na neninger bala surat ini, idi na nemaya' amung-amung luk pangeh inayud kuan tau.”

¹⁴Hilkia, Sapan, Ahikam, Akbor, idi Asaya iné' matun Nabi decur Hulda luk tudo bang babpat bawang Yerusalim luk mebaruh. (Awan Hulda ineh Salum Tikua luk mupun Harhas luk nginita ayung imam ineh.) Idi ideh nemada' neneh ratnan luk pangeh nangun.

¹⁵Idi Hulda nengecuk nedeh ngacing bala Tuhan ini kuan raca'.

¹⁶"Ui ini Tuhan miak ngukum Yerusalim dengan amung lun luk bang bawang ini teh, maya' kudeng bala luk inayud bang surat luk pangeh bica' raca'.

¹⁷Ideh pangeh nenecan Negku, idi pangeh nemaré baré kuan allah baken, pad Ui pelaba useh nedeh ngaceku kekamendeh, pad ideh nengeruat usehKu ku

amung luk kikemdeh ineh. Ui megateh inan Yerusalim, pad usehKu ineh na miak uen ngagka'.

¹⁸Ui ini Tuhan Allah lun Israil pebala kuan raca': Iko pangeh neninger luk inayud bang surat ineh.

¹⁹Idi iko nuren idi nengebeneh bururmu pa kiungKu dengan nangi' idi nenarak ayungmu, kareb iko neninger amung bala ratnan kudeng apeh Ui ngukum Yerusalim idi amung lun bang bawang ini. Idi Yerusalim miak mangun ku aceh luk inan lun matot idi luk ku kediman. Iamo' Ui pangeh neninger sembayangmu,

²⁰pad iko na miak nier ukum luk uenKu ngacing kuan Yerusalim. Ui nima' namu maté dengan do'." Idi lun luk icuk ineh nengacing bala ini kuan Raca' Yosia.

Raca'-Raca' Luk Kedueh 23

¹Raca' Yosia nenawar amung lun rayeh Yahuda idi Yerusalim.

²Idi ideh pad-pad iné' bang Ruma' Allah dengan amung imam, nabi, idi lun mula' rat Yerusalim, do' lun do' idi lun masi' pana'. Idi raca' nemaca' amung bala Surat Pejani' luk pangeh ilap bang Ruma' Allah ineh pedingeren amungdeh ineh.

³Idi ieh netuped su luk inan raca'-raca' tuped, idi ieh nepejani' pa kiung Tuhan sikal nalan maya' bala Tuhan idi ngimet amung ukumNeh idi balaNeh dengan amung niatneh idi dengan amung terawéneh, idi maya' amung bala jani' luk inayud bang surat ineh. Idi lun mula' nepejani' maya' ineh.

⁴Idi Yosia nengecuk ni Hilkia, Imam Rayeh ineh, idi amung imam baken dengan amung lun luk nginita tanga' ngeruat amung repapeh luk pangeh inau' kuan Baal, akang Asera, idi gituen pana', rat bang Ruma' Allah. Idi raca' nengeseb amung ineh bal selipa Yerusalim déi' Ruan Kidron. Idi abuhneh inuit iné' Baitel.

⁵Idi teh ieh nenala' amung imam luk pangeh kinikit raca'-raca' Yahuda, pad maré baré luun amung bubpun allah baken bang anid-anid bawang Yahuda,

idi déi' Yerusalim pana', idi teh amung imam luk nemaré baré kuan Baal, aco, bulan, idi gituen.

⁶Idi teh ieh nemubuh akang Asera rat bang Ruma' Allah amé' bal alad bawang Yersalim macing Arur Kidron, idi ieh nengeseb akang ineh. Idi ieh nemila' neneh areb-areg. Idi ieh nengisak abuhneh luun tanem lun masi'.

⁷Idi ieh nengusag amung takep lun luk pasét pad-pad deléi luk bang Ruma' Allah, su inan decur pekalai ngebaruh kuan amung akang Asera ineh.

⁸Idi ieh nenguit amé' Yerusalim amung imam ineh luk bang bawang-bawang Yahuda. Idi ieh nengelutak amung bubpun su luk inandeh nemaré baré inan akang rat Giba macing déi' Birsiba. Idi ieh nenabpa amung bubpun ada' amék luk i tanga' luk pinudut Yusak lun rayeh bawang, luk pa kabing kareb semuet tanga' bawang.

⁹Imam-imam ineh na miak ngakem bang Ruma' Allah. Iamo' ideh miak kuman ruti luk na linamud arang amung kinanakdeh luk imam.

¹⁰Raca' Yosia nengusag Topit luk déi' Ruan Hinom, pad seburur pana' na miak maré anak deléi idi anak decurdeh sabpen mangun ku baré kuan akang Molek.

¹¹Idi teh ieh nemubuh amung kuda luk pangeh biré amung raca' Yahuda ku sembayang inan aco, luk munung tanga' Ruma' Allah bal pa takep inan Natan Melik lun luk ngasa' ruma' sembayang inan mateh aco, idi ieh nengeseb amung kerétadeh pana'.

¹²Idi amung bubpun luk luun apo takep Akas, luk pinudut raca'-raca' Yahuda, idi amung bubpun luk pangeh inau' Raca' Manasé luun dueh natad Ruma' Allah ineh pana' tibpa raca', idi binila'neh areg-areg. Idi ieh nengisak abuhneh déi' bang Arur Kidron.

¹³Yosia nengusag amung bubpun luk pinudut Raca' Selimun pa busat aco Yerusalim, idi pa kabing busat aco Pegkung Saitun, su luk inan sembayang inan akang luk pelaba dat, ieh ineh Asterot, akang decur lun Sidon, Kimos akang lun Moab, idi Molek akang lun Amon.

¹⁴Idi Yosia nemila' amung diri akang, idi nenebpeng amung ulung. Idi ieh nemapen su ineh ku tulang lun naté.

¹⁵Idi bubpun luk déi' Baitel, ieh ineh su luk inan sembayang inan akang luk pinudut Yerebom Nibat luk pangeh nenguit nelun Israil nganau' sala', inusag Yosia idi binila' areg-areg. Idi ieh nengeseb ulung ineh luk ku sembayang inan Asera.

¹⁶Kareb Yosia nelumi, idi ieh nenier lengutan luun pegkung ineh. Idi ieh nengecuk nelun amé' ngalap amung tulang rat bang lengutan ineh idi ngeseb ineh luun bubpun ineh, pad ngelutak bubpun ineh maya' kudeng bala Tuhan luk pangeh bida' nabi Allah ineh atun.

¹⁷Idi kebala raca', "Tanem idéké ineh?" Idi kebala lun Baitel ineh neneh, "Idi ineh tanem nabi Allah luk nacing rat Yahuda idi nemada' ratnan amung luk inau'mu luun bubpun ineh."

¹⁸Idi kebala raca', "Nima' neneh. Aleg mubuh tulangneh." Idi na ideh nemubuh tulang nabi ineh, idi tulang nabi luk rat Samaria pana'.

¹⁹Idi Raca' Yosia nengusag amung su luk inan sembayang inan akang apud bawang Samaria luk pinudut raca'-raca' Israil, pad Tuhan pelaba useh nedeh. Yosia nengareg amung bubpundeh ineh mepad kudeng luk inau'neh déi' Baitel.

²⁰Idi ieh nengaté amung imam allah baken luun bubpun su luk inandeh ngakem. Idi ieh nengeseb tulang-tulang lemulun luun anid bubpun ineh. Idi ieh nuli' iné' Yerusalim.

²¹Raca' Yosia nengecuk nelun mula' nginita Aco Paska pad ngerayeh Tuhan Allahdeh, maya' kudeng luk inayud bang Surat Pejani'.

²²Idi na Aco Paska kudeng ini inau' raca'-raca' Israil idi Yahuda rat kareb lun luk nguyut ineh ngimet nedeh.

²³Idi nekini kareb lak luk kepulu' ualuh bang imet Yosia, idi Aco Paska ini rinayeh déi' Yerusalim.

²⁴Idi teh Raca' Yosia nenala' amung lun luk mangun idi luk inan ileh Sétan, idi akang isuut, idi amung akang, idi amung luk inan Tuhan megateh luk nekali' bang bawang Yahuda idi déi' Yerusalim, pad ieh ngelelep amung bala ukum luk inayud bang surat luk ilap Imam Hilkia bang Ruma' Allah.

²⁵Idi raca' luk atun rat neneh pana' na mepad kudeng ieh luk uren inan Tuhan dengan amung niatneh, terawéneh, idi tuehneh, maya' amung Ukum Nabi Musa. Idi mucu rat ni Yosia nateh raca' luk kudeng ieh.

²⁶Iamo' na Tuhan lumi ratnan usehNeh luk mebura'. Ieh megateh nelun Yahuda ngaceku amung dat luk inau' Manasé.

²⁷Idi kebala Tuhan, "Ui miak ngusu nelun Yahuda rat pa kiungKu, mepad kudeng Ui pangeh nengusu nelun Israil. Idi Ui miak necan bawang Yerusalim luk pangeh pinili'Ku idi Ruma' su luk inan lemulun sembayang Negku, maya' kudeng luk bilaKu atun."

²⁸Idi amung kekamen Raca' Yosia luk baken pangeh inayud bang Surat Kekamen Raca'-Raca' Lun Yahuda.

²⁹Idi bang imet Yosia ineh, Neko raca' Masir iné' Abpa' Pirat pian pebunu' inan raca' Asur. Idi Raca' Yosia pana' iné' papu' neneh. Iamo' raca' Masir nengaté neneh déi' Megido kareb didueh pebunu'.

³⁰Idi lun tarehneh nenguit butungneh bang aceh keréta rat Megido amé' Yerusalim. Idi ieh tinanem déi' bang tanem raca'-raca'. Idi lun Yahuda nemili' Yoahas anak Yosia, idi nengumau neneh idi nengikit neneh mangun ku raca' libal tamanneh.

³¹Idi ulun Yoahas kareb ieh mangun ku raca' dueh ngepulu' teluh lak. Idi ieh nengimet teluh bulan déi' Yerusalim. Tinanneh, ieh ineh Hamutal Yeremia rat Libna.

³²Idi ieh nenganau' sala' pa kiung Tuhan, maya' amung kekamen tepunneh.

³³Iamo' Neko raca' Masir nenaban neneh déi' Ribla bang bawang Hamat, pad ieh na ngimet déi' Yerusalim. Idi ieh nengecuk nelun Yahuda ineh maré acam tana' 300,000 balad pirak idi 3,000 balad amas.

³⁴Idi Raca' Neko nengikit Eliakim anak Yosia mangun ku raca' libal Yosia. Idi ieh nengisu' ngadanneh Yoyakim. Pangeh ineh idi ieh nenguit Raca' Yoahas pebaya' neneh amé' déi' Masir. Idi Yoahas naté déi'.

³⁵Raca' Yoyakim nengamung acam ineh rat nelun mula' maya' kinula' binawehdeh, pad inan petap ku mayar luk pinutuh Raca' Masir.

³⁶Ulun Yoyakim kareb ieh mangun ku raca' dueh ngepulu' limeh lak. Idi ieh nengimet pulu' aceh lak déi' Yerusalim. Idi tinanneh ineh Sebida Pedaya rat Ruma.

³⁷Idi Yoyakim nenganau' sala' pa kiung Tuhan maya' amung kekamen tepunneh.

Raca'-Raca' Luk Kedueh 24

¹Kareb imet Yoyakim idi Nebukadnesar raca' Babil nengerieng Yahuda. Idi Yoyakim mangun ku lun dukenneh teluh lak kinioneh. Pangeh ineh idi Yoyakim sikal mepuit ratnan imetneh.

²Idi Tuhan nengecuk baweh lun Kasdim, lun Siria, lun Moab, idi lun Amon amé' pebunu' ni Yoyakim idi ngaro bawang Yahuda, maya' kudeng bala Tuhan luk pangeh bida' demulunNeh, ieh ineh nabi-nabi.

³Idi susa' ini nacing kuan Yahuda maya' kudeng bala Tuhan, pad Ieh miak ngusu nedeh rat pa kiungNeh, ngaceku amung sala' luk inau' Manasé,

⁴Idi teh ngaceku dara' lun luk na mesala' luk pangeh rinuatneh, pad ieh pangeh nemanu' Yerusalim ku dara' lun luk na sala'. Idi ngaceku ineh Tuhan na sikal maré do' peh.

⁵Idi amung kekamen Raca' Yoyakim luk baken pangeh inayud bang Surat Kekamen Raca'-Raca' Lun Yahuda.

⁶Idi Yoyakim naté. Idi anakneh Yoyakin mangun ku raca' libalneh.

⁷Idi mucu ratnan ineh raca' Masir na remuat peh rat bang bawangneh, ngaceku raca' Babil pangeh nengalap amung bawang luk bang imet raca' Masir rat Abpa' Masir macing déi' Abpa' Pirat ineh.

- ⁸Ulun Yoyakin kareb ieh mangun ku raca' pulu' ualuh lak. Idi ieh nengimet teluh bulan déi' Yerusalim. Idi tinan raca' ineh Nehusta Elnatan rat Yerusalim.
- ⁹Idi Yoyakin nenganau' sala' pa kiung Tuhan maya' amung kekamen tamanneh.
- ¹⁰Idi kareb imetneh teh amung baweh Nebukadnesar raca' Babil ineh iné' Yerusalim. Idi ideh nengelibut bawang ineh.
- ¹¹Idi Nebukadnesar pana' iné' Yerusalim laba' bawehneh ngelibut bawang ineh.
- ¹²Idi Raca' Yoyakin idi tinanneh, tarehneh, idi lun dukenneh, idi lun luk ngasa' ruma'neh nemaré bururdeh kuan raca' Babil. Idi ieh nenaban nedeh kareb lak luk kewaluh bang imet Yoyakin.
- ¹³Idi ieh nenguit amung binaweh luk meraga rat bang Ruma' Allah, idi rat bang ruma' raca' pana'. Idi ieh nenangal amung repapeh amas luk inau' Raca' Selimun kuan Ruma' Allah, maya' kudeng luk bila Tuhan.
- ¹⁴Nebukadnesar nenaban amung lun bang bawang Yerusalim dengan amung anak raca' idi lun rayeh, amungdeh 1,000 burur. Kudeng ineh teh amung lun luk mileh ngakem. Idi arangdeh inan lun luk mileh nuno. Lun luk masi' mo' neketecan rat arangdeh.
- ¹⁵Nebukadnesar nenguit Raca' Yoyakin amé' déi' Babil dengan tinanneh, awanneh, tarehneh, idi amung lun rayeh Yahuda.
- ¹⁶Idi teh ieh nenaban 7,000 burur lun do', idi 1,000 lun luk mileh ngakem. Arangdeh inan lun luk mileh nuno. Idi amungdeh ineh metueh pebunu'.
- ¹⁷Idi Nebukadnesar nengikit Matania taman pinaken Yoyakin, mangun ku raca' libalneh. Idi ieh nengisu' ngadanneh Sedekia.
- ¹⁸Ulun Sedekia kareb ieh mangun ku raca' dueh ngepulu' aceh lak. Idi ieh nengimet pulu' aceh lak déi' Yerusalim. Idi tinan raca' ineh Hamutal Yeremia rat Libna.

¹⁹Idi Raca' Sedekia nenganau' sala' pa kiung Tuhan maya' amung kekamen Raca' Yoyakim.

²⁰Idi Tuhan pelaba useh nelun Yerusalim idi Yahuda, pad Ieh nengusu nedeh rat pa kiungNeh.

Raca'-Raca' Luk Kedueh 25

¹Idi Sedekia sikal metueh ratnan raca' Babil. Idi pulu' aco bulan pulu bang lak luk keiwa' kareb Raca' Sedekia ngimet Yahuda, idi Nebukadnesar raca' Babil iné' dengan bawehneh sikal munu' Yerusalim. Ideh nelupo bal alad, idi teh nenganau' ibpeng luk medita' libut bawang ineh.

²Idi ideh nengerieng bawang Yerusalim pad macing lak luk kepulu' aceh bang imet Sedekia.

³Idi iwa' aco bulan apat bang lak ineh teh inan lau idi iru' luk pelaba io bang bawang ineh pad na luk kenen lemulun.

⁴Idi libung batu bawang Yerusalim mesong. Idi baweh Yahuda nutun buro kareb medacem, sagan tu pana' lun Babil ngelibut bawangdeh ineh. Ideh nenalan rat kabun raca' maya' tanga' luk titen Arang Dueh Alad. Idi ideh neburo iné' matun Raked Yarden.

⁵Iamo' baweh lun Babil nengerada' Raca' Sedekia, idi nengakem neneh luun raked luk muneng ku Yeriko. Idi amung bawehneh nenecan neneh.

⁶Idi ideh nenguit ni Sedekia amé' matun Raca' Nebukadnesar luk déi' Ribla. Idi Nebukadnesar nengukum neneh déi'.

⁷Idi ideh nengaté anak-anak Sedekia su sirennéh. Idi ideh nenakul matehneh. Idi ideh nengaling neneh ku ratai tekaling idi nenguit neneh iné' déi' Babil.

⁸Idi tudu' aco bulan limeh, bang lak luk kepulu' iwa' kareb Raca' Nebukadnesar ngimet Babil, idi Nebusaradan luk lun rayeh raca' idi lun rayeh bawehneh nesemuet bang Yerusalim.

⁹Idi ieh nengeseb Ruma' Allah, ruma' raca', idi ruma' amung lun rayeh déi' Yerusalim.

- ¹⁰Idi amung libung bawang ineh tibpa bawehneh.
- ¹¹Idi Nebusaradan nenaban lemulun luk neketecan déi' bang bawang ineh amé' Babil, dengan lemulun luk pangeh neperurum nelun Babil, idi lemulun luk mileh ngakem luk nateh tiban atun.
- ¹²Iamo' ieh nenecan bang bawang Yahuda tuda'-tuda' burur lun luk masi' luk na tana'. Idi ieh nengecuk nedeh ngakem bang kabun anggur idi bang lati' pana'.
- ¹³Idi lun Babil nemila' amung diri tekaling idi amung alen luk bang Ruma' Allah dengan luk inan sibaru' ratnan tekaling luk idi déi'. Idi ideh nenguit amung binaweh tekaling amé' Babil.
- ¹⁴Idi ideh nenguit luk ku ngook abuh, idi belanga', idi luk ku ngilep lapung, bigan luk ruandeh dara', idi su luk inan ngeseb umau luk do' buen, idi amung binaweh tekaling luk ruen makai bang kekamen Ruma' Allah.
- ¹⁵Ideh nenguit amung binaweh luk ratnan amas idi pirak, ieh ineh busi' luk isuut idi su luk inan bareh apui.
- ¹⁶Binaweh luk ratnan tekaling luk inau' Raca' Selimun kuan Ruma' Allah, ieh ineh dueh diri, amung keréta, idi takung luk rayeh, na miak uen nimang ngaceku pelaba berat.
- ¹⁷Dueh diri ineh mepad mo' — dita'neh dueh ngepulu' tudu' kaki. Idi riwak luk paped diri ineh, inau' ratnan tekaling. Dita'neh apat kaki setangal. Idi inan berawang-berawang idi bua' delima luk inau' ratnan tekaling.
- ¹⁸Idi Nebusaradan lun rayeh baweh ineh nenaban Seraya, Imam Rayeh, Sepania, imam luk pa liangneh, idi teh teluh burur lun baken luk lun rayeh bang Ruma' Allah.
- ¹⁹Idi rat bang bawang ieh nenaban seburur lemulun luk nguyut baweh, limeh burur lun rayeh raca' luk neketecan bang bawang lun luk ngedengan lun rayeh baweh luk ngimet amung surat ratnan bunu' dengan anem ngepulu' burur lun rayeh luk baken.

- ²⁰Idi Nebusaradan nenated nedeh amé' papu' raca' Babil déi' Ribla.
- ²¹Idi raca' Babil ineh nengecuk nelun dukenneh mebal nedeh idi ngaté nedeh déi' Ribla luk bang bawang Hamat. Kudeng ineh lawé lun Yahuda tibandeh rat bawangdeh sebuleng.
- ²²Idi Nebukadnesar raca' Babil ineh nengikit ni Gedalia anak Ahikam Sapan mangun ku lun rayeh bawang Yahuda, pad ieh ngimet amung lun luk neketecan déi' bawang Yahuda.
- ²³Kareb amung lun rayeh baweh Yahuda luk na tiban neninger bala ineh, idi ideh iné' ni Gedalia déi' Mispa, ieh ineh Ismail Netania, Yohanan Karia, Seraya Tanumet rat Netopa, idi Yesenia rat Maka.
- ²⁴Idi kebala Gedalia, "Ui pejani' kudeng muyuh perurum nelun Babil muyuh na luk katot. Do' muyuh tebawang idi ngakem kuan raca' Babil, pad muyuh miak do' udeng.
- ²⁵Bang bulan luk ketudu' idi Ismail anak Netania Elisama, luk rat inul raca' iné' Mispa dengan pulu' burur lun danganneh. Idi ideh nengaté ni Gedalia. Idi teh ieh nengaté nelun Israil, idi lun Babil luk idi danganneh.
- ²⁶Idi amung lun Israil luk neketecan, lun do' idi lun masi' pana' dengan amung lun rayeh baweh buro iné' Masir, ngaceku ideh matot nelun Babil.
- ²⁷Idi bang lak luk inan Iwil Merodak mangun ku raca' Babil, idi ieh méi' kuan Yoyakin raca' Yahuda, idi ieh nemuit neneh rat bang tutup. Ini pangeh mangun bang dueh ngepulu' tudu' aco bulan pulu' dueh, kareb lak luk keteluh ngepulu' tudu' mucu ratnan Yoyakin pangeh tiban.
- ²⁸Idi Iwil Merodak méi' ni Yoyakin, idi nemaré neneh aceh kekamen luk meluun rayeh ratnan kekamen raca'-raca' baken luk tiban iné' Babil.
- ²⁹Idi Yoyakin sinima' nengelengu ayung tutup ineh. Idi ieh nekuman nan téng raca' raked ulunneh.
- ³⁰Idi anid aco raked ulunneh, ieh nengalap tabpar kuan bururneh sebuleng.

Inul Luk Pun-Pun

Inul Luk Pun-Pun 1

- ¹Adam nenginul Set, Set nenginul Enos, Enos nenginul Kenan,
- ²Kenan nenginul Mahalel, Mahalel nenginul Yarid.
- ³Yarid nenginul Enok, Enok nenginul Metusela. Metusela nenginul Lamek,
- ⁴luk nenginul Noh. Noh inan teluh anak deléi, ieh ineh Sem, Ham, idi Yapit.
- ⁵Idi anak Yapit ineh: Gomer, Magog, Madai, Yawan, Tubal, Misek, Tiras. Idi anak inuldeh titen maya' ngadan tepundeh.
- ⁶Idi inul Gomer ineh pupu Askenas, Ripat, idi Togarma.
- ⁷Idi inul Yawan ineh pupu Elisa, Spaniol, Siprus, idi Rodis.
- ⁸Idi anak Ham ineh: Kus, Masir, Libia, idi Kanaan. Idi anak inuldeh titen maya' tepundeh ineh.
- ⁹Idi inul Kus ineh pupu Siba, Habila, Sabta, Rama, idi Sabtika. Idi inul Rama ineh pupu Siba idi Dedan.
- ¹⁰(Idi Kus inan sebuleng anak deléi luk ngadan Nimrod. Idi ieh luk pun-pun metueh bang tana' ini.)
- ¹¹Idi inul Masir ineh pupu Lidia, Anam, Lihab, idi Naptu,
- ¹²Patrus, Kaslu, idi Kriti (luk tepun lun Pilistin.)
- ¹³Idi anak Kanaan ineh: Sidon anakneh luk atun idi Hit. Idi anak inul didueh titen maya' ngadan tepundeh.
- ¹⁴Idi Kanaan ineh tepun lun Yebusi, lun Amori, lun Girgasi,
- ¹⁵lun Hiwi, lun Arki, lun Sini,
- ¹⁶lun Arbadi, lun Semari, lun Hamat.
- ¹⁷Idi anak Sem ineh: Elam, Asur, Arpaksad, Lud, Aram, Us, Hul, Gitar, idi Misek. Idi anak inuldeh titen maya' ngadan tepundeh.
- ¹⁸Idi Arpaksad nenginul Sila luk nenginul Iber.

- ¹⁹Idi Iber ineh inan dueh anak deléi. Ngadan sebuleng Peleg, ngaceku kareb Iber mulun, tana' ini bibpat, idi ngadan kinanakneh ineh Yoktan.
- ²⁰Idi inul Yoktan ineh pupu Almodad, Selep, Hasarmabat, Yira,
- ²¹Hadoram, Usal, Dikla,
- ²²Ibal, Abimail, Siba,
- ²³Opir, Habila, idi Yobab.
- ²⁴Idi anak inul Sem macing ku inul Abram, ieh ineh: Arpaksad, Sila,
- ²⁵Iber, Peleg, Ru,
- ²⁶Serug, Nahor, Tira,
- ²⁷Abram, (ieh ineh luk titen Ibrahim.)
- ²⁸Ibrahim inan dueh anak deléi, ieh ineh Isak idi Ismail.
- ²⁹Idi inul Ismail ineh lun rayeh pulu' dueh pupu, ieh ineh: Nebayot luk maya' ngadan tepundeh, ieh ineh anak Ismail luk atun, Kedar, Adbil, Mibsam,
- ³⁰Misma, Duma, Masa, Hadad, Tima,
- ³¹Yetur, Napis, idi Kedma.
- ³²Idi anem anak deléi Keturah, apid Ibrahim, ieh ineh Simran, Yoksan, Medan, Midian, Isbak, idi Sua. Yoksan inan dueh anak deléi, ieh ineh Siba idi Dedan.
- ³³Midian inan limeh anak deléi, ieh ineh Epa, Epir, Hanok, Abida, idi Elda.
- ³⁴Isak Ibrahim inan dueh anak deléi, ieh ineh Esau idi Yakub.
- ³⁵Idi anak Esau, ieh ineh Elipas, Ruel, Yus, Yalam, idi Kora.
- ³⁶Idi Elipas ineh tepun pupu Timan, Umar, Sepi, Gatam, Kenas, Timna, idi Amalek.
- ³⁷Idi Ruel ineh tepun pupu Nahat, Sera, Sama, idi Misa.
- ³⁸⁻⁴²Lun luk pun-pun tudo bang bawang Edom, ieh ineh inul anak Sir: Lotan, luk tepun pupu Hori idi pupu Homam. (Lotan inan sebuleng kinanak decur luk ngadan Timna.) Sobal, luk tepun pupu Alban, Manahat, Ibal, Sepi, idi

Onam. Sibion, luk inan dueh anak deléi luk ngadan Aya idi Ana. Ana nenginul Dison, idi Dison ineh tepun pupu Hamran, Esban, Itran, idi Kiran. Iser, luk tepun pupu Bilhan, Saban, idi Yakan. Dison, luk tepun pupu Us idi Aran.

⁴³⁻⁵⁰Raca'-raca' luk pelibal-pelibal ngimet bawang Edom, kareb nateh inan raca' déi' bawang Israil, ieh ineh: Bela Bior rat Dinaba Yobab Sera rat Bosra Husam rat babpat Teman Hadad Bedad rat Abit (ieh luk nengelaya' nelun Midian kareb pebunu' déi' bawang Moab) Samla rat Masrika Saul rat Riobot luk Tangeb Abpa' Baal Hanan Akbor Hadad rat Pau (awanneh ineh Mitabel, anak Matred Mesahab)

⁵¹Muci ratnan até Hadad, Edom inimet pengulu-pengulu ini: Timna, Alia, Yetet,

⁵²Oholibama, Ela, Pinon,

⁵³Kenas, Teman, Mibsar,

⁵⁴Magdiel, idi Iram.

Inul Luk Pun-Pun 2

¹Yakub inan pulu' dueh anak deléi, ieh ineh: Rubin, Simion, Liwi, Yahuda, Iskar, Sebulon,

²Dan, Yusup, Beniamin, Naptali, Gad, idi Aser.

³Yahuda inan limeh anak deléi, ieh ineh Er, Onan, idi Sila, luk anak Batsua seburur decur Kanaani. Idi Er anakneh luk atun ineh pinaté Tuhan ngaceku ieh pelaba dat.

⁴Idi dueh anak Yahuda luk baken, ieh ineh Paris idi Sera luk anak ibanneh Tamar.

⁵Paris inan dueh anak deléi, ieh ineh Esron idi Hamul.

⁶Kinanakneh Sera inan limeh anak delei, ieh ineh Simri, Etan, Heman, Kalkol, idi Darda.

- ⁷Idi Akan, anak Karmi, nengesusu' nelun Israil, ngaceku ieh nengalap binaweh luk inaro kareb pebunu', luk bibpeng na miak lapen.
- ⁸Etan inan sebuleng anak deléi, ieh ineh Asaria.
- ⁹Esrone inan teluh anak deléi, ieh ineh Yeramil, Ram, idi Kaleb.
- ¹⁰Idi inul Ram macing ku inul Isai ieh ineh: Aminadab, Nasun (luk seburur lun rayeh lun Yahuda,)
- ¹¹Salmun, Boas,
- ¹²Obed, idi Isai.
- ¹³Isai inan tudu' anak deléi, ieh ineh, Eliab anak luk atun, Abinadab luk kedueh, Sama luk keteluh,
- ¹⁴Netanel luk keapat, Radai luk kelimeh,
- ¹⁵Osem luk keanem, idi Daud luk ketudu'.
- ¹⁶Idi teh ieh inan dueh anak decur, ieh ineh Seruya idi Abigail. Idi Seruya anak decur Isai ineh inan teluh anak deléi, ieh ineh Abisai, Yoab, idi Asahel.
- ¹⁷Idi Abigail anak decurneh luk baken ineh ilap Yeter luk inul Ismail. Idi didueh inan sebuleng anak deléi luk ngadan Amasa.
- ¹⁸Kaleb Esrone ineh nengaweh Asuba. Idi didueh inan sebuleng anak decur luk ngadan Yeriot. Idi teluh anak deléi Yeriot, ieh ineh Yeser, Sobab, idi Ardon.
- ¹⁹Kareb Asuba naté idi Kaleb nengaweh Eprata. Idi didueh inan sebuleng anak deléi luk ngadan Hur.
- ²⁰Ngadan anak deléi Hur ineh Uri. Idi Uri nenginul Besalel.
- ²¹Kareb ulun Esrone ineh anem ngepulu' lak, idi ieh nengaweh anak decur Makir luk taman Giliad. Idi didueh inan sebuleng anak deléi luk ngadan Segub.
- ²²Idi Segub nenginul Yair. Idi Yair nengimet dueh ngepulu' teluh bawang déi' Giliad.

²³Idi bawang Gesur idi Aram nengelaya' anem ngepulu' bawang déi' Giliad ineh, dengan dueh su luk inan baweh nelupo, ieh ineh Yair idi Kenat, idi bawang-bawang luk pekelibut ineh. Idi amung lemulun bang bawang-bawang ineh inul Makir luk taman Giliad ineh.

²⁴Pangeh até tamanneh Esron, idi Kaleb nengaweh Eprata luk tinula' tamanneh. Idi didueh inan sebuleng anak deléi luk ngadan Asur luk nemudut bawang Tekoa.

²⁵Yeramil, anak Esron luk atun, inan limeh anak deléi. Anak luk atun ineh Ram. Idi ngadan anak luk baken ineh Buna, Oren, Osem, idi Ahiya.

²⁶⁻²⁷Idi Ram inan teluh anak deléi, ieh ineh Mas, Yamin, idi Eker. Yeramil inan aceh awan baken luk ngadan Atara. Didueh inan sebuleng anak deléi luk ngadan Onam.

²⁸Onam inan dueh anak deléi, ieh ineh Samai idi Yada. Idi Samai pana' inan dueh anak deléi, ieh ineh Nadab idi Abisur.

²⁹Abisur nengaweh seburur decur luk ngadan Abihail. Idi didueh inan dueh anak deléi, ieh ineh Aban idi Molid.

³⁰Idi Nadab kinanak Absur ineh inan dueh anak deléi, ieh ineh Seled idi Apaim. Iamo' Seled ineh naté dengan na anak.

³¹Apaim nenginul Isi. Idi Isi nenginul Sesan. Idi Sesan nenginul Alai.

³²Yada, kinanak Samai, inan dueh anak deléi, ieh ineh Yeter idi Yonatan. Iamo' Yeter naté dengan na anak.

³³Yonatan inan dueh anak deléi, ieh ineh Pelet idi Sasa. Amung ini inul Yeramil.

³⁴Idi Sesan ineh na anak deléi iamo' decur mo'. Idi Sesan inan seburur lun duken luk rat bawang Masir ngadanneh Yaraha.

³⁵Idi Sesan nemaré anakneh kuan Yaraha lun dukenneh ineh ku awanneh. Idi didueh inan sebuleng anak deléi luk ngadan Atai.

³⁶Idi ini anak inul Atai ineh: Natan, Sabad,

³⁷Epilal, Obed,

³⁸Yihu, Asaria,

³⁹Heles, Eliasa,

⁴⁰Sismai, Salum,

⁴¹Yekamia, idi Elisama.

⁴²Idi anak Kaleb deléi luk kinanak Yeramil, ieh ineh Mesa. Idi Mesa nenginul Sip, idi Sip nenginul Marisa, idi Marisa nenginul Hebron.

⁴³Hebron inan apat anak deléi, ieh ineh Kora, Tapua, Rikem, idi Sima.

⁴⁴Idi Sima nenginul Raham luk taman Yorkiam. Idi Rikem kinanak Sima nenginul Samai.

⁴⁵Idi Samai nenginul Maun. Idi Maun nenginul Baitsur.

⁴⁶Idi Epa luk apid Kaleb nenginul Haran, Mosa, idi Gasis. Idi Haran pana' inan sebuleng anak luk ngadan Gasis.

(⁴⁷Idi seburur lemulun luk ngadan Yadai, inan anem anak deléi, ieh ineh Rigem, Yotam, Gesan, Pelet, Epa, idi Sap.)

⁴⁸Idi Maka luk apid Kaleb nenginul Siber idi Tirhana.

⁴⁹Idi mucu ieh nenginul Sap luk nemudut bawang Madmana, idi Siwa luk nemudut bawang Makbina idi Gibia. Idi anak decur Kaleb, ieh ineh Aksa.

⁵⁰Idi amung inul Kaleb. Anak Kaleb idi awanneh Eprata luk atun ineh Hur. Idi Sobal Hur nemudut bawang Yarim,

⁵¹Salma Hur nemudut Baitlahim, Harep Hur nemudut Bait Gader.

⁵²Sobal luk nemudut bawang Yarim ineh tepun pupu Haru, sebuang lun Menuhot,

⁵³Idi pupu-pupu luk tudo bang bawang Yarim, ieh ineh lun Itri, lun Puti, lun Sumati, idi lun Misrai. (Lun Sora idi lun Estaul pana' inul pupu ini.)

⁵⁴Salma, luk nemudut Baitlahim ineh, tepun lun Netopat, lun Atrot Bait Yoab, idi lun Sori, ieh ineh sebuang lun Manahat.

(⁵⁵Idi pupu-pupu lun luk ngayud tudo déi' bawang Yabis, ieh ineh lun Tirati, lun Simiati, idi lun Sukati. Lun Keni ineh dingarum dengan tetek ruma' Rikab.)

Inul Luk Pun-Pun 3

¹⁻³Idi ini amung anak Daud luk tinganak déi' Hebron, maya' kirayehdeh: Amnon, anak Akinaum decur lun Yesril ineh Daniel, anak Abigail decur lun Karmel Absalom, anak Maka, luk anak decur Raca' Talmai rat Gesur Adonia, anak Hagit Sepatia, anak Abital Itriam, anak Egla

⁴Anem anak deléi ineh tinganak déi' Hebron, su luk inan Daud nengimet tudu' lak anem bulan kinioneh. Idi ieh nengimet teluh ngepulu' teluh lak déi' Yerusalim.

⁵Idi mula' anakneh tinganak déi'. Idi awanneh Batsiba Amiel nenganak apat anak deléi, ieh ineh: Simia, Sobab, Natan, idi Selimun.

⁶Inan iwa' anak Daud luk baken, ieh ineh: Ibkar, Elisua, Elpelet,

⁷Noga, Nipeg, Yapia,

⁸Elisama, Eliada, idi Elipelet,

⁹Baken ratnan amung ini, inan anak deléi Daud ratnan apid-apidneh. Idi Tamar, ieh ineh anak decurneh.

¹⁰Idi ini inul Raca' Selimun, ratnan taman macing ku anak: Rehebom, Abia, Asa, Yosapat,

¹¹Yoram, Ahasia, Yuas,

¹²Amasia, Usia, Yotam,

¹³Akas, Hesehia, Manasé,

¹⁴Amon, idi Yosia.

¹⁵Idi Yosia inan apat anak deléi, ieh ineh Yohanan, Yoyakim, Sedekia, idi Yoas.

¹⁶Idi inul Yoyakim, ieh ineh Yoyakin luk nenginul Sedekia.

¹⁷Idi ini inul Raca' Yoyakin luk tiban lun Babil. Yoyakin inan tudu' anak: Saltiel,

¹⁸Malkiram, Pedaya, Senasar, Yekamia, Hasama, idi Nedabia.

¹⁹Pedaya inan dueh anak deléi, ieh ineh Serubabel idi Simi. Serubabel inan dueh anak deléi, ieh ineh Mesulam idi Hanania, idi Selomit, ieh ineh anak decurneh.

²⁰Idi inan limeh anakneh luk baken, ieh ineh Hasuba, Ohel, Berekia, Hasadia, idi Yusab Hessed.

²¹Idi Hanania inan dueh anak deléi, ieh ineh Pelatia idi Yesaya. Yesaya nenginul Repaya. Repaya nenginul Arnan. Arnan nenginul Obadia, idi Obadia nenginul Sekania.

²²Sekania inan sebuleng anak deléi luk ngadan Semaya, idi limeh mupun deléi, ieh ineh, Hatus, Igal, Baria, Naria, idi Sapat.

²³Naria inan teluh anak deléi, ieh ineh, Elionai, Hiskia, idi Asrikam.

²⁴Elionai inan tudu' anak deléi, ieh ineh, Hodabia, Eliasib, Pelaya, Akub, Yohanan, Delaya, idi Anani.

Inul Luk Pun-Pun 4

¹Idi ini sebuang inul Yahuda: Paris, Ebron, Karmi, Hur, idi Sobal.

²Sobal nenginul Raya, Raya nenginul Yahat, idi Yahat nenginul Ahumai idi Lahad, ieh ineh tepun lun luk tudo déi' Sora.

³⁻⁴Idi tinan Hur ineh Eprata, ieh ineh awan Kaleb. Idi ieh anakneh luk atun. Idi inul Hur nemudut bawang Baitlahim. Hur inan teluh anak deléi, ieh ineh Etam, Penuel, idi Iser. Etam inan teluh anak deléi, ieh ineh Yesril, Isma, idi Idbas, idi sebuleng anak decur, ieh ineh Haselponi. Pinuel nemudut bawang Gedor, idi Iser nemudut Husa.

⁵Asur luk nemudut bawang Tekoa inan dueh awan, ieh ineh Hela idi Nara.

⁶Asur didueh Nara inan apat anak deléi, ieh ineh Ahusam, Heper, Temeni, idi Hastari.

- ⁷Asur didueh Hela, inan teluh anak deléi, ieh ineh Siret, Isar, idi Etnan.
- ⁸Idi Kos, ieh ineh taman Anub idi Sobiba, idi teh Kos ineh tepun amung pupu luk inul Arel luk anak Harum.
- ⁹Idi inan seburur lemulun luk ngadan Yabis luk meluun do' rat arang amung uang tetek ruma'neh. Idi tinanneh neneten ngadanneh Yabis ngaceku kebalaneh, "Ui nenganak neneh dengan medereh."
- ¹⁰Iamo' Yabis nenawar ngadan Allah lun Israil, kebalaneh, "Do' Iko ngeperuan negku idi ngiuk lakan bawanku, idi ngedengan negku; idi do' Iko ngasa' negku ratnan dat luk ngedereh." Idi Allah nemaré maya' kudeng luk pinutuhneh ineh.
- ¹¹Kaleb, kinanak Sua ineh, nenginul Mekir. Idi Mekir nenginul Eston.
- ¹²Idi Eston inan teluh anak deléi, ieh ineh Baitrapa, Pasia, idi Tehina luk nemudut bawang Nahas. Idi amung inul lun ini tudo déi' Rika.
- ¹³Idi Kenas inan dueh anak deléi, ieh ineh Otniel idi Seraya. Otniel pana' inan dueh anak deléi, ieh ineh Hatat idi Monotai.
- ¹⁴Monotai ineh nenginul Opra. Seraya nenginul Yoab luk nengukab Ruan Tukang su luk inan tukang mo'.
- ¹⁵Kaleb Yepuneh inan teluh anak deléi, ieh ineh Iru, Ela, idi Nam. Idi Ela nenginul Kenas.
- ¹⁶Idi Yehalel inan apat anak deléi, ieh ineh Sip, Sipa, Tiria, idi Asarel.
- ¹⁷⁻¹⁸Esra inan apat anak deléi, ieh ineh Yeter, Mered, Eper, idi Jalon. Idi ini anak Bitia, luk anak decur raca' Masir luk inaweh Mered. Idi ieh nenganak Miriam, Samai, idi Isbar luk nemudut bawang Estemoa. Idi teh Mered nengalap seburur decur lun Yahuda. Idi didueh inan teluh anak deléi, ieh ineh Yered luk nemudut bawang Gedor; Hiber luk nemudut bawang Soko; idi Yekutiel luk nemudut Sanua.

- ¹⁹Hodia nengaweh kinanak decur Naham. Idi inul didueh mangun ku pupu Garmi ineh luk tudo bang bawang Kila, idi pupu Makat luk tudo bang bawang Estemoa.
- ²⁰Simon inan apat anak deléi, ieh ineh Amnon, Rina, Benhanan, idi Tilon. Isi inan dueh anak deléi, ieh ineh Sohet idi Bensohet.
- ²¹Sela ineh anak Yahuda. Idi anak inul Sela, ieh ineh Er luk nengukab bawang Leka; idi Laada luk nengukab bawang Marisa; idi pupu ineh luk ngebaruh kibung déi' Baitasbia;
- ²²Yokim idi amung lun Kosiba; idi Yuas idi Sarap luk nengaweh decur Moab idi netebawang déi' Baitlahim. Iamo' amung ini mangun bang kareb luk mon.
- ²³Idi ideh ineh lun mileh mipi' idi ideh tudo bang bawang Netaim idi Gedera, idi ideh tudo déi' ngakem kuan raca'.
- ²⁴Simion inan limeh anak deléi, ieh ineh Nemuel, Jamin, Yarib, Sera, idi Saul.
- ²⁵Saul nenginul Salum, Salum nenginul Mibsam, idi Mibsam nenginul Misma.
- ²⁶Idi inul Misma, ieh ineh Hamuel, Sakur, idi Simi.
- ²⁷Simi inan pulu' anem anak deléi idi anem anak decurneh. Iamo' amung kinanakneh ineh na mula' anakdeh. Idi pupu Simion ineh na mula' mepad kudeng pupu Yahuda.
- ²⁸Idi ideh tudo déi' Birsiba, Mulada, Hasasual,
- ²⁹Bilha, Isem, Tulad,
- ³⁰Betuel, Horma, Siklag,
- ³¹Bait Markobat, Hasasusim, Baitbiri, idi Saraim. Ini bawangdeh ineh pad macing Daud mangun ku raca'.
- ³²Idi teh ideh tudo bang limeh bawang luk baken, ieh ineh Itam, Ain, Rimon, Token, idi Asan,
- ³³Idi teh ideh mudeng bang bawang luk pekelibut, macing déi' Baalat. Idi ini surat luk inayuddeh ratnan inuldeh idi bawang luk inandeh tudo.

34-38Ini ngadan lemulun luk mangun ku lun rayeh inuldeh: Mesobab, Yamlek, Yosa Amasia, Yoel, Yihu (anak Yosibia luk anak Seraya Asiel), Elionai, Yakuba, Yesohaya, Asaya, Adiel, Yesimil, Benaya, Sisa (anak Sipi luk anak Alon luk inul Yedaya, Simri, idi Semaya). Ngaceku tetek ruma'deh iuh amé' mula'.

39Idi ideh nenalan iné' muneng ku Gedor, macing ruan luk pa busat aco, pian nakap su inan uduh kuan amung dumbadeh.

40Idi ideh nepetulu su inan uduh luk do'angud, aceh tana' luk mebaleng, idi teh do' ali na ria', ngaceku lun luk tudo déi' bang kareb luk mon, ieh ineh lun Ham.

41Idi amung ini luk titen ngadan ineh iné' bang kareb Heskia, raca' lun Yahuda, idi nengusag amung lepo lun luk tudo déi'. Ideh nengusu lemulun ineh idi ideh tebawang su ineh, ngaceku déi' inan petap laman kuan dumbadeh.

42Idi limeh ngeratu burur ratnan pupu Simion iné' pa busat aco macing Edom, dengan lun rayehdeh anak Isi, ieh ineh Pelatia, Naria, Repaya, idi Usiel.

43Idi ideh nengaté amung lun luk neketecan rat nelun Amalek. Idi ideh tudo déi' macing aco sini.

Inul Luk Pun-Pun 5

1Ini inul Rubin, anak Yakub luk atun. (Ngaceku ieh nepasét nan apid tamanneh, idi babpatneh, ieh ineh babpat anak luk atun biré kuan Yusup. Idi bang surat inul ineh na Rubin iniap ku anak luk atun.

2Iamo' pupu Yahuda mangun rayeh arang pupu ineh. Idi ideh nenginul seburur raca' kuan amung pupu ineh, iamo' babpat anak luk atun ineh kuan Yusup.)

3Idi Rubin anak Yakub luk atun inan apat anak, ieh ineh Hanok, Palu, Esron, idi Karmi.

- ⁴⁻⁶Idi inul Yoel, ieh ineh Semaya, Gog, Simi, Mika, Raya, Baal, idi Bira, luk lun rayeh lun Rubin. Ieh tiban Tiglat Piliser raca' Asur.
- ⁷Bang surat inul tetek ruma' inan ngadan lun rayeh-rayeh pupu Rubin, ieh ineh, Yiel, Sekaria,
- ⁸Idi Bela anak Asas Sema ratnan pupu Yoel luk tudo déi' Arur macing déi' Nebo idi Baal Mion.
- ⁹Idi ideh tudo pa busat aco macing su inan lun semuet déi' su luk ali-ali luk bal selipa Abpa' Pirat, ngaceku meluun ula' sapi' idi amékdeh déi' bawang Giliad.
- ¹⁰Bang kareb Raca' Saul, idi inul Rubin nepebunu' nelun Hagri, luk pinatédeh. Idi ideh tudo bang bawangdeh aput tana' luk pa busat aco Giliad.
- ¹¹Pupu Gad tebawang petutup nelun Rubin déi' bawang Basan macing déi' Salika.
- ¹²Idi Yoel ieh ineh lun rayehdeh, idi Sapan luk pa liangneh. Yanai idi Sapat ineh lun rayeh bawang Basan.
- ¹³Idi lun Gad luk baken mangun ku tudu' pupu, ieh ineh Mikail, Mesulam, Siba, Yorai, Yakan, Sia, idi Iber.
- ¹⁴Amungdeh luk tudu' burur ini anak Abihail. Idi ini tepun Abihail Huri, ieh ineh Yarua, Giliad, Mikail, Yerisai, Yado, idi Bus.
- ¹⁵Ahi anak Abdil Guni, ieh ineh lun rayeh amung pupu ini.
- ¹⁶Idi ideh tudo déi' Basan idi Giliad bang amung bawangdeh, idi bang aput laman Saron.
- ¹⁷(Surat inul ini inayud bang kareb Yotam raca' Yahuda, idi bang kareb Yerebom raca' Israil.)
- ¹⁸Idi ratnan inul Rubin, Gad, idi sebuang inul Manasé inan 44,760 burur lun luk mesangit, luk ngimet utap, pelapet, idi binor, idi luk mileh pebunu'.
- ¹⁹Ideh nepebunu' nelun Hagri, ieh ineh pupu Yetur, Napis, idi Nodab.

²⁰Ideh merapet inan Allah idi nesembayang mutuh pedengan, idi Allah neninger sembayangdeh pad ideh metueh rat nelun Hagri idi nelun rurumdeh.

²¹Ideh nengalap amung aya'deh, ieh ineh 50,000 unta, 250,000 dumba, 2,000 keladai. Idi ideh nenaban 100,000 lemulun.

²²Iamo' mula' bunu'deh pinaté, ngaceku bunu' ini ratnan Allah. Idi inul Rubin, inul Gad, idi sebuang inul Manasé ineh tudo su inandeh ineh pad ideh tiban.

²³Pupu Manasé rat pa busat aco tudo déi' bawang Basan macing pa tinueh busat aco déi' Baal Hermon, Senir, idi Pegkung Hermon. Idi ideh iuk amé' mula'.

²⁴Idi ini lun rayeh-rayeh amung tetek ruma'deh, ieh ineh Iper, Isi, Eliel, Asriel, Yeremia, Hodabia, idi Yadiel. Amungdeh lun luk metueh idi mebala.

²⁵Iamo' pupu ineh na lutep maya' Allah tepunde, idi ideh nesembayang inan akang lemulun luk pangeh inusu Allah rat bang bawang luk ilapdeh.

²⁶Idi ngaceku ineh Allah lun Israil nengegio niat Pul raca' Asur, (luk titen Tiglat Piliser) pad ieh nengerieng bawangdeh ineh. Idi ieh nenaban nelun Rubin, lun Gad, idi sebuang inul Manasé, idi nenguit nedeh amé' déi' bawang Hala, Habor, Hara, idi i tangeb Abpa' Gosan macing aco sini.

Inul Luk Pun-Pun 6

¹Liwi inan teluh anak: Gerson, Kohat, idi Merari.

²Kohat inan apat anak deléi: Amram, Isar, Hebron, idi Usiel.

³Amram inan dueh anak deléi: Arun, Musa, idi sebuleng anak decur, Miriam. Arun inan apat anak deléi: Nadab, Abihu, Eliasar, idi Itamar.

⁴Ini anak inul Eliasar: Pinihas, Abisua,

⁵Buki, Usi,

⁶Seraya, Merayot,

⁷Amaria, Ahitub,

- ⁸Saduk, Ahimas,
- ⁹Asaria, Yohanan,
- ¹⁰Asaria (ieh ineh luk ngakem bang Ruma' Allah luk pinudut Selimun déi' Yerusalim,)
- ¹¹Amaria, Ahitub.
- ¹²Saduk, Salum,
- ¹³Hilkia, Asaria,
- ¹⁴Seraya, Yosadak.
- ¹⁵Idi Yosadak tiban Nebukadnesar perapu dengan lun Yahuda idi lun Yerusalim luk baken kareb Tuhan nemarké nedeh tebanen.
- ¹⁶Liwi inan teluh anak deléi: Gerson, Kohat, idi Merari.
- ¹⁷Ideh pana' inan anak deléi. Gerson nenginul Libni idi Simi.
- ¹⁸Kohat nenginul Amram, Isar, Hebron, idi Usiel.
- ¹⁹Idi Merari nenginul Mali idi Musi.
- ²⁰Ini anak inul Gerson: Libni, Yahat, Sima,
- ²¹Yua, Ido, Sera, idi Yitrai.
- ²²Ini inul Kohat: Aminadab, Kora, Asir,
- ²³Elkana, Abiasap, Asir,
- ²⁴Tahat, Uriel, Usia, idi Saul.
- ²⁵Elkana inan dueh anak deléi: Amasai idi Ahimot.
- ²⁶Ini anak inul Ahimot: Elkana, Sopai, Nahat,
- ²⁷Eliab, Yoram, idi Elkana.
- ²⁸Semuil inan dueh anak deléi: Yoel anakneh luk atun, idi Abia luk sekedueh.
- ²⁹Ini anak inul Merari: Mali, Libni, Simi, Usa,
- ³⁰Simia, Hagia, idi Asaya.

³¹Amungdeh ini luk litep Daud nguyut nelun menani bang Ruma' Allah kareb Pati' Pejani' ineh pangeh inau'deh su ineh.

³²Idi ideh pelibal-pelibal ngakem pa atun Lepo su luk inan papu' Tuhan kareb nateh Selimun nemudut Ruma' Allah ineh déi' Yerusalim.

³³Ini inul tetek ruma' lun luk nguyut menani ineh. Inul Kohat: Heman lun nguyut lun menani luk pun-pun, ieh ineh anak Yoel. Idi ini tepun Heman: Yoel, Semuil,

³⁴Elkana, Yeroham, Eliel, Tua,

³⁵Sup, Elkana, Mahat, Amasai,

³⁶Elkana, Yoel, Asaria, Sepania,

³⁷Tahat, Asir, Ebiasap, Kora,

³⁸Isar, Kohat, Liwi, Yakub.

³⁹Idi Asap ineh lun nguyut lun menani luk kedueh luk dengan Heman. Idi Asap, ieh ineh anak Berikia. Idi ini tepun Asap: Simia,

⁴⁰Mikail, Basia, Malkia,

⁴¹Etni, Sera, Adaya,

⁴²Itan, Sima, Simi,

⁴³Yahat, Gerson, Liwi.

⁴⁴Idi Itan ratnan inul Merari ineh lun nguyut lun menani luk keteluh. Idi Itan ineh anak Kisi. Idi ini tepunneh: Abdi, Maluk,

⁴⁵Hasabia, Amasia, Hilkia,

⁴⁶Amsi, Bani, Simer,

⁴⁷Mali, Musi, Merari, Liwi.

⁴⁸Idi kinanakdeh lun Liwi litep kuan amung kekamen bang su luk inan sembayang.

⁴⁹Arun idi anak-anakneh nengeseb baré luun bubpun su luk inan maré luk sabpen idi luun méja Su luk Meluun Meligan. Idi ideh nenganau' luk nguit pedo' kuan lun Israil maya' kudeng amung luk icuk Musa lun duken Allah ineh.

⁵⁰Idi ini inul Arun: Eliasar, Pinihas, Abisua,

⁵¹Buki, Usi, Seraya,

⁵²Merayot, Amaria, Ahitub,

⁵³Saduk, idi Ahimas.

⁵⁴Ini su luk inan inul Arun ratnan pupu Kohat tebawang. Ideh nengalap babpat tana' luk pun-pun.

⁵⁵Ieh ineh Hebron luk déi' tana' Yahuda, idi amung laman luk libutneh.

⁵⁶Iamo' amung tana' luk iring bawang ineh, idi amung bawang luk isuut biré kuan Kaleb Yepuneh.

⁵⁷⁻⁵⁹Bawang-bawang ini litep kuan inul Arun: Hebron, bawang luk inan sigapung ineh, Yatir idi bawang-bawang Libna, Estemoa, Hilen, Debir, Asan, idi Bait Semes dengan amung lamandeh.

⁶⁰Bang bawang Benjamin bawang-bawang ini litep kuandeh dengan amung lamandeh: Giba, Alemet, idi Anatot. Idi amung bawangdeh ineh, pulu' teluh bawang su luk inan amung tetek ruma'deh tudo.

⁶¹Pulu' bawang bang babpat Manasé luk pa acep aco litep maya' udi kuan inul Kohat luk ketecan maya' tetek ruma'deh.

⁶²Idi kuan inul Gerson maya' tetek ruma'deh, pangeh biré pulu' teluh bawang ratnan babpat inul Iskar, Aser, Naptali, idi sebuang inul Manasé luk déi' Basan ineh.

⁶³Kudeng ineh teh pulu' dueh bawang bang babpat Rubin, Gad, idi Sebulon pangeh litep kuan inul Merari maya' tetek ruma'deh.

⁶⁴Kudeng ini lawé lun Israil nengeletep tuda'-tuda' bawang su luk inan lun Liwi tudo.

⁶⁵(Kudeng ineh teh bawang-bawang bang babpat Yahuda, Simion, idi Beniamin pangeh litep dengan nenala' udi.)

⁶⁶Tuda'-tuda' tetek ruma' ratnan pupu Kohat ineh, nengalap bawang idi laman bang babpat Epraim,

⁶⁷ieh ineh Sikem bawang luk inan sigapung luk luun pegkung-pegkung Epraim, Geser,

⁶⁸Yokmiam, Bait Horon,

⁶⁹Aijalon, idi Gat Rimon.

⁷⁰Bang babpat Manasé luk pa acep aco, ideh nengalap inul Manasé, bawang Aner, idi Biliam dengan amung lamandeh.

⁷¹Tetek-tetek ruma' pupu Gerson nengalap bawang-bawang ini dengan amung lamandeh: Bang babpat Manasé luk pa busat aco: Golan luk déi' Basan, idi Astarot.

⁷²Bang babpat Iskar: Kadis, Daberat,

⁷³Ramot, idi Anem.

⁷⁴Bang babpat Aser: Masal, Abdon,

⁷⁵Hukok, idi Rikob.

⁷⁶Bang babpat Naptali: Kedes luk déi' Galilia, Hamon, idi Kiriataim.

⁷⁷Amung tetek ruma' pupu Merari luk baken nengalap bawang-bawang ini dengan amung lamandeh: Bang babpat Sebulon: Rimono idi Tabor.

⁷⁸Bang babpat Rubin, luk pa busat Abpa' Yarden petutup ku Yeriko: Biser luk luun patar, Yasa,

⁷⁹Kedemot, idi Mepat.

⁸⁰Bang babpat Gad: Ramot luk déi' Giliad, Mahanaim,

⁸¹Hesbon, idi Yaser.

Inul Luk Pun-Pun 7

- ¹Iskar inan apat anak deléi: Tola, Pua, Yasub, idi Simron.
- ²Tola inan anem anak: Usi, Repaya, Yeriel, Yamai, Ibsam, idi Semuel. Amungdeh lun rayeh-rayeh bang tetek ruma' Tola. Idi ideh lun luk mesangit. Idi bang kareb Daud kinula' inuldeh 22,600 burur.
- ³Usi inan sebuleng anak deléi, ieh ineh Israya. Israya inan apat anak deléi: ieh ineh Mikail, Obadia, Yoel, idi Isia. Ideh luk limeh burur ini lun rayeh teh.
- ⁴Idi ideh nenguit tuda'-tuda' baweh ratnan anid pupudeh maya' kinula' lun bang tetek ruma'deh. Amungdeh ineh 36,000 burur luk miak pebunu'. Idi pundeh mula', ngaceku ideh mula' awan.
- ⁵Idi kinanakdeh luk ratnan pupu Iskar luk miak pebunu', amungdeh 87,000 burur maya' luk inayud bang surat inuldeh.
- ⁶Beniamin inan teluh anak deléi: Bila, Beker, idi Yediel.
- ⁷Bila inan limeh anak deléi: Esbon, Usi, Usiel, Yeremot, idi Iri. Amungdeh ineh lun rayeh bang tetek ruma'deh. Idi inan 22,034 burur lun luk miak pebunu' maya' luk inayud bang surat inuldeh.
- ⁸Beker inan iwa' anak deléi: Semira, Yuas, Elieser, Elionai, Omri, Yeremot, Abia, Anatot, idi Alemet;
- ⁹idi inan 20,200 burur lun luk miak pebunu' maya' tetek ruma' luk inayud bang surat inuldeh.
- ¹⁰Yediel inan sebuleng anak deléi, ieh ineh Bilan. Idi Bilan inan tudu' anak deléi: Yus, Beniamin, Ihud, Kenana, Sitan, Tarsis, idi Ahisahar.
- ¹¹Amungdeh ini lun rayeh tetek ruma'deh, idi ideh lun pebunu' luk mebala. Idi arang inuldeh inan 17,200 burur lun luk miak pebunu'.
- ¹²Idi teh Supim idi Hupim ratnan pupu ineh. Dan inan sebuleng anak deléi, ieh ineh Husim.
- ¹³Naptali inan apat anak deléi: Yasiel, Guni, Yeser, idi Salum. (Ideh ineh inul Bilha.)

- ¹⁴Manasé inan dueh anak deléi, ieh ineh Asriel, idi Makir luk tinganak apidneh, seburur decur lun Arami. Idi Makir ineh taman Giliad.
- ¹⁵Idi Makir nengalap awan kuan Hupim idi Supim. Idi ngadan kinanakneh luk decur Maka. Idi ngadan anakneh luk kedueh ineh Selopehad. Idi Selopehad ineh inan tuda'-tuda' anak decur.
- ¹⁶Idi Maka awan Makir nenganak dueh anak deléi, ngadan didueh Peris idi Seris. Peris inan dueh anak deléi, Ulam idi Rakem.
- ¹⁷Idi Ulam inan sebuleng anak deléi, ieh ineh Bidan. Amung ini inul Giliad anak Makir Manasé.
- ¹⁸Idi kinanak Giliad luk decur, ieh ineh Hamoleket, inan teluh anak deléi: Isod, Abieser, idi Mala.
- ¹⁹(Semida inan apat anak deléi: Akian, Sikem, Liki, idi Aniam.)
- ²⁰Ini anak inul Epraim: Sutela, Bired, Tahat, Eliada, Tahat,
- ²¹Sabad, Sutela. Epraim inan dueh anak deléi luk baken, ieh ineh Iser idi Eliad. Iamo' didueh pinaté lun Gat kareb ideh iné' ngaro sapi'deh ineh.
- ²²Epraim taman didueh ineh temido tuda'-tuda' aco kinioneh, idi kinanak-kinanakneh iné' ngubuk neneh.
- ²³Idi Epraim nepamung dengan awanneh, idi awanneh mali' idi nenganak aceh anak deléi, idi ieh nenganau' ngadanneh Beria, ngaceku bang ruma'neh inan dereh.
- ²⁴Epraim inan sebuleng anak decur, ieh ineh Sira, luk nengukab bawang Bait Horon luk pa lod, idi Bait Horon luk pa dayeh, idi Usen Sira.
- ²⁵Idi teh Epraim inan sebuleng anak deléi, ieh ineh Ripa. Idi anak inul Ripa: Risep, Tila, Tahan,
- ²⁶Ladan, Amihud, Elisama,
- ²⁷Nun, idi Yusak.

²⁸Idi babpatdeh ineh idi su inandeh tudo, ieh ineh Baitel dengan amung bawang libut-libutneh macing Naran luk pa busat aco, idi Giser luk pa acep aco, idi amung bawang libut-libutneh, macing Naran luk pa busat aco, idi Giser luk pa acep aco, idi amung bawang libut-libutneh, idi Sikem idi Aya dengan bawang libut-libutneh.

²⁹Iamo' inul Manasé nengimet Bait Sian, Tanak, Megido, idi Dor, dengan amung bawang libut-libutdeh. Idi bang amung bawang ini inul Yusup anak Yakub netudo.

³⁰Ini anak inul Aser. Ieh ineh apat anak deléi: Imna, Isba, Isbi, idi Beria, idi sebuleng anak decur, ieh ineh Sireh.

³¹Beria inan dueh anak deléi, Hiber idi Malkiel. (Malkiel nemudut bawang Birsait.)

³²Hiber inan teluh anak deléi: Yaplet, Somer, idi Hotan, idi sebuleng anak decur, Sua.

³³Yaplet inan teluh anak deléi: Pasak, Bimal, idi Asbat.

³⁴Kinanakneh Somer inan teluh anak deléi: Roga, Yehuba, idi Aram.

³⁵Kinanakneh Hotam inan apat anak deléi: Sopa, Imna, Siles, idi Amal.

³⁶Idi anak inul Sopa, ieh ineh Sua, Harnepa, Sual, Beri, Imna,

³⁷Besar, Hod, Sama, Silsa, Itran, idi Bira.

³⁸Anak inul Yeter, ieh ineh Yepuneh, Pispá, idi Ara.

³⁹Idi anak inul Ula, ieh ineh Ara, Haniel, idi Risia.

⁴⁰Idi amungdeh ini inul Aser, lun rayeh-rayeh bang tetek ruma'deh. Ideh lun luk mesangit idi lun rayeh luk mebala. Idi inan 26,000 burur lemulun luk amé' pebunu'.

Inul Luk Pun-Pun 8

¹Beniamin inan limeh anak deléi: Bila anakneh luk atun, Asbel luk kedueh, Ahara luk keteluh.

- ²Idi Noha luk keapat, idi Rapa luk kelimeh.
- ³Idi anak inul Bila, ieh ineh Adar, Gira, Abihud,
- ⁴Abisua, Naaman, Ahua,
- ⁵Gira, Sepupan, idi Huram.
- ⁶⁻⁷Idi anak inul Ihud, ieh ineh Naaman, Ahiya, idi Gira. Amungdeh ineh lun rayeh tetek ruma'deh luk tudo déi' Giba, iamo' ideh binubuh iné' déi' Manahat. Gira luk taman Usa idi Akihun nenguit nedeh mubuh.
- ⁸⁻⁹Saharaim nengelagkan dueh awan, ieh ineh Husim idi Bara. Muci, kareb ieh tudo déi' bawang Moab, ieh nengaweh Hodes idi nenginul tudu' anak deléi: Yobab, Sibia, Misa, Malkam,
- ¹⁰Yus, Sakia, idi Mirma. Amungdeh ini mangun ku lun rayeh tetek ruma'deh.
- ¹¹Idi rat ni Husim ieh nenginul Ahitub idi Elpal.
- ¹²Elpal inan teluh anak deléi: Iber, Misam, idi Simed. Idi Simed nengukab bawang Ono idi Lod, dengan amung bawang libut-libutdeh.
- ¹³Beria idi Sima ineh lun rayeh lun Aijalon, luk pangeh nengusu nelun Gat.
- ¹⁴Idi amung ini anak inul Beria: Ahio, Sasak, Yeremot,
- ¹⁵Sebadia, Arad, Ider,
- ¹⁶Mikail, Ispa, idi Yoha.
- ¹⁷Idi amung ini anak inul Elpal: Sebadia, Mesulam, Hiski, Hiber,
- ¹⁸Ismerai, Islia, idi Yobab.
- ¹⁹Idi amung ini anak inul Simi: Yakim, Sikri, Sabdi,
- ²⁰Elinai, Siletai, Eliel,
- ²¹Adaya, Beraya, idi Simrat.
- ²²Idi amung ini anak inul Susak: Ispan, Iber, Eliel,
- ²³Abdon, Sikri, Hanan,
- ²⁴Hanania, Ilam, Antotia,

- ²⁵Ipdia, idi Penuil.
- ²⁶Idi amung ini anak inul Yeroham: Samserai, Seharía, Atalia,
- ²⁷Yaresia, Elia, idi Sikri.
- ²⁸Idi amung ini lun rayeh bang tetek ruma'deh, idi inuldeh luk mebala luk tudo déi' Yerusalim.
- ²⁹Yiel nengukab bawang Gibion idi tudo déi'. Idi ngadan awanneh, Maka.
- ³⁰Idi anakneh luk atun, ieh ineh Abdon. Idi anak deléineh luk baken, ieh ineh Sur, Kis, Baal, Nadab,
- ³¹Gidor, Ahio, Siker,
- ³²idi Miklot taman Simia. Idi inuldeh ini tudo dengan pupudeh déi' Yerusalim.
- ³³Ner nenginul Kis, idi Kis nenginul Saul. Saul inan apat anak deléi: Yonatan, Malkisua, Abinadab, idi Esbaal.
- ³⁴Yonatan nenginul Meribaal, idi Meribaal nenginul Mika.
- ³⁵Mika inan apat anak deléi: Piton, Milek, Taria, idi Akas.
- ³⁶Idi Akas nenginul Yehoada. Idi Yehoada inan teluh anak deléi: Alemet, Asmabit, idi Simri. Idi Simri nenginul Mosa.
- ³⁷Idi Mosa nenginul Binia, Binia nenginul Rapa, Rapa nenginul Eliasa, Eliasa nenginul Asel.
- ³⁸Asel inan anem anak deléi: Asrikam, Bokeru, Ismail, Seria, Obadia, idi Hanan.
- ³⁹Idi Isek kinanak Asel ineh inan teluh anak deléi: Ulam, Yus, idi Elipelet.
- ⁴⁰Idi amung anak Ulam, ieh ineh lun mesangit luk mileh ngimet binor, idi ieh inan tuda'-tuda' anak idi mupun, amungdeh meratu limeh ngepulu' burur. Amungdeh ini inul Beniamin.

Inul Luk Pun-Pun 9

¹Ngadan amung lun Israil pangeh inayud bang surat inul pupudeh. Idi amung ineh pangeh inayud bang Surat Raca'-Raca' Lun Israil. Idi lun Yahuda tiban iné' déi' Babil ngaceku sala'deh.

²Idi lemulun luk punpun nelemubed iné' inan babpatdeh idi bang bawangdeh, ieh ineh sebuang lun Israil, sebuang imam, sebuang lun Liwi, idi sebuang lun luk ngakem bang Ruma' Allah.

³Idi sebuang inul Yahuda, Beniamin, Epraim, idi Manasé iné' tudo déi' Yerusalim.

⁴⁻⁶Inan 690 tetek ruma' rat pupu Yahuda luk tudo déi' Yerusalim. Idi lun rayeh anak inul Paris Yahuda, ieh ineh Utai anak Amihud Omri. Idi tepunneh luk baken, ieh ineh Imri idi Bani. Idi lun rayeh anak inul Sela Yahuda, ieh ineh Asaya, luk rayeh bang tetek ruma'neh. Idi lun rayeh anak inul Sera Yahuda, ieh ineh Yuel.

⁷⁻⁸Idi lemulun ini ratnan pupu Beniamin tudo déi' Yerusalim: Salu Mesulam, luk mupun Hodabia Hasenua Ibnia Yeroham Ila, anak Usi Mikri Mesulam Sepatia, luk mupun Ruel Ibnia

⁹Inan 956 tetek ruma' ratnan pupu ini luk tudo déi'. Idi amung deléi ineh lun rayeh tetek ruma'deh.

¹⁰⁻¹²Idi amung imam ini tudo déi' Yerusalim: Yedaya, Yoyarib, idi Yakin Asaria Hilkia, ieh ineh lun rayeh bang Ruma' Allah, idi tepunneh, ieh ineh Mesulam, Saduk, Merayot, idi Ahitub. Adaya Yeroham, idi tepunneh, ieh ineh Pasur idi Malkia Masai Adiel, idi tepunneh ieh ineh Yasera, Mesulam, Mesilemit, idi Imer

¹³Imam-imam luk lun rayeh tetek ruma', 1,760 burur. Amungdeh ineh mileh nganau' kekamen bang Ruma' Allah.

¹⁴⁻¹⁶Lun Liwi ini tudo déi' Yerusalim: Semaya Hasub, idi tepunneh, ieh ineh Asrikam idi Hasabia ratnan pupu Merari Bakbakar, Heris, idi Galal Matania Mika, idi tepunneh, ieh ineh Sikri idi Asap Obadia Semaya, idi tepunneh, ieh

ineh Galal idi Yedutun Berekia anak Asa Elkana luk tudo bang bawang-bawang lun Netopa

¹⁷Lun luk nginita Ruma' Allah ini tudo déi' Yerusalim: Salum, Akub, Talmon, idi Ahiman. Salum, ieh ineh lun rayehdeh.

¹⁸Idi macing kareb ineh ideh idi munung Tanga' Raca' luk pa busat aco. Idi ideh nenginita tanga' kuan lun Liwi atun.

¹⁹Salum anak Kori Ebiasap, dengan kinanak-kinanakneh ratnan pupu Kora, nenginita tanga' Lepo su luk inan papu' Tuhan, mepad kudeng luk inau' tepundeuh kareb ideh nenginita su luk inan baweh Tuhan nelupo.

²⁰Idi Pinihas Eliasar (idi do' Tuhan ngedengan neneh) ieh ineh lun rayehdeh atun.

²¹Idi Sekaria Meselemia nenginita tanga' Lepo su luk inan papu' Tuhan.

²²Idi amungdeh ini lun luk pinili' nginita tanga', 212 burur. Idi ngadandeh pangéh inayud bang surat inul maya' bawangdeh. Idi tepundeuh pangéh kinikit Raca' Daud idi Nabi Semuil ku kekamen ineh.

²³Ideh ineh dengan anak inuldeh megéi' nginita tanga' Ruma' Allah.

²⁴Idi inan apat tanga', ieh ineh pa busat aco, pa acep aco, pa tinueh busat aco, idi pa kabing busat aco, idi ideh nginita tanga' ineh.

²⁵Idi kinanak-kinanakdeh ineh luk tudo bang bawang-bawangdeh macing anid-anid tudu' aco, maya' kareb luk litep miak ngelibal nedeh ineh.

²⁶Ideh luk apat lun rayeh lun luk nginita tanga', ieh ineh lun Liwi. Ideh nginita amung takep idi binaweh luk meraga bang Ruma' Allah.

²⁷Ideh tudo muneng ku Ruma' Allah, ngaceku ideh luk kuan kekamen matar ineh. Ideh ineh mo' luk miak ngukab tanga' anid-anid pekak.

²⁸Lun Liwi luk baken nginita amung repapeh luk ku ngakem bang Ruma' Allah, ngaceku ideh ngiap kinula' luk ruen nuet, idi ngiap kinula' luk ruaten.

²⁹Idi sebuangdeh nginita amung repapeh idi binaweh luk meligan ineh, idi amung banak, abpa' anggur, umau luk do' buen, idi remumu' luk do' buen pana'.

³⁰Iamo' imam-imam luk nganau' remumu' luk do' buen ineh.

³¹Idi Matitia seburur lun Liwi, ieh ineh anak Salum lun Kora ineh, luk nganau' pinaram.

³²Idi sebuang lun Kohat nginita ruti luk barén kuan Tuhan, pad ruti ineh tinina' anid-anid Aco luk inan Mudeng.

³³Sebuang lun Liwi nguyut menani. Idi lun rayeh tetek ruma' ini tudo bang takep Ruma' Allah, dengan na nganau' anun-anun luk baken, ngaceku ideh miak darin kedangan tebaco.

³⁴Amungdeh ini lun rayeh bang tetek ruma' lun Liwi, maya' inuldeh. Amungdeh lun rayeh luk tudo déi' Yerusalim.

³⁵Yiel nengukab bawang Gibion idi tudo déi'. Idi ngadan awanneh Maka,

³⁶idi anakneh luk atun, ieh ineh Abdon. Idi anak deléineh luk baken, ieh ineh Sur, Kis, Baal, Ner, Nadab,

³⁷Gedor, Ahio, Sekaria, idi Miklot,

³⁸taman Simia. Idi inuldeh ini tudo dengan pupudeh déi' Yerusalim.

³⁹Ner nenginul Kis, idi Kis nenginul Saul. Saul inan apat anak deléi: Yonatan, Malkisua, Abinadab, idi Esbaal.

⁴⁰Yonatan nenginul Meribaal; idi Meribaal nenginul Mika.

⁴¹Mika inan apat anak deléi: Piton, Milek, Taria, idi Akas.

⁴²Akas nenginul Yara. Idi Yara inan teluh anak deléi: Alemet, Asmabit, idi Simri. Simri nenginul Mosa,

⁴³Mosa nenginul Binia, Binia nenginul Repaya, Repaya nenginul Eliasa, idi Eliasa nenginul Asel.

⁴⁴Asel inan anem anak deléi: Asrikam, Bokeru, Ismail, Seria, Obadia, idi Hanan.

Inul Luk Pun-Pun 10

¹Lun Pilistin nemunu' nelun Israil luun Pegkung Gilboa. Idi mula' lun Israil pinaté su ineh. Idi lun luk neketecan neburo.

²Idi lun Pilistin nemigket ni Saul idi anak-anakneh. Idi ideh nengaté ni Yonatan, Abinadab, idi Malkisua, anak Saul ineh.

³Idi iuk-iuk mula' lun nengerieng ni Saul. Idi ieh nekaneh ileb binor bunu' ineh, pad ieh nurat.

⁴Idi kebala Saul kuan lun luk ngimet pelapetneh, "Ngangat pelapetmu, idi ngaté negku pelé lun luk na manu ineh na situnga idi ngaté negku." Iamo' anak adi' ineh na sikal ngaceku ieh matot. Ngaceku ineh Saul sebuleng nengalap pelapetneh, idi nesiluka' luun ineh.

⁵Idi kareb anak adi' ineh nenier Saul pangeh naté, idi ieh pana' nesiluka' luun pelapetneh, idi ieh naté.

⁶Idi kudeng ineh até Saul, teluh anakneh, idi amung anak itinneh.

⁷Idi kareb lun Israil luk déi' bang ruan nenier baweh lun Israil pangeh neburo, idi Saul dengan anakneh teh pangeh naté, idi ideh nenecan amung bawangdeh idi neburo. Idi lun Pilistin iné' tudo bang bawang ineh.

⁸Idi kenebpa, kareb lun Pilistin nacing ngaro amung lun luk pinaté ineh, ideh nekali' Saul idi diteluh anakneh teh luun Pegkung Gilboa.

⁹Idi ideh nengaleb ni Saul, idi nengelengu amung ayungneh, idi nengecuk nelun nguit ineh ngelibut amung bawang lun Pilistin, pelé ideh mada' lawé ineh bang ruma' akangdeh, idi kuan amung lun pupudeh.

¹⁰Idi amung repapeh Saul ineh rirengdeh bang ruma' Dagon akangdeh ineh.

¹¹Kareb lun bang bawang Yabis Giliad neninger luk inau' lun Pilistin kuan Saul ineh,

¹²Idi amung lun luk mesangit iné' ngalap butung Saul idi butung anakneh, idi nenguit nedeh iné' déi' Yabis. Idi ideh nenanem tulang-tulangdeh iang lawa kayuh lun meraben luk déi' Yabis. Idi ideh mawa' tudu' aco kinioneh.

¹³Saul naté ngaceku ieh na lutep maya' Tuhan. Idi ieh nengelaba ukum Tuhan, ngaceku ieh nenakap ileh ratnan decur luk mangun, idi luk nenawar ada' lun luk naté,

¹⁴idi na ieh nenakap Tuhan, pad Tuhan nengaté neneh idi nengelubed imetneh kuan Daud anak Isai.

Inul Luk Pun-Pun 11

¹Idi amung inul pupu Israil iné' matun ni Daud déi' Hebron. Idi kebaladeh neneh, "Tau ini sebuleng inul.

²Idi mon kareb Saul mangun ku raca' kai, iko teh luk nenguit nekai lun Israil pebunu'. Idi kebala Tuhan namu, 'Iko teh miak matar pupuKu Israil. Idi iko miak mangun ku raca'deh.' “

³Kudeng ineh teh amung lun rayeh Israil iné' matun raca' déi' Hebron. Idi Daud nepejani' nedeh ineh pa kiung Tuhan. Idi ideh nengumau ni Daud ku raca' Israil, maya' kudeng luk bila Tuhan ni Semuil.

⁴Idi Raca' Daud dengan amung lun Israil iné' déi' Yerusalim, ieh ineh Yebus, ngaceku déi' luk inan lun Yebusi tudo.

⁵Idi kebala lun Yebusi ineh ni Daud, "Na iko miak amé' tungé'." Iamo' Daud nengelaya' bawang Sion peh, ieh ineh luk tetanen Bawang Daud.

⁶Idi kebala Daud, "Idé luk pun-pun ngelaya' lun Yebusi ineh, ieh ineh mangun ku lun rayeh baweh." Idi Yoab anak Seruya luk pun-pun numak. Ngaceku ineh ieh mangun ku lun rayeh baweh.

⁷Idi Daud tudo bang bawang ineh peh. Ngaceku ineh ideh nenganau' ngadan bawang ineh "Bawang Daud.”

⁸Idi ieh nemudut bawang libut-libutneh, rat su luk inan tana' luk pinaad pa busat aco surud ineh. Idi Yoab nenuneh sebuang bawang luk neketecan ineh.

- ⁹Idi Daud iuk-iuk metueh, ngaceku Tuhan luk Melalud idi dengan neh.
- ¹⁰Ini ngadan lun pebunu' Daud luk mebala. Ideh nengedengan nelun Israil, pad ideh nengikit neneh mangun ku raca', maya' kudeng luk pijani' Tuhan. Idi ideh nengeletep imetneh ineh.
- ¹¹Luk pun-pun, ieh ineh Yasobiam ratnan pupu Hakmon, luk lun rayeh "Teluh Burur." Ieh nengaté teluh ngeratu burur bang sekua' bunu' ku busuneh.
- ¹²Idi luk kedueh, ieh ineh Eliasar Dodo ratnan pupu Ahohi.
- ¹³Ieh nemaya' ni Daud munu' nelun Pilistin déi' Pas Damim. Idi ieh idi déi' lati' ikun, kareb lun Israil mula' neburo.
- ¹⁴Iamo' ieh netuped dengan anak itinneh luun lati' ineh, idi ieh nemunu' nelun Pilistin. Idi Tuhan nengedengan nedeh pad ideh metueh.
- ¹⁵Idi teh teluh burur arangdeh luk "Teluh Ngepulu'," iné' ni Daud bang lubang batu Adulam. Idi bang kareb ineh baweh lun Pilistin nelupo déi' Ruan Repaim.
- ¹⁶Idi kareb ineh Daud déi' su luk na mepelengit luun pegkung. Idi teh bang kareb ineh baweh lun Pilistin idi déi' Baitlahim.
- ¹⁷Idi Daud melili ku abpa', kebalaneh, "Adoi, ui pelaba pian ngirup abpa' rat bang subuk luk déi' Baitlahim luk iring tanga' bawang ineh!"
- ¹⁸Idi diteluh luk mebala ineh iné' matun su luk inan baweh Pilistin idi nengook abpa' luk bang subuk luk déi' Baitlahim iring tanga' bawang. Idi ideh nelemubed nenguit abpa' ineh kuan Daud. Iamo' Daud ara' ngirup ineh. Iamo' ieh nengutang ineh ku aceh baré kuan Tuhan.
- ¹⁹Kebalaneh, "Na tu-tu ui miak ngirup abpa' ini, ieh ineh mepad kudeng ui ngirup dara' lun ini luk pangeh iné' dengan na matot maté!" Idi na ieh sikal ngirup abpa' ineh. Kudeng ineh kekamen diteluh luk mebala ineh.
- ²⁰Idi Abisai, kinanak Yoab, ieh ineh lun rayeh "Teluh Ngepulu' " burur ineh. Idi ieh pangeh nengaté 300 burur ku busuneh. Ngaceku ineh ieh mebala arangdeh luk "Teluh Ngepulu' " ineh.

²¹Idi ratnan "Teluh Ngepulu' " burur ineh, ieh ineh luk mebala, idi luk mangun ku lun rayehdeh. Iamo' na ieh iapin dengan lun luk "Teluh Burur" ineh.

²²Idi teh Benaya Yoyada rat Kabsil ineh mebala. Ieh nengaté dueh burur lun luk mesangit rat Moab. Idi teh ieh iné' ngaté sebuleng balang bang lubang kareb meteneb.

²³Idi teh ieh nengaté seburur lun Masir luk rayeh burur luk kidita' tudu' kaki setangal. Idi ieh nengimet busu luk pelaba rayeh. Benaya iné' munu' neneh ku kayuh mo'. Idi ieh nemubput busu ineh rat nelun Masir ineh, idi nengaté neneh ku ineh.

²⁴Kudeng ineh luk inau' Benaya Yoyada luk pelaba kuu', seburur rat arangdeh luk "Teluh Ngepulu' " ineh.

²⁵Idi ieh mebala arangdeh luk "Teluh Ngepulu' " ineh. Iamo' na ieh iapin dengan lun luk "Teluh Burur" luk atun ineh. Idi Daud nengikit neneh mangun ku lun rayeh lun luk matar raca'.

²⁶⁻⁴⁷Ini ngadan amung lun pebunu' luk mebala: Asahel, kinanak Yoab Elhan Dodo rat Baitlahim Samot rat Harod Helis rat Pilet Ira Ikes rat Tekoa Abiesa rat Anatot Sibekai rat Husa Ilai rat Ahoh Maharai rat Netopa Heled Baana rat Netopa Itai Ribai rat Gibia déi' bawang Benjamin Benaya rat Piraton Hurai rat Arur Gaas Abiel rat Arba Asmabet rat Bahurum Eliaba rat Salbon Hasem rat Gison Yonatan Sagi rat Harar Ahian Sakar rat Harar Elipal Ur Hiper rat Mekera Ahiya rat Pelon Hesro rat Karmel Naarai Isbai Yoel, kinanak Natan Mibkar Hagri Selik rat Amon Naharai rat Birot (luk nguit repapeh Yoab) Ira idi Garib rat Yatir Uria lun Hiti Sabad Alai Adina Sisa (seburur lun rayeh pupu Rubin luk nguyut teluh ngepulu' burur lun pebunu') Hanan Maka Yosapat rat Mitan Usia rat Astira Sama idi Yiel, anak Hotam rat Arur Yediel idi Yoha, anak Simri rat Tis Eliel rat Mahaba Yeribai idi Yosabia, anak Elnam Itma rat Moab Eliel, Obed, idi Yasiel rat Soba

Inul Luk Pun-Pun 12

¹Mula' lemulun iné' matun ni Daud déi' Siklag, kareb ieh sigapung ni Saul anak Kis. Idi amung ini pana' lun mesangit luk ngedengan neneh bang bunu',

²idi ideh ineh pupu Saul rat Benjamin. Ideh mileh ngelatik ku binor idi teh miak ngelatik batu ku ticu' pa kabing idi pa tinueh pana'.

³⁻⁷Ini ngadan lun rayehdeh: Ahieser idi Yoas, anak Sima rat Gibia. Ini ngadan lun pebunu': Yesiel idi Pilet, anak Asmabet Beraka idi Yihu rat Anatot Ismaya rat Gibion, seburur lun pebunu' luk mebala rat arang lun luk "Teluh Ngepulu' " ineh Yeremia, Yahasiel, Yohanan, idi Yosabad rat Gedera Elusai, Yerimot, Bialia, Semaria, idi Sepatia rat Harip Elkana, Isia, Asarel, Yuser, idi Yesobiam, rat pupu Kora Yula idi Sebadia, anak Yeroham rat Gedor

⁸Idi sebuang pupu Gad teh iné' matun ni Daud déi' su luk na mepelengit déi' su luk ali-ali, ieh ineh lun luk mesangit luk mileh ngimet utap idi busu. Idi kiungdeh ineh mepad kudeng kiung balang, idi awerdeh mepad kiawer talau luk déi' luun pegkung.

⁹⁻¹³Idi ini ngadandeh maya' rayeh kekamendeh: Iser, Obadia, Eliab, Mismana, Yeremia, Atai, Eliel, Yohanan, Elsabad, Yeremia, idi Makbanai.

¹⁴Sebuangdeh ini luk rat pupu Gad lun rayeh baweh pa luun 1,000 burur, idi sebuangdeh ineh lun rayeh luk pa beneh luk ngimet 100 burur.

¹⁵Idi ideh neguta Abpa' Yarden bang bulan luk pun, ieh ineh kareb abpa' ineh ereb tangeb. Idi ideh nengusu amung lun luk luun patar ineh, pa busat aco idi pa acep aco pana'.

¹⁶Idi sebuang pupu Benjamin idi Yahuda iné' matun ni Daud déi' su luk na mepelengit.

¹⁷Idi Daud iné' matun nedeh, kebalaneh, "Kudeng muyuh amé' matun negku dengan do' sikal nengan negku, ui mawang niat nemuyuh. Iamo' kudeng muyuh pian maré negku kuan bunu'ku, sagan tu pana' na sala'ku, idi do' Allah tepun tau nier ratnan lawé ineh pad Ieh ngukum nemuyuh."

¹⁸Idi Roh netemurun pa luun Amasai, luk mangun ku lun rayeh "Teluh Ngepulu' " burur ineh mucu, pad ieh nengitang, kebalaneh, "O Daud, anak

Isai, amung kai ini lun dukenmu! Samal kuanmu idi kuan lun luk ngedengan namu! Allah idi denganmu." Daud nengalap nedeh ineh, idi ieh nenganau' anid-aniddeh ineh ku lun rayeh bawehneh.

¹⁹Sebuang inul Manasé teh pian lumi ni Daud, kareb ieh nacing dengan lun Pilistin sikal pebunu' ni Saul. Iamo' Daud na nengedengan nelun Pilistin, ngaceku lun rayeh lun Pilistin nepegayam idi nengecuk ni Daud buro, kebaladeh, "Kian, ieh pian ngaleb netau lek, idi lumi ni Saul raca'neh ineh."

²⁰Idi kareb Daud iné' déi' Siklag, amung lun Manasé ini nelumi neneh, ieh ineh Adna, Yosabad, Yediel, Mikail, Yosabad, Elihu, idi Siletai. Amungdeh ineh lun rayeh 1,000 burur déi' Manasé atun.

²¹Ideh nengedengan ni Daud kareb idi, mangun ku lun rayeh bawehneh. Ngaceku amungdeh ineh lun pebunu' luk mebala. Idi mucu ideh mangun ku lun rayeh baweh Israil.

²²Lélé anid aco lun macing matun ni Daud pian ngedengan neneh, pad ideh mangun ku aceh baweh rayeh mepad kudeng aceh baweh luk ratnan Allah.

²³⁻³⁷Mula' lun luk pekalai pebunu' iné' ni Daud déi' Hebron pian ngedengan neneh, pelé ieh mangun ku raca' libal Saul, maya' kudeng luk pijani' Tuhan. Ini kinula'deh: Yahuda: 6,800 burur luk petap busu idi utap; Simion: 7,100 lun luk pekalai pebunu'; Liwi: 4,600 burur; Anak itin Yoyada, luk inul Arun: 3,700 burur; Pupu Saduk, seburur anak adi' luk mesangit: ²² lun rayeh; Benjamin (pupu Saul): 3,000 burur (inan mula' lun Benjamin luk litep maya' Saul atun); Ephraim: 20,800 lun pebunu' luk mebala arang pupudeh sebuleng; Manasé luk pa acep aco: 18,000 burur luk pinili' miak ngikit ni Daud ku raca'; Iskar: 200 lun rayeh perapu anak itindeh, (ieh ineh lun luk mileh kali' anun luk do' ruen lun Israil, idi kareb luk petulu pana'); Sebulon: 50,000 luk temina' pebunu', idi luk pekalai ku amung repapeh pebunu'; Naptali: 1,000 lun rayeh perapu 37,000 burur luk mileh ngimet utap idi busu; Dan: 28,600 lun pebunu' luk pekalai; Aser: 40,000 burur luk temina' pebunu'; Pupu-pupu luk pa busat aco Abpa' Yarden — Rubin, Gad, idi Manasé luk pa busat aco: 120,000 burur luk pekalai ku amung repapeh pebunu'.

³⁸Idi amungdeh ini lun pebunu' luk temina' pebunu'. Idi ideh iné' Hebron pian ngikit ni Daud ku raca' lun Israil. Idi teh amung lun baken arang lun Israil sebuleng niat.

³⁹Idi amungdeh ineh idi dengan Daud teluh aco kinioneh, idi ideh nengirup idi nekuman luk pangeh tinina' kinanakdeh kuandeh.

⁴⁰Idi teh lemulun nacing rat mado, ieh ineh lun Iskar, lun Sebulon, idi lun Naptali. Ideh nenguit keladai, unta, kuda, idi sapi', luk nemabeh akan — banak, bua' gita', kireng bua' anggur, abpa' anggur, idi teh umau saitun. Idi teh ideh nenguit sapi' idi dumba luk keretendeh ku kikid. Ngaceku inan awang niat aput bawang Israil.

Inul Luk Pun-Pun 13

¹Idi Daud nepegayam dengan lun rayeh lun luk meribu idi lun rayeh lun luk meratu.

²Idi kebalaneh nelun Israil luk nepamung ineh, "Kudeng muyuh ngerawé do', idi kudeng ini petulu dengan pinian Tuhan Allah tau, do' tau ngecuk lun amé' inan amung kinanak tau luk baken apud bawang Israil, idi teh kuan amung imam idi lun Liwi bang bawangdeh, pad ideh amé' pamung netau.

³Idi do' tau amé' ngalap Pati' Pejani' Allah. Ngaceku kareb Saul mulun, na tau nengerawé ineh."

⁴Idi lun mula' mawang niat ku terawé ineh.

⁵Idi Daud nengamung nelun Israil rat apud bawang, ieh ineh rat lakan Masir luk pa kabing busat aco macing déi' Hamat luk pa tinueh busat aco, pelé ideh nguit Pati' Pejani' Allah rat bawang Yarim.

⁶Idi Daud nenalan dengan amung lun Israil iné' déi' Baala, ieh ineh bawang Yarim luk bang tana' Yahuda, pelé ideh ngalap Pati' Pejani' Allah, luk pinginud kerusi Tuhan déi' surga luk tudo luun melaikat karub.

⁷Idi ideh nenguit Pati' Pejani' Allah ineh rat bang ruma' Abinadab, idi inau'deh bang aceh keréta luk mebaruh. Idi Usa idi Ahio nenated keréta ineh.

⁸Idi Daud idi amung lun Israil pana' ngalai idi menani pa kiung Allah dengan manid-manid luk muni ratnan tapi', giula', karing, suling, idi kelinang.

⁹Kareb ideh nacing su luk inan Kidon rumik, denak-denak Usa nenatang tiku'neh idi nengimet Pati' Pejani' ineh, ngaceku sapi' ineh netekiai.

¹⁰Idi Tuhan museh ni Usa, idi Ieh nengaté neneh, ngaceku ieh nengakem Pati' Pejani' ineh. Idi ieh naté déi' pa kiung Allah.

¹¹Idi Daud dat niat, ngaceku Tuhan nengukum ni Usa. Idi ideh neneten su ineh "Usa Inukum" macing aco sini.

¹²Idi Daud matot inan Allah, kebalaneh, "Kudeng apéh Pati' Pejani' ineh amé' taca' negku?"

¹³Idi Daud na sikal ku Pati' Pejani' Tuhan ineh amé' taca' neneh déi' Yerusalim. Iamo' ieh nenguit neneh iné' bang ruma' Obed Edom lun rat Gat.

¹⁴Idi Pati' Pejani' Allah tican bang ruma' Obed Edom teluh bulan kinioneh. Idi Tuhan nengeperuan ni Obed Edom idi amung uang tetek ruma'neh.

Inul Luk Pun-Pun 14

¹Idi Hiram raca' Sur nengecuk nelun duken amé' matun ni Daud idi nguit kayuh tumuh, idi tuda'-tuda' lun luk mileh ngakem kayuh, idi lun luk mileh mila' batu, pelé ideh miak mudut aceh ruma' kuanneh.

²Idi Daud nekali' Tuhan pangeh nengikit neneh ku raca' lun Israil, idi nengeperuan imetneh ngaceku pupuNeh lun Israil.

³Idi déi' Yerusalim Daud nengalap mula' awan. Idi ieh luk mula' anak deléi' idi anak decur.

⁴Idi ini ngadan anakneh luk tinganak déi' Yerusalim: Samua, Sobab, Natan, Selimun,

⁵Ibkar, Elisua, Elpelet,

⁶Noga, Nepeg, Yapia,

⁷Elisama, Biliada, idi Elipelet.

⁸Idi kareb lun Pilistin nekali' bala Daud pangeh mangun ku raca' lun Israil, idi amung lun Pilistin iné' pian ngakem neneh. Idi Daud iné' matun nedeh.

⁹Idi lun Pilistin nacing ngaro déi' Ruan Lun Luk Medita'.

¹⁰Idi Daud nengitun Tuhan, kebalaneh, "Miakké ui amé' munu' nelun Pilistin? Miakké Tuhan maré nedeh bang paladku?" Idi kebala Tuhan neneh, "Amé' iko, ngaceku Ui maré nedeh bang paladmu."

¹¹Idi Daud iné' déi' su luk titen "Tuhan luk Nemesut", idi ieh nengelaya' nelun Pilistin déi', kebalaneh, "Idi Tuhan pangeh nemesut amung bunu'ku ku tiku'ku mepad kudeng ereb." Idi ngaceku ineh ieh neneten su ineh, "Tuhan Luk Nemesut".

¹²Idi lun Pilistin nenecan amung akangdeh déi'. Idi Daud nengecuk nelun ngeseb amung ineh.

¹³Idi lun Pilistin nacing baruh teh, idi nengaro anun-anun rat nelun Israil teh.

¹⁴Idi sekua' teh Daud nengitun Tuhan, idi kebala Tuhan neneh, "Aleg iko amé' matun nedeh. Iamo' do' iko munu' nedeh rat pa keted, idi iko amé' matun nedeh rat bal kayuh.

¹⁵Idi kareb iko ninger luk kudeng gara lun nalan udung kayuh telatang ineh, do' iko amé' pebunu', ngaceku kareb ineh Tuhan remuat idi nalan pa atun muyuh, sikal ngelaya' baweh lun Pilistin."

¹⁶Idi Daud nenganau' maya' kudeng luk icuk Tuhan neneh. Idi ideh nengelaya' nelun Pilistin ineh rat Gibion macing déi' Giser.

¹⁷Idi ngadan Daud mebala apud amung bawang, idi Tuhan nenganau' nelun pupu baken matot neneh.

Inul Luk Pun-Pun 15

¹Daud nemudut tuda'-tuda' ruma' kuanneh déi' Yerusalim. Idi ieh nenganau' aceh lepo su luk inan Pati' Pejani' Allah.

- ²Idi kebalaneh, "Idi lun Liwi mo' miak mirir Pati' Pejani' Allah. Ngaceku ideh luk pinili' Tuhan miak mirir ineh, idi miak ngakem kuanNeh macing raked-ruked."
- ³Idi Daud nengamung amung lun Israil déi' Yerusalim, pad ideh nguit Pati' Pejani' ineh amé' su inanneh luk pangeh tinina'neh kuan ineh.
- ⁴Idi Daud nengamung amung inul Arun, idi amung lun Liwi pana'.
- ⁵Ratnan inul Kohat, macing Uriel lun rayehdeh dengan 120 burur pupuneh.
- ⁶Ratnan inul Merari, nacing Asaya lun rayehdeh, dengan 220 burur pupuneh.
- ⁷Ratnan inul Gerson, nacing Yoel lun rayehdeh, dengan 130 burur pupuneh.
- ⁸Ratnan inul Elisapan, nacing Semaya lun rayehdeh, dengan 200 burur pupuneh.
- ⁹Ratnan inul Hebron, nacing Eliel lun rayehdeh, dengan 80 burur pupuneh.
- ¹⁰Ratnan inul Usiel, nacing Aminadab lun rayehdeh, dengan 112 burur pupuneh.
- ¹¹Idi Daud nenawar Imam Saduk idi Abiatar, idi lun Liwi, ieh ineh Uriel, Asaya, Yoel, Semaya, Eliel, idi Aminadab.
- ¹²Idi kebala Daud nedeh, "Muyuh ini lun rayeh amung lun bang tetek ruma' lun Liwi. Do' muyuh idi amung kinanak muyuh ngeligan burur muyuh, pelé muyuh miak nguit Pati' Pejani' Tuhan Allah lun Israil amé' su inanneh luk pangeh tinina'ku kuanneh.
- ¹³Ngaceku na muyuh nenguit ineh pun-pun, idi Tuhan Allah tau nengukum netau, ngaceku tau na sembayang Neneh mepad kudeng luk pangeh litep."
- ¹⁴Idi amung imam idi lun Liwi pana' nengeligan bururdeh sikal nguit Pati' Pejani' Tuhan Allah lun Israil.
- ¹⁵Idi lun Liwi nemirir ineh ku kayuh, maya' kudeng luk pangeh bila Tuhan ni Musa.

¹⁶Daud nengecuk nelun rayeh lun Liwi ngelelep kinanakdeh mangun ku lun luk menani dengan raput-raput uni, ieh ineh gita, suling, idi karing, pad uni ineh miak nganau' mawang niat.

¹⁷⁻²¹Idi lun Liwi nengelelep Heman Yoel, idi pupuneh Asap Berekia, idi Etan Kusaya ratnan pupu Merari, ngura' karing tekaling. Idi dengandeh ineh ideh nemili' tuda'-tuda' lun Liwi luk nateg giula' luk melaki' uni, ieh ineh Sekaria, Yasiel, Semiramot, Yehil, Uni, Eliab, Manasia, idi Benaya. Idi ideh nemili' tuda'-tuda' lun Liwi luk nateg giula' luk medangor uni, ieh ineh Matitia, Elipelu, Mikria, Asasia, idi lun luk nginita Ruma' Allah, ieh ineh Obed Edom idi Yiel.

²²Kenania pinili' ku lun nguyut nelun Liwi luk menani ineh, ngaceku ieh mileh.

²³Berekia idi Elkana, pinili' ku lun luk nginita Pati' Pejani' ineh.

²⁴Ideh nemili' tuda'-tuda' imam luk ngiup serupit pa atun Pati' Pejani' ineh, ieh ineh Sebania, Yosapat, Netanel, Amasai, Sekaria, Benaya, Elieser, Obed Edom, idi Yehia mangun ku lun luk nginita Pati' Pejani' ineh.

²⁵Daud dengan amung lun rayeh Israil, idi amung lun rayeh baweh, iné' ngalap Pati' Pejani' Tuhan rat bang ruma' Obed Edom dengan awang niat.

²⁶Idi ngaceku Allah nengedengan nelun Liwi luk nemirir Pati' Pejani' ineh, idi ideh nemaré tudu' sapi' deléi, idi tudu' dumba deléi ku aceh baré kuan Tuhan.

²⁷Idi Daud nengayung ku kuyu' kibung pu luk do'. Kudeng ineh teh amung lun Liwi luk nemirir Pati' Pejani', amung lun luk menani, idi Kenania lun luk nguyut nelun luk menani ineh. Idi teh Daud nengayung ku abet awa' imam ratnan kibung pu luk do'.

²⁸Idi amung lun Israil nenguit Pati' Pejani' Tuhan iné' Yerusalim, dengan ngitang mawang niat, dengan uni serupit, giula', gita, idi karing.

²⁹Kareb Pati' Pejani' Tuhan nacing bang bawang Daud, idi Mikal Saul ineh nenier rat i tabuk, idi ieh kali' Raca' Daud uned sikau' idi ngalai. Idi ieh nengedat neneh bang niatneh.

Inul Luk Pun-Pun 16

- ¹Ideh nenguit Pati' Pejani' ineh semuet bang Lepo luk pangeh tinina' Daud kuanneh. Idi ideh nemaré tuda'-tuda' baré luk sabpen idi baré luk nguit pedo' kuan Allah.
- ²Kareb Daud pangeh nemaré amung baré ineh, idi ieh nemaré peruan kuan lun mula' ineh dengan ngadan Tuhan.
- ³Idi ieh nemaré akan kuan amungdeh, do' deléi idi decur pana', anid-aniddeh sebalad ruti, sebulu' uang pung idi kireng bua' anggur.
- ⁴Daud nengeletep tuda'-tuda' lun Liwi luk nguyut nani ubur kuan Tuhan Allah lun Israil, pa atun Pati' Pejani' ineh.
- ⁵Idi Asap ieh ineh lun rayehdeh. Idi luk kedueh rat neneh ieh ineh Sekaria. Yiel, Semiramot, Yehil, Matitia, Eliab, Benaya, Obed Edom, idi Yiel nenateg gita idi giula'. Idi Asap ngura' karing.
- ⁶Idi dueh imam, ieh ineh Benaya idi Yahasiel megéi' ngiup serupit pa atun Pati' Pejani' Allah.
- ⁷Idi bang kareb ineh Daud pun-pun nengecuk Asap idi lun Liwi luk baken ineh nguyut nani ubur kuan Tuhan.
- ⁸Maré ubur kuan Tuhan idi mada' rayehNeh; idi maré kali' kuan amung pupu ratnan luk inau'Neh!
- ⁹Do' menani ngubur Neneh; idi mada' amung kekamenNeh luk inan mawa!
- ¹⁰Do' tau mawang niat ngaceku ngadanNeh luk rayeh, idi do' lemulun luk ngakem kuan Tuhan mawang niat!
- ¹¹Amé' matun Tuhan mutuh pedengan; idi megéi' nakap Neneh.
- ¹²Ngerawé kekamenNeh luk inan mawa! idi ukum luk pangeh biréNeh.
- ¹³O inul Ibrahim, luk demulunNeh, O anak-anak Yakub luk pinili'Neh!
- ¹⁴Tuhan ineh Allah tau; ukumNeh kuan aput tana'.
- ¹⁵Ieh miak nginita jani'Neh kuan meribu inul macing raked-raked,

- 16idi nginita jani'Neh ni Ibrahim, idi Isak pana'.
- 17Tuhan nenganau' jani' luk meruked kuan Israil, idi kuan Yakub, kebalaNeh,
- 18"Ui miak maré tana' Kanaan mangun ku babpatmu sebuleng."
- 19Kareb pupu Allah nateh mula', idi ideh sakai bang bawang Kanaan.
- 20Ideh nenalan bang anid-anid bawang, idi anid-anid imet.
- 21Na Tuhan nenima' seburur pana' ngedereh nedeh, iamo' Ieh nemada' raca'-raca' ratnan lawédeh,
- 22kebalaNeh, "Aleg ngesusa' demulun luk pinili'Ku, idi aleg ngedereh nabi-nabiKu!"
- 23O amung-amung tana', do' menani kuan Tuhan! Do' mada' anid-anid aco, bala luk do' ratnan Ieh nengulun netau!
- 24Do' mada' rayeh kuan amung bawang, idi kekamenNeh luk melalud kuan amung pupu.
- 25Tuhan ineh rayeh idi miak buren tutu; Ieh miak katot ratnan amung allah.
- 26Allah amung pupu baken ineh akang mo', iamo' Tuhan luk nenganau' langit.
- 27Ubur idi dita' libutNeh, rayeh idi awang bang ruma'Neh.
- 28Do' amung lemulun luk luun tana' ngubur Tuhan! Ngubur rayeh idi laludNeh!
- 29Ngubur ngadan Tuhan luk rayeh, do' nguit baré idi semuet bang ruma'Neh. Do' tekeradung pa kiung Luk Meligan ineh kareb Ieh melagan.
- 30O amung tana', do' matot pa kiungNeh! Tana' ini lutep idi na miak bebuen.
- 31O tana' idi langit, do' mawang niat! Mada' kuan amung pupu, "Tuhan ineh Raca'!"
- 32O abpa' rayeh, do' meberi, idi amung luk bang namu pana'! O amung laman idi luk bang namu pana', do' mawang niat!
- 33Idi kayuh pana' miak ngitang mawang niat, kareb Tuhan amé' ngimet tana' ini.

- ³⁴Maré ubur kuan Tuhan, ngaceku Ieh do'; idi awaNeh meruked.
- ³⁵Do' pebala Neneh, "Ngulun nekai, O Allah luk nengulun nekai; Ngamung nekai idi muit nekai rat nelun pupu baken, pad kai miak ngubur ngadanMu luk meligan, idi maré ubur Namu dengan mawang niat."
- ³⁶Ngubur Tuhan Allah lun Israil! Ngubur Neneh macing ruked-ruked! Idi amung lun mula' nepebala, "Amin!" Idi ideh nengubur Tuhan.
- ³⁷Daud nengeletep ni Asap idi kinanak-kinanakneh lun Liwi ku lun nguyut sembayang su luk inan Pati' Pejani' Tuhan, anid-anid aco.
- ³⁸Obed Edom, anak Yedutun idi anem ngepulu' ualuh burur pupuneh ngedengan nedeh. Hosa idi Obed Edom ineh luk nginita tanga'.
- ³⁹Iamo' Imam Saduk idi imam-imam luk denganneh nguyut sembayang nan Tuhan pa atun Lepo Tuhan luk déi' Gibion.
- ⁴⁰Ideh megéi' maré kuan Tuhan baré luk sabpen luun bubpun, pekak idi malem, maya' amung-amung luk inayud bang Surat Ukum Tuhan, luk bida'Neh nelun Israil.
- ⁴¹Idi lun luk pebaya' nedeh ineh, ieh ineh Heman idi Yedutun idi amung lun baken luk pinili' idi litep menani ngubur Tuhan, ngaceku awaNeh luk meruked.
- ⁴²Heman idi Yedutun inan suling idi karing ku nganau' uni dengan nani ubur. Idi amung-amung pupu Yedutun, ieh ineh lun luk nginita tanga'.
- ⁴³Idi pangeh ineh idi amung lun mula' nuli'. Idi Daud pana' nuli' sikal maré peruan kuan amung lun bang tetek ruma'neh.

Inul Luk Pun-Pun 17

- ¹Idi imet Raca' Daud pangeh litep. Idi ieh nenawar ni Nabi Natan, kebalaneh, "Idi ui tudo bang aceh ruma' ratnan kayuh tumuh. Iamo' Pati' Pejani' Tuhan tudo bang lepo kibung."
- ²Idi kebala Natan ni Daud, "Do' iko nganau' luk pianmu, ngaceku Allah idi denganmu."

- ³Iamo' bang malem ineh teh Tuhan nepebala ni Natan,
- ⁴"Amé' iko mada' balaKu kuan demulunKu Daud, 'Na iko miak nganau' ruma' luk inanKu tudo.
- ⁵Idi nateh Ui netudo bang aceh ruma' rat aco Ui nenguit nelun Israil neremuat rat Masir macing nekini. Iamo' Ui lawé-lawé, idi lepo kibung mo' ruma'Ku.
- ⁶Idi seruked Ui nalan dengan pupuKu Israil, nateh Ui nengitun nelun rayeh luk icukKu ngasa' nedeh, "Ngudeh muyuh na nganau' aceh ruma' kuanKu, ratnan kayuh tumuh?"
- ⁷"Idi nekini do' iko mada' kuan demulunKu Daud, 'Ini bala Tuhan luk Melalud, Ui pangeh nengikit namu rat bang laman, idi ratnan matar dumba, mangun ku lun nguyut amung pupuKu lun Israil.
- ⁸Idi Ui idi denganmu iapeh-iapeh su luk ulekmu. Idi Ui pangeh nengaté amung bunu'mu. Idi Ui miak ngerayeh ngadanmu mepad kudeng ngadan lun luk meluun rayeh luk luun tana'.
- ⁹Idi Ui miak ngeletep aceh luk inan kuan pupuKu Israil, pad ideh tudo su luk litep ineh, idi na ideh uen ngagap, idi teh na ideh uen pupu luk dat ngesusa', mepad kudeng luk atun,
- ¹⁰rat kareb Ui nengecuk nelun luk muit pupuKu Israil. Idi Ui miak ngelaya' amung bunu'mu. Idi teh Tuhan miak ngeletep inulmu mucu mangun ku raca'.
- ¹¹Idi kareb iko maté, idi tinamen dengan tepunmu, Ui miak ngikit sebuleng anakmu mangun ku raca'. Idi Ui miak ngeletep imetneh.
- ¹²Idi ieh luk miak mudut aceh ruma' kuanKu. Idi Ui miak ngeletep kerusi inulneh ngimet macing raked-raked.
- ¹³Idi Ui mangun ku Tamannah. Idi ieh teh mangun ku anakKu. Iamo' na Ui necan neneh, mepad kudeng Ui nenecan ni Saul, luk pangeh tila'Ku, pelé iko mangun ku raca'.

- ¹⁴Iamo' Ui miak ngeletep neneh bang ruma' idi imetKu macing raked-raked. Idi imetneh pana' miak lutep macing raked-raked.' “
- ¹⁵Idi luk linio Allah ni Natan, bida'neh ni Daud.
- ¹⁶Idi Raca' Daud nesemuet bang Lepo idi tudo pa kiung Tuhan, kesembayangneh, "O Tuhan Allah, ui na mayu ngalap amung peruan luk biréMu kuanku idi kuan tetek ruma'ku.
- ¹⁷Iamo' Iko ngula' peruanMu kuanku, pad Iko nepejani' ngeperuan inulku mucu; nekini pana', O Tuhan Allah, Iko ngerayeh negku, mepad kudeng seburur lemulun luk mebala.
- ¹⁸Idi anun teh miak belénku Namu. Sagan tu pana' Iko kali' negku, Iko ngerayeh negku luk demulunMu.
- ¹⁹Ini pianMu sebuleng; idi Iko nengelio amung kekamen ini luk rayeh kuanku.
- ²⁰O Tuhan, na luk mepad kudeng Iko idi na Allah baken teh. Idi kai pangeh nekali' ineh.
- ²¹Idi pupu sapeh bang tana' ini, mepad kudeng pupuMu lun Israil, luk pangeh inuli'Mu rat Masir, mangun ku pupuMu. Idi Iko mebala ngaceku Iko nenganau' kekamenMu luk katot. Ngaceku Iko nengusu amung pupu rat pa kiung pupuMu, kareb Iko nemuit nedeh ineh rat bang bawang Masir?
- ²²Iko pangeh nengeletep pupuMu Israil mangun ku aceh pupuMu macing raked-raked. Idi Iko, O Tuhan, pangeh mangun ku Allahdeh.
- ²³"Idi nekini O Tuhan Allah megéi' nganau' kuanku, idi kuan tetek ruma'ku, maya' kudeng luk pijani'Mu negku,
- ²⁴pad ngadanMu uen ngerayeh macing raked-raked, pelé lemulun miak mala, 'Tuhan luk Melalud. Ieh ineh Allah lun Israil,' idi imet inulku uenMu ngeletep macing raked-raked.
- ²⁵Ui mekuu' sembayang pa kiungMu, O Allahku ngaceku Iko nengegala' amung ini kuan demulunMu. Idi Iko nganau' inulku mangun ku raca'.

²⁶Nekini, O Tuhan, Iko Allah luk matu, idi Iko teh luk pangeh nemaré jani' luk do' ini kuanku.

²⁷Ui mutuh Namu ngeperuan inulku, pelé ideh inanMu méi' macing raked-raked. O Tuhan, Iko pangeh nengeperuan nedeh. Maré peruanMu kuandeh macing raked-raked peh."

Inul Luk Pun-Pun 18

¹Muci ratnan ineh, idi Daud nengelaya' nelun Pilistin. Idi ieh nengaro bawang Gat idi amung babpatneh rat bang palad lun Pilistin ineh.

²Idi teh ieh nengelaya' nelun Moab, pad ideh mangun ku anak itin Daud, idi ideh nemaré pupuk neneh.

³Idi teh Daud nengelaya' ni Hadadeser raca' Soba muneng ku Hamat, kareb ieh iné' ngelelep imetneh déi' Abpa' Pirat.

⁴Idi Daud nengaro rat nedeh, 1,000 keréta bunu', idi 7,000 lun luk maya' kuda, idi 20,000 lun luk nalan kukud. Idi Daud nemulu' urat tumod amung kuda luk ngeruid kerétadeh ineh. Iamo' ieh nengalap petap kuda kuan meratu kerétaneh.

⁵Idi lun Siria nacing rat Damsik sikal ngedengan ni Hadadeser raca' Soba ineh. Iamo' Daud nengaté 22,000 burur lun Siria ineh.

⁶Idi Daud nengelelep tuda'-tuda' baweh bang bawang-bawangdeh, idi lun Siria mangun ku anak itin Daud, idi ideh nemaré pupuk neneh. Idi Tuhan nemaré tueh ni Daud, iapeh pana' ulekneh.

⁷Idi Daud nengalap amung utap amas rat nelun duken Hadadeser ineh, idi ieh nenguit ineh iné' Yerusalim.

⁸Idi ieh nengalap mula' tekaling rat Tibkat idi Kun, dueh bawang luk bang imet Hadadeser ineh. Idi ratnan tekaling ineh, Selimun nenganau' takung tekaling, idi dueh pekatu diri, idi amung-amung repapeh luk inau' ratnan tekaling, idi dueh pekatu diri, idi amung-amung repapeh luk inau' ratnan tekaling ineh kuan Ruma' Allah.

⁹Kareb Tui raca' Hamat nekali' bala Daud pangeh nengelaya' amung baweh Hadadeser ineh,

¹⁰Idi ieh nengecuk anakneh Yoram amé' papu' Raca' Daud, pad ieh petabi' neneh, idi ngubur neneh, ngaceku Daud pangeh nengelaya' ni Hadadeser. Ngaceku Hadadeser ineh megéi' pebunu' ni Tui. Idi Yoram nenguit kuanneh raput-raput repapeh amas, pirak, idi tekaling.

¹¹Idi binaweh ineh pana' pangeh linigan Raca' Daud kuan Tuhan, dengan amung amas idi pirak luk pangeh ilapneh ratnan amung pupu baken luk pangeh linaya'neh, ieh ineh rat nelun Edom, Moab, Amon, Pilistin, idi Amalek.

¹²Idi Abisai anak Seruya nengelaya' nelun Edom, idi nengaté 18,000 bururdeh déi' Ruan Tucu'.

¹³Idi ieh nengelelep tuda'-tuda' baweh apud bawang Edom, idi lun Edom mangun ku anak itin Daud. Idi Tuhan nemaré tueh kuan Daud iapeh pana' ulekneh.

¹⁴Idi Daud nengimet amung lun Israil. Idi ieh nenganau' luk do' idi mepiteb kuan amung pupuneh.

¹⁵Idi Yoab anak Seruya, ieh ineh lun rayeh baweh. Idi Yosapat Ahilud, ieh ineh lun luk ngayud.

¹⁶Idi Saduk Ahitub idi Ahimalek Abiatar, ieh ineh imam. Idi Seraya, ieh ineh lun luk ngayud.

¹⁷Idi Benaya Yoyada, ieh ineh lun rayeh lun luk matar ni Daud. Idi amung anak Daud ineh lun rayeh-rayeh tareh raca'.

Inul Luk Pun-Pun 19

¹Muci ratnan ineh Nahas raca' Amon naté, idi anakneh Hanun mangun ku raca' libalneh.

²Idi kebala Daud, "Ui sikal nganau' luk do' kuan Hanun Nahas. Ngaceku tamanneh nenganau' luk do' kuanku atun." Idi Daud nengecuk nelun

dukenneh ngubuk neneh ngaceku até tamanneh. Kareb ideh nacing déi' Amon idi nepapu' Raca' Hanun,

³Idi amung lun rayeh Amon nepebala ni Hanun, "Matuké iko ngerawé Daud nengecuk nelun ngubuk namu ngaceku ieh ngerayeh tamanmu? Naké Daud nengecuk nelun dukenneh amé' namu, pad ideh miak nier bawang, idi ngelaya' ineh?"

⁴Idi Hanun nengalap amung lun duken Daud ineh. Idi ieh nengiki nedeh, idi ieh nemulu' setangal ayungdeh macing i tipandeh. Idi ieh nengecuk nedeh muli'.

⁵Idi ideh pelaba igu' pad ideh na nuli'. Idi kareb Daud nekali' bala ineh, idi ieh nengecuk nedeh tudo déi' Yeriko pad buluh adadeh mulun.

⁶Kareb Raca' Hanun idi lun Amon nekali' ni Daud museh nedeh ku ineh, Amon nemaré 3,000,000 balad pirak ku nabpar aceh baweh, idi lun maya' kuda rat punang Mesopotamia, idi rat Maka idi Soba dueh bawang Siria.

⁷Idi 32,000 keréta bunu' luk tibpardeh idi baweh raca' Maka nacing idi nelupo muneng ku Mediba. Idi amung lun Amon pana' nepamung, idi netemina' pebunu'.

⁸Kareb Daud nekali' ratnan luk mangun ineh, idi ieh nengecuk ni Yoab dengan amung baweh amé' pebunu' nedeh.

⁹Idi lun Amon nenalan idi nengelalad bawehdeh munung Raba luk bawang rayeh. Idi raca'-raca' luk nacing ngedengan nedeh netuped setau' luun natad.

¹⁰Idi kareb Yoab nenier lawé baweh ineh amé' matun neneh rat pa atun, idi rat pa puet, idi ieh nengalap sebuang lun mesangit luk pinili' rat arang lun Israil. Idi ieh nengerareng nedeh petutup nelun Siria.

¹¹Idi ela anak itinneh ineh biréneh bang palad kinanakneh Abisai luk ngelalad bawehneh petutup nelun Amon.

¹²Idi kebala Yoab neneh, "Kudeng lun Siria ineh ngelaya' negku, do' iko amé' ngedengan negku. Idi kudeng lun Amon ineh ngelaya' namu, kali' rungen ui amé' ngedengan namu.

¹³Do' tau metueh idi mekuu! Do' tau metueh pebunu' kuan pupu tau, idi kuan amung bawang Allah tau. Idi do' Tuhan nganau' anun-anun luk do' pa kiungNeh."

¹⁴Yoab idi amung bawehneh iné' pebunu' nelun Siria. Idi lun Siria neburo.

¹⁵Kareb lun Amon nenier nelun Siria neburo, idi ideh pana' neburo rat ni Abisai, idi nesemuet bang bawang. Idi Yoab nuli' iné' Yerusalim.

¹⁶Kareb lun Siria nekali' nedeh pangeh linaya' lun Israil, idi ideh nenguit tuda'-tuda' lun pebunu' rat bawang-bawang Siria luk pa busat aco Abpa' Pirat, idi Sopak lun rayeh bunu' Hadadeser mangun ku lun rayehdeh.

¹⁷Idi kareb bala ineh nekali' Daud, idi ieh nengamung amung lun Israil, idi neguta Abpa' Yarden, idi nengelalad nedeh petutup ku lun Siria. Idi ideh nepebunu'.

¹⁸Idi lun Israil ngelaya' baweh Siria. Idi rat nelun Siria ineh idi Daud nengaté 7,000 burur lun luk ngimet keréta, idi 40,000 lun luk nalan kukud. Idi teh ideh nengaté ni Sopak lun rayeh baweh Siria ineh.

¹⁹Idi kareb amung raca' luk bang imet Hadadeser nekali' nedeh linaya' lun Israil, idi ideh nepedo' ni Daud idi mangun ku anak itinneh. Idi lun Siria ineh matot ngedengan nelun Amon peh.

Inul Luk Pun-Pun 20

¹Idi kareb pun aco luk melau' kareb raca'-raca' amé' pebunu', idi Yoab nenguit amung baweh, idi nengerieng bawang lun Amon. Idi ideh nengelibut bawang Raba. Iamo' Daud ketecan déi' Yerusalim. Yoab ngelaya' idi nengusag bawang Raba.

²Akang lun Amon luk titen Milkom inan aceh pata luk beratneh lélé 57 kati. Idi luunneh ineh aceh batu luk meraga luk ilap Daud kuan pataneh sebuleng. Idi teh raca' nenguit mula' binaweh rat bang bawang ineh.

³Idi ieh nenguit amung lun luk tudo bang bawang ineh, idi ieh nengecuk nedeh ngakem ku geradi, sakol, idi uai. Idi ieh nenganau' kudeng ineh kuan amung bawang Amon. Idi ieh nuli' dengan amung anak itinneh iné' déi' Yerusalim.

⁴Muci ratnan ineh inan bunu' nelun Pilistin déi' Giser. Idi Sibkai lun Husa nengaté ni Sipai luk ratnan inul lun rayeh burur, idi lun Pilistin linaya'.

⁵Idi mucu ratnan ineh inan teh aceh bunu' nelun Pilistin. Idi Elhanan Yair nengaté Lakmi, kinanak Goliat lun Gat ineh. Idi etun busuneh mepad kirayeh iad luk ku ngebaruh.

⁶Idi teh inan aceh bunu' déi' Gat. Déi' inan aceh deléi luk pelaba rayeh burur. Idi bua' ticu' idi bua' kukudneh anem mop-mop. Idi lun ineh pana' ratnan inul lun rayeh burur.

⁷Idi ieh nesitunga nelun Israil, iamo' ieh pinaté Yonatan Sama kinanak Daud.

⁸Idi ideh luk teluh burur ini ratnan inul luk rayeh burur déi' Gat. Idi ideh ineh pinaté Daud idi anak itinneh.

Inul Luk Pun-Pun 21

¹Sétan pian ngesusa' nelun Israil, idi ieh nengubuk ni Daud pelé ieh ngiap kinula' lun Israil.

²Idi kebala Daud ni Yoab idi amung lun rayeh baweh ineh, "Amé' muyuh apud bawang Israil idi ngiap amung lemulun, pelé ui miak kali' kinula'deh."

³Idi kebala Yoab, "Do' Tuhan ngula' amung pupuNeh meratu kua', O raca', naké amungdeh ineh lun dukenmu? Iamo' ngudehké iko pian ku dalan luk kudeng ini? Anun punmu nguit nelun Israil mesala'?"

⁴Iamo' raca' mesaad. Ngaceku ineh Yoab nenalan iné' apud bawang Israil. Pangeh ineh idi ieh nelemubed iné' déi' Yerusalim.

- ⁵Idi ieh nemada' lun luk iniap ineh ni Daud. Idi kinula' amung lun Israil luk miak amé' pebunu' 1,100,000 burur, idi kinula' lun Yahuda, 470,000 burur.
- ⁶Iamo' na ieh nengiap kinula' lun Liwi idi lun Benjamin, ngaceku ukum raca' na petulu siren Yoab.
- ⁷Idi kekamen ineh teh dat pa kiung Allah. Ngaceku ineh Ieh nengedereh nelun Israil.
- ⁸Idi kebala Daud inan Allah, "Ui pelaba sala', ngaceku nenganau' luk kudeng ineh. Iamo' nekini do' nala' sala'ku, ngaceku ui pelaba bacé."
- ⁹Idi kebala Tuhan ni Nabi Gad, luk mada' ni Daud,
- ¹⁰"Amé' iko mada' ini ni Daud, 'Kudeng ini bala Tuhan. Teluh dalam ini badénKu kuanmu. Do' iko mili' sebuleng. Idi Ui miak nganau' kuanmu.' "
- ¹¹Idi Gad iné' ni Daud, idi nekidi neneh, "Kudeng ini bala Tuhan, 'Do' iko mili'!
- ¹²Iru' teluh lak kinioneh; luk kedueh, bunu' teluh bulan kinioneh, pad iko ruen bunu'mu ngelaya'; luk keteluh, pelapet Tuhan teluh aco kinioneh, ieh ineh kaca déi' bang bawang, idi seburur melaikat Tuhan miak ngaté nelun aput-aput tana' lun Israil.' Idi nekini do' iko mili' anun ormu kuan Tuhan."
- ¹³Idi kebala Daud ni Gad, "Pelaba dat niatku. Do' ui mebpeh bang palad Tuhan, ngaceku Ieh luk inan éi'. Iamo' aleg ui mebpeh bang palad lemulun."
- ¹⁴Idi Tuhan nengacing aceh kaca arang lun Israil idi 70,000 bururdeh naté.
- ¹⁵Idi Allah nengecuk aceh melaikat amé' déi' Yerusalim pad ieh ngusag bawang ineh. Iamo' Tuhan nenginuud; idi kebalaNeh kuan melaikat ineh, "Pangeh petap ineh peh. Ngeluut ticu'mu nekini." Idi melaikat Tuhan ineh netuped iring su inan Arauna lun Yebusi rumik ineh.
- ¹⁶Idi kareb Daud netengook ieh nenier melaikat Tuhan ineh tuped arang gawa', idi pelapet luk pangeh ingat ineh bang paladneh, idi ieh nguma' Yerusalim. Idi Daud netekeradung dengan amung lun rayeh-rayeh. Idi amungdeh nengayung ku kibung guni.

- ¹⁷Kesembayang Daud, "Ui teh luk pangeh nengecuk ngiap kinula' lun ini. Idi ui teh luk mesala', idi luk pangeh nenganau' luk dat. Iamo' anak itinku ini, anunké sala'deh? O Tuhan Allahku, do' Iko ngedereh negku idi amung lun bang tetek ruma'ku. Iamo' méi' inan pupuMu."
- ¹⁸Idi melaikat Tuhan nengecuk ni Gad mada' ni Daud, pad ieh amé' mudut aceh bubpun kuan Tuhan su luk inan Arauna rumik ineh.
- ¹⁹Idi Daud iné' maya' bala Gad, petulu ku bala Tuhan.
- ²⁰Idi Arauna uned rumik padé. Kareb ideh nenier melaikat ineh, idi apat burur anak deléineh nesigapung.
- ²¹Kareb Daud nacing ni Arauna, idi Arauna nenier neneh. Idi ieh neremuat rat su inan rumik ineh, idi netekeradung pa kiung Daud.
- ²²Idi kebala Daud ni Arauna, "Barén kuanku su luk inan rumik ini, pelé ui nganau' aceh bubpun kuan Tuhan — maré neneh kuanku dengan raganeh luk petap — pelé kaca ini ugka' rat nelun mula' ineh."
- ²³Idi kebala Arauna ni Daud, "Do' iko ngalap ineh idi iko nganau' anun luk do' sirenmu. Ngaceku ui maré sapi' ini teh ku baré sabpen, idi luk inan rumik ku kayuh apuineh, idi padé ini ku baré akan. Amung ini barénku."
- ²⁴Iamo' kebala raca', "Aleg kudeng ineh. Iamo' na miak na ui melih ineh dengan raga luk petap, ngaceku na ui sikal ngalap luk iko kuan, kuan Tuhan, pad ui maré baré luk na raga."
- ²⁵Idi Daud nemaré kuan Arauna anem ngeratu balad amas.
- ²⁶Ieh nemudut bubpun kuan Tuhan déi', idi ieh nemaré luk sabpen idi baré luk nguit pedo', idi nenawar ngadan Tuhan. Idi Tuhan nengor tawarneh dengan apui rat déi' langit luk ku ngeseb baré luk luun bubpun ineh.
- ²⁷Idi Tuhan nengecuk melaikat ngusong pelapetneh ineh.
- ²⁸Idi Daud kali' Tuhan pangeh nengor sembayangneh idi ieh nemaré baré luun bubpun su luk inan Arauna rumik ineh.

²⁹Ngaceku bang kareb ineh Lepo su luk inan papu' Tuhan luk pinudut Musa déi' su luk ali-ali, idi bubpun luk inan ngeseb baré idi luun Surud Gibion.

³⁰Iamo' Daud na miak amé' déi' sembayang inan Allah, ngaceku ieh matot ku pelapet melaikat Tuhan ineh.

Inul Luk Pun-Pun 22

¹Idi kebala Daud, "Idi su ini teh miak inan Ruma' Tuhan Allah. Idi su ini teh bubpun luk inan ngeseb baré luk sabpen kuan amung lun Israil."

²Daud nengecuk ngamung lun sakai luk bang bawang Israil. Idi ieh nengecuk nedeh ngakem. Sebuangdeh nemila' batu piduten ku Ruma' Allah.

³Idi ieh netemina' mula' belawan ku maku' amung-amung tanga' idi palin-palin, idi teh tekaling luk na miak uen nimang.

⁴Idi lun Sur idi lun Sidon icukneh nguit kayuh tumuh luk pelaba ula'.

⁵Ngaceku terawé Daud, "Anakku Selimun ineh teh isuut idi na pekalai, idi Ruma' luk ruen kuan Tuhan ineh miak rayeh idi do', pelé ineh mebala idi buren apud amung bawang. Ngaceku ineh do' ui temina' ku ineh nekini." Idi Daud netemina' ku repapeh Ruma' ineh kareb nateh ieh naté.

⁶Idi ieh nenawar anakneh Selimun idi nengecuk neneh mudut aceh ruma' kuan Tuhan Allah lun Israil.

⁷Idi kebala Daud neneh, "O Asi, ui pangeh nengerawé sikal mudut aceh ruma' pad ngerayeh Tuhan Allahku.

⁸Iamo' kebala Tuhan negku, 'Iko pangeh nengaté pelaba ula' lemulun, idi megéi' pebunu'. Iko na miak mudut aceh ruma' kuanKu, ngaceku iko pangeh nengeruat mula' dara'.'

⁹Iamo' Tuhan nepejani' negku, kebalaNeh, 'Muci inan anak deléimu. Idi ieh na miak amé' pebunu', ngaceku Ui maré neneh pedo' dengan amung bunu'neh. Idi ngadanneh Selimun, ngaceku kareb imetneh Ui maré do' udeng idi awang kuan amung lun Israil.

¹⁰Idi ieh miak mudut aceh ruma' kuanKu. Idi ieh teh mangun ku anakKu. Idi Ui pana' mangun ku Tamanneh. Idi imetneh nelun Israil uenKu ngelelep macing raked-raked.' “

¹¹Idi teh kebala Daud, "Nekini O Asi, Tuhanmu ngedengan namu, idi iko pana' miak inan peruan, idi mudut Ruma' Tuhan Allahmu, maya' kudeng luk bida'Neh.

¹²Do' Tuhan maré kuanmu ileh idi beneh niat, pad iko nguyut nelun Israil, petulu ku ukumNeh.

¹³Kudeng iko maya' amung ukum luk bida' Tuhan ni Musa kuan lun Israil kali' rungen iko inan peruan. Do' iko metueh idi mekuu'. Aleg iko matot idi megegker.

¹⁴Ngaceku sagan tu pana' ui mesusa', ui pangeh netemina' ku Ruma' Allah 300 juta balad amas, idi 3,000 juta balad pirak, idi teh tekaling idi belawan luk na miak uen nimang ngaceku pelaba ula'deh. Idi teh ui pangeh netemina' ku kayuh idi batu. Idi do' iko ngula' ineh teh.

¹⁵Idi teh iko inan mula' lun mileh, ieh ineh lun luk mila' batu, lun luk mileh bang amung-amung kekamen,

¹⁶amas, pirak, tekaling, idi belawan. Do' iko ngimun kekamen ineh. Idi do' Tuhan ngedengan namu.”

¹⁷Daud nengecuk amung lun rayeh lun Israil ngedengan ni Selimun.

¹⁸Kebalaneh, "Tuhan Allah muyuh pangeh ngedengan nemuyuh, pad Ieh nemaré nemuyuh do' udeng. Ieh pangeh nemaré amung lun luk tudo bang bawang ini atun bang paladku. Idi nekini ideh pa liang imet muyuh idi pa liang Tuhan pana'.

¹⁹Idi do' muyuh lutep niat idi temina' nakap Tuhan Allah muyuh. Idi do' muyuh amé' mudut Ruma' Allah, pelé Pati' Pejani' Tuhan idi amung binaweh Allah luk meligan ineh miak iten semuet bang Ruma' luk miak piduten kuanNeh."

Inul Luk Pun-Pun 23

¹Kareb Daud pangeh mengered, idi ieh nengikit anakneh Selimun ku raca' lun Israil.

²Daud nengamung amung lun rayeh Israil, dengan amung imam idi lun Liwi teh.

³Idi ieh nengiap nelun Liwi luk deléi luk ulun teluh ngepulu' lak idi mela. Idi kinula'deh 38,000 burur.

⁴Idi raca' nengeletep 24,000 burur ngakem Ruma' Tuhan, idi 6,000 burur luk ngayud ratnan kekamen ineh idi luk mutut ukum teh.

⁵Ieh nengeletep 4,000 burur lun nginita tanga' idi 4,000 burur lun luk ngubur Tuhan dengan amung luk muni luk pangeh inau' ku ngubur Tuhan ineh.

⁶Idi Daud nemabpat nelun Liwi teluh babpat maya' inuldeh, ieh ineh Gerson, Kohat, idi Merari.

⁷Gerson inan dueh anak deléi, ieh ineh Ladan idi Simi.

⁸Ladan inan teluh anak deléi, ieh ineh Yehil, Sitam, idi Yoel,

⁹luk mangun ku lun rayeh pupu Ladan. (Simi inan teluh anak deléi, ieh ineh Selomot, Hasiel, idi Haran.)

¹⁰⁻¹¹Simi inan apat anak deléi, ieh ineh Yahat, Sina, Yus, idi Beria. Amungdeh apat burur. Idi Yahat, ieh ineh anak luk atun, Sina luk kedueh, Yus luk keteluh, idi Beria luk keapat. Yus idi Beria na mula' anak. Ngaceku ineh didueh iniap mepad kudeng setetek ruma' mo'.

¹²Kohat inan apat anak deléi, ieh ineh Amram, Isar, Hebron, idi Usiel.

¹³Idi Amram, anakneh luk atun ineh nenginul Arun idi Musa. (Arun idi anak inulneh ineh itad ku kekamen maré baré luk meluun meligan, idi pad ideh ngeseb umau luk do' buen pa kiung Tuhan macing raked-raked, idi ngakem kuanNeh, idi maré peruan nelun mula' dengan ngadanNeh.

¹⁴Idi anak Musa, nabi Allah tetanen arang inul pupu Liwi.)

- ¹⁵Musa inan dueh anak deléi, ieh ineh Gersom, idi Elieser.
- ¹⁶Idi rat arang anak Gersom ineh, Sebul luk lun rayeh.
- ¹⁷Elieser inan sebuleng anak deléi mo', ieh ineh Rehabia, iamo' inul Rehabia mula'.
- ¹⁸Idi Isar anak Kohat luk kedueh inan sebuleng anak deléi, ieh ineh Selomit luk lun rayeh pupu.
- ¹⁹Idi Hebron, anak Kohat luk keteluh inan apat anak deléi, ieh ineh Yeria, Amaria, Yehasiel, idi Yekamiam.
- ²⁰Idi Usiel, anak Kohat luk keapat inan dueh anak deléi, ieh ineh Mika idi Isia.
- ²¹Merari inan dueh anak deléi, ieh ineh Mali idi Musi. Idi Mali pana' inan dueh anak deléi, ieh ineh Eliasar idi Kis.
- ²²Iamo' Eliasar naté dengan na anak deléi, iamo' decur mo'. Idi ideh ilap kaniddeh, ieh ineh anak Kis.
- ²³Idi Musi anak Merari luk kedueh inan teluh anak deléi, ieh ineh Mali, Ider, idi Yeremot.
- ²⁴Amungdeh ineh anak inul Liwi, maya' inuldeh idi tetek ruma'deh. Idi ngadan amungdeh ineh inayud bang surat inul ineh. Amung inul Liwi ineh, luk ulun dueh ngepulu' lak idi mela inan kekamen bang Ruma' Tuhan.
- ²⁵Kebala Daud, "Tuhan Allah lun Israil pangeh nemaré do' udeng kuan pupuNeh. Idi Ieh teh miak tudo déi' Yerusalim macing ruked-ruked.
- ²⁶Idi ngaceku ineh na lun Liwi mirir Lepo su luk inan papu' Tuhan peh idi repapeh sembayang pana'."
- ²⁷Idi dengan bala Daud luk mucu ineh, amung lun Liwi luk ulun dueh ngepulu' lak idi mela iniap, pad ideh miak ngakem kuan Tuhan.
- ²⁸Kekamen lun Liwi ineh, ieh ineh ngedengan imam-imam luk inul Arun bang kekamen Ruma' Allah, pad ideh ngasa' amung natad idi takep, idi ngeligan amung binaweh luk meligan, ku kekamen luk do' bang Ruma' Allah.

²⁹Ideh temina' ku ruti ubur kuan Tuhan, banak luk barén kenen, pinaram luk na lamud, baré luk dedangen, idi banak luk rinabur ku umau. Idi teh ideh nguad idi nimang amung baré bang Ruma' Allah.

³⁰Idi ideh miak ngubur idi ngerayeh Tuhan anid pekak idi anid malem,

³¹idi kareb inan baré luk sabpen kuan Tuhan kareb Aco luk inan Mudeng, Bulan Baruh, idi kareb aco rayeh luk baken teh. Inan tuda'-tuda' ukum luk ngegala' anid kekamen lun Liwi ineh. Kekamendeh luk meruked, ieh ineh ngubur Tuhan.

³²Ideh ngasa' Lepo su luk inan papu' Tuhan idi Ruma' Allah. Idi teh ideh ngedengan nelun imam, ieh ineh pupudeh luk inul Arun kareb sembayang bang Ruma' Allah.

Inul Luk Pun-Pun 24

¹Ini babpat-babpat anak inul Arun. Arun inan apat anak deléi: Nadab, Abihu, Eliasar, idi Itamar.

²Nadab idi Abihu naté atun ratnan taman didueh dengan na anak. Ngaceku ineh Eliasar idi Itamar mangun ku imam.

³Raca' Daud nemabpat anak inul Arun tuda'-tuda' babpat, maya' kekamendeh. Saduk luk inul Eliasar, idi Ahimalek luk inul Itamar, ngedengan neneh.

⁴Idi meluun ula' lun rayeh ratnan inul Eliasar ratnan inul Itamar, idi inul Eliasar inan pulu' anem lun rayeh bang tetek ruma' tamandeh, idi inul Itamar ualuh mo'.

⁵Idi ideh nemaré kekamen kuandeh dengan nenala' udi, ngaceku inan lun rayeh luk ngakem bang Ruma' Allah idi lun rayeh kuan kekamen Allah, do' ratnan inul Eliasar idi ratnan inul Itamar pana'.

⁶Idi amung ngadandeh inayud Semaya Netanel lun luk ngayud rat nelun Liwi. Idi pa kiung raca' dengan amung lun rayehneh, Imam Saduk, Ahimalek Abitar, idi lun rayeh tetek ruma' imam, idi tetek ruma' lun Liwi mangun ku lun nekali'. Anak inul Eliasar idi Itamar pelibal-pelibal mili'.

7-18Idi dueh ngepulu' apat babpat inul ineh nengalap kekamendeh maya' pili' ineh: 1. Yoyarib 2. Yedaya 3. Harim 4. Sorim 5. Malkia 6. Miamin 7. Hakos 8. Abia 9. Yesua 10. Sekania 11. Eliasib 12. Yakim 13. Hupa 14. Yesebiab 15. Bilga 16. Imer 17. Hesir 18. Apsis 19. Petaya 20. Yeheskel 21. Yakin 22. Gamul 23. Delaya 24. Masia

19Ngadan lemulun ineh inayud maya' kekamendeh bang Ruma' Allah luk litep tepundeh Arun maya' kudeng bala Tuhan Allah lun Israil ineh.

20Ini lun rayeh-rayeh tetek ruma' luk inul Liwi: Yediya ratnan inul Amram luk inul Sebuél;

21Isia luk inul Rehabia;

22Yahat ratnan inul Isar luk inul Selomit;

23anak inul Hebron: Yeria anak luk atun, Amaria luk kedueh, Yehasiel luk keteluh, idi Yekamiam luk keapat;

24Samir ratnan inul Usiel luk inul Mika;

25Sekaria ratnan inul Usiel luk inul Isia kinanak Mika ineh;

26anak inul Merari: Mali, Musi, idi Yasia.

27Yasia inan teluh anak deléi; Soham, Sakur, idi Ibri.

28-29Mali inan dueh anak deléi: Eliasar idi Kis. Eliasar na inan anak deléi. Iamo' Kis inan sebuleng anak deléi, ieh ineh Yeramil.

30Musi inan teluh anak deléi: Mali, Ider, idi Yerimot. Amungdeh ineh inul Liwi.

31Idi lun rayeh anid tetek ruma' dengan kinanakdeh luk kedueh nemili', pad ideh kali' kekamendeh, mepad kudeng amung kinanakdeh, ieh ineh imam luk inul Arun. Raca' Daud, dengan Saduk, Ahimalek, idi amung lun rayeh tetek ruma' imam idi lun Liwi, mangun ku lun nekali'.

Inul Luk Pun-Pun 25

¹Daud dengan amung lun rayeh lun Liwi nemili' pupu ini luk nguyut tebubpun sembayang: Asap, Heman, idi Yedutun. Ideh menani mada' bala Allah dengan nateg gita idi giula' idi ngura' karing. Idi ini ngadan lemulun luk pinili' ku kekamen ineh, maya' anid kekamendeh:

²Apat anak Asap: Sakur, Yusup, Netania, idi Asarila. Amungdeh bang imet Asap luk mada' bala luk biré Allah maya' ecuk raca'.

³Anem anak Yedutun: Gedalia, Seri, Yesaya, Simi, Hasabia, idi Matitia. Amungdeh bang imet tamandeh. Idi ideh mada' bala Allah idi menani ngubur Neneh dengan nateg gita.

⁴Pulu' apat anak Heman: Bukia, Matania, Usiel, Sebuél, Yerimot, Hanania, Hanani, Eliata, Gidalti, Romamti Iser, Yosbekasa, Maloti, Hotir, idi Mahasiot.

⁵Amung ini anak Heman, nabi luk mada' raca', maya' jani' Allah luk ngedita' neneh. Ngaceku pangeh biré Allah kuan Heman pulu' apat anak deléi, idi teluh burur anak decurneh.

⁶Idi amungdeh ini bang imet tamandeh. Idi ideh menani bang Ruma' Allah dengan ngura' karing, idi nateg giula' idi gita. Idi Asap, Yedutun, idi Heman ineh bang imet raca'.

⁷Idi amungdeh ineh dengan amung kinanakdeh lun Liwi mileh menani kuan Tuhan. Idi kinula'deh 288 burur.

⁸Idi ideh nenala' udi pad kali' kekamendeh, do' lun rayeh, anak, guru, idi anak sekola' pana'.

⁹⁻³¹Ini lun rayeh-rayeh dueh ngepulu' apat babpat. Idi anid-anid babpat inan pulu' dueh burur. Idi ini ngadandeh maya' kekamendeh pelibal-pelibal: 1. Yusup ratnan inul Asap 2. Gedalia 3. Sakur 4. Isri 5. Netania 6. Bukia 7. Yesarila 8. Yesaya 9. Matania 10. Simi 11. Asarel 12. Hasalia 13. Subail 14. Matitia 15. Yeremot 16. Hanania 17. Yosbekasa 18. Hanani 19. Maloti 20. Eliata 21. Hatir 22. Gidalti 23. Mahasiot 24. Romamti Iser

Inul Luk Pun-Pun 26

- ¹Ini kekamen lun luk nginita tanga' Ruma' Allah: Ratnan inul Kora, Meselemia Kori ratnan tetek ruma' Asap.
- ²Ieh inan tudu' anak deléi: Sekaria, anak luk atun, Yediel luk kedueh, Sebadia luk keteluh, Yatniel luk keapat,
- ³Ilam luk kelimeh, Yehohanan luk keanem, idi Elihunai luk ketudu'.
- ⁴Idi teh Obed Edom, luk inau' Allah ngeperuan. Ngaceku Ieh nemarké kuanneh ualuh anak deléi: Semaya, Yosabad, Yoa, Sakar, Netanel,
- ⁵Amiel, Iskar, idi Pulitai.
- ⁶Idi Semaya anak Obed Edom luk atun inan anak-anak deléi luk rayeh arang pupudeh, ngaceku ideh mileh.
- ⁷Ini ngadan anak Semaya: Otni, Repal, Obed, Elsabad, Elihu, idi Semakia. (Didueh anak luk kekiped ineh pelaba ileh.)
- ⁸Idi ratnan tetek ruma' Obed Edom ineh inan anem ngepulu' dueh burur luk pelaba ileh bang kekamendeh ini.
- ⁹Idi ratnan tetek ruma' Meselemia inan pulu' ualuh burur luk mileh.
- ¹⁰Idi ratnan tetek ruma' Merari, Hosa inan apat anak deléi: Simri (sagan tu pana' na ieh anak luk atun, tamanneh nengikit neneh mangun ku lun rayeh),
- ¹¹Hilkia, Tebalia, idi Sekaria. Idi inan pulu' teluh burur ratnan tetek ruma' Hosa ineh luk nginita tanga' Ruma' Allah.
- ¹²Idi lun luk nginita tanga' Ruma' Allah ineh bibpat tuda'-tuda' babpat, maya' mepad kudeng amung kinanakdeh lun Liwi luk ngakem bang Ruma' Allah.
- ¹³Anid-anid tetek ruma' luk masi' idi luk mula' nemili', pad ideh kali' sapeh tanga' luk uendeh nginita.
- ¹⁴Idi luk nepetulu ni Selemia, ieh ineh tanga' luk pa busat aco. Idi luk nepetulu kuan anakneh Sekaria, seburur luk mileh pegayam, ieh ineh tanga' luk pa tinueh busat aco.

- ¹⁵Idi luk litep kuan Obed Edom, ieh ineh tanga' luk pa kabing busat aco, idi luk litep kuan anak-anakneh, ieh ineh ruma' luk inan nganug binaweh.
- ¹⁶Idi luk litep kuan Supim idi Hosa, ieh ineh tanga' luk pa acep aco, idi teh Tanga' Saleket luk iring dalan luk amé' pa dayeh. Idi anid-anid su luk inandeh nginita ineh, inan lun luk nginita.
- ¹⁷Idi pa busat aco inan anem burur lun luk nginita bang seaco. Idi pa tinueh busat aco teh inan apat burur. Idi teh pa kabing busat aco inan apat burur. Inan apat burur lun luk nginita ruma' luk inan nganug binaweh, dueh kuan anid sebuleng ruma' ineh.
- ¹⁸Muneng ku lepo luk pa acep aco inan apat burur lun luk nginita dalan rayeh idi dueh burur i lepo ineh.
- ¹⁹Kudeng ineh kekamen lun luk nginita ratnan inul Kora, idi ratnan inul Merari.
- ²⁰Tuda'-tuda' lun Liwi luk baken ngimet amung binaweh Ruma' Allah, idi amung binaweh luk linigan kuan Allah.
- ²¹Idi Ladan, ratnan inul Gerson ineh, tepun tuda'-tuda' tetek ruma' dengan tetek ruma' Yehil.
- ²²Idi Sitam idi Yoel ratnan tetek ruma' ini ngimet amung binaweh bang Ruma' Allah idi su luk inan nganug binaweh ineh.
- ²³Idi inul Amram, Isar, Hebron, idi Usiel nengalap kekamen teh.
- ²⁴Sebuel ratnan inul Gersom Musa, ieh ineh lun rayeh lun luk ngimet amung binaweh luk meraga.
- ²⁵Idi pupu Sebuel luk inul Elieser, ieh ineh Rehabia Elieser, Yesia Rehabia, Yoram Yesia, Sikri Yoram, idi Selomit Sikri.
- ²⁶Selomit dengan amung kinanakneh ngimet amung binaweh luk pangeh linigan Raca' Daud, amung lun rayeh pupu, idi lun rayeh inul, idi lun rayeh baweh pana', kuan Allah.

²⁷Idi ratnan amung luk inarodeh kareb pebunu', ideh nemaré baré luk ku ngedo' Ruma' Allah.

²⁸Idi amung-amung luk linigan Nabi Semuil, Raca' Saul, Abner Ner, idi Yoab anak Seruya, ieh ineh bang imet Selomit idi amung kinanakneh.

²⁹Idi rat nelun Isar, Kenania idi anak-anakneh litep ku amung kekamen ngatur: ieh ineh ngayud idi mutut ukum kuan lun Israil.

³⁰Idi rat nelun Hebron, Hasabia idi 1,700 pupuneh litep ku kekamen ngimet bawang Israil pa acep aco Abpa' Yarden, bang amung kekamen Allah idi kekamen raca' teh.

³¹Idi Yeria ineh lun rayeh inul Hebron. Idi kareb lak luk keapat ngepulu' bang imet Daud, ideh nenakap nelun luk mileh déi' Yaser bang bawang Giliad.

³²Raca' Daud nemili' 2,700 lun rayeh luk mileh ratnan pupu Yeria, pad ideh ngimet nelun Rubin, Gad, idi sebuang inul Manasé, bang amung-amung kekamen Allah idi kekamen raca' teh.

Inul Luk Pun-Pun 27

¹Ini ngadan lun rayeh-rayeh tetek ruma' lun rayeh inuldeh, idi lun rayeh-rayeh luk ngimet bawang. Idi tuda'-tuda' babpat pa liang imet lun rayeh bawehdeh pelibal-pelibal anid-anid bulan ruked lak. Idi anid-anid babpat ineh 24,000 burur.

²⁻¹⁵Ini ngadan lun rayeh baweh kuan anid bulan: Bulan luk atun: Yasobiam Sabdiel, ieh ineh luk inul Paris ratnan pupu Yahuda Bulan luk kedueh: Dodai luk inul Ahohi (Miklot ineh lun rayeh luk pa liangneh) Bulan luk keteluh: Benaya anak Yoyada luk imam ineh; Benaya ineh luk lun rayeh "Teluh Ngepulu' Burur Luk Mebala" ineh (Anakneh Amisabad nengelibal neneh mangun ku lun rayeh baweh ineh) Bulan luk keapat: Asahel, kinanak Yoab (anakneh Sebadia nengelibal neneh) Bulan luk kelimeh: Samut, luk inul Isar Bulan luk keanem: Ira, anak Ikes, rat Tekoa Bulan luk ketudu': Helis, lun Epraim rat Pilet Bulan luk kewaluh: Sibekai rat bawang Husa (ieh luk inul Sera ratnan pupu Yahuda) Bulan luk keiwa': Abieser rat Anatot luk pupu

Beniamin Bulan luk kepulu': Maharai rat Netopa (ieh ineh inul Sera) Bulan luk kepulu' aceh: Benaya rat Piraton, luk pupu Epraim Bulan luk kepulu' dueh: Heldai rat Netopa (ieh ineh inul Otniel)

16-22Ini ngadan lun luk ngimet pupu-pupu Israil: Pupu, Lun Luk Ngimet; Rubin, Elieser Sikri; Simion, Sepatia Maka; Liwi, Hasabia Kemuel; Arun, Saduk; Yahuda, Elihu, seburur kinanak Raca' Daud; Iskar, Omri Mikail; Sebulon, Isamaya Obadia; Naptali, Yeremot Asrel; Epraim, Hosia Asasia; Manasé luk pa acep aco, Yoel Pedaya; Manasé luk pa busat aco, Ido Sekaria; Beniamin, Yasiel Abner; Dan, Asarel Yeroham.

23Idi na Daud nengiap amung lun luk ulun pa liang dueh ngepulu' lak, ngaceku Tuhan pangeh nepejani' ngula' nelun Israil mepad kudeng gituen déi' langit.

24Yoab anak Seruya nengimun ngiap, iamo' na ieh nemangeh iapneh, ngaceku Tuhan museh nelun Israil. Idi teh iap ineh na inayud bang Surat Kekamen Raca' Daud.

25-31Ini ngadan-ngadan lemulun luk ngasa' binaweh raca': Ruma' luk inan nganug binaweh raca': Asmawet Adiel Su luk inan nganug binaweh bang bawang luk isuut: Yonatan Usia Lun luk ngakem lati': Esri Kelub Kabun anggur: Simi rat Rama Su luk inan nganug abpa' anggur: Sabdi rat Sipam Kabun saitun idi gita' (luun surud luk pa acep aco): Baal Hanan rat Gider Su luk inan nganug umau Saitun: Yoas Sapi' luk luun Raked Saron: Sitrai rat Saron Sapi' luk luun ruan: Sapat Adlai Unta: Obil, lun Ismail Keladai: Yedia rat Meronot Dumba idi amék: Yasis, lun Hagri

32Yonatan, taman pinaken Daud, ieh ineh seburur lun luk ngayud luk mileh ngubuk idi mileh pegayam teh. Yonatan idi Yehil Hakmoni mangun ku guru amung anak raca'.

33Idi teh Ahitopel ineh lun luk pegayam nan raca', idi Husia lun Arki ineh lun rurun raca'.

³⁴Muci ratnan até Ahitopel, Abiatar idi Yoyada Benaya nengelibal neneh. Idi Yoab, ieh ineh lun rayeh baweh raca'.

Inul Luk Pun-Pun 28

¹Daud nengecuk amung-amung lun rayeh Israil mepamung déi' Yerusalim. Idi amung lun rayeh pupu, lun rayeh luk ngakem kuan raca', lun rayeh pupu-pupu idi lun rayeh luk ngasa' binaweh idi aya' raca' idi anak-anakneh, ieh ineh amung lun rayeh ruma' raca', lun rayeh baweh, idi lun luk mebala nepamung déi' Yerusalim.

²Idi Raca' Daud netuped, kebalaneh, "Ninger balaku O kinanak-kinanakku. Idi pangeh ui nengerawé bang niatku pian mudut aceh ruma' luk inan ngerareng Pati' Pejani' Tuhan, idi luk mangun ku aceh tapin kukud kuan Tuhan Allah tau. Idi ui pangeh netemina' ku pudut ineh.

³Iamo' Tuhan nemebpeng negku na mudut ineh, ngaceku ui ini seburur lun pebunu' luk pangeh nengeruat mula' dara'.

⁴Iamo' Tuhan Allah lun Israil pangeh nemili' negku idi inulku pana', pad ngimet Israil macing raked-raked. Ieh nemili' pupu Yahuda ku lun nguyut, idi ratnan inul Yahuda Ieh nemili' tetek ruma' tamanku. Idi rat arang kinanak-kinanakku ui ini luk nepili' pelé ui mangun ku raca' lun Israil.

⁵Ui pangeh nepimaren Tuhan mula' anak. Idi rat arangdeh ineh Ieh nemili' Selimun mangun ku raca' Israil, ieh ineh imet Tuhan.

⁶"Kebala Tuhan negku, 'Anakmu Selimun ineh miak mudut Ruma'Ku. Ngaceku pangeh Ui nemili' neneh, pad ieh mangun ku anakKu idi Ui mangun ku Tamanneh.

⁷Idi Ui miak ngelelep imetneh macing raked-raked, kudeng ieh lutep maya' ukum-ukum idi dalan-dalanKu, mepad kudeng luk ruenneh nekini.'

⁸"Idi nekini pana', O kinanak-kinanakku, pa kiung amung lun Israil, ieh ineh pupu Tuhan, idi pedingeren Allah tau, ui periteteng nemuyuh, do' muyuh nginita idi ngimet amung ukum Tuhan Allah tau, pelé muyuh lutep tudo luun

tana' luk do' ini, idi pad muyuh miak necan ineh kuan anak muyuh luk mucu rat nemuyuh ku babpatdeh macing raked-raked.

⁹"Idi iko, O anakku Selimun, do' iko ngiti Allah tamanmu, idi ngakem kuanNeh dengan niat luk mepicet, idi dengan terawé luk petulu. Ngaceku Tuhan ngelio idi kali' amung terawé niat. Kudeng iko nakap Neneh kali' rungen Ieh kali'mu. Iamo' kudeng iko necan Neneh, kali' rungen Ieh nala' namu macing raked-raked.

¹⁰Ngerawé do'-do', idi pangeh Tuhan nemili' namu, pelé iko mudut aceh Ruma' ku aceh su luk meligan. Lutep niatmu, idi nganau' kekamen ineh."

¹¹Daud nemaré kuan Selimun, tari amung pudut Ruma' Allah dengan amung su luk inan nganug binaweh, amung takep luk baken, idi Su luk Meluun Meligan, ieh ineh su luk inan pedo' dengan Allah.

¹²Idi teh ieh nengegala' kuanneh amung-amung luk bang terawéneh ratnan tari natad-natad, idi amung takep luk pekelibut, idi su luk inan binaweh Ruma' Allah, idi binaweh ku baré luk meligan.

¹³Idi teh Daud nengegala' kuanneh, terawéneh ratnan kekamen imam idi lun Liwi, ieh ineh kekamendeh bang Ruma' Allah, idi teh kekamen ngasa' repapeh Ruma' Allah ineh.

¹⁴Idi ieh nemada' berat amas idi pirak luk ku amung-amung repapeh,

¹⁵luk ku lapung idi ku kukud dawan,

¹⁶luk ku méja pirak, idi ku méja amas su luk inan ngerareng ruti ubur kuan Allah.

¹⁷Idi teh ieh nemada' berat amas luk meluun do' ku amung serupang, busi', idi sangkir, idi berat amas idi pirak luk ku bigan pana';

¹⁸idi berat amas luk meluun do' luk ku bubpun su luk inan ngeseb umau luk do' buen, idi keréta dueh melaikat karub luk tegerayap ilad ngerukub Pati' Pejani' Tuhan ineh.

¹⁹Kebala Raca' Daud, "Amung ini ginala' bang tari luk inayud maya' kudeng luk pangeh bida' Tuhan negku."

²⁰Idi kebala Daud ni Selimun, anakneh ineh, "Do' iko metueh idi lutep niat, idi ngimun kekamen ini. Aleg iko matot. Idi aleg iko metalang niat, ngaceku Tuhan Allah, ieh ineh Allahku miak ngedengan namu. Na Ieh miak mado rat namu, idi na Ieh necan namu, pad iko mangeh amung kekamen mudut Ruma' Allah ineh.

²¹Idi ini amung babpat imam idi lun Liwi luk temina' ku amung kekamen Ruma' Allah. Idi bang kekamen ineh iko miak denganin amung-amung lun luk do' niat idi luk mileh bang kekamen ineh. Idi amung lun rayeh idi lun mula' pana' temina' nganét amung ecukmu."

Inul Luk Pun-Pun 29

¹Kebala Raca' Daud nelun mula' ineh: "Anakku Selimun, luk pangeh pinili' Allah, ieh ineh anak luk na pekalai. Idi rayeh kekamen ini, ngaceku baken ieh ineh ruma' lemulun, iamo' ruma' Tuhan Allah.

²Dengan abud tuehku ui pangeh netemina' ku repapeh Ruma' Allah ineh — amas, pirak, tekaling, belawan, kayuh, tuda'-tuda' batu luk meraga idi luk mesilo, puar-puar batu luk meraga ku apin luk do' ayu, idi mula' batu luk mebuda'.

³Idi teh ngaceku Ruma' Allah ineh inanku geregan, idi ui maré teh amung amas, idi pirakku, baken ratnan amung barang luk pangeh tinina'ku atun.

⁴Ui pangeh nemaré 7,000,000 balad amas luk meluun do' idi 21,000,000 balad pirak luk meluun do' nekungakep alad amung takepneh,

⁵Idi luk ku amung repapeh luk ruen lun luk mileh. Idi nekini idéké meran niat, sikal maré baré kuan Tuhan?"

⁶Idi amung lun rayeh inul idi lun rayeh pupu, dengan lun rayeh baweh, idi lun rayeh luk ngasa' binaweh raca' nengamo maré baré,

⁷kuan kekamen mudut Ruma' Allah. Ideh nemaré 15,000,000 balad amas, 10,000 pon amas, 30,000,000 balad pirak, tekaling mela 10,000 pikul, idi belawan 6,000 pikul.

⁸Idi idé-idé luk inan batu luk meraga, ideh nemaré ineh ku Ruma' Allah bang imet Yehil lun Liwi rat inul Gerson ineh.

⁹Idi lun mula' ineh mawang niat ngaceku barédeh ineh dengan ran niat, idi ngaceku ideh nemaré inan Tuhan dengan niat luk matu. Idi teh Raca' Daud pelaba awang niat.

¹⁰Daud nengubur Tuhan pa kiung amung lun mula' ineh, kebalaneh, "Amung ubur kuanMu, O Tuhan Allah tepun kai Yakub, rat mon idi macing raked-raked.

¹¹KuanMu O Tuhan, amung rayeh, amung lalud, amung ubur, idi amung tueh, idi amung dita'. Idi amung-amung luk déi' langit idi luk luun tana' Iko mo' luk kuan, O Tuhan luk kuan amung imet, ngaceku Iko mo' luk rayeh pa luun amung-amung.

¹²Idi amung do' idi ubur rat Namu mo' acingneh. Idi Iko teh ngimet luk amung-amung. Idi bang paladMu inan lalud idi tueh kuan amung-amung.

¹³Idi nekini O Allah kai, kai sembayang pa kiungMu, idi kai ngubur ngadanMu luk buren.

¹⁴"Iamo' idéké ui ini, idi idéké pupuku ini, pad kai miak maré kudeng ini dengan ran niat kai? Ngaceku rat Namu mo' amung ineh. Idi kai maré luk ilap kai rat bang paladMu mo'.

¹⁵Ngaceku kai ini lun sakai mo' pa kiungMu, kudeng lun luk nepura' mepad kudeng amung tepun kai. Idi raked ulun kai luun tana' ini mepad kudeng lungung mo', luk na lutep.

¹⁶O Tuhan Allah kai, amung binaweh ini luk pangeh tinina' ku nganau' aceh ruma' kuan ngadanMu luk meligan ineh, ieh ineh rat bang paladMu mo' punneh. Idi Iko teh luk kuan ineh.

¹⁷Ngaceku ui kali', O Allahku, Iko teh nutun niat lemulun, idi Iko teh pian ku niat luk matu. Idi dengan niat luk mawang idi matu ui pangeh nemaré amung binaweh ini. Idi nekini ui pangeh nenier pupuMu luk idi ieni nguit barédeh kuanMu dengan niat luk mawang idi meran.

¹⁸O Tuhan Allah tepun kai Ibrahim, Isak, idi Yakub, do' ngimet ini macing ruked-ruked bang terawé niat amung pupuMu, idi ngelelep niatdeh Namu.

¹⁹Idi maré kuan anakku Selimun niat luk matu, pad ieh miak nginita amung bala, ukum, idi dalanMu, idi pad ieh miak mudut Ruma' Allah luk pangeh tinina'ku ku amung repapehneh."

²⁰Pangeh ineh idi Daud nepebala inan lun mula' ineh, "Do' muyuh ngubur Tuhan Allah muyuh." Idi amung lun mula' ineh nengubur Tuhan Allah tepunde. Idi ideh netekunal sembayang inan Tuhan, pa kiung raca'.

²¹Idi kenebpa ideh nemaré kuan Tuhan baré luk kereten, idi baré luk sabpen, ieh ineh 1,000 sapi' deléi, 1,000 dumba deléi, idi 1,000 anak dumba, dengan amung baré luk rupen idi baré luk kereten, luk petap kenen amung lun Israil.

²²Idi bang aco sineh teh ideh nekuman idi nengirup pa kiung Tuhan dengan mawang niat. Idi ideh nengikit ni Selimun anak Daud sekedueh kua', idi nengumau neneh mangun ku raca', idi Saduk pana' kinikit ku imam.

²³Idi Selimun netudo luun kerusi imet Tuhan mangun ku raca' libal Daud tamanneh. Idi ieh nengalap peruan bang amung-amung luk ruenneh. Idi amung lun Israil pana' nemaya' balaneh.

²⁴Idi amung lun rayeh lun pebunu' idi amung anak Raca' Daud pana' nepejani' maya' ukum Raca' Selimun.

²⁵Idi Tuhan nengerayeh ni Selimun pa kiung amung lun Israil. Idi Ieh nengedita' imetneh meluun ratnan imet amung raca' Israil luk atun rat neneh.

²⁶Daud Isai pangeh mangun ku raca' pa luun amung lun Israil.

²⁷Idi kinio raca' nengimet nelun Israil, ieh ineh apat ngepulu' lak. Ieh nengimet tudu' lak déi' Hebron. Idi ieh nengimet teluh ngepulu' teluh lak déi' Yerusalim.

²⁸Idi ieh naté kareb ieh petap ngered, idi ieh lun do' luk mula' binaweh idi luk burem. Idi anakneh Selimun mangun ku raca' libalneh.

²⁹Idi amung kekamen Raca' Daud luk atun idi luk kekiped, pangéh inayud bang Surat Nabi Semuil, Surat Kekamen Nabi Natan, idi Surat Kekamen Nabi Gad.

³⁰Ideh mada' ratnan amung rayeh idi lalud imetneh, idi amung luk pangéh mangun kuanneh idi kuan lun Israil, idi kuan amung imet bawang luk libut bawang Israil ineh pana'.

Inul Luk Kedueh

Inul Luk Kedueh 1

¹Selimun anak Raca' Daud metueh ngimet imet Israil, pad Tuhan Allahneh nengeperuan neneh, idi nemaré lalud neneh.

²Raca' Selimun nepebala nelun Israil, ieh ineh amung lun rayeh pa luun luk meribu, idi pa luun luk meratu, amung lun luk mutut ukum, amung lun rayeh lun Israil, idi amung lun rayeh tetek ruma' tamandeh,

³idi nengecuk nedeh maya' neneh amé' su luk inan sembayang déi' Gibion, ngaceku déi' inan Lepo su luk inan papu' Tuhan luk inau' Musa, lun duken Tuhan, déi' su luk ali-ali.

⁴(Iamo' Pati' Pejani' Allah pangeh inuit Daud rat Kiriati Yarim amé' bang lepo luk pangeh tinina' Daud kuan ineh déi' Yerusalim.)

⁵Iamo' bubpun tekaling luk pinudut Besalel, anak Uri Hur idi déi' pa atun Lepo su luk inan papu' Tuhan. Idi Selimun dengan amung lun mula' ineh iné' matun Tuhan su ineh.

⁶Idi Selimun nemaré baré pa kiung Tuhan pa atun bubpun tekaling luk pa atun Lepo ineh. Idi luun ineh ieh nengeseb 1,000 baré luk sabpen.

⁷Idi bang malem ineh teh Allah nesilagan ni Selimun, kebalaNeh neneh, "Mutuh iko anun luk petulu barénKu namu."

⁸Idi kebala Selimun inan Allah, "Iko pangeh nengegala' awamu luk rayeh idi lutep kuan tamanku Daud. Idi iko teh pangeh nenganau' negku mangun ku raca' libalneh.

⁹O Tuhan Allah, jani'Mu kuan tamanku Daud pangeh nangun. Iko pangeh nenganau' negku ku raca' pa luun aceh pupu luk na mekiap.

¹⁰Ngaceku ineh maré kuanku ileh, idi do' kali', pelé ui miak ngimet pupu ini. Kudeng na baré rat Namu kudeng apehké ui ngimet pupuMu luk kinula' ini?"

¹¹Kebala Tuhan Allah ni Selimun, "Do' putuhmu ineh. Na iko mutuh binaweh luk mula' idi luk meraga, ubur, idi até lemulun luk museh namu, idi na iko

nemutuh ulun mekadang, iamo' iko pian ku ileh idi do' kali', pad iko miak nguyut amung pupu luk biréKu mangun ku anak itinmu.

¹²Ui maré ileh idi do' kali' namu. Meluun teh Ui maré namu amung do' idi binaweh luk meraga, idi iko meluun buren ratnan amung-amung raca' luk nengimet atun rat namu, idi luk miak ngimet mucu rat namu teh.”

¹³Idi Selimun nenalan rat su luk inan sembayang déi' Gibion, ieh ineh su luk inan Lepo su luk inan papu' Tuhan, idi ieh nelemubed iné' Yerualim. Su ineh ieh nengimet nelun Israil.

¹⁴Selimun nengamung 1,400 keréta pebunu' idi teh 12,000 kuda. Sebuangdeh isa'neh déi' Yerusalim idi sebuang ticanneh bang bawang-bawang baken.

¹⁵Idi bang imetneh déi' Yerusalim amas idi pirak pana' mepad kinula' batu, idi kayuh tumuh pana' mepad kinula' bulu' luk luun raked.

¹⁶Idi kuda ineh inuit kuan Selimun rat Musri, idi rat Silisia.

¹⁷Idi keréta pebunu' ineh inuit rat Masir, raga sebuleng anem ngeratu balad pirak idi sebuleng kuda meratu limeh ngepulu' balad. Kudeng ineh teh amung ineh pisuen kuan raca'-raca' lun Hiti idi raca'-raca' bawang Siria.

Inul Luk Kedueh 2

¹Selimun pian mudut aceh ruma' sembayang su luk inan ngubur Tuhan, idi aceh ruma' kuan bururneh sebuleng.

²Idi ieh nengecuk lun luk nguit babeh 70,000 burur, idi lun luk mila' batu déi' luun pegkung, 80,000 burur, idi 3,600 burur luk nier kekamendeh.

³Selimun nengecuk nelun duken amé' pegayam ni Hiram raca' Sur, kebalaneh, "Do' masui binaweh kuanku, mepad kudeng luk inau'mu kuan tamanku Daud, kareb iko nemasui kayuh tumuh ku mudut ruma'neh.

⁴Ui pian mudut aceh ruma' sembayang pad ngerayeh ngadan Tuhan Allahku. Ieh ineh mangun ku su luk meligan inanku ngubur Neneh dengan anak itinku. Kai pian maré umau luk do' buen sabpen pa kungNeh, idi teh ruti ubur megéi' barén kai dengan baré luk sabpen kuanNeh anid pekak, anid alem,

amung Aco luk inan Mudeng, amung Bulan Baruh, idi amung aco rayeh Tuhan Allah kai, maya' kudeng luk litep kuan lun Israil macing raked-raked.

⁵Ui pian mudut aceh ruma' sembayang luk rayeh kuan Allah, ngaceku Allah kai ineh rayeh ratnan allah luk baken.

⁶Setuneh lemulun na miak mudut aceh ruma' kuan Allah, ngaceku langit pana' luk meluun dita' na miak inanNeh. Kudeng apehké ui ini, miak mudut aceh ruma' kuanNeh luk meluun ratnan aceh su luk inan ngeseb umau luk do' buen kuanNeh?

⁷Idi nekini do' iko ngecuk kuanku seburur luk mileh nganau' binaweh ratnan amas, pirak, tekaling, belawan, idi nuper luk sia' merirem idi bata' melaco idi luk mebata', idi luk mileh ngarit binaweh, pelé ieh ngedengan amung lun mileh rat Yahuda idi rat Yerusalim, luk pangeh pinili' tamanku Daud.

⁸Idi teh do' iko maré kayuh tumuh kuanku, idi kayuh tongor idi aru' rat Lebanon, ngaceku ui kali' lun dukenmu mileh nebpeng kayuh déi' Lebanon, idi lun dukenku miak pebaya' nelun dukenmu,

⁹pad ideh temina' mula' kayuh kuanku, ngaceku ruma' luk pian pidutenku ineh, rayeh idi do' peh.

¹⁰Ui sikal maré akan kuan lun luk dukenmu, ieh ineh 800,000 gatang padé, 800,000 gatang ikun, 110,000 gilin abpa' anggur, idi 110,000 gilin umau saitun."

¹¹Idi Hiram raca' Sur ineh nemaré aceh surat kuan Selimun, kebalaneh, "Ngaceku Tuhan méi' inan pupuNeh, idi iko kinikitNeh ku raca'deh ineh.

¹²Ngubur Tuhan Allah lun Israil luk nemudut langit idi tana'! Ieh pangeh nemaré kuan Raca' Daud seburur anak luk do' niat, luk mileh, idi luk do' kali' luk pian mudut aceh ruma' kuan Tuhan, idi aceh ruma' kuan bururneh sebuleng.

¹³Ui ngecuk seburur lun mileh, luk do' kali', ieh ineh Hiram,

¹⁴anak seburur decur ratnan inul Dan, iamo' tamanneh lun Sur. Idi ieh mileh nganau' binaweh ratnan amas, pirak, tekaling, belawan, batu, kayuh, idi nuper luk sia' merirem, bata' melaco, idi luk mesia', idi kibung pu luk do', idi luk mileh ngarit binaweh maya' ayu luk badén kuanneh. Nima' neneh ngedengan lun dukenmu luk mileh, idi lun mileh luk nengakem kuan tamanmu Raca' Daud.

¹⁵Idi nekini do' maré amung padé, ikun, umau, idi abpa' anggur luk pangeh bida'mu ineh.

¹⁶Idi kai miak nebpeng kayuh déi' luun pegkung-pegkung Lebanon maya' luk pianmu, idi kai miak nganau' ineh ku rét idi maya' ineh macing Yopa, idi rat ieneh iko miak nguit ineh macing Yerusalim.”

¹⁷Raca' Selimun nengiap amung lun sakai luk bang bawang Israil maya' lawé iap tamanneh Daud. Idi ieh nekali' ula'deh, 153,600 burur.

¹⁸Idi ieh nengeletep 70,000 burur lun luk mabeh babeh, idi 80,000 burur lun luk mila' batu déi' luun pegkung, idi 3,600 burur lun luk nier kekamendeh.

Inul Luk Kedueh 3

¹Raca' Selimun nengimun mudut Ruma' Allah déi' Yerusalim luun Pegkung Moria, su luk inan Tuhan nesilagan inan tamanneh Daud, ieh ineh su luk tinina' Daud, déi' su luk inan Arauna lun Yebusi ineh rumik.

²Idi ieh nengimun mudut ineh, bang dueh aco bulan dueh idi bang lak luk keapat bang imetneh.

³Ruma' Allah luk pinudut Raca' Selimun ineh, kadangneh 15 depeh idi pipangneh 5 depeh.

⁴Idi takep luk pa munung tanga', kadangneh mepad kudeng pipang ruma', ieh ineh 5 depeh, idi dita'neh 30 depeh, idi pa bang lubangneh kikep ku amas luk mesilo.

⁵Idi takep luk rayeh ineh binuunneh ku kayuh tongor, idi kikepneh ku amas luk mesilo, idi inaritneh luunneh maya' ayu lawa piasau, idi arit belipid.

⁶Idi raca' nengayung ruma' ineh ku batu luk meraga idi amas rat bawang Parbaim.

⁷Idi ruma' ineh kikepneh, ieh ineh amung tukedneh, dirineh, aladneh, idi itek tanga'neh ku amas. Idi luun aladneh ideh nengarit ayu melaikat karub.

⁸Takep luk déi' dalem luk titen Su luk Meluun Meligan, kadangneh idi pipangneh pana'

⁵ depeh, mepad kudeng pipang ruma' ineh, idi amung ineh kikepneh ku amas, kinula'neh 600 balad.

⁹Idi paku'neh inau'deh ratnan 50 balad amas. Idi parungneh pana' kikep ku amas.

¹⁰Idi raca' nengecuk nedeh nganau' dueh melaikat karub luk inarit, idi luk kikep ku amas luk ruen bang Su luk Meluun Meligan.

¹¹⁻¹³Su ineh didueh tupid pelalad sium pa munung tanga'. Didueh inan dueh ilad, kadang ilad ineh mela medepeh, idi bulad pad petutup luun uned takep ineh. Idi ilad didueh selipa macing nan alad ruma' ineh teh. Kadang ilad didueh petutum 5 depeh.

¹⁴Idi aceh dicing inau'deh ratnan nuper bata' melaco, isa' merirem, idi mesia', idi ratnan kibung pu. Idi ideh nengebaruh ayu melaikat karub luun kibung ineh.

¹⁵Idi raca' nenganau' pa atun munung tanga' Ruma' Allah ineh dueh diri, kadangneh 8 depeh mela, idi riwak luk paped diri ineh mela medepeh dita'neh.

¹⁶Idi teh ieh nenganau' ratai ratnan arit belipid mepad kudeng bané. Idi ideh nengerareng ineh libut paped diri ineh. Idi ideh nenganau' meratu bua' delima tekito pekelibut ratai ineh.

¹⁷Idi ieh nenaped diri ineh pekop Ruma' Allah. Idi ideh neneten ngadan diri luk pa kabing busat aco ineh Yakin, idi ngadan diri luk pa tinueh busat aco ineh Boas.

Inul Luk Kedueh 4

¹Raca' Selimun nengecuk nedeh nganau' aceh bubpun tekaling, kadangneh 5 depeh, pipangneh 5 depeh dita'neh 2 depeh mela.

²Idi teh ieh nenganau' takung luk melibuh ratnan tekaling. Kidalemneh mela medepeh, pipangneh 2 depeh setangal, idi kkadang pekelibut ineh 7 depeh setangal.

³Idi pekelibut takung ineh inan dueh buun sapi' luk inurai peranga' dengan takung ineh.

⁴Idi takung ineh baben pulu' dueh sapi', idi teluh sapi' sium pa tinueh busat aco, idi teluh pa acep aco, idi teluh pa kabing busat aco, idi teluh pa busat aco. Idi puet amung sapi' ineh petutup.

⁵Idi kikapal iring takung ineh kikapal palad. Idi iring pa luunneh mepad kudeng iring sangkir kudeng ayu busak luk lusad. Idi kinula' abpa' luk semuet bang ineh 15,000 gilin.

⁶Idi ieh nenganau' pulu' bigan su luk inan sibaru'. Idi ieh nenganau' limeh pa kabing busat aco, idi limeh pa tinueh busat aco. Idi amung luk barén sabpen ineh rerebpendeh bang ineh. Iamo' takung ineh kuan amung imam inandeh sibaru'.

⁷⁻⁸Idi ideh nenganau' pulu' kukud dawan ratnan amas maya' luk pangeh litep, idi pulu' méja. Idi ideh nengerareng ineh bang takep luk rayeh bang Ruma' Allah, limeh kukud dawan, idi limeh méja pekop takep ineh. Idi teh ideh nenganau' meratu kedit ratnan amas.

⁹Idi ideh nenganau' natad luk uned kuan imam, idi natad luk bal alad teh, idi itek tanga' luk arang dueh natad ineh kikep ku tekaling.

¹⁰Idi takung ineh rirengdeh muneng ku lidung Ruma' Allah ineh, uned pa busat aco idi pa kabing busat aco.

¹¹⁻¹⁶Idi teh Huram nenganau' amung belanga', luk ku ngook abuh, idi bigan. Idi ieh nemangeh amung repapeh maya' kudeng jani' luk inau'neh kuan Raca' Selimun ratnan Ruma' Allah ineh: Dueh diri Dueh riwak mepad kudeng ayu

bigan paped diri ineh Ratai ratnan arit belipid luk luun riwak ineh 400 bua' delima ratnan tekaling, inau'deh dueh buun pekelibut riwak ineh Pulu' keréta Pulu' bigan Takung Pulu' dueh sapi' luk mabeh takung ineh Belanga', luk ku ngook abuh, idi serupang Amung repapeh ineh inau' Hiram kuan ruma' Tuhan ineh ratnan tekaling luk mesilo, maya' kudeng luk bida' Raca' Selimun.

¹⁷Ieh nengecuk nedeh ngurai amung ineh déi' luun Raked Yarden arang Sukot dengan Sereda.

¹⁸Idi ideh nenganau' pelaba ula' repapeh luk kudeng ineh, pad ideh na kali' berat amung tekaling ineh.

¹⁹Idi Selimun nenganau' amung repapeh luk bang Ruma' Allah, ieh ineh bubpun amas, méja luk inan ruti ubur ineh,

²⁰amung kukud dawan idi amung lapung ratnan amas luk mesilo luk uen nutud pa atun Su luk Meluun Meligan, maya' kudeng luk pangeh litep.

²¹Arit busak lapung idi amung apit inau' ratnan amas luk mesilo.

²²Idi teh amung luk ku ngilep lapung, bigan, luk inan umau luk do' buen, idi sul luk inan bareh apui inau' ratnan amas luk mesilo. Idi itek tanga' luk bal alad Ruma' Allah ineh idi amung itek tanga' Su luk Meluun Meligan, kikep ku amas teh.

Inul Luk Kedueh 5

¹Kareb Raca' Selimun nemangeh pudut Ruma' Allah, idi ieh nenganug amung binaweh luk linigan tamanneh Raca' Daud kuan Tuhan, ieh ineh amas, pirak, idi repapeh luk baken bang su luk inan nganug binaweh bang Ruma' Allah.

²Pangeh ineh Selimun nengamung amung lun ngimet idi lun rayeh pupu Israil déi' Yerusalim, pad ideh nguit Pati' Pejani' Tuhan rat Sion, Bawang Daud.

³Amungdeh nepamung kareb Aco Rayeh Lepo.

⁴Kareb amung lun rayeh Israil nacing idi lun Liwi nengiding Pati' Pejani' ineh,

⁵Idi lun Liwi idi lun imam nenguit ineh dengan Lepo su luk inan papu' Tuhan idi amung binaweh luk meligan luk bang Lepo ineh amé' bang Ruma' Allah.

⁶Raca' Selimun idi amung lun Israil nepamung pa atun Pati' Pejani' ineh, idi nemaré sapi' idi dumba ku baré', pad kinula'deh na mekiapdeh.

⁷Idi amung imam ineh nenguit Pati' Pejani' ineh amé' bang Su luk Meluun Meligan arang ilad dueh melaikat karub ineh.

⁸Idi ilad dueh melaikat karub ineh bulad pa luun Pati' Pejani' ineh dengan kayuh luk ku mirir pati' ineh.

⁹Idi kayuh luk ku mirir ineh luk idi déi' macing aco sini mekadang, pad papedneh melagan rat Su luk Meligan luk pa atun Su luk Meluun Meligan. Iamo' na ieh melagan rat bal selipa.

¹⁰Idi sebuleng anun-anun pana' nateh luk bang Pati' Pejani' ineh, iamo' dueh balad batu ukum mo' luk pangeh inau' Musa bang ineh déi' Sinai, kareb Tuhan nepejani' nelun Israil kareb ideh pangeh neremuat rat bawang Masir.

¹¹⁻¹⁴Amung-amung imam ineh, ratnan tuda'-tuda' babpat pangeh nengeligan bururdeh. Idi amung lun Liwi luk menani, ieh ineh Asap, Heman, Yedutun, idi amung pupudeh, nengayung ku kibung pu. Ideh tuped pa busat aco dengan karing idi gita, idi dengandeh ineh inan 120 burur imam luk ngiup serupit. Amung lun luk ngiup serupit idi lun luk menani nengubur ngadan Tuhan peranga' dengan uni karing idi luk baken pana'. Kenanideh, "Ngubur Tuhan ngaceku Ieh do', idi awaNeH meruked peh." Laba' imam-imam remuat rat bang Ruma' Allah, aceh laput luk merasat ku acang Tuhan, manu' Ruma' ineh, pad ideh na miak lemubed nganau' kekamendeh.

Inul Luk Kedueh 6

¹Kesembayang Raca' Selimun, "O Tuhan, Iko miak tudo bang laput idi su luk medacem.

²Iamo' ui pangeh nemudut aceh ruma' luk do' inanMu tudo ruked-ruked."

- ³Amung lun Israil tuped su ineh, idi raca' nelumi nedeh idi nemutih peruan Allah kuandeh.
- ⁴Kebalaneh, "Amung ubur kuan Tuhan Allah lun Israil luk pangeh nengacing jani'Neh kuan tamanku Daud, kebalaNeh,
- ⁵"Idi rat aco Ui nenguit pupuKu Israil remuat rat bawang Masir, na Ui nemili' bawang sapeh arang amung pupu Israil inanKu mudut aceh ruma' su luk inan lemulun sembayang Negku. Idi na Ui nemili' seburur idé pana' luk mangun ku nguyut amung pupuKu Israil.
- ⁶Iamo' pangeh Ui nemili' Yerusalim pelé lemulun sembayang Negku déi'. Idi Ui nemili' ni Daud mangun ku lun nguyut amung pupuKu Israil.' “
- ⁷Idi kebala Selimun teh, "Tamanku Daud sikal mudut aceh ruma' luk inan sembayang nan Tuhan Allah lun Israil,
- ⁸iamo' kebala Tuhan neneh, "Petulu terawému ratnan mudut aceh ruma' kuanKu,
- ⁹iamo' na iko miak mudut ruma' ineh. Iamo' anakmu mucu miak mudut ruma' ineh kuanKu.’
- ¹⁰"Tuhan pangeh nengacing jani'Neh ineh. Ui amé' ku libal tamanku Daud ngimet nelun Israil, idi teh ui pangeh nemudut aceh ruma' su luk inan sembayang nan Tuhan Allah lun Israil.
- ¹¹Idi pangeh ui nenganau' bang ineh Pati' Pejani' luk inan dueh balad batu ukum luk pangeh biré Tuhan kuan pupu Israil.”
- ¹²Idi Selimun iné tuped pa atun bubpun Tuhan, pa kiung lun mula' idi ieh nengegenang ticu'neh.
- ¹³(Selimun pangeh nenganau' aceh su luk inan tuped ratnan tekaling luun uned natad ineh, kadangneh 8 kaki, pipangneh 8 kaki, idi dita'neh 5 kaki. Idi ieh netuped luun ineh. Idi ieh netekeradung siren amung-amungdeh. Idi ieh nengegenang ticu'neh).

- ¹⁴Kesembayangneh, "O Tuhan Allah lun Israil, na Allah baken, iamo' Iko mo', do' bang langit idi bang tana'. Iko mo' luk maya' jani' idi mekatu kuan amung lun dukenmu luk maya' amung balaMu.
- ¹⁵Idi aco sini Iko pangeh nengacing jani'Mu kuan tamanku Daud demulunMu ineh.
- ¹⁶Nekini pana', O Tuhan Allah lun Israil, do' ngacing jani'Mu luk baken nan tamanku Daud, ratnan Iko maré aceh inulneh megéi' ngimet nelun Israil, kudeng ideh nginita ukumMu, mepad kudeng tamanku ineh.
- ¹⁷O Allah lun Israil, do' ngacing maung luk bilaMu kuan tamanku Daud.
- ¹⁸"Iamo' miakké Allah tudo dengan lemulun luun tana' ini? Idi amung langit pana' na petap inanMu, meluun teh ruma' luk pangeh pinudutku ini!
- ¹⁹O Tuhan Allahku, ui ini demulunMu. Do' Iko ninger sembayangku idi ngua' putuhku Namu.
- ²⁰Do' matar ruma'Mu ini maco idi medacem, ngaceku Iko pangeh nemili' su ineh ku su luk inan sembayang Namu. Kareb ui sium pa Ruma' ini do' Iko megéi' ninger sembayangku.
- ²¹Ninger sembayangku idi sembayang pupuMu lun Israil, kareb ideh sium pa Ruma' ini. Ninger Iko rat su luk inanMu tudo déi' surga, idi maré do'.
- ²²"Kareb seburur nganau' sala' nelun denganneh, idi ieh icuk pebulung, idi ieh pebulung pa atun bubpunMu bang Ruma' ini,
- ²³idi do' Iko ninger rat bang surga idi mutut ukum arang didueh, pad luk mesala' ineh uen ngesala' idi lun luk matu pana' ruen matu.
- ²⁴"Kareb pupuMu Israil melaya' pa atun bunu'deh, ngaceku ideh pangeh mesala' Namu, idi ideh uren, idi ngamo ngadanMu, idi sembayang mutuh do' rat Namu bang Ruma' ini,
- ²⁵idi do' Iko ninger rat bang surga idi maré do' ku sala' pupuMu Israil, idi nguit nedeh lemubed amé' bang bawang luk pangeh biréMu kuandeh idi kuan tepundeh.

²⁶"Kareb langit initekMu, pad na inan udah ngaceku pupuMu pangeh mesala' Namu, idi ideh sium pa Ruma' ini idi sembayang dengan mebeneh niat, idi uren ratnan sala'deh,

²⁷idi do' Iko ninger rat bang surga, idi maré do' ku sala' lun dukenMu, lun Israil. Mada' nedeh ratnan dalam luk matu, idi maré udah luun tana'mu luk pangeh biréMu kuan pupuMu ku babpatdeh luk meruked.

²⁸"Kareb bang bawang ineh inan iru', kaca, bangas, bui luk melau', kato, idi uled, idi kudeng pupuMu uen bunu'deh ngerieng, kian kudeng inan ét luk mebura' lek,

²⁹do' ninger sembayangdeh. Kudeng idé-idé rat arang pupuMu lun Israil nginuud tu-tu pad ideh natang tiku'deh sium pa Ruma' ini idi sembayang,

³⁰do' ninger sembayangdeh rat bang surga su luk inanMu tudo ineh, idi maré do' kuandeh. Iko mo' luk kali' niat lemulun. Do' ngua' kuan anid-anid lemulun maya' kekamendeh,

³¹pelé pupuMu miak matot Namu idi maya' balaMu ruked ulundeh bang bawang luk pangeh biréMu kuan tepun kai.

³²Kareb seburur lun pupu baken macing rat bawang luk mado, ngaceku ieh pangeh ninger ratnan ngadanMu, laludMu, idi pedenganMu, idi kareb ieh macing sium pa Ruma' ini idi sembayang,

³³do' ninger sembayangneh rat bang surga su luk inanMu tudo ineh, idi ngua' amung luk pitueneh Namu ineh, pad amung pupu luk bang tana' ini miak kali' ngadanMu, pelé ideh matot Namu, mepad kudeng pupuMu Israil ineh, idi pad ideh kali' Ruma' Allah luk pinudutku ini, ieh ineh su luk inan lemulun sembayang Namu.

³⁴"Kareb Iko ngecuk pupuMu amé' pebunu', idi ideh pana' sembayang mutuh Namu, sium pa bawang ini luk pinili'Mu, idi Ruma' luk pinudutku ini kuanMu,

³⁵idi do' Iko ninger sembayangdeh, rat bang surga, idi maré nedeh metueh teh.

³⁶"Kareb pupuMu mesala' Namu, (idi seburur pana' nateh luk na mesala') idi Iko museh nedeh, pad Iko maré nedeh bang palad bunu'deh, pelé ideh tebanen bunu' amé bawang luk mado pana',

³⁷do' ninger sembayangdeh. Kudeng bang bawang ineh ideh uren idi sembayang idi ngamo sala' idi kekamendeh luk dat, do' ninger sembayangdeh, O Tuhan.

³⁸Kudeng ideh uren matu-matu bang bawang ineh, pad ideh sembayang Namu sium pa bawang ini luk biréMu kuan tepun kai, ieh ineh bawang luk pinili'Mu ineh, idi Ruma' ini luk pinudutku kuanMu,

³⁹do' Iko ninger sembayangdeh, rat bang surga su luk inanMu tudo ineh. Ninger amung putuhdeh idi méi' nedeh, idi teh maré do' ratnan amung sala' pupuMu ineh.

⁴⁰"Idi nekini, O Allahku, do' Iko nier negku idi ninger putuh sembayangku bang Ruma' ini.

⁴¹O Tuhan Allah, tumui Iko nekini, do' amé' bang Ruma'Mu dengan Pati' Pejani', ieh ineh tanu' laludMu, idi tudo su ineh ruked-ruked. Ngeperuan amung kekamen imamMu, idi ngacing awang niat kuan pupuMu ngaceku éi'Mu nedeh.

⁴²O Tuhan Allah, aleg Iko ngarung raca' luk pinili'Mu ini. Do' ngerawé awaMu nan demulunMu Daud."

Inul Luk Kedueh 7

¹Kareb Selimun pangeh nesembayang, apui nebpeh rat bang langit idi nengeseb amung barédeh ineh. Idi rasat Tuhan pana' manu' Ruma' ineh,

²pad amung imam ineh na miak semuet bang ineh.

³Idi kareb lun Isra'il nenier apui luk nebpeh ineh, idi rasat Tuhan luk manu' Ruma' ineh, idi ideh netekunal sembayang idi nengubur Tuhan, ngaceku éi'Neh idi awaNeh luk meruked.

⁴Raca' Selimun idi lun mula' ineh nemaré tuda'-tuda' baré kuan Tuhan.

⁵Ieh nemaré 22,000 sapi' idi 120,000 dumba ku baré luk nguit pedo'. Kudeng ini lawé Raca' Selimun idi lun mula' ineh nengeligan Ruma' Allah.

⁶Idi amung imam pana' netuped su luk litep kuandeh. Idi petutup nedeh lun Liwi pana' nengubur Tuhan dengan amung-amung luk muni, luk pangeh biré Raca' Daud. Kenanideh, "AwaNeh ineh meruked," ieh ineh mepad kudeng nanideh kareb Daud mulun. Idi amung imam nengiup serupit kareb lun mula' netuped.

⁷Idi Selimun nengeligan uned natad luk pa atun Ruma' Allah ineh. Idi ieh nemaré amung baré luk sabpen su ineh, ieh ineh baré akan idi lemak ratnan baré luk nguit pedo', ngaceku bubpun tekaling luk pinudut Selimun na miak inan maré amung baré ineh.

⁸Raca' Selimun idi amung lun Israil nenganau' Aco Rayeh Lepo ineh tudu' aco kinioneh. Inan mula' lemulun idi lun rat mado pana', ieh ineh rat Ruan Hamat luk pa tinueh busat aco, idi lakan Masir luk pa kabing busat aco.

⁹Idi aco luk kewaluh, ideh nenganau' tebubpun luk kekiped. Ideh pangeh nengeligan bubpun ineh tudu' aco kinioneh, idi irau rayeh ineh pana' tudu' aco kinioneh teh.

¹⁰Idi dueh ngepulu' teluh aco bulan tudu', Raca' Selimun nengecuk nelun mula' ineh muli'. Ideh mawang niat, ngaceku amung peruan luk pangeh biré Tuhan kuan Daud idi Selimun idi pupuNeh lun Israil.

¹¹Raca' Selimun nemangeh pudut Ruma' Allah idi ruma'-ruma' raca' pana', idi amung-amung ineh inau' dengan do'.

¹²Idi Tuhan nesilagan ni Selimun kareb medacem, kebalaNeh, "Ui pangeh neninger putuhmu, idi su ini pangeh pinili'Ku ku ruma' luk inan mare bare.

¹³Kudeng Ui ngitek langit pad na inan udah, idi kudeng Ui ngecuk kato kuman uli' tana', idi kudeng Ui ngacing kaca arang pupuKu,

¹⁴kudeng pupuKu luk titen ku ngadanKu, ngebeneh bururdeh idi sembayang idi nakap Negku, idi uren ratnan lawedeh luk dat ineh, idi Ui miak ninger rat bang surga idi mare do' ku sala'deh, idi ngedo' bawangdeh.

¹⁵Idi matehKu kulat idi lalidKu ninger putuh sembayang muyuh bang Ruma' ini.

¹⁶Ngaceku pangeh Ui nemili' idi nengeligan Ruma' ini, pad Ui buren su ini macing raked-raked, idi matehKu idi niatKu teh idi su ini kidi-kidi.

¹⁷Idi kudeng iko lutep maya' Negku mepad kudeng lawé tamanmu Daud ineh, idi kudeng iko nganau' amung-amung luk pangeh bida'Ku namu, pad iko nginita amung bala idi ukumKu,

¹⁸kali' rungen Ui ngelelep imetmu mepad kudeng luk pangeh pijani'Ku kuan tamanmu Daud, kebalaku neneh, 'Na miak na inan lemulun luk miak ngimet nelun Israil kuanmu.'

¹⁹Iamo' kudeng muyuh teketed idi necan bala idi ukum luk pangeh biréKu nemuyuh idi muyuh amé sembayang inan allah baken,

²⁰kali' rungen Ui ngeruat nemuyuh ineh ratnan tana' luk pangeh biréKu nemuyuh. Idi teh Ruma' ini, luk pangeh liniganKu mangun ku su luk inan sembayang Negku, miak talanKu. Idi Ui miak nganau' neneh ku aceh tulu idi luk inan situnga arang amung pupu.

²¹"Idi Ruma' ini luk buren nekini, idé luk lemaba ieneh miak mawa, kebaladeh, 'Anun pun Tuhan pangeh nenganau' kudeng ini kuan bawang ini idi kuan Ruma' ini?'

²²Idi lun miak ngor, 'Ngaceku ideh pangeh nenecan Tuhan Allah tepundeh ineh luk pangeh nenguit nedeh remuat rat bang bawang Masir. Idi ideh nenakap allah baken idi netekeradung sembayang nedeh. Idi ngaceku ineh Allah nengacing amung dat ini kuandeh.' "

Inul Luk Kedueh 8

¹Idi raked dueh ngepulu' lak Selimun nemudut Ruma' Allah idi ruma'neh sebuleng pana'.

²Idi ieh nemudut baruh amung bawang luk biré Raca' Hiram kuanneh. Idi ieh nengecuk nelun Israil tudo déi'.

- ³Selimun nengalap bawang Hamat idi Soba.
- ⁴Idi ieh nengeraben bawang Palmira déi' su luk ali-ali, idi amung bawang su luk inan nganug binaweh, luk pinudutneh déi' Hamat.
- ⁵Idi teh ieh nemudut Bait Horon pa dayeh idi Bait Horon pa lod, ieh ineh bawang luk libung meraben, idi tanga' luk inan palin,
- ⁶kudeng ineh teh Baalat idi amung bawang su inan binaweh Selimun, idi amung bawang su inan kerétaneh, idi amung bawang su inan lun maya' kuda, idi amung-amung luk pinian Selimun piduten déi' Yerusalim, idi déi' Lebanon idi aput bawang itinneh.
- ⁷Idi amung lun luk neketecan rat arang lun Hiti, lun Amori, lun Prisi, lun Hiwi, idi lun Yebusi, luk baken rat nelun Israil,
- ⁸amung anak inuldeh luk rat neketecan bang bawang ineh idi luk na pinaté lun Israil atun, amungdeh ineh ilap Raca' Selimun mangun ku demulunneh macing aco sini.
- ⁹Iamo' pupu Israil na ilap Selimun mangun ku demulunneh. Iamo' ideh ineh mangun ku lun pebunu', lun tareh, lun rayeh pa luun amung kerétaneh, idi lun luk maya' kudaneh.
- ¹⁰Idi inan 250 burur luk ngimet amung anak itin luk icuk Selimun mudut amung luk pian pidutenneh.
- ¹¹Raca' Selimun nenguit anak raca' Masir rat bang Bawang Daud amé' bang ruma' luk pangeh inau'neh kuanneh, ngaceku kebalaneh, "Na awanku miak tudo bang ruma' Daud, raca' lun Israil, ngaceku meligan amung su luk inan Pati' Pejani' Tuhan."
- ¹²Idi Selimun nemaré baré luk sabpen kuan Tuhan luun bubpun luk pinudutneh pa atun Ruma' Allah ineh,
- ¹³ieh ineh anun luk petulu barén bang anid aco maya' kudeng luk bila Musa bang anid Aco luk inan Mudeng, idi amung Bulan Baruh, idi anid aco rayeh

luk litep, teluh kua' bang selak, ieh ineh kareb Aco Rayeh Ruti luk Na Lamud, idi Irau Pangeh Ngeranih, idi Aco Rayeh Lepo Don.

¹⁴Maya' kudeng tamanneh Daud, idi Selimun nengelelep amung babpat imam bang kekamendeh anid-anid aco, idi teh babpat lun Liwi pana' luk ngedengan amung imam luk menani idi luk nganau' luk litep kuandeh. Idi teh ieh nengelelep babpat-babpat lun luk nginita Ruma' Allah luk ngakem anid-anid aco munung tanga'-tanga', maya' kudeng luk bila Daud, demulun Allah ineh.

¹⁵Idi na lun nengelaba bala raca' ineh ratnan lawé imam idi lun Liwi bang amung kekamendeh, kudeng ineh teh lawé ratnan amung binaweh.

¹⁶Kareb ineh amung kekamen Selimun pangeh nangun. Rat kareb aco ideh nenganau' alen diri Ruma' Allah, macing kekipedneh, amung kekammeneh pelaba do'.

¹⁷Selimun iné' déi' Esion Geber, idi Elot luk su lidung Akaba déi' bawang Edom.

¹⁸Idi Raca' Hiram nengecuk tuda'-tuda' lun rayehneh nguit tuda'-tuda' kapal dengan lun luk mileh maya' kapal luun abpa' rayeh. Idi ideh iné' déi' Opir dengan lun duken Selimun. Ideh nenguit rat déi' 250 pikul amas idi nemaré ineh kuan Selimun.

Inul Luk Kedueh 9

¹Idi raca' decur bang bawang Siba neninger ratnan Raca' Selimun luk mebala ineh. Idi ieh iné' déi' Yerusalim sikal nutun neneh dengan tuda'-tuda' itun. Idi mula' anak itinneh nemaya' neneh, dengan tuda'-tuda' unta luk nguit amung-amung luk do' buen, mula' amas idi batu luk meraga. Idi kareb decur ineh nepapu' ni Selimun, idi ieh nemada' neneh amung terawéneh.

²Idi raca' nengor amung itunneh. Na luk na kali'neh.

³Kareb raca' decur rat bawang Siba nenier amung ileh Raca' Selimun, idi teh ruma'luk pangeh pinudutneh,

⁴Idi akan luun téngneh, idi ruma' lun taréhneh, idi lawé amung lun dukenneh, idi ayungdeh ineh, idi teh amung luk maré luk rupen idi ayungdeh idi baréneh luk sabpen luk biréneh bang Ruma' Allah, idi ieh pelaba awa.

⁵Kebalaneh kuan Raca' Selimun, "Matu bala luk pangeh pindengerku déi' bang bawanku, rat namu idi ilehmu.

⁶Idi na ui manu ku bala ineh kareb nateh ui iné'. Idi setuneh sebuang luk na bida' negku. Ngaceku iko meluun ileh ratnan luk biladeh.

⁷Samal kuan amung lun luk dukenmu ini luk megéi' idi pa kiungmu idi ninger bada'mu luk mileh ineh!

⁸Amung ubur kuan Tuhan Allahmu luk mawang niat namu, pad Ieh nengikit namu mangun ku raca'. Tuhan méi' nelun Israil macing raked-raked. Ngaceku ineh Ieh nengikit namu mangun ku raca'deh pad iko nganau' luk matu idi luk mesiri."

⁹Idi decur ineh nemaré kuan Raca' Selimun 80 pikul amas, idi mula' luk do' buen, idi teh batu luk meraga. Idi na luk idi luk do' buen mepad do' kudeng luk biré raca' decur rat Siba ineh kuan Raca' Selimun.

(¹⁰Idi teh lun duken Raca' Hiram idi Raca' Selimun luk iné' ngalap amas rat Opir, nenguit kayuh lisuan idi teh batu luk meraga.

¹¹Idi ratnan kayuh lisuan ineh raca' nenganau' ican Ruma' Allah, idi ican ruma' raca' sebuleng teh, gita, idi giula' kuan amung lun luk menani. Idi nateh luk kudeng ineh sinier atun bang tana' Yahuda.)

¹²Idi Raca' Selimun nemaré kuan raca' decur rat Siba amung luk pitueneh. Idi ieh nemaré dengan mela luk nekungua' luk biré raca' decur neneh. Idi raca' decur ineh nuli' iné' bawang Siba dengan lun dukenneh.

¹³Idi berat amung amas luk inuit amé' inan Raca' Selimun bang selak, ieh ineh 400 pikul,

¹⁴baken ratnan amung pupuk luk barén lun luk pepua' idi utung pepua' pana'. Idi teh amung raca' Arab idi lun rayeh bawang-bawang Israil nenguit amas idi pirak kuan Selimun.

¹⁵Idi Selimun nenganau' 200 utap luk rayeh ratnan amas luk tinuno. Sebuleng utap ineh kikep ku 11kati amas.

¹⁶Idi teh ieh nenganau' 300 utap luk isuut. Sebuleng utap ineh luk kikep ku 3 kati amas luk tinuno. Idi ieh nenganug amung utap ineh bang aceh ruma' luk titen Ruma' Pulung Lebanon.

¹⁷Idi teh raca' nenganau' sebuleng kerusi raca' luk rayeh luk kikep ku gading idi amas luk meluun do'.

¹⁸Idi kerusi ineh inan anem tatak idi aceh tapin. Amung ineh kikep ku amas idi pekatu nan kerusi ineh. Idi pekop kerusi ineh inan su luk inan ngerareng ticu', dengan aceh balang luk tuped su ineh.

¹⁹Idi teh inan pulu' dueh balang luk tuped luun anid tatak ineh pa kabing idi pa tinuehneh. Idi na luk kudeng ineh inau' bang imet raca' bawang baken.

²⁰Idi amung sangkir Raca' Selimun inau' ratnan amas. Idi amung bigan bang Ruma' Pulung Lebanon pana' inau' ratnan amas luk meluun do'. Ngaceku bang kareb Selimun pirak ineh na pian lun.

²¹Idi kapal-kapal raca' iné' Tarsis dengan kapal-kapal Hiram sekua' bang teluh lak. Ideh nguit rat Tarsis, amas, pirak, gading, kuyad, idi tuau.

²²Raca' Selimun inan meluun ula' binaweh idi ieh meluun ileh ratnan amung raca' bang tana' ini.

²³Amungdeh iné' ngitun neneh, ngaceku pian ninger balaneh luk mileh luk pangeh biré Allah neneh.

²⁴Idi anid-aniddeh nenguit baré kuan Selimun, ieh ineh binaweh amas, pirak, ayung, repapeh pebunu', amung-amung luk do' buen, kuda, idi keladai anid-anid lak.

²⁵Idi teh Raca' Selimun inan 4,000 libung keréta idi kuda, 12,000 lun luk maya' kuda, luk litepneh bang anid-anid bawang rayeh su inan keréta idi dengan raca' déi' Yerusalim.

²⁶Ieh nengimet amung raca' rat Abpa' Pirat ineh macing déi' bawang lun Pilistin, idi lakan bawang Masir teh.

²⁷Idi déi' Yerusalim raca' nenganau' pirak ineh mepad kinula' batu, idi kayuh tumuh mepad kinula' lawa gita' luk déi' Sepila.

²⁸Idi Selimun nenguit kuda rat Musri idi teh rat bang amung bawang luk inimetneh.

²⁹Idi amung kekamen Selimun luk baken, ratnan luk pun-pun macing luk kekipedned, pangeh inayud bang surat Nabi Natan, idi bang bada' Ahiya lun Siloni, idi bang surat ratnan luk nekali' Nabi Ido, ratnan amung-amung lawé Yerebom Nibat.

³⁰Selimun mangun ku raca' lun Israil déi' Yerusalim apat ngepulu' lak kinioneh.

³¹Idi ieh naté, idi tinanemdeh déi' bawang tamanneh Daud. Idi anakneh Rehebom mangun ku raca' libalneh.

Inul Luk Kedueh 10

¹Idi Rehebom iné' Sikem, ngaceku amung lun Israil rat pa tinueh busat aco nepamung déi' Sikem sikal ngikit neneh ku raca'.

²Idi bala ini nekali' Yerebom Nibat kareb ieh déi' bawang Masir, (ngaceku ieh pangeh neburo rat pa kiung Raca' Selimun,) idi ieh nelemubed rat bawang Masir.

³Idi lun Israil rat pa tinueh busat aco ineh neneteng neneh. Idi Yerebom nemaya' nedeh iné' matun Rehebom, kebaladeh,

⁴"Tamanmu pangeh nengeberat amung kekamen kali ini. Kudeng iko ngeran kekamen kai pad kai na mesusa', idi amung kai ini miak lutep maya' namu."

- ⁵Idi kebala Rehebom nedeh, "Muli' muyuh atun. Idi teluh aco baruh do' muyuh lemubed amé' negku." Idi ideh nuli'.
- ⁶Idi Rehebom nengitun amung lun rayeh, luk nengedengan tamanneh Selimun kareb ieh mulun, kebalaneh, "Kudeng apehké ui miak ngor bala lun mula' ini?"
- ⁷Idi kebaladeh, "Kudeng iko méi' nelun mula' ineh, idi maya' piniandeh, idi do' bala nedeh, kalli' rungen amungdeh ineh mangun ku lun dukenmu raked-raked."
- ⁸Iamo' ieh nenecan bada' amung lun rayeh ineh neneh, idi nengitun nelun anak adi' luk mepad rayeh neneh, idi luk idi denganneh rat pun,
- ⁹kebalaneh, "Kudeng apehké tau miak ngor bala lun mula' ini luk pangeh nemutuh negku ngeran babeh luk pangeh rireng tamanku pa luundeh?"
- ¹⁰Idi kebaladeh, "Do iko pebala nedeh, 'Bua' ticu' angi'ku ini meluun rayeh ratnan awa' tamanku.
- ¹¹Idi kudeng i Ama' pangeh nengerareng pa luun muyuh aceh babeh luk meberat, kali' rungen ui ngula' kekamen muyuh ineh baruh teh. Ieh nemabpet nemuyuh ku ué, kali' rungen ui mabpet nemuyuh mucu ku kayuh." "
- ¹²Pangeh teluh aco idi Yerebom dengan lun mula ineh iné' ni Rehebom maya' kudeng balaneh nedeh.
- ¹³Idi raca nengor baladeh ineh dengan gateh niatneh, ngaceku ieh na nemaya' bada' lun luk mengered ineh.
- ¹⁴Idi ieh nepebala nedeh ineh maya' kudeng baladeh luk anak adi' ineh, kebalaneh, "Idi i Ama' pangeh nengeberat kekamen muyuh. Iamo' ui miak ngula' ineh teh. Idi i Ama' pangeh nemabpet nemuyuh ku ué. Iamo' ui mabpet nemuyuh ku kayuh."
- ¹⁵Idi na raca' neninger bala lun mula' ineh, ngaceku isu' ini icing Tuhan pad Ieh ngacing amung-amung luk pangeh bilaNeh kuan Yerebom Nibat dengan tang Ahiya.

¹⁶Kareb lun mula' kali' raca' na sikal ninger baladeh ineh, idi ideh nengitang, kebaladeh, "Na kai pian maya' inul Daud. Anunké luk pangeh inau'deh kuan kai? O lun Israil, do' tau muli'. Nima' Rehebom matar tetek ruma'neh sebuleng." Idi amung lun Israil ineh neburo rat ni Rehebom.

¹⁷Iamo' Rehebom nengimet nelun luk tudo bang bawang-bawang Yahuda mo'.

¹⁸Idi Raca' Rehebom nengecuk ni Adoram ieh ineh lun rayeh lun duken raca' amé' nelun Israil. Iamo' ideh nemitung neneh ku batu, pad ieh naté. Idi Raca' Rehebom dengan mesaget numak bang aceh keréta, idi neburo iné' Yerusalim.

¹⁹Rat kareb ineh amung pupu rat pa tinueh busat aco imet Israil na maya' inul Daud.

Inul Luk Kedueh 11

¹Kareb Rehebom nacing déi' Yerusalim idi ieh nengamung 180,000 burur lun pebunu' luk meluun sangit ratnan pupu Benjamin idi Yahuda. Ieh pian pebunu' nelun Israil, luk pa tinueh busat aco, pelé imet ineh lemubed amé' neneh.

²Iamo' Tuhan nengecuk Nabi Semaya'

³amé' mada' ni Rehebom idi amung lun Yahuda idi lun Benjamin kudeng ini:

⁴"Aleg muyuh amé' pebunu' inan kinanak muyuh lun Israil. Iamo' do' anid-anid muyuh muli', ngaceku isu' ineh pangeh mangun maya' pinianKu." Idi ideh neninger bala Tuhan ini. Idi ideh nuli' idi na nepebunu' ni Yerebom.

⁵Rehebom tudo déi' Yerusalim. Idi ieh nengeraben tuda'-tuda' bawang Yahuda idi Benjamin,

⁶ieh ineh Baitlahim, Etam, Tekoa,

⁷Baitsur, Soko, Adulam,

⁸Gat, Marisa, Sip,

⁹Adoraim, Lakis, Aseka,

- ¹⁰Sora, Aijalon, idi Hebron.
- ¹¹Idi ieh nengeraben bawang ineh, idi ieh nengelelep lun rayeh baweh bang anid-anid bawang ineh, idi nenganug akan, umau, idi abpa' anggur su ineh,
- ¹²idi teh tuda'-tuda' utap idi busu. Kudeng ineh teh ieh nengelelep imetneh pa luun Yahuda idi Benjamin.
- ¹³Idi imam-imam, idi lun Liwi rat apud bawang Israil iné' Yahuda luk pa kabing busat aco.
- ¹⁴Lun Liwi nenecan amung lamandeh, idi amung babpatdeh, idi nepura' iné' déi' Yahuda idi Yerusalim, ngaceku ideh pangeh tila' Yerebom idi amung anakneh, pad ideh na miak ngakem kekamen imam kuan Tuhan.
- ¹⁵Idi Yerebom nengikit tuda'-tuda' imam kuan bururneh sebuleng, luk nguyut sembayang déi' su luk medita', ieh ineh sembayang inan sétan idi inan akang anak sapi' luk pangeh inau'neh.
- ¹⁶Idi amung lemulun luk lutep sikal sembayang nan Tuhan Allah lun Israil nemaya' puet lun Liwi, ratnan amung pupu lun Israil, idi iné' Yerusalim, pad ideh maré baré kuan Tuhan, ieh ineh Allah tepundeh ineh.
- ¹⁷Idi ideh nengeraben imet raca' Yahuda, idi ideh nengetueh Rehebom anak Selimun teluh lak kinioneh. Ngaceku teluh lak kinioneh ideh ineh nemaya' lawé Daud idi Selimun.
- ¹⁸Idi Rehebom nengaweh Mahalat Yerimot, luk mupun Daud, idi tinanneh ineh Abihail Eliab luk mupun Isai.
- ¹⁹Didueh inan teluh anak deléi, ieh ineh Yus, Semaria, idi Saham.
- ²⁰Muci ieh nengalap Maka Absalom luk nenganak kuanneh apat anak deléi, ieh ineh Abia, Atai, Sisa, idi Selomit.
- ²¹Idi Rehebom mawa inan Maka Absalom ineh meluun ratnan awanneh idi apidneh luk baken. Idi ieh nengalap pulu' ualuh awanneh idi anem ngepulu' apidneh. Idi ideh pana' inan anak deléi dueh ngepulu' ualuh burur idi anak decur anem ngepulu' burur.

²²Idi Rehebom méi' ni Abia anak Maka meluun ratnan amung kinanakneh, pad ieh sikal ngikit neneh ku raca' ku libalneh.

²³Idi dengan ileh, Rehebom nemaré kekamen kuan amung anak-anak deléineh bang bawang luk meraben déi' bawang Yahuda idi Beniamin. Idi ieh nemaré kuandeh binaweh dengan petap. Idi ieh nengalap mula' awan kuandeh.

Inul Luk Kedueh 12

¹Kareb imet Rehebom pangeh lutep idi metueh, idi ieh dengan amung lun Israil nenecan ukum Tuhan.

²Ngaceku ineh bang lak luk kelimeh bang imet Rehebom, Sisak raca' Masir nengerieng bawang Yerusalim.

³Ieh nenguit 1,200 keréta, idi 60,000 lun maya' kuda, idi teh lun pebunu' luk na mekiap. Arangdeh inan lun Libia, Suki, idi Sudan.

⁴Ieh nengalap amung bawang luk meraben déi' Yahuda. Idi ieh nacing déi' Yerusalim.

⁵Idi Nabi Semaya iné' ni Rehebom idi amung lun rayeh Yahuda luk nepamung déi' Yerusalim ngaceku Sisak ineh. Idi kebalaneh nedeh, "Kudeng ini bala Tuhan nemuyuh, 'Muyuh pangeh nenecan Negku, idi Ui pana' pangeh nenecan nemuyuh bang palad Sisak.' "

⁶Idi amung lun rayeh Israil idi raca' pana' nengebeneh bururdeh, kebaladeh, "Tuhan ineh matu."

⁷Kareb Tuhan nenier nedeh nengebeneh bururdeh, idi kebalaNeh ni Semaya: 'Ideh pangeh nengebeneh bururdeh. Ngaceku ineh na Ui miak ngaté nedeh. Iamo' Ui maré aceh puit nedeh, pelé usehKu na macing Yerusalim ratnan palad Sisak.

⁸Iamo' ideh miak mangun ku lun duken Sisak, pelé ideh kali' meluun do' ngakem kuanKu, ratnan ngakem kuan raca' bawang baken."

⁹Raca' Sisak iné' déi' Yerusalim, idi ieh nengaro amung binaweh luk meraga rat bang Ruma' Allah, idi rat bang ruma' raca'. Amung ineh tibanneh, dengan amung utap amas luk inau' Raca' Selimun.

¹⁰Idi Rehebom nenganau' tuda'-tuda' utap ratnan tekaling ku libal amung ineh, idi nemaré utap ineh kuan amung lun rayeh lun luk nginita tanga' ruma' raca'.

¹¹Anid kareb raca' amé' déi' Ruma' Allah, idi lun luk nginita tanga' macing nguit utap ineh. Pangeh ineh ideh nengelubed ineh teh bang takep lun luk nginita ineh.

¹²Idi kareb Rehebom nengebeneh bururneh kudeng ineh, idi useh Tuhan nelemuut rat neneh, pad ieh na tila' peh, pad bang bawang Yahuda ineh na susa'.

¹³Raca' Rehebom lutep ngimet déi' Yerusalim teh. Idi ulunneh apat ngepulu' aceh lak kareb punneh mangun ku raca'. Idi ieh nengimet pulu' tudu' lak kinioneh déi' Yerusalim, ieh ineh bawang luk pangeh pinili' Tuhan rat arang amung babpat pupu Israil mangun ku su luk inan sembayang Neneh. Idi ngadan tinan raca' ineh Naama, ieh ineh seburur decur Amon.

¹⁴Idi raca' nenganau' sala' ngaceku na ieh lutep nakap Tuhan.

¹⁵Idi amung kekamen Rehebom rat pun-pun macing kekipedneh, pangeh inayud bang surat Nabi Semaya', idi bang surat Nabi Ido. Idi arang Rehebom dengan Yerebom megéi' inan bunu'.

¹⁶Idi Rehebom naté, idi ieh tinanem bang tanem-tanem raca' déi' bang Bawang Daud, ieh ineh Yerusalim luk mon. Idi anakneh Abia mangun ku raca' libalneh.

Inul Luk Kedueh 13

¹Kareb lak luk kepulu' ualuh bang imet Yerebom raca' Israil, idi Abia mangun ku raca' lun Yahuda.

- ²Idi ieh nengimet teluh lak déi' Yerusalim. Ngadan tinan raca' ineh Mikaya anak Uriel rat Gibia. Idi arang Abia dengan Yerebom pana' inan teh bunu'.
- ³Idi Abia iné' pebunu' dengan 400,000 lun pebunu'. Idi Yerebom pana' nengalad bawehneh, ieh ineh 800,000 lun pebunu'.
- ⁴Dueh baweh ineh petutup luun pegkung-pegkung Epraim. Idi Abia mudik Pegkung Semaraim idi nenawar ni Yerebom idi lun Israil, kebalaneh, "Ninger muyuh!
- ⁵Naké muyuh kali' idi imet Israil ineh biré Tuhan Allah lun Israil kuan Daud macing raked-raked, do' kuan raca' idi anakneh, idi teh dengan aceh jani' luk na miak na bén?
- ⁶Iamo' Yerebom Nibat sikal metueh ratnan Raca' Selimun.
- ⁷Idi tuda'-tuda' lun luk na lutep idi luk dat nengedengan ni Yerebom pad ideh nengedat Rehebom Selimun, ieh ineh kareb Rehebom anak adi', idi ieh na mileh ngerawé, pad ieh na miak metueh rat nedeh.
- ⁸Nekini muyuh ngerawé muyuh miak ngeluun kekamen Tuhan luk bang palad anak Daud, ngaceku muyuh mula', idi dengan muyuh inan akang anak sapi' amas luk pinudut Yerebom ku akang kuan muyuh.
- ⁹Idi muyuh pangeh nengusu amung imam Tuhan, ieh ineh inul Arun idi amung lun Liwi, idi pangeh muyuh nenganau' imam kuan muyuh mepad kudeng amung pupu bawang baken ineh. Idé luk macing uen ngeligan idi luk nguit sebuleng sapi' pegawa' luk deléi, kian tudu' dumba lek, ieh ineh kedingen mangun ku imam kuan akang luk na melalud.
- ¹⁰"Iamo' Tuhan mo' luk Allah kai, idi na kai necan Neneh, idi amung imam luk ngakem kuan Tuhan, ieh ineh inul Arun. Idi amung lun Liwi pana' idi teh bang kekamendeh.
- ¹¹Idi anid pekak idi anid alem ideh maré luk sabpen kuan Tuhan, idi teh umau luk do' buen, idi remumu', idi ideh netemina' ku ruti ubur luun meja luk ratnan amas luk meluun do' ineh, idi teh kukud lapung luk ratnan amas

dengan amung lapungdeh tetudin anid-anid alem. Ngaceku kai nginita ecuk Tuhan Allah kai. Iamo' muyuh pangeh nenecan Neneh.

¹²Idi kali' rungen Allah mo' luk nguyut nekai idi imam-imamNeh pana' dengan serupitdeh luk muni nawar nekai amé' pebunu' nemuyuh. Aleg muyuh pebunu' inan Tuhan Allah tepun muyuh, O lun Israil, ngaceku na muyuh metueh.”

¹³Iamo' Yerebom nengecuk tuda'-tuda' burur luk ngabang nedeh rat pa keted, pad bawehneh sebuleng pa atun lun Yahuda. Idi amung lun luk ngabang ineh pa keteddeh.

¹⁴Idi kareb lun Yahuda ineh nelumi, ideh nenier nedeh ineh pinaté rat pa atun idi rat pa keted. Idi ideh nengitang nawar Tuhan. Idi amung imam pana' nengiupeh serupitdeh.

¹⁵Idi amung lun Yahuda nengudub. Idi Allah nengelaya' ni Yerebom idi amung lun Israil pa kiung Abia idi amung lun Yahuda,

¹⁶pad lun Israil neburo rat pa kiung lun Yahuda. Idi Allah nemaré nedeh bang paladdeh.

¹⁷Idi Abia idi bawehneh ineh nengelaya' nedeh. Idi 500,000 lun Israil luk mesangit pinatédeh.

¹⁸Kudeng ineh lawé lun Israil linaya' bang kareb ineh. Iamo' lun Yahuda luk metueh, ngaceku ideh pangeh merapet inan Tuhan Allah tepundeh.

¹⁹Idi Abia nengerada' ni Yerebom. Idi ieh nengaro rat neneh bawang Baitel, bawang Yesana, idi bawang Epron dengan amung babpatdeh.

²⁰Idi Yerebom na inan tueh peh raked ulun Abia. Meluun teh Tuhan nenecat neneh, pad ieh naté.

²¹Iamo' Abia luk metueh. Idi ieh inan pulu' apat awan, idi ieh inan dueh ngepulu' dueh anak deléi idi pulu' anem anak decur.

²²Idi amung kekamen Abia luk baken idi amung lawéneh idi balaneh, pangeh inayud bang surat Nabi Ido.

Inul Luk Kedueh 14

¹Idi Abia naté. Idi ieh tinanem bang tanem raca' déi' bang Bawang Daud, ieh ineh Yerusalem luk mon. Idi Asa anakneh mangun ku raca' libalneh. Idi kareb imet Raca' Asa, bawang Yahuda na inan bunu' pulu' lak kinioneh.

²Idi Asa nenganau' luk do' idi matu pa kiung Tuhan Allahneh.

³Ieh nenala' amung bubpun pupu baken, idi amung su luk inan sembayang inan akang. Idi ieh nemila' amung diri akang. Idi ieh nenebpeng amung ulung pana'.

⁴Idi ieh nengecuk amung lun Yahuda nakap Tuhan Allah tepundeh, pad ideh maya' ukum idi balaNeh.

⁵Idi teh ieh nenala' rat bang bawang Yahuda amung su luk inan sembayang inan akang, idi bubpun su luk inan ngeseb umau luk do' buen. Ngaceku ineh bang imetneh bawang ineh na inan susa'.

⁶Idi ieh nemudut tuda'-tuda' bawang luk meraben déi' bawang Yahuda, pad bawang ineh na inan ria'. Idi na luk idi bunu' raked tuda'-tuda'lak ineh, ngaceku Tuhan nengeletep imetneh.

⁷Idi kebalaneh kuan lun Yahuda, "Do' tau ngeraben bawang-bawang ini idi ngar ineh pekelibut ku batu, idi pudut-pudut luk medita', idi tuda'-tuda' tanga' bawang dengan palindeh teh. Tana' ineh tau kuan, ngaceku tau pangeh nenakap Tuhan Allah tau, pad Ieh nemaré netau na inan bunu'." Idi ideh nemudut bawang ineh dengan do'.

⁸Idi Asa inan aceh baweh, ieh ineh 300,000 lun Yahuda, luk inan utap idi busu, idi 280,000 lun Benjamin luk inan utap idi luk mileh ngimet binor, amungdeh ineh lun luk mesangit.

⁹Idi Sira lun Sudan nengerieng Yahuda dengan aceh baweh luk 1,000,000 kinula'deh idi 300 keréta. Idi ieh nacing déi' Marisa.

¹⁰Idi Asa iné' matun neneh. Idi didueh nengelalad baweh didueh déi' Ruan Sepata muneng ku Marisa.

¹¹Idi Asa nesembayang inan Tuhan Allahneh, kebalaneh, "O Tuhan, Iko miak ngedengan baweh luk melaya' idi baweh luk metueh pana', O Tuhan Allah kai, ngedengan nekai nekini, ngaceku kai merapet Namu, idi dengan ngadanMu kai pangeh nacing sikal ngelaya' baweh luk rayeh ineh. O Tuhan, Iko mo' Allah kai. Seburur pana' nateh luk metueh rat Namu."

¹²Idi Tuhan nengelaya' nelun Sudan ineh pa kiung Asa, idi lun Yahuda, pad lun Sudan ineh neburo.

¹³Idi Asa, dengan bawehneh ineh nengerada' nedeh macing déi' Gerar. Idi amung lun Sudan ineh naté, ngaceku ideh linaya' pa kiung Tuhan idi pa kiung bawehNeh. Idi lun Yahuda nenaban mula' binaweh.

¹⁴Idi ideh nengusag amung bawang luk libut Gerar. Ngaceku aceh tot ratnan Tuhan pangeh nangun kuan lun bang bawang ineh. Idi lun Yahuda nengaro amung bawang ineh, ngaceku mula' binaweh bang ineh.

¹⁵Idi ideh nengaté tuda'-tuda' lun luk matar aya'deh. Idi ideh nenguit dumba idi unta amé' déi' Yerusalim.

Inul Luk Kedueh 15

¹Roh Allah netemurun luun Asaria Oded,

²pad ieh iné' matun Asa, idi nepebala neneh, "Ninger iko O Asa, idi amung lun Yahuda idi Benjamin: Tuhan pangeh ngedengan nemuyuh, ngaceku muyuh lumi inan Tuhan. Idi kudeng muyuh nakap Neneh, kali' rungen Ieh pana' kali' muyuh. Iamo' kudeng muyuh necan Neneh, kali' rungen muyuh pana' tacinNeh.

³Idi pangeh tuda'-tuda' io lun Israil na maya' Allah luk matu. Idi na ideh ineh inan imam luk mada'. Idi teh na ideh ineh inan ukum.

⁴Iamo' kareb ideh mesusa' ideh nuren inan Tuhan Allah lun Israil idi nenakap Neneh. Idi ideh nekali' Neneh.

⁵Idi kareb ineh na inan do' kuan lemulun luk ngakem anun-anun. Ngaceku anid bawang inan susa',

- ⁶pad ideh pedat sepupu dengan sepupu, idi sebawang dengan sebawang, ngaceku Allah nengesusa' nedeh ineh dengan raput-raput dereh.
- ⁷Iamo' do' muyuh metueh idi mekuu'. Ngaceku muyuh miak ngalap tabpar ratnan kekamen muyuh.”
- ⁸Kareb Asa neninger amung bala idi bada' Nabi Asaria Oded, idi ieh mekuu', idi ieh nengusag amung akang rat apud tana' Yahuda idi Benjamin idi rat amung bawang déi' pegkung-pegkung Epraim luk pangeh inaroneh. Idi teh ieh nenuneh bubpun Tuhan luk pa atun takep Ruma' Allah.
- ⁹Asa nengamung lun Yahuda idi Benjamin, idi lun rat Epraim, Manasé, idi Simion luk tudo arangdeh, ngaceku rat Israil mula' lun luk nelumi neneh kareb ideh nenier Tuhan Allahdeh idi dengan Raca' Asa.
- ¹⁰Ideh nepamung déi' Yerusalim bang bulan luk keteluh, lak luk kepulu' limeh bang imet Asa.
- ¹¹Idi bang aco sineh teh ideh nemaré kuan Tuhan ratnan binaweh luk tibandeh ineh, 700 sapi', idi 7,000 dumba.
- ¹²Idi ideh nepejani' sikal nakap Tuhan Allah tepundeh, dengan amung niatdeh, idi dengan amung terawédeh.
- ¹³Idi idé-idé luk na pian nakap Tuhan Allah lun Israil miak pitayen, do' luk isuut idi luk rayeh, deléi idi decur pana'.
- ¹⁴Idi ideh nepebulung inan Tuhan dengan rayeh arod, idi ngudub, idi nengiuip serupit teh.
- ¹⁵Amung lun Yahuda pana' mawang niat ku bulung ineh, ngaceku ideh nepebulung dengan amung niatdeh, idi dengan ran niatdeh. Ideh nenakap Neneh tu-tu, idi Ieh nekali'deh. Idi Tuhan nemaré nedeh do' udeng idi na inan bunu'.
- ¹⁶Idi Maka pana' tinan Raca' Asa ineh tila'neh ratnan kekammeneh ngaceku ieh pangeh nenganau' aceh akang luk dat kuan Asera. Idi Asa nengusag akang luk dat ineh idi nengeseb neneh tangeb Abpa' Kidron.

¹⁷Iamo' sebuang su luk inan sembayang inan akang na inusag rat arang lun Israil. Iamo' niat Asa na mesala' raked ulunneh.

¹⁸Idi ieh nenguit semuet bang Ruma' Allah amung binaweh luk linigan tamanneh, idi amung binaweh luk linigan dieh sebuleng: amas, pirak, idi binaweh luk baken-baken pana'.

¹⁹Idi na inan bunu' macing lak luk keteluh ngepulu' limeh bang imet Asa.

Inul Luk Kedueh 16

¹Idi lak keteluh ngepulu' anem bang imet Asa, idi nacing Basa raca' lun Israil munu' nelun Yahuda. Idi ieh nengeraben bawang Rama. Idi seburur pana' na simén remuat idi semuet amé' matun Asa raca' lun Yahuda.

²Idi Asa nengeruat amas idi pirak ratnan binaweh luk meraga luk bang Ruma' Allah, idi bang ruma' raca', idi nemaré kuan Benhadad raca' bawang idi nemaré kuan Benhadad raca' bawang Siria, luk tudo bang bawang Damsik, kebalaneh,

³"Do' kiteh perurum mepad kudeng taman kiteh atun. Idi ui maré amas idi pirak ini namu. Do' iko ngagka' jani'mu dengan Basa raca' lun Israil ineh, pad ieh nguit bawehneh buro rat negku."

⁴Idi Benhadad neninger bala Raca' Asa. Idi ieh nengecuk amung lun rayeh bawehneh amé' munu' bawang-bawang lun Israil. Idi ieh nengelaya' Iyon, Dan, Abel Bait Maka, idi amung su luk inan nganug binaweh déi' Naptali.

⁵Idi bala ineh nekali' Basa, idi ieh nugka' ratnan ngeraben bawang Rama.

⁶Idi Raca' Asa nengamung amung lun Yahuda, pad ideh nengengut amung batu déi' Rama, idi amung kayuhneh luk ilap basa ku mudut bawang ineh. Idi dengan ineh ieh nemudut Giba idi Mispa.

⁷Kareb ineh Nabi Hanani iné' matun Asa, raca' lun Yahuda. Kebalaneh neneh, "Ngaceku iko merapet inan Raca' Siria, idi na iko merapet inan Tuhan Allahmu, idi baweh raca' Siria ineh pangeh nepuit rat bang paladmu.

⁸Naké lun Sudan idi lun Libia ineh aceh baweh luk pelaba rayeh, idi mula' keréta idi lun luk maya' kuda teh? Iamo' iko pangeh merapet inan Tuhan. Idi Ieh namaré amungdeh ineh teh bang paladmu.

⁹Tuhan miak nier apud tana', pad ngegala' tueh idi kuu'Neh kuan idé-idé luk na mesala' pa kiungNeh. Idi ngaceku ineh mebacé kekamenmu ini, idi rat pad sini iko uen munu' kidi-kidi.”

¹⁰Iamo' Asa museh nelun nabi ineh, idi nenganau' neneh bang papang bang tutup. Ngaceku ieh megateh neneh ngaceku balaneh ineh. Idi teh tuda'-tuda' burur lun anak itinneh pidereh Asa bang kareb ineh.

¹¹Idi amung kekamen Asa luk pun-pun macing kekiped, pangeh inayud bang Surat Kekamen Raca'-Raca' Yahuda idi Israil.

¹²Idi bang lak luk keteluh ngepulu' iwa' bang imetneh idi Asa mét kukudneh. Idi étneh mebura'. Iamo' bang étneh na ieh nenakap Tuhan, iamo' ieh nenakap nelun luk mileh ngubat.

¹³Idi pangeh dueh lak ieh naté.

¹⁴Idi ieh tinanem bang tanem batu luk kinuerneh bang Bawang Daud, ieh ineh Yerusalim luk mon. Ideh nengumau butungneh ku umau luk do' buen kareb nateh ieh tinanem. Idi ideh netemido neneh dengan aceh apui luk rayeh.

Inul Luk Kedueh 17

¹Yosapat nengelibal tamanneh Asa mangun ku raca'. Idi ieh nengetueh imetneh pad ieh na uen Israil ngelaya'.

²Idi ieh nengeletep bawehneh bang anid-anid bawang Yahuda luk meraben, idi teh pa dayeh. Idi déi' bang amung bawang Epraim luk pangeh rinaben tamanneh.

³Idi Tuhan nengedengan ni Yosapat, ngaceku ieh nemaya' amung lawé tamanneh luk pun-pun ineh. Na ieh nesembayang nan Baal.

- ⁴Ieh nesembayang nan Allah tamanneh. Idi ieh nemaya' amung ukum Allah. Idi na ieh nenginud kekamen raca'-raca' Israil.
- ⁵Idi Tuhan nengeletep imet ineh bang paladneh, idi amung lun Yahuda nemaré baré kuanneh, pad ieh mangun ku lun do' idi mebala.
- ⁶Idi ieh mekuu' maya' lawé Tuhan, pad ieh nengusag amung su luk inan sembayang inan akang, idi amung ulung rat bawang Yahuda.
- ⁷Idi bang lak luk keteluh bang imetneh, Yosapat nengecuk amung lun rayehneh, ieh ineh Benhail, Obadia, Sekaria, Netanel, idi Mikaya, amé' mada' amung lun bang bawang Yahuda.
- ⁸Idi lun Liwi ini nemaya' nedeh, ieh ineh Semaya, Natania, Sebadia, Asahel, Semiramot, Yonatan, Adonia, Tobia, idi Tobadonia. Idi imam Elisama idi Yoram nemaya' nedeh teh.
- ⁹Ideh nenguit Surat Ukum Tuhan idi nenalan apud bawang Yahuda, idi ideh nemada' nelun mula' ineh.
- ¹⁰Idi aceh tot ratnan Tuhan mangun kuan amung imet apud bawang luk pekelibut Yahuda, pad ideh na pebunu' dengan Yosapat.
- ¹¹Idi sebuang lun Pilistin nemaré kuan Yosapat pirak idi baré-baré luk baken. Lun Arab pana' nemaré 7,700 dumba idi 7,700 amék kuanneh.
- ¹²Idi imet Yosapat iuk-iuk metueh. Idi ieh nemudut bang Yahuda, libung-libung luk meraben, idi tuda'-tuda' bawang
- ¹³su luk inan nganug mula' binaweh. Déi' Yerusalim ieh nengeletep lun pebunu' luk mesangit,
- ¹⁴maya' inuldeh. Adna ineh lun rayeh baweh rat inul Yahuda. Idi ieh nengimet 300,000 lun pebunu'.
- ¹⁵Lun luk pa liangneh, ieh ineh Yohanan luk nengimet 280,000 lun pebunu'.
- ¹⁶Idi lun luk pa liang Yohanan ineh teh, Amasia Sikri luk nengimet 200,000 lun pebunu'. (Amasia pian maya' Tuhan dengan ran niatneh.)

¹⁷Idi rat Benjamin: Eliada seburur lun luk metueh idi mesangit luk nengimet 200,000 burur lun luk ngimet binor idi utap.

¹⁸Idi lun luk pa liangneh ineh, Yosabad luk nengimet 180,000 burur lun luk temina' pebunu'.

¹⁹Amungdeh ini bang imet raca', baken ratnan amung lun luk panegh litepneh bang bawang luk meraben aput bawang Yahuda.

Inul Luk Kedueh 18

¹Kareb Raca' Yosapat mula' binaweh idi mebala, idi ieh pana' mangun ku arum Raca' Akab.

²Idi pangeh tuda'-tuda' lak idi ieh iné' papu' Raca' Akab déi' Samaria. Idi Akab nengeret mula' dumba, idi sapi' kuanneh idi kuan amung lun luk denganneh. Idiieh nutun nengubuk ni Yosapat pad ieh maya' neneh amé' déi' Ramot Giliad.

³Kebalaneh, "Sikal iko nalan maya' negku amé' déi' Ramot Giliad ineh?" Idi kebala Yosapat, "Kudeng iko temina', ui pana' temina' dengan bawehku. Miak kai maya' namu."

⁴Idi teh kebala Yosapat, "Iamo' do' iko ngitun Tuhan atun."

⁵Idi Akab nenawar amung nabi, lélé apat ngeratu kinula'deh. Kebalaneh nedeh, "Miakké ui amé' pebunu' déi' bawang Ramot, kian, na lek?" Idi kebala nabi-nabi ineh, "Do' iko amé', ngaceku Tuhan miak maré nedeh bang paladmu."

⁶Iamo' kebala Yosapat, "Inanké nabi baken tungé', luk miak tunin tau?"

⁷Kebala Akab, "Inan teh seburur luk miak tunin tau, ieh ineh Mikaya Imla, iamo' ui megateh neneh, ngaceku sesuut pana' nateh balaneh do' negku, iamo' ieh pelaba dat bala." Idi kebala Yosapat, "Aleg iko pebala kudeng ineh."

⁸Idi Raca' Akab nenawar seburur lun tarehneh, kebalaneh, "Amé' iko nguit Mikaya Imla ineh amé' tungé' dengan mesaget."

⁹Idi dueh raca' ineh tudo luun kerusi imet dengan ayung raca', déi' su luk inan rumik munung tanga' bawang Samaria. Idi amung nabi mada' pa kiung dueh raca' ineh.

¹⁰Idi Nabi Sedekia Kenana pangeh nenganau' unga belawan. Idi kebalaneh ni Akab, "Kudeng ini bala Tuhan, 'Idi kudeng ini teh lawému miak ngegkul-ngegkul nelun bawang Siria ineh, pad iko ngaté nedeh ineh.' "

¹¹Idi kudeng ineh teh bada' amung nabi ineh, kebaladeh, "Do' iko amé' déi' Ramot idi kali' rungen iko metueh. Ngaceku Tuhan miak maré nedeh bang paladmu."

¹²Idi lun luk icuk amé' nawar ni Mikaya ineh nepebala neneh, "Idi amung nabi baken mada' luk do' kuan raca'. Do' iko pana' mada' kudeng ineh teh."

¹³Iamo' kebala Mikaya, "Ui pebulung ku ngadan Tuhan luk mulun, idi anun luk belén Tuhan negku, ineh teh luk belénku."

¹⁴Kareb ieh nacing inan raca', idi raca' nengitun neneh, kebalaneh, "O Mikaya, miak kai amé' pebunu' déi' Ramot ineh, kian na lek?" Idi kebala Mikaya, "Do' iko amé'. Miak iko metueh. Tuhan maré amungdeh ineh bang paladmu."

¹⁵Iamo' kebala Akab neneh, "Tuda' kua' ui nemebpeng namu na miak pebala luk na matu dengan ngadan Tuhan?"

¹⁶Idi kebala Mikaya neneh, "Ui pangeh nenier amung lun Israil urap-urap luun pegkung, mepad kudeng dumba luk na lun matar. Idi Tuhan nepebala, 'Ideh ini na inan lun nguyut, ngaceku ineh nima' anid-aniddeh muli' dengan do'.' "

¹⁷Idi kebala Akab ni Yosapat, "Naké ui nepebala namu, sesuut pana' nateh balaneh do' negku, iamo' ieh pelaba dat bala?"

¹⁸Idi kebala Mikaya, "Ninger iko bala Tuhan: Ui pangeh nenier Tuhan tudo luun kerusiNeh. Idi amung melaikat luk déi' surga tuperd pekop iringNeh.

- ¹⁹Idi Tuhan nengitun, 'Idé miak ngubuk ni Akab pelé ieh amé' pitayen déi' Ramot ineh?' Idi sebuang melaikat ineh nepebala kudeng ini, idi luk baken nepebala kudeng ineh.
- ²⁰Idi aceh ada' iné' pa kiung Tuhan, kebalaneh, 'Ui miak ngubuk neneh.' Idi Tuhan nengitun neneh, 'Dengan anun?'
- ²¹Idi kebala ada' ineh, 'Ui miak mangun ku ada' luk mebalih bang tang amung nabi Akab ineh.' Idi Tuhan nepebala, 'Amé' naluk neneh. Luk bilamu miak mangun.'
- ²²"Idi nekini Tuhan pangeh nemaré ada' luk mebalih bang tang amung nabimu ini. Idi Tuhan pangeh nengelelep susa' kuanmu."
- ²³Idi Nabi Sedekia nemepag kiung Mikaya, kebalaneh, "Kudeng afeh Roh Tuhan ineh mubuh rat negku pad ieh pebala namu?"
- ²⁴Kebala Mikaya, "Iko teh miak kali', kareb iko buro amé' sigapung bang takep."
- ²⁵Idi kebala Raca' Akab, "Ngakem ni Mikaya', idi nguit neneh lemubed amé' ni Amon lun rayeh bawang, idi ni Yoas anak raca' ineh.
- ²⁶Idi ngecuk nedeh nipa lemulun ini bang tutup. Idi maré neneh sesuut ruti idi abpa' mo' pad macing ui muli' dengan do'."
- ²⁷Idi kebala Mikaya, "Kudeng iko muli' dengan do', kali' rungen na Tuhan nepebala negku." Idi teh kebalaneh, "Ninger O amung muyuh!"
- ²⁸Idi Akab raca' lun Israil idi Yosapat raca' lun Yahuda iné' ngerieng Ramot Giliad ineh.
- ²⁹Idi kebala Akab ni Yosapat, "Ui sikal ngisu' ayuku, idi amé' pebunu'. Iamo' do' iko ngayung ku ayung raca' teh." Idi raca' lun Israil nengelibal ayungneh idi iné' pebunu'.
- ³⁰Idi raca' bawang Siria ineh nemebpong amung lun rayeh kerétaneh, "Aleg muyuh pebunu' nelun baken, iamo' raca' lun Israil mo' sebuleng luk uen munu'."

³¹Kareb lun rayeh keréta ineh nenier Raca' Yosapat idi ideh nengerawé neneh raca' lun Israil. Idi ideh iné' pebunu' neneh. Iamo' Raca' Yosapat nengitang, idi Tuhan nengedengan neneh. Idi Allah nengelubed nedeh rat neneh.

³²Idi kareb lun rayeh keréta nenier baken ieh ineh raca' lun Israil, idi ideh neburo rat neneh.

³³Iamo' inan seburur nemayung busuneh dengan na inau' rungen, idi raca' lun Israil nekaneh su sulak kuyu' belawanneh. Idi raca' nepebala kuan lun luk ngimet kerétaneh, "Ngeliud keréta idi nated negku remuat rat arang bunu', ngaceku mebura' uratku."

³⁴Idi kareb ideh pebunu' teh, idi ideh nenganau' Akab pusad bang kerétaneh petutup dengan lun bawang Siria. Idi kareb aco macep idi raca' naté.

Inul Luk Kedueh 19

¹Yosapat raca' Yahuda nuli' dengan do' iné' déi' Yerusalim.

²Iamo' Nabi Yihu Hanani iné' papu' raca'. Idi kebalaneh nan Raca' Yosapat, "Ngudeh iko ngedengan lun luk dat idi méi' inan lun luk megateh inan Tuhan? Ngaceku ineh Tuhan museh namu.

³Iamo' inan luk do' rat namu, ngaceku iko pangeh nenala' amung ulung ineh rat bang bawang, idi pangeh nengeletep niatmu maya' pian Allah."

⁴Yosapat tudo déi' Yerusalim. Idi ieh nalan-nalan arang pupu ineh, rat Birsiba macing déi' pegkung-pegkung Epraim. Idi ieh nengelubed nedeh ineh amé' inan Tuhan Allah tepundeh ineh.

⁵Idi ieh nengikit lun luk mutut ukum bang bawang-bawang Yahuda luk meraben.

⁶Kebalaneh nedeh, "Ngerawé do'-do' kareb muyuh mutut ukum, pad muyuh mutut ineh pa kiung Allah idi baken pa kiung lemulun mo', pelé Tuhan idi dengan muyuh kareb muyuh mutut ukum ineh.

⁷Do' matot inan Tuhan idi ngerawé do'-do', ngaceku Tuhan Allah tau na pian ku saluk, idi ngadan idi suap pana'."

⁸Idi teh déi' Yerusalim Yosapat nengikit tuda'-tuda' lun Liwi idi imam, idi lun rayeh mangun ku lun luk mutut ukum bang besara' ratnan ngelaba ukum Tuhan, idi besara' arang lun bang bawang ineh.

⁹Kebala raca' nedeh, "Do' muyuh nganau' kekamen muyuh dengan matot inan Tuhan, dengan niat luk mesiri idi matu,

¹⁰ieh ineh bang amung besara' luk macing nemuyuh ratnan kinanak-kinanak muyuh luk tudo déi' bang bawangdeh, ratnan ngaté lemulun, ratnan ukum ratnan lawé idi bala, do' muyuh mada' nedeh ineh, pad ideh ineh na mesala' pa kiung Tuhan, pad useh Tuhan na macing nemuyuh idi kinanak-kinanak muyuh pana'. Do' muyuh nganau' kudeng ineh, pelé muyuh sebuleng pana' na mesala'.

¹¹Idi Amaria, Imam Rayeh, ieh ineh lun rayeh muyuh bang amung lawé Tuhan, idi Sebadia Ismail, lun luk ngimet Yahuda, bang amung lawé kekamen raca'. Idi lun Liwi miak matar pad amung ukum ineh bén muyuh. Do' muyuh mekuu' bang amung-amung luk ruen muyuh, idi Tuhan idi dengan lemulun tuk matu."

Inul Luk Kedueh 20

¹Muci ratnan ineh idi lun Moab idi lun Amon nacing dengan lun Mauni pana' sikal pebunu' nan Yahuda.

²Idi lun nemaré kali' ni Yosapat, kebaladeh, "Inan aceh baweh rayeh nacing rat bawang Siria, ieh ineh rat dipar Abpa' luk Mepaci', sikal pebunu' namu. Idi ideh pangeh nacing déi' Hasason Tamar." (Ieh ineh, Enggedi.)

³Yosapat matot, idi ieh nesembayang idi nenakap Tuhan. Idi ieh nengecuk lun apud bawang Yahuda mawa'.

⁴Idi rat amung bawang Yahuda ideh iné' Yerusalim sikal nakap Tuhan,

⁵idi ideh nepamung dengan lun Yerusalim déi' Ruma' Allah, ieh ineh luun natad luk mebaruh ineh. Idi Raca' Yosapat netuped pa atundeh.

⁶Kesembayangneh, "O Tuhan Allah tepun kai, Iko ineh luk ngimet déi' bang Surga. Idi teh Iko ngimet amung pupu. Iko ineh metueh idi melalud, pad seburur pana' nateh luk miak metueh rat Namu.

⁷Iko ineh Allah kai, Iko luk pangeh nengusu amung lun bang bawang ini rat pa kiung pupuMu lun Israil. Idi pangeh Iko nemaré bawang ini kuan inul Ibrahim luk rurumMu macing ruked-ruked.

⁸Idi ideh pangeh netudo bang bawang ini. Idi ideh pangeh nenganau' aceh Ruma' su luk inanMu buren, idi ideh nekali',

⁹kudeng anun-anun susa' macing nedeh, do' bunu', kaca, idi iru', idi ideh miak tuped pa atun Ruma' ini, su luk inandeh sembayang Namu. Idi ideh miak sembayang nawar Namu, bang susa'deh, pad Iko ninger idi ngulun nedeh.

¹⁰"Idi nekini lun Amon, lun Moab, idi lun Edom ngerieng nekai. Ideh ineh luk na biréMu labén lun Israil kareb ideh nacing rat bawang Masir, pad ideh neteketed rat nedeh, idi na ngaté nedeh.

¹¹Idi nekini ideh ngua' nekai dengan luk dat, idi pian ngusu nekai ratnan babpat luk pangeh biréMu kuan kai.

¹²Iko ineh Allah kai, do' Iko ngukum nedeh ineh. Ngaceku kai na inan tueh miak ngelaya' baweh luk mula' ineh luk pangeh nacing pebunu' nekai. Idi kai na kali' ann luk miak ruen kai, iamo' kai merapet Namu."

¹³Idi amung lun Yahuda netuped déi' luun natad Ruma' Allah dengan awan idi anak-anakdeh pana'.

¹⁴Idi bang teubupun ineh Roh Tuhan netemurun luun Yahasiel anak Sekaria, luk anak Benaya luk anak Yiel Matania, ieh ineh seburur lun Liwi luk ratnan inul Asap.

¹⁵Kebalaneh, "O lun Yahuda, lun Yerusalim, Raca' Yosapat: Kudeng ini bala Tuhan kuan muyuh, 'Aleg muyuh matot idi merapang ku baweh luk mula' ini. Ngaceku bunu' ini baken kuan muyuh, iamo' kuan Allah.

¹⁶Pekak nebpa do' muyuh amé' matun nedeh ineh, ngaceku ideh nalan uké rat ungeb Sis. Idi muyuh miak papu' nedeh ineh paped ruan pa busat aco su luk ali-ali déi' Yeruel.

¹⁷Idi sekua' ini na muyuh pebunu', iamo' do' muyuh tuped mo', idi muyuh miak nier pedengan ratnan Tuhan luk ngelaya' nedeh kuan muyuh. O lun Yahuda idi lun bawang Yerusalim, aleg muyuh matot idi merapang. Do' muyuh amé' matun nedeh ineh. Tuhan idi dengan muyuh.' “

¹⁸Idi Yosapat netekunal. Idi amung lun Yahuda idi amung lun bawang Yerusalim netekeradung pa kiung Tuhan, idi nengubur Neneh.

¹⁹Idi amung lun Liwi ratnan inul Kohat idi inul Kora netuped ngubur Tuhan Allah lun Israil dengan rayeh arod.

²⁰Idi pekak uka-uka ideh iné' Tekoa déi' su luk ali-ali. Idi laba'deh ineh nalan Yosapat netuped idi nepebala, "Ninger muyuh, O lun Yahuda idi lun bawang Yerusalim! Do' manu inan Tuhan Allah muyuh, idi muyuh miak uen ngeletep. Manu inan nabiNeh, idi muyuh miak metueh.”

²¹Idi kareb ieh pangeh nepegayam nelun mula' ineh, idi raca' nengeletep tuda'-tuda' lun luk mileh menani kuan Tuhan, pad ideh pekarur ngubur Neneh kareb ideh nenalan pa atun bunu', kenanideh, "Amung ubur kuan Tuhan, ngaceku awaNeh meruked peh!”

²²Idi laba'deh ineh menani ngubur Tuhan, idi Tuhan nengagap amung bunu'deh ineh,

²³pad lun Amon idi lun Moab nepebunu' nelun Edom, idi nengaté amung-amungdeh. Kareb ideh pangeh nengaté amung lun Edom ineh, idi ideh sebuleng pepaté.

²⁴Idi kareb lun Yahdua nacing su pudut luk medita' déi' su luk ali-ali, idi ideh nenier bal selipa lun mula' ineh, idi butung mo' petelubid luun tana'. Seburur pana' nateh luk mulun.

²⁵Idi kareb Yosapat nacing, dengan anak itinneh sikal ngaro binaweh rat nedeh, idi ideh nekali' mula' sapi', ayung, idi binaweh luk meraga, luk ilapdeh

kuan bururdeh sebuleng, tap itendeh. Teluh aco kinioneh ideh nengaro, ngaceku binawehdeh pelaba ula'.

²⁶Idi kareb aco luk keapat idi ideh nepamung déi' Ruan Beraka, idi déi' ideh nengubur Tuhan. Idi ngaceku ineh ideh neten ngadan su ineh Ruan Beraka macing aco sini.

²⁷Idi Yosapat nenguit bawehneh lemubed amé' Yerusalim dengan mawang niat, ngaceku Tuhan pangeh nengelaya' bunu'deh.

²⁸Idi ideh nacing déi' Yerusalim dengan giula', gita, idi serupit, idi iné' bang Ruma' Allah.

²⁹Idi aceh tot ratnan Tuhan nacing kuan amung pupu baken kareb ideh neninger ratnan lawé Tuhan pangeh nepebunu' inan amung bunu' lun Israil.

³⁰Idi imet Yosapat na inan susa' ngaceku Allah nemaré neneh pedo' dengan bunu'neh pekelibut bawangneh.

³¹Idi ulun Yosapat teluh ngepulu' limeh lak kareb ieh mangun ku raca' Yahuda. Idi ieh nengimet déi' Yerusalim dueh ngepulu' limeh lak kinioneh. Idi ngadan tinanneh Asuba Sili.

³²Idi ieh nemaya' lawé tamanneh Asa, idi ieh nenganau' luk matu pa kiung Tuhan.

³³Iamo' nateh amung su luk inan sembayang nan akang inusagneh. Ngaceku lun mula' ineh nateh nengeletep niatdeh inan Allah tepundeh ineh.

³⁴Amung kekamen Yosapat luk baken rat pun-pun idi macing kekiped, pangeh inayud bang Surat Kekamen Yihu Hanani, ieh ineh bang Surat Raca'-Raca' Lun Israil.

³⁵Muci ratnan bunu' ineh Yosapat raca' Yahuda neperurum ni Ahasia raca' Israil luk nenganau' kekamen luk dat.

³⁶Idi déi' Esion Geber didueh nemudut tuda'-tuda' kapal luk miak nalan amé' Tarsis.

³⁷Iamo' Elieser Dodawa rat Marisa ineh neperiteteng ni Yosapat kebalaneh, "Ngaceku iko pangeh neperurum ni Ahasia, idi Tuhan miak ngusag luk pangeh inau'mu ineh." Idi amung kapal ineh nekarem, kareb nateh nenalan amé' déi' Tarsis.

Inul Luk Kedueh 21

¹Idi Yosapat naté. Idi ieh tinanem bang tanem raca'-raca' déi' Bawang Daud, ieh ineh Yerusalim luk mon. Idi Yoram anakneh mangun ku raca' libalneh.

²Idi Yoram inan anem kinanak deléi, ieh ineh Asaria, Yehil, Sekaria, Asariahu, Mikail, idi Sepatia, amungdeh ini anak Yosapat raca' Israil.

³Idi tamandeh nemaré nedeh tuda'-tuda' baré, ieh ineh amas, pirak, idi binaweh luk meraga, idi teh tuda'-tuda' bawang luk meraben déi' bawang Yahuda. Iamo' imet raca' biréneh kuan Yoram, ngaceku ieh anakneh luk atun.

⁴Iamo' kareb Yoram pangeh lutep bang imet tamanneh, idi ieh nengaté amung kinanakneh, idi teh tuda'-tuda' lun rayeh lun Yahuda teh.

⁵Idi ulun Yoram kareb ieh mangun ku raca', teluh ngepulu' dueh lak, idi ieh nengimet déi' Yerusalim ualuh lak kinioneh.

⁶Idi ieh nemaya' kekamen raca'-raca' Israil, kudeng luk inau' amung lun bang tetek ruma' Akab, ngaceku ieh pangeh nengaweh anak Akab. Idi ieh nenganau' luk dat pa kiung Tuhan.

⁷Iamo' na Tuhan pian ngaté inul Daud, ngaceku pejani' luk pangeh inau'Neh ni Daud, ratnan Ieh maré inul kuanneh pad ideh ngimet macing raked-raked.

⁸Bang kareb imet Yoram ineh, idi lun Edom sikal mepuit ratnan imet lun Yahuda, pad ideh nengikit seburur mangun ku raca'deh.

⁹Yoram idi amung lun rayeh bawehneh nenalan dengan keréta bunu'deh, idi nengerieng Edom. Idi baweh Edom nengelibut nedeh, iamo' kareb medacem baweh Yahuda nepuit.

- ¹⁰Idi lun Edom nepuit rat bang imet lun Yahuda macing aco sini. Idi bang kareb ineh teh Libna nepuit ratnan imetneh, ngaceku Yoram pangeh nenecan Tuhan, Allah tepunneh,
- ¹¹Idi teh ieh nenganau' tuda'-tuda' su luk inan sembayang nan ada' luun surud-surud déi' Yahuda. Idi ieh nenguit nelun Yahuda idi lun Yerusalim nganau' sala' pa kiung Tuhan.
- ¹²Idi inan aceh surat ratnan Nabi Elia, kebalaneh, "Tuhan Allah tepunmu Daud ngukum namu, ngaceku na iko maya' lawé tamanmu Yosapat, idi lawé Asa raca' Yahuda.
- ¹³Iamo' iko pangeh nemaya' lawé raca'-raca' Israil, idi iko pangeh nenguit nelun Yahuda idi lun Yerusalim nganau' sala' pa kiung Allah, mepad kudeng luk inau' Akab idi inulneh pana'. Idi teh iko nengaté amung kinanakmu luk deléi luk meluun do' rat namu.
- ¹⁴Ngaceku ineh Tuhan miak ngukum pupumu, anakmu, idi awanmu, idi Ieh miak ngusag binawehmu pana'.
- ¹⁵Idi iko sebuleng pana' miak mekaneh ét luk mebura' bang tinéi' mu luk iuk-iuk amé' dat."
- ¹⁶Idi Tuhan pana' nengegio niat lun Pilistin idi lun Arab luk tudo uneng nelun Sudan, pad ideh nemunu' ni Yoram.
- ¹⁷Idi ideh nengerieng bawang Yahuda, idi nengaro ruma' raca' idi nenaban amung anak raca' idi awanneh pana', pad Ahasia anak deléi Yoram luk isuut mo' luk neketecan.
- ¹⁸Muci ratnan ineh, Tuhan nengedereh ni Yoram ku aceh ét bang tinéi'neh.
- ¹⁹Idi lélé meruked dueh lak ét ineh iuk-iuk mebura', pad ieh naté dengan pelaba dereh. Idi na lun mula' nenutud apui pad temido neneh, mepad kudeng luk inau'deh kuan tepunneh.
- ²⁰Idi ulunneh teluh ngepulu' dueh lak kareb ieh mangun ku raca'. Idi ieh ngimet déi' Yerusalim ualuh lak kinione. Idi ratnan aténeh na lun netemido

neneh. Idi ideh nenanem neneh bang bawang Daud, iamo' baken bang tanem raca'-raca'.

Inul Luk Kedueh 22

¹Idi ulun Yerusalim nengikit Ahasia mangun ku raca' libal tamanneh. Ngaceku amung anak Yoram luk baken pangeh pinaté aceh baweh Arab.

²Idi lun Ahasia kareb ieh mangun ku raca' ineh apat ngepulu' dueh lak. Idi ieh nengimet déi' Yerusalim selak kinioneh. Idi ngadan tinanneh ineh Atalia mupun Omri luk raca' Israil.

³Idi Ahasia nemaya' amung lawé lun bang tetek ruma' Akab, ngaceku tinanneh luk nemada' neneh bang amung kekamen luk dat.

⁴Idi ieh nenganau' luk dat pa kiung Tuhan, ngaceku pangeh até tamanneh, lun bang tetek ruma' Akab ineh mo' luk nemada' neneh, pad ieh pana' mesala'.

⁵Idi ieh nemaya' bada'deh ineh kareb ieh neperurum ni Yoram raca' Israil idi iné pebunu' ni Hasel raca' bawang Siria déi' Ramot Giliad. Idi lun Siria nengurat ni Yoram.

⁶Idi Yoram nelemubed iné' déi' Yesril, pad ngubat uratneh, idi Ahasia iné' ngikak neneh.

⁷Iamo' Allah nenima' ni Ahasia amé' matun Yoram, pad ieh miak ngaté ni Ahasia. Kareb ieh idi déi' idi ieh nemaya' ni Yoram sikal amé' matun Yihu Nimsi, luk pangeh pinili' Tuhan pad ieh ngaté amung inul Akab.

⁸Kareb Yihu ngacing ukum Allah kuan inul Akab, denak-denak ieh nepapu' amung lun rayeh Yahuda idi amung anak deléi kinanak-kinanak Ahasia luk nemaya' neneh bang ikakneh ineh. Idi ieh nengaté amungdeh.

⁹Idi ieh nenakap ni Ahasia, idi ideh nekali' neneh sigapung déi' Samaria. Idi ideh nenguit neneh amé' matun Yihu. Idi Yihu nengaté neneh. Idi ideh nenanem neneh, ngaceku kebaladeh, "Ieh ineh mupun Yosapat luk pangeh

nenakap Tuhan dengan amung niatneh." Idi seburur pana' nateh luk neketecan rat bang tetek ruma' Ahasia, luk miak ngimet ku libalneh.

¹⁰Kareb Atalia tinan Ahasia nekali' anakneh pangeh naté, idi ieh nengaté amung anak-inul raca'.

¹¹Iamo' Yosabat anak decur raca' luk awan Imam Yoyada nengalap ni Yuas anak Ahasia ineh, rat arang amung anak raca' luk pitayen ineh. Idi ieh nengapung neneh dengan decur luk ngasa' neneh bang aceh takep bang Ruma' Allah. Kudeng ineh lawé Yosabat muit neneh rat bang palad Atalia, pad ieh na pitayenneh.

¹²Idi ieh nesigapung bang Ruma' Allah anem lak kinioneh, laba' Atalia ngimet bawang Yahuda.

Inul Luk Kedueh 23

¹Pangeh anem lak Yoyada petap tueh nawar limeh burur lun rayeh baweh, ieh ineh Asaria Yeroham, Ismail Yohanan, Asaria Obed, Masia Adaya, idi Elisapat Sikri. Idi ieh nepegayam nedeh.

²Idi ideh iné' aput bawang Yahuda, idi nenguit amung lun Liwi idi amung lun rayeh tetek ruma' lun Israil, iné déi' Yerusalim.

³Idi amungdeh ineh pana' nepejani' bang Ruma' Allah dengan Yuas anak raca' ineh. Idi kebala Yoyada nedeh, "Nier muyuh, ini anak raca' di! Nekini ieh mangun ku raca', maya' kudeng bala Tuhan ratnan inul Raca' Daud ineh.

⁴Idi ini luk miak ruen tau. Do' sebabpet teluh amung muyuh imam idi lun Liwi luk uen ngelibal kareb Aco luk inan Mudeng nginita tanga',

⁵Idi sebabpat teluh teh nginita ruma' raca', idi sebabpat teluh teh nginita amung munung tanga'. Idi amung lun luk baken ineh miak nganét déi' luun natad Ruma' Allah.

⁶Iamo' aleg lemulun semuet bang Ruma' Allah, iamo' amung imam idi lun Liwi luk ngakem mo', ideh ineh miak semuet, ngaceku ideh meligan. Iamo' amung lun baken ineh do' nginita bala Tuhan.

⁷Idi amung lun Liwi miak tuped pekelibut raca', anid-aniddeh ngangat pelapetneh idi nginita raca' bang amung lawéneh. Idé-idé luk semuet bang Ruma' Allah miak pitayen.

⁸Idi lun Liwi idi lun Yahuda nemaya' kudeng luk bida' Imam Yoyada. Lemulun luk uen ngelibal kareb Aco luk inan Mudeng na icuk muli', pad ideh miak ngedengan nelun luk ngelibal nedeh ineh maya' ecuk lun rayeh-rayehdeh.

⁹Idi Yoyada nemaré kuan amung lun rayeh baweh, busu idi utap Raca' Daud luk dinug bang Ruma' Allah.

¹⁰Idi ieh nengelalad nelun luk nengangat pelapet luk nginita raca', pa tinueh busat aco Ruma' Allah, pelé nginita raca'.

¹¹Idi Yoyada nenated ni Yuas remuat. Idi ieh nengerareng pata luun uluhneh. Idi ieh nemaré neneh ukum Allah ineh, idi ideh neneten neneh raca'. Idi Imam Yoyada dengan anak-anakneh pana' nengumau ni Yuas, idi lun mula' nengitang, "Do' raca' mipu ulun."

¹²Kareb Atalia nekali' ria' lun mula' luk ngitang ngubur raca', idi ieh iné' Ruma' Allah su luk inan lun mula' nepamung.

¹³Idi ieh nenier raca' tuped muneng iring diri luk munung tanga' Ruma' Allah, luk su luk inan raca', idi amung lun rayeh baweh dengan lun luk ngiup serupit idi libut raca'. Lun mula' ngitang idi ngiup serupit dengan mawang niat. Idi teh lun luk menani nenguyut nedeh dengan amung luk muni. Idi Atalia nenarek ayungneh, idi nengitang, "Ieh ngaro imetku! Ieh ngaro imetku!"

¹⁴Yoyada nemebpeng nedeh na ngaté Atalia bang Ruma' Allah. Idi ieh nenguit neneh amé' matun lun rayeh baweh, kebalaneh, "Nguiit neneh remuat amé' arang uned baweh. Idi idé-idé luk pian muit neneh miak pitayen."

¹⁵Ideh nengakem neneh, idi ideh nenguit neneh amé' bang ruma' raca' maya' Tanga' Kuda. Idi ideh nengaté neneh su ineh.

¹⁶Idi Yoyada nenganau' aceh pejani' arangneh dengan lun mula' ineh idi dengan raca', pelé amungdeh ineh mangun ku pupu Tuhan.

¹⁷Idi ideh iné' ruma' Baal, idi nengusag ineh. Amung bubpun, idi akang pana' binila'deh. Idi ideh nengaté Matan imam Baal ineh pa atun bubpun-bubpun ineh.

¹⁸Yoyada nengelelep imam-imam idi lun Liwi nguyut kekamen bang Ruma' Allah, pelé ideh nganau' kekamen luk litep Raca' Daud kuandeh, idi pad ideh ngeseb luk barén kuan Tuhan, maya' kudeng ukum Musa. Idi ideh nenguit nelun menani dengan mawang niat.

¹⁹Idi teh Yoyada nengecuk nelun nginita amung tanga' Ruma' Allah, pelé seburur pana' luk melutak na miak semuet bang ineh.

²⁰Amung lun rayeh baweh, lun luk mebala, lun luk ngimet bawang, idi lun mula' pana' nepekarur maya' ni Yoyada nated raca' rat bang Ruma' Allah amé' ruma' raca'. Ideh nemaya' tanga' luk rayeh idi nenganau' Yuas tudo luun kerusi raca'.

²¹Idi amung lun bang bawang pana' mawang niat. Idi bawang ineh na inan ria', rat pangeh ideh nengaté ni Atalia.

Inul Luk Kedueh 24

¹Ulun Yuas kareb ieh mangun ku raca' tudu' lak. Idi ieh nengimet déi' bawang Yerusalim apat ngepulu' lak kinioneh. Idi ngadan tinan raca' ineh Sibia rat Birsiba.

²Idi Raca' Yuas nenganau' luk matu pa kiung Tuhan ruked ulun Imam Yoyada.

³Idi Yoyada nengalap kuanneh dueh awan Idi ieh inan anak deléi idi decur teh.

⁴Idi mucu ratnan ineh Yuas sikal ngedo' Ruma' Allah.

⁵Idi ieh nengamung amung imam idi lun Liwi. Kebalaneh nedeh, "Do' muyuh remuat amé' apud bawang Yahuda, idi nuduk usin rat nelun Israil ku nuneb

Ruma' Allah muyuh. Bang anid lak do' muyuh megéi' nganau' luk kudeng ini." Iamo' na lun Liwi petacu nenganau' kudeng ineh.

⁶Idi raca' nenawar ni Yoyada Imam Rayeh ineh, kebalaneh, "ngudeh iko na ngubuk nelun Liwi pad ideh nguit amé' tungé' rat bang bawang Yahuda idi Yerusalim amung uang pupuk luk icuk Musa, lun duken Tuhan, kuan sidang lun Israil ku Lepo su luk inan papu' Tuhan?"

(⁷Ngaceku amung anak deléi Atalia, decur luk dat ineh, pangeh nengaro Ruma' Allah idi pangeh nengalap binaweh luk meligan kuan Baal.)

⁸Idi raca' nengecuk nelun Liwi nganau' aceh pati' inan maré pupuk idi ngerareng ineh bal tanga' Ruma' Allah.

⁹Idi ideh nemaré bala apud bawang Yahuda idi Yerusalim, pad ideh nguit pupuk kuan Tuhan, ieh ineh luk pun-pun pimung Musa, lun duken Allah ineh, déi' su luk ali-ali.

¹⁰Idi amung lun rayeh idi lun mula' pana' mawang niat nguit pupuk ineh idi rirengdeh bang pati' ineh, pad pati' ineh panu'.

¹¹Idi kareb pati' ineh inuit lun Liwi amé' bang imet lun tareh raca', idi ideh nekali' mula' usin bang ineh, idi lun luk ngayud kuan raca' macing dengan seburur lun tareh Imam Rayeh ngalap usin ineh idi ngelubed pati' ineh amé' su luk inanneh atun. Kudeng ineh kekamendeh anid-anid aco pad ideh nengamung mula' usin.

¹²Idi usin ineh biré raca' idi Yoyada kuan amung lun luk ngakem ngedo' Ruma' Allah. Idi ideh nenabpar lun luk mileh mudut ruma' batu, tukang kayuh, idi lun luk mileh ku belawan idi tekaling, pad ideh ngedo' Rumah Allah ineh teh.

¹³Amungdeh ineh mekéi' ngakem. Idi Ruma' Allah dino'deh, pad ieh meraben mepad kudeng luk atun.

¹⁴Kareb kekamen ineh pangeh, idi ela amas idi pirak ineh birédeh kuan raca' idi Yoyada ku nganau' bigan idi tuda'-tuda' repapeh kuan Ruma' Allah. Idi ideh megéi' maré baré luk sabpen bang Ruma' Allah ruked ulun Yoyada.

- ¹⁵Idi Yoyada pelaba ngered kareb ieh naté, ulunneh meratu teluh ngepulu' lak.
- ¹⁶Idi ieh tinanem bang tanem raca'-raca' bang bawang Daud, ieh ineh Yerusalim luk mon. Ngaceku ieh pangeh nenganau' luk do' arang lun Israil, idi teh pa kiung Allah idi kuan Ruma'Neh.
- ¹⁷Idi maci ratnan até Yoyada amung lun rayeh Yahuda nengubuk raca' pad ieh neninger baladeh ineh.
- ¹⁸Idi ideh nenecan Ruma' Tuhan Allah tepundeh, idi nesembayang inan ulung, idi akangdeh, pad Yahuda idi Yerusalim inukum ngaceku sala'deh ineh.
- ¹⁹Iamo' Tuhan nengecuk tuda'-tuda' nabi amé' mada' nedeh ineh, pelé ideh lumi inan Tuhan. Iamo' na ideh neninger bala nabi ineh.
- ²⁰Idi Roh Allah netemurun pa luun Sekaria anak Yoyada imam ineh. Ieh tuped pa atun lun mula' idi nengitang, kebalaneh nedeh, "Kudeng ini bala Allah, 'Ngudehke' muyuh ngelaba ukum Tuhan, pad ngacing susa' kuan burur muyuh sebuleng? Ieh nenecan nemuyuh ngaceku muyuh pangeh nenecan Neneh.' "
- ²¹Idi ideh neperurum sikal ngaté ni Sekaria; idi ideh nemitung neneh ku batu maya' bala raca', déi' natad Ruma' Allah.
- ²²Kudeng ineh lawé Raca' Yuas na ngerawé kekamen luk do' luk pangeh inau' Yoyada taman Sekaria kuanneh, iamo' raca' nengaté anakneh. Idi kareb aténeh, kebala Sekaria, "Idi Tuhan mo' nier kekamenmu idi Ieh miak ngua'!"
- ²³Idi udung lak, baweh lun Siria nengerieng bawang Yahuda idi Yerusalim; idi ideh nengaté amung lun luk nguyut idi nenaban mula' binaweh amé' Damsik.
- ²⁴Sagan tu pana' pawa' baweh lun Siria, idi Tuhan nemaré bang paladdeh baweh Yahuda luk meluun ula', ngaceku ideh ineh pangeh nenecan Tuhan Allah tepundeh. Idi kudeng ineh lawédéh nengacing ukum kuan Yuas.

²⁵Kareb baweh Siria ineh nepatad rat ni Yuas, idi ieh pelaba bura' urat. Idi dueh burur lun tarehneh nepakat sikal ngaté neneh, ngaceku até anak Imam Yoyada ineh. Idi ideh nengaté neneh su luk inanneh rudap. Idi ieh tinanem bang bawang Daud, ieh ineh Yerusalim luk mon. Iamo' na ieh tinanem bang tanem raca'.

²⁶Idi lun luk neperurum sikal ngaté neneh, ieh ineh Sabad anak Simiat, seburur decur Amon, idi Yosabad anak Simrit seburur decur lun Moab.

²⁷Idi bala rat ni Yuas idi anak-anakneh, ratnan kudeng apeh ieh nengedo' Ruma' Allah, pangeh inayud bang Surat ekamen Raca'-Raca'. Idi Amasia anakneh mangun ku raca libalneh.

Inul Luk Kedueh 25

¹Idi ulun Amasia kareb ieh mangun ku raca' dueh ngepulu' limeh lak. Idi ieh nengimet déi' Yerusalim dueh ngepulu' iwa' lak kinioneh. Idi ngadan tinan raca' ineh Yoadin rat Yerusalim.

²Idi ieh nenganau' luk matu pa kiung Tuhan, iamo' baken dengan niat luk mesiri.

³Kareb imetneh litep, idi ieh nengaté lun tarehneh luk pangeh nengaté tamanneh.

⁴Iamo' na ieh nengaté anak-anakdeh ineh. Iamo' ieh nemaya' luk icuk Tuhan bang ukum Musa, "Idi tamandeh na miak pitayen ngaceku anakdeh, idi anak pana' na miak pitayen ngaceku tamandeh. Iamo' anid-anid burur miak pitayen ngaceku sala'deh sebuleng."

⁵Idi Amasia nengamung amung lun Yahuda idi lun Benjamin. Idi ieh nemabpat nedeh maya' inuldeh. Idi ieh nengeletap tuda'-tuda' burur lun rayeh pa luun luk meribu, idi pa luun lun luk meratu. Idi ieh nengiap nedeh ineh, ieh ineh lemulun luk dueh ngepulu' lak ulun idi mela. Idi ieh nekali' ula'deh ineh 300,000 burur lun luk pinili' luk mileh pebunu' idi ngimet busu idi utap.

⁶Idi teh ieh nenabpar 100,000 burur lun Israil luk mesangit ku 100 balad pirak.

⁷Iamo' seburur nabi Allah iné' matun raca', kebalaneh, "O raca', aleg iko maré baweh lun Israil ineh nalan maya' namu, ngaceku Tuhan na idi dengan lun Israil, ieh ineh amung inul Epraim ineh.

⁸Iamo' kudeng iko ngalap lemulun ineh ku rurummu bang bunu', kali' rungen Allah ngelaya' namu kareb pebunu'. Ngaceku Allah inan lalud ngedengan idi ngelaya'."

⁹Idi kebala Amasia inan nabi Allah ineh, "Iamo' anun miak mangun ratnan 100 balad pirak luk pangeh biréku kuan baweh lun Israil ineh?" Idi kebala nabi Allah ineh, "Tuhan miak maré meluun ratnan ineh kuanmu."

¹⁰Idi Amasia nengecuk baweh luk nacing neneh rat Epraim muli'. Idi ideh megateh niat nelun Yahuda. Idi ideh nuli'.

¹¹Idi Amasia amé'-amé' mekuu' idi ieh nenguyut bawehneh amé' déi' Ruan Tucu', idi ideh nengaté 10,000 burur lun Edom.

¹²Idi lun Yahuda nengakem 10,000 burur lun Edom luk inuitdeh iné' luun aceh buduk batu. Idi ideh nemepet nedeh rat luun buduk batu ineh, pad ideh naté.

¹³Iamo' amung lun Israil luk pangeh icuk Amasia lemubed ineh, pelé ideh na maya' neneh amé' pebunu', ideh nemunu' tuda'-tuda' bawang Yahuda, rat Samaria macing déi' Bait Horon, idi ideh nengaté 3,000 burur. Idi ideh nenaban mula' binaweh.

¹⁴Idi kareb Amasia pangeh nuli' rat nengelaya' nelun bawang Edom ineh, idi ieh nenguit tuda'-tuda' akang lun Edom ineh. Idi ieh nengerareng akang ineh idi nesembayang nedeh, pad ieh maré luk sabpen kuandeh.

¹⁵Ngaceku ineh Tuhan museh ni Amasia. Idi Ieh nengecuk seburur nabi amé' neneh. Kebala nabi ineh, "Ngudeh iko pangeh nenakap akang pupu baken ineh luk na iak muit pupudeh sebuleng rat bang paladmu?"

¹⁶Iamo' laba' lun ineh pebala-pebala neneh, idi raca' nepebala, "Pangehké iko kinikit mangun ku lun pegayam inan raca'? Pirud iko pad iko na pitayenku!" Idi nabi ineh pirud. Iamo' kebalaneh teh, "Nekini ui kali' idi Allah pangeh

nengelelep niatNeh sikal ngaté namu, ngaceku iko nenganau' kudeng ini, idi teh ngaceku iko na ninger balaku.”

¹⁷Idi Amasia raca' Yahuda nepegayam. Idi ieh nengecuk nelun amé' matun Yoas raca' Israil, ieh ineh anak Yuahas Yihu, kebalaneh, "Do' kiteh pebunu'.”

¹⁸Iamo' Yoas nengecuk nelun duken amé' pebala ni Amasia, "Aceh lawa tabpa' luk luun Pegkung Lebanon ineh nemutih kayuh tumuh luk luun Lebanon ineh teh, keputuhneh, 'Maré anakmu luk decur ku awan anakku luk deléi.' Iamo' kareb ineh inan aceh pung luk meliputi luun Lebanon ineh nelemaba idi nengeradu' lawa tabpa' ineh.

¹⁹O Amasia, iko medita' niat ngaceku iko nengelaya' nelun Edom! Iamo' do' iko tudo déi' ruma'. Ngudeh iko nganau' luk inan meria' kudeng ineh, pad iko idi lun Yahuda pana' mesusa'?”

²⁰Iamo' Amasia na sikal ninger, ngaceku pian Allah maré neneh bang paladdeh ineh, ngaceku ieh pangeh nesembayang nan akang lun Edom.

²¹Idi Yoas raca' lun Israil idi Amasia raca' Yahuda nepebunu'. Didueh nepapu' déi' Bait Semes luk déi' tana' Yahuda ineh.

²²Idi baweh Yahuda pana' linaya'. Idi ideh neburo nuli'.

²³Idi Yoas nenaban ni Amasia. Idi ideh nenguit neneh iné' déi' Yerusalim. Idi ideh nengusag libung bawang Yerusalim rat Tanga' Epraim macing Tanga' Lidung, ieh ineh 100 depeh kadangneh.

²⁴Idi teh ieh nengalap amung amas idi pirak, idi amung binaweh luk bang Ruma' Allah luk isa' inul Obed Edom, idi amung binaweh luk meraga bang ruma' raca', idi teh tuda'-tuda' lun luk tiban, idi ieh nuli' iné' Samaria.

²⁵Idi mucu ratnan até Yoas, raca' Israil, idi Amasia raca' Yahuda mulun pulu' limeh lak kinioneh.

²⁶Idi amung kekamen Amasia luk baken luk pun-pun, macing kekiped, pangeh inayud bang Surat Raca'-Raca' Yahuda idi Israil.

²⁷Rat kareb Amasia nelemubed ratnan Tuhan, idi lun Yerusalim neperurum sikal ngaté neneh. Idi ieh neburo iné' déi' Lakis, idi ideh nengecuk nelun ngerada' neneh macing déi' Lakis. Idi ideh nengaté neneh déi'.

²⁸Idi ideh nenguit butungneh maya' kuda, idi ieh tinanem bang tanem raca'-raca' bang bawang Daud, ieh ineh Yerusalim luk mon.

Inul Luk Kedueh 26

¹Idi lun Yahuda nengalap Usia, luk ulun pulu' anem lak, mangun ku raca' libal Amasia tamanneh.

²Pangeh até Amasia, idi Usia nengalap bawang Elat ineh lemubed. Idi ieh nemudut ineh baruh kareb raca'deh pangeh naté.

³Idi ulun Usia kareb ieh mangun ku raca' pulu' anem lak. Ieh nengimet déi' Yerusalim limeh ngepulu' dueh lak kinioneh. Idi ngadan tinanneh Yekolia rat Yerusalim.

⁴Idi ieh nenganau' luk do' pa kiung Tuhan maya' kudeng luk kikem tamanneh.

⁵Idi ieh metueh nakap Allah ruked ulun Sekaria luk nemada' neneh ratnan matot inan Allah. Idi seruked ieh nakap Tuhan, Allah pana' nengeperuan neneh.

⁶Usia iné' pebunu' nelun Pilistin. Idi ieh nengusag libung bawang Gat, Yamnia, idi Asdod. Idi ieh nemudut tuda'-tuda' bawang rayeh déi' Asdod idi iléi ratnan bawang lun Pilistin ineh.

⁷Allah nengedengan neneh pebunu' nelun Pilistin idi lun Arab luk tudo déi' Gurabal, idi teh lun Mauni.

⁸Idi lun Amon nemaré pupuk teh kuan Raca' Usia. Idi ngadan raca' pana' mebala macing déi' bawang Masir. Ngaceku lalud raca' iuk-iuk amé' rayeh.

⁹Idi teh Usia nemudut tuda'-tuda' pudut luk medita' déi' Yerusalim, déi' Tanga' Lidung idi déi' Tanga' Ruan, idi bang lidung teh.

¹⁰Idi teh ieh nemudut tuda'-tuda' pudut luk medita' déi' su luk ali-ali. Idi ieh nengukat subuk luk rayeh. Ngaceku ieh mula' aya', do' luun raked, idi luun

surud pana', idi tuda'-tuda' lun amé' lati', idi lun ngasa' anggur luun surud idi luun tana' luk mebaleng, ngaceku ieh sikal tebawang.

¹¹Usia inan aceh baweh lun luk pekalai bang bunu' luk amé' pebunu' dengan babpat-babpatdeh maya' kinula'deh luk pangeh iniap Yiel lun luk ngayud ineh, idi Masia lun tareh Hanania, seburur lun rayeh baweh raca'.

¹²Idi teh kinula' amung lun rayeh luk metueh idi mesangit, ieh ineh 2,600 burur.

¹³Idi pa liang imetdeh ineh inan aceh baweh, 307,500 burur luk mesangit, luk ngedengan raca' bang bunu'.

¹⁴Idi Usia nemaré kuan amung baweh: utap, busu, tupi, kuyu' belawan, binor, ileb, idi batu luk uen ngiber.

¹⁵Idi raca' nengecuk nelun luk mileh nganau' déi' Yerusalim tuda'-tuda' igin, luk rireng luun amung pudut luk medita' idi lidung, miak inan mayung ileb idi mepet batu luk rayeh. Idi ngadan raca' mebala macing iapeh-iapeh, ngaceku raca' dinengan Tuhan pad macing ieh metueh.

¹⁶Iamo' kareb Raca' Usia metueh, idi ieh iuk medita' niat, pad ieh mesala' pa kiung Allah, idi ieh nesemuet bang Ruma' Allah sikal ngeseb umau luk do' buen luun bubpun ineh.

¹⁷Iamo' Imam Asaria nemaya' neneh, dengan ualuh ngepulu' burur lun imam lu mekuu' idi metueh.

¹⁸Idi ideh nemebpeng Raca' Usia, kebaladeh neneh, "O Usia na iko miak ngeseb umau luk do' buen kuan Tuhan, iamo' amung imam, luk inul Arun mo' luk pangeh linigan miak ngeseb umau ineh. Remuat iko rat bang su luk meligan ini, ngaceku iko pangeh nenganau' sala pa kiung Tuhan Allah pad na Ieh ngerayeh namu teh."

¹⁹Idi Usia tured bang Ruma' Allah ineh iring bubpun luk inan ngeseb umau luk do' buen, idi ieh nengimet umau luk sabpen ineh bang aceh bigan. Idi ieh museh inan amung imam ineh, idi denak-denak susud nulun luun madu'neh.

²⁰Idi Asaria luk Imam Rayeh, idi imam luk baken teh nenutong neneh. Idi ideh nengecuk neneh buro rat bang Ruma' Allah. Idi ieh neburo peh, ngaceku Allah pangeh nengukum neneh.

²¹Idi ruked ulunneh Raca' Usia melutak pa kiung Tuhan ngaceku ét susudneh ineh. Ieh tudo bang ruma' setau', ngaceku ieh na miak semuet bang Ruma' Allah baruh. Idi anakneh Yotam nengimet nelun bang tetek ruma' raca', idi teh ieh nengimet amung lun luk bang bawang ineh.

²²Amung kekamen Usia luk baken luk pun-pun macing kekiped, pangeh inayud Nabi Yesaya Amos.

²³Idi Usia naté. Idi ieh tinanem bang lengutan raca'-raca', iamo' baken bang tanem raca', ngaceku ét susudneh ineh, idi anakneh Yotam mangun ku raca' libalneh.

Inul Luk Kedueh 27

¹Ulun Yotam kareb ieh mangun ku raca' dueh ngepulu' limeh lak. Idi ieh nengimet déi' Yerusalim pulu' anem lak kinioneh. Idi ngadan tinan raca' ineh Yerusa Saduk.

²Idi ieh nenganau' luk do' pa kiung Tuhan maya' amung kekamen tamanneh Usia — Iamo' na ieh nesemuet bang Ruma' Allah. Iamo' lun mula' na ugka' nganau' luk dat.

³Idi Yotam nemudut Tanga' luk Medita' bang Ruma' Allah, idi nengeraben libung Opel déi' Yerusalim dengan mula' kekamen.

⁴Idi teh ieh nemudut tuda'-tuda' bawang luun pegkung-pegkung Yahuda, idi luun pulung pana' ieh nenganau' tuda'-tuda' ruma' luk medita'.

⁵Idi ieh nengelaya' Raca' Amon bang bunu' ineh, pad bang lak ineh lun Amon nemaré inan raca' 100 balad pirak idi 400,000 gatang padé, idi 400,000 gatang ikun. Idi kinula' ineh luk biré lun Amon kuan Raca' Yotam bang lak luk kedueh, idi bang lak luk keteluh pana'.

⁶Idi Yotam iuk-iuk metueh, ngaceku ieh lutep maya' ukum Tuhan Allahneh.

⁷Idi amung kekamen Yotam luk baken, idi amung bunu'neh, idi amung lawéneh, pangeh inayud bang Surat Raca'-Raca' Israil idi Yahuda.

⁸Idi ulun Yotam kareb ieh mangun ku raca' dueh ngepulu' limeh lak. Idi ieh nengimet déi' Yerusalim pulu' anem lak kinioneh.

⁹Idi ieh naté. Idi ieh tinanem bang Bawang Daud, ieh ineh Yerusalim luk mon. Idi Akas anakneh mangun ku raca' libalneh.

Inul Luk Kedueh 28

¹Ulun Akas kareb ieh mangun ku raca' dueh ngepulu' lak. Idi ieh nengimet déi' Yerusalim pulu' anem lak kinioneh. Idi na ieh nenganau' luk matu pa kiung Tuhan mepad kudeng tepunneh Daud.

²Idi ieh nemaya' amung lawé raca'-raca' Israil Idi teh ieh nengurai tuda'-tuda' akang kuan Baal.

³Idi ieh nengeseb umau luk do' buen déi' Ruan Anak Hinom. Idi ieh nengeseb anak-anak deléineh mangun ku baré, maya' kekamen luk dat luk pangeh inau' amung pupu baken luk pangeh inusu Tuhan ratnan babpatdeh pa kiung lun Israil.

⁴Idi teh ieh nemaré baré idi nengeseb umau luk do' buen luun amung su luk inan sembayang nan akang, idi surud, idi liang amung lawa kayuh.

⁵Ngaceku ineh Tuhan Allah nemaré neneh bang palad raca' Siria. Idi raca' Siria nengelaya' neneh idi nenaban tuda'-tuda' anak itinneh luk inuitneh amé' bawang Damsik. Idi teh Akas biré bang palad raca' Israil luk nengaté mula' lemulun.

⁶Ngaceku Peka Remalia nengaté bang bawang Yahuda 120,000 burur bang seaco mo', amungdeh lun luk mesangit, ngaceku ideh pangeh nenecan Tuhan Allah tepunde.

⁷Idi Sikri seburur lun luk metueh rat Epraim nengaté Masia anak raca' idi Asrikam luk lun rayeh ruma' raca' idi teh Elkana tareh raca'neh.

⁸Idi lun Israil nenaban 200,000 ratnan kinanakdeh, ieh ineh decur idi anak pana'. Idi teh ideh nengaro mula' binaweh rat nedeh, inuitdeh iné' bawang Samaria.

⁹Iamo' inan seburur Nabi Tuhan déi' Samaria, ngadanneh Oded. Idi ieh iné' papu', baweh luk nacing déi' Samaria, kebalaneh nedeh, "Idi ngaceku Tuhan Allah tepun muyuh museh nelun Yahuda, Ieh, nemaré nedeh bang palad muyuh. Iamo' muyuh nengaté nedeh ineh dengan pelaba gateh niat.

¹⁰Idi nekini muyuh pian ngebeneh inul Yahuda idi lun bang bawang Yerusalim mangun ku demulun muyuh. Idi muyuh pana' inan sala' pa kiung Tuhan Allah muyuh.

¹¹Do' muyuh ninger balaku, idi ngelubed amung lun luk pangeh tiban muyuh ratnan kinanak muyuh ineh. Ngaceku Allah museh nemuyuh."

¹²Idi apat burur lun rayeh rat nelun Epraim, ieh ineh Asaria Yohanan, Bereki Mesilemot, Yehiskia Salum, idi Amasa Hadlai iné' matun amung lun luk nacing ratnan bunu' ineh.

¹³Idi kebaladeh nedeh, "Aleg muyuh nguit amé' tungé' lun luk tiban ineh, ngaceku ineh mangun ku sala' tau pa kung Tuhan, pad sala' idi dat tau pelaba ula'. Idi nekini pana' Tuhan museh nelun Israil ngaceku sala' tau."

¹⁴Idi amung lun baweh nemaré nelun luk tiban ineh dengan binaweh luk inaro lun Israil bang palad amung lun rayeh idi lun mula' pana'.

¹⁵Idi ideh luk apat burur ineh icuk maré ayung kuan lun luk tiban ratnan ayung luk inaro ineh. Idi teh ideh nemaré kasut nedeh, dengan luk rupen idi luk kenen teh. Idi ideh nengubat uratdeh. Idi lun luk melaya' inuitdeh maya' keladai. Idi ideh nenated amungdeh luk tiban ineh iné' Yeriko, bawang piasau su luk inan kinanakdeh. Pangeh ineh idi lun Israil nuli' iné' Samaria.

¹⁶Idi kareb ineh Raca' Akas nengecuk raca' Asur ngedengan neneh.

¹⁷Ngaceku lun Edom pangeh nengerieng nelun Yahuda, pad mula' lemulun tibandeh.

¹⁸Kareb ineh teh lun Pilistin nengaro bawang-bawang luk déi' luun raked idi Negeb luk déi' bawang Yahuda. Ideh nengelaya' Bait Semes, Aijalon, Gederot, idi Soko, Timna, idi Gimso dengan amung babpatdeh. Idi lun Pilistin netebawang déi'.

¹⁹Tuhan nengesusu' nelun Yahuda ngaceku Akas raca' Yahuda pangeh nengubuk nedeh pad sala'deh rayeh pa kiung Tuhan.

²⁰Ngaceku ineh Tiglat Piliser raca' Asur, na nengetueh neneh. Iamo' ieh iné' ngedereh neneh.

²¹Sagan pana' Akas pangeh nengalap amung binaweh rat bang Ruma' Allah, ruma' raca', idi ruma' lun rayeh-rayeh, pad maré ineh kuan raca' Asur, nateh raca' Asur nengedengan neneh.

²²Kareb susa' Akas pelaba rayeh, idi ieh nenganau' sala' luk meluun dat pa kiung Tuhan.

²³Ieh nemaré baré kuan amung akang lun Damsik luk pangeh nengelaya' neneh, kebalaneh, "Akang raca'-raca' Siria pangeh nengedengan nedeh ineh, idi ui pana' maré baré kuandeh pelé ideh ngedengan negku." Iamo' ideh ineh ngacing susa' kuanneh idi kuan amung anak itinneh.

²⁴Idi Akas nengamung idi nemila' amung repapeh bang Ruma' Allah. Idi ieh nengitek amung tanga'neh. Idi ieh nenganau' tuda'-tuda' bubpun anid-anid lidung bawang Yerusalim.

²⁵Idi teh ieh nenganau' su luk inan sembayang nan akang bang anid-anid bawang Yahuda, pad ngeseb umau luk do' buen kuan amung akang ineh. Ngaceku ineh Tuhan Allah tepunneh, museh neneh.

²⁶Idi amung kekamen idi lawéneh luk baken, luk pun-pun macing kekiped pangeh inayud bang Surat Raca'-Raca' lun Yahuda idi lun Israil.

²⁷Idi Akas naté. Idi ieh tinanem déi' bang bawang Yerusalim, iamo' baken bang tanem raca'-raca' Israil. Idi anakneh Hesehia mangun ku raca' libalneh.

Inul Luk Kedueh 29

¹Idi ulun Hesehia kareb ieh mangun ku raca' dueh ngepulu' limeh lak. Idi ieh nengimet déi' bawang Yerusalim dueh ngepulu' jiwa lak kinioneh. Idi ngadan tinanneh Abia Sekaria.

²Idi ieh nenganau' luk matu pa kiung Tuhan maya' amung kekamen tepunneh Daud.

³Idi bang lak luk pun Hesehia nengimet, bang bulan luk pun, ieh nengukab amung tanga' Ruma' Allah, idi ieh nengedo' amung ineh.

⁴Idi ieh nengamung amung imam, idi lun Liwi i natad Ruma' Allah pa busat aco.

⁵Kebalaneh nedeh, "Ninger muyuh balaku O lun Liwi! Ngeligan burur muyuh idi ngeligan Ruma' Tuhan Allah tepun muyuh. Idi ngeruat amung luk melutak rat bang Ruma' Allah.

⁶Ngaceku rayeh sala' tepun tau. Pangeh ideh nenganau' luk dat pa kiung Tuhan Allah tau. Idi teh ideh nenecan Allah, idi nelumi ratnan su luk inan Tuhan mudeng.

⁷Idi teh ideh nengitek amung tanga' Ruma' Allah, idi ideh nengilep amung lapung. Idi na ideh nengeseb umau luk do' buen. Idi na ideh nemaré baré luk sabpen kuan Allah lun Israil bang Ruma'Neh ineh.

⁸Ngaceku ineh Tuhan museh nelun Yahuda idi amung lun bang bawang Yerusalim, pad Ieh nenganau' nedeh aceh luk inan megani', idi luk inan mawa, idi luk inan situnga, mepad kudeng luk siren mateh muyuh sebuleng.

⁹Taman-taman tau pangeh pinaté bang bunu', idi anak-anak deléi tau idi decur pana' idi amung awan tau teh pangeh tiban.

¹⁰"Idi nekini inan terawéku sikal nganau' aceh pejani' dengan Tuhan Allah lun Israil, pelé Ieh na museh netau.

¹¹Idi nekini O anak-anakku, do' muyuh megéi', ngaceku muyuh pangeh pinili' Tuhan pad ngeseb umau luk do' buen kuanNeh, idi nguyut nelun mula' sembayang Neneh."

12-14¹Lun Liwi Ini Luk Nepamung Déi': Rat inul Kohat, Mahat Amasai idi Yoes Aseria Rat inul Merari, Kisi Abdi idi Asaria Yehalel Rat inul Gerson, Yua Sima idi Eden Soa Rat inul Elisapan, Simri idi Yuel Rat inul Asap, Sekaria idi Matania Rat inul Heman, Yehuel idi Simi Rat inul Yedutun, Semaya idi Usiel

15¹Idi ideh nengamung kinanak-kinanakdeh. Idi ideh nengeligan bururdeh, idi nesemuet bang Ruma' Allah sikal ngeligan ineh maya' bala raca' luk bila Tuhan neneh.

16¹Idi imam-imam nesemuet bang Ruma' Allah pian ngeligan ineh. Idi ideh nenguit remuat amung luk melutak luk nekali' deh bang Ruma' Allah iné' luun natad. Idi rat ieneh lun Liwi nenguit amung ineh iné' Arur Kidron.

17¹Idi ideh nengimun ngakem aceh aco bulan aceh, idi sekewaluh aco bulan ineh ideh nesemuet bang Ruma' Allah. Idi ideh nengeligan Ruma' Allah ualuh aco kinioneh. Idi pulu' anem aco bulan aceh ideh nemangeh kekamen ineh.

18¹Pangeh ineh idi ideh iné' papu' ni Raca' Hesehia, kebaladeh, "Amung Ruma' Allah pangeh linigan kai, kudeng ineh teh bubpun luk inan ngeseb idi amung repapehneh idi méja luk inan ruti ubur dengan amung repapehneh.

19¹Idi teh amung repapeh luk pangeh tila' Raca' Akas kareb ieh na lutep maya' Tuhan, ineh pangeh linigan kai idi amung ineh idi pa atun bubpun Tuhan."

20¹Raca' Hesehia nekulat pekak uka-uka. Idi ieh nengamung amung lun rayeh bawang, idi ideh iné' Ruma' Allah.

21¹Idi ideh nenguit tudu' sapi' deléi, tudu' dumba deléi, tudu' anak dumba, idi tudu' amék deléi, barén ngaceku sala' tetek ruma' raca' idi lun Yahuda idi pad ngeligan Ruma' Allah. Idi raca' nengecuk inul Arun, ieh ineh amung imam maré amung pung ineh luun bubpun Tuhan.

22¹Idi ideh nengeret amung sapi' atun. Pangeh ineh ideh nengeret dumba idi anak dumba teh, idi dara' ineh pana' ilap amung imam idi inisakdeh luun bubpun ineh.

23¹Pangeh ineh amung amék deléi ineh inuitdeh amé' pa kiung raca' idi lun mula' pana'. Idi ideh nengerareng ticu'deh luundeh.

²⁴Idi amék ineh kirat amung imam, pad dara'deh mangun ku baré ngaceku sala' luun bubpun ineh, idi teh mangun ku luk nguit pedo' kuan amung lun Israil. Ngaceku kebala raca', do' maré baré luk sabpen idi baré ngaceku sala' ineh, kuan amung lun Israil.

²⁵Idi raca' nengecuk nelun Liwi tuped bang Ruma' Allah dengan karing, giula', idi gita, maya' kudeng ecuk Daud idi Gad, luk nabi raca', idi Nabi Natan. Ngaceku bala ini nacing ratnan Tuhan dengan tang nabi-nabiNeh.

²⁶Idi tuped dengan luk muni-muni luk inau' Daud, idi amung imam pana' dengan serupitdeh.

²⁷Idi Heskia nengecuk nelun maré baré luk sabpen luun bubpun ineh. Idi kareb ideh nengimun maré baré luk sabpen ineh, idi ideh menani teh kuan Tuhan dengan amung uni serupit idi peranga' dengan amung luk muni-muni luk inau' Daud, raca' lun Israil.

²⁸Laba' ideh menani idi ngiup serupit lun mula' nesembayang pad baré luk sabpendeh ineh mabud.

²⁹Pangeh ineh raca' idi amung lun danganneh netekeradung sembayang.

³⁰Raca' Heskia idi amung lun rayeh pana' nengecuk nelun Liwi ngubur-ngubur Tuhan maya' bala Daud idi Nabi Asap ineh. Idi ideh menani ngubur Tuhan dengan mawang niat. Idi ideh netekeradung sembayang.

³¹Kebala Heskia, "Nekini muyuh pangeh linigan. Amé' muyuh nguit amung baré luk kereten idi baré ubur bang Ruma' Allah." Ideh nemaya' balaneh. Idi lun luk meran niat nenguit baré luk sabpen pana'.

³²Idi kinula' amung baré luk sabpen luk inuit lun mula' ineh, ieh ineh 70 sapi' deléi, 100 dumba deléi, idi 200 anak dumba. Amung ini ku baré sabpen kuan Tuhan.

³³Idi baré luk linigan ineh 600 sapi' deléi, idi 3,000 dumba.

³⁴Iamo' imam-imam na petap ula'. Ngaceku ineh lun Liwi nengedengan nedeh pad kekamen ineh nepangeh, idi pad amung imam luk baken ineh pana'

pangeh nengeligan bururdeh. (Ngaceku lun Liwi meluun ngerawé ratnan ngeligan bururdeh rat nelun imam.)

³⁵Inan mula' baré luk sabpen, dengan lemak ratnan baré luk nguit pedo', idi amung baré luk inutang luk petulu. Kudeng ineh lawéneh kekamen bang Ruma' Allah nengimun baruh.

³⁶Hesekia idi amung lun mula' pana' mawang niat, ngaceku Allah nengedengan nedeh, pad kekamendeh ineh mangun dengan mesaget.

Inul Luk Kedueh 30

¹Hesekia nengecuk amung lun Israil idi lun Yahuda, idi teh ieh nemaré surat kuan lun Epraim idi Manasé, pelé amungdeh ineh amé' bang Ruma' Allah déi' Yerusalim, pad nganau' Irau Paska kuan Tuhan Allah lun Israil.

²Ngaceku raca' pangéh nepegayam dengan amung lun rayehneh, idi amung lun mula' luk déi' Yerusalim sikal nganau' Irau Paska ineh bang bulan luk kedueh.

³Na ideh miak ngimet ineh bang kareb luk litep ngaceku na petap ula' imam luk pangéh nengeligan bururdeh, idi lun mula' pana' nateh nacing déi' Yerusalim.

⁴Raca' idi lun mula' pana' mawang niat ngaceku terawé ineh.

⁵Ideh nengelelep nelun luk miak nawar nelun Israil rat Birsiba macing déi' Dan, pad ideh amé Yerusalim idi nganau' Irau Paska kuan Tuhan Allah lun Israil. Ngaceku pangéh mio ideh na nenganau' Irau Paska maya' kudeng luk litep.

⁶Idi amung lun duken ineh nenalan maya' ecuk raca' idi lun rayehneh apud bawang Yahuda idi Israil. Kebala surat teteng raca' ineh: "O amung muyuh lun Israil, do' muyuh lumi inan Tuhan Allah Ibrahim, Isak, idi Yakub, pad Ieh pana' miak lumi inan amung lun luk neketecan rat nemuyuh luk nepuit rat bang palad raca'-raca' Asur.

⁷Aleg muyuh mepad kudeng tepun muyuh, idi kinanak muyuh luk pangeh mesala' inan Tuhan Allah tepundeh, pad ideh inukum mepad kudeng luk nekali' muyuh ini.

⁸Aleg muyuh metueh niat mepad kudeng tepun muyuh. Iamo' do' muyuh maya' bala Tuhan. Amé' muyuh déi' Ruma' Allah luk déi' Yerusalim luk pangeh linigan Tuhan Allah muyuh macing ruked-ruked. Idi sembayang Neneh pad Ieh na museh nemuyuh teh.

⁹Kudeng muyuh lumi inan Tuhan, idi amung kinanak muyuh idi anak-anak muyuh miak ngalap éi' pa kiung lun luk pangeh nenaban nedeh, pad ideh barén muli'. Tuhan Allah muyuh méi' idi mekatu, idi na teketed rat nemuyuh kudeng muyuh lumi Neneh.”

¹⁰Lun duken ineh iné' nan anid bawang apud bawang Epraim idi Manasé macing déi' Sebulon. Iamo' pupu ineh meriruh nedeh idi nesitunga.

¹¹Iamo' inan tuda'-tuda' lun rat Aser, Manasé, idi Sebulon, luk iné' Yerusalim dengan mebeneh niat.

¹²Idi Allah nengegio niat lun Yahuda pad ideh sebuleng niat nganau' anun-anun luk icuk raca' idi amung lun rayeh, maya' kudeng luk bila Tuhan.

¹³Idi déi' Yerusalim pana' pelaba ula' lemulun nepamung sikal ngerayeh Aco Rayeh Ruti luk Na Lamud bang bulan luk kedueh.

¹⁴Idi ideh nengusag amung bubpun su luk inan ngeseb umau luk do' buen ineh luk déi' Yerusalim. Idi amung ineh pipetdeh bang Abpa' Kidron.

¹⁵Idi ideh nengeret anak dumba Paska ineh bang pulu' apat aco bulan dueh. Idi amung imam idi amung lun Liwi pana' migu' ngaceku nateh linigan, idi ideh nengeligan bururdeh, pad ideh miak ngeseb baré bang Ruma' Allah.

¹⁶Idi ideh netuped su luk pangeh litep kuandeh bang Surat Ukum Musa nabi Allah. Idi amung imam pana nengisak dara' ratnan baré luk kirat luk ilapdeh rat nelun Liwi.

¹⁷Mula'lemulun bang teubupun ineh nateh nengeligan bururdeh. Ngaceku ineh lun Liwi nengeret anak dumba Paska kuan anid-anid lemulun luk na meligan ineh, pelé barédeh ineh uen ngeligan kuan Tuhan.

¹⁸Ngaceku inan mula' lemulun arangdeh, rat Epraim, Manasé, Iskar, idi Sebulon luk nateh nengeligan bururdeh, iamo' ideh nekuman Irau Paska dengan na maya' luk litep kuandeh. Idi Raca' Hesehia nesembayang kuandeh, kesembayangneh,

¹⁹"O Tuhan Allah tepun kai, ngaceku éi'Mu, do' Iko maré do' kuan amung lemulun ini, luk sembayang Namu dengan amung niatdeh, sagan tu pana' ideh na linigan."

²⁰Idi Tuhan nengua' sembayang Hesehia ineh, pad Ieh nemaré do' nelun mula' ineh, idi Ieh na nengesusa' nedeh.

²¹Idi amung lemulun luk nepamung déi' Yerusalim nengimet Aco Rayeh Ruti luk Na Lamud tudu' aco kinioneh dengan mawang niat. Idi amung lun Liwi idi amung imam pana' nengubur Tuhan anid-anid aco idi menani ubur kuan Tuhan, dengan amung tuehdeh.

²²Idi Hesehia nengubur nelun Liwi ngaceku ilehdeh bang kekamen Tuhan. Kareb pangéh irau tudu' aco kinioneh, dengan maré baré idi ngubur Tuhan Allah tepunde,

²³idi ideh pian ngiuk iraudeh tudu' aco baruh teh. Idi ideh nengerayeh aco ineh dengan mawang niat teh.

²⁴Raca' Hesehia pangéh nemaré kuan teubupun ineh 1,000 sapi' deléi, idi 7,000 dumba ku baré luk kereten. Idi amung lun rayeh bawang pana' nemaré kuan teubupun ineh 1,000 sapi' deléi idi 10,000 dumba. Idi mula' imam teh nengeligan bururdeh.

²⁵Idi amung-amungdeh mawang niat, ieh ineh lun Yahuda, amung imam, lun Liwi, idi amung lemulun luk pangéh nacing rat bawang Israil, idi teh lun sakai pana' luk netebawang déi' bawang Israil idi Yahuda.

²⁶Idi rayeh awang déi' bawang Yerusalim ngaceku rat kareb Selimun anak Daud raca' Israil ineh na luk nekali'deh kudeng ineh.

²⁷Amung imam idi lun Liwi nemutuh peruan Tuhan kuan lun mula' ineh. Idi putuhdeh pindenger Tuhan déi' bang surga.

Inul Luk Kedueh 31

¹Kareb Irau Paska ineh mabud, idi amung lun Israil iné' bang anid bawang Yahuda, idi ideh nemila' amung diri batu idi nenebpeng amung ulung. Idi ideh nengusag amung su luk inan sembayang nan ada' idi bubpun, apud bawang Yahuda, Beniamin, Epraim, idi Manasé. Idi ideh nuli'.

²Idi Heskia nengelelep amung kekamen imam idi lun Liwi, maya' anid babpatdeh. Sebuang maré baré luk sabpen idi sebuang maré baré luk nguit pedo', idi sebuang sembayang idi ngubur Tuhan su anid tanga' Ruma' Allah.

³Idi teh ratnan aya'neh sebuleng, raca' nemaré baré luk sabpen, kareb pekak idi malem, idi teh baré luk sabpen kareb Aco luk inan Mudeng, idi anid Irau Bulan Baruh, idi teh amung ac o rayeh luk litep bang Ukum Tuhan.

⁴Idi teh raca' nengecuk nelun luk tudo déi' Yerusalim, maré babpat luk kuan imam idi teh kuan lun Liwi, pad imam idi lun Liwi ineh lutep nganau' kekamen Tuhan.

⁵Idi kareb ideh nekali' bala ineh, idi lun Israil nenguit baré, ieh ineh padé, abpa' anggur, umau saitun, duru', idi amung uli' lati'deh, idi teh babpat pulu' ratnan luk amung-amung.

⁶Idi amung lun luk tudo bang bawang-bawang Yahuda nenguit babpat pulu' ratnan sapi' idi dumba, idi teh ratnan amung binaweh luk pangeh linigan kuan Tuhan Allahdeh.

⁷Idi ieh nengimun ngamung baré ineh bang bulan luk keteluh. Idi ideh nengamung ineh macing bulan luk ketudu'.

⁸Idi kareb Heskia idi lun rayehneh nekali' amung baré ineh, idi ideh ngubur Tuhan idi amung pupuNeh lun Israil.

- ⁹Idi raca' nengitun amung imam idi lun Liwi ratnan baré-baré ineh.
- ¹⁰Idi kebala Asaria, Imam Rayeh luk inul Saduk ineh ni raca' Hesehia, "Rat kareb aco lun ngimun nguit baré bang Ruma' Allah, inan petap akan kai, idi mula' teh elaneh ngaceku Tuhan pangeh nengeperuan pupuNeh."
- ¹¹Idi ideh netemina' ku tuda'-tuda' takep bang Ruma' Allah maya' ecuk raca'.
- ¹²Idi ideh nengamung amung baré idi babpat pulu' bang takep ineh. Idi lun rayeh pa luun amung ini, ieh ineh Konania seburur lun Liwi, idi luk kedueh, ieh ineh Simi, kinanakneh.
- ¹³Idi inan pulu' burur pa liang didueh ineh, ieh ineh Yehil, Asasia, Nahat, Asal, Yerimot, Yosabad, Eliel, Ismakia, Mahat, idi Benaya, maya' kudeng luk icuk Raca' Hesehia idi Asaria luk Imam Rayeh.
- ¹⁴Idi Koré Imna seburur lun Liwi, luk nginita tanga' Ruma' Allah luk pa busat aco, icuk ngalap amung luk barén kuan Allah, idi teh ieh luk mabpat baré ineh.
- ¹⁵Idi teh bang bawang imam-imam luk baken ieh dinengan tuda'-tuda' burur lun Liwi, ieh ineh Eden Miniamin, Yesua, Semaya, Amaria, idi Sekania. Idi ideh nemabpat akan kuan lun Liwi maya' kekamendeh,
- ¹⁶iamo' baken maya' inuldeh. Ideh nemaré babpat kuan amung deléi luk ngakem bang Ruma' Allah, maya' kekamendeh, ieh ineh luk ulundeh teluh ngepulu' lak idi mela.
- ¹⁷Idi imam-imam icuk ngakem maya' inuldeh, iamo' lun Liwi luk ulun dueh ngepulu' lak idi mela icuk ngakem maya' ruyuddeh.
- ¹⁸Idi ngadan amungdeh inayud dengan ngadan anakdeh, idi awandeh, idi teh ngadan lun luk baken luk bang tetek ruma'deh, ngaceku ideh megéi' temina' ngakem bang Ruma' Allah.
- ¹⁹Arang lun imam luk tudo bang bawang luk biré kuan inul Arun, idi luk tudo bang laman luk iring bawang ineh, inan lun luk pinili' miak maré babpat

akan kuan amung deléi arang imam-imam, kudeng ineh teh kuan amung lemulun luk pangeh inayud ngadan bang surat inul lun Liwi.

²⁰Kudeng ineh luk inau' Hesehia aput bawang Yahuda. Idi ieh nenganau' luk matu idi luk petulu pa kiung Tuhan Allahneh.

²¹Idi dengan amung niatneh, Raca' Hesehia nengakem bang Ruma' Allah, maya' ukum idi bala Tuhan. Idi ieh nenakap kuyut Allahneh, pad ieh nengalap peruan.

Inul Luk Kedueh 32

¹Idi mucu ratnan amung kekamen Hesehia luk do' ini, idi Senakerib, raca' bawang Asur nengerieng Yahuda. Idi ieh nengelibut amung bawang luk meraben libung, keterawéneh sikal ngalap bawang ineh kuan bururneh sebuleng.

²Idi kareb Hesehia nenier lawé Senakerib pian ngerieng Yerusalim,

³⁻⁴Idi ieh nepegayam dengan amung lun rayehneh, pad ideh ngaang amung bued abpa' luk bal selipa bawang ineh, pelé lun Asur na inan abpa' kareb ideh macing Yerusalim. Idi lun rayeh Hesehia nenguyut mula' lemulun luk nengaang amung bued abpa', pad abpa' na manud rat su ineh.

⁵Idi raca' metueh ngakem, idi ieh nengedo' amung libung luk meraben iapeh-iapeh su luk netabpa. Idi ieh nemudut pudut luk medita' luun ineh. Idi teh ieh nemudut libung bal alad bawang. Idi ieh nengeraben libung luk meraben luun tana' luk pinaad luk pa busat aco Yerusalim luk mon ineh Idi teh ieh nenganau' mula' utap idi pelapet.

⁶Idi raca' nengikit tuda'-tuda' lun rayeh baweh pad ideh nguyut anak itinneh. Idi ieh nengamung nedeh i natad tanga' bawang, kebalaneh nedeh,

⁷"Do' muyuh metueh idi mekuu'. Aleg muyuh matot nan raca' Asur idi bawehneh, ngaceku luk idi dengan tau ini meluun rayeh ratnan luk denganneh.

⁸Ieh inan tueh lemulun, iamo' Tuhan Allah luk ngedengan netau idi luk ngelaya' amung bunu' tau." Idi lun mula' inubuk ku bala raca'deh ineh.

⁹Idi laba' Senakerib ngelibut bawang Lakis, ieh nengecuk lun dukenneh amé' matun Heskia idi amung lun Yahuda luk bang bawang Yerusalim, kebalaneh,

¹⁰"Kudeng ini bala Senakerib raca' Asur, 'Idéké inan muyuh merapat, pad muyuh mudeng déi' Yerusalim bang bawang luk linibut.

¹¹Naké Heskia ngeraruh nemuyuh, sikal ngaté nemuyuh ku lau idi paring, kebalaneh, "Tuhan Allah tau miak muit netau rat bang palad raca' Asur ineh?"

¹²Naké Heskia luk pangeh nengusag amung su luk inan sembayang nan akang, idi amung bubpunneh, idi luk nengecuk nelun bawang Yahuda idi Yerusalim, kebalaneh, "Pa atun sebuleng bubpun ini do' muyuh sembayang idi ngeseb baré muyuh?"

¹³Naké muyuh kali' amung luk pangeh inau'ku, idi luk pangeh inau' tepunku kuan pupu-pupu bang bawang baken? Miakké allah pupu baken rat bawang baken muit bawangdeh ineh rat bang paladku?

¹⁴Arang allah amung pupu luk pangeh linaya' tepun-tepunku ineh idéké luk pangeh nemuit pupuneh rat bang paladku? Miakké muyuh puatin Allah muyuh?

¹⁵Aleg muyuh saluken Heskia. Idi aleg muyuh uen ngeraruh kudeng ineh. Aleg muyuh manu neneh. Na luk idi allah pupu baken luk miak muit pupuneh rat bang palad raca' Asur. Meluun teh Allah muyuh na miak muit nemuyuh!"

¹⁶Idi dengan tuda'-tuda' bala luk baken ideh nenguyo Tuhan Allah idi nengedat ni Heskia lun dukenNeh.

¹⁷Idi raca' Asur nengayud aceh surat idi nesitunga inan Tuhan Allah lun Israil, kebalaneh, "Mepad kudeng allah pupu amung bawang baken na miak muit

pupudeh rat bang paladku, idi kudeng ineh teh Allah Hesehia ineh na miak muit pupuneh.”

¹⁸Idi ideh ngitang-ngitang dengan bala lun Yahudi kuan lun bang bawang Yerusalim luk luun libung bawang ineh, pad ngatot idi ngagap nedeh ineh, pelé ideh ngalap bawang ineh.

¹⁹Idi teh ideh maad Allah Yerusalim dengan allah amung pupu luk luun tana' luk pinudut ticu' lemulun mo'.

²⁰Iamo' Raca' Hesehia idi Nabi Yesaya Amos pana' nesembayang pa kiung Allah luk bang surga.

²¹Idi Tuhan nengecuk seburur melaikat luk nengaté amung lun luk mesangit, idi lun rayeh baweh Asur, pad raca' Asur nuli' dengan igu'neh. Idi kareb ieh nesemuet bang ruma' allahneh, idi ieh pinaté anak-anakneh sebuleng.

²²Kudeng ineh lawé Tuhan nemuit Hesehia idi amung lun bang bawang Yerusalim rat bang palad Senakerib raca' Asur, idi rat bang palad amung bunu'neh. Idi Ieh nenganau' nedeh pedo' dengan amung bunu'deh,

²³pad mula' lun nenguit baré kuan Tuhan déi' Yerusalim, idi binaweh luk do' kuan Hesehia raca' Yahuda. Idi mucu ratnan ineh Hesehia rinayeh pa kiung amung lun pupu baken.

²⁴Idi kareb ineh Hesehia mét lélé maté. Idi ieh nesembayang. Idi Tuhan nengua' sembayangneh, idi Ieh nemaré neneh aceh tanu'.

²⁵Iamo' Hesehia na nengua' do' luk pangeh inau' Tuhan kuanneh, ngaceku ieh medita' niat. Ngaceku ineh useh luk meluun rayeh macing neneh idi kuan Yahuda idi lun bang bawang Yerusalim pana'.

²⁶Iamo' Hesehia idi lun bang bawang Yerusalim nengebeneh bururdeh pad useh Tuhan na nacing nedeh bang kareb Hesehia.

²⁷Idi Hesehia iuk mula' binaweh idi mebala. Idi ieh nemudut tuda'-tuda' su luk inan nganug binaweh, ieh ineh amas, pirak, batu luk meraga, anun-anun luk do' buen, utap, idi raput-raput repapeh luk meraga.

²⁸Idi teh ieh nemudut tuda'-tuda' lepo inan nganug padé, abpa' anggur, idi umau, idi tuda'-tuda' libung kuan raput-raput aya', idi tuda'-tuda' libung kuan dumba.

²⁹Idi teh ieh nengukab tuda'-tuda' bawang, ngaceku ieh pelaba ula' aya', idi binaweh luk biré Allah neneh.

³⁰Idi teh Hesehia nengaang turuk Abpa' Gihun luk pa luun ineh, pad ieh manud pa liang tana' pa acep aco Bawang Daud. Idi amung-amung luk inau' Hesehia ineh inan peruan mo'.

³¹Idi kareb lun luk icuk raca' Babil nacing, pelé ngitun ratnan lawé tanu' luk inan mawa luk pangehm mangun bang bawang ineh, idi Allah nenima' ni Hesehia, pian nutun neneh, pelé Ieh kali' amung-amung luk bang niatneh.

³²Idi amung-amung kekamen Hesehia luk baken idi awaneh nan Tuhan pangeh inayud bang Surat ratnan Luk Sinier Nabi Yesaya Amos, luk bang Surat Raca'-Raca' Lun Yahuda idi Lun Israil.

³³Idi Hesehia naté, idi ieh tinanem luun surud luk muneng ku tanem raca'-raca'. Idi amung lun Yahuda dengan amung lun bang bawang Yerusalim nengerayeh neneh kareb aténeh. Idi Manasé anakneh mangun ku raca' libalneh.

Inul Luk Kedueh 33

¹Idi ulun Manasé kareb ieh mangun ku raca' pulu' dueh lak. Idi ieh nengimet déi' Yerusalim limeh ngepulu' limeh lak kinioneh.

²Idi ieh nenganau' sala' pa kiung Tuhan, maya' amung kekamen lun pupu baken luk inan megani', luk pangeh inusu Tuhan ratnan babpatdeh rat pa kiung amung lun Israil.

³Manasé nemudut baruh amung su luk inan sembayang nan ada' luk pangeh inusag Hesehia tamaneh. Idi teh ieh nemudut tuda'-tuda' bubpun Baal. Idi ieh nenganau' ulung teh; idi teh ieh nesembayang inan gituen.

⁴Idi ieh nemudut bubpun allah baken bang Ruma' Allah. Idi ratnan Ruma' ineh Tuhan pangeh nepebala, "Idi déi' Yerusalim inan ngadanKu macing raked-raked!"

⁵Idi ieh nemudut tuda'-tuda' bubpun pad sembayang nan gituen luun dueh natad Ruma' Allah.

⁶Idi ieh nemaré anak-anakneh ku baré sabpen déi' Ruan Anak Hinom, idi ieh nemangun makai ubat Sétan, idi nenawar ada', idi nengitun lun luk mileh mangun. Idi ieh nenganau' luk dat pa kiung Tuhan, pad Tuhan museh neneh.

⁷Idi teh ieh nengerareng aceh akang bang Ruma' Allah. Ratnan su ineh Tuhan pangeh nepebala ni Daud idi anakneh Selimun, "Yerusalim idi Ruma'Ku ini pangeh pinili'Ku ratnan amung tana' pulu' dueh pupu Israil mangun ku su luk inan lemulun sembayang Negku.

⁸Idi na Ui miak mubuh nelun Israil ratnan tana' luk pangeh litepKu kuan tepundeh, kudeng ideh maya' balaKu, idi nginita amung-amung ukum luk biré demulunKu Musa nedeh."

⁹Iamo' Manasé nengeraruh nelun Yahuda, pad kekamendeh ineh meluun dat ratnan kekamen amung lun pupu baken luk pangeh inusu Tuhan pa kiung amung lun Israil.

¹⁰Sagan pana' Tuhan nemada' Manasé idi anak itineh, na ideh neninger.

¹¹Idi Tuhan nenima' amung lun rayeh baweh Asur nengerieng Yahuda. Idi ideh nengakem Manasé ku luk metabpa' idi nengaling neneh. Idi ideh nenguit neneh iné' Babil.

¹²Iamo' bang derehneh ieh mebeneh niat, pad ieh nemutuh pedengan ratnan Tuhan Allahneh.

¹³Idi Allah neninger sembayangneh idi nengua' putuhneh, pad Ieh nemaré neneh lemubed amé' Yerusalim mangun ku raca' teh, pelé Manasé nekali' Tuhan ineh Allah.

¹⁴Idi mucu ratnan ineh Manasé nengedita' libung pa busat aco Bawang Daud, déi' bang ruan, luk pa acep aco Gihun macing Tanga' Lawid, idi libut Opel. Idi ieh nengeletep tuda'-tuda' lun rayeh baweh bang amung bawang luk linibung déi' Yahuda.

¹⁵Idi ieh nenala' amung akang lun pupu baken, idi akang luk inau'neh bang Ruma' Allah. Kudeng ineh teh ieh nenala' rat bang bawang amung bubpun luk pangeh inau'neh luun surud Ruma' Allah idi déi' Yerusalim pana'.

¹⁶Idi ieh nemudut baruh bubpun Tuhan, idi pa luunneh ieh nemaré tuda'-tuda' baré luk nguit pedo' idi baré ubur pana'. Idi ieh nengecuk nelun Yahuda sembayang inan Tuhan Allah lun Israil.

¹⁷Iamo' lun mula' na nugka' maré baré luun su luk medita' ineh, iamo' baré ineh baréndeh kuan Tuhan Allahdeh.

¹⁸Idi amung-amung kekamen Manasé luk baken idi putuhneh bang sembayang inan Allahneh, idi teh amung bala nabi luk pangeh nemada' neneh bang ngadan Tuhan Allah lun Israil pangeh inayud bang Surat Kekamen Raca' Lun Israil.

¹⁹Sembayang raca' ineh idi ua' Tuhan neneh, idi teh amung sala'neh idi raruhneh ratnan Tuhan, idi amung su luk medita' luk pinudutneh idi amung ulung, idi akang luk inau'neh atun ratnan ieh nengebeneh bururneh, pangeh inayud bang Surat Kekamen Nabi.

²⁰Idi Manasé naté. Idi ieh tinanem bang ruma'neh sebuleng. Idi anakneh Amon mangun ku raca' libalneh.

²¹Idi ulun Amon kareb ieh mangun ku raca' ineh dueh ngepulu' dueh lak. Idi ieh nengimet dueh lak déi' Yerusalim.

²²Idi ieh nenganau' luk dat pa kiung Tuhan, mepad kudeng Manasé tamanneh. Ieh sembayang inan akang tamanneh.

²³Iamo' na ieh nengebeneh bururneh idi nelumi nan Tuhan mepad kudeng Manasé tamanneh. Iamo' ieh meluun sala' ratnan tamanneh.

²⁴Idi amung tareh Amon nepegayam sikal ngaté neneh. Idi ideh nengaté neneh bang ruma' raca'.

²⁵Iamo' lun Yahuda nengaté lemulun luk neperurum nengaté Raca' Amon ineh, idi ideh nengikit anakneh Yosia mangun ku raca' libalneh.

Inul Luk Kedueh 34

¹Idi ulun Yosia kareb ieh mangun ku raca' ualuh lak. Idi ieh nengimet teluh ngepulu' aceh lak déi' Yerusalim.

²Idi ieh nenganau' luk matu pa kiung Tuhan. Idi ieh nemaya' lawé tepunneh Daud dengan na umai.

³Idi bang lak luk kewaluh bang imetneh, kareb ieh anak adi', Yosia nengimun nakap Allah tepunneh Daud. Idi bang lak luk kepulu' dueh ieh nengimun ngeligan bawang Yahuda idi Yerusalim ratnan su luk inan sembayang nan ada', idi ulung, idi amung akang.

⁴Idi maya' ecuk raca' ideh nengusag amung bubpun Baal idi amung bubpun su luk inan ngeseb umau luk do' buen, idi ideh nemila' amung ulung idi akang. Idi aregneh inisakdeh luun tanem amung lun luk nesembayang nan akang ineh.

⁵Idi tulang-tulang amung imam ineh iseb Yosia luun bubpundeh. Kudeng ineh lawéneh nengeligan bawang Yahuda idi Yerusalim.

⁶Idi ieh nenganau' kudeng ineh bang bawang luk inusag, ieh ineh Manasé, Epraim, idi Simion, macing bawang Naptali.

⁷Ieh nengusag amung bubpun idi ulung, idi ieh nemila' amung akang areg-areg. Idi ieh nengusag amung bubpun su luk inan ngeseb umau luk do' buen, bang apud bawang Israil. Pangeh ineh raca' nuli' iné' Yerusalim.

⁸Kareb lak luk kepulu' ualuh bang imetneh, kareb ieh pangeh nengeligan bawang idi ruma' ineh, idi Yosia nengecuk Sapan Asalia, idi Masia lun rayeh bawang, idi Yuahas lun luk ngayud, pad ideh pian nuneb Ruma' Tuhan Allahdeh.

⁹Idi ideh iné' ni Hilkia, Imam Rayeh, idi nemaré kuanneh amung usin luk pangeh inuit semuet bang Ruma' Allah idi luk pangeh imung lun Liwi luk nginita tanga', rat nelun Manasé idi lun Epraim, idi amung lun luk neketecan rat nelun Israil, idi rat bang bawang Yerusalim.

¹⁰Idi ideh nemaré ineh kuan amung lun luk ngimet kekamen ngedo' Ruma' Allah. Idi ideh nemakai usin ineh ku ngedo' Ruma' ineh,

¹¹ieh ineh ku tabpar tukang kayuh idi lun luk mileh mudut ruma' idi ku melih batu idi kayuh ku ngedo' amung pudut luk na isa' raca'-raca' Yahuda.

¹²Idi lemulun luk ngimet kekamen ineh inan merapat. Idi lun rayeh bang kekamen ineh, ieh ineh Yahat, Obadia lun Liwi rat inul Merari, Sekaria idi Mesulam, lun Liwi ratnan inul Kohat. (Amung lun Liwi ineh mileh ku amung repapeh luk muni-muni.)

¹³Inan teh lun Liwi luk lun rayeh amung lun luk mabeh binaweh. Idi teh ideh nengatur ratnan amung-amung kekamen. Idi sebuang lun Liwi ineh mangun ku lun luk ngayud idi lun luk nginita tanga'.

¹⁴Laba' ideh nguit amung usin luk pangeh inuit semuet bang Ruma' Allah, idi Hilkia nekali' surat Ukum Tuhan luk biré Tuhan ni Musa.

¹⁵Idi kebala Hilkia ni Sapan lun luk ngayud ineh, "Ui pangeh nekali' surat Ukum ineh bang Ruma' Allah." Idi Hilkia nemaré surat ineh ni Sapan.

¹⁶Idi Sapan nenguit surat ineh kuan raca', kebalaneh, "Kai pangeh nenganau' luk icukmu ineh.

¹⁷Kai pangeh nengalap usin luk dinug bang Ruma' Allah ineh, idi kai nemaré ineh kuan lun luk ngakem idi lun luk ngimet nedeh ineh."

¹⁸Idi kebala Sapan teh, "Hilkia pangeh nemaré surat ini kuanku." Idi Sapan nemaca' surat ineh kuan raca'.

¹⁹Kareb raca' neninger bala surat ineh, idi ieh nenarak ayungneh.

²⁰Idi ieh nengecuk ni Hilkia, Aikam Sapan, Abdon Mika, Sapan lun luk ngayud, idi Asaya lun duken raca',

²¹kebalaneh, "Amé' muyuh ngitun Tuhan kuanku idi kuan amung lun luk neketecan bang bawang lun Israil idi Yahuda, ratnan bala surat luk ilap ineh, ngaceku Tuhan pelaba useh netau, ngaceku tepun tau na nemaya' bala Tuhan, idi na nenganau' amung-amung luk inayud bang surat ini."

²²Idi Hilkia dengan lun luk icuk raca' ineh iné' matun Nabi decur Hulda, awan Salum anak Tokat Hasra luk nginita ayung Ruma' Allah ineh. Idi ieh tudo déi' Yerusalim bang babpat luk mebaruh. Idi ideh nengacing bala ineh kuanneh.

²³Idi Hulda nengecuk nedeh ineh ngacing bala Tuhan ini kuan raca':

²⁴"Ui ini Tuhan miak ngukum Yerusalim dengan amung lun luk bang bawang ini teh, pad ngacing amung kediman luk bila bang surat luk pangeh bica' lun pa kiung raca'.

²⁵Ideh pangeh nenecan Negku, idi pangeh nemaré baré kuan allah baken, pad ideh nengeruat usehKu ku amung luk kikemdeh ineh. Ui megateh inan Yerusalim, pad usehKu ineh na miak uen ngagka'.

²⁶Ui ini Tuhan Allah lun Israil pebala kuan raca': Iko pangeh neninger luk inayud bang surat ineh.

²⁷Idi iko nuren idi nengebeneh bururmu pa kiungKu dengan nangi' idi nenarak ayungmu, kareb iko neninger amung bala ratnan kudeng apeh Ui ngukum Yerusalim idi amung lun luk bang bawang ini. Ngaceku ineh Ui pangeh neninger sembayangmu,

²⁸pad iko na miak nier ukum luk uenKu ngacing kuan Yerusalim. Ui miak nima' namu maté dengan do'." Idi lun luk icuk ineh nengacing bala ini kuan Raca' Yosia.

²⁹Raca' Yosia nenawar amung lun rayeh Yahuda idi Yerusalim.

³⁰Idi ideh pad-pad iné' bang Ruma' Allah dengan amung imam, lun Liwi, idi lun mula' rat Yerusalim, do' lun do' idi lun masi' pana'. Idi raca' nemaca' amung bala Surat Pejani' luk pangeh ilap bang Ruma' Allah ineh pedingeren amungdeh ineh.

³¹Idi ieh netuped su luk inan raca'-raca' tuped, idi ieh nepejani' pa kiung Tuhan sikal maya' bala Tuhan, idi ngimet amung ukumNeh idi bada'Neh, dengan amung niatneh, idi dengan amung terawéneh, idi maya' amung bala jani' luk inayud bang surat ineh.

³²Idi ieh nengecuk amung lun luk bang bawang Yerusalim idi bang bawang Benjamin teh ngimet pejani' ineh. Ngaceku ineh lun bang bawang Yerusalim nemaya' pejani' Allah tepundeh ineh.

³³Idi Yosia nenala' amung binaweh luk inan megateh ratnan amung bawang lun Israil, pad amung lun bang bawang Israil miak sembayang inan Tuhan Allahdeh. Idi raked ulun Raca' Yosia na ideh lemubed ratnan maya' Tuhan Allah tepundeh ineh.

Inul Luk Kedueh 35

¹Idi Yosia nenganau' Irau Paska kuan Tuhan déi' Yerusalim. Idi ideh nengeret anak dumba Paska ineh pulu' apat aco bulan aceh.

²Ieh nemaré kekamen kuan imam-imam bang Ruma' Allah, idi ieh nengubuk nedeh pad ideh meké' ngakem.

³Idi kebalaneh kuan amung lun Liwi luk mada' nelun Israil, idi luk pangeh linigan kuan Tuhan, "Ngerareng Pati' Pejani' luk meligan ineh bang Ruma' Allah luk pinudut Raca' Selimun anak Daud. Aleg muyuh mirir Pati' Pejani' ineh amé' iapeh-iapeh pana'. Do' muyuh ngakem nekini kuan Tuhan Allah muyuh idi kuan pupuNeh, lun Israil.

⁴Do' muyuh temina' ngakem bang Ruma' Allah maya' inul muyuh, petulu ku bala Daud raca' Israil idi Selimun anakneh.

⁵Do' muyuh temina' bang Ruma' Allah pad anid-anid muyuh miak ngedengan sebabpat ratnan amung-amung tetek ruma' lun Israil.

⁶Do' muyuh ngeret anak dumba idi amék Paska ineh idi ngeligan burur muyuh pad muyuh temina' maré baré ineh, pelé amung kinanak muyuh lun Israil miak maya' bala luk biré Tuhan ni Musa.”

⁷Raca' Yosia nemarké 30,000 anak dumba idi anak amék, dengan 3,000 sapi' deléi ratnan lamanneh sebuleng, kuan lun mula'.

⁸Idi amung tareh raca' nemarké baré kuan lun mula' ineh, idi kuan amung imam, idi lun Liwi pana'. Idi lun rayeh bang Ruma' Allah, ieh ineh Hilkia Sekaria idi Yehil nemarké kuan imam 2,600 anak dumba idi amék idi 300 sapi' deléi ku baré Irau Paska ineh.

⁹Idi lun rayeh lun Liwi, ieh ineh Konania, Semaya idi kinanakneh Netanel, idi teh Hasabia, Yiel, idi Yosabad, nemarké 5,000 anak dumba idi anak amék, idi 500 sapi' deléi kuan lun Liwi ku baré Irau Paska.

¹⁰Kareb ideh pangeh netemina' ku Irau Paska ineh, idi amung imam idi lun Liwi netuped su luk litep raca' kuandeh.

¹¹Pangeh ideh nengeret anak dumba idi anak amék ineh, idi lun Liwi nenganit kubildeh idi imam-imam nengisak dara'deh luun bubpun.

¹²Idi ideh nemabpat baré luk sabpen ineh, maya' anid tetek ruma'deh, ku baré kuan Tuhan, maya' kudeng luk inayud bang Ukum Musa.

¹³Idi ideh nenadang baré Paska ineh luun apui maya' bala ineh. Iamo' amung babpat luk pangeh linigan ineh tinanekdeh bang lacang, kuden, idi periuk. Idi ideh nenguit ineh dengan mesaget kuan lun mula'.

¹⁴Pangeh ineh idi lun Liwi netemina' ku babpatdeh sebuleng idi kuan amung imam. Ngaceku amung imam, ieh ineh inul Arun nengakem macing malem maré baré luk sabpen, idi lemak ineh teh.

¹⁵Idi amung inul Asap luk menani ineh netuped su luk litep maya' bala Daud. Idi Asap, Heman, idi Yedutun luk nabi raca' ineh, idi teh amung lun luk nginita tanga' na necan kekamendeh ngaceku lun Liwi ineh netemina' ku Irau Paska kuandeh.

¹⁶Idi bang aco sineh amung kekamen kuan Tuhan tinina', pad ideh miak ngimet Aco Rayeh Paska idi maré luk sabpen luun bubpun Tuhan maya' kudeng bala Raca' Yosia.

¹⁷Idi amung lun Israil luk idi déi' nengimet Irau Paska bang kareb ineh teh, idi teh Aco Rayeh Ruti luk Na Lamud tudu' aco kinioneh.

¹⁸Idi rat kareb Nabi Semuil, na inan Irau Paska arang lun Israil mepad kudeng Irau Paska ini. Idi seburur raca' Israil pana' nateh luk nepekalai ngimet Paska mepad kudeng luk inimet Yosia dengan amung imam idi lun Liwi, idi amung lun Yahuda idi lun Israil luk nacing dengan amung lun bang bawang Yerusalim,

¹⁹ieh ineh bang lak luk kepulu' ualuh bang imet Yosia.

²⁰Idi mucu ratnan ineh kareb Yosia pangeh nengedo' Ruma' Allah ineh, idi Neko raca' bawang Masir ineh iné' pebunu' déi' Karkemis luk i tangeb Abpa' Pirat. Idi Yosia iné' matun neneh.

²¹Iamo' Neko nengecuk nelun amé' ni Yosia, kebalaneh, "Anunké luk pianmu negku, O raca' Yahuda? Ngaceku aco sini na ui amé' pebunu' namu. Iamo' ui amé' matun uang tetek ruma' luk pebunu' negku. Idi Allah pangeh nengecuk negku amé' dengan mesaget. Aleg iko sikal metueh ratnan Allah luk idi denganku, pad Ieh na ngaté namu."

²²Iamo' na Yosia pian buro rat neneh, iamo' ieh sipalep sikal pebunu' neneh. Na ieh neninger bala Neko luk nacing ratnan Allah. Iamo' Yosia nacing déi' Ruan Megido sikal pebunu'.

²³Idi Raca' Yosia inurat lun luk ngelatik ku binor. Idi kebala raca' kuan lun dukenneh, "Nguit negku rat ieni, ngaceku mebura' uratku."

²⁴Idi lun dukenneh nengalap neneh rat bang kerétaneh. Idi ideh nenganau' neneh telubid bang keréta baken, idi nenguit neneh iné' déi' Yerusalim. Idi ieh naté. Idi ieh tinanemdeh bang lengutan tepunneh. Idi amung lun Yahuda, idi amung lun bang bawang Yerusalim pana' netemido ni Yosia.

²⁵Idi Nabi Yeremia nenulu aceh tido kuan Yosia. Idi deléi idi decur luk menani neten ngadan Yosia bang amung tidodeh macing aco sini. Idi ieh ineh mangun ku aceh dalam lun Israil. Idi amung ineh pangeh inayud bang Surat Tido.

²⁶Idi amung-amung kekamen Yosia luk baken, idi amung kekammeneh luk do' petulu dengan luk inayud bang Surat Ukum Tuhan,

²⁷Idi amung kekammeneh luk pun-pun idi luk kekiped pangeh inayud bang Surat Raca'-Raca' Lun Israil idi Lun Yahuda.

Inul Luk Kedueh 36

¹Idi lun Yahuda nemili' Yoahas anak Yosia, idi nengikit neneh ku raca' libal tamanneh déi' Yerusalim.

²Idi ulun Yoahas kareb ieh mangun ku raca' dueh ngepulu' teluh lak. Idi ieh nengimet teluh bulan déi' Yerusalim.

³Idi Neko raca' Masir nenaban neneh. Idi ieh nengecuk nelun Yahuda maré 5,600 kati pirak, idi 56 kati amas ku pupuk.

⁴Idi Eliakim kinanakneh kinikit raca' Masir ku raca' lun Yahuda. Idi ieh nengisu' ngadanneh Yoyakim. Iamo' Yoahas tiban Neko iné' bawang Masir.

⁵Idi ulun Yoyakim kareb ieh mangun ku raca, dueh ngepulu' limeh lak. Idi ieh nengimet pulu' aceh lak déi' Yerusalim. Idi ieh nenganau' sala' pa kiung Tuhan Allahneh.

⁶Idi Nebukadnesar, raca' Babil nengerieng Yahuda. Idi ieh nengaling ni Yoyakim idi nenaban neneh amé' Babil.

⁷Idi Nebukadnesar nenaban repapeh rat bang Ruma' Allah, idi nenganug ineh bang ruma'neh déi' Babil.

⁸Idi amung-amung luk inau' Yoyakim, dengan amung sala'neh idi kekammeneh luk dat, pangeh inayud bang Surat Raca'-Raca' Lun Israil idi Lun Yahuda. Idi Yoyakin anakneh mangun ku raca' libalneh.

⁹Idi ulun Yoyakin kareb ieh mangun ku raca' pulu' ualuh lak. Idi ieh nengimet teluh bulan pulu' aco déi' Yerusalim. Idi ieh nenganau' sala' pa kiung Tuhan.

¹⁰Idi kareb pun melau' idi Nebukadnesar nengecuk nelun nguit ni Yoyakin amé' Babil dengan amung repapeh Ruma' Allah luk meraga. Idi ieh nengikit Sedekia, taman pinaken Yoyakin ku raca' lun Yahuda idi Yerusalim.

- ¹¹Idi ulun Sedekia kareb ieh mangun ku raca' dueh ngepulu' aceh lak. Idi ieh nengimet déi' Yerusalim pulu' aceh lak kinioneh.
- ¹²Idi ieh nenganau' sala' pa kiung Tuhan Allahneh. Idi na ieh nengebeneh bururneh pa kiung Nabi Yeremia luk nemada' bala Tuhan.
- ¹³Sedekia sikal metueh ratnan Raca' Nebukadnesar luk pangeh nengecuk neneh pebulung ku ngadan Allah pad ieh lutep maya' raca' ineh. Idi ieh metueh niat idi na pian uren idi lumi inan Tuhan Allah lun Israil.
- ¹⁴Meluun teh amung lun rayeh Yahuda, lunimam, idi lun mula' pana' nemaya' lawé lun pupu baken pad ideh nesembayang inan akang, idi ideh nengelutak Ruma' Allah luk pangeh liniganNeh sebuleng déi' Yerusalim.
- ¹⁵Idi Tuhan Allah tepundeh ineh megéi' ngecuk lun dukenNeh amé' matun nedeh, ngaceku Ieh méi' inan pupuNeh idi su luk inanNeh, ieh ineh Ruma' Allah.
- ¹⁶Iamo' ideh nesitunga nelun luk icuk Allah ineh. Idi ideh nengesala' amung baladeh. Idi ideh meriruh inan amung nabiNeh, pad Tuhan pelaba useh nedeh, idi usehNeh ineh na miak uen ngagka'.
- ¹⁷Idi Tuhan nengacing kuandeh ineh raca' Babil luk nengaté amung anak adi'deh bang Ruma' Allah pana'. Na ieh méi' nedeh, do' deléi idi decur, lun luk mengered, idi luk isuut, idi teh lun luk mét idi luk do' ulun. Amungdeh ineh biré Allah bang paladneh.
- ¹⁸Idi raca' Babil nengaro Ruma' Allah, idi su luk inan nganug binaweh luk meraga, idi ieh nengalap binaweh raca' idi binaweh lun tarehneh, amung ineh inuitneh iné' Babil.
- ¹⁹Idi ieh nengeseb Ruma'Allah, idi nengusag libung Yerusalim dengan amung ruma' raca', idi repapeh luk meraga.
- ²⁰Idi idé-idé luk nepuit ratnan pelapet ineh tibanneh iné' Babil. Idi ideh mangun ku lun dukenneh idi lun duken anak-anakneh macing bang kareb imet lun Parsi.

²¹Kudeng ineh lawéneh bala Tuhan luk bida' Yeremia pangeh icing: ieh ineh, "Tana' ini na ruen ku lati' tudu' ngepulu' lak kinioneh ku libal lak luk inandeh na ucu' nganau' lati'."

²²Iamo' lak luk pun bang imet Kores raca' bawang Parsi, pad bala Tuhan nacing luk pangeh bida' Yeremia, Tuhan nengegio niat Kores raca' bawang Parsi ineh, pad ieh nengecuk ngitang-ngitang bang aput imetneh. Idi ieh nemaré tuda'-tuda' balad surat, kebalaneh:

²³Kudeng ini bala Kores raca' bawang Parsi, "Tuhan Allah luk déi' surga pangeh nemaré negku amung imet bang tana' ini, idi Ieh pangeh nengecuk negku mudut aceh Ruma' kuanNeh déi' Yerusalim luk bang tana' Yahuda. Idi do' amung muyuh luk pupu Allah muli' amé Yerusalim. Idi Tuhan Allah ngedengan nemuyuh."

Esra

Esra 1

¹Bang lak luk pun-pun kareb imet Kores raca' Parsi, Tuhan nengegio niatneh pad ieh nengayud aceh surat uen lun maca' rayeh tang bang aput-apat imetneh, pelé ngacing bala Tuhan luk bida' Nabi Yeremia ineh.

²"Kudeng ini bala Kores raca' Parsi: Tuhan Allah Surga pangeh nemaré negku amung imet luk luun tana'. Idi pangeh Ieh nengecuk negku mudut aceh Ruma' kuanNeh déi' Yerusalim luk bang tana' Yahuda.

³Do' Allah ngedengan nemuyuh luk mangun ku pupuNeh. Do' muyuh amé' Yerusalim luk déi' tana' Yahuda ineh. Idi do' muyuh mudut baruh Ruma' Tuhan Allah lun Israil, Ieh ineh Allah luk inan sembayang déi' Yerusalim.

⁴Kudeng sebuang pupuNeh luk tiban ineh petulu uen ngedengan, pad ideh miak muli', do' amung lun bang bawang ineh ngedengan nedeh ku pirak, amas, binaweh, idi aya' luk miak mabeh, idi teh baré-baré luk baréndeh dengan ran niat bang Ruma' Allah déi' Yerusalim."

⁵Idi amung lun rayeh tetek ruma' ratnan pupu Yahuda idi Beniamin, dengan amung imam idi lun Liwi, idi idé'-idé' luk tigio Roh Tuhan netemina' amé' mudut baruh Ruma' Allah luk déi' Yerusalim.

⁶Idi amung lun luk tudo pekelibut nedeh ineh nengedengan nedeh ku mula' binaweh, ieh ineh pirak, amas, binaweh luk baken-baken, aya' luk miak mabeh, idi tuda'-tuda' binaweh luk meraga, dengan baré'-baré' luk baren bang Ruma' Allah déi' Yerusalim.

⁷Idi Raca' Kores nemaré kuandeh amung bigan idi sangkir luk pangeh inuit Raca' Nebukadnesar rat Yerusalim idi luk rirengneh bang ruma' akangneh.

⁸Ieh nemaré amung ineh kuan Mitredat, lun rayeh luk ngimet usin raca'. Idi Mitredat nengayud kinula'deh kuan Sesbasar lun rayeh lun Yahuda.

⁹⁻¹⁰Ieh ineh: bigan amas luk ku baré 30 bigan pirak luk ku baré 1,000 bigan luk baken 29 bigan amas luk isuut 30 bigan pirak luk isuut 410 repapeh luk baken 1,000

¹¹Kinula' amung repapeh dengan bigan amas idi pirak 5,400. Amung ineh inuit Sesbasar, kareb ieh iné' Yerusalim dengan amung lun baken luk tiban ineh rat Babil.

Esra 2

¹Mula' lun luk tiban nenecan bawang Babil idi nuli' iné' bang bawangdeh déi' Yerusalim idi Yahuda. Tepundeh pangeh tiban Raca' Nebukadnesar; idi amungdeh ineh tudo déi' Babil. Iamo' nekini ideh muli'.

²Lun rayehdeh, ieh ineh Serubabel, Yesua, Nehemia, Seraya, Rilaya, Mordekai, Bilsan, Mispar, Bigbai, Rehum, idi Bana. Idi ini ngadan pupu Israil dengan kinula'deh luk nuli' rat su luk inandeh tiban:

³⁻²⁰Paros -2,172 Sepatia -372 Ara -775 Pahat Moab (inul Yesua idi Yoab) -2,812 Elam -1,254 Satu -945 Sakai -760 Bani -642 Babai -623 Asgad -1,222 Adonikam -666 Bigbai -2,056 Adin -454 Ater (luk titen Hesehia) -98 Besai -323 Yora -112 Hasum -223 Gibar -95

²¹⁻³⁵Inul lemulun luk pangeh netudo bang bawang ini nuli' teh: Baitlahim -123 Netopa -56 Anatot -128 Asmabet -42 Kiriati Yarim, Kepira, idi Birot -743 Rama idi Giba -621 Mikmas -122 Baitel idi Ai -223 Nebo -52 Magbis -156 Elam luk baken -1,254 Harim -320 Lod, Hadid, idi Ono -725 Yeriko -345 Sena -3,630

³⁶⁻³⁹Ini ngadan inul imam luk nuli' rat su luk inandeh tiban: Yedaya (inul Yesua) -973 Imer -1,052 Pasur -1,247 Harim -1,017

⁴⁰⁻⁴²Inul Liwi luk nuli' rat su luk inandeh tiban: Yesua idi Kadmil (inul Hodabia) -74 Lun luk menani (inul Asap) -128 Lun luk nginita tanga' Ruma' Allah (inul Salum Ater, Talmon, Akub, Hatita, idi Sobai) -139

⁴³⁻⁵⁴Inul lun luk ngakem bang Ruma' Allah luk nuli' rat su luk inandeh tiban: Siha, Hasupa, Tabaut, Keros, Siaha, Padon, Lebana, Hagaba, Akub, Hagab, Samlai, Hanan, Gidel, Gahar, Riaya, Resin, Nekoda, Gasam, Usa, Pasia, Besai, Asna, Miunim, Nepisim, Bakbuk, Hakupa, Harhur, Baslut, Mehida, Harsa, Barkos, Sisera, Tema, Nesia, idi Hatipa.

55-57 Inul demulun Selimun luk nuli' rat su luk inandeh tiban: Sotai, Hasoperet, Peruda, Jala, Darkon, Gidel, Sepatia, Hatil, Pokeret Hasebaim, idi Ami.

58 Kinula' inul lun luk ngakem bang Ruma' Allah idi demulun Selimun luk nuli' rat su luk inandeh tiban -392

59-60 Inan 652 burur lemulun ratnan inul Delaya, Tobia, idi Nekoda luk nuli' rat bawang Tel Mela, Tel Harsa, Kerub, Adan, idi Imer. Iamo' na megala' ideh ineh inul lun Israil.

61-62 Idi ngadan tepun-tepun imam-imam ini na megala': Habaya, Hakos, idi Barsilai. (Aceh tepun pupu imam-imam Barsilai pangeh nengaweh sedecur ratnan inul Barsilai rat Giliad idi ieh pangeh nengalap ngadan ibanneh.) Ideh ini na miak mangun ku imam ngaceku ngadan tepundeh na megala'.

63 Pengulu lun Yahudi nemebpeng nedeh na kuman akan luk barén kuan Allah, pad macing inan imam luk petulu makai Urim idi Tumim.

64-67 Kinula' lun luk tiban luk nelemubed -42,360 Demulundeh luk deléi idi decur -7,337 Deléi idi decur luk menani -200 Kuda -736 Anak upa keladai dengan kuda -245 Unta -435 Keladai -6,720

68 Kareb lun luk tiban ineh nacing déi' Ruma' Allah déi' Yerusalim, sebuang lun rayeh inul nemaré baré dengan ran niatdeh pad ngedengan kekamen mudut Ruma' Allah baruh su luk inan Ruma' Allah atun.

69 Ideh nemaré maya' do'deh: 800 kati amas, 5,600 kati pirak, idi teh 100 kuyu' imam.

70 Idi amung imam, lun Liwi, idi sebuang rat nelun mula' ineh tudo déi' Yerusalim idi libut bawang ineh. Idi amung lun luk menani, lun luk nginita tanga', idi lun luk ngakem bang Ruma' Allah, tudo bang bawang luk muneng. Idi lun Israil luk baken nelemubed iné' bang bawangdeh sebuleng.

Esra 3

1 Kareb bulan luk ketudu', idi amung lun Israil lutep bang bawangdeh sebuleng. Idi ideh nepamung déi' Yerusalim.

²Idi Yesua Yosadak, dengan amung-amung imam luk baken, idi Serubabil Saltiel dengan amung pupuneh nemudut bubpun Allah lun Israil baruh, pad ideh mika maré baré luk sabpen maya' kudeng luk inayud bang Ukum Musa, nabi Allah ineh.

³Idi ideh nemudut bubpun ineh su luk inanneh atun, sagan tu pana' ideh matot inan pupu baken luk bang bawang ineh. Idi ideh nengeseb luun bubpun ineh baré luk sabpen kuan Tuhan anid pekak idi anid alem.

⁴Idi ideh nengimet Aco Rayeh Lepo maya' kudeng luk pangeh inayud, dengan baré luk sabpen anid-anid aco, maya' kudeng luk pekalai kuan aco sineh.

⁵Pangeh ineh, idi ideh nengeseb baré luk sabpen luk pekalai ineh idi namaré baré kareb Bulan Baruh, idi nenganau' anid irau luk litep kuan Tuhan, idi teh ideh namaré kuan Tuhan luk sabpen dengan ran niatdeh.

⁶Ideh nengimun maré baré luk sabpen kuan Tuhan bang aceh aco bulan tudu', sagan tu pana' ideh nateh nengimun mudut Ruma' Allah ineh.

⁷Lun Israil namaré usin kuan amung lun luk mileh ngakem batu idi tukang kayuh, idi teh ideh namaré akan, luk rupen, idi umau saitun kuan bawang Sidon idi Sur ku libal kayuh tumuh rat Lebanon, luk iten maya' abpa' rayeh macing déi' Yopa, maya' bala Kores, raca' Parsi.

⁸Kareb bulan dueh bang lak ineh mucu ratnan acingdeh déi' su luk inan Ruma' Allah déi' Yerusalim, idi ideh nengimun ngakem. Serubabel, Yesua, idi lun Israil luk baken nengimun mudut Ruma' ineh dengan lun imam idi lun Liwi pana', ieh ineh amung lun luk tiban luk pangeh nelemubed iné' Yerusalim. Idi ideh nengelelep amung lun Liwi luk ulun dueh ngepulu' lak idi mela, pad ideh ineh miak ngatur kekamen mudut Ruma' Allah.

⁹Idi Yesua, lun Liwi ineh dengan anak-anakneh idi pupuneh, Kadmil idi anak-anakneh ratnan inul Hodabia nepamung pad ngatur kekamen mudut Ruma' Allah. (Idi teh lun Liwi ratnan inul Henadad nengedengan nedeh.)

¹⁰Kareb ideh nengimun nganau' tapin Ruma' Allah, idi amung imam luk nengayung ku kuyu' imam netuped su luk litep inandeh dengan serupitdeh,

idi teh lun Liwi ratnan inul Asap idi déi' dengan karingdeh. Idi ideh nengubur Tuhan, maya' bala Daud raca' lun Israil.

¹¹Idi ideh pesua-pesua menani, idi nemaré ubur inan Tuhan, kebaladeh, "Tuhan ineh pelaba do', ide éi'Neh lutep kuan lun Israil, macing ruked-ruked." Idi lun mula' nengudub dengan rayeh tang, kareb ideh nengubur Tuhan, ngaceku tapin Ruma' Allah pangeh tinimun.

¹²Iamo' mula' imam idi lun Liwi idi lun rayeh inul luk mengered, idi luk pangeh nekali' Ruma' Allah luk su ineh atun, nenangi' idi netemido kareb ideh nenier tapin Ruma' ini piduten. Iamo' lun baken nengitang ngaceku ideh mawang niat,

¹³pad seburur pana' nateh kali' ilung aroddeh, tangi', kian tang awang niat lek, ngaceku lun mula' ineh ngitang-ngitang dengan rayeh arod, pad pedingeren rat mado.

Esra 4

¹Amung bunu' lun Yahuda idi Beniamin neninger, idi lun luk pangeh tiban ineh nelemubed iné' mudut aceh Ruma' kuan Tuhan Allah lun Israil.

²Idi ideh iné' ni Serubabel idi amung lun rayeh inul, kebaladeh nedeh, "Do' kai ngakem pad-pad dengan muyuh ngaceku kai pana' sembayang inan Tuhan Allah muyuh. Idi teh kai pangeh nemaré baré kuanNeh rat kareb imet Esarhadon raca' Asur luk nemura' nekai amé' tungé'."

³Iamo' kebala Serubabel, Yesua, idi amung lun rayeh inul, "Na muyuh miak ngedengan nekai mudut aceh Ruma' kuan Tuhan Allah kai. Iamo' kai sebuleng mo' mudut ineh, maya' kudeng bala Kores raca' Parsi nekai."

⁴Idi lun bang bawang ineh nutun ngelaya' nelun Yahuda, pad ideh matot mudut.

⁵Idi ideh nenuap tuda'-tuda' lun rayeh lun Parsi pad ideh ngesabeng nedeh. Ideh nenganau' kudeng ineh ruked imet Kores macing bang imet Raca' Darius.

⁶Idi kareb pun imet Raca' Ahasuirus, ideh nengayud kuanneh aceh surat adu' ratnan amung lun bang bawang Yahuda idi Yerusalim.

⁷Idi kareb imet Artasasta raca' Parsi pana', Bislam, Mitredat, Tabiel, idi amung lun ruruhdeh nemaré aceh surat kuan raca'. Idi surat ineh inayud bang buri' Arami, idi balaneh uen ngelibal kareb uen maca'.

⁸Idi Pengulu Rehum idi Simsai lun luk ngayud kuang bawang ineh nemaré surat ini ratnan Yerusalim kuan Raca' Artasasta:

⁹"Rat Pengulu Rehum idi Simsai lun luk ngayud kuan bawang ini dengan amung lun ruruhdeh, idi lun luk mutut ukum, idi lun rayeh luk baken, ieh ineh lun luk rat Erik, Babil, idi Susa luk bang bawang Elam,

¹⁰idi amung pupu baken luk pangeh pinura' i Asurbanipal luk rayeh idi mebala idi luk icukneh tudo bang bawang Samaria, idi aput babpat tana' luk pa acep aco Abpa' Pirat."

¹¹Idi ini bala surat luk birédeh: "Tabi' kuan Raca' Artasasta, ratnan demulunneh, ieh ineh amung lun luk tudo pa acep aco Abpa' Pirat.

¹²"Idi kai pian maré kali' namu, ratnan lun Yahudi luk pangeh nacing tungé' Yerusalim rat bang bawangmu pad ideh mudut baruh bawang luk sikal metueh idi luk dat ineh. Idi ideh nengimun nganau' libung bawang idi na mio teh ideh mangeh kekamen ineh.

¹³O raca', kudeng bawang ineh pangeh pinudut, idi amung libung pangeh inau' peh, kali' rungen ideh na maré pupuk, idi usin raca' na petap mucu.

¹⁴Ngaceku kai pa liang raca' na kai pian namu uen ngebeneh. Idi bang terawé kai,

¹⁵do' iko ngelio bang Surat Kekamen tepunmu, pad iko miak kali' bala ratnan bawang ini luk sikal metueh, idi luk pangeh nengesusu' niat amung raca', idi lun luk ngimet pana' rat mon. Idi pupuneh megéi' dat uen ngimet. Ineh punneh bawang ini inusag.

¹⁶Idi kai ngerawé kudeng bawang ini piduten baruh idi amung libungneh pana' pidutendeh, kali' rungen raca' na miak ngimet babpatmu luk pa acep aco Abpa' Pirat ineh."

¹⁷Idi raca' nemaré surat ini: "Tabi kuan Pengulu Rehum, Simsai, lun luk ngayud kuan bawang, idi lun rorum muyuh luk tudo déi' Samaria idi bang babpat bawang luk pa acep Abpa' Pirat ineh.

¹⁸"Idi surat luk pangeh biré muyuh ineh pangeh bica' pa kiungku dengan megala'.

¹⁹Idi ui nengecuk nelun ngelio ratnan bala muyuh ineh. Idi ideh nekali' rat kareb luk mon bawang ineh sikal metueh ratnan amung raca'. Idi ideh nenganau' ria' idi na sikal pa liang.

²⁰Idi teh raca'-raca' luk metueh nengimet Yerusalim atun idi aput babpat bawang luk pa acep aco Abpa' Pirat. Idi ideh nengalap pupuk idi acam tana' teh.

²¹Idi nekini do' muyuh mebpeng nedeh ineh na ngukab bawang ineh, pad acing balaku nedeh.

²²Ngerawé do'-do' aleg muyu ngesidan ku ecukku ini, pad dat ineh na ngesusa' negku."

²³Kareb ideh pangeh nemaca' surat Raca' Artasasta kuan Rehum, Simsai, idi amung lun rorumdeh, idi dengan mesaget ideh ineh iné' Yerusalim idi nemebpeng nelun Yahudi na mudut bawang ineh.

²⁴Kudeng ineh teh luk nangun atun kareb ideh igka' mudut Ruma' Allah macing lak luk kedueh bang imet Darius raca' Parsi ineh.

Esra 5

¹Idi dueh nabi, ieh ineh Hagai idi Sekaria Ido, nengimun mada' nelun Yahudi luk bang bawang Yahuda idi Yerusalim dengan ngadan Allah lun Israil.

²Kareb Serubabel Saltiel idi Yesua Yosadak neninger bala didueh idi ideh nengimun mudut Ruma' Allah luk déi' Yerusalim baruh. Idi dueh nabi ineh nengedengan nedeh.

³Idi bang kareb ineh Pengulu Tatenai rat pa acep aco Abpa' Pirat, Setar Bosenai, idi amung lun rayeh luk ngedengan nedidueh iné' Yerusalim idi nengitun nelun Yahuda, kebaladeh, "Idéké nengecuk nemuyuh mudut Ruma' Allah muyuh ini dengan repapehneh?"

⁴Idi ideh nengitun ngadan lun luk nemudut ruma' ineh.

⁵Iamo' Allahdeh nematar amung lun rayeh lun Yahudi, idi na lun Parsi nemebpong nedeh ineh, pad dalan ineh miak kali' Darius, pelé ieh ngua' suratdeh ineh.

⁶Idi ini bala surat luk birédeh kuan raca:

⁷"Tabi' idi awang kuan Raca' Darius.

⁸Petulu iko kali' ratnan kai ini pangeh iné' tana' Yahuda idi nenier Ruma' Allah luk meluun rayeh. Idi Ruma' ineh piduten baruh ratnan batu rayeh. Idi amung aladneh binuun ku kayuh. Idi ideh mekél nganau' kekamen ineh dengan mesaget.

⁹"Idi kai pangeh nengitun amung lun rayehdeh ineh, 'Idé luk nengecuk nemuyuh mudut Ruma' ini idi repapehneh?'

¹⁰Idi teh kai pangeh nengitun ngadan amung lun rayehdeh ineh pad kai miak maré kali' namu.

¹¹"Idi ideh nengor bala kai kudeng ini: 'Kai ini lun duken Allah langit idi tana', idi kai mudut Ruma' ini luk pangeh pinudut seburu raca' Israil luk rayeh bang kareb luk mon.

¹²Iamo' ngaceku tepun kai nengeruat useh Allah Surga ineh, idi Ieh nemaré nedeh bang palad Nebukadnesar raca' Babil idi Ruma' ini inusag idi pupu kai tiban iné' déi' Babil.

¹³Iamo' kareb lak luk pun-pun bang imet Kores déi bawang Babil idi ieh nengecuk mudut Ruma' Allah ini.

¹⁴Idi amung repapeh Ruma' Allah luk ratnan amas idi pirak luk ilap Nebukadnesar rat bang Ruma' Allah luk déi' Yerusalim, idi luk pangeh inuitneh iné' bang ruma' akang luk déi' Babil, amung ineh pangeh biré lemubed kuan seburur luk ngadanneh Sesbasar luk pangeh litepneh ku pengulu Yahuda.

¹⁵Idi Raca' Kores nengecuk neneh nguit amung repapeh ineh amé' bang Ruma' Allah déi' Yerusalim, idi mudut Ruma' Allah ineh baruh su luk inanneh.

¹⁶Idi Sesbasar iné' tungé', idi ieh nengimun mudut ineh. Idi rat aco sineh, ideh nemudut ineh macing nekini, iamo' natieh nepangeh.'

¹⁷"Idi nekini kudeng petulu bang terawé raca', do' iko nakap bang su luk inan nganug Surat Raca' déi' Babil, kudeng matu inan bala Raca' Kores ratnan mudut Ruma' Allah luk déi' Yerusalim ineh. Idi do' iko maré kali' pianmu ratnan lawé ini kuan amung kai."

Esra 6

¹Idi Raca' Darius nengecuk nelun nakap bang su luk inan nganug Surat Raca' déi' Babil.

²Iamo' déi' Ekbatana luk bang bawang Midi idi ideh nengalap aceh lulun surat. Idi inan luk inayud bang ineh. Kudeng ini balaneh:

³"Idi kareb lak luk pun-pun bang imet Raca' Kores, ieh nemarké bala ini. Do' Ruma' Allah luk déi' Yerusalim piduten baruh luun su luk inan maré baré luk kereten idi baré luk sabpen. Idi kidita'neh pulu' limeh depeh, idi pipangneh pana' pulu' limeh depeh.

⁴Idi aladneh piduten ratnan teluh buun batu luk libping idi aceh buun kayuh. Idi amung raganeh pana' uen ngua' ku usin luk dinug raca'.

⁵Idi teh do' ngelubed amung repapeh Ruma' Allah luk ratnan amas idi pirak luk pangeh inuit Nebukadnesar rat bang Ruma' Allah luk déi' Yerusalim iné' Babil ineh amé' su luk inanneh.”

⁶Idi Raca' Darius nengua' surat ineh kudeng ini: "Tabi' kuan Tatenai, pengulu pa acep aco Abpa' Pirat, idi Setar Bosenai, idi lun rayeh luk ngedengan nemedueh. "Ngado burur muyuh ratnan Ruma' Allah ineh.

⁷Aleg muyuh ngesabeng kekamen Ruma' Allah ineh. Nima' lun rayeh bawang lun Yahudi idi amung lun rayeh-rayeh lun Yahudi mudut Ruma' Allah ineh su luk litep ineh.

⁸Ui ngecuk nemuyuh ngedengan nedeh pelé ideh mudut Ruma' Allah ineh. Do' maré amung raganeh kuandeh dengan mesaget ratnan usin raca', ieh ineh pupuk idi acam ratnan bawang luk pa acep aco Abpa' Pirat pad kekamendeh na uen ngesabeng.

⁹Idi anun luk piandeh, ieh ineh sapi' deléi luk pegawa', dumba deléi, idi anak dumba, ku baré luk sabpen kuan Allah Surga, idi teh padé, tucu', abpa' anggur, umau, maya' putuh amung imam luk déi' Yerusalim ineh, na miak na ineh barén kuandeh anid-anid aco,

¹⁰pad ideh miak maré baré luk sabpen luk do' buen kuan Allah Surga, idi sembayang mutuh do' ulun kuanku idi kuan anak-anakku.

¹¹Idi teh kebalaku, idé luk ngisu' bala ini kali' rungen sepekatu atang ruma'neh miak uen ngaro idi uen ngabpen. Idi ieh pana' uen nebpek ku ineh. Idi ruma'neh ineh mangun ku su luk inan nala' arap.

¹²Idi do' Allah luk nemili' Yerusalim ku su luk inan lemulun sembayang Neneh nala' amung raca' idi pupu luk ngisu' ukum ini idi luk nutun ngedat Ruma' Allah luk déi'. Idi ui ini Darius pangeh nemaré bala ini. Do' ieh bén dengan meriput.”

¹³Pengulu Tatenai, Setar Bosenai, idi amung lun rayeh luk ngedengan nedidueh nemaya' kudeng luk icuk raca'.

¹⁴Idi amung lun rayeh-rayeh lun Yahudi pana' nemudut idi nemangeh pudut ineh dengan do' ngaceku ubuk Nabi Hagai idi Sakaria Ido. Ideh nemangeh pudut ineh maya' bala Allah lun Israil, idi maya' bala Kores, Darius, idi Artasasata raca'-raca' Parsi ineh.

¹⁵Idi ruma' ineh nepangeh teluh aco bulan Adar, bang lak luk keanem kareb imet Raca' Darius.

¹⁶Idi luk Israil, amung imam, idi lun Liwi, idi amung lun tiban luk pangeh nuli' ineh, nenganau' aco rayeh dengan mawang niat ngaceku Ruma' Allah ineh.

¹⁷Idi kareb aco rayeh Ruma' Allah ineh ideh nemaré 100 sapi' deléi, 200 dumba, 400 anak dumba, idi 12 amék barén ngaceku sala' amung lun Israil, maya' kinula' pupu Israil.

¹⁸Idi ideh nengelelep amung imam idi lun Liwi ngakem bang su luk litep kuandeh bang Ruma' Allah déi' Yerusalim, maya' kudeng luk inayud bang Surat Musa.

¹⁹Idi lun luk tiban ineh luk pangeh nuli' nenganau' Irau paska pulu' apat aco bulan aceh.

²⁰Ngaceku amung imam idi lun Liwi pangeh nengeligan bururdeh maya' kudeng bala Tuhan. Idi ideh nengeret anak dumba Paska kuan amung lun luk tiban luk pangeh nuli' ineh, idi kuan kinanakdeh lun imam, idi kuan bururdeh sebuleng teh.

²¹Idi amung baré ineh kuan lun Israil luk tiban luk pangeh nuli', idi lun luk pangeh nenecan kekamen lun pupu baken luk bang bawang ineh, pad nakap Tuhan Allah lun Israil.

²²Idi ideh nenganau' Aco Rayeh Ruti luk Na Lamud tudu' aco kinioneh dengan mawang niat ngaceku Tuhan pangeh nengawang niatdeh ineh, idi Ieh nengegio niat raca' Asur pad ieh nengedengan nedeh nganau' Ruma' Allah lun Israil.

Esra 7

- ¹Idi mucu ratnan ineh kareb imet Artasasta, raca' Parsi, inan seburur lemulun, ngadanneh Esra. Idi Esra ineh inul Arun, Imam Rayeh ineh, ngaceku Esra, ieh ineh anak Seraya, luk anak Asaria, luk anak Hilkia,
- ²luk anak Salum, luk anak Saduk, luk anak Ahitub,
- ³luk anak Amaria, luk anak Asaria, luk anak Merayot,
- ⁴luk anak Serahia, luk anak Usi, luk anak Buki,
- ⁵luk anak Abisua, luk anak Pinihas, luk anak Eliasar, luk anak Arun Imam Rayeh ineh.
- ⁶Idi Esra ineh seburur luk mileh ngelio ukum Musa luk pangeh biré Tuhan Allah lun Israil. Idi raca' nemaré kuanneh amung luk pianneh, ngaceku Tuhan Allahneh nengeperuan neneh. Idi Esra nenalan rat bawang Babil iné' Yerusalim,
- ⁷dengan tuda'-tuda' burur lun Israil, ieh ineh lun imam, lun Liwi, lun luk menani, idi lun luk nginita tanga' Ruma' Allah, idi lun duken bang Ruma' Allah. Ieh ineh bang lak luk ketudu' kareb imet Raca' Artasasta.
- ⁸⁻⁹Idi ideh nenalan rat Babil aceh aco bulan aceh. Idi ideh dinengan Allah, pad ideh nacing déi' Yerusalim, aceh aco bulan limeh.
- ¹⁰Ruked ulun Esra ieh mepicet nakap bala Tuhan idi nemaya' ukumNeh idi nemada' nelun Israil amung bada' idi ukumNeh.
- ¹¹Idi ini bala surat luk biré Raca' Artasasta kuan Imam Esra, lun luk mileh ngelio ukum Musa, luk kali' amung lawé bala Tuhan idi amung dalam kuan lun Israil:
- ¹²"Idi surat ini rat Artasasta raca' amung raca' kuan Imam Esra, lun luk mileh ngelio ukum Allah Surga.
- ¹³"Ui maré bala ini: Idi bang imetku idé rat pupu Israil idi rat amung imam idi lun Liwi luk pian amé' déi' Yerusalim miak ieh amé' maya' namu.

¹⁴Ngaceku iko pangeh icuk raca' dengan tudu' lun ratehneh, miak amé' nier amung-amung luk déi' bawang Yahuda idi déi' Yerusalim, maya' ukum Allahmu luk idi bang paladmu ineh.

¹⁵Idi iko miak nguit amé' déi' amung amas idi pirak luk pangeh biré raca' idi amung lun tarehneh dengan ran niat kuan Allah lun Israil luk kuan Ruma' idi déi' Yerusalim.

¹⁶Idi teh iko miak nguit amung amas idi pirak luk lapenmu aput bawang Babil, dengan amung baré lun mula' idi baré imam luk birédeh kuan Ruma' Allahdeh déi' Yerusalim.

¹⁷"Idi dengan matar do'-do', do' iko melih sapi', dumba deléi, idi anak dumba ku usin ineh, idi maré akan, idi baré luk rupen, idi amung ineh barén luun bubpun luk bang Ruma' Allahmu déi' Yerusalim.

¹⁸Idi anun luk petulu kali'mu idi kinanak-kinanakmu luk ruen dengan amas idi pirak luk ela ineh, do' iko nganau' maya' pian Allahmu.

¹⁹Iamo' amung repapeh luk pangeh biré namu kuan Ruma' Allahmu ineh, do' iko maré pa kiung Allah déi' Yerusalim.

²⁰Idi anun luk petulu bang terawému barén kuan Ruma' Allahmu meluun ratnan ini, do' iko melih ineh ku usin luk dinug raca'.

²¹"Idi ui ngecuk amung lun rayeh luk ngimet usin bang bawang luk pa acep aco Abpa' Pirat, maré dengan mesaget amung-amung luk pinutuh Imam Esra, lun luk mileh ngelio ukum Allah Surga.

²²Iamo' aleg maré meluun ratnan 5,700 kati pirak, 5,200 gatang padé, 600 gilin abpa' anggur, 600 gilin umau saitun, iamo' tucu' pad pian maré mo'.

²³Idi anun-anun luk icuk Allah Surga ineh, do' nganau' ineh do'-do' kuan Ruma'Neh, pelé Tuhan na museh nan raca', anakneh, idi anak itinneh pana'.

²⁴Idi aleg muyuh ngalap pupuk idi acam ratnan imam, lun Liwi, lun luk menani, lun luk nginita tanga', lun duken luk ngakem bang Ruma' Allah, idi lun duken lun baken bang Ruma' Allah ineh.

²⁵Idi iko, O Esra, maya' ileh Allahmu luk namu ineh, do' ngikit lun luk mutut ukum idi lun rayeh luk ngimet nedeh ineh luk mutut ukum kuan amung lun luk pa acep aco Abpa' Pirat, ieh ineh amung lun luk kali' Ukum Allahmu. Idi idé luk na kali' Ukum ineh do' mada' nedeh.

²⁶Idi idé luk na maya' bala Allahmu idi bala raca' ineh, do' ieh kumin dengan mesaget, kian pitayen, talan rat bang bawang, binawehneh lapen, kian uen nutup lek."

²⁷Kebala Esra, "Amung ubur kuan Tuhan Allah tepun tau luk pangeh nengegio niat raca', pad ieh miak ngerayeh Ruma' Allah luk déi' Yerusalim ineh.

²⁸Ngaceku katu Allah, raca', amung tarehneh, idi lun rayeh-rayeh luk ngedengan neneh pangeh méi' negku. Idi teh Allah nemaré kuu' negku pad ui miak ngubuk tuda'-tuda' lun rayeh pupu Israil pelé ideh miak maya' negku amé' Yerusalim."

Esra 8

¹Idi ini ngadan amung lun rayeh inul luk tiban iné' bawang Babil, idi luk nuli' maya' ni Esra kareb imet Raca' Artasasta:

²⁻¹⁴Gersom, ratnan inul Pinihas Daniel, ratnan inul Itamar Hatus Sekania, ratnan inul Daud Sekaria ratnan inul Paros, dengan 150 burur deléi (luk inan ngadan inayud bang surat inul) Eliunai Serahia, ratnan inul Pahat Moab, dengan 200 burur deléi Sekaria Yahasiel, ratnan inul Satu, dengan 300 burur deléi Ebed Yonatan, ratnan inul Adin, dengan 50 burur deléi Yesaya Atalia, ratnan inul Elam, dengan 70 burur deléi Sebadia Mikail, ratnan inul Sepatia, dengan 80 burur deléi Obadia Yehil, ratnan inul Yoab, dengan 218 burur deléi Selomit Yosipia, ratnan inul Bani, dengan 160 burur deléi Sekaria Babai, ratnan inul Babai, dengan 28 burur deléi Yohanan Hakatan, ratnan inul Asgad, dengan 110 burur deléi Elipelet, Yuel, idi Semaya, ratnan inul Adonikam dengan 60 burur deléi (iamo' ideh nuli' mucu) Utai idi Sakur, ratnan inul Bigbai, dengan 70 burur deléi

¹⁵Ui nengamung nedeh i tangeb abang luk manud macing déi' Ahawa. Idi kai nelupo déi' teluh aco. Idi kareb ui nenier nelun mula, seburur pana' lun Liwi nateh nekali'ku arangdeh.

¹⁶Idi ui nengecuk nawar iwa' burur lun rayehdeh: Elieser, Ariel, Semaya, Elnatan, Yarib, Elnatan, Natan, Sekaria, idi Mesulam, idi teh dueh burur guru: Yoyarib idi Elnatan.

¹⁷Idi ui nengecuk nedeh amé' ni Ido lun rayeh déi' Kasipia, pad ngecuk neneh idi lun danganneh luk ngakem bang Ruma' Allah maré nekai tuda'-tuda' lun ngakem kuan Ruma' Allah kai.

¹⁸Idi ngaceku katu Allah, ideh nemaré kuan kai Serebia, seburur lun mileh, ieh ineh lun Liwi ratnan inul Mali, idi pulu' ualuh burur pupudeh nemaya' nedeh.

¹⁹Idi teh ideh nemaré Hasabia, idi Yesaya ratnan inul Merari, dengan dueh ngepulu' burur pupudeh.

²⁰Idi teh inan 220 burur lun duken bang Ruma' Allah. Tepundeh pangeh litep Daud idi tarehneh, pad ideh miak ngedengan nelun Liwi. Ngadan amung-amungdeh inayud.

²¹Idi ui nengelelep aco luk inan mawa' i tangeb Abang Ahaba, pad kai ngebeneh burur kai pa kiung Allah kai, idi pad mutuh Neneh nguyut nekai maya' dalam idi matar nekai, dengan anak-anak, aya', idi binaweh kai.

²²Ngaceku ui migu' mutuh inan raca' aceh baweh idi lun luk maya' kuda, pad ideh miak matar nekai ratnan amung bunu' arang dalam, ngaceku kebala kai inan raca', "Idi Allah kai, ngeperuan amung lemulun luk merapet Neneh, iamo' Ieh pelaba useh nelun luk teketed rat Neneh."

²³Idi ngaceku ineh kai mawa' idi nemutuh ratnan Allah kai. Idi Allah pana' nengua' putuh kai.

²⁴Idi ui nemili' pulu' dueh burur rat arang lun rayeh imam, ieh ineh Serebia, Hasabia, idi pulu' burur lun baken.

²⁵Idi ui nenimang kuandeh amung amas, pirak, idi repapeh, idi baré luk inuit kuan Ruma' Allah kai luk pangeh biré raca', tarehneh, lun rayehneh, idi amung lun Israil luk idi déi'.

²⁶⁻²⁷Ini luk biréku kuandeh: pirak -43,400 kati 100 repapeh pirak -114 kati amas -7,500 kati 20 bigan amas -13 kati 2 bigan tekaling luk do' luk mepad raga ku bigan amas

²⁸Idi kebalaku nedeh, "Muyuh ini meligan kuan Tuhan Allah tepuh muyuh. Kudeng ineh teh amung repapeh amas idi pirak luk inuit muyuh ku aceh baré dengan ran niat kuanNeh.

²⁹Matar idi nganug ineh pad macing kareb muyuh nimang neneh bang takep-takep imam, idi maré amung ineh kuan amung lun Liwi, idi lun rayeh pupu Israil déi' Yerusalim."

³⁰Idi amung imam idi lun Liwi ineh nengalap amung amas, pirak, idi repapeh ineh itendeh amé' Yerusalim, bang Ruma' Allah kai.

³¹Idi kai nenalan rat Abang Ahaba, pulu' dueh aco bulan aceh iné' Yerusalim. Idi Tuhan nengedengan nekai. Idi Ieh nematar nekai ratnan bunu', idi lun luk ngabang arang dalan.

³²Idi kai nacing déi' Yerusalim idi nengaco teluh aco.

³³Idi kareb aco luk keapat idi kai iné' déi' Ruma' Allah, idi kai nemaré amung amas, pirak, idi repapeh ineh bang palad Meremot Uria, imam ineh. Idi danganneh Eliasar Pinihas, idi dueh lun Liwi, ieh ineh Yosabad Yesua, idi Noadia Binui.

³⁴Idi amung binaweh ineh iniap idi tinimangdeh. Idi berat amung ineh pangeh inayud.

³⁵Idi lun luk tiban luk pangeh nuli' nemaré baré luk sabpen kuan Allah lun Israil, ieh ineh 12 sapi' deléi kuan amung lun Israil, 96 dumba deléi, 77 anak dumba, idi 12 amék ku ngeligan nedeh ratnan sala'. Amung ineh barén sabpen kuan Tuhan.

³⁶Idi ideh nenguit surat luk biré raca', idi nemaré ineh nelun tareh raca' idi kuan lun rayeh-rayeh rat pa acep aco Abpa' Pirat, pad ideh pana' nengedengan nelun Israil idi Ruma' Allah ineh.

Esra 9

¹Muci ratnan ineh idi sebuang lun rayeh Israil iné' matun negku, kebaladeh, "Pupu Israil dengan imam idi lun Liwi pana' na ngado bururdeh ratnan pupu luk pekelibut, ieh ineh lun Kanaani, lun Hiti, lun Prisi, lun Yebusi, lun Amon, lun Moab, lun Masir, idi lun Amori. Idi lun Israil nenganau' kekamen pupu ineh luk inan Tuhan megateh.

²Lun Yahudi pangeh nengalap decur pupu ineh ku awandeh, pad pupu Allah na meligan. Idi lun rayeh-rayeh pana' meluun sala'."

³Kareb ui neninger bala ini, idi ui nenarak ayungku, idi ui nemubput abpukku idi buluh adaku, idi ui netudo dengan dat niat.

⁴Idi amung lun luk matot ku bala Allah lun Israil, ngaceku sala' lun luk tiban luk pangeh nuli' ineh, nepamung negku, iano' ui netudo dengan dat niat pad macing ideh maré baré kareb malem aco.

⁵Idi kareb ideh nemaré baré malem, ui netumui ratnan mawa', dengan ayungku lun nedarak. Idi ui netekeradung. Idi ui nengegenang ticu'ku idi nesembayang inan Tuhan Allahku,

⁶kesembayangku, "O Allahku, ui pelaba igu', na ui mekuu' sium Namu, O Allahku. Ngaceku amung dat kai pangeh medita' ratnan uluh kai, idi amung sala' kai pangeh pebuun-pebuun macing i langit.

⁷Idi rat kareb tepun kai macing aco sini kai bang sala' rayeh. Ngaceku dat kai, kai idi raca'-raca' idi imam-imam kai pangeh biré bang palad raca'-raca' bawang baken, pad kai pinaté, tiban, inaro, idi inigu' macing nekini.

⁸Iamo' nekini mo' éi' Tuhan Allah kai pangeh megala', idi Ieh pian muit tuda'-tuda' lun kai luk ketecan, idi pian maré nekai aceh babpat bang su luk meligan ini, pad Allah kai ngeperuan nekai, idi ngulun nekai ratnan dereh kai.

⁹Ngaceku kai ini demulun atun. Iamo' bang dereh ineh na Allah kai necan nekai. Iamo' Ieh nengegala' awaNeh luk lutep kuan kai pa kiung raca'-raca' Parsi, idi Ieh nengulun nekai, pad kai miak mudut Ruma' Allah kai idi ngedo' amung luk netabpa, pad kai do' udeng bang libung luk mereben déi' Yahuda idi déi' Yerusalim.

¹⁰"Idi nekini, anunké luk miak belén kai, O Allah kai? Ngaceku kai pangeh nenecan amung balaMu,

¹¹luk pangeh bida'Mu dengan tang lun dukenMu, ieh ineh amung nabi, kebaladeh, 'Idi bawang luk ulek muyuh ineh, idi luk lapen muyuh ku babpat muyuh, ieh ineh tana' luk melutak ngaceku lutak amung pupu bang bawang ineh ngaceku ratnan amung kekamendeh luk inan Tuhan megateh idi lutakdeh maput bawang.

¹²Idi ngaceku ineh aleg muyuh ngaweh decur ineh. Aleg muyuh ngacing do' kuandeh macing raked-raked, pelé muyuh mangun metueh idi kuman uli' tana' ineh, idi miak maré ineh ku babpat anak-anak muyuh macing raked-raked.'

¹³Idi ngaceku ratnan amung-amung luk pangeh nangun nekai ngaceku amung sala' idi kekamen kai luk dat, idi kai kali' O Allah, ukum luk biréMu nekai na petap nan kekamen kai luk dat, idi Iko pangeh nenima' nekai mulun teh.

¹⁴Miakké kai lemubed ngelaba ukumMu, idi ngaweh pupu luk melutak ineh? Naké Iko museh nekai macing kai pitayen, pad seburur pana' nateh ketecan?

¹⁵O Tuhan Allah lun Israil, Iko meluun mesiri. Iamo' Iko pangeh nemuit nekai. Kai ngamo sala' kai pa kiungMu. Kai na mayu amé' pa kiungMu."

Esra 10

¹Idi laba' Esra tekeradung idi sembayang dengan nangi' idi ngamo sala' pa atun Ruma' Allah, mula' lun deléi, decur, idi anak-anak rat nelun Israil, nepamung neneh idi nenangi'.

- ²Idi kebala Sekania Yehil, rat inul Elam ni Esra, "Pelaba rayeh sala' kai inan Allah kai ngaceku kai pangeh nengaweh decur-decur ratnan pupu baken. Iamo' sagan tu pana' kudeng ineh inan rapet kuan Israil.
- ³Do' kai pejani' inan Allah kai, ratnan kai miak ngelegkan amung decur ini dengan amung anak luk tinganakdeh, maya' balamu idi amung lun luk matot ku bala Allah kai, idi do' kai nganau' ineh petulu ku ukum Allah.
- ⁴Tuped iko, ngaceku iko kuan kekamen ini, idi amung kai ngedengan namu. Do' iko metueh, idi nganau' kekamen ini."
- ⁵Idi Esra nengecuk amung lun rayeh arang imam idi lun Liwi, idi amung lun Israil pana' pebulung pad ideh maya' bala Sekania ini.
- ⁶Pangeh ineh idi Esra nenalan rat pa atun Ruma' Allah, idi nesemuet bang takep Yohanan Eliasib. Idi ieh nenangi' kedangan-kedangan, idi na ieh nekuman idi nengirup pana', ngaceku ieh dat niat ku sala' amung lun luk tiban luk pangeh nuli' ineh.
- ⁷Idi ideh nemaré bala aput bawang Yahuda idi déi' Yerusalim kuan amung lun luk tiban luk nuli' ineh, pad ideh pamung déi' Yerusalim.
- ⁸Idé luk na macing déi' bang teluh aco ineh, maya' bala amung lun rayeh idi lun ngimet ineh, idi amung binawehdeh ineh miak talan, idi ieh sebuleng pana' miak uen ngatad ratnan tebubpun lun luk tiban ineh.
- ⁹Idi pangeh teluh aco amung deléi' rat nelun Yahuda idi Benjamin nepamung déi' Yerusalim, ieh ineh dueh ngepulu' aco bulan iwa', idi amungdeh ineh nepamung i natad pa atun Ruma' Allah dengan megegker, ngaceku sala' ini idi ngaceku udan luk mula'.
- ¹⁰Idi Imam Esra nudur, idi kebalaneh nedeh, "Idi meluun rayeh sala' muyuh ngaceku muyuh nengaweh decur pupu baken, idi kudeng ineh teh muyuh ngula' sala lun Israil.
- ¹¹Iamo' nekini do' muyuh ngamo sala' pa kiung Tuhan Allah tepun muyuh, idi do' muyuh nganau' luk pinianNeh. Idi ngado burur muyuh ratnan pupu bawang ini, idi ratnan decur pupu baken."

¹²Idi kebala lun mula' ineh dengan rayeh arod, "Kai miak nganau' anun-anun luk dukenmu.

¹³Iamo' kai pelaba ula', idi teh mula' udan. Kai na miak tuped déi' liang. Idi baken ieh ineh kekamen seaco idi dueh aco, ngaceku meluun ula' kai luk pangeh nenganau' sala' ini.

¹⁴Do' amung lun rayeh ketecan déi' Yerusalim idi ngatur lawé ini. Idi idé-idé bang bawang kai luk pangeh nengaweh decur pupu baken do' ideh macing bang kareb luk litep idi dengandeh amung lun luk mutut ukum, idi lun rayeh rat anid-anid bawang, pad ngagka' useh Allah ngaceku sala' ini."

¹⁵Idi Yonatan Asahel idi Yasia Tikua na sikal maya', idi Mesulam idi Sabetai lun Liwi nengedengan nedidueh ineh.

¹⁶Lun luk tiban luk nuli' ineh nemaya' luk litep. Idi Esra nemili' tuda'-tuda' burur, amungdeh lun rayeh inul. Idi ieh nengayud ngadandeh. Idi ideh nengimun ngelio ratnan amung aweh ineh aceh aco bulan pulu'.

¹⁷Idi ideh nemangeh amung gayamdeh ratnan luk nengaweh decur pupu baken ineh aceh aco bulan aceh.

¹⁸⁻⁴⁴Ini ngadan lun luk inan awan pupu baken: Imam, maya' inuldeh: Inul Yesua idi kinanak-kinanakneh, ieh ineh anak Yosadak: Masia, Elieser, Yarib, idi Gedalia. Ideh nepejani' ngelegkan awandeh, idi ideh nemaré sebuleng dumba deléi ku baré ngaceku sala'. Inul Imer: Hanani idi Sebadia Inul Harim: Masia, Elia, Semaya, Yehil, idi Usia Inul Pasur: Elionai, Masia, Ismail, Netanel, Yosabad, idi Elasa Lun Liwi Yosabad, Simi, Kelaya (luk titen Kelita), Pelaya, Yahuda, idi Elieser Lun luk menani: Eliasib Lun luk nginita Ruma' Allah: Salum, Telem, idi Uri Lun Israil luk baken: Inul Paros: Ramia, Isia, Malkia, Miamin, Eliasar, Malkia, idi Benaya Inul Elam: Matania, Sekaria, Yehil, Abdi, Yeremot, idi Elia Inul Satu: Eliunai, Eliasib, Matania, Yeremot, Sabad, idi Asisa Inul Babai: Yohanan, Hanania, Sabai, idi Atlai Inul Bani: Mesulam, Maluk, Adaya, Yasub, Sial, idi Yeremot Inul Pahat Moab: Adna, Kelal, Benaya, Masia, Matania, Besalel, Binui, idi Manasé Inul Harim: Elieser, Isia, Malkia, Semaya, Simion, Beniamin, Maluk, idi Samaria Inul Hasum:

Matenai, Matata, Sabad, Elipelet, Yeremai, Manasé, idi Simi Inul Bani: Madai, Amram, Uel, Benaya, Bedaya, Keluhi, Benia, Meremot, Eliasib, Matania, Matenai, idi Yasu Inul Binui: Simi, Selemia, Natan, Adaya, Maknadebai, Sasai, Sarai, Asarel, Selemia, Semaria, Salum, Amaria, idi Yusup Inul Nebo: Yiel Matitia, Sabad, Sebina, Yadai, Yoel, idi Benaya Amungdeh ini pangeh nengaweh decur pupu baken. Idi ideh nengelegkan nedeh dengan anakdeh.

Nehemia

Nehemia 1

¹Idi ini bala ratnan kekamen Nehemia, anak Hakalia. Kareb ui déi' bawang Susa, ieh ineh bawang rayeh, bang bulan Kisleb bang lak luk kedueh ngepulu',

²idi Hanani, seburur kinanakku nacing dengan tuda'-tuda' burur lun rat déi' Yahuda. Idi ui nengitun nedeh ratnan lun Yahudi luk neketecan idi luk nepuit ratnan bawang luk inandeh tiban, idi ratnan bawang Yerusalim teh.

³Idi kebaladeh negku, "Lun luk neketecan bang bawang ineh luk nepuit ratnan bawang luk inandeh tiban ineh, ideh ineh pelaba susa' idi migu'. Idi teh libung luk meraben déi' Yerusalim pangeh tibpa idi amung tanga'neh pana' iseb."

⁴Kareb ui neninger bala ini, idi ui netudo idi nenangi'. Idi ui netemido tuda'-tuda' aco. Idi ui mawa' na kuman idi nesembayang pa kiung Allah Surga,

⁵kesembayangku, "O Tuhan Allah Surga, Allah luk meluun rayeh idi luk inan matot! Iko lutep maya' jani' idi mawa nelun luk mawa Namu, idi luk maya' amung ukumMu.

⁶Do' iko ngaten lalid idi matehMu, idi ninger sembayang demulunMu, luk sembayang pa kiungMu tebaco kedangan idi mutuh kuan demulunMu, lun pupu Israil, pad kai ngamo sala' kai Namu. Ngaceku amung uang tetek ruma' tepun kai pangeh menganau' sala'.

⁷Kai mesala' pa kiungMu, ngaceku kai na nemaya' ukum, bada', idi dalam luk biréMu ini Musa, demulunMu ineh.

⁸Ngerawé bala luk biréMu ni Musa, 'Kudeng muyuh lun Israil na lutep maya' Negku, Ui miak ngatad nemuyuh amé' arang pupu baken.

⁹Iamo' kudeng muyuh lumi Negku idi maya' amung ukumKu, Ui miak ngamung nemuyuh luk pangeh pitad macing iring tana', idi nguit nemuyuh muli' amé' inan bawang luk pinili'Ku mangun ku su luk inan lemulun sembayang Negku.'

¹⁰O Tuhan ideh ineh demulunMu idi pupuMu, luk pangeh inuli'Mu ku laludMu luk rayeh idi tiku'Mu luk metueh.

¹¹O Tuhan, ninger sembayangku, idi sembayang amung demulunMu luk matot ku ngadanMu. Idi maré peruan negku bang aco sini, idi ngegio niat raca' pad ieh méi' negku."

Nehemia 2

¹Kareb ineh ui ini lun rayeh lun luk nguit luk rupen kuan raca. Idi bang bulan Nisan bang lak luk kedueh ngepulu' bang imet Raca' Artasasta, kareb ieh kuman, idi ui nenguit abpa' anggur kuan raca' ineh. Idi kareb ui tuped pa kiungneh, ui pelaba dat niat.

²Idi kebala raca' negku, "Ngudeh iko dat niat? Ngaceku na iko mét. Iko dat niat mo'." Idi ui pelaba tot.

³Idi kebalaku kuan raca', "Do' raca' mipu ulun! Kali' rungen ui dat niat, ngaceku bawang su luk inan tanem tepunku inusag, idi tanga' bawang pana' pangeh iseb."

⁴Idi kebala raca' negku, "Anun luk pianmu negku?" Idi ui nesembayang inan Allah Surga.

⁵Idi ui nengor bala raca', "Kudeng petulu pa kiung raca' idi kudeng iko méi' negku, do' maré negku amé' déi' Yahuda, ieh ineh bawang su luk inan tanem tepunku ineh, pad ui miak mudut bawang ineh baruh."

⁶Idi kebala raca' negku (idi raca' decur tudo iringneh,) "Anun kinio lawému, idi iko muli?" Idi raca' nengecuk negku nalan. Idi ui nengelelep kinioneh.

⁷Idi kebalaku inan rica', "Kudeng petulu pa kiungmu, do raca maré tuda'-tuda' surat kuan amung lun rayeh bawang déi' dipar Abpa' Pirat, pad ideh maré negku lemaba bawangdeh, pelé ui macing déi' Yahuda,

⁸idi aceh surat kuan Asap, lun luk nginita pulung raca', pad ieh maré kayuh ku atang tanga' su luk meraben iring Ruma' Allah, idi teh ku libung luk

meraben déi' bawang Yerusalim, idi teh ku ruma'ku sebuleng." Idi raca' nemaré luk pinutuhku, ngaceku Allahku nengedengan negku.

⁹Idi ui iné' inan lun rayeh bawang déi' dipar Abpa' Pirat, idi ui nemaré amung surat raca' ineh nedeh. Idi raca' pangeh nemaré tuda'-tuda' lun rayeh baweh idi lun luk maya' kuda nemaya' negku.

¹⁰Iamo' kareb Sanbalat, lun Bait Horon, idi Tobia, lun duken lun Amon, nekali' bala ineh, idi didueh pelaba dat niat, ngaceku inan seburur lun nacing sikal nganau' luk do' kuan lun pupu Israil.

¹¹Idi kareb ui nacing déi' Yerusalim, idi ui netudo teluh aco.

¹²Idi ui netumui tangal dacem dengan tuda'-tuda' lun denganku, idi na ui nemada' luk bida' Allah bang niatku, ratnan luk ruenku kuan Yerusalim, idi na keladai baken ratnan luk pakaiku.

¹³Idi ui neremuat maya' Tanga' Ruan macing Subuk Galau idi Tanga' Téi', idi ui nenier libung Yerusalim luk pangeh tibpa idi teh amung tanga'neh luk pangeh iseb.

¹⁴Idi ui nenalan macing Tanga' Bued Abpa' idi teh macing Takung Raca', iamo' na luk idi dalan kuan keladaiku.

¹⁵Idi malem ineh teh ui nemaya' ruan idi nenier libung ineh. Pangeh ineh idi ui nelemubed maya' Tanga' Ruan ineh.

¹⁶Idi lun rayeh-rayeh na nekali' ratnan lawéku idi luk inau'Ku. Idi nateh ui nemada' nelun Yahudi, ieh ineh lun imam, lun luk ngimet, lun luk rayeh, idi lun mula' luk miak nganau' kekamen ineh.

¹⁷Idi kebalaku nedeh, "Muyuh kali' susa' tau ratnan Yerusalim pangeh inusag idi tanga'neh pangeh iseb. Do' tau mudut libung luk meraben déi' Yerusalim pad tau na migu'."

¹⁸Idi ui nemada' nedeh ratnan kudeng afeh Allah pangeh nengeperuan negku, idi teh ratnan bala raca' negku. Idi kebaladeh, "Do' tau amé' mudut ineh baruh." Idi ideh nengimun ngakem dengan ran niat.

¹⁹Iamo' kareb Sanbalat, Tobia, idi Gesan lun Arab nekali' bala ineh, idi ideh nesitunga nekai, kebaladeh, "Anunké luk ruen muyuh? Muyuh pian metueh ratnan raca'ké?"

²⁰Idi ui nengor baladeh, "Allah Surga miak ngeperuan nekai, idi kai luk demulunNeh miak mudut libung ineh, iamo' muyuh na babpat, idi na lalud, idi na miak teruayen déi' Yerusalim."

Nehemia 3

¹Idi Eliasib, Imam Rayeh nengimun mudut Tanga' Dumba dengan imam-imam luk baken. Idi ideh nesembayang ku ineh idi nenganau' itekneh. Ideh nemudut ineh baruh macing Pudut luk Medita' lu titen Ratu, idi teh macing Pudut luk Medita' luk titen Hananel.

²Idi lun Yeriko nemudut iring Eliasib. Idi Sakur Imri nemudut iring lun Yeriko.

³Idi pupu Hasena nemudut Tanga' Lawid. Ideh nenganau' atangneh, idi itekneh dengan palinneh.

⁴Idi lun luk iringneh, Meremot, anak Uria Hakos nemudut. Idi lun luk iringneh, Mesulam, anak Berekia Mesesabel nemudut. Idi lun luk iringneh, Saduk Bana nemudut.

⁵Idi lun luk iringneh, lun Tekoa nemudut ineh. Iamo' lun rayehdeh ara' metueh ngakem kuan tuandeh.

⁶Idi Yoyada Pasia, idi Mesulam Besodia nemudut Tanga' Mon. Idi didueh nenganau' atangneh, idi itekneh dengan palinneh.

⁷Idi lun luk iringdeh, Melatia lun Gibion idi Yaden lun Meronot, lun Gibion idi lun Mispas nemudut macing ruma' lun rayeh bawang par tungé' Abpa' Pirat.

⁸Idi lun luk iringdeh, Usiel Haraya, lun luk tukang amas nemudut. Idi lun luk iringneh, Hanania, lun luk nganau' luk do' buen nemudut macing nan Libung Rayeh.

- ⁹Idi lun luk iringneh, Repaya Hur, ieh ineh lun rayeh setangal bawang Yerusalim, nemudut.
- ¹⁰Idi lun luk iringneh, Yedaya Harumap nemudut libung luk muneng ku ruma'neh. Idi lun luk iringneh, Hatus Hasabenia nemudut.
- ¹¹Malkia Harim idi Hasub anak Pahat Moab nemudut aceh babpat libung, idi teh Pudut luk Medita' luk titen Tetel.
- ¹²Idi lun luk iring didueh, Salum Haloes, ieh ineh lun rayeh setangal bawang Yerusalim nemudut dengan anak-anakneh luk decur.
- ¹³Hanun idi lun bang bawang Sanua nemudut Tanga' Ruan. Idi ideh nemudut tanga' ineh baruh, idi nenganau' itekneh idi palinneh, idi nemudut baruh 250 depeh libung ineh macing Tanga' Téi'.
- ¹⁴Malkia Rekab, lun rayeh bawang Bait Kerim nemudut baruh Tanga' Téi' idi nenganau' itekneh idi palinneh.
- ¹⁵Idi Salum Kolosi, lun rayeh bawang Mispá nemudut baruh Tanga' Bued Apba'. Idi ieh nenganau' aponeh, itekneh, idi palinneh. Idi ieh nemudut ar Takung Sila luk bang kabun raca', macing ican batu luk dalan temurun rat Bawang Daud.
- ¹⁶Idi lun luk iringneh, Nehemia anak Asbuk, lun rayeh setangal bawang Baitsur nemudut macing su luk petutup ku tanem Raca' Daud, idi macing ku takung luk inau' lemulun idi ruma' lun luk metueh.
- ¹⁷Idi lun luk iring Nehemia Asbuk, ieh ineh lun Liwi: Rehum Bani nemudut su ineh. Idi lun luk iringneh, Hasabia, lun luk rayeh setangal bawang Kila, nemudut kuan bawangneh.
- ¹⁸Idi lun luk iringneh, Babai Henadad, lun rayeh setangal bawang Kila nemudut.
- ¹⁹Idi lun luk iringneh, Eser Yesua, lun rayeh bawang Mispá, nemudut aceh babpat libung luk petutup ku ican luk dalan mudik amé' ruma' su luk inan nganug ayung pebunu' déi' lidung.

- ²⁰Idi lun luk iringneh, Baruk Sabai nemudut aceh babpat libung macing munung tanga' ruma' Eliasib, Imam Rayeh ineh.
- ²¹Idi lun luk iringneh, Meremot, anak Uria Hakos, nemudut babpat libung rat munung tanga' ruma' Eliasib macing papedneh selipa.
- ²²Idi ini ngadan imam-imam luk ngedengan nedeh mudut libung: Idi lun luk iring Meremot, ieh ineh imam-imam.
- ²³Beniamin idi Hasub nemudut aceh babpat libung luk petutup ku ruma' didueh ineh. Idi lun luk iring didueh, Asaria anak Masia Anania nemudut aceh babpat libung iring ruma'neh sebuleng.
- ²⁴Idi lun luk iringneh, Binui Henadad nemudut aceh babpat libung rat ruma' Asaria macing ku lidung libung.
- ²⁵⁻²⁶Idi Palal Usi nemudut aceh babpat libung luk petutup ku lidung idi pudut luk medita' luk pa luun ruma' raca', idi luk luun natad lun luk nginita ruma'. Idi lun luk iringneh, Pedaya Paros nemudut aceh babpat macing su luk petutup ku Tanga' Abpa' pa busat aco idi pudut luk medita' ineh. (Ieh ineh muneng ku babpat bawang luk titen Opel, su luk inan lun duken bang Ruma' Allah tudo.)
- ²⁷Idi lun luk iringneh, lun Tekoa nemudut babpat libungdeh luk kedueh, ieh ineh rat su luk petutup ku pudut luk medita luk matar Ruma' Allah macing ku libung Opel.
- ²⁸Rat Tanga' Kuda anid-anid imam nemudut aceh babpat libung luk petutup ku ruma'neh sebuleng.
- ²⁹Idi lun luk iringdeh, Saduk Imer nemudut libung luk petutup ku ruma'neh sebuleng Idi lun luk iringneh, Semaya Sekania, lun luk nginita Tanga' Pa Busat Aco nemudut.
- ³⁰Idi lun luk iringneh, Hanania Selemia, idi Hanun anak Salap luk keanem nemudut babpatdeh luk kedueh. Idi lun luk iringneh Mesulam Berekia nemudut libung luk petutup ku takepneh.

³¹Idi lun luk iringneh, Malkia, seburur lun luk tukang amas, nemudut libung macing ku ruma' lun duken bang Ruma' Allah, idi teh ruma' lun luk pepua', luk petutup ku Tanga' luk Inan Ngamung idi macing su takep luk pa luun lidung.

³²Idi amung tukang amas idi lun luk pepua' nemudut arang takep luk pa luun lidung ineh idi teh Tanga' Dumba.

Nehemia 4

¹Idi kareb Sanbalat neninger bala ratnan kai mudut libung ineh, idi ieh pelaba gateh niat, idi ieh nesitunga nekai lun Yahudi.

²Idi kebala Sanbalat pa kiung lun rurunneh di baweh lun Samaria, "Anun luk ruen lun Yahudi luk melaya' ineh? Miakké ideh mudut bawang ineh baruh? Miakké ideh maré baré idi mangeh kekamen ineh bang seaco mo'? Miakké ideh nganau' batu luk do' ratnan teceh batu luk neseb teh?"

³Idi kebala Tobia, lun Amon luk tuped iringneh, "Anunké luk pidutendeh? Kudeng inan bungalé manad libung batu ineh kali' rungen ineh metabpa!"

⁴Idi ui ini Nehemia nesembayang, kesembayangku, "O Allah kai, ninger, ngaceku kai ini luk inandeh situnga. Do' ngelubed kuyodeh amé' luun bururdeh sebuleng, pad ideh pana' tebanen idi uen ngaro.

⁵Aleg maré do' ku sala'deh, idi aleg ngiu' sala'deh, ngaceku ideh pangéh nengeruat usehMu pa kiung kai luk mudut ini."

⁶Idi kai nemudut libung ineh, idi amung libung ineh tinutum pad macing setangal dita'neh. Ngaceku lun mula' ineh metueh ngakem.

⁷Iamo' kareb Sanbalat, Tobia, lun Arab, lun Amon, idi lun Asdod neninger bala ratnan kai nemudut libung Yerusalim idi nengedo' luk pangéh inusag ineh, idi ideh pelaba useh.

⁸Idi ideh neperurum sikal metueh rat nelun Yerusalim idi ngagau bawang ineh.

- ⁹Idi kai nesembayang pa kiung Allah kai, idi nematar bawang Yerusalim tebaco kedangan.
- ¹⁰Iamo' lun Yahuda inan aceh nani, kenanideh, "Kai na miak mudut libung ini aco sini, Ngaceku lun luk ngakem ineh melaya', Idi mula' arap teh."
- ¹¹Idi kebala bunu' kai, "Kudeng kai semuet arangdeh idi ngaté nedeh idi ngangka' kekamen ineh, kali' rungen ideh na kali' nekai."
- ¹²Kareb lun Yahudi luk tudo arangdeh macing, ideh megéi pebala, "Ideh miak amé' pebunu' nekai ratnan anid-anid bawangdeh."
- ¹³Ngaceku ineh ui nengelestep nelun mula' ineh, maya' tetek ruma'deh, dengan pelapet, busu, idi binordeh, su libung luk nateh nepangeh.
- ¹⁴Idi ui nekali' lun mula' ineh merapang, idi kebalaku kuan lun rayehdeh, "Aleg matot ku bunu' tau. Do' ngerawé Tuhan luk meluun rayeh idi luk inan matot, idi pebunu' ku libal kinanak muyuh, anak muyuh, awan muyuh, idi ruma' muyuh."
- ¹⁵Kareb bunu' kai nekali' kai neninger ratnan terawédeh idi ratnan Allah pangéh nengusag luk tirawédeh ineh, idi amung kai nelemubed mudut libung ineh.
- ¹⁶Rat pad sineh sebuang lun dukenku nemudut libung idi sebuang nengimet busu, utap, binor, idi ayung pebunu'. Idi amung lun rayeh lun Yahuda nengedengan anak itindeh
- ¹⁷luk mudut libung ineh. Idi lun luk maan ngimet luk panendeh ku ticu'deh selipa, idi selipa ngimet pelapet.
- ¹⁸Idi anid lun luk mudut libung ineh ngabin pelapet. Idi lun luk ngiup serupit tuped iringku.
- ¹⁹Idi kebalaku kuan lun rayeh-rayeh idi lun mula', "Kekamen tau ini rayeh, idi mado arang tau, idi tau urap luun libung ini.
- ²⁰Kudeng muyuh ninger uni serupit, do' muyuh amé' negku. Allah tau miak pebunu' kuan tau."

²¹Idi kai metueh ngakem, idi sebuangdeh ngimet busu rat masat aco macing acep aco.

²²Idi kebalaku kuan lun mula' kareb ineh teh, "Do' anid-anid lemulun idi lun dukenneh tudo tungé' Yerusalim anid alem, pad ideh matar netau medacem, idi maco ideh ngakem."

²³Ngaceku ineh ui idi lun rurumku, lun dukenku, idi lun luk matar luk maya' negku na miak lungu ratnan ayung tau. Idi anid burur tau temina' ku repapeh pebunu'.

Nehemia 5

¹Muci ratnan ineh mula' deléi idi decur lun Yahudi medureng arangdeh sebuleng.

²Idi kebala sebuangdeh, "Mula' kai bang tetek ruma' kai. Na kai miak mulun kudeng na petap padé'."

³Idi kebala lun baken, "Kai pangeh nemaré lati', kabun anggur, idi ruma' kai ku duduk, pad kai ngalap padé idi na maté'."

⁴Idi kebala lun baken teh, "Na miak na kai ngabit usin, pad kai ngua' acam lati' idi kabun anggur kai kuan raca'.

⁵Petulu kai ngalap amung-amung luk lapen lun Yahudi luk baken. Anak kai mepad do' kudeng anakdeh. Iamo' na miak na anak kai mangun ku demulun. Sebuang anak kai luk decur pangeh pinasui mangun ku demulun. Kai pelaba laya' ngaceku lati' idi kabun anggur kai pangeh ilap rat nekai."

⁶Kareb ui ini Nehemia neninger baladeh luk medureng, idi ui megateh niat,

⁷pad ui nengayud nelun rayeh-rayeh, kebalaku, "Muyuh ngedereh kinanak-kinanak muyuh!" Idi ui nengamung nelun mula', pad kai miak mutut ratnan susa' ini,

⁸kebalaku, "Maya tueh tau, tau pangeh nenguli' kinanak tau lun Yahudi luk pangeh pinasui mangun ku demulun pupu baken. Nekini muyuh mesaad, pad

kinanak muyuh sebuleng pisuen kuan lun Yahudi luk baken!" Lun rayeh-rayeh ineh nepirud, ngaceku na luk miak beléndeh.

⁹Idi kebalaku teh, "Sala' luk ruen muyuh ineh! Petulu muyuh matot inan Allah idi nganau' luk matu, pad bunu' tau lun pupu baken na miak situnga netau.

¹⁰Ui nenima' nelun mula' ngabit usin idi padé pana' rat negku. Idi kudeng ineh teh lun rorumku idi lun dukenku. Idi rat pad sini do' tau na mupud baleh.

¹¹Idi do' tau maré lemubed lati', kabun anggur, kabung saitun, idi teh ruma'deh. Do' ngagka' balehdeh nemuyuh — usin, padé, abpa' anggur, idi umau pana'."

¹²Idi lun rayeh-rayeh nengor balaku, "Miak kai maya' balamu, idi maré amung binaweh ineh lemubed, idi na mupud baleh." Idi ui nenawar amung imam idi nengecuk nelun rayeh-rayeh ineh pebulung pad ideh maya' jani'deh.

¹³Idi ui nenaka abet awa'ku idi nengegkar idi, kebalaku, "Kudeng ineh teh Allah miak ngegkar idé-idé rat arang muyuh luk na maya' jani'neh ineh. Allah miak ngalap ruma' muyuh idi amung-amung binaweh muyuh, pad na luk ketecan nemuyuh." Idi amung-amungdeh nepebala, "Amin!" Idi ideh nengubur Tuhan. Idi ideh nemaya' jani'deh ineh.

¹⁴Ruked pulu' dueh lak kareb ui pengulu déi' tana' Yahuda, ieh ineh rat lak luk kedueh ngepulu' kareb imet Artasasta macing lak luk keteluh ngepulu' dueh bang imetneh, ui idi pupuku na nekuman akan luk kuan pengulu.

¹⁵Pengulu-pengulu luk ngimet atun rat negku mangun ku aceh babeh luk meberat kuan lun mula' ngaceku ideh nemutuh apat ngepulu' balad pirak seaco ku melihdeh akan idi abpa' anggur. Demulundeh pana' nengedereh nelun mula'. Iamo' na ui nenganau' kudeng ineh, ngaceku ui matot inan Allah.

¹⁶Ui mekél dengan amung tuehku mudut libung ineh. Idi na ui nengalap sesuut tana' pana'. Amung-amung lun dukenku peruyung mudut denganku.

¹⁷Ui megéi' maré akan kuan meratu limeh ngepulu' lun Yahudi idi lun rayeh-rayehdeh, dengan amung lemulun luk iné' negku rat bawang luk libut-libut Yerusalim.

¹⁸Anid-anid aco ui ngeret sebuleng sapi', anem dumba luk melamu, idi teh mula' lal. Idi anid-anid pulu' aco ui maré abpa' anggur luk mebaruh. Sagan tu pana' kudeng ineh nateh ui nemutih tabpar pengulu, ngaceku babeh lun mula' ineh pelaba berat.

¹⁹Kesembayangku, O Allah, ui mutuh Namu ngerawé kekamenku luk do' kuan pupu ini.

Nehemia 6

¹Sanbalat, Tobia, Gesem, idi bunu' tau luk baken neninger bala ratnan kai pangeh nemangeh kekamen mudut libung, idi sebuleng song pana' nateh luk ketecan. (Iamo' nateh kai nenganau' itek tanga'.)

²Sanbalat idi Gesem neneteng negku papu' nedidueh bang aceh bawang déi' luun Raked Ono. Iamo' didueh pian naluk negku.

³Idi ui nengecuk nelun dukenku mada' nedidueh, kebaladeh, "Nehemia uned nganau' aceh kekamen luk rayeh, idi na ieh miak ucu' pad amé' papu' nemedueh."

⁴Apat kua' didueh neneteng negku, idi anid kua' ui nengor bala didueh kudeng ineh.

⁵Idi Sanbalat neneteng negku luk kelimeh kua'. Idi ieh nemaré surat luk na ebpu, iten seburur demulunneh.

⁶Kebaladeh: "Kebala Gesem, 'Lun pupu baken luk libut-libut Yerusalim mala, iko idi lun Yahudi sikal metueh ratnan raca' Babil, idi ini punneh muyuh nemudut libung ineh baruh. Idi teh iko pian mangun ku raca'.

⁷Idi teh iko pangeh nengecuk tuda'-tuda' nabi mada' déi' Yerusalim ratnan iko mangun ku raca' Yahuda.' Kali' rungen raca' Babil miak ninger bala ini, idi do' kiteh papu' idi pegayam ratnan ineh."

- ⁸Idi ui nemaré bala neneh, "Amung bala luk bang suratmu ineh na matu. Iko mebalih mo'."
- ⁹Ideh sikal ngatot nekai, pad kai ugka' ngakem. Iamo' kesembayangku, "Nekini, Allah, ngetueh negku!"
- ¹⁰Kareb ineh Semaya, anak Delaya Metabel na miak mepai, idi ui iné' ngikak neneh. Idi kebalaneh negku, "Do' kiteh sigapung bang Su luk Meligan déi' bang Ruma' Allah, idi ngitek tanga', ngaceku ideh pian amé' ngaté namu. Ideh macing kareb medacem sikal ngaté namu."
- ¹¹Idi kebalaku, "Na ui seburur lemulun luk pian sigapung. Miakké ui ngulun bururku idi sigapung bang Ruma' Allah? Na tu-tu!"
- ¹²Kareb ui nengerawé ratnan bala Metabel, idi ui kali' baken Allah luk nepebala neneh, iamo' Tobia idi Sanbalat luk pangeh nemaré usin kuanneh, pad ieh naluk negku.
- ¹³Didueh nenabpar neneh, pad ieh ngatot negku pelé ui nganau' sala'. Ideh pian ngigu' negku pa kiung lun baken.
- ¹⁴Idi kesembayangku, "O Allah, ngerawé kekamen Tobia idi Sanbalat, idi ngukum nedidueh. Idi ngerawé nabi decur Nodia, idi teh amung nabi baken luk sikal ngatot negku."
- ¹⁵Pangeh kai nengakem limeh ngepulu' dueh aco, idi kai nemangeh libung ineh, ieh ineh dueh ngepulu' limeh aco bulan Elul.
- ¹⁶Kareb bunu' kai luk libut-libut Yerusalim nekali' bala ineh, idi ideh migu', ngaceku amung-amung lemulun kali' idi kekamen ineh pangeh inau' ngaceku pedengan ratnan Allah.
- ¹⁷Ruked kai ngakem, lun rayeh-rayeh Yahudi idi Tobia pebaré surat.
- ¹⁸Mula' lun Yahuda bang rorum Tobia, ngaceku ieh iban Sekania Ara. Meluun teh, anakneh Yohanan pangeh nengaweh anak decur Mesulam Berekia.
- ¹⁹Lun Yahuda ineh megéi' mada' negku ratnan kekamen Tobia luk do'. Idi ideh ngatum balaku neneh. Idi na ieh ugka' maré surat sikal ngatot negku.

Nehemia 7

¹Idi nekini libung pangeh pinudut baruh. Amung itek tanga' pana' pangeh inau'. Lun luk nginita Ruma' Allah, lun luk menani, idi lun Liwi pangeh nengimun ngakem.

²Idi ui nengecuk dueh burur ngimet bawang Yerusalim: kinanakku Hanani, idi Hanania luk lun rayeh baweh. Hanania ineh seburur lemulun luk inan merapet idi luk meluun matot inan Allah.

³Ui nemebpeng nedidueh na miak ngukab tanga' Yerusalim kareb nateh mudik aco. Idi do' tanga' ineh uen ngitek kareb nateh lun luk nginita bawang ineh muli' kareb aco macep. Idi teh ui nengecuk nedidueh ngelelep lun luk nginita bawang rat arang lemulun luk tudo bang bawang Yerusalim. Sebuangdeh miak lutep bang aceh kekamen, idi sebuangdeh miak nalan-nalan matar bawang iring ruma'deh.

⁴Bawang Yerusalim ineh rayeh, iamo' na mula' lemulun luk tudo su ineh, idi ruma' pana' nateh mula'.

⁵Allah nengegio niatku pad ui nengamung nelun mula' dengan lun rayeh-rayehdeh, pad ui nier surat inuldeh. Ui nengalap surat inul lemulun luk pun nuli' rat bawang su luk inandeh tiban. Idi ini luk nekali'ku.

⁶Mula' lemulun rat bawang Yahuda pangeh nuli' rat bawang su luk inandeh tiban Nebukadnesar, raca' Babil. Anid-anid bururdeh nuli' iné' bawangneh sebuleng, ieh ineh Yerusalim idi bawang baken luk déi' Yahuda.

⁷Ngadan lun rayeh luk nenguit nedeh nuli', ieh ineh, Serubabel, Yesua, Nehemia, Asaria, Ramia, Namani, Mordekai, Bilsan, Misperet, Bigbai, Nehum, idi Bana.

⁸⁻²⁵Ini kinula' lemulun bang anid inul Israil luk nuli' rat bawang su luk inandeh tiban. Paros -2,172 Sepatia -372 Ara -652 Pahat Moab -(Inul Yesua idi Yoab) -2,818 Elam -1,254 Satu -845 Sakai -760 Binui -648 Babai -628 Asgad -2,322 Adonikam -667 Bigbai -2,067 Adin -655 Ater (luk titen Hesehia) -⁹⁸ Hasum -328 Besai -324 Harip -112 Gibion -⁹⁵

26-38 Lemulun luk kuan tepun tudo bang bawang ini nuli' teh rat bawang su luk inandeh tiban: Baitlahim idi Netopa -188 Anatot -128 Bait Asmabet -42 Kiriati Yarim, Kepira, idi Birot -743 Rama idi Giba -621 Mikmas -122 Baitel idi Ai -123 Nebol luk baken -52 Elam luk baken -1,254 Harim -320 Yeriko -345 Lod, Hadid, idi Ono -721 Sena -3,930

39-42 Ini ngadan inul imam luk nuli' rat bawang su luk inandeh tiban: Yedaya (inul Yesua) -973 Imer -1,052 Pasur -1,247 Harim -1,017

43-45 Inul Liwi luk nuli' rat bawang su luk inandeh tiban: Yesua idi Kadmil (inul Hodabia) -74 Lun luk menani bang Ruma' Allah (inul Asap) -148 Lun luk nginita ruma' Allah (inul Salum, Ater, Talmun, Akub, Hatita, idi Sobai) -138

46-56 Inul lun luk ngakem bang Ruma' Allah luk nuli' rat bawang su luk inandeh tiban: Siha, Hasupa, Tabaut, Keros, Sia, Padon, Lebana, Hagaba, Salmi, Hanan, Gidel, Gahari, Riaya, Resin, Nekoda, Gasam, Usa, Pasia, Basai, Munim, Nepusim, Bakbuk, Hakupa, Harhur, Baslit, Mehida, Harsa, Barkos, Sisera, Tema, Nesia, idi Hatipa.

57-59 Inul demulun Selimun luk nuli' rat bawang su luk inandeh tiban: Sotai, Soperet, Perida, Jala, Darkon, Gidel, Sepatia, Hatil, Pokeret, Hasebaim, idi Amon.

60 Kinula' inul lun luk ngakem bang Ruma' Allah idi demulun Selimun luk nuli' rat bawang su luk inandeh tiban ineh 392 burur.

61-62 Inan 642 burur lemulun ratnan inul Delaya, Tobia, idi Nekoda luk nuli' rat bawang Tel Mela, Tel Harsa, Kerub, Adon, idi Imer, iamo' na ideh megala' inul lun Israil.

63-64 Idi inul imam ini na surat inuldeh: ieh ineh Hobaya, Hakos, idi Barsilai. (Tepun inul imam-imam Barsilai pangeh nengaweh seburur decur ratnan inul Barsilai rat Giliad, idi pangeh nengalap ngadan inul libanneh.) Idi ngaceku ideh na miak ngegala' ratnan inuldeh, idi ideh na miak lapen mangun ku imam.

⁶⁵Pengulu nemebpeng nedeh na miak kuman akan luk biré kuan Allah, pad inan imam luk miak makai Urim idi Tumim.

⁶⁶⁻⁶⁹Kinula' lun luk nuli' rat bawang su luk inandeh tiban ineh -42,360 Demulundeh luk deléi idi decur -7,337 Lemulun luk menani, do' decur idi deléi pana' -245 Kuda -736 Aya' luk seupa kuda idi seupa keladai -245 Unta -435 Keladai -6,720

⁷⁰⁻⁷²Mula' lemulun nemaré binaweh pad ngedengan kekamen ngedo' Ruma' Allah. pengulu, 200 tahil amas, 50 bigan ruma' sembayang, 530 kuyu' imam; Lun Rayeh Inul, 253 kati amas, 2,410 kati pirak; Lun Baken, 253 kati amas, 2,190 kati pirak, 67 kuyu' imam.

⁷³Lun imam, lun Liwi, lun luk nginita Ruma' Allah, lun luk menani, idi teh mula' lun luk baken, idi teh lun luk ngakem bang Ruma' Allah, ieh ineh amung lun Israil tudo bang bawangdeh luk isuut idi luk rayeh pana' déi' yahuda.

Nehemia 8

¹Kareb bulan luk ketudu' lun Israil lutep tudo bang bawangdeh. Idi aceh aco bulan ineh amungdeh nepamung déi' Yerusalim, luun natad luk pa atun Tanga' Abpa'. Ideh nemutuh Esra, ieh ineh imam luk mileh ngelio Ukum luk biré Allah nelun Israil dengan bala Musa, pad ieh ngalap Surat Ukum ineh

²Idi Esra nengalap neneh idi nenguit neneh kuan deléi, decur, idi anak luk petap rayeh kali' ilungneh.

³Idi ieh nemaca' Ukum ineh kuandeh luun natad ineh luk pa atun Tanga' Abpa' ineh rat masat aco macing muned aco. Idi amungdeh neninger do'-do'.

⁴Idi Esra netuped bang mimbar luk pinudut ratnan kayuh kuan aco ineh. Idi lemulun ini netuped pa tinuehneh: Matitia, Sima, Anaya, Uria, Hilkia, idi Masia. Idi lemulun ini netuped pa kabingneh: Pedaya, Misail, Malkia, Hasum, Hasbadana, Sekaria, idi Mesulam.

⁵Kareb Esra netuped bang mimbar luk medita' ineh, idi ideh nenutong neneh. Idi kareb ieh nengukab surat ineh, idi amungdeh netuped.

⁶Idi kebala Esra, "Ngubur Tuhan, Allah luk Rayeh!" Idi amungdeh nengiding ticu'deh idi nepebala, "Amin, amin!" Idi ideh netekeradung sembayang.

⁷Idi amungdeh netuped, idi lun Liwi ini luk nengelio Ukum ineh kuandeh: Yesua, Bani, Serebaya, Yamin, Akub, Sabetai, Hodia, Masia, Kelita, Asaria, Yosabad, Hanan, idi Pelia.

⁸Idi ideh ineh pana' nengelibal bala Ukum Allah ineh idi nengelio neneh bang buri' pupu ineh, pad ideh kali' ilungneh.

⁹Kareb lun mula' neninger ilung Ukum ineh, niatdeh nesigio pad ideh nangi'. Idi kebala Nehemia, Esra, idi lun Liwi luk nengelio Ukum ineh nelun mula', "Aco sini meligan kuan Tuhan Allah muyuh. Aleg muyuh temido idi nangi'.

¹⁰Do' muyuh muli' idi nganau' irau. Maré aceh babpat akan idi abpa' anggur muyuh kuan lemulun luk na petap akan. Aco sini meligan kuan Tuhan. Aleg mesusa' niat. Awang luk barén Tuhan nemuyuh ngetueh nemuyuh."

¹¹Lun Liwi nengubuk nelun mula', kebaladeh, "Aleg muyuh mesusa' niat, ngaceku aco sini meligan."

¹²Idi amungdeh nuli' idi nekuman idi nengirup dengan mawang niat. Idi teh ideh nemaré aceh babpat kuan lun baken, ngaceku ideh nekali' ilung bala luk pindengerdeh.

¹³Kenebpa amung lun rayeh inul, dengan amung imam idi lun Liwi iné' ni Esra, sikal sibada' ratnan Ukum.

¹⁴Idi ideh kali' ratnan Ukum luk biré Tuhan dengan bala Musa, idi petulu lun Israil tudo bang lepo kareb Irau Lepo ineh.

¹⁵Idi ideh nemaré bala ini aput Yerusalim idi bawang baken luk rayeh idi luk isuut, kebaladeh, "Amé' luun pegkung idi ngalap angkat saitun luk tinibu, saitun pulung, hadas, piasau, idi kayuh baken luk miak ruen ku lepo maya' bala bang Surat Ukum."

¹⁶Idi lun mula' nengalap angkat idi nemudut lepo luun apo ruma'deh luk mebalad, luun natad ruma'deh, luun natad Ruma' Allah, idi luun natad luk pa atun Tanga' Abpa', idi teh luun natad luk pa atun Tanga' Epraim.

¹⁷Amung lemulun luk nuli' rat bawang su luk inandeh tiban nemudut lepo idi netudo bang ineh. Lun Israil nateh nenganau' luk kudeng ineh mucu ratnan kareb Yusak Nun. Amung-amungdeh pelaba awang niat.

¹⁸Rat aco luk pun-pun bang irau ineh macing aco luk kekiped ideh nemaca' aceh babpat Ukum Allah anid-anid aco. Ideh nenganau' aco rayeh tudu' aco kinioneh. Idi aco luk kewaluh inan aceh irau luk rayeh luk kekipedneh, maya' kudeng luk litep bang Surat Ukum.

Nehemia 9

¹Idi dueh ngepulu' apat aco bulan ineh teh, lun Israil nepamung sikal mawa' na kuman ngaceku mesusa' niat ku sala'deh. Ideh nenacung idi nenganau' abuh luun uluhdeh mangun ku tanu' susa' niatdeh.

²Idi amungdeh pangeh nepatad rat nelun pupu baken. Idi teh ideh netuped ngamo sala'deh idi sala' tepunde panah'.

³Idi Ukum Tuhan Allahdeh bica' kuandeh teluh jam kinioneh. Idi teh teluh jam kinioneh ideh nengamo sala'deh idi nesembayang inan Allah.

⁴Idi Yesua, Bani, Kadmil, Sebania, Buni, Serebia, Bani, idi Kenani netuped bang mimbar lun Liwi. Idi ideh nesembayang dengan rayeh bala kuan Tuhan Allahdeh.

⁵Idi lun Liwi ini nenawar nelun mula' sembayang: Yesua, Kadmil, Bani, Hasabnia, Serebia, Hodia, Sebania, idi teh Petahia. Kebaladeh, "Do' muyuh tuped ngubur Tuhan Allah muyuh! Ngubur Neneh macing raked-raked. O Tuhan, do' ngadanMu luk rayeh uenngubur. Ngaceku ngadanMu luk meluun rayeh."

⁶Idi kudeng ini sembayangdeh: "O Tuhan, Iko sebuleng luk Tuhan; Iko nenganau' langit idi gituen. Iko nenganau' tana' idi abpa' rayeh. Idi teh Iko

nenganau' amung-amung luk bang ineh. Iko nemaré ulun kuan luk amung-amung. Amung lalud luk bang langit netekeradung sembayang Namu.

⁷O Tuhan Allah, Iko nemili' Abram; Iko nenguyut neneh remuat rat bang bawang Ur luk déi' Babil, idi nengisu' ngadanneh mangun ku Ibrahim.

⁸Iko kali' neneh lutep maya' Namu. Iko nenganau' aceh jani' kuanneh. Iko nepejani' maré kuanneh tana' Kanaan, tana' Hiti idi Amori, tana' Prisi, Yebusi, idi Girgasi mangun ku bawang inulneh. Idi Iko lutep maya' jani'Mu.

⁹Iko nekali' tepun kai luk medereh déi' bawang Masir; Iko neninger tawardeh mutuh pedengan rat déi' Abpa Pisui.

¹⁰Iko nenganau' tanu' luk inan mawa pa kiung raca' Masir, idi pa kiung lun rayeh-rayehneh idi pupuneh teh, ngaceku Iko kali' nedeh ngedereh pupuMu. Iko mebala macing aco sini.

¹¹Iko nenganau' aceh dalan maya' uned abpa' rayeh kuan pupuMu, idi nenguyut nedeh maya' tana' luk tekering. Idi lemulun luk nengerada' nedeh pinatéMu bang abpa' rayeh, mepad kudeng batu luk tirem bang abpa' luk meparu'.

¹²Iko nenguyut nedeh kareb maco maya' aceh laput, idi kareb medacem apuiMu nengacang dalandeh.

¹³Déi' Pegkung Sinai Iko netemurun rat Surga, idi nemada' pupuMu su ineh. Iko nemaré ukum idi bada' luk do'.

¹⁴Iko nengecuk nedeh maya' Aco luk inan Mudeng, idi nemaré ukumMu dengan bala demulunMu Musa.

¹⁵Kareb ideh melau, Iko nemaré ruti rat surga, idi kareb ideh meparing Iko nemaré abpa' rat bang batu. Iko luk nengecuk nedeh ngimet tana', luk pijani'Mu barén nedeh.

¹⁶Iamo' tepun tau medita' niat idi metueh niat, pad ideh ara' maya' ukumMu.

¹⁷Ideh ara' maya' ngaceku ideh nekelupan amung luk inau'Mu, idi na nengerawé tanu' luk biréMu. Ideh metueh niat pad ideh nemili' seburur lun

rayeh, luk miak nguit nedeh mangun ku demulun déi' Masir teh. Iamo' Iko ineh Allah luk maré do'; Iko luk méi' idi mawa idi na malé museh. Ei'Mu pelaba rayeh. Na Iko nenecan nedeh.

¹⁸Ideh nenganau' aceh akang luk mepad kudeng sapi', luk titendeh Allah luk nguyut nedeh remuat rat bang bawang Masir! Pelaba datdeh Namu, O Tuhan!

¹⁹Iamo' na Iko nenecan nedeh déi' su luk ali-ali, ngaceku éi'Mu luk pelaba rayeh. Idi na Iko nengalap laput idi apui ineh rat nedeh, ieh ineh luk mada' dalandeh kareb macang idi medacem.

²⁰Ngaceku do'Mu, Iko luk nemada' luk ruendeh, idi nemaré ruti rat surga, idi abpa' luk rupendeh.

²¹Bang apat ngepulu' lak rukeddeh tudo déi' su luk ali-ali, Iko nemaré amung-amung luk piandeh, idi ayungdeh na miak misu' idi kukuddeh na mebara'.

²²"Iko nemaré nedeh ngelaya' bawang idi imet luk baken, ieh ineh tana' luk libut-libut bawangdeh sebuleng. Ideh nengelaya' tana' Hesbon luk inimet Sihon, idi tana' Basan luk inimet Og.

²³Iko luk nemaré anak luk mepad kinula' gituen luk déi' langit, idi nemaré nedeh ngalap idi tudo bang bawang luk pijani'Mu miak barén kuan tepundeh.

²⁴Ideh nengalap tana' Kanaan, idi nengelaya' pupu bawang ineh. Iko nemaré lalud kuan pupuMu, pad ideh nenganau' luk piandeh kuan pupu idi raca' bawang Kanaan.

²⁵PupuMu nengalap bawang luk linibung, tana' luk mebaleng, ruma' luk mepanu' ku binaweh, subuk luk inukat, saitun, buah', idi anggur. Ideh nekuman amung luk piandeh pad ideh melamu; idi ideh mawang niat ku amung-amung luk biréMu kuandeh.

²⁶"Iamo' pupuMu sikal metueh rat Namu idi na maya' balaMu; ideh neteketed ratnan UkumMu. Ideh nengaté amung nabi luk nemada' nedeh, idi luk nengecuk nedeh lumi Namu. Idi ideh megéi' ngedat Namu,

²⁷pad Iko nemaré bunu'deh nengelaya idi nengimet nedeh. Bang susa'deh ideh nemutuh Namu ngedengan nedeh, idi rat Surga Iko nengua' sembayangdeh. Ngaceku éi'Mu luk rayeh Iko nemaré nelun luk nguyut nedeh, luk nemuit nedeh ratnan bunu'deh.

²⁸Kareb na inan susa' ideh nenganau' sala' teh, idi Iko nemaré bunu'deh nengelaya' nedeh. Iamo' kareb ideh nuren idi nemutuh Namu ngulun nedeh, idi Iko neninger rat bang surga; idi ngaceku éi'Mu luk pelaba rayeh, Iko megéi' ngulun nedeh ratnan susa'deh.

²⁹Iko nengecuk nedeh maya' bada'Mu, iamo' ideh nengelaba balaMu dengan medita' niat, sagan pana' UkumMu luk mangun ku ulun kuandeh. Ideh ara' maya' ngaceku ideh metueh niat.

³⁰Anid-anid lak Iko ngubuk nedeh. Nabi-nabiMu nepebala, iamo' pupuMu mebengel, pad Iko nemaré pupu baken nengimet nedeh.

³¹Iamo', ngaceku éi'Mu luk pelaba rayeh, na Iko nenecan idi ngaté nedeh. Iko ineh Allah luk mekatu idi méi'!

³²"O Allah kai, Iko pelaba rayeh! Iko melalud idi luk inan matot! Iko lutep maya' amung jani'Mu. Rat kareb kai pidereh raca' Asur, macing nekini kai pelaba dereh! Raca' kai, lun rayeh kai, imam idi nabi kai, tepun idi amung pupu kai medereh mo'. O Allah, ngerawé ratnan amung dereh kai.

³³Petulu Iko nengukum nekai; Iko luk lutep, iamo' kai luk mesala'.

³⁴Tepun kai, raca' kai, lun rayeh, idi imam kai, nengelaba UkumMu. Na ideh nemaya' bala idi bada'Mu.

³⁵Ngaceku peruanMu, raca'-raca' nengimet pupuMu, kareb ideh tudo luun tana' luk mebaleng idi luk pelaba rayeh, iamo' na ideh nuren idi nemaya' Namu.

³⁶Iamo' nekini kai ini demulun bang bawang luk biréMu nekai, ieh ineh tana' ini luk mebaleng luk maré akan kuan kai.

³⁷Raca'-raca' luk biréMu ngimet nekai, ngaceku kai lun mesala'. ideh ineh luk ngalap bua'-bua' ratnan tana' ini. Ideh nganau' luk piandeh kuan kai idi kuan aya' kai. pad kai pelaba susa!'”

³⁸Ngaceku amung luk pangeh nangun, kai lun Yahudi nengayud aceh jani' luk matu, idi lun rayeh kai, lun Liwi kai, idi imam kai nén surat jani' ini.

Nehemia 10

¹Luk pun-pun nén, ieh ineh Pengulu Nehemia Hakalia, idi pangeh ineh Sedekia luk nén.

²⁻⁸Imam-Imam: Seraya, Asaria, Yeremia, Pasur, Amaria, Malkia, Hatus, Sebania, Maluk, Harim, Meremot, Obadia, Daniel, Gineton, Baruk, Mesulam, Abia, Miamin, Masia, Bilgai, idi Semaya.

⁹⁻¹³Lun Liwi: Yesua Asania, Binui rat inul Henadad, Kadmil, Sebania, Hodia, Kelita, Pelaya, Hanan, Mika, Rehob, Hasabia, Sakur, Serebia, Sebania, Hodia, Bani, idi Beninu.

¹⁴⁻²⁷Lun Rayeh Pupu Israil: Paros, Pahat Moab, Elam, Satu, Bani, Buni, Asgad, Babai, Adonia, Bigbai, Adin, Ater, Hesehia, Asur, Hodia, Hasum, Basai Harip, Anatot, Nebai, Magpias, Mesulam, Hesir, Mesesabel, Saduk, Yadua, Pelatia, Hanan, Anaya, Hosia, Hanania, Hasub, Haloes, Pila, Sobek, Rehum, Hasabna, Masia, Ahia, Hanan, Anan, Maluk, Harim, idi Bana.

²⁸Kai, lun Israil, lun imam-imam, lun Liwi, lun luk nginita Ruma' Allah, lun luk menani bang Ruma' Allah, lun luk ngakem bang Ruma' Allah, idi amung lun baken luk maya' Ukum Allah, pangeh nepatad rat nelun pupu baken luk tudo bang bawang kai, idi teh dengan decur kai idi anak kai luk petap rayeh kali' ilungneh,

²⁹pad-pad dengan lun rayeh-rayeh kai, pebulung pad kai mulun maya' Ukum Allah, luk biréNeh dengan bala demulunNeh Musa; idi kai miak maya' amung —amung luk duken Allah Tuhan kai nekai; idi kai miak ngimet amung-amung Ukum idi bada'Neh. Idi kudeng kai na maya' bulung ini kai miak uen ngediman.

- ³⁰Kai na miak ngaweh nelun pupu baken luk tudo bang bawang kai.
- ³¹Kudeng ideh nguit padé idi anun-anun luk baken luk pisuen kuan kai kareb Aco luk inan Mudeng idi aco baken luk meligan, idi na kai miak melih rat nedeh. Anid-anid lak luk ketudu' kai na miak nganau' lati', idi kai miak ngagka' amung baleh lun baken.
- ³²Anid-anid lak kai miak maré aceh balad pirak luk isuut ku ngedengan kekamen Ruma' Allah.
- ³³Luk miak barén kai kuan sembayang bang Ruma' Allah, ieh ineh: ruti luk biré, baré luk kenen, aya' ku baré luk sabpen anid-anid aco, baré luk sabpen kareb Aco luk inan Mudeng, idi Irau Bulan Baruh, idi aco rayeh luk baken, idi baré luk baken, idi baré ngaceku sala' lun Israil, idi anun-anun luk baken luk petulu kuan Ruma' Allah.
- ³⁴Kai, lun mula', imam, idi lun Liwi miak nala' udi anid-anid lak, pad kai miak kali' inul sapeh luk petulu maré kayuh ku ngeseb baré kuan Tuhan Allah kai maya' kudeng luk inayud bang Surat Ukum.
- ³⁵Anid-anid lak kai miak nguit amé' Ruma Allah padé luk piranah atun idi bua' luk pun melak.
- ³⁶Kai miak nguit amé' matun imam-imam luk ngakem kuan Allah bang Ruma' Allah anak deléi kai luk atun, idi ideh barén kuan Allah, idi teh anak sapi', anak dumba, idi anak amék kai luk atun barén kuan Allah, maya' kudeng luk inayud bang Surat Ukum.
- ³⁷Kai miak nguit amé' matun imam-imam bang Ruma' Allah banak luk pinuar ratnan padé luk pun piranah anid-anid lak, idi amung baré luk baken ratnan abpa' anggur, umau saitun, idi bua' luk baken-baken teh. Kai miak nguit amé' matun lun Liwi luk ngamung babpat pulu' bang bawang kai, babpat pulu' ratnan tibu kai.
- ³⁸Idi petulu imam luk inul Arun idi dengan lun Liwi kareb babpat pulu' ineh uen ngamung. Idi lun Liwi miak nganug bang su luk inan nganug binaweh

bang Ruma' Allah sebabpat ratnan babpat pulu' luk imung ineh, kuan kekamen bang Ruma' Allah.

³⁹Lun Israil idi lun Liwi miak nguit baré padé, abpa' anggur, idi umau saitun amé' bang su luk inan nganug repapeh Ruma' Allah, idi su luk inan imam luk uned ngakem, lun luk nginita Ruma' Allah, idi lun luk menani bang Ruma' Allah tudo. Kai na miak ugka' ngasa' Ruma' Allah kai.

Nehemia 11

¹Lun rayeh-rayeh tudo déi' Yerusalim, idi lun baken, nenala' udi pad ideh mili' aceh tetek ruma' rat arang pulu' tetek ruma' luk miak tudo bang bawang Yerusalim luk meligan. Idi tetek ruma' luk ketecan miak tudo bang bawang baken luk rayeh idi luk isuut pana'.

²Idi lun Israil nengubur lemulun luk nengamo ideh pian tudo déi' Yerusalim.

³Bang bawang luk baken, lun Israil, imam-imam, lun Liwi, lun luk nginita Ruma' Allah, idi inul demulun Selimun tudo bang bawangdeh sebuleng, idi luun tana'deh sebuleng. Ini ngadan lun rayeh luk rat bawang Yahuda luk tudo déi' Yerusalim:

⁴Ngadan inul Yahuda: Ataya, anak Usia Sekaria. Idi arang tepunneh inan Amaria, Sepatia, Malalel, luk inul Paris lun anak Yahuda.

⁵Masia, anak Baruk Kolosi. Idi arang tepunneh inan Hasaya, Adaya, Yoyarib, idi Sekaria, luk inul Sela luk anak Yahuda.

⁶Idi rat arang inul Paris inan 468 lemulun luk mebala luk tudo déi' Yerusalim.

⁷Ngadan inul Benjamin: Salu, anak Mesulam Yoed. Idi arang tepunneh inan Pedaya, Kolaya, Masia, Itiel, idi Yesaya.

⁸Gabai idi Salai, ieh ineh pupu Salu luk muneng. Kinula'deh, 928 tetek inul Benjamin tudo déi' Yerusalim.

⁹Idi Yoel Sikri mangun ku lun rayehdeh. Idi Yahuda Hasenua mangun ku tarehneh bang bawang ineh.

¹⁰Imam-Imam: Yedaya Yoyarib, idi Yakin.

- ¹¹Seraya, anak Hilkia Mesulam. Idi arang tepunneh inan Saduk, Merayot, idi Ahitub luk Imam Rayeh.
- ¹²Inan 822 burur ratnan inul ini luk nengakem bang Ruma' Allah. Adaya, anak Yeroam Pelalia. Idi arang tepunneh inan Amsi, Sekaria, Pasur, idi Malkia.
- ¹³Inan 242 burur ratnan inul ini luk lun rayeh tetek ruma'deh. Amasai, anak Asarel Asai. Idi arang tepunneh inan Mesilemot idi Imer.
- ¹⁴Idi inan 128 burur ratnan inul ini luk mangun ku lun pebunu' luk mebala. Idi lun rayehdeh, ieh ineh Sabdil luk kuan tetek ruma' mebala teh.
- ¹⁵Lun Liwi: Semaya, anak Hasub Asrikam. Idi arang tepunneh inan Hasabia idi Buni.
- ¹⁶Sabetai idi Yosabad, ieh ineh lun Liwi luk mebala luk ngimet kekamen déi' liang Ruma' Allah.
- ¹⁷Matania anak Mika Sabdi, luk inul Asap. Ieh luk nguyut nelun luk mileh menani bang Ruma' Allah kareb ideh menani ubur. Bakbukia luk ngedengan Matania. Abda, anak Samua Galal, luk inul Yedutun.
- ¹⁸Idi inan 284 burur lun Liwi luk tudo bang bawang Yerusalim luk meligan.
- ¹⁹Lun luk nginita Ruma' Allah: Akub, Talmon, idi pupudeh, ieh ineh 172 burur.
- ²⁰Lun Israil, imam-imam, idi lun Liwi luk baken tudo luun tana'deh sebuleng bang bawang baken déi' Yahuda.
- ²¹Lun luk ngakem bang Ruma' Allah tudo bang aceh babpat Yerusalim luk titen Opel. Siha idi Gispa ieh ineh lun luk ngimet kekamendeh.
- ²²Lun rayeh lun Liwi luk tudo déi' Yerusalim, ieh ineh Usi, anak Bani Hasabia. Idi arang tepunneh inan Matania idi Mika. Idi Usi ineh ratnan inul Asap luk nguyut nelun luk mileh menani kareb sembayang bang Ruma' Allah.
- ²³Inan ukum raca' ratnan inul-inul pelibal nguyut nani bang Ruma' Allah anid-anid aco.

²⁴Petahia Mesesabel ratnan inul Sera idi pupu Yahuda mangun ku gatum lun Israil déi' bawang Parsi.

²⁵Mula' lemulun tudo bang bawang luk muneng ku lati'deh. Lun luk inul Yahuda tudo déi' Arba, Dibon, idi Yekabsil, idi bawang luk isuut luk muneng ku bawang ineh.

²⁶Sebuangdeh tudo déi' Yesua, Molada, Baitpelet, idi

²⁷Hasasual, idi déi' Birsiba idi bawang luk libut-libutdeh.

²⁸Idi inan teh luk tudo déi' Siklag, Mekona, idi bawang luk libut-libutdeh,

²⁹idi teh déi' Enrimon, Sora, idi Yarmut,

³⁰déi' Sanua, Adulam, idi teh bawang luk libut-libutdeh. Inan teh luk tudo déi' Lakis idi teh luun lati' luk muneng ku ineh, idi déi' Aseka dengan bawang luk libut-libut ineh. Ieh ineh lun Yahuda tudo luun tana' luk arang Birsiba pa kabing busat aco, dengan Raked Hinom pa tinueh busat aco.

³¹Lun pupu Benjamin tudo bang bawang Giba, Mikmas, Ai, Baitel, idi bawang luk libut-libutdeh,

³²Anatot, Nob, Anania,

³³Hasor, Rama, Gitaim,

³⁴Hadid, Seboim, Nebalat,

³⁵Lod, idi Ono, idi teh luun Raked Tukang.

³⁶Idi tuda'-tuda' babpat lun Liwi luk netudo déi' bawang Yahuda atun litep pad ideh tudo dengan lun Benjamin.

Nehemia 12

¹Idi ini ngadan imam idi lun Liwi luk nuli' rat bawang su luk inandeh tiban dengan Serubabel Saltiel, idi Imam Rayeh Yosua.

²⁻⁷Imam-Imam: Seraya, Yeremia, Esra, Amaria, Maluk, Hatus, Sekania, Rehum, Meremot, Ido, Ginetoi, Abia, Miamin, Madia, Bilga, Semaya, Yoyarib,

Yedaya, Salu, Amok, Hilkia, idi Yedaya. Lemulun ini luk lun rayeh imam-imam kareb Yosua.

⁸Lun Liwi: Ini ngadan lemulun luk nguyut menani ubur: Yesua, Binui, Kadmil, Serebia, Yahuda, idi Matania.

⁹Ini ngadan lemulun luk menani ngor ilung nani ineh: Bakbukia, Uno, idi lun Liwi luk baken.

¹⁰Yosua ineh taman Yoyakim. Yoyakim nenginul Eliasib; Eliasib nenginul Yoyada;

¹¹Yoyada nenginul Yonatan; idi Yonatan nenginul Yadua.

¹²⁻²¹Kareb Yoyakim Imam Rayeh, lemulun ini mangun ku lun rayeh imam: Imam, Inul; Meraya, Seraya; Hanania, Yeremia; Mesulam, Esra; Yohanan, Amaria; Yonatan, Maluki; Yusup, Sebania; Adna, Harim; Helkai, Merayot; Sekaria, Ido; Mesulam, Gineton; Sikri, Abia; I kaceh, Miniamin; Piltai, Modia; Samua, Bilga; Yehonatan, Semaya; Matenai, Yoyarib; Usi, Yedaya; Kalai, Salai; Eber, Amok; Hasabia, Hilkia; Netanel, Yedaya.

²²Aceh surat inul lun rayeh tetek ruma' lun Liwi idi imam-imam pangeh inayud kareb Imam-Imam Rayeh ini mulun: Eliasib, Yoyada, Yohanan, idi Yadua. Idi surat inul ini inayud macing kareb bang imet Darius, raca' Parsi.

²³Ngadan amung lun rayeh tetek ruma' lun Liwi pangeh inayud bang surat inul macing kareb Yohanan luk mupun Eliasib.

²⁴Lun Liwi luk pa liang imet Hasabia, Serebia, Yesua, Binui, idi Kadmil pangeh bibpat. Idi dueh babpat pelibal-pelibal ngubur Allah, maya' bada' luk biré Raca' Daud, demulun Allah.

²⁵Ini ngadan lemulun luk nginita Ruma' Allah luk matar su luk inan nganug binaweh muneng ku amung tanga' Ruma' Allah: Matania, Bakbukia, Obadia, Mesulam, Talmon, idi Akub.

²⁶Amung lemulun ini mulun kareb Yoyakim anak Yosua Yehosadak, idi kareb Pengulu Nehemia, idi kareb Imam Esra luk mileh ngelio Ukum Musa.

²⁷Kareb ideh sembayang ratnan libung bawang Yerusalim, idi lun Liwi pangeh pimung ratnan anid-anid su luk inandeh tudo, pad amung-amungdeh miak ngerayeh aco ineh dengan mawang niat, idi dengan nani ubur, idi dengan uni karing idi teh giula'.

²⁸Lun Liwi luk menani nacing rat bawang luk libut-libut Yerusalim, idi teh rat bawang luk libut-libut Netopa,

²⁹idi teh rat Baitgilgal, Giba, idi Asmabet, su luk inandeh pangeh netebawang.

³⁰Amung imam idi lun Liwi nengeligan bururdeh sebuleng idi lun mula' pana'. Idi ideh nesembayang kuan amung tanga' bawang idi teh libung bawang.

³¹Idi ui ini Nehemia nengamung nelun rayeh-rayeh Yahuda luun libung ineh, idi nemabpat nedeh dueh babpat luk rayeh luk miak nalan libut-libut bawang, idi maré ubur kuan Allah. Idi sebabpat iné' pa kabing maya' luun libung ineh matun Tanga' Téi'.

³²Idi Hosaya nenalan pa puet lun luk menani idi pa atun sebuang lun rayeh Yahuda.

³³⁻³⁵Idi imam-imam ini luk ngiup serupit nemaya' puetdeh: Asaria, Esra, Mesulam, Yahuda, Beniamin, Semaya, idi Yeremia. Idi Sekaria, anak Yonatan Semaya nemaya' puetdeh. (Idi arang tepunneh inan Matania, Mikaya, idi Sakur, luk ratnan inul Asap.)

³⁶Idi tuda'-tuda' burur lun baken ratnan inulneh nemaya' puetneh, ieh ineh: Semaya, Asarel, Milalai, Gilalai, Mai, Netanel, Yahuda, idi Hanani. Idi amungdeh nengimet giula' mepad kudeng luk pikai Raca' Daud, demulun Allah Esra, lun mileh ineh nenguyut babpat ineh pekarur.

³⁷Déi' Tanga' Bued Abpa' ideh numak ican luk macing Bawang Daud, luk lemaba ruma' Daud, idi luk lemubed macing libung ineh déi' Tanga' Abpa', luk pa busat aco bawang Yerusalim ineh.

³⁸Idi babpat luk kedueh luk nemaré ubur ineh iné' pa kabing maya' luun libung ineh, idi ui nemaya' puetdeh. Kai nelemaba Pudut luk Medita' luk titen Tetel macing Libung Rayeh.

³⁹Idi rat su ineh kai nelemaba Tanga' Epraim, Tanga' Yesana, Tanga' Lawid, Pudut luk Medita' luk titen Hananel, idi teh Pudut luk Medita' luk titen Ratu macing Tanga' Dumba. Idi kai nenalan macing Tanga' Lun luk Nginita Bawang.

⁴⁰Idi dueh babpat luk maré ubur kuan Allah nacing su luk inan Ruma' Allah. Sebuang lun rayeh idi denganku.

⁴¹Idi ini ngadan tuda'-tuda' lun baken luk bang babpatku, ieh ineh imam-imam luk ngiup serupit: Eliakim, Masia, Miniamin, Mikaya, Eliunai, Sekaria, idi Hanania;

⁴²Idi teh lun luk menani luk kinuyut Yesrahia: Masia, Semaya, Eliasar, Usi, Yohanan, Malkia, Elam, idi Eser. Idi ideh menani rayeh arod.

⁴³Idi bang aco sineh teh mula' baré luk biré kuan Tuhan, idi lun mula' mepanu' ku awang, ngaceku Allah luk nengawang niatdeh. Decur idi anak pana' nengerayeh aco sineh, idi ria'deh miak pedingeren rat mado.

⁴⁴Kareb ineh ideh nengelelep tuda'-tuda' burur lemulun luk miak ngimet su luk inan nganug padé luk pun piranih, idi bua' luk pun melak, babpat pulu', idi baré luk baken kuan Ruma' Allah. Lemulun ini ngalap baré kuan imam-imam idi lun Liwi maya' kudeng luk icuk bang Ukum Musa, ratnan lati'-lati' luk muneng ku bawang-bawang rayeh. Amung lun Yahuda mawang niat inan imam-imam idi lun Liwi,

⁴⁵ngaceku ideh nenganau' luk icuk Allah, idi nemaya' luk inatur ratnan ngeligan. Idi teh lun luk menani bang Ruma' Allah idi lun luk nginita Ruma' Allah nenganau' kekamendeh maya' kudeng luk icuk Raca' Daud idi anakneh Selimun.

⁴⁶Rat mon, ieh ineh rat kareb Raca' Daud idi Asap lun luk mileh menani ineh, lun luk mileh menani pangeh nenguyut nelun mula' menani ubur kuan Allah.

⁴⁷Idi kareb Serubabel, idi teh kareb Nehemia, amung lun Israil pekalai maré baré anid-anid aco kuan lun luk menani idi teh kuan lun luk nginita Ruma' Allah. Lun mula' nemaré baré luk meligan kuan lun Liwi, idi lun Liwi nemaré aceh babpat luk litep kuan imam-imam.

Nehemia 13

¹Kareb ineh Ukum Musa uned uen maca' kuan lun Israil. Idi ideh nacing ayat luk mada' ratnan lun Amon idi lun Moab bibpeng na miak peruyung dengan pupu Allah.

²Ngaceku lun Amon idi lun Moab na nemaré balu' idi luk rupen kuan lun Israil kareb ideh neremuat rat bang bawang Masir. Iamo' ideh nenabpar ni Bilam pad ieh miak ngediman nelun Israil, iamo' Allah kai nengisu' kedimandeh mangun ku peruan.

³Kareb lun Israil neninger ukum ineh uen maca' idi ideh nengecuk amung lun pupu baken buro rat arangdeh.

⁴Imam Eliasib, luk ngimet su luk inan nganug binaweh bang Ruma' Allah perurum ni Tobia rat mon.

⁵Ieh nemaré ni Tobia makai aceh takep luk rayeh luk litep kuan su luk inan nganug padé idi umau luk do' buen, repapeh luk uen makai bang Ruma' Allah, baré kuan imam-imam, babpat pulu' ratnan padé, abpa' anggur, idi umau saitun luk biré kuan lun Liwi, lun luk menani, idi lun luk nginita Ruma' Allah.

⁶Kareb ineh ui ini Nehemia na idi déi' Yerusalim, ngaceku bang lak luk keteluh ngepulu' dueh, kareb imet Artasasta, raca' Babil, ui pangeh iné' nguit bala kuanneh. Idi mucu ratnan ineh ui sinima'neh

⁷muli' amé' Yerusalim. Idi ui negagap nenier Tobia sinima' Eliasib makai aceh takep bang Ruma' Allah.

⁸Idi ui pelaba gateh niat, pad ui nala' amung binaweh Tobia,

- ⁹Idi ui nengecuk nedeh ngeligan amung takep ineh idi ngelubed amung repapeh Ruma' Allah dengan baré padé, idi umau luk do' buen.
- ¹⁰Idi teh ui kali' nelun Liwi idi lun luk menani bang Ruma' Allah pangeh neburo rat Yerusalim idi nenganau' lati' ngaceku lun Israil na nemaré petap akan.
- ¹¹Idi ui metueh mada' nelun rayeh-rayeh ngaceku ideh nima' Ruma' Allah tacin. Idi ui nenguit nelun Liwi idi lun luk menani lemubed amé' bang Ruma' Allah, idi nengecuk nedeh ngakem baruh.
- ¹²Idi lun Israil nenguit babpat pulu'deh ratnan pade, abpa' anggur, idi umau saitun amé' bang su luk inan nganug repapeh bang Ruma' Allah.
- ¹³Idi ui nengecuk lemulun ini ngimet su luk inan nganug repapeh: Selemia, lun imam; Saduk, lun luk mileh ngelio ukum; idi Pedaya, lun Liwi. Idi Hanan, anak Sakur Matania nengedengan nedeh. Ui kali' ui miak merapet nan lemulun ini luk miak maré akan petap kuan lun rurumdeh bang kekamen Allah.
- ¹⁴Idi kesembayangku, O Allah, ngerawé amung luk inau'ku kuan ruma'Mu, pad lun Israil miak sembayang Namu.
- ¹⁵Kareb ineh, ui nenier nelun Yahuda nengeradu' bua' anggur pad ngalap abpa'neh kareb Aco luk inan Mudeng. Idi teh lun baken nguit padé, abpa' anggur, bua' anggur, bua' gita', idi teh luk baken-baken luun keted keladaideh amé' Yerusalim. Ui nemebpeng nedeh na miak masui kareb Aco luk inan Mudeng ineh.
- ¹⁶Inan lemulun rat Sur luk tudo' dé'i Yerusalim luk nguit lawid idi luk baken-baken luk pisuen kuan lun Israil bang bawang ineh kareb Aco luk inan Mudeng.
- ¹⁷Ui metueh mada' nelun rayeh lun Yahudi, kebalaku nedeh, "Pelaba dat kekamen muyuh! Muyuh ngelutak Aco luk inan Mudeng.

¹⁸Ngaceku kekamen luk kudeng ineh, Allah nengukum tepun muyuh, kareb Ieh nengusag bawang ini. Iamo' muyuh ngacing useh Allah luk meluun rayeh kuan lun Israil ngaceku muyuh ngelutak Aco luk inan Mudeng.”

¹⁹Ui nengecuk nedeh ngitek amung tanga' bawang kareb pun Aco luk inan Mudeng, ieh ineh kareb aco macep, idi na ngukab tanga' ineh pad mabud Aco luk inan Mudeng. Ui nengecuk sebuang lun dukenku tuped munung amung tanga' pad mebpeng lemulun na miak nguit anun-anun kareb Aco luk inan Mudeng.

²⁰Dueh kua' lun luk pepua' nemasui tuda'-tuda' binaweh bal libung Yerusalim malem aco limeh.

²¹Ui nemada' nedeh, "Na ulekneh tudo nganét macing macang aco. Kudeng muyuh nganau' kudeng ini sekua' teh ui miak ngakem nemuyuh." Rat pad sineh na ideh iné' kareb Aco luk inan Mudeng.

²²Ui nengecuk nelun Liwi amé' matar amung tanga' bawang, pad Aco luk inan Mudeng miak uen ngeligan. Idi kesembayangku, O Allah, ngerawé negku, ngaceku kekamenku ini, idi méi' negku, ngaceku awaMu luk pelaba rayeh.

²³Kareb ineh teh ui nekali' mula' lun Yahudi pangeh nengalap decur ku awandeh rat Asdod, Amon, idi Moab.

²⁴Sebuang anakdeh mileh buri' Asdod, kian buri' baken lek, iamo' na ideh kali' buri' kai sebuleng.

²⁵Idi ui metueh mada' deléi ineh idi nemutuh Tuhan ngediman nedeh. Ui nemebal nedeh idi nemubput abpukdeh. Idi ui nengecuk nedeh pebulung ku ngadan Allah, pad ideh idi anakdeh pana' na ngaweh nelun pupu baken.

²⁶Kebalaku nedeh, "Decur ratnan pupu baken luk nenguit Raca' Selimun ngana' sala', sagan pana' ieh luk meluun rayeh ratnan amung-amung raca' pupu baken, idi sagan pana' Allah mawa neneh idi nenganau' neneh mangun ku raca' amung lun Israil.

²⁷Petuluké kai maya' lawé muyuh luk dat, pad kai ngelaba bala Allah idi ngaweh decur ratnan pupu baken?”

²⁸Yoyada, ieh ineh anak Imam Rayeh, Eliasib. Iamo' sebuleng anak Yoyada nengaweh anak decur Sanbalat, rat Bait Horon. Ngaceku ineh ui nengecuk neneh buro rat Yerusalim.

²⁹Idi kesembayangku, O Allah, ngerawé ratnan dat lemulun luk nengelutak kekamen imam idi teh pejani' luk inau'Mu dengan imam-imam idi lun Liwi.

³⁰Ui nengeligan nelun Israil ratnan amung-amung kekamen luk rat nelun pupu baken. Ui nenganau' ukum-ukum kuan lun imam idi lun Liwi, pad amung-amungdeh miak kali' kekamendeh.

³¹Ui nengecuk nelun Israil nguit kayuh ku ngeseb baré luk sabpen bang kareb luk petulu. Idi teh ui nengecuk nguit baré padé luk pun piranih idi bua' luk pun melak. Idi kesembayangku, O Allah, ngerawé amung kekamen ini, idi ngeperuan negku.

Ester

Ester 1

¹⁻²Idi Ahasuiras ineh raca'. Idi kerusi raca' Parsi ineh déi Susa. Ieh ngimet 127 bawang rat India macing Sudan.

³Bang lak luk keteluh bang imetneh ieh nenganau' irau kuan amung pengulu idi lun rayehneh. Amung baweh Parsi idi Midi idi, dengan pengulu idi lun rayeh anid bawang ineh.

⁴Anem bulan kinioneh ieh nengegala' binaweh luk bang ruma'neh luk pelaba do'!

⁵Pangeh ineh, raca' ineh nenganau' aceh irau kuan anak itinneh déi' Susa, ieh ineh kuan lun do' idi lun masi' pana'. Bang aceh minggu ideh irau bang kabun luk iring ruma' raca'.

⁶Déi' natad inan tuda'-tuda' dicing kibung luk mebuda' idi mebata', luk inabet ku kibung pu luk sia' merirem nan susing pirak luun diri batu luk mebuda'. Inan kerusi ratnan amas idi pirak déi' luun natad luk inau' ratnan batu luk meraga, ieh ineh luk mesia', mebata', mebuda', idi mitem.

⁷Luk rupendeh ruen bang sangkir amas, anid-anid sangkir ineh baken ayuneh. Idi raca' nemaré abpa' anggurneh dengan mela.

⁸Na bebpeng raca' ineh na ngirup. Ieh nengecuk demulunneh maré maya' pian anid-anid burur lemulun.

⁹Idi Raca' Decur Basti nenganau' irau kuan amung-amung decur bang ruma' raca'.

¹⁰Kareb aco luk ketudu' bang irau ineh, raca' ineh ngirup dengan mawang niat. Idi ieh nenawar tudu' burur demulunneh luk pinani', ieh ineh Mehuman, Bista, Harbona, Bigta, Abagta, Setar, idi Karkas.

¹¹Ieh nengecuk nedeh nguit Raca' Decur Basti luk inayung ku pata raca'. Raca' decur ineh do' taga idi raca' pian mada' taganeh siren lun rayeh idi amung lun luk tinawar iné' ku irau ineh.

- ¹²Iamo' kareb demulun ineh nemada' Raca' Decur Basti ratnan ecuk raca', ieh ara' amé'. Idi raca' pelaba useh.
- ¹³Idi raca' pekalai ngitun nelun mileh ratnan ukum idi adat bang bawang. Idi ieh nenawar nelun luk mada' neneh ratnan luk miak ruen.
- ¹⁴Idi luk inanneh merapet ieh ineh Karsina, Setar, Admata, Tarsis, Meres, Marsina, idi Memukan—tudu' lun rayeh Parsi idi Midi luk meluun rayeh bang imet ineh, idi luk inan raca' merapet.
- ¹⁵Kebalaneh kuan lemulun ineh, "Ui ini, Ahasuiras nengecuk demulunku nguit balaku kuan Raca' Decur Basti, iamo' ieh ara' maya' bala ineh! Anunké ukum tau luk petulu kuanneh?"
- ¹⁶Idi kebala Memukan kuan raca' idi lun rayehneh, "Raca' Decur Basti pangéh nengedat baken raca' sebuleng mo', iamo' amung lun rayehneh idi amung deléi bang imetneh!
- ¹⁷Aput imet ini amung decur sikal ngebeneh awandeh, kareb ideh kali' luk inau' raca' decur. Kebaladeh, 'Raca' Ahasuiras nengecuk Raca' Decur Basti iné' neneh, iamo' na ieh iné'.'
- ¹⁸Amung decur lun rayeh Parsi idi Midi sikal ngatum bala ini inan lun rayeh raca' aco sini, pad inan susa' idi ria'!
- ¹⁹Kudeng ini pian raca', do' raca' mebpeng ni Basti na amé' matun raca' teh. Do' bala ineh uen ngayud mangun ku ukum Parsi idi Midi, pelé ieh na uen ngisu'. Idi do' seburur decur luk meluun do' ngelibal neneh mangun ku raca' decur.
- ²⁰Kareb ukummu ineh badén aput imet ini amung-amung decur miak ngedita' awandeh, lun do' idi lun dat pana'."
- ²¹Raca' idi lun rayehneh ineh pian ku bala ini, idi raca' nemaya' bala Memukan ineh.

²²Ieh nemaré bala kuan amung babpat bang imetneh, bang buri' lun bang bawang ineh, idi ieh nengecuk amung deléideh mangun ku lun rayeh bang tetek ruma'deh, pad amung uang tetek ruma'deh maya' baladeh.

Ester 2

¹Muci ratnan ineh, kareb useh raca' ugka', ieh nengerawé ratnan luk inau' Basti idi ratnan ukumneh neneh.

²Idi lun mileh luk inan raca' merapet nepebala neneh, "Do' iko ngecuk nelun nakap tuda'-tuda' burur anak adi' decur luk do' taga kuanmu.

³Do' iko ngeletap nelun rayeh bang anid babpat imetmu, pad ideh nguit anak adi' decur luk do' taga ini amé' ruma' awanmu tungé' Susa. Maré nedeh bang imet Hegai lun luk pinani' ineh luk ngasa' decurmu, ieh ideh miak ngalap umau luk do' buen ku ngumau bururdeh.

⁴Idi rat arangdeh do' iko ngalap decur luk pianmu ku libal Raca' Decur Basti." Idi raca' pian ku bala ineh, idi ieh nemaya' luk biladeh ineh.

⁵Idi déi' bawang Susa inan seburur lun Yahudi, ngadanneh Mordekai Yair ratnan pupu Benjamin, luk inul Kis idi Simi.

⁶Kareb Nebukadnesar, raca' Babil nenaban ni Yoyakin raca' Yahuda rat Yerusalim dengan lun baken lun tiban, Mordekai idi arangdeh.

⁷Ieh inan kinanak kanid, ngadanneh Ester luk titen Hadasa bang buri' Iberani. Kareb taman-tinanneh naté, Ester inasuh Mordekai mepad kudeng anakneh sebuleng. Ester do' taga idi metagap.

⁸Idi kareb raca' nemada' bala ineh, pad mula' anak adi' decur inuit iné' Susa, Ester pana' inuitdeh. Idi ieh nesemuet bang ruma' raca' bang imet Hegai luk ngasa' awan raca'.

⁹Hegai méi' ni Ester idi ieh do' neneh. Idi petacu ieh nemaré neneh uen ngumau ku umau luk do' buen, idi ieh nemaré akan luk pelaba do'. Idi teh Ester luk meluun uen ngedita' arang decur baken, pad inan tudu' burur anak decur rat ruma' raca' luk pinili' mangun ku demulunneh.

- ¹⁰Idi Ester nengalum ratnan ieh decur Yahudi, maya' bala Mordekai.
- ¹¹Idi anid-anid aco Mordekai lawé-lawé lemaba natad ruma' decur ineh pian kali' ratnan ulun Ester, idi anun luk miak mangun kuanneh.
- ¹²Idi amung decur inumau ku umau luk do' buen selak kinioneh, ieh ineh ku umau mur anem bulan kinioneh, idi teh ku umau luk baken luk do' buen anem bulan kinioneh. Pangeh ineh anid burur decur miak iten amé' nan Raca' Ahasuiras.
- ¹³Kareb ieh nalan rat ruma' decur amé' ruma' raca', ieh miak ngayung ku anun-anun luk pianneh.
- ¹⁴Ieh amé' pa malem idi kenebpa ieh iten amé' bang ruma' decur lun baken, bang imet Sasgas, ieh ineh lun luk pinani' luk ngasa' apid raca'. Ieh na amé' matun raca' sekua' teh kudeng raca' na pian ku ieh, idi kudeng ieh na nawar ngadanneh.
- ¹⁵Idi macing karebneh Ester amé' papu' raca', ieh ineh Ester Abikail luk kinanak kanid Mordekai luk nengasuh neneh mepad kudeng anakneh sebuleng. Idi Ester buren amung lemulun luk nier neneh. Idi ieh nengayang ku anun-anun luk bila Hegai lun luk pinani' luk ngasa' ruma' decur ineh.
- ¹⁶Idi bang bulan pulu', ieh ineh bulan Tebet, bang lak luk ketudu' bang imet Raca' Ahasuiras, idi Ester inuit iné' matun Raca' Ahasuiras bang ruma' raca'.
- ¹⁷Idi raca' mawa neneh meluun ratnan amung decur baken. Idi ieh meluun méi' neneh ratnan decur baken, pad ieh nenganau' pata raca' luun uluhneh idi nenganau' neneh mangun ku raca' decur ku libal Basti.
- ¹⁸Idi raca' nenganau' aceh irau rayeh kuan Ester, idi ieh nenawar amung lun rayeh idi lun luk ngimet. Idi ieh nengelelep aco rayeh kuan amung imetneh, idi nemaré mula' baré luk petulu barén raca'.
- ¹⁹Idi Mordekai pangeh pinili' ngakem kuan raca'.

²⁰Idi Ester nengalum ratnan ieh decur Yahudi, ngaceku ieh bibpeng Mordekai na mada'. Idi ieh nemaya' balaneh mepad kudeng ieh nemaya' balaneh kareb ieh anak isuut.

²¹Kareb Mordekai ngakem bang ruma' raca', Bigtana idi Teris, dueh burur lun luk pinani' luk matar munung tanga' takep-takep raca', sikal metueh ratnan Raca' Ahasuiras, idi pian ngaté neneh.

²²Mordekai nekali' bala ineh idi ieh nemada' Raca' Decur Ester. Idi Ester nemada' luk nekali' Mordekai kuan raca'.

²³Idi ideh nengelio ineh idi bala ineh matu. Idi didueh inukum tekito pad didueh naté. Idi raca' nengecuk ngayud ini bang surat inul raca'.

Ester 3

¹Muci' ratnan ineh Raca' Ahasuiras nengikit ni Haman Hamedata mangun ku lun rayeh bawang. Haman ineh inul Agag.

²Idi raca' nengecuk amung lun rayeh ngedita' ni Haman idi tekeradung pa kiungneh. Idi amungdeh nenganau' kudeng ineh, iamo' Mordekai ara'.

³Lun rayeh baken bang kekamen raca' nengitun anun punneh ieh na maya' bala raca'.

⁴Anid-anid aco ideh ngitun neneh, iamo' na Mordekai ninger baladeh. Kebalaneh, "Ui ini lun Yahudi, idi ui na miak tekeradung pa kiung Haman." Idi ideh nemada' ni Haman pian kali' kudeng ieh miak nima' Mordekai na ngedita' neneh.

⁵Haman megateh niat kareb ieh kali' Mordekai na miak tekeradung pa kiungneh.

⁶Idi kareb ieh kali' Mordekai ineh lun Yahudi, ieh na pian ngaté Mordekai sebuleng, iamo' ieh nenakap dalan pad ieh miak ngaté amung lun Yahudi aput imet Parsi.

⁷Bang bulan luk pun-pun, ieh ineh bulan Nisan bang lak luk kepulu' dueh kareb imet Ahasuiras, Haman nengecuk nala' udi (luk titen "purim") pad kali'

aco idi bulan luk petulu ngacing luk pianneh. Idi pulu' teluh aco bulan pulu' dueh, ieh ineh bulan Adar, luk litepneh.

⁸Idi kebala Haman ni raca', "Inan aceh pupu luk pitad apud imetmu, bang anid-anid babpat. Ideh maya' adat luk baken ratnan adat lun baken. Meluun teh ideh na maya' ukum imet ini. Ngaceku ineh na petulu iko nima' nedeh.

⁹Kudeng ineh pianmu, nganau' aceh ukum pad ideh pitayen. Kudeng iko nganau' kudeng ineh ui pejani' maré 10,000 balad pirak bang kas raca' ku mayar raga imet ini."

¹⁰Raca' ineh nengelengu susing etuneh, idi nemaré ineh kuan bunu' lun Yahudi, ieh ineh Haman Hamedata luk inul Agag.

¹¹Kebala raca' neneh, "Pupu ineh idi usindeh iko kuan; do' maya' luk pianmu."

¹²Idi pulu' teluh aco bulan luk pun-pun, Haman nenawar nelun luk ngayud kuan raca' idi nemada' aceh ukum nedeh luk uen ngelibal kuan amung-amung buri' bang imet ineh idi barén kuan amung raca', pengulu, idi lun rayeh. Idi ukum ineh biré dengan ngadan Raca' Ahasuiras idi itu ku susingneh.

¹³Idi lun duken nupun nated bala ineh amé' nan anid babpat imet ineh. Maya' ukum ineh amung lun Yahudi luk rayeh idi luk isuut, do' decur idi anak pana' miak pitayen bang seaco, ieh ineh pulu' teluh aco bulan Adar. Ideh pitayen dengan na méi', idi binawehdeh lapen.

¹⁴Ilung ukum ineh badén bang anid-anid babpat imet, pelé amung-amungdeh temina' kareb aco ineh macing.

¹⁵Maya' ukum raca' lun duken ineh nupun dengan mesaget, idi ukum ineh bida' déi' Susa luk bawang rayeh bang imet ineh. Pangeh ineh raca' idi Haman netudo idi ngirup laba' bawang Susa meria' ku bala ineh.

Ester 4

¹Kareb Mordekai nekali' bala ineh, ieh nengerarak ayungneh ku susa' niatneh. Idi ieh nenacung idi lawé-lawé bang bawang dengan pelaba tangi',

²pad ieh nacing munung tanga' ruma' raca'. Na ieh nesemuet ngaceku ayungneh na petulu.

³Idi inan tido arang lun Yahudi aput babpat-babpat imet ineh, su luk inan ukum raca' pangeh bida'. Ideh mawa' na kuman, ideh nangi', idi temido, idi lélé amung-amungdeh nenacung.

⁴Kareb demulun Ester idi lun luk pinani' nemada' neneh ratnan luk ruen Mordekai, ieh pelaba susa' niat. Ieh nemaré ayung ni Mordekai ku libal tacung ineh, iamo' na ieh pian.

⁵Idi Ester nenawar ni Hatak, seburur lun luk pinani' luk litep raca' mangun ku demuluneh, idi nengecuk neneh amé' papu' ni Mordekai idi ngitun anun luk mangun.

⁶Idi Hatak iné' papu' ni Moredekai luun natad bawang rayeh luk iring munung tanga' ruma' raca'.

⁷Mordekai nemada' neneh ratnan luk pangeh nangun neneh, idi ratnan kinula' usin luk pijani' Haman miak barén bang kas raca' kudeng amung lun Yahudi pitayen.

⁸Ieh nemaré ni Hatak sebalad surat ukum luk pinutut déi' Susa ineh luk ngecuk ngaté nedeh. Mordekai nemutih neneh maré surat ineh ni Ester, idi ngegala' susa' ineh kuanneh, pelé ieh amé' mutuh éi' ratnan raca' kuan pupuneh.

⁹Hatak nenganau' kudeng ineh,

¹⁰idi Ester nemaré bala ini iten Hatak kuan Mordekai:

¹¹kebalaneh, "Kudeng idé-idé deléi idi decur amé' luun natad luk bal alad pian papu' raca' dengan na tinawar, lemulun ineh kali' rungen pitayen. Ieh ineh ukum raca'; amung-amung lemulun, ratnan lun rayeh-rayeh raca' macing nan anak itin luk tudo bang babpat-babpat imet, kali' ineh. Seburur pana' nateh miak mepuit ratnan ukum ineh, kudeng raca' na natang rukudneh luk ratnan amas, pad lemulun ineh na pitayen. Iamo' sebulan kinioneh raca' na nenawar negku."

¹²Kareb Mordekai nekali' bala Ester ineh,

¹³ieh nemaré kali' neneh, kebalaneh, "Aleg iko ngerawé iko meluun samal ratnan lun Yahudi luk baken ngaceku iko bang ruma' raca!

¹⁴Kudeng iko ungeng bang kareb luk kudeng ini, surga miak ngedengan nelun Yahudi, pad ideh mulun, iamo' iko pitayen, idi tetek ruma' i tamam miak mabud pitayen. Kian iko mangun ku raca' decur lek ngaceku susa' luk kudeng ini."

¹⁵Ester nengor bala Mordekai, kebalaneh:

¹⁶"Amé' ngamung lun Yahudi luk déi' Susa, pad ideh mawa' na kuman idi ngerawé negku. Aleg kuman idi ngirup teluh aco idi teluh dacek kinioneh. Demulunku idi ui pana' miak nganau' kudeng ineh teh. Pangeh ineh ui miak amé' papu' raca', sagan tu pana' ngelaba ukum. Kudeng ui maté, ui maté."

¹⁷Idi Mordekai nenalan idi nenganau' luk icuk Ester neneh.

Ester 5

¹Aco luk keteluh kareb ieh mawa', Ester nengayung ku ayung raca' decur, idi ieh iné' tupid luun natad luk bal alad ruma' raca' petutup tekep kerusi raca'. Raca' idi luun kerusineh.

²Kareb raca' nekali' Ester tupid bal takep, ieh mawang niat neneh, idi ieh nenatang rukudneh luk ratnan amas. Idi Ester iné' ngakem papedneh.

³"Anun pianmu, Raca' Decur Ester?" kebala raca' neneh. "Ui maré luk pianmu sagan tu pana' setangal imetku."

⁴Idi kebala Ester, "Kudeng iko pian, ui nawar namu idi Haman amé' ku irau luk ruenku temina' kuan medueh bang malem ini."

⁵Idi raca' nenawar Haman miket amé', pad didueh amé' ku irau Ester. Idi didueh iné'.

⁶Kareb didueh ngirup, raca' nengitun ni Ester, kebalaneh, "Mada' negku luk pianmu, pad iko ngalap ineh sagan tu pana' setangal imetku."

⁷Idi kebala Ester,

⁸"Kudeng iko pian ngua' putuhku, ui mutuh nemedueh amé' ku irauku nebpa teh. Kareb ineh ui mada' namu ratnan luk pianku."

⁹Kareb Haman muli' ratnan irau ineh, ieh mawang niat. Iamo' kareb ieh nekali' Mordekai munung tanga' ruma' raca' ineh, idi Mordekai na nudur idi na nengedita' neneh kareb ieh lemaba, idi Haman pelaba useh neneh.

¹⁰Iamo' ieh nengimet bururneh sebuleng idi ieh nuli'. Ieh nenawar lun rurumneh iné' ruma'neh, idi nemutuh awanneh Serés maya' nedeh.

¹¹Ieh nepebala dengan medita' niat ratnan binawehneh luk mula', ratnan kinula' anak deléineh, idi teh ratnan kudeng apeh raca' nengikit neneh, idi ratnan ieh mebala meluun ratnan lun rayeh raca' luk baken.

¹²"Meluun teh," kebala Haman, "Raca' Decur Ester nenganau' aceh irau kuan kai dueh i raca' sebuleng mo', idi kai tinawar amé' nebpa teh.

¹³Iamo' amung ineh na ulek kuanku kareb ui nier Mordekai lun Yahudi ineh tudo munung tanga' ruma' raca'."

¹⁴Idi kebala awanneh idi amung lun rurumneh, "Do' iko ngecuk nelun nganau' aceh luk inan ngekito lemulun, kidita'neh 12 depeh setangal. Pekak nebpa iko miak mutuh raca' ngekito Mordekai luun ineh, pelé iko amé' ku irau ineh dengan mawang niat." Idi Haman mawang niat ku bala ineh; idi ieh nemudut luk inan ngekito lemulun ineh.

Ester 6

¹Dacem ineh raca' na medacep mateh, idi ieh nengecuk nelun duken nguit surat imet pad uen maca' kuanneh.

²Babpat luk bica'deh, ieh ineh ratnan Mordekai luk pangeh nekali' aceh gayam Bigtana idi Teris, dueh burur lun luk pinani' luk matar takep raca'. Idi didueh sikal ngaté raca'.

³Idi raca' nengitun, kebalaneh, "Pangehké tau ngedita' idi ngua' do' Mordekai ineh?" Idi kebala lun dukenneh, "Na luk inau' kuanneh."

⁴Kebala raca' "Inanké lun rayehku tungé' ruma'ku?" Idi Haman, luk pian mutuh raca' ngekito Mordekai su luk inan ngekito luk pangeh tinana'neh, iné' luun nataad.

⁵Idi kebala lun duken raca', "Haman idi tungé' pian papu' namu." Idi kebala raca', "Mutuh neneh semuet."

⁶Haman nesemuet, idi kebala raca' neneh, "Inan seburur lemulun luk ui pian uen ngedita'. Anunké luk petulu ruenku kuan lemulun ineh?" Idi Haman nengerawé, "Idéké luk belén raca' uen ngedita' lek? Kali' rungen ui lek."

⁷⁻⁸Idi ieh nengor bala raca', "Do' nguit kuyu raca' luk pangeh pikaimu kuan lemulun ini. Idi ngayung bang tang kudamu ku belawan luk do'.

⁹Idi ngecuk lunmu luk meluun rayeh ngayung lemulun ineh ku kuyu'mu ineh, idi nguit neneh maya' luun kuda nalan lemaba bawang. Idi ngecuk lun rayehmu ngitang kareb didueh nalan: 'Do' nier ua' raca' kuan lemulun luk ruenneh ngedita!' “

¹⁰Idi kebala raca' ni Haman, "Miket iko ngalap kuyu' idi kuda ineh pad ngedita' ni Mordekai lun Yahudi ineh. Do' nganau' kuanneh amung-amung luk pangeh bilamu. Ieh tudo munung tanga' ruma'ku.”

¹¹Idi Haman nengalap kuyuh' idi kuda raca'. Ieh nengayung Mordekai ku kuyu' ineh. Idi Mordekai nemaya' luun kuda, idi Haman nenguit neneh nalan lemaba bawang idi nengitang kuan lun mula' maya' dalan, "Do' nier ua' raca' kuan lemulun luk ruenneh ngedita!'”

¹²Pangeh ineh Mordekai iné' munung tanga' ruma' raca'. Idi Haman ngebpu kiungneh idi nuli' dengan igu'.

¹³Idi ieh nemada' awanneh idi lun rurumneh ratnan luk nangun kuanneh. Idi kebala awanneh idi lun rurumneh luk mileh ineh neneh, "Iko ngimun uen ngebeneh pa kiung Mordekai. Ieh ineh lun Yahudi, idi iko na miak tumam pa kiungneh. Kali' rungen iko mebpeh sirennéh.”

¹⁴Laba' ideh pegayam, lun luk pinani' rat ruma' raca' nacing pian nated ni Haman amé' ku irau Ester.

Ester 7

¹Raca' idi Haman iné' kuman déi' ruma' Ester

²luk kedueh kua'. Kareb ideh ngirup, raca' nengitun neneh, "O Raca' Decur Ester, anunké luk pianmu? Mada' negku, pad iko ngalap ineh, sagan tu pana' setangal imetku."

³Idi kebala Ester, "Kudeng iko pian ngua' putuhku ini, ui mutuh pian mulun idi pupuku pana'.

⁴Ui ini idi pupuku pangeh pinasui pad miak pitayen macing mabud. Kudeng kai pisuen mangun ku demulun, kali' rungen ui ungeng idi na ngesusa' raca' ku dereh kai."

⁵Idi Raca' Ahasuiras nengitun ni Ester, kebalaneh, "Idéké mekuu' nganau' luk kudeng ineh? Iapehké lemulun ineh?"

⁶Idi kebala Ester, "Bunu' kai idi lun luk ngedereh nekai, ieh ineh lemulun ini luk dat, Haman!" Idi Haman pelaba tot.

⁷Dengan megateh niat raca' neburo rat bang takep idi iné' bang kabun luk iring ruma' raca'. Idi Haman kali' raca' sikal ngukum neneh, idi ieh neketecan pian mutuh Raca' Decur Ester ngulun neneh.

⁸Kareb raca' nelemubed rat bang kabun iné' bang takep Ester, Haman siebpeh luun kerusi Ester pian mutuh éi'. Idi raca' nengitang, "Miakké lemulun ini pasét nan Raca' Decur pa kiungku bang ruma'ku ini?" Kareb raca' pangeh nepebala, lun luk pinani' nemapen uluh Haman.

⁹Idi kebala sebururdeh, ieh ineh Harbona, "Haman pangeh nemudut aceh su luk inan ngekito ni Mordekai déi' ruma'neh, kidita'neh 12 depeh setangal! Idi Mordekai ineh luk nengulun raca'." Idi kebala raca', "Ngekito Haman luun ineh!"

¹⁰Idi Haman tikito luun ineh luk tinina'neh kuan Mordekai. Pangeh ineh useh raca' nugka'.

Ester 8

¹Bang aco sineh teh Raca' Ahasuiras nemaré kuan Raca' Decur Ester amung binaweh idi tana' Haman, bunu' lun Yahudi ineh. Ester nemada' raca' ratnan ieh pupu Mordekai, idi Mordekai tinawar amé' matun raca'.

²Raca' nengelengu susing etuneh (luk ilapneh lemubed rat ni Haman) idi nemaré ineh kuan Mordekai. Idi Ester nenganau' Mordekai ku lun rayeh binaweh idi tana' Haman.

³Idi Ester netekeradung pa kiung raca' idi nengitang, mutuh neneh ngagka' dat luk icing Haman luk inul Agag kuan lun Yahudi ineh.

⁴Idi raca' nengegenang rukud amas pa kiungneh, idi Ester netuped idi nepebala,

⁵"Kudeng iko pian, kudeng iko méi' negku, idi kudeng ieh matu kali'mu, do' iko mutut aceh ukum pad bala Haman Hamedata luk inul Agag na uen ngacing. Ngaceku ieh nengecuk ngaté amung lun Yahudi bang imetmu.

⁶Kudeng apehké ui tuman kudeng susa' ini macing kuan pupuku, pad pupuku sebuleng pitayen?"

⁷Idi kebala Raca' Ahasuiras inan Raca' Decur Ester idi Mordekai lun Yahudi ineh, "Ui pangeh nengekito Haman ngaceku datneh nelun Yahudi. Ui pangeh nemaré binaweh idi tana'neh kuan Ester.

⁸Iamo' aceh ukum luk pangeh biré bang ngadan raca' idi luk itu ku etu raca' na miak uen ngena. Iamo' iko miak ngayud anun-anun luk pianmu kuan lun Yahudi. Ieh miak uen ngayud dengan ngadanku, idi ieh miak uen ngetu ku etu raca'."

⁹Ini mangun dueh ngepulu' teluh aco, bulan teluh, ieh ineh bulan Sibana. Mordekai nenawar nelun luk ngayud kuan raca', idi teh ieh nengecuk nedeh ngayud surat kuan lun Yahudi, pengulu, lun luk ngimet, idi lun rayeh bang 127 babpat rat India macing Sudan. Surat-surat ini inayud bang buri' anid babpat ineh, idi kuan lun Yahudi bang buri'deh sebuleng.

¹⁰Mordekai nengecuk ngayud surat ini dengan ngadan Ahasuiras, idi ngetu surat ineh ku etu raca'. Surat ineh tinated lun luk maya kuda rat ruma' raca'.

¹¹Surat ineh nengegala' ratnan raca' nima' nelun Yahudi bang anid bawang temina' matar burudeh. Kudeng lun pebunu' rat bang babpat sapeh pana' ngerieng nedeh, ideh miak ngua' idi ngaté nedeh perapu dengan awan idi anakdeh. Ideh miak ngaté nedeh macing mabud idi ngalap binawehdeh.

¹²Ukum ini miak bén aput imet Parsi kareb aco luk litep ngaté nelun Yahudi, ieh ineh pulu' teluh aco bulan pulu' dueh, ieh ineh bulan Adar.

¹³Ineh ginala' mangun ku ukum bang anid-anid babpat, pelé lun Yahudi temina' matar bururdeh ratnan bunu'deh bang aco sineh.

¹⁴Maya' ecuk raca' lun luk maya' kuda raca' nenalan dengan mesaget. Ukum ineh ginala' déi' Susa pana', ieh ineh bawang rayeh.

¹⁵Mordekai nenalan rat ruma' raca', inayung ku kuyu' luk mebata' idi mebuda', idi kuyu' luk meboyor ratnan kibung pu luk sia' merirem, idi pata amas luk pelaba do'. Idi déi' luun dalam Susa ideh ngitang ku awang niatdeh.

¹⁶Idi lun Yahudi mawang niat idi meran niat ngaceku ideh kali' ideh uen ngetueh.

¹⁷Bang anid-anid babpat idi bawang, su apeh ukum raca' pangeh bica', lun Yahudi nenganau' aco rayeh, idi nenganau' irau dengan mawang niat. Idi teh mula' lun baken nengisu' adatdeh mangun ku lun Yahudi, ngaceku ideh matot nedeh nekini.

Ester 9

¹Idi pulu' teluh aco bulan Adar, ieh ineh aco luk inan ukum raca' mangun. Idi bang aco sineh bunu' lun Yahudi merapet ngelaya' nedeh. Iamo' setuneh lun Yahudi nengelaya' nedeh.

²Bang anid ruma' lun Yahudi bang anid bawang aput imet Ahasuiras, lun Yahudi netemina' munu' lemulun luk ngerieng nedeh.

³Setuneh amung lun rayeh bawang, ieh ineh pengulu, lun luk ngimet, idi lun luk duken raca' nengedengan nelun Yahudi, ngaceku ideh matot ni Mordekai.

⁴Aput imet ineh Mordekai mebala, ngaceku ieh luk meluun rayeh bang ruma' raca', idi tuehneh iuk-iuk amé' rayeh.

⁵Idi lun Yahudi munu' bunu'deh maya' piandeh. Ideh munu' nedeh ku pelapet idi ngaté nedeh.

⁶Déi' Susa, ieh ineh bawang rayeh, lun Yahudi nengaté limeh ngeratu lemulun.

⁷Idi teh ideh nengaté Parsandata, Dalpon, Aspata,

⁸Porata, Adalia, Aridata,

⁹Paramasta, Arisai, Aridai, idi Baisata,

¹⁰ieh ineh pulu' anak Haman Hamedata, luk bunu' lun Yahudi ineh. Iamo' na ideh nengaro binaweh bunu'deh.

¹¹Bang aco sineh kinula' lemulun luk pinaté déi' Susa, pangeh bida' nan raca'.

¹²Idi kebala raca' inan Raca' Decur Ester, "Lun Yahudi pangeh nengaté 500 lemulun déi' Susa mo', dengan pulu' anak Haman. Kudeng apehké luk inau'deh bang amung bawang luk isuut? Anunké luk pianmu nekini? Iko miak ngalap ineh. Do' mada' luk pianmu negku, pad iko ngalap ineh."

¹³Kebala Ester, "Kudeng pianmu, nima' nelun Yahudi déi' Susa nganau' luk inau'deh aco sini nebpa teh. Idi ngecuk nelun ngekito butung pulu' anak Haman luun su luk inan ngekito lemulun."

¹⁴Idi raca' nengecuk nganau' luk kudeng ineh, idi ukumneh bida' déi' Susa. Idi pulu' butung anak Haman tikito siren amung lemulun.

¹⁵Idi pulu' apat aco bulan Adar, lun Yahudi luk tudo déi' Susa nepamung idi nengaté 300 burur lemulun bang bawang ineh. Iamo' na ideh nengaro binawehdeh.

¹⁶Lun Yahudi bang amung bawang luk isuut pana' netemina' matar bururdeh. Ideh nengaté 75,000 lemulun luk megateh nedeh, pad ideh mepuit ratnan bunu'deh. Iamo' na ideh nengaro binawehdeh.

¹⁷Ieh ineh pulu' teluh aco bulan Adar. Kenebpa ieh ineh pulu' apat aco bulan ineh na ideh nengaté lemulun teh, iamo' ideh nenganau' irau dengan mawang niat.

¹⁸Iamo' lun Yahudi déi' Susa nenganau' aco rayeh kareb pulu' limeh aco bulan ineh, ngaceku ideh nengaté bunu'deh kareb pulu' teluh aco bulan idi pulu' apat aco bulan, idi ideh nugka' pulu' limeh aco bulan ineh.

¹⁹Ineh punneh lun Yahudi luk tudo bang bawang luk isuut luk na libung batu, ngerayeh pulu' apat aco bulan Adar pelé ideh nganau' irau, idi ideh pebaré luk kenen arangdeh sebuleng bang aco sineh.

²⁰Idi Mordekai nengecuk nelun ngayud ratnan amung-amung luk nangun. Ieh nemaré surat kuan amung lun Yahudi luk muneng idi luk mado, aput imet Parsi,

²¹ngecuk nedeh nganau' aco rayeh kareb pulu' apat idi pulu' limeh aco bulan Adar bang anid lak.

²²Ieh ineh aco luk inan lun Yahudi nepuit ratnan bunu'deh; ieh ineh aceh bulan susa' idi dat niat luk inisu' mangun ku aceh kareb awang idi do' ria'. Ideh icuk ngerayeh aco ini dengan nganau' irau, idi pebaré luk kenen kuan bururdeh sebuleng idi kuan lun masi' pana'.

²³Idi lun Yahudi nemaya' bala Mordekai, idi aco rayeh ineh uen maya' anid-anid lak.

²⁴Haman Hamedata luk inul Agag, ieh ineh bunu' lun Yahudi, pangeh nenala' udi luk titen "purim", pelé ieh kali' aco luk inan ngaté nelun Yahudi. Ieh merapet ngaté nedeh macing mabud.

²⁵Iamo' Ester iné' matun raca', idi raca' nemaré ukum luk inayud, pad Haman sebuleng nekaneh ukum luk tinina'neh kuan lun Yahudi. Ieh idi anakneh tikito luun su luk inan ngekito lemulun.

²⁶Ineh punneh aco rayeh ineh titen Irau Nala' Udi, ngaceku ilung "Purim" ieh ineh udi. Ngaceku surat Mordekai idi ngaceku luk pangeh nangun kuandeh,

²⁷lun Yahudi nengeletep aceh ukum kuan bururdeh sebuleng, inuldeh, idi idé- idé luk mangun ku lun Yahudi, pelé ideh ngerayeh dueh aco ineh anid lak bang kareb luk petulu, maya' bada' Mordekai.

²⁸Pangeh litep pad anid tetek ruma' lun Yahudi bang anid bawang luk isuut idi luk rayeh, idi inuldeh luk mucu pana', ngerawé idi ngerayeh Aco Nala' Udi macing raked-raked.

²⁹Idi Raca' Decur Ester Abikail dengan Mordekai nengayud aceh surat dengan lalud ngadanneh pad ngeletep surat ratnan Purim luk inayud Mordekai atun ineh.

³⁰Surat ineh barén kuan amung lun Yahudi, idi sebalad barén kuan 127 babpat bawang bang imet Parsi, pad mutuh awang idi do' udeng kuan amung lun Yahudi,

³¹idi teh pad ngecuk nedeh maya' Aco Nala' Udi bang kareb luk petulu, mepad kudeng ideh nemaya' ukum ratnan aco mawa' idi kareb temido. Ukum ini biré Mordekai, idi Raca' Decur Ester.

³²Idi ukum Ester luk ngamo adat Purim ineh inayud bang surat.

Ester 10

¹Raca' Ahasuiras nengecuk nelun lod idi nelun luk pa dayeh aput imetneh ngakem kuanneh.

²Amung kekammeneh luk rayeh idi luk inan mawa dengan bala ratnan kudeng apeh ieh nengikit Mordekai pangéh inayud bang Surat Inul Raca'-Raca' Parsi idi Midi.

³Raca' Ahasuiras mo' luk meluun rayeh ratnan Mordekai lun Yahudi ineh. Ieh buren lun Yahudi luk baken. Ieh ngakem pad ngacing peruan kuan pupuneh, pelé inuldeh luk mucu do' udeng.

Ayub

Ayub 1

¹Inan aceh lemulun luk ngadan Ayub, luk tudo bang bawang Us. Ieh sembayang inan Allah idi lutep maya' Neneh. Ieh ineh aceh lemulun luk pelaba do', idi luk na pian nganau' anun-anun luk dat.

²Ieh inan tudu' anak deléi idi teluh anak decur.

³Idi teh ieh inan 7,000 dumba, 3,000 unta, 1,000 sapi', idi 500 keladai. Idi teh ieh inan pelaba ula' demulun, idi ieh aceh lemulun luk lun do' arang amung-amung lemulun luk tudo déi' pa busat aco.

⁴Idi anak-anakneh luk deléi pelibal-pelibal nganau' irau, idi lun baken miak amé', idi ideh megéi' neteng teluh kinanakdeh luk decur ineh.

⁵Kareb anid irau ineh pangeh, Ayub megéi' kulat muka pekak idi maré baré ku ngeligan anakneh. Ieh megéi' nganau' kudeng ineh. Ngaceku ieh ngerawé kian seburur rat arangdeh lek pangeh nenganau' sala' idi nenguyo Allah dengan na kali'.

⁶Idi kareb aco luk inan melaikat amé' papu' Tuhan, Sétan idi arangdeh.

⁷Kebala Tuhan neneh, "Anunké luk inau'mu?" Idi kebala Sétan, "Ui lawé-lawé luun tana'."

⁸Kebala Tuhan, "Kali'mu demulunKu Ayub? Luun tana' ineh, seburur pana' nateh luk lutep idi do' mepad kudeng ieh. Ieh sembayang Negku idi na pian nganau' luk dat."

⁹Kebala Sétan, "Miakké Ayub sembayang Namu, kudeng ieh na ngalap anun-anun rat Namu?"

¹⁰Iko pangeh nengelibung neneh idi tetek ruma'neh idi amung binawehneh pana'. Iko megéi' ngeperuan amung luk ruenneh, idi Iko nemaré neneh mula' sapi' aput bawang ineh.

¹¹Iamo' kudeng Iko ngalap amung binawehneh, kali' rungen ieh ngediman Namu."

¹²Kebala Tuhan inan Sétan, "Mo, amung binawehneh bang paladmu, iamo' aleg iko ngedereh ni Ayub." Kareb ineh, idi Sétan neburo.

¹³Idi bang aceh aco kareb anak Ayub nenganau' irau déi' ruma' kinanakdeh luk rayeh,

¹⁴seburur lun duken nupun iné' ni Ayub, kebalaneh, "Kai uned ngeradu lati' makai sapi', idi amung keladai idi bang laman luk muneng ku lati'.

¹⁵Idi denak-denak lun Sabian iné' mano nedeh. Idi ideh nengaté amung-amung demulunmu. Idi ui sebuleng mo' luk mulun luk maré kali' namu."

¹⁶Kareb nateh balaneh nepangeh, idi seburur demulunneh luk baken nacing, kebalaneh, "Dumbamu idi lun luk matar nedeh naté nekaneh ku purét. Idi ui sebuleng mo' luk mulun luk maré kali' namu."

¹⁷Kareb nateh balaneh nepangeh, idi teh seburur demulunneh luk baken nacing, kebalaneh, "Teluh babpat bunu' lun Kasdim nemunu' nekai, idi nengaté amung-amung demulunmu. Idi ui sebuleng mo' luk mulun luk maré kali' namu."

¹⁸Kareb nateh balaneh nepangeh, idi teh seburur demulunneh luk baken nacing, kebalaneh, "Idi kareb anak-anakmu uned kuman irau déi' ruma' anakmu luk rayeh,

¹⁹idi inan aceh barui luk nacing rat su luk ali-ali, idi nemalid ruma' ineh idi amung-amungdeh naté. Idi ui sebuleng mo' luk mulun luk maré kali' namu."

²⁰Idi Ayub nudur idi nengerarak kuyu'neh ngaceku ieh dat niat. Idi ieh nengiki uluhneh, idi netekeradung.

²¹Kebalaneh, "Ui tinganak lubpa idi miak maté lubpa teh. Tuhan nemaré luk amung-amung, idi nekini Ieh pangeh nengalap ineh. Do' ngadanNeh buren!"

²²Sagan tu pana' susa' ineh, na Ayub nenganau' sala' idi ngedat Allah.

Ayub 2

¹Idi kareb aco luk inan malaikat amé' papu' Tuhan sekua' teh. Sétan idi arangdeh.

- ²Kebala Tuhan neneh, "Rat iapehké iko?" Idi kebala Sétan, "Ui lawé-lawé luun tana'."
- ³Kebala Tuhan, "Kali'mu demulunKu Ayub? Luun tana' ineh seburur pana' nateh luk lutep idi do' mepad kudeng ieh. Ieh sembayang Negku idi na pian nganau' luk dat. Iko luk nengubuk Negku, pad Ui nenima' namu ngedereh neneh, dengan na punneh, iamo' Ayub lutep idi do' niat macing nekini."
- ⁴Kebala Sétan, "Seburur lemulun miak maré luk amung-amung pad ieh mulun.
- ⁵Iamo' kudeng Iko ngedereh bururneh sebuleng, ieh miak nguyo namu."
- ⁶Idi kebala Tuhan inan Sétan, "Mo, Ayub ineh bang paladmu, iamo' aleg iko ngaté neneh."
- ⁷Idi Sétan neburo rat pa kiung Tuhan, idi ieh nenganau' puruh luun aput burur Ayub.
- ⁸Idi Ayub iné' tudo iring aceh bubpun arap. Idi ieh nengalap aceh bila' sidangur pingukutneh puruhneh.
- ⁹Idi kebala awan Ayub neneh, "Lutepké iko macing nekini teh? Ngudehké iko na nguyo Allah idi maté?"
- ¹⁰Idi kebala Ayub, "Mebacé bala mineh! Kareb Allah maré luk do' kuan tau, tau ngalap ineh. Ngudehké tau medureng kareb Ieh maré susa' kuan tau." Bang amung-amung susa' ineh pana', Ayub na nengedat Allah.
- ¹¹Teluh lun rorum Ayub, ieh ineh Elipas, luk rat bawang Teman, Bildad luk rat bawang Sua, idi Sopar luk rat bawang Nama. Kareb ideh kali' ratnan dereh Ayub, ideh pian amé' ngikak neneh, pad ideh ngubuk neneh.
- ¹²Kareb ideh mado rat neneh, ideh nenier ni Ayub, iamo' na ideh miti neneh. Kareb ideh kali' neneh Ayub, idi diteluh nangi' idi temido. Ideh nengerarak kuyu'deh, ngaceku ideh dat niat, idi ideh nengisak abuh iné' dita' idi teh luun uluhdeh.

¹³Idi ideh netudo iringneh kinio tudu' aco idi tudu' alem dengan na pebala; ideh ungeng mo', ngaceku ideh kali' derehneh.

Ayub 3

¹Mio-mio idi Ayub nengimun pebala. Idi ieh nengediman aco luk inanneh tinganak.

²⁻³O Allah, do' ngediman aco luk inanku tinganak, idi malem karebku pun mangun ku anak.

⁴O Allah, do' ngisu' aco ineh mangun ku dacem, aleg ngerawé aco sineh teh; aleg nima' acang ngacang neneh.

⁵Nganau' aco sineh meseraber idi medacem; mapen neneh ku laput idi ngelinged mateh aco.

⁶Aleg ngiap dacem sineh bang anid lak;

⁷nima' dacem sineh dat ali ruked-ruked, pad na luk idi awang niat bang kareb ineh.

⁸Nima' lun ngediman aco sineh, ieh ineh lun luk mileh nawar galau.

⁹Aleg nima' gituen pekak merasat; aleg nima' dacem ineh mangun ku acang aco.

¹⁰Ngediman dacem ineh, ngaceku ieh na nengitek nakan tinanku, iamo' ieh nemaré negku kuan susa' idi dereh.

¹¹Meluun do' ui naté bang nakan tinanku, idi naté karebku pun tinganak.

¹²Ngudehké tinanku nengabin negku: ngudehké ieh neniti' negku?

¹³Kudeng ui pangeh naté kareb ineh, nekini ui miak ngato erurku,

¹⁴idi rudap mepad kudeng raca'-raca' idi lun rayeh-rayeh luk nemudut ruma' raca' luk mon.

¹⁵Idi teh ui miak rudap mepad kudeng anak raca' luk manu' ruma'deh ku amas idi pirak,

¹⁶idi rudap mepad kudeng anak butung karebneh tinganak.

¹⁷Bang tanemdeh lun luk dat ugka' nganau' kekamen luk dat, idi lun luk merur ngakem ngato erurdeh.

¹⁸Lun luk tiban pana' ngalap awang niat, idi na nekali' arod idi ukum luk metueh.

¹⁹Amung-amung lemulun idi déi bang tanem, lun rayeh idi anak pana', idi demulun pana' puatin.

²⁰Ngudehké nima' lemulun mulun bang susa'? Ngudehké maré acang kuan lemulun luk medereh?

²¹Ideh nginulat até, iamo' na ieh macing; ideh meluun pian ku tanem ratnan binaweh.

²²Na ideh mawang niat pad macing ideh maté idi tinamen;

²³Allah ngelinged luk miak mangun mucu idi ngerieng nedeh rat selipa idi rat pa selipa.

²⁴Na ui kuman, iamo' ui temido, idi ui na miak ugka' ngarod.

²⁵Amung-amung luk inanku matot idi merapang macing negku.

²⁶Idi na ui miak mawang niat idi ngato erurku, idi susa'ku na tu-tu ugka'.

Ayub 4

¹⁻²O Ayub, mét niatmu kudeng ui pebalaké? Ngaceku na ui miak ungeng teh.

³Iko pangeh nemada' mula' lemulun idi nengetueh ticu'deh luk melaya'.

⁴Kareb seburur luk melaya' idi merur metebaceng, balamu luk nengubuk neneh pad ieh tuman.

⁵Iamo' nekini iko nekaneh susa', idi iko negagap pad iko na miak tuman.

⁶Iko nesembayang inan Allah, idi na iko nenganau' sala'. Petulu iko merapet.

⁷Ngerawé do'-do'! Inanké seburur lemulun luk matu mekaneh susa'?

⁸Ui pangeh nenier lemulun ngeradu lati' sala'deh, idi nengisak luk dat mepad kudeng padé, idi nekini ideh ngeranih dat idi sala' teh.

- ⁹Dengan usehNeh Allah nginiat mepad kudeng barui, pad ideh maté.
- ¹⁰Lun luk dat ngarod idi ngeku mepad kudeng balang, iamo' Allah ngagka' aroddeh idi mila' lipendeh.
- ¹¹Mepad kudeng balang luk na luk kenen, ideh maté idi anak-anakdeh urap-urap.
- ¹²Inan sekua' aceh bala nacing negku kareb ali-ali, pad bala ineh lélé na miak pedingerenku.
- ¹³Ieh mepad kudeng nupi luk ngesabeng rudapku.
- ¹⁴Ui megegker niat; amung bururku pana' megegker teh.
- ¹⁵Aceh bui iné' luun kiungku, pad luunku merinit.
- ¹⁶Idi kareb ineh ui nenier aceh luk tuper. Ui nenutong, iamo' na miak kali' ayuneh. Idi ui neninger aceh arod kareb ali-ali.
- ¹⁷Kebalaneh, "Inanké aceh lemulun luk matu pa kiung Allah? Inanké aceh lemulun luk meligan pa kiung Lun luk nemudut neneh?"
- ¹⁸Allah na merapet inan lun luk dukenNeh rat déi' surga, Ieh kali' sala' melaikatNeh pana'.
- ¹⁹Miakké Ieh merapet inan aceh pudut luk ratnan tana' salit, luk inau' ratnan kipu luk uen ngareg mepad kudeng belebpang?
- ²⁰Aceh lemulun miak mulun pekak, iamo' maté kareb nateh malem dengan na lun kali'.
- ²¹Amung binawehneh miak lapen; idi ieh maté, kareb nateh ieh ngalap ileh."

Ayub 5

- ¹O Ayub, do' iko ngitang. Inanké lemulun luk ngor tangmu? Inanké melaikat luk inanmu merapet?
- ²Mebacé iko maté ku ét niatmu.
- ³Ui pangeh nekali' lun mebacé luk ayudeh do' udeng, iamo' denak-denak ui ngacing kediman kuan ruma'deh.

- ⁴Idi anakdeh na miak do' udeng, pad na lemulun miak ngedengan nedeh bang besara'.
- ⁵Lemulun luk melau kuman padé lun luk mebacé — padé luk mulun arang tabpa' pana — idi lun luk meparing pana' melili ku binawehneh.
- ⁶Luk dat na miak mulun bang tana', idi susa' na miak temubu' luun lati'.
- ⁷Lemulun ngacing susa' kuan bururneh sebuleng, mepad kudeng anak apui luk temulud.
- ⁸Kudeng ui iko, ui miak lumi inan Allah, idi nguit adu'ku amé' Neneh.
- ⁹Kai na kali' ilung kekamenNeh luk rayeh, idi na kekiped tanu'Neh luk inan mawa.
- ¹⁰Ieh maré udan luun tana' idi mubpur amung lati'.
- ¹¹Allah ineh luk ngikit nelun luk masi', idi ngawang niat lun luk temido.
- ¹²⁻¹³Ieh ngusag gayam lemulun luk naluk; Ieh nganau' lun mileh mekaneh abpungdeh sebuleng, pad amung-amung luk ruendeh na mangun;
- ¹⁴kareb macang aco pana' ideh ngakap-ngakap, mepad kudeng kareb medacem.
- ¹⁵Iamo' Allah ngulun nelun masi' ratnan até; idi muit nelun luk melaya' rat nelun luk ngedereh nedeh.
- ¹⁶Ieh maré rapet nelun luk masi', idi niep tang lun luk dat.
- ¹⁷Samal kuan lemulun luk badén Allah! Aleg mét niat kareb Ieh mada' namu.
- ¹⁸Tuhan ngabet urat luk inau'Neh; tiku'Neh ngurat namu, idi teh tiku'Neh ngedo' namu.
- ¹⁹Megéi' kua' Ieh ngulun namu ratnan susa'.
- ²⁰Ieh ngulun namu kareb inan iru', idi matar namu ratnan até, kareb inan bunu'.
- ²¹Allah muit namu rat nelun luk ngedat. Ieh ngulun namu kareb até macing.

²²Iko miak meriruh kareb inan susa' idi lau, idi na matot ku pung luk mesangit.

²³Lati' luk uenmu ngeradu na inan batu, idi pung luk mesangit na ngaté namu.

²⁴Iko miak tudo bang lepomu dengan na susa', kareb iko nier dumbamu na luk na idi.

²⁵Idi anakmu mepad kinula' uduh.

²⁶Iko miak mulun macing mengered, mepad kudeng padé luk temubu' macing uen ngeranéh.

²⁷O Ayub, mio tu-tu kai pangeh nesibada' ini. Kai kali' ini matu. Ngerawé do'-do'!

Ayub 6

¹⁻²Kudeng susa' idi derehku uen nimang,

³ideh meluun berat ratnan bada luk tangeb abpa' rayeh, kali' rungen balaku na petulu.

⁴Allah luk Melalud nengeput negku ku langan idi parirneh nubpa' bang bururku. Allah ngelaya' negku ku amung luk katot.

⁵Keladai mawang niat karebneh kuman uduh, idi sapi' do' udeng karebneh kuman tucu'.

⁶Iamo' idéké miak kuman kikid luk metalang? Inanké én binuda' terur?

⁷Ui na pian kuman luk kudeng ineh, idi amung-amung luk kenenku nganau' negku mét.

⁸Ngudehké Allah na maré luk pituenku? Ngudehké Ieh na ngua' sembayangku?

⁹Meluun do' Ieh petacu ngaté negku,

¹⁰pad ui uput ku awang niatku, sagan tu pana' medereh. Ui kali' Allah ineh meligan; na tu ui ngelaba luk icukNeh rat mon.

- ¹¹Anunké ku tuehku, pad ui mulun. Anunké ulekku mulun kudeng ui na inan rapet?
- ¹²Inanké ui inau' ratnan batu? Tekalingké bururku?
- ¹³Ui na miak ngedengan bururku sebuleng; nabud tuehku idi na lun ngedengan negku peh.
- ¹⁴Sagan tu pana' ui belén lun necan Allah, petulu inan lun rurun luk ngedengan negku bang susa'.
- ¹⁵Iamo' muyuh luk rurunku naluk negku, mepad kudeng arur kareb merikan.
- ¹⁶⁻¹⁷Arur ineh mepanu' ku salju idi batu ais, iamo' kareb melau' salju idi ais ineh na idi, idi arur ineh mekeket.
- ¹⁸Lun luk nalan meraruh karebdeh nakap abpa'; pad ideh maté déi' su luk ali-ali.
- ¹⁹Lun luk nalan rat Siba idi Tema nakap abpa'.
- ²⁰Iamo' na rapetdeh kareb ideh macing ku arur luk na abpa'.
- ²¹Muyuh pana' mepad kudeng arur ineh sirenku; muyuh megagap nier derehku.
- ²²Inanké ui nemutih nemuyuh maré aceh baré negku? idi maré aceh suap nelun kuanku,
- ²³idi ngulun negku ratnan bunu' idi lun luk dat?
- ²⁴Do' mada' negku; mada' sala'ku, ui miak ungeng idi ninger bala muyuh.
- ²⁵Kudeng bala muyuh do' miak ui buken lek, iamo' bala muyuh mebacé.
- ²⁶Muyuh ngerawé balaku mepad kudeng bui; ngudehké muyuh ngua' luk bilaku karebku mesusa'?
- ²⁷Miakké muyuh ngedereh anak maté, idi masui nelun rurun muyuh?
- ²⁸Nier negku, na ui mebalih.
- ²⁹Petap adu' muyuh negku, Aleg muyuh nganau' luk na mesiri. Aleg ngadu' negku. Ui ini mesiri.

³⁰Iamo' muyuh ngerawé negku mebalih — muyuh ngerawé negku na kali' luk mesiri idi luk tekilu'.

Ayub 7

¹Ulun lemulun mepad kudeng kekamen lun pebunu', idi mepad kudeng ulun lun luk ngakem luk meberat,

²mepad kudeng lun tebarin luk pian ku su luk melungung, idi mepad kudeng lemulun luk nganét tabparneh.

³Anid-anid bulan na ulekku mulun; anid-anid dacem ui mesusa'.

⁴Kareb ui telubid pian rudap, pelaba kadang dacem ineh; ui na merudap, iamo' ui nginulat aco macang mo'.

⁵Bururku maput ku uled idi turak, idi nana' puruhku remuat.

⁶Amung aco luk nepelaba na luk inan merapet, idi aco ineh meluun awer ratnan luk pinguuk lun luk ngebaruh.

⁷O Allah, ngerawé ratnan ulunku ini bui mo', idi nabud awang niatku.

⁸Iko nier negku nekini, iamo' na Iko nier negku baruh. Kudeng Iko nakap negku, ui na idi.

⁹⁻¹⁰Mepad kudeng laput luk nalan idi na idi, kudeng ineh teh lemulun maté idi na lemubed; lemulun luk pekalai neneh na ngerawé neneh teh.

¹¹Ui na miak ungeng! Ui mesusa' idi museh! Na miak na ui pebala!

¹²Ngudehké Iko matar negku? Inanké ui aceh pung luk rayeh luk bang abpa'?

¹³Ui telubid pian ngato erurku, pad luk métku miak do'.

¹⁴Iamo' bang nupi Iko ngatot negku. Iko maré luk siren idi nupi luk ngagap,

¹⁵pad ui pian uen lun ngabet dier, pelé ui maté, idi na medereh.

¹⁶Ara' ui mulun. Mabud tuehku! Do' necan negku. Na ulek ulunku.

¹⁷Ngudehké Iko ngerawé lemulun, idi nier amung luk ruenneh?

¹⁸Iko nier neneh anid pekak, idi megéi' nutun neneh.

¹⁹Ngudehké Iko na teketed rat negku, pad ui nelen aka'ku?

²⁰Inanké Iko medereh ku sala'ku? O Iko luk megéi' nier lemulun! Ngudehké Iko nganau' negku ku luk badilin? Ngudehké ui mangun ku babeh kuanMu?

²¹Naké Iko miak maré do' ratnan datku, idi ngiu' sala'ku? Na mio teh ui miak telubid bang tanem, idi ui na idi kareb Iko nakap negku.

Ayub 8

¹⁻²Nabudké amung balamu luk mepad kudeng bui?

³Allah na tu-tu ngisu' ukum luk mesiri; Ieh megéi' nganau' luk matu.

⁴Kali' rungen anakmu nenganau' sala' pa kiung Allah, idi ini punneh Tuhan nengukum nedeh kudeng ineh.

⁵Iamo' do' iko lumi inan Allah idi sembayang,

⁶kudeng iko mesiri idi meligan, kali' rungen Allah amé' ngedengan namu, idi nuneb tetek ruma'mu ku ngua' do'mu.

⁷Idi amung binawehmu luk netutu' na miak uen maad dengan luk barén Allah namu.

⁸Ngerawé ratnan amung-amung ileh luk mon; idi bada' tepun tau.

⁹Ulun tau pelaba kamu', pad tau na kali' anun-anun. Tau mepad kudeng aca' luun tana' ini.

¹⁰Nima' lun mileh ineh mada' namu; do' ninger luk bida'deh:

¹¹"Pisui na miak mulun, su luk na abpa'.

¹²Kudeng abpa' mekeket, pisui ineh luk mekarang atun ratnan uduh baken, kareb ideh medari.

¹³Kudeng ineh teh lemulun luk na maya' Allah. Ideh mekelupan Allah, idi na merapet.

¹⁴Ideh merapet ku terbaru kelawa'.

¹⁵Kudeng ideh pucang nan tebaru kelawa', miakké ideh tuped meraben? Kudeng ideh ngimet tebaru ineh, miakké tebaru ineh tuman, pad ideh tuped?"

¹⁶Lun luk dat temubu' mepad kudeng uduh, kareb mét idang; idi mepad kudeng uduh luk bang kabun.

¹⁷Uatdeh ngawil amung bubpun batu idi teh amung batu luk bang tana' pana'.

¹⁸Iamo' kudeng iko mubput amung ineh, na lun kali' su luk inandeh.

¹⁹Ineh mo' awang lemulun luk dat; lun baken amé' ku libaldeh.

²⁰Iamo' Allah na necan lemulun luk lutep maya' Neneh, idi na Ieh ngedengan lemulun luk dat.

²¹Ieh maré namu meriruh idi ngitang sekua' teh,

²²iamo' Ieh ngigu' lemulun luk megateh namu, idi ruma' lun luk dat miak uen ngusag.

Ayub 9

¹⁻²Mo, ui pangeh neninger amung ineh atun. Iamo' lemulun na miak metueh ratnan Allah.

³Kudeng ieh pesaad pa kiungNeh, Allah miak ngitun meribu itun luk na miak uen ngua'.

⁴Allah mileh idi melalud, pad seburur pana' nateh luk metueh rat Neneh.

⁵Denak-denak Ieh mubuh pegkung-pegkung, idi ngusag nedeh dengan usehNeh.

⁶Allah ngeruyuh tana' ini, idi nguyu' amung diri tana'.

⁷Allah miak mebpeng aco pad ieh na masat, idi gituen pana' pad ideh na merasat.

⁸Seburur pana' nateh ngedengan Allah, kareb Ieh nemalad langit, idi kareb Ieh nengeradu' ribut abpa' rayeh.

- ⁹Allah nenganau' gituen bang langit luk titen Beruang, Belatik, Puru', idi gituen luk pa kabing busat aco.
- ¹⁰Kai na kali' ilung luk ruen Allah, idi kekamenNeh luk melalud na kekipedNeh.
- ¹¹Allah lemaba, iamo' ui na miak nier Neneh.
- ¹²Ieh ngalap luk pianNeh, idi seburur pana' nateh miak mebpeng Neneh; seburur pana' na miak ngitun Neneh, "Anunké luk ruenMu?"
- ¹³Useh Allah lutep. Ieh ngelaya' bunu'Neh luk nengedengan Rahab, pung luk rayeh bang abpa', luk sikal metueh rat Neneh.
- ¹⁴Kudeng apehké ui nakap aceh bala luk pingua' ku bala Allah?
- ¹⁵Sagan tu pana' ui na mesala', na luk miak ruenku, iamo' ui mutuh éi' ratnan Allah luk ngukum negku.
- ¹⁶Sagan tu pana' Ieh nima' negku pebala, na ui merapet Neneh ninger balaku.
- ¹⁷Ieh maré barui, pad Ieh necat idi ngeritep negku, dengan na punneh.
- ¹⁸Kareb nateh ui miak nginiat, idi Ieh ngacing aceh dereh teh; amung-amung luk icingNeh negku nganau' negku mét niat.
- ¹⁹Petuluké ui sikal metueh ratnan Allah? Petuluké ui nguit Neneh besara'? Idéké luk ngecuk Neneh amé'?
- ²⁰Ui na mesala', idi ui lutep maya' Tuhan, iamo' balaku luk ngesala' idi ngukum negku.
- ²¹⁻²²Ui na mesala', iamo' na mekudeh. Ui musam mulun. Na mekudeh; mesala' idi na mesala', Allah miak ngaté netau.
- ²³Kudeng seburur lun luk na mesala' maté denak-denak Allah meriruh mo'.
- ²⁴Allah nemaré tana' ini kuan lemulun luk dat. Ieh nenganau' amung lun luk mutut besara' mebuser. Idi kudeng na ini inau' Allah, idé luk nenganau' ineh?
- ²⁵Ulunku meluun awer ratnan lun luk peribatun, idi sebuleng aco pana' na ngacing peruan kuanku.

²⁶Ulunku lemaba mepad kudeng alud luk mawer, idi mepad kudeng awer kanui luk ngeladai.

²⁷⁻²⁸Kudeng ui merimud pian mekelupan étku, idi amung derehku lemubed amé' negku; ui kali' Allah ngerawé negku mesala'.

²⁹Kudeng Allah ngerawé negku mesala', anunké ulekneh?

³⁰Sabun na miak ngiu' sala'ku.

³¹Allah nala' negku bang aceh lubang luk dat pad ayungku migu' negku.

³²Kudeng Allah ineh lemulun, miak ui ngua' balaNeh, pad kai amé' besara'.

³³Iamo' seburur lemulun pana' nateh luk mangun ku gatam kai dueh Allah, pad ngukum nekai dueh.

³⁴O Allah, ugka' ngedereh negku! Idi aleg ngatot negku!

³⁵Ui na matot. Ui sikal pebala, ngaceku ui kali' niatku sebuleng.

Ayub 10

¹Ui musam mulun. Nier kudeng apeh ét niatku.

²O Allah aleg ngukum negku. Mada' negku anun punMu museh negku.

³petuluké Iko mekuel, pad Iko ngedat luk inau'Mu, idi meriruh ninger gayam lun luk dat?

⁴Inanké Iko nier, mepad kudeng luk siren lemulun?

⁵Mekamu'ké ulunMu, mepad kudeng ulun kai?

⁶Ngudehké Iko nakap amung sala' idi datku?

⁷Iko kali' negku na mesala', idi seburur pana' nateh miak muit negku rat Namu.

⁸Ticu'Mu luk nemudut negku, idi nekini ticu' ineh pian ngusag negku.

⁹Ngerawé kudeng apeh Iko nemudut negku ratnan tana' salit; pianké Iko ngareg negku mangun ku abuh?

- ¹⁰Iko nemaré tueh kuan tamanku, pad ieh nenginul negku; Iko nenubu' negku bang nakan tinanku.
- ¹¹Iko nenganau' bururku dengan tulang idi urat, idi nengebpu tulangku ku uang idi kubil.
- ¹²Iko pangeh nemaré ulun negku idi awaMu luk lutep, idi Iko nematar negku pad ui mulun.
- ¹³Iamo' nekini ui kali' ruked ineh Iko inan terawé luk inalum kuanKu.
- ¹⁴Iko nenier kudeng ui mesala', pad Iko ara' maré do' negku.
- ¹⁵Kareb ui mesala', ui petacu inan susa' pa kiungMu, iamo' kareb ui nganau' luk matu, na samal kuanku. Ui dat niat idi migu'.
- ¹⁶Kudeng ui inan sesuut do', Iko ngerada' negku mepad kudeng balang; Iko nganau' kekamen luk melalud pad ngedereh negku.
- ¹⁷Iko megéi' inan adu' ratnan ui; usehMu negku iuk-iuk amé' rayeh. Iko megéi' inan adu' luk mebaruh.
- ¹⁸O Allah, ngudehké Iko nenima' negku tinganak? Meluun do' ui naté kareb nateh lemulun nenier negku.
- ¹⁹Idi petacu rat bang nakan tinanku amé' bang tanem mepad kudeng na tinganak.
- ²⁰Naké ulunku malé mabud? Nima' negku, pad ui mawang niat segageh!
- ²¹Ui malé nalan, idi na lemubed, Ui amé' inan aceh bawang luk medacem,
- ²²ieh ineh su luk inan dacem, lungung, idi gagau, idi acang pana' mangun ku dacem.

Ayub 11

- ¹⁻²Naké lemulun ngua' bala luk mebacé ini? Miakké seburur lemulun ruen matu ngaceku balaneh mula'?
- ³O Ayub, iko ngerawé kai na miak ngua' balamu. Miakké balamu luk situnga ineh nganau' nekai mebagkeh?

- ⁴Iko mala luk bilamu ineh matu. Iko mala iko meligan pa kiung Allah.
- ⁵Ui pelaba pian ku Allah ngua' balamu!
- ⁶Ieh miak mada' namu ratnan ieh luk inalum. Inan luk meluun dalem ratnan ileh lemulun. Allah na ngukum namu maya' luk petulu.
- ⁷Miakké iko kali' lakan lalud idi rayeh Allah?
- ⁸Langit na lakanneh kuan Allah, iamo' ieh meluun ado rat namu. Allah kali' su luk inan até, iamo' na iko kali' ineh.
- ⁹Lalud Allah meluun rayeh ratnan tana' ini, idi teh meluun rayeh ratnan abpa' rayeh.
- ¹⁰Kudeng Allah ngakem namu, idi nguit namu amé' besara', idéké miak ngagka' Neneh?
- ¹¹Allah kali' lemulun sapeh luk na mayu; Ieh kali' amung-amung kekamendeh luk dat.
- ¹²Lun luk mebacé miak amé' mileh, kareb keladai luk meliputi amé' melayo.
- ¹³O Ayub, nganau' niatmu matu. Ngiding tiku'mu pa kiung Allah.
- ¹⁴Nala' sala' idi luk dat rat bang tetek ruma'mu.
- ¹⁵Pad iko miak tukag dengan na migu', idi lutep dengan na merapang,
- ¹⁶pelé amung susa'mu na teruayen peh; mepad kudeng ereb luk nepangeh,
- ¹⁷pad ulunmu meluun rasat ratnan muned aco, idi dacem misu' mangun ku acang.
- ¹⁸Idi iko do' udeng idi panu' ku rapet. Allah miak matar namu idi ngato erurmu.
- ¹⁹Na iko matot inan bunu'; idi mula' lemulun miak mutuh pedengan rat namu.
- ²⁰Iamo' lun luk dat miak lemiget dengan na merapet, idi kali' na luk idi dalam mepuit. Ideh merapet ku até mo'.

Ayub 12

- 1-2 Matu, muyuh mangun ku tang lun mula'. Kareb muyuh maté, ileh pana' maté dengan muyuh.
- 3 Ui pana' mileh kudeng muyuh; na ui meluun bacé rat nemuyuh; amung lemulun kali' amung luk pangeh bila muyuh.
- 4 Lun rorumku pana' situnga negku nekini; ideh meriruh, sagan tu pana' ui ini matu idi na mesala'. Iamo inan aceh kareb Allah nengua' sembayangku.
- 5 Muyuh na inan susa', iamo' muyuh situnga negku; muyuh necat lemulun luk malé mebpeh.
- 6 Iamo' lun mano idi lun luk na manu na inan susa', sagan pana' tuehdeh sebuleng mangun ku allahdeh.
- 7 Suit idi pung pana' miak mada' namu;
- 8 mutuh ileh ratnan pung luk luun tana' idi bang abpa'.
- 9 Amung-amungdeh kali' ticu' Tuhan nemudut nedeh.
- 10 Allah ineh luk ngimet ulun amung pudutNeh, idi ulun amung lemulun bang paladNeh.
- 11 Iamo' mepad kudeng dila' nutun én luk kenen, kudeng ineh teh lalidmu pian ninger bala.
- 12-13 Lun luk mengered inan ileh, iamo' Allah inan ileh idi lalud. Lun luk mengered do' kali', iamo' Allah do' kali' idi melalud nganau' luk amung-amung.
- 14 Kudeng Allah ngusag, idé luk miak nuneb, idi idéké luk muit nelun luk tetupin Allah?
- 15 Inan rikan kareb Allah na maré udan; inan ereb kareb Ieh maré abpa'.
- 16 Allah ineh mileh idi megéi' metueh, lun luk naluk idi lun luk saluken idi pa liang imet Allah.
- 17 Ieh ngusag ileh lun luk ngimet, idi nganau' lun rayeh nganau' luk mebacé.
- 18 Ieh nala' raca'-raca' idi naban nedeh.

- ¹⁹Ieh ngebeneh imam idi lun luk metueh ngimet.
- ²⁰Ieh nganau' nelun luk inan merapet pirud, idi ngalap ileh rat nelun luk mengered.
- ²¹Ieh ngigu' lemulun luk ngimet idi ngagka' tueh raca'-raca'.
- ²²Ieh maré acang kuan su luk medacem mepad kudeng até.
- ²³Ieh nganau' pupu metueh idi rayeh, iamo' Ieh ngelaya' idi ngusag nedeh teh.
- ²⁴Ieh nganau' nelun rayehdeh mebacé', idi nima' nedeh lawé-lawé déi' su luk ali-ali,
- ²⁵ideh ngakap-ngakap luun dacem mepad kudeng lun luk mabuk.

Ayub 13

- ¹⁻²Amung-amung luk belén muyuh, ui pangeh neninger atun. Ui kali' ilung amung ineh. Ui mepad ileh nemuyuh. Na ui meluun bacé rat nemuyuh.
- ³Iamo' balaku ini kuan Allah, baken kuan muyuh; ui pian besara' pa kiungNeh.
- ⁴Muyuh ngapung bacé muyuh ku balih muyuh, mepad kudeng lun luk ngubat, luk na miak ngedo' seburur pana'.
- ⁵Aleg pebala anun-anun, pad lun baken ngerawé nemuyuh mileh!
- ⁶Ninger muyuh adu'ku.
- ⁷Ngudehké muyuh mebalih? Miakké balih muyuh ngedengan Allah?
- ⁸Petuluké muyuh ngelibal Allah? Miakké muyuh mangun ku lun luk mutut besara' kuanNeh?
- ⁹Kudeng Allah nier nemuyuh, miakké Ieh kali' luk do' bang niat muyuh? Miakké muyuh naluk Allah, mepad kudeng muyuh naluk lemulun?
- ¹⁰Sagan pana' muyuh ngadu' negku ku libal Allah, Ieh miak ngukum nemuyuh.
- ¹¹idi lalud Allah miak ngatot nemuyuh.

- ¹²Ui musam ninger ua' bala muyuh luk rat mon ineh?
- ¹³Do' pirud pad ui miak pebala, na mekudeh ratnan anun luk mangun kuanku kareb ui pebala.
- ¹⁴Ui temina' maré ulunku.
- ¹⁵Na luk ku rapetku, nima' Allah ngaté negku. Ui pian besara' pa kiungNeh.
- ¹⁶Kian, ui miak uen ngulun ku kuu'ku lek, ngaceku lun luk mesala' na mekuu' papu' Allah.
- ¹⁷Do' ninger negku ngegala' balaku.
- ¹⁸Ui temina' besara' pa kiungNeh, ngaceku ui kali' ui luk matu.
- ¹⁹O Allah, pianké Iko ngadu' negku? Kudeng pieh kudeng ineh ui miak pirud idi maté.
- ²⁰Nima' negku mutuh dueh luk pituen. Maré ineh pad ui na sigapung rat Namu:
- ²¹aleg ngukum negku, idi ngatot negku.
- ²²O Allah, Iko pebala atun, idi ui ngor balaMu. Kian, nima' ui pebala lek, idi Iko ngor balaku.
- ²³Anunké datku idi sala'ku? Anunké kekamenku luk dat?
- ²⁴Ngudehké Iko sigapung rat negku. Ngudehké Iko mangun ku bunu'ku?
- ²⁵Pianké Allah ngatot negku? Ui mepad kudeng don mo'. Iko sikal metueh ratnan aceh uduh luk tekering mo'.
- ²⁶Iko nguit adu' luk dat kuanku, ratnan luk inau'ku karebku anak pana'.
- ²⁷Iko ngaling kukudku; Iko nier amung akangku idi lengayanku pana'.
- ²⁸Idi ui uen ngareg mepad kudeng kayuh luk merapuk, idi teh mepad kudeng kuyu' luk kinan kutang.

Ayub 14

- ¹Amung lemulun inan ulun luk mekamu' idi mesusa'.

- ²Ideh temubu' idi mekarang mepad kudeng busak; ideh na idi mepad kudeng aca'.
- ³Miakké Iko nier negku, Allah, idi ngukum negku pa kiungMu?
- ⁴Luk meligan na miak remuat ratnan luk melutak kudeng lemulun.
- ⁵Kikadang ulundeh pangeh pinutut atun— idi teh kinio bulan ideh mulun. Iko nemutut ineh, pad ieh na uen ngisu'.
- ⁶Do' Iko teketed ratnan lemulun idi necan nedeh; pad ideh ngakem dengan mawang niat.
- ⁷Inan rapet kuan kayuh luk pangeh tibpeng; ieh miak nginulih baruh.
- ⁸Sagan tu pana' uatneh amé' mengered idi tuedneh melu bang tana',
- ⁹kudeng ineh uen mubpur ku abpa' ieh miak nginulih mepad kudeng luk tinibu.
- ¹⁰Iamo' lemulun maté, idi ineh kekipedneh; ieh maté, idi amé' iapehké ieh?
- ¹¹Arur mekeket, idi abpa' rayeh pana' tekering,
- ¹²iamo' lun naté na miak tumui. Ruked inan langit, na ideh miak kulat, idi teh ideh na sigio.
- ¹³Ui pian ruenMu ngapung mulun bang su luk inan lun naté; nima' negku uen ngapung, pad usehMu manud, idi ngelelep aco luk inanMu ngerawé negku.
- ¹⁴Kudeng aceh lemulun maté, miakké ieh tumui? Iamo' ui nginulat kareb luk meluun do', kareb susa' ini pangeh pelaba.
- ¹⁵pangeh ineh Iko miak nawar negku idi ui ngor balaMu, idi Iko mawang niat negku luk pinudutMu ineh.
- ¹⁶Idi Iko miak nier anid-anid akangku, iamo' na Iko pian ngiap sala'ku.
- ¹⁷Iko maré do' ratnan sala'ku idi nala' nedeh. Iko ngiu' amung-amung dat luk pangeh kikemku.
- ¹⁸Pegkung miak meturan idi pegkung batu miak mubuh.

¹⁹Abpa' nganau' batu mesalud, idi udan luk mula ngeruru' tana'; kudeng ineh teh Iko nala' rapet lemulun.

²⁰Iko ngelaya' lemulun, pad ieh na idi; kiungneh nisu' karebneh maté.

²¹Anakneh buren, iamo' na ieh kali', idi na ideh mada' neneh kareb ideh uen ngigu'.

²²Ieh kali' étneh sebuleng mo', idi susa' niatneh.

Ayub 15

¹⁻²Bala mo'-mo' ineh, Ayub! Bala mo'-mo'!

³Lun luk mileh na pebala kudeng ineh idi mala bururneh matu dengan bala luk mo'-mo'.

⁴Iko mebpeng nelun baken na matot inan Allah, idi mebpeng nedeh na sembayang pa kiungNeh.

⁵Sala'mu sebuleng luk ngacing balamu ineh, idi iko naluk dengan balamu.

⁶Baken ui luk ngukum namu; iamo' balamu sebuleng luk ngukum namu.

⁷Ikoké lemulun luk pun-pun tinganak? Iko idi kareb Allah nenganau' pegkungké?

⁸Inanké iko nekali terawé Allah? Iko sebuleng mo' luk milehké?

⁹Nateh iko meluun ileh rat nekai.

¹⁰Kai nengalap ileh kai rat nelun luk mebuda' abpuk, ieh ineh lun luk tinganak kareb nateh tamanmu mulun.

¹¹Allah pian ngubuk namu, ngudehké iko na pian. Kai nepebala kuan Allah dengan bala luk do'.

¹²Iamo' iko megateh niat pad iko museh nier nekai.

¹³Iko museh inan Allah pad iko ngedar Neneh.

¹⁴Inanké lemulun luk meligan? Inanké lemulun luk matu pa kiung Allah?

- ¹⁵Allah na merapet inan melaikatNeh pana'; ideh pana' na meligan pa kiungNeh.
- ¹⁶Idi lemulun ngirup luk dat mepad kudeng abpa'; matu lemulun pelaba dat idi na mayu.
- ¹⁷O Ayub, do' ninger bada'ku.
- ¹⁸Lun mileh nemada' negku luk matu, luk pangeh bida' tepunde, idi na luk inalumdeh negku.
- ¹⁹Na pupu baken bang bawangdeh ineh, luk miak ngeraruh nedeh ratnan Allah.
- ²⁰Lun luk dat luk ngedereh nelun baken miak medereh raked ulunneh.
- ²¹Uni luk katot miak pedingerenneh, idi lun mano macing karebneh do' udeng.
- ²²Ieh na merapet miak mepuit ratnan dace, ngaceku pelapet nginulat sikal ngaté neneh;
- ²³Idi suit nginulat sikal kuman butungneh. Ieh kali' dace macing kuanneh mucu.
- ²⁴Susa' idi dereh sikal ngelaya' neneh, mepad kudeng aceh raca' luk melalud.
- ²⁵Ieh ineh kekiped lemulun luk nicuk kiung Allah, idi luk sikal metueh ratnan luk Meluun Melalud.
- ²⁶⁻²⁷Lemulun ineh medita' niat idi sikal metueh; dengan metueh niat ieh ngimet utapneh, idi upun munu' Allah.
- ²⁸Ieh ineh lemulun luk nengaro bawang luk rayeh, idi nengalap ruma' luk ticandeh. Iamo' bawang idi ruma' ineh miak uen ngusag bang bunu'.
- ²⁹Na ieh mio mangun ku lun do', idi binawehneh na lutep neneh. Aca'neh pana' miak metutu',
- ³⁰Idi na ieh miak mepuit ratnan dace. Ieh mepad kudeng aceh kayuh; angkatneh miak sabpen, idi busakneh mepalid ku bui.

³¹Kudeng ieh mebacé idi merapet ku luk dat, luk dat mo' luk lapenneh.

³²Kareb nateh tarekneh macing ieh melayu, mepad kudeng angkat luk na miak nginulih.

³³Ieh mepad kudeng bua' anggur luk merurug, kareb nateh ideh melak, idi mepad kudeng saitun luk na kebua'.

³⁴Na luk idi inul kuan lemulun luk na manu; idi ruma' lemulun luk ngalap suap miak sabpen.

³⁵Ini lemulun luk ngerawé nganau' luk dat; idi niatdeh panu' ku saluk.

Ayub 16

¹⁻²Ui pangeh neninger bala luk kudeng ineh atun; ui na tuman ku ubuk muyuh.

³Pianké muyuh pebala macing ruked-ruked? petuluké muyuh megéi' mutut gayam tau?

⁴Kudeng muyuh ngelibal negku, idi ui ngelibal nemuyuh, ui miak mala luk bila muyuh, ui miak ngeguling uluhku, idi ngereb nemuyuh ku bala luk mula'.

⁵Ui miak ngetueh nemuyuh ku bada'ku, pad ui ngubuk nemuyuh.

⁶Sagan pana' ui pebala, na étku amé' do'; kudeng ui ungeng, ui mepad mo'.

⁷O Allah, Iko pangeh nengelaya' negku; iko nenima' uang tetek ruma'ku pitayen.

⁸Iko pangeh nengakem negku. Iko ineh bunu'ku; pad ui pelaba rugu', pad lemulun ngerawé ineh mangun ku tanu' sala'ku.

⁹Dengan usehNeh Allah ngerarak negku, Ieh nutong negku dengan megateh niat.

¹⁰Lun situnga negku; ideh ngerieng negku idi mepag pingitku.

¹¹Allah pangeh nemaré negku bang palad lun luk dat.

¹²Kareb ui do' udeng Allah nemarek negku, idi nemabpet negku idi nengelaya' negku, Ieh nganau' bururku mangun ku aceh luk badilin.

¹³Idi ngelatik negku rat selipa idi rat pa selipa, idi ilebneh nebpek idi ngurat negku; iamo' na Ieh méi' negku.

¹⁴Ieh megéi' ngurat negku idi munu' negku, mepad kudeng lun pebunu' luk meruden ku gateh niatneh.

¹⁵Ui temido idi nacung idi ui tudo luun abuh idi tekeradung.

¹⁶Ui pangeh nenangi' pad matehku mebara' idi mitem,

¹⁷iamo' nateh ui nengedereh nelun, idi sembayangku pa kiung Allah matu.

¹⁸O Tana', aleg ngapung sala'deh negku! Idi aleg nima' arodku uen ngagka'!

¹⁹Déi surga inan lun luk nekali' negku, luk ngedengan negku.

²⁰Ui mutuh Allah nier abpa' matehku, idi teh ninger sembayangku.

²¹Ui nakap lun luk ku gatumku pa kiung Allah, luk miak mutuh kuanku mepad kudeng lun rorum.

²²Tarekku malé macing, idi ui na miak lemubed peh.

Ayub 17

¹Tarekku malé macing. Mabud niatku; tanem mo' luk nganét negku.

²Ui nier lemulun situnga negku.

³O Allah, do' manu ku balaku. Na ui mebalih. Na lun baken luk miak ngedengan negku.

⁴Iko pangeh nenganau' nedeh mebacé; aleg nima' nedeh medita' niat nier negku nekini.

⁵Baladeh mon, kudeng selemulun masui lun rorumneh, kali' rungen anakneh uen ngedereh.

⁶Idi nekini ideh makai bala ineh pad ngadu' negku, lemulun luk ninger ineh amé' ngelica' kiungku.

- ⁷Ui lélé mebuser ku susa'ku; langen idi kukudku merugu' mepad kudeng aca'.
- ⁸Lemulun luk ngerawé bururdeh matu megagap, idi ideh mala negku na manu.
- ⁹Lemulun luk ngerawé bururdeh do', iuk ngerawé bururdeh matu.
- ¹⁰Iamo' kudeng amung-amungdeh tuped pa kiungku, seburur pana' nateh luk mileh kali'ku.
- ¹¹Tarekku malé macing; luk pangeh tirawéku na mangun, idi na rapetku.
- ¹²Iamo' lun rorumku mala dacem mangun ku acang idi acang ineh muneng, iamo' ui lakat teh tudo bang dacem.
- ¹³Sebuleng mo' rapetku, ieh ineh até su luk inanku telubid bang dacem.
- ¹⁴Ui miak neten tanem ineh tamanku, idi uled luk kuman bururku tetanen tinan idi kinanakku luk decur.
- ¹⁵Iapehké aceh rapet kuanku? Idéké miak nier aceh rapet kuanku?
- ¹⁶Rapet na miak maya' negku, kareb ui amé' su luk inan até.

Ayub 18

- ¹⁻²O Ayub, idanké iko pirud? Kudeng iko pirud, kai miak pebala namu.
- ³Ngudehké iko ngerawé nekai mebacé mepad kudeng sapi'?
- ⁴Iko ngedereh bururmu sebuleng mo' ku usehmu. Miakké tana' ini mangun ku su luk ali-ali ngaceku iko? Miakké pegkung mubuh ngaceku iko?
- ⁵Lapung lun luk dat miak uen ngilep, pad ieh na mulun.
- ⁶Lapung luk bang leponeh miak mekilep.
- ⁷Atun lawéneh do', iamo' nekini ieh mekio'. Ieh mebpeh ku ilehneh sebuleng.
- ⁸Ieh nalan, idi kukudneh mekaneh ku abpung,
- ⁹idi teh tumidneh mekaneh abpung teh.
- ¹⁰Aceh abpung teh ruen temina' kuanneh, ieh ineh su dalanneh.
- ¹¹Libut-libutneh inan luk katot; ieh maya' anid akangneh.

¹²Atun ieh lun do', iamo' nekini ieh melau; dereh tured iringneh idi ngingulat neneh.

¹³Aceh ét luk mebura' maput luunneh, pad langgen idi kukudneh melu.

¹⁴Ieh tila' rat bang lepo luk inanneh do' udeng, idi rinuid iné' matun Raca' Até.

¹⁵Nekini idé-idé pana' miak tudo bang leponeh— kudeng ieh pangéh binubpur ku ubat atun!

¹⁶Uat idi angkatneh netekering.

¹⁷Na ieh mebala déi' ruma'neh idi mado pana'; idi na ieh uen ngerawé teh.

¹⁸Ieh uen ngusu rat bang bawang lun luk mulun idi rat bang acang amé' inan daceh.

¹⁹Na inulneh, idi bang ruma'neh seburur pana' nateh luk miak mulun.

²⁰Rat pa busat aco macing pa acep aco lemulun luk ninger ratnan ukumneh megegker idi matot.

²¹Ini ukum kuan lemulun luk dat, ieh ineh lemulun luk na mawa inan Allah.

Ayub 19

¹⁻²Ngudehké muyuh megéi' ngedereh negku ku bala muyuh?

³Megéi' kua' muyuh ngedat negku, idi ngedereh negku dengan na migu'.

⁴Sagan tu pana' ui nganau' sala', na muyuh mét ku ineh.

⁵Muyuh ngerawé nemuyuh meluun do' rat negku, idi ngerawé susa'ku ini mangun ku tanu' sala'ku.

⁶Naké muyuh kali' Allah luk nenganau' ini? Ieh nengakem negku bang abpungNeh.

⁷Ui ngitang ngaceku Allah munu' negku, iamo' na lun ninger. Ui ngitang, iamo' na lun luk mutut ukum luk mesiri kuanku.

⁸Allah nengitek dalan kuanku, pad ui na nalan petacu; Ieh nenganau' dalanku medacem.

- ⁹Ieh pangeh nengalap amung binawehku idi teh Ieh nengedat ngadanku.
- ¹⁰Ieh necat negku rat selipa idi rat pa selipa. Ieh mubput uat rapetku, pad ui mekarang idi maté.
- ¹¹Allah museh negku idi munu' negku mepad kudeng bunu'Neh luk pelaba dat.
- ¹²Ieh ngecuk bawehNeh munu' negku; ideh ngukat lubang idi ngerieng lepoku.
- ¹³Allah nematad kinanakku rat negku; ui mangun ku pupu baken kuan lun luk pekalai negku;
- ¹⁴pupuku idi rurumku pangeh neburo.
- ¹⁵Sakai luk tudo bang ruma'ku mekelupan negku; decur luk dukenku ngerawé negku lun pupu baken.
- ¹⁶Kareb ui nawar demulunku, na ieh ngor balaku, sagan pana' ui metueh mutuh pedengan.
- ¹⁷Awanku na tuman ku buen niatku; idi kinanakku sebuleng na pian amé' muneng negku.
- ¹⁸Anak-anak pana' meriruh idi situnga negku.
- ¹⁹Lun rurumku luk muneng megileg nier negku; lun luk inanku meluun awa neteketed rat negku.
- ²⁰Kubilku ketecan luun tulangku; idi ui lélé maté.
- ²¹Muyuh ineh lun rurumku! Do' muyuh méi' negku! Allah pangeh nenecat negku.
- ²²Ngudehké muyuh ngerada' negku mepad kudeng Allah? Naké petap dereh muyuh negku?
- ²³Ui pelaba pian ku amung balaku ini uen ngayud bang surat;
- ²⁴idi uen ngarit luun batu macing ruked-ruked.
- ²⁵Iamo' ui kali' inan Lun déi' langit luk miak ngulun negku.

²⁶Sagan tu pana' kubilku melu, bang bururku ini ui miak nier Allah.

²⁷Ui miak nier Neneh dengan matehku sebuleng, idi na Ieh mado rat negku. Ui pelaba laya' ngaceku bala muyuh,

²⁸"Kudeng apehké tau miak ngedereh neneh?" Muyuh nenakap dalan pian munu' negku.

²⁹Iamo' nekini, do' muyuh matot ku pelapet luk ngacing useh Allah pa luun sala', pad muyuh kali' inan lun luk mutut besara'.

Ayub 20

¹⁻²O Ayub, iko ngesusa' negku. Nekini ui miket ngor balamu.

³Bala luk bilamu ngedat negku, iamo' ui kali' kudeng apeh ui miak ngua' balamu.

⁴Naké iko kali' rat pun-pun lemulun inau' luun tana' ini,

⁵lemulun luk dat na mio mawang niat.

⁶Sagan tu pana' ieh mebala idi rayeh macing déi' langit,

⁷ieh mepalid ku bui mepad kudeng abuh. Lemulun luk pekalai neneh miak ngitun, "Iapehké ulekneh?"

⁸Ieh buro mepad kudeng nupi idi luk siren kareb medacem, idi na miak siren baruh teh.

⁹Ieh na idi déi' su luk inanneh pekalai tudo;

¹⁰idi anakneh miak ngelibal luk pinoneh rat nelun masi'.

¹¹Atun bururneh do' taga idi metueh, iamo' na mio teh misu' ku abuh.

¹²⁻¹³Luk dat do' én kali'neh, ieh nganug sesuut bang tangneh pad ieh kali' éneh.

¹⁴Iamo' bang batekneh akan ineh mepét mepad kudeng luk megalih.

¹⁵Lun luk dat nguta' binaweh luk pinoneh. Allah ngeruat neneh rat bang batekneh.

¹⁶Luk telenen lun luk dat mepad kudeng luk megalih, luk ngaté neneh mepad kudeng luk gitapen menipeh.

¹⁷Na ieh mulun mio, pad ieh miak nier umau saitun, rata sapi' idi duru' tebikan luk manud mepad kudeng abpa' pana' na miak sireneh.

¹⁸Na miak na ieh maré lemubed amung luk ilapneh, ieh na miak mawang niat ku samal kekameneh;

¹⁹ngaceku ieh nengedereh idi na méi' nelun masi', idi nengalap ruma' luk pinudut dulun.

²⁰Ieh manga, iamo' na ieh miak mebor.

²¹Kareb ieh kuman, na luk ketecan, iamo' nekini do'neh mabud.

²²Kareb ieh pelaba do' susa' luk meberat miak ngareg neneh.

²³Nima' neneh kuman amung luk pianneh! Allah miak ngukum neneh dengan usehNeh.

²⁴Kareb ieh pian buro ratnan pelapet belawan, ieh miak uen ngelatik ku binor tekaling.

²⁵Aceh ileb nemesut bururneh; papadneh luk mesilo medara', idi ieh pelaba tot.

²⁶Amung-amung luk dinugneh pangeh inusag; apui luk na tinutud lemulun ngeseb neneh dengan amung uang tetek ruma'neh.

²⁷Langit pana' ngegala' sala'neh, idi tana' pana' maré kali' ratnan ieh.

²⁸Amung binawehneh miak sagen ku useh Allah luk mebura'.

²⁹Ini kekiped lemulun luk dat, ieh ineh ukum luk barén Allah kuanneh.

Ayub 21

¹⁻²Do' ninger balaku; ineh mo' luk pituenku rat nemuyuh.

³Nima' negku pebala atun, pangeh ineh muyuh miak situnga negku.

⁴Kedaluisku ini baken dengan lemulun; petulu tu-tu ui miket pebala.

- ⁵Do' nier negku. Kali' rungen iko megagap.
- ⁶Kareb ui ngerawé luk pangeh nangun kuanku, ui mawa idi megeger.
- ⁷Ngudehké Allah nima' nelun luk dat amé' mengered idi metueh?
- ⁸Anakdeh idi mupundeh temubu' pa kiungdeh.
- ⁹Allah na ngacing susa' kuan ruma'deh, idi na luk katotdeh.
- ¹⁰Matu, amung sapi'deh amé' mula', idi nenganak dengan na susa'.
- ¹¹Anakdeh upun idi marot mepad kudeng anak dumba,
- ¹²idi ngalai maya' uni giula' idi suling.
- ¹³Ideh do' udeng ruked ulundeh, idi ideh maté dengan na luk mét.
- ¹⁴Lun luk dat ngecuk Allah necan nedeh; kebaladeh, "Na kai pian maya' dalamMu.
- ¹⁵Anunké ulekneh kai maya' Allah idi sembayang Neneh?"
- ¹⁶Ideh merapet ku tuehdeh sebuleng, iamo' ui na miak ngerawé kudeng ineh.
- ¹⁷Pangehké lapung lun luk dat ineh inilep? Pangehké seburur rat arangdeh pidereh? Pangehké Allah nengukum lemulun luk dat dengan useh,
- ¹⁸pad ideh mepalid ku bui mepad kudeng uduh luk tekering, idi abuh luk mepalid kareb barui?
- ¹⁹Kebala muyuh, Allah ngukum anak ngaceku sala' tamanneh. Na tu! Nima' Allah ngukum nelun mesala sebuleng; pad ideh kali' ineh.
- ²⁰Nima' nelun mesala' mabeh ukum sala'deh sebuleng; pad ideh kali' useh Allah luk Melalud.
- ²¹Kareb lemulun pangeh naté, miakké ieh ngerawé ulun anakneh?
- ²²Miakké lemulun mada' Allah, luk ngukum nedeh luk déi' surga pana'?
- ²³⁻²⁴Sebuang lemulun do' ulun pad macing maté; ideh maté dengan mawang niat idi na susa', idi ideh do; lamu.
- ²⁵Lun baken na tu mawang niat; ideh mulun idi maté dengan mét niat.

- ²⁶Iamo' amung lemulun maté idi tinamen, pad uled maput luundeh.
- ²⁷Ui kali' amung terawé muyuh luk ngedat negku.
- ²⁸Kebala muyuh, "Iapehké ruma' lun rayeh ineh, ieh ineh lemulun luk nenganau' luk dat?"
- ²⁹Naké muyuh nepebala nan lemulun luk megéi amé' ngarang? Naké muyuh kali' baladeh?
- ³⁰Kareb Allah museh idi ngukum lemulun, lun luk dat luk na mukumNeh.
- ³¹Seburur pana' nateh luk ngadu' lemulun luk dat, idi luk ngua' amung dat luk pangeh kikemneh.
- ³²Kareb ieh uen mirir amé' lengutan, su luk inan lemulun matar tanemneh,
- ³³ribu-ribu lemulun maya' butungneh, idi tana' luk luun bururneh pana' meran.
- ³⁴Idi muyuh nutun ngubuk negku ku bala luk mebacé! Amung-amung luk bila muyuh mebalih mo'!

Ayub 22

- ¹⁻²Miakké lemulun luk mileh pana' inan ulek kuan Allah?
- ³Inanké ulekneh kuan Allah, kudeng iko nganau' luk do' idi luk matu?
- ⁴Na Allah mada' namu idi ngukum namu, ngaceku iko matot Neneh mo';
- ⁵iamo' ngaceku iko pelaba ula' sala', idi ngaceku amung dat luk pangeh kikemmu ineh.
- ⁶Kareb iko mupud baleh inan kinanakmu, iko nengalap amung ayungneh ku duduk, pad ieh lubpa.
- ⁷Na iko nemaré abpa' rupen kuan lemulun luk meparing, idi akan kuan lemulun luk melau.
- ⁸Iko nemakai laludmu idi ngadanmu, pad iko miak ngalap amung tana' ineh.
- ⁹Iko na ngedengan decur tinula', iamo' iko nemanu binaweh anak maté idi nengedereh nedeh.

- ¹⁰Ngaceku ineh inan abpung libut-libutmu, pad iko matot.
- ¹¹Idi palaba dacem pad iko na miak nier, idi tubu' belen mepigket namu.
- ¹²Naké Allah tudo bang langit luk meluun dita' idi nier gituen luk pa benehNeh, sagan tu pana' ideh luk palaba dita'.
- ¹³Iamo' kebalamu, "Anun luk kali' Allah? Ieh ibpu laput—kudeng apehké Ieh ngukum netau?"
- ¹⁴Iko ngerawé laput luk mitem ngelinged Neneh pad Ieh na miak nier, kareb Ieh nalan-nalan déi' iring tana'.
- ¹⁵Sikalké iko maya' dalan luk bén lun luk dat?
- ¹⁶Kareb nateh tarekdeh nacing ideh nened.
- ¹⁷Ieh ineh lemulun luk na maya' Allah, idi na manu ku Ieh miak ngukum nedeh.
- ¹⁸Iamo' Allah luk nenganau' nedeh mangun ku lun do'— ui na kali' terawé lemulun luk dat.
- ¹⁹Lun luk do' mawang niat, idi lun luk na mesala' meriruh, kareb ideh nier lemulun luk dat kumin.
- ²⁰Amung binaweh lemulun luk dat uen ngusag, idi amung luk ketecan uen ngeseb.
- ²¹O Ayub, do' iko pedo' dengan Allah, idi aleg iko ngerawé Neneh bunu'mu. Idi iko miak ruenNeh ngeperuan.
- ²²Ngalap amung bada'Neh, idi nganug balaNeh bang niatmu.
- ²³Do' iko lumi inan Allah dengan mebeneh niat, idi ugka' nganau' luk dat bang ruma'mu.
- ²⁴Do' nala' amung amasmu bang arur luk nekeket.
- ²⁵Nima' Allah luk Melalud mangun ku amasmu, idi ku pirakmu luk pebuun.
- ²⁶Pad iko megéi' merapet inan Allah, idi kali' Neneh luk mangun ku lawa awangmu.

²⁷Kareb iko sembayang, Ieh miak ngua' putuhmu, idi iko miak maya' jani'mu Neneh.

²⁸Amung luk ruenmu miak mangun, idi acang miak ngacang su dalanmu.

²⁹Allah ngebeneh lemulun luk medita' niat idi ngulun lemulun luk mebeneh niat.

³⁰Ieh ngulun namu, kudeng iko na mesala', idi kudeng iko nganau' luk matu.

Ayub 23

¹⁻²Macing nekini pana' ui medureng inan Allah; ui na miak ugka' ngarod.

³Ui pelaba pian kali' su inanNeh, idi kali' dalan amé' matun Neneh.

⁴Pad ui nguit besara' ku pa kiungNeh, idi ngamo bururku.

⁵Ui pian kali' anun luk belénNeh, idi kudeng afeh Ieh ngor balaku?

⁶Sikalké Allah metueh rat negku? Na tu! Ieh miak ninger balaku.

⁷Ui ini mesiri; ui miak pegayam dengan Allah; Ieh miak ngamo negku na mesala' peh.

⁸Ui nenakap pa busat aco, iamo' na Allah idi déi'; idi na ui nekali' Neneh pa acep aco teh.

⁹Allah pangeh nengakem pa tinueh busat aco; Ieh pangeh iné' pa kabing busat aco, iamo' nateh ui nekali' Neneh.

¹⁰Iamo' Allah kali' anid su luk ulekku; kudeng Ieh nutun negku, Ieh kali' negku meligan.

¹¹Ui lutep maya' dalan luk pilihNeh, idi na ui umai amé' selipa idi selipa.

¹²Ui megéi' nganau' luk duken Allah; ui maya' pianNeh, baken maya' pianku sebuleng.

¹³Allah na misu'. Seburur pana' nateh luk miak metueh rat Neneh idi mebpeng Neneh na nganau' luk pianNeh.

¹⁴Ieh miak ngeriput luk tirawéNeh kuanku; idi teh inan mula' terawéNeh luk kudeng ineh,

¹⁵Idi ui megegker idi matot pa kiungNeh.

¹⁶⁻¹⁷Allah luk Melalud pangeh nengusag kuu'ku. idi baken dacem, iamo' Allah luk ngatot negku, sagan tu pana' dacem ineh ngebuser matehku.

Ayub 24

¹Ngudehké Allah na ngeletep aceh kareb luk inan ngukum kuan lemulun luk maya' Neneh?

²Lemulun ngiuk lakan pad ngalap tana', idi mano dumba idi nganau' dengan dumbadeh sebuleng.

³Ideh mano keladai anak maté, idi ngimet sapi' decur tinula' ku duduk.

⁴Ideh na nima' nelun masi' nganau' luk petulu kuandeh, idi ngecuk nedeh upun buro idi sigapung.

⁵Pad lun masi' nakap akan déi' su luk ali-ali, mepad kudeng keladai luk meliputi, ngaceku na luk inandeh nakap akan kuan anakdeh.

⁶Idi na miak na ideh nganau' lati' luun tana' dulun, idi ngalap bua' anggur rat bang kabun lemulun luk dat.

⁷Karebdeh rudap ideh na tarub ku ngelau' nedeh.

⁸Ideh meba' ku udan luun pegkung, idi ideh amé' sidakit luun batu.

⁹Lemulun luk dat ngalap anak maté ku demulundeh, idi teh ideh ngalap anak lun masi' ku duduk.

¹⁰Iamo' na miak na lun masi' nalan lubpa, idi ideh melau kareb ideh ngeranih kuan dulun.

¹¹Ideh ngeradu' bua' saitun ku umau, idi bua' anggur ku abpa' anggur, iamo' ideh sebuleng meparing.

¹²Bang bawang rayeh arod lun luk nurat idi lun luk maté pedingeren, iamo' Allah na ninger sembayangdeh.

¹³Inan lemulun luk na pian ku acang; ngaceku ideh na kali' ilungneh. Ideh ara' maya' ineh.

¹⁴Kareb masa aco lun luk ngaté amé' ngaté nelun masi', idi kareb medacem ieh mano.

¹⁵Lun luk pasét ngingulat macep aco, idi ngebpu kiungneh pad na lun kali' neneh.

¹⁶Kareb medacem lun luk mano umak ruma', iamo' kareb macang aco ideh sigapung idi na pian ku acang.

¹⁷Ideh matot ku acang aco, iamo' na ideh matot ku dacep.

¹⁸Lemulun luk dat mened, idi tana'neh kidiman Allah; idi nekini na ieh amé' ngakem bang kabun anggurneh.

¹⁹Mepad kudeng salju ubpa' kareb melau' idi merikan, kudeng ineh teh lun mesala' buro amé' bang tanem.

²⁰Seburur pana' nateh luk ngerawé neneh, tinanneh pana' nateh. Ieh kenen uled, pad ieh mabud.

²¹Amung ini mangun ngaceku ieh ngedereh decur tinula', idi na méi' kuan decur luk na anak.

²²Allah ngusag lun luk melalud dengan tuehneh. Allah necat, idi lun luk dat maté.

²³Kudeng Allah nina' neneh lutep mulun, Ieh matar neneh kidi-kidi.

²⁴Lemulun luk dat uen ngedita' segageh mo' idi pangeh ineh ieh mekarang kudeng uduh, mepad kudeng geramih luk linidik.

²⁵Miakké seburur lemulun ngalum ineh? Inanké lemulun luk kali' balaku na matu?

Ayub 25

¹⁻²Allah ineh melalud; petulu amung lemulun matot Neneh. Ieh ngacing pedo' bang imetNeh luk déi' surga.

³Miakké lemulun ngiap melaikat luk ngakem kuanNeh? Inanké su luk na merasat ku acang Allah?

⁴Inanké lemulun luk matu idi meligan siren Allah?

⁵Bulan pana' na merasat sirenNeh, idi gituen pana' nateh meligan.

⁶Kudeng apeh teh lemulun, uled, idi laled ineh? Anunké ulek lemulun pa kiung Allah?

Ayub 26

¹⁻²Kudeng apehké iko ngedengan idi ngulun negku— luk pelaba laya' ini.

³Kudeng apehké iko mada' negku luk pelaba bacé?

⁴Idéké petulu ninger balamu ineh? Roh idéké luk nengecuk namu pebala kudeng ineh?

⁵Su luk inan até meruyuh; idi lun luk tudo su ineh megegker.

⁶Su luk inan lun naté mukab pa kiung Allah; na luk ku ngelinged neneh rat pa kiungNeh.

⁷Allah nemalad langit luk pa tinueh busat aco, idi nengekito tana' ini su luk na anun-anun.

⁸Allah luk manu' laput ku abpa', pad ideh na mekusag ku beratneh.

⁹Ieh ngelinged bulan batung pa keted laput ineh.

¹⁰Ieh matad acang ratnan dacek ku lakan iring langit.

¹¹Diri langit megegker ku tot, kareb ideh ninger arod Allah.

¹²TuehNeh nengelaya' abpa' rayeh, idi teh ilehNeh nengaté galau Rahab.

¹³NiatNeh luk nengeligan langit; tiku'Neh luk nengaté menipeh luk buro.

¹⁴Iamo' ini mangun ku tanu' laludNeh mo', idi ayek mo' luk pindenger tau. Idéké miak kali' kudeng apeh rayeh Allah?

Ayub 27

¹⁻²Ui pebulung ku Allah luk Melalud luk mulun, luk na mutut besara'ku idi luk nganau' ulunku mesusa'—

³ruked Allah maré niat negku,

- ⁴bibirku na miak pebala luk dat, idi dila'ku na miak mebalih.
- ⁵Na tu ui miak mala nemuyuh matu; raked ulunku ui mala negku matu.
- ⁶Na tu ui ugka' mala negku matu; teruayen niatku do' mo'.
- ⁷Nima' amung lemulun luk sikal metueh rat negku, kumin mepad kudeng lemulun luk dat luk na matu.
- ⁸Anunké rapet lemulun luk na manu kareb Allah ngalap niatdeh?
- ⁹Kareb inan susa' miakké Allah ninger aroddeh?
- ¹⁰Petulu ideh pian ku awang luk barén Allah, idi teh petulu ideh megéi' sembayang.
- ¹¹Nima' negku mada' nemuyuh ratnan kudeng apeh rayeh lalud Allah, idi ngelio luk tirawé Allah luk Melalud.
- ¹²Iamo' setuneh muyuh sebuleng pangeh kali', ngudehké muyuh pebala luk mebacé?
- ¹³Kudeng ini lawé Allah luk Melalud ngukum lemulun luk dat.
- ¹⁴Sagan pana' ideh mula' anak, amungdeh pitayen bang bunu'; idi anakdeh na petap akan.
- ¹⁵Idé-idé luk mulun miak maté ku ét, idi tinula'deh na temido butungdeh.
- ¹⁶Sagan pana' lun luk dat mula' pirak, idi teh mula' ayung,
- ¹⁷lun luk do' ngayung ku ayung ineh, idi lun luk mesiri ngalap pirakneh.
- ¹⁸Lun luk dat mudut ruma' luk na meraben, ruma'deh mepad kudeng terbaru kelawa', idi teh lepo demulun luk matar lati'.
- ¹⁹Kekipedneh, ideh miak telubid dengan binawehdeh, idi kareb ideh kulat, amung binawehdeh na idi.
- ²⁰Tot macing mepad kudeng tubu' belen; ideh mepalid ku bui kareb medacem;
- ²¹ideh mepalid ku bui rat pa busat aco rat su inandeh.

²²Dengan na méi', bui malid nedeh, pad ideh nutun buro.

²³Bui muni bang laliddeh kareb ideh upun, pad ideh matot ku laludneh.

Ayub 28

¹Inan lubang su luk inan ngukat pirak, idi su luk inan amas uen ngeligan.

²Lemulun ngukat belawang rat bang tana', idi ngurai tekaling rat bang batu,

³idi nakap ineh bang su luk meluun dace, idi bang su luk medalem, idi teh bang luk medacem ideh nakap batu.

⁴Mado ratnan bawang idi dalam lemulun, lemulun ngukat lubang. Su ineh ideh ngakem buleng-buleng, idi maya' kalat amé' bang lubang ineh.

⁵Padé mulun luun tana', iamo' pa liang tana' ineh amung batu mekareg.

⁶Batu luk bang tana' inan luk mebata', idi abuh tana' inan amas.

⁷Kanui pana' na kali' dalam luk amé' bang lubang ineh, idi na temulud pa luundeh.

⁸Balang idi pung baken luk mesangit pana' na maya' dalam su luk ali-ali ineh.

⁹Lemulun ngelubang batu luk metueh, idi mubuh pegkung rat su inanneh.

¹⁰Idi kareb ideh nganau' lubang maya' pa liang batu, ideh kali' batu luk meraga.

¹¹Ideh ngukat pad macing punang bued abpa', pad ngalap luk inapung déi'.

¹²Iamo' rat iapehké ileh luk matu? Kudeng apehké tau miak sibada' pad tau miak kali'?

¹³Ileh na miak tekapen ratnan lemulun; seburur pana' nateh luk kali' ratnan raganeh.

¹⁴Ribaruh abpa' idi abpa' rayeh pebala, "Na luk idi ileh su ini."

¹⁵Idi ileh na miak belian ku pirak idi amas.

¹⁶Amas luk do' idi batu luk meraga na petap ku melih ileh ineh.

- ¹⁷Raganeh meluun ratnan amas, idi sidangur luk ratnan amas, idi gelas luk pelaba do'.
- ¹⁸Raga ileh meluun ratnan batu luk meraga luk bang abpa' rayeh, idi gelas luk meraga, idi teh batu luk mesilo idi mesia'.
- ¹⁹Batu luk mebirar idi amas luk meluun do' na miak uen maad ku raga ileh.
- ²⁰Rat iapehké ileh luk matu? Kudeng apehké tau miak sibada', pad tau miak kali'?
- ²¹Sebuleng pudut luk mulun pana' na miak nier ineh, idi teh suit luk temulud pana' nateh kali' neneh.
- ²²Até idi usag pana' ngamo ideh ninger bala mo'.
- ²³Allah sebuleng mo' luk kali' dalanneh, idi su luk inan ileh,
- ²⁴ngaceku Ieh luk kali' iring tana', idi teh amung-amung luk pa liang langit.
- ²⁵Kareb Allah nemaré lalud kuan bui, idi nengeletep kirayeh abpa' rayeh;
- ²⁶kareb Allah nemili' su luk inan udan idi su dalam laput luk muni;
- ²⁷idi Ieh nekali' ileh idi nenutun raganeh— Ieh nengeletep idi nengamo neneh.
- ²⁸Kebala Allah kuan lemulun, "Do' muyuh matot inan Tuhan pad muyuh mileh, idi teketed ratnan luk dat, pad muyuh do' kali'."

Ayub 29

- ¹Ayub nengimun pebala teh.
- ²Meluun do' ui mulun mepad kudeng ulunku luk mon kareb Allah nematar negku.
- ³Allah megéi' idi denganku, idi nengacang dalanku kareb ui nenalan bang dacem.
- ⁴Kareb ineh ui lun do', idi Allah nematar ruma'ku.
- ⁵Allah luk Melalud idi denganku, idi teh amung anakku.

- ⁶Sapi' idi amék nemaré mula' rata, idi saitunku mulun bang tana' su luk mula' batu pana'.
- ⁷Kareb lun rayeh bang bawang nepegayam, ui idi dengandeh,
- ⁸idi anak adi' numai kareb ideh nekali' negku, idi lun luk mengered pana' netuped pad ideh ngerayeh negku.
- ⁹Idi lun luk rayeh-rayeh nepirud;
- ¹⁰idi teh lun luk meluun rayeh pana' nungeng.
- ¹¹Amung lemulun luk nenier negku idi luk neninger bala ratnan ui na miak na ngubur kekamenku.
- ¹²Kareb lun masi' nengitang, ui nengedengan nedeh. ui nengedengan anak maté luk na lun luk nengan nedeh.
- ¹³Lun luk pelaba susa' ngubur negku, idi ui nengedengan decur tinula' pad ideh do' udeng.
- ¹⁴Ui megéi' nganau' luk mesiri idi luk matu.
- ¹⁵Ui nengedengan lun luk nebuser idi lun luk mekió'.
- ¹⁶Ui mepad kudeng taman kuan lun masi', idi ui nengedengan sakai luk inan susa'.
- ¹⁷Ui nengelaya' lemulun luk dat idi nemuit lemulun luk piderehdeh.
- ¹⁸Ui megéi' ngerawé mulun macing ui mengered, idi maté bang ruma'ku dengan do'.
- ¹⁹Ui mepad kudeng aceh lawa kayuh luk inan uat luk megéi' inan abpa', idi angkatneh megéi' meba' ku ipup.
- ²⁰Amung lemulun megéi' ngubur negku, idi bururku metueh peh.
- ²¹Kareb ui ngubuk, amung lemulun pirud idi ninger amung luk bilaku do'-do';
- ²²idi na luk beléndeh kareb ui pangéh nemada' nedeh. Balaku mepad kudeng udan kuandeh;

²³amung-amungdeh neninger dengan mawang niat, mepad kudeng lun luk inan lati' mawang niat kareb inan udan.

²⁴Kareb ui merimud nedeh, ideh pelaba awa, kareb ideh meberat niat na ui mesusa'.

²⁵Ui nenguyut idi nemutut amung gayam; ui nenguyut nedeh mepad kudeng aceh raca' nguyut bawehneh, idi nengubuk nedeh kareb ideh mesusa'.

Ayub 30

¹Iamo' nekini lemulun luk mangud rat negku situnga negku! Tamandeh na mayu ngedengan uko' luk matar dumbaku.

²Ideh pelaba laya', pad ideh na miak ngakem kuanku.

³Ideh masi' idi melau, pad ideh kuman uat luk tekering déi' su luk ali-ali kareb medacem.

⁴Ideh mubput idi kuman uduh déi' su luk ali-ali, idi teh uat belaban luk na mén!

⁵Lun baken masut nedeh dengan ngitang mepad kudeng ngitang nelun luk mano.

⁶Ideh tudo bang lubang batu, idi lubang luk inukat luun irang.

⁷Déi' su luk ali-ali ideh ngarod mepad kudeng pung, ideh pamung liang kayuh.

⁸Lemulun luk na mayu, idi luk na ngadan! Ideh inusu rat bang bawang.

⁹Nekini ideh meriruh negku; idi ui luk inandeh situnga mo'.

¹⁰Ideh megileg nier negku; ideh ngerawé ideh meluun do' rat negku; ideh ngelica' kiungku.

¹¹Ngaceku Allah pangeh nengelaya' negku, idi ideh megateh negku.

¹²Amung lun luk dat ini ngerieng negku, ideh ngerada' negku, pad ideh ngelaya' negku.

¹³Ideh ngabang negku pian ngaté negku; idi na lun mebpeng nedeh.

- 14Ideh semuet maya' lubang libungku idi ubpa luunku;
- 15pad ui pelaba tot; idi ngadanku metutu' mepad kudeng bui, idi do'ku mepalid mepad kudeng laput.
- 16Idi nekini ui malé maté, idi na luk ngagka' derehku.
- 17Kareb medacem tulangku mét; idi derehku na ugka'.
- 18Allah ngakem dier kuyu'ku, idi mag ayungku.
- 19Idi Ieh nala' negku bang buri; ui mepad kudeng arap mo'.
- 20O Allah, ui nawar Namu, iamo' na Iko ngor balaku; idi kareb ui sembayang, Iko na ninger.
- 21Iko ngedereh negku, idi ngesusa' negku dengan amung laludMu.
- 22Iko nima' bui malid negku; Iko luk ngedier negku bang barui luk rayeh.
- 23Ui kali' Iko naban negku amé' bang até, luk tinina' kuan amung-amung lemulun.
- 24Ngudehké Iko ngedereh lemulun luk melaya', idi luk miak mutuh éi' mo'.
- 25Naké ui nangi' dengan lemulun luk mesusa'; idi méi' kuan lun masi'.
- 26Ui merapet ngalap awang idi acang, iamo' susa' idi dacem mo' luk macing negku.
- 27Ui megagau ngaceku mula terawé idi ét; idi dereh mo' luk miak macing negku.
- 28Ui nalan dengan mesusa' niat idi na miak buken. Ui tuped pa kiung lun mula' mutuh pedengan.
- 29Ui ngarod ku dat niatku mepad kudeng uko' luk meliputi luk nguang idi teh puek luk muni kareb medacem.
- 30Kubilku mitem; idi ui medadem.
- 31Atun ui neninger nani luk ngawang niatku, iamo' nekini inan tido idi tangi' mo'.

Ayub 31

- ¹Ui nepejani', pad ui na melili ku decur.
- ²Anunké luk ruen Allah luk Melalud kuan tau? Idi kudeng apehké Ieh ngua' kekamen lemulun?
- ³Ieh maré susa' idi dereh kuan lemulun luk nganau' sala'.
- ⁴Allah kali' amung-amung luk ruenku, idi nier anid-anid akangku.
- ⁵Ui na tu-tu nenganau' luk dat, idi na ui nenaluk nelun baken.
- ⁶Nima' Allah nimang negku ku timang luk matu, pad Ieh kali' ui na mesala'.
- ⁷Kudeng ui umai ratnan dalan luk mesiri, pad ui maya' luk dat, idi kudeng tiku'ku melutak ku sala',
- ⁸do' nima' lati'ku uen ngusag, idi nima' nelun baken kuman tibuku.
- ⁹Kudeng ui melili ku decur lun denganku, pad ui nganét munung tanga'neh,
- ¹⁰do' nima' awanku ngelak kuan deléi baken, idi pamung rudap dengan deléi baken teh.
- ¹¹Kali' rungen sala' ineh pelaba dat, pad ieh ngacing ukum maté.
- ¹²Ieh mepad kudeng aceh apui luk ngeseb, idi ngusag amung luk ui kuan.
- ¹³Kudeng seburur demulunku mada' negku, ui megéi' ninger balaneh idi nganau' luk mesiri.
- ¹⁴Kudeng na pieh kudeng ineh, kudeng apehké ui miak papu' Allah? Anunké luk belénku kareb Allah ngukum.
- ¹⁵Allah luk nemudut negku, idi Ieh teh luk nemudut demulunku.
- ¹⁶Na tu ui na ngedengan nelun masi' idi tinula' luk mesusa'.
- ¹⁷Ui megéi maré babpat akanku kuan anak maté.
- ¹⁸Ruked ulunku ui ngedengan nedeh.
- ¹⁹Kudeng ui kali' seburur lun masi' luk na miak melih ayungneh,

- ²⁰ui megéi' maré ayung ratnan buluh dumbaku kuanneh. Idi ieh megéi ngubur negku dengan amung niatneh.
- ²¹Kudeng ui pangeh nenaluk anak maté, ngaceku ui kali' ui mileh bang besara';
- ²²nima' ticu'ku uen mutul, idi nima' langenku uen mubput ratnan tudungku.
- ²³Na tu ui miak nganau' luk kudeng ineh ngaceku ui matot ku ukum Allah.
- ²⁴Na ui merapet ku binaweh,
- ²⁵idi na ui medita' niat ku ui lun do'.
- ²⁶Na ui sembayang inan aco luk merasat idi bulan luk do' acang.
- ²⁷Na tu ui tinutun ku luk kudeng ineh.
- ²⁸Sala' luk kudeng ineh ngacing ukum maté, ngaceku na manu inan Allah luk Melalud.
- ²⁹Na ui mawang niat ku dereh bunu'ku, idi ku susa'deh.
- ³⁰Na ui mesala' ngediman nedeh, pad ideh maté.
- ³¹Amung lemulun luk ngakem kuanku kali' ui megéi' nganak lun sakai-sakai,
- ³²pad lemulun luk rat mado na rudap déi' liang.
- ³³Lun baken nutun ngalum sala'deh, iamo' na ui nenganau' kudeng ineh.
- ³⁴Na ui matot ku bala dulun; pad ui tudo idi na mepai, ngaceku matot ku baladeh.
- ³⁵Adui, idéké miak ninger balaku? Amung balaku ini matu. Do' nima' Allah luk Melalud ngor balaku. Kudeng amung adu' bunu'ku negku uen ngayud,
- ³⁶amung ineh mangun ku banéku pad ineh siren lun baken.
- ³⁷Idi ui mada' Allah ratnan amung-amung luk inau'ku, pad ui na migu' tuped pa kiungNeh.
- ³⁸Kudeng ui nemano tana' luk inau'ku ku lati'ku rat nelun luk kuan tana' ineh,
- ³⁹idi nekuman ulu'neh, pad lun luk nengisak padé ineh maté ku lau —

⁴⁰do' nima' uduh idi tabpa' mulun ku libal padé idi ikun. Macing ieni mo' balaku.

Ayub 32

¹Idi diteluh na ngua' bala Ayub teh, ngaceku ieh matu bang terawéneh sebuleng.

²Idi seburur lemulun luk ngadan Elihu pelaba useh, ngaceku Ayub ngerawé bururneh sebuleng matu, idi ieh nengesala' Allah. (Idi Elihu ineh anak Barakel, luk inul Bus, ratnan pupu Ram.)

³Idi teh ieh museh inan teluh burur lun rurum Ayub, ngaceku ideh na mileh ngua' bala Ayub, ayu'neh Allah luk sala'.

⁴Iamo' Elihu nima' lun baken pebala atun, ngaceku ieh luk mangud.

⁵Iamo' kareb Elihu kali' diteluh na mileh ngor bala Ayub, idi ieh museh

⁶pad ieh ngimun pebala. Ui matot mada' nemuyuh ratnan terawéku, ngaceku ui mangud idi muyuh mengered.

⁷Bang terawéku, petulu muyuh luk mengered idi mileh miak pebala.

⁸Iamo' Roh Allah luk Melalud luk ngacing ileh kuan lemulun.

⁹Na lemulun mileh idi kali' luk matu, ngaceku ideh mengered mo'.

¹⁰Do' muyuh ninger balaku, pad muyuh kali' terawéku.

¹¹Ui neninger dengan mulai niat, kareb muyuh nepebala, pian kali' ileh muyuh.

¹²Ui neninger do'-do', iamo' na muyuh pebala luk matu, idi na muyuh nengua' bala Ayub.

¹³Kudeng apehké muyuh ngerawé muyuh inan ileh? Nima' Allah ngua' bala Ayub, ngaceku bala muyuh na matu.

¹⁴Ayub nepebala kuan muyuh, baken kuanku, iamo' kali' rungen ui na ngua' bala Ayub maya' terawé muyuh.

¹⁵O Ayub, na ideh mileh pebala, ideh na miak ngua' balamu.

¹⁶Miakké ui ungeng kareb ideh pirud? Ideh tuped su ineh dengan na luk baléndeh.

¹⁷Nekini ui miak ngor balamu, idi mada' terawéku namu.

¹⁸Na ui tuman pirud.

¹⁹Kudeng ui na pebala kali' rungen ui mebacit, mepad kudeng seréi' kubil luk mepanu' ku abpa' anggur luk mebaruh.

²⁰Ui na tuman. Na miak na ui pebala.

²¹Na ui mili' idé-idé pana' bang gayam ini; na ui pian ngacé lemulun mo'-mo',

²²Na ui mileh ngacé lemulun, idi Allah miket ngukum negku kudeng ui nganau' kudeng ineh.

Ayub 33

¹O Ayub, ninger do'-do' amung luk belénku.

²Ui pian mada' luk teruayenku.

³Amung balaku matu, idi na ui mebalih.

⁴Roh Allah nemudut negku, idi nemaré ulun kuanku.

⁵Kudeng miak, do' iko ngor balaku. Do' iko temina' ku ormu.

⁶O Ayub, pa kiung Allah kiteh mepad mo'. Kiteh dueh-dueh pinudut ratnan tana' mo'.

⁷Na luk katotmu negku. Na ui sikal metueh rat namu.

⁸Ini balamu luk pindengerku:

⁹"Ui na sala. Na ui nenganau' luk dat. Ui ini matu, idi na ui nenganau' sala'.

¹⁰Iamo' Allah nakap dalan pad Ieh ngedereh negku, mepad kudeng aceh bunu'Neh.

¹¹Ieh ngaling kukudku, idi nier amung lawéku."

¹²O Ayub, bang terawéku iko mesala'. Allah meluun rayeh ratnan lemulun.

¹³Ngudehké iko ngedat Allah ngaceku Ieh na ninger adu' lemulun?

- ¹⁴Sagan tu pana' Allah pebala dengan tuda'-tuda' dalan, seburur pana' nateh luk ninger balaNeh.
- ¹⁵Allah pebala bang nupi idi bang luk siren kareb lemulun rudap medacem.
- ¹⁶Allah nganau' nedeh ninger luk belénNeh, pad ideh matot ku bada'Neh.
- ¹⁷Allah pebala pelé ideh na nganau' sala' teh, pad ideh na medita' niat.
- ¹⁸Allah na nima' nedeh uan ngedereh, idi Ieh ngulun nedeh ratnan até pana'.
- ¹⁹Allah maré luk mét idi luk kadan kuan lemulun, pad Ieh mada' nedeh.
- ²⁰lemulun luk mét na sikal kuman, pad ieh melibo kuman luk mén.
- ²¹Ieh merugu' pad tulang sigarangneh melagan.
- ²²Ieh lélé amé' su luk inan até.
- ²³Kian melaikat amé' ngedengan neneh lek, ieh ineh seburur rat arang ribu-ribu melaikat Allah, luk nguit lemulun ngerawé ratnan kekamendeh luk petulu.
- ²⁴Idi melaikat ineh méi' neneh, pad ieh pebala, "Muit neneh! Ieh na miak amé' su luk inan até. Ui pangeh nengalap luk ku nguli' neneh."
- ²⁵Idi bururneh metueh idi do' taga baruh;
- ²⁶Allah miak ngua' sembayangneh; idi ieh sembayang inan Allah dengan mawang niat; Allah miak ngeperuan nenek sekua' baruh teh.
- ²⁷Ieh miak tuper idi pebala, "Ui nenganau' sala'. "Ui na nenganau' luk matu, iamo' Allah méi' negku.
- ²⁸Ieh nengimet negku, pad ui na amé' su luk inan até, pad ui mulun teh."
- ²⁹Allah megéi' kua' nganau kudeng ineh;
- ³⁰Ieh ngulun lemulun, pad ieh mulun dengan mawang niat.
- ³¹O Ayub, pirud idi ninger luk belénku.
- ³²Iamo' kudeng inan luk belénmu, do' iko pebala; idi ui miak ngamo namu matu.

³³Kudeng na luk belénmu, do' pirud idi ninger balaku, ui mada' namu pad iko mileh.

Ayub 34

¹⁻²O meteluh luk mileh tu-tu, do' ninger luk belénku.

³Muyuh kali' akan luk mén; ngudehké muyuh na kali' bala luk mileh?

⁴Petulu tau mutut besara' ini.

⁵Kebala Ayub, ieh na mesala', iamo' Allah ara' nganau' luk mesiri kuanneh.

⁶Kebalaneh, "Kudeng apehké ui mebalih idi mala negku mesala'? Ui nurat pad lélé maté, iamo' na ui mesala'."

⁷Pangehké muyuh nenier lemulun luk kudeng Ayub ini atun? Na ieh ngerayeh Allah.

⁸Ieh perurum dengan lemulun luk dat idi lun mesala' pana'.

⁹Kebalaneh, na tu ulekneh maya' luk pian Allah.

¹⁰Do' meteluh ngerawé! ninger luk belénku! Miakké Allah luk Melalud nganau' sala'?

¹¹Ieh ngua' kuan lemulun maya' kekammeneh, idi ngukum nedeh maya' luk kikemdeh.

¹²Allah luk Melalud na nganau' luk dat, idi na Ieh nganau' luk na mesiri.

¹³Inanké Allah nengalap laludNeh rat nelun baken? Inanké lemulun nengecuk Neneh ngimet tana' ini?

¹⁴Kudeng Allah ngalap lemubed niat lemulun,

¹⁵idi amung-amung lemulun miak maté idi misu' ku abuh teh.

¹⁶Kudeng muyuh mileh, do' ninger balaku.

¹⁷Inanké muyuh ngerawé Luk Melalud megatéh inan luk mesiri? Miakké muyuh ngukum Allah luk matu?

- ¹⁸Allah ngukum raca'-raca' idi pengulu pana', kareb ideh dat idi kekamendeh na tabpen.
- ¹⁹Allah nemudut amung-amung lemulun; na Ieh méi' nelun rayeh-rayeh idi lun do' meluun ratnan lun masi'.
- ²⁰Aceh lemulun miak maté denak-denak kareb medacem. Allah necat lemulun pad ideh maté. Ieh ngaté lemulun luk metueh dengan na anun-anun.
- ²¹Ieh nier anid akang lemulun.
- ²²Dacem pana' na miak ngapung lun mesala' ratnan Allah.
- ²³Allah na ngeletep kareb, pad lemulun amé' kuminNeh.
- ²⁴Na Ieh nganau' gayam atun pad Ieh nala' nelun rayeh, idi ngelibal nedeh ku lun baken.
- ²⁵Ieh nala' nedeh idi ngebeneh nedeh kareb medacem, ngaceku Ieh kali' kekamendeh.
- ²⁶Ieh ngukum lun mesala' su siren lun mula',
- ²⁷ngaceku ideh ugka' na maya' Neneh, idi teh na maya' amung ukumNeh,
- ²⁸pad lun masi' nengitang pa kiung Allah, mutuh pedengan, idi Ieh neninger putuhdeh.
- ²⁹Kudeng Allah ungeng, seburur pana' nateh luk miak ngadu' Neneh. Kudeng Ieh teketed ratnan lemulun, ideh na miak nganau' anun-anun.
- ³⁰Idi pupu-pupu na miak mebpeng lemulun luk dat na mangun ku raca'deh.
- ³¹O Ayub, pangehké iko ngamo sala'mu pa kiung Allah, pad iko na nganau' sala' baruh?
- ³²Pangehké iko mutuh Allah ngegala' sala'mu, pad iko ugka' nganau luk dat?
- ³³Kudeng iko ngarung pian Allah, miakké iko mutuh Neneh maya' pianmu? Do' iko ngerawé do'-do' idi ngor bala kai.
- ³⁴Kali' rungen lemulun luk na mebacé ngamo balaku; idi lun mileh luk ninger balaku miak pebala,

³⁵"Bala Ayub mebacé, idi na tu ilung balaneh."

³⁶Ngerawé amung bala Ayub; megala ieh pebala mepad kudeng lemulun luk dat.

³⁷Ieh ara' ugka' ratnan sala'; ieh situnga idi ngedat Allah pa kiung tau.

Ayub 35

¹⁻²O Ayub, na petulu iko mala iko matu pa kiung Allah.

³Idi ngitun Allah, "Kudeng apehké sala'ku ngesusa' namu? Anunké ilungneh ui na nganau' sala'?"

⁴Ui pian ngor balamu idi lun rurummu.

⁵Do' nier langit, idi kudeng apeh kidita' laput ineh!

⁶Kudeng iko nganau' sala', miakké Allah mesusa'? Kudeng iko mula' sala', miakké Ieh mesusa' ku ineh?

⁷Kudeng iko nganau' luk matu, anunké ulekneh kuan Allah? Anunké luk lapen Allah rat namu?

⁸Lun denganmu medereh ngaceku sala'mu, iamo' kekamenmu luk do' ngedengan nedeh.

⁹Kareb lemulun uen ngedereh, ideh ngarod; idi mutuh lemulun ngedengan nedeh.

¹⁰Iamo' na ideh lumi inan Allah luk nemudut nedeh, idi luk maré tueh bang kareb inan susa'.

¹¹Na ideh lumi inan Allah luk maré ileh netau, pad tau meluun ileh ratnan pung idi suit.

¹²Ideh mutuh pedengan, iamo' Allah na ngua' putuhdeh, ngaceku ideh dat idi medita' niat.

¹³Na ulekneh! Allah luk Melalud na nier idi na ninger putuhdeh.

¹⁴O Ayub, kebalamu, iko na miak nier Allah, do' mulai niat — Allah ninger besara'mu.

¹⁵Iko ngerawé Allah na ngukum netau, idi Ieh na nier sala' tau.

¹⁶Na ulekneh iko pebala teh, ngaceku megala' iko na kali' ilung luk belénmu.

Ayub 36

¹⁻²Do' mulai niat teh, idi ninger luk belénku kuan Allah.

³Ui nakap ileh rat mado, pad ui ngegala' siri Allah luk nemudut negku.

⁴Amung luk belénku na mebalih; iko nier pa kiungmu seburur lemulun luk pelaba ileh.

⁵Kudeng apeh tueh Allah! Na Ieh ngarung seburur pana'. Ieh kali' luk amung-amung.

⁶Na Ieh nima' lun mesala' mulun mio. Ieh megéi' nganau' luk mesiri kuan lun masi'.

⁷Ieh matar lemulun luk matu idi nima' nedeh ngimet mepad kudeng raca' pad ideh buren raked-raked.

⁸Iamo' kudeng lemulun kiling idi medereh ngaceku kekamendeh,

⁹idi Allah ngegala sala' idi dita' niatdeh.

¹⁰Ieh mada' nedeh pad ideh ninger, idi teketed ratnan datdeh.

¹¹Kudeng ideh maya' bala Allah idi mangun ku demulunNeh ideh do' udeng idi mekadang ulun.

¹²Iamo' kudeng ideh na ninger ideh maté ku bacédeh.

¹³Lemulun luk na maya' Allah megéi' museh, idi kareb ideh kumin ideh na mutuh pedengan.

¹⁴Ideh maté mangud, linaya' ku ulundeh luk dat.

¹⁵Allah mada' lemulun bang dereh idi susa'deh.

¹⁶Allah nemuit namu ratnan susa', idi maré namu do' udeng; idi téngmu maput ku nuba' idi kikid.

¹⁷Iamo' nekini iko ngalap ukum luk petulu.

¹⁸Matar do'-do' pad iko na saluken ku suap, idi aleg meraruh ku mula' binaweh.

¹⁹Anunké ulekneh ngitang mutuh pedengan. Amung tuehmu na miak ngedengan namu nekini.

²⁰Aleg nginulat dacem, ieh ineh kareb amung pupu miak uen ngusag.

²¹Aleg amé' matun luk dat, derehmu mangun ku bada' pad iko na nganau' sala.

²²Ngerawé kudeng apeh rayeh laludNeh; Allah ineh guru luk meluun rayeh.

²³Seburur pana' nateh mada' luk ruen Allah, idi mala Neneh nenganau' luk dat.

²⁴Allah megéi' buren ngaceku kekamenNeh; do' iko pana' ngubur Neneh.

²⁵Amung lemulun pangeh nenier luk inau'Neh; iamo' seburur pana' nateh luk kali' ilungneh.

²⁶Tau na miak kali' rayeh Allah dengan meriput idi ngiap tuda' lak kinio ulunNeh.

²⁷Allah ngalap abpa' rat luun tana', idi ngisu' neneh ku udan.

²⁸Ieh maré udah ratnan laput kuan amung lemulun.

²⁹Seburur pana' nateh luk kali' kudeng apeh laput mubuh, idi kudeng apeh dalam muni déi' langit su luk inan Allah mudeng.

³⁰Ieh maré kilep déi' langit, iamo' ribaruh abpa' medacem.

³¹Kudeng ini lawéNeh maman amung pupu, pad ideh inan petap akan.

³²Ieh ngakem kilep ku paladNeh, idi ngelelep su ulekneh.

³³Lalam mada' acing barui,

Ayub 37

¹idi sapi' kali' acingneh. Barui nganau' niatku megegker.

- ²O lun muyuh, do' ninger arod Allah, ieh ineh lalam luk remuat rat bang tangNeh.
- ³Ieh maré kilep guta langit, rat iring tana' macing iring selipa.
- ⁴Idi arodNeh pedingeren, ieh ineh uni lalam luk rayeh, idi megéi' kilep merasat.
- ⁵Kareb Allah pebala, kekamen luk inan mawa mangun, luk na tau kali'.
- ⁶Ieh ngecuk salju mebpeh luun tana', idi maré udan luk mula'.
- ⁷Ieh ngagka' kekamen lemulun luk pinudutNeh, idi ngegala' kekamenNeh luk melalud.
- ⁸Pung luk meliputi amé' tudo bang lubangdeh.
- ⁹Barui macing rat pa kabing busat aco, idi teneb rat pa tinueh busat aco.
- ¹⁰Niat Allah ngisu' abpa' ku batu ais.
- ¹¹Kilep remuat rat bang laput,
- ¹²luk lemibung maya' pian Allah. Ideh nganau' amung-amung luk duken Allah aput-aput tana' ini.
- ¹³Allah mubpur tana' ini ku udan; rabpu'-rabpu' pelé ngukum lemulun idi rabpu'-rabpu' pad ngeperuan nedeh.
- ¹⁴O Ayub, ungeng idi ninger; ngerawé amung kekamen Allah luk inan mawa,
- ¹⁵Kali'mu kudeng apeh Allah ngecuk kilep remuat rat bang laput?
- ¹⁶Kali'mu kudeng apeh laput lemibung iang langit? Ieh ineh ngaceku ileh Allah.
- ¹⁷Na tu! Iko kali' ét idang mo' kareb bui macing rat pa kabing busat aco.
- ¹⁸Miakké iko ngedengan Allah malad langit, idi nganau' neneh metueh mepad kudeng tekaling luk mesilo?
- ¹⁹Anunké luk belén kai kuan Allah? Do' mada' nekai. Kai na kali' luk belén kai.

- ²⁰Na ui mutuh Allah nima' negku pebala. Na ui pian pitayenNeh.
- ²¹Idi nekini acang déi' langit pelaba rasat pad na mesier kai; idi langit malét ku bui.
- ²²Rasat luk mepad kudeng amas siren pa tinueh busat aco, idi rayeh Allah ngatot netau.
- ²³Lalud Allah pelaba rayeh, pad tau na miak amé' muneng Neneh; Ieh megéi matu' idi mesiri kuan lemulun.
- ²⁴Petulu amung lemulun matot Neneh, idi petulu Ieh na ninger bala lemulun luk ngerawé bururdeh mileh.

Ayub 38

- ¹Idi rat bang barui Tuhan nepebala ni Ayub
- ²Idéké iko luk na manu ku ilehKu? Iko ngegala' bacému mo'.
- ³Do' iko tuper kudeng seburur deléi idi ngor itun luk tuninku namu.
- ⁴Iapehké iko kareb ui nemudut tana' ini? Kudeng iko pelaba ileh do' mada' negku.
- ⁵Idéké luk nemutut kirayehneh? Idéké luk nenari neneh? Iko kali' ratnan iniké?
- ⁶Anunké luk ngimet diri tana' ini? Idéké nengerareng baru lidung tana' ini?
- ⁷Aco sineh, kareb aco masat amung gituen menani dengan awang niat dengan anak-anak Allah.
- ⁸Idéké ngitek tanga', pad ngeleleng abpa' rayeh, kareb ieh nuput rat bang tana'?
- ⁹Ui ini luk mapen abpa' rayeh ku laput, idi nanga neneh ku dacem.
- ¹⁰Ui ini nengeletap lakan abpa' rayeh, idi nengeleleng ku tanga' luk pilin.
- ¹¹KebalaKu, "Pad ini mo'! Ributmu luk rayeh na miak na ugka' su ini."
- ¹²O Ayub, raked ulunmu, pangehké iko nengecuk aco masat?

- 13 pangehké iko nengecuk aco masat ngeruyuh tana', pad lemulun luk dat remuat rat bang su luk inandeh sigapung?
- 14 Acang aco ngegala' surud idi ruan, mepad kudeng gerinet kuyu'.
- 15 Acang aco meluun rasat kuan lemulun luk dat, idi mebpeng nedeh na nganau' luk dat.
- 16 Pangehké iko iné' bang ribaruh abpa' rayeh? pangehké iko nenalan luun apin abpa' rayeh?
- 17 Pangehké lemulun mada' sirenmu amung tanga' su luk inan até?
- 18 Kali'mu kudeng apeh kirayeh tana' ini? Kudeng iko kali', do' iko ngor balaku.
- 19 Kali'mu rat su apeh inan acang, idi teh rat su apeh inan dacem?
- 20 Miakké iko mada' acang idi dacem ineh, ratnan ulekdeh idi teh su luk inandeh?
- 21 Kali' rungen iko miak, ngaceku iko pelaba ngered, iko pangeh tinganak kareb nateh tana' ini pinudut!
- 22 Pangehké iko nenier takep luk inanKu nganug salju idi udan batu?
- 23 Ui temina' ku ineh kuan kareb luk inan susa', ieh ineh kareb inan bunu'.
- 24 Pangehké iko iné' su luk inan aco masat, idi su irat bui rat pa busat aco?
- 25 Idéké nengukat abang kuan udan luk mula' idi nengukab dalam kuan baru' idi lalam?
- 26 Idéké maré udan su luk na lemulun?
- 27 Idéké mubpur tana' luk tekering pad inan uduh?
- 28 Inanké taman udan idi ipup?
- 29 Idéké tinan abpa' batu ais idi luk meteneb,
- 30 luk ngisu' abpa' mangun ku batu, idi abpa' rayeh pana'?
- 31 Miakké iko ngabet gituen Puru' idi neka abet gituen Belatik?

³²Miakké iko mada' luk ruen gituen bang anid-anid kareb, idi mada' gituen Beruang luk Rayeh idi Beruang luk Isuut?

³³Kali'mu ukum luk kuan langit, pad iko mileh makai ukum ineh luun tana'?

³⁴Miakké iko ngitang mada' laput, pad ideh nganau' namu meba' ku udan?

³⁵Kudeng iko ngecuk kilep merasat, miakké ieh amé' namu idi pebala, "Tungé' ui"?

³⁶Idéké mada' suit Ibis ratnan kareb Abpa' Nil temubu', idi teh idéké luk mada' kok ratnan acing udan?

³⁷⁻³⁸Idéké luk pelaba ileh ngiap laput, idi ngebiring nedeh pad inan udan, luk ngetueh abuh

³⁹Miakké iko nakap luk kenen kuan balang idi ngebor anak balang luk melau,

⁴⁰kareb ideh sigapung bang lubangdeh, idi ngabang?

⁴¹Idéké luk maman bongkak kareb ideh temulud idi melau, kareb anakdeh ngitang mutuh akan rat Negku?

Ayub 39

¹Kali'mu kareb amék uen nenganak luun pegkung? Pangehké iko nenier poyo nenganak?

²Miakké iko ngiap bulan, idi kali' ratnan kareb anakdeh uen nenganak?

³Kali'mu kareb ideh tekeradung ngeruat anakdeh?

⁴Déi' bang pulung anakdeh mangun metueh, ideh buro idi na lemubed.

⁵Idéké luk nemuit keladai luk meliputi, pad ideh nalan maya' piandeh?

⁶Ui nemaré su luk ali-ali, ieh ineh raked luk inan lubang tucu', mangun ku su inandeh.

⁷Ideh nalan mado rat ku bawang rayeh, pad ideh na uen ngelayo idi na ngakem.

⁸Amung pegkung mangun ku lamandeh, su luk inandeh nakap uduh kenendeh.

- ⁹Miakké kelio ngakem kuanmu? Pianké ieh rudap bang libungmu?
- ¹⁰Miakké iko ngimet neneh ku kalat pad ieh ngeradu? Miakké ieh ngeruid ragus luun lati'mu?
- ¹¹Miakké iko merapet ku tuehneh luk rayeh, idi ngecuk neneh nganau' kekamenmu luk meberat?
- ¹²Miakké ieh mabeh luk perinienmu, idi ngamung padé rat su luk inanmu rumik?
- ¹³Pelaba saget kayep ilad suit unta! Iamo' suit unta na temulud kudeng manuuk.
- ¹⁴Suit unta ngiterur luun tana' pad ideh melau' ku lau' tana'.
- ¹⁵Na ieh ngerawé kukud lemulun luk ngeradu' nedeh, idi pung luk meliputi luk macit nedeh.
- ¹⁶Ayuneh terur ineh baken ieh kuan; na ieh megagau ratnan luk inau'neh mo'-mo'.
- ¹⁷Ui ini luk nenganau neneh mebacé, idi Ui na nemaré ileh kuanneh.
- ¹⁸Iamo' kareb ieh upun, ieh miak situnga inan kuda idi teh lun luk maya' kuda ineh.
- ¹⁹O Ayub, ikoké luk nenganau' kuda metueh? Idi nemaré buluh luk mekadang luun dierdeh?
- ²⁰Ikoké luk nenganau' nedeh uput mepad kudeng kato, idi ngatot lemulun ku unideh?
- ²¹Ideh peritamid mawang niat luun raked, idi ideh upun amé' pebunu' dengan amung tuehdeh.
- ²²Na ideh mileh matot, idi teh na ideh buro ku pelapet.
- ²³Repapeh lun luk pebunu' pék-pék, idi mesilo ku acang aco.
- ²⁴Kuda megegker ku gagaudeh, idi ideh perigéi' upun amé' pa atun; idi kareb serupit muni ideh na miak ungeng.

²⁵Anid serupit muni ideh pana' muni. Ideh miak muen bunu' kareb nateh ideh muneng ku bunu' ineh. Idi ideh ninger arod lun rayeh pebunu'.

²⁶Miakké kanui sibada' temulud rat namu, kareb ieh malad iladneh pa kabing busat aco?

²⁷Miakké kanui nganét ukummu, kareb nateh ieh nganau' ararneh luun pegkung?

²⁸Ieh nganau' ruma'neh luun batu luk meluun dita', idi buduk pegkung mangun ku libungneh.

²⁹Rat su ineh ieh nier muneng idi mado pad ieh ngalap luk kenenneh.

³⁰Amung kanui pamung iring butung, idi anak-anakdeh ngirup dara' butung ineh.

Ayub 40

¹⁻²O Ayub, iko nepesaad pa kiung Allah luk Melalud, pianké iko pirud, kian iko pian ngor lek?

³⁻⁴O Tuhan balaku mebacé. Anunké luk ruenku ngor? Na ui pian pebala peh.

⁵Macing nekini pelaba ula' balaku.

⁶Idi Tuhan nepebala ni Ayub rat bang barui.

⁷Do' iko tuped kudeng seburur deléi, idi ngor itun luk tuninKu namu.

⁸Pianké iko mala Ui na mesiri, pad ngesala' negku idi ngamo bururmu matu?

⁹Metuehké iko kudeng Ui? Miakké iko rayeh arod mepad kudeng Ui?

¹⁰Kudeng pieh kudeng ineh, do' ngayung ku ubur idi dita'mu.

¹¹Nier lemulun luk medita' niat idi ngebeneh nedeh ku usehmu.

¹²Ngaté lemulun luk dat, su luk inandeh tuped.

¹³Idi do' nanem nedeh, idi ngabet nedeh bang su luk inan até.

¹⁴Idi Ui luk pun-pun ngubur namu, idi ngamo namu luk metueh.

¹⁵Do' nier temacur. Ui nemudut neneh. Idi Ui nemudut namu teh. Ieh kuman uduh mepad kudeng sapi',

¹⁶iamo' pelaba tueh bururneh!

¹⁷Turneh tuped mepad kudeng aceh kayuh tumuh, idi kukudneh pana' metueh.

¹⁸Tulangneh mepad kudeng tekaling, idi kukudneh mepad kudeng belawan.

¹⁹PudutKu luk meluun inan mawa pad Luk Mudut neneh mo' miak ngelaya' neneh.

²⁰Uduh luk kenenneh iten rat luun pegkung, su luk inan pung luk meliput marot.

²¹Ieh telubid iang kayuh luk metabpa', idi sigapung nan uduh luk nan tana' payeh.

²²Kayuh luk metabpa' idi bulu' luk tangeb abpa' nucung neneh.

²³Ieh na matot ku paru' abpa'; ieh na megagau ku abpa' melipak amé' luun kiungneh.

²⁴Idéké miak ngebuser neneh, pad ngakem neneh? Idi idéké miak ngabpung icungneh?

Ayub 41

¹Miakké iko ngalap galau ku keluit, idi ngabet dila'neh ku kalat?

²Miakké iko ngabet icungneh ku kalat, idi nganau' keluit bang tangneh?

³Miakké ieh mutuh namu muit neneh idi méi' neneh?

⁴Miakké ieh pejani' namu, pad ieh ngakem kuanmu raked-raked?

⁵Miakké iko maman neneh, mepad kudeng suit aya', luk inan demulunmu luk decur marot?

⁶Miakké lun luk ngerabat pesingaro neneh? Miakké lun luk pepua' natek neneh pad ieh pisuen?

- ⁷Miakké iko mayung neneh ku busu lawid? Miakké iko napeh uluhneh ku busu?
- ⁸Ngakem nenek sekua' mo', idi kali' rungen iko na mekelupan sangitneh, pad iko na mekuu' nutun neneh sekua' teh.
- ⁹Idé-idé luk nier galau ieh melaya' idi meluka'.
- ¹⁰Kudeng iko ngegio neneh ieh pelaba sangit; seburur pana' nateh luk mekuu' tuper pa kiungneh.
- ¹¹Idéké miak amé' matun neneh idi ieh mulun? Seburur pana' luk bang tana' ini na miak.
- ¹²Nima' negku mada' namu ratnan kukud galau, idi ratnan tuehneh luk pelaba rayeh.
- ¹³Idéké miak ngalap kubilneh idi napeh ayungneh?
- ¹⁴Idéké miak ngecuk neneh ngukab tangneh, luk inan lipen luk katot.
- ¹⁵Ketedneh inau' ratnan utap luk pilalad, luk inabet idi metueh mepad kudeng batu.
- ¹⁶Anid utap inabet mepicet, pad bui na miak semuet arangdeh.
- ¹⁷Ideh inabet pelaba picet pad ideh na mekusag.
- ¹⁸Kareb ieh mepia' inan luk merasat, idi matehneh merasat mepad kudeng aco masat.
- ¹⁹Apui mebudung rat bang tangneh, idi anak apui pana' remuat.
- ²⁰Rabpun remuat rat bang icungneh, mepad kudeng rabpun uduh luk sabpen pa liang lacang.
- ²¹Niatneh nganau' apui; ngaceku apui uput rat bang tangneh.
- ²²Dierneh pelaba tueh pad idé-idé luk papu' neneh matot.
- ²³Aput kubilneh luk melaya', iamo' metueh mepad kudeng belawan.
- ²⁴Niatneh mepad kudeng batu tekalan, idi na ieh matot.

- ²⁵Kareb ieh tumui amung lalud pana' matot pad ideh melaya'.
- ²⁶Pelapet na miak ngurat neneh; busu, ileb, idi karit na miak ngedereh neneh.
- ²⁷Pa kiungneh belawan mepad kudeng geramih, idi tekaling mepad kudeng kayuh luk merapuk.
- ²⁸Na ieh matot ku ileb; idi batu luk ku mitung neneh, mepad kudeng geramih mo'.
- ²⁹Pa kiungneh peper mepad kudeng geramih teh, idi ieh meriruh kareb lemulun mayung neneh.
- ³⁰Lisunneh mepad kudeng bila' seréi'; ideh ngukut tana' luk meburi kareb ieh nalan.
- ³¹Ieh nibur abpa' rayeh pad ieh meborak, kudeng abpa' luk tinaken idi umau pana'.
- ³²Pa puetneh dalanneh merasat, idi abpa' rayeh mebuda' ku lapa'.
- ³³Aput tana' na luk mepad kudeng ieh; ieh ineh aceh pudu luk na matot.
- ³⁴Ieh luk melun dita' ratnan amung-amung pung luk rayeh; idi teh ieh ineh raca' amung pung luk meliput.

Ayub 42

- ¹Idi Ayub nengor bala Tuhan.
- ²O Tuhan, Iko luk melalud; idi Iko miak nganau' amung-amung luk pianMu.
- ³Iko ngitun idéké luk na manu ku ilehMu, ngaceku ieh mebacé. Ui ini luk nepebala ratnan amung-amung luk na kali'ku, ieh ineh kekamenMu luk inan mawa.
- ⁴Iko nengecuk negku ninger kareb Iko nepebala, pad ui nutun ngor balaMu.
- ⁵kareb ineh ui nekali' luk bila lun baken mo', iamo' nekini ui pangeh nenier Namu dengan matehku sebuleng,
- ⁶idi ui migu' ngaceku amung luk bilaku, idi nekini ui uren tu-tu.

⁷Kareb Tuhan pangeh nepebala amung-amung ineh kuan Ayub, idi kebalaNeh ni Elipas, "Ui museh namu idi nan dueh rurummu ineh ngaceku na meteluh nemala luk matu ratnan Ui, kudeng demulunKu Ayub.

⁸Do' nguit kuan Ayub tudu' sapi' deléi' idi tudu' dumba deléi' barén meteluh ku baré luk sabpen kuan burur meteluh sebuleng. Idi Ayub miak sembayang kuan meteluh, idi Ui miak ngor sembayangneh idi na Ui ngigu' nemeteluh maya' ukum luk petulu. Meteluh na nemala luk matu ratnan Ui, mepad kudeng Ayub."

⁹Elipas, Bildad, idi Sopar nenganau' luk icuk Tuhan nediteluh, idi Tuhan nengor sembayang Ayub.

¹⁰Idi kareb Ayub pangeh nesembayang kuan teluh rurumneh ineh, idi Tuhan nengeperuan neneh, idi nemaré kuanneh dueh kua' kinula' amung binawehneh luk atun.

¹¹Amung kinanak Ayub luk deléi' idi decur idi teh rurumneh luk atun nengikak neneh idi iné' ku irau bang ruma'neh. Ideh nemada' éi'deh idi nengubuk neneh ngaceku amung susa' luk icing Tuhan neneh. Anid bururdeh nemaré kuanneh usin idi susing amas.

¹²Tuhan nengeperuan kekiped ulun Ayub meluun ratnan ulunneh luk atun. Ayub inan 14,000 dumba, 6,000 unta, 2,000 sapi', idi 1,000 keladai.

¹³Ieh nenginul tudu' anak deléi, idi teluh anak decur.

¹⁴Anak decurneh luk atun, ngadanneh Jemima, idi luk kedueh, ngadanneh Kesia, idi luk keteluh, ngadanneh Karen Hapuk.

¹⁵Aput tana' ini na luk idi decur luk meluun taga ratnan anak Ayub. Idi tamandeh nemaré kuandeh aceh babpat ratnan binawehneh mepad kudeng luk biréneh kuan anakneh luk deléi.

¹⁶Muci ratnan ineh Ayub mulun 140 lak, pad ieh kali' mupunneh luk kedueh inul.

¹⁷Idi ieh naté kareb ieh pelaba ngered.

Nani Ubur

Nani Ubur 1

- ¹Samal kuan lemulun luk ara' ku bada' lemulun luk dat, luk na maya' ayu lemulun luk mesala', idi na perurum dengan lemulun luk situnga nan Allah.
- ²Iamo' ieh mawang niat maca' ukum Tuhan, idi ngerawé neneh tebaco kedangan.
- ³Ieh mepad kudeng aceh kayuh luk mulun tangeb abpa', luk megéi' kebua' anid kareb, idi donneh pana' na melayuh. Amung luk ruenneh inan ulek.
- ⁴Iamo' lemulun luk dat na tu-tu kudeng ineh! Ideh mepad kudeng lipang luk mepalid ku bui.
- ⁵Lemulun luk dat miak kumin Allah. Idi lemulun luk mesala' miak uen ngatad ratnan lemulun luk matu.
- ⁶Tuhan miak matar lemulun luk matu. Iamo' lemulun luk dat miak maté raked-raked.

Nani Ubur 2

- ¹Ngudehké lun pupu baken sikal metueh? Ngudehké lemulun ineh ngerawé dalam luk na ulek?
- ²Amung raca'deh sikal metueh, idi amung lun luk ngimet nedeh pamung sikal metueh ratnan Tuhan idi raca'Neh luk pinili'.
- ³Kebaladeh, "Do' tau mepuit ratnan imetdeh, idi nala' abetdeh."
- ⁴Tuhan meriruh ratnan KerusiNeh déi' surga, idi situnga nedeh.
- ⁵Dengan useh Ieh pebala nedeh. Dengan gateh Ieh ngatot nedeh.
- ⁶KebalaNeh, "Ui pangeh nengeletap raca'Ku luun Sion, pegkungKu luk meligan."
- ⁷Kebala raca', "Ui maré kali' luk bila Tuhan. Kebala Tuhan negku: 'Iko anakKu. Aco sini Ui mangun ku TamanMu.

⁸Mutuh, idi Ui miak maré amung pupu kuanMu; amung tana' miak kuanMu mucu.

⁹Iko miak ngimet nedeh dengan ticu' belawan, idi mila' nedeh mepad kudeng kuden.' “

¹⁰Nekini ninger do'-do', O muyuh luk raca', matar do'-do', amung muyuh luk ngimet!

¹¹Maya' Tuhan dengan matot idi megegker.

¹²Ngebeneh burur muyuh pa kiungNeh; kudeng na, kali' rungen Ieh museh, idi muyuh maté, ngaceku Ieh malé useh. Samal kuan amung lemulun luk amé' sigapung Neneh.

Nani Ubur 3

¹Mula' tu-tu bunu'ku, O Tuhan, mula' luk misu' niat sikal munu' negku!

²Ideh ngedat negku, keburideh, "Allah na sikal ngedengan neneh!"

³Iamo' Iko, O Tuhan, megéi' ngelinged negku, Iko maré tueh negku, idi maré kuu' negku teh.

⁴Ui nawar Tuhan, Ngedengan negku," idi rat pegkungNeh luk meligan Ieh ngua' putuhku.

⁵Ui telubid idi rudap, idi kulat dengan do', ngaceku Tuhan matar negku.

⁶Na ui matot ku ribu-ribu bunu' luk ngelibut negku.

⁷Amé' negku, O Tuhan! Ngulun negku, Allahku! Iko mepag pingit bunu'ku, idi mutul lipendeh.

⁸Ulun macing ratnan Allah — do' Ieh ngeperuan pupuNeh!

Nani Ubur 4

¹Ngua' kuanku kareb ui nawar, O Allah, Batu Libungku! Kareb ui bang susa', Iko ngedengan negku. Méi' negku idi ninger sembayangku!

²O lun muyuh, tuda' io muyuh nguyo negku? Tuda' io muyuh geregan ku luk na ulek, idi nakap luk mebalih.

³Do' ngerawé, Tuhan nemili' lemulun luk matu mangun ku pupuNeh. Ieh ninger negku kareb ui nawar Neneh.

⁴Kudeng muyuh museh, aleg nganau' sala'; do' ngerawé ratnan ini, buleng-buleng bang takep muyuh.

⁵Maré kuan Tuhan baré luk petulu, idi merapet Neneh.

⁶Mula' lun pebala, "Kai pian tu-tu uen ngeperuan!" O Tuhan méi' kuan kai!

⁷Awang luk pangeh biréMu negku, O Tuhan, meluun rayeh ratnan awang lemulun luk mula' perinien.

⁸Kareb ui telubid, ui rudap dengan do'; Iko sebuleng, O Tuhan luk nginita negku.

Nani Ubur 5

¹Ninger balaku, O Tuhan, idi ninger arodku.

²Raca'ku idi Allahku, ninger, kareb ui mutuh pedengan. Pa kiungMu, Tuhan, ui sembayang;

³kareb pekak Iko ninger arodku, kareb masat aco ui megéi' sembayang, idi nginulat ua' putuhku.

⁴Iko baken Allah luk mawang niat ku luk dat; idi Iko na nima' luk dat pa kiungMu.

⁵Iko na pian nier lemulun luk medita' niat. Iko megateh inan amung lemulun luk dat.

⁶Iko ngaté amung lemulun luk mebalih, idi megateh inan lemulun luk naluk idi luk ngaté lemulun.

⁷Ngaceku awaMu luk rayeh, ui miak semuet bang ruma'Mu, idi sembayang bang Ruma'Mu luk meligan idi munel pa kiungMu dengan tot.

⁸Tuhan, mula' tu-tu bunu'ku; nguyut negku dengan pianMu luk matu, idi mada' sirenku dalamMu!

⁹Bunu'ku na pebala luk matu; ideh mepanu' ku geregan luk ngaté, idi baladeh mepanu' ku gateh, sagan pana' ideh do' bala.

¹⁰Ngukum nedeh, O Tuhan; ngusag terawédeh luk dat. Masut nedeh rat pa kiungMu, ngaceku sala'deh mula', idi ideh sikal metueh rat Namu.

¹¹Amung-amung lun luk initaMu mawang niat, ideh megéi' menani dengan awang. Iko ngelibung lemulun luk mawa Namu. Bang Namu ideh ngalap awang niat.

¹²Iko, O Tuhan ngeperuan lemulun luk maya' balaMu; éi'Mu matar nedeh mepad kudeng utap.

Nani Ubur 6

¹O Tuhan, aleg mada' negku dengan usehMu! Idi aleg ngukum negku dengan gatehMu!

²Méi' negku, ngaceku ui pelaba erur! Ngedo' negku! Pelaba laya' tulangku,

³idi niatku pana' pelaba susa'! O Tuhan, tuda' io susa' ini ngedereh negku?

⁴Tuhan, ngulun negku! Muit negku ratnan até, ngaceku Iko méi' negku.

⁵Bang su luk inan até, Iko na tirawédeh; seburur pana' nateh nengubur Namu déi!

⁶Ui pelaba erur ngaceku mesusa'; anid alem ui nangi' pad bitaranku idi lagaku meba' ngaceku abpa' matehku.

⁷Matehku mebara' ngaceku ui pelaba tangi', idi meseraber sirenku, ngaceku amung bunu'ku!

⁸Buro rat negku, muyuh luk dat; Tuhan ninger tangi'ku;

⁹kareb ui ngitang mutuh pedengan; Ieh ninger idi ngua' sembayangku.

¹⁰Amung bunu'ku miak kali' igu' luk rayeh ngaceku linaya'; dengan gagau ideh inusu denak-denak.

Nani Ubur 7

- ¹O Tuhan, Allahku, ui pangeh initaMu; ngulun negku, idi muit negku ratnan amung lemulun luk ngerada' negku,
- ²idi naban negku mepad kudeng balang, idi ngeramit negku, pad seburur pana' na miak ngulun negku.
- ³O Tuhan, Allahku, kudeng ui pangeh nenganau' kudeng ini: kudeng ui pangeh nengesala' nelun,
- ⁴kudeng ui pangeh nemasui lun rurumku, idi nengurat bunu'ku dengan na punneh,
- ⁵nima' bunu'ku ngerada' negku idi ngakem negku, pad ui dedaten idi pitayendeh, idi butungku tacindeh luun tana'!
- ⁶Tumui, Tuhan, dengan, usehMu, idi nala' gathé bunu'ku! Tumui idi ngedengan negku; ngaceku Iko pian ku luk matu.
- ⁷Ngamung amung-amung pupu libutMu, idi ngimet nedeh rat déi' dita'.
- ⁸Tuhan luk mutut besara' amung lemulun. Mutut besara'ku, Tuhan, pad ui ruen matu; Iko kali' negku na mesala'.
- ⁹Ngagka' kekamen lemulun luk dat, idi ngeperuan lemulun luk matu. Ngaceku Iko Allah luk matu, Iko ngukum terawé idi pian lemulun.
- ¹⁰Allah, Ieh ineh libungku, idi Ieh ngulun lemulun luk maya' Neneh.
- ¹¹Allah, Ieh ineh lun mutut besara' luk matu, luk megéi' ngukum lemulun luk dat.
- ¹²Kudeng lemulun na uren, Allah miak ngir pelapetNeh. Idi Ieh temina' ku gamanNeh;
- ¹³Ieh temina' ku repapeh pebunu', idi ilebNeh luk mepad kudeng apui.
- ¹⁴Siruh kudeng apeh terawé lemulun luk dat; ieh sikal nganau' susa' idi naluk teh.
- ¹⁵Ieh ngukat aceh lubang luk medalem, idi ieh sebuleng makab bang ineh!

¹⁶Datneh sebuleng teh luk ngukum neneh. Ieh murat ku kekammeneh luk dat ineh.

¹⁷Ui ngubur Tuhan ngaceku SiriNeh. Ui menani ngubur Tuhan luk Meluun Dita'.

Nani Ubur 8

¹O Tuhan, Tuhan kai, rayehMu sinier bang aput-aput tana! Idi Iko buren macing déi' langit,

²dengan nani anak-anak luk medari idi luk isuut pana'. Iko do' udeng bang libungMu luk meraben, Iko ngagka' bunu'Mu idi lun luk ngua'.

³Kareb ui nier langit luk pinudutMu, bulan idi gituen luk inau'Mu—

⁴Idéké lemulun pad Iko ngerawé neneh; idi anak Adam, pad Iko nginita neneh?

⁵Iko nenganau' neneh sesuut beneh ratnan melaikat; Iko nenganau' pata kuanneh, ieh ineh rayeh idi dita'.

⁶Iko nenganau' neneh ngimet pa luun amung-amung:

⁷dumba, sapi', idi pung luk meliput,

⁸suit, idi lawid, idi amung-amung luk mulun bang abpa' rayeh.

⁹O Tuhan, Tuhan kai, rayehMu sinier bang aput-aput tana!

Nani Ubur 9

¹Ui maré ubur Namu, dengan amung niatku, ui mada' amung-amung tanu' luk inan mawa luk inau'Mu.

²Ui menani ku awang niat, ngaceku Iko! Ui menani ubur kuanMu, O Allah luk Meluun Dita'.

³Bunu'Mu buro kareb Iko melagan; ideh mebpeh idi maté.

⁴Iko tudo luun kerusiMu, idi mutut ukum luk matu. Iko nemutut besara'ku, pad ui inau' matu.

- ⁵Iko pangeh nengukum nelun luk na manu, idi nengaté lemulun luk dat, pad ideh na uen ngerawé peh.
- ⁶Amung-amung bunu'ku na luk idi peh; bawangdeh pangeh inusagMu, idi seburur pana' nateh ngerawé nedeh.
- ⁷Iamo' Tuhan luk Raca' ruked-ruked peh; Ieh nengeletep kerusiNeh inanNeh mutut besara'.
- ⁸Ieh ngimet tana' ini dengan luk matu, Ieh mutut besara' pupu-pupu dengan ukum luk matu.
- ⁹Tuhan ineh libung lemulun luk pidereh, idi su luk inandeh inita kareb mesusa'.
- ¹⁰Lemulun luk miti Namu, Tuhan, merapet Namu; na Iko necan lemulun luk amé' Namu.
- ¹¹Menani ngubur Tuhan luk ngimet déi' Sion! Mada' amung pupu ratnan luk inau'Neh!
- ¹²Allah ngerawé lemulun luk pidereh, na Ieh kelupan tawardeh; Ieh ngukum lemulun luk ngedat nedeh.
- ¹³Méi' kuanku, O Tuhan! Siruh kudeng apeh bunu'ku ngedereh negku. Muit negku ratnan até, O Tuhan,
- ¹⁴pelé ui miak ngubur kekamenMu pa kiung lemulun déi' Yerusalim. Ui mawang niat ngaceku Iko nengulun negku.
- ¹⁵Lun luk na manu pangeh nengukat lubang, idi ideh sebuleng nakab bang idi teh. Ideh sebuleng nekaneh abpungdeh.
- ¹⁶Tuhan nengegala' bururNeh, ratnan Ieh mutut besara' dengan ukum luk matu, idi lun luk dat mekaneh abpungdeh ngaceku kekamendeh sebuleng.
- ¹⁷Kekiped lemulun luk dat, ieh ineh até, ngaceku ideh ara' inan Allah.
- ¹⁸Lun masi' na simén macing ruked-ruked. Rapet lemulun luk pidereh na miak metutu' macing ruked-ruked.

¹⁹Tuhan, aleg nima' lemulun metueh rat Namu! Nguit lun luk na manu pa kiungMu, idi ngukum nedeh.

²⁰Nganau' nedeh matot, O Tuhan, pelé ideh kali' ideh lemulun mo'.

Nani Ubur 10

¹Ngudeh Iko pelaba ado, Tuhan? Ngudeh Iko sigapung bang kareb susa'?

²Lemulun luk dat medita' niat idi ngedereh tu-tu nelun masi'; ngakem nedeh bang abpung luk inau'deh sebuleng.

³Lemulun luk dat mesido' ratnan pianneh luk dat, idi lemulun luk ucet nakap binaweh nguyo idi situnga nan Allah.

⁴Dengan dita' niat lemulun luk dat pebala: "Allah na ngukum negku! Na Allah idi!" Kudeng ini terawéneh.

⁵Lun luk dat megéi' ngalap luk pianneh. Na ieh mileh kali' amung ukum Allah, idi ieh situnga nan bunu'neh.

⁶Keterawéneh, "Na ui miak mebeneh; na ui miak mesusa'."

⁷Balaneh megéi' dengan kuyo, bali, idi bala luk katot; ieh mesaget pebala luk dat idi bala luk megateh.

⁸Lemulun luk dat ngabang iring dalan sikal ngaté lemulun luk na inan sala'. Ieh nier anid lawé lun luk kamenneh.

⁹Ieh nganét su luk inanneh ngabang mepad kudeng balang. Ieh nganét pad ieh ngakem nelun masi'; ieh ngakem neneh ku abpungneh idi ngekarad neneh.

¹⁰Ngaceku tueh lemulun luk dat ineh, lun masi' ineh melaya'; pad ieh meluka' idi murat.

¹¹Iamo' lemulun luk dat pebala bang niatneh, "Allah na kali'. Ieh nemapen kiungNeh, idi na Ieh nier negku!"

¹²Amé' negku, O Tuhan ngulun negku! Aleg Iko kelupan lemulun luk pidereh!

¹³Ngudehké lemulun luk dat nguyo Allah, idi pebala bang niatneh, "Teh na ngukum negku"?

¹⁴Iamo' Iko nier idi kali' dereh idi susa' lemulun, idi Iko megéi' temina' ngedengan. Lemulun luk melaya' maré bururneh Namu, Iko megéi' ngedengan nelun masi'.

¹⁵Ngagka' lalud lemulun luk dat; idi ngukum nedeh ngaceku datdeh, pad na luk ketecan luk ruen ngukum!

¹⁶Tuhan luk Raca' macing ruked-ruked. Lun luk na manu miak metutu' ratnan tana'Neh.

¹⁷O Tuhan, Iko ninger sembayang lemulun luk mebeneh niat; Iko maré kuu' nedeh.

¹⁸Iko ninger tawar lemulun luk pidereh idi anak maté teh, idi mutut besara' pelé ideh ruen matu, pad lemulun bang tana' ini na ngacing tot peh.

Nani Ubur 11

¹Ui merapet inan Tuhan ngelibung negku. Ngudeh muyuh mebacé pebala negku: "Temulud iko kudeng suit amé' nan pegkung,

²ngaceku lemulun luk dat temina' ku gamandeh, pian mayung lemulun luk do' kareb medacem.

³Anun luk miak ruen lemulun luk do' kareb bada' idi ukum metutu'?"

⁴Tuhan idi bang ruma'Neh luk meligan; idi kerusiNeh bang surga. Ieh nier amung-amung lemulun, idi kali' anun luk ruendeh.

⁵Ieh ngelio lemulun luk do' idi luk dat; Ieh pelaba gateh inan lemulun luk ngelaba ukum.

⁶Ieh nurun bareh apui idi batu apui luun lemulun luk dat; idi Ieh ngukum nedeh ku budung apui.

⁷Tuhan ineh matu, idi mawa inan kekamen luk do'; lemulun luk maya' balaNeh miak nier Neneh.

Nani Ubur 12

¹Ngulun nekai, O Tuhan! Seburur lemulun luk do' pana' nateh luk ketecan, lemulun luk mesiri pana' nateh luk idi.

²Amung-amungdeh mebalih kuan lun baken, dengan do' bala, iamo' perapid niatdeh.

³Mebpeng dila'deh luk do' bala ineh, Tuhan! Niep tangdeh luk mesido' ineh teh!

⁴Keburi'deh: "Kai pebala maya' pian kai. Seburur pana' nateh miak mebpeng nekai. Idéké luk miak mada' anun luk belénkai?"

⁵"Iamo'," kebala Tuhan, "Ui sikal macing, ngaceku lun masi' pangeh pidereh, idi lun luk pidereh ngarod ku étdeh: Ui miak ngedengan nedeh, mepad kudeng luk piandeh!"

⁶Jani' Tuhan luk inan merapet; idi matu mepad kudeng pirak luk tinutun tudu' kua' bang apui.

⁷⁻⁸Lemulun luk dat idi iapeh-iapeh pana', idi amung lemulun ngubur luk dat. O Tuhan, megéi' ngelibung nekai idi nginita nekai ratnan lemulun ineh.

Nani Ubur 13

¹Tuda' ioké Iko kelupan negku Tuhan? Macing raked-rakedké? Tuda' ioké Iko sigapung rat negku?

²Tuda' ioké ui miak ngaca ét? Tuda' ioké susa' mepanu' bang niatku kareb macang idi kareb medacem? Tuda' ioké bunu'ku metueh rat negku?

³Nier negku, O Tuhan Allahku! Ngua' kuanku! Ngetueh negku sekua' teh, pad ui na maté,

⁴pelé bunu'ku na pebala, "Kai pangeh nengelaya' neneh!" Aleg nima' nedeh mawang niat ku ebpehku.

⁵Ui merapet ku awaMu luk na misu'; ui mawang niat ngaceku Iko ngulun negku.

⁶Ui sikal menani kuan Tuhan, ngaceku Ieh pelaba do' negku.

Nani Ubur 14

¹Lun luk mebacé pebala bang niatdeh, "Na luk idi Allah." Amung-amungdeh na mesiri, idi ideh nenganau' luk pelaba dat; seburur pana' nateh luk nganau' luk do'.

²Tuhan nier lemulun rat surga, pian kali' kudeng inan lun luk mileh, idi kudeng inan luk sembayang nan Allah.

³Iamo' amung-amungdeh pangeh neraruh, idi mepad dat. Seburur pana' nateh luk do'.

⁴Kebala Tuhan, "Naké ideh kali'? Mebacéké amung lemulun luk dat ini? Ideh mulun ku luk pinodeh ratnan pupuKu, idi na ideh sembayang mutuh rat Negku."

⁵Iamo' ideh pelaba tot, ngaceku Allah idi dengan lemulun luk maya' balaNeh.

⁶Ideh situnga ratnan terawé lun masi', ngaceku ieh merapet inan Tuhan.

⁷Ui metueh sembayang pad uluh macing kuan lun Israil rat Sion! Kareb Tuhan ngeperuan pupuNeh sekua' teh, Yakub idi lun Israil miak mawang niat.

Nani Ubur 15

¹Tuhan, idéké miak mudeng bang ruma'Mu? Idéké miak tudo luun Sion, pegkungMu luk meligan?

²Lemulun luk maya' bala Allah bang luk amung-amung, idi megéi' nganau' luk matu; idi balaneh matu idi mesiri.

³Ieh na ngedat nelun baken, idi na nganau' sala' kuan lun rurumneh, idi na ngatum buri' luk dat ratnan lun denganneh.

⁴Na ieh perurum nelun luk tila' Allah, iamo' ngedita' lemulun luk maya' bala Allah. Ieh megéi' nganau' luk pijani'neh dengan na ngerawé raganeh.

⁵Ieh maré usinneh kebiten dengan na ngalap uli'neh, idi na ieh ngalap suap idi ngadu' lemulun luk na mesala'. Lemulun luk nganau' kudeng ini miak ngalap tueh.

Nani Ubur 16

- ¹Ngelibung negku O Allah; ui merapet Namu nginita negku.
- ²Ui pebala kuan Tuhan, "Iko luk Tuhanku; amung luk do' ilapku rat Namu."
- ³Pelaba do' lemulun luk merapet nan Tuhan! Pelaba awang niatku nedeh.
- ⁴Lemulun luk mili' allah baken, ngacing mula' dereh kuan bururdeh sebuleng. Na ui pian perurum nedeh, kareb ideh maré luk kirat kuan allahdeh. Na ui sikal sembayang inan allahdeh.
- ⁵Iko Tuhan, luk babpatku, Iko maré amung-amung luk pianku. Ulunku, ieh ineh bang paladMu.
- ⁶Amung babpat luk biréMu negku pelaba do'. Luk biréMu ineh do' tu-tu!
- ⁷Ui ngubur Tuhan, ngaceku kuyutNeh negku, idi kareb medacem niatku megéi' sigio.
- ⁸Ui lutep ngerawé Tuhan kidi-kidi; na luk nganau' naitku mepakau, ngaceku Tuhan muneng negku.
- ⁹Ui mepanu' ku awang idi geriguen, idi ui megéi' do' udeng teh,
- ¹⁰Ngaceku Iko matar negku ratnan lalud até', idi na Iko nima' lemulun luk inanMu mawa amé' su luk inan até.
- ¹¹Iko mada' kuanku dalan ulun. Kareb Iko idi, ui mepanu' ku awang. Pedengan rat Namu ngacing awang luk meruked kuanku.

Nani Ubur 17

- ¹O Tuhan, ninger putuhku luk matu; ngaceku ui ngitang mutuh pedengan! Ninger putuhku, ngaceku na ui naluk.
- ²Iko mutut besara'ku, pelé ui ruen matu, ngaceku Iko kali' luk matu.
- ³Iko kali' niatku. Iko amé' negku kareb medacem. Iko nengelio negku do'-do' idi Iko kali' na luk idi pian luk dat bang negku.
- ⁴Na ui pebala luk dat kudeng lun baken. Ui pangeh nemaya' ukumMu, idi na maya' lawé lemulun luk mesangit.

- ⁵Rat mon ui pangeh nemaya' lawéMu, idi na neraruh ratnan dalanMu.
- ⁶Ui sembayang mutuh rat Namu, O Allah, ngaceku Iko luk ngua' kuanku. Ngeten lalidMu negku, idi ninger balaku.
- ⁷Ngegala' awaMu luk meluun do'. Kai luk sigapung Namu uen ngulun ratnan bunu' kai.
- ⁸Ngelibung negku, mepad kudeng ngelinged matehMu, idi ngapung negku iang iladMu,
- ⁹ratnan bunu' luk dat. Bunu'ku luk megateh niat ngelibung negku.
- ¹⁰Na ideh méi', idi ideh pebala dengan medita' niat.
- ¹¹Ideh megéi' ngelibut negku, idi nier negku kidi-kidi, ngaceku ideh pian ngelaya' negku.
- ¹²Ideh mepad kudeng balang luk ngabang negku pad ideh miak ngeramit negku.
- ¹³O Tuhan, ngerieng bunu'ku idi ngaté nedeh! Muit negku ku pelapetMu ratnan lemulun luk dat. Muit negku rat nedeh dengan laludMu,
- ¹⁴ieh ineh lemulun luk ngalap luk piandeh bang tana' ini. Ngukum nedeh dengan dereh luk dinugMu kuandeh. Do' anak-anakdeh idi mupundeh ngalap petap dereh teh!
- ¹⁵Iamo' ui miak nier Namu, ngaceku ui luk matu, kareb ui tumui, ui miak mepanu' ku awang, ngaceku Iko idi denganKu.

Nani Ubur 18

- ¹O Tuhan luk tuehku, ui mawa Namu!
- ²Tuhan, Ieh ineh Lun Nengulun negku. Ieh mepad kudeng libung luk meraben. Allahku luk ngelibung negku, idi Ieh nginita negku. Ieh ngelinged negku mepad kudeng utap. Ieh matar idi ngulun negku.
- ³Ui nawar Tuhan, idi Ieh ngulun negku ratnan bunu'ku. Ngubur Tuhan!
- ⁴Dereh até nengelibut negku. Abpa' tubu' belen nenganud negku.

- ⁵Dereh até nengelibut negku, idi tanem tumen abpung kuanku.
- ⁶Idi bang susa'ku ui nenawar Tuhan. Ui nenawar Allahku mutuh pedengan. Bang ruma'Neh Ieh neninger tawarku. Ieh neninger tawarku mutuh pedengan.
- ⁷Idi tana' neruyuh idi nesigio. Tana' luk pa liang pegkung nesigio teh, ngaceku useh Allah!
- ⁸Rabpun neremuat rat bang icungNeh. Bareh idi budung apui luk ngeseb neremuat rat bang tangNeh.
- ⁹Ieh nengebiring langit idi netemurun, dacek luk mepingot iang kukudNeh.
- ¹⁰Ieh nemaya' malaikat karub luk temulud. Ieh temulud siling-siling luun ilad bui.
- ¹¹Dacek mangun ku tarubNeh. Laput luk mekapal idi mitem nengelibut Neneh.
- ¹²Udan batu idi bareh apui neremuat rat bang kilep pa atunNeh, idi nelemaba laput luk medacek.
- ¹³Tuhan nepebala rat bang langit mepad kudeng lalam; idi uni tang Luk Meluun Dita' mepad kudeng udan batu idi bareh apui.
- ¹⁴Ieh nemayung gaman-gamanNeh, idi bunu'Neh neburo, idi Ieh nengeruat kilep taca-taca pad bunu'Neh nepatad.
- ¹⁵Puet ribaruh luk bang abpa' rayeh melagan peh, idi luk pa liang tana' pana' melagan teh, ngaceku usehMu O Tuhan, idi ngaceku gatehMu.
- ¹⁶Rat surga Tuhan ngawal idi ngalap negku, idi nginat negku rat bang abpa' luk medalem.
- ¹⁷Ieh nemuit negku ratnan bunu'ku luk metueh, ratnan amung-amung luk megateh negku — ideh luk meluun tueh rat negku!
- ¹⁸Kareb ui bang susa' ideh nepebunu' negku, iamo' Tuhan nengelibung negku.

- ¹⁹Ieh nemuit negku ratnan derehku, Ieh nengulun negku ngaceku Ieh mawang niat negku.
- ²⁰Tuhan méi' negku ngaceku ui luk matu; Ieh ngeperuan negku ngaceku ui na mesala'.
- ²¹Ui pangeh nemaya' ukum Tuhan, idi na ui nelemubed ratnan Allahku.
- ²²Ui pangeh nemaya' amung-amung ukumNeh. Ui na nengelaba balaNeh.
- ²³Ieh kali' ui na mesala', idi ui nematar bururku ratnan luk dat.
- ²⁴Ieh maré tabpar negku ngaceku ui luk matu, ngaceku ui na mesala' pa kiungNeh.
- ²⁵Iko lutep maya' jani' kuan lemulun luk lutep maya' Namu, idi pelaba do' kuan lemulun luk nganau' luk do'.
- ²⁶Iko ngegala' liganMu kuan lemulun luk meligan, iamo' gatehMu kuan lemulun luk tekilu'.
- ²⁷Iko ngulun lemulun luk mebeneh niat, Iamo' Iko ngebeneh lemulun luk medita' niat.
- ²⁸Tuhan nutud lapungku, pad dacemku buro.
- ²⁹Iko maré tueh negku kareb ui amé' pebunu', idi laludMu pad ui ngusag libungdeh.
- ³⁰Kekamen Allah meluun meriput. BalaNeh luk inan merapet! Ieh mepad kudeng utap kuan lemulun luk peringucung Neneh.
- ³¹Tuhan sebuleng mo' luk Allah. Allah sebuleng mo' luk Batu Libung tau.
- ³²Ieh ineh Allah luk maré tueh negku, idi luk matar lawéku.
- ³³Ieh matar negku luun pegkung, idi nganau' negku upun mepad kudeng talau.
- ³⁴Ieh ngekalai ticu'ku, pad ui miak metueh ngiber gaman.
- ³⁵Iko maré utap ulun kuanku, idi laludMu matar negku. Ratnan pedenganMu ui mangun ku lun rayeh.

- ³⁶Iko nematar negku, pad ui na tiban, idi na tu-tu ui linaya' bunu'ku.
- ³⁷Ui ngerada' bunu'ku pad ngakem nedeh. Na ui ugka' kudeng ideh na linaya'ku.
- ³⁸Ui narad nedeh, idi ideh na miak tumui, pad ideh telubid iring kukudku.
- ³⁹Iko maré tueh negku kareb ui pebunu', pad ui metueh ratnan bunu'ku.
- ⁴⁰Iko ngusu bunu'ku rat negku, ui ngaté lemulun luk megateh negku.
- ⁴¹Ideh ngitang mutuh pedengan, iamo' na luk ngulun nedeh, ideh nawar Tuhan, iamo' na Ieh ngor.
- ⁴²Ui tupeh nedeh, pad ideh mebunek idi mepalid ku bui. Ui ngeradu' nedeh mepad kudeng buri luk luun dalan.
- ⁴³Iko muit negku ratnan lemulun luk sikal ngelibal negku, pad ui mangun ku raca' kuan pupu-pupu. Lemulun luk na mitiku mangun ku anak itinku.
- ⁴⁴Kareb ideh ninger balaku, ideh maya'. Pupu baken pana' miak tekeradung negku.
- ⁴⁵Ngaceku ideh na mekuu', ideh remuat dengan megegker rat bang libungdeh luk meraben.
- ⁴⁶Mulun Tuhan! Ngubur Batu Libungku! Allah, Ieh ineh luk ngulun negku! Do' mada' laludNeh!
- ⁴⁷Ieh maré negku metueh ratnan bunu'ku; Ieh ngebeneh tuda-tuda' pupu rat negku,
- ⁴⁸idi Ieh muit negku ratnan lemulun luk megateh negku. Iko maré negku metueh ratnan bunu'ku, idi ngelibung negku ratnan lemulun luk mesangit.
- ⁴⁹Ngaceku ineh, ui ngubur Namu arang pupu-pupu; ui miak menani ngubur Namu.
- ⁵⁰Allah megéi' maré tueh kuan raca'Neh, Ieh ngegala' awaNeh luk lutep kuan lemulun luk pinili'Neh, ieh ineh kuan Daud idi inulneh macing raked-raked.

Nani Ubur 19

- ¹Langit ngegala' rayeh Allah, idi mada' luk pangeh inau'Neh!
- ²Aco ngegala' rayeh Allah kuan aco luk nebpa. Dacem ngegala' ineh kuan dacem luk nebpa teh.
- ³Na bala luk pedingeren, idi uni teh.
- ⁴Iamo' baladeh mepiar aput-aput tana'. Allah nemudut lepo kuan aco déi' langit,
- ⁵aco ineh remuat mepad kudeng anak adi' luk ngaweh remuat rat bang takepneh mepad kudeng lemulun luk pian peribatun.
- ⁶Ieh ngimun rat iring langit selipa, macing iring selipa. Na luk melinged ratnan lau'neh.
- ⁷Ukum Tuhan ineh meriput, idi ngacing ulun luk mebaruh. Amung ukum Tuhan ineh matu, pad maré ileh kuan lemulun luk na mileh.
- ⁸Ecuk Tuhan ineh matu, lemulun luk maya' ecuk ineh mawang niat. UkumNeh meluun mesiri, pad ngukab terawé lemulun.
- ⁹Do' lemulun matot inan Tuhan: tot ineh lutep macing raked-raked. Ukum-ukum Tuhan ineh matu, idi mesiri teh.
- ¹⁰Ukum ineh meluun do' ratnan amas, luk meluun meraga, idi meluun paci' ratnan duru' luk meluun do'.
- ¹¹Ukum ineh mangun ku bada' kuan demulunMu; ratnan maya' ukum ineh ui ngalap tabpar.
- ¹²Seburur pana' na miak miti sala'neh sebuleng; muit negku ratnan sala' luk inalum!
- ¹³Ngimet negku pelé ui na nganau' sala' rungen; aleg nima' sala' mangun ku raca'ku, pad ui miak meligan, idi mepuit ratnan sala' luk rayeh.
- ¹⁴Nima' balaku idi terawéku petulu maya' pinianMu, O Tuhan, Batu Libungku luk nguli' negku!

Nani Ubur 20

- ¹Do' Tuhan ngua' putuhmu bang kareb susa! Do' Allah Yakub ngelibung namu!
- ²Do' Ieh maré pedengan namu rat ruma'Neh luk meligan, idi ngedengan namu rat Pegkung Sion!
- ³Do' Ieh ngalap amung-amung luk barénmu, idi mawang niat ku amung-amung luk keretenmu.
- ⁴Do' Ieh maré anun luk pianmu, idi ngeperuan amung-amung luk ruenmu.
- ⁵Kai sikal ngudub dengan mawang niat ngaceku tuehmu, idi ngerayeh tuehmmu idi ngubur Allah tau. Do' Tuhan maré amung-amung putuhmu.
- ⁶Nekini ui kali' Tuhan maré tueh kuan raca' luk pinili'Neh. Ieh ngua' kuanneh rat surga luk meligan, idi dengan laludNeh Ieh maré tueh luk rayeh kuan raca'Neh.
- ⁷Sebuangdeh merapet ku keréta belawan, idi sebuang merapet ku kuda; iamo' tau merapet ku lalud Tuhan Allah tau!
- ⁸Ideh miak metebaceng idi mebpeh, iamo' tau miak mudur idi tuped meraben.
- ⁹O Tuhan, maré tueh kuan raca'; do' Iko ngor kareb kai nawar!

Nani Ubur 21

- ¹O Tuhan, raca' mawang niat ngaceku Iko maré tueh neneh. Ieh pelaba awang niat ngaceku Iko nenganau' neneh metueh.
- ²Iko nemaré luk pianneh, idi nengua' putuhneh.
- ³Iko nacing neneh dengan peruan luk rayeh; Iko nengerareng pata amas luun uluhneh.
- ⁴Ieh nemutuh ulun, idi Iko nemaré neneh, ieh ineh ulun luk mekadang.
- ⁵Uburneh rayeh ngaceku pedenganMu. Rayeh idi ngadan luk mebala pangeh biréMu neneh.

⁶PeruanMu ngedengan neneh macing raked-raked. Ieh mepanu' ku awang, ngaceku Iko idi danganneh.

⁷Raca' merapet inan Luk Meluun Dita'. Ngaceku awaNeh lutep ieh mangun ku raca' raked-raked.

⁸Raca' miak ngakem amung-amung bunu'neh, ieh miak naban amung-amung lemulun luk megateh neneh.

⁹Kareb ieh melagan, ieh miak ngeseb nedeh, mepad kudeng apui luk mebudung. Ngaceku useh Tuhan, Ieh miak ngaté nedeh, idi apui miak ngeseb nedeh.

¹⁰Raca' miak ngaté amung-amung anakdeh, idi inuldeh.

¹¹Ideh ngerawé luk dat, idi sikal metueh rat neneh, iamo' na miak mangun.

¹²Ieh miak mayung nedeh, pad ideh upun buro.

¹³O Tuhan, ngegala' tuehMu, idi kai miak menani idi ngubur laludMu.

Nani Ubur 22

¹O Allahku ngudehké Iko nenecan negku? Ui nengitang mutuh pedengan, iamo' macing nekini nateh luk idi.

²Tebaco-tebaco ui nawar Namu O Tuhanku, iamo' na Iko ngor, idi kedangan-kedangan teh, iamo' na ui dinengan.

³Iamo' Iko Allah luk Meligan luk tudo su luk inan lun Israil sembayang.

⁴Tepun kai merapet Namu. Ideh merapet Namu, idi Iko nengulun nedeh.

⁵Ideh nenawar Namu, pad ideh nepuit ratnan dereh. Ideh merapet Namu, idi na ideh migu'.

⁶Iamo' na ui lemulun, iamo' bacuk, luk inan lun amung-amung situnga!

⁷Amung-amung luk nier negku ngacé negku; ideh sikitat dila' situnga idi uluhdeh tuka'-tuka'.

⁸Kebaladeh, "Iko merapet inan Tuhan. Ngudeh Ieh na ngulun namu? Kudeng Tuhan mawa namu, ngudeh Ieh na ngedengan namu?"

- ⁹Iko luk nengedengan negku kareb ui tinganak, idi nengasa' negku kareb ui anak isuut.
- ¹⁰Ui pangeh merapat Namu rat karebku tinganak, idi Iko luk Allahku rat punku mulun.
- ¹¹Aleg Iko mado rat negku! Ngaceku susa' muneng, idi seburur pana' nateh luk ngedengan.
- ¹²Mula' bunu' ngelibut negku, mepad kudeng kerubau deléi, mepad kudeng kerubau deléi luk mesangit déi' bawang Basan.
- ¹³Ideh tenganga' mepad kudeng balang, luk ngeku idi ngeramit negku.
- ¹⁴Tuehku nabud, mepad kudeng abpa' luk inutat. Amung-amung bukuh tulangku pekisu'; idi niatku mepad kudeng ulih luk remuno.
- ¹⁵Tangku tekering mepad kudeng abuh, idi dila'ku pedeket iang karabku. Iko ngerareng negku, mepad kudeng butung, luun abun tana'.
- ¹⁶Lemulun luk dat ngelibut negku. Ideh ngerieng negku mepad kudeng uko'. Ideh ngatep ticu' idi kukudku.
- ¹⁷Amung-amung tulangku melagan. Bunu'ku nutong negku.
- ¹⁸Ideh nala' udi sikal ngalap ayungku, idi mabpat ayung ineh kuandeh.
- ¹⁹Aleg Iko mado rat negku, Tuhan! Miket ngedengan negku idi ngulun negku!
- ²⁰Muit negku ratnan pelapet, idi ratnan uko'-uko' ineh.
- ²¹Muit negku ratnan balang ineh. Ui pelaba laya' pa kiung kerubau luk mesangit ineh.
- ²²Ui miak mada' pupuku ratnan luk inau'Mu. Ui miak ngubur Namu bang tebubpundeh.
- ²³"Ngubur Neneh, O muyuh luk demulun Tuhan! Ngerayeh Neneh, O muyuh luk inul Yakub! Sembayang Neneh, O muyuh lun pupu Israil!
- ²⁴Na Ieh kelupan dereh lun masi', Ieh megéi' nginita nedeh. Na Ieh mado rat nedeh, iamo' Ieh ngor kareb ideh nawar mutuh pedengan."

²⁵Ui miak ngubur Namu bang tebubpun rayeh, ngaceku luk inau'Mu, Idi pa kiung amung-amung lun luk maya' balaMu, ui miak maré baré luk pijani'ku.

²⁶Lun masi' miak kuman pad macing mebor; lemulun luk matun Tuhan miak ngubur Neneh. Do' peruandeh macing raked-raked!

²⁷Amung-amung pupu miak ngerawé Tuhan. Rat aput-apat tana' ideh miak lumi Neneh. Amung-amung pupu miak sembayang Neneh.

²⁸Tuhan ineh raca', idi Ieh ngimet amung-amung pupu.

²⁹Lemulun luk medita' niat miak tekeradung pa kiung Neh; idi lemulun luk miak maté miak munel pa kiungNeh.

³⁰Amung inul luk mucu miak sembayang Neneh; idi bala ratnan Tuhan miak badén kuan inul luk macing mucu.

³¹Pupu luk nateh tinganak miak badén, ratnan Tuhan pangeh nengulun pupuNeh.

Nani Ubur 23

¹Tuhan ineh Lun Matar negku, idi na ui pian ku luk baken.

²Ieh ngato erurku déi' bang laman luk mula' uduh; idi Ieh nguyut negku macing su abpa' luk melio.

³Ieh maré tueh luk mebaruh negku. Ieh nguyut negku bang dalam luk matu maya' jani'Neh.

⁴Sagan tu pana' dalam ineh lemaba dacek luk mepingot, na ui miak matot, ngaceku Iko idi denganku! Idi rukudMu luk matar negku.

⁵Iko temina' irau kuanku, su luk inan maung bunu'ku miak kali' negku; Iko ngumau uluhku idi manu' sangkirku pad macing lubpi.

⁶Kali' rungen do' idi awaMu miak idi denganku raked ulunku; idi ruma' Tuhan mangun ku ruma'ku macing raked-raked.

Nani Ubur 24

- ¹Tana' idi amung uangneh Tuhan kuan, idi amung luk mulun luun tana' ineh pana' Ieh kuan.
- ²Ieh nemudut ineh luun abpa' luk medalem pa liang tana', idi Ieh nenganau' apinneh bang abpa' rayeh.
- ³Idé luk petulu mudik irang Tuhan? Idé luk miak simén semuet bang ruma'Neh luk meligan?
- ⁴Ieh luk meligan bang kekamen idi terawéneh, idi pian ku luk matu, idi luk na mebalih.
- ⁵Ieh miak ruen Tuhan ngeperuan; idi miak ruen Allah matu.
- ⁶Kudeng ineh lemulun luk macing inan Allah, idi luk macing pa kiung Allah Yakub.
- ⁷Ngukab amung bubpu' ar, idi amung tanga' luk mon, pad Raca' luk rayeh miak semuet!
- ⁸Idéké Raca' luk rayeh ineh? Ieh ineh Tuhan, luk metueh idi melalud, Tuhan luk metueh bang bunu'.
- ⁹Ngukab amung bubpu' ar, idi amung tanga' luk mon, pad Raca' luk rayeh miak semuet!
- ¹⁰Idéké Raca' luk rayeh ineh? Tuhan luk kuan amung-amung baweh, Ieh ineh Raca' luk rayeh!

Nani Ubur 25

- ¹Kuan Diko, Tuhan, ui sembayang
- ²Iko, Allahku luk inanku merapet: aleg nima' negku uen ngelaya' idi migu'; aleg nima' bunu'ku mesido' pa kiungku!
- ³Idi baken lemulun luk merapet Namu miak uen ngelaya', iamo' lemulun luk sikal metueh rat Namu.
- ⁴Mada' dalanMu kuanku, O Allah, pad ui miti dalanMu ineh.

- ⁵Mada' negku ratnan ulunMu luk matu; ngaceku Iko Lun Nengulun negku. Idi tebaco-tebaco ui merapet Namu.
- ⁶Ngerawé éi' idi awaMu, O Allah, luk ginala'Mu rat mon.
- ⁷Maré do' ratnan sala' idi dat luk ianu'ku kareb ui anak adi'. Ngaceku awa idi do'Mu luk lutep, ngerawé negku, O Tuhan!
- ⁸Tuhan ineh matu idi do'. Ieh mada' dalam kuan lun luk mesala'.
- ⁹Ieh nguyut lemulun luk mebeneh niat maya' dalam luk matu, idi mada' pianNeh nedeh.
- ¹⁰Dengan awaNeh Ieh lutep nguyut nedeh, ieh ineh amung-amung luk maya' jani' idi ukum-ukumNeh.
- ¹¹Maya' jani'Mu, Tuhan, idi maré do' ratnan sala'ku luk mula' tu-tu.
- ¹²Lemulun luk maya' bala Tuhan miak kali' dalamNeh.
- ¹³Ideh miak megéi' inan peruan, idi anak-anakdeh miak mulun dengan do' bang tana' ineh.
- ¹⁴Tuhan ineh Lun Rurum lemulun luk maya' balaNeh, idi Ieh mada' jani'Neh nedeh.
- ¹⁵Megéi' ui merapet inan Tuhan ngedengan anid-anid kareb, idi Ieh muiit negku ratnan dereh.
- ¹⁶Amé' negku, idi méi' negku, ngaceku ui dat ali idi melaya'.
- ¹⁷Muiit negku ratnan amung-amung rapang idi amung-amung susa'ku.
- ¹⁸Ngerawé amung gagau idi derehku; idi maré do' ratnan amung sala'ku.
- ¹⁹Siruh tuda'-tuda' ula' bunu'ku, idi gatehdeh negku!
- ²⁰Ngelibung negku idi ngulun negku. Aleg nima' negku uen ngelaya' ngaceku ui amé' sigapung Namu.
- ²¹Do' siri niat idi do'ku matar negku, ngaceku ui merapet Namu.
- ²²O Allah, ngulun pupuMu ratnan amung-amung susa'deh!

Nani Ubur 26

- ¹Mala negku na sala', O Tuhan, ngaceku ui nganau' luk mesiri, idi merapet tu-tu Namu.
- ²Nier negku idi nutun negku, O Tuhan, ngelio pianku idi terawéku.
- ³AwaMu luk lutep idi denganku; Iko megéi' lutep nguyut negku.
- ⁴Na ui perurum dengan lemulun luk mebalih, idi na ui pebaya' dengan lun luk siayu.
- ⁵Ui megateh nelun luk nganau' luk dat; idi na ui perurum dengan lun luk na manu.
- ⁶Ui maru' ticu'ku ngaceku ui na mesala', idi kai nalan pekarur dengan sembayang ngelibut bubpunMu, O Tuhan.
- ⁷Ui maré ubur dengan menani, idi mada' amung kekamenMu luk pelaba do'.
- ⁸Ui pian ku ruma' luk inanMu tudo, Tuhan, ieh ineh su luk inan rayehMu lutep.
- ⁹Aleg ngaté negku dengan lun luk mesala'; muit negku ratnan ukum lun luk ngaté—
- ¹⁰lemulun luk megéi' nganau' luk dat, idi megéi' pian maré suap.
- ¹¹Iamo' ui megéi' nganau' luk do', ngulun negku idi méi' kuanku!
- ¹²Ui mepuit ratnan amung-amung dereh; ui ngubur Tuhan bang tebubpun rayeh.

Nani Ubur 27

- ¹Tuhan ineh acang idi ulunku. Idé-idé pana' nateh ui matot; Tuhan matar negku ratnan amung dereh. Na ui miak matot peh.
- ²Kareb lemulun luk dat munu' negku, idi nutun ngaté negku, ideh metebaceng idi mebpeh.
- ³Sagan pana' amung baweh ineh ngelibut negku, na ui miak matot, sagan pana' ideh munu' negku, ui miak lutep merapet Neneh.

⁴Sebuleng mo' luk pinutuhku ratnan Tuhan; sebuleng mo' luk pianku: ieh ineh mudeng bang ruma' Tuhan ruked ulunku, pad mawa ku do'Neh, idi mutuh pedengan rat Neneh.

⁵Ieh miak ngapung negku bang libungNeh kareb inan susa'; Ieh miak matar negku bang ruma'Neh, idi ngerareng negku luun batu luk medita',

⁶pad ui metueh ratnan bunu' luk libutku. Ui miak ngudub dengan mawang niat idi maré baré bang ruma'Neh. Ui miak menani idi ngubur Tuhan.

⁷Ninger, kareb ui nawar Namu, O Tuhan! Méi' negku, idi ngua' tawarku!

⁸KebalaMu, "Amé' Negku." Idi ui sikal amé' Namu, O Tuhan;

⁹aleg sigapung negku! Aleg museh negku; aleg nala' demulunMu. Iko pangeh nengedengan negku, aleg necan negku, O Allah, Lun Nengulun negku.

¹⁰Taman idi tinanku miak necan negku, iamo' Tuhan miak nginita negku.

¹¹Mada' negku, Tuhan, luk pianMu ruenku, idi nguyut negku maya' dalam luk do', ngaceku ui mula' bunu'.

¹²Aleg maré negku kuan bunu'ku; ideh sikal munu' negku; ideh panu' ku balih idi saad.

¹³Ui manu ui miak mulun idi nier do' Tuhan negku.

¹⁴Merapet inan Tuhan! Manu idi aleg merapang. Merapet inan Tuhan!

Nani Ubur 28

¹O Tuhan, Batu Libungku, ui nawar Namu. Ninger tawarku! Kudeng Iko na ngua' tawarku, kali' rungen ui temurun pebaya' nedeh amé' su luk inan até.

²Ninger kareb ui nawar mutuh pedengan, idi kareb ui ngegenang ticu'ku pa atun ruma'Mu luk meligan.

³Aleg ngukum negku dengan lun luk na manu, idi lemulun luk nganau' luk dat, idi lemulun luk do' bala, iamo' bang niatdeh panu' ku gateh.

⁴Ngukum nedeh maya' luk inau'deh, ngaceku kekamendeh luk dat ineh. Maré ukum luk petulu, maya' amung-amung kekamendeh.

⁵Na ideh ngerawé luk inau' Tuhan, idi luk pinudutNeh, idi Tuhan sikal ngukum nedeh, idi ngaté nedeh raked-raked.

⁶Do' maré ubur kuan Tuhan, ngaceku Ieh neninger tawarku mutuh pedengan.

⁷Tuhan matar negku idi ngelibung negku idi ui merapet Neneh; Ieh ngedengan negku, pad ui mawang niat idi menani ubur kuanNeh.

⁸Tuhan matar pupuNeh; Ieh matar idi ngulun raca' luk pinili'Neh.

⁹Ngulun pupuMu, Tuhan, idi ngeperuan lemulun luk Iko kuan! Do' Iko mangun ku lun matar nedeh, idi megéi' nginita nedeh.

Nani Ubur 29

¹Ngubur Tuhan, O amung melaikat! Ngubur rayeh idi laludNeh!

²Ngubur ngadan Tuhan luk rayeh; tekeradung pa kiung Lun luk Meligan kareb Ieh macing.

³Arod Tuhan, ieh ineh Allah luk buren, pedingeren luun abpa' rayeh mepad kudeng lalam.

⁴Arod Tuhan pedingeren dengan amung lalud idi dita'Neh.

⁵Arod Tuhan mila' kayuh tumuh, Ieh mila' kayuh tumuh déi' Lebanon.

⁶Ieh nganau' pegkung Lebanon sikau' mepad kudeng anak sapi' luk isuut, idi Pegkung Hermon sikau' mepad kudeng anak sapi' deléi.

⁷Arod Tuhan ngacing kilep taca-taca.

⁸ArodNeh ngeguyu' tana' su luk ali-ali; Ieh ngeguyu' tana' su luk ali-ali déi' Kadis.

⁹Arod Tuhan maré talau nenganak, idi ngerurug amung-amung don kayuh; idi amung-amung luk bang ruma'Neh ngitang, "Rayeh kuan Allah!"

¹⁰Tuhan ngimet ribaruh abpa'; idi Ieh raca' raked-raked.

¹¹Tuhan maré tueh kuan pupuNeh, idi maré peruan dengan awang kuandeh.

Nani Ubur 30

- ¹Ui ngubur Namu, Tuhan ngaceku Iko nengulun negku, idi nemebpeng bunu'ku na situnga negku.
- ²Ui nengitang mutuh pedengan Namu, O Tuhan Allahku, idi Iko nengedo' negku.
- ³Iko nengelubed negku ratnan até'; ui idi dengandeh luk amé' bang tanem, iamo' Iko nenuneh ulunku.
- ⁴Nani ubur kuan Tuhan, O muyuh luk merapet inan Tuhan! Ngerawé luk inau' Lun luk Meligan ineh, idi maré ubur kuanNeh.
- ⁵UsehNeh segageh mo', idi éi'Neh macing ruked ulun. Sagan pana' nangi' kareb medacem, iamo' awang macing kareb pekak.
- ⁶Ui do' udeng, idi ui nepebala bang niatku, "Na ui miak uen ngelaya'."
- ⁷Iko do' negku, Tuhan, idi nematar negku mepad kudeng bang libung batu. Iamo' kareb Iko sigapung negku, ui pelaba tot.
- ⁸Ui nenawar namu, Tuhan; idi nemutih pedenganMu.
- ⁹"Anunké luk do' luk macing ratnan atéku? Anunké samal ratnan ui amé' tanem? Miakké lun naté ngubur Namu, idi mada' éi'Mu luk meruked?"
- ¹⁰Ninger negku, O Tuhan, idi méi' negku! Ngedengan negku Tuhan!"
- ¹¹Iko nengisu' dat niatku mangun ku awang, idi nenala' tacungku, idi nengayung negku ku ayung luk do'.
- ¹²Na ui miak pirud, ui miak menani ubur kuanMu. Tuhan, Iko Allahku, Ui miak maré ubur kuanMu ruked ulunku.

Nani Ubur 31

- ¹Ui amé' Namu, Tuhan, mutuh sigapung; aleg nima' negku uen ngelaya'. Iko Allah luk matu; ngulun negku!
- ²Ninger negku, idi miket ngulun negku! Do' Iko mangun ku Batu Libungku idi ducungku. Matar idi ngulun negku.
- ³Iko Batu Libung luk matar negku. Nguyut negku mepad kudeng jani'Mu.

- ⁴Muit negku ratnan abpung luk tinina' kuanku; idi mangun ku ducungku.
- ⁵Ui maré bururku bang paladMu. Iko miak ngulun negku, Tuhan; Iko Allah luk lutep maya' jani'.
- ⁶Iko megateh inan lemulun luk sembayang inan akang luk na ulek. Iamo' ui merapet inan Tuhan.
- ⁷Ui miak mawang niat idi geriguen, ngaceku awaMu luk lutep. Iko kali' dereh idi susa'ku.
- ⁸Iko na nenima' bunu'ku nenaban negku; Iko nengerareng negku bang su luk do'.
- ⁹Méi' negku, O Tuhan, ngaceku ui inan susa'. Matehku mebara' ngaceku pelaba tangi'; idi ui pelaba erur!
- ¹⁰Susa' niat idi tangi'ku ngekamu' ulunku. Na ui metueh ngaceku amung susa'ku, idi tulangku pana' melaya' teh.
- ¹¹Amung-amung bunu'ku situnga negku; idi lun denganku ucet ngedat negku. Lemulun luk pekalai negku matot negku. Karebdeh nier negku arang dalan, ideh upun buro matot negku.
- ¹²Amung-amungdeh nekelupan negku mepad kudeng lun naté, idi kudeng luk tila'.
- ¹³Ui ninger mula' munu' luk payek; idi libutku mula' luk inan matot. Ideh pegayam sikal ngaté negku.
- ¹⁴Iamo' ui merapet Namu, Tuhan; Iko luk Allahku.
- ¹⁵Megéi' ui pitarinMu; ngulun negku ratnan bunu'ku idi lemulun luk ngedereh negku.
- ¹⁶Ui ini demulunMu; méi' negku, ngulun negku ngaceku awaMu luk lutep!
- ¹⁷Ui nawar Namu, O Tuhan; aleg nima' negku uen ngelaya'! Nima' lemulun luk dat uen ngelaya', pad ideh pirud bang su luk inan até.

¹⁸Nima' lun luk mebalih mepirud — lemulun luk mesido' idi medita' niat, idi luk ngedat lemulun luk matu!

¹⁹Pelaba do' amung-amung luk nugenMu kuan lemulun luk matot Namu! Idi pelaba do' luk ruenMu pa kiung amung-amung lemulun. Iko matar lemulun luk sigapung Namu.

²⁰Iko ngapung nedeh idi muit nedeh ratnan lemulun luk sikal metueh. Iko ngelinged nedeh bang libung luk meraben, ratnan kuyo bunu'-bunu'deh.

²¹Ngubur Tuhan! Dengan dalan luk do', Ieh nengegala' awaNeh kuanku, kareb bawangku linibut bunu'.

²²Ui matot idi nepebala, "Ui pangeh tila' rat pa kiungMu." Iamo' Iko neninger tawarku, kareb ui nenawar Namu mutuh pedengan.

²³Mawa inan Tuhan, O amung muyuh luk manu Neneh! Tuhan ngelibung lemulun luk manu, iamo' meberat ukumNeh kuan lemulun luk medita' niat.

²⁴Do' amung muyuh luk merapat inan Tuhan metueh idi mekuu'.

Nani Ubur 32

¹Samal kuan lemulun luk nengalap do' ratnan sala', idi kekammeneh luk dat pangeh tila'.

²Samal kuan lemulun luk na sinala' Tuhan, idi luk mepuit ratnan amung saluk.

³Kareb ui na nengamo sala'ku, ui pelaba erur nangi' tebaco-tebaco.

⁴Tebaco-tebaco idi kedangan-kedangan Iko nengukum negku, pad tuehku mabud, mepad kudeng abpa' luk nekeket.

⁵Idi ui nengamo sala'ku Namu; na ui nengalum kekamenku luk dat. Terawéku, "Ui sikal ngamo sala'ku kuan Tuhan," idi Ieh nemaré do' ratnan amung-amung kekamenku luk dat.

⁶Ngaceku ineh, do' amung pupuMu luk manu sembayang Namu kareb inan susa'. Kareb inan abpa' tubu' belen, na ieh miak macing nedeh.

⁷Iko luk inanku sigapung; Iko miak muit negku ratnan susa'. Ui menani rayeh arod ngaceku puitMu, ngaceku Iko ngelibung negku.

⁸Kebala Tuhan, "Ui miak mada' namu dalan luk matu, Ui miak mada' namu do'-do'.

⁹Aleg iko mebacé kudeng kuda idi keladai luk ruen ngeliud ku belawan luk bang tangneh, pad ieh maya' namu."

¹⁰Lemulun luk dat miak medereh, iamo' lemulun luk merapet inan Tuhan ngalap awaNeh luk lutep.

¹¹O amung muyuh luk matu, do' mawang niat idi geriguen, ngaceku ratnan luk inau' Tuhan! O amung muyuh luk maya' balaNeh, do' ngudub dengan mawang niat!

Nani Ubur 33

¹O amung muyuh luk matu, do' mawang niat ngaceku luk inau' Tuhan; ngubur Neneh, O muyuh luk maya' balaNeh.

²Maré ubur kuan Tuhan dengan giula', idi menani kuanNeh dengan gita pana'.

³Do' menani kuanNeh aceh nani luk mebaruh, idi nateg giula' dengan do', idi menani dengan rayeh arod!

⁴Bala Tuhan ineh matu, idi amung kekamenNeh inan merapet.

⁵Tuhan mawa ku luk matu idi luk mesiri; tana' ini mepanu' ku awaNeh luk lutep.

⁶Ratnan ecdukNeh Tuhan nemudut langit, aco, bulan, idi gituen dengan balaNeh mo'.

⁷Ieh nengamung amung abpa' rayeh mangun ku sebuleng luk inan; idi Ieh nenganau' tuda'-tuda' ribaruh bang abpa rayeh ineh.

⁸Do' matot inan Tuhan, O amung-amung tana'! Ngerayeh Neneh, O amung pupu bang tana' ini!

⁹Kareb Ieh nepebala, tana' ini mangun peh; kareb Ieh nengecuk, amung-amung pudut melagan peh.

¹⁰Tuhan ngusag terawé amung-amung bawang, idi Ieh ngagka' luk pian lemulun teh.

¹¹Iamo' terawé idi pian Tuhan lutep macing ruked-ruked.

¹²Samal kuan pupu luk kali' Tuhan ineh Allah; idi samal kuan lemulun luk pinili'Neh mangun ku pupuNeh!

¹³Tuhan nier rat déi' surga, idi kali' amung-amung lemulun.

¹⁴Rat su luk inanNeh ngimet Ieh nier amung-amung luk mulun luun tana' ineh.

¹⁵Ieh nganau' amung-amung terawédeh, idi kali' amung-amung kekamendeh.

¹⁶Seburur raca' na metueh ngaceku bawehneh luk mula'; seburur lun pebunu' na metueh ngaceku laludneh sebuleng.

¹⁷Kuda luk iten pebunu' na ulek, tuehdeh luk rayeh na miak ngulun.

¹⁸Tuhan matar lemulun luk matot Neneh, idi luk merapet ku awaNeh luk lutep.

¹⁹Ieh muit nedeh ratnan até idi ngulun nedeh kareb lau.

²⁰Luk ku rapet tau, ieh ineh Tuhan; Ieh ineh pedengan idi libung tau.

²¹Tau mawang niat ngaceku Ieh, idi merapet ku ngadanNeh luk meligan.

²²Do' awaMu luk lutep ngedengan nekai, O Tuhan, idi Iko luk ku rapet kai.

Nani Ubur 34

¹Ui sikal megéi' maré ubur kuan Tuhan; na ui sikal ugka' ngubur Neneh.

²Ui ngubur Neneh ngaceku luk inau'Neh. Do' amung muyuh luk pidereh ninger idi mawang niat!

³Mada' rayeh Tuhan denganku. Do' amung-amung tau ngubur ngadan Neh!

- ⁴Ui nesembayang inan Tuhan, idi Ieh nengua' kuanku; Ieh nemuit negku ratnan amung totku.
- ⁵Lemulun luk pidereh nier Neneh idi miak ngalap mawang niat; idi na ideh miak migu'.
- ⁶Lemulun luk inan susa' nawar Tuhan, idi Ieh ngua' kuandeh; Ieh muit nedeh ratnan amung susa'deh.
- ⁷MelaikatNeh matar lemulun luk matot inan Tuhan, idi muit nedeh ratnan dereh.
- ⁸Do' nutun idi nakap kudeng apeh do' Tuhan ineh! Samal kuan lemulun luk linibungNeh!
- ⁹Do' amung pupuNeh matot inan Tuhan; ngaceku amung lemulun luk matot Neneh ngalap petap luk piandeh.
- ¹⁰Balang pana' masi' akan idi melau teh, iamo' lemulun luk merapat inan Tuhan na luk idi asi'deh.
- ¹¹O kinanak-kinanakku, amé' negku idi ninger balaku, idi ui sikal mada' nemuyuh matot inan Tuhan.
- ¹²Pianké muyuh ku ulun luk do'? Pianké muyuh mulun mio dengan mawang niat?
- ¹³Matar ratnan pebala luk dat, idi ratnan bala luk mebalih.
- ¹⁴Ugka' ratnan luk dat idi nganau' luk do'; nakap pedo' pad miak ngalap neneh.
- ¹⁵Tuhan nier lemulun luk matu, idi ninger tawardeh;
- ¹⁶iamo' Ieh metueh ratnan lemulun luk dat, pad pupudeh na ngerawé nedeh.
- ¹⁷Lemulun luk matu nawar Tuhan idi Ieh ninger nedeh; Ieh muit nedeh ratnan amung susa'deh.
- ¹⁸Tuhan muneng nelun luk melaso niat; idi Ieh ngulun lemulun luk pelaba susa'.

¹⁹Lemulun luk matu ngalap mula' dereh, iamo' Tuhan muit neneh ratnan amung ineh.

²⁰Tuhan matar neneh do'-do', pad sebuleng tulangneh pana' na meputul.

²¹Lemulun luk dat miak maté ku datneh; idi lemulun luk megateh inan lemulun luk matu miak kumin.

²²Tuhan miak ngulun demulunNeh; lemulun luk amé' sigapung Neneh na miak kumin.

Nani Ubur 35

¹O Tuhan, do' metueh ratnan lemulun luk metueh rat negku, idi munu' lemulun luk munu' negku!

²Ngalap utap idi ngayung ku ayung pebunu'Mu; idi amé' ngedengan negku!

³Ngimet gaman idi pelapetMu, pad munu' lemulun luk ngerada' negku. Mada' negku Iko ineh Lun Nengulun negku!

⁴Nima' lemulun luk sikal ngaté negku uen ngelaya' idi uen ngigu'! Nima' lemulun luk pegayam sikal metueh rat negku, lemubed idi megagau!

⁵Nima' nedeh kudeng lipang padé luk mepalid ku bui, kareb Melaikat Tuhan ngerada' nedeh!

⁶Do' dalandeh mangun medacem idi mesalud, kareb Melaikat Tuhan necat nedeh!

⁷Ideh nenganau' abpung kuanku dengan na punneh, idi nengukat lubang luk medalem sikal ngakem negku.

⁸Iamo' até miak ngakem nedeh kareb nateh ideh kali'; ideh miak kamen bang abpung luk inau'deh, idi mebpeng bang lubang luk inukatdeh.

⁹Idi ui miak mawang niat ngaceku Tuhan; ui miak geriguen ngaceku Ieh nengulun negku.

- ¹⁰Dengan amung niatku ui sikal pebala kuan Tuhan, "Na lemulun mepad kudeng Iko! Iko matar lemulun luk melaya' ratnan lemulun luk metueh, idi lemulun luk mesiri' ratnan lemulun luk ngedereh nedeh!"
- ¹¹Lun luk dat ngesala' idi ngadu' negku ratnan sala' luk na kali'ku.
- ¹²Ideh ngua' do'ku dengan luk dat, pad ui pelaba susa'.
- ¹³Iamo' kareb ideh mét, ui nenganau' tacungku; idi ui nemawa' na nekuman. Idi ui nemunel idi nesembayang kuandeh.
- ¹⁴mepad kudeng sembayangku kuan rorumku idi kinanakku. Idi ui nenalan tekunal dengan nangi', mepad kudeng tangi' lemulun ku tinanneh.
- ¹⁵Kareb ui inan susa', ideh mawang niat, idi pamung iringku idi situnga negku; lemulun luk na mitiku nemebal negku, idi nemepag negku dengan na ugka'.
- ¹⁶Ideh nengedereh negku, idi nesitunga negku, idi nenutong negku dengan megateh niat.
- ¹⁷Tuda' io Iko miak nier, O Tuhan, muit negku ratnan gatehdeh, idi ngulun negku ratnan balang ini!
- ¹⁸Pad ui ngubur Namu bang tebubpun rayeh, idi ngubur Namu pa kiung lun mula'.
- ¹⁹Aleg nima' bunu'ku luk mebalih situnga ngaceku ui uen ngelaya'! Aleg nima' lemulun luk megateh negku dengan na punneh, tuka'-tuka' uluh, mawang niat ku susa'ku!
- ²⁰Na ideh pebala dengan do'; iamo' mebalih idi ngadu' lemulun luk sikal pedo'.
- ²¹Ideh ngadu' negku dengan rayeh arod, "Neh! Neh! Kali' kai luk inau'mu!"
- ²²Iamo' Iko, Tuhan, nenier negku, aleg Iko pirud, Tuhan, aleg Iko mado rat negku!
- ²³Tumui, Tuhan, idi muit negku, tumui, O Allahku, idi ngedengan negku.

²⁴Iko luk matu, Tuhan, mala negku na mesala'; aleg nima' bunu'ku situnga negku.

²⁵Aleg nima' nedeh sebuleng pebala, "Neh! Ineh luk pian kai!" Aleg nima' nedeh pebala, "Kai pangeh nengelaya' neneh!"

²⁶Nima' lemulun luk mawang niat ngaceku derehku uen ngelaya' idi uen ngagau. Nima' nelun luk mala nedeh do' rat negku, uen ngigu' idi uen ngebeneh!

²⁷Nima' nelun luk pian nier negku ruen matu ngitang ku awang niat idi megéi' pebala, "Tuhan ineh rayeh, idi Ieh mawang niat, ngaceku tueh demulunNeh!"

²⁸Idi ui miak mada' siriMu, idi ngubur Namu tebaco-tebaco.

Nani Ubur 36

¹Sala' ngayek bang niat lemulun luk dat; ieh ngarung Allah idi na matot Neneh.

²Ngaceku ieh ngedita' bururneh sebuleng; ieh ngerawé Allah na kali', idi na ngukum sala'neh.

³Balaneh dat idi mepanu' ku balih. Na ieh mileh nganau' luk do' peh.

⁴Ieh telubid, idi ngerawé nganau' luk dat; amung kekammeneh dat, idi na ieh ara' nganau' luk dat.

⁵O Tuhan, awaMu luk lutep idi siriMu macing déi' langit.

⁶SiriMu meraben mepad kudeng pegkung luk rayeh; ukumMu medalem kudeng ribaruh abpa'. Iko Tuhan, nginita lemulun idi pung.

⁷Allah, awaMu luk lutep pelaba do'! Lemulun peringucung pa liang iladMu.

⁸Ideh irau ku akan luk petap rat ruma'Mu. Iko maré luk rupendeh ratnan abpa'Mu luk do'.

⁹Iko ineh luk lawa ulun, idi ngaceku acangMu, kai kali' acang.

¹⁰Do' Iko lutep mawa nelun luk miti Namu, idi nganau' luk do' kuan lemulun luk matu.

¹¹Aleg nima' lemulun luk medita' niat munu' negku; aleg nima' lemulun luk dat masut negku.

¹²Siruh, su luk inan lemulun luk dat nebpeh! Ideh telubid su ineh, idi na miak tumui.

Nani Ubur 37

¹Aleg iko megagau ngaceku lemulun luk dat; aleg nginud lawé lun luk nganau' sala'.

²Ideh metutu' mepad kudeng uduh luk mekarang; idi maté mepad kudeng tibu luk melayuh.

³Merapet inan Tuhan, idi nganau' luk do'; idi tudo bang bawang dengan do' udeng.

⁴Nakap awang niatmu dengan Tuhan, idi Ieh miak maré amung luk pianmu.

⁵Maré bururmu kuan Tuhan; merapet Neneh, idi Ieh ngedengan namu.

⁶Ieh nganau' sirimu merasat, mepad kudeng acang muned aco.

⁷Do' iko ungeng pa kiung Tuhan; nganét luk ruenNeh dengan mulai niat. Aleg megagau ku lemulun luk ngalap mula' binaweh, idi ku lemulun luk ngacing terawédeh luk dat.

⁸Aleg iko museh idi megagau! Ngaceku amung ineh ngacing luk dat.

⁹Lemulun luk merapet inan Tuhan do' udeng bang bawang, iamo' lemulun luk dat miak uen masut.

¹⁰na mio teh lemulun luk dat miak metutu'; iko nakap nedeh, iamo' na ideh kali'mu.

¹¹Lemulun luk mebeneh niat miak do' udeng bang bawang, idi miak ngalap awang luk meriput.

- ¹²Lemulun luk dat sikal metueh ratnan lemulun luk do'; idi megateh niat neneh.
- ¹³Tuhan meriruh ku lemulun luk dat; ngaceku Ieh kali' na mio teh lemulun ineh maté.
- ¹⁴Lemulun luk dat ngangat pelapetdeh, idi ngimet gamandeh, sikal ngaté lemulun luk masi', idi lemulun luk do' niat.
- ¹⁵Iamo' ideh miak kelebpen ku pelapetdeh sebuleng, idi gamandeh miak pitulen.
- ¹⁶Binaweh lemulun luk do' luk sesuut meluun raga ratnan binaweh amung lemulun luk dat;
- ¹⁷ngaceku Tuhan miak ngalap tueh lemulun luk dat, iamo' Ieh ngelibung lemulun luk do'.
- ¹⁸Tuhan nginita lemulun luk maya' balaNeh, idi tana' ineh kuandeh raked-raked peh.
- ¹⁹Na ideh medereh kareb inan susa', iamo' ideh inan petap akan kareb inan iru'.
- ²⁰Iamo' lemulun luk dat miak maté' idi bunu' Tuhan miak metutu' mepad kudeng busak, idi rabpun luk mepalid ku bui.
- ²¹Lemulun luk dat ngabit, iamo' ieh na ngua', iamo' lemulun luk do' niat mekatu idi maré dengan mela.
- ²²Lemulun luk inau' Tuhan ngeperuan, do' udeng bang bawang; iamo' lemulun luk kidiman Tuhan miak ruenNeh masut.
- ²³Tuhan nguyut lemulun dengan do', maya' dalan luk matu, idi mawang niat ku kekamenneh.
- ²⁴Kudeng ieh mebpeh, na ieh mebura', ngaceku Tuhan ngedengan neneh.
- ²⁵Atun ui anak, nekini ui mengered peh, iamo' nateh ui nenier seburur lemulun luk do' luk tican Tuhan, idi anakneh luk mutuh akan.

- ²⁶Megéi' ieh maré mo'-mo' idi maré luk kebiten lun baken teh, idi anakneh mangun ku peruanneh.
- ²⁷Ugka' ratnan luk dat, idi nganau' luk do', idi iko miak mudeng bang bawang raked-raked;
- ²⁸ngaceku Tuhan mawa ku luk matu; na Ieh necan lemulun luk merapet Neneh. Ieh ngelibung nedeh raked-raked, iamo' inul lemulun luk dat miak pitayen.
- ²⁹Lemulun luk matu do' udeng bang bawang, idi tudo su ineh raked-raked.
- ³⁰Bala lemulun luk do' ineh mileh, idi ieh pebala luk matu.
- ³¹Ieh ngimet ukum Allah bang niat, idi na tu-tu mekelupan neneh.
- ³²Lemulun luk dat nier lemulun luk do', idi sikal ngaté neneh;
- ³³iamo' Tuhan na necan neneh bang imet bunu'neh, idi na nima' neneh kumin, kareb ieh tetunin bang besara'.
- ³⁴Merapet inan Tuhan idi maya' ukumNeh. Ieh miak maré tueh namu ngimet bawang ineh, pad iko miak nier ukum lemulun luk dat.
- ³⁵Ui pangeh nenier seburur lemulun luk dat luk metueh ngimet; ieh pa luun amung-amung lemulun, mepad kudeng kayuh tumuh luk medita' déi' pegkung Lebanon,
- ³⁶iamo' mucu ui nelemaba, idi na ieh idi peh; ui nenakap neneh, iamo' na ui kali' neneh.
- ³⁷Nier lemulun luk do' idi lemulun luk matu; mula' inul lemulun luk pian pedo';
- ³⁸iamo' lun mesala' miak mabud maté, idi inuldeh na luk idi.
- ³⁹Tuhan ngulun lemulun luk matu, idi ngelibung nedeh kareb inan susa'.
- ⁴⁰Ieh ngedengan nedeh idi muit nedeh; Ieh muit nedeh ratnan lemulun luk dat, ngaceku ideh amé' peringucung Neneh.

Nani Ubur 38

- ¹O Tuhan, aleg museh negku idi ngukum negku!
- ²Ileb-ilebMu nengurat negku, idi Iko nenecat negku.
- ³Etku pelaba bura', ngaceku usehMu; amung bururku mét ngaceku sala'ku.
- ⁴Ui nened bang ereb sala'ku; sala'ku mangun ku babeh luk pelaba berat kuanku.
- ⁵Ngaceku bacéku, uratku dat buen idi melu.
- ⁶Ui tekunal idi melaso niat; ui nangi' tebaco-tebaco.
- ⁷Ui pelaba lau' ngaceku medadem, idi pelaba bura' étku.
- ⁸Ui na tuman ngaceku pelaba laso niat, idi niatku megagau idi ui ngarod ku étku.
- ⁹Tuhan, Iko kali' luk painku; Iko ninger amung arodku.
- ¹⁰Niatku megegker, idi tuehku nabud idi meseraber sirenku.
- ¹¹Lun rorumku idi lun denganku na pian muneng negku, ngaceku uratku; idi lun bang ruma'ku pana' tudo mado rat negku.
- ¹²Lemulun luk sikal ngaté negku nganau' abpung kuanku, idi lemulun luk sikal ngesusa' negku ngerawé ratnan ngedereh negku; ideh na ugka' nakap dalam sikal metueh rat negku.
- ¹³Ui mepad kudeng lemulun luk mebengel, luk na miak ninger, mepad kudeng lemulun luk mebegkeh, luk na miak peburi'.
- ¹⁴Ui mepad kudeng lemulun luk sibengel, idi na ngua' bala.
- ¹⁵Iamo' ui merapet Namu, O Tuhan'; Iko, O Tuhan Allahku, miak ngua' kuanku.
- ¹⁶Aleg nima' nedeh mesido' niat ku susa'ku; aleg nima' nedeh medita' niat kareb ui mebpeh!
- ¹⁷Ngaceku ui lélé mebpeh, idi étku kidi-kidi.
- ¹⁸Ui ngamo datku, idi sala'ku luk ngerapang negku.

¹⁹Bunu'ku do' ulun idi metueh; inan mula' lemulun luk megateh negku dengan na punneh.

²⁰Lemulun luk ngua' do'ku dengan luk dat, sikal metueh rat negku, ngaceku ui sikal nganau' luk matu.

²¹Aleg necan negku, O Tuhan, aleg Iko mado rat negku, O Allahku!

²²Miket ngedengan negku, O Tuhan, Lun Nengulun negku!

Nani Ubur 39

¹Kebalaku, "Ui miak matar do'-do' ratnan luk ruenku, pad balaku na mesala'. Ui na mala anun-anun kareb lemulun luk dat muneng."

²Idi ui nepirud, na nepebala sebuleng bala luk do' pana'! Iamo' susa'ku iuk-iuk amé' dat,

³Idi niatku pelaba rapang. Kareb ui nengerawé susa'ku, ui meluun meberat niat; pad ui na miak ungeng, kebalaku:

⁴"O Tuhan, maré kali' idan kareb ui maté. Tuda' aco baruh ui mulun? Mada' negku anun kisaget ulunku mabud."

⁵Ulunku pelaba kamu' inau'Mu, idi su sirenMu ulunku na luk idi. Idi amung ulun lemulun pana' mepad kudeng bui luk segageh,

⁶Idi mepad kudeng aca'! Amung luk ruenneh, na ulekneh; ieh ngamung binaweh, idi na kali' idé luk miak ngalap neneh!

⁷Anunké luk ku rapetku, O Tuhan? Ui merapet Namu.

⁸Muit negku ratnan amung sala'ku, aleg nima' lemulun luk mebacé situnga negku.

⁹Ui miak ungeng, idi na pebala anun-anun, ngaceku ini tau'Mu negku.

¹⁰Aleg ngukum negku baruh teh! Ui lélé naté ku ukumMu!

¹¹Iko ngua' sala' lemulun dengan ukum, idi mepad kudeng kutang, Iko ngusag luk innaneh mawa. Idi matu lemulun mepad kudeng bui luk segageh!

¹²Ninger sembayangku O Tuhan, idi ninger putuhku; aleg Iko ungeng, kareb ui nangi! Mepad kudeng tepunku, ui ini sakaiMu, luk tudo tungé' segageh mo'.

¹³Aleg ngukum negku teh, pad ui miak do', kareb nateh ui maté.

Nani Ubur 40

¹Pelaba ioku nenginulat pedengan Tuhan, Ieh neninger idi nekali' putuhku.

²Ieh nengalap negku rat bang lubang até, ieh ineh su luk pelaba buri! Ieh nenganau' negku luun batu, pad ui do' udeng.

³Ieh nemada' negku aceh nani luk mebaruh, aceh nani ubur kuan Allah tau! Mula' lemulun miak kali' idi mawa ku ini, pad ideh merapet inan Tuhan.

⁴Samal kuan lemulun luk merapet nan Tuhan; luk na lumi inan akang, luk na sembayang inan allah luk mebalih.

⁵Mula' luk inau'Mu kuan kai, O Tuhan Allah kai. Iko nenganau' mula' dalam luk pelaba do' kuan kai. Na luk idi seburur pana' luk mepad Namu! Kudeng ui nutun mada' ratnan amung dalamMu, pelaba ula' luk na mebalaku.

⁶Iko na pian ku baré luk kereten idi luk sabpen, Iko na mutuh aya' luk iseb luun bubpun, idi baré luk kereten luk ngiu' sala'. Iko nenganau' lalidku, pad ui ninger balaMu,

⁷idi ui nengor, "Tungé' ui; bada'Mu kuanku ineh bang surat Ukum.

⁸Ui pelaba geregan ku pianMu, O Allahku! Ui nganug' bada'Mu bang niatku."

⁹Ui nemada' bala luk do' ratnan Iko luk nengulun, O Tuhan, kuan pupuMu bang tebubpun luk rayeh, Iko kali' negku na ugka' mada' ineh.

¹⁰Na ui ngalum bala ratnan ulunMu. Megéi' ui mada' ratnan Iko ngedengan idi Iko lutep maya' jani'. Ui na ungeng ratnan éi' idi awaMu luk lutep, bang tebubpun pupuMu luk rayeh.

¹¹O Tuhan, ui kali' Namu na ugka' méi' negku! Ui miak do' udeng kidi-kidi, ngaceku éi' idi awaMu luk lutep.

¹²Mula' susa' luk na mekiap ngelibut negku! Ui pirada' amung sala'ku, pad ui na tuman nier ineh; ideh meluun ula' ratnan abpukku, pad ui na mekuu'.

¹³Ngulun negku, Tuhan! Miket, ngedengan negku!

¹⁴Nima' lemulun luk sikal ngaté negku uen ngelaya' idi uen ngagap. Nima' lemulun luk mawang niat ngaceku derehku uen ngelubed idi uen ngigu'.

¹⁵Nima' lemulun luk situnga negku, ruen ngesusa' ngaceku igu'deh.

¹⁶Do' amung lemulun luk amé' Namu mawang niat idi geriguen! Do' amung lemulun luk geregan ku ulunMu, megéi' pebala, "Tuhan pelaba rayeh!"

¹⁷Ui melaya' idi medereh, O Tuhan, iamo' Iko ngerawé negku. Iko Lun Nengulun idi Allahku. Miket ngedengan negku!

Nani Ubur 41

¹Samal kuan lemulun luk méi' nelun masi'; Tuhan ngedengan neneh kareb ieh mesusa'

²Tuhan ngelibung neneh idi matar ulunneh. Ieh ngeperuan neneh bang tana' ini; na Ieh nima' neneh bang palad bunu'neh.

³Tuhan ngedengan neneh, kareb ieh mét, pad bururneh metueh.

⁴Kebalaku, "Ui pangeh mesala' pa kiungMu, Tuhan, méi' negku idi ngedo' negku!"

⁵Bunu'ku ngedat negku, keburideh, "Idan ieh maté, pad na luk uen ngerawé?"

⁶Lemulun luk amé' nier negku siaya mo'; ideh nakap bala luk dat ratnan ui, idi mada' kuan amung-amung lemulun.

⁷Lemulun luk megateh negku payek seburur dengan seburur; idi ideh nganu aceh bala luk pelaba dat ratnan ui.

⁸Keburideh, "Pelaba bura' étneh, idi na metuineh."

⁹Lun rorumku luk do', luk inanku merapet, luk pad-pad kuman denganku, pangeh mangun ku bunu'ku.

¹⁰Méi' negku, O Tuhan, idi ngetueh bururku; pad ui miak ngua' kuandeh,

- ¹¹Idi ui kali' Iko mawang niat negku, ngaceku bunu'ku na metueh rat negku.
- ¹²Iko ngedengan negku, ngaceku ui do'. Iko matar negku pa kiungMu macing raked-raked.
- ¹³Do' tau ngubur Tuhan, Allah lun Israil, luk rat mon macing raked-raked!
Amin! Amin!

Nani Ubur 42

- ¹Mepad kudeng payo luk nakap abpa' kareb merikan, kudeng ineh teh ui nakap Namu, O Allah.
- ²Ui meparang u Allah luk mulun; idanké ui miak amé' sembayang pa kiungNeh?
- ³Tebaco kedangan ui nangi', idi abpa' mateh mo' luk kenenku. Idi bunu'ku megéi' ngitun negku, "Iapehké Allahmu?"
- ⁴Ui melaso niat kareb ui ngerawé luk mon; ngaceku ui megéi' pebaya' dengan lun mula' amé' ruma' Allah; idi ui luk megéi' nguyut nedeh, idi kai do' awang niat ngudub idi menani ubur kuan Allah.
- ⁵Ngudeh ui pelaba dat niat lek? Ngudeh ui pelaba susa'? Ui miak merapet inan Allah, idi sekua' teh ui miak ngubur Neneh, Lun Nengulun negku idi Allahku.
- ⁶Pelaba laso niatku, ngaceku ineh ui pian ngerawé Neneh, kareb ui tiban déi' punang Abpa' Yarden, muneng ku Pegkung Hermon idi Pegkung Misa ui pian ngerawé Neneh.
- ⁷Ribaruh abpa' rayeh nawar ribaruh abpa' rayeh luk baken amung rueb Allah meberi. Ideh mepad kudeng ribut susa' ratnan Tuhan luk ngereb niatku.
- ⁸Do' Tuhan ngegala' awaNeh luk lutep anid-anid aco, pad ui menani anid-anid alem, idi sembayang nan Allah luk kuan ulunku.
- ⁹Ui pebala inan Allah luk Batu Libungku, "Ngudeh Iko nekelupan negku? Ngudeh ui nangi' kidi-kidi ngaceku gateh bunu'ku?"

¹⁰Ui pelaba dat niat ku baladeh luk dat. Idi ideh megéi' ngitun negku, "Iapehké' Allahmu?"

¹¹Ngudeh ui pelaba dat niat lek? Ngudeh ui pelaba susa'? Ui miak merapet inan Allah, idi sekua' teh ui miak ngubur Neneh, Lun Nengulun negku idi Allahku.

Nani Ubur 43

¹Mala negku na sala', O Allah, idi mala negku matu pa kiung lemulun luk na manu; muit negku ratnan lemulun luk mebalih, idi lemulun luk dat!

²Iko Lun Matar negku O Allah — Ngudeh Iko nenecan negku? Ngudeh ui nangi' kidi-kidi ngaceku gateh bunu'ku?

³Maré acangMu idi luk matu, nguyut negku idi nguit negku lemubed amé' Sion, pegkungMu luk meligan, idi amé' ruma' su luk inanMu tudo!

⁴Pad ui miak amé' matun bubpunMu, O Allah, Iko ineh lawa awangku. Ui miak nateg gita idi menani ngubur Namu, O Allah, Allahku!

⁵Ngudeh ui pelaba dat niat lek? Ngudeh ui pelaba susa'? Ui miak merapet inan Allah, idi sekua' teh ui miak ngubur Neneh, Lun Nengulun negku idi Allahku.

Nani Ubur 44

¹Dengan lalid kai sebuleng kai neninger bala ineh, O Allah — tepun kai nemada' nekai ratnan ineh, ratnan kekamen luk melalud luk inau'Mu kareb idi, ieh ineh bang kareb luk mon:

²ratnan Iko sebuleng nengusu pupu baken idi nengelelep pupuMu bang bawangdeh; ratnan Iko nengukum pupu baken, iamo' Iko nengeperuan pupuMu.

³Na ideh nengaro bawang ineh ku pelapetdeh, idi na nengalap neneh dengan tuehdeh sebuleng, iamo' dengan lalud idi tuehMu, idi ngaceku ideh kali' pedengan idi awaMu nedeh.

⁴Iko luk raca'ku, O Allah, Iko nemaré tueh kuan pupuMu!

- ⁵Ngaceku laludMu kai nengelaya' bunu' kai.
- ⁶Na ui merapet ku gamanku, idi pelapetku na miak ngulun negku,
- ⁷iamo' Iko nengulun nekai ratnan bunu' kai, idi nengelaya' nelun luk megateh nekai.
- ⁸Kai miak megéi' ngubur Allah, idi maré ubur kuanNeh raked-rukéd.
- ⁹Iamo' nekini, Iko pangeh nenecan nekai idi nemina' nekai uen ngelaya'; Iko na pebaya' dengan baweh kai.
- ¹⁰Iko nenganau' nekai buro ratnan bunu' kai, pad ideh nengalap binaweh kai.
- ¹¹Iko nenima' nekai pitayen mepad kudeng dumba; Iko nengatad nekai arang pupu baken.
- ¹²Iko nemasui pupuMu sebuleng dengan raga luk malé, pad na inan uli' kuanMu.
- ¹³Lun dengan kai nier luk inau'Mu kuan kai; idi ideh meriruh idi situnga nekai;
- ¹⁴Iko nenganau' nekai inan lun situnga arang pupu baken, pad ideh tuka'-tuka' uluh idi meriruh.
- ¹⁵Ui pelaba igu' ngerawé susa'ku.
- ¹⁶Ui melibo ninger buri'luk dat luk ruaten bunu'ku, idi lemulun luk megateh negku.
- ¹⁷Amung ini nangun kuan kai, sagan tu pana' kai na nekelupan Namu, idi na nengelaba jani' luk inau'Mu kuan kai.
- ¹⁸Na kai nelemubed rat Namu, idi na kai nengelaba ukumMu.
- ¹⁹Iamo' Iko nenecan nekai arang pung luk mesangit, idi nenima' nekai bang dacem luk mepingot.
- ²⁰Kudeng kai nugka' sembayang inan Allah kai, idi nesembayang ina allah baken,
- ²¹Iko miak kali' ineh, ngaceku Iko kali' terawé lemulun.

²²Iamo' ngaceku Iko Allah, kai pitayen kidi-kidi; kai mepad kudeng dumba luk kereten.

²³Tumui, Tuhan! Ngudeh Iko rudap? Tumui! Aleg necan nekai ruked-ruked!

²⁴Ngudeh Iko sigapung nekai? Aleg kelupan dereh idi susa' kai!

²⁵Kai neluka' ngaceku linaya', idi telubid luun tana'.

²⁶Tumui idi ngedengan nekai! Ngulun nekai ngaceku awaMu luk lutep!

Nani Ubur 45

¹Niatku nesigio ku bala luk do', kareb ui nganau' nani ini kuan raca'; dila'ku mepad kudeng pén lun luk mileh.

²Iko meluun taga ratnan amung lemulun, iko pelaba ileh pebala; Allah ngeperuan namu ruked-ruked!

³Ngabin pelapetmu, O raca' luk mesangit; iko luk melalud idi luk bureh teh!

⁴Do' iko maya' keréta raca' idi metueh, pad nginita luk matu idi luk mesiri! Iko miak ngelaya' bunu'mu ku tuehmu!

⁵Gamanmu metadem, pad mayung niat amung bunu'mu; idi pupu-pupu tekeradung pa kiungmu.

⁶Kerusi luk biré Allah namu meruked peh! Iko ngimet anak itinmu dengan mesiri;

⁷Iko mawa inan lukmatu, idi megateh inan luk dat. Ini punneh Allahmu pangeh nemili' namu, idi nemaré awang luk mula' namu, meluun rat nelun baken.

⁸Idi luun kuyu'mu inan buen mur idi anit kadingau; idi bang ruma' raca' luk pelaba do' lun luk mileh nateg giula' ngawang niatmu.

⁹Arang decur-decur luk bang ruma'mu inan tuda'-tuda' anak raca', idi pa tinueh kerusimu raca' decur tured, inayung ku amas luk meluun do'.

¹⁰O decur luk awan raca', ninger balaku; aleg ngerawé pupumu idi ruma' tamanmu.

¹¹Idi ratnan tagamu raca' miak pian namu; ieh luk tuanmu, do' iko maya' balaneh.

¹²Lun rat bawang Sur nguit luk barén namu; lun do' sikal ngubuk namu ku barédeh.

¹³Anak raca' luk decur tudo bang ruma' raca'; ieh pelaba do' taga! Kuyu'neh tibaruh ratnan gitian amas.

¹⁴Ieh inayung ku kuyu' ineh, idi inuit amé' matun raca'. Decur-decur luk pun mebaruh maya' neneh, idi amungdeh inuit amé' matun raca'.

¹⁵Dengan awang idi geriguen ideh amé' semuet bang ruma' raca'.

¹⁶Iko miak inan mula' anak deléi luk miak ngelibal tepunmu, idi iko miak nganau' nedeh ngimet amung-amung bawang.

¹⁷Naniku nganau' namu mebala, macing ku anak inul, idi amung-amung lemulun miak ngubur namu macing raked-raked.

Nani Ubur 46

¹Allah ineh libung idi tueh tau, Ieh megéi' temina' ngedengan kareb inan susa'.

²Tau na matot, sagan pana' tana' ini meguyu', idi pegkung-pegkung mebubuh amé' bang abpa' rayeh;

³Idi sagan pana' abpa' rayeh meberi, idi surud-surud meguyu' ku tuehneh.

⁴Inan aceh abpa' luk ngacing awang kuan bawang Allah, kuan ruma' Allah luk Meluun Medita'.

⁵Allah tudo bang bawang ineh luk na miak sagen; kareb masat aco Ieh amé' ngedengan neneh.

⁶Pupu-pupu matot idi imet-imet sigio; Allah ngitang, idi tana' metutu'.

⁷Tuhan luk Melalud idi dengan tau' Allah Yakub ineh libung tau!

⁸Amé' nier luk inau' Tuhan! Nier kekamen luk melalud luk inau'Neh luun tana'!

⁹Ieh ngagka' bunu' apud-apud tana'; idi Ieh mutul amung gaman idi pelapet, idi ngeseb amung-amung utap!

¹⁰KebalaNeh, "Ugka' pebunu' idi kali' Ui ini Allah, luk meluun rayeh arang amung pupu, idi apud-apud tana'!"

¹¹Tuhan luk Melalud idi dengan tau, Allah Yakub ineh libung tau.

Nani Ubur 47

¹Do' amung-amung lemulun mepag palad dengan mawang niat. Ngubur Allah dengan menani rayeh arod!

²Tuhan luk Meluun Dita' luk inan matot; Ieh raca' luk rayeh, idi ngimet apud-apud tana'.

³Ieh nemané netau metueh ratnan pupu-pupu; Ieh nenganau' netau ngimet bawangdeh.

⁴Ieh nemili' aceh tana' kuan tau, luk inimet pupuNeh luk inanNeh mawa, dengan mawang niat.

⁵Allah amé' nan kerusiNeh! Inan uni tang luk mawang niat idi serupit, kareb Tuhan umak.

⁶Nani ngubur Allah; nani ngubur raca' tau!

⁷Allah ineh raca' apud-apud tana'; ngubur Neneh dengan nani!

⁸Allah ngimet amung-amung pupu; Ieh tudo luun kerusiNeh luk meligan.

⁹Raca' amung-amung pupu mepamung dengan pupu Allah Ibrahim, Allah luk kuan utap amung-amung lemulun luk mesangit; Ieh ngimet luk amung-amung!

Nani Ubur 48

¹Tuhan ineh rayeh, idi Ieh miak uen ngubur bang bawang Allah tau, luun pegkungNeh luk meligan.

²Sion ineh pegkung Allah luk medita' idi luk do' ayu; bawang Raca' luk rayeh ineh ngacing awang kuan apud-apud tana'!

- ³Allah pangeh nengegala' inan ulun luk rat Neneh, bang libung bawang ineh.
- ⁴Amung-amung raca' nepamung idi iné' Pegkung Sion.
- ⁵Kareb ideh nenier neneh ideh negagap; idi ideh matot idi nupun buro.
- ⁶Ideh megegker ku totdeh idi mét, mepad kudeng decur luk nenganak.
- ⁷Allah ngusag kapal abpa' rat Tarsis ku bui luk rat pa busat aco.
- ⁸Tau neninger ratnan luk inau' Allah, idi nekini tau pangeh nenier ineh bang bawang Allah tau, Tuhan luk Melalud; Ieh miak nginita bawang ineh ruked-ruked.
- ⁹Bang ruma'Mu, O Allah, kai ngerawé awaMu luk lutep.
- ¹⁰Iko buren lemulun iapeh-iapeh pana'; Iko mebala aput-apat tana'. Iko mutut ukum dengan mesiri;
- ¹¹do' lun Sion mawang niat! Iko maré ukum luk matu; do'amung bawang Yahuda mawang niat!
- ¹²Do' nalan libut-libut Pegkung Sion idi ngiap amung ruma' luk medita',
- ¹³idi nier alad bawang ineh, idi bang su luk inandeh nginita, pad muyuh miak mada' anak-anak muyuh,
- ¹⁴ratnan Allah ineh Allah tau, macing ruked-ruked; idi Ieh miak nguyut netau macing ruked-ruked teh.

Nani Ubur 49

- ¹Ninger bala ini, amung-amung muyuh, idi amung pupu luk aput-apat tana',
- ²do' luk rayeh idi luk isuut teh, lun do' idi lun masi' teh.
- ³Ui miak pebala dengan ileh, niatku mepanu' ku terawé luk petulu.
- ⁴Ui ngerawé ratnan aceh luk pinginud, idi ui miak ngelio ilungneh kareb ui nateg giula'.
- ⁵Ngudeh ui matot kareb inan susa', idi kareb ui linibut bunu' luk dat,

- ⁶idi lemulun luk merapat inan binawehdeh, idi luk medita' niat ratnan do'deh?
- ⁷Seburur lemulun na miak nguli' bururneh sebuleng; idi mayar raga ulunneh kuan Allah,
- ⁸ngaceku raga ulun lemulun pelaba rayeh, idi luk kua ngua'neh na petap,
- ⁹pad ieh mulun raked-raked, idi pad ieh na maté.
- ¹⁰Iamo' ngerawé: lun luk mileh pana' maté, mepad kudeng lemulun luk mebacé, idi necan binawehdeh kuan inuldeh.
- ¹¹Tanemdeh mangun ku ruma'deh raked-raked, idi ideh miak tudo su ineh kidi-kidi, sagan pana' ideh inan babpat tana' atun.
- ¹²Rayeh lemulun na miak muit neneh ratnan até; idi ieh miak maté mepad kudeng pung.
- ¹³Siruh, luk mangun kuan lemulun luk merapat inan bururdeh sebuleng, idi kekiped lemulun luk mawang niat ngaceku do'deh.
- ¹⁴Ideh miak maté mepad kudeng dumba, idi até mangun ku lun matar nedeh. Lemulun luk matu miak metueh rat nedeh kareb pekak, ngaceku butung deh melu bang su luk inan até, mado rat ruma'deh!
- ¹⁵Iamo' Allah miak ngulun negku; idi ngalap negku ratnan lalud até.
- ¹⁶Aleg matot kareb lemulun mangun ku lun do', idi binawehneh iuk amé' mula',
- ¹⁷ngaceku na ieh miak nguit binaweh ineh kareb ieh maté; idi do'neh pana' na miak maya' neneh.
- ¹⁸Sagan pana' lemulun mawang niat ku ulunneh bang tana' ini, idi buren ngaceku ieh lun do',
- ¹⁹ieh mepamung dengan tepunneh bang até, su luk inan dacem raked-raked.
- ²⁰Rayeh lemulun na muit neneh ratnan até; ieh miak maté mepad kudeng pung.

Nani Ubur 50

- ¹Tuhan Allah luk Melalud pebala; Ieh nawar amung lemulun luk bang tana', rat pa busat aco macing pa acep aco.
- ²Allah merasat rat Sion, luk pelaba do' ayu.
- ³Allah tau macing dengan na lulem; idi budung apui luk rayeh pa atunNeh, idi barui luk rayeh libutNeh.
- ⁴Ieh nawar langit idi tana' mangun ku luk nekali' Neneh, idi nier Neneh ngukum pupuNeh.
- ⁵KebalaNeh, "Ngamung kuanKu lemulun luk nelutep maya' Negku, luk maré baré Negku maya' jani'deh."
- ⁶Langit mada' siri Allah, idi Ieh sebuleng Luk Mutut Besara'!
- ⁷"Ninger, amung pupuKu! Ui miak pebala; Ui sikal maré luk nekali' namu, O Israil. Ui ini Allah idi Allahmu.
- ⁸Na Ui ngukum namu, ngaceku barému luk kereten, idi barému luk sabpen luk barénmu kidi-kidi.
- ⁹Na ulekKu ngalap sapi' deléi rat bang lamanmu, idi amék rat arang aya'mu;
- ¹⁰amung pung luk bang pulung Ui kuan, dengan amung sapi' luk luun tuda'-tuda' ngeribu pegkung.
- ¹¹Amung-amung suit Ui kuan idi amung-amung luk mulun luun tana' Ui kuan.
- ¹²"Kudeng Ui melau, na Ui mada' namu, ngaceku tana' idi amung luk bang ineh Ui kuan.
- ¹³Miakké Ui kuman uang sapi' deléi idi ngirup dara' amék?
- ¹⁴Do' maré ubur kuan Allah mangun ku barému, idi maré kuan Luk Melalud amugn baré luk pijani'mu.
- ¹⁵Nawar Negku kareb inan susa'; Ui miak ngulun namu idi iko miak ngubur Negku."

¹⁶Iamo' Allah pebala kuan lemulun luk dat, "Ngudeh iko ngapal ukumKu? Ngudeh iko pegayam ratnan jani'Ku?"

¹⁷Iko ara' badénKu; idi ara' ku ukumKu.

¹⁸Kudeng iko papu' lun mano, iko mangun ku lun rurunneh, idi iko perurum dengan lun luk pasét.

¹⁹"Iko megéi' pian pebala luk dat, idi mebalih teh.

²⁰Iko megéi' ngedat kinanakmu sebuleng, idi ngesala' neneh.

²¹Amung ini pangeh inau'mu, iamo' Ui pirud, idi iko ngerawé Ui mepad kudeng iko. Iamo' nekini Ui sikal ngayud namu, idi ngegala' sala' ini kuanmu.

²²"Ninger bala ini, amung-amung muyuh luk na ngerawé Negku, pad Ui na ngaté nemuyuh, ngaceku seburur pana' nateh luk miak ngulun nemuyuh.

²³Lemulun luk maré ubur mangun ku baréneh, ngerayeh Negku; idi kuan lemulun luk maya' Negku Ui miak ngegala' ulunKu!"

Nani Ubur 51

¹Méi negku, O Allah, ngaceku awaMu luk lutep; ngiu' sala'ku, ngaceku éi'Mu luk rayeh!

²Ngiu' amung kekamenku luk dat, idi ngeligan negku ratnan sala'ku!

³Ui miti kekamenku luk dat; idi megéi' ngerawé sala'ku.

⁴Ui nenganau' sala' pa kiungMu sebuleng mo'; idi nenganau' luk dat kali'Mu. Iko petulu miak ngesala' negku, idi ngukum negku.

⁵Ui dat idi mesala' rat aco ui tinganak.

⁶Niat luk lutep luk pianMu; manu' terawéku ku ilehMu.

⁷Nala' sala'ku, pad ui miak meligan; maru' niatku, pad ui mebuda' kudeng salju.

⁸Nima' negku kali' awang idi geriguen; sagan pana' Iko nengedereh negku, ui miak mawang niat teh.

⁹Aleg nier sala'ku, idi ngiu' amung datku.

- ¹⁰Nganau' kuanku niat luk meligan, O Allah, idi maré terawé luk mebaruh idi lutep.
- ¹¹Aleg nala' negku rat pa kiungMu; idi aleg ngalap Roh MeliganMu rat negku.
- ¹²Maré negku sekua' teh awang luk macing ratnan ulunMu, idi ngetueh negku dengan terawé luk lutep maya' Namu.
- ¹³Idi ui miak mada' ukumMu nelun mesala', pad ideh lemubed maya' Namu.
- ¹⁴Muit negku ratnan até, O Allah, idi ngulun negku, idi ui miak mada' siriMu.
- ¹⁵Ngukab tangku, O Tuhan, pad ui miak ngubur Namu.
- ¹⁶Kudeng Iko pian ku baré, miak ui maré ineh, iamo' Iko na pian ku baré luk kereten idi luk sabpen.
- ¹⁷Baréku, ieh ineh niat luk mebeneh, O Allah; Iko pian ku niat luk mebeneh, idi luk nginuud ratnan sala'.
- ¹⁸Do' méi' kuan Sion, Allah, idi ngedengan neneh; mudut alad bawang Yerusalim baruh teh.
- ¹⁹Idi Iko miak mawang niat ku baré luk matu, idi ku amung baré luk sabpen; idi sapi' deléi miak barén luun bubpunMu.

Nani Ubur 52

- ¹Ngudeh iko medita' niat ku sala'mu O lemulun luk mesangit? Awa Allah ineh lutep.
- ²Iko pegayam sikal ngedat nelun baken, dila'mu mepad kudeng iyu luk metadem, idi megéi' mebalih.
- ³Iko mawa ku luk dat meluun ratnan luk do', idi ku luk mebalih meluun ratnan luk matu.
- ⁴Iko pian ngurat lemulun ku balamu, O lun mebalih!
- ⁵Allah miak ngaté namu raked-raked; Ieh miak ngakem idi ngeruid namu rat bang lepomu, idi nala' namu ratnan tana' luk inanmu mulun.

⁶Lemulun luk matu miak nier ineh idi matot; idi ideh meriruh namu, idi pebala,

⁷"Siruh, lemulun luk na merapet inan Allah luk miak ngulun neneh, iamo' ieh merapet ku do' neh, idi binawehneh luk mula!"

⁸Ui mepad kudeng saitun luk mulun iring ruma' Allah; ui merapet inan awa'Neh luk lutep macing raked-raked.

⁹Ui sikal megéi' maré ubur Namu, O Allah, ngaceku luk inau'Mu; ui miak mada' ratnan Iko do', pa kiung pupuMu.

Nani Ubur 53

¹Lun luk mebacé pebala bang niatneh sebuleng, "Na luk idi Allah." Amung-amungdeh na mesiri, idi ideh nenganau' luk pelaba dat; seburur pana' nateh luk nganau' luk do'.

²Allah nier lemulun rat surga pian kali' kudeng inan lemulun luk mileh, idi kudeng inan luk sembayang Neneh.

³Iamo' amung-amungdeh pangeh neraruh, idi mepad dat; seburur pana' nateh luk do'.

⁴Kebala Allah, "Naké ideh kali'? Mebacéké lemulun luk dat ini? Ideh mulun ku luk pinodeh ratnan pupuKu, idi na ideh mutuh rat Negku."

⁵Iamo' ideh pelaba tot, na luk nekali'deh kudeng ineh atun! Ngaceku Allah matad tulang-tulang bunu' pupuNeh. Ieh miak ngelaya' nedeh tu-tu, ngaceku ideh pangeh tila'Neh.

⁶Ui metueh sembayang pad ulun miak macing kuan lun Israil rat Sion! Kareb Tuhan ngeperuan pupuNeh sekua' teh, Yakub idi lun Israil miak mawang niat.

Nani Ubur 54

¹Ngulun negku dengan laludMu, O Allah, muit negku dengan tuehMu!

²Ninger sembayangku, O Allah, idi ninger balaku!

³Lemulun luk medita' niat idi lemulun luk dat; sikal nakap idi ngaté negku, ieh ineh lemulun luk na ngerawé Allah.

⁴Ui kali' Allah ineh Lun Ngedengan negku, idi Tuhan ineh libungku!

⁵Do' dat bunu'ku ineh mangun ku ukum Allah kuandeh; ngaceku Allah lutep maya' jani' idi miak ngaté nedeh.

⁶Ui maré baré Namu dengan mawang niat; ui maré ubur Namu, O Tuhan, ngaceku Iko luk do'.

⁷Iko pangeh nemuit negku ratnan amung-amung susa'ku, idi ui pangeh kali' bunu'ku pangeh linaya'.

Nani Ubur 55

¹Ninger sembayangku, O Allah; aleg Iko silinged kareb ui sembayang!

²Ngerawé balaku idi ngua' putuhku; ui melaya' ku susa'ku.

³Ui megagau ngaceku bala bunu'ku, idi arod lemulun luk dat. Ideh ngacing susa' kuanku; idi ideh megateh idi museh negku.

⁴Niatku panu' ku susa', idi ui pelaba tot maté.

⁵Ui megegker niat idi pelaba tot, idi ui pelaba laya' teh.

⁶Keburi'ku, "Ui pelaba pian ku ilad, mepad kudeng sukur, pad ui temulud idi ngato erurku,

⁷pelé ui temulud amé' mado, idi tudo déi' su luk ali-ali,

⁸idi ui miket nakap ducung inanku, ngaceku bui idi barui luk rayeh."

⁹Ngaté nedeh, O Tuhan, idi nabeng baladeh! Ui kali' inan bunu' idi ria' bang bawang rayeh.

¹⁰Tebaco kedangan ideh ngelibut bawang idi nganau' mula' kekamen luk dat idi susa' teh.

¹¹Iapeh-iapeh pana' inan mula' lemulun luk dat; iring dalan ideh meria' idi naluk teh.

¹²Kudeng peh ineh bunu' luk situnga negku, miak ui tuman sen; idi kueng peh ineh lemulun luk megéi' museh negku luk sikal pa luun, miak ui sigapung neneh.

¹³Iamo' iko luk lun denganku idi lun rurumku luk pelengit ruma' negku!

¹⁴Kiteh megéi' pegayam seburur dengan seburur, idi pad-pad pebaya' dengan lun mula' amé' Ruma' Allah.

¹⁵Do' até macing denak-denak luun bunu'ku; do' ideh temurun dengan mulun amé' bang su luk inan até! Inan luk dat bang ruma'deh idi bang niatdeh.

¹⁶Iamo' ui nawar mutuh Allah ngedengan negku, idi Tuhan miak ngulun negku.

¹⁷Ui ngarod idi mada' susa'ku pa kiungNeh kareb pekak, muned aco idi medacem teh, idi Ieh miak ninger arodku.

¹⁸Ieh miak ngulun negku, kareb ui pebunu'. Ngaceku bunu'ku mula' tu-tu!

¹⁹Allah, luk ngimet rat pun-pun, miak ninger negku idi ngelaya' nedeh; na ideh miak nganau' anun-anun, ngaceku ideh na matot inan Allah.

²⁰Lun denganku luk atun iné' pebunu' nan lun rurumneh; na ieh maya' jani'neh.

²¹Balaneh pelaba do' én, iamo' inan useh bang niatneh; balaneh mesalud mepad kudeng luk inumau, iamo' ideh narad mepad kudeng pelapet luk metadem.

²²Maré susa'mu kuan Tuhan, idi Ieh miak ngetueh namu, na Ieh nima' lemulun luk matu uen ngelaya'.

²³Iamo' Iko, Allah, miak nala' lun ngaté idi lun mebalih ineh bang lubang até. kareb uned tuehdeh. Iamo' kuanku, ui merapet Namu.

Nani Ubur 56

¹Méi' negku, O Allah, ngaceku lemulun sikal ngaté negku; bunu'ku ngedereh negku kidi-kidi!

- ²Tebaco-tebaco bunu'ku ngedereh negku! idi mula' luk sikal ngaté negku!
- ³Kareb ui matot, O Luk Meluun Medita', ui merapet Namu.
- ⁴Ui merapet inan Allah pad ui na matot; ui ngubur Neneh, ngaceku luk pijani'Neh. Anunké luk miak ruen lemulun negku?
- ⁵Ideh ngesusa' negku tebaco-tebaco; ideh megéi' nakap dalam sikal ngedereh negku!
- ⁶Ideh sigapung ngabang negku, idi nier amung-amung luk ruenku, ideh geregan ngaté negku.
- ⁷Ngukum nedeh, O Allah, ngaceku ideh dat; ngelaya' nedeh ku usehMu!
- ⁸Iko kali' ratnan susa'ku; idi nengiap abpa' matehku. Naké amung ini inayud bang suratMu?
- ⁹Kareb aco ui nawar Namu, bunu'ku miak lemubed. Idi ui kali' Allah ineh denganku —
- ¹⁰ieh ineh Tuhan idi ui ngubur jani'Neh.
- ¹¹Ui merapet Neneh, pad ui na matot. Anunké luk miak ruen lemulun negku?
- ¹²Ui maré luk pijani'ku Namu, O Allah; ui miak maré ubur ku baréku,
- ¹³ngaceku Iko nengulun negku ratnan até, idi nengimet negku, pad ui na linaya'. Idi ui nalan pa kiung Allah, bang acang luk ngacang amung-amung luk mulun.

Nani Ubur 57

- ¹Méi' negku, O Allah, méi' negku, ngaceku Iko ineh libungku. Pa liang lungun iladMu, ui peringucung, pad amung dereh lemaba.
- ²Ui nawar Allah, luk Meluun Medita'; Allah luk maré amung luk pianku.
- ³Ieh miak ngua' rat surga idi ngulun negku; Ieh miak ngelaya' bunu'ku. Allah miak ngegala' awaNeh luk lutep idi siriNeh kuan.
- ⁴Ui ini arang balang, idi arangdeh luk kuman lemulun. Lipendeh mepad kudeng gaman, idi dila'deh mepad kudeng pelapet luk metadem.

- ⁵O Allah, ngegala' rayehMu bang langit, idi uburMu bang aput-apat tana'!
- ⁶Bunu'ku pangeh netumen abpung pad ngakem negku; idi ui pelaba susa'. Ideh nengukat lubang su dalanku, iamo' ideh sebuleng nebpeh bang idi.
- ⁷Ui temina', O Allah, idi netemina' do'-do'! Ui miak menani idi ngubur Namu!
- ⁸Sigio, O niatku! Kulat, giula' idi gitaku! Idi ui miak ngalat mateh aco!
- ⁹Ui miak ngubur Namu arang amung-amung bawang, idi amung-amung pupu, O Tuhan.
- ¹⁰AwaMu luk lutep macing déi' surga, idi siriMu macing déi' langit.
- ¹¹O Allah, ngegala' rayehMu bang langit, idi uburMu bang aput-apat tana'.

Nani Ubur 58

- ¹Miakké muyuh mutut ukum luk matu, O muyuh lun rayeh? Miakké muyuh ngukum lemulun maya' luk mesiri?
- ²Na tu! Muyuh ngerawé luk dat mo' luk miak ruen muyuh, idi muyuh nganau' luk pelaba sala' bang tana' ini.
- ³Lemulun luk dat meraruh ruekd ulundeh; ideh mebalih rat acodeh tinganak.
- ⁴Niatdeh mepanu' ku luk ngaté, mepad kudeng menipeh; ideh ngang laliddeh, mepad kudeng seruang luk mebengel,
- ⁵luk na ninger uni tang lemulun luk ngasa' neneh, idi nani lemulun luk mileh mangun.
- ⁶Mutul lipendeh, O Allah; mubput lipen balang luk mesangit ini, O Tuhan.
- ⁷Do' ideh na idi mepad kudeng abpa' luk mekeket; idi riduen mepad kudeng uduh luk luun dalan.
- ⁸Do' ideh mepad kudeng anak luk musul; kudeng anak luk butung rat bang batek, luk na tupu nier acang.
- ⁹Kareb nateh ideh kali', ideh miak deliken mepad kudeng uduh; Allah miak malid nedeh dengan usehNeh luk pelaba bura', kareb ideh lakat mulun.

¹⁰Lun luk matu miak mawang niat kareb ideh nier lun luk mesala' kumin; ideh miak maru' kukuddeh ku dara' lemulun luk dat.

¹¹Lemulun miak pebala, "Kali' rungen inan tabpar kuan lemulun luk matu; idi kali' rungen inan Allah luk ngukum tana' ini!"

Nani Ubur 59

¹Ngulun negku ratnan bunu'ku, O Allahku; ngelibung negku ratnan lemulun luk sikal ngaté negku!

²Ngulun negku ratnan lemulun luk dat ineh; idi muit negku ratnan lun luk ngaté ineh!

³Siruh, ideh ngabang sikal ngaté negku; lemulun luk megateh mepamung sikal metueh rat negku. Baken ngaceku dat luk inau'ku,

⁴idi baken ngaceku sala'ku sebuleng, O Tuhan, ideh upun sigapung ngabang negku.

⁵Miket amé' ngedengan negku, O Tuhan Allah luk Melalud! Iko sebuleng amé' nier, O Allah lun Israil! Tumui idi ngukum amung pupu luk na manu; idi aleg méi' kuan lemulun luk dat ineh!

⁶Ideh lemubed kareb medacem, idi ideh lawé-lawé bang bawang ini, idi ngenger mepad kudeng uko'.

⁷Ninger lu beléndeh! Dila'deh mepad kudeng pelapet, iamo' ideh ngitun, "Idéké ninger netau?"

⁸Iamo' Iko meriruh nedeh, O Tuhan; Iko situnga inan amung-amung pupu!

⁹O Iko luk tuehku, idi ui pinatarMu; Iko, Allah luk Batu Libungku.

¹⁰Allahku luk mawa negku, miak amé' negku; Ieh miak nima' negku nier bunu'ku uen ngelaya'.

¹¹Ngukum nedeh, O Allah, pad ineh mangun ku bada' kuan pupuku. Matad nedeh ku tuehMu, idi ngelaya' nedeh, O Tuhan luk Batu Libung kai.

¹²Bibirdeh idi baladeh mepanu' ku sala; nima' nedeh kamen bang abpungdeh sebuleng, ieh ineh dita' niatdeh. Ngaceku ideh ngediman idi mebalih,

¹³ngabud nedeh ku usehMu, pad na luk ketecan. Idi amung-amung lemulun miak kali' Allah luk ngimet nelun Israil, idi imetNeh macing aput-apat tana'!

¹⁴Ideh lemubed kareb medacem, idi ideh lawé-lawé bang bawang ini, idi ngenger mepad kudeng uko'.

¹⁵Ideh nalan-nalan nakap luk kenen, idi ideh medureng kudengna petap luk lapendeh.

¹⁶Iamo' ui menani ratnan tuehMu; idi kareb pekak ui miak menani dengan rayeh arod ratnan awaMu luk lutep. Iko ineh libungku idi ducungku kareb ui inan susa'.

¹⁷Ui miak ngubur Namu, O Iko luk tuehku; Allah ineh luk Batu Libungku, Ieh ineh Allah luk mawa negku.

Nani Ubur 60

¹O Allah, Iko pangeh nenala' idi nengelaya' nekai; Iko inuseh nekai — iamo' nekini do' mei' kuan kai.

²Iko nengegio tana' idi nemila' neneh; idi nekini do' nuneb bila'neh, ngaceku ieh lélé mepatad!

³Iko pangeh nemané susa' kuan pupuMu; idi nengabuk nekai ku abpa' anggur luk biréMu nekai.

⁴Iko nemada' lemulun luk matot Namu pad ideh miak mepuit ratnan ukum.

⁵Ngulun nekai ku tuehMu; ngua' sembayang kai, pad pupu luk inanMu mawa miak uen ngulun.

⁶Allah nepebala bang su inanNeh luk meligan, keburu'Neh, "Ui miak amé' idi mabpat bawang Sikem, idi mabpat Raked Sukot tuda'-tuda' babpat.

⁷Giliad idi Manasé Ui kuan; Epraim ineh tupiKu, idi Yahuda rukudKu.

⁸Iamo' Ui miak makai Moab ruen ku abpa' inanKu sibiru', idi Edom su luk inanKu nala' kasut. Pilistin na tu miak ngudub ngaceku ideh na metueh rat Negku.”

⁹Idéké luk miak nguit negku amé' nan bawang luk inan ngabang, O Allah? Idéké luk miak nguit negku amé' Edom?

¹⁰Matuké Iko nenala' nekai? Naké Iko pebaya' pad-pad dengan baweh kai?

¹¹Ngedengan nekai kareb kai pebunu', ngaceku pedengan lemulun na ulekneh!

¹²Kudeng Allah ngedengan netau kali' rungen tau metueh; Ieh miak ngelaya' bunu' tau.

Nani Ubur 61

¹Ninger tawarku; idi ninger sembayangku, O Allah!

²Kareb ui bang susa' mado rat ruma', ui nawar Namu! Nguit negku amé' nan Libung Batu luk do',

³ngaceku Iko Lun Matar negku, idi tuehku luk ngelaya' bunu'ku.

⁴Nima' negku tudo bang lepoMu raked ulunku, idi peringucung pa liang iladMu.

⁵Iko pangeh neninger amung-amung jani'ku, O Allah, idi nemaré negku babpat lemulun luk ngerayeh Namu.

⁶Do' ngekadang ulun raca'; idi nima' neneh mulun mio teh!

⁷Do' ieh ngimet raked-raked pa kiungMu, O Allah; matar neneh dengan awaMu luk lutep, idi siriMu.

⁸Idi ui miak megéi' menani ngubur Namu, kareb ui maré kuanMu luk pijani'ku anid-anid aco.

Nani Ubur 62

¹Ui merapet inan Allah mo' sebuleng; ulunku macing rat Neneh.

²Ieh sebuleng mo' luk Lun Matar idi Lun Nengulun negku. Ieh ineh Batu Libungku, idi ui na miak uen ngelaya'.

³Tuda' ioké amung muyuh miak ngatot seburur lemulun, pad ngelaya' neneh, mepad kudeng alad luk metabpa, idi ar luk nusag?

⁴Muyuh pian ngebeneh neneh ratnan kekammeneh luk bureh; muyuh pian ku balih. Bala muyuh miak ngeperuan, iamo' bang niat muyuh ngediman neneh.

⁵Ui merapet inan Allah mo' sebuleng, idi manu Neneh.

⁶Ieh sebuleng mo' luk matar idi ngulun negku; Ieh Batu Libungku, idi ui na miak uen ngelaya'.

⁷Ulun idi uburku ratnan Allah; Ieh ineh Lun Matar negku luk metueh, Ieh ineh ducungku!

⁸Lun pupuku, do' megéi' merapet inan Allah! Mada' susa' muyuh Neneh, ngaceku Ieh ineh Batu Libung tau.

⁹Lemulun mepad kudeng bui, idi lun rayeh pana' na ulekneh. Kudeng nimang nedeh, na ideh meberat, ideh meluun meran ratnan bui.

¹⁰Aleg muyuh merapet sikal ngaté; idi mano binaweh dulun. Sagan pana' binaweh muyuh luk amé' mula', aleg merapet ku ineh.

¹¹Allah pangeh nepebala sekua' mo'; iamo' ui neninger bala ineh dueh kua', idi lalud ineh Alah kuan,

¹²idi awa luk lutep Tuhan kuan. Iko sebuleng, Tuhan, luk ngua' kuan anid-anid lemulun maya' kekammeneh.

Nani Ubur 63

¹Allah, Iko Allahku, idi ui pelaba terawé Namu. Ui pelaba tu-tu geregan Namu; niatku meparang ngerawé Namu, mepad kudeng tana' luk metugeh idi luk na abpa'.

²Nima' negku nier Namu bang su luk meligan; idi nier tueh idi rayehMu.

³AwaMu luk lutep meluun do' ratnan ulun. Ngaceku ineh ui ngubur Namu.

⁴Ui miak maré ubur Namu raked ulunku. Ui miak ngegenang ticuku sembayang pa kiungMu.

⁵Ui mebor mepad kudeng lemulun luk kuman kareb irau, idi ui miak menani dengan mawang niat idi ngubur Namu.

⁶Kareb ui telubid ui ngerawé Namu; kedangan-kedangan ui ngerawé Namu,

⁷ngaceku Iko megéi' ngedengan negku. Pa liang lungung iladMu ui menani dengan mawang niat.

⁸Ui mepicet maya' Namu; idi ticu'Mu ngimet negku.

⁹Lemulun luk sikal ngaté negku miak temurun amé' bang su luk inan até;

¹⁰ideh miak pitayen bang bunu', idi butungdeh miak kenen bungalé.

¹¹Raca' miak mawang niat ngaceku Allah; amung-amung luk nganau' pejani' bang ngadan Allah miak mawang niat, iamo' tang lun mebalih miak semiep.

Nani Ubur 64

¹Ui inan susa', O Allah — ninger sembayangku! Ui matot — muit negku ratnan bunu'ku!

²Matar negku ratnan gayam lemulun luk dat, idi ratnan baweh lemulun luk dat.

³Ideh ngir dila'deh mepad kudeng pelapet, idi mayung luk megateh mepad kudeng gaman.

⁴Rat su luk inandeh ngabang, ideh mayung lemulun luk do' ku gamandeh, ideh mayung denak-denak, idi na ideh matot.

⁵Ideh perurum bang gayamdeh luk dat, ideh pegayam nakap su inandeh tumen abpungdeh. Keburi'deh, "Na ini melagan sirendeh."

⁶Ideh nganau' terawé luk dat, idi pebala, "Kai mileh nganau' aceh terawé luk ngelaba ukum." Niat idi terawé lemulun pelaba dalem!

⁷Iamo' Allah mayung nedeh ku gamanNeh, idi denak-denak ideh murat.

⁸Ieh miak ngaté nedeh ngaceku baladeh; amung-amung luk nier nedeh miak situnga idi tuka'-tuka' uluhdeh.

⁹Amung-amungdeh miak matot, idi mada' ratnan luk inau' Allah, idi ngerawé ratnan kekamenNeh.

¹⁰Amung-amung lemulun luk matu miak mawang niat ngaceku luk inau' Tuhan; ideh miak nakap libung bang Neneh; amung lemulun luk do' miak ngubur Neneh.

Nani Ubur 65

¹Petulu lemulun miak ngubur Namu, déi' Sion, O Allah! Idi do' ideh maré luk pijani'deh Namu,

²Ngaceku Iko luk ngua' sembayangdeh. Amung-amung lemulun miak amé' Namu,

³ngaceku sala'deh. Sala' kai miak ngelaya' nekai, iamo' Iko miak maré do' nekai.

⁴Samal kuan lemulun luk pilinMu, idi luk itenMu tudo bang su inan luk meligan! Kai miak mebor ku amung luk do' bang ruma'Mu, idi peruan luk bang ruma'Mu luk meligan!

⁵Iko ngua' sembayang kai, O Allah Lun Nengulun nekai, Iko ngulun nekai ku kekamen luk inan mawa. Lemulun apud-apud tana' ini merapet Namu, idi lemulun luk déi' dipar abpa' rayeh pana'.

⁶Iko nenganau' su inan pegkung-pegkung ngaceku tuehMu, idi nengegala' laludMu luk rayeh.

⁷Iko ngagka' beri abpa' rayeh, idi uni ribut, idi ria' lemulun pana'.

⁸Amung tana' ini matot, ngaceku kekamen luk rayeh luk inau'Mu! KekamenMu ngacing awang niat, pad macing iring tana'.

⁹Iko maré udah idi ngegala' éi'Mu kuan tana'; Iko nganau' neneh do' idi mebaleng; idi abpa' luk biréMu na miak mekeket; pad tana' miak ngeruat uli'neh. Ini luk inau'Mu:

¹⁰Iko maré udan luk mula' kuan tuda'-tuda' lati', idi mubpur nedeh; Iko ngelaya' tana' ku udan, idi nganau' tibudeh temubu'.

¹¹Ngaceku do'Mu kai ngalap mula' uli' ratnan lati' kai! Iapeh-iapeh luk suet kai inan petap mo' luk lapen kai.

¹²Amung-amung laman mepanu' ku sapi' idi kerubau luk melamu, idi anid-anid surud panu' ku awang niat.

¹³Idi inan teh laman luk mepanu' ku dumba, idi raked maput ku padé; ideh ngitang idi menani dengan mawang niat!

Nani Ubur 66

¹O amung-amung lemulun do' ngitang idi ngubur Allah dengan mawang niat!

²Menani idi ngerayeh ngadanNeh; idi ngerayeh uburNeh!

³Do' mala kuan Allah, "Pelaba do' kekamen luk ruenMu! LaludMu pelaba rayeh, pad bunu'Mu matot idi tekeradung pa kiungMu.

⁴Amung-amung lemulun luk bang tana' sembayang Namu; ideh menani ubur kuanMu, idi menani ngubur ngadanMu."

⁵Do' amé' idi nier luk inau' Allah; kekamenNeh luk pelaba do' arang lemulun.

⁶Ieh nengisu' abpa' rayeh mangun ku tana' luk tekering, pad tepun tau miak guta. Idi ieneh tau mawang niat ngaceku luk inau'Neh.

⁷Dengan laludNeh Ieh ngimet raked-raked, idi matar amung-amung pupu, pad na luk dat sikal metueh rat Neneh!

⁸Ngubur Allah tau, amung-amung pupu; nima' ubur muyuh Neneh pedingeren lun.

⁹Ieh pangeh nengulun netau, idi na Ieh nima' netau mebpeh.

¹⁰Iko pangeh nenutun nekai, O Allah; idi nenutun nekai mepad kudeng pirak luk tinutun ku apui.

¹¹Iko nenima' nekai mekaneh abpung, idi nengerareng babeh luk meberat luun keted kai.

- ¹²Iko nenima' bunu' kai nengeradu' nekai, idi kai nelemaba apui idi abpa', iamo' nekini Iko pangeh nenguit nekai amé' su luk do'.
- ¹³Ui miak nguit baré luk sabpen kuan ruma'Mu; idi maré luk pijani'ku Namu.
- ¹⁴Ui miak maré Namu mepad kudeng luk bilaku, kareb ui bang susa'!
- ¹⁵Ui miak maré dumba sabpen luun bubpun; idi amék pana' miak sabpen mangun ku aceh buen luk do', Ui maré sapi' deléi idi amék deléi teh.
- ¹⁶Amé' idi ninger, amung-amung luk ngedita' Allah, idi ui miak mada' nemuyuh ratnan luk inau'Neh kuanku.
- ¹⁷Ui nenawar Neneh mutuh pedengan; ui netemina' ngubur Neneh dengan nani.
- ¹⁸Kudeng ui na nengerawé sala'ku, kali' rungen Tuhan na neninger sembayangku.
- ¹⁹Iamo' Allah neninger putuhku idi nengerawé sembayangku.
- ²⁰Ui ngubur Allah, ngaceku na Ieh ara' ninger sembayangku, idi na Ieh ngelubed awa'Neh luk lutep rat negku.

Nani Ubur 67

- ¹Méi' nekai, O Allah, idi ngeperuan nekai; nier nekai dengan éi',
- ²pad maung-amung lemulun bang tana' miak kali' pianMu, idi amung pupu miak kali' ulunMu!
- ³Do' lemulun ngubur Namu, O Allah, idi amung-amung lemulun ngubur Namu!
- ⁴Do' amung-amung pupu geriguen idi menani dengan mawang niat, ngaceku Iko mutut ukum luk matu kuan lemulun, idi nguyut amung-amung pupu.
- ⁵Do' lemulun ngubur Namu, O Allah, idi amung-amung lemulun ngubur Namu!
- ⁶Tana' pangeh nengeruat uli'neh; Allah, Tuhan tau, nengeperuan netau.

⁷Allah nengeperuan netau; do' amung lemulun aput-apat tana' ngedita' Neneh.

Nani Ubur 68

¹Allah tumui idi matad bunu'Neh! Do lemulun luk megateh Neneh upun matot Neneh!

²Mepad kudeng rabpun luk mepalid, kudeng ineh teh Ieh miak masut nedeh; mepad kudeng dian luk remuno ku lau' apui, kudeng ineh teh lemulun luk dat miak maté pa kiung Allah.

³Iamo' lemulun luk matu miak mawang niat idi geriguen pa kiung Allah; ideh miak pelaba awang niat.

⁴Do' menani kuan Allah, idi menani ngubur ngadanNeh, idi nganau' dalam kuanNeh luk maya' keréta lemaba su luk ali-ali. NgadanNeh Tuhan — do' mawang niat pa kiungNeh!

⁵Allah mudeng bang ruma'Neh luk meligan, idi nginita anak maté idi decur tinula'.

⁶Ieh maré ruma' kuan lemulun luk dat ali, idi muih nelun luk tiban pad ideh mawang niat; iamo' lemulun luk metueh niat miak tudo luun tana' luk metugeh.

⁷Kareb Iko nenguyut pupuMu, O Allah, idi kareb Iko nelemaba su luk ali-ali,

⁸tana' neruyuh, idi langit nengeruat udan, ngaceku acing Allah luk nesilangan nedeh déi' Sinai, ieh ineh acing Allah lun Israil.

⁹Iko nemaré udan luk mula', O Allah, idi nenuneh tana'Mu luk metugeh;

¹⁰pupuMu netebawang su ineh; idi ngaceku éi'Mu, Iko nemaré petap kuan lun masi'.

¹¹Tuhan nemaré balaNeh, idi mula' decur nenated bala luk do' ineh:

¹²"Amung raca' idi bawehdeh upun buro!" Idi amung decur luk déi' ruma' nemabpat luk ilapdeh;

- ¹³ideh mepad kudeng sukur luk kikep ku pirak, iladdeh merasat kudeng amas luk do'. (Ngudeh sebuang muyuh ketecan bang libung dumba kareb aco pebunu'?)
- ¹⁴Kareb Allah luk Melalud nengatad amung raca' luun Pegkung Salmon, Ieh nemaré salju nebpeh su ineh.
- ¹⁵Pelaba dita' Pegkung Basan! Tuda' budukmu, O Pegkung Basan!
- ¹⁶Ngudeh iko nier idi situnga nan pegkung luk pian Allah inan mudeng, rat budukmu luk medita'? Tuhan miak mudeng su ineh ruked-ruked!
- ¹⁷Tuhan macing rat Sinai idi amé' su luk meligan, dengan tuda'-tuda' ngeribu kerétaNeh.
- ¹⁸Ieh mudik amé' su luk medita', idi nguit lun luk tibanNeh; Ieh ngalap baré ratnan lemulun luk do', idi ratnan lemulun luk metueh niat pana'. Tuhan Allah miak mudeng su ineh.
- ¹⁹Ngubur Tuhan, luk mabeh babeh tau anid-anid aco; Ieh ineh Allah luk ngulun netau.
- ²⁰Allah tau ineh Allah luk ngulun; Ieh ineh Tuhan, luk Tuhan tau, luk muit netau ratnan até.
- ²¹Allah miak mila' uluh bunu'Neh, idi ideh luk na ugka' maya' dalandeh luk mesala'.
- ²²Tuhan nepebala, "Ui miak nguit nedeh lemubed rat Basan; Ui miak nguit nedeh lemubed rat bang ribaruh abpa' luk rayeh,
- ²³pad iko maru' kukudmu ku dara' bunu'mu, idi uko'mu miak ngirup dara' ineh pad sukoldeh."
- ²⁴Ulek tuehMu, O Allah, sinier amung-amung lemulun, idi ulek Allah, Raca'ku, amé' bang su inanNeh luk meligan.
- ²⁵Lun luk menani pa atun, idi lun luk nateg giula' pa mucu, idi anak-anak decur luk nateg tawak arang uneddeh.

²⁶"Ngubur Allah bang tebubpun pupuNeh, idi ngubur Tuhan amung-amung anak inul lun Israil!"

²⁷Idi Benjamin, aceh pupu luk masi' pa atun, idi lun rayeh Yahuda idi lun dengandeh maya' puetdeh, idi lun rayeh Sebulon idi Naptali pa mucu.

²⁸Ngegala' laludMu, O Allah, lalud luk pikaiMu kuan kai,

²⁹rat ruma'Mu déi' Yerusalim, su luk inan raca' nguit baré kuanMu.

³⁰Do' ngukum bawang Masir, luk mepad kudeng pung luk mesangit arang uduh; idi ngukum pupu-pupu luk mepad kudeng sapi' deléi dengan anakdeh, pad ideh tekeradung idi maré amung pirakdeh Namu. Ngatad lemulun luk sikal nganau' bunu'!

³¹Lun luk duken raca' miak macing rat bawang Masir; idi lun Etiopia miak ngegenang ticu'deh sembayang inan Allah.

³²Do' menani kuan Allah, O amung bawang bang tana' ini, idi menani ngubur Tuhan,

³³luk nalan bang langit luk mon. Ninger Neneh ngitang!

³⁴Mada' lalud Allah, luk rayeh pa luun lun Israil, idi luk melalud bang langit.

³⁵Allah luk inan matot kareb Ieh remuat rat bang su inanNeh luk meligan; Ieh ineh Allah lun Israil. Ieh maré tueh idi lalud kuan pupuNeh. Ngubur Allah!

Nani Ubur 69

¹Nuglun negku, O Allah! Abpa' medalem pad dierku;

²ui mened bang buri luk medalem, ngaceku na tana' luk metueh. Ui bang abpa' luk medalem, idi ui lélé mened ku ribut.

³Ui merur ngaceku nawar mutuh pedengan, pad ui mepero; idi matehku mét, ngaceku nakap pedengan ratnan Allah.

⁴Lemulun luk megateh negku dengan na punneh, meluun ula' ratnan abpukku; idi bunu'ku ngadu' negku dengan mebalih; ideh metueh idi sikal ngaté negku. Ideh ngesaad negku maré binaweh luk na pinoku.

- ⁵O Allah, Iko kali' bacéku, idi sala'ku na melinged rat Namu!
- ⁶Aleg nima' negku ngigu' lemulun luk merapet Namu, O Tuhan Allah luk Melalud! Aleg nima' negku ngigu' lemulun luk sembayang Namu, O Allah lun Israil!
- ⁷Ngaceku ngadanMu, ui pangeh dinat, idi mepanu' ku igu'.
- ⁸Ui mepad kudeng sakai inan kinanakku, ui mepad kudeng pupu baken bang tetek ruma'ku.
- ⁹Geriguen ngaceku ruma'Mu ngegio niatku; lemulun luk ngedat Namu ngedat negku.
- ¹⁰Ui ngebeneh bururku idi mawa' na kuman, iamo' lemulun ngedat negku.
- ¹¹Kareb ui nacung idi ideh situnga negku.
- ¹²Ideh ngedat negku kareb ideh pegayam, idi lun mabuk menani ku ui.
- ¹³Iamo' kuanku, ui miak sembayang mutuh Namu, O Tuhan; ngua' kuanku, O Allah, maya' kareb luk pianMu, ngaceku awaMu luk rayeh, idi ngaceku Iko maya' jani' idi ngulun.
- ¹⁴Ngulun negku pad ui na mened bang buri ini; idi muit negku ratnan bunu'ku, idi rat bang abpa' luk medalem.
- ¹⁵Aleg nima' negku manud; idi mened bang ribaruh, idi semuet bang tanem.
- ¹⁶Ngua' kuanku, O Tuhan, ngaceku do'Mu idi awaMu luk lutep; ratnan éi'Mu luk rayeh, ngerawé negku!
- ¹⁷Aleg sigapung inan demulunMu; ui inan susa' luk rayeh — miket, idi ngua' kuanku!
- ¹⁸Amé' ngulun negku; idi muit negku ratnan bunu'ku.
- ¹⁹Iko kali' kudeng apeh ui kinuyo, idi inigu' idi dinat; Iko kali' amung-amung bunu'ku.
- ²⁰Kuyo pangeh nengeberat niatku; idi ui pelaba laya'. Ui merapet nelun mé' idi ngubuk negku, iamo' na luk idi.

- ²¹Kareb ui melau, ideh nemaré urep kuanku; kareb ui meparing, ideh nemaré abpa' luk malam negku.
- ²²Do' iraukeh mangun ku abpung kuandeh; idi do' awang niatdeh ngebpeh nedeh!
- ²³Muser nedeh, pad ideh na nier; idi nganau' awa'deh mét kidi-kidi!
- ²⁴Ngeruat usehMu kuandeh; nima' gatehMu macing denak-denak nedeh,
- ²⁵pad su luk inandeh nelupo dat ali, ngaceku amung-amungdeh pangeh naté!
- ²⁶Ideh ngedereh lemulun luk inukumMu; idi situnga ratnan dereh lemulun luk inuratMu.
- ²⁷Ngiap sala'deh; aleg nima' nedeh ngalap babpat bang ulunMu.
- ²⁸Idi do' ngadandeh uen ngiu' rat bang surat ulun; do' ideh na semuet dengan ngadan pupuMu.
- ²⁹Iamo' ui melaya' idi mét; ngabin negku, O Allah, idi ngulun negku!
- ³⁰Ui miak ngubur Allah dengan menani; ui miak mada' rayehNeh dengan maré ubur Neneh.
- ³¹Ineh luk miak ngawang niat Tuhan meluun ratnan baré sapi', idi meluun ratnan baré sapi' deléi luk rayeh.
- ³²Kareb lun masi' kali' idi, ideh miak mawang niat; idi ideh luk sembayang inan Allah miak uen ngepicet.
- ³³Tuhan ninger putuh lemulun luk masi', idi na kelupan pupuNeh luk tiban.
- ³⁴Ngubur Allah, O langit idi tana', abpa' rayeh idi amung luk bang nedeh.
- ³⁵Ngaceku Ieh miak ngulun Sion, idi mudut amung bawang Yahuda baruh teh. PupuNeh miak tudo déi' idi ngimet tana' ineh;
- ³⁶inul demulunNeh miak ngalap tana' ineh ku babpatdeh, idi ideh luk mawa Neneh miak tudo déi'.

Nani Ubur 70

- ¹Ngulun negku, O Allah! Miket ngedengan negku, O Tuhan!

²Do' ngagap idi ngelaya' lemulun luk sikal ngaté negku! Idi ngelubed idi ngigu' lemulun luk mawang niat ngaceku derehku!

³Do' lemulun luk situnga negku, ruen ngesusa' ngaceku igu'deh!

⁴Do' amung lemulun luk amé' Namu mawang niat idi geriguen! Idi do' amung lemulun luk geregan ku ulunMu megéi' pebala, "Allah pelaba rayeh!"

⁵Ui melaya' idi medereh, miket amé' negku, O Allah, Iko Lun Ngedengan idi Lun Nengulun negku, aleg mio ngua' putuhku, O Tuhan.

Nani Ubur 71

¹Ui megéi' linibungMu O Tuhan, aleg nima' negku uen ngelaya'!

²Ngedengan negku idi muit negku, ngaceku Iko luk matu! Ninger putuhku, idi ngulun negku!

³Do' mangun ku ducungku luk meraben, idi mangun ku ruma' luk meraben luk ngelibung negku; Iko Batu Libung idi tuehku.

⁴O Alah, muit negku ratnan lemulun luk dat, idi ratnan tueh lemulun luk mesala' idi megateh niat.

⁵Rapetku Namu, O Tuhan, ieh ineh rat kareb ui isuut.

⁶Ui merapet Namu ruked ulunku; Iko nematar negku rat kareb ui tinganak; ui miak megéi' ngubur Namu!

⁷Mula' lemulun mawa ku ulunku; iamo' Iko Batu Libungku luk meraben.

⁸Tebaco-tebaco ui ngubur Namu, idi mada' rayehMu.

⁹Ui mengered nekini. Aleg nala' negku! Idi ui melaya'. Aleg necan negku!

¹⁰Bunu'ku luk sikal ngaté negku, pegayam idi sikal metueh rat negku.

¹¹Keburi'deh, "Allah pangeh nenecan neneh; do' tau ngerada' neneh idi ngakem neneh, seburur pana' nateh luk miak muit neneh!"

¹²O Allah, aleg Iko mado rat negku; miket ngedengan negku, O Allahku!

¹³Do' ngelaya' idi ngaté lemulun luk sikal metueh rat negku! Do' ngigu' lemulun luk sikal ngedereh negku!

- ¹⁴Ui miak megéi' merapet Namu; idi miak ngubur Namu kidi-kidi.
- ¹⁵Ui miak mada' siriMu; idi pebala ratnan ulunMu tebaco-tebaco, sagan pana' ui na kali' dengan meriput.
- ¹⁶Ngaceku laludMu, ui miak amé' ruma'Mu, O Tuhan Allah; ui miak mada' ratnan siriMu sebuleng.
- ¹⁷O Allah, Iko nemada' negku rat kareb ui isuut, idi pad macing nekini ui mada' ratnan kekamenMu luk inan mawa.
- ¹⁸Nekini ui mengered idi abpukku mebuda', aleg Iko necan negku, O Allah! Do' Iko idi denganku kareb ui mada' lalud idi tuehMu kuan amung inul luk miak macing.
- ¹⁹SiriMu, O Allah, macing déi' langit. Iko pangeh nenganau' kekamen luk rayeh; seburur pana' nateh mepad Namu!
- ²⁰Iko pangeh nemaré susa' idi dereh kuanku, iamo' Iko nuneb tuehku, idi muiit negku ratnan tanem.
- ²¹Iko megéi' ngedita' negku, idi ngubuk negku teh.
- ²²Ui miak ngubur Namu dengan nateg giula'ku, idi ngubur Namu luk lutep maya' jani', O Allah. Ui miak menani ngubur Namu dengan nateg giula'ku, O Allah lun Israil luk meligan.
- ²³Ui miak ngitang dengan mawang niat, kareb ui nateg giula' kuanMu, idi ui miak menani dengan amung niatku, ngaceku Iko nengulun negku.
- ²⁴Ui miak pebala ratnan siriMu tebaco-tebaco, ngaceku lemulun luk sikal ngaté negku, pangeh linaya' idi gigap.

Nani Ubur 72

- ¹O Allah, mada' raca', pad ieh mutut ukum dengan siriMu, idi maré siriMu kuanneh,
- ²pad ieh ngimet pupuMu dengan mesiri, idi ngimet lun masi' maya' luk matu.
- ³Do' tana' ineh ngalap peruan, idi bawang kali' luk matu.

- ⁴Do' raca' mutut ukum luk matu kuan lun masi'; do' ieh ngedengan nelun masi', idi ngelaya' lemulun luk ngedereh nedeh!
- ⁵Do' ieh mulun mepad kudeng aco, idi mepad kudeng bulan luk ngacang kidi-kidi.
- ⁶Do' ieh mepad kudeng udan luk mebpeh luun lati', idi udan puré luk mubpur tana'.
- ⁷Do' luk matu mangun ruked ulunneh; idi peruan pad macing bulan metutu'.
- ⁸Do' ieh ngimet aput tana'neh, rat Abpa' Pirat pad macing iring tana'.
- ⁹Amung-amung pupu luk déi' su luk ali-ali miak tekeradung pa kiungneh; idi bunu'neh miak uen ngebeneh.
- ¹⁰Raca'-raca' Spaniol idi pulau-pulau miak maré baré neneh, idi raca'-raca' Arab idi Etiopia miak nguit luk barén kuanneh.
- ¹¹Amung-amung raca' miak tekeradung pa kiungneh, idi amung-amung pupu miak ngakem kuanneh.
- ¹²Ieh muit nelun masi' luk mutuh neneh, idi lemulun luk na inan lun méi'.
- ¹³Ieh méi' nelun luk melaya' idi masi'; idi ngulun nedeh.
- ¹⁴Ieh muit nedeh ratnan lemulun luk ngedereh idi luk dat, idi méi' ku ulundeh.
- ¹⁵Do' ulun raca' ineh mipu! Idi do' ieh pamaran amas rat Arabia, idi do' lemulun sembayang kuanneh kidi-kidi; idi do' ieh megéi' ngalap peruan Allah!
- ¹⁶Do' ideh ngalap mula' padé bang bawang ineh; idi do' anid-anid surud maput ku tibu, mepad kudeng bua' déi' Lebanon. Do' bawang-bawangdeh mepanu' ku lemulun, mepad kudeng uduh luk mulun luun tana'.
- ¹⁷Idi do' ngadan raca' ineh na mekelupan; idi do' ieh mebala ruked-ruked mepad kudeng aco. Do' amung-amung bawang ngubur raca' ini, idi do' amung-amung lemulun mutuh Allah ngeperuan nedeh, mepad kudeng Ieh nengeperuan raca' ineh.

¹⁸Ngubur Tuhan Allah lun Israil, Ieh sebuleng nganau' kekamen ini luk inan mawa!

¹⁹Ngubur ngadanNeh luk rayeh raked-raked. Do' rayehNeh manu' amung-amung tana'! Amin! Amin!

²⁰Ini kekiped sembayang Dadu, anak Isai.

Nani Ubur 73

¹Pelaba do' Allah kuan lun Israil, ieh ineh kuan lemulun luk meligan niat!

²Iamo' ui lélé mebpeh; idi kukudku lélé mekesiad,

³ngaceku ui melili ku ulun lemulun luk medita' niat, idi melili nier do' lun luk dat.

⁴Na ideh megéi' mét; ideh metueh idi do' ulun.

⁵Na ideh medereh kudeng lun baken; na ideh inan susa' kudeng lun baken.

⁶Ideh makai dita' niatdeh mepad kudeng bané, idi gatehdeh mepad kudeng kuyu'.

⁷Niatdeh ngeruat luk dat, idi terawédeh pana' mepanu' ku luk dat.

⁸Ideh situngan nan lun baken idi pegayam ratnan kekamen luk dat; ideh medita' niat idi pegayam ratnan ngedereh nelun baken.

⁹Ideh ngedat Allah luk déi' surga, idi sikal pa luun lemulun bang tana' ini,

¹⁰pad pupu Allah pana' manu nedeh, idi maya' amung baladeh.

¹¹Keburi'deh, "Allah na miak kali', idi Luk Meluun Medita' nateh kali'!"

¹²Kudeng ini terawé lemulun lukd dat! Ideh inan mula' binaweh, idi megéi' ngalap dengan mela!

¹³Na ulekneh ui nengeligan niat idi tiku'ku lek.

¹⁴Allah, Iko nenganau' negku medereh tebaco-tebaco, idi nengukum negku anid pekak!

¹⁵Kudeng ui nepebala kudeng ini, kali' rungen ui mesala' pa kiung pupuMu.

- ¹⁶Idi ui nenutun nakap ilung amung ini, sagan tu pana' mikat kuanku,
¹⁷pad macing ui iné' bang ruma'Mu idi kali' luk miak mangun kuan lemulun
luk dat.
- ¹⁸Iko nganau' nedeh su luk mesalud, pad ideh mabud mebpeh!
¹⁹Idi ideh petacu maté; idi atédéh pelaba dat!
- ²⁰O Tuhan, ideh mepad kudeng nupi; kareb kulat amung ineh mekelupan.
²¹Kareb ui mét niat idi terawéku dat,
²²ui mebacé idi na kali ilungneh; ui mepad kudeng pung pa kiungMu.
²³Iamo' ui megéi' denganMu, idi Iko ngimet ticu'ku.
²⁴Iko nguyut negku dengan bada'Mu, idi mucu Iko miak ngalap negku idi
ngedita' negku.
²⁵Iko sebuleng luk kuanku déi' surga, idi luk pianku bang tana'.
²⁶Niat idi terawéku mepanu' ku gregan; Allah ineh tuehku. Ieh mo' luk
pianku raked-raked!
²⁷Ngaceku lemulun luk necan Namu miak maté, idi Iko ngaté lemulun luk na
lutep maya' Namu.
²⁸Iamo' kuanku, pelaba do' muneng inan Allah! Idi Tuhan Allah mangun ku
Libungku, pad ui mada' amung-amung luk inau' Neh.

Nani Ubur 74

- ¹O Allah, ngudeh Iko nenecan nekai kudeng ini? Miakké Iko museh nan
pupuMu raked-raked?
²Ngerawé pupuMu, luk pinili'Mu mangun ku babpatMu mon, luk inuli'Mu
mangun ku pupuMu; ngerawé Pegkung Sion, su luk inanMu netudo!
³Do' amé' nier bawang luk inusag; ngaceku bunu' kai pangeh nengusag
amung-amung luk bang Ruma' Allah!
⁴Bunu'Mu ngudub bang Ruma'Mu; ideh pangeh nengalap Ruma'Mu ineh.

- ⁵Ideh mepad kudeng lemulun luk nebpeng kayuh ku uaideh.
- ⁶Ideh nengusag amung-amung alad bangar ku uaideh idi tuno teh.
- ⁷Ideh nenutung Ruma'Mu; idi nengelutak su luk inan sembayang Namu; ideh nengusag amung-amung ineh.
- ⁸Keburi'deh, "Do' tau ngabud nedeh." Idi ideh nenutung amung-amung ruma' sembayang bang bawang ini.
- ⁹Amung-amung lawé kai amé' sembayang nepagka'; idi nabi-nabi pana' nateh luk ketecan, idi seburur pana' nateh kali' tuda' io susa' ini.
- ¹⁰O Allah, tuda' ioké bunu' kai situnga nekai? Miakké ideh ngedat ngadanMu raked-raked.
- ¹¹Ngudeh Iko ara' ngedengan nekai? Ngudeh Iko gapel ruuk?
- ¹²Iamo' Allah, Iko luk raca' kai rat pun-pun, Iko luk metueh bang tana' ini.
- ¹³Dengan tuehMu Iko nemabpat abpa' rayeh idi nemila' uluh buayeh;
- ¹⁴Iko nemila' uluh galau luk rayeh ineh, idi nemaré butungneh kenen lemulun luk déi' su luk ali-ali;
- ¹⁵Iko nenganau' abpa uput rat bang buedneh, idi nengeket abpa' luk rayeh.
- ¹⁶Iko nenganau' acang idi dacem, idi Iko nenganau' aco idi bulan.
- ¹⁷Iko nengelakan tana' ini; idi nenganau' rikan idi udan.
- ¹⁸Iamo' ngerawé, Tuhan, amung bunu'Mu situnga Namu, idi lun luk mebacé ineh ngedat Namu.
- ¹⁹Aleg maré pupuMu luk melaya' kuan bunu'deh luk mesangit, idi aleg kelupan pupuMu luk pidereh!
- ²⁰Ngerawé jani'Mu nekai. Ngaceku inan lemulun luk dat aput-aput tana'!
- ²¹Aleg nima' lemulun luk pidereh uen ngelaya', iamo' nima' lemulun luk masi' idi luk pidereh ngubur Namu.
- ²²Tumui O Allah, idi matar kekamenMu! Ngerawé kudeng apeh lemulun luk na manu situnga Namu tebaco-tebaco!

²³Aleg kelupan bunu'Mu luk ngitang dengan megateh niat, idi ria' lemulun luk sikal metueh rat Namu.

Nani Ubur 75

¹Kai ngubur Namu, O Allah, kai ngubur Namu! Kai mada' rayehMu, idi mada' kekamen luk inan mawa luk pangeh inau'Mu!

²Kebala Allah, "Ui pangeh nengeletep kareb luk inan mutut ukum, idi Ui miak ngukum dengan mesiri.

³Sagan pana' tana' idi amung luk mulun luunneh metutu', Ui miak ngeraben dirineh.

⁴Ui pebala kuan lemulun luk dat, 'Aleg medita' niat peh;'

⁵Ui ngecuk nedeh ugka' ngedita' bururdeh."

⁶Na luk idi lalud rat pa busat aco idi rat pa acep aco, idi rat pa kabing busat aco idi rat pa tinueh busat aco pana'.

⁷Ieh ineh Allah mo' luk mutut ukum. Ieh ngebeneh sebuang idi ngikit sebuang.

⁸Bang palad Tuhan inan sangkir luk panu' ku abpa' anggur luk megalih. Ieh nguad ineh rupen amung lemulun luk dat, pad macing mabud.

⁹Iamo' ui na ugka' pebala ratnan Allah Yakub, idi na ugka' menani ubur kuanNeh.

¹⁰Ieh miak ngusag lalud lemulun luk dat, iamo' lalud lemulun luk matu iuk amé' mula'.

Nani Ubur 76

¹Allah mebala déi' bawang Yahuda, idi bawang Israil teh.

²Ieh inan ruma' déi' Yerusalim, idi Ieh tudo luun Pegkung Sion.

³Su ineh Ieh nemutul gaman bunu'Neh dengan utap idi pelapetdeh, idi amung luk ku pakaideh.

⁴Iko pelaba rayeh idi medita', kareb Iko lemubed rat pegkung su luk inanMu nengelaya' bunu'Mu!

⁵Binaweh lun pebunu'deh luk mesangit pangeh inaro, idi nekini ideh pangeh naté, idi seburur pana' nateh luk ketecan.

⁶Kareb Iko nengarod nedeh, O Allah Yakub, kuda idi lemulun pana' neluka' idi naté.

⁷Iamo' Iko luk inan matot! Idé luk miak tuped pa kiungMu, kareb Iko museh?

⁸Iko nengegala' ukumMu rat surga, idi tana' ini matot idi pirud,

⁹kareb Iko netumui mada' ukum, pad ngulun amung lemulun luk pidereh bang tana' ini.

¹⁰Useh lemulun pana' mangun ku ubur kuanMu; Iko ngalap kuanMu luk ketecan ratnan bunu' kai.

¹¹Maré kuan Tuhan Allah muyuh luk pijani' muyuh Neneh, idi do' amung pupu luk muneng Neneh nguit luk barén kuanNeh.

¹²Ieh ngebeneh pengulu luk medita' niat, idi ngatot amung raca' luk rayeh.

Nani Ubur 77

¹Ui nawar Allah dengan rayeh arod idi nawar tu-tu, idi Ieh ninger negku.

²Bang kareb susa' ui sembayang inan Tuhan; kedangan-kedangan ui ngiding tiku'ku kareb ui sembayang, iamo' ui na miak buken.

³Kareb ui ngerawé Allah, idi ui ngarod; ui ngerawé tu-tu, idi ui pelaba susa' niat.

⁴Na Ieh nima' negku rudap; ui megagau niat, pad ui na miak peburi'.

⁵Ui ngerawé aco luk pangeh pelaba, idi lak luk mon teh.

⁶Kedangan-kedangan ui mesusa' niat, ui ngerawé idi ngitun bururku sebuleng.

⁷"Miakké Tuhan megéi' necan negku, idi na mé' kuanku teh?

⁸Nugka'ké Ieh mawa negku? Nepelabaké jani'Neh peh?

- ⁹Nekelupanké Allah méi' peh? Pangehké useh nengelibal éi'Neh?"
- ¹⁰Idi ui nepebala, "Luk ngesusa' negku meluun ratnan ini — ngaceku Allah na melalud peh."
- ¹¹Ui ngerawé kekamenMu luk rayeh, O Tuhan, ui ngerawé kekamen luk inan mawa, luk inau'Mu mon.
- ¹²Ui ngerawé ratnan amung-amung luk pangeh inau'Mu, ui ngerawé amung-amung kekamenMu.
- ¹³Amung-amung luk ruenMu, meligan mo', O Allah! Na allah luk rayeh mepad kudeng Iko!
- ¹⁴Iko Allah luk nganau' tanu' luk inan mawa' idi Iko nengegala' laludMu arang amung-amung pupu.
- ¹⁵Dengan laludMu Iko nengulun pupuMu, ieh ineh inul Yakub idi Yusup.
- ¹⁶Kareb amung abpa' nenier Namu, O Allah, ideh matot, idi ribaruh pana' megegker teh.
- ¹⁷Idi laput nengeruat udah; idi lalam muni, idi inan teh kilep luk pelaba.
- ¹⁸Lalam muni, idi kilep nengacang aput tana'; idi tana' nesigio idi neruyuh.
- ¹⁹Iko nenalan idi neguta abpa' rayeh idi ribaruh pana', iamo' lengayanMu na melagan.
- ²⁰Iko nenguyut pupuMu mepad kudeng lun luk matar dumba; Musa idi Arun luk ngimet nedeh.

Nani Ubur 78

- ¹O kinanak-kinanakku, ninger bada'ku, idi ngerawé luk belénku.
- ²Ui pian pebala nemuyuh, idi mada' ratnan luk inalum rat mon,
- ³ratnan luk pindenger idi luk nekali' kai; ieh ineh luk bida' tepun kai kuan kai.

- ⁴Kai na sikal ngalum ineh kuan anak-anak kai, iamo' kai miak mada' kuan anak inul kai kekamen luk nan mawa luk pangeh inau' Tuhan, dengan lalud idi kekamenNeh luk rayeh.
- ⁵Ieh nemaré ukum kuan lun Israil, idi bada' kuan inul Yakub. Ieh nengecuk tepun tau mada' ukumNeh kuan anak-anakdeh,
- ⁶pelé anak inuldeh sibada' ku ineh, idi mucu ideh miak mada' anakdeh.
- ⁷Ratnan luk kudeng ineh ideh miak merapet inan Allah, idi na kelupan luk pangeh inau'Neh, iamo' megéi' maya' ukumNeh.
- ⁸Pad ideh na kudeng tepunde, idi kudeng lemulun luk ngilang idi luk na maya', idi rapetdeh inan Allah na meraben, idi na lutep maya' Neneh.
- ⁹Lun Epraim luk makai gaman kareb pebunu', nebuo kareb acodeh pebunu'.
- ¹⁰Na ideh nemaya' jani'deh inan Allah; idi ideh ara' maya' ukumNeh.
- ¹¹Ideh nekelupan luk pangeh inau'Neh, ieh ineh tanu' luk inan mawa luk ginala'Neh kuandeh.
- ¹²kareb tepunde nenier, idi Ieh nenganau' aceh tanu' luk nan mawa bang bawang Soan, déi' tana' Masir.
- ¹³Ieh nemabpat abpa' rayeh idi nenaped neneh mepad kudeng alad; idi Ieh nenguyut nedeh guta.
- ¹⁴Kareb macang Ieh nenguyut nedeh ku laput, idi kareb medacem Ieh nenguyut nedeh ku acang apui.
- ¹⁵Ieh nemila' batu déi' su luk ali-ali, idi nemaré abpa' nedeh rat bang batu ineh.
- ¹⁶Ieh nenganau' abpa' remuat rat bang batu ineh, mepad kudeng abpa' arur.
- ¹⁷Iamo' ideh mesala' pa kiung Allah teh, idi nengedat Luk Meluun Medita' déi' su luk ali-ali.
- ¹⁸Ideh nenutun Allah, idi mesaad mutuh akan luk piandeh.

- ¹⁹Idi ideh nengedat Allah, kebaladeh, "Miak ké Allah maré akan déi' su luk ali-ali?"
- ²⁰Matu Ieh nenecat batu, pad mula' abpa' neremuat, iamo' miakké Ieh maré ruti nekai teh, idi maré uang pung kuan pupuNeh?"
- ²¹Idi Tuhan museh kareb Ieh neninger baladeh; idi Ieh nengukum inul Yakub ku apui, idi Ieh pelaba gateh nan inul Israil,
- ²²ngaceku ideh na merapet Neneh, idi na manu ku Ieh miak ngulun nedeh.
- ²³Iamo' Ieh nepebala kuan langit, idi nengecuk tanga'neh mukab;
- ²⁴idi Ieh nemaré akan rat surga, idi nemaré ruti manna kenendeh.
- ²⁵Idi ideh nekuman luk kenen melaikat, ngaceku Allah nemaré luk kenendeh pad macing mebor.
- ²⁶Idi Ieh nenganau' bui rat pa busat aco, idi dengan laludNeh, Ieh nenguit bui rat pa kabing busat aco,
- ²⁷idi Ieh nemaré suit kuandeh, mepad kinula' bada luk tangeb abpa;
- ²⁸ideh nebpeh uned su luk inandeh nelupo, libut-libut lepodeh.
- ²⁹Idi pupu ineh nekuman pad macing mebor; ngaceku Allah nemaré amung luk piandeh.
- ³⁰Iamo' laba' ideh kuman, kareb nateh ideh mebor,
- ³¹Allah megateh nedeh, idi nengaté amung deléi luk metueh, ieh ineh anak adi' deléi lun Israil luk metaga.
- ³²Sagan tu pana' inan tanu' luk nan mawa, na ideh ugka' nganau' sala' idi na manu;
- ³³ngaceku ineh Ieh nengagka' ulundeh, mepad kudeng ngilep lapung, ku susa' luk nacing denak-denak.
- ³⁴Iamo' kareb Ieh pian ngaté sebuangdeh, idi ideh luk ketecan lumi Neneh; idi ideh miak uren idi sembayang Neneh.

- ³⁵Ideh nengerawé Allah ineh Batu Libungdeh, idi Luk Meluun Medita' ineh Lun Nengulun nedeh.
- ³⁶Iamo' amung baladeh mebalih; idi uburdeh mo'-mo'.
- ³⁷Na ideh lutep maya' Neneh, idi na lutep maya' jani'deh Neneh.
- ³⁸Iamo' Allah méi' kuan pupuNeh. Ieh nemaré do' ku sala'deh, idi na nengaté nedeh. Megéi' Ieh ugka' ratnan usehNeh, idi ratnan gatehNeh.
- ³⁹Ieh ngerawé nedeh lemulun mo', idi mepad kudeng bui luk lemaba idi na lemubed teh.
- ⁴⁰Tuda' kua' ideh sikal metueh rat Neneh déi' su luk ali-ali; idi tuda' kua' ideh nenganau' Neneh mesusa' niat.
- ⁴¹Megéi' ideh nenutun Allah, idi nenganau' Allah lun Israil Luk Meligan museh.
- ⁴²Ideh nekelupan laludNeh luk rayeh, idi na nengerawé kareb Ieh nemuit nedeh ratnan bunu'deh,
- ⁴³idi nenganau' kekamenNeh luk melalud idi tanu' luk inan mawa bang bawang Soan, déi' tana' Masir.
- ⁴⁴Ieh nengisu' abpa' mangun ku dara', pad lun Masir na miak ngirup abpa'.
- ⁴⁵Ieh nemaré laled nengedereh nedeh, idi atit luk nengesusa' nedeh.
- ⁴⁶Ieh nemaré uled kuman tibudeh, idi kato luk kuman padédeh.
- ⁴⁷Ieh nengaté amung lawa anggurdeh ku udan batu, idi lawa gita'deh ku teneb.
- ⁴⁸Ieh nengaté amung sapi'deh ku udan batu, idi aya'deh luk baken ku kilep.
- ⁴⁹Ieh nengedereh nedeh ku useh idi gatehNeh luk mebura'; idi nengecuk melaikat luk ngaté, pad ideh pelaba susa'.
- ⁵⁰Na Ieh nugka' ratnan usehNeh; na Ieh nengulun nedeh, iamo' Ieh nengaté nedeh ku kaca.
- ⁵¹Ieh nengaté amung-amung anak deléi' lun Masir luk atun.

- 52Pangeh ineh Ieh nenguyut pupuNeh remuat, mepad kudeng lun luk matar dumba, Ieh nenguyut nedeh lemaba déi' su luk ali-ali.
- 53Ieh nenguyut nedeh dengan do', idi ideh na matot; iamo' abpa' rayeh nengened bunu'deh.
- 54Ieh nenguit nedeh iné' bawangNeh luk meligan, idi iné' nan pegkung luk inaroNeh sebuleng.
- 55Ieh nengusu lun luk bang bawang ineh, kareb pupuNeh nacing; Ieh nemabpat tana' ineh kuan amung pupu lun Israil, idi nenima' nedeh tebawang déi'.
- 56Iamo' ideh sikal metueh ratnan Allah luk Melalud, idi nenutun Neneh; idi ideh na nemaya' ukumNeh,
- 57iamo' ideh sikal metueh idi na lutep mepad kudeng tepundeh, idi na inan merapet, mepad kudeng gaman luk dat.
- 58Ideh nenganau' Neneh museh ngaceku ideh nemaya' sembayang lun luk na manu, idi nenganau' Neneh temaruh ngaceku akangdeh.
- 59Allah museh kareb Ieh nenier ineh, idi Ieh nenala' amung-amung pupuNeh.
- 60Ieh nenecan lepoNeh luk déi' silo, su luk inanNeh netudo arang lemulun;
- 61Ieh nenima' bunu'deh nengalap Pati' Pejani', su luk inan lalud idi uburNeh ginala'.
- 62Ieh museh inan pupuNeh sebuleng, idi nenima' nedeh pinaté bunu'deh.
- 63Amung anak adi' decur na awan, ngaceku amung anak adi' deléi pangeh pinaté bang bunu'.
- 64Amung imam pinaté ku pelapet, idi awandeh na miak temido nedeh.
- 65Kekipedneh Tuhan nekulat, mepad kudeng lemulun luk rudap; mepad kudeng selemulun luk metueh luk nabuk ku abpa' anggur.
- 66Ieh nengelubed bunu'Neh, idi nengelaya' nedeh pad ideh migu' raked-raked.
- 67Ieh nenala' inul Yusup, idi na Ieh nemili' pupu Epraim,

⁶⁸iamo' Ieh nemili' pupu Yahuda, idi Pegkung Sion luk inanNeh mawa.

⁶⁹Su ineh Ieh nemudut ruma'Neh, mepad kudeng ruma'Neh déi' surga; Ieh nenganau' neneh tuman mepad kudeng tana' ini, idi meraben macing raked-ruked.

⁷⁰Ieh nemili' Daud luk demulunNeh; Ieh nengalap neneh rat bang laman.

⁷¹su luk inanneh ngasa' anak dumba, Ieh nenganau' neneh mangun ku Raca' lun Israil, ku lun luk matar pupu Allah.

⁷²Daud nematar nedeh do'-do', idi nenguyut nedeh dengan ileh.

Nani Ubur 79

¹O Allah, lun luk na manu pangeh nesemuet bang bawang pupuMu! Ideh nengelutak ruma'Mu luk meligan, idi nengusag bawang Yerusalem.

²Ideh nenecan butung pupuMu kenen suit, idi butung demulunMu kenen pung luk mesangit.

³Ideh nengeruat dara' pupuMu mepad kudeng abpa'; dara'deh manud mepad kudeng abpa' apud bawang Yerusalem, idi seburur pana' nateh luk ketecan luk miak nanem butung ineh.

⁴Pupu luk baken luk libut kai situnga nekai; ideh meriruh idi situnga nekai.

⁵Tuda' io Iko museh nekai, O Tuhan? Macing raked-rukedké? Miakké usehMu mulun mepad kudeng apui?

⁶Do' Iko museh inan pupu luk na sembayang Namu, idi pupu luk na ngerawé Namu!

⁷Ideh nengaté pupu kai, idi nengusag bawang kai.

⁸Aleg ngukum nekai ngaceku sala' tepun kai, iamo' méi' nekai nekini, ngaceku kai pelaba laya'.

⁹Ngedengan nekai, O Allah idi ngulun nekai, ngaceku ubur ngadanMu; muih nekai idi ngiu' sala' kai, pad lemulun miak ngubur Namu.

¹⁰Ngudehké lun luk na manu ngitun nekai, "Iapeh Allah muyuh?" Nima' nekai nier Namu ngukum pupu-pupu, ngaceku ideh nengeruat dara' demulun Mu!

¹¹Ninger arod lemulun luk tiban, idi muit lemulun luk nengalap ukum maté ku laludMu luk rayeh.

¹²O Tuhan, ngua' kuan pupu luk na manu tudu' kua' kinula'neh, ngaceku amung kuyodeh Namu.

¹³Idi kai luk pupuMu idi dumbaMu, miak ngubur Namu ruekd-ruked, idi mada' uburMu kuan anid-anid inul.

Nani Ubur 80

¹Ninger nekai, O Lun Luk Matar pupu Israil, Iko nguyut pupuMu mepad kudeng dumba, Iko tudo luun kerusiMu arang melaikat karub,

²ngegala' awaMu kuan pupu Ephraim, Benjamin idi Manasé! Mada' tuehMu nekai; amé' idi ngulun nekai!

³Nguit nekai lemubed, O Allah! Mada' awaMu nekai, pad kai miak mulun!

⁴Tuda' ioké, Iko miak museh ngaceku sembayang pupuMu. O Tuhan Allah luk Melalud?

⁵Iko pangeh nemaré susa' kinan kai; idi nemaré abpa' mateh inirup kai.

⁶Iko nenima' amung pupu luk libut kai singaro sikal ngalap tana' kai, idi nenima' bunu' kai situnga nekai.

⁷Nguit nekai lemubed, O Allah luk Melalud! Mada' awaMu nekai, pad kai miak mulun!

⁸Iko nenguit aceh lawa anggur rat bawang Masir; Iko nengusu pupu baken idi nenibu lawa anggur ineh luun tana'deh.

⁹Iko nengaka su luk inan nenibu neneh, idi uatneh do', idi angkatneh maput bawang ineh.

¹⁰Idi ieh nengelungung amung pegkung, idi angkatneh mepad kudeng angkat tumuh luk rayeh.

- ¹¹Idi angkatneh macing Abpa' Rayeh, idi macing Abpa' Pirat teh.
- ¹²Ngudeh Iko nengusag ar luk libut lawa ineh? Idi nekini idé-idé luk lemaba ineh miak mano bua'neh.
- ¹³Baka miak ngeradu' neneh, idi pung luk meliputi miak kuman neneh.
- ¹⁴Lumi nekai, O Allah luk Melalud! Nier nekai rat déi' surga; amé' idi ngulun lawa anggurMu ineh!
- ¹⁵Amé' ngulun lawa anggur ini luk tinibuMu, ieh ineh lawa anggur luk isuut luk inau'Mu metueh!
- ¹⁶Bunu' kai pangeh nenebpeng neneh idi nengeseb neneh; do' Iko museh nedeh idi ngaté nedeh!
- ¹⁷Ngelibung idi matar pupu luk pinili'Mu, idi bawang luk inau'Mu metueh!
- ¹⁸Kai na miak lemubed rat Namu peh; ngulun nekai, pad kai ngubur Namu.
- ¹⁹Nguit nekai lemubed, O Tuhan Allah luk Melalud! Mada' awaMu nekai, pad kai miak mulun.

Nani Ubur 81

- ¹Ngitang dengan mawang niat kuan Allah luk Batu Libung tau; idi menani ngubur Allah Yakub!
- ²Ngalap suling idi karing, idi nateg giula' teh.
- ³Ngiup suling kareb irau pangeh ranih, idi kareb bulan baruh, idi kareb bulan batung teh.
- ⁴Ngaceku ini ukum bang bawang lun Israil, idi ecek ratnan Allah Yakub.
- ⁵Ieh nemaré ukum ineh kuan lun Israil, kareb Ieh nengerieng bawang Masir. Ui ninger aceh arod luk na inanku pekalai, kebalaNeh,
- ⁶Ui pangeh nengalap babeh muyuh luk meberat rat luun keted muyuh, idi nenima' nemuyuh ugka' ratnan kekamen muyuh luk meberat.

⁷Kareb muyuh inan susa', muyuh nenawar Negku, idi Ui nengulun nemuyuh, idi nengua' tawar muyuh rat bang ribut su luk inanKu sigapung; idi Ui nenutun nemuyuh déi' bued abpa' Meriba.

⁸O pupuKu, ninger bada'Ku; O lun Israil, Ui pelaba pian nemuyuh ninger bada'Ku!

⁹Aleg muyuh sembayang nan allah baken.

¹⁰Ui ini Tuhan Allah muyuh, luk nenguit nemuyuh remuat rat bawang Masir. Tanganga' tang muyuh, idi Ui maman nemuyuh.

¹¹"Iamo' pupuKu na sikal ninger balaKu; idi lun Israil ara' maya' ukumKu.

¹²Ngaceku ineh Ui nenima' nedeh maya' tueh niatdeh, idi nganau' anun-anun luk piandeh.

¹³Ui pelaba pian pupuKu ninger balaKu; idi pian nedeh maya' ukumKu,

¹⁴pad Ui mesaget ngelaya' bunu'deh, idi ngukum amung-amung bunu'deh.

¹⁵Lemulun luk megateh Negku miak tekeradung pa kiungKu ku totdeh; idi ukumdeh macing raked-raked.

¹⁶Ui miak maman nemuyuh ku padé luk do', idi nukol nemuyuh ku duru' tebikan."

Nani Ubur 82

¹Allah luk ngimet amung ukum bang surga. Ieh maré ukum arang lun rayeh-rayeh, kebalaNeh:

²"Do' muyuh ugka' mutut ukum luk na mesiri, idi na ngerurum lemulun luk dat!

³Ngedengan nelun masi' idi anak maté teh; mutut ukum luk mesiri kuan lun masi' idi lun luk melaya' teh.

⁴Muit nedeh rat bang palad lemulun luk dat!

⁵"Muyuh pelaba bacé idi na kali' anun-anun! Muyuh tudo bang dacem, idi luk mesiri na idi bang tana' ini.

⁶Ui nepebala nemuyuh, 'Muyuh ini allah! Amung muyuh anak Luk Meluun Medita.'

⁷Muyuh miak maté mepad kudeng lemulun; idi ulun muyuh mabud, mepad kudeng raca' pana'."

⁸O Allah, amé' ngimet tana' ini; idi amung-amung pupu Iko kuan.

Nani Ubur 83

¹O Allah, aleg Iko pirud; idi aleg Iko sibengel idi ungeng!

²Ngaceku bunu'Mu sikal metueh, idi lemulun luk megateh Namu sikal pa luun.

³Ideh lulem pegayam sikal metueh ratnan pupuMu; ideh nakap dalam sikal metueh ratnan lemulun luk pinatarMu.

⁴Kebaladeh, "Amé' ngusag bawang Israil, pad na luk teruayen macing raked-ruked!"

⁵Ideh sebuleng niat ratnan luk ruendeh, idi nganau' aceh rorum luk sikal metueh rat Namu:

⁶ideh ineh lun Edom, lun Israil, lun Moab, lun Hagar,

⁷lun Gebal, lun Amon, lun Amalek, lun Pilistin, idi lun Sur.

⁸Lun Asur pana' neperurum nedeh, mangun ku lun dengan inul Lut.

⁹Nganau' kuandeh mepad kudeng luk inau'Mu kuan lun Midian idi Sisera idi Yabin déi' Abpa' Kison,

¹⁰luk pinaté déi' Endor, idi butungdeh nelu luun tana' ineh.

¹¹Nganau' kuan lun rayeh bunu' ineh mepad kudeng luk inau'Mu kuan Oreb idi Seb; idi nganau' kuan lun luk ngimet nedeh mepad kudeng luk inau'Mu kuan Seb idi Salmuna,

¹²luk nepebala, "Kai sikal ngalap tana' Allah."

¹³O Allahku, malid nedeh mepad kudeng abuh, mepad kudeng lipang luk mepalid ku bui.

¹⁴Mepad kudeng regkung luk tetungen, mepad udeng budung regkung luk nan irang,

¹⁵kudeng ineh teh Iko masut nedeh ku ributMu, idi ngatot nedeh ku baruiMu.

¹⁶Ngula' igu'deh, O Tuhan, pad ideh ngamo ngadanMu luk rayeh.

¹⁷Do' ngelaya' nedeh idi ngatot nedeh macing raked-raked, idi nima' nedeh maté bang igu'deh!

¹⁸Nima' nedeh kali' Iko sebuleng luk Tuhan, idi raca' luk meluun rayeh pa luun amung tana'!

Nani Ubur 84

¹Ui pelaba geregan ku ruma'Mu, O Allah luk Melalud!

²Ui pelaba pian tudo déi'! Ui geregan ku natad Ruma' Allah, Ui pelaba tu-tu geregan menani dengan mawang niat kuan Allah luk mulun.

³Pirit idi pelalueh nenganau' arardeh, muneng ku bubpunMu, O Tuhan Allah luk Melalud, Raca'ku idi Allahku, su ineh ideh ngasa' anakdeh.

⁴Pelaba awang niatdeh luk tudo bang Ruma'Mu, idi megéi' menani ngubur Namu!

⁵Pelaba awang niat lemulun luk nengalap tueh rat Namu, idi geregan amé' Pegkung Sion.

⁶Kareb ideh lemaba ruan luk tekering, ieh mangun ku su luk inan bued abpa'; idi udan luk atun manu' amung lubang ku abpa'.

⁷Kareb ideh nalan ideh iuk amé' metueh; ideh miak nier Allah amung allah luun Pegkung Sion!

⁸Ninger sembayangku, Tuhan Allah luk Melalud; ninger, O Allah Yakub!

⁹Ngeperuan raca' kai, luk pinili'Mu, O Allah!

¹⁰Seaco bang Ruma'Mu meluun do' ratnan meribu aco déi' ruma'ku; pelaba do' tuped munung tanga' Ruma' Allahku, ratnan tudo bang ruma' lemulun luk dat.

¹¹Tuhan ineh utap kai idi raca' kai luk rayeh, Ieh ngedita' nekai idi ngeperuan nekai dengan éi'. Na Ieh ara' maré luk do' kuan lemulun luk nganau' luk matu.

¹²Samal kuan lemulun luk merapet Namu, O Allah luk Melalud!

Nani Ubur 85

¹Tuhan, Iko pangeh méi' inan bawangMu, idi nengeperuan nelun Israil teh.

²Iko nemaré do' ku amung dat pupuMu, idi nengiu' amung sala'deh.

³Iko nugka' museh nedeh, idi na megateh nedeh peh.

⁴Nguit nekai lemubed, O Allah Lun Nengulun nekai, idi ugka' tekedamut nekai!

⁵Musehké Iko nekai raked-raked? Naké Iko ugka' megateh nekai?

⁶Do' Iko ngetueh nekai baruh teh, idi kai luk pupuMu miak ngubur Namu.

⁷Mada' awaMu luk lutep nekai, O Tuhan, idi maré pedenganMu luk ngulun nekai.

⁸Ui ninger luk belén Tuhan Allah; Ieh pebala ratnan pedo' kuan kai luk pupuNeh, kudeng kai na lemubed maya' kekamen kai luk mebacé.

⁹Kali' rungen Ieh temina' ngulun lemulun luk ngedita' Neneh, idi uburNeh miak lutep bang bawang tau.

¹⁰Awa idi luk lutep maya' jani' miak mepamung, siri idi pedo' miak mepapu'.

¹¹Baya' lemulun luk matu miak mangun bang tana', idi siri Allah miak nier rat surga.

¹²Tuhan miak ngeperuan netau, idi tana' tau miak ngeruat uli' luk pelaba do'.

¹³Siri miak nalan pa atun Tuhan, idi pedo' maya' puetNeh.

Nani Ubur 86

¹Ninger sembayangku, O Tuhan, idi ngua' kuanku, ngaceku ui melaya' idi masi'.

- ²Ngulun negku ratnan até, ngaceku ui lutep maya' Namu, ngulun negku, ngacéku ui ini demulunMu luk merapet Namu.
- ³Méi' negku, O Tuhan, ngaceku Iko luk Allahku; ui sembayang Namu tebaco-tebaco.
- ⁴Ngawang niat demulunMu, O Tuhan, ngaceku sembayangku macing Namu.
- ⁵O Tuhan, Iko luk do' idi luk maré do', idi luk mepanu' ku awa luk lutep kuan amung lemulun luk sembayang Namu.
- ⁶Ninger sembayangku O Tuhan; idi ninger tawarku mutuh pedengan.
- ⁷Ui nawar Namu kareb inan susa', ngaceku Iko luk ngua' sembayangku.
- ⁸Na luk idi allah baken luk mepad kudeng Iko, O Tuhan, seburur pana' nateh nganau' luk ruenMu.
- ⁹Amung pupu luk inau'Mu miak macing tekeradung Namu, ideh miak ngubur rayehMu,
- ¹⁰ngaceku Iko luk melalud, idi luk nganau' kekamen luk inan mawa; Iko sebuleng mo' luk Allah.
- ¹¹O Tuhan, mada' negku luk pianMu ruenku, pad ui miak lutep maya' Namu, idi sembayang Namu dengan niat luk matu.
- ¹²O Tuhan Allahku, ui miak ngubur Namu dengan amung niatku, ui miak mada' rayehMu raked-raked.
- ¹³Pelaba rayeh awaMu luk lutep kuanku! Iko pangeh nengulun negku ratnan até.
- ¹⁴O Allah, lemulun luk mesido' niat sikal metueh rat negku; aceh rurum lemulun luk dat sikal ngaté negku; ieh ineh lemulun luk na ngerawé Namu.
- ¹⁵O Tuhan, Iko Allah luk méi' idi mawa, idi luk na malé useh, idi megéi' mekatu idi lutep maya' jani'.
- ¹⁶Lumi negku, idi méi' negku, ngetueh idi ngulun negku, ngaceku ui ini demulunMu, mepad kudeng tinanku.

¹⁷Ngegala' do'Mu, O Tuhan, pad lun luk megateh negku miak migu', kareb ideh nier Namu maré ubuk idi pedengan negku.

Nani Ubur 87

¹Allah nemudut bawangNeh luun surud luk meligan;

²Ieh mawa inan bawang Yerusalim meluun ratnan bawang baken déi' Israil.

³O bawang Allah, ninger bala Allah namu, luk mala namu do'.

⁴"Kareb Ui neten ngadan bawang luk maya' Negku, Ui neten ngadan bawang Masir idi Babil; Ui nuet bawang Pilistin, Sur, idi Etiopia bang babpat Yerusalim."

⁵Sion miak tetanen bawang amung-amung pupu, idi Luk Meluun Medita' ngeraben neneh.

⁶Tuhan miak ngayud ngadan amung pupu, idi nuet nedeh mangun ku lun kuan bawang Yerusalim.

⁷Ideh ngalai idi menani, kenanideh, "Bang Sion inan lawa amung-amung peruan."

Nani Ubur 88

¹Tuhan Allah, Lun Nengulun negku, ui nawar tebaco-tebaco, kareb medacem pana' ui amé' matun Namu.

²Ninger sembayanku; idi ninger tawarku mutuh pedengan!

³Ui pelaba ula' susa', pad ui lélé maté.

⁴Ui mepad kudeng lun baken luk lélé maté, idi tuehku nabud.

⁵Ui tican arang lun naté, mepad kudeng lemulun luk pinaté' luk telubid bang tanemdeh, luk na teruayen idi denganinMu.

⁶Iko nenala' negku bang su luk inan até', idi lubang luk pelaba dalem idi medacem teh.

⁷UsehMu pelaba berat kuanku, ui lélé mekarem ku ributneh.

⁸Iko nenganau' lun rorumku mado rat negku, idi megani' nier negku. Ui ita pad na miak remuat,

⁹matehku melaya' ngaceku derehku. O Tuhan, anid aco ui nawar Namu; ui ngiding tiku'ku sembayang Namu!

¹⁰Miakké Iko nganau' tanu' luk nan mawa kuan lun naté? Miakké ideh tumui ngubur Namu?

¹¹Miakké awaMu luk lutep belén bang tanem, idi jani'Mu luk lutep bang su luk medereh?

¹²Miakké tanu'Mu luk nan mawa siren bang su luk medacem, idi éi'Mu bang bawang lun naté?

¹³O Tuhan, ui nawar Namu mutuh pedengan; idi anid pekak ui sembayang Namu.

¹⁴Ngudeh Iko nala' negku, O Tuhan? Ngudeh Iko sigapung negku?

¹⁵Rat kareb ui isuut ui nedereh idi lélé naté; ui nerur ngaceku babeh ukumMu.

¹⁶UsehMu luk mebura' nganud negku; ukumMu luk ngatot negku ngaté negku.

¹⁷Tebaco-tebaco ideh ngelibut negku mepad kudeng ereb; ideh ngerieng negku.

¹⁸Iko nenganau' amung lun rorumku luk do' mado rat negku; dacem mo' luk mangun ku rorumku.

Nani Ubur 89

¹O Tuhan, ui megéi' menani ku awaMu luk lutep; idi megéi' mada' ratnan Iko lutep maya' jani'.

²Ui kali' awaMu miak meruked, idi Iko lutep maya' jani' mepad kudeng langit luk meruked.

- ³KebalaMu, "Ui nepejani' inan lemulun luk pinili'Ku; ieh ineh demulunKu Daud,
- ⁴Ratnan inulmu megéi' inan raca'; idi Ui miak matar imetmu macing raked-ruked.' "
- ⁵Langit miak ngubur kekamenMu luk inan mawa; idi menani ku Tuhan luk lutep maya' jani'.
- ⁶Seburur pana' déi' surga nateh mepad kudeng Tuhan; idi na allah luk baken mepad kudeng Ieh.
- ⁷Ieh rinayeh bang tebubpun luk meligan, ideh luk libutNeh matot Neneh.
- ⁸O Tuhan Allah luk Melalud, seburur pana' nateh melalud kudeng Iko; bang luk amung-amung Iko lutep maya' jani', O Tuhan.
- ⁹Iko luk ngimet abpa' rayeh, idi ngagka' ributneh.
- ¹⁰Iko nengareg Rahab idi nengaté neneh; idi Iko nengelaya' bunu'Mu ku laludMu luk metueh.
- ¹¹Tana' idi langit ineh Iko kuan; idi Iko nemudut tana' ini idi amung luk bang neneh.
- ¹²Iko nenganau' pa kabing idi pa tinueh busat aco; Pegkung Tabor idi Pegkung Hermon menani ngubur Namu dengan mawang niat.
- ¹³Iko pelaba lalud idi pelaba tueh!
- ¹⁴Luk matu idi luk mesiri mangun ku tapin imetMu; bang amung-amung luk ruenMu Iko mawa idi lutep maya' jani'.
- ¹⁵Samal kuan lemulun luk sembayang Namu dengan nani, luk tudo bang acang do'Mu O Tuhan.
- ¹⁶Tebaco-tebaco ideh mawang niat ngaceku ngadanMu, idi ideh ngubur Namu ngaceku do'Mu.
- ¹⁷Dengan katuMu Iko maré tueh nekai, idi ngedita' nekai.
- ¹⁸Tuhan ineh utap kai, idi Iko luk Meligan bang Israil nemaré raca' kuan kai.

- ¹⁹Iko pangeh nepebala bang aceh luk sinier demulunMu luk lutep, "Ui nenganau' seburur lun luk pebunu' luk mebala mangun ku raca'; Ui nengedita' seburur lun luk pinili' rat arang lun mula'.
- ²⁰Ui nemili' demulunKu Daud, idi nengumau neneh ku umauKu luk meligan.
- ²¹TuehKu megéi' ngedengan neneh, idi laludKu miak ngetueh neneh.
- ²²Bunu'neh na miak metueh rat neneh, idi lemulun luk dat na miak ngelaya' neneh.
- ²³Ui miak ngelaya' bunu'neh, idi ngaté amung luk megateh neneh.
- ²⁴Ui mawa neneh idi miak lutep neneh; idi megéi' nganau' neneh metueh.
- ²⁵Ui miak ngiuk imetneh rat Abpa' Rayeh macing Abpa' Pirat.
- ²⁶Ieh miak pebala Negku, 'Iko Tamanku idi Allahku; Iko Batu Libungku idi Lun Nengulun negku.'
- ²⁷Ui nganau' neneh mangun ku anakKu luk atun, idi raca' luk meluun rayeh.
- ²⁸Ui miak megéi' maya' jani'Ku neneh, idi jani'Ku neneh miak meruked.
- ²⁹Ratnan inulneh megéi' inan raca'; imetneh meruked mepad kudeng langit.
- ³⁰"Iamo' kudeng inulneh na nginita ukumKu, idi na maya' amung bada'Ku;
- ³¹kudeng ideh ngelaba balaKu, idi na maya' ecukKu,
- ³²Ui miak ngukum nedeh ku sala'deh, idi mabpet nedeh ku datdeh.
- ³³Iamo' Ui na miak ugka' mawa ni Daud, idi na mekelupan jani'Ku neneh.
- ³⁴Ui na miak ngelaba jani'Ku neneh, idi na ngelubed sebuleng jani'Ku pana'.
- ³⁵"Sekua' mo' Ui nepejani' ku ngadanKu luk meligan, Ui na miak mebalih ni Daud!
- ³⁶Ieh megéi' inan inul macing ruked-ruked, idi Ui miak matar imetneh meruked kudeng aco.
- ³⁷Imetneh meruked kudeng bulan, luk mangun ku tanu' luk lutep bang langit."

- ³⁸Iamo' Iko museh inan raca' luk pinili'Mu; idi Iko nenecan idi nenala' neneh.
- ³⁹Iko nengagka' jani'Mu nan demulunMu, idi nemepet pataneh luun tana'.
- ⁴⁰Iko pangeh nengusag alad bawangneh, idi libungneh luk meraben.
- ⁴¹Amung lemulun luk lemaba mano binawehneh; amung lun danganneh situnga neneh.
- ⁴²Iko pangeh nenganau' bunu'neh metueh idi mawang niat.
- ⁴³Iko nenganau' pelapetneh na ulek, idi nenima' neneh linaya' bang bunu'.
- ⁴⁴Iko pangeh nengalap bedéraneh, idi nengeluka' kerusineh.
- ⁴⁵Iko nenganau' karebneh metueh mekamu' idi nengigu' neneh.
- ⁴⁶O Tuhan, miakké Iko sigapung nekai macing ruked-ruked? Tuda' ioké usehMu mulun mepad kudeng apui?
- ⁴⁷O Tuhan, ngerawé ulun lemulun luk pelaba kamu', idi ngerawé Iko luk nemudut lemulun luk miak maté.
- ⁴⁸Idéké luk miak mulun idi na maté? Kudeng apehké lemulun miak muit bururneh ratnan tanem?
- ⁴⁹O Tuhan, iapehké tanu' awaMu luk atun? Iapehké jani' luk inau'Mu ni Daud?
- ⁵⁰Aleg kelupan negku, demulunMu luk dinat; idi luk kinuyo lemulun luk na manu.
- ⁵¹Bunu'Mu ucet ngedat raca' luk pinili'Mu, O Tuhan, idi ngedat neneh bang anid lawéneh.
- ⁵²Do' tau ngubur Tuhan macing ruked-ruked. Amin! Amin!

Nani Ubur 90

- ¹O Tuhan, Iko megéi' mangun ku libung kai.
- ²Kareb nateh pegkung idi tana' pinudut, Iko Allah luk meruked dengan na punneh idi kekipedneh.

- ³Iko ngecuk lemulun lemubed mangun ku tana', kebalaMu, "Lemubed, muyuh anak lemulun."
- ⁴Meribu lak mepad kudeng seaco Namu; ideh nepelaba, mepad kudeng nalem, mepad kudeng lun matar sejam kareb medacem.
- ⁵Iko nganud lemulun mepad kudeng ereb; ulundeh mepad kudeng nupi, idi kudeng uduh luk temubu' kareb pekak,
- ⁶idi kebusak, iamo' ieh mekarang idi maté kareb malem.
- ⁷Kai pinaté ku usehMu; idi gigap ku gatehMu.
- ⁸Iko ngerareng sala' kai pa kiungMu, idi sala' kai luk inalum melagan sirenMu.
- ⁹Ulun kai mekamu' ku usehMu; idi saget mepangeh mepad kudeng ayek.
- ¹⁰Ulun kai macing tudu' ngepulu' lak; iamo' kudeng kai metueh, ulun kai macing ualuh ngepulu' lak; iamo' megéi' inan susa' idi dereh; idi ulun kai saget mabud peh.
- ¹¹Idéké luk kali' rayeh lalud usehMu? idi idé luk kali' gatehMu luk katot?
- ¹²Mada' nekai ratnan ulun kai luk mekamu', pad kai miak mileh.
- ¹³Tuda' io teh idi Iko ugka' ratnan usehMu? Do' méi' kuan demulun-demulunMu!
- ¹⁴Manu' nekai ku awaMu luk lutep anid pekak, pad kai miak menani idi mawang niat raked ulun kai.
- ¹⁵Maré nakai nekini awang niat, mepad kudeng Iko nemaré susa' kuan kai atun.
- ¹⁶Nima' nekai luk demulunMu, nier kekamenMu luk melalud; nima' inul kai nier laludMu luk rayeh.
- ¹⁷O Tuhan Allah kai, do' peruanMu ngedengan nekai, idi maré peruan bang amung luk ruen kai.

Nani Ubur 91

- ¹Idé-idé luk amé' matun Luk Meluun Medita' mutuh peringucung, idi luk tudo pa liang lungung Luk Meluun Melalud,
- ²miak pebala inan Tuhan, "Iko Batu Libung idi lun Matar negku! Iko luk Allahku, ui merapet Namu."
- ³Ieh miak matar namu dengan do' ratnan abpung luk na melagan, idi ratnan amung ét luk mebura'.
- ⁴Ieh miak ngerukub namu ku iladNeh; pad iko pitarinNeh dengan do', idi jani'Neh luk lutep miak matar idi ngelibung namu.
- ⁵Iko na matot susa' kareb medacem, idi dereh luk macing denak-denak kareb macang,
- ⁶idi ét luk macing kareb medacem, idi luk dat luk ngaté kareb macang.
- ⁷Meribu lemulun miak meluka' iringmu, idi pulu' ngeribu libut-libutmu, iamo' na iko murat.
- ⁸Iko miak nier idi kali' kudeng apeh lemulun luk dat inukum.
- ⁹Ngaceku iko nenganau' Tuhan ku Batu Libungmu, idi Luk meluun Dita' ku Lun Matar namu,
- ¹⁰Sebuleng susa' pana' na miak macing namu, idi lemulun luk dat na miak amé' muineng ruma'mu.
- ¹¹Allah miak maré melaikatNeh ngimet namu, idi matar namu bang anid-anid lawému.
- ¹²Ideh miak ngimet namu ku ticu'deh, pad kukudmu na matuk ku batu.
- ¹³Iko miak ngeradu' balang luk mesangit, idi menipeh luk megalih ticuk.
- ¹⁴Keburi' Allah, "Ui miak ngulun lemulun luk mawa Negku, idi matar lemulun luk miti Negku.
- ¹⁵Kareb ideh nawar Negku, Ui ngor tawardeh; kareb ideh inan susa' Ui idi dengandeh. Ui miak muit nedeh, idi ngedita' nedeh.

¹⁶Ui ngeperuan nedeh ku ulun luk mekadang, pad ideh kali' Ui miak ngulun nedeh."

Nani Ubur 92

¹Pebala do' maré ubur kuan Tuhan, idi ngerayeh Namu dengan menani, O Allah luk Meluun Medita'.

²Ui mada' awaMu luk lutep anid pekak, idi mada' ratnan Iko lutep maya' jani',

³idi menani anid alem, dengan nateg gita idi giula' teh.

⁴O Tuhan, kekamenMu luk melalud nganau' negku mawang niat; ui menani dengan mawang niat ngaceku luk inau'Mu.

⁵Pelaba rayeh kekamenMu, O Tuhan, idi terawéMu pelaba dalem!

⁶Kekamen ini na kali' lun luk mebacé; lemulun luk na mileh na kali' ilungneh.

⁷Lemulun luk dat iuk amé' mula' mepad kudeng uduh, idi lun luk nganau' luk dat miak mangun ku lun do'; iamo' ideh miak pitayen;

⁸ngaceku Iko, Tuhan, luk meluun rayeh macing raked-raked.

⁹Kai kali' bunu'Mu miak maté, idi amung lemulun luk dat uen ngelaya'.

¹⁰Iko nenganau' negku metueh, mepad kudeng sapi' deléi luk meliput; Iko nengeperuan negku ku awang niat.

¹¹Ui nekali' bunu'ku linaya', idi neninger tangi' lemulun luk dat.

¹²Lemulun luk matu miak mulun mepad kudeng piasau, idi temubu' mepad kudeng tumuh luun pegkung Lebanon.

¹³Ideh mepad kudeng kayuh luk tinibu iring ruma' Tuhan, idi luk mulun iring Ruma' Allah tau,

¹⁴idi luk kebua' kareb mengered pana'; idi donneh do' bata' idi na mekarang.

¹⁵Ratnan ineh tau' kali' Tuhan ineh matu; Ieh luk Batu Libungku, idi na luk idi sala' bang Neneh.

Nani Ubur 93

¹Tuhan ineh Raca! Ieh inayung ku dita' idi tueh. Kali' rungen tana' ini lutep, idi na miak bebuen.

²O Tuhan, kerusiMu meraben rat pun-pun, idi rat mon Iko idi.

³Ribaruh abpa' rayeh muni idi meberi, O Tuhan.

⁴Tuhan mo' sebuleng luk ngimet déi' surga, Ieh meluun rayeh ratnan beri abpa' rayeh, idi meluun lalud ratnan ribut.

⁵UkumMu meruked, O Tuhan, idi Ruma'Mu meligan, macing ruked-ruked.

Nani Ubur 94

¹O Tuhan, Iko Allah luk ngukum; ngegala' usehMu!

²Tumui, Iko luk mutut ukum kuan amung-amung lemulun, idi maré ukum luk petulu kuan lemulun luk medita' niat!

³Tuda' ioké lemulun luk dat miak mawang niat, O Tuhan.

⁴Tuda' ioké lun luk nganau' luk dat miak medita' niat, idi mesido' niat ku kekamendeh?

⁵Ideh ngebeneh pupuMu, O Tuhan, idi ngedereh lemulun luk Iko kuan.

⁶Ideh ngaté decur tinula' idi anak maté, idi ngaté sakai luk tudo bang bawang kai.

⁷Keburi'deh, "Tuhan na nier nekai; idi Allah lun Israil na kali'."

⁸O kinanak-kinanakku, ngudeh muyuh pelaba bacé? Idan teh muyuh miak sibada'?

⁹Allah nenganau' lalid tau—ngudeh Ieh na miak nier? Ieh nenganau' mateh tau—ngudeh Ieh na miak nier?

¹⁰Ieh ngimet amung-amung pupu—ngudeh Ieh na ngukum nedeh? Ieh guru amung-amung lemulun—ngudeh Ieh na kali?

¹¹Iamo' Tuhan kali' terawédeh, idi amung ineh mepad kudeng bui.

¹²Samal kuan lemulun luk badénMu ku ukumMu,

¹³pelé ieh ugka' ratnan susa'neh, pad aceh tanem temina' kuan lemulun luk dat.

¹⁴Tuhan na miak necan pupuNeh, idi na sikal necan lemulun luk Ieh kuan.

¹⁵Idi luk mesiri miak kali' bang su luk inan mutut besara', idi amung lemulun luk matu miak maya' ineh.

¹⁶Idéké ngedengan negku, kareb ui sikal metueh ratnan lemulun luk dat, idi lemulun luk nganau' luk dat?

¹⁷Kudeng Tuhan na nengedengan negku, kali' rungen ui miket maté.

¹⁸Keburi'ku, "Mebpeh ui"; iamo' awaMu luk lutep nengimet negku, O Tuhan.

¹⁹Kareb ui megagau idi merapang, Iko ngubuk negku idi ngawang niatku.

²⁰Lun luk mutut besara' luk na mesiri na petulu Namu, ieh ineh lemulun luk ngisu' ukum luk matu,

²¹idi sikal metueh ratnan lemulun luk do', idi maré ukum maté kuan lemulun luk na mesala'.

²²Iamo' Tuhan ineh Batu Libungku, idi Allahku Lun Matar negku.

²³Ieh miak ngukum nedeh ku datdeh, idi ngaté nedeh ku sala'deh; Tuhan Allah tau miak ngaté nedeh.

Nani Ubur 95

¹Do' tau amé' ngubur Tuhan! Do! tau menani dengan mawang niat kuan Allah luk matar netau!

²Do' tau amé' pa kiungNeh dengan maré ubur, idi menani ku nani ubur luk ngawang niat!

³Ngaceku Tuhan ineh Allah Luk Melalud, idi raca' luk melalud pa luun amung-amung allah.

⁴Ieh ngimet aput-aput tana', rat ku lubang luk medalem macing pegkung luk medita',

⁵Ieh ngimet abpa' rayeh luk inau'Neh, idi tana' luk pinudutNeh.

⁶Do' tau amé' tekeradung sembayang Neneh, idi tekeradung pa kiung Tuhan luk nenganau' netau.

⁷Ieh luk Allah tau; tau ini pupuNeh luk pitarinNeh, idi dumba luk uenNeh ngasa'. Do' ninger luk belénNeh aco sini.

⁸"Aleg muyuh metueh niat, kudeng tepun muyuh déi' Kedaluh, idi kareb ideh déi' su luk ali-ali déi' Tutun.

⁹Su ineh ideh nenutun Negku, sagan pana' ideh nenier luk inau'Ku kuandeh.

¹⁰Apat ngepulu' lak Ui netekedamut inan pupu ineh; kebalaKu, 'Ideh pelaba raruh, ngaceku ideh ara' maya' ukumKu!'

¹¹Ui inuseh idi nepebulung, 'Muyuh na miak semuet bang bawang luk barénKu inan muyuh ucu'. ' "

Nani Ubur 96

¹Do' menani aceh nani luk mebaruh kuan Tuhan! O amung-amung tana', do' menani kuan Tuhan!

²Menani kuan Tuhan, idi ngubur Neneh! Do' mada' anid-anid aco bala luk do' ratnan Ieh nengulun netau!

³Do' mada' rayehNeh kuan amung bawang, idi kekamenNeh luk melalud kuan amung pupu.

⁴Tuhan ineh rayeh, idi miak buren tutu; Ieh miak katot ratnan amung allah.

⁵Allah amung pupu baken ineh akang mo', iamo' Tuhan luk nenganau' langit.

⁶Ubur idi dita' libutNeh, rayeh idi taga bang Ruma'Neh.

⁷Do' amung lemulun luk luun tana' ngubur Tuhan! Ngubur rayeh idi laludNeh!

⁸Ngubur ngadan Tuhan luk rayeh, do' nguit baré idi semuet bang Ruma'Neh.

⁹Do' tekeradung pa kiung Luk Meligan ineh kareb Ieh melagan; O amung tana', do' matot pa kiungNeh.

¹⁰Mala kuan amung pupu, "Tuhan ineh Raca! Tana' ini lutep idi na miak bebuen; Ieh miak mutut ukum luk mesiri kuan amung pupu."

¹¹O tana' idi langit, do' mawang niat! O abpa' rayeh, do' muni, idi amun gluk bang namu pana'!

¹²O amung laman idi luk bang namu pana', do' mawang niat! Idi kayuh pana' miak ngitang mawang niat pa kiung Tuhan,

¹³kareb Ieh amé' ngimet tana' ini. Ieh miak ngimet amung pupu bang tana' ini dengan luk mesiri idi luk matu.

Nani Ubur 97

¹Tuhan ineh Raca! O tana', do' mawang niat! O amung pulau déi' abpa' rayeh, do' mawang niat!

²Laput idi dacem libutNeh; luk matu idi luk mesiri mangun ku tapin imetNeh.

³Apui luk pa atunNeh, ngeseb amung bunu'Neh luk libutNeh.

⁴KilepNeh ngacang tana' ini; idi tana' nier ineh idi megegker.

⁵Amung pegkung remuno kudeng ulih pa kiung Tuhan, ieh ineh pa kiung Tuhan luk ngimet amung tana'.

⁶Amung langit mada' siriNeh, pad amung pupu nier rayehNeh.

⁷Amung lemulun luk sembayang inan akang miak migu'; amung allah baken tekeradung pa kiung Tuhan.

⁸Lun Sion idi bawang Yahuda mawang niat, ngaceku ukumMu, O Tuhan!

⁹O Tuhan luk Melalud, Iko luk ngimet amung tana'. Iko meluun rayeh ratnan amung allah.

¹⁰Tuhan mawa nelun luk megateh ku luk dat; Ieh matar ulun pupuNeh, idi muit nedeh ratnan lalud lemulun luk dat.

¹¹Acang ngacang lemulun luk matu, idi awang niat ngacang lemulun luk do'.

¹²O amung muyuh luk matu, do' mawang niat, ngaceku luk inau' Tuhan! Do' ngerawé luk inau' Luk Meligan, idi maré ubur kuanNeh!

Nani Ubur 98

¹Do' menani aceh nani luk mebaruh kuan Tuhan, ngaceku Ieh nenganau' kekamen luk inan mawa! Dengan laludNeh sebuleng idi tuehNeh luk meligan, Ieh pangeh metueh.

²Tuhan nemada' tuehNeh idi laludNeh luk ngulun, kuan amung-amung pupu.

³Ieh nemaya' jani'Neh kuan lun Israil, idi lutep mawa nedeh. Amung lemulun apud tana' pangeh nenier tueh Allah tau.

⁴O amung tana', do' menani dengan mawang niat kuan Tuhan! Ngitang mawang niat, idi menani ngubur Neneh!

⁵O amung tana', do' ngubur Tuhan dengan nateg giula'!

⁶Do' ngitang dengan mawang niat pa kiung Tuhan luk Raca', dengan ngiup suling!

⁷O abpa' rayeh, do' muni, idi amung luk bang namu pana! O tana', do' menani dengan amung luk mulun luunmu!

⁸O abpa' rayeh, do' mepag paladmu; O pegkung, do' muyuh menani pad-pad dengan mawang niat pa kiung Tuhan,

⁹ngaceku Ieh amé' ngimet tana' ini! Ieh miak ngimet amung pupu bang tana' ini, dengan luk mesiri idi luk matu.

Nani Ubur 99

¹Tuhan ineh Raca', idi amung lemulun megegker niat. Ieh tudo luun kerusiNeh arang melaikat karub, idi tana' pana' sigio teh.

²Tuhan ineh melalud déi' Sion; Ieh ngimet amung-amung pupu.

³Amung-amung lemulun miak ngubur ngadanNeh luk rayeh idi luk medita'. Ieh luk meligan!

⁴O Raca' luk melalud, Iko mawa inan luk matu, Iko pangeh nenguit luk mesiri idi luk matu kuan lun Israil.

⁵Ngubur Tuhan Allah tau; do' sembayang pa atun kerusiNeh! Ieh luk meligan.

⁶Musa idi Arun luk arang imamNeh, idi Semuil pana' luk arang lemulun luk sembayang Neneh. Ideh nenawar Tuhan, idi Ieh nengor tawardeh.

⁷Ieh nepebala nedeh rat bang diri laput; ideh nemaya' bala idi ukum luk biréNeh nedeh.

⁸Tuhan Allah kai, Iko nengua' putuh pupuMu; idi nengegala' kuandeh Iko Allah luk maré do' ku sala'; iamo' Iko nengukum nedeh ngaceku sala'deh.

⁹Ngubur Tuhan Allah tau, idi do' tau sembayang luun pegkungNeh luk meligan! Tuhan Allah tau ineh meligan!

Nani Ubur 100

¹O amung tana', do' menani dengan mawang niat kuan Tuhan!

²Do' geregan sembayang inan Tuhan, idi menani pa kiungNeh dengan mawang niat!

³Aleg kelupan Tuhan ineh Allah! Ieh nenganau' netau, idi tau ini Ieh kuan; tau ini pupuNeh idi dumbaNeh.

⁴Do' semuet bang Ruma'Neh idi maré ubur, idi ngubur Neneh bang su inanNeh luk meligan! Maré ubur kuanNeh idi ngerayeh Neneh.

⁵Tuhan ineh do'; awaNeh meruked, idi Ieh lutep maya' jani'Neh macing ruked-ruked.

Nani Ubur 101

¹O Tuhan, ui menani kuanMu, ratnan luk lutep idi luk mesiri.

²Ui sikal maya' dalam luk matu, Idanké Iko amé' negku? Ui pian mulun maya' dalam luk mesiri bang ruma'ku.

³Na ui pian ku luk dat. Ui megateh inan kekamen lemulun luk lemubed ratnan Allah. Na ui pian perurum nedeh.

⁴Na ui pian ku lawé luk tekilu'; idi na pian ku terawé luk dat.

⁵Ui sikal ngaté lemulun luk ngedat lun rurumneh; ui na sikal perurum dengan lemulun luk mesido' idi medita' niat.

⁶Ui miak nakap lemulun luk lutep maya' Allah, pad ideh tudo bang ruma'ku; lemulun luk megéi' maya' luk mesiri, miak mangun ku demulunku.

⁷Lemulun luk mebalih na miak tudo bang ruma'ku; idi lemulun luk siayu na miak tuman pa kiungku.

⁸Anid-anid aco ui miak ngaté lemulun luk dat bang bawang kai; idi masut amung lemulun luk mesala' rat bang bawang Tuhan.

Nani Ubur 102

¹Ninger sembayangku, O Tuhan, idi ninger tawarku mutuh pedengan!

²Aleg sigapung negku kareb ui inan susa! Ninger negku, idi miket ngor tawarku!

³Ulunku metutu' mepad kudeng rabpun, idi bururku meseb mepad kudeng luk sabpen luun apui.

⁴Ui ridu' mepad kudeng uduh; idi ui na pian kuman.

⁵Ui ngarod idi ngitang, ngaceku ui pelaba rugu'.

⁶Ui mepad kudeng suit luk meliputi déi' su luk ali-ali, idi kudeng puek luk bang ruma' tican.

⁷Ui telubid iamo' na ui medacep mateh; ui mepad kudeng sebuleng suit luk luun buduk ruma'.

⁸Tebaco-tebaco bunu'ku ngedat negku; lemulun luk situnga negku ngediman ku ngadanku.

⁹Abuh mangun ku nuba'ku, Idi abpa' matehku mepuar bang luk rupenku,

¹⁰ngaceku useh idi gatehMu, Iko nengalap negku idi nenala' negku.

¹¹Ulunku mepad kudeng aca' kareb malem; ui mepad kudeng uduh luk tekering.

¹²Iamo' Iko, Tuhan, Raca' ruked-ruked; amung-amung inul miak ngerawé Namu.

¹³Iko miak tumui idi méi' kuan Sion, ngaceku tarekneh pangeh macing.

- ¹⁴DemulunMu mawa idi méi' inan Sion, sagan tu pana' ieh inusag.
- ¹⁵Amung pupu miak matot inan Tuhan; amung raca' bang tana' ini miak matot ku laludNeh.
- ¹⁶Kareb Tuhan mudut Sion baruh teh, Ieh miak ngegala' rayehNeh.
- ¹⁷Ieh miak ninger tawar pupuNeh luk tican, idi ngua' sembayangdeh.
- ¹⁸Do' ngayud ratnan luk inau' Tuhan kuan inul muyuh luk mucu, pad lemulun luk nateh tinganak ngubur Neneh mucu.
- ¹⁹Tuhan nenier rat su inanNeh déi' dita', idi Ieh nenier tana' ini rat surga,
- ²⁰pad miak ninger arod lemulun luk tiban, idi muit lemulun luk nengalap ukum maté.
- ²¹Idi ngadanNeh miak badén déi' Sion; idi Ieh miak burem déi' Yerusalim,
- ²²kareb amung pupu idi bawang mepamung sembayang inan Tuhan.
- ²³Tuhan nengelaya' negku kareb ui isuut; Ieh nengekamu' ulunku.
- ²⁴O Allahku, aleg ngalap negku nekini, kareb nateh ui mengered! O Tuhan, Iko mulun ruked-ruked;
- ²⁵Iko pangeh nemudut tana' ini mon, idi dengan ticu'Mu sebuleng, Iko nenganau' langit teh.
- ²⁶Amung ineh miak metutu', iamo' Iko mo' ketecan; ideh miak misu', mepad kudeng kibung luk merupa'. Iko miak ngelengu nedeh mepad kudeng kuyu', idi ideh miak metutu';
- ²⁷iamo' Iko Tuhan na misu', idi ulunMu na kekiped.
- ²⁸Anak kai miak mulun dengan do', idi inuldeh miak mulun pa kiungMu kidi-kidi.

Nani Ubur 103

- ¹O amung burur idi niatku, do' ngubur Tuhan! Idi ngubur ngadanNeh luk meligan.
- ²Ngubur Tuhan, O niatku, idi aleg kelupan éi'Neh.

- ³Ieh maré do' ku amung sala'ku; idi ngedo' amung luk métku;
- ⁴Ieh muit negku ratnan tanem, idi ngeperuan negku ku awa idi éi'Neh;
- ⁵Ieh maré ulun luk do' kuanku, pad ui kudeng anak baruh, idi metueh kudeng kanui.
- ⁶Tuhan mutut ukum luk mesiri kuan lemulun luk pidereh.
- ⁷Ieh nemada' dalanNeh kuan i Musa, idi nenima' lun Israil nenier kekamenNeh luk melalud.
- ⁸Tuhan mepanu' ku éi' idi awa, idi mulai niat, idi mepanu' ku awa luk lutep.
- ⁹Na Ieh megateh netau kidi-kidi, idi usehNeh na meruked.
- ¹⁰Na Ieh ngua' idi ngukum netau maya' sala' idi dat tau.
- ¹¹Pelaba rayeh awaNeh kuan lemulun luk matot Neneh, mepad dita' kudeng langit.
- ¹²Ieh nala' sala' tau mado rat netau, mepad kiado rat pa busat aco amé' pa acep aco.
- ¹³Tuhan méi' kuan lemulun luk matot Neneh, mepad kudeng taman luk méi' inan anakneh.
- ¹⁴Ieh kali' kudeng apeh tau pinudut; idi Ieh kali' tau pinudut ratnan tana'.
- ¹⁵Ulun lemulun mepad kudeng uduh; ieh temubu' idi mulun mepad kudeng busak luk nan natad.
- ¹⁶Idi bui malid neneh, pad ieh na idi, idi su inanneh na kali'neh peh.
- ¹⁷Iamo' awa Tuhan kuan lemulun luk ngedita' Neneh meruked; idi do'Neh pana' meruked kuan amung-amung inul,
- ¹⁸ieh ineh kuan lemulun luk nginita jani'Neh, idi lutep maya' ukumNeh.
- ¹⁹Tuhan nengeletep kerusiNeh déi' surga; idi Ieh luk raca' pa luun amung-amung.
- ²⁰Ngubur Tuhan, O muyuh melaikat luk metueh idi melalud, idi luk maya' ukumNeh, idi luk ninger luk belénNeh!

²¹Ngubur Tuhan, O amung muyuh luk melalud déi' surga, muyuh luk demulunNeh, luk nganau' luk pianNeh!

²²Ngubur Tuhan, O amung-amung luk pinudutNeh, iapeh-iapeh pana' bang imetNeh! Idi ngubur Tuhan, O niatku!

Nani Ubur 104

¹Ngubur Tuhan, O niatku! O Tuhan, Allahku, Iko luk pelaba rayeh! Iko inayung ku dita' idi rayeh;

²Idi bururMu maput ku acang. Iko nemalad langit mepad kudeng lepo,

³Idi nemudut ruma'Mu luun abpa' luk déi' dita'. Iko makai laput ku kerétaMu;

⁴Iko makai bui ku lun dukenMu, idi kilep ku demulunMu.

⁵Iko nengeletep tana' ini luun dirineh dengan meraben, pad ieh na miak bebuen.

⁶Iko nenganau' abpa' rayeh luunneh, mepad kudeng tarub, idi abpa' ineh nengereb pengkung.

⁷Kareb Iko nemada' abpa' ineh, idi ideh pana' buro'; kareb ideh neninger ecukMu, idi ideh pelaba awer manud.

⁸Ideh neburo rat luun pegkung iné' bang alung, luk inau'Mu temina' kuandeh.

⁹Iko nenganau' aceh lakan luk na miak lebéndeh, pad ideh na miak ngereb tana' peh.

¹⁰Iko nganau' bued abpa' manud bang ruan, idi abpa' ineh manud maya' bang alung.

¹¹Idi bued abpa' ineh maré abpa'neh rupan pung luk meliputi, idi keladai luk meliputi pana' miak ngato paringdeh.

¹²Suit-suit nganau' arardeh idi menani udung kayuh luk tangeb abpa'.

¹³Iko Tuhan luk maré udan rat surga luun pegkung, idi tana' ini nepanu' ku peruanMu.

- 14Iko nganau' uduh kuan sapi', idi irin idi padé kuan lemulun, pad ieh miak ngalap akanneh,
- 15idi maré abpa' anggur idi umau saitun, luk nganau' neneh mawang niat, idi nuba' luk ngetueh bururneh.
- 16Tumuh luk déi' Lebanon megéi' inan udan, ieh ineh kayuh Tuhan luk tinibuNeh.
- 17Su ineh suit-suit nganau' arardeh; idi manuuk pana' nganau' arardeh udung kayuh aru'.
- 18Amék luk meliputi tudu luun pegkung luk medita', idi arang-arang batu inan labo tudu.
- 19Iko nenganau' bulan pingatu aceh kareb; idi aco kali' karebneh macep.
- 20Iko nenganau' dacep kareb amung pung luk meliputi nalan.
- 21Balang nenger kareb ideh nakap akan luk barén Allah kuandeh;
- 22kareb aco masat ideh lemubed amé' bang lubangdeh.
- 23Idi lemulun miak ngakem kareb macang, pad macing malem.
- 24O Tuhan, luk inau'Mu pelaba ula'! Iko pelaba ileh nenganau' nedeh! Tana' ini mepanu' ku pung luk pinudutMu.
- 25Idi inan abpa' rayeh luk na kali' iringneh, luk inan pung luk mula' tudu, do' luk rayeh idi luk isuut pana';
- 26kapal maya' luunneh, idi galau ieh ineh pung luk rayeh luk inau'Mu ineh marot bang ineh.
- 27Amung-amungdeh merapet Namu, maré akan kuandeh pad piandeh.
- 28Iko maré akan nedeh, idi ideh kuman pad macing mebor.
- 29Kareb Iko necan nedeh, ideh matot; kareb Iko ngalap niatdeh, ideh maté, idi misu' ku tana' mepad kudeng atun.
- 30Iamo' kareb Iko maré niat nedeh, ideh mulun; Iko maré ulun luk mebaruh kuan tana'.

³¹Do' rayeh Tuhan macing raked-raked! Do' Tuhan mawang niat inan luk inau'Neh.

³²Kareb Ieh nier tana', idi tana' pana' meruyuh, kareb Ieh ngakem pegkung, idi rabpun pana' remuat.

³³Ui miak menani kuan Tuhan raked ulunku; idi menani ngubur Allahku macing raked-raked.

³⁴Do' Ieh mawang niat ku naniku, ngaceku Ieh nganau' negku mawang niat teh.

³⁵Do' lun mesala' mabud rat bang tana' ini; dengan lemulun luk dat pana'! Ngubur Tuhan, O niatku! Ngubur Tuhan!

Nani Ubur 105

¹Maré ubur kuan Tuhan, id mada' rayehNeh, id maré kali' kuan amung pupu ratnan luk inau'Neh!

²Do' menani ngubur Neneh; idi mada' amung kekamenNeh luk inan mawa!

³Do' tau mawang niat ngaceku tau ini pupuNeh idi do' lemulun luk sembayang Neneh mawang niat.

⁴Amé' matun Tuhan mutuh pedengan; idi megéi' nakap Neneh.

⁵Ngerawé kekamenNeh luk inan mawa, idi ukum luk pangeh biréNeh.

⁶O inul Ibrahim luk demulunNeh, O anak-anak Yakub luk pinili'Neh.

⁷Tuhan ineh Allah tau; ukumNeh kuan amung-amung tana'.

⁸Ieh miak nginita jani'Neh kuan meribu inul, macing raked-raked,

⁹idi nginita jani'Neh ni Ibrahim idi Isak pana'.

¹⁰Tuhan nenganau' jani' luk meruked kuan Yakub, kebalaNeh,

¹¹"Ui miak maré tana' Kanaan mangun ku babpatmu sebuleng."

¹²Kareb pupu Allah nateh mula', idi ideh sakai bang bawang Kanaan.

¹³Ideh nenalan bang anid-anid bawang idi anid-anid imet.

- 14Iamo' na Tuhan nenima' seburur pana' ngedereh nedeh. Ieh nemada' raca'-raca' ratnan lawédeh, kebalaNeh,
- 15"Aleg ngesusa' demulun luk pinili'Ku, idi aleg ngedereh nabi-nabiKu!"
- 16Tuhan nemaré iru' bang bawangdeh, pad nengabud akandeh.
- 17Iamo' Ieh nengecuk Yusup luk pinasui mangun ku demulun amé' atun rat nedeh.
- 18Kukudneh nurat ku kalingneh, idi dierneh inabet ku belawan,
- 19pad amung luk bilaneh pangéh nangun. Bala Tuhan nengegala' ni Yusup, ieh luk matu.
- 20Idi raca' Masir luk ngimet mula' pupu nemuit neneh.
- 21Ieh nenganau' neneh ku lun rayeh bang imetneh, pad ieh ngimet aput-aput tana' ineh;
- 22ieh luk pa luun amung tareh raca' idi mada' lun luk mileh luk pa liang raca'!
- 23Idi Yakub iné' Masir, idi netebawang déi'.
- 24Tuhan nemaré mula' anak kuan pupuNeh, idi nenganau' nedeh metueh ratnan bunu'deh.
- 25Ieh nenganau' luk Masir megateh inan pupuNeh, pad ideh nenaluk demulun-demulunNeh.
- 26Idi Ieh nengecuk demulunNeh, Musa, idi Arun, luk pinili'Neh.
- 27Didueh nenganau' kekamen Allah luk melalud, idi tanu' luk nan mawa déi' tana' Masir.
- 28Allah nenganau' daceh bang tana' ineh, iamo' lun Masir na nemaya' ukumNeh.
- 29Ieh nengisu' abpa' deh mangun ku dara', idi nengaté amung lawiddeh.
- 30Bawangdeh nepanu' ku atit, idi bang ruma' raca' pana'.
- 31Allah nengecuk laled idi kutu manu' bawang ineh.

- ³²Ieh nemaré udan batu idi kilep ku libal udah bang bawangdeh;
- ³³idi Ieh nenecat lawa anggur idi gita'deh, idi nemugkul amung-amung kayuh.
- ³⁴Ieh nengecuk kato luk pelaba ula', pad ideh na miak iapin;
- ³⁵ideh nekuman amung tibu idi padé bang bawangdeh.
- ³⁶Ieh nengaté amung anak deléi lun Masir luk atun.
- ³⁷Idi Ieh nenguyut nelun Israil remuat rat bang bawang ineh; idi ideh nenguit pirak idi amas, idi amungdeh metueh idi do' ulun.
- ³⁸Kareb ideh neburo, lun Masir mawang niat, ngaceku ideh matot nedeh.
- ³⁹Allah nengelinged pupuNeh ku laput, idi nemaré apui ku acangdeh kareb medacem.
- ⁴⁰Ideh nemutih luk kenen, idi Ieh nemaré suit tetibung idi ruti rat surga, pad miak ngebor nedeh.
- ⁴¹Ieh nemila' batu, idi abpa' neremuat, idi manud maya' déi' su luk ali-ali, mepad kudeng arur.
- ⁴²Allah nengerawé jani'Neh luk meligan ni Ibrahim luk demulunNeh.
- ⁴³Idi Ieh nenguyut pupu luk pinili'Neh remuat, idi ideh nengitang idi menani dengan mawang niat.
- ⁴⁴Ieh nemaré tana' lun pupu baken nedeh, idi nenima' nedeh ngalap lamandeh,
- ⁴⁵pad pupuNeh miak maya' balaNeh, idi nginita ukumNeh. Ngubur Tuhan!

Nani Ubur 106

- ¹Ngubur Tuhan! Maré ubur kuan Tuhan, ngaceku Ieh do'; idi awaNeh meruked.
- ²Idéiké miak mada' amung kekamenNeh luk rayeh luk pangeh inau'Neh? Idé luk ngubur Neneh dengan meriput?
- ³Samal kuan lemulun luk maya' ukumNeh, idi megéi' nganau' luk matu!

- ⁴Ngerawé negku, O Tuhan, kareb Iko ngedengan pupuMu; ngulun negku, kareb Iko ngulun nedeh.
- ⁵Nima' negku nier do' pupuMu, idi pad-pad do' ria' dengandeh, idi mawang niat dengan lemulun luk Iko kuan.
- ⁶Kai idi tepun kai pangeh nenganau' sala'; kai neraruh idi nenganau' luk dat.
- ⁷Tepun kai luk déi' Masir na kali' ilung kekamen Allah luk nan mawa; ideh nekelupan tuda'-tuda' kekamenMu; luk nengegala' awaMu luk lutep, idi sikal metueh ratnan Luk Melalud déi' Abpa' Pisui.
- ⁸Iamo' Ieh nengulun nedeh, maya' jani'Neh, pad ngegala' laludNeh luk rayeh.
- ⁹Idi Ieh nengecuk Abpa' Pisui. mekeket, idi ieh pana' mekeket, pad Ieh nenguyut pupuNeh guta, maya' tana' luk tekering.
- ¹⁰Ieh nengulun nedeh ratnan lemulun luk megateh nedeh; idi nemuit nedeh ratnan bunu'deh.
- ¹¹Abpa' nengened bunu'deh, pad seburur pana' nateh luk ketecan.
- ¹²Idi pupuNeh nemanu ku jani'Neh idi menani ngubur Neneh.
- ¹³Iamo' ideh saget nekelupan luk inau'Neh, idi na nenganét ecukNeh.
- ¹⁴Ideh nepanu' ku pian bururdeh sebuleng déi' su luk ali-ali idi nenutun Allah;
- ¹⁵Idi Ieh nemaré luk pinutuhdeh, iamo' Ieh nemaré ét luk pelaba bura' kuandeh.
- ¹⁶Déi' su luk ali-ali ideh mét niat ni Musa, idi Arun, demulun Allah luk meligan;
- ¹⁷Idi tana' pana' nekukab, pad Datan idi amung uang ruma' Abiram naté nebpeh bang lubang ineh;
- ¹⁸Idi apui netemurun idi nengeseb lemulun luk dat luk nemaya' nedidueh.
- ¹⁹Ideh nemudut aceh sapi' ratnan amas déi' Sinai idi ideh nesembayang inan akang ineh,
- ²⁰Idi rayeh Allah linibaldeh ku akang pung luk kuman uduh.

- ²¹Ideh nekelupan Allah luk nengulun nedeh, dengan kekamenNeh luk melalud déi' bawang Masir.
- ²²Pelaba do' kekamen luk inan mawa, luk inau'Neh déi' Abpa' Pisui!
- ²³Idi kebala Allah, Ieh sikal ngaté pupuNeh; iamo' Musa, demulun luk pinili'Neh, netuped pa kiung Allah, idi nengagka' usehNeh, pad Ieh na nengaté nedeh.
- ²⁴Ideh ara' ku tana' luk do', ngaceku ideh na manu ku jani' Allah.
- ²⁵Ideh tudo bang lepodeh dengan medureng, idi na sikal ninger bala Tuhan.
- ²⁶Idi Allah nemulun ngedeh, pad ideh maté déi' su luk ali-ali;
- ²⁷idi Ieh miak matad inuldeh arang lemulun luk na manu, pad ideh maté bang bawang pupu baken.
- ²⁸Idi pupu Allah neperurum nedeh luk sembayang inan Baal déi' Pior, idi nekuman baré luk biré kuan akang luk na mulun.
- ²⁹Idi ideh nenganau' Tuhan mét niat ku kekamendeh, pad ét luk mebura' nacing nedeh;
- ³⁰iamo' Pinihas netuped idi nengukum lemulun luk mesala', idi ét ineh nugka',
- ³¹idi luk inau'neh iniap mangun ku luk matu kuanneh, macing raked-raked.
- ³²Pupu Tuhan nenganau' Neneh museh déi' bued abpa' luk déi' Kedaluh, idi Musa nekaneh susa' ngaceku ideh.
- ³³Ideh nenganau' ni Musa melau' niat, pad ieh nengeruat bala luk na petulu belénneh.
- ³⁴Na ideh nengaté lun luk na manu, maya' ecuk Tuhan,
- ³⁵iamo' ideh nepaweh nedeh, idi nenginud lawé lun luk na manu.
- ³⁶Ideh nesembayang inan akangdeh, idi ineh nengacing até kuandeh.
- ³⁷Ideh nemaré anakdeh luk deléi idi decur mangun ku baré kuan akang lun Kanaani.

- ³⁸Ideh nengaté anak-anak luk na mesala', pad tana' ineh linutak ku paté ineh.
- ³⁹Ideh nengelutak bururdeh sebuleng ku kekamendeh, idi na lutep maya' jani'deh inan Allah.
- ⁴⁰Idi Tuhan museh inan pupuNeh; idi Ieh ara' tu-tu nedeh.
- ⁴¹Ieh nemaré nedeh bang palad lun luk na manu, idi bunu'deh nengimet nedeh.
- ⁴²Ideh pidereh bunu'deh, ngaceku ideh pa liang imetdeh.
- ⁴³Megéi' Tuhan nemuit pupuNeh, iamo' ideh sikal metueh rat Neneh, idi sala'deh iuk amé' mula'.
- ⁴⁴Iamo' Tuhan neninger tawardeh, idi nengerawé derehdeh.
- ⁴⁵Kareb Ieh nengerawé jani'Neh nedeh, idi Ieh nenginuud, ngaceku awaNeh luk rayeh.
- ⁴⁶Ieh nenganau' pupu luk nenaban nedeh méi' nedeh.
- ⁴⁷Ngulun nekai, O Tuhan Allah kai, idi nguit nekai lemubed rat arang pupu baken, pad kai ngubur ngadanMu luk meligan, idi maré ubur Namu dengan mawang niat.
- ⁴⁸Do' tau ngubur Tuhan Allah lun Israil; ngubur Neneh rat nekini macing ruked-ruked! Idi do' amung lemulun mala, "Amin!" Ngubur Tuhan.

Nani Ubur 107

- ¹"Maré ubur kuan Tuhan, ngaceku Ieh do'; idi awaNeh meruked!"
- ²Do' ineh belén muyuh pad ngubur Tuhan, ieh ineh amung muyuh luk inulunNeh.
- ³Ieh nemuit nemuyuh ratnan bunu'muyuh, idi nenguit nemuyuh muli' rat bawang baken, rat pa busat aco, rat pa acep aco, rat pa tinueh busat aco, idi rat pa kabing busat aco.
- ⁴Inan luk neraruh déi' su luk ali-ali, idi na kali' dalan amé' nan bawang;
- ⁵ideh melau idi meparing, idi pelaba susa' niat.

- ⁶Bang susa'deh ideh nenawar Tuhan, idi Ieh nemuit nedeh ratnan derehdeh.
- ⁷Ieh nenguyut nedeh maya' dalan luk mesiri, pad macing nan bawang luk suetdeh.
- ⁸Do' ideh ngubur Tuhan ngaceku awaNeh luk lutep, idi kekamenNeh luk do', luk inau'Neh kuandeh!
- ⁹Ieh ngato paring lemulun luk meparing, idi ngebor lemulun luk melau ku akan luk do'.
- ¹⁰Inan luk tudo bang dacem, idi lun luk tiban pidereh katem kalingdeh,
- ¹¹ngaceku ideh nengelaba ukum Allah luk Melalud, idi na nengerawé bada'Neh.
- ¹²Ideh merur ku kekamendeh luk meberat; kareb ideh meluka', seburur pana' nateh luk ngedengan nedeh.
- ¹³Bang susa'deh ideh nenawar Tuhan, idi Ieh nemuit nedeh ratnan derehdeh.
- ¹⁴Ieh nenguit nedeh remuat rat bang dacemdeh, idi nemutut kalingdeh.
- ¹⁵Do' ideh ngubur Tuhan ngaceku awaNeh luk lutep, idi kekamenNeh luk do', luk inau'Neh kuandeh!
- ¹⁶Ieh ngusag amung tanga' tekaling, idi mutul amung itek belawan.
- ¹⁷Inan luk mét ngaceku sala'deh, idi medereh ngaceku datdeh;
- ¹⁸ideh na pian kuman, ngaceku ideh lélé maté.
- ¹⁹Bang susa'deh ideh nenawar Tuhan, idi Ieh nemuit nedeh ratnan derehdeh.
- ²⁰Ieh nengedo' nedeh ku balaNeh, idi nemuit nedeh ratnan tanem.
- ²¹Do' ideh ngubur Tuhan ngaceku awaNeh luk lutep, idi kekamenNeh luk do', luk inau'Neh kuandeh.
- ²²Do' ideh maré baré idi ngubur Neneh, idi menani dengan mawang niat mada' amung luk inau'Neh!
- ²³Inan luk nemaya' kapal abpa', iné' masui luk pisuendeh;

- ²⁴ideh nenier luk inau' Tuhan, ieh ineh kekamenNeh luk nan mawa luun abpa' rayeh.
- ²⁵Ieh nepebala, idi inan bui luk metueh, luk nenganau' ribut luk rayeh.
- ²⁶Kapal ineh netegenang idi lélé mekarem. Bang susa' luk kudeng ineh ideh pelaba tot;
- ²⁷lawédeh midar mepad kudeng lun mabuk, sagan pana' ideh mileh, na ulekneh.
- ²⁸Bang susa'deh ideh nenawar Tuhan, idi Ieh nemuit nedeh ratnan derehdeh.
- ²⁹Ieh nengagka' bui ineh, pad ribut ineh pana' inugka'.
- ³⁰Ideh mawang niat ngaceku abpa' ineh melino peh, idi Tuhan nenguit nedeh dengan do', macing su luk inan kapal mapit luk piandeh.
- ³¹Do' ideh ngubur Tuhan ngaceku awaNeh luk lutep, idi kekamenNeh luk do', luk inau'Neh kuandeh.
- ³²Do' ideh mada' rayehNeh bang teubupun lun mula', idi ngubur Neneh pa kiung teubupun lun rayeh.
- ³³Ieh pangeh nengeket abpa', idi bued pana'.
- ³⁴Ieh nengisu' tana' baleng ku tana' payeh, ngaceku dat lemulun luk tudo su ineh.
- ³⁵Ieh nengisu' su luk ali-ali mangun ku takung, idi tana' luk tekering inisu' ku bued abpa'.
- ³⁶Ieh nenima' lemulun luk melau tudo déi', idi ideh nenganau' aceh bawang su luk inandeh tudo;
- ³⁷ideh nenganau' lati' idi kabun anggur luk nengeruat bua' luk mula'.
- ³⁸Ieh nengeperuan nedeh, pad ideh mula' anak, idi mula' aya' teh.
- ³⁹Kareb pupu Allah linaya' idi inigu' ku dereh idi susa'deh,
- ⁴⁰idi Ieh nengegala' gatehNeh kuan lemulun luk ngedereh nedeh, idi nenganau' nedeh meraruh déi' su luk ali-ali.

⁴¹Iamo' Ieh nemuit nelun masi' ratnan derehdeh, idi nenganau' nedeh amé' mula' mepad kudeng dumba.

⁴²Lun luk matu nier ini, idi ideh mawang niat, iamo' lemulun luk dat ungenng mo'.

⁴³Do' lemulun luk mileh ngerawé bala ini; idi kali' awa Tuhan luk lutep.

Nani Ubur 108

¹Ui temina', O Allah, idi netemina' do'-do'! Ui miak menani idi ngubur Namu! Sigio, O niatku!

²Kulat, giula' idi gitaku! Idi ui miak ngalat mateh aco!

³Ui miak ngubur Namu arang amung bawang, idi arang maung pupu, O Tuhan!

⁴AwaMu luk lutep macing déi' surga, idi siriMu macing déi' langit.

⁵O Allah, ngegala' rayehMu bang langit, idi uburMu bang apud-apud tana'.

⁶Ngulun nekai ku tuehMu, ngua' sembayangku, pad pupu luk inanMu mawa miak mulun.

⁷Kebala Allah bang su inanNeh luk meligan, "Dengan mawang niat, Ui mabpat Sikem, idi maré Raked Sukot kuan pupuKu.

⁸Giliad idi Manasé Ui kuan; Epraim ineh tupiKu, idi Yahuda rukudKu.

⁹Iamo' Ui miak makai Moab, ruen ku abpa' inanKu sibaru', idi Edom su luk inanKu nala' kasut. Ui miak ngudub ngaceku Ui metueh ratnan bawang Pilistin."

¹⁰Idéké luk miak nguit negku amé' nan bawang luk inan ngabang, O Allah? Idéké luk nguit negku amé' bawang Edom?

¹¹Matuké Iko nenala' nekai? Naké Iko nalan maya' baweh kai?

¹²Ngedengan nekai kareb kai pebunu', ngaceku pedengan lemulun na ulekneh!

¹³Kudeng Allah ngedengan netau, kali' rungen tau metueh; Ieh miak ngelaya' bunu' tau.

Nani Ubur 109

¹Ui ngubur Namu, O Allah; aleg Iko ungeng!

²Lemulun luk dat idi lemulun luk mebalih nengedat negku, dengan bala luk na matu.

³ideh nguyo negku, idi ngadu' negku dengan na punneh.

⁴Ideh sikal metueh rat negku, sagan tu pana' ui mawa nedeh, idi nesembayang kuandeh.

⁵Ideh ngua' do'ku ku luk dat, idi awaku ku useh.

⁶Mili' selemulun luk dat ngukum bunu'ku, idi nima' seburur rat arang bunu'neh sebuleng ngadu' neneh.

⁷Do' ieh tetunin pad sala'neh megalala', pad sembayangneh pana' mangun ku sala'!

⁸Nima' neneh miket maté, pad lun baken ngalap kekammeneh!

⁹Do' anakneh mangun ku anak maté, idi awanneh ku tinula'!

¹⁰Nima' anakneh mutuh mo'-mo' idi na ruma', idi duken buro rat ruma' tican luk inandeh tudo!

¹¹Do' lemulun luk inan baleh neneh ngalap amung binawehneh, idi lun sakai ngalap amung luk dinugneh.

¹²Aleg nima' seburur pana' méi' neneh, idi ngasa' anakneh.

¹³Nima' amung inulneh maté, pad ngadanneh na teruayen ratnan inulneh luk mucu.

¹⁴Do' Tuhan ngerawé dat tepunneh, idi na maré do' ku sala' tinanneh.

¹⁵Do' Tuhan megéi' ngerawé sala'deh, pad ideh mekelupan bang tana' ini.

¹⁶Lemulun ineh na mileh méi'; lun masi' lun luk inan susa', idi lun luk melaya' pidereh idi pinaténeh.

- ¹⁷Ieh mawa ku kediman -do' kedimanneh macing neneh! Ieh na pian ngeperuan nelun baken — do' ieh pana' na uen ngeperuan!
- ¹⁸Ieh nemakai kedimanneh mepad kudeng kuyu'; do' kedimanneh lumab amé' bang bururneh, mepad kudeng abpa', idi bang tulangneh, mepad kudeng umau!
- ¹⁹Do' kediman ineh mangun ku ayungneh, idi ku abet awa'neh.
- ²⁰Do' Tuhan ngukum bunu'ku, luk nguyo negku, kudeng ineh!
- ²¹Iamo' Tuhan, Allahku, ngedengan negku maya' jani'Mu, idi muit negku ngaceku awaMu luk do'.
- ²²Ngaceku ui masi' idi mesusa'; idi bang niatku mét.
- ²³Ui mepad kudeng lungung pa malem, luk idi segageh mo'; ui mepalid ku bui mepad kudeng kato.
- ²⁴Idi tulangku melaya' ngaceku na kuman, idi bururku pana' merugu' teh.
- ²⁵Kareb lemulun nier negku, ideh situnga idi ngacé negku.
- ²⁶Ngedengan negku, O Tuhan Allahku; idi ngulun negku ngaceku awaMu luk lutep!
- ²⁷O Tuhan, maré bunu'ku kali' idi Iko mo' luk ngulun negku.
- ²⁸Ideh miak ngediman negku, iamo' Iko luk ngeperuan negku. Nima' lemulun luk ngedereh negku uen ngelaya', idi do' ui luk demulunMu mawang niat.
- ²⁹Nima' bunu'ku mepanu' ku igu'; idi nima' nedeh makai igu'deh mepad kudeng kuyu'.
- ³⁰Ui miak ngubur Tuhan dengan rayeh arod; idi ngubur Neneh bang tebubpun lun mula',
- ³¹ngaceku Ieh matar lemulun luk masi', idi muit neneh ratnan lemulun luk maré ukum maté kuanneh.

Nani Ubur 110

¹Kebala Tuhan kuan Raca'ku, "Tudo pa tinuehKu, pad Ui nganau' bunu'Mu pa liang kukudMu.

²Rat Sion Tuhan miak ngiuk lakan imetMu." KebalaNeh, "Do' Iko ngimet bunu'Mu."

³PupuMu miak mawang niat ngedengan Namu kareb Iko pebunu'. Anak adi'Mu luk deléi amé' Namu, mepad kudeng ipup kareb pekak, luk luun pegkung luk meligan.

⁴Tuhan nepebulung, idi Ieh na ngelaba bulungNeh: "Idi Iko ini Imam luk raked-raked, maya' dalam Melkisadak."

⁵Tuhan ineh pa tinuehMu; idi Ieh miak ngelaya' amung raca' kareb Ieh museh.

⁶Ieh miak ngacing ukum kuan amung pupu, pad su luk inandeh pebunu' mepanu' ku butung; Ieh miak ngelaya' amung raca' aput-put tana'.

⁷Raca'ku miak ngirup abpa' arur luk iring dalan, pad Ieh metueh idi tuped meraben.

Nani Ubur 111

¹Ngubur Tuhan! Ui miak ngubur Tuhan dengan amung niatku, bang tebubpun lun mula'.

²Amung-amung luk ruen Tuhan pelaba do! Amung lemulun luk mawang nait ku kekamen ineh sikal kali' ilungneh.

³Amung luk ruenNeh mepanu' ku ubur idi dita'; idi siriNeh meruked.

⁴Tuhan na nima' netau mekelupan kekamenNeh luk do'; Ieh mekatu idi méi'.

⁵Ieh maré akan kuan lemulun luk ngerayeh Neneh idi na mekelupan jani'Neh.

⁶Ieh nemaré tana' lun pupu baken kuandeh, pad ngegala' laludNeh kuan pupuNeh.

⁷Bang amung luk ruenNeh Ieh lutep idi mesiri; idi amung ukumNeh miak inan merapet.

⁸UkumNeh ineh meruked, dengan matu idi mesiri.

⁹Ieh nenguit ulun kuan pupuNeh, idi nenganau' aceh jani' luk meruked kuandeh. Tuhan ineh meligan idi melalud!

¹⁰Dalan ngalap ileh, ieh ineh ngerayeh Tuhan; Ieh maré ileh luk do' kuan amung lemulun luk maya' ukumNeh. Do' Ieh buren ruked-ruked!

Nani Ubur 112

¹Ngubur Tuhan! Samal kuan lemulun luk ngerayeh Tuhan, idi luk mawang niat maya' ukumNeh.

²Anakneh miak mebala bang tana' ineh; inul lemulun luk do' miak uen ngeperuan.

³Lun bang tetek ruma'neh mula' binaweh, idi do'neh macing ruked-ruked.

⁴Dacem pana' uen ngacang kuan lemulun luk do', ieh ineh kuan lemulun luk méi' idi luk mesiri.

⁵Samal kuan lemulun luk mekatu inan ngabit, luk ngatur kekammeneh dengan mesiri.

⁶Lemulun luk do' na tupu megagau; ieh miak uen ngerawé kidi-kidi.

⁷Na ieh matot ku bala luk dat, anunneh lutep, idi ieh merapet inan Tuhan.

⁸Na ieh merapang idi matot; ieh miak nier bunu'neh uen ngelaya'.

⁹Ieh mekatu maré kuan lun masi'; idi éi'neh meruked; ieh miak mebala idi buren.

¹⁰Lemulun luk dat nier ineh idi ideh museh; idi ideh pelaba gateh idi buro; luk piandeh na mekalapdeh ruked-ruked.

Nani Ubur 113

¹Ngubur Tuhan! Muyuh luk demulun Tuhan, ngubur ngadanNeh!

²NgadanNeh miak uen ngubur, rat nekini macing ruked-ruked!

³Do' ngadan Tuhan uen ngubur, rat pa busat aco macing pa acep aco!

- ⁴Tuhan ngimet amung pupu, rayehNeh meluun dita' ratnan langit.
- ⁵Na seburur pana' mepad kudeng Tuhan Allah tau; luk tudo su luk meluun medita',
- ⁶iamo' Ieh munel nier langit idi tana'.
- ⁷Ieh ngiding lun masi' rat bang abuh, idi nui lun luk melaya' ratnan derehdeh,
- ⁸idi maré nedeh ku rorum raca', ieh ineh raca' pupuNeh.
- ⁹Ieh ngedita' decur luk na anak bang ruma'neh; idi maré anak kuanneh, pad ieh mawang niat. Ngubur Tuhan!

Nani Ubur 114

- ¹Kareb pupu Israil neremuat rat bawang Masir, idi inul Yakub nenecan bawang lun pupu baken,
- ²Yahuda mangun ku pupu Tuhan luk meligan, idi Israil mangun ku imetNeh.
- ³Abpa' Pisui nenier ineh idi ieh neburo, idi Abpa' Yarden nekeket.
- ⁴Amung pegkung sikau' mepad kudeng amék, idi surud sikau' mepad kudeng dumba.
- ⁵Anun punneh iko neburo, O Abpa'? O Abpa' Yarden, ngudeh iko nekeket?
- ⁶O muyuh pegkung, ngudeh muyuh sikau'-sikau' mepad kudeng amék? Idi muyuh surud teh, ngudeh muyuh sikau' mepad kudeng dumba?
- ⁷O tana', do' iko megegker pa kiung Tuhan, ieh ineh pa kiung Allah Yakub,
- ⁸luk nganau' batu misu' ku takung, idi alig batu ku bued abpa'.

Nani Ubur 115

- ¹Baken kuan kai, O Tuhan, baken kuan kai, iamo' kuanMu sebuleng rayeh miak barén, ngaceku siri idi awaMu luk lutep.
- ²Ngudehké lun luk na manu ngitun nekai, "Iapehké Allah muyuh?"
- ³Allah tau déi' surga, Ieh nganau' luk pianNeh.
- ⁴Allah lun luk na manu inau' lemulun, ratnan pirak idi amas.

⁵Ideh inan tang, iamo' na ideh miak pebala; ideh inan mateh, iamo' na miak nier.

⁶Ideh inan lalid, iamo' na miak ninger; ideh inan icung, iamo' na miak muen.

⁷Ideh inan ticu', iamo' na miak ngakem; ideh inan kukud, iamo' na miak nalan; na ideh miak pebala anun-anun pana'.

⁸Do' amung lemulun luk nenganau' nedeh idi lemulun luk merapet nedeh, mangun mepad kudeng akang luk inau'deh!

⁹Do' merapet nan Tuhan, O lun Israil! Ieh luk ngedengan idi matar nemuyuh.

¹⁰Do' merapet nan Tuhan, O muyuh imam Allah! Ieh luk ngedengan idi matar nemuyuh.

¹¹Do' merapet nan Tuhan, amung muyuh luk sembayang Neneh, Ieh luk ngedengan idi matar nemuyuh.

¹²Tuhan ngerawé netau idi ngeperuan netau; Ieh miak ngeperuan pupu Israil, idi amung imam Allah.

¹³Ieh ngeperuan amung lemulun luk sembayang Neneh, do' luk rayeh idi luk isuut pana'.

¹⁴Do' Tuhan ngula' anak muyuh, idi anak inul muyuh pana'.

¹⁵Do' Tuhan luk nenganau' langit idi tana', ngeperuan nemuyuh!

¹⁶Langit ineh Tuhan kuan, iamo' Ieh nemaré tana' ini kuan lemulun.

¹⁷Baken lun naté ngubur Tuhan, idi lemulun luk amé' bang su luk inan até.

¹⁸Iamo' tau luk mulun maré ubur kuanNeh, rat nekini macing raked-raked. Ngubur Tuhan!

Nani Ubur 116

¹Ui mawa inan Tuhan, ngaceku Ieh ninger tawarku, idi ninger sembayanku.

²Anid kua'ku nawar Neneh, Ieh ninger negku.

³Até nemicet abetneh libutku, idi rapang até nacing negku; idi ui mepanu' ku tot idi dereh.

- ⁴Idi ui nenawar Tuhan, keburu'ku, "O Tuhan, ui mutuh Namu ngulun negku!"
- ⁵Tuhan ineh mawa, idi matu; idi Allah tau méi'.
- ⁶Tuhan matar nelun luk melaya'; kareb ui inan susa', Ieh nengulun negku.
- ⁷O niatku do' iko lutep, ngaceku Tuhan do' negku.
- ⁸Tuhan nengulun negku ratnan até; Ieh nengagka' tangi'ku, idi na nenima' negku uen ngelaya'.
- ⁹Idi ui miak nalan pa kiung Tuhan, bang tana' lun luk mulun.
- ¹⁰Na ui nugka' manu, sagan pana' ui nepebala, "Ui pelaba dereh,"
- ¹¹Idi bang susa'ku ui nepebala, "Seburur pana' nateh luk ku rapet."
- ¹²Anunké luk miak barénku kuan Tuhan, ku libal amung do'Neh negku?
- ¹³Ui nguit aceh baré luk rupen kuan Tuhan, idi ngubur Neneh ngaceku Ieh nengulun negku.
- ¹⁴Ui miak maré luk pinaji'ku Neneh, bang teubupun amung pupuNeh.
- ¹⁵Pelaba susa' kuan Tuhan, kareb seburur pupuNeh maté!
- ¹⁶Ui ini demulunMu, Tuhan; ui ngakem kuanMu, mepad kudeng tinanku. Iko pangeh nemuit negku.
- ¹⁷Ui miak maré aceh baré ubur kuanMu, idi nawar ngadanMu.
- ¹⁸Ui miak maré luk pijani'ku Namu, bang teubupun amung pupuMu,
- ¹⁹luun natad ruma'Mu, tunge' Yerusalim. Ngubur Tuhan!

Nani Ubur 117

- ¹Ngubur Tuhan, O amung-amung bawang! Ngubur Neneh, O amung-amung pupu!
- ²AwaNeh kuan tau ineh metueh, idi siriNeh meruked. Ngubur Tuhan!

Nani Ubur 118

- ¹Maré ubur kuan Tuhan, ngaceku Ieh luk do', idi awaNeh meruked.

- ²Do' pupu Israil pebala, "AwaNeh meruked."
- ³Do' amung imam Allah pebala, "AwaNeh meruked."
- ⁴Do' lemulun luk sembayang Neneh pebala, "AwaNeh meruked."
- ⁵Bang susa'ku ui nenawar Tuhan; Ieh nengua' putuhku idi nemuit negku.
- ⁶Tuhan idi denganku, na ui miak matot; anunké luk miak ruen lemulun kuanku?
- ⁷Tuhan luk ngedengan negku, idi ui miak nier bunu'ku uen ngelaya'.
- ⁸Meluun do' merapet inan Tuhan, ratnan merapet ku lemulun;
- ⁹meluun do' merapet inan Tuhan, ratnan merapet ku lun rayeh.
- ¹⁰Mula' bunu' libutku; iamo' dengan lalud Tuhan ui nengaté nedeh!
- ¹¹Ideh nengerieng negku, iamo' dengan lalud Tuhan ui nengaté nedeh!
- ¹²Ideh mepad kudeng tebikan libutku; iamo' ideh saget nabud naté mepad kudeng apui luk ngeseb budud; iamo' dengan lalud Tuhan ui nengaté nedeh!
- ¹³Ui lélé pinaté bunu'ku luk mesangit, iamo' Tuhan nengedengan negku.
- ¹⁴Tuhan nganau' negku melalud idi metueh; Ieh ineh Lun Nengulun negku!
- ¹⁵Ninger udub lemulun luk metueh, bang lepo pupu Allah, keburi'deh, "Lalud Tuhan luk metueh pangeh nenganau' ineh!
- ¹⁶Dengan laludNeh luk metueh, Ieh nemaré netau metueh bang bunu'!"
- ¹⁷Na ui miak maté imao' ui mulun, idi ui mada' luk inau' Tuhan.
- ¹⁸Ieh pangeh nengukum negku, iamo' na Ieh nnima' negku maté.
- ¹⁹Ngukab tanga' Ruma' Allah kuanku, idi ui miak semuet idi ngubur Tuhan!
- ²⁰Tanga' ini kuan Tuhan; lun luk matu mo' miak semuet maya' ineh!
- ²¹Ui ngubur Namu, O Tuhan, ngaceku Iko neninger negku, idi nemaré negku metueh!
- ²²Batu luk tila' lemulun luk mudut ruma', nangun ku batu lidung luk meraben.

- ²³Ini inau' Tuhan; idi ineh pelaba do' siren tau!
- ²⁴Pelaba do' aco luk biré Tuhan kuan tau; do' tau marot dengan mawang niat.
- ²⁵Ngulun nekai, O Tuhan, ngulun nekai! Maré nekai metueh, O Tuhan.
- ²⁶Allah ngeperuan lemulun luk macing bang ngadan Tuhan! Kai ngeperuan nemuyuh rat bang Ruma' Tuhan!
- ²⁷Tuhan ineh Allah; Ieh pelaba do' nekai. Do' muyuh nalan pekarur libut bubpun; idi do' muyuh ngimet angkat.
- ²⁸Iko Allahku, idi ui maré ubur Namu; ui miak mada' rayehMu.
- ²⁹Maré ubur kuan Tuhan, ngaceku Ieh do', idi awaNeh meruked.

Nani Ubur 119

- ¹Samal kuan lemulun luk na mesala', idi luk mulun maya' Surat Tuhan.
- ²Samal kuan lemulun luk maya' ukumNeh, luk maya' Neneh dengan amung niatdeh.
- ³Na ideh nganau' luk mesala', ngaceku ideh maya' dalam Tuhan.
- ⁴Iko nemaré ukumMu nekai, idi nengecuk nekai maya' ineh dengan lutep.
- ⁵Ui merapet negku miak nginita ukumMu, dengan lutep.
- ⁶Kudeng ui ngerawé amung ukumMu, idi ui na miak migu'.
- ⁷Kareb ui sibada' ukumMu luk matu, ui miak ngubur Namu dengan niat luk meligan.
- ⁸Ui miak maya' ukumMu; aleg necan negku!
- ⁹Kudeng apehké seburur anak adi' miak ngimet bururneh pad ieh meligan? Ieh ineh ratnan nginita ukumMu.
- ¹⁰Dengan amung niatku ui nakap Namu; ngimet negku pad ui na ngelaba ukumMu!
- ¹¹Ui ngimet ukumMu bang niatku, pad ui na nganau' sala' pa kiungMu.
- ¹²Ui ngubur Namu, O Tuhan: do' mada' dalamMu negku!

- ¹³Ui miak megéi' mada' amung ukum luk biréMu negku.
- ¹⁴Ui pelaba pian maya' bada'Mu, meluun ratnan ngalap mula' binaweh.
- ¹⁵Ui ngerawé balaMu; idi ngimet bada'Mu.
- ¹⁶Ui mawang niat ku ukumMu, idi na mekelupan ecukMu.
- ¹⁷Do' méi' negku luk demulunMu, pad ui miak mulun, idi maya' bada'Mu.
- ¹⁸Ngalat matehku, pad ui miak nier bada' luk pelaba do' bang SuratMu.
- ¹⁹Ui tudo bang tana' ini segageh mo' mepad kudeng sakai; aleg ngalum ukumMu negku!
- ²⁰Niatku geregan tu-tu kali' ukumMu kidi-kidi.
- ²¹Iko megateh nan lemulun luk medita' niat; idi kediman kuan lemulun luk lemubed ratnan ukumMu.
- ²²Muit negku ratnan dat idi kuyodeh, ngaceku ui pangeh nenginita ukumMu.
- ²³Lun rayeh pegayam sikal metueh rat negku. Ui luk demulunMu miak ngerawé bada'Mu.
- ²⁴UkumMu maré negku mawang niat; ideh mangun ku lun luk mada' negku.
- ²⁵Ui pangeh linaya' idi telubid luun tana'; ngulun negku teh, maya' jani'Mu!
- ²⁶Ui nengamo amung luk pangeh inau'ku, idi Iko nengor balaku; mada' dalamMu negku!
- ²⁷Mada' negku pad ui kali' ilung ukumMu, idi ui miak ngerawé bada'Mu luk pelaba do'.
- ²⁸Ui melaya' ngaceku susa' niatku; ngetueh negku, maya' jani'Mu.
- ²⁹Ngimet negku pad ui na meraruh, idi mada' ukumMu negku dengan éi'Mu.
- ³⁰Ui pangeh nemili' maya' dalamMu; idi ui pangeh nengerawé ukumMu.
- ³¹Ui pangeh nemaya' bada'Mu, O Tuhan, aleg nima' negku uen ngigu'!
- ³²Ui miak geregan maya' ukumMu, ngaceku Iko miak maré ileh luk meriput negku.

- 33Mada' negku, O Tuhan, ilung balaMu, pad ui miak maya' neneh kidi-kidi.
- 34Ngegala' ukumMu negku pad ui maya' ineh; ui miak nginita ukum ineh dengan amung niatku.
- 35Nguyut negku maya' ukumMu, ngaceku ineh luk pianku.
- 36Nganau' negku pian maya' ukumMu, meluun ratnan ngalap mula' binaweh.
- 37Ngimet negku pad ui na ngerawé luk na ulek; do' méi' negku, maya' jani'Mu.
- 38Maya' jani'Mu negku luk demulunMu, ieh ineh jani' luk ruenMu kuan lemulun luk maya' balaMu.
- 39Muit negku ratnan kuyo luk inanku matot; pelaba do' amung ukumMu!
- 40Ui pian maya' amung balaMu; ngaceku Iko luk matu, do' méi' negku!
- 41O Tuhan, mada' negku ratnan awaMu negku, idi ngulun negku maya' jani'Mu;
- 42pad ui ngor bala lemulun luk ngedat negku, ngaceku ui merapet ku balaMu.
- 43Ngedengan negku pad ui pebala luk matu kidi-kidi, ngaceku ui merapet inan ukumMu.
- 44Ui miak maya' ukumMu, macing ruked-ruked!
- 45Ui miak mulun dengan nepuit, ngaceku ui pian maya' ukumMu.
- 46Ui miak maré kali' ratnan balaMu kuan amung raca', idi ui na migu'.
- 47Ui mawang niat maya' ukumMu, ngaceku ui mawa ku ineh.
- 48Ui ngedita' idi mawa ku ukumMu, idi pian ngerawé bada'Mu.
- 49Do' ngerawé jani'Mu negku luk demulunMu; idi ineh maré negku merapet.
- 50Bang derehku pana' ui pangeh inubuk, ngaceku balaMu nemarké ulun negku.
- 51Lemulun luk medita' niat nesitunga negku, iamo' na ui nelemubed ratnan SuratMu.

- 52Ui ngerawé bada' luk bilaMu negku mon, idi ineh mangun ku ubuk kuanku, Tuhan.
- 53Ui pelaba gateh, kareb ui nier lemulun luk dat ngelaba ukumMu.
- 54Iapeh-iapeh su inanku tudo, ui nganau' menani ratnan ukumMu.
- 55Kareb medacem ui ngerawé Namu, O Tuhan, idi ui ngerawé balaMu.
- 56Ini awang niatku: ui maya' ukumMu.
- 57Iko luk pianku, O Tuhan; ui pejani' maya' balaMu.
- 58Ui mutuh Namu dengan amung niatku: do' méi' negku, maya' jani'Mu!
- 59Ui pangeh nengerawé kekamenku, idi pejani' maya' ukumMu.
- 60Dengan na nganét, ui petacu maya' ukumMu.
- 61Lemulun luk dat micet abetdeh libutku, iamo' na ui mekelupan balaMu.
- 62Kareb tangal dacem ui kulat ngubur Namu ngaceku ukumMu luk matu.
- 63Ui lun ruruh amung lemulun luk maya' Namu, idi amung luk maya' ukumMu.
- 64O Tuhan, tana' ini mepanu' ku awaMu luk luteh; do' mada' amung ukumMu negku!
- 65O Tuhan, Iko pangeh nemaya' jani'Mu, idi Iko luk do' negku, luk demulunMu.
- 66Maré negku do' ileh, idi mada' negku, ngaceku ui merapet inan ukumMu.
- 67Kareb nateh Iko nengukum negku, megéi' ui neraruh, iamo' nekini ui maya' balaMu.
- 68Iko pelaba do' idi mekatu; mada' balaMu negku!
- 69Lemulun luk medita' niat nengedat negku dengan mebalih, iamo' ui maya' balaMu dengan amung niatku.
- 70Lemulun ini na mileh, iamo' ui mawang niat ku balaMu.
- 71UkumMu negku ineh do', ngaceku ineh nenganau' negku sibada' ku balaMu.

- ⁷²Bala luk barénMu negku meluun raga ratnan amas idi pirak.
- ⁷³Iko nemudut negku, idi Iko matar negku, maré ileh negku, pad ui miak sibada' ukumMu.
- ⁷⁴Amung lemulun luk matot Namu mawang niat, kareb ideh nier negku, ngaceku ui merapet ku jani'Mu.
- ⁷⁵O Tuhan, ui kali' amung ukumMu mesiri, idi Iko nengukum negku, ngaceku Iko lutep maya' jani'.
- ⁷⁶Ngubuk negku ku awaMu luk lutep, maya' jani'Mu negku luk demulunMu.
- ⁷⁷Do' méi' negku, pad ui miak mulun, ngaceku ui mawang niat ku balaMu.
- ⁷⁸Nima' lemulun luk medita' niat uen ngigu'; ngaceku ideh nengadu' negku dengan mebalih; iamo' ui pian ngerawé ukumMu.
- ⁷⁹Nima' lemulun luk matot Namu amé' negku, idi lemulun luk kali' bada'Mu.
- ⁸⁰Nima' negku maya' ukumMu dengan niat luk mesiri, pad ui na miak uen ngigu'.
- ⁸¹O Tuhan, ui merur nginulat Namu ngulun negku; ui merapet ku balaMu.
- ⁸²Matehku merur nginulat jani'Mu, idi ui ngitun, "Idan Iko miak ngedengan negku?"
- ⁸³Kubilku mekeribet mepad kudeng seréi' kubil luk pangeh tila', iamo' na ui mekelupan ukumMu.
- ⁸⁴Tuda' ioké ui nginulat Namu? Idanké Iko ngukum lemulun luk ngedereh negku?
- ⁸⁵Lemulun luk medita' niat luk na maya' balaMu, pangeh nengukat lubang inandeh ngakem negku.
- ⁸⁶Amung ukumMu inan merapet, Lemulun ngedereh negku dengan mebalih. Ngedengan negku!
- ⁸⁷Ideh lélé ngaté negku, iamo' na ui mekelupan bada'Mu.

- ⁸⁸Do' méi' negku dengan awaMu luk lutep, pad ui miak maya' amung ukumMu.
- ⁸⁹BalaMu, Tuhan, meruked idi lutep bang surga.
- ⁹⁰Iko lutep maya' jani'Mu macing ruked-ruked; Iko nenganau' tana' lutep bang su luk inanneh.
- ⁹¹Amung-amung luk pinudutMu lutep macing aco sini, ngaceku ukumMu, ngaceku ideh luk demulunMu.
- ⁹²Kudeng balaMu na nengawang niatku, kali' rungen ui naté ngaceku ukumMu.
- ⁹³Na ui mekelupan bada'Mu, ngaceku bada' ineh ngulun negku.
- ⁹⁴Ui Iko kuan — ngulun negku! ngaceku ui nakap ukumMu.
- ⁹⁵Lemulun luk dat sikal ngaté negku, iamo' ui miak ngerawé balaMu.
- ⁹⁶Ui pangeh nenier idi amung-amung luk baken miak mabud, iamo' balaMu meruked.
- ⁹⁷Ui mawa ku balaMu, idi ngerawé neneh tebaco-tebaco!
- ⁹⁸UkumMu megéi' idi denganku, idi nganau' negku meluun ileh ratnan amung bunu'ku.
- ⁹⁹Ui pelaba do' ileh kali', meluun ratnan amung guruku, ngaceku ui ngerawé bada'Mu.
- ¹⁰⁰Ui meluun ileh ratnan lun mengered, ngaceku ui maya' ukumMu.
- ¹⁰¹Ui na maya' dalan luk dat, ngaceku ui pian maya' balaMu.
- ¹⁰²Na ui mekelupan bada'Mu, ngaceku Iko luk nemada' negku.
- ¹⁰³Pelaba do' én bada'Mu, meluun paci' ratnan duru' tebikan!
- ¹⁰⁴Ui mileh ratnan ukumMu, pad ui megateh inan amung lawé luk dat.
- ¹⁰⁵BalaMu ineh lapung, ku acang dalanku.
- ¹⁰⁶Ui miak nginita jani'ku, idi maya' bada'Mu luk matu.

- 107Pelaba derehku, O Tuhan; ngulun negku, maya' jani'Mu!
- 108O Tuhan, ngalap sembayang uburku, idi mada' ukumMu negku.
- 109Sagan pana' ui nalan aga'-aga' até, na ui nekelupan balaMu.
- 110Lemulun luk dat tumen abpung kuanku, iamo' na ui nengelaba ukumMu.
- 111UkumMu ineh binawehku luk meruked, idi ku awang niatku.
- 112Ui pian maya' dalanMu, pad macing maté.
- 113Ui megateh inan lemulun luk na lutep maya' Namu, iamo' ui mawa ku balaMu.
- 114Iko Lun Matar idi Batu Libungku; ui merapet ku jani'Mu.
- 115Buro rat negku, O muyuh luk mesala'! Ui sikal maya' amung ukum Allahku.
- 116Ngetueh negku, maya' jani'Mu, pad ui miak mulun; aleg maré negku migu' bang rapetku!
- 117Ngimet negku, pad ui miak mulun, idi nginita amung ukumMu.
- 118Iko nala' amung lemulun luk na maya' ukumMu; pad amung gayam idi salukdeh mo'-mo'.
- 119Amung lemulun luk dat mepad kudeng arap sirenMu; ngaceku ineh ui mawa ku bada'Mu.
- 120Ui pelaba tot Namu, idi ku ukumMu pana'.
- 121Ui pangeh nenganau' luk mesiri idi luk matu; aleg maré negku inan bunu'ku!
- 122Do' Iko pejani' ngedengan demulunMu; aleg nima' lemulun luk medita' niat ngesusa' negku!
- 123Matehku merur nginulat ulunMu, idi puit luk pinaji'Mu.
- 124Do' nganau' luk petulu kuanku, maya' awaMu luk lutep, idi mada' amung ukumMu negku.

- 125Ui ini demulunMu; maré negku mileh, pad ui do' kali' bada'Mu.
- 126O Tuhan, tarekneh pangeh nacing Iko miak ngukum, ngaceku lemulun na maya' balaMu!
- 127Ui mawa ku amung ukumMu, meluun ratnan amas luk meraga.
- 128Ngaceku ineh ui maya' amung bada'Mu; idi ui megateh inan amung dalam luk dat.
- 129Pelaba' do' amung bada'Mu; ui maya' bada'Mu dengan amung niatku.
- 130Bada'Mu luk linio maré acang; idi maré ileh kuan lemulun luk na bida'.
- 131Ui pelaba paring, ngaceku ngerawé ukumMu.
- 132Lumi negku idi méi' negku, mepad kudeng Iko méi' nelun luk mawa Namu.
- 133Ngimet negku pad ui na mebpeh, maya' jani'Mu; aleg nima' negku uen luk dat ngelaya'.
- 134Muit negku rat nelun luk ngedereh negku, pad ui miak maya' ukumMu.
- 135Ngedengan negku ku peruanMu, idi mada' ukumMu negku.
- 136Ui pelaba tangi', ngaceku lemulun na maya' balaMu.
- 137Tuhan, Iko luk matu, idi ukumMu mesiri!
- 138Amung bada' luk biréMu matu idi mesiri.
- 139Usehku mepad kudeng apui, ngaceku bunu'Mu na ngerawé ukumMu.
- 140Jani'Mu ineh matu! idi ui pelaba awa ku ineh!
- 141Ui ini lemulun luk dat idi na mebala; iamo' na ui mekelupan bada'Mu.
- 142SiriMu ineh meruked, idi balaMu matu.
- 143Sagan pana' ui mesusa' idi medereh, iamo' ukumMu ngawang niatku.
- 144Bada'Mu mesiri macing ruked-ruked; maré negku mileh kali', pad ui miak mulun.
- 145Ui nawar Namu dengan amung niatku; ngua' sembayangku, O Tuhan, idi ui miak maya' ukumMu.

- 146Ui nawar Namu; ngulun negku, pad ui maya' bada'Mu.
- 147Kareb nateh aco masat ui nawar Namu mutuh pedengan; ui merapet inan jani'Mu.
- 148Ui na medacep mateh kedangan-kedangan, ngaceku ngerawé bada'Mu.
- 149O Tuhan, ninger negku, maya' awaMu luk lutep; idi nginita ulunku, maya' éi'Mu!
- 150Lemulun luk dat luk ngedereh negku ngerieng negku, ieh ineh lemulun luk na tupu maya' balaMu.
- 151Iamo' Tuhan, Iko muneng negku, idi amung jani'Mu matu.
- 152Mon ui nekali' ratnan bada'Mu; Iko nengeletep neneh macing ruked-ruked.
- 153Nier derehku, idi ngulun negku, ngaceku na ui mekelupan balaMu.
- 154Do' ngedengan idi muit negku; ngulun negku, maya' jani'Mu!
- 155Lemulun luk dat na miak uen ngulun, ngaceku na ideh maya' ukumMu;
- 156iamo' éi'Mu Tuhan, pelaba rayeh, do' ngegala' éi'Mu idi ngulun negku.
- 157Mula' lemulun ngedereh negku idi sikal metueh rat negku, iamo' ui lutep maya' ukumMu.
- 158Kareb ui nier lemulun luk nelemubed, ui pelaba dat niat, ngaceku ideh na maya' balaMu.
- 159O Tuhan, ui pelaba gregan ku bada'Mu! Ngulun negku, maya' awaMu luk lutep.
- 160Amung bada' bang SuratMu ineh matu, idi amung ukumMu luk mesiri ineh meruked.
- 161Lemulun luk metueh ngedereh negku dengan na punneh, iamo' balaMu luk teruayenku.
- 162Pelaba awang niatku ku jani'Mu, mepad kudeng lemulun luk ngalap binaweh luk meraga.
- 163Ui pelaba gateh inan amung-amung balih, iamo' ui mawa inan balaMu.

- 164Tuda' kua' seaco ui ngubur Namu, ngaceku ukumMu luk mesiri.
- 165Lemulun luk mawa ku balaMu do' udeng, idi na luk inandeh metebaceng.
- 166O Tuhan ui nginulat Namu ngulun negku, idi ui nganau' luk dukenMu.
- 167Ui maya' balaMu; ui mawa ku amung ineh dengan amung niatku.
- 168Ui maya' amung ukum idi bada'Mu; idi Iko kali' amung luk ruenku.
- 169O Tuhan, nima' tawarku mutuh pedengan macing Namu! Maré ileh negku maya' jani'Mu.
- 170Ninger sembayanku, idi ngulun negku maya' jani'Mu.
- 171Ui ngubur Namu kidi-kidi, ngaceku Iko mada' dalamMu negku.
- 172Ui menani ratnan balaMu, ngaceku amung ukumMu mesiri.
- 173Do' megéi' temina' ngedengan negku, ngaceku ui maya' ukumMu.
- 174O Tuhan, ui pelaba geregan ku ulunMu! Idi ukumMu ngawang niatku.
- 175Maré ulun negku, pad ui ngubur Namu, idi nima' bada'Mu ngedengan negku.
- 176Ui meraruh mepad kudeng aceh dumba luk netutu'; do' amé' nakap negku luk demulunMu, ngaceku na ui mekelupan amung ukumMu.

Nani Ubur 120

- 1Kareb ui inan susa' ui nenawar Tuhan, idi Ieh nengua' tawarku.
- 2O Tuhan, muit negku ratnan lemulun luk naluk idi mebalih!
- 3O muyuh luk mebalih, anunké luk miak ruen Allah kuan muyuh? Kudeng apehké Ieh ngukum nemuyuh?
- 4Ku gaman lun mesangit luk metadem idi bareh apui!
- 5Ui pelaba susa' tudo arang muyuh, mepad kudeng tudo arang lun Mesek idi lun Kedar!
- 6Pelaba ioku tudo arang lemulun luk ara' pedo'.
- 7Kareb ui pebala ratnan pedo', ideh pian pebunu'.

Nani Ubur 121

- ¹Ui tukag idi nier pegkung; rat iapehké pedengan macing negku?
- ²Pedenganku macing ratnan Tuhan, luk nemudut langit idi tana'.
- ³Do' Ieh na nima' negku mebpeh; do' Lun Matar negku na medacep mateh!
- ⁴Lun luk Matar Israil na medacep mateh idi rudap!
- ⁵Tuhan miak matar namu; Ieh idi iringmu.
- ⁶Aco na miak ngurat namu kareb macang, idi bulan na ngurat namu kareb medacem.
- ⁷Tuhan miak matar namu ratnan amung-amung dereh; idi matar namu do'-do'.
- ⁸Ieh miak matar namu bang anid lawému, rat nekini macing ruked-ruked.

Nani Ubur 122

- ¹Pelaba awang niatku kareb ideh nepebala negku, "Do' tau amé' ruma' Tuhan."
- ²Idi nekini kai tungé', tuped bang libung bawang Yerusalim!
- ³Yerusalim pangeh pinudut baruh, dengan pudut luk do' ayu idi do' lalad teh!
- ⁴Idi amung pupu Israil, macing bang bawang ini, maré ubur kuan Tuhan, mepad kudeng luk icukNeh nedeh.
- ⁵Idi ieni teh raca'-raca' lun Israil netudo idi nemutut ukum kuan anak itinneh.
- ⁶Sembayang mutuh do' udeng kuan bawang Yerusalim! "Nima' lemulun luk mawa namu uen ngeperuan!
- ⁷Nima' lemulun do' udeng bang libungMu, idi do' ulun bang ruma' raca'Mu."
- ⁸Ngaceku lun rorumku idi lun denganku, ui pebala kuan Yerusalim, "Awang kuanmu!"
- ⁹Ngaceku ruma' Tuhan, Allah tau, ui mutuh peruan kuanmu.

Nani Ubur 123

¹O Tuhan, ui tukag nier Namu, déi' surga, su luk inanMu ngimet.

²Mepad kudeng demulun luk merapet inan lun luk kuan neneh, idi decur luk merapet inan decur luk kuan neneh, kudeng ineh teh kai merapet Namu, O Tuhan Allah kai pad Iko méi' nekai.

³Méi' nekai, O Tuhan, méi' nekai, ngaceku ideh nengedat nekai.

⁴Pelaba io kai inan lun do' nesitunga, idi lun luk medita' niat teh!

Nani Ubur 124

¹Kudeng Tuhan na idi dengan tau, Israil miak pebala,

²"Kudeng Tuhan na idi dengan tau, kareb bunu' tau sikal metueh rat netau,

³kali' rungen ideh nelen netau mulun, ngaceku ideh pelaba gateh netau;

⁴idi abpa' nganud netau, idi ngened netau,

⁵idi teh tau manud kareb tubu' belen."

⁶Do' tau ngubur Tuhan, luk na nenima' bunu' tau ngaté netau.

⁷Tau mepad kudeng suit luk nepuit ratnan abpungneh, abpung nepulut, idi tau mepuit!

⁸Pedengan tau macing ratnan Tuhan, luk menudut langit idi tana'.

Nani Ubur 125

¹Lemulun luk merapet inan Tuhan mepad kudeng Pegkung Sion, luk na miak megio idi bebuen.

²Mepad kudeng pegkung luk libut Yerusalim, kudeng ineh teh Tuhan libut pupuNeh, rat nekini macing raked-raked.

³Lemulun luk dat na miak ngimet tana' lun luk matu raked-raked; pad lun luk matu na nganau' luk dat.

⁴O Tuhan, nganau' luk do' kuan lemulun luk nganau' luk do', idi lemulun luk maya' ukumMu.

⁵Iamo' ngukum lemulun luk teketed rat Namu, dengan lemulun luk nganau' luk dat! Awang kuan Israil!

Nani Ubur 126

¹Kareb Tuhan nenguit netau lemubed iné' Sion, tau mepad kudeng nenginupi!

²Tau meriruh idi menani dengan mawang niat! Idi pupu baken nepebala, "Tuhan nenganau' kekamen luk rayeh kuandeh!"

³Matu Ieh nenganau' kekamen luk rayeh kuan tau' idi tau pelaba awang niat!

⁴O Tuhan, nguit nekai muli' amé' bawang kai, mepad kudeng udan nganau' abpa' bang su luk nekeket.

⁵Nima' lemulun luk nenangi' kareb ideh nenibu, ngeranih dengan mawang niat!

⁶Lemulun luk nenangi' kareb ideh nenguit pemaradeh, miak lemubed idi menani dengan mawang niat, nguit peranihdeh.

Nani Ubur 127

¹Kudeng Tuhan na mudut ruma', kekamen lun luk mudut na ulekneh; kudeng Tuhan na matar bawang, kali' rungen na ulek kuan lemulun luk matar.

²Na ulekneh metueh ngakem nakap akan pad muka kulat idi mio rudap. Ngaceku Tuhan maré kuan lemulun luk inanNeh mawa, laba' ideh rudap.

³Anak tau, ieh ineh baré Tuhan; idi ineh peruan luk matu.

⁴Anak deléi luk uned tuehneh, mepad kudeng ileb luk bang palad lun luk pebunu'.

⁵Samal kuan lemulun luk mula' ileb kudeng ineh! Na ieh miak migu', kareb ieh papu' bunu'neh bang su luk inan besara'.

Nani Ubur 128

¹Samal kuan lemulun luk matot inan Tuhan, idi luk maya' ukumNeh!

²Iko miak ngalap petap akan; idi ngalap peruan dengan mawang niat.

³Awanmu mepad kudeng anggur luk kebua' bang ruma'mu, idi anakmu mepad kudeng kayuh saitun libut téngmu.

⁴Lemulun luk maya' Tuhan kali' rungen uen ngeperuan kudeng ini.

⁵Do' Tuhan ngeperuan namu rat Sion! Do' iko nier Yerusalim uen ngeperuan raked ulunmu!

⁶Do' iko mulun pad iko nier mupunmu! Awang kuan Israil!

Nani Ubur 129

¹O Israil, do' mada' ratnan kudeng apeh bunu'mu pangeh nengedereh namu rat karebmu isuut!

²"Rat karebku isuut, bunu'ku pelaba ucet ngedereh negku, iamo na ui nelaya' inau'deh.

³Ideh nengurat ketedku, mepad kudeng lati' luk rinadu.

⁴Iamo' Tuhan Sebuleng Luk Matu, nemuit negku ratnan taban."

⁵Do' amung lemulun luk megateh inan Sion uen ngelaya' idi uen ngusu!

⁶Do' ideh mepad kudeng uduh luk mulun luun apo, idi mekarang kareb nateh ieh bebuten.

⁷Na lun ngalap neneh, idi ngamung neneh.

⁸Lemulun luk lemaba na pebala, "Do' Tuhan ngeperuan namu! Kai ngeperuan namu bang ngadan Tuhan!"

Nani Ubur 130

¹Bang susa'ku ui nawar Namu, O Tuhan.

²Ninger tangi'ku, O Tuhan, idi ninger tawarku mutuh pedengan!

³Kudeng Iko ngiap sala' kai, idéké luk mepuit ratnan ukum.

⁴Iamo' Iko maré do' nekai, pad kai matot Namu.

⁵Ui nginulat pedengan ratnan Tuhan dengan amung niatku, idi merapet ku balaNeh.

⁶Ui nginulat Tuhan dengan amung niatku, meluun ratnan lemulun luk matar nginulat aco macang.

⁷O Israil do' merapet inan Tuhan, ngaceku awaNeh lutep, idi Ieh megéi' sikal ngulun.

⁸Ieh miak ngulun pupuNeh lun Israil ratnan amung sala'deh.

Nani Ubur 131

¹O Tuhan, na ui medita' niat, idi mesido' bala. Na ui ngerawé kekamen luk rayeh, idi gayam luk pelaba dalem kuanku.

²Iamo' ui do' udeng idi mawang niat, mepad kudeng anak luk telubid bang abin tinanneh.

³O Israil, do' merapet inan Tuhan, rat nekini macing raked-raked!

Nani Ubur 132

¹O Tuhan, aleg Iko kelupan ni Daud idi amung luk inau'neh.

²Do' ngarawé jani' luk pijani'neh Namu, O Tuhan Allah Israil luk Melalud;

³"Na ui pian muli' idi telubid;

⁴na ui pian ucu' idi rudap,

⁵pad ui kali' aceh su luk inan Tuhan, Allah Israil Luk Melalud miak mudeng."

⁶Tau neninger ratnan Pati' Pejani' déi' Baitlahim, idi nekali' neneh déi' lati' Yaar.

⁷Keburi' tau, "Do' tau amé' ruma' Tuhan, idi sembayang pa atun kerusiNeh!"

⁸Amé' bang ruma'Mu, Tuhan dengan Pati' Pejani'Mu ineh, ieh ineh tanu' laludMu, idi mudeng su ineh macing raked-raked.

⁹Do' amung imam mada' ratnan Iko ngulun pupuMu; do' amung pupuMu ngitang dengan mawang niat!

¹⁰Iko nenganau' aceh jani' kuan demulunMu Daud; aleg nala' raca' luk pinili'Mu, O Tuhan!

¹¹Iko nenganau' aceh bulung kuan Daud, idi na sikal ngelubed neneh: "Ui nganau' sebuleng anakmu ku raca', idi Ieh miak ngimet ku libalmu.

¹²Kudeng anak-anakmu lutep maya' jani'Ku. idi maya' ukum luk barénKu nedeh, idi anakdeh pana' miak mangun ku raca' macing ruked-ruked."

¹³Tuhan pangeh nemili' Sion; idi Ieh pian tudo déi':

¹⁴"Ui pian tudo idi ngimet ieni ruked-ruked.

¹⁵Ui sikal maré kuan Sion amung luk pianneh; idi maré akan luk petap kuan lemuluneh luk masi'.

¹⁶Ui pian ngeperuan imamneh bang amung luk ruendeh, pad pupuneh menani idi ngitang dengan mawang niat.

¹⁷Ieni, Ui miak naganau' aceh inul Daud mangun ku aceh raca' luk rayeh; Ui nginita imet raca' luk pinili'Ku.

¹⁸Ui miak ngigu' bunu'neh, iamo' imetneh miak uen ngeperuan idi iuk amé' rayeh."

Nani Ubur 133

¹Pelaba do' idi pelaba awang niat, pupu Allah luk mepamung mepad kudeng denganak!

²Ieh ineh mepad kudeng umau saitun luk meraga, luk temepek rat luun uluh idi buluh tang Arun, amé nan dier kuyu'neh.

³Ieh ineh mepad kudeng ipup luk déi' Pegkung Hermon, luk ngeba' amung surud déi' Sion. Su ineh Tuhan nepejani' maré peruanNeh, ieh ineh ulun luk meruked.

Nani Ubur 134

¹Amé', ngubur Tuhan, O amung demulunNeh, idi amung luk sembayang bang Ruma'Neh kareb medacem.

²Ngegenang ticu'mu kareb sembayang bang Ruma' Allah, idi ngubur Tuhan!

³Do' Tuhan luk nemudut langit idi tana', ngeperuan namu rat Sion.

Nani Ubur 135

- ¹Ngubur Tuhan! Ngubur ngadanNeh, O amung muyuh luk demulun Tuhan,
- ²luk tupid bang ruma' Tuhan, bang Ruma' Allah tau luk meligan.
- ³Ngubur Tuhan, ngaceku Ieh do'; menani ngubur ngadanNeh, ngaceku Ieh méi'.
- ⁴Ieh nemili' Yakub kuanNeh, idi nemili' pupu Israil mo' sebuleng kuanNeh.
- ⁵Ui kali' Tuhan tau ineh rayeh, meluun rayeh ratnan amung allah baken.
- ⁶Ieh miak nganau' anun-anun luk pianNeh bang langit idi bang tana', idi bang amung-amung abpa' pana'.
- ⁷Ieh nguit laput rat iring tana'; idi nganau' kilep ku barui, idi nguit bui rat bang lubangneh.
- ⁸Ieh nengaté amung anak luk atun déi' Masir, do' lemulun idi aya'deh pana'.
- ⁹Su ineh Ieh nenganau' tanu' idi kekamen luk inan mawa, pa kiung raca' idi amung lun rayehneh.
- ¹⁰Ieh nengusag mula' bawang, idi negaté amung raca' luk metueh.
- ¹¹Sihon, raca' lun Amori, Og, raca' bawang Basan, idi amung raca' déi' bawang Kanaan.
- ¹²Ieh nemaré tana'deh kuan pupuNeh; ieh ineh kuan lun Israil.
- ¹³O Tuhan, Iko miak tetanen Allah macing raked-raked; idi amung inul miak ngerawé Namu.
- ¹⁴Tuhan miak méi' inan pupuNeh; Ieh miak muit demulunNeh.
- ¹⁵Akang lun luk na manu inau' lemulun ratnan pirak idi amas.
- ¹⁶Ideh inan tang, iamo' na miak pebala, ideh inan mateh, iamo' na miak nier.
- ¹⁷Ideh inan lalid, iamo' na miak ninger, ngaceku ideh na inan niat.
- ¹⁸Do' lemulun luk nenganau' nedeh idi lemulun luk merapet nedeh, mangun mepad kudeng akang luk inau'deh!

¹⁹Ngubur Tuhan, O muyuh lun Israil; ngubur Neneh, amung muyuh imam Allah!

²⁰Ngubur Tuhan, O muyuh lun Liwi; ngubur Neneh, amung muyuh luk matot Neneh!

²¹Ngubur Tuhan déi' Sion, idi ruma'Neh déi' Yerusalim. Ngubur Tuhan!

Nani Ubur 136

¹Maré ubur kuan Tuhan, ngaceku Ieh do', idi awaNeh meruked.

²Maré ubur kuan Allah luk meluun rayeh ratnan amung-amung allah; idi awaNeh meruked.

³Maré ubur kuan Tuhan luk meluun melalud ratnan amung-amung tuhan; idi awaNeh meruked.

⁴Ieh sebuleng mo' nganau' kekamen luk nan mawa; idi awaNeh meruked.

⁵Dengan ilehNeh, Ieh nenganau' langit; idi awaNeh meruked.

⁶Idi Ieh nemudut tana' luun abpa'; idi awaNeh meruked.

⁷Ieh nenganau' aco idi bulan; idi awaNeh meruked;

⁸idi aco ngacang kareb macang; idi awaNeh meruked;

⁹bulan idi gituen ngacang kareb medacem; idi awaNeh meruked.

¹⁰Ieh nengaté anak deléi lun Masir luk atun; idi awaNeh meruked.

¹¹Ieh nenguyut nelun Israil remuat rat bang bawang Masir; idi awaNeh meruked;

¹²dengan tueh idi lalud ticu'Neh, idi awaNeh meruked;

¹³Ieh nengeket Abpa' Pisui, su dalandeh, idi awaNeh meruked;

¹⁴idi Ieh nenguyut pupuNeh guta ineh, idi awaNeh meruked;

¹⁵Ieh nengened raca' Masir dengan bawehneh; idi awaNeh meruked.

¹⁶Ieh nenguyut pupuNeh maya' su luk ali-ali; idi awaNeh meruked.

¹⁷Ieh nengaté amung raca' luk metueh; idi awaNeh meruked.

- ¹⁸Ieh nengaté amung raca' luk mebala; idi awaNeh meruked;
- ¹⁹Sihon, raca' lun Amori; idi awaNeh meruked;
- ²⁰idi Og, raca' bawang Basan' idi awaNeh meruked.
- ²¹Ieh nemaré tana'deh kuan pupuNeh; idi awaNeh meruked;
- ²²Ieh nemaré ineh kuan demulunNeh, Israil; idi awaNeh meruked.
- ²³Na Ieh nekelupan netau kareb tau linaya'; idi awaNeh meruked;
- ²⁴Ieh nemuit netau ratnan bunu' tau; idi awaNeh meruked.
- ²⁵Ieh nemaré akan kuan lemulun idi pung; idi awaNeh meruked.
- ²⁶Maré ubur kuan Allah Surga; idi awaNeh meruked.

Nani Ubur 137

- ¹Kareb tau netudo tangeb Abpa' Babil, tau nenangi' kareb tau nengerawé Sion.
- ²Idi tau nengacang giula' tau luun angkat bulu' luk iring tangeb.
- ³Lemulun luk nenaban netau nengecuk netau menani, idi marot sirendeh; "Do' menani aceh nani ratnan Sion kuan kai!"
- ⁴Kudeng apéh tau miak menani aceh nani Tuhan bang bawang lun pupu baken?
- ⁵Nima' negku na mileh nateg giula' teh, kudeng ui kelupan namu, O Yerusalim!
- ⁶Nima' negku na mileh menani teh, kudeng ui na ngerawé namu, idi na ngerawé namu mangun ku awangku luk meluun rayeh!
- ⁷O Tuhan, do' ngerawé luk inau' lun Edom, kareb Yerusalim ilap lun Babil, keburideh, "Ngusag neneh, kidem-kidem!"
- ⁸O Babil, iko miak sagen! Samal kuan lemulun luk ngua' amung luk inau'mu nekai;
- ⁹luk ngalap anakmu idi mabpet nedeh luun batu.

Nani Ubur 138

¹O Tuhan, ui ngubur Namu dengan amung niatku; ui menani ngubur Namu pa kiung allah lun pupu baken.

²Ui tekeradung sium pa ruma'Mu luk meligan, idi ngubur ngadanMu, ngaceku Iko mawa, idi lutep maya' jani', ngaceku Iko pangeh nengegala' ratnan ngadanMu idi ukumMu meluun rayeh.

³Iko nengor balaku, kareb ui nenawar Namu; dengan tuehMu sebuleng Iko nengetueh negku.

⁴O Tuhan, amung raca' luk bang tana' ini miak ngubur Namu, ngaceku ideh pangeh neninger amung jani'Mu.

⁵Ideh miak menani ratnan luk inau' Tuhan, idi ratnan Allah luk pelaba rayeh.

⁶Sagan tu pana' Tuhan luk Meluun Dita', iamo' Ieh méi' nelun masi', idi kali' lemulun luk medita' niat.

⁷Kareb inan susa' ngelibut negku, Iko nginita negku dengan do'; Iko metueh ratnan bunu'ku luk megateh, idi muit negku dengan laludMu.

⁸Iko pian nganau' amung-amung luk pijani'Mu negku; O Tuhan, awaMu lutep macing raked-raked. Do' mangeh kekamen luk tinimunMu.

Nani Ubur 139

¹O Tuhan, Iko pangeh nenutun negku, idi Iko kali' negku.

²Iko kali' amung-amung luk ruenku; idi kali' amung terawéku rat mado.

³Iko nier negku, kareb ui nalan idi kareb ui tudo; Iko kali' amung-amung luk ruenku.

⁴Kareb nateh ui pebala, Iko kali' luk belénku.

⁵Iko idi iringku, idi matar negku dengan laludMu.

⁶Ui mawa ngaceku ilehMu luk kudeng ineh, idi ineh pelaba ikat kuanku.

⁷Iapehké ulekku buro ratnan RohMu? Iapehké ulekku buro rat pa kiungMu?

- ⁸Kudeng ui amé' déi' surga, Iko idi déi'; kudeng ui amé' bang tana' su luk inan até, Iko idi déi' teh.
- ⁹Kudeng ui temulud amé' pa busat aco, idi tudo mado pa acep aco,
- ¹⁰Iko idi déi' pad nguyut negku, idi ngedengan negku.
- ¹¹Ui miak mutuh dacem ngelinged negku, idi mutuh acang misu' ku dacem,
- ¹²iamo' dacem na medacem sirenMu, idi dacem macang mepad kudeng acang aco. Dacem idi acang mepad sirenMu.
- ¹³Iko nenganau' amung bururku; idi nengamung negku bang nakan tinanku.
- ¹⁴Ui ngubur Namu, ngaceku Iko luk inan matot; amung kekamenMu melalud idi inan mawa. Ui kali' ineh dengan amung niatku.
- ¹⁵Iko nenier tulangku pegatum, ulai-ulai bang nakan tinanku, kraeb ui temubu' déi' dengan na melagan.
- ¹⁶Iko nenier negku kareb nateh ui tinganak. Tarek luk litep kuanku, pangeh inayud bang suratMu, kareb nateh ui tinganak.
- ¹⁷O Allah, terawéMu pelaba ula', idi pelaba ikat kuanku!
- ¹⁸Kudeng ui ngiap nedeh, ideh meluun ula' ratnan bada. Kudeng ui kulat, idi teh Iko denganku.
- ¹⁹O Allah, ui pelaba pian Namu ngaté lemulun luk dat! Ui pelaba pian lemulun luk dat buro rat negku!
- ²⁰Ideh ngedat Namu, idi nguyo ngadanMu.
- ²¹O Tuhan, ui pelaba gateh inan lemulun luk megateh Namu! Ui megateh inan lemulun luk sikal metueh rat Namu!
- ²²Gatehku petap kuandeh; ideh mepad kudeng bunu' sireнку.
- ²³Nutun negku, O Allah, idi kali' niatku; ngelio negku idi ngegala' terawéku.
- ²⁴Do' nier kudeng inan saluk bang niatku, idi nguyut negku maya' dalam luk meruked.

Nani Ubur 140

- ¹O Tuhan, muit negku ratnan lemulun luk dat; idi matar negku ratnan lemulun luk mesangit,
- ²luk megéi' pegayam nganau' luk dat, idi luk megéi' ngacing kedaluh.
- ³Dila'deh mepad kudeng menipeh luk mesangit, idi baladeh mepad kudeng galih ticuk seruang.
- ⁴O Tuhan, matar negku ratnan tueh lemulun luk dat; idi lemulun luk mesangit, luk pegayam sikal ngesala' negku.
- ⁵Lemulun luk medita' niat netumen abpung, idi rabat su dalanku.
- ⁶Ui pebala inan Tuhan, "Iko Allahku." Ninger sembayangku idi putuhku, O Tuhan!
- ⁷Tuhan Allahku, Lun Denganku luk metueh, Iko pangeh nematar negku bang bunu'.
- ⁸O Tuhan, laeg maré kuan lemulun luk dat maya' luk piandeh; aleg nima' gayamdeh luk dat mangun.
- ⁹Aleg nima' lemulun luk libutku metueh; idi nima' gayamdeh luk dat mangun kuan bururdeh sebuleng.
- ¹⁰Nima' bareh apui mebpeh luundeh; nima' nedeh talan bang lubang, pad ideh na remuat.
- ¹¹Nima' lemulun luk ngesala' nelun baken dengan mebalih uen ngelaya'; idi nima' luk dat macing kuan lemulun luk mesangit, pad ngaté neneh.
- ¹²Ui kali' Tuhan ngedengan nelun masi', idi mutut ukum luk matu kuan lemulun luk pidereh.
- ¹³Kali' rungen lemulun luk matu miak ngubur Namu; idi miak mulun pa kiungMu.

Nani Ubur 141

- ¹Ui nawar Namu, O Tuhan; ngedengan negku nekini! Ninger kareb ui nawar Namu.

²Do' ngalap sembayangku, mepad kudeng rabpun luk do' buen, idi ticu'ku luk uen ngegenang, mepad kudeng baré kareb medacem.

³O Tuhan, do matar tangku, idi bibirku.

⁴Ngimet negku pad ui na pian nganau' sala', idi na perurum dengan kekamen lemulun luk dat; idi na kuman irau deh!

⁵Lemulun luk matu mebal idi ngukum negku, pad ineh mangun ku peruan kuanku. Iamo' na ui pian uen lemulun luk dat ngeperuan, ngaceku ui ara' perurum dengan sala'deh.

⁶Kareb lun luk ngimet nedeh talan luun alig batu, lun mula' miak kali' balaku ineh matu.

⁷Mepad kudeng kayuh luk ipak, kudeng ineh teh tulangdeh patad-patad iring tanem.

⁸Iamo' ui merapat Namu, O Tuhan Allahku. Ui pian pitarinMu; aleg nima' negku maté!

⁹Matar negku ratnan abpung luk tinendeh kuanku, ieh ineh abpung lemulun luk dat.

¹⁰Nima' lemulun luk dat mekaneh abpungdeh sebuleng, pad ui lemaba ineh dengan do'.

Nani Ubur 142

¹Ui nawar Tuhan mutuh pedengan; ui nawar tu-tu Neneh.

²Ui nguit amung susa' idi derehku amé' pa kiungNeh.

³Kareb ui pelaba laya', Iko kali' luk miak ruenku. Bunu'ku pangeh netumen abpung su dalanku.

⁴Ui nier libutku na lemulun luk miak ngedengan negku; seburur pana' nateh luk matar idi méi' negku.

⁵O Tuhan, ui nawar Namu mutuh pedengan; Iko, Tuhan, Lun Matar negku; Iko mo' sebuleng luk pianku bang tana' ini.

⁶Ninger tawarku mutuh pedengan, ngaceku ui pelaba laya' bang susa'ku. Muit negku ratnan bunu'ku, luk meluun tueh rat negku.

⁷Ngulun negku ratnan susa'ku, pad ui ngubur Namu bang teubupun pupuMu, ngaceku Iko do' negku.

Nani Ubur 143

¹O Tuhan, niger sembayang idi putuhku! Iko luk matu idi lutep maya' jani', do' ngua' sembayangku!

²Aleg nguit negku amé' bang besara', ngaceku seburur pana' nateh matu pa kiungMu.

³Bunu'ku pangeh nengedereh negku, pad ui linaya'neh; ieh nenuet negku bang tutup luk medacem, mepad kudeng lemulun luk naté.

⁴Idi ui pelaba laya', ngaceku susa' niatku.

⁵Ui ngerawé aco luk pangeh nepelaba, idi amung luk pangeh inau'Mu, idi kekamenMu luk inan mawa.

⁶Ui ngegenang ticu'ku idi sembayang Namu; niatku meparang ngerawé Namu, mepad kudeng tana' luk metugeh.

⁷O Tuhan, ngua' sembayangku nekini! Ngaceku nabud tuehku! Aleg sigapung negku, pad ui na maya' lemulun luk amé' bang su luk inan até.

⁸Ui merapet Namu; maré negku lutep ngerawé awaMu luk lutep anid pekak. Ui maré niatku Namu, idi do' Iko mada' dalan luk suetku.

⁹O Tuhan, ui amé' Namu mutuh pitarin; idi muit negku ratnan bunu'ku.

¹⁰Iko luk Allahku, mada' negku nganau' luk pianMu. Nima' Rohmu luk do' ineh nguyut negku maya' dalan luk do'.

¹¹Ngulun negku Tuhan, maya' jani'Mu; dengan éi'Mu, muit negku ratnan amung susa'ku.

¹²Ratnan awaMu negku, do' ngaté bunu'ku, idi amung lemulun luk ngedereh negku. ngaceku ui ini demulunMu.

Nani Ubur 144

- ¹Maré ubur kuan Tuhan, Lun Luk Matar negku; Ieh ngekalai negku, idi nganau' negku temina' amé' pebunu'.
- ²Ieh Lun Matar idi Batu Libung, idi Ducung idi Lun Nengulun negku, luk inanku merapet. Ieh ngebeneh lun pupu baken pa liangku.
- ³O Tuhan, idéké lemulun, pad Iko miti neneh, idi anak Adam, pad Iko ngerawé neneh?
- ⁴Ieh mepad kudeng bui luk lemaba, idi aconeh mepad kudeng aca'.
- ⁵O Tuhan, ngukab langit idi Iko temurun; ngakem amung pegkung, pad ideh ngeruat rabpun.
- ⁶Do' nganau' kilep, pad ngatad bunu'Mu; mayung nedeh ku ilebMu, pad ideh buro!
- ⁷Do' ngawal negku rat déi' dita', pad ngulun negku rat bang abpa' luk medalem, idi muit negku rat bang palad lun pupu baken,
- ⁸luk na tupu pebala luk matu, idi luk mebalih kareb pebulung pana'.
- ⁹O Allah, ui menani aceh nani luk mebaruh, dengan nateg giula' kuanMu.
- ¹⁰Iko maré tueh kuan amung raca', idi muit demulunMu, Daud.
- ¹¹Ngulun negku ratnan bunu'ku luk megateh, idi muit negku rat bang palad lun pupu baken, luk na tupu pebala luk matu, idi luk mebalih kareb pebulung pana'.
- ¹²Nima' anak-anak tau luk deléi mulun dengan tueh, mepad kudeng tibu luk do'; idi do' anak-anak tau luk decur mepad kudeng batu lidung luk do' luk bang ruma' raca'.
- ¹³Do' lepo tau mepanu' ku padé, idi tibu luk baken-baken pana'; idi do' dumba luk bang laman tau iuk amé' mula'.
- ¹⁴Do' sapi' tau mula' anak dengan na luk maté. Idi do' tangi' lemulun luk pidereh na pedingeren maya' dalan tau!

¹⁵Samal kuan pupu luk kudeng ineh; idi samal kuan lemulun ngaceku Allahdeh ineh Tuhan!

Nani Ubur 145

¹Ui sikal mada' rayehMu, O Allah idi Raca'ku; ui ngubur Namu macing raked-raked.

²Anid aco ui miak maré ubur kuanMu, idi ngubur Namu raked-raked.

³Tuhan ineh rayeh! Ieh miak buren tu-tu; rayehNeh na miak mepad.

⁴Luk inau'Mu miak buren ratnan sebuleng inul macing raked-raked; ideh miak mada' kekamenMu luk rayeh.

⁵Lemulun miak pebala ratnan ubur idi dita'Mu luk rayeh, idi ui miak ngerawé kekamenMu luk inan mawa.

⁶Lemulun miak pebala ratnan rayeh kekamenMu luk melalud, idi ui miak mada' rayehMu.

⁷Ideh miak pebala ratnan do'Mu luk rayeh, idi menani ratnan éi'Mu.

⁸Tuhan mawa idi méi', Ieh mulai niat, idi panu' ku awa luk lutep.

⁹Ieh do' kuan anid-anid burur lemulun, idi méi' inan amung luk pinudutNeh.

¹⁰O Tuhan, amung luk pinudutMu miak ngubur Namu, idi pupuMu miak maré ubur Namu.

¹¹Ideh miak pebala ratnan rayeh imetMu, idi laludMu,

¹²pad amung lemulun miak kali' kekamenMu luk melalud, idi ubur imetMu luk rayeh.

¹³ImetMu meruked, idi Iko Raca' macing raked-raked. Allah lutep maya' jani'Neh, idi maung luk ruenNeh do'.

¹⁴Ieh ngedengan lemulun luk inan susa', idi naped lemulun luk inigu'.

¹⁵Amung-amung luk inan niat merapet Neneh, Ieh maré luk kenendeh kareb ideh pian.

¹⁶Ieh maré petap kuandeh, idi ngebor nedeh amung-amung.

¹⁷Tuhan ineh matu bang amung luk ruenNeh, idi panu' ku éi' bang amung lawéNeh.

¹⁸Ieh muneng nan lemulun luk nawar Neneh, idi nan lemulun luk nawar Neneh dengan niat luk matu.

¹⁹Ieh maré luk pian lemulun luk matot Neneh; Ieh ninger tawardeh, idi ngulun nedeh.

²⁰Ieh matar amung lemulun luk mawa Neneh, iamo' Ieh miak ngaté amung lemulun luk dat.

²¹Ui miak megéi' ngubur Tuhan; do' amung luk inan niat ngubur ngadanNeh luk meligan macing raked-raked.

Nani Ubur 146

¹Ngubur Tuhan! O niatku, ngubur Tuhan!

²Ui miak ngubur Neneh raked ulunku; idi menani kuan Allahku raked ulunku.

³Aleg merapet nan lun rayeh bang tana' ini, idi nan lemulun luk na miak ngulun namu.

⁴Kareb ideh maté ideh lemubed mangun ku tana'; bang aco ineh amung terawédeh mabud.

⁵Samal kuan lemulun luk ruen Allah Yakub ngedengan, idi luk merapet inan Tuhan, Allahneh;

⁶luk nemudut langit, tana', idi abpa', idi amung uangdeh; idi luk megéi' maya' jani'Neh;

⁷luk mutut ukum luk matu kuan lemulun luk pidereh, idi luk maré akan kuan lemulun luk melau. Tuhan muit lemulun luk tiban,

⁸idi ngalat mateh lun nebuser, Ieh naped lemulun luk inigu'; Ieh mawa inan pupuNeh luk matu.

⁹Ieh matar lun sakai luk tebawang; Ieh ngedengan decur tinula' idi anak até, iamo' Ieh ngesabeng terawé lemulun luk dat.

¹⁰Tuhan mangun ku Raca' raked-raked! O Sion, Allahmu miak ngimet macing raked-raked. Ngubur Tuhan!

Nani Ubur 147

¹Ngubur Tuhan! Pelaba do' menani ngubur Allah tau; idi teh tau mawang niat idi petulu ngubur Neneh.

²Tuhan mudut bawang Yerusalim baruh; Ieh nguit lun Israil luk tiba lemubed;

³Ieh ngedo' lemulun luk mesusa' niat, idi ngabet uratdeh.

⁴Ieh kali' kinula' amung gituen, idi neten ngadandeh.

⁵Tuhan tau rayeh idi meluun melalud; idi ilehNeh na miak mepad.

⁶Ieh naped lemulun luk mebeneh niat, idi ngebeneh lemulun luk dat.

⁷Do' menani maré ubur kuan Tuhan; dengan nateg giula' kuan Allah tau.

⁸Ieh mapen langit ku laput, idi maré udan kuan tana', idi nganau' uduh mulun luun surud.

⁹Ieh maré luk kenen kuan amung pung, idi maman anak bungkak kareb ideh nawar.

¹⁰Na Ieh mawang niat ku kuda luk metueh, idi pian ku lemulun luk mesangit;

¹¹iamo' Ieh mawang niat nelun luk ngerayeh Neneh, idi luk merapet nan awaNeh luk lutep.

¹²O Yerusalim, ngubur Tuhan! O Sion, ngubur Allahmu!

¹³Ieh ngeraben tanga'mu, idi ngeperuan pupumu.

¹⁴Ieh matar amung lakanmu, idi maman namu ku padé luk meluun do'.

¹⁵Ieh maré ukumNeh, idi balaNeh saget maput luun tana'.

¹⁶Ieh maré salju mepad kudeng tarub, idi ngisak ipup mepad kudeng abuh.

¹⁷Ieh maré udan batu mepad kudeng batu luk medari; seburur pana' nateh miak tuman ku teneb luk barénNeh!

¹⁸Ieh maré aceh ukum, pad amung ineh mederuno. Ieh maré bui, pad abpa' manud.

¹⁹Ieh maré balaNeh kuan Yakub, idi bada' idi ukumNeh kuan lun Israil.

²⁰Na Ieh nenganau' ini kuan pupu baken; ngaceku ineh ideh na kali' ukumNeh. Ngubur Tuhan!

Nani Ubur 148

¹Ngubur Tuhan! Ngubur Tuhan rat déi' surga, O muyuh luk tudo déi' dita'!

²Ngubur Neneh, O amung melaikatNeh, idi amung bawehNeh luk déi' surga!

³Ngubur Neneh, O aco idi bulan, ngubur Neneh, O gituen luk merasat!

⁴Ngubur Neneh, O langit luk medita' idi abpa' luk pa luun langit!

⁵Do' amungdeh ngubur ngadan Tuhan! Ieh nepebala, idi amung ineh mangun peh;

⁶dengan balaNeh ideh lutep su inandeh macing raked-raked, idi ideh pana' maya' balaNeh.

⁷Ngubur Tuhan rat luun tana', O pung luk bang abpa' idi ribaruh luk medalem;

⁸kilep idi udan batu, salju idi laput, id barui luk maya' balaNeh!

⁹Ngubur Neneh, O surud idi pegkung, bua' idi pulang;

¹⁰amung pung luk melayo idi luk meliputi, menipeh idi suit!

¹¹Ngubur Neneh, amung raca' idi pupu, pengulu idi amung lun rayeh luk baken pana';

¹²anak adi' deléi idi decur, lun mengered idi anak isuut teh!

¹³Do' amungdeh ngubur ngadan Tuhan. NgadanNeh meluun rayeh ratnan amung luk baken; idi uburNeh pa luun tana' idi langit!

¹⁴Ieh nenganau' pupuNeh metueh, pad ideh ngubur Neneh, ieh ineh pupuNeh lun Israil luk muneng Neneh! Ngubur Tuhan!

Nani Ubur 149

¹Ngubur Tuhan! Do' menani aceh nani luk mebaruh kuan Tuhan; ngubur Neneh bang tebubpun pupuNeh luk lutep!

²O Israil, do' iko mawang niat, ngaceku Lun luk Mudut namu; O lun Sion, do' muyuh mawang niat ngaceku Raca' muyuh!

³Do' nateg giula' dengan tubung, idi ngalai ngubur ngadanNeh.

⁴Tuhan mawang niat inan pupuNeh; Ieh ngedita' idi ngetueh lemulun luk mebeneh niat.

⁵Do' pupu Allah mawang niat ku tuehdeh, idi menani ku awang niat kedangan-kedangan.

⁶Do' ideh ngudub kareb ideh ngubur Allah, dengan ngimet pelapetdeh,

⁷pad ngelaya' amung bawang, idi ngukum amung pupu;

⁸pad ngaling raca'deh, idi lun rayehdeh kelingen ku kaling belawan;

⁹pad ngukum amungdeh, maya' luk bila Allah. Kudeng ini tueh pupu Allah! Ngubur Tuhan!

Nani Ubur 150

¹Ngubur Tuhan! Ngubur Allah bang Ruma'Neh! Ngubur tuehNeh bang surga!

²Ngubur Neneh ngaceku kekamen luk melalud luk inau'Neh! Ngubur rayehNeh luk na mepad!

³Ngubur Neneh dengan ngiup bas, idi dengan nateg giula' idi gita!

⁴Do' ngalai ngubur Neneh dengan nateg tubung idi giula', idi ngiup suling!

⁵Ngubur Neneh dengan nateg tawak!

⁶Ngubur Tuhan, O amung pudut luk inan niat! Ngubur Tuhan!

Bale'

Bale' 1

- ¹Balé' Selimun, anak Daud luk raca' Israil.
- ²Balé' ini miak mada' namu, pad iko kali' ileh idi bada', idi bala luk inan ilung luk medalem.
- ³Balé' ini mada' namu ratnan mulun dengan ileh, idi ratnan na naluk, idi ratnan nganau' luk matu idi luk mesiri.
- ⁴Ratnan balé' ini, lun luk mebacé mangun mileh, anak adi' pana' kali' dalam luk matu,
- ⁵lun luk mileh, mangun meluun ileh, idi lun luk pangeh nesibada' miak kiuten,
- ⁶pad ideh kali' ilung balé' luk inalum, idi itun lun mileh luk medalem.
- ⁷Kudeng iko pian ngalap ileh, do' iko matot inan Tuhan atun. Lun luk mebacé na merapet ku ileh, idi na sikal sibada'.
- ⁸O anakku, ninger amung bada' taman, idi ngerawé bala i tinam.
- ⁹Bada' didueh miak ngedo' ulunmu, mepad kudeng sigar idi bané nganau' namu do' taga.
- ¹⁰O anakku, kareb lun mesala' nutun namu, aleg iko melaya'.
- ¹¹Kudeng ideh pebala, "Do' tau amé' ngaté lemulun! Do' tau marot idi ngakem lun luk na mesala'!
- ¹²Kudeng ideh mulun idi do' ulun kareb tau ngalap nedeh, kali' rungen ideh pangeh naté kareb tau necan nedeh!
- ¹³Tau miak ngalap tuda'-tuda' binaweh pad ruma' tau panu'!
- ¹⁴Do' tau pebaya', idi tau mabpat amung luk lapen tau."
- ¹⁵O anakku, aleg iko maya' lemulun luk kudeng ineh. Buro rat nedeh.
- ¹⁶Ideh na tuman na nganau' luk dat. Ideh megéi' temina' ngaté lemulun.

- 17Na ulekneh nganau' abpung su siren suit luk pianmu,
- 18iamo' lemulun luk kudeng ineh nganau' abpung kuan bururdeh sebuleng, idi ideh miak maté ku ineh.
- 19Lun luk mano idi ngaté lemulun na miak na maté.
- 20Ninger! Ileh nawar déi' dalan idi déi' kadai pana'.
- 21Ieh nawar déi' munung tanga' bawang, idi su apeh lemulun pamung.
- 22O lun luk mebacé! Tuda' ioké muyuh mebacé? Tuda' ioké muyuh situnga nan ileh? Naké muyuh pian sibada'?
- 23Ninger, kareb ui mada' nemuyuh; ui miak maré bada' luk do' idi aceh babpat ilehku nemuyuh.
- 24Ui nenawar nemuyuh idi neneteng nemuyuh, iamo' na muyuh neninger.
- 25Muyuh na nemaya' bada'ku, idi muyuh na pian badén.
- 26Ngaceku ineh, kareb muyuh mesusa', ui meriruh. Idi ui situnga nemuyuh kareb inan luk katot —
- 27kareb tot ineh macing nemuyuh mepad kudeng barui, idi nguit bui susa', pad muyuh mét idi medereh.
- 28Kareb ineh muyuh nawar ileh, iamo' na ui sikal ngua' putuh muyuh. Kudeng muyuh nakap negku iapeh-iapeh pana', na muyuh kali' negku.
- 29Na muyuh pian ku ileh, idi muyuh ara' matot inan Tuhan.
- 30Muyuh na pian badénku idi na pian ninger bada'ku.
- 31Ngaceku ineh, muyuh ngalap ukum luk petulu, idi muyuh melibo ku kekamen muyuh sebuleng.
- 32Lemulun luk na pekalai maté ngaceku ideh ngarung ileh. Lun luk mebacé maté ngaceku na ngerawé ileh.
- 33Iamo' idé-idé luk ninger balaku, ieh do' udeng. Ieh mulun dengan na matot.

Bale' 2

- ¹O anakku, do' iko sibada' luk badénku namu, idi aleg iko mekelupan luk dukenku namu.
- ²Ninger amung bada' luk inan ileh, idi nakap ilungneh.
- ³Do' iko mutuh ileh idi do' kali'.
- ⁴Nakap ineh mepad kudeng nakap pirak idi binaweh luk meraga luk inapung.
- ⁵Kudeng iko nganau' kudeng ineh, iko miak kali' ilung matot inan Tuhan, idi iko miak sibada' ratnan Allah.
- ⁶Tuhan, ieh ineh luk maré ileh. Ileh idi do' kali' macing rat Neneh.
- ⁷Ieh ngedengan idi matar lemulun luk matu idi luk mesiri.
- ⁸Idi teh Ieh matar lemulun luk nganau' luk mesiri pa kiung lun baken, idi ngelibung lemulun luk mawa Neneh.
- ⁹Kudeng iko ninger balaku, iko miak kali' luk matu, luk mesiri, idi luk muned. Iko miak kali' luk petulu ruenmu.
- ¹⁰Idi iko mangun mileh idi mawang niat.
- ¹¹Ilehmumu idi terawému luk matu miak matar namu,
- ¹²idi ngimet namu, pad iko na nganau' sala'. Ileh idi terawému luk matu ineh miak matad namu ratnan lemulun luk nganau' kedaluh ratnan baladeh,
- ¹³ieh ineh lemulun luk nenecan ulun luk matu, pad ideh tudo bang dacem sala'.
- ¹⁴Lemulun ineh mawang niat nganau' sala' idi kekamen luk dat.
- ¹⁵Lemulun luk tekilu' ineh na inan merapet.
- ¹⁶Idi iko miak ngarung decur luk mesawa' luk nutun namu ku balaneh luk do'.
- ¹⁷Ieh na lutep inan awanneh sebuleng, idi mekelupan jani'neh luk meligan.
- ¹⁸Kudeng iko umak ruma'neh, iko maya' dalan macing inan até idi su luk inan até pana'.

¹⁹Lemulun luk ngikak neneh na lemubed. Ieh na lemubed maya' dalam ulun.

²⁰Do' iko maya' dalam lemulun luk do', idi nganau' luk matu.

²¹Lemulun luk matu idi mesiri mo' miak tudo bang bawang tau ini.

²²Iamo' Allah miak nala' lemulun luk dat rat bang bawang ini, idi mubput lun mesala' mepad kudeng mubput tibu rat bang tana'.

Bale' 3

¹O anakku, aleg iko mekelupan luk badénku namu. Megéi' ngerawé luk dukenku namu.

²Ratnan bada'ku iko ngalap peruan idi ulun luk mekadang.

³Aleg iko patad ratnan éi' idi do' iko lutep maya' jani'. Ngabet ineh i diermu, idi ngayud ineh bang niatmu.

⁴Kudeng iko nganau' ineh, Allah idi lemulun pana' mawang niat namu.

⁵Merapet inan Tuhan dengan amung niatmu. Idi aleg merapet inan terawému sebuleng.

⁶Ngerawé Tuhan bang amung-amung luk ruenmu, idi Ieh miak mada' namu dalam luk matu.

⁷Aleg ngedita' ilehmu sebuleng; iamo' do' matot inan Tuhan, idi na nganau' sala'.

⁸Idi ineh mangun ku ubat luk do' luk ngedo' urat idi étmu.

⁹Ngerayeh Tuhan idi mare baré Neneh ratnan uli' tana'mu luk meluun do',

¹⁰pad lepomu panu' ku padé, idi su luk inanmu nganug abpa' anggur na petap.

¹¹O anakku, kareb Tuhan mada' namu, ninger do'-do' pad iko badén.

¹²Tuhan mada' lemulun luk inanNeh mawa, mepad kudeng aceh taman mada' anakneh luk inanneh mawang niat.

¹³Samal kuan lemulun luk ngalap ileh, pad ieh do' kali'.

- 14Meluun rayeh samal ineh ratnan ngalap pirak; ileh ineh meluun raga ratnan amas.
- 15Ileh meluun raga ratnan batu luk meraga, idi amung-amung luk pianmu na miak uen maad ku ineh.
- 16Ileh maré namu ulun luk mekadang, mula' binaweh, idi ubur.
- 17Ileh maré namu do' udeng idi nguyut namu dengan do', raked ulunmu.
- 18Lemulun luk ngalap ileh mawang niat; ileh maré ulun kuandeh.
- 19Tuhan nemudut tana' ku ilehNeh. Ieh nemalad langit ku ilehNeh teh.
- 20IlehNeh nganau' abpa' manud, idi laput maré udan kuan tana'.
- 21O anakku, ngimet ileh idi do' kali'mu. Aleg patad ratnan ineh.
- 22Ratnan ineh iko ngalap ulun idi do' udeng,
- 23pad iko nalan dengan do' idi na metebaceng.
- 24Idi iko rudap kedangan-kedangan dengan na matot.
- 25Na iko megagau ku susa' luk macing denak-denak, mepad kudeng barui, kuan lemulun luk dat.
- 26Tuhan ngimet namu, pad iko na mekaneh abpung.
- 27Nganau' luk do' kuan lemulun luk mesusa', kudeng miak.
- 28Aleg ngecuk neneh nganét macing nebpa, kudeng iko miak ngedengan neneh nekini.
- 29Aleg ngesusa' nelun denganmu. Ieh tudo iringmu, idi merapet namu.
- 30Aleg pesaad dengan lun baken dengan na anun punneh, kudeng ieh na nganau' luk inanmu museh.
- 31Aleg iko ngimaruh nan lemulun luk ngedereh nelun, idi aleg iko maya' lawédeh,
- 32ngaceku Tuhan megateh inan lemulun luk nganau' luk dat, iamo' Ieh perurum nan lemulun luk matu.

³³Tuhan ngediman ruma' lemulun luk dat, iamo' Ieh ngeperuan ruma' lemulun luk matu.

³⁴Ieh na pian ku lemulun luk medita' niat, iamo' Ieh méi' kuan lemulun luk mebeneh niat.

³⁵Lemulun luk mileh miak buren, iamo' lemulun luk mebacé iuk-iuk uen ngigu'.

Bale' 4

¹O anak-anakku, ninger bada' taman muyuh. Ninger do'-do' pad muyuh kali'.

²Luk badénku nemuyuh ineh do'. Do' ngerawé amung ineh.

³Kareb ui anak isuut, ieh ineh anak buleng taman-tinanku,

⁴idi tamanku nemada' negku. Kelabaneh, "Do' ngerawé luk belénku, idi aleg mekelupan ineh. Nganau' luk dukenku namu, pad iko mulun.

⁵Ngalap ileh idi do' kali'! Aleg iko mekelupan pad iko teketed ratnan balaku.

⁶Aleg patad ratnan ileh, ngaceku ieh luk matar namu. Mawa neneh, idi ieh miak ngimet namu.

⁷Luk meluun do', do' ngalap ileh idi do' kali'.

⁸Mawa inan ileh, pad ieh ngerayeh namu. Ngimet neneh, idi ieh miak ngedita' namu.

⁹Ieh miak mangun ku pata rayehmu."

¹⁰O Anakku, ninger balaku. Ngerawé do'-do' luk belénku namu, pad iko mekadang ulun.

¹¹Ui nemada' namu ratnan ileh idi dalam ulun.

¹²Na luk ngesabeng namu, kudeng iko nalan dengan ileh, idi kareb iko upun na iko metebaceng.

¹³Do' iko ngerawé luk inanmu nesibada'. Bada' ineh ulunmu. Matar neneh do'-do'.

¹⁴Aleg maya' dalam lemulun luk dat.

¹⁵Aleg nganau' luk kudeng ineh. Patad ratnan luk dat! Ngarung neneh, idi petacu nalan.

¹⁶Lemulun luk dat na rudap kudeng ideh na nganau' sala'; idi ideh na medacep mateh kudeng ideh na ngurat nelun.

¹⁷Ngaté lemulun idi kekamen luk dat mepad kudeng luk kenen idi luk rupen kuandeh.

¹⁸Dalan lemulun luk matu mepad kudeng asat aco, luk iuk-iuk merasat macing acang aco.

¹⁹Iamo' dalan lemulun luk dat medacem, mepad kudeng malem. Ideh mebpeh, iamo' na kali' luk inandeh metebaceng.

²⁰O anakku, ninger balaku.

²¹Aleg patad ratnan bala ineh. Ngerawé idi mawa neneh.

²²Balaku ineh maré ulun idi mangun ku ubat kuan lemulun luk kali' ilungneh.

²³Matar terawému do'-do'. Ratnan terawému, ulunmu misu'.

²⁴Aleg pebala luk mebalih. Aleg perurum dengan balih idi bala luk naluk.

²⁵Do' nier pa atunmu dengan kuu' luk matu, idi aleg migu'.

²⁶Ngerawé do'-do' ratnan luk ruenmu, pad amung luk ruenmu inan peruan.

²⁷Buro ratnan luk dat idi petacu nalan. Idi aleg umai ratnan dalan luk matu.

Bale' 5

¹O anakku, ngerawé ratnan ileh idi do' kali'ku,

²pad iko nganau' luk do', pelé balamu ngegala' ilehmu.

³Sagan tu pana' bibir decur dulun mepaci' kudeng duru' idi ngangep neneh mesalud kudeng umau saitun,

⁴iamo' kekipedneh, iko tacinneh dengan susa' idi dereh.

⁵Ieh nguit namu amé' su luk inan até; dalanneh macing inan até.

⁶Na ieh lutep maya' dalan luk macing inan ulun; ieh umai, iamo' na kali'mu.

- ⁷O anak-anakku, ninger balaku idi aleg mekelupan ineh.
- ⁸Buro ratnan decur luk kudeng ineh! Aleg amé' munung tanga'neh,
- ⁹pad iko na maré ulunmu kuan lun baken, idi iko na maté karebmu mangud bang palad lemulun luk na mileh méi',
- ¹⁰pelé lun baken na ngalap amung binawehmu, idi uli' amung luk ilapmu,
- ¹¹pad iko na maté dengan ngarod, ngaceku uangmu idi uratmu melu,
- ¹²idi iko pebala, "Ngudehké ui na nesibada'? Anunké punneh ui na neninger bada'?
- ¹³Ui na neninger bada' guruku.
- ¹⁴Idi denak-denak ui inigu' pa kiung lun mula'."
- ¹⁵Do' iko lutep inan decurmu sebuleng, idi mawa neneh sebuleng mo'.
- ¹⁶Anak batek na ulek kuanmu.
- ¹⁷Petulu anak-anakmu ngedengan namu baken dulun.
- ¹⁸Do' iko mawang niat inan decurmu luk inawehmu.
- ¹⁹Do' ieh kuanmu, mepad kudeng talau luk do' taga, idi do' iko mawang niat ku bururneh idi awaneh.
- ²⁰O anakku, na petulu iko mawa inan decur baken! Idi teh na petulu iko pian ku burur decur dulun.
- ²¹Tuhan nier amung-amung luk ruenmu. Su apéh ulekmu Ieh nier namu.
- ²²Sala' lemulun luk dat mangun ku abpung. Ieh mekaneh abpung sala'neh sebuleng.
- ²³Ieh maté ngaceku ieh na mileh ngimet bururneh. Bacéneh nguit neneh macing inan lengutan.

Bale' 6

- ¹O anakku, pangehké iko pejani' ngua' baleh dulun?
- ²Pangehké iko ibpung ku bala idi jani'mu sebuleng?

- ³O anakku, kudeng pieh kudeng ineh, iko bang palad lemulun ineh, idi kudeng ini dalan mepuit: miket amé' mutuh neneh muit namu.
- ⁴Aleg iko rudap, idi aleg ucu' pad ngato erurmu.
- ⁵Remuat rat bang abpung ineh mepad kudeng suit idi talau mepuit rat nelun luk nganup.
- ⁶Lemulun luk mekupé petulu sibada' ratnan ulun dara'.
- ⁷Na pengulu, raca', idi luk nguyut nedeh.
- ⁸Iamo' ideh nganug akan kareb melau', pad ideh temina' kareb meteneb.
- ⁹Tuda' ioké lemulun luk mekupé tudo mo'-mo'? Idanké ieh miak tumui?
- ¹⁰Kebalaneh, "Ui pian rudap segageh, idi gapel ruuk pad ngato erurku."
- ¹¹Iamo' laba' ieh rudap, asi' ngerieng neneh mepad kudeng lun mano.
- ¹²Lemulun luk dat nalan-nalan dengan mebalih.
- ¹³Ideh sikinit mateh idi nganau' anun-anun luk naluk namu.
- ¹⁴Ideh megéi' ngerawé luk dat bang niatdeh luk tekilu', idi ngacing susa' iapeh-iapeh pana'.
- ¹⁵Ngaceku ineh susa' miak macing nedeh denak-denak, pad ideh murat idi maté.
- ¹⁶⁻¹⁹Inan tudu' kekamen luk inan Tuhan megateh: ayu luk medita' niat, dila' luk mebalih, ticu' luk ngaté lemulun luk na mesala', niat luk ngerawé luk dat, lemulun luk upun nganau' luk dat, lun nekali' luk mebalih, lemulun luk ngacing kedaluh arang lun rorum.
- ²⁰O anakku, do' iko nganau' luk duken i tamam, idi aleg mekelupan luk bida' i tinam.
- ²¹Do' megéi' nganug bala didueh bang niatmu.
- ²²Bada' didueh miak nguyut namu kareb nalan, idi matar namu kareb medacem, idi mada' namu kareb macang.

- ²³Ukum didueh mepad kudeng lapung luk merasat, idi bada' didueh mada' namu ratnan ulun.
- ²⁴Bada' ineh matad namu ratnan decur luk dat, idi ratnan ubuk decur dulun.
- ²⁵Aleg iko tetunin ku taga decur luk megéi' ngimateh.
- ²⁶Seburur lemulun miak ngalap decur luk mesawa' ku raga sebatang ruti, iamo' raga pasét, ieh ineh amung-amung luk ieh kuan.
- ²⁷Miakké iko ngimet apui muneng ku ruukmu idi na ngeseb kuyu'mu?
- ²⁸Miakké iko nalan luun bareh apui idi kukudmu na melau'?
- ²⁹Mepad susa' pamung rudap dengan decur dulun. Lemulun luk nganau' kudeng ineh medereh.
- ³⁰Lemulun na megateh inan lun mano kudeng ieh ngalap akan dulun karebneh melau;
- ³¹iamo' kudeng ieh uen ngakem, na miak na ieh ngua' tudu' kua' kinula' luk ilapneh, ieh ineh amung-amung luk ieh kuan.
- ³²Iamo' lemulun luk pasét na mileh. Ieh ngusag ulunneh sebuleng.
- ³³Ieh miak uen ngigu' idi bebalen idi igu'neh meruked.
- ³⁴Awan luk deléi meluun gathéh kareb ieh temaruh. Ieh ngua' dengan na méi'.
- ³⁵Ieh na pian ngalap ukum didueh. Baré luk pelaba ula' na miak ngagka' usehneh.

Bale' 7

- ¹O anakku, do' ngerawé luk belénku namu, idi aleg mekelupan luk dukenku namu.
- ²Maya' luk belénku pad iko mulun. Do' matar idi maya' balaku, mepad kudeng iko matar matehmu.
- ³Ngimet bada'ku kidi-kidi, idi ngayud ineh bang niatmu.
- ⁴Nima' ileh mangun ku kinanakmu luk decur, idi do' kali' mangun ku rurummu luk muneng.

- ⁵Idi ratnan ineh iko miak uen ngado ratnan decur dulun, idi ratnan decur luk ngeruid niatmu.
- ⁶Inan sekua' ui nenier rat munung tabuk ruma'ku, idi ui nekali' tuda'-tuda' burur anak adi' deléi
- ⁷luk na pekalai ku kekamen tana' ini. Arangdeh inan seburur anak adi' deléi luk mebacé.
- ⁸Ieh nemaya' dalam su lisangen dalam muneng ku ruma' aceh decur. Ieh nelemaba ruma'neh,
- ⁹kareb madacem.
- ¹⁰Idi decur ineh nepapu' neneh; ieh nengayang mepad kudeng decur luk mesawa', idi ieh temina' naluk.
- ¹¹Ieh mekuu' idi na migu'. Ieh megéi' lawé-lawé.
- ¹²Ieh tuped nganét déi' lisangen dalam, merabpu' iring dalam, idi déi' kadai pana'.
- ¹³Ieh nengapel dier anak adi' ineh, idi nengangep neneh. Dengan na migu' ieh nepebala neneh.
- ¹⁴"Ui nemaré baréku aco sini, idi inan teh uang ratnan baré ineh.
- ¹⁵Idi ui pian nakap idi papu' namu, idi nekini iko idi!
- ¹⁶Idi ui nemalad kibung luk mebarit rat bawang Masir ku apin bitaranku.
- ¹⁷Ui nenganau' neneh do' buen ku mur, garu, idi kayuh kadingau.
- ¹⁸Tau! Do' kiteh pegapel kedangan-kedangan. Kudeng ineh teh kiteh mawang niat.
- ¹⁹Awanku na idi. Ieh iné' ngarang.
- ²⁰Ieh nenguit petap usin idi ieh muli' pangeh dueh minggu."
- ²¹Idi ieh nenutun neneh dengan bururneh, pad ieh melaya' ku ubukneh.
- ²²Ieh petacu nenalan maya' neneh, mepad kudeng sapi' luk kereten, idi mepad kudeng talau luk mekaneh abpung.

²³Idi pusu'neh uen nebpek ku ileb. Ieh mepad kudeng suit luk mekaneh rabat, na kali' susa' macing neneh.

²⁴O anak-anakku, do' ninger luk belénku.

²⁵Aleg nima' decur luk kudeng ineh ngeruid niatmu, idi aleg maya' neneh.

²⁶Ieh pangeh nengusag ulun tuda'-tuda' deléi. Idi ieh nengacing até kuan mula' lemulun.

²⁷Kudeng iko umak ruma'neh, idi iko petacu amé' su luk inan até.

Bale' 8

¹Do' ninger! Ileh nawar, idi Do' Kali' pedingeren.

²Ieh tupid iring dalan idi déi' lisangen dalan.

³Ieh nawar rat munung tanga' bawang.

⁴Ui nawar amung-amung lemulun luk luun tana' ini.

⁵Do' lemulun luk na mileh mangun mileh, idi lun luk mebacé sibada'.

⁶Ninger balaku luk meluun do', amung luk belénku ineh matu.

⁷Ui mala luk matu idi ui megateh inan balih.

⁸Amung-amung luk belénku ineh matu, idi na luk mebalih idi luk ngeraruh.

⁹Kuan lemulun luk do' kali' amung ineh megala'; idi kuan lun luk nesibada' amung ineh melio.

¹⁰Mili' bada'ku ku libal pirak, idi do' kali' ku libal amas luk pelaba do'.

¹¹Ui ini ileh, ui meluun do' ratnan batu luk meraga; idi na luk miak uen maad denganku.

¹²Ui ini ileh, idi ui do' kali'. Ui luk kali' idi muned terawé.

¹³Lemulun luk matot inan Tuhan megateh inan luk dat. Ui megateh inan dita' niat idi sido' niat, dalan luk dat idi bala luk mebalih.

¹⁴Ui ngacing luk tirawéku. Ui kali' luk medalem, idi teh ui metueh.

- ¹⁵Ui ngedengan raca'-raca' luk ngimet bawang, idi lun nguyut luk nganau' ukum luk do'.
- ¹⁶Amung lun luk nguyut bang tana' ini denganinku, idi teh pengulu idi lun rayeh pana'.
- ¹⁷Ui mawa inan lemulun luk mawa negku; idé-idé luk nakap negku miak ngalap negku.
- ¹⁸Ui miak maré binaweh luk do' idi ubur pana', idi teh peruan idi luk matu.
- ¹⁹Luk lapenmu rat negku meluun ratnan amas, idi teh ratnan pirak luk meluun do'.
- ²⁰Ui maya' dalan luk matu, idi teh dalan luk mesiri.
- ²¹Ui maré binaweh kuan lemulun luk mawa negku, idi manu' ruma'deh ku binaweh luk meraga.
- ²²"Tuhan nemudut negku pun-pun, atun ratnan kekamenNeh luk mon.
- ²³Ui luk pun-pun pinudut kareb nateh tana' idi.
- ²⁴Ui tinganak kareb nateh abpa' idi, idi teh kareb nateh bued abpa'.
- ²⁵Ui tinganak atun ratnan pegkung-pegkung idi surud-surud,
- ²⁶kareb nateh Allah nemudut tana' dengan rakedneh. idi sesuut abuh pana'.
- ²⁷Ui idi kareb Allah nemalad langit, idi nenganau' iringneh libut-libut abpa' rayeh.
- ²⁸Kareb Ieh nenganau' laput bang langit, idi teh kareb Ieh nengukab bued abpa' rayeh,
- ²⁹idi kareb Ieh nemebpeng abpa' rayeh na lemaba lakan luk litepNeh. Ui idi kareb Ieh nenganau' tapin tana'.
- ³⁰Ui idi iringNeh mepad kudeng lun luk mileh mudut, ui luk inanNeh mawang niat anid-anid aco, ui megéi' mawang niat pa kiungNeh.
- ³¹Ui mawang niat ku tana' ini idi ku lemulun pana'.

³²"O amung anak adi', ninger balaku. Nganau' luk pianku pad iko mawang niat.

³³Ninger luk badén kuanmu. Do' iko mileh. Aleg patad ratnan bada' ineh.

³⁴Lemulun luk ninger balaku mawang niat, ieh ineh lemulun luk tudo munung tanga'ku anid-anid aco.

³⁵Lemulun luk ngalap negku ngalap ulun, idi Tuhan mawang niat neneh.

³⁶Lemulun luk na ngalap negku ngedereh bururneh sebuleng; idi lemulun luk megateh negku mawa ku até."

Bale' 9

¹Ileh pangeh nemudut ruma'neh luun tudu' diri.

²Ieh nengeret pung pian nganau' irau, idi nenganau' luk do' buen bang abpa' anggur, idi teh ieh nenganau' téng.

³Ieh nengecuk demulunneh luk decur nawar rat su luk medita' bang bawang ineh:

⁴"O lun luk mebacé, do' umak!" Idi kebalaneh kuan lemulun luk mebacé ineh,

⁵"Amé' kuman nuba'ku idi ngirup abpa' anggur luk tinina'ku.

⁶Necan amung lun luk mebacé pad muyuh mulun. Maya' dalam ileh."

⁷Kudeng iko mada' lemulun luk medita' niat, iko miak uenneh ngedat. Kudeng iko mada' lemulun luk dat, iko miak uenneh ngedereh.

⁸Aleg mada' lemulun luk medita' niat, ngaceku ieh megateh niat namu. Iamo' kudeng iko mada' lemulun luk mileh ieh miak ngerayeh namu.

⁹Anun-anun luk belénmu kuan lemulun luk mileh, nganau' neneh meluun ileh. Idi teh anun-anun luk belénmu kuan lemulun luk matu, ineh teh luk ngeluun ilehneh.

¹⁰Kudeng iko pian ngalap ileh, do' iko matot inan Tuhan atun. Kudeng iko ngiti Luk Meligan ineh, iko do' kali'.

¹¹Ileh ineh ngekadang ulunmu.

¹²Iko luk uen ngeperuan kudeng iko mileh. Iamo' kudeng iko ngarung ileh, iko luk medereh.

¹³Bacé ineh mepad kudeng decur luk meria' idi na migu'. Idi teh ieh na kali' anun-anun.

¹⁴Ieh tudo munung tanga' ruma'neh, idi su luk medita' bang bawangneh,

¹⁵idi nawar lemulun luk lemaba ngerawé kekamendeh sebuleng, kebalaneh,

¹⁶"O lemulun luk mebacé, umak.

¹⁷Abpa' luk pino meluun paci'. Ruti luk pino meluun én."

¹⁸Iamo' ideh na kali' lemulun luk amé' déi' maté, idi lemulun luk pangeh numak pangeh iné' su luk inan até.

Bale' 10

¹Balé' ini inayud Selimun: Anak luk mileh ngawang niat tamanneh. Iamo' anak luk mebacé ngesusa' niat tinanneh.

²Luk lapenmu dengan naluk na ngeperuan namu, iamo' luk matu ngulun namu.

³Tuhan na nima' lemulun luk matu melau, iamo' Ieh mebpeng lemulun luk dat na ngalap luk pianneh.

⁴Lun luk mekupé kali' rungen masi', iamo' lun luk megéi' miak mangun ku lun do'.

⁵Lun luk mileh ngeranih kareb padé melak, iamo' lemulun luk rudap kareb lun baken ngeranih miak ngalap igu'.

⁶Lemulun luk matu ngalap peruan. Bala lemulun luk dat ngelinged niat luk dat.

⁷Terawé ratnan lemulun luk matu ngacing peruan. Iamo' lemulun luk dat na miak uen ngerawé.

⁸Lemulun luk mileh miak buken. Lemulun luk pebala luk mebacé miak ngalap dereh.

- ⁹Lemulun luk mesiri do' udeng idi lutep, iamo' lemulun luk naluk miak kamen.
- ¹⁰Lemulun luk ngalum luk matu ngacing kedaluh, iamo' lemulun luk ngegala' luk matu ngacing pedo'.
- ¹¹Bala lemulun luk matu mangun ku bued ulun, iamo' bala lemulun luk dat ngelinged niat luk dat.
- ¹²Gateh niat nganau' kedaluh, iamo' awa na ngua' sala' dulun.
- ¹³Lemulun luk do' kali' pebala dengan ileh, iamo' lun luk mebacé petulu kumin.
- ¹⁴Lemulun luk do' kali' nakap mula' ileh. Iamo' bala lun mebacé ngacing susa'.
- ¹⁵Binaweh lun do' matar neneh. Iamo' lun masi' medereh ku asi'deh.
- ¹⁶Tabpar lemulun luk matu ineh ulun, iamo' sala' ngacing sala' teh.
- ¹⁷Lemulun luk na ara' badén miak mulun, iamo' lemulun luk ara' buken ngalap dereh.
- ¹⁸Lemulun luk mebalih, ieh ineh lemulun luk megateh inan lun baken. Lemulun luk ngatum buri' ineh mebacé.
- ¹⁹Lemulun luk mula' bala malé nganau' sala'. Kudeng iko mileh, kali' rungen iko pirud.
- ²⁰Bala lemulun luk matu mepad kudeng pirak luk do'. Terawé lemulun luk dat na tabpen.
- ²¹Bala lemulun luk matu ngacing peruan kuan lemulun, iamo' bacé ngacing até namu.
- ²²Peruan Tuhan ngacing do' nelun. Kekamen luk meberat na ngula' binawehneh.
- ²³Lemulun luk pian nganau' sala' mebacé, lun luk do' kali' mawang niat ku ileh.

²⁴Lemulun luk matu ngalap luk pianneh, iamo' lemulun luk dat ngalap luk inanneh matot.

²⁵Lemulun luk dat mepalid ku bui, iamo' lemulun luk mesiri tupid meraben.

²⁶Aleg mutuh lemulun luk mekupé ngakem kuanmu. Ieh nganau' lipenmu melaya' mepad kudeng kuman luk malam, idi teh kudeng rabpun bang matehmu.

²⁷Matot inan Tuhan, pad iko mekadang ulun. Lemulun luk dat maté kareb ideh mangud.

²⁸Rapet lemulun luk matu ngacing awang, iamo' lemulun luk dat na inan merapet.

²⁹Tuhan matar lemulun luk na mesala', iamo' Ieh ngaté lemulun luk nganau' sala'.

³⁰Lemulun luk matu do' udeng idi lutep, iamo' lemulun luk dat na tuman bang tana' ini.

³¹Lemulun luk matu pebala dengan ileh, iamo' dila' luk pebala luk dat uen ungeng.

³²Lemulun luk matu pebala dengan éi', iamo' lemulun luk dat megéi' pebala idi ngurat niat lun baken.

Bale' 11

¹Tuhan megateh inan lemulun luk makai timang luk na petulu. Iamo' Ieh mawang niat ku timang luk matu.

²Lemulun luk medita' niat miak uen ngigu', iamo' lemulun luk mileh mebeneh niat.

³Lemulun luk matu maya' luk mesiri. Lemulun luk na inan merapet uen ngusag ku lawédeh luk tekilu'.

⁴Mula' binaweh na miak ngedengan namu kareb iko malé maté, iamo' dalam luk mesiri miak ngulun namu.

- ⁵Kekamen luk mesiri ngeraked dalam lemulun luk matu. Iamo' lemulun luk dat ngacing ebpeh kuan bururneh sebuleng.
- ⁶Lemulun luk mesiri uen ngulun ku dalanneh luk matu, iamo' lemulun luk na inan merapet uen ngabpung ku lilineh sebuleng.
- ⁷Kareb lemulun luk dat maté, rapetneh pana' maté denganneh. Merapet ku binaweh na ulekneh.
- ⁸Lemulun luk matu puatin ratnan susa'. Iamo' susa' macing kuan lemulun luk dat.
- ⁹Lemulun luk na manu ngusag ulun lun baken ku baladeh. Iamo' lun luk matu ngulun nelun baken ku ilehdeh.
- ¹⁰Kareb lemulun luk matu ngalap peruan, bawang su inandeh pana' do' ria'. Kareb lemulun luk dat maté, lemulun ngitang ku awang niatdeh.
- ¹¹Bawang-bawang uen ngerayeh ku ulun lemulun luk matu, iamo' ideh uen ngusag ku bala lemulun luk dat.
- ¹²Lemulun luk situnga nelun baken na mileh. Lemulun luk do' kali' pirud mo'.
- ¹³Aleg mada' luk inalum kuan lemulun luk ngatum buri', ngaceku ieh na inan merapet. Iamo' lemulun luk inan merapet miak ngalum bala ineh.
- ¹⁴Aceh pupu miak uen ngelaya' kudeng na lun luk nguyut nedeh. Iamo' mula' lun luk mada' ngacing do' udeng.
- ¹⁵Kudeng iko pejani' mayar baleh lun baken, na miak na iko mesusa'. Meluun do' iko na pejani' mayar baleh dulun.
- ¹⁶Decur luk do' niat uen ngedita', iamo' decur luk dat lawé miak uen ngigu'. Lun luk mekupé na miak ngalap usin, iamo' lemulun luk megéi' mangun ku lun do'.
- ¹⁷Lemulun luk méi' nelun baken ngalap peruan. Kudeng iko na méi', iko ngurat burumu sebuleng.
- ¹⁸Lemulun luk dat na ngalap peruan, iamo' kudeng iko nganau' luk matu iko ngalap samal.

- ¹⁹Lemulun luk lutep nganau' luk matu miak mulun, iamo' lemulun luk lutep nganau' luk dat miak maté.
- ²⁰Tuhan megateh inan lemulun luk ngerawé luk dat, iamo' Ieh mawang niat inan lemulun luk nganau' luk matu.
- ²¹Kali' rungen lemulun luk dat miak kumin, iamo' lemulun luk matu miak puatin.
- ²²Decur luk do' taga luk dat buri' mepad kudeng susing amas bang icung barek.
- ²³Pian lemulun luk matu ngacing luk do'. Kudeng lemulun luk dat ngalap luk piandeh, lun baken museh.
- ²⁴Sebuang lemulun mekatu maré usin kuan lun baken, idi ideh iuk-iuk mula' binaweh. Iamo' lun baken matot maré idi ideh iuk-iuk amé' masi'.
- ²⁵Lemulun luk mekatu ngalap mula' peruan. Ngedengan nelun baken, idi ideh ngedengan namu.
- ²⁶Lun mula' ngediman lemulun luk ngamung padéneh ngaceku nganét raga luk medita', iamo' ideh ngubur lemulun luk masui padéneh.
- ²⁷Lemulun luk nakap luk do' miak uen ngedita', iamo' kudeng iko nakap luk dat, susa' miak macing namu.
- ²⁸Lemulun luk merapet ku binawehdeh miak mebpeh mepad kudeng don kayuh luk merurug bang kareb luk meteneb. Iamo' lemulun luk matu ngalap peruan, mepad kudeng don kayuh bang kareb luk melau'.
- ²⁹Lemulun luk ngacing susa' kuan tetek ruma'neh, na ngalap anun-anun. Lemulun luk mebacé megéi' mangun ku demulun lun luk mileh.
- ³⁰Bua' lemulun luk matu mangun ku lawa ulun, iamo' lemulun luk dat maté kareb nateh tarekneh macing.
- ³¹Lemulun luk matu ngalap peruan bang tana' ini. Kali' rungen lun luk dat idi lun mesala' miak kumin.

Bale' 12

- ¹Lemulun luk mawa ku ileh pian badén kareb ieh inan sala'. Lemulun luk na pian badén mebacé.
- ²Tuhan mawang niat inan lemulun luk matu, iamo' Ieh ngukum lemulun luk nganau' luk dat.
- ³Luk dat na ngacing do' udeng, iamo' lemulun luk matu tuped meraben.
- ⁴Decur luk do' niat mangun ku pata awan deléineh. Iamo' kudeng ieh ngigu' neneh, ieh mepad kudeng ét susud bang tulangneh.
- ⁵Lemulun luk matu nganau' luk mesiri; iamo' lemulun luk dat pian naluk namu.
- ⁶Bala lemulun luk dat ngacing até, iamo' bala lemulun luk matu muit nelun luk medereh.
- ⁷Lemulun luk dat maté dengan na inul. Iamo' tetek ruma' lemulun luk matu miak mulun.
- ⁸Kudeng iko inan ileh, iko miak buren. Kudeng iko mebacé, lun baken ngebeneh namu.
- ⁹Meluun rayeh samal kuan lun dat luk ngakem nakap akanneh ratnan lun luk ngerawé bururneh do', iamo' setuneh ieh melau.
- ¹⁰Lemulun luk matu méi' kuan aya'neh, iamo' lemulun luk dat ngedereh nedeh.
- ¹¹Lun megéi' luk inan lati' inan petap akan. Iamo' lemulun luk megéi' nganau' luk mo'-mo' na mileh.
- ¹²Lemulun luk dat pian nganau' luk dat mo'. Iamo' lemulun luk matu tuped meraben.
- ¹³Lemulun luk dat uen ngabpung ku balaneh sebuleng, iamo' lemulun luk matu puatin ratnan susa'.
- ¹⁴Lemulun ngalap tabpar maya' luk bilaneh idi luk kikemneh. Ieh ngalap luk petulu kuanneh.

- ¹⁵Lemulun luk mebacé megéi' ngerawé bururneh matu. Lemulun luk mileh ninger bada'.
- ¹⁶Kudeng lun mebacé dat niat, ieh ngegala' ineh. Lemulun luk mileh na dat niat ku bala dulun.
- ¹⁷Bala luk matu ngacing luk mesiri, iamo' bala luk mebalih ngacing luk tekilu'.
- ¹⁸Bala luk na tabpen ngurat mepad kudeng pelapet, iamo' bala lemulun luk matu ngedo' nelun.
- ¹⁹Mebalih na mekadang ulun, iamo' luk matu mulun ruked-ruked.
- ²⁰Lemulun luk ngerawé luk dat miak uen ngagap, iamo' lemulun luk pian ngacing luk do' ngalap mawang niat.
- ²¹Luk dat na macing kuan lemulun luk matu, iamo' lemulun luk dat ngalap susa' mo' sebuleng.
- ²²Tuhan megateh inan lemulun luk mebalih, iamo' Ieh mawang niat inan lemulun luk maya' jani'deh.
- ²³Lemulun luk mileh pirud ratnan ilehneh, iamo' lemulun luk mebacé ngegala' bacédeh.
- ²⁴Lemulun luk megéi' mangun ku lun ngimet, iamo' lun luk mekupé mangun ku demulun mo'.
- ²⁵Susa' bang niat lemulun matad neneh ratnan awang niat, iamo' bala luk méi' miak ngubuk neneh.
- ²⁶Lemulun luk matu megéi' ngerawé kekammeneh, iamo' lemulun luk dat meraruh.
- ²⁷Lun luk mekupé na ngalap luk pianneh, iamo' lun luk megéi' ngalap peruan.
- ²⁸Luk matu ineh dalam ulun; bacé ineh dalam até.

Bale' 13

- ¹Anak luk mileh maya' bada' tamanneh, iamo' lemulun luk medita' niat na ngamo sala'neh.
- ²Lemulun luk matu uen ngeperuan ngaceku baladeh, iamo' lemulun luk naluk nakap luk dat.
- ³Matar do'-do' ratnan balamu, pad iko mulun. Lemulun luk mula' buri' ngusag bururneh sebuleng.
- ⁴Na tu lemulun luk mekupé ngalap luk pianneh. Lemulun luk megéi', ngalap amung-amung luk pianneh.
- ⁵Lemulun luk matu megateh inan balih, iamo' bala lemulun luk dat ngacing igu' mo'.
- ⁶Luk matu matar lemulun luk na mesala'. Luk dat ngacing ebpeh lun mesala'.
- ⁷Inan lemulun luk siayu mangun ku lun do', iamo' na binawehdeh. Inan teh lemulun siayu mangun ku lun masi', iamo' inan mula' binawehdeh.
- ⁸Lun do' makai usin pad matar ulunneh, iamo' lun masi' na uen lun ngesusa'.
- ⁹Lun luk matu mepad kudeng lapung luk merasat; iamo' lemulun luk dat mepad kudeng lapung luk malé mekilep.
- ¹⁰Dita' niat ngacing susa' mo'. Meluun do' mutuh badén.
- ¹¹Kudeng saget ngalap binaweh, binaweh ineh saget metutu'. Kudeng mikat ngalap usin, iko miak ngula' usinmu.
- ¹²Kudeng rapet uen ngarung, niat lemulun pelaba susa', iamo' kudeng pian niatmu uen ngacing iko mepanu' ku rapet.
- ¹³Kudeng iko ara' badén, iko nakap susa'. Maya' bada' ineh, pad iko ngalap ulun.
- ¹⁴Bada' lemulun luk mileh, ieh ineh lawa ulun. Ratnan ineh iko puatin ratnan abpung até.
- ¹⁵Ileh do' kali' uen ngedita', iamo' lemulun luk na inan merapet maya' dalam até.

¹⁶Lemulun luk mileh ngerawé kareb nateh nganau' anun-anun. Iamo' lun luk mebacé ngegala' bacéneh.

¹⁷Lemulun luk nated bala, luk na inan merapet ngacing kedaluh, iamo' lun luk inan merapet nguit pedo'.

¹⁸Lemulun luk na sibada' masi' idi migu'. Lemulun luk ninger bada' uen ngedita'.

¹⁹Kudeng iko ngalap luk pian niatmu pelaba do'. Lun luk mebacé ara' teketed ratnan luk dat.

²⁰Sibada' ratnan lemulun luk mileh, pad iko pana' mileh. Kudeng iko ngalap lun luk mebacé ku rurummu, idi ulunmu uen ngusag.

²¹Susa' ngerada' nelun mesala', iamo' lemulun luk matu uen ngua' ku luk do'.

²²Lemulun luk matu inan binaweh luk uen mabpat kuan mupunneh, iamo' binaweh lun mesala' lapen lun luk matu.

²³Tana' luk na inau' ku lati' miak ngeruat uli' kuan lun masi', iamo' lemulun luk dat mebpeng na nganau' tana' ineh ku lati'.

²⁴Kudeng iko na ngukum anakmu, iko na mawa neneh. Kudeng iko mawa neneh, kali' rungen iko mada' neneh.

²⁵Lemulun luk matu inan petap akan, iamo' lemulun luk dat megéi' melau.

Bale' 14

¹Decur luk mileh ngawang niat tetek ruma'neh, iamo' decur luk mebacé ngusag neneh.

²Kudeng iko matot inan Tuhan, iko maya' dalam luk mesiri, iamo' lemulun luk nganau' luk tekilu' na ngerawé Allah.

³Lun luk mebacé medita' niat, idi ieh pelaba ula' buri'. Lemulun luk mileh uen matar ku balaneh.

⁴Kudeng na sapi' ku ngeruid radu, iko miak nibu sesuut padé mo'. Iamo' kudeng iko inan sapi', iko miak nganau' lati' luk rayeh.

- ⁵Lun nekali' luk inan merapet megéi' mala luk matu, iamo' lun nekali' luk na inan merapet mebalih mo'.
- ⁶Lun luk medita' niat na tu amé' mileh, iamo' lemulun luk do' kali' saget mileh.
- ⁷Aleg perurum nan lemulun luk mebacé. Ideh na miak mada' namu.
- ⁸Rat iapehké ileh lemulun luk mileh? Ngaceku ieh kali' luk petulu ruenneh. Rat iapehké bacé lemulun luk mebacé? Ngaceku ieh sinaluk bang terawéneh.
- ⁹Lemulun luk mebacé na mesusa' niat ku sala'deh. Iamo' lemulun luk matu pian mutuh do' ku sala'deh.
- ¹⁰Kudeng iko mawang niat, iko kuan. Kudeng iko dat niat, iko kuan. Lun baken na miak perurum namu ratnan luk kudeng ineh.
- ¹¹Kareb ruma' lemulun luk dat pangeh inusag, ruma' lemulun luk matu tuped meraben.
- ¹²Inan dalam luk teruayen lemulun matu, iamo' kekiped dalam ineh maté.
- ¹³Riruh lemulun miak ngelinged dat niatneh. Kareb awang buro, idi susa' megéi' idi.
- ¹⁴Lemulun luk dat miak kumin petulu dengan luk kikemneh. Lemulun luk matu uen ngua' maya' kekammeneh luk do'.
- ¹⁵Lemulun luk mebacé manu ku amung-amung luk pedingerenneh. Lemulun luk mileh matar lawéneh.
- ¹⁶Lemulun luk do' kali' buro ratnan luk dat, iamo' lemulun luk mebacé na ngerawé do'-do'.
- ¹⁷Lemulun luk mesaget niat nganau' luk mebacé. Iamo' lun luk mileh mulai niat.
- ¹⁸Lemulun luk mebacé ngalap ua' bacédeh, iamo' lun luk mileh uen ngua' dengan ileh.

- ¹⁹Lemulun luk dat miak tekeradung pa kiung lun luk matu, idi mutuh do' nedeh.
- ²⁰Lun masi' na inan rurum, iamo' lun do' mula' rurum.
- ²¹Kudeng iko pian ngalap awang niat, do' iko méi' nelun masi'. Kudeng na méi' nelun, ieh ineh mesala'.
- ²²Iko miak inan merapet idi buren lun baken, kudeng iko ngakem ngacing luk do'. Kudeng iko ngakem ngacing luk dat iko mesala'.
- ²³Ngakem pad iko ngalap petap. Iamo' gayam luk mo'-mo' nganau' namu masi'.
- ²⁴Lemulun luk mileh uen ngua' ku binaweh, iamo' lemulun luk mebacé ngegala' bacéneh.
- ²⁵Lun nekali' ngulun lemulun kareb ieh mala luk matu. Iamo' kareb ieh mebalih ieh masui lemulun.
- ²⁶Sembayang luk matu ngacing rapet idi do' udeng kuan lemulun idi uang tetek ruma'neh.
- ²⁷Pianké iko buro ratnan até? Sembayang luk matu ieh ineh lawa ulun.
- ²⁸Raca' uen ngerayeh ngaceku kinula' anak itinneh. Kudeng na anak itinneh na ieh mangun ku raca'.
- ²⁹Lemulun luk mekadang niat ineh mileh. Iamo' lemulun luk malé mét niat ngegala' bacéneh.
- ³⁰Lemulun luk na megagau terawé ineh do' ulun, iamo' lemulun luk mét niat inan aceh ét luk pelaba bura'.
- ³¹Kudeng iko ngedereh nelun masi', iko ineh ngedat Allah luk nemudut nedeh. Iamo' kudeng iko méi' nelun masi', iko ineh ngedita' Allah.
- ³²Lemulun luk dat mebpeh ngaceku kekammeneh luk dat, iamo' lemulun luk do' uen matar ngaceku do'neh.

³³Inan ileh bang amung terawé lemulun luk mepiteb, iamo' lun luk mebacé na luk idi ileh.

³⁴Luk matu ngerayeh aceh pupu, iamo' sala' ngigu' tuda'-tuda' pupu.

³⁵Raca'-raca' mawang niat nan lun rayeh luk mileh, iamo' ideh ngukum lun rayeh luk ngigu' nedeh.

Bale' 15

¹Or dengan mebeneh niat miak ngelaya' useh, iamo' or luk metueh ngegio useh.

²Kareb lemulun luk mileh pebala, ileh ineh ngeruid niat, iamo' bala lun luk mebacé na ulekneh.

³Tuhan nier luk mangun iapeh-iapeh. Ieh nginita netau, kareb tau nganau' luk do' idi luk dat.

⁴Bala luk do' ngacing ulun, iamo' bala luk dat ngurat roh lemulun.

⁵Lemulun luk mebacé na ngerawé bada' tamanneh, iamo' lemulun luk mileh pian badénneh.

⁶Lemulun luk matu inan binaweh, iamo' binaweh lemulun luk dat megéi' metutu' kareb inan susa'.

⁷Lun mileh mo' luk ngacing ileh, iamo' baken lun luk mebacé.

⁸Tuhan mawang niat kareb lemulun luk do' sembayang, iamo' Ieh megateh niat ku baré luk iten lemulun luk dat.

⁹Tuhan megateh ku kekamen lemulun luk dat, iamo' Ieh mawa inan lemulun luk nganau' luk matu.

¹⁰Kudeng iko nganau' sala', meberat ukummu; iko miak maté kudeng iko ara' badén.

¹¹Su luk inan até pana' na miak ngelinged anun-anun ratnan Tuhan; kudeng apehké lemulun miak ngalum terawéneh ratnan Allah?

¹²Lemulun luk medita' niat ara' badén, idi na pian buken lun mileh.

- ¹³Kareb lemulun mawang niat ieh merimud, iamo' kareb ieh mesusa' niat, meberat kiungneh.
- ¹⁴Lemulun luk mileh pian sibada', iamo' lemulun luk mebacé mawang niat ku bala luk mebacé.
- ¹⁵Lemulun luk meberat niat megéi' inan susa', iamo' lemulun luk mawang niat megéi' inan peruan.
- ¹⁶Lun masi' luk matot inan Tuhan meluun samal ratnan lun do' luk inan susa'.
- ¹⁷Meluun do' kuman kikid irin dengan lemulun luk inanmu mawa, ratnan kuman uang pung dengan lemulun luk inanmu megateh.
- ¹⁸Lemulun luk malé gateh ngacing kedaluh, iamo' lemulun luk mulai niat ngacing pedo'.
- ¹⁹Lemulun luk mekupé megéi' inan susa', iamo' lemulun luk matu na inan susa'.
- ²⁰Anak deléi' luk mileh ngawang niat tamanneh, iamo' lun mebacé mo' ngedat tinanneh.
- ²¹Kekamen luk mebacé ngawang niat lemulun luk na mileh; iamo' lemulun luk mileh nganau' luk matu.
- ²²Mutuh nelun mada' namu pad luk ruenmu miak mangun. Kudeng iko na badén, luk ruenmu na mangun.
- ²³Lemulun luk maré or luk petulu inan awang!
- ²⁴Lemulun luk mileh mudik maya' dalam ulun, na ieh remuru maya' dalam até.
- ²⁵Tuhan ngusag ruma' lemulun luk medita' niat, iamo' Ieh matar tana' decur tinula'.
- ²⁶Tuhan megateh ku terawé lemulun luk dat, iamo' Ieh mawang niat ku bala luk méi'.
- ²⁷Lemulun luk nakap binaweh maya' dalam luk tekilu' miak ngacing susa' kuan tetek ruma'neh. Aleg ngalap suap, pad iko mekadang ulun.

²⁸Lemulun luk do' ngerawé do'-do' kareb nateh ieh maré or, iamo' lemulun luk dat saget ngor bala pad ngacing ria'.

²⁹Tuhan ninger sembayang lemulun luk do', iamo' na Ieh ninger putuh lemulun luk dat.

³⁰Lemulun luk merimud ngawang niatmu, idi bala luk do' maré namu do' udeng.

³¹Kudeng iko ninger kareb iko badén, iko ineh lemulun luk mileh.

³²Kudeng iko ara' badén, iko ngurat bururmu sebuleng. Kudeng iko pian badén, iko miak amé' mileh.

³³Tot inan Tuhan mangun ku ileh kuanmu. Do' iko mebeneh niat, pad iko ngalap ubur.

Bale' 16

¹Lemulun ngegala' terawédeh, iamo' or luk matu ineh ratnan Allah.

²Iko ngerawé luk ruenmu matu, iamo' Tuhan nier pinian niatmu.

³Maré amung kekamenmu kuan Tuhan, idi luk ruenmu miak mangun.

⁴Amung-amung luk inau' Tuhan inan ulekneh; idi kekiped lemulun luk dat ineh até.

⁵Tuhan megateh inan lemulun luk medita' niat, idi kali' rungen ieh na puatin ratnan ukum.

⁶Do' iko méi' nelun idi lutep maya' jani', idi Allah maré do' ratnan sala' mu. Do' iko matot inan Tuhan, idi luk dat na miak macing namu.

⁷Kareb iko maya' pian Tuhan, bunu'mu miak mangun ku rurummu.

⁸Meluun do' sesuut binaweh luk ilap maya' dalam luk mesiri, ratnan mula' binaweh luk ilap maya' dalam luk tekilu'.

⁹Iko mili' dalam luk bénmu, iamo' Allah ngelelep amung lawému.

¹⁰Allah ngedengan bala raca'; pad ieh na sala' kareb ieh mutut ukum.

¹¹Tuhan pian ku timang, idi uad luk matu, idi teh raga luk petulu.

- ¹²Raca'-raca' megateh inan luk dat, ngaceku luk mesiri ngeletep imetdeh.
- ¹³Raca' pian ninger bala luk matu, idi ieh méi' inan lemulun luk na mebalih.
- ¹⁴Lemulun luk mileh sikal ngawang niat raca'. Kudeng raca' megateh niat lemulun miak pitayen.
- ¹⁵Ei' raca' ngacing ulun mepad kudeng laput luk ngacing udan kareb pun amé' lati'.
- ¹⁶Meluun do' ngalap ileh idi do' kali' ratnan amas idi pirak.
- ¹⁷Lemulun luk do' mili' dalam luk mado ratnan luk dat. Lemulun luk matar lawéneh nginita ulunneh.
- ¹⁸Dita' niat ngacing até, idi lemulun luk mesido' niat mebpeh.
- ¹⁹Lemulun luk masi' idi mebeneh niat meluun samal ratnan lemulun luk medita' niat luk ngalap babpat binaweh luk pino.
- ²⁰Do' iko ninger amung-amung bada', pelé iko ngalap peruan. Merapet inan Tuhan, idi iko mawang niat.
- ²¹Lemulun luk mileh idi mepiteb, mebala ngaceku terawéneh luk muned, idi balaneh luk do' ngubuk lemulun.
- ²²Ileh ineh aceh bued ulun kuan lemulun luk mepiteb, iamo' na ulekneh mada' lemulun luk mebacé.
- ²³Lemulun luk mepiteb ngerawé kareb nateh ieh pebala, pad ubukneh pelaba do'.
- ²⁴Bala luk do' mepad kudeng duru' luk mepaci', idi ieh ngacing do' ulun.
- ²⁵Inan dalam luk teruayen lemulun do', iamo' kekipedneh macing inan até.
- ²⁶Lun tebarin metueh ngakem, ngaceku ieh pian ngebor batekneh.
- ²⁷Lemulun luk dat nakap dalam ngedereh nelun baken; idi balaneh mepad kudeng apui luk ngeseb.
- ²⁸Lemulun luk dat ngatum buri'; ideh ngacing ria' idi ngusag rorum.

²⁹Lemulun luk mesangit ku datneh naluk lun rurunneh pad ideh pelaba dereh.

³⁰Matar bururmu ratnan riruh lemulun luk dat luk sikinit mateh ngaceku ngerawé luk dat.

³¹Mekadang ulun, ieh ineh tabpar lemulun luk matu. Abpuk luk mebuda' mangun ku pata uburneh.

³²Meluun do' ulai niat ratnan ngadan rayeh. Meluun do' ngimet bururmu ratnan ngimet mula' bawang.

³³Lemulun nala' udi, iamo' Allah ineh luk mutut.

Bale' 17

¹Meluun do' kuman ruti luk dat dengan mawang niat ratnan amé' ku irau bang ruma' luk mepanu' ku kedaluh.

²Demulun luk mileh miak ngimet pa luun anak tuanneh luk na mayu, pad ieh ngalap aceh babpat binaweh tuanneh.

³Amas idi pirak tetunin ku apui, idi niat lemulun tetunin Tuhan.

⁴Lemulun luk dat ninger gayam luk dat, idi lemulun luk mebalih ninger bala luk mebalih.

⁵Kudeng iko situnga nan lemulun luk masi', iko situnga nan Allah luk nemudut neneh. Lemulun luk mawang niat ku susa' dulun, kali' rungen miak kumin.

⁶Tepun-tepun mawang niat ku mupundeh, idi anak-anak deléi mawang niat ku tamandeh.

⁷Lemulun luk buren na mebalih, iamo' bala lemulun luk mebacé na ulekneh.

⁸Lemulun luk merapet ku suap ngerawé ideh miak ngalap anun-anun ku libalneh.

⁹Kudeng iko pian ku lemulun mawa namu, do' maré do' nedeh kareb ideh mesala' namu. Kudeng iko ngerawé sala'deh, iko ngusag rurun muyuh.

- ¹⁰Sebuleng bada' kuan lemulun luk mileh meluun rayeh ulek ratnan meratu babal kuan lemulun luk mebacé.
- ¹¹Até miak macing mepad kudeng lun duken luk mesangit kuan lemulun luk dat luk megéi' ngacing ria'.
- ¹²Meluun do' papu' beruang tineh luk museh ku anakneh luk na idi, ratnan papu' lemulun luk mebacé luk nganau' kekammeneh luk mebacé.
- ¹³Kudeng iko ngua' do' ku dat, kali' rungen iko na mepuit ratnan luk dat bang tetek ruma'mu.
- ¹⁴Pun kedaluh mepad kudeng leleng abpa' luk ngimun mepasu. Ngaang neneh pad ieh na amé' rayeh.
- ¹⁵Tuhan megateh nan lemulun luk ngukum lemulun luk na mesala' idi luk muit lemulun luk mesala'.
- ¹⁶Anunké ulekneh lemulun luk mebacé maré usin ku mayar sekola' kudeng ieh na mileh?
- ¹⁷Lun rurum megéi' ngegala' awadeh. Idi kinanak lemulun ngedengan neneh kareb inan susa'.
- ¹⁸Lemulun luk mebacé mo' pejani' mayar baleh lun denganneh.
- ¹⁹Lemulun luk pian ku sala' pian ngacing kedaluh. Lemulun luk nengadan nakap susa'.
- ²⁰Lemulun luk ngerawé idi pebala luk dat na ngalap luk do' — iamo' susa' mo'.
- ²¹Anak luk nganau' luk mebacé ngacing susa' idi dereh kuan tamanneh.
- ²²Awang niat maré namu do' ulun, iamo' berat niat ngelaya' bururmu.
- ²³Lun luk tekilu' luk mutut besara' ngalap suap dengan lulem, pad ideh mutut ukum luk na mesiri.
- ²⁴Lemulun luk mepiteb kali' luk petulu ruenneh, iamo' lemulun luk na petap terawé na mileh mutut.

²⁵Anak luk mebacé ngacing susa' kuan tamanneh, idi terawé luk dat kuan tinanneh.

²⁶Na petulu ngecuk lemulun luk na mesala' mayar ukum. Kudeng lemulun luk matu bebalen, ini mangun ku ukum luk tekilu'.

²⁷Lemulun luk lutep terawé na pelaba ula' buri'. Lemulun luk na megagau inan ileh.

²⁸Idi lemulun luk mebacé pana' mileh siren lun baken kudeng ieh pirud idi na megagau.

Bale' 18

¹Lemulun luk na do' rorum nelun baken ngerawé bururneh sebuleng mo'. Ieh na petulu dengan luk matu siren lun baken.

²Lemulun luk mebacé na pian ku ileh; iamo' ieh pian ngegala' terawéneh sebuleng.

³Sala' idi igu' perurum, idi kudeng iko mebpeh iko uen ngebeneh.

⁴Bala lemulun miak mangun ku aceh bued ileh, medalem mepad kudeng abpa' rayeh, idi do' lio mepad kudeng abpa' arur.

⁵Bang besara' na petulu méi' nan lemulun luk sala', pad lemulun luk mesiri na ruen matu.

⁶Kareb lemulun luk mebacé ngimun pesaad, ieh mutuh bebalen.

⁷Kareb lemulun luk mebacé pebala, ieh ngacing susa' kuan bururneh sebuleng, ieh mekaneh abpung ku balaneh sebuleng.

⁸Bala lemulun luk ngatum buri' mén kuan lun baken, pad ineh macing bang niatdeh.

⁹Lemulun luk mekupé ngakem, mepad kudeng lemulun luk ngusag kekamen dulun.

¹⁰Ngadan Tuhan mepad kudeng aceh pudut luk meraban, su luk inan lemulun luk matu miak sigapung.

- ¹¹Lun do' ngerawé binawehdeh ngelibung nedeh, mepad kudeng libung batu luk ngelibut aceh bawang.
- ¹²Lemulun luk mebeneh niat mo' miak buren. Lemulun luk medita' niat ngacing susa' kuan bururneh sebuleng.
- ¹³Ninger do'-do' kareb nateh iko ngor bala, pad iko na mebacé idi nguyo.
- ¹⁴Kudeng lemulun luk mét pian mulun inan rapet kuanneh. Kudeng ieh na pian mulun, na rapetneh.
- ¹⁵Lemulun luk mileh geregan sibada'.
- ¹⁶Pianké iko papu' lemulun luk mebala? Do' nguít aceh baré kuanneh idi na susa'.
- ¹⁷Ayu lemulun luk pun-pun pebala bang besara' matu, kareb nateh bunu'neh ngimun ngitun neneh.
- ¹⁸Kareb dueh burur lemulun luk melalud besara', kedaluh didueh uen mutut makai udi.
- ¹⁹Kudeng iko ngedengan kinanakmu, ieh miak matar namu mepad kudeng aceh libung batu luk ngelibut bawang. Iamo' kudeng iko ngedaluh neneh, ieh miak ngitek tanga'neh kuanmu.
- ²⁰Bua' amung-amung balamu ruenmu mabeh.
- ²¹Balamu miak ngulun idi ngaté. Iko luk kuman amung bua' balamu.
- ²²Lemulun luk ngalap decur ku awanneh, ngalap luk do'. Megala' Tuhan méi' kuanneh.
- ²³Kareb lemulun luk masi' pebala, ieh mutuh mo', iamo' lun do' ngor balaneh dengan medita' niat.
- ²⁴Inan lemulun luk siayu mangun ku rurum. Iamo' inan rurum luk meluun lutep ratnan kinanakmu sebuleng.

Bale' 19

- ¹Lemulun luk masi' luk nganau' luk mesiri meluun samal ratnan lemulun luk mebacé luk mebalih.
- ²Geregan dengan na ileh na do'. Mesaget niat ngacing susa' kuanmu.
- ³Inan lemulun luk ngedat ulundeh sebuleng ku kekamendeh luk mebacé, idi pangeh ineh ideh ngesala' Tuhan.
- ⁴Lun do' megéi' ngalap rurum luk mebaruh, iamo' rurum lun masi' megéi' necan nedeh.
- ⁵Kudeng iko mebalih bang besara', kali' rungen iko kumin.
- ⁶Mula' lemulun pian denganin lemulun luk mekatu. Idi amung lemulun pian mangun ku rurum lemulun luk megéi' maré luk barén.
- ⁷Kinanak lemulun luk masi' na pian ku ieh. Kali' rungen na rurumneh. Sagan tu pana' ieh nakap rurum, nateh luk idi.
- ⁸Kudeng iko mawa ku bururmu sebuleng do' iko sibada', idi ngimet amung luk ilapmu pad iko uen ngeperuan.
- ⁹Lemulun luk mebalih bang besara' miak kumin, idi lemulun luk mebalih miak maté.
- ¹⁰Na petulu lemulun luk mebacé mulun dengan mula' binaweh, idi na petulu demulun ngimet lun do'.
- ¹¹Lemulun luk inan ileh na malé museh. Kudeng lemulun mesala' namu, meluun do' na ngerawé ineh.
- ¹²Useh raca' mepad kudeng arod balang, iamo' éi'neh mepad kudeng udan bang kareb luk petulu.
- ¹³Anak deléi luk mebacé miak ngabud amung binaweh tamanneh. Decur luk megéi' museh inan awanneh mepad kudeng uni abpa' luk mebpeh kidi-kidi.
- ¹⁴Seburur deléi miak ngalap ruma' idi usin ratnan taman-tinanneh, iamo' Tuhan mo' sebuleng miak maré seburur decur luk mileh ku awanneh.
- ¹⁵Kudeng iko mekupé idi rudap kidi-kidi, kali' rungen iko melau.

- ¹⁶Maya' amung ukum Allah, pad ulunmu mekadang. Kudeng iko ngelaba ukum ineh iko miak maté.
- ¹⁷Kareb iko maré kuan lun masi', ieh ineh mepad kudeng kebiten Tuhan, ngaceku Tuhan ngua' luk birému ineh.
- ¹⁸Mada' anakmu kareb ideh isuut, pad ideh mileh. Kudeng na, iko ngacing dereh kuandeh.
- ¹⁹Kudeng lemulun malé megateh niat, nima' neneh ngalap uli'neh. Kudeng iko ngedengan neneh, kali' rungen iko mesusa' mucu.
- ²⁰Ninger ubuk idi ngalap bada', idi mucu iko mangun mileh.
- ²¹Lemulun inan mula' terawé ratnan luk miak ruenneh, iamo' pian Tuhan mo' luk miak mangun.
- ²²Lemulun luk manga kali' rungen migu'. Lemulun luk masi' meluun samal ratnan lemulun luk mebalih.
- ²³Matot inan Tuhan pad ulunmu mekadang, idi iko do' udeng idi na inan susa'.
- ²⁴Inan lemulun luk pelaba kupé, pad ideh na pian nganau' nuba' bang tangdeh.
- ²⁵Medita' niat petulu kumin, pad lemulun luk dat ileh miak sibada'. Lemulun luk mileh sibada' kareb ieh badén.
- ²⁶Lemulun luk nganau' luk dat kuan tamanneh idi luk ngecuk tinanneh buro, pelaba dat, idi ngacing igu'.
- ²⁷O Asi, kudeng iko ugka' sibada', kali' rungen iko mekelupan luk pangeh nekali'mu.
- ²⁸Na luk idi ukum luk mesiri kudeng seburur lun nekali' pian ngedereh seburur lemulun. Luk dat pelaba én kuan lemulun luk dat.
- ²⁹Lun mebacé luk medita' niat kali' rungen bebalen.

Bale' 20

- ¹Borak naluk idi arak ngacing kedaluh. Idé-idé luk rinaruh ku ineh mebacé.
- ²Do' matot inan raca' luk megateh niat, mepad kudeng iko matot ku balang luk ngeku. Kudeng iko nganau' neneh museh, iko ngacing até kuan bururmu sebuleng.
- ³Lemulun luk mebacé miak pekedaluh; iamo' meluun do' na maya' lemulun luk pekedaluh ineh.
- ⁴Lemulun luk mekupé pad ieh na ngeradu lati'neh bang kareb luk petulu, na luk perinien.
- ⁵Terawé lemulun mepad kudeng abpa' bang subuk luk medalem, iamo' lemulun luk do' kali' miak ngook abpa' ineh.
- ⁶Mula' lemulun mada' bururdeh lutep idi inan merapet, iamo' idéké luk kali' lemulun luk inan merapet.
- ⁷Samal kuan anak luk inan taman luk mesiri idi luk nganau' luk matu.
- ⁸Raca' luk mutut besara' miak ngiti luk dat.
- ⁹Idéké miak pebala, "Niatku meligan; amung sala'ku pangeh tila' "?
- ¹⁰Tuhan megateh ku timang idi uad luk na matu.
- ¹¹Kekamen anak ngegala' terawé idi ulunneh, pad iko miak kali' kudeng ieh mesiri idi matu.
- ¹²Tuhan pangeh nemaré mateh pad tau nier, idi lalid pad tau ninger.
- ¹³Kudeng iko megéi' rudap, kali' rungen iko masi'. Do' iko mekél ngakem, pad iko inan akan.
- ¹⁴"Pelaba ikat," kebala lemulun luk melih. Iamo' kareb ieh nalan, ieh medita' niat ku luk bilihneh.
- ¹⁵Bala luk mileh meluun raga ratnan amas idi batu luk meraga.
- ¹⁶Lemulun luk pejani' mayar baleh lemulun luk inanneh na pekalai mebacé, idi petulu binaweh lemulun luk pejani' ineh lapen ku dudukneh.

- ¹⁷Luk lapenmu dengan dalam luk tekilu' do' én kuanmu, iamo' mucu ieh mepad kudeng bada bang tangmu.
- ¹⁸Kudeng iko badén, luk ruenmu miak mangun. Aleg petacu amé' pebunu' dengan na atur.
- ¹⁹Lun luk ngatum buri' na miak ngalum anun-anun. Buro ratnan lemulun luk pelaba ula' buri'.
- ²⁰Kudeng iko ngediman taman-tinanmu, ulunmu miak mabud, mepad kudeng lapung luk milep kareb medacem.
- ²¹Kudeng iko malé ngalap binaweh, kekipedneh na luk idi peruan kuanmu.
- ²²Aleg iko sebuleng ngua' dat dulun, iamo' do' merapet inan Tuhan, idi Ieh miak nganau' namu matu.
- ²³Tuhan megateh inan lemulun luk makai timang idi uad luk na matu.
- ²⁴Tuhan pangeh nengelelep dalam kuan tau; kudeng apehké seburur miak kali' ratnan ulunneh sebuleng?
- ²⁵Ngerawé do'-do' kareb nateh iko maré aceh baré kuan Allah, pad iko na nginuud mucu.
- ²⁶Raca' luk mileh miak tunap lemulun, pad ieh kali' lemulun luk dat, idi ngukum neneh dengan na méi'.
- ²⁷Roh lemulun, ieh ineh mepad kudeng lapung Tuhan luk ngelio teruayen niatneh.
- ²⁸Imet raca' luk lutep, mesiri, idi matu, na miak uen ngagka'.
- ²⁹Taga anak adi', ieh ineh tuehneh, idi ubur lun merar, ieh ineh abpukneh luk mebuda'.
- ³⁰Rabpu'-rabpu' tau mekaneh susa', pad ulun tau misu'.

Bale' 21

- ¹Tuhan ngimet terawé raca', mepad kudeng Ieh nenganau' dalam abpa'.

- ²Sagan tu pana' iko ngerawé kekamenmu matu, Tuhan luk nier terawé niatmu.
- ³Kekamen lemulun luk matu idi mesiri, meluun do' pa kiung Tuhan ratnan maré baré.
- ⁴Mesido' niat idi medita' niat mangun ku tanu' lemulun luk dat.
- ⁵Lemulun luk mekél idi ngarawé atun, ngalap peruan, iamo' lemulun luk miket niat kali' rungen masi'.
- ⁶Binaweh luk lapenmu dengan dalan luk tekilu' saget metutu' idi kekamen luk kudeng ineh nguit namu macing inan até.
- ⁷Lemulun luk dat kamen ku datdeh sebuleng. Ideh ara' nganau' luk matu.
- ⁸Lemulun luk inan sala' maya' dalan luk tekilu'. Iamo' lemulun luk na mesala' nganau' luk matu.
- ⁹Meluun do' tudo' déi' parung ratnan pamung ruma' dengan decur luk dat buri'.
- ¹⁰Lemulun luk dat melau ku kekamen luk dat, idi na ideh méi' nan lemulun.
- ¹¹Kudeng lemulun luk medita' niat mekaneh ukum, lemulun luk dat ileh pana' sibada'. Lemulun luk mileh miak sibada' ratnan luk badén kuanneh.
- ¹²Lemulun luk matu kali' terawé lemulun luk dat, pad ieh miak ngukum nedeh.
- ¹³Kudeng iko ara' ninger putuh lun masi', putuhmu pana' na miak pedingeren.
- ¹⁴Kudeng seburur lemulun museh namu, aceh baré dengan lulem miak ngagka' usehneh.
- ¹⁵Ukum luk matu ngawang niat lemulun luk do', iamo' ngesusa' niat lemulun luk dat.
- ¹⁶Lemulun luk meraruh ratnan dalan ileh macing inan até.
- ¹⁷Lemulun luk pian ngalap mula' binaweh, abpa' anggur, idi akan luk do' na mangun ku lun do'.

- ¹⁸Lemulun luk dat pian ngacing dereh kuan lemulun luk do', iamo' setuneh ideh luk mekaneh dereh.
- ¹⁹Meluun do' tudo déi' su luk ali-ali ratnan pamung ruma' nan decur luk medureng idi dat buri'.
- ²⁰Bang ruma' lemulun luk mileh inan binaweh luk do' idi luk meraga. Iamo' lemulun luk mebacé makai usinneh mo'-mo'.
- ²¹Kudeng iko do' idi méi' nelun baken, idi ulunmu mekadang; iko miak buren idi na saluken lun baken.
- ²²Lun rayeh pebunu' luk mileh miak ngaro bawang luk pinatar lemulun luk metueh idi miak ngusag libung luk inandeh merapet.
- ²³Kudeng iko na pian mekaneh susa', matar do'-do' ratnan luk belénmu.
- ²⁴Lemulun luk medita' niat kali' rungen mesido' niat, idi ngadanneh, ieh ineh "Situnga", idi ieh nganau' luk amung-amung dengan dita' niatneh.
- ²⁵Lemulun luk mekupé ngaté bururneh sebuleng, ngaceku ieh ara' ngakem.
- ²⁶Ieh megéi' ngerawé ratnan luk pianneh mo'. Iamo' lemulun luk matu miak maré dengan mekatu.
- ²⁷Tuhan megateh inan baré lemulun luk dat, meluun teh kudeng ieh maré dengan terawé luk na petulu.
- ²⁸Lemulun na manu ku luk nekali' lun luk mebalih. Iamo' ideh merapet inan bala lemulun luk mileh ngerawé.
- ²⁹Lemulun luk matu na merapang; iamo' lemulun luk dat kali' rungen siayu.
- ³⁰Amung bada', bala, idi ileh lemulun na ulekneh pa kiung Tuhan.
- ³¹Iko miak temina' ku kuda pad amé' pebunu', iamo' Tuhan luk maré namu metueh.

Bale' 22

- ¹Meluun do' iko buren ngaceku kekamenmu luk do', ratnan iko mebala ngaceku mula' binaweh.

- ²Lun do' idi lun masi' mepad mo', ngaceku Tuhan nemudut nedeh.
- ³Lemulun luk mileh, kali' acing susa', pad ieh buro, iamo' lemulun luk na mileh ngerawé petacu matun susa', idi mucu ieh nginuud.
- ⁴Kudeng iko matot inan Tuhan idi mebeneh niat, iko mangun ku lun do', idi ngalap ubur idi ulun luk mekadang.
- ⁵Kudeng iko pian matar bururmu, do' iko ngado bururmu ratnan abpung luk tinen kuan lemulun luk dat.
- ⁶Kudeng iko mada' anak ratnan ulun luk petulu, ieh miak ngerawé ineh raked ulunneh.
- ⁷Lun masi' mangun ku demulun lun do'. Kudeng iko ngabit usin, iko mangun ku demulun léi luk kuan usin ineh.
- ⁸Idé-idé luk nibu luk dat, kali' rungen ieh ngeranih dereh, ieh ineh aceh ukum luk ngusag neneh.
- ⁹Do' iko mekatu, idi maré aceh babpat akanmu kuan lun masi', idi iko miak uen ngeperuan.
- ¹⁰Masut lemulun luk medita' niat, pad ngagka' pesaad, pekedaluh, idi ngedat.
- ¹¹Raca' miak mangun ku rurummu ngaceku mileh tang. Iamo' Tuhan mawa nan lemulun luk matu.
- ¹²Tuhan matar bala luk matu, iamo' Ieh ngagka' bala lemulun luk mebalih.
- ¹³Lemulun luk mekupé tudo déi' ruma'. Kebalaneh, ieh miak kenen balang kudeng ieh mepai.
- ¹⁴Pasét, ieh ineh aceh abpung luk ngakem lemulun luk inan Tuhan megateh.
- ¹⁵Anak pekalai nganau' luk mebacé, iamo' kudeng ieh bebalen ieh sibada' nganau' luk do'.
- ¹⁶Kudeng iko maré baré kuan lun do' idi ngedereh nelun masi' pad iko mangun ku lun do', kali' rungen iko mangun ku lun masi'.

¹⁷Do' ninger, idi ui miak mada' namu ratnan luk bila lun luk mileh. Sibada' ku bada'deh,

¹⁸pad iko mawang niat ngerawé baladeh idi mileh ngapal ineh.

¹⁹Pianku pad iko merapet inan Tuhan. Ini punneh ui pian mada' bala ineh namu nekini.

²⁰Ui pangeh nengayud teluh ngepulu' bala kuanmu luk inan ileh idi bada', pad iko sibada' ilung bala luk matu.

²¹Idi iko miak mare or luk petulu kuan lemulun luk ngitun namu ratnan luk matu.

²²Aleg ngaro binaweh lun masi' ngaceku ieh melaya', idi aleg ngedereh lemulun luk mesusa' bang besara'.

²³Ngaceku Tuhan ngedengan nedeh, idi Ieh ngukum lemulun luk ngukum nedeh.

²⁴Aleg perurum nan lemulun luk malé museh,

²⁵pad iko na metebaya' ku lawédeh idi mekaneh abpung.

²⁶Aleg iko pejani' mayar baleh dulun.

²⁷Ngaceku kudeng iko na miak mayar, ideh miak ngalap tarubmu.

²⁸Aleg iko ngiuk lakan tana' luk litep tepunmu.

²⁹Lemulun luk mileh bang kekammeneh miak ngakem kuan raca' idi baken kuan lun dat.

Bale' 23

¹Kareb iko pamung kuman dengan lemulun luk mebala, do' matar do'-do'.

²Kudeng iko melau, ngimet bururmu.

³Aleg iko manga ku akanneh luk do'. Kian, ieh pana' nutun namu lek.

⁴Aleg iko ngabud tuehmu nakap binaweh.

⁵Usinmu saget mabud, idi temulud mepad kudeng kanui.

- ⁶Aleg iko kuman iring téng lemulun luk meramen, idi aleg iko manga ku akanneh luk do'.
- ⁷Kebalaneh, "Kuman do'-do'," iamo' na ieh pian maré. Setuneh niat lemulun ineh mepad kudeng luk teruayenneh.
- ⁸Luk kinanmu ineh uenmu nguta', idi na ulek ileh tangmu.
- ⁹Aleg pebala inan lemulun luk mebacé, ngaceku na ieh kali' ilung balamu luk mileh.
- ¹⁰Aleg ngiuk lakan tana' luk mon, idi aleg ngalap tana' anak maté.
- ¹¹Tuhan luk melalud ngedengan nedeh bang besara' pad iko na metueh.
- ¹²Ninger bala gurumu, idi ngalap amung bada'neh.
- ¹³Aleg matot mada' anak. Kudeng ieh bebalen na ieh maté.
- ¹⁴Setuneh ieh miak uen ngulun ku luk kudeng ineh.
- ¹⁵O Asi, kudeng iko mileh, pelaba awang niatku.
- ¹⁶Idi teh ui pelaba awang niat kareb ui ninger namu pebala dengan ileh.
- ¹⁷Aleg melili ku kekamen lemulun luk mesala'. Do' ulunmu lutep bang Tuhan anid-anid aco.
- ¹⁸Kudeng pieh kudeng ineh, iko uen ngeperuan mucu.
- ¹⁹O Asi, do' iko ninger pad iko mileh, idi ngerawé do'-do' ratnan ulunmu.
- ²⁰Aleg perurum inan lemulun luk ucet ngirup idi luk manga.
- ²¹Lun luk mabuk idi lun luk manga kali' rungen ideh amé' masi'. Kudeng iko kuman idi rudap mo', iko miak lubpa.
- ²²Do' ninger bala tamanmu. Baken ratnan tamanmu na iko mulun. Kareb tinanmu mengered do' méi' neneh.
- ²³Luk matu, ileh, bada', idi do' kali' petulu belien, iamo' aleg masui ineh.
- ²⁴Taman lemulun luk matu kali' rungen mawang niat. Idi petulu tau mawang niat ku anak luk mileh.

- ²⁵Do' iko ngawang niat taman-tinanmu.
- ²⁶O Asi, do' iko ninger balaku, idi lutep maya' bada'ku.
- ²⁷Decur luk mesawa' idi decur luk pasét mangun ku abpung kuanmu.
- ²⁸Ideh ngabang namu mepad kudeng lun mano idi ngeraruh mula' deléi.
- ²⁹⁻³⁰Lemulun luk ucet ngirup idi nutun tuda'-tuda' luk rupen megéi' mesusa' idi meberat niat. Ieh megéi' medureng idi ngacing ria'. Matehneh mesia' idi bururneh merirem mo'-mo'.
- ³¹Aleg iko meraruh ku abpa' anggur luk do' sia', pad iko miak nier kiungmu bang sangkir ineh, idi pelaba do' ayuneh sirenmu.
- ³²Kekipedneh iko mét mepad kudeng luk kitep menipeh luk megalih.
- ³³Idi mula' luk baken-baken sirenmu, idi iko na miak ngerawé idi pebala dengan melio.
- ³⁴Iko mepad kudeng lemulun luk mabuk maya' kapal luun abpa' rayeh, idi luk mepatud ratnan paped dirineh luk déi' dita'.
- ³⁵Kebalamu, "Ui pangeh dicat idi bibal. Iamo' na ui kali' ineh. Ngudehké ui na kulat? Ui pian ngirup teh."

Bale' 24

- ¹Aleg melili ku kekamen lemulun luk dat, idi aleg perurum nedeh.
- ²Ideh megéi' ngerawé nganau' ria'. Kareb ideh pebala ideh ngurat niat lemulun.
- ³Ruma'-ruma' piduten luun alen ileh idi do' kali'.
- ⁴Kudeng inan ileh, amung takep uen ngayung ku luk meraga idi luk do' taga.
- ⁵Ileh meluun do' ratnan tueh, idi do' kali' meluun rayeh ratnan lalud.
- ⁶Ngaceku tueh bang bunu' macing ratnan terawé luk mileh, idi kudeng iko badén lun mileh iko miak metueh.
- ⁷Lemulun luk mebacé na kali' ilung bala lemulun luk mileh. Na luk belénneh kareb inan gayam luk tu-tu.

- ⁸Kudeng iko megéi' ngerawé nganau' luk dat, iko miak tetanen lemulun luk ngacing ria'.
- ⁹Luk teruayen lemulun luk mebacé mesala' mo'. Lun mula' megateh inan lemulun luk megéi' situnga nelun baken.
- ¹⁰Kudeng iko melaya' kareb inan susa', kali' rungen iko melaya' tu-tu.
- ¹¹Aleg merapang muit lemulun luk kamen pad ieh pitayen.
- ¹²Kian, iko ngerawé baken ineh kekamenmu lek. Iamo' Allah kali' idi mutut ukum maya' terawé niatmu. Ieh nier namu, Ieh kali', idi Ieh ngua' lemulun maya' kekamendeh.
- ¹³O Asi, do' kuman duru', ngaceku ieh do'. Ngaceku mepad kudeng duru' ratnan tapih do' én luun dila'mu,
- ¹⁴kudeng ineh teh ileh idi do' kali' pelaba do' kuan ulunmu. Ngalap ineh pad iko uen ngeperuan.
- ¹⁵Aleg iko ngerawé ratnan mano luk bang ruma' lemulun luk do', idi aleg ngusag ruma'neh. Kekamen ineh dat.
- ¹⁶Kudeng lemulun luk do' metebaceng ku susa', ieh megéi' tumui. Iamo' lemulun luk dat na tumui ratnan susa'neh.
- ¹⁷Kareb bunu'mu mekaneh susa', aleg iko mawang niat.
- ¹⁸Ngaceku Tuhan miak kali' terawému ineh. Idi na Ieh mawang niat. Kian na Ieh ngukum bunu'mu ineh lek.
- ¹⁹Aleg iko mesabeng ku lemulun luk dat; idi aleg melili ku kekamendeh.
- ²⁰Lemulun luk dat na luk inanneh merapet mucu.
- ²¹O Asi, do' matot inan Tuhan, idi matot inan raca' pana'. Idi aleg perurum nan lemulun luk inan terawé luk baken.
- ²²Ngaceku susa' miak macing denak-denak kuan bururdeh. Naké iko kali', Allah idi raca' miak ngacing ukum luk pelaba rayeh?

²³Lemulun luk mileh pangeh nepebala kudeng ini teh: Kudeng lun luk mutut besara' mili' lemulun, ieh mesala'.

²⁴Kudeng ieh mala lun mesala' na mesala', ieh miak uen ngediman idi inan amung lemulun megateh.

²⁵Lun luk mutut besara' luk ngukum nelun mesala' miak uen ngeperuan idi ngalap ngadan luk do'.

²⁶Or luk matu, ieh ineh tanu' rurum luk matu.

²⁷Do' nganau' lati'mu atun, pad inan petap akan. Pangeh ineh idi iko mudut ruma'.

²⁸Aleg ngadu' nelun denganmu dengan na punneh, idi aleg ngedat neneh mo'-mo'.

²⁹Aleg pebala, "Ui pian ngua' luk inau' neh kuanku! Kali' rungen ui ngua' neneh!"

³⁰Ui nenalan lemaba lati' idi kabun anggur lemulun luk mekupé idi mebacé.

³¹Idi inan mula' tabpa' idi uduh. Ar batu pana' pangeh neluka'.

³²Ui nenier idi nengerawé ratnan ineh pad ui nesibada'.

³³Rudap segageh, medacep mateh. Telubid ngato erurmu,

³⁴iamo' laba' iko rudap asi' miak munu' namu mepad kudeng lun mano luk temina' ku pelapet.

Bale' 25

¹Ini teh balé' Selimun luk inayud lemulun bang ruma' Hesekia, raca' Yahuda.

²Kai ngubur Allah ngaceku luk uenNeh ngalum. Kai ngubur raca'-raca' ngaceku luk uendeh ngegala'.

³Mikat kali' terawé raca'. Terawéneh meluun dita' ratnan langit idi meluun dalem ratnan abpa' rayeh, pad na miak kali' kai.

⁴Kudeng pirak uen ngeligan, lun luk mileh miak nganau' sidangur luk pelaba do'.

- ⁵Aleg nima' lemulun luk dat mada' raca', pad imetneh miak buren ngaceku mesiri.
- ⁶Kareb iko tured pa kiung raca', aleg siayu idi ngedita' bururmu.
- ⁷Meluun do' iko uenneh ngedita' ratnan iko uenneh ngebeneh pad lun baken ngalap su luk inanmu.
- ⁸Aleg iko miket amé' besara' ratnan luk nekali'mu. Kudeng lun nekali' luk baken kali' balamu sala', anunké luk miak ruenmu?
- ⁹Kudeng iko idi lun denganmu pekedaluh, do' medueh sebuleng pedo'. Iamo' aleg ngegala' luk inalum lun baken,
- ¹⁰pad iko na uen lun luk ninger ngesala', idi iko na migu'.
- ¹¹Bala luk petulu mepad kudeng bua' amas luk inau' bang pirak.
- ¹²Bada' lemulun luk inan ileh kuan lemulun luk pian ninger meluun raga ratnan susing amas, idi bané amas luk pelaba do'.
- ¹³Lun duken luk inan merapet ngawang niat lemulun luk ngecuk neneh, mepad kudeng abpa' luk meteneb kareb ngeranéh.
- ¹⁴Lemulun luk na maré luk pijani'deh, mepad kudeng laput idi bui luk na nguit udan.
- ¹⁵Ubuk dengan ulai niat miak ngelaya' lemulun luk metueh niat, pad lun rayeh pana' miak buken.
- ¹⁶Aleg pelaba akan duru' tebikan, pad iko na kuta'.
- ¹⁷Aleg iko megéi' umak ruma' lun denganmu, pad ieh na melibo nier namu, idi megateh namu.
- ¹⁸Lemulun luk mebalih ratnan lun luk denganneh megalih mepad kudeng pelapet, ileb, idi tuno.
- ¹⁹Kudeng merapet inan lemulun luk na lutep kareb inan susa', ieh ineh mepad kudeng kuman ku lipen luk megué idi nalan dengan mekio'.

- ²⁰Kudeng menani kuan lemulun luk meberat niat, ieh ineh mepad kudeng nganau' tucu' bang uratneh, idi mepad kudeng lungu kareb meteneb.
- ²¹Kudeng bunu'mu melau, do' maman neneh; kudeng ieh meparing, maré luk rupenneh,
- ²²pad ieh migu'. Idi Tuhan miak ngua' kuanmu.
- ²³Ngatum buri' ngacing gateh, mepad kudeng bui rat pa tinueh busat aco ngacing udan.
- ²⁴Meluun do' tudo déi' parung ratnan pamung ruma' dengan decur luk dat buri'.
- ²⁵Bala luk do' rat bawang luk mado mepad kudeng abpa' luk meteneb kareb iko meparing.
- ²⁶Lemulun luk do' luk melaya' pa kiung lemulun luk dat mepad kudeng bued abpa' luk melutut, idi subuk luk inan luk megalih.
- ²⁷Pelaba ula' duru' tebikan dat bang batekmu. Kudeng ineh teh lemulun luk megéi' pian buren.
- ²⁸Kudeng iko na miak ngimet usehmu, iko melaya' mepad kudeng aceh bawang luk malé uen ngaro ngaceku na libung.

Bale' 26

- ¹Na petulu ngubur lemulun luk mebacé; ieh ineh mepad kudeng salju kareb melau', idi udan kareb ngeranih.
- ²Kediman na ngurat lemulun luk na petulu uen ngediman; ieh ineh mepad kudeng suit luk temulud dengan na ucep.
- ³Kuda uen mabpet, keladai uen ngimet, idi lemulun luk mebacé bebalen.
- ⁴Kudeng iko ngor bala luk mebacé, iko mepad bacé kudeng lemulun luk ngitun ineh.
- ⁵Ngor bala lemulun luk mebacé maya' bacéneh, pad ieh na ngerawé bururneh mileh.

- ⁶Lemulun luk nima' lun luk mebacé nated bala, mepad kudeng lemulun luk nangal kukudneh ngaceku ieh nakap susa'.
- ⁷Lun mebacé dat ileh makai balé', mepad kudeng lemulun luk mekio' dat ileh nalan.
- ⁸Kudeng ngubur lemulun luk mebacé, ieh ineh mepad kudeng ngelatik ku batu luk pelaba rayeh.
- ⁹Lemulun luk mebacé luk nutun ngalap bala ileh, mepad kudeng lun mabuk luk nutun nguat tabpa' rat bang paladneh.
- ¹⁰Lemulun luk nabpar lemulun luk mebacé ngesusa' nelun baken.
- ¹¹Lemulun luk mebacé luk lemubed nganau' luk mebacé teh, mepad kudeng uko' luk lemubed kuman uta'neh.
- ¹²Lemulun luk mebacé meluun samal ratnan lemulun luk ngerawé bururneh mileh.
- ¹³Ngudehké lemulun luk mekupé na mepai? Anunké luk inanneh matot? Balangké?
- ¹⁴Lemulun luk mekupé demier luun bitaranneh. Ieh mepad kudeng tanga' luk tekito luun abetneh.
- ¹⁵Inan lemulun luk pelaba kupé, pad ideh ara' nganau' nuba' bang tangdeh sebuleng.
- ¹⁶Lemulun luk mekupé ngerawé bururneh meluun ileh ratnan tudu' burur lemulun luk miak maré or luk petulu.
- ¹⁷Lemulun luk semuet bang kedaluh lun baken, mepad kudeng lemulun luk ngakem lalid uko' karebneh nalan.
- ¹⁸⁻¹⁹Lemulun luk naluk lun denganneh idi pebala, "Ui marot mo'," mepad kudeng lemulun luk meruden luk marot ku sinapang.
- ²⁰Kudeng na kayuh, apui maté; kudeng na ngatum buri', kedaluh uen ngedo'.
- ²¹Dereng idi kayuh ngulun apui, idi lun luk ngatum buri' ngekadang kedaluh.

- ²²Ngatum buri' pelaba do' én, pad tau do' pian nelen idi.
- ²³Lemulun luk mapot bala mepad kudeng berinis luun kuden.
- ²⁴Lemulun luk siayu ngalum gatehneh ku bala luk do' pedingeren,
- ²⁵iamo' aleg manu ku balaneh, ngaceku niatneh mepanu' ku gateh.
- ²⁶Sagan tu pana' ieh ngalum gatehneh, iamo' amung-amung lemulun miak nier kekammeneh luk dat.
- ²⁷Lemulun luk tumen abpung kuan lun baken mekaneh abpung ineh teh. Lemulun luk ngukat lubang mebpeh bang ineh.
- ²⁸Lemulun luk megateh inan lun baken sikal ngurat neneh ku balih. Bala luk mapot ngacing usag.

Bale' 27

- ¹Aleg iko medita' niat ratnan luk ruenmu nebpa. Iko na kali' luk miak mangun aco sini.
- ²Nima' nelun baken ngubur namu idi lun pupu baken pana'. Iamo' aleg iko ngubur bururmu sebuleng.
- ³Batu idi bada pelaba berat. Iamo' susa' luk macing ngaceku bacé meluun berat teh.
- ⁴Useh ineh dat kuel idi ngusag, iamo' temaruh luk pelaba dat.
- ⁵Meluun do' mada' lemulun dengan megala', ratnan ngalum éi'mu neneh.
- ⁶Lun rurummu ngurat namu, pad ngacing peruan. Iamo' bunu'mu ngapel namu, pad ngacing susa'.
- ⁷Lemulun luk mebor ara' kuman duru'. Iamo' kareb ieh melau, akan luk mepét pana' do' én kenneh.
- ⁸Lemulun luk mado ratnan ruma'neh mepad kudeng suit luk mado ratnan ararneh.
- ⁹U mau luk do' buen ngawang niatmu, idi bada' lun rurummu pelaba do' pedingerenmu.

- ¹⁰Aleg mekelupan rurumu idi rurun tamanmu. Kudeng iko inan susa', aleg mutuh pedengan ratnan kinanakmu. Lun rurun luk muneng namu meluun do' ratnan kinanakmu luk mado.
- ¹¹O Asi, mawang niatku kudeng iko mileh, pad ui miak ngor bala lemulun luk ngedat negku.
- ¹²Lemulun luk mileh kali' acing susa' pad ieh buro, iamo' lemulun luk na mileh ngerawé, petacu amé' matun susa', idi mucu ieh nginuud.
- ¹³Lemulun luk pejani' mayar baleh lemulun luk inanneh na pekalai, mebacé, idi petulu binaweh lemulun luk pejani' ineh lapen ku dudukneh.
- ¹⁴Lemulun luk ngalat rurunneh pekak uka-uka dengan rayeh arod, mepad kudeng lemulun luk ngediman rurunneh.
- ¹⁵Decur luk dat buri' mepad kudeng dat aco, kareb mudan kidi-kidi.
- ¹⁶Kudeng apehké iko ngagka' neneh. Miakké iko ngagka' bui? Miakké iko ngeragem umau?
- ¹⁷Lemulun sibada' ratnan lemulun, mepad kudeng belawan uen ngir ku belawan.
- ¹⁸Ngasa' gita', pad iko kuman bua'neh. Demulun luk ngasa' tuanneh uen ngedita'.
- ¹⁹Iko nier kiungmu mepad kudeng aca' bang abpa', kudeng ineh teh iko nier bururmu sebuleng bang niatmu.
- ²⁰Luk pian lemulun idi su luk inan até mepad mo'. Ideh megéi' nakap luk piandeh.
- ²¹Amas idi pirak tetunin ku apui, kudeng ineh teh ulun lemulun tetunin.
- ²²Kudeng iko mebal lemulun luk mebacé pad ieh lélé maté, idi ieh mebacé teh.
- ²³Matar dumba idi sapi'mu do'-do',

²⁴ngaceku iko na miak ngimet binawehmu meruked. Imet raca' pana' na lutep kuan inulneh.

²⁵Iko ngeranih uduh luk tinibu kuan aya'mu, idi teh ngalap uduh luk mulun mo'-mo' luun surud laba' nganét uduh luk tinibu mucu.

²⁶Idi ayungmu ruen ratnan buluh dumba, idi iko melih tana' ku usin luk lapenmu, kareb iko masui amék.

²⁷Amék luk ketecan maré rata kuan tetek ruma'mu, idi kuan demulunmu luk decur pana'.

Bale' 28

¹Lemulun luk dat upun buro, sagan pana' na lemulun ngerada' nedeh, iamo' lemulun luk matu mekuu' mepad kudeng balang.

²Aceh pupu kali' rungen metueh idi lutep, kudeng lun rayeh-rayeh mileh. Iamo' kareb aceh pupu nganau' sala', lun luk ngimet megéi' pesua.

³Lun rayeh luk ngedereh nelun masi' mepad kudeng udan luk pelaba ula' luk ngeluka' padé.

⁴Kudeng iko na ngerawé ukum, iko perurum nelun luk dat, iamo' kudeng iko maya' ukum, iko metueh rat nelun luk dat.

⁵Lemulun luk dat na kali' ilung luk mesiri, iamo' lemulun luk tekeradung pa kiung Tuhan kali' luk amung-amung.

⁶Lemulun luk masi' idi mesiri meluun do' ratnan lun do' luk na mesiri.

⁷Anak adi' luk maya' ukum ineh mileh. Iamo' anak adi' luk perurum nan lemulun luk dat ngigu' tamanneh.

⁸Kudeng iko mangun ku lun do' ngaceku muyok nelun, binawehmu miak barén nelun luk méi' nelun masi'.

⁹Kudeng iko na maya' ukum, Allah megateh inan sembayangmu.

¹⁰Kudeng iko naluk lemulun luk mesiri pad ieh nganau' luk dat, iko mekaneh abpungmu sebuleng. Lemulun luk na mesala' ngalap tabpar luk rayeh.

- ¹¹Lun do' megéi' ngerawé bururdeh mileh, iamo' lun masi' luk mileh kali' niatdeh.
- ¹²Kareb lemulun luk do' ngimet, lun mula' mawang niat, iamo' kareb lemulun luk dat ngimet, lun mula' sigapung.
- ¹³Na iko uen ngeperuan kudeng iko ngalum sala'mu. Do' ngamo idi uren, pad Allah méi' namu.
- ¹⁴Do' iko matot inan Tuhan idi iko miak mawang niat. Kudeng iko metueh niat iko mekaneh dereh.
- ¹⁵Anak itin luk masi' melaya' pa kiung raca' luk dat. Raca' ineh mepad kudeng balang luk ngeku idi beruang luk nakap akan.
- ¹⁶Raca' luk na mileh, kali' rungen dat kuel, iamo' raca' luk megateh ku luk tekilu' mio ngimet.
- ¹⁷Lemulun luk ngaté lemulun ngukat tanemneh sebuleng. Aleg ngesabeng neneh.
- ¹⁸Kudeng iko maya' dalam luk mesiri, iko uen ngulun. Iamo' kudeng iko maya' dalam luk tekilu', iko miak mebpeh.
- ¹⁹Lun luk meké' amé' lati' petap akan. Lemulun luk marot kali' rungen masi'.
- ²⁰Lemulun luk mesiri mawang niat idi uen ngeperuan. Iamo' kudeng iko pian mangun ku lun do' dengan mesaget, kali' rungen iko kumin.
- ²¹Na petulu mili' lemulun bang besara'. Iamo' inan lemulun luk sala' mutut ukum, pad ngalap suap luk isuut mo'.
- ²²Lemulun luk ucet ngamung usin pian mangun ku lun do', iamo' na ieh kali' asi' denak-denak macing neneh.
- ²³Setuneh lemulun meluun pian badén ratnan buren mo'-mo'.
- ²⁴Lemulun luk ngerawé na sala' kudeng mano ratnan taman-tinanneh, ieh ineh rorum lemulum luk dat.

²⁵Kudeng iko ngerawé bururmu sebuleng iko ngacing ria'. Meluun do' iko merapet inan Tuhan.

²⁶Lemulun luk merapet inan terawéneh sebuleng, ieh ineh lemulun luk mebacé. Do' iko maya' bada' lemulun luk mileh, pad iko na mekaneh susa'.

²⁷Maré kuan lun masi' pad iko sebuleng inan petap. Lemulun luk teketed rat nelun luk masi' miak uen lun ngediman.

²⁸Lun mula' sigapung kareb lemulun luk dat ngimet. Iamo' kareb lun luk ngimet ineh mebpeh, lemulun luk matu miak ngimet sekua' teh.

Bale' 29

¹Kudeng iko amé'-amé' metueh niat kareb iko badén, mucu iko miak medereh, pad iko na miak tumui.

²Kudeng lemulun luk matu ngimet, anak itinneh mawang niat. Iamo' kudeng lemulun luk dat ngimet, anak itinneh mesusa' niat.

³Kudeng iko pian ku ileh, tamanmu mawang niat namu. Lemulun luk ngabud usin ku mayar decur luk mesawa', mebacé.

⁴Kudeng raca' pian ku luk mesiri, kali' rungen pupuneh metueh, iamo' kudeng ieh pian ku usin mo' ieh miak ngusag bawangneh.

⁵Kudeng iko ngubur lun rurummu mo'-mo', iko tumen abpung kuan bururmu sebuleng.

⁶Lemulun luk dat mekaneh abpung sala'deh sebuleng, iamo' lemulun luk matu inan puit idi awang.

⁷Lemulun luk matu kali' ratnan ulun lun luk masi', iamo' lemulun luk dat na mileh ngerawé luk kudeng ineh.

⁸Lun luk situnga ngagau tuda'-tuda' bawang rayeh, iamo' lemulun luk mileh ngagka' useh.

⁹Kareb lemulun luk mileh nguit lemulun luk mebacé amé' besara', lemulun luk mebacé ineh meriruh idi meria'.

- ¹⁰Lemulun luk ngaté megateh inan lemulun luk mesiri, iamo' lemulun luk matu matar ulun lun luk mesiri ineh.
- ¹¹Lemulun luk mebacé ngeruat usehneh, iamo' lemulun luk mileh, mulai niat pad ieh ngimet usehneh.
- ¹²Kudeng lun luk ngimet ninger luk mebalih, amung lun luk pa liangneh mangun ku lun mebalih.
- ¹³Mateh lun luk masi' idi lun luk ngedereh neneh ratnan Tuhan.
- ¹⁴Kudeng raca' ngedengan nelun masi', ieh miak ngimet mio.
- ¹⁵Bada' idi bebal do' kuan anak. Kudeng ieh maya' pian bururneh sebuleng, ieh ngacing igu' kuan tinanneh.
- ¹⁶Kareb lemulun luk dat ngimet, kekamen luk dat iuk-iuk rayeh. Iamo' lemulun luk matu miak nier ebpeh lemulun luk kudeng ineh.
- ¹⁷Do' mada' anakmu, pad ieh ngacing awang niat namu pelé ieh na maré igu' kuanmu.
- ¹⁸Kudeng aceh pupu na kiuten Allah, kali' rungen anak itin mula' ria'. Samal kuan lemulun luk maya' ukum Allah!
- ¹⁹Demulunmu na miak badén ku bala mo'. Ieh kali' ilung balamu, iamo' na ieh maya'.
- ²⁰Meluun rayeh rapet kuan lemulun luk mebacé ratnan lemulun luk pebala dengan na ngerawé.
- ²¹Kudeng iko maré kuan demulunmu anun-anun luk pianneh, rat kareb ieh isuut, mucu ieh miak ngalap amung binawehmu.
- ²²Lemulun luk malé museh megéi' ngacing ria' idi kedaluh.
- ²³Dita' niat ngacing ebpeh lemulun, iamo' lemulun luk mebeneh niat miak buren.

²⁴Rurum lun mano mangun ku bunu'neh sebuleng. Ieh miak kumin kudeng ieh mada' luk matu bang besara', idi Allah ngediman neneh kudeng ieh mebalih.

²⁵Mesusa' kuanmu kudeng iko matot inan lemulun. Iamo' samal kuan lemulun luk merapet inan Tuhan.

²⁶Amung lemulun pian inan raca' méi'. Iamo' Tuhan mo' mutut luk mesiri.

²⁷Lemulun luk matu megateh inan lemulun luk dat, idi lemulun luk dat megateh inan lemulun luk matu.

Bale' 30

¹Ini bala Agur Yaki: "Allah na idi denganku, Allah na idi denganku, idi ui melaya'!

²Ui mepad kudeng pung, baken lemulun; ui na inan ileh kudeng lemulun.

³Ui na tu-tu nesibada' ku ileh, idi ui na kali' anun-anun ratnan Allah.

⁴Idéké iné' surga, idi nuli' rat déi'? Idéké pangeh nengakem bui ku ticu'neh? Idéké nenanga abpa' bang kibung? Idéké nengelelep iring tana'? Kudeng iko kali', idéké ieh? Idéké anakneh?

⁵"Allah maya' amung-amung jani'Neh. Ieh mepad kudeng utap kuan amung-amung lemulun luk pian uenNeh matar.

⁶Kudeng iko ngeluun bala Tuhan pad iko mada' luk na tu-tu bilaNeh, Ieh miak ngukum namu, pad megala' iko mebalih."

⁷O Allah, ui mutuh dueh peruan rat Namu kareb nateh ui maté:

⁸aleg nima' negku mebalih, idi aleg nima' negku mangun ku lun do' idi ku lun dat. Maré petap akan mo' kuanku.

⁹Kudeng ui pelaba ula' akan, kian ui meraruh rat Namu lek. Iamo' kudeng ui masi', ui mano lek, pad ui ngigu' Allahku.

¹⁰Aleg ngedat demulun pa kiung tuanneh, pad iko na uen ngediman idi uen ngedereh.

- ¹¹Inan lemulun luk ngediman tamandeh idi na méi' kuan tinandeh.
- ¹²Inan lemulun luk ngerawé bururdeh meligan, iamo' setuneh ideh pelaba lutak.
- ¹³Inan lemulun luk ngerawé bururdeh do'. Matu, pelaba do' sen!
- ¹⁴Inan lemulun luk muyok nelun masi', kudeng ineh lawédeh ngalap akandeh.
- ¹⁵Lematak inan dueh anak decur. Ngadan didueh, "Maré negku! Maré negku!"
Inan apat luk na inan musam:
- ¹⁶su luk inan até, decur luk na anak, tana' luk na inan abpa', idi apui luk na mekilep.
- ¹⁷Lemulun luk situnga nan tamanneh idi ngedat tinanneh kareb ieh mengered, petulu kenen kanui, idi petulu matehneh tekulen bungkak luk meliput.
- ¹⁸Inan apat luk pelaba dalem kuanku:
- ¹⁹kanui luk temulud arang gawa', menipeh luk suloi luun batu, kapal luk nakap dalam luun abpa' rayeh, idi deléi idi decur luk pawa.
- ²⁰Ini lawé decur luk na lutep nan awanneh: ieh pasét, amé' diu' idi pebala, "Na sala'ku!"
- ²¹Inan apat luk inan tana' megateh:
- ²²demulun luk mangun ku raca', lun mebacé luk mula' akan,
- ²³decur luk dat luk ngaweh, demulun decur luk ngelibal awan tuanneh.
- ²⁴Inan apat pung bang tana' ini luk pelaba isuut, iamo' ideh pelaba ileh:
- ²⁵Dara': sagan pana' ideh melaya' ideh nganug akandeh kareb melau'.
- ²⁶Arnab: ideh pana' na metueh, iamo' ideh tudo arang batu.
- ²⁷Kato: na raca'deh, iamo' ideh nalan pekarur.
- ²⁸Latek: iko miak ngeragem neneh bang paladmu, iamo' ideh tudo bang ruma' raca'.

²⁹Inan apat luk do' siren kareb ideh nalan:

³⁰balang, luk meluun tueh ratnan amung pung, idi na matot;

³¹amék, lal kok luk medita' niat, idi raca'-raca' pa atun bawehdeh.

³²Kudeng iko pangeh nenganau' luk mebacé ngaceku medita' niat, do' iko ugka' idi ngerawé.

³³Kudeng iko nguel rata sapi' iko ngalap mentéga. Kudeng iko mepag icung lemulun ieh medara'. Ngegio useh idi iko ngacing ria'.

Bale' 31

¹Ini bala tinan Raca' Lemuil kuanneh:

²"Iko anakku luk inanku mawa, luk biré Tuhan maya' putuhku. Anunké luk belénku namu?

³Aleg iko merur nakap decur luk mesawa', idi aleg ngabud usinmu kuandeh. Decur ineh ngebpeh raca'-raca'.

⁴O Lemuil, ninger. Na petulu raca' ngirup abpa' anggur idi melili ku luk rupen luk megalih.

⁵Kudeng ideh ngirup ideh mekelupan ukum luk matu idi na méi' nelun masi'.

⁶Luk rupen ineh mangun ku ubat kuan lun luk medereh idi luk malé maté,

⁷pad ideh mekelupan susa' idi derehdeh.

⁸"Ngedengan lemulun luk na miak muit bururdeh sebuleng. Matar lemulun luk melaya'.

⁹Ngamo nedeh idi mutut ukum luk matu. Matar lemulun luk masi' idi medereh."

¹⁰Pelaba ikat nakap awan decur luk pelaba do'. Ieh meluun raga ratnan bau luk pelaba raga!

¹¹Deléineh merapet neneh, pad ieh na masi'.

¹²Ruked ulunneh decur ineh mangun ku peruan kuanneh, idi na ngesusa' neneh.

- ¹³Ieh meké' ngebaruh kibung ratnan buluh dumba idi pu.
- ¹⁴Ieh nguit akan rat mado mepad kudeng kapal déi' abpa' rayeh.
- ¹⁵Ieh tumui kareb nateh aco masat idi ngelak kuan tetek ruma'neh, idi mada' amung demulunneh luk decur.
- ¹⁶Ieh nakap tana' ku kabun anggur idi melih ineh ku usin luk ilapneh sebuleng.
- ¹⁷Ieh meké' idi metueh ngakem.
- ¹⁸Ieh kali' raga amung luk ruenneh, idi teh ieh ngakem kareb medacem.
- ¹⁹Ieh nguper idi ngebaruh.
- ²⁰Ieh mekatu nelun masi'.
- ²¹Na ieh mesusa' kareb meteneb, ngaceku uang tetek ruma'neh inan ayung luk mekapal.
- ²²Ieh nganau' tarub, idi ieh ngayung ku kibung pu luk sia' merirem.
- ²³Deléineh mebala, idi ieh seburur lun rayeh bawang.
- ²⁴Ieh nganau' ayung idi abet awa' luk pisuenneh kuan lun luk pepua'.
- ²⁵Ieh metueh idi buren, idi na matot mucu aco.
- ²⁶Ieh pebala dengan ileh idi mulai niat.
- ²⁷Ieh megéi', idi ieh ngasa' uang tetek ruma'neh.
- ²⁸Anak-anakneh ngegala' awadeh, idi awanneh ngubur neneh.
- ²⁹Kebalaneh, "Mula' decur mangun ku awan luk do', iamo' iko luk meluun do'."
- ³⁰Do' ayu miak naluk, idi do' taga miak buro, iamo' decur luk matot inan Tuhan petulu buren.
- ³¹Ngubur neneh ngaceku amung-amung luk ruenneh. Idi petulu ieh uen lun ngedita'.

Lun Luk Mada'

Lun Luk Mada' 1

- ¹Ini bala Lun luk Mada', ieh ineh anak Daud, luk raca' déi' Yerusalim.
- ²Na ulekneh, na ulekneh, kebala Lun luk Mada'. Ulun tana' ini na ulekneh.
- ³Lemulun ngakem raked ulunneh, idi na uli'neh.
- ⁴Inul-inul pelibal, iamo' tana' ini na misu'.
- ⁵Aco masat idi aco macep maya' dalan luk pekalai.
- ⁶Ulek bui, ieh ineh pa kabing busat aco idi pa tinueh busat aco, lemibung-lemibung idi lemubed amé' su inanneh teh.
- ⁷Amung-amung abpa' manud macing inan abpa' rayeh, iamo' su inan abpa' rayeh nateh mepanu'. Abpa' lemubed amé' ku udan idi manud sekua' teh amé' bang abpa' rayeh.
- ⁸Idi lemulun musam ku amung-amung ineh, pad ieh melibo ngerawé ineh. Na lemulun mawang niat ku amung luk sirennéh idi luk pedingerenneh.
- ⁹Luk mangun atun mangun baruh teh. Luk inau' atun miak ruen baruh teh. Aput-aput tana' na anun-anun luk mebaruh.
- ¹⁰Kebaladeh, "Siruh! Ini aceh luk mebaruh!" Na tu, amung ineh pangeh nangun atun kareb nateh tau tinganak.
- ¹¹Seburur lemulun pana' nateh kali' luk pangeh nangun atun, idi mucu ratnan ini.
- ¹²Ui ini, Lun luk Mada', mangun ku raca' Israil déi' Yerusalim.
- ¹³Ui nengelelep terawéku, pian sibada' ratnan amung-amung kekamen bang tana' ini. Kekamen luk biré Allah kuan lemulun pelaba ikat.
- ¹⁴Ui pangeh nenier amung luk ruen bang tana' ini, idi na ulekneh, mepad kudeng ngerada' bui mo'.
- ¹⁵Luk tekilu' na miak ruen ngesiri, idi luk na idi na miak uen ngiap.

¹⁶Ui pangeh nengerawé bang niatku, "Ui ini mangun ku lun rayeh idi meluun ileh ratnan amung-amung raca' luk nengimet Yerusalim atun. Ui kali' ilung ileh idi do' kali'."

¹⁷Ui pian ngitun arang do' kali' idi bacé, ileh idi ruden. Ini pana' mepad kudeng ngerada' bui.

¹⁸Kudeng lemulun iuk amé' mileh, idi ieh iuk amé' mesusa', pad ilehneh luk mula' ineh ngurat neneh.

Lun Luk Mada' 2

¹Ui pangeh nengerawé, "Do' ui nutun nganau' amung-amung luk ku ngawang niatku." Iamo' setuneh amung ineh pana' na ulekneh.

²Ui pangeh nekali' riruh ineh mebacé, idi luk ku ngawang niat ineh na ulekneh.

³Idi ui nenutun ngawang niatku ku abpa' anggur, pad ui miak kali' anun-anun luk do' ruen lemulun bang tana' ini raked ulundeh. Iamo' bang amung ineh ui nenakap ileh, idi na rinaruh ku bacé.

⁴Idi ui nenganau' mula' kekamen. Ui nemudut tuda'-tuda' ruma', idi nenibu tuda'-tuda' kabung anggur.

⁵Ui nenganau' tuda'-tuda' kabun idi nenibu tuda'-tuda' bua'.

⁶Ui nengukat takung idi abang dalan abpa'.

⁷Ui nemelih mula' demulun. Idi inan teh demulun tinganak bang ruma'ku. Idi ui meluun ula' aya' rat nelun baken luk tudo' déi' Yerusalim rat mon.

⁸Ui nenganug pirak idi amas ratnan binaweh raca' bang bawang-bawang luk inimetku. Deléi' idi decur menani ngawang niatku, idi ui nengalap amung-amung luk pian lemulun.

⁹Idi ui meluun do' rat nelun baken luk tudo' déi' Yerusalim rat mon, idi ilehku na buro rat negku.

¹⁰Ui nengalap amung-amung luk pianku. Na ui nepatad ratnan anun-anun luk ngawang niatku. Ui mawang niat ku amung-amung kekamenku. Idi ineh mangun ku tabparku.

¹¹Idi kareb ui nengerawé ratnan kélku idi amung-amung luk inau'ku, idi ui nekali' na ulekneh, iamo' mepad kudeng ngerada' bui' mo'.

¹²Ngaceku raca' miak nganau' luk pangeh inau' raca' luk ngimet atun mo'. Idi ui nengerawé ratnan ilung ileh, ruden, idi bacé.

¹³Idi ui nekali', "Ileh meluun do' ratnan bacé, mepad kudeng acang meluun do' ratnan dacem.

¹⁴Lemulun luk mileh kali' dalanneh, iamo' lemulun luk mebacé na kali' dalanneh." Iamo' ui kali' amung-amung tau miak maté.

¹⁵Idi ui nengerawé, "Luk macing kuan lun luk mebacé miak macing kuanku pana'. Anunké ulekneh ui pangeh nengalap ileh?" Idi ui nengor balaku sebuleng, "Na ulekneh, na ulekneh."

¹⁶Lun luk mileh idi lun luk mebacé na miak uen lun ngerawé. Muci aco idi amung-amung tau mekelupan lun. Amung-amung tau maté. Lun mileh idi lun luk mebacé pana'.

¹⁷Ngaceku ineh ulun bang tana' ini na ulekneh kuanku, ngaceku susa' mo' luk uenneh ngacing kuanku. Amung-amung ineh na ulekneh, iamo' ui pangeh nengerada' bui' mo'.

¹⁸Kélku idi luk ilapku na ulekneh, ngaceku ui kali' amung luk ilapku ineh miak tacin kuan lun luk ngelibal negku mangun ku raca',

¹⁹idi ieh mileh lek, kian mebacé lek. Idé luk kali'? Ieh miak ngimet amung-amung luk ilapku bang tana' ini, ngaceku kél idi ilehku. Na ulekneh.

²⁰Idi ui nenginuud ratnan kélku.

²¹Lemulun ngakem dengan tueh, ileh, idi do' kali', iamo' luk lapenneh miak tacin kuan lemulun luk na mekél nakap ineh. Na ulekneh idi teh na petulu!

²²Lemulun ngakem raked ulunneh dengan megagau. Idi anunké tabparneh?

²³Amung-amung luk ruenneh ruked ulunneh ngacing susa' idi dereh mo'. Kareb medacem pana' ieh na miak ugka' ngerawé. Na ulekneh!

²⁴Luk meluun do' kuan lemulun, ieh ineh kuman, ngirup, idi mawang niat ku amung-amung luk ilapneh ratnan kekammeneh. Iamo' ui kali' amung ineh pana' macing ratnan Allah.

²⁵Kudeng na pieh kudeng ineh lemulun na miak kuman idi mawang niat.

²⁶Allah maré ileh, do' kali', idi awang kuan lemulun luk inanNeh mawang niat, iamo' lun mesala' dukenNeh ngakem idi ngamung binaweh luk barén kuan lun baken luk inan Allah mawang niat. Na ulekneh! Mepad kudeng ngerada' bui mo'.

Lun Luk Mada' 3

¹Amung-amung luk mangun bang tana' ini mangun bang kareb luk litep Allah.

²Ieh ngeletep kareb uen nenganak idi kareb maté; inan kareb nibu idi kareb mubput luk tinibu;

³inan kareb ngaté idi inan kareb ngedo'; inan kareb ngusag idi inan kareb mudut.

⁴Ieh ngeletep kareb mesusa' idi kareb mawang niat; inan kareb nangi' idi inan kareb ngalai;

⁵inan kareb ngisak batu idi inan kareb ngamung batu; inan kareb ngapel idi inan kareb na ngapel.

⁶Ieh ngeletep kareb nakap idi kareb nutu'; inan kareb nganug idi inan kareb nala';

⁷inan kareb ngerarak idi inan kareb mubpul; inan kareb ungeng idi inan kareb pebala.

⁸Ieh ngeletep kareb mawa idi kareb megateh; inan kareb pebunu' idi inan kareb pedo'.

⁹Anunké tabpar lemulun ratnan kekammeneh?

- ¹⁰Ui pangeh nekali' kekamen luk biré Allah kuan lemulun.
- ¹¹Ieh nengelelep kareb luk petulu kuan luk amung-amung. Ieh maré kuan lemulun terawé ratnan luk meruked, iamo' na ieh miak kali' kekamen Allah rat pun-pun macing kekipedneh.
- ¹²Idi ui kali' luk meluun do' kuan lemulun, ieh ineh do' ieh mawang niat idi nganau' luk do' ruked ulunneh.
- ¹³Idi do' lemulun kuman, ngirup, idi mawang niat ku amung-amung luk ilapneh ratnan kekammeneh. Ieh ineh baré Allah.
- ¹⁴Ui kali' amung-amung luk ruen Allah lutep macing ruked-ruked. Seburur pana' nateh luk miak ngula' ineh idi ngasi' ineh. Allah nganau' luk kudeng ineh pelé tau matot Neneh.
- ¹⁵Anun-anun luk mangun nekini idi mucu pana' pangeh nangun atun. Idi Allah nganau' luk pangeh icingNeh atun kidi-kidi.
- ¹⁶Idi teh ui kali' bang tana' ini su luk petulu inan luk matu idi luk mesiri, inan luk dat mo'.
- ¹⁷Idi kebalaku, "Allah miak ngukum lemulun luk matu idi lemulun luk dat, ngaceku amung-amung kekamen idi amung-amung luk mangun inan karebneh:"
- ¹⁸Idi ui kali' Tuhan nutun lemulun pelé ideh kali' ideh na meluun do' ratnan pung.
- ¹⁹Ngaceku kekiped lemulun idi pung mepad mo'. Dueh-dueh ineh miak maté. Didueh mepad inan niat. Lemulun na meluun samal ratnan pung, ngaceku ulun bang tana' ini na ulek kuan didueh.
- ²⁰Ulek didueh mepad mo', ieh ineh muli' ku abuh.
- ²¹Idé luk kali' kudeng roh lemulun umak, idi roh pung temurun amé' bang tana'?

²²Idi ui kali' luk meluun do' kuan lemulun, ieh ineh do' ieh mawang niat ku amung-amung luk ilapneh ratnan kekammeneh. Na luk baken luk miak ruenneh. Idi na ieh miak kali' ratnan luk mangun mucu ratnan aténeh.

Lun Luk Mada' 4

¹Idi sekua' teh ui nengerawé ratnan amung-amung luk na mesiri bang tana' ini. Lemulun luk pidereh nangi' idi na lun ngedengan nedeh, ngaceku lemulun luk ngedereh nedeh melalud.

²Ui ngerawé lemulun luk pangeh naté meluun samal ratnan lemulun luk mulun.

³Iamo' meluun samal lemulun luk nateh tinganak idi luk nateh kali' amung-amung luk na mesiri bang tana' ini.

⁴Idi teh ui kali' punneh lemulun mekél ngakem: ieh ineh pad ideh ngalap meluun ula' binaweh ratnan lun baken. Iamo' na ulekneh. Ieh ineh mepad kudeng ngerada' bui mo'.

⁵Lemulun luk mebacé tudo mo', idi ieh iuk-iuk merugu' macing ieh maté.

⁶Mo lek, iamo' meluun do' ngalap sesuut mo' dengan mawang niat, ratnan megagau kidi-kidi nutun ngakem bui dengan dueh ticu'.

⁷Idi inan teh luk na ulekneh bang tana' ini.

⁸Inan lemulun luk tudo sebuleng na lun dengan. Na anakneh, na kinanakneh, iamo' ieh megéi ngakem, ngaceku na ieh mawang niat ku ieh mula' binaweh teh. Kekammeneh kuan idéké? Ngudehké ieh na miak ngawang niatneh? Ini pana' na ulekneh, ngaceku mulun dengan mesusa'.

⁹Dueh burur meluun do' ratnan seburur, ngaceku meluun do' kekamen didueh.

¹⁰Kudeng seburur mebpeh, seburur ngiding neneh. Iamo' kudeng seburur mebpeh kareb ieh sebuleng, pelaba susa', ngaceku na lun ngedengan neneh.

¹¹Kudeng meteneb, dueh burur miak pamung rudap pad do' lau'. Iamo' kudeng apehké seburur lemulun miak do' lau' kudeng ieh rudap sebuleng.

¹²Dueh burur lemulun miak metueh ratnan bunu' luk miak ngelaya' seburur lemulun. Mikat mutut kalat luk inau' ratnan teluh apid.

¹³Anak adi' luk masi' idi mileh meluun do' ratnan raca' luk mengered idi mebacé luk na ninger bada'.

¹⁴Anak adi' ineh miak remuat rat bang tutup pad mangun ku raca', kian ieh tinganak lun luk masi' bang bawang luk ruenneh ngimet mucu lek.

¹⁵Iamo' ui nengerawé ratnan amung-amung lemulun luk bang tana' ini, idi ui pangeh kali' arangdeh inan aceh anak adi' luk ngelibal raca'.

¹⁶Sagan pana' anak itin raca' pelaba ula', kareb ieh maté seburur pana' na mawang niat ku luk pangeh inau'neh. Na ulekneh. Mepad kudeng ngerada' bui mo'.

Lun Luk Mada' 5

¹Ngerawé do'-do' kareb iko amé' bang ruma' sembayang. Do' amé' idi sibada'. Ieh ineh meluun do' ratnan maré baré maya' lawé lemulun luk na mileh ngiti luk matu idi luk na matu.

²Ngerawé kareb nateh iko pebala, idi aleg pejani' mo'-mo' pa kiung Allah. Ieh luk déi' surga, idi iko luk luun tana'. Ngaceku ineh aleg iko pelaba ula' buri'.

³Kudeng iko megagau, iko mula' nupi luk dat, idi kudeng iko mula' buri', kali' rungen iko pebala luk mebacé.

⁴Idi kareb iko pejani' inan Allah, do' petacu maya' ineh. Na Ieh pian ku lun luk mebacé. Nganau' luk pijani' mu ineh.

⁵Meluun do' na tu-tu pejani', ratnan iko pejani' idi na maya' ineh.

⁶Aleg nima' balamu nguit namu nganau' sala', pad iko pebala inan imam Allah, "Jani'ku ineh mo'-mo'." Ngudehké iko ngacing useh Allah, pad Ieh ngusag amung luk inau'mu?

⁷Sagan tu pana' iko mula' nupi idi mula' bala, idi kekamenmu na ulekneh, na miak na iko matot inan Allah.

⁸Kareb iko nier lun luk ngimet ngedereh nelun masi', idi na mutut ukum luk mesiri kuanneh, aleg iko mawa. Anid-anid burur lun ngimet inan luk meluun rayeh rat nedeh. Idi luk meluun rayeh ngimet amung-amungdeh ineh.

⁹Raca' pana' merapet ku luk perinien.

¹⁰Kudeng iko merapet ku usin, iko na miak uen ngebor, ngaceku iko pian ku meluun ula' binaweh teh. Na ulekneh!

¹¹Kudeng iko ngalap meluun ula' binaweh, lemulun luk mula' miak kuman ineh. Iko ngalap ngadan lun do' mo'.

¹²Lemulun luk ngakem, do' rudap, sagan tu pana' na petap akan. Iamo' lun do' na do' rudap ngaceku megagau ngerawé mula' binaweh.

¹³Ini aceh susa' luk sinierku bang tana' ini: lemulu nganug usindeh ngerawé mucu aco,

¹⁴iamo' amung-amung usin ineh metutu' ngaceku aceh kekamen luk na inan peruan, pad na luk ketecan kuan anakdeh.

¹⁵Na luk iten ratnan luk ilap tau kareb tau necan tana' ini, ngaceku lubpa tau remuat rat bang nakan tinan tau. Idi kudeng ineh teh tau necan tana' ini.

¹⁶Ini pana' na petulu. Mepad kudeng acing tau bang tana' ini, kudeng ineh teh kareb tau remuat. Sagan tu pana' tau megéi' nutun ngakem bui, anunké luk lapen tau?

¹⁷Macing kekiped ulun tau, tau bang dacem, dengan susa', gagau, gateh, idi ét pana'.

¹⁸Idi ui pangeh nekali': luk meluun do' kuan lemulun, ieh ineh kuman, ngirup idi mawang niat ku amung-amung luk ilapneh ratnan kekammeneh rakedneh mulun bang tana' ini. Ieh ineh luk biré Allah kuanneh.

¹⁹Kudeng Allah maré binaweh idi tana' kuan lemulun, do' ieh mawang niat ku amung luk ilapneh ineh. Ieh ineh aceh baré luk biré Allah.

²⁰Na ieh megagau ku ulun lemulun luk mekamu'. Ngaceku Allah nengawang niatneh.

Lun Luk Mada' 6

- ¹Ui kali' bang tana' ini, inan aceh susa' luk macing nan lemulun.
- ²Ieh ineh, Allah maré binaweh, ngadan, tana', idi amung luk pianNeh kuan seburur lemulun, iamo' na Ieh nima' neneh mawang niat ku amung ineh. Iamo' lun baken ngalap ineh. Na ulekneh idi na petulu.
- ³Seburur lemulun miak inan meratu anak, idi mulun mio bang tana' ini, iamo' kudeng ieh na miak mawang niat ku luk ilapneh idi kekipedneh na ieh tinamen, meluun do' kuan anak luk maté karebneh uen nenganak.
- ⁴Na ulekneh anak ineh uen nenganak; ieh petacu semuet bang dacem pad ieh na uen lun ngerawé.
- ⁵Na ieh kali' acang aco, idi teh kudeng apeh ulun bang tana' ini. Iamo' ieh meluun samal
- ⁶ratnan lemulun luk na mawang niat ku ulunneh bang tana' ini, sagan tu pana' ieh mulun dueh ngeribu lak. Naké su luk ulek didueh mepad?
- ⁷Lemulun ngakem pad ngalap akan, iamo' megéi' na petap.
- ⁸Kudeng apehké lun luk mileh meluun samal ratnan lun luk mebacé. Inanké ulek ileh kuan lun masi' bang tana' ini.
- ⁹Na ulekneh; mepad kudeng ngerada' bui mo'. Meluun do' mawang niat ku luk bang paladmu ratnan megéi' nakap binaweh luk baken.
- ¹⁰Amung-amung luk mangun pangeh litep rat mon, idi amung tau kali' seburur lemulun na miak pesaad nan lemulun luk metueh rat neneh.
- ¹¹Pelaba ula' bala ngacing luk mo'-mo'. Anunké ulekneh kuan lemulun?
- ¹²Idéké luk miak kali' luk meluun do' kuan lemulun bang ulun tana' ini luk pelaba kamu', idi luk saget buro mepad kudeng aca'. Idéké luk kali' luk mangun bang tana' ini mucu ratnan aténeh.

Lun Luk Mada' 7

- ¹Ngadan luk do' meluun do' ratnan umau luk do' buen luk meraga, idi aco atému meluun do' ratnan aco luk inanmu tinganak.

- ²Meluun do' amé' ruma' su luk inan lemulun nangi' ngaceku lun naté ratnan amé' ku irau, ngaceku do' tau megéi' ngerawé ratnan até luk macing kuan tau amung.
- ³Susa' meluun do' ratnan riruh; sagan tu pana' iko tekedamut, ilehmu amé' metadam ku ineh.
- ⁴Lemulun luk megéi' ngerawé ratnan ngawang niatneh mebacé. Lemulun luk mileh ngerawé ratnan até.
- ⁵Meluun do' badén lun luk mileh ratnan buren lun luk mebacé.
- ⁶Riruh lun luk mebacé mepad kudeng uni tabpa' luk ngetek kareb ieh meseb ku apui. Na tu ilungneh.
- ⁷Kareb lun mileh naluk, ieh mepad kudeng lemulun luk mebacé. Ngalap suap idi iko ngusag ulunmu.
- ⁸Kekiped anun-anun meluun do' ratnan punneh. Ulai niat meluun do' ratnan medita' niat.
- ⁹Aleg malé museh. Lemulun luk mebacé mo' luk mét niat.
- ¹⁰Aleg pebala, "Ngudehké ulun tau mon meluun do'?" Ini aceh itun luk mebacé.
- ¹¹Amung lemulun luk nier aco, petulu ngalap ileh. Ieh ineh mepad kudeng ngalap aceh babpat binaweh.
- ¹²Ileh meluun do' ratnan usin. Ileh matar ulunmu — ini punneh ileh luk meluun do'.
- ¹³Ngerawé ratnan luk inau' Allah. Idéké miak ngesiri luk inau' Allah tekilu'.
- ¹⁴Kareb iko uen ngeperuan, do' iko mawang niat, idi kareb inan susa' do' iko ngerawé: Allah maré awang idi susa' pana'; idi na iko kali' luk miak mangun mucu.
- ¹⁵Ulunku mo'-mo' mo'. Iamo' ui pangeh nekali' luk amung-amung. Lemulun luk do' miak maté, idi lun baken luk dat miak mulun.

- ¹⁶Aleg iko pelaba do' idi aleg iko pelaba ileh — ngudehké iko ngusag ulunmu?
- ¹⁷Iamo' aleg iko pelaba dat idi pelaba bacé, pad iko maté kareb nateh tarekneh.
- ¹⁸Do' ngalap terawé luk muned. Kudeng iko matot inan Allah, luk ruenmu miak mangun.
- ¹⁹Ileh ngetueh seburur lemulun meluun ratnan pulu' raca' miak ngetueh aceh bawang.
- ²⁰Seburur pana' nateh luun tana' ini luk megéi' nganau' luk matu dengan na tu-tu nganau' sala'.
- ²¹Aleg iko ninger bala lemulun — kian iko miak ninger demulunmu ngedat namu lek,
- ²²idi iko sebuleng kali' iko megéi' kua' ngedat nelun baken.
- ²³Ui nenutun amung ini ku ilehku. Kebalaku, "Ui pian ngeriput ilehku." Iamo' ieh ineh mado rat negku.
- ²⁴Kudeng apehké lemulun miak kali' ilung ulun tana' ini? Ieh ineh pelaba dalem idi pelaba ikat.
- ²⁵Iamo' ui mekél sibada' pad nakap ileh idi or kuan amung-amung itunku, pelé ui kali' bacé idi ruden ineh pelaba dat.
- ²⁶Ui kali' luk meluun pét ratnan até, ieh ineh decur. Niatneh mangun ku abpung luk ngakem namu, ieh ineh mepad kudeng rabat, idi kareb ieh ngapel namu, ticu'neh mepad kudeng luk ku ngaling. Lemulun luk maya' pian Allah miak buro, iamo' ieh ngakem lun mesala'.
- ²⁷Mo, kebala Lun luk Mada', Ui sibada' ini pad iuk-iuk inan ileh kareb ui nenakap or ineh.
- ²⁸Iamo' mula' teh or luk na nekali'ku. Arang meribu lemulun ui kali' seburur deléi luk do', iamo' seburur decur pana' nateh luk do' arangdeh.

²⁹Ini amung luk ui nesibada': Allah nenganau' netau mesiri, iamo' tau pangeh nakap dalam luk tekilu'.

Lun Luk Mada' 8

¹Lemulun luk mileh mo' kali' ilung luk amung-amung. Ileh nganau' neneh merimud pad ieh na tekedamut.

²Do' maya' bala raca'. Idi aleg pejani' inan Allah mo'-mo'.

³Raca' miak nganau' luk pianneh. Aleg tuped iringneh pad iko na mekaneh susa'.

⁴Raca' inan lalud, idi lun baken na miak mebpeng neneh.

⁵Kudeng iko maya' balaneh na iko mesusa'. Idi lemulu luk mileh kali' luk petulu ruenneh.

⁶Inan kareb idi dalam luk petulu kuan amung-amung luk ruen tau. Iamo' tau na petap ileh.

⁷Seburur pana' nateh arang tau luk kali' luk mangun mucu, idi idéké luk mada' netau?

⁸Seburur pana' nateh luk miak ngagka' aténeh, pad ieh ngiuk aco luk inanneh maté. Na tau miak mepuit ratnan bunu' ineh. Lemulun luk dat na miak puatin ku datneh.

⁹Ui kali' amung ini kareb ui nengerawé ratnan ulun tana' ini, ngaceku sebuang lemulun inan lalud, idi lun baken medereh pa liang imetdeh.

¹⁰Mo, ui pangeh nekali' lemulun luk dat tinanem. Idi arang dalam kareb ideh muli' rat lengutan, lemulun luk dat ineh buren bang bawang su luk inandeh nenganau' datdeh. Iamo' na ulekneh.

¹¹Anunké punneh lemulun pian nganau' luk dat? Ngaceku kekamen luk dat na saget kumin.

¹²Rabpu'-rabpu' lun mesala' nganau' meratu kekamen luk dat idi simén mulun teh. Iamo' ui kali' lemulun luk matot inan Allah miak uen ngeperuan ngaceku matot Neneh,

¹³Idi lemulun luk dat na uen ngeperuan, idi na ieh mekadang ulun ngaceku na ieh matot inan Allah. Ieh mepad kudeng aca' mo'.

¹⁴Iamo' inan luk na petulu bang tana' ini. Rabpu'-rabpu' lemulun luk matu ngalap ukum lemulun luk dat, idi lemulun luk dat ngalap tabpar lemulun luk matu. Ini pana' na ulekneh!

¹⁵Idi ui kali' luk meluun do' kuan lemulun, ieh ineh kuman, ngirup, idi mawang niat. Idi ini luk miak ruenneh kareb ieh ngakem raked ulunneh luk barén Allah bang tana' ini.

¹⁶Kareb ui nutun ngalap ileh idi nesibada' ku luk mangun bang tana' ini, idi ui kali' sagan tu pana' lemulun na rudap kedangan tebaco,

¹⁷nateh ieh kali' luk ruen Allah. Kudeng apeh pana' tuehmu nutun, iko na miak kali'. Kian, lun luk mileh ngerawé nedeh kali' lek. Iamo' nateh ideh kali'.

Lun Luk Mada' 9

¹Mio tu-tu ui nengerawé ratnan amung ini, pad ui kali' Allah ngimet kekamen lemulun luk mileh idi matu, awadeh idi gatehdeh pana'. Lemulun na kali' luk mangun kuanneh mucu.

²Iamo' na mekudeh. Kekiped lemulun luk matu idi lemulun luk dat mepad mo', ieh ineh lemulun luk meligan idi lemulun luk mesala', lemulun luk sembayang idi lemulun luk na sembayang, lemulun luk maré baré idi lemulun luk na maré baré. Kudeng ineh teh lemulun luk do' idi lemulun luk dat, lemulun luk pebulung idi lemulun luk na pebulung.

³Kekiped amung-amung lemulun bang tana' ini mepad mo'. Ini na petulu! Raked ulundeh lemulun ngerawé ratnan luk dat idi luk mebacé, idi denak-denak ideh maté.

⁴Lemulun luk mulun inan rapet. Uko' luk mulun meluun do' ratnan balang luk naté.

⁵Ngaceku lemulun luk mulun kali' anun-anun, idi na luk lapendeh teh, idi ideh na uen ngerawé teh.

- ⁶Awadeh, gatehdeh, idi pinian bururdeh naté dengandeh. Na ideh ngalap babpat bang luk ruen bang tana' ini teh.
- ⁷Ngaceku ineh do' iko kuman idi ngirup dengan mawang niat. Allah pangeh nengeperuan namu.
- ⁸Do' ngayung ku luk do', idi ngumau uluhmu.
- ⁹Do' mawang niat inan awan luk inanmu mawa, ruked ulunmu luk mekamu' luk biré Allah kuanmu. Ngaceku ini babpatmu ratnan ulun idi kekamenmu bang tana' ini.
- ¹⁰Do' mekél nganau' amung kekamenmu, ngaceku su luk inan até — su luk ulekmu ineh, na luk idi kekamen, terawé, ileh, idi do' kali'.
- ¹¹Idi teh ui kali', bang tana' ini lemulun luk meluun awer na megéi' metueh kareb peribatun, idi lemulun luk mesangit na megéi' metueh kareb pebunu'. Lemulun luk mileh na megéi' petap akan, idi lemulun luk do' kali' na megéi' ngalap mula' binaweh, idi lemulun luk mileh nganau' anun-anun na megéi' mangun ku lun rayeh. Susa' miak macing kuan amung-amung lemulun.
- ¹²Iko na kali' kareb tarekmu macing. Mepad kudeng suit denak-denak mekaneh abpung, idi mepad kudeng lawid mekaneh pukat, kudeng ineh teh tau lemulun denak-denak mekaneh susa'.
- ¹³Inan teh luk kali'ku luk ngegala' terawé ulun tana' ini ratnan ileh.
- ¹⁴Inan aceh bawang luk isuut, idi na mula' lemulun. Seburur raca' luk metueh nengerieng neneh. Ieh nengelikut neneh pad ieh miak ngusag libungneh.
- ¹⁵Inan seburur lun luk masi' bang bawang ineh luk petap ileh ngulun bawang ineh. Iamo' seburur pana' nateh luk nengerawé neneh.
- ¹⁶Kebalaku, Ileh ineh meluun do' ratnan tueh, iamo' na tau ngerawé lun masi' mileh idi na tau pian ninger balaneh.
- ¹⁷Meluun do' ninger lun mileh pebala dengan suut tang ratnan ninger raca' ngitang bang gayam arang lemulun luk mebacé.

¹⁸Ileh meluun do' ratnan repapeh bunu', iamo' sebuleng sala' mo' miak ngusag mula' luk do'.

Lun Luk Mada' 10

¹Butung laled miak nganau' umau luk do' buen dat buen, idi sesuut bacé ngagka' ileh luk rayeh.

²Lemulun luk matu pian nganau' luk do'. Lemulun luk mebacé pian nganau' sala'.

³Bacéneh megala' kuan sakai pana'. Ieh mada' bacéneh siren amung-amung lemulun.

⁴Kudeng raca' museh namu, aleg iko ugka' ratnan kekamenmu. Iko miak ngalap do' ratnan sala' luk rayeh kudeng iko mulai niat.

⁵Ini aceh kekamen luk na mesiri bang tana' ini luk inau' raca'-raca'.

⁶Ideh ngikit lemulun luk mebacé mangun ku lun rayeh. Iamo' ideh ngebeneh nelun do'.

⁷Ui pangeh nenier demulun maya' kuda, iamo' lun do' luk nalan kukud mepad kudeng demulun.

⁸Kudeng iko ngukat lubang, iko pana' mebpeh bang ineh. Kudeng iko ngusag lubang batu, iko gitapen menipeh.

⁹Kudeng iko ngukat batu, iko meritep ku batu ineh. Kudeng iko ngapak kayuh, iko medecat ku ineh.

¹⁰Kudeng uaimu mengadel idi iko na ngir idi, iko merur ngakem ku ineh. Meluun do' ngarawé atun.

¹¹Na ulek ilehmu marot ku menipeh kudeng iko nima' menipeh ngatep namu atun.

¹²Lemulun luk mileh miak buren ngaceku balaneh, iamo' bala lun luk mebacé ngusag ulunneh.

¹³Ieh ngimun dengan bala luk mebacé, idi kekipedneh balaneh mepad kudeng bala lun meruden.

¹⁴Lun mebacé na mileh pirud. Seburur pana' nateh luk kali' luk miak mangun mucu, idi luk mangun mucu ratnan até tau.

¹⁵Kudeng lemulun luk mebacé ngakem, ieh pelaba erur. Idi ieh na miak amé' kadai ngaceku ieh na kali' dalan.

¹⁶Aceh bawang mekaneh susa', kudeng raca' malé buken idi kudeng lun rayeh-rayeh irau kedangan-kedangan.

¹⁷Iamo' samal kuan bawang luk kuan raca' luk mileh mutut ukum kuan bururneh sebuleng, idi luk kuan lun rayeh-rayeh luk kuman bang kareb luk petulu, idi luk ngimet bururdeh idi na mabuk.

¹⁸Kudeng lemulun pelaba kupé na ngelibal apo ruma'neh, kali' rungen apo ruma'neh meratan idi ruma'neh pana' merapuk.

¹⁹Kuman idi ngirup ngawang niatmu. Iamo' kudeng na usin na luk kenen idi na luk rupan.

²⁰Aleg ngilang raca' bang niatmu pana', idi aleg ngedat lun do' bang takepmu sebuleng pana'. Kian suit miak ngatum buri'mu lek.

Lun Luk Mada' 11

¹Do' pepua' ku binawehmu déi' bawang baken, idi mucu iko miak ngalap utung.

²Maré binawehmu kuan tuda'-tuda' bawang, ngaceku iko na kali' susa' luk miak macing namu bang tana' ini.

³Su apeh aceh lawa kayuh meluka', su ineh teh inanneh telubid. Kudeng aceh laput mitem, kali' rungen inan udan.

⁴Kudeng iko nganét bui idi kareb luk petulu, na tu-tu iko miak nibu anun-anun pana', idi teh na luk perinien.

⁵Allah nenganau' luk amung-amung idi iko na miak kali' ilung luk ruenNeh, mepad kudeng iko na kali' kudeng apeh anak luk pun ngimun bang nakan tinanneh.

⁶Do' nibu luk tibuenmu pa pekak idi pa malem teh, ngaceku iko na kali' sapeh luk do' ulun idi sapeh luk dat ulun.

⁷Acang aco pelaba do' siren mateh tau.

⁸Do' mawang niat ku ulunmu anid lak. Sagan tu pana' ulunmu mekadang, do' iko ngerawé amung aco luk inanmu tudo bang dacem até. Na luk inanmu mawang niat mucu.

⁹Do' iko mawang niat idi do' ria' kareb iko anak adi'. Nganau' luk do' sirenmu idi luk pian niatmu. Iamo' do' ngerawé Allah ngukum namu maya' kekamenmu.

¹⁰Aleg iko megagau ku luk anun-anun pad iko na mesusa'. Na iko mio ku anak adi'.

Lun Luk Mada' 12

¹Idi ngerawé Allah luk nemudut namu kareb iko anak adi', kareb nateh aco susa' macing idi iko pebala, "Na ui mawang niat ku ulun tana' ini,"

²ieh ineh kareb acang aco, bulan, idi gituen na merasat kuanmu idi laput megéi' lemubed nguit udan.

³Idi ticu'mu luk pangeh nematar namu miak megegker idi kukudmu luk metueh nekini miak melaya'. Lipenmu mabud pad iko na miak ngagat idi meseraber siren matehmu.

⁴Idi iko mebengel pad na miak ninger ria' luk déi' liang. Na iko miak ninger uni lun luk tupeh idi lun luk menani, iamo' iko kulat ku uni suit.

⁵Iko miak matot ku su luk medita', idi iko mesusa' nalan. Abpukmu amé' mebuda' idi iko na pian pamung dengan awanmu teh. Tau amé' su luk inan tau ngato erur tau luk kekiped, idi lemulun temido maya' dalan.

⁶Kaling pirak miak meputul, idi lapung amas miak mebpeh idi mebila" abet sidangur miak meputut, idi sidangur miak mebila'.

⁷Burur tau miak muli' amé' ku abuh tana' ini, idi roh tau lemubed kuan Allah luk nemaré ulun kuan tau.

⁸Na ulekneh, na ulekneh, kebala Lun luk Mada'. Amung ineh na ulekneh.

⁹Iamo' ngaceku Lun luk Mada' ineh mileh, ieh na nugka' mada' luk nekali'neh. Ieh nesibada' ratnan balé' idi nenutun nedeh ku matu.

¹⁰Lun luk Mada' ineh nenutun nakap bala luk ngubuk, iamo' balaluk inayudneh matu.

¹¹Bala lemulun luk mileh mepad kudeng rukud lun luk matar dumba luk metadem. Ideh pangeh biré Allah luk mangun ku Lun luk Matar netau amung.

¹²O Asi, matar do'-do' ratnan ini teh. Inan pelaba ula' surat luk inayud, na kekipedneh. Kudeng iko nutun sibada' ku amung ineh, iko merur mo'-mo'.

¹³Idi kekiped balaku: Matot inan Allah, idi maya' amung ukumNeh, ngaceku ini punneh lemulun pangeh pinudut. Allah miak ngukum amung-amung kekamen tau luk do', luk dat, idi luk inalum pana'.

Nani Selimun

Nani Selimun 1

¹Nani Selimun luk pelaba do'.

²Iko ngangep negku; idi awamu meluun paci' ratnan abpa' anggur.

³Iko pelaba do buen; idi ngadanmu mepad kudeng umau luk do' buen. Seburur decur pana' nateh na mawa namu.

⁴Ngalap negku idi kitech buro; nguit negku amé' bang takepmu idi iko mangun ku raca'ku. Kitech miak mawang niat ngaceku iko idi. Do' kitech ngerawé awa kitech meluun ratna abpa' anggur, idi iko petulu inan mawa!

⁵Et idang nengitem negku, iamo' ui do' taga. O decur Yerusalim, ui mitem mepad kudeng lepo kibung luk déi' Kedar, ui mepad kudeng dicing luk bang ruma' Raca' Selimun.

⁶Aleg ngerawé negku dat ku ui mitem, ngaceku ét idang luk nengitem negku. Kinanak-kinanakku luk deléi museh negku, idi ideh nengecuk negku ngakem bang kabun anggur, pad na inan karebku ngerawé bururku sebuleng.

⁷Mada' negku, O awaku, su luk inanmu nguit dumbamu, idi su luk inandeh peringucung kareb muned aco. Ngudehké ui nakap namu arang sengeriudan dumba lun baken?

⁸Naké iko kali' su ineh, O decur luk pelaba do' taga'? Do' amé' maya' dumba ineh, idi nakap uduh kuan amékmuneng ku lepo kibung lun luk matar dumba ineh.

⁹O awaku, iko mepad kudeng kuda tineh luk arang kuda luk nguit keréta raca' Masir.

¹⁰Abpukmu luk ipid pelaba do' taga pekop pingitmu, idi diermu inan baé luk meraga.

¹¹Kai miak nganau' ratai amas kuanmu, dengan bané pirak.

¹²Kareb raca'ku netelubid luun bitaranneh, idi umauku pelaba do' buen kali'neh.

¹³Awaku mebuen mepad kudeng mur kareb ui ngabin neneh.

¹⁴Awaku mepad kudeng busak luk mulun mo'-mo' bang kabun anggur déi' Enggedi.

¹⁵O awaku, pelaba do' tagamu! Idi matehmu pana' pelaba do' teh.

¹⁶O awaku, iko teh pelaba taga, idi luk inanku mawang niat. Uduh miak mangun ku bitaran kiteh;

¹⁷Idi tumuh miak ku petuked ruma' kiteh, idi aru' miak ku aponeh.

Nani Selimun 2

¹Ui ini busak tunung luk bang pulung déi' Saron, idi busak ukit luk luun pegkung.

²Awaku mepad kudeng ukit arang tabpa', idi arang amung decur baken.

³Mepad kudeng kayuh luk inan bua' arang kayuh luk bang pulung, kudeng ineh teh awaku arang deléi baken. Ui pian tudo iang lunguneh idi bua'neh pelaba do' én kenenku.

⁴Ieh nenguit negku iné' su luk inan kuman, idi ieh nengiding bedéra awa pa luunku.

⁵Ngetueh negku ku bua' anggur idi ngedo' negku ku bua' luk bang pulung! Ui melaya' ngaceku pelaba awa.

⁶Ticu'neh pa kabing ku lagaku, idi ticu'neh pa tinueh ngapel negku.

⁷O decur Yerusalim, do' muyuh pejani' negku idi pebulung ku payo idi talau luk mawer, pad muyuh na ngesabeng awa kai dueh.

⁸Ui ninger uni tang awaku. Ieh upun maya' luun pegkung amé' papu' negku.

⁹Awaku mepad kudeng talau, idi kudeng anak poyo deléi. Siruh, ieh tuped libal alad kiteh, idi nier negku rat bang tabuk.

¹⁰Awaku pebala negku. Awaneh O awaku, amé' tungé' maya' negku.

¹¹Kareb meteneb pangeh nepelaba; idi udan pangeh nato teh;

¹²Idi amung-amung kayuh pana' kebusak teh. Ini aceh kareb miak menani; idi uni sukur pana' pedingeren déi' lati'.

¹³Bua' gita' pana' malé teh melak, idi buen busak anggur pana' pelaba teh do'. O awaku, amé' maya' negku.

¹⁴Iko sigapung mepad kudeng sukur bang lubang batu. Nima' negku nier kiungmu luk metaga, idi ninger uni tangmu.

¹⁵Do' ngakem amung dawa' labo, idi luk isuut pana', kareb nateh ideh kuman busak anggur ineh.

¹⁶Awaku ui kuan, idi ieh kuan negku. Ieh maman dumbaneh arang bunga' ukit.

¹⁷Kareb meteneb idi nateh mét idang. Lemubed, O awaku, mepad kudeng talau, idi kudeng anak payo deléi luk luun pegkung.

Nani Selimun 3

¹Kareb ui rudap anid-anid aco, Ui nenginupi aceh deléi luk inanku mawa; ui nenakap neneh, iamo' na ieh kali'ku.

²Petacu ui netumui idi nenalan maya' dalan luk rayeh idi luk isuut bang bawang ineh. Ui iné nakap deléi luk inanku mawa, iamo'na ieh kali'ku.

³Lun luk matar bawang ineh nepapu'ku, idi ui nengitun nedeh, "Kali' muyuh awa kidi?"

⁴Kareb ui nelemaba nedeh, petacu ui nekali' awa kidi. Ui nengapel neneh idi ngibpang neneh buro, pad macing ui nenguit neneh amé' ruma' tinanku, idi semuet bang takepneh.

⁵O decur Yerusalim, do' muyuh pejani' negku, idi pebulung ku payo idi talau luk mawer, pad muyuh na ngesabeng awa kai dueh.

⁶Anun luk rat déi' su luk ali-ali ineh, luk kudeng rabpun mur idi umau luk do' buen luk iseb, idi kudeng umau luk do' buen luk pisuen lemulun luk iné' pepua'

⁷Siruh, ideh nguit pagau luk kuan Selimun, ieh ineh anem ngepulu' burur lun luk mesangit rat bawang Israil.

⁸Amung-amungdeh mileh makai pelapet, idi pekalai pebunu'. Anid-anid bururdeh inan pelapet, pad matar bunu' luk macing medacem.

⁹Raca' Selimun binirirdeh luun pagauneh, luk inau' ratnan kayuh luk do'.

¹⁰Kayuh luk anid lidung pagau ineh, luk inan ngabet aponeh, ibpu ku pirak. Idi aponeh kibung luk inan amas. Idi ebpu laganeh kibung luk sia' merirem luk inau' decur Yerusalim luk mawa inan raca'.

¹¹O decur Sion, amé nier Raca' Selimun. Idi pataneh inau' tinanneh, kareb ieh nengaweh, idi aco ineh luk inanneh pelaba awang niat.

Nani Selimun 4

¹O awaku, pelaba do' tagamu! Idi matehmu pana' pelaba do' teh, pa keted ebpu uluhmu. Abpukmu melapi mepad kudeng buluh amék luk remuru pegkung Giliad.

²Lipenmu mebuda' mepad kudeng dumba luk binuting idi luk pangeh biru'. Sebuleng pana' nateh nerukep; amung-amungdeh mepad mo'.

³Bibirmu mepad kudeng gitian luk mesidak; idi balamu pelaba do' pedingeren, idi pingitmu pana' pelaba do' sia'.

⁴Diermu mesalud kudeng ruma' Daud luk medita'. Bané luk i diermu mepad kudeng utap meribu lun pebunu' luk mebala.

⁵Iti'mu mepad kudeng dueh talau luk anak rapid, luk nakap luk kenen arang bunga' ukit.

⁶Ui miak tudo luun pegkung mur, ieh ineh pegkung umau luk do' buen. pad macing aco masat.

⁷O awaku, pelaba do' tagamu, idi luunmu na tupu pilat.

⁸O awanku amé' maya' negku, rat Pegkung Lebanon. Idi remuru rat Pegkung Amana, rat Pegkung Senir idi Pegkung Hermon. su luk inan balang idi kuir tudo.

- ⁹O awa luk awanku, kareb ui nier matehmu idi banému, niatku nepekisu'.
- ¹⁰O awa luk awanku, pelaba do' mawa namu, idi awamu meluun paci' ratnan abpa' anggur. Idi buenmu meluun do' ratnan buen luk baken.
- ¹¹O awaku, bibirmu mepad én kudeng duru' tebikan; idi dila'mu mepad én kudeng rata idi duru' tebikan teh. Kuyu'mu do' buen, mepad kudeng Pegkung Lebanon.
- ¹²Awa luk awanku ineh mepad kudeng aceh kabun luk melinged idi luk linibung, idi kudeng aceh bued luk na melagan.
- ¹³Amung luk tibuen do' ulun su ineh. Idi ideh temubu' mepad kudeng kabung bua' delima, idi ngeruat bua' luk pelaba do', idi inan teh gregka' idi uduh luk do' buen;
- ¹⁴uduh luk do' buen, sigumau, idi kayuh luk mepaci', idi amung kayuh luk do' buen rabpunneh, mur idi tara ala, dengan amung luk meluun do' buen.
- ¹⁵Bued idi arur luk uput rat Pegkung Lebanon, mubpur kabun ineh.
- ¹⁶O bui rat pa tinueh busat aco idi rat pa kabing busat aco, do' tumui idi mebui bang kabunku, idi nguit buen luk do'. Nima' awaku amé' bang kabunneh, idi kuman bua' luk meluun do'.

Nani Selimun 5

- ¹O awa luk awanku, ui pangeh iné' bang kabunku. Ui ngamung murku idi kayuh luk do' buen; ui kuman duru' tebikan, idi ngirup abpa' anggur idi rata sapi'. Decur Baken Do' medueh kuman idi ngirup pad macing medueh mabuk ku awa!
- ²Karebku rudap, lalidku kulat, idi ui neninger awaku nateg tanga'. Awaneh Nima' negku semuet, O awaku, idi sukurku luk pelaba do'. Uluhku neba' ku ipup idi ku udan puré.
- ³Napeh teh, nganau' kuyu' ui atun, idi teh ui pangeh namaru' kukudku, ara' ui meburi baruh teh.
- ⁴Awaku nengakem pasek tanga' kidi, idi niat ku nesigio.

⁵Idi ui pian awaku semuet. Idi bang paladku inan mur, idi luun bua' ticu'ku teh, kareb ui nengakem pasek tanga' ineh.

⁶Idi ui nengukab tanga' kuan awaku, iamo' ieh pangeh neburo. Ui pelaba geregan ninger uni tangneh! Ui nenakap neneh, iamo' na ieh kali'ku; idi ui nenawar neneh, nateh ieh idi.

⁷Ideh luk matar bawang ineh nekali' negku, idi ideh nenecat negku, idi nengalap kuyu' kidi.

⁸O decur Yerusalim, do' muyuh pejani' negku, kudeng muyuh kali' awaku, do' mala neneh, ui melaya' ngaceku pelaba awa.

⁹O decur luk pelaba taga, do' mada' nekai kudeng apéh ayu awa midi. Anunké do'neh awa midi, pad kai pejani' namu?

¹⁰Awaku pelaba taga idi metueh, ieh sebuleng luk pelaba taga arang pulu' ngeribu lemulun.

¹¹Abpukneh mekadang idi megeriwet, idi mitem kudeng bungkak, idi uluhneh mepad kudeng amas luk meluun do'.

¹²Matehneh mepad kudeng sukur luk tuped tangeb abpa', luk biru' ku rata sapi'.

¹³Pingitneh mepad kudeng kabun busak luk do' buen. Bibirneh mepad kudeng bunga' ukit, luk pelaba do' buen.

¹⁴Langenneh pelaba do' ayu, idi ieh inan susing luk meraga. Bururneh do' salad idi mebuda'.

¹⁵Tipenneh mepad kudeng diri batu luk mebuda', luk ilen ku amas. Ayuneh mepad kudeng Pegkung Lebanon, idi tumuhneh luk pelaba do'.

¹⁶Balaneh pelaba do' én, idi ayu bururneh ngawang niatku. Kudeng ineh ayu awa kidi, O decur Yerusalim.

Nani Selimun 6

¹O decur luk pelaba do' taga, iné' iapehké awa midi? Iné' maya' dalam sapeh awa midi? Kai miak ngedengan namu nakap neneh.

²Awa kidi iné' bang kabun nidi, su luk inan kayuh luk do' buen mulun. Ieh maman dumbaneh bang kabun, idi ngamung bunga' ukit.

³Awaku ui kuan, idi ieh kuan negku. Ieh maman dumbaneh arang bunga' ukit.

⁴O awaku, iko do' taga mepad kudeng Yerusalim, idi bawang Tirsa, ieh ineh bawang-bawang luk inan mawa ineh.

⁵Aleg nier negku, ngaceku matehmu ngegio niatku. Abpukmu melapi, mepad kudeng buluh amék luk remuru Pegkung Giliad.

⁶Lipenmu mebuda' mepad kudeng sengeriudan dumba luk pangeh biru'. Sebuleng pana' nateh nerukep, amung-amungdeh mepad mo'.

⁷Pingitmu pelaba do' sia pa keted ebpu uluhmu.

⁸Inan anem ngepulu' raca' decur idi ualuh ngepulu' decur baken teh, idi anak adi' decur luk na mekiap ula'deh!

⁹Iamo' sebuleng mo' luk inanku mawa, idi ieh metaga mepad kudeng sukur. Ieh sebuleng mo' anak decur tinanneh, idi luk inan tinanneh mawa. Amung decur luk nier neneh nginawa ku taganeh; amung raca' decur idi decur baken ngubur neneh.

¹⁰Idéké decur ini luk mepad kudeng aco masat. Ieh metaga kudeng bulan, idi merasat kudeng aco.

¹¹Ui iné' bang kabun bua', sikal nier luk tinibu mucu luun raked ineh, idi nier don kayuh anggur luk mebaruh, idi busak delima.

¹²Ui megegker, ngaceku iko nenganau' negku geregan ku awa, mepad kudeng lun luk ngimet keréta geregan amé' pebunu'.

¹³O decur Sulam lemubed, lemubed, pad kai miak nier namu. Ngudeh muyuh pian nier negku, luk ngalai arang lun mula'?

Nani Selimun 7

¹Pelaba do' kukudmu makai selipar, O decur luk metaga. Ayu tipenmu pelaba do', mepad kudeng luk inau' lun luk mileh ngarit.

²Puedmu mepad kudeng sangkir, luk megéi' ruan abpa'. Awa'mu mepad kudeng aceh runguh padé, luk arang bunga' ukit.

³Iti'mu mepad kudeng payo luk anak rapid, idi kudeng dueh talau.

⁴Diermu mepad kudeng ruma' luk medita' luk mebuda'. Matehmu mepad kudeng takung luk bang bawang Hesbon, luk muneng ku tanga' bawang luk rayeh ineh. Icongmu do' taga mepad kudeng ruma' luk medita déi' Lebanon, luk inan lun tudo matar bawang Damsik.

⁵Uluhmu mepad kudeng Pegkung Karmel. Abpukmu luk ipid mepad do' kudeng kibung luk sia' merirem; idi raca' miak metayan ku do'neh.

⁶O awaku, pelaba do' tagamu, idi ui pelaba awang niat namu.

⁷Ayumu mepad do' kudeng lawa kurma, idi iti'mu kudeng bua'neh.

⁸Ui miak manad ineh, idi ngalap bua'neh. Iti'mu mepad kudeng bua' anggur sirenku, idi riebmumu mepad kudeng bua' luk do' buen,

⁹Idi tangmu mepad kudeng abpa' anggur luk do'. Nima' abpa' anggur ineh manud amé' inan bibir idi lipen awaku.

¹⁰Awaku kuan negku, idi ieh pian ngalap negku.

¹¹O awaku do' kiteh amé' déi' lati', idi rudap sealem déi',

¹²pad kiteh miak tumui muka idi nier anggur, kudeng ieh nengingulih, idi kudeng busakneh nelusad, idi nier delima kudeng ieh kebusak teh. Su ineh ui mada' awaku namu.

¹³Idi inan buen pelamai idi amung bua' luk do' munung tanga' kiteh. O awaku, ui nenganug kuanmu, bua' luk mon idi luk mebaruh.

Nani Selimun 8

¹Kudeng iko kinanakku luk matu, luk neniti' tinanku, idi kareb ui papu' namu arang dalan, ui miak ngangep namu, idi seburu pana' nateh miak ngilang.

²Ui miak nguit namu amé' ruma' tinanku, idi maré abpa' bua' delima luk do' rupunmu.

- ³Ticu'neh pa kabing ku lagaku, idi ticu'neh pa tinueh ngapel negku.
- ⁴O decur Yerusalim, do' muyuh pejani' negku, pad muyuh na ngesabeng awa kai dueh.
- ⁵Idé' ineh luk macing rat déi' su luk ali-ali, luk pimet ticu' dengan waneh? Iang buyo ui nengalat namu, su luk inanmu tinganak.
- ⁶Aleg mawa idi ngalap nelun baken. Ngaceku tueh awa mepad kudeng até, idi useh temaruh mepad kudeng tanem, idi mebudung kudeng apui.
- ⁷Abpa' na miak ngilep neneh, idi ereb na miak nganud neneh. Iamo' kudeng seburur lemulun pian melih awa ku binawehneh, ieh miak ngalap kuyo.
- ⁸Kai inan kinanak decur luk isuut, idi iti'neh isuut. Anun luk miak ruen kai kuanneh, kareb inan lun ngitun neneh?
- ⁹Kudeng ieh alad, kai miak mudut aceh luk inan matar luunneh ku pirak. Kudeng ieh tanga', kai miak ngalad neneh ku bangar tumuh.
- ¹⁰Ui ini alad, idi iti'ku ruma' luk medita'. Awaku miak kali' dengan megala', idi ui ini pinatar do'-do'.
- ¹¹Selimun inan kabun anggur, déi' bawang Baal Hamon. Ieh nemili' lun luk mileh miak ngasa' kabun ineh, idi ideh miak ngacam kabun ineh, meribu balad pirak seburur.
- ¹²Ui sebuleng teh inan kabun anggur, Selimun, iko miak ngalap meribu balad pirakmu, idi lun luk mileh ngasa' kabun ineh, miak ngalap dueh ngeratu balad pirak ku babpatdeh.
- ¹³O awaku, luk tudo bang kabunku, anunké luk pedingeren lun rurumku? Nima' negku ninger uni tangmu teh.
- ¹⁴O awaku amé' negku mepad kudeng talau, idi anak payo luk luun pegkung, su luk inan uduh luk do' buen.

Yesaya

Yesaya 1

¹Bang surat ini inan bala luk ginala' Allah ratnan Yahuda idi Yerusalim kuan Yesaya Amos, bang kareb Usia, Yotam, Akas, idi Hesehia mangun ku raca' Yahuda.

²Kebala Tuhan, "O tana' idi langit, ninger balaKu! Kudeng ini bala Tuhan! Anak-anak luk isa'Ku sikal metueh rat Negku.

³Sapi' kali' lemulun luk kuan nedeh, idi keladai kali' su luk inan tuandeh maman nedeh. Iamo' ideh meluun ileh ratnan pupuKu lun Israil. Ideh na kali' anun-anun."

⁴O pupu luk mesala'. O muyuh luk dat idi tekilu', muyuh miak kumin! Sala' muyuh ngeraruh nemuyuh! Muyuh pangeh nenecan Tuhan Allah lun Israil luk meligan, idi muyuh neteketed rat Neneh.

⁵Ngudehké muyuh sikal metueh rat Negku? Pianké muyuh kumin teh? O Israil, uluhmu muput ku urat, niat idi terawému pana' mét.

⁶Aput bururmu inan luk mét, ieh ineh luk merirem, kimuh, idi urat luk medara' teh. Amung uratmu ineh nateh biru' idi inabet. Idi teh na ubat inau' luundeh.

⁷Tana'mu pangeh inusag idi amung-amung bawangmu nabud iseb. Laba' iko nier, pupu baken ngaro tana'mu idi ngusag luk amung-amung.

⁸Yerusalim sebuleng mo' ketecan, ieh ineh aceh bawang luk uen ngerieng — mepad laya' kudeng lepo lun luk matar kabung anggur idi lepo luk bang kabun timun.

⁹Kudeng Tuhan luk Melalud na nima' sebuang lemulun mulun, kali' rungen Yerusalim nabud inusag, mepad kudeng Sodom idi Gemora.

¹⁰O Yerusalim, raca'mu idi pupumu mepad kudeng lun Sodom idi Gemora. Ninger bala Tuhan nemuyuh, idi maya' bada' Allah tau.

¹¹KebalaNeh, "Anunké ulek amung baré luk barén muyuh Negku? Ui musam ku baré dumba luk sabpen idi lemak aya' muyuh luk meluun do'. Ui musam ku dara' sapi', dumba, idi amék pana'.

¹²Idéké nengecuk nemuyuh nguit amung ineh kareb muyuh amé' sembayang Negku. Idéké nengecuk nemuyuh nalan-nalan bang ruma'Ku?

¹³Na Ui pian ku baré muyuh luk na ulek. Ui megateh ku buen umau luk sabpen muyuh. Ui ara' ku Irau Bulan Baruh, idi Aco luk inan muyuh Mudeng, idi teh tebubpun muyuh pana'. Amung ineh na ulekneh ngaceku sala' muyuh.

¹⁴Ui megateh ku Irau Bulan Baruh idi Aco Rayeh muyuh. Amung ineh mangun ku babeh luk meberat kuanKu.

¹⁵"Kareb muyuh sembayang idi ngiding ticu' muyuh Ui na sikal nier nemuyuh. Sagan tu pana' muyuh mekadang sembayang, Ui na sikal ninger ngaceku ticu' muyuh melutak ku dara'.

¹⁶Do' muyuh sibu'ugka'. Ugka' ratnan amung kekamen luk dat luk kali'Ku. Matu, do' muyuh ugka' ratnan nganau' luk dat,

¹⁷idi sibada' nganau' luk do'. Megéi' mutut luk mesiri. Ngedengan lemulun luk pidereh. Ngedengan anak maté idi decur tinula'."

¹⁸Idi teh kebala Tuhan, "Nekini do' tau mutut gayam ini. Sagan pana' muyuh mesia' ku sala' muyuh, Ui sikal maru' nemuyuh, pad muyuh mebuda' kudeng salju. Sagan pana' sala' muyuh sia' merirem muyuh mangun mebuda' kudeng buluh dumba.

¹⁹Kudeng muyuh sikal maya' balaKu, muyuh miak kuman uli' tana' ini luk do'.

²⁰Iamo' kudeng muyuh ara' maya' balaKu idi sikal metueh rat Negku, muyuh miak kumin maté. Ui ini Tuhan pangeh nepebala."

²¹Bawang luk lutep maya' Negku atun pangeh mangun ku decur luk mesawa'! Mon lun luk matu tudo su ineh, iamo' nekini lun luk ngaté mo' luk ketecan.

²²O Yerusalim, atun iko mepad kudeng pirak, iamo' nekini na ulekmu. Atun iko mepad kudeng abpa' anggur luk do', iamo' nekini iko mangun ku abpa' talang.

²³Lun rayeh muyuh sikal metueh idi perurum nelun mano. Ideh megéi' ngalap baré idi suap. Iamo' na ideh ngedengan anak maté idi decur tinula' bang besara'deh.

²⁴Ngaceku ineh kebala Tuhan amung baweh, ieh ineh Allah Israil luk Melalud: "O bunu'Ku, Ui ngua' nemuyuh pad muyuh na ngesusa' Negku.

²⁵Ui sikal necat nemuyuh. Ui sikal ngeligan nemuyuh mepad kudeng pirak uen ngeligan, idi nala' amung lutak muyuh.

²⁶Ui sikal maré lun ngimet nemuyuh idi lun luk mada' mepad kudeng lun rayeh muyuh mon. Idi Yerusalim miak tetanen bawang luk lutep maya' bala idi matu."

²⁷Ngaceku Tuhan ineh matu, Ieh miak ngulun Yerusalim idi amung lemulun luk uren luk tudo su ineh.

²⁸Iamo' Ieh miak ngukum amung lemulun luk nganau' sala' idi luk sikal metueh rat Neneh. Idi teh Ieh ngaté amung lemulun luk necan Neneh.

²⁹Muyuh miak nginuud ratnan sembayang nan lawa kayuh idi ratnan nganau' kabun su luk inan muyuh sembayang.

³⁰Muyuh miak melayuh mepad kudeng kayuh luk maté, idi kabun luk na uen mubpur.

³¹Mepad kudeng kayuh luk tekering mebareh ku apui, kudeng ineh teh lun luk rayeh miak maté ku kekamendeh luk dat, idi seburu pana' nateh luk miak ngagka' até ineh.

Yesaya 2

¹Ini bala luk biré Allah ni Yesaya Amos ratnan Yahuda idi Yerusalim.

²Muci aco, pegkung luk su inan Ruma' Allah, meluun dita' ratnan amung-amung pegkung. Mula' pupu amé' su ineh,

³kebaladeh, "Do' tau mudik pegkung Tuhan, idi amé' Ruma' Allah lun Israil. Tau miak sibada' luk pianNeh kuan tau; idi tau maya' dalan luk pinili'Neh kuan tau." Bada' Tuhan macing rat Yerusalim; rat Sion Ieh pebala kuan pupuNeh.

⁴Ieh miak ngagka' kedaluh arang pupu luk rayeh, pad ideh nuno pelapetdeh ku radu, idi busudeh ku iyu. Pupu-pupu na pebunu' peh, idi na temina' ku bunu' teh.

⁵O inul Yakub, do' tau nalan bang acang luk barén Allah netau!

⁶O Allah, Iko nenecan pupuMu, ieh ineh inul Yakub. Idi bawangdeh mepanu' ku bangun rat pa busat aco idi rat Pilistin. Ideh maya' adat pupu baken.

⁷Bawangdeh mepanu' ku pirak idi amas, idi binawehdeh na miak mabud. Inan pelaba' ula' kuda idi keréta pana'.

⁸Inan akang apud bawangdeh. Idi ideh sembayang nan luk inau' ticu'deh sebuleng.

⁹Amung-amungdeh miak uen ngigu'. Aleg maré do' nedeh O Tuhan!

¹⁰Ideh sigapung bang lubang batu luun pegkung. Idi teh ideh ngukat lubang bang tana' pad ideh buro ratnan useh Tuhan, idi sigapung ratnan lalud idi rayehNeh!

¹¹Muci aco dita' niat lemulun miak ugka', idi sido' niat lemulun uen ngebeneh. Kareb ineh Tuhan sebuleng mo' uen ngerayeh

¹²Kareb ineh Tuhan luk Melalud miak ngebeneh amung lun luk rayeh, idi amung lemulun luk medita' niat.

¹³Ieh miak nebpeng amung kayuh tumuh luk medita' déi' Lebanon, idi amung kayuh luk meraben déi' Basan.

¹⁴Ieh miak ngeraked pegkung idi surud luk medita',

¹⁵idi ngebeneh amung pudut luk medita' idi amung libung batu.

¹⁶Ieh ngekarem amung kapal luk meluun rayeh idi meluun do'.

¹⁷Dita' niat idi sido' niat lemulun miak uen ngagka'. Kareb ineh Tuhan sebuleng mo' uen ngedita'.

¹⁸Idi amung akang pana' na luk idi peh.

¹⁹Lemulun sigapung bang lubang batu luun pegkung. Idi teh ideh ngukat lubang bang tana', pad ideh buro ratnan useh Tuhan, idi sigapung ratnan lalud idi rayehNeh kareb Ieh macing ngeruyuh tana'.

²⁰Kareb ineh ideh nala' akang luk inau'deh ratnan amas idi pirak, idi necan nedeh kuan labo idi pawat.

²¹Kareb Tuhan macing ngeruyuh tana', lemulun sigapung bang lubang batu luun pegkung, pad ideh buro ratnan usehNeh, idi sigapung ratnan lalud idi rayehNeh.

²²Aleg merapet nan lemulun luk maté. Anunké ulekdeh?

Yesaya 3

¹Nekini Tuhan, ieh ineh Tuhan luk Melalud, temina' nala' rat Yerusalim idi Yahuda amung-amung luk inan lemulun merapet. Ieh miak nala' amung akandeh idi abpa'deh,

²lundeh luk mesangit, lun pebunu'deh, lundeh luk mutut ukum, nabideh, lundeh luk mangun, lun luk ngimet nedeh,

³lun rayeh bawehdeh, lun rayeh bawangdeh, lun rayeh luk ngimet nedeh, idi idé-idé luk makai ileh Sétan pad ngacing luk piandeh.

⁴Tuhan miak nima' anak adi' luk na petap ileh ngimet nedeh.

⁵Amung lemulun miak ngedereh nelun baken. Anak-anak na ngedita' nelun merar, idi lemulun luk mebacé na ngedita' lemulun luk miak buren.

⁶Kareb ineh, tuda'-tuda' burur lemulun miak mili' seburur rat arang inuldeh, kebaladeh, "Iko inan ayung, do' iko mangun ku lun rayeh kai bang susa' ini."

⁷Iamo' kebalaneh, "Ara' ui! Ui na miak ngedengan nemuyuh. Ui pana' na petap akan idi ayung. Aleg nganau' negku ku lun rayeh muyuh!"

⁸Matu, Yerusalim miak kumin! Yahuda malé metabpa. Amung luk beléndeh idi luk ruendeh sikal metueh ratnan Tuhan. Ideh ngedat Allah dengan rungen.

⁹Tueh niatdeh mangun ku lun nekali' bang besara'deh. Ideh nganau' sala' dengan megala' mepad kudeng lun Sodom. Ideh ngacing ukum kuan bururdeh sebuleng.

¹⁰Lemulun luk matu mawang niat idi ideh miak ngalap peruan ratnan uli' kekamendeh.

¹¹Iamo' lemulun luk dat miak kumin idi ngalap ua' kekamendeh.

¹²Lun luk maré usin kebiten ngedereh pupuKu, idi lun luk inandeh pebaleh naluk nedeh. O pupuKu, lun rayeh muyuh ngeraruh nemuyuh, pad muyuh na kali' dalam luk matu.

¹³Tuhan temina' mutut besara'. Ieh temina' ngukum amung pupu.

¹⁴Tuhan pian ngukum lun rayeh idi lun luk ngimet pupuNeh. Ieh ngadu' nedeh, kebalaNeh: "Muyuh pangeh nengaro kabun anggur, idi ruma' muyuh panu' ku luk ilap muyuh rat nelun masi'.

¹⁵Muyuh mesala' ngaceku muyuh ngedereh pupuKu, idi muyok nelun masi'. Ui ini Tuhan luk Melalud pangeh nepebala."

¹⁶Kebala Tuhan, "Decur Yerusalim pelaba dita' niat! Ideh tungog idi ngimateh. Ideh nalan-nalan pian siren, idi karing luk luun kukuddeh ngekéng.

¹⁷Iamo' Ui sikal ngukum nedeh — Ui ngiki uluhdeh pad ideh mebutal."

¹⁸Kareb ineh Tuhan miak ngalap ratnan decur Yerusalim amung-amung luk inandeh medita' niat — pakeldeh, patadeh, banédeh,

¹⁹idi leku'deh. Ieh miak ngalap ebpu kiungdeh,

²⁰idi rongdeh; gimet luk luun langendeh idi luk i awa'deh;

²¹susing luk luun bua' ticu'deh, idi susing icungdeh;

²²amung kuyu' buyordeh, takipdeh, gondoh, kapildeh;

²³kuyuh' luk pelaba lipi, belacadeh luk pelaba do', abet dierdeh idi ebpu uluh teh.

²⁴Inan dat buen ku libal do' buen. Inan nuper ku libal baret. Idi abpukdeh luk pelaba do' misu' ku butal; inan takip dat ku libal takip luk do'; do' tagadeh misu' ku igu'.

²⁵Amung deléi bang bawang Yerusalim idi lun luk mesangit pana' miak pitayen bang bunu'.

²⁶Amung tanga' bawang miak temido idi nangi'. Yerusalim ineh mepad kudeng decur luk tudo lubpa luun tana'.

Yesaya 4

¹Kareb ineh tudu' burur decur miak ngakem seburur deléi, kebaladeh, "Miak kai maman idi ngayung burur kai sebuleng, iamo' nima' nekai neten namu awan kai, pad kai na migu' ngaceku kai tudo buleng-buleng."

²Kareb ineh teh Tuhan nganau' amung tibu bang bawang ineh amé' rayeh idi metaga. Amung pupu Israil luk mulun mawang niat ku uli' tana' ineh.

³Amung-amung pupu luk ketecan déi' Yerusalim, luk pinili' Allah miak mulun, tetanen meligan.

⁴Dengan laludNeh Tuhan miak ngukum idi ngeligan pupu ineh idi nala' babeh sala' Yerusalim idi ngiu' dara luk inutang su ineh.

⁵Idi pa luun Pegkung Sion idi amung-amung luk mepamung su ineh, Tuhan miak maré aceh laput kareb macang, rabpun idi budung apui kareb medacem. Rayeh Allah mapen idi matar aput bawang ineh.

⁶RayehNeh ngelungung bawang ratnan ét idang idi ideh na mesusa' ku udan idi barui.

Yesaya 5

¹Do' ninger naniku ratnan Rurumku idi kabun anggurNeh: Rurumku inan kabun anggur luun surud luk mebaleng.

²Ieh nengukat tana' idi nenala' amung batu. Ieh nenibu anggur luk meluun do'. Ieh nemudut lepo luk medita' pad matar kabun ineh. Ieh nenganau' su luk inan ngeradu' bua' anggur ineh. Ieh nenginulat anggur ineh melak, iamo' amung bua' ineh melam.

³Idi kebala Rurumku, "Do' muyuh luk tudo déi' Yerusalim idi Yahuda mutut ukum arang kabun anggurKu idi Ui.

⁴Inanké luk na inau'Ku kuanneh? Ngudehké bua'neh melam, idi na mepad kudeng luk pianKu?

⁵"Ini luk ruenKu kuan kabun anggurKu. Ui mubput tibu luk pekelibut, idi ngusag ar luk ngelibung neneh, pad pung luk meliputi miak kuman bua'neh idi ngeradu' neneh.

⁶Ui nima' neneh mapet ku uduh. Ui na nangal angkatneh idi na netad libutneh, iamo' Ui nima' uduh idi tabpa' mulun su ineh. Idi teh Ui mebpeng laput na maré udan luunneh."

⁷Israil ineh kabun anggur Tuhan luk Melalud; pupu Yahuda ineh anggur luk tinibuNeh. Ieh merapet nedeh nganau' luk do', iamo' ideh nengaté lemulun, Ieh merapet nedeh nganau' luk matu, iamo' lun luk piderehdeh nengitang ku susa'deh.

⁸Muyuh miak kumin! Muyuh ngula' ruma' idi lati' muyuh, pad na luk inan lun baken tudo, idi muyuh sebuleng mo' luk tudo bang bawang ineh.

⁹Ui neninger Tuhan luk Melalud pebala, "Ruma' luk rayeh idi luk do' ini miak uen ngusag.

¹⁰Uli' kabun anggur luk limeh ikar segilin mo' abpa'neh. Uli' pulu' gatang pimara segatang mo'."

¹¹Muyuh miak kumin! Muyuh tumui uka'-uka' idi ngirup, idi muyuh mio rudap medacem ngaceku mabuk.

¹²Kareb irau muyuh, inan gita, karing, suling, idi abpa' anggur. Iamo' muyuh na kali' luk ruen Tuhan.

¹³Ngaceku ineh muyuh miak tebanen. Lun rayeh muyuh miak maté ku lau, idi lun mula' maté ku paring.

¹⁴Su luk inan até melau nganét nedeh, idi tangneh mukab. Ieh nelen amung lun do' rat Yerusalim perapu lun mula' luk meria'.

¹⁵Amung-amung lemulun miak uen ngigu' idi idé-idé luk medita' niat pana' uen ngebeneh.

¹⁶Iamo' Tuhan luk Melalud nganau' luk matu, pad Ieh ngegala' rayehNeh, idi teh Ieh ngukum pupuNeh pad ngegala' liganNeh.

¹⁷Luun usag bawang ineh anak dumba idi anak amék kuman uduh.

¹⁸Muyuh miak kumin! Muyuh na miak mepuit ratnan sala' muyuh.

¹⁹Kebala muyuh, "Do' Tuhan miket nganau' luk belénNeh, pad tau miak kali' ineh. Do' Allah Israil luk Meligan ngacing luk pianNeh, pad tau miak nier ineh."

²⁰Muyuh miak kumin! Muyuh neten luk dat do' idi luk do' dat. Muyuh ngisu' dacem mangun ku acang, idi acang mangun ku dacem. Muyuh nganau' luk mepét mangun mepaci', idi luk mepaci' mangun mepét.

²¹Muyuh miak kumin! Muyuh ngerawé burur muyuh pelaba ileh.

²²Muyuh miak kumin! Muyuh mebala kareb muyuh muar luk rupen!

²³Iamo' muyuh muit nelun mesala', kudeng ideh maré suap, idi muyuh mebpeng nelun luk matu na ngalap ukum luk mesiri.

²⁴Ngaceku ineh mepad kudeng geramih idi uduh luk tekering sabpen ku apui, kudeng ineh teh uat muyuh miak melu idi busak muyuh miak melayuh idi mepalid ku bui, ngaceku muyuh nenecan bada' Tuhan luk Melalud, ieh ineh bada' Allah Israil luk Meligan.

²⁵Tuhan museh inan pupuNeh idi pangeh nenatang ticu'Neh sikal ngukum nedeh. Pegkung miak meruyuh, idi butung lun naté tacin luun dalam mepad kudeng arap. Sagan tu pana' kudeng ineh useh Tuhan na ugka' iamo' ticu'Neh uen natang sikal ngukum teh.

²⁶Tuhan nateg tawak nawar pupu luk mado. Ieh niuk nawar nedeh rat iring tana'. Idi ideh macing, mawer idi miket.

²⁷Seburur pana' rat arangdeh nateh luk merur idi luk metebaceng. Na ideh medacep mateh. Abet awa'deh mepicet; kasutdeh na medarak.

²⁸Ilebdeh metadem idi binordeh temina'. Lisun kuda metueh mepad kudeng batu idi roda kerétadeh medier kudeng libuleh.

²⁹Lun pebunu' ngarod kudeng balang luk pangeh nengaté pung idi naban ineh pad na miak lapen rat nedeh.

³⁰Kareb ineh, ideh miak ngarod pa luun Israil mepad kudeng beri abpa' rayeh. Siruh bawang ini! Medacem idi mesusa! Acang misu' ku dacem.

Yesaya 6

¹Bang lak luk inan Raca' Usia naté idi ui nenier Tuhan. Ieh tudo luun kerusiNeh, idi Ieh medita' idi rayeh, idi teh kuyuh' boyorNeh maput Ruma' Allah ineh.

²Tuda'-tuda' pudut luk mebudung tupid libut-libutNeh. Anid pudut ineh inan anem ilad. Ideh ngebpu kiungdeh ku dueh ilad ineh, idi bururdeh ibpu ku dueh iladdeh! Ideh temulud ku dueh ilad luk baken ineh.

³Ideh ngitang seburur inan seburur: "Meligan, meligan, meligan! Tuhan luk Melalud ineh meligan! Tana' ini maput ku rayehNeh."

⁴Uni tangdeh nengeruyuh tapin Ruma' Allah, idi Ruma' ineh mepanu' ku rabpun.

⁵Kebalaku, "Ui na inan rapet! Ui miak kumin! Amung bala luk lemaba bibir tangku mesala', idi ui tudo arang aceh pupu luk megéi pebala luk mesala'. Idi nekini dengan matehku sebuleng ui pangeh nenier Raca', ieh ineh Tuhan luk Melalud!"

⁶Idi sebuleng pudut ineh netemulud amé' matun negku. Ieh nenguit aceh bareh apui luk mulun ratnan bubpun ku apit.

⁷Ieh nengisit bibir tangku ku bareh apui luk mulun ineh, kebalaneh, "Ini pangeh nepisit luun bibir tangmu, idi babeh sala'mu pangeh netala', idi iko ngalap do' ratnan sala'mu."

⁸Idi ui neninger Tuhan pebala, "Idéké luk miak dukenKu? Idéké luk mangun ku gatun Kai?" Kebalaku, "Ui miak amé'. Do' ngecuk negku!"

⁹Idi Ieh nengecuk negku amé' mada' bala ini nelun mula': "Sagan tu pana' muyuh ninger do'-do', muyuh na miak kali' ilungneh. Sagan tu pana' muyuh nier do'-do' muyuh na miak kali' luk mangun."

¹⁰Idi kebalaneh negku, "Nganau' terawé lemulun ini mebacé, idi laliddeh mebengel, idi matehdeh mebuser, pad ideh na miak nier, ninger, idi kali' ilungneh, pad ideh na lumi Negku idi uen ngedo'."

¹¹Idi kebalaku, "Tuda' ioké ideh kudeng ineh, Tuhan?" Kebalaneh, "Pad macing amung bawang pangeh inusag idi na lemulun, idi pad macing amung ruma' pangeh tican, idi bawang ineh mangun ku su luk ali-ali.

¹²Ui miak nguit lemulun ineh amé' mado, pad aput bawang ineh dat ali.

¹³Sagan pana' seburur ketecan rat arang pulu' burur, ieh miak pitayen; ieh mepad kudeng tued kayuh luk meraben luk pangeh tibpeng." (Ratnan tued ineh pupu Allah miak mulun baruh.)

Yesaya 7

¹Kareb Raca' Akas, anak Yotam Usia nengimet bawang Yahuda, ideh nengimun pebunu'. Resin, raca' Siria idi Peka Remalia, raca' Israil nengerieng Yerusalim, iamo' na miak ngelaya' bawang ineh.

²Raca' Yahuda neninger bala ratnan baweh Siria nacing bawang Israil, idi raca' dengan anak itinneh pelaba tot, pad ideh megegker, mepad kudeng kayuh luk meguer ku bui.

³Kebala Tuhan ni Yesaya, "Nguit anakmu Sier Yasub idi amé' papu Raca' Akas. Medueh miak papu' neneh su luk inan lun ngebaruh kibung paped abang luk dalam abpa' ratnan takung luk pa luun.

⁴Ngecuk neneh matar do'-do', ungeng, idi na megagau, idi na matot. Useh Raca' Resin idi lun Siria, idi useh Raca' Peka na meluun susa' ratnan rabpun ratnan dueh apak kayuh.

⁵Siria pangeh pegayam dengan Israil idi raca'neh.

⁶Ideh pian ngerieng Yahuda, ngatot nelun mula' pad ideh perurum nedeh, idi ngikit anak Tabil mangun ku raca' Yahuda.

⁷"Iamo' Ui ini Tuhan pebala: Amung ineh na miak mangun.

⁸Ngaceku bawang Siria na meluun tueh ratnan Damsik. Idi Damsik na meluun tueh ratnan Raca' Resin. Idi Israil pana' na tuman mangun ku bawang macing anem ngepulu' limeh lak.

⁹Israil na meluun tueh ratnan bawang Samaria. Idi Samaria na meluun tueh ratnan Raca' Peka. "Kudeng anumu na mepicet, iko na tuped meraben."

¹⁰Tuhan nemaré aceh bala ni Akas teh:

¹¹"Mutuh Tuhan Allahmu maré aceh tanu' namu. Tanu' ineh miak macing ratnan su luk inan até, kian rat surga luk déi' dita' lek."

¹²Idi kebala Akas, "Na tu ui mutuh tanu'. Ui na sikal nutun Tuhan."

¹³Idi kebala Yesaya neneh, "Ninger iko, O inul Raca' Daud; petap susa' kudeng iko ngerur lemulun, pianké iko ngerur Allah teh?

¹⁴Tuhan sebuleng miak maré aceh tanu' namu. Inan seburur anak adi' decur luk mali'. Ieh miak nenganak aceh anak deléi idi ieh nganau' ngadanNeh 'Immanuél.'

¹⁵Kareb Ieh petap rayeh nala' luk dat idi mili' luk do'. Ieh ngirup rata sapi' idi kuman duru' tebikan.

¹⁶Kareb nateh anak ineh mileh mili', bawang dueh raca' luk ngatot namu ineh miak tacin.

¹⁷"Tuhan miak ngacing kuanmu, kuan pupumu idi kuan tetek ruma' raca' aceh kareb luk meluun susa' ratnan luk pangeh mangun atun, ieh ineh mucu ratnan imet Israil nepatad ratnan Yahuda. Ieh miak nguit raca' Asur!

¹⁸"Kareb ineh Tuhan niuk pad lun Masir macing mepad kudeng laled ratnan abpa' luk palung nan Abpa' Nil, idi lun Asur macing rat bawangdeh mepad kudeng tebikan.

¹⁹Ideh temapi bang ruan luk mula' batu idi bang lubang batu pana', idi ideh ngebpu amung kayuh luk metabpa' idi laman pana'.

²⁰"Kareb ineh, Tuhan nabpar lun luk mingit rat déi' dipar Abpa' Pirat, ieh ineh raca' Asur. Ieh miak mingit buluh tang muyuh idi ngiki uluh muyuh idi mingit aput burur muyuh.

²¹"Kareb ineh teh, kudeng seburur lemulun inan sebuleng sapi' idi dueh amék,

²²ideh miak maré mula' rata pad inan petap. Matu, amung lemulun luk ketecan bang bawang miak ngirup rata idi kuman duru' tebikan.

²³"Kareb ineh, kabun luk do' luk inan meribu lawa anggur, idi luk raga meribu balad pirak, miak mapet ku tabpa' idi uduh.

²⁴Na lemulun mekuu' amé' su ineh kudeng na ieh nguit binor. Matu, aput bawang mapet ku tabpa' idi uduh.

²⁵Amung surud su luk inan lati' atun, mapet ku tabpa' idi uduh, pad na lemulun amé' su ineh. Ineh mangun ku laman sapi' idi dumba mo'."

Yesaya 8

¹Kebala Tuhan negku, "Ngalap aceh luk inan ngayud luk rayeh, idi ngayud dengan urup luk mekara: 'Miket Ngaro, Saget Ngalap.'

²Nakap dueh burur lemulun luk inan merapet, ieh ineh Imam Uria, idi Sekaria Yeberekia luk mangun ku lun nekali'."

³Muci ui pamung dengan awanku luk nabi teh. Ieh mali' idi nenganak aceh anak deléi. Kebala Tuhan negku, "Nganau' ngadanneh, "Miket Ngaro, Saget Ngalap.'

⁴Kareb nateh anak ineh petap rayeh pebala, 'Ina' idi 'Ama', amung binaweh Damsik idi luk uen ngaro rat Samaria miak tebanen raca' Asur."

⁵Kebala Tuhan negku teh,

⁶"Ngaceku pupu ini na pian ku Arur Siloa luk melitong, idi ngaceku ideh megegker pa kiung Raca' Resin idi Raca' Peka,

⁷Ui ini Tuhan miak nguit raca' Asur dengan amung bawehneh, pad ieh ngerieng Yahuda. Ideh macing mepad kudeng Abpa' Pirak luk tubu' belen luk ngereb amung tangeb.

⁸Ideh ngerieng Yahuda mepad kudeng tubu' belen luk ngereb apud bawang pad tudung." Allah idi dengan tau! IladNeh tebalad, pad Ieh matar bawang tau.

⁹O amung pupu, do' muyuh mepamung idi matot! O bawang luk iring tana' do' muyuh ninger. Do' muyuh temina' pebunu' idi matot!

¹⁰Do' muyuh pegayam ratnan luk ruen muyuh! Iamo' na muyuh miak ngacing luk pian muyuh. Sagan tu pana' muyuh pegayam tu-tu, na ulekneh, ngaceku Allah idi dengan kai.

¹¹Dengan laludNeh luk rayeh Tuhan neperiteteng negku, pad ui na maya' dalam luk bén lun mula'. KebalaNeh,

¹²"Aleg iko semuet bang gayam lun mula', idi aleg merapang ku luk inandeh matot.

¹³Do' ngerawé, Ui ini Tuhan luk Melalud idi Meligan. Petulu iko matot Negku.

¹⁴Ui mepad kudeng batu luk inan metebaceng kuan lun mula', ngaceku ideh matot ku liganKu. Ui mepad kudeng abpung luk ngabpung lemulun rat imet Yahuda idi Israil, idi lun rat Yerusalim pana'.

¹⁵Mula' lemulun miak metebaceng idi meluka'. Ideh miak mebpeh idi mekareg, idi mekaneh abpung pana'."

¹⁶Anak sekola'ku miak nginita bala luk biré Allah negku.

¹⁷Tuhan nesigapung ratnan pupuNeh, iamo' ui manu idi merapet Neneh.

¹⁸Ini ui dengan amung anak luk biré Tuhan negku. Tuhan luk Melalud luk inan kerusi luun Pegkung Sion pangeh nenganau' nekai mangun ku bala luk mulun kuan pupu Israil.

¹⁹Lemulun miak mutuh namu ngitun bala rat nelun luk mangun idi lemulun luk inan ileh Sétan luk dureng-dureng. Kebaladeh, "Petulu lemulun ngitun bala ratnan ada' idi ngitun nelun luk naté pad ngedengan lemulun luk mulun."

²⁰Iamo' do' iko ngor baladeh, kebalamu, "Do' ninger luk badén Tuhan nemuyuh! Aleg ninger bala lun luk mangun --luk beléndeh na ngacing luk do' kuan muyuh."

²¹Lun mula' miak nalan-nalan bang bawang dengan melau idi mesusa' niat. Ngaceku lau idi usehdeh, ideh miak ngediman raca'deh idi Allahdeh. Ideh tengook idita',

²²idi nutong i tana', iamo' na luk kali'deh baken ratnan susa' idi dacem; idi ideh uen ngusu amé' bang dacem luk katotdeh.

Yesaya 9

¹Idi na luk idi dalan mepuit ratnan kareb luk mesusa' ineh. Bawang pupu Sebulon idi Naptali inigu' atun, iamo' mucu babpat ineh miak buren, rat Abpa' Rayeh pa busat aco macing bawang luk dipar Abpa' Yarden, idi Galilia pana', su luk inan pupu baken tudo.

²Lemulun luk tudo bang dacem pangeh nekali' acang luk rayeh! Ideh tudo bang bawang luk melungung, iamo' nekini acang merasat luundeh.

³O Tuhan, Iko nemaré nedeh awang luk rayeh. Iko nengawang niatdeh. Ideh mawang niat ku luk inau'Mu, mepad kudeng ideh mawang niat kareb ngeranih, idi kareb mabpat binaweh luk tiban.

⁴Ngaceku Iko nemutul paga'deh idi rukud luk ku mebal tudungdeh. O Tuhan Iko nengelaya' pupu ineh luk nengedereh idi nemuyok pupuMu, mepad kudeng Iko nengelaya baweh Midian mon.

- ⁵Kasut baweh luk ngerieng idi ayungdeh luk melutak ku dara' miak sabpen macing mabud!
- ⁶Anak ineh tinganak kuan tau, Anak deléi pangeh biré kuan tau! Idi amung-amung lalud uen ngerareng luun tudungNeh. Ieh miak tetanen "Luk Nan Mawa," "Lun luk ngimet," "Allah luk Melalud," "Taman luk Meruked," idi "Raca' Awang."
- ⁷Lalud luk Neneh iuk-iuk temubu' idi imetNeh megéi' do' udeng. Ieh miak ngelibal imet Raca' Daud. Luk matu idi mesiri mangun ku lawa laludNeh, rat kareb ini macing kekipedneh. Tuhan luk Melalud miak ngelelep amung ineh.
- ⁸Tuhan lutep ngukum imet Israil, ieh ineh inul Yakub.
- ⁹Amung lun Israil idi amung lun luk tudo bang bawang Samaria miak kali' ineh. Nekini ideh medita' niat idi mesido' niat. Kebaladeh,
- ¹⁰"Ruma' ratnan batu bata netabpa, iamo' kai miak ngelibal nedeh ku ruma' batu. Tuked ratnan kayuh gita' pangeh tingal, iamo' kai miak ngelibal ineh ku kayuh tumuh luk do'."
- ¹¹Tuhan nengagau bunu'deh, pad ideh nengerieng nedeh.
- ¹²Siria luk pa busat aco idi Pilistin luk pa acep aco tenganga' tang pian nelen Israil. Iamo' useh Tuhan na ugka', idi ticu'Neh tutang pian ngukum.
- ¹³Pupu Israil nateh nuren. Sagan pana' Tuhan luk Melalud nengukum nedeh, nateh ideh nelumi Neneh.
- ¹⁴Bang seaco Tuhan miak ngukum lun rayeh Israil idi pupuneh. Tuhan miak ngaleb uluh idi natek iur Israil.
- ¹⁵Lun merar idi lun luk buren mangun ku uluh — idi nabi luk mebalih mangun ku iur.
- ¹⁶Lun luk ngimet pupu ini pangeh nengeraruh nedeh pad ideh mepakau niat.
- ¹⁷Idi seburur pana' rat arang anak adi' deléi nateh puatin Tuhan, idi na Ieh méi' inan decur tinula' idi anak maté, ngaceku amung pupu ineh dat idi na

manu, idi amung luk beléndeh pana' dat. Iamo' useh Tuhan na ugka', idi ticu'Neh tutang pian ngukum.

¹⁸Dat pupu ineh mulun mepad kudeng apui luk ngeseb kayuh luk metabpa', idi bitarung pana'. Ieh mulun mepad kudeng apui bang pulung kareb merikan, pad rabpun kemikit amé' i dita'.

¹⁹Ngaceku Tuhan luk Melalud museh, ukumNeh ngeseb mepad kudeng apui aput tana' Israil, pad ngaté pupu ineh, pelé ideh na méi' seburur inan seburur.

²⁰Aput bawang ideh ngalap idi kuman anun-anun luk miak kenendeh, iamo' na ideh miak mebor, pad ideh kuman anakdeh sebuleng!

²¹Pupu Manasé idi pupu Ephraim pebunu' arangdeh sebuleng, idi ideh pamung munu' Yahuda. Iamo' useh Tuhan na ugka', idi ticu'Neh tutang pian ngukum.

Yesaya 10

¹Muyuh miak kumin! Muyuh nganau' ukum luk ngedereh pupuKu,

²idi mebpeng nelun masi' na ngalap luk petulu. Idi bang besara', muyuh mutut ukum luk na mesiri kuandeh. Kudeng ineh lawé muyuh ngaro binaweh decur tinula' idi anak maté.

³Anunké luk ruen muyuh kareb Allah ngukum nemuyuh? Anunké luk ruen muyuh kareb Ieh ngacing susa' kuan muyuh rat bawang luk mado? Amé' mutuh pedengan nidé muyuh? Iapeh inan muyuh ngapung binaweh muyuh?

⁴Muyuh miak pitayen bang bunu', kian tebanen lek. Iamo' useh Tuhan na ugka', idi ticu'Neh tutang pian ngukum.

⁵Kebala Tuhan, "Mesusa' kuan Asur! Ui makai Asur kudeng paper, pelé necat lemulun luk inanKu museh.

⁶Ui nengecuk Asur ngerieng aceh pupu luk na manu idi luk ngegio usehKu. Ui nengecuk nedeh ngaro, mano, idi ngeradu' lemulun luun dalan."

⁷Iamo' raca' Asur inan terawéneh sebuleng luk pelaba dat. Terawéneh lutep pian ngusag mula' bawang.

⁸Ieh nengadan, kebalaneh, "Amung lun rayeh bawehku mepad kudeng raca'!

- ⁹Ui luk nengelaya' bawang Kalno idi Karkemis! Ui luk nengelaya' bawang Hamat idi Arpad! Ui luk nengelaya' bawang Samaria idi Damsik!
- ¹⁰Ui nenatang ticu'ku pelé ui ngukum amung imet luk sembayang inan akang luk meluun ula' ratnan akang Yerusalim idi Samaria.
- ¹¹Ui pangeh nengusag Samaria idi amung akangneh, idi ui miak ngusag Yerusalim idi amung akang luk inandeh sembayang su ineh.”
- ¹²Iamo' kebala Tuhan, "Kareb Ui mangeh kekamenKu luun Pegkung Sion idi déi' Yerusalim, idi Ui miak ngukum raca' Asur, ngaceku ieh nengadan ku dita' niatneh.”
- ¹³Raca' Asur nengadan, kebalaneh, "Ui nenganau' amung ineh. Ui pelaba tueh, idi pelaba ileh. Ui nenala' amung lakan tana' arang tuda'-tuda' bawang idi nengaro binaweh luk dinugdeh. Ui nengeradu' pupu luk tudo su ineh mepad kudeng aceh sapi' deléi.
- ¹⁴Amung pupu bang tana' ini mepad kudeng arar suit, idi ui nengalap binawehdeh mepad kudeng ngalap terur. Sebuleng ilad pana' nateh nesigio pian ngatot negku; sebuleng ticuk pana' nateh nukab idi muni!”
- ¹⁵Iamo' kebala Tuhan, "Miakké uai pebala ieh meluun rayeh ratnan lemulun luk makai neneh? Inanké radi' meluun rayeh ratnan lemulun luk ngeradi' ku ineh? Paper na mabeh lemulun, iamo' lemulun mabeh paper.”
- ¹⁶Tuhan luk Melalud pian ngacing ét pelé ngukum lemulun luk pelaba bor nekini.
- ¹⁷Aceh apui miak mulun bang bururdeh kidi-kidi. Allah Israil luk meligan miak mangun ku budung apui luk ngeseb luk amung-amung bang seaco mo', dengan kayuh luk metabpa' idi bitarung pana'.
- ¹⁸Pulung kara idi lati' luk mebaleng miak uen ngusag, mepad kudeng lemulun luk maté ku ét luk mebura'.
- ¹⁹Kayuh luk ketecan pelaba asi' pad amung ineh mekiap anak.

²⁰Bang aco sineh lun Israil luk neketecan na miak merapet inan aceh pupu luk lélé ngusag nedeh. Ideh miak merapet tu-tu inan Tuhan, Allah Israil luk meligan.

²¹Sesuut mo' lun Israil miak lumi inan Allahdeh luk melalud.

²²Sagan pana' kinula' lun Israil nekini mepad kudeng bada luk tangeb abpa', sesuut mo' miak lemubed. Usag pangeh netemina' kuan pupu ineh, idi usag ineh petulu kuandeh.

²³Matu, apud bawang ineh Tuhan luk Melalud miak ngacing usag maya' kudeng luk bilaNeh.

²⁴Kebala Tuhan luk Melalud inan pupuNeh luk tudo déi' Sion, "Aleg matot nelun Asur, sagan pana' ideh ngedereh nemuyuh mepad kudeng luk inau' Masir mon.

²⁵Na mio teh Ui ugka' ngukum nemuyuh, pelé Ui ngusag nedeh.

²⁶Ui ini Tuhan luk Melalud miak mebal nedeh mepad kudeng Ui nemebal nelun Midian déi' batu Oreb. Ui miak ngedereh Asur, mepad kudeng Ui nengedereh Masir.

²⁷Kareb ineh Ui muit nemuyuh ratnan lalud Asur, idi paga'deh na miak ngesabeng nemuyuh teh."

²⁸Bunu' pangeh nacing bawang Ai! Ideh nelemaba Migron! Ideh nenecan binawehdeh déi' Mikmas.

²⁹Ideh nelemaba ruan idi rudap déi' Giba! Lun bang bawang Rama pelaba tot, idi lun bang bawang Gibia, ieh ineh bawang Raca' Saul pangeh neburo.

³⁰Do' ngitang, O pupu Galim! Ninger, O pupu Lais! Do' ngua', O pupu Anatot!

³¹Lun Madmina idi lun Gebim buro amé' mado.

³²Aco sini bunu' idi déi' bawang Nob, idi su ineh ideh nguma' Pegkung Sion idi bawang Yerusalim.

³³Tuhan luk Melalud miak nutu' nedeh, mepad kudeng angkat kayuh luk tetuin. Idi lun luk meluun dita' niat idi meluun sido' niat arangdeh miak tetuin idi uen ngigu'.

³⁴Tuhan miak nebpeng nedeh mepad kudeng kayuh bang pulung kara tebangen ku uai, idi teh mepad kudeng kayuh luk meluun do' déi' Lebanon meluka'!

Yesaya 11

¹Inul Raca' Daud mepad kudeng aceh Iawa kayuh luk pangeh tibpeng; iamo' tuedneh miak nginulih. Kudeng ineh teh aceh raca' luk mebaruh miak tumui rat arang inul Daud.

²Roh Tuhan miak tudo luunNeh, Ieh ineh Roh ileh idi do' kali', Roh imet idi lalud, Roh ngiti idi matot nan Tuhan.

³Ieh mawang niat maya' pian Tuhan. Ieh na mutut ukum maya' luk siren mateh, idi luk pedingeren lalid.

⁴Ieh mutut ukum luk mesiri kuan lun masi', idi maré luk petulu kuandeh. Maya' balaNeh bawang ineh miak kumin, idi lemulun luk dat miak maté.

⁵Ieh ngimet pupuNeh dengan mesiri idi matu.

⁶Bungalé idi dumba miak pamung dengan do', kuir miak telubid dengan anak amék, anak sapi' idi anak balang pad-pad kuman, idi anak dari miak maman nedeh.

⁷Sapi' idi beruang pana' miak pad-pad kuman, idi anakdeh pad-pad telubid dengan do'. Balang miak kuman uduh luk tekering, mepad kudeng sapi'.

⁸Anak isuut pana' na tiduken, kudeng ieh marot iring seruang.

⁹Luun Sion, ieh ineh pegkung Allah luk meligan, na luk ngurat idi luk dat. Tana' ini miak panu' ku ileh ratnan Tuhan, mepad kudeng abpa' rayeh panu' ku abpa'.

¹⁰Kareb ineh raca' luk mebaruh ratnan inul Daud ineh mangun ku tanu' kuan amung pupu. Ideh miak mepamung bang bawang raca' idi maré ubur Neneh.

¹¹Kareb ineh teh, Tuhan ngegala' laludNeh sekua' teh, idi nguit muli' pupuNeh luk ketecan déi' Asur, Masir, Patros, Sudan, Elam, Babil, Hamat, bawang luk tangeb abpa' rayeh, idi pulau-pulau pana'.

¹²Ieh miak naped aceh bedéra kuan amung pupu, idi Ieh miak ngamung nelun Israil luk pangeh tiban idi lun Yahuda luk pangeh pitad, rat iring tana'.

¹³Imet Israil na temaruh nan Yahuda teh, idi Yahuda na sikal metueh ratnan Israil.

¹⁴Ideh pamung ngerieng nelun Pilistin luk pa acep aco idi ngaro binaweh pupu luk tudo pa busat aco. Ideh miak metueh rat nelun Edom idi Moab, idi lun Amon pana' miak maya' nedeh.

¹⁵Tuhan miak ngacing bui luk melau' luk ngekeket Abpa' Nil idi Abpa' Pirat, pad inan tudu' arur luk isuut mo' ketecan luk miak gitan idé-idé pana'.

¹⁶Kareb ineh inan aceh dalan rat Asur kuan pupuNeh lun Israil luk mulun su ineh teh, mepad kudeng luk inau'Neh kuan tepundeh kareb ideh nenalan rat Masir.

Yesaya 12

¹Kareb ineh inul muyuh miak menani, "O Tuhan, ui ngubur Namu. Atun Iko museh negku, iamo' nekini usehMu nugka', idi ui bukenMu.

²Allah ineh Lun Nengulun negku, ui merapet Neneh idi na matot. Tuhan maré lalud idi tueh negku; Ieh ineh ulunku.

³Dengan mawang niat pupu Tuhan ngook abpa' ratnan bued ulun."

⁴Kareb ineh inul muyuh miak menani, "Maré ubur kuan Tuhan! Mutuh Neneh ngedengan namu! Mada' luk inau'Neh kuan pupu baken. Ngegala' rayehNeh nedeh!

⁵Do' menani kuan Tuhan, ngaceku kekamenNeh luk rayeh. Mada' bala ini pedingeren aput tana'.

⁶Do' lemulun luk tudo déi' Sion ngitang idi menani! Allah Israil ineh meligan idi rayeh, idi Ieh tudo arang pupuNeh."

Yesaya 13

- ¹Ini bala ratnan Babil luk ilap Yesaya anak Amos ratnan Allah.
- ²Do' naped bedéra pebunu' luun surud luk na tupu kayuh! Idi ngitang kuan lun pebunu' idi ngiding ticu'mu mangun ku tanu' kuandeh, pelé ideh ngerieng munung tanga' bawang luk medita' niat ineh.
- ³Tuhan pangeh nenawar lun pebunu'Neh luk mekuu' idi mesangit, pelé ideh nganau' aceh bunu' luk meligan, pad ngukum lemulun luk inanNeh museh.
- ⁴Ninger muyuh! Inan luk muni luun pegkung — mepad kudeng ria' lemulun luk mula', ieh ineh ria' mula' pupu idi imet luk mepamung. Tuhan amung baweh nganau' lun pebunu'Neh temina'.
- ⁵Ideh macing rat bawang luk mado luk iring tana'. Dengan usehNeh Tuhan macing pian ngusag apud bawang Babil.
- ⁶O Babil, ngarod ku étmu! Aco Tuhan muneng peh, ieh ineh aco luk inan Tuhan luk Melalud ngusag namu!
- ⁷Kareb ineh amung ticu' melaya', idi na kuu'deh peh.
- ⁸Ideh pelaba tot, idi mét pana', mepad kudeng decur luk mét nenganak. Ideh pesier idi migu'.
- ⁹Aco Tuhan macing, ieh ineh aco usehNeh. Tana' mangun ku su luk ali-ali idi amung lun mesala' miak maté.
- ¹⁰Amung gituen na macang, kareb aco masat na inan acang, idi bulan pana' na maré acang teh.
- ¹¹Kebala Tuhan, "Ui ngacing susa' kuan tana' idi ngukum lemulun luk dat ngaceku sala'deh. Ui ngebeneh lemulun luk medita' niat idi ngukum lemulun luk mesido niat idi lemulun luk mekuel,
- ¹²pad lemulun pawa' mepad kudeng amas rat Opir.
- ¹³Ui miak ngegio langit, idi tana' uen ngeruyuh rat su luk inanneh, kareb Ui ini Tuhan luk Melalud ngegala' usehKu.

¹⁴"Pupu baken luk tudo déi' Babil miak buro muli'. Ideh urap mepad kudeng payo luk buro kareb lun nganup idi dumba luk na lun matar.

¹⁵Idé-idé luk kamendeh miak tebaken macing maté.

¹⁶Idi anakdeh pana' bebaten macing maté, ruma'deh uen ngaro idi awandeh inan lun pasét, kareb ideh lingo-lingo ku laya'deh."

¹⁷Kebala Tuhan, "Ui ngegio nelun Midi pad ideh ngerieng Babil. Ideh na pian ku pirak idi amas.

¹⁸Ideh miak ngaté anak adi' ku binordeh. Na ideh méi' nan anak isuut idi anak dari pana'.

¹⁹Babil ineh meluun taga ratnan amung bawang baken, idi pupuneh megéi' ngubur neneh. Iamo' Ui ini Tuhan miak ngelaya' Babil, mepad kudeng luk inau'Ku kuan Sodom idi Gemora!

²⁰Seburur lemulun pana' nateh luk tudo su ineh baruh. Lun Arab luk lawé-lawé na lupu su ineh, idi lun luk matar dumba pana' na nakap uduh su ineh teh.

²¹Babil mangun ku su luk inan pung rat su luk ali-ali tudo, idi su luk inan puek nganau' arardeh. Suit luk necan terurdeh miak tudo su ineh, idi amék luk meliputi miak nalan luun usagneh.

²²Pudut luk medita' idi ruma'-ruma' raca' pana' melinguh ku arod bungalé idi ribuan. Tarék Babil pangeh nacing! Ulunneh malé mabud."

Yesaya 14

¹Tuhan méi' nelun Israil sekua' teh, pad Ieh mili' nedeh ku pupuNeh teh idi nima' nedeh lemubed amé' tudo bang bawangdeh sebuleng, idi lun pupu baken pana' miak amé' tudo dengandeh.

²Mula' pupu baken miak ngedengan nelun Israil, kareb ideh lemubed amé' bang bawang luk biré Tuhan nedeh, idi su ineh pupu baken miak ngakem kuan Israil mepad kudeng demulun. Lemulun luk nenaban Israil atun miak tebanen Israil. Idi lun Israil miak ngimet nelun luk nengedereh nedeh atun.

- ³Tuhan miak ngedo' nelun Israil ratnan ét idi derehdeh, idi ratnan kekamen lun luk tiban luk pelaba berat.
- ⁴Kareb Tuhan nganau' kudeng ini, ideh miak situnga inan raca' Babil, kebaladeh: "Raca' luk mekuel pangeh nebpeh! Seburur pana' nateh luk miak pederenneh teh!
- ⁵Tuhan pangeh nengagka' lalud raca'-raca' luk dat
- ⁶luk dengan usehdeh nengedereh amung pupu, idi luk na nugka' ngedereh pupu luk linaya'deh.
- ⁷Nekini inan do' udeng idi awang apud tana', idi amung lemulun menani mawang niat.
- ⁸Kayuh tongor idi tumuh Lebanon mawang niat ku ebpeh raca', ngaceku na lun luk nebpeng nedeh, ngaceku raca' ineh na idi!
- ⁹"Su luk inan até netemina' ngalap raca' Babil. Roh lemulun luk inan lalud bang tana' ini sigio su ineh. Roh raca'-raca' tumui rat luun kerusideh.
- ¹⁰Ideh nawar neneh, kebaladeh, 'Nekini iko mepad laya' kudeng kai. Iko mepad kudeng kai teh!
- ¹¹Atun iko buren dengan uni gita, iamo' nekini iko idi bang su luk inan até. Iko telubid luun ugam luk inan uled, idi tarubmu ineh kelati.'
- ¹²"Pelaba bura' ebpehmu rat déi' langit, O gituen pekak luk merasat. Nekini iko tila' luun tana', iko luk nengedereh amung pupu!
- ¹³Kebalamu bang niatmu, 'Ui amé' déi' surga; Ui miak ngelelep kerusi meluun dita' ratnan gituen Allah. Ui miak tudo luun pegkung pa tinueh busat aco su luk inan amung allah mepamung.
- ¹⁴Ui amé' meluun dita' ratnan laput. Ui nganau' bururku mepad kudeng Luk Meluun Dita.'
- ¹⁵Iamo' iko inau' mebeneh macing bang su luk inan até, ieh ineh bang lubang luk pelaba dalem.

¹⁶"Lun naté miak nutong idi mawa nier namu. Kebaladeh, 'Kudeng iniké lemulun luk nengeruyuh tana' idi luk nengatot amung bawang?"

¹⁷Kudeng iniké lemulun luk nengusag bawang idi luk nengisu' tana' mangun ku su luk ali-ali? Kudeng iniké lemulun luk na tu nemuit nelun luk tibanneh idi na nemaré nedeh muli'?

¹⁸Amung raca' tana' telubid bang tanemdeh luk pelaba do',

¹⁹iamo' iko na tanem, idi butungmu talan bang lubang pad melu idi uen lun ngeradu'. Idi butung lemulun luk pinaté bang bunu' talan pa luunmu.

²⁰Na iko tinamen kudeng raca' baken, ngaceku iko nengusag bawangmu, idi nengaté pupumu sebuleng. Seburur pana' rat bang tetek ruma'mu nateh luk miak mulun.

²¹Ngimun ngaté anak-anak raca' ini. Ideh miak maté ngaceku sala' tepunde. Seburur pana' rat arangdeh nateh luk miak ngimet mangun ku raca' bang tana' ini idi mudut mula' bawang rayeh."

²²Kebala Tuhan luk Melalud, "Ui ngerieng Babil idi ngusag neneh. Ui na necan anun-anun — anak pana' nateh. Seburur pana' nateh luk miak mulun. Ui ini Tuhan pangeh nepebala.

²³Ui ngisu' Babil mangun ku tana' payeh idi puek miak mulun su ineh. Ui miak ngapuh Babil ku apuh pad na luk ketecan. Ui ini Tuhan luk Melalud pangeh nepebala."

²⁴Tuhan luk Melalud pangeh nepebulung, "Luk pangeh litepKu miak mangun, idi luk tirawéKu miak ruenKu.

²⁵Ui miak ngaté nelun Asur bang bawangKu Israil, idi ngeradu' nedeh luun pegkungKu. Ui muit pupuKu ratnan paga Asur, idi teh ratnan luk babende.

²⁶Ini luk teruayenKu kuan tana'. Idi ticu'Ku tutang miak ngukum amung pupu."

²⁷Tuhan luk Melalud na miak na nganau' amung ineh. Ieh pangeh nenatang ticu'Neh pad ngukum, idi seburur pana' nateh luk miak ngagka' Neneh.

²⁸Ini bala luk pangeh bila bang lak luk inan Raca' Akas naté.

²⁹O lun Pilistin, rukud luk nemebal nemuyuh neputul, iamo' na muyuh miak mawang niat. Kareb sebuleng menipeh maté, inan sebuleng luk meluun dat ngelibal neneh. Kareb menipeh nutuk terurneh galau luk temulud remuat!

³⁰Tuhan mangun ku lun matar nelun masi' arang pupuNeh, pad ideh do' udeng. Iamo' Ieh maré kuan muyuh lun Pilistin aceh iru' luk pelaba io pad seburur pana' rat arang muyuh nateh luk mulun.

³¹Ngitang idi mutuh pedengan, O amung bawang Pilistin! O amung bawang, do' muyuh matot! Ngaceku rabpun macing rat pa tinueh busat aco — ieh ineh aceh baweh luk mekuu'.

³²Kudeng apehké tau ngor bala lun luk duken amé' netau rat Pilistin? Tau mada' nedeh ratnan Tuhan luk pangeh nengelelep, Sion, pad pupuNeh luk medereh miak do' udeng su ineh.

Yesaya 15

¹Ini bala ratnan Moab. Bang sedacem bawang Ar idi Kir inusag, idi ali-ali aput bawang Moab.

²Lun Dibon mudik surud amé' nangi' déi' su luk inandeh sembayang. Lun Moab temido ku susa' niatdeh ngaceku bawang Nebo idi Mediba. Ideh pangeh nengiki uluhdeh idi nemingit buluh tangdeh ngaceku susa'deh.

³Lemulun luk maya' dalan nacung. Déi' luun natad bawang idi luun apo ruma'deh luk mebalad ideh temido idi nangi'.

⁴Lun Hesbon idi lun Eliala ngitang, idi aroddeh pedingeren pad macing Yahas. Lun pebunu' pana' megegker idi na mekuu'.

⁵Ui pana' nangi' ngerawé Moab! Lun bang bawang ineh pangeh neburo iné' Soar. Sebuang mudik dalan amé' Luhit, dengan nangi'. Sebuang buro amé' Horonaim dengan ngarod ku dat niatdeh.

⁶Arur Nimrim mekeket, idi uduh luk tangeb abpa' nelayuh, sesuut pana' nateh luk mebata'.

⁷Lemulun nalan lemaba Raked Bulu', nakap dalan buro dengan binawehdeh.

⁸Aput bawang Moab inan tangi'. Tangi' ineh pedingeren rat Eglaim idi Bir Elim.

⁹Déi' Dibon abpa' mesia' ku dara'. Idi inan luk meluun dat tinina' Allah kuan lemulun luk tudo su ineh. Matu, amung lemulun luk ketecan déi' Moab miak pitayen.

Yesaya 16

¹Rat bawang Séla déi' su luk ali-ali, lun Moab maré aceh anak dumba ku baré kuan lemulun luk ngimet Yerusalim.

²Ideh nganét tangeb Abpa' Arnon, idi nalan mo'-mo', mepad kudeng suit luk inusu ratnan arardeh.

³Kebaladeh nelun Yahuda, "Mada' nekai ratnan luk ruen kai. Matar nekai, mepad kudeng kayuh luk ngelungung kareb mét idang muned aco, idi nima' nekai ngato erur kai liang lungungmu. Kai ini lun luk buro. Ngapung nekai su luk inan na kali' lemulun.

⁴Nima' nekai tudo bang bawangmu. Matar nekai ratnan lun luk sikal ngusag nekai." (Dereh idi usag miak mabud, idi lemulun luk ngusag bawang na luk idi peh.

⁵Idi seburur rat arang inul Daud miak mangun ku raca', idi Ieh miak ngimet pupu dengan mesiri idi mawa. Ieh mesaget nganau' luk matu, idi Ieh miak ngacing luk mesiri.)

⁶Kebala lun Yahuda, "Kai pangeh neninger ratnan dita' niat lun Moab. Kai kali' ideh mesido' niat idi nengadan, iamo' na ulek baladeh."

⁷Lun Moab miak nangi' ngaceku derehdeh. Ideh miak nangi' kareb ideh ngerawé akan luk do' luk kinandeh déi' bawang Kir Heris. Ideh pelaba susa' niat.

⁸Amung lati' muneng ku Hesbon idi kabun anggur déi' Sibma inusag. Abpa' anggur ratnan kabun ineh luk nengabuk raca'-raca' amung pupu atun. Mon

anggur ineh maput pa busat aco macing bawang Yaser idi su luk ali-ali, idi pa acep aco Abpa' luk Mepaci'.

⁹Nekini Ui nangi' ngaceku anggur Sibma idi bawang Yaser. Idi teh abpa' matehKu mebpeh ngaceku Hesbon idi Eliala, ngaceku na luk perinien luk ku ngawang niat lemulun.

¹⁰Seburur pana' nateh luk mawang niat luun lati' luk mebaleng. Seburur pana' nateh luk ngitang idi menani bang kabun anggur. Seburur pana' nateh luk ngeradu' anggur pad ngalap abpa'neh. Awang niat idi do' ria' pangeh ugka'.

¹¹Ui ngarod ku susa' niat ngaceku Moab idi Kir Heris.

¹²Lun Moab merur nalan mudik pegkung pad sembayang bang ruma' akang idi su luk inandeh sembayang. Iamo' na ulekneh.

(¹³Ini bala luk biré Tuhan atun ratnan Moab.

¹⁴Idi nekini Tuhan pebala, "Teluh lak baruh binaweh Moab luk pelaba ula' na idi. Pawa' lemulun miak mulun rat arang pupu ineh luk pelaba ula, idi ideh pana' melaya' peh.")

Yesaya 17

¹Ini bala ratnan Damsik. Kebala Tuhan, "Damsik na miak mangun ku aceh bawang teh; ieh mangun ku usag mo'.

²Amung bawang Siria miak tacin ruked-ruked. Ideh mangun ku laman dumba idi sapi', idi seburur pana' nateh luk miak ngusu nedeh.

³Israil na linibung, idi Damsik na tuped sebuleng. Lun Siria mepad kudeng lun Israil luk na miak buren teh. Ui ini Tuhan luk Melalud pangeh nepebala."

⁴Kebala Tuhan, "Kareb ineh rayeh Israil miak ugka', idi do'neh uen ngelibal ku asi'.

⁵Israil mepad kudeng aceh lati' luk pangeh piranih idi ieh dat ali mepad kudeng aceh lati' déi' Repaim luk pangeh piranih teh.

⁶Pawa' lemulun luk ketecan, idi Israil mepad kudeng saitun; iamo' amung bua'neh pangeh ilap. Dueh kian teluh lek ketecan luun tutu'neh, idi teh apat

kian limeh lek ketecan luun angkat pa beneh. Ui ini Tuhan Allah lun Israil, pangeh nepebala.”

⁷Kareb ineh, lemulun miak mutuh pedengan ratnan Lun luk Nemudut nedeh, ieh ineh Allah Israil luk Meligan.

⁸Ideh na merapet ku bubpun luk inau' tiku'deh sebuleng idi ulung luk inau'deh inan sembayang kuan akang Asera, idi bubpun su luk inandeh ngeseb umau luk do' buen.

⁹Kareb ineh bawang luk linibung idi meraben miak tacin idi uen ngusag mepad kudeng bawang lun Hiwi idi lun Amori pangeh tican kareb ideh neburo rat nelun Israil.

¹⁰O Israil, iko pangeh nekelupan Allah luk muit namu, idi luk ngelibung namu mepad kudeng batu luk meraben. Iamo' iko nganau' kabun su luk inan sembayang inan allah pupu baken.

¹¹Iamo' sagan pana' tibu ineh mulun idi kebusak kareb iko nibu nedeh pa pekak, na tu luk perinien. Iamo' inan susa' mo' idi ét luk na miak do'.

¹²Pupu luk rayeh uned meria' dengan arod luk mepad kudeng beri abpa' rayeh, kareb mula' ribut.

¹³Amung pupu macing mepad kudeng ribut luk rayeh, iamo' Allah mada' nedeh pad ideh lemubed. Ideh mepalid mepad kudeng abuh luun pegkung, idi lipang bang libuleh.

¹⁴Ideh ngatot kareb macep aco, iamo' pa pekak ideh na idi! Kudeng ineh kekiped amung lemulun luk ngaro bawang tau.

Yesaya 18

¹Déi' punang amung abpa' Sudan inan bawang su luk inan uni ilad pedingeren.

²Rat bawang ineh tuda'-tuda' lun luk duken maya' rét amé' pa lod. Idi rétdéh inau' ratnan bulu'. O muyuh lun luk duken, muli' muyuh! Do' amé' nated bala kuan bawang muyuh sebuleng déi' punang Abpa' Nil, kuan bawang muyuh

luk metueh idi melalud, kuan pupu muyuh luk medita' idi luk kiniki uluh luk inan lun matot aput-aput tana'.

³O amung muyuh luk tudo bang tana' ini, do' muyuh ninger! Do' nganét aceh bedéra luk uen ngiding luun pegkung! Nganét uni tawak!

⁴Kebala Tuhan negku, "Ui miak nier rat surga mepad kudeng ipup luk macing dengan na muni, ieh ineh kareb do' aco, kareb ngeranih idi mepad kudeng acang aco kareb mét idang.

⁵Kareb nateh mureg bua' anggur, kareb amung busakneh merurug idi bua'neh malé melak, bunu' miak ngaté nelun Sudan, mepad kudeng angkat anggur tetuin ku iyu.

⁶Butung lun pebunu'deh miak tacin, pad kenen suit idi pung luk meliput. Suit kuman ineh kareb melau' idi pung kuman kareb meteneb."

⁷Kareb ineh, Tuhan luk Melalud miak ngalap baré ratnan bawang ineh luk déi' punang Abpa' Nil, bawang luk metueh idi melalud, pupu luk medita' idi luk kiniki uluh, luk inan lun matot aput-aput tana'. Ideh miak macing nan Pegkung Sion su luk inan lemulun sembayang inan Tuhan luk Melalud.

Yesaya 19

¹Ini bala ratnan Masir. Tuhan amé' Masir maya' laput. Akang Masir megegker pa kiungNeh, idi lun Masir matot Neneh.

²Kebala Tuhan, "Ui ngacing bunu déi' bawang Masir, pad kinanak sikal metueh ratnan kinanakneh, idi lun luk pamung bawang pebunu' arangdeh sebuleng. Amung bawang Masir pebunu' arangdeh sebuleng teh idi tuda'-tuda' raca' Masir singaro sikal ngimet.

³Ui miak ngagka' terawé lun Masir idi teh Ui ngelaya' kuu'deh. Ideh miak mutuh pedengan ratnan akangdeh, idi amé' matun nelun luk mangun, idi ngitun roh lun naté pana'.

⁴Ui maré nelun Masir bang palad lun ngimet luk metueh niat. Aceh raca' luk mekuel miak ngimet nedeh. Ui ini, Tuhan luk Melalud pangeh nepebala."

- ⁵Abpa' Nil amé' isuut, idi iuk-iuk amé' mekeket.
- ⁶Abang abpa' dat buen ngaceku amé' mekeket. Idi pisui luk tangeb abpa' miak melayuh,
- ⁷idi amung luk tinibu tangeb Abpa' Nil melayuh idi mepalid ku bui.
- ⁸Amung lun luk nakap lawid bang Abpa' Nil miak ngarod idi nangi', keluit idi rabetdeh na ulek.
- ⁹Lun luk ngebaruh kibung pu na merapet.
- ¹⁰Lun luk ngebaruh ineh idi lun baken luk mileh ngakem pelaba dereh idi meberat niat.
- ¹¹Amung lun rayeh Soan pelaba bacé, idi lun Masir luk mileh mada' raca' maré bada' luk mebacé. Ngudehké ideh pebala kuan raca', "Kai ini anak lun mileh, idi anak-anak raca' luk mon"?
- ¹²O raca' Masir, iapehké lun mileh luk mada' namu. Nima' nedeh mada' namu ratnan terawé Tuhan luk Melalud ratnan Masir.
- ¹³Lun rayeh Soan idi Mempis mebacé peh. Petulu ideh ngimet bawang. Iamo' ideh nengeraruh neneh.
- ¹⁴Tuhan nenima' nedeh maré bada' luk ngagau bawang. Ngaceku ineh Masir megéi' nganau' luk na petulu, idi midar mepad kudeng lun mabuk mekasiad luun uta'neh.
- ¹⁵Seburur lun Masir pana' nateh luk miak ngedengan namu rat arang lun do' idi lun dat, lun rayeh idi anak pana'.
- ¹⁶Kareb ineh lun Masir matot mepad kudeng decur. Ideh megeger ku totdeh kareb ideh kali' Tuhan luk Melalud pangeh nenatang tiku'Neh pad ngukum nedeh.
- ¹⁷Lun Masir matot nan bawang Yahuda, anid karebdeh ngerawé ukum luk tinina' Tuhan luk Melalud kuandeh.

¹⁸Kareb ineh limeh bawang Masir miak pebala bang buri' Kanaan. Lemulun bang bawang ineh pebulung ku ngadan Tuhan luk Melalud. Sebuleng rat arangdeh tetanen, "Bawang Aco."

¹⁹Kareb ineh teh, inan bubpun kuan Tuhan bang bawang Masir, idi aceh diri batu mangun ku terawé ratnan Tuhan déi' lakan tana' Masir.

²⁰Bubpun idi diri ineh mangun ku tanu' ratnan Tuhan luk Melalud idi déi' Masir. Kareb pupu ineh pederen idi nawar mutuh Tuhan ngedengan, Ieh miak ngecuk Lemulun luk Ngulun nedeh.

²¹Tuhan miak ngegala' bururNeh nelun Masir. Kareb ineh teh ideh miak miti Neneh idi sembayang Neneh idi maré baré luk kereten idi luk sabpen. Ideh miak maré jani' Neneh idi maya' luk ruendeh pejani'.

²²Tuhan ngukum nelun Masir, iamo' pangeh ineh Ieh ngedo' nedeh. Ideh miak lumi Neneh, pad Ieh ninger sembayangdeh idi ngedo' nedeh.

²³Idi teh, inan aceh dalan arang Masir idi Asur, pad lun Masir idi lun Asur megéi' nalan arang dueh bawang ineh, idi dueh pupu ineh miak sembayang pad-pad.

²⁴Idi Israil miak mebala dengan Masir idi Asur, idi teluh bawang ineh ngacing peruan kuan uang tana' ini.

²⁵Tuhan luk Melalud miak ngeperuan nediteluh, kebalaNeh, "O pupuKu, Masir, O Asur luk pinudutKu, O Israil, pupu luk pinili'Ku, Ui ngeperuan nemuyuh."

Yesaya 20

¹Maya' bala Sargon, raca' Asur, lun rayeh baweh Asur nemunu' bawang Asdod déi' Pilistin.

²Teluh lak luk nepangeh Tuhan ngecuk ni Yesaya Amos nengelengu tacung idi kasutneh. Ieh nemaya' balaNeh idi nelungu.

³Kareb Asdod pangeh linaya', idi kebala Tuhan, "DemulunKu Yesaya nalan-nalan dengan lungu teluh lak kinioneh. Ini mangun ku tanu' ratnan luk mangun kuan Masir idi Sudan.

⁴Raca' Asur miak nguit nelun luk tiban dengan lubpa ratnan dueh bawang ineh. Anak adi' idi lun merar miak nalan dengan lubpa pad ngacing igu' kuan Masir.

⁵Lemulun luk pangeh merapet ku bawang Sudan idi medita' niat ku bawang Masir miak mawa ku tabpa dueh bawang ineh, idi migu'.

⁶Kareb ineh lemulun luk tudo tangeb abpa' rayeh déi' Pilistin miak pebala, 'Siruh luk pangeh nangun kuan pupu luk inan tau merapet miak matar netau ratnan raca' Asur! Kudeng apehké tau miak mepuit?' "

Yesaya 21

¹Ini bala ratnan Babil. Mepad kudeng libuleh luk malid déi' su luk ali-ali, susa' miak macing rat aceh bawang luk katot.

²Inan aceh luk sinierku ratnan tuda'-tuda' susa' luk pelaba dat ratnan naluk lemulun idi ngusag bawang. O baweh Elam, amé' pebunu'! O baweh Midi, ngerieng amung bawang! Allah miak ngagka' dereh luk icing bawang Babil kuan lun Israil.

³Luk sinier idi luk pindengerku bang amung ineh nganau' negku matot, idi ui mét mepad kudeng decur luk mét nenganak.

⁴Melibung sirenku, idi ui megegker ku totku. Ui nganét medacem dengan mawang niat, iamo' dacem ineh nengacing tot kuanku.

⁵Bang luk sinierku inan aceh irau temina'. Ugam pangeh bilad kuan sakai. Idi ideh kuman idi ngirup. Denak-denak inan lemulun ngitang, "Lun rayeh baweh! Temina' ku utap muyuh!"

⁶Idi kebala Tuhan negku, "Amé' iko ngecuk aceh lun nginita, idi ngecuk neneh maré kali' ratnan luk sirennéh.

⁷Kudeng ieh kali' lemulun luk nalan maya' kuda tedueh-tedueh, idi lemulun luk maya' keladai idi unta, ngecuk neneh nier nedeh do'-do'."

⁸Lun luk nginita ineh ngitang, kebalaneh, "O Tuan, ui matar tebaco kedangan."

⁹Denak-denak ideh macing! Lemulun luk nalan maya' kuda, tedueh-tedueh. Lun luk nginita ineh maré bala, kebalaneh, "Babil pangeh netabpa! Amung akang luk inandeh sembayang pangeh nebila'."

¹⁰O pupuku Israil, muyuh pangeh rinik mepad kudeng padé, iamo' nekini ui pangeh nemada' nemuyuh ratnan bala luk do' luk pindengerku ratnan Tuhan luk Melalud, ieh ineh Allah lun Israil.

¹¹Ini bala ratnan Edom. Seburur lemulun nawar negku rat Edom, kebalaneh, "O lun luk nginita, anun kinio daceh ni teh?"

¹²Kebalaku, "Malé macang aco, iamo' inan daceh teh. Kudeng iko sikal ngitun teh, do' lemubed napeh."

¹³Ini bala ratnan bawang Arab. O muyuh lun Dedan, luk megéi' lupu déi' su luk ali-ali bang bawang Arab,

¹⁴do' maré abpa' rupen lun luk meparing luk amé' nemuyuh. O muyuh lun Tima, do' maré nuba' kuan lun luk buro.

¹⁵Ngaceku ideh buro pad mepuit ratnan pelapet luk temina' ngaté nedeh, idi binor luk temina' ngelatik nedeh idi amung susa' kareb pebunu' teh.

¹⁶Idi kebala Tuhan negku, "Selak baruh ubur pupu Kedar miak ugka'.

¹⁷Lun Kedar luk ngimet binor meluun kuu', iamo' sesuut mo' miak ketecan. Ui ini, Tuhan Allah lun Israil pangeh nepebala."

Yesaya 22

¹Ini bala ratnan Raked Su luk inan Luk Sinier. Anunké luk mangan? Ngudehké amung lemulun bang bawang ineh nganau' irau luun apo ruma' luk mebalad?

- ²Amung bawang ineh do' ria' idi mawang niat. Anak itinmu luk naté bang bunu' ini na naté uned pebunu'.
- ³Amung lun rayeh muyuh neburo idi tiban kareb nateh ideh nengelatik sebuleng ileb.
- ⁴Nima' negku nangi' buleng-buleng. Aleg ngubuk negku, ngaceku pupuku pelaba ula' naté.
- ⁵Ini aceh kareb tot, laya', idi gagau déi' Raked Su luk inan Luk Sinier. Tuhan Allah luk Melalud nengacing amung ineh kuan tau. Libung bawang tau pangeh inusag lun, idi arod lemulun luk mutuh pedengan melinguh arang pegkung.
- ⁶Lun pebunu' rat bawang Elam nacing maya' kuda, idi netemina' ku binor idi ileb. Lun pebunu' rat bawang Kir netemina' ku utap.
- ⁷Aput raked luk mebaleng déi' Yahuda inan keréta, idi lun pebunu' luk maya' kuda tuped pa atun tanga' Yerusalim.
- ⁸Amung-amung luk ku matar Yahuda netabpa. Kareb ineh muyuh nenguit repapeh bunu' rat bang Ruma' luk Bang Pulung.
- ⁹⁻¹⁰Muyuh nekali' song luun libung Yerusalim. Muyuh nengiap amung ruma' déi' Yerusalim idi nengusag sebuangdeh pad ngalap batu pingedo' libung bawang ineh.
- ¹¹Muyuh nemudut aceh luk inan abpa' bang bawang, pad nganug abpa', pelé ngalap abpa' luk manud ratnan takung luk mon. Iamo' muyuh na nengerawé Allah luk nengeletep amung ineh rat mon.
- ¹²Tuhan luk Melalud nengecuk nemuyuh nangi' idi temido, ngiki uluh muyuh idi nacung.
- ¹³Iamo' muyuh neriruh idi nenganau' irau. Muyuh nengeret dumba idi sapi' ku kikid muyuh, idi nengirup abpa' anggur. Kebala muyuh, "Meluun do' tau ngirup idi kuman, ngaceku nebpa tau maté."

¹⁴Kebala Tuhan Allah luk Melalud negku, "Ideh na miak ngalap do' ratnan dat ini ruked ulundeh. Ui ini Allah luk Melalud pangeh nepebala."

¹⁵Tuhan luk Melalud nengecuk negku amé' matun ni Sebna, ieh ineh lun rayeh ruma' raca', idi pebala neneh,

¹⁶"Ngudeh iko kudeng ineh? Ngudehké iko nguer batu ku tanem luk pelaba do' kuan bururmu sebuleng déi' luun pegkung?"

¹⁷Kian, iko lun rayeh lek, iamo' Tuhan miak ngalap namu idi nala' namu

¹⁸Ieh miak ngelilid namu mepad kudeng bul, idi mepet namu amé' bang bawang luk rayeh. Iko miak maté su ineh iring amung keréta luk inanmu medita' niat. Iko ngigu' ruma' tuanmu!

¹⁹Tuhan miak nala' namu ratnan kekamenmu idi ngebeneh namu ratnan kekamenmu luk medita'!"

²⁰Kebala Tuhan ni Sebna, "Kareb ineh Ui miak nawar demulunKu Eliakim Hilkia.

²¹Ui miak ngayung neneh ku kuyu' idi abet awa' kekamenmu, idi maré amung laludmu neneh. Ieh mangun ku aceh taman kuan lun Yerusalim idi Yahuda.

²²Ui maré taka Ruma' Daud luun tudungneh. Luk kabinneh na miak uen ngitek, idi luk uenneh ngitek na miak kabin.

²³Ui miak ngelelep neneh mepad kudeng aceh paku', luk pinaku'. Idi ieh miak mangun ku lawa ubur kuan uang tetek ruma'neh.

²⁴"Iamo' amung pupu luk muneng neneh idi uang tetek ruma'neh mangun ku babeh luk meberat kuanneh. Ideh mepad kudeng lacang idi periuk luk tekito luun paku',

²⁵pad paku' luk meraben ineh miak mebubput idi mebpeh. Ineh kekiped amung luk tikito luunneh." Tuhan pangeh nepebala.

Yesaya 23

¹Ini bala ratnan bawang Sur. O muyuh lun luk ngakem bang kapal déi'abpa' rayeh, ngarod ku dat niat muyuh! Bawang Sur luk inan kapal muyuh ucu'

pangeh inusag. Ruma'neh idi su luk inan kapal mapit inusag teh. Kareb kapal muyuh lemubed rat Siprus, muyuh miak ninger bala ineh.

²O muyuh lun Sidon luk pepua', temido muyuh!

³Muyuh nengecuk nedeh guta abpa' rayeh, pad ideh melih idi masui padé luk rat déi' Masir, idi teh pad ideh pepua' dengan amung pupu baken.

⁴O bawang Sidon, iko inigu'! Abpa' rayeh idi ribaruh abpa' rayeh pana' na pian namu, kebaladeh, "Na anakku, anak deléi idi anak decur nateh luk isa'ku."

⁵Lun Masir pana' miak megagap idi mawa kareb ideh ninger ratnan usag Sur.

⁶O muyuh lun Sur, ngarod ku dat niat muyuh! Idi buro amé' Tarsis!

⁷Matuké ini bawang Sur luk do' ria', luk pinudut mon? Matuké ini bawang luk nengecuk nelun guta abpa' rayeh pad nganau' tuda'-tuda' bawang baruh?

⁸Idéké luk nengerawé ngacing susa' ini kuan Sur, ieh ineh bawang luk iuk-iuk amé' rayeh, idi su ineh lun rayeh-rayeh luk pepua' meluun buren aput tana'?

⁹Tuhan luk Melalud luk nengerawé amung ineh, ngaceku Ieh pian ngagka' dita' niatdeh ratnan amung luk inau'deh, pad ngigu' lun rayehdeh luk buren.

¹⁰O muyuh lun Tarsis, do' nganau' lati', ngaceku Sur na ngedengan namu peh.

¹¹Tuhan pangeh nenatang tiku'Neh luun abpa' rayeh, pad tuda'-tuda' imet pangeh netabpa. Tuhan pangeh nemutut ukum ratnan amung bawang Kanaan luk meraben uen ngusag.

¹²O bawang Sidon, awang niatmu na idi peh. Pupumu pederen, idi sagan pana' ideh buro amé' Siprus, ideh na miak mepuit.

¹³(Lun Babil, baken lun Asur, luk nemaré bawang Sur kuan pung luk meliput. Lun Babil ineh luk nemudut pudut luk medita' su luk inandeh nengeriang bawang. Ideh luk nengusag libung Sur luk meraben, idi luk nengusag amung bawang ineh.)

¹⁴O muyuh lun luk ngakem bang kapal déi' abpa' rayeh, ngarod ku dat niat muyuh. Bawang luk inan muyuh merapet pangeh inusag.

¹⁵Kareb ineh, na lemulun miak ngerawé Sur tudu' ngepulu' lak kinioneh, mepad kinio ulun seburur raca'. Pangeh ineh Sur mepad kudeng aceh decur luk mesawa' bang nani ini:

¹⁶Ngalap gitamu, idi nalan-nalan bang bawang, O decur luk mesawa' luk na teruayen! Nateg gitamu idi menani, pad deléi miak ngerawé namu teh.

¹⁷Pangeh tudu' ngepulu' lak, Tuhan miak nima' Sur lemubed nganau' kekammeneh luk atun. Ieh miak masui bururneh kuan amung pupu apud tana' ini.

¹⁸Usin luk lapenneh ratnan pepua' miak barén kuan Tuhan. Na ieh nganug ineh, iamo' lemulun luk sembayang inan Tuhan miak makai usinneh ku melih akan idi ayungdeh.

Yesaya 24

¹Tuhan miak ngusag amung-amung luk bang tana' ini, pad ieh mangun ku su luk ali-ali. Ieh miak ngebelikui luun tana' idi ngatad amung lemulun.

²Amung-amungdeh mepad ukum — lun imam idi lun mula', demulun idi lun luk kuan nedeh, lun luk melih idi lun luk masui, lun luk maré luk kebiten idi lun luk ngabit, lun do' idi lun masi'.

³Tuhan miak ngalét tana' ini idi ngusag luk bang ineh. Tuhan pangeh nepebala.

⁴Aput tana' metekering idi na abpa', idi na lalud peh. Langit idi tana' pana' pad-pad melaya'.

⁵Lemulun pangeh nengelutak tana' ini, ngaceku ideh ngelaba ukum Allah idi na ngerawé jani' Allah luk meruked ineh.

⁶Ngaceku ineh Allah pangeh nengediman tana' ini, pad ieh uen ngusag. Uang tana' ini uen ngua' maya' kudeng luk inau'deh. Kinula' lemulun luk mulun iuk amé' pawa'.

⁷Anggur melayuh, idi abpa'neh sesuut mo'. Lemulun luk mawang niat atun pangeh mesusa' nekini.

- ⁸Idi uni gita idi sulingdeh pangeh nugka'.
- ⁹Idi teh na lemulun ngirup abpa' anggur idi menani dengan mawang niat peh. Na ideh pian ku én abpa' anggur teh.
- ¹⁰Bawang rayeh na isa'. Anid ruma' initek pad lemulun na miak semuet.
- ¹¹Lemulun lingo-lingo luun dalan idi ngitang mutuh abpa' anggur. Awang niat pangeh neburo macing ruked-ruked; ieh pangeh inusu rat luun tana'.
- ¹²Bawang pangeh inusag idi amung tanga' pana' netabpa.
- ¹³Ini luk miak mangun bang anid bawang apud tana'. Mepad kudeng pangeh ranih, idi bua' saitun pangeh bibpet rat udungneh idi bua' anggur luk kekiped pangeh ilap ratnan lawadeh.
- ¹⁴Lemulun luk ketecan menani ku awang niatdeh. Lemulun luk pa acep aco miak mada' ratnan rayeh Allah,
- ¹⁵idi lemulun luk pa busat aco miak ngubur Neneh. Lemulun luk tudo tangeb abpa' rayeh miak ngubur Tuhan Allah lun Israil.
- ¹⁶Rat iring tana' tau ninger nani ubur ratnan Israil, pupu luk matu ineh. Iamo' na luk idi rapet kuanku! Ui iuk-iuk melaya'! Lemulun luk dat lakat nganau' luk dat, idi datdeh iuk-iuk amé' rayeh.
- ¹⁷O lemulun luk bang tana' ini! Inan luk katot, lubang, idi abpung nganét nemuyuh.
- ¹⁸Lemulun luk nutun mepuit ratnan luk katot miak mebpeh bang lubang, idi lemulun luk mepuit ratnan lubang miak mekaneh abpung. Pelaba ula' udan mebpeh rat déi' langit, idi tapin tana' miak meruyuh.
- ¹⁹Tana' miak turak idi mekurar.
- ²⁰Tana' meruyuh mepad kudeng lun mabuk idi megué mepad kudeng lepo kareb mebarui. Babeh sala' tana' ini pelaba rayeh. Ieh miak mekurar idi na petuneb baruh teh.
- ²¹Kareb ineh Tuhan miak ngukum ada' luk dat déi' arang gawa' idi lun luk ngimet bang tana' ini.

²²Allah miak ngamung raca'-raca' mepad kudeng lun luk tiban luk pimung bang aceh lubang. Ieh nutup nedeh pad macing kareb ideh miak kumin.

²³Bulan amé' medacem, idi mateh aco na macang peh, ngaceku Tuhan luk Melalud mangun ku raca'. Ieh miak ngimet déi' Yerusalim luun Pegkung Sion idi lun rayeh-rayeh pupuNeh miak kali' uburNeh.

Yesaya 25

¹O Tuhan, Iko ineh Allahku, Ui ngerayeh Namu, idi ngubur ngadanMu; Iko nenganau' kekamen luk inan mawa; Iko lutep ngacing luk tirawéMu mon.

²Iko nengisu' bawang-bawang mangun ku usag, idi nengusag libungdeh luk meraben. Ruma'-ruma' raca' luk pinudut bunu' kai pangeh netabpa.

³Pupu baken luk melalud ngubur Namu, idi Iko luk inan matot bang bawang pupu luk mekuel.

⁴Iko mangun ku libung kuan lun masi' bang susa'deh. Iko luk nucung nedeh kareb mebarui, idi ngelungung nedeh kareb mét idang. Niat lemulun luk na méi' mepad kudeng barui kareb meteneb,

⁵idi rikan luun tana' luk tekering. Iamo' Iko O Tuhan nengagka' bunu' kai; Iko nengagka' arod lemulun luk mekuel, mepad kudeng laput ngelungung kareb mét idang.

⁶Luun Pegkung Sion ini Tuhan luk Melalud miak nganau' aceh irau kuan amung pupu bang tana' ini — dengan akan idi abpa' anggur luk meluun do'.

⁷Kareb ineh Ieh miak mubuh laput susa' luk ngelungung amung-amung pupu.

⁸Tuhan miak ngagka' até macing raked-raked! Ieh miak miid abpa' mateh amung-amung lemulun idi nala' igu' amung pupuNeh luk aput-aput tana'. Tuhan pangeh nepebala.

⁹Kareb ineh, amung lemulun miak pebala, "Ieh ineh Tuhan tau! Tau pangeh merapet Neneh idi Ieh nemuit netau idi nekini tau pelaba awang niat, ngaceku Ieh nengulun netau!"

¹⁰Ticu' Tuhan rirengNeh luun Pegkung Sion, iamo' lun Moab uen ngeradu' mepad kudeng geramih uen ngeradu' luun téi'.

¹¹Ideh miak natang ticu'deh, mepad kudeng lemulun luk nutun lemangui. Iamo' Tuhan miak narem dita' niatdeh dengan amung kekamen ticu'deh.

¹²Allah miak ngusag amung libung Moab luk meraben perapu dengan ardeh luk medita', pad amung ineh metabpa.

Yesaya 26

¹Kareb ineh, lemulun menani déi' bawang Yahuda, kenanideh: Bawang tau meraben! Allah sebuleng matar libungneh!

²Ngukab amung tanga' bawang, idi nima' pupu luk mesiri semuet, ieh ineh pupu luk lutep maya' Tuhan.

³Iko, O Tuhan, ngeriput awang lemulun luk lutep manu Namu idi luk merapet Namu.

⁴Do' merapet inan Tuhan macing ruked-ruked, ngaceku Tuhan ineh Libung Batu luk Meruked.

⁵Ieh nengigu' lemulun luk medita' niat, idi nengusag bawangdeh luk meraben, pad libungneh netabpa.

⁶Lemulun luk pidereh atun idi lun masi' pana' ngeradu' neneh nekini.

⁷O Tuhan, Iko ngeraked dalam kuan lemulun luk matu, pelé ideh maya' dalam luk mebalad.

⁸Kai maya' pianMu idi merapet Namu, Iko mo' luk inan kai mawang niat.

⁹Kareb medacem pana' ui geregan perurum Namu, pad ui nakap Namu dengan amung niatku. Kareb Iko ngukum tana' ini idi uang tana' ini, ideh miak kali' ratnan luk matu.

¹⁰Sagan pana' Iko méi' nelun luk dat, ideh na sibada' nganau' luk matu. Bang bawang lemulun luk matu pana', ideh megei' nganau' sala'. Ideh na pian nier rayehMu.

¹¹Bunu'Mu na kali' Namu sikal ngukum nedeh. O Tuhan, do' ngigu' nedeh idi nima' nedeh medereh. Ngegala' awaMu kuan pupuMu siren bunu' ineh.

¹²O Tuhan, Iko sikal ngeperuan nekai. Amung-amung luk ruen kai mangun ngaceku pedenganMu.

¹³O Tuhan Allah kai, kai pangeh inimet pupu baken, iamo' Iko mo' sebuleng Tuhan kai.

¹⁴Ideh pangeh naté idi ideh na mulun peh; rohdeh pana' na miak tumui, ngaceku Iko pangeh nengukum idi nengaté nedeh. Na lemulun ngerawé nedeh peh.

¹⁵O Tuhan, Iko nenganau' pupu kai rayeh, idi nengiuk lakan tana' kai libut-libut bawang, pelé ngadanMu uen ngerayeh.

¹⁶O Tuhan, Iko nengukum pupuMu pad ideh sembayang nakap Namu bang derehdeh.

¹⁷O Tuhan, Iko nenganau' nekai ngitang, mepad kudeng decur luk mét nenganak.

¹⁸Kai mét idi medereh, iamo' na kai nengeruat luk anun-anun. Kai na nengacing ulun kuan tana' kai, idi na kai nengula' uang tana' ini pana'.

¹⁹Pupu kai luk pangeh naté miak mulun baruh! Butungdeh miak muli' mulun! Amung lemulun luk rudap bang tanemdeh, miak tumui idi menani ku awang niatdeh! Mepad kudeng ipup ngeba' tana', kudeng ineh teh Tuhan miak nui lemulun luk naté mon.

²⁰O pupuku, semuet bang ruma' muyuh idi ngitek tanga'. Sigapung segageh, pad macing useh Allah ugka'.

²¹Tuhan macing sikal ngukum lemulun bang tana' ini ngaceku sala'deh. Até lemulun luk inau' dengan lulem bang tana' ini miak uen ngegala', pad tana' na miak ngapung butung lemulun luk pinaté ineh teh.

Yesaya 27

¹Kareb ineh Tuhan miak ngukum Galau, ieh ineh galau luk suloi ineh, idi teh pung luk dat luk tudo bang abpa' rayeh, ku pelapetNeh luk melalud idi metueh.

²Kareb ineh Tuhan miak pebala,

³"Ui ngasa' kabun anggurKu, idi megéi' mubpur neneh. Ui matar kabun ineh tebaco kedangan, pad seburur pana' nateh luk ngusag ineh.

⁴Na Ui museh nan anggur ineh. Meluun do' Ui pebunu' nan tabpa' idi bitarung, pad Ui ngeseb nedeh macing mabud.

⁵Iamo' kudeng bunu' pupuKu pian pitarinKu, do' ideh pedo' Negku. Matu, do' ideh pedo' Negku."

⁶Kareb ineh pupu Israil, ieh ineh inul Yakub, miak inan uat pad ideh mulun idi ideh nginulih idi kebusak. Tana' maput ku bua'deh.

⁷Ukum Tuhan kuan bunu' Israil meluun berat ratnan ukumNeh kuan Israil. Ngaceku na mula' lemulun pinatéNeh.

⁸Ukum Tuhan kuan Israil, ieh ineh Ieh nemaré nedeh tebanen. Ieh nemalid nedeh ku bui luk dat rat pa busat aco.

⁹Israil na miak ngalap do' ratnan sala'neh, pad macing amung bubpun batu lun na manu pangeh nusag, idi pad macing amung ulung idi bubpun su luk inan ngeseb umau luk do' buen pangeh tila'.

¹⁰Bawang luk inan libung luk meraben pangeh nusag. Ieh mangun ku su luk ali-ali, idi teh ku laman sapi' su luk inandeh ngato erurdeh idi su luk inandeh nakap uduh.

¹¹Angat-angat kayuh metekering idi neputul. Idi decur nengalap ineh ku kayuh apui. Ngaceku pupu ineh na kali' anun-anun, idi Allah luk nemudut nedeh na méi' nedeh.

¹²Kareb ineh Tuhan miak ngukum pupuNeh Israil, rat selipa bawang macing selipa, ieh ineh rat Abpa' Pirat macing lakan tana' bawang Masir. Ieh miak ngatad luk do' ratnan luk dat.

¹³Kareb ineh, aceh serupit miak muni pad nawar nelun Israil muli' rat Asur idi Masir, bawang su luk inandeh tiban. Ideh miak macing idi sembayang inan Tuhan déi' Yerusalim, ieh ineh luun pegkungNeh luk meligan.

Yesaya 28

¹Imet Israil miak kumin! Uburneh buro mepad kudeng pata busak luun uluh lun rayeh-rayehneh luk megéi' mabuk. Uluhdeh do' buen ku umaudeh, iamo' ideh telubid ngaceku mabuk.

²Tuhan temina' ku lemulun luk metueh idi melalud luk miak ngerieng nedeh. Ieh macing mepad kudeng udan batu, idi teh mepad kudeng udan luk mula' idi tubu' belen pana' pad maput tana'.

³Dita' niat lun rayeh luk mabuk ineh miak uen ngeradu'.

⁴Ubur lun rayeh ineh luk medita' niat miak buro mepad kudeng bua' gita' luk atun luk lapen kenen kareb ideh melak.

⁵Kareb ineh Tuhan luk melalud mepad kudeng aceh pata busak luk pelaba do' kuan pupuNeh luk ketecan.

⁶Ieh miak maré ileh luk mesiri kuan lemulun luk mutut besara', idi kuu' kuan lemulun luk ngusu bunu' luk ngerieng amung tanga' bawang.

⁷Nabi idi imam pana' mabuk idi midar. Ideh pangeh nengirup pelaba ula' abpa' anggur idi arak, pad ideh metebaceng ku raruh niatdeh. Nabi-nabi ineh pelaba abuk, pad ideh na kali' ilung luk sirendeh ratnan Allah, idi imam-imam pana' pelaba abuk, pad ideh na miak mutut besara luk barén kuandeh.

⁸Méja su luk inandeh tudo maput ku uta', pad na luk meligan.

⁹Kebaladeh ratnan ui, "Idéké luk badén lemulun ineh? Idéké pian badénneh? Bada'neh petulu ku anak isuut luk baruh-baruh nugka' niti' mo'.

¹⁰Ieh mada' netau ngadan urup, ayat-ayat, idi bada'."

¹¹Kudeng muyuh na ninger balaku, Tuhan miak nima' pupu baken mada' nemuyuh dengan buri' luk baken.

¹²Ieh pian ngato erur idi ngubuk nemuyuh, iamo' muyuh ara' ninger balaNeh.

¹³Ineh punneh Tuhan pian mada' nemuyuh ratnan ngadan urup, ayat-ayat, idi bada. Idi muyuh metebaceng ku anid akang muyuh. Muyuh miak uen ngurat idi mekaneh abpung pad muyuh tebanen.

¹⁴O lemulun luk medita' niat, luk ngimet bawang Yerusalim idi pupuneh; do' ninger bala Tuhan.

¹⁵Muyuh nengadan, kebala muyuh, "Kai pangeh nenganau' jani' dengan até, idi su luk inan até pana'. Na kai miak manud ku tubu' belen, ngaceku amung-amung balih idi saluk kai ngelibung nekai."

¹⁶Kudeng ini bala Tuhan: "Ui nganau' déi' Sion aceh tapin luk meraben. Luun ineh Ui nganau' aceh batu lidung luk metueh. Idi bala ini inayud luunneh, 'Lemulun luk manu mulai niat.'

¹⁷Luk mesiri mangun ku tari tapin ineh, idi luk matu mangun ku batu luk pinier siri." Iamo' udan batu miak nala' amung balih muyuh, idi ereb miak ngusag su luk inan muyuh do' udeng.

¹⁸Jani' luk inau' muyuh dengan até idi su luk inan até miak talan. Kareb susa' macing, muyuh uen ngelaya' ku ineh.

¹⁹Susa' ineh macing kidi-kidi, idi anid-anid pekak. Muyuh miak mabeh susa' ineh tebaco kedangan. Anid bada' luk mebaruh ratnan Allah ngacing tot luk mebaruh.

²⁰Muyuh mepad kudeng lemulun luk bang balé' luk rudap luun bitaran luk pelaba kamu', idi tarubneh pelaba isuut.

²¹Tuhan miak munu' mepad kudeng luk inau'Neh déi' Pegkung Perasim idi déi' luun Raked Gibion; pad ngacing luk pianNeh, pelé lemulun miak mawa nier kekamenNeh. Ieh miak ngeriput kekamenNeh. Idi kekamenNeh ineh baken ratnan luk pekalai.

²²Aleg meriruh ku bada' luk barénku nemuyuh! Kudeng muyuh meriruh meluun susa' kuan muyuh mepuit ratnan susa' ineh. Ui pangeh neninger luk pinutut Tuhan luk Melalud. Ieh pian ngusag apud bawang muyuh.

²³Do' muyuh ninger balaku.

²⁴Seburur lemulun na ngeradu lati'neh kidi-kidi pad ieh miak uen nibu.

²⁵Kareb tana'neh pangeh rinadu, ieh nibu ilung adas luk mepaci' idi ladeh teh. Ieh nibu padé idi ikun. Iring lati'neh ieh nibu tibu luk baken.

²⁶Ieh kali' dalam nganau' anun-anun ngaceku ieh bida' Allah.

²⁷Na ieh rumik adas luk mepaci' idi ladeh teh, iamo' ieh ngagka ilungneh.

²⁸Na ieh ngusag ilung padé kareb ieh rumik. Kali' rungen ieh rumik makai kukud, pad ilungneh na mekareg.

²⁹Ileh ineh macing ratnan Tuhan luk Melalud. Ieh pelaba ileh mada'. Idi amung luk teruayenNeh pana' meriput teh.

Yesaya 29

¹Bubpun Allah, ieh ineh Yerusalim miak kumin! Nima' nedeh nganau' iraudéh idi aco rayehdeh selak, dueh lak teh.

²Pangeh ineh Allah miak ngacing susa' kuan bawang luk titen, "Bubpun Allah." Inan tangi' idi tido, idi bawang Yerusalim miak mangun ku aceh bubpun su luk inan ngeseb baré luk sabpen.

³Allah miak munu' bawang ineh, idi ngelibut neneh, pad Ieh ngerieng neneh.

⁴Kareb ineh arod Yerusalim mepad kudeng arod ada' luk nutun pebala rat liang tana'.

⁵O Yerusalim, amung pupu baken luk ngerieng namu miak mepalid ku bui mepad kudeng abuh, idi bawehdeh luk ngatot miak mepalid ku bui mepad kudeng lipang padé. Idi denak-denak

⁶Tuhan luk Melalud miak muit namu dengan lalam idi ruyuh tana'. Ieh miak ngacing barui, libuleh, idi budung apui;

⁷idi amung baweh pupu baken luk ngerieng bawang su luk inan bubpun Allah dengan amung repapehdeh miak buro mepad kudeng nupi, idi mepad kudeng luk pangeh tirawé kareb medacem.

⁸Amung pupu luk mepamung sikal ngerieng Yerusalim ineh mepad kudeng seburur lemulun luk pelaba lau luk nginupi kuman, iamo' kareb ieh kulat ieh melau, idi mepad kudeng lemulun luk pelaba paring luk nginupi ngirup, iamo' kareb ieh kulat telananneh tekering.

⁹Do' muyuh nacu bacé muyuh idi mawa dengan mebuser! Idi muyuh mabuk, iamo' baken ku abpa' anggur. Muyuh midar, iamo' baken ngaceku arak.

¹⁰Tuhan nenganau' nemuyuh medacep mateh; pad muyuh pian rudap.

¹¹Setuneh nabi mangun ku mateh lun mula', iamo' Allah pangkeh nengebuser nedeh. Ilung amung luk sinier nabi miak uen ngalum nemuyuh. Ieh ineh mepad kudeng aceh surat luk pangkeh itu.

¹²Kudeng iko maré ineh ruen lun luk na mileh maca', ieh miak pebala, "Ui na mileh."

¹³Kebala Tuhan, "Lemulun ini siayu sembayang Negku, iamo' na ilung baladeh, idi niatdeh mado rat Negku. Sembayangdeh ineh mangun ku ukum idi adat lemulun mo', luk pangkeh ipaldeh.

¹⁴Ngaceku ineh Ui miak ngagap nedeh ku tuda'-tuda' susa' luk macing denak-denak nedeh. Lemulun luk mileh misu' ku lun luk mebacé, pad ilehdeh na ulek."

¹⁵Lemulun luk pian ngapung terawé deh ratnan Tuhan miak kumin! Ideh nganau' luk pangkeh tirawédeh dengan lulem. Ideh ngerawé lemulun na miak nier nedeh idi kali' luk ruendeh.

¹⁶Kekamendeh tekilu'. Sapehké luk meluun rayeh, lun luk mileh nganau' kuden, kian tana' kuden lek? Miakké anun-anun luk inau' lemulun pebala, "Iko na nenganau' negku"? Miakké ieh pebala, "Iko na mileh"?

¹⁷Mepad kudeng balé, na mio teh pulung kara misu' ku lati, idi lati' misu' ku pulung kara.

¹⁸Kareb ineh lun mebengel miak ninger lemulun maca' surat, idi lun nebuser, luk pangkeh netudo bang dacem, miak kulat mateh idi nier.

¹⁹Lemulun luk na ngadan, idi lemulun luk masi' miak ngalap awang luk barén Allah lun Israil luk Meligan.

²⁰Ieh ineh kekiped lemulun luk ngedereh nelun baken, idi luk situnga nan Allah. Amung lun mesala' miak pitayen.

²¹Allah miak ngaté lemulun luk ngedat nelun baken, idi lemulun luk mebpeng nelun luk mesala' na ngalap ukum, idi lemulun luk mebalih, pad na mutut ukum luk mesiri kuan lemulun luk matu.

²²Idi nekini bala Tuhan, Allah lun Israil, luk nemuit Ibrahim ratnan susa', "O pupuKu, muyuh na miak uen ngigu' teh idi muyuh na mesia' kiung ku igu' teh.

²³Muyuh miak kali' anak-anak luk barénKu nemuyuh, pad muyuh ngamo Ui ini Allah Israil luk Meligan. Muyuh miak ngerayeh Negku idi matot Negku.

²⁴Lun luk mebacé miak sibada' idi lemulun luk megéi' ngedureng mawang niat badén."

Yesaya 30

¹Kebala Tuhan, "Lemulun luk ngimet Yahuda miak kumin, ngaceku ideh sikal metueh rat Negku. Ideh maya' dalan luk na icukKu, idi nganau' rorum luk na pianKu, idi ideh iuk-iuk mula' sala'.

²Ideh mutuh pedengan ratnan Masir, dengan na ngitun Negku. Ideh pian pitarin Masir, pad ideh merapet inan raca' Masir.

³Iamo' raca' ineh na miak ngedengan nedeh, idi kekiped patar Masir, ieh ineh susa'.

⁴Sagan pana' lun dukendeh pangeh nacing bawang Soan idi Hanis déi' Masir,

⁵lun Yahuda miak nginuud ratnan ideh merapet inan pupu ineh luk na inan merapet, ieh ineh aceh pupu luk na ngedengan nedeh, kareb ideh nganét pedengan."

⁶Ini bala Allah ratnan pung luk déi' su luk ali-ali pa kabing busat aco: "Lun duken ineh lemaba tana' luk inan luk katot, ieh ineh balang, seruang, idi

galau luk temulud. Keladai idi untadeh mabeh tuda'-tuda' baré luk meraga kuan aceh pupu luk na miak ngedengan nedeh.

⁷Pedengan rat Masir na ulekneh. Ngaceku ineh Ui neten neneh, 'Galau luk ungeng.' “

⁸Allah nengecuk negku ngayud kekamen pupu ineh bang aceh surat, luk mangun ku tanu' ratnan lawédeh macing raked-raked.

⁹Ideh megéi' sikal metueh ratnan Allah, megéi' mebalih, idi megéi' ara ninger bada' Allah.

¹⁰Ideh ngecuk amung nabi pirud. Kebaladeh, "Aleg mada' nekai ratnan luk matu. Mada' ratnan luk pian pedingeren kai. Nima' nekai saluken.

¹¹Buro rat nekai, idi aleg ngesabeng lawé kai. Na kai pian ninger Allah Israil muyuh luk meligan.”

¹²Iamo' kudeng ini bala Allah Israil luk meligan: "Muyuh na ninger balaKu, idi muyuh merapet ratnan ngaté lemulun idi naluk.

¹³Muyuh mabeh sala' muyuh. Muyuh mepad kudeng alad batu luk medita' luk mesong. Denak-denak muyuh miak metabpa.

¹⁴Muyuh mekareg mepad kudeng kuden, pad bila'neh na petap rayeh ku ngalap bareh apui, idi ku ngook abpa' rat bang subuk.”

¹⁵Kebala Tuhan Allah Israil luk Meligan inan pupuNeh, "Amé' Negku, idi teh merapet Negku, pelé muyuh metueh idi do' udeng." Iamo' na muyuh pian!

¹⁶Kebala muyuh, "Kai sikal buro maya' kuda." Aganeh, buro muyuh! Idi teh kebala muyuh, "Kuda kai mawer." Setuneh kuda lun luk ngerada' nemuyuh meluun awer!

¹⁷Meribu muyuh miak buro kareb muyuh nier sebuleng lun luk munu', idi kudeng limeh burur lun luk munu' macing, amung muyuh miak buro. Sebuleng pana' nateh muyuh ketecan ratnan baweh muyuh, iamo' sebuleng diri bedéra mo' luk ketecan luun surud!

¹⁸Iamo' Tuhan temina' méi' nemuyuh. Idi Ieh pian ngegala' katuNeh nemuyuh, ngaceku Ieh megéi' nganau' luk matu. Awang macing kuan lemulun luk merapet inan Tuhan.

¹⁹O pupu Sion luk tudo déi' Yerusalim, na muyuh miak nangi' peh. Tuhan méi' nemuyuh, idi kareb muyuh ngitang mutuh pedengan, Ieh miak ngor bala muyuh.

²⁰Tuhan miak maré dereh nemuyuh, iamo' Ieh sebuleng ngedengan nemuyuh idi mada' nemuyuh, pelé muyuh na susa' nakap Neneh baruh teh.

²¹Kudeng muyuh umai ratnan dalam amé selipa idi selipa, muyuh miak ninger arodNeh pa puet muyuh kebalaNeh, "Ini dalam, do' maya' ineh."

²²Muyuh nala' akang muyuh luk kikep ku pirak idi amas, mepad kudeng nala' arap, kebala muyuh, "Buro muyuh!"

²³Kareb muyuh nibu padé, Tuhan miak maré udan pad padé ineh mulun, pelé muyuh miak ngalap uli' luk mula', idi sapi' muyuh pana' inan petap uduh.

²⁴Sapi' idi keladai luk ngeradu lati' muyuh miak kuman uduh luk meluun do'.

²⁵Bang aco sineh libung bunu' muyuh luk meraben uen ngusag idi pupu ineh pitayen. Idi abpa' miak manud ratnan anid-anid pegkung idi surud pana'.

²⁶Bulan merasat mepad kudeng aco. Idi rasat aco tudu' kua' rasat ratnan luk pekalai, mepad kudeng acang tudu' aco bang sebuleng aco! Amung ini miak mangun kareb Tuhan ngabet idi ngedo' urat luk biréNeh inan pupuNeh.

²⁷Lalud idi rayeh Allah miak siren rat mado! Apui idi rabpun ngegala' usehNeh. Ieh pebala, idi balaNeh ngeseb mepad kudeng apui.

²⁸Ieh nemaré bui pa atunNeh, mepad kudeng ereb luk nganud anun-anun pana'. Ieh malid pupu-pupu, pad ideh mekusag, pelé ngagka' amung terawédeh luk dat.

²⁹Iamo' muyuh, O pupu Allah, mawang niat idi menani mepad kudeng luk ruen muyuh kareb medacem, kareb irau. Muyuh do' ria' luk pekarur maya' uni gita, kareb ideh amé Ruma Tuhan luk Matar Israil.

³⁰Tuhan miak nima' amung lemulun ninger arodNeh luk buren, idi kali' tueh usehNeh. Inan budung apui, libuleh, udan batu, idi udan luk mula'.

³¹Lun Asur matot kareb ideh ninger arod Allah idi kali' tueh ukumNeh.

³²Kareb Allah necat nedeh kidi-kidi, pupuNeh peranga' akang pekarur maya' uni bas idi gita! Allah sebuleng miak munu' nelun Asur.

³³Mon, aceh apui su luk inan ngeseb raca' Asur pangeh tinina'. Ieh medalem idi rayeh pipang, idi pelaba ula' kayuh apui binuun su ineh. Tuhan miak nginiat luun bubpun ineh, idi niatNeh mepad kudeng aceh arur apui pelé ngeseb amung ineh.

Yesaya 31

¹Lemulun luk amé' Masir mutuh pedengan miak kumin! Ideh merapet ku tueh baweh Masir luk pelaba rayeh — kuda, keréta, idi lun pebunu' pana'. Iamo na ideh merapet inan Tuhan Allah Israil luk Meligan, idi na ideh mutuh pedengan rat Neneh.

²Tuhan kali' luk miak ruenNeh! Ieh ngacing susa'. Ieh ngacing jani'Neh ratnan ngukum lemulun luk dat idi lemulun luk ngedengan nedeh pana'.

³Lun Masir ineh lemulun mo', baken ideh allah! Kudadeh pana', baken ratnan roh iamo' ratnan uang pung! Kareb Tuhan natang ticu'Neh, pupu luk ngedengan metebaceng, idi pupu luk dinengan miak mebpeh, pad amungdeh pad-pad maté.

⁴Kebala Tuhan negku, "Mepad kudeng lun matar dumba na miak ngusu balang luk pangeh nengaté pung, sagan tu pana' ideh ngarod idi ngitang, kudeng ineh teh Ui ini Tuhan luk Melalud na miak uen mebpeng na matar Pegkung Sion.

⁵Mepad kudeng suit temulud ngelibung ararneh, kudeng ineh teh Ui ini Tuhan luk Melalud miak matar idi ngedengan Yerusalim."

⁶Kebala Allah, "O lun Israil, muyuh nenganau' sala' pa kiungKu idi sikal metueh rat Negku.

⁷Iamo' nekini, do' lumi amé' Negku! Muci aco amung muyuh miak nala' akang luk ngacing sala', luk inau' muyuh ratnan pirak idi amas.

⁸Asur miak uen ngusag bang bunu', iamo' baken ngaceku tueh lemulun. Lun Asur miak buro rat bang bunu', idi anak adi'deh miak tebanen.

⁹Raca'deh miak buro ku totneh, idi lun rayeh pebunu' pelaba tot, pad ideh necan bedéra pebunu'deh." Tuhan pangeh nepebala --ieh ineh Tuhan luk inan lun sembayang déi' Sion, idi luk kuan apui mulun déi' Yerusalim luk ku ngeseb baré.

Yesaya 32

¹Muci aco seburur raca' luk mepiteb miak ngimet dengan tuda'-tuda' lun rayeh luk mesiri.

²Idi anid bururdeh mangun ku dicing ratnan bui idi barui. Ideh mepad kudeng arur déi' su luk ali-ali, idi aca' batu rayeh nan tana' luk tekering.

³Matehdeh kulat idi laliddeh ninger pad ideh kali' pian pupu ineh.

⁴Na ideh mawer niat teh, iamo' ideh mutut luk mesiri. Idi lemulun luk meteh buri' miak pebala dengan megalal'.

⁵Seburur pana' nateh luk ngerawé lun luk mebacé ineh mesiri, idi lun luk dat ineh matu.

⁶Lun luk mebacé pebala dengan mebacé idi ngerawé ratnan nganau' kekamen luk dat. Luk ruenneh idi luk belénneh ngedat Allah. Ieh na maré akan kuan lemulun luk melau idi abpa' kuan lemulun luk meparing.

⁷Ieh ineh lemulun luk dat idi teh ieh nganau' luk dat. Ieh ngerawé ratnan ngesusa' nelun masi' ku balih, pelé ideh na ngalap luk petulu.

⁸Iamo' lemulun luk matu nganau' luk mesiri idi lutep nganau' luk matu.

⁹O muyuh decur luk tudo idi na ngakem, idi luk na kali' susa', do' muyuh ninger balaku.

¹⁰Muyuh mawang niat nekini, iamo' lak baruh kareb luk kudeng ini teh, kali' rungen muyuh pelaba susa', ngaceku na bua' anggur lapen muyuh.

¹¹Macing nekini muyuh tudo idi na kali' susa'. Iamo' nekini, do' muyuh megegker ku tot! Ngelengu ayung muyuh idi ngabet kibung luk nedarak i awa' muyuh.

¹²Mepag ruuk muyuh ku susa' niat muyuh, ngaceku lati' luk mebaleng idi kabun anggur pangeh inusag.

¹³Tabpa' idi bitarung mulun luun tana' pupuku. Nangi' ku amung ruma' luk inan lemulun do' udeng idi ku bawang luk do' ria'.

¹⁴Ruma' raca' idi bawang rayeh pana' miak tacin. Ruma' idi libung luk meraben luk matar nedeh uen ngusag macing raked-raked. Keladai luk meliputi miak nalan-nalan, idi dumba pana' nakap uduh su ineh.

¹⁵Iamo' Allah ngutang RohNeh kuan tau sekua' teh. Su luk ali-ali mangun mebaleng, idi lati' ngeruat uli' luk do'.

¹⁶Aput tana' ideh nganau' luk matu idi luk mesiri.

¹⁷Inan awang idi do' udeng raked-raked, ngaceku amung lemulun nganau' luk matu.

¹⁸Pupu Allah do' udeng bang ruma'deh, idi na luk idi susa' anun-anun.

(¹⁹Udan batu miak mebepih luun pulung, idi bawang rayeh miak uen ngusag.)

²⁰Amung lemulun pelaba awang niat ngaceku petap abpa' kuan lati'deh, idi aput tana' inan laman su luk inan keladai idi sapi' do' udeng.

Yesaya 33

¹Bunu' tau miak kumin! Ideh pangeh mano idi naluk, sagan pana' lun baken na nemanu rat nedeh, idi na nenaluk nedeh. Iamo' mucu ideh na miak mano idi naluk teh. Idi ideh pana' saluken idi nan lun mano.

²O Tuhan méi' nekai. Kai merapet Namu matar nekai anid-anid aco, idi ngulun nekai kareb inan susa'.

³Kareb Iko pebunu' kuan kai, pupu baken buro ku uni bunu'Mu ineh.

- ⁴Binawehdeh uen ngaro idi tebanen.
- ⁵Tuhan ineh pelaba rayeh! Ieh ngimet luk amung-amung. Ieh miak manu' Yerusalim ku siri idi piteb,
- ⁶Ieh ngeletep bawang pupuNeh. Ieh megéi' matar pupuNeh idi maré ileh idi do' kali' nedeh. Luk meluun raga kuandeh, ieh ineh totdeh nan Tuhan.
- ⁷Lemulun luk mekuu' pana' nawar mutuh pedengan. Lun luk duken amé' nguit pedo' pelaba tangi'.
- ⁸Dalan rayeh pelaba dat pad na lun maya' ineh. Lemulun na maya' jani'. Seburur pana' nateh luk buren teh.
- ⁹Tana' dat ali idi na lemulun amé' lati'. Pulung Lebanon pangeh nelayuh, idi Raked Saron luk mebaleng mepad kudeng su luk ali-ali, idi déi' Basan idi luun Pegkung Karmel don-don merurug.
- ¹⁰Kebala Tuhan kuan amung pupu, "Nekini Ui tumui idi ngegala' laludKu.
- ¹¹Amung luk teruayen muyuh na mayu, idi amung luk ruen muyuh pana' na ulek. Muyuh ngaté burur muyuh sebuleng!
- ¹²Muyuh mekareg mepad kudeng batu luk sabpen mangun ku kapur, idi mepad kudeng tabpa' luk sabpen mangun ku abuh.
- ¹³Do' amung lemulun luk muneng idi luk mado ninger ratnan luk inau'Ku, pelé ideh ngamo Negku melalud."
- ¹⁴Lun Sion luk mesala' megegker ku totdeh. Kebaladeh, "Ukum Allah mepad kudeng apui luk ngeleb raked-raked. Miakké seburur rat arang tau mepuit ratnan apui luk kudeng ineh?"
- ¹⁵Muyuh miak mepuit kudeng muyuh nganau' luk matu. Aleg muyuh makai ngadan muyuh pad muyuh naluk nelun masi'. Idi aleg muyuh ngalap suap. Aleg perurum nelun luk sikal ngaté lemulun idi luk nganau' kekamen luk dat.
- ¹⁶Kudeng pieh kudeng ineh muyuh miak uen ngeperuan, idi muyuh miak lutep mepad kudeng libung batu luk meraben, pad muyuh inan akan idi abpa' rupan.

¹⁷Muci aco muyuh miak kali' Seburur Raca' luk ngimet aceh bawang luk pelaba rayeh dengan uburNeh.

¹⁸Tot muyuh nan pupu baken luk ngamung pupuk idi lun luk amé' nier dengan lulem mangun ku aceh terawé mo'.

¹⁹Muyuh na nier lun pupu baken luk medita' niat teh, luk makai buri' luk na kali' muyuh!

²⁰Nier Sion, su luk inan tau nganau' irau idi aco rayeh. Nier déi' Yerusalim! Kareb ineh na susa' anun-anun su ineh! Ieh mepad kudeng lepo kibung luk na mubuh, ngaceku abpenneh luk nan ngabet na tu-tu bebuten, idi abetneh na uen mutut.

²¹Tuhan miak ngegala rayehNeh kuan tau. Tau miak tudo tangeb abpa' idi arur pana', iamo' na kapal bunu' miak nalan luun ineh.

²²⁻²³Amung luk ku ngabet luun kapal bunu' ineh na ulek. Kibung luk ku nganau' kapal nalan na miak tebalad! Amung binaweh bunu' miak tebanen. Inan pelaba ula' pad lemulun luk mekio' pana' miak ngalap aceh babpat. Tuhan sebuleng mangun ku raca' tau. Ieh miak ngimet netau idi matar netau.

²⁴Seburur pana' nateh luk pebala, "Ui mét," idi tau ngalap do' ratnan amung-amung sala'.

Yesaya 34

¹O amung pupu baken, amé' tungé'! Do' muyuh mepamung idi ninger. Do' tana' ini dengan uangneh amé' ninger.

²Tuhan museh nan amung pupu idi amung bawehdeh. Ieh pangeh nengukum nedeh macing maté.

³Butungdeh na tinamen, idi melu idi mebuen. Pegkung pana' mesia' ku dara'.

⁴Aco, bulan, idi gituen mekareg mangun ku abuh. Langit pana' na idi mepad kudeng luk linulun, idi gituen miak mebepéh mepad kudeng don luk merurug ratnan anggur idi gita'.

⁵Tuhan netemina' ku pelapetNeh déi' Surga. Idi Ieh miak necat Edom, ieh ineh pupu luk inukumNeh macing maté.

⁶PelapetNeh maput ku dara' idi lemakdeh, mepad kudeng dara' idi lemak anak dumba idi amék luk kereten ku baré. Tuhan miak maré baré ini déi' bawang Bosra, idi Ieh miak ngaté amung lemulun ineh déi' bawang Edom.

⁷Lemulun ineh miak mebpeh mepad kudeng sapi' luk meliputi idi anak sapi' deléi, pelé tana' mesia' ku dara' idi maput ku lemak.

⁸Kareb ineh Tuhan miak muit bawang Sion idi ngua' amung bunu'Neh.

⁹Amung abpa' Edom misu' ku ilu' luk mitem, idi tana' pana' misu' ku batu apui. Aput tana' miak meseb mepad kudeng ilu' luk mebudung.

¹⁰Apui ineh mulun tebaco kedangan. Idi rabpun pana' umak ratnan apui ineh ruked-ruked. Tana' ineh mangun ku su luk ali-ali macing ruked-ruked, idi seburur pana' nateh luk lemaba bawang ineh teh.

¹¹Puek idi bungkak luk kuan tana' ineh luk ruen Tuhan ngisu' pad na luk mulun su ineh, mepad kudeng kareb nateh tana' ini pinudut.

¹²Na raca' luk ngimet bawang ineh, idi lun rayeh-rayeh pana' nateh luk idi.

¹³Tabpa' idi bitarung mulun bang amung ruma' raca' idi bawang luk linibung. Bungalé idi suit luk necan terurdeh pana' tudo su ineh.

¹⁴Pung luk meliputi idi ada'-ada' nalan-nalan muni su ineh idi uek kelawa' ngato erurneh su ineh.

¹⁵Puek nganau' arar, ngiterur, nutuk terur idi ngasa' anakdeh su ineh. Bungkak mepamung su ineh dengan tinehdeh.

¹⁶Nier idi maca' bang surat Tuhan ratnan amung pudut. Sebuleng pana' nateh luk na idi dengan tinehneh. Tuhan pangeh nengecuk amung ineh. Ieh sebuleng miak ngamung nedeh.

¹⁷Tuhan miak mabpat tana' kuan anid-aniddeh. Ideh miak tudo bang bawang ineh ruked-ruked, idi tana' ineh mangun ku babpatdeh macing ruked-ruked.

Yesaya 35

- ¹Su luk ali-ali mawang niat, idi busak mulun luun tana' payeh.
- ²Su luk ali-ali meluun taga ratnan Pegkung Lebanon, idi mepad baleng kudeng tana' Karmel idi Saron; ieh ngitang idi menani ku awang niatneh. Amung lemulun miak nier ubur Allah, dengan rayeh idi laludNeh.
- ³Ngetueh ticu' luk merur, idi aleb luk megegker ku laya'.
- ⁴Mada' lemulun luk merapang, kebalamu, "Do' muyuh metueh idi aleg matot! Allah miak muit nemuyuh, idi teh Ieh ngua' bunu' muyuh."
- ⁵Lun mebuser miak nier, idi lun mebengel miak ninger.
- ⁶Lun luk meliai miak sikau' idi ngalai, idi lun mebegkeh ngitang ku awang niatdeh. Abpa' arur miak manud déi' su lu luk ali-ali;
- ⁷bada luk pelaba lau' mangun ku takung, idi tana' luk tekering mepanu' ku bued abpa'. Su luk inan bungalé tudo atun, mapet ku uduh idi bulu'.
- ⁸Idi inan aceh dalam su ineh, luk titen, "Dalam Macing Inan Luk Meligan." Lun mesala' na tu-tu miak maya' dalam ini; idi lun luk mebacé na nalan su ineh.
- ⁹Na balang su ineh idi pung luk mesangit pana'. Lemulun luk pinuit Tuhan, muli' maya' dalam ini.
- ¹⁰Ideh macing Yerusalim dengan mawang niat; ideh menani idi ngitang ku awang niatdeh. Ideh mawang niat macing raked-raked, idi ideh na kali' susa' idi dat niat.

Yesaya 36

- ¹Idi bang lak luk kepulu' apat kareb Hesehia raca' Yahuda, idi Senakerib raca' lun Asur nengerieng bawang-bawang Yahuda luk linibung ineh idi nengalap nedeh.
- ²Idi ieh nengecuk lun rayehneh nalan rat Lakis amé' Yerusalim dengan aceh baweh luk rayeh pad ngecuk Raca' Hesehia ngamo neneh melaya'. Lun rayeh ineh nelupo luun dalam su luk inan lun ngebaruh, iring abang luk dalam abpa' ratnan takung luk pa luun.

³Teluh lun Yahuda iné' papu' neneh: ieh ineh lun rayeh lun luk ngasa' ruma' raca', Eliakim Hilkia, lun luk ngayud kuan raca', ieh ineh Sebna; idi teh lun rayeh luk ngimet surat, ieh ineh Yoa Asap.

⁴Idi kebala lun rayeh raca' Asur, "Mada' Hesehia, 'Kudeng ini bala raca' Asur luk rayeh: Ngudehké iko pelaba kuu"

⁵Matuké iko ngerawé bala miak ngelibal ileh idi tueh baweh? Idéké luk inanmu merapet, pad iko sikal metueh rat negku?

⁶Iko merapet inan Masir, iamo' rapet ineh mepad kudeng makai uduh ku rukud — ieh meputul idi ngurat ticu'mu. Kudeng ineh teh raca' Masir kudeng lemulun merapet neneh.

⁷" 'Iamo' kudeng iko pebala negku, "Kai merapet inan Tuhan Allah," naké Allah ineh luk kuan su luk inan sembayang idi bubpun luk pangeh inusag Hesehia, idi naké Hesehia nengecuk nelun Yahuda idi Yerusalim sembayang pa atun sebuleng bubpun mo'?"

⁸Ui pejani' namu dengan ngadan raca'. Ui maré namu dueh ngeribu kuda kudeng iko ngalap dueh ngeribu burur lemulun luk maya' nedeh!

⁹Iko na miak ngelaya' seburur pana' rat arang lun pebunu raca' Asur, iamo' iko merapet inan Masir maré keréta idi kuda namu!

¹⁰Miakké ui amé' ngerieng idi ngusag bawang ini dengan na pedengan ratnan Tuhan? Tuhan sebuleng nengecuk negku ngerieng idi ngusag bawang muyuh.' "

¹¹Idi kebala Eliakim, Sebna, idi Yoa nelun rayeh ineh, "Do' pebala nekai dengan buri' Arami. Kai kali' ineh. Aleg pebala dengan buri' Iberani pedingeren lun mula' luk luun libung batu ineh."

¹²Idi kebala lun rayeh ineh, "Matuké iko ngerawé raca' Asur nengecuk negku pebala nemeteluh idi raca' mo'? Na tu, ui pebala nan amung lemulun luk tudo luun libung batu, luk na miak na kuman téi' idi ngirup babpa'deh mepad kudeng muyuh."

¹³Idi ieh netuped ngitang dengan buri' Iberani, "Ninger luk belén raca' Asur nemuyuh.

¹⁴Kebalaneh, 'Aleg muyuh saluken Hesehia. Hesehia na miak ngulun nemuyuh.

¹⁵Idi aleg muyuh duken Hesehia merapet nan Tuhan, pad muyuh ngerawé Tuhan miak ngulun nemuyuh, idi na Ieh nima' baweh Asur ngalap bawang muyuh.

¹⁶Aleg ninger bala Hesehia. Ui ini Raca' Asur ngecuk nemuyuh remuat rat bang bawang, idi do' muyuh ngamo nemuyuh melaya'. Amung muyuh miak kuman bua' ratnan anggur idi gita' muyuh sebuleng, idi teh muyuh miak ngirup abpa' ratnan subuk muyuh sebuleng —¹⁷pad ui mubuh nemuyuh amé' bang aceh bawang luk mepad kudeng luk inan muyuh, su luk inan padé idi anggur, ruti idi kabun anggur.

¹⁸Aleg muyuh uen Hesehia ngeraruh, pad muyuh ngerawé Tuhan miak muit nemuyuh. Pangehké allah pupu bakén nemuit bawangdeh ratnan raca' Asur?

¹⁹Iapehké allah Hamat, Arpad, idi Sepawaim? Pangehké ideh nemuit Samaria rat bang paladku?

²⁰Pangehké allah ineh nemuit bawangdeh rat bang paladku? Ngudehké muyuh ngerawé Tuhan miak ngulun Yerusalim?' “

²¹Lun mula' ineh pirud maya' kudeng luk icuk Hesehia. Idi na ideh nengor balaneh.

²²Idi Eliakim, Sebna, idi Yoa nengerarak ayungdeh ku susa' niatdeh idi iné' mada' raca' ratnan luk bila lun rayeh rat bawang Asur ineh.

Yesaya 37

¹Kareb Raca' Hesehia neninger baladeh, ieh nengerarak ayungneh ku susa' niatneh. Idi ieh nenacung idi iné' bang Ruma' Tuhan.

²Ieh nengecuk ni Eliakim, lun rayeh lun luk ngasa' ruma' raca', Sebna, lun luk ngayud kuan raca', idi imam-imam luk mengered amé' papu' Nabi Yesaya Amos. Ideh pana' nenacung.

³Kebaladeh ni Yesaya, "Kudeng ini bala Hesehia, 'Aco sini, ieh ineh aco dereh; tau bida' idi inigu'. Tau mepad kudeng decur luk malé nenganak, iamo' ieh pelaba laya' pad anak na mebpeh.

⁴Raca' Asur pangeh nengecuk lun rayehneh iné' ngedat Allah luk mulun. Do' Tuhan Allahmu ninger bala luk dat ini idi ngukum lemulun luk nepebala kudeng ini. Do' iko sembayang nan Allah mutuh kuan pupu tau luk ketecan.'
“

⁵Kareb Yesaya nekali' bala Raca' Hesehia,

⁶idi ieh nengelubed bala ineh: "Kudeng ini bala Tuhan: Aleg muyuh megagau ku bala lun Asur luk nengedat Negku.

⁷Ui miak nganau' raca' ninger aceh bala, pelé ieh muli' idi pitayen bang bawangneh sebuleng.”

⁸Kareb lun rayeh rat Asur ineh neninger bala ratnan raca' Asur pangeh nenalan rat Lakis idi pebunu' muneng ku bawang Libna, idi ieh iné' ngitun neneh.

⁹Ngaceku raca' Asur pangeh neninger bala ratnan Tirhaka, raca' Sudan luk amé' pebunu' neneh. Idi kareb ieh neninger bala ineh, idi ieh nemaré aceh surat kuan Hesehia, kebalaneh,

¹⁰"Allah luk inan Hesehia raca' Yahuda merapet, nepejani' na maré Yerusalim bang palad raca' Asur. Iamo' aleg iko saluken ku bala ineh.

¹¹Iko pangeh neninger luk inau' raca' Asur kuan amung bawang luk pian uenneh ngusag. Miakké iko mepuit?

¹²Tepunku nengusag bawang Gosan, haran, idi Resep, idi nengaté nelun Bait Eden luk tudo déi' Telasar, idi seburur pana' rat arang allahdeh nateh luk miak ngulun nedeh.

- ¹³Iapehké raca'-raca' bawang Hamat, Arpad, Sepawaim, Hina, idi Iwa?"
- ¹⁴Raca' Hesehia nengalap surat rat nelun duken ineh idi ieh nemaca' ineh. Idi ieh iné' bang Ruma' Allah, idi nengerareng surat ineh pa kiung Tuhan,
- ¹⁵kesembayangneh,
- ¹⁶"O Tuhan luk Melalud, Allah lun Israil, luk tudo luun kerusiMu, Iko mo' Allah luk Sebuleng. Idi Iko luk pa luun amung imet bang tana' ini. Iko luk nemudut tana' idi langit.
- ¹⁷O Tuhan, nier nekai idi ninger bala kai. Ninger amung luk belén Senakerib, raca' Asur luk ngedat Namu, ieh ineh Allah luk Mulun.
- ¹⁸O Tuhan, kai kali' raca'-raca' Asur pangeh nengusag mula' imet pad bawangdeh mangun ku su luk ali-ali.
- ¹⁹Idi ideh nengeseb akangdeh, luk baken allah luk matu, iamo' amung ineh pinudut lemulun, ratnan kayuh idi batu.
- ²⁰O Tuhan Allah kai, muit nekai rat nelun Asur, pelé amung raca' apud tana' kali' Iko mo' Allah luk matu."
- ²¹Idi lun duken Yesaya icukneh nated bala kuan Raca' Hesehia ratnan or Tuhan kuan sembayangneh.
- ²²Kebala Tuhan, "O Senakerib, bawang Yerusalim meriruh idi situnga namu.
- ²³Idéké luk inanmu nesitunga idi luk inau'mu ngedat? Iko nengedat Negku, ieh ineh Allah Israil luk Meligan.
- ²⁴Iko nengecuk lun dukenmu nguto Negku, kebalamu, 'Dengan amung kerétaku, ui nuké pegkung luk medita' pad macing punang arur déi' Lebanon, idi ui nenebpeng amung tumuh luk medita', idi amung tongor luk meluun do'. Idi ui pangeh nacing bang pulung kara luk mado.
- ²⁵Ui pangeh nengukat subuk idi nengirup abpa' bang bawang baken. Bawehku pangeh nengeket amung abpa' Masir ku dapardeh.'
- ²⁶"Naké iko kali', idi Ui pangeh nengeletep amung ini rat mon? Idi nekini Ui pangeh nengacing amung ineh. Ui luk nemaré lalud namu, pad iko nenabpa

amung libung bawang luk meraben, pelé bawang ineh mangun ku tuda'-tuda' bubpun batu mo'.

²⁷Idi amung lun bang bawang ineh melaya' peh, pad ideh negagap idi migu' teh. Ideh mepad kudeng luk tinibu nan lati', idi teh kudeng uduh luk mulun luun apo, luk nelayuh ku bui luk melau' rat pa busat aco.

²⁸"Ui kali' kareb iko tumui idi kareb iko tudo, kareb iko remuat, idi kareb iko semuet. Idi teh Ui kali' gateh niatmu Negku.

²⁹Ui kali' gateh niat idi dita' niatmu Negku. Ngaceku ineh Ui nganau' kinar luun icungmu idi belawan bang tangmu. Idi Ui nated namu lemubed maya' dalam luk nedalanmu iné' tungé' atun."

³⁰Idi kebala Yesaya nan Raca' Hesehia, "Ini aceh tanu' ratnan luk miak mangun. Bang lak ini idi lak baruh muyuh miak kuman bua' atab tibu muyuh. Iamo' bang lak sedéi' muyuh miak nibu idi ngeranih, idi nibu anggur, idi kuman bua'deh.

³¹Ngaceku lun pupu Yahuda luk neketecan ineh miak inan uat pa liang tana', pad ideh ngeruat bua' luk do'.

³²Rat Yerusalim idi rat Pegkung Sion inan teh lun luk ketecan, ngaceku Tuhan luk Melalud nganau' ineh."

³³Kudeng ini bala Tuhan ratnan raca' Asur ineh: "Na tu-tu ieh miak semuet bang bawang ini, idi ngelatik sebuleng ileb binorneh pana'. Idi na ieh miak ngeriang bawang ini ku utap. Idi na ieh miak nganau' aceh dalam umak amé' luun libung batu ineh.

³⁴Idi teh ieh miak lemubed maya' dalam luk nedalanneh atun. Iamo' na ieh miak semuet bang bawang ini. Ui ini Tuhan pangeh nepebala.

³⁵Ui miak ngelibung idi matar bawang ini ngaceku ngadanKu, idi ngaceku jani'Ku nan demulunKu Daud."

³⁶Melaikat Tuhan iné' su luk inan baweh Asur nelupo idi nengaté 185,000 lun pebunu'. Kareb masat aco amung butungdeh miak siren lun luun natad.

³⁷Idi Senakerib raca' Asur neburo idi nuli' iné' Nineweh.

³⁸Bang seaco, kareb ieh sembayang bang ruma' akangneh, Nisrok, dueh anakneh, Adramalek idi Sarisar, nengaté neneh. Idi didueh neburo iné' tana' Ararat. Idi anakneh luk baken, ieh ineh Esarhadon nengelibal neneh mangun ku raca'.

Yesaya 38

¹Kareb ineh Hesehia mebura' ét lélé maté. Idi Nabi Yesaya Amos iné' neneh, kebalaneh, "Kudeng ini bala Tuhan: Periteteng iko kuan uang tetek ruma'mu, ngaceku iko lélé maté. Ngaceku na ét mini amé' do'."

²Idi Hesehia nesemium pa alad, idi nesembayang mutuh Tuhan, keputuhneh,

³"O Tuhan, do' Iko ngerawé ratnan ui pangeh nenalan pa kiungMu dengan amung do' idi letep niatku. Idi pangeh ui nenganau' luk matu pa kiungMu." Idi ieh pelaba tangi'.

⁴Idi kebala Tuhan ni Yesaya,

⁵"Kudeng ini bala Tuhan tepun muyuh Daud: Pangeh Ui neninger sembayangmu. Idi pangeh Ui kali' abpa' matehmu. Idi ui miak ngekadang ulunmu pulu' limeh lak baruh.

⁶Ui miak muit namu idi bawang Yerusalim rat bang palad raca' Asur idi Ui na ugka' nginita bawang ini."

⁷Idi ini tanu' luk barén Tuhan namu, ratnan Ieh ngacing jani'Neh namu.

⁸Idi Tuhan miak ngelubed aca amé' pulu' ngakang pa puet luun luk ku etu lawé aco luk inau' Akas. Idi Tuhan nengelubed aca' ineh amé' pulu' ngakang.

⁹Kareb Hesehia nedo' ratnan étneh, idi ieh nengayud nani ubur ini:

¹⁰Ui nengerawé kareb ui mulun do', idi ui amé' su luk inan até, idi na mulun macing nan tarekku.

¹¹Ui nengerawé ui na miak nier Tuhan idi lemulun teh, bang tana' su luk inan lemulun tudo.

¹²Ulunku inau' mekamu', mepad kudeng lepo kibung luk tika, Ui nengelulun ulunku mepad kudeng nangal kén lun luk ngebaruh, ratnan su luk inanneh ngebaruh. Ui nengerawé Allah nemangeh ulunku.

¹³Kedangan-kedangan ui nengarod ku étku, idi nengerawé Allah nemangeh ulunku, mepad kudeng aceh balang luk nemutul tulangku.

¹⁴Arodku isuut idi melaya', idi mepad kudeng uni sukur. Matehku melaya' nier déi' langit. O Tuhan, muit negku ratnan amung susa' ini.

¹⁵Anunké luk miak balénku? Tuhan pangeh nenganau' ini. Niatku mesusa' pad ui na medacep mateh.

¹⁶O Tuhan, ui miak mulun kuanmu sebuleng. Ngedo' negku idi nima' negku mulun.

¹⁷Susa' niatku miak misu' ku awang. Iko ngulun negku ratnan amung dereh; Iko maré do' ratnan amung sala'ku.

¹⁸Seburur pana' nateh luk miak ngubur Namu bang su luk inan até. Lun luk naté na miak merapet ku siriMu.

¹⁹Lun luk mulun ngubur Namu, mepad kudeng ui ngubur Namu nekini. Amung taman mada' anakdeh ratnan siriMu.

²⁰O Tuhan, Iko nengedo' negku! Kai nateg gita idi menani ngubur Namu, bang ruma'Mu ruked ulun kai.

²¹Idi kebala Yesaya, "Do' muyuh ngalap sengapil bua' gita' idi ngerareng ineh luun kimuh raca' pad ieh do'."

²²Idi teh Hesehia pangeh nepebala, "Anunké tanu' luk ngegala' ratnan ui miak umak idi semuet bang ruma' Tuhan teh?"

Yesaya 39

¹Bang kareb ineh teh Merodak Baladan, raca' Babil nemarké surat idi baré kuan Raca' Hesehia, ngaceku ieh nekali' Raca' Hesehia mét.

²Idi Hesehia nenganak lun luk duken ineh, idi nemada' sirendeh amung binawehneh, ieh ineh amas idi pirak, remumu' umau luk do' buen, idi teh

repapeh pebunu'. Idi bang ruma'neh idi bang aput imetneh, sebuleng pana' nateh luk na bida' Raca' Hesehia nedeh.

³Idi Nabi Yesaya iné' ni Raca' Hesehia, idi nengitun neneh, "Anun luk bila lun ini? Idi rat iapeh ideh?" Kebala Hesehia, "Ideh nacing rat bawang luk mado, ieh ineh Babil."

⁴Idi kebala Yesaya, "Anun luk sinierdeh bang ruma'mu?" Idi kebala Hesehia, "Ideh pangeh nenier amung luk bang ruma'ku. Sebuleng pana' luk bang amung takepku nateh luk na bida'ku nedeh."

⁵Idi kebala Yesaya inan Raca' Hesehia, "Do' iko ninger bala Tuhan luk Melalud:

⁶Muci aco amung-amung binawehmu idi binaweh tepunmu luk pangeh dinug macing aco sini, miak iten amé' déi' Babil. Sebuleng pana' na miak ketecan.

⁷Idi inul bururmu sebuleng miak tebanen idi uen mani' pad ideh mangun ku demulun Raca' Babil."

⁸Idi kebala Hesehia ni Yesaya, "Petulu bala Tuhan luk bilamu ineh, ngaceku inan do' idi awang ruked ulunku."

Yesaya 40

¹Kebala Allah muyuh, "Do' muyuh ngubuk pupuKu!

²Ngubuk nelun Yerusalim. Do' mada' nedeh, nekini ideh petap dereh, idi Ui maré do' ratnan sala'deh. UkumKu nedeh ngaceku sala'deh pangeh petap."

³Inan lemulun luk ngitang, "Nganau' aceh dalam déi' su luk ali-ali kuan Tuhan idi Allah tau!

⁴Amung ruan miak uen manu', idi amung pegkung miak uen ngeraked. Surud-surud mangun ku raked, idi tana' luk metekura' mangun mebalad.

⁵Idi rayeh Tuhan miak uen ngegala', pad siren amung lemulun. Amung ineh pangeh pijani' Tuhan."

⁶Inan lemulun luk ngitang, "Do' mada!" Kebalaku, "Anunké luk badénku?" "Mada' ratnan lemulun mepad kudeng uduh; idi na mulun mio mepad kudeng busak bunga'.

⁷Uduh idi busak melayuh, kareb Tuhan malid nedeh ku bui. Idi lemulun na meluun tueh ratnan uduh!

⁸Sagan pana' uduh idi busak melayuh, iamo' bala Allah tau meraben!"

⁹O Yerusalim, amé' luun pegkung luk medita', idi mada' bala luk do'! O Sion do' iko ngitang, idi mada' bala luk do'! Aleg matot pebala. Mada' amung bawang Yahuda ratnan acing Allahdeh!

¹⁰Tuhan macing pad ngimet dengan lalud, idi Ieh nguit lemulun luk pinuitNeh.

¹¹Ieh matar pupuNeh mepad kudeng lun luk matar dumba; Ieh ngamung anak dumbaNeh, idi ngabin nedeh; idi teh Ieh nguyut tinandeh ulai-ulai.

¹²Miakké abpa' rayeh tarin ku ragem? Miakké langit tarin ku urek? Miakké amung abuh tana' ini ruen bang aceh sangkir? Miakké pegkung idi surud uen nimang?

¹³Miakké lemulun ngecuk Tuhan nganau' anun-anun? Idéké miak mada' Neneh?

¹⁴Idéké luk tunin Allah, pad Ieh mileh idi do' kali', pelé Ieh sibada' ngakem?

¹⁵Pa kiung Tuhan amung pupu na anun-anun; ideh na meluun ratnan aceh tapek abpa'; pulau luk mado meran mepad kudeng abuh.

¹⁶Amung pung bang pulung Lebanon na petap ku aceh baré kuan Allah tau. Idi amung kayuh luun pulung ineh na petap ku kayuh apui!

¹⁷Pa kiungNeh amung pupu na anun-anun.

¹⁸Idéké luk miak uen maad dengan Allah? Kudeng apehké muyuh miak mada' ayuNeh?

¹⁹Na Ieh kudeng aceh akang luk inau' lemulun, luk kikep lun ku amas, idi luk inau' luun pirak pana'.

- ²⁰Lun masi' luk na miak melih pirak idi amas, mili' kayuh luk na merapuk. Ieh nakap aceh lun luk mileh luk miak nganau' aceh akang luk na metabpa.
- ²¹Naké muyuh kali'? Naké muyuh neninger? Naké muyuh bida' mon? Naké muyuh neninger ratnan lawé tana' ini pinudut?
- ²²Ieh pinudut Raca' luk tudo luun kerusiNeh, pa luun tana' idi pa luun langit pana'. Lemulun luk luun tana' mepad kudeng dara'! Ieh nemalad langit mepad kudeng dicing, mepad kudeng lepo kibung luk inan lemulun tudo.
- ²³Ieh ngebeneh raca' luk melalud, pad ideh na anun-anun.
- ²⁴Ideh mepad kudeng tibu luk mebaruh, luk nateh nepetuneb. Kareb Tuhan maré bui, ideh melayuh, idi mepalid mepad kudeng uduh luk tekering.
- ²⁵Idéké luk miak uen maad dengan Allah luk meligan? Inanké lun baken luk mepad kudeng Ieh?
- ²⁶Do' nier déi' langit! Idéké nemudut gituen luk siren muyuh? Ieh ineh luk nenguyut nedeh mepad kudeng aceh baweh. Ieh kali' kinula'deh idi neten ngadandeh! Ieh pelaba lalud — sebuleng gituen pana' na metutu'!
- ²⁷O Israil, ngudehké iko ngedureng idi ngerawé Tuhan na kali' susa'mu idi na nganau' luk petulu kuanmu?
- ²⁸Naké iko kali'? Naké iko neninger? Tuhan ineh Allah luk meruked, Ieh nemudut amung tana', Ieh na miak merur idi melaya'. Seburur pana' nateh luk kali' terawéNeh.
- ²⁹Ieh ngetueh lemulun luk melaya' idi merur.
- ³⁰Anak-anak pana' miak melaya' idi merur, idi anak adi' metebaceng ku laya'deh.
- ³¹Iamo' idé-idé luk merapet ku Tuhan ngedengan nedeh, miak uen ngetueh baruh. Ideh kemikit dengan ilad mepad kudeng kanui. Kareb ideh upun, na ideh merur; kareb ideh nalan pana' na ideh melaya'.

Yesaya 41

¹Kebala Allah, "O bawang luk mado, do' pirud idi ninger balaKu! Do' muyuh temina' pebala bang besara'. Muyuh inan kareb pebala. Do' tau mepamung, pad tau kali' idé luk matu.

²"Idéké nenguit lun luk metueh rat pa busat aco? Idéké luk nganau' neneh metueh bang amung lawéneh? Idéké luk nganau' neneh metueh ratnan amung raca' idi pupu? Ideh dedaten ku pelapetneh mepad kudeng abuh, idi uen ngatad ku ilebneh mepad kudeng uduh luk tekering mepalid ku bui!

³Ieh ngerada' nedeh idi petacu nalan, Ieh pelaba awer, pad kukudneh na mepisit luun tana'.

⁴Idéké luk nengacing ineh? Idéké nengeletep luk mangun ineh? Ui ini Tuhan idi rat pun-pun, idi Ui ini, Tuhan Allah idi macing kekipedneh.

⁵"Pupu rat bawang mado pangeh nenier luk inau'Ku; ideh matot idi megegker. Ngaceku ineh ideh mepamung.

⁶Lemulun luk mileh ngakem makai ticu' miak ngedengan idi ngubuk nelun baken.

⁷Kebala lun luk ngakem kayuh kuan lun luk tukang amas, 'Do' ineh!' Lun luk nuno akang pad ieh mesalud, ngubuk lemulun luk maku' neneh. Kebala seburur, 'Amut ineh do',' — idi ideh maku' akang su luk inanneh ineh.

⁸"Iamo' iko demulunKu Israil, pupu luk pinili'Ku idi inul rorumKu Ibrahim.

⁹Ui nenguit namu rat iring tana' idi nawar namu rat bawang luk meluun ado, kebalaKu, 'Iko ineh demulunKu.' Ui na nenala' namu, iamo' Ui nemili' namu.

¹⁰Aleg iko matot — Ui idi denganmu. Ui ini Allahmu, aleg iko merapang. Ui ngetueh namu idi ngedengan namu. Ui matar idi ngulun namu.

¹¹O pupuKu, lemulun luk museh namu, miak uen ngigu' idi uen ngedat. Lemulun luk munu' namu miak maté;

¹²lemulun luk munu' namu na idi luun tana' ini mucu.

¹³Ui ini Tuhan Allahmu; Ui ngetueh namu, kebalaKu, 'Aleg iko matot; Ui ngedengan namu.' “

- 14**Kebala Tuhan, "O Israil, sagan tu pana' iko isuut idi melaya', aleg iko matot; Ui ngedengan namu. Ui ini Allah Israil luk meligan luk ngulun namu.
- 15**Ui nganau' namu mepad kudeng luk inan rumik, luk mebaruh, luk metadem idi inan lipen. Iko miak rumik pegkung idi ngusag nedeh; surud-surud pana' mekareg mangun ku abuh.
- 16**Iko ngelalu' nedeh arang gawa'; idi ideh mepalid ku bui. Iamo' iko miak mawang niat; ngaceku Ui ini Allahmu. Iko miak ngubur Negku, Allah Israil luk meligan ineh.
- 17**"Kareb pupuKu medereh nakap abpa', kareb telanandeh metekering ku paring Ui ini Tuhan miak ngua' sembayangdeh. Ui ini Allah lun Israil na tu miak necan nedeh.
- 18**Ui nganau' tuda'-tuda' abpa' manud, luun surud luk tekering, idi bued abpa' miak remuat bang ruan. Ui ngisu' su luk ali-ali mangun ku takung idi tana' luk tekering mangun ku bued abpa'.
- 19**Ui nganau' tumuh mulun déi' su luk ali-ali, idi teh kayuh pirur, hadas, idi saitun. Kayuh miak mulun luun tana' luk metugeh, ieh ineh tongor, aru', idi peribu pana'.
- 20**Lemulun miak nier ineh idi kali', Ui ini Tuhan pangeh nenganau' ineh. Muci ideh miak kali', Allah Israil luk meligan nenganau' amung ineh."
- 21**Kebala Tuhan, raca' Israil, "O allah-allah pupu baken, do' ngukab besara' idi mada' terawé muyuh luk tu-tu!
- 22**Amé' tungé' idi mada' ratnan luk miak mangun. Idi teh ngelio su luk inan besara', ratnan luk pangeh nangun idi kekipedneh.
- 23**Mada' nekai ratnan luk mangun mucu, idi teh kai kali' muyuh ineh allah-allah! Nganau' luk do, ngacing aceh susa', pad kai mawa idi matot!
- 24**Muyuh sebuleng idi amung kekamen muyuh na anun-anun, idi lemulun luk sembayang nemuyuh inan megani'!

²⁵"Ui nemili' seburur lemulun luk tudo pa busat aco; Ui nguit neneh muhu' rat pa busat aco. Ieh ngeradu' raca'-raca' ayu-ayudeh kudeng tana'. Mepad kudeng lun luk mipi' kudeng ngeradu' tana' salit.

²⁶Idéké rat arang muyuh nemada' nekai atun ratnan luk miak mangun ineh pad kai pebala muyuh matu? Seburur pana' rat arang muyuh nateh luk nepebala kudeng ineh, idi na luk pindenger lun.

²⁷Ui ini Tuhan luk pun-pun nemada' bala ineh kuan Sion. Ui nengecuk lun duken amé' mada' Yerusalim, kebalaneh, 'Pupumu muli.'

²⁸Kareb Ui nenier allah-allah seburur pana' nateh luk nepebala, seburur pana' nateh luk ngor balaKu.

²⁹Allah-allah ini na ulekdeh; ideh na miak nganau' anun-anun — amung akangdeh melaya' idi na melalud!"

Yesaya 42

¹Kebala Tuhan, "Ini DemulunKu luk uenKu ngetueh — Lun luk pinili'Ku luk inanKu mawang niat. Ui nemanu' Neneh ku laludKu; Ieh ngacing luk mesiri kuan amung pupu.

²Ieh na ngitang idi na mada' rayeh arod iring dalan pana'.

³Na Ieh sikal mutut bulu' luk pekuyut, idi ngilep sesakan luk uned mulun. Ieh ngacing ukum luk mesiri kuan amung lemulun.

⁴Rapet idi kuu'Neh na miak misu'; idi Ieh ngeletep luk mesiri luun tana' ini. Idi bawang luk mado nginulat bada'Neh."

⁵Allah nemudut langit idi nemalad ineh; Ieh nemudut tana' ini idi amung luk mulun su ineh Ieh nemaré ulun idi niat kuan amung lemulun. Idi kebala Tuhan Allah kuan demulunNeh,

⁶"Ui ini Tuhan, nenawar Namu idi nemaré lalud Namu, pelé ngacing luk mesiri luun tana' ini. Ui maré Namu kudeng aceh pejani' kuan amung lemulun, pad mangun ku acang kuan amung pupu.

- ⁷Iko miak ngalat mateh lun luk nebuser, idi muit lemulun rat bang tutup luk medacem.
- ⁸"Ui ini mo' Tuhan Allah muyuh. RayehKu na barén kuan allah baken; idi uburKu na miak barén kuan akang.
- ⁹Amung luk bilaKu atun pangeh icing. Nekini Ui mada' ratnan luk mebaruh, kareb nateh amung ineh mangun."
- ¹⁰Nani aceh nani luk mebaruh kuan Tuhan, O amung tana' ini, ngubur Neneh dengan nani ini. O muyuh luk maya' kapal luun abpa' rayeh, ngubur Neneh, dengan amung luk mulun bang abpa' rayeh pana'; idi teh bawang luk mado idi lun luk tudo su ineh!
- ¹¹Do' su luk ali-ali idi bawang su ineh ngubur Allah, idi amung lun Kedar pana'. Do' lun Sela menani mawang niat idi ngitang rat luun pegkung.
- ¹²Do' lemulun luk tudo déi' bawang luk mado ngubur idi ngerayeh Tuhan.
- ¹³Tuhan amé' pebunu' mepad kudeng lun luk mesangit. Ieh temina' ku gateh idi tueh pana'. Ieh ngarod idi nateg tawak; Ieh ngegala' laludNeh pa kiung bunu'Neh.
- ¹⁴Kebala Allah, "Pelaba io Ui ungeng idi na nengor bala pupuKu. Iamo' nekini Ui ngeruat usehKu. Ui ngarod mepad kudeng decur luk mét nenganak.
- ¹⁵Ui ngusag surud idi pegkung, idi nganau' uduh idi kayuh tekering. Ui ngisu' raked mangun ku su luk ali-ali, idi ngekeket amung takung.
- ¹⁶"Ui nguyut pupuKu luk mebuser, maya' dalan luk na nedalandeh. Ui ngisu' dacemdeh mangun ku acang, idi ngebalad tana' luk metekura'. Kali' rungen Ui nganau' luk kudeng ineh.
- ¹⁷Amung lemulun luk merapet ku akang idi neten akang ineh allahdeh, miak uen ngigu'."
- ¹⁸Kebala Tuhan, "O muyuh lun luk mebengel, do' ninger! idi muyuh lun luk mebuser, nier do'-do'!

¹⁹Idéké luk meluun buser ratnan demulunKu, idi meluun bengel ratnan lun dukenKu?

²⁰O Israil, mula' luk siniermu, iamo' na tu ulekneh kuanmu. Iko inan lalid luk ku ninger, iamo' anunké luk pindengermu?"

²¹Tuhan ineh Allah luk geregan ngulun, ineh punneh Ieh pian ku bada'Neh buren.

²²Iamo' pupuNeh pangeh inaro idi tiban. Ideh nekaneh abpung idi inau' bang tutup. Idi kareb ideh inaro, seburur pana' nateh luk nengedengan nedeh.

²³Pianké muyuh ninger bala ini? Miakké muyuh ninger do'-do' nekini?

²⁴Idéké nemaré Israil kuan lun luk ngaro ineh? Ieh ineh Tuhan sebuleng, ngaceku sala' tau pa kiungNeh! Tau na tu mulun maya' pianNeh, idi tau na nemaya' bada'Neh.

²⁵Idi Ieh nengacing tueh usehNeh netau, dengan amung dereh pebunu'. Apui usehNeh mulun aput-put Israil, iamo' na tau nekali' luk mangun, idi na tau nesibada' ratnan amung luk mangun ineh.

Yesaya 43

¹O Israil, kebala Tuhan luk nemudut namu, "Aleg matot — Ui matar namu. Ui neneten ngadanmu. Iko Ui kuan.

²Kareb iko guta abpa' luk medalem, Ui idi denganmu pad susa' na ngelaya' namu. Sagan tu pana' iko nalan bang apui, na iko melau'. Susa' luk rayeh pana' na ngedereh namu.

³Ngaceku Ui ini Tuhan Allahmu, Ieh ineh Allah Israil luk meligan luk ngulun namu. Ui maré Masir pad muit namu; dengan Sudan idi Seba pana'.

⁴Ui maré tuda'-tuda' pupu pad ngulun namu, ngaceku iko pelaba do' kali'Ku, idi Ui mawa namu idi ngedita' namu.

⁵Aleg iko matot. Ui idi denganmu! "Rat mado pa busat aco idi pa acep aco Ui nguit pupumu muli'.

⁶Ui ngecuk pa tinueh busat aco muit nedeh, idi ngecuk pa kabing busat aco na ngimet nedeh. Nima' pupuKu muli' rat bawang luk mado, rat aput-apat tana' pana'.

⁷Ideh ineh pupuKu sebuleng luk pinudutKu pelé ngacing rayeh kuanKu.”

⁸Kebala Allah, "Do' nguit pupuKu amé' besara'. Ideh inan mateh, iamo' ideh mebuser; Ideh inan lalid, iamo' ideh mebengel!

⁹Do' nguit amung pupu baken amé' besara'. Idéké rat arang allah-allahdeh kali' luk mangun mucu? Idéké rat arangdeh nemada' ratnan luk mangun nekini? Nima' allah-allah ini nguit lun nekali' nedeh, pad ngegala' nedeh matu, idi mada' kudeng baladeh matu.

¹⁰"O lun Israil, muyuh ineh lun nekali' Negku, idi pupu luk pinili'Ku ku demulunKu, pelé muyuh ngiti Negku idi manu Negku, na luk idi atun, idi teh na luk idi mucu.

¹¹"Ui ini mo' luk Tuhan. Ui ini mo' luk ngulun nemuyuh.

¹²Ui nemada' atun ratnan luk miak mangun, idi Ui nengedengan nemuyuh. Allah pupu baken na tu nenganau' kudeng ineh; muyuh ineh lun nekali' Negku.

¹³Ui ini Allah macing raked-raked. Luk inimet ticu'Ku na miak uen lun ngaro. Luk inau'Ku na miak uen lun ngisu'.

¹⁴Kebala Tuhan, Allah Israil luk meligan luk ngulun nemuyuh, "Ui ngecuk aceh baweh amé' munu' Babil, pelé Ui ngulun nemuyuh. Ui ngusag amung tanga' bawang, pad arod pupu ineh misu' ku tangi'.

¹⁵Ui ini Tuhan Allah muyuh luk meligan. O lun Israil, Ui nemudut nemuyuh, idi Ui ini raca' muyuh.”

¹⁶Bang kareb luk mon, Tuhan nenganau' aceh dalan, maya' abpa' rayeh luk meribuer.

¹⁷Ieh nengacing usag kuan aceh baweh keréta idi kuda luk pelaba rayeh. Ideh neluka' pad na miak tumui teh, idi naté mepad kudeng dian luk nekilep!

¹⁸Iamo' kebala Tuhan, "Aleg muyuh megéi' ngerawé luk nangun bang kareb luk mon.

¹⁹Nginulat luk ruenKu luk mebaruh. Nekini ieh melagan idi miak siren muyuh! Ui nganau' aceh dalam maya' su luk ali-ali idi maré bued abpa' kuan muyuh su ineh.

²⁰Pung luk meliputi pana' miak ngubur Negku dengan bungalé idi suit luk necan terurdeh, kareb Ui nganau' abpa' manud déi' su luk ali-ali, pad maré abpa' rupen pupu luk pinili'Ku.

²¹Ideh ineh pupu luk inau'Ku kuan bururKu sebuleng, luk miak menani ngubur Negku!"

²²Kebala Tuhan, "Iamo'na iko nenawar Negku; O Israil, iko melibo sembayang Negku.

²³Iko na nemaré dumba ku baré sabpen kuanKu, iko na nengubur Negku ku barému. Ui na nemutih baré idi umau luk do' buen pad iko musam.

²⁴Iko na nemelih umau luk do' buen kuanKu, idi nengebor Negku ku lemak aya'mu. Iamo' iko nengesusa' Negku ku sala'mu, idi nengerur Negku ku kekamenmu luk dat.

²⁵Iamo' Ui ini Allah luk ngiu' amung sala'mu, ngaceku ineh luk pianKu. Idi teh Ui na ngerawé sala'mu ineh.

²⁶"Do' tau amé' besara', idi pegayam. Mada' luk kikemmu pad ngegala' sirimu!

²⁷Tepunmu luk pun-pun nenganau' sala'; lun rayeh-rayehmu pana' mesala' pa kiungKu.

²⁸Lun luk ngimet namu nengelutak su inanKu luk meligan, pad Ui ngacing usag kuan Israil, Ui nenima' pupuKu sebuleng uen ngedat."

Yesaya 44

¹Kebala Tuhan, "O demulunKu Israil, ninger do'-do', O pupuKu, inul Yakub luk pinili'Ku.

- ²Ui ini Tuhan luk nemudut namu; rat pun ulunmu, Ui nengedengan namu. Aleg matot, iko ineh demulunKu, idi pupu luk pinili'Ku luk inanKu mawa.
- ³"Ui maré abpa' kuan tana' luk tekering, idi nganau' arur manud déi' su luk ali-ali. Ui ngutang laludKu kuan anak-anakmu, idi ngeperuan amung inulmu.
- ⁴Ideh miak do' ulun, mepad kudeng uduh luk uen mubpur, idi mepad kudeng bulu' luk tangeb abpa'.
- ⁵"Tesebuleng-tesebuleng pebala, 'Ui ini Tuhan kuan,' Idi teh, 'Ui ini lun Israil.' Ideh miak matik ngadan Tuhan luun ticu'deh, idi neten ngadandeh Israil."
- ⁶Kudeng ini bala Tuhan luk ngimet idi matar Israil, ieh ineh Tuhan luk Melalud. "Ui ini luk pun-pun, idi Ui ini luk kekiped. Ui sebuleng mo' luk Allah.
- ⁷Idéké luk miak nganau' luk inau'Ku, idi luk miak mada' luk mangun mucu, ieh ineh rat pun-pun macing kekipedneh?
- ⁸O pupuKu, aleg muyuh matot! Muyuh kali' rat mon macing nekini, Ui nemada' atun ratnan luk mangun mucu, idi muyuh ineh lun nekali' Negku! Inanké Allah luk baken? Sebuleng pana' nateh luk kali'Ku. Na luk idi Batu luk baken."
- ⁹Amung lemulun luk nganau' akang na mayu, idi allah-allah luk uendeh ngedita' pana'na ulek. Lemulun luk sembayang inan allah ineh mebuser idi dat ileh — idi ideh miak uen ngigu'.
- ¹⁰Na ulek ngurai aceh akang luk inan sembayang mepad kudeng aceh allah!
- ¹¹Idé-idé luk sembayang neneh uen ngigu'. Ideh ineh luk nganau' akang lemulun mo'. Nima nedeh tetunin bang besara' — kali' rungen ideh pelaba tot idi uen ngigu'.
- ¹²Lun luk mileh nuno ngalap belawan idi nganau' neneh luun apui. Ieh nuno belawan ineh ku ticu'neh luk metueh pad nganau' luk pianneh. Idi ieh luk melau, meparang, idi merur.

¹³Lun ngakem kayuh nari kayuheh. Ieh ngabar aceh luk kudeng ayu akang ku kapur, idi ngarit ineh ku repapehneh. Ieh nganau' aceh ayu lemulun luk do' taga luk miak ruen bang ruma' sembayang.

¹⁴Ieh nebpeng tumuh, kayuh luk meraben, kian tongor lek. Ieh nibu aceh lawa tumuh lek idi nganét udan mubpur neneh.

¹⁵Sebabpat kayuh mangun ku kayuh apui idi sebabpat ruen ku akang. Sebabpat kayuh ruen ku apui luk inan singidu idi ku nganau' ruti. Idi teh sebabpat luk baken ruenneh ku aceh allah inanneh sembayang!

¹⁶Sebuang kayuh ineh ruenneh ku apui, ku ngeseb uang pung luk kenenneh, pad ieh mebor. Ieh singidu, kebalaneh, "Pelaba do' lau'! Do' apui ini!"

¹⁷Kayuh luk ketecan ineh ruenneh ku aceh akang inanneh tekeradung idi sembayang. Kesembayangneh, "Iko ineh allahku. Do' ngulun negku!"

¹⁸Lemulun luk kudeng ineh palaba bacé, idi na kali' luk ruendeh. Ideh rudap mateh idi ngitek terawédeh pad na kali' luk matu.

¹⁹Lemulun luk nganau' akang na petap ieh pebala, "Sebuang kayuh isebku, idi ui nenganau' ruti luun bareh apui ineh, idi nengeseb uang pung idi nekuman ineh. Kayuh luk neketecan ineh inau'ku ku aceh akang. Idi nekini ui tekeradung pa atun aceh tangal kayuh!"

²⁰Lun mebacé luk sinaluk ineh kuman abuh; idi na miak muit bururneh dengan pebala, "Akang luk bang paladku mebalih mo'."

²¹Kebala Tuhan, "O Israil, ngerawé bala ini; iko ineh demulunKu. Ui nemudut namu ku demulunKu, idi na tu Ui mekelupan namu.

²²Ui nemalid amung sala' muyuh, mepad kudeng laput. Lumi amé' Negku; Ui ini Lun Nengulun namu."

²³O amung langit, ngitang mawang niat! O tana' luk pa liang do' ngitang! O pegkung idi kayuh luk bang pulung, do' ngitang mawang niat! Tuhan nengulun pupuNeh Israil idi nengegala' rayehNeh.

²⁴Ui ini Tuhan luk nemudut idi nenguli' namu. Ui ini Tuhan luk nemudut luk amung-amung, Ui ini mo' luk nemalad langit. Kareb Ui nemudut tana' ini na lun nengedengan Negku.

²⁵Ui ngegala' saluk lun luk mangun, idi ngena bada' lun luk nier gituen. Ui ngena bala lun luk mileh, idi ngegala' ilehdeh ineh luk mebacé.

²⁶Iamo' kareb demulunKu mada' luk mangun mucu, idi lun dukenKu ngegala' terawéKu, idi Ui ngacing terawé idi bada' ineh. KebalaKu kuan Yerusalim, lemulun miak tudo su ineh; idi kuan amung bawang Yahuda, ideh miak piduten baruh ratnan usag ineh.

²⁷Dengan sebuleng ecuk, Ui ngekeket abpa' rayeh.

²⁸KebalaKu ni Kores, "Iko ineh lun ngimet kuanKu; iko miak nganau' luk pianKu; iko miak ngecuk mudut Yerusalim baruh, idi nganau' apin Ruma' Allah pana'." "

Yesaya 45

¹Kores ineh raca' luk pinili' Tuhan! Tuhan nengelelep neneh ngelaya' mula' pupu; Ieh nengecuk neneh ngelaya' raca'-raca'. Tuhan miak ngukab tanga' bawang kuanneh. Kebala Tuhan ni Kores,

²Ui sebuleng nganau' dalan kuanmu, idi ngeraked pegkung idi surud pana'. Ui miak ngusag amung tanga' tekaling idi mutul palin belawandeh.

³Ui ngeruat kuanmu binaweh luk inalum bang su luk medacem; pad iko kali' Ui ini Tuhan Allah lun Israil luk nemili' namu.

⁴Ui ngelelep namu ngedengan demulunKu Israil, ieh ineh pupu luk pinili'Ku. Ui pangeh nengedita' namu, sagan tu pana' iko na miti Negku.

⁵Ui ini Tuhan; na Allah baken rat Negku. Ui maré petap tueh namu, sagan pana' iko na miti Negku,

⁶pelé amung lemulun aput tana' kali' Ui ini Tuhan, idi na Allah baken rat Negku.

- ⁷Ui nganau' acang idi dacem pana'; Ui ngacing peruan idi susa' teh. Ui ini Tuhan luk nganau' amung ineh.
- ⁸Ui ngacing tueh rat langit, mepad kudeng udan; tana' mukab pad ngalap ineh, idi kebua' pad inan puit idi siri. Ui ini Tuhan luk ngacing amung ineh.”
- ⁹Miakké kuden luk pekalai pesaad nelun luk mudut neneh? Miakké tana' salit ngedat nelun luk mileh mudut neneh?
- ¹⁰Mekuu'ké anak pebala nan taman-tinanneh, "Ngudehké medueh nganau' negku kudeng ini?”
- ¹¹Kebala Tuhan Allah Israil luk meligan, luk ngelelep luk mangun mucu. "Muyuh na miak ngitun Negku ratnan anakKu, idi mada' luk petulu ruenKu!
- ¹²Ui ini luk nemudut tana' ini, idi luk nemudut lemulun luk tudo su ini. Dengan laludKu Ui nemalad langit. Ui luk ngimet aco, bulan, idi gituen.
- ¹³Ui luk nengegio Kores, pad ieh ngacing terawéKu idi nganau' luk matu. Ui miak ngesiri amung dalan luk delaninneh. Kores mudut baruh bawangKu Yerusalim, idi muit pupuKu luk tiban ineh. Na lun nabpar neneh pad ieh nganau' kudeng ineh." Tuhan luk Melalud pangeh nepebala.
- ¹⁴Kebala Tuhan kuan Israil, "Binaweh Mesir idi Sudan pana' iko kuan, idi lun luk medita' rat Seba mangun ku demulunmu, ideh uen ngaling idi maya' namu. Ideh tekeradung pa kiungmu idi ngamo, 'Allah idi denganmu — Ieh mo' luk Allah.
- ¹⁵Allah Israil luk ngulun pupuNeh, Ieh ineh Allah luk ngelinged bururNeh sebuleng.
- ¹⁶Lemulun luk mudut akang miak uen ngigu'.
- ¹⁷Iamo' Israil inulun Tuhan; idi tuehneh macing raked-raked. Pupuneh na miak uen ngigu'." “
- ¹⁸Tuhan nemudut amung langit — Ieh sebuleng mo' luk Allah! Ieh nenganau' tana' ini pad ieh meraben! Na Ieh nemudut ineh ku su luk ali-ali, iamo' ku su

luk inan lemulun tudo. Ieh ineh luk pebala, "Ui ini Tuhan, idi na Allah baken rat Negku.

¹⁹Ui na nengalum balaKu idi nengelinged terawéKu. Ui na nengecuk pupuKu Israil nakap Negku mo'-mo' bang su luk medacem. Ui ini Tuhan idi Ui pebala luk matu. Ui ngegala' luk matu."

²⁰Kebala Tuhan, "O amung pupu, do' muyuh mepamung, amung lun luk ketecan kareb imet Babil inusag. Do' muyuh amé' besara'! Lemulun luk pekarur dengan akang kayuhdeh, idi luk sembayang inan akang luk na ngulun nedeh, na kali' anun-anun!

²¹Do' ngukab besara' idi mada' terawé muyuh; do' muyuh pegayam arang muyuh sebuleng. Idéké luk nemada' mon ratnan luk mangun mucu? Ui ini Tuhan Allah luk ngulun pupuNeh. Na Allah baken rat Negku.

²²"O Amung pupu luk aput-aput tana', do' lumi amé' Negku idi ngalap ulun! Ui ini mo' luk Allah.

²³BalaKu ineh matu idi na miak misu'. Ui pebulung ku bururKu sebuleng: Amung lemulun miak tekeradung pa kiungKu, idi pejani' maya' Negku.

²⁴"Ideh miak pebala, "Ratnan Tuhan mo' inan tueh idi lalud.' Iamo' amung lemulun luk megateh Negku uen ngigu'.

²⁵Ui ini Tuhan miak ngulun amung inul Yakub, pelé ideh ngubur Negku.

Yesaya 46

¹"Ini kekiped amung akang Babil! Bel idi Nebo luk inandeh sembayang atun, nekini baben luun keted keladai luk melaya'.

²Ini kekiped akang ini luk na miak ngulun bururdeh. Ideh kamen idi tebanen.

³"O inul Yakub, pupuKu luk ketecan, do' ninger balaKu. Ui nengasa' nemuyuh rat pun muyuh tanganak.

⁴Ui ini Allah muyuh luk miak ngasa' nemuyuh, pad macing muyuh mengered, idi abpuk muyuh mebuda'. Ui nemudut nemuyuh idi ngasa' nemuyuh, Ui ngedengan idi teh Ui ngulun nemuyuh."

⁵Kebala Tuhan, "Idéké miak uen maad denganKu? Inanké lun baken luk mepad kudeng Ui?"

⁶Lemulun ngukab kapildeh idi ngeruat amas; ideh nimang pirak idi nabpar lun tukang amas, pad ieh nganau' akang luk inandeh sembayang!

⁷Ideh maan ineh idi ngerareng ineh su luk inanneh, pad ieh na miak mubuh. Kudeng lemulun sembayang neneh ieh na miak ngor, idi ngulun neneh ratnan susa'.

⁸"O muyuh lun mesala', ngerawé bala ini, ngerawé ratnan luk inau'Ku.

⁹Ngerawé ratnan luk nangun mon; do' ngamo ratnan Ui mo' luk Allah idi na lun baken luk mepad kudeng Ui.

¹⁰Rat pun-pun idi rat mon pana', Ui nemada' ratnan luk miak mangun. KebalaKu, 'TerawéKu na miak na uen ngacing. Ui nganau amung-amung luk pianKu.'

¹¹Ui nawar seburur lemulun rat pa busat aco, Ieh semiling mepad kudeng kanui, pad ngacing luk pianKu. Ui pangeh nepebala idi balaKu ineh uen ngacing.

¹²"O muyuh luk metalang niat, luk na manu ku tuehKu, do' ninger balaKu.

¹³Na mio teh Ui ngacing aco tuehKu. TuehKu na miak uen ngiuk. Ui miak ngulun Yerusalim idi teh ngerayeh Israil su ineh."

Yesaya 47

¹Kebala Tuhan, "O Babil, temurun ratnan kesusimu, idi tudo luun abuh. Atun iko mepad kudeng anak adi' decur, aceh bawang luk na linaya! Idi nekini na iko do' taga idi lun do', iamo' iko demulun mo'.

²Do' ngalap iung idi amé tupeh! Do' nala' ebpu uluhmu idi ngelengu ayungmu! Ngikit takipmu pad guta abpa'.

³Lun mula' miak nier namu lubpa idi uen ngigu'; Ui miak ngua'! Seburur pana' nateh luk mebpeng Negku."

⁴Allah Israil luk Meligan muit netau — ngadanNeh ineh Tuhan luk Melalud!

- ⁵Kebala Tuhan kuan Babil, "Tudo bang dacem idi ungeng; na ideh neten namu Raca' decur amung pupu teh
- ⁶Ui megateh inan pupuKu pad Ui na ngerawé nedeh Ui kuan; Ui nemaré nedeh bang paladmu, idi iko na méi' nedeh. Lun merar pana' piderehmu.
- ⁷Iko nengerawé iko raca' decur macing raked-raked teh, idi na iko meberat niat ku amung, ineh, pad iko nengerawé kekipedneh.
- ⁸"O Babil luk mawa ku rot, do' ninger balaKu, iko luk ngerawé na inan susa', idi luk ngerawé namu mepad rayeh kudeng Allah, pad na lun baken luk mepad kudeng iko. Iko nengerawé na iko mangun ku tinula', idi na anakmu miak maté.
- ⁹Iamo' bang selinggageh, idi bang seaco mo' amung ineh miak mangun. Sagan tu pana' iko mangun, anakmu maté idi iko mangun ku tinula'.
- ¹⁰"Iko na migu' ku datmu; idi nengerawé na iko siren lun baken. Iko neraruh ku ileh idi do' kali'mu, pad iko nepebala bang niatmu, 'Ui ini Allah — na lun baken luk mepad kudeng ui!'
- ¹¹Susa' miak macing namu, idi bangunmu na miak mebpeng ineh. Usag macing namu denak-denak, ieh ineh usag luk na teruayenmu!
- ¹²Kian, kudeng iko makai bangunmu idi lapadmu, luk inanmu pekalai rat isuut, miak iko denganin ineh lek, pad iko ngatot amung bunu'mu.
- ¹³Sagan tu pana' iko badén lun mileh, iko pelaba laya'. Nima' lun mileh ineh amé' ngulun namu, ieh ineh lun luk nier langit idi gituen, idi luk mada' ratnan luk miak mangun kuanmu bang anid-anid bulan.
- ¹⁴"Ideh mepad kudeng uduh luk tekering luk miak sabpen bang apui! Ideh na miak ngulun bururdeh sebuleng — budung apui pelaba lau' kuandeh. Na ieh apui luk inandeh singidu.
- ¹⁵Kudeng ini kekiped bada' lun luk nier langit, ieh ineh luk tuninmu raked ulunmu. Ideh necan namu idi maya' lawédeh sebuleng, pad seburur pana' nateh luk ketecan luk ngulun namu."

Yesaya 48

¹O pupu Israil, do' ninger bala ini, muyuh luk inul Yahuda. Muyuh pebulung ku ngadan Tuhan, idi neten ngadan Allah Israil — iamo' baken dengan matu idi mesiri.

²Iamo' muyuh pebala dengan medita' niat, "Kai lemulun rat bawang luk meligan, idi kai merapet inan Allah Israil, luk titen Tuhan luk Melalud."

³Kebala Tuhan kuan Israil, "Mon Ui nemada' ratnan luk miak mangun; idi denak-denak Ui nengacing ineh!

⁴Ui nekali' atun iko miak metueh niat, metueh kudeng belawan idi tekaling pana'.

⁵Mon Ui nemada' ratnan luk macing kuanmu, idi nemada' luk mangun kareb nateh ineh nacing, pad iko na pebala, 'Akangku nenganau' ineh, idi allah luk inau'ku nengacing ineh.'

⁶"Amung luk bilaKu atun pangeh nangun; iko na miak na mala luk bilakU matu. Nekini Ui mada' namu ratnan luk mangun mebaruh, ieh ineh luk na ginala'Ku atun.

⁷Nekini mo' Ui ngacing ineh; na luk kudeng ini atun. Kudeng inan, kali' rungen iko pebala, 'Ui nekali' ineh.'

⁸Ui nekali' iko na inan merapet; rat punmu tinganak, iko sikal metueh. Ineh punneh, iko na neninger ratnan ineh; seburur pana' nateh luk nemada' namu.

⁹"Ui ngagka' usehKu, padlemulun ngubur ngadanKu. Ui ngagka' pelé iko na pitayen.

¹⁰Ui nenutun namu bang apui dereh mepad kudeng pirak tetunin bang apui pana'. Iamo' Ui nekali' namu na mayu.

¹¹Luk ruenKu ineh maya' pianKu sebuleng — Ui na nima' ngadanKu uen ngigu', pad lun baken ngalap ubur, luk petulu barén kuan bururKu sebuleng."

¹²Kebala Tuhan, "O Israil, pupu luk pinili'Ku, do' ninger balaKu, Ui ini mo' luk Allah, luk pun-pun idi luk kekiped teh!

¹³Ticu'Ku nemudut tana' idi nemalad langit teh. Kareb Ui nawar nedeh ideh petacu amé' Negku.

¹⁴"O lun muyuh, do' mepamung idi ninger! Sebuleng akang pana' nateh luk miak mada' atun, ratnan lun luk pinili'Ku ngerieng Babil; lemulun ineh miak nganau' luk pianKu.

¹⁵Ui ini luk nepebala idi nenawar neneh, Ui nenguyut neneh idi nemaré tueh neneh.

¹⁶"Do' amé' Negku idi ninger balaKu. Rat pun-pun Ui nemada' nemuyuh dengan megala', idi megéi nengacing balaKu ineh." (Idi nekini ui ini, Yesaya, duken Tuhan Allah idi RohNeh.)

¹⁷Kebala Tuhan Allah Israil luk meligan luk ngulun nemuyuh, "Ui ini Tuhan Allah muyuh luk mada' luk do' kuan muyuh, idi luk nguyut nemuyuh maya' dalan luk petulu.

¹⁸"Kudeng muyuh pangeh nengalap amung ukumKu, awang niat manud nemuyuh mepad kudeng abpa' luk na mekeket! Idi tueh melipak amé' nemuyuh, mepad kudeng ribut déi' abpa' rayeh.

¹⁹Idi inul muyuh mepad kudeng bada. Idi ngadandeh na miak uen ngiu' rat pa kiungKu."

²⁰Remuat rat Babil! Buro rat nelun Kasdim! Do' ngitang mada' bala iapeh-iapeh dengan mawang niat: "Tuhan pangeh nengulun demulunNeh Israil!"

²¹Kareb mét idang Tuhan nenguyut pupuNeh déi' su luk ali-ali, iamo' na ideh meparing. Ieh nemila' batu pad abpa' manud kuandeh.

²²Kebala Tuhan, "Na luk idi awang kuan lemulun luk mesala'."

Yesaya 49

¹O bawang idi pupu luk mado, ninger balaKu! Kareb nateh Ui tinganak Tuhan nemili' Negku, idi nengeletap Negku mangun ku DemulunNeh.

²Ieh nenganau' balaKu metadem kudeng pelapet; Ieh nematar Negku ku ticu'Neh sebuleng. Ieh nenganau' Negku mepad kudeng ileb luk metadem, luk temina' uen makai.

³KebalaNeh Negku, "O Israil, Iko ineh DemulunKu. Ui miak buren lemulun ngaceku Iko."

⁴KebalaKu, "Ui pangeh nengakem mo'-mo', Ui nengabud tuehKu, iamo' na bua'neh." Iamo' Ui merapet inan Tuhan nuneb kekamen ineh; idi Ieh miak ngua' kuanKu

⁵Tuhan nengelelep Negku, kareb nateh Ui tinganak, pad Ui mangun ku DemulunNeh idi nguli' pupu Yakub, idi inul Israil pana'. Tuhan maré ubur Negku. Ieh ineh lawa tuehKu.

⁶Kebala Tuhan Negku, "O DemulunKu, Ui inan kekamen luk meluun rayeh kuanMu. Baken Iko nguli' pupu Yakub, idi inul Israil mo'. Iamo' Ui nganau' Namu ku acang amung pupu, pelé Iko ngacing ulun bang apud tana'."

⁷Kebala Allah Israil luk Meligan idi Lun Nengulun, kuan Lemulun luk dinat idi luk inan amung pupu megateh, ieh ineh Demulun amung raca'. "Raca'-raca' miak nier Namu puatin, pad ideh tumui idi ngedita' Namu. Anak-anak raca' pana' miak nier ineh, idi tekeradung pad ngerayeh Namu." Amung ini miak mangun ngaceku Tuhan Allah Israil luk Meligan, pangeh nemili' DemulunNeh idi maya' jani'Neh.

⁸Kebala Tuhan kuan pupuNeh, "Bang kareb luk petulu, Ui méi' nemuyuh idi ngulun nemuyuh. Kareb muyuh mutuh pedengan, Ui ninger arod muyuh. Ui miak matar idi ngelibung nemuyuh, pad muyuh mangun ku aceh jani' kuan amung pupu. Idi teh Ui ngelelep nemuyuh bang bawang muyuh luk tican.

⁹Ui pebala kuan lun luk tiban, 'Do' muyuh mepuit!' Idi kuan lun luk tudo bang dacem, 'Do' semuet bang acang!' Kareb ineh ideh mepad kudeng dumba bang laman;

¹⁰na ideh melau idi meparing. Na ideh medereh ku ét idang idi bui luk melau', ngaceku ideh kiuten Lun luk mawa nedeh. Ieh nguyut nedeh macing inan bued abpa'.

¹¹"Ui nganau' aceh dalam guta pegkung, idi teh aceh dalam luk delanin pupuKu.

¹²PupuKu miak macing rat mado, rat pa tinueh busat aco idi pa acep aco, idi teh rat bawang Sinim luk pa kabing busat aco."

¹³O langit, do' menani! O tana', ngitang mawang niat! Nima' amung pegkung menani teh! Tuhan miak ngubuk pupuNeh. Ieh méi' nan pupuNeh luk medereh.

¹⁴Iamo' kebala lun Yerusalim, "Tuhan pangeh nenecan netau! Ieh nekelupan netau."

¹⁵Idi kebala Tuhan nedeh, "Miakké decur mekelupan anakneh, idi megateh inan anak luk tinganakneh? Sagan pana' decur mekelupan anakneh, Ui na tu mekelupan nemuyuh.

¹⁶O Yerusalim, na tu Ui mekelupan namu, ngadanmu inayudKu luun paladKu.

¹⁷"Lemulun luk mudut namu baruh, malé macing, idi lemulun luk nengusag namu miak buro.

¹⁸Nier luk mangun libut-libutmu. Pupumu mepamung pian muli! Ui ini Tuhan Allah luk mulun pebala, kali' rungen iko mawang niat ngaceku pupumu, mepad kudeng aceh decur luk ngaweh mawang niat ku banéneh!

¹⁹"Bawangmu inusag atun idi dat ali — iamo' nekini ieh pelaba isuut kuan lemulun luk amé' tudo su ineh! Idi lemulun luk nengusag namu miak lapen amé' mado rat namu.

²⁰Anak luk tinganak kareb pupumu tiban, miak pebala namu mucu, 'Bawang ini isuut. Do' maré tana' kuan kai!'

²¹Idi iko miak pebala bang niatmu, 'Idéké nenganak anak ni kuanku? Atun ui na anak idi na miak nenganak. Ui tiban idi tila', idéké nengasa' anak ini? Ui pangeh tican buleng-buleng — rat iapehké anak-anak ini lek?' “

²²Kebala Tuhan Allah kuan pupuNeh, "Ui nateg tawak nawar amung pupu, pelé ideh nguit anak-anakmu muli'.

²³Raca'-raca' miak mangun mepad kudeng tamanmu; raca'-raca' decur ngasa' namu mepad kudeng aceh tinan. Ideh tekeradung pa kiungmu idi ngedita' namu, dengan mebeneh niat. Iko miak kali' idi Ui ini Tuhan. Lemulun luk merapet ku pedenganKu kali' rungen denganin.”

²⁴Miakké binaweh luk inaro lun pebunu' lapen rat neneh? Miakké lun luk tiban lun luk mesangit puatin?

²⁵Kebala Tuhan, "Amung ineh miak mangun. Lun luk tiban lun pebunu' miak lapen rat neneh, idi binaweh luk inaro lun luk mesangit miak tebanen rat neneh. Ui miak munu' lemulun luk munu' namu, idi Ui miak muit anak-anakmu.

²⁶Ui nganau' lun luk ngedereh namu pepaté; ngaceku ideh mabuk ku gateh idi pian ngaté. Idi amung lemulun miak kali' Ui ini Tuhan, Lun luk ngulun idi luk nguit namu. Ideh miak kali' Ui ini Allah Israil luk Melalud.”

Yesaya 50

¹Kebala Tuhan, "Matuké iko ngerawé Ui nengecuk tinanmu buro, mepad kudeng deléi luk patad ratnan awanneh? Kudeng pieh kudeng ineh, iapehké surat patad? Matuké iko ngerawé Ui masui namu kuan lun luk naban, mepad kudeng lemulun luk masui anakneh mangun ku demulun? Na tu! Iko tiban ngaceku sala'mu, idi ngaceku kekamenmu luk dat tinanmu pangeh ligkan.

²Ngudehké pupuKu na nengor balaKu, kareb Ui iné' ngulun nedeh idi nenawar nedeh? Matuké Ui melaya' pad na miak ngulun nedeh? Dengan sebuleng ecek Ui miak ngekeket abpa' rayeh, idi ngisu' abpa' mangun ku su luk ali-ali; pad lawid maté ngaceku na abpa';

³Ui miak ngedacem langit, pad ayuneh kudeng temido nelun naté.”

⁴Tuhan nemada' Negku ratnan luk belénKu, pelé Ui ngetueh lemulun luk merur. Anid pekak Ieh nganau' Negku geregan ninger luk badénNeh Negku.

⁵Tuhan nemaré ileh Negku, pad Ui na sikal metueh idi teketed rat Neneh.

⁶Ui nenima' lun mebal ketedKu. Ui na nemebpeng nedeh kareb ideh nengedat Negku, kareb ideh nemubput buluh tangKu, idi ngelica' kiungKu.

⁷Iamo' baladeh luk dat na ngurat Negku, ngaceku Tuhan Allah ngedengan Negku. Ui ngetueh bururKu pad Ui tuman ku bala ineh, Ui kali' idi Ui na miak uen ngigu',

⁸ngaceku Allah idi muneng Negku, idi Ieh miak ngamo Negku na mesala'. Inanké lemulun pian ngadu' Negku? Do' kiteh pad-pad amé' besara'! Nima' neneh ngadu' Negku!

⁹Tuhan sebuleng ngedengan Negku — idéké miak mada' Negku mesala'? Amung lun luk ngadu' Negku miak buro, mepad kudeng kibung luk kinan kutang!

¹⁰O lun muyuh luk matot nan Tuhan, idi luk maya' bala DemulunNeh — Kareb muyuh maya' dalan luk medacem, do' manu inan Tuhan idi merapet inan Allah muyuh.

¹¹O muyuh luk ngapui idi nguit sesakan, do' muyuh sebuleng nalan bang apui ineh, idi arang sesakan luk tinutud muyuh. Ini ukum luk barénKu nemuyuh; muyuh miak maté dengan medereh.

Yesaya 51

¹Kebala Tuhan, "O muyuh luk amé' Negku luk pian mutuh pedengan, pad muyuh uen ngulun, do' ninger balaKu. Do' ngerawé batu su luk inan muyuh kinuer, idi lubang luk inan muyuh ilap.

²Ngerawé tepun muyuh, Ibrahim idi Sara luk nenginul nemuyuh. Kareb Ui nenawar Ibrahim, na anakneh, iamo' Ui nengeperuan neneh dengan maré anak; idi Ui nenganau' inulNeh pelaba ula'.

³"Idi Tuhan miak méi' inan Sion dengan amung usagneh. Bawangneh luk ali-ali ruenKu ku kabun, mepad kudeng kabun luk inau'Ku déi' Eden. Inan teh awang idi do' ria' su ineh, dengan tuda'-tuda' nani ubur kuanKu.

⁴"O pupuKu, do' ninger balaKu. Ui maré bada'Ku kuan amung pupu. UkumKu ngacing acang kuandeh.

⁵Ui mesagét macing amé' ngulun nedeh; kareb tuehKu malé macing. Ui sebuleng miak ngimet amung pupu. Bawang luk mado pana' nganét acingKu. Ideh merapet Negku ngulun nedeh.

⁶Do' nier langit idi tana' pana! Mepad kudeng rabpun langit miak buro. Idi mepad kudeng kuyu' luk mon, tana' miak mabud, idi tuehKu na kekipedneh.

⁷"O muyuh luk kali' luk matu idi luk ngerawé bada'Ku, do' ninger balaKu. Aleg matot kareb lemulun ngedat idi situnga nemuyuh.

⁸Lemulun luk kudeng ineh miak mabud, mepad kudeng kuyu' luk kenen kutang! Iamo' ulun luk uenKu ngacing meruked idi tuehKu na kekipedneh."

⁹O Tuhan, do' tumui idi ngedengan nekai! Ngulun nekai ku laludMu; maya' kudeng luk inau'Mu mon. Iko ineh nengaté galau Rahab luk bang abpa' rayeh.

¹⁰Iko ineh nengekeket abpa' rayeh, pelé lemulun luk ruenMu ngulun miak guta maya' ineh.

¹¹Lemulun luk pinuitMu miak macing Yerusalim, dengan menani idi ngitang mawang niat. Ideh mawang niat ruked-ruked, idi na tu kali' susa' idi dat niat.

¹²Kebala Tuhan, "Ui ini luk ngetueh nemuyuh. Ngudehké iko matot ku lemulun luk maté, luk mekamu' ulun mepad kudeng uduh?

¹³Miakké iko mekelupan Tuhan luk nemudut namu, idi luk nenganau' tapin tana' ini? Ngudehké iko mulun dengan megéi' matot ku useh lemulun luk ngedereh namu, idi lemulun luk temina' ngaté namu? Usehdeh ineh na miak ngurat namu!

¹⁴Na mio teh lun luk tiban miak puatin; ideh mekadang ulun, idi teh petap akan.

15"Ui ini Tuhan Allahmu. Ui ngelipak abpa' rayeh pad ieh meberi. NgadanKu ineh Tuhan luk Melalud!

16Ui ini luk nemalad langit, idi luk nenganau' tapin tana'; kebalaKu kuan Sion, 'Muyuh ineh pupuKu! Ui nemaré bada'Ku nemuyuh, idi ngelibung nemuyuh ku ticu'Ku.' "

17O Yerusalim, do' iko tumui idi tuped! Iko pangeh nengirup ratnan sangkir ukum luk biré Tuhan rupenmu ngaceku usehNeh. Iko nengirup ineh pad iko mepidar!

18Seburur pana' nateh luk miak nguyut namu, rat arang pupumu seburur pana' nateh luk miak ngimet ticu'mu.

19Iko neketukan ku susa' luk dueh ini: bawangmu inusag ngaceku pebunu', idi teh pupumu melau. Seburur pana' nateh luk miak méi' namu.

20Anid lisangen dalan inan lemulun luk melepu ku laya' bururdeh. Ideh mepad kudeng payo luk mekaneh abpung. Ideh pangeh nekali' useh Allah luk pelaba bura'.

21O lun Yerusalim luk pelaba dereh, muyuh mepidar mepad kudeng lun mabuk.

22Kebala Tuhan Allah luk ngedengan nemuyuh, "Ui ngalap rat nemuyuh sangkir luk biréKu nemuyuh ngaceku Ui museh nemuyuh. Rat pad sini muyuh na ngirup abpa' anggur luk nganau' nemuyuh mepidar ineh.

23Ui maré ineh kuan lemulun luk ngedereh nemuyuh, idi luk nenganau' nemuyuh telubid iring dalan idi luk nengeradu' nemuyuh mepad kudeng abuh."

Yesaya 52

1O Yerusalim, do' iko petuneb pad iko metueh idi rayeh teh! O bawang Allah luk Meligan, do' iko ngayung ku ayung luk do'! Lun luk na manu na miak semuet bang namu teh.

- ²O Yerusalim, do' iko sigegker. Tumui ratnan abuh idi tudo luun kerusimu. O lun Sion luk tiban ineh, do' neka kaling luk ku ngabet nemuyuh!
- ³Kebala Tuhan inan pupuNeh, "Na muyuh bilih ku usin: iamo' muyuh nangun ku demulun. Na usin barén ku nguli' nemuyuh, iamo' muyuh miak puatin.
- ⁴Mon muyuh tudo déi' Masir mepad kudeng sakai. Muci ratnan ineh muyuh tiban Asur dengan na belih.
- ⁵Luk mepad kudeng ineh pangeh mangun déi' Babil nekini; muyuh tiban su ineh dengan na belih. Lemulun luk ngimet nemuyuh medita' niat idi megéi' situnga Negku.
- ⁶Iamo' mucu aco muyuh miak ngamo idi Ui ini Allah luk nepebala nemuyuh."
- ⁷Pelaba do' ayu lemulun luk guta pegkung pian nguit bala luk do', ieh ineh bala awang! Ieh mada' ratnan tuehneh, idi kebalaneh kuan Sion, "Allah muyuh ineh raca!"
- ⁸Lun luk matar bawang ineh peranga' ngitang ku awang niatdeh! Ideh nier dengan matehdeh sebuleng acing Tuhan rat Sion!
- ⁹O Yerusalim luk inusag ineh, do' iko ngitang dengan awang niat! Tuhan nengubuk pupuNeh idi nenuneh bawangNeh.
- ¹⁰Tuhan nengulun pupuNeh ku laludNeh luk meligan, pad kali' aput tana'.
- ¹¹O muyuh luk nguit repapeh luk meligan, buro rat Babil! Aleg ngakem anun-anun luk bibpeng; do' muyuh meligan idi remuat!
- ¹²Setuneh na muyuh petulu buro denak-denak kudeng lemulun luk upun buro! Tuhan Allah muyuh nalan pa atun muyuh idi matar nemuyuh.
- ¹³Kebala Tuhan, "Kekamen DemulunKu miak inan peruan; Ieh uen ngerayed idi buren.
- ¹⁴Mula' lemulun mawa nier Neneh ngaceku ayuNeh nisu' pad Ieh na miti kudeng ayu lemulun.
- ¹⁵Iamo' nekini mula' pupu mawa nier Neneh, idi raca'-raca' semiep tang ku awadeh. Ideh miak nier idi kali' luk nateh nekali' deh atun."

Yesaya 53

¹Kebala lun mula', "Pawa' lemulun luk miak manu ku luk badén kai? Iamo' kuan lun manu lalud Tuhan megala' bang amung ineh.

²Maya' pian Tuhan kuan DemulunNeh, Ieh temubu' mepad kudeng tibu pun inan uat bang tana' luk metugeh. Na Ieh metaga idi buren siren tau pad tau ngerawé Neneh.

³Tau megateh Neneh idi na pian Neneh Ieh mesusa' idi medereh. Seburur pana' nateh luk pian nier Neneh. Tau nengarung Neneh mepad kudeng lemulun luk na ulek.

⁴Setuneh ét idi dereh tau binabehNeh, iamo' tau ngerawé Neneh inukum Allah.

⁵Iamo' Ieh nurat ngaceku sala' tau, idi bibal ngaceku dat tau. Ieh inukum pad tau mepuit, idi nurat pad tau uen ngedo'.

⁶Amung tau mepad kudeng dumba luk neraruh ngaceku tau nemaya' pian tau sebuleng. Idi Tuhan nengacing kuanNeh, ukum luk petulu lapen tau.

⁷Ieh pidereh, iamo' Ieh mebeneh niat, idi ungeng mo'. Mepad kudeng anak dumba luk kereten, idi dumba luk uen muting buluhneh na Ieh muni.

⁸Ieh kikem, inukum idi inuit pitayen, idi seburur pana' nateh luk ngerawé Neneh. Ieh pinaté ngaceku sala' pupu tau.

⁹TanemNeh inau' arang tanem lun luk dat. Iamo' tanemNeh arang tanem lun do', sagan pana' Ieh na tu nenganau' sala', idi na tu Ieh mebalih."

¹⁰Kebala Tuhan, "Ieh pidereh maya' pianKu; até ineh aceh baré luk ngacing do' ratnan sala', pad Ieh miak kali' inulNeh. Ieh miak mulun baruh. Idi rat Neneh, luk teruayenKu uen ngacing.

¹¹Pangeh derehNeh, Ieh ngalap awang teh pad Ieh kali' derehNeh ineh inan ulek. Ieh ineh DemulunKu luk matu, Ieh kumin kuan lun mula', pad ideh mangun ku pupuKu luk matu.

¹²Ngaceku ineh Ui ngedita' Neneh, arang lun luk rayeh idi mebala. Ieh nemaré ulunNeh, pad Ieh inukum mepad kudeng lun luk dat. Ieh inukum ku libal mula' lun mesala', idi Ieh nemutih pad ideh ngalap do' ratnan sala'deh.

Yesaya 54

¹O Yerusalim, atun iko mepad kudeng decur luk na anak. Iamo' do' iko menani idi ngitang ku awang niat. Nekini iko mula' anak, meluun ratnan decur luk na tican awanneh!

²Do' ngeranat lepo kibungmu! Ngekadang abetneh idi ngeraben abpenneh!

³lakanmu uen ngiuk pekelibut. Pupumu miak ngalap lemubed tana' luk inan pupu baken tudo; pad bawang-bawang luk tican panu'ku lemulun.

⁴Aleg iko matot — iko na miak uen ngigu'teh! Iko miak mekelupan sétmu luk mon, idi susa'mu kareb iko tinula'.

⁵Lun luk nemudut namu mangun ku awanmu. Idi ngadanNeh Tuhan luk Melalud! Allah Israil luk Meligan ngulun namu. Ieh ineh raca' amung tana' ini!

⁶O Israil, iko mepad kudeng awan luk mebaruh, luk mesusa' tu ngaceku tican deléineh. Iamo' Tuhan nawar namu lumi Neneh, kebalaNeh:

⁷"Ui nenecan namu segageh mo'; dengan awa luk matu Ui ngalap namu baruh.

⁸Dengan useh Ui neteketed segageh mo', iamo' Ui ngegala' awaKu namu ruked-ruked." Kudeng ini bala Tuhan luk ngulun namu.

⁹"Bang kareb Noh Ui nepejani', pad na ngereb tana' teh. Nekini Ui pejani' na museh namu teh. idi na Ui ngukum namu.

¹⁰Pegkung idi surud miak mekareg iamo' awaKu namu meruked peh. Idi jani'Ku pedo' ruked-ruked teh." Kudeng ini bala Tuhan luk mawa namu.

¹¹Kebala Tuhan, "O Yerusalim, bawang luk pidereh idi mesusa', luk na mubuk. Ui mudut tapinmu mebaruh ratnan batu luk meraga.

¹²Ui nganau' amung pudutmu luk medita' ratnan batu luk mesia', idi tanga'mu ratnan batu luk mesilo kudeng apui, idi libungmu ratnan batu luk meraga!

¹³"Ui sebuleng mada' pupumu, idi maré nedeh peruan idi do' udeng.

¹⁴Iko meraben ngaceku sirimu idi luk matu. Iko mado ratnan dereh idi tot.

¹⁵Kudeng idé-idé sikal metueh rat namu, baken ieh rat Negku. Idé-idé luk sikal metueh rat namu, kali' rungen ieh melaya'!

¹⁶"Ui mudut lun luk nuno, luk pingiup apui ku nuno pelapet. Idi teh Ui mudut lun pebunu' luk ngaté lemulun ku pelapet ineh.

¹⁷Iamo' na repapeh luk ku ngurat namu; iko ngelaya' bala lemulun luk ngadu' namu. Ui ngedengan demulun-demulunKu pad ideh metueh." Tuhan pangeh nepebala.

Yesaya 55

¹Kebala Tuhan, "O muyuh luk meparing, amé' inan abpa! O muyuh luk na usin, melih bera idi kuman! Melih abpa' anggur idi rata sapi' dengan na raga!

²Ngudehké iko makai usin ku luk na miak kenen, idi nala' tabpamu ku luk na ngebor batek? Do' ninger idi maya' balaKu, pad iko mebor ku akan luk meluun do'.

³"O pupuKu ninger bala ini idi amé' Negku, pad muyuh ngalap ulun! Ui maré kuan muyuh aceh jani' luk meruked idi ngacing peruan luk pijani'Ku ini Daud kuan muyuh.

⁴Ui nganau' Neneh ku Lun Nguyut idi ku Lun Ngimet amung pupu pelé Ui ngegala' rayehKu.

⁵Iko miak nawar pupu baken luk na miti Namu atun, pad ideh mesaget amé' Namu. Ui ini Tuhan Allahmu, ieh ineh Allah Israil luk meligan, miak ngacing amung ineh pad iko buren idi uen ngerayeh."

⁶Lumi inan Tuhan idi sembayang pa kiungNeh, kareb Ieh muneng nemuyuh.

⁷Do' lemulun luk dat necan kekamendeh, idi ngisu' terawédeh. Do' ideh lumi inan Tuhan Allah tau, luk méi' ku lemulun idi luk maré do' ratnan sala'.

⁸Ngaceku kebala Tuhan, "TerawéKu idi lawéKu baken ratnan terawé idi lawé muyuh.

⁹Mepad kudeng langit medita' ratnan tana', kudeng ineh teh lawé idi terawéKu meluun dita' ratnan lawé idi terawé muyuh.

¹⁰"BalaKu mepad kudeng salju idi udan luk mebpeh rat langit idi mubpur tana', pelé tibu mulun idi kebua' pad maré akan.

¹¹Kudeng ineh teh balaKu kali rungan ngacing luk pianKu.

¹²"Muyuh miak remuat rat babil dengan mawang niat; idi kiuten dengan do'. Amung pegkung, surud, idi lawa kayuh miak ngitang, idi menani mawang niat pa kiung muyuh!

¹³Tongor miak mulun su luk inan bitarung, idi hadas miak mulun su luk inan tabpa'. Ini mangun ku tanu' luk meruked, idi ku aceh terawé ratnan luk Ui ini Tuhan pangeh nenganau'."

Yesaya 56

¹Kebala Tuhan inan pupuNeh, "Na mio teh Ui ngulun nemuyuh. Ngaceku ineh do' nganau' luk mesiri idi luk matu.

²Ui ngeperuan lemulun luk ngerawé Aco luk inan Mudeng idi na ngelutak aco ineh. Ui ngeperuan lemulun luk na nganau' anun-anun luk dat."

³Na petulu seburur lun pupu baken luk pian maya' Tuhan pebala, "Tuhan na nima' negku sembayang perapu dengan pupuNeh." Na petulu lemulun luk pinani' pebala, "Ui na miak pamung dengan pupu Allah, ngaceku ui na miak inan anak."

⁴Kebala Tuhan kuan lemulun ineh, "Kudeng muyuh ngerayeh Negku idi ngerawé Aco luk inan Mudeng, idi maya' pianKu, idi nginita jani'Ku,

⁵kali' rungen ngadan muyuh meluun teruayen bang Ruma'Ku idi arang pupuKu, sagan tu pana' muyuh na anak. Na tu ngadan muyuh mekelupan ruked-ruked."

⁶Kudeng ini bala Tuhan kuan lun pupu baken luk pamung dengan pupuNeh, idi luk mawa idi maya' Neneh, idi luk ngerawé Aco luk inan Mudeng idi nginita jani'Neh,

⁷"Ui nated nemuyuh amé' Sion, pegkungKu luk meligan ineh, idi maré nemuyuh mawang niat bang ruma' sembayangKu. Idi Ui ngalap luk barén muyuh luun bubpunKu. Ruma'Ku miak tetanen ruma' luk inan sembayang kuan amung-amung pupu."

⁸Tuhan Allah luk nenguit pupuNeh Israil luk tiban muli' pangeh nepejani' nguit pupu baken pad perurum nedeh.

⁹Tuhan ngecuk pupu baken amé' kuman pupuNeh, mepad kudeng pung luk meliput.

¹⁰KebalaNeh, "Amung lun rayeh luk petulu mada' pupuKu ineh mebuser, pad ideh na kali' anun-anun. Ideh mepad kudeng uko' luk nginita luk na mangang — ideh telubid idi nginupi mo'. Ideh pelaba pian rudap!

¹¹Ideh mepad kudeng uko' luk manga luk na mileh mebor. Ideh ineh lun nguyut luk na mileh. Anid-anid bururdeh maya' luk piandeh, idi ngerawé bururdeh sebuleng mo'.

¹²Kebala lun mabuk ini, 'Do' tau ngalap abpa' anggur idi ngirup macing mebor! Idi nebpa meluun do' ria' tau ratnan aco sini.' "

Yesaya 57

¹Lemulun luk do' maté, idi seburur pana' nateh luk ngerawé nedeh. Iamo' kareb ideh maté, ideh amé' su luk inandeh na uen ngedereh.

²Lemulun luk nganau' luk do' ngalap do' idi awang kareb ideh maté.

³O muyuh luk melutak ku sala', amé' tungé' pad muyuh kumin! Muyuh ineh lun luk pasét idi decur luk mesawa'.

⁴Idéké luk inan muyuh situnga? Idéké luk inan muyuh luk mebalih nguto?

- ⁵Muyuh megéi' sembayang inan akang muyuh dengan pasét liang kayuh su luk inan muyuh sembayang. Muyuh maré anak muyuh kereten ku baré bang lubang batu luk tangeb abpa'.
- ⁶Muyuh sembayang inan batu luk mesalud luk lapen muyuh rat bang abpa' ineh. Muyuh ngukit abpa' anggur ku baré kuandeh, idi maré baré akan pana'. Miakké Ui mawang niat ku ineh?
- ⁷Muyuh uké pegkung pad maré baré idi pasét pana'.
- ⁸Muyuh naped akang muyuh luk na petulu siren iring munung tanga' muyuh. Muyuh necan Negku. Muyuh ngelengu ayung muyuh idi pasét luun bitaran muyuh luk rayeh dengan lemulun luk uen muyuh mayar.
- ⁹Muyuh nganau' umau luk do' buen idi amé' sembayang nan akang Molek. Muyuh ngecuk nelun duken amé' nakap akang luk inan muyuh sembayang rat bang su luk inan até pana'.
- ¹⁰Muyuh merur nakap allah-allah luk baken, iamo' na muyuh musam. Muyuh ngerawé akang muyuh luk na petulu siren ngetueh nemuyuh, pad muyuh na tu melaya'.
- ¹¹Kebala Tuhan, "Idéké akang-akang ini luk ngatot nemuyuh, pad muyuh mebalih pa kiungKu idi mekelupan Negku? Ugka'ké muyuh matot Negku ngaceku Ui mio nungeng?"
- ¹²Muyuh ngerawé luk ruen muyuh matu, iamo' Ui ngegala' kekamen muyuh, idi kali' rungen akang muyuh na miak ngedengan nemuyuh.
- ¹³Kareb muyuh mutuh pedengan, nima' akang muyuh ngedengan nemuyuh! Ideh miak mepalid ku bui luk isuut pana'! Iamo' lemulun luk merapet Negku miak lutep bang bawang ineh idi sembayang Negku bang Ruma'Ku."
- ¹⁴Kebala Tuhan, "Nima' pupuKu lumi Negku. Nala' amung-amung luk ngesabeng nedeh! Nganau' dalan temina'!

¹⁵"Ui ini Allah luk medita' idi meligan, luk mulun raked-raked. Ui tudo déi' su luk medita' idi meligan. Idi teh Ui tudo dengan lemulun luk nginuud idi luk mebeneh niat pelé Ui nuneb nedeh pad ideh merapet teh.

¹⁶Ui namaré ulun kuan pupuKu, idi Ui na pian ngadu' nedeh idi museh nedeh raked-raked.

¹⁷Ui museh nedeh ngaceku ideh manga, idi ngaceku sala'deh. Dengan useh Ui nengukum nedeh idi nenecan nedeh Iamo' ideh metueh niat idi nemaya' piandeh sebuleng.

¹⁸"Ui nekali' kekamendeh; iamo' Ui miak ngedo' nedeh. Ui nguyut idi ngedengan nedeh; idi Ui ngubuk lemulun luk mesusa' niat.

¹⁹Ui maré awang kuan amung-amungdeh luk muneng idi luk mado'! Ui ngedo' pupuKu.

²⁰Iamo' lemulun luk dat mepad kudeng abpa' rayeh luk melipak, luk na ucu' nguit arap luk melutak."

²¹Kebala Tuhan, "Lemulun luk dat na ngalap awang."

Yesaya 58

¹Kebala Tuhan, "Ngitang dengan abud tuehmu! Ngegala' amung sala' pupuKu Israil!

²Ideh sembayang Negku anid-anid aco, idi ideh pian maya' ukumKu idi nganau' luk matu. Ideh mutuh Negku ngeperuan nedeh idi maré ukum luk mesiri nedeh."

³Kebaladeh, "Ngudehké tau mawa', kudeng Tuhan na pian nier ineh? Ngudehké tau mesusa', kudeng Ieh na ngerawé ineh?" Kebala Tuhan nedeh, "Setuneh, sagan pana' muyuh mawa', muyuh nakap pian muyuh sebuleng, idi ngedereh lun tebarin muyuh.

⁴Muyuh pesingaro, pebunu', idi pekedaluh. Miakké Ui ninger putuh muyuh kareb muyuh mawa' kudeng ineh?

⁵Kareb muyuh mawa', muyuh ngedereh burur muyuh, tekunal mepad kudeng don uduh, idi telubid luun guni idi abuh. Matuké ineh mawa'? Miakké Ui mawang niat ku ineh?

⁶"Kudeng ini lawéneh mawa' luk pianKu: Neka kaling dereh idi paga' ukum luk na mesiri; idi muit lemulun luk pidereh.

⁷Maman lemulun luk melau, idi nganak lemulun luk masi' luk na ruma'. Maré ayung kuan lemulun luk na kuyu', idi aleg ara' ngedengan pupu muyuh luk muneng.

⁸"Idi katuKu nemuyuh mepad kudeng rasat aco kareb pekak, idi urat muyuh saget mepali'. Ui idi dengan muyuh ruked-ruked idi ngulun nemuyuh. Ui ngelibung nemuyuh.

⁹Kareb muyuh sembayang Ui ngua' putuh muyuh. Kareb muyuh nawar Negku Ui ngor bala muyuh. "Kudeng muyuh ugka' ngedereh lemulun, idi ugka' ratnan situnga idi dat bala;

¹⁰kudeng muyuh maman lemulun luk melau, idi maré petap kuan lun masi', kali' rungen dacek luk ngelibut nemuyuh miak misu' ku acang muned aco.

¹¹Idi Ui nguyut nemuyuh ruked-ruked, idi maré petap kuan muyuh. Ui maré tueh burur idi do' ulun nemuyuh, pelé muyuh mepad kudeng kabun luk petap abpa', idi mepad kudeng bued abpa' luk na mekeket.

¹²Pupu muyuh miak mudut luk inusag mon, luun tapin luk mon ineh, pad muyuh tetanen pupu luk nuneb bawang luk inusag idi luk nganau' baruh dalam luk dat."

¹³Kebala Tuhan, "Kudeng muyuh ngeligan Aco luk inan Mudeng idi na maya' pian muyuh sebuleng bang aco sineh; kudeng muyuh mawang niat ku acoKu luk meligan idi ngerayeh neneh dengan na nalan, ngakem, idi pebala mo'-mo',

¹⁴kali' rungen muyuh ngalap awang ngaceku muyuh mawa Negku. Idi muyuh miak burek apat-apat tana' ngaceku Ui; idi teh muyuh do' udeng bang

bawang luk biréKu kuan tepun muyuh Yakub. Ui ini Tuhan pangeh nepebala."

Yesaya 59

¹Tuhan na pelaba laya' pad Ieh na miak ngulun nemuyuh idi na Ieh pelaba bengel pad Ieh na ninger tawar muyuh mutuh pedengan!

²Iamo' ngaceku sala' muyuh Ieh na ninger putuh muyuh. Sala' muyuh ngatad nemuyuh ratnan Allah, kareb muyuh pian sembayang Neneh.

³Muyuh mesala' ngaceku mebalih, pesingaro, idi ngaté lemulun.

⁴Muyuh amé' besara' iamo' na muyuh mutut luk mesiri. Muyuh metueh bang besara' ngaceku muyuh merapet ku balih. Muyuh ngedereh nelun baken maya' pian muyuh.

⁵⁻⁶Gayam muyuh luk dat mepad galih kudeng terur seruang. Nutun macit sebuleng idi inan teh! Iamo' gayam muyuh na ulek kuan muyuh. Ideh mepad kudeng ayung luk inau' ratnan baru kelawa'!

⁷Muyuh megéi' ngerawé nganau' luk dat, idi muyuh megagau pad muyuh ngacing ineh. Muyuh na matot ngaté lemulun luk na mesala'. Iapeh-iapeh pana' ulek muyuh inan usag mo',

⁸idi seburur pana' nateh do' udeng kudeng muyuh idi. Amung-amung luk ruen muyuh na mesiri. Muyuh maya' dalam luk tekilu', idi idé-idé luk maya' dalam ineh na miak ngalap do'.

⁹Kebala lun mula', "Nekini tau kali' anun punneh Allah na muit netau ratnan lemulun luk ngedat netau. Tau nginulat acang pian nalan, iamo' medacem,

¹⁰tau ngakap-ngakap mepad kudeng lun mebuser. Tau metebaceng kareb muned aco mepad kudeng kareb medacem, idi mepad kudeng bang su luk inan até.

¹¹Tau matot idi mesusa' niat. Tau geregan puatin Allah ratnan dereh idi luk dat, iamo' na luk mangun.

¹²"O Tuhan, sala' kai Namu pelaba ula'. Kai inadu' ngaceku sala' kai. Kai miti amung sala' ineh.

¹³Kai sikal metueh rat Namu, kai nengarung Namu, idi ara' maya' Namu. Kai nengedereh nelun baken idi sikal metueh rat namu. Terawé kai na matu, idi bala kai mebalih mo'.

¹⁴Luk mesiri pangeh inusu idi luk matu na miak amé' muneng nekai. Luk matu metebacang déi' luun natad su luk inan besara', idi na luk mepiteb su ineh.

¹⁵Pawa' lemulun luk mesiri, pad lemulun luk ugka' ratnan kekamen luk dat pana' uen lun ngaro." Tuhan pangeh nekali' ineh, idi Ieh dat niat ngaceku na luk mesiri.

¹⁶Ieh mawa ngaceku seburur pana' nateh luk ngedengan lemulun luk pidereh, pad Ieh pian ngegala' laludneh sebuleng pelé muit nedeh pad Ieh metueh peh.

¹⁷Luk mesiri miak mangun ku ayungNeh kareb Ieh amé' pebunu', idi tueh mangun ku tupiNeh. Ieh miak ngayung ku geregan ngesiri luk amung-amung idi ngukum idi ngua' amung dereh luk icing kuan pupu ineh.

¹⁸Ieh ngukum bunu'Neh maya' kekamendeh, sagan pana' ideh tudo bang bawang luk mado.

¹⁹Rat pa busat aco macing pa acep aco, amung lemulun miak matot Neneh ku laludNeh luk rayeh. Ieh macing mepad kudeng abpa' luk mawer idi barui pana'.

²⁰Kebala Tuhan kuan pupuNeh, "Ui amé' ngedengan nemuyuh déi' Yerusalim, pad Ui ngulun amung muyuh luk teketed ratnan sala' muyuh.

²¹Idi Ui pejani' nemuyuh: RohKu luk tudo luun muyuh idi balaKu luk inau'Ku luun bibir muyuh, na miak buro ratnan tang muyuh macing inan inul-inul muyuh, rat nekini macing raked-raked. Tuhan pangeh nepebala."

Yesaya 60

- ¹O Yerusalim, tumui iko, idi merasat mepad kudeng aco. Rayeh Tuhan merasat luunmu!
- ²Pupu baken nepapen ku dacem, iamo' acang Tuhan merasat luunmu; uburNeh pana' miak siren luunmu.
- ³Pupu baken miak amé' matun acangmu; idi raca'-raca' pian nier acangmu luk pun masat!
- ⁴Do' tengook idi nier libut-libut: amung lemulun mepamung amé' namu; anak deléimu macing rat mado; anak decurmu baben mepad kudeng anak.
- ⁵Iko miak nier ineh dengan pelaba awang niat; iko megegker ku awang niatmu. Binaweh amung pupu miak iten amé' namu, rat déi' dipar abpa' rayeh pana'.
- ⁶Tuda'-tuda' riudan unta macing rat Midian idi Epa. Ideh nguit amas idi umau luk do' buen rat Siba. Lemulun miak mada' bala luk do' ratnan luk ianu' Allah!
- ⁷Amung dumba rat Kedar idi Nebayot, miak iten ku baré kereten kuanmu, idi baré luun bubpun pad maya' pian Tuhan. Tuhan nganau' Ruma'Neh meluun buren ratnan luk atun.
- ⁸Anunké kapal ini luk temulud mepad kudeng laput, idi kudeng sukur luk muli'?
- ⁹Ideh ineh kapal luk macing rat bawang luk mado, luk nguit pupu Allah muli'. Ideh nguit pirak idi amas, pad ngerayeh ngadan Tuhan, Allah Israil luk meligan, luk nenganau' amung bawang ngedita' pupuNeh.
- ¹⁰Kebala Tuhan kuan Yerusalim, "Lun pupu baken miak mudut libungmu baruh; raca'-raca'deh mangun ku demulunmu. Dengan usehKu Ui nengukum namu, iamo' nekini Ui ngegala' katu idi éi'Ku namu.
- ¹¹Tebaco kedangan amung tanga'mu mukab, pad raca' amung pupu miak nguit binawehdeh amé' namu.
- ¹²Iamo' pupu luk na mangun ku demulunmu, miak uen ngusag.

13"Kayuh tongor, aru', idi peribu, luk meluun do' ratnan pulung Lebanon, miak iten, pad mudut namu baruh, O Yerusalim, pelé Ruma'Ku do' ayu, idi bawangKu buren.

14Anak lemulun luk nengedereh namu amé' ngedita' namu dengan tekeradung pa kiungmu. Amung lemulun luk nengedat namu atun miak sembayang pa kiungmu. Ideh neten namu, 'Bawang Tuhan,' 'Sion, Bawang Allah Israil luk meligan.'

15"Atun iko tican idi inan megateh, aceh bawang luk dat ali. Ui nganau' namu buren idi do' ayu, su luk inan awang ruked-ruked.

16Amung pupu idi raca' miak ngasa' namu, mepad kudeng aceh tinan ngasa' anakneh. Iko miak kali' Ui ini Tuhan nengulun namu, idi Allah Israil luk melalud muit namu.

17"Ui nguit kuanmu amas ku libal tekaling, pirak ku libal belawan, idi tekaling ku libal kayuh. Iko ngalap belawan ku libal batu. Lun luk ngimet nemuyuh na miak ngedereh nemuyuh teh, Ui nganau' nedeh ngimet dengan mesiri idi do'.

18Uni pebunu' na pedingeren teh. Bawangmu na uen ngusag baruh teh. Ui matar namu mepad kudeng libung batu. Iko miak ngubur Negku ngaceku Ui ngulun namu.

19"Aco na mangun ku acangmu kareb maco, idi bulan na mangun ku acangmu kareb medacem; Ui ini Tuhan luk mangun ku acangmu luk meruked. Acang rayehKu miak merasat luunmu;

20idi na muyuh temido teh. Ui ini Tuhan mangun ku acangmu luk meruked, luk meluun raben ratnan aco idi bulan.

21Pupumu miak nganau' luk matu, idi ngimet bawang ineh ruked-ruked. Ui nenibu nedeh, Ui nemudut nedeh, pad ngegala' rayehKu kuan luk amung-amung.

²²Tetek ruma'mu luk meluun isuut idi masi' miak amé' rayeh mepad kudeng pupu luk rayeh! Ui nganau' ini dengan mesaget bang kareb luk petulu. Ui ini Tuhan!"

Yesaya 61

¹Roh Tuhan Allah idi pa luunKu, ngaceku Ieh pangeh nengumau Negku, Pad Ui mada' Bala luk Do' kuan lun masi', idi ngedo' lemulun luk nginuud idi mebeneh niat, idi mada' puit kuan lemulun luk tiban, idi teh kuan lemulun luk tinutup.

²Ieh nengecuk Negku pad Ui mada', ratnan tarekNeh macing, kareb Tuhan miak ngulun pupuNeh, idi ngelaya' bunu'deh. Ieh nengecuk Negku pad Ui ngubuk lemulun luk temido.

³Idi maré kuan lemulun luk mesusa' niat déi' Sion, awang idi do' ria' ku libal susa' niat, idi nani ubur ku libal tangi'. Tuhan sebuleng miak ngasa' nedeh; ideh do' ulun mepad kudeng kayuh. Amung lemulun nganau' luk matu. Idi Allah miak buren ngaceku luk inau'Neh.

⁴Ideh mudut baruh bawang-bawang luk inusag mon.

⁵O pupuKu, pupu baken mangun ku demulunmu. Ideh miak matar dumba muyuh, idi nganau' lati' idi ngasa' kabun anggur muyuh.

⁶Iamo' muyuh tetanen imam Tuhan. Muyuh ngalap binaweh ratnan amung-amung pupu dengan mawang niat ku ineh.

⁷Igu' muyuh pangeh nugka'; muyuh tudo bang bawang muyuh sebuleng. Binaweh muyuh dueh kua' ratnan luk atun. Awang niat muyuh macing raked-raked.

⁸Kebala Tuhan, "Ui mawa ku luk mesiri, idi Ui megateh ku luk ngedereh idi luk dat. Ui lutep ngeperuan pupuKu, pad Ui nganau' jani' luk meruked kuandeh.

⁹Ideh miak mebala arang amung pupu; idé-idé luk nier nedeh miak kali' ideh ineh aceh pupu luk inan peruan rat Negku."

¹⁰Yerusalim mawang niat ku luk inau' Tuhan. Ieh mepad kudeng decur luk inayung ku ayung paweh. Allah nengayung neneh ku ulun idi tueh!

¹¹Tuhan lutep ngulun pupuNeh, mepad kudeng pimara na miak na mulun idi temubu', idi amung pupu miak ngubur Neneh.

Yesaya 62

¹Ui sikal pebala pad ngubuk Yerusalim, Ui na miak ungeng pad macing ieh ngalap ulun, pad tuehneh merasat mepad kudeng sesakan kareb medacem.

²O Yerusalim, amung pupu miak nier tuehmu! Amung raca'deh miak nier rayehmu. Iko tetanen ku ngadan luk mebaruh, luk barén Tuhan sebuleng.

³Kareb ineh iko mepad kudeng pata Tuhan luk do' ayu.

⁴Na iko tetanen, "Tican" teh, idi tana'mu na tetanen, "Decur luk Tican!" Ngadanmu luk mebaruh ineh, "Allah Mawang Niat Neneh!" Tana'mu tetanen, "Inan Awan," ngaceku Tuhan mawang niat namu, pad Ieh mangun ku awan deléi kuan tana'mu.

⁵Mepad kudeng seburur anak adi' deléi ngalap seburur anak decur luk pun mebaruh ku awanneh, kudeng ineh teh Allah luk nemudut namu pian ngalap namu. Idi Allah miak mawang niat namu mepad kudeng deléi luk pun ngaweh.

⁶O Yerusalim, Ui nengelelep lun matar luun libungmu. Do' ideh na ungeng tebaco kedangan. Ideh mangun ku terawé kuan Tuhan ratnan jani'Neh pad Ieh na mekelupan ineh!

⁷Do' ideh megéi' sembayang mutuh pedangan pad Ieh nuneb Yerusalim pelé ieh buren aput tana'!

⁸Tuhan nepebulung, idi dengan laludNeh Ieh miak ngacing bulung ineh: "Padé muyuh na kenen bunu' muyuh teh; idi lun pupu baken na ngirup abpa' anggur muyuh teh.

⁹Iamo' muyuh luk nenibu idi nengeranih padé, miak kuman pinaram idi ngubur Tuhan! Muyuh luk nengasa' idi nengalap bua' anggur, miak ngirup abpa'neh luun natad Ruma'Ku."

¹⁰O lun Yerusalim, remuat rat bang bawang, idi nganau' aceh dalam kuan pupu muyuh luk lemubed! Nganau' aceh dalam rayeh idi nala' batu! Nganau' aceh diri mangun ku tanu', pad amung pupu miak kali'

¹¹bala Tuhan kuan aput tana'. KebalaNeh, "Mada' pupu Yerusalim ratnan acing Tuhan luk ngulun nemuyuh idi luk nguit denganNeh lemulun luk pinuitNeh!"

¹²Muyuh tetanen, "Pupu Allah luk Meligan," idi, "Pupu luk Inulun Tuhan!" Yerusalim miak tetanen, "Bawang luk Inan Allah Mawa," idi "Bawang luk Na Tican Allah."

Yesaya 63

¹"Idéké luk macing rat Bosra luk bang bawang Edom? Idéké luk nengayung ku kibung luk mesia' luk pelaba do', idi luk nalan dengan pelaba tagep?" "Ieh ineh Tuhan luk ngulun dengan laludNeh. Ieh amé' mada' tuehNeh."

²"Ngudehké ayungNeh pelaba sia', mepad kudeng lemulun luk ngeradu' bua' anggur pian ngalap abpa'neh?"

³Kebala Tuhan, "Ui nengeradu' amung pupu, mepad kudeng bua' anggur, idi seburur pana' nateh luk nengedengan Negku. Dengan usehKu Ui nengeradu' nedeh, pad dara'deh nengelutak ayungKu.

⁴Ui nengeletep aco luk inanKu ngulun pupuKu; pad Ui ngukum bunu'deh.

⁵Ui mawa kareb Ui nier idi kali' na luk idi seburur pana' luk sikal ngedengan Negku. Iamo usehKu nengetueh Negku, pad Ui sebuleng metueh ratnan bunu' ineh.

⁶Dengan usehKu Ui nengeradu' pupu-pupu, pad ideh nekusag. Ui nengutang dara'deh luun tana'."

⁷Ui mada' ratnan awa Tuhan luk na ugka'; Ui ngubur Neneh ngaceku amung luk inau'Neh kuan tau. Ieh nengeperuan tu-tu pupu Israil, ngaceku éi'Neh idi awanNeh luk lutep.

⁸Kebala Tuhan, "Ideh ineh pupuKu, na ideh naluk Negku." Idi Ieh nemuit nedeh

⁹ratnan amung derehdeh. Baken melaikat, iamo' Tuhan sebuleng luk nengulun nedeh. Dengan awaNeh idi éi'Neh, Ieh nemuit nedeh. Mon Ieh pangeh nengasa' nedeh,

¹⁰iamo' ideh sikal metueh rat Neneh, pad RohNeh luk meligan pelaba susa' niat; pad Tuhan mangun ku bunu'deh idi nemunu' nedeh.

¹¹Iamo' ideh nengerawé ratnan luk nepangeh, kareb Musa, demulun Tuhan ineh, idi kebaladeh, "Iapehké Tuhan ineh luk nengulun lun rayeh pupuNeh ratnan abpa' rayeh? Iapehké Tuhan ineh luk nemaré RohNeh luk Meligan ni Musa?

¹²Iapehké Tuhan ineh luk nengegala' laludNeh, pad Ieh nenganau' kekamen luk inan mawa dengan ticu' Musa, pad abpa' rayeh nepatad pa kiung pupuNeh, idi Ieh buren raked-raked peh?"

¹³Kareb Tuhan nenguyut nedeh guta abpa' luk medalem, ideh mepad kudeng kuda luk meliputi luk na mekasiad, idi luk na metebaceng.

¹⁴Mepad kudeng sapi' kiuten amé' bang laman luk mebaleng, kudeng ineh teh Tuhan nengato erur pupuNeh. Idi Roh Tuhan nenguyut pupuNeh, pad Ieh nengacing ubur kuan ngadanNeh sebuleng.

¹⁵O Tuhan, do' nier rat surga, su luk inanMu tudo dengan ligan idi rayehMu. Kudeng apehké éi'Mu kuan kai. Iapehké laludMu? Kudeng apehké awa idi katuMu? Aleg mekelupan nekai.

¹⁶Iko ineh taman kai. Tepun kai Ibrahim idi Yakub pana' na miak ngedengan nekai. O Tuhan, Iko ineh Taman kai. Iko mo' sebuleng luk megéi' muiit nekai.

¹⁷Ngudehké Iko nima' nekai meraruh ratnan dalamMu? Ngudehké Iko nima' nekai metueh niat, pad kai teketed rat Namu? Do' lumi nekai ngaceku lemulun luk lutep maya' Namu, idi ngaceku pupu luk mangun ku babpatMu rat mon.

¹⁸Bunu' kai pangeh nengusu lélé amung pupuMu. Ideh nengelutak Ruma'Mu pana'.

¹⁹Nekini ayuneh Iko na ngimet nekai, pad kai na mangun ku pupuMu.

Yesaya 64

¹Ngudehké Iko na ngerarak langit idi temurun, pad pegkung-pegkung miak nier Namu dengan megeker ku totdeh,

²mepad kudeng abpa' luk manok luun apui. Amé ngegala' laludMu kuan bunu'Mu, pad amung pupu megegker pa kiungMu.

³Atun Iko iné nganau' luk inan matot luk na tirawé kai, pad pegkung-pegkung nenier Namu idi megegker ku totdeh.

⁴Seburur pana' nateh luk pangeh nenier idi neninger ratnan Allah luk mepad kudeng Iko, luk nganau' kekamen luk do' kuan lemulun luk merapet Neneh.

⁵Iko ngikak lemulun luk mawang niat nganau' luk matu, idi luk ngerawé ratnan luk pianMu kuan ulundeh. Iko museh nekai, iamo' kai na nugka' nganau' sala'; sagan pana' usehMu pelaba rayeh, kai lutep nganau' luk dat rat mon.

⁶Amung kai mesala' peh; idi kekamen kai luk do' pana' mepad kudeng kibung luk melutak. Kai mepad kudeng don luk tekering luk mepalid ku bui, ngaceku sala' kai.

⁷Seburur pana' nateh luk lumi Namu dengan sembayang; idi seburur pana' nateh luk mutuh pedengan rat Namu. Iko sigapung rat nekai idi nenecan nekai, ngaceku sala' kai.

⁸Iamo' Iko ineh Taman kai, O Tuhan. Kai mepad kudeng tana' salit, idi Iko ineh mepad kudeng lun luk nganau' kuden. Iko nemudut nekai.

⁹Aleg Iko pelaba useh nekai, pad Iko ngerawé sala' kai macing raked-raked. Kai ini pupuMu, do' méi' nekai.

¹⁰Bawang-bawangMu luk meligan mangun ku su luk ali-ali, idi Yerusalim ineh aceh usag luk tican.

¹¹Ruma' Allah kai, luk meligan idi pelaba do', su luk inan tepun kai nengubur Namu, pangeh iseb. Idi amung pudut luk inan kai mawa inusag peh.

¹²O Tuhan naké Iko ngerawé amung ineh. Miakké Iko ungeng, pad kai na tuman ku dereh kai?

Yesaya 65

¹Kebala Tuhan, "Ui netemina' ngua' putuh pupuKu, iamo' na ideh nesembayang. Ui netemina' papu' nedeh, iamo' na ideh nenakap Negku. Pupu ineh na nenawar Negku, sagan pana' Ui megéi' temina' ngua' idi pebala, 'Idi Ui; Ui miak ngedengan nemuyuh.'

²Rat mon Ui megéi' temina' ngikak pupu ini luk nganau' sala' idi maya' piandeh sebuleng dengan metueh niat.

³Dengan na migu' ideh megéi' nganau' Negku museh. Ideh maré baré bang kabun su luk inandeh sembayang inan Allah baken, idi teh ngeseb umau luk do' buen luun bubpun allah ineh.

⁴Kareb medacem ideh amé' bang lubang batu idi tanem, pad ngitun ada' lun naté. Pupu ini kuman barek, idi ngirup abpa' pang luk biré kuan allah baken.

⁵Ideh ngecuk lun baken na muneng nedeh, ngaceku ideh meligan idi na miak kamen. Ui megateh inan lemulun luk kudeng ineh — usehKu nedeh mepad kudeng apui luk na maté.

⁶"Ui pangeh nemutut ukum kuandeh, idi ukumdeh ineh pangeh inayud. Na Ui mekelupan luk inau'deh, iamo' Ui ngua'

⁷sala'deh, idi sala' tepundeh. Ideh nengeseb umau luk do' buen luun surud su luk inandeh sembayang inan allah baken, idi ideh nengedat Negku. Idi Ui ngukum nedeh maya' kekamendeh."

⁸Kebala Tuhan, "Na lemulun ngusag bua' anggur luk do'; iamo' ideh ngalap abpa'neh. Idi Ui pana' na ngusag pupuKu — Ui ngulun lemulun luk maya' Negku.

⁹Ui ngeperuan nelun Israil ratnan pupu Yahuda, pad inuldeh miak ngalap tana'Ku luk luun pegkung. PupuKu luk pinili' luk maya' Negku miak tudo su ineh.

¹⁰Ideh sembayang Negku, idi ideh miak nguyut dumba idi sapi'deh amé' nan laman déi' Raked Saron luk pa acep aco, idi Ruan Susa' luk pa busat aco.

¹¹Iamo' na ieh kudeng ineh kuan muyuh luk necan Negku, idi luk na ngerawé Sion, pegkungKu luk meligan ineh idi luk sembayang inan allah Nasip idi Kapeh Tau' luk titen Gad idi Meni.

¹²Muyuh miak pitayen, ngaceku muyuh na nengor balaKu, idi na neninger tawarKu. Dengan rungen muyuh nengelaba ukumKu idi nenganau' luk dat.

¹³Ngaceku ineh kudeng ini bala Tuhan: Lemulun luk sembayang Negku idi maya' balaKu petap akan, iamo' muyuh miak melau idi meparing. Ideh miak mawang niat, iamo' muyuh uen ngigu'.

¹⁴Ideh menani' mawang niat, iamo' muyuh nangi' ku susa' niat.

¹⁵PupuKu luk pinili' ngediman nelun ku ngadan muyuh. Ui ini Tuhan ngaté nemuyuh. Iamo' Ui maré aceh ngadan luk mebaruh kuan lemulun luk maya' balaKu.

¹⁶Idé-idé luk bang bawang ineh luk mutuh peruan, pian uen Allah luk lutep maya' jani' ngeperuan. Susa' luk mon miak buro idi na uen ngerawé peh."

¹⁷Kebala Tuhan, "Ui mudut tana' idi langit luk mebaruh. Amung luk pangeh mangun mon miak mekelupan.

¹⁸Do' muyuh mawang niat ku luk pidutenKu. Yerusalim luk mebaruh luk pidutenKu mepanu' ku awang, idi pupuneh mawang niat peh.

¹⁹Ui pana' mawang niat ngaceku su ineh, idi na lemulun mutuh pedengan.

²⁰Anak isuut na maté, idi amung lemulun mekadang ulun. Lemulun luk ulun meratu lak tetanen ana adi', idi idé-idé luk ulunneh na macing meratu lak kareb ieh maté tetanen kidiman.

²¹⁻²²Lemulun miak tudo bang ruma' luk pidutendeh ineh — ruma' ineh na miak rawen lun baken. Ideh nibu bua' anggur idi ngirup abpa'neh. Na ieh rupan lun baken. PupuKu mekadang ulun mepad kudeng kayuh. Ideh mawang niat ku amung-amung luk lapendeh.

²³Amung kekamendeh inan peruan, idi anak-anakdeh na mekaneh susa'. Ui ngeperuan nedeh dengan inuldeh macing raked-raked.

²⁴Kareb nateh ideh mangeh sembayangdeh Negku, Ui ngua' putuhdeh.

²⁵Bungalé idi anak dumba pad-pad kuman, idi balang kuman uduh mepad kudeng sapi'. Menipeh pana' na megalih. Idi na luk dat idi luk ngurat luun Sion, pegkungKu luk meligan ineh."

Yesaya 66

¹Kebala Tuhan, "Langit ineh kerusiKu, idi tana' ineh tapin kukudKu. Kudeng apehké ayu ruma' luk miak piduten muyuh kuanKu, idi su luk inanKu tudo?

²Ui sebuleng nemudut amung-amung pudut! Ui mawang niat ku lemulun luk mebeneh niat idi luk uren, luk matot Negku idi luk maya' balaKu.

³"Lun mula' nganau' luk piandeh. Ideh ngaté sapi' ku baré, idi lemulun pana' keretendeh ku baré teh; ideh ngeret anak dumba, idi mutul dier uko'; ideh maré baré akan idi teh dara' barek; ideh maré umau luk do' buen, idi sembayang inan akang. Ideh mawang niat ku sembayang luk pelaba dat.

⁴Ngaceku ineh Ui ngacing susa' kuandeh — ieh ineh luk inandeh matot — ngaceku seburur pana' nateh luk nengor balaKu, idi luk neninger tawarKu. Dengan rungen ideh nengelaba balaKu idi nenganau' luk dat."

⁵O muyuh luk matot inan Tuhan idi luk maya' ukumNeh, do' ninger balaNeh: "Sebuang pupu muyuh megateh nemuyuh idi na sikal perurum nemuyuh, ngaceku muyuh lutep maya' Negku. Ideh situnga nemuyuh, kebaladeh, 'Kai

pian nier nemuyuh mawang niat, nima' Tuhan ngegala' rayehNeh pad ngulun nemuyuh.' Iamo' ideh ineh luk uen ngigu'!

⁶Do' muyuh ninger arod luk rayeh ineh bang bawang Yerusalim idi bang Ruma' Allah. Ieh ineh arod Tuhan luk ngukum amung bunu'Neh!

⁷"BawangKu luk meligan mepad kudeng decur luk denak-denak nenganak aceh anak deléi dengan na mét nenganak.

⁸Idéké luk kali' ratnan luk kudeng ineh? Miakké aceh pupu uen nenganak bang aceh aco mo'? Sion na medereh mio kareb nateh pupu ineh uen nenganak.

⁹Petuluké Ui ngedengan pupuKu pad macing ideh malé uen nenganak, iamo' na nima' nedeh uen nenganak?" Tuhan pangeh nepebala.

¹⁰O muyuh luk mawa inan bawang Yerusalim, do' muyuh mawang niat idi do' ria' ku ieh! O muyuh luk netemido neneh atun, do' muyuh mawang niat ku ieh!

¹¹Muyuh ngalap babpat ratnan peruanneh, mepad kudeng anak luk niti'.

¹²Kebala Tuhan, "Ui ngeperuan nemuyuh macing raked-raked. Binaweh amung pupu miak manud amé' nemuyuh mepad kudeng abpa' luk na mekeket. Muyuh mepad kudeng anak luk uen tinanneh niti', idi luk inanneh mawa.

¹³Ui miak ngubuk nemuyuh déi' Yerusalim, mepad kudeng aceh tinan ngubuk anakneh.

¹⁴Kareb muyuh kali' amung ineh mangun, muyuh miak mawang niat, pad muyuh metueh idi do' ulun. Kareb ineh muyuh kali' Ui ini Tuhan ngedengan lemulun luk maya' balaKu, idi ngegala' usehKu kuan amung bunu'Ku."

¹⁵Tuhan macing dengan apui bang keréta luk mepad kudeng libuleh, pad ngukum lemulun luk inanNeh megateh.

¹⁶Dengan apui idi pelapet Ieh ngukum amung lemulun bang tana' ini luk mesala' kaliNeh, pad ideh maté.

¹⁷Kebala Tuhan, "Kekiped lun mesala' malé macing, ieh ineh lemulun luk ngeligan bururdeh pad sembayang inan allah baken, idi luk kuman barek idi anak labo dengan akan baken luk dat.

¹⁸Ui kali' terawédeh idi kekamendeh. Ui amé' ngamung lemulun ratnan anid-anid pupu. Kareb ideh mepamung, ideh miak nier laludKu,

¹⁹pad ideh kali' Ui ini luk ngukum nedeh. "Iamo' Ui miak ngulun sebuangdeh idi ngecuk nedeh amé' mada' amung pupu idi bawang luk mado luk nateh neninger ratnan ngadanKu, idi luk nateh nekali' rayeh idi laludKu: ieh ineh Spaniol, Libia, Lidia dengan lun luk mileh ngelatik ku binor, Tubal idi Grika. Ideh miak mada' ratnan rayehKu kuan pupu ini.

²⁰Ideh miak nated amung kinanak muyuh ratnan anid pupu mangun ku baré kuanKu. Ideh miak nated nedeh macing inan pegkungKu luk meligan déi' Yerusalim. Ideh miak maya' kuda, idi kuda luk seupa keladai, unta, keréta bunu' idi keréta binaweh, mepad kudeng lun Israil nguit baré akan macing inan Ruma' Allah bang su luk inan luk meligan.

²¹Ui miak nganau' sebuangdeh mangun ku imam idi lun Liwi.

²²"Mepad kudeng tana' luk mebaruh idi langit luk mebaruh meraben ngaceku laludKu, kudeng ineh teh inul muyuh idi ngadan muyuh lutep peh.

²³Anid Irau Bulan Baruh, idi anid Aco luk inan Mudeng, lemulun ratnan anid-anid pupu miak amé' sembayang Negku tungé' Yerusalim." Kudeng ini bala Tuhan.

²⁴"Idi kareb ideh remuat ideh miak kali' butung lemulun luk sikal metueh rat Negku. Uled luk kuman nedeh na miak maté, idi teh apui luk ngeseb nedeh pana' na miak maté. Amung lemulun megileg nier nedeh."

Yeremia

Yeremia 1

¹Surat ini mada' ratnan luk bila idi luk inau' Yeremia. Yeremia ini anak Hilkia, seburur imam rat Anatot bang bawang Benjamin.

²Idi bang lak luk kepulu' teluh kareb Raca' Yosia Amon nengimet bawang Yahuda, idi Tuhan nepebala ni Yeremia.

³Idi Ieh nepebala neneh sekua' teh, kareb Yoyakim Yosia mangun ku raca'. Pangeh ineh Tuhan megéi' pebala neneh, pad macing lun Yerusalim tiban, kareb Sedekia Yosia pangeh nengimet nedeh pulu' lak limeh bulan.

⁴Kebala Tuhan negku,

⁵"Kareb nateh Ui nemudut namu ku lemulun, Ui nemili' namu. Idi kareb nateh iko tinganak Ui nengetu namu; Ui nemili' namu mangun ku nabi kuan amung-amung pupu."

⁶Idi kebalamu, "O Tuhan Allah, na ui mileh peburi'. Ngaceku ui anak."

⁷Iamo' kebala Tuhan negku, "Alegmala namu anak, iamo' do' amé' inan pupu su luk dukenKu namu, idi mada' nedeh ratnan amung-amung luk bilaKu namu.

⁸Aleg matot nedeh, ngaceku Ui idi denganmu idi matar namu. Ui ini Tuhan luk pebala namu!"

⁹Idi Tuhan nenatang ticu'Neh, idi nengakem bibirku, idi kebalaNeh negku, "Do' iko ninger! Nekini Ui maré bala luk badénmu.

¹⁰Aco sini Ui maré lalud namu pa luun amung-amung pupu idi amung-amung imet pad mubput idi nabpa, ngusag idi ngeluka', mudut idi nibu."

¹¹Idi Tuhan nengitun negku, kebalaNeh, "Yeremia, anun luk sirenmu?" Kebalaku, "Ui nier angkat berangan."

¹²Idi kebala Tuhan negku, "Matu balamu, idi Ui matar pad balaKu mangun."

¹³Idi Tuhan nengitun negku teh, kebalaNeh, "Anun luk sirenmu baken teh?" Kebalaku, "Ui nier aceh lacang meburek pa tinueh busat aco, luk lélé melukeb pa tungé'."

¹⁴Idi kebala Tuhan negku, "Dereh miak macing rat pa tinueh busat aco kuan amung-amung lun luk tudo bang bawang ini,

¹⁵ngaceku Ui miak nawar amung-amung pupu rat pa tinueh busat aco. Raca'deh miak macing idi ngerareng kerusideh munung amung tanga' Yerusalim idi libut aladneh, idi libut bawang baken déi' Yahuda teh.

¹⁶Kudeng ini lawéneh Ui ngukum lemulun luk mesala', idi luk nenecan Negku, idi luk nengeseb umau luk do' buen kuan allah baken, idi luk nesembayang inan akang luk inau'deh.

¹⁷Do' iko mekuu' amé' mada' nedeh ratnan amung-amung luk belénKu namu. Aleg iko matot nedeh nekini, pad Ui na maré namu matot nedeh mucu, kareb iko idi dengandeh.

¹⁸⁻¹⁹O Yeremia, do' iko ninger! Amung lun bang bawang ini, ieh ineh amung raca' Yahuda, idi amung lun rayeh, idi amung imam idi amung anak itindeh sikal metueh rat namu. Iamo' aco sini Ui ngetueh namu, pad iko tuman rat nedeh, mepad kudeng aceh bawang luk linibung, idi kudeng diri belawan, idi kudeng alad tekaling. Na ideh miak ngelaya' namu, ngaceku Ui idi denganmu idi matar namu. Ui ini Tuhan luk pebala namu."

Yeremia 2

¹Tuhan nengecuk negku

²amé' mada' balaNeh kuan amung lun bang bawang Yerusalim, kebalaNeh, "Ui kali' namu lutep karebmu anak, idi iko mawa Negku kareb kiteh pun paweh. Iko nemaya' Negku déi' su luk ali-ali, su luk na inan lemulun nenganau' lati'.

³O Israil, Ui luk kuan namu; iko aceh lati'Ku luk meluun do'. Ui ngukum amung lun luk nengedereh namu, idi nengesusa' nedeh. Ui ini Tuhan luk pebala namu."

⁴O muyuh lun luk inul Yakub, idi amung uang tetek ruma' lun Israil, do' ninger bala Tuhan.

⁵Kebala Tuhan: "Anun datKu pad tepun muyuh nenecan Negku? Ideh nesembayang inan akang luk na ulek, pad ideh pana' na ulek teh.

⁶Na ideh nengerawé Negku, sagan pana' Ui nemuit nedeh rat bawang Masir, idi nenguyut nedeh maya' déi' su luk ali-ali, ieh ineh su luk mula' pegkung bada idi luk dat ali; ieh ineh tana' luk tekering luk na delanin lemulun idi na inan lun tebawang, ngaceku inan luk katot.

⁷Ui nenguit nedeh iné' inan tana' luk mebaleng, pad ideh do' udeng idi ngalap bua' luk mula'. Iamo' ideh nacing idi nengedat tana'Ku, idi nengelutak bawang luk biréKu nedeh.

⁸Idi lun imam na nengitun, 'Iapeh inan Tuhan?' Idi imamKu sebuleng na miti Negku. Idi lun rayeh-rayeh sikal metueh rat Negku, idi amung nabi nepebala dengan ngadan Baal, idi nesembayang inan akang luk na ulek."

⁹Idi kebala Tuhan, "Ui sikal nguit pupuKu besara' sekua' baruh teh, idi ngadu' anak inuldeh.

¹⁰Do' amé' pulau Siprus luk pa acep aco; ngecuk nelun amé' bawang Kedar luk pa busat aco, idi nier do'-do'. Inanké luk kudeng ini mangun atun?

¹¹Lun pupu baken na nengelibal allahdeh, sagan pana' allahdeh na matu. Iamo' pupuKu pangeh nengelibal Negku, sagan pana' Ui ini Allah luk ngeperuan nedeh; iamo' ideh nengalap allah luk na miak ngedengan nedeh.

¹²Idi Ui ini Tuhan ngecuk langit megegker ku tot, pad ieh megagap idi mawa.

¹³PupuKu pangeh nenganau' dueh sala': ideh nenecan Negku, ieh ineh aceh bued abpa' luk do'; idi ideh nengukat tuda'-tuda' subuk, luk na inan abpa' mudeng.

¹⁴"Israil na ieh demulun, idi na ieh inul demulun. Ngudeh bunu'neh ngerada' neneh?

¹⁵Ideh ngeku iringneh mepad kudeng balang. Idi ideh nenganau' tana'neh mangun ku su luk ali-ali, idi nengusag bawangneh, pad na lemulun tudo bang ineh.

¹⁶Lun Mempis idi lun Tapanes pangeh nemila' uluhneh.

¹⁷O Israil, iko luk nengedat bururmu sebuleng! Ngaceku iko nenecan Negku luk Tuhan Allahmu, karebKu nenguyut namu maya' dalan.

¹⁸Anunké luk pianmu iko amé' bawang Masir? Pian ngirup Abpa' Nil, iko? Anunké luk pianmu iko amé' bawang Asur pian ngirup Abpa' Pirat, iko?

¹⁹Datmu sebuleng miak ngukum namu, idi teh iko miak kumin, ngaceku iko neteketed rat Negku, idi na matot Negku, pad iko kali' kudeng apeh susa' idi dat necan Tuhan Allahmu. Ui ini Tuhan Allah luk Melalud luk pebala namu.

²⁰O lun Israil, rat monneh iko ngelaba balaKu, idi ara' maya' Negku, idi kebalamu, 'Na ui pian mangun ku demulun!' Iamo' iko mepad kudeng decur luk mesawa' luun anid-anid surud luk medita' idi liang anid-anid kayuh luk mebata'.

²¹Iko aceh ilung luk pelaba do' idi bua' anggur luk mepaci', kareb Ui nenibu namu. Iamo' nekini iko mepad kudeng bua' anggur luk melu luk na pianKu.

²²Sagan pana' iko ngasa ticu'mu ku batu. idi sibaru' ku sabun, nateh sala'mu mekiu' sirenKu. Ui ini Tuhan Allah luk pebala namu.

²³Ngudeh iko mala namu na nengelutak bururmu, idi na tupu nesembayang inan Baal? Ngerawé sala' luk pangeh inau'mu déi' luun raked. Iko mepad kudeng aceh unta tineh luk ucet nakap deléi,

²⁴luk buro amé' déi' su luk ali-ali. Kareb ieh nakap deléi, idéké luk miak nginita neneh? Deléi luk pian neneh na susa' nakap neneh, ngaceku ieh luk amé' matun.

²⁵O Israil, aleg nima' kukudmu mét idi telananmu metekering nakap allah baken. Iamo' kebalamu, 'Kapehneh tau'? Ui mawa inan allah baken, idi pian nakap nedeh.' “

- ²⁶Kebala Tuhan, "Muyuh lun Israil miak uen ngigu' mepad kudeng lun mano luk kikem, ieh ineh amung muyuh, do' raca', pengulu, imam, idi nabi.
- ²⁷Amung muyuh luk pebala inan kayuh, 'Iko tamanku,' idi luk pebala inan batu, 'Iko tinanku,' miak uen ngigu'. Ini miak mangun ngaceku muyuh neteketed rat Negku, idi na lumi Negku. Iamo' kareb muyuh inan susa', muyuh mutuh Negku amé' ngulun nemuyuh.
- ²⁸"Iapehké amung allah luk inau' midi? Kareb iko inan susa', nima' nedeh ngulun namu, kudeng mo' ideh miak! O Yahuda, allahmu mepad kinula' bawangmu.
- ²⁹Ui ini Tuhan luk ngitun, anunké luk inan muyuh dat Negku. Amung muyuh pian metueh rat Negku.
- ³⁰Ui nengukum nemuyuh, iamo' na ulekneh, ngaceku muyuh na pian badén. Muyuh nengaté nabi muyuh, mepad kudeng balang luk mesangit.
- ³¹Do' amung muyuh ninger do'-do' luk belénKu, O Israil, inanké Ui mepad kudeng su luk ali-ali, idi kudeng bawang luk inan luk katot kuan muyuh? O pupuKu, ngudeh muyuh mala nemuyuh sikal nganau' luk pian muyuh, idi muyuh na sikal amé' Negku?
- ³²Miakké seburur decur luk paweh ngayung ku kuyu' luk dat? Idi miakké seburur anak adi' decur mekelupan banéneh? Iamo' pupuKu megéi' mekelupan Negku.
- ³³Iko mepad kudeng decur luk nakap deléi, pad decur luk mesawa' pana' nginud lawému.
- ³⁴Kuyu'mu maput ku dara' lemulun luk masi' luk na mesala' idi luk na nemano binawehmu. "Iamo' iko mala,
- ³⁵'Ui na mesala'; kali' rungen Tuhan na museh negku.' Iamo' Ui ini Tuhan miak ngukum namu, ngaceku iko mala namu na mesala'.

³⁶Ngudeh muyuh malé misu' terawé? Kudeng bawang Masir ngedengan namu, kali' rungen iko uenneh ngigu', mepad kudeng bawang Asur nengigu' namu atun.

³⁷Idi iko pana' migu' kareb iko lemubed rat bawang Masir teh. Ui ini Tuhan luk pangeh nenala' luk inanmu merapat; idi na ideh miak nguit luk do' kuanmu."

Yeremia 3

¹Kebala Tuhan, "Kudeng seburur deléi ngelegkan awanneh, pad decur ineh buro idi lapen deléi baken, idi na ieh miak ngalap neneh baruh peh. Ngaceku kekamen luk kudeng ineh ngelutak bawang. O Israil, iko pangeh nengalap mula' awan, iamo' nekini iko pian lemubed amé' Negku!

²Tukag iko nier luun anid-anid pegkung luk inanmu nepasét. Iko nenganét deléi iring dalan, mepad kudeng lun Arab luk ngabang lemulun déi' su luk ali-ali. Iko pangeh nengelutak bawang ku kekamenmu luk dat.

³Ini punneh Ui na maré udan kareb muyuh nganau' lati'. Ayumu pana' mepad kudeng decur luk mesawa', idi iko na migu'.

⁴"Idi nekini iko neten Negku tamanmu, idi iko mala Negku mawa namu ratmu isuut.

⁵Idi teh iko mala Negku na museh namu raked-raked! O Israil, sagan pana' balamu kudeng ineh iamo' iko pangeh nenganau' luk pelaba dat."

⁶Kareb imet Raca' Yosia, idi Tuhan nepebala negku, kebalaNeh, "Yeremia, pangeh iko nenier luk inau' Israil, decur luk na lutep ineh? Ieh iné' inan anid-anid pegkung, idi iné' liang anid-anid kayuh luk mebata' idi pasét.

⁷Idi Ui ini Tuhan nengerawé, sagan pana' ieh nenganau' luk kudeng ineh, miak teh ieh lemubed amé' Negku, iamo' na ieh pian, idi kinanakneh Yahuda luk na lutep pana' nekali' amung ini.

⁸Idi teh Yahuda nekali' Negku nengelegkan Israil idi nengecuk neneh buro, ngaceku ieh pangeh nelemubed rat Negku idi mangun ku decur luk mesawa'.

Iamo' Yahuda, kinanak Israil luk na lutep, na mileh matot. Ieh pana' mangun ku decur luk mesawa',

⁹Idi na migu' teh. Idi teh ieh nengelutak bawang, ngaceku ieh nepasét kareb ieh sembayang inan batu idi kayuh.

¹⁰Pangeh ineh Yahuda, kinanak Israil luk na lutep, nesiayu lemubed amé' Negku. Iamo' na ieh nelemubed dengan niatneh luk matu. Ui ini Tuhan luk pebala namu.”

¹¹Idi kebala Tuhan negku, "Sagan pana' Israil neteketed rat Negku, ieh meluun do' rat ni Yahuda luk na lutep.”

¹²Kebala Tuhan negku, "Yeremia, do' iko amé' pa tinueh busat aco idi mada' ni Israil kudeng ini, 'O Israil luk na lutep, do' lemubed amé' Negku. Na Ui museh namu raked-raked, ngaceku Ui méi' namu.

¹³Do' iko mala namu lun mesala' idi nengelaba bala Tuhan Allahmu. Do' iko ngamo iko pangeh mawa inan allah baken liang anid-anid kayuh luk mebata', idi ngamo namu na nemaya' balaKu. Ui ini Tuhan luk pebala namu.

¹⁴" 'O pupu luk na lutep, do' muyuh lemubed amé' Negku, ngaceku Ui ini Tuhan muyuh. Ui miak ngalap seburur muyuh rat anid bawang, idi dueh burur ratnan anid pupu, idi Ui miak nguit nemuyuh lemubed amé' Pegkung Sion.

¹⁵Idi Ui miak maré nelun rayeh luk maya' Negku ngimet nemuyuh dengan ilehdeh.

¹⁶Kareb muyuh amé' mula' bang bawang ineh, na lun pian pebala ratnan Pati' Pejani' Tuhan, idi na ngerawé ineh, idi na pian nganau' sebuleng baruh teh.

¹⁷Bang kareb ineh Yerusalim miak tetanen kerusi Tuhan, idi amung pupu miak mepamung ieneh dengan ngadanKu. Idi ideh pana' na nganau' luk dat, maya' pian niatdeh luk metueh.

¹⁸Idi Israil miak perurum dengan Yahuda, idi didueh miak pebaya' ratnan bawang luk inandeh tudo luk pa tinueh busat aco amé' tana' luk biré kuan tepun muyuh luk mangun ku babpat muyuh raked-raked.' “

¹⁹Kebala Tuhan, "O Israil, Ui pangeh nengerawé namu mangun ku anakKu, pad Ui miak maré tana' luk do' kuanmu, luk meluun do' bang tana' ini. Ui nengerawé iko neten Negku Tamanmu idi na lemubed rat Negku baruh peh.

²⁰Iamo' iko mepad kudeng decur luk na lutep inan awanneh, kudeng ineh teh iko na lutep Negku. Ui ini Tuhan luk pebala namu.”

²¹Idi inan tangi' déi' luun pegkung; ieh ineh tangi' lun Israil mutuh pedengan ratnan Tuhan, ngaceku ideh mesala' idi nekelupan Tuhan Allahdeh.

²²O amung muyuh luk nenecan Tuhan, do' muyuh lemubed amé' matun Neneh. Ieh miak ngedo' nemuyuh, idi nganau' nemuyuh lutep. Kebala muyuh, "Mo, kai amé' inan Tuhan, ngaceku Ieh ineh Tuhan Allah kai.

²³Ngaceku na ulekneh kai sembayang dengan lun luk na manu déi' luun pegkung. Iamo' Tuhan Allah tau mo' luk miak ngulun nelun Israil.

²⁴Amung binaweh idi aya' luk ilap taman kai dengan anakdeh sebuleng pana' nabud, ngaceku kai nesembayang inan Baal rat isuut.

²⁵Do' tau tudo idi nima' igu' tau ngelinged netau. Ngaceku tau idi taman tau pangeh nenganau' sala' pa kiung Tuhan Allah tau rat isuut, idi tau na nemaya' balaNeh."

Yeremia 4

¹Kebala Tuhan, "O lun Israil, kudeng muyuh lemubed ratnan Baal, do' amé' Negku, idi nala' amung akang luk inanKu megateh, idi lutep maya' Negku,

²idi muyuh miak pebulung ku ngadanKu dengan niat luk mesiri idi luk matu. Amung pupu miak ngubur Negku idi mutuh Negku ngeperuan nedeh.”

³Kebala Tuhan kuan lun Yahuda idi lun Yerusalim, "Ngukat tana' luk na inukat muyuh; idi aleg nibu ilung muyuh arang tabpa'.

⁴Aleg mekelupan jani' muyuh Negku, luk Tuhan muyuh, idi maré amung niat muyuh Negku, O muyuh lun Yahuda idi lun Yerusalim, pad usehKu na ngeseb nemuyuh mepad kudeng apui ngaceku dat luk pangeh inau' muyuh. Ngaceku seburur pana' na miak ngilep apui ineh.”

⁵Nateg tawak muyuh, anid-anid bawang! Idi nawar dengan rayeh arod! Ngecuk nelun Yahuda buro amé' bawang luk meraben libung, idi lun Yerusalim buro amé' Pegkung Sion.

⁶Do' mada' dalam amé' Pegkung Sion. Buro miket! Aleg ngesidan! Ngaceku Tuhan ngacing aceh susa' luk rayeh, rat pa tinueh busat aco.

⁷Aceh balang pangeh neremuat rat bang lubangneh, idi lun luk ngusag amung bawang pangeh nenalan. Ieh nacing rat bawangneh, pian ngusag bawang Yahuda. Idi amung bawang ineh miak uen ngusag pad seburur pana' nateh luk ketecan.

⁸Do' muyuh nacung idi temido, ngaceku Tuhan na ugka' museh nelun Yahuda.

⁹Kebala Tuhan, "Kareb ineh amung raca' idi lun rayeh miak matot; idi lun imam miak megagap, idi amung nabi miak nginawa.”

¹⁰Idi keburiku, "O Tuhan Allah, Iko pangeh nenaluk nelun Yerusalim! KebalaMu, 'Na luk idi bunu' miak macing,' iamo' nekini inan bunu' macing nedeh.”

¹¹Muci lun Yerusalim miak ninger bala ratnan aceh bui luk melau' macing rat su luk ali-ali idi ngedereh pupu Tuhan. Bui ineh baken ieh macing malid nedeh mepad kudeng padé.

¹²Ngaceku bui luk duken Tuhan pelaba tueh. Idi Tuhan sebuleng luk maré kali' ratnan kudeng apeh Ieh miak ngukum pupuNeh.

¹³Siruh, bunu' tau macing mepad kudeng laput, idi kerétaneh mepad kudeng libuleh, kudaneh meluun awer ratnan kanui. Adui! Maté tau!

¹⁴O Yerusalim, maru' sala' luk bang niatmu, pad iko miak uen ngulun. Tuda' io iko ngerawé luk dat baruh teh?

¹⁵Idi inan bala luk dat rat bawang Dan idi rat Pegkung Epraim.

¹⁶Ideh nengecuk mada' amung pupu idi Yerusalim teh, ratnan bunu' luk macing rat bawang mado. Ideh ineh ngitang ngedat amung bawang Yahuda.

¹⁷Ideh miak ngelibut Yerusalim, ngaceku pupu Yahuda sikal metueh ratnan Tuhan. Tuhan pangeh nepebala.

¹⁸O Yahuda, iko luk nengedat bururmu sebuleng, ngaceku lawému idi kekamenmu luk dat. Sala'mu luk nengacing ét ini; idi ieh luk nenebpek niatmu.

¹⁹Adui, pelaba bura' étku! Idi niatku pelaba gegker! Na ui tuman pirud, ngaceku ui ninger uni tawak idi tang lun luk pebunu'.

²⁰Pelaba ula' bunu' macing, idi ngusag amung bawang. Idi denak-denak amung lepoku netabpa, idi kibung luk ku dicing bang lepo ineh nedarak.

²¹Tuda' io ui nier bunu' ini? Idi tuda' io ui ninger uni tawak?

²²Kebala Tuhan, "PupuKu mebacé! Na ideh miti Negku. Ideh mepad kudeng anak luk dat ileh; idi ideh na mileh kali'. Ideh mileh tu-tu nganau' luk dat, iamo' na ideh mileh nganau' luk do'."

²³Kareb ui nenier tana' ini; idi na luk idi ayu idi na uang teh; idi langit na acang teh.

²⁴Idi ui nenier amung pegkung sigio, idi teh amung surud megué.

²⁵Idi teh ui nenier na lemulun ketecan idi amung suit pana' nabud neburo.

²⁶Tana' luk mebaleng ineh pangeh nisu' ku su luk ali-ali; idi amung bawang luk rayeh pangeh inusag, ngaceku useh Tuhan.

(²⁷Kebala Tuhan, "Idi amung-amung tana' miak mangun ku su luk ali-ali. Iamo' na Ui miak ngusag neneh.")

²⁸Tana' ini miak temido, idi langit mangun medacem. Ngaceku Tuhan pangeh nepebala idi na Ieh misu' terawé. Ieh pangeh nemutut ukum ini idi na misu'.

²⁹Kareb ideh kali' ria' lun luk maya' kuda idi lun luk ngimet gaman, idi amungdeh miak buro. Sebuang buro amé' bang pulung, sebuang sigapung bang lubang batu. Idi bang amung bawang rayeh ineh na lemulun peh.

³⁰O Yerusalim, iko na miak na kumin! Ngudeh iko ngayung ku luk mesia'? Ngudeh iko nganau' banému idi ngitem matehmu? Iamo' iko nganau' bururmu metaga, iamo' na ulekneh! Idi amung lun luk mawa namu atun nengelegkan namu idi pian ngaté namu.

³¹Ui neninger arod, mepad kudeng decur luk nenganak atun. Ieh ineh arod Yerusalim luk mabud niat, Ieh nenatang ticu'neh idi nepebala, "Ui pangeh inukum! Ideh pian ngaté negku!"

Yeremia 5

¹O lun Yerusalim, nakap déi' luun dalan! Idi nier muyuh do'-do'! Nakap déi' kadai! Kian inan seburur lemulun lek luk nganau' luk matu, idi luk lutep maya' jani'. Kudeng inan luk kali'mu, Tuhan miak maré do' kuan Yerusalim.

²Sagan tu pana' iko pebulung ku ngadan Tuhan, iko naluk mo'.

³Kali' rungen Tuhan nakap luk matu. Ieh nenecat namu, iamo' iko na kali' étneh. Idi Ieh nenebpek namu, iamo' iko na pian badén. Iko metueh niat idi ara' necan sala'mu.

⁴Idi keterawéku, "Lemulun ini na mileh. Ideh nganau' luk mebacé, idi na kali' luk pian Tuhan.

⁵Ui miak amé' papu' nelun rayeh, idi ngitun nedeh. Kali' rungen ideh kali' luk pian Tuhan." Iamo' amungdeh ngarung lalud Tuhan, idi na maya' ukumNeh.

⁶Ini punneh aceh balang rat bang pulung miak ngaté nedeh; aceh bungalé rat su luk ali-ali miak ngerarak nedeh, idi teh aceh kuir miak semayo bang bawangdeh. Idi idé-idé luk mepai miak uendeh ngerarak ngaceku ideh mula' sala' idi megéi' teketed ratnan Allah.

⁷Kebala Tuhan, "Ngudeh Ui maré do' ratnan sala pupuKu? Ngaceku amung anakdeh nenecan Negku, idi nepebulung ku allah luk na matu. Ui nemaman pupuKu pad ideh mebor, iamo' ideh pasét idi nakap decur luk mesawa'.

⁸Ideh mepad kudeng kuda luk melamu luk melili ku tineh baken.

⁹Petulu Ui ngukum nedeh ngaceku amung ini. Petulu Ui ngua' sala' aceh pupu luk kudeng ineh.

¹⁰Ui miak ngecuk bunu'deh nebpeng anggurdeh, iamo' na miak ngaté nedeh amung. Idi Ui ngecuk nedeh nangal angkatdeh, ngaceku ineh baken Ui kuan.

¹¹Lun Israil idi lun Yahuda pangeh nemasui Negku. Ui ini Tuhan, pangeh nepebala."

¹²Pupu Tuhan pangeh nengalum Neneh. Keburi'deh, "Na Ieh sikal ngukum netau. Na tau miak medereh. Na miak inan bunu' idi na tau miak melau."

¹³⁻¹⁴Keburi'deh, "Amung nabi mepad kudeng bui, idi baladeh baken ratnan Tuhan." Idi kebala Tuhan luk Melalud negku, "O Yeremia, Ui mada' namu ratnan luk miak mangun kuan pupu ini ngaceku baladeh ini. Ui miak nganau' balaKu mepad kudeng apui bang tangmu. Idi lemulun ini mepad kudeng kayuh luk sabpen ku apui ineh."

¹⁵O lun Israil, Tuhan miak nguit aceh pupu rat mado luk munu' nemuyuh. Ieh ineh aceh pupu luk metueh rat mon, idi muyuh na tupu kali' buri'deh.

¹⁶Lun luk ngimet binor mileh ngaté, amungdeh ineh lun mesangit.

¹⁷Idi ideh ineh miak ngabud padé muyuh, dengan anak muyuh luk deléi idi decur teh. Idi ideh ngabud aya' muyuh, dengan bua' anggur idi bua' gita'. Amung bawang muyuh luk linibung luk inan muyuh merapet miak ruen bawehdeh ngusag.

¹⁸Iamo' kebala Tuhan, "Kareb ineh pana', na Ui sikal ngaté pupuKu amung.

¹⁹O Yeremia, kareb ideh ngitun anun punneh Ui nenganau' kudeng ineh, do' mada' nedeh, kebalamu, 'Mepad kudeng muyuh nenecan Tuhan idi mangun ku demulun allah baken bang bawang muyuh, kudeng ineh teh muyuh miak

mangun ku demulun pupu baken bang aceh bawang luk baken muyuh kuan.'

“

²⁰Kebala Tuhan, "Do' mada' inul Yakub idi pupu Yahuda:

²¹Ngerawé do'-do', O muyuh lun mebacé, luk inan mateh idi na miak nier, idi luk inan lalid idi na miak ninger.

²²Ui ini Tuhan; ngudeh muyuh na matot Negku, idi na megegker pa kiungKu? Ui nenganau' bada mangun ku lakan abpa' rayeh, aceh lakan luk meruked luk na miak labén. Sagan pana' mula' ribut, idi meberi, abpa' rayeh ineh na miak lemaba lakan ineh.

²³Iamo' muyuh ini metueh niat idi sikal metueh rat Negku, pad muyuh numai idi nenecan Negku.

²⁴Idi na muyuh nepebala bang niat muyuh, 'Do' tau matot inan Tuhan Allah tau, luk maré udan maya' karebneh, ieh ineh udan luk pun-pun idi luk mucu pana', luk maré aceh kareb inan tau ngeranéh anid lak.'

²⁵Ngaceku sala' idi dat muyuh, idi punneh muyuh pitad ratnan luk do' ini.

²⁶"Lemulun luk dat kekamen tudo arang pupuKu; ideh mepad kudeng lemulun luk nganau' ukung suit iamo' setuneh ideh pian ngakem lemulun.

²⁷Mepad kudeng lun luk ngakem suit manu' belalungdeh ku suit, kudeng ineh teh ideh manu' ruma'deh ku binaweh luk pinodeh. Ngaceku ineh, idi punneh ideh mangun ku lun do',

²⁸idi teh ideh pelaba lamu idi mebor. Idi teh ideh na ugka' nganau' luk dat; na ideh ngedengan anak maté bang besara'deh; idi na ideh nganau' luk mesiri kuan lun luk masi'.

²⁹"Iamo' Ui miak ngukum nedeh ngaceku kekamen ini. Ui miak ngua' sala' pupu ini. Ui ini Tuhan pangeh nepebala.

³⁰Inan sala' luk pelaba dat bang bawang ini.

³¹Idi amung-amung nabi mebalih; imam-imam merapat inan ilehdeh sebuleng; idi ini luk petulu dengan pinian pupuKu. Idi anunké ruendeh kareb kekipedneh?"

Yeremia 6

¹O lun Beniamin, do' muyuh buro pad na maté! Buro rat Yerusalim! Amé' nateg tawak déi' Tekoa, idi mada' nedeh déi' Bait Kerim, ngaceku susa' idi até macing rat pa tinueh busat aco.

²O lun Sion, muyuh mepad kudeng aceh laman luk pelaba do';

³iamo' raca'-raca' miak lupu su ineh dengan bawehdeh, libut-libut muyuh pad ideh ngaro luk piandeh.

⁴Idi kebaladeh, "Do' tau temina' ngerieng Yerusalim kareb muned aco. Idi kebaladeh teh, "Ini pangeh nepelaba peh, ngaceku lélé malem aco.

⁵Do' tau temina' malem ini, idi ngusag amung libung Yerusalim."

⁶Tuhan luk Melalud nengecuk nebpeng amung-amung kayuh, pad tau nganau' aceh dalam luk medita', pelé tau miak semuet bang Yerusalim. KebalaNeh, "Ui pian ngukum bawang ini, ngaceku ieh mepanu' ku sala'.

⁷Mepad kudeng bued megéi' inan abpa', kudeng ineh teh Yerusalim megéi' inan sala'. Idi Ui ninger ria' lun luk pepaté bang bawang ineh; idi Ui nier ét idi urat teh.

⁸O lun Yerusalim, do' muyuh ninger bada'Ku, pad Ui na necan nemuyuh, pelé Ui na ngisu' bawang muyuh mangun ku su luk ali-ali, luk na inan lemulun tudo."

⁹Kebala Tuhan luk Melalud negku, "Amung lemulun luk bang bawang Israil miak lapen amung mepad kudeng bua' anggur luk pinureg pad na luk idi ketecan. Ngaceku ineh do' iko ngulun amung luk miak uen ngulun, mepad kudeng lun luk ngasa' anggur ngalap bua'neh."

¹⁰Idi kebala Yeremia, "Idé luk miak ninger balaku, kareb ui pebala idi mada' nedeh? Ideh mapen laliddeh ara' ninger balaMu; ideh situnga ku balaMu.

- 11**O Tuhan ui mepanu' ku usehMu pad ui na miak tuman." Idi kebala Tuhan negku, "Ngeruat usehKu kuan anak-anak luk déi' iring dalan, idi bang amung tebubpun anak adi' deléi. Dingdiru miak tebanen, idi lun mengered pana'.
- 12**Ruma'deh miak barén kuan lun baken, kudeng ineh teh lati'deh idi decurdeh. Ui miak ngukum pupu luk bang bawang ini.
- 13**Idi amung-amung lun do' idi lun dat pana' nakap usin dengan naluk. Nabi-nabi idi imam pana' nateh mesiri kekamen.
- 14**Idi urat pupuKu uendeh ngubat, ayu-ayuneh na ieh mebura'. Keburi'deh, 'Do', do', 'iamo' na ieh do'.
- 15**Inanké ideh migu' ngaceku kekamendeh luk inanKu megateh? Na tu-tu ideh mileh migu'. Ngaceku ineh ideh miak mebpeh mepad kudeng lun baken. Kareb Ui ngukum nedeh, miak ideh mabud maté. Ui ini Tuhan pangéh nepebala.”
- 16**Kebala Tuhan kuan pupuNeh, "Tupéd déi' lisangen dalan idi nier; ngitun dalan luk meruked, ieh ineh dalan luk meluun do'. Maya' dalan ineh, pad muyuh do' udeng." Iamo' keburideh, "Na kai pian maya' dalan ineh.”
- 17**Tuhan nengeletép tuda'-tuda' lun matar bawang, pad ideh miak ninger uni serupit. Iamo' kebala lun Israil, "Na kai pian ninger!”
- 18**Idi kebala Tuhan, "O amung pupu, do' muyuh ninger, luk miak mangun kuan pupuKu.
- 19**O amung uang tana' ini do' ninger! Ui miak ngusag pupu ini petulu maya' kekamendeh, ngaceku ideh na nemaya' balaKu idi nengarung bada'Ku.
- 20**Na Ui pian ku umau luk do' buen luk itendeh rat bawang Siba, idi amung-amung luk do' buen rat bawang mado. Idi teh Ui na pian ngalap luk baréndeh. Idi na Ui mawang niat ku luk sabpen luun bubpundeh.
- 21**Ngaceku ineh, Ui ini Tuhan miak nganau' pupu ini metebaceng, pad taman idi anak pana' maté, lun rorum idi lun dengandeh teh.”

²²Kebala Tuhan, "Inan aceh pupu luk macing rat pa tinueh busat aco, ieh ineh rat aceh bawang rayeh luk temina' amé' pebunu'.

²³Idi ideh nguit gamen idi pelapetdeh; ideh ineh lun mesangit luk na mileh méi'. Unideh mepad kudeng beri abpa' rayeh kareb ideh nalan maya' kudadeh. Ideh temina' amé' munu' nelun Sion."

²⁴"Tau pangeh neninger bala," keburu' lun Yerusalim, "iamo' ticu' tau melaya'; tau mebura' ét, mepad kudeng decur luk nenganak.

²⁵Na tau mekuu' mepai, ngaceku bunu' tau pangeh netemina' ku repapehdeh, idi luk katot ngelibut netau."

²⁶Kebala Tuhan kuan pupuNeh, "Do' muyuh nacung idi telubid luun abuh. Idi temido mepad kudeng muyuh temido, kareb anak buleng muyuh luk deléi maté. Bunu' luk sikal ngaté nemuyuh miak macing denak-denak.

²⁷O Yeremia, do' iko nutun pupuKu mepad kudeng muyuh nutun perak pad iko kali' kekamendeh

²⁸Idi amung-amungdeh metueh niat idi na maya' bala idi ngatum buri'. Ideh metueh mepad kudeng tekaling idi belawan. Idi amung terawédeh pana' tekilu'.

²⁹Sagan tu pana' tetel pelaba lau', amung luk dat ineh na miak mederuno. Kudeng ineh teh na ulekneh nutun nelun Israil teh, ngaceku lun luk dat na miak mabud talan.

³⁰Ideh ineh miak tetanen pirak luk pangeh tila' ngaceku Ui ini Tuhan pangeh nenala' nedeh."

Yeremia 7

¹⁻³Tuhan nengecuk ni Yeremia amé' munung tanga' Ruma' Allah su luk inan lun Yahuda semuet kareb amé' sembayang. Idi Ieh nengecuk neneh tuped ieneh, idi mada' luk belén Tuhan, Allah lun Israil luk Melalud nedeh, "Ngisu' lawé muyuh idi kekamen muyuh, pad Ui maré nemuyuh lutep tudo ieni.

⁴Aleg manu ku bala luk mebalih ineh, 'Ini Ruma' Tuhan, ini Ruma' Tuhan, ini Ruma' Tuhan!'

⁵"Ngisu' lawé muyuh idi kekamen muyuh. Do' maya' luk mesiri seburur dengan seburur.

⁶Aleg muyok nelun sakai, anak maté idi tinula'. Aleg ngaté lemulun luk na mesala' bang bawang ini luk meligan. Ugka' ratnan sembayang inan allah baken, ngaceku dalan ineh luk ngaté nemuyuh.

⁷Pad Ui miak maré nemuyuh lutep tudo bang bawang ini luk biréKu kuan tepun muyuh ku aceh babpat luk meruked.

⁸"Siruh, muyuh merapet ku akang luk na ulek.

⁹Muyuh mano, ngaté lemulun, pasét, mebalih dengan pebulung, maré luk sabpen kuan Baal, idi sembayang inan allah baken luk na muyuh kali'.

¹⁰Muyuh nganau' luk inanKu megateh, idi muyuh tuped pa kiungKu, bang ruma'Ku sebuleng, idi pebala, 'Tau na inan susa!'

¹¹Inanké muyuh ngerawé ruma'Ku ini inan lun luk mano sigapung? Ui kali' kekamen muyuh. Ui ini Tuhan pangeh nepebala.

¹²Amé' déi' Silo, luk pinili'Ku pun-pun inan muyuh sembayang Negku, idi nier anun luk inau'Ku ngaceku amung dat pupuKu Israil.

¹³Muyuh pangeh nenganau' amung-amung sala' luk pangeh bibpengKu. Sagan pana' Ui megéi' pebala nemuyuh iamo' muyuh ara' ninger, idi kareb Ui nawar nemuyuh, muyuh na sikal ngor balaKu. Ui ini Tuhan pangeh nepebala.

¹⁴Ngaceku ineh Ui miak nganau' kuan ruma'Ku ini luk inan muyuh merapet luk inau'Ku déi' Silo. Ui miak nganau' kuan ruma' ini luk biréKu kuan muyuh idi teh tepun muyuh, mepad kudeng luk pangeh inau'Ku déi' Silo.

¹⁵Ui miak masut nemuyuh rat pa kiungKu, mepad kudeng luk inau'Ku kuan pupu muyuh lun Epraim."

¹⁶Kebala Tuhan, "O Yeremia, aleg iko sembayang kuan pupu ini. Aleg iko mutuh kuandeh, ngaceku Ui na ninger sembayangmu.

- 17**Naké iko nier luk ruendeh déi' bang amung bawang Yahuda idi déi' iring dalam Yerusalim?
- 18**Anak-anak ngamung kayuh apui, lun deléi ngapui, idi decurdeh nguel banak ruen ku pinaram kuan akang decur luk titendeh raca' decur déi' langit. Idi teh ideh ngutang baré luk rupen kuan allah baken, pad ideh ngedereh Negku.
- 19**Matuké Ui luk uendeh ngedereh? Na, Ui pebala, ideh ngedereh bururdeh sebuleng, idi ngigu' bururdeh sebuleng.
- 20**Ngaceku ineh, Ui ini Tuhan Allah miak ngutang usehKu bang bawang ini. Ui ngutang useh ineh luun lemulun idi pung-pung pana', luun kayuh idi lati' pana'. UsehKu mepad kudeng apui luk na miak milep.
- 21**"O pupuKu, meluun do' muyuh sebuleng kuman baré-baré luk petulu sabpen luun bubpun dengan amung baré luk miak kenen muyuh. Ini luk bilaKu, Tuhan luk Melalud, Allah lun Israil.
- 22**Kareb Ui nenguit tepun muyuh remuat rat bang bawang Masir, na Ui nemaré ukum ratnan baré luk sabpen idi baré luk baken-baken.
- 23**Iamo' Ui nengecuk nedeh maya' balaKu, pad Ui mangun ku Allahdeh, idi ideh mangun ku pupuKu. Idi Ui nengecuk nedeh maya' luk bilaKu, pad ideh do' udeng.
- 24**Iamo' na ideh neninger balaKu. Iamo' ideh maya' terawé niatdeh luk dat idi metueh, idi iuk-iuk ideh amé' dat tu-tu.
- 25**Rat kareb tepun muyuh neremuat rat bang bawang Masir macing aco sini, na Ui ugka' maré demulunKu lun nabi.
- 26**Iamo' na muyuh neninger balaKu. Iamo' muyuh metueh niat idi meluun dat ratnan tepun muyuh.
- 27**"Ngaceku ineh, O Yeremia, iko miak pebala luk bilaKu ini kuandeh; iamo' na ideh pian ninger balamu ineh. Iko miak nawar nedeh, iamo' na ideh pian ngor balamu.

²⁸Do' iko mada' nedeh, 'Muyuh aceh pupu luk na maya' Tuhan Allahdeh idi luk na pian badén. Na luk idi lemulun luk lutep maya' jani'. Idi teh na ideh pegayam ratnan luk kudeng ineh.

²⁹" 'O muyuh lun Yerusalim, do' muyuh temido, ngiki abpuk muyuh idi nala' neneh. Idi nganau' aceh tido luun surud, ngaceku Ui ini Tuhan pangeh nenala' pupu ini luk inanKu megateh.'

³⁰"Pupu Yahuda pangeh nenganau' luk dat. Ideh pangeh nenganau' akangdeh luk inanKu megateh bang ruma'Ku idi nengelutak ruma' ineh. Ui ini Tuhan pangeh nepebala.

³¹Ideh pangeh nemudut aceh bubpun luk titen Topet déi' Ruan Hinom, pad ideh maré anakdeh luk deléi idi decur ku baré luk sabpen. Ieh ineh luk na tu-tu icukKu idi luk na tirawéKu pana'.

³²Idi mucu su ineh na miak tetanen Topet idi Ruan Hinom, iamo' su ineh tetanen Ruan Até ngaceku ideh miak nanem lemulun déi' Topet, pad na luk idi tana' ketecan peh.

³³Idi butung-butung ineh mangun ku akan suit idi pung-pung luk meliputiut pana', ngaceku na luk idi lemulun miak ngusu nedeh.

³⁴Tana' ineh mangun ku su luk ali-ali. Idi déi' amung bawang Yahuda idi déi' iring dalan Yerusalim Ui miak ngagka' arod lemulun luk mawang niat idi do' ria', idi arod decur idi deléi luk sikal ngaweh.

Yeremia 8

¹"Idi kareb ineh amung tulang raca' idi lun rayeh Yahuda, dengan amung tulang imam-imam idi nabi, idi teh tulang amung lun baken luk tudo déi' Yerusalim, miak lapen rat bang tanemdeh. Ui ini Tuhan pangeh nepebala.

²Ideh miak uen ngelalad pa kiung aco, bulan, idi gituen luk inandeh mawa idi sembayang, luk uendeh ngitun idi maya'. Idi amung tulang ineh na miak uen ngamung idi tinamen, iamo' amung ineh mangun ku rimuk tana'.

³Idi amung lemulun luk ketecan ratnan inul pupu luk dat ini, luk bang bawang su luk inanKu nengusu nedeh, pian maté. Ui ini, Tuhan luk Melalud, pangeh nepebala.

⁴O Yeremia, Ui ini Tuhan pebala kuan pupuKu: Miakké lemulun mebpeh, idi na tumui teh? Miakké lemulun meraruh, idi na lemubed teh?

⁵O pupuKu, ngudeh muyuh megéi' teketed rat Negku idi na uren? Muyuh merapet ku akang muyuh, idi ara' lumi Negku.

⁶Ui pangeh neninger do'-do', iamo' na muyuh pebala' luk matu. Seburur pana' rat arang muyuh nateh nenginuud ngaceku datneh. Seburur pana' nateh nengitun, 'Anun sala'ku?' Anid-anid burur muyuh lutep maya' pianneh sebuleng, mepad kudeng kuda luk upun amé' matun bunu'.

⁷Manuuk luk déi' langit pana' kali' karebneh temulud amé' bawang baken, kudeng ineh teh sukur, pelelueh, idi lal lakui. Iamo' muyuh luk pupuKu na kali' ukumKu nemuyuh.

⁸Kudeng apehké muyuh pebala, 'Kai mileh, kai inan ukum Tuhan?' Siruh, guru-guru Ukum pangeh nengisu' ukum ineh.

⁹Lun luk mileh arang muyuh uen ngigu', ngaceku balihdeh pangeh ginala'. Ideh pangeh nengarung balaKu idi anunké ilehdeh nekini?

¹⁰Ngaceku ineh Ui miak maré decurdeh kuan deléi baken, idi lati'deh pana' kuan lun baken. Amung-amung lemulun, ieh ineh lun do' idi lun dat teh nakap usin dengan naluk. Nabi-nabi idi imam pana' nateh mesiri kekamen.

¹¹Idi urat pupuKu uendeh ngubat ayu-ayuneh na ieh mebura', kebaladeh, 'Do', do', iamo' na ieh do'.

¹²O pupuKu, inanké muyuh migu' ngaceku kekamen muyuh luk inanKu megateh? Na tu-tu muyuh mileh migu'! Ngaceku ineh muyuh miak mebpeh mepad kudeng lun baken. Kareb Ui ngukum nemuyuh, miak muyuh mabud maté. Ui ini Tuhan pangeh nepebala.

13"Ui ini Tuhan miak ngaté amung pupuKu. Ideh mepad kudeng anggur luk na kebua', idi gita' pana', idi don-don pana' mekarang. Ngaceku ineh Ui miak ngua' kuandeh maya' kekamendeh.

14"Ngudeh tau ungen?" Kebala pupu Allah, "Do' tau miket amé' bawang luk linibung pad maté déi'. Tuhan Allah tau pangeh nemaré ukum maté kuan tau. Ieh pangeh nemaré abpa' luk megalih rupen tau, ngaceku tau nenganau' sala' pa kiungNeh.

15Tau pian do' udeng, iamo' na ulekneh, tau pian uen ngedo', iamo' tot pangeh nacing netau.

16Tau ninger uni kuda bunu' ineh, kareb ideh iné' pa tinueh busat aco macing bawang Dan. Kareb kudadeh muni amung tana' meruyuh. Ideh pian ngaro bawang tau dengan amung uangneh, idi ngusag bawang rayeh dengan amung lemulun teh."

17Kebala Tuhan, "Matar do'-do'! Ui miak maré menipeh arang muyuh, ieh ineh menipeh luk megalih luk na miak inan marot, idi ideh miak nicuk nemuyuh."

18Dat niatku na miak uen ngedo'. Bang niatku mét.

19Ninger muyuh lun Israil! Aput tana' ui ninger pupuku ngitang, "Idiké Tuhan déi' Sion? Idiké Raca' Sion teh?" Idi Tuhan, raca'deh ngor baladeh, "Ngudeh muyuh nganau' Negku museh ku akang muyuh, idi allah pupu baken luk na lalud?"

20Idi pupu ineh ngitang, "Pangeh rikan, pangeh ngeranah, iamo' nateh tau nepuit ratnan bunu' tau."

21Niatku medereh ngaceku dereh pupuku. Ui temido idi pelaba dat niat.

22Naké ubat déi' Giliad? Naké lun luk mileh ngubat déi'? Ngudehké ét pupuku nateh nedo'?

Yeremia 9

- ¹Kudeng uluhku bued abpa', idi matehku mepanu' ku abpa' mateh, ui miak nangi' tebaco kedangan kuan pupuku luk pangeh pinaté.
- ²Meluun do' ui tudo su luk ali-ali, pad ui miak mepatad ratnan pupuku. Ngaceku ideh na lutep maya' jani'deh. Ideh aceh rorum luk masui lun dengandeh.
- ³Ideh megéi' mebalih; idi baken luk matu iamo' balih luk ngimet tana' ini. Kebala Tuhan, "PupuKu na ugka' nganau' luk dat, idi na ideh pian maya' Negku."
- ⁴Do' anid burur matar lun rorumneh, ngaceku na miak merapet ku kinanakmu; ngaceku anid kinanakmu naluk kudeng Yakub, idi lun rorum ngedat lun rorumneh.
- ⁵Amung-amungdeh naluk lun rorumdeh, idi seburur pana' nateh mala luk matu. Dila'deh pekalai mebalih, ideh mesala', iamo' na ideh pian teketed ratnan sala'deh.
- ⁶Ideh megéi' nganau' luk dat, idi megéi' naluk teh. Idi kebala Tuhan, "PupuKu na pian maya' Negku."
- ⁷Ngaceku ineh kebala Tuhan luk Meluun Melalud, "Ui pian nutun pupuKu mepad kudeng pirak. PupuKu pangeh nenganau' luk dat — kudanKu teh ideh?"
- ⁸Dila'deh mepad kudeng langan luk inan parir. idi tangdeh naluk nelun baken. Amung-amungdeh ngeruat bala luk do' kuan lun denganneh, iamo' setuneh ideh nganau' abpung kuandeh.
- ⁹Petuluké Ui ngukum nedeh ngaceku amung ini? Petuluké Ui ngua' sala' aceh pupu luk kudeng ineh? Ui ini Tuhan pangeh nepebala."
- ¹⁰Keburi' Yeremia, "Ui miak nangi' kuan pegkung idi laman, ngaceku ideh pangeh netekering, idi na lemulun maya' ineh. Idi uni sapi' pana' nateh luk pedingeren su ineh. Amung suit idi pung luk meliputi pana' pangeh neburo."

¹¹Kebala Tuhan, "Ui miak nganau' Yerusalim mangun ku ruma' tican, su luk inan galau tudo. Amung bawang Yahuda miak mangun ku su luk ali-ali idi na lemulun."

¹²Idi Yeremia nengitun, "O Tuhan, ngudeh bawang ini tican idi metekering mepad kudeng su luk ali-ali, idi lemulun pana' nateh maya' ineh? Idé luk mileh pad ieh kali' ilungneh? Idé luk bida'Mu pad ieh miak mada' nelun baken?"

¹³Idi Tuhan nengor bala Yeremia, "Amung ini pangeh nangun ngaceku pupuKu na pian maya' bada'Ku. Na ideh maya' Negku, idi na ideh nenganau' luk icukKu nedeh.

¹⁴Iamo' ideh metueh niat idi nesembayang inan akang Baal maya' luk bida' tamandeh.

¹⁵Ngaceku ineh ninger balaKu, Ui ini Tuhan luk Melalud, Allah lun Israil miak maré luk mepét kenen pupuKu, idi abpa' luk megalih pana' rupendeh.

¹⁶Ui miak ngatad nedeh amé' arang pupu baken luk inandeh idi tepundeh na pekalai. Idi Ui miak ngecuk tuda'-tuda' baweh munu' nedeh pad ideh mabud maté."

¹⁷Kebala Tuhan luk Melalud, "Ngerawé! Do' nawar lemulun luk mileh temido, ieh ineh decur luk mileh temido."

¹⁸Kebala lun mula', "Ngecuk nedeh miket nganau' aceh tido kuan tau, pad abpa' mateh tau remuat, pad bibir mateh tau mebara' ngaceku ucet nangi'."

¹⁹Ninger tangi' déi' Sion, "Tau pelaba dereh, idi inigu'deh! Na miak na tau necan bawang tau; ngaceku ruma' tau pangeh inusag."

²⁰Kebala Yeremia, "O decur, do' ninger luk bila Tuhan, idi maya' balaNeh. Mada' anak muyuh luk decur pad ideh mileh nangi' idi mada' rurun muyuh pad ideh mileh temido.

²¹Até pangeh nacing maya' tabuk tau, idi pangeh nesemuet bang ruma' raca' tau, pad anak tau maté arang dalan, idi anak adi' deléi maté déi' kadai.

²²Butung lemulun miak uen ngatad mepad kudeng rimuk luk luun kabun, idi padé luk piranéh luk tican luun lati'. Ini luk icuk Tuhan miak belénku."

²³Kebala Tuhan, "Na petulu lun mileh medita' niat ngaceku ilehneh, idi lun luk metueh ngaceku tuehneh, idi lun luk mula' binaweh ngaceku binawehneh.

²⁴Kudeng seburur pian medita' niat, do' ieh medita' niat ngaceku ieh miti idi kali' Negku, ngaceku Ui ini Tuhan nganau' luk do', idi luk matu idi luk mesiri bang tana' ini. Amung ini luk pianKu. Ui ini Tuhan luk nepebala."

²⁵⁻²⁶Kebala Tuhan, "Malé karebneh macing, idi Ui miak ngukum amung lemulun luk sinunat bang bururdeh, iamo' luk na sinunat bang niatdeh: ieh ineh lun Masir, Yahuda, Edom, Amon, Moab, idi amung lun luk tudo déi' su luk ali-ali idi luk kamu' abpuk. Amung pupu ini idi amung pupu Israil nateh sinunat bang niatdeh idi na ideh maya' balaKu."

Yeremia 10

¹O lun Israil, do' ninger bala Tuhan nemuyuh.

²KebalaNeh, "Aleg nginud kekamen pupu baken, idi aleg muyuh megagap ku tanu' luk siren muyuh déi' langit, mepad kudeng pupu baken.

³Sembayang lemulun ini na ulekneh. Ideh nebpeng kayuh déi' luun pulung, idi lun luk mileh ngarit ineh,

⁴idi ngakep ineh ku amas idi pirak. Idi ideh maku' ineh ku paku', pad ieh na mebpeh.

⁵Akang ineh mepad kudeng akang luk déi' kabun bua' sukui, idi na mileh pebala. Idi ideh baben, ngaceku na ideh miak nalan. Aleg matot ku ineh: ngaceku ideh na ngurat nemuyuh, idi ideh na miak nganau' luk do' kuan muyuh,"

⁶O Tuhan, na lun luk kudeng Iko; Iko luk metueh, idi ngadanMu rayeh idi melalud.

⁷Petulu amung lemulun matot Namu, O Raca' amung pupu? Petulu Iko inan matot. Na lun luk kudeng Iko rat arang amung-amung lun luk mileh bang anid-anid bawang idi bang amung-amung imetdeh.

⁸Amung-amung lun mileh arangdeh mebacé. Miakké akang kayuh mada' nedeh ratnan anun-anun?

⁹Akangdeh kikep ku pirak rat Tarsis idi amas rat bawang Upas, ieh ineh kekamen lun luk mileh; amungdeh inayung ku kibung luk mebata' idi luk tibaruh lun luk mileh ngebaruh.

¹⁰Iamo' Tuhan ineh Allah luk matu, Allah luk mulun idi Raca' luk meruked. Kareb Ieh museh tana' meruyuh; idi amung pupu na tuman ku usehNeh.

(¹¹Do' muyuh lun Israil mada' nelun pupu baken ineh, kebala muyuh, "Amung allah luk na nenganau' tana' idi langit miak sagen. Idi ideh na miak mulun iapeh-iapeh pana' luun tana' ini.")

¹²Tuhan nemudut tana' dengan lalud idi ilehNeh; idi Ieh nemalad langit dengan ilehNeh teh.

¹³Maya' ukumNeh inan uni lalam déi' langit, idi Ieh nguit laput rat iring tana'. Ieh nganau' kilep dengan udan idi maré bui rat su inanneh.

¹⁴Amung lemulun dat ileh idi mebacé, amung lun luk mileh nganau' amas dat niat ku akangdeh, ngaceku ideh ineh allah luk mebalih, idi na mulun.

¹⁵Ideh ineh na ulek, idi petulu uen ngigu'. Ideh miak sagen kareb Tuhan macing ngukum nedeh.

¹⁶Allah Yakub baken kudeng ineh; Ieh ineh nenganau' luk amung-amung, idi Ieh nemili' Israil ku pupuNeh sebuleng. Tuhan luk Melalud, ieh ineh ngadanNeh.

¹⁷O Pupu Yerusalim, luk uen ngerieng! Nipa amung binaweh muyuh,

¹⁸ngaceku Tuhan miak nala' nemuyuh rat bang bawang ini nekini. Ieh miak munu' nemuyuh, pad muyuh mabud maté. Tuhan pangeh nepebala.

¹⁹Idi lun Yerusalim ngitang, "Pelaba bura' ét kai! Urat kai na miak mepali'. Idi kai nengerawé kai miak tuman ku ini!

²⁰Lepo kai pangeh nekusag, ngaceku amung abetdeh pangeh neputut. Anak-anak kai pangeh nenecan nekai, idi amungdeh pangeh neburo. Idi seburur pana' nateh luk ketecan luk miak mudut lepo kai teh."

²¹Kebala Yeremia, "Lun rayeh tau mebacé; ideh na mutuh kuyut ratnan Tuhan. Ini pundeh na mileh; idi pupu tau pangeh nepatad.

²²Do' muyuh ninger! Inan bala macing! Inan aceh ria' bang aceh bawang luk pa tinueh busat aco. Bawehneh miak nganau' amung bawang Yahuda mangun ku su luk ali-ali, ieh ineh su luk inan galau mulun."

²³Tuhan, ui kali' seburur lemulun na lalud miak ngimet ulunneh sebuleng, idi na kali kekipedneh.

²⁴Do' mada' nekai, O Tuhan; iamo' aleg pelaba tueh. Aleg mada' nekai dengan useh, pad kai na maté.

²⁵Do' Iko museh inan pupu luk na sembayang Namu, idi pupu luk na mutuh pedengan rat Namu. Ideh nengaté inul Yakub idi nengusag nekai, idi bawang kai teh.

Yeremia 11

¹Kebala Tuhan ni Yeremia,

²"Ninger bala pejani' ini. Do' mada' nelun Yahuda idi lun Yerusalim teh, kebalamu,

³Ui ini Tuhan Allah lun Israil, pangeh nengediman amung-amung lemulun luk na maya' bala pejani' ini.

⁴Ieh ineh pejani' luk inau'Ku kuan tepundeh, kareb Ui nenguit nedeh remuat rat bang bawang Masir, ieh ineh bawang luk mepad kudeng tetel belawan luk melau' kuandeh. Ui nengecuk nedeh maya' balaKu idi nganau' amung-amung luk icukKu nedeh. KebalaKu, kudeng ideh maya' Negku ideh miak mangun ku pupuKu idi Ui mangun ku Allahdeh.

⁵Idi Ui miak maya' jani' luk inau'Ku kuan tepundeh, idi maré kuandeh tana' luk mebaleng luk inandeh tudo nekini." Idi kebala Yeremia, "Mo, Tuhan."

⁶Idi kebala Tuhan ni Yeremia, "Amé' iko déi' amung bawang Yahuda idi amung dalam Yerusalim. Idi mada' balaKu su ineh, idi ngecuk nedeh ninger idi maya' bala pejani' ineh.

⁷Kareb Ui nenguit tepundeh remuat rat bang bawang Masir, Ui nengecuk nedeh maya' balaKu, idi Ui na ugka' mada' nedeh macing aco sini.

⁸Iamo' ideh na ninger idi maya'. Ideh lutep nganau' luk dat dengan tueh niatdeh. Ui nengecuk nedeh maya' pejani' ineh, iamo' ideh ara'. Ngaceku ineh Ui nengacing amung ukum ineh kuandeh."

⁹Idi kebala Tuhan ni Yeremia, "Amung lun Yahuda idi lun Yerusalim sikal metueh rat Negku.

¹⁰Ideh nelemubed nganau' sala' tepundeh luk ara' maya' balaKu. Ideh nesembayang inan allah baken. Lun Israil idi lun Yahuda nengelaba pejani' luk inau'Ku kuan tepundeh.

¹¹Ngaceku ineh, Ui ini Tuhan pebala nedeh, Ui miak ngukum nedeh pad ideh na mepuit. Idi kareb ideh nawar Negku mutuh pedengan, na Ui pian ninger baladeh.

¹²Idi lun Yahuda idi lun Yerusalim miak amé' mutuh pedengan ratnan amung allah luk inandeh maré baré luk sabpen. Iamo' allahdeh ineh na miak ngulun nedeh kareb ukum ini macing.

¹³Kinula' allah lun Yahuda mepad kudeng kinula' bawangdeh. Idi kinula' bubpun lun Yerusalim luk maré kuan Baal mepad kudeng kinula' dalam bawang ineh.

¹⁴O Yeremia, aleg iko sembayang mutuh kuan lemulun ini. Kareb ideh mesusa' idi nawar Negku mutuh pedengan, idi na Ui ninger baladeh."

¹⁵Kebala Tuhan, "Pupu luk inanKu mawa nganau' luk dat. Miakké ideh amé' bang ruma'Ku? Miakké ideh ngagka' susa' dengan tuda'-tuda' jani' idi baré luk sabpendeh. Miakké ideh mepuit ratnan luk kudeng ineh?"

¹⁶Atun Ui neten nedeh aceh lawa saitun luk mula' don idi mula' bua'. Iamo' nekini Ui miak ngeseb donneh idi mutul angkatneh dengan uni luk mepad kudeng lalam.

¹⁷"Ui ini Tuhan luk Melalud pangeh nenibu Israil idi Yahuda, iamo' nekini Ui mada' nedeh ratnan susa' luk miak macing. Ini miak mangun ngaceku sala'deh sebuleng. Ideh nenganau' Negku museh ku barédeh luk sabpendeh kuan Baal."

¹⁸Kebala Yeremia, "Idi Tuhan nemada' negku ratnan dat luk tirawé bunu'ku kuanku.

¹⁹Ui mepad kudeng anak dumba luk miak pitayen dengan na matot, ngaceku ui na kali' nedeh ngerawé nganau' luk dat kuanku. Kebaladeh, 'Do' tau nebpeng kayuh ini kareb ieh do' ulun. Do' tau ngaté neneh, pelé seburur pana' nateh ngerawé neneh.' "

²⁰Idi kesembayang Yeremia, "O Tuhan luk Melalud, Iko Lun luk Mutut Besara' luk matu. Iko luk nier terawé idi niat lemulun. Nima' negku nier Namu ngua' sala' pupu ini, ngaceku ui pangeh nemaré bururku bang paladMu."

²¹Idi Lun Anatot sikal ngaté ni Yeremia, kebaladeh, "Kai miak ngaté namu, kudeng iko na ugka' mada' dengan ngadan Tuhan."

²²Ngaceku ineh, kebala Tuhan luk Melalud, "Ui miak ngukum nedeh! Anak adi' deléi miak pitayen bang bunu' idi anakdeh miak maté ku lau.

²³Seburur pana' rat arangdeh nateh luk ketecan kareb Ui ngacing susa' kuan lun Anatot."

Yeremia 12

- ¹O Tuhan, kudeng ui pesaad Namu, kali' rungen Iko luk matu. Iamo' do' ui ngitun Namu ratnan anun-anun luk mesiri Ngudeh lemulun luk dat na ngalap susa'? Idi ngudeh lemulun luk naluk ngalap luk piandeh?
- ²Iko nibu nedeh, idi ideh petacu inan uat; idi ideh mulun, idi petacu inan bua'. Ideh ngubur Namu, iamo' na ideh mawa Namu.
- ³Iamo' Tuhan, Iko kali' negku, Iko nier kekamenku idi kali' ui mawa Namu. Do' nguit lemulun luk dat ini, mepad kudeng dumba luk kereten; matad nedeh pad macing aco luk inandeh kereten.
- ⁴Tuda' ioké tana' ini tekering, idi uduh bang laman mekarang? Amung pung idi suit maté ngaceku dat lemulun luk tudo bang bawang ini, ieh ineh lemulun luk pebala, "Tuhan na miak nier kekamen tau."
- ⁵Kebala Tuhan, "O Yeremia, kudeng iko na tuman peribatun dengan lemulun, kudeng apehké iko peribatun dengan kuda? Iko dat udeng bang bawang luk na inan susa', iamo' kudeng apehké iko miak tuman bang pulung tangeb Abpa' Yarden?
- ⁶Kinanakmu luk bang tetek ruma'mu sebuleng pangeh nemasui namu; ideh pangeh perurum dengan bunu'mu. Sagan tu pana' baladeh do', aleg iko merapet nedeh."
- ⁷Kebala Tuhan, "Ui pangeh nenecan pupuKu, Ui pangeh nenala' pupuKu luk pinili'Ku. Ui pangeh nemaré pupu luk inanKu mawa bang palad bunu'deh.
- ⁸Pupu luk pinili'Ku pangeh nangun ku bunu'Ku; mepad kudeng balang luk bang pulung, ideh ngeku Negku pad Ui megateh nedeh.
- ⁹Pupu luk pinili'Ku mepad kudeng kanui, idi kanui luk baken ngekura' nedeh. O muyuh pung luk meliputi, do' amé' ku irau ini.
- ¹⁰Mula' raca' rat bawang baken pangeh nengusag kabun anggurKu, ideh nengeradu' lati'Ku, idi nengisu' bawangKu luk do' mangun ku su luk ali-ali.

¹¹Ideh nenganau' bawang ineh mangun ku tana' luk metugeh, idi luk tican pa kiungKu. Aput tana' mangun ku su luk ali-ali; idi na lemulun ngerawé tana' ineh.

¹²Idi lemulun luk ngaro macing maya' pegkung luk ali-ali ineh. Ui pangeh nemaré bunu' ngusag amung tana' ini, pad seburur pana' nateh luk do' udeng.

¹³PupuKu nenibu padé, iamo' ideh ngalap tabpa' mo'. Ideh metueh ngakem, iamo' na uli'deh. Ngaceku usehKu idi pun tibudeh na uli'."

¹⁴Kebala Tuhan, "Ini balaKu kuan pupu luk dat luk iring bawang Israil, idi luk nengusag tana' luk biréKu kuan pupuKu Israil. Ui miak ngalap pupu ini rat bang bawangdeh, mepad kudeng tibu luk binubput, idi Ui miak muit nelun Yahuda rat nedeh.

¹⁵Iamo' kareb Ui ngalap nedeh idi Ui miak méi' nedeh. Ui miak nguit anid pupu lemubed amé' inan tana' idi bawangdeh sebuleng.

¹⁶Kudeng ideh mepicet maya' sembayang pupuKu, idi pebulung ratnan ngadan Tuhan luk mulun — mepad kudeng luk atun ideh nemada' pupuKu pebulung ratnan ngadan Baal — idi ideh miak mangun ku aceh babpat pupuKu idi ngalap peruan.

¹⁷Iamo' kudeng aceh pupu na maya', idi Ui miak ngalap nedeh idi ngaté nedeh. Ui ini Tuhan pangeh nepebala."

Yeremia 13

¹Idi Tuhan nengecuk negku melih abpar ratnan kibung luk do', idi ngayung ku ineh; iamo' Ieh nemebpeng na miak nganau' bang abpa'.

²Idi ui nemelih abpar ineh, maya' kudeng luk icuk Tuhan, idi ui nengayung ku ineh.

³Idi Tuhan nepebala negku teh, kebalaNeh,

⁴"Amé' déi' Abpa' Pirat. Nguit abpar luk pikaimu ineh, idi ngapung ineh bang aceh lubang batu."

- ⁵Idi ui iné' ngapung ineh muneng ku Abpa' Pirat, maya' kudeng luk icuk Tuhan.
- ⁶Muci ratnan ineh, Tuhan nengecuk negku lemubed amé' Abpa' Pirat idi ngalap abpar luk inapung ineh maya' luk icuk Tuhan.
- ⁷Idi ui nelemubed iné' Abpa' Pirat. Idi ui nenakap idi ui nengalap abpar ineh rat su luk inanku nengapung neneh. Idi abpar ineh na miak uen makai ngaceku ieh merapuk.
- ⁸Idi Tuhan nepebala negku teh. KebalaNeh,
- ⁹"Kudeng ini lawéKu ngukum dita' niat Yahuda idi dita' niat Yerusalim luk pelaba rayeh ineh.
- ¹⁰PupuKu luk dat ini ara' maya' balaKu. Ideh dat idi metueh niat mepad kudeng luk atun. Ideh nesembayang maya' allah baken. Ngaceku ineh ideh mepad kudeng abpar ini luk na miak uen makai.
- ¹¹Mepad kudeng abpar uen micet luun awa' lemulun, kudeng ineh teh Ui pian ku amung lun Israil idi lun Yahuda mepicet maya' Negku."
- ¹²Kebala Tuhan, "O Yeremia, do' mada' nelun Israil, kebalamu, 'Ui ini Tuhan Allah muyuh pebala: "Idi anid-anid rubi miak uen manu' ku abpa' anggur." ' Idi Lun Israil miak pebala namu, kebaladeh, 'Matu anid-anid rubi miak uen manu' ku abpa' anggur,'
- ¹³Do' mada' nedeh, kebalamu, 'Ui ini Tuhan miak manu' pupu luk bang bawang ini ku abpa' anggur pad ideh mabuk: do' amung raca' luk inul Daud, lun imam, lun nabi idi lun Yerusalim pana'.
- ¹⁴Idi Ui miak mila' nedeh mepad kudeng rubi luk uen ngatuk, do' anak idi lun rayeh pana'. Na Ui mawa idi méi' nedeh pad ideh pitayenKu.' "
- ¹⁵O muyuh Lun Israil, Tuhan pangeh nepebala! Do' muyuh mebeneh niat idi ninger balaNeh.

¹⁶Ngerayeh Tuhan Allah muyuh, kareb nateh medacem, pad muyuh na metebaceng luun pegkung kareb medacem, kareb nateh Ieh maré acang luk inan muyuh merapet misu' ku dacem.

¹⁷Kudeng muyuh na ninger, ui miak nangi' dengan lulem ngaceku dita' niat muyuh. Ui miak nangi', pad abpa' matehku mebpeh, ngaceku pupu Tuhan pangeh tiban.

¹⁸Kebala Tuhan ni Yeremia, "Do' ngecuk raca' idi tinanneh, temurun rat luun kerusideh, ngaceku patadeh luk pelaba do' pangeh nebpeh rat luun uluhdeh.

¹⁹Amung bawang rayeh déi' Negeb uen ngerieng. Seburur pana' nateh luk miak macing nedeh. Amung lun Yahuda pangeh tiban."

²⁰O lun Yerusalim, siruh! Bunu' muyuh macing rat pa tinueh busat aco! Iapehké anak itin muyuh luk mepad kudeng sengeriudan dumba luk do' taga?

²¹Anunké luk belén muyuh kareb pupu ineh luk mangun ku rorum muyuh uen ngedita' mangun ku lun rayeh muyuh? Muyuh miak medereh, mepad kudeng decur luk mét nenganak.

²²Kudeng muyuh ngitun anun punneh ini mangun kuan muyuh — idi anun punneh ayung muyuh pangeh dirak pad muyuh inigu' — ieh ineh ngaceku sala' muyuh pelaba dat.

²³Miakké lun Habsi ngisu' ayu kubilneh? Miakké kuir ngisu' baritneh? Kudeng pieh kudeng ineh muyuh luk megéi' nganau' luk dat miak sibada' nganau' luk matu.

²⁴Tuhan miak matad nemuyuh mepad kudeng padek luk mepalid ku bui déi' su luk ali-ali.

²⁵Kebala Tuhan, "Ini ukum luk pinututKu kuan muyuh, ngaceku muyuh mekelupan Negku idi merapet inan allah luk mebalih."

²⁶Tuhan sebuleng miak nala' ayung muyuh pad muyuh migu.

²⁷Tuhan pangeh nenier nemuyuh nganau' luk inanNeh megateh. Luun pegkung idi luun raked muyuh nakap allah pupu baken mepad kudeng deléi

luk melili ku decur lun baken idi kudeng kuda luk nakap tineh. O lun Yerusalim, muyuh pangeh inukum! Idanké muyuh uren idi mangun meligan?

Yeremia 14

¹Kebala Tuhan ni Yeremia ratnan rikan,

²"Yahuda nacung, idi amung-amung bawangneh medereh, idi lun Yahuda telubid luun tana' ngaceku dat niat idi Yerusalim ngitang mutuh pedengan.

³Lun do' ngecuk demulundeh ngalap abpa'; ideh amé' inan subuk, iamo' na abpa'. Idi ideh muli' dengan sidangur luk na uang. Ideh ngebpu uluhdeh ngaceku migu' idi dat niat.

⁴Lun luk amé' lati' pelaba susa' niat idi ngebpu uluhdeh, ngaceku na udan idi tana' tekering.

⁵Déi' luun amug payo tineh necan anakneh luk isuut, ngaceku na uduh.

⁶Idi keladai luk meliputi tured luun surud, idi nginiat mepad kudeng galau. Meseraber sirendeh ngaceku na akandeh.

⁷PupuKu nawar Negku, kebaladeh, 'Sagan pana' sala' kai ngesala' nekai, O Tuhan ngedengan nekai, maya' kudeng luk pijani'Mu. Kai megéi' teketed rat Namu idi megéi' nganau' sala' pa kiungMu.

⁸Iko sebuleng mo' luk miak inan lun Israil merapet, Iko mo' luk ngulun nekai kareb kai inan susa'. Ngudeh Iko mepad kudeng sakai bang bawang kai, luk amé' rudap sealem mo'?

⁹Ngudeh Iko mepad kudeng lemulun luk megagap, idi lun pebunu' luk na miak ngedengan? O Tuhan kali' rungen Iko idi dengan kai! Kai lun pupuMu; aleg Iko necan nekai.' "

¹⁰Kebala Tuhan ratnan pupu ini, "Ideh pian buro rat Negku kudeng ini, idi ideh na miak ngimet bururdeh. Ngaceku ineh Ui na mawang niat nedeh. Ui miak ngerawé kekamendeh luk dat idi ngukum nedeh ngaceku sala'deh."

¹¹Kebala Tuhan negku, "Aleg mutuh Negku ngedengan pupu ini.

¹²Sagan pana' ideh mawa' na kuman idi na Ui sikal ninger putuhdeh. Idi sagan tu pana' ideh maré baré luk sabpen idi baré luk kenen, Ui na mawang niat nedeh. Iamo' Ui miak ngaté nedeh bang bunu', dengan lau idi ét.”

¹³Kebalaku, "O Tuhan Allah, Iko kali' amung nabi mada' pupu ini, kebaladeh, 'Na luk idi bunu' idi lau bang bawang tau ngaceku Tuhan pangeh pejani' na inan susa.' “

¹⁴Iamo' kebala Tuhan, "Amung nabi ineh mebalih dengan ngadanKu. Na Ui nengecuk nedeh, na Ui nepebala nedeh. Amung luk badénde' nemuyuh ratnan luk sinierdeh baken rat Negku, idi bada'deh luk tirawédeh sebuleng na ulekneh.

¹⁵Ui ini Tuhan mada' nemuyuh ratnan luk miak ruenKu kuan nabi ineh luk na icukKu, iamo' luk mada' dengan ngadanKu, kebaladeh, 'Bunu' idi lau na miak macing bang bawang ini.' Ui miak ngaté nedeh bang bunu' idi dengan lau.

¹⁶Lemulun luk inandeh nepebala kudeng ini miak pitayen bang bunu' idi dengan lau. Butungdeh miak talan luun amung dalan Yerusalim, ngaceku na lun luk miak nanem nedeh. Amung ini miak mangun kuandeh, do' awandeh, idi anakdeh luk deléi idi decur teh. Ui miak maré tabpar sala'deh.”

¹⁷Kebala Tuhan, "O Yeremia, mada' pupu ini ratnan susa'mu, kebalamu, 'Nima' abpa' matehku mebpeh tebaco kedangan, meluun do' ui na ugka' nangi', ngaceku pelaba bura' urat pupuku.

¹⁸Kareb ui nalan luun raked, ui nier butung lemulun luk pinaté bang bunu'; idi kareb ui amé' bang bawang rayeh ui nier lemulun luk maté ku lau. Lun nabi idi imam ngakem, iamo' na ideh kali' luk ruendeh.' “

¹⁹O Tuhan, matuké Iko nala' Yahuda, idi megateh inan lun Sion? Ngudeh Iko ngurat nekai, pad kai na miak uen ngedo'? Kai pian pedo', iamo' na luk do'. Kai merapet miak uen ngedo', iamo' luk katot macing nekai.

²⁰O Tuhan, kai ngamo sala' kai, idi sala' tepun kai pana', ngaceku kai nenganau' sala' pa kiungMu.

²¹Ngerawé jani'Mu, idi aleg nala' nekai, aleg ngacing igu' kuan Yerusalim su luk inan kerusi rayehMu. Aleg ngelaba jani' luk inau'Mu kuan kai.

²²Sebuleng pana' rat arang akang pupu baken na miak maré udan rat bang langit. O Tuhan Allah kai, kai merapet Namu, ngaceku Iko mo' luk miak nganau' luk kudeng ineh.

Yeremia 15

¹Kebala Tuhan negku, "O Yeremia, sagan pana' Musa idi Semuil tuped ieni, idi mutuh rat Negku, idi Ui na miak méi' kuan pupu ini. Ngecuk nedeh buro rat pa kiungKu.

²Kareb ideh ngitun namu, kebaladeh, 'Amé' iapehké kai?' Do' mada' nedeh ratnan luk bilaKu. Sebuangdeh maté ku ét — ieh ineh kekipeddeh! Lun baken maté bang bunu' — ieh ineh kekipeddeh! Sebuangdeh maté ku lau — ieh ineh kekipeddeh! Lun baken miak tebanen — ieh ineh kekipeddeh!

³Ui ini Tuhan pangeh nemaré apat ukum luk dat kuandeh; ideh miak pitayen; butungdeh miak tebanen uko'; idi suit pana' miak kuman butung ineh; idi pung luk meliputi miak kuman luk ketecan.

⁴Ui miak nganau' amung pupu bang tana' ini megagap ngerawé nedeh, ngaceku luk inau' Manasé, ngaceku anak Raca' Hesekia, déi' Yerusalim kareb ieh raca' lun Yahuda."

⁵Kebala Tuhan, "O Lun Yerusalim, idéké miak méi' nemuyuh, Idéké luk miak temido nemuyuh? Idéké luk miak ucu' idi ngitun ratnan muyuh?

⁶Muyuh pangeh nenala' Negku, idi pangeh neteketed rat Negku. Ui ini Tuhan pangeh nepebala. Ui nenatang tiku'Ku idi nengaté nemuyuh, ngaceku Ui na tuman ku usehKu.

⁷Bang anid-anid bawang Yahuda Ui nemalid nemuyuh mepad kudeng lipang padé. Ui nengaté pupuKu, idi teh Ui nengaté anak muyuh, ngaceku muyuh na ugka' nganau' luk dat.

⁸Ui nenganau' decur muyuh mangun ku tinula'. mepad kinula' bada déi' tangeb abpa' rayeh. Ui nengaté anak adi' deléi muyuh kareb ideh metaga, pad tinandeh medereh. Idi denak-denak Ui nenecat nedeh pad ideh medereh idi matot.

⁹Decur luk inan tudu' anak deléi nelepu idi ingeb-ingeb. Acangneh nisu' ku dace; ieh pangeh inigu' idi mesusa' niat. Ui miak nima' bunu' muyuh ngaté nemuyuh luk ketecan. Ui ini Tuhan pangeh nepebala.”

¹⁰Kebala Yeremia, "Ui pelaba dereh! Ngudeh tinanku nenganak negku? Na miak na ui pekedaluh idi pesaad inan lemulun bang bawang ini. Na ui ngabit idi maré usin kebitem, iamo' amung lemulun ngediman negku.

¹¹O Tuhan, kudeng na ui demulunMu luk do', idi kudeng na ui nesembayang kuan bunu'ku kareb ideh medereh idi mesusa' niat, nima' amungdeh ngacing kedimandeh kuanku.

¹²Idi seburur pana' nateh luk miak mutul belawan, meluun teh belawan luk rat pa tinueh busat aco luk pinuar ku tekaling.”

¹³Kebala Tuhan negku, "Ui miak ngecuk tuda'-tuda' bunu' amé' naban amung binaweh pupuKu, mangun ku ukumdeh, ngaceku sala' luk kikemdeh apud bawang ineh.

¹⁴Ui nganau' nedeh mangun ku demulun bunu'deh bang bawang luk nateh nekali'deh, ngaceku usehKu mepad kudeng apui luk mulun raked-raked.”

¹⁵Idi kebala Yeremia, "O Tuhan, Iko luk meluun kali'. Ngerawé negku idi ngedengan negku. Do' Iko ngua' lemulun luk ngedereh negku. Aleg Iko pelaba ulai niat, pad ideh ngaté negku. Do' ngerawé ui pidereh ngaceku Iko.

¹⁶Iko nepebala negku, idi ui neninger amung balaMu. O Tuhan Allah luk Melalud, Iko luk kuan negku, idi balaMu manu' niatku ku awang.

¹⁷Na ui perurum dengan lun baken, marot, idi meriruh. Ngaceku kekamen luk biréMu negku, ui neketecan buleng-buleng idi mepanu' ku useh.

¹⁸Ngudeh ui megéi' medereh? Ngudeh uratku na mepali'? Iamo' miakké Iko ngesusa' negku mepad kudeng arur luk mekeket kareb merikan?"

¹⁹Idi kebala Tuhan ni Yeremia, "Kudeng iko lumi Negku, Ui miak ngalap namu, iko miak mangun ku demulunKu sekua' teh. Kudeng iko pebala luk petulu, idi baken luk na ulek, iko miak mangun ku nabiKu sekua' teh. Lemulun miak amé' namu, iamo' aleg iko amé' nedeh.

²⁰Ui miak nganau' namu mangun ku alad luk ratnan tekaling pa kiung lemulun ini. Ideh sikal metueh rat namu, iamo' ideh na miak ngelaya' namu. Ui idi denganmu, idi miak matar namu.

²¹Ui muit namu rat bang palad lemulun luk dat, idi ngulun namu ratnan lalud lemulun luk mesangit. Ui ini Tuhan pangeh nepebala."

Yeremia 16

¹Idi Tuhan nepebala negku teh,

²"Aleg iko ngaweh idi ngalap anak bang bawang luk kudeng ini.

³Ui miak mada' namu ratnan luk miak mangun kuan anak-anak luk tinganak ieni, idi luk miak mangun kuan taman idi tinandeh teh.

⁴Ideh miak maté ku ét luk mebura'. Seburur pana' nateh luk temido nedeh, idi na ideh tinamen. Idi butungdeh telubid luun tana' mepad kudeng rimuk. Ideh miak pitayen bang bunu' idi maté ku lau. Idi butungdeh mangun ku akan kuan suit-suit idi pung-pung luk meliputi.

⁵"Aleg iko umak ruma' lemulun luk temido, idi aleg iko temido seburur lemulun pana'. Ngaceku na Ui maré nedeh do' udeng, idi na Ui méi' idi mawa nedeh.

⁶Lun do' idi lun dat miak maté bang bawang ini. Iamo' na ideh tinamen, idi na ideh uen nido. Idi sebururdeh pana' nateh nacung.

⁷Idi seburur pana' na miak kuman idi ngirup dengan lun kareb lemulun luk inanneh mawa maté. Idi seburur pana' nateh luk méi', sagan tu pana' tamanneh idi tinanneh maté.

⁸"Aleg umak ruma' lemulun luk nganau' irau. Aleg perurum kuman idi ngirup dengandeh.

⁹Ninger luk bilaKu, ieh ineh Tuhan luk Melalud, Allah lun Israil. Ui miak ngagka' riruh idi awang niatdeh, idi tang decur idi deléi luk sikal ngaweh bang bawang ini. Idi lun bang bawang ini miak nier amung ini mangun.

¹⁰"Kareb iko mada' nedeh ratnan amung ini, ideh miak ngitun namu, anun punneh Ui ngukum nedeh kudeng ineh. Ideh miak ngitun, 'Anun sala' kai pa kiung Tuhan Allah kai?'

¹¹Do' mada' nedeh ratnan luk bila Tuhan, 'Tepun muyuh nenecan Negku, idi maya' idi nesembayang inan allah baken. Ideh nenecan Negku idi na nemaya' bada'Ku.

¹²Iamo' muyuh pangeh nenganau' luk meluun dat ratnan luk inau' tepun muyuh. Amung muyuh dat idi metueh niat idi na maya' Negku.

¹³Ngaceku ineh, Ui miak masut nemuyuh rat bang bawang ini, pad muyuh amé' bang aceh bawang luk nateh nekali' muyuh idi tepun muyuh pana'. Idi déi' muyuh miak sembayang inan allah baken tebaco kedangan. Idi na Ui miak méi' nemuyuh.' “

¹⁴Kebala Tuhan, "Idi karebneh miak macing, seburur pana' nateh miak pebulung ku ngadanKu ini, Allah luk mulun luk nenguit pupu Israil remuat rat bang tana' Masir.

¹⁵Iamo' ideh miak pebulung ku ngadanKu ini, Allah luk mulun luk nenguit nelun Israil remuat rat bang bawang luk pa tinueh busat aco, idi rat bang amung bawang luk inanKu nengatad nedeh. Ui miak nguit nedeh lemubed amé' bang bawangdeh sebuleng, ieh ineh bawang luk biréKu kuan tepundeh.”

¹⁶Kebala Tuhan, "Ui ngecuk mula' lun luk ngerabat amé' ngakem lemulun ini. Idi Ui miak ngecuk mula' lun luk nganup nakap nedeh luun anid pegkung, idi luun surud, idi bang lubang batu pana'.

¹⁷Ui nier amung luk ruendeh. Na luk lumi Negku. Na ideh miak ngapung sala'deh pa kiungKu.

¹⁸Ui miak ngua' sala' idi datdeh dueh kua'. Ideh pangeh nengelutak tana'Ku ku akangdeh luk na mulun luk mepad kudeng butung. Idi ideh pangeh nemanu' bawang luk biréKu nedeh ku allahdeh luk mebalih."

¹⁹O Tuhan, Iko luk matar negku, idi maré tueh kuanku. Iko megéi' ngedengan negku kareb inan susa'. Amung pupu rat iring tana' miak amé' Namu idi pebala, "Tepun kai nesembayang inan allah luk mebalih mo', idi akang luk na ulek.

²⁰Miakké seburur lemulun nganau' allahneh sebuleng? Na tu-tu miak! Baken ideh allah luk matu."

²¹"Ngaceku ineh," kebala Tuhan, "nekini Ui miak ngegala' lalud idi tuehKu kuandeh, pad ideh kali' Ui ini Tuhan."

Yeremia 17

¹Kebala Tuhan, "O lun Yahuda, sala' muyuh pangeh inayud ku pén belawan. Ieh pangeh inayud luun niat muyuh ku batu intan luk mesilo, idi inarit luun anid lidung bubpun luk inan muyuh maré baré luk sabpen.

²Anak-anak muyuh kali' amung bubpun idi ulung luk typed kuan akang Asera luk muneng anid kayuh luk mebata' luun surud,

³idi luun pegkung. Ui miak maré bunu' muyuh ngalap amung binaweh muyuh, ngaceku sala' luk inau' muyuh aput bawang muyuh.

⁴Na miak na muyuh necan tana' luk biréKu nemuyuh. Idi Ui miak nganau' nemuyuh mangun ku demulun bunu' muyuh bang aceh bawang luk nateh nekali' muyuh, ngaceku usehKu mepad kudeng apui luk mulun raked-raked."

⁵Kebala Tuhan, "Ui miak ngukum lemulun luk teketed rat Negku, idi luk merapet ku tueh lemulun idi ulun tana' ini.

⁶Ieh mepad kudeng aceh kayuh luk isuut déi' su luk ali-ali, luk mulun luun tana' luk tekering idi mepaci', su luk na lemulun. Idi na luk do' miak macing neneh.

⁷Iamo' Ui ngeperuan lemulun luk merapet Negku.

- ⁸Ieh mepad kudeng aceh kayuh luk tinibu tangeb abpa', uatneh macing bang abpa'. Na ieh matot ku rikan ngaceku donneh megéi' mebata'. Sagan tu pana' na mudan, ieh miak kebua' kidi-kidi.
- ⁹"Idéké luk miak kali' niat lemulun? Ieh ineh luk naluk meluun ratnan luk anun-anun. Ieh mebura' ét, idi na miak uen ngedo'.
- ¹⁰Ui ini Tuhan nutun terawé idi niat lemulun. Ui ngukum anid burur lemulun maya' lawéneh idi luk ruenneh."
- ¹¹Lemulun luk ngalap usin dengan naluk mepad kudeng suit luk mamut terur suit baken. Idi kareb ieh mangun ku lun do', amung luk ilapneh metutu'; kekipedneh ieh mangun ku lun mebacé.
- ¹²Ruma' Allah tau mepad kudeng kerusi rayeh, luk pinudut luun pegkung luk medita' rat pun-pun.
- ¹³Tuhan, Ieh ineh rapet lun Israil; idi amung lemulun luk necan Neneh miak uen ngigu'. Ideh miak metutu' mepad kudeng ngadan luk inayud luun tana', ngaceku ideh pangeh nenecan Tuhan, ieh ineh, bued abpa' luk do'.
- ¹⁴O Tuhan, ngedo' negku, pad ui do' ulun, idi muit negku pad ui na inan susa'. Iko mo' luk bureнку!
- ¹⁵Kebala lun mula' negku, "Kudeng apehké bala ratnan Tuhan ngukum netau? Do' Ieh ngacing ukum ineh nekini!"
- ¹⁶Iamo' Tuhan, na ui nemutih Namu ngukum nedeh. Idi na ui mawang niat kudeng inan susa' macing nedeh. O Tuhan, Iko kali' amung ineh, idi teh Iko kali' luk pangeh bilaku.
- ¹⁷Aleg Iko mangun ku luk katot kuanku. Iko luk inanku sigapung kareb inan susa'.
- ¹⁸Do' ngigu' nedeh luk ngedereh negku, iamo' ngulun negku. Do' ngatot nedeh, iamo' aleg ngatot negku. Ngacing susa' kuandeh idi mila' nedeh.

¹⁹Kebala Tuhan negku, "O Yeremia, amé' tuped munung Tanga' Lemulun, su inan raca'-raca' Yahuda semuet idi remuat, kareb ideh nalan rat Yerusalim, idi do' iko amé' tuped munung amung tanga' Yerusalim luk baken teh.

²⁰Ngecuk amung raca' idi amung lun Yahuda, idi amung lemulun luk tudo déi' Yerusalim idi luk maya' tanga' ini, ninger luk belénKu.

²¹Do' mada' nedeh, kudeng ideh ngerawé ulundeh, aleg ideh mabeh kareb Aco luk inan Mudeng. Aleg ideh mabeh anun-anun maya' tanga' Yerusalim.

²²Idi aleg ideh nguit anun-anun remuat rat bang ruma'deh kareb Aco luk inan Mudeng. Aleg ideh, ngakem kareb Aco luk inan Mudeng. Ngaceku aco ineh meligan kuandeh, mepad kudeng luk icukKu kuan tepundeh.

²³Tepundeh na neninger idi nemaya' balaKu. Iamo' ideh metueh niat, idi na pian maya' Negku idi sibada' rat Negku.

²⁴"Ngecuk lemulun ini maya' amung balaKu. Aleg ideh mabeh anun-anun maya' tanga' bawang ini kareb Aco luk inan Mudeng, pad Aco luk inan Mudeng mangun ku aco luk meligan kuandeh. Idi na tu-tu ideh ngakem kareb ineh.

²⁵Idi raca'-raca' idi penguludeh miak semuet maya' tanga' Yerusalim dengan amung lalud raca', mepad kudeng Raca' Daud. Ideh miak nalan maya' keréta idi kuda dengan lun Yahuda idi lun Yerusalim pana', pad bawang Yerusalim megéi' inan mula' lemulun.

²⁶Lemulun miak macing rat bawang-bawang Yahuda idi ruma'-ruma' libut-libut bawang Yerusalim. Ideh miak macing rat babpat tana' Beniamin, rat surud-surud, rat pegkung-pegkung, idi rat Negeb pana'. Ideh miak nguit baré luk sabpen idi luk kereten, dengan baré luk kenen idi umau luk do' buen, dengan baré ubur, amé' bang ruma'Ku.

²⁷Iamo' do' ideh maya' balaKu. Do' ideh ngerawé Aco luk inan Mudeng mepad kudeng aco luk meligan idi na mabeh anun-anun maya' tanga' Yerusalim bang aco ineh. Kudeng ideh ngelaba ukum Aco luk inan Mudeng, Ui miak

ngeseb amung tanga' Yerusalim. Idi amung-amung ruma' raca' déi' Yerusalim miak sabpen ku apui ineh, idi seburur pana' nateh miak ngaté apui ineh."

Yeremia 18

¹Kebala Tuhan negku,

²"Amé' ruma' lun luk mileh mipi' kuden, idi Ui miak mada' balaKu namu."

³Idi ui iné' déi', idi nenier lun ineh mipi' kuden.

⁴Idi kareb aceh kuden luk inau'neh na do' tu, ieh miak ngalap tana' kuden ineh idi muar neneh baruh teh idi nganau' kuden baruh teh.

⁵Idi kebala Tuhan negku,

⁶"Kali' rungen Ui miak nganau' kuan muyuh lun Israil, mepad kudeng luk inau' lun luk mileh mipi' kuden. Muyuh idi bang paladKu, mepad kudeng tana' kuden luk bang palad lun luk mileh mipi' kuden.

⁷Kudeng idan-idan Ui pebala, Ui sikal mubput, ngaro, idi ngusag aceh pupu idi aceh bawang,

⁸idi pupu ineh uren ratnan amung-amung datdeh, idi Ui miak ngisu' terawéKu, pad Ui na miak nganau' luk bilaKu.

⁹Iamo', kudeng Ui pebala, Ui miak nibu idi ngeletap aceh pupu idi bawang,

¹⁰idi pupu ineh nganau' luk dat, Ui miak ngisu' terawéKu, pad Ui na miak nganau' luk bilaKu.

¹¹Ngaceku ineh do' mada' nelun Yahuda idi lun Yerusalim, kebalamu, 'Ui ini Tuhan luk mileh mipi' kuden. Ui temina' ku ukum kuan muyuh. Do' muyuh uren ratnan kekamen muyuh luk dat idi ngisu' lawé idi kekamen muyuh.'

¹²Iamo' ideh miak pebala, 'Na ulekneh mada' nekai! Kai sikal maya' terawé kai sebuleng. Kai miak maya' pinian burur kai sebuleng idi maya' niat kai luk dat."

¹³Kebala Tuhan, "Do' ngitun amung-amung pupu, Inanké luk kudeng ineh mangun atun? Lun Israil pangeh nenganau' luk pelaba dat!

¹⁴Miakké salju luk luun Pegkung Lebanon ubpa'? Miakké arur luk luun pegkung ineh mekeket?

¹⁵Iamo' pupuKu pangeh nekelupan Negku. Ideh ngeseb umau luk do' buen kuan akangdeh. Ideh netebaceng maya' dalam luk matu, idi na ideh maya' dalam luk meruked, iamo' ideh maya' dalam luk na rapi'.

¹⁶Ideh nenganau' bawang ini mangun ku luk katot, idi uen ngedat ruked-ruked. Idi amung lun luk lemaba, megagap ku luk sirendeh, idi ideh siguling uluh idi mawa.

¹⁷Ui miak matad pupuKu pa kiung bunu'deh; mepad kudeng kipu luk mepalid ku bui rat pa busat aco. Ui miak teketed rat nedeh. Na Ui ngedengan nedeh kareb susa' ineh macing."

¹⁸Idi kebala lun mula', "Do' tau nala' ni Yeremia! Inan teh imam-imam luk miak mada' netau, idi lun mileh luk ngubuk netau, idi nabi-nabi luk miak mada' bala Allah. Do' tau ngadu' neneh, idi aleg ninger bada'neh."

¹⁹Idi kesembayang Yeremia, "O Tuhan, ninger balaku, idi ninger adu' bunu'ku negku.

²⁰Miakké luk do' uen ngua' ku luk dat? Ideh pangeh nengukat aceh lubang kuanku. Do' ngerawé ratnan sembayangku kuandeh pa kiungMu kareb ui nemutuh Namu aleg museh nedeh.

²¹Iamo' nekini Tuhan, nima' anakdeh maté ku lau. Nima' nedeh pitayen bang bunu'. Nima' decurdeh patad ratnan awandeh idi anakdeh. Nima' amung deléi maté ku ét, idi amung anak adi' deléi pitayen bang bunu'.

²²Ngecuk aceh baweh ngaro ruma'deh denak-denak pad ideh ngitang idi matot. Ideh pangeh nengukat aceh lubang kuanku idi nenganau' abpung pad ideh ngakem negku.

²³Iamo' Tuhan, Iko luk kali' gayamdeh luk sikal ngaté negku. Aleg Iko maré do' ratnan dat idi sala'deh. Do' nala' nedeh! Ngukum nedeh kareb Iko museh!"

Yeremia 19

¹Tuhan nengecuk negku amé' melih aceh kuden. Ieh nengecuk negku nguit tuda'-tuda' lun rayeh pupu Israil idi tuda'-tuda' imam luk mengered,

²amé' Ruan Hinom luk déi' liang Tanga' Kuden Luk Mebila'. Idi ui icuk Tuhan mada' balaNeh déi'.

³Tuhan nengecuk negku pebala, "O amung raca' Yahuda idi lun Yerusalim, do' ninger luk belénKu, ieh ineh Tuhan luk Melalud, Allah lun Israil. Ui ngacing aceh susa' kuan bawang ini, pad idé-idé luk ninger balaneh miak megagap.

⁴Ui miak nganau' amung ineh ngaceku pupu ini pangeh nenecan Negku idi pangeh nengelutak bawang ini ku barédeh kuan allah baken — luk nateh nekali' tepundeh, luk nateh nekali' raca'-raca' Yahuda, meluun teh luk nateh nekali' bururdeh sebuleng. Ideh pangeh nemanu' bawang ini ku dara' lemulun luk na mesala'.

⁵Idi ideh pangeh nenganau' bubpun kuan Baal, pad ideh miak ngeseb anakdeh mangun ku baré luk sabpen. Na tu Ui nengecuk nedeh ngeseb anakdeh mangun ku baré luk sabpen. Na tu Ui nengerawé ratnan luk kudeng ineh.

⁶Ngaceku ineh, mucu su ineh na miak tetanen Topet idi Ruan Hinom, iamo' su ineh tetanen Ruan Até.

⁷Idi su ini Ui miak ngusag amung terawé lun Yahuda idi lun Yerusalim. Ui miak nima' bunu'deh metueh rat nedeh pad ideh ngaté nedeh. Ui miak maré butungdeh kenen suit-suit idi pung-pung luk meliput.

⁸Ui miak ngacing dereh luk pelaba rayeh pad idé-idé luk lemaba miak megagap idi mawa ngaceku amung-amung luk pangeh nangun déi'.

⁹Ui miak nganau' lemulun luk tudo déi' kuman uang anakdeh sebuleng. Ideh miak kuman lun dengandeh kareb bunu'deh ngerieng bawangdeh idi nutun ngaté nedeh.”

¹⁰Idi Tuhan nengecuk negku mila' kuden ineh pa kiung lemulun luk nemaya' negku,

¹¹idi mada' nedeh ratnan luk bila Tuhan luk Melalud, kebalaNeh, "Ui miak mila' pupu ini idi bawang ini, mepad kudeng muyuh mila' kuden, pad ieh na miak mangun ku kuden baruh. Lemulun miak nanem nelundeh luk maté déi' Topet pana', ngaceku na luk inan baken su luk inan nanem nedeh.

¹²Ini luk miak ruenKu kuan bawang ini idi lun luk tudo ieni. Ui miak nganau' neneh mepad kudeng bawang Topet.

¹³Idi ruma'-ruma' Yerusalim, idi ruma' raca'-raca' Yahuda, idi amung ruma' su luk inandeh ngeseb umau luk do' buen kuan gituen luun apodeh idi su luk inandeh ngutang baré luk rupen kuan allah baken miak mangun melutak mepad kudeng Topet."

¹⁴Idi ui nenalan rat bawang Topet, su luk inan Tuhan nengecuk negku mada' balaNeh. Idi ui iné' tupid luun natad Ruma' Allah idi nemada' amung lemulun.

¹⁵Kebalaku, "Kudeng ini bala Tuhan luk Melalud, Allah lun Israil, 'Ui miak ngacing kuan bawang ini idi kuan amung ruma' libut-libut bawang ini amung ukum luk litepKu, ngaceku muyuh metueh niat idi na sikal ninger luk belénKu.' "

Yeremia 20

¹Pasur, anak Imer, ieh ineh imam idi lun rayeh bang Ruma' Allah. Ieh neninger amung bada' Yeremia.

²Idi Pasur nengecuk mebal neneh idi ngaling neneh bang Ruma' Allah munung Tanga' Beniamin luk pa luun.

³Pekak kenebpa, kareb Pasur pangeh neneka kalingneh, idi Yeremia nepebala neneh, "Na Tuhan neneten ngadanmu Pasur. Iamo' ngadan luk pangeh biré Tuhan namu, ieh ineh, 'Inan Luk Katot Iapeh-Iapeh.'

⁴Iamo' Tuhan sebuleng nepebala, 'Ui miak nganau' namu mangun ku luk katot kuan bururmu sebuleng idi kuan lun rurummu pana'. Idi iko miak nier nedeh pitayen ku pelapet bunu'deh. Ui miak maré amung pupu Yahuda bang palad

raca' Babil. Ieh miak naban sebuangdeh amé' Babil, idi lun baken miak pitayenneh.

⁵Ui miak nima' bunu'deh ngaro amung-amung luk meraga bang bawang ini, idi ideh miak naban amung-amung binaweh, pad amung-amung binaweh raca'-raca' Yahuda pana' miak tebanen amé' Babil.

⁶Idi iko, Pasur, idi amung uang tetek ruma'mu miak kamen idi tebanen amé' Babil. Idi déi' iko miak maté idi tinamen dengan amung lun rurummu luk inanmu mebalih ineh.' “

⁷Tuhan, Iko nenaluk negku, idi ui pangeh sinaluk. Iko meluun tueh rat negku, idi Iko nengelaya' negku. Amung lemulun situnga negku, idi meriruh negku tebaco-tebaco.

⁸Kareb ui pebala, ui megéi' ngitang "Susa' idi Até!" O Tuhan, ideh situnga negku kidi-kidi ngaceku ui mada' balaMu.

⁹Iamo' kareb ui pebala, "Do' ui mekelupan Tuhan, idi na mada' bang ngadanNeh," idi balaMu ineh mepad kudeng apui bang niatku, idi bang tulangku. Ui na miak ngilep neneh, idi na ui tuman na mada' balaMu.

¹⁰Ui ninger lun mula' payek-payek. "Inan Luk Katot Iapeh-Iapeh." Kebaladeh, "Do' tau ngadu' neneh!" Lun rurumku pana' pian ku ui mebpeh. Kebaladeh, "Miak ieh uen naluk lek. Do' tau ngakem neneh idi ngua' datneh.”

¹¹Iamo' Iko Tuhan luk kuanku. Iko luk metueh idi melalud, idi lun luk ngedereh negku miak metebaceng idi na miak metueh. Ideh miak uen ngigu' ngaceku ideh na miak metueh. Ideh migu' ruked-ruked idi na mekelupan.

¹²Iamo' Iko Tuhan luk Melalud, Iko nutun lemulun dengan dalan luk matu. Iko kali' luk bang niatdeh idi terawédeh. Nima' negku nier Namu ngua' sala' bunu'ku, ngaceku ui merapet Namu.

¹³Do' menani kuan Tuhan! Ngubur Tuhan! Ieh muit nelun luk pidereh rat bang palad lemulun luk dat.

¹⁴Ngediman aco luk inanku tinganak! Mekelupan aco luk inan tinanku nenganak negku!

¹⁵Ngediman nelun luk nengawang niat tamanku, kareb ieh nenguit bala, "Iko inan anak deléi!"

¹⁶Do' ieh mepad kudeng bawang-bawang luk inusag Tuhan dengan na méi'. Nima' neneh ninger arod lun luk mét kareb pekak, idi kukor kareb muned aco,

¹⁷ngaceku na ieh nengaté negku kareb nateh ui tinganak, pad nakan tinanku mangun ku tanemku, idi ui na tinganak peh.

¹⁸Ngudeh ui tinganak? Pad ui ngalap susa', dereh, idi até dengan igu'ké?

Yeremia 21

¹Raca' Sedekia nengecuk Pasur Malkia idi Sepania Masia, lun imam, amé' matun ni Yeremia idi nemutuh, kebala didueh,

²"Do' iko mutuh Tuhan kuan kai, ngaceku Nebukadnesar, raca' Babil munu' nekai. Kian, Tuhan miak nganau' aceh tanu' luk melalud kuan kai lek, idi ngecuk Nebukadnesar buro."

³Idi Tuhan nepebala ni Yeremia, idi Yeremia nepebala inan lun luk icuk iné' papu' neneh,

⁴"Do' mada' ni Sedekia ratnan luk bila Tuhan Allah lun Israil, 'Ui miak masut amung lun pebunu' luk pikai Sedekia pad ideh munu' Raca' Babil idi bawehneh luk ngelibut libung bawang. Idi Ui miak muun pelapetdeh uned bawang ineh.

⁵Idi Ui miak munu' nemuyuh dengan amung tuehKu, usehKu, idi gatehKu.

⁶Ui miak ngaté amung-amung lemulun luk tudo bang bawang ini. Lemulun idi pung pana' miak maté ku ét luk pelaba bura'.

⁷Idi Sedekia, raca' Yahuda, amung lun rayehneh idi amung lemulun luk na maté bang bunu', ku lau, idi ku ét ineh, siménKu kamen Raca' Nebukadnesar idi bunu'deh luk pian ngaté nedeh. Nebukadnesar miak ngaté amung-

amungdeh ineh dengan na méi' inan seburur pana'. Seburur pana' nateh miak tacin. Ui ini Tuhan pangeh nepebala.”

⁸Idi Tuhan nengecuk ni Yeremia pebala inan pupu ineh, "Ninger muyuh! Ui ini Tuhan nima' nemuyuh mili' arang dueh dalam ini — aceh dalam luk macing inan ulun, idi aceh dalam luk macing inan até.

⁹Idé-idé luk tudo bang bawang ini miak pitayen bang bunu', kian maté ku lau idi ku ét lek. Iamo' idé-idé luk remuat idi amé' matun nelun Babil luk uned ngerieng bawang, idi mutuh éi' na miak pitayen. Idi ieh simén mulun.

¹⁰Ui lutep terawé na sikal méi' inan bawang ini, iamo' sikal ngusag neneh. Ieh miak barén kuan raca' Babil, idi ieh miak ngeseb neneh. Ui ini Tuhan pangeh nepebala.

¹¹⁻¹²"O Yeremia, do' ngecuk inul raca' Yahuda, ieh ineh inul Raca' Daud, ninger luk bilaKu ini, luk mangun ku Tuhandeh. 'Do' mutut ukum luk mesiri anid-anid aco. Matar lemulun luk uen naluk, ratnan lemulun luk naluk neneh. Kudeng na, kekamen muyuh luk dat miak ngegio usehKu, pad ieh mulun kudeng apui luk na miak uen ngilep.

¹³Iko, Yerusalim meluun dita' ratnan amung ruan, mepad kudeng aceh pegkung batu luk uned raked. Iamo' Ui ini Tuhan miak munu' namu. Iko pebala, seburur pana' nateh luk miak munu' namu idi ngelaya' namu.

¹⁴Iamo' Ui ini Tuhan miak ngukum nemuyuh, ngaceku amung luk inau' muyuh Ui miak ngeseb ruma' muyuh. Idi apui ineh miak ngeseb amung-amung luk libut-libutneh. Ui ini Tuhan pangeh nepebala.' "

Yeremia 22

¹⁻²Tuhan nengecuk negku amé' ruma' raca' Yahuda, luk inul Raca' Daud, pad ui ngecuk raca', amung lun rayehneh, idi amung pupu Yerusalim ninger luk belén Tuhan.

³"KebalaKu, Ui ini Tuhan mada' nemuyuh ratnan luk matu idi luk mesiri. Matar lemulun luk uen naluk ratnan lemulun luk naluk neneh. Aleg ngesusa'

idi ngedereh nelun sakai, anak maté, idi decur tinula'. Idi aleg ngaté lemulun luk na mesala' bang bawang luk meligan ini.

⁴Kudeng matu-matu muyuh maya' luk icukKu, idi inul Daud lutep mangun ku raca'. Idi ideh, dengan amung lun rayehdeh idi anak itindeh megéi' lemaba tanga' ruma' ini, maya' keréta idi kudadeh.

⁵Iamo' kudeng muyuh na maya' balaKu, idi Ui sebuleng mulung nemuyuh, idi ruma' muyuh ini miak metabpa. Ui ini Tuhan pangeh nepebala.

⁶"Ruma' raca' Yahuda pelaba do' taga sirenKu, mepad kudeng tana' Giliad idi Pegkung Lebanon. Iamo' Ui miak ngisu' neneh mangun ku su luk ali-ali, pad na lemulun tudo su ineh.

⁷Ui miak ngecuk lemulun ngusag neneh. Ideh miak nguit uai, pad ideh nebpeng diri kayuh tumuh bang ruma' ineh idi talan bang apui.

⁸"Muci mula' lun sakai miak lemaba idi ngitun seburur dengan seburur, 'Ngudeh Tuhan nenganau' luk kudeng ini kuan bawang luk rayeh ini?'

⁹Idi ideh miak pebala, 'Ngaceku ideh pangeh nenecan pejani' Tuhan Allahdeh, idi ideh nesembayang maya' allah baken.' "

¹⁰O Lun Yahuda, aleg nangi' ni Raca' Yosia, aleg temido ku aténeh. Iamo' do' nangi' ni Yoahas, luk anakneh, ieh tebanendeh, idi na ieh miak lemubed nier tana' luk inanneh tinganak.

¹¹Kebala Tuhan ratnan Yoahas Yosia, luk nengelibal tamanneh mangun ku raca' Yahuda, "Ieh pangeh nenalan rat ieni idi na miak lemubed teh.

¹²Ieh miak maté bang bawang su luk inanneh tebanendeh. Idi na ieh miak nier bawang ini teh."

¹³Mesusa' kuan lemulun luk mudut ruma' idi parungneh maya' dalam luk tekilu' idi mebalih; luk ngecuk nelun denganneh ngakem idi na ieh mayar tabpardeh.

¹⁴Mesusa' kuan lemulun luk pebala, "Ui pian mudut aceh ruma' luk rayeh dengan parungneh luk rayeh teh." Idi ieh nganau' tabuk bang ruma'neh dengan alad luk ratnan kayuh tumuh, idi uen naat mesia'.

¹⁵Miakké iko mangun ku raca', ngaceku iko inan ruma' ratnan kayuh tumuh luk meluun do' ratnan ruma' dulun? Do' ngerawé tamanmu. Ieh nekuman idi nengirup, idi nenganau' luk matu idi luk mesiri, idi ieh do' udeng peh.

¹⁶Ieh nemutut ukum luk mesiri kuan lun masi', idi ieh inan peruan. Ini dalam lemulun luk miti Tuhan.

¹⁷Iamo' iko ngerawé bururmu sebuleng mo'. Iko ngaté lemulun luk na mesala' idi ngedereh anak itinmu. Tuhan pangeh nepebala.

¹⁸Idi kebala Tuhan ratnan Yoyakim Yosia, raca' Yahuda, "Seburur pana' nateh luk temido aténeh idi pebala, 'Bulé, Bulé, lun rorumku!' Seburur pana' nateh luk nangi' neneh, idi ngitang, 'O Ama!' O raca'ku!'

¹⁹Maya' dalam nanem keladai, butungneh miak berikaden idi talan bal déi' tanga' Yerusalim."

²⁰O Lun Yerusalim amé' déi' Pegkung Lebanon idi ngitang, amé' tana' Basan idi nangi'. Ngitang rat pegkung-pegkung Moab, ngaceku amung bawang luk inan muyuh perurum pangeh linaya'.

²¹Tuhan nepebala nemuyuh kareb muyuh do' udeng, iamo' muyuh ara' ninger. Kudeng ini ulun muyuh rat kareb muyuh anak. na tu-tu muyuh sikal maya' Tuhan.

²²Lun rayeh muyuh miak mepalid ku bui, amung rorum muyuh miak tebanen, idi bawang muyuh miak uen ngigu', ngaceku amung kekamen muyuh luk dat.

²³Muyuh tudo arang kayuh tumuh luk inuit rat Lebanon. Iamo' muyuh pelaba susa' kareb dereh macing nemuyuh, idi ét muyuh mepad kudeng ét decur luk mét nenganak.

²⁴Kebala Tuhan kuan Yoyakin Yoyakim, raca' Yahuda, "Ui pebulung ku ngadanKu, Allah luk mulun. Sagan tu pana' iko susing luun bua' tiku'Ku pa tinueh Ui miak ngelengu namu,

²⁵pad iko miak barén nelun luk sikal ngaté namu, ieh ineh lemulun luk inanmu matot. Ui miak maré namu kuan Nebukadnesar, raca' Babil idi bawehneh.

²⁶Ui miak masut namu idi tinanmu amé' inan bawang baken, su luk na inan medueh tinganak, idi déi' medueh miak maté'.

²⁷Na medueh miak lemubed amé' inan bawang luk pian siren medueh."

²⁸Kebala Yeremia, "Matuké Raca' Yoyakin mepad kudeng aceh kuden luk nebila' idi luk pangeh tila' idi luk na pian lun? Ngudehké ieh idi anakneh tiban idi tila' bang aceh bawang luk na nekali' deh?"

²⁹O tana', O tana', O tana'! Ninger luk pangeh bila Tuhan:

³⁰"Lemulun ini kumin na miak inan anak, idi na miak ngalap luk pianneh. Na ieh miak inan inul luk mangun ku raca' mepad kudeng Daud, idi ngimet bawang Yahuda. Ui ini Tuhan pangeh nepebala."

Yeremia 23

¹Pelaba rayeh ukum Tuhan kuan raca'-raca' luk nima' anak itinneh pitayen idi uen ngatad.

²Ini bala Tuhan Allah lun Israil ratnan raca'-raca' luk pinili' mangun ku lun matar pupuNeh, "Muyuh pangeh nengatad pupuKu idi nengusu nedeh. Idi na muyuh nematar nedeh. Nekini Ui sikal ngukum nemuyuh ngaceku amung-amung dat luk inau' muyuh.

³Ui miak ngamung pupuKu luk ketecan rat bawang-bawang luk inanKu nengatad nedeh, idi Ui miak nguit nedeh muli'. Idi ideh miak inan mula' anak idi amé'-amé' mula'.

⁴Ui miak maré kuandeh raca'-raca' luk miak matar nedeh, pad ideh na matot, idi seburur pana' nateh luk miak metutu'. Ui ini Tuhan pangeh nepebala."

⁵Kebala Tuhan, "Kali' rungen mucu Ui miak mili' aceh inul Daud luk matu mangun ku raca'. Raca' ineh mileh ngimet idi miak nganau' luk mesiri idi luk matu aput-apat tana'.

⁶Kareb Ieh mangun ku raca', pupu Yahuda miak do' udeng idi lun Israil na inan bunu'. Ideh miak neten raca' ineh 'Tuhan Pangeh Nengulun Netau.'

⁷"Idi mucu," kebala Tuhan, "lemulun na megéi' pebala, 'Allah luk mulun nenguit nelun Israil remuat rat bang bawang Masir.'

⁸Iamo' ideh miak pebala, 'Allah luk mulun pangeh nenguit nelun Israil remuat rat bang bawang luk pa tinueh busat aco, idi rat bang amung bawang luk baken luk inan Tuhan nengatad nedeh. Idi ideh miak tudo bang bawangdeh sebuleng teh.' “

⁹Kebala Yeremia ratnan nabi-nabi, "Niatku melaso idi teh ui megeker. Ngaceku Tuhan idi balaNeh luk meligan, ui mepad kudeng lemulun luk mabuk, luk nengirup pelaba ula' abpa' anggur.

¹⁰Bawang ini mepanu' ku lemulun luk na maya' Tuhan. Idi ideh nganau' luk dat, idi na mutut luk mesiri. Idi ngaceku ukum Tuhan amung tana' tekedamut; idi laman-laman tekering.”

¹¹Kebala Tuhan, "Amung nabi idi imam na ngerawé Allah, Ui nenier nedeh nganau' luk dat bang Ruma' Allah pana'.

¹²Amung dalan luk béndeh mesalud idi medacem. Idi Ui miak nganau' nedeh metebaceng idi mebpeh. Ui miak ngacing dereh kuandeh, ukumdeh lélé macing. Ui ini Tuhan pangeh nepebala.

¹³Ui pangeh nenier sala' nabi-nabi Samaria. Ideh nepebala dengan ngadan Baal, idi nengeraruh pupuKu lun Israil.

¹⁴Iamo' Ui pangeh nenier nabi-nabi Yerusalim nganau' luk meluun dat. Ideh pasét idi mebalih, idi nguyut lemulun nganau' luk dat, pad seburur pana' nateh luk pian ugka' nganau' luk dat. SirenKu, ideh mepad dat, kudeng lun Sodom idi Lun Gemora.

¹⁵"Ngaceku ineh, Ui ini Tuhan luk Melalud pebala ratnan nabi-nabi Yerusalim: Ui miak maré tibu luk mepét kenendeh, idi abpa' luk megalih rupendeh, ngaceku ideh na manu idi nengeperuit luk dat aput-aput tana'."

¹⁶Kebala Tuhan luk Melalud kuan pupu Yerusalim, "Aleg ninger bala nabi-nabi, ngaceku ideh nguit nemuyuh merapet inan bala luk mo'-mo'. Ideh mada' nemuyuh ratnan luk pangeh tirawédeh sebuleng, idi baken luk bilaKu.

¹⁷Ideh megéi' ngubuk lemulun luk ara' ninger balaKu, kebaladeh, 'Amung-amung luk do' miak mangun kuan muyuh.' Idi ideh mada' lemulun luk metueh niat, kebaladeh, 'Na tu-tu susa' miak macing nemuyuh.' "

¹⁸Kebala Yeremia, "Seburur pana' rat arang nabi-nabi ini nateh luk pangeh nekali' terawé Tuhan luk inalum. Seburur pana' rat arangdeh nateh luk pangeh neninger balaNeh idi kali' ilungneh. Na tu-tu ideh neninger idi nemaya' luk bila Tuhan.

¹⁹Useh Allah mepad kudeng barui, idi kudeng libuleh luk macing luun uluh lemulun luk dat.

²⁰Ieh na miak ugka' pad Ieh nganau' amung-amung luk pian ruenNeh. Muci aco pupuNeh miak kali' ilungneh dengan megala'."

²¹Kebala Tuhan, "Na Ui nengecuk nabi ini, iamo' ideh iné'. Na Ui nemaré balaKu nedeh, iamo' ideh nepebala dengan ngadanKu.

²²Kudeng ideh pangeh nekali' terawéKu luk inalum, idi ideh miak mada' balaKu kuan pupuKu, idi ngecuk nedeh uren ratnan ulundeh idi kekamendeh luk dat.

²³"Ui ini Allah luk idi iapeh-iapeh pana', idi baken bang sebuleng luk inan mo'. Ui ini Tuhan pangeh nepebala.

²⁴Seburur pana' nateh luk miak sigapung su luk na kali'Ku. Naké muyuh kali' Ui idi iapeh-iapeh bang langit idi luun tana' pana'?

²⁵Ui kali' luk bila nabi-nabi ineh luk mebalih dengan ngadanKu idi luk pebala, 'Tuhan pangeh nemaré balaNeh nekai bang nupi kai.'

- ²⁶Tuda' ioké nabi-nabi ini miak ngeraruh pupuKu dengan balih luk pangeh tirawédeh?
- ²⁷Ideh ngerawé pupuKu miak mekelupan Negku ngaceku nupi-nupi luk badénde, mepad kudeng tepunde nekelupan Negku idi nelumi inan Baal.
- ²⁸Do' nabi luk pangeh nenginupi pebala, 'Ui pangeh nenginupi mo', 'iamo' do' nabi luk pangeh neninger balaKu mada' bala ineh dengan luk matu. Lipang padé na miak uen maad dengan bera.
- ²⁹BalaKu mepad kudeng apui idi mepad kudeng tuno luk mila' batu.
- ³⁰Ui megateh inan nabi luk mano balaKu ratnan nabi luk baken, pad ideh sebuleng miak mada' bala ineh.
- ³¹Ui megateh inan nabi luk mada' baladeh sebuleng idi pebala, 'Kudeng ini bala Tuhan.'
- ³²Do' ninger balaKu, ieh ineh bala Tuhan. Ui megateh inan nabi luk mada' nupideh dengan mebalih. Ideh mada' nupideh idi ngeraruh pupuKu dengan balih idi dita' niatdeh. Na Ui nengecuk nedeh, idi na tu-tu ideh ngedengan pupuKu. Ui ini Tuhan pangeh nepebala.
- ³³"O Yeremia, kareb seburur rat arang pupuKu, idi nabi idi imam pana' ngitun namu, kebaladeh, 'Anunké bala Tuhan?' do' mada' nedeh, kebalamu, 'Bala Tuhan, ieh ineh aceh babeh, idi ieh miak nala' nemuyuh.'
- ³⁴Idi kudeng seburur nabi, idi imam, idi seburur rat arang pupu ini pana' pebala, 'Bala Tuhan, ieh ineh aceh babeh,' idi Ui miak ngukum neneh dengan amung uang tetek ruma'neh pana'.
- ³⁵Iamo' petulu ieh ngitun nelun rurumneh idi pupuneh, kebalaneh, 'Kudeng apehké Tuhan nengor bala muyuh? Anunké luk bilaNeh?'
- ³⁶Idi na ideh miak pebala, 'Bala Tuhan, ieh ineh aceh babeh,' ngaceku kudeng inan seburur lemulun luk pebala kudeng ineh, idi Ui miak nganau' balaKu mangun ku aceh babeh kuanneh. Lemulun ini pangeh nengisu' bala Allahdeh, ieh ineh Allah luk mulun, Tuhan luk Melalud.

³⁷O Yeremia, do' ngitun nelun nabi, kebalamu, 'Kudeng apehké Tuhan nengor bala muyuh? Idi anunké luk bila Tuhan?'

³⁸⁻³⁹Idi kudeng ideh pebala, 'Bala Tuhan, ieh ineh aceh babeh,' idi kali' rungen Ui miak ngakem nedeh idi nala' nedeh mado rat Negku, do' ideh idi bawang luk biréKu nedeh idi inan tepundeh pana'. Ngaceku ideh nengeruat bala luk bibpengKu ineh.

⁴⁰Ui miak ngacing kuandeh igu' luk meruked, luk na miak mekelupan."

Yeremia 24

¹Tuhan nemada' sirenku, dueh tayen mepanu' ku bua' gita' luk rireng pa atun Ruma' Allah. Ieh ineh mucu ratnan Nebukadnesar raca' Babil nenaban tuda'-tuda' burur lemulun rat Yerusalim amé' Babil, ieh ineh Yoyakin Yoyakim, raca' Yahuda, dengan amung lun rayeh Yahuda idi amung-amung lun luk mileh ngakem.

²Tayen luk pun-pun mepanu' ku bua' gita' luk do', luk saget melak, iamo' tayen luk baken mepanu' ku bua' gita' luk pelaba dat, luk na miak kenen.

³Idi kebala Tuhan negku, "O Yeremia, anunké luk sirenmu?" Idi ui nengor balaNeh, kebalaku, "Bua' gita'. Luk do', ieh ineh pelaba do', idi luk dat, ieh ineh pelaba dat, pad ieh na miak kenen."

⁴Idi kebala Tuhan negku,

⁵"Ui ini luk Tuhan Allah lun Israil ngerawé idi pupu luk tiban iné' Babil mepad kudeng bua' gita' luk do' ini, idi Ui miak méi' nedeh.

⁶Ui miak matar nedeh idi nguit nedeh lemubed amé' bang bawang ini. Ui miak ngeperuan nedeh, idi na miak ngukum nedeh; Ui miak nibu nedeh, idi na miak mubput nedeh.

⁷Ui miak ngegio niatdeh, pad ideh pian ngiti Negku. Ideh mangun ku pupuKu, idi Ui mangun ku Allahdeh, ngaceku ideh miak lumi Negku dengan amung niatdeh.

⁸"Idi Ui ini Tuhan miak nganau' kuan Sedekia, raca' Yahuda, idi kuan amung penguluneh, idi kuan lun Yerusalim luk ketecan bang bawang ini, idi luk iné' Masir pana', mepad kudeng luk ruenKu kuan bua' gita' luk dat ini, idi luk na miak kenen.

⁹Ui miak ngacing ukum luk dat kuandeh, pad amung pupu bang tana' ini miak matot. Lemulun miak situnga nedeh, meriruh nedeh, idi ngedat nedeh, idi ngadandeh tetanendeh ku kediman bang amung bawang luk inanKu nengatad nedeh.

¹⁰Ui miak ngacing bunu', lau, idi ét kuandeh pad seburur pana' rat arangdeh nateh luk ketecan bang bawang luk biréKu nedeh idi inan tepundeh."

Yeremia 25

¹Bang lak luk keapat kareb imet Yoyakim Yosia, raca' Yahuda, idi Yeremia nengalap bala Tuhan ratnan amung pupu Yahuda. (Ieh ineh bang lak luk pun-pun, kareb imet Nebukadnesar raca' Babil.)

²Idi kebala Yeremia kuan amung pupu Yahuda idi kuan amung lemulun luk tudo déi' Yerusalim,

³"Tuhan pangeh nepebala negku dueh ngepulu' teluh lak kinioneh, ieh ineh rat lak luk kepulu' teluh kareb imet raca' Yosia Amon nelun Yahuda pad macing aco sini idi na ui ugka' mada' nemuyuh ratnan luk bilaNeh. Iamo' na muyuh nemaya' balaNeh.

⁴Muyuh na neninger idi na nemaya' balaNeh, sagan tu pana' Tuhan na ugka' ngecuk demulunNeh lun nabi amé' nemuyuh.

⁵Ideh nengecuk nemuyuh lumi ratnan lawé idi kekamen muyuh luk dat, pad muyuh miak tudo bang bawang luk biré Tuhan nemuyuh idi inan tepun muyuh mangun ku babpat muyuh luk meruked.

⁶Ideh nengecuk nemuyuh na sembayang idi na maya' allah baken, idi na nganau' Tuhan museh ngaceku sembayang inan akang luk pangeh inau' muyuh. Kudeng muyuh pangeh nemaya' bala Tuhan, idi na Ieh pian ngukum nemuyuh.

⁷Iamo' kebala Tuhan, 'Muyuh na sikal ninger balaKu. Iamo' muyuh nganau' Negku museh ngaceku akang muyuh. Idi muyuh pangeh nengacing ukumKu kuan burur muyuh sebuleng.'

⁸"Idi ngaceku muyuh na neninger balaNeh, kebala Tuhan luk Melalud,

⁹Ui miak nawar amung pupu rat pa tinueh busat aco, idi demulunKu Nebukadnesar raca' Babil. Idi Ui miak nguit nedeh munu' nemuyuh idi amung pupu libut-libut muyuh. Idi Ui miak ngusag bawang-bawang muyuh pad ideh na miak piduten raked-raked peh. Idi amung-amung lemulun miak megagap nier luk mangun kuan muyuh. Ui ini Tuhan pangeh nepebala.

¹⁰Idi Ui miak ngagka' do' ria' idi awang niatdeh, dengan tang decur idi deléi luk sikal ngaweh. Idi Ui miak ngagka' uni iung lemulun luk tupeh. Idi Ui miak ngilep lapungdeh.

¹¹Idi aput bawang ini miak uen ngusag, pad ieh pelaba dat ayu. Idi amung-amung pupu ini miak mangun ku demulun raca' Babil tudu' ngepulu' lak kinioneh.

¹²Muci ratnan ineh Ui miak ngukum raca' Babil idi anak itinneh ngaceku sala'deh. Ui miak ngusag bawangdeh, pad ieh na piduten raked-raked.

¹³Ui miak ngukum bawang Babil maya' kudeng luk bilaKu, idi luk inayud bang surat ini, ieh ineh amung-amung ukum luk bila Yeremia miak macing kuan amung pupu ini.

¹⁴Mula' pupu idi raca'-raca' luk rayeh miak naban nedeh mangun ku demulun, idi Ui miak ngua' amung kekamendeh luk dat.' "

¹⁵Kebala Tuhan Allah lun Israil negku, "Ini aceh sangkir abpa' anggur luk mepanu' ku usehKu. Ui ngecuk namu nguit sangkir ini kuan tuda'-tuda' pupu luk badénKu namu, pad ideh ngirup abpa' ini.

¹⁶Kareb ideh ngirup abpa' ini ideh idar-idar lawé idi meraruh terawé ngaceku bunu' luk uenKu ngacing kuandeh."

17Idi ui nengalap sangkir ineh rat bang palad Tuhan idi nemaré abpa' ineh rupan amung-amung pupu luk bida' Tuhan negku.

18Yerusalim idi amung-amung bawang Yahuda dengan raca'-raca' idi penguludeh nengirup abpa' ineh pad bawang ineh mangun ku su luk ali-ali. Idi amung-amung lemulun megagap nier luk pangeh nangun kuandeh, pad ngadandeh tetanen lemulun ku kediman. (Idi kudeng ini luk mangun macing aco sini.)

19-26Ini ngadan lemulun luk nengirup abpa' ineh: raca' Masir idi amung pengulu idi lun rayehneh; amung lun Masir, idi sakaideh; amung raca' bawang Us; amung raca' bawang Pilistin: ieh ineh bawang Askelon, Gasa, Ekeron, idi luk ketecan ratnan bawang Asdod; amung pupu Edom, Moab, idi Amon; amung raca' Sur idi Sidon; amung raca' luk ngimet bawang tangeb Abpa' Rayeh; amung bawang Dedan, Tema, idi Bus; amung pupu luk mekamu' abpuk; amung raca' bawang Arab; amung raca' lemulun luk tudo déi' su luk ali-ali; amung raca' Simri, Elam, idi Midi; amung raca' rat pa tinueh busat aco luk muneng idi luk mado, ieh ineh amung-amungdeh. Anid pupu bang tana' ini na miak na ngirup abpa' ineh. Idi mucu raca' Babil pana' nengirup ineh.

27Idi kebala Tuhan negku, "Do' mada' pupu ini, kebalamu, 'Ui ini Tuhan luk Melalud, Allah lun Israil ngecuk nemuyuh ngirup pad muyuh mabuk idi kuta', pelé muyuh mebpeh idi na miak tumui ngaceku bunu' luk uenKu ngacing kuan muyuh.'

28Idi kudeng ideh ara' ngalap sangkir rat bang paladmu, pad ideh miak ngirup abpa' ineh, do' mada' nedeh, kebalamu, Tuhan luk Melalud ngecuk nemuyuh ngirup ineh.

29Ui miak ngimun ngukum bawangKu sebuleng. Miakké muyuh mepuit ratnan ukumKu? Na tu-tu muyuh miak mepuit. Ngaceku Ui ngacing bunu' kuan amung-amung pupu bang tana' ini. Ui ini Tuhan luk Melalud pangeh nepebala.

30"O Yeremia, do' iko mada' amung-amung luk pangeh bilaKu. Do' iko mada' lemulun ini, kebalamu, 'Tuhan miak ngitang rat bang langit, idi pebala rat déi' dita'. Ieh miak megateh niat inan pupuNeh; Ieh miak ngitang mepad kudeng lemulun luk ngeradu' buah' anggur, idi idé-idé luk bang tana' ini miak ninger Neneh

31LinguNeh miak pedingeren pad macing iring tana' pana', ngaceku Tuhan ngadu' amung-amung pupu. Ieh miak nutun amung-amung pupu idi ngaté amung-amung lemulun luk nganau' luk dat. Tuhan pangeh nepebala.' "

32Kebala Tuhan luk Melalud, "Dereh miak macing kuan anid-anid pupu, idi aceh barui miak macing rat iring tana'.

33Kareb aco ineh amung butung lemulun luk pinaté Tuhan miak uen ngatad rat iring tana' selipa macing iring tana' selipa. Idi seburur pana' nateh luk temido nedeh. Butungdeh na miak lapen idi tinamen. Ideh miak telubid luun tana' mepad kudeng rimuk luun tana'.

34"Do' muyuh lun rayeh ngitang. Do' muyuh temido idi siluti luun tana'. Ngaceku tarekneh pangeh nacing, muyuh miak pitayen, idi muyuh miak kereten mepad kudeng dumba deléi luk meluun do'.

35Idi lun rayeh pupu na miak mepuit.

36-37Idi bang derehdeh ideh ngitang idi ngarod, ngaceku dengan usehNeh, Tuhan pangeh nengusag bawangdeh luk do'.

38Tuhan pangeh nenecan pupuNeh, mepad kudeng aceh balang luk necan lubangneh. Amung dereh bunu' idi useh Tuhan pangeh nengisu' bawang ineh mangun ku su luk ali-ali."

Yeremia 26

1Kareb Raca' Yoyakim Yosia nengimun ngimet bawang Yahuda,

2idi kebala Tuhan ni Yeremia, "Do' tuped luun natad Ruma' Allah idi mada' amung-amung luk icukKu namu, kuan amung-amung lemulun luk macing rat

bawang-bawang Yahuda, pad ideh sembayang déi'. Aleg mekelupan sebila' bala pana'.

³Kian, lemulun ineh miak ninger idi necan kekamendeh luk dat lek. Kudeng pieh kudeng ineh Ui miak ngisu' terawéKu ratnan ukum luk uenKu ngacing kuandeh ngaceku kekamendeh luk dat ineh.”

⁴Tuhan nengecuk ni Yeremia pebala inan pupu ineh, "Ui ini Tuhan ngecuk nemuyuh maya' Negku idi maya' amung bada' luk biréKu nemuyuh.

⁵Do' muyuh ninger amung bala demulunKu, lun nabi luk megéi' dukenKu amé' nemuyuh. Macing nekini pana' muyuh nateh nemaya' baladeh.

⁶Kudeng muyuh na maya' luk icukKu ini, idi Ui miak ngukum Ruma' Sembayang ini mepad kudeng luk inau'Ku déi' Silo. Amung pupu bang tana' ini miak neten ngadan bawang ini ku kediman.”

⁷Amung lun imam idi nabi idi amung pupu ineh neninger luk bila Yeremia bang Ruma' Allah.

⁸Kareb Yeremia pangeh nemada' amung-amung luk icuk Tuhan neneh, idi amung lun imam idi nabi idi pupu ineh pana' nengakem neneh, idi nengitang, "Na miak na iko pitayen ngaceku balamu ineh!

⁹Ngudehké iko pebala dengan ngadan Tuhan, 'Ruma' ini miak mangun mepad kudeng Silo, idi bawang ini miak uen ngusag, pad seburur pana' nateh luk miak tudo ieneh?' " Idi pupu ineh nengerieng ni Yeremia déi' bang Ruma' Allah.

¹⁰Kareb amung lun rayeh Yahuda neninger bala ratnan luk pangeh nangun, idi ideh nenalan rat ruma' raca' idi iné' tuped munung Tanga' Baruh déi' Ruma' Allah.

¹¹Idi kebala amung lun imam idi nabi kuan lun rayeh idi kuan pupu ineh, "Na miak na lemulun ini pitayen ngaceku ieh nengadu' bawang tau. Muyuh sebuleng pangeh neninger balaneh.”

¹²Idi kebala Yeremia kuan amung lun rayeh idi pupu ineh pana', "Tuhan nengecuk negku mada' amung-amung bala luk pindenger muyuh ratnan Ruma' idi bawang ini.

¹³Do' muyuh ngisu' lawé muyuh idi kekamen muyuh, idi maya' bala Tuhan Allah muyuh, pad Ieh miak ngisu' terawéNeh ratnan ukum luk miak uenNeh ngacing kuan muyuh.

¹⁴Iamo' ui ini bang palad muyuh. Do' nganau' anun-anun luk mesiri idi luk matu bang terawé muyuh.

¹⁵Iamo' kudeng muyuh ngaté negku, kali' rungen muyuh idi lun luk tudo bang bawang ini mesala', ngaceku ngaté lemulun luk na mesala', ngaceku Tuhan luk nengecuk negku mada' amung bala ini kuan muyuh."

¹⁶Idi kebala amung lun rayeh idi pupu ineh kuan lun imam idi nabi, "Lemulun ini na miak pitayen, ngaceku ieh nemada' netau dengan ngadan Tuhan Allah tau."

¹⁷Pangeh ineh tuda'-tuda' burur lun rayeh netuped idi nepebala kuan lemulun luk pangeh nepamung,

¹⁸"Kareb Raca' Hesehia nengimet bawang Yahuda, idi Nabi Mika rat Moreset nemada' nelun mula', kebalaneh, 'Kudeng ini bala Tuhan luk Melalud: Sion miak uen ngeradu mepad kudeng lati'; Yerusalim miak mangun ku perupun batu mo', idi surud su inan Ruma' Allah miak mangun ku pulung.'

¹⁹Idi Hesehia raca' Yahuda idi anak itinneh na nengaté ni Mika. Iamo' Hesehia matot inan Tuhan idi pian inanNeh méi'. Idi Tuhan nengisu' terawéNeh ratnan ukum luk miak uenNeh ngacing kuandeh. Idi nekini tau sikal ngacing aceh ukum luk pelaba rayeh kuan burur tau sebuleng."

²⁰(Idi inan seburur lemulun teh, ieh ineh Uria Semaya rat Kiriat Yarim, luk nemada' dengan ngadan Tuhan. Idi ieh nengadu' bawang ini idi pupu ini mepad kudeng luk inau' Yeremia.

²¹Kareb Raca' Yoyakim idi bawehneh idi lun rayehneh neninger luk bila Uria, idi raca' ineh pana' pian ngaté neneh. Iamo' Uria nekali' baladeh; idi ieh neburu iné' Masir.

²²Iamo' Raca' Yoyakim nengecuk ni Elnatan Akbor idi tuda'-tuda' burur lun baken amé' Masir pad ideh miak ngalap ni Uria.

²³Ideh nenguit ni Uria lemubed rat Masir kuan Raca' Yoyakim luk nengecuk ngaté neneh idi nala' butungneh bang lengutan lun masi'.)

²⁴Idi Ahikam Sapan nengedengan ni Yeremia, pad ieh na barén kuan pupu ineh idi pitayen.

Yeremia 27

¹Muci ratnan Sedekia Yosia mangun ku raca' Yahuda, idi Tuhan nengecuk ni Yeremia

²nganau' aceh paga' ratnan kubil sapi' idi raken kayuh, pad ieh miak ruen luun dieneh.

³Idi Tuhan nengecuk neneh maré aceh bala iten lun duken raca'-raca' Edom, Moab, Amon, Sur, idi Sidon luk pangeh iné' Yerusalim pad ideh papu' Raca' Sedekia.

⁴Tuhan luk Melalud, Allah lun Israil nengecuk ni Yeremia ngecuk nelun duken ineh mada' raca'-raca'deh ratnan luk bila Tuhan, kebalaNeh,

⁵"Ui ini dengan lalud idi tuehKu luk rayeh, nemudut tana' ini, idi lemulun idi amung pung luk tudo luun tana'. Idi Ui miak maré neneh kuan idé-idé luk pianKu.

⁶Ui luk pangeh nenganau' amung pupu ini bang palad demulunKu Nebukadnesar raca' Babil, amung pung luk meliputi pana' biréKu neneh.

⁷Amung pupu miak mangun ku demulunneh, idi demulun anakneh, idi demulun mupunneh pana', pad macing tarekneh bawangneh sebuleng miak uen ngelaya'. Idi pupuneh sebuleng miak mangun ku demulun tuda'-tuda' pupu baken luk melalud idi raca'-raca' luk rayeh.

⁸Iamo' kudeng aceh pupu idi bawang na pian uen Nebukadnesar ngimet, idi uenneh ngebeneh, idi Ui miak ngukum bawang ineh dengan bunu', lau, idi ét pana', pad bawang ineh uen Nebukadnesar ngimet.

⁹Aleg ninger bala nabi muyuh, idi idé-idé pana' luk mada' ratnan luk miak macing mucu, dengan mada' nupi, idi dengan nawar ada' lun naté, idi dengan ileh Sétan. Amung-amungdeh mebpeng nemuyuh na miak mangun ku demulun raca' Babil.

¹⁰Ideh naluk nemuyuh, pad muyuh tebanen amé' mado ratnan bawang muyuh sebuleng. Ui miak masut nemuyuh, idi muyuh miak pitayen.

¹¹Iamo' kudeng aceh pupu maya' bala raca' Babil idi mangun ku demuluneh, idi Ui miak nima' pupu ineh lutep tudo bang bawangdeh sebuleng, pad ideh nganau' lati' idi tudo déi'. Ui ini Tuhan pangeh nepebala.”

¹²Kudeng ineh teh bala Yeremia kuan Sedekia raca' Yahuda, kebalaneh, "Do' maya' bala raca' Babil, idi mangun ku demuluneh, idi demulun anak itinneh pana' pad iko mulun.

¹³Ngudehké iko idi anak itinmu pitayen bang bunu', idi maté ku lau idi ét pana'. Amung ineh miak mangun kuan anid-anid pupu luk na mangun ku demulun raca' Babil.

¹⁴Aleg iko ninger bala nabi-nabi luk mebpeng namu na miak mangun ku demulun raca' Babil. Ideh naluk namu.

¹⁵Kebala Tuhan, Na Ui nengecuk nedeh, idi ideh mebalih dengan ngadanKu. Ngaceku ineh, Ui miak masut namu idi iko miak pitayen, idi nabi-nabi luk mebalih ineh.”

¹⁶Idi Yeremia nemada' nelun imam idi pupu ineh luk pangeh bila Tuhan, kebalaNeh, "Aleg muyuh ninger bada' nabi-nabi luk pebala, 'Amung binaweh Ruma' Allah miak iten lemubed rat bawang Babil.' Ideh mebalih pa kiung muyuh.

¹⁷Aleg ninger baladeh. Do' mangun ku demulun raca' Babil pad muyuh mulun. Ngudehké muyuh nima' bawang muyuh uen ngusag?

¹⁸Kudeng ideh nabi luk matu luk kali' balaKu do' ideh mutuh Negku, Tuhan luk Melalud, pad Ui na nima' binaweh luk ketecan déi' Yerusalim, bang Ruma' Allah idi bang ruma' raca', iten amé' Babil.”

¹⁹⁻²⁰(Kareb Raca' Nebukadnesar nenaban Yoyakin Yoyakim, raca' Yahuda iné' Babil dengan amung lun rayeh Yahuda idi Yerusalim, ieh nenecan amung diri, idi luk inan sibaru', amung alen, idi tuda'-tuda' binaweh baken rat bang Ruma' Allah.)

²¹"Ninger balaKu, ieh ineh Tuhan luk Melalud, Allah lun Israil ratnan binaweh luk ketecan déi' Yerusalim bang Ruma' Allah idi bang ruma' raca' pana'.

²²Ideh miak iten amé' Babil idi ketecan déi', pad Ui ngerawé binaweh ineh teh. Idi Ui miak nguit binaweh ineh lemubed idi ngerareng amung ineh bang su luk inandeh. Ui ini Tuhan pangeh nepebala."

Yeremia 28

¹Bang lak ineh teh, ieh ineh bang bulan luk kelimeh idi lak luk keapat kareb imet Raca' Sedekia, idi Hanania Asur, seburur nabi rat bawang Gibion nepebala ni Yeremia bang Ruma' Allah. Kebalaneh ni Yeremia pa kiung amung imam idi lun mula' teh,

²"Kudeng ini bala Tuhan luk Melalud, Allah lun Israil, 'Ui pangeh nengelaya' raca' Babil.

³Bang dueh lak Ui miak nguit lemubed amung binaweh luk tiban Raca' Nebukadnesar rat Ruma' Allah iné' Babil.

⁴Idi Ui miak nguit ni Yoyakin Yoyakim, raca' Yahuda dengan amung lun luk tiban rat Yahuda iné' Babil, muli'. Mo, Ui miak ngelaya' raca' Babil. Ui ini Tuhan pangeh nepebala.' “

⁵Idi kebala Yeremia inan Nabi Hanania pa kiung amung imam idi lun mula' luk tuped bang Ruma' Allah,

⁶"Do' kudeng amung ineh mangun, idi Tuhan ngacing amung balamu, pad Ieh nguit lemubed rat Babil amung binaweh Ruma' Allah idi amung lemulun luk pangeh tiban.

⁷Iamo' ninger luk belénku namu idi nelun mula' teh.

⁸Nabi-nabi luk nemada' atun rat negku idi rat namu teh nemada' ratnan bunu', lau, idi ét luk miak macing kuan mula' pupu idi imet luk rayeh.

⁹Iamo' nabi luk mada' na miak inan bunu', baken nabi luk icuk Tuhan, kudeng luk bila nabi ineh na uen ngacing."

¹⁰Idi Hanania nengalap paga' rat luun dier Yeremia idi nemutul neneh.

¹¹Idi kebala Hanania pa kiung lun mula', "Kudeng ini bala Tuhan, 'Ui miak mutul paga' luk inau' Raca' Nebukadnesar luun dier amung-amung pupu bang dueh lak kinioneh.' " Kareb ieh neninger bala ineh, idi Nabi Yeremia neburo rat neneh.

¹²Muci ratnan Hanania nemutul paga' luk luun dier Yeremia, idi kebala Tuhan ni Yeremia,

¹³"Amé' mada' ni Hanania, kebalamu, 'Kebala Tuhan, Iko miak mutul paga' kayuh, iamo' Ieh miak ngelibal neneh ku paga' belawan.

¹⁴Kebala Tuhan luk Melalud, Allah lun Israil, Ui miak nganau' paga' belawan luun dier amung-amung pupu ini, idi ideh miak mangun ku demulun Nebukadnesar, Raca' Babil. Idi Ui miak maré amung-amung pung luk meliputiut pana' kuan Nebukadnesar.' "

¹⁵Idi kebala Yeremia ni Hanania, "O Hanania, do' iko ninger! Na iko icuk Tuhan, idi iko ngeraruh pupu ini pad ideh maya' balihmu.

¹⁶Ngaceku ineh, kebala Tuhan, 'Ui pian nala' namu. Kareb nateh lak ini mabud iko miak maté ngaceku iko nengecuk pupu ini ngelaba bala Tuhan.' "

¹⁷Idi Nabi Hanania naté bang bulan luk ketudu' bang lak ineh.

Yeremia 29

- ¹Nabi Yeremia nengayud aceh surat kuan amung lun rayeh, imam, nabi, idi pupu Yahuda luk tiban Nebukadnesar rat Yerusalim iné' Babil.
- ²Ieh nengayud surat ineh mucu ratnan Raca' Yoyakin, tinanneh, amung lun rayeh bang ruma' raca', amung lun rayeh Yahuda idi Yerusalim, idi amung lun luk mileh bang anid-anid kekamen pangeh tiban rat Yerusalim.
- ³Sedekia, raca' Yahuda nengecuk Elasa Sapan idi Gemaria Hilkia nated surat ineh ni Nebukadnesar raca' Babil. Idi kebala surat ineh kudeng ini:
- ⁴"Kebala Tuhan luk Melalud, Allah lun Israil, kuan amung lemulun luk sinima' Tuhan tiban Nebukadnesar rat Yerusalim iné' Babil,
- ⁵'Do' muyuh mudut ruma' idi tebawang, idi nganau' kabun idi kuman luk tibuen muyuh.
- ⁶'Do' muyuh ngaweh pad muyuh inan anak. Idi nima' anak muyuh ngaweh, pad ideh pana' inan anak, idi muyuh amé' mula'.
- ⁷'Do' ngakem kuan bawang luk inanKu nemaré nemuyuh tebanen, pad bawang ineh ruen ngeperuan. Do' mutuh Negku ngeperuan bawang ineh, ngaceku kudeng ieh ruen ngeperuan, muyuh pana' miak ruen ngeperuan teh.
- ⁸Ui ini Tuhan Allah lun Israil, mada' nemuyuh pad muyuh na saluken nabi-nabi luk tudo arang muyuh idi idé-idé pana' luk mada' ratnan luk miak macing mucu. Aleg maya' nupideh.
- ⁹Ideh mebalih dengan ngadanKu. Na Ui nengecuk nedeh. Ui ini Tuhan pangeh nepebala.'
- ¹⁰"Kebala Tuhan, 'Kareb mabud tudu' ngepulu' lak déi' Babil, Ui miak méi' nemuyuh idi maya' jani'Ku idi nguit nemuyuh muli'.
- ¹¹Ui sebuleng mo' kali' luk pianKu kuan muyuh, pad muyuh ruen ngeperuan, idi na medereh peh, pelé muyuh miak ngalap luk pian muyuh.
- ¹²Kareb ineh muyuh miak nawar Negku idi sembayang mutuh rat Negku, idi Ui miak ngua' sembayang muyuh.

¹³Muyuh miak nakap Negku, idi muyuh miak miti Negku, ngaceku muyuh nakap Negku dengan amung niat muyuh.

¹⁴Ui ini Tuhan pebala, muyuh miak miti Negku, idi Ui miak nguit nemuyuh muli' amé' bawang muyuh. Ui miak ngamung nemuyuh rat bang anid bawang idi su luk inanKu nengatad nemuyuh. Idi Ui miak nguit nemuyuh muli' amé' bawang luk inanKu nemaré nemuyuh tiban. Ui ini Tuhan pangeh nepebala.'

¹⁵"Kebala muyuh, 'Tuhan pangeh nemaré nabi kuan kai déi' Babil.'

¹⁶Do' ninger luk bila Tuhan ratnan raca' luk ngimet bawang mepad kudeng Raca' Daud, idi ratnan amung lemulun bang bawang ini, ieh ineh pupu muyuh luk na tiban maya' nemuyuh.

¹⁷Kebala Tuhan luk Melalud, 'Ui ngacing bunu', lau, idi ét kuandeh, idi Ui miak nganau' nedeh mepad kudeng bua' gita' luk melu luk na miak kenen.

¹⁸Ui miak ngeradu' nedeh idi ngacing bunu', lau, idi ét kuandeh, pad amung pupu bang tana' ini miak megagap ku ideh. Iapeh-iapeh pana' luk inanKu ngatad nedeh, lun baken miak megagap idi matot, ngaceku luk pangeh nangun kuandeh. Ideh miak situnga nedeh idi neten ngadandeh ku kediman.

¹⁹Amung ini miak mangun kuandeh ngaceku ideh na maya' bala luk megéi' bida' kuandeh dengan tang demulun idi nabiKu. Ideh ara' ninger bala ineh.

²⁰Do' amung muyuh luk biréKu tiban raca' Babil rat Yerusalim, ninger luk bilaKu, ieh ineh Tuhan.'

²¹"Kebala Tuhan luk Melalud, Allah lun Israil ratnan Akab Kolaya idi Sedekia Masia, luk mebalih dengan ngadanNeh, 'Ui miak maré nedidueh bang palad Nebukadnesar raca' Babil luk miak ngaté nedidueh pa kiung muyuh.

²²Kareb lemulun luk tiban rat Yerusalim iné' Babil pian ngediman seburur lemulun idi ideh miak pebala, "Nima' Tuhan nganau' kuanmu mepad kudeng luk inau' raca' Babil kuan Sedekia idi Akab luk isebneh mulun!"

²³Amung ini miak mangun kuandeh ngaceku ideh nenganau' luk mebacé — ideh pasét idi mebalih dengan ngadan Tuhan. Ini baken luk pianKu. Ui kali'

amung kekamendeh, idi Ui mangun ku lun nekali' nedeh. Ui ini Tuhan pangeh nepebala.' “

24-25Tuhan luk Melalud, Allah lun Israil nengecuk ni Yeremia mada' ni Semaya rat Nehelam, luk pangeh nemaré surat dengan ngadanneh kuan amung lun Yerusalim, idi kuan Imam Sepania Masia idi kuan amung imam baken. Idi kebala Semaya bang surat luk biréneh ni Sepania:

26"Tuhan nenganau' namu mangun ku imam ku libal Yoyada, idi nekini iko lun rayeh bang Ruma' Allah. Do' iko ngecuk nelun ngaling amung lun luk mebacé luk siayu mangun ku nabi, idi ngabet dierdeh ku belawan.

27Ngudeh iko na nengukum ni Yeremia rat Anatot luk ngedita' bururneh arang muyuh mepad kudeng nabi.

28Do' ngukum ni Yeremia ngaceku kebalaneh nelun luk tiban déi' Babil, 'Kali' rungen muyuh mio déi' Babil. Do' muyuh mudut ruma' idi tebawang, idi nganau' kabun idi kuman luk tibuen muyuh.' “

29Surat Semaya ini bica' Imam Sepania ni Yeremia.

30Idi kebala Tuhan ni Yeremia,

31-32"Do' maré bala ini kuan amung-amung lun luk tiban déi' Babil, 'Kudeng ini bala Tuhan ratnan Semaya: Ui ini Tuhan miak ngukum ni Semaya dengan amung inulneh. Na Ui nengecuk neneh, iamo' ieh nepebala nemuyuh mepad kudeng nabi, pad muyuh nemaya' balihneh. Na ieh miak inan inul arang muyuh. Ieh na miak mulun, pad ieh nier amung-amung luk do' luk miak ruenKu kuan pupuKu, ngaceku ieh nengecuk nedeh ngelaba balaKu. Ui ini Tuhan pangeh nepebala.' "

Yeremia 30

1Tuhan Allah lun Israil,

2nepebala ni Yeremia "Do' ngayud bang aceh surat amung-amung luk bilaKu namu.

³Ngaceku tarekneh malé macing kareb Ui miak muit pupuKu, lun Israil idi lun Yahuda. Ui miak nguit nedeh lemubed inan tana' luk biréKu kuan tepundeh. Idi ideh miak ngalap tana' ineh ku babpatdeh. Ui ini Tuhan pangeh nepebala.”

⁴Kebala Tuhan kuan lun Israil idi lun Yahuda:

⁵”Ui ninger lemulun ngarod, ngaceku megagap idi matot, ngaceku na awang niatdeh.

⁶Do' muyuh ngitun idi ngerawé! Miakké seburur deléi nenganak? Ngudehké Ui nier anid-anid burur deléi ngakem batekdeh, mepad kudeng decur luk mét nenganak? Ngudehké amungdeh mebudi kiung?

⁷Aceh kareb luk pelaba dereh miak macing; luk meluun dat ratnan amung kareb luk baken — amung inul Yakub miak mesusa' niat; iamo' ideh miak mulun.”

⁸Kebala Tuhan luk Melalud, "Kareb aco ineh macing Ui miak mutul paga' luk luun dierdeh idi neka kalingdeh, pad ideh na mangun ku demulun pupu baken teh.

⁹Iamo' ideh miak mangun ku demulunKu, ieh ineh Tuhan Allahdeh, idi Daud, luk barénKu nedeh mangun ku raca'deh.

¹⁰”O pupuKu, aleg muyuh matot. O muyuh lun Israil, aleg muyuh merapang. Ui muit nemuyuh ratnan bawang luk mado, ratnan tana' Babil luk inan muyuh tiban. Muyuh miak muli' dengan mawang niat, pad muyuh do' udeng, idi seburur pana' nateh luk miak ngatot nemuyuh.

¹¹Ui ngedengan nemuyuh idi ngulun nemuyuh. Ui miak ngusag amung-amung bawang, luk inanKu nengatad nemuyuh, iamo' na Ui ngaté nemuyuh. Ui na muit nemuyuh ratnan amung ukum; iamo' Ui miak méi' nemuyuh. Ui ini Tuhan pangeh nepebala.”

¹²Kebala Tuhan kuan pupuNeh, "Et muyuh pelaba bura' idi urat muyuh na miak mepali'.

13Seburur pana' nateh luk miak ngasa' nemuyuh idi kimuh muyuh na miak mepali'. Na tu-tu iko miak uen ngedo'.

14Amung rurum muyuh nekelupan nemuyuh, idi na ideh méi' nemuyuh. Ui nenecat nemuyuh mepad kudeng bunu', idi ukum muyuh pelaba berat, ngaceku sala' muyuh luk mula', idi dat muyuh luk rayeh.

15Aleg muyuh medureng ratnan urat muyuh, ngaceku ét muyuh na miak uen ngedo'. Ui nengukum nemuyuh kudeng ini, ngaceku sala' muyuh luk mula', idi dat muyuh luk rayeh.

16Amung lemulun luk ngedereh nemuyuh miak uen ngedereh, idi amung bunu' muyuh miak tebanen. Amung lemulun luk ngesusa' nemuyuh miak uen ngesusa', idi bawang amung lemulun luk ngaro bawang muyuh, miak uen ngaro teh.

17Ui miak maré nemuyuh do' ulun, idi ngedo' urat muyuh, sagan tu pana' bunu' muyuh pebala, 'Sion pangeh tila'; seburur pana' nateh luk méi' neneh! Ui ini Tuhan pangeh nepebala.”

18Kebala Tuhan, "Ui miak nguit pupuKu lemubed amé' inan tana'deh, idi Ui méi' inan anid-anid tetek ruma'deh. Anid bawang miak piduten baruh idi anid ruma' pana'.

19Lemulun luk tudo déi' miak menani idi ngubur Tuhan. Ideh miak ngitang ku awang niatdeh. Ui miak maré nedeh amé'-amé' mula', idi ngedita' nedeh.

20Idi amung anakdeh mepad kudeng luk atun, idi bawangdeh miak uen ngelelep pa kiungKu. Ui miak ngukum amung pupu luk ngedereh nedeh.

21-22Penguludeh idi raca'deh miak tumui rat arang pupudeh sebuleng. Kareb Ui nawar neneh, ieh miak amé' muneng Negku. Seburur pana' nateh luk mekuu' amé' kudeng ieh na tinawar. Ideh miak mangun ku pupuKu idi Ui miak mangun ku Allahdeh. Ui ini Tuhan pangeh nepebala.”

23-24UsehNeh mepad kudeng barui, idi kudeng libuleh luk macing luun uluh lemulun luk dat. Ieh na miak ugka' pad Ieh nganau' amung-amung luk pian ruenNeh. Muci aco pupuNeh miak kali' ilungneh dengan megala'.

Yeremia 31

¹Kebala Tuhan, "Tarekneh malé macing kareb Ui mangun ku Allah amung pupu Israil, idi ideh miak mangun ku pupuKu.

²Ui pangeh méi' kuan lemulun déi' su luk ali-ali luk nepuit ratnan até. Kareb lun Israil pian ngato erurdeh,

³idi Ui nesilangan kuandeh rat mado. O muyuh lun Israil, Ui megéi' mawa nemuyuh pad Ui megéi' ngegala' éi'Ku.

⁴Ui miak naped nemuyuh baruh. Muyuh miak ngalap karing muyuh idi ngalai dengan awang niat.

⁵Sekua' teh muyuh miak nibu kabun anggur luun surud Samaria, idi lemulun luk nibu kabun ineh miak kuman bua'neh.

⁶Matu, tarekneh malé macing kareb lun matar bawang miak ngitang rat luun surud Epraim, 'Do' tau mudik amé' Sion, idi papu' Tuhan Allah tau.' "

⁷Kebala Tuhan, "Menani dengan mawang niat kuan Israil, pupu luk meluun rayeh. Do' muyuh menani ngubur Tuhan, 'Tuhan pangeh nengulun pupuNeh, idi nemuit amung lun luk neketecan.'

⁸Ieh miak nguit nedeh rat pa tinueh busat aco, idi ngamung nedeh rat iring tana'. Lun mebuser idi lun luk mekio' miak maya' nedeh, idi decur luk mali', idi luk malé nenganak; amungdeh miak lemubed mangun ku aceh pupu luk rayeh.

⁹PupuKu miak lemubed dengan nangi', idi sembayang kareb Ui nguit nedeh muli'. Ui miak nguyut nedeh macing inan arur, idi maya' dalan luk do', pad ideh na metebaceng. Ui ini mepad kudeng taman lun Israil, idi Epraim, ieh ineh anakKu luk atun.

¹⁰Amung pupu, ninger balaKu, ieh ineh Tuhan. idi mada' balaKu déi' bawang luk mado! Ui ini, luk nengatad nelun Israil, miak ngamung nedeh idi matar nedeh mepad kudeng lemulun luk matar sengeriudan dumbaneh.

- 11**Ui pangeh nengulun nelun Israil, idi nemuit nedeh rat bang palad aceh pupu luk rayeh.
- 12**Ideh miak amé' menani dengan mawang niat luun Pegkung Sion, idi ideh mawang niat ku baréKu, ieh ineh padé, abpa' anggur, umau, dumba, idi sapi' pana'. Ideh mepad kudeng aceh kabun luk megéi' uen mubpur, idi ideh na miak medereh teh.
- 13**Amung anak adi' decur miak ngalai dengan mawang niat, idi deléi luk mengered idi luk isuut teh miak mawang niat. Ui miak ngubuk nedeh, pad tidodeh mangun ku awang, idi susa'deh pana' mangun ku awang niat.
- 14**Ui miak ngebor amung imam dengan akan luk meluun do', idi maré amung-amung luk pian pupuKu. Ui ini Tuhan pangeh nepebala.”
- 15**Kebala Tuhan, "Inan aceh tang pindenger déi' bawang Rama. Inan luk nangi' idi temido teh, ieh ineh Rakel luk nangi' ku anakneh, idi na ieh miak buken, ngaceku anakneh na idi peh.
- 16**Aleg iko nangi', idi do' miid abpa' matehmu. Amung-amung luk inau'mu kuan anakmu na miak na uen ngua', idi ideh miak lemubed ratnan bawang bunu'deh. Ui ini Tuhan pangeh nepebala.
- 17**Muyuh miak uen ngeperuan mucu; idi anak muyuh miak muli'. Ui ini Tuhan pangeh nepebala.
- 18**"Idi Ui ninger lun Israil pebala dengan mesusa' niat, 'O Tuhan, kai mepad kudeng sapi' deléi luk ungeng, iamo' Iko nemada' nekai pad kai nemaya' balaMu. Do' Iko nguit nekai lemubed, ngaceku kai pian lumi Namu, Iko luk Tuhan Allah kai.
- 19**Kai neteketed rat Namu, iamo' na mio teh idi kai pian lumi Namu. Kareb Iko pangeh nengukum nekai, kai netekunal ku susa' kai. Idi kai pelaba igu', ngaceku kai mesala' kareb kai isuut.'
- 20**"O Israil, iko anak luk inanKu mawa idi luk inanKu méi'. Kareb Ui neten ngadanmu, niatKu sigio ngerawé namu. Ui miak méi' namu, Ui ini Tuhan pangeh nepebala.

- ²¹Do' nganau' etu dalan, idi lemubed maya' dalan luk nedalan muyuh atun. Lemubed O lun Israil, idi muli' amé' bawang luk pangeh tican muyuh.
- ²²Tuda' ioké muyuh perapid terawé, O muyuh luk na manu? Ui ini Tuhan pangeh nenganau' luk mebaruh: seburur decur luk pelaba laya' mepad tueh kudeng deléi.”
- ²³Kebala Tuhan luk Melalud, Allah lun Israil, "Kareb Ui nguit nelun Israil muli', idi ideh miak pebala bang tana' Yahuda idi bang amung bawangneh, 'Do' Tuhan ngeperuan surud Yerusalim luk meligan, ieh ineh su luk meligan luk inanNeh tudo.’
- ²⁴Muci lemulun miak tudo bang amung bawang Yahuda, idi ideh miak nganau' lati' idi matar aya'deh.
- ²⁵Ui miak ngato erur lemulun luk merur idi ngebor lemulun luk melaya' ngaceku melau.
- ²⁶Ideh miak pebala, 'Ui pangeh nerudap idi ui metueh burur peh.’
- ²⁷"Ui ini Tuhan pebala, 'Tarekneh malé macing kareb Ui manu' tana' Israil idi Yahuda ku lemulun idi pung.
- ²⁸Mepad kudeng atun Ui matar nedeh pad Ui miak mubput, necat, ngusag, ngaté, idi ngedereh nedeh, kudeng ineh teh nekini Ui miak matar nedeh pad Ui mudut idi nibu nedeh.
- ²⁹Idi kareb ineh na lemulun miak pebala, 'Amung-amung taman pangeh nekuman bua' anggur luk melam, idi lipen anak-anakdeh melaya' peh.’
- ³⁰Iamo' anid-anid burur luk kuman bua' anggur luk melam, kali' rungen lipenneh sebuleng miak melaya'. Idi anid-anid burur lemulun miak maté ngaceku sala'neh sebuleng.”
- ³¹Kebala Tuhan, "Tarekneh malé macing kareb Ui miak nganau' aceh pejani' luk mebaruh dengan pupu Israil idi Yahuda.
- ³²Na ieh mepad kudeng pejani' luk inau'Ku dengan tepundeh kareb Ui nguyut nedeh remuat rat bang bawang Masir. Na ideh lutep maya' pejani' luk inau'Ku

kuandeh, sagan tu pana' Ui luk mangun ku Tuhandeh. Ui ini Tuhan pangeh nepebala.

³³Idi kareb ineh, ini jani' luk miak ruenKu dengan pupu Israil. Ui miak nganau' balaKu bang terawédeh, idi ngayud bala ineh bang niatdeh. Ui miak mangun ku Allahdeh, idi ideh mangun ku pupuKu.

³⁴Idi na ideh megéi' mada' nelun dengandeh, idi pebala inan kinanak-kinanakdeh, 'Do' muyuh miti Tuhan,' ngaceku amung-amungdeh miak miti Negku, anak-anak idi lun rayeh pana'. Ui miak maré do' ratnan sala'deh idi na ngerawé kekamendeh luk dat teh. Ui ini Tuhan pangeh nepebala.”

³⁵Tuhan maré mateh aco ku acang, gituen idi bulan ku acang kareb medacem. Ieh miak nganau' lipak abpa' rayeh meberi. NgadanNeh, Tuhan luk Melalud.

³⁶KebalaNeh, "Israil miak mangun ku aceh pupu pa kiungKu, pad macing kekiped tana'.”

³⁷Kudeng langit miak uen nari, idi luk pa liang tana' miak kali', kareb ineh mo' Ieh miak nala' pupu Israil, ngaceku amung-amung luk inau'deh. Tuhan pangeh nepebala.

³⁸Kebala Tuhan, "Tarekneh miak macing kareb bawang ini miak piduten baruh, rat Pudut Hananel luk Medita' macing Tanga' Lidung.

³⁹Idi rat ieneh lakan tana' miak ngelibut bawang, pa acep aco macing surud Garib, idi rat ieneh macing Goa.

⁴⁰Aput ruan ineh, su luk inan muyuh nganau' butung idi arap, idi amung tana' luk pa luun Arur Kidron macing Tanga' Kuda luk pa busat aco, miak mangun meligan kuanKu, ieh ineh Tuhan. Bawang ineh na tu-tu mekusag peh.”

Yeremia 32

¹Tuhan nepebala ni Yeremia bang lak luk kepulu' kareb Raca' Sedekia ngimet Yahuda, ieh ineh bang lak luk kepulu' ualuh kareb Raca' Nebukadnesar ngimet Babil.

²Kareb ineh baweh raca' Babil nengerieng Yerusalim, idi Nabi Yeremia tinutup luun natad ruma' raca'.

³Raca' Sedekia pangeh nenutup neneh su ineh idi nengadu' neneh, ngaceku Yeremia nepebala, "Kebala Tuhan, 'Ui miak maré bawang ini kuan raca' Babil, idi ieh miak ngalap neneh.

⁴Raca' Sedekia na miak mepuit rat nelun Babil. Ieh miak barén kuan raca' Babil idi ieh miak papu' neneh idi pebala neneh.

⁵Sedekia miak tebanen amé' Babil, idi ieh miak tudo déi' pad Ui ngukum neneh, sagan tu pana' ieh pebunu' nelun Babil, ieh na miak metueh. Ui ini, Tuhan pangeh nepebala.' “

⁶Kebala Yeremia, "Kudeng ini bala Tuhan negku,

⁷Hanamel, anak taman pinakenmu Salum miak amé' namu idi mutuh namu melih tana'neh luk déi' Anatot, ngaceku iko pupuneh luk muneng idi miak melih tana'neh.' “

⁸Idi maya' kudeng luk bila Tuhan, kinanakku Hanamel iné' negku luun natad su luk inanku tinutup, kebalaneh, 'Do' iko melih tana'ku luk déi' Anatot bang babpat Benjamin. Ngaceku iko pupuku luk muneng idi miak melih idi ngimet tana' ineh. Do' iko melih ineh kuan bururmu sebuleng.' Idi ui kali' Tuhan luk nengecuk negku nganau' luk kudeng ineh.

⁹Idi ui nemelih tana' Hanamel ineh idi nenimang usin kuanneh. Idi raga tana' ineh pulu' tudu' balad pirak.

¹⁰Idi ui nengayud ngadanku idi ui nengamut surat ineh pa kiung lemulun luk nekali', idi ui nenimang pirak ineh luun timang.

¹¹Idi ui nengalap dueh balad surat belih tana' ineh, sebuleng luk pangeh imut idi sebuleng luk mukab.

¹²Idi ui nemaré dueh surat ineh kuan Baruk Neria Masia, pa kiung Hanamel, idi lun nekali' luk pangeh nengayud ngadandeh luun surat belih tana', idi amung lun Yahudi luk tudo luun natad ineh.

- ¹³Idi kebalaku ni Baruk pa kiung amungdeh,
- ¹⁴'Tuhan luk Melalud, Allah lun Israil pangeh nengecuk namu ngalap surat ini, do' surat belih tana' luk imut idi luk mukab teh. Do' nganau' surat ini bang kuden pad ieh na miak metutu.'
- ¹⁵Kebala Tuhan luk Melalud, Allah lun Israil, 'Muci aco lemulun miak melih ruma', lati', idi kabun anggur bang bawang ini.' “
- ¹⁶Kareb ui pangeh nemaré surat belih tana' kuan Baruk Neria, idi ui nesembayang, kebalaku,
- ¹⁷"O Tuhan Allah, Iko luk nenganau' tana' idi langit dengan lalud idi tuehMu luk rayeh. Na luk idi anun-anun luk na miak ruenMu.
- ¹⁸Iko pangeh nengegala' éi'Mu kuan tuda'-tuda' ngeribu lemulun, iamo' Iko ngukum lemulun ngaceku sala' tamandeh. Iko mo' Allah luk rayeh idi melalud. Idi ngadanMu, ieh ineh Tuhan luk Melalud.
- ¹⁹Iko luk inan terawé luk pelaba do' idi megéi' nganau' kekamen luk melalud. Iko nier amung-amung luk ruen lemulun. Idi Iko ngua' kuandeh, maya' kudeng luk kikemdeh.
- ²⁰Iko nenganau' kekamen luk melalud idi luk inan mawa déi' bawang Masir. Idi Iko na ugka' nganau' luk kudeng ineh pad macing aco sini pana', do' bang bawang Israil idi bang bawang pupu baken pana', pad Iko buren iapeh-iapeh pana'.
- ²¹Dengan kekamen luk melalud idi luk inan mawa luk nengatot bunu' kai, Iko nengegala' lalud idi tuehMu, pad Iko miak nguit pupuMu Israil rat bang bawang Masir.
- ²²Iko nemaré kuandeh tana' ini luk mebaleng, luk pijani'Mu kuan tepundeh.
- ²³Iamo' kareb ideh nesemuet bang bawang ini idi nengalap neneh ku babpatdeh, idi na ideh nemaya' amung ukumMu idi bada'Mu. Na ideh nenganau' anun-anun luk icukMu nedeh. Ngaceku ineh Iko nengacing amung dereh ini kuandeh.

²⁴"Lun Babil pangeh nenganau' tuda'-tuda' dalan tana' luk medita' libut-libut bawang Yerusalim, pad ideh miak semuet idi ngelaya' bawang ineh. Ngaceku bunu', lau, idi ét, bawang ineh malé ruendeh ngelaya'. O Tuhan, Iko miak nier idi amung-amung luk bida'Mu pangeh nangun.

²⁵Iamo', Tuhan Allah, Iko luk nengecuk negku melih tana' ini pa kiung lun luk nekali', sagan tu pana' bawang ini malé ruen lun Babil ngelaya'."

²⁶Idi kebala Tuhan ni Yeremia,

²⁷"Ui ini Tuhan Allah amung lemulun. Na luk idi anun-anun luk na miak ruenKu.

²⁸Ngaceku ineh, Ui miak maré bawang ini kuan Nebukadnesar, raca' Babil idi bawehneh, idi ideh miak ngelaya' neneh.

²⁹Idi lun Babil luk ngerieng bawang ini miak amé' ngeseb neneh. Ideh miak ngeseb bawang idi amung ruma' su luk inan lemulun nganau' Negku museh, ngaceku ngeseb umau luk do' buen kuan Baal luun apodeh, idi ngutang baré luk rupen kuan allah baken.

³⁰Rat pun-pun, lun Israil idi lun Yahuda pangeh nenganau' luk na petulu dengan pinianKu. Lun Israil pangeh nenganau' Negku museh ku akang luk inau'deh.

³¹Bawang ini pangeh nenganau' Negku museh idi megateh rat pun-pun ineh pinudut. Ui pangeh nemutut ukum idi sikal ngusag neneh,

³²ngaceku amung-amung dat luk pangeh inau' lun Israil idi lun Yahuda, dengan amung raca' idi lun rayehdeh, lun imam idi nabideh, idi pupu Yahuda idi Yerusalim.

³³Ideh neteketed rat Negku, idi sagan tu pana' Ui na ugka' mada' nedeh, nateh ideh neninger idi pian badén.

³⁴Meluun teh ideh nengerareng amung akang luk inanKu megateh bang Ruma' Allah luk pinudut dengan ngadanKu, pad ideh nengelutak neneh.

³⁵Ideh pangeh nemudut bubpun kuan Baal déi' Ruan Hinom, pad ideh miak maré anakdeh luk deléi idi decur kuan allah Molek. Na Ui nengecuk nedeh nganau' luk kudeng ineh pad ideh nguit nelun Yahuda nganau' sala'."

³⁶Kebala Tuhan Allah lun Israil, "O Yeremia, iko pangeh nemada' pupu ini ratnan bunu', lau, idi ét luk miak nganau' bawang ini ruen raca' Babil ngelaya'. Idi nekini do' iko ninger luk badénKu teh.

³⁷Ui pian ngamung amung-amung pupu rat anid-anid bawang luk inanKu nematad nedeh dengan useh idi gatehKu. Idi Ui sikal nguit nedeh muli' amé' bawang ini, pad ideh do' udeng.

³⁸Idi ideh mangun ku pupuKu, idi Ui mangun ku Allahdeh.

³⁹Idi Ui miak maré kuandeh sebuleng terawé, pelé ideh matot Negku raked-raked, pad ideh ngalap peruan dengan inuldeh pana'.

⁴⁰Ui miak nganau' kuandeh aceh pejani' luk meruked. Na Ui ugka' nganau' luk do' kuandeh, pad niatdeh matot Negku, idi ideh na teketed rat Negku.

⁴¹Idi dengan mawang niat Ui miak ngeperuan nedeh, idi dengan amung niatKu Ui miak ngelelep nedeh raked-raked bang bawang ini.

⁴²"Mepad kudeng Ui pangeh nengacing susa' kuan pupu ini, kudeng ineh teh Ui miak maré kuandeh amung-amung peruan luk pijani'Ku.

⁴³O Yeremia, iko nepebala, 'Bawang ini miak mangun ku su luk ali-ali, pad na lemulun idi pung pana', idi ieh miak barén kuan lun Babil.' Iamo' mucu lemulun miak melih tana' bang bawang ini.

⁴⁴Lemulun miak melih tana' ineh, idi ngayud ngadan luun surat tana' ineh idi ngamut surat ineh pa kiung lemulun luk nekali'. Amung ini miak mangun bang babpat Benjamin, ieh ineh bang bawang luk libut-libut Yerusalim, amung bawang Yahuda, amung bawang luk luun pegkung, amung bawang luk luun raked, idi amung bawang luk déi' Negeb. Ui miak nguit pupu ini muli' amé' bawangdeh. Ui ini Tuhan pangeh nepebala."

Yeremia 33

- ¹Kareb Yeremia tinutup luun natad, idi ieh neninger bala Tuhan sekua' teh.
- ²Tuhan luk nemudut idi nengelelep tana' ini nepebala ni Yeremia. Ieh luk titen Tuhan nepebala,
- ³"Nawar Negku, idi Ui miak ngor balamu, idi ngegala' kuanmu kekamen luk pelaba do' idi luk inan mawa luk nateh nekali'mu.
- ⁴⁻⁵Ui ini Tuhan Allah lun Israil pebala, 'Amung ruma' déi' Yerusalim idi ruma' raca' Yahuda miak uen ngusag. Na ulekneh amé' munu' nelun Babil luk luun dalam tana' luk medita', pad muyuh na miak manu' bawang ku butung lemulun luk ruenKu necat dengan usehKu. Ui pangeh neteketed ratnan bawang ini ngaceku kekamen luk dat luk pangeh kikem pupu ini.
- ⁶Ui miak ngedo' bawang ini idi pupu ini pad ideh mawang niat idi do' udeng.
- ⁷Ui miak ngeperuan Yahuda idi Israil, idi Ui miak mudut bawang ineh baruh mepad kudeng luk atun.
- ⁸Ui miak ngeligan nedeh ratnan sala' luk inau'deh pa kiungKu. Idi Ui miak maré do' ratnan sala'deh idi datdeh.
- ⁹Yerusalim miak mangun ku aceh lawa awang, ubur, idi rayeh kuanKu. Idi amung pupu bang tana' ini miak matot idi megegker, kareb ideh ninger ratnan amung peruan luk ruenKu ngacing kuan lun Yerusalim idi bawangdeh ini.' “
- ¹⁰Kebala Tuhan, "Muyuh pebala, 'Bawang ini mepad kudeng su luk ali-ali. Na lemulun idi pung pana'.' Matu bawang Yahuda idi dalam Yerusalim na lemulun idi pung pana'. Iamo' bawang ini miak kali' sekua' teh,
- ¹¹awang niat idi do' ria', idi tang deléi idi decur luk sikal ngaweh. Muyuh miak ninger nani lemulun luk nguit baré ubur bang ruma'Ku. Kebaladeh, 'Maré ubur kuan Tuhan luk Melalud, ngaceku Ieh do', idi awaNeh meruked.' Ui miak ngeperuan bawang ini mepad kudeng luk atun. Ui ini Tuhan pangeh nepebala.”

¹²Kebala Tuhan luk Melalud, 'Bang bawang ini luk mepad kudeng su luk ali-ali idi luk na lemulun idi pung pana', miak ku laman mucu su luk inan lemulun miak matar dumbadeh.

¹³Mucu lemulun luk matar dumba miak ngiap dumbadeh bang babpat Beniamin, idi bang bawang luk libut-libut Yerusalim, amung bawang Yahuda, amung bawang luk luun pegkung, amung bawang luk luun raked idi amung bawang luk déi' Negeb. Ui ini Tuhan pangeh nepebala.”

¹⁴Kebala Tuhan, "Tarekneh miak macing, kareb Ui ngacing jani'Ku nelun Israil idi Yahuda.

¹⁵Kareb ineh Ui miak maré aceh inul Daud luk matu, idi Ieh miak nganau' luk matu idi luk mesiri aput-aput tana'.

¹⁶Kareb ineh pupu Yahuda miak uen ngulun idi lun Yerusalim miak do' udeng. Ngadan luk baréndeh kuan pupudeh idi bawangdeh, ieh ineh, 'Tuhan pangeh nengulun netau.'

¹⁷Ui ini Tuhan pejani', idi Ui miak maré inul Daud mangun ku raca' Israil raked-raked,

¹⁸idi imam-imam rat pupu Liwi megéi' tuped pa kiungKu idi maré baré luk sabpen, baré luk kenen, idi baré luk kereten.”

¹⁹Kebala Tuhan ni Yeremia,

²⁰"Ui na miak ngelaba jani'Ku ratnan aco idi dace, pad aco idi dace na mangun bang kareb luk petulu.

²¹Kudeng ineh teh Ui na miak ngelaba jani'Ku kuan demulunKu Daud, pad na luk idi inulneh luk mangun ku raca', idi jani'Ku nelun imam ratnan pupu Liwi luk ngakem kuanKu.

²²Ui miak ngula' inul demulunKu Daud, idi imam-imam ratnan pupu Liwi luk ngakem kuanKu, pad ideh mepad kinula' gituen luk déi' langit, idi mepad kudeng bada luk tangeb abpa' rayeh luk na mekiap.”

²³Kebala Tuhan ni Yeremia,

²⁴"Kali'mu bala pupu ini luk pebala, 'Tuhan pangeh nenala' Israil idi Yahuda, ieh ineh dueh pupu luk pinili'Neh?' Pad ideh ngedat pupuKu, idi na ngerawé nedeh mangun ku aceh pupu.

²⁵Iamo' Ui ini Tuhan pangeh pejani' ratnan aco idi daceh, idi Ui pangeh nenganau' ukum ratnan tana' idi langit.

²⁶Kudeng ineh teh Ui miak maya' jani'Ku dengan inul Yakub, idi demulunKu Daud. Ui miak mili' aceh inul Daud luk miak ngimet inul Ibrahim, Isak, idi Yakub. Idi teh Ui miak ngeperuan pupuKu, idi méi' nedeh."

Yeremia 34

¹Tuhan nepebala ni Yeremia kareb Nebukadnesar, raca' Babil ngerieng Yerusalim idi bawang luk libut-libut Yerusalim, dengan bawehneh idi baweh amung pupu luk pa liang imetneh.

²Tuhan Allah lun Israil nengecuk ni Yeremia pebala ni Sedekia raca' Yahuda, "Ui ini Tuhan maré bawang ini bang palad raca' Babil, idi ieh miak sabpenneh.

³Iko na miak buro rat neneh. Iko miak kamen idi tebanenneh. Medueh miak pesier idi pegayam. Idi iko miak amé' Babil.

⁴O Raca' Sedekia, ninger balaKu. Ui sikal mada' ratnan lawému! Na iko miak pitayen bang bunu'.

⁵Iko miak maté dengan do'. Idi mepad kudeng lemulun nengeseb umau luk do' buen kareb ideh nenanem tepunmu luk mangun ku raca' atun rat namu, kudeng ineh teh ideh miak ngeseb umau luk do' buen kuanmu. Ideh miak temido namu, ketidodeh, 'Raca' tau pangeh naté!' Ui ini Tuhan pangeh nepebala."

⁶Idi Nabi Yeremia nemada' amung bala ini kuan Raca' Sedekia déi' Yerusalim,

⁷kareb baweh raca' Babil uned ngerieng bawang ineh idi bawang Lakis idi bawang Aseka, ieh ineh dueh bawang Yahuda luk ketecan luk linibung teh.

⁸Tuhan nepebala ni Yeremia mucu ratnan Raca' Sedekia nepejani' dengan lun Yerusolim, miak muit demulundeh.

⁹Ideh nepejani' muit demulundeh luk lun Iberani, do' deléi idi decur teh, pad seburur pana' na miak ngimet nelun Yahudi mangun ku demulun.

¹⁰Idi amung lemulun idi lun rayehdeh nemaya' jani' ineh, pad ideh miak muit demulundeh, idi na ngalap nedeh baruh teh.

¹¹Idi ideh nemuit demulundeh, iamo' mucu ideh nengisu' terawédeh, idi nengalap nedeh lemubed, mangun ku demulun baruh teh.

¹²⁻¹³Pangeh ineh kebala Tuhan, Allah lun Israil ni Yeremia, "Ui nenganau' aceh jani' dengan tepun muyuh, kareb Ui nemuit nedeh rat bang palad lun Masir luk nenganau' nedeh mangun ku demulun. KebalaKu,

¹⁴Kareb lak luk ketudu', do' muyuh muit demulun muyuh luk lun Iberani luk pangeh bilih muyuh, idi luk pangeh nengakem anem lak.' Iamo' tepun muyuh na sikal ninger idi maya' balaKu.

¹⁵Iamo' nekini pangeh tuda'-tuda' aco muyuh nengisu' terawé muyuh pad muyuh nenganau' luk petulu dengan pinianKu. Amung muyuh nengamo miak muit demulun muyuh luk lun Iberani, idi muyuh nenganau' aceh jani' pa kiungKu, bang Ruma' luk pinudut dengan ngadanKu.

¹⁶Iamo' muyuh nengisu' terawé muyuh teh idi nengedat Negku. Amung muyuh nengalap lemubed demulun luk pangeh pinuit muyuh maya' piandeh, idi muyuh nenganau' nedeh mangun ku demulun baruh teh.

¹⁷Ngaceku ineh, Ui ini Tuhan pebala, 'Muyuh na nemaya' balaKu. Muyuh na nemuit demulun muyuh luk lun Iberani. Ngaceku ineh Ui maré puit nemuyuh, pad muyuh maté bang bunu', ét, idi lau. Ui miak nganau' amung bawang bang tana' ini megagap ku luk ruenKu nemuyuh.

¹⁸⁻¹⁹Lun rayeh Yahuda idi Yerusolim, dengan lun rayeh ruma' raca', imam-imam, idi lun mula' bang bawang ini, nenganau' aceh jani' Negku, kareb ideh nenalan arang dueh babpat sapi' luk inupadeh ineh. Iamo' ideh nengelaba

jani' luk inau'deh pa kiungKu, idi na nemaya' bala jani' ineh. Idi Ui miak nganau' kuan pupu ini mepad kudeng luk inau'deh kuan sapi' ineh.

²⁰Ui miak maré nedeh bang palad bunu'deh, ieh ineh kuan lemulun luk pian ngaté nedeh, pad butungdeh miak kenen suit idi pung luk meliput.

²¹Ui miak maré ni Sedekia, raca' Yahuda idi amung lun rayehneh bang palad bunu' luk sikal ngaté nedeh. Ui miak maré nedeh kuan baweh raca' Babil luk pangeh nugka' ngerieng nemuyuh.

²²Ui miak ngecuk nedeh pad ideh lemubed amé' bawang ini. Ideh miak ngerieng bawang ini, pad ideh ngalap idi ngeseb neneh. Ui miak nganau' amung bawang Yahuda mepad kudeng su luk ali-ali luk na lemulun. Ui ini Tuhan pangeh nepebala.' "

Yeremia 35

¹Kareb Yoyakim, anak Yosia mangun ku raca' Yahuda, idi Tuhan nepebala ni Yeremia,

²"Amé' pegayam nelun Rekabi. Idi nguit nedeh semuet bang aceh takep Ruma' Allah idi maré abpa' anggur kuandeh."

³Idi Yeremia nenguit amung lun Rekabi, ieh ineh Yasania luk anak Yeremia Habasinia dengan amung kinanakneh idi anakneh.

⁴Idi Yeremia nenguit nedeh amé' bang Ruma' Allah, ieh ineh bang takep anak Hanan Igdalia luk demulun Allah. Takep ineh muneng ku takep amung lun rayeh idi pa luun takep Salum Masia, aceh lun rayeh bang Ruma' Allah.

⁵Idi Yeremia nengerareng tuda'-tuda' sangkir idi sidangur pa kiung lun Rekabi, idi kebalaneh nedeh, "Do' muyuh ngirup."

⁶Iamo' kebaladeh, "Kai na miak ngirup abpa' anggur ngaceku Yonadab, anak tepun kai Rekabi, nemebpeng nekai idi inul kai na miak ngirup abpa' anggur.

⁷Idi ieh nemebpeng nekai na miak mudut ruma' idi nganau' lati', idi na nganau' kabun anggur idi teh na melih kabun anggur. Ieh nengecuk nekai

tudo bang lepo kibung ruked ulun kai, pad kai lutep tudo bang bawang mepad kudeng sakai.

⁸Kai pangeh nemaya' bala Yonadab, anak tepun kai Rekabi. Kai na tu-tu ngirup abpa' anggur, do' burur kai sebuleng, awan kai, idi anak kai luk deléi idi decur pana'.

⁹Kai na mudut ruma', idi na kabun anggur, lati', idi padé kai.

¹⁰Kai tudo bang lepo kibung. Kai pangeh nemaya' amung-amung luk bila tepun kai Yonadab.

¹¹Iamo' kareb Nebukadnesar, raca' Babil nesemuet bang bawang ini, kai nepegayam idi iné' Yerusalim, pad kai buro rat baweh Babil idi baweh Siria teh. Idi punneh kai tudo déi' Yerusalim.”

¹²⁻¹³Idi Tuhan luk Melalud, Allah lun Israil nengecuk Yeremia pebala nelun Yahuda idi Yerusalim, kebalaNeh, "Ui ini, Tuhan ngitun nemuyuh, 'Anun punneh muyuh ara' ninger idi maya' bada'Ku?'

¹⁴Inul Yonadab pangeh nemaya' ukumneh na miak ngirup abpa' anggur, pad ideh na ngirup macing aco sini, ngaceku ideh maya' ukum luk biré tepundeh. Iamo' Ui na ugka' mada' nemuyuh, idi muyuh na maya' balaKu.

¹⁵Idi Ui na ugka' maré demulunKu lun nabi luk ngecuk nemuyuh necan dalam muyuh luk dat pad muyuh nganau' luk do'. Ideh nemebpeng nemuyuh na sembayang inan allah baken, pad muyuh lutep tudo bang bawang luk biréKu kuan muyuh idi tepun muyuh. Iamo' na muyuh ninger idi maya' balaKu.

¹⁶Inul Yonadab pangeh nemaya' ukum luk biré tepundeh nedeh, iamo' muyuh na nemaya' balaKu.

¹⁷Ngaceku ineh, Ui ini, Tuhan luk Melalud, Allah lun Israil miak ngacing kuan muyuh lun Yahuda idi lun Yerusalim amung dereh luk pijani'Ku. Ui miak nganau' kudeng ini, ngaceku kareb Ui nepebala nemuyuh, muyuh na neninger balaKu, idi kareb Ui nenawar nemuyuh, muyuh na nengor balaKu.”

¹⁸Idi Yeremia nemada' pupu Rekabi ratnan amung-amung luk bila Tuhan luk Melalud, Allah lun Israil, kebalaneh, "Muyuh pangeh nemaya' amung ukum luk biré tepun muyuh Yonadab.

¹⁹Ngaceku ineh, Ui ini, Tuhan luk Melalud, Allah lun Israil pejani', ieh ineh Yonadab Rekab megéi' inan inul deléi luk mangun ngakem kuanKu."

Yeremia 36

¹Bang lak luk keapat kareb Raca' Yoyakim, anak Yosia ngimet Yahuda, idi kebala Tuhan ni Yeremia,

²"Ngalap geretas idi ngayud luunneh amung-amung luk bilaKu namu ratnan Israil, Yahuda, idi amung pupu baken. Idi teh ngayud amung-amung luk bilaKu namu rat pun-pun Ui nepebala namu, ieh ineh rat kareb imet Raca' Yosia macing aco sini.

³Kian, kareb lun Yahuda ninger ratnan amung-amung susa' luk ruenKu ngacing nedeh, idi ideh miak teketed ratnan kekamendeh luk dat lek. Idi Ui miak maré do' ratnan datdeh idi sala'deh."

⁴Idi Yeremia nenawar ni Baruk Neria idi nengecuk neneh ngayud amung-amung luk bila Tuhan ni Yeremia. Idi Baruk nengayud amung ineh luun geretas.

⁵Idi kebala Yeremia ni Baruk, "Ui na simén semuet bang Ruma' Allah.

⁶Do' iko amé' déi' ku libalku kareb aco lemulun mawa' na kuman, idi maca' surat ineh dengan rayeh arod, pad ideh miak ninger amung-amung luk bila Tuhan negku, idi luk bida'ku namu. Do' maca' surat ineh pad amung-amung lemulun miak ninger balamu, meluun teh lun Yahuda luk nacing rat bawang-bawangdeh.

⁷Kian, ideh miak sembayang inan Tuhan idi teketed ratnan kekamendeh luk dat lek, ngaceku Tuhan pangeh nemada' pupu ini dengan usehNeh luk pelaba bura'."

⁸Idi Baruk nemaca' bala Tuhan bang Ruma' Allah maya' kudeng luk bila Yeremia neneh.

⁹Bang bulan iwa', lak luk kelimeh kareb Raca' Yoyakim ngimet Yahuda, ideh nenganau' aco luk inan mawa' na kuman pa kiung Tuhan. Idi amung lun Yerusalim idi lemulun luk nacing rat bawang-bawang Yahuda nemaya' aco ineh.

¹⁰Idi Baruk nemaca' amung bala Yeremia luk bang surat ineh, pad ieh pedingeren amung lemulun bang ruma' sembayang, ieh ineh bang takep Gemaria Sapan, luk lun rayeh raca'. Idi takepneh ineh luun parung, ieh ineh munung Tanga' Baruk bang Ruma' Allah.

¹¹Mikaya, anak Gemaria Sapan, neninger Baruk maca' bala Tuhan bang surat ineh.

¹²Idi ieh iné' ruma' raca', idi nesemuet bang takep lun rayeh raca', su luk inan amung lun rayeh uned pegayam. Idi lun rayeh luk pegayam, ieh ineh Elisama, lun rayeh raca', Delaya Semaya, Elnatan Akbor, Gemaria Sapan, Sedekia Hanania, idi teh amung lun rayeh luk baken.

¹³Idi Mikaya nemada' nedeh ratnan amung bala luk bica' Baruk nelun mula'.

¹⁴Idi amung lun rayeh ineh nengecuk Yehudi Netania luk mupun Selemia Kusi amé' mada' ni Baruk pad ieh nguit surat luk bica'neh kuan lun mula' ineh. Idi Baruk nenguit surat ineh idi nemaya' nedeh.

¹⁵"Tudo iko," kebaladeh, "idi maca' surat ineh kuan kai." Idi Baruk nemaca' surat ineh kuandeh.

¹⁶Idi kareb ieh pangeh nemaca' amung ineh, idi ideh pesier ngaceku ideh megagap. Idi kebaladeh ni Baruk, "Do' kai mada' bala ini kuan raca'."

¹⁷Idi kebaladeh neneh, "Do' mada' nekai kudeng apeh iko nengayud ini? Yeremiaké luk nengecuk namu?"

¹⁸Idi Baruk nengor baladeh, kebalaneh, "Yeremia nemada' amung bala ini kuanku, idi ui nengayud ineh luun geretas ku dawat."

- ¹⁹Idi kebaladeh neneh, "Do' medueh Yeremia amé' sigapung. Idi aleg nima' seburur pana' kali' su inan medueh."
- ²⁰Lun rayeh nenganau' surat ineh bang takep Elisama, lun rayeh raca', idi ideh iné' pa kiung raca' idi nemada' amung bala ineh neneh.
- ²¹Idi raca' nengecuk Yehudi amé' ngalap surat ineh. Idi ieh nenguit surat ineh rat takep Elisama idi nemaca' ineh kuan raca' idi kuan amung lun rayeh luk tuped iringneh.
- ²²Idi kareb ineh meteneb idi raca' singidu bang ruma' luk inanneh tudo kareb meteneb.
- ²³Idi kareb Yehudi pangeh nemaca' teluh apat babpat, raca' ineh nengirit babpat luk bica'neh ineh, idi nenala' ineh bang apui. Ieh nenganau' kudeng ineh pad amung surat ineh nabud iseb.
- ²⁴Iamo' raca' idi lun rayehneh luk neninger bala surat ineh na matot idi na uren.
- ²⁵Sagan tu pana' Elnatan, Delaya, idi Gemaria nemutuh raca' na ngeseb surat ineh, na ieh neninger baladeh.
- ²⁶Idi ieh nengecuk Yeramil, seburur anak raca', idi Seraya Asriel, idi Selemia Abdil amé' ngakem Nabi Yeremia idi Baruk lun luk ngayud ineh. Iamo' Tuhan pangeh nengapung nedidueh.
- ²⁷Kareb raca' pangeh nengeseb surat luk bida' Yeremia ni Baruk, idi kebala Tuhan ni Yeremia,
- ²⁸"Do' iko ngalap aceh geretas teh idi ngayud luun ineh amung bala luk inayud bang surat luk iseb Raca' Yoyakim."
- ²⁹Idi Tuhan nengecuk neneh mada' Raca' Yoyakim, kebalaNeh, "Iko pangeh nengeseb surat ineh, idi iko pangeh nengitun Yeremia anun punneh ieh nengayud ratnan raca' Babil luk miak macing idi ngusag bawang ini idi ngaté lemulun idi pung pana'.

³⁰Ngaceku ineh, Ui ini Tuhan pebala namu, O Raca' Yoyakim. Seburur pana' ratnan inulmu nateh miak mangun ku raca'. Butungmu miak talan, pad ieh melau' kareb macang, idi meteneb kareb medacem.

³¹Ui miak ngukum namu idi inulmu dengan amung lun rayehmu, ngaceku amung-amung sala' muyuh. Iko idi lun Yahuda idi Yerusalim na neninger bada'Ku. Ngaceku ineh Ui miak ngacing kuan muyuh amung susa' luk pangeh bida'Ku.”

³²Idi Yeremia nengalap aceh geretas teh idi nemaré ineh kuan Baruk, lun luk ngayud ineh. Idi ieh nengayud amung-amung luk bida' Yeremia. Ieh nengayud amung bala luk pangeh inayud bang surat luk iseb Raca' Yoyakim. Idi Yeremia nengecuk neneh ngayud tuda'-tuda' bala luk kudeng ineh teh.

Yeremia 37

¹Nebukadnesar raca' Babil nenganau' Sedekia Yosia mangun ku raca' bang bawang Yahuda ku libal Yoyakin Yoyakim.

²Iamo' Sedekia idi amung lun rayehneh dengan lun mula' pana' na nemaya' bala Tuhan luk bida' Nabi Yeremia.

³Raca' Sedekia nengecuk Yukal Selemia idi Sepania Masia luk imam amé' papu' Yeremia. Kebala didueh neneh, "Do' sembayang inan Tuhan Allah kai kuan kai.”

⁴Kareb ineh Yeremia nateh tinutup idi ieh sinima' nalan arang lun mula'.

⁵Iamo' baweh raca' Masir pangeh nenalan rat bawang Masir. Idi kareb lun Babil luk ngerieng Yerusalim kali' bala ineh, idi ideh nelemubed.

⁶Idi kebala Tuhan Allah lun Israil kuan Nabi Yeremia,

⁷"Mada' raca' Yahuda, luk nengecuk namu ngitun Negku, kebalamu, 'Baweh raca' Masir luk amé' ngedengan namu, miak muli' amé' Masir.

⁸Idi lun Babil miak lemubed idi ngerieng bawang ini. Ideh miak ngalap idi ngeseb neneh.

- ⁹Ui ini Tuhan mada' nemuyuh pad muyuh na uen naluk idi ngerawé lun Babil na lemubed. Ngaceku kali' rungen ideh lemubed.
- ¹⁰Sagan tu pana' muyuh metueh ratnan amung baweh Babil luk ngerieng nemuyuh, pad lun luk nurat mo' ketecan bang lepodeh, lemulun ineh pana' miak tumui idi ngeseb bawang ini.' “
- ¹¹Baweh Babil neburo rat Yerusalim ngaceku baweh raca' Masir malé macing.
- ¹²Idi Yeremia nenalan rat Yerusalim pian amé' babpat Benjamin pad ieh ngalap babpat tana' pupuneh.
- ¹³Iamo' kareb ieh nacing Tanga' Benjamin, idi lun rayeh lun pebunu' luk matar tanga' ineh, luk ngadanneh Iria anak Selemia Hanania, nengagka' ni Yeremia, kebalaneh neneh, "Iko necan nekai amé' ngedengan nelun Babil!”
- ¹⁴Iamo' kebala Yeremia, "Na tu! Na ui necan nemuyuh." Iamo' Iria na sikal ninger balaneh. Ieh nengakem ni Yeremia idi nenguit neneh amé' nan lun rayeh.
- ¹⁵Ideh megateh ni Yeremia idi nemebal neneh idi nenutup neneh bang ruma' Yonatan, lun rayeh raca'. (Ruma' Yonatan pangeh inisu' mangun ku ruma' tutup.)
- ¹⁶Yeremia tinutup bang lubang luk pa liang ruma' tuda'-tuda' io.
- ¹⁷Raca' Sedekia nengecuk nelun nguit ni Yeremia amé' papu' neneh, idi déi' bang ruma' raca' ieh nengitun neneh buleng-buleng, kebalaneh, "Inanké luk bila Tuhan ratnan ui?" Idi kebala Yeremia, 'Inan. Iko miak barén bang palad raca' Babil.”
- ¹⁸Idi Yeremia nengitun, kebalaneh, "Anun sala'ku pa kiungmu, idi pa kiung lun rayehmu idi pupu ini pad ui tinutupmu?
- ¹⁹Anunké luk mangun kuan nabimu luk nemada' namu, kebaladeh, 'Raca' Babil na miak munu' namu idi bawang ini?'

²⁰Idi nekini, O Raca', ui mutuh namu ninger idi maya' balaku. Aleg ngecuk negku lemubed amé' ruma' Yonatan lun rayehmu ineh, pad ui na maté su ineh.”

²¹Ngaceku ineh, Raca' Sedekia nengecuk nelun nutup ni Yeremia luun natad. Idi ideh nemaré neneh sebalad ruti anid-anid aco rat bang kadai luk nan nganau' ruti, pad ruti bang bawang ineh mabud. Idi Yeremia neketecan luun natad ineh.

Yeremia 38

¹Sepatia Matan, Geladia Pasur, Yukal Selemia, idi Pasur Malkia neninger luk bila Yeremia nelun mula', kebalaneh,

²"Tuhan pangeh nepebala, 'Idé-idé luk ketecan bang bawang ini miak maté ku bunu', lau, idi ét. Iamo' idé-idé luk amé' matun nelun Babil na miak pitayen. Iamo' ieh miak mulun.' “

³Idi teh Yeremia nemada' nedeh ratnan amung luk bila Tuhan, kebalaneh, "Ui miak maré bawang ini kuan baweh raca' Babil, idi ieh miak ngalap neneh.”

⁴Idi kebalala lun rayeh ineh inan raca', "Lun ini na miak na pitayen. Dengan bala luk kudeng ineh Yeremia ngelaya' nelun pebunu'. Idi ieh nganau' luk kudeng ineh kuan amung lemulun luk ketecan bang bawang ini. Lemulun ini na ngedengan nelun mula'. Iamo' ieh ngedereh nedeh.”

⁵Idi kebalala Raca' Sedekia, "Do', pad pian muyuh. Ui na miak mebpeng nemuyuh.”

⁶Idi ideh nengalap ni Yeremia idi nenganau' neneh bang subuk Pengulu Malkia, luk luun natad ineh. Idi ideh nengurur neneh bang subuk luk na abpa'. Iamo' Yeremia nepelusuk bang buri luk bang subuk ineh.

⁷Iamo' Ebek Melek lun Sudan, seburur lemulun luk pinani' luk ngakem bang ruma' raca' nekali' bala ratnan Yeremia luk inau' bang subuk. Kareb ineh raca' pegayam munung Tanga' Benjamin.

⁸Idi Ebed Melek nenalan rat ruma' raca' idi nepebala nan raca',

- ⁹"O Raca', sala' luk inau' lemulun ini. Ideh nenganau' ni Yeremia bang subuk, idi kali' rungen ieh maté ku lau. Idi na luk kenen bang bawang ini."
- ¹⁰Idi raca' nengecuk Ebed Melek nguit teluh ngepulu' burur lemulun luk tuped ieneh amé' nginat ni Yeremia rat bang subuk ineh kareb nateh ieh maté.
- ¹¹Idi Ebed Melek nenguit lemulun ineh iné' bang takep ruma' raca' luk inandeh nganug binaweh. Idi ideh nengalap tuda'-tuda' kuyu' luk dat luk inururneh kuan Yeremia luk bang subuk.
- ¹²Idi kebala Ebed Melek ni Yeremia, "Do' iko nganau' kuyu' ini bang ilekmu pad abet ineh na miak ngurat namu." Idi Yeremia nenganau' luk kudeng ineh.
- ¹³Idi ideh nenginat neneh ku abet ineh idi nengalap neneh. Pangeh ineh Yeremia tinutup luun natad ineh teh.
- ¹⁴Raca' Sedekia nengecuk nelun nguit Nabi Yeremia amé' matun neneh munung tanga' luk keteluh bang Ruma' Allah. Idi kebalaneh ni Yeremia, "Ui pian ngitun namu aceh itun, idi aleg iko ngalum anun-anun negku."
- ¹⁵Idi kebala Yeremia, "Kudeng ui mada' luk matu, ui miak pitayenmu. Idi kudeng ui ngubuk namu, na iko pian maya' balaku."
- ¹⁶Idi Raca' Sedekia nepejani' ni Yeremia dengan lulem. Kebalaneh, "Ui pebulung dengan ngadan Tuhan luk mulun, idi luk ngulun netau, na ui ngaté namu, idi teh na ui maré namu bang palad lemulun luk sikal ngaté namu."
- ¹⁷Idi kebala Yeremia ni Sedekia, "Tuhan luk Melalud, Allah lun Israil nepebala, 'Kudeng iko maré bururmu bang palad lun rayeh raca' Babil, iko miak mulun, idi bawang ini na sabpen. Iko dengan tetek ruma'mu miak mulun.
- ¹⁸Iamo' kudeng iko na nganau' kudeng ineh, idi bawang ini miak barén kuan lun Babil, luk miak ngeseb neneh, idi iko pana' na miak mepuit rat nedeh.' "
- ¹⁹Iamo' kebala Raca' Sedekia, "Ui matot nelun Yahudi luk pangeh neperurum nelun Babil. Kian, ui barén bang paladdeh lek, pad ideh ngedereh negku."

²⁰Idi kebala Yeremia, "Na tu iko barén bang paladdeh. Ui mutuh namu maya' bala Tuhan luk bilaku namu, pad iko uen ngeperuan idi na iko maté.

²¹Iamo' Tuhan pangeh nengegala' bang aceh luk sinierku amung-amung luk miak mangun kudeng iko ara' maré bururmu nedeh.

²²Siruh! Amung decur luk ketecan déi' ruma' raca' Yahuda uen nated amé' matun lun rayeh raca' Babil. Ninger luk beléndeh maya' dalan: 'Lun rurun raca' nengeraruh neneh, idi ideh luk pa luunneh. Idi nekini kukudneh nepelusuk bang buri, idi lun rurunneh pangeh nenecan neneh.' “

²³Idi kebala Yeremia, "Amung decur idi anakmu miak iten amé' matun lun Babil. Idi iko sebuleng na miak mepuit rat nedeh. Iko miak tebanen raca' Babil, idi bawang ini miak mabud sabpen.”

²⁴Idi kebala Sedekia, "Aleg iko mada' nelun baken ratnan gayam kiteh ini, pad iko na pitayen.

²⁵Kudeng lun rayeh kali' ui nepebala namu, kali' rungen ideh ngitun namu ratnan gayam kiteh. Ideh miak pejani' na ngaté namu kudeng iko mada' nedeh.

²⁶Iamo' do' iko pebala, 'Ui mutuh neneh pad ieh na ngecuk negku lemubed amé' ruma' Yonatan idi maté déi'.' “

²⁷Matu amung lun rayeh ineh iné' matun ni Yeremia. Idi ideh nengitun neneh. Iamo' Yeremia nemada' nedeh maya' kudeng luk icuk raca' neneh. Idi na ideh miak nganau' anun-anun, ngaceku seburur pana' nateh luk neninger gayam didueh ineh.

²⁸Idi Yeremia tinutup luun natad ineh pad macing aco luk inan Yerusalim linaya' lun Babil.

Yeremia 39

¹Bang bulan pulu', lak luk keiwa' kareb Raca' Sedekia ngimet Yahuda, idi Nebukadnesar, raca' Babil nacing dengan amung bawehneh idi nengerieng Yerusalim.

- ²Idi iwa' aco bulan apat bang lak luk kepulu' aceh, kareb Raca' Sedekia ngimet, idi amung libung bawang netabpa.
- ³(Kareb Yerusalim pangeh linaya', idi amung lun rayeh raca' Babil iné' tuped munung Tanga' luk Uned, ieh ineh Neregal Sareser, Samgar Nebo, Sarsekim, idi teh Neregal Sareser luk baken teh.)
- ⁴Kareb Sedekia, raca' Yahuda idi amung bunu'neh nekali' luk pangeh nangun, idi ideh nenutun buro rat bang bawang Yerusalim kareb medacem. Ideh nenalan rat kabun raca' maya' tanga' luk titen Arang Dueh Alad. Idi ideh neburo amé' matun Raked Yarden.
- ⁵Iamo' baweh lun Babil nengerada' nedeh, idi nengakem ni Sedekia luun raked luk muneng ku Yeriko. Idi ideh nenaban neneh idi nemarké neneh bang palad Raca' Nebukadnesar luk déi' Ribla luk bang bawang Hamat, idi Nebukadnesar nengukum neneh déi'.
- ⁶Déi' Ribla raca' Babil nengecuk nelun ngaté anak-anak Sedekia su siren Sedekia. Idi teh ideh nengecuk nelun ngaté amung lun rayeh Yahuda.
- ⁷Idi ieh nengecuk nelun nakul match Sedekia, idi ngaling neneh pad ieh iten amé' Babil.
- ⁸Idi teh lun Babil nengeseb ruma' raca' idi ruma'-ruma' lun mula'. Idi ideh nengusag amung libung batu Yerusalim.
- ⁹Kekipedneh, Nebusaradan, lun rayeh baweh nenaban lemulun luk neketecan bang bawang ineh amé' Babil, dengan lemulun luk pangeh neperurum neneh.
- ¹⁰Ieh nenecan bang bawang Yahuda tuda'-tuda' burur lun masi' luk na tana'. Idi ieh nemarké kabun anggur idi lati' kuandeh.
- ¹¹Iamo' Nebukadnesar, raca' Babil nengecuk Nebusaradan, lun rayeh baweh maré kali' ratnan Yeremia kudeng ini:
- ¹²"Amé' ngalap ni Yeremia idi ngasa' neneh. Aleg ngedereh neneh, iamo' nganau' anun-anun luk pianneh."

¹³Idi Nebusaradan dengan Pengulu Nebusasban idi Pengulu Neregal Sareser idi amung lun rayeh raca' Babil luk baken,

¹⁴nenawar ni Yeremia idi nengecuk nelun nguit neneh ratnan natad ineh. Idi ideh nengecuk Gedalia anak Ahikam Sapan matar neneh, pad ieh muli' dengan do'. Idi Yeremia neketecan dei' arang pupuneh sebuleng.

¹⁵Tuhan nepebala ni Yeremia kareb ieh tinutup luun natad ineh. KebalaNeh,

¹⁶"Do' amé' mada' ni Ebed Melek lun Sudan ineh luk bila Tuhan luk Melalud, Allah lun Israil, kebalaNeh, 'Ui ngacing susa' kuan bawang ini idi baken peruan, maya' kudeng luk bilaKu. Idi kareb amung ini mangun, iko idi su ineh pad iko nier ineh.

¹⁷Iamo' Ui ini Tuhan miak matar namu, pad iko na barén bang palad lemulun luk inanmu matot.

¹⁸Ui miak matar namu pad iko na pitayen. Iko miak mulun, ngaceku iko merapet Negku. Ui ini Tuhan pangeh nepebala.' "

Yeremia 40

¹Tuhan nepebala ni Yeremia, kareb Nebusaradan, lun rayeh baweh pangeh nemuit neneh déi' Rama. Ideh pangeh nenguit ni Yeremia bang kaling, dengan amung lun baken rat Yerusalim idi Yahuda luk miak tebanen amé' Babil.

²Idi lun rayeh baweh nepegayam ni Yeremia buleng-buleng, "Tuhan Allahmu nemada' ratnan susa' luk miak macing kuan bawang ini,

³idi nekini Ieh pangeh nenganau' maya' kudeng luk bilaNeh. Amung ini pangeh nangun ngaceku pupumu mesala' pa kiung Tuhan idi na nemaya' balaNeh.

⁴Nekini ui neka kaling luk luun langenmu pad iko mepuit. Kudeng iko pian maya' negku amé' Babil, miak mo', idi ui miak matar namu. Iamo' kudeng iko na pian, aleg iko amé'. Amung bawang idi pa kiungmu. Do' iko amé' iapeh-iapeh su luk pianmu."

⁵Iamo' Yeremia na iné', idi kebala Nebusaradan, "Lemubed amé' ni Gedalia, anak Ahikam Sapan, luk inau' raca' Babil mangun ku lun rayeh amung bawang Yahuda. Iko miak tudo denganneh arang pupumu. Iko miak amé' iapeh-iapeh su luk pianmu." Idi ieh nemaré aceh baré idi sesuut balu' idi nenima' neneh nalan.

⁶Yeremia iné' tudo dengan Gedalia déi' Mispa, idi ieh netudo arang pupuneh luk neketecan bang bawang ineh.

⁷Inan sebuang lun rayeh Yahuda idi lun pebunu' luk nateh neperurum nelun Babil. Idi ideh kali' bala ratnan raca' Babil pangeh nenganau' Gedalia Ahikam mangun ku lun rayeh bawang, idi nenganau' neneh ngimet amung lemulun luk nateh tiban amé' Babil, ieh ineh lemulun luk meluun asi' bang bawang ineh.

⁸Idi Ismail Netania, Yohanan Karia, Seraya Tanumet dengan anak-anak Epai rat Netopa, idi Yesania lun Maketit iné' dengan anak itindeh papu' ni Gedalia déi' Mispa.

⁹Idi kebala Gedalia, "Ui pejani', kudeng muyuh perurum nelun Babil, muyuh na luk katot. Do' muyuh tebawang, idi ngakem kuan raca' Babil, pad muyuh miak do' udeng.

¹⁰Ui sebuleng miak tudo déi' Mispa idi mangun ku gatum muyuh kareb lun Babil amé' tungé'. Iamo' muyuh miak ngamung idi nganug abpa' anggur, bua', idi umau saitun, idi tudo bang bawang-bawang luk ilap muyuh."

¹¹Idi kareb ineh amung lun Yahudi luk tudo déi' Moab, Amon, Edom, idi bawang-bawang baken kali' bala ratnan raca' Babil nenima' sebuang lun Yahudi tudo déi' Yahuda, idi nenganau' Gedalia mangun ku lun rayehdeh.

¹²Ngaceku ineh amung lun Yahudi ineh nenecan bawang su luk inandeh pitad idi nelemubed iné' Yahuda. Ideh iné' papu' ni Gedalia déi' Mispa. Idi ideh nengamung mula' abpa' anggur idi bua' pana'.

¹³Pangeh ineh Yohanan Karia idi amung lun rayeh lun pebunu' luk nateh neperurum nelun Babil iné' matun Gedalia déi' Mispa.

¹⁴Idi kebaladeh neneh, "Naké iko kali' Balis raca' Amon pangeh nengecuk Ismail Netania amé' ngaté namu?" Iamo' na ieh manu ku baladeh.

¹⁵Idi Yohanan nepebala ni Gedalia buleng-buleng, "Nima' negku amé' ngaté Ismail pad na lemulun miak kali' idé luk nengaté neneh. Ngudehké ieh simén ngaté namu? Kudeng ieh ngaté namu, idi amung lun Yahudi bang imetmu miak uen ngatad, pad amung lemulun luk ketecan déi' Yahuda mesusa'."

¹⁶Iamo' kebala Gedalia, "Aleg muyuh ngaté neneh. Ngaceku bala muyuh ratnan Ismail na matu!"

Yeremia 41

¹Bang bulan luk ketudu' idi Ismail anak Netania Elisama, luk ratnan inul raca' iné' papu' ni Gedalia déi' Mispa dengan pulu' burur lun danganneh.

²Kareb ideh pad-pad kuman déi' Mispa, idi Ismail dengan pulu' burur lun danganneh nengaté ni Gedalia luk inau' raca' Babil mangun ku lun rayeh bawang ku pelapetdeh.

³Idi teh Ismail nengaté amung-amung lun Yahudi luk idi dengan Gedalia déi' Mispa dengan amung-amung baweh Babil luk idi déi' Mispa teh.

⁴Kenebpa, kareb nateh seburur nekali' ratnan até Gedalia,

⁵Idi ualuh ngepulu' burur lemulun nacing rat Sikem, Silo, idi Samaria. Ideh pangeh nemingit idi nengerarak kuyu'deh, idi nengurat bururdeh sebuleng. Idi ideh nenguit baré akan idi umau luk do' buen amé' bang Ruma' Allah.

⁶Idi Ismail nenalan rat Mispa sikal papu' nedeh, idi ieh nangi' maya' dalan. Kareb ieh nacing nedeh, idi kebalaneh, "Do' amé' papu' Gedalia."

⁷Iamo' kareb ideh nesemuet bang bawang, Ismail idi anak itinneh nengaté nedeh idi nenala' butungdeh bang aceh subuk.

⁸Iamo' arangdeh inan pulu' burur lemulun luk nepebala ni Ismail, "Aleg ngaté nekai! Kai inan padé, ikun, umau saitun, idi duru' inapung déi' lati'." Idi na ieh nengaté nedeh dengan lun rurumdeh.

⁹Subuk su luk inan Ismail nenala' butung lemulun luk pinaténeh pelaba rayeh. Subuk ineh pangeh inukat kareb Raca' Asa sikal metueh rat ni Basa raca' Israil. Idi Ismail nemanu' subuk ineh ku butung lemulun luk pinaténeh.

¹⁰Idi Ismail nengakem amung anak raca' luk decur dengan amung lemulun luk ketecan déi' Mispa luk biré Nebusaradan lun rayeh baweh bang imet Gedalia. Ismail nenaban nedeh amé' bawang Amon.

¹¹Yohanan Karia idi amung lun rayeh baweh nekali' bala ratnan dat luk inau' Ismail ineh.

¹²Idi ideh nenguit anak itindeh iné' munu' neneh. Ideh nepigket neneh muneng tangeb takung Gibion.

¹³Kareb lun luk tiban Ismail nekali' Yohanan idi lun rayeh baweh ineh, ideh pelaba awang niat.

¹⁴Idi lun luk tiban ineh nupun iné' ni Yohanan.

¹⁵Iamo' Ismail dengan ualuh burur anak itinneh neburo rat ni Yohanan idi iné' bawang Amon.

¹⁶Idi Yohanan dengan amung lun rayeh baweh luk nemaya' neneh nengalap amung lun pebunu', decur, anak, idi lun luk pinani' luk pangeh tiban Ismail rat Mispa, kareb ieh pangeh nengaté ni Gedalia. Idi ideh nengasa' lemulun luk inuit Yohanan rat Gibion.

¹⁷Idi ideh nenalan idi nelupo déi' Kimam muneng ku Baitlahim. Ideh pian amé' déi' Masir,

¹⁸pad ideh miak buro rat nelun Babil. Ideh matot nelun Babil ngaceku Ismail nengaté ni Gedalia luk inau' raca' Babil mangun ku lun rayeh bawang.

Yeremia 42

¹Idi amung lun rayeh baweh dengan Yohanan Karia idi Asaria Hosaya nacing dengan anak itindeh, lun do' idi lun dat pana'.

²Idi kebaladeh ni Nabi Yeremia, "Do' nganau' luk pituen kai namu! Do' sembayang pa kiung Tuhan Allah kuan kai. Mutuh kuan amung-amung kai

luk ketecan. Atun kai mula', iamo' nekini kai pawa', mepad kudeng luk siniermu.

³Mutuh Tuhan Allah tau mada' dalam luk bén kai idi anun-anun luk petulu ruen kai.”

⁴Idi kebala Yeremia, "Mo, do'. Ui miak sembayang pa kiung Tuhan Allah tau, maya' kudeng luk pinutuh muyuh, idi ui miak mada' nemuyuh ratnan anun-anun luk belénNeh. Na ui miak ngalum anun-anun nemuyuh.”

⁵Idi kebaladeh ni Yeremia, "Nima' Tuhan mangun ku lun nekali' luk matu rat nekai, kudeng kai na maya' amung ukum luk barén Tuhan Allah tau namu kuan kai.

⁶Kai ngecuk namu amé' matun Tuhan Allah tau. Idi sagan pana' malé kian mikat lek kai miak maya' balaNeh. Idi kudeng kai maya' balaNeh, kali' rungen kai ngalap peruan.”

⁷Pulu' aco mucu ratnan ineh, idi Tuhan nepebala ni Yeremia.

⁸Idi Yeremia nengamung Yohanan Karia dengan amung lun rayeh baweh luk idi danganneh, idi anak itindeh, lun do' idi lun dat pana'.

⁹Idi kebalaneh nedeh, "Tuhan Allah lun Israil luk pinutuhku kuan muyuh nepebala,

¹⁰Kudeng muyuh pian tudo bang bawang ini, idi Ui ngelelep nemuyuh idi na Ui ngedereh nemuyuh. Ui miak nibu nemuyuh idi na Ui mubput nemuyuh. Ui mesusa' niat ngaceku dereh luk icingKu nemuyuh.

¹¹Aleg muyuh matot ni raca' Babil. Aleg matot neneh ngaceku Ui idi dengan muyuh. Ui miak ngulun nemuyuh idi muit nemuyuh rat bang paladneh.

¹²Ui miak méi' nemuyuh idi nganau' raca' Babil pana' méi' nemuyuh, pad ieh nima' nemuyuh muli'. Ui ini Tuhan panggeh nepebala.’

¹³⁻¹⁵"Iamo' aleg muyuh luk ketecan bang bawang Yahuda ngelaba bala Tuhan Allah muyuh pad muyuh ara' tudo bang bawang ini. Aleg muyuh pebala, 'Na! Kai sikal amé' tudo déi' Masir. Ngaceku na luk idi bunu' idi uni tawak luk

nawar amé' pebunu', idi na kai melau.' Kudeng muyuh pebala kudeng ini, idi Tuhan luk Melalud, Allah lun Israil pebala, 'Kudeng muyuh mesaad amé' bawang Masir,

¹⁶idi bunu' luk inan muyuh matot mepigket nemuyuh, idi lun luk inan muyuh matot miak ngerada' nemuyuh, idi muyuh miak maté déi' Masir.

¹⁷Amung lemulun luk mesaad amé' Masir miak maté ku bunu', lau, idi ét. Seburur pana' nateh luk miak mulun. Idi teh seburur pana' nateh luk miak mepuit ratnan susa' luk ruenKu ngacing kuandeh.'

¹⁸"Kebala Tuhan Allah lun Israil, 'Mepad kudeng useh idi gatehKu inutang kuan lun Yerusalim, kudeng ineh teh usehKu miak uen ngutang kuan muyuh, kudeng muyuh amé' Masir. Muyuh mangun ku aceh luk inan megagap. Lun baken miak situnga nemuyuh, idi ideh neten ngadan muyuh ku kediman. Idi muyuh na miak nier bawang ini teh.' "

¹⁹Idi kebala Yeremia teh, "Tuhan pangeh nemebpeng nemuyuh luk ketecan déi' Yahuda, na miak amé' déi' Masir. Idi ui mada' nemuyuh nekini

²⁰ngaceku muyuh sala' terawé. Muyuh nengecuk negku amé' matun Tuhan Allah tau, kebala muyuh, 'Mutuh ratnan Tuhan Allah tau kuan kai! Mada' nekai ratnan amung-amung luk belénNeh kuan kai, idi kai miak maya' ineh.'

²¹Idi nekini ui pangeh nemada' nemuyuh, iamo' muyuh pangeh nengelaba amung bala Tuhan Allah tau luk bilaku nemuyuh.

²²Ngaceku ineh, ngerawé do'-do'! Muyuh miak maté ku bunu', lau, idi ét bang bawang luk inan muyuh pian amé'."

Yeremia 43

¹Kareb Yeremia pangeh nemada' amung-amung bala luk biré Tuhan Allahdeh badén kuandeh,

²idi Asaria Hosaya, Yohanan Karia dengan amung lun rurumdeh nepebala ni Yeremia dengan medita' niat, "Mebalih iko! Tuhan Allah tau na nengecuk namu mebpeng nekai na miak amé' tudo déi' Masir.

³Iamo' Baruk Neria pangeh nengagau namu pad iko pian maré nekai bang palad lun Babil, pelé ideh ngaté nekai idi naban nekai amé' Babil."

⁴Idi Yohanan, idi lun rayeh baweh, idi lun mula' pana' na pian maya' ukum Tuhan, idi na pian tudo bang bawang Yahuda.

⁵Idi Yohanan dengan amung lun rayeh baweh nenguit amung lemulun luk ketecan bang bawang Yahuda amé' Masir. Ideh nenguit amung-amung lemulun luk pangeh nelemubed amé' Yahuda ratnan bawang luk inandeh pangeh pitad:

⁶ieh ineh deléi idi decur, anak idi anak raca' luk decur. Ideh nenguit amung-amung lemulun luk biré Nebusaradan, lun rayeh baweh bang palad Gedalia, dengan Yeremia idi Baruk pana'.

⁷Ideh nengelaba ukum Tuhan idi iné' Masir, macing bawang Tapanes.

⁸Kebala Tuhan ni Yeremia déi' Tapanes,

⁹"Ngalap tuda'-tuda' batu luk rayeh idi nanem ineh pa atun munung tanga' ruma' raca' bang bawang ini, pad lun Yahudi nier namu nganau' ineh.

¹⁰Idi mada' nedeh, kebalamu, 'Ui ini Tuhan luk Melalud, Allah lun Israil miak nguit demulunKu, Nebukadnesar raca' Babil, idi nganau' kerusineh pa luun batu luk tinanemKu idi mudut lepo kibung raca' pa luun ineh.

¹¹Nebukadnesar miak amé' ngelaya' bawang Masir. Lemulun luk petulu maté miak pitayenneh. Lemulun luk petulu uen naban miak tebanenneh. Lemulun luk petulu maté bang bunu' miak pitayenneh bang bunu'.

¹²Ui miak ngeseb ruma' amung allah lun Masir, pad raca' Babil miak ngeseb sebuang allahdeh idi sebuang miak tebanenneh. Mepad kudeng lun luk matar dumba nala' kutu dumba rat luun kuyu'neh, kudeng ineh teh raca' Babil miak ngeligan bawang Masir, idi muli' dengan do'.

¹³Ieh miak ngusag ulung batu déi' Bait Samas luk déi' Masir ineh, idi ngeseb amung ruma' allah lun Masir."

Yeremia 44

- ¹Tuhan nepebala ni Yeremia ratnan amung lun Yahudi luk tudo déi' Masir bang amung bawang Migdol, Tapanes, Mempis, idi bang bawang luk pa kabing busat aco.
- ²Kebala Tuhan luk Melalud, Allah lun Israil, "Muyuh sebuleng pangeh nekali' susa' luk icingKu kuan Yerusalim idi amung bawang Yahuda. Macing nekini pana' bawang ineh inusag idi na lemulun.
- ³Ui nenganau' kudeng ineh ngaceku lun bang bawang ineh nenganau' luk dat, pad Ui museh nedeh. Ideh nemaré baré kuan allah baken idi nesembayang inan allah luk nateh nekali'deh, luk nateh nekali' muyuh idi luk nateh nekali' tepun muyuh.
- ⁴Na Ui ugka' ngecuk demulunKu lun nabi luk mada' nemuyuh pad muyuh na nganau' kekamen luk dat ini luk inanKu megateh.
- ⁵Iamo' na muyuh ninger idi maya' balaKu. Muyuh na sikal ugka' nganau' luk dat, ieh ineh muyuh nemaré baré kuan allah baken.
- ⁶Ngaceku ineh Ui nengutang useh idi gatehKu luun amung bawang Yahudi idi luun dalam Yerusalim pad Ui nengeseb nedeh. Bawang ineh inusag pad ideh mangun ku aceh luk inan megagap macing aco sini.
- ⁷"Idi Ui ini Tuhan luk Melalud, Allah lun Israil ngitun nemuyuh anun punneh muyuh nganau' luk dat kuan burur muyuh sebuleng. Ngudehké muyuh pian ngacing susa' kuan deléi idi decur, anak adi' idi anak isuut, pad seburur pana' arang pupu muyuh nateh luk ketecan.
- ⁸Ngudehké muyuh nganau' Negku museh ku akang muyuh, idi baré muyuh kuan allah baken tungé' Masir su luk inan muyuh tudo nekini? Kali' rungen muyuh ngusag ulun muyuh sebuleng, pad anid-anid pupu bang tana' ini miak situnga nemuyuh, idi neten ngadan muyuh ku kediman.
- ⁹Nekelupan muyuhké amung kekamen luk dat luk pangeh kikem muyuh idi awan muyuh, tepun muyuh, idi raca'-raca' Yahuda idi awandeh pana' bang amung bawang Yahuda idi luun dalam Yerusalim?

¹⁰Iamo' macing aco sini muyuh nateh nengebeneh burur muyuh. Idi muyuh na matot Negku pad muyuh mulun maya' bala idi ukum luk biréKu kuan muyuh idi kuan tepun muyuh.

¹¹"Ngaceku ineh, Ui ini Tuhan luk Melalud, Allah lun Israil miak ngacing susa' kuan muyuh, pad Ui ngusag amung bawang Yahuda.

¹²Ui miak ngukum nelun Yahuda luk ketecan idi luk mesaad sikal amé' Masir. Kali' rungen amung-amungdeh miak maté déi' Masir. Sebuang miak maté bang bunu'. Idi sebuang miak maté ku lau. Ideh miak mangun ku aceh luk inan megagap. Lun baken miak situnga nedeh idi neten ngadandeh ku kediman.

¹³Ui miak ngukum nedeh luk tudo déi' Masir, mepad kudeng Ui nengukum Yerusalim — ku bunu', lau, idi ét.

¹⁴Seburur pana' rat arang lun Yahuda luk ketecan idi luk iné' tudo déi' Masir, nateh luk miak mepuit idi mulun. Seburur pana' nateh luk miak lemubed amé' Yahuda, ieh ineh bawang luk inandeh pian tudo sekua' teh, iamo' tuda'-tuda' burur lemulun mo' luk buro."

¹⁵Idi amung deléi luk nekali' ratnan decurdeh luk nemaré baré kuan allah baken, idi teh amung decur luk tuped ieneh, dengan lun Yahudi rat pa kabing busat aco, ieh ineh mula' lemulun nepebala ni Yeremia,

¹⁶"Kai ara' ninger bala luk bilamu nekai dengan ngadan Tuhan.

¹⁷Kai sikal nganau' amung-amung luk pangeh bila kai. Kai miak maré baré kuan allah decur luk titen Raca' Decur Surga, idi kai miak ngutang baré luk rupen kuanneh, mepad kudeng luk inau' kai idi tepun kai, raca' kai idi lun rayeh kai bang amung bawang Yahuda idi luun dalam Yerusalim. Kareb ineh kai mula' akan, idi kai do' udeng. Idi na inan susa'.

¹⁸Iamo' kareb kai nugka' maré baré kuan Raca' Decur Surga idi nugka' ngutang baré luk rupen kuanneh, idi kai na ngalap anun-anun idi pupu kai pangeh naté bang bunu' idi ku lau."

¹⁹Idi kebala decur-decur ineh, "Kareb kai nenganau' pinaram mepad kudeng ayu Raca' Decur Surga, idi nemaré baré kuanneh, idi nengutang baré luk rupen kuanneh, idi awan kai mawang niat ratnan luk inau' kai."

²⁰Idi kebala Yeremia kuan amung lemulun ineh, do' deléi idi decur luk nengor balaneh kudeng ineh,

²¹"Ratnan baré luk biré muyuh idi tepun muyuh, raca' idi lun rayeh muyuh dengan amung anak itindeh bang amung bawang Yahuda idi luun dalam Yerusalim, muyuh ngerawé Tuhan na nekali' ratnan ineh, kian Ieh nekelupan lek.

²²Idi nekini bawang muyuh inusag idi na lemulun. Ieh pangeh mangun ku aceh luk inan megagap idi lun baken neten ngadanneh ku kediman, ngaceku Tuhan na tuman ku kekamen muyuh luk dat.

²³Susa' luk nekini pangeh nacing nemuyuh ngaceku muyuh nemaré baré kuan allah baken idi nenganau' sala' pa kiung Tuhan. Na muyuh mulun maya' bada' idi ukumNeh."

²⁴⁻²⁵Yeremia nemada' nelun mula', meluun teh decur-decur ineh, amung-amung luk bila Tuhan luk Melalud, Allah lun Israil kuan lun Yahuda luk tudo déi' Masir, kebalaNeh, "Muyuh idi awan muyuh pangeh nepejani' inan Raca' Decur Surga. Muyuh nepejani' maré baré kuanneh idi ngutang baré luk rupen kuanneh, idi muyuh pangeh nemaya' jani' muyuh. Kudeng pieh kudeng ineh, do' muyuh maya' jani' muyuh!

²⁶Iamo' do' muyuh ninger jani' luk Ui ini Tuhan pangeh nenganau' bang ngadanKu luk melalud kuan amung muyuh lun Yahudi déi' Masir: Na tu Ui miak nima' nemuyuh neten ngadanKu kareb muyuh pebulung, kebala muyuh, 'Dengan ngadan Tuhan Allah luk mulun!'

²⁷Ui miak ngukum nemuyuh pad muyuh na ngalap peruan, iamo' amung muyuh maté. Amung muyuh lun Yahuda luk tudo déi' Masir miak maté bang bunu', kian ku ét lek, pad seburur pana' rat arang muyuh nateh luk ketecan.

²⁸Iamo' tuda'-tuda' burur rat arang muyuh miak mepuit idi muli' rat Masir amé' Yahuda. Idi lun Yahuda luk ketecan rat arangdeh luk iné' Masir miak kali' bala sapeh luk matu, balaKuké, kian, baladeh lek.

²⁹Ui ini Tuhan miak maré aceh tanu' luk ngegala' Ui miak ngukum nemuyuh bang bawang ini, idi jani'Ku ratnan ngacing susa' kuan muyuh miak mangun.

³⁰Ui miak maré Hopra, raca' Masir, bang palad bunu' luk sikal ngaté neneh, mepad kudeng Ui nemaré Sedekia raca' Yahuda bang palad Nebukadnesar, raca' Babil, ieh ineh bunu'neh luk sikal ngaté neneh."

Yeremia 45

¹Bang lak luk keapat kareb Yoyakim Yosia ngimet Yahuda idi Baruk Neria nengayud luk bila Yeremia neneh. Kebala Yeremia ni Baruk,

²"Tuhan Allah lun Israil nepebala,

³O Baruk, kebalamu, Ui pian ugka', ngaceku Tuhan pangeh nengula' susa'ku! Ui merur ngarod idi na miak ngato erurku!' "

⁴Idi Tuhan nengecuk ni Yeremia pebala ni Baruk, "Ui ngusag luk pinudutKu, idi mubput luk tinibuKu. Ui miak nganau' luk kudeng ini aput tana'.

⁵Miakké iko nakap luk meluun do' kuan bururmu sebuleng? Aleg nganau' kudeng ineh. Ui ngacing susa' kuan amung lemulun, iamo' iko miak mepuit idi mulun, iapeh-iapeh luk ulekmu. Ui ini Tuhan pangeh nepebala."

Yeremia 46

¹Tuhan nepebala ni Yeremia ratnan amung-amung pupu.

²Ini luk bilaNeh ratnan bawang Masir. Tuhan nepebala ratnan baweh Neko, raca' Masir luk linaya' Nebukadnesar, raca' Babil déi' Karkemis muneng ku Abpa' Pirat, bang lak luk keapat kareb Yoyakim Yosia ngimet Yahuda.

³"Lun rayeh baweh Masir ngitang, 'Do' ngalap utap muyuh, idi amé' pebunu'!

⁴Temina' ku kuda muyuh idi tudo luundeh! Idi baris dengan tupi luun uluh muyuh! Ngir pelapet muyuh! Idi ngayung ku ayung bunu'!"

- ⁵"Iamo' anun luk sirenKu?" kebala Tuhan, "Ideh nelemubed dengan matot. Lun bunu'deh linaya'; ideh matot idi buro, idi na lumi teh.
- ⁶Lemulun luk mawer na miak mepuit, lun bunu' pana' na miak buro. Idi muneng ku Abpa' Pirat pa tinueh busat aco, ideh metebaceng idi mebpeh.
- ⁷Idé ini luk temubu' mepad kudeng Abpa' Nil, mepad kudeng abpa' luk ngereb?
- ⁸Ieh ineh Masir luk temubu' mepad kudeng Abpa' Nil, mepad kudeng abpa' luk ngereb. Kebala Masir, 'Ui miak temubu' idi ngereb amung tana' idi ngusag bawang idi ngaté lemulun luk tudo déi'.
- ⁹Ngecuk kuda idi keréta nalan! Nima' amung baweh nalan: lun rat Sudan idi Libia luk ngimet utapdeh, idi lun rat Lidia luk ngimet busu.' “
- ¹⁰Aco sini, ieh ineh aco Tuhan Allah luk Melalud: aco sini Ieh miak ngua'; aco sini Ieh ngukum bunu'Neh. PelapetNeh miak kuman nedeh, idi ngirup dara'deh pad ieh mebor. Aco sini Tuhan luk Melalud ngaté lemulun luk inukumNeh pa tinueh busat aco, muneng ku Abpa' Pirat.
- ¹¹O lun Masir, do' amé' Giliad, idi nakap ubat! Amung ubat muyuh sebuleng na ulekneh, idi na luk miak ngedo' nemuyuh.
- ¹²Amung pupu neninger ratnan igu' muyuh, idi teh amung lemulun neninger tido muyuh. Dueh burur lun pebunu' mepatuk, idi didueh meluka'.
- ¹³Kebala Tuhan ni Yeremia kareb Nebukadnesar raca' Babil iné' ngerieng bawang Masir,
- ¹⁴"Mada' bala ini bang amung bawang Masir, do' déi' Migdol, Mempis, idi Tapanes. 'Do' temina' amé' pebunu'; amung binaweh idi bawang muyuh miak uen ngusag bang bunu'!
- ¹⁵Ngudehké akang muyuh luk melalud nebpeh? Ngaceku Tuhan luk nenecat neneh!'
- ¹⁶Lun pebunu' muyuh netebaceng idi nebpeh, kebaladeh seburur inan seburur, 'Miket! Do' tau muli', pad tau mepuit ratnan pelapet bunu' tau!'

- 17"Maré kuan raca' Masir aceh ngadan luk mebaruh, ieh ineh 'Rayeh Tang Mo'-Mo'.'
- 18Ui ini Tuhan luk Melalud luk raca'. Ui ini Allah luk mulun. Mepad kudeng Pegkung Tabor meluun dita' ratnan amung pegkung, idi Pegkung Karmel medita' ratnan abpa' rayeh, kudeng ineh teh tueh lemulun luk munu' namu.
- 19O muyuh lun Masir, do' muyuh temina' tebanen! Mempis miak mangun ku su luk ali-ali, idi bawang luk inusag luk na lemulun.
- 20Masir mepad kudeng sapi' tineh luk do' luk kitep pitek luk rat pa tinueh busat aco.
- 21Lun pebunu' luk uen nabpar pana', melaya' kudeng anak sapi'. Na ideh tuman pebunu', iamo' ideh upun buro, ngaceku aco luk nandeh kumin pangeh nacing, ieh ineh aco atédéh.
- 22Lun Masir upun buro, idi muni kudeng uni menipeh, kareb baweh bunu' macing idi ngapak nedeh ku uaideh, mepad kudeng lemulun ngapak kayuh.
- 23Ideh temara' pulung Masir. Anak itindeh na mekiap, idi lun pebunu'deh meluun ula' ratnan kato.
- 24Lun Masir inigu' idi linaya' pupu rat pa tinueh busat aco. Ui ini Tuhan pangeh nepebala."
- 25Kebala Tuhan luk Melalud, Allah lun Israil, "Ui miak ngukum Amon, allah lun Tibis, perapu dengan Masir idi amung allah idi raca'deh. Ui miak ngukum raca' Masir idi amung lemulun luk merapet neneh.
- 26Ui miak maré nedeh bang palad lemulun luk sikal ngaté nedeh, ieh ineh Nebukadnesar raca' Babil idi bawehneh. Iamo' mucu aco lemulun miak tudo déi' Masir, mepad kudeng luk atun. Ui ini Tuhan pangeh nepebala."
- 27"O amung inul demulunKu Yakub, aleg muyuh matot. O lun Israil, aleg megagap. Ui miak muit nemuyuh ratnan bawang luk mado, rat su luk inan muyuh pangeh tiban. Muyuh miak lemubed idi mulun dengan do'. Muyuh miak do' udeng, idi na lemulun miak ngagau nemuyuh.

²⁸Ui idi dengan muyuh idi ngulun nemuyuh. Ui miak ngusag amung bawang su luk inanKu nengatad nemuyuh, iamo' na Ui ngaté nemuyuh. Na Ui nima' nemuyuh na ngalap ukum, iamo' kareb Ui ngukum nemuyuh Ui miak méi' nemuyuh. Ui ini Tuhan pangeh nepebala."

Yeremia 47

¹Kareb nateh raca' Masir nemunu' Gasa, Tuhan nepebala ni Nabi Yeremia ratnan lun Pilistin.

²KebalaNeh, "Siruh! Abpa' temubu' pa tinueh busat aco, idi miak manud mepad kudeng tubu' belen, lun ngereb amung tana' idi amung luk luun tana' pana', do' amung bawang idi lemulun luk tudo bang ineh. Lemulun miak ngitang mutuh pedengan, idi amung lemulun bang tana' ini miak nangi'.

³Ideh miak ninger uni kukud kuda, idi uni keréta idi uni rodadeh. Taman-taman na miak lemubed ngalap anakdeh idi ticu'deh melaya' peh.

⁴Tarekneh pangeh nacing kareb Pilistin uen ngusag, pad na lun ngedengan Sur idi Sidon. Ui ini Tuhan miak ngaté nelun Pilistin, ieh ineh amung lun luk nacing rat bawang Kaptor luk tangeb abpa' rayeh.

⁵Susa' luk rayeh pangeh nacing kuan lun Gasa, idi pupu Askelon pirud mo'. Tuda' ioké lun Pilistin luk ketecan miak temido?

⁶Muyuh ngitang, 'O pelapet Tuhan! Tuda' ioké iko narad? Do' iko lemubed amé' bang binanmu idi ngato erurmu.'

⁷Kudeng apehké ieh miak ugka', ngaceku Ui maré kekamen kuanneh? Ui nengecuk neneh munu' bawang Askelon, idi lemulun luk tudo tangeb abpa' rayeh."

Yeremia 48

¹Kebala Tuhan luk Melalud ratnan Moab, "Mesusa' kuan lun Nebo — bawangdeh inusag! Kiriataim pangeh ilap, idi libung batuneh luk rayeh inusag, pupuneh pana' inigu' peh,

²amung ubur Moab pangeh netutu'. Déi' Hesbon bunu'neh pegayam, 'Do' tau ngusag bawang Moab.' Bawang Dibon miak pirud, ngaceku tuda'-tuda' baweh ngerieng neneh.

³Idi lun Horanaim ngitang 'Inan susa' idi bunu' luk rayeh!'

⁴"Moab pangeh inusag, ninger amung anak nangi'.

⁵Ninger ilung tangi'deh, raked dalam amé' Luhit, ninger aroddeh ngaceku mesusa', raked dalam amé' Horonaim.

⁶'Miket! Upun buro!' kebaladeh. 'Upun, mepad kudeng keladai luk meliput déi' su luk ali-ali!'

⁷"O Moab, iko merapet inan tueh idi do'mu, iamo' nekini iko miak lapen, idi allahmu Kemos miak tebanen dengan amung pengulu idi imamneh.

⁸Aceh bawang pana' nateh luk na inusag. Amung ruan idi raked miak sagen. Ui ini Tuhan pangeh nepebala.

⁹Nganau' aceh batu ku terawé ratnan Moab, ngaceku bawang ineh uen ngusag. Amung ruma'neh pana' miak uen ngusag, idi seburur pana' nateh luk tudo su ineh teh."

(¹⁰Kediman kuan lemulun luk na nganau' kekamen Tuhan dengan amung niatneh! Kediman kuan lemulun luk na ngaté nelun ku pelapetneh!)

¹¹Kebala Tuhan, "Macing nekini Moab na inan susa', idi teh na tiban. Moab mepad kudeng abpa' anggur luk neketecan bang rubi, idi na inutang bang rubi baken. En na mekisu', éneh mepad kudeng luk atun.

¹²"Iamo' tarekneh miak macing kareb Ui ngecuk lemulun ngutang Moab mepad kudeng abpa' anggur. Ideh miak nala' abpa' anggur idi mila' rubi ineh.

¹³Kareb ineh lun Moab dat niat inan allahdeh Kemos, mepad kudeng lun Israil dat niat inan Baitel, aceh allah luk inandeh merapet.

¹⁴"O lun Moab, ngudehké muyuh mala nemuyuh lun luk mebala, lun luk mesangit bang bunu'?

¹⁵Moab idi amung bawangneh inusag, idi anak adi'deh luk deléi luk do' taga pangeh pinaté. Ui ini, Raca', Tuhan luk Melalud, idi Ui pangeh nepebala.

¹⁶Ukum Moab malé macing, idi ieh malé uen ngusag.

¹⁷"Do' muyuh temido ni Moab, O muyuh luk tudo muneng ku bawang ineh, amung muyuh luk pangeh nekali' uburneh. Kebala muyuh, 'Imetneh luk melalud pangeh inugka'; ubur idi laludneh pangeh netutu.'

¹⁸O muyuh luk tudo déi' Dibon, temurun ratnan kerusi ubur muyuh, idi tudo luun tana'. Lun luk ngusag Moab pangeh nacing, idi pangeh nengusag amung libungneh.

¹⁹O muyuh luk tudo déi' Arur, do' tuper iring dalan idi nganét. Ngitun nelun luk buro anun luk mangun.

²⁰'Moab pangeh netabpa,' miak beléndeh, 'Do' temido neneh. Ieh pangeh inigu'. Mada' nelun luk tudo tangeb Abpa' Arnon, Moab pangeh inusag!'

²¹"Ukum pangeh nacing kuan amung bawang luk luun raked: luun Holon, Yasa, Mepat,

²²Dibon, Nebo, Bait Diblataim,

²³Kiriataim, Bait Gamul, Bait Mion,

²⁴Keriot, idi Bosra. Ukum pangeh nacing kuan amung bawang Moab, luk mado idi luk muneng pana'.

²⁵Lalud Moab pangeh linaya', idi tuehneh pangeh inusag. Ui ini Tuhan pangeh nepebala.

²⁶"Ngabuk ni Moab, ngaceku ieh sikal metueh rat Negku luk Tuhan. Moab miak silubid luun uta'neh, pad lemulun miak meriruh.

²⁷O Moab, ngerawé kudeng afeh iko nesitunga nelun Israil? Muyuh nesitunga nedeh mepad kudeng muyuh nesitunga nelun luk kikem arang lun mano.

²⁸"O muyuh luk tudo déi' Moab, necan bawang muyuh! Amé' tudo luun pegkung batu! Do' muyuh mepad kudeng sukur luk nganau' ararneh bang lubang pegkung batu ineh.

²⁹Moab pelaba dita' niat! Ui pangeh nekali' dita' niat idi sido' niat muyuh. Idi Ui kali' nemuyuh megéi' ngerawé burur muyuh sebuleng.

³⁰Ui ini Tuhan kali' dita' niat lun Moab. Baladeh luk medita' na ulekneh idi kekamendeh na meruked.

³¹Ngaceku ineh, Ui miak nangi' nelun Moab idi lun Kir Heres.

³²Ui miak nangi' nelun Sibma, meluun ratnan lun Yaser. O bawang Sibma, iko mepad kudeng aceh lawa anggur, idi angkatmu macing déi' dipar Takung luk Mepaci', idi macing Yaser pana'. Iamo' nekini amung bua'mu idi anggurmu pangeh inusag.

³³Na luk idi awang niat idi do' ria bang tana' Moab luk mebaleng. Idi abpa' anggur pana' na manud rat bang su luk inan ngeradu' bua' anggur ineh. Na lemulun luk nganau' abpa' anggur idi luk ngitang ku awangdeh.

³⁴"Lun Hesbon idi lun Elila ngitang, idi tangdeh pedingeren macing Yahas, idi teh pedingeren lun Soar, idi macing Horonaim idi Eglat luk Mebaruh. Idi Arur Nimrim pana' nekeket.

³⁵Ui miak ngagka' nelun Moab, pad ideh na maré luk sabpen luun su luk inandeh sembayang, idi pad ideh na maré luk kereten kuan allahdeh. Ui ini Tuhan pangeh nepebala.

³⁶"Idi niatKu mesusa' ngaceku Moab idi lun Kir Heres. Ui mepad kudeng lemulun luk ngiup suling mangun ku aceh tido, ngaceku amung binawehdeh na idi.

³⁷Amung-amungdeh pangeh nengiki uluhdeh idi teh ideh nemingit buluh tangdeh. Ideh nengurat ticu'deh idi amung-amungdeh nenacung.

³⁸Luun amung apo ruma' lun Moab idi déi' luun amung natad pana' na luk baken, lun temido mo', ngaceku Ui nemila' Moab mepad kudeng aceh rubi luk na pian lun. Ui ini Tuhan pangeh nepebala.

³⁹Moab pangeh inusag! Do' muyuh ngitang! Ngaceku Moab pangeh inigu'. Ieh pangeh inusag, idi amung pupu libutneh situnga neneh.

⁴⁰Ui ini Tuhan pangeh nepejani': Aceh pupu miak ngeladai luun Moab mepad kudeng aceh kanui.

⁴¹Amung bawangneh idi libung batu miak lapen. Idi bang aco sineh amung baweh Moab miak matot mepad kudeng decur luk mét nenganak.

⁴²Moab miak uen ngusag, pad na ieh mangun ku aceh pupu teh, ngaceku ieh sikal metueh rat Negku.

⁴³Inan tot, lubang, idi abpung temina' kuan lun Moab. Ui ini Tuhan pangeh nepebala.

⁴⁴Idé-idé luk sikal buro ratnan luk katot miak mebpeh bang lubang. Idi idé-idé luk manad sikal remuat rat bang lubang ineh miak mekaneh abpung, ngaceku Ui pangeh nengelelep aceh kareb luk inan Moab uen ngusag. Ui ini Tuhan pangeh nepebala.

⁴⁵Lemulun luk buro nakap pedengan déi' bawang Hesbon. Iamo' Hesbon, bawang luk inimet Raca' Sihon atun uned meseb. Amung raked idi pegkung lun Moab luk pian pebunu' pangeh neseb.

⁴⁶Mesusa' kuan lun Moab! Lemulun luk nesembayang inan Kemos pangeh pinaté, idi anakdeh luk deléi idi decur pangeh tiban.

⁴⁷"Iamo' mucu aco, Ui miak ngeperuan ni Moab baruh." Ieh ineh ukum Tuhan kuan Moab.

Yeremia 49

¹Kebala Tuhan ratnan lun Amon, "Iapehké lun Israil? Naké lemulun luk miak matar bawangdeh? Ngudehké ideh nima' lemulun luk sembayang inan Milkom ngalap tana' pupu Gad idi tebawang déi'?"

²Ngerawé do'-do', tarekneh miak macing kareb Ui nganau' lun bang bawang Raba ninger uni lun pebunu'. Bawang lun Amon ineh miak uen ngusag idi amung ruma'deh miak mabud sabpen. Idi lun Israil miak ngalap tana'deh lemubed ratnan lemulun luk nengaro neneh. Ui ini Tuhan pangeh nepebala.

³O lun Hesbon, do' muyuh ngitang! Bawang muyuh pangeh inusag! O muyuh decur lun Raba. Do' muyuh temido! Do' muyuh nacung idi nangi'. Do' muyuh perigéi' upun. Akang muyuh Milkom miak tebanen perapu dengan imam idi penguluneh.

⁴Ngudehké muyuh luk na lutep manu pelaba dita' niat? Tueh muyuh na luk idi. Ngudehké muyuh merapet inan lalud muyuh, kebala muyuh, 'Lemulun na mekuu' munu' nekai?'

⁵Ui miak ngacing tot kuan muyuh rat pa selipa idi rat pa selipa. Amung muyuh miak upun buro, idi seburur pana' nateh luk miak ngamung baweh muyuh teh. Ui ini Tuhan pangeh nepebala.

⁶"Iamo' mucu aco Ui miak ngeperuan nelun Amon teh. Ui ini Tuhan pangeh nepebala."

⁷Kebala Tuhan luk Melalud ratnan Edom, "Matuké lun Edom na mileh ngerawé? Naké lun luk nguyut nedeh mileh mada' nedeh? Iapehké ilehdeh?

⁸O lun Dedan, upun buro! Amé' sigapung! Ui miak ngaté inul Esau, ngaceku tarek luk inandeh miak kumin pangeh nacing.

⁹Kareb lemulun ngalap bua' anggur, ideh megéi' necan sesuut bua'. Idi kareb lun mano macing kareb medacem, ideh ngalap luk piandeh mo'.

¹⁰Iamo' Ui pangeh nengabud inul Esau, idi nengegala' amung su luk inandeh sigapung, pad ideh na miak sigapung teh. Lun Edom idi pupudeh idi lun dengandeh pangeh pinaté. Seburur pana' nateh luk ketecan.

¹¹Necan amung anak maté muyuh denganKu, idi Ui miak ngasa' nedeh. Decur muyuh luk tinula' pana' miak merapet Negku."

¹²Kebala Tuhan, "Kudeng lemulun luk na petulu kumin ngirup ratnan sangkir ukum, miakké muyuh mepuit ratnan ukum? Na tu! Muyuh pana' miak ngirup ratnan sangkir ineh!

¹³Ui sebuleng pangeh nepebulung, kebalaKu, Bawang Bosra miak mangun ku aceh luk inan megagap idi su luk ali-ali. Lemulun miak situnga neneh, idi

neten ngadanneh ku kediman. Amung ruma' libut-libutneh miak uen ngusag macing raked-raked. Ui ini Tuhan pangeh nepebala.”

¹⁴Kebala Yeremia, "Ui pangeh nengalap aceh bala ratnan Tuhan. Ieh nengecuk seburur lun duken mada' amung pupu, kebalaNeh, 'Ngamung baweh muyuh idi amé' munu' Edom! Do' muyuh temina' pebunu!'

¹⁵Tuhan miak ngelaya' bawangmu, pad seburur pana' nateh luk ngedita' namu.

¹⁶Iko sinaluk ngaceku dita' niatmu. Na tu lemulun matot namu. Iko tudo luun pegkung batu luk medita'. Iamo' sagan pana' ruma'mu medita' kudeng arar kanui, Tuhan miak ngebeneh namu. Tuhan pangeh nepebala.”

¹⁷Kebala Tuhan, "Aceh susa' luk pelaba rayeh miak macing kuan Edom, pad amung-amung lemulun luk lemaba miak megagap idi matot nier amung-amung luk pangeh nangun.

¹⁸Ukum miak macing kuan Edom, mepad kudeng ukum Sodom idi Gemora, ieh ineh kareb ideh idi amung bawang luk muneng inusag. Seburur pana' nateh luk miak mulun ieneh, segageh pana' nateh. Ui ini Tuhan pangeh nepebala.

¹⁹Ui miak macing mepad kudeng balang luk remuat rat bang pulung luk tangeb Abpa' Yarden idi nalan luun laman. Idi Ui miak nganau' nelun Edom upun buro rat bang bawangdeh. Idi lun rayeh luk pilinKu miak ngimet bawang ineh. Idéké luk mepad Negku? Idéké luk sikal metueh rat Negku? Iapehké lun rayeh luk metueh rat Negku?

²⁰Do' ninger balaKu ratnan lun Edom idi luk miak ruenKu kuan lemulun luk tudo bang bawang Teman. Anak-anakdeh pana' miak tebanen, pad amung lemulun miak megagap.

²¹Kareb Edom metabpa, unineh miak nganau' tana' meruyuh, idi arod lemulun miak pedingeren macing Abpa' Pisui.

²²Bunu' ineh miak munu' bawang Bosra mepad kudeng kanui luk ngeladai rat déi' dita'. Idi bang aco sineh, baweh Edom miak matot mepad kudeng decur luk mét nenganak.”

²³Kebala Tuhan kuan Damsik, "Lun bang bawang Hamat idi Arpad megagau idi mesusa' ngaceku ideh neninger bala luk dat. Susa' ngereb nedeh mepad kudeng abpa' rayeh, pad ideh na do' udeng.

²⁴Lun Damsik melaya', idi upun buro ngaceku matot. Ideh mét idi medereh mepad kudeng decur luk mét nenganak.

²⁵Bawang luk mebala idi do' ria' atun pangeh tican.

²⁶Idi kareb ineh amung anak adi' deléi idi lun pebunu' miak pitayen déi' luun dalan bawang ineh. Ui ini Tuhan luk Melalud pangeh nepebala.

²⁷Ui miak ngeseb amung libung batu Damsik idi ruma'-ruma' Raca' Benhadad pana'.”

²⁸Kebala Tuhan ratnan pupu Kedar idi lun rayeh bawang Hasor, luk linaya' Nebukadnesar raca' Babil, "Amé' munu' nelun Kedar idi ngaté pupu luk rat pa busat aco ineh!

²⁹Ngalap lepo idi aya'deh, idi kibung, idi teh amung binaweh luk bang lepodeh ineh. Ngalap untadeh, idi mada' nedeh, 'Inan luk katot libut-libut muyuh!'

³⁰"O lun Hasor, Ui ini Tuhan ngecuk nemuyuh buro amé' mado idi sigapung déi'. Nebukadnesar raca' Babil pian munu' nemuyuh, kebalaneh,

³¹'Miket! Do' tau munu' lemulun ineh luk ngerawé na inan susa'. Bawangdeh ineh na libung idi na tanga', idi teh na lun matar nedeh.' Tuhan pangeh nepebala.

³²"Ngalap untadeh idi amung-amung aya'deh! Ui miak ngatad lemulun luk mekamu' abpuk ineh, idi Ui miak ngacing susa' kuandeh rat selipa idi rat pa selipa. Ui ini Tuhan pangeh nepebala.

³³Hasor miak mangun ku su luk ali-ali macing raked-raked, ieh ineh su luk inan galau mo'. Seburur pana' nateh luk miak tudo ieneh, segageh pana' nateh."

³⁴Kareb Sedekia pun-pun mangun ku raca' Yahuda, idi Tuhan nepebala ni Yeremia ratnan bawang Elam.

³⁵Kebala Tuhan luk Melalud, "Ui miak ngaté amung lemulun luk mileh mayung ku busu luk pangeh nenganau' bawang Elam rayeh.

³⁶Ui miak ngacing bui rat iapeh-iapeh luk malid pupu Elam amé' iapeh-iapeh, pad na luk idi bawang luk na ulek lemulun luk buro.

³⁷Ui miak nganau' nelun Elam matot nan bunu' luk pian ngaté nedeh. Ui miak ngaté nedeh dengan usehKu luk pelaba bura', idi ngecuk tuda'-tuda' baweh munu' nedeh pad ideh mabud maté. Ui ini Tuhan pangeh nepebala.

³⁸Ui miak ngaté amung raca' idi lun rayeh Elam, pad Ui ngelelep kerusiKu ieneh.

³⁹Iamo' mucu aco Ui miak ngeperuan nelun Elam teh. Ui ini Tuhan pangeh nepebala."

Yeremia 50

¹Kebala Tuhan ni Nabi Yeremia ratnan Babil idi pupuneh.

²"Mada' bala ini kuan amung pupu! Nateg tawak, idi maré kali! Aleg ngalum ineh! Babil pangeh netabpa! Akangneh Marduk pangeh nebila! Idi amung akang Babil pangeh inigu'. Amung akang luk inan megani' pangeh inusag!

³"Aceh pupu rat pa tinueh busat aco pangeh iné' munu' Babil, pad ieh mangun ku su luk ali-ali. Lemulun idi pung pana' miak buro, pad seburur pana' nateh luk mulun su ineh."

⁴Kebala Tuhan, "Kareb ineh lun Israil idi lun Yahuda miak amé' nakap Negku luk Allahdeh dengan nangi'.

⁵Ideh miak ngitun dalam amé' Sion idi maya' dalam ineh. Ideh miak nganau' aceh pejani' luk meruked dengan Tuhan luk na miak labéndeh.

⁶"PupuKu mepad kudeng dumba luk neraruh, luk rinaruh lun luk matar nedeh luun pegkung. Ideh pangeh nenalan mepad kudeng dumba, rat aceh pegkung amé' luun pegkung baken. Idi ideh pangeh nekelupan libungdeh.

⁷Amung lemulun luk kali' nedeh ngaté nedeh. Idi kebala bunu'deh, 'Ideh pangeh nenganau' sala' pa kiung Tuhan. Ngaceku ineh na kai mesala'. Tepundeuh pangeh merapat inan Tuhan, idi petulu ideh lutep maya' Neneh.'

⁸"O Lun Israil, buro rat Babil! Necan bawang ineh! Do' muyuh buro atun!

⁹Ui miak ngegio tuda'-tuda' pupu rat pa tinueh busat aco, pad ideh amé' munu' Babil. Ideh miak ngerieng bawang ineh idi ngalap neneh. Ideh miak mayung ku busudeh mepad kudeng lun nganup luk mileh mayung.

¹⁰Babil miak uen ngaro. Idi lemulun luk ngaro neneh miak ngalap anun-anun luk piandeh. Ui ini Tuhan pangeh nepebala.

¹¹"O Lun Babil, muyuh ngaro bawang pupuKu. Sagan tu pana' iko mawang niat idi do' ria', idi nalan mepad kudeng sapi' luk rumik padé, idi kudeng kuda luk muni,

¹²bawangmu ineh miak uen ngigu' idi uen ngebeneh. Babil miak mangun ku bawang luk isuut tu-tu, ieh ineh su luk ali-ali luk na abpa'.

¹³Ngaceku usehKu, seburur pana' nateh luk tudo déi' Babil. Ieh miak uen ngusag. Amung lemulun luk lemaba miak megagap idi mawa ku luk pangeh nangun kuanneh.

¹⁴"O muyuh lun luk mileh mayung ku busu, do' muyuh temina' ngerieng bawang Babil idi ngelibut neneh. Mayung busu muyuh nelun Babil, ngaceku ieh pangeh nenganau' sala' pa kiungKu luk Tuhan

¹⁵Ngitung-ngitung libut-libut bawang ineh! Nekini Babil pangeh melaya'. Libung batuneh pangeh nekusag. Ui ini Tuhan ngua' nelun Babil. Do' muyuh pana' ngua' nedeh, idi nganau' kuandeh mepad kudeng luk pangeh inau'deh kuan lun baken.

¹⁶Aleg nima' padé uen nibu déi' Babil, idi aleg nima' lemulun ngeranih su ineh. Amung lun sakai luk tudo déi' miak matot baweh luk ngerieng nedeh ineh, pad ideh muli'."

¹⁷Kebala Tuhan, "Lun Israil mepad kudeng dumba luk uen balang ngerada' idi ngatad. Pun-pun ideh binunu' raca' Asur, idi pangeh ineh Nebukadnesar raca' Babil ngim tulangdeh.

¹⁸Ngaceku ineh Ui ini, Tuhan luk Melalud, Allah lun Israil, miak ngukum Nebukadnesar idi bawangneh, mepad kudeng Ui nengukum raca' Asur.

¹⁹Ui miak nguit nelun Israil muli' amé' bawangdeh. Ideh miak kuman nuba' luun Pegkung Karmel idi bang babpat Basan. Idi ideh miak kuman amung luk piandeh déi' Ephraim idi Giliad.

²⁰Kareb ineh, na miak kali' sala' arang lun Israil, idi na luk dat arang lun Yahuda pana', ngaceku Ui miak maré do' kuan lemulun luk siménKu mulun. Ui ini Tuhan pangeh nepebala."

²¹Kebala Tuhan, "Do' munu' lemulun déi' Merataim idi Pekod. Do' ngaté nedeh. Do' nganau' amung luk dukenKu nemuyuh. Ui ini Tuhan pangeh nepebala.

²²Uni lun pebunu' pedingeren bang bawang ngaceku inan usag luk rayeh.

²³Babil pangeh nenecat amung tana' ini, idi nekini tuno ineh pangeh neputul. Amung-amung pupu megagap nier luk pangeh nangun kuan Babil.

²⁴O Babil, iko pangeh nekaneh abpung luk inau'Ku kuanmu, sagan tu pana' iko na kali'. Iko pangeh kikemdeh, ngaceku iko sikal metueh rat Negku.

²⁵Ui pangeh nengukab su luk inanKu nganug busuKu, idi dengan usehKu Ui pangeh nengalap busu ineh ngaceku Ui ini, Tuhan luk Melalud, inan luk ruenKu déi' Babil.

²⁶Do' munu' Babil rat selipa idi rat pa selipa, idi ngaro lepo padédeh. Ngamung amung binaweh luk ruen muyuh ngaro mepad kudeng aceh bubpun padé. Do' ngusag bawang ineh idi aleg necan anun-anun pana'.

²⁷Ngaté amung lundeh luk pebunu! Ngaté nedeh, idi aleg méi' nelun Babil! Tarekneh pangeh macing kareb ideh miak kumin!”

²⁸(Lun luk neburo rat Babil iné' Sion, idi nemada' ratnan kudeng apéh Tuhan Allah tau nengua' luk inau' lun Babil kuan Ruma'Neh.)

²⁹"Do' ngecuk nelun luk mileh mayung ku busu amé' munu' Babil. Idi teh ngecuk amung-amung lemulun luk mileh mayung ku busu amé' ngelibut bawang ineh, idi aleg nima' seburur pana' buro. Do' ngua' amung-amung luk pangeh inau'neh. Idi nganau' kuanneh, mepad kudeng luk inau'neh kuan lun baken. Ngaceku dengan medita' niat ieh sikal metueh rat Negku, ieh ineh Tuhan lun Israil luk Meligan.

³⁰Idi amung anak adi' deléi miak pitayen luun dalam bawang ineh, idi amung bawehneh miak uen ngaté bang aco sineh. Ui ini Tuhan pangeh nepebala.

³¹"O Babil, iko pelaba dita' niat. Ngaceku ineh, Ui ini, Tuhan luk Melalud, sikal metueh rat namu. Tarekneh pangeh nacing kareb iko miak kumin.

³²Pupumu luk medita' niat miak metebaceng idi meluka', idi seburur pana' nateh luk miak ngiding namu. Ui miak ngeseb amung bawangmu, idi teh amung luk libut-libutmu miak uen ngusag.”

³³Kebala Tuhan luk Melalud, "Amung lun Israil idi lun Yahuda pangeh pidereh. Amung-amung lun luk nenaban nedeh matar nedeh do'-do' idi na sikal muit nedeh.

³⁴Iamo' Lun luk pian muit nedeh ineh metueh — idi ngadanNeh, ieh ineh Tuhan luk Melalud. Ieh luk miak ngedengan nedeh idi nguit tana' ini pedo', iamo' Ieh miak ngacing susa' kuan lun Babil.”

³⁵Kebala Tuhan, "Até kuan Babil! Até kuan pupuneh, idi kuan lun rayeh idi lun mileh pana'.

³⁶Até kuan nabi-nabineh luk mebalih — ideh pelaba bacé. Até kuan bawehneh — ideh pelaba tot.

³⁷Ngaté kudaneh idi ngusag kerétaneh! Ngaté nelun pebunu' luk ngalap tabpar pana' — ideh pelaba laya! Ngusag amung binawehneh; idi ngaro neneh.

³⁸Ngacing rikan kuan bawangneh, pad abpa'neh mekeket. Babil ineh aceh bawang luk mepanu' ku akang luk dat luk naluk nelun Babil.

³⁹"Ngaceku ineh, Babil mangun ku su luk mula' ada' idi suit luk melutak. Idi mucu na lemulun miak mulun ieneh, macing raked-raked.

⁴⁰Mepad kudeng luk inau'Ku kuan Sodom, Gemora, idi bawang luk muneng ku bawang ineh, kareb Ui nengusag nedeh, kudeng ineh teh luk miak ruenKu kuan Babil. Seburur pana' nateh luk miak mulun su ineh, segageh pana' nateh. Ui ini Tuhan pangeh nepebala.

⁴¹"Aceh pupu macing rat bawang luk pa tinueh busat aco, ieh ineh aceh bawang luk melalud rat mado luk temina' pebunu'.

⁴²Ideh pangeh nengalap busu idi pelapetdeh. Ideh mesangit idi na mileh méi'. Uni bawehdeh mepad kudeng beri abpa' rayeh kareb ideh nalan maya' kudadeh. Ideh temina' munu' nelun Babil."

⁴³Kareb raca' Babil neninger bala ineh, idi ticu'neh melaya'. Idi ieh pelaba susa' mepad kudeng seburur decur luk mét nenganak.

⁴⁴"Ui ini Tuhan miak remuat rat bang pulung tangeb Abpa' Yarden idi nalan luun laman. Idi Ui miak nganau' nelun Babil denak-denak buro rat bang bawangdeh. Idi lun luk pilinKu miak ngimet bawang ineh. Idéké luk mepad Negku? Idéké luk sikal metueh rat Negku? Iapehké lun rayeh luk metueh rat Negku?

⁴⁵Do' ninger balaKu ratnan bawang Babil, idi luk ruenKu kuan pupuneh. Anak-anakdeh pana' miak tebanen, pad amung lemulun miak megagap.

⁴⁶Kareb Babil metabpa, unineh miak nganau' tana' meruyuh, idi arod lemulun miak pedingeren amung pupu baken."

Yeremia 51

- ¹Kebala Tuhan, "Ui ngacing aceh bui luk ngusag, kuan Babil idi pupuneh.
- ²Ui miak ngecuk nelun rat bawang baken amé' ngusag Babil mepad kudeng bui luk malid lipang padé. Kareb acodeh ngusag ineh, ideh miak munu' rat selipa idi rat pa selipa, pad bawang ineh na luk anun-anun.
- ³Aleg maré kareb kuan baweh Babil, pad ideh na miak mayung ku busudeh idi pad ideh na miak ngayung ku ayungdeh. Aleg méi' inan anak adi deléideh! Ngusag amung bawehdeh!
- ⁴Ideh miak uen ngurat pad ideh maté luun dalam bawangdeh.
- ⁵Ui ini, Tuhan Allah luk Melalud, na nenecan Israil idi Yahuda, sagan tu pana' ideh nenganau' sala' pa kiungKu, ieh ineh Tuhan lun Israil luk Meligan.
- ⁶Buro rat Babil, pad muyuh mulun. Aleg muyuh maté ngaceku sala' Babil. Ui miak ngua' idi ngukum neneh, maya' kudeng luk pangeh inau'neh
- ⁷Babil ineh mepad kudeng aceh sangkir amas bang paladKu, luk ngabuk amung tana' ini. Amung-amung pupu nengirup abpa' anggurneh, pad ideh meraruh terawé.
- ⁸Denak-denak Babil netabpa, idi inusag! Do' nangi' neneh! Nakap ubat kuan uratneh. Kian, ieh miak uen ngedo' lek.
- ⁹Kebala lun sakai luk tudo déi', 'Kai nutun ngedengan Babil, iamo' mulai kai. Miket! Do' tau muli'. Allah pangeh nengukum Babil dengan amung tuehNeh, pad bawang ineh nabud nusag.' "
- ¹⁰Kebala Tuhan, "PupuKu ngitang, kebaladeh, 'Tuhan pangeh nengegala' do' kai. Do' tau amé' mada' nelun Sion ratnan amung luk inau' Tuhan Allah tau.' "
- ¹¹Tuhan pangeh nengegio terawé raca'-raca' Midi, ngaceku Ieh pian ngusag bawang Babil. Kudeng ineh lawéNeh Tuhan ngua' ratnan usag Ruma'Neh. Kebala lun rayeh baweh, "Ngir busu muyuh! Idi temina' ku utap muyuh!
- ¹²Nateg tawak pad amung muyuh temina' ngusag libung batu Babil. Do' mula' lemulun luk matar. Ngecuk nedeh temina' su luk inandeh! Idi ngecuk nelun

baken ngabang!" Tuhan pangeh nenganau' luk tirawéNeh idi luk bilaNeh kuan lun Babil.

¹³Déi' Babil mula' abpa' idi binaweh luk pelaba do', iamo' tarekneh pangeh nacing kareb gitian ulunneh miak meputut.

¹⁴Tuhan luk Melalud pangeh nepebulung ku ulunNeh sebuleng, kebalaNeh, "Ui miak ngacing mula' lemulun munu' Babil, mepad kudeng kinula' kato, idi ideh miak ngitang ngaceku ideh metueh ratnan bawang ineh."

¹⁵Tuhan nemudut tana' dengan lalud idi ilehNeh, idi Ieh nemalad langit dengan ilehNeh teh.

¹⁶Maya' ukumNeh inan uni lalam déi' langit, idi Ieh nguit laput rat iring tana'. Ieh nganau' kilep dengan udan, idi maré bui rat su inanNeh.

¹⁷Amung lemulun dat ileh idi mebacé, amung lun luk mileh nganau' amas, dat niat ku akangdeh, ngaceku ideh ineh allah luk mebalih, idi na mulun.

¹⁸Idi ideh ineh na ulek, idi petulu uen ngigu'. Ideh miak sagen kareb Tuhan macing ngukum nedeh.

¹⁹Allah Yakub baken kudeng ineh; Ieh ineh nenganau' luk amung-amung, idi Ieh nemili' Israil ku pupuNeh sebuleng. Tuhan luk Melalud, ieh ineh ngadanNeh.

²⁰Kebala Tuhan, "O Babil, iko tunoKu idi busuKu luk ku nengelaya' tuda'-tuda' pupu idi tuda'-tuda' imet.

²¹Idi dengan ineh teh Ui nengaté kuda idi lun luk maya' kuda teh. Ui nengusag keréta idi lun luk ngimet keréta ineh teh.

²²Ui nengaté deléi idi decur, lun mengered idi anak baruh teh, anak adi' deléi idi decur pana'.

²³Ui nengaté lun luk matar dumba dengan dumbadeh, lun luk amé' lati' dengan aya'deh, lun luk ngimet idi lun rayehdeh."

²⁴Kebala Tuhan, "Muyuh miak nier Negku ngua' bawang Babil idi pupuneh, ngaceku amung dat luk inau'deh kuan Sion.

²⁵O Babil, iko mepad kudeng aceh pegkung luk ngusag tana' ini, iamo' Ui ini Tuhan mangun ku bunu'mu. Ui miak ngakem namu, idi nala' namu luun tana', pad iko sabpen idi abuh mo' luk ketecan.

²⁶Sebuleng batu pana' rat arang batu luk inusag ineh nateh luk miak uen mudut baruh. Iko mepad kudeng su luk ali-ali macing raked-raked. Ui ini Tuhan pangeh nepebala.

²⁷"Do' nateg tawak, pad amung pupu miak ninger! Mada' amung pupu pad ideh temina' munu' Babil! Ngecuk bawang Ararat, Mini, idi Askenas amé' pebunu'. Mili' seburur lun rayeh baweh. Do' nguit amung-amung kuda, kinula'deh mepad kudeng kinula' kato.

²⁸Do' ngecuk raca'-raca' Midi dengan lun rayeh idi penguludeh, idi amung bawang bang imetdeh, temina' amé' munu' Babil.

²⁹Tana' sigio idi meruyuh ngaceku Tuhan ngacing luk pianNeh. Ieh miak nganau' Babil mangun ku su luk ali-ali luk na inan lemulun.

³⁰Baweh Babil pangeh nugka' pebunu' idi uta bang libungdeh luk meraben. Ideh na mekuu', mepad kudeng decur mo'. Tanga' bawang pangeh inusag idi amung ruma' meseb.

³¹Mula' lun duken upun mada' raca' Babil, kebaladeh, 'Bawangmu inusag lun rat pa selipa macing pa selipa.

³²Bunu' ineh pangeh nengelaya' nelun luk matar gitan ineh idi ideh nenutung budud teh. Baweh Babil megagau.

³³Na mio teh bunu'deh ineh miak narad nedeh idi ngeradu' nedeh mepad kudeng padé su luk inan rumik.' Tuhan luk Melalud, Allah lun Israil pangeh nepebala."

³⁴Raca' Babil nemulu' bawang Yerusalim, idi nekuman uangneh. Ieh nengukit amung-amung luk bang bawang ineh, mepad kudeng abpa' luk bang sidangur. Idi ieh nenelen ineh mepad kudeng galau. Idi ieh nengalap luk pianneh idi ieh nenala' luk na pianneh.

³⁵Nima' nelun Sion pebala, "Do' Babil mabeh sala' luk inau'neh kuan kai!"
Nima' nelun Yerusalim pebala, "Do' Babil mabeh sala' ngaceku dereh luk
icingneh kuan kai!"

³⁶Idi kebala Tuhan nelun Yerusalim, "Ui miak ngedengan nemuyuh idi ngua'
susa' muyuh. Ui miak nganau' bued abpa' idi amung arur Babil mekeket.

³⁷Idi Babil miak mangun ku aceh bubpun batu luk inusag idi su luk inan pung
luk meliputi. Ieh miak mangun ku aceh luk inan megagap. Seburur pana'
nateh luk mulun ieneh. Idi amung lemulun luk nier neneh miak matot
ngaceku luk pangeh nangun kuanneh.

³⁸Lun Babil ngeku mepad kudeng balang idi muni mepad kudeng uni anak
balang.

³⁹Matuké ideh manga. Ui miak nganau' aceh irau kuandeh. Idi Ui miak
nganau' nedeh mabuk idi mawang niat. Ideh miak rudap idi na kulat teh.

⁴⁰Ui miak nguit nedeh kereten, mepad kudeng anak dumba, amék, idi dumba
deléi. Ui ini Tuhan pangeh nepebala.

⁴¹"Babil, ieh ineh bawang luk buren aput tana' ini, pangeh linaya'! Ieh pangeh
nangun ku aceh luk inan megagap kuan amung pupu.

⁴²Abpa' rayeh netemubu' idi nengereb Babil.

⁴³Amung bawangneh pangeh nangun ku aceh luk inan megagap. Ideh mepad
kudeng su luk ali-ali, luk na abpa', idi na lemulun luk tebawang idi lun luk
lemaba pana'.

⁴⁴Ui miak ngukum Bél, allah lun Babil, idi ngecuk neneh maré binaweh luk
pinoneh lemubed. Idi pupu baken na miak sembayang neneh teh. "Libung
batu Babil pangeh netabpa. O lun Israil, buro rat ieneh!

⁴⁵Do' amung muyuh buro ratnan usehKu luk pelaba bura'.

⁴⁶Do' muyuh mekuu' idi aleg matot ku bala luk pedingeren muyuh. Anid lak
inan bala macing, ieh ineh bala ratnan susa' bang bawang, idi ratnan seburur
raca' sikal metueh ratnan raca' baken.

⁴⁷Idi ngaceku ineh, tarekneh miak macing kareb Ui ngukum amung akang Babil. Bawang ini miak uen ngigu' idi amung lun luk bang bawang ini miak pitayen.

⁴⁸Amung-amung luk luun tana' idi luk bang langit miak ngitang ku awang niat kareb Babil barén bang palad lemulun luk macing rat pa tinueh busat aco luk sikal ngusag neneh.

⁴⁹Babil nengacing até kuan lemulun aput-apat tana', idi nekini Babil miak metabpa ngaceku ieh nengacing até kuan mula' lun Israil. Ui ini Tuhan pangeh nepebala.”

⁵⁰Kebala Tuhan, "O pupuKu luk déi' Babil, muyuh pinuit ratnan até! Buro nekini! Aleg nganét! Sagan tu pana' muyuh mado ratnan bawang muyuh, do' ngerawé Negku luk Tuhan muyuh, idi ngerawé Yerusalim teh.

⁵¹Muyuh pebala, 'Kai pangeh dinat idi inigu'. Kai pelaba laya', ngaceku pupu baken pangeh nengalap su luk meligan bang Ruma' Allah.'

⁵²Ngaceku ineh, Ui pebala: Tarekneh malé macing kareb Ui ngukum amung akang Babil, idi lun luk nurat miak ngarod aput-apat bawangneh.

⁵³Sagan tu pana' Babil umak amé' bang langit idi mudut aceh libung batu déi', idi Ui miak ngecuk lemulun ngusag neneh. Ui ini Tuhan pangeh nepebala.

⁵⁴"Ninger tangi' lemulun déi' Babil, idi tido ngaceku usag bawang.

⁵⁵Ui ngusag Babil idi nganau' neneh pirud. Amung baweh ngerieng neneh idi ngitang, mepad kudeng beri abpa' rayeh.

⁵⁶Ideh iné' ngusag Babil, lun pebunu'neh pangeh kikem, idi busudeh neputul. Ui ini Allah luk ngukum luk dat, Ui miak ngukum Babil maya' kudeng luk inau'neh.

⁵⁷Ui miak ngabuk nelun luk ngimet neneh — lun luk mileh, lun rayeh, idi lun pebunu'. Ideh miak rudap, idi na kulat. Ui ini luk raca' pangeh nepebala, Ui ini Tuhan luk Melalud.

⁵⁸Libung batu Babil miak talan luun tana', idi amung tanga'neh luk rayeh miak sabpen. Amung kekamen anak itinneh na ulek, idi luk inau' amung pupu sabpen mo'. Tuhan luk Melalud pangeh nepebala.”

⁵⁹Seraya, anak Neria Masia, ieh ineh lun duken Raca' Sedekia. Bang lak luk keapat kareb Raca' Sedekia ngimet Yahuda, idi Seraya pian amé' Babil, idi Yeremia nemaré aceh bada' kuanneh.

⁶⁰Yeremia nengayud bang aceh surat ratnan amung-amung susa' luk miak macing kuan Babil, idi teh amung-amung bala luk baken ratnan Babil.

⁶¹Kebalaneh ni Seraya, "Kareb iko macing déi' Babil, do' iko maca' kuan lun mula' dengan rayeh arod amung-amung bala luk inayud bang surat ini.

⁶²Pangeh ineh do' sembayang, kesembayangmu, 'O Tuhan, Iko nepejani' ngusag bawang ini, pad sebuleng pudut pana' nateh luk mulun ieneh, do' lemulun idi pung pana', pad ieh mangun ku su luk ali-ali macing raked-ruked.'

⁶³O Seraya, kareb iko pangeh nemaca' surat ini kuan lun mula', do' ngabet aceh batu nan surat ineh, idi nala' neneh bang Abpa' Pirat,

⁶⁴kebalamu, 'Ini luk miak mangun kuan Babil — ieh miak turem idi na lupung teh, ngaceku ukum luk uen Tuhan ngacing kuanneh.' " Ini mo' kekiped bala Yeremia.

Yeremia 52

¹Ulun Sedekia, dueh ngepulu' aceh lak kareb ieh mangun ku raca'. Idi ngadan tinanneh Hamutal, ieh ineh anak Yeremia luk tudo déi' Libna.

²Idi Raca' Sedekia nenganau' luk dat pa kiung Tuhan, mepad kudeng luk inau' Raca' Yoyakim.

³Yerusalim idi Yahuda iuk amé' dat pad Tuhan museh nedeh, idi nemaré nedeh tebanen. Idi Sedekia sikal metueh ratnan Raca' Babil.

⁴Idi pulu' aco, bulan pulu' bang lak luk keiwa' kareb Raca' Sedekia ngimet Yahuda, idi Nebukadnesar raca' Babil iné' dengan amung bawehneh sikal

munu' Yerusalim. Ideh nelupo bal alad bawang, idi teh nenganau' ibpeng luk medita' libut bawang ineh.

⁵Idi ideh nengerieng bawang Yerusalim pad macing lak luk kepulu' aceh kareb imet Sedekia.

⁶Idi iwa' aco bulan apat bang lak ineh teh, inan lau idi iru' luk pelaba io, pad na luk kenen lemulun.

⁷Idi libung batu bawang Yerusalim netabpa. Idi baweh Yahuda nutun buro kareb medacem, sagan tu pana' lun Babil ngelibut bawangdeh ineh. Ideh nenalan rat kabun raca', maya' tanga' luk titen Arang Dueh Alad! Idi ideh neburo iné' matun Raked Yarden.

⁸Iamo' baweh lun Babil nengerada' Raca' Sedekia idi nengakem neneh luun raked luk muneng ku Yeriko. Idi amung bawehneh nenecan neneh.

⁹Kareb Sedekia pangeh tiban, idi ideh nenated neneh amé' matun Raca' Nebukadnesar luk déi' Ribla luk bang bawang Hamat, idi Nebukadnesar, nengukum neneh déi'.

¹⁰Déi' Ribla raca' Babil nengecuk nelun ngaté anak-anak Sedekia su siren Sedekia. Idi teh ieh nengecuk nelun ngaté amung lun rayeh Yahuda.

¹¹Idi ieh nengecuk nelun nakul mateh Sedekia, idi ngaling neneh, pad ieh iten amé' Babil. Idi Sedekia tinutup déi' Babil pad macing ieh maté.

¹²Idi pulu' aco bulan limeh bang lak luk kepulu' iwa' kareb Raca' Nebukadnesar ngimet Babil, idi Nebusaradan luk lun rayeh raca' idi lun rayeh bawehneh, nesemuet bang Yerusalim.

¹³Idi ieh nengeseb Ruma' Allah, ruma' raca', idi ruma' amung lun rayeh déi' Yerusalim.

¹⁴Idi lun pebunu'neh nengusag amung libung batu bawang ineh.

¹⁵Idi Nebusaradan nenaban lemulun luk neketecan bang bawang ineh amé' Babil, dengan lemulun luk pangeh neperurum neneh; idi lemulun luk mileh ngakem luk nateh tiban atun.

¹⁶Iamo' ieh nenecan bang bawang Yahuda tuda'-tuda' burur lun luk masi' luk na tana'. Idi ieh nengecuk nedeh ngakem bang kabun anggur idi bang lati' pana'.

¹⁷Idi lun Babil nemila' amung diri tekaling, idi amung alen luk bang Ruma' Allah, dengan luk inan sibaru' ratnan tekaling luk idi déi'. Idi ideh nenguit amung binaweh tekaling amé' Babil.

¹⁸Idi ideh nenguit luk ku ngook abuh, idi belanga', idi luk ku ngilep lapung, idi bigan luk ruandeh dara', idi su luk inan ngeseb umau luk do' buen, idi amung binaweh tekaling luk uen makai bang kekamen Ruma' Allah.

¹⁹Ideh nenguit amung-amung binaweh luk ratnan amas idi pirak: busi' luk isuut, su luk inan bareh apui, bigan luk ruandeh dara', belanga', kukud dawan, su luk inan ngeseb umau luk do' buen, idi teh bigan luk ku ngutang baré luk rupan.

²⁰Binaweh luk ratnan tekaling luk inau' Raca' Selimun kuan Ruma' Allah, ieh ineh dueh diri, alen, bigan luk rayeh, idi pulu' dueh sapi' deléi luk ngimet ineh, na miak uen nimang ngaceku pelaba berat.

²¹⁻²²Dueh diri ineh mepad mo' dita'neh, ieh ineh dueh ngepulu' tudu' kaki, idi kirayehneh pulu' ualuh kaki libut-libutneh. Dueh-dueh diri ineh inan lubang. Idi tekaling ineh apat inci kapalneh. Pa luun sebuleng diri ineh inan aceh babpat luk ratnan tekaling, dita'neh tudu' kaki setangal. Idi libut tekaling ineh inan berawang dengan bua' delima luk inau' ratnan tekaling teh.

²³Idi luun berawang sebuleng diri ineh inan meratu bua' delima, idi iwa' ngepulu' anem bua' delima ineh miak siren rat déi' liang.

²⁴Idi Nebusaradan, lun rayeh bawang ineh nenaban ni Seraya, Imam Rayeh ineh, Sepania, imam luk pa liangneh, idi teh teluh burur lun baken luk lun rayeh bang Ruma' Allah.

²⁵Idi rat bang bawang ineh ieh nenaban seburur lemulun luk nguyut baweh, tudu' burur lun rayeh raca' luk neketecan bang bawang, lun luk ngedengan

lun rayeh baweh luk ngimet amung surat ratnan bunu', dengan anem ngepulu' burur lun rayeh luk baken.

²⁶Idi Nebusaradan nenated nedeh amé' matun raca' Babil luk déi' Ribla.

²⁷Idi déi' Ribla bang bawang Hamat, raca' Babil nengecuk nelun mebal nedeh, idi ngaté nedeh. Idi lun Yahuda tiban rat bang bawangdeh sebuleng.

²⁸Idi ini surat luk ratnan lemulun luk tiban Nebukadnesar: bang lak luk ketudu' kareb imetneh ieh nenaban 3,023 burur;

²⁹bang lak luk kepulu' ualuh, 832 burur rat Yerusalim;

³⁰idi bang lak luk kedueh ngepulu' teluh, Nebusaradan nenaban 745 burur. Amungdeh 4,600 burur luk pangeh tiban ineh.

³¹Idi bang lak luk inan Ewil Merodak mangun ku raca' Babil, ieh méi' kuan Yoyakin raca' Yahuda idi nemuit neneh rat bang tutup. Ini pangeh nangun bang dueh ngepulu' limeh aco bulan pulu' dueh bang lak luk keteluh ngepulu' tudu', mucu ratnan Yoyakin pangeh tiban.

³²Idi Ewil Merodak méi' ni Yoyakin idi nemaré neneh aceh kekamen luk meluun rayeh ratnan kekamen raca'-raca' baken luk tiban iné' Babil.

³³Idi Yoyakin sinima' nengelengu ayung tutup ineh, idi ieh nekuman iring téng raca' raked-raked ulunneh.

³⁴Idi anid aco raked ulunneh, ieh ngalap tabpar kuan bururneh sebuleng.

Tido Yeremia

Tido Yeremia 1

¹Nekini Yerusalim pelaba dat ali, ieh ineh bawang luk pelaba ula' lemulun atun! Atun ieh buren, iamo' nekini ieh mepad kudeng decur tinula'. Bawang luk meluun do' atun mangun ku demulun.

²Ieh nangi' kedangan-kedangan, pad abpa' matehneh mebpeh. Seburur pana' nateh luk ngubuk neneh, rat arang lemulun luk mawa neneh atun. Rurumneh pangeh nemasui neneh, idi nekini ideh mangun ku bunu'neh.

³Pupu Yahuda pangeh tiban mangun ku demulun. Ideh tudo bang bawang baken, idi na ruma'deh sebuleng. Ideh linibut bunu' pad ideh na miak buro.

⁴Seburur pana' nateh luk amé' Ruma' Allah, pad sembayang kareb aco rayeh. Anak adi' decur medereh, idi imam-imam ngarod mo'. Na lemulun déi' munung tanga' bawang, idi Sion ineh pelaba dereh.

⁵Bunu'neh mangun ku lun rayehneh, idi ieh bang imetdeh. Tuhan nenganau' neneh medereh, ngaceku sala'neh luk mula'; idi anak-anak pana' pangeh tiban.

⁶Ubur Yerusalim pangeh nabud. Lun luk nguyut neneh mepad kudeng payo luk buro kareb lun nganup. Na uduh kenendeh idi ideh melaya'.

⁷Yerusalim ngerawé uburneh luk mon, kareb nateh ieh inusag. Kareb ieh nebpeh bang palad bunu'neh na luk ngedengan neneh. Lun luk nengelaya' neneh meriruh ku ebpehneh.

⁸Sala' Yerusalim pelaba rayeh, pad ieh tila' mepad kudeng kibung luk melutak. Lemulun luk nengubur neneh atun ngedat neneh; ideh nenier neneh lubpa. Idi ieh ngarod idi sigapung ku igu'neh.

⁹Lutakneh petatem nan takipneh, iamo' na ieh nengerawé kekipedneh. Ebpehneh pelaba dat, pad ieh na miak buken. Bunu'neh metueh idi ieh mutuh éi' ratnan Tuhan.

- 10Bunu' ineh nemano amung binawehneh. Ieh nekali' nedeh semuet bang Ruma' Allah, luk bibpeng Tuhan na miak suaten lun luk na manu.
- 11Pupuneh ngarod kareb nakap akan. Ideh ngelibal binawehdeh ku akan, pad ideh miak mulun. "Nier negku, Tuhan," kebala Yerusalim, "Nier derehku".
- 12"Nier negku!" kebala Yerusalim kuan lemulun luk lemaba. "Na lun mét kudeng ui, Et ineh pangeh icing Tuhan kareb Ieh museh negku.
- 13"Ieh nengacing apui rat déi' dita' luk ngeseb bang bururku. Ieh netumen abpung kuanku, pad ui mebpeh. Ieh nenecan negku, idi ui mét tebaco-tebaco.
- 14"Idi Ieh nengiap sala'ku idi nengangel amung ineh; Ieh nengekito ineh nan dierku, pad ui melaya' ku beratneh. Tuhan nemaré negku kuan bunu'ku, idi ui na miak metueh rat nedeh.
- 15"Tuhan meriruh ku bawehku luk meluun tueh. Ieh nengecuk aceh baweh ngerieng negku, idi nengaté anak adi'ku luk deléi. Ieh nengareg pupuku luk meluun do', mepad kudeng bua' anggur luk ridu'.
- 16"Ineh punneh abpa' matehku mebpeh. Idi ui na miak buken idi mawang niat. Bunu' ineh metueh rat nekai; idi pupuku pelaba susa' niat.
- 17"Ui nengegenang ticu'ku, iamo' na lun ngedengan negku. Tuhan nengecuk bunu'ku ngelibut negku. Ui mepad kudeng kibung luk melutak arangdeh.
- 18"Iamo' Tuhan ineh mesiri, ngaceku ui nengelaba balaNeh. Ninger balaku, O amung pupu, idi nier derehku. Anak adi'ku luk delei idi decur pangeh tiban.
- 19"Ui nenawar rurumku, iamo' ideh na pian ngedengan negku. Amung imam idi lun rayeh pana' naté luun dalan. Kareb ideh nenakap akan.
- 20"O Tuhan, nier derehku idi susa' niatku! Niatku nginuud ku sala'ku. Inan até luun dalan, idi bang ruma' pana' inan teh até.
- 21"Ninger arodku; na lemulun ngubuk negku. Bunu'ku mawang niat ku susa' luk icingMu negku. Ngacing aco luk pijani'Mu, nganau' bunu'ku medereh mepad kudeng ui.

²²"Ngukum nedeh ngaceku datdeh. Mepad kudeng Iko nengukum negku ngaceku sala'ku. Ui ngarod ku derehku, idi teh ui mesusa' niat."

Tido Yeremia 2

¹Nekini Tuhan pangeh nemapen Sion ku dacem ngaceku usehNeh. Kareb aco usehNeh, Ieh nenecan ruma'Neh pana'.

²Dengan na méi' Tuhan nengusag amung bawang Yahuda, idi Ieh nengusag libung batu luk ku matar bawang. Ieh nengigu' imet ineh idi lun luk ngimet pana'.

³Ieh nengelaya' Israil dengan usehNeh. Ieh na nengedengan neneh kareb bunu' nacing. Ieh museh ni Yakub mepad kudeng apui luk ngeseb.

⁴Ieh nengelatik ilebNeh mepad kudeng bunu'. Dengan tuehNeh Ieh nengaté amung lemulun luk do' taga. Ieh nengacing apui usehNeh bang ruma'deh pana'.

⁵Mepad kudeng aceh bunu', Tuhan nengusag Israil, dengan amung libung batu idi ruma' raca' pana'. Ieh nengacing susa' luk na miak ugka' kuan lun Yahuda.

⁶Ieh nengareg Ruma'Neh luk inandeh tebubpun. Ieh nengagka' aco rayeh idi Aco luk inan Mudeng. Raca' idi imam pana' kali' tueh usehNeh.

⁷Tuhan nenecan bubpunNeh idi Ruma'Neh luk meligan. Ieh nenima' bunu' ngusag aladneh. Ideh nengitang bang Ruma' Allah mepad kudeng kareb aco rayeh.

⁸Tuhan nengelelep usag libung Sion; Ieh nenari libung ineh, pad ngelelep usagneh. Pudutneh luk medita' idi libungneh pad-pad netabpa.

⁹Tanga'neh nepapen ku usagneh, idi palin-palindeh neputul. Raca' idi lun rayehdeh pangeh tiban. Ukum Musa na badén, idi na luk siren nabi-nabi ratnan Allah.

¹⁰Lun mengered rat Yerusalim tudo idi ungeng; idi nacung dengan abuh luun uluhdeh. Anak adi' decur munel idi nier i tana'.

- ¹¹Matehku mebara' ku tangi'; idi ui pelaba susa' niat. Ui medereh ku susa' niatku, ngaceku usag pupuku. Anak-anak dari idi luk niti' pana' melepu luun dalan.
- ¹²Kebaladeh nan tinandeh, "Iapehké nuba'?" Ideh mebpeh luun dalan, mepad kudeng lun nurat, idi maté bang abin tinandeh.
- ¹³O Yerusalim luk inanku mawa, anunké luk belénku? Kudeng apehké ui ngubuk namu? Na luk medereh kudeng iko. Susa'mu meluun rayeh ratnan abpa' rayeh; idi na iko miak uen ngubat.
- ¹⁴Amung nabimu mebalih mo'. Bada'deh nenaluk namu idi na nengegala' sala'mu. Ideh nengeraruh namu pad iko na miak uren.
- ¹⁵Lemulun luk maya' dalan lemaba bawang, situnga idi mepag palad. Ideh siguling idi meriruh ku usag Yerusalim. "Iniké bawang luk pelaba do' taga?" Ideh meriruh. "Iniké luk ku awang amung tana' ini?"
- ¹⁶Amung bunu'mu situnga namu idi nutong namu dengan gateh niatdeh. Ideh ngeraceng, kebaladeh, "Kai nengusag ineh! Ini aco luk inan kai nginulat!"
- ¹⁷Tuhan pangeh nenganau' luk litepNeh atun. Ieh nengusag namu dengan na méi', mepad kudeng luk bilaNeh atun. Ieh nemaré tueh kuan bunu'mu, pelé ideh mawang niat ku ebpehmu.
- ¹⁸O Yerusalem, do' libungmu ngitang kuan Tuhan. Nima' abpa' matehmu manud tebaco kedangan. Do' iko merur kidi-kidi ku tangi' idi dat niat!
- ¹⁹Do' megéi' kulat medacem idi ngitang pa kiung Allah. Ngegala' amung-amung luk bang niatmu kuan Allah, idi mutuh éi' kuan anak-anakmu, luk maté ku lau déi' lisangen dalan!
- ²⁰O Tuhan, nier nelun luk uenMu ngedereh! Decur kuman butung anak luk inandeh mawa! Imam idi nabi pana' pitayen bang Ruma' Allah!
- ²¹Butung anak adi' idi lun mengered telubid luun dalan, anak adi' luk deléi' idi decur luk pinaté bunu'. Dengan na méi' Iko nengaté nedeh, kareb aco usehMu.

²²Iko nenawar bunu'ku nganau' aco rayeh luk ngatot negku. Idi aco sineh seburur pana' nateh luk mepuit ratnan usehMu. Ideh nengaté anak luk isa'ku idi luk inanku mawa.

Tido Yeremia 3

¹Ui ini pangeh nekali' dereh idi useh Allah.

²Ieh nenguyut negku amé' bang su luk medacem.

³Dengan na méi' Ieh nenecat negku kidi-kidi.

⁴Ieh nengurat bururku, idi nemutul tulangku.

⁵Ieh nenganau' negku bang tutup dereh idi susa'.

⁶Ieh nenganau' negku tudo bang dacem até.

⁷Ieh nengaling negku, pad na miak mepuit ratnan su luk inanku tinutup.

⁸Ui ngitang mutuh pedengan, iamo' sembayangku na pedingeren!

⁹Ui idar-idar karebku nalan, linibut ku libung batu.

¹⁰Ieh nenginulat negku mepad kudeng beruang; Ieh nengeramit negku mepad kudeng balang.

¹¹Ieh nengerada' negku ratnan dalam idi nengerarak negku idi nenecan negku.

¹²Ieh nengalap binorNeh idi nengelatik negku ku ilebNeh.

¹³Ieh nengelatik negku ku ilebNeh.

¹⁴Lemulun meriruh negku tebaco-tebaco. Ui ini luk inan uang tana' ini situnga.

¹⁵Dengan mesaad Ieh nemaré luk mepét rupenku idi luk kenenku.

¹⁶Ieh nengasa kiungku luun tana', idi nemutul lipenku luun batu.

¹⁷Ui nekelupan ratnan do' ulun, do' udeng, idi awang.

¹⁸Na mio teh ui maté; rapetku nan Tuhan pangeh neburo.

¹⁹Terawé ratnan dereh idi dat udengku pelaba galih;

- 20 pad ui megéi' meberat niat.
- 21 Iamo' rapetku lemubed kareb ui ngerawé ini:
- 22 Awa idi éi' Tuhan na miak ugka',
- 23 mebaruh kudeng pekak, idi lutep kudeng masat aco.
- 24 Tuhan mo' luk kuanku, idi ui merapet Neneh.
- 25 Tuhan ineh do' kuan lemulun luk merapet Neneh.
- 26 Meluun do' tau mulai niat nginulat Neneh, pad Ieh ngulun netau.
- 27 Idi meluun do' sibada' mulai niat karebmu mangud.
- 28 Kareb tau medereh do' tau tudo idi ungeng.
- 29 Aleg tau ngedureng, ngaceku inan teh rapet.
- 30 Kudeng tau bibal idi dinat, nima'neh.
- 31 Tuhan luk méi', idi na Ieh necan netau raked-raked.
- 32 Kareb Ieh ngacing susa' netau, Ieh na ugka' méi' netau.
- 33 Na Ieh mawang niat ngedereh netau.
- 34 Tuhan kali' kareb niat tau nurat bang tutup;
- 35 Tuhan kali' kareb tau bibpeng lun na nganau' luk petulu.
- 36 Idi teh Ieh kali' kareb lemulun mutut ukum luk na matu.
- 37 Pian Tuhan mo' sebuleng miak mangun.
- 38 Luk do' idi luk dat mangun maya' ecukNeh.
- 39 Petuluké tau ngedureng kareb tau kumin ngaceku sala' tau?
- 40 Do' tau ngerawé lawé tau, idi lumi inan Tuhan.
- 41 Do' tau sembayang idi ngukab niat tau kuan Allah luk déi' surga, kesembayang tau,
- 42 "Kai nenganau' sala' idi sikal metueh rat Namu, O Tuhan, idi na Iko maré do' nekai.

- 43" Iko nengerada' idi nengaté nekai, éi' Mu liniged ku usehMu.
- 44 UsehMu mepad kudeng laput pad sembayang kai na miak petacu amé' Namu.
- 45 Iko nenganau' nekai ku lubang arap bang tana' ini.
- 46" Kai dinat idi inan bunu' kai situnga.
- 47 Kai nekali' dereh idi usag, pad kai mulun dengan merapang.
- 48 Abpa' matehku mebpeh idi manud mepad kudeng abpa' ngaceku usag pupuku.
- 49" Abpa' matehku mepad kudeng arur luk na mekeket,
- 50 pad macing Tuhan nier rat surga.
- 51 Susa' bawangku nengesusa' niatku.
- 52" Mepad kudeng suit ui nekaneh abpung bunu'ku luk megateh negku dengan na punneh.
- 53 Ideh nenala' negku bang aceh lubang idi nemapen neneh ku batu.
- 54 Abpa' temubu', idi ui ngerawé maté.
- 55" Ui nenawar Namu O Tuhan rat bang lubang ineh.
- 56 Kareb ui nemutuh Namu ninger sembayangku, idi Iko neninger.
- 57 Iko nengua' putuhku, idi nemada' negku pad ui na matot.
- 58" Iko nengedengan negku O Tuhan, idi nengulun negku.
- 59 Mutut kuanku dengan méi'; Iko kali' sala'deh negku.
- 60 Iko kali' gateh bunu'ku negku, idi gayamdeh luk sikal ngaté negku.
- 61" O Tuhan, Iko neninger nedeh ngedat negku idi kali' gayamdeh.
- 62 Tebaco kedangan ideh pegayam ngedat negku.
- 63 Rat pekak macing malem ideh situnga negku.
- 64" O Tuhan, ngukum nedeh idi ngua' kekamendeh.

⁶⁵Ngediman nedeh pad ideh na tuman ku dat niatdeh.

⁶⁶Ngusu nedeh rat bang tana' ini!"

Tido Yeremia 4

¹Amas tau luk mesilo na mesilo peh; usag Ruma' Allah tila' luun dalam.

²Anak adi' Sion mepad kudeng amas kuan tau atun, iamo' nekini ideh inau' lun ku kuden.

³Tineh bungalé sikal maman anakneh, iamo' pupuku mepad kudeng suit luk megateh inan anakneh.

⁴Ideh nima' anakdeh luk niti', maté ku lau idi paring. Anak dari mutuh akan mo', idi na lun maré nedeh.

⁵Lemulun luk pekalai kuman akan luk pelaba do' maté luun dalam. Lun do' nakap akan arang arap.

⁶Sala' Yerusalim meluun rayeh ratnan sala' Sodom, luk inusag bang palad Allah.

⁷Atun anak adi' deléineh meluun buda' ratnan salju idi rata sapi'. Ideh do' ulun idi metueh.

⁸Butungdeh telubid luun dalam, kiungdeh mitem idi ideh na miti. Kubildeh tekering kudeng kayuh idi tegeribpir luun tulangdeh.

⁹Meluun samal kuan lemulun luk naté bang bunu' ratnan lun luk naté ku lau ngaceku na akan.

¹⁰Decur luk méi' nenanek anakdeh sebuleng ku akandeh; ineh luk kenendeh kareb pupuku mesusa'.

¹¹Tuhan nengacing usehNeh dengan meriput, idi nemaré apui déi' Sion pad ieh nabud neseb.

¹²Amung raca' idi uang tana' ini na ngerawé bunu' semuet maya' tanga' Yerusalim.

¹³Iamo' ineh nangun. Nabi idi imamneh pangeh nenganau' sala', pad ngacing até kuan lemulun luk na mesala'.

¹⁴Ideh lawé-lawé maya' dalam mepad kudeng lemulun luk nebuser. Bururdeh medara', pad lun baken na pian ngakem nedeh!

¹⁵Lun baken pebala, "Buro muyuh. Melutak muyuhneh. Aleg ngakem negku!" Idi ideh lawé-lawé rat aceh bawang macing nan bawang baken. Idi na lun pian nganak nedeh.

¹⁶Idi teh Tuhan na pian ngerawé nedeh. Ieh nengatad nedeh. Meluun teh Ieh na méi' nan imam idi lun rayehdeh.

¹⁷Kai pian denganin, iamo' na tu luk nengedengan nekai. Kai merapet inan aceh pupu luk na miak ngedengan nekai.

¹⁸Bunu' ineh ngabang nekai, pad kai na miak nalan déi' liang. Tarek kai pangeh nacing.

¹⁹Ideh nengerada' nekai mepad kudeng kanui luk semiling. Ideh nemupud dalam kai luun pegkung, idi teh ideh nengagap nekai déi' su luk ali-ali.

²⁰Ideh nengakem lun luk ngedengan nekai, ieh ineh raca' luk pinili' Tuhan, idi luk inan kai merapet miak matar nekai ratnan bunu'.

²¹O lun Edom idi lun Us, do' muyuh meriruh idi mawang niat nekini. Iamo' kareb susa' macing nemuyuh, kali' rungen muyuh migu' idi lubpa.

²²Sion pangeh nemabeh salaneh; ukumneh pangeh nepelaba rat neneh. Iamo' Edom miak kumin Tuhan luk ngegala' sala'mu ineh.

Tido Yeremia 5

¹O Tuhan, do' ngerawé susa' kai, idi nier igu' kai.

²Lun baken pangeh nengalap binaweh kai; idi pupu baken tudo bang ruma' kai.

³Taman kai pangeh pinaté bunu'; idi tinan kai mangun ku tinula'.

⁴Kai melih abpa' luk rupen kai, idi kayuh apui pana'.

- ⁵Kai uen ngusu mepad kudeng keladai idi unta, pad kai na miak ngato erur kai.
- ⁶Kai nemutih akan mo' rat Asur idi Masir, pelé kai mulun.
- ⁷Tepun kai nenganau' sala' idi naté, iamo' kai medereh ngaceku sala'deh.
- ⁸Kai bang imet lemulun luk mepad kudeng demulun, idi kai na miak puatin ratnan imetdeh.
- ⁹Inan lun luk ngaté bang pulung; kai inan luk katot kareb nakap akan.
- ¹⁰Kai medadem ngaceku na petap akan, pad kubil kai melau' kudeng tetel.
- ¹¹Awan kai luk déi' Sion idi anak decur kai luk déi' Yahuda, pangeh kikem bunu' luk mesaad pasét nedeh.
- ¹²Lun rayeh kai pangeh kikem idi tekito; lun merar kai na uen ngerayeh.
- ¹³Anak adi' deléi kai duken tupeh mepad kudeng demulun; idi anak deléi maan kayuh luk meberat.
- ¹⁴Nekini lun merar na tudo munung tanga' bawang, idi anak adi' pana' na nateg gita.
- ¹⁵Awang pangeh nenecan nekai, idi teh na kai ngalai ngaceku mesusa' niat.
- ¹⁶Pata kai pangeh nebpeh rat luun uluh kai. Mesusa' kuan kai ngaceku kai nenganau' sala'.
- ¹⁷Kai pelaba susa' niat, idi meseraber siren kai, ngaceku abpa' mateh kai mebpeh,
- ¹⁸ngaceku Pegkung Sion tican idi dat ali, idi bungalé nalan luun usagneh.
- ¹⁹Iamo' Iko, O Tuhan, mangun ku raca' luk meruked; idi miak ngimet macing kekipedneh.
- ²⁰Ngudehké Iko pelaba io tacan nekai? Miakké Iko ngerawé nekai teh?
- ²¹O Tuhan, nguit nekai lumi amé' Namu, pelé amung-amung mepad kudeng luk atun.
- ²²Miakké Iko necan nekai ruked-ruked? Naké usehMu miak ugka'?

Yehiskiel

Yehiskiel 1

¹Limeh aco bulan apat bang lak luk keteluh ngepulu', ui tudo dengan lun Yahudi luk tiban déi' tangeb Abpa' Kibar luk déi' bawang Babil.

²(Ieh ineh bang limeh aco bulan bang lak luk kelimeh mucu ratnan Raca' Yoyakin pangeh tiban.)

³Ui ini Yehiskiel Busi luk imam, neninger Tuhan pebala negku idi nekali' laludNeh, déi' tangeb Abpa' Kibar luk déi' Babil.

⁴Ui netengook idi nenier libuleh luk macing rat pa tinueh busat aco. Kilep merasat ratnan laput luk rayeh, idi libut-libutneh langit pana' macang. Idi su luk merasat ku kilep ineh, inan luk mesilo mepad kudeng tekaling.

⁵Idi uned libuleh ineh ui nenier luk mepad kudeng ayu apat pung. Idi bururdeh kudeng lemulun.

⁶Iamo' anid-aniddeh inan apat kiung idi apat ilad.

⁷Kukuddeh mesiri, iamo' lisundeh mepad kudeng lisun sapi' deléi. Idi pung ineh mesilo mepad kudeng tekaling luk isa.

⁸Idi teh ideh inan apat ticu' lemulun liang anid iladdeh.

⁹Anid pung ineh malad dueh iladneh pad mangun ku aceh libung luk melebping, idi iladdeh petutup-petutup. Kareb ideh nalan ideh nalan pad-pad dengan na lumi.

¹⁰Idi anid-anid apat kiung pung ineh baken ayu: pa atun inan kiung lemulun, pa tinueh inan kiung balang, pa kabing inan kiung sapi' deléi, idi pa keted inan kiung kanui.

¹¹Dueh ilad anid-anid pung ineh tebalad, pad ideh petutup nan ilad pung luk iringdeh, idi dueh iladdeh luk baken tegeripu.

¹²Anid-anid pung ineh nier su tuludeh. Ngaceku ineh ideh na lumi kareb ideh nalan amé' su apeh luk piandeh.

- ¹³Arang pung ineh inan luk kudeng ayu sesakan luk mebudung, luk megéi' nalan. Apui ineh megéi' mebudung idi ngeruat kilep.
- ¹⁴Pung ineh pana' nalan lemubed mepad kudeng kilep.
- ¹⁵Kareb ui nenier apat pung ineh, ui nekali' apat roda luk macing luun tana', sebuleng iring anid-aniddeh.
- ¹⁶Idi anid-anid roda ineh mesilo kudeng batu luk meraga idi mepad ayu. Idi anid roda inan roda luk tepalang unedneh,
- ¹⁷pad amung roda miak nalan matun anid-anid lidung.
- ¹⁸Idi iring roda ineh maput ku mateh.
- ¹⁹Kareb pung ineh nalan, roda pana' nalan maya' nedeh, idi kudeng pung ineh kemikit, kudeng ineh teh roda kemikit.
- ²⁰Pung ineh nalan su apeh luk pian ulekdeh, idi roda pana' maya' mepad kudeng luk ruen pung ineh teh, ngaceku pung luk nguyut nedeh.
- ²¹Anid kua' pung ineh nalan, ucu' idi kemikit, roda pana' nganau' luk kudeng ineh teh, ngaceku pung luk nguyut nedeh.
- ²²Pa luun pung ineh inan luk melibuh luk inau' ratnan sayun luk mesilo.
- ²³Pa liang luk melibuh ineh anid pung nemalad dueh iladneh petutup ku ilad pung luk iringneh, idi nemapen bururneh ku dueh iladneh luk baken.
- ²⁴Ui neninger uni iladdeh kareb ideh temulud. Ieh ineh mepad kudeng beri abpa' rayeh, idi teh mepad kudeng uni aceh baweh luk rayeh, idi mepad kudeng uni tang Allah luk Melalud. Kareb ideh ucu' temulud, iladdeh tegeripu,
- ²⁵idi inan teh uni rat pa luun luk melibuh ineh luk pa luundeh.
- ²⁶Pa luun luk melibuh ineh inan luk mepad kudeng ayu kerusi luk inau' ratnan batu luk bata' langit, idi aceh ayu lemulun luk tudo luunneh.
- ²⁷Idi ayu lemulun ineh mesilo mepad kudeng tekaling luk luun apui. Ieh merasat mepad kudeng budung apui.

²⁸Idi acangneh mepad kudeng tegkang luk luun laput. Kudeng ineh teh ayu rayeh Tuhan. Kareb ui nenier amung ineh, ui netekeradung luun tana'. Idi ui neninger aceh tang pebala,

Yehiskiel 2

¹"O lemulun, do' iko mudur. Ui pian pebala namu."

²Kareb Ieh uned pebala, Roh Allah nesemuet bang negku idi nengiding negku, idi ui neninger uni tang ineh pebala,

³"O lemulun, Ui ngecuk namu amé' nelun Israil, luk sikal metueh idi luk neteketed rat Negku. Macing nekini pana' ideh sikal metueh rat Negku mepad kudeng tepundeh.

⁴Ideh metueh niat idi na ngedita' Negku. Ui ini Tuhan ngecuk namu amé' mada' nedeh ratnan luk belénKu nedeh.

⁵Kudeng ideh ninger, kian na ninger lek, na miak na ideh kali' aceh nabi pangeh iné' nedeh.

⁶"Iamo' aleg iko matot nedeh idi ku baladeh, O lemulun. Ideh miak ngelibut namu mepad kudeng tabpa'. Idi teh iko tudo arangdeh mepad kudeng tudo arang menipal kara'. Iamo' aleg iko matot ku kiung idi bala lemulun ineh luk sikal metueh.

⁷Iko miak mada' nedeh anun-anun luk dukenKu namu, kudeng ideh ninger, kian na ninger lek. Idi ngerawé do'-do', ngaceku lemulun ineh sikal metueh.

⁸"O lemulun, do' ninger balaKu namu. Aleg iko metueh niat kudeng ideh. Ngukab tangmu idi kuman luk barénKu namu."

⁹Ui nenier aceh ticu' nicul luk negku, idi inan aceh surat bang paladNeh.

¹⁰Ieh nengukab surat ineh, idi ui nekali' inan luk inayud pekop surat ineh — ieh ineh tido, arod, idi bala ratnan susa'.

Yehiskiel 3

¹Kebala Allah, "O lemulun, do' iko kuman surat ini, idi amé' pebala nelun Israil."

- ²Idi ui nengukab tangku, idi Ieh nemaré surat ineh kenenku.
- ³KebalaNeh, "O lemulun, kuman surat ini luk barénKu namu. Ngebor batekmu ku ineh." Ui nekuman ineh, idi ieh mén mepad kudeng duru' tebikan.
- ⁴Idi kebala Allah, "O lemulun, amé' nelun Israil, idi mada' nedeh ratnan luk belénKu namu.
- ⁵Na Ui ngecuk namu amé' nan pupu luk mikat buri'. Ui ngecuk namu amé' nelun Israil.
- ⁶Kudeng Ui ngecuk namu amé' inan pupu luk rayeh luk mikat buri' luk na kali'mu, ideh pian ninger balamu.
- ⁷Iamo' lun Israil na pian ninger balamu. BalaKu pana' ideh na ninger. Amung-amungdeh metueh niat na maya' bala.
- ⁸Nekini Ui miak nganau' namu metueh niat idi mekuu' mepad kudeng ideh.
- ⁹Ui miak nganau' namu meluun tueh ratnan batu, idi mepad tueh kudeng batu luk meraga. Aleg iko matot inan lemulun luk sikal metueh."
- ¹⁰Kebala Allah, "O lemulun, ninger do'-do' idi ngerawé amung-amung luk belénKu namu.
- ¹¹Idi amé' inan pupumu luk tiban idi mada' nedeh ratnan luk belénKu nedeh, kudeng ideh ninger balaKu, kian na lek."
- ¹²Idi Roh Allah nengikit negku, idi ui neninger aceh arod pa ketedku luk mepad rayeh kudeng uni ruyuh tana', kebalaneh, "Ngubur rayeh Tuhan luk déi' dita!"
- ¹³Ui neninger uni ilad pung ineh mebabpet déi' arang gawa', idi teh uni roda ineh pana' mepad rayeh kudeng uni ruyuh tana'.
- ¹⁴Kareb Roh Allah nengikit idi nenguit negku, idi ui dat niat idi museh, idi lalud Tuhan neketukan luunku.
- ¹⁵Ui iné' su luk inan lun luk tiban tudo déi' Tel Abib, luk déi' tangeb Abpa' Kibar, idi ui netudo déi' tudu' aco kinioneh dengan pelaba awa.

- ¹⁶Pangeh tudu' aco, idi Tuhan nepebala negku.
- ¹⁷KebalaNeh, "O lemulun, Ui nganau' namu mangun ku lun luk matar bawang kuan pupu Israil. Do' iko mada' balaKu nedeh.
- ¹⁸Kudeng Ui mala seburur lemulun luk dat miak maté, idi kudeng iko na ngecuk neneh ngisu' kekammeneh pad ieh mulun, ieh miak maté bang sala'neh, idi iko luk mabeh aténeh pa kiungKu.
- ¹⁹Kudeng iko mada' lemulun luk dat, idi na ieh ugka' nganau' luk dat, ieh miak maté bang sala'neh, iamo' Ui ngulun namu.
- ²⁰"Kudeng lemulun luk do' ngimun nganau' luk dat, idi Ui tumen abpung kuanneh, kali' rungen ieh maté kudeng iko na mada' neneh. Ieh miak maté ngaceku sala'neh, idi Ui na ngerawé kekamen luk do' luk inau'neh atun. Idi iko mabeh aténeh pa kiungKu.
- ²¹Kudeng iko mebpeng lemulun luk do' na nganau' sala, pad ieh ninger balamu idi na nganau' sala', ieh miak mulun, idi iko pana' uenKu ngulun."
- ²²Idi lalud Tuhan neketukan luunku, idi ui neninger balaNeh negku, "Tumui iko idi amé' luun raked. Idi Ui miak pebala namu déi'."
- ²³Id ui iné luun raked, idi su ineh ui nenier rayeh Tuhan, mepad kudeng luk sinierku déi' tangeb Abpa' Kibar. Idi ui netekeradung luun tana',
- ²⁴iamo' Roh Allah nesemuet bang negku idi nenui negku. Idi kebala Tuhan negku, "Do' iko muli', semuet bang ruma'mu idi ngitek tanga' ruma'mu ineh.
- ²⁵O lemulun, iko miak batin ku kalat, pad iko na miak mepai.
- ²⁶Ui miak ngaté urat dila'mu, pad iko na miak mada' lemulun ini luk sikal metueh.
- ²⁷Idi kareb Ui pebala namu teh idi iko miak peburi', iko miak pebala nedeh, 'Kudeng ini bala Tuhan.' Sebuang miak ninger balamu, idi sebuang na ninger, ngaceku ideh ineh aceh pupu luk sikal metueh."

Yehiskiel 4

- ¹Kebala Allah, "O lemulun, do' ngalap aceh batu bata, idi nganau' neneh pa atunmu, idi ngarit aceh ayu bawang Yerusalim luunneh.
- ²Idi nganau' aceh tanu' pinginud Yerusalim uen ngerieng. Ieh ineh do' nganau' abang, ibpeng su luk inan lupu, idi teh repapeh luk ku ngusag bawang.
- ³Do' naped aceh balad belawan ku alad arangmu dengan bawang ineh. Sium pa atun bawang ineh. Bawang ineh uen ngerieng, idi iko luk ngerieng neneh. Ini mangun ku tanu' kuan pupu Israil.
- ⁴"Telubid tebiring pa kabing, idi Ui ngerareng sala' pupu Israil luunmu. Iko miak telubid su ineh idi mabeh sala'deh,
- ⁵teluh ngeratu iwa' ngepulu' aco kinioneh, ngaceku Ui ngukum namu seaco mangun ku aceh lak, ku pinginud ukumdeh.
- ⁶Pangeh ineh tebiring selipa idi mabeh sala' Yahuda apat ngepulu' aco kinioneh — seaco mangun ku aceh lak ku pinginud ukumdeh.
- ⁷"Nutong bawang Yerusalim luk uen ngerieng. Ngelulun langen kuyu'mu, idi mada' ukum kuan bawang ineh.
- ⁸Ui miak ngabet namu, pad iko na miak tebiring selipa, pad macing bunu' ugka'.
- ⁹"Do' ngalap bara, ikun, peritek, bua' petar, binamud, idi banak. Muar amung ineh mangun ku ruti. Ini mangun ku akanmu 390 aco kinioneh, kareb iko tebiring pa kabing.
- ¹⁰Iko miak kuman anem tahil ruti seaco. Idi do' kuman sesuut-sesuut anid kua'.
- ¹¹Idi teh iko miak ngirup dueh sangkir abpa' mo' bang seaco.
- ¹²Iko miak nganau' apui ratnan téi' lemulun luk tekering. Do' ngeseb ruti luun bareh apui ineh, idi kuman ineh su siren amung-amung lemulun."
- ¹³Kebala Tuhan, "Kareb Ui matad nelun Israil bang bawang pupu baken, kudeng ineh teh lawédeh kuman akan luk bibpeng ukum Musa."

¹⁴Iamo' kebalaku, "Ara' ui, Tuhan! Macing nekini nateh ui nengelutak bururku. Rat isuut ui nateh nekuman uang pung luk naté ku ét, idi luk pinaté pung luk meliputi pana'. Ui nateh nekuman akan luk melutak."

¹⁵Idi kebala Allah, "Kudeng pieh kudeng ineh, miak iko makai téi' sapi' idi ngeseb rutimu luun ineh."

¹⁶Idi teh kebalaNeh, "O lemulun, Ui miak ngesusa' bawang Yerusalim, pad ideh na inan petap ruti kenendeh. Dengan merapang ideh miak nguad akan idi abpa' luk rupendeh.

¹⁷Matu, ideh na inan ruti idi abpa', pad ideh na tuman ku derehdeh, idi ideh iuk-iuk amé' merugu' bang sala'deh."

Yehiskiel 5

¹Kebala Allah, "O lemulun, do' ngalap aceh pelapet luk metadem. Mingit buluh tangmu idi abpukmu. Nimang abpuk ineh, idi mabpat neneh mangun ku teluh babpat.

²Ngeseb aceh babpat bang bawang ineh kareb bunu' ugka'. Idi teh ngalap aceh babpat idi natek ineh ku pelapetmu kareb iko lawé-lawé bang bawang. Idi nala' babpat luk ketecan pad ieh mepalid ku bui, idi Ui munu' neneh ku pelapetKu.

³Nganug tuda'-tuda' urat abpuk ineh idi ngelulun neneh bang iring kuyu'mu.

⁴Idi ngalap sebuang urat ineh teh idi nala' nedeh bang apui pad ideh meseb. Rat nedeh apui miak meperuit kuan amung pupu Israil."

⁵Idi kebala Tuhan, "Nier bawang Yerusalim. Ui nemudut neneh uned tana' ini, dengan bawang baken libut-libutneh.

⁶Iamo' Yerusalim sikal metueh ratnan ukumKu, pad ieh meluun dat ratnan pupu baken, ieh meluun ara' ku ukumKu, ratnan bawang luk libut-libutneh. Yerusalim nengarung bada'Ku, idi ara' maya' ukumKu.

⁷O Yerusalim, do' ninger balaKu. Ngaceku Ui ini Tuhan. Iko ngacing ria' meluun ratnan pupu luk libut-libutmu, ngaceku iko na ninger balaKu, idi na maya' ukumKu. Iko nemaya' lawé pupu baken.

⁸Idi Ui ini Tuhan pebala, Ui mangun ku bunu'mu. Ui miak ngukum namu su siren amung pupu.

⁹Ui miak ngacing kuan Yerusalim ukum luk meluun rayeh ratnan luk atun idi ratnan luk macing mucu, ngaceku amung kekamenmu luk inanKu megateh.

¹⁰Idi déi' Yerusalim, taman-taman miak kuman anakdeh, idi anak-anak miak kuman tamandeh. Ui miak ngukum namu idi matad lemulun luk ketecan amé' iapeh-iapeh.

¹¹"Ui ini Allah luk mulun idi ini bala Tuhan: Ngaceku iko nengelutak ruma'Ku ku kekamen luk dat idi megani', idi Ui miak ngusag namu dengan na méi'.

¹²Sebabpat bang teluh babpat pupumu miak maté bang bawang, ku ét, idi lau. Sebabpat miak pitayen ku pelapet bal alad bawang; idi babpat luk keteluh miak mepalid ku bui idi Ui ngerada' nedeh dengan pelapetKu.

¹³"Iko miak kali' useh idi gatehKu luk mebura', pad Ui musam. Kareb amung ini mangun, iko miak kali' idi Ui ini Tuhan nepebala namu dengan usehKu, ngaceku iko na lutep maya' Negku.

¹⁴Amung-amung lun pupu baken luk libut-libutmu idi luk lemaba namu miak situnga namu rat mado.

¹⁵"Kareb Ui museh idi megateh namu, idi kareb Ui ngukum namu, amung-amung pupu luk libut-libutmu miak matot. Ideh megileg nier namu idi situnga namu.

¹⁶Idi Ui na maré akan namu pad iko maté ku lau. Idi laumu mepad kudeng ét lemulun luk binayung ku ileb.

¹⁷Ui ngacing lau idi pung luk mesangit miak ngaté anakmu, idi teh ét idi bunu' miak ngaté namu. Ui ini Tuhan pangeh nepebala."

Yehiskiel 6

- ¹Kebala Tuhan negku,
- ²"O lemulun, nier amung pegkung déi' bawang Israil, idi mada' balaKu nedeh.
- ³Ngecuk nedeh ninger bala Tuhan luk belénKu kuan pegkung, surud, ruan, idi raked. Ui miak maré pelapet luk ngusag su luk inan lemulun sembayang inan akang.
- ⁴Amung bubpun miak uen ngusag idi su luk inan ngeseb umau luk do' buen miak uen mila'. Amung lemulun miak pitayen pa atun akangdeh.
- ⁵Ui miak matad butung lun Israil. Ui miak ngisak tulangdeh libut-libut bubpun ineh.
- ⁶Amung bawang Israil miak uen ngusag, idi su luk inandeh sembayang inan akang pana' miak uen ngusag, pad amung bubpun idi akangdeh uen ngareg, idi su luk inandeh ngeseb umau luk do' buen uen mila', idi amung-amung luk pangeh inau'deh metutu'.
- ⁷Lemulun iapeh-iapeh pana' miak pitayen, idi lemulun luk ketecan miak ngamo Negku ini Tuhan.
- ⁸"Ui nima' sebuang lemulun mulun amé' arang pupu baken,
- ⁹idi tudo déi'. Su luk inandeh tiban, ideh miak ngerawé idi kali' Negku luk ngukum nedeh pad ideh migu', ngaceku niatdeh luk na lutep mado rat Negku, idi ideh meluun awa inan akangdeh. Ideh miak megateh inan bururdeh sebuleng, ngaceku kekamendeh luk dat idi megani'.
- ¹⁰Ideh miak kali' Negku, Ui ini Tuhan, idi bada'Ku nedeh baken mo'-mo'."
- ¹¹Kebala Tuhan Allah, "Ngekaka ticu'mu, namid kukudmu idi nangi' ku susa' niatmu, ngaceku amung kekamen luk dat idi melutak luk inau' lun Israil. Ideh miak maté bang bunu', ku lau, idi ku ét pana'.
- ¹²Lemulun luk mado mét idi maté. Lemulun luk muneng miak maté bang bunu'. Lemulun luk ketecan miak maté ku lau. Ideh miak kali' usehKu luk mebura'.

¹³Butungdeh miak uen ngisak arang akangdeh idi libut-libut bubpundeh, idi luun anid surud idi pegkung, idi liang anid lawa kayuh idi su apeh luk inandeh ngeseb baré kuan akangdeh. Idi amung-amung lemulun miak kali' Negku, Ui ini Tuhan.

¹⁴Matu, Ui miak natang tiku'Ku idi ngusag bawangdeh. Ui nganau' neneh mangun ku su luk ali-ali rat pa kabing busat aco pad macing bawang Ribla pa tinueh busat aco, ieh ineh amung su luk inan lun Israil tudo. Idi amung-amung lemulun miak kali' Negku, Ui ini Tuhan."

Yehiskiel 7

¹Kebala Tuhan negku,

²"O lemulun, Ui ini Tuhan, idi ini balaKu kuan tana' lun Israil. Ini kekipedneh, idi teh kekiped amung tana' lun Israil.

³"O Israil, kekipedneh pangeh nacing. Iko miak kali' usehKu; Ui ngukum namu ngaceku luk inau'mu ineh. Ui ngua' namu ngaceku kekamenmu luk pelaba dat.

⁴Ui na miak méi' namu. Ui miak ngukum namu ngaceku kekamenmu luk pelaba dat, pad iko kali' Negku, Ui ini Tuhan."

⁵Kudeng ini bala Tuhan, "Susa' megéi' macing namu.

⁶Ini kekipedneh! Ini kekipedneh! Iko melaya'!

⁷Ini kekiped muyuh luk tudo bang bawang ini. Aco malé macing kareb nateh irau déi' luun pegkung, iamo' gagau mo'.

⁸"Na mio teh iko miak kali' usehKu luk mebura'. Ui ngukum namu ngaceku luk inau'mu ineh. Ui ngua' namu ngaceku kekamenmu luk pebala dat.

⁹Ui na miak méi' namu. Ui miak ngukum namu ngaceku kekamenmu luk pelaba dat, pad iko kali' Negku, Ui ini Tuhan, idi Ui ini luk ngukum namu."

¹⁰Aco dereh malé macing. Kekamen luk dat amé' mula'. Dita' niat iuk-iuk amé' rayeh.

- ¹¹Kekamen luk dat ngacing kekamen luk meluun dat. Na luk ketecan kuandeh; binaweh pana' nateh, ubur pana' nateh, rayeh pana' nateh.
- ¹²Tarekneh malé macing. Aco ineh muneng. Melih idi masui pana' na ilungneh, ngaceku useh Allah miak macing luun amung-amung lemulun.
- ¹³Lemulun luk pepua' na miak ngalap lemubed luk netutu'neh ruked ulunneh. (Luk sinier ini na mepad ilungneh kuan amung-amung lemulun.) Lemulun luk dat na miak mulun.
- ¹⁴Ideh nateg tawak, idi temina'. Iamo' seburur pana' nateh luk amé' pebunu' ngaceku useh Tuhan macing kuan amung-amung lemulun.
- ¹⁵Inan lemulun pekakem luun dalan déi' kadai, idi bang ruma' inan lemulun luk mét idi melau. Idé-idé luk déi' lati' miak maté bang bunu', idi idé-idé luk bang bawang miak maté ku ét idi lau.
- ¹⁶Sebuang buro amé' luun pegkung mepad kudeng sukur luk matot, iamo' ngaceku sala'deh ideh miak maté.
- ¹⁷Ticu' amung-amung lemulun melaya', idi alebdeh pana' megegker.
- ¹⁸Ideh miak nacung idi megegker. Uluhdeh uen ngiki, idi ideh uen ngigu'.
- ¹⁹Ideh nala' amas idi pirakdeh luun dalan mepad kudeng nala' arap, ngaceku pirak idi amas na miak ngulun nedeh kareb Tuhan ngacing usehNeh. Na ideh miak makai ineh ku ngebor batekdeh idi ku ngawang niatdeh. Amas idi pirak ineh nenguit nedeh nganau' sala'.
- ²⁰Atun ideh medita' niat ku banédeh luk do' taga, iamo' ideh nemakai ineh ku nganau' akang luk dat. Ineh punneh Tuhan nenganau' binawehdeh mangun ku luk inandeh megani'.
- ²¹Kebala Tuhan, "Ui miak nima' pupu baken mano rat nedeh, idi lemulun luk ngelaba ukum miak ngaro binawehdeh idi ngelutak neneh.
- ²²Idi Ui miak teketed kareb lemulun ngelutak Ruma'Ku idi kareb lun mano ngaro ineh.

²³Iapeh-iapeh pana' inan gagau. Mula' lun luk ngaté lemulun idi mula' lun luk dat bang bawang muyuh ineh.

²⁴Ui miak nguit pupu baken luk meluun dat amé' tungé' idi nima' nedeh ngaro ruma' muyuh. Lemulun luk metueh pana' merapang kareb Ui nima' pupu baken ngelutak su luk inan muyuh sembayang.

²⁵Susa' macing pad muyuh na tuman. Muyuh nakap do' udeng iamo' na miak.

²⁶Susa' megéi' macing idi bala luk dat pana'. Muyuh nguring mutuh nabi ngegala' luk sinierdeh. Imam pana' na bada' kuan lun mula', idi lun rayeh-rayeh pana' na bada' teh.

²⁷Raca' miak temido, anak raca' pana' na rapet, idi lun mula' megegker ku totdeh. Ui ngukum nemuyuh ngaceku luk inau' muyuh, idi Ui mutut ukum kuan muyuh mepad kudeng muyuh nemutut ukum kuan lun baken. Idi muyuh miak kali' Ui ini Tuhan."

Yehiskiel 8

¹Limeh aco bulan anem bang lak luk keanem, kareb kai tiban, idi lun rayeh-rayeh lun Yahuda luk tiban tudo bang ruma'ku idi pegayam negku, denak-denak lalud Tuhan neketukan negku.

²Ui netengook idi nekali' aceh ayu luk mebudung. Rat ku awaneh macing ku kukudneh bururneh mepad kudeng apui, idi rat ku awa'neh macing ku uluhneh ieh mesilo mepad kudeng tekaling luk isa.

³Idi ieh nenatang luk kudeng ayu aceh ticu' idi nengakem abpukku. Idi bang luk sinierku ineh, Roh Allah nengikit negku iné' arang gawa' idi nguit negku amé' Yerusalim. Ieh nguit negku macing munung tanga' luk déi' dalem, ieh ineh tanga' Ruma' Allah luk pa tinueh busat aco, su luk inan aceh akang luk inan Allah megateh.

⁴Su ineh ui nenier rayeh Allah luk Israil, mepad kudeng ui nenier rayehNeh bang luk sinierku déi' luun raked.

⁵Kebala Allah negku, "O lemulun, nier pa tinueh busat aco." Idi ui nenier, idi muneng ku bubpun luk déi' munung tanga' ui nenier akang luk inan Allah megateh.

⁶Kebala Allah negku, "O lemulun, do' nier luk ruendeh. Nier kekamen lun Israil luk pelaba dat luk ngado Negku ratnan su luk inanKu luk meligan. Iko miak nier luk meluun dat ratnan ineh."

⁷Ieh nenguit negku iné' munung tanga' natad luk déi' liang, idi nemada' aceh lubang alad Ruma' Allah sirenku.

⁸KebalaNeh, "O lemulun, mesut alad su ini." Idi ui nemesut neneh idi nekali' aceh tanga'.

⁹Idi kebalaNeh, "Semuet idi nier kekamendeh luk dat ineh."

¹⁰Idi ui nesemuet idi nenier. Alad-alad ineh maput ku arit menipeh idi pung baken luk melutak idi arit luk baken luk inan lun Israil sembayang.

¹¹Tudu' ngepulu' lun rayeh lun Israil idi déi' dengan Yasania Sapan. Anid-anid bururdeh ngimet aceh luk inan ngeseb umau luk do' buen, idi ieh merabpun.

¹²Allah nengitun negku, kebalaNeh, "O lemulun, inanké iko nier luk ruen lun Israil dengan lulem? Amungdeh sembayang bang aceh takep luk mepanu' ku akang. Kebaladeh, "Tuhan na nier netau. Tuhan pangeh nenecan bawang tau." "

¹³Idi kebala Tuhan negku, "Iko miak nier kekamendeh luk meluun dat ratnan ineh."

¹⁴Idi Ieh nenguit negku amé' munung tanga' Ruma' Allah luk pa tinueh busat aco, idi nemada' decur luk temido ku até akang Tamus sirenku.

¹⁵Idi Allah nengitun negku, kebalaNeh, "O lemulun, kali'muké ineh? Iko miak nier kekamendeh luk meluun dat ratnan ineh."

¹⁶Idi Ieh nenguit negku amé' luun natad Ruma' Allah luk déi' dalem. Idi munung tanga' Su luk Meligan arang bubpun idi dalam inan lélé dueh

ngepulu' limeh burur lemulun. Ideh neteketed rat Su luk Meligan idi netekunal pa busat aco, idi ideh sembayang inan aco masat.

¹⁷Idi kebala Tuhan negku, "O lemulun, kali' muké ineh? Lun Yahuda ineh na musam ku kekamendeh luk dat luk siniermu ineh. Ngaceku kekamendeh ineh, inan luk dat iapeh-iapeh pana' bang bawang ini. Meluun teh, ideh amé' tungé' idi nganau' Negku meluun useh. Nier kudeng apeh ideh ngedat Negku dengan dalam luk meluun dat!

¹⁸Ideh miak kali' usehKu luk mebura'. Ui na miak méi' nedeh. Ideh sembayang dengan abud rayeh arod, iamo' Ui na miak ninger sembayangdeh ineh."

Yehiskiel 9

¹Idi ui neninger Allah ngitang, kebalaNeh, "Amé' tungé' amung muyuh luk ngukum bawang ini, idi nguit repapeh muyuh."

²Petacu anem burur lemulun nacing munung tanga' luk déi' liang, ieh ineh tanga' luk pa tinueh busat aco. Idi anid bururdeh inan repapeh luk ku ngaté bang paladdeh. Idi seburur lemulun luk ngayung ku kibung pu nemaya' nedeh, idi inan luk ku ngayud bang paladneh. Idi amungdeh iné' tupid muneng ku bubpun luk ratnan tekaling.

³Idi rayeh Allah lun Israil luk merasat numak ratnan pung luk inan ilad ineh idi nemubuh iné' munung tanga' Ruma' Allah. Idi Tuhan nenawar lemulun luk ngayung ku kibung pu, kebalaNeh,

⁴"Do' amé' nalan apud bawang Yerusalim, idi nganau' aceh tanu' luun madu' amung lemulun luk mesusa' niat ngaceku amung kekamen luk dat luk ruen lun bang bawang ineh."

⁵Idi ui neninger bala Allah kuan lun baken ineh, "Maya' neneh nalan apud bawang idi ngaté lemulun. Aleg méi' inan seburur lemulun pana'.

⁶Ngaté lemulun luk mengered, anak adi' deléi idi decur pana', tinar-tinar idi anak-anak. Iamo' aleg ngurat lemulun luk inan tanu' luun madu'neh. Ngimun

ieni bang ruma'ku." Idi ideh nengimun ngaté lun rayeh luk tuped pa atun Ruma' Allah.

⁷Kebala Allah nedeh, "ngelutak Ruma' Allah. Manu' natad ineh ku butung. Kai muyuh!" Idi ideh nengimun ngaté lemulun bang bawang ineh.

⁸Kareb ideh ngaté lemulun, ui sebuleng luk idi. Ui netekeradung luun tana' idi nengitang, kebalaku, "O Tuhan Allah, miakké Iko ngaté amung-amung lun Israil luk ketecan ngaceku usehMu nan bawang Yerusalim?"

⁹Idi Allah nengor balaku, "Lun Israil idi lun Yahuda pelaba sala' ngaceku kekamendeh luk dat. Ideh nengaté lemulun aput tana' idi nemanu' Yerusalim ku kekamendeh luk dat. Kebaladeh, 'Tuhan pangeh nenecan bawang tau. Idi teh Tuhan na nier netau.'

¹⁰Ui na muit seburur pana' idi na Ui nganau' kuandeh mepad kudeng ideh nenganau' kuan lun baken."

¹¹Idi lemulun luk ngayung ku kibung pu ineh nepebala inan Tuhan, "Ui pangeh nemaya' balaMu."

Yehiskiel 10

¹Ui nenier luk melibuh luk pa luun uluh pung luk inan ilad ineh, idi pa luundeh ineh inan luk mepad kudeng ayu kerusi luk inau' ratnan batu luk bata' langit.

²Kebala Allah nan lemulun luk ngayung ku kibung pu ineh, "Amé' arang roda luk pa liang pung ineh, idi manu' dueh paladmu ku bareh apui luk mebudung. Idi ngisak bareh apui ineh aput bawang ineh." Ui nenier neneh nalan.

³Pung luk inan ilad ineh tuped pa kabing busat aco Ruma' Allah kareb ieh nesemu, idi aceh laput maput natad luk déi' dalem.

⁴Idi rayeh Tuhan numak ratnan pung ineh idi nemubuh iné' munung tanga' Ruma' Allah, idi laput ineh nemanu' Ruma' Allah, pad natad ineh mebudung ku rayeh Tuhan.

- ⁵Idi uni ilad pung-pung ineh pedingeren luun natad luk déi' liang pana'. Idi unineh mepad kudeng arod Allah luk Melalud.
- ⁶Kareb Tuhan nengecuk lemulun luk ngayung ku kibung pu ngalap apui rat arang roda luk liang pung-pung ineh, idi ieh iné' tuped iring sebuleng roda ineh.
- ⁷Sebuleng pung ineh nenatang ticu'neh bang paui ineh luk arangdeh, idi nengalap bareh apui, idi nengerareng neneh bang palad lemulun luk ngayung ku kibung pu ineh. Lemulun ineh nengalap bareh apui ineh idi nenalan.
- ⁸Ui nenier inan luk kudeng ayu ticu' lemulun liang anid ilad pung ineh.
- ⁹Idi teh ui nenier inan sebuleng roda iring anid pung ineh, idi amung roda ineh mesilo mepad kudeng batu luk meraga.
- ¹⁰Amungdeh mepad ayu, idi anid roda inan roda luk tepalang unedneh.
- ¹¹Kareb pung ineh nalan, ideh nalan matun anid-anid lidung dengan na lumi. Ideh pad-pad nalan matun su luk ulekdeh dengan na lumi.
- ¹²Burur, keted, ticu', iladdeh, idi roda pana' maput ku mateh.
- ¹³Amung roda ini mepad kudeng roda bang luk sinierku atun.
- ¹⁴Anid-anid pung ineh inan apat kiung, luk pun-pun ineh kiung sapi' deléi, luk kedueh ineh kiung lemulun, luk keteluh ineh kiung balang, idi luk keapat ineh kiung kanui.
- ¹⁵(Amung pung ineh mepad kudeng luk sinierku déi' tangeb Abpa' Kibar.) Pung-pung ineh nekemikit iné' arang gawa',
- ¹⁶Idi kareb ideh nalan, roda pana' nalan maya' nedeh. Kareb ideh malad iladdeh pian nalan, roda ineh pana' nemaya' nedeh.
- ¹⁷Kareb pung ineh ucu', roda pana' ucu', idi kareb pung ineh temulud, roda pana' nemaya' nedeh, ngaceku pung ineh nguyut nedeh.
- ¹⁸Idi rayeh Tuhan nenecan munung tanga' Ruma' Allah idi nemubuh iné' pa luun pung ineh.

¹⁹Ideh nemalad iladdeh idi nekemikit rat luun tana' kareb ui nenier nedeh, idi roda pana' nemaya' nedeh. Ideh nucu' gageh munung tanga' Ruma' Allah pa busat aco, idi rayeh Allah lun Israil idi pa luundeh.

²⁰Idi ui nengiti pung ini kali' rungen mepad kudeng luk sinierku déi' tangeb Abpa' Kibar luk nenguit Allah lun Israil luun kerusiNeh.

²¹Anid-anid pung ineh inan apat kiung, idi apat ilad, idi teh inan luk kudeng ayu ticu' lemulun liang anid iladdeh.

²²Idi kiungdeh mepad kudeng luk sinierku déi' tangeb Abpa' Kibar. Anid pung neh nalan petacu su tuludeh.

Yehiskiel 11

¹Roh Allah nengikit negku idi nenguit negku amé' matun tanga' Ruma' Allah luk pa busat aco. Idi ui nenier munung tanga' ineh dueh ngepulu' limeh burur lemulun, idi arangdeh ui nekali' ni Yasania Asur idi Pelatia Benaya lun nguyut pupu ineh.

²Idi kebala Allah negku, "O lemulun, ini lemulun luk dat luk ngakem bang bawang ini maya' terawédeh sebuleng.

³Kebaladeh, 'Tau miak ngalap utung ratnan mudut ruma'. Bawang ini mepad kudeng lacang, idi tau mepad kudeng uang pung bang ineh, iamo' lacang ineh ngelibung netau ratnan apui.'

⁴O lemulun, ngadu' nedeh."

⁵Roh Tuhan neketukan negku, idi Tuhan nengecuk negku mada' bala ini nelun mula: "O lun Israil, Ui kali' luk belén muyuh idi luk teruayen muyuh.

⁶Muyuh pangeh nengaté pelaba ula' lemulun bang bawang ini pad butung maput luun dalan.

⁷"Ui ini Tuhan, idi ini balaKu nemuyuh. Matu bawang ini mangun ku lacang, iamo' uang pung pinginud anunké? Ieh ineh amung butung luk pinaté muyuh! Iamo' muyuh miak talan rat bang bawang ini.

⁸Matotké muyuh ku pelapet? Ui ngecuk lemulun munu' nemuyuh ku pepalet.

⁹Ui nala' nemuyuh rat bang bawang ini idi maré nemuyuh bang palad lun pupu baken. Muyuh mekaneh ukum maté.

¹⁰Muyuh pitayen bang bunu' bang bawang muyuh sebuleng, pad muyuh kali' Ui ini Tuhan.

¹¹Muyuh baken uang pung ineh, idi bawang ini na miak ngelibung nemuyuh. Ui ngukum nemuyuh su apeh luk inan muyuh bang bawang Israil,

¹²pad muyuh kai' Ui ini Tuhan idi ukum luk linaba muyuh, ieh ineh ukumKu, idi ecuk luk na binaya' muyuh, ieh ineh ecukKu, iamo' muyuh nemaya' ukum amung pupu baken luk libut muyuh.”

¹³Kareb ui uned mada' luk biré Tuhan ineh, Pelatia Benaya neluka' idi naté. Ui netekeradung idi nengitang, "Adui, Tuhan Allah! Miakké Iko ngaté amung lun Israil luk ketecan?"

¹⁴Kebala Tuhan negku,

¹⁵"O lemulun, lun luk tudo déi' Yerusalim pegayam ratnan iko idi teh ratnan kinanakmu lun Israil luk tiban. Kebaladeh, 'Lun luk tiban ineh pelaba ado, pad ideh na miak sembayang inan Tuhan. Ieh pangeh nemaré tana' ini kuan tau.'

¹⁶"Do' mada' balaKu inan kinanakmu luk tiban ineh. Ui ini luk nemasut nedeh pad ideh uen ngatad idi tudo bang bawang baken luk mado. Iamo' laba' ini Ui nima' nedeh sembayang Negku bang amung bawang luk ulekdeh ineh.

¹⁷"Ngaceku ineh do' mada' nedeh, kebalamu, Kudeng ini bala Tuhan: Ui miak ngamung nedeh ratnan bawang su luk inanKu nengatad nedeh, idi Ui maré tana' Israil lemubed kuandeh.

¹⁸Kareb ideh lemubed, do' ideh ngusag amung akang luk inan megani' idi luk inanKu megateh.

¹⁹Ui maré kuandeh rok luk mebaruh idi niat luk lutep Negku. Niatdeh luk metueh kudeng batu ruenKu ngelibal ku niat luk melaya'.

²⁰Pangeh ineh ideh miak ngimet amung ukumKu idi lutep maya' amung ecukKu. Ideh mangun ku pupuKu, idi Ui mangun ku Allahdeh.

²¹Iamo' Ui miak ngukum lemulun luk mawa nan akang luk inan megani' idi luk inanKu megateh. Ui miak ngukum nedeh ngaceku luk inau'deh ineh." Tuhan Allah pangeh nepebala.

²²Pung-pung luk inan ilad ineh nengimun temulud, idi roda-roda pana' nemaya' nedeh. Idi rayeh Allah lun Israil idi pa luundeh.

²³Idi rayeh Tuhan nenecan bawang Yerusalim idi nemubuh iné' luun pegkung luk pa busat aco bawang ineh.

²⁴Bang luk sinierku ineh Roh Tuhan nengikit negku idi nenguit negku lemubed amé' matun lun luk tiban déi' Babil ineh. Idi luk sinierku ineh na idi,

²⁵idi ui nemada' nelun luk tiban ineh ratnan amung-amung luk ginala' Tuhan negku.

Yehiskiel 12

¹Kebala Tuhan negku,

²"O lemulun, iko tudo arang lemulun luk sikal metueh. Ideh inan mateh, iamo' na ideh nier. Ideh inan lalid, iamo' na ideh ninger, ngaceku ideh sikal metueh.

³"O lemulun, do' iko nipa mepad kudeng lemulun luk buro, idi nalan kareb aco macang. Nima' nelun baken nier namu nalan amé' su luk ulekmu. Kian, lun luk sikal metueh ineh miak kali' lek.

⁴Do' iko nipa kareb acang aco, idi nalan buro pa malem su siren matehdeh.

⁵Kareb ideh nier namu, do' nganau' aceh song bang alad ruma'mu, idi nguit babehmu maya' ineh.

⁶Nima' nedeh nier namu ngiding babehmu idi nalan kareb medacem dengan mapen kiungmu, pad iko na miak nier su ulekmu. Luk ruenmu ineh miak mangun ku bada' kuan lun Israil."

⁷Ui nenganau' luk icuk Tuhan negku. Aco sineh ui nenipa mepad kudeng lemulun luk buro, idi kareb aco macep idi ui nenganau' aceh song bang alad ruma'ku. Ui nemabeh babehku kareb ideh nier negku.

⁸Idi kenebpa Tuhan nepebala negku.

⁹KebalaNeh, "O lemulun, nekini lun Israil ineh luk sikal metueh ngitun namu ratnan luk ruenmu.

¹⁰Do' mada' nedeh, kebalamu, 'Kudeng ini bala Tuhan Allah: Bada' ini kuan raca' luk ngimet déi' Yerusalim idi kuan amung lun luk bang bawang ineh.'

¹¹Maré kali' nedeh, luk inau'mu ineh, ieh ineh aceh tanu' ratnan luk miak mangun kuandeh — ideh miak mangun ku lemulun luk buro idi tebanen.

¹²Raca' luk ngimet nedeh miak mabeh babehneh kareb medacem idi buro maya' song luk ruendeh bang alad ineh. Ieh miak mapen matehneh, pad na kali' su ulekneh.

¹³Idi Ui miak malad rabatKu idi ngakem neneh. Idi Ui miak nguit neneh amé' bawang Babil, idi ieh maté su ineh dengan na kali' bawang ineh!

¹⁴Ui miak ngatad amung lun rayehneh, lun luk mada' neneh, idi lun luk matar neneh amé' iapeh-iapeh, pad lemulun nakap idi ngaté nedeh.

¹⁵"Kareb Ui ngatad nedeh arang pupu baken bang bawang luk mado, idi ideh miak kali' Ui ini Tuhan.

¹⁶Ui miak muit sebuangdeh ratnan bunu', iru', idi ét, pad arang pupu baken ineh ideh ngiti kekamendeh luk inan megani' idi ngamo Negku, Ui ini Tuhan."

¹⁷Kebala Tuhan negku,

¹⁸"O lemulun, do' iko megegker kareb iko kuman, idi megegker ku tot kareb iko ngirup.

¹⁹Mada' amung pupu ineh: Kudeng ini bala Tuhan Allah kuan lun Yerusalim luk ketecan bang bawang deh. Ideh miak megegker kareb ideh kuman, idi

megegker ku tot kareb ideh ngirup. Bawangdeh miak uen ngaro, ngaceku amung-amungdeh luk tudo su ineh na maya' ukum.

²⁰Bawang luk mepanu' ku lemulun nekini miak uen ngusag, idi tana'deh ineh mangun ku su luk ali-ali. Idi ideh miak kali' Ui ini Tuhan."

²¹Kebala Tuhan negku,

²²"O lemulun, ngudehké lemulun megéi' ngerawé balé' mini, 'Karebneh nepelaba idi luk bida' na mangun?'

²³Do' mada' nedeh, kebalamu: Kudeng ini bala Tuhan Allah, Ui miak ngagka' balé' ineh, pad ieh na miak badén bang bawang Israil teh. Mada' nedeh, kebalamu, 'Karebneh pangeh nacing, idi luk bida' miak mangun.'

²⁴"Luk siren idi luk badén luk na matu na miak mangun arang lun Israil.

²⁵Ui ini Tuhan miak pebala nedeh, idi luk belénKu miak mangun, idi na mio teh. O muyuh luk sikal metueh, luk bida'Ku miak mangun kareb muyuh mulun. Ui ini Tuhan Allah pangeh nepebala.

²⁶Kebala Tuhan negku,

²⁷"O lemulun, lun Israil ngerawé luk siniermu idi luk bida'mu ineh miak mangun mucu aco.

²⁸Do' mada' nedeh, kebalamu, 'Kudeng ini bala Tuhan Allah: Na mio teh Ui miak nganau' luk pangeh bida'Ku. Ui ini Tuhan Allah pangeh nepebala.' "

Yehiskiel 13

¹Kebala Tuhan negku,

²"O lemulun, mada' ukum nabi lun Israil. Ngecuk lemulun luk mada' maya' terawédeh sebuleng, kebalamu, 'Do' ninger bala Tuhan.' "

³Kudeng ini bala Tuhan Allah: "Nabi ini luk mebacé miak kumin! Ideh mada' ratnan terawédeh sebuleng idi siayu mada' ratnan luk sinierdeh.

⁴O lun Israil, nabi muyuh mepad kudeng bungalé luk tudo arang ruma'-ruma' luk inusag.

⁵Ideh na matar libung bawang déi' su luk na meraben, idi na ideh mudut libung baruh, pad Israil na miak uen ngedengan kareb bunu' macing kareb aco Tuhan.

⁶Luk sinierdeh na matu, idi luk bida'deh mebalih. Kebaladeh, 'Ini bala Tuhan,' iamo' na Ui nengecuk nedeh. Idi ideh merapet ku baladeh miak mangun.

⁷Kudeng ini balaKu, 'Luk sinier muyuh na matu, idi luk bida' muyuh ratnan luk miak mangun ineh mebalih. Muyuh pebala, ieh ineh balaKu, iamo' na Ui nepebala nemuyuh.' “

⁸Idi kebala Tuhan Allah nedeh, "Bala muyuh ineh na matu, idi teh luk sinier, muyuh ineh mebalih. Ui mangun ku bunu' muyuh.

⁹Ui temina' ngukum nemuyuh lun nabi luk siayu ratnan luk sinier idi luk mebalih ratnan luk miak mangun mucu. Kareb pupuKu mepamung, muyuh na idi arangdeh; ngadan muyuh na miak uen ngayud dengan ngadan lun Israil luk baken. Na tu-tu muyuh miak muli' ame' bawang muyuh, pad muyuh miak kali' Ui ini Tuhan.

¹⁰"Nabi-nabi ngeraruh pupuKu, kebaladeh, 'Do', do', iamo' na ieh do! PupuKu pangeh nenganau' libung ratnan batu luk inau' mo'-mo', idi nabi-nabi nengamut neneh ku tana' salit!

¹¹Mada' nedeh, kebalamu, 'Libung ini miak metabpa.' Ui maré udan luk mula', pad ieh meketukan ku udan batu, idi bui luk metueh miak malid neneh.

¹²Libung ineh miak metabpa idi amung lemulun ngitun namu, 'Anunké ulekneh tana' salit ineh?' “

¹³Kudeng ini bala Tuhan Allah, "Dengan usehKu Ui miak maré aceh bui luk metueh, udan luk mula', idi udan batu pad libung ineh mekusag.

¹⁴Ui pian ngusag libung luk imutdeh ineh, idi ngareg neneh, pad batu luk ku alen ineh melagan. Muyuh miak maté meritep ku tabpaneh ineh, pad amung lemulun miak kali' Ui ini Tuhan.

¹⁵"Libung ineh idi lemulun luk nengamut ineh ku tana' salit miak lai' usehKu luk metueh. Idi Ui miak pebala nemuyuh, Libung ineh na idi, idi teh lemulun luk nengamut neneh pana' na idi,

¹⁶ieh ineh nabi-nabi luk nemada' ni Yerusalim, kebaladeh, 'Do', do', 'iamo' na ieh do'." Tuhan Allah pangeh nepebala.

¹⁷Kebala Tuhan, "O lemulun, ngerawé decur arang pupumu luk mebalih ratna luk miak mangun. Mebpeng nedeh na mada',

¹⁸idi mada' nedeh ratnan luk belén Tuhan Allah nedeh. "Muyuh decur miak kumin. Muyuh nerut gimet idi ngabet ineh luun ticu' muyuh, idi muyuh nganau' ucung ku gimet luun uluh muyuh, pad muyuh melalud ngedat nelun baken. Muyuh pian ku lalud ngulun idi ngaté pupuKu, pad muyuh ngalap utung.

¹⁹Muyuh ngedat Negku pa kiung pupuKu, pad muyuh ngalap sesuut ikun idi tuda'-tuda' balad ruti. Muyuh pian ngaté lemulun luk na petulu pitayen, idi ngulun lemulun luk na petulu uen ngulun, pad muyuh mebalih kuan pupuKu, idi ideh manu nemuyuh."

²⁰Kudeng ini bala Tuhan Allah: "Ui miak neka gimet luk luun ticu' muyuh luk ku ngaté idi ngulun. Ui nala' ineh pad pupu luk inimet muyuh miak mepuit.

²¹Ui miak nala' ucung muyuh pad pupuKu mepuit macing ruked-ruked, pad muyuh kali' Ui ini Tuhan.

²²"Muyuh sikal metueh rat Negku. Muyuh ngesabeng lemulun luk matu ku balih muyuh, idi muyuh na nima' lemulun luk dat teketed ratnan sala'deh, pad ideh ngalap ulun.

²³Idi nekini, luk sinier muyuh luk na matu, idi balih muyuh ratnan luk miak mangun, pangeh nabud. Ui muit pupuKu rat bang palad muyuh, pad muyuh kali' Ui ini Tuhan."

Yehiskiel 14

¹Sebuang lun rayeh lun Israil iné' negku pelé ideh kali' pian Tuhan.

²Idi kebala Tuhan negku,

³"O lemulun, lun ini ucet ngerawé akangdeh, pad ideh nganau' sala'. Petuluké Ui tunindeh?

⁴"Do' pebala nedeh: Kudeng ini bala Tuhan Allah, 'Amung-amung lun Israil luk ucet ngerawé akang, pad ideh nganau' sala', idi luk ngitun nabi miak ngalap or rat Negku. Ieh ineh or luk petulu kuan tuda'-tuda' ngeratu akangdeh.

⁵Amung-amung akang ineh pangeh nengeraruh nelun Israil rat Negku. Iamo' Ui merapet ngeruid niatdeh, pad ideh lutep maya' Negku.'

⁶"Do' pebala nelun Israil: Kudeng ini bala Tuhan Allah, 'Do' muyuh uren idi teketed ratnan akang muyuh idi kekamen muyuh luk dat.'

⁷"Kudeng seburur lun Israil, kian sakai lek luk tudo arang lun Israil teketed rat Negku, idi ucet ngerawé akang, pad ieh nganau' sala', idi ngitun nabi, Ui ini Tuhan miak maré or kuanneh.

⁸Ui sikal metueh rat neneh idi nganau' neneh mangun ku bada' kuan lun baken. Ui miak ngatad neneh ratnan pupuKu lun Israil, pad muyuh kali' Ui ini Tuhan.

⁹"Kudeng seburur nabi saluken pad ieh maré or luk na matu, ieh ineh ngaceku Ui ini Tuhan nima' neneh saluken, Ui miak ngatad neneh rat nelun Israil.

¹⁰Nabi ineh idi lun luk ngitun neneh pana' miak ngalap ukum luk mepad mo'.

¹¹Ui nganau' kudeng ini pad lun Israil na necan Negku, idi na ngelutak bururdeh ku sala'deh ineh. Ideh mangun ku pupuKu, idi Ui mangun ku Allahdeh." Tuhan Allah pangeh nepebala.

¹²Kebala Tuhan negku,

¹³"O lemulun, kudeng aceh bawang nganau' sala' idi na lutep maya' Negku, Ui natang ticu'Ku idi ngusag akangdeh. Ui maré iru' luk ngaté lemulun idi pung pana'.

¹⁴Sagan tu pana' Noh, Danel, idi Ayub idi arangdeh, kekamendeh luk do' ineh miak ngulun burur diteluh sebuleng mo'.". Tuhan Allah pangeh nepebala.

¹⁵"Kudeng Ui ngecuk pung luk meliputi ngaté nedeh, idi bawang ineh pelaba susa', pad na miak nalan su ineh,

¹⁶sagan tu pana' diteluh tudo su ineh, Ui ini Tuhan Allah luk mulun pebala, diteluh na miak ngulun anak diteluh sebuleng pana'. Diteluh ngulun burur diteluh sebuleng mo', idi bawang ineh pana' mangun ku su luk ali-ali.

¹⁷"Kudeng Ui ngacing aceh bunu' kuan bawang ineh, pad lemulun idi pung pitayen ku pelapet,

¹⁸sagan tu pana' diteluh tudo su ineh, Ui ini Tuhan Allah luk mulun pebala, diteluh na miak ngulun anak diteluh pana', iamo' diteluh ngulun burur diteluh sebuleng mo'.

¹⁹"Kudeng Ui ngacing aceh ét kuan bawang ineh, pad mula' lemulun idi pung pana' maté ku usehKu,

²⁰sagan tu pana' Noh, Danel, idi Ayub tudo su ineh, Ui ini Tuhan Allah luk mulun pebala, diteluh na miak ngulun anak diteluh sebuleng pana'. Kekamen diteluh luk do' ineh miak ngulun burur diteluh sebuleng mo'."

²¹Kudeng ini bala Tuhan Allah, "Ui maré kuan Yerusalim, apat ukumKu luk meluun dat, ieh ineh bunu', iru', pung luk mesangit, idi ét, pad lemulun idi pung pana' maté.

²²Idé-idé luk mulun idi luk ngulun anakneh, kali' rungen pelaba dat siren muyuh, pad muyuh kali' idi ukum luk uenKu ngacing kuan Yerusalim ineh petulu.

²³Kareb muyuh nier kekamendeh luk dat, idi muyuh miak kali' na Ui ngukum nedeh mo'-mo'." Tuhan Allah pangeh nepebala.

Yehiskiel 15

¹Kebala Tuhan negku,

²"O lemulun, kudeng apehké uar uen maad ku lawa kayuh? Anunké ulek aceh angkat anggur kudeng ieh uen maad ku kayuh luk bang pulung?

³Miakké iko mudut anun-anun ku ineh? Miakké iko nganau' ineh ku aceh luk inan ngacang?

⁴Na ulekneh! Angkat ineh miak sabpen mo'. Kareb pekop papedneh neseb, idi unedneh mitem, miakké iko mudut anun-anun ku ineh?

⁵Kareb nateh angkat ineh iseb na ulekneh. Idi kareb ieh neseb, ieh meluun dat."

⁶Kudeng ini bala Tuhan Allah: "Mepad kudeng aceh uar lapen rat bang pulung idi sabpen, kudeng ineh teh Ui miak ngalap lemulun luk tudo déi' Yerusalim,

⁷pad Ui ngukum nedeh. Ideh nepuit ratnan apui, iamo' nekini, apui miak ngeseb nedeh amung. Kareb Ui ngukum nedeh, idi iko miak kali' Negku, Ui ini Tuhan.

⁸Ngaceku ideh na lutep maya' Negku, Ui miak ngisu' bawangdeh mangun ku su luk ali-ali." Tuhan Allah pangeh nepebala.

Yehiskiel 16

¹Kebala Tuhan negku,

²"O lemulun, mada' Yerusalim ratnan kekamendeh luk pelaba dat.

³Mada' Yerusalim ratnan bala Tuhan Allah nedeh: "Iko tinganak déi' bawang Kanaan. Tamanmu ineh lun Amori, idi tinanmu lun Hiti.

⁴Kareb iko tinganak, abet puedmu na binulu', na iko diniu', na iko piniid ku tucu' idi na iko libin ku kibung.

⁵Na lun méi' namu pad ideh nganau' luk kudeng ineh. Kareb iko tinganak na lun méi' namu, idi ideh nenala' namu luun natad.

⁶"Kareb Ui nelemaba, Ui nekali' namu sigio bang dara'mu sebuleng. Iamo' sagan tu pana' iko medara', Ui mebpeng namu na maté.

⁷Ui nenganau' namu temubu' mepad kudeng aceh tibu luk do' ulun. Iko iuk-iuk metueh idi medita', pad iko mangun ku anak adi' decur. Iti'mu petap rayeh, idi abpukmu mekadang, iamo' iko lubpa.

⁸Kareb Ui nelemaba namu sekua'teh, idi Ui nekali' iko temina' inan mawa. Ui nemapen bururmu luk lubpa ku kuyu'Ku, idi nepejani' mawa namu. Matu, Ui nepejani' namu, idi iko mangun ku pupuKu." Kudeng ini bala Tuhan Allah.

⁹Ui nengalap abpa', idi Ui namaru' dara' rat luunmu. Ui nengumau luunmu ku umau saitun.

¹⁰Ui nengayung namu ku kuyu' luk tibaruh idi namaré namu kasut luk ratnan kubil pung luk meluun do', idi pata ratnan kibung pu, idi kuyu' ratnan kibung luk mesalud.

¹¹Ui namarénamu leku' idi bané.

¹²Ui namaré namu susing icung, abé, idi pata luk metaga luun uluhmu.

¹³Iko inayung ku amas idi pirak, idi kuyu'mu ratnan kibung pu luk tibaruh idi teh kibung luk mesalud. Iko nekuman ruti luk inau' ratnan banak luk meluun do' idi diru' idi umau saitun pana'. Iko pelaba do' taga idi teh iko mangun ku raca' decur.

¹⁴Iko mebala ku tagamu aput-aput tana'. Iko pelaba do' taga, ngaceku Ui ini luk nemudut namu." Kudeng ini bala Tuhan Allah.

¹⁵Iamo' iko merapet inan tagamu idi inan ngadanmu, pad iko pamung dengan idé-idé luk lemaba.

¹⁶Iko nengayung su luk inanmu sembayang ku kibungmu luk do' taga, idi su ineh iko mangun ku decur luk mesawa'.

¹⁷Iko nengalap amas idi pirak luk biréKu namu ku mudut akang deléi luk inanmu pasét.

¹⁸Iko nengalap kibung luk tibaruh luk biréKu namu ku ngayung akang ineh. Idi iko namaré kuan akang-akang ineh umau saitun, idi umau luk do' buen luk biréKu namu.

- ¹⁹Ui nemaré akan namu, ieh ineh banak luk meluun do', umau saitun, idi duru', iamo' iko nemaré amung ineh ku baré, pad ngeruid niat amung akangmu ineh." Kudeng ini bala Tuhan Allah.
- ²⁰"Iko nengalap anakmu luk deléi idi decur luk tinganakmu kuanKu, idi nemaré nedeh ku baré kuan akang ineh. Naké sétmu petap dat teh?
- ²¹Iamo' iko ngeluun sala'mu, pad iko nemaré anak-anakKu ku baré kuan akangmu.
- ²²Kareb iko bang ulunmu luk dat idi luk melutak, na tu iko nengerawé ulunmu kareb iko isuut, ieh ineh kareb iko lubpa idi sigio bang dara'mu sebuleng."
- ²³Kebala Tuhan Allah, "Mesusa' kuanmu! Mesusa' kuanmu! Kareb iko pangeh nenganau' amung kekamen luk dat ineh,
- ²⁴iko nemudut su luk inanmu sembayang inan akang iring anid dalam pad iko pasét inan akang ineh.
- ²⁵Iko nengedat tagamu. Iko nemaré bururmu kuan idé-idé luk lemaba idi sétmu iuk-iuk amé' mula'.
- ²⁶Iko nenima' lun Masri, ieh ineh lun denganmu luk mepanu' ku lili, pasét namu, pad iko ngegio usehKu ku sétmu.
- ²⁷"Nekini Ui natang ticu'Ku pian ngukum namu, idi nala' peruan luk biréKu namu. Ui pangeh nemaré namu kuan lun Pilistin luk megateh namu, ngaceku kekamenmu luk dat idi melutak.
- ²⁸"Ngaceku lilimu na ugka' ku lun baken, iko nengerada' nelun Asur. Iko mangun ku decurdeh luk mesawa', iamo' lilimu na ugka' ku ineh teh.
- ²⁹Iko mangun ku decur luk mesawa' kuan lun Babil, ieh ineh pupu luk pepua' ineh, iamo' nateh lilimu ugka' ku ineh."
- ³⁰Kudeng ini bala Tuhan Allah, "Iko nenganau' amung ineh mepad kudeng seburur decur luk mesawa' luk na migu'.

³¹Iko nemudut su luk inanmu sembayang inan akang iring anid dalam, pad iko pasét nedeh. Iamo' na iko mepad kudeng decur luk mesawa' luk nakap usin mo'.

³²Iamo' iko mepad kudeng decur luk pasét nelun baken idi na mawa inan awanneh sebuleng.

³³Decur luk mesawa' ngalap tabpar, iamo' iko nemaré baré kuan lemulun luk inanmu mawa, idi nemaré suap, pad ideh macing rat iapeh-iapeh-iapeh idi pasét namu.

³⁴Iko decur luk mesawa' luk mebaken tu-tu. Na lun baken nengecuk namu pasét. Na iko nengalap tabpar. Iko nemaré tabpar nedeh! Matu, iko mebaken tu-tu.”

³⁵O decur luk mesawa', ninger bala Tuhan.

³⁶Kudeng ini bala Tuhan Allah: "Iko nengelebpa bururmu idi pasét nan lemulun luk inanmu mawa idi nan amung akangmu luk pelaba dat. Idi iko nengaté anak-anakmu ku baré kuan akangmu ineh.

³⁷Ngaceku ineh Ui miak ngamung amung lemulun luk inanmu pasét ineh, do' luk inanmu mawa idi luk inanmu megateh pana'. Ui miak naped nedeh libut-libutmu, idi Ui ngelebpa bururmu, pad ideh kali' namu lubpa.

³⁸Ui miak ngukum namu ngaceku pasét idi ngaté lemulun. Denga usehKu Ui ngukum namu macing maté.

³⁹Ui maré namu bang paladdeh, idi ideh miak ngusag su luk inanmu pasét idi sembayang inan akang. Ideh miak ngalap ayungmu idi banému, pad iko lubpa.

⁴⁰"Ideh miak ngegio useh lun mula', pad ideh mitung namu ku batu idi natek namu ku pelapetdeh.

⁴¹Ideh miak ngeseb amung ruma'mu, pad mula' decur nier ukumKu namu ineh. Ui ngagka' namu pad iko na pasét, idi pad iko na maré baré kuan lemulun luk inanmu mawa.

- ⁴²Idi usehKu miak ugka' pad Ui mulai niat. Idi na Ui museh idi temaruh teh.
- ⁴³Iko nekelupan do'Ku namu kareb iko isuut, idi iko nengegio usehKu ku amung kekamenmu luk dat. Ngaceku ineh Ui ngua' kekamenmu ineh. Ngudehké iko nengeluun sala'mu ku sét?" Tuhan Allah pangeh nepebala.
- ⁴⁴Kebala Tuhan, "O Yerusalim, lemulun baken miak nganau' balé' ini ratnan namu: Anak decur mepad kudeng tinanneh.
- ⁴⁵Matu, iko anak decur tinanmu. Ieh megateh inan awanneh idi anak-anakneh. Iko mepad kudeng kinanakmu luk decur luk megateh inan awandeh idi anak-anakdeh. Tinan muyuh ineh lun Hiti idi taman muyuh lun Amori.
- ⁴⁶"Kinanakmu decur luk rayeh ineh Samaria luk pa tinueh busat aco dengan amung bawangneh. Kinanakmu decur luk isuut ineh Sodom luk pa kabing busat aco dengan amung bawangneh.
- ⁴⁷Lilimu na ugka' kareb iko nemaya' lawédeh idi kekamendeh luk dat ineh. Idi iuk-iuk iko nenganau' kekamen luk meluun dat rat nedeh.
- ⁴⁸"Ui ini Tuhan Allah luk mulun pebala: Kinanakmu Sodom dengan amung bawangneh na nenganau' luk dat mepad kudeng iko idi amung bawangmu.
- ⁴⁹Sodom dengan anak-anakneh luk decur medita' niat ngaceku akandeh petap idi ideh do' udeng teh, iamo' na ideh méi' nelun masi' idi lun luk medereh pana'.
- ⁵⁰Ideh medita' niat idi metueh niat idi nenganau' luk inanKu megateh pad Ui nengaté nedeh pa kiungmu.
- ⁵¹"Samaria na mula' sala' mepad kudeng iko. Iko nenganau' kekamen luk meluun dat ratnan kekammeneh ineh. Ayu sala' kinanak-kinanakmu isuut kudeng uen maad dengan kekamenmu.
- ⁵²Na miak na iko migu' ngaceku sala' kinanak-kinanakmu isuut ratnan sala'mu. Do' iko migu' ngaceku kinanak-kinanakmu matu kudeng uen maad denganmu."

⁵³Kebala Tuhan ni Yerusalim, "Ui pian ngeperuan Sodom idi Samaria dengan amung bawangdeh baruh teh. Idi Ui ngeperuan Yerusalim teh.

⁵⁴Kali' rungen iko migu', idi igu'mu ineh miak ngegala' peruan kinanak-kinanakmu.

⁵⁵Ideh miak ngalap peruan teh, idi iko idi amung bawangmu miak uen nuneb.

⁵⁶Naké' iko nesitunga ni Sodom kareb iko medita' niat,

⁵⁷kareb nateh kekamenmu luk dat pangeh megala'? Nekini iko mepad kudeng Sodom. Lun Edom, lun Pilistin, idi lun denganmu luk megateh namu situnga namu.

⁵⁸Na miak na iko mekaneh dereh, ngaceku kekamenmu luk dat idi melutak." Tuhan pangeh nepebala.

⁵⁹Kebala Tuhan Allah, "Ui miak maré ukum luk petulu namu, ngaceku iko na nemaya' jani'mu, idi teh iko nengelaba bala.

⁶⁰Iamo' Ui miak maya' jani'Ku namu kareb iko isuut. Idi Ui miak nganau' aceh jani' luk meruked kuanmu.

⁶¹Iko miak ngerawé kekamenmu pad iko migu' kareb kinanak decurmu luk rayeh idi luk isuut muli' amé' namu. Ui nima' nedeh mangun mepad kudeng anak decurmu, sagan pana' Ui na nepejani' nganau' kudeng ineh.

⁶²Ui miak pejani' baruh pad iko kali' Ui ini Tuhan.

⁶³Kareb Ui maré do' ratnan amung sala'mu, iko miak ngerawé sala'mu ineh pad iko ungeng ku igu'mu." Tuhan Allah pangeh nepebala.

Yehiskiel 17

¹Kebala Tuhan negku,

²"O lemulun, mada' nelun Israil aceh luk pinginud

³pad ideh kali' luk belén Tuhan Allah nedeh. Inan aceh kanui luk pelaba rayeh. Idi ieh nemalad iladneh luk pelaba rayeh. Aput bururneh inan buluh

luk pelaba do' taga. Ieh netemulud iné' luun Pegkung Lebanon idi ieh nenangal udung kayuh tumuh.

⁴Ieh nenguit ineh iné' bawang lun luk pepua'.

⁵Idi ieh nengalap aceh luk tinibu rat bawang Israil idi nenibu neneh luun tana' luk mebaleng su luk mula' abpa', pad ieh temubu'.

⁶Luk tinibu ineh nenginulih, pad ieh mangun ku lawa anggur luk rayeh idi mebeneh. Angat-angatneh matun kanui ineh idi uatneh iuk-iuk medalem. Idi anggur ineh inan mula' angkat idi don pana'.

⁷Inan aceh kanui luk rayeh luk baken teh. Idi ieh inan ilad luk rayeh idi mula' buluh. Idi uat anggur ineh matun kanui ineh, idi donneh pana' matun neneh pad ieh mubpur neneh idi ngula' abpa' kuanneh.

⁸Iamo' anggur ineh pangeh tinibu luun tana' luk mebaleng, su luk mula' abpa', pad ieh ngeruat don idi bua' idi pad ieh mangun ku anggur luk meluun do'.

⁹"Idi Ui ini Tuhan Allah nengitun, Miakké anggur ini mulun idi temubu'? Naké kanui luk pun-pun ineh mubput neneh idi ngalap bua'neh, idi nutu' angkat-angatneh pad ideh melayuh? Dengan sesuut tueh mo' aceh pupu luk rayeh miak mubput neneh.

¹⁰Matu, ieh tinibu, iamo' miakké ieh mulun idi temubu'? Naké ieh tekering kareb bui macing rat pa busat aco? Naké ieh tekering su luk inanneh mulun ineh?"

¹¹Kebala Tuhan negku,

¹²"Ngitun lun luk sikal metueh ineh ratnan ilung luk pinginud ineh. Do' mada' nedeh, kebalamu: Raca' Babil iné' Yerusalim idi nenaban raca' idi lun rayeh-rayehneh iné' Babil.

¹³Idi ieh nengalap seburur lemulun luk inul raca' idi nepejani' neneh, idi nenguit neneh pebulung pad ieh lutep maya' jani'. Ieh nenutup tuda'-tuda' burur lun rayeh,

¹⁴pad bawang ineh na sikal metueh teh, idi pad ideh na ngelaba jani' ineh.

¹⁵Iamo' Raca' Yahuda sikal metueh idi nengecuk tuda'-tuda' demulunneh amé' Masir, pad ngalap mula' kuda idi aceh baweh luk rayeh. Miakké ieh metueh? Miakké lawéneh na ngalap susa'? Miakké ieh ngelaba jani' dengan na kumin?

¹⁶Kebala Tuhan, "Ui ini Allah luk mulun. Idi raca' ini miak maté déi' Babil, ngaceku ieh na maya' bulungneh. Idi teh ieh nengelaba jani' luk inau'neh dengan Raca' Babil luk nengikit neneh mangun ku raca'.

¹⁷Baweh raca' Masir luk melalud pana' na miak ngedengan neneh kareb ieh pebunu', ngaceku lun Babil miak mudut ibpeng idi ngukat abang, pad ideh ngaté mula' lemulun.

¹⁸Raca' Yahuda na nemaya' bulungneh idi teh ieh nengelaba jani'neh. Amung ineh inau'neh, idi nekini ieh na miak mepuit."

¹⁹Kebala Tuhan Allah, "Ui ini Allah luk mulun, idi Ui miak ngukum neneh, ngaceku ieh ngelaba jani' luk binulungneh ku ngadanKu.

²⁰Ui miak malad rabatKu idi ngakem neneh. Ui naban neneh amé' déi' Babil pad ieh kumin, ngaceku ieh na lutep maya' Negku.

²¹Lun pebunu'neh luk meluun sangit miak pitayen bang bunu'. Idi lun luk ketecan miak uen ngatad amé' iapeh-iapeh, pad iko kali' Ui ini Tuhan pangeh nepebala."

²²Kudeng ini bala Tuhan Allah: "Ui miak ngalap udung kayuh tumuh, idi nangal aceh angat luk mebaruh; Ui nibu ineh luun pegkung luk medita',

²³ieh ineh pegkung Israil luk meluun dita'. Ieh miak inan angat idi kebua', pad ieh mangun ku tumuh luk meluun do'. Tuda'-tuda' suit miak mulun su ineh, idi nganau' arardeh luun angatneh.

²⁴Amung-amung kayuh bang tana' ini miak kali' Ui ini Tuhan. Ui nebpeng kayuh luk medita', pad kayuh luk isuut temubu'. Ui nganau' kayuh luk mebata' metekering, idi kayuh luk tekering ruenKu mebata' teh. Ui ini Tuhan pangeh nepebala. Ui miak nganau' luk pijani'Ku ineh."

Yehiskiel 18

¹Kebala Tuhan negku,

²"Anunké balé' luk megéi' beléndeh déi' bawang Israil? 'Amung-amung taman pangeh nekuman bua' anggur luk malam, idi lipen anak-anakdeh melaya' peh.' “

³Kebala Tuhan, "ui ini Allah luk mulun. Idi aleg muyuh mada' balé' ini teh déi' bawang Israil.

⁴Ulun taman-tinan idi ulun anak pana' Ui kuan. Lemulun luk nganau' sala' ineh miak maté.

⁵"Ngerawé ratnan lemulun luk do', idi matu idi mesiri.

⁶Ieh na sembayang inan akang lun Israil idi na ieh kuman luk biré luun bubpun luk bibpeng. Na ieh pasét nan decur dulun, idi na ieh pamung rudap dengan awanneh kareb ieh macing bulan.

⁷Na ieh naluk nelun baken, idi na ieh mano teh. Ieh nguli' luk biré lun luk ngiceh ku dudukneh. Ieh maman lemulun luk melau idi ngayung lemulun luk lubpa.

⁸Ieh na maré usin kebiten lun pad ieh ngalap utung. Ieh ara' nganau' luk dat idi megéi' mutut ukum luk mesiri.

⁹Ieh maya' amung ukumKu idi ngimet amung bada'Ku. Kali' rungen ieh miak mulun ngaceku ieh matu." Kudeng ini bala Tuhan Allah.

¹⁰"Iamo' ngerawé ratnan anakneh, Ieh mano idi ngaté lemulun, idi nganau'

¹¹luk na tu-tu inau' tamanneh. Ieh kuman luk biré luun bubpun luk bibpeng, idi ieh pasét nan decur dulun.

¹²Ieh naluk nelun masi' idi mano. Ieh ngimet luk biré lun luk ngiceh ku dudukneh. Ieh sembayang inan akang idi nganau' luk dat.

¹³Ieh maré usin kebiten lun, pad ieh ngalap utung. Miakké ieh mulun? Na tu-tu! Ieh pangeh nenganau' amung kekamen luk dat ini, idi ieh miak maté ngaceku ineh. Ieh maté ngaceku sala'neh sebuleng.

14"Idi ngerawé ratnan anak lemulun ini teh. Ieh nier amung-amung sala' luk inau' tamanneh, iamo' na ieh maya' lawéneh.

15Na ieh sembayang inan akang lun Israil idi na ieh kuman luk biré luun bubpun luk bibpeng ineh. Na ieh pasét nan decur dulun.

16Na ieh ngedereh nelun, idi na ieh mano teh. Ieh nguli' luk biré lun luk ngiceh ku duduk. Ieh maman lemulun luk melau idi ngayung lemulun luk lubpa.

17Ieh ara' nganau' luk dat. Idi na ieh maré usin kebiten lun pad ieh ngalap utung. Ieh maya' amung ukumKu idi ngimet amung bada'Ku. Ieh na maté ngaceku sala' tamanneh. Kali' rungen ieh miak mulun.

18Tamanneh nenaluk nelun idi nemanu teh, idi megéi' ngedat nelun baken. Idi ieh naté ngaceku sala'neh.

19"Iamo' kebalamu, 'Ngudehké anakneh na kumin ngaceku sala' tamanneh?' Ngaceku anakneh megéi' nganau' luk matu idi luk do'. Ieh nengimet ukumKu idi nemaya' amung-amung bada'Ku. Idi kali' rungen ieh miak mulun.

20Lemulun luk nganau' sala' ineh miak maté. Anak na miak kumin ngaceku sala' tamanneh. Idi taman na miak kumin ngaceku sala' anakneh. Lemulun luk do' miak uen ngeperuan ngaceku kekammeneh luk do'. Idi lemulun luk dat miak kumin ngaceku kekammeneh luk dat.

21"Kudeng lemulun luk dat ugka' nganau' sala', pad ieh ngimet ukumKu kudeng ieh nganau' lu matu idi do', na ieh maté; kali' rungen ieh mulun.

22Ieh miak ngalap do' ratnan amung-amung sala'neh, pad ieh mulun, ngaceku ieh nenganau' luk matu."

23Kebala Tuhan Allah, "Miakké Ui mawang niat ku até lemulun luk dat? Na tu! Ui meluun pian neneh uren idi mulun.

24"Iamo' kudeng lemulun luk matu ugka' nganau' luk do' idi ngimun nganau' kekamen luk dat mepad kudeng lemulun luk dat, miakké ieh mulun? Na tu!

Kekammeneh luk do' pana' na miak uen ngerawé. Ieh miak maté ngaceku na lutep idi ngaceku sala'neh.

²⁵"Iamo' kebala muyuh, 'Luk ruen Tuhan ineh na matu.' Ninger balaKu, O muyuh lun Israil. Kian, muyuh ngerawé ukumKu na matu. Setuneh kekamen muyuh luk na matu.

²⁶Kudeng lemulun luk matu ugka' nganau' luk do', pad ieh maté, setuneh ieh maté ngaceku kekammeneh luk dat.

²⁷Kudeng lemulun luk dat ugka' nganau' sala', idi ngimun nganau' luk matu idi do', ieh ngulun bururneh sebuleng.

²⁸Ieh kali' sala'neh idi ugka' nganau' luk dat, pad ieh na maté. Ieh miak mulun.

²⁹Idi kebala muyuh lun Israil, 'Luk ruen Tuhan ineh na matu.' Muyuh ngerawé ukumKu na matu. Setuneh kekamen muyuh luk na matu.

³⁰"Ui ini, Tuhan Allah, ngukum nemuyuh lun Israil maya' kekamen muyuh. Do' teketed ratnan kekamen muyuh luk dat, idi aleg nima' sala' muyuh ngaté nemuyuh.

³¹Do' muyuh ugka' ratnan kekamen muyuh luk dat, idi do' ngalap terawé idi niat luk mebaruh. Ngudehké muyuh lun Israil pian maté?"

³²Kebala Tuhan Allah, "Na Ui mawang niat ku até lemulun. Do' ugka' nganau' sala' idi mulun."

Yehiskiel 19

¹Allah nengecuk negku menani aceh nani luk inan dat niat kuan dueh raca' Israil.

²Tinanmu ineh balang. Ieh nengasa' anakneh arang anak balang deléi.

³Ieh nengasa' sebuleng anakneh, idi nemada' neneh nakap akan, pad ieh nakap lemulun kenneh.

⁴Amung pupu neninger balaneh, idi nengabang neneh bang lubang. Ideh nenganau' neneh bang belalung, idi nenguit neneh amé' Masir.

⁵Tineh ineh na inan rapet teh. Idi ieh nengasa' sebuleng anakneh teh, pad ieh mangun ku balang luk mesangit.

⁶Kareb ieh rayeh ieh nemaya' balang baken amé' nakap akan. Ieh nesibada' nakap akan, pad ieh kuman lemulun.

⁷Ieh nengusag tuda'-tuda' bawang luk linibung idi bawang rayeh pana'. Lemulun bang bawang ineh pelaba tot kareb ieh ngeku.

⁸Amung pupu nepamung pian munu' neneh; lemulun nacing rat iapeh-iapeh. Ideh nemalad rabatdeh, idi nengakem neneh ku abpungdeh.

⁹Ideh nenganau' neneh bang belalung, idi nenguit neneh kuan Raca' Babil. Ideh nematar neneh, pad na lun ninger neneh ngeku teh, luun amung surud déi' bawang Israil.

¹⁰Tinanmu mepad kudeng anggur, luk tinibu tangeb arur. Ngaceku petap abpa', idi mula' don idi bua'neh.

¹¹Angat-angat anggur ineh metueh, pad ideh mangun ku rukud raca'. Idi lawa anggur netemubu' macing nan laput, Amung lemulun kali' neneh mula' don idi medita'.

¹²Iamo' ieh binubput ku gateh idi talan luun tana'. Bui rat pa busat aco nengekering bua'neh. Angatneh pana' tinutu' pad ideh tekering idi sabpen.

¹³Nekini ieh pangeh tinibu déi' su luk ali-ali ieh ineh luun tana' luk tekering idi luk na abpa'.

¹⁴Lawaneh nekaneh ku apui pad angatneh idi bua'neh pana' neseb. Idi angatneh pana' na metueh teh pad na mangun ku rukud raca'. Ini aceh nani luk inan dat niat luk megéi' uen menani.

Yehiskiel 20

¹Pulu' aceh bulan limeh bang lak luk ketudu', sebuang lun rayeh lun Israil iné' negku pad ngitun pian Allah. Ideh netudo pa kiungku,

²idi kebala Tuhan negku,

³"O lemulun, mada' luk belén Tuhan Allah nan lemulun ini, 'Muyuh macing Negku pad ngitun pianKuké?' Ui ini Tuhan luk mulun. Idi muyuh na miak ngitun Negku anun-anun. Ui ini Tuhan Allah pangeh nepebala.

⁴"O lemulun, temina'ké iko ngukum nedeh? Do' iko ngukum nedeh. Nganau' nedeh ngerawé ratnan kekamen tepundeh luk dat ineh.

⁵Mada' luk belénKu nedeh. Kareb Ui nemili' Israil, Ui nepebulung nedeh. Ui nengegala' bururKu nedeh déi' bawang Masir idi nepebala nedeh, 'Ui ini Tuhan Allah muyuh.'

⁶Kareb ineh Ui nepejani' nguit nedeh remuat rat bang bawang Masir macing inan tana' luk pinili'Ku kuandeh, ieh ineh tana' luk mebaleng idi luk meluun do'.

⁷Ui nengecuk nedeh nala' akangdeh luk pelaba dat luk inandeh mawa, pad ideh na ngelutak bururdeh ku allah luk mebalih rat Masir, ngaceku Ui ini Tuhan Allahdeh.

⁸Iamo' ideh sikal metueh rat Negku idi ara' ninger balaKu. Na ideh nenala' akangdeh luk pelaba dat idi na ideh nenecan amung allah lun Masir. Ui netemina' ngukum nedeh ku usehKu déi' bawang Masir.

⁹Iamo' na Ui nengukum nedeh, pad Ui na ngigu' ngadanKu pa kiung lun pupu baken bang bawang ineh, ngaceku Ui pangeh nepejani' nguit nelun Israil remuat rat bang bawang Masir.

¹⁰"Idi Ui nenguit nedeh remuat rat bang bawang Masir amé' déi' su luk ali-ali.

¹¹Ui nemaré bada'Ku nedeh, idi nemada' nedeh ratnan amung ukumKu, luk ngacing ulun kuan lemulun luk maya' nedeh.

¹²Ui nenganau' Aco luk inan Mudeng mangun ku tanu' jani' kai, pad ideh kali' Ui ini Tuhan ngeligan nedeh.

¹³Iamo' déi' su luk ali-ali pana', ideh sikal metueh rat Negku. Ideh nengelaba ukumKu idi na nemaya' bada'Ku luk ngacing ulun kuan idé-idé luk maya'

nedeuh. Ideh na nemaya' ukum ratnan Aco luk inan Mudeng. Ui netemina' ngukum nedeuh ku usehKu déi' su luk ali-ali, pad Ui ngaté nedeuh.

¹⁴Iamo' na Ui nengukum nedeuh, pad Ui na ngigu' ngadanKu, ngaceku pupu baken ineh pangeh nenier Negku nguit nelun Israil remuat rat bang bawang Masir.

¹⁵Idi Ui nepebulung déi' su luk ali-ali pelé Ui na nguit nedeuh macing inan tana' luk pangeh biréKu nedeuh, ieh ineh tana' luk mebaleng idi luk meluun do'.

¹⁶Ui nepebulung ngaceku ideh na nemaya' bada'Ku idi nengelaba ukumKu, idi na nemaya' ukum ratnan Aco luk inan Mudeng. Ideh meluun pian sembayang inan akangdeh.

¹⁷"Iamo' Ui méi' nedeuh. Na Ui nengaté nedeuh déi' su luk ali-ali.

¹⁸Ui nengecuk anakdeh su ineh, kebalaKu, 'Aleg maya' ukum luk inau' tepun muyuh; idi aleg maya' adatdeh, idi aleg ngelutak burur muyuh ku akangdeh.

¹⁹Ui ini Tuhan Allah muyuh. Do' maya' ukumKu idi bada'Ku.

²⁰Do' ngeligan Aco luk inan Mudeng, pad ieh mangun ku tanu' jani' luk inau' tau, pelé muyuh kali' Ui ini Tuhan Allah muyuh.'

²¹"Iamo' anak-anak inuldeh pana' sikal metueh rat Negku. Ideh nengelaba ukumKu idi na nemaya' bada'Ku, luk ngacing ulun kuan idé-idé luk maya' nedeuh. Ideh na nemaya' ukum ratnan Aco luk inan Mudeng. Ui netemina' ngukum nedeuh ku usehKu déi' su luk ali-ali, pad Ui ngaté amung-amungdeh.

²²Iamo' na Ui nengaté nedeuh, pad Ui na ngigu' ngadanKu arang pupu baken luk nenier Negku nguit nelun Israil remuat rat bang bawang Masir.

²³Idi Ui nepebulung teh déi' su luk ali-ali, kebalaKu, Ui miak ngatad nedeuh amé' aput-apat tana'.

²⁴Ui nenganau' ineh ngaceku ideh na nemaya' bada'Ku, idi ideh nengelaba ukumKu, idi na nemaya' ukum ratnan Aco luk inan Mudeng; idi ideh nesembayang inan akang tepundeuh.

25"Ngaceku ineh Ui nemaré kuandeh ukum luk na do', idi adat luk na miak ngacing ulun kuandeh.

26Ui nenima' nedeh ngelutak bururdeh ku barédeh sebuleng, idi ideh nemaré anakdeh luk atun ku baré, pad ini mangun ku ukum, pelé Ui ngegala' kuandeh ratnan Ui ini Tuhan.

27"O lemulun, do' mada' luk belénKu nelun Israil. Kudeng ini teh tepundeh nengedat Negku ku lawédeh luk na lutep.

28Ui nenguit nedeh iné' inan tana' luk pijani'Ku kuandeh. Kareb ideh nenier pegkung-pegkung luk medita' idi lawa kayuh luk mebata', ideh nemaré baré luun anid pegkung ineh. Ideh nenganau' Negku museh ku baré luk isebdeh, idi baré luk rupen luk inuitdeh.

29Ui nengitun nedeh, 'Anunké su luk medita' ineh luk ulek muyuh?' Idi macing nekini ideh tinten, 'Su Luk Medita.'

30Do' mada' luk belénKu nelun Israil. Ngudehké muyuh nganau' sala' luk kikem tepun muyuh, pad muyuh melili ku akangdeh?

31Macing nekini pana' muyuh maré baré luk mepad, idi ngelutak burur muyuh akang ineh, idi maré anak muyuh ku baré lemaba apui. Idi muyuh lun Israil na ugka' ngitun luk pianKu. Ui ini Tuhan Allah luk mulun. Ui na nima' nemuyuh ngitun anun-anun Negku.

32Pian muyuh mangun mepad kudeng pupu baken, ieh ineh mepad kudeng pupu luk tudo bang bawang baken idi luk sembayang inan lawa kayuh idi batu pana', iamo' na ineh miak mangun."

33"Ui ini Tuhan Allah luk mulun, idi Ui miak ngimet nemuyuh ku ticu' luk metueh, dengan amung lalud idi usehKu.

34Ui miak ngegala' lalud idi usehKu, kareb Ui ngamung nemuyuh idi nguit nemuyuh lemubed ratnan amung bawang su luk inan muyuh pangeh pitad.

35Ui nguit nemuyuh macing déi' 'Su luk Ali-Ali kuan Amung Pupu,' pad Ui papu' nemuyuh su ineh idi ngukum nemuyuh.

³⁶Ui ngukum nemuyuh mepad kudeng Ui nengukum tepun muyuh déi' Sinai, ieh ineh déi' su luk ali-ali." Kudeng ini bala Tuhan Allah.

³⁷"Idi Ui miak ngimet nemuyuh dengan metueh pad muyuh maya' jani' ineh.

³⁸Ui miak ngatad rat arang muyuh lemulun luk sikal metueh rat Negku idi luk nganau' sala'. Ui miak ngalap nedeh ratnan bawang luk inandeh tudo nekini, iamo' na Ui nima' nedeh muli' amé' bawang Israil, pad muyuh kali' Ui ini Tuhan."

³⁹Kebala Tuhan Allah, "O lun Israil, aganeh muyuh sembayang nan akang muyuh! Iamo' Ui periteteng nemuyuh, mucu ratnan ineh, na miak na muyuh maya' balaKu, pad muyuh na ngigu' ngadanKu luk meligan teh ratnan baré muyuh kuan akang."

⁴⁰Kebala Tuhan Allah, "Déi' bang bawang Yerusalim, luun surudKu luk meligan, ieh ineh luun pegkung Israil luk medita', amung muyuh lun Israil miak sembayang Negku. Kareb ineh Ui mawang niat nemuyuh, idi na miak na muyuh nguit amé' Negku, amung baré muyuh, bua' luk atun, idi baré muyuh luk meligan.

⁴¹Kareb Ui pangeh nenguit nemuyuh remuat rat bang bawang su luk inan muyuh pangeh pitad, pad Ui ngamung nemuyuh, idi Ui miak ngalap baré luk sabpen muyuh. Ngaceku muyuh pian sembayang Negku, idi lun pupu baken miak kali' Ui ini luk meligan.

⁴²Kareb Ui nguit nemuyuh muli' amé' bawang Israil luk pijani'Ku kuan tepun muyuh, idi muyuh miak kali' Ui ini Tuhan,

⁴³pad muyuh ngerawé ratnan amung-amung kekamen muyuh luk dat luk nengelutak burur muyuh, pelé muyuh megateh inan burur muyuh sebuleng, ngaceku amung kekamen muyuh luk dat.

⁴⁴Kareb ineh muyuh kali' Ui ini Tuhan, ngaceku na Ui ngukum nemuyuh maya' sala' muyuh idi kekamen muyuh luk dat, iamo' Ui miak matar ngadanKu." Tuhan Allah pangeh nepebala.

⁴⁵Kebala Tuhan Allah negku,

⁴⁶"O lemulun, nier pa kabing busat aco. Mada' bawang luk pa kabing busat aco, idi mada' bala luk barén Tuhan kuan pulung luk pa kabing busat aco.

⁴⁷Ngaceku pulung luk pa kabing busat aco niner bala Tuhan Allah. 'Siruh, Ui pian ngulun apui luk miak ngeseb anid lawa kayuhmu luk tekering idi anid lawa kayuhmu luk mebata!' Apui ineh na miak uen ngaté. Ieh miak meperuit rat pa kabing busat aco macing pa tinueh busat aco, pad ngilud kiung anid lemulun,

⁴⁸pelé amung lemulun kali' Ui ini Tuhan pangeh nengulun apui luk na miak uen ngaté.' "

⁴⁹Idi kebalaku, "O Tuhan Allah, amung lemulun ngilang negku, ngaceku ui megéi' pebala ratnan luk pinginud."

Yehiskiel 21

¹Kebala Tuhan negku,

²"O lemulun, do' ngadu' bawang Yerusalam, idi ngadu' su luk inan pupu ineh sembayang. Mada' bawang Israil,

³Kudeng ini bala Tuhan, Ui pian munu' nemuyuh, idi ngaté nemuyuh ku pelapetKu, do' lemulun luk do' idi lemulun luk dat pana',

⁴ngaceku Ui miak ngaté lemulun rat pa tinueh busat aco macing pa kabing busat aco ku pelapetKu.

⁵Amung lemulun miak kali' Ui pangeh nenginat pelapetKu idi na pian nganug neneh bang binanneh baruh teh.'

⁶"O lemulun, do' iko ngarod rayeh-rayeh siren amung lemulun mepad kudeng lemulun luk na merapet.

⁷Kareb ideh ngitun namu anun punmu ngarod, do' mada' nedeh ratnan luk miak mangun. Mada' nedeh ratnan tot luk miak manu' niatdeh. Ticu'deh miak melaya', pad ideh na mekuu' teh. Alebdeh pana' megegker. Tarekneh pangeh macing." Tuhan Allah pangeh nepebala.

⁸Kebala Tuhan negku,

- ⁹"O lemulun, mada' bala luk biré Tuhan. Mada' pupu ini luk belén Tuhan: Pelapet, ieh ineh pelapet luk metadem idi mesilo;
- ¹⁰inau' metadem pad miak ngaté, idi merasat mepad kudeng kilep. Ieh na miak uen ngagka', ngaceku muyuh na neninger bada'.
- ¹¹Pelapet ineh uen mesilo, pad ieh temina' uen makai. Ieh metadem idi mesilo, temina' kuan lemulun luk ngaté.
- ¹²Ngarod idi nangi', O lemulun; pelapet ini tinina' kuan pupuKu, idi kuan amung lun rayeh Israil. Ideh miak pitayen denga pupuKu luk baken. Do' mepag ruukmu ku susa' niatmu!
- ¹³Ui nutun pupuKu, idi kudeng ideh ara' uren, kali' rungen amung ini mangun kuandeh.
- ¹⁴"O lemulun, do' iko mada' bala luk biré Tuhan. Mepag paladmu, idi pelapet miak ngaté dueh, teluh kua'. Pelapet ineh ngatot idi ngaté,
- ¹⁵pad pupuKu na mekuu' idi metebaceng. Ui ngatot bawangdeh ku pelapet luk merasat, mepad kudeng kilep idi luk temina' ngaté.
- ¹⁶O pelapet luk metadem, natek pa kabing idi pa tinueh! Natek pad iapeh ulekmu.
- ¹⁷Ui miak mepag paladKu, pad usehKu ugka'. Ui ini Tuhan pangeh nepebala.”
- ¹⁸Kebala Tuhan negku,
- ¹⁹"O lemulun, do' nabpu' dueh dalam luk bén raca' Babil dengan pelapetneh. Dueh dalam ineh remuat rat bang sebuleng bawang mo'. Do' nganau' tanu' su lisangen dalam.
- ²⁰Aceh tanu' mada' dalam luk bén raca' amé' Raba luk bang bawang Amon, idi luk baken mada' dalam amé' Yahuda, petacu semuet bang Yerusalim.
- ²¹Raca' Babil tuped iring tanu' déi' lisangen dalam, idi ieh ngimet tuda'-tuda' ileb idi nengebpeh nedeh luun tana' pad ieh kali' sapeh dalam luk bénneh. Idi teh ieh nala' udi, idi nier até pung luk kirat.

²²Bang paladneh luk pa tinueh ieh ngimet ileb luk nicul Yerusalim. Ileb ineh ngecuk neneh amé' mudut repapeh luk ku ngusag bawang idi ngitang ngecuk lemulun amé' pebunu'; repapeh luk ku ngusag bawang ineh uen ngerareng iring tanga' bawang, idi ibpeng dengan abang pana' miak ruendeh.

²³Lun Yerusalim na manu ku ineh ngaceku jani' luk pangeh pinututdeh. Iamo' bada' luk biré atun ineh mada' nedeh ratnan sala'deh idi mangun ku tanu' ratnan ideh tebanen.

²⁴Kudeng ini bala Tuhan Allah. Sala' muyuh pangeh ginala'. Amung lemulun kali' muyuh mesala'. Sala' muyuh megala' bang kekamen muyuh. Muyuh kali' rungen mesala', idi Ui maré nemuyuh bang palad bunu' muyuh.

²⁵"O raca' Israil luk dat idi luk na meligan. Tarekmu pangeh nacing, ieh ineh aco luk inanmu kumin.

²⁶Ui ini Tuhan Allah pangeh nepebala. Do' ngedita' luk mebeneh, idi ngebeneh luk medita'!

²⁷Yerusalim uen ngusag. Matu, Ui ngusag bawang ineh. Iamo' ini na miak mangun pad macing Ui pangeh nemili' lemulun luk ngukum bawang ineh.

²⁸"O lemulun, do' iko mada' bala luk biré Tuhan. Kudeng ini bala Tuhan Allah ratnan lun Amon luk ngedat nelun Israil. Do' mada' nedeh, kebalamu, 'Pelapet ineh temina' ngusag; ieh mesilo pad miak ngaté, idi merasat kudeng kilep.'

²⁹Mada' nelun Amon ratnan luk sirendeh luk na matu, idi ratnan bada'deh luk mebalih. Lun Amon ineh pelaba dat. Tarekdeh pangeh nacing, ieh ineh aco luk inandeh miak kumin. Pelapet ineh miak macing nan dierdeh.

³⁰"Nganug pelapetmu bang binanneh. Ui ngukum namu bang su luk inanmu pangeh pinudut, ieh ineh bang bawang su luk inanmu tinganak.

³¹Iko miak kali' usehKu kareb usehKu namu mepad kudeng apui luk mebudung. Ui maré namu bang palad lemulun luk mesangit luk mileh ngusag,

³²pad iko uen ngusag ku apui. Dara'mu uen ngutang bang bawangmu sebuleng, pad na lemulun ngerawé namu teh!" Tuhan pangeh nepebala.

Yehiskiel 22

¹Kebala Tuhan negku,

²"O lemulun, inanké iko temina' ngukum bawang luk mepanu' ku lun luk ngaté? Mada' neneh ratnan amung-amung kekammenneh luk dat.

³Kudeng ini bala Tuhan Allah: Ngaceku iko pangeh nengaté mula' pupumu sebuleng, idi ngaceku iko pangeh nengelutak bururmu sebuleng, ngaceku sembayang inan akang, kali' rungen tarekmu macing.

⁴Iko mesala' ngaceku amung até ineh, idi iko melutak ku akang luk inau'mu ineh idi nekini tarekmu macing. Ini punneh Ui nenima' amung pupu situnga namu, idi amung bawang meriruh nier namu.

⁵Bawang luk muneng idi bawang luk mado pana' meriruh ngaceku iko mebala ku ria' luk na pinutut.

⁶Amung lun rayeh Israil merapet ku tuehdeh sebuleng idi megéi' ngaté lemulun.

⁷Seburur pana' rat arang muyuh nateh luk ngedita' tamantinanneh. Muyuh naluk nelun pupu baken idi muyuh muyok decur tinula' idi anak maté pana'.

⁸Muyuh na ngerawé su luk meligan, idi teh muyuh na maya' ukum ratnan Aco luk inan Mudeng.

⁹Sebuang lemulun ngadu' nelun baken pad ideh pitayen. Sebuangdeh kuman luk barén kuan akang. Idi sebuangdeh megéi' maya' pinian bururdeh.

¹⁰Sebuangdeh pasét nan awan tamandeh. Sebuangdeh pamung dengan decur kareb macing bulan.

¹¹Ideh megéi' pasét idi ngubuk ibandeh luk decur idi kinanakdeh luk pamung taman pana'.

¹²Sebuang pupumu ngaté lemulun pad ngalap usin. Sebuangdeh maré usin kebiten lun Israil pad ideh ngalap utung luk rayeh. Ideh nekelupan Negku." Tuhan Allah pangeh nepebala.

¹³"Ui miak ngukum namu ngaceku iko mano idi ngaté lemulun.

¹⁴Inanké kuu'mu, idi inanké tueh ticu'mu teh, kareb Ui pangeh nengukum namu? Ui ini Tuhan pangeh nepebala, idi Ui nganau' luk bilaKu.

¹⁵Ui miak ngatad pupumu amé' bang anid bawang idi arang anid pupu pad ngagka' kekamenmu luk dat.

¹⁶Idi pupu baken miak situnga namu, O Yerusalim, pad iko kali' Ui ini Tuhan."

¹⁷Kebala Tuhan negku,

¹⁸"O lemulun, lun Israil na ulek kuanKu. Ideh mepad kudeng teceh tekaling, semara' luk mebuda', belawan, idi semara' luk mitem kareb pirak pangeh linigan bang tetel.

¹⁹Ngaceku ineh, kudeng ini bala Tuhan Allah: Ideh na ulek. Ui miak ngamung nedeh bang bawang Yerusalim

²⁰mepad kudeng lemulun nganau' pirak, tekaling, belawan, semara' luk mitem, idi semara' luk mebuda' bang tetel luk ngeligan.

²¹Matu, Ui miak ngamung nedeh bang Yerusalim, idi nganau' apui pa liangdeh, pad ideh remuno ku usehKu.

²²Ideh remuno déi' Yerusalim mepad kudeng pirak remuno bang tetel, pelé ideh kali' ideh nekaneh useh Tuhan."

²³Kebala Tuhan negku teh,

²⁴"O lemulun, mada' nelun Israil, kudeng ini bala Tuhan: Muyuh mepad kudeng aceh bawang luk na inan udan idi luk na linigan, luk miak kumin ku usehKu.

²⁵Lun rayehdeh mepad kudeng balang luk ngeku ku pung luk pinatédeh. Ideh ngaté lemulun idi ngaro amung usin idi binaweh luk miak lapendeh, pad ideh inan mula' decur tinula'.

²⁶Imam-imam ngelaba ukumKu, idi na ngerawé luk meligan. Ideh na ngiti arang luk meligan idi luk na meligan, idi ideh na maya' ukum ratnan Aco luk inan Mudeng. Ngaceku ineh lun Israil na ngerayeh Negku.

²⁷Lun luk ngimet mepad kudeng bungalé luk ngeramit pung luk pinatédeh. Ideh ngaté lemulun pad mangun ku lun do'.

²⁸Nabi-nabi pangeh nengalum sala'deh mepad kudeng lemulun nat alad ku sat luk mebuda'. Luk sirendeh na matu idi luk beléndeh pana' mebalih. Kebaladeh, ideh mada' bala Tuhan Allah, iamo' Ui ini Tuhan na nepebala nedeh.

²⁹Lun do' naluk idi mano. Ideh ngedereh nelun masi' idi muyok nelun pupu baken.

³⁰Ui nenakap lemulun luk miak mudut aceh libung, idi luk miak tuped su luk inusag, pad matar bawang kareb ieh uen ngusag ku usehKu, iamo' nateh luk nekali'Ku.

³¹Ngaceku ineh Ui ngukum nedeh ku usehKu, idi ngeseb nedeh mepad kudeng apui ngaceku amung kekamendeh." Tuhan Allah pangeh nepebala.

Yehiskiel 23

¹Tuhan nepebala negku,

²"O lemulun, inan dueh denganak decur.

³Kareb didueh anak adi' déi' bawang Masir, didueh pasét idi mangun ku decur luk mesawa'.

⁴Ngadan kinanakneh aceh luk rayeh, ieh ineh Oholah (luk pinginud Samaria), idi ngadan kinanakneh aceh luk isuut, ieh ineh Oholibah (luk pinginud Yerusalim). Ui nengaweh nedidueh idi didueh inan anak.

- ⁵Sagan tu pana' ieh awanKu, Oholah megéi' pasét idi melili ku deléi luk inanneh mawa rat bawang Asur, ieh ineh lun pebunu'
- ⁶luk ngayung ku ayung luk mesia' merirem, lun do' idi lun rayeh pebunu' pana', amungdeh anak adi' luk do' taga idi lun rayeh lun luk maya' kuda.
- ⁷Ieh mangun ku decur luk mesawa' kuan amung lun rayeh baweh Asur, idi lilineh ineh nenguit neneh ngelutak bururneh ngaceku sembayang inan akang lun Asur.
- ⁸Ieh nengimun pasét déi' bawang Masir idi na ugka' teh. Rat kareb ieh anak adi', deléi pamung rudap neneh mepad kudeng dengan decur luk mesawa',
- ⁹pad Ui nemaré neneh kuan lun Asur luk inanneh mawa idi luk pianneh.
- ¹⁰Ideh nengelebpa neneh, idi nenaban anakneh luk deléi idi decur teh, idi ideh nengaté neneh, pad decur iapeh-iapeh pana' ngatum bala ratnan kekipedneh.
- ¹¹"Sagan tu pana' Oholibah nekali' amung ineh, ieh meluun dat idi ucet pasét meluun ratnan kinanakneh Oholah.
- ¹²Ieh panu' ku lili inan lun rayeh lun Asur idi lun rayeh pebunu', ieh ineh lun pebunu' luk ngayung ku ayung luk do' taga — idi nan lun rayeh baweh luk maya' kuda, amungdeh anak adi' luk do' taga.
- ¹³Ui nekali' neneh decur luk mesawa', idi didueh mepad dat.
- ¹⁴⁻¹⁵"Idi ieh iuk-iuk ucet pasét. Idi teh ieh melili ku ayu lun rayeh-rayeh Babil luk inarit luun alad luk sinat ku sat mesia', dengan abet awa'deh idi sigardeh pana'.
- ¹⁶Kareb ieh nenier nedeh, idi ieh mepanu' ku lili, pad ieh nengecuk nelun dukenneh amé' nedeh déi' Babil.
- ¹⁷Idi lun Babil ineh iné' pasét neneh. Ideh nengelutak neneh, pad ieh museh nedeh.

¹⁸Ieh pasét dengan megalá', pad amung lemulun kali' neneh decur luk mesawa'. Ui megileg ku kekammeneh mepad kudeng Ui megileg ku kekamen kinanakneh.

¹⁹Ieh meluun ucet pasét, mepad kudeng luk inau'neh kareb ieh anak adi' decur luk mesawa' déi' Masir.

²⁰Ieh pelaba pian ku deléi luk ucet ku decur mepad kudeng keladai idi kuda ucet ku tineh."

(²¹O Oholibah, iko pian nginud kekamenmu luk dat kareb iko anak adi' déi' Masir, kareb deléi marot ku iti'mu pad iko pasét.)

²²"O Oholibah, kudeng ini bala Tuhan Allah: Iko musam ku deléi ineh luk mawa namu, iamo' Ui nganau' nedeheh megateh namu pad ideh ngelibut namu.

²³Ui nguit amung lun Babil idi lun Kasdim, lun rat Pekod, Sua, Kua, idi amung lun Asur. Ideh ineh lun do' idi lun rayeh rat arang anak adi' luk do' taga. Amungdeh lun rayeh luk ngimet idi lun rayeh baweh luk maya' kuda.

²⁴Ideh miak ngerieng namu rat pa tinueh busat aco, dengan aceh baweh rayeh luk nguit keréta bunu' idi keréta luk nguit repapeh pana'. Ideh miak ngelibut namu dengan ayung utap idi tupi lun pebunu'. Ui maré namu bang paladdeh, pad ideh ngukum namu maya' ukumdeh.

²⁵Ngaceku Ui megateh namu, Ui miak nima' nedeheh mulu' icungmu idi lalidmu idi ngaté anakmu pana'. Ideh ngalap anakmu luk deléi idi decur idi geseb nedeheh mulun.

²⁶Ideh narak ayungmu idi ngaro banému rat luun bururmu.

²⁷Ui ngagka' lilimu idi kekamenmu luk melutak luk inau'mu rat kareb iko déi' Masir, pad iko na nier akang idi ngerawé Masir.

²⁸Kudeng ini bala Tuhan Allah, "Ui maré namu bang palad lemulun luk inanmu museh idi megileg.

²⁹Idi ngaceku ideh megateh namu ideh miak ngalap amung-amung luk ilapmu, pad iko lubpa. Iko miak uen ngegala' dengan ayu decur luk mesawa'. Ini miak mangun ngaceku lilimu idi sétmu.

³⁰Iko pangeh mangun ku decur luk mesawa' kuan amung-amung pupu, idi nengelutak bururmu ku akangdeh.

³¹Iko nemaya' lawé kinanakmu, ngaceku ineh Ui ngukum namu mepad kudeng Ui ngukum kinanakmu ineh.”

³²Kebala Tuhan Allah, "Iko miak ngirup ratnan sangkir kinanakmu; ieh rayeh idi medalem. Amung lemulun miak situnga namu; sangkir ineh mepanu'.

³³Iko miak mesusa' niat idi mabuk, ku sangkir tot idi usag, ieh ineh sangkir kinanakmu Samaria.

³⁴Iko miak ngirup amung luk bang sangkir ineh, idi ngurat ruukmu ku bila'neh. Ui ini Tuhan pangeh nepebala.”

³⁵Kudeng ini bala Tuhan Allah, "Ngaceku iko nekelupan Negku idi neteketed rat Negku, iko miak medereh ngaceku lili idi sétmu.”

³⁶Kebala Tuhan negku, "O lemulun, temina'ké iko ngukum ni Oholah idi Oholibah? Do' ngadu' nedidueh ngaceku kekamen didueh luk dat.

³⁷Didueh sala' pasét idi ngaté lemulun — didueh nepasét nan akang idi nengaté anak-anak luk tinganak didueh kuanKu. Didueh nemaré anak didueh ku baré kuan akang ineh.

³⁸Meluun teh, didueh nengelutak Ruma'Ku idi na nemaya' ukum ratnan Aco luk inan Mudeng, luk pangeh litepKu.

³⁹Pangeh didueh nengaté anak-anakKu mangun ku baré kuan akang ineh, bang aco sineh didueh iné' Ruma'Ku idi nengelutak neneh. Ineh luk inau' didueh bang Ruma'Ku!

⁴⁰"Didueh nengecuk nelun duken amé' nawar deléi rat bawang luk mado, idi deléi ineh nacing. Didueh decur ineh nedi' idi nenat mateh idi nenganau' bané.

⁴¹Didueh netudo luun pagau luk do' dengan aceh méja pa kiung didueh. Idi didueh nengerareng luun méja ineh umau luk do' buen idi umau saitun luk biréKu nedidueh.

⁴²Arod lemulun luk marot pedingeren, ieh ineh deléi luk inuit rat déi' su luk ali-ali. Ideh nenganau' leku' luun langen dueh decur ineh idi pata luun uluh didueh.

⁴³Idi keterawéKu, ideh pasét nan decur luk mengered bang sét.

⁴⁴Ideh pesua' amé' nedidueh mepad kudeng deléi amé' nan decur luk mesawa'. Kudeng ineh teh lawédeh ni Oholah idi Oholibah, decur luk pasét ineh.

⁴⁵Lemulun luk matu miak ngukum nedidueh ngaceku pasét idi ngaté lemulun, ngaceku didueh megéi' pasét idi teh inan dara' luun ticu' didueh.”

⁴⁶Kudeng ini bala Tuhan Allah, "Nguit aceh baweh idi ngatot nedidueh idi ngaro binaweh didueh.

⁴⁷Nima' baweh ineh mitung nedidueh ku batu idi ngeret nedidueh ku pelapet, idi ngaté anak didueh idi ngeseb ruma' didueh.

⁴⁸Ui miak ngagka' sét aput bawang ineh, pad mebpeng decur na pasét mepad kudeng didueh.

⁴⁹Idi menganak miak kuminKu ngaceku sala' pasét idi sembayang nan akang. Idi medueh kali' Ui ini Tuhan Allah."

Yehiskiel 24

¹Pulu' aco, bulan pulu' bang lak luk keiwa' Tuhan nepebala negku.

²KebalaNeh, "O lemulun, do' ngayud aco bulan aco sini, ngaceku aco sini raca' Babil ngimun ngerieng Yerusalim.

³Mada' luk pinginud ini kuan pupuKu luk sikal metueh. Kudeng ini bala Tuhan: 'Nganau' lacang luun apui, idi manu' neneh ku abpa'.

⁴Nganau' uang pung luk meluun do' — lipneh, kukudneh, idi uang luk muneng ku tulangneh.

⁵Ngalap uang ratnan dumba luk meluun do', idi nganau' mula' kayuh iang lacang ineh. Nima' abpa' ineh menok, idi nanek tulang denga uang ineh.' “

⁶Kudeng ini bala Tuhan Allah, "Bawang lun luk ngaté pangeh inukum! Ieh mepad kudeng lacang luk metugor luk na tu isa. Uang pung ineh ilap tesebuleng-tesebuleng pad na luk ketecan.

⁷Ngaceku ina até bang bawang rayeh. Iamo' dara' na inutang luun tana' su luk inan abuh miak ngapung neneh. Iamo' ieh inutang luun batu.

⁸Ui nenecan dara' ineh su ineh, su luk inanneh na miak pungen, idi su luk inanneh miak mutuh ua'.”

⁹Kudeng ini bala Tuhan, "Bawang lun luk ngaté pangeh inukum! Ui sebuleng miak ngamung kayuh apui.

¹⁰Do' nguit kayuh apui teh! Ngiup apui! Nanek uang pung. Nanek pad abpa'neh mekeket. Do' ngeseb tulangneh!

¹¹Do' nganau' lacang tekaling ineh luk na uang luun bareh apui pad ieh mesia'. Idi tugorneh miak buro pad lacang ineh meligan baruh.

(¹²Iamo' baken amung tugorneh buro ku apui.)

¹³O Yerusalim, kekamenmu luk dat pangeh nengelutak namu. Sagan tu pana' Ui nenutun ngeligan namu, iko melutak teh. Iko na mangun meligan teh kareb nateh iko kali' usehKu luk mebura'.

¹⁴Ui ini Tuhan pangeh nepebala. Tarekmu pangeh nacing, pad Ui na miak méi' namu idi mekelupan datmu. Iko miak kumin ngaceku amung kekamenmu." Tuhan Allah pangeh nepebala.

¹⁵Kebala Tuhan negku,

¹⁶"O lemulun, denak-denak Ui sikal ngalap lemulun luk inanmu meluun awa. Aleg iko medureng, temindo, idi nangi'.

¹⁷Aleg tangi'mu pedingeren lun baken. Aleg iko nacung, iamo' ngayung ku sigar idi kasutmu. Aleg ngebpu kiungmu, idi aleg kuman akan lun luk nacung.”

¹⁸Bang pekak ineh ui nepegayam nelun mula'. Idi malem ineh awanku naté. Kenebpa ui nenganau' luk pangeh bila Tuhan negku.

¹⁹Kebala lun mula', "Ngudehké iko nganau' luk kudeng ineh?"

²⁰Kebalaku nedeh, "Tuhan nengecuk negku

²¹ngacing balaNeh ini nemuyuh lun Israil. Muyuh medita' niat ratnan raben Ruma' Allah ineh. Muyuh pian ngikak idi nier neneh. Iamo' Tuhan miak ngusag neneh idi anak muyuh luk isuut luk ketecan déi' Yerusalim miak pitayen bang bunu'.

²²Kareb ineh muyuh miak nganau' luk inau'ku ini. Muyuh na ngebpu kiung muyuh, idi na muyuh kuman akan lun luk nacung.

²³Muyuh miak ngayung ku sigar idi kasut muyuh. Idi na muyuh temido idi nangi'. Muyuh miak melaya' ngaceku sala' muyuh, pad muyuh ngarod seburur nan seburur.

²⁴Idi ui mangun ku tanu' kuan muyuh. Muyuh miak nganau' amung-amung luk inau'ku. Kebala Tuhan, "Kareb ini mangun idi muyuh miak kali' Ui ini Tuhan." "

²⁵Kebala Tuhan, "O lemulun, nekini Ui miak ngusag Ruma' Allah luk meraben luk inandeh medita' niat idi mawang niat, ngaceku ideh pian ngikak idi nier neneh. Idi Ui miak ngaté anakdeh luk deléi idi decur pana'.

²⁶Bang aco sineh, kareb Ui nganau' ineh, lemulun luk mepuit ratnan usag ineh miak amé' mada' namu.

²⁷Kareb aco sineh teh iko miak pebala teh idi pegayam neneh. Kudeng ineh teh iko mangun ku tanu' kuan lun mula', pad ideh kali' Ui ini Tuhan."

Yehiskiel 25

¹Kebala Tuhan negku,

²"O lemulun, do' mada' sala' bawang Amon.

³Ngecuk nedeh ninger bala Tuhan Allah, ieh ineh, 'Muyuh mawang niat kareb muyuh nenier Ruma'Ku linutak, idi bawang Israil inusag idi pupu Yahuda tiban.

⁴Ngaceku muyuh mawang niat ku ineh, Ui miak nima' pupu-pupu rat su luk ali-ali luk pa busat aco ngelaya' nemuyuh. Ideh miak lupu bang bawang muyuh idi tebawang su ineh. Ideh miak kuman bua' idi ngirup rata sapi' muyuh.

⁵Ui miak ngisu' bawang Raba mangun ku libung unta, idi Amon mangun ku libung dumba, pad muyuh kali' Ui ini Tuhan.'

⁶"Kudeng ini bala Tuhan Allah, 'Muyuh nemepag palad idi nuput ku awang niat muyuh. Muyuh nesitunga nan bawang Israil.

⁷Ngaceku ineh, Ui miak maré nemuyuh bang palad lun pupu baken, pad ideh ngaro binaweh muyuh. Ui miak ngusag nemuyuh pad muyuh na mangun ku aceh pupu teh, idi na luk idi bawang muyuh sebuleng teh. Kareb ineh muyuh miak kali' Ui ini Tuhan.' "

⁸Kebala Tuhan Allah, "Ngaceku kebala Moab, 'Yahuda ineh mepad kudeng amung pupu baken,'

⁹Ui miak nima' bawang luk matar lakan bawang Moab uen ngerieng, meluun teh bawang luk meluun do', ieh ineh Bait Yerimot, Baal Mion, idi Keriataim.

¹⁰Ui miak nima' pupu-pupu rat su luk ali-ali luk pa busat aco ngelaya' bawang Moab dengan bawang Amon, pad Moab pana' na mangun ku aceh pupu teh.

¹¹Ui miak ngukum Moab, pad ideh kali' Ui ini Tuhan."

¹²Kebala Tuhan Allah, "Dengan megateh niat lun Edom nengua' dat Yahuda, idi ngaceku ineh Edom mesala'.

¹³Kudeng ini bala Tuhan Allah: Ui miak ngukum Edom idi ngaté amung lemulun idi pung pana' bang bawang ineh. Ui nganau' bawang Edom mangun ku su luk ali-ali rat bawang Teman macing bawang Dedan. Amung pupu ineh pitayen bang bunu'.

¹⁴PupuKu lun Israil miak ngacing ua'Ku kuan Edom, pad Edom kali' usehKu luk rayeh. Edom miak kali' dereh ua'Ku neneh." Tuhan Allah pangeh nepebala.

¹⁵Kebala Tuhan Allah, "Dengan megateh niat lun Pilistin pangeh nengua' dat bunu'deh luk mon pad ideh pitayendeh.

¹⁶Kudeng ini bala Tuhan: Ui miak ngerieng nelun Pilistin pad ideh mabud. Ui miak ngaté amung lemulun luk neketecan luun Raked Pilistin.

¹⁷Ui ngukum idi ngua' nedeh dengan metueh, pad ideh kali' usehKu, idi teh ideh kali' Ui ini Tuhan."

Yehiskiel 26

¹Aceh aco bulan ... bang lak luk kepulu' aceh, kebala Tuhan negku,

²O lemulun, lun Sur ngitang ku awang niatdeh, kebaladeh, 'Bunu' tau Yerusalim pangeh inusag! Amung tanga'neh pangeh mukab kuan tau. Usagneh miak ngacing utung kuan tau!

³"Ngaceku ineh kudeng ini bala Tuhan: O bawang Sur, Ui ini bunu'mu. Ui nguit mula' pupu ngerieng namu. Ideh macing mepad kudeng ribut abpa' rayeh.

⁴Ideh miak ngusag libung bawangmu idi pudutmu luk medita' pana'. Ui miak ngapuh amung abuh pad batu mo' luk ketecan.

⁵Ieh mangun ku su luk inan midang rabat uned abpa' rayeh. Ui ini Tuhan Allah pangeh nepebala. Pupu baken miak ngaro binaweh Sur.

⁶Idi amung lun luk bang bawang isuut apud bawang Sur miak pitayendeh, pad Sur kali' Ui ini Tuhan."

⁷Kebala Tuhan Allah, "Ui nguit raca' luk meluun rayeh, ieh ineh Nebukadnesar, raca' Babil, pad ieh ngerieng Sur. Ieh macing rat pa tinueh busat aco dengan aceh baweh luk pelaba rayeh dengan kuda, keréta, idi lun luk maya' kuda.

⁸Lemulun luk bang bawang isuut ineh miak pitayen. Bunu' ineh miak ngukat abang idi nganau' ibpeng; idi utapdeh mangunku alad luk meraben pa kiungmu.

⁹Ideh miak ngusag libungmu ku repapehdeh luk ku ngusag bawang, idi teh ideh ngusag pudutmu luk medita' ku belawan.

¹⁰Kipuh luk mepalid ku kudadeh miak ngebpu namu. Uni kudadeh luk ngeruid keréta repapeh idi keréta pebunu' miak ngegio libungmu kareb ideh lemaba maya' tanga' bawang luk inusag ineh.

¹¹Lun luk upun maya' kuda luun dalanmu miak ngaté amung pupumu ku pelapetdeh. Amung dirimu luk meraben miak metabpa.

¹²Bunu'mu miak ngaro binawehmu idi luk pisuenmu pana'. Ideh miak ngusag amung aladmu idi ruma'mu luk do'. Ideh miak ngalap amung batu, kayuh, idi arap, talan bang abpa'.

¹³Ui miak ngagka' amung nanimu, idi uni giula'mu.

¹⁴Sebuleng batu mo' miak tacinKu, su luk inan lemulun midang rabatdeh. Bawang ineh na miak piduten baruh. Ui ini Tuhan pangeh nepebala.”

¹⁵Kudeng ini bala Tuhan Allah kuan bawang Sur: "Kareb iko uen ngelaya', lemulun luk tudo tangeb abpa' rayeh miak matot ku arod lemulun luk pitayen.

¹⁶Raca' amung pupu luk mileh maya' kapal déi' abpa' rayeh miak temurun rat luun kerusideh. Ideh miak ngelengu kuyu' raca'deh luk tibaruh, idi tudo luun tana' dengan megegker. Ideh pelaba tot ku ukummu, pad ideh na miak ugka' megegker.

¹⁷Ideh miak menani tido ini kuanmu: Bawang luk mebala ineh inusag! Kapalneh pangeh tila' rat luun abpa' rayeh. Pupu bawang ini nengimet abpa' rayeh, idi ngatot lemulun luk tudo tangeb abpa' rayeh.

¹⁸Nekini ieh pangeh netabpa. Amung pulau megegker. Idi pupudeh megagap ku usag ineh.' “

¹⁹Kebala Tuhan Allah, "Ui miak nganau' namu dat ali mepad kudeng bawang luk inusag idi luk tican. Ui mapen namu ku ribaruh abpa'.

²⁰Ui maré namu semuet bang su luk inan até, pad iko perurum nelun luk mulun bang kareb luk mon. Ui ngecuk namu tudo meparud pa liang tana' arang usag luk meruked dengan lun naté. Iko na miak lemubed rat ieneh, pad tudo bang tana' lun luk mulun.

²¹Ui nganau' namu mangun ku pinginud luk inan matot. Ieh ineh kekipedmu. Lemulun miak nakap namu, iamo' iko na miak kali'deh." Tuhan Allah pangeh nepebala.

Yehiskiel 27

¹Kebala Tuhan negku,

²"O lemulun, do' menani aceh tido kuan Sur,

³ieh ineh bawang luk tangeb abpa' rayeh idi luk pepua' dengan amung lemulun luk tudo tangeb abpa' rayeh. Kudeng ini bala Tuhan Allah: 'O Sur, iko medita' niat ratnan iko metaga.

⁴Ruma'mu ineh luun abpa' rayeh. Lun luk mudut namu nganau' namu kudeng kapal luk do' ayu.

⁵Amung bangarmu inau'deh ratnan kayuh tongor, idi kayuh tumuh rat Lebanon mangun ku dirimu.

⁶Ideh nengalap kayuh luk meraben rat Basan ku buému. Ideh nenganau' apinmu ratnan kayuh tongor rat Siprus. idi nengayung ineh ku gading.

⁷Kibung luk ku nganau' kapal nalan inau' ratnan kibung pu luk tibaruh rat Masir, pad megala' rat mado. Apomu inau' ratnan kibung luk meluun do', idi luk sia' merirem rat pulau Elisa.

⁸Lunmu luk mué ineh rat Sidon idi Arwad; idi lunmu luk mileh nengimet kapal.

⁹Lun ngakem kayuh luk luun kapal, ieh ineh lun mileh rat Gebal. Lun ngimet kapal rat anid kapal luun abpa' rayeh, iné' pepua' bang amung-amung kadaimu.'

¹⁰"Lun pebunu' rat Parsi, Lidia idi Libia, inan bang bawehmu. Ideh nengekito utap idi tupideh bang ruma' bawehmu. Idi teh ideh luk nengacing ubur kuanmu.

¹¹Lun pebunu' rat Arwad nematar libungmu, idi lun rat Gamad nematar pudutmu luk medita'. Ideh nengekito utapdeh luun aladmu. Idi teh ideh luk nenganau' namu metaga.

¹²"Iko pepua' déi' Tarsis, idi nengalap pirak, belawan, semara' luk mebuda', idi semara' luk mitem ku libal binawehmu luk mula' ineh.

¹³Iko pepua' déi' Grika, Tubal, idi Misek idi nengalap demulun idi tekaling ku libal binawehmu.

¹⁴Iko nengalap kuda ku ngeruid keréta, kuda luk nguit lemulun, idi aya' luk seupa kuda idi seupa keladai rat Bait Togarma ku libal binawehmu.

¹⁵Lun Dedan pepua' namu, idi lun rat bang bawang luk tangeb abpa' rayeh nemaré gading idi kayuh luk mitem ku libal binawehmu.

¹⁶Lun Aram nemelih binaweh luk pisuenmu. Ideh nemaré batu luk bata' uduh, kibung luk sia' merirem, kibung luk tibaruh, kibung pu, batu luk meraga rat bang abpa' rayeh, idi batu luk mesia' ku libal binawehmu.

¹⁷Lun Yahuda idi lun Israil nemaré padé, duru', umau saitun, idi umau luk do' buen ku libal binawehmu.

¹⁸⁻¹⁹Damsik nemelih binaweh luk pisuenmu idi nemaré abpa' anggur rat Helbon idi buluh dumba rat Sahar ku libalneh. Ideh nemaré belawan luk tinuno idi umau luk do' buen ku libal sebuang binawehmu.

²⁰Lun Dedan nemaré kibung luk ku tapin keted kuda ku libal binawehmu.

²¹Lun Arab idi lun rayeh bawang Kedar nemaré anak dumba, dumba, idi amék ku libal binawehmu.

- ²²Lun luk pepua' rat Siba idi Rama nemaré umau luk do' buen, batu luk meraga, idi amas ku libal binawehmu.
- ²³Bawang Haran, Kani, Eden, lun luk pepua' rat Siba, bawang Asur, idi Kilmad pepua' namu.
- ²⁴Ideh nemasui ayung luk do', kibung luk sia' merirem, idi kibung luk tibaruh, ugam luk do' taga, idi abet idi kalat luk do'.
- ²⁵Binawehmu ineh inuit maya' kapal luk meluun rayeh. "Iko mepad kudeng kapal déi' luun abpa' rayeh, luk mepanu' ku binaweh luk meberat.
- ²⁶Kareb lunmu luk mué nguit namu maya' abpa' rayeh, iko mekarem mado rat ku tangeb, ngaceku bui rat pa busat aco.
- ²⁷Amung binaweh idi lun luk ngimet kapal, lun ngakem kayuh idi lun luk pepua', amung lun pebunu' luk bang kapal— neturem bang abpa' rayeh kareb kapalmu nekarem.
- ²⁸Arod lun luk ngimet kapal luk nened pedingeren déi' tangeb abpa'.
- ²⁹"Nekini amung kapal pangeh tican. Idi amung lun luk ngimet kapal pangeh numak luun tangeb.
- ³⁰Ideh temido namu dengan abuh luun uluhdeh idi luun bururdeh teh.
- ³¹Ideh ngiki uluhdeh idi nacung, idi ideh nangi' ku dat niatdeh namu.
- ³²Ideh menani aceh tido kuanmu, 'Idéké miak uen maad dengan Sur, luk ungeng bang abpa' rayeh?
- ³³Kareb binawehmu inuit maya' abpa' rayeh, iko nemaré petap kuan anid pupu. Raca' nangun ku lun do' ku binawehmu luk mula'.
- ³⁴Nekini iko nekarem bang abpa' rayeh. Iko neturem bang ribaruh. Binawehmu idi amung lun tebarinmu, netutu' maya' namu bang abpa' rayeh.'
- ³⁵"Amung lun luk tudo tangeb abpa' rayeh megagap ku ukummu. Raca'deh pana' matot pad kiungdeh mebudi.

³⁶Iko metutu' raked-raked, idi amung lun luk pepua' pelaba tot, ngaceku kian ideh mekaneh ukummu lek."

Yehiskiel 28

¹Kebala Tuhan negku,

²"O lemulun, mada' Raca' Sur ratnan luk belén Tuhan Allah neneh: 'Iko pelaba dita' niat, pad iko mala iko aceh allah. Kebalamu, "Ui mepad kudeng aceh allah luk tudo luun kesusineh, luk linibut abpa' rayeh." Sagan tu pana' iko siayu mangun ku aceh allah, setuneh iko lemulun idi baken Tuhan.

³Iko ngerawé iko meluun ileh ratnan Danel, pad na luk uen ngalum rat namu.

⁴Dengan ileh idi terawému iko mangun ku lun do' ku binaweh amas idi pirak.

⁵Iko pangeh megéi' pepua' dengan ilehmu, pad iko mula' utung. Iko medita' niat ngaceku iko mula' binaweh.'

⁶"Ngaceku ineh kudeng ini bala Tuhan Allah: 'Ngaceku iko ngerawé iko mepad ileh kudeng aceh allah,

⁷Ui miak ngecuk bunu' luk na méi' ngerieng namu. Ideh miak ngusag amung binaweh luk ilapmu ku ileh idi terawému.

⁸Ideh miak ngaté namu idi nala' butungmu bang abpa' rayeh.

⁹Kareb ideh macing ngaté namu, miakké iko pebala iko allah? Kareb iko tuped pa kiung lun luk ngaté ngamu iko lemulun teh idi baken Tuhan.

¹⁰Iko maté mepad kudeng uko', bang palad lun pupu baken luk na manu nan Allah. Ui ini Tuhan Allah pangeh nemutut Ukum.' "

¹¹Kebala Tuhan negku teh,

¹²"O lemulun, do' nganau' aceh tido kuan Raca' Sur luk kumin, idi mada' neneh, kudeng ini bala Tuhan Allah: 'Atun iko mangun ku pinginud ratnan luk meligan. Iko mileh idi metaga!

¹³Iko tudo déi' Eden, bang kabun Allah, idi nengayung ku batu luk meraga, ieh ineh batu luk mesia', batu intan, batu luk mebirar, batu luk bata' melaco,

bau burur, batu luk mebirar luk mesilo; batu luk bata' langit, batu luk bata' uduh, idi batu luk sia' merirem. Iko nengayung ku amas. Ayung amas ineh inau' kuanmu kareb aco luk inanmu pinudut.

¹⁴Ui nengecuk seburur melaikat luk inan matot matar namu su ineh. Iko tudo luun pegkungKu luk meligan idi nenalan arang batu luk meraga idi mesilo.

¹⁵Kekamenmu do' rat karebmu pinudut pad macing iko nganau' luk dat.

¹⁶Iko megagau pepua', pad iko mesala' idi ngedereh lemulun. Idi Ui nengusu namu ratnan pegkungKu luk meligan. Melaikat luk nematar namu nengusu namu rat arang batu luk meraga idi mesilo.

¹⁷Iko medita' niat ku tagamu, idi iko mebacé ngaceku rayehmu. Ui nenala' namu luun tana' pad iko mangun ku bada' kuan raca' baken.

¹⁸Sala'mu pelaba rayeh kareb iko pepua', pad su luk inanmu sembayang pana' linutak. Idi Ui nengeseb bawang ineh pad iko mangun ku abuh siren lun baken.

¹⁹Iko metutu' raked-raked, idi amung pupu baken luk pekalai namu pelaba tot, ngaceku kian ideh mekaneh ukummu lek.' “

²⁰Kebala Tuhan negku,

²¹"O lemulun, do' ngadu' bawang Sidon,

²²idi mada' luk belén Tuhan Allah nedeh, kebalamu, 'Ui ini bunu'mu, O Sidon. Ui miak buren lun ngaceku ukumKu namu. Ideh miak kali' Ui ini Tuhan, kareb Ui ngegala' liganKu idi ngukum lemulun luk tudo bang namu.

²³Ui maré ét namu, idi ngutang dara' luun dalanmu. Iko uen ngerieng rat selipa idi rat pa selipa, pad pupumu pitayen, pad iko kali' Ui ini Tuhan.' “

²⁴Kebala Tuhan, "Pupu baken libut-libut bawang Israil luk nesitunga neneh na mangun ku tabpa' luk ngurat Israil sekua' teh, pad ideh kali' Ui ini Tuhan.”

²⁵Kebala Tuhan Allah, "Ui nguit nelun Israil muli' ratnan bawang su luk inanKu nengatad nedeh, pad amung-amung pupu kali' Ui ini meligan. Lun

pupu Israil miak tudo bang bawangdeh sebuleng luk biréKu kuan demulunKu Yakub,

²⁶dengan do' udeng. Ideh mudut ruma' idi teh ideh nibu anggur. Ui miak ngukum nelun dengandeh luk nesitunga nedeh, pad Israil do' udeng pelé ideh kali' Ui ini Tuhan Allahdeh."

Yehiskiel 29

¹Pulu' dueh aco bulan pulu' bang lak luk kepulu', kebala Tuhan negku,

²"O lemulun, do' ngadu' Raca' Masir idi mada' neneh ratnan ukum luk macing neneh, idi teh ukum bawang Masir:

³Kudeng ini bala Tuhan Allah kuan Raca' Masir, 'Ui ini bunu'mu, O buayah luk rayeh luk tudo bang abpa'. Iko pebala, Abpa' Nil iko kuan, idi teh iko pebala, iko nemudut bururmu sebuleng.

⁴Ui nganau' aceh keluit bang tangmu, idi nganau' lawid luk bang abpa' mu pedekat luun raramu. Idi Ui nginat namu rat bang Abpa' Nil, dengan lawid luk luun bururmu ineh.

⁵Ui miak nala' namu dengan amung lawid ineh déi' su luk ali-ali. Butungmu miak mebpeh luun tana' dengan na tinamen. Ui maré neneh kuan suit idi pung ku akandeh,

⁶pad amung lun Masir kali' Ui ini Tuhan.' " Kebala Tuhan, "Lun Israil pangeh merapet nemuyuh lun Masir ngedengan nedeh, iamo' muyuh mepad kudeng aceh rukud luk melaya'.

⁷Kareb ideh pucang namu, iko neputul idi nepesut tudungdeh pad awa'deh mét.

⁸Ngaceku ineh, kudeng ini bala Tuhan Allah: Ui ngecuk lemulun ngerieng namu ku pelapet, pad ideh ngaté pupumu idi aya'mu.

⁹Masir miak mangun ku su luk ali-ali, pad iko kali' Ui ini Tuhan. "Ngaceku iko pebala Abpa' Nil iko kuan, idi iko nemudut neneh,

¹⁰Ui mangun ku bunu'mu, idi bunu' Abpa' Nilmu pana'. Ui nganau' aput bawang Masir mangun ku su luk ali-ali, rat bawang Migdol luk pa tinueh busat aco macing bawang Asuan luk pa kabing busat aco, pad macing lakan tana' bawang Sudan.

¹¹Lemulun idi pung pana' na lemaba su ineh. Apat ngepulu' lak kinioneh na luk mulun su ineh.

¹²Masir miak mangun ku bawang luk meluun dat ali bang tana' ini. Usag bawang-bawang Masir meluun dat ratnan usag bawang baken, idi na piduten baruh apat ngepulu' lak kinioneh. Ui miak ngatad nelun Masir amé' arang pupu baken bang anid-anid bawang.”

¹³Kebala Tuhan Allah, "Pangeh apat ngepulu' lak Ui miak nguit nelun Masir lemubed ratnan bawang pupu baken, su luk inanKu nengatad nedeh,

¹⁴idi Ui maré nedeh tudo bang babpat Masir luk pa kabing busat aco, ieh ineh bawangdeh luk pun-pun.

¹⁵Su ineh ideh mangun ku aceh imet luk meluun laya', pad ideh na miak ngimet pupu baken teh, ngaceku ideh masi'.

¹⁶Israil na merapet mutuh pedengan nedeh baruh. Kareb Israil nier ukum Masir, ieh miak kali' mesala' merapet nedeh. Idi Israil miak kali' Ui ini Tuhan Allah.”

¹⁷Aceh aco bulan aceh bang lak luk kedueh ngepulu' tudu', kebala Tuhan negku,

¹⁸"O lemulun, Nebukadnesar, raca' Babil, nengerieng bawang Sur. Ieh nengecuk bawehneh metueh ngakem, pad abpukdeh nebubput idi tudungdeh nurat, iamo' na samalneh kuan raca' idi bawehneh ineh.

¹⁹Ngaceku ineh, kudeng ini bala Tuhan Allah: Ui maré tana' Masir kuan Raca' Nebukadnesar. Ieh miak ngaro idi naban amung binaweh Masir ku tabpar bawehneh.

²⁰Ui maré Masir neneh ku ua' kekammeneh, ngaceku bawehneh nengakem kuanKu. Ui ini Tuhan pangeh nepebala.

²¹"Kareb amung ineh mangun Ui miak ngetueh nelun Israil idi nima' namu, Yehiskiel, pebala su luk inan lemulun miak ninger namu, pelé ideh kali' Ui ini Tuhan."

Yehiskiel 30

¹Kebala Tuhan teh,

²"O lemulun, mada' bala luk barénKu idi pebala, Kudeng ini bala Tuhan Allah: 'Temido, ngaceku mesusa' aco ineh!'

³Aco ineh muneng, aco luk inan Tuhan ngacing ukum, aco luk ngacing laput idi susa' kuan amung pupu.'

⁴Inan bunu' déi' bawang Masir, idi susa' luk rayeh déi' Sudan. Mula' lemulun miak pitayen déi' Masir. Bawang ineh miak uen ngaro, pad ieh mangun ku usag.

⁵"Lun tebarin luk pebunu' rat Sudan, Lidia, Libia, Arabia, idi Kub, idi rat arang pupuKu sebuleng pana' miak pitayen bang bunu' ineh."

⁶Kebala Tuhan, "Rat Migdol luk pa tinueh busat aco macing Asuan luk pa kabing busat aco, amung lemulun luk ngedengan Masir pitayen. Baweh Masir luk medita' niat miak uen ngusag. Ui ini Tuhan Allah pangeh nepebala.

⁷Tana' ineh mangun ku bawang luk meluun dat ali bang tana' ini, bawang-bawangneh mangun ku usag mo'.

⁸Kareb Ui ngeseb bawang Masir idi ngaté amung lemulun luk ngedengan neneh, ideh miak kali' Ui ini Tuhan.

⁹"Kareb aco ineh macing, idi Masir pangeh inusag, Ui miak ngecuk nelun duken amé' ngegio nelun Sudan, pad ideh matot. Aco ineh malé macing!"

¹⁰Kebala Tuhan Allah, "Ui ngecuk ni Nebukadnesar raca Babil ngabud binaweh Masir.

- ¹¹Ieh miak macing dengan bawehneh luk na méi', idi ngusag bawangdeh. Ideh munu' Masir ku pelapet, pad bawang ineh mepanu' ku butung.
- ¹²Ui ngekeket Abpa' Nil idi maré Masir bang imet lemulun luk dat. Pupu baken miak ngusag amung bawang. Ui ini Tuhan pangeh nepebala.”
- ¹³Kebala Tuhan Allah, "Ui miak ngusag akang idi allah luk mebalih déi' Mempis. Kareb ineh na lun luk ngimet Masir, idi Ui miak ngatot nelun Masir.
- ¹⁴Ui nganau' babpat Masir luk pa kabing busat aco dat ali, idi Ui ngeseb bawang Soan luk pa tinueh busat aco. Ui miak ngukum bawang Tibis.
- ¹⁵Ui miak ngacing usehKu kuan Pelusium, bawang luk meraben déi' Masir. Ui miak ngaro binaweh Tibis.
- ¹⁶Ui miak ngeseb bawang Masir, pad Pelusium pana' medereh. Libung Tibis miak uen ngusag, idi bawang rayeh mereb ku abpa'.
- ¹⁷Anak adi' deléi rat On idi rat Bubastis pitayen bang bunu', idi lun baken pana' tebanen.
- ¹⁸Tapanes mangun medacem kareb Ui ngagka' lalud Masir, idi ngabud tuehdeh luk inandeh medita' niat. Aceh laput miak mapen Masir, idi amung lemulun luk bang bawang-bawangneh miak tebanen.
- ¹⁹Kareb Ui ngukum Masir kudeng ineh, ideh miak kali' Ui ini Tuhan.”
- ²⁰Tudu' aco, bulan aceh, bang lak luk kepulu' aceh, kebala Tuhan negku,
- ²¹"O lemulun, Ui pangeh nemutul langen Raca' Masir. Na ieh inabet ku kén pad ieh do', pelé ieh metueh ngimet pelapet teh.
- ²²Idi kudeng ini bala Tuhan Allah, 'Ui ini bunu' raca' Masir. Ui miak mutul dueh langenneh — ieh ineh luk do' idi luk pangeh pinutul pana', pad pelapet mebpeh rat bang paladneh.
- ²³Ui miak ngatad nelun Masir aput-aput tana'. Idi Ui miak nganau' langen raca' Babil metueh, idi Ui nganau' pelapetKu bang paladneh.
- ²⁴Iamo' Ui mutul langen raca' Masir, pad ieh ngarod idi maté pa kiung bunu'neh.

²⁵Ui ngelaya' neneh, idi Ui ngetueh raca' Babil. Kareb Ui maré pelapetKu neneh pad ieh munu' nelun Masir, amung lemulun miak kali' Ui ini Tuhan.

²⁶Ui ngatad nelun Masir aput-apat tana', pad ideh kali' Ui ini Tuhan.' "

Yehiskiel 31

¹Aceh aco bulan teluh bang lak luk kepulu' aceh, kebala Tuhan negku,

²"O lemulun, do' mada' Raca' Masir idi amung anak itinneh, kebalamu, 'Iko pelaba rayeh! Iko pinginud anunké?

³Iko mepad kudeng kayuh tumuh déi' Lebanon, idi angkatmu do' taga idi ngelungung, idi batangmu macing nan laput.

⁴Iko mulun ngaceku abpa' luk manud bang tana'. Ideh mubpur su luk inanmu mulun idi ngacing arur kuan amung kayuh bang pulung.

⁵Ngaceku iko mula' abpa', iko meluun dita' ratnan kayuh baken, idi angkatmu rayeh idi mekadang.

⁶Amung-amung suit nengarar udungmu. Idi pung luk mesangit nenganak liang lungungmu. Idi amung pupu bang tana' ini nengato erurdeh su ineh.

⁷Lawamu ineh pelaba do' taga; batangmu medita' idi angkatmu mekadang; uatmu macing nan abpa' luk bang tana'.

⁸Iko meluun do' ratnan amung tumuh luk bang kabun Allah. Angat tongor idi gita' pana' na mepad kudeng angkatmu. Idi na kayuh bang kabun Allah luk metaga kudeng iko.'

⁹Ui nenganau' namu metaga', idi angkatmu rubpé, pad kayuh baken bang kabun Allah déi' Eden melili ku tagamu.'

¹⁰"Ngaceku ineh, kudeng ini bala Tuhan Allah: Iko ineh iuk-iuk medita' pad macing nan laput, idi kareb iko temubu', iko mangun medita' niat.

¹¹Ngaceku ineh, Ui pangeh nenala' namu, idi Ui miak maré namu kuan raca' pupu baken. Ieh miak ngedereh namu ku ngua' datmu.

¹²Lun pupu baken luk na méi' miak nebpeng namu idi necan namu. Angatmu miak mebpeh luun anid pegkung idi raked bang bawang ineh. Amung pupu luk tudo iang lungungmu miak buro.

¹³Suit-suit miak ucep luun batangmu luk tibpeng ineh, idi pung luk mesangit miak nalan luun angatmu.

¹⁴Idi rat pad sini sebuleng kayuh pana' na miak amé' medita' pad macing nan laput, sagan tu pana' uen mubpur. Amung-amungdeh pana' miak maté mepad kudeng lemulun, idi amé' perurum nedeh bang su luk inan até."

¹⁵Kudeng ini bala Tuhan Allah, "Aco iko amve' su luk inan até, Ui miak ngecuk abpa' luk bang tana' mapen namu, idi temido. Ui miak ngelubed abpa' pad mula' abpa' arur na manud. Ngaceku iko, Ui ngacing dacem luun Pegkung Lebanon, idi amung kayuh luk bang pulung miak tekering.

¹⁶Kareb Ui ngecuk namu amé' su luk inan até, uni ebpehmu miak ngeruyuh amung bawang. Amung kayuh Eden, ieh ineh amung kayuh luk meluun do' rat Lebanon miak buken bang su luk inan até.

¹⁷Ideh nemaya' namu amé' su luk inan até pad perurum nedeh luk pangeh tibpeng atun. Idi amung-amung luk tudo liang lungungmu pangeh pitad amé' arang pupu baken.

¹⁸"Kayuh ineh raca' Masir idi amung anak itinneh. Kayuh Eden pana' na mepad dita' idi do'. Iamo' nekini, mepad kudeng kayuh Eden, iko miak amé' su luk inan até, pad perurum nan lemulun luk na manu nan Allah, idi teh lemulun luk pitayen bang bunu'." Kebala Tuhan Allah, "Ui pangeh nepebala."

Yehiskiel 32

¹Aceh aco bulan pulu' dueh bang lak luk kepulu' dueh, kebala Tuhan negku,

²"O lemulun, nganau' aceh tido kuan raca' Masir rat Negku, kebalamu: Iko siayu mepad kudeng balang arang amung pupu, iamo' iko mepad kudeng buayeh luk mesibur bang abpa'. Iko nganau' abpa' melutut ku kukudmu, idi iko ngelutak abpa'.

- ³Kareb mula' pupu mepamung, Ui miak ngakem namu bang rabatKu idi nima' nedeh nginat rabat ineh.
- ⁴Ui miak ngebpeh namu luun tana', pad amung pung idi amung suit miak amé' kuman namu.
- ⁵Ui mapen pegkung idi raked ku butungmu luk melu.
- ⁶Ui ngeba' tana' ini ku dara'mu, pad pegkung uen mapen idi arur uen manu'.
- ⁷Kareb Ui ngaté namu, Ui ngedacem langit idi ngilep gituen. Ui ngelinged aco ku laput idi bulan pana' na macang.
- ⁸Ui miak ngilep amung acang bang langit, pad tana'mu ineh medacem. Ui ini Tuhan Allah pangeh nepebala.
- ⁹"Mula' pupu miak mesusa' kareb Ui mada' bala ratnan atému bang bawang luk na inanmu pekalai.
- ¹⁰Luk ruenKu namu miak ngagap mula' pupu. Kareb Ui ngeliling pelapetKu, raca'-raca' megegker ku tot. Kareb iko mebpeh, amung-amungdeh megegker ngerawé ulundeh sebuleng."
- ¹¹Kebala Tuhan Allah kuan raca' Masir, "Iko amé' matun pelapet raca' Babil.
- ¹²Ui nima' bunu' ratnan pupu-pupu luk na méi' nginat pelapetdeh pad ngaté nelun mula'. Ideh miak ngusag amung-amung luk inanmu medita' niat idi ngaté anak itinmu.
- ¹³Ui ngaté sapi'mu déi' su luk inandeh ngirup abpa'. Na lemulun idi sapi' ketecan pad ngelutut abpa'.
- ¹⁴Ui nima' amung abpa'mu melio, idi arur muyuh pana' manud ulai-ulai. Ui ini Tuhan Allah pangeh nepebala.
- ¹⁵Kareb Ui nganau' Masir mangun ku su luk ali-ali idi ngaté amung lemulun luk tudo su ineh, ideh miak kali' Ui ini Tuhan.
- ¹⁶Bada' ini luk meberat miak mangun ku aceh tido. Decur ratnan anid pupu miak menani tidu ineh kuan Masir idi amung pupuneh. Ui ini Tuhan Allah pangeh nepebala."

- ¹⁷Pulu' limeh aco bulan bang lak luk kepulu' dueh, kebala Tuhan negku,
- ¹⁸"O lemulun, nangi' idi temido kuan amung lun Masir. Ngecuk nedeh amé' su luk inan até dengan pupu baken luk mebala.
- ¹⁹Kebalamu nedeh: Meluunké taga muyuh rat nelun baken? Amé' telubid bang tanem lun luk na manu.
- ²⁰"Ideh miak meluka' dengan lemulun luk pitayen bang bunu'. Pelapet temina' ngaté amung-amung lemulun bang bawang Masir.
- ²¹Lun luk meluun sangit idi lun luk nengedengan nedeh bang bunu' nawar nelun Masir amé' su luk inan até. Kebaladeh, 'Lun luk na manu luk pinaté bang bunu' pangeh netemurun idi netelubid su ini!'
- ²²"Asur pana' idi déi' dengan amung tanem bawehneh. Amungdeh ineh pinaté bang bunu',
- ²³idi tanemdeh idi bang su luk meluun dalem déi' su luk inan até. Amung lun pebunu' Asur pinaté bang bunu' idi tanemdeh pekelibut lungun Asur ineh. Iamo' atun ideh ngatot lemulun bang tana' ini.
- ²⁴"Elam pana' idi déi' dengan amung tanem bawehneh. Amungdeh ineh pinaté bang bunu' idi netemurun dengan na sinunat iné' su luk inan até. Kareb ideh mulun ideh ngatot, iamo' nekini ideh pangeh naté idi inigu'.
- ²⁵Elam telubid arangdeh luk pinaté bang bunu', idi tanem bawehneh pekelibut neneh. Amungdeh ineh na sinunat idi pinaté bang bunu'. Kareb ideh mulun ideh ngatot, iamo' nekini ideh pangeh naté idi inigu', mepad kudeng lun baken ineh luk pinaté bang bunu'.
- ²⁶"Misek idi Tubal pana' idi déi' dengan amung tanem bawehneh. Amungdeh ineh na sinunat, idi pinaté bang bunu'. Iamo' atun ideh nengatot lemulun bang tana' ini.
- ²⁷Kareb ideh tinanem na ideh inubur mepad kudeng lun mesangit bang kareb luk mon, luk iné' su luk inan até dengan ayung lun pebunu', pelapet iang

pudakdeh, idi utap luun ruukdeh. Atun lun mesangit ini metueh, pad ngatot lemulun bang tana' ini.

²⁸"Kudeng ineh lun Masir uen ngelaya' pad ideh telubid arang lun luk na sinunat luk pinaté bang bunu'.

²⁹"Edom pana' idi déi' dengan raca'neh idi lun luk ngimet neneh. Atun ideh lun pebunu' luk metueh, iamo' nekini ideh telubid déi' su luk inan até dengan lun luk na sinunat luk pinaté bang bunu'.

³⁰"Amung lun luk ngimet rat pa tinueh busat aco idi déi' dengan lun Sidon. Atun ideh ngatot, iamo' nekini ideh temurun amé' su luk inan até dengan igu' pad perurum dengan lemulun luk pinaté bang bunu', idi tinamen dengan na sinunat.

³¹"Kareb raca' Masir nier nedeh, ieh miak buken ratnan aténeh sebuleng idi ratnan até bawehneh luk pinaté bang bunu'," kebala Tuhan Allah.

³²"Ui nenima' raca' Masir ngatot lemulun bang tana' ini, iamo' ieh pitayen dengan amung bawehneh idi tinamen dengan lun luk na sinunat luk maté bang bunu'." Tuhan Allah pangeh nepebala.

Yehiskiel 33

¹Kebala Tuhan negku,

²"O lemulun, mada' pupumu ratnan luk mangun kareb Ui ngacing bunu' kuan aceh bawang. Lun luk bang bawang ineh mili' rat arangdeh seburur lun luk matar.

³Kareb ieh nier bunu' macing ieh nateg tawak pad mada' nelun mula'.

⁴Kudeng seburur ninger uni tawak iamo' na maya' ineh, idi bunu' macing idi ngaté neneh, idi ieh mabeh sala' aténeh sebuleng.

⁵Ieh maté ngaceku sala'neh sebuleng, ngaceku ieh na nemaya' uni tawak ineh. Kudeng ieh pangeh nemaya', ieh miak mulun.

⁶Iamo' kudeng lun luk matar ineh nier bunu' macing idi na nateg tawak, bunu' ineh miak amé' ngaté lun luk mesala' ineh. Idi lun luk matar ineh mabeh sala' atédéh pa kiungKu.

⁷"O lemulun, Ui ngikit namu mangun ku lun luk matar kuan amung pupu Israil. Iko ngalap balaKu, idi ngacing bada'Ku nedeh.

⁸Kudeng Ui mala seburur lemulun luk dat miak maté, iamo' iko na mada' neneh pad ieh misu', pelé ieh mulun, kali' rungen ieh maté dengan na uren, iamo' iko mabeh sala' aténeh pa kiungKu.

⁹Kudeng iko mada' lemulun luk dat, iamo' ieh na uleg ratnan sala'neh, ieh miak maté denga na uren, iamo' iko miak mulun."

¹⁰Kebala Tuhan negku, "O lemulun, mada' nelun Israil ratnan luk megéi' beléndeh, kebaladeh, 'Kai meberat niat ngerawé sala' idi kekamen kai luk dat. Kai iuk-iuk melaya'. Kudeng apehké kai miak mulun?'

¹¹Mada' nedeh, Ui ini Tuhan Allah luk mulun na sikal nier lun luk mesala' maté. Ui pian nier neneh uleg ratnan sala' idi mulun. O Israil, ugka' nganau' kekamen luk dat. Ngudehké iko sikal maté?

¹²"O lemulun, mada' nelun Israil, kudeng lemulun luk matu nganau' sala', kekammeneh luk do' luk inau'neh atun na miak ngulun neneh. Kudeng lemulun luk dat ugka' nganau' luk dat, ieh na miak kumin, idi kudeng lemulun luk matu ngimun nganau' sala', ieh na miak mulun teh.

¹³Kudeng Ui pejani' maré ulun kuan lemulun luk matu, iamo' ieh merapet ku kekammeneh luk do' luk inau'neh atun, idi ieh nganau' sala', Ui na ngerawé kekammeneh luk do' ineh. Ieh miak maté ngaceku sala'neh.

¹⁴Kudeng Ui mala kuan lemulun luk dat, Iko miak maté, idi ieh uleg ratnan sala' idi nganau' luk matu,

¹⁵ieh ineh ieh ngelubed duduk luk ilapneh ku libal luk kinabit, idi ieh maré lemubed luk pinoneh — kudeng ieh uleg ratnan sala', pad ieh maya' ukum luk maré ulun, na ieh maté, iamo' ieh mulun.

- ¹⁶Ui maré do' ratnan sala' luk pangeh kikemneh. Ieh miak mulun ngaceku ieh nenganau' luk matu.
- ¹⁷"Idi pupumu pebala luk inau'Ku na matu! Setuneh kekamendeh luk na matu.
- ¹⁸Kareb lemulun luk matu ugka' nganau' luk do' idi nganau' luk dat, ieh miak maté ku ineh.
- ¹⁹Kareb lemulun luk dat ugka' nganau' sala' idi nganau' luk matu, ieh ngalap ulun.
- ²⁰Israil, iko pebala, Ui na nganau' luk matu, iamo' Ui ngukum namu maya' kekamenmu."
- ²¹Limeh aco, bulan pulu' bang lak luk kepulu' dueh mucu ratnan kai tiban, seburur lemulun luk neburo rat Yerusalim iné' mada' negku ratnan tabpa bawang ineh.
- ²²Idi nalem kareb nateh ieh nacing, ui nekali' lalud Tuhan idi denganku. Kenebpa kareb lemulun ineh nacing, Tuhan nemaré negku peburi' baruh teh.
- ²³Kebala Tuhan negku,
- ²⁴"O lemulun, lun luk tudo bang bawang Israil luk inusag pebala, 'Ibrahim ineh seburur lemulun mo', idi aput bawang ini biré neneh, iamo' kai ini mula', kali' rungen tana' ini kai kuan.'
- ²⁵"Mada' nedeh, kudeng ini bala Tuhan Allah: Muyuh kuman dara' perapu dengan uang. Muyuh sembayang inan akang idi ngaté lemulun. Kudeng apehké muyuh ngerawé tana' ini muyuh kuan?
- ²⁶Muyuh merapet ku pelapet muyuh. Iamo' kekamen muyuh pelaba dat. Amung-amung muyuh pasét. Kudeng apehké muyuh ngerawé tana' ini muyuh kuan?
- ²⁷"Mada' nedeh, Ui ini Tuhan Allah luk mulun, idi kali' rungen lemulun ineh luk tudo bang bawang luk inusag miak pitayen. Ideh luk tudo punang arur

miak kenen pung luk mesangit. Ideh luk sigapung luun pegkung idi bang lubang batu miak maté ku ét.

²⁸Ui nganau' bawang ineh mangun ku su luk ali-ali. Tuehdeh luk inandeh medita' niat miak mabud. Pegkung Israil mangun dat ali, pad seburur pana' nateh luk nalan su ineh.

²⁹Kareb Ui ngukum pupu ineh ngaceku sala'deh, pad bawangdeh mangun ku su luk ali-ali, idi ideh miak kali' Ui ini Tuhan."

³⁰Kebala Tuhan, "O lemulun, pupumu megéi' pebala ratnan iko, kareb ideh papu' iring libung bawang idi munung tanga' ruma'deh. Kebaladeh, 'Do' tau amé' ninger bala Tuhan.'

³¹Idi pupuKu mepamung pian ninger balamu, iamo' na ideh maya' luk belénmu nedeh. Ideh ngubur balamu, iamo' ideh pian ngalap usin mo'.

³²Sirendeh iko mepad kudeng aceh lun luk menani ratnan awa tana' ini idi luk nateg gita. Ideh ninger amung balamu, iamo' na ideh maya'.

³³Iamo' kareb amung balamu mangun — idi amung ineh na miak na mangun — idi ideh miak kali' seburur nabi idi arangdeh."

Yehiskiel 34

¹Kebala Tuhan negku,

²"O lemulun, ngadu' nelun luk matar nelun Israil, ieh ineh dumbaKu. Mada' nedeh. Kudeng ini bala Tuhan Allah: Muyuh miak kumin, O muyuh lun luk matar nelun Israil! Muyuh ngasa' burur muyuh sebuleng, iamo' na muyuh ngasa' dumba ineh.

³Muyuh ngirup rata sapi' idi ngayung ku buluh dumba, idi ngeret idi kuman dumba luk meluun do'. Iamo' na muyuh ngasa' dumba ineh.

⁴Muyuh na nengasa' dumba luk melaya', na nengedo' dumba luk mét, na nengabet urat dumba luk nurat, na nenguit dumba luk neraruh muli', idi na nenakap dumba luk netutu'. Iamo' muyuh nengedereh nedeh.

⁵Ngaceku dumba ineh na lun luk matar nedeh, ideh nepatad pad pung luk mesangit nengaté idi nekuman nedeh.

⁶Idi dumbaKu neraruh luun surud luk medita' idi luun pegkung pana'. Ideh nepatad aput tana' ini, idi seburur pana' nateh luk nenakap nedeh.

⁷"Ngaceku ineh, O muyuh lun luk matar, ninger bala Tuhan.

⁸Ui ini Tuhan Allah luk mulun, do' ninger balaKu, DumbaKu pangeh pinaté idi kinan pung luk mesangit, ngaceku na luk matar nedeh. LunKu luk matar na iné' nakap dumba. Ideh nengasa' bururdeh sebuleng idi ideh na ngerawé dumba.

⁹O muyuh lun matar, do' ninger balaKu.

¹⁰Kudeng ini bala Tuhan Allah: Ui ini bunu' muyuh. Ui miak ngalap dumbaKu rat nemuyuh pelé muyuh na mangun ku lun matar nedeh, pad muyuh na ngerawé burur muyuh sebuleng mo'. Ui ngalap dumbaKu rat nemuyuh pad muyuh na kuman nedeh.

¹¹"Kudeng ini bala Tuhan Allah: Ui ini nakap dumbaKu idi ngasa' nedeh,

¹²mepad kudeng lun matar ngasa' dumbaneh luk pangeh nepatad idi teh luk mepamung. Ui nguit nedeh muli' rat su lukinaneh nepatad kareb aco susa' luk medacem ineh.

¹³Ui nguit nedeh remuat rat bang bawang baken, pelé ngamung nedeh idi nguit nedeh muli'. Ui maman nedeh luun pegkung Israil, idi tangeb abpa' idi bang anid bawang su luk inan lemulun tudo.

¹⁴Ui nima' nedeh kuman déi' laman luk luun pegkung idi luk luun raked dengan na susa'.

¹⁵Ui ini mangun ku lun matar dumbaKu idi nakap su luk inaneh ngato erurdeh, Ui ini Tuhan Allah pangeh nepebala.

¹⁶"Ui miak nakap dumba luk netutu', nguit muli' dumba luk neraruh, ngabet urat dumba luk murat, ngedo' dumba luk mét, idi ngasa' dumba luk melamu idi luk metueh, ngaceku Ui ini Lun Matar luk nganau' luk matu.

17"O dumbaKu, kudeng ini bala Tuhan Allah: Ui miak ngukum anid burur muyuh pelé ngatad luk do' ratnan luk dat, ieh ineh Ui ngatad dumba ratnan amék.

18Naké muyuh mawang niat kuman uduh luk do'? Ngudehké muyuh ngeradu' uduh luk ketecan ku kukud muyuh? Naké muyuh mawang niat ngirup abpa' luk melio? Ngudehké muyuh ngelutut abpa' luk ketecan ku kukud muyuh?

19Petuluké dumbaKu luk baken kuman uduh luk ridu' muyuh, id ngirup abpa' luk linutut muyuh?

20"Ngaceku ineh, kudeng ini bala Tuhan Allah: Ui ngukum nemuyuh, pad ngatad dumba luk melamu ratnan dumba luk merugu'.

21Muyuh nemanul dumba luk mét idi nengagkul nedeh ratnan sengeriudan.

22Iamo' Ui miak ngulun dumbaKu, pad ideh na uen muyuh ngedereh teh.

23Ui maré kuandeh demulunKu Daud ku Lun Matar nedeh, idi Ieh miak ngasa' nedeh.

24Ui ini Tuhan, mangun ku Allahdeh, idi demulunKu Daud mangun ku Raca'deh. Ui pangeh nepebala.

25Ui nganau' aceh jani' kuandeh luk maré ulun kuandeh. Ui nala' amung pung luk mesangit rat bang bawang ineh, pelé dumbaKu mulun dengan do' bang laman idi rudap bang pulung pana'.

26"Ui ngeperuan nedeh idi nima' nedeh nalan libut-libut pegkungKu luk meligan. Ui ngeperuan nedeh ku udan bang kareb luk petulu.

27Amung kayuh miak kebua', lati' inan uli', idi amung lemulun do' udeng bang bawangdeh sebuleng. Kareb Ui muih pupuKu rat nelun luk nenaban nedeh, kareb Ui mutut kalingdeh, idi ideh miak kali' Ui ini Tuhan.

28Lun luk na manu na miak ngaro nedeh baruh, idi pung luk mesangit na miak ngaté idi kuman nedeh. Ideh do' udeng idi na lun ngatot nedeh.

29Ui maré nedeh tana' luk mebaleng, pad na lun melau bang bawang ineh. Lun pupu baken na situnga nedeh baruh.

³⁰Amung lemulun miak kali' Ui ini lun matar Israil, idi ideh luk mangun ku pupuKu. Ui ini Tuhan Allah pangeh nepebala.

³¹"O dumbaKu luk sengeriudan luk paninKu, muyuh ineh lemulun, idi Ui ini Allah muyuh." Kudeng ini bala Tuhan Allah.

Yehiskiel 35

¹Kebala Tuhan negku,

²"O lemulun, ngadu' bawang Edom.

³Mada' pupu ineh. Kudeng ini bala Tuhan Allah: Ui ini bunu'mu, O pegkung Edom! Ui nganau' namu mangun ku su luk ali-ali.

⁴Ui ngusag amung bawangmu, pad tana'mu dat ali, pelé iko kali' Ui ini Tuhan.

⁵"Iko bunu' Israil luk meruked idi nemaré pupuneh pitayen kareb susa'neh kareb ukumneh luk kekiped.

⁶Ngaceku ineh — idi Ui ini Tuhan Allah luk mulun — kali' rungen iko na miak mepuit ratnan ukum maté. Iko mesala' ngaceku ngaté lemulun, idi até miak ngerada' namu.

⁷Ui miak nganau' punang arur déi' Edom mangun ku su luk ali-ali, idi ngaté amung lemulun luk lemaba su ineh.

⁸Ui miak mapen pegkung ku butung, idi butung lemulun luk pinaté bang bunu' maput luun pegkung idi luun raked.

⁹Ui nganau' namu mangun ku su luk ali-ali raked-raked, pad seburur pana' nateh luk mulun bang bawang-bawangmu teh, pelé iko kali' Ui ini Tuhan.

¹⁰"O Edom, kebalamu, 'Dueh pupu, ieh ineh Yahuda idi Israil, idi bawang didueh ui kuan, idi tau miak ngalap bawang-bawang ineh,' sagan pana' Tuhan idi arangdeh.

¹¹Ngaceku ineh, kali' rungen Ui ini Tuhan Allah luk ulun miak ngua' namu ngaceku useh, gateh, idi temaruhmu inan pupuKu. Ideh pana' miak kali' Ui ngukum namu ngaceku luk inau'mu nedeh.

¹²Idi iko kali' Ui ini Tuhan neninger namu pebala dengan situnga ratnan pegkung-pegkung Israil luk dat ali luk pian lapenmu.

¹³Ui neninger balamu luk medita' niat luk ngedat Negku.”

¹⁴Kebala Tuhan Allah, "Ui nganau' namu dat ali, pad aput tana' mawang niat ku tabpamu, mepad kudeng iko mawang niat ku susa' Israil luk pupuKu. Pegkung Sir idi tana' Edom mangun dat ali, pad amung lemulun kali' Ui ini Tuhan."

Yehiskiel 36

¹Kebala Tuhan, "O lemulun, do' mada' amung pegkung Israil.

²Kudeng ini bala Tuhan Allah nemuyuh: Dengan medita' niat bunu' lun Israil nepebala, 'Nekini pegkung ineh luk mon tau kuan!'

³Ngaceku ineh do' mada', Kudeng ini bala Tuhan Allah: Kareb pupu baken luk pekelibut Israil nengerieng idi nengaro pegkung Israil, amung lemulun nesitunga nan Israil.

⁴Ngaceku ineh, O muyuh pegkung Israil, ninger luk belén Tuhan Allah kuan pegkung, surud, arur, raked, su luk inusag, idi su luk tican luk inaro idi luk inan pupu baken nesitunga.

⁵Ui ini Tuhan Allah pangeh nepebala dengan gateh niatKu ratnan pupu baken luk pekelibut Israil, idi meluun teh Edom. Dengan mawang niat ideh situnga idi nengaro tana'Ku idi lamanKu.

⁶Ngaceku ineh mada' bala luk barén Tuhan Allah kuan bawang Israil, idi kuan pegkung, surud, arur, idi raked: Dengan gateh niatKu Ui pebala ngaceku muyuh pidereh pupu baken.

⁷Ui ini Tuhan Allah pebulung. Pupu baken luk pekelibut Israil miak uen ngigu'.

⁸Iamo' luun amung pegkung Israil, lawa kayuh miak nginulih idi kebua' kuan muyuh pupuKu lun Israil. Na mio teh muyuh muli'.

⁹Ui idi dengan muyuh, idi kali' rungen tana' muyuh uen ngeradu teh pad miak nganau' lati'.

¹⁰Ui nganau' nemuyuh amé'-amé' mula'. Amung bawang muyuh luk inusag piduten baruh, pad muyuh tudo su ineh.

¹¹Ui nganau' lemulun id sapi' pana' amé'-amé' mula'. Muyuh meluun ula' ratnan luk atun, idi muyuh miak mula' anak teh. Ui nima' nemuyuh tudo su ineh mepad kudeng luk atun, idi muyuh ngalap peruan luk meluun rayeh, pelé muyuh kali' Ui ini Tuhan.

¹²Ui nguit lun pupuKu Israil muli' pad nalan luun tana' muyuh, luk mangun ku babpat muyuh sebuelng luk mebaleng pad anak muyuh petap akan.

¹³"Kudeng ini bala Tuhan Allah: Lemulun neten pegkung-pegkung ineh 'Kuman Lemulun', kebaladeh, pegkung ineh mano anak ratnan pupu ineh.

¹⁴Ui ini Tuhan pangeh nepebala. Rat pad sini ideh na kuman lemulun, idi na mano anak muyuh,

¹⁵pad pegkung ineh na ninger kuyo lun luk na manu idi bala pupu baken luk situnga. Pegkung ineh na mano anak ratnan pupu ineh. Ui ini Tuhan pangeh nepebala."

¹⁶Kebala Tuhan negku,

¹⁷"O lemulun, kareb lun Israil tudo bang bawangdeh atun, ideh nengelutak neneh ku lawédeh idi kekamendeh. SirenKu kekamendeh melutak mepad kudeng kibung decur luk macing bulan.

¹⁸Ui nengacing usehKu nedeh, ngaceku mula' lemulun luk pinatédeh bang bawang ineh, idi ngaceku akangdeh luk nengelutak bawangdeh.

¹⁹Ui nengukum nedeh ngaceku lawédeh idi kekamendeh, pad Ui nengatad nedeh amé' bang bawang pupu baken.

²⁰Iamo' su paeh luk ulekdeh, ideh nengigu' ngadanKu luk meligan, ngaceku lun pebala, 'Lemulun ini nenecan bawang luk biré Allahdeh nedeh,'

- ²¹pad Ui mesusa' ngerawé ngadanKu luk meligan, ngaceku lun Israil nengigu' ngadanKu su apeh luk ulekdeh.
- ²²"Ngaceku ineh do' mada' nelun Israil. Kudeng ini bala Tuhan Allah nedeh: Luk ruenKu mucu, baken ngaceku muyuh lun Israil, iamo' ngaceku ngadanKu luk meligan, luk inigu' muyuh bang anid bawang.
- ²³Kareb Ui ngegala' ligan ngadanKu luk rayeh kuan anid bawang, ieh ineh ngadan luk inigu' muyuh arang pupu baken, idi ideh miak kali' Ui ini Tuhan. Ui ini Tuhan Allah pangeh nepebala. Ui makai nemuyuh pad ngegala' kuan anid pupu, Ui ini meligan.
- ²⁴Ui miak ngalap nemuyuh rat arang anid pupu idi rat bang anid bawang, idi nguit nemuyuh muli' amé' bang bawang muyuh sebuleng.
- ²⁵Ui miak ngisak abpa' luk meligan luun muyuh, pad muyuh baruin ratnan akang muyuh idi ratnan anun-anun luk nengelutak nemuyuh.
- ²⁶Ui maré kuan muyuh niat luk mebaruh, idi teh roh luk mebaruh ruenKu bang nemuyuh. Ui miak nala' niat muyuh luk ratnan batu, idi maré niat lemulun kuan muyuh.
- ²⁷Ui nganau' RohKu sebuleng bang nemuyuh, pad nganau' nemuyuh maya' ukumKu idi ngimet bada'Ku luk biréKu nemuyuh,
- ²⁸pelé muyuh tudo bang bawang luk biréKu inan tepun muyuh. Muyuh mangun ku pupuKu, idi Ui ini mangun ku Allah muyuh.
- ²⁹Ui ngulun nemuyuh ratnan amung-amung luk ngelutak nemuyuh. Ui ngecuk padé maré uli' luk mula', pad muyuh na melau teh.
- ³⁰Ui miak ngula' uli' bua' idi lati' muyuh, pad na luk idi iru' luk ngigu' nemuyuh arang pupu baken baruh peh.
- ³¹Muyuh miak ngerawé kekamen muyuh luk dat idi sala' luk inau' muyuh, pad muyuh megateh inan burur muyuh sebuleng ngaceku sala' idi dat muyuh.
- ³²O Israil, kudeng ini bala Tuhan, Ui na nganau' ini ngaceku muyuh. Do' muyuh migu' ku kekamen muyuh. Ui ini Tuhan Allah pangeh nepebala."

³³Kebala Tuhan Allah, "Kareb Ui ngeligan nemuyuh ratnan amung-amung sala' muyuh, Ui miak nima' nemuyuh tudo bang bawang muyuh, pad muyuh mudut baruh luk inusag ineh.

³⁴Lemulun luk megéi' lemaba lati' muyuh kali' lati' muyuh mapet, iamo' Ui nima' nemuyuh nganau' lati' muyuh baruh.

³⁵Amung lemulun miak pebala ratnan tana' luk mapet ini luk mangun mepad kudeng Kabun Eden, idi ratnan bawang luk tibpa, inaro, idi inusag, luk linibung, pad lemulun miak tudo su ineh baruh.

³⁶Idi pupu baken luk pekelibut Israil luk neketecan miak kali' Ui ini Tuhan mudut baruh bawang luk inusag idi teh nibu luun lati' luk pangeh tican. Ui ini Tuhan pangeh nepebala, idi Ui miak nganau' luk bilaKu."

³⁷Kebala Tuhan Allah, "Ui nganau' meluun ratnan ineh teh. Ui nima' nelun Israil mutuh pedengan rat Negku. Ui nima' nedeh amé' mula' mepad kudeng aceh riudan dumba.

³⁸Bawang luk pangeh inusag bang kareb ini miak mepanu' ku lemulun mepad kudeng Yerusalim atun mepanu' ku dumba luk barén kareb aco rayeh, pelé ideh kali' Ui ini Tuhan."

Yehiskiel 37

¹Ui neketukan Roh Tuhan, idi Roh ineh nenguit negku idi nengerareng negku bang ruan, idi su ineh maput ku tulang.

²Ieh nenguyut negku lawé-lawé bang ruan ineh, idi Ui nenier pelaba ula' tulang, idi tulang ineh pelaba tekering.

³Kebala Tuhan negku, "O lemulun, miakké tulang ini mulun baruh?" Idi kebalaku, "O Tuhan Allah, Iko sebuleng mo' luk kali' ineh."

⁴KebalaNe, "Do' mada' bala luk barénKu kuan tulang ini. Ngecuk nedeh ninger bala Tuhan.

⁵Kudeng ini bala Tuhan Allah kuandeh: Ui nganau' niat bang nemuyuh, pad muyuh mulun.

⁶Ui maré urat kuan muyuh idi uang, idi ngebpu nemuyuh ku kubil. Ui nganau' niat bang nemuyuh, pelé muyuh mulun, pad muyuh kali' Ui ini Tuhan.”

⁷Idi ui nemada' luk bila Tuhan negku. Kareb ui pebala, ui neninger uni luk mekaru', ieh ineh tulang-tulang amé' petutum.

⁸Kareb ui nier, tulang-tulang ineh ibpu ku uang, urat, idi kubil. Iamo' na luk idi niat bang burur ineh.

⁹Kebala Allah negku, "O lemulun, mada' bala luk barénKu kuan bui. Kudeng ini bala Tuhan Allah: Amé' rat anid lidung tana' idi nginiat kuan butung-butung ini, pad ideh mulun.”

¹⁰Idi ui nemada' luk bila Tuhan negku. Idi niat nesemuet bang butung ineh, pelé ideh mulun idi ideh netuped, pad inan pelaba ula' lemulun.

¹¹Kebala Allah negku, "O lemulun, lun Israil mepad kudeng tulang ini. Kebaladeh, 'Kai tekering, idi na luk inan merapet, idi na kekiped kai.’

¹²Ngaceku ineh mada' nelun Israil. Kudeng ini bala Tuhan Allah: Ui ngukab tanemdeh idi nguit nedeh remuat, pad ideh muli' amé' bawang Israil.

¹³Kareb Ui ngukab tanem pupuKu idi nguit nedeh remuat, ideh miak kali' Ui ini Tuhan.

¹⁴Ui nganau' niatKu bang nedeh, pad ideh mulun, idi Ui nima' nedeh tudo bang bawangdeh sebuleng, pad ideh kali' Ui ini Tuhan. Ui pangeh nepejani', idi Ui miak nganau' luk bilaKu. Ui ini Tuhan pangeh nepebala.”

¹⁵Kebala Tuhan negku teh,

¹⁶"O lemulun, ngalap aceh rukud idi ngayud luunneh, 'Imet Yahuda.' Idi ngalap aceh rukud teh idi ngayud luunneh, 'Imet Israil.’

¹⁷Idi ngimet dueh rukud ineh mepad kudeng sebuleng rukud.

¹⁸Pupumu miak ngecuk namu mada' ilungneh nedeh.

¹⁹Mada' nedeh, Kudeng ini bala Tuhan Allah: Ui pian ngalap rukud luk pinginud Israil idi Ui pian mamung ineh dengan rukud luk pinginud Yahuda. Idi Ui nganau' dueh rukud ineh mangun ku sebuleng bang paladKu.

²⁰"Ngimet dueh rukud luk inayudmu ineh bang paladmu, pad lun mula' miak nier ineh.

²¹Mada' nedeh, Kudeng ini bala Tuhan Allah: Ui ngalap nelun Israil rat bang bawang luk ulekdeh ineh, idi ngamung nedeh, idi nguit nedeh amé' bawangdeh sebuleng.

²²Ui nganau' nedeh mangun ku sebuleng pupu bang bawang luk luun pegkung Israil. Sebuleng raca' miak ngimet nedeh, pad ideh na mangun ku dueh imet.

²³Ideh na ngelutak bururdeh ku akang luk dat teh, idi na meraruh ku sala' teh. Ui miak muit nedeh ratnan amung lawédeh luk mesala' idi amung raruhdeh. Ui miak ngeligan nedeh pad ideh mangun ku pupuKu idi Ui mangun ku Allahdeh.

²⁴DemulunKu Daud mangun ku raca'deh idi sebuleng Lun Matar miak ngimet nedeh, idi ideh miak maya' ukumKu.

²⁵Ideh miak tudo bang bawang luk biréKu kuan demulunKu Yakub, ieh ineh bawang tepundeh. Ideh tudo su ineh dengan anakdeh idi inuldeh ruked-ruked. DemulunKu Daud miak ngimet nedeh ruked-ruked.

²⁶Ui nganau' aceh jani' luk ngelelep nedeh ruked-ruked. Ui nganau' nedeh amé' mula'. Idi Ui nganau' ruma'Ku arangdeh macing ruked-ruked.

²⁷Ui miak tudo arangdeh idi mangun ku Allahdeh, idi ideh mangun ku pupuKu. Kareb Ui nganau' rumaKu arangdeh macing ruked-ruked, amung pupu miak kali' Ui ini Tuhan pangeh nengalap Israil kuanKu."

Yehiskiel 38

¹Kebala Tuhan negku,

²"O lemulun, do' ngadu' ni Gog rat bawang Magog. Ieh ineh raca' rayeh bang bawang Misek idi Tubal. Ngadu' neneh.

³Kudeng ini bala Tuhan Allah: Ui ni bunu'mu.

⁴Ui ngakem namu idi ngedier namu amé' pa keted. Ui nganau' keluit bang tangmu idi ngeruid namu dengan bawehmu semuet bang ukum, dengan baweh kuda idi lun luk maya' kuda dengan ayung bunu'deh. Baweh ineh pelaba rayeh idi anid lun pebunu' ngimet utap idi pelapet.

⁵Lun rat Parsi, Sudan, idi Libia idi denganmu. Amungdeh inan utap idi tupi.

⁶Amung lun pebunu' rat bawang Gomer idi Bait Togarma rat pa tinueh busat aco idi denganmu, kudeng ineh teh lun pebunu' rat bawang baken.

⁷Do' iko temina' dengan amung bawehmu luk maya' ukummu.

⁸Pangeh tuda'-tuda' lak Ui ngecuk namu ngerieng aceh bawang su luk inan lemulun tudo dengan na matot bunu' rat kareb ideh pimung rat bang tuda'-tuda' bawang. Iko miak ngerieng pegkung-pegkung Israil luk mio tican, iamo' nekini ideh do' udeng su ineh.

⁹Iko dengan bawehmu idi dengan mula' pupu baken miak ngerieng bawang Israil mepad kudeng barui, idi iko mapen tana' mepad kudeng laput.”

¹⁰Kudeng ini bala Tuhan Allah ni Gog: "Kareb ineh iko inan aceh terawé luk dat.

¹¹Iko miak ngerawé ratnan ngerieng aceh bawang luk melaya' luk na linibung idi luk na lun pebunu', idi su luk inan lemulun do' udehg.

¹²Iko miak mano idi ngaro ruma' lemulun luk mudeng bang bawang luk inusag atun. Ideh pimung rat arang anid-anid pupu, idi nekini ideh inan tana' idi aya', idi ideh tudo uned tana' ini.

¹³Lun Siba, lun Dedan, idi lun luk pepua' rat bawang Tarsis miak ngitun namu, kebaladeh, 'Pangehké iko nengamung bawehmu amé' pebunu' pad ngaro idi naban pirak, amas, sapi', idi binaweh, idi buro dengan pelaba ula' binaweh luk uenmu mano?' “

¹⁴Idi Tuhan Allah nengecuk negku pebala ni Gog, "Kudeng ini bala Tuhan Allah: Kareb pupuKu lun Israil do' udeng iko miak nalan,

¹⁵rat bawangmu luk pa tinueh busat aco. Iko nguit aceh baweh luk rayeh idi luk mesangit ratnan mula' pupu. Amungdeh maya' kuda.

¹⁶Iko miak munu' nelun Israil, mepad kudeng aceh barui luk lemaba bawang. Kareb tarekneh macing, Ui ngecuk namu ngerieng bawangKu, pad amung pupu kali' Negku, pelé Ui ngegala' liganKu bang luk ruenKu kuanmu.

¹⁷Ui nepebala ratnan iko dengan tang demulunKu nabi-nabi lun Israil luk atun, kebalaKu, Ui miak nguit seburur lemulun munu' Israil." Tuhan Allah pangeh nepebala.

¹⁸Kebala Tuhan Allah, "Kareb Gog munu' Israil, Ui megateh niat.

¹⁹Dengan usehKu Ui pejani'. Idi kareb ineh, inan aceh ruyuh tana' luk rayeh bang bawang Israil.

²⁰Amung lawid idi suit, amung pung luk rayeh idi luk isuut, idi amung lemulun luk luun tana' ini miak megegker ku totdeh Negku. Pegkung miak meturan, pipi'-pipi' pana' meturan, idi amung libung batu miak metabpa.

²¹Ui miak ngatot ni Gog ku tuda'-tuda' susa'. Ui ini Tuhan pangeh nepebala. Bawehneh sebuleng pad-pad pepaté ku pelapetdeh.

²²Ui ngukum neneh ku ét idi até pitayen. Ui ngutang udan idi udan batu, apui idi batu apui luunneh idi luun bawehneh, idi teh luun amung pupu baken luk ngedengan neneh.

²³Dengan luk kudeng ineh, Ui ngegala' kuan amung pupu ratnan Ui ini rayeh idi meligan, pelé ideh kali' Ui ini Tuhan."

Yehiskiel 39

¹Kebala Tuhan Allah, "O lemulun, ngadu' ni Gog, raca' luk rayeh bang bawang Misesk idi Tubal, idi mada' neneh. Kudeng ini bala Tuhan Allah: Ui ini bunu'mu.

- ²Ui ngedier namu amé' pa keted, idi nguit namu rat pa tinueh busat aco amé' inan pegkung-pegkung Israil.
- ³Ui miak mepag ticu'mu pa kabing, pad binormu mebpeh, idi ticu'mu pa tinueh pad ilebmu mebpeh.
- ⁴Gog dengan bawehneh idi dengan pupu baken luk ngedengan neneh miak meluka' idi maté luun pegkung Israil, idi Ui nima' butungdeh kenen suit idi pung luk meliputi.
- ⁵Ideh miak meluka' idi maté luun natad. Ui ini Tuhan Allah pangeh nepebala.
- ⁶Ui nganau' apui bang bawang Magog idi maya' tangeb abpa' rayeh su luk inan lemulun do' udeng, pad amung-amung lemulun kali' Ui ini Tuhan.
- ⁷Idi kali' rungen pupuKu lun Israil miak kali' ngadanKu luk meligan idi Ui na nima' ngadanKu uen ngigu' teh, pelé amung pupu miak kali' Ui ini Tuhan Allah lun Israil luk Meligan.”
- ⁸Kebala Tuhan Allah, "Kali' rungen tarekneh luk bida'Ku miak macing.
- ⁹Lemulun luk tudo bang amung bawang Israil miak amé' ngalap repapeh luk tacin ku kayuh apui. Ideh nganau' apui ratnan utap, binor, ileb, paper, idi busu, tudu' lak kinioneh.
- ¹⁰Ideh na ngalap kayuh apui rat luun natad idi nebpeng kayuh luun pulung, ngaceku petap repapeh luk tacin luk sabpendeh. Ideh miak ngaro binaweh lemulun luk nengaro binawehdeh." Tuhan Allah pangeh nepebala.
- ¹¹Kebala Tuhan, "Kareb amung ini mangun, Ui miak maré aceh tanem kuan Gog déi' bawang Israil, luun Raked Sakai, luk pa busat aco Abpa' luk Mepaci'. Gog id amung bawehneh tinamen su ineh, idi raked ineh tetanen, 'Raked Baweh Gog.'
- ¹²Lun Israil nanem butung idi ngeligan bawang tudu' bulan kinioneh.
- ¹³Amung lun bang bawang ineh peruyung nanem nedeh, idi kareb aco tuehku' ideh miak buren ku ineh. Ui ini Tuhan pangeh nepebala.

¹⁴Pangeh tudu' bulan lemulun miak pilin nalan aput-apat bawang nakap butung luk ketecan luun tana', pad ngeligan bawang.

¹⁵Kareb ideh nalan aput-apat bawang, kudeng ideh kali' aceh tulang lemulun, ideh nganau' aceh etu iringneh, idi lun luk nganau' tanem amé' nanem ineh luun Raked Baweh Gog.

(¹⁶Muneng ku raked ineh inan aceh bawang luk ngalap ngadan baweh ineh.) Kudeng ineh bawang miak uen ngeligan teh.”

¹⁷Kebala Tuhan Allah negku, "O lemulun, nawar amung suit idi pung rat iapeh-iapeh amé' kuman baré luk ruenKu temina' kuandeh. Ieh ineh aceh irau luk rayeh luun pegkung Israil, su luk inandeh miak kuman lemulun idi ngirup dara'.

¹⁸Ideh kuman butung lun pebunu' idi ngirup dara' raca' bang tana' ini. Amungdeh ineh pitayen mepad kudeng dumba deléi, anak dumba, amék, idi sapi' luk melamu.

¹⁹Kareb Ui ngaté lemulun ini, mepad kudeng baré luk kereten, suit idi pung miak kuman lemak macing mebor idi ngirup dara' pad ideh mabuk.

²⁰Iring téngKu ideh miak kuman kuda, idi lun luk maya' kuda, lun luk mesangit, idi lun pebunu'. Ui ini Tuhan Allah pangeh nepebala.”

²¹Kebala Tuhan, "Ui miak nima' pupu baken nier rayehKu, idi Ui ngegala' laludKu, kareb Ui ngacing ukumKu luk mesiri.

²²Rat pad sineh lun Israil miak kali' Ui ini Tuhan Allahdeh.

²³Idi pupu baken miak kali' lun Israil tiban ngaceku sala' luk kikemdeh pa kiungKu. Ui neteketed rat nedeh, pad bunu'deh nengakem nedeh, pelé ideh pitayen.

²⁴Ui nengukum nedeh petulu dengan lutakdeh idi datdeh, idi Ui neteketed rat nedeh.”

²⁵Kebala Tuhan Allah, "Nekini, Ui miak mé' nan inul Yakub, lun Israil, pelé ideh uen ngeperuan. Ui matar ngadanKu luk meligan.

²⁶Kareb ideh do' udeng bang bawangdeh sebuleng teh, dengan na luk ngedereh nedeh, ideh miak mekelupan igu'deh kareb ideh neraruh rat Negku.

²⁷Ui miak nguit nedeh muli' rat bang amung bawang bunu'deh, pad ngegala' liganKu pa kiung mula' pupu baken.

²⁸Kareb ineh pupuKu miak kali' Ui ini Tuhan Allahdeh, ngaceku Ui nemaré nedeh tebanen, idi nekini Ui ngamung nedeh idi nguit nedeh muli', pad seburur pana' nateh luk ketecan.

²⁹Ui miak ngutang RohKu kuan lun Israil, idi na Ui teketed rat nedeh teh. Ui ini Tuhan Allah pangeh nepebala."

Yehiskiel 40

¹Pulu' aco pangeh umak lak baruh, ieh ineh dueh ngepulu' limeh lak mucu ratnan kai tiban, idi pulu' apat lak mucu ratnan Yerusalim linaya'. Idi bang aco sineh teh Ui neketukan Roh Tuhan, idi Ieh nenguit negku nalan.

²Bang luk sinierku Allah nenguit negku iné' bawang Israil idi Ieh nengerareng negku luun pegkung luk medita'. Ui nenier pa atunku tuda'-tuda' pudut mepad kudeng ayu bawang rayeh.

³Ieh nenguit negku amé' muneng, idi ui nenier aceh lemulun luk mesilo mepad kudeng tekaling. Ieh nengimet aceh tari luk ratnan kibung pu, idi aceh rukud luk ku nari. Idi ieh netuped munung tanga'.

⁴Kebalaneh negku, "O lemulun, do' iko nier. Ninger do'-do' idi ngerawé ratnan amung-amung luk badénku sirenmu, ngaceku ineh punneh iko inuit amé' tungé'. Do' iko mada' nelun Israil ratnan amung-amung luk sirenmu napeh."

⁵Idi ui nenier aceh Ruma' Allah luk linibung. Lemulun ineh nenguit rukudneh luk dueh depeh kadangneh, idi ieh nenari libung ineh. Dita'neh idi kapalneh dueh depeh.

⁶Idi ieh iné' matun tanga' luk pa busat aco. Idi ieh numak ican idi nenari munung tanga' ineh. Ineh pana' dueh depeh dalamneh.

⁷Bal tanga' ineh inan aceh dalam arang takep lun luk nginita, teluh pa selipa, teluh pa selipa. Anid takep ineh mepad pipangneh, ieh ineh dueh depeh; idi alad arang takep ineh ualuh kaki kapalneh. Bal takep lun luk nginita ineh inan aceh dalam teh luk dueh depeh kadangneh luk petacu semuet bang aceh takep luk rayeh pa atun Ruma' Allah.

⁸⁻⁹Ieh nenari takep ineh, idi pipangneh dueh depeh mela. Ieh mangun ku paped munung tanga' luk muneng ku Ruma' Allah, idi alad luk bal selipa dueh kaki kapalneh.

(¹⁰Takep lun luk nginita luk pekop dalam ineh mepad rayeh, idi alad luk arangdeh mepad kapalneh.)

¹¹Pangeh ineh lemulun ineh nenari pipang dalam maya' munung tanga'. Ieh ineh apat depeh pipangneh, idi arang tanga' luk dueh ineh dueh depeh mela pipangneh kareb ieh mukab.

¹²Pa atun anid takep lun luk nginita ineh inan aceh alad luk mebeneh, dita'neh idi kapalneh dueh kaki. (Pipang takep ineh dueh depeh.)

¹³Idi ieh nenari kiado rat ku alad sebuleng takep macing ku alad takep luk bal selipa dalam ineh, ieh ineh lélé tudu' depeh kikadangneh.

¹⁴Takep luk paped dalam ineh petacu semuet amé' nan natad luk uned ruma' ineh. Ieh nenari ineh, idi pipangneh limeh depeh mela.

¹⁵Kikadang dalam rat bal selipa tanga' macing papedneh selipa, ieh ineh pulu' teluh depeh mela.

¹⁶Inan tabuk luk isuut luun alad anid takep ineh, idi teh luun alad luk arang takep ineh. Inan lawa piasau inarit luun alad luk petutup ku dalam.

¹⁷Lemulun ineh nenguit negku amé' nan natad luk bal alad maya' tanga' ineh. Idi inan teluh ngepulu' takep luk iring alad luk ngelibung bawang, idi pa atun takep inan aceh natad luk ianu' ratnan batu,

¹⁸luk ngelibut natad luk bal alad ineh. Natad luk bal alad meluun beneh ratnan natad luk uned ineh.

¹⁹Inan aceh tanga' luk meluun dita' luk macing nan natad luk uned ineh. Lemulun ineh nenari arang dueh tanga' ineh. Idi kikadangneh lélé dueh ngepulu' tudu' depeh.

²⁰Idi lemulun ineh nenari tanga' luk pa tinueh busat aco, luk macing nan natad luk bal alad.

²¹Teluh takep lun luk nginita luk iring dalam selipa, alad luk arangdeh, idi takep luk rayeh mepad kirayeh kudeng bang tanga' luk pa busat aco, ieh ineh kikadang tanga', pulu' teluh depeh mela idi pipangneh lélé tudu' depeh.

²²Takep luk rayeh, tabuk, idi arit lawa piasau, mepad kudeng luk bang tanga' luk pa busat aco. Su ineh pana' inan tudu' tatak umak amé' munung tanga', idi takep luk rayeh pa atun natad luk uned.

²³Guta natad luk bal alad rat tanga' luk pa tinueh busat aco inan aceh tanga' luk amé' nan natad luk uned, mepad kudeng luk pa busat aco. Lemulun ineh nenari arang dueh tanga' ineh. Idi kikadangneh lélé dueh ngepulu' tudu' depeh.

²⁴Pangeh ineh ieh nenguit negku amé' pa kabing busat aco, idi kai nenier aceh tanga' teh. Ieh nenari ineh, idi ieh mepad kudeng luk baken.

²⁵Inan tabuk bang takep tanga' ineh mepad kudeng bang tanga' baken. Idi kikadang tanga' ineh pulu' teluh depeh mela, idi pipangneh lélé tudu' depeh.

²⁶Inan tudu' tatak pad umak su ineh, idi takepneh luk rayeh pa atun natad luk uned. Inan lawa piasau inarit luun alad luk petutup ku dalam ineh.

²⁷Su ineh pana' inan aceh tanga' luk amé' nan natad luk uned ineh. Lemulun ineh nenari kiado rat tanga' lu kedueh ineh. Idi kikadangneh lélé dueh ngepulu' tudu' depeh.

²⁸Idi lemulun ineh nenguit negku maya' tanga' luk pa kabing busat aco amé' nan natad luk uned ineh. Ieh nenari tanga' ineh, idi ieh mepad kudeng luk baken.

29-30 Takep lun luk nginita, takep luk rayeh, idi alad luk arangdeh mepad kirayeh kudeng bang tanga' luk baken. Inan teh tabuk bang takep ini. Idi kkadang tanga' ini pulu' teluh depeh mela, idi pipangneh lélé tudu' depeh.

31 Inan takep luk rayeh petutup ku natad luk bal alad. Inan lawa piasau inarit luun alad luk petutup ku dalan. Inan ualuh tatak pad umak amé' munung tanga' ineh.

32 Lemulun ineh nenguit negku maya' tanga' luk pa busat aco amé' nan natad luk uned. Ieh nenari tanga' ineh, idi ieh mepad kudeng luk baken.

33 Takep lun luk nginita, takep luk rayeh idi alad luk arangdeh, mepad kirayeh kudeng bang tanga' luk baken. Inan tabuk pekelibut luun alad ineh, idi inan teh aceh takep luk rayeh. Idi kkadang tanga' ineh pulu' teluh depeh mela, idi pipangneh lélé tudu' depeh.

34 Takep luk rayeh petutup ku natad luk bal alad. Inan lawa piasau inarit luun alad luk petutup ku dalan. Inan ualuh tatak pad umak amé' munung tanga' ineh.

35 Lemulun ineh nenguit negku amé' nan tanga' luk pa tinueh busat aco. Ieh nenari ineh, idi ieh mepad kudeng luk baken.

36 Inan teh takep lun luk nginita, alad luk inarit arangdeh, aceh takep luk rayeh, idi tabuk pekelibut luun alad ineh. Kkadang tanga' ineh pulu' teluh depeh mela, idi pipangneh lélé tudu' depeh.

37 Takep luk rayeh ineh petutup ku natad luk bal alad. Inan lawa piasau inarit luun alad luk petutup ku dalan. Inan ualuh tatak pad umak amé' nan tanga' ineh.

38 Luun natad luk bal alad ineh inan aceh pudut baken luk pekatu nan tanga' luk déi' dalem, luk semuet amé' bang takep luk rayeh luk petutup ku natad ineh. Su ineh ideh maru' butung pung luk sabpen teburur mangun ku baré.

39 Bang takep luk rayeh ineh inan apat méja, dueh selipa idi dueh selipa. Luun méja ineh ideh ngaté pung luk ku baré sabpen teburur, idi baré ngaceku sala', idi teh babeh sala'.

⁴⁰Bal takep ineh inan teh apat méja, dueh munung tanga' selipa idi dueh selipa, ieh ineh munung tanga' luk pa tinueh busat aco.

⁴¹Inan apat méja bang takep idi apat bal alad, ieh ineh ualuh méja su luk inan pung luk barén pitayeh.

⁴²Apat méja ineh luk nan ngerareng baré luk sabpen teburur inau' ratnan batu. Kidita'deh dueh kaki idi pipangneh dueh kaki setangal. Amung repapeh luk ku ngaté pung luk barén uen ngerareng luun méja ini.

⁴³Iring amung méja ineh apat inci kirayehneh. Amung uang pung luk ku baré uen ngerareng luun méja ineh.

⁴⁴Iring tanga' luk pa tinueh busat aco inan aceh takep luk meluun do' luk petutup pa kabing busat aco, idi inan teh iring tanga' luk pa kabing busat aco luk petutup pa tinueh busat aco.

⁴⁵Kebala lemulun ineh negku, "Takep luk petutup pa kabing busat aco kuan imam-imam luk ngakem bang Ruma' Allah.

⁴⁶Idi takep luk petutup pa tinueh busat aco kuan imam-imam luk ngakem iring bubpun." Amungdeh ineh lun Liwi luk Inul Saduk. Ideh mo' luk simén amé' ngakem pa kiung Tuhan.

⁴⁷Lemulun nenari natad luk uned ineh, idi pipangneh lélé dueh ngepulu' tudu' depeh. Inan aceh bubpun pa atun Ruma' Allah.

⁴⁸Idi ieh nenguit negku maya' munung tanga' semuet bang takep luk pa atun Ruma' Allah. Ieh nenari munung tanga' ineh, idi kikadangneh medepeh mela' pipangneh lélé apat depeh, idi aladneh pekop lélé medepeh kapalneh.

⁴⁹Kikadang takep luk pa atun ineh lélé anem depeh, idi pipangneh teluh depeh mela dengan ican pad umak amé' dita'. I dita' inan diri pekop munung tanga' ineh.

Yehiskiel 41

¹Pangeh ineh lemulun ineh nenguit negku amé' bang takep luk uned. Ieh nenari dalan, idi kikadangneh lélé dueh depeh,

²pipangneh lélé teluh depeh, idi kapal aladneh pekop mela medepeh. Ieh nenari takep ineh idi kikadangneh lélé pulu' aceh depeh, idi pipangneh mela limeh depeh.

³Idi ieh nesemuet bang takep luk kekiped. Ieh nenari dalan, idi kikadangneh setangal depeh, pipangneh lélé dueh depeh, idi kapal aladneh pekop lélé dueh depeh.

⁴Ieh nenari takep ineh idi pinangneh pekelibut limeh depeh mela. Idi kebalaneh negku, "Ini Su luk Meluun Ligan."

⁵Lemulun ineh nenari kapal alad luk pekelibut Ruma' Allah, idi kapalneh lélé dueh depeh. Pekatu nan alad ineh pekelibut Ruma' Allah inan mula' takep luk isuut, pipangdeh medepeh.

⁶Takep ini inan teluh tutul. Inan teluh ngepulu' takep bang setutul. Alad Ruma' Allah iuk-iuk melipi maya' tutulneh, pad amung takep miak maya' tutulneh, pad amung takep miak tudo luun alad ineh dengan na uen maku'.

⁷Inan tuda'-tuda' ican luk rayeh pipang bal alad takep ineh pekelibut Ruma' Allah. (Ngaceku takep ini, siren rat iléi, ayu alad Ruma' Allah mepad kapal macing i dita'.) Idi lemulun miak umak rat i beneh amé' nan uned idi amé' i dita' teh.

⁸Ui nenier aceh natad pekelibut Ruma' Allah ineh. Natad ineh meluun dita' ratnan tana' luk pekelibut; kidita'neh lélé dueh depeh, idi mepad dita' nan tapin takep luk pekatu nan alad Ruma' Allah.

⁹⁻¹⁰Kapal alad luk pekelibut takep ini mela medepeh. (Inan aceh natad, pipangneh mela limeh depeh, pekelibut Ruma' Allah arang natad luk medita ineh dengan pudut imam-imam.)

¹¹Inan aceh tanga' luk semuet bang amung takep luk pa tinueh busat aco, idi teh aceh tanga' luk semuet bang takep luk pa kabing busat aco. Pipang natad luk pekelibut Ruma' Allah ineh mela medepeh.

¹²Pa acep aco inan aceh pudut luk petutup ku Ruma' Allah. Pipangneh lélé pulu' iwa' depeh idi kikadangneh dueh ngepulu' apat depeh. Kapal aladneh pekelibut mela medepeh.

¹³Lemulun ineh nenari bal Ruma' Allah. Kikadangneh lélé dueh ngepulu' tudu' depeh. Rat pa keted Ruma' Allah guta natad macing nan paped pudut pa acep aco lélé dueh ngepulu' tudu' depeh kiadoneh.

¹⁴Pipang pa atun Ruma' Allah dengan natad luk pekop lélé dueh ngepulu' tudu' depeh.

¹⁵Ieh nenari pudut luk pa acep aco Ruma' Allah dengan aladneh luk pekop, luk petutup ku natad, idi kikadangneh lélé dueh ngepulu' tudu' depeh. Takep bang Ruma' Allah luk pa atun, takep luk rayeh, idi Su luk Meluun Ligan,

¹⁶inayung ku kayuh luk do' taga ratnan apin macing ku tabuk. Tabuk ineh miak uen mapen.

¹⁷Alad luk bang Ruma' Allah inarit pad macing pa luun tanga'.

¹⁸Arit ineh lawa piasau idi pung luk inan ilad libut-libut takep ineh. Anid pung inan dueh kiung:

¹⁹ieh ineh kiung lemulun luk nier piasau pa selipa, idi kiung balang luk nier piasau selipa. Kudeng ineh ayuneh libut-libut alad ineh,

²⁰ratnan apin macing paluun tanga'.

²¹Diri tanga' ineh melebping. Pa atun munung tanga' Su luk Meluun Ligan inan luk kudeng ayu

²²bubpun luk ratnan kayuh. Dita'neh lélé medepeh idi pipangneh setangal depeh. Diri lidungneh, alenneh, idi iringneh inau' ratnan kayuh. Kebala lemulun ineh negku, "Ini méja luk idi pa kiung Tuhan."

²³Inan tanga' pekop paped dalan luk semuet bang takep luk rayeh, idi teh pekop paped dalan luk semeut bang Su luk Meluun Ligan.

²⁴Tanga' ineh inan dueh itek luk kabin nan uned.

²⁵Inan lawa piasau idi pung luk inan ilad inarit luun tanga' luk semuet bang takep rayeh mepad kudeng luk luun alad ineh. Idi bal munung tanga' luk semuet bang takep luk pa atun inan alad luk ku itekneh.

²⁶Pekop iring takep ineh inan tuda'-tuda' tabuk, idi luun aladneh inan arit lawa piasau.

Yehiskiel 42

¹Lemulun ineh nenguit negku amé'nan natad luk bal alad pad macing nan aceh pudut luk pa tinueh busat aco Ruma' Allah, idi luk na mado ratnan pudut luk pa acep aco Ruma' Allah.

²Kikadang pudut ineh lélé dueh ngepulu' tudu' depeh, idi pipangneh pulu' teluh depeh mela.

³Iring selipa ieh petutup ku natad luk iring Ruma' Allah luk limeh depeh mela kikadangneh, idi iring selipa ieh petutup ku natad batu luk bal alad. Ieh pinudut teluh sekuna', anid sekuna' iuk-iuk medita'.

⁴Iring pa tinueh busat aco pudut ini inan aceh dalan, pipangneh lélé teluh depeh idi kikadangneh lélé dueh ngepulu' tudu' depeh, dengan tanga'-tanga'.

⁵Takep luk luun sekuna' luk medita' meluun isuut ratnan luk luun sekuna' luk uned idi luk mebeneh, ngaceku ideh pa keted.

⁶Takep luk luun teluh sekuna' ineh pinudut luun natad dengan na diri. Na ideh mepad kudeng pudut luk baken.

⁷⁻⁸Amung takep luk luun sekuna' luk mebeneh, pulu' teluh depeh mela kikadangneh, idi pekatu dengan ineh inan aceh alad luk pulu' teluh depeh mela kikadangneh luk petutup ku takep-takep baken.

⁹⁻¹⁰Pa busat aco pudut ineh, rat ku alad ineh, inan tanga'-tanga' luk semuet nan natad luk bal alad. Pa kabing busat aco Ruma' Allah inan aceh pudut luk mepad, na mado ratnan pudut luk pa acep aco Ruma' Allah.

¹¹Pa atun takep-takep idi inan aceh dalan luk mepad kudeng dalan luk pa tinueh busat aco. Kirayehneh mepad, ayuneh mepad, idi tanga' neh pana' mepad.

¹²Inan tanga'-tanga' pa kabing busat aco pudut ineh, ieh ineh paped alad pa busat aco.

¹³Kebala lemulun ineh negku, "Dueh pudut ini meligan. Bang ineh imam-imam luk amé' pa kiung Tuhan kuman baré luk meluun ligan. Ngaceku takep ineh meligan, imam-imam ngerareng baré luk meluun ligan su ineh: ieh ineh baré padé idi baré ngaceku sala' idi babeh sala'.

¹⁴Kareb imam-imam pangeh iné' bang Ruma' Allah idi pian amé' nan natad luk bal alad ineh, ideh necan ayung luk meligan luk pikaideh kareb ngakem pa kiung Tuhan. Ideh ngayung ku ayung luk baken kareb nateh ideh amé' su luk inan lun mula' mepamung."

¹⁵Kareb lemulun ineh pangeh nenari bang Ruma' Allah ineh, ieh nenguit negku remuat maya' tanga' luk pa busat aco, idi ieh nenari bal alad Ruma' ineh.

¹⁶Ieh nengalap rukud luk ku nari ineh idi ieh nenari pa busat aco, ieh ineh 133 depeh.

¹⁷⁻¹⁹Idi ieh nenari pa tinueh busat aco, pa kabing busat aco, idi pa acep aco, idi ideh mepad kadang, ieh ineh 133 depeh,

²⁰pad alad ineh ngelibut aceh Ruma' dengan natadneh luk mepad pipang, ieh ineh 133 depeh. Alad ineh ngatad luk meligan ratnan luk na meligan.

Yehiskiel 43

¹Lemulun ineh nenguit negku amé' nan tanga' luk pa busat aco,

²idi su ineh ui nenier rayeh Allah lun Israil macing rat pa busat aco. Tang Allah mepad kudeng beri abpa' rayeh, idi tana' merasat ku rayehNeh.

³Luk sinierku ineh mepad kudeng luk sinierku kareb Allah iné' ngusag Yerusalim, idi teh luk sinierku tangeb Abpa' Kibar. Idi Ui netekeradung.

- ⁴Idi rayeh Allah nelemaba maya' tanga' luk pa busat aco idi nesemuet bang Ruma'Neh.
- ⁵Roh nengiding negku idi nenguit negku amé' nan natad luk uned, idi ui nekali' Ruma' Allah nepanu' ku rayeh Tuhan.
- ⁶Lemulun ineh netuped iringku, idi ui neninger Tuhan pebala negku rat bang Ruma'Neh ineh,
- ⁷"O lemulun, ini kerusiKu, Ui miak tudo su ini arang lun pupu Israil, idi ngimet nedeh macing ruked-ruked, pad lun Isrial idi raca'deh na miak ngigu' ngadanKu luk meligan dengan sembayang inan allah baken, idi teh dengan naped ulung kuan raca'deh luk naté.
- ⁸Raca'-raca' ineh nemudut tanga'-tanga' idi diri tanga' ruma'deh muneng ku tanga' idi diri tanga' Ruma'Ku, pad alad mo' arang kai. Ideh nengigu' ngadanKu luk meligan dengan kekamendeh luk pelaba dat, pad Ui nengaté nedeh dengan usehKu.
- ⁹Do' ideh ugka' sembayang nan allah baken idi ngusag ulung raca'deh, pelé Ui mulun arangdeh macing ruked-ruked."
- ¹⁰Idi teh kebala Tuhan, "O lemulun, do' mada' nelun Israil ratnan Ruma'Ku, idi nima' nedeh sibada' ratnan ayuneh, pad ideh migu' ngaceku kekamendeh luk dat.
- ¹¹Kudeng ideh migu' ngerawé kekamendeh, do' ngelio ayu Ruma'Ku kuandeh, ieh ineh ayuneh, tanga'-tanga' neh luk inan semuet idi remuat, kirayehneh, aturneh, idi amung ukum idi ecukneh. Ngayud amung ineh kuandeh, pad ideh kali' aturneh, pelé ideh maya' amung ukumneh.
- ¹²Ini ukum ratnan Ruma' Allah: Amung tana' libut-libutneh ineh meluun ligan."
- ¹³Ini kirayeh bubpun. Tari luk ku nari bubpun mepad kudeng luk ku nari Ruma' Allah. Libut-libut alen bubpun inan abang, kidalemneh lélé dueh kaki, idi pipangneh pana' mepad, idi iring abang ineh lélé sekaki dita'neh.

¹⁴Sekuna' bubpun luk pun-pun setangal depeh dita'neh. Pipang sekuna' luk kedueh lélé dueh kaki pekelibut, idi kidita'neh mela sedepéh. Idi teh pipang sekuna' iuk keteluh lélé dueh kaki pekelibut ratnan sekuna' luk kedueh.

¹⁵Sekuna' luk pa luun su luk inan amung baré sabpen medepéh mela kidita'neh. Lidungneh meluun dita' ratnan unedneh.

¹⁶Pipangneh mepad, ieh ineh teluh depeh mela.

¹⁷Pipang sekuna' luk uned pana' mepad, ieh ineh lélé apat depeh; idi ieh pinudut lélé sekaki rat ku iring sekuna' luk pun-pun. (Pipang abang ineh lélé dueh kaki.) Ican luk nan umak bubpun ineh pa busat aco.

¹⁸Kebala Tuhan Allah negku, "O lemulun, ninger balaKu. Kareb bubpun ineh pangeh pinudut, do' iko ngeseb baré luunneh pad ieh uen ngeligan idi ngisak dara' pung luk kereten luunneh.

¹⁹Imam lun Liwi luk inul Saduk mo' miak amé' ngakem pa kiungKu. Ui ini Tuhan Allah ngecuk kudeng ini. Iko miak maré nedeh aceh sapi' deléi luk pegawa' luk baréndeh ku baré ngaceku sala'.

²⁰Do' iko ngalap sebuang dara'neh idi nganau' ineh luun lidung sekuna' bubpun luk pa luun ineh, idi teh luun lidung sekuna' bubpun luk uned idi libut-libut iringneh. Kudeng ineh iko ngeligan bubpun ineh, idi nganau' aceh luk inan pedo'.

²¹Do' iko nguit sapi' luk barén ku baré ngaceku sala' idi ngeseb neneh su luk litep bal alad Ruma' Allah.

²²Kenebpa do' iko ngalap aceh amék deléi luk do' idi maré neneh ku baré ngaceku sala'. Ngaligan bubpun ku dara'neh mepad kudeng luk inau'mu ku dara' sapi' ineh.

²³Kareb iko pangeh nenganau' ineh, do' ngalap aceh sapi' deléi luk pegawa' idi dumba deléi luk pegawa', luk na anun-anun luk mét.

²⁴Do' nguit ineh amé' Negku luk Tuhan. Imam-imam ngisak tucu' luun didueh ineh idi ngeseb nedidueh ku baré kuanKu.

²⁵Bang tudu' aco do' iko maré amék, sapi', idi dumba ku baré ngaceku sala'. Amungdeh deléi luk na luk mét.

²⁶Bang tudu' aco ineh do' imam-imam nganau' luk inan pedo' pad bubpun ineh uen ngeligan.

²⁷Abud minggu ineh, do' imam-imam ngimun maré baré luk sabpen idi baré luk sabpen idi baré luk nguit pedo' kuan lun mula' luun bupun ineh, pelé Ui mawang niat nemuyuh. Ui ini Tuhan Allah pangeh nepebala."

Yehiskiel 44

¹Lemulun ineh nenguit negku amé' nan tanga' luk bal alad Ruma' Allah luk pa busat aco. Idi tanga' ineh initek.

²Idi kebala Tuhan negku, "Tanga' ini mitek idi na miak kabin. Seburur lemulun pana' nateh luk miak semuet maya' tanga' ineh, ngaceku Ui ini Tuhan Allah lun Israil pangeh nesemuet maya' ineh. Na miak na ieh mitek.

³Iamo' raca' luk ngimet miak tudo su ineh idi kuman pa kiungKu. Ieh miak semuet idi remuat maya' takep luk rayeh luk paped ruma'Ku ineh."

⁴Idi lemulun ineh nenguit negku semuet maya' tanga' luk pa tinueh busat aco luk pa atun Ruma' Allah. Ui nenier idi nekali' Ruma' Allah ineh mepanu' ku rayehNeh. Idi ui netekeradung,

⁵idi kebala Tuhan negku, "O lemulun, ngerawé do'-do' ratnan luk siren idi pedingerenmu. Ui mada' namu ratnan amung ukum idi lawé Ruma' Allah. Idi ngerawé do'-do' ratnan idé lemulun luk semuet idi remuat rat bang Ruma'Ku ineh.

⁶Mada' nelun Israil luk sikal metueh ineh. Kudeng ini bala Tuhan Allah: O lun Israil, do' muyuh ugka' ratnan kekamen muyuh luk dat.

⁷Muyuh nima' nelun pupu baken luk na sinunat bang burur idi niatdeh, idi luk na maya' balaKu, semuet bang Ruma'Ku, kareb lemak idi dara' barén muyuh Negku. Muyuh pangeh nengelaba jani'Ku ku kekamen muyuh luk pelaba dat.

- ⁸Muyuh na matar repapehKu luk meligan, iamo' muyuh ngecuk nelun pupu baken matar su luk meligan ineh.
- ⁹"Ngaceku ineh kudeng ini bala Tuhan Allah: Lun pupu baken luk na sinunat bang burur idi niatdeh na miak semuet bang Ruma'Ku, sagan tu pana' ieh tudo arang lun Israil.
- ¹⁰"Lun Liwi luk nenecan Negku kareb lun Israil neraruh idi nesembayang inan akang, miak kumin.
- ¹¹Ideh miak ngakem bang Ruma'Ku idi matar tanga' idi nganau' kekamen luk baken-baken teh. Ideh ngeret pung luk barén lun mula' ku baré luk sabpen idi ku baré luk kereten, idi ideh megéi' temina' ngakem kuan lun mula'.
- ¹²Ngaceku ideh nengakem kuan lun Israil pa kiung akangdeh, pad ngeraruh nelun mula', Ui ini Tuhan Allah pebulung, na miak na imam-imam ineh kumin.
- ¹³Ideh na miak mangun ku imam-imam pa kiungKu, idi teh ideh na miak amé' muneng ku anun-anun luk linigan kuanKu. Idi ideh na miak semuet bang Su luk Meluun Ligan teh. Ini ukum ngaceku kekamendeh luk pelaba dat.
- ¹⁴Ui ngecuk nedeh nganau' kekamen lun duken mo' bang Ruma' Allah."
- ¹⁵Kebala Tuhan Allah, "Iamo' imam-imam lun Liwi luk inul Saduk, lutep ngakem bang Ruma'Ku kareb lun Israil luk baken neteketed rat Negku. Ngaceku ineh ideh luk miak ngakem pa kiungKu idi nguit lemak idi dara' ratnan amung baré.
- ¹⁶Ideh luk miak semuet bang Ruma'Ku, ngakem iring bubpunKu, idi nguyut sembayang bang Ruma' Allah!
- ¹⁷Kareb ideh maya' tanga' semuet nan natad luk uned Ruma' Allah, ideh ngayung ku kibung pu. Ideh na miak ngayung ku ayung luk inau' ratnan buluh dumba kareb ideh ngakem luun natad luk uned, idi bang Ruma' Allah.
- ¹⁸Ideh makai sigar idi siduar luk inau' ratnan kibung pu, dengan na abet awa' pad ideh na mepana.

¹⁹Kareb nateh ideh amé' nan natad luk bal alad su luk inan lun mula', ideh ngelengu ayung luk pakaideh bang Ruma' Allah idi necan ineh bang takep luk meligan. Ideh ngayung ku ayung luk baken, pad ligan ratnan ayungdeh na macing nan lun mula'.

²⁰"Abpuk imam na miak uen ngiki idi na miak mekadang. Abpukdeh mepad kudeng luk pekalai mo'.

²¹Imam-imam na miak ngirup abpa' anggur kareb nateh ideh semuet nan natad luk uned.

²²Ideh na miak ngaweh decur luk pangeh nepatad ratnan deléineh. Ieh miak ngaweh anak adi' decur luk nateh nepamung dengan deléi, kudeng na ieh miak ngalap tinula' imam.

²³"Do' imam-imam mada' pupuKu, pad ideh ngiti luk meligan idi luk na meligan, idi luk bipeng idi luk na bibpeng.

²⁴Kudeng inan besara', do' imam-imam mutut besara' ineh maya' ukumKu. Do' ideh ngimet amung aco rayeh maya' ukum idi lawéKu Idi do' ideh ngeligan Aco luk inan Mudeng.

²⁵"Imam-imam na miak ngelutak bururdeh ku butung, kudeng baken ratnan butung taman-tinanneh, anakneh, kinanakneh deléi, idi kinanakneh decur luk na awan.

²⁶Kareb ieh pangeh linigan do' ieh nganét tudu' aco kinioneh.

²⁷Pangeh ineh do' ieh amé' nan natad luk uned idi maré aceh baré ngaceku sala', pelé ieh miak ngakem bang Ruma' Allah teh. Ui ini Tuhan pangeh nepebala.

²⁸"Babpat inul lun imam ratnan luk biréKu nelun Israil luk barén kuan anid-anid inul, ieh ineh kekamen imam. Na ideh miak ngalap tana' bang bawang Israil. Ui ini babpat imam-imam ineh.

²⁹Baré akan idi baré ngaceku sala' idi babeh sala' mangun ku akandeh, idi ideh ngalap amung-amung luk barén kuanKu bang bawang Israil.

³⁰Ideh ngalap luk meluun do' ratnan bua' luk pun-pun idi amung-amung luk baken luk barén kuanKu. Kareb pupu ini nganau' ruti, ruti luk pun-pun ruendeh barén kuan imam-imam pad ruma'deh uenKu ngeperuan.

³¹Imam-imam na miak kuman suit idi pung luk maté mo'-mo', idi teh luk pitayen pung baken."

Yehiskiel 45

¹Kareb tana' uen mabpat kuan anid-anid pupu, do' ngeletep aceh babpat luk meligan kuan Tuhan. Kikadangneh pulu' batu, idi pipangneh ualuh batu. Aput babpat ineh meligan.

²Bang babpat ineh do' ngeletep aceh tana' kuan Ruma' Allah, pipangneh mepad, ieh ineh 133 depeh. Libut-libut ineh inan aceh natad, pipangneh pulu' teluh depeh mela.

³Ratnan babpat tana' ineh do' nari aceh babpat, kikadangneh pulu' batu, idi pipangneh apat batu, ieh ineh su luk inan Ruma' Allah, luk meluun ligan.

⁴Inan aceh babpat tanta' luk meligan luk uen ngeletep kuan imam-imam luk ngakem kuan Tuhan bang Ruma'Neh. Su ineh teh inan ruma'deh idi tana' luk meligan su luk inan Ruma' Allah.

⁵Idi teh do' nari aceh babpat kikadangneh pulu' batu idi pipangneh apat batu luk uen ngeletep kuan lun Liwi luk ngakem bang Ruma' Allah. Su ineh inan bawang luk inandeh tudo.

⁶Do' ngeletep aceh tana' kuan bawang rayeh, kikadangneh pulu' batu idi pipangneh dueh batu. Bawang ineh pelengit su luk meligan idi mangun ku bawang amung lun Israil.

⁷Do' ngeletep tana' kuan lun luk ngimet, rat su luk meligan idi bwang rayeh ineh pad macing Abpa' Rayeh luk pa acep aco idi lakan tana' luk pa busat aco. Kikadangneh rat pa busat aco macing pa acep aco mepad kudeng kadang babpat-babpat pupu Israil.

⁸Tana' ini mangun ku babpat lun luk ngimet bang bawang Israil, pad ieh na ngedereh nelun mula' teh, iamo' ieh nima' tana' luk baken mangun ku babpat pupu-pupu Israil.

⁹Kebala Tuhan Allah, "Muyuh pelaba io nganau' sala', O muyuh lun luk ngimet bawang Israil. Do' muyuh ugka' ngedereh idi ngaté lemulun. Nganau' luk matu idi luk mesiri. Aleg ngusu pupuKu ratnan tana'deh. Kudeng ini bala Tuhan Allah.

¹⁰"Do' muyuh makai uad idi tari luk matu.

¹¹"Gatang luk ku nguad padé, ieh ineh epa mepad kudeng gatang luk ku nguad abpa', ieh ineh bat. Idi uad luk pekalai, ieh ineh sehomer luk apat ngepulu' anem gatang. 1homer = 10 epa = 10 bat

¹²"Do' uad muyuh kudeng ini: 20 géra = 1sikal 60 sikal = 1mina

¹³⁻¹⁵"Kudeng ini lawé muyuh maré baré muyuh: Padé: 1/60 amung luk perinien muyuh Ikon: 1/60 amung luk perinien muyuh Umau saitun: 1/100 amung bua' muyuh. (Do' ieh uen nguad maya' bat, ieh ineh iwa' gatang. 10 bat = 1homer = 1kor.) Dumba: 1dumba rat arang 200 "Do' muyuh nguit baré akan, pung luk sabpen teburur, idi pung ku baré luk nguit pedo', pad muyuh ngalap do' ratnan sala' muyuh. Ui ini Tuhan Allah luk ngecuk ineh.

¹⁶"Amung lemulun bang bawang ineh nguit baré ineh kuan lun luk ngimet Israil.

¹⁷Idi ieh luk petulu maré pung luk sabpen teburur, idi baré akan, idi baré luk rupan kuan amung pupu Israil kareb aco rayeh, Irau Bulan Baruh, idi Aco luk inan Mudeng. Do' ieh maré amung baré ngaceku sala', baré akan, baré luk sabpen teburur, idi baré luk nguit pedo', pad ngiu' sala' lun pupu Israil."

¹⁸Kebala Tuhan Allah, "Aceh aco bulan aceh do' iko maré aceh sapi' deléi luk do', pad ngeligan Ruma' Allah.

¹⁹Imam miak ngalap sebuang dara' pung luk kereten ku baré ngaceku sala' idi ruenneh luun diri tanga' Ruma' Allah, idi luun apat lidung bubpun, idi teh luun diri tanga'-tanga' luk semuet amé' nan natad luk uned.

²⁰Idi nganau' kudeng ineh teh tudu' aco bulan, kuan lemulun luk nganau' sala' baken dengan rungen idi ngaceku na kali' Kudeng ineh, iko ngeligan Ruma' Allah.

²¹"Pulu' apat aco bulan aceh do' muyuh ngimun Irau Paska. Tudu' aco kinioneh muyuh kuman ruti luk na linamud.

²²Bang aco irau luk pun-pun, do' lun luk ngimet maré aceh sapi' deléi ku baré ngaceku sala'neh sebuleng idi teh ngaceku sala' lun mula'.

²³Anid-anid aco kareb irau ineh do' ieh maré kuan Tuhan tudu' sapi' deléi idi tudu' dumba deléi luk na luk mét, idi ngeseb nedeh teburur. Idi teh do' ieh maré aceh amék deléi anid aco ku baré ngaceku saia'.

²⁴Dengan anid sapi' idi dimba luk barén, do' muyuh maré apat gatang setangal padé idi teluh seréi' umau saitun luk rayeh.

²⁵"Kareb Irau Lepo luk ngimun pulu' limeh aco bulan tudu', do' lun luk ngimet ineh maré baré ngaceku sala' luk mepad mo' tudu' aco kinioneh, baré luk mepad luk sabpen teburur, idi baré akan idi umau saitun luk mepad teh."

Yehiskiel 46

¹Kebala Tuhan Allah, "Tanga' natad luk uned luk pa buat aco uen ngitek anem aco kareb muyuh ngakem. Iamo' ieh kabin bang Aco luk inan Mudeng idi teh Bulan Baruh.

²Lun luk ngimet miak nalan ratnan natad luk bal alad amé' bang takep luk rayeh luk munung tanga' ineh idi tuped iring diri tanga' kareb imam-imam ngeseb baréneh luk teburur, idi kareb ideh maré baréneh luk nguit pedo'. Do' ieh sembayang munung tanga' idi remuat. Tanga' ineh na mitek pad macing aco macep.

³Anid Aco luk inan Mudeng idi anid Bulan Baruh lun mula' tekeradung idi sembayang nan Tuhan pa atun tanga' ineh.

⁴"Bang Aco luk inan Mudeng do' lun luk ngimet nguit amé' pa kiung Tuhan anem anak dumba, idi sebuleng dumba deléi luk na luk mét mangun ku baré luk sabpen teburur.

⁵Do' ieh nguit baré akan apat gatang setangal idi anun-anun luk baken luk pian barénneh dengan anid anak dumba ineh. Denga anid baré akan luk apat gatang setangal ineh, do' ieh nguit teluh seréi' umau saitun luk rayeh.

⁶Kareb Bulan Baruh ieh miak maré aceh sapi' deléi luk pegawa', anem anak dumba, idi sebuleng dumba deléi luk na anun-anun luk mét.

⁷Dengan anid sapi' idi dumba luk barén, do' ieh maré apat gatang setangal padé idi anun-anun luk pian barénneh dengan anak dumba ineh. Teluh seréi' umau saitun luk rayeh miak barén dengan padé ineh.

⁸Do' lun luk ngimet ineh nalan maya' bang takep luk rayeh idi remuat maya' tanga' luk dalanneh pun-pun.

⁹"Kareb lun mula' amé' sembayang nan Tuhan kareb aco rayeh, ideh luk semuet maya' tanga' luk pa tinueh busat aco miak remuat kareb ideh pangeh nesembayang maya' tanga' luk pa kabing busat aco. Ideh luk semuet maya' tanga' luk pa kabing busat aco miak remuat maya' tanga' luk pa tinueh busat aco. Na ideh miak remuat maya' dalam luk pun-pun, iamo' do' ideh maya' tanga' luk petutup.

¹⁰Do' lun luk ngimet semuet kareb lun mula' macing, idi remuat kareb ideh remuat.

¹¹Kareb irau idi aco rayeh, baré akan ineh apat gatang setangal padé dengan anid sapi' idi dumba, idi teh anun-anun luk pian barén lun luk sembayang ineh dengan anid anak dumba. Teluh seréi' umau saitun luk rayeh miak barén dengan padé ineh.

¹²"Kareb lun luk ngimet pian maré aceh baré kuan Tuhan, maya' ran niatneh — aceh baré luk sabpen teburur, kian aceh baré luk nguit pedo' lek — do' tanga' luk pa busat aco luk semuet amé' nan nataad luk uned, kabin kuanneh.

Ieh maré baré ineh maya' lawé luk pekalai kareb Aco luk inan Mudeng, idi do' tanga' ineh uen ngitek kareb ieh remuat.”

¹³Kebala Tuhan, "Anid-anid pekak do' maré kuan Tuhan sebuleng anak dumba luk ulun selak idi luk na luk mét. Ini miak barén anid-anid aco.

¹⁴Idi teh anid pekak do' maré apat kati banak idi aceh seréi' umau saitun luk rayeh pimuar banak ineh. Ukum ratnan baré ini kuan Tuhan lutep macing raked-raked.

¹⁵Anak dumba, banak, idi umau saitun ineh miak barén kuan Tuhan anid pekak macing raked-raked.”

¹⁶Kudeng ini bala Tuhan Allah: "Kudeng lun luk ngimet maré sebabpat tana'neh kuan sebuleng anakneh, tana' ineh mangun ku babpat anak ineh ratnan binaweh tetek ruma'neh ineh.

¹⁷Iamo' kudeng lun luk ngimet ineh maré sebabpat tana' ineh kuan seburu lun dukenneh, tana' ineh miak uen nguli' kuan lun luk ngimet kareb lak puit. Ieh luk kuan tananeh, idi anakneh mo' luk miak ngalap aceh babpat luk meparud.

¹⁸Lun luk ngimet na miak ngaro tana' anak itinneh. Ieh miak maré tana' kuan anakneh ratnan babpat tana' luk pangeh litep kuanneh, pelé ieh na ngedereh pupuKu idi ngaro tana'deh.”

¹⁹Idi lemulun ineh nenguit negku amé' munung tanga' takep-takep luk muneng ku tanga' luk pa kabing busat aco natad luk uned ineh. Ini takep luk meligan kuan imam-imam. Ieh nenicul su luk pa acep aco takep ineh,

²⁰kebalaneh, "Ini su luk inan imam-imam nanek uang pung luk barén ngaceku sala' idi babeh sala', idi teh su luk inandeh nganau' baré akan, pad anun-anun luk linigan na iten amé' nan natad luk bal alad, idi na macing nan lun mula'.”

²¹⁻²²Idi ieh nenguit negku amé' nan natad luk bal alad, idi ieh nemada' sirenku natad-natad luk isuut bang anid-anid lidung ineh kikadangdeh lélé pulu' aceh depeh, idi pipangdeh ualuh depeh mela.

²³Anid-anid natad ineh inan libung batu denga tetel iring alad.

²⁴Kebala lemulun ineh negku, "Ini dapur-dapur su luk inan lun duken bang Ruma' Allah nanek baré luk barén lun mula'."

Yehiskiel 47

¹Lemulun ineh nenguit negku lemubed amé' munung tanga' Ruma' Allah. Rat pa liang tanga' ineh abpa' manud amé' pa busat aco. Idi Ruma' Allah petutup ku ineh. Ieh manud lemaba maya' pa kabing busat aco bubpun ineh.

²Pangeh ineh lemulun ineh nenguit negku remuat rat bang su luk inan Ruma' Allah maya' tanga' luk pa tinueh busat aco idi nenguit negku macing nan tanga' luk petutup ku busat aco. Aceh arur manud lemaba pa kabing busat aco tanga' ineh.

³Dengan rukudneh luk ku nari, lemulun ineh nenari 250 depeh amé' pa lod, pa busat aco. Idi ieh nengecuk negku guta abpa' su ineh. Abpa' ineh pad bangil mo'.

⁴Ieh nenari 250 depeh teh, idi abpa' ineh pad aleb mo'. Ieh nenari 250 depeh teh, idi abpa' ineh pad awa'.

⁵Ieh nenari 250 depeh teh idi arur ineh pelaba dalem, pad ui na miak guta maya' ineh. Miak lemangui mo'.

⁶Kebalaneh negku, "O lemulun, ngerawé do'-do' ratnan ini." Idi lemulun ineh nenguit negku amé' tangeb arur ineh,

⁷idi kareb ui nacing, ui nekali' mula' lawa kayuh tangeb abpa'.

⁸Kebalaneh negku, "Abpa' ini manud lemaba tana' luk pa busat aco macing nan Raked Yarden idi Abpa' luk Mepaci'. Kareb ieh semuet bang Abpa' luk Mepaci' ieh nganau' abpa' ineh meligan.

⁹Su apeh inan abpa' ini manud inan raput-raput pung idi lawid. Arur ini miak nganau' Abpa' luk Mepaci' meligan. Su apeh inanneh manud ieh ngacing ulun.

¹⁰Ratnan Bued Abpa' Enggedi macing nan Bued Abpa' Eneglaim inan lun luk ngerabat lawid tangeb abpa' ineh. Ideh miak midang rabatdeh. Inan raput-raput lawid mepad kudeng luk bang Abpa' Rayeh.

¹¹Iamo' abpa' luun tana' payeh idi takung luk tangeb abpa' rayeh na mangun meligan. Ideh mangun ku su luk inan ticu'.

¹²Pekop tangeb arur ineh inan raput-raput lawa kayuh luk maré akan. Dondeh na melayuh, idi na ideh ugka' kebua'. Ideh inan bua' luk mebaruh anid-anid bulan, ngaceku ideh mebubpur ku arur luk manud ratnan Ruma' Allah. Lawa kayuh ineh maré akan, idi dondeh ku ubat.”

¹³Kebala Tuhan Allah, "Ini lakan-lakan tana' luk uen mabpat kuan pulu' dueh pupu. Idi pupu Yusup mo' ngalap dueh babpat.

¹⁴Ui pebulung nan tepun muyuh idi nepejani' maré tana' ini kuandeh. Do' ieh uen mabpat kuan muyuh.

¹⁵"Lakan tana' luk pa tinueh busat aco maya' pa busat aco rat Abpa' Rayeh macing nan bawang Hetlon, Ruan Hamat, bawang Sedad,

¹⁶bawang Berota, idi Sibraim (luk arang imet Damsik dengan imet Hamat), idi bawang Tikun (luk iring lakan tana' imet Hauran).

¹⁷Lakan tana' luk pa tinueh busat aco maya' rat Abpa' Rayeh macing nan bawang Enon luk pa busat aco dengan babpat Damsik idi Hamat luk iring lakan tana' luk pa tinueh busat aco.

¹⁸"Lakan tana' luk pa busat aco maya' rat arang bawang Damsik dengan bawang Hauran. Abpa' Yarden mangun ku lakan tana' arang tana' Israil pa acep aco, idi Giliad pad busat aco, macing nan Bawang Piasau déi' Abpa' luk Mepaci'.

¹⁹"Lakan tana' luk pa kabing busat aco amé' pa lod busat aco rat Bawang Piasau macing nan takung Kadis, idi amé' pa dayeh busat aco maya' lakan tana' Masir macing nan Abpa' Rayeh.

²⁰"Lakan tana' luk pa acep aco, ieh ineh Abpa' Rayeh macing pa tinueh busat aco, ieh ineh inan aceh bawang luk pa acep aco Ruan Hamat.

²¹"Do' mabpat tana' ini kuan pupu muyuh;

²²ineh mangun ku babpat muyuh luk meruked. Pupu baken luk tudo arang muyuh idi luk inan anak luk tinganak su ini miak ngalap babpat tana' kareb muyuh mabpat ineh. Do' ideh mepad kudeng lun Israil luk nala' udi idi ngalap babpat tana' dengan pupu Israil.

²³Anid-anid burur lun pupu baken miak ngalap babpatdeh dengan pupu luk inandeh tudo. Ui ini Tuhan pangeh nepebala."

Yehiskiel 48

¹⁻⁷Lakan tana' luk pa tinueh busat aco maya' pa busat aco rat Abpa' Rayeh macing bawang Hetlon, Ruan Hamat, bawang Enon, idi lakan tana' arang imet Damsik denga imet Hamat. Anid-anid pupu miak ngalap aceh babpat tana' rat lakan tana' luk pa busat aco macing nan lakan tana' luk pa acep aco, maya' kudeng luk pa beneh ini, rat pa tinueh busat aco macing pa kabing busat aco; Dan, Aser, Naptali, Manasé, Epraim, Rubin, Yahuda.

⁸Idi rat pa busat aco macing pa acep aco inan tana' luk linigan kuan Allah. Pipangneh pulu' batu, idi kikadangneh rat pa busat aco macing pa acep aco mepad kikadang babpat pupu-pupu Israil. Idi Ruma' Allah piduten unedneh.

⁹Kikadang babpat tana' ini luk linigan kuan Tuhan pulu' batu, idi pipangneh ualuh batu.

¹⁰Imam-imam miak ngalap aceh babpat tana' ini luk meligan. Kikadangneh pa tinueh busat aco idi pa kabing busat aco pulu' batu, idi pipangneh pa busat aco idi pa acep aco apat batu. Ruma' Allah piduten uned tana' ineh.

¹¹Babpat luk meligan ineh kuan imam-imam luk inul Saduk. Ideh nelutep ngakem kuanKu idi na neperurum nelun Israil nganau' sala' kudeng lun Liwi luk baken ineh.

¹²Ngaceku ineh ideh ngalap aceh babpat luk do' muneng ku babpat lun Liwi luk baken, idi ineh mangun ku luk meluun ligan.

¹³Lun Liwi miak ngalap aceh babpat tana' muneng ku tana' lun imam. Kikadangneh muneng ku tana' lun imam. Kikadangneh pulu' batu idi pipangneh apat batu.

¹⁴Tana' luk linigan kuan Tuhan ineh meluun do' ratnan amung tana' luk baken. Sesut tana' ineh pana' na miak pisuen, na miak uen ngelibal, idi na miak uen lun baken ngacem. Tana' ineh meligan kuan Tuhan.

¹⁵Tana' luk ketecan na meligan, kikadangneh pulu' batu idi pipangneh dueh batu. Tana' ineh kuan lun mula' mo'. Ideh miak tebawang su ineh. Bawang rayeh piduten unedneh.

¹⁶Idi pipangneh mepad mo' na macing dueh batu.

¹⁷Libut-libut bawang ineh inan natad, pipangneh 75 depeh.

¹⁸Tana' luk ketecan kareb bawang ineh pangeh pinudut, luk iring tana' luk meligan, ieh ineh apat batu pa busat aco idi apat batu pa acep aco, miak inan lun luk tudo bang bawang ineh nganau' lati'.

¹⁹Idé-idé luk tudo bang bawang rayeh ineh, ratnan anid-anid pupu miak nganau' lati' su ineh.

²⁰Pipang amung tana' luk uen ngelelep pulu' batu, ieh ineh apat ngepulu' batu pekelibut. Idi tana' bawang rayeh bang ineh teh.

²¹⁻²²Kareb tana' luk linigan kuan Tuhan idi tana' luk kuan bawang rayeh pangeh ilap ratnan babpat tana' ineh luk pipangneh pulu' batu, amung tana' luk ketecan selipa idi pa selipa macing abpa' rayeh pa acep aco idi lakan tana' pa busat aco mangun ku babpat lun luk ngimet. Ruma' Allah, tana' luk linigan kuan Tuhan, tana' luk biré nelun Liwi, idi bawang rayeh idi uned babpat ineh. Babpat ineh arang babpat luk biré kuan Yahuda pa tinueh busat aco, dengan babpat luk biré kuan Benjamin pa kabing busat aco.

23-27Pa kabing busat aco babpat ineh, anid-anid pupu Israil luk baken miak ngalap aceh babpat tana' rat lakan tana' luk pa busat aco macing lakan tana' luk pa acep aco, maya' kudeng luk pa beneh ini, rat pa tinueh busat aco macing pa kabing busat aco: Benjamin, Simion, Iskar, Sebulon, Gad.

28Pa kabing busat aco babpat luk biré kuan pupu Gad, lakan tana' amé' pa lod busat aco rat Bawang Piasau macing takung Kadis, idi amé pa dayeh busat aco maya' lakan tana' Masir macing Abpa' Rayeh.

29Kebala Tuhan Allah, "Kudeng ineh lawéneh tana' uen mabpat kuan pupu Israil, pad ideh ngalap tana' luk ku babpat inuldeh."

30-34Ini amung tanga' bawang ineh. Kikadang anid libung na macing dueh batu, idi anid libung ineh inan teluh tanga', idi anid tanga' inan ngadan aceh pupu Israil. Tanga' luk pa tinueh busat aco titen Rubin, Yahuda, idi Liwi. Tanga' luk pa busat aco titen Yusup, Benjamin, idi Dan. Tanga' luk pa kabing busat aco titen Simion, Iskar, idi Sebulon. Idi tanga' luk pa acep aco titen Gad, Aser, idi Naptali.

35Kidakang libung luk libut-libut bawang lélé ualuh batu. Ngadan bawang ineh rat pad sineh, "Tuhan Idi Su Ini!"

Daniel

Daniel 1

¹Bang lak luk keteluh kareb imet Yoyakim raca' Yahuda, idi Nebukadnesar raca' Babil nengerieng Yerusalim idi nengelibut bawang ineh.

²Tuhan nenima' Nebukadnesar ngakem Raca' Yoyakim idi ngalap sebuang binaweh rat bang Ruma' Allah. Ieh nenguit nelun luk tiban amé' ruma' akangneh déi' Babil, idi ieh nenganug binaweh ineh bang su luk inan nganug luk meraga.

³Idi raca' ineh nengecuk ni Aspenas, lun rayeh lun luk dukenneh mili' rat arang lun Israil luk tiban ineh, tuda'-tuda' anak adi' deléi luk inul raca' idi luk inul lun do',

⁴ieh ineh tuda'-tuda' luk metaga idi luk na anun-anun luk dat luun bururdeh, luk mileh, idi luk petap sekola', luk saget mileh, pad ideh miak ngakem bang ruma' raca'. Idi Aspenas miak mada' nedeh maca' idi ngayud buri lun Babil.

⁵Idi raca' nengecuk maré nedeh akan idi abpa' anggur ratnan téng raca' anid-anid aco. Pangeh ideh sibada' bang teluh lak ideh miak tuped pa kiung raca'.

⁶Arang lemulun luk pinili' ineh, Daniel, Hanania, Misail, idi Asaria, amungdeh inul Yahuda.

⁷Lun rayeh lun duken raca' nemaré nedeh ngadan baruh, ieh ineh Beltesasar, Sadrak, Misak, idi Abednego.

⁸Iamo' Daniel na pian uen ngelutak ku akan idi abpa' anggur rat bang ruma' raca'. Ieh nemutuh Aspenas, lun rayeh lun luk duken ineh, ngedengan neneh.

⁹Idi Allah nenganau' Aspenas méi' kuan Daniel.

¹⁰Iamo' kebala Aspenas ni Daniel, "Ui matot inan raca'. Ieh nemaré ukum ratnan luk kenen idi luk rupen muyuh. Kudeng muyuh na do' ulun mepad kudeng anak-anak adi' luk baken ineh, ui pitayenneh lek."

¹¹Idi Daniel iné' matun lun matar luk litep Aspenas matar neneh idi teluh burur lun baken ineh.

¹²"Nutun nekai kinio pulu' aco," kebala Daniel. "Maré nekai kikid irin idi abpa' talang.

¹³Maad nekai dengan anak adi' luk kuman ratnan téng raca' idi nganau' anun-anun luk petulu dengan ayu kai."

¹⁴Idi ieh nenima' nedeh nutun akan ineh kinio pulu' aco.

¹⁵Pangeh ineh idi ideh do' ulun idi meluun tueh rat nelun baken luk nekuman ratnan téng raca'.

¹⁶Ngaceku ineh lun matar ineh na nemaré akan raca' teh iamo' kikid irin mo' sebuleng.

¹⁷Allah nemaré inan apat anak adi' ineh ileh ratnan amung-amung surat idi teh terawé luk medalem. Idi Ieh nemaré ni Daniel ileh ngelio luk sinier idi nupi pana'.

¹⁸Idi abud teluh lak luk litep raca', idi Aspenas nenguit amung anak adi' ineh amé' matun Nebukadnesar.

¹⁹Idi raca' nepebala nedeh, idi ieh nekali' Daniel, Hanania, Misail, idi Asaria meluun do' ratnan anak adi' luk baken. Idi ideh mangun ku lun duken raca'.

²⁰Kareb raca' nengitun nedeh ratnan anun-anun luk medalem idi luk mikat uen mutut, ieh kali' nedeh pulu' kua' ileh ratnan lun luk mileh mangun idi luk mileh nier bang aput imetneh.

²¹Idi Daniel nengakem su ineh pad macing Kores mangun ku raca' Babil.

Daniel 2

¹Bang lak luk kedueh kareb imet Nebukadnesar idi ieh nenginupi. Idi ieh megagau ngerawé nupineh pad ieh na rudap.

²Idi ieh neneteng nelun luk mileh nier, lun luk mangun, lun luk melalud ratnan gimet, idi lun luk nawar ada', pad ideh ngelio nupi ineh kuanneh. Kareb ideh nacing idi tuped pa kiung raca',

³idi kebalaneh nedeh, "Ui inan nupi luk ngagau negku. Ui pian kali' ratnan ineh."

⁴Idi ideh nengor bala raca' bang buri' Arami, kebaladeh, "Do' raca' mipu ulun! Mada' nupimu nekai, idi kai miak mada' ilungneh."

⁵Idi kebala raca' nelun luk nawar ada', "Kudeng muyuh na miak mada' nupiku idi ilungneh, na miak na ui ngecuk nelun natek nemuyuh idi ngusag ruma' muyuh.

⁶Iamo' kudeng muyuh miak mada' nupiku idi ilungneh, ui miak maré kuan muyuh tuda'-tuda' baré idi ngadan luk rayeh. Ngaceku ineh do' mada' nupiku negku idi ilungneh."

⁷Idi kebaladeh inan raca', "Kudeng raca' mada' nupimu nekai, idi kai miak mada' ilungneh."

⁸Idi kebala raca' nedeh, "Mo, muyuh pian ngiuk balaku, ngaceku muyuh kali' luk pangeh pinututku na miak misu'.

⁹Kudeng muyuh na mada' nupiku negku, idi amung-amung muyuh miak kumin. Muyuh pangeh nepegayam pian naluk negku, pad terawéku misu'. Mada' nupiku negku, pad ui kali' idi muyuh miak mada' ilungneh."

¹⁰Idi kebala lun luk nawar ada' ineh, "Seburur pana' bang aput-apat tana' ini nateh luk miak mada' luk initun raca'. Seburur raca' pana' luk meluun rayeh idi melalud nateh luk nengitun luk kudeng ineh inan lun luk mileh nier, lun luk melalud ratnan gimet, idi lun luk nawar ada'.

¹¹Luk initun raca' ineh pelaba ikat, pad allah-allah mo' sebuleng miak kali' ilungneh, iamo' na ideh tudo arang lemulun."

¹²Idi raca' ineh petacu megateh niat, pad ieh nengecuk ngaté amung-amung lun luk mileh luk ngedengan raca' déi' Babil.

¹³Idi amung-amungdeh mekaneh ukum maté dengan Daniel idi lun rurumneh pana'.

¹⁴Idi Daniel iné' ni Ariuk dengan bala luk do' idi mileh. Idi Ariuk ineh lun rayeh lun luk nginita raca' luk pangeh icuk ngacing ukum ineh.

¹⁵Idi kebala Daniel ni Ariuk, "Ngudehké raca' nemutut aceh ukum luk meberat kudeng ineh?" Idi Ariuk nemada' ni Daniel ratnan luk pangeh nangun ineh.

¹⁶Idi Daniel petacu iné' mutuh raca' ngiuk ukum ineh, pad ieh miak mada' raca' ratnan ilung nupi ineh.

¹⁷Idi Daniel nuli' idi nemada' nelun rurumneh, Hanania, Misail, idi Asaria ratnan luk pangeh nangun.

¹⁸Ieh nengecuk nedeh sembayang mutuh Allah Surga méi' nedeh idi mada' nedeh ratnan luk inalum pad ideh na pitayen dengan lun baken luk mileh déi' Babil.

¹⁹Idi malem ineh pana' luk inalum ineh linio kuan Daniel bang aceh luk sinierneh, idi ieh nengubur Allah Surga: Kebalaneh,

²⁰"Do' ngubur ngadan Allah macing raked-raked, ngaceku Ieh luk mileh idi melalud.

²¹Ieh luk ngimet amung kareb. Ieh luk mudut idi ngagka' raca'-raca'; Ieh maré ileh idi do' kali' kuan lemulun.

²²Ieh ngelio luk medalem idi luk inalum, idi Ieh kali' luk inapung bang dace; idi acang luk pekelibut Neneh.

²³Ui ngubur idi ngerayeh Namu. O Allah tepunku. Iko nemaré ileh idi tueh negku; Iko nengua' sembayangku idi nemada' nekai ratnan luk belén ni raca'."

²⁴Idi Daniel iné' ni Ariuk luk icuk raca' ngaté nelun mileh luk déi' Babil, kelabaneh, "Aleg ngaté nedeh. Do' nguit negku amé' matun raca', idi ui miak mada' neneh ratnan ilung nupineh ineh."

²⁵Idi Ariuk nenguit ni Daniel dengan mesaget amé' matun raca' ineh. Idi kebalaneh ni raca', "Ui pangeh nekali' seburur lun luk tiban rat Yahuda luk miak mada' kuan raca' ratnan ilung nupimu ineh."

²⁶Idi kebala raca' ni Daniel (luk titen Beltesasar), "Miakké iko mada' nupiku idi ilungneh negku?"

²⁷Idi kebala Daniel, "O raca', seburur lun luk nawar ada', seburur lun luk mangun, seburur lun luk mileh nier, idi seburur lun luk mileh kali' gituen nateh luk miak mada' luk kudeng ineh.

²⁸Iamo' inan aceh Allah déi' Surga luk mileh ngelio luk inalum. Ieh pangeh nemada' namu, O Raca' Nebukadnesar, ratnan luk miak mangun mucu. Idi ini nupi ineh idi luk siniermu karebmu rudap.

²⁹"O raca', kareb iko rudap, iko nenginupi ratnan luk mangun mucu, idi Allah luk ngelio luk inalum nemada' namu ratnan luk miak mangun ineh.

³⁰Idi luk inalum ineh pangeh linio kuanku, baken ngaceku ui luk meluun ileh rat nelun baken, iamo' pad iko, O raca', miak kali' ilung nupimu, idi terawému pana' luk nacing namu.

³¹"O raca', bang luk siniermu ineh, iko nenier aceh ayu lemulun luk rayeh luk netuped pa kiungmu, luk merasat idi luk mesilo, idi luk inan matot.

³²Uluhneh ineh ratnan amas luk do'. Ruuk idi langenneh inau' ratnan pirak; awa'neh idi teladingneh inau' ratnan tekaling.

³³Kukudneh inau' ratnan belawan, idi daparnéh inau' ratnan belawan idi tana' kuden.

³⁴Kareb iko nenier neneh, idi aceh batu luk rayeh neturi' rat luun pegkung dengan na lemulun nengakem neneh, idi nekanéh dapar luk kudeng ayu lemulun ineh, luk ratnan belawan idi tana' kuden, pad dueh dapar ineh nekurar.

³⁵Petacu belawan, tana' kuden, tekaling, pirak, idi amas ineh nisu' ku kipuh luk luun apin su luk inan rumik kareb merikan. Idi amung ineh nepalid ku bui pad na luk ketecan. Iamo' batu ineh netemubu' mangun ku aceh pegkung luk mapen aput tana'.

³⁶"Ieh ineh nupimu. Nekini ui miak mada' ilungneh namu.

³⁷O raca', iko luk meluun rayeh rat arang amung-amung raca'. Allah Surga pangeh nengeletep namu mangun ku raca', idi Ieh nemaré namu lalud, tueh, idi ubur pana'.

³⁸Ieh nengeletep namu mangun ku raca' apud tana'. Idi iko raca' amung pung idi suit pana'. Iko ineh uluh luk ratnan amas.

³⁹Muci rat namu inan aceh imet luk baken, iamo' na ieh mepad rayeh kudeng imetmu. Idi mucu ratnan ineh inan aceh imet luk keteluh luk ratnan tekaling, luk miak ngimet apud tana'.

⁴⁰Idi mucu ratnan ineh inan aceh imet luk keapat, luk mepad tueh kudeng belawan. Mepad kudeng belawan luk mila' idi ngareg luk amung-amung, kudeng ineh teh imet ineh miak mila' idi ngareg amung-amung imet luk atun rat neneh.

⁴¹Iko nekali' dapar idi bua' kukud ineh puar-puar tana' kuden idi belawan. Ilungneh imet ineh miak mangun ku dueh babpat. Imet ineh inan sesuatu tueh ratnan belawan ineh, ngaceku inan belawan puar-puar dengan tana' kuden ineh.

⁴²Ilungneh bua' kukud luk ratnan belawan puar-puar dengan tana' kuden, ieh ineh imet ineh kali' rungen metueh, iamo' malé mekurar.

⁴³Idi teh iko nekali' belawan ineh puar-puar dengan tana' kuden. Idi raca'-raca' imet ineh miak nutun nutum tetek ruma'deh ratnan aweh seburur dengan seburur, iamo' na miak, mepad kudeng belawan luk na miak puar dengan tana' kuden.

⁴⁴Idi kareb raca'-raca' ineh ngimet, Raca' Surga miak ngeletep aceh imet luk na kekipedneh. Imet ineh na miak uen ngelaya', iamo' ieh miak ngusag amung-amung imet luk baken. Idi ieh miak meraben macing raked-raked.

⁴⁵Iko nekali' aceh batu luk neturi' ratnan pegkung dengan na luk nengakem neneh. Idi batu ineh nekaneh luun luk kudeng ayu lemulun ineh luk ratnan belawan, tekaling, tana' kuden, pirak, idi amas. O raca', Allah luk rayeh mada'

namu ratnan luk miak mangun mucu. Ui pangeh nemada' namu ratnan nupimu idi ilungneh luk matu.”

⁴⁶Idi Raca' Nebukadnesar netekeradung pa kiung Daniel, idi ieh nengecuk nelun ngeret pung idi maré baré kuanneh.

⁴⁷Idi kebala raca', "Allahmu ineh meluun rayeh ratnan amung-amung allah, idi Ieh luk Tuhan amung-amung raca', idi luk ngelio luk inalum, ngaceku iko luk miak ngelio luk inalum ineh.”

⁴⁸Idi ieh nemarké kuan Daniel aceh kekamen luk rayeh. Idi teh ieh nemarké neneh tuda'-tuda' baré luk pelaba do'. Idi ieh nengecuk ni Daniel ngimet bawang Babil, idi ieh nenganau' neneh mangun ku lun rayeh amung-amung lun mileh luk déi' Babil ineh.

⁴⁹Idi maya' putuh Daniel, Raca' Nebukadnesar nengelelep Sadrak, Misak, idi Abednego ngimet amung kekamen déi' bawang Babil. Idi Daniel sinima' tudo déi' ruma' raca'.

Daniel 3

¹Raca' Nebukadnesar nengecuk nganau' aceh akang amas, kidita'neh iwa' ngepulu' kaki idi pipangneh iwa' kaki. Idi ieh nengerareng neneh luun Raked Dura bang bawang Babil.

²Idi raca' nengecuk amung-amung lun rayehneh mepamung — ieh ineh amung lun luk inul raca', pengulu-pengulu, idi lun luk pa liang pengulu, lun luk mileh ngedengan raca, lun luk ngimet usin, lun luk mutut ukum, idi lun luk pa liangdeh, idi teh amung-amung lun rayeh bang anid-anid babpat bawang. Ideh titeng ngerayeh aco ngaceku akang luk inau' Nebukadnesar.

³Amung lun rayeh luk nepamung ngerayeh aco ineh netuped pa atun akang ineh.

⁴Idi seburur lun luk nated bala raca' nengitang, kebalaneh, "O muyuh luk rat anid-anid bawang idi pupu, idi teh luk manid-manid buri'!

⁵Idi kareb muyuh ninger uni serupit, suling, giula', idi gita, idi amung-amung luk muni pana', idi do' muyuh tekeradung idi sembayang inan akang amas luk inau' Raca' Nebukadnesar.

⁶Idé-idé luk na tekeradung sembayang miak petacu talan bang tetel apui.”

⁷Idi kareb ideh neninger amung-amung luk muni ineh, idi lemulun rat anid-anid bawang, pupu, idi teh luk manid-manid buri' netekeradung sembayang inan akang amas luk inau' Raca' Nebukadnesar.

⁸Idi tuda'-tuda' burur lun Babil pian ngadu' nelun Yahudi.

⁹Idi kebaldeh ni Raca' Nebukadnesar, "Do' raca' mipu ulun!

¹⁰Iko pangeh nengecuk amung-amung lemulun tekeradung sembayang inan akang amas kareb ideh ninger amung-amung luk muni ineh.

¹¹Idi idé-idé luk na tekeradung sembayang neneh miak talan bang tetel apui.

¹²Inan tuda'-tuda' burur lun Yahudi luk icukmu ngimet bawang Babil — ieh ineh Sadrak, Misak, idi Abednego. Ideh ngelaba bala raca'. Na ideh sembayang inan akangmu, idi na ideh tekeradung pa kiung akangmu ineh.”

¹³Idi raca' petacu megateh niat idi nengecuk nediteluh amé' matun neneh.

¹⁴Idi kebalaneh nediteluh, "Sadrak, Misak, idi Abednego, matuké meteluh ara' sembayang inan allahku idi na tekeradung pa kiung akang luk inau'ku ineh?

¹⁵Ngaceku ineh, kareb meteluh ninger uni serupit, suling, giula', gita, idi amung-amung luk muni ineh, do' meteluh tekeradung sembayang inan akang ineh. Kudeng na, muyuh miak talan bang tetel apui. Inanké allah luk miak ngulun nemeteluh?”

¹⁶Idi Sadrak, Misak, idi Abednego nengor bala raca', kebala diteluh, "O raca', na ulekneh kai ngor balamu.

¹⁷Kudeng Allah luk inan kai sembayang miak ngulun nekai ratnan tetel apui, idi ratnan laludmu, kali' rungen Ieh miak nganau' luk kudeng ineh.

¹⁸Iamo' kudeng Ieh na ngulun nekai, O raca', kali' rungen kai na miak sembayang inan allahmu, idi kai na miak tekeradung pa kiung akang amas luk inau'mu ineh."

¹⁹Idi Nebukadnesar pelaba useh nediteluh, pad kiungneh mesia' ku gatehneh. Ieh nengecuk nelun dukenneh ngelau' tetel ineh tudu' kua' kilau'neh.

²⁰Idi ieh nengecuk nelun pebunu'neh luk meluun tueh ngabet nediteluh idi nala' nediteluh bang tetel apui.

²¹Idi ideh nengabet nediteluh luk inayung ku kuyu' idi kuyu' boyor, idi teh sigar. Idi ideh nenala' nediteluh bang tetel apui.

²²Idi ngaceku ukum raca' pelaba berat, idi apui ineh pelaba lau', pad lun luk nenated nediteluh amé bang tetel ineh neseb ku apui ineh.

²³Idi Sadrak, Misak, idi Abednego luk inabet ineh nebpeh luun uned apui ineh.

²⁴Idi Nebukadnesar negagap. Idi ieh nengitun nelun mileh ineh. "Naké tau nengabet teluh burur lemulun idi nenala' nediteluh bang tetel apui?" Idi kebaladeh, "Matu, O raca'."

²⁵Idi kebala raca', "Ngudehké ui nier apat burur lemulun nalan bang apui ineh? Na ideh inabet idi na ideh neseb — idi luk keapat ineh mepad kudeng aceh allah ayuneh."

²⁶Nebukadnesar iné matun tanga' tetel apui ineh idi nengitang, kebalaneh, "Sadrak! Misak! Abednego! Demulun Allah luk Meluun Rayeh! Remuat meteluh!" Idi diteluh petacu neremuat.

²⁷Idi amung lun luk inul raca', pengulu-pengulu, lun luk pa liang pengulu, idi lun mileh luk ngedengan raca' nepamung pian nier mediteluh luk na neseb ku apui. Abpuk diteluh pana' nateh netegeruit ku apui ineh, ayung diteluh pana' nateh neseb, idi na buen rabpun luun diteluh.

²⁸Kebala raca', "Ngubur Allah Sadrak, Misak, idi Abednego. Ieh nengecuk melaikatNeh ngulun nelun luk merapet idi sembayang Neneh. Diteluh

nengelaba ukumku idi na matot maté, ngaceku na diteluh pian tekeradung sembayang inan allah baken ratnan Allahdeh sebuleng.

²⁹"Idi nekini ui maré aceh ukum: Kudeng idé-idé ratnan anid-anid bawang, pupu, idi luk ratnan manid-manid buri' ngedat Allah Sadrak, Misak, idi Abednego, ieh miak uen natek, idi ruma'neh miak uen ngusag. Na luk idi allah baken luk miak ngulun kudeng ini."

³⁰Idi raca' nemaré kuan Sadrak, Misak, idi Abednego kekamen luk meluun rayeh bang bawang Babil.

Daniel 4

¹Raca' Nebukadnesar nemaré surat ini kuan lemulun bang anid-anid bawang, idi ratnan manid-manid pupu, idi buri' bang tana' ini: "Tabi'!

²Surat ini mada' nemuyuh ratnan kekamen luk melalud idi luk inan mawa luk linio Allah luk Meluun Rayeh kuanku.

³"Kudeng apeh rayeh kekamen Allah luk inan mawa luk linio kuan tau! Pelaba lalud amung-amung tanu' luk inau'Neh! Allah ineh raca' luk ngimet macing raked-raked.

⁴"Ui ini Nebukadnesar tudo dengan na anun-anun susa' bang ruma'ku, idi ui mawang niat ngaceku ui pelaba do'.

⁵Iamo' ui inan aceh nupi luk ngatot negku, idi ui nekali' luk inan matot ineh kareb ui rudap.

⁶Idi ui nengecuk nelun nguit amung-amung lun mileh luk déi' Babil, pad ideh miak mada' ilung nupi ineh negku.

⁷Idi ideh nenguit amung lun luk mileh nier, lun luk mangun, lun luk nawar ada', idi lun luk mileh kali' gituen. Ui nemada' nupiku nedeh, iamo' na ideh mileh mada' ilungneh negku.

⁸Pangeh ineh Daniel iné' negku (ieh ineh luk titen Beltesasar maya' ngadan allahku.) Idi Roh Allah luk Meligan idi bang neneh. Ngaceku ineh ui nemada' nupiku neneh.

⁹Kebalaku neneh: O Beltesasar, luk lun rayeh amung lun luk mileh nier, ui kali' Roh Allah luk Meligan idi bang namu, idi iko kali' amung-amung luk inalum. Ini nupiku. Mada ilungneh negku.

¹⁰"Kareb ui rudap idi ui nekali' aceh kayuh luk pelaba dita' uned tana' ini.

¹¹Idi kayuh ineh iuk-iuk medita' pad ieh macing déi' langit idi miak siren lemulun aput-aput tana'.

¹²Idi donneh pelaba do' taga, idi bua'neh pelaba ula', pad miak kenen amung luk mulun bang tana' ini. Pung luk meliputi tudo ngato erurdeh su lungung kayuh ineh. Suit-suit nenganau' arardeh nan angkatneh. Idi amung luk mulun nekuman bua' ineh.

¹³"Kareb ui uned ngerawé luk sinierku ineh, idi ui nekali' aceh melaikat luk megéi' matar netemurun rat surga.

¹⁴Idi ieh nengitang, kebalaneh, 'Do' nebpeng kayuh ineh, nutu' angkatneh, idi nala' donneh idi bua'neh. Ngusu pung rat su ineh idi suit luk nan angkatneh.

¹⁵Iamo' necan tuedneh bang tana', idi ngelilid neneh ku belawan idi tekaling. Idi nima' neneh su ineh dengan uduh. " 'Nima' ipup mebpeh luun lemulun ini, idi nima' neneh tudo dengan pung idi tibu-tibu.

¹⁶Idi bang tudu' lak kinioneh ieh miak ngerawé kudeng pung mo', baken kudeng terawé lemulun.

¹⁷Ini luk pinutut melaikat-melaikat luk megéi' matar. Do' ngegala' kuan lemulun luk aput-aput tana' ratnan Allah luk Meluun Rayeh luk melalud ratnan amung-amung imet lemulun luk bang tana' ini. Ieh miak ngikit idé-idé luk pianNeh mangun ku raca' — sagan pana' ieh lemulun luk meluun isuut.'

¹⁸"Ini nupiku," kebala raca' Nebukadnesar, "Nekini, Beltesasar, do' mada' ilungneh negku. Lun mileh luk ngedengan negku na miak mada' ilungneh negku, iamo' iko luk miak mada' negku, ngaceku Roh Allah luk Meligan idi bang namu."

¹⁹Idi Daniel (luk titen Beltesasar) pelaba susa' niat, pad na luk belénneh. Idi kebala raca' neneh, "O Beltesasar, aleg iko dat niat ngaceku ilung nupiku ini." Kebala Beltesasar, "Meluun do', O raca', kudeng nupimu ineh uen ngacing kuan bunu'mu.

²⁰Kayuh luk medita' idi metueh macing déi' langit idi miak siren amung lemulun aput-aput tana' ini.

²¹Idi donneh pelaba do' taga, idi bua'neh pelaba ula' pad miak kenen amung luk mulun bang tana' ini. Pung luk meliputi tudo su lungungneh, idi suit-suit nenganau' arardeh nan angkatneh.

²²"O raca', iko ini luk kayuh ineh. Iko ini medita' idi metueh. Iko iuk amé' rayeh pad iko macing déi' langit, idi laludmu maput aput tana'.

²³Idi kareb iko nenier, seburur melaikat netemurun rat surga, kebalaneh, 'Nebpeng kayuh ineh idi nala' neneh, iamo' necan tuedneh ineh bang tana', idi ngelilid neneh ku belawan idi tekaling, idi necan neneh su ineh dengan uduh. Nima' ipup mebpeh luunneh, idi necan neneh su ineh dengan pung, kinio tudu' lak.'

²⁴"O raca', ini ilung nupimu. Kebala Allah luk Meluun Rayeh: Ini luk miak mangun kuanmu.

²⁵Iko miak uen ngusu rat arang lemulun, idi iko miak tudo dengan pung luk meliputi. Idi iko miak kuman uduh mepad kudeng sapi', idi rudap déi' liang, idi ipup miak mebpeh luunmu kinio tudu' lak. Pangeh ineh iko miak kali' Allah luk Meluun rayeh luk kuan amung imet lemulun bang tana' ini, idi Ieh miak ngikit idé-idé luk pianNeh mangun ku raca'.

²⁶Melaikat ineh nengecuk necan tued ineh bang tana'. Ilungneh iko miak mangun ku raca' baruh teh, kareb iko kali' idi Allah luk ngimet amung tana' ini.

²⁷Ngaceku ineh, O raca', do' iko maya' bada'ku. Ugka' nganau' sala', idi nganau' luk matu; méi' kuan lun masi', pad iko uren ratnan amung-amung dat luk pangeh inau'mu, idi iko miak uen ngeperuan peh."

- ²⁸Amung-amung ini mangun kuan Raca' Nebukadnesar.
- ²⁹Pangeh pulu' dueh bulan kareb ieh nalan bang kabun luk luun apo ruma' raca; déi' Babil,
- ³⁰idi kebalaneh, "Siruh kudeng apeh rayeh bawang Babil! Ui nemudut ineh mangun ku bawangku luk rayeh, pad ui ngegala' lalud idi tuehku, rayeh idi uburku."
- ³¹Kareb uned ieh pebala, idi inan tang rat déi' langit, "O Raca' Nebukadnesar, ninger balaKu. Nekini imetmu pangeh ilap rat namu.
- ³²Iko miak uen ngusu rat arang lemulun, idi iko miak tudo dengan pung luk meliputi. Iko miak kuman uduh mepad kudeng sapi' kinio tudu' lak. Idi pangeh ineh iko miak kali' idi Allah luk Meluun Rayeh luk kuan amung imet lemulun luk bang tana' ini. Idi Ieh miak ngikit idé-idé luk pianNeh mangun ku raca'."
- ³³Idi petacu bala ineh icing. Idi Nebukadnesar inusu rat arang lemulun, idi ieh nekuman uduh mepad kudeng sapi'. Ipup nebpeh luun bururneh. Idi abpukneh amé' mekadang mepad kudeng buluh kanui idi lisunneh pana' mekadang mepad kudeng lisun suit.
- ³⁴"Idi abud tudu' lak ineh, Ui ini Nebukadnesar netengook nier déi' langit, idi petacu terawéku nisu'. Idi ui nengubur Allah luk Meluun Rayeh idi nengubur Neneh idi nengerayeh Neneh luk mulun macing raked-raked. "Teh miak ngimet macing raked-raked.
- ³⁵Kudeng lemulun bang tana' ini uen maad dengan Allah, ideh na anun-anun. Amung melaikat luk déi' Surga idi lemulun bang tana' ini pa liang imetNeh. Seburur pana' na miak ngeluun luk pianNeh, idi ngitun Neneh ratnan luk ruenNeh.
- ³⁶"Kareb terawéku do', idi amung ubur imetku, idi amung rayeh, idi laludku pangeh biré negku baruh teh. Amung lun mileh idi lun rayehku nengalap negku lemubed teh, idi ui pangeh litep bang kekamen raca' baruh teh, dengan ubur luk meluun rayeh ratnan luk atun.

³⁷"Idi nekini, ui ini Nebukadnesar ngubur idi ngerayeh Raca' Surga. Amung-amung luk ruenNeh matu. Ieh megéi' nganau' luk mesiri, idi Ieh ngebeneh lemulun luk medita' niat."

Daniel 5

¹Kareb imet Belsasar, idi ieh nenawar meribu lun rayeh amé' ku irauneh luk rayeh. Idi ideh nengirup abpa' anggur.

²Kareb ideh ngirup idi Belsasar nengecuk nelun dukenneh nguit sangkir idi bigan amas idi pirak luk tiban tamanneh Nebukadnesar rat bang Ruma' Allah déi' Yerusalim, pad raca', lun rayehneh, awanneh, idi apidneh miak ngirup makai sangkir idi bigan ineh.

³Idi petacu ideh nenguit sangkir idi bigan amas ineh, idi amung-amungdeh nengirup.

⁴Ideh nengirup abpa' anggur idi nengubur akang luk inau' ratnan amas, pirak, tekaling, belawan, kayuh, idi batu teh.

⁵Idi denak-denak, aceh ticu' lemulun nesilangan, idi nengayud luun alad batu ruma' raca', su luk inan lapung luk merasat. Idi raca' ineh nenier ticu' ineh ngayud.

⁶Idi kiungneh nisu' mebudi idi ieh megegker niat.

⁷Idi ieh nengitang mutuh nelun nguit lun luk mangun, lun luk nawar ada', idi lun luk mileh kali' gituen. Idi kareb ideh nacing, kebala raca' nedeh, "Idé-idé luk mileh maca' ayud iniidi mada' ilungneh negku, idi ieh uen ngayung ku kuyu' boyor luk sia' merirem, idi ratai amas miak ruen ku banéneh, idi ieh miak ngalap ngadan luk keteluh bang imet bawang ini."

⁸Idi amung lun luk mileh luk ngedengan raca' nacing, iamo' seburur pana' nateh luk mileh maca' ayud ineh idi mada' ilungneh nan raca'.

⁹Ngaceku ineh, Raca' Belsasar pelaba susa' niat idi kiungneh pelaba budi idi lun rayehneh pana' na kali' anun luk miak ruendeh.

- ¹⁰Idi tinan raca' neninger ria' raca' idi lun rayehneh ineh, idi ieh iné' sikang. Kebalaneh, "Do' raca' mipu ulun! Ngudeh iko megagau idi mebudi kiung?"
- ¹¹Inan seburur lemulun bang imetmu luk inan Roh Allah luk Meligan. Kareb tamanmu raca', lemulun ini luk do' kali', idi ilehneh mepad kudeng ileh allah. Idi tamanmu Raca' Nebukadnesar nengelelep neneh ku lun rayeh lun luk mileh nier, lun luk mileh mangun, lun luk mileh nawar ada', idi lun luk mileh kali' gituen.
- ¹²Ieh luk pelaba ileh idi do' kali' ratnan ilung nupi, idi ngelio luk medalem idi luk inalum. Do' neteng ni Daniel (luk titen raca' Beltesasar) idi ngecuk neneh mada' ilung amung-amung ini."
- ¹³Idi petacu ideh nenguit ni Daniel amé' pa kiung raca'. Idi kebala raca' neneh, "Matuké iko ini Daniel, seburur lun Yahudi luk tiban tamanku luk raca' rat bawang Yahuda.
- ¹⁴Ui neninger idi Roh Allah idi bang namu, pad iko mileh idi do' kali'.
- ¹⁵Lun luk mileh idi lun luk mangun icuk maca' ayud ini idi mada' ilungneh negku, iamo' na ideh kali' ilungneh.
- ¹⁶Idi ui neninger idi iko luk kali' luk medalem idi luk inalum. Kudeng iko mileh maca' ayud ini idi mada' ilungneh negku, idi iko uen ngayung ku kuyu' boyor luk sia' merirem, idi ratai amas miak ruen ku banému, idi iko miak ngalap ngadan luk keteluh bang imet bawang ini."
- ¹⁷Idi kebala Daniel, "Na ui pian ku barému ineh. Do' maré ineh kuan dulun. Iamo' ui miak maca' luk inayud ineh idi mada' ilungneh kuan raca'.
- ¹⁸"Allah luk Meluun Rayeh nengelelep tamanmu Nebukadnesar mangun ku raca' luk rayeh. Idi Ieh nengedita' neneh idi nemaré ubur kuanneh.
- ¹⁹Ieh pelaba rayeh pad lemulun ratnan anid-anid bawang, pupu, idi luk ratnan manid-manid buri' matot neneh idi megegker pa kiungneh. Idi kudeng ieh pian ngaté seburur lemulun, idi ieh nganau' luk kudeng ineh. Kudeng ieh pian ngulun seburur lemulun idi ieh nganau' luk kudeng ineh. Ieh nengubur idi nengigu' idé-idé luk pianneh.

²⁰Iamo' ngaceku ieh iuk medita' niat, idi na méi' nelun, idi ieh tila' ratnan kerusi raca', pad ieh na miak buren.

²¹Ieh inusu rat arang lemulun, idi terawéneh nisu' mepad kudeng terawé pung. Ieh tudo dengan keladai luk meliput, idi ieh nekuman uduh mepad kudeng sapi', idi ieh rudap déi' liang, idi ipup nebpeh luun bururneh. Kekipedneh ieh kali' idi Allah luk Meluun Rayeh luk kuan amung imet luk bang tana' ini, idi Ieh ngikit idé-idé luk pianNeh mangun ku raca'.

²²"Idi iko ini luk anakneh na nengebened bururmu, sagan pana' iko pangeh nekali' amung-amung ini.

²³Iko sikal metueh ratnan Tuhan Surga pad iko nenguit sangkir idi bigan luk tiban rat bang Ruma' Allah. Iko, lun rayehmu, awanmu idi apidmu nengirup abpa' anggur luk bang sangkir idi bigan ineh. Idi muyuh nengubur akang luk inau' ratnan amas, pirak, tekaling, belawan, kayuh, idi batu, ieh ineh allah luk na miak nier, ninger, idi kali' anun-anun. Iamo' na muyuh nengubur Allah luk ngimet ulun muyuh idi amung-amung luk ruen muyuh.

²⁴Ini punneh Allah nengecuk ticu' ineh ngayud bala ini.

²⁵"Ini luk inayud; 'Ngiap, ngiap, nimang, mabpat.'

²⁶Idi ini ilungneh: ngiap, Allah pangeh nengiap amung-amung aco imetmu idi nengagka' namu;

²⁷nimang, iko pangeh tinimang idi iko pelaba ran;

²⁸mabpat, imetmu pangeh bibpat idi biré nelun Midi idi Parsi."

²⁹Idi petacu Belsasar nengecuk nelun dukenneh ngayung ni Daniel ku kuyu' boyor luk sia' merirem idi ratai amas inau' ku banéneh, idi Belsasar neparé neneh ngadan luk keteluh bang imetneh.

³⁰Idi dacem ineh Belsasar, raca' Babil ineh pinaté.

³¹Idi Darius, lun Midi mangun ku raca'. (Idi ulun Darius kareb ineh anem ngepulu' dueh lak.)

Daniel 6

- ¹Idi Darius nemili' 120 pengulu luk miak ngimet aput-apat imetneh.
- ²Idi ieh nemili' ni Daniel dengan dueh burur lun baken mangun ku lun ngimet pa luun pengulu ineh idi teh ngedengan raca'.
- ³Idi megala' kekamen Daniel meluun do' ratnan kekamen lun ngimet idi pengulu luk baken ineh. Ngaceku ieh pelaba ileh idi do' niat, idi Raca' Darius pian ngeletep neneh mangun ku lun rayeh aput imet raca'.
- ⁴Idi lun ngimet idi pengulu luk baken nakap sala' Daniel bang kekamenneh. Iamo' na ideh kali' anun-anun sala' Daniel, ngaceku ieh mesiri idi na nganau' luk dat idi luk tekilu'.
- ⁵Kebaladeh, "Na tau miak ngadu' ni Daniel ratnan kekamenneh. Kian, ratnan sembayangneh lek miak tau ngadu' neneh."
- ⁶Idi ideh iné' matun raca', kebaladeh, "O Raca' Darius, do' iko mipu ulun!
- ⁷Amung kai luk ngakem kuanmu, ieh ineh lun ngimet, pengulu, lun luk pa liang pengulu, idi lun mileh ngerawé, idi do' raca' maré aceh ukum luk meberat. Kinio teluh ngepulu' aco, do' mebpeng lemulun na miak mutuh anun-anun luk ratnan allah idi lemulun pana', iamo' miak mutuh ratnan raca' mo' sebuleng. Idé-idé luk ngelaba ukum ini miak talan bang lubang balang.
- ⁸Do' raca' nén ukum ini, pad ieh miak bén idi na miak uen ngisu' mepad kudeng amung ukum lun Midi idi lun Parsi."
- ⁹Idi Raca' Darius nenén ukum ineh.
- ¹⁰Kareb Daniel nekali' idi ukum ineh pangeh pinutut, idi ieh nuli'. Idi déi' bang parung ruma'neh inan teluh tabuk luk petutup bawang Yerusalim. Idi déi' bang parung ruma'neh inan teluh tabuk luk petutup bawang Yerusalim. Idi ieh netekeradung munung tabuk luk mukab ineh idi nesembayang pa kiung Allah teluh kua' seaco mepad kudeng luk pekalai.
- ¹¹Kareb bunu' Daniel nekali' neneh nesembayang inan Allah,
- ¹²Idi petacu ideh iné' matun raca' pian ngadu' ni Daniel. Kebaladeh, "O raca', iko nenén aceh ukum luk mebpeng na miak mutuh anun-anun ratnan allah

idi lemulun pana', kinio teluh ngepulu' aco, iamo' miak mutuh ratnan raca' sebuleng mo'. Idi lemulun luk ngelaba ukum ineh miak talan bang lubang balang." "Mo," kebala raca', "Aceh ukum luk meberat mepad kudeng ukum lun Midi idi lun Parsi, luk na miak uen ngisu'."

¹³Idi kebaladeh ni raca', "Seburur lun luk tiban rat Yahuda, ieh ineh Daniel, na ngerayeh raca', idi ieh ngelaba ukummu. Ieh sembayang teluh kua' seaco."

¹⁴Kareb raca' nekali' bala ini, idi ieh mesusa' niat pad ieh nenakap dalam sikal muit ni Daniel. Idi ieh nemutuh ngerawé macing aco macep.

¹⁵Idi lemulun ineh nacing sekua' teh idi kebaladeh ni raca', "O raca', iko kali', maya' ukum lun Midi idi lun Parsi, ukum raca' na miak uen ngisu'."

¹⁶Idi raca' nengecuk nala' ni Daniel bang lubang balang. Idi kebala raca' ni Daniel, "Do' Allah luk inanmu merapet tu-tu ngulun namu."

¹⁷Idi ideh nenguit aceh batu ku kakeb lubang ineh. Idi raca' nenganau' aceh etuneh idi etu lun rayehneh luun batu ineh, pad Daniel na miak puatin.

¹⁸Idi raca' nuli'. Iamo' na ieh nekuman idi nemarot mepad kudeng luk pekalai. Idi dacep sineh na tupu ieh rudap.

¹⁹Idi kareb aco masat, raca' netumui idi petacu iné' matun lubang balang ineh.

²⁰Kareb ieh muneng, idi ieh nengitang ngaceku dat niatneh, "O Daniel, demulun Allah luk mulun! Miakké Allah luk inanmu merapet ngulun namu ratnan balang ineh?"

²¹Idi kebala Daniel, "Do' raca' mipu ulun!

²²Allah nengecuk melaikatneh neniep tang balang ineh, pad ideh na ngaté negku. Ieh nenganau' kudeng ineh ngaceku Ieh kali' negku na mesala', idi ngaceku ui na mesala' pa kiungmu. O raca'."

²³Idi raca' pelaba awang niat, idi ieh nengecuk nelun dukenneh nenginat ni Daniel rat bang lubang balang ineh. Idi ideh nenginat neneh, idi ideh kali' neneh na nurat, ngaceku ieh merapet inan Allah.

²⁴Idi raca' nengecuk nala' nelun luk nengadu ni Daniel bang lubang balang, perapu dengan awandeh idi anakdeh. Kareb nateh ideh nacing uned lubang ineh, idi balang ineh nengakem nedeh idi nemutul amung tulangdeh.

²⁵Idi Raca' Darius nengayud aceh surat kuan amung-amung lemulun ratnan anid-anid bawang, pupu, idi luk ratnan manid-manid buri' bang tana' ini. Kebalaneh: "Tabi'!

²⁶Ui ngecuk amung-amung lemulun luk bang aput imetku matot idi ngerayeh Allah Daniel. "Ieh ineh Allah luk mulun, idi luk ngimet macing raked-raked. ImetNeh na miak uen ngusag idi laludNeh na tu-tu miak uen ngagka'.

²⁷Ieh ngulun idi muit; Ieh nganau' kekamen luk melalud, idi tanu' luk inan mawa, do' bang Surga idi bang tana' ini pana'. Ieh nengulun ni Daniel ratnan lalud balang."

²⁸Idi Daniel uen ngeperuan kareb imet Darius idi kareb imet Kores, lun Parsi pana'.

Daniel 7

¹Bang lak luk pun-pun kareb imet Belsasar, raca' Babil, idi ui ini Daniel nenginupi idi nenier aceh luk nekali'ku kareb medacem. Idi ui nengayud nupi ineh, idi ini bala

²luk ratnan luk sinierku bang dacem ineh: Inan bui rat iapeh-iapeh luk nenganau' ribut déi' abpa rayeh.

³Idi apat pung luk rayeh nelupung rat bang abpa' rayeh ineh, idi amungdeh na mepad.

⁴Sebuleng mepad kudeng balang ayuneh, luk inan ilad mepad kudeng kanui. Kareb ui nenutong neneh, denak-denak iladneh nebubput. Idi pung ineh kiniding, pad ieh netuped mepad kudeng lemulun. Idi terawé lemulun biré kuanneh.

⁵Idi ui nenier pung luk kedueh ineh. Idi ayuneh mepad kudeng beruang luk tupid kudeng lemulun. Idi inan teluh tulang sigarang bang tangneh, idi inan aceh tang luk nepebala neneh, "Kuman uang pung pad iko mebor."

⁶Kareb ui nutong teh, idi teh ui nekali' aceh pung luk baken. Ayuneh mepad kudeng kuir. Idi luun ketedneh inan apat ilad, luk mepad kudeng ilad suit. Idi teh inan apat uluhneh! Idi ieh inan lalud ngimet.

⁷Kareb ui nenutong, ui nekali' pung luk keapat ineh. Ieh luk inan matot. Idi ieh pelaba dat, idi melalud. Ieh inan lipen belawan luk pelaba rayeh, idi ieh megéi' kuman, idi ieh ngeradu' luk amung-amung. Idi ayuneh baken ratnan amung pung ineh. Ieh inan pulu' unga,

⁸Idi kareb ui nenutong unga ineh, ui nekali' aceh unga luk isuut luk temubu' arang unga luk baken. Idi unga luk isuut ineh nemubput teluh unga luk mekara ineh. Idi ieh inan mateh lemulun idi inan tang luk megéi' pebala dengan medita' niat.

⁹Kareb ui nenier, inan tuda'-tuda' kerusi raca' luk rireng. Idi Seburur luk mulun raked-raked tudo luun sebuleng kerusi ineh. AyungNeh mebuda' mepad kudeng salju, idi abpukNeh mepad kudeng buluh dumba luk do'. KerusiNeh mebudung ku apui, kudeng ineh teh rodaneh;

¹⁰Idi apui neremuat ratnan kerusi ineh mepad kudeng abpa' luk manu. Idi ribu-ribu lemulun ngedengan Neneh, idi teh meluun ula' ratnan ineh netupid pa kiungNeh. Idi ideh nengukab amung surat idi ideh nengimun besara'.

¹¹Kareb ui nenutong, ui neninger unga luk isuut ineh pebala dengan medita' niat, idi pung luk keapat ineh pinaté, idi butungneh tila' bang apui idi neseb.

¹²Idi lalud pung luk baken ineh ilap rat nedeh, iamo' ideh simén mulun macing kareb luk litep kuandeh.

¹³Bang luk sinierku kareb medacem ineh, idi ui nenier luk kudeng ayu lemulun. Idi Ieh amé'-amé' muneng bang laput, idi Ieh iné' matun Neneh luk mulun raked-raked, idi Ieh kinuyut amé' pa kiungNeh.

¹⁴Idi Ieh nengalap lalud, ubur, idi rayeh raca', pad lemulun ratnan anid-anid bawang, pupu, idi luk ratnan manid-manid buri' miak maya' Neneh. LaludNeh meruked, idi imetNeh na kekiped.

¹⁵Luk sinierku ineh nengagap negku, pad ui mengagau.

¹⁶Ui iné' mutuh seburur lun luk tuped su ineh ngegala' ratnan ineh. Idi ieh nemada' ilungneh negku.

¹⁷Kebalaneh, "Apat pung luk rayeh, ieh ineh apat imet luk miak mangun bang tana' ini.

¹⁸Idi pupu Allah luk Meluun Rayeh miak ngalap lalud raca' macing ruked-ruked."

¹⁹Pangeh ineh ui pian kali' ratnan pung luk keapat ineh, luk na mepad kudeng luk baken, iamo' ieh lun inan matot, idi inan lipen belawan idi lisun tekaling. Ieh nengagat idi nekuman idi nengeradu' amung-amung luk kikemneh.

²⁰Idi teh ui pian kali' ilung ratnan pulu' unga ineh luk luun ulukneh, idi teh ratnan unga luk isuut ineh luk netemubu' mucu idi luk nemubput teluh unga ineh. Ieh inan mateh idi tang luk megéi' pebala dengan medita' niat. Idi ayuneh inan matot tu-tu, meluun ratnan unga luk baken.

²¹Kareb ui nenier, idi unga ineh nepebunu' nelun pupu Allah idi nengelaya' nedeh.

²²Idi Luk mulun ruked-ruked iné' mutut ukum luk méi' nelun pupu Allah luk Meluun Rayeh. Tarekneh pangeh nacing kareb pupu Allah miak ngalap lalud raca'.

²³Ini ilung luk bida' negku: "Pung luk keapat, ieh ineh imet luk keapat luk miak mangun bang tana' ini, idi luk baken ratnan amung-amung imet. Ieh miak ngareg amung tana' ini, idi ngeradu' neneh.

²⁴Idi pulu' unga, ieh ineh pulu' raca' luk miak tumui bang imet ineh. Pangeh ineh aceh raca' luk baken miak tumui. Idi ieh baken ratnan raca'-raca' luk atun ineh. Idi ieh miak nala' teluh raca'.

²⁵Ieh miak ngedat Allah luk Meluun Rayeh idi ngedereh pupu Allah. Ieh nutun ngisu' ukum sembayangdeh idi acodeh luk rayeh. Idi pupu Allah pa liang imetneh kinio teluh lak setangal.

²⁶Idi besara' ineh miak ngimun, idi ngagka' laludneh idi ngaté neneh.

²⁷Lalud idi rayeh ratnan amung-amung imet luk bang tana' ini miak barén kuan pupu Allah luk Meluun Rayeh. Laluddeh luk ratnan raca' na kekipedneh idi amung lun luk ngimet bang tana' ini miak ngakem kuandeh idi maya' baladeh.”

²⁸Idi ini kekiped balaneh. Ui ini Daniel pelaba tot pad kiungku mebudi, iamo' ui nenganug bala ini bang niatku.

Daniel 8

¹Bang lak luk keteluh kareb imet Belsasar, ui ini Daniel nekali' aceh luk sinierku baruh teh.

²Idi bang luk sinierku ineh, denak-denak ui idi bang bawang Susa luk linibung ineh, luk déi' bang babpat Elam. Ui netuped tangeb Abpa' Ulai.

³Idi ui nekali' aceh dumba deléi luk tuped tangeb abpa' ineh. Ieh inan dueh unga, idi luk netemubu' mucu meluun rayeh ratnan luk pun-pun.

⁴Ui nenier dumba deléi ineh nengegkul pa acep aco, pa tinueh busat aco, idi pa kabing busat aco. Idi na pung baken miak ngagka' neneh pad ieh mepuit ratnan laludneh. Ieh nenganau' luk pianneh, idi mangun medita' niat.

⁵Kareb ui ngerawé luk sinierku ini, aceh amék upun rat pa acep aco idi ieh pelaba awer, pad kukudneh na mepisit i tana'. Ieh inan aceh unga luk rayeh arang matehneh.

⁶Kareb ieh nepapu' dumba luk inan dueh unga ineh luk sinierku tuped tangeb abpa' ineh, ieh nedunak nengeranik neneh dengan abud tuehneh.

⁷Ui nenier neneh ngelaya' dumba ineh. Ieh pelaba gateh pad ieh nengeranik neneh, idi nemutul dueh unganeh ineh. Idi dumba ineh na metueh peh, idi ieh kinarung luun tana' idi ridu'. Idi seburur pana' nateh luk miak ngulun neneh.

⁸Amék ineh amé' meluun medita' niat, iamo' kareb laludneh meluun rayeh idi unganeh neputul. Idi apat unga luk rayeh netemubu' ngelibal neneh, luk petulu ku apat lidung tana'.

⁹Idi teh aceh unga luk isuut netemubu' nan sebuleng ratnan unga luk apat ineh. Ieh nengegala' laludneh pa kabing busat aco, idi pa busat aco, idi lelé macing Tana' luk Pijani' ineh.

¹⁰Ieh amé' metueh pad ieh metueh ratnan baweh langit, ieh ineh gituen. Idi ieh nenala' sebuang gituen luun tana'. Idi ieh nengeradu' nedeh.

¹¹Ieh nesitunga nan Raca' baweh surga pana'. Idi ieh nengagka' baré luk pekalai, idi sembayang bang Ruma' Allah pana' igka'neh.

¹²Sala' nengelibal baré luk pekalai ineh, idi teh sembayang luk matu tila'neh. Amung luk ruen unga ineh miak mangun.

¹³Idi ui neninger seburur melaikat ngitun nan melaikat baken, kebalaneh, "Tuda' ioké luk nekali' Daniel bang luk sinierneh ineh mangun — ieh ineh sala' luk pelaba dat ngelibal baré luk pekalai, idi baweh surga idi Ruma' Allah ridu'?"

¹⁴Idi kebalaneh, "Pangeh 2,300 malem idi pekak, Ruma' Allah miak uen ngedo'."

¹⁵Ui ini Daniel nutun nakap ilung luk sinierneh ineh. Denak-denak inan luk kudeng ayu lemulun tuped pa kiungku.

¹⁶Idi ui neninger aceh tang lemulun luk nawar rat déi' dipar Abpa' Ulai, kebalaneh, "O Gabriel, mada' neneh ratnan ilung luk sinierneh ineh."

¹⁷Idi Gabriel iné' tuped iringku, idi ui pelaba tot, pad ui neluka'. Kebala Gabriel negku, "O lemulun, do' iko kali' ilungneh. Luk siniermu ineh ngegala' ratnan luk kekiped."

¹⁸Uned ieh pegayam negku, idi ui nelepu. Ieh nengimet negku idi ieh nengiding negku,

¹⁹kebalaneh, "Ui ngegala' kuanmu ratnan luk mangun ngaceku useh Allah. Luk siniermu ineh ratnan kekipedneh.

²⁰"Dumba luk siniermu luk inan dueh unga ineh pinginud imet Midi idi Parsi.

²¹Amék ineh imet Grika, idi unga luk rayeh luk arang matehneh, ieh ineh raca' Grika luk pun-pun.

²²Apat unga luk netemubu' kareb unga luk pun-pun ineh neputul, pinginud apat imet luk miak mangun ratnan pupu ineh, iamo' na ideh metueh mepad kudeng imet luk pun-pun ineh.

²³"Kareb kekiped imet ineh malé macing, idi ideh pelaba dat, pad ideh na miak na kumin, idi aceh raca' luk dat luk naluk idi luk metueh niat miak ngimet.

²⁴Ieh miak amé' metueh, iamo' baken ngaceku laludneh sebuleng. Ieh miak megéi' ngusag, idi amung luk ruenneh mangun. Ieh miak ngelaya' lemulun luk melalud, idi pupu Allah pana'.

²⁵Ngaceku ieh mileh idi naluk, amung luk ruenneh miak mangun. Idi ieh pelaba dita' niat, idi denak-denak ieh ngaté mula' lemulun. Ieh miak situngana Raca' luk meluun rayeh, iamo' ieh miak pitayen baken ratnan lalud lemulun.

²⁶Luk siniermu ineh ratnan baré pa malem idi pa pekak luk pangeh linio namu kali' rungen matu. Do' ngalum ineh, ngaceku mio teh luk siniermu ineh mangun."

²⁷Ui ini Daniel meberat niat, idi ui mét tuda'-tuda' aco. Pangeh ineh idi ui netumui idi nelemubed ngakem kuan raca'. Ui inan mula' terawé ratnan luk sinierku ineh, iamo' ui na kali' ilungneh.

Daniel 9

¹Darius Ahasuirus, luk pupu Midi ngimet bawang Babil.

²Bang lak luk pun kareb ieh ngimet, ui ini Daniel sibada' ratnan Surat Tuhan idi nengerawé ratnan tabpa Yerusalim luk kinio tudu' ngepulu' lak, maya' kudeng luk bila Tuhan ni Nabi Yeremia.

³Idi ui nesembayang inan Tuhan Allah, idi nemutih rat Neneh, idi mawa' na kuman, idi nenacung, idi tudo luun abuh.

⁴Ui nesembayang inan Tuhan Allahku idi nengamo amung sala' pupuku. Kesembayangku, "O Tuhan Allah, Iko luk rayeh idi luk buren kai. Iko luk lutep maya' jani'Mu, idi megéi ngegala awaMu luk lutep kuan lemulun luk mawa Namu idi luk maya' amung-amung ukumMu.

⁵"Kai pangeh nenganau' sala'; kai nenganau' luk dat idi neraruh. Kai pangeh nengelaba ukumMu, idi nelemubed ratnan luk bida'Mu nekai.

⁶Na kai neninger bala demulunMu luk nabi luk nepebala dengan ngadanMu kuan raca' kai, lun ngimet nekai, tepun kai, idi amung pupu kai.

⁷O Tuhan, Iko luk matu, idi kai luk megéi' nganau' luk dat — ieh ineh kai luk tudo déi' Yahuda idi déi' Yerusalim, idi amung lun Israil luk pitadMu amé' bang bawang luk muneng idi luk mado, ngaceku ideh na lutep maya' Namu.

⁸O Tuhan raca'-raca' kai, lun ngimet nekai, idi tepun kai pangeh nenganau' luk dat idi mesala' pa kiungMu.

⁹Iko luk méi' idi maré do', iamo' kai sikal metueh rat Namu.

¹⁰Kai na neninger balaMu, O Tuhan Allah, kareb Iko nengecuk nekai maya' amung ukum luk biréMu nekai dengan tang demulunMu luk nabi.

- 11**Amung lun Israil nengelaba ukumMu idi ara' ninger balaMu. Kai nenganau' sala' pa kiungMu, idi Iko nengacing kediman luk inayud bang Surat Ukum demulunMu Musa kuan kai.
- 12**Iko nengacing kuan kai idi kuan lun rayeh kai amung-amung luk bilaMu. Ukum luk icingMu kuan bawang Yerusalim meluun berat ratnan ukum amung bawang baken bang tana' ini.
- 13**Kai nengalap amung ukum luk ginala' bang Surat Ukum Musa. Idi macing nekini pana', O Tuhan Allah kai, kai na maya pianMu, idi kai na lumi ratnan sala' kai pad kai maya' luk matu.
- 14**O Tuhan Allah kai, Iko netemina' ngukum nekai. Idi Iko nenganau' kudeng ineh, ngaceku amung luk ruenMu matu, iamo' na kai neninger balaMu.
- 15**"O Tuhan Allah kai, Iko nengegala' laludMu kareb Iko nenguit pupuMu remuat rat bang bawang Masir, idi macing nekini kai ngerawé laludMu. Kai pangeh nenganau' sala'. Kai pangeh nenganau' luk dat.
- 16**Iko luk matu. Ngaceku ineh aleg Iko museh kuan bawang Yerusalim teh. Ieh ineh bawangMu sebuleng, idi pegkungMu luk meligan. Amung-amung pupu bang bawang luk libut-libut Yerusalim situnga neneh idi pupuMu, ngaceku amung sala' kai idi dat tepun kai.
- 17**O Allah, ninger sembayang idi putuhku. Ngedo' rama'Mu luk pangeh unusag. Ngedo' neneh pad amung-amung lemulun kali' idi Iko luk Allah.
- 18**Ninger sembayang kai, O Allah; nier nekai idi nier susa' kai idi susa' bawang luk titen bawangMu. Kai sembayang pa kiungMu ngaceku Iko luk méi', idi baken ngaceku kai pangeh nenganau' luk matu.
- 19**O Tuhan, ninger sembayang kai. O Tuhan, maré do' ku sala' kai. O Tuhan ninger nekai idi nganau' luk pianMu! Pad amung-amung lemulun kali' Iko luk Allah. Aleg mio! Bawang ini idi pupu ini Iko kuan."
- 20**Ui uned sembayang idi ngamo sala'ku idi sala' pupuku Israil, idi ui nemutih Tuhan Allahku ngedo' ruma'Neh.

²¹Idi kareb ui sembayang, idi lun luk titen Gabriel, luk nekali'ku bang luk sinierku pun-pun, netemulud nacing negku. Ieh ineh kareb luk petulu maré baré pa malem.

²²Kebalaneh, "O Daniel, ui iné ngedengan namu, pad iko kali' ilung bada' luk biré ineh.

²³Kareb iko nengimun sembayang mutuh ratnan Allah, idi Ieh nengua' putuhmu. Ui luk maré orNeh namu, ngaceku Allah mawa namu. Ninger do'-do' kareb ui mada' ilung luk siniermu ineh.

²⁴"Allah pangeh nengelelep tudu' kua' tudu' ngepulu' lak, pad pupumu idi bawangmu luk meligan miak mangeh amung-amung dat idi sala-deh. Pangeh ineh ideh miak ngalap do' ratnan sala'deh, idi luk matu luk meruked miak uen ngelelep, pad luk sinier ineh idi bada' luk biré ineh miak mangun, idi Ruma' Allah luk meligan miak uen ngeligan.

²⁵Ngerawé do'-do': Rat kareb ukum ratnan mudut Yerusalim baruh barén, pad acing Raca' luk pinili' Allah, ieh ineh apat ngepulu' iwa' lak kinioneh. Yerusalim miak piduten baruh dengan tuda'-tuda' dalan idi libung luk meraben. Idi ieh miak tured kinio 434 lak. Iamo' bang kareb ineh mula' susa'.

²⁶Pangeh ineh, luk pinili' Allah ineh miak pitayen dengan na punneh. Bawang ineh idi Ruma' Allah miak sagen baweh luk bang imet aceh raca' luk rayeh. Kekipedneh miak macing mepad kudeng ereb. Idi macing kekipedneh ineh inan bunu' idi susa' luk icuk Allah.

²⁷Idi lun rayeh baweh ineh miak nganau' aceh jani' luk lutep dengan mula' lemulun kinio tudu' lak. Idi ieh miak ngagka' amung baré kinio teluh lak setangal. Idi Akang luk Nguyo miak uen ngerareng luun su luk meluun dita' bang Ruma' Allah, pad macing kareb Allah ngukum lemulun luk ngerareng akang ineh su ineh."

Daniel 10

¹Bang lak luk keteluh kareb imet Kores raca' Parsi, aceh bala nacing kuan Daniel luk titen Beltesasar. Idi bala ineh matu, iamo' mikat kali' ilungneh. Idi bala ineh linio kuanneh bang aceh luk sinierneh.)

²Kareb ineh, ui ini Daniel mesusa' niat kinio teluh minggu.

³Na ui nekuman akan luk do' idi uang pung. Na ui nengirup abpa' anggur. Na ui nemabpa abpukku, pad macing teluh minggu.

⁴Dueh ngepulu' apat aco bulan aceh bang lak ineh, ui netuped tangeb Abpa' Tigris luk rayeh ineh.

⁵Ui netengook idi nekali' Seburur Lemulun luk ngayung ku kibung luk do', idi abet awa' luk ratnan amas.

⁶BururNeh mesilo mepad kudeng batu luk meraga. KiungNeh merasat mepad kudeng kilep, idi matehNeh mebudung mepad kudeng apui. LangenNeh idi kukudNeh mesilo mepad kudeng tekaling, idi arodNeh mepad kudeng arod mula' lemulun.

⁷Ui sebuleng luk nekali' luk sinier ineh. Lemulun luk idi denganku na nenier anun-anun, iamo' ideh matot, idi upun amé' sigapung.

⁸Ui sebuleng mo' neketecan su ineh idi nenier luk inan mawa ineh. Idi ui melaya', idi kiungku nisu' pad seburur pana' nateh luk miak miti negku.

⁹Kareb ui neninger balaNeh, idi ui neluka' tekulub luun tana' idi na kali' anun-anun.

¹⁰Idi inan aceh ticu' nengakem negku luk nengiding negku, pad ui netekeradung. Idi ui megegker teh.

¹¹Idi kebalaNeh negku, "O Daniel, Allah mawa namu. Do' tuped idi ninger do'-do' amung-amung luk belénKu. Ui luk icuk amé namu." Kareb Ieh pangeh nepebala kudeng ini, idi ui netuped dengan megegker teh.

¹²Idi kebalaNeh, "O Daniel, aleg matot. Allah neninger sembayangmu bang aco luk pun-pun kareb iko nengebeneh bururmu, pad iko miak kali' ilungneh. Idi Ui luk iné' ngua' sembayangmu.

¹³Iamo' melaikat luk dat luk matar imet Parsi sikal metueh rat Negku kinio dueh ngepulu' aceh aco. Pangeh ineh Mikail, seburur rat arang melaikat luk rayeh, iné' ngedengan Negku, ngaceku Ui tican buleng-buleng déi' bang imet Parsi.

¹⁴Ui iné' mada' namu pad iko kali' ratnan luk miak mangun kuan pupumu mucu. Ini aceh luk sirenmu ratnan luk mangun mucu."

¹⁵Kareb Ieh nepebala, idi ui nenier i tana' idi na nepebala.

¹⁶Idi denak-denak aceh luk kudeng ayu lemulun nengakem bibirku. Idi tangku nukab idi ui petacu nepebala. Kebalaku kuan luk tuped pa kiungku, "O Tuhan, luk sinierku ini ngelaya' negku, pad ui na ugka' megegker.

¹⁷Ui mepad kudeng demulun luk tuped pa kiung tuanneh. Kudeng apehké ui pebala Namu? Na tuehku idi teh ui mabud niat."

¹⁸Sekua' teh Ieh nengimet negku, idi ui meluun tueh.

¹⁹KebalaNeh, "Allah mawa namu, aleg megagau idi matot. Do' iko mekuu'." Kareb Ieh pangeh nepebala, idi ui metueh, idi kebalaku, "O Tuhan, anunké luk belénMu. Ngaceku ui do' inau'Mu."

²⁰⁻²¹Idi kebalaneh, "Kali'mu, amé' ngudeh Ui namu? Ui pian mada' namu ratnan luk inayud bang Surat luk Matu. Nekini Ui lemubed amé' munu' melaikat luk dat luk matar imet Parsi. Pangeh ineh melaikat luk dat luk matar imet Grika miak macing. Idi seburur pana' nateh luk ngedengan Negku, iamo' Mikail mo' sebuleng, ieh ineh melaikat luk matar bawang Israil.

Daniel 11

¹"Mikail ineh luk ngedengan negku idi luk matar negku.

²Idi nekini Ui pian mada' namu ratnan luk matu." Kebala Melaikat ineh, "Teluh raca' teh miak ngimet Parsi, idi pangeh ineh luk keapat, ieh ineh raca' luk meluun ula' binaweh ratnan raca' luk baken ineh. Idi kareb ieh pelaba tueh dengan pelaba ula' binaweh, idi ieh pian metueh ratnan imet Grika.

- ³"Idi seburur raca' luk mesangit miak macing. Ieh mangun ku raca' aceh imet luk pelaba rayeh, idi ieh nganau' anun-anun luk pianneh.
- ⁴Iamo' kareb ieh pelaba tueh, imetneh miak uen mabpat apat. Idi inulneh na miak ngimet. Luk baken miak ngelibal neneh, iamo' tuehdeh na mepad.
- ⁵"Idi raca' Masir ineh metueh. Iamo' seburur lun rayeh bawehneh miak meluun tueh pad ieh mangun ku raca' aceh imet luk meluun rayeh.
- ⁶Pangeh tuda'-tuda' lak, raca' Masir miak maré anakneh luk decur kuan raca' Siria ku awanneh, pad nganau' aceh rurun arang didueh. Iamo' rurun ineh na mio, idi decur ineh, demulunneh, anakneh, idi awanneh miak pitayen.
- ⁷Pangeh ineh seburur pupu decur ineh miak munu' baweh raca' Siria, idi semuet bang libung luk meraben idi ngelaya' nedeh.
- ⁸Ieh miak naban amung akangdeh perapu dengan binaweh amas idi pirakdeh. Idi amung ineh miak itendeh amé' Masir. Pangeh tuda'-tuda' lak kareb na inan susa'
- ⁹Idi raca' Siria miak amé' munu' bawang Masir, iamo' ieh uendeh ngusu.
- ¹⁰"Anak-anak raca' Siria miak temina' amé' pebunu' dengan aceh baweh luk rayeh. Idi seburur rat arangdeh miak metueh mepad kudeng ereb, pad ieh amé' ngerieng aceh libung bunu'.
- ¹¹Dengan gatehneh raca' Masir miak amé' munu' raca' Siria pad ieh ngalap bawehneh luk pelaba rayeh.
- ¹²Ieh miak medita' niat ngaceku tuehneh idi ngaceku ula' lemulun luk pinaténeh. Iamo' tuehneh ineh na mio.
- ¹³"Raca' Siria miak lemubed idi ngamung aceh baweh luk meluun rayeh ratnan luk atun di. Bang kareb luk petulu ieh miak lemubed dengan aceh baweh luk rayeh idi luk netemina' do'-do'.
- ¹⁴Idi mula' lemulun sikal metueh ratnan raca' Masir. Idi tuda'-tuda' burur lemulun luk mesangit ratnan pupu Daniel sebuleng sikal metueh ngaceku aceh luk sinierdeh, iamo' ideh miak uen ngelaya'.

- ¹⁵Idi raca' Siria miak ngerieng aceh bawang luk linibung pad ieh ngalap neneh. Idi baweh rat Masir na pian pebunu' peh, ngaceku lemulun luk metueh pana' nateh petap tueh.
- ¹⁶Bunu' ineh miak nganau' luk pianneh dengan na sabeng. Ieh miak tuped luun Tana' luk Pijani' ineh idi ngalap lalud pa luunneh.
- ¹⁷"Idi raca' Siria pian nguit amung bawehneh amé' pebunu' teh. Ieh miak pejani' maré seburur anak raca' ngaweh, pad ieh ngedereh bunu'neh. Iamo' na ulekneh.
- ¹⁸Pangeh ineh ieh miak ngerieng tuda'-tuda' bawang luk tangep abpa' rayeh, idi ieh miak naban mula' lemulun. Iamo' seburur lun rayeh rat bawang baken miak ngelaya' neneh, idi ngagka' dita' niatneh.
- ¹⁹Raca' ineh miak lemubed amé' bang libungneh luk meraben déi' bawangneh sebuleng. Iamo' ieh miak uen ngelaya'. Idi ini kekiped kekamen lemulun ineh.
- ²⁰"Seburur raca' luk baken miak ngelibal neneh, idi ieh miak ngecuk lemulun ngamung pupuk pad ieh ngula' binaweh imetneh. Iamo' na mio teh raca' ineh pana' miak pitayen, iamo' baken bang bunu'.
- ²¹"Idi raca' luk nengelibal raca' Siria ineh seburur lemulun luk dat luk na petulu mangun ku raca'. Iamo' denak-denak ieh ngalap lalud dengan naluk.
- ²²Amung baweh luk sikal metueh rat neneh, idi Imam Allah luk Rayeh pana' miak uen ngelaya' idi uen ngusu.
- ²³Ieh nutun perurum dengan bawang baken dengan naluk, pad ieh amé' metueh sagan tu pana' imetneh sebuleng isuut.
- ²⁴Ieh miak ngelaya' aceh bawang luk inan mula binaweh luk na inan susa'. Idi ieh miak nganau' tuda'-tuda' kekamen luk na tu-tu inau' tepunneh. Idi ieh miak mabpat kuan anak itinneh binaweh luk tibanneh bang bunu' ineh. Ieh pian ngerieng libung-libung luk meraben, iamo' na mio.

- ²⁵"Dengan mekuu' ieh pian ngamung aceh baweh luk rayeh, pad ieh miak munu' raca' Masir luk temina' munu' neneh dengan aceh baweh luk rayeh idi melalud. Iamo' raca' Masir na miak metueh ngaceku uen naluk.
- ²⁶Lun ruruneh luk muneng miak ngelaya' neneh. Mula' lun pebunu'neh miak pitayen, idi bawehneh uen ngusag.
- ²⁷Idi dueh raca' ineh miak kuman nan sebuleng téng, iamo' terawé didueh dat, idi didueh pad-pad mebalih. Didueh na miak ngalap luk pian didueh, ngaceku nateh karebneh nacing.
- ²⁸Raca' Siria gugkang muli' dengan amung binaweh luk tibanneh. Ieh metueh niat pian ngusag anu pupu Allah. Ieh metueh niat pian ngusag anu pupu Allah. Ieh miak nganau' luk pianneh, idi lemubed amé' nan bawangneh sebuleng.
- ²⁹"Muci ieh miak amé' munu' bawang Masir sekua' teh, iamo na ieh mangun kudeng luk atun.
- ³⁰Lun Rum macing maya' kapal pian metueh rat neneh, pad ieh matot. "Idi ieh miak lemubed dengan megateh niat idi nutun ngusag anu pupu Allah. Ieh miak maya' bala lemulun luk pangeh nenecan sembayang ineh.
- ³¹Tuda'-tuda' babpat bawehneh miak ngelutak Ruma' Allah idi libungneh. Ideh ngagka' baré luk pekalai anid-anid aco, idi naped Akang luk Nguyo ineh.
- ³²Dengan saluk, raca' miak ngubuk lemulun luk pangeh nenecan sembayang ineh, iamo' lemulun luk maya' Allah miak metueh.
- ³³Lun luk mileh miak mada' mula' lun baken. Iamo' na mio sebuang miak pitayen bang bunu' idi apui. Idi binaweh sebuang miak pinawen lun luk mano, idi ideh pana' tebanen.
- ³⁴Kareb ideh uen ngedereh, pawa' lemulun luk ngedengan nedeh. Iamo' sebuang lemulun luk ngedengan nedeh ngerawé bururdeh sebuleng mo'.
- ³⁵Sebuang luk mileh miak pitayen, pad ngeligan pupu ineh — pad macing kekipedneh, ieh ineh kareb luk pangeh litep Allah.

³⁶"Raca' Siria miak nganau' anun-anun luk pianneh. Ieh miak pebala dengan medita' niat, kebalaneh, ieh meluun melalud ratnan amung-amung akang idi meluun rayeh ratnan Allah luk Meluun Rayeh. Ieh nganau' kudeng ineh pad ieh kumin Allah. Allah miak nganau' amung-amung luk pianNeh.

³⁷Raca' ineh na ngerawé allah tepunneh, idi lalud luk inan decur mawa. Setuneh, ieh na tu-tu ngerawé allah ngaceku ieh ngerawé bururneh sebuleng meluun rayeh rat nedeh.

³⁸Iamo' ieh miak ngerayeh lalud luk matar libung luk meraben. Ieh miak maré amas, pirak, batu luk meraga, idi baré baken luk do' kuan aceh lalud luk na tu-tu tirawé tepunneh.

³⁹Ieh miak ngecuk lemulun luk sembayang inan lalud pupu baken matar amung libungneh luk meraben. Ieh miak ngerayeh lemulun luk pian neneh ngimet nedeh, pad ieh maré kekamen luk medita' nedeh, idi tana' pana' barénneh ku samaldeh.

⁴⁰Kareb tarek raca' Siria malé macing, idi raca' Masir miak munu' neneh, idi raca' Siria pana' miak ngua' dengan abud tuehneh. Ieh miak nguit keréta kuda, idi mula' kapal, pad ieh miak ngerieng Masir mepad kudeng ereb.

⁴¹Idi ieh miak munu' Tana' luk Pijani' ineh, idi ngaté ribu-ribu lemulun. Idi bawang Edom, Moab, idi luk neketecan ratnan bawang Amon miak mepuit.

⁴²Ieh miak ngelaya' mula' bawang. Idi Masir pana' na miak mepuit.

⁴³Ieh miak naban binaweh amas idi pirak idi binaweh baken luk meraga luk inapung déi' Masir. Ieh miak ngelaya' bawang Libia idi Sudan.

⁴⁴Pangeh ineh bala miak macing rat pa busat aco, idi rat pa tinueh busat aco luk ngatot neneh, pad ieh metueh pebunu' idi ngaté mula' lemulun.

⁴⁵Idi ieh miak mudut lepo raca' luk rayeh arang abpa' rayeh dengan pegkung su luk inan Ruma' Allah. Iamo' ieh miak maté, idi seburur pana' nateh luk miak ngedengan neneh.

Daniel 12

¹"Kareb ineh, Mikail, melaikat luk rayeh ineh luk matar pupumu miak silagan. Idi kareb ineh inan mula' susa', luk meluun dat ratnan luk nekali' pupu ineh rat pun-pun. Kareb ineh amung pupumu, luk kuan ngadan inayud bang Surat Allah miak uen ngulun.

²Mula' lemulun luk pangeh naré miak tumui baruh. Sebuangdeh miak mulun ruked-ruked, idi sebuangdeh miak ngalap igu' luk meruked.

³Lun luk mileh miak merasat mepad kudeng acang langit. Idi lun nemada' nelun baken nganau' luk matu, miak merasat mepad kudeng gituen macing ruked-ruked.

⁴"Idi nekini, O Daniel, do' ngakeb surat ineh idi nganau' aceh etu luunneh, pad macing kareb luk kekiped. Idi kareb nateh kekipedneh mula' lemulun pian ngelio ratnan ilung luk mangun ineh."

⁵Idi ui ini Daniel nekali' dueh burur lun baken luk tuped petutup abpa' ineh.

⁶Idi seburur nepebala nan lemulun luk ngayung ku kibung luk do', luk tuped pa dayeh sesuut, "Tuda' ioké pad macing kekiped amung luk inan mawa ini?"

⁷Idi lemulun luk ngayung ku kibung luk do' ineh nengiding dueh ticu'neh pa langit, idi nepebulung dengan ngadan Allah luk Meruked. Idi ui neninger balaneh, "Pangeh teluh lak setangal, kareb dereh pupu Allah ugka', amung luk inan mawa ini pangeh nangun."

⁸Ui neninger balaneh ineh, iamo' na kali' ilungneh. Idi ui nengitun, kebalaku, "O tuan, kudeng apehké kekipedneh?"

⁹Idi kebalaneh, "Amé iko Daniel, ngaceku amung bala ini uen ngalum macing kareb luk kekiped.

¹⁰Mula' lemulun miak uen ngeligan. Lemulun luk dat na miak kali' ilungneh, iamo' ideh miak nganau' luk dat mo'. Lemulun luk mileh miak kali' ilungneh.

¹¹"Rat kareb ideh nugka' maré baré luk pekalai, ieh ineh rat kareb Akang luk Nguyo, inan 1,290 aco.

¹²Samal kuan lemulun luk lutep pad macing 1,335 aco ineh mabud.

13"O Daniel, do' iko lutep macing kareb luk kekiped. Idi iko miak maté, iamo' iko miak tumui idi ngalap tabparamu kareb aco luk kekiped ineh."

Hosia

Hosia 1

¹Surat ini ngegala' bala luk biré Tuhan ni Hosia Biri kareb Raca'-raca' Usia, Yotam, Akas, idi Hesehia pesua ngimet bawang Yahuda, idi kareb Raca' Yerebom Yoas ngimet bawang Israil.

²Kareb Tuhan pun-pun pebala nelun Israil dengan tang Hosia, idi kebalaNeh neneh, "Pupu bang bawang ini na lutep Negku idi ideh sembayang inan allah baken. Ngaceku ineh do' iko ngaweh aceh decur luk na lutep namu mucu; pad iko inan anak rat neneh."

³Ngaceku ineh Hosia nengaweh ni Gomer Diblaim. Idi ieh mali' idi nenganak aceh anak deléi.

⁴Kebala Tuhan ni Hosia, "Do' nganau' ngadanneh, 'Yesril' ngaceku na mio teh ui miak ngukum raca' Israil ngaceku tepunneh Yihu nengaté tuda'-tuda' lemulun déi' Yesril. Idi Ui miak ngagka' imet inul Yihu déi' Israil.

⁵Idi kareb ineh, Ui miak ngusag baweh lun Israil, luun Raked Yesril."

⁶Sekua' teh Gomer mali' idi ieh nenganak aceh anak decur. Idi kebala Tuhan ni Hosia, "Do' nganau' ngadanneh, 'Na Inan Méi',' ngaceku Ui na miak méi' idi maré do' nelun Israil teh.

⁷Iamo' Ui miak méi' nelun Yahuda. Ui ini Tuhan Allahdeh miak ngulun nedeh, iamo' baken ku bunu', pelapet, binor, kuda, idi lun luk maya' kuda pana'."

⁸Kareb Gomer nugka' niti' "Na Inan Méi'," idi ieh mali' teh idi nenganak aceh anak deléi teh.

⁹Kebala Tuhan ni Hosia, "Do' nganau' ngadanneh, 'Baken PupuKu,' ngaceku muyuh ini, Israil, baken pupuKu, idi Ui ini baken Allah muyuh."

¹⁰Lun Israil miak mepad kudeng bada déi' tangeb abpa' rayeh, ieh ineh na mekiap. Pangeh bila nedeh, "Muyuh ini baken pupuKu," iamo' mucu bala ini miak belén nedeh, "Muyuh ini anak-anak Allah lun mulun!"

¹¹Idi lun Yahuda idi lun Israil miak uen ngamung. Ideh sebuleng miak mili' seburur lun ngimet, idi teh ideh miak amé' mula' idi uen ngeperuan. Matu, aco Yesril ineh aco rayeh!

Hosia 2

¹Ngaceku ineh do' neten kinanakmu lun Israil "Pupu Allah" idi "Luk Inan Tuhan Méi'."

²O anak-anakKu, do' ngubuk tinaran muyuh — sagan tu pana' ieh na lutep Negku, idi Ui baken kudeng awanneh. Ngubuk neneh pad ieh na mesawa' idi na pasét.

³Kudeng ieh na ugka', Ui miak ngelebpa neneh, pad ayuneh mepad kudeng kareb ieh tinganak. Ui miak nganau' neneh mepad kudeng tana' luk metugeh, pad ieh maté ku paring.

⁴Na Ui méi' nan anak-anakneh; ngaceku ideh tinganak bang sét

⁵kuan decur luk mesawa' luk na migu'. Kebala decur ineh, "Ui amé' nakap deléi-deléi luk mawa negku. Ideh maré akan idi luk rupenku, buluh dumba, idi kibung pu, umau saitun, idi abpa' anggur."

⁶Ngaceku ineh Ui sikal ngelibung neneh ku kayuh luk metabpa' idi ku aceh ar teh.

⁷Ieh pian ngerada' deléi-deléi luk inanneh mawa, iamo' na ieh miak remuat. Ieh nakap nedeh iamo na kali' nedeh. Idi ieh miak pabala, "Ui pian lemubed amé' inan awanku luk atun ngaceku atun ui meluun do' ratnan ulunku nekini."

⁸Na ieh nengamo' Ui ini luk nemaré padé, abpa' anggur, idi umau saitun neneh. Idi teh Ui nemaré mula' pirak idi amas neneh, iamo' ieh nemaré ineh kuan akang Baal.

⁹Ngaceku ineh kareb ngeranih, Ui miak ngalap padé idi abpa' anggur luk biréKu neneh, idi teh Ui ngalap buluh dumba idi kibung pu luk biréKu ku ayungneh.

- ¹⁰Ui miak ngelebpa neneh pa kiung amung deléi luk inanneh mawa, pad seburur pana' nateh luk miak muit neneh ratnan laludKu.
- ¹¹Ui miak ngagka' awang niatneh, irauneh luk anid lak, aco rayehneh luk anid bulan, idi tebubpunneh luk anid-anid minggu — ieh ineh amung-amung aco luk inanneh sembayang.
- ¹²Ui miak ngusag kabun anggur idi kabun gita'neh luk bilaneh pangeh biré deléi-deléi luk inanneh mawa ku tabparneh. Ui miak ngisu' kabun anggur idi gita'neh mangun ku pulung, pad pung luk meliputi ngusag ineh.
- ¹³Ui ngukum neneh ngaceku ieh mekelupan Negku — kareb ieh ngeseb umau luk do' buen kuan Baal idi akreb ieh nengayang ku baréneh idi nengerada' deléi-deléi luk inanneh mawa. Tuhan pangeh nepebala.
- ¹⁴Ngaceku ineh Ui pian nguit neneh amé' déi' su luk ali-ali teh, pad Ui ngubuk neneh dengan awaKu.
- ¹⁵Idi teh Ui maré kabun anggurneh lemubed kuanneh, pad Raked Susa' mangun ku tanga' rapet. Ieh mawa Negku mepad kudeng kareb ieh anak adi', kareb ieh neburo rat bawang Masir.
- ¹⁶Sekua' teh ieh neten Negku awanneh, idi na ieh neten Negku akang Baalneh.
- ¹⁷Idi na Ui nima' neneh neten ngadan Baal baruh teh.
- ¹⁸Kareb ineh Ui nganau' aceh jani' dengan pung idi suit luk meliputi, pad ideh na ngedereh pupuKu. Ui nala' amung repapeh pebunu' rat bang bawang — amung pelapet idi binor — pad pupuKu do' udeng idi na inan susa'.
- ¹⁹O Israil, Ui ngalap namu mangun ku awanKu, macing raked-raked; Ui nganau' luk matu idi luk mesiri; Ui ngegala' éi idi awaKu luk lutep.
- ²⁰Ui maya' jani'Ku idi ngalap namu, pad iko kali' Ui ini Tuhan.
- ²¹Kareb ineh Ui ngua' sembayang pupuKu Yesril. Ui maré udan luun tana',
- ²²pad tana' ngeruat padé, bua' anggur, idi bua' saitun.

²³Ui ngeletep pupuKu bang bawang, idi ngeperuan nedeh. Ui miak méi' inan lemulun luk titen "Na Inan Méi'," idi pebala nan lemulun luk titen, "Baken PupuKu." "Muyuh ineh pupuKu." Idi ideh ngor balaKu, "Iko ineh Allah kai."

Hosia 3

¹Idi teh kebala Tuhan negku, "Do' iko amé' sekua' teh inan awanmu luk inanmu mawa, sagan tu pana' ieh pasét. Do' mawa neneh mepad kudeng Ui mawa nelun Israil, sagan tu pana' ideh maya' allah baken luk inandeh maré kireng bua' anggur."

²Idi ui nenguli' neneh ku pulu' limeh balad pirak idi limeh ngepulu' gatang ikun.

³Kebalaku neneh ieh miak tudo mio denganku. Ieh na miak pasét. Idi na ui pamung rudap denganneh teh.

⁴Ilungneh, lun Israil miak mulun mio dengan na raca' idi lun ngimet, dengan na maré baré, idi na ulung, idi na akang idi ayu allah baken teh, pad ngelio luk mangun mucu.

⁵Mucu lun Israil miak lumi inan Tuhandeh, idi Daud luk raca'deh. Kareb ineh, ideh miak matot inan Tuhan idi ngalap baré-baréNeh luk do'.

Hosia 4

¹Tuhan ngesala' nelun luk tudo bang bawang ini. O Israil, ninger balaNeh. Ini adu'Neh: "Lemulun bang bawang ini na lutep maya' jani'deh, idi na mawa. Ideh na ngamo Negku ini Allahdeh.

²Lemulun pejani', idi ideh na maya' jani'deh. Ideh mebalih, ngaté lemulun, mano, idi pasét. Kekamendeh luk dat amé'-amé' rayeh.

³Idi tana' mangun metugeh, idi amung-amung luk mulun su ineh miak maté. Amung pung, suit, idi lawid pana' miak maté."

⁴Kebala Tuhan, "Aleg ngadu' idi periteteng nelun mula', ngaceku adu'Ku ini nelun imam.

- ⁵Tebaco kedangan kekamen muyuh na ulekneh idi lun nabi pana' na meluun do' rat nemuyuh. Ui miak ngusag Israil luk tinanmu.
- ⁶PupuKu uen ngusag ngaceku ideh na manu Negku. Muyuh imam pana' na manu Negku, idi ara' ku bada'Ku. Ngaceku ineh Ui na pian ku muyuh idi anak muyuh mangun ku imamKu.
- ⁷"Iuk-iuk mula' sala'deh pa kiungKu. Ui miak ngisu' dita'deh mangun ku igu'.
- ⁸Ideh mangun ku lun do' ratnan baré ngaceku sala' pupuKu, idi mawang niat kareb ideh mula' sala'.
- ⁹Lun mula' idi imam-imam pana' miak pad-pad kumin. Ui miak ngukum nedeh idi ngua' kekamendeh luk dat.
- ¹⁰Kareb ideh kuman babpat deh ratnan baré-baré, na ideh miak mebor ku ineh. Ideh pasét na allah baken, iamo' na anakdeh, ngaceku ideh neteketed rat Negku idi nemaya' allah baken."
- ¹¹"Abpa' anggur nganau' pupuKu mebacé!
- ¹²Ideh mutuh luk linio ratnan ulung kayuh! Ulung kayuh ineh mangun ku gurudeh! Ideh nenecan Negku; mepad kudeng seburur decur luk mangun ku decur luk mesawa', ideh nemaré bururdeh kuan allah baken.
- ¹³Ideh maré baré luun buduk pegkung, idi ideh ngeseb umau luk do' buen liang kayuh luk medita' luun surud-surud, ngaceku do' lungung! "Ngaceku ineh, anak muyuh mangun ku decur luk mesawa' idi iban decur muyuh pana' pasét teh.
- ¹⁴Iamo' na Ui ngukum nedeh ku kekamen ineh, ngaceku muyuh deléi pana' pasét idi maré baré dengan decur luk mesawa' déi ruma' Baal. Kebala balé, 'Pupu luk na mileh uen ngusag.'
- ¹⁵"Sagan tu pana' pupu Israil na lutep maya' Negku, aleg lun Yahuda mesala' bang luk kudeng ineh. Aleg amé' sembayang déi' Gilgal idi Baitel, idi aleg pejani' su ineh bang ngadan Tuhan luk mulun.

¹⁶Lun Israil metueh niat mepad kudeng kerubau. Kudeng apehké Ui miak maman nedeh mepad kudeng anak dumba déi' bang laman?

¹⁷⁻¹⁸Lun Israil ucet ngerawé akang. Ideh perurum nelun mabuk. Ideh na ugka' pasét idi meluun teh ideh pian ku igu', baken ubur ngaceku do'.

¹⁹Ideh tigio aceh roh luk malid nedeh mepad kudeng barui, idi allah-allah luk inandeh sembayang na miak ngedengan nedeh.

Hosia 5

¹"O muyuh lun imam, ninger bala ini! O muyuh lun Israil, ninger do'-do'! O muyuh luk tetek ruma' raca', ninger! Petulu muyuh ngukum nelun baken, iamo' muyuh sebuleng miak kumin.

²Muyuh pangéh mangun ku aceh abpung déi' Mispa, idi aceh rabat luun Surud Tabor. Muyuh sikal metueh, pad muyuh ucet nganau' sala', idi Ui ngukum amung-amung muyuh.

³Ui kali' kekamen lun Israil — na ideh miak sigapung rat Negku. Israil na lutep maya Negku idi pupu ineh pangéh nengelutak bururdeh."

⁴Kekamen lun Israil luk dat ngetueh niatdeh pad ideh na lumi inan Allah. Ideh mangun ku demulun akang, pad ideh na manu inan Tuhan.

⁵Dita' niat lun Israil luk ngadu' bururdeh sebuleng. Sala'deh nganau' nedeh metebaceng idi mebpeh, idi lun Yahuda pana' mebpeh metebaya' dengandeh.

⁶Sagan tu pana' ideh nguit dumba idi sapi'deh mangun ku baré kuan Tuhan, na ulekneh. Ideh na miak kali' Neneh, ngaceku Ieh pangéh nenecan nedeh.

⁷Ideh nemasui Tuhan, idi na lutep maya' Neneh; idi anakdeh pana' baken anak Tuhan. Ngaceku ineh tana'deh miak uen ngusag.

⁸Nateg tawak déi' Gibia idi déi' Rama pana'! Ngitang déi' Baitel! Amé' pebunu', O lun Benjamin!

⁹Israil uen ngusag kareb aco ukumneh. Ui mada' arang pupu-pupu Israil ratnan luk na miak na mangun!

¹⁰Kebala Tuhan, "Ui museh ngaceku lun luk ngimet Yahuda pangeh nemano tana' kinanak-kinanakdeh, idi Ui miak ngacing ukum kuandeh mepad kudeng tubu' belen.

¹¹Israil inan susa'. Tana'neh sebuleng pangeh inaro ngaceku ieh nemutih pedengan ratnan akang luk na miak ngedengan neneh.

¹²Ngaceku ineh Ui miak ngusag Israil idi lun Yahuda pana'.

¹³"Kareb Israil nekali' étneh, idi Yahuda nenier uratneh, idi Israil iné' déi' Asur mutuh raca' rayeh ngedengan nedeh, iamo' na ieh miak ngedo' étdeh idi uratdeh ineh.

¹⁴Ui miak ngeramit nelun Israil idi Yahuda mepad kudeng balang luk mesangit. Ui sebuleng miak ngeramit nedeh idi necan nedeh. Ui miak naban nedeh pad seburur pana' nateh luk miak ngulun nedeh.

¹⁵"Ui miak necan pupuKu pad ideh medereh ku sala'deh, idi ideh amé' nakap Negku. Kian bang derehdeh ideh nutun nakap Negku lek."

Hosia 6

¹Do' tau lumi inan Tuhan. Ieh nengeramit netau, iamo' kali' rungen Ieh miak ngedo' netau. Ieh pangeh nengurat netau, iamo' naké Ieh ngabet urat tau lek?

²Pangeh dueh aco Ieh miak ngulun netau, idi aco luk keteluh Ieh miak nui netau, pad tau mulun pa kiungNeh.

³Do' tau nutun ngiti Tuhan. Kali' rungen Ieh amé' netau mepad kudeng aco masat. Ieh miak amé' netau mepad kudeng udan luk mubpur tibu-tibu kareb nibu.

⁴Iamo' kebala Tuhan, "O Israil idi Yahuda, anunké luk ruenKu kuan muyuh? Awa muyuh Negku saget buro mepad kudeng laput pa pekak. Ieh ineh mepad kudeng ipup luk buro kareb mét idang.

⁵Ngaceku ineh Ui nengecuk nabi-nabiKu mada' nemuyuh ratnan ukum idi usagKu. Luk pianKu kuan pupuKu megala'.

⁶Ui pian ku awa muyuh luk lutep, baken ku baré pung. Ui pian ruen pupuKu ngiti. Na Ui pian ku baré luk sabpen.

⁷Iamo' kareb pupu ini nesemuet bang bawang luk pijani' ineh, ideh ngelaba jani' luk inau'Ku kuandeh.

⁸Giliad ineh aceh bawang luk mepanu' ku lemulun luk dat idi luk ngaté.

⁹Imam-imamdeh mepad kudeng aceh riudan lun luk mando luk ngabang lemulun. Maya' dalan amé' déi' su luk meligan déi' Sikem pana' ideh ngaté lemulun. Ideh nganau' kekamen luk dat dengan rungen!

¹⁰Ui pangeh nenier aceh kekamen luk dat déi' Israil: pupuKu pangeh nengelutak bururdeh ku sembayang inan akang.

¹¹"O lun Yahuda, Ui pangeh nengelelep aceh kareb ngukum nemuyuh ngaceku kekamen muyuh luk dat.

Hosia 7

¹Kareb Ui sikal ngedo' pupuKu Israil idi ngeperuan nedeh, sala'deh, idi kekamendeh luk dat mo' luk sirenKu. Ideh naluk idi ngaro ruma' idi mano. Ideh mano ratnan lemulun luk maya' dalan pana'.

²Idi na tu ideh ngerawé Ui kali' amung kekamendeh luk dat, iamo' amung sala'deh ngelibut nedeh pa kiungKu."

³Kebala Tuhan, "Lemulun naluk raca' idi lun rayeh-rayehneh dengan gayamdeh luk dat.

⁴Amung-amungdeh naluk idi na lutep maya' jani'. Ideh mepad kudeng aceh tetel luk melau' ku apui luk inau' lemulun luk mileh nganau' ruti, iamo' ieh na nganau' petap kayuh laba' ruti ineh rutung.

⁵Kareb aco rayeh raca', ideh nengabuk raca' idi lun rayeh-rayehneh ku abpa' anggur pad ideh mebacé.

⁶Matu, ideh melau' mepad kudeng tetel ku gayamdeh luk dat. Kedangan-kedangan usehdeh mulun kidi-kidi, idi pa pekak ieh petacu mebudung.

⁷"Ngaceku usehdeh ideh nengaté amung-amung lemulun luk ngimet nedeh. Amung raca'deh pinaté tesebuleng-tesebuleng, iamo' seburur pana' nateh luk sembayang mutuh pedengan rat Negku."

⁸Kebala Tuhan, "Lun Israil mepad kudeng setangal ruti. Ideh merapet ku pupu baken luk libut-libutdeh.

⁹Ideh melaya' ngaceku ideh merapet ku pupu baken, iamo' na ideh kali' laya'deh, idi teh na ideh kali' abpukdeh amé' mebuda'.

¹⁰Dita' niat lun Israil luk ngadu' bururdeh sebuleng. Iamo' na ideh lumi Negku luk Tuhan Allahdeh.

¹¹Israil mepad kudeng suit limun luk mebacé; pun-pun ieh mutuh pedengan rat ni Masir. Pangeh ineh ieh temulud amé' Asur!

¹²Ui miak malad rabat idi miak ngakem neneh kareb ieh temulud mepad kudeng suit. Ui miak ngukum Israil ngaceku amung-amung kekammeneh luk dat.

¹³"Lun Israil miak kumin! ideh pangeh nenecan Negku idi sikal metueh rat Negku. Ideh miak uen ngusag. Setuneh Ui pian ngulun nedeh. Iamo' ideh mebalih ku Ui!

¹⁴Ideh na sembayang dengan matu-matu pa kiungKu. Ideh siluka' idi temido mepad kudeng lun luk na manu. Ideh sikal metueh rat Negku!

¹⁵Sagan tu pana' Ui ngasuh nedeh pad ideh metueh, iamo' ideh pegayam sikal metueh rat Negku.

¹⁶Ideh megéi' teketed rat Negku pad amé' matun tuda'-tuda' allah luk na inan lalud. Ideh mepad kudeng binor luk tekilu' luk na inan merapet. Ngaceku lun luk ngimet nedeh pebala dengan medita' niat, ideh miak pitayen pad lun Masir pana' meriruh."

Hosia 8

¹Kebala Tuhan, "Nateg tawak! Bunu'-bunu' ngerieng bawangKu mepad kudeng kanui! PupuKu pangeh nengelaba jani' luk inau'Ku nedeh, idi ideh ara' maya' bada'Ku.

²Sagan tu pana' ideh neten Negku Allahdeh, idi ngamo nedeh pupuKu,

³ideh neteketed ratnan luk do'. Ngaceku ineh amung bunu'deh miak ngerada' nedeh.

⁴"PupuKu nemili' tuda'-tuda' raca' iamo' baken maya' pianKu. Ideh nemili' tuda'-tuda' lun luk ngimet, iamo' baken maya' pianKu. Ideh nenganau' akang ratnan pirak idi amas, pad uen ngusag.

⁵Ui megateh ku sapi' deléi' luk inau' ratnan amas luk inan lun Samaria sembayang. Ui pelaba gateh nelun Samaria. Tuda' ioké ideh nganau' kekamen luk dat teh?

⁶Seburur lun Israil luk nenganau' akang ineh, idi na ieh Allah! Akang luk inan lun Samaria sembayang miak uen ngareg!

⁷Kareb ideh nibu bui, ideh ngeranih barui! Kudeng padé melipang, na luk idi banak idi pinaram. Iamo' kudeng inan pinaram, pupu baken miak kuman ineh!

⁸Amung lun Israil miak telenen, idi uen ngusag. Nekini pana' pupu baken ngerawé nedeh na ulek.

⁹Ideh metueh niat mepad kudeng keladai luk meliputi, idi ideh maya'piandeh sebuleng. Ideh pangeh iné' mutuh pedengan rat ni Asur. Lun Israil pangeh nemasui bururdeh kuan pupu baken pad ideh pitarindeh.

¹⁰Iamo' Ui sikal ngamung nedeh idi ngukum nedeh. Na mio teh ideh medereh ku ét kareb raca' Asur ngedereh nedeh.

¹¹"Lun Israil nenganau' mula' bubpun. Idi kudeng ineh teh ideh ngula' sala'deh!

¹²Ui ngayud mula' bada' kuan pupuKu, iamo' ideh ara' ku bada' ineh, idi ngerawé bala ineh baken kuandeh.

¹³Ideh pelaba pian maré baré, idi ideh pian kuman uang pung. Iamo' Ui ini Tuhan na mawang niat nedeh, idi nekini Ui ngerawé sala'deh, idi sikal ngukum nedeh. Ui miak ngecuk nedeh muli' amé' déi' Masir.

¹⁴"Lun Israil pangeh nemudut ruma' luk pelaba do', iamo' ideh mekelupan Allah luk nemudut nedeh. Lun Yahuda pangeh nemudut bawang rayeh luk linibung. Ui miak maré apui ngeseb bawangdeh idi ngusag ruma'deh luk do'."

Hosia 9

¹O Lun Israil, ugka' nganau' aco rayeh mepad kudeng lun luk na manu. Muyuh pangeh neteketed ratnan Allah idi na lutep maya' Neneh. Aput-aput tana' muyuh pangeh nemasui burur muyuh kuan Baal, mepad kudeng decur luk mesawa', idi muyuh pian ku padé luk ku tabpar sét!

²Iamo' na mio teh muyuh na ngalap petap padé idi umau saitun, idi teh na luk idi abpa' anggur.

³Lun Israil na miak tudo bang bawang Tuhan, iamo' na miak na muyuh lemubed amé' déi' Masir, idi kuman akan lun Asur luk na tabpen.

⁴Bang bawang pupu baken lun Israil na miak maré baré abpa' anggur kuan Tuhan, idi nguit baré luk sabpen kuanNeh. Akandeh miak ngelutak amung-amung lun luk kuman ineh, mepad kudeng akan kareb irau lun luk maté. Akan ineh ku ngebor batekdeh sebuleng, idi na miak iten amé' bang Ruma' Allah.

⁵Idi anunké luk miak ruendeh kareb aco irau luk litep Tuhan?

⁶Kareb susa' ineh macing idi lun Israil uen ngatad, lun Masir miak ngamung nedeh, pad nanem nedeh déi' Mempis! Binawehdeh idi ruma'deh miak uen ngelinged ku uduh idi tabpa'.

⁷Aco luk inan ngukum pangeh nacing, pad lun Israil miak mekaneh ukum luk petulu. Israil miak kali' kareb amung ineh mangun! Kebala muyuh, "Nabi ineh mebacé. Lemulun luk kikem Roh ini meruden." Muyuh megateh negku ngaceku sala' muyuh pelaba rayeh.

⁸Allah nengecuk negku luk mangun ku seburur lun nabi, pad ui mada' pupuNeh Israil. Iamo' iapeh-iapeh pana' ulekku, muyuh nutun tumen abpung kuanku mepad kudeng kuan suit. Bang bawang Allah lun mula' mangun ku bunu' nabi.

⁹Amung kekamendeh pelaba dat, mepad kudeng déi' Gibia. Allah ngerawé sala'deh idi sikal ngukum nedeh.

¹⁰Kebala Tuhan, "Kareb Ui pun-pun kali' Israil, ieh mepad kudeng bua' anggur luk mulun mo'-mo' déi' su luk ali-ali. Kareb Ui pun-pun kali' tepun muyuh, ideh mepad kudeng bua' gita' luk pun melak. Iamo' kareb ideh iné' Baal Pior, ideh nengimun sembayang inan Baal, idi Ui megateh nedeh mepad kudeng Ui megateh ku akang luk inandeh mawa.

¹¹Ubur Israil miak buro mepad kudeng suit luk temulud, pad na anak luk uendeh nenganak, idi na decur mali'.

¹²Idi sagan tu pana' inan anak, Ui miak ngalap nedeh, pad seburur pana' nateh luk ketecan. Kareb Ui necan pupu ini, susa' luk pelaba rayeh miak macing nedeh.”

¹³O Tuhan, ui miak nier ineh nekini. Lun Israil nima' anakdeh kamen, pad ideh pitayen bunu'deh.

¹⁴O Tuhan, anunké luk pituenku kuan pupu ini? Do' maré nedeh nakan luk na ngeruat anak, idi iti' luk na rata!

¹⁵Kebala Tuhan, "Amung kekamendeh luk dat nengimun déi' Gilgal. Su ineh Ui nengimun megateh nedeh. Ngaceku amung kekamendeh luk dat, Ui miak ngusu nedeh rat bang bawangKu. Idi Ui na miak mawa nedeh peh; amung lun luk ngimet nedeh sikal metueh rat Negku.

¹⁶Lun Israil mepad kudeng aceh tibu luk inan uat luk tekering, pad na kebua'. Na ideh miak inan anak. Iamo' sagan tu pana' inan anak, Ui miak ngaté anak luk inandeh mawa ineh.”

¹⁷Allahku miak ngarung pupuNeh, ngaceku ideh na neninger balaNeh. Ideh miak mangun ku sakai arang lun pupu baken.

Hosia 10

¹Pupu Israil mepad kudeng anggur luk mula' bua'. Luk mula' binaweh, iuk mula' bubpun. Kareb mula' uli' tana'deh, idi ulung su luk inandeh sembayang iuk-iuk pelaba do' taga.

²Niatdeh panu' ku saluk, idi nekini ideh mekaneh dereh ngaceku sala'deh. Allah miak ngusag bubpundeh idi mutul ulungdeh ineh.

³Na mio pupu ini miak pebala, "Tau na raca', ngaceku na tau matot inan Tuhan. Iamo' anunké luk miak ruen raca' kuan tau.

⁴Ideh pegayam idi pejani' mo'-mo', idi perurum dengan bawang baken, iamo' na ulekneh. Ukum luk mesiri misu' ku ukum luk tekilu', idi mulun mepad kudeng uduh luk dat aput-put bawang."

⁵Lemulun luk tudo bang bawang Samaria miak matot idi temido ngaceku sapo' deléi luk inau' ratnan amas déi' Baitel pangeh tiban. Ideh dengan imam-imam luk ngakem kuan akang ineh miak temido neneh. Ideh miak temido kareb ideh ngusag amasneh.

⁶Akang ineh tebanen amé' déi' Asur mangun ku baré kuan raca' rayeh ineh. Israil miak uen ngigu' ngaceku bada' luk binaya'deh.

⁷Denak-denak raca'deh na idi, mepad kudeng lapa' abpa'.

⁸Bubpun luk dat su luk inan lun Israil sembayang inan akang miak uen ngusag. Tabpa' idi uduh miak mulun luun bubpundeh. Lun Israil miak pebala inan pegkung, "Ngapung nekai!" idi inan surud, "Mebpeh luun kai!"

⁹Kebala Tuhan, "Lun Israil na ugka' nganau' sala' pa kiungKu rat kareb ideh nenganau' sala' déi' Gibia. Idi ideh miak pebunu' déi' Gibia teh.

¹⁰Ui munu' pupu ini luk mesala' idi ngukum nedeh. Tuda'-tuda' pupu miak perurum munu' nedeh, pad ideh kumin ngaceku sala'deh luk mula'.

¹¹"Israil mepad kudeng anak sapi' luk pangeh nesibada' idi luk pian rumik padé. Iamo' Ui nenganau' paga' luun dierneh luk do' taga, dengan abetneh. Ui nengecuk Yahuda ngeradu, idi Israil icukKu ngeruid luk ku ngurar tana'.

¹²KebalaKu, 'Nibu luk matu kuan burur muyuh sebuleng idi ngeranih amung peruan luk macing ratnan awa muyuh Negku. Ngukat tana' luk nateh inukat kuan burur muyuh sebuleng, ngaceku ini kareb luk petulu kuan muyuh, pad muyuh lumi Negku luk Tuhan muyuh, idi Ui miak amé' ngutang aceh peruan luun muyuh.'

¹³Iamo' muyuh nenibu luk dat idi nengeranih uli'neh. Muyuh nekuman bua' balih muyuh. "Ngaceku muyuh merapet ku kekamen muyuh sebuleng idi ku baweh muyuh luk mula',

¹⁴bunu' miak macing kuan anak itin muyuh, pad amung libung muyuh luk meraben miak uen ngusag. Aco sineh mepad kudeng aco luk inan Raca' Salman nengusag bawang Baitarbel bang bunu', idi tinan-tinan dengan anakdeh neritep pad ideh naté.

¹⁵Idi ini luk miak mangun kuan muyuh, O muyuh lun Baitel, ngaceku kekamen muyuh luk pelaba dat. Kareb ideh ngimun pebunu', raca' Israil miak maté."

Hosia 11

¹"Kareb Israil anak, Ui mawa neneh; kareb ieh nenalan rat Masir, Ui neneten neneh anakKu,

²Iamo' sagan tu pana' Ui megéi' nawar neneh, ieh teketed tu-tu rat Negku. PupuKu ineh nemaré baré kuan Baal; idi nengeseb umau luk do' buen kuan akang.

³Iamo' Ui ini nemada' ni Israil pad ieh miak nalan. Ui nengabin nedeh; iamo' na ideh nengamo Negku luk nengasa' nedeh.

⁴Ui nengeruid nedeh dengan awa idi éi', Ui nengabin nedeh idi nemuen nedeh; Ui netekunal maman nedeh.

⁵"Ideh ara' lumi Negku. Ngaceku ineh na miak na ideh lemubed amé' Masir, idi Asur miak ngimet nedeh.

⁶Bunu' miak munu' bawangdeh idi ngusag palin tanga' bawang. PupuKu miak uen ngusag bang bunu', ngaceku ideh nemaya' bada' luk dat.

⁷Ideh neteketed rat Negku, pad ideh na miak puatin ratnan bua' sala'deh. Ideh miak ngarod ngaceku paga' luk ruen luundeh, iamo' seburur pana' nateh luk miak muit nedeh.

⁸"O Israil, kudeng apehké Ui miak nala' nemuyuh? Kudeng apehké' Ui miak necan nemuyuh? Miakké Ui ngusag nemuyuh mepad kudeng Ui nengusag Adam, idi ngedereh nemuyuh, mepad kudeng Ui nengedereh Seboim? Na Ui mawang niat nganau' luk kudeng ineh! Ui méi' nemuyuh.

⁹Na Ui ngukum nemuyuh dengan usehKu; Ui na ngusag Israil teh. Ngaceku Ui ini Allah, baken lemulun. Ui ini Luk Meligan idi dengan muyuh. Ui na miak amé' nemuyuh dengan useh.

¹⁰"Ui miak ngeku mepad kudeng balang pa kiung bunu'deh, idi pupuKu miak maya' Negku. Ideh miak mesaget amé' Negku rat pa acep aco.

¹¹Ideh miak amé' rat Masir, mepad kudeng awer suit, idi rat Asur, mepad kudeng sukur. Ui miak nguit nedeh muli'. Ui ini Tuhan pangeh nepebala."

¹²Kebala Tuhan, "Lun Israil pangeh mebalih idi naluk pa kiungKu. Idi macing nekini lun Yahuda sikal metueh rat Negku luk lutep idi meligan.

Hosia 12

¹Amung-amung luk ruen lun Israil rat pekak macing medacem na ulekneh. Ideh mebalih idi ngurat lemulun. Ideh perurum ni Asur, idi pepua' dengan Masir."

²Tuhan inan adu' nelun Yahuda. Ieh pian ngukum bawang Israil ngaceku kekamen pupuneh. Ieh sikal ngua' kekamendeh luk dat.

³Tepundeh Yakub nenaluk kinanakneh kareb didueh lakat bang nakan tinan didueh, idi kareb Yakub rayeh, ieh pekakem dengan Allah.

⁴Ieh pekakem dengan seburur melaikat, pad ieh metueh. Yakub nenangi' idi nemutuh uen ngeperuan. Tuhan iné' ngikak tepun tau Yakub déi' Baitel, idi déi' Ieh nepebala neneh.

⁵Idi Ieh ineh Tuhan Allah luk Melalud — Tuhan ieh ineh ngadan luk buren.

⁶O muyuh lun inul Yakub, do' merapet inan Allah muyuh idi lumi Neneh. Do' muyuh lutep idi mesiri idi ngingulat pedengan ratnan Allah muyuh dengan mulai niat.

⁷Kebala Tuhan, "Lun Israil mepad kilu' kudeng lun Kanaani; ku timang luk na matu bang paladdeh ideh pian naluk lemulun luk melih.

⁸Iamo' kebaladeh, 'Kai lun do'. Kai pangeh nengalap mula' binaweh. Seburur pana' nateh luk miak ngadu' nekai ratnan ngalap binaweh dengan naluk.'

⁹Ui ini Tuhan Allah muyuh luk nguit nemuyuh remuat rat bang bawang Masir. Idi Ui miak nganau' nemuyuh tudo bang lepo kibung sekua' teh, mepad kudeng kareb Ui iné' ngikak nemuyuh déi' su luk ali-ali.

¹⁰"Ui nepebala inan nabi-nabi idi nemaré tuda'-tuda' luk sinierdeh. Idi dengan bala nabi Ui miak ngacing ukum.

¹¹Déi' Giliad ideh sembayang inan akang. Lemulun luk sembayang inan akang ineh miak maté. Déi' Gilgal sapi' deléi' barén sabpen, ngaceku ineh amung bubpundeuh miak uen ngusag pad mangun ku tuda'-tuda' bubpun batu luun natad."

¹²Tepun tau Yakub neburo iné' bawang Mesapotamia, su luk inanneh nengasa' dumba lun baken, pad ieh ngalap awan.

¹³Tuhan nengecuk seburur nabi nguit nelun Israil remuat rat bang bawang Masir. Ieh nengecuk seburur nabi ngasa' nedeh!

¹⁴Lun Israil pangeh nengegio useh Tuhan; petulu ideh ngalap ukum maté, idi na Allah pian maré do' nedeh. Ieh pian ngukun nedeh ngaceku igu' luk icingdeh Neneh.

Hosia 13

¹Mon kareb pupu Epraim nepebala, lun baken matot. Amung pupu Israil luk baken matot. Amung pupu Israil luk baken nengedita' Epraim. Iamo' lun Epraim mesala' ngaceku sembayang inan Baal, pad ideh miak pitayen.

²Ideh na ugka' nganau' sala'; ideh nganau' akang belawan luk inandeh sembayang. Ideh nganau' akang ratnan pirakdeh, ratnan terawé lemulun, idi luk ruen ticu' lemulun. Kebaladeh, "Do' maré baré kuandeh!" Kudeng apehké lemulun pian muen akang ineh, ieh ineh akang dengan ayu sapi' deléi!

³Idi denak-denak lemulun ini na idi, mepad kudeng laput luk pa pekak, idi mepad kudeng ipup luk buro kareb mét idang. Ideh mepad kudeng lipang padé luk mepalid ku bui rat su luk inan rumik, idi mepad kudeng rabpun kareb ngelak.

⁴Kebala Tuhan, "Ui ini Tuhan Allah muyuh luk nenguit nemuyuh remuat rat bang bawang Masir. Kareb ineh muyuh na ngiti Allah baken rat Negku. Ui ini sebuleng Lun Nengulun nemuyuh.

⁵Ui nengasa' nemuyuh déi' su luk ali-ali kareb merikan.

⁶Iamo' kareb muyuh nesemuet bang bawang luk do', idi muyuh mebor pad muyuh medita' niat idi mekelupan Negku.

⁷Ngaceku ineh Ui miak ngeramit nemuyuh mepad kudeng balang. Mepad kudeng kuir Ui miak ngabang nemuyuh.

⁸Ui ngurak nemuyuh mepad kudeng beruang tineh luk nepatad ratnan anakneh idi ngerarak nemuyuh. Mepad kudeng balang Ui miak petacu kuman nemuyuh, idi ngerarak nemuyuh mepad kudeng pung luk meliput.

⁹"O lun Israil Ui miak ngaté nemuyuh! Idéké luk miak ngedengan nemuyuh?"

¹⁰Muyuh nemutuh aceh raca' idi lun luk ngimet. Iamo' kudeng apehké ideh miak ngulun pupu ini?

¹¹Dengan usehKu Ui nemaré raca'-raca' kuan muyuh, idi teh dengan gatehKu Ui nengalap nedeh rat nemuyuh.

¹²"Kekamen Israil luk dat idi sala'neh pangeh inayud, idi amung-amung surat pangeh dinug.

¹³Israil miak ngalap ulun sen, iamo' na ieh pian. Ieh mebacé mepad kudeng anak luk malé mebpeh rat bang nakan tinanneh, iamo' na ieh remuat!

¹⁴Ui na pian muit pupu ini ratnan su luk inan até, idi ngulun nedeh ratnan lalud até ineh. O até, do' amé' nedeh dengan galihmu! O su luk inan até, do' amé' nedeh dengan usagmu! Na Ui méi' inan pupu ini.

¹⁵Sagan tu pana' Israil temubu' mepad kudeng uduh, Ui miak maré bui luk melau' rat pa busat aco, pad arur idi bued abpa'deh mekeket, idi amung-amung luk meraga miak uenneh ngusag.

¹⁶Israil na miak na ngeranéh bua'-bua' sala'neh, ngaceku ieh sikal metueh ratnan Allah. Amung anak itinneh miak maté bang bunu'; anak luk isuut pana' miak bebaten bunu' Israil luun tana', idi teh decur luk mali' miak teraden."

Hosia 14

¹O lun Israil, lumi inan Tuhan Allah muyuh! Muyuh metebaceng ngaceku sala' muyuh.

²Do' lumi inan Tuhan, idi nima' sembayang ini mangun ku aceh baré kuanNeh: "Maré do' ratnan amung-amung sala' kai, idi ninger sembayang kai, pelé kai ngubur Namu mepad kudeng luk pijani' kai.

³Asur na miak ngulun nekai, idi keréta bunu' na miak matar nekai. Idi na kai sikal pebala inan akang kai teh, 'Muyuh ini allah kai.' O Tuhan, kai ngamo, Iko mo' luk méi' inan anak maté."

⁴Kebala Tuhan, Ui miak nguli' pupuKu. Ui miak mawa nedeh dengan amung niatKu, ngaceku na Ui museh nedeh nekini.

⁵Ui miak mangun ku ipup kuan Israil, pad ieh kebusak mepad kudeng bunga' okit. Ideh miak inan uat mepad kudeng kayuh luun Pegkung Lebanon.

⁶Ideh miak nginulih pad ideh do' ayu, mepad kudeng saitun. Idi ideh do' buen, mepad kudeng tumuh luun Pegkung Lebanon.

⁷Sekua' teh Ui mangun ku libungdeh. Ideh miak do' ulun mepad kudeng luk tinibu, idi kebua' mepad kudeng anggur. Ideh miak mebala mepad kudeng abpa' anggur rat Lebanon.

⁸Lun Israil na sikal sembayang inan akang teh, Ui ngua' sembayangdeh idi ngasa' nedeh. Ui ngelungung nedeh mepad kudeng aceh kayuh. Ui ini lawa amung-amung peruandeh.

⁹Do' lemulun luk mileh nakap ilung bala luk inayud bang surat ini, idi nganug ineh bang niatdeh. Amung dalam Tuhan ineh matu, idi lemulun luk matu mulun maya' dalam ineh, iamo' lemulun luk mesala' metebaceng.

Yoel

Yoel 1

¹Ini bala Tuhan kuan Yoel, anak Petuil.

²Ninger, muyuh lun luk mengered, idi amung lun baken luk déi' Yahuda teh: Inanké susa' nangun kudeng ini nekali' muyuh idi tepun muyuh mon?

³Do' mada' ratnan ineh kuan anak muyuh, pad ideh mada' anakdeh, macing ku anak inul muyuh pana'.

⁴Sebuang tibu kinan kato tulang. Idi luk ketecan kinan kato pedier idi kato sekiré.

⁵Kulat idi nangi', O muyuh lun luk mabuk, idi lun luk ngirup abpa' anggur ngaceku bua' anggur pangeh nabud.

⁶Kato luk pelaba ula' nengedat lati' tau; kinula'deh na mekiap idi ideh pelaba tueh; lipendeh metadem mepad kudeng lipen balang.

⁷Ideh pangeh nengedat anggur tau, idi nekuman bua' gita' tau. Idi anitdeh pana' kinandeh, pad amung angkatdeh mebuda'.

⁸O lun muyuh, do' nangi' mepad kudeng decur luk temido tudukneh luk naté'.

⁹Na luk idi padé idi abpa' anggur luk miak barén bang Ruma' Allah; idi imam-imam nangi' ngaceku na luk miak barén sabpen kuan Tuhan.

¹⁰Amung lati' na uli'; idi tana' pana' nangi'; ngaceku amung padé nedat, idi bua' anggur idi bua' saitun pana' nekarang.

¹¹O muyuh lun luk nganau' lati', idi muyuh luk ngasa' kabun anggur, do' muyuh mesusa' niat, ngaceku padé, ikun, idi amung tibu baken pangeh nedat.

¹²Idi amung lawa anggur idi gita'; amung bua' luk baken pangeh nekarang. Idi awang lemulun pangeh nekarang teh.

¹³O muyuh imam luk ngeseb baré luun bubpun Tuhan, do' muyuh nacung idi nangi' idi mepamung bang Ruma' Allah kedangan-kedangan. Na luk idi padé idi abpa' anggur luk miak barén kuan Allah muyuh.

¹⁴Do' ngecuk mawa' na kuman, idi nganau' aceh tebubpun sembayang; do' ngamung amung lun rayeh luk nguyut, idi amung pupu Yahuda bang Ruma' Tuhan Allah muyuh, idi nawar Neneh.

¹⁵Aco Tuhan ineh muneng; idi Ieh nguit até ratnan Luk Melalud. Idi kareb aco ineh pelaba dereh.

¹⁶Kai kali' amung tibu kai pangeh nedat. Idi na luk idi awang niat bang Ruma' Allah tau.

¹⁷Padé pana' maté luun tana' luk tekering. Idi na luk miak nugen, idi lepo padé tau pana' merapuk peh.

¹⁸Idi amung dumba idi sapi' pana' muni ku laudeh! Idi dawa' sapi' megagau, ngaceku na uduh kenendeh. Idi dawa' dumba pana' medereh teh.

¹⁹Ui nawar Namu, O Tuhan, ngaceku uduh idi kayuh nekarang mepad kudeng luk iseb.

²⁰Idi amung pung luk meliputi pana' nawar Namu, ngaceku amung arur nekeket, idi uduh pana' nekarang mepad kudeng luk iseb.

Yoel 2

¹Do' nateg tawak luun pegkung Sion, ieh ineh pegkung Allah luk meligan. Pad lun pupu Yahuda megegker, ngaceku aco Tuhan malé macing.

²Aco ineh medacem idi inan mesusa' niat, idi medacem ku laput. Kato luk pelaba ula' macing, mepad kudeng acang luun pegkung kareb pekak. Na luk mepad kudeng ini atun, idi mucu pana' nateh luk miak mangun kudeng ineh.

³Ideh kuman amung tibu mepad kudeng meseb ku apui. Pa atundeh tana' ineh mepad kudeng Kabun Eden, iamo' a puetdeh mepad kudeng bada luk na inan uduh mulun. Sebuleng pana' nateh luk neketecan inau'deh.

⁴Ideh mepad kudeng kuda; idi apundeh mepad kudeng apun kuda luk amé' pebunu'.

⁵Kareb ideh uput-uput déi' luun pegkung, unideh mepad kudeng uni keréta, idi kudeng uni budud luk tetungen. Ideh do' atur mepad kudeng baweh luk temina' amé' pebunu'.

⁶Kareb ideh amé' muneng, amung lemulun matot, idi kiungdeh mebudi.

⁷Ideh munu' mepad kudeng lemulun, idi manad alad mepad kudeng lun pebunu'. Idi ideh nalan tacu-tacu dengan na umai,

⁸idi na pili teh. Na ideh mesabeng ku abpa' idi ar luk inau'deh.

⁹Ideh semuet bang bawang luk rayeh; ideh uput maya' luun alad idi semuet maya' tabuk mepad kudeng lun mano.

¹⁰Tana' idi langit megeker pa atundeh . Aco idi bulan medacem, idi gituen pana' na macang.

¹¹Tuhan ngecuk bawehNeh dengan rayeh arod luk mepad kudeng uni lalam. Idi amung baweh luk maya' balaNeh pelaba ula' idi metueh. Aco Tuhan ineh pelaba dereh! Idéké luk tuman ratnan ineh?

¹²Kebala Tuhan, "Do' uren nekini, idi lemubed maya' Negku dengan niat luk matu, idi nangi' dengan mawa'

¹³Nima' niat muyuh luk meberat ngegala' susa' muyuh, aleg narak kuyu' muyuh sebuleng mo'." Lemubed amé' inan Tuhan Allah muyuh. Ieh do' niat idi panu' ku éi'. Ieh mulai niat idi maya' jani'Neh. Ieh pian maré do' idi na sikal ngukum.

¹⁴Kian lek, Tuhan Allah tau miak ngisu' terawéNeh, idi ngeperuan netau dengan uli' luk petap ratnan luk tibuen tau. Idi tau miak maré tuda'-tuda' baré kuanNeh ratnan padé idi abpa' anggur.

¹⁵Nateg tawak déi' luun Pegkung Sion; do' ngecuk mawa' na kuman, idi nganau' aceh tebubpun sembayang.

¹⁶Do' ngamung amung lun mula' ineh, pad ideh temina' amé' ku tebubpun luk meligan. Do' nguit lun luk mengered idi anak-anak, idi teh anak luk niti'. Meluun teh kuan lun luk aweh baruh, do' necan takepdeh idi amé' tebubpun.

17Do' imam-imam luk ngakem kuan Tuhan nangi' idi sembayang bang Ruma' Allah, arang tanga' idi bubpun, kesembayangdeh, "Do' méi' kuan pupuMu, O Tuhan. Aleg nima' lun pupu baken ngedat nekai idi situnga nekai, idi pebala, 'Tapeh Allah muyuh?' “

18Idi Tuhan nengegala' éi'Neh kuan bawangNeh idi pupuNeh.

19Idi Ieh nengua' sembayangdeh: KebalaNeh, "Nekini Ui maré padé nemuyuh, dengan abpa' anggur idi umau, pad muyuh mebor, idi pad lun pupu baken na situnga nemuyuh peh.

20Ui miak nala' baweh kato luk arang muyuh, luk nacing rat pa tinueh busat aco. Idi Ui ngusu sebuangdeh amé' déi' su luk ali-ali. Idi ideh luk pa atun miak uen ngusu amé' Abpa' Maté. Idi ideh luk pa puet amé' Abpa' Rayeh. Idi butungdeh miak mebuen. Ui nganau' kudeng ini ngaceku maya' amung luk inay'deh kuan muyuh.

21"O amung lati', aleg matot, do' mawang niat idi geriguen, ngaceku Tuhan nenganau' mula' kuan muyuh.

22O amung pung, aleg matot, ngaceku inan mula' uduh peh. Idi amung kayuh pana' kebua'; idi bua' gita' idi bua' anggur pana' mula'.

23"O lun Sion, do; mawang niat, ngaceku luk inau' Tuhan Allah muyuh kuan muyuh. Ieh pangeh nemaré udan luk petap, do' udan luk atun idi udan luk mucu pana'.

24Su luk inan rumik miak panu' ku padé; idi lubang luk iring su luk inan marek bua' anggur ineh lubpi ku abpa' anggur idi umau.

25Ui miak ngelibal luk na ilap muyuh bang lak luk inan kato nekuman tibu muyuh. Ui luk nengecuk baweh ineh nengedereh nemuyuh.

26Nekini muyuh mula' luk kenen idi mebor. Muyuh miak ngubur Tuhan Allah muyuh, luk nenganau' luk pelaba do' kuan muyuh. Idi pupuKu na miak inan situnga baruh peh.

²⁷Kareb ineh, O Israil, muyuh miak kali' Ui idi arang muyuh, idi Ui ini Tuhan luk Allah muyuh, idi na luk baken. Idi pupuKu na miak inan situnga baruh peh.

²⁸"Muci Ui miak ngutang RohKu luun amung-amung lemulun: anak muyuh luk deléi idi decur miak mada' bala luk barénKu, idi deléi muyuh luk mengered miak nginupi, idi anak adi' deléi muyuh miak nier luk sirendeh.

²⁹Idi kareb ineh teh Ui miak ngutang RohKu luun amung demulun pana', do' deléi idi decur.

³⁰"Ui miak maré tanu' bang langit idi bang tana' kareb nateh aco ineh. Idi inan teh dara', apui, idi rabpun.

³¹Aco miak medacem, idi bulan mesia' kudeng dara', kareb nateh aco Tuhan luk rayeh luk inan matot ineh macing.

³²Iamo' amung lemulun luk mutuh pedengan ratnan Tuhan miak uen ngulun. Mepad kudeng luk bila Tuhan, 'Inan lemulun luk miak uen ngulun, luun Pegkung Sion idi déi' Yerusalim. Lemulun luk pilin Tuhan miak mulun.' "

Yoel 3

¹Kebala Tuhan, "Kareb ineh Ui miak nuneb bawang Yahuda idi Yerusalim.

²Idi Ui miak ngamung amung-amung pupu, idi nguit nedeh amé' Ruan Yosapat. Su ineh Ui miak ngukum nedeh, ngaceku amung luk inau'deh kuan pupuKu sebuleng. Ngaceku ideh nengatad nelun Israil iné' bawang baken, idi nemabpat bawang Israil, ieh ineh tana'Ku.

³Ideh nenala' udi pad ideh nekali' lun luk miak ngalap lun luk tiban ineh. Ideh nemasui anak deléi idi anak decur mangun ku demulun, pad ideh miak mayar raga decur luk mesawa' idi abpa' anggur teh.

⁴"Anun luk ruen muyuh kuanKu, O Sur, Sidon, idi amung babpat Pilistin? Muyuh pian ngua' Negkuké? Kudeng muyuh nganau' kudeng ineh, Ui miak ngua' kuan muyuh dengan mesaget!

- ⁵Muyuh pangeh nengalap pirak idi amasKu idi nenguit binawehKu luk meraga iné' bang ruma' sembayang muyuh.
- ⁶Muyuh pangeh nenguit lemulun rat Yahuda idi Yerusalim mado rat bawangdeh sebuleng, idi nemasui nedeh kuan lun Grika.
- ⁷Nekini Ui sikal nguit nedeh lemubed rat bang bawang luk inan muyuh nemasui nedeh. Ui miak nganau' kuan muyuh mepad kudeng luk inau' muyuh kuandeh.
- ⁸Ui miak nima' anak deléi idi anak decur muyuh pisuen kuan lun Yahuda. Idi ideh miak masui nedeh kuan lun Sabian luk mado. Ui ini Tuhan pangeh nepebala.
- ⁹"Maré kali' kuan amung-amung pupu: 'Do' temina' pebunu', nawar lun luk mesangit, idi ngamung lun luk amé' pebunu', idi nalan!
- ¹⁰"Do' nuno belawan radu muyuh ku pelapet, idi nuno beluing muyuh ku uang gaman. Lun luk melaya' pana' na miak na amé' pebunu'.
- ¹¹Miket nalan, O amung pupu, idi pamung luun ruan ineh! " O Tuhan, nguit bawehMu luk metueh.
- ¹²"Do' amung pupu temina', idi amé' Ruan Yosapat. Idi su ineh Ui ini Tuhan miak tudo, idi ngukum amung-amung pupu.
- ¹³"Do' ngalap aling muyuh idi ngeranéh nedeh, ngaceku ideh pelaba dat. Misak nedeh mepad kudeng misak bua' anggur, bang su luk inan marek bua' anggur, pad abpa' anggur ineh lubpi."
- ¹⁴Pelaba ula' ria' lemulun déi' Ruan Luk Inan Ukum. Idi su ineh aco Tuhan malé macing.
- ¹⁵Aco' idi bulan medacem, idi gituen pana' na macang.
- ¹⁶Tuhan ngarod rat Pegkung Sion; idi arodNeh rat Yerusalim mepad kudeng uni lalam; pad tana' idi langit megegker ku uni tangNeh. Iamo' Ieh miak ngelibung pupuNeh.

17"Kareb ineh, O Israil, iko miak kali' Ui ini Tuhan Allahmu. Ui tudo déi' Sion, pegkungKu luk meligan. Yerusalim miak mangun ku bawang luk meligan; pupu baken na miak ngalap ineh baruh peh.

18"Kareb ineh amung pegkung miak mangun ku kabun anggur; idi anid-anid surud inan sapi'; idi abpa' inan petap kuan amung lun Yahuda. Inan aceh arur rat Ruma' Allah, idi ieh miak ngeba' Raked Kayuh Pirur.

19"Bawang Masir miak mangun kudeng su luk ali-ali, idi Edom aceh bawang luk miak tacin; ngaceku ideh nengaro bawang Yahuda, idi nengaté lemulun luk na mesala'.

20-21Ui miak ngua' ngunang lemulun luk pinaté; idi na Ui muit lemulun luk mesala'. Iamo' Yahuda idi Yerusalim inan lemulun macing raked-raked, idi Tuhan miak tudo luun Pegkung Sion."

Amos

Amos 1

¹Ini bala Amos, seburur lun matar dumba rat arang lun Tekoa luk ngasa' dumba. Allah nengegala' bala ini ni Amos dueh lak atun ratnan ruyuh tana', kareb Usia ineh raca' Yahuda, idi Yerebom Yoas ineh raca' Israil.

²Kebala Amos, "Allah ngarod rat Pegkung Sion; idi arodNeh pedingeren rat Yerusalim, pad amung laman tekering, idi uduh luun buduk Pegkung Karmel luk mebata' amé' mesia'."

³Kebala Tuhan, "Lun Damsik megéi' nganau' sala'. Kali' rungen Ui ngukum nedeh, ngaceku ideh ucet ngedereh nelun Giliad.

⁴Ui ngacing apui kuan imet Siria, pad amung libung Raca' Benhadad sabpen.

⁵Ui mutul palin tanga' bawang Damsik idi mubuh amung lun luk ngimet Ruan Aben idi baiteden. Lun Siria miak tebanen amé' bawang Kir."

⁶Kebala Tuhan, "Lun Gasa megéi' nganau' sala'. Kali' rungen Ui ngukum nedeh, ngaceku ideh nenaban aceh pupu, pad ideh barén kuan lun Edom.

⁷Ngaceku ineh Ui ngacing apui kuan libung Gasa pad amung libung bawang ineh sabpen.

⁸Ui naban amung raca' luk ngimet bawang Asdod idi Askelon. Ui munu' bawang Ekron pad amung lun Pilistin luk ketecan maté."

⁹Kebala Tuhan, "Lun Sur megéi' nganau' sala'. Kali' rungen Ui ngukum nedeh ngaceku ideh nenaban aceh pupu amé' bawang Edom. Na ideh nemaya' jani' luk inau'deh inan kinanakdeh.

¹⁰Ngaceku ineh Ui ngacing apui kuan libung Sur, pad amung libung bawang ineh sabpen."

¹¹Kebala Tuhan, "Lun Edom megéi' nganau' sala'. Kali' rungen Ui ngukum nedeh, ngaceku ideh nemunu' kinanakdeh lun Israil, idi na pian méi'. Usehdeh na ugka'.

¹²Ngaceku ineh Ui ngacing apui kuan Teman, pad amung libung Bosra sabpen.”

¹³Kebala Tuhan, "Lun Amon megéi' nganau' sala'. Kali' rungen Ui ngukum nedeh, ngaceku ideh muer batek decur Giliad luk mali', ngaceku ideh melili ku tana'.

¹⁴Ngaceku ineh Ui ngacing apui kuan libung Raba, pad amung libung bawang ineh sabpen. Inan arod kareb aco pebunu', idi bunu' ineh mepad kudeng baru.

¹⁵Raca'deh miak tebanen dengan amung lun rayehneh."

Amos 2

¹Kebala Tuhan, "Lun Moab megéi' nganau' sala'. Kali' rungen Ui ngukum nedeh ngaceku ideh nengeseb tulang raca' Edom mangun ku kapur.

²Ui ngacing apui kuan tana' Moab pad amung libung Keriot sabpen. Lun Moab miak maté bang bunu' uned arod lun pebunu' idi uni serupit.

³Ui ngaté raca' Moab idi amung lun rayeh bang bawang ineh.”

⁴Kebala Tuhan, "Lun Yahuda megéi' nganau' sala'. Kali' rungen Ui ngukum nedeh, ngaceku ideh situnga ku bada'Ku, idi na maya' ukumKu. Ideh rinaruh allah luk mebalih luk inan tepundeh nesembayang.

⁵Ngaceku ineh Ui ngacing apui kuan Yahuda pad amung libung Yerusalim sabpen.”

⁶Kebala Tuhan, "Lun Israil megéi' nganau' sala'. Kali' rungen Ui ngukum nedeh, ngaceku ideh masui nelun luk na mesala' ngaceku na mayar balehdeh, idi ideh masui lun masi' luk na miak mayar raga kasut pana' mangun ku demulun.

⁷Ideh ngeradu' nelun luk melaya' idi masut nelun masi'. Anak adi' deléi' idi luk mengered pana' pasét nan decur luk mesawa' déi' ruma' sembayang nan akang, pad ngadanKu luk meligan uen ngedat.

⁸Déi' ruma' sembayang ineh ideh telubid luun ayung luk inuit ku duduk ngaceku balehdeh. Bang Ruma' Allahdeh ideh ngirup abpa' anggur luk ilapdeh rat nelun luk pebaleh nedeh,

⁹sagan pana' ngaceku ideh, Ui nengaté nelun Amori luk medita' mepad kudeng kayuh tumuh idi metueh mepad kudeng kayuh luk meraben. Ui nengaté nedeh amung-amung.

¹⁰"O pupuKu, Ui nenated nemuyuh remuat rat bang bawang Masir, idi nenguyut nemuyuh déi' su luk ali-ali apat ngepulu' lak kinioneh, idi Ui nemaré tana' lun Amori nemuyuh.

¹¹Ui nemili' sebuang anak muyuh mangun ku nabi, idi sebuang anak adi' deléi' mangun ku lun Nasiri. Naké ini matu, O pupu Israil? Ui ini Tuhan pangeh nepebala.

¹²Iamo' muyuh nengecuk nelun Nasiri ngirup abpa' anggur, idi nemebpeng nelun nabi na mada' balaKu.

¹³Idi nekini Ui ini ngeradu' nemuyuh ieni, mepad kudeng aceh keréta luk mepanu' ku padé pana' ngeradu'.

¹⁴Lun luk upun luk mawer pana' na mepuit. Lun luk metueh amé' melaya' idi lun pebunu' pana' na miak ngulun bururdeh.

¹⁵Lun luk ngimet binor na miak tuper meraben, lun luk upun luk mawer na miak uen ngulun, idi lun luk maya' kuda na mepuit idi na mulun.

¹⁶Lun pebunu' luk mekuu' buro dengan lubpa kareb aco sineh." Tuhan pangeh nepebala.

Amos 3

¹O Lun Israil, do' ninger bala ini luk bila Tuhan ratnan lawé muyuh: "Ui nenguyut amung pupu muyuh remuat rat bang bawang Masir.

²Rat arang pupu bang tana' ini muyuh sebuleng mo' luk initiKu idi luk isa'Ku. Ngaceku ineh Ui ngukum nemuyuh ngaceku sala' muyuh."

³Miakké dueh burur lemulun nalan pad-pad kudeng na pegayam atun?

- ⁴Miakké balang ngeku bang pulung kudeng na luk ilapneh? Miakké anak balang ngeku bang lubangneh kudeng na luk kikemneh?
- ⁵Miakké suit mekaneh abpung kudeng na upanneh? Miakké abpung metamat kudeng na luk mekaneh idi?
- ⁶Miakké inan kukor bang bawang kudeng na luk katot? Inanké susa' luk rayeh bang bawang kudeng Tuhan na ngacing ineh?
- ⁷Tuhan na nganau' anun-anun dengan na ngegala' terawéNeh kuan demulunNeh lun nabi.
- ⁸Kudeng balang ngeku, idéké luk na matot Kudeng Tuhan pebala, idéké luk tuman na mada' balaNeh?
- ⁹Mada' lemulun luk tudo bang ruma' raca' déi' Asdod idi Masir, kebala muyuh, "Do' muyuh mepamung déi' Samaria pelé muyuh nier ria' luk su ineh, idi sala' luk kikemdeh bang bawang ineh."
- ¹⁰Kebala Tuhan, "Lemulun ini manu' ruma'deh ku binaweh luk uendeh ngaro dengan kekamen luk dat. Ideh na kali' dalan luk mesiri.
- ¹¹Ngaceku ineh bunu' miak ngelibut bawangdeh, idi ngusag libungdeh, idi ngaro ruma'deh."
- ¹²Kebala Tuhan, "Mepad kudeng lun luk matar dumba ngalap dueh kukud idi sebuleng lalid dumba luk kinan balang, kudeng ineh teh Allah miak ngulun teceh pupu Israil luk telubid luun bitaran luk do' déi' Samaria.
- ¹³Do' muyuh ninger idi mada' inul Yakub," kebala Tuhan Allah luk Melalud.
- ¹⁴"Kareb Ui ngukum pupu Israil ngaceku sala'deh, Ui ngusag amung bubpun Baitel. Lidung bubpun pana' uen nangal idi mebpeh luun tana'.
- ¹⁵Ui ngusag ruma' idi lepo. Ruma' luk inayung ku batu gading miak metabpa, idi amung ruma' luk rayeh uen ngusag."

Amos 4

¹Ninger do'-do', O muyuh decur Samaria, luk melamu mepad kudeng sapi' luk mebor, luk ngedereh lemulun luk melaya' idi lemulun luk masi', idi luk pebala inan awan muyuh, "Do' maré luk rupen!"

²Ui ini Tuhan luk meligan idi Ui pangeh nepejani', "Tarekneh macing idi muyuh miak riden ku od, pad anid burur muyuh mepad kudeng lawid luun keluit.

³Muyuh miak iten remuat maya' song libung idi talan," kebala Tuhan.

⁴Kebala Tuhan Allah, "O muyuh lun Israil, amé' nganau' sala' déi' Baitel idi Gilgal! Idi nguit pung luk kereten anid-anid pekak, idi babpat pulu' muyuh bang anid teluh aco.

⁵Maré ruti muyuh ku baré ubur, idi ngedita' burur muyuh ratnan baré muyuh maya' ran niat! Ngaceku muyuh geregan ku luk kudeng ineh.

⁶"Ui ini luk ngacing lau kuan amung bawang muyuh, pad muyuh na akan. Iamo' na muyuh lumi Negku.

⁷Ui nemaré rikan kareb petulu inan udan kuan lati' muyuh. Ui nemaré udan bang sebuleng bawang, idi baken bang bawang baken. Sebuleng lati' inan udan, iamo' lati' baken na udan, pad ieh tekering.

⁸Lemulun luk melaya' ku paring ratnan dueh teluh bawang iné' nakap abpa' bang bawang baken, iamo' na petap luk rupendeh. Iamo' na muyuh lumi Negku.

⁹Ui nemaré uled idi bangas luk nengaté padé muyuh. Kato nekuman kabun irin, anggur, gita', idi saitun muyuh. Iamo' na muyuh lumi Negku, kebala Tuhan.

¹⁰"Ui nemaré kaca nemuyuh mepad kudeng luk biréKu ni Masir. Ui nengaté anak adi' muyuh bang bunu' idi nengaro kuda muyuh. Ui nemanu' icung muyuh ku buen butung su luk inan muyuh nelupo. Iamo' na muyuh lumi Negku," kebala Tuhan.

¹¹"Ui nengukum sebuang muyuh mepad kudeng Ui nengukum Sodom idi Gemora. Muyuh mepad kudeng luten luk ilap ratnan apui. Iamo' na muyuh lumi Negku," kebala Tuhan.

¹²"Ngaceku ineh, O lun Israil, Ui ngacing ukum ini kuan muyuh. Idi ngaceku ineh, do' muyuh temina' kumin Allah!"

¹³Allah luk nemudut pegkung idi bui. Ieh ngegala' terawéNeh kuan lemulun; idi ngisu' acang mangun ku dacem. Ieh ineh Raca' aput-apat tana'. Idi ngadanNeh ineh Tuhan Allah luk Melalud!

Amos 5

¹O muyuh lun Israil ninger tidoKu ini kuan muyuh:

²Israil ineh anak luk pun mebaruh luk pangeh nebpeh idi na miak tumui teh. Ieh telubid luun tana', idi na lun pian ngiding neneh.

³Kebala Tuhan, "Aceh bawang lun Israil! Nengeruat 1,000 lun pebunu', iamo' 100 burur mo' luk muli'; aceh bawang baken ngeruat 100 lun pebunu', iamo' 10 burur mo' luk muli'."

⁴Kebala Tuhan nelun Israil, "Amé' Negku, pad muyuh mulun.

⁵Aleg amé' sembayang déi' Birsiba. Aleg nakap Negku déi' Baitel. Baitel na ulekneh. Aleg amé' Gilgal — pupu ineh miak tebanen."

⁶Nakap Tuhan, pad muyuh mulun. Kudeng na, Ieh miak macing mepad kudeng apui luun inul Yusup. Apui ineh miak ngeseb nelun Baitel. Seburur pana' nateh luk ngilep ineh.

⁷Pelaba susa' kuan muyuh luk ngekilu' ukum idi mebpeng lemulun na ngalap luk petulu!

⁸Tuhan nenganau' gituen, Puru' idi Belatik. Ieh ngisu' dacem mangun ku acang, idi aco mangun ku alem. Ieh nawar abpa' luk bang abpa' rayeh idi ngutang ineh luun tana'. NgadanNeh ineh Tuhan.

⁹Ieh ngaté nelun luk mesangit idi ngusag libungdeh luk meraben.

- 10**Muyuh megateh inan lemulun luk nganau' luk mesiri idi luk mada' luk matu bang besara'.
- 11**Muyuh nengedereh nelun masi' idi nengaro padéden. Ngaceku ineh muyuh na miak tudo bang ruma' batu luk do' luk pinudut muyuh. Idi muyuh na miak ngirup abpa', anggur ratnan kabun anggur luk do' luk tinibu muyuh.
- 12**Ui kali' sala' muyuh luk pelaba rayeh, idi kinula' kekamen muyuh luk dat. Muyuh ngedereh lemulun luk do'. Muyuh ngalap suap. Idi muyuh mebpeng nelun masi' na ngalap ukum luk mesiri bang besara'.
- 13**Bang kareb luk dat ini petulu lun luk mileh pirud.
- 14**Nutun nganau' luk matu idi baken luk dat, pad muyuh mulun, pelé Tuhan Allah luk Melalud miak tudo arang muyuh, maya' kudeng bala muyuh.
- 15**Do' megateh inan luk dat, mawa ku luk do', idi mutut ukum luk mesiri bang besara'. Kian, Tuhan Allah luk Melalud miak méi' nan sebuang pupu luk ketecan ini lek.
- 16**Idi kebala Tuhan Allah luk Melalud, "Inan tido idi arod ku ét déi' dalam rayeh bang bawang ini. Pupu luk punang abpa' miak darin pad temido nelun maté dengan lemulun luk ngalap tabpar temido.
- 17**Déi' bang kabun anggur pana' inan tido, ngaceku Ui amé' ngukum nemuyuh," kebala Tuhan.
- 18**Pelaba susa' kuan muyuh luk nginulat aco Tuhan ineh. Anunké ulek aco Tuhan ineh kuan muyuh? Ieh ineh aco dacem, idi baken acang.
- 19**Ieh ineh mepad kudeng lemulun luk buro ratnan balang idi papu' beruang, idi mepad kudeng lemulun luk muli' idi ngakem alad ruma' idi ieh tiduken menipeh!
- 20**Aco Tuhan ngacing dacem, baken acang. Ieh ineh aco susa' dengan na luk ngacang.
- 21**"Ui megateh inan irau sembayang muyuh, Ui na tuman ku ineh!

²²Kareb muyuh nguit baré luk sabpen idi baré akan kuanKu, Ui na pian ngalap ineh. Idi Ui na pian ku pung luk melamu luk iten muyuh ku baré ubur.

²³Aleg muyuh menani rayeh arod. Na Ui pian ku uni gita muyuh.

²⁴Nima' ukum luk matu idi luk mesiri manud mepad kudeng abpa' luk na miak mekeket.

²⁵"O muyuh lun Israil, ruked apat ngepulu' lak kareb muyuh tudo déi' su luk ali-ali, muyuh na nguit luk kereten idi luk barén kuanKu.

²⁶Idi nekini muyuh miak mabeh Sakut, raca' muyuh, idi Kaiwan, akang gituen muyuh, ieh ineh akang-akang luk pinudut muyuh kuan burur muyuh sebuleng.

²⁷Idi Ui miak naban nemuyuh lemaba Damsik," kebala Tuhan luk titen Allah luk Melalud.

Amos 6

¹Pelaba susa' kuan muyuh luk do' udeng déi' Sion, idi kuan muyuh luk mawang niat déi' Samaria — muyuh lun rayeh ratnan pupu Israil luk mebala ineh, luk inan pupu tau merapet ngalap pedengan!

²Amé' nier bawang Kalni. Idi amé' bawang Hamat luk rayeh, idi macing bawang Gat déi' bawang Pilistin. Ideh meluun do' ratnan imet Yahuda idi Israilké? Inanké tana'deh meluun rayeh ratnan tana' muyuh?

³Muyuh nutun ngiuk aco susa', iamo' kekamen muyuh ngacing susa'.

⁴Pelaba susa' kuan muyuh luk telubid luun pagau luk do', idi teh luun kerusi, idi kuman uang anak sapi' idi teh uang anak dumba.

⁵Muyuh pain nganau' nani idi nateg gita mepad kudeng Daud.

⁶Muyuh ucet ngirup abpa' anggur idi ngumau burur muyuh ku umau luk pelaba do', iamo' na muyuh mesusa' ratnan usag Israil.

⁷Ngaceku ineh muyuh luk pun-pun tebanen. Irau idi lawé rayeh muyuh miak mabud.

⁸Tuhan sebuleng pangeh nepebulung. Kebala Tuhan luk Melalud, "Ui megateh ku dita' niat lun Israil. Ui megateh ku ruma' raca'deh. Ui maré bawangdeh idi amung uangneh kuan bunu'deh."

⁹Kudeng pulu' burur deléi ketecan bang setetek ruma', amung-amungdeh miak maté.

¹⁰Kareb pupu lun luk maté ineh amé' ngalap butungdeh pad ideh sabpen, ieh nawar lemulun luk sigapung bang ruma' ineh, kebalaneh, "Inanké butung baken?" Idi kebaladeh, "Na luk idi!" Idi kebala pupudeh ineh, "Pirud iko! Tau na miak neten ngadan Tuhan pana'."

¹¹Kareb Tuhan ngecuk, amung ruma' luk rayeh idi luk isuut uen ngareg.

¹²Miakké kuda upun luun batu? Miakké lemulun ngeradu abpa' rayeh ku sapi'? Iamo' muyuh nengisu' ukum luk mesiri mangun ku racun, pad luk matu mangun ku sala'.

¹³Muyuh mawang niat ku luk na ulek, idi pebala dengan medita' niat, "Kai metueh ngaceku lalud kai sebuleng."

¹⁴Tuhan Allah luk Melalud ngor bala muyuh, "Ui ngecuk aceh pupu ngerieng nemuyuh lun Israil. Ieh miak ngedereh nemuyuh rat Ruan Hamat luk pa tinueh busat aco macing Raked Araba luk pa kabing busat aco."

Amos 7

¹Tuhan nemaré luk sinierku ini: Kareb uduh raca' pangeh piranéh, idi ieh ngimun mulun baruh, idi ui nenier Tuhan mudut pelaba ula' kato.

²Bang luk sinierku ineh, ui nekali' kato ineh kuman amung luk mebata' bang bawang ineh macing mabud. Idi kebalaku, "O Tuhan, maré do' kuan pupuMu! Kudeng apehké ideh mulun, ngaceku ideh pelaba isuut idi melaya'?"

³Idi Tuhan nenginuud, kebalaneh, "Luk siniermu ineh na mangun."

⁴Tuhan nengegala' luk sinierku ini. Ui nekali' Neneh temina' ngukum pupuNeh ku apui. Idi apui ineh nengeseb abpa' rayeh luk liang tana', idi nengimun ngeseb tana' ineh pana'.

⁵Idi kebalaku, "O Tuhan do' ugka! Kudeng apehké pupuMu mulun? Ideh pelaba isuut idi melaya'."

⁶Idi Tuhan nenginuud, kebalaNeh, "Luk siniermu ini pana' na mangun."

⁷Tuhan nengegala' luk sinierku ini. Ui nekali' Neneh tuped iring aceh alad luk pangeh pinudut maya' batu luk pinier siri. Idi inan teh batu luk pinier siri bang paladNeh.

⁸Idi kebalaNeh, "O Amos, anunké luk sirenmu?" Idi kebalaku, "Aceh batu luk pinier siri." Idi kebalaNeh, "Siruh, Ui makai ineh pad ngegala' sala' pupuKu. Ui na nginguud. Kali' rungen Ui ngukum nedeh.

⁹Amung su luk inan inul Isak sembayang miak uen ngusag. Amung su luk meligan déi' Israil pana' miak uen ngusag. Ui ngacing bunu' kuan tetek ruma' Raca' Yerobom."

¹⁰Amasia, imam Baitel nemada' ni Yerebom, raca' Israil, kebalaneh, "Amos pegayam nelun Israil, sikal metueh rat namu. Bada'neh ngusag bawang ini.

¹¹Kudeng ini balaneh, 'Yerebom miak maté bang bunu', idi lun Israil miak tebanen.' "

¹²Idi kebala Amasia ni Amos, "O nabi, lemubed amé' bawang Yahuda ngalap akanmu idi mada' luk belén Tuhan su ineh.

¹³Aleg mada' luk belén Tuhan déi' Baitel teh. Ini su luk inan raca' sembayang, idiruma' sembayang pupu ini."

¹⁴Idi kebala Amos, "Ui baken nabi — baken ini kekamenku. Ui ini lun matar dumba, idi teh ui ngasa' gita'.

¹⁵Iamo' Tuhan nenawar negku ratnan kekamenku matar dumba idi nengecuk negku mada' nelun Israil kuanNeh.

¹⁶Ngaceku ineh do' ninger bala Tuhan. Iko ngecuk negku ugka' mada' bala luk biré Tuhan ratnan lun Israil, pad ui ugka' megateh inan inul Isak ineh.

¹⁷Ngaceku ineh, O Amasia, kebala Tuhan namu, 'Awanmu mangun ku decur luk mesawa' bang bawang ini, idi anak-anakmu pitayen bang bunu'. Tana'mu

uen mabpat idi barén kuan lun baken, idi iko sebuleng miak maté bang bawang pupu baken. Idi lun Israil miak tebanen.' "

Amos 8

¹Tuhan nengegala' luk sinierku ini. Ui nenier aceh tayen luk mepanu' ku bua'.

²Idi kebala Tuhan, "O Amos, anunké luk sirenmu?" Idi kebalaku, "Aceh tayen luk mepanu' ku bua'." Idi kebala Tuhan negku, "Tarekneh pangeh nacing kuan pupuKu lun Israil. Idi Ui na nginuud. Kali' rungen Ui ngukum nedeh.

³Bang aco sineh amung nani déi' ruma' raca' mangun ku tido. Iapeh-iapeh pana' inan butung. Sebuleng uni pana' nateh luk pedingeren."

⁴Ninger muyuh, O lun luk ngedereh nelun luk masi' idi luk pian ngesusa' nelun dat bang bawang ini.

⁵Kebala muyuh, "Mikat tau nganét aco luk meligan pangeh, pad tau masui padé tau. Idanké Aco luk inan Mudeng mabud, pad tau miak masui dalé tau, pelé tau muyok nedeh dengan gatang luk na matu, idi ngisu' timang pad naluk nelun luk melih?

⁶Idi dengan raga kasut, tau melih seburur lun masi' ku demulun tau. Tau masui dalé luk dat idi ngalap raga luk petap."

⁷Tuhan, Allah lun Israil nepebulung, "Ui na mekelupan kekamendeh luk dat.

⁸Tana' miak meruyuh, idi amung lun luk bang bawang ineh temido. Aput tana' sigio, pad ieh medita' idi mebeneh, mepad kudeng Abpa' Nil temubu' idi melena'.

⁹Bang aco sineh Ui nganau' aco macep kareb muned aco, idi luun tana' medacem kareb maco. Ui ini Tuhan pangeh nepebala.

¹⁰Ui nganau' aco rayeh muyuh mepad kudeng kareb nenem nelun luk maté, pad nani muyuh mangun ku tido, idi Ui nganau' nemuyuh nacung. Muyuh mepad kudeng taman-tinan luk temido anak bulengdeh. Idi aco sineh pelaba susa' macing kekipedneh.

¹¹"Tarekneh macing idi Ui maré lau bang tana'deh. Lemulun miak melau, baken ku ruti, idi meparing, baken ku abpa'. Iamo' ideh melau ku bala Tuhan. Ui ini Tuhan pangeh nepebala.

¹²Lemulun miak melaya' idi nalan rat pa tinueh busat aco macing pa kabing busat aco, idi rat pa busat aco macing pa acep aco. Idi iapeh-iapeh pana' ideh nakap bala ratnan Tuhan, iamo' na luk kali'deh.

¹³Kareb ineh anak decur luk do' taga idi anak adi' deléi miak meluka' ngaceku meparing.

¹⁴Lemulun luk pebulung ku akang Samaria, kebaladeh, 'Ku ulun akang Dan,' idi 'Ku ulun akang Birsiba' — lemulun ini miak meluka' idi na tumui."

Amos 9

¹Ui nenier Tuhan tured iring bubpun. Idi kebalaNeh, "Necat luun diri ruma' sembayang, pad amung munung tanga' sigio. Mutul diri ineh pad ideh mepeh luun uluh lun mula'. Ui ngaté lemulun luk ketecan bang bunu'. Seburur pana' nateh luk mepuit.

²Sagan pana' ideh ngukat dalan macing su luk inan até, Ui miak ngakem nedeh. Sagan pana' ideh manad macing surga, Ui miak ngerurut nedeh.

³Kudeng ideh sigapung luun buduk Pegkung Karmel, Ui nakap idi ngakem nedeh. Kudeng ideh sigapung bang ribaruh abpa' rayeh, Ui miak ngecuk galau abpa' ngatep nedeh.

⁴Kudeng ideh tebanen bunu'deh, Ui ngecuk ngaté nedeh ku pelapet. TerawéKu lutep pian ngaté nedeh, idi na Ui ngedengan nedeh."

⁵Tuhan Allah luk Melalud ngakem tana', pad ieh ubpa'; amung luk tudo su ineh temido. Aput tana' medita' idi mebeneh, mepad kudeng Abpa' Nil temubu' idi melena'.

⁶Tuhan mudut amung takepNeh déi' bang langit, idi nganau' luk luun langit pa luun tana'. Ieh nawar amung abpa' rayeh, idi ngutang ineh luun tana'. NgadanNeh ineh Tuhan.

⁷Kebala Tuhan, "O muyuh lun Israil, Ui nganau' luk mepad kuan muyuh idi kuan lun Sudan. Ui nenguit nelun Pilistin rat Kaptor, idi lun Siria rat Kir, mepad kudeng Ui nguit nemuyuh rat Masir.

⁸Ui nier imet Israil luk mesala' ini, idi Ui nala' neneh rat luun tana'. Iamo' na Ui ngusag neneh macing mabud.

⁹"Ui maré ukum idi ngagag nelun Israil mepad kudeng padé bang agag. Ui ngagag nedeh arang amung pupu pad nala' luk na ulek.

¹⁰Lun mesala' arang pupuKu pitayen bang bunu' — ieh ineh amung lemulun luk pebala, 'Allah na nima' netau mekaneh susa'."

¹¹Kebala Tuhan, "Kareb ineh Ui nuneb tetek ruma' Daud luk mepad kudeng ruma' luk netabpa. Ui ngedo' aladneh, idi nuneb neneh baruh. Ui mudut neneh baruh mepad kudeng luk atun.

¹²Idi lun Israil miak ngalap luk ketecan ratnan tana' Edom, idi amung bawang luk Ui kuan atun." Kudeng ini bala Tuhan luk ngacing amung bala ini.

¹³"Tarekneh macing," kebala Tuhan, "kareb lun ngeradu perapu lun luk ngeranih; idi lun baken temina' nganau' abpa' anggur, kareb lun nibu anggur ineh. Amung pegkung ngeruat abpa' anggur luk mepaci', idi ieh manud ratnan amung surud.

¹⁴Ui nguit pupuKu muli', idi ideh mudut amung bawangdeh baruh idi tudo su ineh. Ideh nibu anggur idi ngirup abpa'neh. Ideh nganau' kabun-kabun idi kuman uli'neh.

¹⁵Ui ngisak nedeh luun tana' luk biréKu nedeh, pad ideh na miak uen mubput baruh." Tuhan Allah muyuh pangeh nepebala.

Obadia

Obadia 1

- ¹Ini bada' luk biré kuan Obadia: ini bala Tuhan Allah ratnan bawang Edom.
- ²Kebala Tuhan kuan bawang Edom, "Ui miak nganau' namu isuut, pad amung-amung lemulun situnga namu.
- ³Dita' niatmu pangeh nenaluk namu. Iko tudo bang libung batu luk meraben; ruma'mu déi' luun pegkung, idi kebalamu kuan bururmu sebuleng, 'Idéké luk miak ngusag negku?'
- ⁴Sagan tu pana' iko nganau' ruma'mu medita' mepad kudeng arar kanui, idi arang gituen, Ui miak ngusag namu.
- ⁵Kareb lun mano macing kareb medacem, ideh ngalap luk piandeh mo'. Kareb lun ngalap bua' anggur, ideh necan sebuang. Iamo' bunu'mu pangeh nengabud namu.
- ⁶Ideh pangeh nekali' binawehmu, O Esau, idi amung-amung ineh pangeh ilapdeh.
- ⁷Pupu luk nengedengan namu atun pangeh nenaluk namu; ideh nemasut namu rat bang bawangmu. Lemulun luk do' rorum namu atun pangeh nengelaya' namu. Lun rorum luk pamung akan denganmu atun pangeh netumen abpung kuanmu, kebaladeh, 'Iapeh amung ilehneh luk atun di?'
- ⁸Kebala Tuhan, "Kareb Ui ngukum Edom, Ui miak ngaté nedeh luk mileh, idi nala' amung ileh rat Pegkung Esau.
- ⁹Lun mesangit rat Teman miak matot, idi amung lun luk pebunu' luk luun Pegkung Esau miak pitayen.
- ¹⁰"Iko miak pitayen idi uen ngigu' macing raked-raked; ngaceku iko nengaté inul Yakub luk kinanakmu, idi nengalap binawehdeh.
- ¹¹Iko na nengedengan nedeh, kareb bunu'deh nengurak tanga' bawangdeh. Muyuh mepad dat kudeng lun pupu baken, luk nemanu amung binaweh Yerusalim, idi nemabpat ineh kuandeh sebuleng.

¹²Na iko petulu miak mawang niat ku susa' kinanakmu luk déi' bawang Yahuda. Na iko petulu miak mawang niat, kareb ideh linaya'. Na iko petulu miak meriruh nedeh kareb susa'deh.

¹³Na iko petulu miak semuet bang bawang pupuKu idi mawang niat ku derehdeh, idi pesingaro ku binawehdeh kareb susa'deh luk rayeh ineh.

¹⁴Na iko petulu miak tuped luun lisangen idi ngaté nedeh luk pian buro. Na iko petulu miak maré nedeh bang palad bunu'deh kareb susa'deh luk rayeh.

¹⁵"Aco ineh malé macing kareb Ui ini Tuhan miak ngukum amung-amung pupu. O Edom, anun luk pangeh inau'mu, kudeng ineh teh miak ruen kuanmu. Iko miak ngalap mepad kudeng luk pangeh birému.

¹⁶PupuKu pangeh nengirup aceh ukum luk mepét bang aceh sangkir, déi' luun pegkungKu luk meligan. Idi amung bawang luk libut Yahuda miak ngirup aceh ukum luk meluun dat, pad ideh mabud maté.

¹⁷"Iamo' lemulun luk buro amé' luun Pegkung Sion miak mulun, idi su ineh luk meligan. Idi pupu Yakub miak ngimet luk babpatdeh sebuleng.

¹⁸"Pupu Yakub idi Yusup mepad kudeng apui; ideh miak ngaté nelun pupu Esau, mepad kudeng apui luk ngeseb geramih. Seburur pana' rat arang inul Esau nateh luk mulun. Ui ini Tuhan luk pangeh nepebala.

¹⁹"Lun Israil rat Negeb miak ngimet Pegkung Edom idi lemulun rat surud luk pa busat aco miak ngalap tana' lun Pilistin. Lun Israil miak ngimet tana' lun Epraim idi Samaria; idi pupu Benjamin miak ngalap tana' Giliad.

²⁰Baweh lun luk tiban luk rat pa tinueh busat aco imet Israil, miak ngalap tana' lun Puniki, macing bawang Sarepat luk pa tinueh busat aco. Lun luk tiban rat Yerusalim luk déi' Sardis, miak ngalap amung bawang Negeb.

²¹Lun Israil miak amé' luun Pegkung Sion pad matar neneh; ineh miak ngimet Pegkung Edom. Idi Tuhan miak mangun ku raca'."

Yunus

Yunus 1

¹Kebala Tuhan ni Yunus, anak Amitai:

²"Do' iko amé' Ninewé, bawang luk rayeh ineh, idi mada' neneh; ngaceku Ui pangeh nekali' amung-amung lemulun luk bang bawang ineh pelaba dat."

³Iamo' Yunus neburo rat pa kiung Tuhan amé' Tarsis. Idi kareb ieh nacing Yopa, idi inan aceh kapal; luk lélé nalan amé' Spaniol. Idi ieh nemayar tabangneh idi ieh iné' maya' ineh, ngaceku ieh pian buro, pad ieh mado ratnan Tuhan.

⁴Iamo' Tuhan nemaré aceh barui luun abpa' ineh; idi ribut pelaba rayeh, pad kapal ineh lélé mebila' ku ribut ineh.

⁵Amung-amung lun luk ngakem bang kapal ineh matot, idi anid-anid bururdeh nengitang nawar allahdeh, idi ideh nenala' amung binaweh luk inuitdeh, pad kapal ineh meran. Iamo' Yunus iné' déi' dalem idi nerudap.

⁶Idi lun luk ngimet kapal ineh iné' neneh, idi keburineh neneh, "Ngudeh iko rudap? Tumui iko idi nawar allahmu mutuh pedengan; kian lek ieh miak méi' netau, pad tau na maté."

⁷Idi keburineh lun luk ngakem bang kapal ineh, "Do' tau nala' udi, pad tau kali' idé luk mesala', idi ieh luk nengacing susa' ini kuan tau." Idi ideh nenganau' kudeng ineh, idi Yunus luk nekaneh.

⁸Idi kebaladeh neneh, "Do' iko mada' nekai, idé luk nengacing susa' ini! Iné ngudeh iko tungé'? Rat iapeh iko? Iapeh bawangmu, idi lun anun iko?"

⁹Idi keburineh Yunus, "Ui ini lun Iberani, ui sembayang inan Tuhan Allah déi' Surga, luk nenganau' abpa' idi tana'."

¹⁰Idi lun luk ngakem bang kapal ineh pelaba tot, idi keburideh neneh, "Pelaba dat luk inau'mu!" (Ideh kali' ieh neburo rat pa kiung Tuhan, ngaceku ieh nemala nedeh.)

¹¹Idi ribut ineh iuk amé' mula', idi ideh nengitun neneh, "Anun luk ruen kai namu, pad ribut ini ugka?"

¹²Idi keburu' Yunus, "Do' nala' negku bang abpa', pad ribut ini miak ugka' kuan muyuh. Ui kali' ribut ini mangun ngaceku sala'ku."

¹³Iamo' lun luk ngakem bang kapal ineh nutun peribué amé' matun tangeb, iamo' na miak, ngaceku ribut pelaba dat.

¹⁴Idi ideh nengitang nawar Tuhan, kesembayangdeh, "O Tuhan, kai mutuh Namu, aleg nima' nekai maté, ngaceku kai nala' lemulun ini. Aleg ngukum nekai mepad kudeng lun luk ngaté; ngaceku iko, O Tuhan luk nemada' nekai ratnan luk miak ruen kai."

¹⁵Idi ideh nengakem ni Yunus idi nemala' neneh bang abpa', idi petacu ribut ineh nugka'.

¹⁶Idi lun luk ngakem bang kapal ineh matot inan Tuhan, pad ideh nemaré aceh baré idi nepejani' maya' Neneh.

¹⁷Idi Tuhan nengecuk aceh lawid luk rayeh nelen ni Yunus; idi kinio Yunus bang batek lawid ineh teluh aco idi teluh dacem.

Yunus 2

¹Idi Yunus nesembayang inan Tuhan Allah, bang batek lawid ineh, kesembayangneh,

²"O Tuhan, bang susa'ku ui nenawar Namu, idi Iko nengua' sembayangku. Rat bang su luk inan até ui nenawar mutuh pedengan, idi Iko neninger tawarku,

³Iko nenala' negku, uned ribaruh abpa' rayeh, idi ui uned awerneh; idi ributmu luk metueh pa luunku.

⁴Kebalaku, "Ui pangeh tila' rat pa kiungMu, kudeng apéh ui miak nier ruma'Mu luk meligan ineh teh.

⁵Idi abpa' nengereb negku, idi nengened negku, idi uduh luk bang abpa' rayeh nebelilid luun uluhku.

⁶Idi ui nepetarem pad macing puet ribaruh, luk bang tana' luk inan tanga' luk pinasek macing raked-ruked. Iamo' Iko, O Tuhan Allahku, nengalap negku rat bang ribaruh ineh.

⁷Kareb niatku lélé meputut, idi ui nengerawé Namu O Tuhan, idi sembayangku nacing Namu, bang Ruma'Mu luk meligan.

⁸Ideh luk sembayang inan akangdeh luk na ulek, pangeh nenecan Namu,

⁹Iamo' ui miak menani ngubur Namu; ui miak maré aceh baré Namu, ui miak nganau' luk pangeh pijani'ku. Ulun miak macing ratnan Tuhan!"

¹⁰Idi Tuhan nepebala inan lawid ineh, idi ieh nenguta' ni Yunus luun tangeb.

Yunus 3

¹Idi sekua' teh Tuhan nepebala ni Yunus,

²"Do' iko amé' Ninewé, bawang luk rayeh ineh idi mada' nedeh ratnan bala luk bilaKu namu."

³Idi Yunus iné' Ninewé maya' kudeng luk icuk Tuhan neneh. Idi Ninewé ineh aceh bawang luk pelaba rayeh, idi ieh miak delanin bang teluh aco.

⁴Kareb Yunus pangeh nenalan, seaco kinioneh bang bawang ineh, ieh nemada' nedeh, keburineh, "Apat ngepulu' aco teh rat aco sini bawang Ninewé ini miak uen ngusag!"

⁵Idi lun Ninewé nemanu inan bala Allah. Idi ideh nengecuk amung-amung lun bang bawang ineh mawa' na kuman. Idi ideh nenacung mangun ku tanu'deh pangeh nuren, do' lun dat idi lun do' pana'.

⁶Kareb raca' Ninewé nekali' bala ineh, idi ieh nudur ratnan kerusineh, idi nengelengu kuyu'neh, idi ieh nenacung idi netudo luun abuh.

⁷Idi ieh nemaré kali' kuan amung lun Ninewé: "Ini aceh ukum ratnan raca' idi lun rayeh-rayeh teh: Seburur pana' nateh miak kuman anun-anun; do' lemulun, idi sapi', idi dumba pana', na miak kuman idi ngirup.

⁸Do' amung lemulun idi aya' pana' nacung. Do' anid burur sembayang inan Allah dengan niat luk matu, idi necan kekammeneh luk dat idi sala' luk pangeh inau'neh.

⁹Kian lek Allah miak nginuud idi ugka' ratnan usehNeh pad tau na miak maté!”

¹⁰Allah nenier luk inau'deh, idi nekali' nedeh nenecan kekamendeh luk dat. Idi Ieh nenginuud idi na nengacing susa' luk pangeh bilaNeh atun.

Yunus 4

¹Idi Yunus pelaba dat niat idi museh.

²Idi ieh nesembayang inan Tuhan, kesembayangneh, "O Tuhan, kareb nateh ui nenalan ui pangeh kali' Iko miak nganau' kudeng ini. Idi punneh ui pian buro amé' Spaniol. Ui kali' Iko Allah luk mawa idi méi', idi megéi' mulai niat, idi mekatu, idi megéi' nginuud pad Iko na ngukum.

³O Tuhan, do' ngalap niatku nekini, ngaceku meluun do' ui maté.”

⁴Idi Tuhan nengua' sembayangneh, kebalaNeh, "Ngudeh iko museh?”

⁵Idi Yunus neremuat rat bang bawang ineh idi netudo pa busat aco. Idi ieh nenganau' aceh ducung inanneh tudo nganét luk mangun bang bawang ineh.

⁶Idi Tuhan Allah nenganau' aceh tabuh mulun iring ducungneh, pad ieh na medereh ku ét idang. Idi Yunus pelaba awang niat ku tabuh ineh.

⁷Iamo' kenebpa kareb nateh aco masat, Allah nenganau' aceh uled kuman tabuh ineh pad ieh naté.

⁸Idi kareb aco masat Allah nemaré aceh bui luk melau' rat pa busat aco, idi Yunus lélé nelepu ku ét idang. Idi ieh pian maté. Kebalaneh, "Meluun do' ui maté.”

⁹Iamo' kebala Allah neneh, "Ngudeh iko pelaba useh ku tabuh ineh!" Idi Yunus nengor balaneh, "Kali' rungen ui pelaba useh, ngaceku ui geregan ku tabuh ineh!”

¹⁰Idi kebala Tuhan neneh, "Tabuh ini netemubu' bang sedacem idi mekarang bang seaco. Na iko nengasa' neneh, idi na iko nenganau' neneh temubu' — iamo' iko méi' ku idi!

¹¹Meluun teh Ui méi' kuan bawang Ninewé luk rayeh ineh dengan meratu dueh ngepulu' ribu mela anak luk na mesala' idi aya'deh luk mula' teh!"

Mika

Mika 1

¹Ini bala luk biré Tuhan ni Mika luk rat Moresét, kareb Yotam, Akas, idi Hesekia ngimet Yahuda. Idi ini luk sinier Mika ratnan Samaria idi Yerusalem.

²O amung pupu, ninger bala ini idi amung muyuh luk tudo bang tana' ini! Tuhan Allah miak mangun ku lun nekali' ratnan muyuh. Ninger! Tuhan pebala rat ruma'Neh luk déi' Surga.

³Tuhan macing rat su inanNeh luk meligan. Ieh temurun idi nalan luun pegkung.

⁴Idi pegkung miak ubpa' liang daperNeh, mepad kudeng semara' luk remuno bang apui, idi raked pana' meturan, mepad kudeng abpa' luk manud rat luun surud.

⁵Amung ini miak mangun ngaceku pupu Israil pangeh nenganau' sala', idi sikal metueh ratnan Allah. Idéké luk uen ngesala' ratnan dat lun Israil? Lun Samaria mo'! Idéké luk nguit nelun Yahuda sembayang inan akang? Lun Yerusalim mo'!

⁶Ngaceku ineh kebala Tuhan, "Ui miak nganau' Samaria mangun ku aceh luk inan batu luk inusag, idi ku su luk inan nibu anggur. Ui miak ngutang amung usag bawang ineh luun raked, idi ngusag amung alen ruma'neh.

⁷Amung-amung akangneh luk meraga miak uen mila' idi sabpen. Pupu ineh nengalap akangdeh ineh ku tabpar sétdeh dengan allah baken, idi nekini sala'deh pa kiung Allah miak uen ngua'."

⁸Idi kebala Mika, "Ngaceku ineh ui miak temido idi nalan lubpa dengan na kasut. Ui miak muni mepad kudeng bungalé idi suit luk muni kareb medacem.

⁹Ngaceku urat Samaria na miak uen ngedo'. Yahuda pana' malé murat kudeng ineh teh. Até pangeh nacing inan amung-amung tanga' Yerusalim, su luk inan pupuku ineh mulun."

¹⁰Aleg mada' nelun Gat ratnan laya' tau. Aleg nima' nedeh nier nemuyuh nangi'. O muyuh lun Bait Lapra, do' muyuh siluti bang abuh.

¹¹O lun Sapir, do' muyuh tebanen dengan lubpa idi migu'. Lun luk tudo déi' Sanan na miak mulun. Kareb muyuh ninger lun Baitesel temido, idi muyuh kali' na luk inan sigapung su ineh.

¹²Lun Marot tebukut ku étdeh, idi ideh pian uen ngedo', ngaceku Tuhan pangeh nengacing susa' muneng ku Yerusalim.

¹³O muyuh lun Lakis, nganau' kuda muyuh pa atun keréta. Iko nengitud sala' lun Israil, pad iko nguit nelun Yerusalim nganau' sala'.

¹⁴Idi nekini O pupu Yahuda, do' muyuh buro rat Moresét Gat. Raca'-raca' Israil na miak ngalap pedengan rat bawang Aksib.

¹⁵O lun bang bawang Marisa, Tuhan miak maré nemuyuh bang palad aceh bunu' luk miak ngaro bawang muyuh. Raca' Israil miak sigapung bang lubang batu déi' Adulam.

¹⁶O lun Yahuda, do' muting abpuk muyuh idi temido anak luk inan muyuh mawa. Mutal uluh muyuh mepad kudeng kanui, ngaceku ideh miak lapen rat nemuyuh.

Mika 2

¹Pelaba susa' kuan lemulun luk telubid luun bitaran idi ngerawé-ngerawé ratnan luk dat! Idi kareb macang aco, idi ideh inan aceh kareb, petacu ideh nganau' luk tirawédeh.

²Kareb ideh pian ku tana', ideh ngalap mo'. Kudeng ideh pian ku ruma', ideh ngalap mo'. Ideh mano ruma' idi tana' lun baken.

³Ngaceku ineh kebala Tuhan, "Ui ngacing susa' nemuyuh, pad muyuh na miak mepuit, pelé muyuh na mulun dengan medita' niat, ngaceku muyuh pelaba susa' kareb ineh.

⁴Aco sineh, amung lemulun miak mada' bala ratnan susa' muyuh, pad ideh nganau' aceh nani luk mepad kudeng tido: Kai pangeh inusag! Tuhan pangeh nengalap tana' kai, idi ineh biré kuan lemulun luk nenaban nekai.”

⁵Ngaceku ineh, seburur pana' rat arang muyuh nateh luk miak ngalap tana' kareb aco tana' uen mabpat teh arang pupu Tuhan.

⁶Idi kebala lun Israil negku, "Aleg mada' nekai. Aleg mada' ratnan amung ineh. Allah na pian ngigu' nekai.

⁷Inanké lun Israil kidiman Tuhan? Inanké Tuhan mawer niat? Miakké Tuhan nganau' luk kudeng ineh? Naké Ieh pebala luk do' kuan lemulun luk nganau' luk matu?”

⁸Idi kebala Tuhan, "Iamo' muyuh nganau' burur muyuh mangun ku bunu' pupuKu. Muyuh mano kuyu' rat nelun luk do' niat, luk muli' rat bang bunu' idi luk ngerawé na inan susa' peh.

⁹Muyuh ngecuk decur pupuKu buro rat bang ruma' luk inandeh do' udeng, idi muyuh pangeh nengaro peruan luk biréKu inan anakdeh.

¹⁰Do' muyuh buro; na su ini luk inan muyuh ucu'. Ngaceku muyuh nganau' sala', muyuh miak ngalap aceh ukum luk pelaba berat.

¹¹"Pupu ini pian ku nabi luk mepanu' ku balih idi saluk, luk lawé-lawé mada', kebaladeh, 'Mula' abpa' anggur idi arak miak barén nemuyuh.’

¹²"Iamo' Ui miak ngamung amung muyuh lun Israil luk ketecan. Ui miak ngamung nemuyuh mepad kudeng dumba bang libung, idi teh mepad kudeng sengeriudan dumba luk bang laman. Bawang muyuh miak mepanu' ku ria' mula' lemulun.”

¹³Allah miak ngukab dalan kuandeh, idi nguyut nedeh. Ideh miak urap maya' tanga' bawang, pad ideh meput. Raca'deh, ieh ineh Tuhan sebuleng miak nguyut nedeh.

Mika 3

¹O muyuh luk lun rayeh lun Israil! Petulu muyuh pian ku ukum luk mesiri,

- ²iamo' muyuh megateh inan luk do' idi mawa inan luk dat. Muyuh nganit kubil pupu ini kareb ideh mulun, idi ngalap uangdeh ratnan tulangdeh.
- ³Muyuh nganit kubildeh, mutul tulangdeh, idi mulu' uangdeh mepad kudeng uang pung luk uen nanek, idi kenen muyuh.
- ⁴Karebneh macing, muyuh miak ngitang pa kiung Tuhan, iamo' na Ieh ngor bala muyuh. Idi teh na Ieh ninger sembayang muyuh, ngaceku muyuh nenganau' luk dat.
- ⁵Pupu ini sinaluk nabi-nabi luk pejani' ngacing luk do' kuan lemulun luk mayar tabpardeh, iamo' ngacing bunu' kuan lemulun luk na mayar nedeh. Kebala Tuhan kuan nabi-nabi ini,
- ⁶"Ngaceku muyuh ngeraruh pupuKu, idi muyuh na miak nier luk siren teh, idi teh muyuh na miak mada' ratnan luk mangun mucu. O nabi-nabi, tarek muyuh lélé macing. Idi aco mangun medacem kuan muyuh kidi-kidi."
- ⁷Lemulun luk mada' ratnan luk mangun mucu miak migu' ngaceku ideh sala' bada'. Amung-amungdeh miak dat niat, ngaceku Allah na miak ngor baladeh maya' luk piandeh.
- ⁸Iamo' ui ini Mika ruen Roh Tuhan manu' ku lalud, ukum luk mesiri, idi kuu', pad ui mada' nelun Israil ratnan amung-amung sala'deh.
- ⁹Ninger balaku, O muyuh lun rayeh lun Israil, luk megateh inan ukum luk mesiri idi ngisu' luk matu mangun ku balih.
- ¹⁰Muyuh mudut bawang Allah, ieh ineh Yerusalim luun alen até idi ukum luk na mesiri.
- ¹¹Lun rayeh-rayeh luk ngimet bawang ngalap suap, imam-imam luk ngelio ukum Tuhan ngalap tabpar, idi nabi-nabi pana' luk mada' luk sirendeh ngalap usin ku ineh. Idi kebaladeh, Tuhan idi dengandeh. Idi teh ideh pebala, "Naké Tuhan idi dengan kai? Na susa' macing nekai."

¹²Idi nekini, ngaceku sala' muyuh, Sion miak uen ngeradu mepad kudeng aceh lati', Yerusalim miak mangun ku aceh usag batu, idi surud su luk inan Ruma' Allah miak mangun ku pulung.

Mika 4

¹Muci aco pegkung su luk inan Ruma' Allah meluun dita' ratnan luk amung-amung. Idi mula' pupu miak amé' su ineh,

²kebaladeh, "Do' tau mudik pegkung Tuhan idi amé' Ruma' Allah lun Israil. Tau miak sibada' ratnan luk pian ruen tau; idi tau miak maya' dalam luk pinili'Neh." Bada' Tuhan macing rat Yerusalim; rat Sion Ieh pebala inan pupuNeh."

³Ieh miak mutut gayam arang amung pupu, idi mangun ku lun luk mutut besara' arang amung-amung imet luk rayeh, ieh ineh luk mado rat Israil. Idi nuno pelapetdeh ruen ku radu, idi busudeh ruen ku beluing. Amung pupu na amé' pebunu', idi na sibada' ratnan pebunu' teh.

⁴Amung lemulun miak tudo dengan do' muneng ku anggur idi gita'deh, idi seburur pana' nateh luk miak ngatot nedeh. Tuhan luk Melalud pangeh nepejani' ratnan amung ineh.

⁵Anid-anid pupu sembayang idi maya' allahdeh sebuleng, iamo' tau sembayang idi maya' Tuhan Allah tau macing ruked-ruked.

⁶Kebala Tuhan, "Karebneh malé macing, idi Ui miak ngamung pupuKu luk medereh ngaceku tiban, ieh ineh lemulun luk inukumKu atun.

⁷Ideh mekio' idi mado ratnan bawangdeh, iamo' Tuhan pian ngeperuan nedeh sekua' baruh teh, pad ideh mangun ku aceh pupu luk rayeh."

⁸Idi iko, O Yerusalim, Pegkung Batu su luk inan Allah matar pupuNeh, iko miak mangun ku bawang rayeh bang imetmu sekua' teh.

⁹Ngudeh iko ngitang-ngitang? Ngudeh iko mét mepad kudeng decur luk nenganak? Naké raca' muyuh? Naké lun rayeh muyuh ketecan?

¹⁰O pupu Yerusalim, ngarod ku ét muyuh mepad kudeng decur luk nenganak. Na miak na muyuh necan bawang rayeh, idi tudo bang bawang luk isuut. Idi na miak na muyuh amé' Babil. Iamo' muyuh miak puatin déi' idi Tuhan miak ngulun nemuyuh ratnan bunu' muyuh.

¹¹Mula' pupu nepamung pian munu' nemuyuh. Kebaladeh, "Do' Yerusalim uen ngusag! Kai miak kali' bawang ini musag!"

¹²Iamo' pupu ini na kali' luk teruayen Tuhan. Idi teh ideh na kali' Tuhan pian ngamung nedeh idi ngukum nedeh, mepad kudeng padé uen ngerenik.

¹³Kebala Tuhan, "O pupu Yerusalim, do' amé' ngukum bunu' muyuh! Ui miak ngetueh nemuyuh mepad kudeng sapi' luk unga belawan, idi dapar tekaling. Muyuh miak ngerenik mula' pupu, pad binawehdeh lapenKu, pelé amung ineh mangun ku binaweh Tuhan luk kuan aput tana'."

Mika 5

¹O lun Yerusalim, do' muyuh sigapung bal alad bawang muyuh, ngaceku bunu' ngerieng nemuyuh. Ideh munu' lun rayeh luk ngimet nelun Israil!

²"O Baitlahim Eprata, iko aceh bawang luk meluun isuut déi' Yahuda. Iamo' Ui nguit aceh Raca' rat namu kuan lun Israil, luk inul tetek ruma'deh rat mon."

³Idi Tuhan miak maré pupuNeh bang palad bunu'deh, pad decur luk petulu nenganak ineh nenganak aceh anak deléi. Pangeh ineh pupuNeh luk pangeh tiban ineh miak uen ngelubed kuan pupudeh sebuleng.

⁴Kareb Ieh macing Ieh miak ngimet pupuNeh dengan tueh luk ratnan Tuhan, idi dengan ubur Tuhan Allah sebuleng. PupuNeh miak tudo dengan do', iamo' lemulun luk aput-apat tana' miak ngamo rayehNeh,

⁵idi Ieh luk ngacing pedo'. Kareb lun Asur ngerieng bawang tau idi ngusag libung tau luk meraben, tau miak ngecuk nelun rayeh-rayeh tau luk meluun tueh amé' munu' nedeh.

⁶Idi ku pelapetdeh ideh ngelaya' bawang Asur. Ideh luk muit netau rat nelun Asur, kareb ideh ngerieng bawang tau.

⁷Pupu Israil luk ketecan mepad kudeng ipup luk barén Tuhan kuan anid-anid pupu, idi mepad kudeng udan puré luk mebpeh luun tibu luk mulun. Ideh merapet inan Allah, baken inan lemulun.

⁸Sebuang lun Israil miak tacin arang pupu-pupu mepad kudeng aceh balang luk nakap akan bang pulung idi bang laman. Ieh semuet arang dumba idi ieh upun matun nedeh, idi ngeramit nedeh pad ideh maté, idi na ideh miak uen ngulun.

⁹Israil miak ngelaya' bunu'neh, idi ngaté amung-amungdeh.

¹⁰Kebala Tuhan, "Kareb ineh Ui miak ngalap kuda muyuh idi ngusag keréta muyuh.

¹¹Ui miak ngusag amung bawang muyuh luk rayeh, idi amung libung muyuh luk meraben.

¹²Ui miak nala' amung gimet muyuh, idi ngaté amung lun luk mileh nier.

¹³Ui miak ngusag amung akang idi ulung luk inan muyuh sembayang. Muyuh na miak sembayang inan luk pangeh inau' muyuh teh.

¹⁴Ui miak ngusag amung ulung bang bawang muyuh dengan amung bawang muyuh luk rayeh.

¹⁵Idi dengan usehKu Ui miak ngua' kuan amung pupu luk na maya' balaKu."

Mika 6

¹Do' ninger adu' Tuhan pa kiung lun Israil. O Tuhan, miket mada' adu'Mu. Pegkung mangun ku lun luk nekali'. Nima' amung surud ninger luk belénMu.

²O pegkung, muyuh luk alen tana' ini luk na sigio, do' ninger adu' Tuhan! Tuhan pian mada' adu'Neh pa kiung lun Israil, idi pian nguit nedeh besara'.

³Kebala Tuhan, "O pupuKu, anunké luk inau'Ku nemuyuh? Kudeng apehké Ui mangun ku babeh kuan muyuh? Do' muyuh mada' Negku.

⁴Ui nenguit nemuyuh remuat rat bawang Masir. Idi teh Ui nemuit nemuyuh ratnan taban. Idi Ui nengecuk ni Musa, Arun, idi Miriam mangun ku lun nguyut nemuyuh.

⁵O pupuKu, do' ngerawé ratnan luk tirawé Balak, raca' Moab ratnan muyuh, idi kudeng apeh Bilam Bior nengor balaneh. Do' ngerawé ratnan amung-amung luk nangun kareb maya' dalam rat Sitim amé' Gilgal, pelé muyuh kali' luk inau'Ku pad ngulun nemuyuh.”

⁶Anunké luk itenku kuan Tuhan, Allah surga, kareb ui amé' sembayang Neneh? Petuluké ui nguit anak sapi' luk meluun do' mangun ku baré luk sabpen kuanNeh?

⁷Mawangké niat Tuhan kudeng ui nguit ribu-ribu dumba, idi pulu' ribu arur luk mepanu' ku umau saitun? Miakké ui maré Neneh anakku luk atun ku ngua' sala'ku?

⁸O lun muyuh, Tuhan pangeh nemada' nemuyuh ratnan luk do'. Kudeng ini luk dukenNeh nemuyuh: nganau' luk mesiri, idi do' lutep bang awa. Maya' Allah muyuh dengan mebeneh niat.

⁹Mileh lemulun luk matot inan Tuhan. Tuhan ngitang-ngitang bang bawang rayeh, "O muyuh luk bang bawang rayeh ini, do' muyuh ninger.

¹⁰Bang ruma' lun luk dat inan binaweh luk ilap dengan pino. Luk ku nimangdeh na matu, idi Ui megateh ku ineh.

¹¹Miakké Ui maré do' nelun luk sala' timang?

¹²Lun do' bang bawang rayeh muyok nelun masi'. Idi amung lun luk bang bawang ineh mebalih mo'.

¹³Idi nekini Ui ngimun ngedereh idi ngukum nemuyuh, ngaceku sala' muyuh.

¹⁴Muyuh miak kuman, iamo' na muyuh mebor, idi melau kidi-kidi. Idi luk nugen muyuh pana' na do'. Anun-anun luk pangeh dinug muyuh miak uenKu ngusag bang bunu'.

¹⁵Muyuh miak nibu, iamo' na muyuh ngeranih. Muyuh miak ngeradu' buah' saitun muyuh, iamo' na muyuh makai umauneh. Muyuh miak nganau' abpa' anggur, iamo' na muyuh ngirup idi.

¹⁶Muyuh pangeh nemaya' Kekamen Raca' Omri luk dat, idi kekamen anakneh Raca' Akab. Macing nekini muyuh nemaya' terawé didueh, pad Ui pian ngusag nemuyuh, pelé amung pupu muyuh uen ngedat. Amung-amung lemulun iapeh-iapeh pana' miak ngedat nemuyuh."

Mika 7

¹Ui pelaba susa! Ui mepad kudeng lemulun luk melau luk nakap buah' iamo' na luk idi, idi anggur pana' nateh luk idi. Amung buah' anggur idi amung buah' gita' pana' pangeh ilap.

²Na luk idi seburur lemulun luk mesiri ketecan bang bawang ini, idi teh seburur pana' natéh luk lutep maya' Allah. Ideh pangeh naté. Amung-amung lemulun luk baken pian ngaté lemulun. Idi teh ideh ngerada' nelun luk bang bawang ineh.

³Ideh mileh nganau' luk dat. Lun rayeh-rayeh idi lun luk mutut ukum mutuh suap. Lun luk mebala mada' nedeh ratnan luk pianneh, idi ideh pamung pegayam.

⁴Idi lun luk meluun do' idi meluun siri rat arangdeh mepad kudeng tabpa'. Tarekneh pangeh macing kareb Allah ngukum pupu ineh, maya' kudeng luk bida'Neh. Idi nekini ideh megagau.

⁵Aleg manu ku bala lun denganmu, idi aleg merapet inan lun rurummu. Matar do'-do' ratnan luk belénmu kuan awanmu pana'.

⁶Anak deléi situnga na tamandeh, idi anak decur sikal metueh ratnan ibandeh; idi lun luk bang tetek ruma'neh mangun ku bunu'neh.

⁷Iamo' ui ini miak nginulat Tuhan Dengan merapet ui miak nginulat Allah luk miak ngulun negku. Allahku miak ninger sembayangku.

⁸O bunu'ku, aleg muyuh mawang niat ku susa'ku. Ui pangeh nebpeh, iamo' ui miak tumui. Ui bang dacem nekini, iamo' Tuhan maré acang negku.

⁹Ui pangeh nenganau' sala' pa kiung Tuhan idi segageh mo' Ieh miak museh negku. Iamo' kekipedneh Ieh miak ngelibung negku, idi muit negku ratnan sala' luk inau' lun kuanku.

¹⁰Idi bunu'ku miak nier pad ideh migu', ieh ineh bunu' luk situnga negku, kebaladeh, "Iapehké Tuhan Allahmu?" Ui miak nier laya'deh, idi ngeradu' nedeh mepad kudeng buri.

¹¹O lun Yerusalim, karebneh malé macing; muyuh miak mudut libung bawang muyuh baruh. Kareb ineh bawang muyuh miak amé' rayeh.

¹²Pupu muyuh miak lemubed amé' nemuyuh rat iapeh-iapeh — rat déi' Asur luk pa busat aco, rat déi' Masir luk pa kabing busat aco, idi teh rat abpa' rayeh idi pegkung luk mado'.

¹³Iamo' tana' ini miak mangun ku su luk ali-ali ngaceku amung dat lemulun luk netudo ieneh.

¹⁴O Tuhan, do' Iko mangun ku lun matar pupu luk pinili'Mu ineh. Ideh tudo déi' su luk ali-ali. Idi libut-libutdeh inan tana' luk mebaleng. Nima' nedeh amé' kuman bang laman luk do' déi' Basan idi déi' Giliad, mepad kudeng luk inau'deh mon

¹⁵Kebala Tuhan, "Ui miak nganau' kekamen luk melalud kuandeh, mepad kudeng luk inau'Ku, kareb iko remuat rat bang bawang Masir."

¹⁶Amung pupu miak nier ineh idi migu', sagan tu pana' ideh metueh. Ideh ungeng mo' idi na ninger anun-anun.

¹⁷Ideh miak suloi mepad kudeng menipeh; mepad kudeng pung luk remuat rat bang lubangdeh dengan megegker. Ideh miak matot pad ideh lumi inan Tuhan Allah tau.

¹⁸O Tuhan, na luk idi Allah luk mepad kudeng Iko. Iko maré do' ratnan sala' lemulun luk ketecan. Idi na Iko museh kidi-kidi, iamo' Iko lutep bang awaMu.

¹⁹Iko miak méi' nekai sekua' teh. Iko miak ngeradu' sala' kai iang daparMu, idi nala' nedeh bang abpa' rayeh!

²⁰Iko miak ngegala' idi Iko lutep maya' jani'Mu idi lutep bang awaMu kuan pupuMu Israil luk inul Ibrahim, maya' kudeng luk pijani'Mu kuan tepun kai bang kareb luk mon.

Nahm

Nahm 1

¹Ini bala ratnan Ninewé, ieh ineh surat ratnan luk sinier Nahum, lun luk rat Elkos.

²Tuhan Allah temaruh; Ieh ngukum nelun luk sikal metueh rat Neneh, idi Ieh ngua' nedeh dengan useh.

³Tuhan na malé museh; iamo' Ieh melalud, idi na miak na Ieh ngukum nelun luk mesala' Su luk dalam Tuhan inan barui. Laput ineh abuh ratnan kukudNeh!

⁴Ieh mebpeng abpa' rayeh, pad ieh mekeket, idi arur-arur pana' ruenNeh mekeket. Laman luk déi' Basan melayuh, idi Pegkung Karmel tekering, idi busak luun Pegkung Lebanon mekarang.

⁵Amung pegkung meruyuh pa kiung Tuhan; idi surud pana' sigio. Tana' ini pana' meruyuh kareb Tuhan silagan; idi amung lemulun pana' megegker.

⁶Kareb Tuhan museh, idéké luk miak tuman ku usehNeh? Ieh ngutang usehNeh luk mebudung; batu-batu pana' mekareg amé' ku abuh pa kiungNeh.

⁷Tuhan ineh do'; Ieh nengelibung pupuNeh kareb inan susa'; idi Ieh matar lemulun luk lumi Neneh.

⁸Mepad kudeng ereb luk rayeh, Ieh ngusag amung-amung luk sikal metueh rat Neneh. Ieh ngerada' amung bunu'Neh, pad ideh mabud maté.

⁹Ngudehké muyuh pegayam sikal metueh ratnan Tuhan? Ieh miak ngaté nemuyuh. Na seburur miak nutun Tuhan, meluun ratnan sekua'.

¹⁰Mepad kudeng tabpa' luk mepamung idi geramih luk tekering muyuh miak sabpen!

¹¹Rat namu, O Ninewé, nacing seburur lemulun luk megéi' ngerawé luk dat, idi luk sikal metueh ratnan Tuhan, ieh ineh aceh lun duken Belial.

¹²Ini luk belén Tuhan kuan pupuNeh, "Sagan pana' lun Asur mula' idi metueh, bawehdeh miak uen ngusag pad ideh na idi peh. O pupuKu, muyuh nedereh inau'Ku, iamo' na Ui pian nganau' kudeng ineh sekua' teh.

¹³Nekini Ui ngagka' lalud Asur pa luun muyuh, idi Ui neka kaling muyuh."

¹⁴Ini luk bila Tuhan ratnan lun Asur: "Na lun ngerawé nedeh peh. Ui miak ngusag amung akang luk bang ruma' allahdeh. Ui nganau' aceh lengutan kuan lun Asur, ngaceku na ideh petulu mulun bang tana' ini."

¹⁵Siruh, seburur lun duken macing maya' pegkung, luk nated bala luk do'! Ieh nalan pad ieh mada' ratnan tueh luk macing nemuyuh. O lun Yahuda, ngerayeh aco muyuh, idi maré kuan Allah luk pijani' muyuh. Lemulun luk dat na miak ngerieng bawang muyuh teh. Ideh pangeh inusag!

Nahm 2

¹O Ninewé, iko uen ngerieng! Lalud luk miak mila' namu pangeh nacing. Matar amung libung luk meraben! Ngabang dalan! Do' iko temina' pebunu'!

²(Tuhan malé ngelubed ubur Israil, pelé ieh mepad kudeng luk atun kareb nateh bunu' nengaro bawang ineh.)

³Lun pebunu' luk ngerieng namu ngimet utap luk mesia', idi ngayung ku luk mesia' teh. Ideh netemina' pebunu'! Kerétadeh mekilat mepad kudeng apui! Idi kudadeh pana' gregan nalan!

⁴Kerétadeh nalan peliwa-peliwa, luun dalan idi luun natad pana'. Ideh mekilat mepad kudeng sesakan, idi awerdeh mepad kudeng kilep.

⁵Lun rayeh pebunu' pangeh titeng; pad ideh ngimet bawehdeh. Lun luk ngerieng upun amé' matun libung idi nganau' luk ku ngerieng bawang ineh.

⁶Amung tanga' abpa' mukab, pad ruma' raca' mepanu' ku tot.

⁷Raca' decur tibandeh, idi demulunneh nangi'; ideh mepag ruukdeh ku dat niatdeh.

⁸Mepad kudeng abpa' rat bang lelung, lun buro rat Ninewé! "Ugka'-Ugka'!" kebala lun baken. Iamo' seburur pana' nateh luk lemubed.

⁹Ngaro pirak idi amas! Bawang ini mepanu' ku binaweh!

¹⁰Ninewé inusag, tican, idi dat ali! Niatdeh sigio ku totdeh; idi teh alebdeh megegker. Kiungdeh mebudi idi ideh melaya' peh.

¹¹Iapehké lubang balang ineh nekini, ieh ineh su luk inan anak balang isa' tinandeh, idi su luk inan balang deléi sigapung dengan anakneh ineh; pad ideh na inan susa'?

¹²Balang ineh nengaté pung luk tikapneh, idi nemaré babpat kuan tineh idi anakneh; idi nemanu' lubangneh ku uang luk ketecan.

¹³"Ui ini bunu'mu," kebala Tuhan luk Melalud. "Ui miak ngeseb amung kerétamu. Amung anak balangmu ineh miak maté bang bunu', idi Ui miak ngalap amung-amung binaweh luk pinomu rat nelun baken. Idi arodmu pana' nateh pedingeren bang tana' ini."

Nahm 3

¹Bawang Ninewé luk mebalih idi ngaté, luk mepanu' ku binaweh luk miak tebanen, miak kumin.

²Ninger uni babpet kuda, uni roda, idi uni kuda luk upun, idi uni keréta luk meguai!

³Lun luk maya' kuda upun amé' pebunu', pelapet merasat, idi busu mesilo. Butung-butung pebuun pad na mekiap, idi lemulun metebaceng luun dalan, ngaceku mula' butung!

⁴Ninewé, decur luk mesawa' ineh kunin. Ieh do' taga idi mepanu' ku ileh, luk ngeruid nelun baken nganau' sala'. Ieh nengeruid niat mula' pupu baken idi pasét nedeh.

⁵Kebala Tuhan luk Melalud, "Ui miak ngukum namu, O Ninewé! Ui miak ngelebpa namu, pad iko migu' siren amung pupu baken.

⁶Ui miak ngebeneh namu, idi mapen namu ku lutak. Lemulun miak nutong namu idi megagap.

- ⁷Lemulun luk nier namu megileg. Kelabadeh, 'Ninewé pangeh inusag! Idéké luk méi' neneh?' Seburur pana' nateh luk pian ngubuk namu.”
- ⁸O Ninewé, iko meluun do'ké ratnan bawang Tibis, ieh ineh bawang luk rayeh déi' Masir. Bawang ineh pana' inan aceh abpa' luk ngelibung neneh mepad kudeng alad. Abpa' Nil luk mangun ku libungneh luk meraben.
- ⁹Ieh nengimet Sudan idi Masir, idi laludneh na lakan. Libia pana' rurunneh.
- ¹⁰Iamo' lun Tibis pangeh tiban iné' bawang baken. Idi anid lisangen dalam anak-anakdeh bibal pad ideh naté. Lun rayeh-rayehdeh pangeh kiling, idi ideh bibpat kuan lun luk naban nedeh.
- ¹¹O Ninewé, iko pana' miak melepu ngaceku mabuk! Iko pana' miak nutun buro ratnan bunu'mu.
- ¹²Amung libungmu luk meraben mepad kudeng gita' luk melak bua'; nguyu' kayuh ineh pad bua'neh mebpeh bang tangmu!
- ¹³Lun pebunu'mu mepad kudeng decur, idi bawangmu na miak tured pa kiung bunu'mu. Apui miak ngeseb palin tanga'mu.
- ¹⁴Ngereb abpa' idi iko temina' uen ngerieng, idi ngetueh libungmu luk meraben! Do' nganau' tana' salit, pad iko miak nganau' batu bata ineh ku ngeraben libung ineh!
- ¹⁵Iamo' sagan tu pana' iko nganau' kudeng ineh iko miak sabpen kian pitayen bang bunu' lek. Iko miak kenen mepad kudeng padé luk kenen kato. Iko amé' mula' mepad kudeng kato!
- ¹⁶Iko inan lun luk pepua' kinula' gituen bang langit! Iamo' nekini ideh na idi peh, mepad kudeng kato luk malad iladdeh pad ideh temulud.
- ¹⁷Lun rayehmu mepad kudeng kato luk amé' mula' idi ucep luun libung kareb meteneb. Iamo' kareb mét idang ideh buro, idi seburur pana' nateh luk kali' su ulekdeh.

¹⁸O raca' Asur, amung pengulumu pangeh naté, idi amung lun rayehmu rudap macing raked-raked! Pupumu urap-urap luun pegkung, idi seburur pana' nateh luk nguit nedeh muli'.

¹⁹Na luk ku ngedo' ét idi uratmu. Idé-idé luk ninger bala ini miak mepag palad ngaceku ideh mawang niat. Seburur pana' nateh luk nepuit ratnan datmu.

Habakuk

Habakuk 1

- ¹Ini bala luk linio Tuhan ni Nabi Habakuk.
- ²O Tuhan, tuda' ioké ui miak nawar Namu mutuh pedengan kareb nateh Iko ninger, idi ngulun nekai rat nelun luk ngedereh nekai?
- ³Ngudehké Iko nganau' negku nier susa' idi dat luk kudeng ineh? Até idi luk ngedereh idi libut-libutku. Iapeh-iapeh pana' ideh pebunu' idi pekedaluh.
- ⁴Ukum ineh melaya' idi na ulekneh, idi na lun luk mutut ukum luk mesiri. Ideh mutut luk tekilu', idi lun luk dat metueh rat nelun luk matu.
- ⁵Kebala Tuhan kuan pupuNeh, "Do' nier amung-amung pupu luk libut-libut muyuh, idi muyuh miak mawa ratnan luk siren muyuh. Ui sikal nganau' aceh luk inan muyuh na manu kareb muyuh ninger bala ineh.
- ⁶Ui ngikit nelun Babil luk mesangit idi mekuu' ineh. Ideh nalan amé' mado pian ngelaya' bawang baken.
- ⁷Ideh ngacing tot, idi ideh na maya' ukum, iamo' merapet inan laluddeh sebuleng.
- ⁸"Kudadeh meluun awer ratnan kuir, idi meluun sangit idi melau ratnan bungalé. Lun pebunu'deh luk maya' kuda macing rat mado. Idi kudadeh peritamid. Ideh ngeladai mepad kudeng kanui.
- ⁹"Bawehdeh nalan petacu pian ngaro amung bawang, idi amung lemulun matot ku acingdeh. Lun luk tibandeh na mekiap, mepad kudeng bada.
- ¹⁰Ideh situnga inan raca'-raca', idi meriruh inan lun rayeh-rayeh. Sebuleng libung luk meraben pana' nateh luk miak ngagka' nedeh. Ideh muun tana' ku dalandeh umak, pad ideh ngalap bawang ineh.
- ¹¹Ideh lemaba mepad kudeng bui, idi ideh na idi peh. Ideh ineh lemulun luk sembayang inan laluddeh sebuleng."

¹²O Tuhan, Iko luk Allah rat pun-pun. Iko ineh luk Allahku luk meligan idi meruked. Tuhan Allahku, Iko luk matar negku. Iko pangeh nemili' idi nengetueh nelun Babil, pad ideh miak ngukum nekai.

¹³Iamo' kudeng apehké Iko tuman nier lemulun ineh luk naluk idi dat? MatehMu meluun meligan, pad Iko na miak nier luk dat, idi Iko na tuman nier lemulun luk nganau' sala'. Ngudehké Iko pirud kareb ideh ngaté lemulun luk meluun siri ratnan bururdeh sebuleng?

¹⁴Kudeng apehké Iko miak nganau' lemulun mepad kudeng lawid idi mepad kudeng dara' luk nalan pekarur?

¹⁵Lun Babil ngeluit lemulun mepad kudeng lawid. Ideh ngerabat nedeh. Idi ideh ngitang mawang niat, ngaceku luk ilapdeh!

¹⁶Ideh sembayang inan rabatdeh, idi maré baré kuandeh, ngaceku rabatdeh maré amung-amung luk meluun do' nedeh.

¹⁷Miakké ideh makai pelapetdeh macing ruked-ruked, pad ngaté amung pupu dengan na méi'?

Habakuk 2

¹Ui miak umak pudutku luk medita' amé' nginita, pad ui kali' luk duken Tuhan belénku, idi ui nguit orNeh ratnan luk inadu'ku ineh.

²Tuhan nemaré or ini negku, "Do' ngayud luun balad tana' salit, luk ruenKu ngelio namu, pad ineh malé uen maca'!

³Do' ngayud ineh, ngaceku karebneh nateh nacing kareb amung ineh miak mangun. Iamo' karebneh malé macing, idi luk bida'Ku namu miak mangun. Ayuneh mio macing, iamo' do' nginulat neneh. Ieh miak mangun bang kareb luk litepKu, idi na miak mio ratnan ineh.

⁴Idi ini balaKu, 'Lemulun luk dat na miak mulun. Iamo' lemulun luk matu miak mulun ngaceku ideh lutep manu inan Allah.' “

⁵Lemulun luk mangun ku lun do' uen naluk ku binawehdeh. Lemulun luk manga medita' niat idi megagau idi na miak mebor mepad kudeng até. Ineh pundeh ngalap anid-anid bawang kuandeh.

⁶Pupu luk linaya' ineh miak situnga nelun luk ngelaya' nedeh. Kebaladeh, "Muyuh ngalap luk na muyuh kuan, iamo' muyuh miak kumin! Tuda' ioké muyuh amé' ku lun do' ngaceku muyuh megéi' naluk nelun luk inan baleh nemuyuh?"

⁷Bang segageh mo', muyuh pana' inan baleh nelun, idi uen ngesaad mayar bunga'neh. Bunu'-bunu' miak macing ngegegker nemuyuh. Ideh miak ngaro binaweh muyuh!

⁸Muyuh pangeh nengaro tuda'-tuda' pupu. Idi pupu luk neketecan miak ngaro nemuyuh, ngaceku muyuh pangeh nengaté lemulun idi nenganau' luk dat kuan amung-amung pupu bang tana' ini idi bawangdeh pana'.

⁹Muyuh miak kumin! Tetek ruma' muyuh inau' muyuh ku lun do' ku binaweh luk pino muyuh. Idi muyuh pian nganau' arar muyuh su luk medita', pad muyuh na mekaneh susa'.

¹⁰Muyuh pangeh nengigu' tetek ruma' muyuh ngaceku terawé muyuh luk medita' niat. Muyuh pangeh nengusag ulun muyuh sebuleng, ngaceku muyuh nengusag tuda'-tuda' pupu.

¹¹Batu ratnan libung luk meraben miak ngitang ngadu' nemuyuh, idi iang apo pana' melinguh.

¹²Muyuh miak kumin! Muyuh nemudut aceh bawang luun alen sala' idi até pana'.

¹³Amung-amung pupu luk linaya' muyuh merur ngakem nganau' luk na ulek, idi amung luk pinudutdeh meseb. Tuhan luk Melalud pangeh nenganau' ineh.

¹⁴Tana' ini miak mepanu' ku ileh ratnan ubur Allah, mepad kudeng abpa' rayeh luk nepanu' ku abpa'.

¹⁵Muyuh miak kumin! Mesusa' kuan lemulun luk nguit nelun danganneh ngirup, luk ngutang luk megalih pad ideh mabuk, pad ideh nganau' kekamen luk na tabpen.

¹⁶Nekini iko uen ngigu', idi na iko buren. Iko sebuleng luk mabuk idi nganau' luk na tabpen. Iko miak ngirup ratnan sangkir ukum Tuhan. Idi rayehmu misu' ku igu.

¹⁷Muyuh nebpeng amung pulung Lebanon, idi nekini muyuh miak uen nebpeng. Muyuh nengaté pung luk bang pulung ineh, idi nekini pung ineh ngatot nemuyuh. Ini mangun ngaceku muyuh nengaté mula' lemulun idi muyuh nengedereh lemulun bang tana' idi nengusag bawangdeh.

¹⁸Anunké ulek akang ineh? Ieh luk inau' lemulun mo', idi na ineh mada' luk matu kuan muyuh. Anunké do' luk ruenneh kuan lun luk mudut ineh, pad ieh merapet ku ineh. Ieh ineh aceh allah luk na miak pebala!

¹⁹Muyuh miak kumin. Muyuh pebala inan kayuh, "Kulat iko!" idi inan batu luk ungeng, "Tumui, iko!" Miakké akang ineh mada' luk anun-anun? Sagan tu pana' ieh kikep ku pirak idi amas, na luk idi ulun bang neneh.

²⁰Tuhan idi bang Ruma'Neh luk meligan. Do' amung lemulun bang tana' ini pirud pa kiungNeh.

Habakuk 3

¹Idi ini sembayang Nabi Habakuk.

²O Tuhan, ui pangeh neninger ratnan luk inau'Mu, idi ui mepanu' ku tot. Do' nganau' bang kareb ini kekamen luk rayeh luk inau'Mu mon. Do' Iko méi', sagan pana' Iko museh.

³Allah macing sekua' teh rat Edom, Tuhan luk meligan macing rat luun surud Paran. Langit mepanu' ku rayehNeh, idi tana' ini mepanu' ku uburNeh.

⁴Ieh macing mepad kudeng rasat aco idi ticu'Neh merasat teh, idi laludNeh pungenNeh su ineh.

⁵Allah ngecuk ét nalan pa atunNeh; idi até pana' duken maya' Neneh teh.

⁶Kareb Ieh ucu' tana' meruyuh kareb Ieh nier, amung pupu megegker. Pegkung luk meruked mekurar, idi surud luk meruked pana' neturan, ieh ineh surud su luk inanNeh nenalan bang kareb luk mon.

⁷Ui nekali' lun Kusan matot; idi lun Midian megegker.

⁸O Tuhan, inanké amung abpa' luk nganau' Namu museh? Inanké abpa' rayeh luk nenganau' Namu megateh niat? Iko nenalan maya' laput; laput luk mitem mangun ku kerétaMu kareb Iko nenguit pupuMu pad ideh metueh.

⁹Iko netemina' makai binorMu idi nenganau' ilebneh. KilepMu nemila' tana'.

¹⁰Kareb amung pegkung nier Namu ideh meruyuh, idi udan nebpeh rat déi' langit. Abpa' luk pa liang tana' meberi, idi paru'deh pelaba rayeh.

¹¹Kareb ilebMu mesilo, idi busuMu merasat, aco idi bulan nungeng.

¹²Dengan usehMu, Iko nenalan maya' uned tana', dengan gatehMu, Iko nengeradu' amung pupu.

¹³Iko nenalan pian ngulun pupuMu, idi ngulun raca' luk pinili'Mu. Iko nengelaya' lun rayeh lemulun luk dat, idi nengusag rorum luk nemaya' neneh.

¹⁴IlebMu nenebpek lun rayeh baweh, kareb baweh ineh iné' mepad kudeng baru, sikal matad nekai dengan medita' niat mepad kudeng lun luk ngedereh nelun luk masi' dengan lulem.

¹⁵Dengan kudaMu, Iko nengeradu' abpa' rayeh pad ributneh melapa'.

¹⁶Ui ini Habakuk ninger amung ini idi megegker; bibirku pana' megegker ku totku. Bururku melaya', idi kukudku metebaceng. Ui miak nginulat karebneh macing, kareb Allah miak ngukum lemulun luk munu' nekai.

¹⁷Sagan tu pana' gita' na kebua', idi bua' anggur pana' nateh luk idi. Idi teh saitun na kebua', idi lati' pana' na inan uli'; Sagan pana' amung dumba maté, idi laman sapi' na uang,

¹⁸idi Ui miak mawang niat, ngaceku Tuhan Allah ineh Lun Nengulun negku.

¹⁹Tuhan maré tueh negku. Ieh nganau' negku mawer mepad kudeng awer payo, idi nima' negku nalan su luk medita' idi su luk do' pana'.

Sepania

Sepania 1

¹Ini bala luk biré Tuhan ni Sepania, kareb Raca' Yosia anak Amon ngimet Yahuda. (Idi Sepania ineh inul Raca' Hesehia. Hesehia nenginul Amaria. Amaria nenginul Gedalia. Gedalia nenginul Kusi. Idi Kusi nenginul Sepania.)

²Kebala Tuhan, "Ui miak nala' amung-amung luk luun tana',

³ieh ineh amung-amung lemulun, pung, suit idi lawid pana'. Ui miak ngacing ebpeh amung-amung luk dat. Ui miak ngaté lemulun, pad seburur pana' nateh luk ketecan luun tana' ineh. Ui ini Tuhan pangeh nepebala.

⁴"Ui miak necat nelun Yahuda idi Yerusalim. Ui miak ngusag amung luk ketecan ratnan sembayang Baal su ineh, idi nala' ngadan idi terawé ratnan amung imam luk sembayang inan Baal, do' imam luk sembayang inan Baal mo', idi imamKu sebuleng pana'.

⁵Ui miak ngaté lemulun luk sembayang luun apo ruma' inan aco, bulan, idi gituen. Ui miak ngaté lemulun luk sembayang Negku idi pebulung pa kiungKu, idi luk pebulung dengan ngadan akang Milkom pana'.

⁶Ui miak ngaté lemulun luk teketed rat Negku idi na maya' Negku teh, ieh ineh lemulun luk na amé' Negku, idi luk na mutuh pedengan."

⁷Aco Tuhan ineh malé macing. Do' pirud pa kiungNeh. Tuhan temina' ngaté pupuNeh mepad kudeng aceh baré luk kereten.

⁸Kebala Tuhan, "Kareb aco ngeret baré ineh, Ui miak ngukum amung pengulu idi anak raca', idi amung lemulun luk maya' adat pupu baken.

⁹Ui miak ngukum amung lemulun luk sembayang mepad kudeng lun pupu baken, luk mano idi ngaté, idi luk manu' ruma' akangdeh ku binaweh luk pinodeh."

¹⁰Kebala Tuhan, "Bang aco sineh muyuh miak ninger arod lemulun luk munung Tanga' Lawid déi' Yerusalim. Muyuh miak ninger tido lemulun bang babpat bawang luk mebaruh, idi aceh uni luk rayeh luun surud.

¹¹Do' temido idi nangi' kareb muyuh ninger uni ini, O muyuh luk tudo bang babpat bawang luk pa beneh, ngaceku amung lun luk pepua' pangeh naté!

¹²"Kareb ineh Ui miak ngalap aceh lapung idi ngilu' Yerusalim do'-do'. Ui miak ngukum lemulun luk metalang niat, idi luk lutep maya' piandeh sebuleng, luk pebala bang niatdeh, 'Allah na nganau' anun-anun, luk do' idi luk dat pana'.'

¹³Binawehdeh miak tebanen, idi ruma'deh uen ngusag. Na ideh miak tudo bang ruma' luk pidutendeh, idi na ideh miak ngirup abpa' anggur ratna kabun luk uendeh nibu."

¹⁴Aco rayeh Tuhan malé macing! Bang aco sineh lun pebunu' luk meluun sangit pana' miak ngarod ku dat niatdeh.

¹⁵Ieh ineh aco useh, aco susa' idi dat niat, aco usag idi até, aco daceh idi meseraber, aco laput idi barui.

¹⁶Ieh ineh aco uni serupit bunu' idi arod lun pebunu' luk ngerieng bawang luk linibung idi pudut luk medita'.

¹⁷Kebala Tuhan, "Ui ngacing susa' luk pelaba rayeh kuan lemulun, pad ideh ngakap-ngakap mepad kudeng lun luk mebuser. Ideh pangeh nenganau' sala' pa kiungKu, idi nekini dara'deh uen ngutang mepad kudeng abpa' idi butungdeh miak melu luun tana'."

¹⁸Amung pirak idi amasdeh na miak ngulun nedeh, kareb aco luk inan Tuhan ngegala' usehNeh. Amung tana' miak uen ngusag ku apui usehNeh. Ieh miak ngaté amung-amung lemulun luk tudo bang tana'.

Sepania 2

¹O bawang luk na kali' migu', do' muyuh tumui,

²kareb nateh muyuh melayuh idi maté mepad kudeng busak bunga', pa kiung useh Tuhan luk macing nemuyuh, idi kareb nateh aco luk inanNeh ngegala' usehNeh macing.

³O amung muyuh lun luk mebeneh niat bang bawang ini, luk maya' ukumNeh, do' amé' inan Tuhan. Do' nganau' luk matu dengan mebeneh niat, pad muyuh mepuit lek kareb aco luk inan Tuhan ngegala' usehNeh.

⁴Seburur pana' nateh luk ketecan déi' bawang Gasa. Askelon miak tacin. Bang setangal aco mo' lun Asdod miak uen ngusu, idi lun Ekron miak tebanen.

⁵Muyuh lun Pilistin luk tudo tangeb abpa' rayeh na miak na kumin. Tuhan pangeh nemutut ukum kuan muyuh. Ieh miak ngaté nemuyuh pad seburur pana' nateh luk ketecan.

⁶Tana' muyuh luk tangeb abpa' rayeh miak mangun ku laman dumba.

⁷Lun Yahuda luk mulun miak tebawang luun tana' muyuh. Ideh miak nganau' laman kuan dumbadeh su ineh, idi ideh miak rudap bang ruma'-ruma' déi' Askelon. Tuhan Allahdeh miak ngedengan nedeh, pad ideh uen ngeperuan teh.

⁸Kebala Tuhan luk Melalud, "Ui pangeh neninger nelun Moab idi lun Amon ngedat idi situnga na pupuKu, idi pebala dengan medita' niat ratnan kudeng apéh ideh miak ngalap tana'deh.

⁹Ui ini Allah lun Israil luk mulun, pebulung ku ulunKu, kebulungKu, 'Moab idi Amon miak uen ngusag, mepad kudeng Sodom idi Gemora. Bawang ineh mangun ku su luk inan uduh luk dat, idi su luk inan lubang tucu' idi usag luk meruked. PupuKu luk mulun miak ngaro dueh bawang ineh idi ngalap tana'deh.' "

¹⁰Lun Moab idi lun Amon miak kumin kudeng ineh, ngaceku ideh pebala dengan medita' niat, idi nesitunga nan pupu Tuhan luk Melalud.

¹¹Tuhan miak ngatot nedeh. Ieh miak nala' amung kang tana' ini, pad na luk ketecan, idi anid-anid pupu miak sembayang Neneh bang bawangdeh sebuleng.

¹²O muyuh lun Sudan! Muyuh pana' pitayen Tuhan.

¹³Tuhan miak makai laludNeh pelé Asur uen ngusag, ieh ineh bawang luk pa tinueh busat aco. Ieh miak ngusag bawang Ninewé, pad ieh tacin idi mangun ku su luk ali-ali luk na abpa'.

¹⁴Dumba idi sapi' dengan pung luk baken-baken pana' miak telubid su ineh. Puek miak mulun arang usag bawang ineh idi muni-muni ratnan tabuk. Bungkak muni-muni ratnan munung tanga'. Kayuh tumuh miak lapen ratnan ruma' bawang ineh.

¹⁵Ini luk miak mangun kuan bawang luk medita' niat ngaceku ratnan laludneh, idi luk ngerawé na inan susa'. Lun bang bawang ineh ngerawé bawangdeh luk meluun rayeh bang tana' ini. Ieh miak mangun ku bawang luk tican su luk inan pung luk meliputi ngato erurdeh. Idé-idé luk lemaba su ineh miak matot idi situnga neneh.

Sepania 3

¹Na miak na Yerusalim kumin, ieh ineh bawang luk dat ineh luk sikal metueh idi luk ngedereh pupuneh sebuleng.

²Na ieh neninger bala Tuhan idi na ieh nengalap bada'Neh. Na ieh merapet inan Tuhan, idi na ieh nemutih pedengan rat Neneh.

³Amung lun rayeh mepad kudeng balang luk melau; lun luk mutut besara' mepad kudeng bungalé luk pelaba anga pad ideh na necan sebuleng tulang pana' macing pekak.

⁴Lun nabi na inan merapet. Ideh megéi' naluk. Idi lun imam ngelutak luk pangeh linigan. Ideh ngisu' Ukum Allah maya' piandeh sebuleng.

⁵Iamo' Tuhan idi bang bawang ineh. Ieh nganau' luk matu, idi na tu-tu nganau' luk tekilu'. Anid-anid pekak Ieh ngegala' siriNeh kuan pupuNeh ineh. Iamo' lemulun luk na matu megéi' nganau' luk dat, idi na ideh migu'.

⁶Kebala Tuhan, "Ui nengaté tuda'-tuda' pupu, idi nengusag bawangdeh, pad libung idi pudut luk medita' pana' inusag. Amung dalandeh dat ali idi seburur lemulun pana' nateh luk mulun su ineh.

⁷Pangeh ineh Ui nengerawé pupuKu ineh sikal matot Negku, idi ngalap bada'Ku. Ui nengerawé nedeh na mekelupan luk bida'Ku nedeh. Iamo' na mio teh ideh mepad dat kudeng luk atun."

⁸Idi kebala Tuhan, "Nganét Negku! Nganét aco luk inanKu tuped ngadu' amung pupu. Ui pian ngamung amung pupu idi imet, pelé ideh kali' tueh usehKu. Amung tana' miak uen ngusag ku apui usehKu.

⁹"Kareb ineh Ui miak ngisu' bala amung pupu mangun ku aceh bala luk meligan, pelé ideh nawar ngadan Tuhan idi maya' Neneh dengan sebuleng niat.

¹⁰Rat bawang Sudan luk mado pana', pupuKu luk pitad ineh miak nguit barédeh kuanKu.

¹¹O pupuKu, kareb ineh na muyuh migu' teh ngaceku muyuh pian metueh rat Negku atun. Ngaceku Ui miak nala' amung lemulun luk medita' niat, pelé muyuh na sikal metueh rat Negku teh, luun pegkungKu luk meligan déi' Yerusalim.

¹²Pupu luk tacinKu su ineh mebeneh niat. Idi ideh miak amé' Negku idi mutuh pedengan.

¹³Lun israil luk mulun kareb ineh na ngedat nelun baken, idi na mebalih, idi na naluk pana'. Ideh miak do' udeng, idi na luk katot."

¹⁴O lun Israil, do' muyuh menani idi ngitang mawang niat! O Yerusalim, do' iko mepanu' ku awang niat!

¹⁵Tuhan pangeh nengusu bunu'mu. Ieh nenala' amung lemulun luk sikal metueh rat namu. Tuhan, Raca' lun Israil idi denganmu. Nekini na luk inan matot.

¹⁶Karebneh miak macing idi ideh miak pebala kuan Yerusalim, "O bawang Sion, aleg matot! Aleg nima' ticu'mu melaya!"

¹⁷Tuhan Allahmu idi denganmu, laludNeh ngetueh namu. Tuhan miak mawang niat namu, dengan awaNeh Ieh maré ulun luk mebaruh namu. Ieh miak menani idi mawang niat namu,

¹⁸idi awang niatNeh mepad kudeng awang niat lemulun kareb irau. Kebala Tuhan, "Ui pangeh nengagka' bala ratnan ukummu, idi pangeh nenala' igu'mu.

¹⁹Karebneh malé macing! Ui miak ngukum lemulun luk ngedereh namu; Ui miak ngedo' lemulun luk mekio', idi nguit nelun luk tiban muli'. Ui miak ngisu' igu'deh mangun ku ubur, idi amung tana' ini miak ngubur nedeh.

²⁰Karebneh malé macing! Ui miak nguit pupu muyuh luk pitad muli', pad muyuh buren idi mebala aput tana', kareb Ui nuneb nemuyuh su siren muyuh." Tuhan pangeh nepebala.

Hagai

Hagai 1

- ¹Aceh aco bulan anem, bang lak luk kedueh kareb Raca' Darius ngimet Parsi, idi Tuhan nepebala dengan tang Nabi Hagai. Idi bala ini kuan Serubabel Saltiel, lun rayeh Yahuda, idi kuan Yosua Yosadak luk Imam Rayeh.
- ²Idi kebala Tuhan luk Melalud, "Lemulun ini pebala, ini baken kareb luk petulu mudut Ruma' Allah baruh."
- ³Idi Tuhan luk Melalud nemaré bala ini dengan tang Hagai:
- ⁴"O pupuKu, ngudehké muyuh tudo bang ruma' luk do', iamo' Ruma'Ku sebuleng nusag?"
- ⁵Siruh luk mangun kuan muyuh!
- ⁶Muyuh pangeh nenibu mula' padé, iamo' sesuut mo' luk piranih. Muyuh inan akan sen, iamo' na ieh miak kenen muyuh macing mebor. Muyuh inan abpa' anggur. Iamo' na muyuh miak mabuk ku ineh. Muyuh inan ayung, iamo' ineh na petap ku ayung muyuh. Idi tabpar lun luk ngakem na petap.
- ⁷Siruh luk mangun kuan muyuh!
- ⁸Do' muyuh amé' luun surud déi' idi ngalap kayuh. Mudut Ruma' Allah baruh, pad Ui mawang niat idi miak uen ngerayeh maya' dalam luk petulu.
- ⁹"Muyuh ngerawé muyuh miak ngalap mula' padé, iamo' sesuut mo' luk ilap muyuh. Idi kareb muyuh nenguit ineh muli', idi Ui nemalid neneh. Anun punneh Ui nenganau' ineh. Ngaceku Ruma'Ku nusag, idi anid-anid burur muyuh meké! ngakem kuan ruma' muyuh sebuleng.
- ¹⁰Ini punneh na mudan, idi na luk mulun.
- ¹¹Ui pangeh nengacing iru' kuan tana', ieh ineh luun surud, lati', kabun anggur, kabun saitun, idi anid-anid tibu luk mulun, kuan lemulun idi pung, idi amung-amung luk tibuen pana'."

¹²Idi Serubabel idi Yosua dengan amung lemulun luk nuli' ratnan bawang su luk inandeh tiban nemaya' luk bila Tuhan Allahdeh. Ideh matot, pad ideh nemaya' bala Nabi Hagai, lun duken Tuhan.

¹³Idi Hagai nemada' bala Tuhan nelun mula'. KebalaNeh, "Ui idi dengan muyuh --ini jani'Ku."

¹⁴Tuhan nengegio niat amung lemulun, pad ideh mudut Ruma' Allah: Serubabel luk lun rayeh Yahuda, Yosua luk Imam Rayeh, idi amung lemulun luk nuli' rat bawang su luk inandeh tiban. Ideh nengimun mudut Ruma' Allahdeh, Tuhan luk Melalud,

¹⁵dueh ngepulu' apat aco bulan anem bang lak luk kedueh kareb imet Raca' Darius.

Hagai 2

¹Dueh ngepulu' aceh aco bulan tudu' bang lak ineh, Tuhan nepebala dengan tang Nabi Hagai.

²Ieh nengecuk ni Hagai nepebala kuan Serubabel, lun rayeh Yahuda, idi kuan Yosua luk Imam Rayeh, idi teh kuan lemulun bang bawang ineh. KebalaNeh nedeh,

³"Idéké rat arang muyuh luk nekali' kudeng apeh do'neh Ruma' Allah ini atun? Kudeng apehké kido'neh nekini? Na ieh mangun ku anun-anun sirenmu nekini.

⁴Do' iko lutep nekini, O Serubabel, ngaceku Tuhan luk pebala. Idi do' iko mekuu', O Yosua Yosadak, luk Imam Rayeh. O lun muyuh luk bang bawang ini, do' muyuh mekuu'! Ngaceku Tuhan luk pebala. Do' muyuh ngakem! Ui idi dengan muyuh,

⁵maya' kudeng jani'Ku nemuyuh kareb muyuh neremuat rat bang bawang Masir. Idi RohKu tudo arang muyuh. Aleg muyuh matot.

⁶"Na mio teh Ui miak nguyu' langit, tana', idi abpa'.

⁷Ui miak ngegker amung pupu, idi binawehdeh miak iten amé' bang Ruma' Allah, pad ieh mepanu' ku binaweh luk meraga.

⁸Amung pirak idi amas luk bang tana' ini Ui kuan.

⁹Kali' rungen Ruma' Allah luk mebaruh meluun do' ratnan Ruma' luk mon ineh. Idi bang bawang ini Ui miak ngeperuan pupuKu pad ideh do' udeng." Tuhan luk Melalud pangeh nepebala.

¹⁰Dueh ngepulu' apat aco bulan iwa' bang lak luk kedueh kareb imet Raca' Darius, Tuhan luk Melalud nepebala ni Nabi Hagai sekua' teh.

¹¹KebalaNeh, "Ngitun amung imam ratnan ukum ini:

¹²Kudeng seburur lemulun nguit sesuut uang pung luk linigan ratnan aceh baré, linulun bang kayu'neh, idi kudeng kuyu' ineh mekaneh ku ruti, nuba', abpa' anggur, umau saitun, kian akan luk baken lek, miakké akan ineh mangun meligan?" Idi amung imam nengor bala Tuhan, kebaladeh, "Na miak."

¹³Idi Hagai nengitun imam-imam ineh, kebalaneh, "Kudeng seburur lemulun melutak ngaceku ieh pangeh nengakem butung, idi kudeng ieh ngakem sesuut ratnan akan ini, miakké akan ineh mangun melutak?" Idi imam ineh nengor balaneh, kebaladeh, "Miak."

¹⁴Idi kebala Hagai, "Tuhan pebala, 'Kudeng ineh teh pupu ini, idi amung-amung luk ruendeh, pad amung-amung luk baréndeh luun bubpun pana' melutak.' "

¹⁵Kebala Tuhan, "Ngerawé do'-do' ratnan luk pangeh nangun kuan muyuh. Kareb nateh muyuh nengimun mudut Ruma' Allah baruh,

¹⁶muyuh megéi' amé' lepo padé ngerawé ngalap dueh ngepulu' gatang, iamo' inan pulu' gatang mo'. Muyuh megéi' amé' ngook limeh ngepulu' gilin abpa' anggur rat bang rubi, iamo' inan dueh ngepulu' gilin mo'.

¹⁷Ui nemaré uled, luping, idi udan batu pad amung-amung luk tibuen muyuh melu. Iamo' na muyuh uren ku ineh.

¹⁸Ngerawé do'-do' ratnan luk miak mangun rat pad sini, ieh ineh dueh ngepulu' apat aco bulan iwa', ngaceku alen Ruma' Allah pangeh inau'.

¹⁹Na' luk idi padé ketecan. Anggur, gita', delima, idi saitun nateh nekebua'. Iamo' rat pad sini Ui pian ngeperuan nemuyuh.”

²⁰Bang aco sineh teh, ieh ineh dueh ngepulu' apat aco bulan, Tuhan nemaré bala luk kedueh kua' ni Hagai:

²¹"Mada' ni Serubabel, lun rayeh Yahuda ineh, kebalamu, 'Ui malé nguyu' langit idi tana'.

²²Ui malé ngusag tuda'-tuda' imet, pad ngagka' laluddeh. Ui miak ngelupat keréta-keréta dengan lun luk ngimet ineh. Amung kuda miak maté, idi lun luk maya' kuda pana' miak pepaté.

²³Bang aco sineh, Ui miak ngalap namu, O Serubabel demulunKu. Idi Ui miak nganau' namu mangun ku raca' pa luun pupuKu. Iko sebuleng luk pinili'Ku.' " Tuhan luk Melalud pangeh nepebala.

Sekaria

Sekaria 1

- ¹Tuhan nemaré bala ini kuan Nabi Sekaria luk anak Berekia Ido bang bulan ualuh, lak luk kedueh kareb imet Darius raca' Parsi.
- ²Tuhan luk Melalud nengecuk ni Sekaria pebala kuan pupuneh, "Ui ini Tuhan pelaba useh inan tepun muyuh.
- ³Iamo' nekini UI pebala nemuyuh, 'Do' lumi Negku, idi Ui miak lumi nemuyuh.
- ⁴Aleg muyuh mepad kudeng tepun muyuh. Nabi-nabi luk mulun bang kareb luk mon nemaré balaKu nedeh, idi nemebpeng nedeh na nganau' luk dat. Iamo' na ideh pian ninger balaKu.
- ⁵Iapehké tepun muyuh nekini? Mulun teh ideh luk nabi ineh?
- ⁶Iamo' bada' idi ukum luk biréKu dengan tang demulunKu lun nabi pangeh nangun kuan tepun muyuh. Mio-mio ideh nuren idi nengamo Negku, Tuhan luk Melalud, pangeh nengukum nedeh maya' kekamendeh, maya' kudeng luk pangeh tirawéKu.' “
- ⁷Bang lak luk kedueh kareb imet Darius, ieh ineh dueh ngepulu' apat aco bulan pulu' aceh (luk titen bulan Sibat), Tuhan nemaré aceh bala bang luk sinierku kareb medacem.
- ⁸Ui nenier aceh melaikat Tuhan luk maya' kuda luk mesia'. Ieh pangeh nucu' liang kayuh hadas luun raked, idi pa puetneh inan kuda baken—mesia', mebuda' idi meburit.
- ⁹Idi ui nengitun neneh, kebalaku, "Anunké ilung kuda ini?" Idi kebalaneh, "Ui miak mada' ilungneh namu.
- ¹⁰Tuhan luk nengecuk nelun luk maya' kuda ini amé' nier bang tana' ini.”
- ¹¹Idi kebala lun luk maya' kuda ineh kuan melaikat, "Kai pangeh nenalan aput-put tana' ini, idi lun luk bang tana' ini melaya' idi na pebunu'.”

¹²Idi kebala melaikat ineh, "O Tuhan luk Melalud, Iko museh inan Yerusolim idi bawang-bawang Yahuda kinio tudu' ngepulu' lak. Tuda' ioké idi Iko mada' éi'Mu nedeh?"

¹³Idi Tuhan nengor bala melaikat ineh dengan bala luk do',

¹⁴Idi melaikat ineh nengecuk negku mada' luk bila Tuhan luk Melalud ineh, kebalaNeh, "Ui mawa tu-tu idi méi' kuan Yerusolim, bawangKu luk meligan ineh. Idi Ui museh inan pupu baken luk mulun dengan na susa'.

¹⁵Kareb Ui nengimet usehKu inan pupuKu, pupu baken ineh luk nengacing susa' luk meluun rayeh kuan pupuKu.

¹⁶Idi nekini Ui amé' Yerusolim, pad Ui mada' éi'Ku kuan bawang ineh Ruma'Ku miak piduten baruh, idi bawang ineh pana'."

¹⁷Idi melaikat ineh nengecuk negku mada', kebalaneh, "Tuhan luk Melalud nepejani' idi bawang-bawangNeh ini miak uen ngeperuan, idi Ieh miak ngubuk Yerusolim sekua' teh, pad ieh mangun ku bawangNeh luk pinili'."

¹⁸Bang aceh luk sinier, idi ui nekali' apat unga pung.

¹⁹Idi ui nemutuh melaikat ineh mada' ilungneh. Idi kebalaneh, "Teh ineh apat imet bang tana' ini luk pangeh nematad nelun Yahuda, lun Israil, idi lun Yerusolim."

²⁰Idi Tuhan nemada' apat burur lemulun luk ngimet tuno sirenku.

²¹Idi ui nengitun, "Anunké luk ruen lemulun ini?" Kebalaneh, "Ideh amé' ngatot idi ngusag imet luk pangeh nengebeneh tana' Yahuda idi luk pangeh nematad pupu ini."

Sekaria 2

¹Bang aceh luk sinier teh, idi ui nekali' seburur lemulun luk ngimet aceh luk pinari.

²Kebalaku, "Amé' iapeh iko?" Idi kebalaneh, "Ui pian nari Yerusolim pad ui kali kikadangneh idi kirayehneh."

- ³Idi ui nenier melaikat ineh nukang, idi seburur melaikat luk baken iné' papu' neneh.
- ⁴Idi kebala melaikat luk pun-pun ineh inan melaikat luk baken, "Do' upun amé' mada' anak adi' luk ngimet luk pinari ineh, kebalamu, 'Aleg nganau' alad bawang Yerusalim, ngaceku mula' lemulun idi sapi' pana' miak macing bang bawang neh.
- ⁵Tuhan pangeh nepejani', idi Ieh sebuleng miak mangun ku alad apui libut-libut bawang ineh, pad Ieh ngelibung neneh, idi tudo su ineh dengan amung uburNeh.' “
- ⁶⁻⁷Idi kebala Tuhan kuan pupuNeh, "Ui nematad nemuyuh amé' iapeh-iapeh. Iamo' nekini, do' muyuh lun luk tiban buro rat bawang Babil idi muli' amé' Yerusalim.
- ⁸Idé-idé luk necat nemuyuh, ieh ineh luk necat luk meluun raga kuanKu." Idi Tuhan luk Melalud nengecuk negku nated bala ini kuan pupu baken luk nengaro bawang pupuNeh, kebalaNeh.
- ⁹"Tuhan sebuleng luk ngua' nemuyuh, idi lemulun luk mangun ku demulun muyuh atun miak ngaro bawang muyuh." Kareb ini mangun megala' ratnan Tuhan luk Melalud luk nengecuk negku.
- ¹⁰Kebala Tuhan, "O lun Yerusalim do' menani mawang niat. Ngaceku Ui amé' tudo arang muyuh!"
- ¹¹Idi bang kareb ineh mula' pupu miak amé' inan Tuhan idi mangun ku pupuNeh. Ieh miak tudo arang muyuh, idi muyuh miak kali' Tuhan luk nengecuk negku amé' nemuyuh.
- ¹²Sekua' teh Yahuda miak mangun ku babpat Tuhan luk inanNeh mawa bang bawang luk meligan, idi Yerusalim miak mangun ku bawang luk inanNeh meluun awa.
- ¹³Pirud muyuh pa kiung Tuhan. Ieh macing netau ratnan su luk inanNeh mudeng luk meligan.

Sekaria 3

¹Bang aceh luk sinier teh Tuhan nemada' Yosua, Imam Rayeh, sirenku Ieh netuped pa kiung melaikat Tuhan. Idi Sétan netuped iring Yosua pian ngadu' neneh.

²Idi kebala melaikat Tuhan kuan Sétan ineh, "Do' Tuhan ngukum namu O Sétan. Do' Tuhan luk mawa inan Yerusalim ngukum namu. Lemulun ini mepad kudeng aceh kayuh luk ilap rat bang apui."

³Idi Yosua netuped su ineh. Idi ieh ngayung ku kuyu' luk melutak.

⁴Idi kebala melaikat kuandeh luk ngedengan neneh déi' Surga, "Ngelengu kuyu' lemulun ini luk melutak." Idi kebalaneh ni Yosua, "Ui pangeh nenala' sala'mu, idi miak maré kuyu' luk mebaruh namu."

⁵Idi ieh nengecuk nedeh luk ngedengan neneh nganau' aceh sigar luk meligan luun uluh Yosua. Idi ideh nenganau' luk icuk ineh idi nengayung neneh kareb melaikat Tuhan tuped su ineh.

⁶Idi keala melaikat ni Yosua,

⁷"Tuhan luk Melalud pangeh nepebala, Kudeng iko maya' ukumKu idi nganau' kekamen luk biréKu namu, idi iko miak ngimet bang ruma'Ku idi natad ruma'Ku pana'. Idi Ui miak ninger sembayangMu, mepad kudeng Ui ninger sembayang amung melaikat luk pa kiungKu.

⁸O Yosua, Imam Rayeh, do' iko ninger idi lun rorum luk tudo pa atunmu pana'. Muyuh ineh aceh tanu' ratnan luk do' luk miak mangun mucu. Ui miak maré demulunKu, luk titen Angat!

⁹Ui naped pa kiung Yosua aceh batu luk inan tudu' mateh! Idi Ui miak ngarit aceh arit luunneh, idi bang aceh aco mo' Ui miak nala' amung sala' tana' ini.

¹⁰Bang aco sineh, anid burur muyuh miak nawar nelun denganneh amé' tudo dengan mawang niat bang kabun anggur idi gita' muyuh."

Sekaria 4

¹Melaikat luk pangeh nepebala negku iné' negku sekua' teh, idi nengalat negku, ayu-ayuneh ui rudap.

²Idi ieh nengitun negku, kebalaneh, "Anunké luk sirenmu?" Idi kebalaku, "Aceh kukud dawan luk ratnan amas. Idi pa luun inan aceh bigan luk inan umau, idi tudu' lapung.

³Idi anid-anid lapung ineh inan tudu' su luk inan iring kukud dawan ineh."

⁴Idi ui nemutuh melaikat ineh mada' ilungneh.

⁵Idi kebalaneh, "Naké iko kali'?" Idi ui nengor balaneh, "Na!"

⁶Melaikat ineh nengecuk negku maré ni Serubabel bala ini luk ratnan Tuhan: "Baken ratnan lalud baweh, idi baken ratnan tuehmu sebuleng, iamo' ratnan RohKu, ieh ineh miak mangun.

⁷Idéké iko, O pegkung luk rayeh? Do' iko mangun ku raked pa kiung Serubabel. Iko miak mudut Ruma' Allah baruh idi kareb iko ngerareng batuneh luk kekiped, lun mula' miak ngitang, 'Do' Allah luk mekatu ngeperuan ruma' ini!' "

⁸Inan teh aceh bala Tuhan negku.

⁹KebalaNeh, "Serubabel nengimun mudut Ruma' Allah, idi ieh miak mangedh neneh. Idi kareb amung ini mangun, pupuKu miak kali' idi Ui luk nengecuk namu amé' nedeh.

¹⁰Ideh mesusa' niat ngaceku sesuut mo' luk inau'deh. Iamo' ideh miak mawang niat kareb ideh nier ni Serubabel luk nguit nedeh mudut Ruma' Allah ineh." Kebala melaikat negku, "Tudu' lapung ineh, ieh ineh tudu' mateh Tuhan luk nier aput-aput tana'."

¹¹Idi kebalaku neneh, "Anunké ilung dueh kayuh saitun luk pekop iring kukud dawan ineh?

¹²Idi anunké ilung dueh angkat saitun luk iring dueh turuk luk ratnan amas luk mangun ku dalan umau saitun?"

¹³Idi kebalaneh negku, "Na kali'mu?" Kebalaku, "Na!"

¹⁴Idi kebala melaikat ineh, "Teh ineh dueh burur lemulun luk pinili' idi inumau Allah luk tuped pa kiung Tuhan luk ngimet aput tana'."

Sekaria 5

¹Idi teh ui nenier aceh surat luk temulud.

²Idi melaikat ineh nengitun negku ratnan luk sinierku. Idi kebalaku neneh, "Ui nier aceh surat luk temulud, luk kikadang limeh depeh, idi pipangneh dueh depeh setangal."

³Idi kebalaneh negku, "Bang surat ini pangeh inayud ratnan kediman luk miak remuat aput-apat tana'. Baladneh selipa ngegala' ratnan amung lun luk mano miak talan ratnan tana' ini. Idi baladneh selipa teh ngegala' ratnan amung-amung lemulun luk mebalih kareb pebulung miak talan teh.

⁴Tuhan luk Melalud pebala idi Ieh miak ngeruat kediman ineh, luk miak semuet bang ruma' anid-anid burur lun luk mano idi ruma' lemulun luk mebalih kareb pebulung. Idi kediman ineh miak tudo' bang ruma'deh pad kayuh idi batu ruma'-ruma' ineh uen ngusag."

⁵Idi melaikat ineh nesilangan sekua' teh, kebalaneh, "Nier luk miak macing nekini!"

⁶"Anun ineh?" kebalaku. Idi kebalaneh, "Teh ineh aceh buan, idi ieh mangun ku pinginud sala' luk aput tana' ini!"

⁷Idi kakeb buan ineh inau' ratnan semara'. Kareb ui nenier, kakeb luk inau' ratnan semara' ineh inukab, idi bang ineh inan seburur decur!

⁸Idi kebala amelaikat ineh, "Decur ini, ieh ineh pinginud sala'!" Idi ieh nengeranek neneh bang buan ineh teh idi nengakeb neneh.

⁹Idi ui netengook idi nekali' dueh burur decur luk inan ilad mepad kudeng suit rot luk temulud amé' matun negku. Idi teh ideh nenguit buan ineh amé' déi' dita'.

¹⁰Idi kebalaku kuan melaikat ineh, "Iten didueh amé' iapeh buan ineh?"

¹¹Idi kebalaneh, "Ideh pian mudut aceh ruma' sembayang kuanneh déi' Babil. Kareb ieh pangeh pinudut, buan ineh miak uen ngerareng bang ruma' ineh pad ieh inan sembayang."

Sekaria 6

¹Idi inan teh luk sinierku. Ui nenier apat keréta luk remuat rat arang dueh pegkung tekaling.

²Keréta luk pun-pun ineh rinuid kuda luk mesia', luk kedueh rinuid kuda luk mitem,

³luk keteluh rinuid kuda luk mebuda', idi luk keapat rinuid kuda luk mabuh.

⁴Idi ui nemutuh melaikat ineh mada' ilung ratnan keréta ineh?

⁵Idi kebalaneh, "Ieh ineh apat bui, luk pangeh nacing rat pa kiung Tuhan amung tana' ini."

⁶Keréta luk rinuid kuda luk mitem ineh amé' Babil luk pa tinueh busat aco. Kuda luk mebuda' amé' pa acep aco, idi kuda luk mabuh amé' inan bawang luk pa kabing busat aco.

⁷Kareb kuda luk mabuh neremuat, ideh pian miket nalan amé' nier tana' ini. Idi kebala melaikat nedeh, "Amé' nier tana' ini." Idi ideh nenalan.

⁸Idi melaikat nengitang negku, "Kuda-kuda luk iné' Babil luk pa tinueh busat aco ineh pangeh nengagka' useh Allah."

⁹Idi bala ini biré Tuhan negku.

¹⁰KebalaNeh, "Ngalap amung baré luk biré Heldai, Tobia, idi Yedaya, lun luk tiban ineh. Idi bang aco sineh teh do' amé' ruma' Yosia Sepania. Amung lemulun ineh pangeh nuli' rat Babil, bawang luk inandeh tiban ineh.

¹¹Do' ngalap pirak idi amas luk pangeh birédéh, idi nganau' aceh pata, idi nganau' neneh luun uluh Yosua Yosadak, Imam Rayeh ineh.

¹²Mada' neneh ratnan luk bila Tuhan luk Melalud, kebalaneh, Lemulun luk titen Angat miak temubu' su luk inanNeh, idi mudut Ruma' Tuhan baruh.

¹³Ieh miak mudut neneh, id miak buren mepad kudeng Raca', idi Ieh miak ngimet pupuNeh. Idi aceh Imam miak tuped iring kerusi Raca' ineh, idi Didueh pad-pad ngakem dengan do.'

¹⁴Idi pata ineh miak mangun ku aceh terawé bang Ruma' Tuhan ratnan Heldai, Tobia, Yedaya, idi Yosia.”

¹⁵Lemulun luk tudo mado miak macing ngedengan nedeh luk mudut Ruma' Tuhan baruh. Kareb ruma' ineh pangeh pinudut, muyuh miak kali' idi Tuhan luk Melalud nengecuk negku amé' nemuyuh! Amung ini miak mangun kudeng muyuh maya' amung-amung ukum Tuhan Allah muyuh.

Sekaria 7

¹Tuhan namaré aceh bala ni Sekaria bang lak luk keapat kareb imet Raca' Darius. Idi bala ineh nacing apat aco bulan iwa', ieh ineh Bulan Kisleb.

²Lun Baitel pangeh nengecuk ni Sareser idi Regemelek dengan lun dukendeh amé' Ruma' Tuhan luk Melalud, pad ideh miak sembayang mutuh peruan Tuhan.

³Idi ideh nengitun imam-imam idi nabi-nabi, kebaladeh, "Petuluké kai temido ngaceku usag Ruma' Allah, idi mawa' na kuman bang bulan limeh, mepad kudeng luk inau' kai bang tuda'-tuda' lak kinioneh?"

⁴Idi bala Tuhan nacing negku.

⁵KebalaNeh, "Mada' nelun luk bang bawang ini dengan imam-imam, ieh ineh kareb ideh mawa' na kuman idi temido bang bulan limeh idi bulan tudu', kinio tudu' ngepulu' lak, idi na ideh nengubur Negku.

⁶Idi kareb ideh nekuman idi nengirup, ideh nengerawé bururdeh sebuleng.”

⁷Ini mepad kudeng luk bila Tuhan dengan tang nabi-nabi luk atun, kareb Yerusalim mepanu' ku lemulun dengan na susa', idiinan teh lemulun luk tudo bang bawang luk isuut luk libut-libut bawang rayeh, ieh ineh luk pa kabing busat aco, idi luun surud luk pa acep aco.

⁸Tuhan nemaré bala ini ni Sekaria:

⁹"Ui pangeh nengecuk nemuyuh mutut ukum luk matu. 'Do' muyuh méi' seburur inan seburur.

¹⁰Aleg ngedereh tinula', anak maté, sakai luk tudo arang muyuh, idi lun luk masi' pana'. Idi aleg muyuh ngerawé dalam luk inan muyuh ngedereh nelun baken.'

¹¹"Iamo' pupuKu ara' ninger balaKu. Idi ideh neteketed ratnan amung ukumKu ineh.

¹²Idi niatdeh metueh mepad kudeng batu, idi na ideh pian ninger bada' luk biréKu nelun nabi, luk mulun bang kareb luk mon, pad Ui pelaba useh.

¹³Ngaceku ideh na neninger kareb Ui nepebala, idi Ui na pian ngua' sembayangdeh.

¹⁴Mepad kudeng barui. Ui nemalid nedeh, pad ideh tudo bang bawang pupu baken. Ideh nenganau' bawang pupu baken. Ideh nenganau' bawang ini luk do' dat ali', pad seburur pana' nateh luk tudo su ini."

Sekaria 8

¹Tuhan luk Meluun Melalud nemaré bala ini ni Sekaria.

²KebalaNeh, "Ui geregan nengan Yerusalim ngaceku awaKu luk pelaba rayeh inan pupuneh. Idi awa ineh nenganau' Negku megateh inan bunu'neh.

³Ui miak lemubed amé' Yerualim, bawangKu luk meligan, idi tudo su ineh. Yerusalim miak tetanen bawang luk matu, idi pegkung Tuhan luk Melalud miak tetanen pegkung luk meligan.

⁴Sekua' teh deléi idi decur luk mengered idi luk nalan makai rukud, miak tudo iring dalam idi luun natad Yerusalim.

⁵Idi pelaba ula' anak deléi idi decur miak marot luun dalam ineh.

⁶"Pupu luk ketecan nekini ngerawé amung ini na miak mangun. Iamo' Ui kali' amung ini mangun.

⁷Ui miak ngulun pupuKu luk rat bawang luk pa busat aco idi pa acep aco,

⁸Idi nguit nedeh muli' amé' Yerusalim. Ideh mangun ku pupuKu, idi Ui mangun ku Allahdeh, luk ngimet nedeh dengan lutep maya' jani' idi luk matu.

⁹"Do' muyuh mekuu'! Nekini muyuh ninger bala nabi-nabi luk bila kareb ideh nengimun mudut Ruma'Ku baruh.

¹⁰Atun ratnan ineh seburur pana' nateh luk miak nabpar lemulun idi pung, idi amung lemulun matot mepai ngaceku mula' bunu'. Idi Ui nemaré nedeh pekedaluh arangdeh sebuleng.

¹¹Iamo' nekini na Ui ngedereh pupuKu luk ketecan kudeng ini.

¹²Ideh miak nibu dengan na susa'. Anggurdeh miak ngeruat bua', tana' miak ngeruat padé idi petap udan. Ui miak maré amung peruan ini kuan pupuKu luk ketecan.

¹³O lun Yahuda idi lun Israil! Atun, lun pupu baken nengediman nelun, kebaladeh, 'Do' amung susa' macing nemuyuh, mepad kudeng luk pangeh nacing kuan Yahuda idi Israil!' Iamo' Ui miak ngulun nemuyuh, pad lun pupu baken miak pebala, 'Do' muyuh uen ngeperuan mepad kudeng Yahuda idi Israil!' Do' muyuh mekuu' idi aleg matot."

¹⁴Kebala Tuhan luk Melalud, "Kareb tepun muyuh nenganau' Negku museh, Ui pian ngacing luk dat kuandeh, idi na terawéKu nisu'.

¹⁵Iamo' nekini Ui pian ngeperuan nelun Yerusalim idi Yahuda. Aleg muyuh matot.

¹⁶Ini luk petulu ruen muyuh: Do' pebala luk matu seburur kuan seburur. Idi bang besara' muyuh, do' mutut ukum luk matu luk nguit pedo'.

¹⁷Idi aleg muyuh ngerawé dalan luk inan muyuh ngedereh nelun baken. Aleg muyuh mebalih kareb pebulung. Ui megateh inan balih, idi ukum luk na mesiri, idi kekamen luk dat."

¹⁸Tuhan luk Melalud nemaré bala ini ni Sekaria.

¹⁹KebalaNeh, "Aco luk inan mawa' na kuman bang bulan apat, limeh, tudu', idi bulan pulu' miak mangun ku aco rayeh luk inan mawang niat idi do' ria' kuan lun Yahuda. Iamo' do' muyuh mawa inan luk matu idi pedo'."

²⁰Idi kebala Tuhan luk Melalud, "Karebneh miak macing, idi lemulun ratnan imet luk rayeh idi bawang luk rayeh miak amé' Yerusalim.

²¹Idi lemulun ratnan aceh bawang miak pebala nan lemulun ratnan bawang luk baken, 'Kai amé' sembayang inan Tuhan luk Melalud, pad kai miak mutuh aceh peruan rat Neneh. Do' maya' nekai!'

²²Pupu luk rayeh idi melalud miak amé' Yerusalim, pad sembayang inan Tuhan luk Melalud idi mutuh aceh peruan rat Neneh.

²³Kareb ineh, pulu' burur lun pupu baken miak amé' papu' seburur lun Yahudi idi pebala, 'Kai pian maya' namu, ngaceku kai pangeh neninger bala ratnan Allah idi dengan muyuh.' "

Sekaria 9

¹Ini bala Tuhan: Ieh pangeh nemutut ukum kuan tana' Hadrak idi bawang Damsik. Baken amung pupu Israil mo', iamo' bawang rayeh déi' Siria pana' Tuhan kuan.

²Hamat luk iring Hadrak, Tuhan kuan. Kudeng ineh teh bawang Sur idi Sidon, dengan maung ilehdeh.

³Sur pangeh nemudut libung luk meraben libut bawangneh, idi pangeh nengamung pirak idi amas mepad kinula' bada!

⁴Iamo' Tuhan miak ngalap amung-amung binawehneh. Ieh miak nala' binawehneh ineh bang abpa' rayeh, idi bawang ineh pana' miak sabpen pad na luk ketecan su ineh.

⁵Idi bawang Askelon miak nier amung ineh, pad ieh matot. Bawang Gasa pana' miak kali' dereh. Kudeng ineh teh Ekron—luk inanneh merapet na miak mangun. Raca' Gasa miak pitayen, idi bawang Askelon miak tacin.

⁶Puar-puar pupu miak tudo déi' Asdod. Idi kebala Tuhan, "Ui miak ngebeneh amung lun Pilistin luk medita' niat ini.

⁷Ideh na miak kuman uang dengan dara', idi akan baken luk bibpeng. Amung-amung lemulun luk ketecan miak mangun ku aceh babpat pupuKu, mepad kudeng aceh inul ratnan pupu Yahuda. Ekron pana' miak mangun ku aceh babpat pupuKu, mepad kudeng lun Yebusi.

⁸Ui miak matar tana'Ku idi mebpeng baweh pad ideh na miak lemaba ineh. Ui miak mebpeng amung raca' luk rayeh, pad ideh na miak ngedereh pupuKu sekua' teh. Ui pangeh nekali' dereh pupuKu ineh."

⁹O lun Sion, do' muyuh mawang niat! O lun Yerusalim, do' ngitang mawang niat! Siruh, raca' muyuh amé' nemuyuh! Ieh luk meluun tueh, iamo' mebeneh niat, idi nalan maya' anak keladai.

¹⁰Kebala Tuhan, "Ui miak ngusag keréta bunu' lun Israil idi ngusu amung kuda rat Yerusalim; idi busu luk pikai bang bunu' miak uen mutul. Raca' muyuh miak nguit amung pupu pedo'. Ieh miak ngimet rat abpa' rayeh selipa macing selipa, idi rat abpa' Pirat macing iring tana'."

¹¹Kebala Tuhan, "Ngaceku jani'Ku namu, luk itu ku dara' baré, Ui miak muit pupumu luk tiban ineh rat bang lubang luk na abpa'.

¹²Lemubed, O muyuh lun luk tiban luk inan rapet; amé inan bawang muyuh luk na susa'. Ui mada' nemuyuh nekini, Ui miak ngua' kuan muyuh dueh kua'. Peruan miak ngelibal dereh muyuh.

¹³Ui miak makai Yahuda mepad kudeng binor lun pebunu', idi Israil mepad kudeng ilebneh. Ui miak makai nelun Sion mepad kudeng pelapet, pad ideh munu' nelun Grika."

¹⁴Tuhan miak silagan pa luun pupuNeh; Ieh mak ngelatik ilebNeh, mepad kudeng kilep. Tuhan Allah miak ngiup serupit; Ieh miak nalan maya' barui rat pa kabing busat aco.

¹⁵Tuhan luk Melalud miak matar pupuNeh, pad ideh miak ngaté bunu'deh. Bang bunu' ideh miak ngitang mepad kudeng lun mabuk; ideh miak ngeruat

dara' bunu'deh, pad dara' ineh manud mepad kudeng dara' baré, luk inutang luun bubpun rat bang bigan.

¹⁶Idi kareb aco sineh Tuhan miak ngulun pupuNeh, mepad kudeng lun luk matar dumba muit sengeriudan dumbaneh ratnan bunu'. Ideh merasat bang bawangNeh mepad kudeng batu luk mesilo luun pata.

¹⁷Pelaba do' bawang ineh! Anak adi' miak temubu' ngaceku padé idi abpa' anggurneh.

Sekaria 10

¹Mutuh Tuhan maré udan bang kareb luk petulu. Tuhan luk maré laput mitem luk nguit udan, pad amung-amung lati' lun mebata'.

²Lemulun ngitun akang, iamo' ideh ngalap or luk mebalih idi mebacé. Lun luk ngelio nupi mebalih: idi ubukdeh na ulek. Idi lun mula' lawé-lawé mepad kudeng dumba luk neraruh. Ideh mesusa' ngaceku na lun luk nguyut nedeh.

³Kebala Tuhan, "Ui museh nelun luk ngimet pupuKu, idi Ui pian ngukum nedeh. Pupu Yahuda Ui kuan, idi Ui ini Tuhan luk Melalud miak matar nedeh. Ideh miak mangun ku kuda bunu'Ku luk melalud.

⁴Amung lun luk ngedereh, ieh ineh lun luk ngimet, lun luk nguyut, idi lun rayeh baweh, perigéi' buro rat bawang Yahuda.

⁵Lun Yahuda miak metueh mepad kudeng lun pebunu' luk ngeradu' bunu'deh luun dalan luk meburi. Ideh miak pebunu' ngaceku Tuhan idi dengandeh. Idi ideh miak ngelaya' bunu' luk maya' kuda pana'.

⁶"Ui miak ngetueh pupu lun Yahuda; Ui miak ngulun nelun pupu Israil. Ui miak méi' nedeh idi nguit amung-amungdeh muli'. Ayu-ayuneh Ui na tu-tu nenala' nedeh. Ui ini Tuhan Allahdeh luk miak ngua' sembayangdeh.

⁷Kareb ineh lun Israil mepad kudeng lun pebunu' luk mawang niat ku abpa' anggur. Inuldeh miak ngerawé tuehdeh dengan mawang niat ngaceku luk inau' Tuhan.

⁸Ui miak nawar pupuKu idi ngamung nedeh, Ui miak ngulun nedeh, pad ideh amé' mula', mepad kudeng luk atun.

⁹Sagan pana' Ui matad nedeh arang pupu baken, ideh miak ngerawé Negku bang bawang luk mado. Ideh miak mulun idi muli' dengan anakdeh pana'.

¹⁰Ui miak nguit nedeh muli' rat Masir idi Asur, idi ngeletep nedeh bang bawangdeh sebuleng. Ideh miak tudo déi' Giliad idi Lebanon pana', pad aput tana' ineh mepanu' ku lemulun.

¹¹Kareb ideh manud bang abpa' susa'deh, Ui ini Tuhan miak necat amung ribut, idi ribaruh Abpa' Nil miak mekeket. Asur miak uen ngebeneh, idi lalud Masir miak metutu'.

¹²Ui miak ngetueh pupuKu, pad ideh sembayang Negku idi maya' balaKu." Tuhan pangeh nepebala.

Sekaria 11

¹O Lebanon, ngukab amung tanga'mu, pad apui miak ngeseb amung kayuh tumuhmu!

²O kayuh tongor, do' nangi' idi temido, ngaceku kayuh tumuh pangeh neluka': kayuh luk pelaba do' ineh pangeh neseb! O kayuh luk meraben déi' Basan, do nangi' idi temido, ngaceku pulung kara pangeh tibpeng!

³Lun luk ngimet ngitang ku dat niatdeh; ngaceku uburdeh pangeh netutu'! Ninger amung balang luk ngeku; pulungdeh luk tangeb Abpa' Yarden pangeh neseb!

⁴Kebala Tuhan Allahku negku, "Do' mangun ku lun luk matar sengeriudan dumba luk malé pitayen.

⁵Lun luk kuan nedeh ngaté nedeh idi nateh inukum. Ideh masui uangdeh idi ideh pebala, 'Ngubur Tuhan! Kai mangun ku lun do'.' Lun luk matar nedeh na méi' nedeh."

⁶Idi kebala Tuhan, "Nekini Ui na méi' nedeh luk tudo bang bawang ini. Ui sebuleng miak maré anid-anid lemulun bang palad lun luk ngimet neneh idi

raca'neh. Lun luk ngimet ineh miak ngusag bawang ini, idi Ui na pian muit neneh ratnan laluddeh.")

⁷Lemulun luk pebelih dumba ineh nenabpar negku, idi ui mangun ku lun luk matar dumba luk malé pitayen. Idi ui nengalap dueh rukud. Sebuleng titenku "Ei", idi sebuleng titenku "Rurum." Idi ui nematar dumba ineh.

⁸Ui museh inan teluh burur lun luk matar dumba luk megateh negku, idi nengagka' nediteluh bang aceh bulan.

⁹Idi kebalaku kuan sengeriudan ineh, "Na ui mangun ku lun luk matar nemuyuh peh. Luk pian maté, do' ideh maté. Luk miak pitayen, do' ideh pitayeh. Idi luk ketecan miak pepadé."

¹⁰Idi ui nengalap kayuh luk titen "Ei" ineh idi nemutul neneh pad ngagka' jani' luk inau' Tuhan dengan amung pupu.

¹¹Idi jani' ineh igka' bang aco sineh. Ideh luk pebelih dumba nenginita negku, idi ideh nekali' Tuhan nepebala nedeh bang luk inau'ku ineh.

¹²Idi kebalaku nedeh, "Kudeng petulu kuan muyuh, do' maré tabparku negku. Kudeng na, aleg maré." Idi ideh nemaré negku teluh ngepulu' balad pirak ku tabparku.

¹³Idi kebala Tuhan negku, "Do' nganug ineh bang su luk inan nganug binaweh Ruma' Allah, ieh ineh raga luk nepimelih negku." Idi ui nengalap teluh ngepulu' balad pirak ineh, idi nenganug ineh bang su luk inan nganug binaweh Ruma' Allah.

¹⁴Idi ui nemutul rukud luk kedueh luk titen "Rurum." Idi rurum Yahuda idi Israil inusag.

¹⁵Idi kebala Tuhan negku, "Do' iko mangun ku lun luk matar dumba sekua' teh, iamo' sekua' ini ieh lun luk matar dumba luk na mayu.

¹⁶Ui panggeh nengeletep seburur lun luk matar sengeriudan dumbaKu. Iamo' na ieh ngedengan dumba luk uen ngedereh. Idi na ieh nakap dumba luk

meraruh. Idi na ieh ngedo' luk murat. Idi na ieh maman luk ketecan. Iamo' ideh kuman uang dumba luk pelaba lamu, idi mubput lisundeh.

¹⁷Lun luk matar ineh luk na mayu miak kumin! Ieh pangeh nenecan sengeriudanneh! Amung laludneh miak uen ngagka bang bunu'. Langenneh miak melaya', idi matehneh mebuser."

Sekaria 12

¹Ini aceh bala Tuhan ratnan Israil, ieh ineh Tuhan luk nemalad langit, idi luk nemudut tana' ini, idi luk nemaré niat kuan lemulun. KebalaNeh,

²"Ui miak nganau' Yerusalim mangun mepad kudeng aceh sangkir abpa' anggur, idi amung pupu luk libut-libutneh miak ngirup macing mabuk. Idi kareb ideh ngerieng Yerusalim, amung-amung bawang Yahuda luk baken pana' miak uen ngerieng.

³Kareb ineh Ui miak nganau' Yerusalim mangun mepad kudeng aceh batu luk meberat—bawang sapeh luk nutun ngiding neneh miak meritep. Amung-amung bawang bang tana' ini miak perurum ngerieng neneh.

⁴Kareb ineh Ui miak ngatot amung kudadeh, idi nganau' amung lun luk maya' kuda meruden. Ui miak nginita nelun Yahuda, iamo' Ui miak ngebuser mateh kuda bunu'deh.

⁵Idi amung pupu Yahuda miak pebala arangdeh sebuleng, 'Tuhan Allah luk Melalud ngetueh pupuNeh luk tudo déi' Yerusalim.'

⁶"Kareb ineh Ui miak nganau' amung inul Yahuda mangun mepad kudeng aceh apui bang pulung idi mepad kudeng aceh lati' luk malé uen ngeranih. Ideh miak ngusag amung bawang luk muneng. Idi lun Yerusalim miak do' udeng bang bawangdeh ineh.

⁷"Ui ini Tuhan miak maré tueh kuan baweh-baweh Yahuda atun, pad ubur luk lapen inul Daud idi lun Yerusalim na meluun rayeh ratnan ubur bawang Yahuda luk baken.

⁸Kareb ineh Tuhan luk miak matar lemulun luk tudo déi' Yersualim, idi lemulun luk meluun laya' pana' miak mangun metueh mepad kudeng Daud. Inul Daud miak nguyut nedeh mepad kudeng Allah, ieh ineh mepad kudeng aceh melaikat Tuhan.

⁹Kareb ineh Ui miak ngusag anid bawang luk nutun munu' Yerusalim.

¹⁰"Ui miak ngutang kuan inul Daud idi kuan lun Yerusalim Roh éi' idi Roh sembayang. Idi ideh miak nier Neneh luk pangeh tibpekdeh. Idi ideh temido Neneh, mepad kudeng lemulun luk temido anak buleng. Ideh miak temido dengan pelaba susa' niat, mepad kudeng lemulun temido anak deléideh luk atun.

¹¹Kareb ineh inan tido luk rayeh déi' Yerusalim, mepad kudeng tido kuan Baal déi' Raked Megido.

¹²Anid-anid tetek ruma' bang bawang ineh miak temido. Anid-anid deléi luk inul Daud petala temido, idi awandeh pana' petala temido' deléi luk inul Natan petala temido, idi awandeh pana' petala temido;

¹³idi tetek ruma' luk inul Liwi, dengan awandeh; tetek ruma' Simi dengan awandeh;

¹⁴idi amung-amung tetek ruma' luk baken miak petala temido, idi awandeh pana' petala temido."

Sekaria 13

¹Kebala Tuhan luk Melalud, "Kareb ineh aceh turuk miak kabin kuan inul Daud, idi lun Yerusalim, pad ideh miak baruin ratnan amung sala'deh, idi ratnan sembayang inan akang.

²Kareb ineh Ui miak nala' ngadan amung akang luk bang bawang ineh, pad ideh na miak teruayen peh. Idi teh Ui miak nala' nabi luk mebalih, pad lemulun na pian sembayang inan akang.

³Idi kudeng seburur nabi luk mebalih mada' luk nekali'neh, idi taman-tinaneh sebuleng miak pebala, 'Petulu iko pitayen, ngaceku iko mebalih

dengan ngadan Tuhan. Idi taman-tinaneh miak nebpek neneh kudeng ieh mada' luk mebalih.

⁴Kareb ineh seburur nabi pana' nateh luk medita' niat ratnan luk sinieneh. Idi na lun pian ngayung ku ayung nabi idi siayu mepad kudeng nabi.

⁵Iamo' ieh pian pebala, 'Baken ui nabi. Ui ini lun tebawang. Ui pangeh nenganau' lati' ruked ulunku.'

⁶Idi kudeng seburur ngitun neneh, kebalaneh, 'Nurat ngudehké luk luun ruukmu ineh?' Idi ieh miak ngor balaneh, 'Ui nurat déi' ruma' rorumku.' "

⁷Kebala Tuhan luk Melalud, "Tumui, O pelapet, idi ngaté nelun luk matar dumbaKu! Ngaté neneh, idi dumba-dumba ineh miak uen matad. Ui miak munu' pupuKu,

⁸idi aput-aput tana' dueh babpat ratnan teluh babpat lemulun miak pitayen.

⁹Idi Ui miak nutun babpat luk ketecan ineh, idi ngeligan nedeh, mepad kudeng pirak luk uen ngeligan ku apui. Ui miak nutun nedeh mepad kudeng amas luk tetunin ku apui. Ideh miak sembayang mutuh rat Negku, idi Ui miak ngua' sembayangdeh. Idi Ui miak pebala, 'Ini pupuKu.' Idi ideh miak ngamo Negku ini Allahdeh."

Sekaria 14

¹Aco luk inan Tuhan nganau' amung ineh miak macing. Idi bawang Yerusalim miak uen ngaro, idi binaweh luk ilap miak uen mabpat su siren muyuh.

²Tuhan miak ngamung amung-amung pupu pad ideh munu' Yerusalim. Bawang rayeh ineh miak lapen, ruma'-ruma' miak uen ngaro, idi decur-decur miak inan pasét. Sebuang lemulun miak tebanen, iamo' lemulun luk ketecan na uen ngusu rat bang bawang rayeh ineh.

³Idi Tuhan miak amé' munu' amung pupu ineh, maya' kudeng luk inau'Neh rat mon.

⁴Kareb ineh Ieh miak tuped luun Pegkung Saitun, luk pa busat aco Yerusalim. Idi Pegkung Saitun ineh miak mekupa rat pa busat aco macing pa acep aco,

pad inan aceh raked luk rayeh. Setangal pegkung ineh miak mubuh amé' pa tinueh busat aco, idi setangal miak mubuh amé' pa kabing busat aco.

⁵Muyuh miak buro maya' raked ineh, luk macing bal déi' pegkung ineh. Muyuh miak buro mepad kudeng luk inau' tepun muyuh kareb tana' meruyuh, kareb imet Usia, raca' Yahuda. Tuhan Allahku miak macing dengan amung melaiaktNeh.

⁶Kareb ineh na melau' idi meteneb.

⁷Idi na medacem teh. Idi kareb malem pana' macang kidi-kidi. Tuhan mo' luk kali' kareb amung ini miak mangun.

⁸Bang aco sineh, abpa' ulun miak manud rat Yerusalim, idi sebuang miak macing nan Abpa' luk Mepaci' idi sebuang nan Abpa' Rayeh. Idi abpa' ineh miak manud raked lak.

⁹Idi Tuhan miak mangun ku raca' aput-apat tana'. Idi kareb ineh Tuhan sebuleng mo', idi ngadanNeh sebuleng mo'.

¹⁰Idi tana' luk libut-libut Yerusalim miak uen ngeraked rat Giba luk pa tinueh busat aco macing inan Rimon luk pa kabing busat aco, Yerusalim miak uen ngedita' meluun ratnan tana' luk libut-libutneh, ieh ineh rat Tanga' Benjamin macing nan Tanga' Lidung, su luk inan aceh tanga' atun, idi rat Pudut luk Medita' luk titen Hananel macing su luk inan raca' ngeradu' buah anggur.

¹¹Idi lun mula' miak do' udeng su ineh. Idi na inan susa'.

¹²Tuhan miak ngacing aceh ét luk pelaba bura' kuan amung pupu luk munu' Yerusalim. Uangdeh miak melu kareb ideh tuper pana'. Ideh teh matehdeh idi dila'deh miak melu.

¹³Kareb ineh Tuhan miak nganau' nedeh pelaba gagau idi matot, pad anid-anid burur miak ngakem lemulun luk iringneh idi munu' neneh.

¹⁴Lun Yahuda miak munu', pad ideh matar Yerusalim. Ideh miak ngaro binaweh maung-amung pupu—ieh ineh amas, pirak, idi kibung luk mula' pana'.

¹⁵Idi teh aceh ét luk pelaba bura' miak macing luun kuda, idi aya' luk seupa kuda idi seupa keladai, unta idi keladai pana', ieh ineh amung aya' baweh bunu' ineh.

¹⁶Kareb bunu' ineh pangeh linaya', idi amung-amungdeh luk neketecan miak amé' Yerusalim anid lak, pad sembayang inan Raca', ieh ineh Tuhan luk Melalud, idi pad ngerayeh Irau Lepo.

¹⁷Kudeng aceh pupu ara' amé' sembayang inan Raca', ieh ineh Tuhan luk Melalud, idi udan na mebpeh luun tana'deh.

¹⁸Kudeng lun Masir ara' ngerayeh Irau Lepo, ideh miak mekaneh ét luk barén kuan anid pupu luk ara' amé'.

¹⁹Ini ukum luk miak macing kuan Masir idi kuan amung pupu baken, kudeng na ideh ngerayeh Irau Lepo.

²⁰Kareb ineh icung kuda miak uen ngarit dengan bala ini, "Linigan kuan Tuhan." Idi lacang bang Ruma' Allah pana' mepad ligan kudeng ligan luk pa atun bubpun.

²¹Anid-anid lacang luk déi' Yerusalim idi Yahuda miak uen ngeligan kuan Tuhan luk Melalud. Lemulun luk maré baré miak amé' ngalap lacang ineh, ku nanek uang pung luk barén kuan Tuhan. Idi kareb ineh na luk idi lemulun luk pepua' bang Ruma' Tuhan luk Melalud.

Malaki

Malaki 1

¹Ini bala Tuhan luk badén Malaki kuan lun Israil:

²Kebala Tuhan nan pupuNeh, "Ui pangeh mawa nemuyuh rat mon." Iamo' kebaladeh, "Kudeng apehké Iko nengegala' awaMu nekai?" Kebala Tuhan, "Sagan pana' Esau idi Yakub denganak, Ui mawa ni Yakub idi inulneh,

³iamo' Ui megateh ni Esau idi inulneh teh. Ui pangeh nengusag bawang Esau luk luun pegkung, pad tana' ineh inan pung luk meliputi tudo."

⁴Kudeng inul Esau, ieh ineh lun Edom, pebala, "Bawang tau pangeh inusag, iamo' tau miak mudut baruh," Tuhan miak ngor baladeh, "Nima' nedeh mudut baruh — idi Ui miak ngusag neneh teh. Lun baken miak neten nedeh, 'Bawang luk dat' idi 'Pupu luk inan Tuhan megateh raked-raked.' "

⁵Pupu Israil miak nier ini dengan matehdeh sebuleng, idi ideh miak pebala, "Tuhan ineh melalud, sagan pana' mado rat bawang Israil!"

⁶Kebala Tuhan luk Melalud kuan lun imam, "Anak ngedita' tamanneh id demulun matot nelun luk kuan neneh. Ui ini taman muyuh, ngudeh muyuh na ngedita' Negku? Ui luk kuan nemuyuh—ngudeh muyuh na matot Negku? Muyuh ngedat Negku, iamo' kebalanya muyuh, 'Kudeng apehké kai ngedat Namu?'

⁷Ngaceku muyuh nemaré akan luk dat luun bubpunKu. Idi kebalanya muyuh, 'Kudeng apehké kai ngedat Namu?' Ngaceku muyuh nengerawé bubpun Tuhan miak uen ngedat.

⁸Kudeng muyuh maré pung luk mebuser Negku, petuluké ineh? Kudeng muyuh maré pung luk mekio' idi luk mét, petuluké ineh? Do' muyuh nutun maré aceh luk kudeng ineh kuan pengulu muyuh. Mawangké niatneh nemuyuh? Idi miakké ieh ngedengan nemuyuh?"

⁹Idi kebalanya Malaki, "Kudeng muyuh lun imam nutun mutuh Allah ngedengan netau nekini, kali' rungen Ieh na ninger sembayang muyuh, ngaceku dat muyuh.

¹⁰Idi kebala Tuhan luk Melalud, Meluun do' seburur muyuh ngitek tanga' Ruma' Allah, pad muyuh na nganau' apui luk na ulek luun bubpunKu. Na Ui mawang niat nemuyuh! Na Ui pian ngalap luk barén muyuh Negku.

¹¹Aput-apat tana' lemulun ngerayeh Negku. Idi iapeh-iapeh pana' ideh ngeseb umau luk do' buen idi maré baré luk petulu kuanKu. Amung-amungdeh ngerayeh Negku!

¹²Iamo' muyuh ngedat Negku, kareb muyuh mala bubpunKu na ulek, idi ngedat akan luk barén muyuh Negku.

¹³Kebala muyuh, 'Pelaba usam kai nganau' luk kudeng ini!' Idi muyuh teketed rat Negku. Muyuh maré pung luk pino muyuh idi luk mekio' idi luk mét kuanKu. Petuluké Ui miak ngalap luk kudeng ineh rat nemuyuh?

¹⁴Kediman kuan lun luk naluk luk maré pung luk na ulek kuanKu, kareb ieh pangeh nepejani' maré luk do' rat arang aya'neh kuanKu. Ngaceku Ui ini aceh Raca' luk rayeh idi amung-amung pupu matot Negku, kebala Tuhan luk Melalud."

Malaki 2

¹Kebala Tuhan luk Melalud kuan imam-imam, "Ini aceh ukum kuan muyuh:

²Do' muyuh ngedita' Negku dengan lu ruen muyuh. Kudeng muyuh na ninger balaKu, idi ngimet neneh do'-do', Ui miak ngacing kediman kuan muyuh. Peruan muyuh luk rat Negku mangun ku kediman kuan muyuh. Setuneh Ui pangeh nengediman peruan ineh, ngaceku muyuh na ngimet ukumKu do'-do'.

³Ui miak mada' dat anak-anak muyuh, idi ngelusi amung téi' pung luk barén muyuh luun kiung muyuh, idi Ui miak nala' nemuyuh dengan téi' ineh,

⁴pad muyuh kali' Ui luk nemaré ukum ini kuan muyuh, pad pejani'Ku dengan lun imam, luk inul Liwi miak lutep.

⁵"Ui nepejani' maré ulun luk do' nedeh, idi amung ini pangeh biréKu nedeh, pad ideh miak ngerayeh Negku. Idi kareb ineh ideh matot Negku pad ideh nengerayeh Negku.

⁶Ideh nemada' luk matu, idi na nemada' luk mesala'. Ideh do' rorum Negku; ideh nenganau' luk matu idi nengedenan nelun baken, pad ideh ugka' nganau' luk dat.

⁷Kekamen imam, ieh ineh mada' bada' luk matu ratnan Allah. Do' idé-idé pana' miak amé' nedeh idi sibada' ratnan luk pianKu, ngaceku ideh lun duken Tuhan luk Melalud.

⁸Iamo' muyuh lun imam pangeh numai ratnan dalam luk matu. Bada' muyuh pangeh nenganau' mula' lemulun ngakem luk mesala'. Muyuh pangeh nengelaba jani'Ku luk nemuyuh.

⁹Ngaceku ineh Ui pana' miak nganau' nelun Israil ngedat nemuyuh, ngaceku muyuh na maya' badaKu, idi kareb muyuh mada' ratnan luk pianKu, muyuh na nganau' luk mepad kuan amung lemulun.”

¹⁰Naké amung tau sebuleng Taman, ieh ineh sebuleng Allah luk nemudut netau? Ngudeh tau na maya' jani' tau inan kinanak tau luk baken? Ngudeh tau ngedat pejani' Allah inan tepun tau?

¹¹Lun Yahuda na nemaya' jani'deh inan Allah, idi ideh nenganau' kekamen luk dat bang bawang Israil idi déi' Yerusalim. Ideh pangeh nengelutak Ruma' Allah luk inan Tuhan mawa. Deléideh nengaweh decur pupu luk sembayang inan akang.

¹²Do' Tuhan nala' idé-idé luk nganau' kudeng ineh, pad ieh na mangun ku pupu tau, ieh ineh pupu luk maré baré kuan Tuhan luk Melalud.

¹³Idi ini aceh kekamen luk inau' muyuh. Muyuh nangi' idi ngarod iring bubpun Tuhan, ngaceku Ieh na ngalap baré muyuh.

¹⁴Idi muyuh ngitun, "Anun punneh?" Ieh ineh ngaceku Tuhan kali' namu nengelaba jani'mu inan awan luk ilapmu kareb iko anak adi'. Ieh luk rorummu, idi iko na nemaya' jani'mu neneh, sagan tu pana' iko nepejani' inan Allah ku iko lutep neneh.

¹⁵Allah nenganau' nemedueh mangun ku sebuleng burur idi sebuleng roh. Ngaceku pian Allah tau inan anak luk mangun ku pupu Tuhan luk matu.

Ngaceku ineh matar do'-do', pad seburur pana' na ngelaba jani'neh inan awan luk ilapneh kareb ieh anak adi'.

¹⁶Kebala Tuhan Allah lun Israil, "Ui megateh inan lemulun luk patad ratnan awanneh. Ui megateh inan deléi luk nganau' kudeng ineh kuan awanneh. Ngaceku ineh matar do'-do', pad muyuh na ngelaba jani' muyuh inan awan muyuh."

¹⁷Tuhan musam ninger bala muyuh. Iamo' kebala muyuh, "Musam ngudeh Ieh lek?" Ngaceku muyuh mala, "Tuhan luk Melalud ngerawé amung lun mesala' do', idi mawang niat nedeh." Idi teh muyuh mala, "Iapeh Allah luk ruendeh matu di?"

Malaki 3

¹Idi Tuhan luk Melalud ngor bala muyuh, "Ui miak ngecuk nelun dukenKu nganau' temina' dalan kuanKu. Idi denak-denak Tuhan luk tekapen muyuh miak macing bang Ruma'Neh. Idi lun duken luk inan muyuh mawang niat miak macing idi mada' jani'Ku."

²Idé luk tuman kareb Ieh macing? Idé luk na matot kareb Ieh melagan? Ieh mepad kudeng apui luk ngederuno amas idi pirak, idi mepad kudeng sabun.

³Ieh miak macing idi ngukum mepad kudeng lemulun luk ngederuno idi maru' pirak. Ieh miak maru' imamNeh mepad kudeng pirak idi amas luk inau' ngederuno, pad ideh maré baré luk petulu kuan Tuhan.

⁴Idi baré luk iten lun Yahuda idi lun rat Yerusalim kuan Tuhan miak ngawang niatNeh, mepad kudeng luk atun.

⁵Kebala Tuhan luk Melalud, "Ui miak amé' ngukum nemuyuh idi ngegala' sala' lemulun luk mangun, idi lemulun luk pasét, idi lemulun luk mala luk na matu, idi lemulun luk naluk nelun luk tebarindeh ratnan tabpardeh, idi lemulun luk muyok decur tinula', idi anak maté, idi lun sakai, idi lemulun luk na ngerayeh Negku.

⁶"Ui ini Tuhan luk na misu'. Ngaceku ineh muyuh luk inul Yakub nateh inukum.

⁷Muyuh mepad kudeng tepun muyuh ngaceku muyuh nelemubed rat Negku idi na nengimet ukumKu. Do' muyuh lumi amé' Negku, idi Ui miak lumi nemuyuh. Iamo' kebala muyuh, 'Anun luk miak ruen kai, pad kai lumi amé' Namu?'

⁸KebalaKu, Petuluké selemulun naluk Allah? Na tu-tu! Iamo' muyuh naluk Negku Kudeng afeh? Ratnan babpat pulu' idi baré muyuh.

⁹Amung muyuh kidiman ngaceku amung pupu ini naluk Negku.

¹⁰Do' nguit amung babpat pulu' muyuh amé' bang Ruma' Allah pad inan akan bang Ruma'Ku. Nutun Negku, pad muyuh kali' Negku ngukab tanga' langit idi ngutang peruan kuan muyuh dengan mela.

¹¹Na Ui nima' uled kuman tibu muyuh, pad anggur muyuh mula' bua'.

¹²Idi amung pupu miak mala nemuyuh pelaba samal, ngaceku tana' muyuh do' inan mulun.”

¹³"Muyuh nengedat Negku," kebala Tuhan. "Iamo' keburu' muyuh, 'Kudeng afeh kai nengedat Namu?'

¹⁴Keburu' muyuh, 'Na ulek sembayang inan Allah. Anun ulek maya' balaNeh, idi nginuud ratnan sala' kai pa kiung Tuhan luk Melalud?

¹⁵Kai kali' lemulun luk medita' niat luk pelaba samal. Lemulun luk nganau' luk dat pana' inan peruan, idi ideh nutun Allah dengan kekamendeh luk dat dengan na susa'.' “

¹⁶Idi lemulun luk matot inan Tuhan pebada' seburur dengan seburur, idi Tuhan neninger baladeh. Pa kiungNeh inan surat luk inan ngayud kekamen lemulun luk matot inan Tuhan idi luk ngerayeh Neneh.

¹⁷Kebala Tuhan luk Melalud, "Ideh miak mangun ku pupuKu. Idi kareb aco luk inan ngukum, Ui miak ngalap nedeh. Ngaceku Ui méi' nedeh, mepad kudeng aceh taman luk méi' inan anakneh luk do' baya' bala.

¹⁸Kareb ineh muyuh miak nier luk mangun kuan lemulun luk matu idi kuan lemulun luk dat, idi kuan lemulun luk maya' Negku idi lemulun lu na maya'."

Malaki 4

¹Kebala Tuhan luk Melalud, "Ngerawé' do'-do', kareb aco ineh macing, amung-amung lemulun luk medita' niat idi luk dat miak meseb mepad kudeng geramih. Kareb aco ineh ideh meseb pad na luk ketecan.

²Iamo' kuan muyuh luk na maya' Negku, Ui miak maré laludKu luk ngulun, merasat luun muyuh mepad kudeng aco, pad ngedo' nemuyuh. Muyuh miak mepuit idi mawang niat, mepad kudeng anak sapi' luk rinuat rat bang libungdeh.

³Muyuh miak metueh ratnan lemulun luk dat; ideh mepad kudeng abuh riduen muyuh kareb aco luk inanKu ngacing ukum.

⁴"Do' ngerawé bada' demulunKu Musa, ieh ineh amung ukum luk biréKu neneh déi' luun Pegkung Sinai, luk miak bén amung pupu lun Israil.

⁵"Iamo' kareb nateh aco Tuhan luk inan matot ineh macing, Ui miak ngecuk Nabi Elia amé' nemuyuh.

⁶Ieh miak nguit taman pedo' dengan anak, idi anak pedo' dengan taman, pad Ui na macing idi ngusag bawang muyuh."

Lun Bawang - All Bible

Matius

Matius 1

¹Idi ini surat luk mada' ratnan inul Yésus Keristus, anak Daud, luk inul Ibrahim.

²Ibrahim nenginul Isak; Isak nenginul Yakub; Yakub nenginul Yahuda idi kinanakneh.

³Yahuda nenginul Paris idi Sera, ratnan decur ngadanneh Tamar; Paris nenginul Esron, idi Esron nenginul Aram.

⁴Aram nenginul Aminadab; Aminadab nenginul Nasun; Nasun nenginul Salmun.

⁵Salmun nenginul Boas ratnan awanneh Rahab; Boas nenginul Obéd ratnan awanneh Rut; Obéd nenginul Isai.

⁶Isai nenginul Raca' Daud. Idi Raca' Daud nenginul Selimun ratnan decur luk awan uria atun.

⁷Selimun neningul Rehebom; Rehebom nenginul Abia; Abia nenginul Asa.

⁸Asa nenginul Yosapat; Yosapat nenginul Yoram; Yoram nenginul Usia.

⁹Usia nenginul Yotam; Yotam nenginul Akas; Akas nenginul Hesekia.

¹⁰Hesekia nenginul Manasé; Manasé nenginul Amon; Amon nenginul Yosia.

¹¹Yosia nenginul Yoyakin idi kinanakneh kareb ideh tibandeh amé' déi' Babil.

¹²Idi pangeh ideh tiban macing déi' Babil, Yoyakin nenginul Saltiel; Saltiel nenginul Serubabel.

¹³Serubabel nenginul Abiud; Abiud nenginul Eliakim; Eliakim nenginul Asur.

- ¹⁴Asur nenginul Saduk; Saduk nenginul Akim; Akim nenginul Eliud.
- ¹⁵Eliud nenginul Eliasar; Eliasar nenginul Matan; Matan nenginul Yakub.
- ¹⁶Yakub nenginul Yusup, ieh ineh awan Mariam; idi Mariam nenganak Yésus luk titen Keristus.
- ¹⁷Idi amung inul rat kareb Ibrahim macing kareb Daud, pulu' apat; idi rat kareb Daud macing ideh tiban iné' déi' Babil, pulu' apat inul, idi pulu' apat inul rat kareb ineh pad macing Keristus tinganak.
- ¹⁸Kudeng ini lawéneh Yésus Keristus tinganak. TinanNeh Mariam pangeh tinuduk Yusup, iamo' kareb nateh didueh nepaweh, idi Mariam kali' ieh mali' ratnan Roh Meligan.
- ¹⁹Idi Yusup, luk tudukneh ineh, selemulun luk matu. Idi ieh sikal mepatad lulem rat neneh ngaceku ieh ara' ngigu' neneh.
- ²⁰Iamo' kareb ieh ngerawé kudeng ini, aceh melaikat Tuhan nesilangan neneh kareb ieh nenginupi, keburineh, "O Yusup, anak Daud, aleg iko merapang ngalap ni Mariam ku awanmu. Ngaceku luk bang nakanneh ineh inau' Roh Meligan.
- ²¹Idi Mariam miak nenganak aceh anak deléi; idi do' iko nganau' ngadanNeh Yésus, ngaceku Ieh luk miak ngulun pupuNeh ratnan sala'deh."
- ²²Idi amung ini pangeh mangun, pad ngacing luk bila Tuhan dengan tang nabi, kebalaNeh,
- ²³"Aceh decur luk pun mebaruh, miak mali' pad ieh nenganak aceh anak deléi. Idi Ieh miak tetanen 'Immanuel'." (luk ilungneh, "Allah dengan tau").
- ²⁴Kareb Yusup nekulat idi ieh nenganau' luk icuk melaikat Tuhan neneh, idi ieh nengalap ni Mariam ku awanneh.
- ²⁵Iamo' na ieh nepamung neneh pad macing Mariam nenganak aceh anak deléi. Idi Yusup nenganau' ngadanNeh Yésus.

Matius 2

- ¹Yésus tinganak déi' Baitlahim bang bawang Yudia, kareb imet Raca' Herodés, idi tuda'-tuda' lun luk mileh nier gituen nacing rat pa busat aco iné' Yerusalim,
- ²keburi'deh, "Su apehké Raca' lun Yahudi luk tinganak mebaruh? Ngaceku kai pangeh nenier gituenNeh luk pa busat aco. Idi kai macing sikal sembayang Neneh."
- ³Kareb Raca' Herodés neninger bala ineh, ieh megagau. Kudeng ineh teh amung lun bang bawang Yerusalim teh.
- ⁴Idi ieh nengamung amung imam rayeh idi guru-guru Ukum, keburi'neh, "Iapehké su luk inan Keristus tinganak?"
- ⁵Idi kebaladeh, "Déi' Baitlahim luk bang bawang Yudia. Kudeng ineh luk inayud nabi, kebalaneh,
- ⁶O Baitlahim luk bang bawang Yudia, na iko isuut rat arang lun luk ngimet raca' Yudia; ngaceku rat namu miak remuat aceh lun luk ngimet luk sikal nguyut pupuKu lun Israil.' "
- ⁷Idi Herodés nelulem nawar nelun luk mileh nier gituen ineh, idi nengelio nedeh do'-do' idan gituen ineh nekali'deh.
- ⁸Idi ieh nengecuk nedeh amé' déi' Baitlahim, keburi'neh, "Amé' muyuh nakap do'-do' anak luk isuut ineh. Kareb muyuh kali' Neneh, do' muyuh mada' negku, pad ui pana' miak amé' sembayang Neneh."
- ⁹Idi ideh nenalan; idi gituen luk sinierdeh pa busat aco ineh nenalan pa atundeh, idi gituen ineh nugka' pa luun su luk inan anak ineh.
- ¹⁰Kareb ideh nenier gituen ineh ideh pelaba awang niat.
- ¹¹Idi ideh iné' bang ruma' idi ideh nenier anak ineh dengan tinanNeh Mariam, idi ideh netekeradung sembayang Neneh. Pangeh ineh ideh nengukab pati'deh, idi nemaré baré Neneh, ieh ineh amas, idi luk sabpen luk do' buen, idi mur.

¹²Allah nemebpong nedeh bang nupideh na lemubed amé' inan Raca' Herodés teh, idi ideh nuli' maya' dalan baken.

¹³Litad ideh nuli', inan aceh melaikat Tuhan nesilangan ni Yusup bang nupineh, idi kebalaneh, "Tumui iko, idi nated anak dengan tinanNeh, idi buro amé' Masir, idi tudo déi' pad ui mada' namu, ngaceku Herodés nakap anak ineh pian ngaté Neneh."

¹⁴Idi Yusup netumui idi nenated anak ineh dengan tinanNeh kareb medacem, idi iné' Masir.

¹⁵Idi ieh netudo déi' pad macing Herodés naté, pad ngacing luk bila Tuhan dengan tang nabi, kebalaNeh, "Ui pangeh nenawar AnakKu lu deléi rat Masir."

¹⁶Kareb Herodés nekali' ieh sinaluk lun mileh luk rat pa busat aco ineh, idi ieh pelaba gateh niat. Idi ieh nengecuk lemulun amé' ngaté amung anak deléi luk déi' Baitlahim idi luk bang amung-amung babpatneh, luk ulun dueh lak amé' pa beneh, maya' kareb luk pangeh linio lun luk mileh ineh neneh.

¹⁷Kudeng ini luk pangeh mangun luk bila Nabi Yeremia, kebalaneh:

¹⁸"Inan aceh tang pindenger déi' Rama, inan luk nangi' idi temido teh. Rakel nangi' ku anakneh; na ieh mia buken, ngaceku amung anakneh luk isuut pangeh naté."

¹⁹Kareb Herodés pangeh naté, idi aceh melaikat Tuhan nesilangan ni Yusup bang nupineh déi' Masir.

²⁰Idi keburi' melaikat neneh, "Tumui iko idi nated anak luk isuut ineh dengan tinanNeh, idi muli' amé' bawang Israil; ngaceku ideh luk sikal ngaté anak ineh pangeh naté."

²¹Idi Yusup netumui idi nenated anak luk isuut ineh dengan tinanNeh idi iné' bawang Israil.

²²Kareb ieh neninger Arkilaus pangeh nengelibal tamaneh Herodés mangun ku raca' Yudia, idi Yusup matot amé' déi', iamo' ngaceku pangeh bida' Allah kuannehang bang nupi, idi ieh nelemubed iné' bang bawang Galilia.

²³Idi ieh iné' tebawang bang bawang Nasarét; pad ngacing luk bila nabi-nabi, kebaladeh, "Ieh miak tetanen Lun Nasarét."

Matius 3

¹Kareb ineh Yahya luk Ngerereb iné' mada' déi' su luk ali-ali bang bawang Yudia,

²kebalanehang, "Do' muyuh uren ratnan sala' muyuh, ngaceku Imet surga pangeh muneng."

³Ngaceku ini ieh luk pangeh bila Nabi Yesaya, keburinehang, "Seburur lemulun ngitang déi' su luk ali-ali, kebalanehang, 'Nganau' temina' dalam Tuhan, idi ngesiri lisangen-lisangenNeh.' "

⁴Idi ayung Yahya ineh buluh pung unta, idi abet awanehang kubil pung, idi akannehang, ieh ineh kato idi duru' tebikan.

⁵Idi lemulun iné' nenehang rat Yerusalim idi aput tana' Yudia, idi ratnan amung-amung bawang luk libut-libut Abpa' Yarden.

⁶Idi idehang nengamo sala'deh, idi Yahya nengerereb nedeh bang Abpa' Yarden.

⁷Kareb Yahya nenier nelun Parisi idi Saduki amé' mutuh rerebpen, keburinehang nedeh, "O muyuh menipehang, idéké luk nemada' nemuyuh ratnan muyuh miak uen ngulun ratnan usehang Allah luk macing?"

⁸Do' muyuh ngeruat bua' luk petulu dengan uren.

⁹Idi aleg muyuh ngerawé bang niat muyuh, 'Ibrahim ineh taman tau,' ngaceku ui pebala nemuyuh, Allah melalud ngisu' batu-batu ini mangun ku inul Ibrahim.

¹⁰Idi uai pangehang temina' inan uat kayuh, idi anid-anid lawa kayuh luk na ngeruat bua' luk do' miak tebangen idi talan bang apui.

¹¹Ui ngerereb nemuyuh bang abpa', mangun ku tanu' muyuh pangeh nuren, iamo' Ieh luk macing mucu rat negku ngerereb nemuyuh ku Roh Meligan idi apui. Ieh meluun lalud ratnan ui, idi ngiding kasutNeh pana' ui na mayu.

¹²Idi Ieh ngimet bebperNeh, pad Ieh rumik amung padé. Idi Ieh ngamung padéNeh bang lepoNeh, iamo' lipangneh miak sabpenNeh ku apui luk na miak milep.”

¹³Kareb idi Yésus iné' rat Galilia macing Yarden sikal rerebpen Yahya.

¹⁴Iamo' Yahya nemebpeng Neneh, kebalaneh, "Do' ui rerebpenMu, ngudehké Iko amé' mutuh negku ngerereb Namu?”

¹⁵Iamo' kebala Yésus, "Aganeh nekini, ngaceku do' tau maya' amung-amung luk pian Allah." Idi Yahya nemaya' balaNeh.

¹⁶Idi kareb Yésus pangeh rireb, Ieh petacu numak rat bang abpa'. Idi langit pana' mukab, idi Yésus nenier Roh Allah temuruhn kudeng aceh suit sukur idi nucep luunNeh.

¹⁷Idi inan aceh tang rat bang langit luk nepebala, "Ini AnakKu luk inanKu mawa, idi Ui mawang niat Neneh."

Matius 4

¹Idi Yésus kinuyut Roh iné' su luk ali-ali pad Ieh tetunin Iblis.

²Idi Ieh mawa' apat ngepulu' aco idi apat ngepulu' alem. Pangeh ineh Ieh melau peh.

³Idi Iblis iné' Neneh, kebalaneh, "Kudeng matu Iko Anak Allah, do' Iko ngisu' batu-batu ini mangun ku ruti kenenMu.”

⁴Iamo' kebala Yésus, "Pangeh inayud bang Surat Allah, 'Baken ratnan ruti mo' lemulun miak mulun, iamo' ratnan anid-anid bala luk bila Allah.' “

⁵Idi Iblis nenguit Yésus semuet bang Bawang luk Meligan, idi nenganau' Neneh luun buduk Ruma' Allah,

⁶Idi kebalaneh Neneh, "Kudeng matu Iko Anak Allah, do' Iko ubpa amé' déi' liang, ngaceku pangeh inayud bang Surat Allah, 'Allah miak mada' melaikat-

melaikatNeh ratnan Iko; ideh miak ngimet Namu ku ticu'deh, pelé kukudMu na matuk ku batu.' “

⁷Idi kebala Yésus, "Pangeh inayud teh bang Surat Allah, 'Aleg iko nutun Allah Tuhanmu.' “

⁸Pangeh ineh Iblis nenguit Yésus iné' luun pegkung luk medita', idi ieh nemada' sirenNeh amung-amung imet tana' ini dengan rayehdeh.

⁹Idi kebala Iblis Neneh, "Amung-amung imet ini barénku Namu, kudeng Iko tekeradung sembayang negku.”

¹⁰Idi kebala Yésus neneh, "Buro iko, Sétan, ngaceku pangeh inayud bang Surat Allah, 'Do' iko sembayang inan Tuhan Allahmu, idi maya' Neneh mo'.' “

¹¹Idi Iblis neburo rat Neneh, idi melaikat-melaikat nacing idi nengasa' Neneh.

¹²Kareb Yésus neninger Yahya pangeh kikem, idi Ieh nelemubed iné' Galilia.

¹³Idi na Ieh tudo déi' Nasarét, iamo' Ieh iné' Kapernaum, luk iring tangeb Takung Galilia luk bang babpat Sebulon idi Naptali. Idi Ieh tudo déi',

¹⁴pad nacing luk bila Nabi Yesaya, kebalaneh,

¹⁵"Tana' Sebulon idi tana' Naptali luk déi' dipar Abpa' Yarden, idi luk muneng ku takung, ieh ineh Galilia, tana' lun pupu baken!

¹⁶Pupu luk tudo bang dacem, miak nier acang luk rayeh. Idi kuan lemulun luk tudo bang lungung su luk inan até acang miak macing.”

¹⁷Rat kareb idi Yésus nengimun mada', kebalaNeh, "Do' muyuh uren, ngaceku Imet surga pangeh muneng!”

¹⁸Kareb Yésus nenalan tangeb Takung Galilia, Ieh nenier dueh lun ngerabat luk denganak, ieh ineh Simun luk titen Pétrus, idi kinanakneh Andrias, luk uned ngerabat déi' bang takung ineh.

¹⁹Idi kebala Yésus nedidueh, "Do' medueh amé' maya' Negku, idi Ui nganau' nemedueh ku lun ngerabat lemulun.”

²⁰Idi petacu didueh nenecan rabat ineh, idi nemaya' Neneh.

²¹Idi Ieh nenalan teh, idi Ieh nenier dueh denganak luk baken teh, ieh ineh Yakub idi Yahya Sabdi, luk tudo bang alud dengan Sabdi taman didueh, idi diteluh ngii' rabatdeh, idi Ieh nenawar nedidueh.

²²Idi petacu didueh nenecan alud ineh dengan taman didueh, idi nemaya' Yésus.

²³Yésus nenalan apud tana' Galilia, idi nemada' bang ruma' sembayangdeh, idi Ieh nemada' Bala luk Do' ratnan Imet ineh, idi Ieh nengedo' amung-amung lun luk mét, idi melaya' burur.

²⁴Idi bala ratnan Yésus nepiar apud bawang Siria, idi ideh nenguit amung-amung lun luk mét amé' Neneh, idi sebuang mét dengan riput-riput luk mét. Inan sebuang luk sinuet ada', inan teh luk mét meruai, idi inan teh sebuang luk meliai, idi Ieh nengedo' nedeh.

²⁵Idi pelaba ula' lemulun nemaya' Neneh rat Galilia idi Pulu' Bawang rat Yerusalim idi Yudia, idi rat déi' dipar Abpa' Yarden.

Matius 5

¹Yésus nenier nelun mula', idi Ieh numak luun pegkung. Kareb Ieh netudo, idi anak-anak sekola'Neh iné' Neneh.

²Idi Ieh nemada' nedeh, kebalaNeh:

³"Samal kuan lemulun luk kali' asi'deh pa kiung Allah, ngaceku ideh luk kuan Imet surga.

⁴"Samal kuan lemulun luk mesusa' niat, ngaceku ideh miak buken Allah peh.

⁵"Samal kuan lemulun luk mebeneh niat, ngaceku ideh miak ngalap luk pijani' Allah.

⁶"Samal kuan lemulun luk melau idi meparinku luk matu, ngaceku ideh miak uen ngebor.

⁷"Samal kuan lemulun luk méi' nelun baken, ngaceku Allah miak méi' nedeh.

⁸"Samal kuan lemulun luk meligan niat, ngaceku ideh miak nier Allah.

- ⁹"Samal kuan lemulun luk nguit lemulun pedo', ngaceku ideh miak tetanen ku anak-anak Allah.
- ¹⁰"Samal kuan lemulun luk pidereh ngaceku luk matu, ngaceku ideh luk kuan Imet surga.
- ¹¹"Samal kuan muyuh kareb lemulun ngedat nemuyuh idi ngedereh nemuyuh idi nguyo nemuyuh dengan mebalih ngaceku Ui.
- ¹²Do' muyuh geriguen idi mawang niat, ngaceku rayeh tu tabpar muyuh déi' surga; ngaceku kudeng ineh teh amung-amung nabi luk atun rat nemuyuh pangeh pidereh teh.
- ¹³"Muyuh mepad kudeng tucu' tana' ini. Iamo' kudeng tucu' pangeh metalang, ieh na mepaci' peh. Idi na ulek neh peh. Do' ieh talan idi ricuen lemulun.
- ¹⁴"Muyuh ini mepad kudeng acang tana'. Aceh bawang luk luun pegkung na miak melinged.
- ¹⁵Na lemulun nutud lapung idi ngakeb neneh ku gatang, iamo' ieh nganau' neneh luun dawan, pad ieh ngacang amung lemulun bang ruma' ineh.
- ¹⁶Kudeng ineh teh do' muyuh maré acang muyuh nelun, pad ideh miak nier kekamen muyuh luk do', idi ngerayeh Taman muyuh luk bang surga.
- ¹⁷"Aleg muyuh ngerawé Ui pangeh nacing pian ngusag Ukum Musa idi surat nabi-nabi; baken Ui nacing pian ngusag, iamo' ngaceku sikal mangeh amung ineh.
- ¹⁸Ngerawé do'-do'! Seruked langit idi tana' pana' idi, sebuleng titik idi sebuleng bila' bala luk isuut pana' luk rat bang Ukum na miak metutu', pad macing amung-amung ineh mangun.
- ¹⁹Ngaceku idé-idé luk sikal ngelaba sebuleng ukum luk isuut, idi luk mada' kudeng ineh kuan lun baken teh, idi ieh luk tetanen isuut bang Imet surga. Iamo' idé-idé luk maya' Ukum ini, idi luk mada' ineh, ieh miak tetanen rayeh bang Imet surga.

²⁰Ngaceku ineh Ui pebala nemuyuh, kudeng niat muyuh na mesiri meluun ratnan siri niat guru-guru Ukum idi lun Parisi teh, na tu-tu muyuh miak semuet bang Imet surga.

²¹"Muyuh pangeh neninger luk paneh bila mon, ieh ineh, 'Aleg iko ngaté, idi idé-idé luk sikal ngaté, ieh miak iten amé' besara'.'

²²Iamo' nekini Ui pebala nemuyuh: idé-idé luk museh inan kinanakneh, ieh miak iten amé' besara, idi idé-idé luk pebala nan kinanakneh, 'Iko mebacé,' ieh miak iten papu' lun luk rayeh; idi idé-idé luk pebala, 'Iko meruden,' ieh luk ngalap ua'neh bang apui.

²³Kareb iko maré baré anun-anun luun bubpun kuan Allah, idi su ineh iko kali' kinanakmu mét niat namu,

²⁴do' iko necan barému iring bubpun ineh, idi amé' pedo' dengan kinanakmu atun, idi teh iko lemubed maré baré ineh.

²⁵"Kudeng inan seburur lemulun luk ngadu' namu, idi nguit namu besara', do' iko saget pedo' neneh, kareb nateh iko amé' besara', pad ieh na maré namu papu' lun luk mutut besara', idi lun luk mutut besara' ineh na maré namu nelun pulis, idi pulis na nipa namu bang tutup.

²⁶Ui pebala namu, iko na miak remuat rat bang tutup ineh, kudeng ketecan sesin pana' luk nateh binayarmu.

²⁷"Muyuh pangeh neninger luk pangeh bila, 'Aleg pasét.'

²⁸Iamo' nekini Ui pebala nemuyuh: anid-anid lemulun luk melili ku decur bang niatneh, kareb ieh nier bururneh, pangeh ieh pasét neneh bang niatneh.

²⁹Kudeng matehmu pa tinueh ngacing sala' kuanmu, do' nakul neneh, idi talan rat namu; ngaceku meluun do' sebabpat bururmu maté ratnan amung babpat bururmu talan bang apui.

³⁰Kudeng tiku'mu pa tinueh ngacing sala' kuanmu, do' nangal idi nala' neneh, ngaceku meluun do' na luk idi sebabpat bururmu ratnan amung babpat bururmu talan bang apui.

- 31"Idi teh pangeh bila, 'Idé-idé luk ngelagkan awanneh, do' ieh maré aceh surat patad neneh.'
- 32Iamo' nekini Ui pebala nemuyuh: idé-idé luk ngelagkan awanneh, kudeng baken ratnan pasét, ieh luk maré awanneh pasét, idi idé-idé luk ngaweh decur luk ligkan ineh, ieh pasét teh.
- 33"Muyuh pangeh neninger teh luk pangeh bila kuan lun rayeh mon, 'Aleg iko pebulung dengan mebalih; iamo' do' iko ngacing kuan Tuhan amung bulungmu ineh.'
- 34Iamo' nekini Ui pebala nemuyuh: aleg tu-tu muyuh pebulung ku surga, ngaceku ieh ineh kerusi Allah.
- 35Aleg pebulung ku tana' teh, ngaceku ieh ineh teh luk tapin kukud Allah; aleg pebulung ku bawang Yerusalem, ngaceku ieh ineh bawang Raca' rayeh.
- 36Aleg pebulung ku uluhmu teh, ngaceku iko na miak nganau' sengurat abpukmu mebuda' kian mitem lek.
- 37Iamo' do' muyuh pebala, 'Mo,' idi 'Na.' Bala luk meluun ratnan ineh macing ratnan Iblis.
- 38"Muyuh pangeh neninger luk pangeh bila, 'Mateh su amateh, idi lipen sua lipen.'
- 39Iamo' nekini Ui pebala nemuyuh: aleg metueh ratnan lemulun luk dat, iamo' kudeng selemulun mepag pingitmu pa tinueh, do' maré pingitmu pa kabing teh.
- 40Kudeng selemulun nguit namu besara', idi ieh ngalap kuyu'mu, do' maré kuyu' boyormu neneh teh.
- 41Kudeng selemulun mesaad nguit namu nalan sebatu kiadoneh, do' iko maya' neneh dueh batu kiadoneh.
- 42Maré kuan lemulun luk mutuh namu, idi kudeng lemulun sikal ngabit rat namu, do' maré luk pianneh.

⁴³"Muyuh pangeh neninger luk pangeh bila, 'Do' iko mawa nelun denganmu, idi megateh inan bunu'mu.'

⁴⁴Iamo' nekini Ui pebala nemuyuh: do' mawa inan bunu' muyuh, idi sembayang kuan lemulun luk ngedereh nemuyuh,

⁴⁵pad muyuh mangunk u anak-anak Taman muyuh luk bang surga. Ngaceku Ieh maré acoNeh merasat kuan lemulun luk dat idi luk do', idi Ieh maré udan kuan lemulun luk matu idi lemulun luk na matu teh.

⁴⁶Petuluké Allah maré tabpar nemuyuh, kudeng muyuh mawa inan lemulun luk mawa nemuyuh? Lun luk ngalap usin pupuk pana' nganau' luk kudeng ineh teh?

⁴⁷Idi kudeng muyuh maré tabi' kuan kinanak-kinanak muyuh mo' sebuleng, do'ké kekamen muyuh rat nelun baken? Lun na manu pana' nganau' luk kudeng ineh teh.

⁴⁸Do' muyuh meligan, mepad kudeng Taman muyuh luk bang surga ineh meligan teh.

Matius 6

¹"Matar do'-do', pad muyuh na nganau' kekamen muyuh luk matu pa kiung lemulun mo', idi ngaceku sikal sirendeh; ngaceku kudeng muyuh nganau' kudeng ineh, muyuh na miak ngalap tabpar ratnan Taman muyuh luk bang surga.

²"Ngaceku ineh kareb iko maré usin kuan lun masi', aleg iko ngiup serupit pa atunmu kudeng luk ruen lun luk siayu bang ruma' sembayang idi iring dalan, ngaceku piandeh buren dulun. Ngerawé do'-do'! Ideh pangeh nengalap tabpardeh.

³Iamo' kareb iko maré usin kuan lun masi', aleg nima' ticu'mu pa kabing kali' luk ruen ticu'mu pa tinueh,

⁴pad usin luk barénmu kuan lun masi' ineh na miak kali' dulun. Idi Tamanmu luk nier amung-amung luk na megala' ineh, sikal ngua' kuanmu.

⁵"Kareb muyuh sembayang, aleg muyuh kudeng lun luk siayu! Ideh sikal tupid sembayang bang ruma' sembayang idi nan lisangen dalan, pad ideh miak siren dulun. Ngerawé do'-do'! Ideh pangeh nengalap tabpardeh.

⁶Iamo' kareb iko sembayang, do' semuet bang takepmu, idi ngitek tanga' takep ineh, idi sembayang nan Tamanmu luk na melagan. Idi Tamanmu luk nier amung-amung luk na melagan ineh, sikal ngua' kuanmu.

⁷"Kareb iko sembayang, aleg iko lubed-lubed bala mepad kudeng lun pupu baken; ngaceku ideh ngerawé sembayangdeh pedingeren ngaceku baladeh mula'.

⁸Aleg muyuh nginud lemulun ineh, ngaceku Taman muyuh kali' luk inan ulek kuan muyuh, kareb nateh muyuh mutuh rat Neneh.

⁹Do' muyuh sembayang kudeng ini: 'O Taman kai luk bang surga, do' ngadanMu uen ngerayeh

¹⁰Do' ImetMu uen ngacing, idi luk pianMu mangun bang tana', mepad kudeng bang surga.

¹¹Maré nekai aco sini akan luk petap.

¹²Maré do' ratnan amung sala' kai, mepad kudeng kai pangeh nemaré do' ratnan amung sala' dulun.

¹³Aleg nima' nekai tetunin Iblis, iamo' muit nekai ratnan laludneh.' [Iko luk kuan Imet, idi lalud idi rayeh, macing ruked-ruked peh, Amin.]

¹⁴"Ngaceku kudeng muyuh maré do' ratnan sala' dulun, Taman muyuh luk bang surga pana' sikal maré do' kuan muyuh.

¹⁵Iamo' kudeng muyuh na sikal maré do' ratnan sala' dulun, Taman muyuh pana' nateh sikal maré do' ratnan sala' muyuh.

¹⁶"Idi teh, kareb muyuh mawa', aleg tekedamut kiung mepad kudeng lun luk siayu, ngaceku ideh siisu' kiungdeh, pad lun baken ngerawé nedeh mawa'. Ngerawé do'-do'! Ideh pangeh nengalap tabpardeh.

¹⁷Kareb iko mawa', do' iko ngumau uluhmu idi maru' kiungmu,

- 18**pad lemulun na kali' namu mawa', iamo' Tamanmu luk na melagan ineh miak kali'; idi Tamanmu luk nier amung-amung luk na melagan ineh, sikal ngua' kuanmu.
- 19**"Aleg nganug binaweh bang tana' ini, su luk inan kutang idi tugor luk ngerapuk neneh, idi lun mano luk ngurak ruma' idi mano.
- 20**Iamo' do' muyuh nganug binaweh bang surga, su luk na kutang idi tugor luk ngerapuk, idi na lun mano luk ngurak ruma' idi mano.
- 21**Ngaceku iapeh-iapeh luk inan binawehmu, su ineh teh niatmu.
- 22**"Mateh ineh mepad kudeng lapung. Kudeng matehmu do', amung buburmu pana' macang.
- 23**Iamo' kudeng matehmu dat, amung bururmu pana' medacem. Idi kudeng acang luk bang bururmu medacem, kali' rungen daceh ineh pelaba rayeh.
- 24**"Na selemulun luk miak ngakem kuan dueh tuan' ngaceku na miak na seburur inanneh megateh idi luk baken ineh inanneh mawa, idi ieh lutep inan seburur idi megateh inan seburur. Muyuh na miak mangun ku demulun Allah, idi demulun binaweh tana' ini teh.
- 25**"Ngaceku ineh Ui pebala nemuyuh, aleg merapang ratnan ulun muyuh, ieh ineh ratnan luk miak kenen muyuh idi luk urpen muyuh; idi ratnan ayung kuan burur muyuh. Naké ulun ineh meluun ratnan luk kenen idi burur ineh meluun ratnan ayung?
- 26**Siruh, suit-suit luk arang gawa', na ideh ngisak idi na ideh ngeranéh, idi na ideh ngamung akan bang lepo; idi Taman muyuh luk bang surga maman nedeh. Naké muyuh meluun raga ratnan suit-suit ineh?
- 27**Idéké rat arang muyuh miak ngekadang ulunneh sesuut pana' ngaceku merapang?
- 28**"Idi ngudehké muyuh merapang ratnan ayung? Ngerawé ratnan ulun busak bunga', na ideh ngakem idi na ideh nguper gitian.

²⁹Iamo' Ui pebala nemuyuh: Selimun, sagan tu pana' lun do', na nengayung ku luk do' kudeng sebuleng busak ini.

³⁰Kudeng Allah ngayung uduh, luk mulun aco sini idi kenebpaneh ieh talan bang tetel apui, naké Ieh meluun pian ngayung nemuyuh, O muyuh luk na petap anu?

³¹Ngaceku ineh, aleg muyuh merapang idi pebala: 'Anunké luk kenen kai? Anunké luk rupen kai? Anunké luk miak lungen kai?'

³²Lun pupu baken pana' nakap amung ineh, idi Taman muyuh luk bang surga meluun kali' amung ineh inan ulek kuan muyuh.

³³Iamo' do' atun nakap ImetNeh dengan amung luk pianNeh; idi amung ineh miak barén Allah nemuyuh.

³⁴Ngaceku ineh aleg muyuh megagau ratnan nebpa, ngaceku nebpa inan gagauneh sebuleng. Aganeh susa' seaco petap mo' bang seaco.

Matius 7

¹"Aleg ngesala' nelun baken, pad muyuh pana' na uen ngesala' teh.

²Ngaceku Allah ngukum nemuyuh mepad kudeng muyuh pana' ngedat nelun baken. Idi dengan uad luk muyuh nguad kuan lun baken, kudeng ineh teh Allah nguad kuan muyuh.

³Ngudehké iko nier mumuk kayuh luk bang mateh kinanakmu ineh, iamo' na kali'mu batang luk bang matehmu sebuleng?

⁴Ngudehké iko mekuu' pebala nan kinanakmu, 'Nima' negku ngeruat mumuk kayuh rat bang matehmu,' iamo' inan batang bang matehmu sebuleng?

⁵O lun luk siayu, ngeruat batang rat bang matehmu sebuleng atun; idi mucu iko miak nier dengan megala' pad miak ngeruat mumuk kayuh rat bang mateh kinanakmu ineh.

⁶"Aleg maré luk meligan kuan uko'-uko', idi aleg mepet bau mutiara muyuh pa kiung barek, pad ideh na ngeradu' neneh pa liang kukuddeh, idi lemubed amé' musing nemuyuh.

- ⁷"Do' mutuh, idi miak barén nemuyuh; do' nakap, idi muyuh miak ngalap; nateg tanga', idi tanga' ineh miak kabin kuan muyuh.
- ⁸Ngaceku anid-anid lemulun luk mutuh miak ngalap; idi lemulun luk nakap miak kali', idi kuan lemulun luk nateg, tanga' miak kabin kuanneh.
- ⁹Taman sapehké rat arang muyuh, kudeng anakneh mutuh ruti, ieh maré batu kuanneh?
- ¹⁰Idi kudeng ieh mutuh lawid, ieh maré menipeh?
- ¹¹Ngaceku ineh kudeng muyuh luk dat, kali' teh maré luk do' kuan anak-anak muyuh, meluun teh Taman muyuh luk bang surga sikal maré luk do' kuan lemulun luk mutuh Neneh?
- ¹²"Anun-anun luk pian muyuh ruen lun baken kuan muyuh, kudeng ineh teh, do' muyuh nganau' kuandeh; ngaceku ini ilung Ukum Musa idi bada' nabi-nabi.
- ¹³"Do' muyuh semuet maya' tanga' luk meperi'; ngaceku rayeh tanga' idi rayeh pipang dalam luk nguit amé' bang luk ngaté, idi mula' lemulun luk semuet bang ineh.
- ¹⁴Ngaceku meperi' tanga', idi isuut pipang dalam, luk nguit amé' bang ulun, idi pawa' lemulun luk semuet bang ineh.
- ¹⁵"Do' muyuh matar do'-do' ratnan nabi luk mebalih luk amé' nemuyuh, dengan ngayung ku buluh dumba, iamo' bang niatdeh mepad kudeng bungalé luk mesangit.
- ¹⁶Ratnan bua' kekamendeh muyuh miak ngiti nedeh. Lemulun na miak mureg bua' anggur ratnan lawa tabpa', idi mureg bua' gita' ratnan bitarung.
- ¹⁷Kudeng ineh teh lawa kayuh luk do' ngeruat bua' luk do'; iamo' lawa kayuh luk dat ngeruat bua' luk dat.
- ¹⁸Na miak lawa kayuh luk do' ngeruat bua' luk dat, idi lawa kayuh luk dat ngeruat bua' luk do'.

- ¹⁹Lawa kayuh luk na ngeruat bua' luk do' ineh miak tebangen idi talan bang apui.
- ²⁰Ngaceku ratnan bua'-bua'deh muyuh miak ngiti nabi luk mebalih ineh.
- ²¹"Baken anid-anid lemulun luk pebala Negku, 'Tuhan, Tuhan,' miak semuet bang Imet surga; iamo' lemulun luk maya' pian TamanKu luk bang surga.
- ²²Kareb aco ineh mula' lemulun sikal pebala Negku, keburideh, 'Tuhan, Tuhan, kai nemada' bang ngadanMu, idi bang ngadanMu kai nenala' ada', idi bang ngadanMu kai nenganau' kekamen luk rayeh.'
- ²³Idi kareb ineh Ui pebala nedeh, 'Na tu Ui miti nemuyuh. Buro muyuh rat Negku, O muyuh luk nganau' luk dat.'
- ²⁴"Ngaceku ineh anid-anid lemulun luk ninger balaKu ini, idi maya' ineh, ieh mepad kudeng lun mileh luk nemudut ruma'neh luun batu.
- ²⁵Idi netemurun udah luk mula', idi abpa' netemubu', idi barui luk metueh nengeduyung ruma' ineh; idi na ieh neluka', ngaceku dirineh inau' luun batu.
- ²⁶"Anid-anid lemulun luk ninger balaKu ini, idi na sikal maya' ineh, ieh mepad kudeng lun mebacé luk nemudut ruma'neh luun bada.
- ²⁷Idi netemurun udan luk mula', idi abpa' netemubu', idi barui luk metueh nengeduyung ruma' ineh, idi petacu ieh neluka'; idi luka'neh pelaba bura'."
- ²⁸Idi pangeh Yésus nemada' bala ini, idi lun mula' mawa ku bada'Neh ineh.
- ²⁹Ieh nemada' nedeh mepad kudeng lemulun luk inan lalud, baken tu-tu ratnan guru-guru Ukum.

Matius 8

- ¹Yésus netemurun rat luun pegkung, idi mula' lemulun nemaya' Neneh.
- ²Idi inan aceh lemulun luk mét susud iné' Neneh, idi ieh netekeradung pa kiungNeh, keburineh, "Tuhan, kudeng Iko pian, miak Iko ngedo' negku."
- ³Idi Yésus nenatang ticu'Neh idi nengakem neneh, kebalaNeh, "PianKu; do' iko meligan peh!" Idi petacu susudneh ineh nepali'.

⁴Idi kebala Yésus neneh, "Ngerawé do'-do'! Aleg mada' kuan seburur lemulun pana', iamo' do' iko amé' mada' bururmu siren lun imam, idi maré baré luk icu Musa, pad miak mangun ku sebuleng luk nekali' kuandeh."

⁵Kareb Yésus nesemuet bang bawang Kapernaum, idi inan aceh lun rayeh lun pebunu' iné' Neneh, idi nemutih Neneh,

⁶keburi'neh, "O Tuhan, demulunku telubid bang ruma' idi ieh mét naté urat, idi ieh pelaba dereh."

⁷Idi kebala Yésus neneh, "Ui pian amé' ngedo' neneh."

⁸Idi kebala lun rayeh lun pebunu' ineh, "O Tuhan, ui na mayu uenMu ngikak bang ruma'ku; iamo' do' Iko mala sebila' bala mo', idi demulunku miak do' peh.

⁹Ui pana' selemulun luk pa liang ukum idi pa liang ukum dui pana' inan lun pebunu', idi ui pebala kuan sebururdeh, 'Amé' iko,' idi ieh pana' amé'; idi kuan seburur luk baken teh, 'Amé' tungé',' idi ieh macing, idi kuan demulunku, 'Do' nganau' ini,' idi ieh pana' nganau'."

¹⁰Idi kareb Yésus neninger luk kudeng ineh, Ieh mawa idi kebalaNeh kuan lemulun luk nemaya' Neneh, "Ui pebala nemuyuh, rat arang lun Israil pana' nateh Ui nekali' anu luk kudeng ineh rayeh.

¹¹Ngerawé do'-do'! Inan mula' lemulun sikal amé' rat pa busat aco idi pa acep aco luk sikal tudo dengan Ibrahim, Isak, idi Yakub bang Imet surga.

¹²Iamo' lemulun luk petulu semuet bang Imet ineh talan bang dacem déi' liang, idi su ineh lemulun tangi'-tangi' idi pekatep lipen."

¹³Idi kebala Yésus nelun rayeh lun pebunu', "Muli' iko, idi miak mangun kuanmu mepad kudeng luk iko pangeh nemanu." Idi kareb ineh teh demulun ineh do' peh.

¹⁴Kareb Yésus numak ruma' Pétrus, idi Ieh nenier iban Pétrus telubid ngaceku medadem.

- ¹⁵Idi Yésus nengakem ticu'neh, idi dademneh ineh pana' nedo' peh; idi ieh netumui idi nengasa' Neneh.
- ¹⁶Kareb malem aco, ideh nenguit mula' lemulun luk sinuet ada' amé' matun Yésus. Idi Ieh nenala' amung ada' dengan sebila' bala. Idi Ieh nengedo' amung-amung lun luk mét,
- ¹⁷pad ngacing luk bila Nabi Yesaya, kebalaneh, "Ieh sebuleng nengalap amung-amung laya' tau, idi nemabeh amung-amung luk kadan tau."
- ¹⁸Yésus nenier inan mula' lemulun libut-libutNeh, idi petacu Ieh nengecuk anak-anak sekola'Neh guta amé' déi' dipar.
- ¹⁹Idi inan seburur guru Ukum iné' Neneh, keburineh, "O Guru, ui sikal maya' Namu pad iapeh luk suetMu."
- ²⁰Idi kebala Yésus neneh, "Bungalé inan lubangdeh, idi suit-suit déi' arang gawa' pana' inan arardeh; iamo' Anak-Lemulun na luk inanNeh ngerareng uluhNeh."
- ²¹Idi seburur anak sekola' nepebala Neneh, "O Tuhan, nima' negku amé' nanem tamanku atun."
- ²²Iamo' kebala Yésus neneh, "Maya' Negku, idi nima' lun naté nanem lun dengandeh luk naté."
- ²³Yésus netemaleb bang aceh alud, idi anak-anak sekola'Neh nemaya' Neneh.
- ²⁴Denak-denak inan aceh barui luk rayeh déi' bang takung ineh, pad alud ineh lélé mereb ku ribut ineh, iamo' Yésus rudap.
- ²⁵Idi anak-anak sekola'Neh iné' Neneh idi nengalat Neneh, keburideh, "Ngulun nekai, O Tuhan, ngaceku kai lélé maté."
- ²⁶Idi kebala Yésus, "Ngudehké muyuh matot, O muyuh luk na petap anu?" Idi Ieh netumui idi nengagka' barui idi ribut abpa', pad ieh melitong peh.
- ²⁷Idi amungdeh mawa, keburideh, "Kudeng apehké lemulun ini, ngaceku barui idi ribut abpa' pana' maya' balaNeh?"

²⁸Yésus nacing déi' dipar, déi' tana' lun Gadara, idi inan dueh burur lemulun luk sinuet ada' iné' papu' Neneh. Idi didueh nacing ratnan lengutan dengan pelaba sangit, pad lemulun na miak lemaba maya' dalam ineh.

²⁹Idi didueh nengitang, keburu' didueh, "Anunké luk pianMu nekai, O Anak Allah? Iko macing sikal ngedereh nekaiké kareb nateh tarekneh macing?"

³⁰Idi na mado rat nedeh inan tuda'-tuda' barek luk uned nakap akan.

³¹Idi ada'-ada' ineh nemutuh Yésus, keburu'deh, "Kudeng Iko sikal nala' nekai, do' Iko ngecuk nekai semuet bang burur barek-barek ineh."

³²Idi kebala Yésus nedeh, "Do' muyuh amé'." Idi ideh pana' neremuat, idi nesemuet bang burur barek-barek ineh, idi amungdeh ineh nupun musul maya' irang pegkung ineh, idi nubpa bang abpa' rayeh. Idi ideh naté nened bang abpa' ineh.

³³Idi lemulun luk matar barek ineh pana' nebuo idi nesemuet bang bawang, idi ideh nemada' ratnan amung-amung ineh, idi ratnan lemulun luk sinuet ada' ineh.

³⁴Idi amung-amung lemulun neremuat rat bang bawang sikal mepapu' Yésus. Idi kareb ideh nekali' Neneh, ideh nemutuh Neneh buro rat bang bawangdeh.

Matius 9

¹Yésus netemaleb bang aceh alud, idi neguta macing déi' dipar, idi Ieh nacing inan bawangNeh sebuleng.

²Idi ideh nenguit seburur lemulun luk mét naté urat amé' Neneh, luk telubid luun birirneh. Idi Yésus nekali' rayeh anudeh ineh, idi Ieh nepebala inan lemulun luk mét naté urat ineh, "O anakKu, do' iko lutep niat; iko lun mesala', iamo' Ui maré do' namu."

³Idi sebuang rat arang guru-guru Ukum ineh nengerawé bang niatdeh, "Lemulun ini nguyo Allah."

⁴Yésus nekali' terawédeh, idi kebalaNeh, "Ngudehké muyuh ngerawé luk dat bang niat muyuh?"

- ⁵Sapehké luk meluun malé, mala, 'Iko lun mesala', iamo' Ui maré do' namu,' kian pebala, 'Tumui idi nalan'?
- ⁶Iamo' nekini muyuh miak kali' Anak-Lemulun ngimet lalud maré do' ratnan sala' bang tana'." Idi kebalaneh kuan lemulun luk mét naté urat, "Tumui iko idi ngiding luk inanmu rudap, idi muli' amé' ruma'mu."
- ⁷Idi lun mét ineh netumui, idi iné' ruma'neh.
- ⁸Kareb lun mula' nekali' ratnan luk kudeng ineh, idi ideh matot idi nengerayeh Allah luk namaré lalud luk kudeng ineh kuan lemulun.
- ⁹Yésus nenecan bawang ineh, idi kareb Ieh nenalan, Ieh nenier selemulun, ngadanneh Matius, luk tudo bang ruma' luk inan ngamung usin pupuk. Idi kebalaneh Yésus neneh, "Do' maya' Negku." Idi Matius netuped idi nemaya' Yésus.
- ¹⁰Idi kareb Yésus nekuman bang ruma' Matius, idi mula' lemulun luk ngamung usin pupuk idi lun mesala' pana' iné' idi netudo dengan Yésus idi anak-anak sekola'Neh teh.
- ¹¹Idi kareb lun Parisi nenier ineh, idi kebaladeh kuan anak-anak sekola'Neh, "Ngudehké Guru muyuh kuman dengan lun luk ngamung usin pupuk, idi lun mesala' teh?"
- ¹²Idi Yésus neninger bala ineh, idi kebalaneh, "Lemulun luk do' burur na ulek kuan lun ngubat, iamo' lemulun luk mét mo'.
- ¹³Iamo' do' muyuh amé' ngelio ilung bala ini, 'Idi luk pianKu ineh éi', baken pung luk kereten.' Ngaceku baken Ui macing nawar lemulun luk matu, iamo' lemulun luk mesala'."
- ¹⁴Idi anak-anak sekola' Yahya iné' matun Yésus, keburideh, "Ngudehké kai idi lun Parisi pana' megéi' mawa', iamo' anak-anak sekola'Mu na mawa'?"
- ¹⁵Idi kebalaneh Yésus, "Miakké lun rorum deléi luk sikal ngaweh ineh mesusa' niat kareb ieh idi dengandeh? Na tu! Iamo' aconeh miak macing kareb deléi luk sikal ngaweh ineh miak lapen rat arangdeh, kareb ineh ideh mawa'.

¹⁶"Na luk idi seburur lemulun luk mubpul aceh kuyu' luk mon ku kibung luk mebaruh, ngaceku kali' rungen bubpul ineh medarak, ieh ineh kibung luk mebaruh ngedarak luk mon ineh, pad darakneh meluun rayeh peh.

¹⁷Idi na lemulun ngutang abpa' anggur luk mebaruh bang seréi' kubil luk mon, ngaceku seréi' kubil ineh mebila', idi abpa' anggur ineh mutat, idi seréi' ineh pana' mepau teh. Iamo' abpa' anggur luk mebaruh ruen lemulun bang seréi' kubil luk mebaruh, pad dueh-dueh ineh do'."

¹⁸Kareb Yésus pebala kudeng ini kuandeh, idi inan seburur lun rayeh lun Yahudi nacing idi netekeradung sembayang Neneh, keburineh, "Anakku luk decur pangeh naté; do' Iko amé' ngerareng tiku'Mu luun bururneh, pad ieh mulun."

¹⁹Idi Yésus nudur idi nemaya' neneh, idi anak-anak sekola'Neh nemaya' puetNeh.

²⁰Idi inan seburur decur luk mét mirat dara' pangeh pulu' dueh lak kinioneh inéh rat pa ketedNeh idi nengakem iring kuyu'Neh.

²¹Ieh nengerawé bang niatneh, "Kudeng ui ngakem kuyu'Neh mo, ui miak do' peh."

²²Yésus nelumi idi nenier neneh, kebalaNeh, "O anakKu, do' iko lutep niat, anumu pangeh nengedo' namu." Idi petacu decur ineh do' peh.

²³Idi kareb Yésus nacing bang ruma' lun rayeh ineh, idi nenier lemulun luk ngiup suling idi lemulun luk mula' ria',

²⁴idi kebalaNeh, "Buro muyuh, anak ini na naté, ieh rudap mo'." Idi ideh meriruh idi nesitunga Neneh.

²⁵Iamo' kareb pangeh lun mula' ineh icukNeh buro, Yésus nesemuet idi nengimet tiku'neh; idi anak decur ineh netumui.

²⁶Idi bala ratnan luk kudeng ineh nepiar macing libut-libut bawang ineh.

²⁷Yésus nenecan bawang ineh, idi kareb Ieh nenalan, inan dueh lun mebuser nemaya' Neneh, idi nengitang, kebala didueh, "O Anak Daud, mé' nekai!"

²⁸Idi kareb Ieh pangeh nesemuet bang ruma', lemulun luk mebuser ineh iné' matun Neneh. Idi kebala Yésus nedidueh, "Manuké medueh Ui melalud nganau' kekamen ini?" Idi kebala didueh, "Manu, Tuhan."

²⁹Idi Ieh nengakem mateh didueh, kebalaNeh, "Do' mangun kuan medueh mepad kudeng luk medueh pangeh manu."

³⁰Idi mateh didueh nekulat, idi Yésus neperiteteng tu-tu nedidueh, kebalaNeh, "Ngerawé do'-do', aleg mada' seburur lemulun pana' ratnan ini."

³¹Iamo' didueh neremuat, idi nemada' bala ratnan Yésus apud bawang ineh.

³²Idi kareb ideh nalan, idi ideh nenguit seburur lun mebegkeh luk sinuet ada' iné' matun Yésus.

³³Idi kareb ada' ineh tila' rat neneh, idi lun mebegkeh ineh nepebala; idi lun mula' ineh pana' mawa, keburideh, "Rat mon nateh kekamen luk kudeng ini sinier arang lun pupu Israil."

³⁴Iamo' kebala lun Parisi, "Ieh nala' ada' dengan lalud lun rayeh ada'."

³⁵Idi Yésus nenalan libut-libut amung-amung bawang idi ruma'. Idi Ieh nemada' bang amung-amung ruma' sembayangdeh, idi nemada' Bala luk Do' ratnan Imet ineh, idi nengedo' amung-amung lu mét, idi amung-amung laya' burur lemulun.

³⁶Iamo' kareb Ieh nenier nelun mula', Ieh méi' nedeh, ngaceku ideh mesusa' idi urap-urap kudeng dumba-dumba luk na lun matar.

³⁷Idi kebala Yésus nan anak-anak sekola'Neh, "Matu, mula' luk perinien, iamo' pawa' lun luk ngeranéh.

³⁸Do' mutuh ratnan Tuhan luk kuan perinien ineh, pelé Ieh ngecuk lemulun ngeranéh lati'Neh ineh."

Matius 10

¹Yésus nenawar pulu' dueh anak sekola'Neh amé matun Neneh, idi Ieh nemaré lalud nedeh pa luun ada'-ada', pad miak masut nedeh, idi pad ideh ngedo' amung-amung luk mét, idi amung-amung laya' burur lemulun.

- ²Ini ngadan pulu' dueh rasul: pun-pun Simun luk titen Pétrus, idi kinanakneh Andrias; Yakub Sabdi, idi Yahya kinanakneh;
- ³Pilipus, Bartolomius, Tomas, Matius luk ngamung rigit pupuk, Yakub Alpius, Tadius;
- ⁴idi Simun lun Selot, idi Yudas Iskariot luk nemasui Yésus.
- ⁵Yésus nengecuk pulu' dueh rasul ini,idi Ieh neperiteteng nedeh, kebalaNeh, "Aleg muyuh semuet bang bawang lun pupu baken, idi aleg semuet bang bawang-bawang Samaria.
- ⁶Iamo' do' muyuh amé' inan amung dumba luk neraruh ratnan lun pupu Israil.
- ⁷Amé' mada', kebala muyuh, 'Imet surga pangeh muneng.'
- ⁸Ngedo' lun luk mét, idi nui lun luk naté, ngeligan lun luk mét susud, idi masut amung-amung ada. Muyuh pangeh nengalap mo'-mo', idi do' muyuh maré mo'-mo' teh.
- ⁹Aleg muyuh nguit amas, pirak, idi usin bang kapil muyuh,
- ¹⁰idi luk inan balu' kareb nalan, idi dueh kuyu', kasut, idi rukud pana'. Ngaceku anid-anid lemulun luk ngakem petulu ngalap luk kenneh.
- ¹¹"Kareb muyuh semuet bang bawang idi bang ruma' iapeh-iapeh pana', do' muyuh nakap lemulun luk do' niat; idi mudeng dengandeh pad muyuh nalan.
- ¹²Kareb muyuh umak ruma', idi do' maré tabi' kuandeh.
- ¹³Idi kudeng lun luk bang ruma' ineh do' niat, do' maré peruan muyuh kuandeh, iamo' kudeng ideh na do' niat, nima' peruan muyuh ineh muli' amé' nemuyuh.
- ¹⁴Idi idé-idé luk ara' nganak nemuyuh, idi luk ara' ninger bala muyuh, kareb muyuh remuat rat bang ruma'deh idi bawangdeh, do' muyuh ngegkar abuh ratnan kukud muyuh.
- ¹⁵gerawé do'-do'! Meluun meran ukum bawang Sodom idi Gemora, kareb Aco Ngukum, ratnan bawang ineh.

¹⁶"Ngerawé do'-do'! Ui ngecuk nemuyuh kudeng dumba arang uned bungalé. Do' muyuh mileh mepad kudeng menipeh, idi do' niat mepad kudeng suit sukur.

¹⁷Matar do'-do'! Ngaceku muyuh miak barén lemulun bang besara', idi ideh sikal mebal nemuyuh bang ruma' sembayangdeh.

¹⁸Idi teh muyuh miak itendeh amé' besara' pa kiung lun luk ngimet idi raca'-raca' ngaceku Ui, pad muyuh mada' Bala luk Do' pa kiungdeh idi pa kiung lun pupu baken teh.

¹⁹Kareb muyuh itendeh amé' besara', aleg megagau ratnan kudeng apeh idi anun luk miak belén muyuh; ngaceku kareb ineh miak barén nemuyuh bala luk belén muyuh.

²⁰Ngaceku baken muyuh luk pebala, iamo' Roh Taman muyuh luk pebala lemaba bibir tang muyuh.

²¹"Kinanak miak maré kinanakneh pitayen, idi taman miak maré anakneh; anak-anak sikal metueh ratnan taman-tinandeh, pad ideh maré nedeh pitayen.

²²Muyuh miak inan amung-amung lemulun megateh ngaceku ngadanKu; iamo' lemulun luk tuman pad macing kekipedneh uen ngulun.

²³Kareb ideh ngedereh nemuyuh, bang aceh bawang, do' muyuh buro amé' inan bawang luk baken. Ui pebala nemuyuh, kareb nateh muyuh nesemuet bang amung-amung bawang libut-libut tana' Israil, Anak-Lemulun macing.

²⁴"Seburur anak sekola' na meluun rayeh ratnan guruneh, idi seburur demulun na meluun rayeh ratnan tuanneh.

²⁵Idi miak mo' kudeng anak sekola' ineh mepad dengan guruneh, idi kudeng demulun mepad dengan tuanneh. Kudeng ideh pangeh neneten tuan ruma' Balsebul, meluun teh ideh sikal ngedat anak itinneh.

²⁶"Aleg muyuh matot nan lemulun. Sebuleng pana' na luk idi luk melinged luk na miak uen ngegala', idi luk inapung luk na miak kali' lemulun.

- ²⁷Anun-anun luk Ui mala nemuyuh bang dacem, do' muyuh mala bang acang; idi luk pindenger muyuh ayek-ayek, do' muyuh mada' rat luun buduk ruma'.
- ²⁸Idi aleg matot nedeh luk ngaté burur mo', idi na melalud ngaté niat; iamo' do' muyuh matot nan Allah luk melalud ngaté niat idi burur pana' bang apui.
- ²⁹Suit pirit luk dueh pisuen lemulun aceh sin mo'. Iamo' sebuleng pana' na miak mebpeh luun tana', kudeng na pian Taman muyuh.
- ³⁰Iamo' abpuk luk luun uluh muyuh pangeh iniap.
- ³¹Ngaceku ineh, aleg muyuh matot, ngaceku muyuh meluun raga ratnan suit pirit luk mula'.
- ³²"Anid-anid lemulun luk ngamo Negku pa kiung lemulun. Ui pana' ngamo neneh pa kiung TamanKu luk bang surga.
- ³³Iamo' anid-anid lemulun luk ngalum Negku pa kiung lemulun, ieh pana' luminKu pa kiung TamanKu luk bang surga.
- ³⁴"Aleg ngerawé Ui pangeh nacing pad maré pedo' luun tana'; baken Ui nacing pad nguit pedo', iamo' aceh pelapet.
- ³⁵Ui nacing matad deléi ratnan tamanneh, idi decur ratnan tinanneh, idi iban ratnan ibanneh.
- ³⁶Idi lun bang ruma'neh mangun ku bunu'neh.
- ³⁷"Lemulun luk mawa inan taman idi tinanneh meluun ratnan Ui, na ieh mayu kuanKu; idi lemulun luk mawa inan anakneh luk deléi idi anakneh luk decur meluun ratnan Ui, na ieh mayu kuanKu.
- ³⁸Idi lemulun luk na maan salibneh idi maya' Negku, na ieh mayu kuanKu.
- ³⁹Lemulun luk ngerawé ulunneh sebuleng, na miak ngalap ulun luk matu; iamo' lemulun luk na ngerawé ulunneh sebuleng ngaceku Ui, ieh luk miak ngalap ulun luk matu.
- ⁴⁰"Lemulun luk nganak nemuyuh, ieh teh luk nganak Negku, idi lemulun luk nganak Negku, ieh teh luk nganak Neneh luk nengecuk Negku.

⁴¹Lemulun luk nganak seburur nabi ngaceku ieh nabi, ieh teh luk miak ngalap tabpar mepad kudeng nabi; idi lemulun luk nganak selemulun luk matu ngaceku ieh lemulun luk matu, ieh teh luk miak ngalap tabpar mepad kudeng selemulun luk matu.

⁴²Ngerawé do'-do'! Idé-idé luk maré aceh sangkir abpa' talang rupen seburur ratnan luk isuut ini, ngaceku ieh anak sekola'Ku, tabparneh na metutu'."

Matius 11

¹Kareb Yésus pangeh neperiteteng inan pulu' dueh anak sekola'Neh, idi Ieh nenalan rat déi' sikal mada' idi nated Bala luk Do' bang bawang-bawang luk muneng.

²Kareb Yahya luk Ngerereb neninger rat bang tutup ratnan amung-amung kekamen Keristus, idi ieh nengecuk anak-anak sekola'neh amé

³ngitun Yésus, keburideh, "Iko iniké luk miak macing ineh, kian petulu kai nginulat nelun baken lek?"

⁴Idi kebala Yésus, "Amé' muyuh idi mada' kuan Yahya ratnan anun-anun luk pindenger idi sinier muyuh,

⁵ieh ineh lun melun mebuser kulat mateh, lun meliai miak nalan, lun mét susud pangeh linigan, lun mebengel ninger, idi lun naté tinui peh, idi Bala luk Do' bida' kuan lun masi'.

⁶Samal kuan lemulun luk na mesabeng ngaceku Ui."

⁷Idi litaddeh nenalan, Yésus nengimun pebala kuan lun mula' ineh ratnan Yahya, kebalaNeh, "Anunké luk iné' muyuh sira' déi' su luk ali-ali? Selawa bulu'ké luk megio ku bui?

⁸Kian, anunké luk iné' muyuh sira'? Selemulun luk ngayung ku ayung luk do' saludké? Setuneh, lemulun luk ngayung ku ayung luk mesalud, ieh ineh mudeng bang ruma' raca'-raca'.

⁹Iamo' anunké punneh muyuh iné' déi'? Sikal nier aceh nabiké? Matu, Ui pebala nemuyuh, idi ieh selemulun luk meluun ratnan nabi.

¹⁰Ngaceku lawé Yahya pangeh inayud kudeng ini, "Sirun, Ui ngecuk lun dukenKu amé' pa kiungMu, ieh ineh luk nganau' temina' dalamMu pa kiungMu.'

¹¹Ngerawé do'-do'! Rat arang amung-amung lemulun, na luk idi seburur pana' luk meluun rayeh ratnan Yahya luk Ngerereb; iamo' luk isuut tu bang Iemt surga, ieh ineh luk meluun rayeh ratnan neneh.

¹²Idi rat kareb Yahya mada' macing nekini, Imet surga inaro lemulun, idi lemulun luk metueh nutun ngalap neneh.

¹³Amung-amung nabi idi Ukum Musa nemada' ratnan Imet ineh, pad acing Yahya ineh.

¹⁴Idi kudeng muyuh sikal ninger baladeh, Yahya ineh Elia luk macing maya' bala nabi.

¹⁵Lemulun luk inan lalid, do' ieh ninger.

¹⁶"Iamo' dengan anunké Ui miak maad inul luk bang kareb ini? Ieh ineh mepad kudeng anak-anak luk tudo déi' kadai, idi luk ngitang kuan lun dengandeh,

¹⁷kebaladeh, 'Kai pangeh nengiup suling kuan muyuh, idi na muyuh nengalai; idi kai pangeh temido, iamo' nateh muyuh nangi!'

¹⁸Yahya nacing dengan na kuman idi ngirup, idi kebaladeh, 'Teh sinuet ada.'

¹⁹Anak-Lemulun nacing dengan kuman idi ngirup, idi kebaladeh, 'Siruh, selemulun luk manga, idi luk ngirup anggur, Ieh perurum dengan lemulun luk ngamung usin pupuk idi lun mesala' teh.' Iamo' buah'-buah'neh ngegala' ratnan ileh Allah ineh matu."

²⁰Idi Yésus nengimun remasang kuan bawang-bawang, su luk inanNeh pangeh nenganau' mula' kekamen luk melalud, ngaceku ideh na uren, kebalaNeh,

²¹"Mesusa' kuanmu Korasin! Mesusa' kuanmu Baitsaida! Ngaceku kudeng kekamen luk melalud pangeh inau' bang Sur idi Sidon, kudeng luk pangeh inau' bang nemedueh, kali' rungen ideh pangeh nacung idi nuren mon.

²²Ngerawé do'-do'! Kareb Aco Ngukum, Allah méi' nelun Sur idi Sidon meluun ratnan medueh.

²³Idi iko, O Kapernaum, pian uen ngedita' macing langit? Iamo' iko miak temurun macing inan até', ngaceku kudeng kekamen luk melalud luk inau' bang namu pangeh inau' déi' bawang Sodom, kali' rungen ieh idi macing aco sini.

²⁴Ngerawé do'-do'! Kareb Aco Ngukum, Allah méi' nelun Sodom meluun ratnan iko."

²⁵Kareb idi teh kebala Yésus, "O Ama', Tuhan langit idi tana', Ui ngubur Namu ngaceku Iko nengalum amung-amung ini ratnan lemulun luk mileh idi luk do' kali', idi nengegala' ineh kuan anak-anak.

²⁶Mo, Ama', ngaceku ineh luk petulu pa kiungMu.

²⁷"TamanKu pangeh nemaré Negku luk amung-amung idi seburur pana' na miti Anak, iamo' Taman mo', idi seburur pana' na miti Taman, iamo' Anak mo', idi teh lemulun luk pinili' Anak, ieh luk miak badénNeh ratnan Allah.

²⁸"Amé' Negku, amung-amung muyuh luk ngakem idi luk mabeh luk meberat, idi Ui ngato erur muyuh.

²⁹Do' muyuh ngalap paga'Ku idi sibada' rat Negku, ngaceku Ui mulai niat idi mebeneh niat, idi erur muyuh miak uen ngato.

³⁰Ngaceku paga'Ku malé idi babehKu meran teh."

Matius 12

¹Kareb ineh teh Yésus nenalan lemaba lati'-lati' bang Aco luk inan Mudeng. Idi anak-anak sekola'Neh pana' melau, idi ideh nengalap runguh padé ineh, idi ideh nekuman ineh.

- ²Kareb lun Parisi nenier luk kudeng ineh, idi kebaladeh kuan Yésus, "Siruh, anak-anak sekola'Mu nganau' luk bibpeng kareb Aco luk inan Mudeng."
- ³Iamo' kebala Yésus, "Naké muyuh nemaca' luk inau' Daud idi lun danganneh kareb ideh melau?"
- ⁴Ieh nesemuet bang Ruma' Allah, idi nekuman ruti luk biré kuan Allah, sagan pana' bibpeng na kenendeh. Imam-imam mo' luk miak kuman ineh.
- ⁵Naké muyuh nemaca' bang Ukum Musa, kudeng apeh lun imam-imam, kareb Aco' luk inan Mudeng, semuet bang Ruma' Allah idi ngelaba ukum ratnan Aco luk inan Mudeng, idi na ideh mesala'?
- ⁶Ui pebala nemuyuh, inan Sebuleng tungé' luk meluun rayeh ratnan Ruma' Allah.
- ⁷Bang Surat Allah pangeh inayud, 'Idi luk pianKu ineh éi', baken pung luk kereten.' Kudeng muyuh pangeh nekali' ilungneh, kali' rungen muyuh na nengukum lemulun luk na mesala'.
- ⁸Ngaceku Anak-Lemulun luk Tuhan pa luun Aco luk inan Mudeng."
- ⁹Yésus nenecan bawang ineh, idi nesemuet bang aceh ruma' sembayang.
- ¹⁰Idi Ieh nenier aceh lemulun luk pangeh naté selipa ticu'neh; idi ideh nengitun Neneh, keburideh, "Naké bibpeng na ngedo' lemulun bang Aco luk inan Mudeng?" pelé ideh miak ngadu' Neneh.
- ¹¹Idi kebala Yésus, "Idéké rat arang muyuh luk inan sebuleng dumba, idi kudeng dumba ineh mebbeh bang lubang kareb Aco luk inan Mudeng, naké ieh sikal ngalap neneh rat bang lubang ineh?"
- ¹²Lemulun meluun meraga ratnan sebuleng dumba! Ngaceku ineh na bibpeng nganau' luk do' bang Aco luk inan Mudeng."
- ¹³Idi kebala Yésus kuan lemulun ineh, "Natang ticu'mu." Idi ieh nenatang ticu'neh, idi ticu'neh do' peh, mepad kudeng ticu'neh selipa.
- ¹⁴Iamo' lun Parisi ineh neburo, idi ideh nepegayam pian ngaté Yésus.

- ¹⁵Idi kareb Yésus nekali' piandeh, Ieh neburo rat déi'. Idi mula' lemulun nemaya' puetNeh, idi Ieh nengedo' amung-amungdeh.
- ¹⁶Idi Ieh neperiteteng nedeh, pad ideh na mada' ratnan kekamenNeh,
- ¹⁷pad ngacing luk bila Nabi Yesaya, kebalaneh,
- ¹⁸"Ini demulun luk pangeh pinili'Ku, Ieh luk inanKu mawa, idi Ui mawang niat Neneh. Ui sikal maré RohKu tudo luunNeh, idi Ieh sikal mada' ukum kuan amung-amung lun pupu baken.
- ¹⁹Na Ieh sikal pesaad idi ngitang, na Ieh mada' dengan rayeh tang luun anid-anid dalan.
- ²⁰Na Ieh sikal mutut bulu' luk pekuyut, idi ngilep sibabu luk uned merabpun. Ieh ngakem pad macing luk matu ruen metueh;
- ²¹idi amung pupu miak merapet Neneh.”
- ²²Idi ideh nenguit seburur lemulun luk sinuet ada' luk mebuser idi mebegkeh amé' matun Yésus. Idi Yésus nengedo' neneh, pad lun mebegkeh ineh pebala idi nier teh.
- ²³Idi lun mula' ineh mawa, keburideh, "Naké ini Anak Daud?”
- ²⁴Kareb lun Parisi neninger bala ini, keburideh, "Lemulun ini nala' ada' ku lalud Balsebul, lun rayeh ada' ineh.”
- ²⁵Yésus nekali' terawédeh, idi kebalaNeh nedeh, "Anid-anid bawang luk sikal metueh sebuleng ratnan sebuleng, musag peh; idi anid-anid ruma' idi tetek ruma' luk sikal metueh sebuleng ratnan sebuleng, na ieh miak tuped.
- ²⁶Idi kudeng Sétan nala' Sétan, ieh sikal metueh ratnan bururneh sebuleng; idi kudeng apehké imetneh miak tuped?
- ²⁷Idi kudeng Ui nala' ada' ku lalud Balsebul ineh, ku lalud idéké anak-anak muyuh nala' nedeh? Ngaceku ineh ideh miak ngegala' sala' muyuh.
- ²⁸Ui nala' ada' ku lalud Roh Allah. Idi megala' Imet Allah pangeh nacing nemuyuh.

- 29"Seburur lemulun pana' na miak semuet bang ruma' lemulun luk metueh, pad mano binawehneh, kudeng ieh na ngaling lemulun luk metueh ineh atun. Pangeh ineh idi teh ieh miak mano binaweh luk bang ruma'neh ineh.
- 30"Lemulun luk na perurum Negku, ieh sikal metueh rat Negku, idi lemulun luk na ngamung denganKu, ieh ineh luk matad peh.
- 31"Ui pebala nemuyuh, anid-anid sala' idi kuyo lemulun miak inan maré do', iamo' nguyo Roh ineh na tu-tu miak inan maré do'.
- 32"Idi idé-idé luk nguyo Anak-Lemulun miak teh ngalap do', iamo' idé-idé luk nguyo Roh Meligan, na tu-tu miak ngalap do', do' bang tana' ini, idi bang kareb luk macing mucu teh.
- 33"Kudeng kayuh ineh titen do', idi bua'neh pana' do'; kudeng kayuh ineh titen dat idi bua'neh pana' dat teh; ngaceku tau miti kayuh ratnan bua'neh.
- 34"O muyuh menipeh, kudeng apehké muyuh miak pebala luk do', kudeng muyuh sebuleng luk dat? Ngaceku ela ratnan niat lemaba bibir tangneh.
- 35"Lemulun luk do' ngeruat anun-anun luk do' ratnan binaweh luk do', idi lemulun luk dat ngeruat anun-anun luk dat ratnan binaweh luk dat.
- 36"Ui pebala nemuyuh, kareb Aco Ngukum, lemulun miak mabeh anid-anid bala luk mo'-mo' luk remuat rat bang tangdeh.
- 37"Ngaceku ratnan balamu iko miak ruen matu, idi ratnan balamu iko miak kumin teh."
- 38"Kareb ineh teh inan tuda'-tuda' guru Ukum idi lun Parisi luk nepebala, "O Guru, kai sikal nier aceh tanu' rat Namu."
- 39"iamo' kebala Yésus, "Inul luk dat idi luk na lutep nakap aceh tanu', iamo' na tanu' barén nedeh, iamo' tanu' Nabi Yunus mo'.
- 40"Ngaceku mepad kudeng Yunus netudo teluh aco idi teluh dacem kinioneh bang batek lawid rayeh, kudeng ineh teh Anak-Lemulun miak tudo bang lubang tana' teluh aco idi teluh dacem kinioneh.

⁴¹Lemulun rat bawang Ninewé sikal tumui kareb Aco Ngukum peranga' dengan inul ini, idi ideh miak ngesala' inul ini, ngaceku ideh nuren ngaceku ratnan bada' Yunus; idi inan tungé' Seburur Lemulun luk meluun rayeh ratnan Yunus.

⁴²Idi Raca' Decur rat tana' pa kabing busat aco sikal tumui kareb Aco Ngukum peranga' dengan inul ini, idi ieh miak ngesala' inul ini; ngaceku ieh nacing rat iring tana' sikal ninger ratnan ileh Selimun; idi inan tungé' Seburur Lemulun luk meluun rayeh ratnan Selimun!

⁴³"Iamo' ada', kareb ieh pangeh neremuat ratnan lemulun, idi ieh nalan lemaba su luk na abpa', idi nakap luk inanneh ucu', iamo' na luk idi.

⁴⁴Idi keburineh, 'Ui sikal muli' amé' ruma'ku, ieh ineh luk inanku neremuat atun.' Idi kareb ieh macing ieh kali' ruma'neh na uang, idi pangeh inapuh, idi inau' temina'.

⁴⁵Idi ieh amé' ngalap tudu' ada' luk baken teh denganneh, ieh ineh luk meluun dat ratnan ieh, idi ideh semuet idi tudo déi' idi ratnan lemulun luk sinuet ineh, kekipedneh mangun meluun dat ratnan luk pun-pun. Kudeng ineh teh luk mangun mucu kuan inul luk dat ini."

⁴⁶Uned Yésus pebala nelun mula', tinanNeh idi kinanak-kinanakNeh netuped déi' liang ruma', sikal pebala Neneh.

⁴⁷Kebala seburur lemulun Neneh, "Siruh, tinan idi kinanak-kinanakMu tuped déi' liang ruma', idi ideh sikal pebala Namu."

⁴⁸Iamo' kebala Yésus, "Idéké luk tinanKu? Idi idéké luk kinanak-kinanakKu?"

⁴⁹Idi Ieh nenatang ticu'Neh idi nicul anak-anak sekola'Neh, kebalaNeh, "Siruh, tinanKu idi kinanak-kinanakKu.

⁵⁰Ngaceku idé'-idé luk nganau' luk pian TamanKu luk bang surga, ieh luk kinanakKu deléi, idi kinanakKu decur idi tinanKu teh."

Matius 13

¹Kareb aco sineh, Yésus neremuat rat bang ruma' ineh idi netudo tangeb Takung Galilia.

²Idi pelaba ula' lemulun nepamung iné' Neneh, pad Ieh netemaleb bang aceh alud idi netudo, idi lun mula' netuped tangeb abpa'.

³Idi Ieh nemada' nedeh dengan luk pinginud. KebalaNeh, "Inan selemulun luk iné' ngisak padé pimara.

⁴Idi kareb ieh nengisak, sebuang ilung padé nebpeh iring dalan, idi suit-suit nacing idi nekuman ilung ineh.

⁵Inan teh luk nebpeh luun tana' luk metekura', luk masi' tana'neh, idi petacu ilung ineh temubu' ngaceku tana'neh na medalem.

⁶Kareb mét idang idi ieh mekarang peh. Ngaceku ieh na uat, ieh petacu melayuh.

⁷Idi inan teh luk nebpeh arang tabpa', idi tabpa' ineh pana' netemubu', idi libutneh mapet pad ieh na mulun.

⁸Iamo' inan teh luk nebpeh luun tana' luk mebaleng, pad ieh nengeruat bua', sebuang meratu ula'neh, idi sebuang anem ngepulu' ula'neh, idi sebuang teluh ngepulu' ula'neh.”

⁹Idi kebala Yésus, "Lemulun luk inan lalid, do' ieh ninger!”

¹⁰Idi anak-anak sekola' Yésus iné' Neneh, kebaladeh, "Ngudeh Iko mada' nedeh dengan luk pinginud?”

¹¹Idi kebala Yésus, "Tuhan pangeh nemaré nemuyuh do' kali' ratnan luk inalum ratnan Imet surga, iamo' na Ieh nemaré kuandeh.

¹²Ngaceku idé-idé luk inan anun-anun, idi kuanneh miak barén teh, idi ieh miak ngalap dengan mela; iamo' idé-idé luk na luk idi anun-anun, idi rat neneh teh miak lapen anun-anun luk ieh kuan.

¹³Ngaceku ineh Ui mada' nedeh dengan luk pinginud; ngaceku sagan pana' ideh nier, na ideh nier, idi sagan pana' ideh ninger, na ideh ninger, idi na ideh kali' ilungneh.

¹⁴Idi bala Nabi Yesaya pangeh nacing nedeh, keburu'neh, 'Muyuh miak ninger idi ninger, iamo' muyuh na kali' ilungneh. Muyuh miak nier idi nier, iamo' na muyuh kali' luk siren muyuh.

¹⁵Ngaceku lemulun ini na mileh ngerawé; laliddeh musam ninger, idi matehdeh medacep. Kudeng na pieh kudeng ineh, ideh nier dengan matehdeh idi ninger dengan laliddeh, idi do' kali' bang niatdeh, idi ideh lumi Negku, kebala Allah, pad Ui miak ngedo' nedeh.'

¹⁶"Iamo' samal kuan muyuh, ngaceku mateh muyuh nier, idi lalid muyuh ninger.

¹⁷Ngerawé do'-do', mula' nabi idi lemulun luk matu geregan nier luk siren muyuh, idi na ideh nenier neneh; idi ninger luk pedingeren muyuh ineh, iamo' na ideh neninger ineh.

¹⁸"Do' muyuh ninger pinginud lun luk ngisak padé pimara.

¹⁹Kareb lemulun ninger bala ratnan Imet ineh, idi na kali' ilungneh, idi petacu Seluk Dat macing, idi ngaro padé pimara luk pangeh inisak bang niatneh, ini ieh luk inisak iring dalan.

²⁰Iamo' luk inisak luun tana' luk metekura', ieh ineh lemulun luk ninger bala idi petacu ngalap neneh dengan mawang niat.

²¹Iamo' na luk idi uat bang bururneh sebuleng, idi ieh tuman segageh mo'. Idi kareb susa' idi dereh macing ngaceku bala ineh, petacu ideh lemubed.

²²Idi luk inisak arang tabpa', ieh ineh lemulun luk ninger bala ineh; idi rapang luk ratnan tana' ini, idi saluk ratnan mula' binaweh, nebpek bala ineh, pad ieh na kebua'.

²³Idi luk inisak luun tana' mebaleng, ieh ineh lemulun luk ninger bala, idi do' kali' ilungneh; idi ieh kebua' idi ngeruat mula' uli', sebuang meratu ula'neh, sebuang anem ngepulu' ula'neh, idi sebuang teluh ngepulu' ula'neh."

²⁴Yésus nemada' kuandeh aceh luk pinginud luk baken teh, kebalaNeh, "Imet surga mepad kudeng selemulun luk nengisak padé pimara luk do' bang lati'neh.

²⁵Iamo' kareb lemulun rudap, bunu'neh nacing idi nengisak bua' budud arang padé ineh, idi neburo peh.

²⁶Iamo' kareb padé ineh mulun idi kebua', budud ineh pana' melagan teh.

²⁷Idi demulun-demulunneh nacing idi pebala kuan tuan luk kuan lati' ineh, 'Tuan, naké iko nengisak padé pimara luk do' bang lati'mu? Rat iapehké budud ineh lek?'

²⁸Idi kebalaneh nedeh, 'Ini kekamen bunu!' Idi kehuri' demulunneh neneh, 'Sikalké iko kai amé' mubpun budud ineh?'

²⁹Idi kebalaneh nedeh, 'Aganeh, ngaceku kian kareb muyuh mubput budud ineh padé ineh pana' meubput teh meperapu denganneh.

³⁰Do' nima' dueh-duehneh mulun pad macing kareb ngeranih. Idi kareb ngeranih ui sikal ngecuk nelun luk ngeranih mubput amung-amung budud atun idi ngangel neneh idi ngeseb neneh, iamo' padé ineh uen ngamung bang lepoku.' “

³¹Yésus nemada' aceh luk pinginud luk baken teh kuandeh, kebalaNeh, "Imet surga mepad kudeng aceh ngilung sesawi' luk ilap seburur lemulun idi inisak luun lati'neh.

³²Ilung sesawi' ineh meluun isuut ratnan amung-amung ilung luk baken, iamo' kareb ieh mulun ieh meluun rayeh ratnan amung-amung irin. Idi ieh mangun ku aceh lawa kayuh pad suit-suit rat arang gawa' macing idi ngarar luun angkat-angkatneh.”

³³Yésus nemada' nedeh aceh pinginud luk baken teh, "Imet surga mepad udeng lamud, luk ilap seburur decur idi rirengneh bang teluh uad banak pad amung-amungneh mepuar peh.”

³⁴Amung bala ini bila Yésus nelun mula' dengan luk pinginud mo'. Idi na Ieh nepebala anun-anun kuandeh baken ratnan luk pinginud,

³⁵pad ngacing luk bila nabi, kebalaneh, "Ui sikal ngukab tangKu dengan luk pinginud; Ui sikal mada' ratnan luk inapung rat pun tana' ini pinudut."

³⁶Pangeh ineh Yésus nenecan lun mula', idi nesemuet bang ruma'. Idi anak-anak sekola'Neh iné' Neneh,keburi'deh, "Mada' nekai ratnan ilung pinginud budud luk bang lati' ineh."

³⁷Idi kebala Yésus, "Ieh luk nengisak ilung luk do' ineh, ieh ineh pinginud Anak-Lemulun.

³⁸Idi lati', ieh ineh pinginud tana' ini. Idi ilung luk do', ieh ineh pinginud anak-anak Imet ineh. Idi budud, ieh ineh pinginud anak-anak Luk Dat ineh;

³⁹idi bunu' luk nengisak budud, ieh ineh pinginud Iblis; idi kareb ngeranah, ieh ineh pinginud kareb kekiped tana' ini; idi lun ngeranah, ieh ineh pinginud melaikat-melaikat.

⁴⁰Mepad kudeng budud ineh pangeh pimung idi iseb ku apui, kudeng ineh teh kareb kekiped tana' ini.

⁴¹Anak-Lemulun sikal ngecuk melaikat-melaikatNeh, idi ideh miak mubput amung-amung luk ngesabeng ratnan ImetNeh, dengan amung-amung lemulun luk ngakem luk dat.

⁴²Idi ideh sikal nala' nedeh bang tetel apui. Su ineh lemulun tangi'-tangi' idi pekatep lipen.

⁴³Kareb ineh amung-amung lemulun luk matu miak merasat kudeng mateh aco bang Imet Tamandeh. Lemulun luk inan lalid, do' ieh ninger!

⁴⁴"Imet surga mepad kudeng aceh binaweh luk meraga luk inapung bang tana', luk ilap lemulun idi ieh nengapung neneh teh. Ngaceku ieh pelaba awang niat, idi ieh nemasui amung-amung luk ieh kuan, idi iné' melih tana' ineh.

45"Idi teh Imet surga mepad kudeng seburur lemulun luk pepua' luk nakap bau mutiara luk do'.

46Kareb ieh nengalap aceh ngilung bau mutiara luk meraga ineh, idi ieh iné' idi nemasui amung-amung luk ieh kuan idi nemelih bau ineh.

47"Idi teh Imet surga mepad kudeng aceh rabat teh, luk pipet bang abpa' rayeh, pad ngalap raput-raput lawid.

48Kareb rabat ineh mepanu', ideh ngeruid neneh macing tangeb abpa'; idi ideh tudo mili', ieh ineh luk do' ruendeh bang buandeh, iamo' luk dat talandeh.

49Kudeng ineh teh kareb kekiped tana' ini: amung-amung melaikat remuat amé' matad lun luk dat ratnan lemulun luk matu,

50idi nala' nedeh bang tetel apui. Su ineh lemulun tangi'-tangi' idi pekatep lipen."

51Kebala Yésus nedeh, "Pangehké muyuh kali' amung-amung ilung ini?" Kebaladeh Neneh, "Mo, kali'."

52Idi kebalaNeh nedeh, "Ngaceku ineh anid-anid guru Ukum luk pangeh mangun ku anak sekola' ratnan Imet surga, mepad kudeng aceh tuan ruma' luk ngeruat ratnan binawehneh luk meraga, do' binaweh luk mebaruh idi luk mon pana'."

53Idi pangeh Yésus nemada' nedeh ratnan luk pinginud-pinginud ini idi Ieh nenalan rat déi',

54idi nuli' iné' bawangNeh sebuleng. Ieh nemada' nedeh bang ruma' sembayangdeh pad macing ideh mawa, keburideh, "Rat iapehké lemulun ini nengalap ilehNeh? Siruh, kekamenNeh ini luk melalud teh!

55Bakenké Ieh ini anak lun ngakem kayuh? Bakenké tinanNeh luk ngadanneh Mariam, idi kinanak-kinanakNeh Yakub, Yusup, Simun, idi Yudas?

56Idi kinanak-kinanakNeh luk decur pana', bakenké ideh idi dengan tau tungé'? Rat iapeh Ieh nengalap amung ileh ini lek?"

⁵⁷Idi ideh nesabeng ku Ieh. Kebala Yésus nedeh, "Seburur nabi kali' rungen ruen ngedita', iamo' bang bawangneh idi ruma'neh sebuleng na lun ngedita' neneh."

⁵⁸Idi su ineh na Ieh nenganau' mula' kekamen luk melalud ngaceku ideh na manu.

Matius 14

¹Kareb ineh Herodés, raca' Galilia ineh neninger bala ratnan Yésus.

²Idi keburu'neh nelun tarehneh, "Ini Yahya luk Ngerereb, ieh pangeh netumui rat arang lun naté; ini punneh inan lalud luk kudeng ini ngakem bang bururneh."

³Ngaceku Herodés pangeh nengakem idi nengaling idi nenutup Yahya atun, ngaceku ratnan Herodia, awan Pilipus luk kinanakneh.

⁴Ngaceku Yahya megéi' mada' ni Herodés, "Bibpeng kuanmu na miak ngalap decur ineh ku awanmu."

⁵Herodés sikal ngaté ni Yahya, iamo' ieh matot nelun mula', ngaceku ideh manu Yahya ineh aceh lun nabi.

⁶Iamo' kareb nacing aco irau, ieh ineh aco Herodés tinganak, idi anak decur Herodia nengalai arang lemulun, idi ieh nengawang niat Herodés,

⁷pad Herodés nepebulung idi nepejani' maré anun-anun luk pitueneh.

⁸Idi ngaceku tinanneh nengubuk neneh, kebala anak decur ineh, "Do' maré kuanku uluh Yahya luk Ngerereb ineh bang aceh bigan."

⁹Idi raca' mesusa' niat; iamo' ngaceku bulungneh idi lemulun luk netudo kuman denganneh, ieh nengecuk nedeh maré ineh neneh.

¹⁰Idi ieh nengecuk nedeh amé' ngaleb uluh Yahya déi' bang tutup.

¹¹Idi uluh Yahya inuitdeh bang bigan, idi biré kuan anak decur ineh, idi ieh nenguit neneh amé' inan tinanneh.

- ¹²Idi anak-anak sekola' Yahya iné' ngalap butungneh, idi ideh nenanem neneh, idi ideh iné' mada' Yésus.
- ¹³Kareb Yésus neninger baladeh, idi Ieh neburo rat déi' maya' aceh alud amé' su luk ali-ali. Idi kareb lun mula' neninger ratnan ineh, ideh nenecan bawangdeh maya' tana' luun idi nemaya' Neneh.
- ¹⁴Idi kareb Yésus neremuat Ieh nenier pelaba ula' lemulun, idi Ieh méi' nedeh, idi nengedo' lemulun luk mét arangdeh.
- ¹⁵Idi kareb malem aco, anak-anak sekola' ineh iné' Neneh, keburideh, "Su ini mali tu, idi aco pana' pangeh macep do' ngecuk lun mula' ini amé' bang bawang-bawang, pad ideh melih luk kenen kuandeh."
- ¹⁶Iamo' kebala Yésus nedeh, "Na ulek ideh nalan; do' muyuh maré nedeh kuman."
- ¹⁷Idi kebaladeh Neneh, "Na luk kenen kai ieni, iamo' inan limeh balad ruti idi dueh lawid mo'."
- ¹⁸Idi kebala Yésus nedeh, "Do' nguit ineh amé' Negku."
- ¹⁹Idi Ieh nengecuk lun mula' ineh tudo luun uduh; idi Ieh nengalap ruti luk limeh balad, idi dueh lawid ineh, idi Ieh netengook déi' langit, idi nesembayang. Idi Ieh nemuri'-muri' ruti ineh, idi nemaré ineh kuan anak-anak sekola'Neh, idi ideh nenganid ineh kuan lun mula'.
- ²⁰Idi amung-amungdeh nekuman pad ideh mebor. Idi ideh nengamung tecehneh, pad panu' pulu' dueh ngebuan.
- ²¹Idi amungdeh luk nekuman ineh lélé limeh ngeribu deléi, idi inan teh decur-decur idi anak-anak.
- ²²Idi petacu Yésus nengecuk anak-anak sekola'Neh temaleb bang alud, idi amé' dipar pa atunNeh, laba' Ieh ngecuk lun mula' ineh muli'.
- ²³Pangeh Ieh nengecuk lun mula' ineh muli', idi Ieh iné' luun pegkung sikal sembayang. Idi kareb malem aco, Ieh netudo déi' buleng-buleng.

- ²⁴Iamo' alud ineh pangeh nacing inan uned abpa', idi ieh mekibing ku ribut; ngaceku bui nengeluut neneh.
- ²⁵Kareb malé macang, idi Yésus iné' nede, nalan maya' luun abpa' rayeh ineh.
- ²⁶Kareb anak-anak sekola'Neh nenier Neneh nalan luun abpa' rayeh ineh, idi ideh megagap, keburideh, "Ada' ini!" Idi ideh nengitang ngaceku pelaba tot.
- ²⁷Iamo' petacu Yésus nepebala nede, kebalaneh, "Aleg merapang! Ui ini, aleg matot."
- ²⁸Idi kebalaneh Pétrus, "Tuhan, kudeng matu ineh iko, nawar negku amé' Namu maya' luun abpa'."
- ²⁹Idi kebalaneh Yésus, "Do' iko amé'." Idi Pétrus neremuat rat bang alud idi nenalan luun abpa' iné' Neneh.
- ³⁰Iamo' kareb ieh kali' barui, ieh matot; idi ieh lélé petarem bang abpa', idi ieh nengitang, kebalaneh, "O Tuhan, ngulun negku!"
- ³¹Idi petacu Yésus nenatang ticu'Neh, idi nengimet neneh, idi nepebala neneh, "O iko luk na petap anu, ngudeh iko merapang?"
- ³²Idi pangeh didueh netemaleb bang alud ineh barui ineh pana' nugka' peh.
- ³³Idi anak sekola' Yésus luk bang alud ineh netekeradung sembayang Neneh, kebalaneh, "Matu, Iko Anak Allah."
- ³⁴Idi ideh neguta, idi nacing déi' tana' Genésaret.
- ³⁵Kareb lun luk bang bawang ineh nengiti Yésus, idi ideh nengecuk lemulun amé' libut-libut bawang ineh, pad ideh nenguit amung-amung lemulun luk mét amé' Neneh.
- ³⁶Idi ideh nemutih Neneh maré nede ngakem iring kuyu'Neh mo' idi idé-idé luk ngakem Neneh, ieh miak do' peh.

Matius 15

- ¹Kareb ineh inan lun Parisi idi guru-guru Ukum rat Yerusalim, luk iné' matun Yésus, keburideh,
- ²"Ngudehke anak-anak sekola'Mu ngelaba bada' tepun tau? Na ideh maru' ticu'deh maya' adat tau kareb nateh ideh kuman."
- ³Idi kebala Yésus, "Ngudeh muyuh pana' ngelaba ukum Allah ngaceku bada' tepun muyuh?"
- ⁴Ngaceku kebala Allah, 'Ngedita' taman-tinanmu,' idi teh, 'Lemulun luk ngedat tamanneh idi tinanneh, do' ieh pitayeh.'
- ⁵Iamo' keburideh muyuh, 'Idé-idé luk pebala kuan tamanneh idi tinanneh, Anun-anun luk inan ulek kuan medueh rat negku, pangeh biré kuan Allah,'
- ⁶idi na ulekneh ieh ngedita' tamanneh teh. Idi muyuh pangeh nengebeneh ukum Allah ngaceku bada' tepun muyuh.
- ⁷O muyuh lun luk siayu! Matu luk bila Yesaya ratnan muyuh, kebalaneh,
- ⁸Pupu ini ngedita' Negku ku bibir tangdeh, Iamo' niatdeh mado rat Negku.
- ⁹Mo'-mo' mo' lemulun ini sembayang Negku, ngaceku ideh mada' ukum-ukum ratnan bada' lemulun.' "
- ¹⁰Idi Yésus nenawar lun mula' amé' matun Neneh, idi nepebala kuandeh, "Ninger, pad muyuh kali' ilungneh.
- ¹¹Baken luk semuet bang tang luk ngelutak lemulun, imao' luk remuat rat bang tangneh, ieh ineh luk ngelutak lemulun."
- ¹²Idi anak-anak sekola' ineh iné' Neneh, idi keburideh Neneh, "Kali'Mu lun Parisi nesabeng kareb ideh neninger bala Midi?"
- ¹³Iamo' Yésus nengor baladeh, keburideh, "Anid-anid tibu luk na tinibu TamanKu bang surga, ieh miak bebuten peh.
- ¹⁴Aganeh lemulun ini, ngaceku ideh lun nguyut luk mebuser, idi kudeng lun mebuser nguyut lun mebuser, kali' rungen didueh miak mebepéh bang lubang."

- ¹⁵Idi Pétrus nengor balaNeh, keburineh, "Mada' nekai ratnan ilung luk pinginud ineh."
- ¹⁶Idi keburineh, "Macing nekini pana' naké muyuh petap terawé teh?"
- ¹⁷Naké muyuh kali' anun-anun luk semuet bang tang petacu amé' bang batek, idi talan bang temaba'.
- ¹⁸Iamo' amung-amung luk remuat rat bang tang lemulun, ieh ineh remuat rat bang niatneh; idi ieh ineh luk ngelutak lemulun.
- ¹⁹Ngaceku rat bang niat remuat teruayen luk dat, ngaté, pasét, mesawa', mano, mebalih, nguyo.
- ²⁰Amung-amung kekamen ini luk ngelutak lemulun, iamo' kuman ku ticu' luk na biru', na miak ngelutak lemulun."
- ²¹Idi Yésus neremuat rat bawang ineh idi iné' bang babpat luk muneng ku Sur idi Sidon.
- ²²Idi seburur decur lun Kanaani iné' ratnan babpat tana' ineh idi nengitang, keburineh, "O Tuhan, O Anak Daud, méi' negku; ngaceku anakku luk decur pelaba dereh ngaceku ieh sinuet ada'."
- ²³Iamo' Yésus na nengor aceh bila' balaneh pana'. Idi anak-anak sekola'Neh iné' mutuh Neneh, kebaladeh, "Ngecuk neneh buro ngaceku ieh ngitang-ngitang maya' puet tau."
- ²⁴Idi kebala Yésus, "Na Ui icuk amé' kuan lun baken, iamo' kuan dumba-dumba luk netutu' ratnan pupu lun Israil mo'."
- ²⁵Iamo' decur ineh nacing idi netekeradung pa kiungNeh, keburineh, "O Tuhan, nengan negku."
- ²⁶Idi kebala Yésus, "Na do' ngalap ruti ratnan anak-anak barén kuan uko'."
- ²⁷Iamo' keburineh decur ineh, "Matu, Tuhan, iamo' uko' pana' kuman areg-areg luk nebpeh ratnan méja tuandeh."
- ²⁸Idi kebala Yésus neneh, "O decur, anumu rayeh tu-tu. Miak mangun kuanmu kudeng luk pianmu." Idi petacu anakneh dino' peh.

²⁹Idi Yésus nenalan rat déi', idi nacing muneng ku Takung Galilia; idi Ieh numak luun pegkung idi netudo déi'.

³⁰Idi pelaba ula' lemulun iné' Neneh, idi ideh nenguit lun meliai, lun mebuser, lun mebegkeh, lun mepueg, idi mula' lun baken teh, idi ideh nengerareng nedeh iring kukudNeh, pad Ieh nengedo' amungdeh ineh.

³¹Lun mula' ineh mawa, kareb ideh nenier lun mebegkeh pebala-pebala, lun mepueg do', lun meliai nalan do'-do', idi lun mebuser nier peh; idi ideh nengerayeh Allah lun Israil.

³²Yésus nenawar anak-anak sekola'Neh amé' Neneh, kebalaNeh, "Ui méi' nelun mula' ini, ngaceku pangeh teluh aco ideh tudo denganKu idi na luk kenendeh; idi ara' Ui ngecuk nedeh muli' kudeng ideh melau, ngaceku kian ideh melepu arang dalam lek."

³³Idi kebala anak-anak sekola'Neh Neneh, "Rat iapehké tau miak ngalap petap ruti tungé' su luk ali-ali kuan lemulun luk kinula' ini?"

³⁴Idi kebala Yésus nedeh, "Tuda' ruti luk idi nemuyuh?" Idi keburideh, "Tudu' balad, idi sesuut lawid luk medari."

³⁵Idi Yésus nengecuk lun mula' tudo luun tana'.

³⁶Idi Ieh nengalap ruti luk tudu' balad idi lawid ineh, idi Ieh nemaré ubur kuan Allah idi nemuri'-muri' neneh, idi nemaré kuan anak-anak sekola' ineh, idi ideh nenganid kuan lun mula' ineh.

³⁷Idi amungdeh ineh nekuman pad ideh mebor. Idi ideh nengamung tecehneh, panu' tudu' ngebuan.

³⁸Idi kinula' deléi luk nekuman ineh apat ngeribu, idi inan teh decur idi anak.

³⁹Idi Yésus nengecuk lun mula' ineh muli' idi Ieh netemaleb bang alud, idi iné' bang babpat Magadan.

Matius 16

¹Idi lun Parisi idi lun Saduki nacing sikal nutun Yésus, idi nemutuh Neneh maré aceh tanu' rat bang surga sirendeh.

- ²Iamo' kebala Yésus, "Kareb aco macep muyuh pebala, 'Merikan ini lek, ngaceku langit ini mesia'."
- ³Idi kareb pekak, muyuh pebala, 'Mudan aco sini lek, ngaceku langit ini mesia' idi medacem.' Matu muyuh mileh kali' ayu langit, iamo' na muyuh mileh kali' ratnan tanu'-tanu' kareb ini!
- ⁴Inul luk dat idi luk na lutep nakap aceh tanu', iamo' na tanu' barén nedeh, iamo' tanu' Nabi Yunus mo'." Idi Yésus nenecan nedeh idi nalan.
- ⁵Kareb anak-anak sekola'Neh iné' déi' dipar, ideh nekelupan nguit ruti.
- ⁶Idi kebala Yésus nedeh, "Ngerawé do'-do" muyuh, idi matar do'-do' ratnan lamud lun Parisi idi lun Saduki.
- ⁷Idi ideh nepegayam arangdeh sebuleng, keburideh, "Tau' na nenguit ruti."
- ⁸Kareb Yésus nekali' baladeh, idi kebalaNeh, "O muyuh luk na petap anu, ngudeh muyuh pegayam arang muyuh sebuleng, ngaceku na luk idi ruti nemuyuh?"
- ⁹Naké muyuh kali' idi ngerawé ratnan limeh balad ruti kuan limeh ngeribu lemulun, idi ratnan tudu' ngebuan tecehneh luk imung muyuh?"
- ¹⁰Kudeng apeh tudu' balad ruti kuan apat ngeribu lemulun idi tuda' ngebuan tecehneh luk imung muyuh teh?"
- ¹¹Kudeng apehké muyuh na kali' idi baken ratnan ruti luk Ui mala kuan muyuh? Iamo' matar do'-do' ratnan lamud lun Parisi idi lun Saduki ineh."
- ¹²Idi ideh nekali' ilung bala Yésus, ieh ineh baken Ieh nepebala ratnan matar bururdeh ratnan lamud ruti, iamo' ratnan luk bida' lun Parisi idi lun Saduki.
- ¹³Idi pangeh Yésus nacing bang tana' Kaisaria Pilipi, Ieh nengitun anak-anak sekola'Neh, keburideh, "Maya' buri' dulun, idéké Anak-Lemulun?"
- ¹⁴Idi keburideh, "Sebuang pebala, Yahya luk Ngerereb; inan teh luk pebala, Elia' inan teh luk pebala, Yeremia, kian, seburur nabi luk baken lek."
- ¹⁵Idi kebala Yésus, "Idéké Ui ini bang terawé muyuh?"

- 16**Idi kebala Simun Pétrus, "Iko Keristus, Anak Allah luk mulun."
- 17**Idi kebala Yésus, "Samal kuanmu, O Simun, anak Yunus! Ngaceku baken lemulun luk ngelio ini kuanmu, iamo' TamanKu luk bang surga.
- 18**Idi Ui pebala namu teh, O Pétrus, iko ineh aceh batu, idi luun batu ini Ui sikal mudut sidangKu, idi até pana' na miak metueh rat neneh.
- 19**Ui maré namu amung-amung taka Imet surga; idi anun-anun luk iko ngabet bang tana' ini, ieh ineh betin bang surga, idi anun-anun luk iko neka bang tana' ini, ieh ineh teh takan bang surga."
- 20**Idi Yésus neperiteteng kuan anak-anak sekola'Neh, pad na mada' kuan seburur lemulun pana', ratnan Ieh Keristus.
- 21**Rat kareb ineh, Yésus nengimun mada' kuan anak-anak sekola'Neh, kebalaNeh, "Na miak na Ui amé' déi' Yerusalim, idi mabeh mula' dereh ratnan lun rayeh, idi ratnan imam-imam rayeh idi guru-guru Ukum, pad Ui pitayen teh, idi aco luk keteluh Ui miak tuyen teh."
- 22**Idi Pétrus nenguit Yésus iné' setau', idi ieh nemebpeng Neneh, keburineh, "Do' amung ineh uen Allah ngado rat Namu, O Tuhan! Dereh ineh na miak macing Namu."
- 23**Iamo' Yésus nelumi, idi nepebala ni Pétrus, "Amé' pa ketedKu, O Sétan! Iko luk ngesabeng Negku, ngaceku iko baken ngerawé luk ratnan Allah, iamo' lu ratnan lemulun mo'."
- 24**Idi kebala Yésus kuan anak-anak sekola'Neh, "Idé-idé luk sikal maya' Negku, do' ieh na ngerawé bururneh sebuleng, iamo' maan salibneh idi maya' Negku.
- 25**Ngaceku idé-idé luk ngerawé ulunneh, na miak ngalap ulun luk matu; idi lemulun luk na ngerawé ulunneh sebuleng ngaceku Ui, ieh ngalap ulun luk matu.
- 26**Ngaceku anunké ulekneh kudeng selemulun ngalap amung-amung tana' ini, iamo' na ieh ngalap ulun luk meruked? Idi anunké luk miak barén lemulun ku libal ulunneh?

²⁷Ngaceku Anak-Lemulun sikal macing dengan rayeh TamanNeh, idi dengan melaikat-melaikatNeh. Kareb ineh Ieh sikal ngua' kuan anid-anid lemulun maya' kekammeneh.

²⁸Ngerawé do'-do', inan sebuang rat arangdeh luk tuped ieni, luk na miak kali' maté, kareb nateh ideh nier Anak-Lemulun macing dengan ImetNeh."

Matius 17

¹Pangeh anem aco Yésus nenguit Pétrus, Yakub, idi kinanakneh Yahya amé' setau' luun aceh pegkung luk medita'.

²Kareb diteluh nenier Yésus, idi ayuNeh nisu' pa kiung diteluh, idi kiungNeh merasat mepad kudeng mateh aco, idi ayungNeh pana' mebuda' mepad kudeng acang teh.

³Idi Musa Idi Elia sinier diteluh pebala dengan Yésus.

⁴Idi Pétrus nepebala inan Yésus, "O Tuhan, do' tau tudo ieni; kudeng Tuhan pian, ui sikal mudut teluh lepo ieni; sebuleng kuanMu, sebuleng kuan Musa, idi sebuleng kuan Elia teh."

⁵Idi uned ieh pebala, inan aceh laput luk merasat iné' ngelungung nedeh; idi inan aceh tang rat bang laput ineh luk nepebala, "Ini AnakKu luk inanKu mawa; idi Ui mawang niat Neneh; do' muyuh ninger balaNeh."

⁶Kareb anak-anak sekola' Yésus neninger tang ineh idi ideh neluka' luun tana', idi ideh pelaba tot.

⁷Idi Yésus iné' ngakem nediteluh, keburu'Neh, "Do' meteluh tumui, aleg matot."

⁸Idi diteluh netengook idi na nenier seburur lemulun baken, iamo' Yésus sebuleng.

⁹Idi laba' ideh temurun rat luun pegkung ineh, Yésus neperiteteng nediteluh, keburu'Neh, "Aleg mada' luk sinier meteluh kuan seburur lemulun pana', pad Anak-Lemulun pangéh tumui rat arang lun naté."

¹⁰Idi anak-anak sekola'Neh nengitun Yésus, keburu' diteluh, "Ngudehké guru-guru Ukum pebala, na miak na Elia macing atun?"

¹¹Idi kebala Yésus, "Matu, Elia macing atun, pad nganau' temina'.

¹²Iamo' Ui pebala nemeteluh, Elia pangeh nacing idi ideh na miti neneh, iamo' ideh pangeh nenganau' kuanneh anun-anun luk piandeh sebuleng. Kudeng ineh teh Anak-Lemulun uendeh ngedereh."

¹³Idi diteluh ineh nekali' Ieh pebala ratnan Yahya luk Ngerereb.

¹⁴Idi kareb ideh nacing nelun mula', inan aceh lemulun iné' idi netekeradung Neneh, keburu' neh,

¹⁵"O Tuhan, do' Iko méi' kuan anakku luk deléi. Ngaceku ieh mét meruai, idi ieh pelaba dereh, ngaceku ieh megéi' meluka' bang apui idi bang abpa' pana'.

¹⁶Ui nenguit neneh amé' matun anak-anak sekola'Mu, idi na ideh miak ngedo' neneh."

¹⁷Kebala Yésus, "O inul luk na manu idi luk neraruh ini, tuda' ioké Ui tudo dengan muyuh? Tuda' ioké Ui mekadang niat nemuyuh? Do' nguit neneh amé' Negku."

¹⁸Idi Yésus nengecuk ada' ineh buro, idi ada' ineh neremuat, pad anak ineh petacu do'.

¹⁹Idi anak-anak sekola' ineh iné' lulem matun Yésus idi keburu'deh, "Ngudehké ada' ineh na metala' kai?"

²⁰Idi kebala Yésus nedeh, "Ngaceku muyuh na petap anu. Ngerawé do'-do', kudeng anu muyuh kirayeh aceh ngilung sesawi' pana', miak mo' muyuh pebala kuan pegkung ini, 'Mubuh iko rat tungé' idi amé' déi', idi kali' rungen ieh mubuh peh; idi na luk idi anun-anun luk na miak ruen muyuh.

²¹Iamo' ada' luk kudeng ini na miak ruaten dengan anun-anun, iamo' dengan sembayang idi mawa' mo'."

²²Kareb amung anak sekola' ineh nepamung déi' Galilia, idi Yésus nepebala nedeh, "Anak-Lemulun miak barén bang palad lemulun.

²³Idi ideh sikal ngaté Neneh; idi aco luk keteluh Ieh miak tuyen teh." Idi ideh pelaba dat niat.

²⁴Kareb ideh nacing Kapernaum, idi lemulun luk ngamung usin pupuk luk kinula'neh limeh ngepulu' sin iné' ni Pétrus, keburideh, "Naké Gurumu mayar limeh ngepulu' sin pupuk?"

²⁵Idi keburideh Pétrus, "Mayar!" Kareb Pétrus nesemuet bang ruma', Yésus nengitun neneh atun, kebalaNeh, "Kudeng apehké terawému, Simun? Ratnan idéké amung raca' tana' ini nengalap acam idi usin pupukdeh? Ratnan anak itindehké, kian ratnan lun sakai lek?"

²⁶Idi keburideh Pétrus Neneh, Rat nelun sakai." Idi kebala Yésus neneh, "Ngaceku ineh anak-anakneh na mayar ineh.

²⁷Iamo' pad tau na ngesabeng nedeh, amé' iko tangeb takung, idi ngeluit idi ngalap lawid luk pun-pun lupung; idi kareb iko ngukab tangneh, bang tangneh miak iko kali' sebalad pirak, ieh ineh aceh rigit. Lapenmu balad pirak ineh idi maré ineh ku pupukKu idi pupukmu pana'."

Matius 18

¹Kareb ineh anak-anak sekola' ineh iné' matun Yésus, keburideh, "Idéké luk meluun rayeh bang Imet surga?"

²Idi Yésus nenawar aceh anak isuut, idi Ieh nenaped neneh pa atun.

³Kebala Yésus, "Ngerawé do'-do'! Kudeng muyuh na misu' niat, idi mangun mepad kudeng anak luk isuut ini, na tu muyuh miak semuet bang Imet surga.

⁴Luk meluun rayeh bang Imet surga, ieh ineh lemulun luk ngebeneh niatneh sebuleng mepad kudeng anak luk isuut ini.

⁵Idi idé-idé luk nganak anak luk isuut luk kudeng ini bang ngadanKu, ieh nganak Negku teh.

⁶"Idé-idé luk ngesabeng seburur rat arang anak luk isuut luk manu Negku ini, meluun do' kuanneh kudeng aceh batu tekalan luk rayeh betin i dierneh pad ngerarem neneh nan uned abpa' rayeh.

⁷Mesusa' kuan tana' ini ngaceku sabeng. Ngaceku na miak na sabeng ineh macing, iamo' mesusa' kuan lemulun luk ngacing sabeng ineh.

⁸Kudeng ticu'mu idi kukudmu ngesabeng namu, do' nangal neneh, idi talan rat namu; ngaceku meluun do' iko semuet bang ulun dengan ticu' luk sebuleng idi kukud luk sebuleng, ratnan iko talan bang apui luk meruked dengan ticu' luk dueh idi kukud luk dueh.

⁹Idi kudeng matehmu ngesabeng namu, do' nakul neneh, idi talan rat namu, ngaceku meluun do' iko semuet bang ulun dengan mateh luk sebuleng ratnan iko talan bang apui dengan mateh luk dueh.

¹⁰Matar do'-do' idi aleg muyuh ngedat sebuleng rat arang anak-anak luk isuut ini; ngaceku Ui pebala nemuyuh, déi' bang surga melaikat-melaikatdeh nier kidi-kidi kiung TamanKu luk bang surga.

¹¹Ngaceku Anak-Lemulun iné', pad ngulun lemulun luk netutu'.

¹²Kudeng apehké terawé muyuh? Kudeng inan aceh lemulun luk inan meratu dumba, idi kudeng sebuleng neraruh, naké ieh necan luk iwa' ngepulu' iwa' dumba ineh, idi amé' luun pegkung-pegkung idi nakap neneh luk neraruh ineh?

¹³Idi kudeng ieh ngalap neneh, matu, Ui pebala nemuyuh, ieh pelaba awang niat neneh meluun ratnan iwa' ngepulu' iwa' burur luk na neraruh.

¹⁴Kudeng ineh teh TamanKu luk bang surga, baken pianNeh sebuleng pana' rat arang anak-anak isuut ini metutu' peh.

¹⁵Kudeng kinanakmu mesala' namu, do' iko amé' mada' neneh ratnan sala'neh buleng-buleng; kudeng ieh sikal ninger balamu, pangeh iko nengalap kinanakmu.

¹⁶Iamo' kudeng ieh ara' ninger balamu, do' iko nguit denganmu seburur kian dueh burur baken teh, pad dengan tang dueh teluh burur lun luk nekali' ineh anid-anid bala miak lutep peh.

¹⁷Kudeng ieh ara' ninger nedeh, do' iko mada' kuan lun sidang; idi kudeng ieh ara' ninger lun sidang teh, nima' neneh mangun mepad kudeng lun pupu baken idi mepad kudeng lemulun luk ngamung usin pupuk.

¹⁸"Matu, Ui pebala nemuyuh, anun-anun luk muyuh ngabet bang tana' ini, ieh ineh betin bang surga, idi anun-anun luk muyuh neka bang tana' ini, ieh ineh teh takan bang surga.

¹⁹"Idi teh Ui pebala nemuyuh, kudeng dueh burur rat arang muyuh sebuleng niat bang tana' ini ratnan anun-anun luk pituen didueh, kali' rungen miak baren nedidueh ratnan TamanKu luk bang surga.

²⁰Ngaceku iapeh-iapeh inan dueh kian teluh burur luk teubupun bang ngadanKu, su ineh teh Ui idi arangdeh."

²¹Pétrus iné' matun Yésus idi keburineh, "O Tuhan, tuda' kua'ké ui miak maré do' nan kinanakku luk mesala' negku? Macing tudu' kua'ké?"

²²Idi kebala Yésus neneh, "Na Ui pebala namu, macing tudu' kua' mo', iamo' tudu' ngepulu' kua' tudu'.

²³Ngaceku ineh Imet surga mepad kudeng aceh raca' luk sikal mupud baleh ratnan lun tebarinneh.

²⁴Idi kareb ieh nengimun ngelio ratnan balehdeh, inan aceh lun tebarin luk inan baleh tuda'-tuda' ngejuta rigit inuitdeh ame' matun neneh.

²⁵Iamo' ngaceku na ieh miak ngua', idi tuanneh nengecuk nelun masui neneh mangun ku demulun dengan amung uang tetek ruma'neh perapu amung binawehneh, pad ieh miak ngua' balehneh.

²⁶Demulun ineh netekeradung pa kiungneh, keburineh, 'Tuan, do' iko mulai niat negku. Kali' rungen ui ngua' namu.'

²⁷Ngaceku ieh mé' neneh, tuan lun tebarin ineh nemuit neneh, idi ieh nemaré do' kuanneh ratnan balehneh.

²⁸"Iamo' lun tebarin ineh neremuat, idi ieh nepapu' lun danganneh luk inan baleh neneh tuda'-tuda' rigit. Idi ieh nengakem neneh, idi nemarek dierneh, keburineh, 'Ngu'a' balehmu negku.'

²⁹Idi lun danganneh netekeradung idi nemutuh neneh, keburineh, 'Do' iko mulai niat negku. Kali' rungen ui ngu'a' namu.'

³⁰Iamo' na ieh sikal, idi ieh iné' nipa neneh bang tutup pad ieh nengu'a' balehneh.

³¹Idi kareb lun danganneh luk baken nenier luk inau'neh, idi ideh dat niat, idi iné' mada' inan tuandeh amung luk pangeh inau'neh.

³²Idi tuanneh nenawar demulun ineh amé' matun neneh, keburineh, 'O lun tebarin luk dat, ui pangeh nemuit namu ratnan amung-amung balehmu, ngaceku iko nemutuh negku.

³³Naké do' kudeng iko méi' kuan lun denganmu teh, mepad kudeng ui pangeh méi' namu teh?'

³⁴Idi tuanneh museh neneh, idi ieh nemaré neneh tetupin lun matar tutup, pad ieh ngu'a' amung-amung balehneh."

³⁵Idi kebala Yésus, "Kudeng ini teh TamanKu luk bang surga sikal nganau' kuan muyuh, kudeng muyuh na sikal maré do' kuan kinanak-kinanak muyuh ratnan niat muyuh."

Matius 19

¹Kareb Yésus pangeh nemada' bala ini, idi Ieh nenalan rat Galilia iné' bang babpat Yudia, luk déi' dipar Abpa' Yarden.

²Idi mula' tu-tu lemulun nemaya' Neneh, idi Ieh nengedo' nedeh déi'.

³Idi lun Parisi nacing sikal nutun Neneh, keburideh, "Miakké seburur deléi ngelagkan awanneh ngaceku anun-anun?"

⁴Idi kebala Yésus, "Naké muyuh nemaca' Surat Allah, 'Idi Ieh luk pangeh nenganau' lemulun pun-pun, nenganau' nedeh ku deléi idi decur?'

- ⁵Idi kebalaNeh, 'Ngaceku ineh do' lemulun necan taman-tinanneh idi pamung dengan awanneh, idi diduen miak mangun ku sebuleng burur peh.'
- ⁶Idi didueh ineh baken dueh burur peh, iamo' sebuleng burur mo'. Ngaceku ineh, luk pangeh tinutup Allah aleg seburur lemulun matad peh."
- ⁷Idi keburu' lun Parisi Neneh, "Kudeng matu balaMu, anunké punneh Musa nengecuk maré surat patad, pad ngelagkan neneh?"
- ⁸Idi kebala Yésus nedeh, "Musa nenima' nemuyuh ngelagkan awan muyuh ngaceku muyuh metueh niat. Iamo' rat pun-pun na ieh kudeng ineh.
- ⁹Ui pebala nemuyuh, idé-idé luk ngelagkan awanneh, kudeng baken ratnan pasét, idi ngaweh lun baken teh, ieh pasét teh. Idi lemulun luk ngaweh decur luk pangeh ligkan ineh, ieh pana' pasét teh."
- ¹⁰Idi anak-anak sekola'Neh nepebala Neneh, "Kudeng matu lawé ini ratnan deléi idi awanneh, na ulekneh paweh."
- ¹¹Iamo' keburu'Neh nedeh, "Bala ini baken kuan amung lemulun, iamo' barén Allah kuan sebuang lemulun mo'.
- ¹²Ngaceku inan sebuang lemulun luk pinani', luk pinani' ku lun baken; idi inan sebuang lemulun luk tinganak kudeng ineh rat bang nakan tinandeh; idi inan teh lemulun luk pinani' luk nemani' bururdeh sebuleng, ngaceku Imet surga. Idé-idé lemulun luk mileh kali' ilungneh, do' ieh ngalap neneh."
- ¹³Kareb ineh lemulun nenguit anak-anak luk isuut amé' matun Neneh, pelé Ieh miak ngerareng ticu'Neh luundeh idi sembayang kuandeh, iamo' anak-anak sekola'Neh nemebpeng nedeh.
- ¹⁴Idi kebala Yésus nedeh, "Nima' anak-anak luk isuut amé' Negku idi aleg mebpeng nedeh, ngaceku lemulun luk kudeng ini luk kuan Imet surga."
- ¹⁵Idi Yésus nengerareng ticu'Neh luundeh, idi Ieh nenalan.
- ¹⁶Inan aceh lemulun luk iné' matun Yésus, keburu'neh, "O Guru, anunké kekamen luk do' luk miak ruenku pad ui miak ngalap ulun luk meruked?"

¹⁷Idi kebala Yésus, "Ngudehké iko ngitun Negku ratnan luk do'? Inan Sebuleng mo' luk do'; iamo' kudeng iko sikal semuat bang ulun luk meruked, do' iko maya' ukum-ukum ineh."

¹⁸Idi ieh nengitun Yésus, keburineh, "Ukum-ukum anunké ineh?" Idi kebala Yésus neneh, "Aleg iko ngaté, aleg iko pasét, aleg iko mano, aleg iko mangun ku lun nekali' luk mebalih;

¹⁹ngedita' taman-tinanmu; idi do' iko mawa nelun denganmu mepad kudeng bururmu sebuleng."

²⁰Idi kebala anak adi' ineh, "Amung-amung ukum ini ui pangeh nemaya'; anunké luk nateh inau'ku?"

²¹Kebala Yésus neneh, "Kudeng iko sikal mangun meriput, muli' iko, masui binawehmu, maré kuan lun masi', pad iko ngalap binaweh déi' surga: idi amé' maya' Negku."

²²Kareb anak adi' ineh neninger balaNeh, idi ieh neburo dengan susa' niat, ngaceku ieh mula' binaweh.

²³Idi Yésus nepebala kuan anak-anak sekola'Neh, "Matu, Ui pebala nemuyuh, mikat tu-tu kuan lemulun luk mula' binaweh semuet bang Imet surga.

²⁴Idi Ui pebala nemuyuh teh, meluun malé aceh pung unta semuet bang lubang pinu, ratnan lemulun luk mula' binaweh semuet bang Imet Allah."

²⁵Idi kareb anak-anak sekola'Neh neninger balaNeh, idi ideh pelaba awa, keburideh, "Kudeng pieh kudeng ineh, idéké luk miak ngalap ulun?"

²⁶Idi Yésus nenier nedeh, kebalaNeh, "Kuan lemulun ini na miak mangun iamo' kuan Allah amung-amung miak mangun."

²⁷Idi kebala Pétrus, "Siruh, kai pangeh nenecan luk amung-amung pad maya' Namu; anunké luk lapen kai teh?"

²⁸Kebala Yésus nedeh, "Ui pebala nemuyuh: idi bang Imet luk mebaruh, kareb Anak-Lemulun tudo luun kerusi rayehNeh, muyuh pana' luk pangeh nemaya'

Negku miak tudo luun pulu' dueh kerusi, idi ngukum pulu' dueh babpat pupu lun Israil.

²⁹Idé-idé lemulun luk pangeh nenecan ruma'neh, kinanakneh deléi, kinanakneh decur, taman-tinanneh, anak-anakneh, idi tana'neh, ngaceku ngadanKu, ieh miak ngalap meratu kua' ula'neh, idi ulun luk meruked teh.

³⁰Iamo' mula' lemulun luk pa atun miak amé' pa mucu, idi luk pa mucu amé' pa atun.

Matius 20

¹"Imet surga mepad kudeng aceh tuan ruma' luk neremuat pekak uka-uka, pad nabpar lemulun pelé ideh ngakem bang kabun anggurneh.

²Ieh nepejani' nabpar nedeh serigit seaco, idi ieh nengecuk nedeh amé' ngakem bang kabunneh.

³Kareb tangal mudik aco, idi ieh neremuat, idi ieh nenier lun baken tuped mo'-mo' déi' kadai,

⁴idi keburu'neh nedeh, 'Amé' muyuh teh ngakem bang kabun anggurku, idi tabpar luk matu barénku nemuyuh peh.' Idi ideh iné'.

⁵Idi sekua' teh ieh neremuat, kareb muned aco, idi kareb tangal musul aco teh, idi ieh nenganau' kudeng ineh teh.

⁶Idi kareb aco malé malem ieh neremuat sekua' teh, idi ieh kali' lun baken tuped mo'-mo' déi' kadai teh. Idi keburu'neh nedeh, 'Ngudehké muyuh tuped mo'-mo' ieni tebaco-tebaco?'

⁷Idi keburu'deh neneh, 'Ngaceku na luk idi lemulun nabpar nekai.' Keburu'neh nedeh, 'Amé' muyuh teh ngakem bang kabun anggurku.'

⁸"Idi kareb malem aco, tuan kabun ineh nepebala inan lun matar kabunneh, 'Do' nawar lemulun luk pangeh nengakem, idi maré tabpardeh, ngimun ratnan lemulun luk mucu pad macing nedeh luk atun.'

⁹Kareb lemulun luk nesemuet malem aco ineh nacing, ideh nengalap tabpardeh anid-anid burur aceh rigit.

- ¹⁰Idi kareb lemulun luk pun-pun ineh nacing, idi ideh ngerawé nedeh ngalap mela; iamo' anid-anid burur ineh pana' nengalap serigit teh.
- ¹¹Kareb ideh nengalap tabpardeh, idi ideh iné' dengan tekedamut nan tuan ruma' ineh,
- ¹²keburi'deh, 'Lun ini luk mucu nengakem dengan segageh mo' kinioneh, idi iko nemaré tabpardeh mepad kudeng kai teh luk nengakem tebaco-tebaco kareb pelaba ét edang.'
- ¹³Iamo' tuan nengor bala seburur, keburu'neh, 'O aca'ku, na ui naluk namu. Naké iko nengamo negku ngalap aceh rigit?
- ¹⁴Do' ngalap tabparmu idi muli' pianku maré kuan lun ini luk mucu tabpar luk mepad dengan tabparmu.
- ¹⁵Naké ui miak nganau' luk pianku ku binawehku sebuleng? Temaruhké iko ngaceku ui luk mekatu?' “
- ¹⁶Idi kebala Yésus, "Idi kudeng ineh teh luk pa mucu amé' pa atun, idi luk pa atun amé' pa mucu.”
- ¹⁷Kareb Yésus amé' déi' Yerusalim idi Ieh nenguit pulu' dueh anak sekola' ineh, idi kebalaNeh nedeh,
- ¹⁸"Ninger muyuh, nekini tau amé' déi' Yerusalim; idi Anak-Lemulun miak barén bang palad imam-imam rayeh, idi guru-guru Ukum teh; idi ideh sikal ngaté Neneh.
- ¹⁹Idi ideh sikal maré Neneh bang palad lun pupu baken luk situnga Neneh, mebal Neneh, idi nalib Neneh; idi aco luk keteluh Ieh miak tuyen teh.”
- ²⁰Kareb ineh tinan anak-anak Sabdi iné' matun Yésus dengan dueh-dueh anakneh, idi ieh netekeradung sembayang Neneh idi nemutuh luk pituen rat Neneh.
- ²¹Idi kebala Yésus neneh, "Anunké luk pianmu?" Idi keburu' decur ineh Neneh, "Do' Iko ngecuk dueh anakku ini tudo denganMu bang ImetMu, sebuleng pa tinueh idi sebuleng pa kabingMu.”

²²Iamo' kebala Yésus nan dueh anak Sabdi ineh, "Na medueh kali' luk pituen medueh. Miakké medueh ngirup ratnan sangkir luk rupenKu?" Idi keburu' didueh Neneh, "Miak."

²³Kebala Yésus nedidueh, "Matu, medueh miak ngirup ratnan sangkirKu. Iamo' ratnan tudo pa tinueh idi pa kabingKu, na Ui melalud maré kuan medueh, iamo' babpat ineh tinina' kuan lemulun luk pinili' TamanKu."

²⁴Kareb pulu' anak sekola'Neh luk baken neninger ratnan ini, idi ideh museh nedenganak.

²⁵Iamo' Yésus nenawar nedeh amé' matun Neneh, kebalaNeh, "Muyuh kali' lun luk ngimet lun pupu baken metueh ngimet nedeh, idi lun rayeh-rayehdeh inan lalud pa luunde.

²⁶Iamo' na ieh miak kudeng ineh arang muyuh, iamo' idé'-idé luk sikal mangun rayeh rat arang muyuh, ieh ineh luk miak mangun ku lun ngasa' nemuyuh;

²⁷idi idé'-idé luk sikal mangun ku lun rayeh arang muyuh, ieh ineh luk miak mangun ku demulun muyuh teh,

²⁸mepad kudeng Anak-Lemulun pana' na Ieh nacing pad Ieh miak uen ngasa', iamo' pad Ieh miak ngasa' idi maré ulunNeh mangun ku uli' kuan amung-amung lemulun."

²⁹Kareb ideh nenalan remuat rat Yeriko, idi pelaba ula' lemulun nemaya' Neneh.

³⁰Idi inan dueh burur lun mebuser luk tudo iring dalam; idi kareb didueh neninger Yésus lemaba, didueh nengitang, keburu' didueh, "O Tuhan, Anak Daud, méi' nekai!"

³¹Idi lun mula' nemebpeng nedidueh, idi nengecuk nedidueh pirud, iamo' didueh meluun rayeh tang, keburu' didueh, "O Tuhan, Anak Daud, méi' nekai!"

³²Yésus nugka' idi nenawar nedidueh, kebalaNeh, "Anunké luk piar, medueh Ui miak nganau' kuan medueh?"

³³Idi keburu' didueh, "O Tuhan, kai mutuh kulat mateh!"

³⁴Yésus méi' nedidueh, idi Ieh nengakem mateh didueh. Petacu mateh didueh kulat idi didueh nemaya' Neneh.

Matius 21

¹Kareb ideh macing muneng ku bawang Yerusalim idi ideh nesemuet bang bawang Baitpagi, luk déi' luun Pegkung Saitun. Yésus nengecuk dueh burur anak sekola'Neh amé' atun, keburu'Neh nedidueh,

²"Amé medueh semuet bang bawang luk pa atun medueh, idi petacu medueh miak papu' aceh keladai luk inabet dengan anakneh; do' neka dingetineh idi nguit amé' Negku.

³Idi kudeng inan lemulun luk pebala anun-anun nemedueh, do' medueh pebala neneh, 'Tuhan luk pian ku ini,' idi petacu ieh sikal ngecuk nemedueh nguit nedidueh."

⁴Idi amung ini pangeh mangun, pad ngacing luk bila nabi, kebalaneh:

⁵"Do' mada' bawang Sion, Nekini Raca'mu amé' namu. Ieh mebeneh niat, Ieh tudo luun keted keladai, luun keladai luk isuut, ieh ineh anak keladai."

⁶Anak-anak sekola' ineh iné', idi ideh nenganau' luk icuk Yésus nedeh.

⁷Idi ideh nenguit keladai idi anakneh, idi ideh nengerareng kuyu'deh luun keted didueh, idi Yésus netudo luun ineh.

⁸Idi mula' lemulun nemalad ayungdeh luun dalam, idi lun baken nenutu' angkat-angkat kayuh, idi nengerareng angkat-angkat ineh uned dalam teh.

⁹Idi lun mula' luk nenalan pa atunNeh idi pa ketedNeh nengitang, keburu'deh, "Ngubur Anak Daud! Samal kuanNeh luk macing bang ngadan Tuhan! Ngubur Allah!"

¹⁰Kareb Yésus nesemuet bang bawang Yerusalim, idi amung-amung lemulun meria' peh, keburu'deh, "Idéké lemulun ini?"

- ¹¹Idi lun mula' nepebala, "Ieh ineh seburur nabi, Yésus lun Nasarét, luk bang bawang Galilia."
- ¹²Yésus nesemuet bang Ruma' Allah, idi nemasut amung lemulun luk masui idi luk melih binaweh bang Ruma' Allah ineh. Ieh nengelukeb méja-méja lemulun luk ngelibal rigit, idi kerusi-kerusi lemulun luk masui suit sukur ineh,
- ¹³kebalaNeh nedeh, "Pangeh inayud bang Surat Allah, 'Ruma'Ku tetanen ruma' luk inan sembayang,' iamo' muyuh nganau' ineh mangun ku su luk inan lun mano."
- ¹⁴Lun mebuser idi lun meliai iné' Neneh bang Ruma' Allah, idi Ieh nengedo' nedeh.
- ¹⁵Imam-imam rayeh idi guru'-guru' Ukum ineh megateh niat kareb ideh nenier kekamen Yésus luk melalud, idi nekali' anak-anak luk bang Ruma' Allah ineh nengitang idi nepebala, "Ngubur Anak Daud!"
- ¹⁶Idi keburideh kuan Yésus, "Iko kali' baladehké?" Idi Yésus nepebala nedeh, "Mo' Ui kali'. Naké muyuh nemaca' ayat ini bang Surat Allah? 'Ratnan tang anak-anak luk isuut idi anak-anak luk niti' pana' uburMu pangéh meriput.' "
- ¹⁷Idi Yésus nenecan nedeh, idi neremuat rat bang bawang ineh, idi iné rudap déi' bawang Baitani.
- ¹⁸Idi pekak kareb Yésus nelemubed iné' bawang ineh, Ieh melau.
- ¹⁹Idi Ieh nenier aceh lawa gita' luk iring dalam, idi Ieh iné' matun ineh. Idi Ieh nenier na luk idi anun-anun pana', iamo' don sebuleng. Idi kebalaNeh neneh, "Do' iko na kebua' rat nekini macing raked-raked peh." Idi lawa gita' ineh petacu melayuh peh.
- ²⁰Kareb anak-anak sekola' ineh nekali' ratnan ini, ideh pelaba awa, keburideh, "Kudeng apehké lawa gita' ini petacu melayuh?"
- ²¹Idi kebala Yésus, "Ngerawé do'-do'! Kudeng muyuh manu tu-tu dengan na merapang, baken muyuh melalud ngnau' kekamen luk kudeng ini kuan lawa

gita' mo', iamo' kudeng muyuh pebala kuan pegkung ini pana', 'Do' iko mubuh idi talan bang abpa' rayeh,' idi luk icukmu miak mangun peh.

²²Idi amung-amung luk pituen muyuh bang sembayang, kudeng muyuh manu, muyuh miak ngalap ineh teh.”

²³Kareb Yésus nesemuet bang Ruma' Allah, imam-imam rayeh idi lun rayeh ratnan pupu ineh, iné' Neneh kareb Ieh mada', idi keburideh, "Dengan lalud anunké Iko nganau' kekamen ini? Idi idéké luk nemarké lalud ini kuanMu?”

²⁴Kebala Yésus nedeh, "Ui pana' sikal ngitun aceh itun rat nemuyuh; idi kudeng muyuh ngor balaKu, Ui teh miak mada' nemuyuh dengan lalud idéké Ui nganau' kekamen ini.

²⁵Rat iapehké rereb Yahya: rat surgaké, kian ratnan lemulun lek?" Idi ideh pesaad arangdeh sebuleng, keburideh, "Kudeng tau mala', Rat surga,' idi Ieh miak pebala netau, 'Ngudehké muyuh na manu neneh?'

²⁶Iamo' kudeng tau mala, 'Ratnan lemulun,' tau matot nelun mula' ini, ngaceku amung-amung deh ngerawé Yahya ineh seburur nabi teh.”

²⁷Idi ideh nengor bala Yésus, kebaladeh, "Kai na kali." Idi Yésus nepebala nedeh teh, "Ui pana' na sikal mala kuan muyuh dengan lalud idéké Ui nganau' kekamen ini.

²⁸"Kudeng apehké terawé muyuh? Inan aceh lemulun luk inan dueh anak deléi; idi ieh nepebala kuan anakneh luk atun, keburineh, 'Asi, amé' iko ngakem aco sini bang kabun anggur ineh,'

²⁹Idi kebala anak ineh, 'Ara' ui amé,' iamo' mucu ieh nenginuud, idi ieh iné' peh.

³⁰Idi ieh iné' matun anakneh luk kedueh idi nepebala kudeng ineh teh; idi kebala anak ineh, 'Mo, Ama', amé' ui,' iamo' na ieh iné'.

³¹Sapehké rat arang dueh anak ineh luk nemaya' pian tamanneh?" Idi keburideh Neneh, "Seluk atun." Idi Yésus nepebala nedeh, "Ui pebala

nemuyuh, lemulun luk ngamang usin pupuk idi decur-decur luk mesawa' semuet bang Imet Allah pa atun muyuh.

³²Ngaceku Yahya iné' nemuyuh dengan dalan luk matu, idi muyuh na manu neneh; iamo' lun luk ngamung usin pupuk idi decur-decur luk mesawa' manu neneh; sagan pana' muyuh pangeh kali', iamo' mucu muyuh na uren idi manu neneh.”

³³Kebala Yésus, "Ninger muyuh aceh luk pinginud luk baken teh: Inan seburur tuan ruma' luk nenibu aceh kabun anggur, idi ieh nengar libut-libutneh, idi nengukat aceh lubang anggur, idi ieh nemudut aceh lepo luk medita'. Ieh nemaré kabun ineh icam tuda'-tuda' lun matar kabun, idi ieh iné' bawang baken.

³⁴Kareb malé macing karebneh kebua', ieh nengecuk demulun-demulunneh amé' inan lun matar kabun ineh, ngaceku pianneh ngalap babpat bua' ratnan kabunneh.

³⁵Iamo' lun luk ngacam kabun ineh nengakem demulun-demulunneh, idi sebuleng bibaldeh, sebuleng pinatédeh, idi sebuleng bitungdeh ku batu.

³⁶Sekua' teh ieh nengecuk demulunneh luk baken teh, meluun ula' ratnan luk atun; idi ideh nenganau' kudeng ineh teh kuandeh.

³⁷Idi kekipedneh ieh nengecuk anak deléineh amé' nedeh, keburineh, 'Kali' rungen ideh miak ngedita' anakku.'

³⁸Iamo' kareb lun matar kabun ineh nenier anakneh, idi ideh nepegayam seburur dengan seburur, keburideh, 'Ini inulneh; do' tau ngaté neneh, pad tau ngalap babpatneh.'

³⁹Idi ideh nengakem neneh, idi nenala' neneh rat bang kabun anggur ineh, idi ideh nengaté neneh.

⁴⁰"Ngaceku ineh kareb tuan kabun ineh macing, anunké luk ruenneh kuan lun matar kabun ineh?"

⁴¹Idi keburideh Neneh, "Dengan até luk pelaba dereh, ieh sikal ngaté lemulun luk dat ineh, idi kabun anggur ineh pana' barén uen lemulun baken ngacam, ieh ineh luk miak maré usag buaneh bang anid-anid karebneh kebua'."

⁴²Yésus nepebala nedeh, "Naké muyuh nemaca' ayat ini bang Surat Allah? 'Batu luk tila' lun luk mudut ruma' ineh pangeh mangun ku batu lidung. Ieh ineh inau' Tuhan, idi pelaba do' siren mateh tau.' "

⁴³Kebala Yésus, "Ngaceku ineh Ui pebala nemuyuh, Imet Alla miak lapen rat nemuyuh, idi barén kuan aceh pupu luk ngeruat bua' luk petulu.

(⁴⁴Idé-idé lemulun luk mebbeh luun batu ini ieh miak mareg peh, iamo' lemulun luk ritapin batu ini miak mekareg.)"

⁴⁵Kareb imam-imam rayeh idi lun Parisi neninger luk pinginud-pinginudNeh, ideh nekali' Yésus pebala ratnan ideh.

⁴⁶Idi ideh nenakap dalam sikal ngakem Neneh, iamo' ideh matot nelun mula' ngaceku ideh ngerawé Yésus ineh nabi.

Matius 22

¹Idi sekua' teh Yésus nemada' nedeh dengan luk pinginud, keburideh,

²"Imet surga mepad kudeng aceh raca' luk nenganau' irau paweh kuan anakneh.

³Ieh nengecuk demulun-demulunneh amé' nawar lemulun luk pangeh titengneh amé' ku irau ineh; idi ideh ara' amé'.

⁴Sekua' teh ieh nengecuk demulunneh luk baken, keburideh, 'Do muyuh mada' lemulun luk pangeh tinawar, "Ui pangeh netemina' luk kenen; sapi'-sapi' idi pung-pung baken teh luk melamu pangeh kirat, idi amung-amung pangeh temina'; amé' iko ku irau paweh ineh." "

⁵Iamo' ideh na nengerawé tawar ineh idi ideh nenalan. Sebuleng iné' lati'neh, sebuleng iné' pepua'.

⁶Lun baken teh ngakem demulun raca' ineh, idi nemebal nedeh, idi ngaté nedeh.

⁷Raca' ineh pelaba useh; idi ieh nengecuk lun pebunu'neh amé' ngaté lemulun luk nengaté ineh. Idi ideh nenutung bawangdeh.

⁸Idi ieh nenawar demulun-demulunneh, kebalaneh, 'Irau paweh pangeh inau' temina', iamo' lun sakai luk tinawar na mayu.

⁹Amé' muyuh inan lisangen-lisangen dalam, idi tuda'-tuda' lemulun luk mepapu' muyuh, do' nawar nedeh amé' ku irau paweh.'

¹⁰Demulun-demulun ineh iné' inan anid-anid lisangen dalam, idi nengamung amung-amung lemulun luk nepapu' nedeh, luk dat idi luk do' pana', idi ruma' lun paweh ineh panu' ku lun sakai peh.

¹¹"Kareb raca' nesemuet sikal nier lemulun luk pangeh nepamung, ieh nenier aceh lemulun luk na nengayung ku ayung lun paweh.

¹²Raca' ineh nengitun neneh, 'O Aca', kudeng apehké iko semuet tungé' dengan na nengayung ku ayung lun paweh?' Idi ieh pirud-pirud peh.

¹³Idi kebala raca' ineh kuan demulun-demulunneh, 'Ngaling ticu' idi kukudneh, idi nala' neneh bang daceh luk déi' liang. Su ineh ieh nangi' idi pekatep lipen.' “

¹⁴Kebala Yésus, "Ngaceku mula' luk tinawar, iamo' pawa' luk pinili'.”

¹⁵Idi lun Parisi iné' pegayam nakap dalam kudeng apeh ideh miak nutun Yésus.

¹⁶Idi ideh nengecuk anak-anak sekola'deh dengan lun Herodiani teh amé' matun Neneh. Idi kebaladeh Neneh, "Guru, kai kali' Iko seburur lemulun luk matu, idi Iko mada' dalam Allah dengan luk matu, idi na Iko mili' ayu lemulun; ngaceku na Iko ngerawé taga burur lemulun.

¹⁷Ngaceku ineh, do' Iko mada' nekai kudeng apeh terawéMu? Petuluké kai maré usin pupuk kuan raca' Rum, kian na lek?”

¹⁸Iamo' Yésus kali' niatdeh luk dat, idi keburu'Neh, "Ngudehké muyuh nutun Negku, O muyuh lun luk siayu?

¹⁹Maré usin pupuk ineh sirenKu." Idi ideh nenguit aceh sin sirenNeh.

- ²⁰Idi kebala Yésus nedeh, "Ayu idéké ini idi ngadan idéké ini teh?"
- ²¹Idi keburi'deh Neneh, "Ini raca' kuan." Idi kebala Yésus nedeh, "Ngaceku ineh, do' muyuh maré kuan raca' anun-anun luk raca' kuan; idi kuan Allah anun-anun luk Allah kuan."
- ²²Kareb ideh neninger balaNeh, idi ideh pelaba awa. Idi ideh nenecan Neneh, idi neburo peh.
- ²³Bang aco sineh teh, lun Saduki iné' matun Yésus. (Ieh ineh lun luk mala na luk idi tui ratnan até.)
- ²⁴Kebaladeh, "O Guru, Musa pangeh nepebala, 'Kudeng aceh deléi maté, idi na anakneh, do' kinanakneh ngaweh tinula'neh, idi nginul anak kuan kinanakneh.'
- ²⁵Idi inan arang uned kai tudu' deléi luk denganak. Idi seluk rayeh nengaweh idi naté, dengan na anak. Idi awanneh ticanneh kuan kinanakneh.
- ²⁶Kudeng ineh teh kinanak luk kedueh idi luk keteluh, pad macing luk ketudu'.
- ²⁷Idi mucu ratnan amung-amungdeh, decur ineh pana' naté teh.
- ²⁸Ngaceku ineh, kareb aco tul, awan idéké decur ineh, rat arang tudu' deléi ineh? Ngaceku amung-amungdeh pangeh nengaweh neneh."
- ²⁹Iamo' kebala Yésus nedeh, "Muyuh sala' ngerawé ngaceku muyuh na kali' Surat idi lalud Allah.
- ³⁰Ngaceku kareb aco tui na ideh ngaweh, idi na ideh barén paweh, iamo' ideh mepad kudeng melaikat luk déi' surga.
- ³¹Idi ratnan lun naté tumui, naké muyuh nemaca' teh luk bila Allah nemuyuh, kebalaNeh,
- ³²'Ui ini Tuhan Ibrahim, Tuhan Isak, idi Tuhan Yakub'? Allah ineh baken Ieh Tuhan lemulun luk maté, iamo' Ieh Tuhan lemulun luk mulun."
- ³³Kareb lun mula' neninger balaNeh, ideh mawa ku bada'Neh ineh.

- 34Kareb lun Parisi neninger kudeng apeh Yésus nemebpeng lun Saduki, macing ideh pirud, idi ideh nepamung.
- 35Idi inan sebuleng rat arangdeh, ieh ineh guru Ukum, idi ieh nengitun Yésus, sikal nutun Neneh, keburineh,
- 36"O Guru, sapehké ukum luk meluun rayeh ratnan Ukum Musa?"
- 37Idi Yésus nepebala neneh, "Do' iko mawa inan Tuhan Allahmu dengan amung niatmu, idi amung ulunmu, idi amung terawému.
- 38Ini ukum luk meluun rayeh idi luk atun.
- 39Ukum luk kedueh mepad kudeng ini teh, ieh ineh, Do' iko mawa nelun denganmu mepad kudeng bururmu sebuleng.
- 40Amung Ukum Musa idi bala nabi-nabi pekatu ratnan dueh ukum ini.
- 41Kareb lun Parisi nepamung teh, Yésus nengitun nedeh, keburineh,
- 42"Kudeng apehké terawé muyuh ratnan Keristus? Anak idéké Ieh?" Idi keburideh Neneh, "Anak Daud."
- 43Idi kebala Yésus nedeh, "Kudeng pieh kudeng ineh, kudeng apehké Roh nengegio niat Daud pad ieh neten Neneh Tuhan? Ngaceku Daud nepebala,
- 44'Tuhan nepebala kuan Tuhanku, Tudo Iko pa tinuehKu, pad Ui nganau' amung bunu'Mu pa liang kukudMu.'
- 45Kudeng Daud neten Neneh Tuhan, kudeng apehké Keristus mangun ku Anakneh?"
- 46Idi seburur pana' na miak ngor bala Yésus dengan sebila' bala pana'. Idi rat pad aco sineh na lemulun luk mekuu' ngitun Neneh baruh teh.

Matius 23

- 1Idi kebala Yésus kuan lun mula' idi anak-anak sekola'Neh,
- 2"Guru-guru Ukum idi lun Parisi luk ngegala' bala Ukum Musa.

³Ngaceku ineh, do' muyuh nganau' idi maya' amung ukum luk bida'deh nemuyuh; iamo' aleg muyuh nginud kekamendeh, ngaceku ideh pebala dengan tang mo', iamo' kekamendeh na petulu dengan luk bida'deh.

⁴Meluun teh ideh ngabet babeh luk meberat, idi ideh ngerareng luun tudung lun baken; iamo' ideh sebuleng na pian ngedengan nedeh mabeh babeh ineh sekua' pana'.

⁵Iamo' amung-amung kekamendeh inau'deh siren lemulun; idi su luk inandeh nganug ayat-ayat luun madudeh idi luun langendeh pelaba rayeh, idi ideh nganau' ramoi luk rayeh balad iring kuyu'deh.

⁶Idi ideh sikal tudo su luk meluun do' kareb irau, idi luun tudo su luk meluun do' kareb irau, idi luun kerusi lun rayeh bang ruma' sembayang teh.

⁷Idi ideh pian buren lemulun déi' kadai, idi ideh sikal ku lemulun neten nedeh, 'Guru.'

⁸Aleg muyuh tetanendeh 'Guru', ngaceku sebuleng mo' luk Guru muyuh, idi muyuh amung-amung denganak peh.

⁹Idi aleg muyuh neten idé'idé lemulun luk bang tana' ini 'Taman', ngaceku sebuleng mo' Taman muyuh, ieh ineh luk bang surga.

¹⁰Idi aleg muyuh tetanendeh 'Lun Rayeh', ngaceku sebuleng mo' luk Lun Rayeh muyuh, ieh ineh Keristus.

¹¹Iamo' lemulun luk meluun rayeh arang muyuh, do' ieh mangun ku lun ngasa' nemuyuh.

¹²Idi idé'idé luk ngedita niatneh sebuleng, ieh ineh miak uen ngebeneh peh; idi idé'idé luk ngebeneh niatneh sebuleng, ieh ineh miak uen ngedita' peh.

¹³"Mesusa' kuan muyuh guru-guru Ukum idi lun Parisi, lun luk siayu! Muyuh ngitek tanga' Imet surga kuan lun baken, ngaceku muyuh sebuleng na sikal semuet, idi muyuh mebpeng nelun baken luk sikal semuet teh.

14"Mesusa' kuan muyuh guru-guru Ukum idi lun Parisi, lun luk siayu! Muyuh ngabud ruma' decur tinula', idi teh muyuh sibala mo'-mo' bang sembayang luk mekadang! Ngaceku ineh, meluun rayeh ukum muyuh peh.

15"Mesusa' kuan muyuh guru-guru Ukum idi lun Parisi! Lun luk siayu! Muyuh ngelibut abpa' rayeh idi tana' teh, sikal ngalap sebuleng lemulun semuet bang sembayang; idi kareb ieh pangeh nesemuet, muyuh nganau' neneh ku anak apui dueh kua' mela ratnan burur muyuh sebuleng.

16"Mesusa' kuan muyuh lun nguyut luk mebuser, luk pebala, 'Idé-idé luk pebulung ku Ruma' Allah ineh, aganeh mo', iamo' idé-idé luk pebulung ku amas luk bang Ruma' Allah, ieh luk mabeh bulung ineh peh.'

17Muyuh lun mebacé luk mebuser! Anunké luk meluun rayeh lek, amas, kian Ruma' Allah luk ngeligan amas ineh lek?

18Idi teh kebala muyuh, 'Idé-idé luk pebulung ku bubpun, aganeh mo', iamo' idé-idé luk pebulung ku luk biré, luk luun bubpun, ieh lu mabeh bulung ineh peh.'

19Muyuh lun mebuser, sapehké luk meluun rayeh lek, binaweh luk biré luun bubpun, kian bubpun ineh lek luk ngeligan luk biré muyuh?

20Ngaceku ineh idé-idé luk pebulung ku bubpun, ieh pana' pebulung ku bubpun ineh, idi ku amung-amung luk biré luunneh.

21Idi idé-idé luk pebulung ku Ruma' Allah, ieh pebulung ku Ruma' Allah ineh, idi ku Tuhan luk mudeng bang Ruma' Allah pana'.

22Idi lemulun luk pebulung ku surga, ieh pebulung ku kerusi Allah, idi ku Tuhan luk tudo luun kerusi Allah ineh teh.

23"Mesusa' kuan muyuh guru-guru Ukum idi lun Parisi! Lun luk siayu! Muyuh maré babpat pulu' ratnan bawing, bua' ladeh, idi kulit kayuh luk mén; iamo' luk meluun rayeh ratnan Ukum Musa, ieh ineh ukum luk matu, éi, idi anu, tican muyuh. Ini luk petulu ruen muyuh, iamo' luk baken ineh pana' aleg necan.

- ²⁴O muyuh lun nguyut luk mebuser, luk meker ku ritek, iamo' muyuh nelen pung unta!
- ²⁵"Mesusa' kuan muyuh guru-guru Ukum idi lun Parisi! Lun luk siayu! Muyuh maru' luun sangkir idi bigan, iamo' bang lubangneh mepanu' ku pano idi lili.
- ²⁶O iko lun Parisi luk mebuser, do' iko maru' bang lubang sangkir idi bigan ineh atun, pad luunneh pana' meligan.
- ²⁷"Mesusa' kuan muyuh guru-guru Ukum idi lun Parisi! Lun luk siayu! Muyuh mepad kudeng tanem batu luk sinat ku apur, sagan pana' do' ayu luunneh, iamo' bang lubang mepanu' ku tulang-tulang lun naté idi puar-puar luk nan megeni'.
- ²⁸Kudeng ineh teh ayu burur muyuh mepad kudeng lun luk matu siren lun baken, imao' bang niat, muyuh mepanu' ku saluk idi luk dat.
- ²⁹"Mesusa' kuan muyuh guru-guru Ukum idi lun Parisi! Lun luk siayu! Muyuh nganau' tanem nabi-nabi, idi ngayung tanem lemulun luk matu,
- ³⁰kebala muyuh, 'Kudeng tau idi kareb tepun tau mulun mon, kali' rungen tau na perurum dengan lemulun luk nengeruat dara' nabi-nabi.'
- ³¹Matu muyuh ngamo ratnan muyuh inul lemulun luk nengaté nabi-nabi atun!
- ³²Mangeh mo' kekamen tepun muyuh.
- ³³Muyuh menipeh idi inul menipeh, kudeng apehké muyuh mepuit ratnan ukum apui?
- ³⁴Ngaceku ineh Ui pebala nemuyuh, Ui ngecuk nabi-nabi, lun mileh, idi guru-guru amé' nemuyuh; sebuang muyuh miak ngaté idi nalib; sebuang muyuh miak mabpet bang ruma' sembayang muyuh idi masut nedeh rat aceh bawang macingku bawang baken teh,
- ³⁵pad muyuh mabeh amung-amung dara' lemulun luk matu luk pangeh inutang bang tana' ini, ngimun ratnan dara' Abil selemulun luk matu pad

macing dara' Sekaria Barakia, luk pinaté muyuh arang Ruma' Allah idi bubpun.

³⁶Matu, Ui pebala nemuyuh, amung ukum ini miak macing kuan inul ini.

³⁷"O Yerusalim, Yerusalim! Iko ngaté nabi-nabi, idi mitung lemulun luk icuk amé' namu ku batu-batu. Tuda' kua' Ui sikal ngamung anak-anakmu mepad kudeng aceh tineh lal luk ngerukub anak-anakneh liang iladneh, iamo' na muyuh sikal!

³⁸Nekini, ruma' muyuh pangeh tican ali-ali.

³⁹Ngaceku Ui pebala nemuyuh, muyuh na miak nier Negku rat pad sini peh, pad macing muyuh pebala, 'Samal kuanNeh luk macing bang ngadan Tuhan.' "

Matius 24

¹Yésus neremuat rat bang Ruma' Allah ineh, idi uned Ieh nalan, anak-anak sekola'Neh iné' Neneh idi nemada' pudut Ruma' Allah ineh sirenNeh.

²Iamo' kebala Yésus, "Muyuh nier amung iniké? Ui pebala nemuyuh, na miak ketecan sebuleng batu ieni luk na miak uen ngusag peh."

³Kareb Yésus tudo luun Pegkung Saitun, amung-amung anak sekola'Neh iné' lulem matun Neneh, keburideh, "Ngelio kuan kai idanké amung ini miak mangun. Anunké tanu' luk mada' ratnan acingMu idi kekiped tana'?"

⁴Idi kebala Yésus, "Matar do'-do' pad lemulun na naluk nemuyuh.

⁵Ngaceku mula' lemulun sikal macing bang ngadanKu, kebaladeh, 'Ui ini Keristus,' idi ideh miak naluk mula' lemulun.

⁶Idi na miak na muyuh ninger ratnan pebunu' idi bala luk ratnan pebunu' teh. Ngerawé do'-do' pad muyuh na megagap, na miak na amung ini mangun; iamo' nateh ini kekipedneh.

⁷Bawang sikal pebunu' dengan bawang baken, idi babpat sikal pebunu' dengan babpat baken; idi inan teh iru' luk rayeh macing, idi teh miak mangun ruyuh tana' apud-apud tana'.

- ⁸Amung ini, ieh ineh pun-pun luk medereh.
- ⁹"Idi muyuh miak kamen idi ruen ngedereh, idi pitayen pana'. Amung lemulun miak megateh nemuyuh ngaceku ngadanKu.
- ¹⁰Kareb idi mula' lemulun lemubed ratnan anudeh, idi sikal masui lun dengandeh, idi seburur megateh inan seburur baken.
- ¹¹Idi mula' nabi luk mebalih macing idi naluk mula' lemulun.
- ¹²Idi ngaceku luk dat amé'-amé' mula', kareb ineh awa lun mula' metalang peh.
- ¹³Iamo' lemulun luk tuman pad macing kekipedneh uen ngulun.
- ¹⁴Idi Bala luk Do' ratnan Imet ini miak badéndeh macing aput-aput tana'; pad mangun ku luk nekali' kuan amung-amung pupu; pangeh ineh idi teh ieh kekipedneh.
- ¹⁵"Muyuh miak nier 'Dat luk Ngacing Tot' tuped bang su luk meligan, maya' kudeng luk bida' Nabi Daniel. (Do' lemulun luk maca' kali' ilungneh!)
- ¹⁶Idi kareb ineh teh do' lemulun luk bang tana' Yudia buro amé' luun pegkung.
- ¹⁷Aleg lemulun luk luun buduk ruma' temurun ngalap anun-anun binaweh rat bang ruma'neh.
- ¹⁸Aleg lemulun luk déi' lati' muli' ngalap kuyu'neh.
- ¹⁹Mesusa' kuan decur luk mali' idi luk niti' anak areb ineh!
- ²⁰Do' muyuh sembayang pad muyuh na buro kareb luk meteneb, idi kareb Aco luk ina Mudeng pana'.
- ²¹Ngaceku kareb ineh macing aceh dereh luk rayeh tu-tu, ieh ineh mepad dereh luk rayeh tu-tu, ieh ineh mepad kudeng luk nateh nangun rat pun-pun tana' pad macing nekini, idi na tu-tu miak mangun mucu.

²²Iamo' kudeng kareb ineh na ruen Allah mekamu', kali' rungen seburur pana' na miak uen ngulun; iamo' ngaceku lun luk pinili' Allah, kareb ineh ruenNeh mekamu'.

²³"Idi kudeng seburur lemulun pebala nemuyuh bang kareb ineh, 'Siruh, ini Keristus!' idi 'Ineh Keristus!'—aleg muyuh manu.

²⁴Ngaceku tuda'-tuda' Keristus luk mebalih idi nabi luk mebalih miak macing idi nganau' tanu' luk rayeh idi kekamen luk nan mawa, pad naluk, kudeng miak, lun luk pinili' pana'.

²⁵Ngerawé do'-do'! Ui pangeh nemada' nemuyuh atun.

²⁶"Kudeng lun pebala nemuyuh, 'Siruh, Ieh idi déi' su luk ali-ali!'—aleg muyuh amé' déi'; idi kudeng ideh pebala, 'Siruh, Ieh idi bang takep!'—aleg muyuh manu ku baladeh.

²⁷Ngaceku acing Anak-Lemulun mepad kudeng kilep luk rat pa busat aco idi melagan pad macing pa acep aco.

²⁸"Ngaceku iapeh-iapeh ina butung, su ineh teh inan suit kanui mepamung.

²⁹"Idi kareb pangeh dereh ineh, petacu mateh aco medacem, bulan pana' na maré acangneh, gituen-gituen merurug rat bang langit, idi amung-amung lalud luk déi' langit ineh pana' mebubuh teh.

³⁰Pangeh ineh, tanu' Anak-Lemulun megala' bang langit; idi amung pupu bang tana' ini temido, idi ideh miak nier Anak-Lemulun amé' luun laput rat surga, dengan lalud idi rasat luk rayeh.

³¹Idi Ieh sikal ngecuk melaikat-melaikatNeh dengan serupit luk rayeh uni, pad ideh ngamung lun luk pinili'Neh ratnan apat busat bui, ieh ineh rat iring langit pad macing iring selipa.

³²"Do' muyuh sibada' ratnan pinginud aceh lawa gita'. Kareb angkatneh mebata' idi donneh pun mua', muyuh kali' kareb melau' pangeh muneng.

³³Kudeng ineh teh muyuh ini, kareb muyuh nier amung-amung ineh, do' muyuh kali' karebneh pangeh muneng, munung tanga' peh.

- ³⁴Ngerawé do'-do'! Inul ini na miak metutu', pad macing amung ini mangun.
- ³⁵Langit idi tana' miak metutu', iamo' balaKu na miak metutu'.
- ³⁶"Iamo' ratnan aconeh idi karebneh seburur pana' nateh kali', sagan pana' melaikat luk déi' surga, idi Anak ineh pana' nateh kali', iamo' Taman sebuleng.
- ³⁷Idi acing Anak-Lemulun mepad kudeng bang kareb Noh.
- ³⁸Mepad kudeng kareb nateh ereb, ideh nekuman, nengirup, idi nengaweh, pad macing aco Noh nesemuet bang alud rayeh ineh;
- ³⁹iamo' ideh na kali' megala' pad macing ereb luk nengabud amungdeh. Kudeng ineh teh acing Anak-Lemulun.
- ⁴⁰Kareb ineh inan dueh burur deléi déi' lati'; seburur lapen idi seburur tacin.
- ⁴¹Inan teh dueh burur decur luk peruyung tupeh déi' lepo; seburur lapen idi seburur tacin.
- ⁴²Matar do'-do', ngaceku muyuh na kali' aco sapeh luk Tuhan muyuh macing peh.
- ⁴³Ngerawé do'-do', kudeng tuan ruma' pangeh nekali' karebneh luk inan lun mano macing, kali' rungen ieh matar idi na ieh nima' ruma'neh uen ngusag.
- ⁴⁴Ngaceku ineh do' muyuh megéi' temina', ngaceku Anak-Lemulun sikal macing bang aceh kareb luk na kali' muyuh.
- ⁴⁵"Idéké demulun luk lutep idi mileh, luk icuk tuanneh matar uang ruma'neh, pad maré luk kenendeh bang kareb luk petulu?
- ⁴⁶Samal kuan demulun ineh luk mekeribpeh tuan nganau' kudeng ineh kareb ieh macing.
- ⁴⁷Matu, Ui pebala nemuyuh, tuanneh miak maré neneh ngimet amung-amung binawehneh.
- ⁴⁸Iamo' kudeng demulun ineh dat, ieh mmiak pebala bang niatneh, 'Tuanku mio macing,'

⁴⁹Idi ieh ngimun mebal lun denganneh, idi ieh kuman idi ngirup dengan lun mabuk.

⁵⁰Idi tuan demulun ineh miak macing kareb seaco luk ieh na nginulat neneh, idi bang aceh kareb luk na kali'neh.

⁵¹Tuaneh miak ngaté neneh pad ieh ngalap babpat dengan lun luk siayu, idi su ineh lemulu tangi'-tangi' idi pekatep lipen.

Matius 25

¹"Kareb ineh Imet surga mepad kudeng pulu' burur decur luk pun mebaruh, luk nenguit lapungdeh, idi iné' ngapu' deléi luk sikal ngaweh.

²Idi rat arangdeh inan limeh burur luk mebacé, idi limeh burur luk mileh.

³Ideh luk mebacé nenguit lapungdeh, iamo' na ideh nenguit umau.

⁴Iamo' ideh luk mileh nenguit umau bang seréi' dengan lapungdeh.

⁵Deléi ineh mio macing, pad maung-amungdeh medacep mateh idi rudap.

⁶"Iamo' kareb tangal dacem inan lun ngitang, kebalaneh, 'Kulat muyuh! Deléi luk sikal ngaweh macing peh! Remuat muyuh ngapu' neneh!'

⁷Idi pulu' decur luk pun mebaruh ineh netumui idi nengasa' lapungdeh.

⁸Idi decur luk mebacé nepebala kuan decur luk mileh, 'Maré nekai sebuang umau muyuh; ngaceku lapung kai sikal milep.'

⁹Iamo' kebala decur luk mileh, 'Kian, na miak kuan kai idi kuan muyuh teh lek, meluun do' muyuh amé' inan luk masui umau, idi melih kuan muyuh sebuleng.'

¹⁰Idi litaddeh iné' melih umau deléi luk sikal ngaweh nacing peh; idi ideh luk netemina' nesemuet maya' neneh ku irau paweh, idi tanga' ineh initek peh.

¹¹"Pangeh ineh, decur luk pun mebaruh luk baken ineh nacing peh, idi nepebala, 'Tuan, Tuan, ngukab tanga' kuan kai.'

¹²Iamo' kebala deléi luk sikal ngaweh ineh, 'Na ui miti nemuyuh.' "

¹³Idi kebala Yésus, "Matar do'-do', ngaceku muyuh na kali' aco idi karebneh.

¹⁴Imet surga mepad kudeng selemulun luk sikal amé' ngarang bang bawang baken, idi ieh nenawar amung-amung demuluneh, idi nemaré binawehneh bang paladdeh.

¹⁵Idi kuan sebuleng ieh nemaré limeh ngeribu rigit, idi kuan sebuleng dueh ngeribu rigit, idi kuan sebuleng meribu rigit, anid-anid maya' ilehneh. Idi ieh nenalan peh.

¹⁶Idi demulun luk nengalap limeh ngeribu rigit petacu iné' idi pepua' ku usin ineh pad ieh nengalap uli'neh limeh ngeribu rigit teh.

¹⁷Kudeng ineh teh lemulun luk nengalap dueh ngeribu rigit nengalap uli'neh dueh ngeribu rigit teh.

¹⁸Iamo' ieh luk nengalap meribu rigit iné' idi nengukat tana', idi nengapung usin tuanneh.

¹⁹"Idi mio-mio tuan demulun ineh nuli' peh idi ieh nengiap uli'deh.

²⁰Idi ieh luk nengalap limeh ngeribu rigit iné' idi nenguit limeh ngeribu rigit baken teh, idi keburi'neh, 'Tuan, iko nemaré negku atun limeh ngeribu rigit. Siruh, ui pangeh nengalap uli'neh limeh ngeribu rigit teh.'

²¹Idi tuanneh nepebala neneh, 'Do' luk inau'mu, O demulun luk do' idi lutep niat. Iko pangeh nelutep ratnan luk isuut, pad ui sikal nganau' namu ngimet luk mula'. Do' iko ngalap awang pad-pad denganku.

²²Idi ieh luk nengalap dueh ngeribu rigit iné' teh, idi keburi'neh, 'Tuan, iko nemaré negku atun dueh ngeribu rigit. Siruh, ui pangeh nengalap uli'neh dueh ngeribu rigit teh.'

²³Idi tuanneh nepebala neneh, 'Do' luk inau'mu, O demulun luk do' idi lutep niat. Iko pangeh nelutep ratnan luk isuut, pad ui sikal nganau' namu ngimet luk mula'. Do' iko ngalap awang pad-pad denganku.'

²⁴Idi ieh luk nengalap meribu rigit iné' teh, k idi keburi'neh, 'Tuan, ui kali' iko aceh lemulun luk metueh niat, idi iko ngeranih ratnan su luk inan iko na nengisak; idi iko ngamung teh rat su luk inan iko netunap.

- ²⁵Ui matot, idi ui iné' nanem rigitmu bang tana'. Siruh, ini teh rigit tuan di.'
- ²⁶Iamo' kebala tuanneh, 'Iko demulun luk dat idi mekupé, iko kali' ui ngeranéh rat su luk inanku na nengisak, idi ngamung rat su luk inanku na netunap.
- ²⁷Ngaceku ineh, do' kudeng iko pangeh nemaré usinku kuan lemulun luk mileh pepua', pad ui miak ngalap mula' usinku dengan uli'neh teh kareb ui macing.
- ²⁸Do' muyuh ngalap usin ineh rat neneh, idi maré neneh kuan lemulun luk inan pulu' ngeribu rigit.
- ²⁹Ngaceku idé-idé luk inan anun-anun, kuan lemulun ineh miak barén teh, iamo' lemulun luk na anun-anun, luk ieh kuan pana' miak lapen rat neneh peh.
- ³⁰Idi do' muyuh nala' demulun luk na ulek ini bang dacek luk déi' liang. Su ineh lemulun tangi'-tangi' idi pekatep lipen.'
- ³¹"Kareb Anak-Lemulun macing mangun ku raca' dengan amung melaikatNeh, idi Ieh miak tudo luun kerusiNeh,
- ³²idi amung-amung pupu mepamung pa kiungNeh. Kareb ineh Ieh sikal matad kiungNeh. Kareb ineh Ieh sikal matad nedeh seburur ratnan seburur, mepad kudeng lun matar dumba matad dumba ratnan amék.
- ³³Ieh sikal ngamung dumba-dumba pa tinuehNeh, iamo' amék-amék ineh pa kabingNeh.
- ³⁴Idi Raca' ineh sikal pebala kuan lemulun luk pa tinuehNeh, 'Amé' muyuh luk pangeh nengalap peruan ratnan TamanKu, lapen muyuh rat pun-pun tana' pinudut.
- ³⁵Ui melau, idi muyuh nemaman Negku; Ui meparing, idi muyuh nemaré Negku luk rupen; Ui lun sakai, idi muyuh nenganak Negku;
- ³⁶Ui lubpa, idi muyuh nengayung Negku; Ui pangeh mét, idi muyuh nengasa' Negku; Ui netudo bang tutup, idi muyuh nengikak Negku.'

³⁷Idi lemulun luk matu miak ngor, keburideh, 'O Tuhan, idanké kai nenier Iko melau, idi nemaman Namu, Iko meparing, idi kai nemarké Namu luk rupen?

³⁸Idi idanké kai nenier Iko lun sakai, idi kai nenganak Namuké, Iko lubpa, idi kai nengayung Namu?

³⁹Idi idanké kai nenier Iko mét idi bang tutup, idi kai nengikak Namu?'

⁴⁰Idi Raca' ineh sikal ngor, kebalaNeh, 'Ui pebala nemuyuh, ngaceku muyuh nenganau' kudeng ini kuan seburur kinanakKu lun dat, ieh ineh luk inau' kuanKu teh.'

⁴¹"Idi Ieh pebala kuan lemulun luk pa kabingNeh, 'Buro rat Negku, O muyuh luk binulung, idi semuet bang apui luk meruked, luk tinina' kuan Iblis dengan melaikat-melaikatneh!

⁴²Ui melau, iamo' na muyuh nemaman Negku; Ui meparing, iamo' muyuh na nemarké luk rupenKu;

⁴³Ui lun sakai, iamo' muyuh na nenganak Negku; Ui lubpa, iamo' muyuh na nengayung Negku; Ui pangeh mét idi netudo bang tutup, iamo' muyuh na nengikak Negku.'

⁴⁴Kareb ineh ideh miak ngor balaNeh, keburideh, 'O Tuhan, idanké kai nenier Iko melau, meparing, lun sakai, lubpa, mét, bang tutup, idi na kai nengasa' Namu?'

⁴⁵Idi Raca' ineh sikal ngor baladeh, keburineh, 'Setuneh, Ui pebala nemuyuh, ngaceku muyuh na nenganau' kudeng ini kuan seburur kinanakKu lun dat, muyuh na nenganau' kuanKu teh.'

⁴⁶Lemulun ini semuet bang ukum ruked-ruked peh, iamo' lemulun luk matu semuet bang ulun luk meruked."

Matius 26

¹Kareb Yésus pangeh nemada' amung-amung bala ineh, idi kebalaNeh kuan anak-anak sekola'Neh,

- ²"Muyuh kali', kareb pangeh dueh aco, inan Irau Paska idi Anak-Lemulun barén pad Ieh uen nalib."
- ³Kareb ineh nepamung lun imam-imam rayeh, idi lun rayeh ratnan pupu ineh déi' bang ruma' Imam Rayeh, luk ngadanneh Kayapas.
- ⁴Idi ideh pegayam nakap dalan pad ideh miak ngakem Yésus dengan lulem idi ngaté Neneh.
- ⁵Iamo' keburideh, "Aleg kareb irau, pad na luk idi ria' arang lun mula'."
- ⁶Kareb Yésus tudo déi' Baitani bang ruma' Simun luk mét susud ineh,
- ⁷inan seburur decur iné' matun Neneh, luk nenguit aceh seréi' umau luk do' buen idi luk meraga, idi ieh nengutang umau ineh luun uluh Yésus kareb Ieh netudo kuman.
- ⁸Kareb anak-anak sekola'Neh nekali' ratnan ineh, idi ideh museh, keburideh, "Anunké punneh umau ineh uenneh nuso mo'?"
- ⁹U mau ini petulu pisuen dengan raga luk mikat idi barén kuan lun masi'."
- ¹⁰Yésus nekali' baladeh, idi Ieh nepebala nedeh, "Ngudehké muyuh ngesusa' decur ineh? Ieh nenganau' luk do' kuanKu.
- ¹¹Ngaceku lun masi' megéi' idi dengan muyuh; iamo' Ui ini na megéi' idi dengan muyuh.
- ¹²Ieh nengutang umau ini luun bururKu, pianneh nganau' bururKu temina' kuan tanemKu.
- ¹³Ngerawé do'-do' Iapeh-iapeh pana' aput-aput tana' ini Bala luk Do' ini badén, su ineh teh kekamen decur ini miak tetanen teh mangun ku terawé ratnan ieh."
- ¹⁴Idi seburur rat arang pulu' dueh anak sekola' ineh luk ngadanneh Yudas Iskariot, iné' matun imam-imam rayeh,
- ¹⁵keburineh, "Anunké luk barén muyuh negku kudeng ui maré Yésus nemuyuh?" Idi ideh nemaré neneh teluh ngepulu' balad pirak.

- ¹⁶Rat kareb ineh Yudas nenakap dalan, pad ieh miak maré Yésus bang paladdeh.
- ¹⁷Kareb aco luk pun-pun ratnan Irau Ruti luk Na Lamud, anak-anak sekola' ineh iné' matun Yésus, keburideh, "Su apehké luk pianMu inan kai nganau' temina' pad Iko miak kuman Irau Paska?"
- ¹⁸Idi keburideh, "Amé' muyuh bang bawang rayeh, matun seburur lemulun luk netemina' idi pebala neneh, 'Keburi' Guru, tarekKu pangeh muneng; idi bang ruma'Mu Ui sikal kuman Irau Paska dengan anak-anak sekola'Ku.' "
- ¹⁹Idi anak-anak sekola' ineh nemaya' ecuk Yésus neneh, idi ideh nenganau' temina' Irau Paska ineh.
- ²⁰Kareb malem aco Yésus netudo kuman dengan pulu' dueh anak sekola' ineh.
- ²¹Idi uneddeh kuman, Yésus nepebala neneh, "Ui pebala nemuyuh, inan sebuleng rat arang muyuh luk sikal masui Negku."
- ²²Idi ideh mesusa' tu-tu niat, idi anid-aniddeh nengimun pebala Neneh, keburideh, "Uiké ieh, O Tuhan?"
- ²³Idi kebala Yésus, "Ieh luk ngerereb ruti bang bigan pad-pad denganKu, ieh ineh luk masui Negku.
- ²⁴Anak-Lemulun amé' rungen, mepad kudeng luk inayud ratnan Ieh, iamo' mesusa' tu-tu kuan lemulun luk masui Anak-Lemulun. Meluun do' lemulun ineh na tinganak."
- ²⁵Idi keburideh Yudas luk nemasui Neneh, "Uiké ieh lek, O Guru?" Idi keburideh Yésus neneh, "Mepad kudeng luk bilamu."
- ²⁶Laba' ideh kuman, Yésus nengalap ruti idi nesembayang, idi nemuri' neneh, idi Ieh nemaré kuan anak-anak sekola'Neh, kebalaNeh, "Ngalap idi kuman' ini bururKu."
- ²⁷Idi Ieh nengiding aceh sangkir, idi nemaré ubur, idi nemaré neneh, kebalaNeh, "Ngirup muyuh amung ratnan sangkir ini,

- ²⁸ngaceku ini dara'Ku, ieh ineh dara' pejani' Allah luk inutang kuan lun mula' mangun ku aceh dalam ngalap do' ratnan sala'.
- ²⁹Iamo' Ui pebala nemuyuh, Ui na sikal ngirup abpa' anggur teh pad macing aco Ui ngirup neneh sekua' teh dengan muyuh bang Imet TamanKu.”
- ³⁰Idi pangeh ideh menani aceh nani, idi ideh neremuat idi iné' déi' Pegkung Saitun.
- ³¹Kebala Yésus nedeh, "Amung-amung muyuh miak buro necan Negku bang dacem ini, ngacem pangeh inayud, 'Allah miak ngaté Lun Matar dumba, idi amung-amung dumba luk sengeriudan ineh mepatad.'
- ³²Iamo' mucu ratnan Ui tumui, idi Ui sikal amé' pa atun muyuh macing déi' Galilia.”
- ³³Idi kebala Pétrus Neneh, "Sagan pana' amung-amungdeh necan Namu, ui sebuleng na tu sikal necan Namu.”
- ³⁴Idi kebala Yésus neneh, "Ngerawé do'-do', bang dacem ini, kareb nateh lal ngekook, iko ngalum Negku teluh kua'.”
- ³⁵Idi kebala Pétrus Neneh, "Sagan pana' ui pitayen pad-pad denganMu, na tu ui sikal ngalum Namu." Kudeng ineh teh bala amung-amung anak sekola' ineh.
- ³⁶Pangeh ineh Yésus nemaya' anak sekola'Neh macing su luk ngadanneh Getsémani, idi kebalaNeh nedeh, "Do' muyuh tudo ieni laba' Ui amé' sembayang pa déi'.”
- ³⁷Idi Ieh nenguit Pétrus idi dueh anak Sabdi maya' Neneh, idi Ieh petacu meberat niat pad Ieh pelaba susa'.
- ³⁸Idi kebalaNeh nedeh, "Mesusa' tu-tu niatKu, malé maté ayuKu; tudo ieni muyuh denganKu idi matar pad muyuh na rudap.”
- ³⁹Idi Ieh nenalan pa atun sesuut, idi Ieh netekeradung idi sembayang, kesembayangNeh, "O Ama', kudeng miak, do' sangkir ini labén Negku; iamo' baken maya' pianKu, iamo' maya' pianMu.”

⁴⁰Idi Ieh iné' matun anak-anak sekola' ineh idi Ieh nenier nedeh rudap, idi kebalaNeh ni Pétrus, "Adui, naké muyuh miak matar bang sejam mo' denganKu?"

⁴¹Matar idi sembayang, pad muyuh na semuet bang tutun; sagan pana' niat muyuh geregan, iamo' burur muyuh melaya' peh."

⁴²Idi sekua' teh Ieh iné' sembayang, kesembayangNeh, "O Ama', kudeng sangkir ini na miak buro pad Ui ngirup ineh, aganeh pianMu miak mangun."

⁴³Idi sekua' teh Ieh nelemubed, idi Ieh nenier nedeh uned rudap, ngaceku ideh pelaba dacep mateh.

⁴⁴Idi Yésus neburo rat nedeh sekua' teh idi iné' sembayang seketeluh kua', idi Ieh nesembayang mepad kudeng sembayangNeh luk atun teh.

⁴⁵Idi Ieh iné' matun anak-anak sekola'Neh, idi keburu'Neh nedeh, "Do' muyuh rudap nekini idi ngato erur muyuh. Siruh, karebneh malé macing idi Anak-Lemulun miak barén bang palad lun mesala'.

⁴⁶Tumui! Do' tau nalan. Siruh, ieh luk masui Negku macing peh!"

⁴⁷Uned Yésus pebala, idi Yudas nacing, ieh ineh sebuleng rat arang pulu' dueh anak sekola'Neh, dengan mula' tu-tu lemulun luk nengimet pelapet idi kayuh ieh ineh lemulun luk icuk imam-imam rayeh idi lun rayeh ratnan pupu Yahudi.

⁴⁸Lemulun luk nemasui Yésus pangeh nemaré aceh tanu' kuandeh, keburu'neh, "Lemulun luk ui muen, Ieh ineh Yésus; do' muyuh ngakem Neneh."

⁴⁹Kareb Yudas nacing, idi ieh petacu iné' matun Yésus, keburu'neh, "Bulé' Guru," idi ieh nemuen Neneh.

⁵⁰Idi kebala Yésus neneh, "O Aca', do' mesaget nganau' luk pianmu." Idi ideh iné' ngakem Yésus, idi nengimet Neneh ét-ét.

⁵¹Idi sebuleng rat arang lun dengan Yésus nenatang ticu'neh idi nengangat pelapetneh, idi nenarad demulun Imam Rayeh, idi nemulu' lalidneh.

- ⁵²Idi keburu' Yésus neneh, "Do' ngusong pelapetmu bang binanneh, ngaceku lemulun luk ngaté ku pelapet miak pitayen ku pelapet teh.
- ⁵³Naké iko kali' Ui miak sembayang mutuh ratnan TamanKu pad Ieh petacu maré mela pulu' dueh baweh melaikatNeh kuan nekini pana'?
- ⁵⁴Iamo' kudeng Ui nganau' kudeng ineh, kudeng apehké miak macing bala Surat Allah luk pebala, idi na miak na mangun kudeng ini?"
- ⁵⁵Idi Yésus nepebala kuan lun mula', "Muyuh remuat ayu-ayu sikal pebunu' dengan lun manoké, dengan pelapet idi kayuh pad ngakem Negku? Anid-anid aco Ui netudo mada' ago déi' bang Ruma' Allah, idi nateh muyuh nengakem Negku.
- ⁵⁶Iamo' amung ini pangeh mangun pad ngacing bala Surat Allah luk bila nabi-nabi." Idi amung-amung anak sekola'Neh nenecan Neneh, idi neburo.
- ⁵⁷Lemulun luk pangeh nengakem Yésus nenguit Neneh amé' matun Kayapas, Imam Rayeh, ieh ineh su luk inan guru-guru Ukum idi lun rayeh pupu ineh nepamung.
- ⁵⁸Pétrus nemaya' Neneh rat mado macing bang sikang ruma' Imam Rayeh, idi ieh nesemuet idi netudo dengan amung-amung lun pulis, ngaceku sikal nier kekipedneh.
- ⁵⁹Idi imam-imam rayeh idi amung-amung teubupun besara' nenakap lun nekali' luk mebalih ratnan Yésus, pad ideh miak ngaté Neneh.
- ⁶⁰Idi na luk kali'deh, sagan pana' inan mula' lun nekali' luk mebalih luk iné'. Iamo' mucu ratnan kareb ini, dueh burur iné'.
- ⁶¹Idi keburu' didueh, "Lemulun ini pangeh pebala, 'Ui miak ngusag Ruma' Allah idi mudut neneh bang teluh aco kinioneh.' "
- ⁶²Idi Imam Rayeh netuped, idi kebuli'neh nan Yésus, "Naké Iko ngor adu'deh Namu ineh?"

⁶³Iamo' Yésus pirud mo'. Idi keburu' Imam Rayeh Neneh, "Ui ngecuk Namu pebulung ku ngadan Allah luk mulun, idi mada' nekai kudeng matu Iko Keristus Anak Allah."

⁶⁴Kebala Yésus neneh, "Mepad kudeng luk bilamu. Iamo' Ui pebala nemuyuh, rat pad sini muyuh miak nier Anak-Lemulun tudo pa tinueh Luk Melalud, idi amé' luun iaput rat surga."

⁶⁵Idi Imam Rayeh nenarak ayungneh, keburu'neh, "Ieh pangeh nenguyo! Anunké ulekneh lun nekali' kuan tau teh? Nekini muyuh pangeh neninger kuyoNeh.

⁶⁶Anunké terawé muyuh?" Idi kebaladeh, "Do' Ieh pitayen peh."

⁶⁷Idi ideh nengelica' kiungNeh, idi nemukut Neneh; idi sebuang nemepag Neneh,

⁶⁸keburu'deh, "Do' Iko mada' nekai, O Keristus, idéké lemulun luk nemepag Namu?"

⁶⁹Idi Pétrus netudo setau' déi' sikang; idi seburur anak adi' decur iné' matun neneh, keburu'neh, "Iko ini teh luk dengan Yésus, lun Galilia ineh."

⁷⁰Iamo' Pétrus nengena pa kiung amung-amungdeh, keburu'neh, "Na ui kali' ilung balamu."

⁷¹Idi ieh iné' munung tanga' sikang ineh, idi seburur anak adi' decur luk baken teh nenier neneh, idi keburu'neh nedeh luk tured déi', "Lun ini pangeh perurum dengan Yésus, lun Nasarét teh."

⁷²Idi sekua' teh ieh nengena dengan pebulung, keburu'neh, "Na ui miti lemulun ineh."

⁷³Idi segageh teh lemulun luk tured déi' iné' ni Petrus, kebaladeh, "Matu iko seburur rat arangdeh, ngaceku buri'mu miti kai."

⁷⁴Idi Pétrus nengimun ngediman idi pebulung, keburu'neh, "Na tu ui miti lemulun ineh." Idi lal pana' petacu nengekook peh.

⁷⁵Idi Pétrus nengerawé bala Yésus atun, keburu'Neh, "Kareb nateh lal ngekook, iko miak ngalum Negku teluh kua'." Idi ieh neremuat idi nenangi' dengan singap-singap.

Matius 27

¹Kareb pekak uka-uka, amung-amung imam rayeh idi lun rayeh pupu ineh pana' nepegayam ratnan Yésus, pian ngaté Neneh.

²Idi ideh nengaling Neneh, idi nenguit Neneh idi nemaré Neneh kuan Pilatus, luk ngimet bawang ineh.

³Kareb Yudas luk nemasui Yésus, nekali' neneh nengukum Neneh, ieh nenginuud, idi nengelubed teluh ngepulu' balad pirak ineh kuan imam-imam rayeh idi lun rayeh ineh.

⁴Keburu'neh, "Ui mesala' ngaceku ui nemasui dara' aceh lemulun luk na mesala'!" Iamo' keburu'deh, "Mekudeh ieh? Baken kai, iamo' iko luk mabeh ini."

⁵Idi ieh nemapet balad pirak ineh bang Ruma' Allah idi nuli', idi iné' perieret.

⁶Imam-imam rayeh nengamung balad pirak ineh, keburu'deh, "Na tau miak nipa ini bang pati' rigit pupuk ngaceku ini tabpar dara'."

⁷Idi ideh nepegayam idi nemutut pad ideh nemelih tana' ratnan tukang mipi' kuden mangun ku lengutan kuan lun sakai.

⁸Ngaceku ineh tana' ineh titendeh Tana' Dara', macing aco sini pana'.

⁹Kareb idi pangeh mangun luk bila Nabi Yeremia, kebalaneh, "Idi ideh nenguit teluh ngepulu' balad pirak, ieh ineh ragaNeh luk imo lun Israil.

¹⁰Idi ideh nemaré ineh ku belih tana' tukang mipi' kuden mepad kudeng luk pangeh bila Tuhan kuanku."

¹¹Idi Yésus netuped pa kiung Lun luk Ngimet Bawan gineh; idi ieh nengitun Yésus, keburu'neh, "Ikoké Raca' lun Yahudi?" Idi keburu' Yesus neneh, "Mepad kudeng balamu."

- ¹²Idi kareb Yésus inadu' imam-imam rayeh idi lun rayeh-rayeh teh, idi Ieh nungeng.
- ¹³Idi kebala Pilatus Neneh, "Naké Iko ninger mula' adu'deh Namu?"
- ¹⁴Iamo' Yésus na nengor sebila' bala pana', pad Lun luk Ngimet Bawang ineh mawa tu.
- ¹⁵Kareb Irau Paska, Lun luk Ngimet Bawang megéi' muit seburur lemulun luk tinutup kuan lun mula', ieh ineh idé-idé luk piandeh.
- ¹⁶Kareb idi inan seburur lemulun bang tutup luk pelaba dat, ngadanneh Barabas.
- ¹⁷Idi kareb lun mula' nepamung, Pilatus nengitun nedeh, "Sapehké luk pian muyuh ui muit kuan muyuh? Barabaské, kian Yésus luk titen Keristus?"
- ¹⁸Ieh nekali' ideh pangéh nemaré Neneh ngaceku ideh temaruh.
- ¹⁹Laba' Pilatus tudo bang ruma' besara', awanneh nengecuk mada' neneh, keburineh, "Aleg iko nganau' anun-anun pana' kuan lemulun luk matu ini; ngaceku aco sini pelaba susa' niatku ku nupiku Neneh."
- ²⁰Imam-imam rayeh idi lun rayeh-rayeh nengubuk nelun mula' pad ideh mutuh muit Barabas idi ngaté Yésus.
- ²¹Iamo' kebala Lun luk Ngimet Bawang, "Sapehké rat arang didueh luk pian muyuh ui muit kuan muyuh?" Idi keburideh neneh, "Barabas."
- ²²Pilatus nepebala nedeh, "Kudeng pieh kudeng ineh anunké luk ruenku kuan Yésus luk titen Keristus?" Idi keburideh neneh, "Do' Ieh uen nalib."
- ²³Iamo' kebala Pilatus, "Ngudeh, sala' anunké luk pangéh inau'Neh?" Iamo' ideh nengitang, keburideh, "Do' Ieh uen nalib."
- ²⁴Kareb Pilatus nekali' balaneh na ulek, iamo' mangun meluun mula' ria', idi ieh nengalap abpa' idi namaru' paladneh pa kiung lun mula' ineh, kebalaneh, "Ui meligan ratnan dara' lemulun luk matu ini! Muyuh sebuleng mabeh dara'Neh."

- ²⁵Idi amung-amung lemulun ineh nengor balaneh, keburideh, "Aganeh kai idi anak-anak kai mabeh dara'Neh."
- ²⁶Idi Pilatus nemuit Barabas kuandeh iamo' ieh nemebal Yésus idi nemaré Neneh nedeh, pad Ieh uen nalib.
- ²⁷Pangeh ineh, lun pebunu' Pilatus nenguit Yésus amé' bang ruma' Lun luk Ngimet Bawang ineh, idi Pilatus nengamung amung bawehneh idi nengecuk nedeh ngelibut Yésus.
- ²⁸Idi ideh nengelengu ayung Yésus idi nengayung Neneh ku kuyu' luk mesia'.
- ²⁹Idi ideh nengapid tabpa' ku pataNeh idi nengerareng ineh luun uluhNeh, idi ideh nemaré rukud bang paladNeh, idi ideh netekeradung pa kiungNeh idi nesitunga Neneh. Keburideh, "Tabi' Raca' lun Yahudi."
- ³⁰Idi ideh nengelica' Neneh, idi nengalap rukud ineh, idi nenecat uluhNeh.
- ³¹Idi pangeh ideh nesitunga Neneh, ideh nengelengu kuyu' ineh rat Neneh, idi nengayung Neneh ku ayungNeh sebuleng, idi nenguit Neneh remuat pad Ieh miak uendeh nalib.
- ³²Idi kareb ideh neremuat, ideh nekali' aceh lemulun rat Kiréni, luk ngadanneh Simun; idi ieh sinaaddeh maan salib Yésus.
- ³³Kareb ideh nacing su luk inan ngadanneh Golgota, ilungneh, Su luk inan Perupuk Uluh,
- ³⁴Idi ideh nemaré abpa' anggur luk pinuar ku luk mepét, rupenNeh. Kareb Ieh nenila' ineh, na Ieh sikal ngirup.
- ³⁵Ideh nenalib Neneh, idi ideh nemabpat ayungNeh kuandeh maya' udi.
- ³⁶Idi ideh netudo déi' idi nematar Neneh.
- ³⁷Idi ideh nenganau' aceh adu Neh luk inayud pa luun uluhNeh, "Ini Yésus luk Raca' lun Yahudi."
- ³⁸Kareb ineh inan dueh burur lun mano sinalib peranga' dengan Yésus, seburur pa tinueh idi seburur pa kabingNeh.

- ³⁹Idi lemulun luk nelemaba su ineh neguyo Yésus idi ideh tuka'-tuka' uluh.
- ⁴⁰Keburi'deh, "Neh! Iko luk ngusag Ruma' Allah idi mudut neneh teh bang teluh aco mo' kinioneh, do' ngulun bururMu sebuleng. Kudeng matu Iko Anak Allah, temurun ratnan salib ineh."
- ⁴¹Kudeng ineh teh imam-imam rayeh idi guru-guru Ukum idi lun rayeh-rayeh nesitunga Neneh, keburid'eh,
- ⁴²"Ieh pangeh nengulun lun baken, iamo' na Ieh melalud ngulun bururNeh sebuleng. Kudeng Ieh Raca' pupu Israil, do' Ieh temurun nekini ratnan salib idi tau miak manu Neneh.
- ⁴³Ieh merapet inan Allah, do' Allah ngulun Neneh nekini, kudeng Ieh mawa Neneh; ngaceku keburid'Neh, 'ui ini Anak Allah.' "
- ⁴⁴Idi lun mano luk sinalib denganNeh nengedat Neneh kudeng ineh teh.
- ⁴⁵Idi rat muned aco aput-aput tana' ineh medacem pad macing tangal musul aco.
- ⁴⁶Idi kareb lélé tangal musul aco Yésus nengitang, kebalaNeh, "Eli, Eli, lema Sabaktani?" ilungneh, "AlahKu, AllahKu, anunké punneh Iko necan Negku?"
- ⁴⁷Kareb ideh neninger tangNeh, idi sebuang rat arang lemulun luk tuped déi' nepebala, "Lun ini nawar Elia."
- ⁴⁸Idi petacu seburur rat arangdeh nupun idi nengalap aceh lemut batu, idi nenganau' neneh panu' ku abpa' luk malam idi nenganau' neneh nan paped kayuh, idi nemaré neneh rupenNeh.
- ⁴⁹Iamo' keburid' lun baken, "Aganeh, do' tau nier kudeng Elia sikal amé' ngulun Neneh."
- ⁵⁰Idi sekua' teh Yésus nengitang idi niatNeh neputut.
- ⁵¹Idi denak-denak dicing Ruma' Allah ineh nedarak upa dueh rat pa luun macing pa beneh; idi tana' nesigio teh, idi batu-batu nebila' peh.
- ⁵²Idi tanem-tanem mukab teh; idi mula' butung lun luk meligan luk pangeh naté netumui.

- ⁵³Ideh neremuat rat bang lengutan, idi pangeh Yésus netumui rat arang lun naté, idi ideh nesemuet bang Bawang luk Meligan idi megala' kuan lun mula'.
- ⁵⁴Idi kareb lun rayeh lun pebunu' idi lemulun luk tudo danganneh matar Yésus nekali' tana' meruyuh, dengan amung-amung luk pangeh mangun, ideh pelaba tot, idi keburideh, "Matu, Ieh Anak Allah."
- ⁵⁵Idi inan mula' decur su ineh luk nenier amung-amung ineh rat mado, idi luk pangeh nemaya' Yésus rat Galilia, idi luk nengasa' Neneh.
- ⁵⁶Idi arangdeh Mariam Magdalina, Mariam luk tinan Yakub idi Yusup, idi tinan anak-anak Sabdi ineh.
- ⁵⁷Idi kareb malem aco, nacing aceh lun do', ngadanneh Yusup rat Arimatia, idi ieh pana' seburur anak sekola' Yésus.
- ⁵⁸Idi ieh iné matun Pilatus idi nemutuh butung Yésus idi Pilatus nengecuk maré neneh.
- ⁵⁹Idi Yusup nengalap butung ineh idi nengelilib neneh ku kibung luk do'.
- ⁶⁰Idi ieh nengerareng neneh bang tanemneh sebuleng luk mebaruh, luk pangeh kinuerneh ratnan batu; idi ieh negelubid aceh batu rayeh nepingakeb munung tanem ineh idi ieh neburo.
- ⁶¹Idi déi' Mariam Magdalina idi Mariam luk baken ineh teh, netudo muneng ku tanem.
- ⁶²Idi kenebpa, ieh ineh kareb Aco luk inan Mudeng, imam-imam rayeh idi lun Parisi nepamung amé' matun Pilatus,
- ⁶³keburideh, "O Tuan, kai ngerawé bala lun naluk ineh kareb Ieh mulun, keburideh, 'Pangeh teluh aco idi Ui sikal tumui teh.'
- ⁶⁴Ngaceku ineh do' Tuan ngecuk lemulun ngeraben tanemNeh pad macing aco luk keteluh, pad anak-anak sekola'Neh na miak amé' mano Neneh, idi pebala nelun Ieh pangeh tumui rat arang uned lun naté. Idi kekipedneh raruh lemulun meluun dat ratnan luk pun-pun."

⁶⁵Idi Pilatus nepebala nedeh, "Muyuh pana' inan lun matar, do' muyuh amé' idi ngeraben tanemneh maya' amung-amung ileh muyuh."

⁶⁶Idi ideh iné' ngeraben tanem ineh, idi nenalit batu tanem ineh idi lun matar ineh pana' nemaya' nedeh.

Matius 28

¹Idi pangeh Aco luk inan Mudeng, kareb lélé macing pekak Aco Minggu ineh teh, Mariam Magdalena idi Mariam luk baken teh iné' nier tanem ineh.

²Denak-denak tana' meruyuh; idi aceh melaikat Tuhan rat bang surga iné' ngelubid kakeb tanem ineh, idi netudo luunneh.

³Ayuneh mepad kudeng kilep, idi ayungneh mebuda' kudeng salju.

⁴Idi lun luk matar ineh pana' megegker ngaceku matot neneh, mepad kudeng lun naté.

⁵Idi kebala melaikat nan decur-decur ineh, "Aleg muyuh matot, ngaceku ui kali' muyuh nakap Yésus luk pangeh sinalib ineh.

⁶Na Ieh idi tungé' ngaceku Ieh pangeh netumui, kudeng luk bilaNeh atun; amé' nier su luk inandeh nengerareng Neneh atun.

⁷Do' muyuh amé' saget-saget idi mada' anak-anak sekola'Neh, kebala muyuh, Ieh pangeh netumui rat arang lun naté; idi Ieh nalan pa atun muyuh amé' Galilia; déi' muyuh miak nier Neneh. Ngerawé do'-do'! Pangeh ui nemada' nemuyuh."

⁸Idi ideh nenalan iket-iket ratnan tanem ineh dengan matot, idi niatdeh pelaba awang idi ideh nupun nated bala ineh kuan anak-anak sekola'Neh.

⁹Denak-denak Yésus nepapu' nedeh, keburu'Neh, "Awang kuan muyuh." Idi ideh iné' ngapel kukudNeh idi netekeradung sembayang Neneh.

¹⁰Idi kebala Yésus nedeh, "Aleg matot, do' muyuh amé' idi ngecuk kinanak-kinanakKu semuet bang bawang Galilia, idi napeh Ui miak sirendeh déi."

¹¹Laba' decur-decur ineh nalan, sebuang rat arang lun matar ineh nesemuet bang bawang rayeh, idi nemada' kuan lun imam-imam rayeh ratnan amung-amung luk pangeh mangun.

¹²Idi imam-imam pangeh netebubpun dengan lun rayeh, idi pangeh ideh nepegayam, ideh nemaré mula' usin kuan lun pebunu' ineh,

¹³keburi'deh, "Do' muyuh mada', 'Anak-anak sekola'Neh nelulem kareb medacem idi nemanu Neneh, laba' kai rudap.'

¹⁴Idi kudeng Lun luk Ngimet Bawang ninger bala ini, kai miak ngubuk neneh, pad muyuh na mesusa'."

¹⁵Idi lun matar ineh nengalap usin ineh, idi ideh nemada' mepad kudeng luk pangeh bida' nedeh. Idi bala ini inan arang lun Yahudi pad macing aco sini pana'.

¹⁶Idi pulu' aceh anak sekola' ineh iné' luun surud déi' Galilia luk bida' Yésus kuandeh atun.

¹⁷Kareb ideh nenier Neneh, idi ideh netekeradung sembayang Neneh, iamo' sebuangdeh na manu.

¹⁸Yésus iné' nedeh, kebalaNeh, "Amung-amung lalud bang surga idi bang tana' pana' pangeh biré Negku.

¹⁹Ngaceku ineh, amé' muyuh idi nganau' amung-amung pupu mangun ku anak-anak sekola'Ku, idi ngerereb nedeh bang ngadan Taman, Anak, idi Roh Meligan.

²⁰Idi mada' nedeh pad ideh maya' amung-amung bala luk icukKu nemuyuh. Idi Ui ngedengan nemuyuh raked-raked pad macing kekipedneh."

Markus

Markus 1

- ¹Ini pun-pun Bala luk Do' ratnan Yésus Keristus Anak Allah.
- ²Mepad kudeng luk inayud bang surat Nabi Yesaya, kebalaneh; "Matu, Ui ngecuk lun dukenKu amé' pa atunMu, pad nganau' temina' dalamMu.
- ³Idi seburur lemulun ngitang déi' su luk ali-ali: 'Nganau' temina' dalam Tuhan, idi ngesiri lisangen-lisangenNeh!' “
- ⁴Idi Yahya nacing ngerereb lemulun déi' su luk ali-ali, idi nemada' ratnan rereb uren, ieh ineh dalam ngalap do' ratnan sala'.
- ⁵Kareb ineh amung uang tana' Yudia neremuat dengan amung lun Yerusalim iné' matun Yahya. Ideh nengamo sala'deh, idi Yahya nengerereb nedeh bang Abpa' Yarden.
- ⁶Yahya ineh nengayung ku buluh pung unta, idi inan abet awa'neh ratnan kubil pung, idi luk kenneh, ieh ineh kato idi duru' tebikan.
- ⁷Kebalaneh nelun mula', "Muci rat negku ini miak macing Seburur Lemulun teh luk meluun lalud rat negku. Neka abet kasutNeh pana' ui na mayu.
- ⁸Ui ngerereb nemuyuh bang abpa'; iamo' Ieh miak ngerereb nemuyuh ku Roh Meligan.”
- ⁹Na mio teh idi Yésus nacing rat Nasarét déi' tana' Galilia idi Yahya nengerereb Neneh bang Abpa' Yarden.
- ¹⁰Kareb Yésus numak rat bang abpa' ineh, Ieh nenier langit mukab idi Roh Allah temurun luunNeh mepad kudeng aceh suit sukur.
- ¹¹Idi inan aceh tang rat bang langit, "Iko ini AnakKu luk inanKu mawa, idi Ui mawang niat Namu!”
- ¹²Petacu teh Roh nenguit Neneh amé' su luk ali-ali.
- ¹³Idi Ieh netudo déi' su luk ali-ali apat ngepulu' aco kinioneh, tinutun Sétan. Idi Ieh tudo arang pung-pung luk meliputi, iamo' melaikat-melaikat pana' nacing ngasa' Neneh.

- ¹⁴Kareb Yahya ineh pangeh kikem, idi Yésus nacing déi' Galilia mada' Bala luk Do' ratnan Allah.
- ¹⁵KebalaNeh, "Karebneh pangeh macing, idi Imet Allah pangeh muneng. Do' muyuh uren idi manu ku Bala luk Do' ini."
- ¹⁶Kareb Yésus nenalan déi' tangeb Takung Galilia, idi Ieh nenier dueh burur lun ngerabat, ieh ineh Simun dengan kinanakneh Andrias, uned ngerabat déi' bang takung ineh.
- ¹⁷Idi keburu' Yésus nedidueh, "Amé' medueh maya' Negku, idi Ui nganau' nemedueh mangun ku lun ngerabat lemulun."
- ¹⁸Petacu didueh nenecan rabat ineh, idi nemaya' Yésus.
- ¹⁹Kareb Yésus nenalan rat déi' nateh mado tu, idi Ieh nenier Yakub Sabdi, dengan kinanakneh Yahya, idi didueh tudo bang alud ngii' rabat.
- ²⁰Idi Ieh petacu nenawar nedidueh, idi didueh nenecan Sabdi taman didueh bang alud dengan lun tebarinneh, idi nemaya' Yésus.
- ²¹Ideh iné' déi' Kapernaum, idi kareb Aco luk inan Mudeng, Yésus nesemuet bang ruma' sembayang idi nemada' nedeh.
- ²²Idi lemulun ineh mawa ku bada'Neh ineh. Ieh baken ratnan guru-guru Ukum, ngaceku Ieh nemada' nedeh dengan lalud.
- ²³Idi kareb ineh seburur lemulun luk sinuet ada' nesemuet bang ruma' sembayang, idi nengitang,
- ²⁴keburu'neh, "O Yésus lun Nasarét, anunké luk pianMu nekai? Iko macing sikal ngaté nekaiké? Ui kali' Namu ini, ieh ineh Lemulun luk Meligan luk nacing ratnan Allah."
- ²⁵Idi Yésus nemebpeng neneh, keburu'Neh, "Pirud! Remuat iko ratnan lemulun ini!"
- ²⁶Idi ada' ineh ucet ngagau lemulun ineh, idi nengitang, idi ieh neremuat rat neneh.

²⁷Idi lun mula' ineh mawa pad ideh nengitun seburur dengan seburur, keburi'deh, "Anunké ini? Bada' luk mebaruhké? Ngaceku amung-amung ada' pana' icukNeh dengan lalud, pad ideh maya' balaNeh."

²⁸Idi dengan mesaget amung-amung bala ratnan Yésus ini nepiar bang libut-libut bawang Galilia.

²⁹Ideh neremuat rat bang ruma' sembayang idi iné' ruma' Simun idi Andrias pad-pad dengan Yakub idi Yahya.

³⁰Idi iban Simun, telubid ngaceku medadem, idi petacu ideh nemaré kali' kuan Yésus ratnan ineh.

³¹Idi Yésus nacing idi nengimet ticu'neh, idi nenui neneh, pad dademneh ineh pana' nedo' peh, idi decur ineh nengasa' nedeh.

³²Kareb aco pangeh macep, idi ideh nenguit amé' matun Yésus amung-amung lemulun luk mét idi lemulun luk sinuet ada' pana'.

³³Idi amung lun bang bawang ineh pana' nepamung munung tanga' ruma' ineh.

³⁴Idi Yésus nengedo' mula' lemulun luk inan puar-puar luk mét, idi mula' ada' pana' tila'Neh. Iamo' Ieh na maré ada' ineh pebala-pebala, ngaceku ada' ineh miti Neneh.

³⁵Pekak uka-uka, kareb nateh aco masat, idi Yésus netumui, idi Ieh neremuat iné' su luk ali-ali, idi Ieh nesembayang déi'.

³⁶Iamo' Simun dengan amung lun rurunneh ineh nesemunu' Neneh.

³⁷Kareb ideh nepapu' Neneh, idi ideh nepebala Neneh, "Amung-amung lemulun nakap Namu!"

³⁸Iamo' Yésus nepebala nedeh, "Do' tau amé' bang bawang luk bake luk muneng rat ieni, pad Ui mada' déi' teh, ngaceku ini punneh Ui nacing."

³⁹Idi Ieh iné' mada' bang amung ruma' sembayangdeh ineh déi' aput tana' Galilia, idi Ieh nenala' ada' teh.

⁴⁰Inan aceh lemulun luk mét susud iné' matun Yésus, idi netekeradung pa kiungNeh mutuh pedengan, keburineh, "Kudeng Iko pian, Iko miak ngedo' negku."

⁴¹Idi Yésus pelaba éi' neneh, idi Ieh nenatang tiku'Neh idi nengakem neneh, kebalaNeh, "Ui pian ngedo' namu, do' iko meligan peh!"

⁴²Idi petacu susudneh ineh nedo', idi ieh malét.

⁴³Idi Yésus metueh mada' neneh, idi nengecuk neneh nalan dengan mesaget,

⁴⁴kebalaNeh, "Ngerawé do'-do', aleg iko mala anun-anun kuan seburur lemulun pana'. Iamo' do' iko petacu amé' mada' bururmu siren lun imam, idi maré baré maya' kudeng luk icuk Musa, pad ngegala' ligamu kuan amung-amung lemulun."

⁴⁵Iamo' lemulun ineh nenalan idi nengimun mada' bala ineh aput-apat bawang. Ieh nemada' ratnan amung ineh pad Yésus na miak semuet bang bawang ineh dengan megala'. Iamo' Ieh tudo déi' su luk ali-ali' idi mula' lemulun nacing Neneh ratnan anid-anid bawang.

Markus 2

¹Pangeh tuda'-tuda' aco, idi Yésus nelemubed iné' déi' Kapernaum, id bala ratnan acingNeh déi' ruma' nepiar.

²Idi mula' lemulun nepamung, pad na luk idi luk inan peh, macing ku munung tanga' pana'. Yésus nemada' Bala luk Do' kuandeh,

³idi inan lemulun luk naté urat, luk binirir apat burur iné' matun Neneh.

⁴Iamo' ideh na miak amé' muneng nan Yésus ngaceku pelaba ula' lemulun. Idi ideh nengukab apo su luk inanNeh ineh. Kareb ideh pangeh nengukab apo ineh, idi ideh nengurur birir lemulun luk naté urat ineh pa kiung Yésus.

⁵Yésus nenier anudeh ineh, idi kebalaNeh nan lemulun luk naté urat ineh, "O anakKu, iko pangeh nengalap do' ratnan sala'mu."

⁶Idi sebuang rat arang guru-guru Ukum luk tudo déi' nengerawé bang niatdeh,

⁷"Ngudehké lemulun ini mekuu' nguyo Allah kudeng ineh? Idéké miak maré do' ratnan sala'? Inan Sebuleng mo', Ieh ineh Allah."

⁸Kareb ineh teh Yésus nekali' ratnan ideh ngerawé kudeng ineh bang niatdeh, idi kebalaNeh nedeh, "Ngudehké muyuh ngerawé kudeng ineh bang niat muyuh?"

⁹Sapehké luk meluun malé, mala kuan lemulun luk naté urat ineh, 'Iko pangeh nengalap do'ké,' kian pebala, 'Tumui iko, ngiding luk inanmu rudap ine idi nalan'?"

¹⁰Ui ngegala' kuan muyuh ratnan Anak-Lemulun ngimet lalud bang tana' ini maré do' ratnan sala'." Idi kebalaNeh kuan lemulun luk naté urat ineh,

¹¹"Ui pebala namu, Tumui iko, ngiding luk inanmu rudap ineh idi muli'."

¹²Idi ieh netumui, petacu nengiding luk inanneh rudap ineh idi neremuat siren lun mula', pad amung-amungdeh pana' mawa idi nengerayeh Allah, keburi'deh, "Nateh kai nekali' luk kudeng ini atun!"

¹³Yésus nelemubed iné' tangeb Takung Galilia, idi lun mula' iné' Neneh, idi Ieh nemada' nedeh.

¹⁴Kareb Ieh nelemaba, idi Ieh nenier Liwi Alpius tudo bang ruma' luk inan ngalap usin pupuk. Kebala Yésus neneh, "Do maya' Negku." Idi Liwi netuped idi nemaya' Neneh.

¹⁵Kareb Yésus kuman bang ruma' Liwi, idi mula' lemulun luk ngamung usin pupuk idi lun mesala' pana' tudo dengan Yésus idi anak-anak sekola'Neh teh; ngaceku inan mula' lemulun luk kudeng ineh nemaya' Yésus.

¹⁶Kareb guru-guru Ukum idi lun Parisi nenier Yésus kuman dengan lun mesala' idi lun luk ngamung usin pupuk ineh teh, idi kebaladeh nan anak-anak sekola'Neh, "Ngudehké Yésus kuman dengan lemulun luk kudeng ineh?"

¹⁷Kareb Yésus neninger baladeh, idi kebalaNeh nedeh, "Lemulun luk do' ulun na ulek uen ngubat, iamo' lemulun luk mét. Baken Ui macing nawar lemulun luk matu, iamo' lemulun luk mesala'."

¹⁸Idi anak-anak sekola' Yahya idi lun Parisi pana' uned mawa', idi ideh nacing ngitun Yésus, "Ngudehké anak-anak sekola' Yahya idi anak-anak sekola' lun Parisi pana' mawa', iamo' anak-anak sekola'Mu na mawa'?"

¹⁹Idi kebala Yésus nedeh, "Miakké lun rurun deléi luk sikal ngaweh mawa' kareb ieh idi dengandeh? Kareb deléi luk sikal ngaweh ineh idi dengandeh na ideh mawa'.

²⁰Iamo' aconeh miak macing kareb deléi luk sikal ngaweh ineh miak lapen rat arangdeh, idi kareb ineh teh ideh miak mawa'.

²¹"Na luk idi seburur lemulun luk mubpul aceh kuyu' luk mon ku kibung luk mebaruh, ngaceku kali' rungen bubpul ineh medarak, ieh ineh kibung luk mebaruh ngedarak luk mon ineh pad darakneh meluun rayeh peh.

²²Idi na luk idi seburur pana' ngutang abpa' anggur luk mebaruh bang seréi' kubil luk mon, ngaceku abpa' anggur ineh miak ngebila' seréi' ineh, idi abpa' anggur ineh pana' mutat, idi seréi' ineh mebila' peh. Iamo' abpa' anggur luk mebaruh miak ruen lemulun bang seréi' luk mebaruh."

²³Kareb Aco luk inan Mudeng Yésus nenalan lemaba lati'-lati', idi kareb ideh nalan anak-anak sekola'Neh nengalap runguh padé ineh.

²⁴Idi lun Parisi nepebala kuan Yésus, "Siruh anak-anak sekola'Mu nganau' luk bibpeng kareb Aco luk inan Mudeng?"

²⁵Idi kebala Yésus nedeh, "Natehké muyuh nemaca' luk inau' Daud kareb na luk kenenneh? Idi ieh dengan anak itinneh melau,

²⁶idi ieh nesemuet bang Ruma' Allah, idi nekuman ruti luk biré kuan Allah, kareb Abiatar Imam Rayeh. Maya' Ukum tau, imam-imam mo' luk miak kuman ruti ineh. Iamo' Daud nekuman ineh, idi ieh nemaré nelun denganneh teh."

²⁷Idi kebala Yésus nedeh, "Aco luk inan Mudeng inau' ngaceku lemulun, baken lemulun inau' ngaceku Aco luk inan Mudeng.

²⁸Ngaceku ineh Anak-Lemulun ineh Tuhan pa luun Aco luk inan Mudeng teh."

Markus 3

¹Yésus nelemubed iné' bang ruma' sembayang teh, idi déi' inan selemulun luk naté ticu'neh pa selipa.

²Idi inan lemulun nenier Neneh, kudeng Ieh miak ngedo' lemulun ineh bang Aco luk inan Mudeng, pelé ideh miak ngadu' Neneh.

³Idi keburi' Yésus kuan lemulun luk naté ticu' ineh, "Amé' iko pa atun."

⁴Idi Ieh nengitun nelun mula', kebalaNeh, "Miakké bang Aco luk inan Mudeng nganau' luk do', kian luk dat? Ngulun burur, kian ngaté?" Idi ideh pirud.

⁵Idi Yésus nenier libut-libutdeh dengan museh idi mesusa' niat, ngaceku niatdeh metueh, idi kebalaNeh kuan lemulun luk mét ineh, "Natang ticu'mu!" Idi ieh nenatang ticu'neh, idi ticu'neh pana' nedo'.

⁶Idi lun Parisi neremuat rat bang ruma' sembayang, idi petacu ideh nepegayam nelun Herodiani ratnan kudeng apeh ideh miak ngaté Yésus.

⁷Yésus nenalan dengan anak-anak sekola'Neh iné' Takung Galilia, idi pelaba ula' lemulun maya' Neneh. Ideh nacing rat Galilia, rat Yudia,

⁸rat Yérusalim, rat Idumia, rat dipar Abpa' Yarden, idi rat bawang Sur idi Sidon. Idi lun mula' ini iné' matun Yésus kareb ideh pangeh neninger ratnan amung kekamenNeh ineh.

⁹Idi Ieh nengecuk anak-anak sekola' nganau' temina' sebuleng alud kuanNeh, pad lun mula' na miak ngerieng Neneh.

¹⁰Mula' lemulun pangeh dino'Neh, pad tuda'-tuda' lemulun luk inan luk mét pana' nacing ngerieng Neneh idi sikal ngakem Neneh.

¹¹Kareb lemulun luk sineut ada' nenier Yésus, idi dieh neluka' pa kiungNeh idi nengitang, keburi'deh, "Iko ineh Anak Allah."

¹²Idi Yésus nemebpeng nedeh na mada' Neneh Anak Allah.

- ¹³Yésus numak luun aceh surud, idi Ieh nenawar idé luk pianNeh, idi ideh iné' matun Neneh.
- ¹⁴Idi Ieh nenganau' lutep pulu' dueh burur, pelé ideh pad-pad denganNeh, idi pad ideh miak duken amé' mada' lemulun,
- ¹⁵idi teh ideh ngalap lalud nala' ada'.
- ¹⁶Ini ngadan pulu' dueh burur luk pinili'Neh: Simun (luk titenNeh Pétrus);
- ¹⁷Yakub Sabdi idi kinanakneh Yahya, (didueh ineh titen Yésus Buanergis, ilungneh, anak-anak lalam);
- ¹⁸Andrias, Pilipus, Bartolomius, Matius, Tomas, Yakub Alpius, Tadius, Simun lun Selot
- ¹⁹idi Yudas Iskariot, ieh ineh luk nemasui Yésus.
- ²⁰Idi Yésus nuli' idi lun mula' pana' nepamung teh, pad ideh na mekatau' kuman.
- ²¹Kareb bala ineh pangeh nekali' lun bang ruma' Yésus, idi ideh pian amé' ngalap Neneh muli' ngaceku lemulun mala', "Ieh meruden!"
- ²²Kudeng ineh teh amung guru-guru Ukum luk pangeh nacing rat Yerusalim nepebala, "Ieh sinuet Balsebul." Idi kebala lun baken, "Ieh nala' ada' dengan lalud lun rayeh ada'."
- ²³Idi Yésus nengamung nelun mula' idi nemada' nedeh dengan luk pinginud, kebalaNeh, "Kudeng apehké Sétan miak nala' Sétan?"
- ²⁴Kudeng aceh bawang patad-patad idi pekedaluh arangdeh sebuleng, bawang ineh na miak tuped.
- ²⁵Kudeng aceh tetek ruma' patad-patad idi pekedaluh arangdeh sebuleng, idi tetek ruma' ineh na miak tuped.
- ²⁶Idi kudeng imet Sétan patad-patad idi pekedaluh arangdeh sebuleng, imet ineh na miak tuped, iamo' mekusag pad na luk ketecan peh.

²⁷"Idi na luk idi seburur pana' miak semuet bang ruma' lemulun luk metueh idi mano binawehneh kudeng na ieh ngaling lemulun luk metueh ineh atun' idi teh ieh miak mano binaweh luk bang ruma'neh ineh.

²⁸"Ngerawé do'-do'! Lemulun miak ngalap do' ratnan amung-amung sala', kudeng ineh teh ratnan amung-amung kuyo ineh.

²⁹Iamo' idé-idé luk nguyo Roh Meligan na ieh miak ngalap do' ratnan sala' macing raked-raked, iamo' sala'neh ineh meruked peh."

(³⁰Yésus nemada' kudeng ineh ngaceku ideh nemala Neneh sinuet ada'.)

³¹Pangeh ineh tinan ésus idi kinanak-kinanakNeh nacing Neneh. Ideh netuped déi' liang idi nengecuk lemulun nawar Neneh.

³²Idi lun mula' pana' netudo libut-libut Yésus,idi kebaladeh Neneh, "Siruh, tinan idi kinanak-kinanakMu tuped déi' liang nakap Namu!"

³³Iamo' kebala Yésus, "Idéké luk tinanKu idi idéké luk kinanak-kinanakKu?"

³⁴Idi Ieh nelumi idi nenier amung-amung lemulun luk libut-libutNeh, idi nepebala, "Siruh, ini tinanKu idi kinanak-kinanakKu!

³⁵Ngaceku idé-idé luk nganau' pian Allah, ieh ineh luk kinanakKu deléi, idi kinanakKu luk decur, idi tinanKu teh."

Markus 4

¹Sekua' teh Yésus nengimun mada' nelun mula' tangeb Takung Galilia. Idi mula' lemulun nepamung pad Ieh sinaad umak bang aceh alud idi Ieh tudo déi' bang abpa', idi lun mula' ineh pana' netuped tangeb abpa'.

²Idi Ieh nemada' nedeh luk pinginud, idi kareb Ieh nemada', kebalaNeh,

³"Ninger muyuh! Inan selemulun luk iné' ngisak padé pimara.

⁴Kareb uned ieh nengisak, inan sebuang nebpeh iring dalan, idi suit-suit nacing nekuman ilung ineh.

⁵Idi inan teh luk nebpeh luun tana' luk metekura', luk na mula' tana'neh, idi petacu ilung ineh temubu' ngaceku tana'neh na medalem.

- ⁶Iamo' kareb aco masat, ieh mekarang peh, idi ngaceku ieh na uat, ieh petacu melayuh.
- ⁷Inan teh luk nebpeh arang tabpa', idi tabpa' ineh pana' netemubu' idi libutneh mapet, pad ieh na miak ngeruat bua'.
- ⁸Idi inan teh luk nebpeh luun tana' luk mebaleng, pad nengeruat bua' luk mulun, idi bua'neh amé'-amé mula', ieh ineh inan luk teluh ngepulu', idi inan luk anem ngepulu', idi inan teh luk meratu kinula'neh.”
- ⁹Idi kebala Yésus nedeh, "Idé-idé luk inan lalid miak ninger, do' ieh ninger.”
- ¹⁰Kareb Yésus sebuleng mo', idi lemulun luk neninger balaNeh iné' Neneh dengan pulu' dueh anak sekola'Neh idi nengitun Neneh ratnan luk pinginud ineh.
- ¹¹Idi kebala Yésus nedeh, "Kuan muyuh pangeh biré luk inalum ratnan Imet Allah, iamo' kuan amung-amung lemulun luk déi' liang ineh pangeh biré amung-amung ini dengan luk pinginud,
- ¹²pelé, 'Ideh miak nier idi nier, iamo' na ideh kali' luk sirendeh. Ideh miak ninger idi ninger, iamo' na ideh kali' ilungneh. Ngaceku kudeng ideh neninger, idi ideh lumi inan Allah, pad Ieh maré do' ratnan sala'deh.' “
- ¹³Kebala Yésus nedeh, "Naké muyuh kali' ilung luk pinginud ini? Kudeng apehké muyuh miak kali' ilung maung-amung pinginud luk baken teh?
- ¹⁴Idi lun luk ngisak ineh, ieh ineh ngisak bala Allah.
- ¹⁵Inan kareb bala ineh mebpeh iring dalan. Lemulun ninger, iamo' kareb ideh pangeh neninger, petacu Sétan macing idi ngalap bala ineh luk pangeh inisak bang niatdeh.
- ¹⁶Lun baken mepad kudeng luk inisak luun tana' luk metekura'. Kareb ideh pangeh neninger bala ineh, petacu ideh ngalap neneh dengan mawang niat.
- ¹⁷Iamo' na luk idi uat bang bururdeh sebuleng idi na ideh tuman mio. Kareb susa' idi dereh macing ngaceku bala ineh, petacu ideh lemubed.

¹⁸Lun baken mepad kudeng luk inisak arang tabpa' ineh teh. Ideh ninger ala ineh,

¹⁹iamo' rapang ratnan ulun tana' ini, idi lili ratnan mula' binaweh, idi lili ratnan amung-amung luk baken teh, semuet bang niatdeh idi nebpek bala ineh, pad ieh na kebua'.

²⁰Iamo' lun baken mepad kudeng luk inisak luun tana' luk do'. Ideh ninger bala ineh, idi ngalap neneh, idi ieh kebua' idi ngeruat mula' uli': inan luk teluh ngepulu', inan luk anem ngepulu', idi inan teh luk meratu kinula'neh."

²¹Idi teh kebala Yésus, "Inanké lemulun nguit aceh lapung idi ngerareng neneh pa liang gatang, kian pa liang bitaran lek? Naké ieh nganau' neneh luun kukud dawan?"

²²Anun-anun luk inapung miak uen ngegala', idi anun-anun luk inalum miak badén.

²³Kudeng iko inan lalid, do' iko ninger."

²⁴Idi teh kebalaNeh, "Ngerawé do'-do' ratnan luk pedingeren muyuh. Allah ngukum nemuyuh maya' uad luk muyuh nguad kuan lun baken. Iamo' ukum Allah meluun berat kuan muyuh.

²⁵Ngaceku lemulun luk inan anun-anun, idi kuanneh miak barén teh, idi lemulun luk na luk idi anun-anun, idi rat neneh teh miak lapen anun-anun luk ieh kuan."

²⁶Idi teh kebala Yésus, "Imet Allah mepad kudeng seburur lemulun luk ngisak ilung luun tana'.

²⁷Idi ieh rudap kareb malem idi tumui kareb macang, idi ilung ineh pana' temubu'. Iamo' na ieh kali' kudeng apeh ieh mulun.

²⁸Imao' tana' ineh ngeruat bua' ratnan tibu ineh, pun-pun donneh, mucu runguhneh, idi luk kekiped ilungneh.

²⁹Idi kareb bua'neh melak, petacu lemulun ineh nguit aling, ngaceku pangeh macing karebneh ngeranih."

³⁰Idi kebala Yésus, 'Kudeng apehké luk pian tau maad Imet Allah, idi dengan pinginud luk kudeng apehké miak tau ngegala' ratnan ineh?

³¹Ieh ineh mepad kudeng aceh ngilung sesawi' luk meluun isuut ratnan amung-amung ilung bang tana' ini. Lemulun ngalap idi ngisak ineh luun tana';

³²iamo' kareb ieh pangeh inisak idi ieh mulun, id mangun ku aceh lawa luk meluun rayeh ratnan amung-amung lawa irin luk baken, idi ngeruat angat-angat luk mekara teh, pad suit pana' miak ngarar pa liang donneh.”

³³Dengan pinginud luk kinula' ini, Yésus nemada' bala ineh kuan lun mula', pad luk miak kali'deh.

³⁴Idi na Ieh nepebala nedeh dengan na luk pinginud; iamo' kareb Ieh sebuleng dengan anak-anak sekola'Neh, idi Ieh nemaré kali' ilung amung-amung bala ineh kuandeh.

³⁵Bang aco sineh teh, kareb malem, idi kebala Yésus kuan ana-anak sekola'Neh, "Do' tau guta amé' déi' dipar.”

³⁶Idi ideh nenecan nelun mula' ineh, idi anak-anak sekola'Neh nenguit Yésus pad-pad dengandeh bang aceh alud. Inan teh alud luk baken.

³⁷Denak-denak barui luk rayeh nacing, idi ribut pana' nengeduyung alud, pad alud ineh lélé panu' ku abpa'.

³⁸Iamo' Yésus déi' pa puet alud uned rudap luun laga. Ideh nengalat Neneh, keburideh, "O Guru! naké Iko ngerawé netau lélé mekarem?”

³⁹Yésus netumui, idi nemebpong barui ineh idi kebalaNeh kuan ribut ineh, "Ugka' iko!" Idi barui ineh nugka' peh, pad abpa' ineh melino peh.

⁴⁰Idi Yésus nepebala nan anak-anak sekola'Neh, "Ngudehké muyuh matot? Natehké muyuh manu?”

⁴¹Iamo' ideh pelaba tot idi nepebala seburur kuan seburur, "Idéké lemulun ini, pad barui idi ribut pana' maya' balaNeh?”

Markus 5

- ¹Idi ideh nacing déi' dipar Takung Galilia, déi' tana' lun Gadara.
- ²Kareb Yésus neremuat rat bang alud, idi petacu seburur lemulun nepapu' Neneh, luk nacing ratnan lengutan.
- ³Lemulun ineh sinuet ada', idi ieh bang lengutan. Seburur pana' nateh luk miak ngaling neneh, sagan pana' dengan kaling belawan.
- ⁴Tuda'-tuda' kua' ieh pipang idi kiling teh, iamo' amung-amung kaling ineh pangeh pinututneh, idi papang kukundeh ineh pana' inusagneh. Na luk idi seburur lemulun pana' luk miak ngimet neneh.
- ⁵Tebaco kedangan ineh nalan nan lengutan ineh idi luun surud-surud, dengan ngitang idi ngurat bururneh ku batu.
- ⁶Iamo' kareb ieh nenier Yésus rat mado, idi ieh nupun macing tekeradung pa kiungNeh,
- ⁷idi nengitang, keburineh, "Anunké luk pianMu negku, O Yésus Anak Allah luk Meluun Dita'? Ui mutuh Namu bang ngadan Allah, aleg Iko ngedereh negku!"
- (⁸Ngaceku pangeh bila Yésus kuanneh, "O ada', remuat iko ratnan lemulun ini!")
- ⁹Idi Ieh nengitun neneh, "Idéké ngadanmu?" Idi ieh nengor balaNeh, keburineh, "Ngadanku 'Baweh' ngaceku kai mula'."
- ¹⁰Idi ieh pelaba uring nemutuh Yésus pelé ideh na dukenNeh remuat rat bang bawang ineh.
- ¹¹Idi déi' luun surud inan barek luk mula' nakap akan.
- ¹²Idi kebala ada'-ada' ineh inan Yésus, "Nima' nekai semuet bang burur barek ineh!"
- ¹³Idi Ieh nenima' nedeh. Idi ada'-ada' ineh neremuat, idi ideh nesemuet bang burur barek ineh. Idi kinula' barek ineh lélé dueh ngeribu. Idi ideh nupun musul pegkung ineh idi nubpa bang Takung Galilia, idi ideh naté bang takung ineh.

¹⁴Idi lemulun luk matar barek ineh pana' neburo, idi nemada' ratnan luk nangun ineh déi' bang bawang rayeh idi bang barar lati' pana'. Idi lun mula' neremuat pian nier ratnan luk nangun ineh.

¹⁵Idi ideh iné' matun Yésus idi nenier lemulun luk pangeh sinuet baweh ada' ineh. Idi ieh netudo dengan nengayung idi terawéneh do'. Idi lun mula' matot.

¹⁶Lun luk pangeh nenier neneh ineh nemada' nelun mula' ratnan lemulun luk pangeh sinuet ada', idi ratnan barek ineh pana'.

¹⁷Idi ideh nemutih Yésus buro rat bang bawangdeh.

¹⁸Kareb Yésus netemaleb bang alud, idi kebala lemulun luk sinuet ada' ineh, "Ui pian maya' Namu."

¹⁹Iamo' Yésus na nima' neneh maya' Neneh. KebalaNeh neneh, "Do' iko muli' idi mada' nelun bang tetek ruma'mu ratnan kekamen luk rayeh luk pangeh inau' Tuhan kuanmu, idi ratnan éi'Neh namu."

²⁰Idi lemulun ineh nenalan idi nemada' bang Pulu' Bawang ineh ratnan pangeh inau' Yésus kuanneh, idi amung lemulun luk neninger ineh mawa.

²¹Yésus nelemubed guta takung ineh. Idi tangeb abpa' mula' lemulun nepamung Neneh.

²²Idi Yairus, lun rayeh ruma' sembayang, iné' Neneh. Kareb ieh nenier Yésus, idi ieh netekeradung pa kiungNeh,

²³Idi ieh mesaad mutuh, keburu'neh, "Anak decurku luk isuut lélé maté, do' Iko amé' idi ngerareng ticuMu luunneh pad ieh do' idi mulun teh."

²⁴Idi Yésus iné' maya' neneh, idi lun mula' nemaya' Neneh idi nengerieng Neneh.

²⁵Idi inan seburur decur luk mebura' ét mirat dara' pangeh pulu' dueh lak kinioneh,

²⁶sagan tu pana' ieh pangeh inubat mula' lemulun luk ngubat. Ieh pangeh nengabud amung-amung usinneh, iamo' na ieh do', iamo' iuk-iuk mebura' ét.

- ²⁷Kareb ieh neninger ratnan Yésus idi ieh iné' arang lun mula' ineh rat pa keted.
- ²⁸Idi keterawéneh, "Kudeng ui ngakem kuyu'Neh mo', kali' rungen ui miak do' peh."
- ²⁹Ieh nengakem kuyu' Yésus. Idi petacu tapek dara'neh ineh nugka' peh, idi ieh nekali' bang bururneh, ratnan ieh pangeh nedo' ratnan luk métneh ineh.
- ³⁰Petacu Yésus nekali' inan lalud neremuat rat Neneh, idi Ieh nelumi nelun mula' ineh idi nepebala, "Idéké luk nengakem kuyu'Ku?"
- ³¹Idi keburu' anak-anak sekola' Neneh, "Iko kali' lun mula' ini ngerieng Namu. Ngudeh Iko ngitun, 'Idé luk ngakem Negku?' "
- ³²Idi Yésus nenier libut-libut sikal kali' idé luk nenganau' luk kudeng ineh.
- ³³Idi decur ineh pana' matot idi megegker, ngaceku ieh kali' luk pangeh mangun kuanneh, idi ieh nacing tekeradung pa kiung Yésus idi nemaré kali' ratnan amung-amung ini dengan matu.
- ³⁴Kebala Yésus neneh, "O anakKu, anumu pangeh nengedo' namu. Muli' iko dengan awang, miak iko do' ratnan étmu."
- ³⁵Kareb Yésus uned pebala, inan tuda'-tuda' lemulun rat ruma' Yairus nacing mada' neneh, "Anakmu pangeh naté. Ngudeh iko ngesusa' Guru?"
- ³⁶Yésus na nengerawé baladeh ineh, iamo' kebalaNeh neneh, "Aleg matot, manu mo'!"
- ³⁷Idi na Ieh nima' seburur pana' maya' Neneh, iamo' Pétrus, Yakub, idi Yahya, kinanak Yakub ineh mo' nemaya' Neneh.
- ³⁸Kareb ideh nacing ruma' Yairus ineh, idi Yésus kali' ria', idi neninger tangi' idi tido.
- ³⁹Kareb Ieh numak idi kebalaNeh nedeh, "Ngudeh muyuh megagau idi nangi'? Na anak ini naté, iamo' ieh rudap."

⁴⁰Idi ideh nesitunga Neneh. Iamo' Ieh nengecuk amungdeh remuat, idi Ieh nenguit taman-tinan anak ineh dengan teluh burur anak sekola'Neh nesemuet bang takep luk inan anak ineh.

⁴¹Idi Ieh nengimet ticu' anak ineh idi nepebala, "Talita kum!" luk ilungneh, "O anak decur, Ui pebala namu, tumui iko."

⁴²Idi petacu anak ineh netumui idi nenalan. (Ulunneh pulu' dueh lak.) Idi amungdeh pelaba awa!

⁴³Iamo' Ieh nemebpeng nedeh na mada' nelun baken, kebalaNeh, "Do' maré luk kenenneh."

Markus 6

¹Idi Yésus nenecan bawang ineh, idi nuli' iné' bawangNeh sebuleng dengan anak-anak sekola'Neh.

²Kareb Aco luk inan Mudeng, Yésus nengimun mada' bang ruma' sembayang. Idi mula' lemulun mawa kareb ideh neninger bada'Neh, kebaladeh, "Rat iapehké lemulun ini nengalap luk kudeng ini? Kudeng apehké ileh luk biré Neneh ineh, idi kekamen luk melalud luk inau'Neh?"

³Bakenké Ieh ini lun ngakem kayuh, anak Mariam, idi kinanak Yakub, usup, Yudas idi Simun? Idi bakenké kinanak-kinanakNeh luk decur pana' idi dengan tau tungé'?" Idi ideh nesabeng ku Ieh.

⁴Kebala Yésus nedeh, "Seburur nabi kali' rungen ruen ngedita', iamo' bang bawangneh sebuleng idi tetek ruma'neh sebuleng na lun ngedita' neneh."

⁵Idi su ineh na Ieh miak nganau' sebuleng kekamen luk melalud pana', iamo' inan tuda'-tuda' lemulun luk mét mo' luk dino'Neh dengan nengerareng ticu'Neh luundeh.

⁶Idi Yésus mawa, ngaceku ideh na manu. Yésus nenalan bang bawang luk libut-libut Nasarét ineh idi Ieh nemada' nelun mula'.

⁷Yésus nenawar pulu' dueh anak sekola'Neh idi nengecuk nedeh tedueh-tedueh. Idi Ieh nemaré lalud kuandeh pa luun amung-amung ada'.

⁸Idi Ieh nemebpeng nedeh na nguit anun-anun kareb ideh nalan, iamo' sebuleng rukud mo', ruti pana' na, luk inan balu' pana' na, idi usin bang takubdeh pana' na;

⁹miak teh makai kasut, iamo' aleg makai dueh buun kuyu'.

¹⁰Idi kebalaneh nedeh, "Kareb muyuh darin umak, do' muyuh tudo su ineh, pad macing muyuh remuat rat bang bawang ineh.

¹¹Kudeng muyuh macing bang aceh bawang luk na pian nganak nemuyuh idi luk na sikal ninger bala muyuh, do' muyuh necan bawang idi ngegkar abuh luk liang depar muyuh mangun ku aceh bada' kuandeh."

¹²Idi ideh nenalan idi nemada' ratnan lemulun na miak na uren.

¹³Ideh nenala' mula' ada' idi nengumau mula' lemulun luk mét, idi nengedo' nedeh.

¹⁴Raca' Herodés neninger bala ineh, ngaceku ngadan Yésus pangeh nepiar. Idi inan lun pebala, "Yahya luk Ngerereb pangeh netumui rat arang lun naté. Ini punneh inan lalud luk kudeng ini ngakem bang bururneh."

¹⁵Idi inan teh lun pebala, "Ini Elia." Idi inan teh lun baken luk pebala, "Ieh seburur nabi, mepad kudeng nabi luk mon."

¹⁶Kareb Herodés neninger bala ineh, idi kebalaneh, "Yahya ini luk pangeh kilebku pangeh tumui teh!"

¹⁷Herodés sebuleng pangeh nengecuk lemulun ngakem Yahya, idi ideh nengaling neneh idi nenipa neneh bang tutup, ngaceku ratnan Herodia, awan Pilipus luk kinanakneh, ngaceku Herodés panegh nengaweh neneh.

¹⁸Yahya luk Ngerereb megéi' mada' ni Herodés, "Bibpeng kuanmu na miak ngalap awan kinanakmu."

¹⁹Idi Herodia mét niat ni Yahya sikal ngaté neneh, iamo' na miak ngaceku Herodés.

²⁰Herodés matot ni Yahya, ngaceku ieh kali' ieh seburur lemulun luk matu idi meligan, idi ieh megéi' nginita neneh. Ieh pian ninger bala Yahya, sagan tu pana' ieh megagau ku balaneh.

²¹Mio-mio inan aceh kareb luk biré kuan Herodia, ieh ineh kareb aco luk inan Herodés tinganak. Idi ieh nengana' aceh irau kuan amung-amung lun rayeh bang imetneh, lun rayeh bawehneh, idi lun rayeh bang bawang Galilia pana'.

²²Kareb ineh anak decur Herodia nesemuet idi nengalai. Idi ieh nengawang niat Herodés dengan lun luk tinawarneh. Idi kebala raca' kuan anak decur ineh, "Do' iko mutuh anun-anun luk pianmu, pad ui miak maré ineh kuanmu."

²³Idi Herodés nepebulung neneh, keburu'neh, "Anun-anun pana' luk pituenmu rat negku, ui miak maré kuanmu, macing sebuang imetku pana'."

²⁴Idi anak decur ini iné' ngitun tinanneh, "Anunké luk pituenku?" Idi keburu' tinanneh, "Do' mutuh uluh Yahya luk Ngerereb."

²⁵Idi dengan mesaget anak decur ineh iné' matun raca', keburu'neh, "Ui mutuh namu maré uluh Yahya luk Ngerereb bang aceh bigan."

²⁶Idi raca' pelaba susa' niat; iamo' ngaceku bulungneh, idi teh ngaceku amung lemulun luk tinawarneh ineh, na ieh miak ngelaba luk pinutihneh.

²⁷Idi raca' ineh nengecuk seburur lun matar amé' ngalap uluh Yahya. Idi lemulun ineh iné' ngaleb uluh Yahya déi' bang tutup.

²⁸Idi ieh nenguit uluhneh ineh bang bigan, idi ieh nemaré neneh kuan anak decur ineh; ini anak decur ineh pana' nemaré neneh kuan tinanneh.

²⁹Kareb bala ineh nekali' anak-anak sekola' Yahya, idi ideh iné' ngalap butungneh, idi ideh nenanem neneh.

³⁰Lun rasul pana' nelemubed iné' matun Yésus. Idi ideh nemada' Neneh ratnan amung-amung luk inau'deh idi luk bida'deh pana'.

³¹Idi kebala Yésus nedeh, "Do' tau sebuleng amé' su luk ali-ali, pad muyuh miak ngato erur muyuh." Ngaceku mula' lemulun luk macing idi nalan teh, pad ideh na miak kuman pana'.

³²Idi ideh nemaya' alud iné' su luk ali-ali.

³³Iamo' mula' lemulun nekali' nedeh nalan idi mula' teh lemulun luk miti nedeh; idi ideh neremuat rat bang bawangdeh, idi nupun pa atun maya' tana'. Idi ideh nacing atun ratnan lemulun luk maya' alud ineh.

³⁴Kareb Yésus numak rat bang alud, idi Ieh nenier mula' lemulun, idi Ieh méi' nedeh, ngaceku ideh mepad kudeng dumba luk na lun matar. Idi Ieh nengimun maré mula' bada' kuandeh.

³⁵Idi kareb lélé macep aco, idi anak-anak sekola'Neh iné' Neneh, kebaladeh, "Su ini mali tu, idi lélé macep aco.

³⁶Do' ngecuk lun mula' ini amé' déi' lati' idi ruma' pana' luk muneng, pad melih akan kuandeh sebuleng."

³⁷Iamo' kebala Yésus, "Do' muyuh maré nedeh kuman." Idi kebaladeh, "Pianmu kai amé' melih ruti luk raga dueh ngeratu rigit kenen lun mula' iniké?"

³⁸Idi kebala Yésus nedeh, "Tuda' balad ruti muyuh? Do' amé' nier." Kareb ideh nekali', idi kebaladeh Neneh, "Inan ruti limeh balad, idi dueh lawid mo'."

³⁹Idi Yésus nengecuk anak-anak sekola'Neh nganau' nedeh tudo setau'-setau' luun uduh ineh.

⁴⁰Idi ideh netudo setau'-setau', inan luk meratu, idi inan luk limeh ngepulu' kinula'deh.

⁴¹Yésus nengalap ruti luk limeh balad idi dueh lawid ineh, idi Ieh netengook déi' langit idi nesembayang. Ieh nemuri'-muri' ruti ineh, idi nemaré kuan anak-anak sekola'Neh. Idi ideh nengerareng ineh pa kiung lun mula'. Kudeng ineh teh dueh lawid ineh bibpat kuan lun mula'.

⁴²Idi amung-amungdeh nekuman pad macing mebor.

- ⁴³Pangeh ineh idi ideh nengamung amung-amung tecehneh, panu' pulu' dueh ngebuan, idi teh ela lawid ineh.
- ⁴⁴Idi ula' lemulun luk nekuman ruti ineh, ieh ineh limeh ngeribu burur amung-amung deléi mo'.
- ⁴⁵Idi petacu Yésus nengecuk anak-anak sekola'Neh temaleb bang alud sikal guta amé' par déi' bawang Baitsaida, kareb Ieh ngecuk lun mula' ineh muli.'
- ⁴⁶Pangeh Ieh nemutuh do' nedeh, idi Ieh iné' luun pegkung sikal sembayang.
- ⁴⁷Kareb malem aco, idi alud ineh pana' nacing luun uned takung ineh, kareb Yésus sebuleng déi' tana' luun.
- ⁴⁸Idi Ieh nenier nedeh pelaba erur peribue' ngaceku bui pelaba tueh, idi kareb malé macang, idi Ieh iné' nedeh idi nalan luun abpa' ineh sikal lemaba nedeh.
- ⁴⁹Iamo' ideh nenier Neneh nalan luun abpa' ineh, idi ideh nengerawé Neneh ada', idi ideh nengitang.
- ⁵⁰Kareb amungdeh nenier Yésus idi ideh megagap. Iamo' petacu Yésus nepebala nedeh, "Aleg muyuh merapang, Ui ini, aleg matot!"
- ⁵¹Idi Ieh numak bang alud ineh dengandeh, idi bui ineh pana' nugka', pad amungdeh pelaba awa;
- ⁵²ngaceku ideh nateh nekali' idi nateh nengerawé ratnan ilung ruti luk biréNeh ineh, ngaceku nateh terawédeh mukab.
- ⁵³Ideh neguta takung, idi nacing déi' tana' Genésaret idi ideh nengabet aluddeh déi' tangeb.
- ⁵⁴Kareb ideh numak rat bang alud, petacu amung-amung lemulun miti Yésus.
- ⁵⁵Idi ideh nalan libut-libut bawang ineh idi nenguit amung-amung lun luk mét luun birirdeh iné' su luk inandeh nekali' Yésus.
- ⁵⁶Idi su apeh pana' ulek Yésus, do' déi' ruma', déi' bawang rayeh, idi déi' lati' pana', lun mula' nenguit amung-amung lun luk mét, idi nengerareng nedeh luun natad su luk inan masui irin, idi nemutuh Neneh nima' nedeh ngakem iring kuyu'Neh mo'. Idi idé'idé luk nengakem kuyu'Neh ineh petacu do'.

Markus 7

¹Lun Parisi dengan tuda'-tuda' guru Ukum luk pangeh nacing rat déi' Yerusalim iné' matun Neneh.

²Idi ideh nekali' tuda'-tuda' anak sekola'Neh luk nekuman ruti dengan tucu' luk melutak, ieh ineh luk na biru' maya' adat lun Parisi.

(³Ngaceku lun Parisi dengan amung-amung lun Yahudi na kuman kareb nateh ideh sibaru', ieh ineh maya' adat tepundeh.

⁴Kudeng ineh teh kareb muli' rat kadai, na ideh miak kuman kareb nateh ideh nesibaru', idi mula' teh luk baken-baken luk ilapdeh idi binaya'deh, mepad kudeng maru' amung-amung sangkir, kuden, belanga tekaling, idi pagau.)

⁵Lun Parisi idi guru-guru Ukum nengitun Neneh, "Ngudehké anak-anak sekola'Mu na nganau' mepad kudeng bada' lun rayeh, iamo' ideh kuman ruti dengan na sibaru'?"

⁶Idi kebala Yésus nedeh, "Matu amung-amung luk pangeh bida' Nabi Yésaya ratnan muyuh lemulun luk siayu, mepad kudeng luk inayud: 'Pupu ini ngedita' Negku ku bibir tangdeh, iamo' niatdeh mado rat Negku.

⁷Mo'-mo' lemulun ini sembayang Negku, ngaceku ideh mada' ukum-ukum ratnan bada' lemulun.'

⁸"Idi ukum Allah muyuh necan, iamo' bada' lemulun muyuh ngimet."

⁹Idi teh kebala Yésus, "Muyuh mileh ngarung ukum Allah, pad muyuh miak maya' bada' tepun muyuh.

¹⁰Ngaceku Musa nepebala, 'Do' ngedita' taman-tinanmu,' idi teh, 'Lemulun luk ngedat taman-tinaneh, do' ieh pitayeh.'

¹¹Iamo' keburu' muyuh, 'Do' kudeng seburur lemulun pebala kuan taman kian tinaneh, Idi anun-anun luk inan ulek kuanmu rat negku pangeh mangun ku Kurban,' (ilungneh, barén inan Allah).

¹²Idi na muyuh maré neneh nganau' anun-anun luk kuan taman idi tinaneh.

- ¹³Kudeng ineh teh muyuh ngebeneh bala Allah ngaceku ratnan bada' muyuh, idi mula' teh luk mepad kudeng ineh luk ruen muyuh.”
- ¹⁴Yésus nenawar nelun mula' amé' matun Neneh teh, idi nepebala kuandeh, "Ninger muyuh, amung-amung luk rat Negku, do' muyuh kali' ilungneh.
- ¹⁵Idi na luk idi anun-anun pana' luk macing rat pa luun burur lemulun idi semuet bang bururneh, miak ngelutak neneh, iamo' luk remuat rat bang niat lemulun, ineh luk ngelutak neneh.
- ¹⁶Idé lemulun luk inan lalid miak ninger, do' ieh ninger.”
- ¹⁷Idi kareb Yésus nenecan lun mula' ineh idi nesemuet déi' bang ruma', idi anak-anak sekola'Neh nacing Neneh idi nengitun ratnan luk pinginud ini.
- ¹⁸Idi kebala Yésus nedeh, "Muyuh na meluun ileh rat nelun baken. Naké muyuh kali', anun luk semuet bang burur lemulun luk rat pa luun na miak ngelutak neneh?
- ¹⁹Ngaceku baken ieh semuet bang niat, iamo' bang batek, idi miak remuat bang temaba'." (Dengan luk kudeng ineh Yésus nengamo amung luk kenen ineh meligan.)
- ²⁰Idi teh kebalaNeh, "Anun luk remuat rat bang nait lemulun ineh luk ngelutak neneh.
- ²¹Ngaceku rat déi' dalem, ieh ineh rat bang niat lemulun remuat terawé luk dat, luk mesawa', mano, ngaté, pasét,
- ²²melili, luk dat, naluk, pinian burur, temaruh, kuyo, medita' niat, bacé.
- ²³Amung-amung kekamen luk dat ini remuat rat bang niat idi ngelutak lemulun.
- ²⁴Yésus nenalan rat déi', id Ieh iné' bang bawang luk muneng ku Sur. Idi Ieh numak bang aceh ruma', pianNeh seburur lemulun pana' na kali', iamo' na Ieh miak sigapung.

²⁵Ngaceku dengan mesaget bala Yésus nacing inan seburur, luk kuan sebuleng anak decur luk isuut pangeh sinuet ada', idi ieh nacing tekeradung pa kiungNeh.

²⁶Idi decur ini seburur lun pupu baken luk tinganak déi' Siro Punikia. Idi ieh nemutuh Yésus nala' ada' ineh ratnan anakneh.

²⁷Iamo' kebala Yésus, "Nima' anak-anak uen ngebor atun, ngaceku na do' ngalap ruti ratnan anak-anak idi nala' kuan uko'."

²⁸Idi kebala decur ineh, "Matu, O Tuhan, iamo' uko' luk pa liang méja ine pana' kuman areg-areg luk kenen anak ineh."

²⁹Kebala Yésus neneh, "Ngaceku ratnan bala luk kudeng ini, do' iko muli' pangeh ada' ineh neremuat rat bang burur anakmu."

³⁰Kareb decur ineh nuli', idi ieh nenier anakneh ineh netelubid luun bitaranneh, idi ada' ineh pana' pangeh neremuat.

³¹Yésus neremuat rab bang babpat Sur teh idi nelemaba Sidon iné' Takung Galilia maya' dalam Pulu' Bawang.

³²Idi ideh nenguit seburur lemulun luk mebengel idi meteh buri' iné' Neneh, idi ideh nemutuh Yésus ngerareng ticu'Neh luunneh.

³³Idi Yésus nengatad lemulun ineh rat arang lun mula' ineh, idi nenganau' bua' ticu'Neh bang lalidneh. Pangeh ineh Ieh nengelica' idi nengakem dila'neh.

³⁴Idi Yésus netengook déi' langit, idi nengarod idi nepebala kuan lemulun ineh, "Eppata," ilungneh, "Mukab iko!"

³⁵Petacu lalidneh mukab idi dila'neh pana' netaka, idi ieh pebala dengan mesiri.

³⁶Idi Yésus nemebpeng nedeh na mada' ratnan ineh kuan seburur lemulun pana'. Iamo' kareb Ieh metueh mebpeng, idi meluun tueh lemulun nemada' ratnan ineh.

³⁷Idi amung-amungdeh pelaba awa, keburideh, "Amung-amung luk inau'Neh pelaba do'. Ieh nganau' lemulun luk mebengel miak ninger, idi lemulun luk mebegkeh miak pebala."

Markus 8

¹Kareb ineh teh lun mula' nepamung idi na luk idi anun-anun pana' luk miak kenendeh. Idi Yésus nenawar anak-anak sekola'Neh amé' Neneh, kebalaNeh,

²"Ui mé' nelun mula' ini, ngaceku pangeh teluh aco ideh tudo denganKu, idi na luk kenendeh.

³Kudeng Ui ngecuk lun mula' ini muli' dengan melau, kali' rungen ideh melepu arang dalan, ngaceku inan luk nacing rat mado."

⁴Idi kebala anak-anak sekola'Neh Neneh, "Rat iapehké tau miak ngalap petap ruti tungé su luk ali-ali kuan lemulun luk kinula' ini?"

⁵Idi Yésus nengitun nedeh, "Tuda' ruti luk inan nemuyuh?" Idi keburideh, "Tudu' balad mo'."

⁶Idi Ieh nengecuk lun mula' ineh tudo luun tana', idi Ieh nengalap ruti luk tudu' balad ineh, idi Ieh nemaré ubur kuan Allah, idi nemuri'-muri' ruti ineh idi nemaré kuan anak-anak sekola'Neh. Idi ideh nenganid kuan lun mula'.

⁷Idi inan teh déi' sesuut lawid luk dari-dari. Kareb Ieh pangeh nesembayang ratnan lawid ineh, idi Ieh nengecuk anak-anak sekola'Neh nganid kuan amung-amung lemulun ineh.

⁸Idi ideh nekuman pad macing mebor; idi ideh nengamung tecéh luk neketecan, panu' tudu' ngebuan.

⁹Idi kinula'deh lélé apat ngeribu, idi Yésus nengecuk nedeh muli'.

¹⁰Kareb ineh teh Ieh netemaleb bang alud dengan anak-anak sekola'Neh, idi ideh nacing déi' babpat bawang Dalmanuta.

¹¹Lun Parisi nacing inan Yésus idi nepesaad Neneh, idi nemutih rat Neneh aceh tanu' rat surga, ngaceku ideh sikal nutun Neneh.

¹²Idi Yésus negarod kebalaNeh, "Ngudehké inul ini nakap tanu'? Ui pebala nemuyuh, sebuleng tanu' pana' na miak barén kuan inul ini."

¹³Idi Ieh nenecan nedeh idi netemaleb bang alud teh, idi neguta takung ineh.

¹⁴Idi anak-anak sekola' Yésus nekelupan nguit ruti; idi bang alud ineh inan sebalad ruti mo'.

¹⁵Idi Yésus nemada' nedeh, keburu'Neh, "Ngerawé do'-do', idi matar burur muyuh ratnan lamud lun Parisi idi ratnan lamud Herodés.

¹⁶Idi ideh nepegayam arangdeh sebuleng, keburu'deh, "Ieh mala kudeng ineh ngaceku na luk idi ruti inuit tau."

¹⁷Iamo' Yésus nekali' terawédeh idi Ieh nengitun nedeh, "Ngudehké muyuh pegayam arang muyuh sebuleng ngaceku na luk idi ruti nemuyuh? Naké muyuh kali' idi naké muyuh ngerawé ilungneh? Natehké terawé muyuh mukab?

¹⁸Muyuh inan mateh, naké muyuh nier? Muyuh inan lalid, naké muyuh ninger, idi naké muyuh ngerawé?

¹⁹Kareb Ui nemuri' ruti luk limeh balad arang lemulun luk limeh ngeribu ineh, tuda' ngebuanké teceh ruti ineh luk imung muyuh?" Idi keburu'deh Neneh, "Pulu' dueh ngebulan."

²⁰"Idi teh kareb luk tudu' balad ineh pinuri' arang lun apat ngeribu, idi tuda' ngebulan teceh ruti luk imung muyuh?" Idi keburu'deh, "Tudu' ngebulan."

²¹Idi kebala Yésus nedeh, "Naké muyuh kali' ilungneh?"

²²Idi ideh nacing déi' bawang Baitsaida. Idi ideh nenguit seburur lemulun luk mebuser, idi nemutih Neneh ngakem lemulun ineh.

²³Yésus nengimet ticu' lemulun luk mebuser ineh idi nenguyut neneh remuat rat bang bawang ineh. Pangeh Ieh nengelica' matehneh, idi Ieh nengerareng ticu'Neh luunneh, kebalaNeh, "Miakké iko nier anun-anun?"

²⁴Idi lemulun ineh netukag idi nepebala, "Ui nier lemulun, iamo' ayudeh mepad kudeng lawa kayuh luk nalan."

- ²⁵Muci teh Ieh nengerareng tiku'Neh luun matehneh, idi ieh nenier do'-do' pad ieh nedo' peh, idi miak nier amung-amung dengan melagan.
- ²⁶Yésus nengecuk neneh muli', keburu'Neh, "Aleg iko lemubed amé' bang bawang."
- ²⁷Idi Yésus neremuat dengan anak-anak sekola'Neh iné' bawang-bawang Kaisaria Pilipi. Kareb uned Ieh nalan, idi kebalaNeh inan anak-anak sekola'Neh, "Maya' buri'dulun, idéké Ui ini?"
- ²⁸Idi keburu' anak-anak sekola'Neh, "Inan luk nemala Yahya luk Ngerereb, inan luk nemala Elia, idi inan teh luk nemala seburur lemulun rat arang nabi."
- ²⁹Idi Yésus nengitun nedeh, "Kudeng buri' muyuh ini, idéké Ui ini?" Idi kebala Pétrus, "Iko Keristus."
- ³⁰Idi Yésus nemebpeng nedeh na mada' nelun baken ratnan Ieh.
- ³¹Idi Yésus nengimun mada' anak-anak sekola'Neh: "Na miak na Anak-Lemulun mabeh mula' dereh, pad Ieh talan lun rayeh-rayeh, imam-imam rayeh, idi guru-guru Ukum teh. Ieh miak pitayendeh, idi pangeh teluh aco, Ieh miak tumui teh."
- ³²Idi Ieh nemala bala ineh dengan megala'. Idi Pétrus nenguit Yésus iné setau' idi nemebpeng Neneh.
- ³³Iamo' Yésus nelumi idi nenier anak-anak sekola'Neh, idi nemebpeng ni Pétrus, keburu'Neh, "Amé pa ketedKu, O Sétan! Ngaceku iko baken ngerawé luk ratnan Allah, iamo' luk ratnan lemulun mo'."
- ³⁴Idi Yésus nenawar nelun mula' ineh dengan anak-anak sekola'Neh, idi kebalaNeh, "Idé-idé luk sikal maya' Negku, do' ieh na ngerawé bururneh sebuleng iamo' maan salibneh idi maya' Negku.
- ³⁵Ngaceku idé-idé luk ngerawé ulunneh, na miak ngalap ulun luk matu; idi lemulun luk na ngerawé ulunneh sebuleng ngaceku Ui idi ngaceku Bala luk Do' ineh, ieh miak ngalap ulun luk matu.

³⁶Ngaceku anunké ulekneh kudeng selemulun ngalap amung-amung tana' ini, iamo' na ieh ngalap ulun luk meruked?

³⁷Idi anunké miak barén lemulun ku libal ulunneh?

³⁸Ngaceku ineh idé-idé luk migu' ngamo Negku idi balaKu teh arang pupu luk pasét idi mesala' ini, idi Anak-Lemulun ine pana' migu' ngamo neneh kareb Ieh macing dengan rayeh TamanNeh dengan melaikat-melaikatNeh luk meligan."

Markus 9

¹Idi kebala Yésus, "Ngerawé do'-do', inan rat arangdeh luk tuped ieni luk na miak kali' maté kareb nateh ideh nier Imet Allah macing dengan laludneh."

²Pangeh anem aco Yésus nenguit Pétrus, Yakub, idi Yahya amé' setau' luun aceh pegkung luk medita', idi ayuNeh nisu' pa kiungdeh.

³Idi ayungNeh merasat, idi pelaba buda', pad seburur lemulun bang tana' ini na miak mupu' pad mebuda' kudeng ineh.

⁴Idi diteluh nenier Elia idi Musa nepebala-pebala dengan Yésus.

⁵Idi kebala Pétrus nan Yésus, "O Guru, do' tau tudo ieni; nima' nekai mudut teluh lepo, sebuleng kuanMu, sebuleng kuan Musa, idi sebuleng kuan Elia."

⁶Ngaceku na ieh kali' anun luk miak belénneh ngaceku ideh pelaba tot.

⁷Idi inan aceh laput luk nengelungung nedeh, idi inan aceh tang rat bang laput ineh luk nepebala, "Ini AnakKu luk inanKu mawa, do' muyuh ninger Neneh."

⁸Idi diteluh nenier libut-libut, idi na ideh kali' seburur lemulun pana', iamo' Yésus mo'.

⁹Idi laba' ideh temurun rat luun pegkung ineh, idi Yésus nemebpeng nediteluh na mada' luk sinierdeh ineh kuan seburur lemulun pana', pad pelaba karebneh Anak-Lemulun pangeh tumui rat arang lun naté.

¹⁰Idi diteluh nemaya' balaNeh, idi nengitun seburur dengan seburur, "Anunké ilung bala, tumui rat arang lun naté ineh?"

- 11**Idi ideh nengitun Yésus, keburideh, "Ngudehke guru-guru Ukum nepebala, idi na miak na Elia miak macing atun?"
- 12**Idi kebala Yésus, "Matu Elia macing atun pad nganau' amung-amung temina'. Iamo' kudeng apehke luk inayud ratnan Anak-Lemulun, idi Ieh miak mabeh mula' dereh idi talan lemulun?"
- 13**Ui pebala nemuyuh, idi Elia ineh pangeh nacing, idi ideh nenganau' kuanneh anun-anun luk piandeh sebuleng, maya' kudeng luk inayud ratnan ieh."
- 14**Kareb ideh nacing inan anak-anak sekola'Neh, idi ideh nenier nelun mula'. Idi guru-guru Ukum nengitun-ngitun anak sekola'Neh.
- 15**Idi kareb lun mula' nenier Yésus idi ideh pelaba awa, idi nupun nepetabi' Neneh.
- 16**Yésus nengitun anak-anak sekola'Neh, "Anunké luk inan muyuh pesaad?"
- 17**Idi seburur rat arang lun mula' ineh nepebala, "O Guru, ui pangeh nenguit kuanMu anakku luk deléi luk sinuet ada' pad ieh mebegkeh.
- 18**Idi iapeh-iapeh luk inan ada' ineh semuet neneh, idi ieh ngeluka' neneh; idi tangneh melapa' idi lipenneh pekatep, idi ieh kukeng. Idi ui pangeh nemutih anak-anak sekola'Mu nala' ada' ineh, iamo' na ideh miak."
- 19**Kebala Yésus nedeh, "O inul luk na manu! Tuda' ioké Ui tudo dengan muyuh? Tuda' ioké Ui mekadang niat kuan muyuh? Do' nguit neneh amé' Negku."
- 20**Idi ideh nenguit anak ineh iné' Neneh. Kareb ada' ineh nekali' Yésus, idi petacu ieh nengeluka' anak ineh, pad ieh nebpeh luun tana' idi rier-rier dengan tangneh melapa' teh.
- 21**Idi Yésus nengitun taman anak ineh, "Tuda' ioké ini pangeh nangun neneh?" Idi keburineh, "Rat ieh isuut.

²²Idi megéi' ieh talanneh bang apui idi bang abpa', ngaceku ieh sikal ngaté neneh. Ngaceku ineh kudeng Iko miak ngedengan neneh, do' méi' nekai idi ngedengan nekai."

²³Iamo' kebala Yésus, "Matu, kudeng iko miak! Luk amung-amung miak mangun kuan lemulun luk manu."

²⁴Idi taman anak ineh nengitang idi nangi', kebalaneh, "Ui inan anu sen, iamo' na petap. Ngedengan anuku ineh!"

²⁵Idi Yésus nenier lun mula' luk nupun pamung déi', idi Ieh nemebpeng ada' ineh idi nepebala, "O ada' luk mebegkeh idi mebengel, Ui ngecuk namu remuat rat neneh, idi aleg iko semuet baruh teh."

²⁶Idi ada' ineh nengeluka' neneh teh, idi neremuat. Idi anak ineh mepad kudeng butung, pad lun mula' ineh nepebala, "Ieh naté."

²⁷Iamo' Yésus nengimet tiku'neh idi nengiding neneh, idi ieh netumui.

²⁸Kareb Yésus pangeh nesemuet bang ruma' idi anak-anak sekola'Neh nengitun Neneh dengan lulem, keburideh, "Anunké punneh kai ini na miak nala' ada' ineh?"

²⁹Kebala' Yésus, "Ada' luk kudeng ineh na miak ruaten dengan anun-anun imao' dengan sembayang."

³⁰Idi ideh nenecan bawang ineh, idi nenalan lemaba Galilia, iamo' Yésus na sikal seburur pana' kali' Neneh,

³¹ngaceku Ieh uned mada' anak-anak sekola'Neh, kebalaNeh, "Anak-Lemulun barén bang palad lemulun, idi lemulun miak ngaté Neneh. Kareb Ieh pitayendeh, idi pangeh teluh aco, idi Ieh miak tumui teh."

³²Iamo' na ideh kali' ilung bala ini, idi ideh matot ngitun Neneh teh.

³³Idi ideh nacing déi' Kapernaum. Kareb Yésus nacing déi' ruma', idi Ieh nengitun anak-anak sekola'Neh, "Anunké luk inan muyuh pesaad kareb muyuh maya' dalan?"

34Iamo' ideh pirud, ngaceku ideh pangeh pesaad déi' arang dalam ratnan idéké luk meluun rayeh.

35Idi Yésus netudo idi nenawar pulu' dueh anak sekola' ineh, kebalaNeh, "Idé-idé luk sikal amé' pa atun, do' ieh amé' pa mucu lun baken, idi mangun ku lun ngasa' amung-amung lemulun."

36Ieh nengalap seburur anak luk isuut, idi nenaped neneh arangdeh. Kareb Ieh pangeh nengapel neneh idi keburu'Neh nedeh teh,

37"Idé-idé luk nganak seburur anak luk isuut mepad kudeng anak ini bang ngadanKu, idi ieh luk nganak Negku; idi idé-idé luk nganak Negku ini, setuneh baken ieh nganak Negku iamo' Ieh luk pangeh nengecuk Negku."

38Kebala Yahya Neneh, "O Guru, kai pangeh nenier seburur lemulun luk nala' ada' dengan ngadanMu, idi kai nemebpeng neneh ngaceku na ieh maya' netau."

39Iamo' keburu' Yesus, "Aleg mebpeng neneh, ngaceku na luk idi seburur pana' nganau' kekamen luk melalud dengan ngadanKu, idi petacu ngedat Negku.

40Ngaceku lemulun luk na sikal metueh rat Negku, ieh ineh luk lun dengan tau.

41Meluun teh, idé-idé luk maré luk rupen ratnan sesangkir abpa' pana' ngaceku ngadanKu, idi ngaceku muyuh ini lun dengan Keristus, ngaerawé do'-do', na tabparneh ineh miak metutu' peh.

42"Idé-idé luk ngesabeng seburur rat arang anak luk isuut luk manu Negku ini, meluun do' kuanneh kudeng aceh batu tekalan luk rayeh betin i dierneh idi ieh miak talan bang abpa' rayeh.

43Idi kudeng ticu'mu ngesabeng namu, do' nangal neneh, ngaceku meluun do' iko semuet bang ulun luk meruked dengan ticu' luk sebuleng, ratnan iko semuet bang takung apui dengan ticu' luk dueh, ieh ineh bang apui luk na miak uen ngilep.

44Déi' uleddeh na miak maté, idi apui na miak uen ngilep.

⁴⁵Idi kudeng kukudmu ngesabeng namu, do' nangal neneh, ngaceku meluun do' iko semuet bang ulun luk meruked dengan kukud luk sebuleng ratnan iko talan bang takung apui dengan kukud luk dueh.

⁴⁶Déi' uleddeh na miak maté, idi apui na miak uen ngilep.

⁴⁷Idi teh, kudeng matehmu ngesabeng namu, do' nakul neneh, ngaceku meluun do' iko semuet bang Imet Allah dengan mateh luk sebuleng ratnan iko talan bang takung apui dengan mateh luk dueh.

⁴⁸Déi' uleddeh na miak maté, idi apui na miak uen ngilep.

⁴⁹"Ngaceku anid-anid burur miak uen ngeligan ku apui mepad kudeng aceh baré uen nucu' ku tucu'.

⁵⁰Idi tucu' ineh do', iamo' kudeng tucu' ineh pangeh metalang, dengan anunké ieh miak uen muyuh mepaci' teh? Do' inan tucu' bang niat muyuh, idi pedo' seburur dengan seburur."

Markus 10

¹Yésus nenecan bawang ineh, idi iné' tana' Yudia idi neguta Abpa' Yarden, idi mula' lemulun iné' Neneh teh, idi Ieh nemada' nedeh mepad kudeng luk pekalai teh.

²Lun Parisi nacing sikal nutun Neneh, idi ideh nengitun Neneh, "Miakké seburur lemulun ngelagkan awanneh?"

³Idi Yésus nengor baladeh dengan aceh itun, "Anunké luk pangeh icuk Musa nemuyuh?"

⁴Idi keburideh, "Musa nenima' lemulun ngayud surat patad, pad miak ngelagkan awan."

⁵Kebala Yésus nedeh, "Ngaceku ratnan tueh niat muyuh idi Musa nengayud ukum ini kuan muyuh.

⁶Iamo' rat pun-pun tana' ini, maya' kudeng luk inayud, 'Allah nenganau' lemulun deléi idi decur.

⁷Ngaceku ineh do' lemulun necan taman-tinanneh idi pamung dengan awanneh,

⁸Idi didueh ineh mangun ku sebuleng burur peh,' pad didueh ineh baken dueh burur peh, iamo' sebuleng burur mo'.

⁹Ngaceku ineh, luk pangeh tinutup Allah, aleg seburur lemulun matad peh.”

¹⁰Kareb ideh nacing déi' ruma', idi anak-anak sekola' Yésus nengitun Neneh ratnan ineh.

¹¹Idi kebalaNeh nedeh, "Idé-idé luk ngelagkan awanneh idi ngaweh decur baken, ieh ineh pasét pa kiung awanneh,

¹²Idi kudeng seburur decur ngelagkan awanneh, idi ngaweh deléi luk baken, ieh pana' pasét teh.”

¹³Idi lemulun nenguit anak-anak luk isuut iné' Neneh, pelé Ieh miak ngakem nedeh. Iamo' anak-anak sekola'Neh nemebpeng nedeh.

¹⁴Kareb Yésus nekali' ratnan ineh, idi Ieh museh, kebalaNeh, "Nima' anak-anak luk isuut amé' Negku, idi aleg mebpeng nedeh, ngaceku lemulun luk kudeng ini luk kuan Imet Allah.

¹⁵Ngerawé do'-do'! Idé-idé lukna ngalap Imet Allah ineh mepad kudeng anak luk isuut, na ieh miak semuet bang ineh.”

¹⁶Idi Yésus nengapel anak-anak ineh, idi Ieh nengerareng ticu'Neh luundeh idi nengeperuan nedeh.

¹⁷Kareb Yésus negugkang nalan, inan seburur lemulun luk nupun idi netekeradung pa kiungNeh, idi nengitun Neneh keburu'neh, "O Guru luk do', anunké luk miak ruenku, pelé ui miak ngalap ulun luk meruked?”

¹⁸Idi Yésus nepebala neneh, "Anunké punneh iko mala Negku do'? Seburur pana' na luk do', inan Sebuleng mo', ieh ineh Allah.

¹⁹Kali' rungen iko pangeh kali' ukum-ukum Allah: 'Aleg iko ngaté lemulun, aleg iko pasét, aleg iko mano, aleg iko mangun ku lun nekali' luk mebalih, aleg iko naluk lemulun, ngedita' taman-tinanmu.' “

²⁰Idi ieh nepebala nan Yésus, "O Guru, amung ini ui pangeh nemaya' rat kareb ui suut."

²¹Idi Yésus nenutong lemulun ineh dengan mawa neneh, kebalaNeh, "Sebuleng mo' luk nateh inau'mu, muli' iko idi masui amung binawehmu, idi maré kuan lun masi', pad iko miak ngalap binaweh déi' surga; idi amé' maya' Negku."

²²Iamo' ieh tekedamut ku bala ineh, idi eh nuli' dengan mesusa' niatneh, ngaceku ieh mula' binaweh.

²³Yésus nenier libut-libutNeh idi nepebala kuan anak-anak sekola'Neh, "Mikat tu-tu kuan lemulun luk mula' binaweh semuet bang Imet Allah!"

²⁴Idi anak-anak sekola'Neh mawa ngaceku bala ineh. Iamo' kebala Yésus kuandeh teh, "O anak-anakKu, miak tu-tu semuet bang Imet Allah!"

²⁵Meluun malé aceh pung unta semuet bang lubang pinu' ratnan seburur lemulun luk mula' binaweh semuet bang Imet Allah."

²⁶Idi anak sekola' Yésus pelaba awa idi nengitun seburur dengan seburur, "Kudeng pieh kudeng ineh, idéké luk miak ngalap ulun?"

²⁷Idi Yésus nenutong nedeh idi nepebala, "Kuan lemulun ini na miak mangun, iamo' baken kudeng ineh kuan Allah, ngaceku kuan Allah luk amung-amung miak mangun."

²⁸Idi kebala Pétrus Neneh, "Kai ini, panegh nenecan luk amung-amung pad maya' Namu."

²⁹Kebala Yésus nedeh, "Ui pebala nemuyuh, na luk idi seburur lemulun pana' luk pangeh nenecan ruma'neh, kinanakneh deléi idi decur, taman-tinaneh, anak-anakneh, idi tana'neh, ngaceku Ui idi ngaceku Bala luk Do' ineh teh,

³⁰iamo' ieh miak ngalap meratu kua' kinula'neh kareb ieh bang tana' ini, ieh ineh ruma', kinanakneh deléi idi decur, tinaran idi anak-anak, idi tana', idi teh dereh; iamo' bang kareb luk macing mucu ieh miak ngalap ulun luk meruked.

- 31Idi mula' lemulun luk pa atun miak amé pa mucu, idi luk pa mucu ineh amé' pa atun.”
- 32Kareb ideh nalan amé' déi' Yerusalim, idi Yésus pana' nenalan pa atun, idi ideh merapang, idi lemulun luk nemaya' nedeh ineh pana' matot. Kareb ineh teh Ieh nenguit pulu' dueh anak sekola'Neh, idi nengimun mada' nedeh ratnan amung-amung luk miak mangun kuanNeh.
- 33KebalaNeh, "Nekini tau amé' déi' Yerusalim, idi Anak-Lemulun miak barén bang palad imam-imam rayeh idi guru-guru Ukum. Ideh miak ngukum Neneh pitayen, idi miak maré Neneh bang palad lun pupu baken.
- 34Idi teh ideh miak situnga Neneh, ngelica' Neneh, mebal Neneh, idi ngaté Neneh, iamo' pangeh teluh aco idi Ieh miak tumui teh.”
- 35Yakub idi Yahya luk anak Sabdi nacing Neneh, idi nepebala, "O Guru, inan luk pian kai Namu.”
- 36Idi kebala Yésus nedidueh, "Anunké luk pian medueh Negku?”
- 37Idi kebala didueh, "Do' maré nekai tudo seburur pa tinueh idi seburur pa kabing bang ImetMu luk rayeh.”
- 38Iamo' kebala Yésus nedidueh, "Medueh na kali' luk pinutuh medueh. Miakké medueh ngirup ratnan sangkir derehKu ini? Idi miakké medueh rerebpen maya' lawé rerebKu?”
- 39Idi keburu' didueh, "Miak." Idi Yésus nepebala nedidueh, "Matu medueh miak ngirup ratnan sangkir derehKu, idi medueh miak rerebpen maya' lawé rerebKu teh.
- 40Iamo' ratnan tudo pa tinueh idi pa kabingKu ineh na Ui melalud maré kuan medueh. Iamo' babpat ineh pangeh tinina' kuan lemulun luk pangeh pinili' Allah.”
- 41Kareb pulu' burur anak sekola' ineh neninger ratnan luk kudeng ineh, idi ideh museh ni Yakub idi Yahya.

⁴²Idi Yésus nenawar nedeh amé' Neneh, idi kebalaNeh, "Muyuh kali' lemulun luk titen lun luk ngimet lun pupu baken meteh ngimet nedeh, idi lun rayeh-rayehdeh ngimet lalud arangdeh.

⁴³Iamo' muyuh ini baken kudeng ineh. Kudeng idé luk sikal mangun rayeh rat arang muyuh, do' ieh mangun ku lun ngasa' nemuyuh.

⁴⁴Idi idé-idé luk rat arang muyuh sikal mangun ku lun rayeh, do' ieh mangun ku demulun kuan amung-amung.

⁴⁵Ngaceku Anak-Lemulun pana' na nacing pad uen ngasa', iamo' Ieh pian ngasa' idi maré ulunNeh mangun ku uli' kuan amung-amung lemulun."

⁴⁶Idi ideh nacing déi' Yeriko. Kareb Yésus nenalan rat Yeriko dengan anak-anak sekola'Neh idi pelaba ula' lemulun nemaya' nedeh, idi inan aceh anak Timius, luk ngadan Bartimius luk mebuser, tudo iring dalan mutuh usin.

⁴⁷Kareb ieh neninger ratnan Yésus lun Nasarét idi, ieh nengitang, keburineh, "O Yésus Anak Daud, méi' negku!"

⁴⁸Idi lun mula' ineh museh neneh idi nengecuk neneh pirud, iamo' meluun rayeh tangneh keburineh, "O Anak Daud, méi' negku ini!"

⁴⁹Idi Yésus nugka', kebalaNeh, "Nawar neneh." Idi ideh nenawar lun mebuser ineh, keburideh, "Do' iko mawang niat idi tumui. Ieh nawar namu."

⁵⁰Idi ieh nenecan tarubneh ineh, idi netuped idi iné' matun Yésus.

⁵¹Idi kebala Yésus neneh, "Anunké luk pianmu Negku?" Idi keburineh lun mebuser ineh Neneh, "O Guru, ui mutuh miak nier."

⁵²Idi Yésus nepebala neneh, "Nalaniko, anumu pangeh nengedo' namu." Idi petacu ieh miak nier peh, idi nemaya' Yésus bang lawéNeh.

Markus 11

¹Kareb ideh malé macing bawang Yerusalim, muneng ku Baitpangi idi Baitani, luk déi' luun Pegkung Saitun, idi Yésus nengecuk dueh burur anak sekola'Neh,

²kebalaNeh nedidueh, "Amé' medueh semuet bang bawang luk pa atun medueh. Kareb medueh macing déi', medueh miak papu' sebuleng anak keladai luk inabet, idi seburur lemulun nateh netudo luun katedneh. Do' neka abetneh, idi nguit neneh amé' Negku.

³Kudeng seburur lemulun ngitun nemedueh, 'Anunké punneh medueh nganau' kudeng ini?' idi do' medueh mala, 'Tuhan pian ku ieh,' idi petacu ieh miak ngecuk nemedueh nguit neneh."

⁴Idi didueh iné' idi nepapu' sebuleng anak keladai luk inabet munung tanga' iring dalam, idi didueh neneka abetneh.

⁵Idi lemulun luk tuped déi' nepebala nedidueh, "Ngudeh medueh muit anak keladai ineh?"

⁶Idi didueh nengor baladeh maya' kudeng luk bila Yésus. Idi ideh nenima' nedidueh nalan.

⁷Idi didueh nenguit anak keladai ineh amé' matun Yésus, idi ideh nenganau' ayungdeh luunneh; idi ideh nenganau' Yésus tudo luun ketedneh.

⁸Idi mula' lemulun nemalad ayungdeh luun dalam, idi inan teh lun baken luk nenganau' don-don luk ilapdeh déi' bang kabun luun dalam.

⁹Idi lemulun luk nalan pa atun idi luk pa mucu pana' nengitang, keburideh, "Ngubur Allah! Samal kuanNeh luk macing bang ngadan Tuhan!

¹⁰Samal kuan imet tepun tau Daud luk nacing ini! Ubur kuan Allah!"

¹¹Yésus iné' Yerusalim, idi nesemuet bang Ruma' Allah. Ieh nenier amung-amung luk libut-libutNeh. Ngaceku aco pangeh malem, Ieh iné' Baitani dengan pulu' dueh anak sekola'Neh.

¹²Kenebpa, kareb ideh remuat rat déi' Baitani idi Yésus melau.

¹³Rat mado Ieh nenier aceh lawa gita' luk inan don, idi Ieh iné' nier kudeng inan bua'neh. Iamo' kareb Ieh iné' matun ineh, idi Ieh nenier na bua'neh, iamo' don sebuleng, ngaceku nateh nacing karebneh gita' ineh kebua'.

¹⁴Idi kebala Yésus neneh, "Aleg seburur lemulun pana' kuman bua' rat namu rat nekini macing raked-raked peh." Idi anak-anak sekola'Neh neninger bala ini.

¹⁵Kareb ideh nacing déi' Yerusalim, Yésus nesemuet bang Ruma' Allah, idi Ieh nengimun masut lemulun luk masui idi melih déi' bang Ruma' Allah ineh. Ieh nengelukeb meja lemulun luk ngelibal usin, idi kerusi lemulun luk masui sukur pana'.

¹⁶Idi teh na Ieh nemaré seburur lemulun pana' nguit anun-anun binaweh lemaba Ruma' Allah ineh.

¹⁷Idi Ieh nemada' nelun mula' kebalaNeh, "Pangeh inayud, 'Ruma'Ku miak tetanen ruma' luk inan sembayang kuan amung-amung pupu.' Iamo' muyuh pangeh nenganau' neneh mangun ku lubang lun mano."

¹⁸Idi bala ineh nekali' imam-imam rayeh idi guru-guru Ukum idi ideh nenakap dalam sikal ngaté Neneh; ngaceku ideh matot Neneh, ngaceku amung lun mula' pana' mawa ku bada'Neh ineh.

¹⁹Kareb malem aco Yésus nenalan rat bawang Yerusalim dengan anak-anak sekola'Neh.

²⁰Kareb ideh lemaba pekak uka-uka, idi ideh nekali' lawa gita' ineh pangeh netekering macing luun uatneh.

²¹Idi Pétrus nengerawé ratnan ini, idi ieh nepebala kuanNeh, "O Guru, siruh, lawa gita' luk kidimanMu pangeh naté."

²²Idi kebala Yésus nedeh, "Manu inan Allah.

²³Ngerawé do'-do', idé-idé luk pebala kuan pegkung ini, 'Do' iko mubah idi talan bang abpa' rayeh!' dengan na merapang bang niatneh iamo' manu idi balaneh ineh pana' mangun, kali' rungen luk kudeng ineh mangun kuanneh.

²⁴Ngaceku ineh Ui pebala nemuyuh: Amung-amung luk pian pituen muyuh bang sembayang, do' muyuh manu idi muyuh pangeh nengalap ineh, pad amung luk pituen muyuh miak barén nemuyuh.

²⁵Kareb muyuh tupid sembayang, maré do' kuan lemulun luk inan muyuh megateh, pad Taman muyuh luk déi' surga miak maré do' ratnan sala' muyuh.

²⁶Kudeng muyuh na maré do', idi Taman muyuh luk déi' surga pana' na miak maré do' ratnan sala' muyuh."

²⁷Ideh nacing déi' Yerusalim teh. Idi kareb Yésus nenalan bang Ruma' Allah, imam-imam rayeh idi guru-guru Ukum dengan lun rayeh-rayeh teh iné' Neneh,

²⁸idi nengitun Neneh, "Dengan lalud anunké Iko nganau' kekamen ini? Idéké luk nemaré lalud ini kuanMu, pad Iko nganau' ineh?"

²⁹Idi Yésus nengor baladeh, "Ui pana' sikal ngitun nemuyuh, idi kudeng muyuh ngor balaKu, idi Ui teh miak mada' nemuyuh dengan lalud idéké Ui nganau' kekamen ini.

³⁰Rereb Yahya ineh, punneh rat surgaké, kian ratnan lemulun lek?"

³¹Idi ideh pegayam seburur dengan seburur, keburideh, "Kudeng tau mala, 'Rat surga,' Ieh miak pebala, 'Ngudehké muyuh na manu neneh?"

³²Idi kudeng tau mala, 'Ratnan lemulun—' "; (Ideh matot nelun mula', ngaceku lun mula' nengerawé Yahya ineh seburur nabi.)

³³Idi ideh nengor bala Yésus, kebaladeh, "Kai na kali." Idi Yésus nepebala nedeh, "Ui pana' na sikal mala kuan muyuh dengan lalud idéké Ui nganau' kekamen ini."

Markus 12

¹Yésus nengimun pebala nedeh dengan aceh luk pinginud, "Inan seburur lemulun luk nenibu aceh kabun anggur, ieh nengar libut-libutneh, ieh nengukat luk inanneh misak bua' anggur ineh, idi ieh nemudut aceh lepo luk medita'. Idi ieh nemaré kabun ineh icam tuda'-tuda' lun matar kabun, idi ieh iné' bawang baken.

²Idi macing kareb bua' ineh melak, idi ieh nengecuk seburur demulunneh amé' ngalap babpat bua' rat nelun luk ngacam kabun ineh.

- ³Iamo' lun luk ngacam kabun ineh nengakem neneh, idi nemebal neneh, idi nengecuk neneh muli' dengan na uang.
- ⁴Idi lun luk kuan kabun ineh nengecuk seburur demulunneh luk baken teh idi demulun ineh pana' inuratdeh uluhneh, idi ideh nengigu' neneh.
- ⁵Idi teh ieh nengecuk seburur lun baken, idi lemulun ineh pana' pinatédeh, idi mula' lun baken icukneh teh, sebuang bibaldeh, idi sebuang pinatédeh.
- ⁶Idi inan teh seburur, ieh ineh anakneh luk deléi luk inanneh mawa, idi bang luk kekiped ieh nengecuk neneh amé' nelun luk ngacam kabun ineh, ngaceku keburineh, 'Kali' rungen ideh miak ngedita' anakku.'
- ⁷Iamo' lun luk ngacam kabun ineh nepebala seburur dengan seburur, 'Ini inulneh, do' tau ngaté neneh, idi babpatneh ineh mangun ku binaweh tau.'
- ⁸Idi ideh nengakem neneh idi nengaté neneh, idi ideh nenala' butungneh rat bang kabun ineh.
- ⁹"Anunké luk ruen lun luk kuan kabun ineh? Na miak na ieh macing idi ngaté amung-amung lun matar kabun ineh, idi maré kabun anggur ineh kuan luk baken.
- ¹⁰Naké muyuh nemaca' ayat bang Surat Allah: 'Idi batu luk tila' lemulun luk mudut ruma' ineh, pangeh mangun ku batu lidung;
- ¹¹Ieh ineh kekamen Tuhan, idi pelaba do' siren mateh tau?' “
- ¹²Lun Yahudi nenakap dalam sikal ngakem Yésus, ngaceku ideh kali' luk pinginud ineh bilaNeh ratnan ideh sebuleng. Iamo' ideh matot nelun mula', idi ideh nenima' Neneh idi ideh nenalan.
- ¹³Idi ideh nengecuk tuda'-tuda' lun Parisi idi lun Herodiani, sikal nuuk Yésus.
- ¹⁴Idi ideh iné' matun Yésus, kebaladeh, "O Guru, kai kali' idi Iko seburur lemulun luk matu, luk na mili' ayu lemulun, ngaceku Iko na ngerawé do' lemulun, iamo' dalam Allah badénMu dengan matu. Petuluké kai maré pupuk kuan raca' Rum, kian na lek? Do'ké kai maré, kian na lek?"

- ¹⁵Iamo' Yésus kali' nedeh siayu, idi Ieh nengitun nedeh, "Ngudehké muyuh nutun Negku? Do' nguit aceh sin amé' Negku, pad Ui miak nier ineh."
- ¹⁶Idi ideh nenguit sesin sirenNeh. Idi Yésus nepebala nedeh, "Ayu idéké ini idi ngadan idéké ini?" Idi keburideh Neneh, "Ini raca' kuan."
- ¹⁷Idi Yésus nepebala nedeh, "Do' maré kuan raca' anun-anun luk raca' kuan, idi kuan Allah anun-anun luk Allah kuan." Idi ideh mawa ku balaNeh.
- ¹⁸Idi lun Saduki iné' matun Yésus. (Ideh mala na luk idi tui ratnan até.)
- ¹⁹Kebaladeh, "Guru, Musa pangeh nengayud ukum ini kuan tau: 'Kudeng kinanak seburur lemulun maté idi necan awanneh, iamo' na luk idi anak, do' kinanakneh ngalap awanneh ineh, idi nginul anak kuan kinanakneh.'
- ²⁰Idi inan tudu' deléi luk denganak. Idi seluk rayeh ineh nengaweh, iamo' ieh naté dengan na anak.
- ²¹Idi luk kedueh pana' nengalap tinula' ineh, idi ieh pana' naté dengan na anak; idi luk keteluh ineh pana' kudeng ineh teh.
- ²²Idi ideh luk tudu' burur ineh pana' nengalap neneh, idi na anak; idi pangeh amung-amungdeh naté, decur ineh pana' naté teh.
- ²³Kareb aco tui, idé mangun ku awan decur ineh? Ngaceku luk tudu' burur ineh pangeh nengaweh neneh."
- ²⁴Idi kebala Yésus nedeh, "Sala' terawé muyuh! Anun punneh? Ngaceku na muyuh kali' Surat Allah idi lalud Allah.
- ²⁵Ngaceku kareb lemulun tumui rat arang lun naté, na ideh ngaweh, iamo' ideh mepad kudeng melaikat luk déi' surga.
- ²⁶Iamo' ratnan lun naté luk tinui ineh, naké muyuh nemaca' bang Surat Musa ratnan kayuh luk meseb, kudeng afeh Allah nepebala neneh, 'Ui ini Tuhan Ibrahim, Isak, idi Yakub'?
- ²⁷Ilungneh Allah ineh baken Tuhan lemulun luk maté, iamo' Tuhan lemulun luk mulun. Muyuh ini sala' terawé.

²⁸Inan seburur guru Ukum luk neninger nedeh pesaad. Ieh kali' or Yésus nelun Saduki pelaba do'. Idi ieh pana' nengitun Neneh, keburineh, "Ukum sapehké luk atun?"

²⁹Kebala Yésus, "Ukum luk meluun rayeh, ieh ineh, 'Ninger muyuh do'-do', O Israil! Allah Tuhan tau, Ieh ineh Tuhan luk Sebuleng.

³⁰Do' iko mawa inan Allah Tuhanmu dengan amung niatmu, amung ulunmu, amung terawému, idi amung tuehmu teh.'

³¹Idi luk kedueh, 'Do' iko mawa nelun denganmu mepad kudeng bururmu sebuleng.' Idi na luk idi ukum baken luk meluun rayeh ratnan dueh ukum ini."

³²Idi guru Ukum ineh nepebala nan Yésus, "Matu, Guru, matu balaMu ineh, idi Allah ineh Sebuleng, idi na luk idi luk baken iamo' Allah.

³³Do' lemulun mawa inan Tuhan dengan amung niatneh, amung ilehneh, idi amung tuehneh; idi teh do' ieh mawa nelun denganneh mepad kudeng bururneh sebuleng. Ineh luk meluun rayeh ratnan amung-amung baré luk sabpen idi baré luk kereten."

³⁴Kareb Yésus nenier idi ieh pangeh, nengor balaNeh dengan ileh, idi Ieh nepebala neneh, "Iko na mado ratnan Imet Allah." Idi na lemulun mekuu' ngitun Neneh peh.

³⁵Kareb Yésus nemada' bang Ruma' Allah, Ieh nengitun, "Kudeng apehké guru-guru Ukum mala idi Keristus ineh Anak Daud?

³⁶Ngaceku Daud nepebala bang Roh Meligan, 'Tuhan nepebala kuan Tuhanku, Tudo Iko pa tinuehKu, pad Ui nganau' bunu'-bunu'Mu mangun ku tapin kukudMu.'

³⁷"Daud sebuleng neneten Neneh Tuhan; idi kudeng apehké Ieh mangun ku Anakneh teh?" Lun mula' ine pelaba pian ninger bala Yésus.

³⁸Idi bang bada'Neh Yésus nepebala nedeh, "Matar burur muyuh ratnan guru-guru Ukum luk sikal nalan-nalan dengan kuyu' luk mekadang, idi sikal burem lemulun déi' kadai,

³⁹luk tudo luun kerusi luk meluun do' bang ruma' sembayang, idi su luk inan ubur kareb irau.

⁴⁰Ideh ngabud amung-amung binaweh decur tinula', idi mekadang sembayang dengan dalan luk siayu. Idi dieh ineh pana' miak mekaneh ukum luk meluun berat."

⁴¹Kareb Yésus netudo muneng ku pati' luk ruan usin, idi Ieh nenier lun mula' luk nganau' usin bang pati' ineh. Mula' lun do' nenipa usindeh bang pati' ineh.

⁴²Idi seburur decur tinula' luk masi' nacing, idi nenipa dueh balad usin, ieh ineh sesin mo'.

⁴³Idi Yésus nenawar anak-anak sekola'Neh idi nepebala nedeh, "Matu, Ui pebala nemuyuh, decur tinula' luk masi' ini pangeh nenipa meluun ratnan amung-amung lemulun luk nenipa usin bang pati' ineh.

⁴⁴Ngaceku amung-amungdeh ineh pangeh nenipa usindeh ratnan eladeh, iamo' decur ini pangeh nenipa ratnan asi'neh amung-amung luk inan neneh, pad na luk ketecan kuanneh."

Markus 13

¹Kareb Yésus neremuat rat bang Ruma' Allah idi seburur anak sekola'Neh nepebala Neneh, "O Guru, siruh kudeng apeh do' ayuneh batu-batu idi pudut ini!"

²Idi keburu' Yésus, "Iko nier amung-amung pudut luk rayeh iniké? Na miak ketecan sebuleng batu luk buun-buun ieni, luk na miak uen ngusag peh."

³Kareb Yésus tudo luun Pegkung Saitun muneng ku Ruma' Allah ineh, idi Pétrus, Yakub, Yahya, idi Andrias nengitun Neneh lulem, keburu'deh,

⁴"Do' mada' kuan kai, idanké amung-amung ini miak mangun, idi anunké tanu'neh kareb amung-amung ini malé macing?"

- ⁵Idi kebala Yésus nedeh, "Matar do'-do', pad lemulun na naluk nemuyuh.
- ⁶Ngaceku mula' lemulun sikal macing bang ngadanKu, keburideh, 'Ui ini Ieh!' Idi ideh miak naluk mula' lemulun.
- ⁷Kareb muyuh ninger uni lun pebunu' idi bala ratnan pebunu', aleg muyuh megagap, ngaceku na miak na amung-amung ini mangun peh; iamo' nateh ineh kekipedneh.
- ⁸Aceh bawang sikal pebunu' dengan bawang baken, idi aceh imet sikal pebunu' dengan imet baken; idi miak mangun ruyuh tana' iapeh-iapeh, idi teh iru' luk rayeh miak mangun. Idi ineh mepad kudeng pun ét nenganak.
- ⁹Iamo' do' muyuh matar do'-do'. Muyuh miak kamen idi iten amé' besara'. Muyuh miak bebalen bang ruma' sembayang. Idi teh muyuh miak tuped pa atun lun luk ngimet bawang idi raca'-raca' teh ngaceku Ui, pad muyuh mada' Bala luk Do' nedeh.
- ¹⁰Na miak na Bala luk Do' ineh badén atun kuan amung-amung pupu.
- ¹¹Iamo' kareb muyuh kamen idi itendeh amé' pa kiung luk inan besara', aleg muyuh megagau atun ratnan anun-anun luk miak belén muyuh, iamo' anun-anun luk biré kuan muyuh bang kareb ineh, idi ineh luk miak belén muyuh, ngaceku baken muyuh luk pebala iamo' Roh Meligan.
- ¹²Idi kinanak miak maré kinanakneh pitayen, idi taman miak maré anakneh, idi anak-anak ineh sikal metueh ratnan taman-tinandeh, idi maré nedeh pitayen.
- ¹³Idi muyuh miak inan amung-amung lemulun megateh ngaceku Ui, iamo' lemulun luk tuman pad macing kekipedneh miak uen ngulun.
- ¹⁴"Muyuh miak nier 'Dat luk Ngacing Tot' ineh tuped su luk na petulu." (Idi do' lemulun luk maca' kali' ilungneh!) "Kareb ineh do' lemulun luk ang tana' Yudia buro amé' luun pegkung.
- ¹⁵Idi do' lemulun luk luun buduk ruma' aleg temurun idi semuet sikal ngalap anun-anun luk bang ruma'neh.

- ¹⁶Idi aleg lemulun luk bang lati'neh muli' idi ngalap kuyu'neh.
- ¹⁷Idi pelaba susa' kuan decur luk mali' idi luk niti' anak kareb ineh!
- ¹⁸Sembayang pelé amung ini na mangun kareb meteneb.
- ¹⁹Ngaceku bang aco sineh miak mangun dereh, mepad kudeng luk na nangun rat pun-pun tana' pinudut Allah pad macing nekini, idi na tu-tu miak mangun mucu.
- ²⁰Iamo' Tuhan pangeh nengekamu' kareb ineh; kudeng na pieh kudeng ineh seburur pana' na miak mulun. Iamo' ngaceku pupuNeh luk pinili' Ieh nengekamu' kareb ineh.
- ²¹"Idi teh kudeng seburur lemulun pebala nemuyuh bang kareb ineh, 'Siruh, ini Keristus!' idi 'Ineh Keristus!' aleg muyuh manu!
- ²²Ngaceku tuda'-tuda' Keristus luk mebalih idi nabi luk mebalih miak macing, idi nganau' tanu' idi kekamen luk nan mawa, pad naluk, kudeng miak, lun luk pinili' pana'.
- ²³Matar do'-do'! Ui pangeh nemada' nemuyuh atun ratnan amung-amung ini.
- ²⁴"Iamo' bang kareb ineh, mucu ratnan dereh ineh mateh aco miak medacem, idi bulan pana' na miak maré acangneh.
- ²⁵Idi gituen-gituen bang langit miak merurug, idi amung-amung lalud luk déi' langit ineh pana' miak mebubuh peh.
- ²⁶Kareb ineh Anak-Lemulun miak megala', kareb Ieh macing bang laput dengan lalud luk rayeh idi rasat.
- ²⁷Ieh miak ngecuk melaikat-melaikat ineh ngamung lun luk pinili'Neh ratnan apat busat bui, ieh ineh ratnan iring tana' macing iring langit.
- ²⁸"Do' muyuh ngalap aceh luk pinginud ratnan lawa gita'. Kareb angkatneh mebata', idi donneh pun mua', muyuh kali' kareb melau' pangeh muneng.
- ²⁹Kudeng ineh teh muyuh ini, kareb muyuh nier amung-amung ineh mangun, do' muyuh kali' karebneh pangeh muneng idi malé macing.

- ³⁰Ngerawé do'-do'! Amung ini miak mangun kareb nateh inul ini maté.
- ³¹Langit idi tana' miak metutu', iamo' balaKu na miak metutu' peh.
- ³²"Iamo' ratnan aconeh idi karebneh seburur pana' nateh kali, sagan pana' melaikat luk déi' surga, idi Anak ineh pana' nateh kali', iamo' Taman sebuleng mo'.
- ³³Matar do'-do' idi sembayang, ngaceku na muyuh kali' idan karebneh.
- ³⁴Idi ieh mepad kudeng seburur lemulun luk amé' ngarang idi necan ruma'neh bang palad demulunneh. Ieh maré kekamen kuan anid-anid bururdeh, idi periteteng kuan luk matar tanga' ineh, pad ieh matar do'-do'.
- ³⁵Ngaceku ineh matar do'-do' ngaceku muyuh na kali' idan tuan ruma' ini sikal macing, kian malem, tanggal dacek lek, kareb kok lal lek, kian kareb masat aco lek.
- ³⁶Kudeng Ieh macing denak-denak aleg Ieh kali' nemuyuh rudap.
- ³⁷Luk belénKu nemuyuh kudeng ineh teh luk belénKu kuan amung-amung lemulun: Matar do'-do'!"

Markus 14

- ¹Inan teh dueh aco ketecan kareb nateh Irau Paska idi Irau Ruti luk Na Lamud. Idi imam-imam rayeh idi guru-guru Ukum nenakap dalam sikal ngakem Yésus dengan lulem pad ngaté Neneh.
- ²Kebaladeh, "Aleg ngakem Neneh kareb irau, pad na luk idi ria'."
- ³Kareb Yésus déi' Batitani bang ruma' Simun luk mét susud ineh, idi uned Ieh tudo kuman, idi seburur decur nacing Neneh idi nenguit sebuleng seréi' luk panu' ku umau luk do' buen idi luk mikat rata. Idi ieh nemila' seréi' ineh, idi ieh nengutang umau ineh luun uluh Yésus.
- ⁴Idi inan lemulun luk megateh nenier neneh, keburideh, "Anunké punneh umau luk do' buen ini uenneh nuso mo'?"
- ⁵U mau ini miak pisuen, idi raganeh mela teluh ngeratu rigit, idi miak barén kuan lun masi'." Idi ideh nengedaluh neneh.

⁶Iamo' keburu' Yésus, "Nima neneh, ngudehké muyuh ngesusa' neneh? Ieh nganau' luk do' kuanKu.

⁷Ngaceku lun masi' megéi' idi dengan muyuh, idi kudeng muyuh sikal, miak muyuh ngedengan nedeh, iamo' Ui ini na megéi' idi dengan muyuh.

⁸Decur ini pangeh nenganau' luk miak ruenneh. Ieh nengumau bururKu, kareb nateh Ui uen nanem.

⁹Ngerawé do'-do'! Iapeh-iapeh pana' aput-aput tana' ini Bala luk Do' ineh miak badén, su ineh teh kekamen decur ini miak tetanen teh mangun ku terawé ratnan ineh.

¹⁰Idi Yudas Iskariot, ieh ineh seburur rat arang pulu' dueh anak sekola' ineh, iné' matun Imam Rayeh, sikal maré Yésus kuandeh.

¹¹Idi ideh mawang niat neninger ratnan ineh. Idi ideh nepejani' maré usin kuanneh. Idi Yudas pana' nakap dalam kudeng apeh ieh miak maré Neneh bang aceh kareb luk do'.

¹²Bang aco rayeh luk pun-pun ratnan Aco Rayeh Ruti luk Na Lamud, ieh ineh kareb anak duma Paska ineh miak kereten, idi anak-anak sekola'Neh nepebala Neneh, "Iapehké luk pianMu kai amé' nganau' Irau Paska ineh kuanMu?"

¹³Idi Ieh nengecuk dueh burur anak sekola'Neh, kebalaNeh, "Amé' medueh bang bawang, idi seburur deléi luk nguit aceh sidangur abpa' miak papu' nemedueh, idi do' amé' maya' neneh,

¹⁴macing nan ruma' luk ulekneh. Idi do' medueh ngitun tuan ruma' ineh, 'Keburi' Guru, Iapehké takep luk inanKu miak kuman Irau Paska dengan anak-anak sekola'Ku?'

¹⁵Idi ieh miak mada' siren medueh aceh takep luk rayeh déi' dita' luk pangeh tinina' do'-do', idi déi' do' medueh nganau' temina' kuan tau."

- ¹⁶Idi anak-anak sekola' ineh iné' bang bawang idi didueh ineh nenier mepad kudeng luk bila Yésus kuan didueh; idi didueh nenganau' temina' Irau Paska ineh.
- ¹⁷Idi kareb malem aco idi Yésus nacing dengan pulu' dueh anak sekola'Neh.
- ¹⁸Idi uned ideh tudo kuman, idi Yésus nepebala, "Ui pebala nemuyuh, seburur rat arang muyuh luk tudo kuman denganKu sikal masui Negku."
- ¹⁹Idi petacu ideh mesusa' niat idi nepebala sua-sua, "Uiké ieh?"
- ²⁰Idi kehuri' Yésus, Ieh seburur rat arang muyuh luk pulu' dueh, luk ngerereb ruti bang bigan pad-pad denganKu.
- ²¹Anak-Lemulun amé' rungen mepad kudeng luk inayud ratnan Ieh, iamo' mesusa' kuan lemulun luk masui Anak-Lemulun. Meluun do' kuan lemulun ineh kudeng ieh na tinganak.
- ²²Idi uned ideh kuman, Yésus nengalap ruti idi Ieh nesembayang maré ubur, idi nemuri'-muri' ruti ineh, idi nemaré ineh kuan anak sekola'Neh, kebalaNeh, "Lapen muyuh ini idi kuman, ini bururKu."
- ²³Idi Ieh nengiding aceh sangkir, idi nemaré ubur kuan Allah. Idi Ieh nemaré kuandeh teh, idi amungdeh pana' nengirup abpa' ratnan sangkir ineh.
- ²⁴Idi kebala Yésus, "Ini dara'Ku, ieh ineh dara' pejani' Allah luk inutang kuan lun mula'.
- ²⁵Ui pebala nemuyuh, idi na Ui miak ngirup abpa' anggur ineh pad macing aco Ui ngirup abpa' anggur luk mebaruh ineh bang Imet Allah."
- ²⁶Idi ideh menani aceh nani, idi ideh iné' déi' Pegkung Saitun.
- ²⁷Yésus nepebala nedeh, "Amung-amung muyuh miak buro necan Negku, ngaceku pangeh inayud, 'Allah miak ngaté Lun Matar dumba, idi amung-amung dumba luk sengeriudan ineh miak mepatad.'
- ²⁸Iamo' pangeh Ui tumui ratnan até, Ui sikal amé' pa atun muyuh macing Galilia."

²⁹Idi kebala Pétrus, "Sagan pana' amung-amungdeh necan Namu, iamo' ui na sikal necan Namu."

³⁰Idi Yésus nepebala neneh, "Ngerawé do'-do', bang aco sini, ieh ineh kareb malem, kareb nateh lal ngekook dueh kua', iko miak ngalum Negku teluh kua'."

³¹Idi Pétrus meluun tueh nepebala, "Sagan pana' ui maté pad-pad denganMu, na tu-tu ui miak ngalum Namu." Kudeng ini teh bala amung-amungdeh.

³²Kareb ideh nacing su luk titen Getsémani, idi Yésus nepebala kuan anak-anak sekola'Neh, "Tudo muyuh ieni laba' Ui amé' sembayang."

³³Idi Ieh nenguit Pétrus, Yakub, idi Yahya denganNeh, idi Ieh petacu meberat niat, pad Ieh pelaba susa'.

³⁴Idi keburu'Neh nedeh, "Mesusa' tu-tu niatKu, malé maté ayuKu, do' muyuh tudo ieni idi matar do'-do'."

³⁵Idi Ieh nenalan pa atun sesuut, idi Ieh netekeradung idi nesembayang mutuh pad kareb ineh labén Neneh kudeng miak.

³⁶KebalaNeh, "Ama', O Ama', luk amung-amung inan bang laludMu, idi do' ngatad sangkir ini rat Negku, iamo' ratnan ineh pana' baken maya' pian Dui, iamo' pian Diko."

³⁷Kareb Ieh nelemubed, Ieh nenier nedeh rudap, idi kebalaNeh ni Pétrus, "O Simun, rudapké iko? Naké iko miak matar bang sejam mo' kinioneh?"

³⁸Matar idi sembayang pad muyuh na semuet bang tutun; sagan pana' niat muyuh geregan, iamo' burur muyuh melaya' peh."

³⁹Idi Yésus iné' sembayang teh, mepad kudeng sembayangNeh luk atun.

⁴⁰Idi Ieh nelemubed, idi Ieh nenier nedeh rudap teh, ngaceku ideh medacep mateh. Idi na ideh kali' anun luk miak beléndeh Neneh.

⁴¹Ieh nelemubed seketeluh kua', idi kebalaNeh nedeh, "Rudapké muyuh teh idi ngato erur muyuh? Nekini pangeh petap. Karebneh pangeh nacing. Nekini Anak-Lemulun miak barén bang palad lun mesala'.

⁴²Tumui muyuh, do' tau nalan. Siruh, lemulun luk masui Negku pangeh nacing!”

⁴³Kareb Yésus uned pebala, idi Yudas, luk rat arang pulu' dueh anak sekola' ineh, nacing dengan lun mula' luk nengimet pelapet idi rukud, ieh ineh lemulun luk icuk imam-imam rayeh idi guru-guru Ukum idi lun rayeh-rayeh teh.

⁴⁴Idi lemulun luk nemasui Yésus ineh pangeh nemarké tanu' kuandeh, keburi'neh, "Lemulun luk ui muen, Ieh ineh Yésus. Do' muyuh ngakem Neneh idi matar Neneh do'-do'.”

⁴⁵Kareb Yudas macing idi petacu ieh iné' matun Yésus, idi kebalaneh, "O Guru," idi ieh nemuen Neneh.

⁴⁶Idi ideh nengakem Yésus idi nengimet Neneh ét-ét.

⁴⁷Iamo' seburur rat arang amungdeh luk tuper déi' nengangat pelapetneh, idi nenarad demulun Imam Rayeh idi nenangal lalidneh.

⁴⁸Idi kebala Yésus nedeh, "Petuluké muyuh macing dengan pelapet idi kayuh pad ngakem Negku?

⁴⁹Bang anid-anid aco Ui idi arang muyuh idi mada' nemuyuh bang Ruma' Allah, idi nateh muyuh nengakem Negku. Iamo' na miak na bala luk inayud bang Surat Allah uen ngacing.”

⁵⁰Idi amung anak sekola'Neh nenecan Neneh, idi neburo.

⁵¹Idi inan seburur anak adi' luk nemaya' Yésus, luk nengayung ku kibung pu mo'. Idi ideh nenutun ngakem neneh teh.

⁵²Iamo' ieh nenecan ayungneh idi neburo dengan lubpa.

⁵³Idi ideh nenguit Yésus amé' ruma' Imam Rayeh; idi déi' ima-imam rayeh nepamung dengan lun rayeh-rayeh idi guru-guru Ukum.

⁵⁴Idi Pétrus nemaya' Neneh rat mado, macing bang sikang ruma' Imam Rayeh ineh, idi ieh netudo pad-pad dengan amung lun pulis, idi nesingidu.

⁵⁵Imam-imam rayeh idi amung tebubpun besara' ineh nenakap luk nekali' lun ratnan sala' Yésus, ngaceku pian ngaté Neneh; iamo' na luk kali'deh.

⁵⁶Ngaceku mula' lemulun mangun ku lun nekali' luk mebalih ratnan Ieh, idi luk nekali'deh ineh na petulu.

⁵⁷Idi inan teh tuda'-tuda' lemulun luk netuped idi mebalih ratnan Yésus, keburid'eh,

⁵⁸"Kai pangeh neninger lemulun ini pebala, 'Ui sikal ngusag Ruma' Allah ini, luk pinudut lemulun, idi bang teluh aco Ui miak mudut Ruma' Allah luk baken ruen lemulun.' "

⁵⁹Sagan pana' kudeng ineh idi luk nekali'deh ineh na petulu.

⁶⁰Idi Imam Rayeh ineh netuped arang uneddeh, idi nengitun Yésus, "Naké Iko ngor adu'deh amu?"

⁶¹Iamo' Yésus pirud, idi na Ieh nengor sebila' bala pana'. Idi sekua' teh Imam Rayeh ineh nengitun Neneh, "Matuké Iko Keristus, Anak Allah luk buren ineh?"

⁶²Idi kebala Yésus, "Ui ini Ieh, idi muyuh miak nier Anak-Lemulun tudo pa tinueh Luk Meluun Lalud, idi macing dengan laput luk rat déi' langit."

⁶³Idi Imam Rayeh ineh pana' nenarak ayungneh idi nepebala, "Na ulekneh tau nakap luk nekali' peh?"

⁶⁴Muyuh pangeh neninger kuyoNeh ineh, idi anunké terawé muyuh?" Idi ideh nemutut ukum ineh, do' Ieh pitayen.

⁶⁵Idi ideh nengimun ngelica' Neneh, idi ideh nengakeb kiungNeh, idi nemukut Neneh, kebaladeh, "Do' Iko mada' idé luk mukut Namu!" Idi lun pulis ineh pana' nengakem Neneh Idi nemepag kiungNeh.

⁶⁶Kareb Pétrus déi' sikang ruma' ineh, idi seburur anak adi' decur luk demulun Imam Rayeh nelemaba neneh.

⁶⁷Kareb ieh nenier Pétrus singidu, idi ieh pana' nenutong neneh idi nepebala, "Iko ini teh luk dengan Yésus lun Nasarét ineh."

⁶⁸Iamo' Pétrus pana' nengena idi nepebala, "Na kali'ku ilung balamu ineh." Kareb ieh neremuat iné' munung tanga', idi lal pana' nengekook.

⁶⁹Idi anak adi' decur ineh nenier neneh teh idi nepebala nelun luk netuped déi', "Ieh ini teh seburur rat arangdeh ineh."

⁷⁰Iamo' Pétrus nengena teh. Segageh teh idi keburu' lemulun luk tuped déi' kuan Pétrus, "Matu iko seburur rat arangdeh ineh, ngaceku iko seburur lun Galilia teh."

⁷¹Idi Pétrus nepebulung, keburu'neh, "Na tu ui miti lemulun luk belén muyuh ineh."

⁷²Idi lal pana' petacu nengekook sekedueh kua'. Idi Pétrus pana' nengerawé ratnan bala luk bila Yésus neneh, ieh ineh, "Kareb nateh lal ngekook dueh kua', Iko miak ngalum Negku teluh kua'." Kareb ieh nengerawé ineh, idi ieh nangi'.

Markus 15

¹Kareb pekak uka-uka idi petacu imam-ima rayeh, lun rayeh-rayeh, guru-guru Ukum idi amungdeh luk nepamung ineh teh nepegayam arangdeh sebuleng. Ideh nengaling Yésus idi nenguit Neneh idi nemaré Neneh kuan Pilatus.

²Idi Pilatus nengitun Neneh, "Ikoké Raca' lun Yahudi?" Idi kebala Yésus, "Kudeng luk bilamu."

³Idi imam-imam rayeh nengadu' Yésus ratnan mula' bala.

⁴Idi Pilatus nengitun Neneh teh, keburu'neh, "Naké Iko pian ngor sekua' pana'? Do' ngerawé inan mula' tu-tu adu'deh Namu."

⁵Iamo' sebila' bala pana' nateh bila Yésus, pad Pilatus mawa.

⁶Idi kareb Irau Paska, Pilatus pekalai muit kuandeh seburur lemulun luk tinutup, ieh ineh idé-idé luk pituendeh.

⁷Idi inan seburur lemulun luk ngadanneh Barabas, luk tinutup pad-pad dengan lun luk dat, luk pangeh nengaté lemulun bang ria' luk inau'deh ineh.

- ⁸Idi lun mula' ineh iné' matun Pilatus idi nemutih neneh nganau' mepad kudeng luk pekalai.
- ⁹Idi kebala Pilatus nedeh, "Sikalké muyuh ui muit Raca' lun Yahudi ineh kuan muyuh?"
- ¹⁰Ieh nekali' idi imam-imam rayeh pangéh nemaré Neneh ngaceku ideh temaruh.
- ¹¹Iamo' imam-imam rayeh nengeria' nelun mula', pad ideh mutuh Pilatus muit Barabas kuandeh.
- ¹²Idi kebala Pilatus nelun mula'. "Anunké luk ruenku kuan lemulun luk bila muyuh Raca' lun Yahudi ineh?"
- ¹³Idi ideh nengitang teh, "Nalib Neneh!"
- ¹⁴Idi Pilatus nepebala kuandeh, "Ngudeh, sala' anunké luk pangéh inau'Neh?" Idi meluun metueh ideh nengitang, "Nalib Neneh!"
- ¹⁵Idi ngaceku Pilatus sikal ngawang niat lun mula' ineh, ieh nemuit Barabas kuandeh. Idi ieh nengecuk nedeh mebal Yésus idi nemaré Neneh uendeh nalib.
- ¹⁶Lun pebunu' nenguit Yésus semuet bang sikang luk bang ruma' Lun luk Ngimet Ukum. Idi ideh nenawar amung-amung babpat lun pebunu'.
- ¹⁷Ideh nengayung Yésus ku kuyu' luk sia' merirem, idi nengapid tabpa' ku pataNeh, idi ideh nengerareng ineh luun uluh Yésus.
- ¹⁸Idi ideh nemaré tabi' kuanNeh, keburideh, "Tabi' Raca' lun Yahudi!"
- ¹⁹Ideh nenecat uluhNeh ku aceh kayuh idi nengelica' Neneh, idi ideh netekeradung pa kiungNeh.
- ²⁰Idi pangéh ideh nesitunga Neneh, idi ideh nengelengu kuyu'Neh luk sia' merirem ineh rat Neneh, idi nengayung Neneh ku ayungNeh sebuleng. Idi ideh nenguit Neneh remuat pad Ieh miak uendeh nalib.

- ²¹Idi inan seburur lemulun luk nelemaba déi' luk nacing rat mado, ieh ineh Simun lun Kiréni, luk taman Iskander idi Rupus, idi ieh sinaaddeh maan salib Yésus.
- ²²Idi ideh nenguit Yésus amé' déi' Golguta, luk ilungneh, Su luk inan Perupuk Uluh.
- ²³Idi ideh nenutun maré luk rupenNeh, ieh ineh abpa' anggur luk pinuar ku mur, iamo' na Ieh nengalap ineh.
- ²⁴Idi ideh nenalib Neneh, idi ideh nemabpat ayungNeh dengan nenala' udi, pad ineh miak uendeh mabpat kuan anid-anid bururdeh.
- ²⁵Idi kareb tangal mudik aco ideh nenalib Neneh.
- ²⁶Idi surat luk nengadu' Neneh pangeh inayud pa luunNeh, ieh ineh, "Raca' lun Yahudi."
- ²⁷Idi inan dueh burur lun luk dat luk sinalib peranga' denganNeh, seburur pa tinueh idi seburur pa kabingNeh.
- ²⁸Kudeng ineh luk pangeh mangun luk bila bang Surat Allah, keburideh, "Ieh inukum pad-pad dengan lemulun luk dat."
- ²⁹Lemulun luk lemaba nenguyo Neneh idi uluhdeh tuka'-tuka', keburideh, "Neh! Iko luk ngusag Ruma' Allah idi mudut neneh bang teluh aco kinioneh!
- ³⁰Do' temurun ratnan salib ineh idi ngulun bururMu sebuleng!"
- ³¹Kudeng ineh teh imam-imam rayeh idi guru-guru Ukum nesitunga Neneh, keburideh seburur dengan seburur, "Ieh nengulun lun baken, iamo' na Ieh melalud ngulun bururNeh sebuleng!
- ³²O Keristus, Raca' lun Israil, do' Iko temurun ratnan salib ineh, pad kai miak nier idi manu." Idi didueh luk sinalib dengan Yésus ineh teh nengedat Neneh.
- ³³Kareb muned aco, idi apud tana' pana' medacem pad macing tangal musul aco.

³⁴Kareb tangal musul aco, idi Yésus nengitang, kebalaNeh, "Eloi, Eloi lema sabaktani?" luk ilungneh, "AllahKu, AllahKu, anunké punneh Iko necan Negku?"

³⁵Idi sebuang lemulun luk tuped déi' neninger tangNeh, idi ideh nepebala, "Ninger, Ieh nawar Elia."

³⁶Idi sebururdeh, nupun nguit lemut batu, idi ngerereb neneh bang abpa' luk malam. Idi ieh nenganau' ineh nan paped kayuh, idi nemaré ineh luun bibir Yésus, keburineh, "Aganeh, do' tau nier kudeng Elia sikal amé' nurun Neneh."

³⁷Iamo' Yésus nengitang, idi niatNeh neputut.

³⁸Idi dicing Ruma' Allah ineh pana' nedarak upa dueh, rat pa luun macing pa beneh.

³⁹Kareb lun rayeh lun pebunu' luk netuped pa atun salib ineh nenier kudeng apeh lawé Yésus naté, idi ieh nepebala, "Matu lemulun ini Anak Allah."

⁴⁰Inan teh tuda'-tuda' decur luk nenier amung ineh rat mado. Idi arangdeh ineh teh Mariam Magdalina, Mariam tinan Yakub luk isuut, Yusup, idi Salomé.

⁴¹Decur ineh pangeh nemaya' Yésus idi nengasa' Neneh kareb Ieh déi' Galilia. Idi mula' teh decur luk baken luk nemaya' Neneh iné' Yerusalim.

⁴²Idi kareb malem aco, ngaceku aco ineh Aco luk Temina', ieh ineh aco luk atun ratnan Aco luk inan Mudeng,

⁴³Idi Yusup lun Arimatia nacing. Yusup ineh seburur lun teubupun besara' idi luk bureh. Ieh sebuleng teh nganét Imet Allah, idi dengan mekuu' ieh iné' matun Pilatus idi nemutuh butung Yésus.

⁴⁴Pilatus mawa ratnan Yésus pangeh naté. Idi ieh nenawar lun rayeh lun pebunu' idi nengitun neneh kudeng Ieh pangeh mio naté.

⁴⁵Kareb Pilatus kali' bala lun rayeh lun pebunu', idi ieh nemaré butung Yésus kuan Yusup.

⁴⁶Idi Yusup pana' nemelih kibung luk do' idi nenurun butung Yésus, idi nengelilib neneh ku kibung luk do' ineh. Idi ieh nengerareng neneh bang tanem luk pangeh kinuer ratnan batu. Pangeh ineh ieh nengelubid sebuleng batu nepingakeb munung tanem ineh.

⁴⁷Mariam Magdalina idi Mariam tinan Yusup ineh pana' nenier su luk inandeh nengerareng Yésus ineh.

Markus 16

¹Aco luk ina Mudeng pangeh nepelaba, idi Mariam Magdalina, Maria tinan Yakub idi Salomé pana' nemelih luk do' buen, idi ideh iné' pad ngumau butung Yésus.

²Pekak uka-uka, aco luk pun-pun bang minggu ineh, idi ideh iné' déi' nan tanem, kareb aco masat.

³⁻⁴Idi ideh nepebala arangdeh sebuleng, "Idéké luk miak ngedengan netau ngelubid batu ineh rat munung tanem ineh?" Ngaceku batu ineh pelaba rayeh. Idi ideh nenier batu ineh pangeh linubid.

⁵Idi ideh nesemuat bang tanem ineh, idi ideh nenier seburur anak adi' luk tudo pa tinueh, luk nengayung ku kuyu' luk mebuda'. Idi ideh pelaba tot.

⁶Idi keburu' anak adi' ineh nedeh, "Aleg matot! Muyuh nakap Yésus lun Nasarét luk pangeh sinalib ineh. Na Ieh idi tungé' — Ieh pangeh netumui. Siruh, su luk inandeh nengerareng Neneh.

⁷Nekini do' muyuh amé' idi maré kali' kuan anak-anak sekola'Neh idi kuan Pétrus pana', kebala muyuh: 'Ieh nalan pa atun muyuh amé' Galilia, idi déi' muyuh miak nier Neneh mepad kudeng luk bilaNeh nemuyuh.' “

⁸Idi ideh neremuat idi nupun ratnan tanem ineh, ngaceku gegker idi tot pangeh nacing pa luundeh, idi sebuleng pana' na luk biladeh kuan seburur lemulun pana', ngaceku ideh matot.

[⁹Pangeh Yésus netumui pekak uka-uka bang aco luk pun-pun bang minggu ineh, idi pun-pun Ieh nesilagan kuan Mariam Magdalena. Ieh pangeh nenala' tudu' ada' rat neneh.

¹⁰Mariam iné' maré kali' kuan amung-amung lemulun luk maya' Neneh. Ideh uned temido idi nangi'.

¹¹Kareb ideh neninger bala Mariam ratnan Yésus mulun, idi ratnan Ieh pangeh sinierneh, idi na ideh manu.

¹²Muci ratnan ineh Yésus nesilagan denan ayu luk baken kuan dueh anak sekola' luk nalan amé' bang aceh bawang luk isuut.

¹³Idi didueh nemaré kali' kuan anak sekola' luk baken teh; iamo' ideh na manu.

¹⁴Muci ratnan ineh Yésus nesilagan kuan pulu' aceh anak sekola'Neh, kareb uneddeh kuan, idi Ieh nengayud nedeh ngaceku ideh na manu idi metueh niat, id teh ngaceku ideh na manu ku bala lemulun luk pangeh nenier Neneh mucu ratnan Ieh tumui.

¹⁵Idi kebalaNeh, "Do' muyuh amé' aput-aput tana' idi mada' Bala luk Do' ini kuan amung-amung lemulun.

¹⁶Idé-idé luk manu idi rerebpen miak uen ngulun, iamo' idé-idé luk na manu, ieh luk miak kumin.

¹⁷Idi tanu' ini luk melalud miak barén kuan lemulun luk manu: dengan ngadanKu ideh miak nala' ada', idi ideh miak pebala dengan puar-puar buri';

¹⁸kudeng ideh ngakem menipeh, idi ngirup anun-anun luk megalih, na ideh mesabeng ku ineh. Idi ideh miak ngerareng ticu'deh luun lemulun luk inan luk mét, pad ideh do'."

¹⁹Kareb Tuhan Yésus pangeh nepebala nedeh, idi Ieh nekemikit iné' surga idi netudo pa tinueh Allah.

²⁰Idi anak-anak sekola'Neh iné' mada' iapeh-iapeh, idi Tuhan pana' nengakem pad-pad dengandeh, idi nengepicet bada'deh dengan tanu' luk melalud.] [(v

9) Decur-decur ineh iné' matun Pétrus idi lun rurun-rurumneh, idi nengacing bala nedeh ratnan luk pangeh pindengerdeh. (v 10) Pangeh ineh, idi Yésus sebuleng nengacing dengan tang anak-anak sekola'Neh, bala luk meligan idi luk mulun ratnan ulun luk meruked.]

Lukas

Lukas 1

- ¹Kuan kinanakku Téopilus: Mula' lemulun pangeh nenutun ngayud bala ratnan luk pangeh mangun arang kai.
- ²Ideh nengayud kuan kai ratnan luk bila lemulun luk nekali' kekamen ineh rat pun-pun idi luk nemada' bala ineh.
- ³Idi ui ini luk pangeh nengelio do'-do' amung bala ini rat pun-punneh, sikal ngayud kuanmu bala luk petulu, O Téopilus luk buren,
- ⁴pad iko miak kali' luk matu ratnan amung-amung bala luk bida' kuanmu.
- ⁵Kareb Raca' Herodés ngimet bawang Israil, idi inan aceh imam, ngadanneh Sekaria, luk ratnan babpat Abia. Idi ngadan awanneh ineh Elisabet. Idi ieh pana' inul imam.
- ⁶Idi didueh ineh lemulun luk matu pa kiung Allah, idi maya' amung-amung bala idi ukum Tuhan dengan na sala'.
- ⁷Iamo' didueh na anak, ngaceku Elisabet ineh aceh decur luk na anak, idi didueh pana' pangeh mengered.
- ⁸Kareb Sekaria uned ngakem bang kekamen imam pa kiung Allah maya' luk inanneh pekalai,
- ⁹idi ieh nekaneh udi, maya' adat imam, pad ieh semuet bang Ruma' Allah ngeseb umau luk do' buen ineh.
- ¹⁰Idi lun mula' sembayang déi' liang kareb ngeseb umau luk do' buen ineh.
- ¹¹Idi seburur melaikat Tuhan nesilagan kuan Sekaria; ieh tuped pa tinueh su luk inan bubpun luk inan ngeseb umau luk do' buen ineh.
- ¹²Idi Sekaria pana' negagap nenier neneh, idi ieh pelaba tot.
- ¹³Iamo' kebala melaikat neneh, "Aleg matot, O Sekaria, Allah pangeh neninger putuhmu, idi awanmu Elisabet ineh miak nenganak aceh anak deléi kuanmu. Idi do' iko nganau' ngadanneh Yahya.

- ¹⁴Idi miak mangun kuanmu awang niat idi geriguen teh. Idi mula' lemulun miak mawang niat ngaceku ratnan acingneh,
- ¹⁵ngaceku ieh miak mangun rayeh pa kiung Tuhan. Idi na ieh miak ngirup abpa' anggur idi luk rupen luk dat, idi ieh miak mepanu' ku Roh Meligan rat bang batek tinanneh.
- ¹⁶Idi ieh miak nguli' mula' lun pupu Israil amé' inan Allah Tuhandeh ineh.
- ¹⁷Ieh miak nalan pa kiung Tuhan dengan roh idi lalud Elia. Ieh miak nguit taman-taman idi anak-anakdeh pedo', idi lun luk ngelaba bala uenneh ngelubed kuan terawé lemulun luk matu, pad ieh nganau' temina' aceh pupu kuan Tuhan.”
- ¹⁸Idi keburu' Sekaria kuan melaikat ineh, "Kudeng apehké ui miak kali' kudeng ini matu? Ngaceku ui mengered, idi awanku pana' pelaba ngered teh.”
- ¹⁹Idi kebala melaikat neneh, "Ui ini Gabriel luk tuped pa kiung Allah. Ui pangeh icuk pebala namu idi ngacing bala luk do' ini.
- ²⁰Iamo' iko na manu ku balaku luk miak uen ngacing bang kareb luk petulu. Ngaceku iko na manu, iko mebegkeh idi na miak peburi' pad macing aco jani'ku mangun.”
- ²¹Idi lun mula' ineh nganét-nganét ni Sekaria. Ideh pelaba awa ngaceku ieh mio bang Ruma' Allah.
- ²²Kareb ieh neremuat, idi na ieh miak pebala kuan lemulun ineh. Idi ideh nekali' Sekaria ineh pangeh nenier aceh luk sinierneh bang Ruma' Allah. Idi ieh nemada' nedeh dengan ticu'neh ngaceku ieh mebegkeh peh.
- ²³Kareb aco kekammeneh bang Ruma' Allah petap, idi ieh nuli'.
- ²⁴Muci ratnan ineh idi awanneh Elisabet mali' idi ieh na mepai limeh bulan kinioneh, kebalaneh,
- ²⁵"Nekini Tuhan pangeh nengedengan negku kudeng ini. Ieh pangeh nenala' igu'ku pa kiung lemulun.”

- ²⁶Kareb Elisabet mali' pangeh anem bulan, melaikat Gabriel ineh icuk Allah amé' inan aceh bawang déi' Galilia luk titen Nasarét.
- ²⁷Ieh nenguit bala kuan seburur anak decur luk pun mebaruh, luk petuduk dengan seburur deléi ngadanneh Yusup, ratnan inul Daud. Idi ngadan decur ineh Mariam.
- ²⁸Melaikat ineh iné' neneh, kebalaneh, "Awang kuanmu! Tuhan idi denganmu, idi pangeh nengeperuan namu."
- ²⁹Mariam negagap ku bala ineh; idi ieh nengerawé ratnan ilungneh.
- ³⁰Idi kebala melaikat neneh, "O Mariam, aleg matot! Iko pangeh nengalap katu ratnan Allah.
- ³¹Iko miak mali', idi nenganak aceh anak deléi, idi do' iko nganau' ngadanNeh Yésus.
- ³²Ieh miak mangun rayeh, idi Ieh miak belén Anak Allah luk Meluun Dita'. Idi Allah Tuhan tau miak maré kuanNeh imet tepunNeh Daud,
- ³³Ieh miak mangun ku raca' kuan inul Yakub macing raked-raked; idi ImetNeh ineh na miak mabud!"
- ³⁴Idi kebala Mariam nan melaikat ineh, "Kudeng apehké amung ini miak mangun, ngaceku ui nateh nekali' deléi?"
- ³⁵Idi kebala melaikat ineh, "Roh Meligan miak temurun luunmu, idi lalud Allah miak nucung namu. Ngaceku ineh anak luk meligan ineh miak tetanen Anak Allah.
- ³⁶Ngerawé pupumu Elisabet ineh. Kebaladeh, ieh na miak inan anak; iamo' ieh mali' pangeh anem bulan, sagan tu pana' ieh mengered.
- ³⁷Ngaceku na luk idi anun-anun luk na miak ruen Allah."
- ³⁸Idi kebala Mariam neneh, "Ui ini demulun Tuhan; do' nganau' kuanku maya' kudeng luk bilamu." Idi melaikat ineh neburo rat iringneh.
- ³⁹Muci ratnan ineh Mariam netemina'. Idi ieh iné' inan pegkung, ieh ineh aceh bawang déi' tana' Yudia.

- ⁴⁰Ieh numak ruma' Sekaria, idi nemaré tabi' ni Elisabet.
- ⁴¹Kareb Elisabet neninger tabi' Mariam ineh, idi anak luk bang nakanneh ineh pana' nesigio, idi Elisabet pana' nepanu' ku Roh Meligan.
- ⁴²Idi ieh nengitang kebalaneh, "Iko luk inan samal rat arang amung-amung decur, idi samal kuan anak luk uenmu nenganak ineh.
- ⁴³Kudeng apehké peruan ini mangun kuanku, pad tinan Tuhanku iné' ngikak negku?
- ⁴⁴Ngaceku kareb ui neninger tabi'mu ineh anak luk bang nakanku pana' nesigio ngaceku awang niatneh.
- ⁴⁵Samal kuanmu luk pangeh nemanu ineh, ngaceku anun-anun luk bila namu ratnan Tuhan miak mangun peh.”
- ⁴⁶Idi kebala Mariam, "Niatku ngerayeh Tuhan,
- ⁴⁷idi rohku do' ria inan Allah Lun Nengulun negku,
- ⁴⁸ngaceku Ieh pangeh nekali' ratnan beneh demulunNeh! Idi rat pad kareb ini amung inul miak mala ui luk inan samal,
- ⁴⁹ngaceku Luk Meluun Lalud pangeh nenganau' aceh kekamen luk rayeh kuanku. NgadanNeh ineh meligan,
- ⁵⁰idi éi'Neh lutep kuan anid-anid inul luk matot Neneh.
- ⁵¹Ieh nenatang ticu'Neh luk melalud idi nengatad lemulun luk medita' niat dengan amung terawédeh.
- ⁵²Ieh nengebeneh raca'-raca' ratnan kerusi imetdeh, idi nengedita' lemulun luk mebeneh.
- ⁵³Lemulun luk melau binorNeh ku luk do', idi lemulun luk lun do' icukNeh buro dengan na uang.
- ⁵⁴Ieh nengedengan pupu Israil, demulunNeh, ngaceku Ieh ngerawé éi'Neh,
- ⁵⁵maya' kudeng luk bilaNeh kuan Ibrahim idi kuan inulneh macing raked-rukéd peh.”

- ⁵⁶Idi Mariam netudo dengan Elisabet lélé teluh bulan kinioneh, idi ieh nuli'.
- ⁵⁷Idi mabud bulan Elisabet miak nenganak, idi ieh nenganak aceh anak deléi.
- ⁵⁸Idi lun bang bawangneh idi pupuneh neninger idi Tuhan pelaba éi' neneh; idi ideh pana' mawang niat danganneh.
- ⁵⁹Idi aco luk kewaluh idi selemulun nacing nunat anak ineh, idi sikal nganau' ngadanneh Sekaria maya' ngadan tamanneh.
- ⁶⁰Iamo' kebala tinanneh, "Na! Ngadanneh Yahya."
- ⁶¹Iamo' keburu'deh neneh, "Na luk idi seburur pana' rat arang pupumu luk kudeng ini ngadan!"
- ⁶²Idi ideh nengitun tamanneh dengan makai ticu', idé ngadanneh luk pianneh ku ngadan anak ineh.
- ⁶³Sekaria nemutuh aceh bangar luk inan ngayud, idi ieh nengayud kudeng ini, "Ngadanneh Yahya." Idi amungdeh ineh pana' mawa.
- ⁶⁴Idi petacu Sekaria miak peburu', idi ieh nengimun ngubur Allah.
- ⁶⁵Idi lun bang bawang ineh pelaba tot. Idi bala ratnan ineh nepiar aput pegkung tana' Yudia.
- ⁶⁶Idi amung lemulun luk neninger ineh nengerawé idi nengitun, kebaladeh, "Anunké miak mangun kuan anak ini?" Ngaceku lalud Tuhan idi neneh.
- ⁶⁷Idi Sekaria taman Yahya nepanu' ku Roh Meligan idi ieh nemada' bala luk biré Allah, kebalaneh,
- ⁶⁸"Do' tau ngubur Tuhan Allah lun Israil! Ieh iné' ngedengan pupuNeh, pad Ieh nemuit nedeh.
- ⁶⁹Ieh nemaré aceh Lun Nengulun luk melalud kuan tau, ieh ineh inul demulunNeh Daud.
- ⁷⁰Mon Ieh nepebala dengan tang nabi-nabiNeh luk meligan:
- ⁷¹Ieh nepejani' muit netau ratnan bunu' tau, idi ratnan lalud lemulun luk megateh netau.

⁷²Ieh nepejani' ngegala' éi'Neh kuan tepun tau, idi ngerawé pejani'Neh luk meligan.

⁷³⁻⁷⁴Ieh nepejani' kuan tepun tau Ibrahim idi nepebulung pad muit netau ratnan bunu' tau pelé tau sembayang Neneh dengan na matot:

⁷⁵pad tau meligan idi matu pa kiungNeh raked-raked ulun tau.

⁷⁶"Iko ini, O anakku miak tetanen seburur nabi Allah luk Meluun Dita'. Iko miak nalan pa atun Allah pad nganau' temina' dalamNeh,

⁷⁷pelé mada' pupuNeh ratnan ideh miak uen ngulun pad ideh ngalap do' ratnan sala'deh.

⁷⁸Allah tau mawa idi méi'. Ieh ngacing rasat ulun kuan tau,

⁷⁹rat surga Ieh ngacang lemulun luk tudo bang lungung até luk medacem, idi nguyut netau amé' inan dalam awang."

⁸⁰Idi anak ineh pana' netemubu' idi iuk-iuk amé' rayeh rohneh. Idi ieh netudo déi' su luk ali-ali pad macing kareb ieh nengegala' bururneh kuan lun Israil.

Lukas 2

¹Kareb ineh teh Raca' Augustus nemaré ukum kuan amung anak itinneh, pad ideh amé' uen ngiap.

²Kareb iap luk pun-pun ini inau' idi Krinius ineh Lun luk Ngimet Bawang Siria.

³Idi amungdeh iné' pad uen ngiap bang bawangdeh sebuleng.

⁴Yusup nenalan rat bawang Nasarét bang babpat Galilia iné' Baitlahim bang bawang Yudia, ngaceku ieh inul Daud.

⁵Yusup iné' uen ngiap pad-pad dengan Mariam, tudukneh luk mali'.

⁶Idi kareb didueh déi' Baitlahim, Mariam pana' mabud bulanneh miak nenganak.

⁷Teh nenganak aceh anak deléi, ieh ineh anak luk atun, idi ieh nengelabin Neneh ku kibung luk do' laya', idi nengerareng Neneh bang bau' sapi', ngaceku na luk idi luk inan kuan lemulun ineh bang ruma' sakai'.

⁸Idi bang bawang ineh pana' inan tuda'-tuda' lun matar luk tudo déi' natad matar aya'deh kareb malem aco.

⁹Idi denak-denak sebuleng malaikat Tuhan netuped iringdeh, idi rayeh Tuhan pana' merasat libut-libutdeh, idi ideh pelaba tot.

¹⁰Iamo' kebala malaikat ineh nedeh, "Aleg matot, ngaceku ui ngacing kuan muyuh aceh bala luk do' ratnan awang luk rayeh luk miak macing kuan amung-amung pupu.

¹¹Aco sini aceh Lun Ngulun pangeh tinganak kuan muyuh bang bawang Daud, ieh ineh Keristus Tuhan ineh.

¹²Idi ini tanu'Neh kuan muyuh; muyuh miak papu' aceh anak luk libin ku kibung luk do' laya' idi luk rireng bang bau' sapi'."

¹³Denak-denak aceh baweh luk rayeh rat surga netuped dengan malaikat ineh, idi nengubur Allah, kebaladeh:

¹⁴"Amung rayeh kuan Allah bang langit luk meluun dita', idi awang luun tana' rat arang lemulun luk inanNeh mawa!"

¹⁵Idi kareb amung malaikat ineh nelemubed rat nedeh iné' surga, idi lun matar ineh nepebala seburur dengan seburur, "Amé' tau déi' Baitlahim idi nier luk pangeh nangun ineh, luk pangeh bida' Tuhan netau."

¹⁶Idi ideh pana' nenalan dengan mesaget, idi nepapu' ni Mariam idi Yusup, idi ideh nekali' anak ineh rireng bang bau' sapi'.

¹⁷Kareb lun matar nenier Neneh, idi ideh nemada' bala luk pangeh bila nedeh ratnan anak ineh.

¹⁸Idi amung lemulun luk neninger ineh pana' mawa ratnan luk bila lun luk matar ineh nedeh.

¹⁹Iamo' Mariam nengerawé amung bala ini bang niatneh.

²⁰Idi lun matar ineh pana' nelemubed dengan ngerayeh idi ngubur Allah, ngaceku ratnan amung-amung luk pindengerdeh idi sinierdeh, mepad kudeng luk bila kuandeh atun.

²¹Pangeh ualuh aco kareb anak ineh miak uen nunat, idi ideh nemaré ngadan Yésus Neneh, maya' kudeng luk bila melaikat, kareb nateh Ieh nangun bang nakan.

²²Kareb mabud aco luk inan sibiru' maya' Ukum Musa, Yusup idi Mariam nenguit anak ineh iné' Yerusalim pad maré Neneh kuan Tuhan,

²³maya' kudeng luk inayud bang ukum Tuhan: "Idi anid-anid anak deléi luk pun-pun ngukab nakan tinanneh miak tetanen meligan kuan Tuhan."

²⁴Didueh sikal maré luk barén bang Ruma' Allah, maya' kudeng luk titen bang ukum Tuhan, ieh ineh, "Dueh suit sukur, idi dueh suit limun."

²⁵Idi déi' Yerusalim inan seburur lemulun, ngadanneh Simion. Ieh ineh lemulun luk matu idi luk matot inan Allah, idi ieh nganét aco luk inan Israil uen ngulun. Idi Roh Meligan idi denganneh.

²⁶Idi Roh Meligan pangéh nengelio kuanneh, ratnan ieh na miak maté kareb nateh ieh nenier Keristus Tuhan ineh.

²⁷Idi dengan lalud Roh ineh Simion nesemuet bang Ruma' Allah. Kareb taman-tinan Yésus nenguit Yésus anak ineh semuet pad lemulun miak nganau' kuanNeh maya' kudeng Ukum Musa,

²⁸Idi Simion nengalap Neneh, idi nengubur Allah, kebalaneh:

²⁹"O Tuhan, Iko pangéh nemaya' jani'Mu, pad Iko miak nima' negku maté dengan awang.

³⁰Matehku pangéh nenier ulun luk rat Namu,

³¹luk tinina'Mu pa kiung amung pupu:

³²Ieh ineh aceh acang luk ngelio dalamMu kuan lun pupu baken, idi ngacing rayeh kuan pupuMu Israil."

³³Idi taman-tinan Anak ineh mawa ratnan luk bila Simion ratnan Ieh.

³⁴Simion nengeperuan nedidueh, idi nepebala ni Mariam, tinanNeh ineh, "Anak ini pinili' Allah pad ngaté idi nui mula' lun Israil. Ieh miak mangun ku aceh tanu' ratnan Allah luk uen lun mula' ngilang,

³⁵pelé ngegala' terawédeh luk inalum. Idi susa' miak ngeruruk niatmu mepad kudeng pelapet luk metadem.”

³⁶Idi inan teh seburur nabi luk decur, ngadanneh Anna Panuil, ratnan inul Asir. Idi ieh mengered. Pangeh ieh nengaweh tudu' lak idi awanneh naté,

³⁷idi ieh tinula' ualuh ngepulu' apat lak kinioneh. Idi na ieh nenecan Ruma' Allah, iamo' tebaco kedangan ieh sembayang nan Allah dengan mawa' idi mutuh ratnan Allah.

³⁸Kareb ineh teh ieh nacing maré ubur inan Allah, idi nepebala ratnan anak ineh kuan amung lemulun luk nganét Allah nguli' Yerusalim.

³⁹Kareb ideh pangeh nenganau' amung-amung luk petulu maya' ukum Tuhan, idi ideh nuli' iné' Nasarét luk bang bawang Galilia.

⁴⁰Idi anak ineh netemubu' idi amé' metueh, idi Ieh mepanu' ku ileh, idi katu Allah pana' idi denganNeh.

⁴¹Idi anid-anid lak taman-tinan Yésus amé' Yerusalim ku Irau Paska.

⁴²Kareb ulunNeh pulu' dueh lak, idi ideh iné' ku irau mepad kudeng luk pekalai.

⁴³Kareb mabud aco irau ineh, didueh nuli', iamo' Yésus anak ineh neketecan déi' Yerusalim dengan na nekali' taman-tinanNeh.

⁴⁴Iamo' terawé didueh Ieh idi arang lemulun luk nalan maya' dalam ineh, pad macing seaco kiadoneh dinalandeh, idi didueh nenakap Neneh arang pupu idi lun dengandeh;

⁴⁵iamo' didueh na nepapu' Neneh, idi didueh nelemubed iné' Yerusalim nakap Neneh.

⁴⁶Kareb mabud teluh aco didueh nepapu' Neneh bang Ruma' Allah uned tudo arang lun guru-guru. Idi Ieh neninger baladeh idi nengitun-ngitun nedeh.

⁴⁷Idi amung lemulun luk neninger Neneh ineh pana' mawa ratnan ileh idi orNeh.

⁴⁸Idi taman-tinanNeh mawa nenier Neneh, idi keburu' tinanNeh kuanNeh, "O Anakku, anunké punneh Iko nganau' kudeng ini kuan kai? Kai dueh dengan mesusa' nakap Namu."

⁴⁹Idi kebalaNeh nedidueh, "Anunké punneh medueh nakap Negku? Naké medueh kali' idi Ui kali' rungen bang ruma' TamanKu?"

⁵⁰Iamo' taman-tinanNeh na kali' ilung ratnan bala luk bilaNeh ineh.

⁵¹Idi Yésus nemaya' nedidueh nuli' iné' Nasarét. Idi Ieh nemaya' bala didueh. Idi tinanNeh nenganug amung ineh bang niatneh.

⁵²Idi Yésus iuk-iuk amé' rayeh idi mileh, idi ngalap katu Allah idi lemulun pana'.

Lukas 3

¹Idi bang lak luk kepulu' limeh kareb Raca' Tibirius, idi kareb Pontius Pilatus pana' nengimet bawang Yudia, idi Raca' Herodés nengimet Galilia, idi kinanakneh Pilipus nengimet tana' Ituria idi Trakonitus, idi Raca' Lisantias nengimet Abilini,

²idi kareb Annas idi Kayapas mangun ku imam rayeh, idi bala Allah nacing kuan Yahya Sekaria déi' su luk ali-ali.

³Idi Yahya nenalan aput-aput bawang libut Abpa' Yarden mada' ratnan rereb uren, ieh ineh dalam ngalap do' ratnan sala',

⁴maya' kudeng luk inayud bang surat Nabi Yesaya, kebalaneh, "Seburur lemulun ngitang déi' su luk ali-ali: 'Nganau' temina dalam Tuhan; idi ngesiri lisangen-lisangenNeh!

⁵Anid-anid ruan miak uen manu', anid-anid pegkung idi surud miak uen ngebeneh. Luk tekilu' miak uen ngeisir, idi luk metekura' miak uen maad.

⁶Amung-amung lemulun miak nier ulun luk ratnan Allah!" "

⁷Idi keburu' Yahya kuan lun mula' luk nacing sikal rerebpenneh, "O muyuh menipeh! Idéké pangeh nemada' nemuyuh buro ratnan useh luk miak macing?"

⁸Do' muyuh ngeruat bua'-bua' luk petulu dengan uren, idi aleg muyuh ngimun pebala bang niat muyuh, 'Ibrahim, ieh ineh tepun kai,' ngaceku ui pebala nemuyuh, Allah melalud ngisu' batu-batu ini mangun ku anak-anak Ibrahim.

⁹Idi nekini pana' uai pangeh temina' inan uat lawa kayuh teh, idi anid-anid lawa kayuh luk na ngeruat bua' luk do', ieh ineh miak tebangen idi talan bang apui."

¹⁰Idi lun mula' ineh pana' nengitun neneh, keburu'deh, "Anunké luk do' teh miak ruen kai?"

¹¹Idi kebala Yahya, "Lemulun luk inan dueh kuyuh, do' ieh maré sebuleng kuan lemulun luk na, idi lemulun luk mula' luk kenen, do' ieh nganau' kudeng ineh teh."

¹²Idi lemulun luk ngamung usin pupuk pana' nacing sikal rerebpen, kebaladeh, "O Guru, anunké luk miak ruen kai?"

¹³Idi keburu' Yahya nedeh, "Aleg muyuh nakap meluun ratnan luk litep kuan muyuh."

¹⁴Idi inan teh tuda'-tuda' lun pebunu' luk nengitun neneh, keburu'deh, "Anunké luk miak ruen kai ini?" Idi keburu'neh kuandeh, "Aleg muyuh ngalap binaweh dulun, idi aleg muyuh ngadu' lemulun dengan mebalih. Do' muyuh mawang niat ratnan tabpar muyuh."

¹⁵Iamo' pupu ineh nganét dengan merapat, idi amungdeh nengerawé bang niatdeh ratnan Yahya, kudeng ieh ineh Keristus.

¹⁶Idi kebala Yahya nedeh, "Ui ini ngerereb nemuyuh ku abpa'; iamo' inan teh Seburur Lemulun luk macing mucu, ieh ineh luk meluun lalud rat negku; idi neka abet kasutNeh pana' ui na mayu. Idi Ieh sikal ngerereb nemuyuh ku Roh Meligan idi apui

¹⁷Idi bebperNeh inan bang paladNeh, pelé Ieh miak nganau' malét su luk inanNeh rumik, idi ngamung padéNeh bang lepo, iamo' lipangneh miak sabpenNeh ku apui luk na miak milep.”

¹⁸Idi dengan tuda'-tuda' bada' luk baken teh Bala luk Do' bida'neh kuan pupu ineh.

¹⁹Iamo' Yahya nengesala' Raca' Herodés luk bibpeng Yahya ngaceku ieh nengaweh Herodia, awan kinanakneh, idi ngaceku amung kekamen Herodés luk dat.

²⁰Idi Herodes nenganau' luk meluun dat, idi ieh nenipa Yahya bang tutup.

²¹Kareb amung lemulun pangeh rireb, idi Yésus pana' rireb. Idi Ieh uned sembayang idi langit mukab,

²²idi Roh Meligan netemurun luunNeh maya' ayu burur, mepad kudeng aceh suit sukur. Idi inan aceh tang rat bang langit luk pabala, "Iko ini AnakKu luk inanKu mawa. Ui mawang niat Namu.”

²³Kareb Yésus nengimun kekamenNeh, ulunNeh lélé teluh ngepulu' lak; idi bang terawé lemulun, Ieh ineh anak Yusup, anak Héli,

²⁴anak Matat, anak Liwi, anak Malki, anak Yanai, anak Yusup,

²⁵anak Matatias, anak Amos, anak Nahun, anak Esli, anak Nagai,

²⁶anak Maat, anak Matatias, anak Simi, anak Yusik, anak Yuda,

²⁷anak Yuhanan, anak Risa, anak Serubabel, anak Saltiel, anak Neri,

²⁸anak Malki, anak Adi, anak Kosam, anak Elemodam, anak Er,

²⁹anak Yosua, anak Elieser, anak Yorim, anak Matat, anak Liwi,

³⁰anak Simion, anak Yahuda, anak Yusup, anak Yonan, anak Eliakim,

³¹anak Melia, anak Mina, anak Matata, anak Natan, anak Daud,

³²anak Isai, anak Obed, anak Boas, anak Salmun, anak Nasun,

³³anak Aminadab, anak Admin, anak Arni, anak Ebron, anak Paris, anak Yahuda,

- ³⁴anak Yakub, anak Isak, anak Ibrahim, anak Tirah, anak Nahor,
³⁵anak Serug, anak Ru, anak Peleg, anak Iber, anak Silah,
³⁶anak Kainan, anak Arpaksad, anak Sem, anak Noh, anak Lamék,
³⁷anak Metusala, anak Enok, anak Yarid, anak Mahalalel, anak Kainan,
³⁸anak Enos, anak Sét, anak Adam, anak Allah.

Lukas 4

- ¹Idi Yésus pana' nepanu' ku Roh Meligan, kareb Ieh nelemubed rat Yarden. Idi Roh ineh nenguyut Neneh iné' su luk ali-ali.
- ²Idi déi' Ieh tinutun Iblis apat ngepulu' aco kinioneh. Ruked ineh sebuleng anun-anun pana' nateh kinanNeh. Kareb pangeh mabud aco ineh Ieh melau peh.
- ³Idi Iblis nepebala Neneh, "Kudeng matu Iko Anak Allah, do' Iko ngisu' batu ini mangun ku ruti kenenMu."
- ⁴Idi Yésus nengor balaneh, "Pangeh inayud bang Surat Allah, 'Baken ratnan ruti mo' lemulun miak mulun.' "
- ⁵Idi Iblis nenguit Neneh amé' inan aceh pegkung, idi ieh nemada' amung imet libut-libut tana' ineh sirenNeh segageh mo' kinioneh.
- ⁶Idi Iblis nepebala Neneh, "Ui sikal maré amung lalud ini idi rayehdeh kuanMu; ngaceku amung-amung ini pangeh biré negku, idi ui miak maré ineh kuan idé-idé lun pianku.
- ⁷Ngaceku ineh kudeng Iko sembayang negku idi amung-amung ineh mangun ku binawehMu."
- ⁸Idi Yésus nengor balaneh, "Pangeh inayud bang Surat Allah, 'Do' iko sembayang inan Allah Tuhanmu, idi maya' Neneh mo'.' "
- ⁹Idi Iblis nenguit Neneh iné' Yerusalim, idi ieh nenganau' Neneh luun buduk Ruma' Allah idi nepebala Neneh, "Kudeng matu Iko Anak Allah, do' Iko ubpa rat ieni amé' déi' liang;

¹⁰ngaceku pangeh inayud, 'Idi Ieh miak pebala kuan amung-amung melaikatNeh ratnan Iko, pad ideh matar Namu,'

¹¹idi 'Ideh miak ngimet Namu bang ticu'deh, pad kukudMu na miak matuk ku batu.' “

¹²Idi kebala Yésus neneh, "Pangeh inayud bang Surat Allah, 'Aleg iko nutun Allah Tuhanmu.' “

¹³Pangeh Iblis ineh nengabud tutunneh nan Yésus, idi ieh neburo rat Neneh segageh mo' kinioneh.

¹⁴Pangeh ineh Yésus nelemubed iné' Galilia dengan lalud Roh; idi balaNeh nepiar apud bawang ineh.

¹⁵Idi Ieh nemada' bang amung ruma' sembayangdeh, idi amung lemulun pana' nengerayeh Neneh.

¹⁶Idi Yésus iné' Nasarét, su luk inanNeh tudo kareb Ieh anak. Idi kareb Aco luk inan Mudeng Ieh nesemuat bang ruma' sembayang maya' kudeng luk pekalai. Idi Ieh netuped sikal maca' Surat Allah.

¹⁷Idi ideh nemaré kuanNeh surat Nabi Yesaya. Pangeh Ieh nengelesad ineh, idi Ieh nepapu' aceh bala luk pangeh inayud,

¹⁸"Roh Tuhan idi pa luunKu, ngaceku Ieh pangeh nengumau Negku, pad Ui mada' Bala luk Do' kuan lun masi'. Ieh nengecuk Negku mada' puit kuan lun luk tiban, idi ngedo' match lun luk nebuser, idi muit lemulun luk neritep,

¹⁹idi mada' lak luk inan Tuhan ngulun pupuNeh.”

²⁰Idi Ieh nengelulun surat ineh, idi nemaré ineh kuan lun luk ngasa' ruma' sembayang, idi Ieh netudo. Idi lemulun bang ruma' sembayang ineh nenutong Neneh.

²¹Idi Ieh nengimun pebala nedeh, "Bang aco sini ayat bang Surat Allah luk muyuh neninger pangeh icing.”

²²Niat amungdeh ineh nesigio ku bada'Neh, idi ideh mawa ku balaNeh luk pelaba do', keburu'deh, "Bakenké Ieh ini anak Yusup?”

²³Idi kebala Yésus nedeh, "Kali' rungen muyuh mada' luk pinginud ini kuanKu, 'O Lun Ngubat, ngedo' bururMu sebuleng," idi teh, 'Do' Iko nganau' tungé' bang bawangMu sebuleng, mepad kudeng luk biladeh nekai ratnan luk inau'Mu déi' Kapernaum.'

²⁴Matu, Ui pebala nemuyuh, na luk idi seburur nabi pana' ruen ngedita' bang bawangneh sebuleng.

²⁵"Ninger do'-do', bang kareb Elia, inan mula' decur tinula' arang lun Israil, kareb na udan teluh lak anem bulan kinioneh pad macing iru' luk rayeh aput tana' ineh.

²⁶Iamo' Elia ineh na icuk kuan seburur lun baken, iamo' kuan seburur decur tinula' déi' Sarepat déi' tana' Sidon.

²⁷Idi kareb Nabi Elisa ineh, inan mula' lemulun luk mét susud arang lun Israil, idi na luk idi seburur pana' luk dino' iamo' Naaman, seburur lun Siria ineh mo'."

²⁸Amung lemulun bang ruma' sembayang ineh pana' pelaba useh kareb ideh neninger bala ineh.

²⁹Ideh nudur nala' Yésus rat bang bawang ineh idi nenguit Neneh amé' inan aceh buduk pegkung su luk inan bawangdeh pinudut, sikal nala' Neneh déi' beneh.

³⁰Iamo' Yésus nelemaba arangdeh idi nenalan.

³¹Idi Yésus iné' Kapernaum bang babpat Galilia. Idi Ieh nemada' lemulun kareb Aco luk inan Mudeng.

³²Ideh mawa ku bada'Neh, ngaceku balaNeh inan lalud.

³³Idi bang ruma' sembayang ineh inan seburur lemulun luk sinuet ada', idi ieh nengitang, keburineh,

³⁴"Anunké luk pianMu nekai, O Yésus lun Nasarét? Iko macing sikal ngaté nekaiké? Ui kali' Namu ini, Iko ineh Lun Duken Allah luk Meligan."

³⁵Idi Yésus nemebpeng neneh, kebalaneh, "Pirud! Remuat iko ratnan lemulun ini!" Idi ada' ineh pana' nengeluka' neneh arang lemulun luk mula' ineh, idi ada' ineh neremuat rat bang bururneh dengan na nenganau' luk métneh.

³⁶Idi amungdeh ineh mawa idi nepebala seburur dengan seburur, keburideh, "Bala anunké ini? Ngaceku dengan lalud idi tueh Ieh ngecuk amung ada' buro idi ideh remuat."

³⁷Idi bala ratnan Yésus nepiar kuan amung babpat libut-libut bawang ineh.

³⁸Yésus neremuat rat bang ruma' sembayang ineh idi iné' ruma' Simun. Idi iban Simun medadem, idi ideh nemutuh Yésus ngedengan neneh.

³⁹Idi Ieh netuped iringneh idi nemebpeng dadem ineh. Idi dadem ineh pana' nedo', idi petacu ieh netumui idi nengasa' nedeh.

⁴⁰Kareb aco macep, idi amung lemulun luk inan puar-puar luk mét, nenguit lemulun luk mét ine amé' matun Yésus. Idi Ieh nengerareng ticu'Neh luun anid-anid lemulun ineh idi nengedo' nedeh.

⁴¹Idi ada'-ada' pana' neremuat ratnan lemulun luk mula' ineh idi nengitang, keburideh, "Iko ini Anak Allah." Idi Yésus nemebpeng nedeh na pebala-pebala, ngaceku ada' ineh nekali' idi Ieh ineh Keristus.

⁴²Kareb aco macang Yésus neremuat iné' su luk ali-ali; idi lun mula' nenakap Neneh. Kareb ideh nekali' Neneh, idi ideh sikal ngimet Neneh pad Ieh na necan nedeh.

⁴³Iamo' kebalaneh Yésus nedeh, "Ui na miak na mada' Bala luk Do' ratnan Imet Allah kuan bawang luk baken pana', ngaceku ini punneh Ui pangeh icuk Allah."

⁴⁴Idi Ieh nemada' bang ruma'-ruma' sembayang apud bawang ineh.

Lukas 5

¹Kareb lun mula' ineh nengeriang Yésus sikal ninger bala Allah, kareb Ieh netuped déi' tangeb Takung Genésaret,

- ²Idi Ieh nenier dueh alud inabet déi' tangeb takung ineh; iamo' lemulun luk ngerabat ineh pangeh netemurun rat bang alud ineh maru' rabatdeh.
- ³Yésus netemaleb bang aceh alud, ieh ineh alud Simun, idi Ieh nemutih neneh ngatad alud ineh mado sesuut rat ku tangeb. Idi Ieh netudo nemada' lun mula' ineh rat bang alud.
- ⁴Pangeh Ieh nugka' mada', idi Ieh nepebala ni Simun, "Do' amé' su luk medalem idi mepet rabatmu pad iko ngalap lawid."
- ⁵Idi kebala Simun, "O Tuhan, kedangan-kedangan kai nengerabat, sebuleng pana' nateh luk ilap kai; iamo' ngaceku ratnan ecukMu ui miak mepet rabat ineh."
- ⁶Kareb pangeh rabat ineh pipetdeh, idi ideh nengalap lawid pelaba ula', pad rabat ineh lélé nedarak peh.
- ⁷Idi ideh nengayep lun dengandeh luk bang alud baken ineh amé' ngeruyung nedeh. Idi ideh nacing idi nemanu' dueh alud ineh, pad macing lélé turem.
- ⁸Kareb Simun Pétrus nenier ineh, idi ieh netekeradung pa kiung Yésus, keburineh, "O Tuhan, buro rat negku, ngaceku ui lemulun luk panu' ku sala'."
- ⁹Simun idi lun danganneh pelaba awa, ngaceku mula' lawid luk ilapdeh.
- ¹⁰Kudeng ineh teh Yakub idi Yahya, anak Sabdi, luk mepad kekamen dengan Simun. Idi kebala Yésus ni Simun, "Aleg matot, rat pad kareb ini iko miak ngerabat lemulun."
- ¹¹Kareb alud pangeh rinuiddeh amé' tangeb, idi ideh nenecan amung-amung ineh idi nemaya' Yésus.
- ¹²Kareb Yésus bang aceh bawang, inan aceh lemulun luk mét susud dengan pelaba bura'. Kareb ieh nenier Yésus idi ieh netekeradung idi nemutih Neneh, keburineh, "O Tuhan, kudeng Iko pian, miak Iko ngedo' negku."
- ¹³Yésus nenatang tiku'Neh idi nengakem neneh, kebalaNeh, "PianKu, do' iko meligan peh!" Idi petacu susud ineh nepali'.

¹⁴Idi Yésus neperiteteng neneh, "Aleg iko mala kuan seburur lemulun pana', iamo do' iko amé' mada' bururmu siren lun imam, idi maré luk barén mangun ku liganmu, maya' kudeng luk icuk Musa, pad ngegala' kuan lun mula' ratnan iko pangeh nedo'."

¹⁵Iamo' meluun mepiar bala ratnan Yésus, idi pelaba ula' lemulun nepamung sikal ninger balaNeh idi pian uen ngedo' ratnan étdeh.

¹⁶Iamo' Yésus iné' su luk ali-ali idi nesembayang.

¹⁷Bang seaco kareb Yésus nemada', inan tuda'-tuda' lun Parisi idi guru Ukum tudo déi', luk nacing rat anid-anid bawang bang babpat Galilia idi Yudia idi rat Yerusalim pana'. Idi lalud Tuhan idi luun Yésus, pad Ieh nengedo' nelun mét.

¹⁸Idi inan teh seburur lemulun luk mét naté urat luk binirir, idi ideh nenakap dalam sikal nguit neneh semuet pad ngerareng neneh pa kiung Yésus.

¹⁹Iamo' ideh na miak nguit neneh semuet ngaceku lemulun pelaba peri'. Idi ideh numak iné' luun apo ruma' ineh, idi ideh nengukab apo idi nengurur neneh arangdeh bang birirneh pa kiung Yésus.

²⁰Kareb Yésus nekali' anudeh ineh, idi Ieh nepebala nan lemulun ineh, "Iko pangeh nengalap do' ratnan sala'mu.

²¹Idi guru-guru Ukum idi lun Parisi nepebala arangdeh sebuleng, "Idéké lemulun luk nguyo ini? Idéké miak maré do' ratnan sala', iamo' Sebuleng mo', ieh ineh Allah?"

²²Iamo' ngaceku Yésus nekali' terawédéh, idi Ieh nengitun nedeh, "Ngudehké muyuh ngerawé luk kudeng ineh?"

²³Sapehké luk meluun malé belén, 'Iko pangeh nengalap do' ratnan sala'mu,' kian, 'Tumui idi nalan'?

²⁴Iamo' pelé muyuh kali' idi Anak-Lemulun ngimet lalud bang tana' ini maré do' ratnan sala'," (idi keburu'Neh kuan lemulun luk mét naté urat ineh) "Ui pebala kuanmu, tumui iko, ngiding luk inanmu rudap idi muli'."

- ²⁵Idi petacu ieh netemui pa kiung lun mula' ineh idi nengiding luk inanneh telubid, idi ieh nuli' idi nengerayeh Allah.
- ²⁶Idi amungdeh ineh mawa idi nengubur Allah. Ideh nepanu' ku tot, kebaladeh, "Bang aco sini kai nekali' kekamen luk nan mawa!"
- ²⁷Pangeh ineh Yésus neremuat, idi nekali' aceh lemulun luk ngamung usin pupuk, ngadanneh Liwi, luk tudo bang ruma' luk inan ngamung usin pupu. Idi kebala Yésus neneh, "Do' maya' Negku."
- ²⁸Liwi netuped idi nenecan luk amung-amung, idi nemaya' Yésus.
- ²⁹Idi Liwi nenganau' aceh irau luk rayeh kuan Yésus bang ruma'neh. Idi déi' inan mula' lemulun luk ngamung usin pupuk idi lun baken teh luk tudo kuman dengandeh.
- ³⁰Idi lun Parisi idi guru-guru Ukum dureng-dureng kuan anak-anak sekola' Yésus, keburideh, "Ngudehké muyuh kuman idi ngirup dengan lun luk ngamung usin pupuk idi lun mesala' teh?"
- ³¹Idi kebala Yésus, "Lemulun luk do' burur na ulek kuan lun ngubat, iamo' lemulun luk mét.
- ³²Baken Ui macing nawar lemulun luk matu iamo' lemulun luk mesala', pad ideh uren."
- ³³Kebala sebuang lemulun inan Yésus, "Anak-anak sekola' Yahya megéi mawa' idi sembayang, kudeng ineh teh lun Parisi; iamo' anak-anak sekola'Mu kuman idi ngirup mo'."
- ³⁴Idi kebala Yésus nedeh, "Miakké lun rorum deléi luk sikal ngaweh ineh duken muyuh mawa', kareb deléi luk sikal ngaweh idi dengandeh?"
- ³⁵Iamo' aconeh miak macing, kareb deléi luk sikal ngaweh miak lapen rat arangdeh, idi kareb ineh teh ideh miak mawa'."
- ³⁶Yésus nemada' kuandeh aceh luk pinginud teh, "Na luk idi seburur lemulun luk narak sengirit kibung ratnan aceh kuyu' luk mebaruh, pad mubpul luun

aceh kuyu' luk mon; kudeng nganau' kudeng ineh, luk mebaruh ineh pana' medarak, idi sengirit kibung luk mebaruh ineh na petulu dengan luk mon.

³⁷Idi na luk idi seburur pana' ngutang abpa' anggur luk mebaruh bang seréi kubil luk mon; ngaceku abpa' anggur luk mebaruh ineh miak mila' seréi' kubil luk mon ineh, idi abpa' anggur ineh pana' mutata, idi seréi' kubil ineh mepau teh.

³⁸Na! Abpa' anggur luk mebaruh meluun do' ruen bang seréi' kubil luk mebaruh!

³⁹Idi na luk idi seburur pana' ngirup abpa' anggur luk mon, idi miak melili ku abpa' anggur luk mebaruh, ngaceku keburineh, 'Luk mon ineh do' éni' "

Lukas 6

¹Kareb Aco luk inan Mudeng idi Yésus nenalan lemaba lati'-lati', idi anak-anak sekola'Neh pana' nengalap runguh padé, idi nengugut ineh idi nekuman.

²Iamo' kebala tuda'-tuda' burur lun Parisi, "Ngudehké muyuh nganau' luk bibpeng kareb Aco luk inan Mudeng?"

³Kebala Yésus nedeh, "Naké muyuh nemaca' luk inau' Daud kareb ieh melau idi amung lun denganneh pana'?"

⁴Ieh numak bang ruma' Allah, idi nengalap ruti luk biré kuan Allah. Idi ieh nekuman, idi nemarké nelun denganneh teh, luk bibpeng na miak kenen, iamo' luk miak kenen lun imam mo'?"

⁵Idi Yésus nepebala nedeh, "Anak-Lemulun ineh Tuhan pa luun Aco luk inan Mudeng ineh."

⁶Idi kareb Aco luk inan Mudeng luk baken, Yésus numak bang ruma' sembayang idi nemada'; idi déi' inan selemulun luk naté ticu'neh pa tinueh.

⁷Idi guru-guru Ukum idi lun Parisi pana' nenier kudeng Ieh ngedo' lemulun ineh bang Aco luk inan Mudeng, pad ideh miak kali' dalan ngadu' Neneh.

⁸Iamo' Ieh sebuleng nekali' terawédeh, idi Ieh nepebala kuan lemulun luk naté ticu' ineh, "Mudur iko idi tuper pa atun." Idi ieh nudur idi netuper déi'.

⁹Idi kebala Yésus nedeh, "Ui ngitun nemuyuh: Maya' ukum tau, anunké luk miak ruen bang Aco luk inan Mudeng? Ngedengan kian ngurat? Ngulun kian ngaté?"

¹⁰Idi Yésus nenier amung-amungdeh, kebalaNeh, "Natang ticu'mu!" Idi ieh nenganau' kudeng ineh, idi ticu'neh nedo'.

¹¹Idi amungdeh ineh pelaba gateh. Idi ideh nepegayam arangdeh sebuleng, ratnan anun luk miak ruendeh kuan Yésus.

¹²Kareb ineh teh Yésus neremuat iné' luun pegkung sikal sembayang; idi kedangan-kedangan ineh Ieh sembayang inan Allah.

¹³Kareb aco pangeh macang Ieh nenawar anak-anak sekola'Neh, idi Ieh nemili' rat arangdeh pulu' dueh burur, luk titenNeh rasul-rasul,

¹⁴ieh ineh Simun luk titenNeh Pétrus idi kinanakneh Andrias; Yakub, Yahya, Pilipus, Bartolomius,

¹⁵Matius, Tomas, Yakub Alpius, Simun, lun Selot,

¹⁶Yudas Yakub, idi Yudas Iskariot luk mangun ku lemulun luk masui Neneh.

¹⁷Yésus netemurun maya' nedeh, idi Ieh netuped su luk meraked, dengan tuda'-tuda' ula' anak sekola'Neh. Idi lun mula' nacing rat Yudia, Yerusalim, idi rat tangeb abpa' rayeh luk muneng ku Sur idi Sidon. Ideh nacing sikal ninger bala Yésus pad ideh uen ngedo' ratnan étdeh.

¹⁸Idi lemulun luk sinuet ada' pana' dino'Neh.

¹⁹Amung lemulun pian ngakem Neneh, ngaceku inan lalud luk neremuat rat Neneh, pad amungdeh nedo' inau'Neh.

²⁰Yésus nenier anak-anak sekola'Neh idi nepebala, "Samal kuan muyuh luk masi'; ngaceku muyuh luk kuan Imet Allah.

²¹"Samal kuan muyuh luk melau nekini; ngaceku muyuh miak uen ngebor. "Samal kuan muyuh luk nangi' nekini; ngaceku muyuh miak meriruh.

22"Samal kuan muyuh kareb lemulun megateh nemuyuh, idi ngatad nemuyuh rat arangdeh, idi ngedat nemuyuh idi ngesala' nemuyuh, ngaceku ratnan Anak-Lemulun.

23Do' muyuh mawang niat idi sikau'-sikau' ku awang niat muyuh kareb aco ineh; ngaceku rayeh tabpar muyuh déi' surga. Ngaceku kudeng ineh teh luk inau' tepundeh.

24"Iamo' mesusa' kuan muyuh luk lun do' nekini; ngaceku muyuh do' udeng bang tana' ini!

25"Mesusa' kuan muyuh luk mebor nekini; ngaceku muyuh melau mucil!
"Mesusa' kuan muyuh luk meriruh nekini; ngaceku muyuh temido idi nangi' mucil!

26"Mesusa' kuan muyuh kareb muyuh buren amung-amung lemulun, ngaceku kudeng ineh teh luk inau' tepundeh kuan nabi-nabi luk mebalih."

27"Iamo' Ui pebala kuan muyuh ini luk ninger balaKu: Mawa inan bunu' muyuh, idi nganau' luk do' kuan amung lemulun luk megateh nemuyuh,

28mutuh peruan kuan lemulun luk ngediman nemuyuh, idi sembayang kuan lemulun luk ngedat nemuyuh.

29Kudeng lemulun mepag pingitmu selipa, maré teh kuanneh pingitmu selipa. Idi lemulun luk sikal ngalap kuyu'mu, aleg ngibpeng neneh ngalap kuyu' boyormu teh.

30Maré kuan anid-anid lemulun luk mutuh namu; idi kudeng lemulun ngalap anun-anun luk rat namu pana', aleg mutuh lemubed teh.

31Idi mepad kudeng muyuh sikal ruen lun baken kuan muyuh, do' muyuh nganau' kudeng ineh kuandeh teh.

32"Kudeng muyuh mawa inan lemulun luk mawa nemuyuh, anunké tabpar muyuh? Lun mesala' pana' mawa kuan lemulun luk mawa nedeh!

³³Kudeng muyuh nganau' luk do' kuan lemulun luk nganau' luk do' kuan muyuh mo', anunké tabpar muyuh teh? Lun mesala' pana' nganau' kudeng ineh teh.

³⁴Kudeng muyuh maré luk kebiten lemulun, merapet miak ngalap lemubed rat neneh, anunké tabpar muyuh teh? Lun mesala' pana' maré luk kebiten kuan lun mesala', merapet miak ngalap lemubed mepad kinula'neh.

³⁵Na! Do' muyuh mawa inan bunu' muyuh idi nganau' luk do' kuandeh, idi maré luk kebiten dengan na merapet miak ngalap lemubed. Idi muyuh miak ngalap tabpar luk rayeh, pad muyuh mangun ku anak-anak Allah luk Meluun Dita'. Ngaceku Ieh mawa kuan lemulun na maré ubur idi luk dat pana'.

³⁶Do' muyuh méi' nelun mepad kudeng Taman muyuh pana' méi nemuyuh.

³⁷"Aleg muyuh ngesala' nelun, pad muyuh na miak uen Allah ngesala; idi aleg ngukum seburur lemulun, pad muyuh na miak kumin Allah; do' muyuh maré do', pad Allah maré do' nemuyuh.

³⁸Do' muyuh maré kuan lun baken, idi muyuh miak inan Allah maré teh, maya' aceh uad luk matu. Muyuh ngalap luk uen netel, idi uen ngat-ngat pad macing mela, idi luk barén bang paladmu. Ngaceku dengan uad luk muyuh nguad, miak uen nguad kuan muyuh teh."

³⁹Idi Yésus nemada' kuandeh aceh luk pinginud teh, kebalaNeh, "Miakké lun mebuser nguyut lun mebuser? Naké didueh ineh mebpeh bang lubang?"

⁴⁰Seburur anak sekola' na meluun rayeh ratnan guruneh; iamo' anid-anid anak sekola' luk pangeh petap sibada' ineh miak mangun mepad kudeng guruneh teh.

⁴¹"Ngudehké iko nier mumuk kayuh luk bang mateh kinanakmu ineh, iamo' na kali' mu batang luk bang matehmu sebuleng?"

⁴²Kudeng apehké iko miak mala kuan kinanakmu ineh, 'O kinanak, nima' negku ngeruat mumuk kayuh rat bang matehmu,' ngaceku iko na nier batang luk bang matehmu sebuleng? O lun luk siayu, ngeruat batang rat bang

matehmu sebuleng atun, idi mucu iko miak nier megala' pad miak ngeruat mumuk kayuh luk bang mateh kinanakmu ineh."

⁴³"Ngaceku na luk idi lawa kayuh luk do', luk ngeruat bua' luk dat, idi lawa kayuh luk dat, luk ngeruat bu'a luk do'.

⁴⁴Anid-anid lawa kayuh miak uen ngiti ratnan bua'deh sebuleng, ngaceku ratnan lawa tabpa' na miak lemulun mureg bua' gita', idi ratnan apet tabpa' na lemulun mureg bua' anggur.

⁴⁵Lemulun luk do' ngeruat anun-anun luk do' ratnan binaweh niat luk do', idi lemulun luk dat ngeruat luk dat ratnan binaweh luk dat, ngaceku ela ratnan niat lemaba bibir tangneh."

⁴⁶"Ngudehké muyuh nawar Negku, 'Tuhan, Tuhan,' iamo' na muyuh maya' luk bilaKu?

⁴⁷Anid-anid lemulun luk macing Negku, luk ninger balaKu idi maya' ineh, Ui sikal mada' kuan muyuh kudeng apeh ayuneh.

⁴⁸Ieh ineh mepad kudeng seburur lemulun luk mudut ruma' idi nengukat macing medalem, idi ieh nenganau'diri luun batu. Kareb abpa' temubu' idi awer abpa' nengeduyung ruma' ineh, na ieh miak megio, ngaceku kekamen ineh meraben.

⁴⁹Iamo' lemulun luk pangeh neninger dengan na maya', ieh ineh mepad kudeng seburur lemulun luk mudut ruma'neh luun tana' dengan na tapin; idi awer abpa' pana' nengeduyung ruma' ineh, idi petacu ieh neluka', idi luka'neh pelaba bura'."

Lukas 7

¹Kareb Yésus nemangeh amung-amung balaNeh luk pindenger lun mula' ineh, idi Ieh nesemuet bang bawang Kapernaum.

²Idi inan seburur demulun lun rayeh baweh Rum luk inan tuanneh pelaba awa, idi ieh mét lélé maté.

- ³Kareb lun rayeh baweh ineh neninger ratnan Yésus, idi ieh nengecuk lun rayeh lun Yahudi mutuh Neneh macing ngedo' demulunneh ineh.
- ⁴Ideh nacing inan Yésus, idi ideh nemutuh tu-tu Neneh, keburideh, "Mayu ieh ruenMu ngedengan.
- ⁵Ieh mawa kuan pupu tau, idi ieh luk nemudut ruma' sembayang tau."
- ⁶Idi Yésus iné' maya' nedeh. Kareb Ieh pangeh muneng inan ruma' ineh, idi lun rayeh baweh ineh nengecuk tuda'-tuda' lun rurunneh amé' papu Neneh, kebaladeh, "O Tuhan, aleg mesusa' ngaceku ui na mayu uen Tuhan ngikak bang ruma'ku.
- ⁷Ngaceku ineh, ayuneh ui sebuleng pana' na mayu macing papu' nan Tuhan. Iamo do' Iko mala sebila' bala mo' idi demulunku miak do' peh.
- ⁸Ngaceku ui ini pana' seburur lemulun luk pa liang ukum, idi pa liang ukum dui pana' inan tuda'-tuda' lun pebunu'; idi ui mala kuan sebururdeh, 'Amé' iko,' idi ieh pana' amé'; idi kuan seburur luk baken teh, 'Amé' tungé,' idi ieh pana' macing; idi kuan demulunku, 'Do' nganau' ini,' idi ieh pana' nganau'."
- ⁹Kareb Yésus neninger balaneh idi Ieh mawa, idi nelumi nelun mula' luk nemaya' Neneh, kebalaneh, "Ui pebala nemuyuh, rat arang lun Israil pana' nateh Ui nekali' anu luk kudeng ineh rayeh."
- ¹⁰Kareb lun luk icuk ineh nelemubed iné' ruma', idi ideh nenier demulun ineh pangeh nedo'.
- ¹¹Na mio ratnan ineh teh Yésus iné' bawang Nain, idi anak-anak sekola'Neh idi lun mula' nemaya' Neneh.
- ¹²Kareb Ieh macing nan tanga' bawang ineh idi inan lun mirir lungun. Idi lun luk naté ineh anak buleng. Idi tinanneh tinula'. Idi mula' lun bang bawang ineh nemaya' neneh.
- ¹³Kareb Tuhan nenier decur ineh, idi Ieh méi' neneh, kebalaneh, "Aleg iko nangi'."

¹⁴Idi Ieh iné ngakem lungun ineh, idi lemulun luk nemirir ineh nugka'. Idi kebala Yésus, "O anak adi', Ui pebala namu, do' iko tumui!"

¹⁵Idi lun luk naté ineh netudo, idi nengimun pebala-pebala. Idi Yésus nemaré neneh nan tinanneh.

¹⁶Idi lun mula' ineh pelaba tot idi nengerayeh Allah, keburideh, "Aceh nabi luk rayeh pangeh nacing arang tau," idi "Allah pangeh nengikak pupuNeh."

¹⁷Idi bala ratnan Yésus nepiar apud tana' Yudia idi amung bawang libut-libut ineh teh.

¹⁸⁻¹⁹Idi anak-anak sekola' Yahya nemada' neneh ratnan amung ineh. Idi Yahya nenawar dueh anak sekola'neh, idi nengecuk nedidueh ngitun Tuhan, "Iko iniké Luk miak macing, kian, miak kai nginulat seburur lun baken?"

²⁰Kareb didueh nacing inan Yésus idi didueh nepebala, "Yahya luk Ngerereb nengecuk nekai amé' inan Tuhan idi ngitun, 'Iko iniké Luk miak macing ineh, kian, miak kai nginulat seburur lun baken?' "

²¹Kareb ineh teh Yésus nengedo' mula' lemulun luk inan luk mét idi kaca, idi luk sinuet ada'. Idi Ieh nengedo' match mula' lun luk nebuser.

²²Idi Yésus nengor bala didueh, keburideh, "Amé medueh idi mada' kuan Yahya ratnan anun-anun luk pangeh sinier idi pindenger medueh; ieh ineh lun mebuser kulat match, lun meliai nalan, lun mét susud pangeh biru', idi lun mebengel ninger peh, lun naté pana' tinui, idi Bala luk Do' pangeh bida' kuan lun masi'.

²³Samal kuan lemulun luk na mesabeng ku Ui."

²⁴Kareb lun duken Yahya ineh nenalan, idi Yésus nengimun pebala kuan lun mula' ratnan Yahya, keburideh, "Anunké luk amé muyuh sira' déi' su luk ali-ali? Selawa bulu'ké luk megio ku bui?

²⁵Kian, anunké luk amé muyuh sira'? Selemulun luk ngayung ku ayung luk do' saludké? Setuneh lemulun luk ngayung ku ayung luk do' salud idi mulun dengan petap anun-anun, ieh ineh mudeng bang ruma' raca'-raca'.

- ²⁶Iamo' anunké luk amé' muyuh sira'? Seburur nabiké? Matu, idi Ui pebala nemuyuh, idi ieh selemulun luk meluun ratnan nabi.
- ²⁷Ngaceku ini pangeh inayud ratnan lawé Yahya, 'Ui ngecuk lun dukenKu amé pa atunMu, ieh ineh luk nganau' temina' dalanMu.'
- ²⁸Ui pebala nemuyuh, idi rat arang amung-amung lemulun luk tinganak ratnan decur, na luk idi seburur pana' luk meluun rayeh ratnan Yahya, iamo' luk isuut tu bang Imet Allah, ieh ineh luk meluun rayeh rat neneh."
- ²⁹Idi amung-amung pupu luk neninger Neneh, idi lemulun luk ngamung usin pupuk ineh pana' nemaya' ukum-ukum Allah luk matu, ngaceku ideh pangeh rireb dengan rereb Yahya.
- ³⁰Iamo' lun Parisi, idi guru-guru Ukum nengarung pian Allah kuan bururdeh sebuleng, ngaceku ideh na rireb Yahya.
- ³¹Kebala Yésus, "Dengan anunké Ui miak maad inul ini, idi anunké luk mepinud nedeh ineh?
- ³²Ideh mepad kudeng anak-anak luk tudo déi' kadai idi ngitang seburur kuan seburur, keburideh, 'Kai pangeh nengiup suling kuan muyuh, idi na muyuh nengalai! Idi kai pangeh netemido, amo' nateh muyuh nenangi.'
- ³³Yahya luk Ngerereb nacing dengan na kuman ruti idi ngirup abpa' anggur, idi kebala muyuh, 'Teh sinuet ada!'
- ³⁴Anak-Lemulun nacing dengan kuman idi ngirup, idi kebala muyuh, 'Siruh, selemulun luk manga idi luk ngirup abpa' anggur! Ieh perurum teh dengan lemulun luk ngamung usin pupuk idi lun mesala.'
- ³⁵Iamo' ileh Allah uen lemulun luk ngalap ineh ngegala'."
- ³⁶Seburur lun Parisi nenawar Yésus kuman. Idi Yésus numak ruma' lun Parisi ineh idi netudo kuman.
- ³⁷Idi bang bawang ineh inan seburur decur luk mesala'. Kareb ieh nekali' Yésus uned tudo kuman bang ruma' lun Parisi ineh, idi ieh nenguit sebuleng seréi umau luk do' buen.

³⁸Idi ieh netuped pa keted Yésus muneng ku kukudNeh idi nangi', idi ieh nengeba' kukud Yésus ku abpa' matehneh. Idi ieh nemiid kukudNeh ku abpukneh, idi nemuen kukud Yésus, idi nengumau kukudNeh ku umau luk do' buen ineh.

³⁹Kareb lun Parisi nenier ineh, idi ieh nepebala bang niatneh, "Kudeng lemulun ini seburur nabi, kali' rungen Ieh kali' idé' decur luk ngakem Neneh ineh, idi Ieh kali' neneh mesala'!"

⁴⁰Idi Yésus nengor balaneh, keburu'Neh, "O Simun, inan luk balénKu namu." Idi keburu' Simun, O Guru, do' mada' negku nekini."

⁴¹"Inan dueh burur lemulun luk pebaleh nan seburur luk nemaré usin kebiten, idi luk kuan seburur baleh limeh ngeratu rigit, idi luk baken limeh ngepulu'.

⁴²Didueh ineh na luk idi anun-anun luk ku ngua' baleh ineh, idi ieh nemuit nedidueh ratnan baleh didueh ineh. Nekini idéké rat arang didueh ineh luk meluun mawa neneh?"

⁴³Idi kebala Simun, "Ui ngerawé lemulun luk pinuit ratnan baleh luk meluun ula'." Idi kebala Yésus neneh, "Matu terawému ineh."

⁴⁴Idi Yésus nelumi inan decur ineh idi nepebala ni Simun, "Iko kali' decur iniké? Ui nesemuet bang ruma'mu, na iko nemaré abpa' ku maru' kukudKu, iamo' decur ini nengeba' kukudKu ku abpa' matehneh idi nemiid ku abpukneh.

⁴⁵Na iko nemuen Negku, iamo' decur ini rat pun Ui nesemuet bang ruma'mu na ieh nugka' nemuen kukudKu.

⁴⁶Na iko nengumau uluhKu, iamo' decur ini ngenumau kukudKu ku umau luk do' buen.

⁴⁷Ngaceku ineh Ui pebala namu, ieh pangéh nengalap do' ratnan sala'neh luk mula' ineh, ngaceku awaneh pelaba rayeh; iamo' kuan lemulun luk pangéh nengalap do' ratnan sala'neh luk sesuut, idi awaneh pana' sesuut teh."

⁴⁸Idi kebala Yésus kuan decur ineh, "Iko pangéh nengalap do' ratnan sala'mu."

⁴⁹Idi lemulun luk tudo kuman denganNeh nengimun pebala bang niatdeh sebuleng, "Idéké lemulun ini luk miak maré do' ratnan sala' peh?"

⁵⁰Idi kebala Yésus nan decur ineh, "Anumu pangeh nengulun namu, nalan iko dengan awang."

Lukas 8

¹Na mio ratnan ineh, idi Yésus nenalan libut-libut bawang idi ruma' ineh, idi nemada' Bala luk Do' ratnan Imet Allah. Idi pulu' dueh anak sekola' ineh nemaya' Neneh.

²Idi teh inan tuda'-tuda' decur luk pangeh dino'Neh ratnan ada', luk nemaya' Neneh, ieh ineh Mariam (luk titen Magdalina), luk pangeh pinuit ratnan tudu' ada',

³Idi teh Yohana awan Kusa lun luk ngasa' binaweh Herodés, Susana, idi mula' decur baken teh luk nengasa' Yésus idi anak-anak sekola'Neh ku binawehdeh sebuleng.

⁴Lun mula' megéi' amé' nan Yésus rat anid-anid bawang. Idi kareb lemulun pelaba ula', Ieh nemada' luk pinginud ini:

⁵"Inan selemulun luk iné ngisak padé pimaraneh; idi kareb ieh nengisak, sebuang padé ineh nebpeh iring dalan, idi ridu'-ridu' lemulun, pad suit-suit nekuman ineh.

⁶Idi inan teh luk nebpeh luun gura' batu; idi kareb ieh mulun, idi ieh mekarang peh, ngaceku na meba'.

⁷Idi inan teh luk nebpeh arang tabpa'; idi tabpa' ineh netemubu' pad-pad dengan ineh pad ieh pelaba apet, idi na mulun do'-do'.

⁸Idi inan teh luk nebpeh luun tana' luk mebaleng, idi mulun pad macing nengeruat bua' meratu ula'neh." Idi kebala Yésus, "Lemulun luk inan lalid miak ninger, do' ieh ninger!"

⁹Idi anak-anak sekola' Yésus nengitun ilung luk pinginud ini.

¹⁰Idi kebala Yésus nedeh, "Pangeh biré nemuyuh do' kali' bala luk inalum ratnan Imet Allah, iamo' kuan lemulun luk baken ineh dengan luk pinginud, pelé kareb ideh nier, na luk sinierdeh, idi kareb ideh ninger pana' na ideh kali' ilungneh."

¹¹"Idi ini ilung pinginud ineh: idi ilung padé ineh bala Allah.

¹²Idi luk nebpeh iring dalan, ieh ineh lemulun luk pangeh neninger, iamo' mucu Iblis macing ngalap bala ineh rat bang niatdeh, pad lemulun ineh na manu idi uen ngulun peh.

¹³Idi luk nebpeh luun gura' batu ineh, ieh ineh lemulun luk pangeh neninger, idi nengalap bala dengan mawang niat; iamo' lemulun ineh na uat idi ideh manu segageh mo', idi kareb luk nutun macing, petacu ideh lemubed.

¹⁴Idi luk nebpeh arang tabpa' ineh, ieh ineh lemulun luk pangeh neninger. Iamo' ideh mesabeng ku rapang idi mula' binaweh idi luk do' bang tana' ini, pad ideh na ngeruat bua' dengan meriput.

¹⁵Iamo' luk nebpeh luun tana' luk do' ineh, ieh ineh lemulun luk pangeh neninger bala ineh, idi nengimet meraben bang niat luk mesiri idi do', idi ngeruat bua' dengan mulai niat.

¹⁶"Na luk idi seburur pana' luk nutud ilu', idi ngakeb neneh ku gatang, kian ngerareng neneh pa liang bitaran, iamo' ieh ngerareng neneh luun dawan, pad lemulun luk semuet miak nier acang ineh.

¹⁷Sebuleng pana' na miak uen ngapung luk na miak uen ngegala', idi na luk idi luk inalum luk na miak kali' lemulun idi miak megala' peh.

¹⁸"Ngaceku ineh ngerawé kudeng apeh muyuh ninger, ngaceku idé-idé luk inan anun-anun, idi kuanneh miak barén teh, idi idé-idé luk na luk idi anun-anun, idi luk tirawéneh inan kuanneh miak lapen rat neneh."

¹⁹Tinan idi kinanak-kinanak Yésus pian amé' matun Neneh, iamo' na ideh miak amé' muneng Neneh ngaceku pelaba ula' lemulun.

²⁰Kebala seburur lemulun Neneh, "Tinan idi kinanak-kinanakMu tuped déi' liang sikal papu' Namu."

²¹Iamo' kebala Yésus nedeh, "Tinan idi kinanak-kinanakKu, ieh ineh luk ninger idi maya' bala Allah."

²²Idi bang seaco Yésus dengan anak-anak sekola'Neh netemaleb bang aceh alud, idi kebala Yésus nedeh, "Do' tau guta amé' déi' dipar takung ineh." Idi ideh nenalan.

²³Iamo' kareb uneddeh maya' alud, idi Yésus nerudap, idi netemurun aceh barui luk rayeh déi' bang takung ineh, idi alud ineh pana' lélé mepanu' ku abpa', pad ideh pelaba susa'.

²⁴Idi ideh iné' matun Yésus, idi nengalat Neneh, keburideh, "O Tuhan! O Tuhan! Tau lélé maté." Idi Yésus netemui idi nengagka' barui idi ribut ineh, pad ieh melitong peh.

²⁵Idi keburideh nan anak-anak sekola'Neh, "Iapehké anu muyuh?" Iamo' ideh mawa idi matot, kebaladeh seburur dengan seburur, "Idéké lemulun ini luk mebpeng barui idi ribut, pad ideh maya' balaNeh?"

²⁶Ideh nemaya' alud iné' tana' lun Gerasa, luk petutup ku Galilia.

²⁷Kareb Yésus numak déi' tangeb, idi Ieh nepapu' seburur lemulun luk rat bang bawang ineh, luk sinuet ada'. Idi pangeh tuda'-tuda' io lemulun ineh na luk idi ayung, idi na tudo bang ruma' teh, iamo' bang lengutan mo'.

²⁸Kareb ieh nenier Yésus, idi ieh nengitang idi netekeradung pa kiungNeh, kebalaneh, "Anunké luk pianMu negku, O Yésus Anak Allah luk Meluun Dita'? Ui mutuh, aleg Iko ngedereh negku."

²⁹Ieh nepebala kudeng ineh ngaceku Yésus nengecuk ada' ineh remuat rat bang bururneh. Mula' kua' ada' ineh nengimet neneh; idi sagan tu pana' ieh pinatar lemulun, pad ieh kiling idi pipang; iamo' amung-amung kaling ineh nabud pinututneh, idi ieh pinasut ada' amé' su luk ali-ali.

- ³⁰Idi Yésus nengitun neneh, "Idéké ngadanmu?" Idi keburineh, "Baweh," ngaceku mula' ada' pangeh nesemuet bang bururneh.
- ³¹Ada'-ada' ineh nemutuh Yésus na ngecuk nedeh semuet bang lubang luk na miak uen nari kidalemneh.
- ³²Idi inan barek luk mula' uned nakap akan déi' luun surud; idi ada'-ada' ineh pana' nemutuh Yésus, pad Ieh nima' nedeh semuet bang burur barek ineh. Idi Ieh nenima' nedeh.
- ³³Idi ada'-ada' ineh neremuat rat bang burur lemulun ineh idi nesemuet bang burur barek-barek ineh. Barek-barek ineh nupun musul maya' irang pegkung ineh idi nubpa bang abpa' rayeh. Idi ideh naté nened.
- ³⁴Kareb lemulun luk matar barek ineh nekali' luk kudeng ineh, idi ideh neburo, idi nemada' nelun bang bawang ineh idi bang lati'-lati' teh.
- ³⁵Ideh neremuat amé' nier luk pangeh nangun ineh, idi iné' matun Yésus, idi nepapu' lemulun luk inan ada' neremuat ineh tudo iring kukud Yésus. Ieh pangeh nengayung, dengan na meruden, pad ideh palaba tot.
- ³⁶Idi lemulun luk pangeh nenier luk kudeng ineh nemada' nedeh, ratnan kudeng afeh lemulun luk sinuet ada'-ada' ineh pangeh dino'.
- ³⁷Idi amung lemulun luk rat libut bawang Gerasa nemutuh Yésus buro rat nedeh, ngaceku ideh palaba tot. Idi Yésus netemaleb bang aceh alud, idi Ieh nenalan.
- ³⁸Lemulun luk inan ada' neremuat ineh nemutuh Yésus, pad ieh miak maya' Neneh. Iamo' Yésus nengecuk neneh nalan, keburineh,
- ³⁹"Muli' iko, idi mada' kudeng afeh rayeh luk inau' Allah kuanmu." Idi lemulun ineh pana' iné', idi nemada' libut-libut bawang ineh, kudeng afeh rayeh luk pangeh inau' Yésus kuanneh.
- ⁴⁰Kareb Yésus nelemubed, idi Ieh tinawar lun mula', ngaceku amung-amungdeh nganét Neneh.

⁴¹Idi seburur lemulun luk ngadanneh Yairus, ieh ineh seburur lun rayeh ruma' sembayang nacing idi netekeradung iring kukud Yésus, mutuh Neneh amé' ruma'neh.

⁴²Ngaceku inan aceh anak decurneh luk sebuleng luk lélé pulu' dueh lak ulunneh, idi ieh lélé maté. Uned Yésus nalan idi lun mula' pana' nengerieng Neneh.

⁴³Idi inan seburur decur luk mét mirat dara' pangeh pulu' dueh lak kinioneh, idi sagan pana' ieh nengabud binawehneh kuan lun ngubat, iamo' seburur pana' nateh nengedo' neneh.

⁴⁴Idi decur ineh nacing rat pa keted idi nengakem kuyu' Yésus, idi petacu dara'neh nugka'.

⁴⁵Idi kebala Yésus, "Idéké luk nengakem Negku?" Idi lun mula' nengena, idi kebala Pétrus, "O Tuhan, lun mula' ngeperi' idi ngerieng Namu!"

⁴⁶Iamo' Yésus nepebala, "Inan seburur lemulun pangeh nengakem Negku; ngaceku Ui nekali' sebuleng lalud neremuat rat Negku."

⁴⁷Iamo' kareb decur ineh nekali' ieh na miak sigapung, idi ieh nacing dengan megegker, idi netekeradung pa kiung Yésus idi nemada' pa kiung amung-amung pupu ineh, ratnan ieh pangeh nengakem kuyu' Yésus, idi ratnan kudeng apeh ieh petacu nedo' peh.

⁴⁸Idi kebala Yésus neneh, "O anakKu, anumu pangeh nengedo' namu, nalan iko dengan awang."

⁴⁹Kareb Yésus uned pebala, idi seburur lemulun nacing rat ruma' lun rayeh ruma' sembayang ineh, keburu'neh, "Anakmu pangeh naté, aleg ngesusa' Guru teh."

⁵⁰Iamo' Yésus neninger bala ineh, idi Ieh nengor neneh, "Aleg matot, manu mo', pad ieh miak mulun."

⁵¹Kareb Ieh nacing bang ruma' ineh, idi na Ieh nima' seburur pana' semuet denganNeh, iamo' Pétrus, Yahya, Yakub, idi taman-tinan anak ineh mo'.

⁵²Idi amung-amung lemulun pana' nangi' idi temido neneh; iamo' keburu Yésus, "Aleg nangi', baken ieh naté, iamo' rudap."

⁵³Idi ideh meriruh idi nesitunga Neneh, ngaceku ideh kali' neneh pangeh naté.

⁵⁴Iamo' Yésus nengimet ticu' anak ineh idi nengitang, kebalaNeh, "O anak decur, tumui iko."

⁵⁵Idi niatneh pana' nelemubed, idi petacu ieh netumui, idi Yésus nengecuk maré luk kenen kuan anak ineh.

⁵⁶Idi taman-tinanneh mawa; idi Yésus neperiteteng nedeh, "Aleg mala ratnan ini kuan seburur lemulun pana'."

Lukas 9

¹Yésus nenawar pulu' dueh anak sekola'Neh, idi nemaré tueh idi lalud kuandeh, pad ideh miak ngusu ada' idi ngedo' amung-amung luk mét.

²Idi Ieh nengecuk nedeh mada' Imet Allah idi ngedo' lemulun luk mét.

³KebalaNeh nedeh, "Aleg muyuh nguit anun-anun kareb muyuh nalan; rukud pana' na, luk inan balu' pana' na, ruti pana' na, usin pana' na, kuyu' luk dueh pana' na.

⁴Idi ruma' iapeh luk inan muyuh semuet, do' tudo déi', idi rat déi' muyuh remuat teh.

⁵Idi iapeh-iapeh lemulun na sikal nganak nemuyuh, do' muyuh nalan rat bang bawang ineh, idi ngegkar abuh ratnan kukud muyuh, mangun ku aceh bada' kuandeh."

⁶Idi anak-anak sekola' ineh nenalan idi iné' bang anid-anid bawang idi nemada' Bala luk Do' idi nengedo' lemulun iapeh-iapeh pana'.

⁷Herodés, raca' sebabpat apat bawang ineh, neninger ratnan amung-amung luk pangeh nangun; idi ieh merapang ngaceku inan sebuang lemulun pebala, "Yahya pangeh netumui rat arang lun naté!"

⁸Idi lun baken nepebala, "Elia pangeh nesigala," idi inan teh luk nepebala, "Seburur rat arang nabi luk mon pangeh netumui."

⁹Idi kebala Herodés, "Ui pangeh nengaleb uluh Yahya; iamo' idéké lemulun ini, luk beléndeh nganau' kekamen ini?" Idi ieh nenakap dalam sikal nier Yésus.

¹⁰Rasul-rasul Yésus nelemubed, idi nemada' Neneh ratnan amung-amung luk pangeh inau'deh. Idi Ieh nenguit nedeh nala amé' bang aceh bawang luk ngadanneh Baitsaida.

¹¹Kareb lun mula' nekali' ratnan ineh, idi amung-amungdeh nemaya' Neneh. Yésus nenawar nedeh, idi nepegayam nedeh ratnan Imet Allah, idi Ieh nengedo' lemulun luk sikal uen ngedo'.

¹²Kareb aco macep, idi pulu' dueh anak sekola'Neh ineh iné' Neneh idi nepebala, "Ngecuk lun mula' ini muli' amé' déi' lati' idi ruma' luk muneng pad ideh miak tudo déi' idi nakap akan kuandeh sebuleng, ngaceku su luk inan tau ini mali tu."

¹³Iamo' keburu' Yésus nedeh, "Do' muyuh maré nedeh kuman." Idi keburu' anak-anak sekola' ineh, "Na luk idi ruti nekai luk meluun ratnan limeh balad, idi dueh lawid mo'. PianMu kai amé' melih luk kenen kuan amungdeh iniké?"

¹⁴Ngaceku kinula'deh lélé limeh ngeribu amung lun deléi ineh. Idi kebala Yésus kuan anak-anak sekola'Neh, "Ngecuk nedeh tudo setau'-setau' lélé limeh ngepulu' burur setebubpun."

¹⁵Anak-anak sekola'Neh nenganau' kudeng ineh, idi nengecuk nedeh tudo.

¹⁶Yésus nengalap ruti luk limeh balad, idi lawid luk dueh ineh, idi Ieh netengook déi' langit nesembayang. Pangeh ineh Ieh nemuri' ruti idi lawid ineh, idi nemaré kuan anak-anak sekola'Neh. Idi ideh nenganid ineh kuan lun mula'.

¹⁷Idi amung-amungdeh nekuman macing mebor. Idi ideh nengamung tecehneh, pad macing panu' pulu' dueh ngebuan.

¹⁸Kareb Yésus nesetau', idi nesembayang, idi anak-anak sekola'Neh iné' Neneh. Idi Ieh nengitun nedeh, keburu'Neh, "Idéké Ui ini, maya' terawé lun mula'?"

¹⁹Idi kebaladeh Neneh, "Yahya luk Ngerereb." Iamo' inan luk pebala, "Elia." Idi inan teh luk pebala, "Seburur rat arang nabi luk mon pangeh netumui."

²⁰Idi keburu'Neh nedeh, "Iamo' maya' terawé muyuh ini, idéké Ui?" Idi kebala Pétrus Neneh, "Keristus luk ratnan Allah."

²¹Idi Yésus nemebpeng na mala kuan seburur lemulun pana',

²²keburu'Neh, "Anak-Lemulun na miak na mabeh mula' dereh, idi talan lun rayeh-rayeh, imam-imam rayeh, idi guru-guru Ukum, pad Ieh pitayen. Idi aco luk keteluh Ieh miak tuyen teh."

²³Idi kebalaNeh nelun mula', "Idé-idé luk sikal maya' Negku, do' ieh ngalum bururneh idi maan salibneh anid-anid aco, idi maya' Negku.

²⁴Lemulun luk ngerawé ulunneh sebuleng na ngalap ulun luk matu; iamo' lemulun luk na ngerawé ulunneh sebuleng ngaceku Ui, ieh miak ngalap ulun luk matu.

²⁵Anunké ulekneh kuan seburur lemulun kudeng ieh ngalap amung tana' ini, iamo' ulunneh sebuleng metutu' kian talan lek?

²⁶Ngaceku idé-idé luk migu' ngamo Negku idi balaKu, idi Anak-Lemulun ineh pana' migu' ngamo neneh, kareb Ieh macing dengan rayehNeh sebuleng idi dengan rayeh TamanNeh, idi dengan rayeh melaikat-melaikatNeh luk meligan.

²⁷Ngerawé do'-do', inan sebuang rat arangdeh luk tuped ieni luk na miak kali' maté kareb nateh ideh nier Imet Allah."

²⁸Idi lélé ualuh aco mucu ratnan bala ineh, idi Yésus nenguit Pétrus, Yahya, idi Yakub amé' luun aceh pegkung sikal sembayang.

²⁹Idi uned Ieh sembayang, idi ayu kiungNeh nisu', idi ayungNeh pana' mangun mebuda' idi merasat.

- ³⁰Idi inan dueh burur lemulun luk pebala denganNeh, ieh ineh Musa idi Elia,
- ³¹luk siner dengan rasat. Idi didueh nepegayam ratnan até Yésus, luk ngacing pian Allah déi' Yerusalim.
- ³²Idi Pétrus idi lun denganneh uned rudap, iamo' kareb diteluh nekulat idi diteluh nenier rayeh Yésus idi dueh burur lemulun luk tuped iringNeh ineh.
- ³³Kareb dueh burur lemulun ineh sikal patad rat Neneh, keburu' Pétrus kuan Yésus, "O Guru, do' tau tudo ieni; nima' nekai mudut teluh lepo, sebuleng kuanMu, sebuleng kuan Musa, idi sebuleng kuan Elia." Iamo' na ieh kali' anun luk pangeh bilaneh ineh.
- ³⁴Uned ieh pebala kudeng ineh, aceh laput nacing ngelungung nedeh; idi ideh matot kareb ideh bang laput ineh.
- ³⁵Inan aceh, tang rat bang laput ineh luk nepebala, "Ini AnakKu luk pinili'. Do' muyuh ninger Neneh."
- ³⁶Kareb tang ineh pangeh nepebala, idi Yésus mo' luk sinierdeh sebuleng. Idi anak-anak sekola' pana' pirud, idi na nemala kuan seburur lemulun pana' ratnan anun-anun luk sinierdeh.
- ³⁷Kenebpa ideh netemurun rat luun pegkung ineh, idi mula' lemulun nacing papu' Yésus.
- ³⁸Rat arang lun mula' ineh inan seburur lemulun nengitang, keburu'neh, "O Guru, ui mutuh Namu amé' nier anakku luk deléi; ngaceku ieh luk anak bulengku.
- ³⁹Idi inan sebuleng ada' luk semuet bang bururneh, idi denak-denak ieh ngitang, idi ada' ineh ngeluka' neneh pad tangneh melapa', idi teh ieh ngurat bururneh. Idi ada' ineh na pian buro rat neneh.
- ⁴⁰Idi ui nemutuh anak-anak sekola'Mu nala' ada' ineh, iamo' na ideh miak nala' neneh."

⁴¹Idi kebala Yésus, "O inul luk na manu idi luk neraruh ini. Tuda' ioké Ui tudo dengan muyuh idi mekadang niat nemuyuh? Do' nguit anakmu ineh amé' tungé'."

⁴²Laba' anak adi' ineh nalan-nalan, idi ada' ineh nengeluka' neneh luun tana' idi nengurat neneh. Iamo' Yésus nemebpeng ada' ineh, idi nengedo' anak ineh, idi nemaré neneh lemubed kuan tamanneh.

⁴³Idi amungdeh ineh mawa ratnan lalud Allah ineh. Uned ideh mawa ratnan amung luk inau' Yésus ineh, idi Ieh nepebala kuan anak-anak sekola'neh,

⁴⁴"Aleg kelupan luk belénKu nemuyuh, ngaceku Anak-Lemulun miak barén bang palad lemulun."

⁴⁵Iamo' ideh na kali' ilung bala ineh. Ilungneh inalum rat nedeh, pad ideh na kali'. Idi ideh matot ngitun Neneh ratnan ineh.

⁴⁶Idi arang anak-anak sekola' ineh mangun aceh kedaluh ratnan idé' luk meluun rayeh.

⁴⁷Yésus nekali' ratnan terawé niatdeh ineh, idi Ieh nengalap aceh anak luk isuut, idi nenaped neneh iringNeh,

⁴⁸kebalaNeh nedeh, "Idé-idé luk nganak anak luk isuut ini bang ngadanKu, ieh ineh nganak Negku; idi idé-idé luk nganak Negku, ieh ineh nganak Neneh luk nengecuk Negku. Ngaceku luk pelaba isuut rat arang amung-amung muyuh, ieh ineh luk meluun rayeh."

⁴⁹Idi Yahya nepebala, "O Guru, kai pangeh nenier seburur lemulun luk nala' ada' bang ngadanMu; idi kai nemebpeng neneh ngaceku na ieh maya' nekai."

⁵⁰Iamo' keburu' Yésus ni Yahya, idi kuan anak sekola'Neh luk baken, "Aleg mebpeng neneh, ngaceku lemulun luk na sikal metueh rat nemuyuh, ieh ineh lun dengan muyuh."

⁵¹Kareb Yésus malé uen ngikit amé' surga, idi Ieh nenalan petacu iné' Yerusalim.

⁵²Ieh nengecuk tuda'-tuda' lun duken amé' pa atunNeh. Idi ideh nenalan, idi nesemuet bang aceh bawang lun Samaria sikal nganau' temina' luk inan kuanNeh.

⁵³Iamo' na ideh pian nganak Neneh, ngaceku megala' Ieh amé' Yerusalim.

⁵⁴Kareb anak sekola'Neh Yakub idi Yahya nekali' ratnan ineh, idi kebala didueh, "O Tuhan, pianké Iko kai ngecuk apui temurun rat bang langit pad ngeseb nedeh?"

⁵⁵Iamo' Yésus nelumi idi nemebpeng nedidueh,

⁵⁶idi ideh nenalan iné' inan aceh bawang luk baken.

⁵⁷Uned ideh nalan, idi seburur lemulun nepebala Neneh, "Ui sikal maya' Namu pad iapeh luk suetMu."

⁵⁸Idi keburu' Yésus neneh, "Bungalé inan lubangdeh, idi suit-suit déi' arang gawa' inan arardeh, iamo' Anak-Lemulun na luk idi luk inan Neh ngerareng uluhNeh."

⁵⁹Idi kebala Yésus kuan seburur luk baken, "Do' maya' Negku." Iamo' keburu' lemulun ineh, "O Tuhan, nima' negku amé' nanem tamanku atun."

⁶⁰Iamo' keburu' Yésus neneh, Nima' lun naté nanem lun dengandeh luk naté; iamo' iko ini amé' mada' Imet Allah."

⁶¹Idi keburu' selemulun luk baken teh, "Ui sikal maya' Tuhan; iamo' nima' negku muli' amé' mala, "Do' tudo', kuan lun uang ruma'ku."

⁶²Idi keburu' Yésus neneh, "Lemulun luk ngimet etun radu idi lumi pa puet na mayu semuet bang Imet Allah."

Lukas 10

¹Pangeh ineh, idi Tuhan pana' nemili' tudu' ngepulu' dueh burur lemulun, idi nengecuk nedeh tedueh-tedueh amé' pa atunNeh bang anid-anid bawang idi su luk inanNeh pian amé'.

²Idi kebalaNeh nedeh, "Mula' luk perinien, iamo' pawa' lun luk ngeranih. Do' mutuh ratnan Tuhan luk kuan perinien ineh, pad Ieh ngecuk lemulun amé' ngeranih uli' luk tinibuNeh ineh.

³Amé' muyuh! Ui ngecuk nemuyuh mepad kudeng anak dumba arang uned bungalé.

⁴Aleg nguit kapil, tabpung, idi kasut; idi aleg petabi' dengan seburur lemulun pana' arang dalan.

⁵Kareb muyuh semuet bang ruma' iapeh-iapeh pana', do' muyuh pebala atun, 'Samal kuan ruma' ini.'

⁶Kudeng inan lemulun luk do' niat déi', idi tabi' muyuh ineh pana' miak lutep kuanneh; iamo' kudeng na, tabi' muyuh miak lemubed kuan muyuh.

⁷Do' muyuh tudo bang ruma' ineh idi kuman idi ngirup anun-anun luk baréndeh; ngaceku anid-anid lemulun luk ngakem, kali' rungen ngalap tabparneh. Aleg muyuh mubuh ratnan sebuleng ruma' amé' bang ruma' baken.

⁸Kareb muyuh semuet bang bawang iapeh-iapeh pana', idi lemulun nganak nemuyuh, do' muyuh kuman anun-anun luk baréndeh nemuyuh,

⁹idi ngedo' lemulun luk mét bang bawang ineh, idi mala kuandeh, 'Imet Allah pangeh muneng nemuyuh.'

¹⁰Iamo' kareb muyuh semuet bang bawang iapeh-iapeh pana', iamo' lemulun na nganak nemuyuh, do' muyuh remuat amé' inan dalan-dalandeh idi mala,

¹¹'Abuh bawang muyuh luk nepedaket luun kukud kai ineh pana', kai ngegar kuan muyuh; iamo' do' muyuh kali' idi Imet Allah pangeh muneng.'

¹²Ui pebala nemuyuh, kareb Aco Ngukum, Allah meluun méi' nelun Sodom ratnan bawang ineh!

¹³"Mesusa' kuanmu, O Korasin! Mesusa' kuanmu, O Baitsaida! Ngaceku kudeng kekamen luk melalud pangeh inau' bang bawang Sur idi Sidon,

kudeng luk pangeh inau' bang nemedueh, kali' rungen ideh pangeh nuren mon dengan tudo bang abuh idi inayung ku guni.

¹⁴Kareb Aco Ngukum, Allah meluun méi nelun Sur idi Sidon rat nemuyuh.

¹⁵Idi iko, O Kapernaum, iko pian uen ngedita' macing langit. Iamo' iko miak uen ngebeneh macing su inan até!”

¹⁶Idi Yésus nepebala kuan anak-anak sekola'Neh, "Lemulun luk neninger nemuyuh, ieh ineh ninger Negku, idi lemulun luk nala' nemuyuh, ieh ineh nala' Negku, idi lemulun luk nala' Negku, ieh ineh nala' Neneh luk nengecuk Negku.”

¹⁷Tudu' ngepulu' dueh anak sekola' ineh nelemubed dengan mawang niat idi nepebala, "O Tuhan, amung-amung ada' pana' maya' ukum kai bang ngadanMu.”

¹⁸Idi keburu' Yésus nedeh, "Ui nenier Sétan nebpeh mepad kudeng kilep rat bang langit.

¹⁹Ninger do'-do', Ui pangeh nemaré nemuyuh lalud ngeradu' menipeh idi menipal kara', idi lalud pa luun amung-amung tueh Bunu' ineh, idi sebuleng pana' na miak ngesabeng nemuyuh.

²⁰Iamo' aleg muyuh mawang niat ngaceku amung-amung ada' maya' ukum muyuh, iamo' do' muyuh mawang niat ngaceku ngadan muyuh pangeh inayud déi' surga.”

²¹Bang kareb ineh pana' Yésus mawang niat bang Roh Meligan idi nepebala, "O Ama', Tuhan langit idi tana', Ui ngubur Namu, ngaceku Iko pangeh nengalum amung ini ratnan lemulun luk mileh idi luk do' kali', idi pangeh nengegala' neneh kuan anak-anak. O Ama', amung ineh inau'Mu maya' pianMu.

²²"Luk amung-amung pangeh biré Taman kuanKu, idi seburur pana' na miti Anak ineh, iamo' Taman mo', idi seburur pana' na miti Taman ineh, iamo' Anak mo', idi teh lemulun luk pinili' Anak, ieh luk miak badénNeh ratnan Allah.”

²³Idi Yésus nelumi inan anak-anak sekola'Neh idi nepebala lulem, "Samal kuan muyuh luk nier amung-amung luk siren muyuh.

²⁴Ui pebala nemuyuh, mula' nabi idi raca' geregan nier luk sinier muyuh, iamo' na ideh nenier ineh; idi ninger luk pedingeren muyuh ineh, iamo' na ideh neninger ineh."

²⁵Idi inan seburur guru Ukum netuped sikal nutun Neneh, keburu'neh, "O Guru, anunké luk ruenku, pelé ui miak ngalap ulun luk meruked?"

²⁶Idi keburu' Yésus neneh, "Anunké luk inayud bang Ukum Musa? Kudeng apehké luk bica'mu?"

²⁷Idi ieh nepebala, "Do' iko mawa inan Tuhan Allahmu dengan amung-amung niatmu, amung-amung ulunmu, amung-amung tuehmu, idi amung-amung terawému; idi mawa inan lun denganmu mepad kudeng bururmu sebuleng."

²⁸Idi kebala Yésus neneh, "Matu balamu ineh. Nganau' kudeng ini, idi kali' rungen iko miak mulun."

²⁹Iamo' guru Ukum ineh sikal ngamo bururneh mesiri, idi keburu'neh kuan Yésus, "Idéké lun denganku ineh?"

³⁰Idi kebala Yésus, "Inan selemulun luk netemurun rat Yerusalim amé' Yeriko; idi ieh nepapu' lun mano, idi ideh nengalap ayungneh idi nemebal neneh lélé maté, idi ideh nenalan necan neneh.

³¹Idi inan seburur imam nenalan maya' dalan ineh teh; kareb ieh nenier neneh, ieh nesemisir lemaba neneh teh.

³²Kudeng ineh teh, seburur lun Liwi nacing su luk inanneh ineh, idi nenier neneh idi nesemisir lemaba neneh.

³³Iamo' seburur lun Samaria luk uned nalan nacing su luk inanneh telubid ineh. Idi kareb ieh nenier neneh, idi niatneh nesigio ngaceku méi' neneh.

³⁴Ieh iné' matun neneh, idi nengutang umau idi abpa' anggur luunneh, idi nengabet uratneh. Pangeh ineh idi ieh nenganau' neneh tudo luun keladaineh sebuleng, idi nenguit neneh amé' ruma' sakai idi nengasa' neneh.

³⁵Kenebpa ieh nengalap dueh rigit idi nemaré kuan tuan ruma' sakai ineh idi nepebala, 'Do' iko ngasa' neneh, idi anun-anun luk iko maré meluun ratnan ini ui miak ngelibal kareb ui lemubed teh.' “

³⁶Idi kebala Yésus, "Rat arang teluh burur ineh sapehké luk bang terawému, mangun ku rorum lemulun luk inurat lun mano ineh?"

³⁷Idi kebala guru Ukum ineh, "Ieh luk nemada' éi' kuanneh." Idi kebala Yésus kuanneh, "Amé' iko, nganau' luk kudeng ineh teh.”

³⁸Kareb ideh nenalan, Yésus nesemuet bang aceh bawang; déi inan seburur decur luk ngadanneh Marta nenawar Neneh umak bang ruma'.

³⁹Idi Marta ineh inan aceh kinanak decur, ngadanneh Mariam, luk tudo iring kukud Yésus, neninger balaNeh.

⁴⁰Marta ineh megagau ku mula' kekamen bang ruma' ineh; idi ieh iné' matun Yésus idi kebalaneh, "O Tuhan, naké Iko ngerawé ratnan kinanakku nima' negku ngakem sebuleng mo'? Ngecuk neneh ngeruyung negku.”

⁴¹Idi kebala Tuhan neneh, "Marta, Marta, iko mesusa' idi merapang ratnan mula' kekamen;

⁴²iamo' sebuleng mo' luk petulu tekapen. Mariam pangeh nemili' babpat luk do' luk na miak lapen rat neneh."

Lukas 11

¹Idi bang seaco Yésus nesembayang su luk inanNeh sembayang. Kareb Ieh nugka', idi seburur anak sekola'Neh nepebala Neneh, "O Tuhan, mada' nekai ratnan sembayang, mepad kudeng Yahya nemada' anak sekola'neh.”

²Idi kebala Yésus nedeh, "Kareb muyuh sembayang, do' muyuh mala, 'O Ama' luk bang surga: Do' ngadanMu uen ngerayeh; idi ImetMu uen ngacing bang tana'.

³Maré nekai akan luk petap anid-anid aco.

⁴Maré do' ratnan amung-amung sala'kai, ngaceku kai pana' maré do' kuan anid-anid burur luk mesala' pa kiung kai. Idi aleg nguit nekai amé' bang luk nutun.' “

⁵Idi kebala Yésus nan anak-anak sekola'Neh, "Idéké rat arang muyuh luk inan aceh lun rurum, idi amé' neneh kareb tangal dacem idi pebala neneh, 'O lun rurum, maré teluh balad ruti kebitenku;

⁶seburur lun rurumku luk nalan pangeh numak ruma'ku, idi na luk idi anun-anun luk miak barénku kenenneh'?

⁷Idi lun rurumneh ineh pana' miak ngor balaneh rat bang takep, 'Aleg ngesusa' negku, tanga'ku pangeh initek, idi anak-anakku idi denganku luun bitaranku. Ui na miak tumui maré luk kuanmu.'

⁸Ui pebala nemuyuh, sagan pana' na ieh tumui maré luk kuanneh ngaceku ieh lun rurumneh, iamo' ngaceku ieh metueh mutuh, idi ieh miak tumui, idi maré kuanneh anun-anun luk pianneh.

⁹Idi Ui pebala nemuyuh teh: Do' mutuh, idi miak barén nemuyuh; do' nakap, idi muyuh miak ngalap; nateg tanga', idi tanga' miak kabin kuan muyuh.

¹⁰Ngaceku anid-anid lemulun luk mutuh miak ngalap; idi lemulun luk nakap miak kali', idi kuan lemulun luk nateg, tanga' ineh miak kabin.

¹¹Taman sapehké rat arang muyuh, kudeng anakneh mutuh ruti, ieh maré batu kuanneh? Idi kudeng ieh mutuh lawid, ieh maré menipeh?

¹²Idi kudeng ieh mutuh terur, ieh maré menipal kara'?

¹³Kudeng muyuh luk dat kali' teh maré luk do' kuan anak-anak muyuh, meluun teh Taman muyuh luk bang surga sikal maré Roh Meligan kuan lemulun luk mutuh rat Neneh!”

¹⁴Idi bang seaco Yésus uned nala' aceh ada' luk mebegkeh. Kareb ada' ineh pangeh neremuat, idi lun mebegkeh ineh pana' nepebala-pebala, idi lun mula' ineh pana' mawa.

- 15**Iamo' inan tuda'-tuda' lemulun rat arangdeh nepebala, "Lemulun ini nala' ada' dengan lalud Balsebul, lun rayeh ada'."
- 16**Idi teh inan lun baken nenutun Neneh idi nemutih Neneh maré aceh tanu' rat surga.
- 17**Iamo' Yésus nekali' terawédeh, idi kebalaNeh nedeh, "Anid-anid bawang luk sikal metueh sebuleng ratnan sebuleng na miak lutep; idi anid-anid tetek ruma' luk sikal metueh sebuleng ratnan sebuleng miak musag peh.
- 18**Kudeng imet Sétan inan kedaluh arangdeh sebuleng, kudeng apehké imetneh miak tuped? Kebala muyuh, Ui nala' ada dengan lalud Balsebul.
- 19**Iamo' kudeng Ui ini nala' ada' dengan lalud Balsebul ineh, dengan lalud idéké anak-anak muyuh nala' nedeh? Lun luk maya' nemuyuh pana' ngegala' ratnan terawé muyuh sala'!
- 20**Na! Dengan lalud Allah Ui nala' ada dengan ticu' Allah. Ieh ineh luk ngegala' ratnan Imet Allah pangeh nacing nemuyuh.
- 21**"Kareb lemulun luk metueh pangeh netemina' ku ayung pebunu' matar ruma'neh sebuleng, idi amung-amung binawehneh miak uen ngasa'.
- 22**Iamo' kareb seburur luk meluun tueh macing neneh idi ngelaya' neneh, kali' rungen ieh ngalap amung-amung ayung pebunu' ineh luk inanneh merapat, idi ieh mabpat amung luk pinoneh ineh.
- 23**"Lemulun luk na perurum Negku, ieh ineh sikal metueh rat Negku; idi lemulun luk na ngedengan Negku ngamung, ieh ineh luk ngatad."
- 24**"Kareb ada' remuat ratnan lemulun, ieh nalan lemaba su luk na abpa', idi nakap su luk inanneh ucu'. Iamo' na luk kali'neh, idi keburineh, 'Ui sikal muli' amé' ruma'ku, ieh ineh su luk pangeh ticanku atun.'
- 25**Idi kareb ieh macing, ieh kali' ruma' ineh pangeh inapuh idi inau' temina'.
- 26**Muci ieh amé' idi ngalap tudu' ada' luk baken teh danganneh, ieh ineh luk meluun dat rat neneh, idi ideh semuet tudo déi'. Idi kekiped lemulun ineh meluun dat ratnan luk pun-pun."

²⁷Pangeh Yésus nepebala kudeng ineh, idi seburur decur luk arang lun mula' nengitang, keburu'neh Neneh, "Samal kuan batek luk nemali' Namu, idi iti' luk neniti' Namu!"

²⁸Iamo' kebala Yésus, "Meluun teh, samal kuan lemulun luk ninger bala Allah idi ngimet neneh."

²⁹Kareb lun mula' nepamung Neneh, idi Yésus nepebala kudeng ini, "Inul ini pelaba dat. Ideh nakap aceh tanu', iamo' na miak barén kuandeh tanu' luk baken, iamo' tanu' Nabi Yunus mo'.

³⁰Mepad kudeng Yunus mangun ku aceh tanu' kuan lun Ninewé, kudeng ineh teh Anak-lemulun mangun ku tanu' kuan inul ini.

³¹Kareb Aco Ngukum raca' decur luk rat tana' pa kabing busat aco miak tumui pad-pad dengan inul ini idi ngesala' nede; ngaceku ieh ineh nacing rat iring tana', sikal ninger ileh Selimun; idi inan tungé seburur lemulun luk meluun rayeh ratnan Selimun.

³²Kareb Aco Ngukum lun Ninewé miak tumui pad-pad dengan inul ini idi ngesala' neneh; ngaceku ideh nuren ku bada' Yunus, idi inan tungé' seburur lemulun luk meluun rayeh ratnan Yunus.

³³"Na luk idi seburur pana' luk nutud ilu', idi ngapung ineh, idi ngakeb neneh ku gatang, iamo' ieh nganau' neneh luun dawan, pad lemulun luk semuet miak nier acang ineh.

³⁴Idi acang bururmu, ieh ineh matehmu. Kudeng matehmu do', kali' rungen amung bururmu pana' macang. Iamo' kudeng matehmu ineh dat, kali' rungen bururmu pana' medacem peh.

³⁵Ngaceku ineh matar do'-do' pad acang luk bang bururmu ini na medacem.

³⁶Kudeng amung bururmu ineh macang, pad na luk idi medacem, kali' rungen amung-amungneh ineh macang, mepad kudeng ilu' ngacang namu dengan acangneh."

³⁷Uned Yésus pebala kudeng ineh, idi seburur lun Parisi nacing nawar Neneh kuman dengahneh; idi Ieh nesemuet bang ruma'neh, idi tudo kuman.

³⁸Lun Parisi ineh mawa kareb ieh nenier Yésus na maru' ticu'Neh kareb nateh Ieh nekuman.

³⁹Idi kebala Tuhan neneh, "O muyuh lun Parisi, luk maru' luun sangkir idi bigan, iamo' niat muyuh mepanu' ku pano' idi luk dat.

⁴⁰O muyuh lun mebacé! Bakenké Allah luk nenganau' pa luun, idi lubangneh?

⁴¹Iamo' maré kuan lun masi' anun-anun luk bang sangkir idi bigan muyuh, idi luk amung-amung miak meligan kuan muyuh.

⁴²"Mesusa' kuan muyuh, O lun Parisi! Muyuh maré babpat pulu' ratnan bawing idi karid pét, idi amung-amung irin pana', iamo' muyuh pangeh nengelaba ukum idi awa Allah. Petulu muyuh nganau' amung ineh, iamo' aleg necan luk baken.

⁴³"Mesusa' kuan muyuh, O lun Parisi! Muyuh sikal tudo luun kerusi luk inan ubur bang ruma' sembayang, idi muyuh sikal burem lemulun déi' kadai.

⁴⁴Mesusa' kuan muyuh! Muyuh mepad kudeng tanem luk na melagan, idi lemulun luk nalan pa luunneh na kali' neneh."

⁴⁵Idi kebala seburur guru Ukum Neneh, "O Guru, dengan bala luk kudeng ineh Iko ngedat nekai teh."

⁴⁶Idi kebala Yésus, "Mesusa' kuan muyuh teh, O guru-guru Ukum! Muyuh ngerareng pa luun lemulun babeh luk meberat idi luk mikat baben, iamo' muyuh sebuleng dengan sebuleng bua' ticu' muyuh pana' na sikal ngakem babeh ineh.

⁴⁷Mesusa' kuan muyuh ngaceku muyuh nganau' tanem nabi-nabi, iamo' tepun muyuh nengaté nedeh.

⁴⁸Muyuh sebuleng ngamo ratnan muyuh na dat niat ku kekamen tepun muyuh ineh, ngaceku ideh luk ngaté nabi-nabi, idi muyuh luk nganau' tanemdeh.

⁴⁹Ngaceku ineh teh Ileh Allah nepebala, 'Ui ngecuk nabi-nabi idi lun duken kuandeh, idi sebuangdeh miak pitayen, idi sebuangdeh miak uendeh ngedereh.'

⁵⁰Idi inul luk bang kareb ini miak kumin ngaceku até amung nabi luk pinaté rat pun tana' ini pinudut,

⁵¹ieh ineh ngimun ratnan até Abil macing inan até' Sekaria luk pangeh pinaté arang bubpun idi Su luk Meligan. Meluun teh, Ui pebala nemuyuh, idi inul bang kareb ini miak kumin ngaceku amung atédeh ineh.

⁵²"Mesusa' kuan muyuh, O guru-guru Ukum! Taka luk ku ngukab ruma' ileh dinug muyuh. Muyuh sebuleng na semuet, idi muyuh mebpeng lemulun luk sikal semuet."

⁵³Kareb Yésus neremuat rat déi', idi guru-guru Ukum idi lun Parisi ineh pana', nengimun ngedat Neneh, idi nengitun Neneh ratnan tuda'-tuda' itun,

⁵⁴idi nganét Neneh, sikal nganau' abpung kuanNeh, pad ideh miak ngesala' balaNeh.

Lukas 12

¹Kareb tuda'-tuda' ngeribu lemulun nepamung, padideh meradu' seburur dengan lun baken, idi Yésus nepebala kuan anak-anak sekola'Neh atun, "Matar burur muyuh ratnan lamud lun Parisi, ieh ineh siayu.

²Anun-anun luk lininged miak uen ngegala', idi luk inalum miak kali' lemulun.

³Ngaceku ineh anun-anun luk bila muyuh bang dacem, miak pedingeren bang acang; idi anun-anun luk inayek muyuh bang lalid lemulun bang takep, miak badén rat pa luun buduk ruma'.

⁴Ui pebala nemuyuh, O Lun rorumKu, aleg matot nedeh luk ngaté burur mo', idi mucu sebuleng pana' na miak ruendeh teh.

⁵Iamo' Ui sikal ngegala' kuan muyuh idé-idé luk miak inan muyuh matot, ieh ineh do' matot inan Allah, luk inan lalud nala' bang apui kareb Ieh pangeh nengaté. Matu, Ui pebala nemuyuh, do' muyuh matot inan Allah.

⁶"Bakenké suit pirit pisuen lemulun limeh buleng dueh sin? Idi pa kiung Allah sebuleng pana' na miak mekelupan.

⁷Iamo' abpuk luun uluk muyuh pana' amungneh pangeh iniap. Aleg muyuh matot; muyuh meluun raga ratnan suit pirit luk mula' ineh."

⁸"Ui pebala nemuyuh, anid-anid lemulun luk ngamo Negku pa kiung lemulun, idi Anak-Lemulun pana' sikal ngamo neneh pa kiung melaikat-melaikat Allah.

⁹Iamo' lemulun luk ngalum Negku pa kiung lemulun, idi ieh pana' miak lumin Anak-Lemulun pa kiung melaikat-melaikat Allah.

¹⁰"Idé-idé luk mala bala luk sikal metueh ratnan Anak-Lemulun, ieh ineh miak inan maré do', iamo' kuan lemulun luk nguyo Roh Meligan, na tu-tu miak ngalap do' ratnan sala'deh.

¹¹"Kareb lemulun nguit nemuyuh amé' pa kiung teubupun bang ruma' sembayang, idi pa kiung raca' idi lun rayeh bawang, aleg muyuh megagau ratnan kudeng apeh muyuh miak ngor baladeh idi ratnan anun-anun luk miak belén muyuh.

¹²Ngaceku Roh Meligan miak mada' nemuyuh bang kareb ineh teh ratnan anun luk do' belén muyuh."

¹³Inan seburur rat arang lun mula' ineh nepebala Neneh, "O Guru, do' ngecuk kinanakku mabpet binaweh luk tican taman kai kuan kai."

¹⁴Iamo' kebala Yésus neneh, "O Aca', idéké luk nenganau' Negku mangun ku lun luk mutut besara' idi lun mabpat binaweh muyuh?"

¹⁵Idi teh kebalaNeh nedeh, "Ngerawé do'-do', matar burur muyuh ratnan amung-amung lili, ngaceku ulun lemulun luk matu na macing ratnan ula' binawehneh, sagan tu pana' ieh lun do'."

- ¹⁶Idi Yésus nemada' aceh luk pinginud kuandeh, keburu'Neh, "Inan aceh tana' seburur lun do' luk nengeruat mula' bua'.
- ¹⁷Idi ieh nengerawé bang niatneh, keterawéneh, 'Na luk inanku nganug amung-amung padéku. Anunké luk miak ruenku?'
- ¹⁸Idi keburu'neh, 'Ini luk ruenku: do' ui ngusag amung-amung lepoku idi mudut luk meluun rayeh, idi déi' ui sikal nganug amung-amung padé idi binawehku.
- ¹⁹Idi ui sikal pebala kuan bururku sebuleng, Samal kuanmu! Iko inan mula' binaweh dinug kuan tuda'-tuda' lak. Do' ngato erurmu, kuman, ngirup, idi ngalap mawang niat.'
- ²⁰Iamo' Allah nepebala neneh, 'O bacé! Malem ini teh ulunmu miak lapen rat namu; idéké luk ngalap amung binaweh luk dinugmu ineh?'"
- ²¹Idi teh kebala Yésus, "Kudeng ineh teh ratnan lemulun luk ngamung binaweh kuan bururneh sebuleng, iamo' na ieh lun do' pa kiung Allah."
- ²²Kebala Yésus kuan anak-anak sekola'Neh, "Ngaceku ineh Ui pebala nemuyuh, Aleg merapang ratnan ulun muyuh ieh ineh anunké luk miak kenen muyuh; idi ratnan burur muyuh, ieh ineh anunké luk miak iungen muyuh.
- ²³Ngaceku ulun ineh meluun raga ratnan luk kenen, idi burur ineh meluun raga ratnan ayung.
- ²⁴Ngerawé ratnan suit bungkak, na ideh ngisak idi ngeranéh, na luk inandeh nganug akan, idi lepo. Allah teh ngasa' nedeh! Idi muyuh meluun raga ratnan suit!
- ²⁵Idéké rat arang muyuh, miak ngekadang ulunneh sesuut pana' ngaceku merapang?
- ²⁶Kudeng luk sesuut ini pana' na miak ruen muyuh, ngudehké muyuh merapang ratnan luk baken-baken ineh?

²⁷Ngerawé ratnan busak, kudeng apéh ulundeh, na ideh ngakem, na ideh nguper gitian; iamo' Ui pebala nemuyuh, Selimun pana' dengan amung rayehneh, na nengayung ku luk do' ayu kudeng sebuleng rat arang busak ini.

²⁸Iamo' kudeng Allah ngayung uduh natad kudeng ineh, luk mulun aco sini idi kenebpa ieh talan bang tetel apui, meluun teh Ieh sikal ngayung nemuyuh, O muyuh luk na petap anu.

²⁹Idi aleg megagau ratnan luk kenen, idi luk rupen muyuh, idi aleg muyuh merapang.

³⁰Ngaceku amung-amung ini tikap lun luk manu bang tana' ini, iamo' Taman muyuh meluun kali' ratnan amung-amung ini inan ulek kuan muyuh.

³¹Iamo' do' nakap ImetNeh, idi amung-amung ini pana' miak barén kuan muyuh.

³²"Aleg matot, O sengeriudan dumba luk isuut ini, ngaceku Taman muyuh pian maré Imet ineh nemuyuh.

³³Do' muyuh masui binaweh muyuh idi maré kuan lun masi'. Idi nganau' kuan burur muyuh kapil-kapil luk na miak melu, idi ngamung binaweh muyuh déi' surga, ieh ineh su luk inan lun mano na semuet, idi kutang na miak kuman.

³⁴Ngaceku iapeh-iapeh luk inan binaweh muyuh, su ineh teh luk inan niat muyuh.

³⁵"Do' awa' muyuh uen ngabet idi lapung muyuh mebudung;

³⁶idi do' muyuh mepad kudeng lemulun luk nginulat tuandeh kareb ieh muli' ratnan irau paweh; idi kareb ieh macing idi nateg tanga', ideh miak petacu ngukab tanga' kuanneh.

³⁷Samal kuan amung-amung demulun, luk mekeribpeh tuandeh uned matar kareb ieh macing. Ui pebala nemuyuh, tuan ineh miak ngabet awa'neh sebuleng, idi nawar nedeh tudo kuman, idi ngasa' nedeh.

³⁸Kudeng ieh macing kareb malé tanggal dacem, kian kareb nateh lal ngekook lek, idi nier nedeh kudeng ineh, samal kuan amung-amung demulun ineh.

³⁹Iamo' ngerawé do'-do', kudeng tuan ruma' ineh pangeh nekali' karebneh luk inan lun mano macing, kali' rungen ieh matar, idi na nima' ruma'neh uen ngusag.

⁴⁰Do' muyuh temina', ngaceku Anak-Lemulun sikal macing bang aceh kareb luk na muyuh kali'."

⁴¹Idi keburu' Pétrus, "O Tuhan, Iko mada' luk pinginud ini kuan kaiké, kian kuan amung-amung lemulun lek?"

⁴²Idi kebala Tuhan, "Idéké demulun luk lutep idi mileh, luk ruen tuanneh ngecuk matar uang ruma'neh, pad mabpat luk kenendeh bang kareb luk petulu?"

⁴³Samal kuan demulun ineh luk mekeribpeh tuan nganau' kudeng ineh kareb ieh muli'!

⁴⁴Matu, Ui pebala nemuyuh, tuan ineh miak maré neneh ngimet amung binawehneh.

⁴⁵Iamo' kudeng demulun ineh pebala bang niatneh, 'Tuanku mio macing,' idi ieh ngimun mebal demulun deléi idi decur pana', idi kuman idi ngirup macing mabuk,

⁴⁶Idi tuan demulun ineh miak macing kareb seaco luk ieh na nginulat neneh, idi bang aceh kareb luk na ieh kali'. Idi ieh miak mulu' neneh, idi nuet neneh dengan lun luk na manu.

⁴⁷"Idi demulun luk pangeh nekali' pian tuanneh, iamo' na ieh netemina', idi na ieh nenganau' pian tuanneh ineh, ieh miak uen mebal mula' kua'.

⁴⁸Iamo' demulun luk na nekali' pian tuanneh, idi ieh nenganau' luk na petulu, idi ieh miak uen mebal sesuut mo'. Ngaceku kuan anid-anid lemulun luk biré mula', rat neneh mula' luk miak tekapen, idi kuan lemulun luk biré mula' kekamen, ratnan neneh mula' luk miak pituen.

⁴⁹"Ui nacing pad nganau' apui luun tana' ini; Ui pelaba pian kudeng apui ineh pangeh mebudung!"

⁵⁰Ui na miak na rerebpen dengan aceh rereb, idi kudeng apehké susa' niatKu kareb nateh rereb ineh mangun!

⁵¹Inanké muyuh ngerawé Ui pangeh nacing nguit pedo' bang tana' ini? Na, iamo' bunu'.

⁵²Rat kareb ini limeh burur lemulun bang aceh ruma' sikal metueh seburur ratnan seburur, ieh ineh teluh burur sikal metueh ratnan dueh, idi dueh sikal metueh ratnan teluh.

⁵³Taman sikal metueh ratnan anakneh luk deléi, idi anak deléi sikal metueh ratnan tamanneh; tinan sikal metueh ratnan anak decur, idi anak decur sikal metueh ratnan tinanneh; idi tinan deléi sikal metueh ratnan ibanneh luk decur, idi ibanneh luk decur sikal metueh ratnan tinan deléi ineh."

⁵⁴Idi teh kebala Yésus kuan lun mula', "Kareb muyuh nier inan laput umak pa acep aco, muyuh petacu pebala, 'Udan sikal mebpeh,' idi mangun kudeng ineh teh.

⁵⁵Idi kareb bui rat pa kabing busat aco ngiup, idi keburu' muyuh, 'Aco miak mét idang napeh,' idi mangun kudeng ineh teh.

⁵⁶O muyuh lun luk siayu, muyuh kali' ngelio ratnan ayu tana' idi langit, iamo' kudeng apehké muyuh na miak kali' ngelio bang kareb ini?

⁵⁷"Ngudehké muyuh na miak mutut luk matu kuan burur muyuh sebuleng?

⁵⁸Kudeng seburur lemulun ngadu' namu idi nguit namu besara', laba medueh nalan do' iko nakap dalam mepuit rat neneh; pad ieh na nguit namu amé' matun lun luk mutut besara', idi lun luk mutut besara' na maré namu nelun pulis, idi lun pulis ineh na nipa namu bang tutup.

⁵⁹Ui pebala namu, na tu-tu iko miak remuat rat bang tutup ineh kudeng ketecan sesin pana' luk nateh binayarmu."

Lukas 13

¹Kareb ineh teh inan tuda'-tuda' lemulun luk nemarké kali' kuan Yésus ratnan lun Galilia luk pinaté Pilatus kareb ideh uned maré baré kuan Allah.

²Idi kebala Yésus nedeh, "Inanké muyuh ngerawé idi lun Galilia ini meluun rayeh sala'deh ratnan sala' amung lun Galilia luk baken ineh, ngaceku ideh pinaté kudeng ineh?

³Ui pebala nemuyuh, 'Baken kudeng ini! Iamo' kudeng muyuh na uren kali' rungen amung muyuh pana' miak maté kudeng ineh teh.'

⁴Kudeng apehké pulu' ualuh burur lemulun luk naté neritep ku ruma' luk medita' déi' Siloam ineh? Inanké muyuh ngerawé sala'deh meluun rayeh ratnan sala' amung lemulun luk tudo déi' Yerusalim?

⁵Ui pebala nemuyuh, 'Baken kudeng ineh! Iamo' kudeng na muyuh uren, kali' rungen amung muyuh pana' miak maté kudeng ineh teh.' “

⁶Yésus nemada' kuandeh luk pinginud ini, "Inan selemulun luk inan aceh lawa gita' luk tinibu bang kabun anggurneh. Idi ieh nacing sikal nakap buah ratnan lawa ineh, iamo' sebuleng pana' nateh luk ilapneh.

⁷Idi keburu'neh kuan lun matar kabun ineh, 'Siruh, pangeh teluh lak kinioneh ui nacing nakap buah ratnan lawa gita' ini, nateh luk ilapku; do' nebpang neneh, anunké ulekneh ieh ngeperi' tana' ineh?'

⁸Iamo' kebala lun matar kabun ineh, 'O tuan, nima' neneh selak ini teh, pad ui miak ngaka iringneh idi ngerimuk lawaneh.

⁹Kudeng ieh kebua' mucu aco, do'; kudeng na, miak iko nebpang neneh.' “

¹⁰Kareb Yésus uned mada' bang aceh ruma' sembayang bang Aco luk inan Mudeng,

¹¹Idi inan seburur decur luk sinuet ada' luk ngelaya' burur pangeh pulu' ualuh lak kinioneh, macing ketedneh pangeh tebukut, pad ieh na miak ngesiri bururneh.

¹²Kareb Yésus nenier neneh, idi Ieh nenawar decur ineh, kebalaNeh, "O decur, mepuit iko ratnan étmu ineh.”

¹³Idi Ieh nengerareng tiku'Neh luun decur ineh; idi petacu ketedneh ineh mesiri, idi ieh nengerayeh Allah.

¹⁴Idi lun rayeh ruma' sembayang ineh museh ngaceku Yésus nengedo' lemulun kareb Aco luk inan Mudeng, idi kebalaneh nelun mula', "Inan anem aco luk inan lemulun miak ngakem; ngaceku ineh do' lemulun macing bang aco ineh pad ideh miak uen ngedo', iamo' aleg kareb Aco luk inan Mudeng."

¹⁵Iamo' Tuhan nengor balaneh, keburu'Neh, "O lun luk siayu, bakenké bang Aco luk inan Mudeng anid-anid burur muyuh muit sapi' idi keladaineh rat bang libungneh, sikal nguit neneh amé' ngirup?"

¹⁶Iamo' decur ini, seburur anak Ibrahim luk inabet Sétan, pangeh pulu ualuh lak kinioneh, naké ieh do' puatin ratnan abet ini bang Aco luk inan Mudeng?"

¹⁷Kareb Yésus nepebala kudeng ineh, amung-amung bunu'Neh migu' peh, iamo' amung-amung lun mula' ineh mawang niat ngaceku amung-amung kekamen luk rayeh luk pangeh inau'Neh.

¹⁸Kebala Yésus, "Anunké luk mepad kudeng Imet Allah, idi dengan anunké miak Ui maad neneh?"

¹⁹Ieh ineh mepad kudeng aceh ngilung sesawi', luk inuit idi inisak selemulun bang kebunneh sebuleng. Idi ilung ineh mulun, idi mangun ku aceh lawa, pad suit-suit pana' ngarar luun angkat-angkatneh."

²⁰Idi teh kebala Yésus, "Dengan anunké Ui miak maad Imet Allah?"

²¹Ieh ineh mepad kudeng lamud, luk ilap seburur decur, idi rirengneh bang teluh uad banak, pad amung-amungneh mepuar peh."

²²Yésus nenalan lemaba tuda'-tuda' bawang idi ruma;, idi nemada' lemulun idi ngetacu lawéNeh amé' Yerusalim.

²³Idi seburur lemulun nepebala Neneh, "O Tuhan, pawa'ké lemulun luk ngalap ulun?" Idi kebala Yésus nedeh,

²⁴"Do' ngekél burur muyuh semuet maya' tanga' luk meperi', ngaceku mula' lemulun luk sikal semuet iamo' na miak.

²⁵Tuan ruma' ineh miak tumui idi ngitek tanga', idi mucu kareb muyuh tuped bal alad idi ngimun nateg tanga', kebala muyuh, 'O Tuan, ngukab tanga' kuan

kai!' idi Ieh pana' miak ngor bala muyuh keburu'Neh, 'Ui na kali' rat iapeh muyuh nacing!'

²⁶Idi muyuh miak ngor balaNeh, 'Kai pangeh nekuman idi nengirup pa kiungMu, idi Iko nemada' bang bawang kai.'

²⁷Idi Ieh miak pebala nemuyuh, 'Ui na kali' rat iapeh muyuh nacing; buro muyuh rat Negku, amung muyuh luk nganau' luk dat!'

²⁸Idi su ineh muyuh tangi'-tangi' idi pekatep lipen, kareb muyuh nier Ibrahim, Isak, idi Yakub, idi amung-amung nabi bang Imet Allah, iamo' muyuh sebuleng duken remuat.

²⁹Idi inan teh lemulun luk macing rat pa busat aco, idi rat pa acep aco teh, idi rat pa tinueh busat aco, idi rat pa kabing busat aco, miak tudo bang Imet Allah.

³⁰Idi lemulun luk pa mucu miak amé' pa atun; idi lemulun luk pa atun miak amé' pa mucu."

³¹Kareb ineh teh tuda'-tuda' lun Parisi iné' matun Yésus, idi kebaladeh, "Do' Iko buro rat ieni idi amé' bawang baken, ngaceku Herodés sikal ngaté Namu."

³²Idi kebala Yésus nedeh, "Amé' muyuh mala kuan bungalé ineh, 'Ui nala' ada', idi ngedo' lemulun bang aco sini idi nebpa, idi aco luk keteluh Ui miak mangeh kekamenKu.'

³³Iamo' na miak na Ui ngetacu lawéKu bang aco sini, nebpa idi soriak; ngaceku na miak seburur nabi pitayen mado rat Yerusalim.

³⁴"O Yerusalim, Yerusalim! Iko nengaté nabi-nabi, idi nemitung lemulun luk icuk amé' namu ku batu! Tuda' kua' Ui sikal ngamung anak-anakmu mepad kudeng aceh tineh lal luk ngerukub anak-anakneh liang iladneh, iamo' na muyuh sikal!

³⁵Nekini ruma' muyuh pangeh tican ali-ali. Ui pebala nemuyuh, idi na muyuh miak nier Negku teh, pad macing kareb luk muyuh pebala, 'Samal kuanNeh luk macing bang ngadan Tuhan!' "

Lukas 14

¹Kareb Yésus iné' kuman bang ruma' seburur lun rayeh lun Parisi bang Aco luk inan Mudeng, idi lun mula' nier Neneh.

²Idi inan seburur lemulun luk mét mebuung iné' matun Yésus.

³Idi Yésus pana' nengitun guru-guru Ukum idi lun Parisi, keburu'Neh, "Miakké ngedo' lemulun bang Aco lun inan Mudeng, kian, na lek?"

⁴Iamo' ideh pirud. Idi Ieh nengimet lun mét ineh, idi nengedo' neneh. Idi Ieh nengecuk neneh nalan.

⁵Idi Ieh nepebala nedeh, "Idéké rat arang muyuh luk na miket ngalap keladai idi sapi'neh luk pangeh nebpeh bang lubang bang Aco luk inan Mudeng?"

⁶Idi na ideh miak ngor amung-amung balaNeh ineh teh.

⁷Yésus nekali' kudeng apeh lun luk tinawar mili' su luk meluun do'. Ngaceku ineh Ieh nemada' aceh luk pinginud kuandeh, kebalaNeh,

⁸"Kareb iko darin lemulun amé' ku irau paweh, aleg tudo su luk meluun do', ngaceku kian inan teh lemulun luk meluun buren rat namu darinneh,

⁹idi lemulun luk pangeh nenawar namu macing idi pebala namu, 'Maré luk inan ineh kuan lemulun ini,' idi dengan migu' mo' iko amé' tudo su luk pa beneh tu-tu.

¹⁰Iamo' kareb iko darin lemulun, do' iko amé' tudo su luk pa beneh tu-tu, pad lemulun luk nenawar namu macing idi pebala namu, 'O Aca', do' umak tudo pa luun teh,' idi iko miak ngalap rayeh pa kiung amung lemulun luk pamung kuman denganmu.

¹¹Ngaceku anid-anid lemulun luk ngedita' bururneh, ieh ineh miak uen ngebeneh, idi lemulun luk ngebeneh bururneh miak uen ngedita'."

¹²Idi Yésus nepebala kuan lemulun luk nenawar Neneh, "Kareb iko nganau' irau kareb maco idi malem, aleg nawar nelun rurumu, kinanakmu, pupumu, idi lun do' luk bang bawangmu, pad ideh na ngua' tawarmu.

- ¹³Kareb iko nganau' irau, do' nawar lemulun luk masi', luk mepueg luk meliai, idi luk mebuser pana';
- ¹⁴Idi samal kuanmu teh, ngaceku na luk idi anun-anun luk inandeh miak ngua' namu; ngaceku iko miak uen ngua' kareb aco tui lemulun luk matu.”
- ¹⁵Kareb seburur rat arangdeh luk kuman ineh neninger luk kudeng ini, idi ieh nepebala kuan Yésus, "Samal kuan lemulun luk kuman ruti bang Imet Allah.”
- ¹⁶Kebala Yésus neneh, "Inan seburur lemulun nenganau' aceh irau luk rayeh, idi ieh nenawar tuda'-tuda' ula' lemulun.
- ¹⁷Kareb lemulun sikal kuman, idi ieh nengecuk demulunneh amé' inan lemulun luk tinawar ineh idi pebala, 'Amé' muyuh, ngaceku amung-amungneh pangéh temina!'
- ¹⁸Iamo' amung-amungdeh dengan sebuleng niat nemutuh do', keburu' seburur luk pun-pun kuanneh, 'Ui pangéh nemelih tana' idi ui sikal amé' nier neneh, ui mutuh do'.'
- ¹⁹Idi keburu' luk baken, 'Ui pangéh nemelih pulu' sapi', idi ui sikal amé' nutun nedeh, ui mutuh do'.'
- ²⁰Idi seburur luk baken nepebala, 'Ui pangéh nengaweh baruh, ngaceku ineh ui na miak macing.'
- ²¹Idi demulun ineh nuli' idi nemaré kali' ratnan ineh kuan tuanneh. Idi tuan ruma' ineh pana' museh idi nepebala kuan demulun ineh, 'Remuat iko amé' dengan mesaget su dalan-dalan idi lisangen, nguit amé' tungé' lemulun luk masi', luk mepueg, luk mebuser, idi luk meliai pana'.'
- ²²Idi keburu' demulun ineh kuanneh, 'O tuan, anun luk icukmu ineh ui pangéh nenganau', iamo' inan teh su luk inan ketecan.'
- ²³Idi kebala tuan ineh kuan demulunneh, 'Remuat iko amé' inan dalan-dalan ratis idi su luk mapet, idi ngubuk lemulun semuet pad ruma'ku mepanu'.
- ²⁴Ui pebala nemuyuh, seburur pana' na luk idi rat arang amung-amung lemulun luk tinawar ineh miak kuman irauKu ineh.' “

- ²⁵Mula' lemulun nenalan maya' Yésus, idi Ieh nelumi idi nepebala nedeh,
- ²⁶"Lemulun luk amé' Negku na miak mangun ku anak sekola'Ku kudeng ieh na megateh inan tamanneh, tinanneh, awanneh, anakneh, kinanakneh luk deléi, kinanakneh luk decur, idi bururneh sebuleng pana'.
- ²⁷Idé-idé luk na maan salibneh idi maya' Negku, ieh na miak mangun ku anak sekola'Ku.
- ²⁸Kudeng seburur rat arang muyuh sikal mudut aceh pudut luk medita', ieh tudo atun ngiap raganeh, kudeng ieh miak mangeh neneh.
- ²⁹Kudeng na pieh kudeng ineh, ieh na miak mangeh pudut ineh, idi kareb ieh pangeh nenganau' dirineh, amung-amung lemulun luk nier luk kudeng ineh situnga-situnga neneh,
- ³⁰keburi'deh, 'Lemulun ini pangeh nengimun mudut ruma' luk medita', iamo' na miak mangeh neneh.'
- ³¹Kudeng aceh raca' amé' munu' raca' baken luk macing munu' neneh dengan dueh ngepulu' ribu lemulun na miak na ieh tudo atun idi ngerawé kudeng ieh miak tuman dengan pulu' ribu lemulun luk maya' neneh.
- ³²Kudeng na pieh kudeng ineh, ieh ngecuk lun dukenneh amé' papu' raca' baken kareb ieh mado, pad ngitun ratnan pedo'."
- ³³Kebala Yésus, "Kudeng ineh teh idé-idé rat arang muyuh luk na necan amung binawehneh, na ieh miak mangun ku anak sekola'Ku.
- ³⁴"Tucu' ineh do'; iamo' kudeng tucu' ineh metalang, kudeng apehké ieh mepaci' baruh?
- ³⁵Idi na ulekneh kuan tana' idi rimuk pana', iamo' miak talan. Lemulun luk inan lalid, do' ieh ninger."

Lukas 15

- ¹Bang seaco amung-amung lemulun luk ngamung usin pupuk idi lun mesala' pana' iné' tuped iring Yésus sikal ninger balaNeh.

²Idi lun Parisi idi guru-guru Ukum ngedureng, kebaladeh, "Lemulun ini nawar lun mesala' idi pamung kuman dengandeh."

³Idi Yésus nemada' luk pinginud ini kuandeh, kebalaNeh:

⁴"Kudeng seburur lemulun rat arang muyuh inan meratu dumba, idi sebuleng rat arangdeh metutu', naké ieh necan iwa' ngepulu' iwa' dumba bang laman idi amé' nakap luk metutu' ineh pad macing ieh ngalap neneh?

⁵Kareb ieh ngalap neneh, idi ieh nganau' neneh luun tudungneh dengan mawang niat.

⁶Kareb macing ruma'neh, idi ieh nawar lun rurumneh idi lun bang bawangneh, kebalaneh, 'Do' muyuh mawang niat denganku, ngaceku ui pangéh nengalap dumbaku luk netutu' ineh.'

⁷Idi Ui pebala nemuyuh, kudeng ineh teh awang luk déi' surga ngaceku seburur lemulun luk mesala' luk uren, meluun ratnan iwa' ngepulu' iwa' burur lemulun luk matu luk na susa' uren.

⁸"Kudeng seburur decur inan pulu' balad pirak, idi sebalad metutu', anunké luk ruenneh? Ieh nutud lapung idi ngapuh ruma'neh idi nakap do'-do' pad macing ieh ngalap ineh?

⁹Kareb ieh ngalap usinneh, idi ieh nawar lun rurumneh idi lun bang bawangneh, keburu'neh, 'Do' muyuh mawang niat denganku, ngaceku ui pangéh nengalap usinku luk pangéh netutu' ineh!'

¹⁰Ui pebala nemuyuh, kudeng ineh teh melaikat-melaikat Allah mawang niat ngaceku seburur lemulun luk mesala' uren."

¹¹Idi kebala Yésus teh, "Inan selemulun luk inan dueh anak deléi.

¹²Idi keburu' luk isuut ineh kuan tamanneh, 'O Ama', maré aceh babpat binaweh kuanku.' Idi ieh nemabpat binaweh ineh kuan didueh.

¹³Na mio rat pangéh ineh, idi anak luk isuut ineh nengamung amung-amung binawehneh idi iné' bang bawang luk mado; idi déi' ieh nengebura' binawehneh dengan kekamen luk dat.

- ¹⁴Kareb binawehneh nabud pinasui, idi mangun aceh iru' rayeh bang bawang ineh; idi ieh pelaba asi'.
- ¹⁵Idi ieh iné' ngakem kuan seburur lun bang bawang ineh; idi lemulun ineh nengecuk neneh matar barekneh déi' lati'.
- ¹⁶Idi ieh melili sikal ngebor batekneh ku padak luk kenen barek ineh, iamo' seburur pana' na nemaré kuanneh.
- ¹⁷Kareb ieh nengerawé do'-do', idi ieh nepebala, 'Tuda' ula' lun tebarin tamanku luk ngalap akan dengan petap, iamo' tunge' ui lélé maté ku lau!
- ¹⁸Ui sikal lemubed amé' inan tamanku idi pebala neneh, O Ama', ui pangeh nenganau' sala' pa kiung Allah idi pa kiungmu pana'.
- ¹⁹Na ui mayu tetanen ku anakmu peh, do' nganau' negku mangun ku seburur lun tebarinmu.'
- ²⁰Idi ieh nenalan idi iné' inan tamanneh. 'Iamo' kareb ieh mado, tamanneh pangeh nekali' neneh, idi niatneh sigio ngaceku méi' neneh, idi tamanneh nupun nengapel dierneh idi nemuen neneh.
- ²¹Idi keburu' anakneh kuanneh, 'O Ama', ui pangeh nenganau' sala' pa kiung Allah idi pa kingmu pana', na ui mayu tetanen ku anakmu peh.'
- ²²Iamo' tamanneh nenawar demulun-demulunneh, kebalaneh, 'Do' nguit dengan mesaget kuyu' buyor luk do' tu-tu idi ngayung neneh, idi ngebpul aceh susing luun bua' ticu'neh idi kasut luun kukudneh.
- ²³Idi nguit anak sapi' luk melamu, idi ngeret neneh, do' tau irau.
- ²⁴Ngaceku anakku ini pangeh naté idi muli' mulun. Ieh pangeh neraruh, idi pangeh nelemubed.' Idi ideh pana' nengimun do' ria'.
- ²⁵"Idi anakneh luk rayeh ineh déi' lati'. Kareb ieh muli' idi muneng ku ruma' ineh, idi ieh neninger uni suling idi lun ngalai.
- ²⁶Idi ieh nenawar seburur rat arang demulunneh idi nengitun, anunké luk mangun ineh.

²⁷Idi keburu' demulun ineh kuanneh, 'Kinanakmu luk isuut pangeh nuli', idi tamanmu nengeret aceh anak sapi' luk melamu ineh, ngaceku ieh pangeh nengalap neneh lemubed dengan ulun luk do.'

²⁸Idi anak luk rayeh ineh museh na sikal semuet bang ruma', idi tamanneh neremuat ngubuk neneh semuet.

²⁹Iamo' kebalaneh nan tamanneh, 'Tuda' lak kinioneu ui ngakem kuanmu nateh ui nengelaba sebuleng ukummu; idi nateh iko nemarké aceh anak amék, pad ui irau dengan lun rorumku.

³⁰Iamo' kareb anakmu ini luk pangeh nengabud binawehmu ineh ku decur luk mesawa' nelemubed, idi iko nengeret anak sapi' luk melamu kuanneh.'

³¹Idi kebala tamanneh, 'O anakku, iko megéi' idi denganku, idi amung-amung babpatku ineh mangun ku babpatmu.

³²Do' tau irau idi mawang niat, ngaceku kinanakmu ini pangeh naté idi muli' mulun; ieh pangeh neraruh idi nelemubed teh.' "

Lukas 16

¹Kebala Yésus kuan anak-anak sekola' ineh, "Inan seburur lun do' luk inan selemulun luk ngasa' binawehneh; idi lemulun ineh inadu' lun baken inan tuanneh ngaceku nengebura' binaweh tuanneh.

²Idi tuan ineh nenawar neneh, idi kebalaneh, 'Anunké luk pindengerku ratnan iko luk inadu' lun? Maré negku nekini aceh surat luk ngegala' ratnan binawehku luk bang paladmu, ngaceku na iko miak mangun ku lun ngasa' binawehku peh.'

³Idi keburu' lun luk ngasa' binawehneh ineh bang niatneh, 'Anunké luk miak ruenku? Ngaceku tuanku nala' negku ratnan kekamen ngasa' binaweh ini? Idi ngukat tana' ui na metueh, idi mutuh usin mo'-mo' pana' ui migu'.

⁴Nekini ui kali' anun luk miak ruenku kareb ui pangeh tila' ratnan kekamen ngasa' binaweh ini pad ui miak lapen semuet bang ruma' lun baken.'

⁵Idi ieh nenawar anid-anid lemulun luk pangeh nepebaleh inan tuanneh idi nepebala kuan luk pun-pun, 'Tuda' balehmu inan tuanku?'

⁶Keburi'neh, 'Umau saitun meratu ngutin.' Idi keburu'neh kuanneh, 'Ngalap surat balehmu ini, do' iko tudo miket idi ngayud limeh ngepulu.'

⁷Idi ieh nepebala kuan luk baken, 'Iko ini tuda'ké balehmu?' Idi keburu'neh, 'Padé 8,000 gatang.' Idi keburu'neh kuanneh, 'Ngalap surat balehmu ini, ngayud 6,000.'

⁸Idi tuanneh ineh pana' nengubur lun luk ngasa' binawehneh luk na matu ineh, ngaceku ratnan luk inau'neh ineh dengan ilehneh; ngaceku anak-anak tana' ini meluun ileh ratnan anak-anak acang."

⁹Idi teh kebala Yésus, "Ui pebala nemuyuh: nganau' lun rurum kuan burur muyuh sebuleng dengan binaweh tana' ini luk na matu ineh; idi kareb binaweh tana' ini metutu' rat nemuyuh, muyuh miak lapen amé' bang ruma' luk meruked.

¹⁰Lemulun luk lutep niat bang kekamen luk isuut ini, ieh teh lutep niat bang kekamen luk rayeh; idi lemulun luk na matu bang kekamen luk isuut, ieh teh na matu bang kekamen luk rayeh.

¹¹Kudeng muyuh na lutep niat ngimet binaweh tana' ini, idéké luk merapet nemuyuh ratnan binaweh luk matu?

¹²Kudeng muyuh na lutep niat dengan binaweh lun baken, idéké luk miak maré kuan muyuh binaweh muyuh sebuleng?

¹³"Na luk idi seburur demulun miak ngakem kuan dueh tuan, ngaceku na miak na seburur inanneh megateh idi luk baken ineh inanneh mawa, idi ieh ngimet meraben dengan seburur idi ngedat luk baken. Idi muyuh na miak mangun ku demulun Allah idi demulun usin."

¹⁴Kareb lun Parisi neninger amung bala luk kudeng ineh, idi ideh nesitunga nan Yésus, ngaceku ideh melili ku usin.

¹⁵Iamo' kebala Yésus nedeh, "Muyuh luk ngatu burur muyuh sebuleng pa kiung lemulun, iamo' Allah kali' niat muyuh; ngaceku anun-anun luk siren medita' pa kiung lemulun, na ulekneh pa kiung Allah.

¹⁶"Ukum Musa ineh idi surat nabi-nabi lutep pad macing kareb Yahya; idi rat kareb ineh pana' Imet Allah bida' peh, idi anid-anid lemulun singaro semuet bang ineh.

¹⁷Iamo' meluun malé langit idi tana' ini metutu' ratnan ngetutu' sesuut Ukum Musa.

¹⁸"Idé-idé luk ngelagkan awanneh, idi ngaweh lun baken teh, ieh pasét peh; idi lemulun luk ngaweh decur luk ligkan deléi ineh idi ieh pana' pasét teh.

¹⁹"Inan seburur lun do'; idi ieh ngayung ku kibung luk sia' merirem idi kibung luk mesalud, idi mulun dengan do' anid-anid aco.

²⁰Inan teh seburur lun masi' luk mebaké, ngadanneh Lasarus, telubid munung tanga' lun do' ineh.

²¹Idi ieh melili ku areg nuba' luk luun téng lun do' ineh; idi uko' pana' macing ngil bakéneh ineh.

²²Idi na mio ratnan ineh lemulun luk mutuh usin ineh pana' naté idi inuit melaikat amé ni Ibrahim. Idi lun do' ineh pana' naté teh, idi ieh tinanem.

²³Ieh pelaba dereh bang Su luk inan Até, idi ieh netukag, idi nenier Ibrahim luk mado idi Lasarus iringneh.

²⁴Idi ieh nengitang, keburineh, 'O tamanku Ibrahim! Méi' negku, idi ngecuk Lasarus amé' negku idi ngerereb paped bua' ticu'neh bang abpa', idi ngeteneb dila'ku ngaceku ui pelaba dereh bang apui ini.'

²⁵Iamo' kebala Ibrahim, 'O anakku, do' ngerawé, iko pangeh nengalap luk do' kareb iko mulun, idi Lasarus ini nengalap dereh; iamo' nekini ieh inubuk peh, iamo' iko pidereh peh.

²⁶Idi teh arang muyuh dengan kai inan aceh lubang luk rayeh, pad lemulun rat ieni luk sikal amé' déi' na miak, idi lemulun rat déi' pana' na miak guta amé' nekai.'

²⁷Idi keburu' lun do' ineh, 'Ngaceku ineh, ui mutuh namu ngecuk neneh amé' ruma' tamanku,

²⁸ngaceku ui inan limeh kinanak deléi; do' ieh maré kali' kuandeh, pad ideh na miak semuet bang dereh ini.'

²⁹Iamo' kebala Ibrahim, 'Ideh inan surat Musa idi nabi-nabi pana', do' ideh maya' ineh.'

³⁰Idi keburu' lun do' ineh, 'Na ineh petap, O tamanku Ibrahim, iamo' kudeng seburur lemulun rat arang lun naté amé' nedeh, kali' rungen ideh uren.'

³¹Iamo' kebala Ibrahim, 'Kudeng ideh na sikal ninger surat Musa idi nabi-nabi, meluun teh ideh na miak mubuk kudeng seburur lemulun tumui rat arang lun naté pana'.' "

Lukas 17

¹Yésus nepebala kuan anak-anak sekola'Neh, "Na miak na inan sabeng luk ngebpeh lemulun, iamo' mesusa' kuan lemulun luk ngacing sabeng ineh!

²Meluun do' kuanneh, kudeng aceh batu rayeh betin i dierneh, idi ieh talan bang abpa' rayeh, ratnan ieh ngesabeng seburur rat arang anak luk isuut ini.

³Matar burur muyuh! "Kudeng kinanakmu mesala', mebpeng neneh; kudeng ieh nginuud, maré do' kuanneh.

⁴Kudeng ieh nganau' sala' namu tudu' kua' bang seaco, idi tudu' kua' teh ieh lemubed amé' namu idi pebala, 'Ui nginuud,' do' iko maré do' neneh!"

⁵Idi kebala rasul-rasul ineh kuan Yésus, "Do' ngerayeh anu kai!"

⁶Idi kebala Yésus, "Kudeng muyuh inan anu luk kirayeh aceh ngilung sesawi' pana', idi miak muyuh pebala kuan lawa gita' ini, 'Mebubput iko idi uen nibu bang abpa' rayeh!' Idi ieh pana' maya' balamu teh.'

⁷"Kudeng arang muyuh inan seburur demulun luk ngeradu, kian matar dumba lek, miakké iko pebala neneh kareb ieh muli' rat lati', 'Miket amé' kuman'?

⁸Na tu! Iamo' iko pebala neneh, 'Do' nganau' temina' luk kenenku, ngabet awa'mu idi ngasa' negku, pad ui kuman idi ngirup; idi pangeh ineh iko miak kuman idi ngirup'?

⁹Miakké demulun ineh buren ngaceku ieh maya' bala tuanneh?

¹⁰Kudeng ineh teh muyuh, kareb muyuh pangeh nenganau' amung-amung luk pangeh icuk kuan muyuh, do' muyuh pebala, 'Kai ini demulun luk na ulek; kai pangeh nenganau' luk petulu ruen kai.' "

¹¹Kareb Yésus nenalan amé' Yerusalim, Ieh nelemaba arang Samaria idi Galilia.

¹²Kareb Ieh nesemuet bang sebuleng bawang, inan pulu' burur lemulun luk mét susud nepapu' Neneh, idi ideh netuped mado,

¹³idi ideh pana' nengitang, keburideh, "O Yésus, O Guru, méi' nekai."

¹⁴Kareb Yésus nenier nedeh, idi Ieh nepebala kuandeh, "Amé' muyuh mada' burur muyuh siren lun imam-imam." Idi uned ideh nalan, idi ideh nedo' peh.

¹⁵Idi seburur rat arangdeh ineh, kareb ieh nekali' bururneh nedo', idi ieh nelemubed idi nengerayeh Allah dengan arod luk rayeh.

¹⁶Ieh netekeradung iring kukud Yésus, idi nemaré ubur kuanNeh. Idi lemulun ineh seburur lun Samaria.

¹⁷Kebala Yésus, "Bakenké pulu' burur lemulun luk pangeh dino'? Iapehké iwa' burur ineh peh?

¹⁸Ngudehké sakai ini mo' luk lemubed amé' ngerayeh Allah?"

¹⁹Idi kebala Yésus kuan lemulun ineh, "Mudur iko idi nalan! Anumu pangeh nengedo' namu."

²⁰Tuda'-tuda' lun Parisi nengitun Yésus ratnan idan Imet Allah macing. KebalaNeh, "Acing Imet Allah na miak siren dengan megala'.

- ²¹Na lemulun miak pebala, 'Siruh tungé!' kian, 'Déi!'; ngaceku Imet Allah ineh idi arang muyuh.”
- ²²Idi kebala Yésus kuan anak-anak sekola'Neh, "Karebneh miak macing idi muyuh pian nier sebuleng ratnan aco Anak-Lemulun ineh, iamo' na muyuh miak kali' ineh.
- ²³Inan lemulun luk pebala nemuyuh, 'Siruh déi! Siruh tungé!' Aleg muyuh amé' nakap ineh!
- ²⁴Ngaceku mepad kudeng kilep luk macang rat iring langit selipa macing iring langit selipa, kudeng ineh teh Anak-Lemulun kareb acoNeh.
- ²⁵Iamo' atun na miak na Ieh mabeh mula' dereh, idi talan inul luk bang kareb ini.
- ²⁶Mepad kudeng luk nangun kareb Noh, kudeng ineh teh miak mangun kareb Anak-Lemulun.
- ²⁷Lemulun nekuman, nengirup, idi nengaweh, pad macing aco Noh semuet bang alud rayeh, idi abpa' pana' netemubu' ngaté amung-amungdeh.
- ²⁸Kudeng ineh teh, luk nangun kareb Lut, lemulun nekuman, nengirup, nemasui idi nemelih, idi nenibu idi nemudut ruma' pana'.
- ²⁹Kareb aco Lut remuat rat bang Sodom ineh, idi udan apui idi batu apui pana' netemurun rat déi' langit nengaté amung-amungdeh.
- ³⁰Mepad kudeng ineh teh mangun kareb Anak-Lemulun miak uen ngegala'.
- ³¹"Kareb aco ineh lemulun luk luun buduk ruma' aleg temurun nguit binawehneh remuat, idi aleg lemulun luk déi' lati'neh muli'.
- ³²Ngerawé ratnan awan Lut ineh.
- ³³Lemulun luk ngerawé ulunneh sebuleng na miak ngalap ulun luk matu; iamo' lemulun luk na ngerawé ulunneh sebuleng, ieh miak ngalap ulun luk matu.
- ³⁴Ui pebala nemuyuh, kareb malem ineh teh, inan dueh burur lemulun luun aceh bitaran; seburur miak lapen, idi seburur tacin.

³⁵Idi inan teh dueh burur decur luk peruyung tupeh, ineh pana' seburur teh miak lapen idi seburur tacin.

³⁶Idi inan dueh burur luk déi' lati', seburur miak lapen idi seburur tacin.”

³⁷Idi kebala anak sekola'Neh, "Iapehké, O Tuhan?" Idi kebala Yésus nedeh, "Iapeh-iapeh inan butung, idi su ineh teh inan suit kanui mepamung."

Lukas 18

¹Idi Yésus nemada kuandeh aceh luk pinginud, pad ideh megéi' sembayang dengan na melawa',

²kebalaNeh, "Idi bang aceh bawang inan seburur lun luk mutut besara' luk na matot inan Allah, idi luk na ngerawé lemulun pana'.

³Bang bawang ineh teh inan aceh decur tinula' luk megéi' kua' macing neneh, kebalaneh, 'Ngedengan negku bang besara'ku pa kiung lemulun luk ngadu' negku.'

⁴Idi tuda'-tuda' io lun luk mutut besara' ineh na sikal, iamo' kekipedneh ieh ngerawé bang niatneh, 'Sagan pana ui na matot inan Allah idi na ngerawé lemulun,

⁵iamo' ngaceku decur tinula' ineh ngesusa' negku, miak ui ngedengan neneh pelé ieh na megéi macing ngerur negku.' “

⁶Idi kebala Tuhan, "Do' ninger luk bila lun luk mutut besara' luk na matu ineh!

⁷Naké Allah miak, ngedengan anid-anid lemulun luk pinili'Neh luk nawar Neneh tebaco kedangan? Miakké Ieh nginiuk ngedengan nedeh?

⁸Ui pebala nemuyuh, dengan mesaget Ieh ngedengan lemulun ineh. Iamo' kareb Anak-Lemulun macing, miakké Ieh papu' anu bang tana' ini?”

⁹Idi Yésus nemada' luk pinginud ini teh kuan tuda'-tuda' lemulun luk ngerawé bururdeh matu, idi luk nengebeneh lemulun baken.

¹⁰KebalaNeh, "Inan dueh burur lemulun nesemuet bang Ruma' Allah sikal sembayang, ieh ineh seburur lun Parisi, idi seburur lun luk ngamung usin pupuk.

¹¹Lun Parisi ineh netuped idi nesembayang bang niatneh kudeng ini, 'O Allah, ui maré ubur kuanMu, ngaceku ui baken kudeng lemulun luk baken, ieh ineh lemulun luk mano, lemulun luk na mesiri, lemulun luk pasét, idi lun luk ngamung usin pupuk ini pana'.

¹²Ui mawa' dueh kua' bang seminggu, idi ui maré babpat pulu' ratnan amung-amung luk ilapku.'

¹³Iamo' lun luk ngamung usin pupuk ineh netuped mado. Na ieh mekuu' tukag déi' langit, iamo' mepag ruukneh, kesembayangneh, 'O Allah, méi' negku, lemulun luk mesala' ini.'

¹⁴Idi Ui pebala nemuyuh, lemulun ini muli' imo Allah matu baken ratnan lun Parisi ineh; ngaceku anid-anid lemulun luk ngedita' bururneh miak uen ngebeneh; iamo' lemulun luk ngebeneh bururneh miak uen ngedita'."

¹⁵Tuda'-tuda' lemulun nenguit anakdeh luk isuut amé' matun Yésus, pelé Ieh miak ngakem nedeh. Iamo' kareb anak-anak sekola' ineh nekali' ratnan ineh, idi ideh nemebpeng nedeh.

¹⁶Iamo' Yésus nenawar anak-anak ineh amé' Neneh, kebalaNeh, "Nima' anak-anak luk isuut amé' Negku, aleg mebpeng nedeh, ngaceku lemulun luk kudeng ini luk kuan Imet Allah.

¹⁷Ngerawé do'-do'! Idé-idé luk na ngalap Imet Allah mepad kudeng anak luk isuut ineh, na ieh miak semuet bang ineh.

¹⁸Seburur lun rayeh nengitun Yésus, keburineh, "O Guru luk do', anunké luk miak ruenku, pad ui miak ngalap ulun luk meruked?"

¹⁹Kebala Yésus neneh, "Anunké punneh iko mala Negku do'? Seburur pana' na luk do', inan Sebuleng mo', Ieh ineh Allah.

²⁰Kali' rungen iko kali' ratnan ukum Allah, ieh ineh, 'Aleg iko pasét; aleg iko ngaté lemulun; aleg iko mano; aleg iko mangun ku lun nekali' luk mebalih; ngedita' taman-tinanmu.' “

²¹Idi keburu'neh, "Amung ini ui pangeh nemaya' rat kareb ui suut.”

²²Kareb Yésus neninger balaneh, idi Ieh nepebala neneh, "Sebuleng mo' luk nateh inau'mu. Masui amung-amung binawehmu idi maré kuan lun masi', pad iko ngalap binaweh déi' surga, idi amé' maya' Negku.”

²³Kareb ieh neninger kudeng ini idi ieh pelaba dat niat ngaceku ieh pelaba ula' binaweh.

²⁴Yésus nekali' neneh mesusa' niat, idi ieh nepebala, "Mikat tu-tu kuan lemulun luk mula' binaweh semuet bang Imet Allah!

²⁵Meluun malé aceh pung unta semuet bang lubang pinu ratnan seburur lemulun luk mula' binaweh semuet bang Imet Allah.”

²⁶Lemulun luk neninger ineh nepebala, "Kudeng pieh kudeng ineh, idéké luk miak ngalap ulun?”

²⁷Iamo' kebala Yésus, "Anun-anun luk na miak mangun kuan lemulun miak mangun kuan Allah.”

²⁸Idi keburu' Pétrus, "Kai ini pangeh nenecan ruma' kai pad maya' Namu.”

²⁹Idi keburu' Yésus kuandeh, "Matu, Ui pebala nemuyuh, na luk idi seburur pana' luk nenecan ruma', awan, kinanak, taman-tinan, idi anak-anak, ngaceku ratnan Imet Allah,

³⁰luk na miak ngalap mula' kua' kinula'neh bang kareb ini, idi kekipedneh ulun luk meruked.”

³¹Idi Yésus nenguit pulu' dueh anak sekola' ineh, idi nepebala nedeh, "Nekini tau amé' déi' Yerusalim, idi amung-amung luk inayud nabi-nabi miak uen ngacing kuan Anak-Lemulun.

³²Ieh miak barén bang palad lun pupu baken, idi Ieh miak inan situnga, idi uen ngediman, idi uen lemulun ngelica'.

³³Ideh pana' miak mebal idi ngaté Neneh, idi aco luk keteluh Ieh miak tumui teh.”

³⁴Iamo' na ideh kali' sesuut pana' ilungneh; idi bala ini inalum rat nedeh, na ideh kali' ratnan luk pangeh bila Yésus ineh.

³⁵Idi kareb Ieh macing muneng ku Yeriko, inan selemulun luk mebuser tudo iring dalam mutuh mo'.

³⁶Idi kareb ieh neninger lun mula' ineh lemaba, ieh nengitun, "Anunké ini?"

³⁷Idi keburideh neneh, "Yésus lun Nasarét lemaba.”

³⁸Idi ieh nengitang, keburineh, "O Yésus, Anak Daud, méi' negku!”

³⁹Idi lemulun luk pa atun nemebpeng neneh, idi nengecuk neneh pirud, iamo' meluun rayeh arodneh, "O Anak Daud, méi' negku!”

⁴⁰Idi Yésus nugka' idi nengecuk lemulun nated lun mebuser amé' matun Neneh. Kareb ieh muneng, idi Yésus nengitun neneh,

⁴¹"Anunké luk pianmu Ui nganau' kuanmu?" Kebalaneh, "O Tuhan, ui mutuh miak nier.”

⁴²Idi kebala Yésus neneh, "Do' iko nier! Anumu pangeh nengedo' namu.”

⁴³Idi petacu ieh miak nier peh, idi nemaya' Yésus idi nengerayeh Allah. Kareb lun mula' nenier ineh, idi ideh nengubur Allah.

Lukas 19

¹Yésus nesemuet lemaba bawang Yeriko.

²Idi inan selemulun, luk ngadanneh Sakius, ieh ineh lun rayeh luk ngamung usin pupuk, idi ieh teh mula' binaweh.

³Idi ieh nenakap dalam sikal nier idéké Yésus ineh, iamo' na miak ngaceku lemulun mula', idi teh ieh mebeneh.

⁴Idi ieh nupun iné' pa atun lun mula', idi nemanad aceh lawa gita' sikal nier Yésus, ngaceku su ineh Ieh miak lemaba.

⁵Kareb Yésus nacing su luk inanneh ineh, idi Yésus pana' nenier déi' dita' idi nepebala neneh, "O Sakius, remurut iko dengan mesaget, ngaceku bang aco sini na miak na Ui umak ruma'mu."

⁶Idi dengan mesaget ieh neremurut idi nenguit Neneh dengan mawang niat.

⁷Amung lemulun luk nenier ratnan ineh dureng-dureng, idi nepebala, "Ieh iné' tudo dengan lun luk mesala'."

⁸Sakius netuped idi nepebala inan Tuhan, "Sebuang ratnan binawehku, O Tuhan, ui maré kuan lemulun luk masi', idi kudeng ui pangeh nengalap binaweh dulun dengan naluk, ui maré lemubed apat kua' kinula'neh."

⁹Idi kebala Yésus neneh, "Bang aco sini ulun nacing kuan uang tetek ruma' ini, ngaceku lemulun ini teh luk iniap ku anak Ibrahim.

¹⁰Ngaceku Anak-Lemulun nacing nakap idi ngulun luk neraruh.

¹¹Kareb lun mula' neninger bala ineh, idi Ieh nemada' aceh luk pinginud teh. Ieh pangeh muneng ku Yerusalim, idi bang terawé lun mula' Imet Allah miak siren kareb aco sineh teh.

¹²Ngaceku ineh kebala Yésus, "Inan seburur lun do' luk nenalan iné' bawang luk mado, pad ieh miak mangun ku raca'. Pangeh ineh ieh miak lemubed.

¹³Kareb nateh ieh nenalan ieh nenawar pulu' burur demulunneh idi nemaré kuan anid bururdeh sebalad amas kebalaneh, 'Do' muyuh pepua' pad macing ui muli'.'

¹⁴Iamo' lun bang bawang ineh megateh neneh, idi nengecuk lun duken ngerada' neneh, keburideh, 'Kai na sikal lemulun ini mangun ku raca' kai.'

¹⁵"Lun do' ineh kinikit mangun ku raca', idi ieh nuli'. Ieh petacu nawar amung-amung demulun luk inanneh nemaré balad amas ineh, pad ieh miak kali' tuda' luk ilapdeh.

¹⁶Idi luk pun-pun iné' neneh, idi nepebala, 'O tuan, sebalad amasmu ineh pangeh mangun ku pulu' balad.'

- ¹⁷Idi keburu' tuan ineh neneh, 'Do' luk inau'mu, O demulun luk do! Ngaceku iko pangeh nelutep bang luk isuut, iko miak ngimet pulu' bawang.'
- ¹⁸Idi luk kedueh iné' neneh, keburu'neh, 'O tuan, sebalad amasmu ineh pangeh mangun ku limeh balad.'
- ¹⁹Idi keburu' tuan kuan demulun ineh teh, 'Iko miak ngimet limeh bawang.'
- ²⁰Idi luk baken iné' matun neneh, keburu'neh, 'O tuan, ini sebalad amasmu, luk dinugku bang belaca.
- ²¹Ui matot namu, ngaceku iko selemulun luk metueh niat; iko ngalap luk na iko kuan, idi ngeranih luk na tinibumu.'
- ²²Idi kebala tuan ineh neneh, 'O demulun luk dat, dengan balamu ineh ui ngukum namu. Pangeh iko kali', idi ui ini selemulun luk metueh niat, luk ngalap anun-anun luk na ui kuan, idi ngeranih anun-anun luk na tinibuku.
- ²³Anunké punneh iko na nganug usinku bang béng? Idi kareb ui macing miak ui ngalap lemubed dengan uli'neh.'
- ²⁴Idi ieh nepebala nan lemulun luk tuper déi, 'Do' muyuh ngalap rat neneh balad amas ineh, idi maré neneh kuan lemulun luk inan pulu' balad.'
- ²⁵Idi keburu'deh neneh, 'O tuan, ieh inan pulu' balad.'
- ²⁶Ui pebala nemuyuh, idé-idé luk inan anun-anun, kuan lemulun ineh miak barén teh, iamo' lemulun luk na anun-anun, anun luk ieh kuan pana' miak lapen rat neneh peh.
- ²⁷Iamo' bunu'-bunu'ku ineh luk na sikal negku mangun ku raca'deh, do' nguit nedeh amé; tungé' idi ngaté nedeh pa kiungku.' “
- ²⁸Kareb Yésus pangeh nepebala kudeng ineh, idi Ieh nenalan atun amé' Yerusalim.
- ²⁹Kareb Ieh nacing muneng ku Baitpigi idi Baitani déi' Pegkung Saitun, idi Ieh nengecuk dueh burur anak sekola'Neh,
- ³⁰kebalaNeh, "Amé' medueh bang bawang luk pa atun medueh, kareb medueh semuet bang bawang ineh, medueh miak papu' aceh anak keladai inabet, luk

na tupu inan lun netudo luunneh atun. Do' neka abetneh, idi nguit neneh amé' tungé'.

³¹Kudeng idé-idé ngitun nemedueh, 'Anunké punneh medueh neka neneh?' do' mala kudeng ini, 'Tuhan pian ku ieh.' “

³²Idi didueh nenalan, idi didueh nekali' matu kudeng luk bida' Yésus nedidueh ineh.

³³Uned didueh neka abet anak keladai ineh, idi lemulun luk kuan anak keladai ineh nepebala nedidueh, "Anunké punneh medueh neka anak keladai ineh?"

³⁴Idi keburu' didueh, "Tuhan pian ku ieh.”

³⁵Idi didueh nenguit neneh amé' ni Yésus, idi didueh nemalad ayung didueh sebuleng luun anak keladai ineh, idi nenganau' Yésus tudo luunneh.

³⁶Idi kareb uned Ieh nalan, idi inan lemulun nemalad kibung uned dalan.

³⁷Kareb Ieh pangeh muneng ku su luk inan irang Pegkung Saitun, idi amung-amung anak sekola' luk mula' ineh mawang niat idi ngubur Allah dengan arod luk rayeh, ngaceku amung-amung kekamen luk melalud luk sinierdeh ineh,

³⁸kebaladeh, "Samal kuan Raca' luk macing bang ngadan Tuhan; awang déi surga, idi ubur kuan Allah!”

³⁹Idi arang lun mula' ineh inan tuda'-tuda' lun Parisi luk nepebala Neneh, "O Guru, mebpeng anak-anak sekola'Mu ineh.”

⁴⁰Idi kebala Yésus, "Ui pebala nemuyuh, kudeng ideh pirud, kali' rungen batu-batu miak ngitang.”

⁴¹Kareb Yésus muneng ku Yerusalim, idi Ieh nenier bawang ineh idi Ieh nenangi',

⁴²kebalaNeh, "Pelaba do' kudeng aco sini iko kali' ratnan luk miak nguit awang! Iamo' nekini iko na miak nier ineh.

⁴³Aconeh miak macing namu, idi bunu'-bunu'mu miak ngar libut-libutmu, idi ngerieng namu idi ngelibut namu.

⁴⁴Ideh miak ngusag namu idi ngaté anak-anakmu, idi sebuleng batu pana' luk pebuun dengan luk baken na ketecan bang namu, ngaceku iko na nekali' karebneh Allah iné' ngulun namu.”

⁴⁵Yésus nesemuet bang Ruma' Allah, idi nengimun masut lemulun luk pepua' déi',

⁴⁶kebalaNeh, "Pangéh inayud, 'Ruma'Ku miak tetanen ruma' luk inan sembayang.' Iamo' muyuh ini nganau' neneh mangun ku lubang lun mano.”

⁴⁷Idi anid-anid aco Yésus nemada' bang Ruma' Allah ineh. Iamo' imam-imam rayeh idi guru-guru Ukum, dengan lun rayeh pupu ineh nenakap dalam sikal ngaté Neneh.

⁴⁸Idi na ideh kali' anun-anun luk miak ruendeh ineh, ngaceku amung pupu ineh merapet Neneh idi sikal ninger balaNeh.

Lukas 20

¹Bang seaco kareb Yésus nemada' nelun mula' bang Ruma' Allah, idi nemada' Bala luk Do', idi imam-imam rayeh idi guru-guru Ukum dengan lun rayeh pana' nacing iné' Neneh,

²kebaladeh, "Mala kuan kai dengan lalud anunké Iko nganau' kekamen ini? Idéké luk nemarké lalud ini kuanMu?”

³Kebala Yésus nedeh, "Ui pana' sikal ngitun nemuyuh. Mada' Negku,

⁴rereb Yahya ineh punneh rat surgaké, kian ratnan lemulun lek?”

⁵Idi ideh pegayam seburur dengan seburur, keburideh, "Kudeng tau mala, 'Rata surga,' Ieh miak pebala, "Ngudehké muyuh na manu neneh?”

⁶Iamo' kudeng tau mala, 'Ratnan lemulun,' kali' rungen amung-amung pupu miak mitung netau ku batu; ngaceku amung-amungdeh manu ku Yahya ini seburur nabi.”

⁷Idi kebaladeh, "Kai na kali' rat iapeh punneh.”

⁸Idi kebala Yésus nedeh, "Ui pana' na sikal mala kuan muyuh dengan lalud idéké Ui nganau' kekamen ini."

⁹Idi Yésus nemada' aceh luk pinginud kuan lun mula', "Inan seburur lemulun luk nenganau' aceh kabun anggur; idi ieh nemaré kabun ineh uen tuda'-tuda' lun matar kabun ngacam. Idi ieh nenalan tuda'-tuda' io bang bawang baken.

¹⁰Idi kareb macing karebneh kebua', idi ieh nengecuk seburur demulunneh amé' ngalap sebabpat bua' anggur ineh rat nelun matar kabun ineh. Iamo' lun matar kabun ineh nemebal neneh idi nengecuk neneh muli' dengan na uang.

¹¹Idi ieh nengecuk seburur demulunneh luk baken teh, idi demulun ineh pana' bibaldeh, idi ideh nengigu' neneh idi nengecuk neneh muli' dengan na uang.

¹²Muci ieh nengecuk demulunneh luk keteluh, iamo' demulun ineh pana' inuratdeh idi tila'deh.

¹³Idi kebala tuan kabun anggur ineh, 'Anunké luk miak ruenku? Do' ui ngecuk anakku luk inanku mawa; kian, ideh miak ngedita neneh lek.'

¹⁴Iamo' kareb lun matar kabun nenier anakneh ineh, idi ideh nepegayam seburur dengan seburur, keburideh, 'Ini inulneh, do' tau ngaté neneh, pad babpatneh mangun ku binaweh tau.'

¹⁵Idi ideh nenala' neneh rat bang kabun ineh idi nengaté neneh. "Nekini anunké luk ruen tuan kabun anggur ineh kuan lun matar kabun ineh?"

¹⁶Kali' rungen ieh macing sikal ngaté amung-amung lun matar kabun ineh idi maré kabun anggur ineh kuan lun baken teh." Kareb ideh neninger bala luk kudeng ineh, idi ideh nepebala, "Na tu kudeng ineh!"

¹⁷Iamo' Yésus nenier nedeh idi nepebala, "Anunké ilung ayat luk inayud bang Surat Tuhan ini, 'Batu luk tila' lun luk mudut ruma', pangeh mangun ku batu lidung.'

¹⁸Idi anid-anid lemulun luk mebpeh luun batu ineh, miak mareg peh, iamo' lemulun luk ritapin batu ini, miak mekareg."

- ¹⁹Guru-guru Ukum idi imam-imam rayeh nakap dalam sikal ngakem Yésus, iamo' ideh matot nan pupu ineh; ngaceku ideh kali' luk pinginud ini bila Yésus kuan bururdeh sebuleng.
- ²⁰Idi ideh nenganét aceh kareb luk petulu nuap tuda'-tuda' lemulun luk amé' nier, luk siayu mepad kudeng lemulun luk matu, sikal nuuk Yésus, pad ideh miak maré Neneh kuan lun rayeh idi lalud lun luk ngimet ukum.
- ²¹Idi keburideh Neneh, "O Guru, kai kali' Iko luk mala idi mada' dengan niat luk matu, idi na mili' ayu lemulun, iamo' dalam Allah bida'Mu dengan matu.
- ²²Miakké kai maré pupuk kuan raca' Rum, kian na lek?"
- ²³Iamo' Yésus nekali' ilehdeh, idi Ieh nepebala nedeh,
- ²⁴"Maré aceh sin sirenKu. Ayu idéké idi ngadan idéké ieh?" Idi keburideh, "Ini raca' kuan."
- ²⁵Idi kebala Yésus nedeh, "Kudeng pieh kudeng ineh, do' maré kuan raca' anun-anun luk raca' kuan, idi kuan Allah anun-anun luk Allah kuan."
- ²⁶Idi na ideh miak ngesala' Neneh pa kiung lun mula'; idi ideh mawa ratnan orNeh, idi ideh ungeng.
- ²⁷Tuda'-tuda' lun Saduki iné' matun Yésus. (Ideh mala na luk idi tui ratnan até.) Idi ideh nengitun Neneh,
- ²⁸keburideh, "O Guru, Musa pangeh nengayud ukum kuan tau: 'Kudeng kinanak seburur lemulun maté, idi kudeng ieh inan awan iamo' na luk idi anakneh, do' kinanakneh ngalap awanneh ineh idi nginul anak kuan kinanakneh.'
- ²⁹Inan tudu' deléi luk denganak, idi seluk rayeh ineh nengaweh, idi naté dengan na anak.
- ³⁰Idi luk kedueh,
- ³¹idi luk keteluh pana' nengalap decur ineh, idi kudeng ineh teh ideh luk tudu' kinanak ineh pana' naté dengan na anak.
- ³²Pangeh ineh decur ineh pana' naté teh.

³³Kareb aco tui, decur ineh mangun ku awan idéké rat arangdeh ineh? Ideh luk tudu' pangeh nengaweh neneh."

³⁴Idi keburu' Yésus nedeh, "Anak-anak tana' ini ngaweh;

³⁵iamo' mucu aco lemulun luk petulu tumui ratnan até idi ngalap ulun luk meruked na ngaweh.

³⁶Ideh mepad kudeng malaikat, idi na maté baruh peh. Ideh ineh anak Allah ngaceku ideh pangeh netumui.

³⁷Musa pangeh nengegala' ratnan lemulun luk naté miak tumui. Bang ayat-ayat ratnan kayuh luk meseb ieh neneten Tuhan 'Allah Ibrahim, Allah Isak, idi Allah Yakub.'

³⁸Ilungneh Tuhan ineh baken Allah lemulun luk maté, iamo' Allah lemulun luk mulun; ngaceku amung-amungdeh mulun kuan Allah."

³⁹Tuda'-tuda' guru Ukum nengor balaNeh, keburu'deh, "O Guru, matu balaMu ineh."

⁴⁰Ngaceku na ideh mekuu' ngitun Neneh baruh peh.

⁴¹Idi kebala Yésus nedeh, "Kudeng apehké lemulun mala Keristus ineh Anak Daud?

⁴²Ngaceku Daud sebuleng nemala bang surat Nani Ubur, 'Tuhan nepebala nan Tuhanku: Tudo Iko pa tinuehKu,

⁴³pad Ui nganau' bunu'Mu mangun ku tapin kukudMu.'

⁴⁴Kudeng pieh kudeng ineh Daud neneten Neneh, 'Tuhan,' idi kudeng apehké Ieh mangun ku anakneh teh?"

⁴⁵Kareb lun mula' neninger balaNeh, idi Yésus nepebala pa kiung amung-amung pupu ineh nan anak-anak sekola'Neh,

⁴⁶"Matar burur muyuh ratnan guru-guru Ukum, luk sikal nalan dengan kuyu' buyor, idi teh sikal buren lemulun déi' kadai, idi pian ku kerusi luk meluun do' bang ruma' sembayang, idi su luk meluun do' kareb irau,

⁴⁷Idi luk muyok decur tinula' idi mano ruma'deh, idi luk siayu mekadang sembayang! Ukumdeh ineh meluun dat."

Lukas 21

¹Idi Yésus nenier lun do' uned nipa usin luk baréndeh bang pati' luk ruan usin.

²Idi Ieh nenier teh seburur decur tinula' luk masi' nenipa dueh balad usin bang pati' ineh.

³Idi kebala Yésus, "Ui pebala nemuyuh, decur tinula' luk masi' ini pangeh nenipa meluun ratnan amung-amungdeh.

⁴Ngaceku lun baken nenipa usin luk baréndeh ratnan eladeh, iamo' decur ini pangeh nenipa ratnan asi'neh amung-amung luk inan neneh, pad na luk ketecan kuanneh."

⁵Kareb lemulun nepebala ratnan Ruma' Allah ineh inayung ku batu luk meraga idi raput-raput baré, idi Yésus nepebala,

⁶"Muyuh nier amung-amung ini. Sebuleng batu pana' luk buun-buun ieni na miak ketecan mucu. Amungdeh miak musag."

⁷Idi kebaladeh, "O Guru, idanké susa' ini miak mangun? Idi anunké tanu'neh ratnan dereh ini malé mangun?"

⁸Kebala Yésus, "Matar do'-do', aleg muyuh saluken. Ngaceku mula' lemulun macing bang ngadanKu, keburu'deh, 'Ui ini Ieh,' idi teh, 'Karebneh pangeh muneng!' Aleg muyuh maya' nede.

⁹Kareb muyuh ninger ratnan pebunu' idi ria' luk mula', aleg muyuh matot; ngaceku na miak na susa' ini mangun atun, iamo' kekipedneh na macing dengan mesaget."

¹⁰Idi teh kebalaNeh, "Papu sikal metueh ratnan pupu, idi imet sikal metueh ratnan imet baken.

¹¹Idi miak mangun ruyuh tana' luk rayeh, idi iapeh-iapeh pana' inan iru' idi ét. Inan teh luk maré tot idi tanu' luk rayeh rat bang langit.

¹²Iamo' atun ratnan susa' ineh lemulun sikal ngakem nemuyuh idi ngedereh nemuyuh, pad muyuh barén bang ruma'-ruma' sembayang idi bang tutup, idi iten papu' raca' idi lun luk ngimet ukum ngaceku ngadanKu.

¹³Kareb ineh muyuh miak mada' Bala luk Do'.

¹⁴Do' muyuh lutep! Aleg ngerawé atun ratnan kudeng apeh muyuh miak ngor baladeh.

¹⁵Ngaceku Ui miak maré bala kuan muyuh idi ileh, luk na miak uen bunu'-bunu' muyuh ngelaya' idi uen ngedaluh.

¹⁶Muyuh miak barén taman-tinan muyuh, kinanak-kinanak muyuh, pupu muyuh, idi lun rurum muyuh, idi tuda'-tuda' rat arang muyuh miak pitayen.

¹⁷Muyuh miak inan amung-amung lemulun megateh ngaceku ngadanKu.

¹⁸Iamo' sengurat abpuk muyuh pana' na miak mebubput.

¹⁹Do' muyuh lutep, pad muyuh miak ngalap ulun.

²⁰"Kareb muyuh nier Yerusalim linibut tuda'-tuda' baweh, idi muyuh kali' tabpaneh pangeh muneng.

²¹Kareb ineh do' lemulun luk bang tana' Yudia buro amé' luun pegkung, idi lun bang bawang ineh do' buro, idi lemulun luk déi' lati' aleg semuet bang bawang.

²²Ngaceku ieh ineh Aco Ngukum, pad amung-amung luk inayud bang Surat Allah miak macing.

²³Mesusa' kuan decur luk mali' idi luk niti' anak kareb ineh! Ngaceku kareb ineh miak mangun aceh susa' luk rayeh luun tana' ini, idi useh kuan amung-amung pupu ini.

²⁴Sebuang lemulun miak pitayen ku pelapet, idi lun baken miak tebanen amé' bang amung bawang luk baken; idi Yerusalim miak riduen-riduen lun luk na manu, pad macing kareb imetdeh mabud.

²⁵"Idi miak mangun tuda'-tuda' tanu' luun mateh aco idi bulan idi gituen-gituen pana'. Idi luun tana' inan susa' kuan amung-amung pupu dengan gagau ngaceku beri abpa' rayeh idi ereb teh.

²⁶Lemulun lélé maté ku tot kareb ideh nganét susa' luk miak mangun luun tana' ini; ngaceku lalud-lalud luk déi' langit ineh pana' miak meguyu' peh.

²⁷Idi ideh miak nier Anak-Lemulun macing bang laput dengan lalud idi rasat luk rayeh.

²⁸Kareb amung-amung ini pun mangun, do' muyuh tukag idi tengook déi' dita', ngaceku puit kuan muyuh pangeh muneng."

²⁹Idi Yésus nemala kuandeh aceh luk pinginud, "Ngerawé lawa gita' idi lawa amung-amung luk baken teh.

³⁰Kareb muyuh nier lawa ineh ngimun nginulih, muyuh sebuleng kali' idi kareb melau' pangeh muneng.

³¹Kudeng ineh teh kareb muyuh nier amung-amung ineh mangun, do' muyuh kali' idi Imet Allah pangeh muneng.

³²"Ngerawé do'-do'! Amung ini miak mangun kareb nateh inul ini maté.

³³Langit idi tana' miak metutu', iamo' balaKu na miak metutu' peh.

³⁴"Matar burur muyuh pad niat muyuh na barén kuan luk manga idi mabuk idi rapang ratnan ulun tana' ini, pad aco ineh macing luun muyuh denak-denak mepad kudeng abpung.

³⁵Ngaceku aco ineh miak macing luun amung-amung lemulun luk tudo bang aput-aput tana' ini.

³⁶Do' muyuh megéi matar idi sembayang, pad muyuh metueh muit burur muyuh ratnan amung-amung luk sikal mangun ineh, idi tuman matun Anak-Lemulun."

³⁷Idi anid-anid aco Yésus nemada' bang Ruma' Allah; iamo' anid-anid alem Ieh neremuat idi rudap luun Pegkung Saitun.

³⁸Idi kareb pekak uka-uka amung-amung pupu ineh pana' nacing sikal ninger balaNeh bang Ruma' Allah.

Lukas 22

¹Idi Irau Ruti luk Na Lamud luk titen Irau Paska pangeh muneng.

²Imam-imam rayeh idi guru-guru Ukum nenakap dalam ngaté Yésus; ngaceku ideh matot inan pupu ineh.

³Idi Sétan nesemuet bang burur Yudas luk titen Iskariot, ieh ineh selemulun luk iniap dengan pulu' dueh burur anak sekola' ineh.

⁴Idi Yudas iné' matun imam-imam rayeh idi lun rayeh lun pebunu' idi nengitun kudeng apeh ieh miak maré Yésus kuandeh.

⁵Idi ideh mawang niat idi nepejani' maré usin neneh.

⁶Yudas pana' nengamo, idi nenakap kareb luk do' inanneh maré Yésus kuandeh kareb na lemulun.

⁷Idi nacing karebneh Irau Ruti luk Na Lamud. Idi na miak na anak dumba Paska ineh kereten.

⁸Idi Yésus nengecuk Pétrus idi Yahya, kebalaNeh, "Amé' medueh nganau' temina' Irau Paska kuan tau, pad tau miak kuman."

⁹Idi kebala didueh Neneh, "Su apehké pianMu kai nganau' temina' Irau Paska ineh?"

¹⁰Idi kebala Yésus nedidueh, "Kareb medueh semuet bang bawang, inan aceh deléi luk nguit aceh sidangur abpa' miak papu' nemedueh; do' maya' neneh umak ruma' luk inanneh umak.

¹¹Idi mala kuan tuan ruma' ineh, 'Keburi' Guru namu, Su apehké takep luk inanKu miak kuman Irau Paska dengan anak-anak sekola'Ku?

¹²Idi ieh miak mada' kuan medueh aceh takep luk rayeh déi' dita', luk tinina' do'-do', idi déi' do' medueh nganau' temina'!"

- ¹³Idi didueh iné' idi nenier mepad kudeng luk bila Yésus nedidueh, idi didueh nenganau' temina' Irau Paska ineh.
- ¹⁴Idi macing karebneh, idi Yésus pana' netudo dengan rasul-rasulNeh.
- ¹⁵Idi Ieh nepebala nedeh, "Ui pelaba pian kuman Irau Paska ini pad-pad dengan muyuh, kareb nateh Ui ngalap dereh!
- ¹⁶Ngaceku Ui pebala nemuyuh, Ui na miak kuman neneh pad macing Irau Paska ineh uen ngeriput bang Imet Allah.”
- ¹⁷Idi Ieh nengalap aceh sangkir, idi kareb Ieh pangeh nemaré ubur, Ieh nepebala, "Lapen muyuh ini, idi nganid arang muyuh sebuleng.
- ¹⁸Ngaceku Ui pebala nemuyuh, rat kareb ini, Ui na miak ngirup abpa' anggur ini pad Imet Allah macing.”
- ¹⁹Idi Yésus nengalap ruti, idi nemaré ubur, idi nemuri' neneh, idi nemaré neneh kuandeh, keburu'Neh, "Ini bururKu luk biré ngaceku muyuh; nganau' kudeng ini mangun ku sebuleng terawé rat Negku.”
- ²⁰Idi kudeng ineh teh, pangeh ideh nekuman, Ieh nemaré sangkir ineh nedeh, keburu'Neh, "Sangkir ini, ieh ineh pejani' Allah luk mebaruh bang dara'Ku, luk pangeh inutang ngaceku muyuh.
- ²¹"Iamo' siruh! Lemulun luk masui Negku idi pamung denganKu luun téng ini!
- ²²Ngaceku Anak-Lemulun amé' rungen, mepad kudeng luk pangeh litep kuanNeh; iamo' mesusa' kuan lemulun luk masui Neneh.”
- ²³Idi ideh nengimun ngitun seburur dengan seburur, idéké rat arangdeh luk sikal nganau' kudeng ineh.
- ²⁴Idi mangun aceh kedaluh arangdeh, idéké rat arangdeh luk meluun rayeh.
- ²⁵Idi kebala Yésus nedeh, "Raca'-raca' lun pupu baken ngimet nedeh; idi lemulun luk ngimet lalud pa luundeh titen lun ngedengan.

²⁶Iamo' aleg muyuh ini kudeng ineh. Luk meluun rayeh arang muyuh, do' ieh mangun kudeng luk meluun mangud, idi luk ngimet, do' ieh mangun kudeng lemulun luk ngasa'.

²⁷Ngaceku idéké luk meluun rayeh, lemulun luk tudo kumanké, kian luk ngasa' lek? Kali' rungen lemulun luk tudo kuman ineh. Iamo' tudo arang muyuh kudeng lemulun luk ngasa'.

²⁸"Iamo' muyuh luk megéi' idi denganKu bang amung-amung tutunKu,

²⁹idi mepad kudeng TamanKu pangeh nemaré Negku lalud ngimet, kudeng ineh teh Ui maré nemuyuh lalud ngimet.

³⁰Muyuh miak kuman idi ngirup luun sebuleng téng denganKu bang ImetKu, idi muyuh miak tudo luun kerusi idi ngukum pulu' dueh babpat pupu Israil.

³¹"O Simun, Simun! Siruh! Sétan pangeh nemutuh nutun nemuyuh, pad ieh tunap nemuyuh mepad kudeng padé.

³²Iamo' Ui pangeh nesembayang kuanmu, pad anumu na metutu'; idi kareb iko pangeh nuren, do' iko ngepicet kinanak-kinanakmu."

³³Idi kebala Pétrus Neneh, "O Tuhan, ui temina' tetupin idi maté denganMu!"

³⁴Iamo' kebala Yésus, "O Pétrus, Ui pebala namu, kareb nateh lal ngekook aco sini iko miak ngalum Negku teluh kua', idi mala iko na miti Negku."

³⁵Idi keburu' Yésus kuan anak-anak sekola' ineh, "Kareb Ui ngecuk nemuyuh remuat dengan na nguit kapil, tabpung, idi kasut, inanké muyuh masi'?" Idi keburu'deh, "Na."

³⁶Idi kebalaNeh nedeh, "Iamo' nekini lemulun luk inan kapil do' ieh nguit neneh, idi luk inan tabpung kudeng ineh teh; iamo' lemulun luk na luk idi anun-anun, do' ieh masui kuyu'neh idi melih pelapet.

³⁷Ngaceku Ui pebala nemuyuh, anun-anun luk inayud ratnan bururKu na miak na uen ngacing teh, ieh ineh, 'Idi Ieh pangeh iniap pad-pad dengan lemulun luk ngelaba ukum,' ngaceku amung-amung luk petulu denganKu inan kekipedneh."

- ³⁸Idi keburideh, "O Tuhan, siruh, tungé' inan dueh pelapet!" Idi kebala Yésus nedeh, "Petap gayam ini peh!"
- ³⁹Yésus nenalan rat Yerusalim, idi iné' déi' Pegkung Saitun maya' kudeng luk pekalai; idi anak-anak sekola'Neh nemaya' Neneh.
- ⁴⁰Kareb Ieh nacing su luk inan ineh, Ieh nepebala nedeh, "Do' muyuh sembayang pad muyuh na tetunin!"
- ⁴¹Ieh nepatad rat nedeh, idi iné' mado sesuut. Idi Ieh netekeradung sembayang,
- ⁴²kesembayangNeh, "O Ama', kudeng petulu dengan pianMu, ngatad sangkir ini rat Negku, iamo' baken pianKu, iamo' pinianMu mo' miak mangun."
- ⁴³Idi nesilangan kuanNeh seburur melaikat rat surga nengetueh Neneh.
- ⁴⁴Dengan pelaba dereh Ieh meluun tueh sembayang, pad panaNeh mangun kudeng dara' temepek luun tana'.
- ⁴⁵Idi kareb Ieh netukag ratnan sembayang, idi Ieh iné' inan anak-anak sekola'Neh, idi Ieh nenier nedeh rudap ngaceku susa' niatdeh.
- ⁴⁶Idi kebalaNeh nedeh, "Anunké punneh muyuh rudap? Do' muyuh tumui idi sembayang, pad muyuh na tetunin."
- ⁴⁷Yésus uned pebala, kareb lun mula' nacing, dengan lemulun luk ngadanneh Yudas ineh, ieh ineh seburur rat arang pulu' dueh anak sekola' ineh, luk nenguyut nedeh, idi ieh iné' matun Yésus sikal muen Neneh.
- ⁴⁸Idi keburideh Yésus neneh, "O Yudas, iko sikal masui Anak-Lemulun dengan muenké?"
- ⁴⁹Kareb lemulun luk iring Yésus nenier ratnan luk sikal mangun ineh, idi keburideh, "O Tuhan, do'ké ai ngaté dengan pelapet ini?"
- ⁵⁰Idi seburur rat arangdeh nenarad demulun Imam Rayeh idi nenangal lalidneh pa tinueh.
- ⁵¹Iamo' Yésus nengor baladeh, "Miak ineh peh!" Idi Ieh nengakem lalidneh ineh idi nengedo' neneh.

⁵²Idi kebala Yésus kuan imam-imam rayeh idi lun rayeh Ruma' Allah idi amung-amung lun rayeh luk nacing Neneh, "Petuluké muyuh macing dengan pelapet idi kayuh pad ngakem Negku, ayu-ayuneh Ui ini lun luk dat?"

⁵³Anid-anid aco Ui idi arang muyuh bang Ruma' Allah, idi nateh muyuh pian ngakem Negku, iamo' ini karebneh muyuh ngakem kareb lalud dacem ngimet."

⁵⁴Ideh nengakem Yésus, idi nenguit Neneh amé' bang ruma' Imam Rayeh. Iamo' Pétrus nemaya' Neneh rat mado.

⁵⁵Kareb ideh pangeh nengaba apui déi' sikang idi ideh nepamung tudo, idi Pétrus nacing idi netudo arangdeh ineh.

⁵⁶Kareb seburur anak adi' decur nenier neneh muneng ku apui ineh, idi ieh nenutong neneh idi nepebala, "Lun ini teh pad-pad dengan Yésus!"

⁵⁷Iamo' Pétrus nengena, keburineh, "O decur, ui na miti Neneh."

⁵⁸Idi na mio ratnan ineh seburur lun baken teh nenier neneh, idi nepebala, "Iko pana' seburur lemulun rat arangdeh teh." Iamo' keburineh Pétrus, "Na ieh ui."

⁵⁹Kareb lélé sejam mucu ratnan ineh seburur lun baken teh mesaad idi nepebala, "Matu lemulun ini teh luk denganNeh, ngaceku ieh ini pana' seburur lun Galilia."

⁶⁰Iamo' keburineh Pétrus, "Ui na kali' ilung anun luk bilamu." Idi kareb ineh teh uned ieh pebala, lal pana' nengekook.

⁶¹Idi Yésus nelumi idi nenier Pétrus; idi Pétrus nengerawé ratnan bala Tuhan, mepad kudeng luk bilaNeh neneh atun, "Idi kareb nateh lal ngekook aco sini, iko miak ngalum Negku teluh kua'."

⁶²Idi Pétrus neremuat, idi nenangi' dengan singap-singap.

⁶³Idi lemulun luk nengimet Yésus nesitunga idi nemebal Neneh.

⁶⁴Pangeh ineh ideh nengakeb kiung Yésus, idi nengitun Neneh, keburineh, "Do' Iko mada', idéké lemulun luk nemepag Namu?"

⁶⁵Idi mula' teh bala luk baken rinuatdeh nguyo Neneh.

⁶⁶Kareb aco pangeh macang, idi lun rayeh-rayeh lun Yahudi nepamung tebubpun dengan imam-imam rayeh idi guru-guru Ukum. Ideh nenguit Yésus amé' matun tebubpun besara'deh.

⁶⁷Idi keburideh, "Kudeng matu Iko Keristus, do' mala kuan kai." Iamo' kebala Yésus nedeh, "Kudeng Ui mala nemuyuh, muyuh na manu Negku;

⁶⁸idi kudeng Ui ngitun nemuyuh, idi muyuh na pian ngor balaKu.

⁶⁹Iamo' rat pad kareb ini Anak-Lemulun miak tudo pa tinueh lalud Allah."

⁷⁰Idi amungdeh nepebala, "Kudeng pieh kudeng ineh, Iko ini Anak Allahké?" Idi keburideh kuandeh ineh, "Mepad kudeng bala muyuh sebuleng, Ui ini Ieh!"

⁷¹Idi keburideh ineh, "Anunké ulekneh lun nekali' kuan tau teh, ngaceku tau pana' pangeh neninger ratnan balaNeh sebuleng?"

Lukas 23

¹Lun mula' ineh pana' nudur idi nenguit Yésus amé' matun Pilatus,

²idi amung-amungdeh nengimun ngadu' Neneh, keburideh, "Kai nekali' lemulun ini nengeraruh pupu kai, idi nemebpeng lemulun na maré acam kuan raca' Rum, idi nemala bururNeh Keristus, seburur raca'."

³Idi Pilatus pana' nengitun Neneh, keburideh, "Ikoké Raca' lun Yahudi?" Idi Yésus nengor balaneh, keburideh, "Mepad kudeng balamu."

⁴Idi kebala Pilatus kuan imam-imam rayeh idi lun mula' ineh teh, "Ui kali' lemulun ini na sala' anun-anun pana'!"

⁵Idi meluun tueh lun mula' mesaad, keburideh, "Teh ngagau pupu ini idi mada' lemulun libut-libut tana' Yudia rat Galilia macing su ini."

⁶Kareb Pilatus neninger ratnan ineh, idi ieh nengitun kudeng lemulun ini lun Galilia.

⁷Kareb ieh nekali' Yésus ineh iniap bang imet Herodés, idi ieh nengecuk nguit Neneh amé' matun Herodés luk idi déi' Yerusalim bang kareb ineh.

⁸Kareb Herodés nenier Yésus, ieh pelaba awang niat, ngaceku pangeh mio ieh sikal nier Neneh, ngaceku ieh pangeh neninger mula' bala ratnan Ieh idi merapet miak nier aceh tanu' luk pangeh inau'Neh.

⁹Idi Herodés nengitun Yésus tuda'-tuda' itun, iamo' Yésus na nengor sebila' bala pana'.

¹⁰Imam-imam rayeh, idi guru-guru Ukum ineh iné' muneng idi nengadu' Yésus dengan tuda'-tuda' adu' luk meberat.

¹¹Herodés dengan lun pebunu' ineh pana' nengedat idi nesitunga Neneh. Idi ideh nengayung Neneh ku ayung luk do', idi nengecuk nguit Neneh lemubed amé' ni Pilatus.

¹²Idi rat aco sineh teh Herodés idi Pilatus neperurum seburur dengan seburur ngaceku atun inan kedaluh arang didueh.

¹³Pilatus nenawar imam-imam rayeh idi lun rayeh-rayeh idi lun mula' nepamung,

¹⁴keburi'neh nedeh, "Muyuh pangeh nenguit lemulun ini kuanku ayu-ayu Ieh kudeng selemulun luk ngeraruh pupu ini, idi ui pangeh nengelio Neneh pa kiung muyuh, iamo' sebuleng sala' pana' nateh nekali'ku inau'Neh maya' kudeng luk inadu' muyuh.

¹⁵Herodés pana' nateh nekali' sala'Neh, ngaceku ieh pana' nemaré Neneh lemubed amé' netau. Na luk inau' lemulun ini pad Ieh ngalap ukum maté.

¹⁶Ngaceku ineh nekini ui miak ngecuk nelun mebal Neneh idi muit Neneh."

¹⁷Anid Irau Paska Pilatus megéi muit seburur lemulun luk tinutup kuandeh.

¹⁸Iamo' lun mula' nengitang, keburi'deh, "Ngaté lemulun ini, idi muit Barabas kuan kai!"

¹⁹(Idi Barabas ineh seburur lemulun luk tinutup ngaceku ieh nenganau' mula' ria' bang bawang ineh ngaceku ngaté lemulun.)

- ²⁰Idi sekua' teh Pilatus nepebala kuandeh, ngaceku piannah muit Yésus.
- ²¹Iamo' ideh nengitang, keburu'deh, "Nalib Neneh! Nalib Neneh!"
- ²²Idi keteluh kua' Pilatus nengitun nedeh, "Dat anunké luk inau'Neh? Ui na kali' sebuleng sala'Neh pana', pad Ieh ngalap ukum maté. Ui miak ngecuk nelun mebal Neneh idi muit Neneh."
- ²³Iamo' ideh pelaba saad ngitang mutuh Neneh ruen nalib. Idi piandeh luk binaya' peh.
- ²⁴Pilatus nemaré ukum maté kuan Yésus maya' putuhdeh ineh.
- ²⁵Ieh nemuit lemulun luk tinutup ngaceku ieh nenganau' mula' ria' idi ngaté lemulun, maya' kudeng luk pinutuhdeh, iamo' Yésus biréneh maya' luk pian niatdeh.
- ²⁶Ideh nenguit Yésus nalan. Idi kareb ideh nalan, ideh nepapu' seburur lun Kiréni, ngadanneh Simun, luk nacing rat mado. Ideh nengakem neneh, idi nengerareng salib luun tudungneh, pad ieh maan ineh maya' puet Yésus.
- ²⁷Idi pelaba ula' lemulun nemaya' Neneh. Idi inan teh tuda'-tuda' decur luk netemido idi nangi' Neneh.
- ²⁸Iamo' Yésus nelumi nedeh idi nepebala, "O anak decur Yerusalim, aleg muyuh nangi' Negku, iamo' do' muyuh nangi' burur muyuh sebuleng idi anak-anak muyuh teh.
- ²⁹Ngaceku aconeh miak macing kareb lemulun pebala, 'Samal kuan decur luk na anak idi nakan luk na miak mali', idi iti' luk na tiniti' anak!'
- ³⁰Kareb ineh teh lemulun miak pebala kuan pegkung, 'Ngeritep nekai!' idi kuan surud-surud, 'Ngakeb nekai!'
- ³¹Ngaceku kudeng kekamen ini mangun kareb kayuh mebata', anunké luk mangun kareb kayuh ineh tekering?"
- ³²Idi ideh nenguit dueh burur lemulun luk dat pad didueh pitayen dengan Yésus.

³³Kareb ideh nacing su luk inan ngadanneh Perupuk Uluh, idi ideh nenalib Yésus pad-pad dengan dueh burur lemulun luk dat ineh, sebuleng pa tinuehNeh idi sebuleng pa kabing.

³⁴Idi kesembayang Yésus, "O Ama', maré do' kuan lemulun ineh ngaceku na ideh kali' luk inau'deh. Idi ideh nenala' udi idi nemabpat ayungNeh arangdeh.

³⁵Lun mula' ineh netuped nier. Iamo' lun rayeh lun Yahudi nesitunga Neneh, keburideh, "Teh pangeh nengulun lun baken, nekini nima' Neneh ngulun bururNeh sebuleng, kudeng matu Ieh Keristus Allah luk pinili'."

³⁶Idi lun pebunu' pana; nesitunga Neneh. Ideh iné' Neneh idi nemaré abpa' luk malam kuanNeh,

³⁷kebaladeh, "Kudeng Iko Raca' lun Yahudi, do' ngulun bururMu sebuleng!"

³⁸Idi inan aceh bala inayud pa luunNeh kudeng ini, "Ini Raca' lun Yahudi."

³⁹Idi seburur ratnan lemulun luk dat luk tekito denganNeh ineh nenguyo Neneh, "Bakenké Iko ini Keristus? Ngulun bururMu sebuleng idi kai pana!"

⁴⁰Iamo' luk baken ineh nemebpeng neneh, keburineh, "Naké iko matot inan Allah? Amung tau pangeh inukum maté.

⁴¹Kiteh kali' rungen inukum dengan matu, ngaceku kiteh ngalap ua' luk petulu dengan kekamen kiteh; iamo' lemulun ini sebuleng pana' nateh sala'Neh."

⁴²Idi keburineh nan Yésus, "O Yésus, do' ngerawé negku kareb Iko macing mangun ku Raca'."

⁴³Idi kebala Yésus neneh, "Ui pebala namu, aco sini teh iko idi pad-pad denganKu bang Pirdaus."

⁴⁴Kareb lélé muned aco, idi rasat mateh aco mekilep, idi aput tana' ini medacem pad macing tangal musul aco.

⁴⁵Idi dicing luk tekito bang Ruma' Allah nedarak upa dueh.

⁴⁶Yésus nengitang, kesembayangNeh, "O Ama', Ui maré rohKu bang paladMu." Pangeh Ieh nemala kudeng ineh, idi niatNeh neputut.

⁴⁷Kareb lun rayeh lun pebunu' nenier luk mangun ineh, idi ieh pana' nengerayeh Allah, keburineh, "Matu lemulun ini seburur lemulun luk matu."

⁴⁸Kareb lun mula' luk nepamung nenier ineh nekali' luk mangun ineh, idi ideh nuli' dengan nemepag ruukdeh.

⁴⁹Idi amung-amung lun denganNeh idi decur luk pangeh nemaya' Yésus rat Galilia netuped nier amung ideh rat mado.

⁵⁰⁻⁵¹Inan seburur lemulun, ngadanneh Yusup, rat Arimatia aceh bawang lun Yahudi. Ieh seburur lemulun luk mepiteb idi matu, idi ieh nenganét acing Imet Allah. Sagan pana' ieh seburur lun tebubpun besara', na ieh nengamo maya' luk pinutut idi luk inau'deh ineh.

⁵²Idi ieh iné' matun Pilatus idi nemutih butung Yésus.

⁵³Idi ieh nenurun butung ineh idi nengelilib neneh ku kibung luk do'. Pangeh ineh ieh nenganau' butung bang tanem luk pangeh kinuer ratnan batu, idi luk nateh pikai atun.

⁵⁴Ieh ineh aco limeh, idi Aco luk inan Mudeng pangeh muneng.

⁵⁵Idi decur-decur luk nemaya' Yésus rat Galilia, nemaya' ni Yusup idi nenier tanem ineh idi kudeng apeh butung Yésus rireng bang ineh.

⁵⁶Idi ideh nuli' idi nenganau' temina' amung-amung luk do' buen idi umau luk do' buen teh. Kareb Aco luk inan Mudeng, idi ideh nucu' maya' ukum Allah.

Lukas 24

¹Idi muka pekak Aco Minggu ineh, idi decur-decur ineh iné' déi' nan tanem idi nenguit luk do' buen luk pangeh tinina'deh.

²Idi ideh nenier batu ineh pangeh linubid ratnan tanem ineh.

³Kareb ideh nesemu, idi ideh nenier butung Tuhan Yésus na idi.

⁴Kareb ideh tuped idi mawa ratnan ineh, denak-denak dueh burur lemulun netuped iringdeh dengan ayung luk merasat.

⁵Idi ideh pelaba tot dengan netekunal macing kiungdeh luun tana', idi dueh burur lemulun ineh nepebala nedeh, "Anunké punneh muyuh nakap luk mulun arang luk naté?

⁶Na Ieh idi tungé, iamo' Ieh pangeh netumui. Do' ngerawé kudeng apéh balaNeh kuan muyuh kareb Ieh tudo déi' Galilia:

⁷Anak-Lemulun na miak na barén bang palad lun mesala' pad Ieh uen nalib, idi aco luk keteluh Ieh miak tumui peh.' "

⁸Idi decur-decur ineh nengerawé ratnan bala Yésus ineh,

⁹idi ideh nuli' ratnan tanem ineh idi nemaré kali' ratnan amung-amung ineh kuan pulu' aceh anak sekola' ineh idi lun baken pana'.

¹⁰Idi decur ineh, ieh ineh Mariam Magdalina, Yohana, idi Mariam tinan Yakub. Ideh dengan decur baken luk nemaya' nedeh ineh nemaré kali' ratnan amung luk mangun ini kuan rasul-rasul.

¹¹Iamo' rasul-rasul ngerawé bala decur ineh mebalih, idi na ideh manu ku baladeh.

¹²Iamo' Pétrus nudur idi nupun iné' ku tanem ineh, idi ieh netekunal nier déi' dalem. Sebuleng anun-anun pana' nateh luk nekali'neh iamo' kibung luk mebuda' ineh mo'; idi ieh nuli' dengan mawa ku amung-amung luk pangeh nangun ineh.

¹³Bang aco sineh teh inan dueh burur lemulun rat arangdeh ineh uned nalan amé' bang aceh bawang luk ngadanneh Emaus, kiado dalanneh lélé tudu' batu rat Yerusalim.

¹⁴Idi didueh nepebala arang didueh sebuleng ratnan amung-amung luk pangeh nangun ineh.

¹⁵Kareb didueh pebala-pebala idi nengitun seburur ratnan seburur, denak-denak Yésus netuped iring didueh, idi nenalan maya' nedidueh.

¹⁶Didueh nenier Yésus, iamo' na didueh miti Neneh.

- ¹⁷Idi Yésus nengitun nedidueh, "Anunké bala luk bila medueh kareb medueh nalan?" Idi didueh nugka' dengan dat niat.
- ¹⁸Idi sebuleng didueh luk ngadanneh Kliopas, nepebala Neneh, "Iko sebuleng mo' luk tudo déi' Yerusalim, luk nateh nekali' ratnan amung-amung luk pangeh nangun déi' bang kareb iniké?"
- ¹⁹Idi kebala Yésus nedidueh, "Ratnan anunké ineh?" Idi keburu' didueh Neneh, "Ratnan Yésus lun Nasarét, ieh ineh seburur Nabi luk melalud bang kekamenNeh idi balaNeh pa kiung Allah idi lun mula' pana'."
- ²⁰Imam-imam rayeh idi lun luk ngimet netau pangeh nemaré Neneh pad Ieh pitayen. Idi ideh nenalib Neneh.
- ²¹Iamo' tau ini merapet Ieh luk miak nguli' nelun Israil. Meluun teh, aco sini abud aco luk keteluh ngimun ratnan amung-amung ineh luk pangeh mangun.
- ²²Idi teh tuda'-tuda' decur luk ratnan rorum kai nemada' luk nan mawa kuan kai; kareb aco masat ideh iné' nan tanem,
- ²³iamo' ideh na nekali' butungNeh. Idi ideh nelemubed idi nemala, idi ideh nenier aceh luk sinierdeh, ieh ineh melaikat-melaikat luk nemada' ratnan Yésus mulun teh.
- ²⁴Idi tuda'-tuda' lun ratnan rorum kai iné' nan tanem ineh, idi ideh nenier matu luk bila decur ineh, iamo' Yésus sebuleng na idi nekali'deh."
- ²⁵Idi Yésus nepebala nedidueh, "O lemulun luk mebacé. Muyuh mulai maya' amung-amung bala nabi-nabi ineh!"
- ²⁶Na miak na Keristus ngalap medereh, pad Ieh semuet bang rayehNeh."
- ²⁷Idi Yésus nengelio kuan didueh ineh amung-amung luk bila ratnan bururNeh sebuleng bang amung-amung Surat Allah, ngimun ratnan surat Musa idi anun-anun luk inayud nabi-nabi.
- ²⁸Idi diteluh ineh iné' muneng ku bawang su luk ulek didueh, idi Yésus nesilaba.

²⁹Iamo' didueh ineh sikal ngimet Neneh, keburu' didueh, "Do' Iko tudo dengan kai dueh, ngaceku aco pangeh malem idi aco pangeh macep." Idi Ieh pana' numak pad-pad dengan didueh.

³⁰Idi Ieh tudo kuman pad-pad dengan didueh, idi Ieh nengalap ruti, idi nesembayang. Ieh nemuri' ruti ineh, idi Ieh nemaré kuan didueh ineh.

³¹Mateh didueh mukab pad didueh nengiti Yésus; iamo' Yésus neburo rat su siren didueh.

³²Idi didueh nepebala seburur kuan seburur, "Bakenké niat kitech nesigio kareb Ieh nepebala kuan kitech maya' dalan, idi nengelio rat bang Surat Allah kuan kitech?"

³³Petacu didueh nudur idi nelemubed iné' Yerusalim. Idi didueh nepapu' pulu' aceh anak sekola' ineh uned tebubpun dengan lun baken pana',

³⁴idi kebaladeh, "Matu, Tuhan pangeh netumui idi Ieh nesilangan kuan Simun."

³⁵Idi didueh ineh pana' nemada' ratnan amung-amung luk pangeh nangun kareb didueh tangal dalan, idi kudeng apeh Yésus inite didueh kareb Ieh nemuri' ruti ineh.

³⁶Uned ideh pebala-pebala ratnan amung-amung ineh, idi denak-denak Yésus netuped arang uneddeh, idi nepebala kuandeh, "Awang kuan muyuh!"

³⁷Iamo' ideh negagap idi pelaba tot ngaceku ideh ngerawé Ieh ada.'

³⁸Iamo' kebala Yésus nedeh, "Anunké punneh muyuh megagap, idi anunké punneh muyuh merapang?"

³⁹Siruh ticu' idi kukudKu, ini Ui. Do' ngakem Negku idi nier, ngaceku ada' na uang idi tulang mepad kudeng luk siner muyuh Negku."

⁴⁰Kareb Ieh pangeh pebala kudeng ineh, idi Ieh nemada' ticu'Neh idi kukudNeh pana' sirendeh.

⁴¹Idi kareb ideh na manu ngaceku mawang niat idi mawa, idi Ieh nengitun nedeh, "Inanké luk kenen muyuh ieni?"

⁴²Idi ideh nemaré setangal lawid luk kiriki kuanNeh.

⁴³Idi Ieh pana' nengalap, idi nekuman neneh pa kiungdeh.

⁴⁴Idi Ieh nepebala kuandeh, "Ini balaKu luk pangeh bilaKu kuan muyuh kareb Ui idi dengan muyuh atun, idi na miak na uen ngacing amung-amung luk pangeh inayud ratnan bururKu rat bang Ukum Musa, surat nabi-nabi, idi Nani Ubur ineh teh."

⁴⁵Idi Ieh nengukab terawédeh pad ideh kali' ilung bala Surat Allah ineh,

⁴⁶idi kebalaNeh nedeh, "Pangeh inayud, Keristus na miak na medereh, idi Ieh miak tumui teh rat arang lun naté bang aco luk keteluh;

⁴⁷idi bang ngadanNeh miak badén dalan uren idi do' ratnan sala' kuan amung-amung pupu, ngimun rat Yerusalim.

⁴⁸Muyuh ini mangun ku lun luk nekali' ratnan amung-amung ini.

⁴⁹Ui ini maré kuan muyuh luk pijani' TamanKu. Iamo' do' muyuh nganét bang bawang ini, pad muyuh uen ngeriput dengan lalud luk rat déi' dita'."

⁵⁰Idi Yésus nenguit nedeh remuat rat Yerusalim idi nemaya' nedeh macing Baitani. Idi Ieh nengiding tikuNeh idi nengeperuan nedeh.

⁵¹Uned Ieh nengeperuan nedeh, idi Ieh nepatad rat nedeh, idi Ieh nekemikit umak iné' surga.

⁵²Idi ideh netekeradung sembayang Neneh, idi nelemubed iné' Yerusalim dengan pelaba rayeh awang niatdeh.

⁵³Idi ideh megéi' semuet bang Ruma' Allah idi ngubur-ngubur Allah.

Yahya

Yahya 1

- ¹Kareb nateh tana' pinudut, idi Bala ineh pangeh idi. Ieh idi dengan Allah, idi Ieh mepad dengan Allah teh.
- ²Rat pun-pun Bala ineh idi dengan Allah.
- ³Rat Neneh Allah nemudut luk amung-amung, idi na luk idi anun-anun pana' luk pangeh pinudut baken ratnan Ieh.
- ⁴Bala ineh lawa ulun idi ulun ineh nengacing acang kuan lemulun.
- ⁵Acang ineh merasat bang dacem, idi dacem ineh na miak ngilep neneh.
- ⁶Inan selemulun luk icuk Allah, ngadanneh Yahya.
- ⁷Ieh iacing pad mada' lemulun ratnan acang ineh. Ieh nemada' ratnan ineh pad amung-amung lemulun miak ninger idi manu ku acang ineh.
- ⁸Ieh sebuleng baken acang ineh; ieh nacing pad maré kali' ratnan acang ineh.
- ⁹Ini acang luk matu luk macing bang tana' ini pad ngacang amung-amung lemulun.
- ¹⁰Bala ineh pangeh idi bang tana' ini. Idi Allah nemudut tana' ini ratnan Ieh, iamo' tana' ini na nengiti Neneh;
- ¹¹Ieh nacing inan pupuNeh sebuleng, iamo' pupuNeh ineh na pian ngalap Neneh.
- ¹²Iamo' kuan lemulun luk nengalap idi manu Neneh, Ieh nemaré lalud pad ideh mangun ku anak-anak Allah.
- ¹³Na ideh mangun ku anak Allah maya' lawé lemulun uen nenganak, iamo' Allah sebuleng mangun ku Tamandeh.
- ¹⁴Bala ineh pangeh mangun ku lemulun idi netudo arang tau. Tau pangeh nenier rayehNeh luk mepanu' ku katu idi luk matu. Ieh ineh rayeh luk ilapNeh ngaceku Ieh Anak sebuleng Allah Taman.

- ¹⁵Yahya nemare kali' ratnan Yésus, idi nengitang, kebalaneh, "Ini Lemulun luk bilaku miak macing mucu rat negku. Iamo' Ieh meluun rayeh rat negku, ngaceku Ieh pangeh idi kareb nateh ui tinganak."
- ¹⁶Ngaceku ratnan katuNeh luk pelaba rayeh Allah pangeh nengeperuan netau, idi peruan ineh iuk-iuk mula'.
- ¹⁷Allah nemaré Ukum dengan tang Musa, iamo' katu idi luk matu pangeh nacing ratnan Yésus Keristus.
- ¹⁸Seburur pana' nateh luk nenier Allah iamo' Anak buleng ineh luk idi dengan Allah, idi luk tudo iring Taman, Ieh luk pangeh nengegala' Neneh.
- ¹⁹Lun rayeh-rayeh lun Yahudi déi' Yerusalim nengecuk imam-imam idi lun Liwi amé' ngitun Yahya, kebaladeh, "Idéké iko ini?"
- ²⁰Yahya na nengalum, iamo' ieh nengamo dengan megala', kebalaneh, "Ui ini baken Keristus."
- ²¹Idi ideh nengitun neneh teh, "Kudeng pieh kudeng ineh, idéké iko? Iko Eliaké?" Idi keburineh, "Baken." "Iko nabi inehké?" Idi keburineh, "Baken."
- ²²Idi kebaladeh neneh, "Idéké iko ini? Ai na miak na ngor bala lemulun luk nengecuk nekai. Anunké luk belénmu ratnan bururmu sebuleng?"
- ²³Idi kebala Yahya (maya' kudeng bala Nabi Yesaya): " 'Ui ini tang lemulun luk ngitang déi' su luk ali-ali: Ngesiri dalam Tuhan!' "
- ²⁴Idi lemulun ineh pangeh icuk luk Parisi.
- ²⁵Idi ideh nengitun ni Yahya, keburideh, "Kudeng iko ini baken Keristus, idi baken Elia, idi baken nabi ineh, anunké punneh iko ngerereb lemulun?"
- ²⁶Idi kebala Yahya, "Ui ini ngerereb dengan abpa' mo', iamo' arang uned muyuh inan Seburur Lemulun luk na muyuh miti,
- ²⁷Ieh macing mucu rat negku, idi neka abet kasutNeh pana' ui na mayu."
- ²⁸Amung ini pangeh mangun déi' Baitani, déi' dipar Abpa' Yarden, su luk inan Yahya nengerereb lemulun.

²⁹Kenebpa Yahya nenier Yésus macing neneh, idi keburineh, "Siruh, Anak Dumba Allah luk mabeh sala' amung uang tana' ini.

³⁰Ratnan Ieh ini luk ui pangeh nemada', kebalaku, 'Muci rat negku Seburur Lemulun macing, luk meluun rayeh rat negku, ngaceku Ieh pangeh idi atun rat negku.'

³¹Atun ui na kali' idé Ieh; iamo' ui nacing ngerereb dengan abpa', pad ngegala' Neneh kuan luk pupu Israil."

³²Idi Yahya pana' nemaré kali' keburineh, "Ui nenier Roh Allah temurun rat déi' langit, mepad kudeng aceh suit sukur, idi Ieh tudo luun Yésus.

³³Idi ui na miti Neneh; iamo' Allah luk nengecuk negku ngerereb dengan abpa' ineh, nepebala negku, 'Iko miak nier Roh ineh temurun idi tudo luun Seburur Lemulun. Ieh ineh luk ngerereb dengan Roh Meligan.' "

³⁴Idi kebala Yahya, "Ui pangeh nenier ineh, idi maré kali' nemuyuh ratnan Ieh ini Anak Allah."

³⁵Kenebpa Yahya idi teh dengan dueh burur anak sekola'neh.

³⁶Kareb ieh nenier Yésus nalan, idi ieh nepebala, "Siruh, Anak Dumba Allah."

³⁷Idi dueh burur anak sekola' ineh neninger neneh pebala kudeng ineh, idi didueh nemaya' Yésus.

³⁸Yésus nelumi, idi nenier nedidueh luk maya' Neneh ineh, idi kebalaNeh nedidueh, "Anunké luk tekapen medueh?" Idi keburineh didueh Neneh, "O Rabi!" (Ilung Rabbi, ieh ineh Guru), "Iapehké inanMu tudo?"

³⁹Idi kealaNeh nedidueh, "Amé' tungé' idi nier." Idi didueh nemaya' Neneh idi nenier su luk inanNeh tudo. Idi didueh netudo dengan Yésus aco sineh. (Kaerb ineh pelaba tangal musul aco.)

⁴⁰Seburur rat arang didueh luk neninger bala Yahya, idi luk pangeh nemaya' Yésus, ieh ineh Andrias, kinanak Simun Pétrus.

⁴¹Idi Andrias nepapu' kinanakneh Simun, idi nepebala neneh, "Kai pangeh nepapu' Mesias" (luk ilungneh Keristus).

⁴²Ieh nenguit Simun amé' matun Yésus. Idi Yésus nenier neneh idi nepebala, "Iko ini Simun, anak Yahya, iko miak tetanen Képas." (Ini mepad kudeng Pétrus, idi ilungneh "Batu.")

⁴³Kenebpa Yésus sikal amé' déi' Galilia. Ieh nenakap ni Pilipus, idi nepebala neneh, "Maya' Negku."

(⁴⁴Pilipus ineh lun Baitsaida, luk pamung bawang dengan Andrias idi Pétrus.)

⁴⁵Pilipus nenakap Nataniel, idi nepebala neneh, "Kai pangeh nepapu' Yésus, luk pangeh ginala' Musa bang Surat Ukum idi nabi-nabi pana', ieh ineh Yésus, anak Yusup lun Nasarét."

⁴⁶Idi keburu' Nataniel neneh, "Miakké Nasarét ngacing anun-anun luk do'?" Idi keburu' Pilipus neneh, "Amé' iko idi nier."

⁴⁷Kareb Yésus nenier Nataniel macing Neneh, idi Ieh nepebala ratnan ieh, "Siruh, seburur lun Israil luk matu, idi luk na naluk teh!"

⁴⁸Idi keburu' Nataniel Neneh, "Kudeng apehké Rabbi ngiti negku?" Idi Yésus nengor balaneh, keburu'Neh, "Kareb nateh Pilipus nenawar namu, kareb iko pa liang lawa gita' ineh, pangeh Ui nekali' namu."

⁴⁹Idi keburu' Nataniel Neneh, "O Guru, Iko Anak Allah! Iko luk Raca' lun pupu Israil!"

⁵⁰Idi kebala Yésus neneh, "Manuké iko ngaceku Ui mala kuanmu Ui nenier namu pa liang lawa gita' ineh? Iko miak nier luk meluun rayeh ratnan ini."

⁵¹Idi kebalaNeh nedeh teh, "Matu Ui pebala nemuyuh, idi muyuh miak nier langit mukab, idi amung-amung melaikat Allah umak idi temurun luun Anak-Lemulun."

Yahya 2

¹Dueh aco mucu ratnan ineh inan aceh irau paweh déi' bawang Kana, déi' tana' Galilia. Idi tinan Yésus idi déi',

²Yésus idi anak-anak sekola'Neh pana' tinawar amé' ku irau paweh ineh.

- ³Kareb abpa' anggur pangeh mabud, idi tinan Yésus nepebala Neneh, "Abpa' anggurdeh mabud."
- ⁴Idi kebala Yésus neneh, O Ina', aleg ngecuk Negku nganau' kudeng ineh. KarebKu ngegala' rayehKu nateh nacing."
- ⁵Idi tinanNeh nepebala inan amung-amung demulun, "Nganau' muyuh anun-anun luk dukenNeh nemuyuh."
- ⁶Maya' adat baru' lun Yahudi inan anem rubi déi'. Kinula' abpa' luk miak semuet bang aceh rubi, ieh ineh dueh ngepulu' kian teluh ngepulu' gilin.
- ⁷Idi kebala Yésus nelun duken ineh, "Do' manu' amung rubi ini ku abpa'." Idi ideh nenganau' abpa' pad macing mepanu'.
- ⁸Idi kebalaNeh nedeh, "Ngook nekini, idi nguit kuan lun rayeh irau ineh." Idi ideh nenguit ineh iné' neneh.
- ⁹Idi ieh nenutun abpa' luk pangeh mangun ku abpa' anggur ineh. Na ieh kali' rat iapeh ini nacing (iamo' amung lun duken luk nengook abpa' ineh nekali'). Idi ieh nenawar anak deléi luk paweh,
- ¹⁰idi keburineh neneh, "Anid-anid lemulun pekalai maré abpa' anggur luk do' atun, idi kareb lemulun pangeh musam ngirup, idi ieh maré luk na do' tu; iamo' iko nenganug abpa' anggur luk meluun do' macing nekini!"
- ¹¹Yésus nenganau' tanu' luk melalud luk pun-pun ini déi' Kana luk bang bawang Galilia; idi Ieh nengegala' rayehNeh déi', pad anak-anak sekola'Neh pana' manu Neneh.
- ¹²Muci ratnan ineh Yésus iné' bawang Kapernaum dengan tinanNeh, kinanak-kinanakNeh, idi anak-anak sekola'Neh. Idi ideh netudo déi' tuda'-tuda' aco kinioneh.
- ¹³Kareb aco rayeh Irau Paska lun Yahudi pangeh muneng, idi Yésus iné' Yerusalim.

¹⁴Idi bang Ruma' Allah Ieh nepapu' tuda'-tuda' lemulun luk masui sapi', dumba, sukur, idi tuda'-tuda' lemulun luk ngelibal usin luk tudo iring méjadeh.

¹⁵Ieh nenganau' aceh bebal ratnan ué', idi Ieh nemasut amung pung rat bang Ruma' Allah ineh, do' dumba idi sapi' pana'. Ieh nengisak amung-amung usin lemulun luk ngelibal usin ineh, idi méjadeh linukebNeh.

¹⁶Idi kebalaNeh nelun luk masui sukur ineh, "Iten muyuh amung ini rat ieni. Aleg muyuh nganau' ruma' TamanKu ini mangun ku luk inan masui idi melih."

¹⁷Idi anak-anak sekola'Neh nengerawé ratnan luk pangeh inayud, "Geriguen ngaceku ruma'Mu ngegio niatKu."

¹⁸Idi lun rayeh-rayeh Yahudi nengedaluh Yésus, kebaladeh, "Anunké tanu' luk miak ruenMu pad ngegala' laludMu kuan kai?"

¹⁹Idi kebala Yésus, "Ngusag Ruma' Allah ini, idi Ui sikal mudut neneh teh bang teluh aco kinioneh."

²⁰Idi keburideh, "Apat ngepulu' anem lak kinioneh lemulun mudut Ruma' Allah ini. Miakké Iko mudut neneh bang teluh aco mo'?"

²¹Iamo' ruma' Allah luk bilaNeh ineh, ieh ineh bururNeh sebuleng.

²²Kareb Yésus tinui rat arang lun naté, idi anak-anak sekola'Neh nengerawé ratnan luk bilaNeh ineh. Idi ideh manu ku Surat Allah idi bala Yésus pana'.

²³Kareb Yésus déi' Yerusalim kareb Irau Paska, mula' lemulun manu inan ngadanNeh, ngaceku ideh pangeh nenier amung-amung tanu' luk inau'Neh.

²⁴Iamo' Yésus na merapet nedeh, ngaceku Ieh nekali' terawé amung-amung lemulun.

²⁵Na ulekneh seburur pana' mada' Neneh ratnan lemulun, ngaceku Ieh sebuleng kali' amung-amung luk bang niatdeh.

Yahya 3

¹Inan seburur lun Parisi, ngadanneh Nikodimus, ieh ineh seburur lun rayeh lun Yahudi.

²Ieh iné' papu' Yésus kareb malem, idi nepebala Neneh, "O Guru, kai kali' Iko ini Guru luk nacing ratnan Allah. Ngaceku na luk idi seburur pana' miak nganau' amung tanu', mepad kudeng luk ianu'Mu, kudeng na Allah idi danganneh."

³Idi kebala Yésus, "Matu, Ui pebala namu, kudeng selemulun na tinganak baruh, na ieh miak nier Imet Allah."

⁴Idi kebala Nikodimus, "Kudeng apehké seburur lemulun miak ruen nenganak kareb ieh pangeh rayeh? Miakké ieh semuet baruh bang nakan tinanneh, idi ruen nenganak teh?"

⁵Idi kebala Yésus, "Matu, Ui pebala namu, kudeng selemulun na tinganak ratnan abpa' idi Roh, na ieh miak semuet bang Imet Allah.

⁶Luk tinganak ratnan burur lemulun, ieh lemulun teh; idi luk tinganak ratnan Roh, ieh Roh teh.

⁷Aleg iko mawa, ngaceku Ui pebala namu, muyuh na miak na uen nenganak baruh.

⁸Bui macing iapeh-iapeh luk pianneh. Iko ninger unineh, iamo' iko na kali' rat iapeh ieh macing idi iapeh luk ulekneh. Kudeng ineh teh anid-anid lemulun luk tinganak ratnan Roh."

⁹Idi kebala Nikodimus, "Kudeng apehké amung ineh miak mangun?"

¹⁰Kebala Yésus, "Iko guru lun Israilké, idi na iko kali' ilung amung-amung ini?"

¹¹Matu, Ui pebala namu, kai pebala ratnan luk kali' kai, idi kai mada' ratnan luk sinier kai, iamo' na muyuh pian ngalap bala kai ineh.

¹²Muyuh na manu Negku kareb Ui mada' nemuyuh ratnan luk mangun bang tana' ini, kudeng apehké muyuh miak manu kudeng Ui mada' nemuyuh ratnan surga?"

¹³Seburur pana' nateh numak surga, baken ratnan Anak-Lemulun luk pangeh netemurun rat surga.”

¹⁴Mepad kudeng Musa nengiding menipeh ineh déi' su luk ali-ali, kudeng ineh teh Anak-Lemulun kali' rungen uen ngikit,

¹⁵pad idé-idé luk manu Neneh miak ngalap ulun luk meruked.

¹⁶Ngaceku Allah mawa kuan uang tana' ini, pad Ieh nemaré Anak bulengNeh, idi idé-idé luk manu Neneh na miak maté, iamo' ieh ngalap ulun luk meruked.

¹⁷Ngaceku Allah nan nengecuk AnakNeh amé' bang tana' ini pad ngukum tana' ini, iamo' pad tana' ini miak uen ngulun ngaceku Ieh.

¹⁸Lemulun luk manu Neneh na miak kumin, iamo' lemulun luk na manu ineh kali' rungen pangeh inukum, ngaceku na ieh manu inan ngadan Anak buleng Allah ineh.

¹⁹Idi ini ukum ineh: acang pangeh nacing bang tana' ini, iamo' lemulun meluun sikal ku dacem ratnan acang ineh, ngaceku kekamendeh dat.

²⁰Idé-idé luk nganau' luk dat, megateh inan acang idi na macing inan acang ineh, pad kekammeneh na uen ngegala',

²¹iamo' lemulun luk nganau' luk matu macing inan acang, pad megala' kekammeneh ineh maya' pian Allah.

²²Pangeh ineh Yésus idi anak-anak sekola' iné déi' tana' Yudia. Idi Ieh netudo dengandeh déi', idi nengerereb lemulun.

²³Idi Yahya pana' nengerereb déi' Ainun muneng ku Salim, ngaceku mula' abpa' déi'. Idi lemulun nacing idi rirebneh.

(²⁴Yahya nateh tinutup.)

²⁵Sebuang anak sekola' Yahya nepesaad dengan seburur lun Yahudi ratnan adat sibiru'.

²⁶Idi ideh iné' ni Yahya idi nepebala neneh, "O Guru iko ngerawé lemulun ineh luk denganmu dipar Abpa' Yarden, luk pangeh bilamu? Ieh ngerereb lemulun nekini idi amung-amung lemulun amé' Neneh."

²⁷Iamo' kebala Yahya, "Seburur pana' na miak ngalap anun-anun kudeng na barén Allah neneh.

²⁸Muyuh sebuleng mangun ku lun nekali' negku: Na ui pebala idi ui ini Keristus ineh. Iamo' ui icuk Allah atun rat Neneh.

²⁹Deléi luk sikal ngaweh, ieh kuan decur ineh; idi lun rorum deléi luk sikal ngaweh ineh tuped iringneh, idi ieh pelaba awang niat ninger bala deléi ineh. Kudeng ineh teh ui ini nekini pelaba awang niat. Idi awangku meriput.

³⁰Do' Ieh iuk amé' rayeh, idi ui ini iuk amé' isuut."

³¹Ieh luk macing rat déi' dita', Ieh ineh luk meluun rayeh ratnan amung-amung. Lemulun luk ratnan tana' ini iniap kuan tana' ini teh idi pebala ratnan tana' ini. Ieh luk macing rat suraga, Ieh ineh pa luun amung-amung.

³²Ieh maré kali' ratnan luk sinierNeh idi luk pindengerNeh teh, iamo' seburur pana' na ngalap balaNeh ineh.

³³Lemulun luk ngalap balaNeh ngegala' ratnan Allah ineh matu.

³⁴Ieh luk icuk Allah mada' bala Allah, ngaceku Allah maré TohNeh dengan na uen nguad.

³⁵Taman mawa inan Anak ineh, idi luk amung-amung pangeh biréNeh bang paladNeh.

³⁶Lemulun luk manu inan Anak ineh, ieh ngalap ulun luk meruked. Iamo' lemulun luk na maya' bala Anak ineh, ieh na miak kali' ulun, iamo' useh Allah tudo pa luunneh.

Yahya 4

¹Lun Parisi neninger ratnan kudeng apeh Yésus ngalap idi ngerereb meluun ula' anak sekola' ratnan Yahya.

(²Setuneh baken Yésus sebuleng nengerereb lemulun, iamo' anak-anak sekola'Neh luk nengerereb nedeh.)

³Kareb Yésus kali' baladeh ineh, idi Ieh nenecan tana' Yudia, idi nelemubed iné' Galilia.

⁴Iamo' na miak na Ieh lemaba tana' Samaria.

⁵Ieh nacing inan aceh bawang déi' Samaria, ngadanneh Sikar, muneng ku tana' luk pangeh biré Yakub atun kuan Yusup, anakneh ineh.

⁶Idi déi' inan aceh subuk Yakub. Idi ngaceku Yésus merur nenalan Ieh netudo iring subuk ineh. Kareb ineh lélé muned aco.

⁷Idi seburur decur lun Samaria nacing sikal ngalap abpa' ineh; idi kebala Yésus neneh, "Ui mutuh ngirup."

(⁸Ngaceku anak-anak sekola'Neh pangeh iné' melih luk kenen déi' bang bawang.)

⁹Idi kebala decur lun Samaria Neneh, "Kudeng apehké Iko ini seburur lun Yahudi mutuh luk rupen rat negku, seburur decur lun Samaria?" Ngaceku lun Yahudi na pamung akan dengan lun Samaria.

¹⁰Idi kebala Yésus, 'Kudeng iko kali' katu Allah idi idé Lemulun luk mutuh namu maré luk rupen, na miak na iko mutuh rat Neneh, pad Ieh maré abpa' luk mulun kuanmu."

¹¹Idi keburu' decur ineh, "O Tuan, Iko na luk ku ngook abpa', idi subuk ini medalem. Rat iapehké Iko ngalap abpa' luk mulun ineh?"

¹²Tepun kai Yakub nemané subuk ini kuan kai. Idi ieh sebuleng nengirup ratnan subuk ini dengan anak-anakneh idi sapi'neh pana'. Ikoké meluun rayeh ratnan tepun kai Yakub?"

¹³Kebala Yésus, "Idé-idé luk ngirup abpa' ini, ieh miak meparing teh:

¹⁴iamo' idé-idé luk ngirup abpa' luk barénKu neneh, na ieh miak meparing ruked-ruked, ngaceku abpa' luk barénKu ineh, miak mangun bang bururneh ku aceh bued abpa' luk manud macing inan ulun luk meruked."

- ¹⁵Idi kebala decur ineh, "O Tuan, maré negku abpa' ineh, pad ui na meparing idi na merur amé' tungé ngook abpa'."
- ¹⁶Kebala Yésus neneh, "Amé' iko nawar awanmu, idi lemubed amé' tungé'."
- ¹⁷Kebala decur ineh, "Ui na awan." Idi kebala Yésus neneh, "Matu balamu, iko na awan.
- ¹⁸Limeh burur deléi pangeh mangun ku awanmu, idi luk nekini baken awanmu. Matu balamu ineh."
- ¹⁹Kebala decur ineh, "O Tuan, ui kali' Iko seburur nabi.
- ²⁰Tepun kai nesembayang luun surud ini iamo' kebala muyuh, Yerusalim ineh luk do' inan lemulun sembayang."
- ²¹Keburi' Yésus neneh, O decur, do' iko manu Negku, karebneh miak macing idi lemulun na miak sembayang inan Taman ineh luun surud ini idi déi' Yerusalim pana'.
- ²²Muyuh lun Samaria na kali' idé luk inan muyuh sembayang; kai lun Yahudi kali' luk inan kai sembayang, ngaceku ulun macing rat nelun Yahudi.
- ²³Iamo' karebneh miak macing, idi nekini pana' pangeh nacing idi amung-amung lemulun luk sembayang luk matu ineh miak sembayang inan Taman dengan lalud Roh Allah idi luk matu; ngaceku Taman ineh petulu dengan lemulun luk kudeng ineh sembayang Neneh.
- ²⁴Allah ineh Roh; idi lemulun luk sembayang Neneh, na miak na ieh sembayang dengan lalud RohNeh idi luk matu."
- ²⁵Idi keburu' decur ineh Neneh, "Ui kali' Mesias luk titen Keristus miak macing. Kareb Ieh macing, Ieh miak mada' netau ratnan luk amung-amung."
- ²⁶Kebala Yésus neneh, "Ui ini Ieh luk pegayam denganmu."
- ²⁷Kareb ineh teh anak-anak sekola'Neh nacing; idi ideh mawa, ngaceku Yésus nepegayam dengan seburur decur. Iamo' seburur pana' na nengitun Neneh, "Anunké luk tekapenMu?" idi "Ngudehké Iko pebala neneh?"

- 28Idi decur ineh nenecan sidangurneh, idi iné' bang bawang idi nepebala nelun mula' déi',
- 29"Amé' muyuh nier lemulun luk mada' negku ratnan amung-amung luk inau'ku. Bakenké Ieh ini Keristus?"
- 30Idi lun mula' ineh nenalan rat bang bawang iné' nier Yésus.
- 31Kareb ineh teh kebala anak-anak sekola' ineh nan Yésus, "O Guru, kuman Iko."
- 32Iamo' keburu'Neh nedeh, "Ui inan luk kenen luk Ui sikal kuman luk na kali' muyuh."
- 33Idi anak-anak sekola' nepebala seburur dengan seburur, "Inanké lemulun nenguit luk kenen kuanNeh?"
- 34Idi kebala Yésus nedeh, "AkanKu, ieh ineh nganau' luk pianNeh luk nengecuk Negku, idi ngeriput kekamenNeh.
- 35Muyuh pebala, idi apat bulan teh idi miak ngeranih. Matu Ui pebala nemuyuh, Do' muyuh tukag, idi nier lati'-lati', ngaceku nekini lati' ineh pangéh melak miak uen ngeranih.
- 36Idi lemulun luk ngeranih ineh ngalap tabpar, idi ngamung bua' luk kuan ulun luk meruked, pad lemulun luk nibu idi lemulun luk ngeranih, pad-pad mawang niat.
- 37Matu bala ini, "Seburur nibu, idi seburur luk baken ngeranih.'
- 38Ui nengecuk nemuyuh ngeranih bang lati' luk na inau' muyuh; luk baken nenganau' ineh, idi muyuh ngalap uli'neh."
- 39Mula' lun Samaria bang bawang ineh manu inan Yésus, ngaceku ratnan bala decur luk nepebala, "Ieh nemada' negku ratnan amung-amung luk inau'ku."
- 40Idi kareb lun Samaria ineh nacing inan Yésus ideh nemutih Neneh tudo dengandeh; idi Ieh netudo déi' dueh aco kinioneh.
- 41Idi meluun ula' lemulun manu teh, ngaceku bala Yésus.

⁴²Idi kebaladeh nan decur ineh, "Nekini kai manu, baken ngaceku luk bilamu mo', iamo' kai sebuleng pangeh neninger balaNeh idi kai nekali', idi Ieh ineh Lun Nengulun tana' ini."

⁴³Idi pangeh dueh aco Yésus nenalan rat déi' iné' Galilia.

⁴⁴Ngaceku Yésus sebuleng nepebala, "Seburur nabi na miak ruen ngedita' bang bawangneh sebuleng."

⁴⁵Kareb Ieh nacing déi' Galilia, idi Ieh tinawar lun Galilia, ngaceku ideh pangeh iné' ku Irau Paska déi' Yerusalim, idi ideh nenier amung-amung luk inau'Neh kareb irau ineh.

⁴⁶Idi Yésus nelemubed iné' Kana déi' tana' Galilia, su luk inan abpa' inisu'Neh mangun ku abpa' anggur ineh. Idi inan seburur lun tareh raca' luk inan aceh anak luk mét déi' Kapernaum.

⁴⁷Kareb ieh neninger ratnan Yésus pangeh nacing rat tana' Yudia amé' Galilia, idi ieh iné' papu' Yésus, idi nemutih Neneh amé' ngedo' anakneh luk lélé maté.

⁴⁸Kebala Yésus neneh, "Kudeng na muyuh nier tanu' idi kekamen luk nan mawa, na tu muyuh manu."

⁴⁹Idi kebala lun tareh raca' ineh, "O Tuan, amé' Iko kareb nateh anakku maté."

⁵⁰Kebala Yésus neneh, "Amé' iko, anakmu ineh mulun." Idi lemulun ineh manu ku bala Yésus ineh, idi ieh iné'.

⁵¹Kareb ieh arang dalan, demulunneh iné' papu' neneh, kebaladeh, "Anakmu ineh pangeh do'."

⁵²Idi ieh nengitun nedeh ratnan idan karebneh ieh nedo'. Idi kebaladeh, "Nalem kareb mepulid aco dademneh pangeh nedo'."

⁵³Idi tamanneh nengerawé kareb ineh teh Yésus nepebala neneh, "Anakmu ineh mulun." Idi ieh manu dengan amung uang tetek ruma'neh.

⁵⁴Idi ini tanu' luk kedueh inau' Yésus kareb pangeh Ieh nacing rat tana' Yudia amé' Galilia.

Yahya 5

¹Muci ratnan ineh inan aceh irau lun Yahudi; idi Yésus iné' déi' Yerusalim.

²Idi déi' Yerusalim muneng ku "Tanga' Dumba" inan aceh takung, maya' buri' Iberani titen Betesda, idi takung ineh inan limeh tador.

³Mula' lun mét telubid luun tador ineh, ieh ineh lun mebuser, lun meliai, idi lun mét naté urat. (Ideh nganét abpa' takung ineh melipu',

⁴ngaceku nganét kareb aceh melaikat Tuhan temurun bang takung neh idi ngelipu' abpa', idi lun mét luk temurun atun bang takung ineh, kareb abpa'neh melipu', idi ieh do'ratnan anun-anun luk métneh.)

⁵Idi inan teh déi' seburur lemulun luk mét pangeh teluh ngepulu' ualuh lak kinioneh.

⁶Kareb Yésus nenier nedeh telubid déi', idi nekali' ieh pangeh mét mio kudeng ineh, idi Ieh nepebala neneh, "Sikalké iko do' ratnan étmu?"

⁷Idi kebala lun luk mét ineh, "O Tuan, na lemulun luk miak nguit negku semuet bang takung ini kareb abpa'neh melipu', iamo' kareb ui macing, lun baken pangeh netemurun nengili negku."

⁸Kebala Yésus neneh, "Tumui iko idi nguit ugammu idi nalan!"

⁹Idi petacu lemulun ineh nedo', idi ieh nenguit ugamneh idi nenalan. Idi ini mangun kareb Aco luk inan Mudeng.

¹⁰Ngaceku ineh lun Yahudi nepebala kuan lemulun luk dino' ineh, "Aco sini Aco luk inan Mudeng, bibpeng kuanmu na miak nguit ugammu ineh."

¹¹Iamo' kebalaneh, "Kebala lemulun luk nengedo' negku ini, 'Nguit ugammu idi nalan.' "

¹²Idi ideh nengitun neneh, keburideh, "Idéké lemulun ineh luk nemala kuanmu, 'Nguit ugammu idi nalan?'"

- 13**Iamo' lemulun luk dino' ineh na kali' Neneh idé, ngaceku pelaba ula' lemulun su ineh, idi Yésus pangeh nenalan.
- 14**Muci ratnan ineh Yésus nepapu' neneh bang Ruma' Allah, idi nepebala neneh, "Nekini iko pangeh do'. Aleg nganau' sala' peh, pad iko na mekaneh luk meluun dat."
- 15**Idi lemulun ineh iné' mada' nelun Yahudi ratnan Yésus luk nengedo' neneh ineh.
- 16**Ngaceku ineh lun Yahudi nengimun ngedereh Yésus, ngaceku Ieh nenganau' luk kudeng ineh kareb Aco luk inan Mudeng.
- 17**Iamo' kebala Yésus nedeh, "TamanKu ngakem kidi-kidi, idi Ui pana' ngakem teh."
- 18**Ngaceku ineh lun Yahudi meluun tueh nakap dalam sikal ngaté Neneh, baken ngaceku ngelaba ukum Aco luk inan Mudeng mo', iamo' ngaceku Ieh nemala Allah ineh TamanNeh, idi maad bururNeh dengan Allah.
- 19**Idi kebala Yésus, "Matu, Ui pebala nemuyuh, Anak ineh na miak nganau' anun-anun luk maya' pianNeh sebuleng, iamo' Ieh nier luk ruen Taman ineh. Anun-anun luk inau' Taman, ineh teh luk ruen Anak ineh.
- 20**Ngaceku Taman mawa inan Anak ineh, idi Ieh nemada' sirenNeh amung-amung luk ruenNeh sebuleng; idi teh Ieh sikal mada' sirenNeh kekamen luk meluun rayeh ratnan amung-amung ini, pad muyuh pana' miak mawa.
- 21**Mepad kudeng Taman nui amung-amung lun naté idi ngulun nedeh, kudeng ineh teh Anak ineh ngulun idé-idé luk pianNeh.
- 22**Ngaceku Taman ineh na ngukum seburur pana', iamo' Ieh pangeh nemaré amung-amung ukum ineh kuan Anak ineh,
- 23**pad amung-amung lemulun miak gedita' Anak ineh mepad kudeng ideh ngedita' Taman ineh mepad kudeng ideh ngedita' Taman ineh teh. Lemulun luk na ngedita' Anak ineh, idi ieh pana' na ngedita' Taman luk nengecuk Neneh.

- ²⁴Matu, Ui pebala nemuyuh, lemulun luk ninger balaKu idi manu inan Luk nengecuk Negku, ieh ineh ngalap ulun luk meruked, idi na semuet bang ukum, iamo' ieh pangeh pinuit ratnan até amé' inan ulun.
- ²⁵Matu, Ui pebala nemuyuh, idi karebneh miak macing idi nekini pana' pangeh nacing, idi amung-amung lun naté miak ninger uni tang Anak Allah, idi lemulun luk ninger ineh miak mulun.
- ²⁶Mepad kudeng Taman ineh lawa ulun, kudeng ineh teh Ieh nemaré kuan AnakNeh mangun ku lawa ulun teh.
- ²⁷Idi teh Ieh nemaré lalud kuanNeh miak ngacing ukum, ngaceku Ieh Anak-Lemulun.
- ²⁸Aleg muyuh mawa ratnan ineh, ngaceku karebneh miak macing idi amung-amung lemulun luk bang tanem miak ninger uni tangNeh,
- ²⁹idi ideh miak remuat rat bang tanem. Idé-idé luk pangeh nenganau' luk do' miak tumui amé' inan ulun luk meruked, idi idé-idé luk pangeh nenganau' luk dat miak tumui idi ngalap ukum.
- ³⁰UI na miak nganau' anun-anun maya' pianKu sebuleng. Ui ngukum lemulun maya' kudeng luk uen Allah ngelelep, idi ukumKu ineh matu; ngaceku na Ui maya' pianKu sebuleng, iamo' pianNeh luk nengecuk Negku.
- ³¹Kudeng Ui maré kali' ratnan bururKu sebuleng, idi luk nekali'Ku ineh na matu.
- ³²Inan luk bakén luk maré kali' ratnan Ui, idi Ui kali' bala luk bilaNeh ineh matu.
- ³³Muyuh ini pangeh nengecuk lemulun amé' matun Yahya, idi ieh pana' nemaré kali' ratnan luk matu ineh.
- ³⁴Iamo' Ui ini na ngalap luk nekali' ratnan lemulun, iamo' Ui mala ratnan ini, pad muyuh ini miak uen ngulun.
- ³⁵Yahya ineh mepad kudeng aceh lapung luk mulun idi merasat; iamo' muyuh ini sikal mawang niat segageh mo' kinioneh bang acangneh ineh.

³⁶Iamo' Ui inan aceh luk nemaré kali' luk meluun rayeh ratnan luk nekali' Yahya ineh. Kekamen luk inau'Ku, luk icuk TamanKu ruenKu, maré kali' ratnan Ui, idi ngegala' ratnan Ui icuk TamanKu.

³⁷Idi Taman ineh luk nengecuk Negku pangeh nemaré kali' ratnan Ui. Muyuh nateh neninger uni tangNeh idi nenier kiungNeh,

³⁸Idi muyuh na nganug balaNeh bang niat muyuh, ngaceku muyuh na manu Neneh luk icukNeh.

³⁹Muyuh ngelio Surat Allah, ngaceku bang terawé muyuh bang ineh muyuh miak ngalap ulun luk meruked. Idi Surat ineh teh maré kali' ratnan Ui.

⁴⁰Iamo' na muyuh sikal macing Negku pad muyuh miak mulun.

⁴¹"Ui ini na ngalap dita' ratnan lemulun.

⁴²Iamo' Ui kali' nemuyuh na luk idi awa Allah bang niat muyuh.

⁴³Ui ini macing dengan ngadan TamanKu, iamo' muyuh na ngalap Negku; kudeng selemulun baken macing dengan ngadanneh sebuleng, kali' rungen muyuh ngalap neneh.

⁴⁴Kudeng apehké muyuh miak manu, laba' muyuh nakap rayeh rat arang muyuh sebuleng, iamo' na muyuh nakap rayeh ratnan Allah luk Sebuleng ineh?

⁴⁵Aleg muyuh ngerawé Ui ini sikal ngadu' nemuyuh pa kiung Taman ineh. Inan selemulun luk ngadu' nemuyuh, ieh ineh Musa luk inan muyuh merapat.

⁴⁶Kudeng muyuh manu inan Musa, kali' rungen muyuh manu Negku, ngaceku Musa pangeh nengayud ratnan Ui.

⁴⁷Iamo' kudeng muyuh na manu ku luk inayud bang surat Musa, kudeng apehké muyuh miak manu ku balaKu?"

Yahya 6

¹Muci ratnan ineh Yésus ine' déi' dipar Takung Galilia, (ieh ineh Takung Tibirias).

²Mula lemulun nemaya' Neneh, ngaceku nenier tanu'-tanu' kareb Ieh nengedo' lun mét.

³Yésus numak nan aceh surud idi Ieh netudo déi' dengan anak-anak sekola'Neh.

⁴Irau Paska lun Yahudi pangeh muneng,

⁵Yésus nenier libut-libutneh idi nekali' mula' lemulun amé' Neneh, idi kebalaNeh ni Pilipus, "Rat iapehké tau melih ruti, pad lun mula' ini kuman?"

(⁶Idi Yésus nepebala kudeng ineh ngaceku sikal nutun neneh, ngaceku Ie sebuleng kali' luk miak ruenNeh.)

⁷Kebala Pilipus Neneh, "Ruti luk dueh ngeratu rigit raganeh na petap kuan lemulun ini, sagan pana' panid sesuut."

⁸Idi seburur rat arang anak-anak sekola' ineh, ieh ineh Andrias, kinanak Simun Pétrus, nepebala Neneh,

⁹"Tungé' inan aceh anak luk inan limeh balad ruti ikun idi dueh lawid; iamo' anunké ulekneh ineh kuan lun mula' ini?"

¹⁰Idi keburu' Yésus, "Ngecuk lun mula' ineh tudo." Ngaceku su luk inandeh ineh mula' uduh; idi kinula' deléi luk netudo lélé limeh ngeribu burur.

¹¹Yésus nengalap ruti ineh, idi nemaré ubur nan Allah, idi Ieh nemabpat ineh kuan lun mula' luk tudo ineh. Kudeng ineh teh lawid ineh pana' bibpatNeh. Idi amungdeh nekuman dengan petap.

¹²Kareb amung-amungdeh mebor, idi Yésus nepebala inan anak-anak sekola'Neh, "Ngamung amung-amung tecehneh, pad sesuut pana' na talan."

¹³Idi ideh nengamung tecehneh panu' pulu' dueh ngebuan dengan areg ruti luk limeh balad ineh, ieh ineh areg luk teceh kinan lemulun ineh.

¹⁴Kareb lun mula' pangeh nenier tanu' luk inau' Yésus, idi keburu'deh, "Matu Ieh ini nabi luk macing bang tana' ini."

¹⁵Yésus nekali' nedeh macing sikal nganau' Neneh mangun ku raca' idi Ieh sebuleng iné' luun aceh pegkung teh.

- ¹⁶Kareb lélé malem aco idi anak-anak sekola'Neh iné' déi' takung,
- ¹⁷idi ideh netemaleb bang alud idi neguta takung ineh iné' Kapernaum. Idi kareb aco pangeh medacem, Yésus nateh nacing nedeh.
- ¹⁸Idi takung ineh pelaba ula' ribut, ngaceku bui pelaba tueh.
- ¹⁹Kareb ideh pangeh peribué lélé teluh apat batu kiadoneh, denak-denak ideh nenier Yésus nalan luun abpa' takung ineh, macing muneng ku aluddeh, idi ideh matot.
- ²⁰Iamo' kebala Yésus nedeh, "Ui ini, aleg matot."
- ²¹Idi ideh mawang niat ngalap Neneh umak bang alud, idi petacu alud ineh nacing luun tangeb, su luk ulekdeh.
- ²²Lun mula' luk neketecan déi' dipar takung ineh, nekali' inan sebuleng alud mo' luk ketecan su ineh. Ideh kali' Yésus na nemaya' alud anak-anak sekola'Neh, iamo' ideh pangeh nenalan atun.
- ²³Kenebpa inan tuda'-tuda' alud luk nacing rat Tibirias, muneng ku su luk inandeh nekuman ruti nalem kareb Tuhan pangeh nemaré ubur.
- ²⁴Iamo' kareb lun mula' nenier Yésus na idi déi', idi anak-anak sekola'Neh pana' nateh idi, idi ideh netemaleb bang alud, idi iné' déi' Kapernamun nakap Yésus.
- ²⁵Kareb lun mula' nepanu' Yésus dipar takung ineh, idi ideh nepebala Neneh, "O Guru, idanké Iko nacing tungé?"
- ²⁶Idi kebala Yésus, "Matu, Ui pebala nemuyuh, muyuh ini nakap Negku baken ngaceku muyuh kali' ilung kekamenKu luk melalud, iamo' ngaceku muyuh nekuman ruti pad macing mebor.
- ²⁷Aleg muyuh ngakem ngaceku akan luk melu, iamo' ngaceku akan luk meraben macing inan ulun luk meruked. Akan ineh miak barén Anak-Lemulun nemuyuh ngaceku Allah Taman pangeh nenganau' etuNeh luunNeh pad ngamo Neneh matu."

²⁸Idi kebaladeh Neneh, "Anunké luk miak ruen kai pad kai nganau' kekamen Allah?"

²⁹Idi kebala Yésus, "Ini luk pian Alah ruen muyuh, do' muyuh manu Neneh luk icuk Allah ineh."

³⁰Idi keburideh Neneh, "Anunké tanu' luk ruenMu, pad kai miak nier idi manu Namu? Anunké luk ruenMu?"

³¹Tepun kai nekuman manna déi' su luk ali-ali, mepad kudeng luk inayud ineh 'Ieh pangeh nemaré uandeh ruti rat déi' surga kenendeh.' "

³²Kebala Yésus nedeh, "Matu, Ui pebala nemuyuh, baken Musa luk nemaré ruti rat déi' surga ineh, iamo' TamanKu luk nemaré kuan muyuh Ruti luk matu ineh rat surga.

³³Ngaceku Ruti Allah, Ieh ineh luk temurun rat surga idi luk maré ulun kuan uang tana' ini."

³⁴Idi keburideh Neneh, "O Tuan, do' megéi' maré Ruti ini kuan kai."

³⁵Idi kebala Yésus nedeh, "Ui ini Ruti Ulun ineh; lemulun luk macing Negku, na ieh miak melau peh, idi lemulun luk manu Negku, na ieh miak meparing teh.

³⁶Ui nepebala nemuyuh, muyuh pangeh nenier Negku iamo' na muyu manu.

³⁷Anid-anid lemulun luk barén Taman Negku miak amé' Negku, idi lemulun luk amé' Negku na tu-tu uenKu ngarung.

³⁸Ngaceku Ui netemurun rat surga, pad nganau' pianNeh luk nengecuk Negku, baken maya' pianKu sebuleng.

³⁹Iamo' ini pian Taman luk nengecuk Negku, pad Ui na ngetutu' idé-idé ratnan amung amungdeh luk biréNeh Negku, iamo' luk pianNeh, do' Ui nui nedeh kareb aco luk kekiped.

⁴⁰Ngaceku ini pian TamanKu, pad amung-amung luk nier Anak ineh idi manu Neneh miak ngalap ulun luk meruked, idi Ui ini miak nui nedeh kareb aco luk kekiped."

- ⁴¹Idi lun Yahudi ngedureng Neneh, ngaceku Ieh nepebala, "Ui ini Ruti luk netemurun rat surga."
- ⁴²Idi keburideh, "Bakenké lun ini Yésus, anak Yusup? Kai kali' taman-tinanNeh. Kudeng apehké Ieh pebala, 'Ui temurun rat déi' surga?'"
- ⁴³Idi kebala Yésus, "Aleg muyuh dureng-dureg arang muyuh sebuleng!"
- ⁴⁴Seburur pana' na miak macing Negku kudeng niatneh na rinuid Taman luk nengecuk Negku; idi Ui ini miak nui neneh kareb aco luk kekiped.
- ⁴⁵Pangeh inayud nabi-nabi, 'Amung lemulun miak badén Allah.' Idi anid-anid lemulun luk pangeh ninger bala Taman idi sibada' rat Neneh, ieh teh miak amé' Negku.
- ⁴⁶Baken ilungneh seburur lemulun pangeh nenier Taman, iamo' Ieh luk nacing ratnan Allah pangeh nenier Taman ineh.
- ⁴⁷Matu, Ui pebala nemuyuh, lemulun luk manu ngalap ulun luk meruked.
- ⁴⁸Ui ini Ruti Ulun.
- ⁴⁹Tepun muyuh pangeh nekuman manna déi' su luk ali-ali, idi ideh naté teh.
- ⁵⁰Idé-idé luk kuman Ruti luk temurun rat surga, na ieh maté.
- ⁵¹Ui ini Ruti luk mulun, luk temurun rat surga. Kudeng idé lemulun kuman ratnan Ruti ini, ieh miak mulun raked-raked. Idi Ruti luk barénKu ineh, ieh ineh bururKu. Ui maré ineh pad tana' ini ngalap ulun."
- ⁵²Idi lun Yahudi nepekedaluh arangdeh sebuleng idi nepebala, "Kudeng apehké lun ini miak amré bururNeh kenen kai?"
- ⁵³Idi kebala Yésus nedeh, "Matu, Ui pebala nemuyuh, kudeng muyuh na kuman burur Anak-Lemulun idi ngirup dara'Neh, na muyuh miak ngalap ulun bang burur muyuh.
- ⁵⁴Kudeng idé-idé luk kuman bururKu idi ngirup dara'Ku, ieh inan ulun luk meruked, idi Ui ini sikal nui neneh kareb aco luk kekiped.

- ⁵⁵Ngaceku bururKu, ieh ineh akan luk matu, idi dara'Ku, ieh ineh luk rupen luk matu.
- ⁵⁶Kudeng idé-idé luk kuman bururKu idi ngirup dara'Ku, idi ieh lutep bang Negku, idi Ui pana' lutep bang neneh.
- ⁵⁷Mepad kudeng Taman luk mulun ineh nengecuk Negku, idi Ui pana' mulun ngaceku ratnan Taman ineh, kudeng ineh teh idé-idé luk kuman bururKu, ieh pana' miak mulun ngaceku Ui mulun.
- ⁵⁸Ini Ruti luk temurun rat surga. Na ieh mepad kudeng ruti luk kinan tepun muyuh, luk ngacing até. Idé-idé luk kuman Ruti ini, ieh miak mulun raked-ruked.”
- ⁵⁹Amung-amung bala ini bila Yésus bang ruma' sembayang, kareb Ieh nemada' déi' Kapernaum.
- ⁶⁰Mula' Anak sekola'Neh neninger bala ineh kudeng ini, idi kebaladeh, "Mikat kali' ilung bala ini. Idéké luk miak ninger ineh?”
- ⁶¹Yésus kali' anak-anak sekola'Neh dureng-dureng ratnan bala ini, idi kebalaNeh nedeh, "Muyuh mesabeng ku bala iniké?”
- ⁶²Kudeng apehké kareb muyuh nier Anak-Lemulun umak amé' su luk inanNeh atun?
- ⁶³Roh, Ieh ineh luk ngulun, idi burur, sebuleng pana' na ulekneh. Idi bala luk Ui mala kuan muyuh ngacing Roh Allah luk maré ulun.
- ⁶⁴Iamo' inan teh rat arang muyuh tuda'-tuda' lemulun luk na manu." Ngaceku rat punneh Yésus nekali' idé luk na manu ineh, idi idé luk sikal masui Neneh.
- ⁶⁵Idi kebur'i'Neh, "Ini punneh Ui nepebala nemuyuh, idi seburur pana' na miak macing Negku kudeng na ratnan Taman.”
- ⁶⁶Ngaceku ineh mula' anak sekola'Neh nelemubed, idi na nemaya' Neneh teh.
- ⁶⁷Idi kebala Yésus nan pulu' dueh anak sekola'Neh ineh, "Inanké muyuh pian necan Negku?”

⁶⁸Idi kebala Simun Pétrus Neneh, "O Tuhan, amé' nidéké kai? BalaMu mo' luk maré ulun luk meruked.

⁶⁹Kai ini pangeh manu idi kali', idi Iko ineh Luk Meluun Ligan luk macing ratnan Allah."

⁷⁰Idi kebala Yésus nedeh, "Bakenké Ui nemili' nemuyuh luk pulu' dueh burur ini? Iamo' inan seburur rat arang muyuh luk mangun ku sétan."

⁷¹Ieh nepebala ratnan Yudas, anak Simun Iskariot; ngaceku ieh luk sikal masui Yésus, idi ieh pana' seburur rat arang pulu' dueh anak sekola' ineh.

Yahya 7

¹Muci ratnan ineh Yésus nenalan déi' tana' Galilia. Ieh na sikal lemaba bawang Yudia, ngaceku lun Yahudi nakap dalam sikal ngaté Neneh.

²Iamo' irau lun Yahudi pangeh muneng, ieh ineh Irau Lepo.

³Idi kebala kinanak-kinanakNeh Neneh, "Nalan rat ieni, idi amé' tana' Yudia, pad anak-anak sekola'Mu miak nier amung-amung kekamen luk ruenMu.

⁴Seburur pana' na miak nganau' anun-anun dengan lulem kudeng ieh sebuleng sikal buren. Kudeng Iko nganau' kekamen ineh, ngegala' bururMu kuan uang tana' ini!"

⁵Kinanak-kinanakNeh pana' nateh manu Neneh.

⁶Idi kebala Yésus nedeh, "KarebKu ngegala' rayehKu nateh nacing; iamo' kareb muyuh ineh idi kidi-kidi.

⁷Uang tana' ini na megateh nemuyuh iamo' ieh megateh Negku, ngaceku ui ngegala' ratnan amung-amung kekamendeh luk dat.

⁸Do' muyuh amé' ku irau. Nateh Ui netemina' amé' ku irau ini, ngaceku karebKu ngegala' rayehKu nateh nacing."

⁹Kudeng ineh teh balaNeh. Idi Ieh netudo déi' Galilia.

¹⁰Pangeh kinanak-kinanakNeh iné' ku irau ineh, idi Yésus iné' teh. Iamo' na Ieh nesibada'. Ieh iné' lulem.

- ¹¹Lun Yahudi nenakap Neneh bang irau ineh idi nepebala, 'Iapehké Ieh?'”
- ¹²Idi lun mula' pelaba dureng ratnan Yésus. Idi inan luk pebala, "Ieh lemulun luk do'," idi lun baken nepebala, 'Baken, iamo' Ieh naluk nelun mula' ineh.”
- ¹³Iamo' seburur pana' na pebala-pebala dengan megala' ratnan Yésus, ngaceku ideh matot nelun Yahudi.
- ¹⁴Kareb uned irau ineh, idi Yésus nesemeut bang Ruma' Allah idi nemada'.
- ¹⁵Idi lun Yahudi mawa, keburideh, "Kudeng apehké lemulun ini kali' surat dengan na nesibada'?"”
- ¹⁶Idi kebala Yésus, "Bada'Ku ineh baken rat Negku, iamo' ratnan Allah luk nengecuk Negku.
- ¹⁷Kudeng idé lemulun luk sikal nganau' pian Allah, ieh miak kali' ratnan bada' ini, kudeng ratnan Allah punneh, kian, Ui pebala dengan pianKu sebuleng lek.
- ¹⁸Lemulun luk pebala dengan pianneh sebuleng, ieh nakap rayehneh sebuleng, iamo' lemulun luk nakap rayehneh luk nengecuk neneh, ieh ineh luk matu, idi na luk idi sala' bang neneh.
- ¹⁹Naké Musa nemaré Ukum kuan muyuh? Idi na luk idi seburur pana' rat arang muyuh luk maya' Ukum ineh. Anunké punneh muyuh nakap dalam sikal ngaté Negku?"”
- ²⁰Idi kebala lun mula', "Iko sinuet ada'. Idéké nakap dalam sikal ngaté Namu?"”
- ²¹Kebala Yésus nedeh, "Ui nenganau' aceh kekamen luk melalud, idi amung muyuh mawa ku ineh.
- ²²Musa nengecuk nemuyuh uen nunat. Kareb Aco luk inan Mudeng pana' muyuh miak nunat anak muyuh. Setuneh adat nunat baken rat ni Musa, iamo' ratnan tepun muyuh sebuleng.
- ²³Kudeng selemulun sinunat kareb Aco luk inan Mudeng, pad Ukum Musa na uen ngelaba ngudehké muyuh museh Negku ngaceku Ui nengedo' selemulun kareb Aco luk inan Mudeng?

- ²⁴Aleg muyuh ngadu' lemulun maya' luk sinier muyuh mo', iamo' mutut ukum dengan mesiri idi matu.”
- ²⁵Inan tuda'-tuda' lemulun rat Yerusalim luk nepebala, "Bakenké Ieh ini luk tekapen lun Yahudi, pad Ieh pitayendeh?
- ²⁶Siruh! Ieh pebala pa kiung lun mula', idi na lemulun mebpeng Neneh. Kian, lun rayeh-rayeh kali' lek idi matu Ieh ini Keristus?
- ²⁷Kareb Kerisuts macing, seburur pana' na miak kali' rat iapeh iratNeh. Iamo' kai kali' lemulun ini, idi rat iapeh iratNeh.”
- ²⁸Kareb Yésus nemada' bang Ruma' Allah, idi Ieh nengitang, kebalaNeh, "Matuké muyuh ngiti Negku; inanké muyuh kali' rat iapeh iratKu? Ui na macing maya' pianKu sebuleng. Ieh luk nengecuk Negku ineh matu, idi muyuh na ngiti Neneh.
- ²⁹Ui miti Neneh, ngaceku Ui nacing rat Neneh, idi Ieh luk nengecuk Negku.”
- ³⁰Di lun rayeh lun Yahudi nenakap dalam sikal ngakem Neneh, iamo' seburur pana' na mekuu' ngakem Neneh, ngaceku tarekNeh nateh nacing.
- ³¹Iamo' mula' lemulun rat arang lun mula' ineh manu Neneh, idi nepebala, "Kareb Keristus macing, miakké Ieh nganau' tanu' meluun ula' ratnan luk inau' lemulun ini?”
- ³²Lun Parisi neninger lun mula' ineh pebala-pebala kudeng ini ratna Yésus. Idi imam-imam rayeh idi lun Parisi pana' nengecuk tuda'-tuda' lun pulis amé' ngakem Neneh.
- ³³Idi kebala Yésus, "Segageh mo' kinioneh Ui tudo dengan muyuh, idi Ui amé' Neneh luk nengecuk Negku.
- ³⁴Muyuh sikal nakap Negku, idi na muyuh miak ngalap Negku: idi su luk inanKu, muyuh na miak macing.”
- ³⁵Idi lun Yahudi nepebala arangdeh sebuleng, "Iapehké ulek lemulun ini pad tau na miak ngalap Neneh? Sikalké Ieh amé' bawang lun Grika su luk inan lun Yahudi tebawang pad Ieh mada' nelun Grika?

³⁶KebalaNeh, 'Muyuh sikal nakap Negku, idi na muyuh miak kali' Negku, idi su luk inanKu, muyuh na miak amé.' Anunké ilung balaNeh ineh?"

³⁷Aco luk kekiped bang irau ineh, ieh ineh aco luk meluun rayeh. Bang aco sineh Yésus netuped idi nengitang, kebalaNeh, "Kudeng idé lemulun luk meparing, do' ieh macing Negku idi ngirup.

³⁸Maya' kudeng luk inayud bang Surat Allah, 'Idé-idé luk manu Negku, rat bang neneh ineh miak manud tuda'-tuda' bued abpa' luk mulun.' "

(³⁹Ieh nemala ini ratnan Roh luk miak lapen amung-amung lemulun luk manu Neneh. Ngaceku kareb ineh nateh Roh Meligan biré, ngaceku Yésus nateh rinayeh.)

⁴⁰Mula' lemulun neninger bala ini, idi ideh nepebala, "Matu Ieh ini nabi ineh!"

⁴¹Lun baken nepebala, "Ieh ini Keristus." Inan teh lun baken nepebala, "Keristus na miak macing rat Galilia!

⁴²Pangeh inayud bang Surat Allah, Keristus ineh inul Daud, idi uen nenganak déi' Baitlahim su luk inan Daud tudo."

⁴³Ngaceku lun mula' pekedaluh ratnan Yésus.

⁴⁴Sebuangdeh sikal ngakem Neneh, iamo' seburur pana' nateh luk mekuu'.

⁴⁵Idi lun pulis ineh nelemubed iné' inan imam-imam rayeh idi lun Parisi luk nengitun nedeh, kebaladeh, "Ngudehké muyuh na nenguit Neneh?"

⁴⁶Idi kehuri' lun pulis ineh, "Nateh lemulun nepebala mepad kudeng lemulun ini."

⁴⁷Idi kebala lun Parisi nedeh, "Pangehké muyuh rinaruhNeh?"

⁴⁸Inanké muyuh nekali' seburur lun rayeh kian lun Parisi lek, luk manu Neneh?

⁴⁹Lun mula' ini na kali' Ukum Musa, idi ideh kidiman Allah!"

⁵⁰Idi Nikodimus seburur rat arang lun Parisi ineh, ieh ineh luk nepapu' Yésus atun. Ieh nepebala nedeh,

⁵¹"Maya' Ukum tau, tau na miak ngukum selemulun kareb nateh neninger luk inau' idi luk belénneh."

⁵²Idi kebaladeh, "Iko rat Galilia teh? Ngelio bang Surat Allah! Inanké nabi luk macing rat Galilia?"

Yahya 8

¹Idi amung-amungdeh nuli'. Iamo' Yésus iné' déi' Surud Saitun.

²Pekak kenebpa idi Ieh iné' bang Ruma' Allah teh, idi lun mula' iné' Neneh, idi Ieh netudo mada' nedeh.

³Idi guru-guru Ukum idi lun Parisi pana' nenguit seburur decur luk kikem uned pasét, idi ideh nenganau' neneh tuped pa atundeh,

⁴idi nepebala nan Yésus, "O Guru, decur ini kikem uned pasét.

⁵Bang Ukum kai Musa nengecuk mitung decur luk kudeng ini ku batu. Kudeng apehké terawé Guru ratnan ineh?"

⁶Ideh nemala ini sikal nutun Neneh, pad ideh miak ngadu' Neneh. Iamo' Yésus nemunel idi nengayud luun tana' ku bua' tiku'Neh.

⁷Iamo' kareb ideh ngitun Neneh, Ieh netuped idi nepebala nedeh, "Idé-idé rat arang muyuh luk na nenganau' sala' do' ieh mitung decur ini ku batu atun."

⁸Idi Ieh nemunel teh idi nengayud luun tana'.

⁹Kareb ideh neninger bala ineh, ideh neremuat sebuleng-sebuleng, ngimun rat nelun merar. Yésus sebuleng neketecan. Idi decur ineh pana' tuped su ineh.

¹⁰Yésus netuped, idi nepebala neneh, "O decur, iapehké ideh? Naké seburur neketecan teh luk ngukum namu?"

- ¹¹Idi keburu' decur ineh, "Seburur pana' nateh, O Tuhan." Idi keburu' Yésus neneh, "Ui ini pana' nateh sikal ngukum namu. Muli' iko, idi aleg nganau' sala' peh."]
- ¹²Yésus nemada' nedeh teh, kebalaNeh, "Ui ini Acang Tana'. Idé-idé luk maya' Negku miak ngalap acang luk maré ulun, idi na ieh miak nalan bang daceh." "
- ¹³Idi keburu' lun Parisi Neneh, "Iko maré kali' ratnan bururMu sebuleng; luk nekali'Mu ineh na matu."
- ¹⁴Idi kebala Yésus, "Sagan pana' Ui maré kali' ratnan bururKu sebuleng, matu teh luk nekali'Ku ineh, ngaceku Ui kali' rat iapeh Ui nacing idi iapeh ulekKu, iamo' muyuh ini ka kali' rat iapeh Ui nacing idi iapeh ulekKu.
- ¹⁵Muyuh ini ngukum maya' terawé lemulun; Ui ini na ngukum seburur pana'.
- ¹⁶Iamo' kudeng Ui ngukum pana', idi ukumKu ineh matu, ngaceku baken Ui sebuleng mo' iamo' Taman luk nengecuk Negku idi denganKu.
- ¹⁷Bang ukum muyuh pangeh inayud, idi luk nekali' dueh burur matu peh.
- ¹⁸Ui maré kali' ratnan bururKu sebuleng, idi teh Taman luk nengecuk Negku pana' maré kali' ratnan Ui."
- ¹⁹Idi keburu'deh Neneh, "Iapehké TamanMu?" Idi kebala Yésus, "Muyuh na miti Negku idi TamanKu pana' muyuh na miti. Kudeng muyuh miti Negku, kali' rungen muyuh miti TamanKu teh."
- ²⁰Amung bala ini bilaNeh kareb Ieh mada' bang Ruma' Allah, muneng ku su luk inan nganug usin. Idi seburur pana' na nengakem Neneh, ngaceku tarekNeh nateh nacing.
- ²¹Kebala Yésus nedeh teh, "Ui ini amé', idi muyuh sikal nakap Negku, iamo' muyuh miak maté bang sala' muyuh. Muyuh na miak macing su luk inanKu amé'."
- ²²Idi keburu' lun Yahudi, "KebalaNeh, 'Muyuh na miak macing su luk inanKu amé'. Ieh sikal peripatéké?"

- ²³Idi kebala Yésus nedeh, "Muyuh ini rat pa liang, Ui ini rat déi' dita'. Muyuh ini ratnan tana' ini, Ui ini baken ratnan tana' ini.
- ²⁴Ineh punneh Ui nepebala nemuyuh, idi muyuh miak maté bang sala' muyuh. Kali' rungen muyuh miak maté bang sala' muyuh, kudeng muyuh na manu, idi Ui ini Ieh."
- ²⁵Idi keburideh Neneh, "Idéké Iko ini?" Idi kebala Yésus nedeh, "Anunké ulekneh Ui pebala kuan muyuh teh.
- ²⁶Inan mula' luk belénKu idi luk ruenKu mutut ratnan muyuh, iamo' Ieh luk nengecuk Negku matu peh, idi anun luk pindengerKu rat Neneh, ineh teh luk belénKu kuan uang tana' ini."
- ²⁷Idi ideh na kali' luk bilaNeh nedeh, ieh ineh ratnan Taman.
- ²⁸Idi kebala Yésus nedeh, "Kareb muyuh ngikit Anak-Lemulun, idi muyuh miak kali' Ui ini Ieh, idi teh muyuh miak kali' idi sebuleng pana' na Ui nganau' maya' pianKu sebuleng, iamo' mepad kudeng TamanKu nemada' Negku, kudeng ineh teh luk belénKu.
- ²⁹Idi Ieh luk nengecuk Negku idi denganKu, idi na Ieh necan Negku sebuleng, ngaceku Ui megéi' maya' luk pianNeh."
- ³⁰Kareb Yésus pebala kudeng ineh, mula' lemulun manu Neneh.
- ³¹Idi kebala Yésus nelun Yahudi luk manu Neneh, "Kudeng muyuh maya' balaKu, idi dengan matu muyuh mangun ku anak-anak sekola'ku,
- ³²idi muyuh miak kali' luk matu, idi luk matu ineh miak muit nemuyuh."
- ³³Idi kebaladeh, "Kai ini mupun Ibrahim, idi nateh kai mangun ku demulun seburur pana', kudeng apehké balaMu, 'Muyuh miak mepuit?'"
- ³⁴Kebala Yésus nedeh, "Matu, Ui pebala nemuyuh, idé-idé luk nganau' sala', ieh ineh luk demulun sala'.
- ³⁵Idi demulun ineh na mangun ku uang tetek ruma' raked-raked, iamo' anak ineh tudo raked-raked.
- ³⁶Kudeng Anak ineh muit nemuyuh, idi muyuh pangeh mepuit dengan matu.

- ³⁷Ui kali' muyuh mupun Ibrahim, iamo' muyuh nakap dalam ngaté Negku, ngaceku bada'Ku na lapen muyuh.
- ³⁸Ui pebala ratnan luk bida' TamanKu Negku, iamo' muyuh pana' nganau' luk bida' taman muyuh nemuyuh.”
- ³⁹Idi ideh nengor balaNeh, keburideh, "Ibrahim, ieh luk taman kai." Idi keburideh Yésus nedeh, "Kudeng muyuh anak Ibrahim, kali' rungen muyuh sikal nganau' teh amung-amung kekamen Ibrahim.
- ⁴⁰Luk pangeh inau'Ku, ieh ineh ngegala' kuan muyuh anun-anun luk matu luk ilapKu ratnan Allah. Iamo' muyuh pian ngaté Negku. Ibrahim na nenganau' kudeng ineh!
- ⁴¹Muyuh ini nganau' kekamen taman muyuh." Idi keburideh Neneh, "Baken kai tinganak ratnan sét. Inan sebuleng Taman kai, ieh ineh Allah.”
- ⁴²Idi kebala Yésus nedeh, "Kudeng Allah ineh Taman muyuh, kali' rungen muyuh mawa Negku, ngaceku Ui pangeh nacing ratnan Allah, idi nekini Ui idi ieni. Na Ui nacing maya' pianKu sebuleng, iamo' Ieh luk nengecuk Negku.
- ⁴³Ngudehké muyuh na kali' ilung balaKu? Ngaceku muyuh na miak ninger bada'Ku ini.
- ⁴⁴Taman muyuh, ieh ineh Iblis, idi muyuh sikal maya' pian taman muyuh. Rat pun-pun Iblis, ieh ineh lun ngaté, idi na ieh tudo bang luk matu, ngaceku na luk matu bang neneh. Kareb ieh mebalih idi ieh pebala maya' ayuneh sebuleng, ngaceku ieh luk mebalih ineh taman amung-amung balih.
- ⁴⁵Iamo' Ui ngegala' luk matu ratnan Allah. Ineh punneh muyuh na manu Negku.
- ⁴⁶Idéké rat arang muyuh miak ngesala' Negku? Kudeng Ui mala luk matu, ngudehké muyuh na manu Negku?
- ⁴⁷Lemulun luk ratnan Allah, ieh teh luk ninger bala Allah. Ini punneh muyuh na ninger bala ineh, ngaceku muyuh baken ratnan Allah.”

⁴⁸Idi lun Yahudi nengor bala Yésus, keburideh, "Bakenké matu luk bila kai, Iko seburur lun Samaria, idi Iko sinuet ada?"

⁴⁹Idi kebala Yésus, "Ui na sinuet ada'. Ui ngedita' TamanKu, iamo' muyuh ngedat Negku.

⁵⁰Ui na nakap rayeh kuan bururKu sebuleng. Inan Sebuleng luk ngerayeh Negku idi luk ngamo Negku matu.

⁵¹Matu, Ui pebala nemuyuh, kudeng idé lemulun maya' balaKu, na ieh miak maté."

⁵²Idi keburideh lun Yahudi Neneh, "Nekini kai kali' idi Iko sinuet ada'. Ibrahim idi amung-amung nabi pangeh naté. Iamo' Iko ini pebala, 'Kudeng idé lemulun maya' balaKu na ieh miak maté.'

⁵³Taman kai Ibrahim pangeh naté! Ikoké meluun rayeh ratnan Ibrahim? Amung-amung nabi pana' pangeh naté. Bang terawéMu, idéké Iko?"

⁵⁴Kebala Yésus, "Kudeng Ui ngerayeh bururKu sebuleng, kali' rungen rayehKu na ulek. Iamo' luk ngerayeh Negku, ieh ineh TamanKu luk belén muyuh Allah muyuh.

⁵⁵Muyuh na miti Neneh, iamo' Ui miti Neneh. Kudeng Ui pebala idi na Ui miti Neneh, kali' rungen Ui mepad kudeng muyuh luk mebalih, iamo' Ui miti Neneh, idi Ui maya' balaNeh.

⁵⁶Idi taman muyuh Ibrahim geregan nier acoKu; ieh pangeh nenier ineh idi ieh mawang niat peh."

⁵⁷Idi keburideh lun Yahudi Neneh, "UlunMu nateh limeh ngepulu' lak, idi Iko pangeh nenier Ibrahimké?"

⁵⁸Idi kebala Yésus, "Matu, Ui pebala nemuyuh, kareb nateh Ibrahim tinganak, Ui ini pangeh idi."

⁵⁹Idi ideh nengamung batu pian mitung Neneh, iamo' Yésus nesigapung idi neremuat rat bang Ruma' Allah ineh.

Yahya 9

¹Yésus nenalan, idi Ieh nenier selemulun luk nebuser rat bang batek tinanneh.

²Idi anak-anak sekola'Neh nengitun Neneh, keburideh, "O Guru, idéké luk nenganau' sala', lemulun iniké kian taman-tinanneh lek, pad ieh mebuser rat bang batek tinanneh?"

³Idi kebala Yésus, "Baken lemulun ini nebuser ngaceku sala'neh sebuleng idi sala' taman-tinanneh, iamo' pad lalud Allah miak uen ngegala' bang ulunneh.

⁴Do' tau nganau' kekamen Allah luk nengecuk Negku ini kareb aco macang teh. Ngaceku dacem sikal macing idi kareb ineh seburur pana' na miak ngakem.

⁵Ruked Ui bang tana' ini, Ui ini Acang Tana'."

⁶Kareb Ieh pangeh nepebala kudeng ini, idi Ieh nengelica' luun tana', idi nenganau' tana' ineh mesalit ku aka'Neh. Idi Ieh nemiid tana' salit ineh luun mateh lun mebuser ineh,

⁷idi nepebala neneh, "Amé' iko sibaru' déi' bang Takung Siloam!" (Ilung Siloam bang buri' Iberani, ieh ineh "Icuk.") Idi ieh iné' sibaru', idi nelemubed dengan matehneh nedo.'

⁸Idi keburideh lun bang bawangneh idi lun baken pana' luk nekali' neneh atun mutuh mo', "Bakenké ieh ini lun luk tudo mutuh mo'?"

⁹Inan luk nepebala, "Ini ieh." Inan teh luk nepebala, "Baken, iamo' ayuneh mepad kudeng ieh." Lemulun ineh sebuleng nepebala, "Ui ini ieh."

¹⁰Idi keburideh neneh, "Kudeng apehké matehmu nedo'?"

¹¹Idi kebalaneh, "Inan selemulun ngadanNeh Yésus nenganau' tana' ineh mesalit, idi nemiid luun matehku idi nepebala, 'Amé' iko sibaru' déi' Takung Siloam.' Idi ui pana' iné' sibaru' déi', idi ui miak nier."

¹²Idi ideh nengitun neneh, keburideh, "Iapehké lemulun ineh?" Idi keburineh, "Ui na kali'."

¹³Idi ideh nenguit lun luk nebuser ineh amé' matun lun Parisi.

¹⁴Kareb Yésus nenganau' tana' salit ineh idi nengedo' matehneh, ieh ineh Aco luk inan Mudeng.

¹⁵Idi lun Parisi nengitun neneh sekua' teh, kudeng apehké ieh nier. Idi keburineh nedeh, "Ieh nenganau' tana' salit luun matehku, idi ui nesibaru' idi nenier."

¹⁶Idi sebuang lun Parisi ineh nepebala, "Lemulun ini baken ratnan Allah, ngaceku Ieh na maya' ukum Aco luk inan Mudeng." Idi inan teh lemulun luk pebala, "Kudeng apehké seburur lun mesala' miak nganau' tanu'-tanu' luk kudeng ineh?" Idi ideh pekedaluh arangdeh sebuleng.

¹⁷Ngaceku ineh ideh nengitun neneh sekua'teh, "Anunké luk belénmu ratnan Ieh? Ngaceku Ieh pangeh nengedo' matehmu?" Idi ieh nengor baladeh, keburineh, "Ieh ineh nabi."

¹⁸Idi lun Yahudi na manu ratnan ieh nebuser atun idi nekini miak nier, pad ideh nenawar taman-tinan lemulun luk nedo' mateh ineh.

¹⁹Idi ideh nengitun nedidueh, keburideh, "Matuké, ieh ini anak medueh, luk bila medueh nebuser rat bang batek? Kudeng apehké ieh miak nier nekini?"

²⁰Idi kebala taman-tinaneh, "Kai miti neneh idi ieh ini luk anak kai, idi teh ieh nebuser rat bang batek.

²¹Na kai kali' kudeng afeh ieh miak nier. Idi na kai kali' idé luk nengedo' matehneh. Ngitun neneh sebuleng, ieh pangeh rayeh, nima' neneh sebuleng maré kali'."

²²Taman-tinaneh nepebala kudeng ineh ngaceku matot nelun Yahudi, ngaceku ideh pangeh nepegayam, idi kudeng inan selemulun ngamo Yésus ineh Keristus, ieh miak talan rat bang ruma' sembayang.

²³Ineh punneh taman-tinaneh nepebala, "Ieh pangeh rayeh, do' ngitun neneh sebuleng."

²⁴Idi ideh nenawar lun luk nebuser ineh sekua' teh, idi nepebala neneh, "Do' iko mada' luk matu pa kiung Allah! Kai ini kali', idi lemulun ineh lun mesala'."

²⁵Idi ieh nengor baladeh, keburineh, "Kudeng Ieh seburur lun mesala' ui na kali', iamo' sebuleng mo' luk ui kali', idi atun ui nebuser, idi nekini ui nier."

²⁶Idi keburideh neneh, "Anunké luk inau'Neh kuanmu? Kudeng apehké Ieh nengedo' matehmu?"

²⁷Idi keburineh nedeh, "Pangeh ui nemala kuan muyuh, iamo' na muyuh neninger. Anunké punneh muyuh sikal ninger sekua' teh? Sikalké muyuh mangun ku anak sekola'Neh?"

²⁸Idi ideh nengedat neneh, kebaladeh, "Iko ini luk anak sekola'Neh, iamo' kai ini anak sekola' Musa.

²⁹Kai kali' idi Allah pangeh nepebala kuan Musa; iamo' ratnan lemulun ini kai na kali' rat iapeh Ieh nacing."

³⁰Idi lemulun ineh nengor baladeh, keburineh, "Ui mawa ku ineh, muyuh na kali' rat iapeh Ieh nacing sagan pana' Ieh nengedo' matehku.

³¹Tau kali' idi Allah na ninger lemulun luk mesala', iamo' lemulun luk sembayang inan Allah idi luk nganau' pinianNeh, ieh ineh mo' luk pedingerenNeh.

³²Rat pun tana' ini nateh lemulun nekali' bala ratnan lemulun luk ngedo' mateh lemulun luk nebuser rat bang batek.

³³Kudeng lemulun ineh baken ratnan Allah, Ieh na miak nganau' anun-anun."

³⁴Idi ideh nengor balaneh, keburideh, "Matu iko ini tinganak bang sala', idi iko sikal mada' nekaiké?" Idi ideh nenala' neneh rat bang ruma' sembayang.

³⁵Yésus neninger ratnan lemulun ineh pangeh tila'deh. Idi Ieh nenakap neneh kebalaNeh, "Manuké iko inan Anak Allah?"

³⁶Idi lemulun ineh nengor balaNeh, "Idéké Ieh ineh, O Guru, pad ui miak manu Neneh?"

³⁷Idi keburu' Yésus neneh, "Iko pangeh nenier Neneh, idi luk pebala denganmu, ieh ineh Ieh."

³⁸Idi keburu'neh, "O Tuhan, ui manu." Idi ieh netekeradung pa kiung Yésus.

³⁹Idi kebala Yésus, "Ui macing bang tana' ini pad mutut ukum luk matu, pad lemulun luk na nier miak nier, idi lemulun luk nier ineh mangun mebuser."

⁴⁰Tuda'-tuda' lun Parisi luk idi denganNeh déi' neninger bala ini idi nepebala Neneh, "Iko ngerawé kai mebuserké?"

⁴¹Idi kebala Yésus nedeh, "Kudeng muyuh mebuser, na muyuh mesala', iamo' ngaceku muyuh pebala, 'Kai nier,' sala' muyuh ineh idi teh.

Yahya 10

¹"Matu, Ui pebala nemuyuh, idé-idé luk na semuet bang libung dumba maya' tanga', iamo' manad maya' dalan luk baken, ieh ineh lemulun luk mano idi lun ngaro.

²Lemulun luk semuet maya' tanga' ineh, ieh ineh lun luk matar dumba.

³Lun luk matar tanga' ngukab tanga' kuanneh, idi dumba-dumba ineh ninger uni tangneh, idi ieh nawar ngadan anid-anid dumbaneh, idi nenguit nedeh remuat.

⁴Kareb ieh pangeh nengeruat dumbaneh ineh, idi ieh nalan pa atundeh, idi dumba-dumba ineh maya' neneh, ngaceku ideh miti uni tangneh.

⁵Na tu-tu ideh sikal maya' nelun baken, iamo' ideh buro rat neneh, ngaceku na ideh miti uni tang lun baken."

⁶Idi luk pinginud ineh bila Yésus nedeh; iamo' na ideh kali' ilung luk bilaNeh nedeh.

⁷Idi Yésus nepebala nedeh teh, "Matu, Ui pebala nemuyuh, Ui ini Tanga' kuan dumba ineh.

⁸Amung-amung lemulun luk nacing atun rat Negku, ieh ineh lemulun luk mano idi lun ngaro, iamo' dumba ineh na ninger baladeh.

- ⁹Ui ini Tanga'. Kudeng idé lemulun semuet maya' Negku, ieh miak uen ngulun, idi ieh pana' remuat idi semuet idi ngalap akanneh.
- ¹⁰Idi lun mano ineh macing sikal mano idi ngaté idi ngusag mo'. Ui ini nacing pad dumba ineh miak ngalap ulun idi ngalap ulun ineh dengan mela.
- ¹¹"Ui ini Lun Matar luk Do'; idi Lun Matar luk Do' ineh maré ulunNeh ku libal dumba-dumba ineh.
- ¹²Lun tebarin luk baken lun matar, idi teh dumba ineh baken aya'neh sebuleng, kareb ieh nier bungalé luk macing, idi ieh necan sengeriudan dumba ineh idi upun muit bururneh sebuleng, idi bungalé ngakem dumba ineh pad matad-matad nedeh.
- ¹³Idi lun tebarin ineh buro ngaceku ieh kali' rungen lun tebarin mo', idi na ieh méi' inan dumba ineh.
- ¹⁴Ui ini Lun Matar luk Do'; idi Ui miti dumba-dumbaKu idi dumba-dumbaKu miti Negku teh,
- ¹⁵mepad kudeng Taman miti Negku, idi Ui pana' miti Taman; idi Ui maré ulunKu ngaceku amung-amung dumba ineh.
- ¹⁶Inan teh dumbaKu luk baken luk na semuet bang libung dumba ini; idi amung-amung ini pana' Ui miak nguit, idi dumba-dumba ineh miak ninger uni tangKu, idi miak mangun ku aceh sengeriudan idi Lun Matar ineh pana' sebuleng mo'.
- ¹⁷"Taman mawa Negku, ngaceku Ui maré ulunKu pad Ui miak ngalap neneh lemubed teh.
- ¹⁸Seburur pana' na ngalap ulunKu rat Negku, iamo' Ui maré neneh maya' pianKu sebuleng. Ui melalud maré neneh idi melalud ngalap neneh lemubed teh. Ini lalud luk ilapKu ratnan TamanKu."
- ¹⁹Idi lun Yahudi pekedaluh ratnan bala ineh.
- ²⁰Idi mula' rat arangdeh nepebala, "Teh sinuet ada! Ieh meruden! Ngudehké muyuh ninger balaNeh?"

- ²¹Inan teh luk baken nepebala, "Lemulun luk sinuet ada' na miak pebala kudeng ini. Kudeng apehké ada' miak ngedo' match lun mebuser?"
- ²²Kareb ineh, ieh ineh kareb meteneb, inan Irau Ngeligan Ruma' Allah déi' Yerusalim.
- ²³Idi Yésus nalan bang Ruma' Allah, ieh ineh luun Tador Selimun.
- ²⁴Idi lun Yahudi nepamung libut-libutNeh idi kebaladeh, "Anunké kinioneh teh Iko ngagau niat kai? Kudeng Iko ini Keristus, mala kuan kai dengan megala'."
- ²⁵Kebala Yésus nedeh, "Ui pangeh nemada' nemuyuh, idi na muyuh manu. Kekamen luk inau'Ku dengan ngadan TamanKu, ieh ineh maré kali' ratnan Ui.
- ²⁶Iamo' muyuh ini na manu, ngaceku muyuh baken dumbaKu.
- ²⁷Dumba-dumbaKu ninger uni tangKu, idi Ui miti nedeh, idi ideh maya' Negku.
- ²⁸Ui maré kuandeh ulun luk meruked, idi na tu dumba-dumba ineh miak maté ruked-ruked peh, idi seburur pana' na miak ngaro nedeh rat bang paladKu.
- ²⁹TamanKu luk nemaré nedeh kuanKu meluun rayeh ratnan amung-amung; idi seburur pana' na miak ngaro nedeh rat bang palad TamanKu.
- ³⁰Ui idi Taman ineh Sebuleng."
- ³¹Sekua'teh lun Yahudi nengamung batu sikal mitung Neneh.
- ³²Iamo' kebala Yésus nedeh, "Mula' kekamen luk do' pangeh inau'Ku kuan muyuh dengan ngadan TamanKu; ratnan kekamen anunké muyuh sikal mitung Negku?"
- ³³Idi lun Yahudi nengor balaNeh, keburideh, "Baken ngaceku kekamen luk do' kai mitung Namu, iamo' ngaceku Iko nguyo Allah. Iko lemulun mo' iamo' Iko maad bururMu dengan Allah."
- ³⁴Kebala Yésus nedeh, "Bakenké bang Ukum muyuh inan luk pangeh inayud kudeng ini, 'Ui pangeh nepebala, muyuh allah-allah'?"

³⁵Tau kali' bala luk inayud bang Surat Allah na miak uen ngalum macing ruked-ruked. Allah sebuleng neten allah-allah, ieh ineh lemulun luk inan bala Allah pangeh biré.

³⁶Miakké muyuh ini pebala Ui nguyo Allah, ngaceku Ui ngamo Ui ini Anak Allah? Ui ini luk pinili' idi icuk Allah amé' bang tana' ini.

³⁷Kudeng na Ui nganau' kekamen TamanKu, aleg muyuh manu Negku.

³⁸Iamo' kudeng Ui nganau' ineh, sagan pana' muyuh na manu Negku, na miak na muyuh manu ku kekamenKu pad muyuh kali' do'-do' ratnan Taman ineh idi bang Negku idi Ui pana' bang Neneh.”

³⁹Idi sekua' teh ideh nenakap dalam sikal ngakem Neneh, iamo' Yésus mepuit rat bang paladdeh.

⁴⁰Yésus iné' déi' dipar Abpa' Yarden teh, su luk inan Yahya nengerereb lemulun atun. Idi Ieh netudo déi'.

⁴¹Idi mula' lemulun nacing Neneh idi nepebala, "Kali' rungen Yahya na nenganau' sebuleng tanu', iamo' amung-amung bala luk bila Yahya ratnan lemulun ini matu peh.”

⁴²Idi mula' lemulun luk déi' manu inan Yésus.

Yahya 11

¹Inan selemulun luk mét, ngadanneh Lasarus, lun Baitani, ieh ineh bawang Mariam idi kinanakneh Marta.

(²Mariam ineh luk nengumau Yésus ku umau luk do' buen, idi luk nemiid kukudNeh ku abpukneh. Idi Lasarus luk mét, ieh ineh kinanakneh.)

³Idi dueh kinanakneh ineh nemaré bala kuan Yésus, kebala didueh, "O Tuhan, lemulun luk inanMu mawa ineh mét.”

⁴Kareb Yésus neninger bala ineh, keburu'Neh, "Et ini na miak ngacing até kuan Lasarus. Iamo' ini miak ngegala' rayeh Allah, pad Anak Allah pana' uen ngerayeh ngaceku ineh.”

⁵Iamo' Yésus mawa inan Marta, idi kinanakneh luk decur, idi Lasarus ineh.

⁶Kareb Ieh neninger ratnan Lasarus ineh mét, idi Ieh netudo dueh aco su ineh teh.

⁷Pangeh ineh Yésus nepebala inan anak-anak sekola'Neh, "Do' tau lemubed amé' bawang Yudia."

⁸Idi kebala anak-anak sekola'Neh, "O Guru, ina lun Yahudi nakap dalam sikal mitung Namu, idi nekini lko sikal lemubed amé' déi' teh?"

⁹Idi kebala Yésus, "Bakenké bang seaco pulu' dueh jam? Kudeng selemulun nalan kareb acang aco na ieh matuk, ngaceku ieh nier acang tana' ini.

¹⁰Iamo' kudeng ieh nalan kareb medacem, kali' rungen ieh matuk, ngaceku acang ineh na idi bang neneh."

¹¹Yésus nepebala kudeng ini, idi teh keburu'Neh nedeh, "Lun rorum tau Lasarus pangeh nerudap, iamo' Ui amé' nui neneh."

¹²Idi keburu' anak-anak sekola'Neh, "O Tuhan, kudeng ieh rudap, miak ieh do' lek."

¹³Iamo' ilung bala Yésus, Lasarus pangeh naté. Iamo' ideh nengerawé Yésus pebala ratnan Lasarus rudap mo'.

¹⁴Idi Yésus nepebala nedeh dengan megala', "Lasarus pangeh naté.

¹⁵Samal kuan muyuh, Ui na idi déi', pad muyuh manu. Iamo' do' tau amé' ni Lasarus."

¹⁶Idi keburu' Tomas (luk titen Anak Rapid) kuandeh luk pad-pad anak sekola' Yésus, "Do' tau amé' teh, pad tau maté denganNeh."

¹⁷Kareb Yésus nacing, idi Ieh nekali' Lasarus ineh pangeh tinanem apat aco.

¹⁸Kiado Baitani rat Yerusalim na mela ratnan dueh batu.

¹⁹Idi mula' lun Yahudi pangeh nengikak ni Marta idi Mariam sikal ngubuk nedidueh, ngaceku kinanak didueh Lasarus ineh pangeh naté.

²⁰Kareb Marta neninger bala ratnan Yésus macing, idi ieh iné' papu' Neneh. Mariam netudo déi' ruma'.

- ²¹Idi keburu' Marta inan Yésus, "O Tuhan, kudeng Iko idi tungé', kali' rungen kinanakku na naté!
- ²²Iamo' ui kali' teh idi anun-anun luk pituenMu ratnan Alah miak barénNeh kuanMu."
- ²³Idi kebala Yésus ni Marta, "Kinanakmu ineh miak tumui teh."
- ²⁴Idi kebala Marta inan Yésus, "Ui kali' ieh miak tumui kareb aco luk kekiped."
- ²⁵Idi kebala Yésus ni Marta, "Ui ini Tui ratnan até idi Ulun. Idé-idé luk manu Negku, sagan pana' pangeh naté, ieh miak mulun teh;
- ²⁶idi idé-idé luk mulun idi manu Negku, na ieh miak maté raked-raked peh. Manuké iko ku ini?"
- ²⁷Idi kebala Marta, "Mo, Tuhan, ui manu idi Iko ineh Keristus, Anak Allah, luk macing bang tana' ini."
- ²⁸Pangeh Marta nepebala kudeng ini, idi ieh iné' nawar kinanakneh Mariam dengan ayen-ayen, keburu'neh, "Guru idi tungé', idi Ieh nawar namu."
- ²⁹Kareb Mariam neninger kudeng ineh, ieh petacu tumui idi iné' matun Yésus. (³⁰Kareb ineh Yésus nateh nacing bang bawang ineh, iamo' Ieh idi déi' su luk inan Marta nepapu' Neneh teh.)
- ³¹Lun Yahudi luk idi dengan Mariam bang ruma', idi luk nengubuk neneh, nemaya' neneh kareb ideh nenier neneh nudur dengan mesaget. Ideh nengerawé Mariam amé' inan tanem idi nangi' déi'.
- ³²Kareb Mariam nacing su luk inan Yésus ineh idi ieh nenier Neneh, idi ieh netekeradung iring kukudNeh, idi kebalaNeh, "O Tuhan, kudeng Iko idi tungé', na kinanakku ineh naté."
- ³³Kareb Yésus nenier Mariam nangi', idi amung-amung lun Yahudi luk pebaya' neneh ineh pana' nangi', idi niatNeh nesigio idi Ieh mesusa' peh,
- ³⁴idi kebalaNeh "Iapehké ihe inau' muyuh?" Idi keburu'deh Neneh, "O Tuhan, amé' tungé' idi nier."

- 35Yésus nangi'.
- 36Idi kebala lun Yahudi ineh, "Siruh, kudeng apeh Ieh mawa neneh!"
- 37Iamo' arangdeh inan luk nepebala, "Ieh negedo' mateh lun mebuser ineh. Ngudehké Ieh na nengedo' ni Lasarus pad ieh na naté?"
- 38Idi niat Yésus nesigio teh. Idi Ieh iné' inan tanem. Idi tanem ineh bang lubang batu, idi aceh batu inau' ku kakebneh.
- 39Idi kebala Yésus, "Ngelubid batu ini." Idi kebala Marta, kinanak lun luk naté ineh, "O Tuhan, nekini ieh pangeh mebuen, ngaceku pangeh apat aco kinioneh."
- 40Idi kebala Yésus neneh, "Bakenké Ui nepebala namu, kudeng iko manu iko miak nier rayeh Allah?"
- 41Idi ideh nengelubid batu ineh. Idi Yésus netengook, kesembayangNeh, "O Ama', Ui maré ubur kuanMu ngaceku Iko neninger balaKu.
- 42Ui kali' Iko megéi' ninger balaKu, iamo' ngaceku lun mula' ini Ui mala kudeng ineh, pad ideh manu ratnan Iko luk nengecuk Negku."
- 43Kareb Ieh pangeh nepebala kudeng ini, Ieh nengitang, kebalaNeh, "O Lasarus, remuat iko!"
- 44Idi lun luk naté ineh neremuat, dengan abet kukud idi ticu'neh ratnan kibung luk mebuda', idi kiungneh ibpu ku belaca. Idi kebala Yésus nedeh, "Neka neneh idi nima' neneh nalan."
- 45Mula' lun Yahudi luk iné' ngikak ni Mariam idi luk nenier kekamen Yésus ineh manu neneh.
- 46Iamo' sebuangdeh iné' nelun Parisi, idi nemada' nedeh ratnan kekamen luk inau' Yésus ineh.
- 47Ngaceku ineh imam-imam rayeh idi lun Parisi nengamung lun rayeh-rayeh netebubpun, idi nepebala, "Anunké luk ruen tau, ngaceku lemulun ineh nganau' mula' tanu'?"

⁴⁸Kudeng tau nima' Neneh kudeng ineh, kali' rungen amung lemulun manu Neneh, idi lun Rum macing ngaro Ruma' Allah idi pupu tau pana!"

⁴⁹Idi rat arangdeh inan selemulun ngadanneh Kayapas, ieh ineh Imam Rayeh bang lak ineh, nepebala nedeh, "Muyuh na kali' anun-anun.

⁵⁰Naké muyuh kali' meluun do' seburur lemulun maté ku libal pupu tau, ratnan amung-amung pupu ineh maté?"

⁵¹Setuneh ieh na nepebala maya' terawéneh sebuleng, iamo' ngaceku ieh Imam Rayeh, ieh nemada' luk biré Allah ratnan Yésus miak maté ku libal lun Yahudi;

⁵²idi baken ku libal pupu ineh mo', iamo' pad amung-amung anak Allah luk mepatad-patad ineh pana' uenNeh ngamung mangun ku sebuleng.

⁵³Idi rat aco sineh ideh nepegayam sikal ngaté Yésus.

⁵⁴Ngaceku ineh Yésus nalan dengan silagan déi' Yudia, iamo' Ieh iné' inan aceh bawang muneng ku su luk ali-ali, bang aceh bawang luk titen Epraim. Idi Ieh netudo déi' dengan anak-anak sekolaNeh.

⁵⁵Idi Irau Paska lun Yahudi pangeh muneng, idi mula' lemulun rat bawang ineh iné' Yerusalim, pad ideh uen ngeligan kareb nateh irau ineh.

⁵⁶Ideh nenakap Yésus idi nepebala seburur inan seburur karebdeh nepamung bang Ruma' Allah, "Anunké terawé muyuh? Miakké Ieh macing kareb irau ini?"

⁵⁷Iamo' imam-imam rayeh idi lun Parisi pana' pangeh nemaré ukum, kudeng idé luk kali' su luk inan Yésus tudo, do' ieh mada', pad ideh miak ngakem Neneh.

Yahya 12

¹Anem aco atun ratnan Irau Paska ineh, idi Yésus iné' déi' Batiani, su luk inan Lasarus luk tinuiNeh.

²Idi ideh nenganau' aceh Irau kuanNeh déi'. Idi Marta nengasa' nedeh; idi Lasarus pana' netudo kuman iring Yésus.

³Idi Mariam nengalap sekati umau luk do' buen luk mikat raganeh, idi nengumau kukud Yésus, idi nemiid kukudNeh ineh ku abpukneh. Idi bang ruma' ineh mepanu' ku buen umau ineh.

⁴Iamo' keburu' seburur anak sekola'Neh, ieh ineh Yudas Iskariot, luk masui Yésus mucu,

⁵"Ngudehké umau ini na pisuen dengan raga teluh ngeratu rigit, idi usin ineh barén kuan lun masi'?"

⁶Ieh nepebala kudeng ineh, baken ngaceku ieh méi' nelun masi', iamo' ngaceku ieh lun mano, idi ieh luk ngimet tabpung idi ngalap usin luk tinipa bang tabpung ineh.

⁷Idi kebala Yésus, "Aleg ngesabeng decur ineh! Nima' neneh nganug luk idi neneh kuan aco luk inanKu tinamen.

⁸Lun masi' megéi' idi dengan muyuh, iamo' Ui na megéi' idi dengan muyuh."

⁹Mula' lun Yahudi nekali' ratnan Yésus idi déi' Batiani. Idi ideh iné' déi', baken ngaceku Yésus mo', iamo' ngaceku sikal nier Lasarus teh luk tinuiNeh rat arang lun naté.

¹⁰Idi imam-imam rayeh nepegayam ratnan ngaté Lasarus teh,

¹¹ngaceku mula' lun Yahdi pangeh nenecan nelun nguyut nedeh idi manu inan Yésus.

¹²Kenebpa lun mula' luk pangeh iné' ku irau ineh neninger bala ratnan Yésus amé' Yerusalim.

¹³Ideh nengalap angkat-angkat piasau idi iné' ngalap Yésus. Ideh nengitang, "Ngubur Allah! Samal kuanNeh luk macing bang ngadan Tuhan, ieh ineh Raca' Israil!"

¹⁴Idi Yésus pana' nengalap aceh anak keladai, idi netudo luun ketedneh, maya' kudeng luk inayud bang Surat Allah, kebalaneh,

¹⁵"Aleg matot, anak decur rat Sion! Siruh Raca'mu macing, idi tudo lun keted anak keladai!"

- ¹⁶Kareb ineh anak-anak sekola'Neh na kali' ilung bala ineh. Iamo' kareb Yésus pangeh rinayeh, idi ideh nengerawé ratnan luk pangeh inayud ratnan Ieh, idi teh ideh pangeh nenganau' ini kuanNeh.
- ¹⁷Lun mula' luk idi dengan Yésus kareb Ieh nenawar Lasarus remuat rat bang tanem idi nenui neneh rat arang lun naté, nemada' ratnan luk pangeh mangun.
- ¹⁸Ineh punneh lun mula' ineh iné' papu' Neneh, ngaceku ideh neninger idi Yésus pangeh nenganau' kekamen luk melalud ineh.
- ¹⁹Idi kebala lun Parisi seburur nan seburur, "Siruh, amung uang tana' ini pangeh nemaya' Neneh. Kekamen tau na ulek!"
- ²⁰Idi inan tuda'-tuda' lun Grika arang lemulun luk pangeh nacing sembayang kareb irau ineh.
- ²¹Lemulun ineh iné' ni Pilipus, lun Baitsaida déi' tana' Galilia, idi nemutih neneh, keburideh, "Tuan, kai sikal nier Yésus."
- ²²Pilipus iné' mada' ni Andrias, idi didueh iné' mada' Yésus.
- ²³Idi kebala Yésus nedeh, "Tarekneh pangeh nacing kareb Anak-Lemulun miak uen ngerayeh.
- ²⁴Matu, Ui pebala nemuyuh, kudeng aceh ngilung padé na mebpeh luun tana' idi maté, ieh ketecan aceh ngilung mo', kudeng ieh maté, ieh miak kebua' mula'.
- ²⁵Lemulun luk mawa inan ulunneh na miak ngalap ulun luk matu, idi idé luk megateh inan ulunneh bang tana' ini, miak ngalap ulun luk matu, ieh ineh ulun luk meruked.
- ²⁶Idé-idé luk pian ngakem kuanKu, do' ieh maya' Negku, pad demulunKu idi dengaKu iapeh-iapeh pana' Ui idi. Idi TamanKu miak ngedita' lemulun luk ngakem kuanKu.

²⁷"Nekini niatKu mesusa'. Anunké luk belénKu? Miakké Ui pebala, 'O Ama', ngado Negku ratnan kareb ini'? Na! Ngaceku ineh punneh Ui pangeh nacing inan kareb luk medereh ini.

²⁸O Ama', ngerayeh ngadanMu!" Idi aceh tang rat bang langit nepebala, "Ui pangeh nengerayeh Neneh, idi Ui sikal ngerayeh Neneh teh."

²⁹Lun mula' luk tuper déi' neninger tang ineh idi nepebala, "Ini uni lalam." Inan teh lun baken nepebala, "Seburur melaikat nepebala Neneh."

³⁰Iamo' kebala Yésus nedeh, "Baken ngaceku Ui, bala ini pindenger, iamo' ngaceku muyuh.

³¹Nekini karebneh tana' ini miak kumin; nekini raca' tana' ini miak talan.

³²Kareb Ui uen ngikit ratnan tana' ini, Ui sikal ngeruid amung-amung lemulun amé' Negku."

(³³Dengan bala ini, Ieh nengegala' ratnan kudeng apeh Ieh maté.)

³⁴Kebala lun mula' nedeh, "Surat Ukum kai mada' ratnan Keristus ineh mulun raked-raked. Kudeng apehké Iko pebala, idi na miak na Anak-Lemulun ineh uen ngikit? Idéké Anak-Lemulun ineh?"

³⁵Idi kebala Yésus nedeh, "Acang ineh idi arang muyuh segageh mo'. Do' muyuh nalan kareb acang ineh idi arang muyuh, pad daceh na ngili nemuyuh. Lemulun luk nalan bang daceh, na ieh kali' iapeh luk suetneh.

³⁶Do' manu ku acang ineh, kareb acang ineh idi arang muyuh, pad muyuh mangun ku anak acang. Pangeh Yésus nepebala kudeng ineh idi Ieh neburo idi sigapung nedeh.

³⁷Sagan pana' mula' tanu' inau' Yésus pa kiungdeh, iamo' na ideh manu Neneh;

³⁸pad ngacing bala Nabi Yésaya luk nemala, "O Tuhan, idéké luk pangeh manu ku bala kai? Idi kuan idéké ticu' Tuhan pangeh ginala?"

³⁹Ini punneh ideh na miak manu, ngaceku bala Yésaya teh,

⁴⁰"Allah nengebuser matehdeh idi nengetueh terawédeh, pad ideh na nier dengan matehdeh, idi na kali' dengan terawédeh, pelé ideh na lumi Negku, uenKu ngedo'."

⁴¹Yésaya nepebala kudeng ini ngaceku ieh pangeh nenier rayeh Yésus idi nepebala ratnan Ieh.

⁴²Sagan pana' kudeng ineh, mula' rat arang lun rayeh-rayeh manu inan Yésus, iamo' ngaceku ratnan lun Parisi ideh na mekuu' ngamo, pad ideh na talan rat bang ruma' sembayang.

⁴³Ideh sikal buren lemulun, iamo' na pian buren Allah.

⁴⁴Idi Yésus nengitang, kebalaNeh, "Idé-idé luk manu Negku, baken ieh manu Negku mo', iamo' inan Allah teh luk nengecuk Negku.

⁴⁵Idé'-idé luk nier Negku, ieh pana' nier Allah luk nengecuk Negku.

⁴⁶Ui ini nacing bang tana' ini mangun ku acang, pad idé-idé luk manu Negku na tudo bang dacem.

⁴⁷Idé-idé luk ninger balaKu, iamo' na nginita neneh, Ui na ngukum neneh; ngaceku na Ui macing ngukum uang tana' ini, iamo' sikal ngulun nedeh.

⁴⁸Lemulun luk nala' Negku idi na ngalap balaKu, inan Sebuleng luk ngukum neneh. Idi bala luk badénKu, ieh ineh luk ngukum neneh kareb aco luk kekiped.

⁴⁹Ngaceku Ui na nepebala maya' pianKu sebuleng, iamo' Taman luk negecuk Negku ineh luk mada' Negku ratnan bala luk belénKu.

⁵⁰Idi Ui kali' ukumNeh ineh maré ulun luk meruked. Kudeng ineh teh anunanun luk belénKu, ieh ineh luk bida' Taman Negku miak belénKu.

Yahya 13

¹Bang aco luk atun ratnan Irau Paska ineh, idi Yésus nekali' ratnan karebNeh pangeh nacing luk inanNeh necan tana' ini amé' inan Taman. Ieh pangeh mawa inan uang tana' ini, idi Ieh mawa nedeh macing kekipedneh.

²Yésus idi anak-anak sekola'Neh kuman malem. Iblis paneh nemili' Yudas Iskariot, anak Simun ineh, pad ieh masui Yésus.

³Yésus kali' idi TamanNeh pangeh nemaré luk amung-amung bang paladNeh, idi teh Ieh kali' Ieh nacing ratnan Allah idi muli' amé' inan Allah.

⁴Yésus neburo ratnan méja idi nengelengu kuyu'Neh, idi nengalap aceh aduk, idi nengabet awa'Neh.

⁵Ieh nengutang abpa' bang aceh bigan luk rayeh, idi nengimun maru' kukud anak-anak sekola'Neh, idi nemiid ku aduk luk inabet i awa'Neh ineh.

⁶Kareb Yésus nacing ni Simun Pétrus, idi keburu' Pétrus Neneh, "O Tuhan, pianké Iko maru' kukudku?"

⁷Kebala Yésus, "Anun-anun luk ruenKu, iko na kali' nekini, iamo' mucu iko miak kali'."

⁸Idi kebala Pétrus Neneh, "Aleg tu-tu Iko maru' kukudku." Iamo' kebala Yésus neneh, "Kudeng Ui na maru' kukudmu iko na miak ngalap babpat denganKu."

⁹Idi keburu' Simun Pétrus Neneh, "O Tuhan, kudeng pieh kudeng ineh, aleg maru' kukudku sebuleng mo', iamo' do' maru' ticu' idi uluhku teh."

¹⁰Kebala Yésus neneh, "Idé-idé luk pangeh nediu', amung bururneh pana' malét; lemulun ineh maru' kukudneh mo'. Amung muyuh pana' malét, iamo' sebuleng mo' luk na."

(¹¹Ngaceku Yésus panegh nekali' idé luk sikal masui Neneh; ineh punneh Ieh nepebala, "Amung muyuh pana' malét, iamo' sebuleng mo' luk na.")

¹²Pangeh Yésus namaru' kukud amung-amung anak sekola'Neh idi nenuet kuyu'Neh, idi Ieh netudo iring méja idi nepebala nedeh, "Muyuh kali' luk inau'Ku kuan muyuhké?

¹³Muyuh ini nawar Negku Guru idi Tuhan, idi matu bala muyuh ineh, ngaceku Ui ini Ieh.

¹⁴Kudeng Ui, Tuhan idi Guru, pangeh namaru' kukud muyuh, do' muyuh maru' kukud muyuh seburur dengan seburur teh.

¹⁵Ui pangeh nemaré luk pinginud kuan muyuh, pad muyuh pana' nganau' mepad kudeng Ui nganau' kuan muyuh.

¹⁶Matu, Ui pebala nemuyuh, seburur demulun na meluun rayeh ratnan tuanneh, idi seburur lun duken pana' na meluun rayeh ratnan luk nengecuk neneh.

¹⁷Kudeng muyuh kali' amung-amung ini, samal kuan muyuh kudeng muyuh nganau' ineh.

¹⁸"Ui pebala baken ratnan amung-amung muyuh; ngaceku Ui kali' idé lemulun luk pinili'Ku; iamo' bala bang Surat Allah ineh na miak na uen ngacing, ieh ineh, 'Lemulun luk kuman pad-pad denganKu ineh sikal metueh rat Negku.'

¹⁹Nekini Ui mala amung ini kuan muyuh, pad muyuh manu idi Ui ini Ieh, kareb ieh mangun.

²⁰Matu, Ui pebala nemuyuh luk ngalap lemulun luk icukKu, ieh ngalap Negku; iamo' lemulun luk ngalap Negku, ieh ngalap Allah luk nengecuk Negku."

²¹Pangeh Yésus nepebala kudeng ini, idi Ieh mesusa' niat idi nemaré kali', kebalaNeh, "Matu, Ui pebala nemuyuh, idi seburur rat arang muyuh sikal masui Negku."

²²Anak-anak sekola' ineh melingo idi nenier seburur dengan seburur luk baken, ngaceku na ideh kali' idé luk bilaNeh ineh.

²³Seburur rat arang anak-anak sekola' Yésus, ieh ineh luk inanNeh mawa, netudo iring Yésus.

²⁴Simun Pétrus nenawar neneh, kebalaneh neneh, "Ngitun idé luk bilaNeh ineh."

²⁵Idi anak sekola' ineh iné' muneng nan Yésus idi nengitun Neneh, "O Tuhan, idéké ieh?"

²⁶Idi kebala Yésus, "Ui miak ngerereb aceh picut ruti idi maré kuanneh. Ini ieh." Idi Ieh nengalap ruti ineh, idi nengerereb neneh, idi nemarké kuan Yudas anak Simun Iskariot ineh.

²⁷Pangéh Yudas nengalap ruti ineh, idi Sétan nesemuet bang niatneh. Idi keburi' Yésus neneh, "Do' iko nganau' dengan mesaget anun luk ruenmu!"

²⁸Iamo' na luk idi seburur pana' rat arang amungdeh luk pad-pad kuman ineh kali' anun punneh Ieh nepebala kudeng ineh kuanneh.

²⁹Ngaceku Yudas ineh ngimet usin, inan luk ngerawé Yésus nepebala neneh, "Do' tau melih anun-anun luk pian tau kuan irau," kian, pad ieh maré kuan lun masi' lek.

³⁰Yudas nengalap ruti ineh, idi ieh neremuat dengan mesaget. Idi aco pana' malem.

³¹Kareb Yudas pangéh neremuat, idi Yésus nepebala, "Nekini rayeh Anak-Lemulun ginala', idi rayeh Allah pana' ginala' bang Neneh.

³²Kudeng rayeh Allah ginala' bang Neneh, idi Allah teh sikal ngegala' rayehNeh bang bururNeh sebuleng, idi Allah miak nganau' ineh dengan mesaget.

³³O anak-anakKu, segageh mo' kinioneh Ui tudo dengan muyuh. Muyuh sikal nakap Negku. Iamo' mepad kudeng Ui pangéh nepebala kuan lun Yahudi, Ui pebala kuan muyuh, 'Su luk inanKu amé', muyuh na miak macing.'

³⁴Aceh ukum luk mebaruh Ui maré kuan muyuh, ieh ineh, do' muyuh mawa seburur inan seburur mepad kudeng Ui pangéh mawa nemuyuh, pad muyuh pana' mawa seburur inan seburur.

³⁵Kudeng muyuh mawa seburur inan seburur, idi amung-amung lemulun miak kali' muyuh ineh anak-anak sekola'Ku."

³⁶Idi kebala Simun Pétrus Neneh, "O Tuhan, iapehké luk inanMu amé'?" Idi kebala Yésus neneh, "Iko na miak maya' Negku amé' su luk inanKu amé' nekini. Iamo' mucu iko miak maya' Negku."

³⁷Idi kebala Pétrus, "O Tuhan, ngudehké ui na miak maya' Namu nekini? Ui temina' maté ngaceku Iko."

³⁸Idi kebala Yésus, "Matuké Iko temina maté ngaceku Ui? Matu, Ui pebala namu, kareb nateh lal ngekook, iko miak ngalum Negku teluh kua'."

Yahya 14

¹Kebala Yésus nedeh, "Aleg muyuh megagau niat; do' manu inan Allah, idi manu inan Negku teh.

²Bang ruma' TamanKu inan mula' luk inan tudo' kudeng na pieh kudeng ineh, kali' rungen Ui pangeh nemala kuan muyuh; ngaceku Ui amé' nganau' temina' luk inan kuan muyuh.

³Pangeh Ui amé' nganau' temina' luk inan kuan muyuh, idi Ui lemubed ngalap nemuyuh amé' Negku, pelé su luk inanKu tudo, déi' teh luk inan muyuh.

⁴Idi muyuh kali' dalam amé' su luk inanKu."

⁵Kebala Tomas Neneh, "O Tuhan, kai na kali' su apeh luk inanMu amé' kudeng apehké kai kali' dalam ineh?"

⁶Keburi' Yésus neneh, "Ui ini dalam idi Luk Matu idi Ulun. Seburur pana' na macing inan Taman, kudeng na ratnan Negku.

⁷Muyuh pangeh nengiti Negku. Idi muyuh miak ngiti TamanKu teh. Idi rat kareb ini muyuh miti Neneh, idi teh muyuh pangeh nenier Neneh."

⁸Idi keburu' Pilipus Neneh, "O Tuhan, mada' Taman ineh siren kai, pad kai mawang niat."

⁹Idi kebala Yésus neneh, "O Pilipus, tuda'-tuda' io Ui tudo dengan muyuh, idi nateh iko miti Negku? Lemulun luk pangeh nenier Negku, ieh pangeh nenier Taman teh. Kudeng apehké balamu, 'Mada' Taman ineh siren kai'?

¹⁰Naké iko manu idi Ui ini bang Taman, idi Taman pana' bang Negku? Amung-amung bala luk Ui ini mala kuan muyuh, baken Ui pebala dengan

pianKu sebuleng, iamo' Taman ineh luk lutep bang Negku, Ieh luk nganau' amung-amung kekamen ineh.

¹¹Do' muyuh manu Negku, ngaceku Ui ini bang Taman idi Taman pana' bang Negku; kudeng na tu pana', do' manu Negku ngaceku ratnan kekamen ini.

¹²Matu, Ui pebala nemuyuh, idé luk manu Negku, ieh pana' miak nganau' kekamen luk ruenKu, idi ieh miak nganau' kekamen luk meluun rayeh ratnan ini, ngaceku Ui amé' inan TamanKu.

¹³Idi anun-anun pana' luk pituen muyuh bang ngadanKu, Ui miak ngua' neneh, pad Taman uen ngerayeh bang Anak.

¹⁴Kudeng muyuh mutuh rat Negku anun-anun bang ngadanKu, Ui miak ngua' neneh.

¹⁵"Kudeng muyuh mawa Negku, do' maya' ukum-ukumKu.

¹⁶Ui mutuh ratnan Taman, idi Ieh miak maré nemuyuh Lun Ngedengan luk baken, ieh ineh Roh luk matu pad Ieh ngedengan nemuyuh raked-raked peh.

¹⁷Ieh na miak lapen tana' ini, ngaceku tana' ini na kali' Neneh, idi na miti Neneh. Iamo' muyuh miti Neneh ngaceku Ieh tudo dengan muyuh, idi Ieh idi bang nemuyuh.

¹⁸"Ui na miak necan nemuyuh mepad kudeng anak maté; Ui sikal macing nemuyuh.

¹⁹Segageh teh uang tana' ini na miak nier Negku peh, iamo' muyuh ini miak nier Negku, ngaceku Ui ini mulun, idi muyuh pana' miak mulun teh.

²⁰Kareb aco ineh teh muyuh miak kali' idi Ui ini bang TamanKu, idi muyuh pana' bang Negku, idi Ui pana' bang nemuyuh.

²¹"Kudeng idé-idé luk gimet idi maya' amung ukumKu, ieh ineh luk mawa Negku. Idi lemulun luk mawa Negku, idi Taman pana' mawa neneh, idi Ui teh mawa neneh idi ngegala' bururKu kuanneh."

²²Idi Yudas (baken Yudas Iskariot ineh) nepebala Neneh, "O Tuhan, kudeng apehké dalanneh Iko sikal ngegala' bururMu kuan kai idi baken kuan uang tana' ini?"

²³Idi kebala Yésus, "Kudeng idé-idé luk mawa Negku, kali' rungen ieh maya' balaKu, idi TamanKu ineh mawa neneh, idi Kai sikal macing neneh idi tudo danganneh.

²⁴Lemulun luk na mawa Negku, na ieh maya' balaKu. Idi bala luk muyuh ninger ineh baken balaKu, iamo' bala Taman ineh luk nengecuk Negku.

²⁵"Ui pangeh nemala amung ini kuan muyuh selaba' Ui tudo dengan muyuh.

²⁶Iamo' Lun Ngedengan ineh, ieh ineh Roh Meligan, luk uen Taman ngecuk bang ngadanKu, Ieh luk miak mada' luk amung-amung kuan muyuh. Idi Ieh ngedengan nemuyuh pad muyuh ngerawé amung-amung luk pangeh bilaKu nemuyuh.

²⁷"Ui necan awang kuan muyuh, idi Ui maré awangKu sebuleng kuan muyuh. Ui na maré ineh kuan muyuh maya' lawé tana' ini. Aleg muyuh megagau niat idi aleg matot.

²⁸Muyuh pangeh neninger balaKu nemuyuh, 'Ui amé' idi Ui sikal lemubed kuan muyuh.' Kudeng muyuh mawa Negku, kali' rungen muyuh mawang niat ngaceku Ui amé' inan Taman, ngaceku TamanKu meluun rayeh rat Negku.

²⁹Nekini Ui pangeh nemala kuan muyuh kareb nateh ineh mangun, pad muyuh miak manu kareb ieh mangun.

³⁰Na Ui miak mala mio kuan muyuh teh, ngaceku raca' tana' ini macing, iamo' na ieh melalud rat Negku.

³¹Ui nganau' teh mepad kudeng luk icuk Taman kuanKu, pad uang tana' ini miak kali' idi Ui mawa inan Taman. "Tumui muyuh, do' tau nalan rat ieni.

Yahya 15

¹"Ui ini Lawa Anggur luk matu, idi TamanKu, Ieh ineh luk ngasa' neneh.

- ²Anid-anid angkat luk bang Negku luk na kebua' miak tetuinNeh; idi anid-anid angkat luk kebua' ruenNeh ngalét pad bua'neh meluun ula'.
- ³Muyuh ini kali' rungen malét ngaceku bala luk bilaKu nemuyuh.
- ⁴Do' muyuh lutep bang Negku, idi Ui pana' bang nemuyuh. Mepad kudeng angkat na miak kebua' dengan lalud bururneh sebuleng, kudeng na lutep bang lawa anggur, kudeng ineh teh muyuh pana' na miak kebua' kudeng muyuh na lutep bang Negku.
- ⁵Ui ini Lawa Anggur, idi muyuh angkat-angkatneh. Kudeng idé-idé luk lutep bang Negku, idi Ui pana' bang neneh, ieh miak kebua' mula'; ngaceku kudeng Ui na ngedengan nemuyuh, muyuh na miak nganau' anun-anun.
- ⁶Kudeng idé-idé luk na lutep bang Negku, ieh miak talan mepad kudeng angkat ineh, idi mangun tekering. Muci lemulun miak ngamung angkat-angkat ineh idi ideh miak talan bang apui, idi sabpen.
- ⁷Kudeng muyuh lutep bang Negku, idi balaKu lutep bang nemuyuh, do' mutuh anun-anun luk pian muyuh, idi ineh luk miak mangun kuan muyuh.
- ⁸Bang amung ini rayeh TamanKu uen ngegala', ieh ineh kudeng muyuh kebua' mula', idi muyuh miak mangun ku anak-anak sekola'Ku.
- ⁹Mepad kudeng Taman pangeh mawa Negku, kudeng ineh teh Ui pangeh mawa nemuyuh. Do' muyuh lutep bang awaKu ineh.
- ¹⁰Kudeng muyuh maya' ukum-ukumKu, kali' rungen muyuh miak lutep bang awaKu, mepad kudeng Ui pangeh nemaya' ukum-ukum TamanKu, idi nelutep bang awaNeh.
- ¹¹Idi Ui pangeh nemala amung ini kuan muyuh, pad awangKu tudo bang nemuyuh, idi awang muyuh pana' meriput peh.
- ¹²Ini ukumKu, ieh ineh do' muyuh mawa seburur inan seburur mepad kudeng Ui pangeh mawa nemuyuh.
- ¹³Na luk idi seburur pana' luk inan awa luk meluun rayeh ratnan ini, ieh ineh pad ieh maré ulunneh ngaceku amung-amung luk rurunneh.

- ¹⁴Muyuh ini lun rorumKu kudeng muyuh nganau' anun-anun luk dukenKu nemuyuh.
- ¹⁵Na Ui neten nemuyuh demulun teh, ngaceku seburur demulun na kali' luk ruen tuanneh; iamo' Ui pangeh neneten nemuyuh luk rorumKu, ngaceku amung-amung luk Ui neninger ratnan TamanKu, ineh teh luk bida'Ku nemuyuh.
- ¹⁶Baken muyuh luk nemili' Negku, iamo' Ui ini luk nemili' nemuyuh idi nengeletep nemuyuh, pad muyuh amé' ngeruat mula' bua', idi pad bua' muyuh ineh meruked peh. Idi anun-anun luk pituen muyuh ratnan Taman bag ngadanKu, Ieh miak maré kuan muyuh.
- ¹⁷Ini luk dukenKu nemuyuh, pad muyuh mawa seburur inan seburur.
- ¹⁸"Kudeng uang tana' ini megateh nemuyuh, ngerawé, idi ieh pangeh megateh Negku atun rat nemuyuh.
- ¹⁹Kudeng muyuh ratnan tana' ini, kali' rungen tana' ini miak mawa nemuyuh mepad kudeng pupuneh sebuleng. Iamo' muyuh baken ratnan tana' ini, ngaceku Ui pangeh nemili' nemuyuh ratnan tana' ini. Ini punneh tana' ini megateh nemuyuh.
- ²⁰Do' muyuh ngerawé bala luk bilaKu nemuyuh, 'Seburur demulun na meluun rayeh ratnan tuanneh.' Kudeng ideh nengedereh Negku, kali' rungen ideh ngedereh nemuyuh teh. Kudeng ideh nemaya' balaKu, idi bala muyuh pana' miak béndeh.
- ²¹Iamo amung-amung ini miak ruendeh kuan muyuh ngaceku ngadanKu, ngaceku ideh na miti Neneh luk nengecuk Negku.
- ²²Kudeng Ui na nacing pebala nedeh, idi na ideh nmesala', iamo' nekini ideh na miak sumaad ratnan sala'deh.
- ²³Idé-idé luk megateh Nekgu, ieh megateh inan TamanKu teh.

²⁴Kudeng Ui na nenganau' tuda'-tuda' kekamen luk nateh inau' lun baken arangdeh, idi na ide ideh mesala' iamo' nekini ideh pangéh nenier idi megateh Negku idi inan Taman teh.

²⁵Iamo' amung ini pangéh mangun kudeng ini, pad ngacing bala luk inayud bang Ukumdeh, 'Idi ideh pangéh megateh Negku dengan na punneh.'

²⁶"Iamo' Lun Ngedengan ineh miak macing, ieh ineh Roh luk matu luk macing ratnan Taman. Ui ngecuk Neneh amé' nemuyuh ratnan Taman ineh, idi Ieh miak maré kali' ratnan Ui.

²⁷Muyuh pana' miak mangun ku lun nekali' Negku, ngaceku muyuh tudo denganKu rat pun-pun.

Yahya 16

¹Ui pangéh nemala amung ini kuan muyuh, pad anu muyuh na mesabeng.

²Idi muyuh miak uen lun masut rat bang ruma' sembayang. Matu, karebneh miak macing, idi idé-idé luk ngaté nemuyuh miak ngerawé ieh nganau' luk do' kuan Allah.

³Amung-amung ini miak ruendeh, ngaceku na ideh miti Taman idi Ui teh.

⁴Iamo' Ui pangéh nemala amung ini kuan muyuh, pad kareb ini macing muyuh miak ngerawé, idi amung ineh pangéh bilaKu nemuyuh. "Idi na Ui mala amung-amung ini kuan muyuh rat pun-pun, ngaceku Ui tudo dengan muyuh.

⁵Iamo' nekini Ui amé' inan Allah luk nengecuk Negku, sagan pana' seburur rat arang muyuh na ngitun Negku, 'Su apehké ulekMu?'

⁶Iamo' ngaceku Ui pangéh nemala amung ini kuan muyuh, niat muyuh mesusa'.

⁷Iamo' Ui mala luk matu kuan muyuh, do' kuan muyuh kudeng Ui ini amé', ngaceku kudeng Ui na amé', Lun Ngedenan ineh na miak macing nemuyuh; iamo' kudeng Ui amé'. Ui miak ngecuk Neneh amé' nemuyuh.

⁸Idi kareb Ieh macing Ieh miak ngegala' kuan uang tana' ini ratnan ideh sala' terawé ratnan kekamen luk dat idi ratnan luk matu idi ratnan ukum.

⁹Ideh sala' terawé ratnan kekamen luk dat, ngaceku ideh na manu Negku.

¹⁰Ideh sala' terawé ratnan luk matu, ngaceku Ui amé' inan Taman idi muyuh na miak nier Negku teh.

¹¹Ideh sala' terawé ratnan ukum, ngaceku raca' tana' ini pangeh inukum.

¹²"Inan teh mula' bala luk Ui sikal mala kuan muyuh, iamo' nekini muyuh na miak tuman ratnan ineh.

¹³Iamo' kareb Roh luk matu macing, idi Ieh miak nguit nemuyuh semuet bang amung-amung luk matu. Na Ieh pebala maya' pianNeh sebuleng, iamo' anun-anun luk pedingerenNeh, ineh teh luk miak belénNeh. Ieh miak mada' nemuyuh ratnan luk miak macing.

¹⁴Idi Ieh sikal ngerayeh Negku, ngaceku Ieh sikal ngalap luk rat Negku, idi mada' kuan muyuh.

¹⁵Amung-amung luk Taman kuan, ineh teh Ui kuan, ineh punneh Ui nepebala, idi Ieh sikal ngalap luk rat Negku, pad uen ngacing kuan muyuh.

¹⁶"Segageh mo' idi muyuh na miak nier Negku teh, idi segageh mo', idi muyuh miak nier Negku."

¹⁷Idi tuda'-tuda' burur anak sekola'Neh nepebala seburur inan seburur, "Anunké ilungneh? KebalaNeh, 'Segageh mo' idi muyuh na miak nier Negku teh, idi segageh mo' idi muyuh miak nier Negku,' idi teh kebalaNeh, 'Ngaceku Ui amé' inan Taman'?"

¹⁸Idi keburideh, "Anunké ilungneh, 'Segageh teh'? Na tau kali' ilung luk bilaNeh ineh."

¹⁹Yésus kali' nedeh sikal ngitun Neneh. Di kebala Yésus nedeh, "Iniké luk tunin muyuh arang muyuh sebuleng, ngaceku Ui nepebala, 'Segageh mo', idi muyuh na miak nier Negku teh, idi segageh mo', idi muyuh miak nier Negku'?"

²⁰Matu, Ui pebala nemuyuh, muyuh miak nangi' idi temido, iamo' uang tana' ini miak mawang niat; idi muyuh ini miak mesusa' niat, iamo' susa' muyuh miak misu' mangun ku awang.

²¹Kareb seburur decur mét nenganak, ieh mesusa' niat, ngaceku karebneh pangeh macing; iamo' kareb anak mebpeh ieh na ngerawé derehneh, ngaceku ieh mawang niat ku anakneh luk tinganak bang tana' ini.

²²Kudeng ineh teh muyuh mesusa' nekini, iamo' Ui miak nier nemuyuh teh, idi miak muyuh mepanu' ku awang, idi seburur pana' nateh luk miak ngalap awang ineh rat nemuyuh.

²³"Kareb aco sineh muyuh na miak mutuh anun-anun rat Negku peh. Matu, Ui pebala nemuyuh, Taman ineh miak maré nemuyuh anun-anun luk pituen muyuh bang ngadanKu.

²⁴Macing nekini pana' muyuh nateh nemuyuh anun-anun bang ngadanKu. Do' mutuh, pad muyuh miak ngalap, pad awang muyuh miak meriput peh.

²⁵"Amung-amung ini pangeh bida'Ku nemuyuh dengan luk pinginud. Iamo' karebneh miak macing idi Ui na pebala kuan muyuh teh dengan luk pinginud, iamo' dengan megala' Ui miak mada' nemuyuh ratnan Taman ineh.

²⁶Kareb aco sineh muyuh miak mutuh bang ngadanKu, idi Ui na mala Ui ini sikal mutuh kuan muyuh ratnan Taman,

²⁷ngaceku Taman sebuleng mawa nemuyuh, ngaceku muyuh ini mawa Negku, idi ngaceku muyuh pangeh manu idi Ui ini nacing ratnan Taman.

²⁸Ui nacing ratnan Taman, idi nesemuet bang tana' ini; iamo' nekini Ui sikal necan tana' ini teh idi amé' inan Taman."

²⁹Idi kebala anak-anak sekola'Neh Neneh, "Siruh, nekini Iko pebala dengan megala' idi na pebala dengan luk pinginud.

³⁰Nekini kai kali' idi Iko kali' luk amung-amung, idi na ulekneh selemulun ngitun Namu; ngaceku ineh kai manu idi Iko pangeh nacing ratnan Allah."

³¹Kebala Yésus nedeh, "Manuké muyuh nekini?"

³²Siruh, karebneh miak macing, idi pangeh nacing teh, idi muyuh miak mepatad anid-anid burur amé' ruma'neh sebuleng, pad Ui sebuleng ketecan; iamo' na Ui sebuleng, ngaceku Taman ineh idi denganKu.

³³Ui nemala amung ini kuan muyuh, pad muyuh mawang niat bang Negku. Bang tana' ini muyuh medereh; iamo' do' muyuh mekuu'. Ui pangeh metueh ratnan tana' ini."

Yahya 17

¹Pangeh Yésus nepebala, idi Ieh netengook déi' langit, kebalaNeh, "O Ama' karebneh pangeh macing. Ngegala' rayeh AnakMu, pad AnakMu pana' miak ngegala' rayehMu.

²Iko pangeh nemaré lalud kuanNeh pa luun amung-amung lemulun, pad Ieh miak maré ulun luk meruked kuan anid-anid burur luk biréMu Neneh.

³Ini ulun luk meruked, ieh ineh pad ideh miti Namu, Allah luk Sebuleng idi matu, idi Yésus Keristus luk Iko nengecuk ineh.

⁴Ui pangeh nengerayeh Namu bang tana', idi nengeriput kekamen luk Iko nemaré kuanKu.

⁵Idi nekini, O Ama', ngerayeh Negku pa kiungMu sebuleng dengan rayeh luk Ui nekali' pa kiungMu kareb nateh tana' ini pinudut.

⁶Ui pangeh ngegala' ngadanMu kuan lemulun bang tana' ini luk biréMu kuanKu. Ideh kuanMu, idi Iko nemaré nedeh kuanKu, idi ideh pangeh nemaya' balaMu.

⁷Nekini ideh kali' idi amung-amung luk biréMu kuanKu ineh macing rat Namu.

⁸Ui nemaré kuandeh bala luk bilaMu Negku, idi ideh pangeh nengalap ineh. Ideh nekali' dengan matu idi Ui nacing rat Namu. Idi teh ideh manu ratnan Iko luk nengecuk Negku.

⁹Ui ini mutuh kuandeh, Na Ui mutuh kuan uang tana' ini, iamo' kuan lemulun luk biréMu Negku, ngaceku ideh kuanMu.

- ¹⁰Amung-amung luk kuanKu, ineh teh kuanMu, idi luk kuanMu, ineh teh kuanKu, idi rayehKu ginala' bang nedeh.
- ¹¹Idi nekini Ui amé' Namu. Na Ui tudo bang tana' ini teh, iamo' ideh tudo bang tana' ini. O Ama' luk meligan! Ngasa' nedeh ku lalud ngadanMu luk biréMu Negku, pad ideh mangun ku sebuleng mepad kudeng Kiteh.
- ¹²Laba' Ui tudo dengandeh, Ui ini nengimet nedeh bang ngadanMu luk biréMu Negku. Ui pangeh nematar nedeh, idi seburur pana' rat arangdeh na metutu', iamo' lemulun luk na miak na metutu', pad ngacing bala bang Surat Allah.
- ¹³Iamo' nekini Ui amé' Namu; idi Ui mala amung ini serukedKu tudo bang tana' ini, pad ideh miak ngalap awangKu bang niatdeh dengan meriput.
- ¹⁴Ui ini nengacing balaMu kuandeh; idi uang tana' ini megateh nedeh, ngaceku ideh baken ratnan tana' ini, mepad kudeng Ui teh baken ratnan tana' ini.
- ¹⁵Na Ui mutuh Namu ngalap nedeh rat bang tana' ini, iamo' pad Iko ngimet nedeh ratnan luk Dat ineh.
- ¹⁶Mepad kudeng Ui ini baken ratnan tana' ini, ideh pana' baken ratnan tana' ini.
- ¹⁷Ngeligan nedeh bang luk matu; balaMu, ineh luk matu.
- ¹⁸Ui nengecuk nedeh amé' bang tana' ini, mepad kudeng Iko nengecuk Negku.
- ¹⁹Ui ngeligan bururKu ngaceku ideh, pad ideh pana' uen ngeligan bang luk matu.
- ²⁰Ui mutuh baken kuandeh mo', iamo' kuan idé-idé pana' luk manu Negku ngaceku ratnan bada'deh.
- ²¹Ui mutuh pelé amungdeh mangun ku sebuleng mepad kudeng Iko bang Negku, O Ama', idi Ui pana' bang Namu, idi ideh pana' mangun ku sebuleng bang Nekiteh, pad uang tana' ini miak manu ratnan Iko luk nengecuk Negku.

²²Ui nemarké kuandeh rayeh luk pangeh biréMu Negku; pad ideh pana' mangun ku sebuleng, mepad kudeng Kiteh ini mangun ku sebuleng peh.

²³Ui ini bang nedeh. Idi Iko bang Negku, pelé ideh miak mangun meligan bang sebuleng rorum; pad uang tana' ini miak kali' ratnan Iko luk nengecuk Negku idi mawa nedeh mepad kudeng Iko mawa Negku.

²⁴"O Ama', pianKu idi lemulun luk pangeh biréMu Negku ineh idi denganKu iapeh-iapeh luk inanKu, pad ideh miak nier rayehKu luk pangeh biréMu Negku, ngaceku Iko pangeh mawa Negku atun ratnan tana' ini pinudut.

²⁵O Ama' luk matu, tana' ini na miti Namu, iamo' Ui ini miti Namu, idi ideh pana' pangeh nekali' ratnan Iko luk nengecuk Negku.

²⁶Ui nengegala' Namu kuandeh, idi Ui sikal ngegala' Namu teh, pad awa luk mepad kudeng awaMu kuanKu ineh, lutep bang nedeh, idi Ui pana' lutep bang nedeh teh."

Yahya 18

¹Pangeh Yésus nesembayang kudeng ineh, idi Ieh nenalan dengan anak-anak sekola'Neh iné' déi' dipar Arur Kidron, su luk inan aceh kabun. Yésus iné' bang kabun ineh dengan anak-anak sekola'Neh.

²Yudas, luk nemasui Neneh, kali' kabun ineh, ngaceku megéi kua' Yésus tebubpun déi' dengan anak-anak sekola'Neh.

³Ngaceku ineh Yudas nenguit sebuang bunu' dengan lun pulis ratnan imam-imam rayeh idi lun Parisi, idi nacing déi' dengan lapung, sesakan, idi pelapet.

⁴Idi Yésus luk nekali' amung-amung luk miak mangun kuanNeh, neremuat idi nepebala nedeh, "Idéké luk tekapen muyuh?"

⁵Idi kebaladeh, "Yésus lun Nasarét." Idi kebala Yésus nedeh, "Ui ini Ieh." Idi Yudas luk nemasui Neneh tupid dengandeh.

⁶Kareb Yésus nepebala, "Ui ini Ieh," idi ideh nelemubed idi neluka' luun tana'.

⁷Idi Yésus nengitun nedeh teh, "Idéké luk tekapen muyuh?" Idi kebaladeh, "Yésus lun Nasarét."

⁸Idi kebala Yésus, "Ui pangeh nepebala nemuyuh, 'Ui ini Ieh.' Ngaceku ineh, kudeng muyuh nakap Negku, nima' lun baken ini nalan."

(⁹Ieh nemala kudeng ini pad ngacing bala luk bilaNeh ineh, "Ratnan amung-amung lemulun luk biréMu Negku ineh, seburur pana' na Ui ngetutu'.")

¹⁰Idi Simun Pétrus inan pelapet. Ieh nengangat neneh idi nenarad demulun imam Rayeh, idi nenangal lalidneh pa tinueh. Ngadan demulun ineh Malkus.

¹¹Kebala Yésus ni Pétrus, "Do' ngusong pelapetmu bang binanneh. Naké Ui miak ngirup ratnan sangkir luk biré Taman kuanKu?"

¹²Idi sebuang bunu' idi lun rayehdeh idi amung-amung lun pulis lun Yahudi ineh pana' nengakem Yésus, idi nengabet Neneh,

¹³Idi nenguit Neneh pun-pun amé' matun Annas, ieh ineh iban Kayapas, luk mangun ku Imam Rayeh bang lak ineh.

¹⁴Kayapas ineh luk nemada' lun Yahudi do' kudeng seburur lemulun maté ku libal pupu ineh.

¹⁵Simun Pétrus idi seburur anak sekola' baken nemaya' puet Yésus. Idi anak sekola' luk baken ineh inisi Imam Rayeh, idi ieh iné' dengan Yésus luun natad ruma' Imam Rayeh.

¹⁶Iamo' Pétrus netuped déi' liang, munung tanga'. Idi anak sekola' luk baken ineh neremuat, idi nepebala dengan seburur decur luk matar tanga', idi ieh nenguit Pétrus semuet.

¹⁷Idi keburu' decur luk matar tanga' ineh ni Pétrus, "Bakenké iko pana' seburur anak sekola' lemulun ineh?" Idi kebala Pétrus, "Baken."

¹⁸Idi amung-amung demulun idi lun pulis pangeh nengaba apui ngaceku meteneb, idi ideh nengsidu, idi Pétrus pana' tuped dengandeh idi singidu.

¹⁹Imam Rayeh ineh nengitun Yésus ratnan anak-anak sekola'Neh, idi ratnan bada'Neh.

²⁰Idi kebala Yésus neneh, "Ui ini pangeh nepebala dengan megala' kuan uang tana' ini; megéi Ui mada' bang ruma' sembayang idi bang Ruma' Allah, ieh

ineh su luk inan amung lun Yahudi pamung. Idi sebuleng pana' na Ui nemala dengan ngalum.

²¹Anunké punneh iko ngitun Negku? Do' ngitun lemulun luk pangeh neninger balaKu. Ideh kali' luk bilaKu ineh.”

²²Kareb Yésus pangeh nemala ini, seburur lun matar luk tupid déi' nemepag kiungNeh kebalaneh, "Ngudehké Iko mekuu' pebala kudeng ini nelun Imam Rayeh?”

²³Idi kebala Yésus neneh, "Kudeng balaKu ini sala', do' ngegala' ineh nelun mula' luk idi ieni. Iamo' kudeng balaKu matu, ngudehké iko mepad Negku?”

²⁴Idi Annas nengecuk nated Neneh amé' matun Imam Rayeh Kayapas. Idi ticu' Yésus inabet.

²⁵Simun Pétrus tupid sigidu teh. Idi keburu' seburur neneh, "Bakenké iko pana' seburur anak sekola'Neh?" Idi ieh nengalum, keburu'neh, "Baken.”

²⁶Idi seburur rat arang demulun Imam Rayeh, luk dingkanid dengan lemulun luk tirad Pétrus lalid ineh, nepebala, "Naké ui nenier namu bang kabun denganNeh?”

²⁷Idi Pétrus pana' nengalum teh; idi lal pana' petacu nengekook peh.

²⁸Idi pekak uka-uka, ideh nenguit Yésus rat ruma' Kayapas amé' ruma' Lun luk Ngimet Ukum. Idi lun Yahudi na nesemuat bang ruma' ineh, pad ideh na uen ngelutak, idi ideh miak kuman Irau Paska.

²⁹Ngaceku ineh Pilatus iné' ngitun nedeh, keburu'neh, "Anunké adu' muyuh kuan lemulun ini?”

³⁰Idi kebaladeh, "Kudeng lemulun ini baken selemulun luk mesala', nateh kai nemaré Neneh kuan tuan.”

³¹Idi keburu' Pilauts nedeh, "Do' muyuh ngalap Neneh idi ngukum Neneh maya' Ukum muyuh." Keburu' lun Yahudi neneh, "Kai ini na miak ngaté seburur lemulun pana'.”

(³²Ini mangun pad ngacing luk pangeh bila Yésus ratnan lawé atéNeh.)

³³Pangeh Pilatus nesemuet bang ruma' Lun luk Ngimet Ukum ineh, idi ieh nenawar Yésus, idi ieh nengitun, "Ikoké Raca' lun Yahudi?"

³⁴Idi kebala Yésus, "Inanké bala ini ratnan Tuan sebuleng, kian, lun baken nemala kuanmu ratnan Ui lek?"

³⁵Kebala Pilatus, "Ui ini lun Yahudiké? PupuMu sebuleng idi imam-imam rayeh luk nemaré Namu kuanku. Anunké luk inau'Mu?"

³⁶Idi kebala Yésus, "ImetKu ineh baken ratnan tana' ini. Kudeng ImetKu ratnan tana' ini, kali' rungen demulun-demulunKu miak pebunu' pad Ui na barén kuan lun Yahudi. Iamo' ImetKu ineh baken ratnan tana' ini!"

³⁷Idi keburu' Pilatus Neneh, "Iko pana' seburur raca ké?" Idi kebala Yésus, "Matu kudeng buri'mu, Ui ini seburur raca' Ini punneh Ui pangeh tinganak, idi nacing bang tana' ini pad Ui maré kali' ratnan luk matu. Idé-idé luk geregan ku luk matu ineh, ieh luk ninger balaKu."

³⁸Idi keburu' Pilatus Neneh, "Anunké luk matu ineh?" Idi Pilatus neremuat iné' nelun Yahudi, idi keburu'neh nedeh, "Ui na kali' anun punneh ui ngukum Neneh.

³⁹Iamo' maya' adat muyuh, kareb Irau Paska ui miak muit seburur lemulun luk tinutup. Sikalké muyuh ku ui muit Raca' lun Yahudi ineh?"

⁴⁰Idi ideh nengitang, keburu' deh, "Baken Ieh, iamo' Barabas!" (Barabas ineh seburur lun mano.)

Yahya 19

¹Pangeh ineh Pilatus pana' nenguit Yésus, idi nemebal Neneh.

²Idi lun pebunu' ineh nengapid tabpa' ku pata idi nengerareng ineh luun uluhNeh. Idi ideh nengayung Neneh ku kuyu' luk sia' merirem;

³Idi ideh iné' Neneh, kebaladeh, "Tabi' Raca' lun Yahudi!" Idi ideh nemepag Neneh.

⁴Idi Pilatus neremuat idi nepebala nedeh, "Siruh, ui nguit Neneh kuan muyuh, pad muyuh kali' negku na kali' anun punneh ui ngukum Neneh."

⁵Idi Yésus neremuat, dengan pata luk metabpa' idi kuyu' luk sia' merirem. Idi keburu' Pilatus kuan amung-amungdeh, "Siruh, lemulun ineh!"

⁶Kareb imam-imam rayeh idi lun pulis pana' nenier Neneh, idi ideh nengitang, keburu'deh, "Nalib Neneh, nalib Neneh!" Idi keburu' Pilatus nedeh, "Do' muyuh ngalap Neneh, idi nalib Neneh! Ngaceku na ui kali' anun punneh ui ngukum Neneh."

⁷Idi lun Yahudi nengor balaneh, keburu'deh, "Maya' Ukum kai do' Ieh mate, ngaceku Ieh nemala bururNeh Anak Allah."

⁸Kareb Pilatus neninger bala ineh, idi ieh pelaba tot.

⁹Ieh nesemuet bang ruma' Lun luk Ngimet Ukum ineh sekua' teh, idi nepebala inan Yésus, "Rat iapehké iratMu?" Iamo' Yésus na nengor balaneh.

¹⁰Idi keburu' Pilatus Neneh, "Naké Iko sikal pebala negku? Naké Iko kali' ui melalud muit Namu, idi melalud nalib Namu?"

¹¹Idi kebala Yésus neneh, "Iko na melalud pa luunKu, kudeng na biré namu ratnan Allah. Ngaceku ineh lemulun luk nemaré Negku kuanmu meluun rayeh sala'."

¹²Kareb Pilatus neninger bala ineh, idi ieh nenakap dalam sikal muit Yésus. Iamo' lun Yahudi nengitang, keburu'deh, "Kudeng Tuan muit lemulun ini, baken Tuan lun dengan raca' Rum. Idé-idé luk ngamo bururneh raca', ieh luk sikal metueh ratnan raca' Rum."

¹³Pangeh Pilatus neninger bala ini, idi ieh neguit Yésus remuat, idi netudo luun kerusi besara', idi su ineh titen "Batu luk Mebalad." (Bang buri' Iberani ieh ineh, "Gabata".)

¹⁴Kareb ineh lélé muned aco, idi kenebpa Irau Paska. Idi kebala Pilatus nelun Yahudi, "Siruh, Raca' muyuh!"

¹⁵Iamo' ideh nengitang, keburu'deh, "Ngaté Neneh! Ngaté Neneh! Nalib Neneh!" Idi keburu' Pilatus nedeh, "Do'ké ui nalib Raca' muyuh?" Idi imam-

imam rayeh nengor balaneh, keburideh, "Na luk idi raca' kai luk baken ratnan raca' Rum."

¹⁶Idi Piltus nemaré Yésus nedeh, pad Ieh uen nalib. Idi ideh nenguti Yésus.

¹⁷Idi Ieh neremuat idi nemaan salibNeh sebuleng amé' matun. Su luk inan Perupuk Uluh (Bang buri' Iberani ieh ineh "Golgota.")

¹⁸Déi' ideh nenalib Neneh dengan dueh burur lun baken, sebuleng selipa idi sebuleng selipa, iamo' Yésus arang uned didueh.

¹⁹Pilatus nengayud aceh surat, idi ieh nengerareng ineh pa luun salib ineh. Ieh nengayud kudeng ini, "Yésus, lun Nasarét, Raca' lun Yahudi."

²⁰Idi mula' lun Yahudi nemaca' ayud ineh, ngaceku su luk inan Yésus sinalib ineh muneng inan bawang, idi surat ineh inayud bang buri' Iberani, buri' Rum, idi buri' Grika.

²¹Idi kebala imam-imam rayeh lun Yahudi kuan Pilatus, "Aleg iko ngayud 'Raca' lun Yahudi,' iamo', 'Ui ini Raca' lun Yahudi,' mepad kudeng luk bilaNeh ineh."

²²Iamo' kebala Pilatus, "Luk pangeh inayudku pangehneh ineh."

²³Pangeh lun pebunu' ineh nenalib Yésus, idi ideh nengalap ayungNeh, idi nemabpat neneh apat babpat, ieh ineh kuan anid-anid burur lun pebunu' sebuleng babpat. Idi teh ideh nengalap kuyu'Neh; iamo' kuyu' ineh na dirut, iamo' pekatu rat dita' macing pa beneh.

²⁴Idi ideh nepebala seburur inan seburur, "Aleg tau narak neneh, iamo' do' tau nala' udi ratnan ineh, pad tau kali' idé luk miak ngalap neneh," pad ngacing bala bang Surat Allah ineh luk pebala, "Ideh pangeh nemabpat ayungKu seburur dengan seburur, Idi ideh nala' udi ratnan kuyu'Ku." Idi lun pebunu' ineh nenganau' kudeng ineh.

²⁵Idi tinan Yésus idi kinanak tinanNeh luk decur, Mariam awan Kliopas, idi Mariam Magdalena netuped iring salib Yésus.

²⁶Kareb Yésus nenier tinanNeh idi anak sekola' luk inanNeh mawa ineh tuped muneng, idi Ieh nepebala inan tinanNeh, "O Ina', siruh, anakmu!"

²⁷Pangeh ineh Ieh nepebala inan anak sekola' ineh, "Siruh, tinanmu!" Idi rat kareb ineh anak sekola' ineh nengalap neneh tudo bang ruma'neh sebuleng.

²⁸Pangeh neh Yésus nekali' idi amung-amung pangeh riniput, idi Ieh nepebala, "Ui meparing," pad ngacing bala bang Surat Allah ineh.

²⁹Idi déi' inan aceh sangkir luk rireng mepanu' ku abpa' luk malam; idi ideh nengerareng aceh lemut batu, luk mepanu' ku abpa' luk malam nan paped angkat likudung, idi nenguit ineh macing inan tang Yésus.

³⁰Kareb Yésus pangeh nengalap abpa' luk malam ineh, kebalaNeh, "Pangeh meriput!" Idi Ieh nemunel idi niatNeh neputut.

³¹Idi ngaceku aco sineh aco limeh, ieh ineh Aco Temina' kuan Irau Paska, pad butung lemulun luk sinalib ineh na ketecan luun salib, meluun teh ngaceku Aco luk inan Mudeng bang minggu ineh meluun ligan, idi lun Yahudi nemutuh Pilatus nima' nedeh mutul kukuddeh idi ngalap butungdeh ratnan salib.

³²Idi lun pebunu' nacing, idi nemutul kukud lemulun luk pun-pun idi kukud lun baken luk sinalib dengan Yésus ineh.

³³Iamo' kareb ideh nacing ni Yésus idi nenier Neneh pangeh naté, na ideh nemutul kukudNeh.

³⁴Iamo' seburur lun pebunu' nenebpek sigarang Yésus ku busu, idi petacu dara' Yésus neremuat dengan abpa'.

(³⁵Idi lemulun luk pangeh nenier ineh nemaré kali', pad muyuh miak manu. Luk nekali'neh ineh matu. Idi ieh kali' luk bilaneh ineh matu.)

³⁶Ini punneh ini mangun, pad ngacing bala bang Surat Allah ineh, "Sebuleng tulangNeh pana' na miak pitulen."

³⁷Idi inan teh ayat bang Surat Allah luk mala, "Ideh miak nier Neneh luk pangeh tibpekdeh."

³⁸Pangeh ineh Yusup lun Arimatia nemutuh butung Yésus rat ni Pilatus. (Yusup ineh seburur anak sekola' Yésus teh, iamo' dengan lulem ngaceku matot nelun Yahudi.) Idi Pilatus nenima' neneh. Idi Yusup iné' ngalap butung Yésus.

³⁹Idi Nikodimus luk iné' atun matun Yésus kareb malem, nacing teh, idi nenguit mur pinuar dengan tara ala, lélé anem ngepulu' kati beratneh.

⁴⁰Idi didueh nengalap butung Yésus, idi nengelilib neneh ku kibung luk do' idi ku amung-amung luk do' buen ineh, maya' lawé nanem lun Yahudi.

⁴¹Muneng ku su luk inan Yésus sinalib ineh inan aceh kabun, idi bang kabun ineh inan aceh tanem luk mebaruh, su luk nateh inan ngerareng butung lemulun.

⁴²Ngaceku aco sineh kareb nateh Aco luk inan Mudeng, idi ideh nengerareng butung Yésus bang ineh.

Yahya 20

¹Pekak uka-uka bang Aco Minggu, ieh ineh kareb medacem teh, idi Mariam Magdalina iné' inan tanem ineh, idi nenier batu ineh pangeh linubid rat munung lubang tanem ineh.

²Idi ieh nupun iné' nakap Simun Pétrus, idi anak sekola' luk baken luk inan Yésus mawa, idi nepebala nedidueh, "Lemulun pangeh nengalap Tuhan rat bang tanem, idi na kai kali' iapeh inandeh nengerareng Neneh."

³Idi Pétrus neremuat dengan anak sekola' luk baken ineh idi iné' nan tanem ineh.

⁴Idi didueh nupun, iamo' anak sekola' luk baken nupun, meluun awer rat ni Pétrus, idi nacing atun inan tanem ineh.

⁵Ieh netekunal, idi ieh nenier amung-amung kibung ineh ketecan, iamo' na ieh nesemuet bang tanem ineh.

⁶Simun Pétrus pana' nacing rat pa puet, idi nesemuet bang tanem ineh, idi ieh nenier kibung ineh teh,

⁷Idi aduk luk luun uluhNeh atun na rireng dengan kibung luk baken, iamo' linulun setau'.

⁸Idi anak sekola' luk baken luk nacing atun déi' bang tanem ineh pana' nesemuet, idi nenier idi manu.

(⁹Nateh ideh nekali' ilung bala bang Surat Allah ratnan Ieh na miak na tumui rat arang lun naté.)

¹⁰Idi dueh anak sekola' ineh nuli'.

¹¹Iamo' Mariam nangi' pa atun tanem ineh. Kareb ieh nangi' ieh netekunal idi nenier bang tanem;

¹²Idi ieh nenier dueh burur melaikat luk ayung mebuda' luk tudo, ieh ineh seburur pa uluh idi seburur pa kukud su luk inan nengerareng butung Yésus atun.

¹³Idi kebala didueh ni Mariam, "O decur, anunké punneh iko nangi'?" Idi keburi' Mariam nedidueh, "Ngaceku lemulun pangeh nengalap Tuhanku, idi ui na kali' iapeh inandeh nengerareng Neneh."

¹⁴Pangeh Mariam nepebala kudeng ineh, idi ieh nelumi, idi nenier Yésus tuped su ineh, iamo' na ieh miti Neneh Yésus.

¹⁵Idi Yésus nengitun neneh, kebalaNeh, "O decur, anunké punneh iko nangi'? Idéké luk tekapenmu?" Mariam ngerawé Ieh ineh lun matar kabun, idi kebalaneh Neneh, "Tuan, kudeng iko nengalap Neneh rat ieni, mada' negku, iapehké inanmu nengerareng Neneh, pad ui miak amé' ngalap Neneh."

¹⁶Kebala Yésus neneh, "Mariam!" Idi Mariam nelumi idi nepebala bang buri' lun Iberani, "Rabbuni!" (Ilungneh "Guru.")

¹⁷Idi kebala Yésus neneh, "Aleg iko ngakem Negku, ngaceku nateh Ui numak iné' inan TamanKu, iamo' amé' iko inan amung-amung kinanakKu, idi mala kuandeh, 'Ui umak amé' inan TamanKu idi Taman muyuh, idi inan TuhanKu idi Tuhan muyuh.' "

- ¹⁸Idi Mariam Magdalina iné' mada' anak-anak sekola' ineh ratnan ieh pangeh nenier Tuhan, idi nemada' nedeh ratnan amung ini.
- ¹⁹Idi kareb malem Aco Minggu, idi kareb amung-amung tanga' initek su luk inan anak-anak sekola' tudo ngaceku matot nelun Yahudi, idi Yésus nacing netuped arangdeh idi nemala kuandeh, "Awang kuan muyuh!"
- ²⁰Kareb Ieh pangeh nemala kudeng ini, Ieh nemada' ticu'Neh idi sigarangNeh sirendeh. Idi anak-anak sekola' ineh mawang niat kareb ideh nenier Tuhan ineh.
- ²¹Idi Yésus nemala kuandeh sekua' teh, "Awang kuan muyuh! Mepad kudeng Taman pangeh nengecuk nemuyuh."
- ²²Idi kareb Ieh pangeh nemala kudeng ini, idi Ieh nenginiat kuandeh idi nepebala nedeh, "Lapen muyuh Roh Meligan.
- ²³Kudeng idé-idé luk inan muyuh maré do' ratnan sala'deh, idi ideh miak ngalap do' ratnan sala', idi idé-idé luk inan muyuh na maré do', idi ideh mabeh sala'deh."
- ²⁴Idi Tomas, seburur rat arang pulu' dueh anak sekola' ineh, (luk titen Anak Rapid), na idi dengandeh kareb Yésus nacing.
- ²⁵Idi anak-anak sekola' luk baken ineh nepebala neneh, "Amung-amung kai pangeh nepapu' dengan Tuhan ineh." Iamo' Tomas nepebala nedeh, "Kudeng ui na nier lubang paku' bang paladNeh, idi na ngerareng bua' ticu'ku bang lubang paku' di, idi na ngerareng ticu'ku bang sigarangneh, na ui miak manu."
- ²⁶Pangeh seminggu, idi anak-anak sekola' Yésus nepamung bang ruma' teh, idi Tomas pana' idi dengandeh. Kareb tanga' ruma' ineh initek, idi Yésus nacing netuped arangdeh idi nepebala, "Awang kuan muyuh!"
- ²⁷Idi Ieh nepebala ni Tomas, "Ngerareng bua' ticu'mu su ini idi nier paladKu, idi natang ticu'mu idi ngerareng neneh bang sigarangKu, idi aleg iko merapang, iamo' manu."

²⁸Idi kebala Tomas Neneh, "O Allah, O Tuhanku!"

²⁹Kebala Yésus neneh, "Manuké iko ngaceku iko nenier Negku? Samal kuan lemulun luk manu, sagan pana' na nenier Negku!"

³⁰Idi inan mula' tanu' luk baken teh luk inau' Yésus pa kiung anak-anak sekola'Neh luk na inayud bang surat ini.

³¹Amung-amung ini pangeh inayud, pad muyuh miak manu, idi Yésus ineh Keristus, Anak Allah, pad muyuh luk manu ineh miak ngalap ulun bang ngadanNeh.

Yahya 21

¹Pangeh ineh Yésus nengegala' bururNeh sekua' teh kuan anak-anak sekola'Neh déi' Takung Tiberias. Kudeng ini lawéneh.

²Simun Pétrus, Tomas (luk titen Anak Rapid). Nataniel (rat bawang Kana déi' tana' Galilia), anak-anak Sabdi, idi dueh burur anak-anak sekola'Neh luk baken nepamung.

³Idi keburu' Simun Pétrus nedeh, "Ui amé' ngerabat." Idi keburu'deh neneh, "Kai pana' sikal maya' namu." Idi ideh nesemuet bang alud idi nenalan; idi kareb malem ineh sebuleng pana' nateh luk ilapdeh.

⁴Kareb aco masat Yésus netuped tangeb abpa'; iamo' anak-anak sekola' ineh na kali' Neneh Yésus.

⁵Kebala Yésus nedeh, "O lun rurumKu, inanké lawid muyuh?" Idi kebaladeh, "Na luk idi."

⁶Kebala Yésus nedeh, "Mepet rabat muyuh pa tinueh alud ineh, kali' rungen muyuh ngalap." Idi ideh nemepet rabatdeh, idi ideh na miak ngeruid neneh ngaceku pelaba ula' lawid.

⁷Idi anak sekola' luk inan Yésus mawa nepebala ni Pétrus, "Ieh ineh Tuhan!" Kareb Simun Pétrus neninger idi Ieh ineh Tuhan, idi ieh nengabet kuyu'neh i awa'neh, ngaceku ieh lungu, idi ieh nubpa bang abpa'.

⁸Iamo' anak-anak sekola' luk baken nacing dengan alud ineh, ngaceku ideh na mado tu rat tangeb, iamo' limeh ngepulu' depeh mo'. Idi ideh nengeruid rabat luk mepanu' ku lawid ineh.

⁹Kareb ideh numak luun tangeb, idi ideh nenier bareh apui, idi lawid rireng pa luunneh dengan ruti.

¹⁰Idi kebala Yésus nedeh, "Do' muyuh nguit sesuut lawid luk ilap muyuh ina."

¹¹Idi Simun Pétrus numak bang alud idi nengeruid rabat ineh luk mepanu' ku lawid luk mekara macing nan tangeb, idi inan meratu limeh ngepulu' teluh kinula'deh, iamo' na rabat ineh nedarak.

¹²Kebala Yésus nedeh, "Amé' tungé idi kuman." Iamo' seburur anak sekola' pana' nateh luk mekuu' ngitun Neneh, "Idéké Iko?" ngaceku ideh kali' Ieh ineh Tuhan.

¹³Idi Yésus nacing idi nengalap ruti idi nemaré kuandeh, idi kudeng ineh teh lawid ineh pana'.

¹⁴Idi ineh luk keteluh kua'neh Yésus nengegala' bururNeh kuan anak-anak sekola'Neh mucu ratnan Ieh netumui rat arang lun naté.

¹⁵Pangeh ideh nekuman, idi Yésus nengitun Simun Pétrus, "O Simun, anak Yahya, mawaké iko Negku meluun ratnan lemulun ini?" Idi keburu' Pétrus Neneh, "O Tuhan, Iko kali' idi ui mawa Namu." Idi kebala Yésus neneh, "Do iko maman anak-anak dumbaKu."

¹⁶Idi Ieh nengitun neneh luk kedueh kua', "O Simun, anak Yahya, mawaké iko Negku?" Idi keburu' Pétrus Neneh, "O Tuhan, Iko kali' idi ui mawa Namu." Idi kebala Yésus neneh, "Do' iko maman dumba-dumbaKu."

¹⁷Idi Ieh nengitun neneh luk keteluh kua', "O Simun, anak Yahya, mawaké iko Negku?" Idi Pétrus pana' mesusa', ngaceku pangeh teluh kua' Ieh nengitun neneh, "Mawaké iko Negku?" Idi keburu' Pétrus Neneh, "O Tuhan, Iko kali' amung-amung, idi Iko kali' idi ui mawa Namu." Idi kebala Yésus neneh, "Do' iko maman dumba-dumbaKu.

¹⁸Matu, Ui pebala namu, kareb iko isuut, iko sebuleng nengabet awa'mu, idi iné' iapeh-iapeh pian niatmu; iamo' kareb iko pangeh rayeh, iko miak natang ticu'mu, idi seburur lun baken miak ngabet awa'mu, idi nguit namu amé' su luk inanmu na sikal amé'."

¹⁹Dengan bala ini Yésus nengegala' ayu até Pétrus luk miak ngerayeh Allah. Kareb Ieh pangeh nepebala kudeng ini, idi kebalaNeh ni Pétrus, "Do' iko maya' Negku."

²⁰Pétrus nelumi, idi nenier anak sekola' luk ina Yésus mawa maya' pa puetdeh, idi ieh ineh luk iné' muneng nan Yésus kareb irau malem idi nengitun, "Idéké luk miak masui Tuhan?"

²¹Idi kareb Pétrus nenier anak sekola' ineh, idi ieh nepebala nan Yésus, "O Tuhan, kudeng apehké lemulun ini?"

²²Idi kebala Yésus neneh, "Kudeng pianKu lemulun ini ketecan pad Ui macing baruh, bala ini baken kuanmu. Do' iko maya' Negku."

²³Idi bala ini nepiar arang uned amung-amung kinanak, idi anak sekola' ineh na miak maté. Iamo' baken kudeng ineh bala Yésus, idi anak sekola' ineh na miak maté, iamo', "Kudeng pianKu idi lemulun ini ketecan pad Ui macing baruh, bala ini baken kuanmu."

²⁴Idi ieh ineh anak sekola' luk maré kali' ratnan amung-amung ini, idi luk pangeh ngayud amung-amung ini; idi tau kali' idi luk nekali'neh ineh matu peh.

²⁵Idi inan teh mula' kekamen baken luk inau' Yésus, idi kudeng anid-anid kekamen ineh uen ngayud, ui ngerawé tana' ini pana' na miak ngimet surat-surat luk uen ngayud ineh.

Kekamen Rasul-Rasul

Kekamen Rasul-Rasul 1

- ¹Kuan kinanakku Téopilus: Bang suratku luk atun ineh ui nengayud ratnan amung-amung luk inau' idi bida' Yésus rat kareb Ieh nengimun kekamenNeh,
- ²pad macing aco Ieh kinikit iné' surga. Kareb nateh Ieh kinikit, dengan lalud Roh Meligan Ieh nemada' rasul-rasul luk pangeh pinili'Neh.
- ³Ruked apat ngepulu' aco pangeh atéNeh Yésus nesilangan nedeh tuda'-tuda' kua; pad ngegala' kuandeh ratnan Ieh mulun. Ieh sinierdeh, idi nepebala nedeh ratnan Imet Allah.
- ⁴Kareb ideh nepamung, idi Ieh nemebpeng nedeh na necan Yerusalim, kebalaNeh, "Do' muyuh nganét baré luk pijani' TamanKu, luk bilaKu nemuyuh.
- ⁵Yahya nengerereb dengan abpa', iamo' na mio teh muyuh ini rerebpen dengan Roh Meligan.”
- ⁶Kareb rasul-rasul nepamung dengan Yésus, idi ideh nengitun Neneh, keburi'deh, "O Tuhan, miakké Iko ngelubed Imet kuan Israil nekini?”
- ⁷Kebala Yésus nedeh, "Na muyuh miak kali' aconeh idi karebneh, luk litep TamanKu maya' laludNeh sebuleng.
- ⁸Iamo' muyuh miak mepanu' ku lalud kareb Roh Meligan temurun luun muyuh, idi muyuh miak mangun ku lun nekali' Negku, do' déi' Yerusalim, do' aput tana' Yudia idi Samaria pad macing iring tana'pana'.”
- ⁹Idi pangeh Ieh nepebala kudeng ineh, idi Ieh ilap peh laba' ideh nier Neneh, idi aceh laput nengelinged Neneh rat pa kiungdeh.
- ¹⁰Idi laba' ideh netengook déi' langit kareb Ieh numak, denak-denak dueh burur lemulun dengan ayung luk mebuda', tuped muneng iringdeh.
- ¹¹Idi kebala didueh, "O muyuh lun Galilia, ngudehké muyuh tuped idi netengook nier déi' langit? Yésus ini luk kinikit rat arang muyuh iné' surga,

miak temurun mepad kudeng luk sinier muyuh kareb Ieh kinikit iné' surga ineh.”

¹²Pangeh ineh rasul-rasul nelemubed iné' Yerusalim rat Pegkung Saitun, luk lélé setangal batu rat Yerusalim.

¹³Ideh nesemuet bang bawang Yerusalim idi numak semuet bang takep luk pa luun, ieh ineh su luk inan Pétrus, Yahya, Yakub idi Andrias, Pilipus idi Tomas, Bartolomius idi Matius, Yakub Alpius, Simun lun Selot, idi Yudas Yakub.

¹⁴Idi amung-amungdeh megéi' perurum sembayang dengan tuda'-tuda'decur, idi Mariam tinan Yésus, idi dengan kinanak-kinanakNeh

¹⁵Pangeh tuda'-tuda' aco inan aceh tebubpun lun manu, ieh ineh lélé meratu dueh ngepulu' burur kinula'deh, idi Pétrus netuped idi nemada'.

¹⁶Kebalaneh, "O kinanak-kinanakku, na miak na bala bang Surat Allah uen ngacing, maya' kudeng luk bila Roh meligan dengan dila' Daud ratnan Yudas, luk mangun ku lun nguyut lemulun luk nengakem Yésus.

¹⁷Atun Yudas ineh bang rurum tau, ngaceku ieh pangeh pinili' ngalap babpat bang kekamen tau.”

¹⁸(Idi Yudas ngalap aceh babpat tana' dengan raga kekammeneh luk dat, su luk inanneh nebpeh muki' idi batekneh nebacit, pad tinéi'neh neremuat.

¹⁹Idi bala ineh naput kuan amung-amung lemulun déi' Yerusalim, pad tana' ineh titen dengan buri'deh sebuleng, Akeldama, ilungneh, "Tana' Dara".)

²⁰"Ngaceku pangéh inayud bang surat Nani Ubur, 'Aganeh dat ali luk inanneh tudo; aleg maré lemulun tudo' déi'. Idi teh pangéh inayud, 'Aganeh lun baken ngalap kekammeneh.'

²¹⁻²²"Ngaceku ineh, do' seburur lemulun maya' netau mangun ku lun nekali' ratnan tui Tuhan Yésus. Do' ieh pilin rat arangdeh luk bang rurum tau, ruked Yésus idi dengan tau, ngimun rat kareb Yahya nemada' ratnan rerebneh, macing aco luk inan Yésus kinikit rat arang tau iné' surga.”

²³Idi ideh nemili' dueh burur lemulun ieh ineh Yusup (luk titen Barsabas idi Yustus), idi teh Matias.

²⁴Idi ideh nesembayang, kesembayangdeh, "O Tuhan, Iko luk kali' niat amung-amung lemulun, do' mada' rat arang dueh burur ini, idéké luk pinili'Mu,

²⁵ngalap babpat bang kekamen ini idi bang kekamen rasul luk tican Yudas, kareb ieh iné' su luk inanneh."

²⁶Idi ideh nenala' udi kuan dueh burur ineh, idi Matias luk nekaneh pili' ineh. Idi ieh iniap dengan pulu' aceh rasul ineh.

Kekamen Rasul-Rasul 2

¹Kareb macing Aco Pentakosta, idi amung-amungdeh netebubpun bang aceh ruma.

²Idi denak-denak inan uni rat bang langit, ayuneh kudeng uni bui luk rayeh luk manu' amung ruma' luk inandeh tudo ineh.

³Idi ideh nenier tuda'-tuda' dila' mepad kudeng apui ayudeh, luk patad-patad, idi netudo luun anid-anid burur lemulun ineh.

⁴Idi amung-amungdeh pana' mepanu' ku Roh Meligan, pad ideh nengimun peburi' dengan raput-raput buri' kareb Roh ineh nemaré nedeh peburi'.

⁵Idi inan tuda'-tuda' lun Yahudi luk tudo déi' Yerusalim, luk mepicet bang sembayangdeh, luk nacing rat anid-anid bawang bang tana' ini.

⁶Kareb ideh neninger uni ineh, idi lun mula' nepamung, idi ideh mawa ngaceku anid-anid bururdeh neninger rasul-rasul ineh pebala dengan buri'deh sebuleng.

⁷Lun mula' ineh lingo-lingo idi mawa, keburideh, "Siruh, bakenké lemulun luk pebala ini lun Galilia?

⁸Kudeng apehké tau ninger nedeh, anid-anid pebala bang buri' tau sebuleng?

⁹Tau ini rat Partia, Midia, Elam, Mesopotamia, Yudia, Kapadokia, Pontus, idi Asia,

- 10**rat Prigia idi Pampilia, rat Masir idi babpat-babpat Libia luk muneng ku Kiréne; inan teh arang tau rat Rum;
- 11**inan teh lun Yahudi, idi lun pupu baken luk maya' sembayang lun Yahudi; idi sebuang tau ini rat Kriti idi Arabia, iamo' amung tau ninger lemulun ineh pebala bang buri' tau sebuleng ratnan kekamen Allah luk melalud."
- 12**Idi amung-amungdeh lingo-lingo idi megagau idi pebala seburur inan seburur, "Anunké ilungneh ini?"
- 13**Iamo' lun baken situnga, keburideh, "Lun ini mabuk."
- 14**Idi Pétrus netuped dengan pulu' aceh rasul luk baken idi nemada' nelun mula' dengan rayeh bala, kebalaneh, "O lun Yahudi idi amung muyuh luk tudo déi' Yerusalim, ninger balaku ini idi nima' negku ngelio ilung ini.
- 15**Lemulun ini na mabuk, kudeng terawé muyuh, ngaceku nekini tanggal mudik aco mo'.
- 16**Iamo' ini bala luk bida' Nabi Yoél:
- 17**Idi Allah pebala: Kareb aco kekiped Ui sikal ngutang Rohku kuan amung lemulun, pad anak-anak muyuh deléi idi decur miak mada' luk barén Allah, idi anak adi' muyuh miak nier tuda'-tuda' luk siren, idi lun mengered nginupi raput-raput nupi.
- 18**Idi luun demulun-demulunKu, deléi idi decur pana', Ui sikal ngutang RohKu kareb ineh teh, pad ideh pana' mada' luk barén Allah.
- 19**Ui nganau' kekamen luk nan mawa bang langit, idi tanu'-tanu' luun tana' pana'. Ieh ineh dara', apui, idi rabpun luk mitem;
- 20**mateh aco mangun medacem, idi bulan mesia' kudeng dara', kareb nateh Aco Tuhan macing, ieh ineh aco luk rayeh idi luk meligan teh.
- 21**Kareb ineh, idé-idé luk nawar ngadan Tuhan miak uen ngulun peh.'
- 22**"O lun Israil, ninge muyuh bala ini: Yésus lun Nasarét ineh pangeh imo Allah. Amung ini ginala'Neh kuan muyuh dengan kekamen luk melalud,

kekamen luk nan mawa, idi tanu'-tanu' pana' luk inau' Allah dengan tiku' Yésus arang muyuh. Muyuh sebuleng kali' amung ineh.

²³Allah, maya' pian idi ilehNeh sebuleng, pangeh nemutut ratnan Yésus barén bang palad muyuh. Idi muyuh nengaté Neneh kareb muyuh nenima' lemulun luk dat nalib Neneh.

²⁴Idi Yésus ineh tinui Allah idi pinuitNeh ratnan dereh até, ngaceku até na miak ngimet Neneh.

²⁵Ngaceku Daud nemala ratnan Ieh kudeng ini: 'Ui pangeh nenier Tuhan megéi' pa kiungku; Ieh idi pa tinuehku, pelé ui na mesusa'.

²⁶Ngaceku ineh niatku geregan idi dila'ku panu' ku awang; idi teh bururku miak merapet,

²⁷ngaceku na Iko maré niatku bang su inan até; idi na Iko maré DemulunMu luk meligan ruen melu.

²⁸Iko pangeh nemada' negku dalam ulun, idi ui mepanu' ku awang, ngaceku Iko idi denganku.'

²⁹"O kinanak-kinanakku, ui mekuu' pebala nemuyuh ratnan tepun tau Daud. Ieh naté idi tinanem, idi teh tanemneh arang tau macing aco sini teh.

³⁰Ieh ineh aceh nabi, idi pangeh nekali' pejani' Allah neneh: Allah nepebulung ratnan Ieh sikal nganau' aceh inul Daud mangun ku raca', mepad kudeng Daud,

³¹Daud nekali' luk ruen Allah, pad ieh nepebala ratnan tui Keristus, kebalaneh, 'Na Ieh tican bang su inan até; idi bururNeh na miak melu.'

³²Idi Yésus ini luk tinui Allah ratnan até, idi amung tau mangun ku lun nekali' Neneh.

³³Ieh pangeh kinikit, pad tudo pa tinueh Allah, idi Ieh nengalap rat Neneh Roh Meligan, idi inutangNeh Roh ineh maya' kudeng jani' TamanNeh, idi luk sinier muyuh idi luk pindenger muyuh nekini, ieh ineh baréNeh luk inutangNeh kuan kai.

³⁴Daud sebuleng na numak iné' surga; iamo' ieh nepebala: 'Tuhan pangeh nepebala kuan Tuhanku: Tudo Iko pa tinuehKu,

³⁵pad Ui nganau' amung bunu'Mu mangun ku tapin kukudMu.'

³⁶"Ngaceku ineh do' amung-amung lun Israil kali' dengan megala' ratnan Allah pangeh nenganau' Yésus luk sinalib muyuh ineh mangun ku Tuhan idi Keristus."

³⁷Kareb lun mula' neninger bala ineh, idi niatdeh nesigio idi mesusa', idi kebaladeh ni Pétrus idi rasul-rasul luk baken ineh, "O kinanak-kinanak, anunké luk miak ruen kai?"

³⁸Idi keburu' Pétrus nedeh, "Do' amung-amung muyuh uren, idi rerebpen bang ngadan Yésus Keristus, pelé muyuh ngalap do' ratnan sala' muyuh; idi muyuh miak ngalap baré Allah, ieh ineh Roh Meligan.

³⁹Ngaceku Allah nepejani' baken kuan muyuh mo' iamo' kuan inul muyuh pana', idi teh kuan lemulun luk mado, ieh ineh idé-idé luk darin Tuhan Allah tau amé' Neneh."

⁴⁰Idi Pétrus nengubuk nedeh idi nemada' nedeh dengan mula' bala luk baken, keburu'neh, "Ngulun burur muyuh ratnan ukum luk macing kuan pupu luk tekilu' ini!"

⁴¹Mula' lemulun manu ku balaneh pad ideh rireb peh. Kareb aco ineh teh inan lélé teluh ngeribu burur luk nemaya' nedeh.

⁴²Idi ideh pana' lutep ninger bada' rasul-rasul idi ideh perurum seburur dengan seburur, pamung kuman, idi sembayang teh.

⁴³Amung lemulun matot ku tanu'-tanu' idi kekamen luk nan mawa luk inau' rasul-rasul ineh.

⁴⁴Amung-amung lun manu ineh serurum idi binawehdeh bibpat kuan amung-amungdeh.

⁴⁵Ideh nemasui binawehdeh idi amung luk ideh kuan, idi nemaré babpat kuan amung-amung lemulun, maya' ran niatdeh.

⁴⁶Anid-anid aco ideh teubupun bang Ruma' Allah, idi pamung kuman bang ruma'deh sebuleng, dengan awang idi mebeneh niat.

⁴⁷Ideh nengubur Allah, idi amung lemulun mawang niat nedeh. Idi anid-anid aco Tuhan nengula' rurumdeh ngaceku ratnan lemulun luk ngalap ulun luk meruked.

Kekamen Rasul-Rasul 3

¹Bang seaco Pétrus idi Yahya numak Ruma' Allah kareb inan sembayang, ieh ineh tangal musul aco.

²Idi inan selemulun luk meliai rat bang batek tinanneh luk binirir lemulun; idi inau'deh anid-anid aco tudo munung tanga' Ruma' Allah luk titen Tanga' luk Do', pad mutuh mo' rat nelun luk nesemuet bang Ruma' Allah ineh.

³Kareb ieh nenier Pétrus idi Yahya semuet bang Ruma' Allah, idi ieh nemutuh mo' rat nedidueh.

⁴Iamo' Pétrus idi Yahya nenier neneh idi nepebala, "Nier nekai do'-do'."

⁵Idi ieh nenier nedidueh ineh merapet miak ngalap anun-anun rat nedidueh.

⁶Idi keburu' Pétrus neneh, "Amas idi pirak na luk idi negku, iamo' anun luk inan negku, ineh ui miak maré kuanmu: dengan ngadan Yésus Keristus, lun Nasarét ineh, nalan iko!"

⁷Idi Pétrus pana' nengimet ticu'neh pa tinueh idi nengegenang neneh. Idi kareb ineh petacu kukudneh idi bangilneh metueh peh.

⁸Idi ieh nesikau' idi netuped, idi petacu nenalan, idi nesemuet bang Ruma' Allah dengan didueh, idi nenalan idi nesikau'-sikau' nengubur Allah.

⁹Idi lun mula' ineh nenier neneh nalan idi ngubur Allah,

¹⁰idi kareb ideh nengiti neneh, ngaceku ieh luk tudo mutuh mo' munung tanga' Ruma' Allah luk titen Tanga' luk Do' ineh, idi amung-amung lemulun ineh pelaba awa idi lingo-lingo ngaceku amung-amung luk pangeh mangun kuanneh.

- ¹¹Kareb uned lemulun ineh nengimet Pétrus idi Yahya, idi amung-amung lemulun mawa idi nupun nepamung nan tadur luk titen Tadur Selimun.
- ¹²Kareb Pétrus nenier lun mula' ineh, idi ieh nepebala nedeh, "O lun Israil, ngudehké muyuh mawa ratnan lawé lemulun ini? Idi ngudehké muyuh ngerawé nekai nenganau' lemulun ini nalan dengan lalud idi do' kai sebuleng?
- ¹³Ngaceku Tuhan Ibrahim, Isak, idi Yakub, ieh ineh Tuhan tepun tau, nengerayeh DemulunNeh Yésus luk biré bang palad lun rayeh muyuh idi luk tila' muyuh pa kiung Pilatus kareb ieh sikal muit Neneh.
- ¹⁴Yésus ineh meligan idi matu. Iamo' muyuh nenala' Neneh idi nemutih selemulun luk munu' puatin ku libalNeh.
- ¹⁵Idi muyuh nengaté Lawa Ulun, iamo' Allah nenui Neneh rat arang lun naté, idi kai mangun ku lun nekali' ratnan amung ineh.
- ¹⁶Dengan lalud ngadan Yésus, lun luk meliai ini inau' metueh. Luk sinier muyuh idi luk initi muyuh pangeh mangun ngaceku anu nan ngadanNeh ineh. Anu inan Yésus nengedo' lemulun ini pa kiung amung muyuh.
- ¹⁷"Idi nekini, O kinanak-kinanakku, ui kali' idi muyuh nenganau' kudeng ini ngaceku na muyuh kali', idi lun luk ngimet nemuyuh pana' kudeng ineh teh.
- ¹⁸Atun Allah nemada' dengan dila' nabi-nabi ratnan KeristusNeh uen ngedereh. Idi nekini bala ineh pangeh icingNeh.
- ¹⁹Ngaceku ineh do' muyuh uren idi lumi inan Allah pad Ieh ngiu' sala' muyuh,
- ²⁰pad ulun muyuh uen Tuhan ngebaruh, pelé Allah ngecuk Yésus amé' nemuyuh, ieh ineh Keristus luk pinili'Neh kuan muyuh.
- ²¹Idi Yésus tudo déi' surga pad macing kareb Allah ngebaruh luk amung-amung maya' kudeng luk bilaNeh dengan tang nabi-nabiNeh luk meligan bang kareb luk mon.

²²Musa pangeh nepebala, 'Allah Tuhan muyuh sikal ngikit aceh Nabi kuan muyuh rat arang pupu muyuh, mepad kudeng ui. Do' muyuh ninger amung-amung luk belénNeh.

²³Idé-idé luk na ninger bala Nabi ineh, miak uen ngatad ratnan pupu Allah idi pitayen.'

²⁴Idi amung-amung nabi luk nepebala, ngimun ratnan Semuil idi nabi-nabi luk mucu, pangeh nemada' ratnan kareb ini.

²⁵Amung pejani' Allah luk icing nabi-nabi ineh, kuan muyuh, idi muyuh ngalap babpat bang pejani' luk biré Allah kuan tepun muyuh. Allah nepebala ni Ibrahim, 'Ratnan inulmu ineh amung-amung pupu bang tana' ini miak ngalap peruan.'

²⁶Idi Allah pangeh nengikit DemulunNeh, idi Ieh nengecuk Neneh amé' nemuyuh atun, pad ngeperuan nemuyuh idi nguit anid-anid burur muyuh uren ratnan kekamen muyuh luk dat."

Kekamen Rasul-Rasul 4

¹Uned Pétrus idi Yahya pebala nan lemulun ineh, idi imam-imam dengan lun Saduki, idi lun rayeh lun matar Ruma' Allah iné' nedidueh.

²Ideh museh ngaceku didueh ineh nemada' nelun mula' ratnan Yésus netumui ratnan até, luk mangun ku tanu' ratnan lun maté pana' miak tumui.

³Idi ideh nengakem nedidueh idi nenipa nedidueh bang tutup macing kenebpa, ngaceku pangeh malem.

⁴Iamo' mula' lemulun luk neninger bala ineh manu; idi amung deléi ineh lélé macing limeh ngeribu burur.

⁵Idi kenebpa amung lun luk ngimet nelun Yahudi, lun rayeh-rayeh, idi guru-guru Ukum nepamung déi' Yerusalim.

⁶Ideh nepegayam dengan Annas Imam Rayeh, Kayapas, Yahya, Iskandar, idi amung lemulun ineh pana' luk ratnan inul Imam Rayeh.

⁷Ideh nenganau' rasul-rasul ineh tuper arangdeh, idi ideh nengitun nedidueh, "Kudeng apehké muyuh nengedo' lun luk meliai ineh? Lalud anunké idi ngadan idéké luk pikai muyuh?"

⁸Idi pangeh ineh Pétrus luk mepanu' ku Roh Meligan nengor baladeh, keburi'neh, "O muyuh lun ngimet idi lun rayeh teh,

⁹kudeng kai ini tinutun aco sini ratnan kekamen luk do' luk inau' kuan lun mét meliai, kudeng apéh lemulun ini pangeh dino',

¹⁰do' amung muyuh kali' idi amung pupu Israil pana', idi dengan ngadan Yésus Keristus, lun Nasarét luk pangeh sinalib muyuh, idi luk tinui Allah rat arang lun naté, ratnan lalud Dieh lemulun ini tuper pa kiung muyuh dengan do'.

¹¹Surat Allah ngegala' ratnan Yésus ineh, kebalaneh, 'Batu luk tila' muyuh luk mudut ruma', mangun luk Batu Lidung."

¹²Idi na luk idi ulun luk meruked bang selemulun luk baken, ngaceku na luk idi ngadan luk baken aput tana' luk pangeh biré Allah kuan lemulun, luk inan tau miak ngalap ulun luk meruked."

¹³Kareb lun rayeh ineh nenier kuu' Pétrus idi Yahya, idi ideh nekali' nedidueh lun dat idi na mileh teh, ideh mawa. Idi ideh nekali' ratnan didueh ineh lun rurun Yésus atun.

¹⁴Ideh na miak mala anun-anun pana', ngaceku ideh nenier lemulun luk pangeh dino' ineh tuper dengan didueh.

¹⁵Idi ideh nengecuk nedidueh remuat rat bang tebubpun besara' ineh, idi ideh nepegayam arangdeh sebuleng,

¹⁶keburi'deh, "Anunké luk miak ruen tau kuan lemulun ineh? Amung-amung lemulun luk tudo déi' Yerusalim pangeh nekali' kekamen luk inan mawa ini luk inau' didueh. Tau na miak ngalum ineh.

¹⁷Do' tau mebpeng nedidueh na mada' bang ngadan ini kuan seburur pana', pad bala ini na kali' lun baken."

- ¹⁸Idi ideh nenawar nedidueh idi nemebpeng tu-tu nedidueh aleg pebala idi mada' bang ngadan Yésus ineh.
- ¹⁹Iamo' kebala Pétrus idi Yahya, "Do' muyuh ngerawé sapehké luk matu pa kiung Allah, maya' pian muyuh kian maya' pian Allah lek.
- ²⁰Ngaceku kai na miak ugka' mada' amung luk sinier kai idi luk pindenger kai teh.”
- ²¹Iamo' lun rayeh-rayeh ineh metueh mebpeng nedidueh idi ideh nemuit nedidueh, ngaceku na luk idi punneh ideh ngukum nedidueh, ngaceku lun mula' nengerayeh Allah ngaceku ratnan tanu' luk pangeh mangun.
- ²²Idi ulun lemulun luk pangeh nedo' ratnan tanu' ini, mela apat ngepulu' lak.
- ²³Kareb Pétrus idi Yahya pinuit, idi didueh iné' matun lun ruruh didueh idi nemada' amung-amung luk pangeh bila imam-imam rayeh idi lun rayeh-rayeh pana' kuan didueh.
- ²⁴Kareb ideh neninger bala didueh, idi ideh nengitang kuan Allah dengan sebuleng niat idi sembayang, kesembayangdeh, "O Tuhan, Iko luk nemudut langit idi tana' idi abpa' rayeh idi amung uangdeh,
- ²⁵Iko nepebala dengan Roh Meligan dengan dila' tepun kai Daud demulunMu ineh, kudeng ini, 'Ngudehké amung lun pupu baken megateh niat; ngudehké amung pupu nepegayam mo'-mo'.
- ²⁶Idi amung-amung raca' bang tana' netumui, idi lun luk ngimet pana' nepamung sikal metueh ratnan Tuhan idi KeristusNeh.'
- ²⁷Matu bang bawang ini Herodés idi Pontius Pilatus nepamung dengan lun pupu baken idi pupu Israil pana' sikal metueh ratnan Yésus DemulunMu luk meligan ineh, luk inumauMu mangun ku Keristus.
- ²⁸Ideh nepamung nganau' amung-amung luk Iko pangeh nengeletep maya' lalud idi pianMu.
- ²⁹Nekini, O Tuhan, nier kudeng apeh ideh ngatot nekai, idi do' Iko maré kuan kai demulun-demulunMu ineh ileh mada' balaMu dengan mekuu'.

³⁰Natang tiku'Mu idi ngedo lemulun idi nganau' tuda'-tuda' tanu' idi kekamen luk nan mawa dengan ngadan Yésus DemulunMu luk meligan.”

³¹Kareb ideh pangeh nesembayang, idi luk inandeh tebubpun ineh neruyuh; idi amung-amungdeh mepanu' ku Roh Meligan idi nemada' bala Allah dengan mekuu'.

³²Amung-amung lun manu ineh sebuleng niat idi sebuleng terawé. Na luk idi seburur pana' luk mala binawehneh ieh kuan, iamo' amung binaweh ineh bibpatdeh.

³³Dengan lalud luk rayeh rasul-rasul ineh nemada' luk nekali'deh ratnan tui Tuhan Yésus, idi Allah nengutang peruan luk rayeh kuan amungdeh.

³⁴Seburur pana' nateh luk masi' rat arangdeh. Lemulun luk inan tana' idi ruma' nemasui ineh idi nenguit raganeh,

³⁵idi ideh nemaré ineh kuan rasul-rasul ineh, idi usin ineh uen mabpat kuan anid-aniddeh maya' ran niatdeh.

³⁶Idi Yusup seburur lun Liwi luk tinganak déi' Siprus, luk titen rasul-rasul ineh Barnabas (ilungneh "Luk Ngubuk"),

³⁷nemasui aceh tana' luk ieh kuan, idi nenguit raganeh idi nemaré usin ineh kuan rasul-rasul ineh.

Kekamen Rasul-Rasul 5

¹Inan selemulun luk ngadanneh Ananias idi awanneh Sapira. Ananias nemasui sebuang tana' didueh.

²Iamo' kareb nateh ieh nemaré raganeh kuan rasul-rasul ineh ieh nenganug sebuang ratnan raganeh kuan bururneh sebuleng. Idi awanneh pana' nekali' ineh.

³Iamo' kebala Pétrus neneh, "O Ananias, ngudehké Iko nenima' Sétan ngimet niatmu, pad iko mebalih inan Roh Meligan idi nenganug sebuang raga tana' ineh?"

⁴Kareb nateh tana' ineh pinasui, bakenké ineh iko kuan? Idi kareb ieh pangeh pinasui, bakenké raganeh iko kuan? Ngudehké iko ngerawé nganau' kudeng ineh? Iko na mebalih pa kiung lemulun, iamo' pa kiung Allah.”

⁵Kareb Ananias neninger bala ini, idi ieh neluka' idi niatneh neputut. Idi nacing aceh tot luk rayeh kuan amung-amung lemulun luk neninger bala ineh.

⁶Idi anak-anak adi' luk idi déi' nesemuet idi nengelilib neneh. Idi ideh nemirir neneh idi nenanem neneh.

⁷Idi pangeh teluh jam awanneh ineh pana' nesemuet dengan na kali' anun-anun luk pangeh mangun.

⁸Idi kebala Pétrus neneh, "Do' iko mada' negku, matuké tana' ineh muyuh pangeh nemasui dengan raga kinula' ineh?" Idi kebalaneh, "Mo, ini amung raganeh.”

⁹Idi kebala Pétrus neneh, "Anunké punneh medueh pangeh perurum sikal nutun Roh Tuhan? Siruh, lemulun luk nenanem awanmu ineh idi munung tanga', idi ideh miak mirir namu remuat teh.”

¹⁰Idi denak-denak ieh pana' neluka' iring kukud Pétrus idi niatneh neputut. Idi anak-anak adi' ineh nesemuet idi nenier decur ineh pangeh naté. Idi ideh nemirir neneh idi nenanem neneh iring awanneh.

¹¹Idi nacing aceh tot luk rayeh tu-tu kuan amung lun sidang ineh idi kuan amung lun baken luk neninger bala ineh.

¹²Mula' tanu' idi kekamen luk nan mawa inau' rasul-rasul arang pupu ineh. Idi amung-amungdeh pana' netebubpun dengan sebuleng niat luun Tador Selimun.

¹³Idi rat arang lun baken seburur pana' na mekuu' perurum nedeh, iamo' lun mula' nengubur nedeh.

¹⁴Idi inan teh lemulun luk manu inan Tuhan, ieh ineh meluun ratnan nedeh, do' decur idi deléi pana',

- ¹⁵pad ideh nenguit lun mét iné' iring dalam rayeh idi nengerareng nedeh luun pagau idi ugamdeh, pad aca' Pétrus mekaneh luunde kareb ieh lemaba.
- ¹⁶Idi mula' lemulun rat bawang luk libut-libut Yerusalim ineh nenguit lun mét idi lemulun luk sinuet ada'; idi amung-amungdeh nedo'.
- ¹⁷Iamo' Imam Rayeh idi amung luk rurunneh ineh luk ratnan babpat lun Saduki, ngimaruh nan rasul-rasul, idi pian metueh rat nedeh.
- ¹⁸Ideh nengakem rasul-rasul ineh idi nenipa nedeh bang tutup.
- ¹⁹Iamo' kareb medacem seburur melaikat Tuhan nengukab amung-amung tanga' tutup ineh idi nenguit nedeh remuat idi kebalaneh nedeh,
- ²⁰"Amé' muyuh tuped bang Ruma' Allah idi mada' nelun mula' ratnan Ulun luk mebaruh ineh."
- ²¹Rasul-rasul nemaya' balaneh ineh, idi ideh nesemuet bang Ruma' Allah kareb pekak uka-uka, idi nemada' nedeh. Idi Imam Rayeh dengan amung lun rurunneh nenawar amung lun rayeh lun Yahudi tebubpun pegayam. Idi ideh nengecuk nguit rasul-rasul rat bang tutup, pad ideh papu' tebubpun ineh.
- ²²Iamo' pulis luk iné' ineh na nekali' lemulun ineh bang tutup, idi ideh nelemubed idi nemada', keburideh,
- ²³"Kai kali' tutup ineh pangeh initek do'-do' idi lun luk matar ineh pana' tuped munung amung-amung tanga' ineh; iamo' pangeh kai nengukab tanga' ineh idi kai nenier na luk idi seburur pana' bang tutup ineh."
- ²⁴Kareb lun rayeh lun matar Ruma' Allah idi imam-imam rayeh neninger bala ineh, idi ideh merapang ku ineh.
- ²⁵Idi nacing selemulun nepebala kuandeh, "Siruh, lemulun luk sinuet muyuh bang tutup ineh tuped bang Ruma' Allah idi mada' pupu ineh."
- ²⁶Idi lun rayeh lun matar Ruma' Allah ineh dengan pulis iné' idi nenated nedeh, iamo' baken dengan metueh niat ngaceku ideh matot bitungin pupu ineh ku batu.

- ²⁷Ideh nenguit rasul-rasul ineh amé' matun tebubpun besara'. Idi kebala Imam Rayeh nedeh,
- ²⁸"Kai nemebpong nemuyuh na mada' dengan ngadan ini, iamo' muyuh pangeh manu' bawang Yerusalim ku bada' muyuh, idi muyuh sikal maré nekai mabeh dara' lemulun ini."
- ²⁹Iamo' kebala Pétrus idi rasul-rasul, "Tau na miak na maya' Allah meluun ratnan lemulun.
- ³⁰Allah Tuhan tepun tau pangeh nenui Yésus luk pangeh pinaté idi sinalib muyuh.
- ³¹Ieh kinikit Allah tudo pa tinuehNeh mangun ku Raca' idi Lun Nengulun, pad nguit nelun pupu Israil uren idi ngalap do' ratnan sala'.
- ³²Kai ini lun nekali' ratnan amung-amung kekamen ini, idi kudeng ineh teh Roh Meligan luk biré Allah kuan amung-amung lemulun luk maya' Neneh."
- ³³Kareb lun rayeh tebubpun besara' neninger bala ini, idi ideh megateh niat pad ideh sikal ngaté rasul-rasul ineh.
- ³⁴Iamo' seburur lun Parisi, ngadanneh Gamalil, ieh ineh selemulun luk mada' Ukum Musa luk rinayeh amung pupu ineh, netuped bang tebubpun besara' ineh idi nengecuk nguit lemulun ineh remuat.
- ³⁵Idi kebalaneh nan tebubpun besara' ineh, "O lun Israil, matar do'-do' muyuh ratnan luk ruen muyuh kuan lemulun ini.
- ³⁶Ngaceku atun ratnan ini inan selemulun ngadanneh Tudas, luk nengerayeh ngadanneh sebuleng, idi lélé apat ngeratu lemulun nemaya' neneh; iamo' ieh pangeh pinaté idi amung-amung lemulun luk nemaya' neneh nepatad idi na luk idi anun-anun luk mangun.
- ³⁷Pangeh ineh Yudas lun Galilia nacing kareb ideh nengiap lemulun. Idi ieh pana' nengeruid sebuang pupu maya' neneh. Iamo' ieh pinaté teh, idi amung lemulun luk nemaya' neneh nepatad peh.

³⁸Idi nekini ui pebala nemuyuh, aleg muyuh ngukum lemulun ini. Nima' nedeh, ngaceku kudeng terawédeh idi kekamendeh ratnan lemulun, kali' rungen gio ini miak ugka'.

³⁹Iamo' kudeng kekamen ineh ratnan Allah, na muyuh miak metueh ratnan lemulun ineh, ngaceku kian, ayuneh muyuh sikal metueh ratnan Allah lek." Idi teubupun besara' ineh pana' nemaya' bala Gamalil.

⁴⁰Ideh nenawar rasul-rasul ineh idi ideh nemebal nedeh idi nemebpong nedeh na mada' dengan ngadan Yésus. Idi ideh nemuit nedeh.

⁴¹Idi rasul-rasul ineh neburo rat pa kiung teubupun besara' ineh dengan mawang niat ngaceku ideh tirawé Allah mayu mekaneh dereh ngaceku ngadan Yésus.

⁴²Idi anid-anid aco ideh mada' bang Ruma' Allah idi bang ruma' lemulun pana' Bala luk Do' ratnan Yésus Keristus.

Kekamen Rasul-Rasul 6

¹Na mio teh kareb anak-anak sekola' Yésus iuk amé' mula', idi lun Yahudi rat bawang Grika ngedureng nelun Yahudi ngaceku decur tinula'deh na ngalap babpat usin anid-anid aco.

²Ngaceku ineh pulu' dueh rasul ineh nengamung amung-amung anak sekola' idi nepebala nedeh, "Na kai miak ugka' mada' bala Tuhan idi ngimet usin sidang.

³Ngaceku ineh, O kinanak-kinanak, mili' rat arang muyuh tudu' burur luk buren idi luk mepanu' ku Roh Meligan idi ileh, luk miak uen kai ngelestep kuan kekamen ini.

⁴Iamo' kai ini lutep bang kekamen sembayang idi mada' bala Tuhan."

⁵Idi baladeh ini petulu dengan pian lun mula' ineh, idi ideh nemili' Stepanus, ieh ineh selemulun luk panu' dengan anu idi Roh Meligan, idi teh Pilipus, Prokorus, Nikanor, Timon, Parmenas, idi Nikolaus, seburur lun pupu baken rat Antiokia luk nemaya' sembayang lun Yahudi atun.

⁶Idi tudu' burur ineh inuitdeh iné matun rasul-rasul; idi rasul-rasul ineh nesembayang idi nengerareng ticu'deh luundeh.

⁷Idi bala Tuhan nepiar; pad anak-anak sekola' déi' Yerusalim mula' tu-tu; idi imam pana' mula' tu-tu nemaya' sembayang ineh.

⁸Stepanus luk mepanu' ku katu idi ku lalud ineh teh nenganau' tuda'-tuda' kekamen luk nan mawa idi tanu'-tanu' arang pupu ineh.

⁹Iamo' tuda'-tuda' lemulun sikal metueh rat neneh. Lemulun ineh ratnan ruma' sembayang, luk titen ruma' sembayang Lun luk Pinuit, ieh ineh lun Yahudi rat Kiréni idi Iskandria. Idi ideh neperurum nelun Yahudi rat Kilikia idi Asia nepesaad ni Stepanus.

¹⁰Iamo na ideh miak metueh ratnan luk bila Stepanus dengan ileh luk ratnan Roh.

¹¹Idi ideh nenuap tuda'-tuda' lemulun pad ideh pebala, "Kai pangeh neninger neneh makai bala luk nguyo ni Musa idi Allah pana'."

¹²Idi ideh nengacing aceh ria' kuan pupu ineh, pad lun mula' dengan lun rayeh-rayeh, idi guru-guru Ukum pelaba' useh. Idi ideh nenaban ni Stepanus idi nenguit neneh amé' matun tebubpun besara'.

¹³Idi ideh nenguit tuda'-tuda' lemulun pad ideh mebalih, kebaladeh, "Lemulun ini na ugka' nguyo Ruma' Allah idi Ukum Musa pana'.

¹⁴Kai neninger neneh pebala, idi Yésus lun Nasarét ineh sikal ngusag Ruma' Allah idi ngisu' adat luk biré Musa netau."

¹⁵Idi amung-amung lemulun luk tudo bang tebubpun ineh nenutong Stepanus, idi kiungneh sinierdeh kudeng ayu kiung melaikat.

Kekamen Rasul-Rasul 7

¹Idi kebala Imam Rayeh ni Stepanus, "Matuké bala ineh?"

²Idi kebala Stepanus, "O lun kinanak idi lun taman-taman, ninger muyuh. Allah luk meluun rayeh nengegala' bururNeh kuan tepun tau Ibrahim, kareb

ieh idi déi' bawang Mesopotamia kareb nateh ieh netudo bang bawang Haran,

³Idi kebala Tuhan neneh, 'Remuat iko rat bang bawangmu ini idi rat arang pupumu, idi amé' inan sebuleng bawang luk uenKu nicul kuanmu.'

⁴Ibrahim neremuat rat bang bawang lun Kasdim, idi ieh tudo déi' Haran. Idi kareb tamanneh pangeh naté, Allah nemubuh neneh rat déi' macing inan tana' ini luk inan muyuh mudeng nekini.

⁵Idi Allah na nemaré sesuut tana' pana' kuanneh ratnan bawang ini, kirayeh lengayan pana' nateh. Iamo' Ieh nepejani' maré tana' ineh kuanneh idi kuan inulneh pana', sagan pana' kareb ineh Ibrahim na anak.

⁶Idi Allah nepebala kudeng ini, 'Idi mupunneh miak tudo bang bawang sakai, idi tebanendeh idi uen ngedereh apat ngeratu lak kinioneh.'

⁷Idi teh Allah nepebala, 'Ui sikal ngukum pupu luk naban nedeh ineh, idi pangeh ineh miak ideh remuat rat déi', idi sembayang Negku ieni.'

⁸Idi Allah nemaré ni Ibrahim aceh pejani' sunat. Idi Ibrahim nenunat ni Isak kareb ulunneh seminggu. Idi Isak nenunat ni Yakub, idi Yakub nenunat pulu' dueh tepun pupu tau.

⁹"Idi tepun tau mét niat ni Yusup idi nemasui neneh amé' bawang Masir. Iamo' Allah nengedengan neneh,

¹⁰Idi nemuit neneh ratnan amung-amung derehneh, idi nemaré neneh katu idi ileh pa kiung raca' Masir ineh luk nenganau' neneh mangun ku lun rayeh amung-amung tana' Masir idi amung-amung anak itinneh.

¹¹Idi nacing aceh iru' kuan amung tana' Masir idi Kanaan ineh idi dereh luk rayeh, pad tepun tau na akan.

¹²Iamo' pangeh Yakub nekali' idi inan padé' déi' Masir, idi ieh nengecuk tepun tau amé' déi' lawédeh sepun-pun.

¹³Idi sekedueh kua' lawédeh Yusup nengegala' bururneh nan kinanak-kinanakneh, idi raca' Masir pana' nekali' ratnan inulneh.

- 14Idi Yusup neneteng tamanneh Yakub amé' neneh dengan amung-amung kinanakneh, ieh ineh tudu' ngepulu' limeh burur kinula'deh.
- 15Idi Yakub nepura' iné' Masir, idi ieh naté dengan amung-amung tepun tau pana'.
- 16Idi butungdeh inuit iné' Sikem, idi tinanem bang tanem luk bilih Ibrahim ratnan pupu Hamor déi' Sikem ku usin pirak.
- 17'Iamo' kareb pangeh nacing pejani' luk biré Allah kuan Ibrahim, idi pupu ineh luk amé' mula' déi' Masir.
- 18Kekipedneh inan aceh raca' luk baken déi' Masir luk na nekali' ni Yusup.
- 19Ieh nenaluk pupu tau idi nengedereh tepun tau. Ieh mesaad ngecuk nedeh nala' anak-anakdeh luk isuut pad ideh maté.
- 20Kareb ineh Musa tinganak idi ieh pelaba taga. Ieh isa' teluh bulan kinioneh bang ruma' tamanneh.
- 21Kareb ieh tila', idi anak decur raca' Masir nengalap neneh idi nengasa' neneh mepad kudeng anakneh sebuleng.
- 22Idi Musa pangeh bida' bang amung ileh lun Masir, pad ieh mebala tu-tu ngaceku balaneh idi kekamenneh.
- 23'Kareb ulun Musa apat ngepulu' lak, niatneh nesigio sikal ngikak amung kinanakneh, pupu Israil.
- 24Idi ieh nenier selemulun luk pidereh lun Masir, idi ieh nengedengan lemulun ineh, idi ieh nengua' dengan ngaté lun Masir ineh.
- 25(Bang terawé Musa, kinanak-kinanakneh pana' nekali' idi dengan ticu'neh, Allah sikal muit nedeh; iamo' na tu ideh nekali'.)
- 26Idi kenebpa teh ieh nacing kareb lemulun pekedaluh, idi sikal ngubuk nedeh pedo', keburineh, 'O lun muyuh, muyuh ini denganak, ngudehké muyuh ngedereh seburur dengan seburur?'
- 27Iamo' lemulun luk nengedereh lun denganneh nengarung neneh, keburineh, 'Idéké luk nenganau' namu ku lun rayeh idi lun luk mutut besara' arang kai?

- ²⁸Iko pian ngaté negku mepad kudeng iko nengaté aceh lun Masir nalem?’
- ²⁹Kareb Musa neninger bala ineh, idi ieh neburo rat Masir idi ieh iné' tebawang déi' tana' Midian. Idi déi' ieh nenginul dueh anak deléi.
- ³⁰"Pangeh apat ngepulu' lak, idi ieh nenier déi' su luk ali-ali muneng ku Pegkung Sinai inan aceh melaikat bang budung apui luk udung aceh kayuh luk mebeneh.
- ³¹Musa mawa nier ineh, idi ieh iné' muneng sikal nier ineh do'-do'. Iamo' ieh neninger tang Tuhan pebala:
- ³²'Ui ini Allah tepun muyuh, Ibrahim, Isak, idi Yakub.' Idi Musa megegker pad ieh na mekuu' amé' nier.
- ³³Idi Tuhan nepebala neneh, 'Lenguenmu kasut ratnan kukudmu ineh, ngaceku su luk inanmu tuper, ieh ineh tana' luk meligan.
- ³⁴Ui pangeh nenier dereh pupuKu luk bang tana' Masir. Ui pangeh neninger aroddeh, idi Ui temurun sikal muit nedeh. Do' iko amé' nekini; Ui ngecuk namu amé' tana' Masir.
- ³⁵"Idi Musa kinarung lun pupu Israil, kebaladeh, Idéké luk nenganau' namu ku lun luk ngimet idi lun luk mutut besara?' Iamo' ieh luk icuk Allah mangun ku lun luk ngimet idi ku lun luk muit dengan lalud melaikat luk sinieneh bang budung apui luk udung kayuh ineh.
- ³⁶Idi ieh teh luk nenguit nedeh remuat rat bang bawang Masir dengan nenganau' kekamen luk nan mawa idi tanu'-tanu' bang bawang Masir, idi déi' Abpa' Pisui, idi mucu déi' su luk ali-ali apat ngepulu lak kinioneh.
- ³⁷Idi Musa ineh luk nepebala nelun pupu Israil, 'Allah sikal maré kuan muyuh aceh Nabi rat arang pupu muyuh sebuleng mepad kudeng ui ini teh.'
- ³⁸Musa ineh luk nengedengan nelun pupu Israil déi' su luk ali-ali. Ieh idi déi' dengan tepun tau idi melaikat luk nepebala neneh déi' Pegkung Sinai ineh. Idi Allah nemaré kuanneh bala luk mulun, luk uenneh ngacing kuan tau.

³⁹"Iamo' tepun tau na sikal maya' balaneh. Ideh nengarung neneh idi pian lemubed amé' Masir.

⁴⁰Idi kebaladeh ni Arun, 'Do' iko nganau' akang kuan kai, luk miak nalan pa atun kai. Na kai kali' luk mangun kuan Musa ineh luk nenguit nekai remuat rat bang bawang Masir.'

⁴¹Idi kareb ineh ideh nenganau' aceh akang mepad kudeng anak sapi', idi nemaré baré kuanneh. Idi ideh nenganau' irau pad ngedita' luk inau'deh sebuleng.

⁴²Iamo' Allah neteketed rat nedeh idi nenima' nedeh sembayang nan gituen, maya' kudeng luk inayud bang surat nabi-nabi: 'O lun Israil! Baken muyuh nemaré pung-pung luk kirat ineh kuanKu raked apat ngepulu' lak déi' su luk ali-ali

⁴³Lepo akang Molok luk binirir muyuh idi ayu gituen Repan akang muyuh ineh; ideh ineh akang luk inau' muyuh inan muyuh sembayang. Ngaceku ineh Ui mubah nemuyuh amé' bal déi' bawang Babil.'

⁴⁴"Tepun tau inan Lepo su luk inan papu' Tuhan déi' su luk ali-ali. Lepo ineh inau' maya' ayu luk icuk Allah ni Musa idi maya' ayu luk bida' Allah neneh.

⁴⁵Pangeh ineh tepun tau luk nengalap lepo ineh ratnan tamandeh nenguit ineh semuet dengan Yusak kareb ideh nengaro bawang rat nelun pupu baken, luk inusu Allah pa kiungdeh. Lepo ineh idi déi' macing kareb Daud.

⁴⁶Idi Daud inan Allah mawa, idi ieh mutuh mudut aceh ruma' kuan Allah Yakub.

⁴⁷Iamo' Selimun luk nemudut ruma' ineh kuanNeh.

⁴⁸"Iamo' Allah luk Meluun Dita' ineh na tudo bang ruma luk pinudut lemulun, maya' kudeng luk bida' nabi,

⁴⁹Kebala Tuhan, 'Langit ineh kerusiKu, idi tana' ineh tapin kukudKu. Kudeng apehké ruma' luk piduten muyuh kuanKu? Idi iapehké su luk inanKu ngato erurKu?

50Bakenké amung ini inau' tiku'Ku?'

51"O muyuh luk metueh niat, idi luk na sinunat niat idi lalid, muyuh megéi' sikal metueh ratnan Roh Meligan! Kudeng tepun muyuh, kudeng ineh teh muyuh.

52Idéké nabi luk na pidereh tepun muyuh ineh? Ideh nengaté amung-amung lemulun luk nemada' atun ratnan acing Lun luk Matu ineh, ieh ineh luk pangeh biré muyuh nekini idi luk pinaté muyuh teh.

53Muyuh luk pangeh nengalap ukum Allah luk icing melaikat, iamo' na muyuh maya' ineh."

54Kareb teubpun besara' lun Yahudi neninger bala Stepanus, idi ideh megateh niat, idi ideh netegelitem neneh.

55Iamo' Stepanus luk mepanu' ku Roh Meligan netengook déi' langit idi nenier rayeh Allah idi Yésus luk tuped pa tinueh Allah.

56Idi kebalaneh, "Siruh, ui nier langit pangeh mukab, idi Anak-Lemulun tuped pa tinueh Allah."

57Iamo' ideh nengitang, idi nengang laliddeh, idi ideh peranga' nedupeh neneh.

58Ideh nenala' neneh rat bang bawang ineh idi nemitung neneh ku batu. Idi lun luk nekali' ineh pana' nengerareng ayungdeh iring kukud sebuleng lun anak adi', ngadanneh Saul.

59Idi laba' ideh mitung ni Stepanus idi ieh sembayang, "O Tuhan Yésus, lapenMu rohku."

60Idi ieh netekeradung idi nengitang, "O Tuhan, aleg ngukum nedeh ngaceku sala' ini." Idi pangeh ieh nepebala kudeng ini, idi ieh naté peh.

Kekamen Rasul-Rasul 8

1Idi Saul mawang niat ku Stepanus ineh pinaté. Bang aco sineh nacing aceh pedereh luk rayeh bang sidang déi' Yerusalim, idi amungdeh nepatad-patad aput bawang Yudia idi Samaria, iamo' rasul-rasul mo' luk ketecan.

- ²Idi lemulun luk mepicet manu nenanem ni Stepanus, idi nenangi' neneh tu-tu.
- ³Iamo' Saul nengedereh sidang ineh. Ieh nesemuet bang anid-anid ruma' idi nengeruid lemulun, deléi idi decur pana', idi nemaré nedeh bang tutup.
- ⁴Idi amung-amung lemulun luk nepatad ineh pana' nenalan mada' Bala luk Do' ineh.
- ⁵Pilipus iné' bawang Samaria, idi nemada' nedeh ratnan Keristus.
- ⁶Lun mula' ineh neninger do'-do' luk bila Pilipus, idi ideh nenier tanu'-tanu' luk inau'neh.
- ⁷Ada'-ada' neremuat rat bang burur mula' lemulun, idi ideh nengitang. Idi mula' lemulun luk mét naté urat idi meliai dino'neh.
- ⁸Idi ideh nengalap awang luk rayeh bang bawang Samaria ineh.
- ⁹Iamo' bang bawang ineh inan selemulun ngadanneh Simun, luk mileh mangun, idi ieh nenganau' lun Samaria ineh mawa. Ieh nengedita' bururneh sebuleng, kebalaneh, "Ui ini luk melalud."
- ¹⁰Idi amung lun luk bang bawang ineh, do' lun dat idi lun do' pana' neninger balaneh idi nepebala, "Lun ini, ieh ineh lalud Allah luk titen Lalud Rayeh ineh."
- ¹¹Idi ideh neninger neneh do'-do', ngaceku mio ieh nenganau' nedeh mawa ngaceku bangunneh.
- ¹²Iamo' kareb ideh manu ni Pilipus luk nemada' Bala luk Do' ratnan Imet Allah idi ngadan Yésus Keristus, idi ideh rireb, do' deléi idi decur teh.
- ¹³Idi Simun pana' manu, idi pangeh ieh rireb ieh lutep maya' ni Pilipus; idi ieh lingo-lingo kareb ieh nenier amung-amung tanu' idi kekamen luk melalud luk inau' ineh.
- ¹⁴Kareb rasul-rasul déi' Yerusalim neninger ratnan lun Samaria pangeh nemaya' bala Allah, idi ideh nengecuk Pétrus idi Yahya amé' nedeh.

¹⁵Kareb didueh nacing, idi didueh nesembayang kuan lun Samaria, pad lun ineh ngalap Roh Meligan,

¹⁶ngaceku Roh Meligan ineh nateh netemurun luun seburur pana' rat arang lun ineh, iamo' ideh pangeh rireb dengan ngadan Tuhan Yésus mo'.

¹⁷Idi didueh nengerareng ticu' didueh luun lemulun ineh idi ideh pana' nengalap Roh Meligan.

¹⁸Kareb Simun nekali' idi Roh Meligan ineh biré ngaceku rasul-rasul nengerareng ticu' didueh luun lemulun ineh, idi ieh nemaré usin kuan didueh,

¹⁹kebalaneh, "Maré negku lalud ineh, pad ui ngerareng ticu'ku luun idé'-idé', pad ideh ngalap Roh Meligan."

²⁰Iamo' keburu' Pétrus neneh, "Do' usinmu idi bururmu pana' amé' bang apui, ngaceku iko ngerawé katu Allah miak belian dengan usin.

²¹Iko na babpat bang kekamen kai ini, ngaceku niatmu na mesiri pa kiung Allah.

²²Do' iko uren ratnan terawému luk dat ineh idi sembayang pad Tuhan maré do' namu.

²³Ngaceku ui nier namu mepanu' ku lili luk dat, idi inabet sala'."

²⁴Idi kebala Simun nedidueh, "Sembayang kuanku inan Tuhan, pad ui na mekaneh anun-anun luk pangeh bila medueh negku."

²⁵Kareb Pétrus idi Yahya pangeh nemada' luk nekali' didueh idi nemada' bala Tuhan, idi didueh nelemubed iné' Yerusalim, idi nemada' Bala luk Do' kuan mula' bawang lun Samaria.

²⁶Iamo' aceh melaikat Tuhan nepebala ni Pilipus, "Nalan iko idi amé' pa kabing busat aco maya' dalan rat Yerusalim amé' Gasa." (Na lemulun maya' dalan ineh nekini.)

²⁷Pilipus nenipa idi nenalan. Idi inan aceh lun Etiopis, ieh ineh selemulun luk pinani', idi rayeh laludneh pa liang Kandéké, raca' decur bawang Etiopia, luk ngasa' amung binawehneh. Idi ieh iné' Yerusalim sikal sembayang.

²⁸Idi kareb ieh nelemubed, ieh tudo bang kerétaneh, idi nemaca' surat Nabi Yesaya.

²⁹Idi Roh Meligan nepebala ni Pilipus, "Amé' iko muneng ku keréta ineh."

³⁰Pilipus nupun iné' matun neneh, idi neninger neneh uned maca' surat Nabi Yesaya, idi keburineh, "Iko kali' ilung luk bica' muké?"

³¹Idi kebalaneh, "Kudeng apeh ui kali' kudeng na lemulun mada' negku?" Idi ieh nenawar Pilipus umak tudo iringneh.

³²Idi ini ayat-ayat luk bica'neh bang Surat Allah ineh: "Ieh pangeh inuit kudeng aceh dumba luk kereten idi kudeng aceh anak dumba luk mebegkeh pa kiung lun luk muting buluhneh; kudeng ineh teh na Ieh nengukab tangNeh.

³³Ieh dinatdeh, idi ukum luk matu na inau' kuanNeh. Idéké miak mada' ratnan inulNeh? Ngaceku niatNeh pangeh ilap rat bang tana' ini."

³⁴Idi lemulun luk pinani' ineh nepebala ni Pilipus, "Ui mutuh namu mada' negku ratnan idéké nabi nemada', ratnan bururneh sebulengké, kian ratnan lun baken lek?"

³⁵Idi Pilipus nengelio ayat-ayat ineh, idi nemada' neneh Bala luk Do' ratnan Yésus.

³⁶Kareb didueh uned maya' dalan ineh, idi didueh nacing inan aceh abpa'. Idi lemulun luk pinani' ineh nepebala, "Ieni inan abpa', anunké luk mebpeng negku na rerebpen?"

[³⁷Idi kebala Pilipus, "Kudeng iko manu dengan amung niatmu miak iko rerebpen." Idi kebalaneh, "Ui manu idi Yésus Keristus, Ieh ineh Anak Allah."]

³⁸Idi ieh nengagka' keréta ineh. Idi didueh netemurun bang abpa', idi Pilipus nengerereb neneh.

³⁹Kareb didueh numak rat bang abpa', Roh Tuhan nengalap ni Pilipus. Idi lun Etiopia na miak nier neneh peh, idi ieh nuli' dengan mawang niat.

⁴⁰Idi denak-denak Pilipus kali' neneh idi déi' Asotus. Idi ieh nenalan idi nemada' Bala luk Do' bang amung-amung bawang pad ieh nacing déi' Kaisaria.

Kekamen Rasul-Rasul 9

¹Kareb ineh Saul meluun gathé niat sikal ngaté anak-anak sekola' Tuhan ineh. Idi ieh iné' matun Imam Rayeh,

²Idi nemutuh neneh maré surat itenneh amé' Damsik kuan ruma'-ruma' sembayang déi', idi kudeng ieh mepapu' lemulun luk maya' Dalan Tuhan ineh, do' deléi idi decur pana', ieh miak ngakem nedeh idi nguit nedeh amé' Yerusalim.

³Idi uned ieh nalan amé' muneng ku Damsik, idi denak-denak inan aceh acang luk rayeh rat bang langit luk merasat nengelibut neneh.

⁴Idi ieh neluka' luun tana' idi neninger aceh tang luk pebala neneh, "Saul, Saul, anunké punneh iko ngedereh Negku."

⁵Idi keburu'neh, "Idéké Iko ineh, O Tuhan? Idi Ieh nepebala, "Ui ini Yésus, luk pederenmu ineh.

⁶Tumui iko idi semuet bang bawang, idi déi' iko miak ninger ratnan anun-anun luk ruenmu."

⁷Idi lemulun luk nemaya' neneh netuped idi lingo-lingo, neninger bala ineh, iamo' na luk idi aceh burur lemulun pana' sinierdeh.

⁸Saul netumui; idi ieh nekulat mateh, iamo' ieh nebuser peh. Idi ideh nengimet ticu'neh, idi nenguyut neneh amé' bawang Damsik.

⁹Idi teluh aco kinioneh, ieh nebuser, idi na nekuman idi nengirup abpa' teh.

¹⁰Déi' Damsik inan aceh anak sekola', ngadanneh Ananias. Idi kebala Tuhan neneh bang aceh luk sinierneh, "O Ananias!" Idi keburu'neh, "Anun idi, Tuhan?"

¹¹Idi kebala Tuhan neneh, "Nalan iko idi amé' inan aceh dalam ngadanneh Mesiri, idi ngitun déi' ruma' Yudas ratnan seburur lemulun ngadanneh Saul, lun Tarsus, ngaceku nekini ieh sembayang.

¹²Idi ieh pangeh nenier selemulun ngadanneh Ananias luk nacing idi nengerareng ticu' luunneh, pad ieh miak nier peh."

¹³Idi kebala Ananias, "O Tuhan, ui pangeh neninger mula' bala ratnan lemulun ini. Ieh pangeh nenganau' tuda'-tuda' kekamen luk dat kuan lun manu déi' Yerusalim.

¹⁴Idi tungé' Damsik pana' ieh inan lalud ratnan imam-imam rayeh ngakem amung-amung lemulun luk neten ngadanMu."

¹⁵Iamo' kebala Tuhan neneh, "Amé iko, ngaceku ieh luk pinili'Ku, ngakem kuanKu, pad ieh ngegala' ngadanKu kuan lun pupu baken idi raca'-raca', idi kuan lun pupu Israil pana'.

¹⁶Idi Ui sebuleng sikal mada' kuanneh, tuda'-tuda' dereh luk miak kali'neh ngaceku ngadanKu."

¹⁷Idi Ananias iné' idi nesemuet bang ruma' ineh, idi nengerareng ticu'neh luun Saul, keburu'neh, "O kinanakku Saul, ui ini icuk Tuhan, ieh ineh Yésus luk nengegala' bururNeh kuanmu uned dalam luk dinalanmu ina di, pad iko miak nier baruh teh, idi pad iko mepanu' ku Roh Meligan."

¹⁸Idi kareb ineh teh inan luk nebpeh rat bang matehneh luk mepad kudeng rara lawid, idi ieh miak nier baruh teh, idi ieh nudur iné' rerebpen.

¹⁹Idi ieh nekuman pad ieh metueh. Saul netudo tuda'-tuda' aco kinioneh idi nepamung dengan anak-anak sekola' ineh déi' bawang Damsik.

²⁰Ieh petacu iné' bang ruma'-ruma' sembayang idi nemada' ratnan Yésus, Ieh ineh Anak Allah.

²¹Idi amung lemulun luk neninger balaneh mawa idi nepebala, "Naké ieh ineh lemulun luk ngaté lemulun luk neten ngadan ini déi' Yerusalim? Idi ieh

nacing tungé' ngaceku ieh pian nguit nedeh kitem abetdeh pa kiung imam-imam rayeh.”

²²Idi bada' Saul iuk-iuk melalud, idi ieh nengelaya' nelun Yahudi luk tudo déi' bawang Damsik ineh, kareb ieh nengegala' Yésus ineh Keristus peh.

²³Pangeh tuda'-tuda' aco idi lun Yahudi nepegayam sikal ngaté ni Saul.

²⁴Iamo' gayam lemulun ineh pangeh nekali'neh. Idi ideh nengabang munung tanga' tebaco kedangan, pad ideh miak ngaté neneh;

²⁵iamo' lun rurunneh nengalap neneh kareb malem aco, idi nengurur neneh bang buan amé' libal ar.

²⁶Saul iné déi' Yerusalim, idi ieh sikal nutun perurum dengan anak-anak sekola' Yésus. Iamo' ideh matot neneh, idi na manu ratnan ieh seburur anak sekola' Yésus.

²⁷Iamo' Barnabas nengedengan neneh idi nenguit neneh amé' matun rasul-rasul ineh. Ieh nemada' nedeh ratnan kudeng apeh Saul nenier Tuhan uned dalanneh, idi kudeng apeh Tuhan nepebala neneh. Idi teh ieh nemada' nedeh ratnan kudeng apeh Saul nemada' ratnan ngadan Yésus dengan mekuu' déi' bawang Damsik.

²⁸Idi Saul tudo dengandeh idi nenalan apud Yerusalim. Ieh nemada' bang ngadan Tuhan dengan mekuu'.

²⁹Idi ieh neperiteteng idi nepesaad dengan lun Yahudi rat bawang Grika, iamo' ideh pana' nenakap dalam sikal ngaté neneh.

³⁰Kareb bala ini nekali kinanak-kinanakneh luk baken, idi ideh nenguit neneh amé' Kaisaria, idi nengecuk neneh amé' Tarsus.

³¹Idi sidang luk apud-apud tana' Yudia, Galilia, idi Samaria nengalap awang idi anu luk meraben. Idi sidang ineh iuk metueh dengan matot inan Tuhan, idi dengan lalud Roh Meligan ideh iuk amé' mula'.

³²Pétrus nenalan apud-apud bawang idi ieh iné' matun lun manu luk tudo déi' Lidda.

³³Idi déi' ieh nepapu' selemulun ngadanneh Anias, luk telubid luun luk inanneh rudap ualuh lak kinioneh, idi ieh mét naté urat.

³⁴Idi keburu' Pétrus neneh, "O Anias, Yésus Keristus ngedo' namu. Tumui iko, idi ngelepi' luk inanmu rudap." Idi petacu ieh netumui peh.

³⁵Idi amung lun luk bang bawang Lidda idi Saron ineh nenier neneh, idi nelumi inan Tuhan.

³⁶Déi Yopa inan seburur decur luk manu, ngadanneh Tabita, luk ilungneh Dorkas, ieh ineh "Talau." Idi decur ineh megéi' nganau' kekamen luk do' idi méi' nelun masi'.

³⁷Idi kareb ineh luk mét nacing neneh idi ieh petacu naté. Idi kareb ideh pangéh namaru' butungneh, idi ideh nengerareng neneh bang takep luk déi' parung.

³⁸Idi bawang Lidda ineh muneng ku Yopa, idi kareb anak-anak sekola' Yésus neninger Pétrus idi déi' bawang Lidda ineh, idi ideh nengecuk dueh burur amé' neteng neneh, kebala didueh, "Do' saget amé' nekai."

³⁹Idi Pétrus netumui idi nemaya' nedidueh. Kareb ieh nacing idi ideh nenguit neneh semuet déi' parung. Idi amung-amung lun decur tinula' luk tuped iringneh nangi' idi nemada' sirennéh kuyu' idi ayung luk pangéh inau' Dorkas kareb ieh idi dengandeh.

⁴⁰Pétrus nengecuk amung-amung lemulun remuat, idi ieh netekeradung nesembayang. Idi ieh nelumi inan butung ineh, keburu'neh, "O Tabita, tumui iko!" Idi Tabita nekulat. Kareb ieh nenier Pétrus, idi ieh netumui.

⁴¹Idi Pétrus nengegenang ticu'neh idi nenganau' neneh tuped. Idi kareb ieh pangéh nenawar nelun manu idi decur-decur tinula', ieh namaré neneh kuandeh dengan do'.

⁴²Idi bala ini nepiar libut-libut bawang Yopa, idi mula' lemulun manu inan Tuhan peh.

⁴³Idi Pétrus netudo déi' Yopa tuda'-tuda' aco dengan seburur lemulun ngadanneh Simun, ieh ineh lun luk ngakem ratnan kubil pung.

Kekamen Rasul-Rasul 10

¹Idi déi' bawang Kaisaria inan selemulun ngadanneh Kornilius, ieh ineh lun rayeh aceh babpat baweh Rum luk titen "Baweh Italia."

²Ieh ineh selemulun luk sembayang idi luk manu inan Allah dengan amung uang tetek ruma'neh. Ieh megéi' maré kuan lun Yahudi luk masi'. Idi ieh megéi' sembayang inan Allah.

³Bang seaco kareb nateh tangal musul aco, ieh nenier dengan megala' bang aceh luk siniernes aceh melaikat Allah nacing neneh idi nepebala neneh, "O Kornilius!"

⁴Idi ieh nenier melaikat ineh dengan matot, kebalaneh, "Anun idi, O Tuhan?" Idi kebala melaikat neneh, "Amung sembayangmu idi éi'mu pangeh kali' Allah mangun ku aceh terawé pa kiungNeh.

⁵Nekini do' iko ngecuk lemulun amé' Yopa, idi nawar seburur lemulun ngadanneh Simun luk titen Pétrus.

⁶Ieh tudo dengan aceh lemulun ngadanneh Simun, lun luk ngakem ratnan kubil pung, idi ruma'neh tangeb abpa' rayeh."

⁷Kareb melaikat ineh pangeh nenalan, idi Kornilius nenawar dueh burur demulun luk ngakem bang ruma'neh ineh, idi seburur luk pebunu' luk megéi' sembayang rat arang lemulun luk ngasa' neneh.

⁸Ieh nemada' amung bala ineh kuandeh idi nengecuk nedeh amé' Yopa.

⁹Kenebpa, kareb lemulun ineh malé macing Yopa, idi Pétrus numak luun buduk ruma' idi nesembayang kareb muned aco.

¹⁰Idi ieh melau idi sikal kuman, iamo' laba' ideh nganau' temina' ieh nenier aceh luk siniernes.

¹¹Idi langit mukab, idi inan aceh luk kudeng tarub luk rayeh luk inimet anid lidungneh inurur macing luun tana'.

¹²Bang ineh inan puar-puar pung, menipeh, idi suit.

¹³Idi inan aceh tang luk pebala neneh, "O Pétrus, mudur iko, keretenmu idi kenenmu pung ineh!"

¹⁴Iamo' Pétrus nepebala, "Ara' ui Tuhan, ngaceku ui nateh nekuman anun-anun luk dat idi melutak."

¹⁵Iamo' tang ineh nepebala sekua' teh, "Luk pangeh biru' Allah aleg iko mala neneh dat."

¹⁶Ini mangun teluh kua', idi pangeh ineh luk inurur ineh ininat amé' déi' langit.

¹⁷Kareb uned Pétrus ngerawé ratnan ilung luk sinierneh ineh, idi lemulun luk icuk Kornilius tuped munung tanga'. Ideh pangeh nengitun ratnan iapeh ruma' Simun,

¹⁸idi ideh nengitun, "Inanké lemulun tungé' luk ngadanneh Simun Pétrus?"

¹⁹Laba' Pétrus ngerawé ratnan luk sinierneh ineh, idi Roh nepebala neneh, "Siruh, inan teluh burur lemulun nakap namu.

²⁰Do' iko mesaget temurun amé' maya' lemulun ineh; aleg iko matot, ngaceku Ui ini luk nengecuk nedeh."

²¹Idi Pétrus netemurun iné' matun lemulun ineh, kebalaneh, "Ui ini luk tekapen muyuh. Anunké punneh muyuh macing tungé'?"

²²Idi keburideh, "Ngaceku Kornilius, seburur lun rayeh baweh nengecuk nekai amé'. Ieh ineh seburur lemulun luk matu luk sembayang inan Allah. Idi ieh buren amung lun Yahudi. Melaikat Allah nengecuk neneh neteng namu amé' ruma'neh ninger bala rat namu."

²³Idi Pétrus nenganak nedeh. Idi kenebpa ieh netemui idi nenalan maya' nedeh, idi tuda'-tuda' kinanakneh rat bawang Yopa nemaya' neneh teh.

²⁴Idi kesoriak ideh nacing bawang Kaisaria. Idi Kornilius nenganét nedeh, idi ieh pangeh nenawar amung uang tetek ruma'neh idi lun rurumneh netebubpun.

- ²⁵Kareb Pétrus nesemuet, idi Kornilius nepapu' neneh idi netekeradung iring kukudneh idi nesembayang neneh.
- ²⁶Iamo' Pétrus nenaped neneh, keburineh, "Tuped iko; ui ini pana' lemulun teh."
- ²⁷Kareb uned Pétrus pegayam neneh, idi ieh nesemuet idi nepapu' mula' lemulun luk pangeh netebubpun.
- ²⁸Idi kebalaneh nedeh, "Muyuh sebuleng kali' idi lun Yahudi ngelaba ukum kudeng ideh perurum dengan lun pupu baken, idi amé' ngikak pana' nateh miak; iamo' Allah pangeh nemada' negku pad ui na mala seburur lemulun dat idi melutak.
- ²⁹Ngaceku ineh ui macing dengan na ara' kareb ui tinawar. Ngaceku ineh ui ngitun, anunké punneh muyuh nenawar negku?"
- ³⁰Idi kebala Kornilius, "Teluh aco luk pangeh nepelaba, kareb tanggal musul aco kudeng ini, ui nesembayang bang ruma'ku. Denak-denak selemulun netuped pa kiungku dengan ayung luk merasat,
- ³¹idi kebalaneh, 'O Kornilius, sembayangmu pangeh ilap idi éi'mu pana' tirawé Allah.
- ³²Do' ngecuk lemulun amé' Yopa idi nawar Simun luk titen Pétrus. Ieh tudo bang ruma' Simun luk ngakem ratnan kubil pung, tangeb abpa' rayeh.'
- ³³Idi ui petacu nengecuk lemulun amé' nawar namu, idi mawang niat iko pangeh nacing. Ngaceku ineh nekini amung kai pangeh netebubpun tungé' pa kiung Allah, pad ninger amung bala luk bila Tuhan kuanmu."
- ³⁴Idi Pétrus nepebala, "Dengan matu ui nier, idi Allah na mili' ayu lemulun,
- ³⁵iamo' idé-idé luk matot Neneh idi ngakem luk matu, idi ieh luk petulu dengan pinianNeh.
- ³⁶Muyuh kali' bala luk icing Allah kuan lun pupu Israil, ieh ineh Bala luk Do' ratnan awang luk lemaba Yésus Keristus, ieh ineh luk Tuhan amung lemulun.

³⁷Idi teh muyuh kali' luk nangun apud bawang Yudia, ngimun rat Galilia, ieh ineh pangeh rereb luk bida' Yahya ineh.

³⁸Muyuh pangeh neninger ratnan Yésus lun Nasarét ineh, kudeng apeh Allah pangeh nengumau Neneh ku Roh Meligan idi lalud. Ieh nenalan iné' iapeh-iapeh idi nenganau' kekamen luk do', idi nengedo' amung-amung lemulun luk inimet Iblis; ngaceku Allah nengedengan Neneh.

³⁹Kai ini lun nekali' ratnan amung-amung luk inau'Neh ineh, do' déi' bawang Yahudi idi déi' Yerusalim teh. Ieh ineh teh luk pinaté idi sinalib.

⁴⁰Iamo' aco luk keteluh Allah nenui Neneh, idi Ieh nemaré Neneh nesilangan,

⁴¹baken kuan amung lemulun, iamo' kuan kai luk pinili' Allah mangun ku lun nekali' Neneh. Kai ini pangeh nekuman idi nengirup denganNeh mucu ratnan Ieh tinui Allah rat arang lun naté.

⁴²Idi Ieh nengecuk nekai mada' Bala luk Do' ineh kuan amung pupu, idi mangun ku lun nekali' ratnan Ieh luk inau' Allah mangun ku Lun luk Mutut Besara' amung-amung lemulun luk mulun idi lun pangeh naté pana'.

⁴³Idi rat neneh ineh amung-amung nabi nemaré kali', idi idé-idé luk manu Neneh kali' rungen ngalap do' ratnan sala' ngaceku ngadanNeh.”

⁴⁴Kareb uned Pétrus pebala, idi Roh Meligan netemurun luun amung-amung lemulun luk neninger bala ineh.

⁴⁵Idi lun Yahudi luk manu luk maya' adat sunat, idi luk nemaya' ni Pétrus mawa, ngaceku Roh Meligan luk biré Allah pangeh inutang kuan lun pupu baken pana'.

⁴⁶Ideh neninger nedeh pebala dengan raput-raput buri' idi ideh nengerayeh Allah. Idi keburu' Pétrus nedeh,

⁴⁷"Miakké seburur lemulun mebpeng abpa' pad na miak ngerereb lemulun ini luk pangeh nengalap Roh Meligan mepad kudeng kai ini?"

⁴⁸Idi ieh nengecuk nedeh rerebpen dengan ngadan Yésus Keristus. Idi pangeh ineh ideh nemutuh Pétrus tudo déi' tuda'-tuda' aco kinioneh.

Kekamen Rasul-Rasul 11

¹Rasul-rasul idi kinanak-kinanak luk déi' bawang Yudia neninger ratnan lun pupu baken ineh pangeh nengalap bala Allah.

²Kareb Pétrus numak déi' Yerusalim idi lemulun luk maya' adat sunat ineh nengilang neneh, keburideh,

³"Iko pangeh iné' inan lemulun luk na sinunat idi nekuman dengandeh."

⁴Iamo' Pétrus nengimun mada' amung luk nangun kuandeh dengan megala', keburineh:

⁵"Kareb unedku sembayang déi' bawang Yopa, idi ui nenier aceh luk sinierku, idi inan aceh luk kudeng tarub luk rayeh luk inimet anid lidungneh, inurur rat déi' langit macing negku.

⁶Ui nenier ineh do'-do', idi ui kali' inan puar-puar pung luk apat kukud, pung luk meliputi, menipeh, idi suit.

⁷Idi ui neninger aceh tang luk nepebala negku, 'O Pétrus, mudur iko, keretenmu idi kenenmu pung ineh.'

⁸Iamo' keburiku, 'Ara' ui Tuhan, ngaceku nateh ui nekuman anun-anun luk dat idi melutak.'

⁹Iamo' tang ineh nepebala sekua' teh rat déi' langit, 'Luk pangeh biru' Allah aleg iko mala neneh dat!'

¹⁰Ini mangun teluh kua', idi pangeh ineh amung ineh ininat amé' déi' langit.

¹¹Idi kareb ineh teh inan teluh burur lemulun luk tured pa atun ruma' luk inan kai tudo, luk icuk rat Kaisaria amé' matun negku.

¹²Idi Roh nengecuk negku amé' maya' nedeh dengan na merapang, idi anem kinanak ini pana' nemaya' negku, idi kai nesemuet bang ruma' Kornelius.

¹³Idi ieh nemada' nekai ratnan kudeng apéh ieh nekali' melaikat ineh tured bang ruma'neh luk nepebala neneh, 'Ngecuk lemulun amé' déi' Yopa nawar Simun luk titen Pétrus.

- ¹⁴Ieh miak mada' aceh bala kuanmu, idi ratnan bala ineh iko dengan tetek ruma'mu miak ngalap ulun.'
- ¹⁵Kareb uned ui pebala idi Roh Meligan netemurun luun lemulun ineh mepad kudeng luun tau kareb pun-pun.
- ¹⁶Idi ui nengerawé ratnan bala Tuhan, 'Sagan pana' Yahya nengerereb bang abpa', iamo' muyuh ini miak rerebpen bang Roh Meligan.'
- ¹⁷Megala; Allah pangeh nemaré baré kuan pupu ineh mepad kudeng luk biréNeh kuan tau kareb tau manu inan Tuhan Yésus Keristus. Idéké ui ini, miakké ui mebpeng Allah?"
- ¹⁸Pangeh ideh neninger kudeng ini idi amung-amungdeh pirud, idi nengerayeh Allah, kebaladeh, "Kudeng pieh kudeng ineh, kuan lun pupu baken teh Allah pangeh nemaré dalan uren luk nguit amé' inan ulun."
- ¹⁹Idi lun manu nepatad-patad ngaceku dereh luk nacing kareb até Stepanus ineh. Idi ideh neburo iné' Punikia, Siprus, idi Antiokia. Iamo' ideh nemada' bala ineh kuan lun Yahudi mo'.
- ²⁰Iamo' arang lun manu ineh inan teh lun Siprus idi lun Kiréni. Idi kareb ideh nacing déi' Antiokia, ideh nemada' nelun pupu baken. Ideh nemada' Bala luk Do' ratnan Tuhan Yésus.
- ²¹Idi lalud Tuhan nengedengan nedeh, pad mula' lemulun manu idi lumi inan Tuhan.
- ²²Idi sidang déi' Yerusalim neninger bala ratnan sidang Antiokia, idi ideh nengecuk Barnabas amé' déi'.
- ²³Kareb ieh nacing idi nenier katu Allah, idi ieh mawang niat peh, idi ieh nemada' amung-amungdeh pad niatdeh lutep maya' Tuhan.
- ²⁴Barnabas ineh selemulun luk do', idi panu' ku Roh Meligan idi anu, idi lemulun luk lumi inan Tuhan luk amé' mula'.
- ²⁵Pangeh ineh Barnabas iné' Tarsus sikal nakap ni Saul.

²⁶Kareb ieh nepapu' neneh idi ieh nenguit neneh iné' déi' Antiokia. Idi raked selak didueh ineh netebubpun dengan sidang, idi nemada' mula' lemulun. Idi déi' Antiokia anak-anak sekola' pun-pun titen lun Kristen.

²⁷Idi kareb ineh tuda'-tuda' nabi rat Yerusalem iné' déi' Antiokia.

²⁸Idi seburur rat arangdeh luk titen Agabus netuped idi nemada' dengan lalud Roh ratnan aceh iru' luk rayeh luk miak mangun apud tana' ini. (Idi iru' ineh nangun kareb imet Raca' Klaudius.)

²⁹Idi anak-anak sekola' ineh pana' neperurum sikal maré luk barénde kuan amung-amung kinanakdeh luk déi' bawang Yudia maya' kinula' binawehdeh.

³⁰Idi ideh nenganau' kudeng ineh idi nemaré luk birédeh bang ticu' Barnabas idi Saul kuan amung-amung lun rayeh ineh.

Kekamen Rasul-Rasul 12

¹Kareb ineh teh Raca' Herodes nengecuk ngedereh tuda'-tuda' lun sidang.

²Idi ieh nengecuk ngaté Yakub kinanak Yahya ku pelapet.

³Idi kareb ieh nenier kekamen ineh nengawang niat lun Yahudi, idi petacu ieh nengakem Pétrus teh. (Ieh ineh kareb aco Rayeh Ruti luk Na Lamud.)

⁴Idi kareb ieh pangeh nengakem neneh, idi ieh nenuet neneh bang tutup, idi nemaré neneh bang palad pulu' anem lun pebunu'. Idi apat burur lun pebunu' ineh pelibal-pelibal matar neneh. Herodés pian ngelio neneh pa kiung lun mula' mucu ratnan Irau Paska.

⁵Ngaceku ineh Pétrus ita bang tutup; iamo' sidang ineh nesembayang kuannehan inah Allah dengan matu-matu.

⁶Bang sealem kareb nateh Herodés sikal nguit ni Pétrus pa kiung lun mula', idi Pétrus rudap arang uned dueh burur lun pebunu'. Idi ieh inabet ku kaling. Idi teh inah tuda'-tuda' lemulun luk munung tanga' matar ruma' tutup ineh.

⁷Denak-denak aceh melaikat Tuhan netuped déi', idi aceh acang merasat bang takep ineh. Idi melaikat ineh nengegio tudung Pétrus idi nengalat neneh,

kebalaneh, "Tumui iko dengan mesaget." Idi kaling ineh pana' netaka ratnan tiku'neh.

⁸Idi kebala melaikat ineh teh, "Do' iko ngabet awe'mu, idi muet kasutmu." Idi Pétrus nenganau' kudeng ineh. Idi kebala melaikat neneh, "Do' iko ngayung ku kuyuh'mu idi maya' negku."

⁹Pétrus nemaya' neneh remuat rat bang tutup, iamo' na ieh kali' luk inau' melaikat ineh matu; ngaceku bang terawéneh ieh ineh aceh luk sinierneh mo'.

¹⁰Kareb ieh pangeh nelemaba lun matar luk pun-pun, idi luk kedueh, idi didueh nacing inan aceh tanga' belawan luk amé' inan bawang. Tanga' ineh mukab sebuleng kuan didueh, idi didueh neremuat idi nelemaba aceh dalan. Idi petacu melaikat ineh mebuo rat ni Pétrus.

¹¹Idi Pétrus nekali' ratnan luk nangun kuanneh, idi keburineh, "Nekini ui kali' dengan matu idi Tuhan pangeh nengecuk melaikatNeh muit negku rat bang palad Herodés idi ratnan pian luk Yahudi ineh."

¹²Kareb ieh pangeh nengerawé ratnan ini idi ieh iné' ruma' Mariam luk tinan Yahya, luk titen Markus. Inan tuda'-tuda' lemulun déi' luk pangeh netebubpun idi uned sembayang.

¹³Kareb ieh nenateg tanga' ar ineh, idi seburur decur iné' ngukab tanga', ngadanneh Rodé.

¹⁴Idi ieh miti uni tang Pétrus idi na ieh nengukab tanga' ineh ngaceku pelaba awang niatneh. Ieh nupun idi nesemuet bang ruma' idi nemada' ratnan Pétrus tuped déi' munung tanga' ar ineh.

¹⁵Idi keburideh neneh, "Iko meruden." Iamo' decur ineh mesaad mala bala luk bilaneh ineh. Idi keburideh, "Ada'neh ineh!"

¹⁶Iamo' Pétrus na ugka' nateh tanga' ineh. Idi kareb ideh nengukab tanga', idi ideh nenier neneh idi mawa peh.

¹⁷Idi Pétrus nemebpeng nedeh dengan ticu'neh ngecuk nedeh pirud, idi ieh nemada' nedeh kudeng apeh Tuhan pangeh nenguit neneh remuat rat bang tutup ineh, idi keburu'neh, "Mada' bala ineh kuan Yakub idi kinanak-kinanak teh." Pangeh ineh idi ieh nenalan.

¹⁸Kareb macang aco, idi lun pebunu' mula' ria'. Anunké luk nangun kuan Pétrus.

¹⁹Herodés nengecuk nakap neneh iamo' na Pétrus nekali'deh. Idi Herodés nengelio lun pebunu' ineh, idi nengecuk ngaté nedeh. Idi Herodes nenalan rat Yudia iné' déi' Kaisaria, idi ieh netudo déi'.

²⁰Herodés pelaba useh nelun Sur idi Sidon. Ngaceku ineh ideh iné' matun neneh. Idi kareb ideh pangeh nengubuk ni Belastus luk lun rayeh bang ruma' raca' ineh, idi ideh nemutuh do' ni Herodés, ngaceku bawangdeh merapet ngalap luk kenen rat bang bawang raca' ineh.

²¹Idi kareb seaco, Herodés nengayung ku ayung imetneh, idi netudo luun kerusi besara'neh idi nemada' nelun mula'.

²²Idi lun mula' ineh nengitang, keburu'deh, "Baken ini bala lemulun, iamo' ini aceh bala allah."

²³Idi petacu aceh melaikat Tuhan nenecat neneh, ngaceku na ieh nengerayeh Allah. Idi ieh kinan uled idi petacu niatneh neputut.

²⁴Idi bala Allah ineh nepiar.

²⁵Barnabas idi Saul nelemubed rat Yerusalim, kareb didueh pangeh nenganau' kekamen didueh, idi nenguit ni Yahya luk titen Markus maya' nedidueh.

Kekamen Rasul-Rasul 13

¹Bang sidang déi' Antiokia inan tuda'-tuda' nabi idi guru, ieh ineh Barnabas, Simion luk titen Mitem, Lukius lun Kiréni, Menahem luk isa' rat isuut pad-pad dengan Raca' Herodés Antipas, idi Saul.

²Idi laba' ideh sembayang inan Tuhan idi mawa', idi kebala Roh Meligan, "Uen ngatad kuanKu Barnabas idi Saul, pad didueh miak nganau' kekamen luk icukKu nedidueh."

³Kareb ideh pangeh mawa' idi nesembayang, idi ideh nengerareng ticu'deh luun Saul idi Barnabas, idi ideh nengecuk nedidueh nalan.

⁴Roh Meligan nengecuk Barnabas idi Saul amé' Salukia, idi rat déi' didueh nenalan maya' kapal iné' pulau Siprus.

⁵Kareb didueh nacing déi' Salamis, idi didueh nemada' bala Allah bang amung-amung ruma' sembayang lun Yahudi. Yahya Markus pana' iné' maya' nedidueh idi nengedengan nedidueh.

⁶Ideh nenalan aput-apat pulau ineh pad macing Papos, idi ideh nepapu' aceh lun mangun, ieh ineh seburur nabi lun Yahudi luk mebalih, ngadanneh Bar Yésus.

⁷Ieh ineh lun rurum Sergius Paulus selemulun luk mileh, lun rayeh bawang ineh. Idi ieh iné' nawar ni Barnabas idi Saul amé' matun neneh sikal ninger bala Allah.

⁸Iamo' Elimas, lun mangun ineh (ngaceku kudeng ineh teh ilung ngadanneh) sikal metueh rat nedeh ngaceku sikal ngelubed lun rayeh ineh ratnan anuneh.

⁹Iamo' Saul luk titen Paulus teh, mepanu' ku Roh Meligan. Idi ieh nenutong neneh,

¹⁰idi keburu'neh, "O iko luk mepanu' ku amung-amung balih idi luk dat, anak Iblis, bunu' amung-amung luk matu'! Megéi' iko ngekilu' dalan Tuhan luk mesiri!

¹¹Siruh, nekini ticu' Tuhan macing namu, pad iko mebuser, idi na nier mateh aco tuda'-tuda' aco kinioneh." Idi kareb ineh teh inan rabun luk mitem macing nan matehneh pad ieh libung-libung nakap lemulun luk miak nguyut neneh.

- ¹²Idi kareb lun rayeh ineh nenier luk kudeng ineh idi ieh manu peh, idi mawa tutu ratnan bada' Tuhan ineh.
- ¹³Idi Paulus idi lun danganneh pana' nenalan maya' kapal rat Papos macing Perga déi' tana' Pampilia. Idi Yahya Markus nepatad rat nedeh idi nelemubed iné' Yerusalim.
- ¹⁴Iamo' ideh nenalan rat Perga iné' Antiokia déi' tana' Pisidia, idi ideh nesemuet bang ruma' sembayang kareb Aco luk inan Mudeng, idi netudo.
- ¹⁵Kareb ideh pangeh nemaca' surat Ukum Musa idi surat nabi-nabi, idi lun rayeh-rayeh ruma' sembayang ineh nengecuk lemulun amé' matun rasul-rasul ineh, keburideh, "O kinanak-kinanakku, kudeng inan rat arang muyuh luk sikal mala aceh bala luk miak ngubuk pupu ineh, do' mala nekini."
- ¹⁶Paulus netuped, idi nengayep nedeh, idi nepebala: "O muyuh lun Israil, idi muyuh luk matot inan Allah, ninger muyuh.
- ¹⁷Allah lun pupu Israil ineh pangeh nemili' tepun tau idi nengerayeh pupu ineh kareb ideh tudo déi' bawang Masir, idi nengeruat nedeh rat déi' dengan laludNeh luk rayeh.
- ¹⁸Idi ruked apat ngepulu' lak Ieh mulai niat nedeh déi' su luk ali-ali.
- ¹⁹Ieh nengusag tudu' pupu déi' bawang Kanaan, idi Ieh nemabpat tana'deh kuan pupuNeh sebuleng mangun ku bawangdeh,
- ²⁰apat ngeratu limeh ngepulu' lak kinioneh. "Pangeh ineh Ieh nemaré nedeh tuda'-tuda' lun luk mutut besara', pad macing kareb Nabi Semuil.
- ²¹Kareb ideh nemutih raca', idi Allah nemaré kuandeh Saul Kis, ieh ineh selemulun ratnan pupu Benjamin, mangun ku raca'deh apat ngepulu' lak kinioneh.
- ²²Kareb Ieh pangeh nenala' neneh, idi Ieh nengikit Daud mangun ku raca'deh. Idi kebalaNeh ratnan Daud, 'Daud Isai ineh, selemulun luk petulu dengan pian niatKu. Ieh sikal nganau' amung luk pianKu.'

²³Idi ratnan inul Daud ini, Allah pangeh nemaré kuan lun pupu Israil seburur Lun Nengulun, ieh ineh Yésus, maya' jani'Neh.

²⁴Idi atun ratnan acingNeh Yahya pangeh nemada' ratnan rereb idi uren kuan amung-amung lun pupu Israil.

²⁵Kareb uned Yahya mangeh kekammeneh, idi kebalaneh, 'Muyuh ngerawé idéké ui ini. Ui ini baken Luk uen muyuh nganét. Nier tau luk mangun mucu! Inan Selemulun luk macing mucu rat negku ini, idi ui na mayu ngelengu kasut ratnan kukudNeh.'

²⁶"O kinanak-kinanakku, luk inul Ibrahim, idi amung-amung pupu baken luk idi ieni luk sembayang nan Allah; kuan tau bala ulun ini pangeh nacing.

²⁷Ngaceku lemulun luk tudo déi' Yerusalim idi lun rayeh-rayehdeh na miti Yésus ineh Lun Nengulun, ideh na kali' ilung bala nabi-nabi luk bica'deh anid Aco luk inan Mudeng, idi ideh nengacing bala nabi-nabi kareb ideh nengukum Yésus.

²⁸Idi sagan pana' na punneh ideh nengaté Neneh, iamo' ideh nemutuh Pilatus, pad Ieh miak pitayen.

²⁹Kareb ideh pangeh nengacing amung-amung bala luk inayud ratnan Yésus, idi ideh nengalap Neneh rat luun kayuh salib ineh, idi nenipa Neneh bang tanem.

³⁰Iamo' Allah nenui Neneh rat arang lun naté.

³¹Idi tuda'-tuda' aco kinioneh Ieh nesilangan kuan lemulun luk nemaya' Neneh rat Galilia idi numak déi' Yerusalim, idi nekini lemulun ineh mangun ku lun nekali' Neneh kuan pupu Israil.

³²Idi kai ini nguit Bala luk Do' kuan muyuh, ieh ineh pejani' luk biré Allah kuan tepun tau,

³³maya' kudeng luk pijani' Allah kuan mupun tau, kareb Ieh nenui Yésus. Idi kudeng ineh teh luk inayud bang Nani Ubur luk kedueh, 'Iko ini AnakKu, idi bang aco sini Ui pangeh nenganak Namu.'

³⁴Idi ini luk bila Allah ratnan ieh nenui Neneh rat arang lun naté, pad Ieh na lemubed amé' inan luk melu, 'Ui sikal maré kuanMu peruan luk matu idi luk meligan, luk pijani'Ku ni Daud.'

³⁵Ineh punneh Ieh pebala teh bang ayat Nani Ubur luk baken, 'Na Iko maré DemulunMu luk lutep ruen melu.'

³⁶Daud nenganau' luk pian Allah bang karebneh. Idi ieh naté idi tinanem iring tepunneh, idi ieh melu peh.

³⁷Iamo' Ieh luk tinui Allah ineh na Ieh melu peh.

³⁸Do' muyuh kali', O kinanak-kinanakku, idi ngaceku Yésus, dalam ngalap do' ratnan sala' bida' kuan muyuh,

³⁹idi ngaceku Ieh, idé'-idé' luk manu, ieh miak puatin ratnan amung-amung sala' luk na miak uen Ukum Musa ngiu'.

⁴⁰Ngaceku ineh matar do'-do', pad luk inayud bang surat nabi-nabi na macing nemuyuh,

⁴¹Siruh, muyuh luk situnga! Do' muyuh mawa idi maté! Ngaceku kekamen luk ruenKu bang kareb muyuh ini, luk na muyuh sikal manu, sagan pana' uen ngelio kuan muyuh.' “

⁴²Kareb Paulus idi Barnabas neremuat rat bang ruma' sembayang, idi lemulun nemutuh nedidueh mada' bala ineh kareb Aco luk inan Mudeng baruh.

⁴³Kareb ideh pangeh netebubpun, idi mula' lun Yahudi, idi lun pupu baken luk maya' sembayang lun Yahudi, nemaya' ni Paulus idi Barnabas. Idi didueh nemada' idi nengubuk nedeh, pad ideh lutep bang katu Allah.

⁴⁴Kareb Aco luk inan Mudeng baruh ineh, idi amung-amung lun bang bawang ineh netebubpun neninger bala Allah.

⁴⁵Iamo' kareb lun Yahudi nenier lun mula' ineh, idi ideh mét niat, idi ideh nengilang bala Paulus idi nenguyo neneh.

⁴⁶Iamo' Paulus idi Barnabas meluun mekuu' mada', kebala didueh, "Setuneh bala Allah ineh na miak na belén atun kuan muyuh, iamo' ngaceku muyuh

pangeh nengarung balaNeh idi ngerawé burur muyuh na mayu ngalap ulun luk meruked, idi kai necan nemuyuh idi amé' nelun pupu baken.

⁴⁷Ngaceku kudeng ineh Tuhan nengecuk nekai, kebalaNeh, 'Ui nganau' Namu ku aceh acang kuan lun pupu baken, pad ngacing dalam ulun kuan amung uang tana' ini.' “

⁴⁸Kareb lun pupu baken neninger bala ini, ideh mawang niat idi nengerayeh bala Allah; idi lemulun luk pinili' ngalap ulun luk meruked ineh manu peh.

⁴⁹Idi bala Allah nepiar aput bawang ineh.

⁵⁰Iamo' lun Yahudi nengubuk lun rayeh-rayeh bawang idi decur-decur luk lun do' rat nelun pupu baken luk sembayang inan Allah. Idi ideh nengacing aceh susa' kuan Paulus idi Barnabas, idi nemasut nedidueh rat bang bawangdeh ineh.

⁵¹Iamo' rasul-rasul ineh nengegkar abuh ratnan kukuddeh mangun ku tanu' kuan lemulun ineh, idi ideh iné' déi' Ikonium.

⁵²Idi anak-anak sekola' déi' Antiokia ineh pana' mepanu' ku awang idi Roh Meligan.

Kekamen Rasul-Rasul 14

¹Déi' Ikonium pana' Paulus idi Barnabas iné' bang ruma' sembayang lun Yahudi idi nepebala kudeng ineh pad pelaba ula' lun Yahudi idi lun Grika pana' manu peh.

²Iamo' lun Yahudi luk na manu nengagau niat lun pupu baken ineh, pad ideh museh idi sikal metueh ratnan lun Kristen ineh.

³Idi rasul-rasul neketecan déi' tuda'-tuda' ioneh. Didueh nemada' dengan mekuu' ratnan Tuhan. Idi Tuhan nengegala' ratnan bala didueh ratnan katuNeh matu, idi Ieh nemaré lalud nedidueh, pad didueh nenganau' tanu' idi kekamen luk nan mawa.

⁴Iamo' lun bang bawang ineh nepebabpat, ieh ineh sebabpat pamung dengan lun Yahudi idi luk baken dengan rasul-rasul.

- ⁵Idi lun pupu baken dengan lun Yahudi idi lun rayeh-rayeh nepamung sikal ngedereh rasul-rasul idi mitung nedidueh ku batu.
- ⁶Kareb didueh nekali' ratnan ineh idi didueh neburo iné' déi' Listra idi Derbi déi' bawang Likonia, idi libut-libut bawang ineh teh.
- ⁷Idi déi' teh didueh nemada' Bala luk Do' ineh.
- ⁸Déi' Listra inan aceh lemulun luk meliai rat isuut, idi luk na tupu nekali' nalan.
- ⁹Ieh neninger bala Paulus, idi Paulus nekali' neneh manu merapet miak nalan,
- ¹⁰idi kebala Paulus dengan bala luk rayeh, "Tuped iko!" Idi ieh nesikau'-sikau' idi petacu nalan.
- ¹¹Kareb lun mula' nekali' luk inau' Paulus, idi ideh nengitang dengan buri' lun Likonia, "Allah-allah pangeh netemurun kuan tau nemaya' ayu lemulun."
- ¹²Idi ideh neneten Barnabas ineh Sius, idi Paulus ineh Hermis ngaceku ieh luk megéi' pebala.
- ¹³Idi imam Sius, luk kuan ruma' akang pa atun bawang ineh, nenguit sapi' idi busak kuan anid-anid tanga' bawang ineh, idi sikal maré luk barénneh kuan lun mula' ineh.
- ¹⁴Kareb Barnabas idi Paulus neninger ratnan luk pian ruendeh, idi didueh nenarak ayung didueh idi nupun semuet arang uned lun mula' idi nengitang,
- ¹⁵kebala didueh, "O amung-amung muyuh, anunké punneh muyuh nganau' kudeng ini? Kai ini pana' lemulun teh mepad kudeng muyuh, idi kai nguit kuan muyuh Bala luk Do', pad muyuh miak teketed ratnan luk mo'-mo' ini idi lumi nan Allah luk mulun, idi luk nemudut langit, tana', idi abpa' rayeh dengan amung uangneh.
- ¹⁶Idi mon Allah nemaré amung-amung pupu nalan maya' piandeh sebuleng.

¹⁷Iamo Ieh megéi' ngegala' laludNeh, ratnan Ieh nganau' luk do' idi maré kuan muyuh udan rat déi' langit idi bua' bang kareb luk petulu. Idi Ieh ngebor nemuyuh ku akan idi awang teh.”

¹⁸Idi dengan bala ineh pana' mesusa' teh luun rasul ineh nemebpong nelun mula' ineh pad ideh na maré luk baréndeh kuan didueh.

¹⁹Iamo' lun Yahudi nacing rat Antiokia luk déi' Pisidia idi Ikonium; idi ideh nengubuk nelun mula', pad ideh nemitung ni Paulus ku batu idi nengeruid neneh rat bang bawang ineh, idi ideh nengerawé neneh naté.

²⁰Iamo' kareb lun manu ineh netuped iringneh, idi ieh netumui idi nesemuet bang bawang. Idi kenebpa ieh nemaya' ni Barnabas lemubed amé' Derbi.

²¹Paulus idi Barnabas nemada' Bala luk Do' déi' Derbi, pad mula' lemulun manu. Pangeh ineh, idi didueh nelemubed iné' Listra, Ikonium, idi Antiokia luk déi' Pisidia.

²²Didueh nengepicet anu lun manu ineh, idi nengecuk nedeh lutep bang anu, kebala didueh, "Idi na miak na tau medereh semuet bang Imet Allah.”

²³Idi didueh nemili' lun rayeh-rayeh bang anid-anid sidang. Idi dengan sembayang idi mawa', didueh nemaré nedeh bang palad Tuhan luk inandeh manu.

²⁴Pangeh ineh didueh nelemaba bawang Pisidia, idi didueh nacing déi' Pampilia.

²⁵Didueh nemada' bala Allah déi' Perga, idi iné' déi' Atalia,

²⁶idi rat déi' didueh nenalan maya' kapal macing déi' Antiokia, su luk inan didueh atun biré bang palad Allah, kuan kekamen luk pangeh inau' didueh ineh.

²⁷Kareb didueh nacing déi' Antiokia, idi didueh nengamung nelun sidang ineh idi nemada' nedeh ratnan amung-amung luk inau' Allah kuan didueh, idi kudeng apeh Allah nengukab tanga' anu kuan lun pupu baken.

²⁸Idi mio didueh netudo déi' dengan lun manu ineh.

Kekamen Rasul-Rasul 15

¹Tuda'-tuda' burur lemulun nacing rat Yudia idi nemada' kinanak-kinanak ineh, keburideh, "Kudeng na muyuh uen nunat maya' Ukum Musa, na muyuh miak ngalap ulun."

²Idi ideh nepesaad ni Paulus idi Barnabas ratnan ineh. Kekipedneh ideh nemili' Paulus idi Barnabas dengan tuda'-tuda' lun baken rat Antiokia pad ideh amé' déi' Yerusalim ngitun rasul-rasul idi lun rayeh-rayeh ratnan ineh.

³Lun sidang ineh nenated nedidueh, idi kareb didueh nelemaba Punikia idi Samaria, idi didueh nemada' ratnan lun pupu baken pangeh nengalap Yésus. Bala ineh nengacing awang niat luk rayeh kuan amung-amung kinanak ineh.

⁴Kareb didueh nacing déi' Yerusalim, idi lun sidang idi rasul-rasul idi lun rayeh-rayeh nenguit nedidueh dengan mawang niat, idi didueh nemada' ratnan amung-amung luk inau' Allah kuan didueh.

⁵Iamo' tuda'-tuda' lun manu ratnan babpat lun Parisi, netuped idi nepebala, "Meluun do' nunat amung lemulun ineh, idi ngecuk nedeh maya' Ukum Musa."

⁶Rasul-rasul idi lun rayeh-rayeh ineh nepamung sikal ngerawé ratnan ecuk ineh.

⁷Kareb ideh mio pegayam, idi Pétrus nudur idi nepebala, "O kinanak-kinanakku, muyuh kali' mon Allah nemili' negku rat arang muyuh pad ui mada' nelun pupu baken, pad ideh pana' ninger idi manu teh.

⁸Idi Allah luk kali' niat lemulun nengegala' ratnan Ieh mawang niat nelun ineh, ngaceku Ieh nemaré kuandeh Roh Meligan mepad kudeng Ieh nemaré kuan tau.

⁹Idi Allah na mili' arang tau dengan lemulun ineh, idi Ieh namaru' niatdeh ngaceku ideh manu.

¹⁰Ngaceku ineh ngudehké muyuh nutun Allah idi sikal nganau' babeh ineh luun tudung lun manu ineh luk nateh binabeh tepun tau idi tau ini pana'?

¹¹Na! Tau manu idi uen ngulun ngaceku katu Tuhan Yésus, mepad kudeng ideh teh.”

¹²Idi amung-amungdeh pirud, idi neninger bala Barnabas idi Paulus luk nemada' ratnan amung tanu' idi kekamen luk nan mawa luk inau' Allah arang lun pupu baken dengan burur didueh.

¹³Kareb didueh pangeh nepebala idi Yakub nengor bala didueh, kebalaneh, "O Kinanak-kinanakku, ninger muyuh balaku!

¹⁴Simun pangeh nemada' ratnan kudeng apeh Allah pun-pun nengikak nelun pupu baken, idi nemili' rat nedeh aceh pupu kuanNeh.

¹⁵Idi bala ineh petulu dengan amung-amung bala nabi-nabi, mepad kudeng luk inayud ini.

¹⁶Kebala Tuhan, Muci Ui sikal lemubed, idi mudut baruh imet Daud luk inusag ineh. Ui mudut baruh teh luk inusag ineh, pad ieh meraben,

¹⁷pad lun baken miak nakap Tuhan, ieh ineh lun pupu baken luk tinawar mangun ku pupuKu.

¹⁸Kudeng ineh bala Tuhan, luk pangeh nengelio ineh rat pun-pun.' “

¹⁹Idi teh kebala Yakub, Bang terawéku, na petulu ngesabeng nelun pupu baken ineh luk pangeh lumi inan Allah.

²⁰Iamo' do' tau nguyud surat kuan lemulun ineh, pad ideh na kuman anun-anun luk melutak ngaceku biré kuan akang, idi pad ideh na pasét, idi na kuman pung luk naté nekaling, idi dara' pana'.

²¹Ngaceku rat mon Ukum Musa pangeh bica' bang amung-amung ruma' sembayang kareb anid-anid Aco luk inan Mudeng. Idi bala Musa ineh badén bang anid bawang.”

²²Rasul-rasul idi lun rayeh-rayeh dengan amung lun sidang ineh nemutut pad mili' lemulun rat arangdeh, luk dukendeh amé' déi' Antiokia dengan Paulus idi Barnabas. Idi ideh nemili' Yudas luk titen Barnabas, idi Silas, ieh ineh dueh burur luk buren lun sidang.

²³Idi ideh nemaré sebuleng surat ini itendeh: "Tabi' ratnan rasul-rasul, lun rayeh-rayeh idi kinanak-kinanak muyuh kuan kinanak-kinanak rat nelun pupu baken déi' Antiokia, Siria, idi Kilikia.

²⁴Kai neninger inan tuda'-tuda' lemulun luk neremuat rat arang kai luk nengagau nemuyuh dengan bala luk ngagap niat muyuh, sagan pana' kai na nengecuk lemulun ineh.

²⁵Ngaceku ineh kai pangeh neperurum ngamo mili' tuda'-tuda' lemulun luk miak amé nemuyuh maya' ni Barnabas idi Paulus luk inan kai mawa ineh,

²⁶Idi luk pangeh nemaré ulun didueh ngaceku ngadan Tuhan tau Yésus Keristus.

²⁷Kai pangeh nenecuk Yudas idi Silas amé' nemuyuh, idi didueh miak mada' bala surat ini kuan muyuh.

²⁸Ngaceku petulu dengan pian Roh Meligan idi pian kai teh, na kai ngerareng luun tudung muyuh babeh luk meluun berat ratnan luk petap ini,

²⁹ieh ineh aleg kuman akan luk biré kuan akang, idi aleg kuman dara' idi pung luk naté nekaling, idi teh aleg muyuh pasét. Kudeng muyuh matar burur muyuh sebuleng ratnan amung ini, samal kuan muyuh. Tabi' kuan muyuh.”

³⁰Lun luk pinili' nated bala ineh icuk nalan, idi ideh iné' Antiokia. Idi ideh nengamung amung lun manu idi nemaré surat ineh nedeh.

³¹Kareb ideh nemaca' surat ineh, idi ideh mawang niat ngaceku bala luk ngubuk ineh.

³²Idi Yudas idi Silas ineh nabi teh. Idi didueh nengubuk nelun manu ineh, pad ideh mekuu' idi metueh.

³³Kareb didueh pangeh netudo mio sesuut, idi kinanak-kinanak ineh nengecuk nedidueh muli' dengan awang amé' inan lun luk nengecuk nedidueh atun.

[³⁴Iamo' Silas pian tudo déi'.]

³⁵Paulus idi Barnabas tudo tuda'-tuda' io déi' Antiokia, idi nemada' idi nengelio bala Tuhan dengan tuda'-tuda' lun baken teh.

³⁶Na mio ratnan ineh idi kebala Paulus ni Barnabas, "Amé' kiteh ngikak kinanak-kinanak bang anid-anid bawang su luk inan kiteh nemada' bala Tuhan atun, idi nier kudeng afeh ulundeh."

³⁷Idi Barnabas sikal nguit Yahya Markus amé' maya' nedidueh.

³⁸Iamo' Paulus nengerawé na do' nguit neneh, ngaceku ieh na nemaya' nedidueh raked lawé didueh. Iamo' ieh nenecan nedidueh déi' Pampilia.

³⁹Idi didueh nepesaad pad didueh nepatad. Idi Barnabas nenguit ni Markus maya' neneh, idi nemaya' kapal iné' Siprus.

⁴⁰Paulus nemili' Silas, idi kareb kinanak-kinanak pangeh nemaré neneh bang palad Tuhan idi ieh nenalan peh.

⁴¹Ieh nenalan nelemaba bawang Siria idi Kilikia, idi nengeraben amung-amung sidang ineh.

Kekamen Rasul-Rasul 16

¹Paulus nacing déi' Derbi idi Listra. Idi inan seburur lun manu déi', ngadanneh Timotius, anak seburur decur lun Yahudi luk manu, iamo' tamanneh lun Grika.

²Idi Timotius ineh inubur amung-amung kinanak luk déi' Listra idi Ikonium ineh.

³Paulus sikal nguit Timotius maya' neneh, idi ieh nenunat neneh, ngaceku lun Yahudi luk tudo su ineh nekali' tamanneh ineh lun Grika.

⁴Kareb ideh nalan nelemaba bawang ineh, idi ideh nengelio kuan lun manu ineh ratnan ukum-ukum luk pangeh pinutut rasul-rasul idi lun rayeh-rayeh déi' Yerusalim. Idi ideh nengecuk nedeh maya'.

⁵Kudeng ineh teh sidang-sidang ineh rinaben anudeh, idi anid-anid aco ideh iuk amé' mula'.

⁶Idi ideh nenalan lemaba bawang Prigia idi Galatia, ngaceku bibpeng Roh Meligan aleg mada' bala Allah déi' Asia.

⁷Kareb ideh nacing lakan Misia, idi ideh sikal nutun semuet déi' Bitinia, iamo' Roh Yésus na nima' nedeh.

⁸Idi ideh nelemaba Misia idi netemurun iné' Troas.

⁹Idi malem ineh Paulus nenier aceh luk siniernih; ieh ineh inan seburur lun Makedonia netuped nenawar neneh, keburineh, "Amé' tungé' Makedonia idi ngedengan nekai!"

¹⁰Kareb Paulus pangeh nekali' ineh, idi kai petacu nipa idi iné' Makedonia, ngaceku bang terawé kai Allah nenawar nekai amé' mada' Bala luk Do' kuandeh.

¹¹Kai nenalan maya' kapal rat Troas, idi kai petacu iné' Samotraki; idi kenebpa nacing déi' Niapolis.

¹²Rat déi' kai iné' pa dayeh macing Pilipi, ieh ineh aceh bawang bang Babpat Aceh déi' Makedonia, luk bang imet Rum. Idi kai tudo tuda'-tuda' aco kinioneh bang bawang ineh.

¹³Kareb Aco luk inan Mudeng, kai neremuat rat bang bawang ineh iné' tangeb abpa', su luk inan kai nengerawé lun Yahudi miak sembayang. Idi kai netudo idi nepegayam dengan decur-decur luk nepamung su ineh.

¹⁴Idi inan aceh decur ngadanneh Lidia, seburur rat Tiatira luk masui kibung luk sia' merirem. Ieh sembayang inan Allah, idi Tuhan nengukab niatneh pad ieh nengerawé amung-amung bala luk bila Paulus ineh.

¹⁵Ieh pangeh rireb dengan amung uang tetek ruma'neh. Idi ieh nemutih nekai, keburineh, "Kudeng muyuh ngerawé ui ini manu inan Tuhan, amé' muyuh tudo bang ruma'ku." Idi ieh mesaad nenawar nekai.

¹⁶Bang seaco kareb kai nalan amé' su luk inan sembayang, idi inan seburur decur luk sinuet ada' luk mileh mangun nepapu' nekai. Idi ieh nengalap mula' usin kuan tuan-tuaneh ngaceku bangunneh ineh.

¹⁷Ieh nemaya' puet Paulus idi kai teh, idi nengitang, keburu'neh, "Lemulun ini demulun Allah luk Meluun Dita' luk mada' dalam ulun kuan muyuh."

¹⁸Idi tuda'-tuda' aco kinioneh ieh nenganau' kudeng ineh, pad Paulus museh idi nelumi neneh idi nepebala nan ada' ineh, "Dengan ngadan Yésus Keristus ui ngecuk namu remuat rat bang burur decur ini." Idi ada' ineh petacu neremuat.

¹⁹Kareb tuan-tuaneh nekali' luk inandeh merapet ngalap usin pangeh netutu', idi ideh nengakem ni Paulus idi Silas idi nengeruid nedidueh amé' luun natad pa kiung lun rayeh-rayeh.

²⁰Ideh nenguit nedidueh amé' matun lun tareh imet Rum, keburu'deh, "Lemulun ini lun Yahudi luk ngagau bawang tau ini.

²¹Didueh mada' adat luk na miak lapen idi bén tau lun Rum ini."

²²Idi lun mula' pana' meria' nengadu' nedidueh; idi lun rayeh-rayeh nengerarak ayung didueh idi nengecuk mebal nedidueh.

²³Kareb ideh pangeh bibal, idi ideh nenuet nedidueh bang tutup, idi nengecuk lun matar tutup ineh nginita nedidueh do'-do'.

²⁴Kareb lun matar tutup ineh nekali' bala ini, idi ieh nenuet nedidueh bang takep tutup luk medalem tu-tu, idi kukud didueh pipang.

²⁵Kareb malé tangal dacem, Paulus idi Silas pana' nesembayang idi menani ngubur Allah, idi amung-amung lemulun luk tinutup ineh pana' neninger tang didueh.

²⁶Denak-denak inan aceh ruyuh tana' luk rayeh, pad apin tutup ineh meguyu'; idi petacu amung-amung tanga' ineh mukab idi kalingdeh netaka peh.

²⁷Idi lun matar tutup ineh nekulat, idi kareb ieh nenier tanga' tutup ineh pangeh mukab, idi ieh nengangat pelapetneh sikal peripaté, ngaceku bang terawéneh lemulun luk bang tutup ini pangeh neburo.

²⁸Idi Paulus nengitang, keburu'neh, "Aleg peripaté ngaceku amung-amung kai idi tungé'."

- ²⁹Idi lun matar tutup ineh nemutuh lapung idi nupun semuet idi dengan megegker niat netekeradung pa kiung Paulus idi Silas teh.
- ³⁰Pangeh ineh ieh nenguit nedidueh neremuat, idi nepebala, "O lun dueh, anunké luk miak ruenku pad ui ngalap ulun?"
- ³¹Idi kebala didueh, "Manu inan Tuhan Yésus, pad iko ngalap ulun dengan amung uang tetek ruma'mu."
- ³²Idi didueh nemada' bala Tuhan kuanneh idi kuan amung uang tetek ruma'neh.
- ³³Kareb malem ineh teh ieh nenguit nedidueh idi namaru' urat didueh, idi petacu ieh rireb dengan amung uang tetek ruma'neh.
- ³⁴Ieh nenguit nedidueh umak bang ruma'neh, idi ieh namaré akan kuan didueh. Idi ieh dengan amung uang tetek ruma'neh mawang niat ngaceku ieh pangeh manu inan Allah.
- ³⁵Pekak uka-uka idi lun tareh imet Rum nengecuk nelun pulis nated bala pad didueh puatin.
- ³⁶Idi kebala lun matar tutup ni Paulus, "Lun tareh imet Rum pangeh nengecuk muit nemedueh. Ngaceku ineh medueh miak nalan dengan do'."
- ³⁷Iamo' keburu' Paulus nelun pulis, "Kai ini pangeh bibal pa kiung lun mula' dengan na pinutut lun luk mutut besara', sagan pana' kai lun Rum. Idi ideh nenuet nekai bang tutup. Idi nekini lemulun ineh sikal ngeruat nekai dengan lulem! Na tu miak! Do' nima lun tareh imet Rum sebuleng macing nguit nekai remuat."
- ³⁸Idi bala ineh bida' lun pulis kuan lun tareh imet Rum. Idi ideh matot kareb ideh neninger didueh ineh lun Rum.
- ³⁹Idi ideh iné' mutuh do' nedidueh. Idi ideh nenguit nedidueh remuat idi nengecuk nedidueh buro rat bang bawang ineh.

⁴⁰Paulus idi Silas neremuat rat bang tutup ineh idi iné' ruma' Lidia. Kareb didueh nepapu' dengan kinanak-kinanak ineh, idi didueh nengubuk nedeh, idi didueh pana' nenalan peh.

Kekamen Rasul-Rasul 17

¹Didueh nenalan lemaba Ampipolis idi Apolonia, idi nacing déi' Tesalonika su luk inan aceh ruma' sembayang lun Yahudi.

²Idi maya' kudeng luk pekalai, Paulus iné' tebubpun bang ruma' sembayang ineh. Idi bang teluh Aco luk inan Mudeng ieh nepekitun dengan lemulun ineh ratnan Surat Allah,

³dengan nemada' idi nengelio ratnan Keristus na miak na medereh idi tumui rat arang lun naté, keburineh, "Yésus luk ui mada' kuan muyuh, Ieh ineh Keristus."

⁴Idi inan sebuang rat arangdeh luk manu pad ideh nemaya' ni Paulus idi Silas. Kudeng ineh teh mula' lun Grika luk sembayang nan Allah, idi teh mula' decur rat arang lun do'.

⁵Iamo' lun Yahudi ineh mét niat. Ideh nenguit tuda'-tuda' lemulun luk dat luk nalan mo'-mo' déi' kadai, idi ideh nengamung nelun mula' pad ngagau bawang ineh. Idi nengelibut ruma' Yason idi nenakap rasul-rasul, pian nguit nedidueh remuat kuan lun mula'.

⁶Iamo' kareb ideh na nekali' nedidueh, idi ideh nengeruid ni Yason idi tuda'-tuda' kinanak luk baken amé' matun lun rayeh bawang ineh. Idi ideh nengitang, keburideh, "lemulun ini pangeh nengagau iapeh-iapeh pana'! Nekini ideh pangeh nacing bawang tau;

⁷idi Yason pangeh nengasa' nedeh. Amungdeh ineh ngelaba ukum raca' Rum, kerburideh, inan teh raca' luk baken, ngadanNeh Yésus."

⁸Idi lun mula' dengan lun rayeh-rayeh bawang ineh negagap ku bala ineh.

⁹Idi lun rayeh-rayeh nengalap usin rat ni Yason idi lun baken teh, pad ideh nemuit nedeh.

- ¹⁰Kareb medacem kinanak-kinanak ineh nengecuk Paulus idi Silas amé' Beria. Kareb didueh nacing déi', idi petacu didueh nesemuet bang ruma' sembayang lun Yahudi.
- ¹¹Idi déi' lemulun meluun do' terawé ratnan lun Tesalonika. Ideh pangéh nengalap bala ineh dengan mawang niatdeh, idi anid-anid aco ideh nengelio Surat Allah, pian kali' kudeng matu amung luk bila Paulus ineh.
- ¹²Mula' rat arangdeh manu, kudeng ineh teh rat arang decur lun Grika luk lun do'. Idi mula deléi lun Grika manu teh.
- ¹³Iamo' kareb lun Yahudi luk déi' Tesalonika nekali' bala Allah ineh pangéh bida' Paulus déi' Beria pana', idi ideh iné' déi' pian ngagau nelun mula' ineh.
- ¹⁴Idi kinanak-kinanak ineh petacu nengecuk Paulus nalan amé' tangeb abpa' rayeh, iamo' Silas idi Timotius tudo déi' Beria.
- ¹⁵Iamo' lemulun luk nenguit ni Paulus nenated neneh macing déi' Atina. Pangéh ineh ideh nelemubed iné' Beria dengan bala rat ni Paulus kuan Silas idi Timotius, neteng nedidueh amé' neneh dengan miket.
- ¹⁶Kareb Paulus nenganét ni Silas idi Timotius déi' Atina, idi niatneh mesusa' nenier bawang ineh mepanu' ku akang.
- ¹⁷Idi ieh nepekitun bang ruma' sembayang dengan lun Yahudi idi amung lemulun luk sembayang nan Allah, idi teh déi' luun natad pana' anid-anid aco dengan lemulun luk lemaba déi'.
- ¹⁸Idi inan teh tuda'-tuda' guru lun Epikuri idi Stoiki nepesaad neneh. Idi inan teh luk nepebala, "Anunké luk pian belén lun ini luk mesuki tang?" Iamo' lun baken nepebala, "Ayuneh lemulun ini mada' ratnan allah-allah lun pupu baken." Ideh nepebala kudeng ineh ngaceku Paulus nemada' ratnan Yésus idi tuiNeh.
- ¹⁹Idi ideh nenguit ni Paulus amé' pa atun lun luk pegayam déi' Ariopagus, keburi'deh, "Miakké kai kali' amung-amung bada' luk mebaruh luk bida'mu ini?"

- ²⁰Iko nguit bala luk inan kai mawa, idi kai sikal kali' ilung bala ineh.”
- ²¹(Ngaceku amung-amung lun Atina idi lun sakai luk netudo déi' pana' na pian ku luk baken, iamo' ideh pebala idi ninger anun-anun luk mebaruh mo'.)
- ²²Paulus netuped luun uned Ariopagus ineh idi nepebala, "O lun Atina, bang amung-amung lawé muyuh, ui kali' nemuyuh lun luk ngerawé tu-tu ratnan sembayang muyuh.
- ²³Ngaceku kareb ui nenalan idi nenier amung luk inan muyuh sembayang, ui nekali' aceh bubpun luk inan ayud luunneh kudeng ini, 'Kuan Allah luk na kai nekali.' Ngaceku ineh luk inan muyuh sembayang dengan na nekali' miak badénku nemuyuh.
- ²⁴Allah luk nemudut tana' ini idi amung uangneh, Ieh ineh Tuhan tana' idi langit. Idi Ieh na miak tudo bang ruma' luk pinudut ticu'.
- ²⁵Idi Allah na isa' ticu' lemulun, ngaceku na Ieh masi' ratnan anun-anun, iamo' Ieh sebuleng luk maré ulun idi niat idi amung-amung luk baken teh kuan amung lemulun,
- ²⁶Idi ratnan seburur lemulun Ieh nemudut amung-amung pupu, idi nenganau' nedeh tudo aput tana'. Ieh sebuleng nengelelep atun, karebdeh, idi su lakan luk inandeh tudo,
- ²⁷pad ideh nakap Allah idi merapet miak ideh mekakap Neneh pad ideh ngalap Neneh, sagan pana' Ieh na mado ratnan anid-anid burur tau,
- ²⁸ngaceku pangeh bila lun, 'Bang Neneh tau mudeng idi sigio idi mulun teh.' Maya' kudeng luk inayud tuda'-tuda' lun mileh nulu rat arang muyuh, 'Tau ini pana' mangun ku anak-anakNeh teh.'
- ²⁹Idi ngaceku tau ini anak-anak Allah, na do' tau ngerawé Allah mepad kudeng amas, pirak, batu luk inarit dengan ileh idi terawé lemulun.
- ³⁰Idi Allah nepirud ratnan kareb luk mebacé ineh, iamo' nekini amung-amung lemulun iapeh-iapeh pana' icukNeh uren.

³¹Ngaceku Ieh pangeh nengelelep seaco luk inanNeh maré ukum luk matu kuan amung tana' ini ratnan Selemulun luk pinili'Neh. Idi bala ini pangeh ginala' Allah kuan amung-amung lemulun, kareb Ieh nenui Lemulun ineh rat arang lun naté.”

³²Kareb lemulun ineh neninger ratnan tui lun naté, idi sebuang lemulun sikal situnga; iamo' lun baken nepebala, "Kai sikal ninger namu ratnan ineh sekua' teh.”

³³Idi Paulus neburo rat bang gayam ineh.

³⁴Iamo' inan teh tuda'-tuda' lemulun luk neperurum neneh idi manu teh. Arangdeh iman Dionisius lun Ariopagus, idi seburur decur, ngadanneh Damaris idi lun baken teh.

Kekamen Rasul-Rasul 18

¹Pangeh ineh Paulus nenalan rat Atina idi iné' déi' Korintus.

²Idi ieh nepapu' seburur lun Yahudi ngadanneh Akila, luk tinganak déi' bawang Pontus, luk nacing baruh rat Italia dengan awanneh Priskila, ngaceku Klaudius raca' Rum pangeh nengecuk nelun Yahudi remuat rat bang bawang Rum. Idi ieh iné' matun nedidueh.

³Kekamendeh mepad, idi ieh netudo dengan didueh idi ideh pad-pad ngakem, ngaceku ideh lun luk mileh nganau' lepo kibung.

⁴Idi anid-anid Aco luk inan Mudeng Paulus pegayam bang ruma' sembayang, idi nengubuk nelun Yahudi idi lun Grika pana'.

⁵Kareb Silas idi Timotius ineh nacing rat Makedonia, idi Paulus megéi' mada' bala ineh teh, idi nemaré kali' kuan lun Yahudi ratnan Yésus ineh Keristus.

⁶Kareb ideh sikal metueh rat neneh idi nenguyo neneh, idi ieh nengegkar ayungneh, kebalaneh, "Kudeng muyuh na ngalap ulun, muyuh sebuleng mabeh ineh. Ui na mabeh ineh. Rat pad sini ui amé' nelun pupu baken.”

⁷Idi ieh nenecan nedeh, idi iné' tudo bang ruma' Titus Yustus, ieh ineh selemulun luk sembayang inan Allah; idi ruma'neh pekatu dengan ruma' sembayang.

⁸Krispus, lun rayeh ruma' sembayang ineh, dengan amung uang tetek ruma'neh manu nan Tuhan, idi mula' lun Korintus pana' luk neninger bala Tuhan petacu manu idi rireb peh.

⁹Idi Tuhan nepebala ni Paulus kareb malem aco bang aceh luk sinierneh, "Aleg iko matot, iamo' pebala iko idi aleg pirud teh.

¹⁰Ngaceku Ui idi denganmu, idi seburur lemulun pana' nateh luk miak ngakem namu pad ngedereh namu; ngaceku mula' pupuKu bang bawang ini."

¹¹Idi Paulus netudo déi' selak anem bulan kinioneh, idi nemada' bala Allah kuan lemulun ineh.

¹²Kareb Galio mangun ku lun luk ngimet déi' bawang Akaya, idi lun Yahudi neperanga' ngakem ni Paulus, idi nenguit neneh amé' bang besara',

¹³kebaladeh, "Lemulun ini ngecuk lemulun sembayang inan Allah maya' dalam luk na petulu dengan ukum."

¹⁴Kareb Paulus sikal pebala, idi Galio nepebala nelun Yahudi ineh, "O lun Yahudi, kudeng matu bala ini ratnan ngelaba ukum idi ratnan nganau' luk dat, miak ui ninger bala muyuh.

¹⁵Iamo' kudeng kedaluh ini ratnan bala idi ngadan-ngadan idi ukum muyuh, do' muyuh sebuleng mutut amung ineh. Ui ara' mangun ku lun luk mutut besara' luk kudeng ineh!"

¹⁶Idi ieh nemasut lemulun ineh rat bang besara' ineh.

¹⁷Idi amung-amungdeh nedupeh ni Sostenis, lun rayeh ruma' sembayang ineh, idi nemebal neneh pa kiung besara' ineh. Iamo' Galio ungeng ratnan ineh.

¹⁸Paulus netudo déi' Korintus tuda'-tuda' io teh. Pangeh ineh ieh nenalan maya' kapal dengan Priskila idi Akila. Kareb nateh ieh nenalan, idi ieh nenganau' aceh jani' déi' Kenkria, idi nengiki uluhneh.

¹⁹Ideh nacing déi' Epesus, idi Paulus nenecan nedidueh déi', iamo' ieh sebuleng petacu nesemuet bang ruma' sembayang, idi nepesaad nelun Yahudi.

²⁰Ideh nemutih neneh tudo mio sesuut, iamo' ieh ara'.

²¹Iamo' kareb ieh nenecan nedeh, idi ieh nepebala, "Pad baré Allah mo' idi ui lemubed amé' nemuyuh teh." Idi ieh nenalan maya' kapal rat Epesus.

²²Kareb ieh nacing déi' Kaisaria, idi ieh numak idi nepetabi' nelun sidang ineh. Pangeh ineh ieh iné' déi' Antiokia.

²³Kareb ieh pangeh netudo déi' tuda'-tuda' aco kinioneh, idi ieh iné' aput bawang Galatia idi Prigia idi nengepicet anu amung-amung lun manu ineh.

²⁴Idi seburur lun Yahudi ngadanneh Apolus, luk tinganak déi' bawang Iskandria, nacing déi' Epesus. Ieh ineh selemulun luk mileh mada' idi luk do' kali' Surat Allah.

²⁵Ieh pangeh bida' ratnan Dalan Tuhan, idi dengan niat luk matu ieh nepebala idi metueh mada' ratnan Yésus, sagan pana' ieh sebuleng nekali' rereh Yahya mo'.

²⁶Ieh nengimun pebala dengan mekuu' bang ruma' sembayang. Kareb Priskila idi Akila neninger bada'neh, idi didueh nenguit neneh muli', idi nemada' Dalan Allah neneh dengan megala'.

²⁷Apolus pian amé' déi' bawang Akaya, idi lun manu déi' Epesus nengedengan neneh idi nemaré surat kuan kinanak-kinanakdeh déi' Akaya ineh, idi nengecuk nedeh nganak neneh. Kareb ieh nacing ieh nengedengan nedeh luk pangeh manu ngaceku ratnan katu Allah.

²⁸Idi dengan ilehneh ieh nengelaya' amung-amung kedaluh lun Yahudi pa kiung lun mula', idi nengelio rat bang Surat Allah ratnan Yésus ineh Keristus.

Kekamen Rasul-Rasul 19

¹Kareb Apolus déi' Korintus, idi Paulus nengelaba tana' déi' dayeh idi nacing déi' Epesus. Idi ieh nepapu tuda'-tuda' anak sekola Yésus.

²Idi ieh nengitun nedeh, kebalaneh, "Pangehké muyuh nengalap Roh Meligan kareb muyuh manu?" Idi keburideh, "Nateh kai neninger ratnan Roh Meligan.

³Idi keburineh, "Kudeng pieh kudeng ineh, dengan rereb anunké muyuh rireb peh?" Idi keburideh, "Dengan rereb Yahya."

⁴Idi keburideh Paulus, "Yahya ineh nengerereb nelun luk uren mo'. Ieh nemada nelun Israil, pad ideh manu Neneh luk macing mucu rat neneh, ieh ineh Yésus."

⁵Kareb ideh neninger bala ineh, idi amung-amungdeh rireb dengan ngadan Tuhan Yésus.

⁶Kareb Paulus pangeh nengerareng ticu'neh luunde, idi Roh Meligan netemurun luun anid-anid bururdeh, idi ideh nepeburideh dengan burideh luk biré idi nemada' luk biré Allah teh.

⁷Idi amung-amungdeh lélé pulu' dueh burur.

⁸Paulus nesemuat bang ruma' sembayang idi nepebala dengan mekuu' kuan lun mula', teluh bulan kinioneh. Ieh nepekitun idi nengubuk nedeh ratnan imet Allah.

⁹Iamo' sebuangdeh ineh metueh niat idi na manu. Ideh nengedat Dalan Tuhan ineh pa kiung lun mula', pad Paulus neburo rat nedeh, idi nenguit anak-anak sekola' Yésus maya' neneh. Idi anid-anid aco ieh nepegayam bang ruma' sekola' Tiranus.

¹⁰Ini mangun bang dueh lak kinioneh, pad amung lemulun luk tudo déi' Asia, do' lun Yahudi idi lun Grika pana' neninger bala Tuhan.

¹¹Idi Allah nenganau' tuda'-tuda' tanu' luk na inan pekalai dengan ticu' Paulus,

- ¹²pad belaca idi kibung ayung luk pikai Paulus inuitdeh kuan lun mét ineh, pad luk mét ineh buro rat nedeh, idi ada'-ada' pana' remuat rat nedeh.
- ¹³Inan teh tuda'-tuda' lun Yahudi luk nalan-nalan ngusu ada'. Idi ideh neten ngadan Tuhan Yésus kareb ideh nenganau' luk kudeng ineh, keburideh, "Ui mulung namu dengan ngadan Yésus luk bida' Paulus."
- ¹⁴Inan teh tudu' burur deléi, ieh ineh anak Skiwa luk Imam Rayeh lun Yahudi luk nenganau' kudeng ineh.
- ¹⁵Iamo' kebala ada' ineh nedeh, "Yésus ineh ui miti, idi Paulus ineh ui kali', iamo' muyuh ini idéké?"
- ¹⁶Idi lemulun luk sinuet ada' ineh nedupeh nedeh idi nengelaya' nedeh. Idi ideh neburo rat bang ruma'neh dengan lubpa idi nurat teh.
- ¹⁷Idi bala ineh nepiar kuan amung-amung lun Yahudi idi lun Grika luk tudo déi' Epesus; idi nacing aceh tot kuan amung-amungdeh, idi ngadan Tuhan Yésus meluun buren.
- ¹⁸Idi mula' lun manu ineh nacing idi nengamo idi nengegala' amung-amung kekamendeh.
- ¹⁹Idi inan tuda'-tuda' rat arangdeh luk mileh mangun nengamung suratdeh, idi nengeseb surat ineh pa kiung lun mula; idi kinula' raga surat ineh léle macing limeh ngepulu' ribu rigit.
- ²⁰Kudeng ineh teh bala Allah iuk amé' rayeh idi metueh.
- ²¹Kareb amung ineh pangeh mangun, idi Paulus geregan sikal ngelaba bawang Makedonia idi Akaya, idi amé' déi' Yerusalim, keburineh, "Kareb ui pangeh macing déi', na miak na ui nier bawang Rum teh."
- ²²Idi ieh nengecuk dueh burur lemulun luk nengedengan neneh amé' déi' Makedonia, ieh ineh Timotius idi Erastus, kareb ieh netudo mio sesuut déi' Asia.
- ²³Kareb ineh teh inan aceh ria' luk rayeh ratnan Dalam Tuhan ineh déi' Epesus.

²⁴Inan aceh lemulun ngadanneh Demetrius, ieh ineh tukang pirak, luk mudut ruma'-ruma' akang Artemis luk isuut dengan pirak. Idi kekamen ineh ngacing mula' usin kuan tukang-tukang ineh.

²⁵Idi ieh nengamung nedeh, dengan lemulun luk mepad kekamendeh, keburi'neh, "O kinanak-kinanak, muyuh kali' ratnan kekamen ini tau ngalap binaweh tau.

²⁶Muyuh sebuleng nier idi ninger ratnan luk ruen Paulus ineh. Kebalaneh akang luk inau' lemulun baken allah luk matu. Idi ieh pangeh nengubuk nelun mula', do' tunge' Epesus, idi lélé aput tana' Asia.

²⁷Ngaceku ineh susa' luk macing baken kuan kekamen tau sebuleng luk miak uen ngedat, iamo' ruma' Artemis, akang luk rayeh ineh pana' na miak buren lemulun teh, idi kian lek netutu' ubur akang ineh luk inubur amung-amung lun bang tana' Asia idi aput-apat tana' ini pana'."

²⁸Kareb lun mula' ninger bala ineh, idi ideh megateh niat, idi nengitang, kebaladeh, "Rayeh tu Artemis, akang lun Epesus!"

²⁹Idi ria' ineh nepiar aput bawang. Idi lun mula' nengakem ni Gayus idi Aristarkus, lun Makedonia luk maya' ni Paulus, idi nupun nguit nedidueh bang su luk inandeh marot.

³⁰Paulus sikal semuet arang uned lun mula' ineh, iamo' lun manu ineh na nenima' neneh.

³¹Idi tuda'-tuda' lun rayeh Asia luk rorum Paulus ineh nemaré bala neneh, mutuh neneh, aleg mekuu' semuet bang su luk inandeh marot ineh.

³²Idi sebuangdeh nengitang kudeng ini, idi sebuang kudeng ineh. Ngaceku bang tebubpun ineh mula' ria', idi mula' lemulun luk na kali' anun pundeh nepamung.

³³Inan sebuangdeh nengerawé Iskandar luk miak maré or, ngaceku lun Yahudi nengecuk neneh amé' pa atun. Idi Iskandar ineh nengayep nelun mula' ineh sikal ngor baladeh.

³⁴Iamo' kareb ideh nekali' idi ieh ineh lun Yahudi, idi amung-amungdeh nengitang dengan sebuleng bala dueh jam kinioneh, kebaladeh, "Rayeh tu Artemis, akang lun Epesus ineh!"

³⁵Muci ratnan ineh, lun luk ngayud kuan bawang ineh nengagka' ria' lun mula ineh, kebalaneh, "O lun Epesus, idé-idé pana' kali', idi bawang Epesus ini, luk matar ruma' Artemis luk rayeh idi batu luk meligan luk nebpeh rat langit.

³⁶Seburur pana' nateh luk miak ngalum ineh. Ngaceku ineh, do' muyuh pirud idi aleg nganau' anun-anun dengan na ngerawé do'-do'.

³⁷Ngaceku muyuh pangeh nenguit lemulun ini amé' tungé', sagan pana' ideh na mano binaweh akang idi na ideh nenguyo akang tau.

³⁸Kudeng Demetrius idi lun tebarinneh inan adu' kuan seburur lemulun pana', idi luk inan besara' ineh mukab peh, idi lun mutut besara' pana' inan teh, aganeh ideh besara' seburur dengan seburur.

³⁹Iamo' kudeng inan anun-anun luk baken luk pian muyuh, idi miak muyuh mangeh ineh bang tebubpun luk matu.

⁴⁰Kian, mesusa' tau ini napeh lek ngaceku tau uen ngadu' ratnan tebubpun tau luk meria' aco sini, ngaceku na luk idi punneh; idi ratnan ria' ini na tau miak ngor anun-anun."

⁴¹Kareb ieh pangeh nepebala kudeng ineh, idi ieh nengecuk nelun luk tebubpun ineh muli.

Kekamen Rasul-Rasul 20

¹Kareb ria' ineh pangeh nugka' idi Paulus nenawar nelun manu ineh idi neperiteteng nedeh. Idi pangeh ieh nemala, "Do' tudo muyuh," idi ieh iné' déi' Makedonia.

²Ieh nelemaba amung-amung babpat ineh idi nengubuk nelun mula' dengan bada'neh. Pangeh ineh ieh iné' Akaya,

³Idi tudo déi' teluh bulan kinioneh. Kareb ieh sikal amé' déi' Siria idi ieh nekali' lun Yahudi nenganau' aceh gayam sikal metueh rat neneh. Ngaceku ineh ieh nelemubed lemaba bawang Makedonia.

⁴Sopater Pirus rat Beria nemaya' neneh; kudeng ineh teh Aristarkus idi Sekundus rat Tesalonika, Gayus rat Derbi, Timotius, Tikikus idi Tropimus rat tana' Asia.

⁵Ideh nenalan atun idi nenganét nekai déi' Troas.

⁶Kai pana' nenalan maya' kapal rat Pilipi mucu ratnan Aco rayeh Ruti luk Na Lamud. Idi bang limeh aco kai iné' matun nedeh déi' Troas idi netudo déi' seminggu.

⁷Kareb aco luk pun-pun bang minggu ineh, idi kai netebubpun nemuri' ruti. Idi Paulus nemada' nelun manu macing tangal dacem, ngaceku ieh sikal nalan maya' kapal kenebpa.

⁸Idi inan tuda'-tuda' lapung bang takep luk déi' parung, ieh ineh su luk inan kai tebubpun.

⁹Idi inan seburur anak adi' ngadanneh Utikus, luk tudo munung tabuk idi luk nerudap ngaceku Paulus pelaba io bada'; idi ngaceku ieh pelaba rudap, idi ieh nebpeh rat luun parung luk keteluh, idi petacu naté. Idi ideh nengalap neneh.

¹⁰Idi Paulus netemurun idi nengapel neneh, keburineh, "Aleg mesusa', mulun tieh!"

¹¹Idi ieh nelemubed iné' déi' parung idi ieh nemuri' ruti idi nekuman, idi ideh nepegayam macing aco masat, idi Paulus nenalan.

¹²Idi ideh nenguit anak adi' ineh muli' dengan do'; idi amung-amungdeh inubuk peh.

¹³Idi kai iné' umak bang kapal, idi nenala iné' Asos, sikal amé' ngalap ni Paulus déi', maya' kudeng luk bilaneh, ngaceku ieh sebuleng sikal maya' tana'.

¹⁴Kareb ieh nepapu' nekai déi' Asos idi kai nenawar neneh umak bang kapal, idi iné' Mitilini.

- ¹⁵Kai nenalan rat déi', idi kenebpa kai iné' muneng ku pulau Kios; idi kesoriak kai nacing déi' Samos, idi keso sedéi' di kai nacing déi' Militus.
- ¹⁶Ngaceku pian Paulus nalan maya' kapal lemaba Epesus, pelé ieh na mio déi' bawang Asia ngaceku ieh sikal miket, kudeng ieh miak macing déi' Yerusalim kareb Aco Rayeh Pentakosta.
- ¹⁷Idi rat Militus Paulus nengecuk lun Epesus nawar lun rayeh-rayeh sidang ineh papu' neneh.
- ¹⁸Kareb ideh nacing idi Paulus nepebala nedeh, "Muyuh kali', ratnan kudeng apeh lawéku seruked ui tudo dengan muyuh rat pun-pun ui nacing déi' tana' Asia.
- ¹⁹Ui nengakem kuan Tuhan dengan mebeneh niat idi tangi', sagan pana' inan tuda'-tuda' luk nutun ratnan gayam lun Yahudi luk nacing negku.
- ²⁰Muyuh kali' ratnan ui na nengalum anun-anun luk petulu badén kuan muyuh, kareb ui nemada' idi ngubuk nemuyuh pa kiung lun mula' idi bang ruma'-ruma' muyuh.
- ²¹Ui nemaré kali' kuan lun Yahudi idi lun pupu baken ratnan lumi inan Allah, idi manu inan Tuhan tau Yésus Keristus.
- ²²Idi nekini, ui maya' kuyut Roh Meligan amé' Yerusalim, idi na ui kali' luk mangun kuanku déi'.
- ²³iamo' ui kali' Roh Meligan maré kali' kuanku bang anid-anid bawang, ratnan ui tetupin idi uen ngedereh.
- ²⁴Iamo' na tu ui ngerawé niatku inan raga kuan bururku sebuleng, kudeng ui miak ngeriput luk ruenku, idi mangeh kekamenku luk ilapku ratnan Tuhan Yésus, ieh ineh pad ui mada' Bala luk Do' ratnan katu Allah.
- ²⁵"Ui pangeh nengikak idi nemada' amung-amung muyuh ratnan Imet Allah. Idi nekini ui kali' idi muyuh na miak nier kiungku teh.
- ²⁶Ngaceku ineh bang aco sini ui maré kali' nemuyuh, kudeng sebuang muyuh meraruh, na ui mesala' pa kiung Tuhan.

- ²⁷Ngaceku na ui nengalum anun-anun, iamo' ui nemada' kuan muyuh amung-amung luk pian Allah.
- ²⁸Matar burur muyuh sebuleng idi amung sengeriudan ineh. Ngaceku muyuh mangun ku lun matar sidang maya' ecuk Roh meligan. Do' muyuh ngasa' sidang Allah, luk pangeh inuli' dengan dara'Neh sebuleng.
- ²⁹Idi ui kali' mucu ratnan ui necan nemuyuh, idi inan teh tuda'-tuda' bungalé luk mesangit sikal semuet arang muyuh, idi luk na méi' inan sengeriudan ineh.
- ³⁰Idi rat arang muyuh sebuleng pana' miak tumui tuda'-tuda' lemulun luk mada' bada' luk tekilu', pad ngeruid niat lun manu ineh maya' nedeh.
- ³¹Matar do'-do', idi ngerawé ratnan teluh lak kinioneh, tebaco kedangan, ui na ucu' nemada' anid-anid burur dengan abpa' matehku.
- ³²"Idi nekini ui maré nemuyuh kuan Allah idi kuan bala katuNeh ineh. Ieh luk melalud ngeraben nemuyuh idi maré kuan muyuh peruan luk tinina' kuan amung pupuNeh.
- ³³Na ui nelili ku pirak, amas, idi ayung muyuh teh.
- ³⁴Muyuh sebuleng kali' ticu'ku ini pangeh mekél ngakem idi ngalap luk pianku idi luk pian lun denganku pana'.
- ³⁵Bang amung-amung kekamen ini ui pangeh nengegala' kuan muyuh kudeng apeh tau petulu mekél ngedengan lemulun luk masi' idi mesusa'. Ngerawé bala Tuhan Yésus, 'Meluun rayeh peruan kuan lemulun luk maré ratnan lemulun luk ngalap.' “
- ³⁶Kareb Paulus pangeh nepebala kudeng ineh, idi ieh netekeradung idi nesembayang dengan amung-amung lemulun ineh.
- ³⁷Idi amung-amungdeh pana' nangi' idi nengapel ni Paulus idi nepetabi' neneh.
- ³⁸Ideh pelaba susa' niat ngaceku balaneh ineh, ratnan ideh na miak nier kiungneh baruh peh. Idi ideh nenated neneh semuet bang kapal.

Kekamen Rasul-Rasul 21

- ¹Kareb kai nepatad rat nedeh, idi kai nenalan maya' kapal idi nacing déi' Kus. Idi kenebpa kai nacing déi' Rodus idi rat déi' iné' déi' Patara.
- ²Déi' Patara inan kapal luk amé' déi' Punika, idi kai numak kapal ineh idi nenalan.
- ³Kareb kai nenier bawang Siprus idi kai nenecan bawang ineh pa kabing, idi petacu nenalan iné' bawang Siria idi netemurun déi' bawang Sur; ngaceku déi', kapal ineh nengeruat uangneh.
- ⁴Idi kai nepapu' dengan tuda'-tuda' lun manu, idi netudo déi' seminggu. Idi ideh tigio Roh pad ideh nengecuk ni Paulus aleg amé' déi' Yerusalim.
- ⁵Kareb pangeh mabud tuda'-tuda' aco kai netudo déi', idi kai nenalan. Idi amung-amungdeh dengan awan idi anak-anakdeh, nenated nekai remuat rat bang bawang ineh, idi kai netekeradung idi nesembayang tangeb abpa' rayeh.
- ⁶Kareb kai pangeh nepetabi' seburur dengan seburur, idi kai numak bang kapal, idi ideh nuli'.
- ⁷Kai petacu nalan rat Sur macing déi' Tolemais, idi kai nemaré tabi' kuan kinanak-kinanak ineh idi netudo dengandeh seaco kinioneh.
- ⁸Kenebpa kai nenalan idi nacing déi' Kaisaria. Kai tudo bang ruma' Pilipus, lun luk nated Bala luk Do' ineh, ieh ineh selemulun ratnan tudu' burur luk pinili' déi' Yerusalim.
- ⁹Idi lun ini inan apat burur anak decur luk pun mebaruh luk nemada' bala luk biré Allah.
- ¹⁰Laba' kai tudo tuda'-tuda'a aco déi', inan seburur nabi ngadanneh Agabus, netemurun rat bawang Yudia.
- ¹¹Ieh iné' matun nekai; idi ieh nengalap abet awa' Paulus, idi nengabet kukud idi ticu'neh sebuleng, keburu'neh, "Kudeng ini bala Roh Meligan, 'Lun luk kuan abet awa' ini miak betin lun Yahudi déi' Yerusalim, idi ieh barénde' bang palad lun pupu baken.' "

¹²Kareb kai neninger bala ineh, idi kai dengan kinanak-kinanak bang bawang ineh nemutuh neneh aleg amé' déi' Yerusalim.

¹³Iamo' kebala Paulus, "Anunké ulekneh muyuh nangi' idi ngelaso niatku? Ngaceku ui temina' baken betin mo', iamo' pitayen déi' Yerusalim ngaceku ngadan Tuhan Yésus."

¹⁴Kareb ieh na sikal mubuk, idi kai pana' nucu' idi nepebala, "Nima' pian Tuhan mangun."

¹⁵Pangeh ineh kai netemina' idi iné' Yerusalim.

¹⁶Idi sebuang kinanak rat Kaisaria nemaya' nekai, idi nenated nekai amé' matun Menason, lun Siprus luk pangeh mio mangun ku anak sekola' Yésus. Idi kai sikal rudap bang ruma'neh.

¹⁷Kareb kai nacing déi' Yerusalim idi kinanak-kinanak ineh pana' nenganak nekai dengan mawang niat.

¹⁸Kenebpa Paulus nemaya' nekai amé' papu' Yakub; Idi amung-amung lun rayeh sidang pana' inan teh déi'.

¹⁹Paulus nepetabi' nedeh, idi ieh nemada' nedeh ratnan amung-amung luk inau' Allah arang lun pupu baken dengan kekammeneh.

²⁰Kareb ideh pangeh neninger bala Paulus, ideh nengerayeh Allah idi nepebala neneh, "O kinanak, siruh! Inan tuda'-tuda' ngeribu lun Yahudi luk pangeh manu, iamo' amung-amungdeh ineh mepicet ngimet Ukum Musa.

²¹Iamo' ideh pangeh neninger ratnan iko mada' amung-amung lun Yahudi luk tudo arang lun pupu baken ineh, aleg maya' Ukum Musa, idi aleg nunat anak-anakdeh idi aleg maya' adat lun Yahudi.

²²Kali' rungen ideh miak ninger ratnan acingmu. Anunké luk miak ruen tau?

²³Ngaceku ineh, nganau' luk badén kai namu. Kai inan apat burur tungé' luk pangeh pejani'.

²⁴Do' iko maya' nedeh idi ngeligan bururmu sebuleng dengandeh teh, idi ngedengan nedeh ku usin, pad ideh miak ngiki uluhdeh, idi amung-amung

lemulun miak kali' idi bala luk bila lemulun kuandeh ratnan iko na matu, iamo' iko sebuleng pana' maya' Ukum Musa teh.

²⁵Iamo' kuan lun pupu baken luk pangeh manu ineh, pangeh kai nemaré surat, mada' luk pinutut kai pad ideh na kuman luk biré kuan akang, idi dara', idi pung luk naté nekaling, idi pad ideh na pasét.”

²⁶Paulus nenguit lemulun ineh maya' neneh, idi kenebpa ieh nengeligan bururneh sebuleng dengandeh. Ieh nesemuet bang Ruma' Allah idi nemada' ratnan tuda' aco luk inandeh uen ngeligan ineh, pad ideh miak maré luk baréndeh ineh.

²⁷Kareb malé mabud tudu' aco kinioneh, idi lun Yahudi rat Asia ineh pana' luk nenier Paulus bang Ruma' Allah ineh, nengagau lun mula' idi nengakem ni Paulus,

²⁸Idi nengitang, keburideh, "O lun Israil, miket! Ini ieh luk mada' iapeh-iapeh idi ngedat nelun Israil, Ukum Musa, idi Ruma' Allah ini. Meluun teh ieh nenguit tuda'-tuda' lun pupu baken semuet bang Ruma' Allah, pad nengelutak su luk meligan ini.”

²⁹Ideh nepebala kudeng ineh ngaceku atun ideh pangeh nenier Tropimus lun Epesus ineh nepamung dengan Paulus déi' Yerusalim, idi ideh nengerawé Paulus pangeh nenguit neneh amé' bang Ruma' Allah.

³⁰Idi amung-amung lun bang bawang ineh meria', idi pupu ineh pana' nupun idi nepamung. Ideh nengakem ni Paulus idi ideh nengeruid neneh remuat rat bang Ruma' Allah ineh. Idi petacu ideh nengitek tanga'-tanga' Ruma' Allah.

³¹Kareb lun mula' sikal ngaté neneh, idi bala nacing kuan lun rayeh baweh Rum ratnan amung-amung lun bang bawang Yerusalim meria' peh.

³²Idi ieh petacu nenguit tuda'-tuda' lun pebunu' idi lun rayehdeh, idi ideh netemurun nupun iné' Yerusalim. Kareb lun mula' nenier neneh dengan lun pebunu' ineh, idi ideh nugka' mebal ni Paulus.

³³Idi lun rayeh baweh ineh iné' ngakem ni Paulus idi nengecuk nedeh ngabet neneh ku dueh kaling. Idi kebalaneh, "Idéké lemulun ini, idi anun luk inau'neh."

³⁴Idi sebuang rat arang lun mula' ineh nengitang kudeng ini, idi sebuang kudeng ineh. Ideh pelaba ria' pad lun rayeh baweh na miak kali' dengan megala' anun luk pangeh nangun. Idi ieh nengecuk nedeh nguit ni Paulus semuet bang libung lun pebunu' luk meraben.

³⁵Idi kareb ieh nacing inan ican, idi ieh binirir tuda'-tuda' lun pebunu', ngaceku lun mula' pelaba ria';

³⁶ngaceku lun mula' ineh maya' puet idi ngitang-ngitang, "Ngaté neneh!"

³⁷Kareb ideh nenguit Paulus lélé semuet bang libung lun pebunu', idi ieh nepebala kuan lun rayeh baweh, kebalaneh, "Miak ui pegayam namu?" Idi kehuri' lun rayeh baweh ineh, "Kali'mu buri' Grika?"

³⁸Kudeng pieh kudeng ineh iko baken lun Masir luk nengegio kedaluh atun, idi luk nenguyut apat ngeribu lun pebunu' amé' su luk ali-ali?"

³⁹Iamo' kebala Paulus, "Ui ini lun Yahudi rat Tarsus, luk tinganak bang aceh bawang luk mebala bang tana' Kilikia, idi ui mutuh namu nima' negku pebala nelun mula' ini."

⁴⁰Lun rayeh baweh ineh nenima' neneh, idi Paulus netuped luun ican, idi nengayep nelun mula' ineh. Ideh nepirud, idi ieh nepebala dengan buri' lun Iberani, kebalaneh:

Kekamen Rasul-Rasul 22

¹"O taman-taman idi kinanak-kinanak, ninger muyuh!"

²Kareb ideh neninger neneh pebala bang buri' Iberani, idi ideh pelaba pirud peh. Idi kebala Paulus:

³"Ui ini lun Yahudi, luk tinganak déi' Tarsus luk bang bawang Kilikia, iamo' ui inasuh tungé' Yerusalim, idi ui anak sekola' Gamalil luk bida'neh maya' Ukum

tepun tau dengan matu. Idi ui mepicet manu inan Allah, mepad kudeng muyuh aco sini teh.

⁴Ui nengedereh idi nengate lemulun luk maya' Dalan Tuhan ini. Idi ui nengakem deléi idi decur idi nenuet nedeh bang tutup.

⁵Imam Rayeh idi lun reyeh-rayeh lun Yahudi pana' miak ngegala' rat nan ui mala luk matu. Ngaceku ui nengalap rat nedeh tuda'-tuda' surat luk inayud kuan kinanak-kinanak lun Yahudi déi' Damsik. Idi ui iné' déi', pad ngakem lemulun ineh, idi pad nguit nedeh kitem kaling amé' Yerusalim pelé ideh miak kumin peh.

⁶"Uned ui nalan muneng ku Damsik, kareb muned aco, denak-denak inan acang luk merasat rat bang langit libutku.

⁷Ui neluka' luun tana' idi ui neninger aceh arod luk pebala negku, 'Saul, Saul! Ngudehké' iko ngedereh Negku?'

⁸Idi keburiku, 'Idéké Iko, O Tuhan?' Idi kebalaNeh negku, 'Ui ini Yésus lun Nasarét luk pederenmu.'

⁹Lun luk nemaya' negku nenier acang ineh, iamo' na ideh neninger bala luk nepebala negku ineh.

¹⁰Idi keburiku, 'O Tuhan, anunké luk miak ruenku?' Idi kebala Tuhan negku, 'Tumui iko idi amé' semuet bang bawang Damsik; idi déi' miak belén namu amung-amung kekamen luk inau' temina' kuanmu.'

¹¹Ui nebuser ku rasat acang ineh, idi lun denganku nenguyut negku macing déi' Damsik.

¹²"Idi inan selemulun, ngadanneh Ananias, luk mepicet maya' Ukum Musa, luk inubur amung lun Yahudi luk tudo déi' Damsik.

¹³Ieh iné' negku, keburineh, 'O kinanakku Saul do' iko kulat mateh idi nier.' Kareb ineh teh ui pana' nenier neneh.

¹⁴Idi kebalaneh, 'Allah tepun tau pangeh nemili' namu atun, pelé iko kali pianNeh, idi miak nier Luk Matu ineh idi ninger bala rat bang tangNeh.

¹⁵Ngaceku iko mangun ku lun nekali' Neneh kuan amung-amung lemulun ratnan luk sinier idi pindengermu ineh.

¹⁶Idi nekini anunké punneh iko nganét? Tumui iko idi rerebpen idi nawar ngadan Yésus, pad amung-amung sala'mu uen ngiu'.

¹⁷"Ui nuli' iné' Yerusalim, idi uned ui sembayang bang Ruma' Allah, idi ui nenier aceh luk sinierku.

¹⁸Idi ui nekali' Tuhan ineh nepebala negku, 'Miket remuat rat Yerusalim; ngaceku lemulun bang bawang ini na sikal ninger luk nekali'mu rat Negku'.

¹⁹Idi keburiku, 'O Tuhan, lemulun ineh kali' ratnan kudeng apeh ui iné' bang ruma'-ruma' sembayang idi nengakem idi nemebal lemulun luk manu Namu.

²⁰Kareb Stepanus, lun luk nekali' Namu pinaté, idi ui idi déi' idi neperurum nedeh luk nengaté neneh, idi nengimet ayungdeh.'

²¹Idi kebala Tuhan negku, 'Nalan iko, ngaceku Ui sikal ngecuk namu amé' mado kuan lun pupu baken.' “

²²Lun mula' neninger bala Paulus macing ieni mo'; idi ideh nengitang, keburideh, "Nala' neneh! Ngaté neneh! Na ieh petulu mulun teh.”

²³Idi ideh nengitang idi nengelengu ayungdeh, idi nengisak abuh amé' dita'.

²⁴Lun rayeh baweh ineh nengecuk nguit ni Paulus semuet bang libung lun pebunu'. Idi ieh nengecuk nedeh mebal neneh, pad ideh kali' anun punneh lun Yahudi ineh nengitang kudeng ineh ratnan lawéneh.

²⁵Kareb ieh kiling ku nuper kubil, idi Paulus nepebala nelun rayeh lun pebunu' luk tuper muneng neneh, "Miakké muyuh mebal seburur lun Rum kareb nateh ieh tinutun?”

²⁶Kareb lun rayeh lun pebunu' ini neninger bala ineh, idi ieh iné' nelun rayeh baweh idi nengitun neneh, kebalaneh, "Anunké luk ruenmu? Lemulun ini lun Rum.”

²⁷Idi lun rayeh baweh ineh pana' iné' ni Paulus idi nengitun neneh, kebalaneh, "Mala negku, matuké iko ini lun Rum?" Idi keburiku Paulus, "Matu.”

²⁸Idi kebala lun rayeh baweh ineh, "Ui ini pana' pangeh nengalap ngadan anak Rum dengan raga luk rayeh." Idi kebala Paulus, "Iamo' ui ini titen anak Rum rat punku tinganak."

²⁹Idi lun luk temina' ngelio ni Paulus ineh petacu buro rat neneh, idi lun rayeh baweh pana' matot teh, ngaceku ieh kali Paulus ineh lun Rum, idi ieh luk pangeh nengaling neneh.

³⁰Lun rayeh baweh ineh sikal kali' punneh dengan megala' ratnan kudeng apéh Paulus inadu' lun Yahudi ineh, idi kenebpa ieh neneka abetneh, idi nengecuk imam-imam rayeh idi amung-amung teubupun besara' ineh mepamung, idi ieh nenguit Paulus temurun idi nenaped neneh pa kiung lun mula' ineh.

Kekamen Rasul-Rasul 23

¹Idi Paulus nenutong teubupun besara' ineh, kebalaneh, "O kinanak-kinanakku! Ratnan ulunku ini ui meran niat pa kiung Allah macing aco sini."

²Idi Ananias, Imam Rayeh ineh nengecuk lemulun luk tuper iring Paulus mepag tangneh.

³Idi kebala Paulus kuanneh, Allah miak mepag namu, O alad luk sinat ku kapor luk mebuda! Iko ini tudo ngukum negku maya' Ukum Musa, iamo' iko ngelaba Ukum Musa dengan ngecuk lemulun mepag negku!"

⁴Idi keburi' lun luk tuper muneng ni Paulus, "Iko ngilang Imam Allah luk Rayeh!"

⁵Idi keburi' Paulus, "O kinanak-kinanakku, ui na kali' ieh ineh Imam Rayeh, ngaceku pangeh inayud, 'Aleg iko ngedat lun rayeh pupumu.' "

⁶Iamo' kareb Paulus nekali' idi sebuang lemulun ineh lun Saduki, idi luk baken ineh lun Parisi, idi ieh nengitang bang teubupun ineh, kebalaneh, "O kinanak-kinanakku, ui ini lun Parisi idi anak lun Parisi. Ngaceku rapet idi tui lun naté ui ini tinutun bang besara'."

⁷Kareb ieh pangeh nepebala kudeng ineh, idi nacing aceh kedaluh arang lun Parisi dengan lun Saduki. Idi lun mula' ineh pana' nepatad peh.

⁸(Ngaceku lun Saduki pebala na luk idi tui, idi na luk idi melaikat idi roh pana'; iamo' lun Parisi manu ku amung ineh.)

⁹Idi nacing kedaluh luk rayeh, idi tuda'-tuda' guru Ukum ratnan babpat lun Parisi nudur, keburideh, "Lemulun ini na sala' anun-anun! Inan aceh roh kian melaikat nepebala neneh lek!"

¹⁰Kedaluh ineh iuk amé' dat, pad lun rayeh baweh ineh matot kudeng Paulus uendeh ngerarak. Idi ieh nengecuk nelun pebunu' ineh nguit ni Paulus remuat rat arangdeh, pad ieh semuet bang libung lun pebunu'.

¹¹Malem nebpa idi Tuhan netuped iringneh idi nepebala, "Do' iko lutep niat. Mepad kudeng iko pangeh nemaré kali' ratnan Ui déi' Yerusalim, kudeng ineh teh do' iko maré kali' ratnan Ui déi' Rum pana'."

¹²Kenebpa idi tuda'-tuda' lun Yahudi nepegayam idi nepebulung, kebaladeh, na ideh sikal kuman idi ngirup pad macing Paulus pitayendeh.

¹³Idi kinula' lemulun luk nepebulung ineh mela apat ngepulu' burur.

¹⁴Idi ideh iné' matun imam-imam rayeh idi lun rayeh baken teh, keburideh, "Kai pangeh nepebulung, idi kai na sikal kuman anun-anun kareb nateh kai ngaté ni Paulus.

¹⁵Ngaceku ineh do' muyuh idi lun tebubpun besara' ineh ngelio kuan lun rayeh baweh ineh, pad ieh miak nguit ni Paulus temurun kuan muyuh, ayuneh muyuh pian ngelio kekammeneh dengan megala'. Iamo' kai ini pangeh temina' ngaté neneh kareb nateh ieh macing."

¹⁶Iamo' kareb anak pinaken Paulus luk deléi neninger ratnan gayam ineh, idi ieh iné' semuet bang libung lun pebunu' idi nemaré kali' ni Paulus.

¹⁷Idi Paulus nenawar seburur lun rayeh lun pebunu' ineh idi nepebala, "Itenmu anak adi' ini kuan lun rayeh baweh; ngaceku inan aceh bala luk badénneh neneh."

¹⁸Idi ieh nenguit anak adi' ineh amé' matun lun rayeh baweh, keburineh, "Paulus luk tinutup ineh nenawar negku idi nemutih nguit anak adi' ini matun namu, ngaceku inan aceh bala luk badénneh namu."

¹⁹Idi lun rayeh baweh ineh pana' nengimet ticu'neh, idi nenguit neneh amé' setau' idi nengitun neneh, "Anunké luk belénmu negku?"

²⁰Idi keburineh, "Lun Yahudi pangeh nepegayam sikal mutuh namu nguit ni Paulus temurun nebpa amé' matun tebubpun besara', ayuneh ideh sikal ngelio do'-do' ratnan kekammeneh.

²¹Iamo' aleg iko ninger baladeh, ngaceku inan mela apat ngepulu' burur luk ngabang neneh, idi luk pangeh nepebulung na sikal kuman idi ngirup pana' pad macing Paulus pitayendeh. Idi nekini amungdeh ineh temina' nganét balamu.

²²Idi kebala lun rayeh baweh ineh, "Aleg mada' nelun baken ratnan iko pangeh nengelio bala ini kuanku." Idi ieh nengecuk anak adi' ineh muli'.

²³Idi lun rayeh baweh ineh nenawar dueh burur lun rayeh lun pebunu' ineh idi nepebala, "Uen medueh ngamung dueh ngeratu lun pebunu' luk miak amé' déi' Kaisaria, dengan tudu' ngepulu' lun maya' kuda, idi dueh ngeratu lun ngimet busu, kareb pun rudap malem ini.

²⁴Idi uen ngamung tuda'-tuda' kuda, idi miak nganau' ni Paulus luundeh, idi nguit neneh dengan do' kuan Pilik, ieh ineh Lun luk Ngimet Ukum."

²⁵Idi ieh nengayud aceh surat, kudeng ini balaneh:

²⁶"Tabi' rat negku, Klaudius Lisias macing inan Lun luk Ngimet Ukum, ieh ineh Pilik luk pelaba buren.

²⁷Lun ini pangeh kikem lun Yahudi, idi kareb uned ideh sikal ngaté neneh, idi ui nacing dengan bawehku idi nemuit neneh, ngaceku ui pangeh neninger ieh ini lun Rum.

²⁸Ui sikal kali' punneh lemulun ineh nengadu' neneh, idi ui nenguit neneh temurun amé' matun tebubpun besara'deh.

²⁹Idi ui nekali' neneh ini inadu' ratnan tuda'-tuda' bala ratnan ukumdeh ineh, iamo' na luk idi sebuleng adu' pana' luk petulu dengan ukum pitayen idi uen nutup.

³⁰Idi kareb ui pangeh bida' ratnan aceh gayam lun Yahudi luk perurum sikal ngaté neneh, idi ui petacu nemaré neneh namu, idi nengecuk bunu'neh ngadu' neneh pa kiungmu.”

³¹Lun pebunu' ineh nengalap ni Paulus maya' kudeng luk icuk kuandeh, idi ideh nenated neneh kareb malem amé' déi' Antipatris.

³²Kenebpa lun luk nenalan kukud nelemubed iné' bang libung lun pebunu', iamo' lun luk maya' kuda ineh nemaya' ni Paulus.

³³Ideh nenguit neneh nacing déi' Kaisaria, idi ideh nemaré ni Paulus bang palad Lun luk Ngimet Ukum, dengan surat ineh teh.

³⁴Lun luk Ngimet Ukum ineh nemaca' surat ineh, idi ieh nengitun neneh bawang sapeh luk inanneh. Kareb ieh nekali' idi Paulus ineh lun Kilikia,

³⁵idi keburu'neh, "Ui sikal ngelio balamu, kareb bunu'-bunu'mu macing tungé'." Idi ieh nengecuk nedeh ngimet ni Paulus bang ruma Raca' Herodés.

Kekamen Rasul-Rasul 24

¹Pangeh limeh aco mucu ratnan ineh, idi Imam Rayeh Ananias iné' Kaisaria dengan tuda'-tuda' lun rayeh idi seburur lun luk mileh pebala, ngadanneh Tertulus. Ideh iné' matun Pilik, idi nengadu' ni Paulus.

²Kareb Tertulus tinawar, idi ieh nengimun ngadu' ni Paulus, kebalaneh: "O tuanku Pilik luk pelaba buren, ratnan tuan kai kali' awang niat, idi ratnan ileh tuanku tuda'-tuda' luk do' pangeh inau' kuan pupu ini.

³Idi idan-idan pana' idi iapeh-iapeh pana' kai mawang niat ku ini, pad kai ngubur namu.

⁴Iamo' pad ui na ngimet namu idi ui mutuh namu méi' nekai idi ninger bala kai luk sesuut ini.

⁵Kai pangeh nekali' idi lun ini lemulun luk dat. Ieh nengimun ria' kuan lun Yahudi apud tana' ini, idi ieh mangun ku lun rayeh babpat Nasarét.

⁶Ieh nenutun ngelutak Ruma' Allah; iamo' kai nengakem neneh. [Kai sikal ngukum neneh maya' Ukum kai.

⁷Iamo' Lisias lun rayeh baweh ineh, nengaro neneh rat bang palad kai,

⁸idi nengecuk nelun luk nengadu' ni Paulus amé' matun namu.] Kudeng iko ngelio kekamenneh, idi iko sebuleng miak kali' rat neneh matu amung-amung adu' kai neneh.”

⁹Lun Yahudi luk idi déi' nengadu' neneh, idi nengamo ratnan amung bala Tertulus ineh matu.

¹⁰Idi Pilik, Lun luk Ngimet Ukum ineh nengayep ni Paulus ngecuk neneh pebala, idi Paulus pana' nepebala kudeng ini "Ui kali', iko mangun ku lun luk ngimet pupu ini tuda'-tuda' lak kinioneh, idi dengan mawang niat ui miak ngor balamu.

¹¹Kudeng iko ngitun, miak iko kali', idi na meluun ratnan pulu' dueh aco atun, ui iné' sembayang déi' Yerusalim.

¹²Lun Yahudi na nekali' negku pekedaluh dengan seburur pana' bang Ruma' Allah ineh, idi na ideh nekali' negku nengamung nelun mula' sikal nganau' kedaluh, idi na ideh nekali' negku nganau' ria' bang ruma'-ruma' sembayang idi bang bawang iapeh-iapeh pana'.

¹³Idi nateh lemulun ineh miak ngegala ratnan adu'deh negku nekini.

¹⁴Iamo' ini ui ngamo kuanmu: Ui sembayang inan Allah tepun tau maya' Dalan Tuhan ineh, luk titendeh na matu. Iamo' ui manu ku amung-amung luk inayud bang Ukum Musa idi surat nabi-nabi.

¹⁵Ui merapet inan Allah mepad kudeng lemulun ineh teh, ratnan tui amung lemulun, do' kuan lun luk matu, idi kuan lun luk na matu pana'.

¹⁶Ngaceku ineh ui megéi' ngekél bururku sebuleng pad teruayen niatku na mesala' pa kiung Allah idi pa kiung lemulun pana'.

- ¹⁷Idi pangeh tuda'-tuda' lak mucu ratnan ui nenecan Yerusalim idi ui iné' sikal nguit luk barén mo' kuan pupuku, idi teh luk barén kuan Tuhan.
- ¹⁸Idi laba' ui nganau' kudeng ini, ideh nepapu' negku kareb ui pangeh biru' bang Ruma' Allah. Iamo' na luk idi ria', idi na ui nengamung nelun mula'.
- ¹⁹Iamo' inan tuda'-tuda' lun Yahudi mo' rat tana' Asia. Setuneh ideh amé' papu' namu pad ngadu' negku, kudeng inan adu'deh negku.
- ²⁰Kudeng na luk idi, nima' lemulun ineh ngegala' sala'ku luk nekali'deh kareb ui tupid pa kiung tebubpun besara' ineh,
- ²¹sebuleng balaku mo' luk miak uendeh ngadu', ieh ineh kareb ui nepebala pa kiungdeh, 'Ui ini tunutun aco sini, ngaceku ui manu ku tui lun naté.' “
- ²²Iamo Pilik luk meluun kali' ratnan Dalan Tuhan, nemangeh besara' ineh, keburi'neh, "Kareb Lisias, lun rayeh baweh ineh macing tungé', idi ui sikal mutut gayam ini.”
- ²³Idi ieh nengecuk lun rayeh lun pebunu' ineh ngimet ni Paulus bang tutup, iamo' dengan ukum luk meran, idi lun rurum Paulus simén ngasa' neneh.
- ²⁴Tuda'-tuda' aco idi Pilik nacing dengan awanneh Drusila, ieh ineh seburur lun Yahudi. Pilik neneteng ni Paulus, idi ieh neninger bala Paulus ratnan manu inan Keristus Yésus.
- ²⁵Iamo' kareb Paulus nemada' ratnan luk matu, idi ratnan ngimet burur sebuleng, idi ukum luk macing mucu, idi Pilik matot idi nepebala, "Nekini do' iko buro, kudeng inan kareb mucu, ui nawar namu teh.”
- ²⁶Idi teh ieh merapet ni Paulus maré usin kuanneh. Ngaceku ineh ieh nengecuk neneh megéi' amé' matun neneh, pad ieh pegayam denganneh.
- ²⁷Dueh lak mucu ratnan ineh, idi Porkius Péstus nengelibal ni Pilik, idi ngaceku Pilik sikal ngawang niat lun Yahudi idi ieh nenecan ni Paulus bang tutup.

Kekamen Rasul-Rasul 25

- ¹Teluh aco mucu rat Péstus pangeh nacing bang bawang ineh, idi ieh nenalan rat Kaisaria iné' Yerusalim.
- ²Déi', imam-imam rayeh idi lun rayeh-rayeh lun Yahudi nengegala' adu'deh ni Paulus. Ideh mesaad nemutuh ni Péstus
- ³pad ieh nima' ni Paulus iten amé' Yerusalim, ngaceku ideh pangeh nepegayam sikal ngaté neneh tangal dalan.
- ⁴Iamo' kebala Péstus, "Paulus inimet déi' Kaisaria, idi ieh sebuleng sikal amé' déi' dengan miket.
- ⁵Do' amung-amung lun rayeh rat arang muyuh temurun maya' negku, idi kudeng lemulun ineh inan sala' do' ideh ngadu' neneh.
- ⁶Idi Péstus netudo dengandeh ualuh kian pulu' aco kinioneh, idi ieh iné' Kaisaria. Idi kenebpa ieh netudo bang ruma' besara', idi nengecuk nguit ni Paulus amé' matun neneh.
- ⁷Kareb Paulus nacing, idi lun Yahudi luk pangeh nacing rat Yerusalim netuped libutneh, idi nengimun ngadu' neneh tu-tu. Iamo' ideh na miak ngegala' ratnan adu'deh matu.
- ⁸Iamo' Paulus nemaré' or, keburu'neh, "Ui na nengelaba Ukum lun Yahudi, ukum Ruma' Allah, idi ukum raca' Rum pana'."
- ⁹Péstus pian buren lun Yahudi, idi kebalaneh ni Paulus, "Sikalké iko amé' déi' Yerusalim pad ui nutun namu déi'?"
- ¹⁰Iamo' kebala Paulus, "Ui tuped pa kiung besara' raca' Rum, su luk petulu nan nutun negku. Iko sebuleng kali' idi ui na mesala' pa kiung lun Yahudi.
- ¹¹Kudeng ui pangeh nengelaba ukum idi pangeh nenganau' anun-anun luk petulu dengan ukum maté, na ui ara' maté. Iamo' kudeng adu'deh na matu, idi seburur pana' nateh luk miak maré negku kuandeh. Ui pian amé' matun besara' raca' Rum."

¹²Idi Péstus nepegayam dengan teubupun besara' ineh, idi kebalaneh, "Iko pangeh nemutuh amé' matun besara' raca' Rum, idi kuan raca' Rum iko miak amé'."

¹³Na mio teh idi Raca' Agripa nacing dengan Berniki déi' Kaisaria, sikal ngikak ni Péstus.

¹⁴Kareb didueh pangeh netudo déi' tuda'-tuda' aco, idi Péstus nemada' raca' ineh ratnan besara' Paulus, keburineh, "Inan selemulun luk bang tutup tungé luk tican Pilik.

¹⁵Idi kareb ui déi' Yerusalim, imam-imam rayeh idi lun rayeh-rayeh lun Yahudi nengadu' neneh, idi nemutuh negku ngukum neneh.

¹⁶Iamo' kebalaku nedeh, idi na adat lun Rum maré seburur lemulun kumin kareb nateh lemulun luk inadu' ineh nepapu' lemulun luk nengadu' neneh pad ieh ngor adu'deh neneh.

¹⁷Kareb ideh iné' tungé', na ui nenganét teh, iamo' kenebpa ui netudo luun kerusi besara', idi nengecuk ni Paulus amé' matun negku.

¹⁸Lun luk nengadu' ineh netuped, iamo' ideh na nenguit adu' ratnan luk dat kudeng luk tirawéku.

¹⁹Iamo' inan tuda'-tuda' adu' ratnan sembayangdeh sebuleng, idi teh ratnan selemulun ngadanNeh Yésus, luk pangeh naté idi luk bida' Paulus Ieh mulun.

²⁰Ngaceku ui na kali' kudeng apeh ngelio amung ineh, idi ui nengitun kudeng ieh sikal amé' Yerusalim, pad ieh tetunin déi'.

²¹Iamo' Paulus nemutuh tetunin pa kiung raca' Rum, idi ieh nemutuh uen matar pad raca' Rum miak mutut besara'neh. Ngaceku ineh ui nengecuk ngimet neneh, pad ui nated neneh amé' matun raca' Rum."

²²Idi keburineh Agripa ni Péstus, "Ui sebuleng pana' sikal ninger bala lemulun ineh." Idi kebala Péstus, "Nebpa iko miak ninger balaneh."

²³Idi kenebpa Agripa idi Berniki nacing dengan ubur idi nesemuet bang ruma' besara' dengan amung-amung lun rayeh baweh idi lun rayeh-rayeh bawang ineh pana'. Idi Péstus nenguit ni Paulus amé' nedeh.

²⁴Idi keburu' Péstus, "O Raca' Agripa idi amung-amung lun luk teubupun dengan kai tungé', muyuh nier lemulun ini. Amung lun Yahudi, do' déi' Yerusalim idi tungé' teh, pangeh nengadu' neneh pa kiungku. Ideh ngitang, kebaladeh, idi na do' ieh mulun teh.

²⁵Iamo' na ui kali' sebuleng sala'neh luk petulu dengan ukum maté. Idi ngaceku ieh sebuleng nemutuh tetunin raca' Rum, idi ui nengamo nima' neneh amé'.

²⁶Iamo' na ui kali' anun-anun luk uenku ngayud kuan raca' ineh. Ngaceku ineh ui nguit neneh amé' pa atun muyuh, meluun teh pa atun Raca' Agripa, pelé tau ngelio ratnan ini. Pangeh ineh inan teh luk uenku ngayud.

²⁷Ngaceku bang terawéku, na petulu maré lun tinutup dengan na ngelio adu'neh."

Kekamen Rasul-Rasul 26

¹Idi kebala Agripa ni Paulus, "Iko miak pebala kuan bururmu sebuleng." Idi Paulus nengegenang ticu'neh idi nepebala:

²"O Raca' Agripa, bang terawéku samal kuanku, ngaceku aco sini ui miak ngor baladeh pa kiungmu ratnan amung-amung adu' lun Yahudi kuanku.

³Idi teh ngaceku iko luk meluun kali' amung-amung adat idi kedaluh lun Yahudi. Ngaceku ineh ui mutuh namu ninger negku dengan mulai niat.

⁴"Amung-amung lun Yahudi kali' ratnan ulunku rat ui isuut. Ideh kali' rat pun-pun ui mulun bang bawangku sebuleng idi déi' Yerusalim pana'.

⁵Ideh pangeh nekali' rat mon, idi kudeng ideh pian, miak ideh maré kali' ratnan ui pangeh mulun kudeng lun Parisi maya' babpat luk meluun picet bang sembayang kai.

⁶Idi nekini ui tuped pa kiungmu ngaceku ui merapet ku jani' Allah luk biréNeh kuan tepun kai.

⁷Idi pulu' dueh pupu kai tebaco kedangan sembayang inan Allah dengan megéi', idi merapet miak ngalap jani' ineh. Idi ngaceku luk inan kai merapet ineh, O Raca' ku, ui ini inadu' lun Yahudi!

⁸Ngudehké lun Yahudi na manu idi Allah nui lun naté?

⁹Atun ui sebuleng nengerawé petulu ui nganau' tuda'-tuda' kekamen pad metueh ratnan ngadan Yésus lun Nasarét ineh.

¹⁰Idi ui nenganau' kudeng ineh déi' Yerusalim. Ui nemaya' ecek imam-imam rayeh idi ui nenipa tuda'-tuda' lun manu bang tutup. Meluun teh kareb lemulun ineh pinaté, ui pana' neperurum dengandeh luk ngaté ineh.

¹¹Idi inan kareb teh ui nemebal nedeh bang amung-amung ruma' sembayang idi nengesaad nedeh nguyo ni Yésus. Idi ngaceku pelaba gathé niatku kuan lemulun ineh, ui nengedereh nedeh macing bawang lun pupu baken pana'.

¹²"Kareb ui nenganau' kudeng ini idi ui nenalan amé' Damsik maya' ecek idi pian imam-imam rayeh.

¹³Idi kareb ui maya' dalam muned aco, O raca'ku, ui nenier aceh acang rat bang langit luk meluun rasat ratnan aco, luk nengelibut negku idi lemulun luk nemaya' negku ineh teh.

¹⁴Amung-amung kai neluka' luun tana', idi ui neninger aceh uni tang luk pebala negku dengan buri' Iberani, 'Saul, Saul! Ngudehké' iko ngedereh Negku? Iko ngurat bururmu sebuleng, mepad kudeng sapi' luk nupak kayuh tuanneh, luk metadem papedneh!'

¹⁵Idi keburu'ku, 'Idéké Iko, O Tuhan?' Idi kebala Tuhan ineh, 'Ui ini Yésus luk pederenmu.

¹⁶Iamo' tumui iko idi tuped, ngaceku ini punneh Ui siniermu, pad Ui ngeletep namu mangun ku demulunKu idi ku lun nekali' ratnan amung-amung luk pangeh siniermu idi ratnan luk miak sirenmu mucu rat Negku teh.

- ¹⁷Ui miak muit namu ratnan pupu ini idi rat nelun pupu baken luk inanKu ngecuk namu amé'.
- ¹⁸Iko miak ngukab matehdeh, pad ideh teketed ratnan dagem idi lumi inan acang, idi ratnan lalud Sétan amé' inan Allah. Idi ngaceku ideh manu Negku, ideh ngalap do' ratnan sala' idi ngalap babpat dengan lun luk pinili' Allah.
- ¹⁹"Dengan luk kudeng ineh, O Raca' Agripa, ui na sikal ngelaba luk sinierku rat surga ineh.
- ²⁰Ui nemada' atun déi' Damsik idi déi' Yerusalim idi mucu libut-libut tana Yudia, idi arang lun pupu baken, pad ideh uren, idi lumi inan Allah dengan nganau' kekamen luk petulu dengan uren ineh.
- ²¹Ngaceku ineh lun Yahudi nengakem negku bang Ruma' Allah idi nenutun ngaté negku.
- ²²Iamo' macing aco sini ui pangeh dinengan Allah, pad ui tuper idi maré kali' nekini pa kiung amung-amung lun mula', do' lun do' idi lun masi' pana'. Ui na pebala anun-anun luk baken iamo' luk pangeh bila nabi-nabi idi Musa miak mangun peh:
- ²³ieh ineh ratnan Keristus na miak na medereh, pad Ieh luk pun-pun tumui rat arang lun naté, pelé Ieh mada' acang kuan ulun lun Yahudi idi kuan lun pupu baken pana'."
- ²⁴Pangeh paulus nengor kudeng ineh, idi Péstus nengitang, kebalaneh, "Meruden iko, O Paulus, ilehmu luk mula' ineh nganau' namu meruden."
- ²⁵Iamo' kebala Paulus, "Baken ui meruden, O Péstus luk bureh, iamo' ui mala bala luk matu idi melio.
- ²⁶O Raca' Agripa! Ui miak mada' namu dengan na merapang, ngaceku iko kali' amung-amung bala ini. Ui kali' do'-do' idi amung-amung ini pangeh megala' kuanmu, ngaceku amung-amung ineh baken inau' dengan lulem.
- ²⁷O Raca' Agripa, manuké iko inan nabi-nabi ineh? Ui kali' iko manu."

²⁸Idi kebala Agripa ni Paulus, "Dengan ubukmu luk sesuut miakké ui mangun ku lun Kristen?"

²⁹Idi kebala Paulus, "Do' dengan luk sesuut idi luk mula', ui mutuh ratnan Allah pad iko idi amung-amung lemulun luk ninger balaku aco sini miak mangun mepad kudeng ui ini, iamo' baken dengan kaling ini."

³⁰Idi raca' ineh nudur, dengan lun rayeh bawang idi Berniki awanneh, idi amung-amung lemulun luk tudo dengandeh ineh teh.

³¹Idi kareb ideh pangeh neremuat, idi ideh pebala seburur dengan seburur, keburi'deh, "Lemulun ini na nganau' anun-anun luk petulu dengan ukum maté idi tetupin pana'."

³²Idi kebala Agripa ni Péstus, "Lemulun ini miak puatin kudeng ieh na nemutuh tetunin pa kiung raca' Rum."

Kekamen Rasul-Rasul 27

¹Kareb pangeh pinutut ratnan kai maya' kapal amé' déi' Italia, idi nemaré ni Paulus idi tuda'-tuda' lun baken luk tinutup, amé' matun seburur lun rayeh lun pebunu', ngadanneh Yulius, ratnan "Baweh Raca' Rum."

²Kai numak bang aceh kapal luk rat déi' Adramitium, luk temina' nalan maya' iring tana' Asia, idi kai nenalan. Idi inan selemulun luk nemaya' nekai, ieh ineh Aristarkus, lun Makedonia rat bawang Tesalonika.

³Kenebpa kai nacing déi' Sidon. Idi Yulius méi' ni Paulus, idi nenima' neneh amé' nier lun rurumneh, pad ideh maré luk pianneh.

⁴Kai nenalan rat déi', idi nemaya' iring pulau Siprus, ngaceku inan bui rat pa atun kai.

⁵Kai neguta abpa' Kilikia idi Pampilia, idi nacing déi' Mira, ieh ineh tana' Likia.

⁶Idi déi' lun rayeh lun pebunu' nekali aceh kapal rat Iskandria luk nalan amé' Italia, idi kai tinawarneh umak bang kapal ineh.

⁷Idi tuda'-tuda' aco kinioneh kai nemaya' kapal ulai-ulai, idi dengan mesusa' kai nacing muneng Kenidus. Idi ngaceku bui nengesabeng nekai, idi kai nenalan maya' iring bawang Kriti lemaba Salmoni.

⁸Idi dengan mesusa' kai nemaya' iring bawang ineh, idi nacing inan abpa' luk melitong, ngadanneh Lidung luk Do', muneng ku bawang Lasia.

⁹Idi mio kai ucu' déi', pad inan luk ngesabeng lawé kai, ngaceku aco mawa' lun Yahudi pangéh nepelaba, idi Paulus nengubuk nedeh,

¹⁰kebalaneh, "O lun muyuh, ui kali' lawé tau rat nekini medereh idi mula' rugi' teh, baken kuan binaweh idi kapal ini mo', iamo' kuan burur tau sebuleng."

¹¹Iamo' lun rayeh pebunu' ineh meluun rapet nan lemulun luk ngimet kapal idi tuan luk kuan kapal ineh teh ratnan luk bila Paulus.

¹²Ngaceku su luk inan kapal mapit ineh na do' kareb meteneb. Ngaceku ineh mula' lemulun nengecuk nedeh maya' kapal rat déi', merapet ideh miak nacing déi' Pinik idi tudo déi' kareb meteneb. Pinik ineh su luk inan kapal mapit déi' bawang Kriti, luk amé' matun pa dayeh busat aco idi pa lod busat aco.

¹³Kareb inan bui luk ulai-ulai rat pa kabing busat aco, ideh nengerawé pangéh nacing luk piandeh, idi ideh nenganak betuh idi nenalan maya' tangeb bawang Kriti.

¹⁴Iamo' na mio nacing aceh barui luk rayeh déi', ngadanneh Pa Lod Busat Aco.

¹⁵Kareb kapal ineh inuit bui ineh, idi na miak metueh rat neneh, idi kai nenima neneh manud.

¹⁶Kai selinged sesuut kareb kai iné' pa kabing busat aco aceh pulau luk isuut, ngadanneh Kauda. Idi su ineh dengan mesusa' kai nengabet alud luk bang kapal ineh.

- ¹⁷Ideh nenginat alud ineh, idi nengangel kapal ku tuda'-tuda' abet, idi ngaceku matot kapal mepasad luun bada, su luk metutun muneng ku Libia, idi ideh nenurun kén kapal ineh idi nenima' kapal ineh manud.
- ¹⁸Iamo' barui ineh iuk metueh, idi kenebpa ideh luk bang kapal nenala' binaweh bang abpa' rayeh.
- ¹⁹Idi kesoriak ideh nenala' repapeh kapal pana' bang abpa' rayeh.
- ²⁰Idi kai na miak nier mateh aco idi gituen bang tuda'-tuda' aco, kinioneh, idi barui ineh na ugka', pad kekipedneh kai na tupu merapet miak mulun peh.
- ²¹Kareb lemulun pangeh mio na nekuman, idi Paulus netuped arangdeh idi nepebala, "O lun muyuh, kudeng muyuh neninger buri'ku atun, 'Aleg nalan rat Kriti,' na tau ngalap mesabeng idi rugi' ini teh.
- ²²Iamo' nekini ui ngecuk nemuyuh lutep niat, ngaceku seburur pana' rat arang tau nateh miak metutu', iamo' kapal ini sebuleng mo'.
- ²³Ngaceku malem ina aceh melaikat Allah luk inanku sembayang iné' negku,
- ²⁴kebalaneh, 'Aleg iko matot, O Paulus; na miak na iko tuped pa kiung raca' Rum, idi matu Allah maré kuanmu amung-amung lemulun luk denganmu bang kapal ineh.'
- ²⁵Ngaceku ineh, O lun muyuh, lutep mo' niat muyuh ngaceku ui manu inan Allah, idi mepad kudeng bala luk biréNeh kuanku, ieh ineh teh luk miak mangun.
- ²⁶Iamo' na miak na tau mepasad inan aceh bawang.”
- ²⁷Kareb macing alem luk kepulu' apat, idi kai manud-manud bang Abpa' Adria. Kareb lélé tangal dacem lun luk ngakem bang kapal ineh nengerawé iuk amé' muneng ku tangeb.
- ²⁸Idi ideh nenala' betuh luk ku nutun kidalemneh; idi ideh nekali' kidalemneh dueh ngepulu' depeh; idi na mado rat déi' teh idi ideh nenala' betuh ineh sekua' teh idi ideh nekali' kidalemneh pulu' limeh depeh.

²⁹Ideh matot mepasad luun batu-batu, idi ideh nenurun apat betuh rat pa ulin, idi nesembayang mutuh aco macang.

³⁰Idi lun luk ngakem bang kapal ineh nenutun buro rat bang kapal ineh. Ideh nenurun alud bang abpa', ayudeh sikal nurun betuh rat pa atun kapal.

³¹Iamo' kebala Paulus nelun rayeh lun pebunu' ineh, "Kudeng na lemulun ineh ketecan bang kapal, idi amung-amung muyuh pana' na miak mulun."

³²Idi amung-amung lun pebunu' ineh pana' nenetak abet alud ineh, idi nenima' neneh manud.

³³Kareb masat aco, idi Paulus pana' nengecuk nedeh kuman, kebalaneh, "Muyuh nenganét pulu' apat aco nekini, idi ruked ini muyuh na nekuman anun-anun pana'.

³⁴Ngaceku ineh ui mutuh nemuyuh kuman, pad muyuh metueh idi na maté. Ngaceku sengurat abpuk pana' na miak metutu' ratnan uluh seburur muyuh."

³⁵Kareb Paulus pangeh nemala kudeng ini, idi ieh nengalap ruti idi ieh nesembayang inan Allah pa kiung amung-amungdeh. Idi ieh nemuri' ruti ineh idi ieh nengimun kuman.

³⁶Pangeh ineh amung-amungdeh nengalap tueh sesuatu, idi ideh nekuman.

³⁷Kinula' kai bang kapal ineh dueh ngeratu tudu' ngepulu' anem burur.

³⁸Kareb amung-amung kai pangeh mebor, idi ideh nenala' padé bang abpa' rayeh, pad kapal ineh meran.

³⁹Kareb macang aco, na ideh miti tangeb ineh, iamo' sinierdeh aceh lidung luk inan nara, idi ideh nengerawé kudeng miak, do' nima' kapal ineh mepasad déi'.

⁴⁰Idi ideh nenangal abet betuh ineh, idi ideh nenecan amung ineh bang abpa' rayeh, idi nenetak abet ulinneh, idi nenganak kén luk ku nganau' alud ineh nalan maya' bui, idi petacu iné' matun tangeb ineh.

⁴¹Iamo' ideh nacing su luk metutun, idi kapaldeh ineh nepasad pa ludungneh pad na miak sigio, iamo' pa ulinneh nabud nebila' ngaceku ribut luk metueh.

⁴²Idi lun pebunu' sikal ngaté nelun luk tinutup ineh, pad seburur pana' na lemangui idi buro.

⁴³Iamo' lun rayeh lun pebunu' ineh sikal ngulun ni Paulus, idi ieh nemebpeng nedeh na maya' piandeh. Idi ieh nengecuk nedeh luk mileh lemangui ubpa rat bang kapal idi lemangui amé' nan tangeb,

⁴⁴Idi lemulun luk ketecan miak ngimet bangar idi ngimet bila' kapal ineh. Idi kudeng ineh teh amung-amung kai mulun idi nacing inan tangeb.

Kekamen Rasul-Rasul 28

¹Kareb kai pangeh nepuit, idi kai nekali' ngadan bawang ineh Malta.

²Idi lun bang bawang ineh méi' nekai. Ideh nengaba apui, idi nenganak nekai, ngaceku mudan idi meteneb teh.

³Iamo' kareb Paulus ineh nengamung raka'-raka' idi nenganau' luun apui ineh, idi inan sebuleng menipeh neremuat ngaceku melau', idi nengawil ticu'neh.

⁴Kareb lun bang bawang ineh nenier menipeh ineh ngawil ticu' Paulus, idi ideh nepebala seburur inan seburur, "Kali' rungen lemulun ini lun ngaté. Iamo' Luk Ngua' ineh na maré neneh mulun, sagan pana' ieh pangeh nepuit ratnan susa' bang abpa' rayeh."

⁵Iamo' Paulus nengegkar menipeh ineh luun apui idi dengan na kali' ét sesuut pana'.

⁶Idi ideh nenganét nier neneh mebara', kian meluka' idi petacu maté lek. Iamo' kareb ideh pangeh nenganét mio idi ideh na kali' anun-anun luk medereh macing neneh, idi ideh nengisu' terawédeh, pad ideh nemala Paulus ineh inan lalud akang.

⁷Idi na mado rat su ineh, inan aceh tana' luk inimet selemulun luk ngadan Publius, ieh ineh lun rayeh bawang ineh. Ieh nengasa' nekai dengan mawang niatneh bang teluh aco kinioneh.

⁸Kareb ineh taman Publius medadem idi mét batek téi' dara' teh. Idi Paulus nesemuet bang takepneh. Ieh nesembayang, idi nengerareng ticu'neh luunneh idi nengedo' neneh.

⁹Pangeh ineh, inan teh lun baken luk mét bang bawang ineh luk iné' ni Paulus. Idi amungdeh ineh dino'.

¹⁰Idi ideh nemaré tuda'-tuda' baré kuan kai; idi kareb kai pian nalan, ideh nenguit kuan kai binaweh luk pian kai.

¹¹Pangeh teluh bulan idi kai nenalan rat pulau ineh maya' aceh kapal luk rat déi' Iskandria luk titen "Akang Luk Perapid," luk nucu' kareb meteneb déi' bawang ineh.

¹²Kai nacing déi' Surakus, idi nucu' déi' teluh aco kinioneh.

¹³Rat déi' kai nenalan idi nacing déi' Regium. Kenebpa inan bui rat pa kabing busat aco, luk nenguit nekai, idi kesoriak kai nacing déi' Putioli.

¹⁴Idi déi' kai nepapu' tuda'-tuda' kinanak luk nenawar nekai tudo dengandeh seminggu. Idi mucu kai iné' Rum.

¹⁵Kinanak-kinanak luk déi' Rum ineh nekali' bala kai macing idi ideh nacing Kadai Apius idi Teluh Kadai sikal papu' nekai. Kareb Paulus nenier nedeh ieh nengubur Allah idi nengalap niat luk mekuu'.

¹⁶Kareb kai nacing déi' Rum, idi ideh nenima' Paulus tudo ali-ali dengan seburur lun pebunu' luk matar neneh.

¹⁷Pangeh teluh aco Paulus nenawar nelun rayeh lun Yahudi. Kareb ideh nepamung, idi kebalaneh nedeh, "O kinanak-kinanakku! Sagan pana' ui na nenganau' anun-anun luk sikal metueh ratnan pupu idi adat tepun tau, ui pangeh tinutup déi' Yerusalim idi biré bang palad lun Rum.

¹⁸Kareb ideh pangeh nengelio negku, idi ideh sikal muit negku, ngaceku na luk idi punneh ui miak kumin dengan ukum maté.

¹⁹Iamo' kareb lun Yahudi mesaad, idi ui nesumaad amé' tetunin pa kiung raca' Rum, baken ngaceku ui inan aceh adu' kuan pupuku.

- ²⁰Ineh punneh ui mutuh papu' nemuyuh pad miak pebala nemuyuh teh. Ngaceku ui pangeh kiling ngaceku Ieh luk inan lun Israil merapat.”
- ²¹Idi kebaladeh neneh, "Sebuleng surat pana' nateh luk ilap kai rat Yudia ratnan lawému. Idi seburur kinanak kai pana' nateh iné' tungé' rat déi', pad nguit bala luk do' idi luk dat ratnan iko.
- ²²Iamo' kai pian ninger ratnan terawému; ngaceku kai kali', idi iapeh-iapeh pana' lemulun ngedat rurummu ineh.”
- ²³Kareb ideh pangeh nengelelep aceh aco dengan Paulus, idi pelaba ula' lemulun nacing su luk inanneh tudo ineh. Idi ieh nemada' bala ineh kuandeh rat pekak macing malem idi nemada' luk nekali'neh ratnan Imet Allah. Ieh nenutun ngegala' kuandeh ratnan Yésus, do' rat bang Ukum Musa idi rat bang surat nabi-nabi.
- ²⁴Sebuangdeh manu ku balaneh, iamo' inan teh luk na manu.
- ²⁵Idi ideh nenalan dengan na perurum arangdeh sebuleng. Ngaceku Paulus pangeh nemada' bala ineh, "Matu-matu bala luk bila Roh Meligan dengan tang Nabi Yesaya kuan tepun muyuh!
- ²⁶KebalaNeh, 'Amé' iko inan pupu ini idi pebala: Matu muyuh sikal ninger, iamo' na muyuh kali' ilungneh; muyuh miak nier, iamo' na muyuh kali'.
- ²⁷Ngaceku terawé pupu ini mengadel, idi ideh nengang laliddeh, idi ideh rudap mateh, pad ideh na miak nier dengan matehdeh, idi ninger dengan laliddeh, idi kali' ilungneh dengan niatdeh, pad ideh lumi Negku, kebala Allah, idi Ui ngedo' nedeh.' “
- ²⁸Idi kebala Paulus, "Ngaceku ineh do' muyuh kali' idi ulun meruked luk ratnan Allah pangeh icing kuan lun pupu baken. Ideh sikal ninger teh.”
- ²⁹Pangeh Paulus nepebala kudeng ineh, idi amung-amung lun Yahudi nuli' dengan nepesaad-pesaad seburur dengan seburur.

³⁰Idi dueh lak kinioneh, Paulus sebuleng netudo déi' bang ruma' luk binayarneh, idi ieh nenganak amung-amung lemulun luk macing ngikak neneh.

³¹Ieh nemada' ratnan Imet Allah idi ratnan Tuhan Yésus Keristus dengan mekuu' niat idi dengan na lun mebpeng peh.

Rum

Rum 1

- ¹Rat negku Paulus, demulun Yésus Keristus, seburur rasul luk pinili' idi tinawar Allah pad mada' BalaNeh luk Do'.
- ²Bala luk Do' ineh pijani' Allah mon dengan tang nabi-nabi, idi pangeh inayud bang Surat Allah.
- ³Bala ineh ratnan AnakNeh, Tuhan Yésus Keristus, luk maya' inul lemulun pangeh mangun ratnan inul Daud;
- ⁴iamo' maya inul Roh luk ngeligan pangeh ginala' dengan lalud rayeh ratnan Ieh Anak Allah, ngaceku tuiNeh ratnan até.
- ⁵Ngaceku rat Neneh ui pangeh nengalap katu pad ui mangun ku rasul ngaceku Keristus, pelé ui nguit lemulun ratnan anid-anid pupu manu idi maya' pianNeh.
- ⁶Idi rat arangdeh ineh muyuh rat Rum pana' luk tinawar Allah mangun ku pupu Yésus Keristus.
- ⁷Ngaceku ineh ui ngayud kuan amung muyuh lun Rum, luk inan Allah mawa, idi luk tinawar mangun ku lun manu: Do' katu idi awang temurun kuan muyuh ratnan Allah Taman tau idi Tuhan tau Yésus Keristus.
- ⁸Pun-pun ui maré ubur kuan Allahku bang Yésus Keristus ratnan amung-amung muyuh, ngaceku anu muyuh pangeh bida' aput tana' ini.
- ⁹Ui ngakem kuan Allah dengan amung niatku dengan mada' Bala luk Do' ratnan AnakNeh. Idi Allah ineh miak ngegala' ratnan anun-anun luk bilaku matu. Allah kali' ratnan ui megéi' ngerawé nemuyuh
- ¹⁰anidku sembayang. Ui mutuh Allah nima' negku ngikak nemuyuh nekini, maya' pianNeh luk do', ngaceku mio ui pian amé'.
- ¹¹Ngaceku ui geregan sikal nier nemuyuh, pad ui miak ngacing kuan muyuh peruan Roh luk nganau' nemuyuh lutep.

¹²Ilungneh, amung-amung tau pad-pad buken ratnan anu anid-anid burur, do' ui idi muyuh pana'.

¹³Do' muyuh ngerawé ini, O kinanak-kinanakku, tuda'-tuda' kua' ui sikal macing nemuyuh, iamo' macing nekini megéi' inan luk ngesabeng negku. Ui pian ngalap bua' rat arang muyuh, mepad kudeng arang lun pupu baken teh.

¹⁴Ui ini inan baleh kuan amung lemulun, do' lun Grika idi kuan lun baken pana', do' kuan lun mileh idi kuan lun mebacé pana'.

¹⁵Ineh punneh ui gregan tu-tu mada' Bala luk Do' kuan muyuh luk bang bawang Rum teh.

¹⁶Ngaceku na ui migu' ngamo Bala luk Do' ineh; ngaceku ieh ineh lalud Allah luk ngacing ulun kuan anid-anid lemulun luk manu, pun-pun kuan lun Yahudi, idi kuan pun pupu baken pana'.

¹⁷Ngaceku bang Bala luk Do' ineh, Allah ngelio ratnan lemulun ruen matu ngaceku anu rat punneh macing kekipedneh; maya' kudeng luk pangeh inayud, "Idi lemulun luk matu ineh miak mulun ngaceku anu."

¹⁸Useh Allah uen ngelio rat surga kuan amung-amung sala' idi kekamen lemulun luk dat, luk ngang luk matu ku lawédeh luk dat.

¹⁹Allah ngukum lemulun ngaceku luk kali'deh ratnan Allah megala' kuandeh, ngaceku Allah pangeh nengelio ineh nedeh.

²⁰Rat pun-pun tana' ini pinudut Allah, amung-amung kekamenNeh luk inalum, ieh ineh lalud idi ulun Allah luk meruked, pangeh sinier dengan megala' bang amung-amung luk pangeh pinudut. Ngaceku ineh ideh na miak ngor peh.

²¹Ideh ngiti Allah, iamo' ideh na ngerayeh Neneh kudeng Allah, idi na ideh maré ubur kuanNeh. Iamo' ideh pangeh mangun mo'-mo' bang terawédeh, idi naitdeh luk mebacé mepanu' ku dacem.

²²Ideh ngamo bururdeh mileh, iamo' ideh mebacé.

²³Ideh na sembayang nan Allah luk meruked. Iamo' ideh sembayang nan akang luk inau' maya' ayu lemulun luk miak maté, idi suit, pung, idi menipeh pana'.

²⁴Ngaceku bacédeh ineh Allah nenima' nedeh bang amung-amung pian niatdeh luk melutak. Idi ideh ngelutak bururdeh arangdeh sebuleng.

²⁵Ideh ngelibal luk matu ratnan Allah dengan mebalih idi sembayang idi ngakem kuan luk pinudut Allah ku libal Ieh luk nemudut, idi luk buren ruked-ruked! Amin.

²⁶Ngaceku ineh Allah nemaré nedeh kuan amung-amung pinian bururdeh luk dat. Decur-decurdeh pana' maya' luk inandeh na pekalai ku libal luk inandeh pekalai.

²⁷Kudeng ineh teh deléi-deléi pana' necan luk inandeh pekalai dengan decur idi mepanu' ku lilideh seburur dengan seburur, ieh ineh, deléi dengan deléi nganau' kekamen luk dat, idi ngalap bang bururdeh ua' luk petulu dengan sala' luk ngeraruh ineh.

²⁸Idi ngaceku ideh ara' ngimet Allah bang terawédeh, idi ideh biré Allah kuan terawé luk melutak, pad ideh nganau' anun-anun luk na do'.

²⁹Niatdeh mepanu' ku amung-amung sala', luk dat, lili, idi terawé luk dat. Idi ideh mepanu' ku ét niat, ngaté, kedaluh, naluk, idi ideh ngedat, idi ngatum bala,

³⁰idi ideh ngesala', idi megateh niat inan Allah, mesido', medita' niat, idi ideh ngedita' bururdeh sebuleng, idi nakap ileh luk dat, idi ngelaba bala taman-tinan,

³¹mebacé, na maya' jani', na mawa nelun, idi na méi' teh.

³²Ideh kali' ukum Allah luk pebala ratnan lemulun luk nganau' kudeng ineh na miak na mekaneh ukum maté. Iamo' baken ideh nganau' kudeng ini mo', iamo' ideh perurum dengan lemulun luk nganau' kudeng ineh teh.

Rum 2

- ¹O lun rurumku, mekuu'ké iko ngesala' nelun baken? Iko idi idé-idé pana' na miak ngor. Ngaceku kudeng iko ngesala' nelun baken, iamo' iko sebuleng nganau' kudeng ineh teh, iko ngacing ukum kuan bururmu sebuleng.
- ²Idi tau kali' Allah nganau' luk matu kuan lemulun luk nganau' kudeng ineh.
- ³O lun rurumku luk ngesala' nelun luk nganau' kudeng ineh, iko pana' nganau' kudeng ineh teh, inanké iko ngerawé iko ini miak mepuit ratnan ukum Allah?
- ⁴Idi inanké iko ngebeneh katuNeh luk rayeh idi ulai niatNeh idi kadang niatNeh? Naké iko kali' ratnan katu Allah ineh ngeruid namu pad iko uren?
- ⁵Iamo' iko metueh niat idi na sikal uren. Iko ngeberat ukum kuan bururmu sebuleng kareb Aco Useh Allah, ieh ineh kareb ukum Allah luk matu uen ngegala'.
- ⁶Ngaceku Allah sikal ngua' anid-anid lemulun maya' kekamendeh.
- ⁷Allah miak maré ulun luk meruked kuan lemulun luk megéi' nganau' luk do' idi luk nakap rayeh dengan ubur idi ulun luk na miak melu.
- ⁸Iamo' kuan lemulun luk ngerawé bururdeh sebuleng idi luk na maya' luk matu, pad ideh nganau' luk dat, Allah miak ngacing useh idi gatehNeh.
- ⁹Inan teh susa' idi dereh kuan anid-anid burur lemulun luk nganau' luk dat ineh, pun-pun kuan lun Yahudi idi kuan lun pupu baken teh.
- ¹⁰Iamo' Allah miak maré rayeh, dita', idi awang kuan amung-amung lemulun luk nganau' luk do', pun-pun kuan lun Yahudi idi kuan lun pupu baken teh.
- ¹¹Ngaceku Allah na mili' ayu lemulun. P
- ¹²Lun pupu baken na kali' Ukum Musa. Ideh nganau' sala' idi meraruh dengan na kali' Ukum ineh. Iamo' lun Yahudi kali' Ukum ineh. Ideh nganau' sala' idi miak kumin maya' Ukum ineh.
- ¹³Ngaceku baken lemulun luk ninger Ukum luk matu pa kiung Allah, iamo' luk maya' Ukum ineh luk ruen matu peh.

¹⁴Lun pupu baken na kali' Ukum ineh, iamo' kareb ideh nganau' kudeng Ukum ineh maya' terawédeh sebuleng, idi lemulun ineh mangun ku ukum kuan bururdeh sebuleng, sagan pana' ideh na kali' Ukum ineh.

¹⁵Kekamendeh ngegala' ratnan lawé Ukum ineh inayud bang niatdeh. Idi teruayen niatdeh ngegala' ineh, ngaceku terawédeh sebuleng rabpu'-rabpu' ngesala' nedah, idi rabpu'-rabpu' ngamo nedeh matu.

¹⁶Kudeng ineh teh luk mangun kareb Aco luk inan Allah dengan Yésus Keristus ngukum amung-amung kekamen lemulun luk lulem, petulu dengan Bala luk Do' luk badénku.

¹⁷Iamo' kudeng iko titen lun Yahudi idi merapet inan Ukum idi ngedita' bururmu ngaceku sembayang inan Allah,

¹⁸idi kali' pian Allah idi sikal ku kekamen luk matu, ngaceku iko nesibada' ratnan Ukum ineh,

¹⁹idi kudeng iko merapet inan bururmu mangun ku lun nguyut lun mebuser idi ku acang kuan lemulun luk bang medacem,

²⁰idi lun mada' lemulun luk mebacé idi guru anak-anak, ngaceku bang Ukum ineh iko ngalap amung ileh idi luk matu;

²¹ngaceku ineh, O iko luk mada' nelun baken, do' iko mada' bururmu sebuleng. Iko luk mada' aleg mano, iamo' iko mano.

²²Iko luk mada' aleg pasét, iamo' iko pasét. Iko luk ara' inan akang, iamo' iko mano ratnan ruma' akang.

²³Iko luk ngedita' bururmu ngaceku Ukum Allah, iamo' iko ngigu' Allah dengan ngelaba UkumNeh.

²⁴Pangeh inayud bang Surat Allah, "Ngaceku muyuh lun Yahudi, ngadan Allah uen lun pupu baken nguyo."

²⁵Ngaceku setuneh sunat ineh inan ulek kuanmu kudeng iko maya' Ukum ineh. Iamo' kudeng iko ngelaba Ukum, sunatmu pana' mangun mepad kudeng na sunat teh.

²⁶Kudeng lemulun luk na sinunat maya' amung luk bida' bang Ukum Musa, bakenké luk na sinunat ineh uen ngiap mepad kudeng sinunat teh?

²⁷Idi lemulun luk na sinunat, iamo' luk nganau' Ukum ineh, miak ngesala' namu luk ngelaba Ukum sagan pana' iko kali' bala luk inayud ineh idi iko sinunat teh.

²⁸Idéké seburur lun Yahudi luk matu, luk matu-matu sinunat? Baken lemulun luk tinganak rat nelun Yahudi, luk sinunat maya' adatdeh.

²⁹Iamo' lun Yahudi luk matu ineh, ieh ineh lun Yahudi bang niatneh. Idi sunat luk matu ineh, ieh ineh sunat bang niat, ieh ineh luk ratnan Roh, idi baken maya' urup mo'. Idi ubur lemulun ineh baken ratnan lemulun iamo' ratnan Allah.

Rum 3

¹Ngaceku ineh, inanké lun Yahudi meluun samal rat nelun pupu baken? Idi inanké ulek sunat ineh?

²Kali' rungen! Pun-pun ngaceku Allah pangeh nemarké balaNeh nelun Yahudi.

³Mekudeh ieh kudeng sebuang lemulun na manu? Miakké ineh ngisu' niat Allah luk lutep maya' jani'Neh?

⁴Na tu-tu! Ngaceku Allah ineh matu, sagan pana' amung-amung lemulun mebalih, maya' kudeng luk inayud ini: "Nima' balaMu uen ngegala' matu, kareb Iko pebala, idi Iko miak metueh, kareb Iko uen lemulun ngesala'."

⁵Iamo' kudeng sala' tau ngelio luk matu ratnan Allah, anunké luk miak belén tau? Naké Allah ineh matu kareb Ieh ngacing usehNeh kuan tau? (Ui pebala maya' bala lemulun.)

⁶Na tu-tu! Kudeng Allah na matu, kudeng apehké Ieh ngukum tana' ini?

⁷Iamo' kudeng luk matu ratnan Allah rinayeh ngaceku balihku, ngudehké ui inukum mepad kudeng lun mesala'?

⁸Ngudehké tau na pebala, "Aganeh tau nganau' luk dat pad do'neh miak uen ngegala"? Setuneh inan lemulun luk ngesala' idi ngadu' negku, kebaladeh ui pangeh pebala kudeng ineh. Petulu lemulun ineh kumin Allah.

⁹Kudeng apehké? Inanké tau lun Yahudi nganau' luk meluun do'? Na tu-tu! Ui pangeh nengegala' ratnan lun Yahudi idi lun pupu baken teh pa liang ukum sala',

¹⁰maya' kudeng luk inayud ini: "Idi na luk idi seburur pana' luk matu,

¹¹na luk idi lemulun luk kali' ilungneh, idi luk nakap Allah.

¹²Amung lemulun pangeh neteketed ratnan Allah; amungdeh pangeh neraruh; na luk idi lemulun luk nganau' luk do', seburur pana' nateh!"

¹³Telanandeh ineh mepad kudeng tanem luk mukab; idi dengan dila'deh ideh naluk, idi galih rat bang tang seruang inan luun bibirdeh;

¹⁴tangdeh mepanu' ku kediman luk mepét.

¹⁵Ideh mesaget ngeruat dara' lemulun;

¹⁶ideh ngacing usag idi dereh iapeh-iapeh luk ulekdeh.

¹⁷Idi dalam awang na initideh,

¹⁸idi nateh ideh mileh matot inan Allah."

¹⁹Nekini tau kali' amung-amung luk bila bang Ukum, ieh ineh luk bila kuan lemulun luk pa liang Ukum ineh, pad anid-anid tang lemulun miak semiep idi amung uang tana' ini mebpeh pa liang ukum Allah.

²⁰Ngaceku seburur pana' nateh luk ruen matu pa kiung Allah ratnan nganau' Ukum ineh. Iamo' ratnan Ukum Musa lemulun miak kali' ratnan sala'.

²¹Iamo' nekini luk matu ratnan Allah pangeh linio baken ratnan ukum. Iamo' ineh pangeh bida' bang surat Ukum Musa idi surat nabi-nabi.

²²Lemulun ruen Allah matu ngaceku manu inan Yésus Keristus, ieh ineh amung lemulun luk manu, ngaceku na Ieh mili' ayu lemulun:

²³amung-amung lemulun pangeh nenganau' sala', pad ideh mado ratnan Allah luk miak ngulun nedeh.

²⁴Amungdeh ruen matu ratnan katu Allah luk barén mo'-mo' ngaceku ratnan uli' luk bang Keristus Yésus.

²⁵Allah nemaré AnakNeh mangun ku aceh dalan pedo', ngaceku manu inan dara'Neh, pad ngegala' luk matu ratnan Allah, ngaceku dengan ulai niatNeh Ieh nemaré do' ratnan sala' luk inau' lemulun atun.

²⁶Ieh pian ngegala' siriNeh bang kareb ini teh, pad ngegala' ratnan Ieh sebuleng luk matu, idi Ieh nganau' lemulun luk manu inan Yésus matu.

²⁷Ngaceku ineh, anunké ulekneh ngedita' burur tau? Na ulekneh! Mekudeh na miak? Ngaceku tau maya' Ukum Musaké? Baken, iamo' ngaceku tau manu.

²⁸Ngaceku ineh tau kali' idi lemulun ruen matu ratnan manu, baken ratnan nganau' Ukum Musa.

²⁹Inanké Allah ineh Tuhan lun Yahudi mo'? Bakenké Ieh ineh Tuhan lun pupu baken teh? Kali' rungen!

³⁰Allah ineh Sebuleng mo', idi Ieh luk nganau' nelun Yahudi matu ratnan anudeh, idi lun pupu baken pana' ruen matu ngaceku anu.

³¹Ngaceku ineh, ratnan anu ineh tau nala' Ukum Musaké? Na tu-tu, iamo' tau ngepicet Ukum ineh.

Rum 4

¹Anunké luk miak belén tau ratnan ulun Ibrahim, tepun tau?

²Kudeng ieh inau' matu ratnan kekammeneh, inan teh punneh ieh ngedita' bururneh, iamo' baken pa kiung Allah.

³Pangeh inayud bang Surat Allah, "Ibrahim manu inan Allah, idi anuneh ineh iniap mangun ku luk matu kuanneh."

⁴Lemulun luk ngakem, ngalap usin tabpardeh, baken mepad kudeng baré.

- ⁵Iamo' lemulun luk manu na merapet ku kekammeneh. Ieh manu inan Allah luk ngamo lun mesala' matu ngaceku ratnan anuneh.
- ⁶Ini ilung bala Daud kareb ieh nepebala ratnan samal lemulun luk iniap Allah matu dengan na ngerawé kekammeneh, kebalaneh,
- ⁷"Samal kuan lemulun luk inan Allah maré do' ratnan kekammeneh luk dat pad sala'neh pangeh kikeb peh!
- ⁸Samal kuan lemulun luk na uen Tuhan ngiap sala'neh!"
- ⁹Inanké samal ineh kuan lemulun luk sinunat mo'? Na! Iamo' lemulun luk na sinunat pana'. Ngaceku pangeh kai nemala maya' kudeng luk inayud, "Kuan Ibrahim ineh anuneh nan Allah iniap mangun ku luk matu."
- ¹⁰Idanké ini mangun? Kareb ieh pangeh sinunatké, kian, kareb nateh ieh sinunat? Baken kareb ieh sinunat, iamo' kareb nateh ieh sinunat.
- ¹¹Muci ieh sinunat, idi sunat ineh aceh tanu' luk ngegala' ratnan Allah nengamo Ibrahim matu ngaceku ratnan anuneh, kareb nateh ieh sinunat. Ngaceku ineh Ibrahim mangun ku taman amung lemulun luk manu inan Allah, idi luk iniapNeh matu, sagan pana' ideh na sinunat.
- ¹²Idi teh ieh mangun ku taman lemulun luk sinunat ineh pana', baken ngaceku ideh sinunat mo', iamo' ngaceku ideh mulun dengan anu mepad kudeng taman tau Ibrahim, kareb ieh nateh sinunat.
- ¹³Allah nepejani' ni Ibrahim idi inulneh, ratnan ieh miak ngalap tana' ini. Jani' ini litep, baken ngaceku Ibrahim nemaya' Ukum, iamo' ngaceku ieh manu pad ieh iniap Allah matu.
- ¹⁴Ngaceku kudeng lemulun luk nganau' Ukum ineh miak ngalap tana' ini, kali' rungen anu ineh mo'-mo', idi pejani' ineh pana' na ulekneh.
- ¹⁵Ukum ngacing useh Allah, iamo' iapeh-iapeh luk na inan Ukum, déi' na luk idi luk ngelaba ukum.
- ¹⁶Ini punneh luk lapen ineh macing ratnan anu, ieh ineh maya' katu, pad pejani' ineh uen lutep kuan inul Ibrahim, baken kuan luk inan Ukum mo',

iamo' kuan luk manu mepad kudeng Ibrahim, luk mangun ku taman amung-amung tau,

¹⁷kudeng luk inayud, "Idi Ui pangeh nenganau' namu ku taman tuda'-tuda' pupu," pa kiung Allah luk inanneh manu, ieh ineh Allah luk ngulun lemulun luk naté, idi luk mudut anun-anun luk nateh pinudut.

¹⁸Ngaceku sagan pana' Ibrahim na luk inanneh miak merapet teh, idi ieh merapet dengan manu, pelé ieh mangun ku taman tuda'-tuda' pupu, maya' kudeng luk pangeh bila, "Idi kudeng ineh teh inulmu miak mangun."

¹⁹Ulunneh lélé meratu lak. Iamo' na ieh melaya' bang anuneh kareb ieh nengerawé bururneh sebuleng luk mepad kudeng naté, idi kareb ieh nengerawé Sara na tupu inan anak.

²⁰Iamo' ngaceku ieh nengerawé pejani' Allah, idi na ieh merapang, dengan na manu, iamo' ieh meluun metueh ratnan anuneh, dengan nengerayeh Allah,

²¹idi nekali' Allah luk melalud miak ngacing luk pijani'Neh kuanneh.

²²Ini punneh anu Ibrahim, "iniap Allah kuanneh mangun ku luk matu."

²³Iamo' bala "iniap mangun ku luk matu ineh" baken inayud kuan Ibrahim mo',

²⁴iamo' kuan tau pana', pad miak uen ngiap kuan tau luk manu nan Allah, luk pangeh nenui Yésus Tuhan tau, rat arang lun naté.

²⁵Yésus biré pad Ieh naté ngaceku sala' tau, idi Ieh tinui pad nganau' netau matu.

Rum 5

¹Ngaceku tau inau' matu ratnan anu, idi tau ngalap pedo' dengan Allah ngaceku Tuhan tau Yésus Keristus.

²Idi ratnan Yésus Keristus tau sinima' semuet ngaceku anu bang katu ineh luk inan tau miak mulun. Idi tau mawang niat ngaceku merapet ngalap babpat bang rayeh Allah.

- ³Idi teh tau mawang niat bang luk medereh pana', ngaceku tau kali' idi dereh ineh ngacing ulai niat,
- ⁴idi ulai niat ineh ngacing niat luk meraben, idi niat luk meraben ineh ngacing inan rapet,
- ⁵idi rapet ineh na miak maré migu', ngaceku awa Allah pangeh inutang bang niat tau ratnan Roh Meligan luk biré kuan tau.
- ⁶Ngaceku kareb tau melaya' teh, idi Keristus naté ngaceku lun mesala' bang kareb luk litep Allah.
- ⁷Ngaceku pawa' lemulun luk sikal maté ngaceku lun luk matu, kian, ngaceku lun luk do' miak selemulun mekuu' maté lek.
- ⁸Iamo' Allah pangeh nengegala' awaNeh kuan tau, ngaceku Keristus naté kuan tau, kareb tau pa liang ukum sala'.
- ⁹Idi nekini ngaceku tau inau' matu ratnan dara'Neh, meluun teh tau puatin ratnan useh Allah ngaceku Ieh.
- ¹⁰Atun tau mangun ku bunu' Allah, idi tau nengalap pedo' denganNeh ngaceku até AnakNeh. Ngaceku tau mangun ku rorum Allah, na miak na tau uen ngulun ngaceku ulun Keristus.
- ¹¹Baken kudeng ineh mo', iamo' tau mawang niat inan Allah ngaceku tau mangun ku lun rorumNeh ngaceku Tuhan tau Yésus Keristus.
- ¹²Sala' nacing bang tana' ini ratnan seburur lemulun, idi sala'neh ineh ngacing até. Ratnan luk kudeng ineh até ineh nepinul kuan amung lemulun, ngaceku amung lemulun nenganau' sala'.
- ¹³Kareb nateh Ukum biré, inan sala' bang tana' ini, iamo' iapeh-iapeh na inan ukum, sala' pana' na iapin.
- ¹⁴Iamo' até ineh nengime amung lemulun rat kareb Adam macing kareb Musa, sagan pana' sala'deh baken ngelaba ukum Allah mepad kudeng Adam. Adam mangun ku luk pinginud Yésus luk sikal macing ineh.

¹⁵Iamo' katu Allah idi sala' Adam na mepad, ngaceku mado arang luk dueh ini. Matu mula' lemulun naté ngaceku sala' seburur lemulun ineh. Iamo' katu Allah meluun rayeh. Kudeng ineh teh baré Allah kuan mula' lemulun, ngaceku katu seburur lemulun, ieh ineh Yésus Keristus.

¹⁶Mado arang baré Allah dengan sala' lemulun. Aceh sala' nengacing ukum "Mesala"; iamo' pangeh sala' luk mula' ineh, kebala Allah luk mekatu ineh, "Lemulun ineh ruen matu peh."

¹⁷Matu dengan sala' seburur, até pangeh mangun ku raca' ngaceku ratnan seburur lemulun ineh. Iamo' meluun rayeh ulekneh luk inau' Seburur Lemulun, ieh ineh Yésus Keristus. Anid-anid lemulun luk ngalap katu Allah luk mela ineh, idi baréNeh, ieh ineh luk matu, miak mulun idi ngimet ngaceku ratnan Keristus.

¹⁸Ngaceku ineh mepad kudeng ratnan aceh sala', amung-amung lemulun mekaneh ukum, kudeng ineh teh ratnan aceh kekamen luk matu ineh, amung-amung lemulun ruen matu peh, pad ngalap ulun.

¹⁹Ngaceku mepad kudeng ratnan seburur luk na maya' bala, lemulun luk mula' mangun ku lun mesala', kudeng ineh teh ratnan Seburur Lemulun luk maya' ukum, idi lemulun luk mula' mangun ku lun matu peh.

²⁰Idi Ukum ineh biré, pad sala' ineh amé' mula'; iamo' iapeh-iapeh sala' pangeh amé' mula', déi' teh katu Allah mela peh.

²¹Mepad kudeng sala' mangun ku raca' bang até, kudeng ineh teh katu Allah miak mangun ku raca' ratnan luk matu macing inan ulun luk meruked, ngaceku Yésus Keristus Tuhan tau.

Rum 6

¹Ngaceku ineh anunké luk miak belén tau? Do'ké tau tudo bang sala', pad katu Allah amé' mula'?

²Na tu-tu! Idi tau ini pangeh naté nepuit ratnan sala', kudeng apehké tau miak mulun bang neneh?

³Naké muyuh kali' idi tuda'-tuda' tau luk pangeh rireb bang Keristus Yésus ineh, pangeh rireb bang atéNeh?

⁴Dengan rereb ineh tau tinanem dengan Keristus bang atéNeh, idi mepad kudeng Keristus pangeh netumui rat arang lun naté ngaceku rayeh TamanNeh, kudeng ineh teh tau ini pana' miak mulun bang ulun luk mebaruh.

⁵Ngaceku kudeng tau pangeh mangun ku sebuleng denganNeh, dengan ngalap babpat bang atéNeh, kudeng ineh teh tau mangun ku sebuleng denganNeh bang tuiNeh.

⁶Tau kali' ini, ieh ineh burur tau luk mon pangeh sinalib dengan Keristus pad burur luk nganau' sala' ineh miak maté, pelé tau na mangun ku demulun sala' teh.

⁷Ngaceku lemulun luk pangeh naté ineh pangeh pinuit ratnan sala'.

⁸Kudeng tau pangeh naté dengan Keristus, tau merapet ngalap ulun denganNeh.

⁹Ngaceku tau kali', idi Keristus luk pangeh tinui rat arang lun naté ineh na miak maté peh; idi até ineh pana' na miak ngimet Neneh.

¹⁰Ngaceku ratnan até Keristus, idi Ieh naté sekua' mo' kuan sala', iamo' ratnan ulunNeh ineh, Ieh mulun kuan Allah peh.

¹¹Kudeng ineh teh do' muyuh ngerawé burur muyuh maté mepuit ratnan sala', iamo' mulun kuan Allah dengan Keristus Yésus.

¹²Ngaceku ineh, aleg nima' sala' mangun ku raca' bang burur muyuh luk miak maté, pad muyuh maya' pianneh.

¹³Aleg muyuh maré sebabpat burur muyuh ineh kuan sala', pad uen makai ku kekamen luk dat. Iamo' maré burur muyuh kuan Allah, mepad kudeng lemulun luk pinuit ratnan até amé' nan ulun teh, idi do' maré amung babpat burur muyuh kuan Allah, pad uen makai ku kekamen luk matu.

¹⁴Aleg nima' sala' mangun ku raca' bang ulun muyuh, ngaceku muyuh baken pa liang Ukum iamo' pa liang katu Allah.

¹⁵Kudeng apehké? Miak tau nganau' sala' ngaceku tau baken pa liang ukum iamo' pa liang katu Allahké? Na tu-tu!

¹⁶Naké muyuh kali', kareb muyuh maré burur muyuh mangun ku demulun, pad maya' bala seburur lemulun, setuneh muyuh mangun ku demulun kuan lemulun luk Bén muyuh ineh, do' kuan sala' macing inan até, kian kuan baya' luk macing inan luk matu?

¹⁷Iamo' ngubur Allah, ngaceku atun muyuh mangun ku demulun sala', iamo' nekini dengan niat luk matu, muyuh maya' ayu bada' ineh luk pangeh bida' kuan muyuh.

¹⁸Muyuh pangeh pinuit ratnan sala', idi muyuh mangun ku demulun kuan luk matu.

¹⁹Ui pebala maya' ayu lemulun ngaceku ratnan laya' burur muyuh, ngaceku mepad kudeng mon muyuh namaré amung-amung babpat burur muyuh mangun ku demulun kuan luk melutak idi kuan luk dat pad nganau' kekamen luk dat, kudeng ineh teh nekini do' muyuh maré amung-amung babpat burur muyuh mangun ku demulun kuan luk matu pad nganau' kekamen luk meligan.

²⁰Kareb muyuh demulun sala', idi muyuh mepuit ratnan luk matu.

²¹Anunké bua'neh luk ilap muyuh ratnan amung-amung kekamen luk inan muyuh migu' nekini? Ngaceku kekipedneh maté.

²²Iamo' nekini, ngaceku muyuh pangeh nepuit ratnan sala', idi mangun ku demulun kuan Allah, idi muyuh miak ngalap bua'-bua' luk macing inan luk meligan, idi kekipedneh ulun luk meruked.

²³Ngaceku tabpar sala' ineh maté, iamo' katu Allah ineh ulun luk meruked dengan Keristus Yésus Tuhan tau.

Rum 7

- ¹O kinanak-kinanakku, kali' rungen muyuh kali' luk belenku, ngaceku amung muyuh kali' ratnan ukum. Idi ukum ineh ngimet lemulun raked ulunneh.
- ²Seburur decur luk inan awan inabet ratnan ukum kuan awanneh laba' ieh mulun teh, iamo' kudeng ieh maté, decur ineh mepuit ratnan ukum awanneh.
- ³Ngaceku ineh kudeng decur ineh ngalap deléi luk baken kareb awanneh mulun, idi ieh tetanen decur luk pasét. Iamo' kudeng awanneh ineh maté idi ieh mepuit ratnan ukum ineh, idi baken ieh decur luk pasét peh, sagan pana' ngalap awan baken.
- ⁴Kudeng ineh teh, O kinanak-kinanakku, muyuh ini pana' pinaté mepuit ratnan Ukum ineh ngaceku muyuh mangun ku sebabpat burur Keristus. Nekini muyuh mangun ku pupuNeh luk pangeh tinui rat arang lun naté, pad tau ngeruit bua'-bua' kuan Allah.
- ⁵Kareb tau mulun maya' ulun tana' ini, idi pinian burur tau luk mepanu' ku sala', luk tinui ratnan Ukum ineh, nengakem bang burur tau, pad ngeruat bua'-bua' luk macing inan até.
- ⁶Iamo' nekini tau pangeh nepuit ratnan Ukum ineh, ieh ineh tau pangeh naté idi nepuit ratnan Ukum ineh luk pangeh nengabet netau, pad na maya' dalam ukum luk mon luk inayud mo', iamo' nekini Roh Allah miak nguyut netau maya' dalam Roh luk mebaruh.
- ⁷Ngaceku ineh anunké luk miak belén tau? Ukum ineh sala'ké? Na tu-tu! Iamo' ui na kali' sala', kudeng baken ratnan Ukum ineh, ngaceku na ui kali' ratnan melili, kudeng na Ukum ineh mala, "Aleg iko melili!"
- ⁸Sala' ineh tigio ratnan bebpeng, idi ieh nengacing lili bang niatku. Ngaceku kudeng na bebpeng ineh, sala' maté.
- ⁹Atun ui ini mulun dengan na kali' ukum, iamo' kareb bebpeng ineh nacing, idi sala' mulun baruh teh,
- ¹⁰idi ui naté, idi bebpeng luk petulu nguit ulun ineh, nguit negku maté.

- 11**Sala' ineh tigio ratnan bebpeng ineh, idi ieh nenaluk negku, idi ngaceku ratnan ineh sala' nengaté negku.
- 12**Ngaceku ineh Ukum Musa ineh meligan, idi luk icukneh pana' meligan idi matu idi do' teh.
- 13**Matuké ukum luk do' ineh ngacing até kuanku? Na tu-tu! Sala' ineh luk ngacing atéku. Dengan makai luk do' ineh, sala' ngacing até kuanku, pad ngegala' ilung sala' ineh. Ukum ineh ngegala' ratnan sala' ineh pelaba dat.
- 14**Ngaceku tau kali', idi Ukum ineh ratnan Roh, iamo' ui ini ratnan ulun tana' ini, pinasui pa liang sala'.
- 15**Ui na kali' anun luk ruenku, ngaceku baken ui nganau' luk pianku, iamo' luk inanku megateh, ieh ineh luk ruenku.
- 16**Kareb ui nganau' luk na pianku, idi ui ngamo idi Ukum ineh do' peh.
- 17**Ngaceku ineh, baken ui ineh luk nganau' ineh, iamo' sala' luk bang bururku.
- 18**Ui kali' idi na luk do' bang niatku, ieh ineh bang ulun tana' ini. Sagan pana' ui pian nganau' luk do', iamo ui na miak nganau' ineh.
- 19**Ui na nganau' luk do' ineh luk pianku, iamo' ui nganau' luk dat luk na pianku ineh.
- 20**Kudeng ui nganau' luk na pianku, ilungneh baken ui luk nganau' ineh, iamo' sala' luk tudo bang bururku.
- 21**Ngaceku ineh ui nier ukum ini: kareb ui sikal nganau' luk do', idi luk dat ineh muneng peh.
- 22**Ui geregan ku ukum Allah bang niatku,
- 23**iamo' ui nier inan ukum luk baken bang bururku, luk sikal metueh ratnan ukum luk imo terawéku, idi luk naban negku pa liang ukum sala' luk ngakem bang bururku ini.
- 24**Adui, ui lemulun luk mebacé ini! Idéké miak muit negku remuat rat bang burur sala' ini?

²⁵Ui ngubur Allah ratnan Yésus Keristus, Tuhan tau! Ngaceku ineh, idi ui sebuleng dengan niatku maya' ukum Allah, iamo' dengan ulun tana' ini ui maya' ukum sala'.

Rum 8

¹Nekini na luk idi ukum kuan lemulun luk bang Keristus Yésus.

²Ngaceku ukum Roh luk maré ulun bang Keristus Yésus pangeh nemuit negku ratnan ukum sala' idi até ineh teh.

³Ukum ineh na miak ngagka' sala', ngaceku pinian burur lemulun luk melaya', iamo' Allah pangeh nengecuk AnakNeh sebuleng dengan ayu lemulun luk mesala' mangun ku baré ngaceku sala' ineh, pad ngukum sala' bang pinian burur.

⁴Allah nenganau' ineh, pad anun-anun luk icuk bang Ukum ineh miak uen ngeriput bang burur tau, luk na mulun maya' pinian burur, iamo' maya' pian Roh.

⁵Lemulun luk mulun maya' pinian burur ngerawé ratnan tana' ini, iamo' lemulun luk mulun maya' Roh ineh ngerawé ratnan amung-amung luk pian Roh.

⁶Ngaceku bua' terawé maya' pinian burur, ieh ineh maté; iamo' bua terawé ratnan Roh, ieh ineh ulun idi awang.

⁷Lemulun luk ngerawé maya' pinian burur pebunu' dengan Allah, ngaceku na maya' ukum Allah, idi na tu-tu miak.

⁸Lemulun luk maya' pinian burur na miak perurum dengan Allah.

⁹Iamo' muyuh ini na maya' pinian burur, iamo' maya' pian Roh, ieh ineh kudeng Roh Allah tudo bang burur muyuh. Kudeng idé-idé luk na inan Roh Keristus bang niatneh, baken ieh pupu Keristus.

¹⁰Iamo' kudeng Keristus tudo bang nemuyuh, sagan pana' burur ineh maté ngaceku sala', iamo' Roh ineh mulun ngaceku muyuh pangeh inau' matu.

¹¹Iamo' kudeng RohNeh luk nenui Yésus rat arang lun naté ineh tudo bang burur muyuh, idi Ieh ineh luk nenui Keristus Yésus rat arang lun naté ineh miak ngulun burur muyuh luk maté ineh pana', dengan RohNeh luk tudo bang burur muyuh.

¹²Ngaceku ineh, O kinanak-kinanakku, tau ini inan baleh baken kuan pinian burur pad mulun maya' pinian burur,

¹³ngaceku kudeng muyuh mulun maya' pinian burur, idi muyuh maté teh; iamo' kudeng dengan Roh ineh muyuh ngaté kekamen burur ineh, idi muyuh miak mulun peh.

¹⁴Lemulun luk kiuten Roh Allah, ieh ineh anak-anak Allah.

¹⁵Ngaceku baken muyuh ngalap roh mangun ku demulun tot teh, iamo' muyuh pangeh nengalap Roh Allah mangun ku anak Allah, idi bang Roh ineh tau ngitang, "O Ama! O Ama!"

¹⁶Roh Allah ineh maré kali' dengan roh tau, ratnan tau ini anak-anak Allah.

¹⁷Ngaceku tau ini anak-anakNeh, tau miak ngalap babpat luk litep Allah kuan pupuNeh. Idi teh tau ngalap babpat dengan Keristus, kudeng tau perurum medereh denganNeh, pad tau mepad uen ngerayeh denganNeh.

¹⁸Ui ngerawé, idi dereh luk bang kareb ini na miak uen maad dengan rayeh luk uen ngelio kuan tau mucu.

¹⁹Dengan rapet luk rayeh amung-amung luk pinudut nganét anak-anak Allah uen ngegala'.

²⁰Amung-amung luk pinudut ineh na miak ngacing luk ulekneh, baken maya' terawé luk pinudut ineh, iamo' ngaceku pangeh litep Allah. Iamo' inan teh rapet ini,

²¹ieh ineh amung-amung luk pinudut ineh miak mepuit ratnan taban luk ngusag, pad semuet bang puit luk rayeh pad-pad dengan anak-anak Allah.

²²Tau kali' idi amung-amung luk pinudut ineh mepad arod, idi mepad kali' mét nenganak macing nekini pana'.

²³Iamo' baken ineh mo', iamo' tau sebuleng luk inan Roh, ieh ineh baré Allah luk pun-pun ineh, ngarod bang niat tau, idi nganét Allah ngalap netau mangun ku anakNeh, pad amung burur tau puatinNeh.

²⁴Ngaceku ratnan rapet ineh mo' tau pangeh inulun; iamo' kudeng tau miak nier luk inan tau merapet, ineh baken rapet. Ngaceku idéké luk merapet ku luk miak sireneh?

²⁵Iamo' kudeng tau merapet inan anun-anun luk na miak siren tau, idi dengan mulai niat tau nganét neneh.

²⁶Kudeng ineh teh Roh pana' ngedengan laya' tau. Ngaceku na tau kali' luk petulu pituen tau; iamo' Roh ineh sebuleng mutuh ratnan Allah kuan tau dengan arod luk na miak belén peh.

²⁷Allah luk nier niat lemulun kali' anun-anun luk teruayen Roh ineh, ngaceku Roh ineh mutuh ratnan Allah kuan amung-amung lun manu maya' pianNeh.

²⁸Tau kali', idi amung-amung kekamen perurum ngacing luk do' kuan lemulun luk mawa inan Allah, ieh ineh kuan lemulun luk tinawar maya' pianNeh.

²⁹Lun luk pinili' Allah atun, pangeh litepNeh mangun mepad kudeng AnakNeh, pad AnakNeh ineh mangun ku anak luk atun rat arang mula' kinanakNeh.

³⁰Idi Allah nenawar lemulun luk litepNeh, idi lemulun luk tinawarNeh ineh, ideh inau'Neh matu peh, idi lemulun luk inau'Neh matu ineh, ideh rinayehNeh peh.

³¹Ngaceku ineh anunké luk belén tau nekini? Kudeng Allah ngedengan netau, idéké luk miak metueh rat netau?

³²Ngaceku Allah na nengimet AnakNeh sebuleng, iamo' nemaré Neneh ku peruan tau amung-amung, kali' rungen dengan baré ineh Ieh sikal maré anun-anun pana' luk miak barénNeh kuan tau.

³³Idéké miak ngadu' lemulun luk pinili' Allah? Allah sebuleng ngamo nedeh na mesala'.

³⁴Miakké idé-idé ngesala' nedeh? Keristus Yésus ineh pangeh naté idi muli' mulun teh, idi Ieh pa tinueh Allah. Ieh mutuh ratnan Allah kuan tau.

³⁵Idéké luk miak matad netau ratnan awa Keristus? Susa'ké, kian dereh lek, kian luk sikal ngedereh lek, kian lau lek, kian luk lubpa lek, kian luk ngesabeng lek, kian pelapet lek?

³⁶Maya' kudeng luk pangeh inayud, "Ngaceku Iko kai pinaté tebaco-tebaco; kai pidereh mepad kudeng dumba luk kereten."

³⁷Na, iamo bang amung-amung ini tau meluun tueh ngaceku Ieh luk mawa netau.

³⁸Ngaceku ui merapet até idi ulun, melaikat idi raca', amung-amung luk inan nekini idi luk sikal macing teh, idi lalud luk dat,

³⁹lalud luk pa luun, idi lalud luk pa liang, idi anun-anun luk pinudut pana', na miak matad netau ratnan awa Allah luk bang Keristus Yésus Tuhan tau.

Rum 9

¹Ui ini pupu Keristus, idi luk belénku matu. Na ui mebalih. Teruayen niatku luk bang imet Roh Meligan, maré kali' negku ratnan ui na mebalih.

²Ui pelaba berat niat, idi susa' luk bang niatku na miak ugka'.

³Meluun do' ui sebuleng uen ngediman idi uen ngatad ratnan Keristus, ngaceku kinanak-kinanakku, ieh ineh pupu luk sebuleng inul denganku.

⁴Ngaceku ideh ineh lun Israil luk ilap Allah mangun ku anakNeh. Idi teh Allah nemaré rayehNeh, pejani'Neh, idi UkumNeh kuandeh. Idi ideh kali' sembayang luk matu.

⁵Ideh ineh inul tepun-tepun tau, idi rat arangdeh Keristus pangeh nangun maya' ayu lemulun. Do' Allah luk pa luun amung-amung, buren ruked-ruked! Amin.

⁶Iamo' na ui mala jani' Allah na icing. Ngaceku baken amung-amung inul Israil ineh mangun ku pupu luk pinili' Allah.

⁷Baken amung-amung inul Ibrahim mangun ku anak-anak Allah. Kebala Allah ni Ibrahim, "Inul Isak miak tetanen inulmu."

⁸Ilungneh, baken anak-anak burur lemulun ineh anak-anak Allah, iamo' anak-anak pejani' ineh iniap ku inulneh.

⁹Ngaceku pejani' Allah kudeng ini, "Bang kareb luk litep Ui sikal macing, idi Sara miak ngalap aceh anak deléi."

¹⁰Baken kudeng ineh mo'. Iamo' Ribeka mali' ratnan seburur deléi, ieh ineh Isak, tepun tau luk awanneh.

¹¹Ngaceku kareb nateh anak rapid ineh neremuat idi kareb nateh didueh nenganau' anun-anun luk do' idi luk dat pad pian Allah ratnan luk pinili'Neh uen ngelestep, ieh ineh baken ratnan kekamen lemulun, iamo' ratnan tawar Allah,

¹²idi pangeh bila kuan Ribeka ineh, "Luk atun miak mangun ku demulun kuan luk mucu."

¹³Maya' kudeng luk inayud, "Yakub luk inanKu mawa, iamo' Esau luk inanKu megateh."

¹⁴Anunké luk miak belén tau? Allah nganau' luk na matuké? Na tu-tu!

¹⁵Ngaceku Ieh nepebala ni Musa, "Ui miak méi' inan idé-idé luk pianKu, idi Ui miak mawa inan idé-idé luk pianKu."

¹⁶Ngaceku amung ineh baken ratnan pian lemulun, idi kél lemulun, iamo' ratnan éi' Allah.

¹⁷Ngaceku Surat Allah pebala kuan raca' Masir, "Ngaceku ineh Ui nengedita' namu, pad Ui mada' laludKu bang bururmu, idi ngadanKu badén aput tana ini."

¹⁸Ngaceku ineh Allah méi' kuan idé-idé luk pianNeh, idi Ieh ngetueh niat idé-idé luk pianNeh.

- ¹⁹Iko pian ngitun negku, "Kudeng pieh kudeng ineh, ngudehké Allah ngesala' lemulun? Idéké miak metueh ratnan pian Allah?"
- ²⁰O kinanakku, idéké iko luk sikal pesaad dengan Allah? Miakké luk pinipi' ineh pebala kuan luk mipi' ineh, "Ngudehké iko nenganau' negku kudeng ini?"
- ²¹Naké lun tukang kuden ineh miak makai tana' luk mesalit ineh maya' pianNeh? Ratnan setebalu' ineh ieh miak nganau' aceh kuden luk do', kian aceh kuden luk dat lek?
- ²²Kudeng ineh teh ratnan kekamen Allah. Ieh sikal mada' usehNeh idi ngelio laludNeh. Ieh mulai niat ratnan lemulun luk inanNeh museh, ieh ineh lemulun luk tinina' uen ngusag.
- ²³Ieh pian ngegala' rayehNeh luk mela luk inutang kuan tau luk inanNeh méi', luk tinina' pad ngalap rayehNeh ineh.
- ²⁴Ngaceku tau pangeh tinawarNeh, baken ratnan pupu lun Yahudi mo', iamo' ratnan lun pupu baken teh.
- ²⁵Bala Allah pangeh inayud bang surat Nabi Hosia, kebalaNeh, "Lemulun luk baken pupuKu miak tetanenKu 'PupuKu.' Pupu luk inanKu mawa miak tetanen 'InanKu Mawa.'
- ²⁶Bang bawang luk inandeh pebala nedeh 'Muyuh ini baken pupuKu,' su ineh teh ideh miak tetanen anak-anak Allah luk mulun."
- ²⁷Idi Yesaya ngitang ratnan Israil kudeng ini: "Sagan pana' kinula' pupu Israil mangun kudeng bada tangeb abpa' rayeh, idi sebuangdeh ineh mo' miak uen ngulun.
- ²⁸Ngaceku Tuhan miak ngacing ukum bang tana' ini dengan mesaget idi meriput."
- ²⁹Maya' kudeng luk bila Yesaya atun, "Kudeng na Tuhan luk melalud maré inul kuan tau, kali' rungen tau pangeh mangun mepad kudeng Sodom idi Gemora."

³⁰Anunké luk miak belén tau? Lun pupu baken, luk na nenakap luk matu, pangeh nengalap luk matu, ieh ineh luk matu ratnan anu.

³¹Iamo' pupu Israil luk nenakap ukum luk matu, na nacing inan ukum ineh.

³²Ngudeh? Ngaceku ideh nenakap baken dengan manu, iamo' dengan kekamendeh sebuleng. Idi ideh netebaceng luun batu luk inan metebaceng,

³³maya' kudeng luk inayud, "Siruh, Ui ngerareng déi' Sion aceh batu luk inan metebaceng ieh ineh aceh batu luk maré lemulun mebpeh. Iamo' idé-idé luk manu Neneh na miak migu'."

Rum 10

¹O kinaak-kinakku, pian niatku idi sembayangku kuan Allah, ieh ineh pad pupuku miak uen ngulun.

²Ui mangun ku lun nekali' kuandeh ratnan ideh mepicet inan Allah, iamo' baya'deh baken ratnan ileh luk matu.

³Na ideh ngiti luk matu ratnan Allah, idi ideh nutun ngelelep dalan pad ideh ruen matu maya' terawédeh sebuleng. Idi na ideh nengebeneh bururdeh pad ideh ruen matu maya' pian Allah.

⁴Keristus ineh nengeriput Ukum, pad amung lemulun luk manu miak ruen matu.

⁵Musa nengayud, idi lemulun luk nganau' luk matu rat bang Ukum ineh miak mulun ratnan ineh.

⁶Iamo' ini luk bila ratnan luk matu luk macing ratnan anu, "Aleg pebala bang niatmu, 'Idéké miak semuet surga?' (ilungneh nguit Keristus temurun),

⁷idi, 'Idéké luk miak temurun bang luk inan maté?' " (ilungneh nguit Keristus tumui rat arang lun naté).

⁸Ini luk bilaneh, "Bala ineh muneng namu peh, ieh ineh bang tangmu, idi bang niatmu pana'," (ieh ineh bala manu luk badén kai).

⁹Kudeng iko ngamo dengan tangmu idi Yésus ineh Tuhan, idi manu bang niatmu idi Allah pangeh nenui Neneh rat arang lun naté ineh, idi iko miak uen ngulun.

¹⁰Tau manu bang niat tau pad tau ruen matu, iamo' tau ngamo dengan tang tau pad ngalap ulun luk meruked.

¹¹Surat Allah pebala, "Idé-idé luk manu Neneh na miak migu' peh."

¹²Ilungneh, lun Yahudi idi lun pupu baken mepad mo'. Ngaceku ineh teh Tuhan kuan amung-amung, idi Ieh ngeperuan amung-amung lemulun luk nawar Neneh.

¹³Ngaceku "anid-anid lemulun luk nawar ngadan Tuhan miak uen ngulun."

¹⁴Iamo' kudeng apehké ideh miak nawar Luk nateh ideh nemanu? Idi kudeng apehké ideh miak manu Luk nateh ideh neninger? Idi kudeng apehké ideh miak ninger kudeng nateh ideh bida'?

¹⁵Idi kudeng apehké bala ineh miak badén, kudeng lun luk mada' na icuk? Maya' kudeng luk inayud, "Kudeng apeh do' ayu lengayan amung-amung lemulun luk nguit Bala luk Do'."

¹⁶Iamo' baken amung-amungdeh nemaya' Bala luk Do' ineh. Kebala Yesaya, "O Tuhan, idéké luk manu inan luk bida' kai?"

¹⁷Ngaceku ineh anu ineh macing ratnan ninger bada', iamo' bada' ineh macing ratnan bala Keristus.

¹⁸Iamo' ui ngitun: Naké lemulun ineh neninger teh? Mo, neninger! Ngaceku maya' kudeng luk inayud: "Bada'deh pangeh nepiar apud tana', Idi baladeh pana' nacing iring tana'."

¹⁹Iamo' ui ngitun: Naké pupu Israil kali'? Pun-pun Musa sebuleng pebala, "Kebala Allah: 'Ui nganau' nemuyuh mét niat inan pupu luk baken aceh imet luk matu; Ui nganau' nemuyuh museh nan aceh pupu luk mebacé.' "

²⁰Idi Yesaya meluun kuu' kareb ieh pebala, "Kebala Allah, 'Ui ilap lemulun luk na nenakap Negku, Ui nesilangan kuan lemulun luk na nengitun Negku.' "

²¹Iamo' kebala Yesaya ratnan pupu Israil, "Kebala Allah, 'Tebaco-tebaco Ui nengurur ticu'Ku kuan pupu luk na maya' bala idi luk pekedaluh.' "

Rum 11

¹Idi ui ngitun, "Pangehké Allah nenala' pupuNeh ineh?" Na tu-tu! Ngaceku ui ini lun Israil teh, luk inul Ibrahim, ratnan inul Benjamin.

²Allah na nenala' pupuNeh luk pinili'Neh atun. Muyuh kali' bala Surat Allah ratnan Elia, kudeng afeh ieh nengadu' pupu Israil pa kiung Allah?

³"O Tuhan, nabi-nabiMu pangeh pinatédeh, idi amung-amung bubpunMu pangeh tibpa, pad ui mo' luk ketecan, idi ideh nutun ngaté negku."

⁴Anunké or Allah neneh? "Ui pangeh nenecan kuanKu tudu' ngeribu lun deléi luk nateh netekeradung inan akang Baal."

⁵Kudeng ineh teh nekini pana' inan sebuang luk pinili' ngaceku katu Allah.

⁶Iamo' kudeng ratnan katu, idi baken ratnan kekamen lemulun, ngaceku kudeng ratnan kekamen ineh, katu ineh baken katu peh.

⁷Kudeng afehké ilungneh? Luk tikap pupu Israil ineh na ideh miak ngalap; iamo' lun luk pinili' pangeh nengalap ineh, iamo' lun baken ineh mebengel ratnan tawar Allah.

⁸Maya' kudeng luk inayud, "Allah nenganau' niat idi terawédeh meberat pad macing aco sini ideh na miak nier dengan matehdeh, idi ninger dengan laliddeh."

⁹Kudeng ineh teh bala Daud, "Nima' iraudeh mangun ku aceh abpung; pad ideh mebpeh idi kumin!

¹⁰Nima' matehdeh ruen ngesaweng, pad ideh na miak nier, idi keteddeh megéi tebukut."

¹¹Ui ngitun teh: Inanké lun Yahudi netebaceng pad ideh mebpehké? Na tu-tu! Iamo' ebpehdeh ineh ngacing ulun kuan lun pupu baken, pad nganau' pupu Israil mét niat.

¹²Ebpeh lun Yahudi ineh nengacing peruan kuan uang tana' ini, idi asi'deh ineh nengacing peruan kuan lun pupu baken. Meluun teh kareb kinula' lun Yahudi pangeh petap!

¹³Nekini ui pebala kuan muyuh lun pupu baken: Seruked ui mangun ku rasul kuan lun pupu baken, ui ngubur kekamenku,

¹⁴pad ui miak nganau' inulku lun Yahudi mét niat, idi nguit sebuangdeh macing inan ulun.

¹⁵Ngaceku kareb ideh tila', tana' ini pedo' dengan Allah. Kudeng apehké kareb ideh lapen Allah? Kali' rungen inan ulun rat arang lun naté!

¹⁶Iamo' kudeng sengeragam luk atun ineh biré kuan Tuhan, idi kudeng ineh teh tebalu' luk rayeh ineh pana' Tuhan kuan. Idi kudeng uat ineh biré kuan Tuhan, kudeng ineh teh angkat-angateh ineh pana' Tuhan kuan.

¹⁷Sebuang angkat pangeh tingal, idi muyuh lun pupu baken mepad kudeng aceh angkat saitun pulung luk kinawin luun ineh, pad ngalap babpat ratnan uat lawa saitun ineh luk mepanu' ku para'.

¹⁸Aleg iko medita' niat ratnan angkat-angat ineh. Iamo' kudeng iko ngedita' bururmu pana', ngerawé do'-do', baken iko luk ngimet uat ineh, iamo' uat ineh luk ngimet namu.

¹⁹Iamo' iko sikal pebala, "Angat-angat ineh pangeh neputul, pad ui ini miak uen ngawin luunneh."

²⁰Matu, ratnan na manu, angkat-angat ineh neputul peh, iamo' iko ini lutep ngaceku manu. Aleg iko medita' niat, iamo' do' iko matot.

²¹Ngaceku kudeng Allah na méi' kuan angateh sebuleng, kali' rungen Ieh na méi' namu.

²²Ngaceku ineh ngerawé ratnan katu idi tueh Allah; ieh ineh tuehNeh kuan lemulun luk pangeh nebpeh, iamo' katuNeh namu, kudeng iko lutep bang katuNeh. Kudeng na, idi iko pana' miak uen nangal.

- ²³Iamo' lun Yahudi pana' miak uen ngawin, kudeng ideh nginuud ratnan na manu, ngaceku Allah melalud ngawin nedeh teh.
- ²⁴Muyuh lun pupu baken mepad kudeng angkat saitun pulung ineh luk tingal, idi kinawin luun lawa saitun luk isa'. Lun Yahudi ineh mepad kudeng lawa saitun luk isa', idi meluun alé kuan Allah, ngawin angkat-angkat luk tingal ineh luun lawadeh sebuleng.
- ²⁵Inan luk inalum, O kinanak-kinanakku, luk ui pian muyuh kali', pad muyuh na ngerawé burur muyuh mileh, ieh ineh, tueh niat lun Israil na meruked, pad kinula' lun pupu baken luk amé' nan Allah petap.
- ²⁶Kudeng ineh lawéneh amung pupu Israil miak uen ngulun, maya' kudeng luk inayud, "Lun Ngulun ineh miak macing rat Sion. Ieh sikal ngado luk dat ratnan inul Yakub.
- ²⁷Idi ini pejani'Ku nedeh, kareb Ui maré do' ratnan sala'deh."
- ²⁸Ngaceku ideh na pian ku Bala luk Do', lun Yahudi mangun ku bunu' Allah ngaceku muyuh lun pupu baken. Iamo' ngaceku pili' Allah, ideh mangun ku rurunNeh ngaceku tepundeh.
- ²⁹Ngaceku Allah na nginuud ratnan luk barénNeh, idi ratnan tawarNeh ineh pana'.
- ³⁰Ngaceku atun muyuh ini ngelaba bala Allah, iamo' nekini muyuh ngalap éi' ngaceku ratnan pupu Israil ngelaba bala ineh.
- ³¹Idi kudeng ineh teh lun Yahudi nekini ngelaba bala Allah, idi ngaceku éi' luk bida' kuan muyuh ineh, idi ideh pana' nekini ngalap éi' teh.
- ³²Ngaceku amung-amungdeh biré Allah inan luk ngelaba bala, pad Ieh miak méi' kuan amung-amungdeh.
- ³³Kudeng apeh kirayehneh, ieh ineh do' idi ileh idi luk kali' Allah! Idéké miak ngelio luk uenNeh mutut. Idéké luk kali' luk ruenNeh?
- ³⁴Maya' kudeng luk inayud: "Idéké luk kali' terawé Tuhan? Idéké luk miak mada' Neneh?"

³⁵Idéké luk pangeh nemaré anun-anun kuanNeh, pad Ieh miak ngua?"

³⁶Ngaceku luk amung-amung pangeh pinudutNeh. Idi luk amung-amung mangun rat Neneh idi kuanNeh. Ngubur Neneh macing raked-raked! Amin.

Rum 12

¹Ngaceku ineh, O kinanak-kinakku, ngaceku ratnan éi' Allah kuan tau, ui mutuh nemuyuh maré burur muyuh mangun ku baré luk mulun idi luk linigan kuanNeh maya' pian Allah. Ineh sembayang muyuh luk matu.

²Idi aleg muyuh maya' ayu lemulun bang tana' ini, iamo' ngisu' ayu muyuh dengan petuneb niat muyuh, pad muyuh miak kali' anun luk pian Allah, ieh ineh luk do' idi luk petulu idi luk meligan.

³Ngaceku ratnan katu luk biré kuanku idi ui pebala kuan anid-anid lemulun, aleg ngerawé bururneh meluun ratnan terawé luk matu, iamo' do' ieh ngerawé dengan mebeneh niat maya' babpat anu luk bibpat Allah kuan anid-anid burur.

⁴Ngaceku mepad kudeng sebuleng burur inan mula' babpat, iamo' baken amung-amungdeh mepad kekamen,

⁵kudeng ineh teh tau luk mula' ini mangun ku sebuleng burur dengan Keristus, idi amung-amung tau inabet seburur kuan seburur, mepad kudeng tuda'-tuda' babpat bang sebuleng burur.

⁶Ngaceku ineh do' tau makai baré tau luk baken-baken maya' katu luk biré kuan tau ineh. Kudeng tau inan baré mada' luk biré Allah, do' tau nganau' ineh maya' anu luk ilap tau.

⁷Kudeng baré tau ineh ngasa' lemulun, do' tau ngasa' lemulun; kudeng mada', do' mada'.

⁸Kudeng baré tau ineh ngubuk, do' ngubuk; kudeng maré, do' maré dengan mekatu. Kudeng iko mangun ku lun rayeh, do' iko megéi'; idi idé-idé luk méi', do' nganau' ineh dengan mawang niat.

- ⁹Do' muyuh mawa dengan na siayu. Do' muyuh megateh inan luk dat, idi ngimet luk do'.
- ¹⁰Do' mawa seburur dengan seburur, mepad kudeng kinanak-kinanak bang Keristus. Do' megéi' ngedita' nelun baken.
- ¹¹Do' muyuh mekéi' dengan na mekupé. Do' muyuh mepicet bang Roh dengan ngakem kuan Tuhan.
- ¹²Do' mawang niat ngaceku rapet muyuh, idi mulai niat bang susa', idi lutep bang sembayang.
- ¹³Maré petap kuan lun manu luk masi', idi megéi' ngasa' sakai.
- ¹⁴Mutih peruan kuan lemulun luk ngedereh nemuyuh. Mutuh peruan idi aleg ngediman nedeh.
- ¹⁵Do' mawang niat dengan lemulun luk mawang niat, idi nangi' dengan lemulun luk nangi'.
- ¹⁶Do' méi' kuan amung-amung lemulun. Aleg medita' niat, iamo' mawang niat ku kekamen luk mebeneh. Aleg ngerawé burur muyuh mileh.
- ¹⁷Aleg ngua' dat lemulun dengan luk dat. Nganau' luk do' siren amung-amung lemulun.
- ¹⁸Do' nganau' anun-anun luk petulu ruen muyuh, pad muyuh pedo' dengan amung-amung lemulun.
- ¹⁹O lun rorumku, aleg muyuh sebuleng ngua', iamo' nima' Allah ngua'. Ngaceku pangeh inayud, "Ui ini luk ngua'; Ui ini sikal ngua', kebala Tuhan."
- ²⁰Iamo' maya' kudeng luk inayud, "Kudeng bunu'mu melau, do' maré luk kenenneh, kudeng ieh meparang, do' maré luk rupenneh. Ngaceku dengan kekamen luk kudeng ineh iko ngamung bareh apui pa luun uluhneh."
- ²¹Aleg nima' luk dat ngelaya' namu, iamo' ngelaya' luk dat dengan luk do'.

Rum 13

¹Do' anid-anid lemulun maya' ukum lun luk ngimet bawang. Ngaceku na luk idi lalud luk na biré Allah mo'. Idi amung-amung lalud ineh pangeh litep Allah.

²Idé-idé luk sikal metueh ratnan lun rayeh ineh, ieh ineh ngelaba luk litep Allah; iamo' lemulun luk ngelaba ineh miak ngalap ukum kuan bururdeh sebuleng.

³Ngaceku lun luk ngimet na ngacing tot kuan kekamen luk do', iamo' kuan kekamen luk dat. Pianmu na matot nan lun rayeh inehké? Nganau' luk do', pad iko miak ngalap ubur rat neneh.

⁴Ngaceku ieh demulun Allah luk ngacing luk do' kuanmu. Iamo' kudeng iko nganau' luk dat, do' iko matot neneh, ngaceku baken ieh ngimet lalud ineh mo'-mo', ngaceku ieh demulun Allah, luk ngacing useh kuan idé-idé luk nganau' luk dat.

⁵Ngaceku ineh do' muyuh maya' bala lun luk ngimet, baken ngaceku useh Allah mo', iamo' ngaceku teruayen niat muyuh.

⁶Ineh punneh muyuh mayar acam teh; ngaceku ideh demulun Allah luk inau' lutep nganau' kekamen ini.

⁷Do' muyuh mayar baleh muyuh kuan lun luk ngimet ineh, ieh ineh pupuk binaweh muyuh, idi pupuk tana' pana'. Ngedita' idi ngerayeh amung-amungdeh.

⁸Aleg muyuh pebaleh kuan idé-idé pana', iamo' do' mawa seburur dengan seburur. Ngaceku idé-idé luk mawa inan lemulun, ieh ineh pangeh nenganau' Ukum Musa.

⁹Ngaceku bala ini, "Aleg iko pasét, aleg iko ngaté, aleg iko mano, aleg iko melili," idi anun-anun ukum luk baken, ieh ineh pangeh pimung bang bala ini, ieh ineh, "Do' iko mawa nelun denganmu mepad kudeng bururmu sebuleng."

¹⁰Idé-idé luk mawa nelun denganneh na ieh nganau' luk dat kuanneh. Ngaceku ineh awa ineh mangun ku dalan maya' amung ukum.

¹¹Do' muyuh mawa, ngaceku muyuh kali' karebneh. Karebneh pangeh nacing, idi petulu muyuh kulat ratnan rudap muyuh. Ngaceku nekini ulun ineh meluun muneng kuan tau ratnan atun kareb tau pun manu.

¹²Idi dacem pangeh mado, idi acang pangeh muneng. Do' tau nala' amung-amung kekamen luk medacem, idi do' tau ngayung ku acang.

¹³Do' tau mulun dengan ulun luk mepiteb mepad kudeng kareb acang aco; aleg dengan marot idi mabuk, aleg dengan mesawa', idi luk melutak, aleg dengan pekedaluh idi mét niat.

¹⁴Iamo' do' muyuh ngayung ku Yésus Keristus Tuhan ineh, idi aleg ngerawé ratnan ulun tana' ini dengan ngakem luk pinianneh.

Rum 14

¹Do' perurum nelun luk melaya' anuneh ineh. Aleg pesaad neneh ratnan terawéneh.

²Inan lemulun luk merapet miak kuman amung-amung luk kenen, iamo' lemulun luk melaya' ineh kuman kikid irin mo'.

³Aleg lemulun luk kuman anun-anun ngebeneh luk na kuman, idi aleg lemulun luk kuman kikid irin mo' ngesala' lemulun luk kuman anun-anun, ngaceku Allah pangeh nengalap neneh.

⁴Idéké iko ini luk ngesala' demulun lun baken? Tuanneh sebuleng luk kali' kudeng ieh do', kian dat lek. Idi ieh miak tuped meraben, ngaceku Tuhan melalud ngetueh neneh.

⁵Inan teh lemulun luk ngerawé seaco meluun do' ratnan aco luk baken, iamo' inan teh luk baken luk ngerawé anid-anid aco ini mepad mo'. Do' anid-anid burur lutep bang niatneh sebuleng.

⁶Lemulun luk ngerawé aco sineh, nima' neneh ngimet ineh ngaceku Tuhan, idi lemulun luk kuman ineh, nima' neneh kuman ngaceku Tuhan, ngaceku ieh maré ubur kuan Allah; idi lemulun luk na sikal kuman ineh, nima' neneh na kuman ngaceku Tuhan, idi maré ubur kuan Allah teh.

⁷Ngaceku rat arang tau, seburur pana' na miak mulun kuan bururneh sebuleng, idi seburur pana' na miak maté kuan bururneh sebuleng.

⁸Kudeng tau mulun, tau mulun kuan Tuhan teh, idi kudeng tau maté, tau maté kuan Tuhan. Kudeng tau mulun idi maté pana', tau ini pupu Tuhan teh.

⁹Ngaceku Keristus naté idi muli' mulun teh, pad Ieh mangun ku Tuhan kuan lemulun luk pangeh naté idi luk mulun pana'.

¹⁰Iamo' iko ini, anunké punneh iko ngesala' kinanakmu? Idi iko, anunké punneh iko ngebeneh kinanakmu teh? Ngaceku amung-amung tau miak amé' matun kerusi besara' Allah.

¹¹Ngaceku pangeh inayud, "Ratnan ulunKu ini, kebala Tuhan, idi anid-anid aleb miak tekeradung pa kiungKu, idi anid-anid dila' miak ngamo Ui ini Tuhan."

¹²Ngaceku ineh, idi anid-anid burur tau na miak na ngor ratnan bururneh sebuleng kuan Allah.

¹³Ngaceku ineh aleg tau ngesala' seburur dengan seburur teh, iamo meluun do' muyuh mutut ini, pad aleg seburur ngesabeng kinanakneh pad ieh mebpeh.

¹⁴Idi ngaceku rorumku dengan Tuhan Yésus, ui kali' na luk idi akan anun-
anun pana' luk melutak, iamo' kuan lemulun luk ngerawé akan ineh melutak,
idi kuanneh kali' rungen melutak.

¹⁵Kudeng iko ngesabeng kinanakmu ngaceku luk kenenmu ineh, idi baken iko maya' dalam mawa teh. Aleg ngeraruh neneh ngaceku ratnan luk kenenmu ineh, ngaceku Keristus pangeh naté ku libalneh.

¹⁶Aleg nima' luk do' sirenmu ruen lemulun ngedat.

¹⁷Ngaceku Imet Allah ineh baken ratnan kuman idi ngirup, iamo' luk matu idi awang idi mawang niat luk biré Roh Meligan.

¹⁸Idé-idé luk mangun ku demulun Keristus bang luk kudeng ini, idi ieh luk petulu dengan pian Allah, idi ieh luk buren lemulun.

¹⁹Ngaceku ineh do' tau nakap anun-anun luk ngacing inan awang idi luk ngepicet niat tau seburur dengan seburur.

²⁰Aleg ngusag luk inau' Allah ngaceku ratnan luk kenen. Amung-amung luk kenen ineh meligan peh, iamo sala' muyuh kudeng luk kenen muyuh ngesabeng nelun baken.

²¹Meluun do' kudeng na kuman uang pung, idi ngirup abpa' anggur, idi anun-anun pana' luk miak ngesabeng kinanakmu.

²²Idi anu luk namu ineh, ngimet kuan bururmu sebuleng pa kiung Allah teh. Samal kuan lemulun luk na ngesala' bururneh ratnan anun-anun luk bang terawéneh do'.

²³Iamo' idé luk kuman dengan merapang, ieh ineh miak kumin, ngaceku na ieh kuman dengan manu. Idi anun-anun luk na ratnan manu, ieh ineh sala' peh.

Rum 15

¹Do' tau luk mepicet anu ngedengan lemulun luk melaya', idi aleg tau ngerawé burur tau sebuleng.

²Do' anid-anid burur tau ngawang niat kinanak tau, pad ngacing peruan kuandeh, pelé anudeh uen ngepicet.

³Ngaceku Keristus pana' na nengerawé bururNeh sebuleng, iamo' kudeng luk pangeh inayud, "Idi amung-amung adu' lemulun luk ngilang Namu, pangeh mebpeh luun bururku."

⁴Ngaceku amung-amung luk pangeh inayud bang Surat Allah, pangeh inayud pad mangun ku bada' kuan tau, pelé tau ngalap rapet ratnan ulai niat idi ubuk luk barén kuan tau bang surat ineh.

⁵Do' Allah, luk lawa ulai niat idi ubuk teh, maré kuan muyuh sebuleng niat arang muyuh sebuleng, maya' ayu Keristus Yésus,

⁶pad dengan sebuleng niat idi sebuleng tang, muyuh ngerayeh Allah, ieh ineh Taman Tuhan tau Yésus Keristus.

⁷Do' muyuh perurum seburur dengan seburur, mepad kudeng Keristus pangeh nengalap nemuyuh kuan rayeh Allah.

⁸Ui pebala nemuyuh, idi Keristus pangeh ngasa' nelun Yahudi, pad ngegala' ratnan Allah lutep maya' jani'. Ieh ngeriput pejani'Neh kuan tepun-tepun tau;

⁹pelé lun pupu baken pana' miak ngerayeh Allah ngaceku éi'Neh, maya' kudeng luk pangeh inayud, "Idi ini punneh ui ngubur Namu arang lun pupu baken, idi menani ngubur ngadanMu."

¹⁰Idi teh keburu'neh, "Mawang niat, O lun pupu baken, dengan pupu luk pinili' Allah."

¹¹Idi teh, "Ngubur Tuhan ineh, O amung lun pupu baken. Ngubur neneh, O amung-amung pupu,"

¹²Idi kebala Yesaya teh, "Idi inul Isai ineh miak macing teh, idi Ieh miak uen ngikit pad ngimet lun pupu baken, idi ideh miak merapet Neneh."

¹³Do' Allah, luk lawa rapet ineh, manu' niat muyuh ku awang idi pedo' bang anu muyuh, pad ratnan lalud Roh Meligan, muyuh mepanu' ku rapet.

¹⁴O kinanak-kinanakku, ui kali' muyuh mepanu' ku luk do' idi ileh, pad muyuh miak mada' seburur dengan seburur.

¹⁵Iamo' bang surat ini, ui mekuu' ngayud pad nganau' nemuyuh ngerawé ratnan tuda'-tuda' bala. Ui mekuu' ngayud ini ngaceku katu luk biré Allah kuanku,

¹⁶pad ui mangun ku lun duken Keristus Yésus kuan lun pupu baken. Ui ngakem mepad kudeng imam idi mada' Bala luk Do' ratnan Allah, pad lun pupu baken ineh miak lapen Allah mangun ku aceh baré luk petulu idi luk uen ngeligan ratnan Roh Allah.

¹⁷Ngaceku ineh bang Keristus Yésus ui ngedita' bururku ratnan amung-amung luk ui nganau' ngaceku Allah.

¹⁸Ui mekuu' pebala ratnan luk inau' Keristus mo' dengan bururku, pad nguit lun pupu baken ineh maya' bala Allah. Ini pangeh inau' dengan bala idi kekamen,

¹⁹dengan lalud tanu' idi kekamen luk nan mawa, idi dengan lalud Roh Meligan, pad ngimun rat Yerusalim idi macing déi' Ilikum ui pangeh nemada' megala' Bala luk Do' ratnan Keristus.

²⁰Idi pianku mada' Bala luk Do' su luk inan ngadan Keristus ineh nateh bida', pad ui na mudut ruma' pa luun diri lun baken.

²¹Maya' kudeng luk pangeh inayud, "Lemulun luk na nekali' bala ratnan Ieh miak nier, idi lemulun luk na neninger ineh miak kali'."

²²Ngaceku ineh, tuda'-tuda' kua' ui sikal macing nemuyuh. Iamo' ui mula' sabeng.

²³Iamo' nekini kekamenku bang bawang ini pangeh, idi ngaceku bang tuda'-tuda' lak ui geregan macing nemuyuh,

²⁴kareb ui nalan amé' bawang Spaniol, idi ui merapet, bang dalanku, miak umak ngikak nemuyuh idi muyuh miak ngedengan negku pad ui amé' déi' kareb ui pangeh netudo dengan muyuh segageh.

²⁵Iamo' nekini ui amé' déi' Yerusalim sikal nguit usin kuan lun manu.

²⁶Ngaceku sidang-sidang déi' Makedonia idi Akaya sikal ngamung usin kuan lun manu luk masi' déi' Yerusalim.

²⁷Niatdeh sebuleng sigio pian nganau' ineh. Setuneh petulu ideh ngedengan kinanak-kinanak luk masi' ineh, ngaceku lun Yahudi pangeh nengacing peruan kuan lun pupu baken. Idi petulu lun pupu baken ineh ngasa' nelun Yahudi ineh dengan binawehdeh.

²⁸Kareb ui pangeh nenganau' ini idi pangeh nemaré kuandeh luk pangeh pimung ineh, idi ui sikal nalan amé' déi' Spaniol lemaba bawang muyuh.

²⁹Ui kali' kareb ui macing nemuyuh, idi ui macing mepanu' ku peruan ratnan Keristus.

³⁰Ui mutuh nemuyuh, O kinanak-kinanakku, ngaceku ratnan Tuhan tau Yésus Keristus idi ngaceku ratnan awa Roh Meligan, ngekél burur muyuh denganku bang sembayang inan Allah ngaceku ui,

³¹pad ui mepuit ratnan lun luk na manu déi' Yudia, idi kekamenku kuan Yerusalim miak petulu dengan pian lun manu ineh.

³²Kudeng ini pian Allah, ui miak macing nemuyuh dengan mawang niat, idi ngato erurku dengan muyuh.

³³Do' Allah luk lawa awang ineh tudo dengan muyuh anid-anid burur. Amin.

Rum 16

¹Ui maré kuan muyuh Pibi, kinanak tau luk decur ini, luk mangun ku lun ngasa' sidang déi' Kenkria ineh.

²Do' muyuh nganak neneh bang Tuhan petulu dengan lawé lun manu, idi nengan neneh bang anun-anun luk pianneh rat nemuyuh. Ngaceku ieh ineh teh pangeh mangun ku lun rorum kuan tuda'-tuda' lemulun, idi kuan bururku sebuleng pana'.

³Do' maré tabi' kuan Priskila idi Akila, lun denganku bang kekamen Keristus Yésus.

⁴Didueh ineh pangeh nemaré ulun didueh ngaceku bururku, idi baken ui ini mo', iamo' amung-amung sidang rat arang lun pupu baken pana' ngubur nedidueh.

⁵Maré tabi' teh kuan sidang luk bang ruma' didueh ineh. Tabi' kuan lun rorumku Epenitus, ieh ineh lemulun luk pun nemanu inan Keristus déi' tana' Asia.

⁶Tabi' kuan Mariam luk pangeh nengakem tu-tu kuan muyuh.

⁷Tabi' kuan Andronikus idi Yunias, pupuku lun Yahudi idi lun denganku bang tutup, luk buren rat arang rasul-rasul, idi luk atun rat negku manu inan Keristus.

⁸Tabi' kuan Ampliatus, lun rorumku bang Tuhan.

- ⁹Tabi' kuan Urbanus, luk lun dengan kai bang kekamen Keristus, idi lun rurumku Istakus.
- ¹⁰Tabi' kuan Apelis luk lutep bang Keristus. Tabi' kuan lun bang ruma' Aristobulus.
- ¹¹Tabi' kuan Herodion, pupuku ineh. Tabi' kuan lun bang ruma' Narkisus luk maya' Tuhan.
- ¹²Tabi' kuan Tripina idi Triposa, ieh ineh decur luk nengakem kuan Tuhan. Tabi' kuan Persis, decur luk inan mawa ineh, luk nengakem do'-do' kuan Tuhan.
- ¹³Tabi' kuan Rupus, luk pebala do' kekamen bang Tuhan, idi kuan tinanneh, luk pangeh mangun ku tinanku teh.
- ¹⁴Tabi' kuan Asinkritus, Peligon, Hermis, Patrobas, idi Hermas, idi amung-amung kinanak luk dengandeh ineh.
- ¹⁵Tabi' kuan Pilologus, Yulia, Nerius idi kinanakneh luk decur, idi Olimpas, idi amung-amung lun manu luk dengandeh ineh.
- ¹⁶Do' muyuh petabi' seburur dengan seburur dengan pebuen luk meligan. Idi tabi' ratnan amung-amung sidang Keristus kuan muyuh.
- ¹⁷Ui mutuh nemuyuh, O kinanak-kinanakku, ngerawé amung-amung lemulun luk ngacing kedaluh, idi luk ngeraruh lemulun ratnan bada' luk inan muyuh nesibada'. Do' muyuh teketed rat nedeh ineh.
- ¹⁸Ngaceku lemulun luk nganau' kudeng ini baken mangun ku demulun Keristus Tuhan tau, iamo' mangun ku demulun pinian bururdeh sebuleng, idi dengan bala luk mepaci' idi luk do', ideh naluk lun luk mesiri niat.
- ¹⁹Ngaceku baya' muyuh nan Tuhan pangeh megala' kuan amung-amung lemulun. Ngaceku ineh ui mawang niat nemuyuh, iamo' ui pian pad muyuh mangun mileh bang anun-anun luk do', idi na mesala' ratnan luk dat.

²⁰Idi Allah, luk lawa awang ineh, sikal ngeradu' Sétan ineh dengan mesaget pa liang lengayan kukud muyuh. Idi do' katu Tuhan tau Yésus Keristus ngedengan nemuyuh.

²¹Tabi' rat ni Timotius, lun denganku bang kekamenku kuan muyuh, idi tabi' ratnan pupuku Lukius, Yason, idi Sosipater.

²²Ui ini Tertius, luk nengayud surat ini, maré tabi' kuan muyuh bang Tuhan.

²³Idi tabi' kuan muyuh rat ni Gayus, luk nengasa' negku idi amung-amung sidang ineh. Idi tabi' kuan muyuh rat ni Erastus, lun ngimet usin bawang ini, idi rat ni Kuartus, kinanak ineh. [²⁴Do' katu Tuhan tau Yésus Keristus ngedengan amung-amung muyuh. Amin.]

²⁵Do' tau ngerayeh Allah. Ieh ngepicet anu muyuh, maya' Bala luk Do' luk badénku, idi maya' bada' ratnan Yésus Keristus ineh, idi maya' luk linio ratnan bala luk inalum rat mon.

²⁶Iamo' nekini bala ineh pangeh megala' ratnan surat nabi-nabi, idi maya' ukum Allah luk meruked ineh, pangeh linio kuan amung-amung pupu, pad ideh miak manu idi maya'.

²⁷Idi kuan Allah luk inan amung-amung ileh, inan rayeh ngaceku ratnan Yésus Keristus, macing ruked-ruked peh! Amin.

1 Korintus

1 Korintus 1

¹Surat rat ni Paulus, luk maya' pian Allah tinawar mangun ku rasul Yésus Keristus, idi Sostenis, kinanak tau—

²Kuan sidang Allah luk bang bawang Korintus, ieh ineh kuan amung-amung luk linigan bang Keristus Yésus, idi luk tinawar mangun ku lun luk meligan, dengan amung-amung lemulun luk nawar ngadan Tuhan tau Yésus Keristus bang amung-amung su luk inan, ieh ineh Tuhandeh idi Tuhan tau pana':

³Do' katu idi awang ratnan Allah Taman tau idi Tuhan Yésus Keristus temurun kuan muyuh.

⁴Ui megéi' maré ubur kuan Allahku ngaceku muyuh ratnan katuNeh luk biré kuan muyuh bang Keristus Yésus.

⁵Ngaceku bang Keristus muyuh mangun ku lun do' bang luk amung-amung, ieh ineh bang anid-anid bala idi amung-amung ileh.

⁶Bala ratnan Keristus ineh pangeh inau' lutep bang nemuyuh,

⁷pad muyuh na mekurang ratnan aceh baré Roh pana', laba' muyuh nganét luk uen ngelio ratnan Tuhan tau Yésus Keristus.

⁸Ieh sikal nganau' nemuyuh lutep macing kekipedneh, pad muyuh na mesala' kareb Aco Tuhan tau Yésus Keristus.

⁹Idi Allah ineh luk pangeh nenawar nemuyuh semuet bang rorum AnakNeh Yésus Keristus Tuhan tau, lutep maya' jani'.

¹⁰O kinanak-kinanakku, ui mutuh nemuyuh dengan ngadan Tuhan tau Yésus Keristus, pad muyuh amung-amung sebuleng niat ratnan luk belén muyuh, pad na patad. Iamo' do' muyuh mangun ku aceh rorum, dengan sebuleng terawé idi sebuleng niat.

¹¹Ngaceku O kinanak-kinanakku, lun rat bang tetek ruma' Kloé pangeh nemada' negku ratnan muyuh pekedaluh.

¹²Ini ilung balaku: Anid-anid burur muyuh baken bala. Sebuang pebala, "Ui ini Paulus kuan," idi inan luk pebala, "Ui ini Apolos kuan," idi inan teh luk pebala, "Ui ini Pétrus kuan," idi inan teh luk pebala, "Ui ini Keristus kuan."

¹³Miakké Keristus uen mabpat? Inanké Paulus ineh sinalib ngaceku muyuh? Idi dengan ngadan Pauluské muyuh rireb?

¹⁴Ui ngubur Allah, ngaceku na luk idi seburur pana' rat arang muyuh luk pangeh rirebku, iamo' Krispus idi Gayus mo'.

¹⁵Seburur pana' nateh luk miak pebala, muyuh pangeh rireb dengan ngadanku.

¹⁶(Iamo' ui pangeh nengerereb lun bang ruma' Stepanus, idi baken ratnan ineh na ui kali' kudeng inan luk rirebku.)

¹⁷Keristus na nengecuk negku amé' ngerereb lemulun. Ieh nengecuk negku mada' Bala luk Do', baken dengan ileh bala, pad salib Keristus ineh na mo'-mo'.

¹⁸Ngaceku bada' ratnan salib ineh mangun ku bacé kuan lemulun luk bang dalan até; iamo' kuan tau luk bang dalan ulun meruked, bada' ineh mangun ku lalud Allah.

¹⁹Ngaceku pangeh inayud, "Idi Ui sikal nala' ileh lemulun luk mileh ineh, idi terawé lemulun luk ngerawé ineh Ui sikal ngagka'."

²⁰Iapehké lun mileh ineh? Iapehké guru-guru Ukum ineh? Iapehké lun luk mileh pekitun bang kareb ini? Allah nenganau' ileh tana' ini mebacé?

²¹Ngaceku Allah, dengan ilehNeh, pangeh nengitek dalan, pad lemulun na miak ngiti Allah dengan ilehdeh sebuleng. Iamo' Allah pian ngulun lemulun luk manu ku bada' luk "mebacé" ini luk badén kai.

²²Lun Yahudi nakap tanu', idi lun Grika nakap ileh.

²³Iamo' tau ini mada Keristus luk sinalib, ieh ineh aceh bada' luk ngesabeng nelun Yahudi, idi mangun ku bacé kuan lun pupu baken.

²⁴Iamo' kuan lemulun luk tinawar, do' lun Yahudi idi lun pupu baken pana', Keristus ineh lalud Allah idi ileh Allah.

²⁵Ngaceku luk titen bacé Allah ineh meluun rayeh ilehneh ratnan ileh lemulun; idi luk titen laya' Allah ineh meluun tueh ratnan tueh lemulun.

²⁶Ngerawé muyuh, O kinanak-kinanakku, ratnan ulun muyuh kareb muyuh tinawar Allah. Pawa' muyuh luk mileh idi melalud idi mebala maya' terawé lemulun.

²⁷Iamo' luk mebacé bang tana' ini pinili' Allah, pad Ieh miak ngigu' lemulun luk mileh ineh, idi luk melaya' bang tana' ini pinili' Allah, pad Ieh miak ngigu' lemulun luk metueh ineh.

²⁸Idi luk mebeneh bang tana' ini idi luk pidat ineh pinili' Allah, idi anun-anun luk na tupu raga pana', pad Ieh miak nala' anun-anun luk meraga,

²⁹pad seburur pana' na ngedita' bururneh sebuleng pa kiung Allah.

³⁰Iamo' dengan peruan ratnan Allah, muyuh ini perurum dengan Keristus Yésus, luk pangeh mangun ku ileh kuan tau ratnan Allah. Ieh nganau' netau matu, idi ngeligan idi nguli' netau.

³¹Ngaceku ineh maya' kudeng luk inayud, "Idé-idé luk mesido' niat, nima' neneh mesido' niat ngaceku luk inau' Tuhan."

1 Korintus 2

¹Kareb ui iné' nemuyuh atun, pad mada' baba' Allah luk inalum ineh, O kinanak-kinanakku, na ui makai bila' bala luk mekadang idi ileh luk medalem.

²Ngaceku, ui pangeh nengerawé kudeng ini, laba' ui tudo arang muyuh, ui pian kelupan amung-amung luk baken, idi ngerawé ratnan Yésus Keristus sebuleng, idi meluun teh, ateNeh luun kayuh salib ineh.

³Kareb ui iné' nemuyuh, ui melaya' idi megegker ku tot.

⁴Idi balaku idi bada'ku baken dengan ileh lemulun, iamo' dengan bada' Roh idi lalud Allah luk miak ngeruid niat lemulun

- ⁵pad anu muyuh baken ratnan ileh lemulun, iamo' ratnan lalud Allah.
- ⁶Iamo' ui mada' ratnan ileh ineh kuan lun luk lutep bang Tuhan. Iamo' baken ileh tana' ini idi baken ileh lun luk ngimet tana' ini, luk miak talan.
- ⁷Ileh luk badénku, ieh ineh ileh Allah luk inalum, luk inapung ratnan lemulun idi luk litep Allah kareb nateh tana' ini pinudut, mangun ku rayeh tau.
- ⁸Idi seburur lun ngimet bang tana' ini pana' na nengiti ileh ineh. Kudeng ideh pangeh nengiti ineh, kali' rungen ideh na nenalib Tuhan luk rayeh ineh.
- ⁹Iamo' maya' kudeng luk inayud, "Luk na sinier mateh, idi luk na pindenger lalid, luk na megala' bang niat lemulun, ieh ineh luk inau' Allah temina' kuan lemulun luk mawa Neneh."
- ¹⁰Iamo' kuan tau Allah pangeh nengelio ineh dengan RohNeh, ngaceku Roh Allah ineh ngelio luk amung-amung, meluun teh terawé Allah luk medalem.
- ¹¹Idéké luk kali' niat lemulun? Roh luk bang niat lemulun ineh mo' luk kali'. Kudeng ineh teh na luk idi seburur pana' luk kali' niat Allah, iamo' Roh Allah mo'.
- ¹²Na tau nengalap roh tana' ini. Tau pangeh nengalap Roh Allah, pad tau miak kali' amung-amung luk barén Allah kuan tau
- ¹³Ngaceku ineh, kareb kai mada' bala luk matu ratnan Roh, na kai pebala maya' ileh lemulun, iamo' maya bada' Roh Allah.
- ¹⁴Iamo' lemulun luk na inan Roh Allah na miak ngalap baré-baré luk ratnan Roh Allah ineh, ngaceku amung ineh mangun ku bacé kuanneh, idi na ieh miak ngiti ineh, kudeng na Roh Allah ngelio ineh.
- ¹⁵Lemulun luk inan Roh Allah miak ngelio luk amung-amung, iamo' ieh sebuleng na miak uen lun ngesala'.
- ¹⁶Maya' kudeng luk inayud, "Idéké luk kali' terawé Tuhan? Idéké miak mada' Neneh?" Iamo' tau ini inan terawé Keristus.

1 Korintus 3

- ¹O kinanak-kinanakku, atun ui na miak pebala nemuyuh mepad kudeng kuan lemulun luk inan Roh. Ui nepebala nemuyuh mepad kudeng kuan lemulun luk maya' ulun tana' ini, ieh ineh mepad kudeng anak isuut bang Keristus.
- ²Idi ui nemaré rata kuan muyuh, baken nuba'; ngaceku muyuh nateh rayeh, idi macing nekini pana' nateh muyuh rayeh ngaceku muyuh lakat mulun maya' ulun tana' ini.
- ³Ngaceku kudeng inan ét niat idi kedaluh arang muyuh, bakenké muyuh bang ulun tana' ini idi maya' ulun lemulun luk bang tana' ini?
- ⁴Ngaceku kareb lemulun pebala, "Ui ini Paulus kuan," idi luk baken pebala, "Ui ini Apolos kuan," bakenké muyuh lemulun luk maya' ulun tana' ini?
- ⁵Idéké Apolos ineh? Idi idéké Paulus ineh? Kai ini demulun Allah mo', luk nenguit nemuyuh manu. Anid-anid burur kai nganau' kekamen luk barén Tuhan kuan kai.
- ⁶Ui ini luk nenibu, idi Apolos luk mubpur, iamo' Allah luk ngulun neneh.
- ⁷Luk nibu ineh na luk idi anun-anun, idi luk mubpur ineh pana' nateh luk idi anun-anun, iamo' Allah sebuleng luk ngulun tibu ineh.
- ⁸Idi luk nibu idi luk mubpur ineh mepad mo', iamo' anid-anid burur miak ngalap tabparneh sebuleng, maya' kekammeneh sebuleng.
- ⁹Ngaceku kai lemulun pad-pad ngakem dengan Allah, idi muyuh ini lati' Allah. Muyuh ini pinginud aceh ruma' Allah.
- ¹⁰Idi maya' baré Allah kuanku, ui nenganau' kekamen lun luk mileh mudut ruma' ineh. Ui nenaped dirineh, idi lun baken mudut luun ineh. Iamo' nima' anid-anid burur ngerawé kudeng apeh luk pidutenneh ineh.
- ¹¹Ngaceku diri luk baken na miak benen seburur pana', iamo' luk pangeh ibpen, ieh ineh Yésus Keristus.
- ¹²Sebuang lemulun mudut ruma' amas, pirak, idi batu-batu luk meraga, idi lun baken makai kayuh, uduh luk tekering, idi don pa luun diri ineh.

¹³Idi kekamen anid-anid burur miak uen ngelio, ngaceku Aco Keristus ineh miak ngegala' neneh, ngaceku kekamen ineh uen ngelio ku apui; idi apui ineh sebuleng miak nutun kekamen anid-anid burur.

¹⁴Kudeng kekamen seburur ketecan, luk pinudutneh pa luun diri ineh, kali' rungen ieh miak ngalap tabparneh.

¹⁵Kudeng kekamen seburur neseb, kali' rungen ieh merugi'. Iamo' ieh sebuleng miak uen ngulun, iamo' mepad kudeng lemulun luk muit bururneh ratnan apui.

¹⁶Naké muyuh kali' idi muyuh ini ruma' Allah idi Roh Allah tudo bang nemuyuh?

¹⁷Kudeng seburur lemulun ngusag ruma' Allah, idi ieh miak uen Allah ngusag teh. Ngaceku ruma' Allah ineh meligan, ieh ineh burur muyuh.

¹⁸Aleg seburur pana' naluk bururneh sebuleng. Kudeng idé lemulun rat arang muyuh ngerawé bururneh sebuleng mileh bang tana' ini, nima' neneh mangun mebacé, pelé ieh miak mangun mileh.

¹⁹Ngaceku ileh tana' ini mangun ku bacé kuan Allah. Ngaceku pangeh inayud, "Idi Tuhan ngakem lemulun luk mileh ineh bang ilehneh sebuleng,"

²⁰idi teh pangeh inayud, "Tuhan kali' ratnan terawé lemulun luk mileh ineh na ulek."

²¹Ngaceku ineh aleg seburur pana' ngedita' bururneh ratnan ileh lemulun. Luk amung-amung pangeh biré kuan muyuh,

²²Paulus, Apolos, Pétrus, tana' ini, ulun idi até, luk inan nekini idi luk sikal macing teh, amung-amung ineh muyuh kuan.

²³Idi muyuh ini Keristus kuan, idi Keristus Allah kuan.

1 Korintus 4

¹Do' muyuh ngerawé nekai mepad kudeng demulun Keristus luk litep ngasa' bada' Allah luk inalum.

²Idi luk petulu kuan lun ngasa', do' ieh lutep inan tuanneh.

³Iamo' ratnan ui, na mekudeh kudeng ui kumin muyuh idi idé-idé pana'. Ui sebuleng pana' na ngukum bururku

⁴Ngaceku sebuleng pana' na ui kali' sala'ku sebuleng, iamo ratnan kudeng ineh ui nateh inau' matu peh, iamo' luk ngukum negku ineh Tuhan

⁵Ngaceku ineh aleg muyuh ngukum idé-idé pana' kareb nateh karebneh, ieh ineh kareb nateh Tuhan macing. Ieh miak ngegala' anun-anun luk inapung bang dacem, idi Ieh ngelio amung-amung pinian niat lemulun. Anid-anid burur miak ngalap ubur ratnan Allah.

⁶Ngaceku muyuh, O kinanak-kinanakku, ui pangeh nengalap luk pinginud kuan Apolos idi bururku sebuleng, pad muyuh miak sibada' ratnan lawé kai, kudeng apeh ilung bala ini, "Aleg ngelaba luk inayud." Aleg seburur rat arang muyuh ngedita' seburur lemulun idi ngebeneh seburur lun baken.

⁷Ngaceku idéké luk nganau' namu meluun do' rat nelun baken? Idi anunké inan namu luk baken ilapmu? Idi kudeng iko pangeh nengalap ineh anunké punneh iko ngedita' bururmu kudeng ayuneh luk ilapmu ineh baken aceh baré?

⁸Kali' rungen muyuh mebor! Kali' rungen muyuh lun do'! Muyuh pangeh mangun ku raca'-raca', iamo' kai nateh! Setuneh ui pian ku muyuh mangun ku raca'-raca', pad kai miak mangun ku raca'-raca' dengan muyuh!

⁹Ngaceku ui ngerawé idi Allah pangeh nenganau' nekai mangun ku rasul-rasul luk pa beneh tu-tu, mepad kudeng lemulun luk inukum maté pa kiung lun mula' mangun ku aceh luk siren melaikat idi lemulun pana'.

¹⁰Ngaceku Keristus kai ini mangun mebacé, iamo' muyuh mileh bang Keristus! Kai ini melaya', iamo' muyuh metueh! Kai ini pidat, iamo' muyuh rinayah!

¹¹Macing nekini kai kali' melau, idi meparang, lubpa, idi bebalen, idi na ruma' inan tudo,

¹²kai merur ngakem dengan ticu' kai sebuleng. Kareb kai uen ngediman, kai ngua' dengan peruan; kareb kai uen ngedereh, kai tuman teh;

¹³kareb kai uen ngadu', kai ngua' dengan bala luk do'. Kai mepad kudeng arap bang tana' ini idi luk melutak siren lemulun.

¹⁴Ui ngayud ini baken pad ngigu' nemuyuh, iamo' pad mada' nemuyuh mepad kudeng anak-anak luk inanku mawa.

¹⁵Ngaceku sagan pana' muyuh inan pulu' ngeribu guru bang Keristus, iamo' muyuh na mula' taman. Ngaceku bang Keristus Yésus ui ini pangeh nenganak nemuyuh dengan Bala luk Do' ineh.

¹⁶Ngaceku ineh ui mutuh nemuyuh maya' lawéku.

¹⁷Idi ini punneh ui nengecuk Timotius amé' nemuyuh, ieh ineh anakku luk inanku mawa idi luk lutep bang Tuhan. Ieh miak mada' nemuyuh ratnan amung-amung dalanku bang Keristus, mepad kudeng luk bida'ku iapeh-iapeh pana' bang anid-anid sidang.

¹⁸Inan tuda'-tuda' lemulun luk medita' niat, terawédeh na ui mekuu' macing nemuyuh.

¹⁹Iamo' kudeng pian Tuhan, ui sikal macing nemuyuh dengan mesaget. Idi ui miak kali' luk miak ruen lemulun luk medita' niat ineh, baken luk miak beléndeh mo'.

²⁰Ngaceku Imet Allah ineh baken ratnan bala mo', iamo' ratnan lalud.

²¹Anunké pian muyuh? Do'ké ui macing nemuyuh dengan nguit ué', kian dengan awa idi niat luk mebeneh lek?

1 Korintus 5

¹Matu inan bala rat arang muyuh inan pasét, idi sebuleng sét luk kudeng ineh na nekali', sagan pana' rat arang lun na manu pana', pad seburur anak nengalap awan tamanneh.

²Ngudehké muyuh medita' niat? Petulu muyuh mesusa' niat, pad lemulun luk nenganau' kekamen ineh talan rat arang muyuh.

³Sagan pana' bururku mado rat nemuyuh, iamo' rohku muneng, mepad kudeng ui sebuleng idi dengan muyuh, idi bang ngadan Tuhan tau Yésus, ui

pangeh nenganau' temina' ukum kuan lemulun luk nenganau' kekamen luk dat ineh.

⁴Kareb tau mepamung bang roh, ieh ineh muyuh pad-pad denganku dengan lalud Yésus Tuhan tau,

⁵do' muyuh maré lemulun ineh kuan Sétan pad ngaté pinian bururneh, pad rohneh miak uen ngulun kareb Aco Tuhan Yésus ineh.

⁶Na petulu muyuh ineh medita' niat. Naké muyuh kali' idi lamud luk sesuut ineh ngelamud amung-amung tebalu' banak ineh?

⁷Nala' lamud luk mon ineh pad muyuh mangun ku setebalu' luk mabaruh, ngaceku muyuh kali' rungen na mepuar ku lamud. Ngaceku Anak Dumba Paska tau, ieh ineh Keristus, pangeh kirat.

⁸Ngaceku ineh do' tau ngerayeh irau ineh, baken dengan lamud luk mon, idi baken dengan lamud sala' idi dat, iamo' dengan ruti luk na linamud, ieh ineh dengan niat luk mesiri idi luk matu.

⁹Bang surat luk inayudku kuan muyuh ui nemutih nemuyuh aleg perurum dengan lun luk pasét.

¹⁰Ilungneh, baken na tu-tu perurum dengan lun luk pasét, lun luk melili idi luk muyok, idi luk sembayang inan akang. Kudeng pieh kudeng ineh na miak na muyuh remuat rat bang tana' ini.

¹¹Ilung balaku, ieh ineh, aleg perurum dengan lun luk titen kinanak kudeng ieh pasét, melili, sembayang inan akang, ngedat, mabuk, kian mano lek. Aleg pamung kuman pana' dengan lemulun luk kudeng ineh.

¹²⁻¹³Kudeng apehké ui miak ngukum lemulun luk baken lun sidang? Allah miak ngukum nedeh. Iamo' bakenké muyuh luk petulu ngukum lemulun luk bang sidang muyuh sebuleng? Maya' kudeng luk inayud, "Do' matad lemulun luk dat ineh rat arang muyuh."

1 Korintus 6

- ¹Kudeng idé lemulun rat arang muyuh inan adu' nelun manu, ngudehké ieh amé' besara' pa kiung lun luk na manu, idi baken pa kiung lun manu?
- ²Naké muyuh kali' idi tana' ini miak kumin lun manu? Idi kudeng tana' ini kumin muyuh, naké muyuh miak mutut besara' luk isuut ineh?
- ³Naké muyuh kali' idi tau miak ngukum melaikat? Meluun teh, besara' ratnan ulun tana' ini!
- ⁴Kudeng muyuh inan besara' luk kudeng ineh, miakké muyuh ngecuk lemulun luk baken lun sidang mutut besara' muyuh ineh?
- ⁵Ui mala ini pad muyuh kali' migu'. Naké seburur rat arang muyuh luk mileh, luk miak mutut besara' arang kinanak-kinanakneh?
- ⁶Iamo' muyuh nima' kinanak amé' besara' denan kinanak baken, meluun teh pa kiung lun luk na manu.
- ⁷Setuneh kedaluh ini arang muyuh ngegala' laya' muyuh. Naké meluun do' muyuh tuman ratnan dereh idi buyok?
- ⁸Iamo' muyuh sebuleng nganau' sala' idi muyok, meluun teh pa kiung kinanak-kinanak muyuh pana'!
- ⁹Naké muyuh kali' idi lemulun luk na matu na miak ngalap Imet Allah? Aleg muyuh uen ngeraruh. Lun mesawa', lun sembayang inan akang, lun pasét, deléi dengan deléi luk nganau' kekamen luk dat,
- ¹⁰lun mano, lun luk melili, lun mabuk, lun luk ngedat, idi lun muyok — na miak ngalap babpat bang Imet Allah!
- ¹¹Kudeng ineh teh ulun sebuang muyuh atun, iamo' muyuh pangeh biru' ratnan sala', muyuh pangeh linigan kuan Allah, muyuh pangeh inau' matu pa kiung Allah bang ngadan Tuhan Yésus Keristus idi bang Roh Allah tau.
- ¹²Inan luk pebala, "Ui miak nganau' anun-anun luk pianku." Matu! Iamo' baken amung ineh inan ulek kuanmu. Ui pana' miak pebala, "Ui miak nganau' anun-anun luk pianku." Iamo' ui ini na sikal mangun ku demulun anun-anun pana'.

¹³Inan teh luk pebala, "Akan ineh kuan batek, idi batek ineh kuan akan." Matu! Iamo' dueh-duehneh ineh miak uen Allah ngusag. Iamo' burur ineh baken kuan pasét, iamo' kuan Tuhan, idi Tuhan ineh kuan burur.

¹⁴Allah pangeh nenui Tuhan ineh ratnan até, idi sikal nui netau teh dengan laludNeh.

¹⁵Muyuh kali' idi burur muyuh ini babpat Keristus. Miakké ui ngalap aceh babpat Keristus ineh idi nganau' neneh ku babpat decur luk mesawa'? Na tu-tu!

¹⁶Naké muyuh kali' idi luk pamung nan decur luk mesawa' mangun ku sebuleng burur denganneh? Ngaceku kebala Tuhan, "Idi didueh ineh miak mangun ku sebuleng burur."

¹⁷Iamo' lemulun luk perurum dengan Tuhan mangun ku sebuleng roh denganNeh.

¹⁸Ngado burur muyuh ratnan pasét! Anid-anid sala' baken luk inau' lemulun, ieh ineh baken ratnan bururneh. Iamo' lemulun luk pasét ineh, ieh ineh mesala' kuan bururneh sebuleng.

¹⁹Naké muyuh kali' idi burur muyuh ineh ruma' Roh Meligan luk tudo bang nemuyuh, luk muyuh pangeh nengalap ratnan Allah? Burur muyuh ineh baken muyuh kuan.

²⁰Muyuh pangeh bilih dengan raga luk mikat. Ngaceku ineh do' muyuh ngerayeh Allah dengan burur muyuh.

1 Korintus 7

¹Idi ratnan amung-amung luk inayud muyuh bang surat muyuh ineh, idi do' deléi aleg perurum dengan decur.

²Iamo' ngaceku ratnan pasét, idi do' anid-anid deléi ngalap awanneh sebuleng, idi anid-anid decur ngalap awanneh sebuleng.

³Idi do' deléi luk inan awan ineh nganau luk petulu kuan decurneh, kudeng ineh teh decur luk inan awan ineh kuan deléineh.

⁴Idi decur luk inan awan ineh na miak ngimet bururneh sebuleng, iamo' deléi ineh. Kudeng ineh teh deléi luk inan awan ineh na miak ngimet bururneh sebuleng, iamo' decur ineh.

⁵Aleg mebpeng seburur inan seburur, iamo' dengan pian anid-anid kuan segageh mo', pad muyuh miak sembayang idi mucu miak pamung teh, pelé muyuh na tetunin Sétan, ngaceku muyuh na miak ngimet burur muyuh sebuleng.

⁶Iamo' balaku ini baken ukum, iamo' bada' mo'.

⁷Setuneh ui pian kudeng muyuh mepad kudeng ui ini. Iamo' anid-anid burur miak ngalap baréneh ratnan Allah, ieh ineh seburur kudeng ini, idi seburur kudeng ineh.

⁸Iamo' kuan lun anak adi' idi kuan lun tinula' ui sikal mala, idi do' ideh mulun kudeng ui ini teh.

⁹Iamo' kudeng ideh na miak ngimet bururdeh, nima' nedeh ngaweh, ngaceku meluun do' ngaweh ratnan medereh ku lilideh.

¹⁰Iamo' kuan lemulun luk pangeh nengaweh ineh ui ngecuk (ieh ineh baken ui ini iamo' Tuhan), idi aleg decur ineh patad ratnan awanneh,

¹¹(iamo' kudeng ieh pangeh nepatad, idi do' ieh kudeng anak adi' raked-raked, kudeng na ieh pedo' dengan deléineh)--idi aleg deléi ineh ngelagkan decurneh.

¹²Idi kuan lemulun luk baken ineh ui ini luk pebala (idi baken Tuhan), idi kudeng idé lun kinanak luk inan awan luk na manu, idi decur ineh sikal tudo denganneh, idi aleg deléi ineh ngelagkan neneh.

¹³Idi decur luk inan awan luk na manu, idi deléi ineh sikal tudo denganneh, idi aleg decur ineh ngelagkan neneh.

¹⁴Ngaceku deléi luk na manu ineh linigan bang decurneh, idi decur luk na manu ineh linigan bang awanneh. Kudeng na pieh kudeng ineh, kali' rungen anak-anak muyuh ineh melutak, iamo' nekini ideh meligan peh.

¹⁵Iamo' kudeng lemulun luk na manu ineh pian patad, nima' neneh patad. Idi kinanak deléi idi kinanak decur ineh na inabet teh bang anun-anun luk kudeng ineh. Iamo' muyuh pangeh tinawar Allah mulun dengan pedo'

¹⁶O decur luk inan awan, kudeng apehké iko kali' kudeng iko miak ngulun awanmu? O déléi luk inan awan, kudeng apehké iko kali' kudeng iko miak ngulun awanmu?

¹⁷Do' anid-anid burur mulun maya' baré Tuhan neneh, mepad kudeng ulunneh kareb ieh tinawar Allah. Ini bada'ku bang amung-amung sidang.

¹⁸Kudeng selemulun tinawar kareb pangeh sinudat, aleg nutun nala' tanu' sunatneh. Idi kudeng selemulun tinawar kareb nateh ieh sinunat, aleg ieh uen nunat.

¹⁹Ngaceku sunat idi na sunat pana' nateh ulekneh. Luk inan ulek, ieh ineh maya' ukum Allah.

²⁰Do' anid-anid burur lutep bang ulun luk inanneh tinawar Allah.

²¹Kudeng iko demulun kareb iko tinawar, aleg iko mesusa'. Iamo' kudeng iko miak puatin, meluun do' puatin.

²²Ngaceku seburur demulun luk tinawar Tuhan, ieh ineh lun pinuit Tuhan; kudeng ineh teh lun luk baken demulun luk tinawar Keristus, ieh ineh demulun Keristus.

²³Allah pangeh nemelih nemuyuh. Ngaceku ineh aleg muyuh mangun ku demulun lemulun.

²⁴O kinanak-kinanakku, do' anid-anid burur perurum dengan Allah bang ulun luk inanneh tinawar atun.

²⁵Idi ratnan anak-anak luk pun mebaruh, na bala Tuhan negku. Iamo' ui maré pinianku kudeng lemulun luk lutep ngaceku ratnan éi' Tuhan.

²⁶Idi ui ngerawé, ngaceku ratnan susa' luk nekini, do' lemulun lutep bang ulun luk inanneh pekalai nekini.

²⁷Kudeng iko inan decur, aleg iko patad rat neneh. Kudeng iko nateh nengaweh, aleg nakap awan.

²⁸Iamo kudeng iko ngaweh, na iko mesala', idi kudeng seburur anak decur luk pun mebaruh ngaweh, na ieh mesala'. Iamo' lemulun luk kudeng ineh miak ngalap susa' bang tana' ini. Idi ui ini méi' nemuyuh.

²⁹Ini ilung balaku, O kinanak-kinanakku, idi na kareb luk mekadang peh. Ngaceku ineh rat pad kareb ini nima' lemulun luk inan awan ineh mulun mepad kudeng lemulun luk na awan;

³⁰idi lemulun luk nangi' mepad kudeng lemulun luk na nangi', lemulun luk meriruh, mepad kudeng lemulun luk na mawang niat, lemulun luk pebelih, mepad kudeng lemulun luk na binaweh;

³¹idi lemulun luk makai tana' ini, mepad kudeng lemulun luk na makai ineh; ngaceku ayu tana' ini miak metutu'.

³²Iamo' pianku, aleg muyuh merapang, Lemulun luk na awan ineh meluun ngerawé ratnan kekamen Tuhan, ngaceku ieh sikal maya' pian Tuhan.

³³Iamo' lemulun luk inan awang ngerawé ratnan ulun tana' ini, ngaceku ieh sikal maya' pian awanneh,

³⁴idi niatneh perapid. Idi decur luk na awan ineh idi anak decur luk pun mebaruh pana' ngerawé ratnan kekamen Tuhan, ngaceku ieh pian uen ngeligan bang bururneh idi rohneh pana'. Iamo' decur luk inan awan ineh, ngerawé ratnan ulun tana' ini, ngaceku ieh sikal maya' pian awanneh.

³⁵Ui pebala kudeng ini ngaceku ui pian ngedengan nemuyuh. Na ui sikal ngabet nemuyuh. Iamo' ui pian pad muyuh nganau' luk matu idi luk petulu, idi pad muyuh lutep ngakem kuan Tuhan dengan amung niat muyuh.

³⁶Iamo' kudeng selemulun ngerawé na do' luk inau'neh kuan tudukneh, idi kudeng ieh pangeh rayeh, idi kudeng na miak tuman, nima' neneh nganau' luk pianneh, na ieh mesala', idi miak didueh ineh paweh.

³⁷Iamo' idé luk lutep niatneh dengan na sinaad, iamo' miak tuman na ngaweh, idi pangeh nengelelep niatneh na ngalap tudukneh ineh, idi kekammeneh ineh do' teh.

³⁸Ngaceku ineh lemulun luk ngaweh tudukneh nganau' luk do', idi lemulun luk na ngaweh neneh nganau' luk meluun do' teh.

³⁹Idi decur luk inan awan inabet kuan deléineh kareb awanneh ineh mulun; iamo' kudeng awanneh maté, idi ieh mepuit pad miak paweh dengan idé-idé luk pianneh, iamo' bang Tuhan mo'.

⁴⁰Iamo' ui ngerawé meluun do' kuanneh kudeng ieh na awan baruh. Ineh maya' terawéku, idi ui teh inan Roh Allah.

1 Korintus 8

¹Idi ratnan akan luk biré inan akang, idi tauh kali' idi "tau amung-amung inan ileh." Idi "ileh" ineh ngerayeh burur néi' sebuleng, iamo' awa ineh ngepicet niat.

²Kudeng lemulun ngerawé bururneh kali' ratnan anun-anun setuneh luk kali'neh ineh na meriput.

³Iamo' kudeng idé lemulun luk mawa inan Allah, ieh ineh luk inisi Allah.

⁴Ratnan kuman luk kenen luk biré inan akang ineh, tau kali' idi na luk idi akang luk inan ulun bang tana' ini, idi teh na luk idi Allah baken iamo' luk Sebuleng ineh mo'.

⁵Ngaceku kudeng inan luk titen "allah-allah" pana', do bang langit idi bang tana', idi sagan pana' inan mula' luk titen "Allah" idi "lalud",

⁶iamo' kuan tau inan Sebuleng mo', ieh ineh Allah Taman, idi luk amung-amung rat Neneh mo' punneh, idi tau pana' kuanNeh, idi Tuhan pana' Sebuleng teh, ieh ineh Yésus Keristus, ngaceku luk amung-amung rat Neneh punneh, idi tau pana' mulun rat Neneh teh.

⁷Iamo' baken amung-amung lemulun kali' ini. Idi inan tuda'-tuda' lemulun luk macing nekini pekalai nan akang. Ideh kuman luk pangeh biré inan akang, pad teruayen niatdeh melaya' idi melutak.

⁸Setuneh akan na nguit netau meluun muneng inan Allah. Kudeng tau na kuman tu pana; nateh rugi' tau, idi kudeng tau kuman pana', nateh taduk tau.

⁹Matar do'-do', pad puit muyuh ineh na ngacing sabeng kuan lemulun luk melaya' anu, pad ideh nganau' sala'.

¹⁰Ngaceku kudeng selemulun luk melaya' anuneh nier namu luk inan "ileh" ineh tudo kuman bang ruma' akang, naké ieh mekuu' kuman akan luk biré inan akang ineh?

¹¹Dengan luk kudeng ineh "ilehmu" ineh ngesabeng kinanakmu luk melaya' anu ineh, pad ieh meraruh. Idi Keristus naté kuanneh teh.

¹²Dengan luk kudeng ini muyuh mesala' pa kiung Keristus, ngaceku muyuh mesala' pa kiung kinanak-kinanak ineh idi ngurat teruayen niatdeh luk melaya'.

¹³Kudeng akan ngacing sabeng kuan kinanakku ineh pad ieh mesala', na tu-tu sikal kuman uang pung, pad ui na ngacing sabeng kuan kinanakku.

1 Korintus 9

¹Bakenké ui mepuit? Bakenké ui ini rasul? Bakenké ui pangeh nenier Yésus Tuhan tau? Bakenké muyuh ini mangun ku bua' kekamenku bang Tuhan?

²Sagan pana' lun baken na ngamo negku rasul, iamo' pa kiung muyuh ui rasul. Ngaceku muyuh luk etu kekamenku bang Tuhan ratnan ui ini rasul.

³Kudeng lemulun ngesala' negku, ini orku:

⁴Naké ui miak kuman idi ngirup?

⁵Naké ui miak nguit denganku aceh awan luk manu, mepad kudeng rasul-rasul baken, idi kinanak-kinanak Tuhan, idi Pétrus?

⁶Kian, ui dengan Barnabas mo' luk na miak ucu' ratnan kekamen ticu'ké?

⁷Idéké mangun ku lun pebunu' idi tuman ngalap akan idi ayungneh sebuleng? Idi idéké luk nganau' kabun anggur idi luk na miak kuman bua'-bua'neh? Idi idéké luk matar sengeriudan dumba idi luk na ngirup rataneh ineh?

⁸Amung-amung luk pinginud luk biréku ini ratnan ulun luk pekalai anid-anid aco. Ukum Musa pana' kudeng ineh teh?

⁹Pangeh inayud, "Idi aleg iko ngabet tang sapi' luk uned rumik ineh." Inanké Allah ngerawé sapi' ineh?

¹⁰Naké Ieh pebala ngaceku tau? Matu bala ini pangeh inayud kuan tau. Do' lemulun luk ngeradu idi lemulun luk rumik ineh ngakem dengan merapat miak ngalap babpat uli' ratnan lati'deh.

¹¹Kai nenibu ilung Roh arang muyuh. Sala'ké kudeng kai ngeranih bua' tana' ini rat nemuyuh?

¹²Kudeng lun baken miak ngalap babpat luk kudeng ineh rat nemuyuh, meluun teh kuan kai lek? Iamo' na kai makai lalud ineh, iamo' kai tuman ratnan amung-amung, pad kai na ngesabeng Bala luk Do' ratnan Keristus.

¹³Naké muyuh kali' lemulun luk ngakem bang Ruma' Allah ngalap akan ratnan Ruma' Allah ineh, idi lemulu luk maré baré luun bubpun pana' ngalap babpat ratnan baré ineh?

¹⁴Kudeng ineh teh Tuhan pangeh nengeletap pad lemulun luk mada' Bala luk Do' ngalap akandeh ratnan mada' Bala luk Do' ineh.

¹⁵Iamo' ui na nengalap luk petulu barén kuanku; idi na ui ngayud nekini, pad ui miak ngalap babpat kuan bururku sebuleng. Meluun do' ui maté ratnan seburur mala balaku mo'-mo'.

¹⁶Ui na miak ngedita' bururku ngaceku ui mada' Bala luk Do'. Ngaceku ui icuk mada' ineh. Mesusa' kuanku kudeng ui na mada' Bala luk Do' ineh.

¹⁷Kudeng ui mada' maya' pinianku sebuleng, ui miak merapat ngalap tabpar. Iamo' ngaceku ui mada' Bala luk Do' maya' ecuk Allah, ieh ineh mangun ku aceh kekamen luk biré kuanku.

¹⁸Anunké tabparku? Tabparku, ieh ineh mada' Bala luk Do' ineh dengan na ngalap anun-anun, pad ui na ngalap luk petulu barén kuanku ngaceku mada' Bala luk Do' ineh.

¹⁹Ui baken demulun idé-idé pana', iamo' ui nganau' bururku mangun ku demulun kuan amung-amung lemulun, pad ui miak ngalap mula' lemulun kuan Keristus.

²⁰Idi kuan lun Yahudi ui mangun kudeng lun Yahudi, pad ui miak ngalap lun Yahudi ineh. Idi kuan lemulun luk maya' Ukum Musa, ui mangun kudeng lemulun luk maya' Ukum ineh, sagan pana' ui sebuleng na maya' ineh, pad ui miak ngalap lemulun luk maya' Ukum Musa ineh.

²¹Idi kuan lun pupu baken, ui mangun kudeng lun pupu baken luk na kali' Ukum lun yahudi, pad ui miak ngalap lun pupu baken. Baken ilungneh ui na maya' ukum Allah. Setuneh ui maya' ukum Keristus.

²²Arang lemulun luk melaya' anu ui mangun' kudeng ideh teh, pad ui miak ngalap nedeh. Ui mangun ku anun-anun kuan amung-amung lemulun pad ui miak ngulun sebuang rat arangdeh maya' dalam anun-anun pana'.

²³Amung-amung ineh ui nganau' ngaceku Bala luk Do' ineh, pad ui ngalap babpat bang peruanneh.

²⁴Muyuh kali', idi su luk inan peribatun ineh, amung-amungdeh upun, iamo' seburur mo' luk meluun awer? Idi do' muyuh upun mepad kudeng ineh, pad muyuh meluun awer.

²⁵Anid-anid burur lemulun luk sikal metueh bang rot ineh megéi' maya' bebpeng lun luk marot. Ideh sikal ngalap aceh pata luk miak merapuk, iamo' tau ini sikal ngalap sebuleng pata luk na miak merapuk.

²⁶Ngaceku ineh ui ini upun pad ui meluun awer, baken dengan na ulek. Kudeng ineh teh kareb ui pebukut, baken kudeng mukut bui.

²⁷Ui ngerumu' bururku, pad ui nganau' neneh ku demulun, pelé ui luk nemada' nelun baken ineh na miak talan.

1 Korintus 10

¹Ui pian nemuyuh ngerawé, O kinanak-kinanaku, luk mangun kuan tepun tau luk maya' ni Musa. Ideh pa liang laput, idi amung-amungdeh ineh neguta abpa' rayeh.

²Amung-amungdeh pangeh rireb bang laput idi bang abpa' rayeh, pad mangun ku anak itin Musa.

³Amung-amungdeh nekuman ruti ratnan Roh luk mepad mo',

⁴idi nengirup luk rupen ratnan Roh luk mepad mo'. Ngaceku ideh pangeh nengirup ratnan batu luk ratnan Roh luk nemaya' nedeh ineh, idi batu ineh Keristus.

⁵Iamo' mula' rat arangdeh na petulu pa kiung Allah. Ngaceku ineh ideh naté déi' su luk ali-ali.

⁶Amung-amung ineh mangun ku luk pinginud kuan tau, pad tau na melili ku luk dat, kudeng lemulun ineh.

⁷Aleg muyuh sembayang inan akang, mepad kudeng tuda'-tuda' rat arangdeh ineh. Ngaceku pangeh inayud, "Idi pupu ineh paneh netudo kuman idi ngirup, idi ngalai."

⁸Aleg tau pasét, kudeng luk inau' tuda'-tuda' rat arangdeh ineh, pad bang seaco dueh ngepulu' teluh ngeribu burur naté.

⁹Idi aleg tau nutun Tuhan, mepad kudeng tuda'-tuda' rat arangdeh ineh pad ideh naté tinicuk menipeh.

¹⁰Idi teh aleg muyuh dureng-dureng, mepad kudeng tuda'-tuda' rat arangdeh, pad ideh pinaté melaikat luk ngaté.

¹¹Amung ini mangun kuandeh mangun ku luk pinginud kuan lun baken, idi amung ini pangeh inayud mangun ku bada' kuan tau. Ngaceku tau mulun kareb malé kekipedneh.

¹²Idé-idé luk ngerawé bururneh tuped meraben, do' ieh matar pad ieh na mebpeh.

¹³Anid-anid tutun luk pekalai inan lemulun mo' pangeh nacing nemuyuh. Iamo Allah ineh lutep maya' jani', idi na Ieh nima' nemuyuh tetunin meluun ratnan tueh muyuh, iamo' dengan tutun ineh Ieh sikal nganau' aceh dalam mepuit, pad muyuh miak tuman.

¹⁴Ngaceku ineh, O amung-amung luk inanku mawa, ngado burur muyuh ratnan sembayang inan akang.

¹⁵Ui pebala nemuyuh mepad kudeng lun luk mileh. Do' muyuh sebuleng maad balaku ini.

¹⁶Tau maré ubur kuan Allah ngaceku sangkir peruan ineh. Idi kareb tau ngirup ratnan sangkir ineh, naké tau ngalap babpat bang dara' Keristus? Idi kareb tau kuman ruti luk pinuri' tau ineh, naké tau ngalap babpat bang burur Keristus?

¹⁷Ngaceku ruti luk sebalad ineh, kudeng ineh teh tau luk mula' ini mangun ku sebuleng burur, ngaceku amung-amung tau nekuman ratnan ruti luk sebalad ineh.

¹⁸Ngerawé lun Iberani. Lemulun luk kuman luk biré luun bubpun ineh ngalap babpat ratnan kekamen ngasa' bubpun ineh.

¹⁹Anunké ilung balaku? Akang idi akan luk biré inan akang ineh inan ilungké?

²⁰Na! Ilung balaku, ieh ineh anun-anun luk biré luun bubpun akang ineh, baken biré kuan Allah, iamo' kuan ada'. Idi ui na sikal nemuyuh perurum dengan ada' ineh.

²¹Muyuh na miak ngirup ratnan sangkir Tuhan idi ratnan sangkir ada'. Idi muyuh na miak ngalap babpat ratnan téng Tuhan idi ratnan téng ada' ineh.

²²Pianké tau ku Tuhan temaruh? Inanké tau ngerawé netau meluun tueh ratnan Tuhan?

²³Inan luk pebala, "Ui miak nganau' anun-anun luk pianku." Matu! Iamo' baken amung-amung ineh inan ulek kuanmu. "Kai miak nganau' anun-anun." Iamo' baken amung-amung ineh inan ulek.

²⁴Idi aleg seburur lemulun pana' nakap peruanneh sebuleng, iamo' do' ngerawé lun baken.

²⁵Idi uang pung luk pisuen déi' kadai, miak kenen muyuh dengan na ngitun, pad teruayen niat muyuh na mesala'.

²⁶Ngaceku kebala Tuhan, "Tana' ini idi amung uangneh, ieh ineh Tuhan kuan."

²⁷Kudeng seburur lun na manu nawar nemuyuh kuman idi muyuh sikal amé', kenen muyuh anun-anun luk inau' kuan muyuh dengan na ngitun pad teruayen niat muyuh na mesala'.

²⁸Iamo' kudeng selemulun pebala kuan muyuh, "Akan ini pangeh biré inan akang," aleg muyuh kuman ineh, pad na ngesabeng lemulun ineh, idi teruayen niat.

²⁹(Baken ngaceku teruayen niat muyuh sebuleng, iamo' pad teruayen niat lun baken ineh na mesala'.) Kian inan luk pebala lek, "Ngudehké puitku ineh kumin ngaceku ratnan teruayen niat lun baken?"

³⁰Kudeng ui maré ubur kuan Allah ngaceku akanku, ngudehké ui uen lemulun ngesala', ngaceku ui pangeh nemaré ubur kuan Allah ngaceku akan ineh."

³¹Anun-anun luk ruen muyuh, do' kuman idi ngirup pana', do' muyuh nganau' amung ineh pad ngerayeh Allah.

³²Aleg muyuh ngacing sabeng kuan lun Yahudi idi lun pupu baken idi kuan sidang Allah pana'.

³³Do' maya' ulunku! Bang anun-anun luk ruenku, ui nutun ngawang niat lun mula! Na ui nakap luk do' kuanku sebuleng, iamo' ui ngerawé lun baken, pad ideh miak uen ngulun.

1 Korintus 11

- ¹Do' muyuh maya' ulunku, kudeng ui pana' maya' ulun Keristus
- ²Ui ngubur nemuyuh ngaceku muyuh megéi ngerawé idi maya' bada' luk biréku nemuyuh.
- ³Iamo' ui sikal nemuyuh kali', idi luk ngimet anid-anid burur deléi, Ieh ineh Keristus, idi luk ngimet decur, ieh ineh deléi, idi luk ngimet Keristus ineh, Ieh ineh Allah.
- ⁴Idi anid-anid deléi luk sembayang idi luk mada' dengan ngebpu uluhneh ngigu' Keristus,
- ⁵iamo' anid-anid decur luk sembayang idi mada' luk biré Allah dengan na ngebpu uluhneh ngigu' awanneh. Ieh mepad kudeng seburur decur luk kiniki.
- ⁶Kudeng seburur decur na ngebpu uluhneh, nima' abpukneh uen muting teh. Iamo' ngaceku na petulu kuan decur ngiki uluhneh idi muting abpukneh, nima' neneh ngebpu uluhneh.
- ⁷Na do' deléi ngebpu uluhneh, ngaceku ieh pinginud ayu idi rayeh Allah. Iamo' decur ineh pinginud rayeh lun deléi.
- ⁸Ngaceku deléi ineh baken punneh ratnan decur, iamo' decur ineh ratnan deléi punneh.
- ⁹Idi deléi ineh baken pinudut ngaceku decur, iamo' decur ineh pinudut ngaceku deléi.
- ¹⁰Ngaceku ratnan amung-amung melaikat, do' decur nganau' luun uluhneh aceh tanu' ieh liang imet awanneh.
- ¹¹Iamo' bang ulun tau bang Tuhan, na luk idi decur dengan na deléi, idi na luk idi deléi dengan na decur.
- ¹²Ngaceku mepad kudeng decur ineh ratnan deléi punneh, kudeng ineh teh deléi tinganak ratnan decur; iamo' amung-amung ineh ratnan Allah.
- ¹³Do' muyuh ngerawé, petuluké seburur decur sembayang inan Allah arang lun mula', dengan na ebpu uluh?

- ¹⁴Naké pekalai kudeng seburur deléi inan abpuk mekadang, ineh mangun ku igu' kuanneh?
- ¹⁵Iamo' kudeng decur inan abpuk mekadang ineh mangun ku rayeh kuanneh. Ngaceku abpukneh ineh biré kuanneh mangun ku ebpuneh.
- ¹⁶Kudeng inan lemulun pesaad ratnan ineh, idi kai pebala, "Ini adat bang sidang kai, idi amung-amung sidang Allah pana'."
- ¹⁷Maya' kudeng bada' ini, ui na ngubur nemuyuh, ngaceku tebubpun muyuh na ngacing luk do', iamo' ngacing luk dat.
- ¹⁸Pun-pun ui ninger, kareb muyuh tebubpun bang sidang, inan tuda'-tuda' kedaluh arang muyuh, idi lélé ui manu ku ineh.
- ¹⁹Na miak na inan babpat arang muyuh, pad lemulun luk matu ineh megala' siren muyuh.
- ²⁰Kareb muyuh tebubpun, setuneh baken Irau Tuhan luk kenen muyuh.
- ²¹Ngaceku bang irau ineh anid-anid burur singaro kuman luk kenneh sebuleng, pad inan luk melau idi inan luk mabuk teh.
- ²²Naké ruma' luk inan muyuh kuman idi ngirup? Ngudehké muyuh ngedat sidang Allah idi ngigu' lemulun luk masi'? Anunké luk miak belénku nemuyuh? Miakké ui ngubur nemuyuh? Na tu-tu! Ui na ngubur nemuyuh.
- ²³Ngaceku ui nengalap ratnan Tuhan bada' luk biréku nemuyuh: ieh ineh kareb malem luk inan Tuhan Yésus pinasui, idi Ieh nengalap ruti,
- ²⁴idi pangeh Ieh nemaré ubur, idi Ieh nemuri' ruti, kebalaNeh, "Ini bururKu luk biré ngaceku muyuh. Nganau' kudeng ini mangun ku aceh terawé ratnan Ui."
- ²⁵Kudeng ineh teh kareb pangeh nekuman, idi Ieh nengalap sangkir, kebalaNeh, "Sangkir ini, ieh ineh pejani' Allah luk mebaruh luk itu ku dara'Ku. Anid-anid kareb muyuh ngirup, nganau' kudeng ineh mangun ku aceh terawé ratnan Ui."

²⁶Ngaceku tuda'-tuda' kua' muyuh kuman ruti ini idi ngirup ratnan sangkir ini, muyuh mada' até Tuhan pad Ieh macing.

²⁷Ngaceku ineh idé-idé luk kuman ruti ineh, idi ngirup ratnan sangkir Tuhan ineh dengan na mayu, idi ieh mesala' kuan burur Tuhan idi dara'Neh teh.

²⁸Iamo' do' lemulun ngerawé ulunneh sebuleng, idi pangeh ineh do' ieh kuman ruti idi ngirup ratnan sangkir ineh.

²⁹Ngaceku lemulun luk kuman idi ngirup dengan na ngerawé burur Tuhan, idi ieh kuman idi ngirup aceh ukum kuan bururneh sebuleng.

³⁰Idi ini punneh mula' rat arang muyuh luk melaya' idi mét, idi inan teh luk pangeh naté.

³¹Kudeng tau ngerawé ulun tau sebuleng atun, na tau miak kumin Allah.

³²Iamo' kudeng tau kumin, idi tau badén Tuhan dengan ukum, pad tau na mekaneh ukum pad-pad dengan tana' ini.

³³Ngaceku ineh, O kinanak-kinanakku, kareb muyuh pamung kuman Irau Tuhan, do' muyuh nganét nelun baken.

³⁴Kudeng inan seburur luk melau, nima' neneh kuman bang ruma'neh, pad kareb muyuh tebubpun, muyuh na kumin Allah. Ratnan luk baken-baken ineh ui sikal ngegala' kareb ui macing.

1 Korintus 12

¹O kinanak-kinanakku, ratnan baré-baré luk ratnan Roh Meligan, ui sikal nemuyuh kali' luk matu.

²Muyuh kali' kareb muyuh na manu, muyuh pangeh rinuid kuan akang luk na niat ineh, luk megéi ngeraruh nemuyuh.

³Petulu muyuh kali, idi seburur pana' luk kinuyut Roh Allah, na miak pebala, "Yésus ineh kidiman!" Idi seburur pana' na miak mala, "Yésus ineh Tuhan," kudeng ieh na kinuyut Roh Meligan.

⁴Inan tuda'-tuda' baré Roh, iamo' amung ineh biré Roh luk sebuleng ineh.

- ⁵Inan tuda'-tuda' kekamen ngasa', iamo amung ineh biré Tuhan luk sebuleng ineh.
- ⁶Idi inan tuda'-tuda' kekamen luk melalud, iamo' lalud ineh biré Allah luk sebuleng ineh kuan amung lemulun.
- ⁷Iamo' tanu' ratnan Roh ineh biré kuan anid-anid burur, pad ngacing do' kuan amung-amung.
- ⁸Kuan seburur, Roh maré bala ileh; idi kuan lun baken, bala kali' barén Roh ineh teh.
- ⁹Kuan seburur, Roh ineh maré anu, idi kuan lun baken, Roh luk sebuleng ineh maré baré ngedo' lun mét.
- ¹⁰Kuan seburur, Roh maré baré nganau' kekamen luk melalud, idi kuan lun baken, baré mada' luk biré Allah, idi kuan lun baken Ieh maré ileh ngiti baré luk ratnan Roh, idi baré luk baken ratnan Roh. Kuan lun baken Ieh maré buri' luk ratnan Roh, idi kuan lun baken ileh ngelio ilung buri' ineh.
- ¹¹Iamo' amung-amung ineh kekamen Roh luk sebuleng ineh teh. Ieh maré kuan anid-anid burur, maya' pianNeh sebuleng.
- ¹²Keristus ineh mepad kudeng sebuleng burur luk mula' babpat. Sagan pana' mula' babpat, iamo' Ieh ineh sebuleng burur.
- ¹³Kudeng ineh teh amung-amung tau, do' lun Yahudi idi lun pupu baken, do' demulun idi lun luk baken demulun, pangeh rireb mangun ku sebuleng burur, idi amung-amung tau pangeh ngirup ratnan Roh luk sebuleng ineh luk inutang kuan tau.
- ¹⁴Ngaceku burur ineh pana' baken sebuleng babpatneh, iamo' mula'.
- ¹⁵Kudeng kukud pebala, "Ngaceku ui baken ticu', na ui aceh babpat ratnan burur," idi baken ngaceku bala ineh kukud ineh na aceh babpat ratnan burur.
- ¹⁶Idi kudeng lalid pebala, "Ngaceku ui baken mateh, na ui aceh babpat ratnan burur," idi baken ngaceku bala ineh lalid ineh na aceh babpat ratnan burur.

- ¹⁷Kudeng amung burur ineh mangun ku mateh, su apehké luk ninger ineh? Idi kudeng amungneh ineh mangun ku luk ninger, su apehké luk muen ineh?
- ¹⁸Iamo' Allah pangeh nemudut anid-anid babpat burur maya' pianNeh sebuleng.
- ¹⁹Kudeng amung-amungdeh ineh mangun ku sebuleng babpat, su apehké burur ineh?
- ²⁰Sagan pana' babpat ineh mula', iamo' burur ineh sebuleng mo'.
- ²¹Idi mateh na miak pebala inan ticu', "Iko na ulek kuanku." Idi uluh na miak pebala inan kukud, "Medueh na ulek kuanku."
- ²²Idi teh amung-amung babpat burur luk ayuneh pelaba laya', ieh ineh meluun rayeh ulek.
- ²³Idi babpat burur luk uen tau ngerawé na buren, ruen tau ngasa' do'-do'. Idi babpat tau luk na do' ayu ineh uen tau ngayung ku ayung luk do'.
- ²⁴Iamo' babpat tau luk do' ayu na ulek ku ayung ineh. Allah pangeh nemudut burur ineh dengan maré meluun mula' ubur kuan babpat luk na do' ayu ineh.
- ²⁵Idi na luk idi dat ruruh bang burur, iamo' amung-amung babpat ineh pad-pad pasa'.
- ²⁶Kudeng sebuleng babpat ineh mét, idi amung-amung babpat ineh pana' mét teh. Idi kudeng sebuleng babpat buren, idi amung-amung babpat ineh pana' mawang niat peh.
- ²⁷Idi muyuh ini burur Keristus, idi amung-amung muyuh babpatNeh.
- ²⁸Allah pangeh nengelelep kekamen bang sidangNeh: luk pun-pun rasul-rasul, luk kedueh nabi-nabi, luk keteluh guru-guru, idi luk mucu lun luk nganau' kekamen luk melalud, idi luk mucu teh lun luk inan baré ngedo' lun mét, lun luk ngedengan, lun luk ngimet, idi lun luk pebala dengan buri' luk ratnan Roh.

²⁹Baken amung-amungdeh rasul. Baken amung-amungdeh nabi. Baken amung-amungdeh guru. Baken amung-amungdeh ineh nganau' kekamen luk melalud.

³⁰Baken amung-amungdeh ngalap lalud ngedo' lemulun. Baken amung-amungdeh pebala dengan buri' ratnan Roh. Baken amung-amungdeh mileh ngelio ilung buri' ineh.

³¹Ngaceku ineh do' muyuh nakap dengan matu amung-amung baré luk meluun rayeh. Idi ui mada' kuan muyuh aceh dalan luk meluun do'.

1 Korintus 13

¹Kudeng ui pebala dengan tuda'-tuda' buri' lemulun idi melaikat pana', iamo' ui na mawa, kali' rungen ui pangeh mangun kudeng aceh tawak luk muni, idi karing luk ngekéng.

²Kudeng ui inan baré mada' luk biré Allah, idi ui inan ileh idi kali' amung-amung luk inalum, idi kudeng ui inan anu luk meriput, pad ui miak mubuh pegkung pana', iamo' kudeng ui na mawa, kali' rungen ui pana' na ulek.

³Kudeng ui maré binawehku nelun masi', idi maré bururku sabpen pana', iamo' kudeng ui na mawa, nateh ulekneh kuanku.

⁴Awa ineh mulai niat idi méi'; awa ineh na temaruh; na ngedita' bururneh sebuleng, na mesido' niat.

⁵Awa ineh na nganau' luk na petulu; na nakap luk kuan bururneh sebuleng; na megateh niat; na ngerawé sala' dulun.

⁶Awa ineh na mawang niat ngaceku ratnan luk dat, iamo' mawang niat ngaceku ratnan luk matu.

⁷Awa ineh tuman ratnan luk amung-amung, anuneh, rapetneh, idi ulai niatneh tuman macing raked-raked.

⁸Awa ineh meruked peh; baré mada' luk biré Allah segageh mo', baré buri' luk ratnan Roh miak milep, idi ileh pana' miak ugka'.

⁹Ngaceku ileh idi bada' luk biré Allah kuan tau na meriput.

¹⁰Iamo' kareb luk meriput ineh macing, idi luk na meriput ineh miak metutu'.

¹¹Kareb ui anak isuut, ui pebala, idi kali', idi ngerawé mepad kudeng anak isuut. Nekini ui pangeh rayeh, idi ui necan amung-amung kekamen anak isuut.

¹²Ngaceku nekini tau nier bang sayun dengan meseraber, iamo' kareb ineh kiung mepapu' dengan kiung. Idi nekini ilehku nateh meriput, iamo' kareb ineh ilehku mangun meriput mepad kudeng ileh Allah ratnan bururku pangeh meriput.

¹³Idi inan anu, rapet, idi awa, luk teluh ini; iamo' ratnan luk teluh ini luk meluun rayeh, ieh ineh awa.

1 Korintus 14

¹Nakap muyuh awa ineh; idi geregan ku baré luk ratnan Roh, iamo' meluun teh pad muyuh miak mada' luk biré Allah.

²Ngaceku lemulun luk pebala dengan buri' luk ratnan Roh, baken pebala kuan lemulun, iamo' kuan Allah, ngaceku seburur pana nateh luk kali' ilungneh, iamo' dengan lalud Roh ieh mala luk inalum.

³Iamo' lemulun luk mada' luk biré Allah ineh, ngacing kuan lemulun bala luk ngubuk, ngelestep, idi ngepicet anu.

⁴Lemulun luk pebala dengan buri' luk ratnan Roh ineh ngepicet anuneh sebuleng, iamo' lemulun luk mada' luk biré Allah ineh ngepicet anu sidang.

⁵Ui pian kudeng amung muyuh pebala dengan buri' luk ratnan Roh, iamo' meluun teh kudeng muyuh mada' luk biré Allah. Ngaceku lemulun luk mada' luk biré Allah ineh meluun rayeh ratnan lemulun luk pebala dengan buri' luk ratnan Roh, kudeng na lemulun bang sidang ineh luk miak ngelio ilung buri' ineh, pad sidang ineh uen ngepicet.

⁶O kinanak-kinanakku, kudeng ui macing nemuyuh idi pebala dengan buri' luk ratnan Roh, anunké ulekneh? Na luk idi anun-anun, kudeng ui na ngacing

kuan muyuh bala luk linio, kian ileh lek, kian bada' luk biré Allah lek, kian bada' lek.

⁷Sagan pana' anun-anun luk na niat, iamo' luk muni, do' suling kian giula' Iek, kudeng unineh mepad, kudeng apehké miak kali' sapeh uni suling, idi sapeh uni giula' ineh?

⁸Idi kudeng uni tawak na megala', idéké miak temina' amé' pebunu'?

⁹Kudeng ineh teh, idéké kali' ilung buri' muyuh ineh, kudeng bala muyuh na megala', ngaceku muyuh pebala dengan buri' luk ratnan Roh? Bala muyuh ineh metutu' arang gawa'.

¹⁰Bang tana' ini inan raput-raput buri', idi sebuleng pana' nateh luk na ilung.

¹¹Kudeng ui na kali' ilung buri' ineh, idi ui mangun ku lun pupu baken kuan lemulun luk makai ineh, idi lemulun luk makai ineh mangun ku lun pupu baken kuanku.

¹²Ngaceku muyuh metueh nakap baré luk ratnan Roh, do' muyuh nutun nakap baré luk ngepicet anu sidang.

¹³Ngaceku ineh, do' lemulun luk pebala dengan buri' luk ratnan Roh ineh sembayang pad ieh miak ngegala' ilung buri' ineh.

¹⁴Ngaceku kudeng ui sembayang dengan buri' luk ratnan Roh, idi rohku sembayang iamo' terawéku na maya' sembayang ineh.

¹⁵Anunké luk ruenku? Ui miak sembayang dengan rohku, idi teh ui miak sembayang dengan terawéku. Ui miak menani dengan rohku, idi teh ui miak menani dengan terawéku.

¹⁶Kareb iko maré ubur dengan roh, kudeng apehké lemulun luk na baré ineh miak pebala "Amin" ratnan bala uburmu, ngaceku ieh na kali' ilung anun luk bilamu.

¹⁷Sagan pana' iko ini maré ubur dengan matu, iamo' anu lun baken na pinicetmu.

¹⁸Ui ngubur Allah, ngaceku ui sebuleng pebala dengan buri' luk ratnan Roh meluun ratnan amung-amung muyuh.

¹⁹Iamo' bang tebubpun ui meluun pian mala limeh bila' bala dengan terawéku, pad ui mada' nelun baken, ratnan pulu' ngeribu bila' bala dengan buri' luk ratnan Roh ineh.

²⁰O kinanak-kinakku, aleg muyuh mepad kudeng anak-anak bang terawé muyuh, iamo' bang luk dat miak muyuh mangun ku anak-anak; iamo' bang terawé muyuh ineh do' muyuh mangun ku lun merar.

²¹Idi bang Surat Allah pangeh inayud, "Kebala Tuhan, Ui sikal pebala kuan pupu ini dengan tang lemulun luk baken buri', idi bibir lun pupu baken. Sagan pana' kudeng ineh, idi nateh ideh sikal ninger balaKu."

²²Ngaceku ineh baré buri' luk ratnan Roh ineh mangun ku aceh tanu', baken kuan lun manu, iamo' kuan lun luk na manu, iamo' baré mada' luk biré Allah ineh mangun ku tanu' kuan lun manu, baken kuan lun luk na manu.

²³Ngaceku ineh, kudeng amung sidang ineh tebubpun, idi amung-amung lun sidang pebala dengan buri' luk ratnan Roh, idi lun baken idi lun luk na manu semuet, naké ideh ngerawé nemuyuh meruden?

²⁴Iamo' kudeng amung muyuh uned mada' luk biré Allah, idi lun luk na manu idi lun baken semuet, idi lemulun ineh miak ninger bada'deh, idi ngerawe sala'neh. Idi ieh miak kumin maya' luk pindengerneh ineh.

²⁵Terawéneh luk inalum bang niatneh miak uen ngegala', pad ieh sikal tekeradung sembayang inan Allah dengan ngamo, "Matu-matu Allah idi arang muyuh!"

²⁶Ngaceku ineh, O kinanak-kinakku, kareb muyuh tebubpun, do' muyuh temina' menani, mada', maré aceh bala luk linio, idi do' temina' makai buri' luk ratnan Roh, idi temina' ngelio ilungneh. Iamo' petulu amung baré ineh ngepicet anu lun sidang.

²⁷Kudeng selemulun pebala dengan buri' luk ratnan Roh, nima' dueh burur, na miak mela ratnan teluh burur, iamo' seburur pesua seburur; idi nima' selemulun mada' ilung bala ineh.

²⁸Iamo' kudeng na lemulun luk miak ngelio ineh, nima' neneh ungeng bang teubupun, idi pebala bang niatneh sebuleng idi inan Allah.

²⁹Nima' dueh teluh burur lemulun luk mada' lu biré Allah ineh pebala, idi lun baken ineh ngiti baladeh.

³⁰Iamo' kudeng inan luk linio Allah kuan seburur luk bang teubupun ineh, do' lemulun luk uned pebala ineh pirud.

³¹Amung-amung muyuh miak pesua mada' luk biré Allah, pad amung lun sidang sibada' idi buken.

³²Petulu baré mada' luk biré Allah bang imet lun luk mada' ineh,

³³ngaceku baken pian Allah tau ngegau teubupun, iamo' pad tau lutep. Mepad kudeng bang amung-amung sidang pupu Allah,

³⁴do' decur-decur pirud bang teubupun. Na ideh uen nima' pebala, iamo' do' ideh mebeneh, maya' kudeng bala Ukum Yahudi teh.

³⁵Kudeng ideh sikal sibada' anun-anun, nima' nedeh ngitun ratnan awandeh sebuleng déi' ruma', ngaceku na petulu decur-decur pebala bang sidang ineh.

³⁶Inanké muyuh ngerawé muyuh lawa bala Allah? Idi kuan muyuh sebulengké bala ini pangeh icing?

³⁷Kudeng idé-idé ngerawé bururneh nabi idi lemulun luk inan Roh, do' ieh kali' inayudku kuan muyuh ineh ukum Tuhan.

³⁸Iamo' kudeng ieh na sikal maya' ineh, aleg muyuh ninger balaneh.

³⁹Ngaceku ineh, O kinanak-kinanakku, do' meké! nakap baré mada' luk biré Allah ineh, idi aleg mebpeng lemulun na pebala dengan buri' luk ratnan Roh.

⁴⁰Iamo' amung-amung ini na miak na ruen dengan matu maya' aturneh.

1 Korintus 15

¹Idi nekini, O kinanak-kinanakku, ui pian ngelio kuan muyuh ratnan Bala luk Do' luk bida'ku atun. Muyuh pangeh nengalap ineh. Idi nekini anu muyuh mepicet ngaceku Bala luk Do' ineh.

²Idi ratnan Bala luk Do' ineh teh muyuh ngalap ulun luk meruked, kudeng muyuh ngimet bala luk bida'ku ineh meraben. Iamo' kudeng anu muyuh ineh mo'-mo' na miak.

³Ui nengacing kuan muyuh luk pangeh ilapku, ieh ineh luk meluun do': ratnan Keristus ineh naté ngaceku sala' tau petulu dengan bala Surat Allah,

⁴Idi Ieh pangeh tinanem, idi kareb aco luk keteluh Ieh pangeh tinui petulu dengan bala Surat Allah,

⁵Idi Ieh pangeh nesilagan kuan Pétrus, idi mucu kuan pulu' dueh burur rasul ineh.

⁶Mucu ratnan ineh, Ieh nesilagan teh kuan mela limeh ngeratu kinanak-kinanak bang sekua', idi lélé amung-amungdeh ineh mulun macing nekini, iamo' sebuangdeh pangeh naté.

⁷Idi Ieh nesilagan kuan Yakub, idi mucu teh kuan amung-amung rasul.

⁸Idi kekipedneh Ieh nesilagan kuanku teh, mepad kudeng anak luk mucu tinganak.

⁹Ui ini luk meluun dat rat arang amung-amung lun rasul ineh, pad ui na mayu tetanen ku rasul, ngaceku ui pangeh nengedereh sidang Allah.

¹⁰Iamo' ngaceku ratnan katu Allah ui pangeh misu', pad ulunku mepad kudeng luk bang kareb ini, idi katu luk biréNeh negku na mo'-mo'. Iamo' ui luk meluun géi' ratnan amung-amungdeh, iamo' baken ui, iamo' katu Allah luk ngedengan negku.

¹¹Ngaceku ineh, do' ui idi ideh pana' mada' Bala luk Do' ineh, luk inan muyuh pangeh manu.

¹²Kudeng kai mada' ratnan Keristus pangeh tinui rat arang lun naté, kudeng apehké sebuang muyuh pebala na luk idi tui ratnan até?

- ¹³Kudeng ini matu, ilungneh Keristus nateh tinui.
- ¹⁴Idi kudeng Keristus nateh tinui, bada' kai ini mo'-mo', idi anu muyuh pana' mo'-mo' teh.
- ¹⁵Meluun teh megala' kai mebalih pa kiung Allah, ngaceku kai nemada' ratnan Allah nenui Keristus ratnan até. Iamo' setuneh nateh Ieh tinuiNeh, kudeng matu lun naté na miak tuyen.
- ¹⁶Ngaceku kudeng lun naté na miak tuyen, Keristus pana' nateh tinui teh.
- ¹⁷Idi kudeng Keristus na tinui, anu muyuh mo'-mo' peh, idi teh muyuh lakat meraruh bang sala' muyuh.
- ¹⁸Idi teh ilungneh, lun manu luk pangeh naté bang Keristus ineh pana' na ngalap ulun.
- ¹⁹Kudeng bang ulun ini mo' tau merapet inan Keristus, tau meluun susa' ratnan amung lemulun bang tana' ini.
- ²⁰Iamo' matu Keristus pangeh tinui rat arang lun naté, mangun ku bua' luk atun rat arang amung-amung lemulun luk pangeh naté.
- ²¹Ngaceku mepad kudeng até ineh pangeh icing ratnan seburur lemulun, kudeng ineh teh tui ratnan até icing ratnan seburur lemulun.
- ²²Ngaceku mepad kudeng bang Adam amung-amung lemulun maté, kudeng ineh teh bang Keristus amung-amungdeh miak mulun.
- ²³Iamo' anid-anid maya' karebneh sebuleng; idi bua' luk atun, Ieh ineh Keristus, idi mucu amung-amung pupu Keristus kareb acingNeh luk kedueh kua'.
- ²⁴Idi mucu teh macing kekipedneh, ieh ineh kareb Keristus maré Imet ineh kuan Allah Taman, kareb Ieh pangeh nengusag luk ngimet, idi luk inan lalud, idi tueh luk ratnan roh luk baken.
- ²⁵Ngaceku na miak na Keristus mangun ku raca', pad Allah ngebeneh amung-amung bunu'Neh pa liang kukudNeh.
- ²⁶Idi bunu' luk kekiped tu-tu luk uenNeh ngusag, ieh ineh até.

²⁷Ngaceku pangeh inayud bang Surat Allah, "Luk amung-amung pangeh rireng pa liang kukud Keristus." Iamo' megala' idi baken Allah sinuet dengan "luk amung-amung" ineh, ngaceku Allah luk ngebeneh luk amung-amung ineh pa liang Keristus.

²⁸Kareb luk amung-amung pangeh inau' pa liang imet Keristus ineh, idi Anak ineh pana' sikal ngebeneh bururNeh kuan Allah luk ngebeneh luk amung-amung kuanNeh, pad Allah miak mangun ku amung-amung bang luk amung-amung.

²⁹Kudeng na pieh kudeng ineh, anunké punneh sebuang lemulun sikal rerebpen ngaceku lun naté? Kudeng lun naté na tupu tinui, anunké punneh sebuang lemulun pangeh rireb ngaceku lun naté ineh?

³⁰Ngudehké tau ini pana' mekaneh dereh anid-anid kareb?

³¹O kinanak-kinanakku, anid-anid aco ui matun até, idi ui ngamo kudeng ini, ngaceku awang niatku nemuyuh bang ulun tau bang Keristus Yésus Tuhan tau.

³²Anunké ulekneh kuanku kudeng ui dengan terawé lemulun mo' pangeh pekakem dengan pung luk meliputi déi' Epesus? Kudeng lun naté na tuyen, "Do' tau kuman idi ngirup, ngaceku nebpa tau maté."

³³Aleg muyuh uen naluk, ngaceku "Rurum luk dat ngusag kekamen luk do'."

³⁴Do' muyuh kulat dengan matu idi aleg nganau' sala'; ngaceku inan tuda'-tuda' lemulun luk na ngiti Allah. Ui mala ini, pad muyuh kali' migu'.

³⁵Inan luk pebala, "Kudeng apehké lun naté miak tuyen? Idi kudeng apehké ayu burur lemulun luk tuyen ineh?"

³⁶O lun mebacé! Kareb muyuh nibu ilung bang tana', na ieh miak mulun kudeng ieh na maté.

³⁷Idi luk tinibu bang tana' ineh, ieh ineh ilung luk inukak, kian dalé idi luk baken-baken lek, iamo' baken amung lawa luk miak mulun mucu.

- ³⁸Iamo' Allah maré kuanneh aceh burur maya' pianNeh, idi kuan raput-raput ilung bururneh sebuleng.
- ³⁹Idi baken amung-amung luk mulun ineh mepad ayu, iamo' lemulun baken, idi pung-pung baken, suit-suit baken, idi lawid pana' baken teh.
- ⁴⁰Inan teh tuda'-tuda' luk pinudut bang langit, idi tuda'-tuda' luk pinudut bang tana'; iamo' acang luk pinudut bang langit ineh baken, idi acang luk pinudut bang tana' ineh baken teh.
- ⁴¹Acang aco baken, acang bulan baken, idi acang gituen baken; ngaceku ratnan acangneh, sebuleng gituen baken ratnan gituen baken.
- ⁴²Kudeng ineh teh tui lun naté, ieh ineh tinamen idi melu, idi tuyen pad na miak melu;
- ⁴³tinamen dengan dat, tuyen dengan do'; tinamen dengan laya', tuyen dengan tueh;
- ⁴⁴tinamen burur tana' ini, tuyen burur ratnan Roh. Kudeng inan burur tana' ini, inan teh burur ratnan Roh.
- ⁴⁵Ngaceku pangeh inayud, "Idi lemulun luk pun-pun, ieh ineh Adam, mangun ku seburur luk mulun." Idi Adam luk kekiped ineh mangun ku Roh luk ngulun.
- ⁴⁶Iamo' baken luk ratnan Roh mangun pun-pun, iamo' luk ratnan tana', idi luk ratnan Roh ineh mucu.
- ⁴⁷Adam luk atun ineh inau' ratnan tana', idi ieh nacing ratnan tana'; Adam luk kedueh ineh nacing rat surga.
- ⁴⁸Lemulun luk ratnan tana' ini mepad kudeng lemulun luk inau' ratnan tana'. Idi lemulun luk rat surga ineh, mepad kudeng Ieh luk macing rat surga.
- ⁴⁹Idi mepad kudeng tau ngayung ku ayuneh luk ratnan tana' ini, kudeng ineh teh tau miak ngayung ku ayuNeh luk rat surga ineh.

⁵⁰Ini ilung balaku, O kinanak-kinanakku: uang idi dara' na miak ngalap babpat bang Imet Allah. Idi luk pinudut luk miak merapuk na miak ngalap babpat bang luk pinudut luk na miak merapuk.

⁵¹Ngerawé do'-do' ratnan luk inalum ini: baken amung-amung tau ini miak maté, amung-amung tau miak uen ngisu',

⁵²bang selinggageh, bang sekacep mateh kareb muni serupit luk kekiped. Ngaceku serupit miak muni, idi amung-amung lun naté miak tuyen, dengan luk pinudut luk na miak melu, idi tau ini miak uen ngisu'.

⁵³Ngaceku na miak na luk pinudut luk miak melu ini ngayung ku luk pinudut luk na miak melu, idi luk miak maté ini na miak na ngayung ku luk na miak maté.

⁵⁴Iamo' kareb luk pinudut luk miak melu ini pangeh nengayung ku luk pinudut luk na miak melu, idi luk miak maté ini pangeh nengayung ku luk na miak maté, pangeh ineh miak macing bala luk pangeh inayud ini: "Idi até pangeh tilen ratnan tueh."

⁵⁵"O até, iapehké tuehmu? O até, iapehké galihmu?"

⁵⁶Galih até, ieh ineh sala', idi lalud sala', ieh ineh Ukum.

⁵⁷Iamo' ngubur Allah, luk maré netau metueh ngaceku ratnan Tuhan tau Yésus Keristus.

⁵⁸Ngaceku ineh, O kinanak-kinanakku luk inanku mawa, do' muyuh lutep dengan na sigio, idi megéi' bang kekamen Tuhan, ngaceku muyuh kali' idi kél muyuh na mo'-mo' bang Tuhan.

1 Korintus 16

¹Ratnan ngamung usin kuan lun manu déi' Yudia, do' muyuh maya' kudeng luk pangeh icukku kuan amung-amung sidang déi' Galatia.

²Anid-anid Aco luk inan Mudeng, do' amung-amung muyuh nganug usin bang ruma'neh sebuleng maya' kinula'neh, pad kareb ui macing na muyuh ngamung usin.

- ³Kareb ui macing, idi ui miak ngecuk idé-idé luk uen muyuh ngamo dengan surat pad ideh nguit luk biré muyuh ineh amé' Yerusalim.
- ⁴Idi kudeng petulu ui amé' teh, miak ideh maya' negku.
- ⁵Ui sikal macing nemuyuh, kareb ui pangeh nengikak bawang Makedonia, ngaceku ui sikal amé' déi' Makedonia atun.
- ⁶Ui miak tudo mio sesuut dengan muyuh, kian, tudo kareb meteneb lek, pad muyuh miak nated negku iapeh-iapeh luk ui sikal amé'.
- ⁷Iamo sekua' ini na ui papu' nemuyuh, iamo' ui merapet miak tudo mio sesuut dengan muyuh kudeng Tuhan nima'.
- ⁸Iamo' ui sikal tudo déi' Epesus pad macing Aco Pentakosta,
- ⁹ngaceku pangeh inukab kuanku tanga' luk rayeh kuan kekamen luk do' ulek, idi inan mula' luk sikal metueh déi'.
- ¹⁰Kudeng Timotius macing, nganak neneh, ngaceku ieh nganau' kekamen Tuhan mepad kudeng ui ini teh.
- ¹¹Ngaceku ineh aleg nima' selemulun ngebeneh neneh. Iamo' do' muyuh nated neneh nalan dengan mawang niat, pad ieh miak lemubed amé' negku, ngaceku ui nganét neneh dengan kinanak-kinanak luk baken ineh.
- ¹²Ratnan kinanak tau Apolos, tuda'-tuda' kua' ui nengubuk neneh, pad ieh amé' ngikak nemuyuh dengan kinanak-kinanak ineh. Idi na ieh ngamo amé' nekini, iamo' ieh sikal macing kudeng tanga' kabin kuanneh.
- ¹³Kekipedneh, matar do'-do', idi tuped meraben bang anu muyuh. Do' muyuh mekuu' idi metueh.
- ¹⁴Nima' amung-amung kekamen muyuh ruen dengan awa.
- ¹⁵Muyuh kali' ratnan Stepanus idi tetek ruma'neh. Ideh luk pun-pun manu inan Yésus déi' Akaya, idi ideh pangeh nemaré bururdeh pad ngasa' nelun manu. O kinanak-kinanakku, ui mutuh nemuyuh,
- ¹⁶maya' kuyut lemulun luk kudeng ineh idi anid-anid lemulun luk pad-pad ngakem dengandeh.

¹⁷Ui mawang niat ratnan acing Stepanus, Portunatus, idi Akaikus, ngaceku ideh pangeh nengelibal nemuyuh.

¹⁸Ideh pangeh nengawang niatku idi niat muyuh pana'. Lemulun luk kudeng ineh petulu uen muyuh ngerayeh.

¹⁹Amung-amung sidang déi' Asia maré tabi' kuan muyuh. Akila idi Priskila dengan sidang luk tebubpun bang ruma' didueh maré tabi' nemuyuh bang Tuhan.

²⁰Amung-amung kinanak luk tungé' maré tabi' kuan muyuh. Do' muyuh petabi' seburur dengan seburur dengan pebuen luk meligan.

²¹Ui ngayud ini dengan tiku'ku sebuleng: Tabi' rat negku, Paulus.

²²Kudeng idé lemulun luk na mawa inan Tuhan ineh, nima' neneh uen ngediman. Maranata! (ilungneh, O Tuhan, amé' dengan mesaget!)

²³Idi katu Tuhan tau Yésus Keristus ineh ngedengan nemuyuh.

²⁴Idi awaku ngedengan nemuyuh anid-anid burur bang Keristus Yésus. Amin!

2 Korintus

2 Korintus 1

¹Ratnan Paulus, rasul Kristus Yésus dengan pian Allah, idi ratnan Timotius kinanak tau— Kuan sidang Allah déi' Korintus idi kuan amung lun manu apud bawang Akaya:

²Do' katu Allah temurun kuan muyuh idi awang ratnan Allah Taman tau, idi Tuhan Yésus Keristus.

³Do' tau ngubur Allah Taman Tuhan tau Yésus Keristus, ieh ineh Taman luk lawa amung éi' idi Allah luk lawa amung ubuk!

⁴Ieh ngubuk netau bang amung-amung dereh tau, pad tau miak ngubuk lemulun luk bang susa' anun-anun pana', dengan ubuk ratnan Allah luk nengubuk nekai ini.

⁵Mepad kudeng tau ngalap babpat dereh Keristus luk mula' ineh, kudeng ineh teh bang Keristus tau ngalap pedenganNeh luk rayeh.

⁶Kudeng kai medereh, ieh ineh pad muyuh miak uen ngedengan idi uen ngulun, idi teh kudeng kai uen ngedengan, muyuh pana' uen ngedengan, pad muyuh ngalap tueh idi ulai niat, pelé muyuh tuman kareb muyuh medereh mepad kudeng kai teh.

⁷Idi rapet kai nemuyuh pangeh lutep. Kai kali', idi mepad kudeng muyuh ngalap babpat bang dereh kai, kudeng ineh teh muyuh ngalap pedengan luk lapen kai ineh.

⁸Kai pian nemuyuh ngerawé, O kinanak-kinanakku, ratnan dereh luk pangeh nekali' kai déi' Asia. Dereh kai ineh pelaba berat, meluun ratnan tueh kai, pad kai na merapet miak mulun teh.

⁹Kai sebuleng pangeh nekali' bang burur kai ukum maté, pad kai na merapet inan burur kai sebuleng, iamo' inan Allah luk nui nelan naté.

¹⁰Ieh nengulun nekai ratnan até luk kudeng ineh rayeh, idi Ieh luk sikal ngulun nekai teh. Kai merapet Neneh miak ngulun nekai teh,

11kudeng muyuh nengan nekai dengan sembayang muyuh. Dengan luk kudeng ineh putuh lemulun luk mula' ineh miak uen ngua', pad Allah miak ngeperuan nekai, idi mula' lemulun miak maré ubur kuan Allah ngaceku kai.

12Kai mawang niat ngaceku teruayen niat kai ngelio kuan kai ratnan ulun kai bang tana' ini, meluun teh ratnan rorum kai dengan muyuh luk pangeh isa' dengan kuu' idi siri niat ngaceku lalud katu Allah, idi baken ngaceku ileh lemulun.

13-14Luk kai ngayud kuan muyuh na baken ratnan luk miak ruen muyuh maca' idi kali' ilungneh. Idi ui merapet nemuyuh miak kali' dengan meriput, anun-anun luk na kali' muyuh nekini dengan meriput, pad kareb Aco Tuhan Yésus, muyuh miak mawang niat nekai, mepad kudeng kai pana' mawang niat nemuyuh.

15Idi ngaceku ui pangeh merapet kudeng ini, pianku sikal macing nemuyuh atun, pad muyuh ngalap peruan luk kedueh kua'.

16Atun ui pian amé' nemuyuh kareb maya' dalam amé' Makedonia idi rat Makedonia lemubed amé' nemuyuh teh, pad muyuh ngedengan negku bang lawéku amé' Yudia.

17Kareb ui nengerawé kudeng ineh, perapid niatkuké? Inanké ui ngerawé maya' pianku sebuleng, pad "Mo" idi "Na" ineh mepad kuanku?

18Dengan ngadan Allah luk lutep maya' jani', idi balaku nemuyuh ineh baken "Mo" idi "Na".

19Ngaceku Yésus Keristus Anak Allah, luk bida' kai arang muyuh ieh ineh Siluanus, Timotius, idi ui, baken "Mo" idi "Na". Iamo' bang Keristus ineh inan "Mo" mo'.

20Ngaceku Keristus, Allah pebala, "Mo" kuan amung-amung jani'Neh. Ineh punneh tau mala "Amin" teh ratnan Yésus Keristus, pad Allah uen ngerayeh.

21Idi Allah luk ngepicet nekai dengan muyuh bang Keristus, idi Ieh pangeh nengumau nekai.

²²Ieh teh pangeh nemaré tanu' kuan tau dengan maré etu Roh semuet bang niat tau.

²³Ui nawar Allah mangun ku luk nekali' negku. Ieh kali' niatku! Ngaceku ratnan éi'ku kuan muyuh ui nateh nacing déi' Korintus.

²⁴Na kai mangun ku raca' pa luun anu muyuh, iamo' kai ngakem dengan muyuh sikal maré nemuyuh mawang niat, ngaceku dengan anu muyuh tuped meraben.

2 Korintus 2

¹Ui pangeh nengelelep niatku kudeng ini, ua na sikal macing nemuyuh sekua' teh pad ngesusa' niat muyuh.

²Ngaceku kudeng ui ini ngesusa' nemuyuh, idi idéké miak maré negku mawang niat, iamo' lemulun luk ui pangeh nengesusa' ineh?

³Ui nengayud surat ineh, pad kareb ui macing ui na mesusa' niat ratnan lemulun luk megéi' maré negku mawang niat. Ngaceku ui merapet, idi kudeng ui mawang niat idi amung-amung muyuh mawang niat teh.

⁴Ui nengayud kuan muyuh dengan mesusa' idi meberat niat, idi dengan tangi' pana'. Na ui pian ngesusa' nemuyuh, iamo' pianku muyuh kali' awaku nemuyuh.

⁵Kudeng selemulun nengacing susa' niat kuan seburur lemulun, idi na ieh nengacing susa' niat ineh kuanku mo', iamo' kuan muyuh, kian kuan sebuang muyuh lek. Ngaceku na ui pian ngesusa' neneh.

⁶Petap dereh kuan lemulun ineh, ngaceku ieh pangeh inukum lun mula'.

⁷Do' muyuh maré do' kuanneh nekini, idi ngubuk neneh, pad ieh na mekarem ngaceku susa' niatneh.

⁸Ui mutuh nemuyuh ngegala' awa muyuh neneh.

⁹Ini punneh ui nengayud surat ineh, pad ui kali' kudeng apeh kekamen muyuh bang tutun ini, idi kudeng muyuh maya' amung-amung balaku.

¹⁰Idé-idé lemulun luk inan muyuh maré do', ui pana' maré do' neneh teh, ngaceku anun-anun luk inanku pangeh nemaré do' ineh, (kudeng inan anun-anun luk inanku petulu maré do') idi ui pangeh nemaré do' ngaceku muyuh pa kiung Keristus,

¹¹pad Sétan na ngelaya' netau, ngaceku tau kali' ilehneh.

¹²Kareb ui nacing déi' Troas sikal mada' Bala luk Do' ratnan Keristus, idi inan aceh tanga' inukab Tuhan kuanku.

¹³Iamo' ui mesusa' niat, ngaceku na nepapu' kinanakku Titus ineh. Ngaceku ineh ui nemutuh do' nedeh idi ine' déi' Makedonia.

¹⁴Iamo' ngubur Allah! Ieh megéi' nguyut nekai pekarur ngaceku tueh bang Keristus, pad kai mada' ileh ratnan Keristus iapeh-iapeh pana' mepad kudeng aceh buen luk do'.

¹⁵Ngaceku kai mangun ku aceh buen luk do' luk barén Kristus kuan Allah, luk meperuit arang lemulun luk uen ngulun idi luk metutu' pana'.

¹⁶Kuan lemulun luk metutu', kai mangun ku aceh buen butung luk ngaté; iamo' kuan lemulun luk uen ngulun, aceh buen luk ngulun. Idéké luk temina' kuan kekamen luk kudeng ini?

¹⁷Kai ini baken kudeng mula' lemulun luk nakap tabpar kuan bururdeh sebuleng ratnan bala Allah, iamo' kai pebala dengan mesiri niat, mepad kudeng demulun Keristus luk icuk Allah.

2 Korintus 3

¹Inanké kai ini ngimun ngubur burur kai sebuleng teh? Petuluké kai ngalap surat rat nemuyuh, kian kuan muyuh lek, luk ngubur burur kai, mepad kudeng tuda'-tuda' lun baken?

²Muyuh sebuleng aceh surat luk iten kai, ieh ineh surat luk inayud bang niat kai, idi luk uen lun mula' ngiti idi maca'.

³Idi megala' muyuh mangun ku surat Keristus luk inayud kai, inayud baken dengan dawat, iamo' dengan Roh Allah luk mulun, baken luun batu luk tebalad, iamo' bang niat lemulun.

⁴Kai mala kudeng ini ngaceku kai merapet inan Allah ngaceku Keristus.

⁵Baken kai ini sebuleng mileh nganau' anun-anun dengan ileh kai sebuleng, iamo' ileh kai ineh macing ratnan Allah.

⁶Ieh luk pangeh nenganau' nekai mileh mangun ku lun luk mada' pejani' luk mebaruh, baken maya' urup mo', iamo' maya' Roh. Ngaceku urup ineh ngaté, iamo' Roh ineh ngulun.

⁷Iamo' kudeng kekamen luk nenguit até dengan surat luk inayud luun batu luk tebalad ineh pangeh nacing dengan rayehneh, pad lun pupu Israil na miak nutong kiung Musa ngaceku rayeh rasat kiungneh, sagan pana' rasat ineh miak buro,

⁸naké kekamen Roh ineh meluun rayeh rasatneh?

⁹Kudeng kekamen luk ngacing ukum kuan lemulun ineh rayeh rasatneh, meluun teh kekamen luk ngacing luk matu ineh pana' inan rayeh uburneh.

¹⁰Setuneh ayuneh luk rinayeh atun ineh baken rinayeh nekini, kudeng uen maad dengan rasat luk meluun rayeh ineh.

¹¹Ngaceku kudeng luk miak buro ineh mangun dengan rayehneh, idi meluun teh luk meruked ineh mangun dengan rayeh teh.

¹²Ngaceku kai inan rapet luk kudeng ineh, idi kai mekuu' pebala.

¹³Baken kai mepad kudeng Musa, luk ngebpu kiung pad lun pupu Israil na miak nutong kekiped rasat ineh luk miak buro.

¹⁴Iamo' terawédeh pangeh mengadel, pad macing aco sini kareb ideh maca' Pejani' Mon, idi ebpu kiung ineh nateh linakab, ngaceku ebpu kiung ineh miak talan ngaceku Keristus mo'.

¹⁵Iamo' macing aco sini, kareb Ukum Musa uen maca', idi ebpu ineh ngakeb niatdeh.

¹⁶Iamo' kareb lemulun lumi inan Tuhan, idi ebpu ineh miak talan.

¹⁷Idi Tuhan ineh Roh, idi su apeh inan Roh Tuhan, su ineh teh inan puit.

¹⁸Iamo' tau amung-amung dengan kiung luk na ibpu, ngelubed rasat Allah mepad kudeng sayun, idi misu' kuan ayu ineh teh ratnan rasat macing amé' inan rasat ineh teh, mepad kudeng luk ratnan Tuhan, ieh ineh Roh.

2 Korintus 4

¹Dengan éi'Neh Allah pangeh nemaré kuan kai, pad kai na metalang niat.

²Kai pangeh nenala' amung-amung kekamen luk inalum idi luk ngacing igu', idi na kai naluk idi mebalih ratnan bala Allah. Iamo' dengan ngelio luk matu ineh kai ngamo burur kai kuan teruayen niat amung-amung lemulun pa kiung Allah.

³Iamo' kudeng Bala kai luk Do' ineh lininged, idi ieh melinged kuan lemulun luk metutu'.

⁴Idi raca' tana' ini pangeh nengebuser mateh niat lemulun luk na manu ineh, pad ideh na miak macang ku acang Bala luk Do' ratnan rasat Keristus, ieh ineh ayun Allah.

⁵Kai na mada' ratnan burur kai sebuleng, iamo' ratnan Keristus Yésus luk Tuhan. Idi kai ini demulun muyuh ngaceku ratnan Keristus.

⁶Allah luk pangeh nepebala, "Do' acang ineh merasat rat bang dacem," Ieh ineh teh luk merasat bang niat kai, pad ngacang netau ku ileh ratnan rayeh Allah luk merasat nan kiung Yésus Keristus.

⁷Iamo' kai inan binaweh luk buren ini bang kudeng luk inau' ratnan tana', pad ela ratnan laludneh muli' amé' inan Allah, idi baken rat nekai punneh.

⁸Megéi' kai mesusa', iamo' na kai linaya'. Kai merapang niat, iamo' na kai ugka' merapet.

⁹Kai pidereh, iamo' na kai tican; kai nurat, iamo' na kai naté.

¹⁰Idi megéi' kai mabeh dereh ratnan até Yésus bang burur kai iapeh-iapeh luk inan kai amé', pad ulun Yésus ineh miak uen ngegala' bang burur kai.

¹¹Ruked ulun kai, kai megéi barén kuan até ngaceku ratnan Yésus, pad ulun Yésus ineh miak uen ngegala' bang burur kai luk miak maté ineh.

¹²Kudeng ineh teh até ngakem bang burur kai, iamo' ulun ineh bang nemuyuh.

¹³Pangeh inayud, "Ui pangeh manu, idi ini punneh ui nepebala." Kai inan teh roh anu, idi kai ini pana' pebala ngaceku kai manu.

¹⁴Kai kali' idi Allah luk pangeh nenui Tuhan Yésus sikal nui nekai mepad kudeng Yésus ineh teh, idi sikal maré nekai amé' matun Neneh dengan muyuh.

¹⁵Amung ini mangun pad ngacing peruan kuan muyuh; idi kareb katu Allah macing nan meluun ula' lemulun, idi ideh maré meluun ula' ubur pelé ngerayeh Allah.

¹⁶Ngaceku ineh na kai metalang niat. Sagan pana' burur kai iuk melu, iamo' niat kai uen mebaruh anid-anid aco.

¹⁷Idi susa' kai luk meran idi segageh mo', nguit nekai macing nan ubur luk meluun rayeh idi meruked,

¹⁸ngaceku na kai ngerawé nier anun-anun luk megala' ineh, iamo' luk na siren, ngaceku luk siren ineh segageh mo', iamo' anun-anun luk na siren ineh meruked.

2 Korintus 5

¹Ngaceku kai kali' idi kudeng ruma' luk inan tau tudo bang tana' ini uen ngusag, tau miak ngalap aceh ruma' ratnan Allah, ieh ineh su luk inan tudo, baken inau' ku ticu', iamo' meruked déi' surga.

²Idi nekini tau ngarod idi geregan sikal uen ngayung ku ruma' tau luk rat surga ineh.

³Kudeng tau inayung na tau miak lubpa peh.

- ⁴Kareb tau bang ruma' ini, tau ngarod ku babeh luk meberat ineh; na tau pian patad ratnan burur tau, iamo' tau pian uen ngayung ku burur luk rat surga, pad luk miak maté ineh uen ngelabin ku ulun.
- ⁵Allah luk nenganau' netau temina' ngalap isu'. Idi Ieh nemaré RohNeh mangun ku etu ratnan luk tinina'Neh kuan tau.
- ⁶Kai megéi' mekuu', ngaceku kai kali', idi laba' kai tudo bang burur ini, kai mado ratnan Tuhan.
- ⁷Kai mulun ngaceku anu, baken ngaceku luk siren.
- ⁸Kai mekuu' idi pelaba pian mepatad ratnan burur, pad tudo dengan Tuhan.
- ⁹Meluun teh kai mekéi' maya' pianNeh, do' bang burur ini idi mado ratnan burur pana'.
- ¹⁰Ngaceku na miak na amung tau kumin pa atun kerusi besara' Keristus, pad anid-anid lemulun ngalap ua', maya' luk pangeh inau'neh bang ulunneh, do' kian dat lek.
- ¹¹Kai kali' ilungneh matot nan Tuhan. Ini punneh kai ngubuk lemulun. Allah kali' dengan meriput luk bang niat kai. Kudeng ineh teh ui merapet nemuyuh pana' kali' luk bang niatku.
- ¹²Kai na ngubur burur kai pa kiung muyuh sekua' teh. Iamo' kai ngacing kuan muyuh aceh punneh muyuh uen ngedita' ngaceku kai, pad muyuh miak ngor bala lemulun luk ngedita' bururdeh ratnan ayu lemulun, iamo' baken ratnan niatneh.
- ¹³Kudeng ayuneh kai meruden, ieh ineh ngaceku Allah; idi kudeng kai lutep terawé, ieh ineh ngaceku muyuh.
- ¹⁴Ngaceku awa Keristus ineh ngegio niat kai, ngaceku ini luk tirawé kai, idi seburur pangeh naté ngaceku amung-amung lemulun, ini punneh amung-amungdeh pangeh naté.

¹⁵Idi Ieh pangeh naté ngaceku amung-amung lemulun, pad lemulun luk mulun ineh na mulun kuan bururdeh sebuleng teh, iamo' kuanNeh ineh luk pangeh naté idi netumui teh ngaceku lemulun ineh.

¹⁶Ngaceku ineh, rat pad sini na kai ngesala' seburur pana' maya' ayu lemulun. Sagan pana' kai pangeh ngiti Keristus maya' ayu lemulun, iamo' nekini na kai ngiti Neneh mepad kudeng ineh teh.

¹⁷Kareb selemulun mulun bang Keristus, idi ieh ineh aceh pudut luk mebaruh, idi amung-amung luk mon ineh pangeh tila', idi amung-amung luk mebaruh pangeh nacing.

¹⁸Amung ini inau' Allah, luk pangeh nenguit netau pedo' Neneh, ngaceku ratnan Keristus, idi Ieh nemaré netau kekamen nguit nelun baken pedo'.

¹⁹Allah bang Keristus ineh nemaré uang tana' ini pedo' Neneh idi na Ieh ngiap sala'deh. Ieh pangeh nemaré kuan kai bala ratnan nguit pedo' ineh.

²⁰Ngaceku ineh kai mangun ku lun duken Keristus, ayuneh Allah mutuh dengan dila' kai. Bang ngadan Keristus, kai mutuh nemuyuh pedo' dengan Allah.

²¹Keristus na mesala', iamo' Allah nenganau' Neneh mangun ku sala' ngaceku tau, pad tau ini ruen Allah matu bang Keristus ineh.

2 Korintus 6

¹Iamo' kai luk pad-pad ngakem dengan Allah mutuh nemuyuh teh, pad muyuh na ngalap katu Allah mo'-mo'.

²Ngaceku Allah pebala, "Kareb aco luk petulu Ui neninger balamu. Idi kareb aco ulun Ui nengedengan namu." Setuneh nekini karebneh luk petulu ineh, idi matu aco ulun pangeh macing.

³Na kai nganau' anun-anun luk ngesabeng nelun, pad kekamen kai na uen ngilang peh.

- ⁴Iamo' bang amung-amung luk ruen kai, kai ngegala' ratnan kai ini demulun Allah, ieh ineh dengan mulai niat kai tuman ratnan dereh, susa', idi sabeng pana'.
- ⁵Kai pangeh bibal, tinutup, idi pidereh lun mula'. Kai merur ngaceku mula' kekamen, na petap rudap, idi na petap akan.
- ⁶Kai ngegala' nekai demulun Allah ratnan ligan, ileh, ulai niat, idi katu kai; idi teh ngaceku pedengan ratnan Roh Meligan, idi awa kai luk matu,
- ⁷ratnan bada' kai luk matu, idi ratnan lalud Allah. Luk matu mangun ku repapeh kai kareb pebunu', idi ku matar burur kai.
- ⁸Kai uen ngerayeh idi uen ngigu'; kai uen ngedat idi buren. Sagan pana' kai mala luk matu, kai tetanen lun mebalih;
- ⁹ayuneh kai na mebala, iamo' setuneh kai mebala; ayuneh kai maté, iamo' setuneh kai mulun. Sagan pana' kumin, iamo' na kai pitayen.
- ¹⁰Sagan pana' kai uen ngesusa', iamo' kai megéi' mawang niat; ayuneh kai masi', iamo' kai nganau' mula' lemulun mangun ku lun do'. Ayuneh kai na binaweh, iamo' setuneh kai inan luk amung-amung.
- ¹¹O lun Korintus, kai pangeh nemada' nemuyuh dengan megala', idi kai mawa nemuyuh.
- ¹²Kai pangeh mawa nemuyuh dengan na ngalum anun-anun, iamo' muyuh na mawa nekai kudeng ineh.
- ¹³Ui pebala kudeng kuan anak-anakku: do' muyuh mawa nekai teh, mepad kudeng kai pangeh mawa nemuyuh!
- ¹⁴Aleg muyuh peruyung ngakem dengan lemulun luk na manu. Kudeng apehké luk matu idi luk na matu perurum? Idi kudeng apehké acang idi dacem pamung?
- ¹⁵Kudeng apehké Keristus idi Iblis perurum? Idi anunké rurum arang lun manu dengan lun luk na manu?

¹⁶Anunké rorum arang ruma' Allah dengan akang? Ngaceku tau ini ruma' Allah luk mulun, maya' kudeng bala Allah, "Ui sikal tudo idi mudeng arangdeh ineh; Ui mangun ku Tuhandeh, idi ideh mangun ku pupuKu."

¹⁷Ngaceku ineh, kebala Tuhan, "Remuat muyuh rat arangdeh, idi patad rat nedeh. Aleg ngakem anun-anun luk melutak, idi Ui sikal ngalap nemuyuh.

¹⁸Ui mangun ku Taman muyuh, idi muyuh mangun ku anak-anakKu, do' deléi idi decur teh, kebala Tuhan luk Melalud."

2 Korintus 7

¹Amung ini pangeh biré kuan tau, O lun rorumku. Ngaceku ineh do' tau ngeligan burur tau ratnan amung luk ngelutak burur idi niat, idi ngeriput ligan tau dengan matot inan Allah.

²Ngukab niat muyuh kuan kai. Idi seburur pana' nateh pidereh kai, seburur pana' nateh inusag kai, idi seburur pana' nateh sinaluk kai.

³Ui na pebala kudeng ini pad ngesala' nemuyuh, ngaceku atun ui nepebala, kai mawa nemuyuh idi perurum nemuyuh, sagan pana' mulun, kian maté lek.

⁴Ui merapet nemuyuh, idi ui mawang niat ku muyuh. Bang amung-amung susa' kai ui mawang niat idi mekuu'.

⁵Kareb kai nacing déi' Makedonia pana', na kai miak ngato erur kai, iamo' kai pidereh iapeh-iapeh pana'. Idi inan kedaluh rat nelun baken idi tot bang niat kai sebuleng.

⁶Iamo' Allah luk ngubuk lemulun luk mebeneh niat, Ieh ineh teh nengubuk nekai dengan acing Titus;

⁷idi baken dengan acingneh ineh mo', iamo dengan ubuk luk ilapneh rat nemuyuh. Kareb ieh nemada' nekai ratnan muyuh pian papu' negku, idi ratnan inuud idi tangi' muyuh, idi ratnan muyuh pian ngedengan negku, idi ui pelaba awang niat.

⁸Sagan pana' ui nengesusu' nemuyuh ku surat ineh, na ui nginuud ratnan ineh. Atun ui lélé nginuud, kareb ui kali' surat ineh nengesusu' nemuyuh segageh mo' kinioneh.

⁹Iamo' nekini ui mawang niat, baken ngaceku muyuh pangeh nesusa' niat, iamo' ngaceku muyuh mesusa' niat pad macing uren. Susa' niat muyuh pangeh pikai Allah, pad na muyuh merugi' ngaceku luk inau' kai.

¹⁰Ngaceku susa' luk maya' pian Allah ineh nguit uren macing inan ulun luk meruked, idi na tau miak mesusa' niat ku ineh. Iamo' susa' niat ratnan tana' ini ngacing até.

¹¹Ngerawé luk inau' Allah ratnan susa' muyuh. Nekini muyuh pelaba kél ngegala' ratnan muyuh na mesala'. Kudeng apehké gateh, tot, tueh, idi kél muyuh, pad muyuh pelaba pian ngukum kekamen luk dat. Bang amung-amung ineh muyuh pangeh nengegala' nemuyuh matu.

¹²Sagan pana' ui pangeh nengayud surat ineh, baken ui nengayud ngaceku lemulun luk nenganau' sala' mo', idi baken ngaceku lemulun luk medereh ku sala' ineh, iamo' pad ngegala' kuan muyuh ratnan rayeh awa muyuh nekai pa kiung Allah.

¹³Ineh punneh kai pangeh inubuk. Iamo' baken kai inubuk mo'. Kai pelaba awang niat ngaceku awang Titus ineh, ngaceku muyuh pangeh nengawang niatneh.

¹⁴Atun ui nengubur nemuyuh pa kiungneh, idi na muyuh nengigu' negku. Kai megéi' mala luk matu kuan muyuh. Kudeng ineh teh megala' ratnan luk bila kai pa kiung Titus ineh pangeh ginala' matu.

¹⁵Idi awaneh kuan muyuh amé' mula', ngaceku ieh nengerawé ratnan baya' muyuh, idi kudeng apeh muyuh nengalap neneh dengan matot idi megegker.

¹⁶Idi ui mawang niat ngaceku ui miak merapet nemuyuh!

2 Korintus 8

- ¹Kai sikal nemuyuh kali', O kinanak-kinanakku, ratnan katu Allah luk biréNeh bang amung-amung sidang déi' Makedonia.
- ²Ideh pangeh tinutun ku susa' luk pelaba rayeh; iamo' ngaceku awang niatdeh luk mela, sagan pana' ideh masi', ideh mekatu.
- ³Ui maré kali ratnan ideh nemaré maya' kinula' binawehdeh, idi meluun ratnan kinula' binawehdeh teh. Maya' piandeh sebuleng,
- ⁴ideh mesaad mutuh nekai, pad ideh simén maré kuan lun manu déi' Yudia.
- ⁵Ini meluun ratnan luk pangeh tirawé kai. Iamo' atun ideh nemaré bururdeh kuan Tuhan, idi kuan kai teh, maya' pian Allah.
- ⁶Ngaceku ineh kai nengecuk Titus nutum kekamen ini luk tinimunneh, idi ngedengan nemuyuh pad muyuh ngeriput kekamen mawa ineh.
- ⁷Muyuh lun do' bang luk amung-amung: ieh ineh anu, bada', ileh, amung-amung kél, idi awa muyuh kuan kai. Ngaceku ineh do' muyuh mekatu bang kekamen mawa ini.
- ⁸Ui na maré tuda'-tuda' ukum ratnan ini. Iamo' dengan ngegala' kél lun baken ratnan maré, ui merapet nemuyuh ngegala' rayeh awa muyuh teh.
- ⁹Ngaceku muyuh kali' katu Tuhan tau Yésus Keristus; sagan pana' Ieh lun do' Ieh mangun masi' ngaceku muyuh, pad dengan dalan asi'Neh ineh muyuh miak mangun ku lun do'.
- ¹⁰Maya' terawéku, meluun do' nekini muyuh ngeriput luk tinimun muyuh bang lak luk pangeh nepelaba. Muyuh luk pun-pun maré, meluun teh muyuh nemaré dengan mawang niat.
- ¹¹Nekini do' muyuh ngeriput kekamen ineh, dengan abud tueh muyuh, pad ngegala' ratnan muyuh mileh mangeh kekamen ineh luk pangeh tinimun muyuh.
- ¹²Kudeng muyuh mawang niat maré, Allah ngalap baré muyuh maya' kinula' binaweh muyuh, baken maya' luk na ilap muyuh.

13-14 Na ui pian ngeran babeh lun baken idi ngeberat babeh muyuh; iamo' ngaceku muyuh inan petap bang kareb ini, petulu muyuh ngedengan nelun luk masi'. Kudeng ineh teh kareb muyuh masi' idi ideh inan petap, ideh miak ngedengan nemuyuh. Dengan luk kudeng ineh anid-anid burur ngalap luk petap.

15 Maya' kudeng luk inayud, "Lemulun luk nengalap mula' ineh na mela, idi luk nengalap sesuut na masi'."

16 Kai ngubur Allah ngaceku Ieh nengegio niat Titus pad ieh geregan ngedengan nemuyuh.

17 Baken ieh pian maya' putuh kai mo', iamo' ieh mawang niat ngedengan nemuyuh, pad ieh geregan amé' nemuyuh.

18 Kai ngecuk seburur kinanak maya' neneh. Kinanak ineh buren bang amung-amung sidang ngaceku kekammeneh mada' Bala luk Do'.

19 Meluun ratnan ineh, ieh pangeh pinili' sidang-sidang, pad ieh maya' nekai bang lawé kai nganau' kekamen mawa ineh, pad ngerayeh Tuhan, idi pad ngegala' ratnan kai pian ngedengan nelun masi'.

20 Kai matar do'-do' ratnan ngimet usin pupuk ini, pad lun baken na ngesala' nekai.

21 Pian kai nganau' luk matu, baken pa kiung Tuhan mo', iamo' pa kiung lemulun teh.

22 Idi kai ngecuk kinanak kai maya' nedidueh ineh. Ieh megéi kua' pangeh sinier kai bang kélneh dengan tuda'-tuda' kekamen; idi nekini ieh meluun kél teh, ngaceku pelaba rapet nemuyuh.

23 Ratnan Titus ineh, idi ieh ineh lun rurumku luk ngakem denganku kuan muyuh, idi ratnan dueh kinanak luk baken ineh, idi didueh mangun ku lun duken sidang-sidang pad ngerayeh Keristus.

24 Ngegala' awa muyuh kuandeh, pad amung-amung sidang kali' ineh, idi pad ideh kali' nekai matu kareb kai ngubur nemuyuh.

2 Korintus 9

¹Idi ratnan ngasa' nelun manu déi' Yudia ineh na susa' ui ngayud kuan muyuh.

²Ui kali' muyuh pian ngedengan, idi ui pangeh nengubur nemuyuh pa kiung lun Makedonia, keburiku, "Akaya pangeh netemina' maré lak luk nepelaba." Idi kél muyuh ineh pangeh nengegio niat lun mula' ineh.

³Idi ui ngecuk kinanak-kinanak ineh, pad ideh kali' kai na ngubur nemuyuh mo'-mo'. Iamo' maya' kudeng luk bilaku, muyuh miak temina' ngedengan.

⁴Kudeng lun Makedonia macing denganku idi kali' nemuyuh nateh temina', kali' rungen kai pelaba igu' (idi muyuh pana' migu') ngaceku kai pangeh merapet nemuyuh.

⁵Ngaceku ineh ui ngerawé na miak na mutuh kinanak-kinanak ineh amé' nemuyuh atun, idi nganau' temina' atun baré luk muyuh pangeh pejani' ineh, pad megala' ieh baré luk mekatu, baken baré luk sinaad.

⁶Ngerawé do'-do'! Lemulun luk nibu sesuut, ieh miak ngeranéh sesuut teh, idi lemulun luk nibu dengan mela, ieh miak ngeranéh dengan mela teh.

⁷Nima' anid-anid burur maré maya' katu niatneh, aleg dengan dat niat idi mesaad. Ngaceku Allah mawa inan lemulun luk maré dengan mawang niat.

⁸Idi Allah melalud maré meluun ratnan luk pian muyuh, pad muyuh megéi' inan petap kuan burur muyuh sebuleng, idi mela pana' kuan amung luk petulu denganin.

⁹Maya' kudeng luk inayud, "Ieh mekatu maré kuan lun masi'; idi éi'Neh meruked."

¹⁰Idi Allah luk maré ilung kuan lun luk nibu, idi ruti kuan luk kenen, Ieh ineh teh miak maré idi ngula' tibu muyuh idi ngula' bua'-bua' ratnan katu muyuh.

¹¹Ieh megéi' maré petap kuan muyuh pad muyuh megéi' mekatu, pelé mula' lemulun miak ngubur Allah ngaceku baré luk ilapdeh rat nekai.

¹²Ngaceku kekamen muyuh ini na maré petap kuan lun manu luk masi' mo', iamo' ieh ngacing mula' ubur kuan Allah.

¹³Idi ngaceku dalam tanu' katu muyuh ineh, mula' lemulun miak ngerayeh Allah ngaceku muyuh lutep maya' Bala luk Do' ratnan Keristus luk imo muyuh, idi ngaceku muyuh mekatu maré babpat kuandeh idi kuan lun baken pana'.

¹⁴Idi ideh miak sembayang kuan muyuh dengan awa ngaceku katu luk rayeh luk ginala' Allah kuan muyuh.

¹⁵Ngubur Allah ngaceku katuNeh luk pelaba do'.

2 Korintus 10

¹Ui ini, Paulus sebuleng, ngubuk nemuyuh dengan mebeneh niat idi éi' Keristus. Ui mebeneh niat pa kiung muyuh, iamo' kareb ui mado rat nemuyuh ui mekuu'.

²Ui mutuh ini, pad kareb ui macing na ui uen ngesaad ngegala' kuu'ku, ngaceku ui kali' ui miak ngegala' kuu'ku kuan tuda'-tuda' lemulun luk ngerawé nekai ngakem maya' pinian tana' ini.

³Ngaceku sagan pana' kai mulun maya' ayu tana', idi na kai pebunu' maya' ayu tana'.

⁴Ngaceku ayung pebunu' kai ini baken maya' ayu tana', iamo' maya' lalud Allah pad ngusag libung-libung luk meraben.

⁵Kai ngelaya' amung-amung saad lemulun, idi amung-amung luk sikal metueh ratnan ileh Allah, idi kai naban anid-anid terawé maya' Keristus.

⁶Kareb muyuh pangeh nengegala' do' idi baya' muyuh, idi kai temina' ngukum amung kekamen luk ngelaba ukum.

⁷Muyuh nier luk pa kiung muyuh mo'. Kudeng idé lemulun ngerawé neneh pupu Keristus, nima' neneh ngerawé ratnan bururneh sebuleng, ngaceku kai ini pana' pupu Keristus, mepad kudeng ieh.

⁸Ngaceku na ui migu', sagan pana' ui pelaba ucet ngedita' bururku ngaceku lalud kai luk biré Tuhan pad ngepicet nemuyuh idi baken ngusag nemuyuh.

⁹Na ui pian siren kudeng lemulun luk sikal ngatot nemuyuh dengan surat-surat luk biréku ineh.

¹⁰Inan luk sikal pebala teh, "Suratneh ineh meberat idi metueh, iamo' ayu bururneh melaya', idi balaneh na ulekneh!"

¹¹Nima' lemulun ineh ngerawé, idi mepad kudeng bala kai bang surat-surat luk biré kareb mado, kudeng ineh teh kekamen kai kareb kai muneng.

¹²Ngaceku na kai mekuu' semuet bang iap lemulun luk ngubur bururdeh sebuleng, idi maad burur kai dengandeh. Iamo' ideh luk nari bururdeh sebuleng maya' tarideh sebuleng, idi maad bururdeh arangdeh sebuleng mebacé.

¹³Iamo' kai na sikal ngedita' burur kai dengan na lakan, iamo' maya' lakan luk linakan Allah kuan kai. Idi lakan ineh macing nemuyuh teh.

¹⁴Ngaceku na kai nengelaba lakan ineh kareb kai nacing nemuyuh dengan mada' Bala luk Do' ratnan Keristus, ngaceku muyuh bang babpat luk biré Allah kuan kai.

¹⁵Idi na kai ngedita' burur kai ratnan kekamen lun baken luk bal lakan luk litep Allah kuan kai. Iamo' kai merapet anu muyuh amé' mula', pad kai miak nganau' kekamen luk meluun rayeh arang muyuh maya' lakan luk litep Allah.

¹⁶Idi kai miak mada' Bala luk Do' bang bawang luk mado rat nemuyuh, pad kai na ngedita' burur kai ratnan kekamen luk inau' bang babpat lun baken.

¹⁷Pangeh inayud, "Idé luk ngedita' bururneh, nima' neneh ngedita bururneh ratnan kekamen Tuhan."

¹⁸Ngaceku baken lemulun luk ngubur bururneh sebuleng ineh luk buren Allah, iamo' lemulun luk inubur Tuhan.

2 Korintus 11

¹Do' muyuh mulai niat negku sagan pana' ui sesuut bacé.

²Ui merapang ngaceku muyuh, dengan rapang luk ratnan Allah, ngaceku ui pangeh nenuduk nemuyuh dengan seburur deléi, ieh ineh Keristus mepad kudeng seburur anak luk pun mebaruh luk meligan.

³Iamo' ui matot idi mepad kudeng menipeh nenaluk Hawa dengan ilehneh, kudeng ineh teh terawé muyuh miak ruen ngeraruh ratnan siri niat idi ligan luk nguyut amé' inan Keristus.

⁴Ngaceku muyuh ngalap idé-idé luk macing mada' Yésus luk baken, idi luk na bida' kai, idi teh muyuh ngalap roh luk baken ratnan Roh luk pangeh ilap muyuh atun, idi bada' luk baken ratnan Bala luk Do' luk ilap muyuh.

⁵Ui na ngerawé bururku ini sesuut pana' mebeneh ratnan rasul-rasul luk rayeh ineh.

⁶Kian ui dat ileh peburi' lek, iamo' ui petap ileh. Kai pangeh nengegala' ini kuan muyuh bang anid-anid kareb idi bang amung-amung luk pangeh mangun pana'.

⁷Inanké ui mesala' kudeng ui ngebeneh bururku sebuleng, pad muyuh ini miak uen ngedita' ngaceku ui nemada' Bala luk Do' ratnan Allah dengan na tabpar?

⁸Ui pangeh nengasi' sidang-sidang luk baken, idi nengalap tabpar rat nedeh, pad ui miak ngasa' nemuyuh.

⁹Idi kareb ui netudo dengan muyuh bang asi', na ui mangun ku babeh kuan seburur pana', ngaceku kinanak-kinanak luk macing rat Makedonia nemaré petap kuanku. Kareb idi ui na sikal mangun ku babeh kuan muyuh, idi kudeng ineh teh mucu.

¹⁰Dengan luk matu ratnan Keristus luk tudo bang bururku, dita'ku ini na miak bebangin bang amung-amung babpat Akaya.

¹¹Ngudeh ui pebala kudeng ini? Kian, ngaceku ui na mawa nemuyuh lek? Allah kali' negku mawa nemuyuh.

¹²Ui pian nutum luk ruenku nekini, pad ui miak mebpeng nelun rasul-rasul luk baken ineh na ngedita' bururdeh idi pebala kekamendeh ineh mepad kudeng kekamen kai.

¹³Lemulun ineh baken rasul luk matu. Ideh ineh rasul-rasul luk mebalih. Ideh mebalih ratnan kekamendeh, idi siayu pad ideh siren lun mepad kudeng rasul-rasul Keristus luk matu.

¹⁴Iamo' na ui mawa ratnan ineh, ngaceku Sétan sebuleng pana' miak ngisu' ayuneh, pad ieh siren mepad kudeng malaikat acang.

¹⁵Idi ineh baken kekamen luk inan mawa kudeng amung demulun Sétan ngisu' ayudeh pad ideh siren mepad kudeng demulun luk matu; idi kekipedneh ideh uen ngua' maya' kekamendeh sebuleng.

¹⁶Ui pebala sekua' teh, aleg seburur pana' ngerawé negku ini mebacé. Iamo' kudeng muyuh ngerawé kudeng ineh, do' muyuh ngalap negku mepad kudeng selemulun luk mebacé, pad ui pana' miak medita' niat sesuut.

¹⁷Luk belénku nekini na ui mala maya' ecuk Tuhan, iamo' kudeng ayu lemulun luk mebacé luk mekuu' ngedita' bururneh;

¹⁸ngaceku mula' lemulun ngedita' bururdeh maya' terawé lemulun, idi ui pana' sikal ngedita' bururku.

¹⁹Muyuh mulai niat pa kiung lemulun luk mebacé. Bang terawé muyuh, muyuh ineh mileh.

²⁰Muyuh mulai niat nelun luk nganau' nemuyuh mangun ku demulun, kian luk muyok nemuyuh, luk naluk nemuyuh, luk ngebeneh nemuyuh, idi luk mepag nemuyuh.

²¹Idi ui pelaba igu' mala ini, iamo' kai pelaba laya', pad na miak nganau' kudeng ineh. Iamo' kudeng lemulun mekuu' ngedita' bururneh ratnan anun-anun, ui pebala mepad kudeng lun luk mebacé—ui pana' mekuu' teh.

²²Ideh lun Iberaniké? Ui pana' kudeng ineh teh. Ideh lun Israilké? Ui pana' kudeng ineh teh. Ideh inul Ibrahimké? Ui pana' kudeng ineh teh.

²³Ideh demulun Keristuské? Ui pebala kudeng lemulun luk meruden—ui teh demulun luk meluun do! Ui luk meluun géi' ngakem. Ui luk megéi' tinutup. Ui luk megéi' bibpet. Megéi' ui lélé maté.

²⁴Ui pangeh bibpet lun Yahudi limeh kua', anid-aniddeh mabpet negku teluh ngepulu' iwa' bang sekua'.

²⁵Ui bibal lun Rum teluh kua', sekua' ui binitung ku batu, teluh kua' ui mekarem, tebaco kedangan ui nanud bang abpa' rayeh.

²⁶Megéi' kua' ui nenalan bang tuda'-tuda' dereh ratnan ereb, bang tuda'-tuda' dereh ratnan lun mano, bang tuda'-tuda' dereh ratnan pupuku lun Yahudi, bang tuda'-tuda' dereh ratnan pupu baken, bang tuda'-tuda' dereh bang bawang, bang tuda'-tuda' dereh déi' su luk ali-ali, bang tuda'-tuda' dereh bang abpa' rayeh, bang tuda'-tuda' dereh arang kinanak-kinanak luk naluk.

²⁷Ui merur bang kekamen luk meberat. Megéi' ui na rudap. Megéi' ui melau idi meparing. Megéi' ui na petap akan idi ayung, idi na luk inan rudap.

²⁸Idi teh, baken ratnan amung-amung dereh ineh anid-anid aco, ui merapang ratnan ulun amung-amung sidang.

²⁹Kudeng selemulun melaya', ui teh melaya'. Kudeng selemulun mebpeh bang sala', ui pelaba susa' niat.

³⁰Kudeng ui sikal ngedita' bururku, meluun do' ui ngedita' bururku ratnan laya'ku.

³¹Idi Allah, ieh ineh Taman Tuhan Yésus luk buren raked-raked, kali' negku na mebalih.

³²Kareb ui déi' Damsik lun luk ngimet luk pa beneh Aritas ineh nengecuk lun matar bawang ngakem negku.

³³Iamo' ui inurur déi' liang bang aceh buan maya' tabuk alad bawang. Kudeng ineh ui nepuit rat bang paladneh.

2 Korintus 12

- ¹Ui na miak na ngedita' bururku, sagan pana' na ulek. Ngaceku ui sikal mada' ratnan luk sinierku idi bala luk linio ratnan Tuhan.
- ²Idi ui ngiti selemulun luk bang Keristus, idi pangeh pulu' apat lak atun, lemulun ineh pangeh kinikit macing déi' langit luk meluun dita' (kian dengan burur lek, ui na kali' kian bang aceh luk sinier mo' lek, ui na kali', Allah luk kali').
- ³Idi ui kali' lemulun luk titen ini (kian dengan burur lek, kian bang aceh luk sinier mo' lek, ui na kali', Allah luk kali').
- ⁴Idi ieh inuit iné' bang Pirdaus idi neninger bala luk na miak tetanen, ieh ineh luk na miak tetanen lemulun.
- ⁵Idi ratnan lemulun ini ui sikal ngedita' bururku, iamo' ratnan bururku sebuleng ui na sikal ngedita' bururku, kudeng na ratnan amung-amung laya'ku sebuleng.
- ⁶Kudeng ui sikal ngedita' bururku, na ui mebacé, ngaceku ui miak mala luk matu; iamo' ui na sikal ngedita' bururku pad lemulun na ngerawé negku meluun ratnan luk nekali'neh ratnan kekamenku idi balaku.
- ⁷Idi ngaceku bala luk linio ineh pelaba ula', pad ui na ngedita' bururku, idi pangeh biré kuanku aceh tabpa' luk nebpek bururku, ieh ineh aceh ét luk icuk Sétan, luk ngedereh negku, pad ui na ngedita' bururku.
- ⁸Idi ratnan ini teluh kua' ui pangeh nemutuh ratnan Tuhan, pad dereh ineh talan rat negku.
- ⁹Idi balaNeh kuanku, "KatuKu petap kuanmu, ngaceku laludKu uen ngegala' bang laya'." Ngaceku ineh dengan pelaba awang niat ui ngedita' bururku bang amung-amung laya'ku, pad lalud Keristus temurun luunku.
- ¹⁰Ini punneh amung-amung laya', kediman, asi', dereh idi susa' mangun ku awang kuanku ngaceku Kristus. Ngaceku kareb ui melaya', kareb ineh teh ui metueh peh.

¹¹Ui pangeh mangun mebacé, iamo' muyuh ini nengesaad negku. Setuneh meluun do' ui buren muyuh. Ngaceku sesuut pana' na ui mebeneh ratnan rasul-rasul luk rayeh ineh, sagan pana' ui ini na mebala.

¹²Tanu'-tanu' luk ngegala' ratnan ui rasul pangeh inau' arang muyuh dengan pelaba ulai niat, ieh ineh dengan tanu'-tanu', kekamen luk inan mawa, idi kekamen luk melalud.

¹³Idanké ui mekurang ngerawé nemuyuh ratnan sidang baken, kareb ui na mutuh anun-anun rat nemuyuhké? Ui mutuh do' nemuyuh ratnan sala' ini!

¹⁴Ngerawé do'-do', ini luk keteluh kua' ui temina' sikal macing nemuyuh, idi ui na sikal mangun ku babeh kuan muyuh. Ngaceku baken ui nakap binaweh muyuh, iamo' burur muyuh. Ngaceku na do' anak-anak nganau' temina' binaweh kuan taman-tinandeh, iamo' taman-tinan nganau' temina' kuan anak-anakdeh.

¹⁵Ui ini pelaba pian maré anun-anun, idi maré bururku sebuleng pana' ngaceku muyuh. Kudeng ui pelaba awa nemuyuh, petuluké muyuh na mawa negku?

¹⁶Matu ui ini na mangun ku babeh kuan muyuh. Iamo' inan luk sikal pelaba ui nengalap nemuyuh dengan saluk.

¹⁷Pangehké ui nengalap peruan rat nemuyuh lemaba lemulun luk pangeh icukku kuan muyuh ineh?

¹⁸Ui pangeh nemutuh Titus amé' nemuyuh, idi ui nengecuk kinanak ineh maya' neneh. Pangehké Titus nemuyok nemuyuh? Naké kai dueh nenalan maya' sebuleng Roh ineh teh? Naké kai dueh mepad lawé?

¹⁹Kian, mio muyuh ngerawé idi kai pian ngamo burur kai pa kiung muyuh. Na! Kai pebala maya' pian Keristus pa kiung Allah. Iamo' amung-amung luk ruen kai, O lun rorumku, miak ngetueh anu muyuh.

²⁰Ui merapang, idi kareb ui macing, kian ui miak nier nemuyuh baken ratnan luk pianku, idi muyuh pana' nier negku baken ratnan luk pian muyuh. Ui

merapang inan kedaluh, temaruh, useh, patad-patad, ngedat, payek-payek, mesido' niat, idi ria' lek.

²¹Ui merapang, kareb ui macing teh Tuhanku ngebeneh negku pa kiung muyuh, pad ui mesusa' niat ngaceku mula' lemulun luk pangeh mesala' atun, idi luk nateh nuren ratnan luk melutak, pasét, idi sawa' luk inau'deh ineh.

2 Korintus 13

¹Ini luk keteluh kua' ui macing nemuyuh. "Idi kudeng inan luk ngadu' nelun, na miak na inan dueh, teluh burur lun nekali'"—maya' kudeng luk pangeh inayud.

²Ui pian mada' nemuyuh luk pangeh mesala' atun, idi amung lun baken pana', mepad kudeng luk bilaku atun, kareb ui nengikak nemuyuh luk kedueh kua', iamo' ui pebala kudeng ineh teh rat mado: kareb ui macing teh, seburur pana' nateh luk mepuit ratnan ukum.

³Kali' rungen muyuh miak ngalap tanu' ratnan Keristus pebala lemaba Negku. Idi Ieh na melaya' pa kiung muyuh, iamo' Ieh ngegala' laludNeh arang muyuh.

⁴Ngaceku sagan pana' Ieh sinalib bang laya'Neh, iamo' Ieh mulun nekini ngaceku ratnan lalud Allah. Kai ini pana' melaya' teh bang Neneh, iamo' kai miak mulun denganNeh kuan muyuh, ngaceku ratnan lalud Allah.

⁵Nutun idi nier ulun muyuh sebuleng, inanké anu muyuh lutep? Naké muyuh sebuleng kali' idi Yésus Keristus tudo bang nemuyuh? Kudeng na pieh kudeng ineh muyuh pangeh neraruh.

⁶Ui merapet nemuyuh kali' kai ini na neraruh.

⁷Kai mutuh inan Allah, pad muyuh na nganau' sala', baken pad kai ini siren matu, iamo' pad muyuh ini nganau' luk matu, sagan pana' ayuneh kai pangeh neraruh.

⁸Ngaceku kai na miak nganau' anun-anun luk sikal metueh ratnan luk matu, iamo' maya' luk matu.

⁹Ngaceku kai mawang niat, kareb kai ini melaya' idi muyuh ini metueh. Ini punneh kai sembayang pad anu muyuh uen ngeriput.

¹⁰Ini punneh ui ngayud ini, kareb ui mado rat nemuyuh, pad kareb ui macing teh na ui metueh mada' nemuyuh dengan lalud luk biré Tuhan kuanku. Lalud ineh biré Tuhan pad mudut idi baken ngusag.

¹¹Idi nekini, O kinanak-kinanakku, tabi' kuan muyuh. Do' muyuh mekéel pad anu muyuh meriput, idi ninger bada'ku. Do' muyuh sebuleng niat, idi pedo'. Idi Allah luk lawa awa idi pedo' miak tudo dengan muyuh.

¹²Do' muyuh petabi' seburur dengan seburur dengan pebuen luk meligan. Amung-amung lun manu ineh maré tabi' kuan muyuh.

¹³Do' katu Tuhan Yésus Keristus idi awa Allah idi rorum Roh Meligan ngedengan amung-amung muyuh.

Galatia

Galatia 1

¹Rat ni Paulus luk pinili' mangun ku rasul, baken ratnan lemulun idi baken lemaba lemulun teh, iamo' ratnan Yésus Keristus idi Allah Taman, luk pangeh nenui Yésus rat arang lun naté.

²Amung-amung kinanak luk tungé' maré tabi' denganku kuan sidang-sidang luk déi' Galatia:

³Do' katu idi awang temurun kuan muyuh ratnan Allah Taman idi Tuhan tau Yésus Keristus.

⁴Keristus nemarké bururNeh ngaceku sala' tau, pad Ieh miak muit netau ratnan kareb luk dat ini maya' pian Allah, ieh ineh Taman tau.

⁵Rayeh kuan Allah macing raked-raked! Amin.

⁶Ui mawa ngaceku muyuh mesaget maya' bala luk baken, idi teketed ratnan Allah luk nenawar nemuyuh bang katu Keristus.

⁷Setuneh na luk idi Bala luk Do' luk baken; iamo' inan sebuang lemulun luk ngagau nemuyuh, idi luk sikal ngisu' Bala luk Do' ratnan Keristus.

⁸Iamo' kudeng kai ini idi seburur melaikat rat surga pana' miak mada' kuan muyuh bala luk baken ratnan luk kai pangeh nemada' kuan muyuh, nima' neneh uen ngediman!

⁹Kai pangeh nemala atun, nekini pana' ui mala teh, idi kudeng idé lemulun mada' bala kuan muyuh luk baken ratnan luk pangeh ilap muyuh ineh, nima' neneh uen ngediman.

¹⁰Inanké muyuh ngerawé ui pian buren lemulun? Na tu! Ui pian buren Allah. Inanké ui pian pedingeren lemulun? Kudeng pieh kudeng ineh, idi baken ui ini demulun Keristus.

¹¹Nima' negku maré kali' nemuyuh, O kinanak-kinanakku: Bala luk Do' luk pangeh bida'ku ineh baken ratnan lemulun.

¹²Na ui nengalap bala ineh ratnan lemulun, idi na ui bida' seburur lemulun pana'. Yésus Keristus sebuleng nengelio ineh kuanku.

¹³Muyuh pangeh neninger ratnan ulunku luk atun bang sembayang lun Yahudi, ratnan ui pelaba ucet ngedereh sidang Allah idi nengusag neneh.

¹⁴Ui metaduk bang sembayang lun Yahudi meluun ratnan pupuku luk mula' luk mepad ulun denganku, ngaceku pelaba kél ratnan amung-amung adat tepunku.

¹⁵Iamo' Allah dengan katuNeh nemili' negku rat bang batek tinanku, idi nenawar negku pad ui ngakem kuanNeh. Idi kareb ieh pian

¹⁶ngegala' AnakNeh ineh bang negku, pelé ui miak mada' Bala luk Do' ratnan Ieh arang lun pupu baken, idi kareb ineh teh ui na pegayam dengan seburur pana',

¹⁷idi na ui numak iné' Yerusalim matun lemulun luk mangun ku rasul atun rat negku, iamo' ui iné' déi' bawang Arab, idi nelemubed teh iné' Damsik.

¹⁸Pangeh teluk lak baruh ui numak iné' Yerusalim sikal pekali' dengan Pétrus; idi ui netudo denganneh dueh minggu kinioneh.

¹⁹Iamo' rasul-rasul luk baken, seburur pana' nateh nepapu'ku iamo' Yakub sebuleng mo' luk kinanak Tuhan ineh.

²⁰Luk inayudku ini matu. Pa kiung Allah na ui mebalih.

²¹Muci ratnan ineh ui iné' déi' bawang Siria idi Kilikia.

²²Iamo' kiungku nateh initi sidang luk bang Keristus déi' Yudia.

²³Ideh nekali' luk bila lemulun mo', "Lemulun luk nengedereh netau atun, nekini mada' Bala luk Do' ratnan anu luk piderehneh atun."

²⁴Idi ideh nengubur Allah ngaceku ui.

Galatia 2

¹Pulu' apat lak mucu ratnan ineh, ui numak teh iné' déi' Yerusalim dengan Barnabas. Idi ui nenguit ni Titus denganku.

- ²Ui iné' déi' maya' bala luk linio Allah kuanku. Idi ui nemada' nelun rayehdeh setau'-setau' ratnan Bala luk Do' luk bida'ku arang lun pupu baken ineh, pad kekamenku luk nekini idi luk nepangeh na mo'-mo' peh.
- ³Sagan pana' Titus, lun denganku ineh, pupu lun Grika, nateh ieh sinaad ruen nunat,
- ⁴sagan pana' tuda'-tuda' lemulun siayu mangun ku kinanak pangeh semuet dengan lulem, pad nier puit kai, luk kai nengalap bang Keristus Yésus. Ideh sikal nguit nekai mangun ku demulun.
- ⁵Idi sekua' pana' na kai nengebeneh burur kai kuandeh, pad kai miak ngasa' Bala luk Do' luk matu ineh kuan muyuh.
- ⁶Iamo' ratnan lemulun luk pangeh titen lun rayeh — idi ngadandeh na inan ulek kuanku; ngaceku Allah na mili' ayu lemulun — mepad kudeng luk bilaku, na ideh nemada' luk mebaruh kuanku.
- ⁷Iamo' setuneh ideh nengamo idi Allah pangeh negeletep negku mada' Bala luk Do' kuan lun pupu baken, mepad kudeng Ieh nengeletep Pétrus mada' Bala luk Do' kuan lun Yahudi.
- ⁸Allah luk nemaré tueh kuan Pétrus pad ieh mangun ku rasul kuan lun Yahudi, Ieh teh nemaré tueh kuanku mangun ku rasul kuan lun pupu baken.
- ⁹Kareb ideh pangeh nenier katu luk pangeh biré kuanku ini, idi Yakub, Pétrus, idi Yahya, luk ayuneh mangun ku lun nguyut, nepetabi' nekai dueh Barnabas, mangun ku aceh tanu' perurum, pad kai ini amé' mada' nelun pupu baken, iamo' ideh amé' mada' nelun Yahudi.
- ¹⁰Iamo' ideh pian nekai ngerawé nelun masi' arangdeh, idi ini luk ui geregan tu-tu nganau'.
- ¹¹Iamo' kareb Pétrus nacing déi' Antiokia, idi ui nengayud neneh pa kiung lun mula', ngaceku megala' lawéneh sala'.

¹²Kareb nateh lun luk icuk Yakub nacing, ieh pangeh nekuman dengan lun pupu baken; iamo' kareb ideh nacing, idi ieh neburo idi nenecan nedeh ngaceku matot nelun luk metueh mada' ratnan sunat ineh.

¹³Idi lun Yahudi luk baken pana' pad-pad nesiayu dengan Pétrus pad Barnabas pana' rinaruh ratnan lawédeh ineh.

¹⁴Kareb ui nenier idi kekamen lemulun ineh na petulu dengan luk matu ratnan Bala luk Do', idi ui nemala kuan Pétrus pa kiung lun mula', "Kudeng iko seburur lun Yahudi mulun maya' ayu lun pupu baken, idi baken maya' ayu lun Yahudi, kudeng apehké iko ngesaad lun pupu baken ini mulun maya' ayu lun Yahudi?"

¹⁵Kali' rungen tau tinganak lun Yahudi idi baken tinganak lun pupu baken luk mesala'.

¹⁶Iamo' kai kali' idi lemulun ruen matu ngaceku manu inan Yésus Keristus, baken ngaceku maya' Ukum. Kai pana' pangeh manu inan Keristus Yésus, pad kai ruen matu ngaceku anu kai nan Keristus, baken ngaceku maya' Ukum. Ngaceku seburur pana' nateh luk ruen matu ngaceku maya' Ukum.

¹⁷Kudeng kai metueh nakap dalam sikal ruen matu bang Keristus, idi kai ini pana' siren kudeng lun mesala' mepad kudeng lun pupu baken, inanké Keristus lawa sala'? Na tu-tu!

¹⁸Kudeng ui lemubed maya' aceh dalam luk pangeh ticanku, idi megala' ui lun mesala'.

¹⁹Ngaceku ratnan Ukum ui ini naté nepuit ratnan Ukum, pad ui miak mulun kuan Allah.

²⁰Ui pangeh sinalib dengan Keristus. Idi ulunku ini baken ui teh, iamo' Keristus luk mulun bang negku. Ulunku luk nekini, ieh ineh ulun ratnan anu inan Anak Allah luk pangeh mawa negku idi luk nemaré bururNeh ngaceku ui.

²¹Na ui ngarung katu Allah. Kudeng luk matu ineh nacing dengan dalam Ukum Musa, idi Keristus pangeh naté mo'-mo'.

Galatia 3

¹Muyuh lun Galatia pelaba bacé! Idéké luk pangeh nenaluk nemuyuh dengan mangun? Até Yésus Keristus luun kayuh salib pangeh ginala' pa kiung muyuh!

²Do' ngor balaku ini: inanké muyuh nengalap Roh ineh ngaceku maya' Ukum, kian ngaceku ninger idi manu ku Bala luk Do' lek?

³Ngudehké muyuh kudeng ineh bacé? Muyuh pangeh nengimun dengan Roh, pianké muyuh mangeh kekamen maya' ulun tana' ini?

⁴Mo'-mo' ké amung-amung peruan luk pangeh ilap muyuh? Na ui manu ku ineh.

⁵Inanké Allah maré Roh kuan muyuh, idi nganau' kekamen luk melalud arang muyuh ngaceku muyuh maya' Ukum ineh kian ngaceku ninger idi manu ku Bala luk Do' lek?

⁶Mepad kudeng luk inayud ratnan Ibrahim, "Ieh pangeh manu inan Allah, idi ngaceku anuneh ineh ieh imo Allah matu."

⁷Ngaceku ineh do' muyuh kali', idi amung-amung lemulun luk manu ineh anak-anak Ibrahim luk matu.

⁸Surat Allah nekali' atun, idi Allah sikal nganau' lun pupu baken matu ngaceku anu, idi Ieh nemada' Bala luk Do' atun kuan Ibrahim, kebalaneh, "Idi bang namu amung-amung lun pupu baken miak ngalap peruan."

⁹Ngaceku ineh amung-amung lemulun luk manu ngalap peruan dengan Ibrahim luk manu ineh.

¹⁰Lemulun luk merapet sikal maya' Ukum, ideh pa liang kediman, ngaceku pangeh inayud, "Idi kediman kuan anid-anid burur lemulun luk na lutep nganau' amung-amung luk inayud bang surat Ukum ineh."

¹¹Megala' pa kiung Allah, idi seburur pana' na miak ruen matu ngaceku ratnan Ukum; ngaceku pangeh inayud, "Lemulun luk matu miak ngalap ulun ngaceku anu."

¹²Iamo' Ukum ineh baken ratnan manu, iamo' maya' kudeng luk inayud, "Lemulun luk maya' amung Ukum ineh miak mulun ngaceku Ukum ineh teh."

¹³Imao' Keristus pangeh nenguli' netau ratnan kediman Ukum ineh dengan mangun ku aceh kediman kuan tau, ngaceku pangeh inayud, "Kediman kuan anid-anid lemulun luk tekito luun kayuh."

¹⁴Keristus nenganau' ineh, pad peruan luk ratnan Ibrahim miak macing kuan lun pupu baken bang Keristus Yésus, pelé tau miak ngalap Roh luk pijani' ineh ngaceku ratnan anu.

¹⁵O kinanak-kinakku, ui makai luk pinginud ratnan ulun tau luk pekalai: kudeng dueh burur ngamo ratnan anun-anun, pad didueh pejani', seburur pana' nateh miak ngusag jani' ineh, kian ngeluun ineh.

¹⁶Allah nenganau' jani'-jani'Neh kuan Ibrahim idi inulneh. Surat Allah na pebala, "idi kuan amung inulneh," ilungneh mula' lemulun. Kebalaneh, "Idi kuan sebuleng inulmu," ilungneh seburur mo', ieh ineh Keristus.

¹⁷Ini ilung balaku: Allah nenganau' aceh jani', idi nepejani' maya' ineh. Ukum luk nacing apat ngeratu teluh ngepulu' lak mucu ratnan ineh na miak ngusag pejani' ineh, idi ngagka' jani' Allah.

¹⁸Ngaceku kudeng luk barén Allah macing ratnan Ukum, idi baken ieh ratnan jani'Neh; iamo' ngaceku Allah pangeh nenganau' jani' ineh, idi Ieh nengacing ineh kuan Ibrahim.

¹⁹Kudeng pieh kudeng ineh, anunké ulek Ukum ineh? Ukum ineh pangeh biré pad ngegala' sala', idi inan ulek pad macing inul Ibrahim tinganak, luk inan jani' ineh biré. Ukum ineh biré lemaba melaikat-melaikat dengan ticu' seburur lemulun luk ngatum.

²⁰Idi na ulekneh lemulun luk ngatum kudeng inan seburur mo'; idi Allah ineh Sebuleng.

²¹Inanké ilungneh Ukum ineh sikal metueh ratnan jani'-jani' Allah? Na tu-tu! Ngaceku kudeng sebuleng ukum pangeh biré luk miak ngacing ulun kuan lemulun, kali' rungen lemulun miak ruen matu ratnan ukum ineh.

- ²²Iamo' Surat Allah pebala, amung tana' ini pa liang lalud sala', pad baré ineh luk pijani' maya' anu inan Yésus Keristus miak barén kuan lemulun luk manu.
- ²³Iamo' kareb nateh anu ineh nacing, tau pangeh inimet pa liang Ukum, idi tinutup, pad anu ineh miak uen ngegala'.
- ²⁴Ngaceku ineh Ukum ineh pangeh mangun ku aceh guru pad Keristus macing, pelé tau miak ruen matu ratnan anu.
- ²⁵Iamo' pangeh acing anu ineh, idi na tau pa liang ukum guru ineh.
- ²⁶Amung-amung muyuh anak-anak Allah ngaceku ratnan anu Keristus Yésus.
- ²⁷Amung muyuh luk pangeh rireb bang Keristus pangeh nengayang ku Keristus.
- ²⁸Na luk idi lun Yahudi idi lun pupu baken, na luk idi demulun idi lun luk mepuit, na luk idi deléi idi decur; ngaceku amung-amung muyuh ini mangun ku sebuleng bang Keristus Yésus.
- ²⁹Kudeng muyuh mangun ku pupu Keristus, kali' rungen muyuh inul Ibrahim luk ngalap babpat petulu dengan pejani' Allah ineh.

Galatia 4

- ¹Idi teh seruked lemulun luk ngalap babpat ineh anak teh, sesuut pana' na ieh baken ratnan demulun, sagan pana' ieh luk kuan amung-amung.
- ²Iamo' ieh pa liang taman luk nengasa' neneh idi lun luk nengimet neneh pad macing kareb luk litep tamanneh.
- ³Kudeng ineh teh tau ini, kareb tau anak-anak, tau mangun ku demulun pa liang roh-roh luk ngimet tana'.
- ⁴Iamo' pangeh karebneh meriput Allah nengecuk AnakNeh luk tinganak ratnan seburur decur idi luk inau' mebeneh pa liang Ukum lun Yahudi,
- ⁵pad Ieh nguli' amung-amung lemulun luk inau' mebeneh pa liang Ukum ineh, pelé tau mangun ku anak Allah.

- ⁶Ngaceku muyuh mangunku anak-anak, idi Allah pangeh nengecuk Roh AnakNeh semuet bang niat tau luk nawar, "Ama', O Ama'!"
- ⁷Ngaceku ineh na iko mangun ku demulun teh, iamo' mangun ku anak; idi ngaceku iko mangun ku anakNeh, kali' rungen iko mangun ku lemulun luk ngalap babpat Allah pana'.
- ⁸Iamo' atun muyuh na miti Allah, idi muyuh mangun ku demulun kuan akang luk baken allah luk matu.
- ⁹Iamo' nekini, ngaceku muyuh miti Allah, meluun teh ngaceku muyuh inite Allah, ngudehké muyuh teketed idi lemubed kuan roh-roh tana' ini luk metueh ngimet, luk melaya' idi masi', pad muyuh mangun ku demulundeh sekua' teh?
- ¹⁰Muyuh ngerawé aco, bulan, kareb luk rayeh, idi lak teh.
- ¹¹Ui merapang ku muyuh! Kian kél idi erurku ngaceku muyuh mo'-mo' lek.
- ¹²O kinanak-kinanakku, ui mutuh nemuyuh mangun kudeng ui ini. Ngaceku ui pana' mepad kudeng muyuh. Idi sesuut pana' na muyuh nganau' sala' kuanku.
- ¹³Muyuh kali' punneh ui nemada' Bala luk Do' kuan muyuh mon. Ngaceku ui mét.
- ¹⁴Iamo' na muyuh nengedat idi nenala' negku, sagan pana' étku mangun ku aceh tutun kuan muyuh. Iamo' muyuh nenganak negku mepad kudeng nganak melaikat Allah. Muyuh nenganak negku mepad kudeng nganak Keristus pana'.
- ¹⁵Atun muyuh mawang niat. Anun luk nangun? Uni kali' idi kudeng miak, muyuh pian nakul ilung mateh muyuh idi maré kuanku.
- ¹⁶Pangehké ui mangun ku bunu' muyuh ngaceku mada' luk matu kuan muyuh?
- ¹⁷Lun baken ineh meké' nakap nemuyuh, iamo' baken maya' pinian luk do'; iamo' ideh sikal ngetatau nemuyuh pad muyuh teketed maya' nedeh.

- ¹⁸Idi kél ineh megéi do' kudeng inan terawé luk do', idi baken kareb ui idi dengan muyuh mo'.
- ¹⁹O anak-anakku, ngaceku muyuh ui mabeh luk mét mepad kudeng nenganak teh, pad Keristus ruen bang nemuyuh.
- ²⁰Ui geregan kudeng ui idi dengan muyuh nekini pad ui miak ngisu' terawéku pa kiung muyuh, ngaceku ui merapang ratnan ulun muyuh.
- ²¹Nima' negku ngitun nemuyuh luk sikal mangun ku demulun Ukum: naké muyuh ninger bala Ukum ineh?
- ²²Kebalaneh, Ibrahim ineh nenginul dueh anak deléi, sebuleng ratnan demulun decur, idi sebuleng ratnan decur luk lun do'.
- ²³Iamo' anak luk ratnan demulun decur ineh pangeh tinganak ratnan ulun lemulun; iamo' anak luk ratnan decur luk lun do' pangeh tinganak ngaceku ratnan pejani'.
- ²⁴Ini mangun ku aceh luk pinginud, ngaceku dueh decur ini mangun ku dueh pejani', sebuleng rat Pegkung Sinai luk nenganak anak-anak luk mangun ku demulun, ieh ineh Hagar.
- ²⁵Idi Hagar ineh pinginud Pegkung Sinai déi' bawang Arab, idi pinginud Yerusalim luk nekini, ieh ineh aceh demulun dengan anak-anakneh.
- ²⁶Iamo' Yerusalim luk déi' dita', ieh ineh luk lun do', idi tinan tau.
- ²⁷Ngaceku pangeh inayud, "Do' iko mawang niat, O decur luk na anak! Do' iko mawang niat idi ngitang, O decur luk na nekali' mét nenganak! Ngaceku decur luk tican ineh meluun ula' anakneh ratnan decur luk inan awan."
- ²⁸Iamo' muyuh ini, O kinanak-kinanakku, anak-anak Allah, maya' jani'Neh mepad kudeng Isak.
- ²⁹Kareb ineh anak uk tinganak kudeng luk pekalai nengedereh anak luk tinganak maya' lalud Roh Allah. Kudeng ineh teh nekini.

³⁰Iamo' kudeng apehké bala Surat Allah? Kebalaneh, "Nala' demulun luk decur ineh dengan anakneh, ngaceku anak demulun luk decur ineh na miak ngalap babpat pad-pad dengan anak decur luk lun do' ineh."

³¹Ngaceku ineh, O kinanak-kinanakku, tau ini baken anak demulun decur ineh, iamo' anak decur luk lun do' ineh.

Galatia 5

¹Nekini tau mepuit, ngaceku Keristus pangeh nemuit netau. Ngaceku ineh do' tau tuped meraben, idi aleg muyuh mangun ku demulun sekua' teh.

²Ninger muyuh! Ui ini Paulus pebala nemuyuh. Kudeng muyuh ruen nunat, ilungneh Keristus na ulek kuan muyuh.

³Sekua' teh ui mada' nemuyuh: idé-idé luk ruen nunat, idi na miak na ieh maya' amung-amung Ukum ineh.

⁴Muyuh luk sikal ruen matu ratnan maya' Ukum ineh pangeh nepatad ratnan Keristus. Muyuh pangeh neremuat rat bang katu Allah.

⁵Kai ini merapet ku Allah nganau' nekai matu. Idi kai nganét ineh dengan lalud RohNeh luk ngakem maya' anu kai.

⁶Ngaceku bang Keristus Yésus, sunat idi na sinunat pana' nateh ulekneh, iamo' luk do', ieh ineh anu luk uen ngegala' bang awa.

⁷Atun muyuh meké! Idéké luk nemebpeng nemuyuh pad muyuh na maya' luk matu ineh?

⁸Ngaceku ubuk ineh baken ratnan Tuhan luk pangeh nenawar nemuyuh.

⁹Idi lamud luk sesuut ngelamud banak luk setebalu' ineh.

¹⁰Ui merapet nemuyuh bang Tuhan, pad muyuh na ngerawé ratnan anun-anun luk baken. Iamo' lemulun, sagan pana' idé, luk ngagau niat muyuh miak kumin Allah.

¹¹Iamo', O kinanak-kinanakku, kudeng ui mada' ratnan sunat ineh teh, ngudehké ui pidereh teh? Kudeng pieh kudeng ineh, bada'ku ratnan salib ineh na mangun ku batu luk inan metebaceng.

¹²Nima' amung-amung lemulun luk ngagau niat muyuh ineh ngurat bururdeh sebuleng.

¹³Iamo' muyuh ini, O kinanak-kinanakku, pangeh tinawar pad muyuh mepuit; iamo' aleg makai puit ineh maya' pinian burur, iamo' ratnan awa ngebeneh burur muyuh seburur dengan seburur.

¹⁴Ngaceku amung-amung Ukum ineh pangeh pimung dengan sebuleng bala, ieh ineh, "Do' iko mawa kuan lun denganmu mepad kudeng bururmu sebuleng."

¹⁵Iamo' kudeng muyuh ngatep idi ngedereh nelun dengan muyuh, kali' rungen muyuh mepad kudeng pung. Ngerawé do'-do' pad muyuh na pepadé.

¹⁶Ini ilung balaku: nima' Roh Meligan ngimet ulun muyuh, pad muyuh na maya' pinian burur.

¹⁷Ngaceku pinian burur sikal metueh ratnan Roh, idi pinian Roh ineh sikal metueh ratnan pinian burur, ngaceku dueh-duehneh ini pebunu' pad muyuh na miak nganau' luk pian muyuh.

¹⁸Iamo' kudeng muyuh kiuten Roh idi na muyuh pa liang Ukum ineh.

¹⁹Kekamen luk maya' pinian burur pangeh megala', ieh ineh pasét, luk melutak, idi mesawa',

²⁰sembayang inan akang, mangun, pebunu', kedaluh, temaruh, megateh niat, ngeluun bururmu sebuleng, patad, babpat-babpat,

²¹melili, mabuk, rot luk dat, idi luk kudeng ineh teh. Ui mada' nemuyuh nekini, mepad kudeng ui pangeh nemada' nemuyuh atun: lemulun luk nganau' kekamen ini na miak ngalap babpat bang Imet Allah.

²²Iamo' bua'-bua' Roh ineh, ieh ineh awa, mawang niat, pedo', mulai niat, éi' do' niat, lutep maya' jani',

²³mebeneh niat, idi tuman ratnan pinian burur. Idi na luk idi ukum luk mebpeng luk kudeng ini.

²⁴Iamo' lemulun luk manun ku pupu Keristus Yésus pangeh nenalib pinian burur dengan amung-amung lili idi piandeh.

²⁵Roh Meligan pangeh nemaré ulun kuan tau. Ngaceku ineh do' tau nima' Neneh ngimet ulun tau.

²⁶Aleg tau ngedita' burur tau sebuleng, pad tau maré ét niat seburur dengan seburur, idi temaruh seburur dengan seburur.

Galatia 6

¹O kinanak-kinanakku, kudeng seburur kikem bang anun-anun luk mesala', do' muyuh luk kiuten Roh ineh ngedo' lemulun luk kudeng ineh dengan niat luk mebeneh, dengan ngerawé burur muyuh sebuleng pad muyuh sebuleng na mekaneh tutun.

²Do' muyuh mabeh babeh muyuh seburur dengan seburur, idi kudeng ineh teh muyuh ngeriput ukum Keristus.

³Ngaceku kudeng idé lemulun luk ngerawé bururneh do', setuneh na ieh do'. Ieh naluk bururneh sebuleng.

⁴Iamo' do' anid-anid burur ngiti kekamenneh sebuleng. Kudeng kekamenneh do', idi teh ieh miak mawang niat ku luk inau'neh ineh dengan na pian uen maad dengan lun baken.

⁵Ngaceku anid-anid burur miak mabeh babehneh sebuleng.

⁶Do' lemulun luk badén ku bada' Kristen maré babpat binawehneh kuan lemulun luk mada' neneh.

⁷Aleg muyuh uen naluk; Allah na miak inan situnga. Anun-anun luk tibuen lemulun, ineh teh luk miak ruenneh ngeranih.

⁸Kudeng ieh nibu maya' pinian bururneh, ratnan pinian bururneh ineh ieh miak ngeranih até; iamo' kudeng ieh nibu maya' kuyut Roh ineh, ratnan Roh ineh ieh miak ngeranih ulun luk meruked.

⁹Aleg tau musam nganau' luk do', ngaceku inan karebneh tau ngeranih, kudeng tau tuman.

- ¹⁰Ngaceku ineh, do' tau megéi' nganau' luk do' kuan amung-amung lemulun, meluun teh kuan kinanak-kinanak luk pad-pad manu.
- ¹¹Siruh, kudeng apéh rayeh urup luk inayud kuan muyuh dengan ticu'ku sebuleng.
- ¹²Lemulun luk ngedita' bururdeh maya' ayu lemulun, ideh luk ngesaad nemuyuh ruen nunat, pad ideh na uen ngedereh ratnan salib Keristus ineh.
- ¹³Lemulun luk sinunat ineh na ngimet Ukum, iamo' piandeh muyuh ruen nunat pad ideh miak ngedita' bururdeh ngaceku muyuh maya' adat ineh.
- ¹⁴Iamo' na ui pian medita' niat ku luk baken ratnan salib Tuhan tau Yésus Keristus. Ngaceku ratnan salibNeh ineh, tana' ini sinalib kuanku, idi ui pana' sinalib kuan tana' ini.
- ¹⁵Ngaceku sunat idi na sinunat ineh pana' nateh ulekneh, iamo' luk inan ulek, ieh ineh aceh pudut luk mebaruh.
- ¹⁶Do' awang idi éi' temuruh luun amung-amung lemulun luk maya' ukum ini, idi luun pupu Allah ineh.
- ¹⁷Rat kareb ini aleg seburur pana' ngesusa' negku; ngaceku pilat Yésus ineh luk luun bururku ngegala' ratnan ui ini demulun Yésus.
- ¹⁸Do' katu Tuhan tau Yésus Keristus ngedengan roh muyuh, O kinanak-kinanakku. Amin.

Epesus

Epesus 1

¹Rat ni Paulus, rasul Keristus Yésus maya' pian Allah— Kuan amung lun manu luk déi' Epesus luk lutep bang Keristus Yésus:

²Do' katu idi awang ratnan Allah Taman tau idi Tuhan Yésus Keristus ngedengan nemuyuh.

³Do' tau ngubur Allah, Taman Tuhan tau Yésus Keristus! Ngaceku Ieh pangeh nengeperuan netau bang Keristus dengan amung-amung baré Roh luk rat surga.

⁴Kareb nateh tana' ini pinudut, Allah nemili' netau bang Keristus ineh, pad tau meligan idi na mesala' pa kiung Tuhan. Ngaceku awaNeh,

⁵Allah pangeh nengeletep netau atun mangun ku anak-anakNeh ngaceku ratnan Yésus Keristus, maya' luk petulu dengan pinianNeh.

⁶Do' tau ngubur Allah ngaceku katuNeh luk pelaba rayeh, luk biréNeh kuan tau bang anakNeh luk inanNeh mawa!

⁷Ngaceku ratnan dara' Keristus tau pangeh inuli', ieh ineh Allah maré do' ratnan amung-amung sala', maya' katuNeh luk mela ineh,

⁸luk biré dengan mela kuan tau. Dengan amung ilehNeh idi do' kali',

⁹Allah nenganau' luk pianNeh, pad Ieh nengegala' kuan tau terawéNeh luk inalum ineh, luk litepNeh miak uen ngeriput lemaba Keristus.

¹⁰Allah pian ngacing terawéNeh bang kareb luk petulu; ieh ineh Ieh pian ngamung amung-amung luk pinudut, do' luk bang surga idi luk luun tana', mangun ku sebuleng pa liang Keristus luk rayeh.

¹¹Amung-amung miak ruen maya' pian idi terawé Allah. Idi Allah nemili' netau mangun ku pupuNeh bang Keristus, ngaceku pinianNeh sebuleng, maya' kudeng luk litepNeh rat pun-pun.

¹²Ngaceku ineh, do' tau ini luk pun-pun merapet inan Keristus ineh, ngubur rayeh Allah!

¹³Kudeng ineh teh muyuh, kareb muyuh neninger bala luk matu, ieh ineh Bala luk Do' luk nengulun nemuyuh, idi muyuh pangeh manu inan Keristus, idi muyuh pangeh itu ku Roh Meligan luk pangeh pijani' ineh.

¹⁴Idi Roh mangun ku etu ratnan tau ngalap babpat idi puit luk pijani' Allah kuan pupuNeh sebuleng. Do' tau ngubur rayeh Allah.

¹⁵Ngaceku ineh, kareb ui pangeh neninger ratnan anu muyuh inan Tuhan Yésus idi awa muyuh kuan amung-amung lun manu,

¹⁶na ui ugka' ngubur Allah ngaceku muyuh. Ui neten nemuyuh bang sembayangku,

¹⁷idi mutuh Allah Tuhan tau Yésus Keristus, ieh ineh Taman luk buren ineh, maré kuan muyuh Roh luk nganau' nemuyuh mileh, idi luk ngegala' Allah kuan muyuh pad muyuh ngiti Neneh.

¹⁸Ui mutuh Tuhan ngukab terawé muyuh pad muyuh miak nier rasatNeh, idi pad muyuh kali' anunké rapet ineh luk inan muyuh tinawarNeh, idi kudeng apeh do' amung peruan luk rayeh ineh luk pinaji'Neh kuan amung-amung lun manu;

¹⁹idi kudeng apeh rayeh laludNeh kuan tau luk manu. Lalud luk ngakem bang netau mepad kudeng lalud rayeh

²⁰luk pikai Neh, kareb Ieh nenui Keristus rat arang lun naté, idi nengetudo Neneh pa tinuehNeh déi' surga.

²¹Keristus meluun dita' ratnan amung lalud, idi tueh, idi luk ngimet déi' surga. Ieh pa luun amung-amung lalud bang tana' ini, idi bang tana' luk miak macing mucu pana'.

²²Idi luk amung-amung inau' Allah pa liang kukud Keristus, idi Ieh biré Allah kuan sidang mangun ku luk rayeh pa luun luk amung-amung.

²³Ngaceku sidang ineh burur Keristus, luk riniput Tuhan luk ngeriput amung-amung bang luk amung-amung.

Epesus 2

- ¹Atun muyuh pangeh naté ngaceku amung-amung dat idi sala' muyuh.
- ²Kareb ineh muyuh nemaya' ulun tana' ini luk dat; muyuh nemaya' raca' amung-amung lalud luk arang gawa', ieh ineh roh luk ngakem nekini bang niat lemulun luk ngelaba bala Allah.
- ³Setuneh atun amung tau mepad kudeng ideh. Tau mulun maya' pinian burur tau, idi nenganau' anun-anun luk petulu dengan terawé tau. Idi tau pangeh nekaneh useh Allah mepad kudeng lun baken ineh teh.
- ⁴Iamo' éi' Allah pelaba rayeh, idi awaNeh kuan tau pana' rayeh,
- ⁵pad kareb tau naté ngaceku sala' tau, Ieh pangeh nengulun netau pad-pad dengan Keristus. Muyuh pangeh inulun ngaceku katu Allah,
- ⁶idi bang Keristus Yésus Ieh pangeh nenui idi nengetudo netau, pelé tau pad-pad ngimet dengan Keristus déi' surga.
- ⁷Allah nenganau' ini pelé ngegala' macing raked-raked, katuNeh luk pelaba rayeh, ieh ineh awaNeh luk ginala' kuan tau bang Keristus Yésus.
- ⁸Ngaceku dengan katu Allah muyuh inulun ngaceku ratnan anu, idi ini baken kekamen muyuh, iamo' baré Allah,
- ⁹baken ratnan kekamen, pad seburur na ngedita' bururneh.
- ¹⁰Ngaceku tau ini luk pinudut Allah, inau'Neh bang Keristus Yésus pad nganau' kekamen luk do' luk tinina' Allah kuan tau.
- ¹¹O muyuh lun luk tinganak pupu baken luk titen lun Yahudi na sinunat, do' ngerawé kudeng apeh ulun muyuh mon. (Iamo' lun Yahudi ngamo bururdeh sebuleng sinunat. Sunat ineh aceh adat luk ruen lemulun kuan bururdeh sebuleng.)
- ¹²Kareb ineh muyuh mado ratnan Keristus. Muyuh na iniap dengan pupu Allah luk pinili'. Muyuh na nengalap babpat bang jani' luk pijani' Allah kuan pupuNeh. Muyuh mulun bang tana' ini dengan na rapet, idi na Tuhan.
- ¹³Iamo' bang Keristus Yésus, muyuh luk atun mado, nekini pangeh muneng ngaceku ratnan dara' Keristus.

¹⁴Ngaceku Keristus sebuleng mangun ku pedo' kuan tau. Ngaceku Ieh nenganau' nelun Yahudi idi lun pupu baken ineh mangun ku sebuleng pupu. Dengan bururNeh sebuleng Keristus nengusag alad luk nematad nedeh pad ideh pebunu'.

¹⁵Ieh nenala' Ukum lun Yahudi dengan amung-amung adatdeh, idi Ieh nemudut ratnan dueh babpat ineh sebuleng pupu luk perurum Neneh. Idi dengan ineh Ieh nengacing pedo'.

¹⁶Ratnan atéNeh luun kayuh salib Keristus nengagka' bunu' ineh. Dengan salibNeh Ieh nenguit dueh babpat ineh pedo' dengan Allah pad ideh mangun ku sebuleng burur kuan Allah.

¹⁷Idi Keristus nacing mada' Bala luk Do' ratnan awang idi pedo' kuan muyuh luk mado ratnan Allah idi kuan lun Yahudi luk muneng Neneh.

¹⁸Ngaceku ratnan Keristus teh tau luk dueh babpat ini miak amé' matun Taman bang Roh luk sebuleng ineh.

¹⁹Ngaceku ineh baken muyuh lun pupu baken idi lun sakai teh, iamo' nekini muyuh ineh lun kuan bawang mepad dengan lun manu. Idi teh muyuh mangun ku setetek ruma' dengan Allah.

²⁰Muyuh pana' pinudut pa luun tapin luk rireng rasul-rasul idi nabi-nabi, idi batu lidung, ieh ineh Keristus Yésus sebuleng.

²¹Idi bang Keristus amung-amung pudut pebuun, idi amé'-amé' rayeh mangun ku Ruma' Allah luk meligan bang Tuhan.

²²Idi bang Keristus ineh teh muyuh ini pana' pinudut pad-pad mangun ku luk inan Allah tudo ngaceku ratnan RohNeh.

Epesus 3

¹Idi ini punneh ui ini, luk kiling ngaceku Keristus Yésus kuan muyuh lun pupu baken, sembayang pa kiung Allah.

²Kali' rungen muyuh pangen neninger ratnan kekamen luk biré Allah kuanku maya' katuNeh, pad ui ngacing luk do' kuan muyuh.

- ³Allah nengegala' luk inalumNeh ineh kuanku dengan dalam bala luk linio, mepad kudeng luk pangeh inayudku kuan muyuh atun dengan sesuut bala.
- ⁴Idi kudeng muyuh maca' ineh, miak muyuh kali' luk nekali'ku ratnan luk inalum Keristus.
- ⁵Idi mon luk inalum ineh nateh bida' kuan lemulun, mepad kudeng luk pangeh ginala' Roh nekini kuan rasul-rasul idi nabi-nabi luk meligan.
- ⁶Ini luk inalum ineh: dengan dalam Bala luk Do' ineh lun pupu baken ngalap babpat perian Allah pad-pad dengan lun Yahudi. Ideh mangun ku babpat sebuleng burur, idi ngalap babpat bang jani' Allah luk pijani'Neh bang Keristus Yésus.
- ⁷Ui pangeh inau' ku lun luk mada' Bala luk Do' maya' katu Allah luk biréNeh negku ngaceku tueh laludNeh ineh.
- ⁸Idi kuanku ini luk pelaba dat rat arang amung-amung lun manu, katu ineh pangeh biré pad ui miak mada' Bala luk Do' kuan lun pupu baken ratnan do' Keristus luk na kekipedneh,
- ⁹idi ngegala' kuan amung lemulun kudeng apeh pian Allah luk inalum miak uen ngacing. Allah luk nemudut luk amung-amung pangeh nenapung ineh tuda'-tuda' io,
- ¹⁰pad bang kareb ini tuda'-tuda' ileh Allah miak badén sidang kuan amung-amung luk ngimet idi lalud luk déi' surga.
- ¹¹Allah nenganau' ini maya' pinianNeh luk meruked luk inau'Neh lutep bang Keristus Yésus Tuhan tau.
- ¹²Bang Keristus ineh, idi ngaceku anu tau Neneh, tau mekuu' amé' matun Allah dengan merapat.
- ¹³Ngaceku ineh ui mutuh pad muyuh na metalang niat ngerawé derehku kuan muyuh luk mangun ku peruan kuan muyuh.
- ¹⁴Idi ini punneh ui tekeradung pa kiung Taman ineh.
- ¹⁵Rat Neneh anid-anid pupu déi' surga idi bang tana' pana' inan ngadan.

¹⁶Idi ui mutuh pad Ieh maré kuan muyuh ratnan rayehNeh luk mela, lalud ratnan RohNeh luk nganau' nemuyuh metueh bang niat muyuh,

¹⁷pad Keristus tudo bang niat muyuh ngaceku anu. Ui mutuh pad muyuh inan uat idi diri bang awa,

¹⁸pad muyuh dengan amung lun manu miak kali' tuda' kirayehneh, kikedangneh, kidita'neh, idi kidalemneh, awa Keristus.

¹⁹Matu, do' muyuh kali' awa Keristus — sagan pana' awaNeh ineh na miak kali' kidalemneh — pad muyuh miak uen manu' ku amung-amung peruan Allah dengan elaNeh.

²⁰Idi kuan Allah luk melalud nganau' dengan ela-ela anun-anun luk pituen tau idi luk teruayen tau pana', maya' laludNeh luk ngakem bang netau:

²¹idi rayeh kuan Allah bang sidang idi bang Keristus Yésus, pad macing amung-amung inul, raked-raked peh. Amin.

Epesus 4

¹Idi ini punneh ui ini, Paulus, luk pangeh kiling ngaceku Tuhan, mutuh nemuyuh mulun petulu dengan tawar luk inan muyuh pangeh tinawar ineh.

²Do' muyuh mebeneh niat, melaya' niat, idi mulai niat. Idi teh do' ngegala' awa muyuh idi ngedengan seburur dengan seburur.

³Do' muyuh mekél ngita rurun luk biré Roh Allah nemuyuh, dengan abet awang idi pedo'.

⁴Inan sebuleng burur idi sebuleng Roh mepad kudeng inan sebuleng rapet luk inan muyuh pangeh tinawar Allah.

⁵Inan sebuleng Tuhan, sebuleng anu, idi sebuleng rereb.

⁶Inan sebuleng Allah idi Taman kuan amung lemulun. Ieh ineh Tuhan pa luun amung-amung, idi Ieh ngakem bang luk amung-amung. Ieh idi bang luk amung-amung teh.

⁷Anid-anid burur tau ngalap baré luk petulu maya' babpat luk biré Keristus ineh.

- ⁸Maya' kudeng luk inayud, "Kareb Ieh numak iné' dita' Ieh nenguit mula' lemulun luk tiban; idi Ieh nemarké baré kuan lemulun."
- ⁹Anunké ilung bala, "Kareb Ieh numak"? Ilungneh, pun-pun Ieh netemurun — ieh ineh macing nan tana' luk pa liang tu-tu.
- ¹⁰Idi Ieh luk pangeh netemurun, Ieh ineh teh luk pangeh numak meluun dita' ratnan amung-amung langit ineh, pelé Ieh miak manu' luk amung-amung.
- ¹¹Ieh luk maré baré-baré kuan lemulun. Ieh nengiding sebuang lemulun mangun ku rasul-rasul, sebuang mangun ku nabi-nabi, sebuang mangun ku lun mada' Bala luk Do', idi sebuang mangun ku gembala idi guru.
- ¹²Ieh nenganau' ini pad ngelelep lun manu kuan kekamen Tuhan, pad ngetueh burur Keristus.
- ¹³Kudeng ineh teh amung-amung tau macing inan sebuleng ruruh bang anu idi ileh ratnan Anak Allah. Tau mangun ku lun merar luk iuk-iuk amé' meriput petulu dengan rayeh Keristus.
- ¹⁴Pad tau na mangun ku anak-anak peh luk lipak-lipak mepad kudeng ribut luk iniup amung-amung bui bada' luk bida' lemulun dengan saluk idi ilehdeh luk dat ineh, idi luk ngeraruh lemulun ku ilehdeh ineh.
- ¹⁵Iamo' dengan pebala luk matu dengan awa, do' tau mangun meriput bang Keristus luk mangun ku Lun Rayeh.
- ¹⁶Pa liang imet Keristus amung babpat burur ineh mepamung idi burur ineh petutum ngaceku ratnan anid-anid lawa' tulang luk tinina' kuanneh. Idi kareb anid-anid babpat ngakem maya' luk petulu, amung burur ineh temubu' idi uen ngetueh bang awa.
- ¹⁷Bang ngadan Tuhan, ui pebala idi mada' nemuyuh: aleg muyuh mulun maya' lawé lun pupu baken luk maya' terawédeh luk mo'-mo';
- ¹⁸Idi terawédeh medacem. Ideh na ngalap babpat bang ulun luk biré Allah ngaceku ideh mebacé idi metueh niat.

- ¹⁹Na ideh mileh migu'. Ideh maré bururdeh kuan kekamen luk dat, idi megéi' nganau' amung-amung kekamen luk melutak.
- ²⁰Iamo' baken kudeng ineh luk inan muyuh sibada' ratnan Keristus!
- ²¹Matu muyuh pangeh neninger ratnan Ieh, idi muyuh pangeh nesibada' ratnan Ieh, maya' luk matu luk ginala' bang Yésus.
- ²²Ngaceku ineh do' nala' ulun muyuh luk mon luk nenguit nemuyuh mulun maya' ulun muyuh luk atun luk uen ngaté ngaceku pinianneh luk naluk.
- ²³Do' amung terawé muyuh idi niat muyuh ruen mebaruh.
- ²⁴Do' ngayung ku ulun luk mebaruh, luk inau' maya' ayu Allah, idi luk uen ngegala' bang ulun luk matu, mesiri, idi meligan.
- ²⁵Ngaceku ineh do' muyuh ugka' mebalih. Do' anid-anid muyuh pebala luk matu kuan kinanakneh, ngaceku amung-amung tau pad-pad mangun ku babpat burur Keristus.
- ²⁶Kudeng muyuh museh, aleg nganau' sala', aleg muyuh nganug useh muyuh pad aco macep.
- ²⁷Aleg muyuh maré luk inan kuan Iblis.
- ²⁸Lemulun luk pekalai mano, do' ieh ugka' mano peh, idi meluun do' ieh merur nakap luk kuan bururneh sebuleng, pad ieh miak maré kuan lun masi'.
- ²⁹Aleg ngeruat bala luk dat, iamo' ngeruat bala luk do' idi luk petulu pad ngacing peruan kuan lemulun luk ninger bala muyuh ineh.
- ³⁰Idi aleg muyuh ngesusa' Roh Allah luk meligan luk inan muyuh pangeh itu pad macing aco ulu'.
- ³¹Do' amung-amung luk mepét, megateh nait, useh, kedaluh, idi kuyo talan rat arang muyuh dengan amung-amung luk dat.
- ³²Do' muyuh méi' seburur dengan seburur, idi mebeneh niat, idi pedo' seburur dengan seburur, mepad kudeng Allah pana' bang Keristus pangeh nemaré do' kuan muyuh.

Epesus 5

¹Ngaceku muyuh ineh lun manu inan Allah mawa' do' muyuh nutun maya' ayuNeh.

²Idi mulun bang awa, mepad kudeng Keristus pana' pangeh mawa netau, idi pangeh nemaré bururNeh ngaceku tau, mangun kuk aceh baré luk do' buen idi aceh luk barén luk inan Allah mawang niat.

³Ngaceku muyuh ineh lun manu, gayam ratnan pasét, luk melutak, idi lili na miak tetanen arang muyuh.

⁴Idi teh na petulu muyuh ngeruat bala luk melutak, bala luk mebacé, idi bala luk na petulu tetanen. Iamo' meluun do' maré ubur.

⁵Ngerawé do'-do'! Lemulun luk pasét, lemulun luk melutak, idi lemulun luk melili (ngaceku lili ineh mepad kudeng sembayang inan akang) na ngalap babpat bang Imet Keristus idi Allah ineh.

⁶Aleg nima' seburur pana' naluk nemuyuh dengan bala luk mo'-mo', ngaceku ratnan ineh useh Allah macing kuan lemulun luk ngelaba balaNeh.

⁷Aleg muyuh perurum nedeh.

⁸Atun muyuh pekalai bang dacem, iamo' nekini muyuh luk manu idi mulun bang acang Tuhan, idi petulu muyuh mulun mepad kudeng anak-anak acang.

⁹Ngaceku bua'-bua' luk remuat rat bang acang, ieh ineh luk do', luk matu, idi luk mesiri.

¹⁰Do' muyuh nutun sibada' luk petulu maya' pian Tuhan.

¹¹Aleg muyuh perurum bang kekamen lemulun luk nganau' luk na petulu, iamo' meluun do' ngesala' kekamen ineh.

(¹²Ngaceku amung-amung kekamen luk inau'deh dengan lulem ineh, neten neneh pana' migu' teh.)

¹³Kareb kekamen ineh uen acang ngegala', idi datdeh megala' peh.

¹⁴Ngaceku anun-anun luk ginala' bang acang, ieh ineh macang. Ini punneh Tuhan pebala, "Kulat, O iko luk rudap, idi tumui rat arang lun naté! Idi Keristus macang luunmu."

¹⁵Ngaceku ineh ngerawé do'-do' ratnan kudeng apéh muyuh mulun. Aleg mulun mepad kudeng lemulun luk mebacé, iamo' do' mepad kudeng lemulun luk mileh,

¹⁶dengan na nala' kareb, ngaceku kareb ini kareb luk dat.

¹⁷Aleg muyuh mebacé, iamo' do' muyuh nakap luk pian Tuhan ruen muyuh.

¹⁸Aleg muyuh mabuk ku arak luk ngusag ulun muyuh, iamo' do' muyuh mepanu' ku Roh.

¹⁹Idi pebala arang muyuh sebuleng dengan nani ubur, idi ubur-ubur, idi nani luk ratnan Roh. Idi do' muyuh menani idi ngitang dengan ubur dengan amung niat muyuh kuan Tuhan.

²⁰Megéi' maré ubur bang luk anun-anun kuan Allah Taman dengan ngadan Tuhan tau Yésus Keristus.

²¹Ngebeneh burur muyuh seburur dengan seburur dengan matot inan Keristus.

²²O decur luk inan awan, do' muyuh mebeneh ratnan deléi muyuh mepad kudeng kuan Tuhan,

²³ngaceku deléi ineh mangun ku rayeh kuan decurneh, mepad kudeng Kerisuts pana' mangun ku rayeh kuan sidang, idi Keristus sebuleng luk nengulun burur ineh.

²⁴Iamo' mepad kudeng sidang ineh mebeneh ratnan Keristus, kudeng ineh teh decur luk inan awan mebeneh ratnan deléideh bang luk amung-amung.

²⁵O deléi luk inan awan, mawa inan decur muyuh, mepad kudeng Keristus pana' pangeh mawa inan sidang, idi nemaré bururNeh ngaceku sidang ineh.

²⁶Ieh nenganau' ineh pelé Ieh miak ngeligan sidang ineh, kareb Ieh pangeh namaru' neneh ku baru' abpa' ratnan bala Allah,

²⁷pad Ieh mudut sidang ineh pa kiungNeh sebuleng dengan do' taga, meligan, idi meriput, dengan na pilat, idi urat, idi anun-anun luk na petulu pana'.

²⁸Do' deléi mawa inan decurdeh, mepad kudeng mawa inan bururdeh sebuleng. Idi lemulun luk mawa inan decurneh, ieh ineh mawa inan bururneh sebuleng.

(²⁹Na luk idi seburur pana' luk megateh inan bururneh sebuleng. Iamo' ieh matar idi ngasa' neneh, mepad kudeng Keristus pana' matar idi ngasa' sidangNeh ineh,

³⁰ngaceku tau ini babpat bururNeh.)

³¹Maya' kudeng luk inayud, "Ini punneh seburur lemulun sikal necan taman-tinaneh, idi pamung dengan awanneh, idi didueh ineh mangun ku sebuleng uang mo' peh."

³²Bada' luk inalum ini pelaba dalem, iamo' ui ngerawé ini pinginud ratnan ruruh arang Keristus dengan sidangNeh.

³³Iamo' do' amung-amung muyuh mawa inan decur muyuh sebuleng mepad kudeng burur muyuh sebuleng; do' decur luk inan awan ineh ngedita' deléineh.

Epesus 6

¹O anak-anak, maya' bala taman-tinan muyuh bang Tuhan, ngaceku ineh luk matu.

²"Ngedita' taman idi tinanmu" (idi ineh ukum luk pun-pun dengan sebuleng pejani'),

³"pad mangun ku luk do' kuan muyuh, idi muyuh mulun mio bang tana' ini."

⁴O taman-tinan, aleg nganau' anak muyuh mét niat, iamo' ngasa' nedeh idi mada' nedeh dengan bada' luk petulu pa kiung Tuhan.

⁵O demulun, do' muyuh maya' ukum lun luk kuan nemuyuh dengan matot idi megegker, idi dengan niat luk do' mepad kudeng muyuh maya' Keristus.

⁶Aleg dengan siayu mepad kudeng sikal ngawang niat lemulun, iamo' mepad kudeng demulun Keristus luk maya' pian Allah dengan amung niatdeh.

⁷Idi do' muyuh ngakem dengan niat luk geregan mepad kudeng kuan Tuhan idi baken kuan lemulun.

⁸Ngerawé do'-do'! Anid-anid burur, do' demulun idi lun luk baken demulun, miak ngalap tabpar ratnan Tuhan, maya' kekamen luk do' luk ruenneh.

⁹O lun luk kuan demulun ineh, do' muyuh nganau' kudeng ineh teh kuandeh, idi ugka' ratnan rangat buri' muyuh, idi ngerawé do'-do', Lun luk kuan nedeh idi luk kuan nemuyuh pana' idi déi' surga, idi Ieh na mili' ayu lemulun.

¹⁰Idi kekipedneh, do' muyuh mangun metueh bang Tuhan idi dengan tueh laludNeh ineh.

¹¹Idi do' ngayung ku amung ayung Allah, pad muyuh tuman ratnan amung-amung saluk Iblis.

¹²Ngaceku tau baken pekakem dengan lemulun, iamo' dengan amung-amung tueh, lalud, idi raca' luk ngimet luk medacem, idi amung-amung lalud ada' luk dat déi' arang gawa'.

¹³Ngaceku ineh do' muyuh ngayung ku amung ayung Allah, pad muyuh tuman kareb aco luk dat, idi tuped meraben kareb muyuh pangeh nenganau' luk amung-amung.

¹⁴Ngaceku ineh do' muyuh tuped meraben, idi awa' muyuh betin ratnan luk matu, idi ngayng ku kuyu' belawan luk matu,

¹⁵idi kél muyuh mada' Bala luk Do' luk nguit pedo' mangun ku kasut muyuh.

¹⁶Idi megéi ngayung ku utap, ieh ineh manu, idi dengan ineh miak muyuh ngilep amung-amung ileb apui luk ratnan Luk Dat ineh.

¹⁷Idi do' muyuh ngalap tupi ulun, idi pelapet Roh, ieh ineh bala Allah.

¹⁸Nganau' amung ineh dengan sembayang idi putuh. Megéi' sembayang dengan Roh. Ngaceku ineh, do' lutep idi aleg metalang niat. Megéi' sembayang kuan lun manu.

¹⁹Idi mutuh kuanku pad bala Allah barén negku kareb ui temina' mada', pelé ui mekuu' mada' luk inalum ratnan Bala luk Do' ineh.

²⁰Ngaceku Bala luk Do' ui mangun ku lun duken, sagan pana' ui kiling. Mutuh kuanku pad ui mekuu' mada' ratnan Bala luk Do', maya kudeng luk petulu belénku peh.

²¹Tikikus, kinanak luk inan tau mawa idi luk lutep bang kekamen Tuhan, miak mada' nemuyuh ratnan ui, pad muyuh kali' kudeng apeh ulunku.

²²Ineh punneh ui ngecuk neneh amé' nemuyuh, pad mada' nemuyuh ratnan kudeng apeh ulun kai amung, pelé muyuh bukenneh.

²³Do' Allah Taman idi Tuhan Yésus Keristus maré awang idi awa dengan anu kuan amung-amung kinanak.

²⁴Idi do' katu Allah ngedengan amung-amung lemulun luk mawa inan Tuhan tau Yésus Keristus dengan awa luk na miak maté.

Pilipi

Pilipi 1

¹Rat ni Paulus idi rat ni Timotius, demulun Keristus Yésus — Kuan amung-amung lun manu bang Keristus Yésus déi' bawang Pilipi, idi kuan amung-amung lun matar sidang idi lun ngasa' sidang teh:

²Do' katu idi awang ratnan Allah Taman tau idi ratnan Tuhan tau Yésus Keristus temurun kuan muyuh.

³Ui ngubur Allahku anid kareb ui ngerawé nemuyuh.

⁴Anid kua' ui sembayang kuan muyuh, ui sembayang dengan mawang niat,

⁵ngaceku ratnan ruruh muyuh bang kekamen mada' Bala luk Do' ineh rat aco luk pun-pun macing nekini.

⁶Ui kali' do'-do': Allah luk nengimun kekamen luk do' ini arang muyuh miak mangeh ineh pad macing aco Yésus Keristus ineh.

⁷Ui megéi' ngerawé nemuyuh, idi petulu ui inan terawé luk kudeng ineh ratnan muyuh. Ngaceku amung muyuh ngalap babpat pad-pad denganku, do' kareb ui kiling idi teh kareb ui mepuit, pad ui miak ngelelep idi ngasa' Bala luk Do' ineh.

⁸Allah kali' ratnan ui sikal papu' nemuyuh dengan éi' Yésus Keristus.

⁹Ini sembayangku, pad awa muyuh amé'-amé' mula' dengan ileh luk matu idi teh ileh ngiti,

¹⁰pad muyuh miak mili' luk meluun do', pelé muyuh miak mangun meligan idi na mesala' kareb Aco Yésus Keristus.

¹¹Ulun muyuh miak uen manu' ku bua'-bua' luk matu ratnan Yésus Keristus, pad ngacing rayeh idi ubur kuan Allah.

¹²Idi ui sikal maré kali' kuan muyuh, O kinanak-kinanakku, idi amung-amung luk pangeh nangun kuanku, pangeh mangun ku dalan mada' Bala luk Do'.

¹³Pad pangeh ginala' kuan lun pebunu' bang ruma' lun ngimet bawang, idi lun baken pana', ratnan ui kiling ngaceku ui demulun Keristus.

- ¹⁴Idi mula' kinanak-kinanak teh meluun rapet inan Tuhan ngaceku ratnan ui pangeh kiling, idi amé'-amé' mekuu' mada' bala Allah dengan na matot.
- ¹⁵Matu, sebuang lemulun mada' Keristus ineh ngaceku ratnan temaruh idi kedaluh, idi inan teh dengan niat luk do'.
- ¹⁶Idi ideh nganau' kudeng ineh ngaceku ratnan awa, ngaceku kali' idi ui ini litep Allah ku matar Bala Luk Do' ineh.
- ¹⁷Lun baken ineh mada' Keristus ngaceku sikal pa luun, baken dengan niat luk matu. Ideh pian nganau' susa' kuanku luk kiling ini.
- ¹⁸Na mekudeh! Ui mawang niat ku ineh — kudeng Keristus badén teh, kian dengan matu idi siayu pana'. Ui megéi' mawang niat.
- ¹⁹Ngaceku ui kali' ui miak puatin ngaceku sembayang muyuh idi pedengan ratnan Roh Yésus Keristus.
- ²⁰Ui geregan idi merapet dengan matu-matu, pad ui na melaya' bang kekamenku. Iamo' do' ui megéi' mekuu', meluun teh bang kareb ini, pad ui pelaba kél ngerayeh Keristus bang bururku, do' dengan ulun kian até lek.
- ²¹Ngaceku kuanku, kudeng mulun, ieh ineh Keristus, idi kudeng maté, ieh ineh peruan.
- ²²Iamo' kudeng dengan ulunku ui ngeruat meluun ula' bua' ratnan kekamenku, idi na ui kali' sapeh luk pian pilinku.
- ²³Niatku perapid ratnan luk dueh ini. Ui pian amé' idi tudo dengan Keristus, ngaceku luk kudeng ineh luk meluun do'.
- ²⁴Iamo' kuan muyuh ui inan ulek mulun.
- ²⁵Ui merapet ratnan ini. Ineh punneh ui kali' ui miak mulun teh idi tudo dengan muyuh, pad muyuh metaduk idi mawang niat bang anu.
- ²⁶Ngaceku ineh kareb ui idi dengan muyuh teh, meluun teh muyuh mawang niat ratnan ini bang Keristus Yésus.
- ²⁷Iamo' do' ulun muyuh petulu dengan Bala luk Do' luk ratnan Keristus, do' kareb ui macing ngikak nemuyuh idi kareb ui mado pana', pad ui miak ninger

ratnan muyuh tupid meraben dengan sebuleng niat idi sebuleng terawé, idi pad-pad pebunu', pelé ngacing anu ku Bala luk Do' ineh.

²⁸Aleg matot nan bunu' muyuh. Do' muyuh mekuu', pad ngegala' kuandeh ratnan muyuh metueh, idi ideh melaya'. Ngaceku Allah luk maré nemuyuh metueh.

²⁹Ngaceku Allah pangeh nemaré kareb kuan muyuh pad ngakem kuan Keristus ineh, baken dengan manu Neneh mo', iamo' dengan ngalap medereh pana' ngaceku Ieh.

³⁰Nekini muyuh miak pebunu' pad-pad denganku bang bunu'ku ineh, luk pangeh sinier muyuh atun, idi luk mangun kuanku nekini pana', mepad teh kudeng luk pindenger muyuh.

Pilipi 2

¹Inanké ulun muyuh bang Keristus ngetueh nemuyuh? Inanké awaNeh ngubuk nemuyuh? Inanké rurum muyuh dengan Roh? Inanké muyuh mawa idi méi' seburur dengan seburur?

²Ui mutuh nemuyuh ngeriput awangku. Do' muyuh sebuleng terawé idi pad-pad mawa. Do' muyuh sebuleng niat bang anu, idi sebuleng rurum.

³Aleg nganau' anun-anun dengan sikal pa luun idi dengan medita' niat, iamo' dengan mebeneh niat anid-anid burur muyuh ngerawé nelun baken meluun do' ratnan burur muyuh sebuleng.

⁴Aleg seburur lemulun ngerawé kekammeneh sebuleng mo', iamo' do' ieh ngerawé ratnan kekamen lun baken teh.

⁵Do' terawé muyuh mepad kudeng terawé Keristus Yésus:

⁶Sagan pana' Ieh dengan ayu Allah, na Ieh mesaad pian ngimet mepad kudeng Allah ineh.

⁷Imao' Ieh nengasi' bururNeh mangun ku demulun bang ayuNeh mepad kudeng lemulun idi sinier mepad kudeng ayu lemulun teh.

⁸Ieh nengebeneh niatNeh, idi lutep pad macing inan até — ieh ineh até sinalib.

⁹Ngaceku ineh Allah nengedita' Neneh macing nan su luk meluun medita', idi nemaré Neneh sebuleng ngadan luk pa luun amung-amung ngadan.

¹⁰Idi dengan ngadan Yésus ineh miak tekeradung amung-amung aleb luk déi' surga idi luk bang tana', idi pa liang tana' pana',

¹¹Idi amung-amung dila' miak ngamo idi Yésus Keristus ineh Tuhan, kuan rayeh Allah, ieh ineh Taman.

¹²Ngaceku ineh, O lun rorumku, mepad kudeng muyuh megéi' maya' balaku kareb ui idi dengan muyuh, do' muyuh maya' balaku nekini kareb ui mado rat nemuyuh. Do' muyuh ngakem dengan matot idi megegker pad ngeriput ulun muyuh bang Keristus.

¹³Ngaceku Allah, Ieh ineh luk ngakem bang nemuyuh pad muyuh geregan idi ngakem teh sikal ngacing pianNeh luk do' ineh.

¹⁴Idi do' muyuh ngakem dengan na dureng-dureng idi pekedaluh,

¹⁵pad muyuh na mesala' idi niat muyuh pana' meligan peh, ieh ineh anak-anak Allah luk na mesala' arang uned pupu luk tekilu' idi luk mesala'. Do' muyuh merasat arangdeh mepad kudeng gituen-gituen déi' langit,

¹⁶kareb muyuh nicul bala luk maré ulun, pad ui mawang niat ku muyuh kareb Aco Keristus, ngaceku kekamenku na mo'-mo', idi erurku pana' na mo'-mo' teh.

¹⁷Iamo' kudeng ui ngeruat dara'ku pana', mepad kudeng aceh baré luk inutang luun baré anu muyuh, idi ui mawang niat teh idi pad-pad mawang niat dengan amung-amung muyuh.

¹⁸Kudeng ineh teh do' muyuh mawang niat idi do' ria' pad-pad denganku.

¹⁹Iamo' bang Tuhan tau Yésus ui merapet miak ngecuk Timotius ngikak nemuyuh dengan mesaget, pad nitku lutep kareb ui kali' amung-amung bala luk rat nemuyuh.

- ²⁰Ieh mo' luk sebuleng niat denganku, luk mepad ngerawé nemuyuh dengan matu-matu.
- ²¹Ngaceku amung-amungdeh nakap luk kuan bururdeh sebuleng, baken luk ratnan Yésus Keristus.
- ²²Iamo' muyuh kali' kudeng apeh Timotius nengegala' kélneh, idi kudeng apeh kai dueh nengakem pad-pad mepad kudeng anak dengan tamanneh ngaceku Bala luk Do' ineh.
- ²³Ui merapet petacu ngecuk neneh amé' nemuyuh kareb ui pangeh kali' kudeng apeh luk mangun kuanku.
- ²⁴Idi ui merapet inan Tuhan, pad ui sebuleng pana' miak macing nemuyuh dengan mesaget.
- ²⁵Iamo' bang terawéku do' ui ngecuk Epaproditus, kinanak tau ineh, kuan muyuh, ieh ineh lun denganku bang kekamen idi bunu' Tuhan, idi luk duken muyuh ngasa' negku bang asi'ku.
- ²⁶Ieh pelaba pian papu' nemuyuh, idi ieh mesusa' niat teh ngaceku muyuh pangeh neninger idi ieh mét.
- ²⁷Idi sagan pana' ieh mét lélé maté, iamo' Allah méi' neneh, idi baken kuanneuh sebuleng mo' iamo' kuanku pana, pad ui na pelaba dat niat.
- ²⁸Ngaceku ineh ui saget-saget ngecuk neneh, pad muyuh mawang niat nier neneh sekua' teh, idi ui na pelaba dat niat.
- ²⁹Ngaceku ineh do' muyuh ngalap neneh dengan ngadan Tuhan, dengan panu'-panu' awan ngiat muyuh, idi ngedita' lemulun luk kudeng ineh.
- ³⁰Ngaceku ratnan kekamen Keristus ieh pangeh lélé maté, idi na ieh nengerawé ulunneh sebuleng, ngaceku ieh sikal ngelibal nemuyuh ngasa' negku ini.

Pilipi 3

- ¹Abudneh, O kinanak-kinanakku, do' muyuh mawang niat bang Tuhan. Idi na ui melibo ngayud sekua' teh bala luk mepad kudeng ini kuan muyuh, ngaceku ieh ineh mangun ku do' kuan muyuh.
- ²Do' matar burur muyuh ratnan uko'-uko', ieh ineh ratnan lemulun luk lemubed ngakem luk dat, idi maya' adat sunat luk mesala'.
- ³Ngaceku tau ini sunat luk matu, idi tau luk sembayang inan Allah dengan Roh, idi mawang niat dengan ulun tau bang Keristus Yésus, idi na merapet ku anun-anun luk ratnan burur.
- ⁴Kali' rungen ui ini miak merapet ku luk ratnan burur. Idi kudeng idé lemulun luk baken ngerawé miak merapet ku luk ratnan burur, idi meluun teh ui ini pana'.
- ⁵Ui pangeh sinunat kareb aceh minggu ulunku. Ui ini lun Israil, ratnan babpat lun Beniamin. Idi ui ini lun Iberani idi inul lun Iberani pana'. Ratnan Ukum lun Yahudi ui ini lun Parisi.
- ⁶Idi ui meké' pad ui megéi' nengedereh sidang, idi ratnan luk matu bang Ukum ui na mesala'.
- ⁷Iamo' anun-anun luk pangeh mangun ku peruan kuanku atun, ineh teh luk belénku mangun ku rugi' ngaceku Keristus.
- ⁸Idi meluun teh, bang terawéku, luk amung-amung miak mangun ku rugi' kuanku ngaceku luk pelaba raga ini, ieh ineh pad ui miak miti Keristus Yésus Tuhanku. Idi ngaceku Keristus ui pangeh nenala' luk amung-amung. Idi amung-amung ineh ui mala mangun ku arap, pad Keristus mangun ku peruanku,
- ⁹pelé ui mangun ku sebuleng denganNeh, baken dengan luk matu ratnan bururku sebuleng idi ratnan Ukum teh, iamo' dengan luk matu ineh luk nacing ngaceku anu inan Keristus, ieh ineh luk matu ratnan Allah ngaceku manu.
- ¹⁰Luk pianku, ieh ineh ngiti Neneh idi kali' lalud tuiNeh ineh idi ruruh bang derehNeh ineh, idi mangun mepad denganNeh bang atéNeh,

- ¹¹pad ui miak macing inan tui rat arang lun naté ineh.
- ¹²Baken ayu-ayuneh ui pangeh nacing, idi pangeh mangun meriput; iamo' ui mekél matun Neneh, pad ui miak ngimet meraben mepad kudeng ui pangeh inimet Keristus Yésus.
- ¹³O kinanak-kinanakku, nateh ui mala bururku pangeh nengimet meraben ratnan ineh, iamo' sebuleng teh luk miak ruenku, ieh ineh ui mekelupan amung-amung luk pa puet, idi ngetaduk bururku kuan luk pa atun.
- ¹⁴Ui upun-upun amé' inan tanu' luk matun tabpar, ieh ineh tawar Allah luk déi' dita' bang Keristus Yésus.
- ¹⁵Ngaceku ineh, do' tau luk lutep anu ngerawé luk kudeng ineh, idi kudeng sebuang muyuh inan terawé luk baken, idi ineh miak ruen Allah ngegala' kuan muyuh.
- ¹⁶Do' tau nacu lawé tau maya' bada' luk binaya' tau macing nekini.
- ¹⁷O kinanak-kinanakku, do' amung-amung muyuh pad-pad maya' lawéku, idi ngerawé do'-do' ratnan amung lemulun luk nalan kudeng ineh, mepad kudeng kai mangun ku luk pinginud kuan muyuh.
- ¹⁸Ngaceku mula' lemulun luk nenganau' bururdeh mangun ku bunu' kuan salib Keristus, luk pangeh bilaku tuda'-tuda' kua' kuan muyuh, idi nekini pana' ui mada' dengan tangi'ku.
- ¹⁹Idi kekipeddeh bang apui, idi batekdeh mangun ku akang kuandeh, idi anun-anun luk inan migu' mangun ku rayeh kuandeh, idi ideh luk ngerawé ratnan kekamen tana' ini.
- ²⁰Iamo' tana' tau inan déi' surga, idi tau nganét Lun Nengulun macing rat surga, ieh ineh Tuhan Yésus Keristus.
- ²¹Ieh miak ngisu' ayu burur tau luk dat ini mangun kudeng ayu bururNeh luk merasat ineh, maya' mepad kudeng tuehNeh luk miak ngebeneh luk amung-amung pa liang imetNeh.

Pilipi 4

- ¹Ngaceku ineh, O kinanak-kinanakku luk inanku mawa, idi luk inanku geregan, idi luk mangun ku awangku idi pataku, idi bang luk kudeng ineh do' muyuh lutep bang Tuhan, O luk inanku mawa.
- ²Ui mutuh Yodia idi ui mutuh Sintiki teh, mangun ku sebuleng niat bang Tuhan.
- ³Meluun teh kuanmu pana', O lun denganku luk matu, ui mutuh namu ngedengan nedidueh luk decur ineh, luk pangeh pad-pad nerur denganku bang kekamen mada' Bala luk Do' pad-pad dengan Klemen teh, idi amung-amung lun denganku luk baken-baken teh, luk pangeh inayud ngadandeh bang surat ulun Allah.
- ⁴Do' muyuh mulai niat bang Tuhan anid-anid kareb, idi sekua' teh ui pebala kuan muyuh: do' muyuh mawang niat.
- ⁵Do' muyuh mebeneh niat siren amung-amung lemulun. Idi Tuhan lélé macing.
- ⁶Aleg muyuh merapang ratnan anun-anun, iamo' bang luk amung-amung do' amung-amung pian muyuh uen ngegala' kuan Allah, bang sembayang idi putuh dengan maré ubur.
- ⁷Idi awang ratnan Allah luk meluun rayeh ratnan amung-amung ileh lemulun miak matar niat muyuh idi terawé muyuh bang Yésus Keristus.
- ⁸Kekipedneh, O kinanak-kinanakku, anun-anun luk do', luk buren, luk matu, luk rayeh, luk mesiri, luk meligan, luk meluun do', idi luk petulu buren, ineh luk miak teruayen muyuh.
- ⁹Do' maya' anun-anun luk inan muyuh nesibada' idi luk ilap muyuh rat negku, do' ratnan balaku idi kekamenku pana'. Idi Allah luk lawa amung-amung awang miak ngedengan nemuyuh.
- ¹⁰Iamo' ui pelaba awang niat bang Tuhan ngaceku bang tuda'-tuda' ioneh idi muyuh nengerawé negku teh; matu pana' atun muyuh ngerawé ratnan ineh, iamo' na luk idi kareb muyuh miak ngedengan negku.

- ¹¹Baken ui pebala kudeng ini ngaceku ratnan asi', ngaceku ui pangeh nesibada' bang lawé anun-anun pana' ui ngalap awang niat mo'.
- ¹²Ui pangeh nekali' ratnan masi' idi mela teh. Ui pangeh nesibada', iapeh-iapeh pana', bang anid-anid kareb, ieh ineh kareb mebor idi melau, kareb petap idi kareb masi', ui mawang niat.
- ¹³Ui miak nganau' luk amung-amung ngaceku Keristus luk ngetueh negku.
- ¹⁴Iamo' muyuh pangeh nenganau' luk do' idi nengedengan negku bang derehku.
- ¹⁵Idi muyuh sebuleng pana' pangeh kali' teh, O lun Pilipi, idi kareb Bala luk Do' ineh pun-pun bida', kareb pun ui neremuat rat Makedonia, idi sebuleng sidang pana' na sikal perurum denganku ratnan maré idi ratnan ngalap pana', iamo' muyuh sebuleng mo'.
- ¹⁶Ngaceku kareb ui déi' Tesalonika muyuh pangeh nemaré tuda'-tuda' kua' bang kareb ui masi'.
- ¹⁷Idi baken barve ini luk tekapenku, iamo' ui nakap bua'-bua' luk mangun ku peruan muyuh.
- ¹⁸Ui pangeh nengalap amung-amung ineh, idi teh, meluun ratnan luk petap. Idi ui pangeh nengalap mela ngaceku ui nengalap rat ni Epaproditus amung baré muyuh. Baré ineh mangun ku aceh buen luk do' idi baré luk pian idi luk petulu dengan Allah.
- ¹⁹Idi Tuhanku miak nganau' petap ratnan amung-amung asi' muyuh maya' do'Neh dengan rayehNeh bang Keristus Yésus.
- ²⁰Idi rayeh kuan Allah, ieh ineh Taman tau macing raked-raked! Amin.
- ²¹Do' ngacing tabi'ku kuan amung-amung lun manu luk bang Keristus Yésus. Idi tabi' kuan muyuh ratnan kinanak luk pad-pad denganku.
- ²²Tabi' kuan muyuh rat nelun manu' pun-pun rat nelun bang ruma' raca' Rum.
- ²³Idi do' katu Tuhan tau Yésus Keristus ngedengan roh muyuh.

Kolose

Kolose 1

¹Rat ni Paulus, rasul Keristus Yésus maya' pian Allah, idi rat ni Timotius, kinanak tau—

²Kuan amung-amung lun manu idi kinanak luk lutep bang Keristus luk déi' Kolosé: Do' katu idi awang ratnan Allah Taman tau temurun kuan muyuh.

³Kai megéi' maré ubur kuan Allah, Taman Tuhan tau Yésus Keristus, kareb kai sembayang kuan muyuh.

⁴Ngaceku kai pangeh neninger ratnan anu muyuh inan Keristus Yésus idi awa muyuh kuan amung lun manu.

⁵Kareb Bala luk Do', ieh ineh bada' luk matu ineh nacing nemuyuh atun, muyuh neninger ratnan rapet luk barénneh. Anu idi awa muyuh tipin luun luk inan muyuh merapet ineh luk dinug kuan muyuh déi' surga.

⁶Bala luk Do' ineh ngacing peruan idi mepiar apud tana', mepad kudeng luk pangeh nepiar arang muyuh rat pun aco muyuh neninger ratnan éi' Allah idi nekali' ratnan katu Allah dengan matu.

⁷Muyuh pangeh nesibada' rat ni Epapras lun dengan kai luk inan mawa, luk lutep ngakem bang ngadan kai kuan Keristus.

⁸Ieh nemada' nekai ratnan awa luk biré Roh nemuyuh.

⁹Ngaceku ineh, kareb kai neninger ratnan muyuh, kai megéi' sembayang kuan muyuh. Kai mutuh Allah pad muyuh uen manu' ku ileh ratnan pianNeh, dengan namung ileh idi do' kali' luk barén RohNeh,

¹⁰pad ulun muyuh petulu dengan pinian Tuhan idi muyuh perurum denganNeh bang luk amung-amung, idi ngeruat bua' bang anid-anid kekamen luk do', idi pad ileh muyuh ratnan Allah amé'-amé' rayeh.

¹¹Do' muyuh uen ngetueh dengan amung tueh luk macing ratnan lalud Allah luk rayeh pad muyuh miak tuman dengan mulai niat bang luk amung-amung.

- ¹²Idi do' muyuh maré ubur kuan Taman tau luk nenganau' nemuyuh mayu ngalap babpat ratnan luk tinina' Allah kuan lun manu bang imet acang ineh.
- ¹³Ieh nemuit netau ratnan lalud dace m idi nemubuh netau amé' bang imet Anak luk inanNeh mawa.
- ¹⁴Idi rat Neneh ineh inan uli' kuan tau, ieh ineh tau ngalap do' ratnan sala' tau.
- ¹⁵Idi Keristus luk mangun ku ayu Allah luk na sinier ineh, ieh ineh Anak luk Atun ratnan amung-amung luk pinudut.
- ¹⁶Ngaceku bang Keristus ineh pangeh nangun luk amung-amung, luk bang langit idi luk bang tana' pana', idi luk melagan idi luk na melagan pana', do' lalud-lalud roh, idi luk nguyut, do' luk ngimet ukum, idi luk ngimet lalud, idi luk amung-amung pangeh inau' rat Neneh idi kuan-Neh.
- ¹⁷Ieh pangeh idi kareb nateh luk amung-amung idi, idi amung-amung pangeh inau' lutep bang Neneh.
- ¹⁸Idi Ieh luk mangun ku uluh burur, ieh ineh sidang; Ieh luk pun-pun, idi mangun ku Anak luk Atun rat arang lun naté, pelé bang luk amung-amung Ieh luk mangun ku luk meluun rayeh.
- ¹⁹Ngaceku pangeh nepetulu dengan pian Allah, ratnan amung-amung luk meligan ineh inau' pamung bang Anak ineh.
- ²⁰Idi ratnan Anak ineh luk amung-amung inau' Allah pedo' dengan bururNeh, do' luk bang tana' ini idi luk bang langit pana', kareb Ieh pangeh nengacing pedo' ratnan dara' Keristus luun kayuh salib.
- ²¹Atun muyuh mado ratnan Allah. Muyuh ineh bunu'Neh ngaceku kekamen idi terawé muyuh luk dat.
- ²²Iamo' nekini Ieh pangeh nenganau' nemuyuh pedo' dengan até AnakNeh luk bang burur lemulun, pad nguit nemuyuh amé' matun luk meligan dngan na melutak idi mesala' pa kiung Allah,

²³kudeng muyuh lutep bang anu, idi meraben, pad muyuh na miak bebuen ratnan rapet bang Bala luk Do', luk pangeh pindenger muyuh, idi luk pangeh bida' kuan amung-amung pudut luk pa liang langit. Idi ui ini Paulus luk pangeh nangun ku lun luk mada' ineh.

²⁴Idi nekini ui kali' mawang niat ratnan amung-amung dereh luk ilapku ngaceku muyuh, pad ui ngabud luk ketecan ratnan dereh Keristus bang bururku, ngaceku bururNeh, ieh ineh sidang.

²⁵Idi ui pangeh inau' ku lun ngasa' sidang ineh, maya' kekamen Allah luk pangeh biréNeh kuanku ngaceku muyuh, pad ngacing bala Allah,

²⁶ieh ineh luk inalum idi luk inapung ratnan amung-amung kareb idi amung-amung inul lemulun, iamo' nekini pangeh ginala' kuan amung-amung lun manu.

²⁷Idi kuan lemulun ineh Allah sikal maré kali' kudeng apeh do'neh, rayeh luk inalum ineh kuan lemulun luk na maya': ieh ineh Keristus luk bang nemuyuh, Keristus luk inan merapet ngalap rayeh.

²⁸Idi Keristus luk badén kai ineh, idi kai periteteng kuan anid-anid burur mada' anid-anid lemulun dengan ileh, pad kai miak naped anid-anid lemulun ineh pa kiung Tuhan dengan ligandeh bang Keristus.

²⁹Idi ini punneh ui merur teh, idi mekéi dengan matu, maya' tueh Keristus luk ngakem bang negku.

Kolose 2

¹Nima' negku maré kali' nemuyuh ratnan tuehku ngakem kuan muyuh idi kuan lun Laudikia, idi teh kuan amungdeh luk mili' negku ini.

²Ui nganau' kudeng ini pad niatdeh mekuu', idi ideh perurum bang awa, idi manu dengan matu-matu ngaceku ideh kali' luk inalum Allah, ieh ineh Keristus.

³Keristus ineh taka luk ngukab amung-amung ileh idi do' kali' Allah luk inalum mepad kudeng binaweh luk meraga.

- ⁴Ui mala ini, pad seburur pana' na naluk nemuyuh ku bala luk pelaba, paci'.
- ⁵Ngaceku sagan pana' bururku na muneng, iamo' rohku ngedengan nemuyuh, idi ui mawang niat, ngaceku ui nier ulun muyuh idi anu muyuh luk lutep bang Keristus.
- ⁶Muyuh pangeh nengalap Keristus Yésus Tuhan tau. Ngaceku ineh, do' ulun muyuh lutep bang Neneh.
- ⁷Do' muyuh inan uat bang Neneh idi do' ulun muyuh piduten luun tapin ineh, ieh ineh Keristus. Idi do' anun muyuh amé' rayeh, maya' kudeng luk pangeh bida' kuan muyuh. Do' muyuh mepanu' ku ubur.
- ⁸Matar do'-do', pad seburur lemulun pana' na naban nemuyuh ku ilehneh idi salukneh luk mo'-mo', luk maya' bada' tepun-tepun idi roh-roh tana' ini, baken maya' Keristus.
- ⁹Ngaceku bang Keristus amung-amung riput luk meligan ratnan Allah pamung dengan ayu burur.
- ¹⁰Idi muyuh pana' miak uen ngeriput bang Neneh. Keristus ineh mangun ku luk rayeh pa luun amung-amung luk ngimet idi lalud teh.
- ¹¹Idi dengan Keristus teh muyuh sinunat ku aceh sunat luk baken dengan ticu' lemulun, ieh ineh ku sunat Keristus luk muit nemuyuh ratnan burur luk mesala'.
- ¹²Kareb muyuh rireb, muyuh tinanem dengan Keristus, idi bang rereb ineh teh muyuh pangeh tinui teh dengan Keristus, ngaceku manu inan lalud Allah luk nenui Neneh rat arang lun naté ineh.
- ¹³Idi muyuh pana' atun pangeh naté ngaceku sala' idi ulun burur muyuh luk na sinunat. Meluun teh muyuh pangeh inulun Allah pad-pad denganNeh. Idi Ieh pangeh nemaré do' ratnan amung-amung sala' tau.
- ¹⁴Ieh pangeh metueh ratnan Ukum, idi Ieh nengiu' surat baleh luk petulu ruen tau mayar. Ieh nengiu' ineh kareb Ieh nenapek ineh luun kayuh salib.

¹⁵Idi luun salib ineh Keristus nenala' amung-amung luk ngimet idi amung-amung lalud luk na melagan, idi Ieh metueh pad Ieh nengegala' laya' deh kareb Ieh nenguit nedeh pekarur mepad kudeng lun luk tiban.

¹⁶Ngaceku ineh aleg nima' seburur lemulun pana' ngesala' nemuyuh ngaceku ratnan akan idi luk rupan, idi ratnan aco luk rayeh, idi Bulan luk Mebaruh, idi Aco luk inan Mudeng.

¹⁷Idi ieh ineh mangun ku lungung-lungung ratnan amung-amung luk miak macing, iamo' luk tuneh ieh ineh Keristus.

¹⁸Aleg muyuh saluken lemulun luk pian ngebeneh bururneh pa kiung melaikat idi sembayang nedeh. Lemulun luk kudeng ineh megéi' pebala ratnan luk sinierneh, pad ieh ngedita' bururneh ngaceku pian mebala. Iamo' terawéneh maya' ulun tana' ini.

¹⁹Idi na ieh merapat inan Keristus luk mangun ku Uluh ineh. Pa liang imet Keristus amung-amung burur miak panin idi uen ngamung ratnan langod tulang idi urat-urat idi temubu' maya' pian Allah.

²⁰Muyuh pangeh naté pad-pad dengan Keristus nepuit ratnan bada' roh-roh tana' ini. Ngudehké muyuh ngebeneh burur muyuh kuan amung-amung ukum ada' ayu-ayuneh muyuh mulun bang tana' ini.

²¹Ukum ada', ieh ineh "Aleg ngimet, aleg nila', aleg ngakem."

²²Amung ukum ineh na ulekneh, kareb ineh pangeh pikai, ngaceku amung ineh ukum idi bada' luk inau' lemulun mo'.

²³Sagan pana' ayuneh amung ukum ineh ratnan ileh, dengan mesaad sembayang inan melaikat, dengan ngebeneh niat idi ngurat burur; iamo' amung ukum ineh na ulekneh, idi na miak muit nemuyuh ratnan pinian burur muyuh sebuleng.

Kolose 3

¹Muyuh pangeh tinui pad-pad dengan Keristus. Ngaceku ineh do' nakap anun-anun luk déi' dita', su apeh luk inan Keristus tudo pa tinueh Allah.

- ²Ngerawé ratnan luk déi' dita', aleg ngerawé ratnan luk bang tana.
- ³Ngaceku muyuh pangeh naté, idi ulun muyuh inapung dengan Keristus bang Allah.
- ⁴Ulun muyuh luk matu, ieh ineh Keristus. Idi kareb Ieh macing sekedueh kua', muyuh pana' miak melagan pad-pad denganNeh bang rayehNeh.
- ⁵Do' muyuh ngilep amung-amung kekamen tana' ini, ieh ineh, pasét, luk melutak, maya' pian burur sebuleng, idi lili luk dat, idi teh lili luk mepad kudeng sembayang inan akang.
- ⁶Idi ratnan amung-amung ineh useh Allah miak macing kuan lemulun luk ngelaba balaNeh.
- ⁷Idi atun muyuh pana' nalan maya' luk kudeng ineh kareb ulun muyuh bang imetdeh.
- ⁸Iamo' nekini do' muyuh necan amung-amung ineh, ieh ineh useh luk ngacing ét niat, kuyo, idi bala luk melutak.
- ⁹Aleg mebalih arang muyuh sebuleng, ngaceku muyuh pangeh nenala' ulun luk mon ineh dengan amung-amung kekammeneh,
- ¹⁰idi nengayung ku ulun luk mebaruh. Ieh ineh lemulun luk mebaruh luk ruen Allah mebaruh maya' ayu Allah, Lun, luk Mudut ineh, pad nguit nemuyuh miti Neneh dengan matu-matu.
- ¹¹Ngaceku ineh na luk idi lun pupu baken idi lun Yahudi, na luk idi sunat idi na sinunat teh, na luk idi lun luk na mileh idi lun luk mesangit, idi na luk idi demulun idi lun do'. Iamo' Keristus luk mangun ku luk amung-amung! Idi Keristus luk bang luk amung-amung.
- ¹²Muyuh ini pupu Allah. Ieh mawa nemuyuh idi nemili' nemuyuh mangun ku pupuNeh sebuleng. Ngaceku ineh do' muyuh ngayung ku katu, beneh niat, idi kadang niat.
- ¹³Do' muyuh mulai niat seburur dengan seburur idi maré do' arang muyuh sebuleng, kareb idé-idé ngadu' seburur lemulun baken. Do' muyuh maré do'

arang muyuh sebuleng, mepad kudeng Tuhan pangeh nemaré do' kuan muyuh.

¹⁴Iamo' luk pun-pun ratnan amung-amung ineh, do' muyuh ngayung ku awa luk miak ngabet luk amung-amung mangun ku aceh rorum luk meriput.

¹⁵Idi do' awang Keristus ngimet bang niat muyuh, idi bang luk kudeng ineh teh muyuh pangeh tinawar bang burur luk sebuleng; idi do' muyuh maré ubur.

¹⁶Idi do' bala Keristus ineh tudo bang nemuyuh dengan mela, dengan amung-amung ileh. Idi mada' idi periteteng arang muyuh sebuleng, dengan nani ubur idi ubur-ubur idi nani luk ratnan Roh. Idi do' menani dengan maré ubur kuan Allah bang niat muyuh.

¹⁷Anun-anun luk ruen muyuh idi luk belén muyuh do' amung ineh ruen dengan ngadan Tuhan Yésus, idi maré ubur kuan Allah Taman tau bang ngadan Yésus.

¹⁸O decur luk inan awan, do' muyuh mebeneh ratnan awan muyuh maya' kudeng luk petulu bang Tuhan.

¹⁹O deléi luk inan awan, do' muyuh mawa inan awan muyuh, idi aleg megateh niat nedeh.

²⁰O anak-anak, do' muyuh maya' ukum taman-tinan muyuh bang luk amung-amung, ngaceku ineh luk petulu inan Tuhan.

²¹O taman-tinan, aleg muyuh ngacing ét niat inan anak-anak muyuh, pad ideh na metalang niat.

²²O demulun, bang luk amung-amung do' muyuh maya' bala lun luk kuan nemuyuh bang tana' ini, baken dengan siayu pad muyuh buren lemulun, iamo' dengan niat luk lutep, pad muyuh ngerayeh Tuhan.

²³Anun-anun luk ruen muyuh, do' nganau' dengan matu-matu, mepad kudeng luk kuan Tuhan idi baken kuan lemulun.

²⁴Do' muyuh ngerawé! Muyuh miak ngalap ua' ratnan Tuhan. Muyuh miak ngalap ua' ratnan Tuhan. Muyuh miak ngalap luk tinina' Tuhan kuan pupuNeh. Muyuh mangun ku demulun kuan Tuhan, ieh ineh Keristus.

²⁵Idi lemulun luk nganau' sala' miak mabeh sala' luk inau'neh ngaceku Allah ngua' kuan anid-anid burur dengan na mili' ayu lemulun.

Kolose 4

¹O lun luk kuan demulun ineh, do' muyuh nganau' luk mesiri idi luk matu kuan demulun-demulun muyuh ngaceku kali' idi kuan muyuh pana' inan. Seburur luk kuan nemuyuh luk déi' surga.

²Do' muyuh lutep sembayang, idi matar bang amung ineh dengan maré ubur.

³Idi sembayang kuan kai teh, pad Tuhan miak ngukab aceh tanga' kuan kai mada' bala Tuhan, ieh ineh luk inalum ratnan Keristus. Ngaceku ineh punneh ui ini kiling teh.

⁴Mutuh kuanku pad ui miak ngegala' amung-amung ineh mepad kudeng luk petulu.

⁵Do' muyuh nalan dengan ileh pa kiung amung-amung lemulun luk na maya', idi makai anid-anid kareb.

⁶Do' bala muyuh megéi' do' pedingeren, idi do' muyuh kali' kudeng apeh maré or luk do' kuan anid-anid lemulun.

⁷Tikikus kinanak tau luk inan mawa ineh seburur demulun Tuhan luk lutep bang kekamenNeh, idi luk ngakem pad-pad denganku. Ieh miak maré kali' nemuyuh ratnan ui.

⁸Ineh punneh ui nengecuk neneh amé', nemuyuh, pad ieh ngawang niat muyuh dengan bala ratnan ulun amung kai.

⁹Onesimus maya' neneh. Ieh ineh kinanak luk lutep idi luk ineh mawa, idi luk pamung sebawang dengan muyuh. Idi didueh ineh miak maré kali' nemuyuh ratnan amung-amung luk pangeh mangun tungé'.

¹⁰Tabi kuan muyuh rat ni Aristarkus, lun denganku luk pad-pad denganku bang tutup, idi rat ni Markus luk sepupu dengan Barnabas. (Idi rat neneh ineh muyuh pangeh nengalap ukum idi kudeng ieh macing nemuyuh do' ngalap neneh.)

¹¹Idi Yosua luk titen Yustus ineh pana' maré tabi'. Idi amungdeh ineh luk ngimet adat sunat, idi ideh mo' luk ngakem pad-pad denganku bang Imet Allah, idi ideh teh luk pangeh mangun ku ubuk kuanku.

¹²Tabi' kuan muyuh rat ni Epapras luk pamung sebawang dengan muyuh, ieh ineh demulun Keristus Yésus. Ieh mekél sembayang kuan muyuh, pad muyuh lutep idi tuped meraben-bang Keristus dengan anu luk meriput, idi pad muyuk miak maya' amung-amung luk pian Allah.

¹³Ui maré kali' ratnan lemulun ineh. Ieh pelaba erur ngaceku muyuh, idi ngaceku amung-amung lun Laudikia idi lun Hirapolis.

¹⁴Tabi' kuan muyuh rat ni Lukas, lun ngubat luk inan mawa, idi tabi' rat ni Dimas pana'.

¹⁵Tabi' kuan amung-amung kinanak luk déi' Laudikia, idi kuan Nimpa, idi kuan sidang luk déi' ruma'neh.

¹⁶Kareb surat ini pangeh bica' muyuh, do' maca' ineh kuan sidang luk déi' Laudikia, idi muyuh maca' surat luk macing rat déi' Laudikia teh.

¹⁷Idi maré kali' ni Arkipus, "Matar do'-do' ratnan kekamen luk pangeh ilapmu bang Tuhan pad miak ngeriput ineh."

¹⁸Tabi' rat negku ini, Paulus. Ui ngayud surat ini ku ticu'ku sebuleng. Aleg kelupan negku luk kiling ini. Idi do' katu Allah temurun idi ngedengan nemuyuh.

1 Tesalonika

1 Tesalonika 1

¹Rat ni Paulus, Siluanus, idi Timotius — Kuan sidang lun Tesalonika luk mangun ku pupu Allah Taman, idi Tuhan Yésus Keristus: Do' katu idi awang temurun kuan muyuh.

²Kai megéi' maré ubur kuan Allah ngaceku amung-amung muyuh, idi megéi' neten ngadan muyuh bang sembayang kai.

³Ngaceku kai ngerawé pa kiung Allah Taman tau ratnan kekamen muyuh luk dengan anu, idi kél muyuh luk dengan awa, idi letep niat muyuh luk merapet inan Tuhan tau Yésus Keristus.

⁴Kai kali' ratnan muyuh pangeh pinili', O kinanak-kinanakku luk inan Allah mawa.

⁵Ngaceku bada' kai ratnan Bala luk Do' pangeh icing kuan muyuh baken dengan bala mo', iamo' dengan lalud, idi Roh Meligan, idi dengan anu luk matu-matu. Muyuh kali' kudeng apeh ulun kai arang muyuh ngaceku muyuh.

⁶Muyuh nenginud lawé kai idi lawé Tuhan teh; idi sagan pana' muyuh medereh, muyuh nengalap bala ineh dengan awang luk macing ratnan Roh Meligan.

⁷Pad muyuh mangun ku luk pinginud kuan amung-amung lemulun luk manu déi' Makedonia idi déi' Akaya teh.

⁸Ngaceku rat nemuyuh pangeh neremuat bala Tuhan, baken déi' Makedonia idi Akaya mo', iamo' bang anid-anid bawang, anu muyuh inan Allah pangeh nepiar, pad kai na miak mala anun-anun teh.

⁹Amung lemulun ineh mala ratnan kudeng apeh muyuh nenganak nekai kareb kai nengikak nemuyuh, idi kudeng apeh muyuh neteketed ratnan akang idi nelumi inan Allah, pelé muyuh miak mepicet inan Allah luk mulun idi luk matu ineh,

¹⁰Idi nganét acing AnakNeh luk rat surga, luk pangeh tinui rat arang lun naté, ieh ineh Yésus luk nemuit netau ratnan useh luk miak macing teh.

1 Tesalonika 2

¹Muyuh sebuleng kali', O kinanak-kinanakku, na kai macing nemuyuh mo'-mo'.

²Muyuh kali' kudeng apeh kai nedereh idi nurat déi' Pilipi atun, kareb nateh kai iné' nemuyuh déi' Tesalonika. Iamo' Allah tau nemaré kuu' kuan kai pad kai mada' Bala luk Do' luk macing rat Neneh, kuan muyuh, sagan pana' mula' bunu'.

³Idi bala kai nemuyuh baken ratnan luk ngeraruh, idi baken ratnan luk melutak, idi baken dengan saluk.

⁴Iamo' kai megéi' pebala maya' pian Allah ngaceku Ieh nemili' nekai idi nemaré Bala luk Do ini kuan kai. Na kai nutun ngawang niat lemulun, iamo' kai pian ngawang niat Allah luk nutun niat tau.

⁵Muyuh kali' kai na nemakai bala luk mepaci', idi na kai siayu pad ngelinged lili. Allah teh miak mangun ku luk nekali' ratnan ineh.

⁶Na kai nenakap rayeh ratnan lemulun, do' rat nemuyuh idi rat nelun baken pana',

⁷sagan pana' kai miak ruen muyuh ngasa', ngaceku kai rasul-rasul Keristus, iamo' kai mebeneh niat arang muyuh mepad kudeng sebuleng tinan ngasa' anak-anakneh sebuleng.

⁸Ngaceku awa kai nemuyuh, kai temina' maré babpat kuan muyuh, baken ratnan Bala luk Do' ratnan Allah ineh mo', iamo' ulun kai sebuleng pana'. Ngaceku muyuh luk inan kai mawa.

⁹Kali' rungen muyuh ngerawé, O kinanak-kinanakku, ratnan erur idi kél kai. Tebaco kedangan kai nengakem pad kai na maré meberat kuan seburur pana' rat arang muyuh, kareb kai nemada' Bala luk Do' ratnan Allah kuan muyuh.

- ¹⁰Muyuh mangun ku luk nekali' nekai, idi kudeng ineh teh Allah: ulun kai pa kiung muyuh luk manu ineh do', mesiri, idi na mesala'.
- ¹¹Muyuh kali' terawé kai ratnan muyuh mepad kudeng taman dengan anak.
- ¹²Kai nengetueh anu muyuh, kai nengubuk nemuyuh, idi kai nengecuk nemuyuh mulun maya' pian Allah luk nawar nemuyuh semuet bang ImetNeh idi rayehNeh teh.
- ¹³Idi ini punneh kai ini pana' megéi' maré ubur kuan Allah. Kareb kai nemada' bala Allah kuan muyuh, muyuh nengalap bala ineh baken mepad kudeng bala lemulun, iamo' matu mepad kudeng bala Allah. Ngaceku Allah ngakem bang nemuyuh luk manu.
- ¹⁴O kinanak-kinanakku, muyuh pangeh nekali' susa' mepad kudeng sidang Allah déi' tana' Yudia, ieh ineh susa' pupu Keristus Yésus. Muyuh pangeh pidereh pupu muyuh sebuleng, mepad kudeng ideh teh pidereh lun Yahudi,
- ¹⁵luk pangeh nengaté Tuhan tau Yésus idi nabi-nabi pana'. Idi kai pana' piderehdeh. Ideh pelaba dat pa kiung Allah. Idi teh ideh sikal metueh ratnan lemulun.
- ¹⁶Ideh mebpeng nekai na mada' bala luk ngacing ulun kuan lun pupu baken. Lun Yahudi na ugka' nganau' sala'-sala' luk pangeh kikemdeh ineh. Iamo' nekini useh Allah nacing pa luundeh.
- ¹⁷Iamo' kai ini, O kinanak-kinanakku, kareb kai pangeh pitad rat nemuyuh segageh mo' — baken patad bang terawé, iamo' ratnan burur mo' — kai pelaba terawé nemuyuh. Kai mekél nakap dalan pad kai miak papu' nemuyuh.
- ¹⁸Ngaceku ineh kai pian lemubed amé' nemuyuh. Ui ini Paulus nenutun lemubed, baken sekua' mo', iamo' Sétan ineh nengesabeng nekai.
- ¹⁹Idéké luk mangun ku rapet kai, ku awang, idi ku pata dita' kai? Bakenké muyuh pa kiung Tuhan tau Yésus kareb Ieh macing teh?
- ²⁰Kali' rungen muyuh mangun ku rayeh idi awang kai!

1 Tesalonika 3

¹Kekipedneh kai na miak tuman teh. Ngaceku ineh kai ngerawé do' kai tudo déi' Atina tuda'-tuda' io.

²Idi kai nengecuk Timotius, ieh ineh kinanak tau luk ngakem kuan Allah idi pad-pad mada' Bala luk Do' ratnan Keristus dengan kai. Kai nengecuk neneh ngedengan nemuyuh idi ngepicet anu muyuh,

³pad muyuh na lemubed ngaceku dereh ini. Muyuh sebuleng kali' amung dereh ineh mangun ku sebabpat luk pian Allah kuan tau.

⁴Ngaceku kareb kai idi dengan muyuh, kai nemada' nemuyuh atun ratnan kai uen ngedereh; idi muyuh kali' do'-do', ineh luk pangeh nangun.

⁵Ini punneh ui nengecuk Timotius amé' nemuyuh. Kareb ui na miak tuman teh, ui nengecuk neneh pad ui miak kali' ratnan anu muyuh, kian muyuh pangeh tinutun Iblis ineh pad erur kai mangun mo'-mo'.

⁶Nekini Timotius pangeh nacing rat nemuyuh idi nenguit kuan kai bala luk do' ratnan anu idi awa muyuh. Ieh nemaré kali' ratnan muyuh megéi' do' nekai, idi ratnan muyuh geregan papu' nekai, mepad kudeng kai geregan papu' nemuyuh.

⁷Ini punneh bang amung-amung susa' idi dereh kai, niat kai pangeh inubuk ngaceku anu muyuh, O kinanak-kinanakku,

⁸ngaceku nekini kai mulun dengan do' kudeng muyuh lutep bang Tuhan.

⁹Idi nekini kai miak ngubur Allah ngaceku muyuh, idi ngaceku awang niat luk pangeh ilap kai pa kiung allah tau ngaceku muyuh.

¹⁰Tebaco kedangan kai mutuh rat Neneh, pad kai miak nier kiung muyuh teh, pelé kai miak ngedengan nemuyuh idi anun muyuh ruen petap.

¹¹Do' Allah Taman tau, idi Tuhan Yésus pana' ngukab dalan pad kai macing nemuyuh.

¹²Idi do' Tuhan nganau' nemuyuh meluun awa seburur dengan seburur, idi inan amung-amung lemulun dengan mela, mepad kudeng kai mawa nemuyuh.

¹³Dengan luk kudeng ineh Ieh miak ngepicet niat muyuh, pad muyuh meligan dengan na melutak idi na mesala' pa kiung Allah, Taman tau, kareb acing Tuhan tau Yésus dengan amung-amung lun manu.

1 Tesalonika 4

¹Kekipedneh, O kinanak-kinanakku, muyuh pangeh nesibada' rat nekai ratnan kudeng apeh muyuh miak mulun pad ngawang niat Allah: ieh ineh mepad kudeng ulun muyuh nekini. Idi nekini kai mutuh nemuyuh bang ngadan Tuhan Yésus nganau' meluun rantan ineh.

²Ngaceku muyuh kali' bada' luk pangeh bida' kai kuan muyuh bang ngadan Tuhan Yésus.

³Ini pian Allah kuan muyuh: do' muyuh mangun meligan, idi ugka' ratnan pasét.

⁴Do' anid-anid burur deléi muyuh mileh mili' awan muyuh sebuleng bang luk meligan idi luk buren,

⁵baken ratnan lili burur muyuh sebuleng mepad kudeng lun pupu baken luk na miti Allah.

⁶Idi aleg seburur lemulun pana' ngelaba ukum idi nganau' sala' kuan kinanakneh bang luk kudeng ineh, ngaceku Tuhan luk ngua' amung-amung ineh, mepad kudeng luk pangeh bila kai atun. Kai pangeh metueh mada' nemuyuh.

⁷Ngaceku Allah pangeh nenawar netau baken pad nganau' luk melutak, iamo' luk meligan.

⁸Ngaceku ineh lemulun luk ngarung bada' ini, baken ieh ngarung lemulun, iamo' Allah luk maré RohNeh luk meligan kuan muyuh.

⁹Idi ratnan awa arang kinanak, na kai ngayud kuan muyuh ngaceku muyuh sebuleng pangeh bida' Allah mawa seburur dengan seburur.

¹⁰Idi muyuh pangeh nenganau' luk kudeng ineh kuan kinanak-kinanak luk déi' Makedonia. Iamo' kai mutuh nemuyuh, O kinanak-kinanakku, do' awa muyuh amé'-amé' mula'.

¹¹Idi do' muyuh mulun dengan na mula' ria', idi nganau' kekamen muyuh sebuleng, idi ngakem dengan ticu' muyuh mepad kudeng luk pangeh bida' kai,

¹²pad muyuh miak uen ngedita' siren lemulun luk na maya', idi muyuh na miak merapet ku lun baken maré luk pian muyuh.

¹³O kinanak-kinanakku, kai pian nemuyuh kali' luk matu ratnan lemulun luk panegh naté, pad muyuh na miak ngalap dat niat mepad kudeng lemulun luk na luk idi rapet inan Allah.

¹⁴Tau manu idi Yésus ineh pangeh naté idi tinui teh. Kudeng ineh teh tau manu idi lemulun luk naté bang anu inan Yésus, ieh ineh miak iten Allah pad-pad denganNeh.

¹⁵Ini bala Tuhan luk badén kai nemuyuh: tau ini luk mulun kareb acing Tuhan, na miak amé' pa atun lemulun luk pangeh naté.

¹⁶Tuhan sebuleng miak temurun rat surga dengan uni tang luk rayeh, idi dengan uni tang lun rayeh melaikat, idi dengan uni serupit Allah. Idi amung-amung lemulun luk pangeh naté bang Keristus miak tumui atun.

¹⁷Muci tau luk uned mulun kareb ineh miak lapen amé' bang laput pad-pad dengandeh papu' Tuhan déi' arang gawa'. Kudeng ineh teh tau megéi' pad-pad dengan Tuhan.

¹⁸Ngaceku ineh do' muyuh ngubuk seburur dengan seburur dengan bala ini.

1 Tesalonika 5

¹Ratnan amung-amung karebneh, O kinanak-kinanakku, na ulek ruen ngayud kuan muyuh.

²Ngaceku muyuh sebuleng pangeh kali' dengan megala' idi Aco Tuhan ineh macing mepad kudeng lun mano kareb medacem.

³Kareb lemulun pebala, "Pelaba do' ali idi do' udeng," idi denak-denak até macing kuandeh, mepad kudeng luk mét nenganak kuan seburur decur luk mali'. Idi na tu-tu ideh miak muit bururdeh.

⁴Iamo' muyuh ini, O kinanak-kinanakku, na muyuh ineh tudo bang dacem, pad aco ineh macing nemuyuh mepad kudeng lun mano.

⁵Amung-amung muyuh anak-anak acang idi anak-anak aco. Tau ini baken ratnan malem idi ratnan medacem.

⁶Ngaceku ineh, do' tau na rudap mepad kudeng lun baken, iamo' do' tau matar idi ngerawé-ngerawé.

⁷Lemulun rudap kareb medacem, idi lemulun mabuk kareb medacem teh.

⁸Iamo' tau ini luk ratnan aco. Do' tau kulat idi ngayung ku kuyu' belawan, ieh ineh anu idi awa, idi ngayung ku tupi, ieh ine rapet miak ngalap ulun.

⁹Ngaceku Allah nemili' netau baken pad tau medereh ku usehNeh, iamo' pad tau miak ngalap ulun ratnan Tuhan tau Yésus Keristus,

¹⁰luk naté ngaceku tau, pad kareb tau mulun idi maté pana', tau mulun pad-pad denganNeh.

¹¹Ngaceku ineh, ngubuk seburur dengan seburur idi ngepicet seburur dengan seburur, mepad kudeng luk inau' muyuh teh.

¹²O kinanak-kinanakku, kai mutuh nemuyuh ngerawé lemulun luk merur ngakem arang muyuh, idi luk nguyut nemuyuh bang Tuhan, idi luk mada' nemuyuh.

¹³Do' muyuh ngedita' nedeh tu-tu dengan awa ngaceku ratnan kekamendeh. Idi do' muyuh pedo' seburur dengan seburur.

¹⁴O kinanak-kinanakku, kai mutuh nemuyuh mada' lemulun luk mekupé, ngetueh lemulun luk metalang niat, ngubuk lemulun luk melaya', idi mulai niat kuan amung-amung lemulun.

¹⁵Matar do'-do'! Aleg seburur pana' ngua' luk dat dengan luk dat kuan seburur lemulun pana', iamo' megéi' nakap luk do' seburur kuan seburur idi kuan amung-amung lemulun.

¹⁶Do' muyuh megéi' mawang niat,

¹⁷idi sembayang dengan na melawa',

¹⁸idi maré ubur ratnan luk amung-amung, ngaceku ini pian Allah bang Keristus Yésus kuan muyuh.

¹⁹Aleg ngilep Roh ineh,

²⁰idi aleg ngebeneh bada' luk biré Tuhan.

²¹Do' muyuh ngiti luk amung-amung, idi luk do' miak itin muyuh;

²²ngado burur muyuh ratnan amung-amung ayu luk dat.

²³Idi do' Allah, luk lawa awang ineh, ngeligan nemuyuh dengan petap; idi do' roh idi ulun idi burur muyuh uen ngasa' dengan petap idi na mesala', kareb acing Tuhan tau Yésus Keristus.

²⁴Allah luk nenawar nemuyuh miak nganau' amung ineh ngaceku Ieh lutep maya' jani'.

²⁵O kinanak-kinanakku, sembayang kuan kai.

²⁶Tabi' kuan amung-amung kinanak dengan pebuen luk meligan.

²⁷Ui mutuh tu-tu nemuyuh dengan ngadan Tuhan, pad surat ini uen maca' kuan amung kinanak luk manu.

²⁸Do' katu Tuhan tau Yésus Keristus ngedengan nemuyuh.

2 Tesalonika

2 Tesalonika 1

¹Rat ni Paulus, Siluanus idi Timotius — Kuan sidang lun Tesalonika luk bang Allah Taman tau, idi bang Tuhan tau Yésus Keristus:

²Do' katu idi awang ratnan Allah Taman tau idi ratnan Tuhan tau Yésus Keristus temurun kuan muyuh.

³Idi do' kai megéi' maré ubur kuan Allah ngaceku muyuh, O kinanak-kinanakku, mepad kudeng luk petulu, ngaceku anu muyuh amé'-amé' mula', idi awa rat arang muyuh sebuleng amé'-amé' mela kuan anid-anid burur muyuh.

⁴Ineh punneh kai ngubur nemuyuh bang amung-amung sidang Allah, ngaceku ulai niat idi anu muyuh bang amung-amung dereh idi susa' luk ngesabeng nemuyuh.

⁵Ineh luk mangun ku tanu' ratnan ukum Allah luk matu, ratnan muyuh mayu ruen ngiap kuan Imet Allah, idi ngaceku ineh muyuh kali' medereh teh.

⁶Ngaceku Allah miak nganau' luk matu. Ieh pian ngedereh lemulun luk ngedereh nemuyuh.

⁷Idi muyuh luk pidereh ineh miak ngalap do' udeng pad-pad dengan kai, kareb Tuhan Yésus uen ngegala' rat surga dengan amung-amung baweh melaikatNeh,

⁸dengan apui luk mebudung, pad ngua' kuan amung-amung lemulun luk na miti Allah, idi kuandeh luk na sikal maya' Bala luk Do' ratnan Tuhan tau Yésus.

⁹Ideh miak ngalap dereh até luk meruked pitad rat pa kiung Allah idi ratnan rayeh laludNeh,

¹⁰kareb Ieh macing bang Aco ineh, pad Ieh uen ngerayeh bang amung-amung pupuNeh, idi uen ngedita' bang amung-amung lemulun luk manu. Kareb ineh

muyuh pana' idi arangdeh, ngaceku muyuh pangeh manu ku bala luk bida' kai nemuyuh.

¹¹Ineh punneh kai megéi sembayang kuan muyuh pad Tuhan tau ngiap nemuyuh petulu maya' tawarNeh nemuyuh. Idi dengan laludNeh do' Allah ngacing amung-amung pian muyuh, pad muyuh maya' luk do' idi pad kekamen anun muyuh uen ngeriput,

¹²pad ngadan Tuhan tau Yésus uen ngerayeh bang nemuyuh, idi muyuh bang Neneh, maya' katu Allah idi Tuhan Yésus Keristus.

2 Tesalonika 2

¹Idi ratnan acing Tuhan tau Yésus Keristus idi ratnan tau tebubpun pad-pad denganNeh, kai mutuh nemuyuh, O kinanak-kinanakku,

²aleg muyuh saget pekisu' terawé idi megagap ku bala lemulun ratnan Aco Tuhan pangeh nacing, ayuneh pangeh bida' lemulun luk kikem roh lek, kian bida' lemulun kareb ieh mada' lek. Kian inan luk pebala, kai ini pangeh nengayud ineh bang surat.

³Aleg muyuh saluken lemulun ratnan anun-anun, ngaceku Aco ineh na miak macing kareb nateh lemulun mula' lumi ratnan anu atun, idi Lemulun luk Dat luk kumin bang apui uen ngejala'.

⁴Ieh sikal metueh ratnan amung-amung luk inan lemulun sembayang idi luk titen lemulun ratnan Allah. Ieh miak ngedita' bururneh, pad ieh tudo bang Ruma' Allah idi ngamo bururneh ineh Allah.

⁵Naké muyuh ngerawé kareb ui tudo dengan muyuh ui pangeh nemala amung-amung ini kuan muyuh?

⁶Iamo' inan luk ngesabeng ineh nekini, pad ieh na mangun, idi muyuh kali' anun ineh. Bang kareb luk inau' lutep, Lemulun luk Dat ineh miak ngejala' bururneh.

⁷Luk Inalum ineh kali' rungen uned ngakem, iamo' inan luk nabeng nekini. Kudeng luk nabeng ineh talan,

⁸Lemulun luk Dat ineh miak uen ngegala' idi miak pitayen Tuhan Yésus ku bui tangNeh, idi uen ngusag ku rasat acingNeh.

⁹Idi Lemulun luk Dat ineh macing dengan lalud Sétan, idi nganau' kekamen luk melalud, idi tanu' luk na matu idi kekamen luk nan mawa.

¹⁰Ieh naluk lemulun luk kumin maté ku saluk luk dat. Lemulun ineh miak maté, ngaceku na ideh ngalap idi mawa ku luk matu pad ideh miak uen ngulun.

¹¹Ini punneh Allah nengacing kuandeh sebuleng lalud luk ngeraruh, pad ideh miak manu ku luk mebalih,

¹²pelé amung-amung luk na manu ku luk matu, iamo' mawang niat ku luk dat ineh miak uen ngediman.

¹³Iamo' do' kai ini megéi maré ubur kuan Allah ngaceku muyuh, O kinanak-kinanankku luk inan Tuhan mawa. Ngaceku muyuh pangeh pinili' Allah rat pun-pun pad uen ngulun, ngaceku muyuh linigan bang Roh, idi muyuh manu ku luk matu.

¹⁴Allah nenawar nemuyuh kuan luk kudeng ineh dengan Bala luk Do' luk bida' kai nemuyuh; Ieh nenawar nemuyuh, pad ngalap babpat ratnan rayeh Tuhan tau Yésus Keristus.

¹⁵Ngaceku ineh, O kinanak-kinanankku, do' muyuh tuper meraben, idi ngimet amung-amung bada' luk pangeh bida' kuan muyuh, do' dengan bala idi surat kai pana'.

¹⁶Do' Tuhan tau Yésus Keristus sebuleng, idi Allah Taman tau, luk pangeh mawa netau idi nemaré ubuk luk meruked idi rapet luk do' ngaceku ratnan katuNeh,

¹⁷ngubuk niat muyuh idi ngeraben nemuyuh bang anid-anid kekamen idi bala luk do'.

2 Tesalonika 3

- ¹Kekipedneh, O kinanak-kinanakku, do' muyuh sembayang kuan kai, pad bala Tuhan temubu' idi uen ngerayeh, mepad kudeng luk mangun arang muyuh teh.
- ²Sembayang kuan kai pad kai miak uen muit ratnan lemulun luk melalid idi luk dat, ngaceku baken amung-amung lemulun manu.
- ³Iamo' Tuhan lutep maya' jani'. Ieh miak ngeraben nemuyuh idi matar nemuyuh ratnan Lemulun luk Dat ineh.
- ⁴Idi bang Tuhan kai merapet nemuyuh, pad muyuh nganau' idi miak nganau' luk duken kai nemuyuh.
- ⁵Idi do' Tuhan ngeruid niat muyuh pad muyuh ngalap awa Allah idi ulai niat Keristus ineh.
- ⁶O kinanak-kinanakku, kai periteteng nemuyuh dengan ngadan Tuhan tau Yésus Keristus, ngado burur muyuh ratnan anid-anid kinanak luk na petulu kekammeneh, idi luk na maya' bada' luk ilapneh rat nekai.
- ⁷Ngaceku muyuh sebuleng kali' kudeng apeh muyuh miak maya' lawé kai, ngaceku kai na nenganau' luk na petulu arang muyuh.
- ⁸Na kai nekuman luk kenen dengan na raga. Iamo' kai mekél idi merur bang kekamen kai tebaco kedangan, pad kai na ngesusa' seburur pana' arang muyuh.
- ⁹Kai nenganau' kudeng ineh, baken ngaceku kai na miak mutuh pedengan rat nemuyuh, iamo' pad kai mangun ku aceh luk pinginud kuan muyuh.
- ¹⁰Ngaceku kareb kai tudo dengan muyuh, kai neperiteteng nemuyuh kudeng ini: Kudeng idé-idé luk na sikal ngakem, aleg ieh kuman.
- ¹¹Kai mala kudeng ineh ngaceku kai ninger ratnan tuda'-tuda' burur arang muyuh luk mekupé. Na ideh ngakem, iamo' semuet bang gayam lun baken mo'.
- ¹²Idi bang ngadan Tuhan Yésus Keristus kai periteteng nedeh idi mada' nedeh: do' ideh ngakem dengan na ria' idi kuman luk lapendeh sebuleng.

- ¹³Iamo' muyuh ini, O kinanak-kinakku, aleg muyuh musam nganau' luk do'.
- ¹⁴Kudeng idé-idé na maya' bala kai luk bang surat ini, do' muyuh nier lemulun ineh idi aleg perurum neneh, pad ieh migu'.
- ¹⁵Aleg muyuh ngerawé neneh mangun ku bunu', iamo' mada' neneh mepad kudeng seburur kinanak.
- ¹⁶Do' Tuhan sebuleng luk lawa amung-amung awang megéi' maré awang kuan muyuh bang luk amung-amung. Idi do' Tuhan ngedengan amung-amung muyuh.
- ¹⁷Dengan tiku'ku sebuleng ui ngayud ini: Tabi' rat negku Paulus. Kudeng ini lawéku nén anid-anid suratku. Kudeng ini ayudku.
- ¹⁸Do' katu ratnan Tuhan tau Yésus Keristus ngedengan amung-amung muyuh.

1 Timotius

1 Timotius 1

¹Rat ni Paulus, rasul Keristus Yésus maya' ukum Allah Lun Nengulun netau idi Yésus Keristus luk mangun ku rapet tau —

²Kuan Timotius, luk mangun ku anakku matu-matu bang anu: Do' katu idi éi' idi awang ratnan Allah Taman, temurun kuanmu, idi ratnan Keristus Yésus, Tuhan tau.

³Kareb ui uned amé' Makedonia, ui pangeh nemutih namu tudo déi' Epesus, pad iko miak mada' tuda'-tuda' lemulun aleg mada' sebuleng bada' luk baken.

⁴Ngacuk nedeh ugka' pebala luk mo'-mo', idi bala luk ratnan inul luk na kekiped, luk ngacing kedaluh idi na ngacing pian Allah luk uen ngegala' ngaceku manu.

⁵Ilung balaku, ieh ineh pad ngacing awa luk remuat rat bang niat luk meligan, teruayen niat luk do', idi anu luk matu.

⁶Inan tuda'-tuda' lemulun luk numai ratnan amung-amung ini, idi luk lumi inan bala luk mo'-mo'.

⁷Ideh sikal mangun ku guru Ukum Allah, iamo' ideh na kali' ilung anun-anun luk beléndeh idi luk uendeh ngamo.

⁸Tau kali' idi Ukum ineh do', kudeng lemulun maya' neneh dengan luk petulu.

⁹Ngerawé do'-do'! Ukum ineh baken kuan lemulun luk matu, iamo' kuan lemulun luk ngelaba ukum, luk na sikal maya' bala, luk na sembayang inan Allah, luk mesala', luk maya' ulun tana' ini, luk ngaté tamantinan idi luk ngaté nelun baken,

¹⁰kuan lemulun luk pasét, idi deléi luk nganau' luk melutak arangdeh sebuleng, kuandeh luk naban lemulun, luk mebalih, luk pebulung ku luk mebalih, idi luk nganau' anun-anun pana' luk na petulu dengan bada' luk matu.

¹¹Bada' ineh lapen ratnan Bala luk Do' luk biré kuanku pad ui mada' ineh, ieh ineh Bala luk Do' ratnan Allah luk rayeh idi buren.

¹²Idi ui ngubur Keristus Yésus, Tuhan tau luk pangeh nengetueh negku, ngaceku Ieh pangeh merapet negku, pad Ieh nengelelep negku kuan kekamen ini,

¹³sagan pana' atun ui nenguyo Neneh, idi nengedereh idi nengedat Neneh. Iamo' Allah méi' negku ngaceku ui na manu, idi na kali' anun-anun luk pangeh inau'ku.

¹⁴Idi Tuhan nengutang katuNeh luk mela kuanku, idi nemaré kuanku anu idi awa bang Keristus Yésus.

¹⁵Bala ini matu idi petulu tu-tu miak lapen lemulun: ieh ineh Keristus Yésus pangeh nacing bang tana' ini sikal ngulun lun mesala'; idi rat arangdeh ineh ui luk meluun rayeh sala'.

¹⁶Iamo' ini punneh Allah méi' negku, pelé bang negku luk meluun rayeh sala' ineh, Keristus Yésus miak ngegala' ulai niatNeh, idi ui miak mangun ku ayu luk nudin kuan amung-amung lemulun luk miak manu Neneh teh, macing inan ulun luk meruked.

¹⁷Idi amung-amung dita' idi rayeh kuan Raca' luk meruked, luk na miak maté, idi luk na miak siren, ieh ineh Allaah luk Sebuleng, ruked-ruked peh! Amin.

¹⁸Ini ukum luk ui maré kuanmu, O anakku Timotius, maya' amung-amung bala luk biré Tuhan atun ratnan iko. Do' iko makai bala ineh mangun ku repapehmu, kareb iko pebunu' bang bunu' luk matu,

¹⁹idi do' iko lutep bang anu idi teruayen niat luk do'. Inan tuda'-tuda' lemulun luk na ngerawé teruayen niatdeh, idi anudeh nekusag.

²⁰Arangdeh ineh Himenius idi Iskandar, luk pangeh biréku kuan Sétan, pad ideh miak badén aleg nguyo Allah.

1 Timotius 2

- ¹Ngaceku ineh ui mada' namu pun-pun, pad amung putuh sembayang idi ubur barén nan Allah kuan amung lemulun;
- ²kuan amung-amung raca' idi lun rayeh, pad tau miak ngalap ulun luk do' udeng idi awang dengan baya' luk meriput idi kekaman luk do'.
- ³Idi ineh luk do' idi luk petulu pa kiung Lun Nengulun netau, ieh ineh Allah,
- ⁴ngaceku Ieh pian amung-amung lemulun ngalap ulun idi kali' luk matu.
- ⁵Idi Allah ineh Sebuleng mo', idi Luk Ngatum ineh pana' Sebuleng teh arang Allah dengan lemulun, idi Ieh pana' lemulun teh, ieh ineh Keristus Yésus,
- ⁶luk pangeh nemaré bururNeh mangun ku uli' kuan amung-amung lemulun, ieh ineh mangun ku sebuleng luk nekali' bang kareb luk petulu, ratnan Allah pian ngulun amung-amung lemulun.
- ⁷Idi ini punneh ui litep mangun ku rasul, idi ku guru kuan lun pupu baken pad mada' ratnan anu ineh idi luk matu teh. Ui na mebalih. Ui mala luk matu.
- ⁸Pianku amung-amung deléi sembayang bang anid-anid luk inan, idi ngiding ticu' luk meligan dengan na museh idi pekedaluh.
- ⁹Kudeng ineh teh pianku amung-amung decur ngayung bururdeh ku ayung luk petulu, dengan igu' idi ngimet burur; baken dengan abpuk luk uen ngayung, idi dengan amas, bau mutiara, idi ayung luk meraga;
- ¹⁰iamo' dengan kekamen luk do', mepad kudeng luk petulu kuan decur luk sikal mepicet maya' Allah.
- ¹¹Do' decur ineh sibada' pirud-pirud dengan abud-abud beneh niatneh.
- ¹²Iamo' na ui nima' seburur decur mada' idi ngimet ukum pa luun deléi, iamo' do' ieh pirud.
- ¹³Ngaceku Adam pangeh pinudut atun, mucu ratnan ineh idi teh Hawa;
- ¹⁴idi baken Adam luk sinaluk, iamo' decur ineh pangeh sinaluk pad ieh nengelaba ukum Allah.

¹⁵Iamo' ieh uen ngulun ngaceku nenganak Anak ineh, kudeng ieh migu' idi lutep bang anu, awa, idi ligan.

1 Timotius 3

¹Idi ini bala luk matu: Kudeng seburur lemulun sikal ku kekamen lun rayeh sidang, idi ieh pian ku kekamen luk do'.

²Ngaceku ineh do' lun rayeh sidang ineh na nganau' sala'. Do' ieh ngalap sebuleng awan mo', idi ngimet bururneh dengan terawé luk lutep. Do' ieh maya' amung-amung luk petulu, idi nganak nelun sakai. Do' ieh mileh mada'.

³Na ieh miak mangun ku lemulun luk mabuk idi luk pekedaluh, iamo' do' ieh mulai niat, idi mebeneh niat. Na ieh miak melili ku usin.

⁴Do' ieh ngasa' uang tetek ruma'neh dengan meriput, idi mada' anak-anakneh maya' ukumneh idi ngedita' neneh.

⁵Kudeng seburur lemulun na mileh ngimet uang tetek ruma'neh sebuleng, kudeng apehké ieh miak matar sidang Allah?

⁶Aleg ieh seburur lemulun luk baruh-baruh ngalap Yésus, pad ieh na miak ngerayeh bururneh idi mekaneh ukum Iblis.

⁷Idi do' ieh lemulun luk buren lun luk na manu, pad ieh na mekaneh useh idi abpung Iblis.

⁸Kudeng ineh teh do' amung-amung lun ngasa' sidang ineh mepiteb, aleg perapid dila', aleg ideh melili ku luk inan mabuk. Idi aleg melili ku binaweh.

⁹Do' ideh ngimet bada' luk matu luk ginala' Allah dengan anu idi teruayen niat luk do'.

¹⁰Idi do' ideh tetunin atun. Idi kudeng ideh na mesala', do' ideh ngimet kekamen ngasa' sidang ineh.

¹¹Kudeng ineh teh do' awandeh mepiteb, idi na ngatum bala, idi do' ideh ngimet bururdeh idi lutep bang luk amung-amung.

¹²Idi do' lun ngasa' sidang ineh ngalap sebuleng awan mo', idi ngasa' anak-anakneh idi uang tetek ruma'neh dengan meriput.

¹³Lun luk ngasa' sidang do'-do' miak buren lun baken, idi ideh mekuu mada' ratnan anu tau inan Yésus Keristus.

¹⁴Kareb ui ngayud surat ini kuanmu ui merapet miak macing namu teh dengan mesaget.

¹⁵Iamo' kudeng ui mio, idi iko miak kali' kudeng apeh ulun lemulun bang ruma' Allah, ieh ineh sidang Allah luk mulun, sebuleng diri idi tuked ratnan luk matu.

¹⁶Idi rayehneh luk inalum ineh ratnan baya' tau na miak belén. Ieh pangeh linigan bang burur lemulun, idi inau' matu ratnan Roh, idi ginala' kuan melaikat-melaikat. Ieh bida' arang amung-amung pupu, idi inan merapet bang tana', idi inuit umak dengan rayeh.

1 Timotius 4

¹Roh Meligan pangeh ngegala' kareb kekipedneh inan tuda'-tuda' lemulun luk miak meraruh ratnan anu, ngaceku ideh maya' roh-roh luk mebalih idi bada' ada' pana'.

²Bada' ini macing ratnan saluk lun mebalih luk bang teruayen niatdeh pangeh iseb ku belawan luk melau'.

³Ideh mebpeng lemulun na ngaweh, idi mebpeng na kuman tuda'-tuda' akan. Iamo' akan ineh inau' Allah pad miak kenen lemulun luk manu idi luk kali' ratnan luk matu, dengan maré ubur.

⁴Amung-amung pudut Allah ineh do', idi sebuleng pana' na miak talan, kudeng amung ineh lapen dengan ubur,

⁵ngaceku ineh linigan ku bala Allah idi ku sembayang.

⁶Kudeng bala ini badénmu kuan kinanak-kinanak tau, kali' rungen iko mangun ku demulun luk do' kuan Keristus Yésus, luk bida' bang bada' anu idi dengan amung-amung bada' luk do' luk pangeh binaya'mu dengan lutep.

⁷Ngado bururmu ratnan bala luk mo'-mo' luk mepad kudeng luk belén decur-decur remerar ineh. Do' iko sibada' mepicet maya'.

⁸Ngaceku ngalap tueh burur ineh sesuut ulekneh, iamo' baya' ineh inan ulek bang luk amung-amung, ngaceku inan bang neneh pejani' ulun luk nekini idi luk miak macing.

⁹Bala ini matu idi petulu tu-tu miak lapen.

¹⁰Ini punneh tau merur idi metueh ngakem ngaceku tau merapet tu-tu inan Allah luk mulun, luk mangun ku Lun Nengulun amung-amung lemulun, meluun teh amung-amung lemulun luk manu.

¹¹Ngegala' idi mada' amung-amung bala ineh.

¹²Aleg nima' seburur pana' ngebeneh namu ngaceku iko mangud, iamo' do' iko mangun ku aceh luk pinginud luk nudin idi luk do' kuan amung-amung lemulun luk manu, do' ratnan gayammu idi ulunmu, do' awa idi anu idi ligan teh.

¹³Do' iko lutep ratnan maca' Surat Allah, mada', idi ngayud nelun sidang pad ui macing.

¹⁴Aleg iko mekelupan baré luk ratnan Roh luk bang namu, luk pangeh biré kuanmu dengan bala luk ratnan Roh, kareb ticu' amung-amung lun rayeh sidang pangeh rireng luunmu.

¹⁵Do' iko makai amung-amung baré ineh, idi maré bururmu kuan kekamen ineh, pad megala' kuan amung-amung lemulun ratnan iko metaduk.

¹⁶Ngerawé do'-do' ratnan bururmu sebuleng idi ratnan bada'mu. Do' iko lutep bang amung ini, ngaceku dengan kekamen luk kudeng ini iko miak uen ngulun, do' bururmu sebuleng idi lemulun luk ninger namu pana'.

1 Timotius 5

¹Aleg iko ngayud seburur lun rayeh, iamo' do' ngubuk neneh mepad kudeng tamanmu; idi lun luk anak baruh mepad kudeng kinanak,

²idi decur luk remerar mepad kudeng tinan, idi decur luk pun mebaruh mepad kudeng kinanak decur dengan abud-abud ligan.

³Do' méi' inan decur tinula' luk tinula' matu.

- ⁴Iamo' kudeng seburur decur tinula' inan anak, kian mupun lek, do' ideh sibada' pun-pun nganau' luk do' kuan uang tetek ruma'deh sebuleng, idi ngua' kuan taman-tinandeh, ngaceku ini luk petulu pa kiung Allah.
- ⁵Idi decur luk tinula' matu idi luk ketecan sebuleng, do' ieh merapat inan Allah idi lutep bang sembayang idi putuhneh tebaco kedangan.
- ⁶Iamo' decur tinula' luk nakap awang bang tana' ini mulun mepad kudeng maté.
- ⁷Idi amung-amung ini do' iko mada', pad ideh na mesala'.
- ⁸Iamo' kudeng idé lemulun luk na ngasa' pupuneh sebuleng meluun teh uang tetek ruma'neh, idi ieh pana' pangeh nengarung anu, idi ieh meluun dat ratnan lemulun luk na manu.
- ⁹Aleg ngayud ngadan decur tinula' luk nateh nacing anem ngepulu' lak ulunneh. Idi do' luk pangeh nengalap sebuleng awan mo'.
- ¹⁰Idi do' ieh buren ngaceku kekamen neh luk do', ngaceku ieh pangeh nengasa' anak-anakneh, idi nenganak lun sakai, idi namaru' kukud lun manu, idi nengedengan lemulun luk mesusa', idi mekél bang amung-amung luk do'.
- ¹¹Iamo' aleg ngayud ngadan amung-amung decur tinula' luk mangud, ngaceku ideh pian ngaweh maya' pinian bururdeh idi necan Keristus,
- ¹²idi ideh mesala' ngaceku ngelaba jani'deh Neneh luk pun-pun.
- ¹³Idi ideh sibada' mangun mekupé', idi megéi' amé' ngeruma'; iamo' baken ideh mekupé mo', iamo' mangun ku luk ngatum buri' idi luk ngusag kekamen lun baken, idi pebala anun-anun luk na petulu beléndeh.
- ¹⁴Ngaceku ineh pianku amung-amung decur tinula' luk mangud ineh ngaweh pad inan anak, idi ngasa' uang tetek ruma'deh, idi aleg ngukab dalam kuan bunu'-bunu' tau pad ideh miak ngedat netau.
- ¹⁵Ngaceku inan tuda'-tuda' tinula' luk pangeh neraruh maya' Sétan.

¹⁶Kudeng seburur decur luk manu inan decur tinula' bang tetek ruma'neh, do' ieh ngasa' nedeh, pad sidang na mesusa', pad sidang miak ngedengan amung-amung decur tinula' luk tudo sebuleng.

¹⁷Lun rayeh-rayeh luk ngimet do'-do' ineh, mayu ngalap dueh kua' kinula' tabpar, meluun teh lemulun luk mekél nginul bala idi mada'.

¹⁸Ngaceku kudeng ini bala Surat Allah, "Aleg iko ngabet tang sapi' luk uned rumik ineh," idi "Anid-anid lemulun lik ngakem kali' rungen ngalap tabparneh."

¹⁹Aleg iko ninger adu' ratnan seburur lun rayeh, kudeng na bila dueh teluh burur lun nekali'.

²⁰Idi lemulun luk megéi' nganau' sala', do' iko mada' nedeh pa kiung amung-amung lemulun, pad lun baken miak matot.

²¹Idi ui periteteng namu pa kiung Allah idi Yésus Keristus idi amung melaikat luk meligan, do' iko maya' bala ini dengan na mili' lemulun, idi dengan na ngerawé seburur meluun ratnan lun baken.

²²Aleg iko ngerareng tiku'mu denak-denak luun seburur pana', idi aleg perurum bang sala' lun baken. Matar bururmu dengan meligan.

²³Aleg iko ngirup abpa' mo', iamo' do' ngirup sesuut abpa' anggur, ngaceku ét ruukmu idi laya'mu luk géi'-géi' ineh.

²⁴Sala' sebuang lemulun megala' kareb nateh lun baken ngia' nedeh, iamo' sala' sebuang lemulun megala' mucu.

²⁵Kudeng ineh teh kekamen luk do' ineh megala' tutu, idi luk na megala' pana' na miak pungen.

1 Timotius 6

¹Do' amung lemulun luk mangun ku demulun ngedita' lun rayehdeh, pad na nguyo ngadan Allah idi bada' tau.

²Demulun luk inan lun rayeh luk manu, aleg ngebeneh nedeh, ngaceku ideh ineh kinanakdeh. Iamo' do' ideh meluun kél ngasa' nedeh, ngaceku lemulun

luk uendeh ngasa' ineh lun manu luk inandeh mawa. Kudeng ineh teh iko mada' idi ngecuk.

³Kudeng idé-idé lemulun mada' bada' luk baken idi luk na petulu dengan bala luk matu, ieh ineh bala Tuhan tau Yésus Keristus, idi bada' luk macing inan baya' kuan Allah,

⁴idi ieh ineh lemulun luk ngerayeh bururneh dengan na kali' anun-anun. Ieh pelaba ucet pesaad idi pekedaluh ratnan bala, idi ngacing ét niat, kedaluh, kuyo, idi tuda'-tuda' terawé luk dat,

⁵kedaluh lemulun luk na mileh ngerawé, idi luk na kali' luk matu. Idi bang terawédeh baya' ineh mangun ku aceh dalan ngalap tabpar.

⁶Iamo' baya' dengan mawang niat, ieh ineh maré peruan luk rayeh.

⁷Tau na nguit anun-anun semuet bang tana' ini. Ngaceku ineh tau na miak nguit anun-anun remuat teh.

⁸Iamo' kudeng tau inan akan idi ayung, do' tau mawang niat ku ineh.

⁹Iamo' lemulun luk sikal mangun ku lun do', mebpeh bang tutun idi mekaneh abpung, ieh ineh lili luk mebacé idi luk ngacing susa', luk nerem lemulun bang usag idi até.

¹⁰Ngaceku lili inan usin, ieh ineh aceh uat amung-amung luk dat; idi inan lemulun luk pangeh nenganau' kudeng ini, pad ideh rinaruh ratnan anu idi nengalap bang bururdeh mula' susa'.

¹¹Iamo' iko ini, O demulun Allah, ngado bururmu ratnan amung-amung ineh, idi nakap luk matu, baya', anu, awa, ulai niat, idi niat luk do'.

¹²Do' mekél dengan matu bang bunu' anu, idi ngimet ulun luk meruked luk inanmu pangeh tinawar kareb iko pangeh nengamo sebuleng amo luk do' pa kiung mula' lemulun luk nekali'.

¹³Ui periteteng namu pa kiung Allah luk ngulun luk amung-amung, idi pa kiung Keristus Yésus luk nemaré kali' ratnan amo luk do' pa kiung Pontius Pilatus.

¹⁴Do' iko maya' ukum ineh dengan na mesala' idi melutak pad acing Tuhan tau Yésus Keristus.

¹⁵Bang kareb luk petulu acingNeh miak ruen Allah ngacing, ieh ineh Lun luk Ngimet luk sebuleng idi luk buren, ieh ineh Raca' pa luun amung-amung raca', idi Tuhan pa luun amung-amung tuan.

¹⁶Ieh sebuleng mo' na miak maté. Ieh tudo bang acang luk na miak mesier, luk na tu-tu sinier idi luk na miak siren seburur lemulun. Amung-amung ubur idi lalud kuanNeh, ruked-ruked! Amin.

¹⁷Do' mada' kuan amung-amung lemulun luk lun do' bang tana' ini, pad ideh na medita' niat, idi aleg ideh merapet ku binaweh luk na meruked ineh. Iamo' do' ideh merapet inan Allah luk maré anun-anun kuan tau dengan mela pad niat tau mawang.

¹⁸Ngecuk nedeh nganau' luk do', pad kekamendeh luk do' ineh amé' mula'. Dengan méi' idi mekatu do' ideh maré kuan lun baken.

¹⁹Dengan luk kudeng ineh ideh ngamung binaweh luk mangun ku tapin mucu, pad ideh miak ngalap ulun luk matu ineh.

²⁰O Timotius, matar amung-amung luk biré kuanmu, idi ngatad bururmu ratnan bala luk neraruh luk mo'-mo', idi terawé ratnan "ileh" luk baken ileh luk matu.

²¹Ngaceku inan lemulun luk ngamo bururdeh mileh, iamo' ngaceku ineh ideh pangeh neraruh ratnan anu. Idi katu Allah ngedengan nemuyuh.

2 Timotius

2 Timotius 1

¹Rat ni Paulus, rasul Keristus Yésus luk dengan pian Allah mada' pejani' ulun luk inan bang Keristus Yésus —

²Kuan Timotius, anakku luk inanku mawa: Do' katu, éi', idi awang ratnan Allah Taman temurun kuanmu idi ratnan Tuhan tau Yésus Keristus.

³Ui ngubur Allah luk inanku mepicet dengan teruayen niat luk meligan maya' kudeng kekamen tepunku, idi dengan na melawa' ui ngerawé namu bang sembayangku tebaco kedangan.

⁴Ui ngerawé ratnan abpa' matehmu, idi ui geregan papu' namu pad awangku panu'.

⁵Ui ngerawé anumu luk matu bang niatmu, luk pun-pun netudo bang niat tepunmu Lois idi tinanmu Uniki, iamo' ui pangeh merapet anu ineh idi bang niatmu teh.

⁶Idi ini punneh ui ngegio terawému pad iko miak ngulun baré Allah luk bang bururmu ratnan ticu'ku luk pangeh rireng luunmu ineh.

⁷Ngaceku Roh luk biré Alla kuan tau na ngatot netau. Iamo' RohNeh ineh maré lalud idi awa, pad tau ngimet burur.

⁸Ngaceku ineh aleg migu' maré kali' ratnan Tuhan tau, idi aleg migu' ratnan ui kiling ngaceku Tuhan. Iamo' do' iko pad-pad ngalap medereh ngaceku Bala luk Do' maya' lalud Allah.

⁹Allah nengulun netau idi nenawar netau mangun ku pupuNeh, baken maya' kekamen tau, iamo' maya' pianNeh sebuleng idi katu luk biréNeh kuan tau atun bang Keristus Yésus rat kareb luk pun-pun.

¹⁰Iamo' nekini katu ineh pangeh ginala' kuan tau dengan acing Lun Nengulun netau, ieh ineh Keristus Yésus luk pangeh nengelaya' lalud até idi luk nengegala' ulun, idi dengan Bala luk Do', Ieh pangeh nengegala' ulun lu meruked.

- ¹¹Allah pangeh nemili' negku mangun ku lun mada', idi rasul, idi guru teh.
- ¹²Ineh punneh ui ngalap medereh bang amung ini. Iamo' na ui migu', ngaceku ui kali' idé luk inanku merapet ineh, idi ui kali' Ieh melalud miak ngasa' baréku pad macing Aco ineh.
- ¹³Do' ngalap luk pinginud ratnan amung-amung bala luk matu luk pangeh pindengermu rat negku, dengan anu idi awa luk bang Keristus Yésus.
- ¹⁴Do' matar amung-amung luk do' ineh luk biré kuanmu, ratnan Roh Meligan luk tudo bang netau.
- ¹⁵Iko kali' amung-amung lemulun luk déi' tana' Asia ineh pangeh neteketed rat negku, idi arangdeh ineh Pigelus idi Hermogenis.
- ¹⁶Idi do' Tuhan maré éi' kuan amung uang tetek ruma' Onesiporus, ngaceku tuda'-tuda' kua' ieh nengetueh niatku, idi na ieh migu' ku kalingku,
- ¹⁷iamo' kareb ieh déi' bawang Rum ieh pangeh nenakap negku dengan kél pad ieh nepapu' negku.
- ¹⁸Do' Tuhan ngedengan neneh, pad ieh ngalap éi' ratnan Tuhan kareb Aco ineh. Iko kali' do'-do' ratnan kudeng apeh ieh nengasa' negku déi' Epesus.

2 Timotius 2

- ¹Ratnan iko ini, O anakku, do' iko metueh bang katu luk bang Keristus Yésus.
- ²Idi bada' luk pangeh pindengermu rat negku arang lun mula' luk nekali', do' mada' kuan lemulun luk lutep idi luk petulu mada' nelun baken teh.
- ³Do' iko pad-pad nalap medereh denganku mepad kudeng seburur lun pebunu' luk do' ratnan Keristus Yésus.
- ⁴Seburur lun pebunu' luk uned pebunu' na ngesabeng niatneh ku anun-anun luk ratnan tana' ini. Iamo' ieh pian ngawang niat lun rayehneh.
- ⁵Idi lemulun luk peribatun, na pimaren pata kudeng ieh na maya' mepad kudeng luk icuk.

- ⁶Idi lun luk merur ngakem bang lati', kali' rungen ngalap bua'neh luk pun-pun.
- ⁷Ngerawé do'-do' balaku ini, ngaceku bang luk amung-amung Tuhan miak maré ileh kuanmu.
- ⁸Ngerawé ratnan Yésus Keristus inul Daud ineh luk tinui rat arang lun naté, mepad kudeng Bala luk Do' luk bida'ku ineh.
- ⁹Ngaceku ui mada' Bala luk Do' ineh ui medereh pad ui kiling, mepad kudeng lun luk dat. Iamo' bala Allah baken ieh kiling.
- ¹⁰Ineh punneh ui tuman ratnan amung-amung ngaceku pupu Allah luk pinili', pad ideh pana' ngalap ulun bang Keristus Yésus dengan rayeh luk meruked.
- ¹¹Idi ini bala luk matu: "Kudeng tau pangeh naté pad-pad denganNeh. tau miak mulun pad-pad denganNeh.
- ¹²Kudeng tau megéi' medereh tau miak ngimet pad-pad denganNeh. Kudeng tau ngalum Neneh, Ieh pana' ngalum netau.
- ¹³Kudeng tau na lutep, ieh megéi' lutep, ngaceku Ieh na miak ngalum bururNeh."
- ¹⁴Mada' nelun luk badénmu, idi periteteng nedeh pa kiung Tuhan, pad ieh na pekedaluh ratnan bala. Ini na ulek, iamo' ngacing luk dat kuan lemulun luk ninger ineh.
- ¹⁵Do' iko mekél pad iko buren Allah, mepad kudeng seburur demulun luk na migu' idi luk nginul bala ratnan luk matu dengan mesiri.
- ¹⁶Iamo' ngado bururmu ratnan bala lun luk ngeraruh luk mo'-mo', ngaceku bala ineh ngado lemulun ratnan Tuhan.
- ¹⁷Luk badéndeuh mepad kudeng kimuh luk kuman uang. Arangdeh inan Himenius idi Pilitus.
- ¹⁸Didueh pangeh neraruh ratnan luk matu, idi pebala tui tau ini pangeh nepelaba, pad anu lemulun uen ngelaya'.

¹⁹Iamo' diri Allah luk lutep ineh meraben peh, idi kudeng ini etuneh; "idi Tuhan miti amung-amung pupuNeh," idi teh, "Idé-idé luk neten ngadan Tuhan, do' ieh ngado bururneh ratnan luk dat."

²⁰Idi binaweh luk bang ruma' luk rayeh baken ratnan amas idi pirak mo', iamo' ratnan kayuh idi tana' pana', idi inan teh kuan kekamen luk buren idi inan teh kuan kekamen luk dat.

²¹Kudeng idé-idé ngeligan bururneh ratnan luk kudeng ineh, ieh miak mangun ku aceh binaweh luk buren, ngaceku ieh pangeh linigan, idi miak uen Tuhanneh makai, temina' kuan amung-amung kekamen luk do'.

²²Ngado bururmu ratnan amung-amung lili anak adi', idi nakap luk matu, anu, awa, idi pedo', dengan amung-amung lemulun luk nawar ngadan Tuhan dengan niat luk meligan.

²³Iamo' ngado bururmu ratnan saad luk mebacé idi luk na ulekneh, ngaceku iko kali' luk kudeng ineh ngacing kedaluh.

²⁴Demulun Tuhan na miak pekedaluh. Do' ieh mulai niat kuan amung-amung, mileh mada' lemulun, idi mekadang niat bang dereh,

²⁵idi do' ieh mada' lemulun luk sikal metueh rat neneh dengan mebeneh niat, merapet idi Allah miak nguit nedeh uren, pad ideh kali' ratnan luk matu.

²⁶Idi ideh miak mepuit ratnan abpung Iblis, kareb ideh pangeh tiban demulun Tuhan pad nganau' pian Allah.

2 Timotius 3

¹Ngerawé do'-do', kareb Aco luk kekiped miak macing aceh kareb luk medereh.

²Lemulun miak mawa inan bururdeh sebuleng, melili ku usin, ngerayeh bururdeh, medita' niat, nguyo lemulun, ngelaba bala taman-tinandeh, na maré ubur, idi na meligan.

³Ideh na méi', na sikal pedo', ngesala' lemulun, na ngimet bururdeh, mesangit, idi megateh inan luk do'.

⁴Ideh na inan merapet, sikal metueh, mesido' niat, meluun sikal ngawang niatdeh ratnan mawa inan Allah.

⁵Ideh siayu maya' Tuhan, iamo' lalud baya' ineh kinarungdeh. Do' iko ngado bururmu ratnan lemulun ini.

⁶Inan lemulun luk kudeng ineh semuet bang ruma' idi naban decur luk mebacé luk panu' ku sala'deh, idi luk kinuyut tuda'-tuda' lili,

⁷decur-decur luk megéi' sibada', iamo' na ideh miak kali' ratnan luk matu.

⁸Mepad kudeng Yanes idi Yambris pekedaluh dengan Musa, kudeng ineh teh lemulun ini sikal metueh ratnan luk matu. Ideh na mileh ngerawé, idi anudeh mo'-mo'.

⁹Iamo' na ideh miak mekéi, ngaceku bacédeh miak megala' kuan amung-amung, mepad kudeng bacé dueh burur lemulun ini.

¹⁰Iamo' iko pangeh nemaya' bada'ku, ulunku, idi luk pianku. Iko pangeh nekali' anuku, kadang niatku, awaku, ulai niatku,

¹¹idi amung-amung dereh idi susa'ku. Iko kali amung-amung luk nangun kuanku déi' Antiokia, Ikonium, idi Listra, ieh ineh tuda'-tuda' dereh. Iamo' Tuhan nemuit negku ratnan amung ineh.

¹²Amung lemulun luk sikal mulun mepicet inan Allah dengan Keristus Yésus miak ngalap medereh.

¹³Lemulun luk dat idi siayu, luk amé' rayeh datdeh. Ideh naluk nelun baken, idi ideh pana' sinaluk teh.

¹⁴Iamo' do' iko lutep bang bada' luk pangeh bida' kuanmu, idi luk inanmu manu, dengan ngerawé idé luk pangeh nangun ku guru-gurumu.

¹⁵Do' ngerawé rat isuut iko pangeh nekali' ratnan Surat luk Meligan luk miak maré ileh kuanmu luk macing inan ulun ngaceku manu inan Keristus Yésus.

¹⁶Anid-anid Surat Allah pangeh ginala' Allah, idi inan ulek kareb mada' luk matu. Bala ineh ngegala' luk mesala', ngesiri luk tekilu', idi mada' dalam luk petulu dengan pian Allah,

¹⁷pad demulun Allah ineh meligan, idi tinina; kuan amung-amung kekamen luk do'.

2 Timotius 4

¹Ui mada' namu pa kiung Allah idi Keristus Yésus, luk mangun ku Lun luk Mutut Besara' kuan amung lemulun luk mulun idi luk pangeh naté: ngaceku acingNeh idi ImetNeh ui ngecuk namu;

²mada' bala ineh, idi do' iko temina', do' bang kareb luk do' idi bang kareb luk na do', ngegala' sala' lemulun, mebpeng idi mada' dengan mekadang niat.

³Karebneh miak macing idi lemulun na miak ngimet bada' luk matu; iamo' ngaceku laliddeh megatal sikal ninger, idi ideh ngamung tuda'-tuda' guru kuan bururdeh maya' pinian bururdeh sebuleng.

⁴Ideh miak teketed ratnan ninger luk matu, idi lumi inan bala luk mebalih.

⁵Iamo' bang luk amung-amung do' iko ngimet bururmu, tuman ratnan luk medereh, nganau' kekamen lemulun luk mada' Bala' luk Do', idi ngeriput kekamenmu mepad kudeng demulun Allah.

⁶Ui miak barén idi tarekku pangeh nacing.

⁷Ui pangeh mekél pebunu' bang bunu' luk do'. Ui pangeh peribatun macing su garis luk kekiped, idi ui pangeh nematar anuku ineh.

⁸Idi nekini pata ratnan luk matu pangeh tinina' kuanku idi Tuhan, ieh ineh Lun luk Mutut Besara' luk matu ineh miak maré pata ineh kuanku kareb Aco ineh; idi baken kuanku mo', iamo' kuan amung-amung lemulun luk pangeh geregan ku acingNeh.

⁹Do' nutun macing negku dengan mesaget.

¹⁰Dimas pangeh nenecan negku ngaceku mawa kuan tana' ini, idi ieh pangeh iné' Tesalonika; Kreskes iné' Galatia, idi Titus iné' Dalmatia.

¹¹Lukas mo' luk pad-pad denganku. Do' ngalap Markus idi nguit neneh denganmu, ngaceku ieh miak ngedengan negku bang kekamenku.

¹²Idi Tikikus pangeh icukku amé' déi' Epesus.

¹³Kareb iko macing, do' nguit kuyu' boyor luk pangeh ticanku déi' Troas déi' ruma' Karpus, idi amung-amung surat, meluun teh amung-amung kubil luk uen ngayud.

¹⁴Iskandar lun mileh nganau' belawan ineh pangeh nenganau' mula' luk dat kuanku, idi Tuhan miak ngua' neneh maya' kekammeneh.

¹⁵Matar bururmu rat neneh, ngaceku ieh pangeh metueh ratnan bala tau.

¹⁶Kareb ui pun-pun nengor bala bang besara', na luk idi seburur pana' luk ngeruyung negku; iamo' amung-amungdeh nenecan negku. Ui merapet amung ineh na mangun ku babeh kuandeh.

¹⁷Iamo' Tuhan nengedengan negku idi nengetueh negku, pad ui miak mada' Bala luk Do' ineh, idi amung-amung lun pupu baken miak ninger. Idi ui mepuit ratnan tang balang ineh.

¹⁸Tuhan miak muit negku ratnan anid-anid luk dat idi miak ngulun negku pad semuet bang IemtNeh luk bang surga, idi rayeh kuanNeh ruked-ruked. Amin.

¹⁹Tabi' kuan Priskila idi Akila, idi kuan uang ruma' Onesiporus.

²⁰Erastus neketecan déi' Korintus: idi Tropimus pangeh ticanku déi' Militus ngaceku ieh mét.

²¹Do' nutun macing tungé' kareb nateh meteneb. Ubulus, Pudenus, Linus, Klaudia, idi amung-amung kinanak maré tabi' kuanmu.

²²Do' Tuhan ngedengan rohmu. Do' katu Allah ngedengan amung-amung muyuh.

Titus

Titus 1

¹Rat ni Paulus, demulun Allah idi rasul Yésus Keristus. Ui pangeh pinili' Allah, idi icuk ngepicet anu pupu Allah luk pinili' idi nguyut nedeh macing inan luk matu, maya' kudeng luk bida' ratnan baya' tau,

²luk tipin luun rapet tau ku ulun luk meruked, luk pangeh pijani' Allah luk na miak mebalih, atun ratnan amung-amung kareb luk meruked.

³Idi balaNeh ineh pangeh ginala' bang kareb luk petulu, bang bada' luk pangeh biré kuanku, maya' kudeng ukum Lun Nengulun netau, ieh ineh Allah.

⁴Kuan Titus, luk mangun ku anakku matu-matu dengan sebuleng anu. Do' katu idi awang ratnan Allah, ieh ineh Taman, idi ratnan Keristus Yésus Lun Nengulun netau temurun kuanmu.

⁵Ui nenecan namu déi' Kriti, pad iko miak mangeh amung-amung luk nateh inau', idi pad iko miak mili' lun rayeh-rayeh sidang bang anid-anid bawang, maya' kudeng luk pangeh icukku namu:

⁶Do' lun rayeh sidang ineh lemulun luk na mesala', idi luk inan sebuleng awan mo', idi anak-anakneh manu idi na inadu' ngaceku kekamen luk dat, idi na ngelaba ukum.

⁷Ngaceku lun rayeh sidang ineh ngasa' kekamen Allah idi na miak mesala'. Ieh na miak medita' niat, na malé museh, na mabuk, na pekedaluh, idi na melili ku binaweh bang tana' ini.

⁸Do' ieh ngasa' nelun sakai, idi mawa ku luk do'. Do' ieh mepiteb, mesiri, meligan, idi ngimet burur.

⁹Do' ieh ngimet meraben bala luk matu maya' bada' Tuhan ineh, pad ieh miak nginul bada' luk matu, idi mada' lemulun luk sikal metueh.

¹⁰Ngaceku inan mula' lemulun luk na maya' bala, luk pebala mo'-mo', idi luk naluk, meluun teh lemulun luk ngimet ukum nunat.

¹¹Tangdeh na miak na uen niep, ngaceku ideh ngagau amung uang tetek ruma' lemulun, idi mada' luk na petulu, pad ngalap binaweh mo'.

¹²Seburur nabi rat Kriti pangeh nepebala, "Lun Kriti megéi' mebalih. Ideh ineh pung luk dat, lemulun luk mekupé idi manga."

¹³Luk bila nabi ineh matu. Ngaceku ineh, metueh mada' nedeh, pad anudeh meriput,

¹⁴pelé ideh na ngerawé bala lun Yahudi luk mo'-mo', idi ukum lemulun luk pangeh neteketed ratnan luk matu.

¹⁵Idi kuan lun luk meligan amung-amung meligan peh; iamo' kuan lemulun luk melutak idi luk na manu sebuleng pana' na meligan, ngaceku terawédeh idi teruayen niatdeh pana' melutak.

¹⁶Ideh ngamo bururdeh ngiti Allah, iamo' dengan kekamendeh ideh ngalum Neneh. Ideh luk inan lun baken megateh; ideh ngelaba bala idi na mayu nganau' kekamen luk do'.

Titus 2

¹Iamo' do' iko mada' luk petulu dengan bada' luk matu.

²Mada' amung-amung deléi luk remerar pad ideh lutep terawé, mepiteb, idi ngimet burur; pad anudeh idi awadeh meriput, idi pad ideh tuman.

³Kudeng ineh teh do' amung-amung decur luk remerar mulun maya' baya' luk matu, ieh ineh na ngedat lemulun, na mangun ku demulun abpa' anggur, iamo' mada' anun-anun luk do',

⁴pad ideh mada' decur-decur luk mebaruh ratnan mawa inan awandeh, idi mawa inan anak-anakdeh,

⁵pad ideh lutep terawé, meligan, idi mileh ngasa' uang tetek ruma', do' niat, idi maya' bala awandeh, pad bala Allah na uen nguyo.

⁶Kudeng ineh teh mada' amung-amung deléi luk mebaruh ratnan ngimet bururdeh.

⁷Idi bang luk amung-amung, do' iko sebuleng mangun ku aceh luk pinginud amung-amung kekamen luk do'. Idi bang bada'mu do' iko mesiri idi matu.

⁸Makai bala luk matu luk na miak uen ngesala', pad ngigu' lemulun luk sikal metueh, ngaceku na luk inandeh ngedat netau.

⁹Do' amung-amung demulun maya' bala lun luk kuan nedeh idi nganau' luk piandeh bang luk amung-amung dengan na ngupat bala,

¹⁰idi dengan na mano. Iamo' do' ideh megéi' lutep idi do' niat bang luk amung-amung pad ideh ngerayeh bada' Allah, Lun Nengulun netau.

¹¹Ngaceku Allah pangeh nengegala' katuNeh luk ngacing ulun kuan amung-amung lemulun.

¹²Katu ineh mada' netau, pad tau lumi ratnan kekamen luk na meligan idi amung-amung lili tana' ini, idi pad tau ngimet burur tau idi mulun bang tana' ini maya' luk mesiri, idi luk petulu dengan pinian Allah,

¹³kareb tau nganét Aco luk inan tau merapet ineh, ieh ineh kareb ubur Allah luk meluun rayeh idi Lun Nengulun netau Yésus Keristus miak megala' teh.

¹⁴Ieh nemaré bururNeh ngaceku tau, pad Ieh nguli' netau ratnan amung-amung kekamen luk dat, pad Ieh ngeligan kuan bururNeh, aceh pupu mangun ku binawehNeh sebuleng, luk mekél nganau' luk do'.

¹⁵Maré kali' ratnan amung-amung bala ini, mada' idi mebpeng dengan petap tueh. Aleg iko uen lemulun ngebeneh.

Titus 3

¹Mada' nelun luk badénmu pad ideh ngebeneh bururdeh kuan amung-amung lun ngimet idi lun rayeh pana', dengan maya' baladeh, idi temina' nganau' anid-anid kekamen luk do'.

²Mada' nedeh pad ideh na nguyo seburur lemulun, idi na pekedaluh, iamo' pad ideh mulai buri', idi megéi' ngegala' do' niatdeh kuan amung-amung lemulun.

³Ngaceku atun tau pana' mebacé, ngelaba bala, neraruh, mangun ku demulun kuan amung-amung lili idi rot luk dat bang tana' ini. Kareb ineh tau mulun bang luk dat idi ét niat, luk inan lemulun megateh, idi megateh seburur inan seburur.

⁴Iamo' kareb éi' idi awa Allah Lun Nengulun netau pangeh ginala',

⁵Ieh nengulun netau. Baken ngaceku ratnan kekamen luk do' luk inau' tau, iamo' ngaceku éi'Neh. Ieh nengulun netau ku baru' Roh Meligan luk nguit netau tinganak mebaruh, pad ngalap ulun luk mebaruh.

⁶Allah nengutang RohNeh pa luun tau dengan mela ngaceku ratnan Yésus Keristus, Lun Nengulun netau,

⁷pad tau miak ruen matu ngaceku ratnan katuNeh, idi ngalap babpat ulun luk meruked luk inan tau merapet ineh.

⁸Bala ini matu. Idi luk pianku, do' iko metueh mada' amung bala ini, pad lemulun luk pangeh manu inan Allah ineh mekél nganau' amung-amung luk do'. Amung-amung bala ini do' idi inan ulek kuan lemulun.

⁹Iamo' ngado bururmu ratnan saad luk mebacé idi bala ratnan ngadan tepun, kedaluh, idi pesaad ratnan Ukum. Amung-amung luk kudeng ineh mo'-mo' idi na ulek.

¹⁰Lemulun luk ngatad rurum mucu ratnan ieh pangeh bida' dueh kua', nala' neneh.

¹¹Iko kali' nelun luk kudeng ineh pangeh neraruh. Idi sala'neh ngegala' ratnan ieh na matu.

¹²Kareb ui ngecuk Artemas amé' namu kian Tikikus lek, do' iko nutun macing negku déi' Nikopolis, ngaceku ui lutep tudo déi' kareb meteneb.

¹³Do' iko mekél ngedengan ni Sinas, lun luk ngatum ukum ineh, idi Apolos pana', pad didueh miak nalan. Aleg nima' nedidueh masi' ratnan anun-anun.

¹⁴Nima' amung-amung lun tau sibada' nganau' luk do' pad ideh miak ngedengan asi' lemulun, idi na ideh mulun dengan na ngeruat bua'.

¹⁵Idi amung-amung kinanak luk idi denganku maré tabi' kuanmu. Tabi' kuan amung lun rurun tau bang anu. Idi do' katu Allah ngedengan amung-amung muyuh.

Pilimon

Pilimon 1

¹Rat ni Paulus, seburur lemulun luk kiling ngaceku Keristus Yésus, idi rat ni Timotius kinanak tau — Kuan Pilimon luk pad-pad ngakem dengan kai bang kekamen Allah,

²idi kuan kinanak kai luk decur Apia, idi kuan Arkipus, lun dengan kai bang bunu' Tuhan, idi kuan sidang luk déi' ruma'mu:

³Do' katu idi awang ratnan Allah, Taman tau, idi ratnan Tuhan Yésus Keristus temurun kuan muyuh.

⁴Idi ui megéi' maré ubur kuan Tuhanku idi neten ngadanmu bang amung-amung sembayangku,

⁵ngaceku ui ninger ratnan awamu idi ratnan anumu kuan Tuhan Yésus idi kuan amung-amung lun manu.

⁶Ui sembayang pad rorum anumu inan ulek pad ngiti anid-anid kekamen luk do' luk lapen tau bang Keristus.

⁷Ui pangeh mawang niat idi inubuk ngaceku ratnan awamu, ngaceku iko ngawang niat amung-amung lun manu, O kinanakku.

⁸Ngaceku ineh, idi teh ngaceku ui ini kinanakmu bang Keristus, ui miak mekuu' ngecuk namu nganau' anun-anun luk petulu.

⁹Iamo' ngaceku ratnan awa ui pelaba sikal mutuh namu, ieh ineh ui ini Paulus, lemulun luk mengered idi teh nekini kiling ngaceku Keristus Yésus,

¹⁰ui mutuh namu ngaceku Onesimus luk pangeh mangun ku anakku bang tutup ini.

¹¹Atun ieh na ulek kuanmu, iamo' nekini ieh inan ulek kuanmu idi kuanku teh.

¹²Ieh pangeh icukku lemubed amé' namu — ieh luk inanku pelaba awa.

¹³Idi pianku ngimet neneh pad ngasa' negku laba' ui kiling ngaceku Bala luk Do', mangun ku libalmu.

- ¹⁴Iamo' na ui sikal nganau' anun-anun dengan na kali' terawému, pad katumu baken ratnan sinaad, iamo' ratnan pianmu sebuleng.
- ¹⁵Ngaceku kian, ini punneh ieh pitad rat namu segageh mo', pad iko miak ngimet neneh raked-raked.
- ¹⁶Nekini ieh baken demulun mo', iamo' meluun do' ratnan demulun. Ieh mangun ku seburur kinanak bang Keristus. Ui pelaba awa neneh! Meluun teh iko miak mawa neneh bang kekamen demulun, idi ngaceku ieh mangun ku kinanak bang Tuhan pana'!
- ¹⁷Ngaceku ineh, kudeng iko ngerawé negku mepad kudeng lun denganmu, do' ngalap neneh mepad kudeng ui.
- ¹⁸Kudeng ieh pangeh nengasi' namu idi pebaleh namu, do' nima' negku ngua' baleh ineh.
- ¹⁹Ui ini Paulus, ngayud dengan tiku'ku sebuleng: Ui miak ngua' ineh lemubed. (Petuluké ui maré namu ngerawé ratnan iko pana' pebaleh negku ratnan ulunmu sebuleng?)
- ²⁰Ngaceku ineh, kinanakku, nima' negku ngalap peruan rat namu bang Tuhan; ngawang niatku bang Keristus.
- ²¹Idi ui ngayud kudeng ini kuanmu ngaceku merapat idi iko miak maya' balaku idi ui kali' namu sikal nganau' meluun ratnan putuhku ineh.
- ²²Idi ratnan luk kudeng ineh, do' iko nganau' temina' aceh takep kuanku, ngaceku ui merapat idi ngaceku sembayang muyuh ui miak barén amé' nemuyuh.
- ²³Epapras, luk kiling denganku ngaceku Keristus Yésus maré tabi' kuanmu,
- ²⁴idi teh Markus, Aristarkus, Dimas, idi Lukas, ieh ineh lun denganku pad-pad bang kekamen Allah.
- ²⁵Idi do' katu Tuhan tau Yésus Keristus ngedengan rohmu.

Iberani

Iberani 1

- ¹Bang kareb luk mon Allah megéi' pebala kuan tepun tau maya' tuda-tuda' dalan dengan dila' nabi-nabi.
- ²Iamo' kekipedneh Ieh nepebala kuan tau lemaba AnakNeh luk inau'Neh lutep pad miak ngalap luk amung-amung, idi rat Neneh teh pangeh inau' amung-amung luk pinudut.
- ³Ieh merasat ku rasat rayeh Allah; Ieh mepad ayu dengan ulun Allah. Ieh ngimet luk amung-amung dengan balaNeh luk melalud. Kareb Ieh pangeh nengiu' amung-amung sala', idi Ieh netudo pa tinueh Luk Meluun Rayeh déi' dita'.
- ⁴Anak ineh inau' meluun rayeh ratnan melaikat mepad kudeng ngadan luk biré Allah Neneh meluun rayeh ratnan ngadandeh.
- ⁵Ngaceku Allah na nepebala nan melaikat-melaikatNeh, "Iko ini AnakKu; Aco sini Ui nenganak Namu." Idi teh, Allah na nepebala inan seburur melaikat, "Ui ini mangun ku TamanNeh, idi Ieh pana' mangun ku AnakKu."
- ⁶Idi teh kareb Anak buleng ineh inuitNeh iné' bang tana', idi Ieh nepebala, "Do' melaikat-melaikat Allah tekeradung sembayang Neneh."
- ⁷Idi ratnan melaikat-melaikat ineh, Ieh nepebala, "Ieh mudut melaikat-melaikatNeh mangun ku bui, idi lun dukenNeh ku budung apui."
- ⁸Iamo' ratnan AnakNeh Allah nepebala, "KerusiMu O Allah, inan ruked-ruked, idi rukud luk matu, ieh ineh rukud ImetMu.
- ⁹Iko mawa ku luk matu, idi megateh ku luk dat; ineh punneh Iko panegh inumau Allah TuhanMu, ku umau awang meluun ratnan amung-amung lun denganMu."
- ¹⁰Idi teh, kebalaNeh, "Iko ini, O Tuhan nengerareng tana' ini rat pun-pun, idi langit ineh pana' inau' ticu'Mu.

¹¹Amung-amung ineh miak musag, iamo' Iko luk meruked; amung-amungneh ineh miak melu, mepad kudeng kibung.

¹²Mepad kudeng tarub Iko miak ngelulun neneh, idi mepad kudeng aceh kibung amung-amung ineh miak misu'. Iamo' Iko luk na misu', idi Iko na miak mengered.”

¹³Melaikat sapehké luk inanNeh nepebala, "Tudo Iko pa tinuehKu, pad Ui ngebeneh bunu'-bunu'Mu mangun ku tapin kukudMu?"

¹⁴Idéké melaikat-melaikat ineh? Bakenké amung-amung ini roh luk ngakem kuan Allah, luk icukNeh ngedengan lemulun luk ngalap ulun luk meruked, pad ideh miak ngasa' nedeheh?

Iberani 2

¹Ineh punneh petulu tau ngerawé ratnan amung-amung luk pangeh pindenger ineh, pad tau na miak uen ngeraruh.

²Pangeh ginala' bala luk bila melaikat ineh matu, idi idé-idé luk na nemaya ineh inukum maya' luk kikemneh.

³Kudeng apehké tau miak mepuit kudeng tau na ngerawé ulun luk kudeng ineh rayeh? Tuhan pun-pun nemada' ratnan ulun ineh, idi lemulun luk neninger balaNeh nengegala' kuan tau ratnan bala ineh matu.

⁴Idi teh Allah ngedengan luk nekali'deh ineh dengan tanu'-tanu', idi kekamen luk nan mawa idi anid-anid kekamen luk melalud. Idi Ieh nemarké baré Roh Meligan, maya' pianNeh sebuleng.

⁵Allah na nengecuk melaikat ngimet tana' luk pidutenNeh, luk tau ngerawé nekini.

⁶Iamo' maya' kudeng luk bila bang Surat Allah, kebalaneh, "Anunké lemulun pad Tuhan ngerawé neneh, idi anunké anak Adam, pad Tuhan ngikak neneh?"

⁷Bang segageh Iko nenganau' neneh sesuut beneh ratnan melaikat; Iko nemarké rayeh idi dita' ku pataNeh.

⁸Iko nengelelep neneh mangun ku raca' pa luun luk amung-amung." Kebalaneh, Allah nengelelep lemulun mangun ku "raca' pa luun luk amung-amung," ilungneh luk amung-amung. Iamo' nekini na tau nier lemulun mangun ku raca' pa luun luk amung-amung.

⁹Iamo' tau nier Yésus luk segageh inau' sesuut beneh ratnan melaikat ineh, pad dengan katu Allah Ieh miak maté kuan amung lemulun. Tau nier Neneh nekini dengan pata rayeh idi dita' ngaceku até luk pangeh binabehNeh.

¹⁰Maya' pian Allah luk nemudut idi luk ngimet luk amung-amung, petulu Yésus uen ngeriput ku dereh, pad Ieh miak nguit mula' anak amé' inan rayehNeh. Ngaceku Yésus, Ieh ineh lawa ulundeh.

¹¹Ngaceku Luk ngeligan idi luk linigan ineh pana', amung-amung ineh ratnan Sebuleng mo' punneh; idi ini punneh Ieh na migu' neten nedeh kinanak,

¹²kebalaNeh, "ui sikal mada' ngadanMu, O Allah, kuan kinanak-kinanakKu; Idi arang sidang Ui miak ngubur Namu."

¹³Idi teh, kebalaNeh, "Ui ini miak merapet Neneh." Idi teh, kebalaNeh, "Siruh, Ui ini dengan anak-anak luk biré Allah kuanKu."

¹⁴Ngaceku anak-anak ineh lemulun luk inan uang idi dara', Yésus pana' nengalap burur luk kudeng ineh, pad ratnan atéNeh Ieh miak nala' neneh luk ngimet lalud até, ieh ineh Iblis,

¹⁵pad Ieh miak muit tuda'-tuda' lemulun luk mangun ku demulun raked-raked ulundeh ngaceku matot ku até.

¹⁶Megala' baken melaikat luk denganinNeh iamo' inul Ibrahim.

¹⁷Ilungneh, na miak na Ieh ruen mepad kudeng kinanak-kinanakNeh bang luk amung-amung, pad Ieh miak mangun ku Imam Rayeh luk méi' idi lutep maya' jani', pelé pupuNeh ineh bang kekamenNeh kuan Allah miak ngalap do' ratnan sala'.

¹⁸Nekini Ieh miak ngedengan lemulun luk tetunin ineh, ngaceku Ieh sebuleng pangeh pidereh idi tinutun.

Iberani 3

¹O kinanak-kinanakku luk meligan, luk pad-pad ngalap babpat bang tawar luk rat surga, do' muyuh ngerawé Rasul idi Imam Rayeh luk pangeh imo tau, ieh ineh Yésus.

²Ieh lutep kuan Luk nenawar Neneh, mepad kudeng Musa pana' lutep bang kekamen kuan uang ruma' Allah ineh.

³Lemulun luk mudut ruma' uen ngerayeh meluun ratnan ruma' ineh. Kudeng ineh teh Yésus mayu uen ngerayeh meluun ratnan Musa.

⁴Anid-anid ruma' ineh piduten lemulun; iamo' luk mudut luk amung-amung, Ieh ineh Allah.

⁵Idi Musa ineh lutep kuan amung-amung uang ruma' Allah mepad kudeng demulun, idi ieh nepebala ratnan amung-amung luk miak badén Allah mucu.

⁶Iamo' Keristus ineh lutep ngaceku Ieh Anak luk ngimet ruma' Allah. Tau ini uang ruma' Allah ineh, kudeng tau lutep bang kuu' idi rapet tau, pad macing kekipedneh.

⁷Ngaceku ineh maya' bala Roh Meligan, "Bang aco sini kudeng muyuh ninger bala Allah,

⁸aleg muyuh ngetueh niat muyuh mepad kudeng bang kareb muyuh sikal metueh ratnan Allah, kareb muyuh nenutun Neneh déi' su luk ali-ali.

⁹Su ineh tepun muyuh nenutun idi nengelio Negku, kebala Allah, sagan pana' kekamenKu sinierdeh apat ngepulu' lak kinioneh.

¹⁰Ineh punneh Ui museh nedeh idi nepebala, 'Niatdeh ineh megéi' meraruh, na ideh pian maya' balaKu.'

¹¹Ui museh nedeh idi nepebulung: 'Na tu-tu ideh miak semuet bang luk inanKu ucu!' “

¹²O kinanak-kinanakku, matar do'-do' pad seburur pana' rat arang muyuh na ngalap niat luk dat dengan na manu pad ieh lumi ratnan Allah luk mulun ineh!

¹³Iamo' do' mada' arang muyuh sebuleng anid-anid aco, seruked "Aco Sini" miak tetanen, pad seburur pana' rat arang muyuh na mangun metueh niat ngaceku saluk sala'.

¹⁴Ngaceku tau pangeh nengalap babpat bang Keristus kudeng tau ngimet meraben rapet luk pun-pun ineh pad macing kekipedneh.

¹⁵Ngaceku pangeh inayud: "Bang aco sini kudeng muyuh ninger balaNeh, aleg muyuh ngetueh niat muyuh mepad kudeng bang kareb muyuh sikal metueh."

¹⁶Idéké lemulun luk neninger bala Allah idi sikal metueh rat eneh? Bakenké lemulun luk pangeh kinuyut Musa neremuat rat Masir?

¹⁷Idéké luk inanNeh museh bang apat ngepulu' lak kinioneh ineh? Bakenké amung-amung lemulun luk pangeh nenganau' sala', pad butungdeh petelubid bang su luk ali-ali ineh?

¹⁸Idéké luk binulungNeh, kareb Ieh nepebala, "Na tu-tu ideh miak semuet bang luk inanKu ucu"? Bakenké lemulun luk nengelaba bala ineh?

¹⁹Idi tau kali' nedeh na miak semuet ngaceku na manu.

Iberani 4

¹Allah pangeh nenecan aceh pejani' kuan tau ratnan semuet bang luk inan ucu' denganNeh. Do' tau matot pad seburur rat arang muyuh na ketecan déi' liang.

²Ngaceku Bala luk Do' pangeh bida' kuan tau, mepad kudeng ideh ineh teh; iamo' bada' luk pindenger ineh na miak ngacing peruan kuandeh, ngaceku na ieh dinengan ratnan anu kuan lemulun luk ninger ineh.

³Ngaceku tau luk pangeh manu ini semuet bang luk inanNeh ucu' maya' kudeng luk panegh bilaNeh, "Mepad kudeng Ui pangeh nepebulung dengan usehKu: 'Idi na tu-tu ideh miak semuet bang luk inanKu ucu!' " Ieh nepebala kudeng ineh sagan pana' amung-amung kekamen ineh pangeh inau' temina' rat pun-pun tana'.

⁴Ngaceku inan aceh ayat luk pangeh bilaNeh ratnan aco luk ketudu' mepad kudeng ini, "Idi Allah nucu' bang aco luk ketudu' ratnan amung-amung kekamenNeh."

⁵Sekua' teh Ieh nepebala kudeng ini, "Idi na tu-tu ideh ineh miak semuet bang luk inanKu ucu'."

⁶Lemulun luk neninger Bala luk Do' atun na miak semuet bang su luk inan Allah ucu', ngaceku ideh na manu. Kudeng pieh kudeng ineh, inan lun baken luk miak semuet bang su luk inanNeh ucu'.

⁷Ini pangeh ginala', ngaceku Allah nengelelep aceh aco luk baken luk titen, "Aco Sini." Allah nepebala ratnan ineh tuda'-tuda' lak mucu ratnan ineh bang Nani Ubur Daud, bang ayat luk bila atun ineh, "Bang aco sini, kudeng muyuh ninger bala Allah, aleg muyuh ngetueh niat muyuh."

⁸Kudeng Yusak pangeh nenguit nedeh semuet bang luk inandeh ucu' dengan Allah, kali' rungen Allah na neneten aco luk baken mucu ratnan ineh.

⁹Kudeng pieh kudeng ineh, kali' rungen pangeh litep aceh kareb luk inan ucu' kuan pupu Allah.

¹⁰Ngaceku lemulun luk pangeh nesemuet bang luk inan Allah ucu' ineh, ieh pangeh nucu' ratnan kekammeneh sebuleng, mepad kudeng luk inau' Allah.

¹¹Ngaceku ineh, do' tau ngekél burur tau semuet bang luk inan Allah ucu' ineh, pad seburur pana' na miak mebpeh, mepad kudeng ideh luk nengelaba ukum.

¹²Bala Allah ineh mulun idi melalud, idi meluun tadem ratnan pelapet luk tadem pekop, idi kuman medalem pad matad ulun idi roh, idi buku tulang idi isud, idi miak ngukum amung-amung terawé idi pian niat tau.

¹³Na luk idi anun-anun luk uen ngelinged kuan Allah. Iamo' amung-amung pudut megala' idi mukab pa kiungNeh. Idi tau maré or kuanNeh ratnan kekamen tau.

¹⁴Ngaceku ineh, do' tau ngimet amo anu ineh. Ngaceku tau inan Imam Rayeh luk pangeh nengelaba langit, ieh ineh Yésus, Anak Allah.

¹⁵Ngaceku na luk idi Imam Rayeh kuan tau luk na méi' inan amung-amung laya' tau, iamo' luk pangeh nengalap tutun bang luk amung-amung mepad kudeng tau, idi teh Ieh na mesala'.

¹⁶Ngaceku ineh do' tau amé' matun kerusi katu Allah dengan niat luk mekuu', pad tau ngalap éi' idi katu luk ngedengan netau bang kareb luk petulu.

Iberani 5

¹Anid-anid Imam Rayeh ineh pinili' rat arang lemulun, idi litep ngakem kuan Allah ngaceku lemulun, pad ideh maré luk barén idi luk kereten luun bubpun kuan Tuhan, ngaceku sala' lemulun.

²Ngaceku ieh sebuleng melaya' ieh miak mulai niat kuan lemulun luk mebacé idi neraruh.

³Idi ratnan ineh na miak na ideh maré luk kereten ngaceku sala', baken ngaceku pupu ineh mo', iamo' ngaceku bururneh sebuleng teh.

⁴Na luk idi seburur pana' luk miak ngalap dita' ineh kuan bururneh sebuleng, iamo' kudeng ieh tinawar Allah, mepad kudeng Arun, ieh miak mangun ku Imam Rayeh.

⁵Kudeng ineh teh Keristus pana', na Ieh nengerayeh bururNeh pad Ieh mangun ku Imanm Rayeh, iamo' Allah luk nepebala Neneh, "Iko ini AnakKu; Aco Sini Ui mangun ku TamanMu."

⁶Idi teh Ieh nepebala bang ayat baken teh, "Iko ini Imam luk raked-raked maya' dalam Melkisedek."

⁷Kareb Yésus mulun bang tana' ini, Ieh pana' nesembayang idi nemutih dengan rayeh arod idi tangi' pa kiung Allah luk melalud ngulun Neneh ratnan até. Idi sembayang Yésus pangeh pindenger Allah ngaceku Ieh nengebeneh bururNeh pa kiung Allah.

⁸Sagan pana' Ieh Anak Allah, Ieh nesibada' maya' bala ngaceku amung-amung derehNeh.

⁹Kareb Ieh pangeh linigan, Ieh mangun ku lawa ulun luk meruked kuan amung lemulun luk maya' balaNeh,

¹⁰idi Ieh titen Allah, Imam Rayeh maya' adat Melkisedek.

¹¹Inan mula' luk miak belén tau ratnan ini, iamo' na tau miak ngegala' ineh, ngaceku muyuh na miak kali' ilungneh.

¹²Setuneh petulu muyuh miak mangun ku guru ngaceku muyuh mio maya', iamo' na miak na muyuh badén teh ratnan bada' Allah luk pun-pun. Muyuh ineh lemulun luk na miak kuman akan luk metueh, iamo' muyuh lakat niti'.

¹³Ngaceku lemulun luk niti' na pekalai ku bada' luk ratnan luk matu ngaceku ieh anak.

¹⁴Iamo' akan luk metueh ineh kuan lemulun luk rayeh ulun, ieh ineh kuan lemulun luk pangeh pekalai ratnan ilehneh, pad miak mili' luk do' idi luk dat.

Iberani 6

¹Ngaceku ineh, do' tau ugka' ratnan ngegala' bada' Keristus luk pun-pun ineh. Do' ngetacu amé' inan luk meriput, idi aleg tau ngerareng diri teh, ieh ineh dengan bada' uren ratnan kekamen luk nguit macing inan até, idi anu inan Allah,

²bada' ratnan rereb, bada' ratnan ngerareng ticu' luun lemulun, bada' ratnan tui lun naté teh, idi ukum luk meruked.

³Do' tau amé' pa atun! Idi ini luk ruen tau, kudeng tau simén Allah.

⁴Ngaceku kudeng apeh lemulun luk pangeh nelemubed miak kiuten pad uren teh? Atun ideh bang acang Allah. Ideh pangeh kali' baré luk rat surga ineh, idi pangeh nengalap babpat ratnan Roh Meligan.

⁵Idi ideh kali' bala Allah luk do' ineh, idi amung-amung lalud bang kareb luk miak macing teh.

⁶Idi mucu ideh neraruh, pad ideh na miak iteh sekua' teh amé' inan uren, ngaceku Anak Allah ineh sinalibdeh, idi ideh nengigu' Neneh pa kiung lun mula'.

⁷Allah ngeperuan tana' luk megéi' ngalap abpa' udan temurun luunneh idi luk ngeruat irin-irin luk inan ulek kuan lemulun luk nibu ineh.

⁸Iamo' kudeng tana' ineh ngeruat tabpa' idi bitarung, ieh talan idi ieh lélé uen ngediman idi kekipedneh miak sabpen.

⁹Sagan pana' kai pebala kudeng ini, O muyuh luk inanku mawa, kai merapet nemuyuh pangeh nengalap peruan luk meluun do' idi luk macing inan ulun luk meruked.

¹⁰Ngaceku baken Allah na matu, idi Ieh na mekelupan ratnan, kekamen muyuh idi awa muyuh lu ginala' muyuh kuanNeh, kareb muyuh nengasa' nelun manu atun, idi macing nekini teh.

¹¹Kai rayeh rapet pad anid-anid burur muyuh mekél macing kekipedneh, pad amung-amung luk inan muyuh merapet miak mangun.

¹²Na kai pian muyuh mekupé, iamo' do' muyuh mepad kudeng lemulun iamo' do' muyuh mepad kudeng lemulun luk manu idi mulai niat, pad muyuh ngalap amung-amung luk pijani' Allah.

¹³Kareb Allah nepejani' ni Ibrahim, Ieh nepebulung pad Ieh pejani' nganau' luk pijani'Neh ineh. Ngaceku na luk meluun rayeh ratnan bururNeh sebuleng, Ieh nepebulung bang ngadanNeh sebuleng.

¹⁴KebulungNeh, "Ui pejani' ngeperuan namu, idi ngula' inulmu."

¹⁵Ibrahim ine mulai niat idi ieh nengalap pejani' Allah ineh.

¹⁶Kareb lemulun pebulung, ieh makai ngadan lemulun luk meluun rayeh ratnan bururneh sebuleng, idi bulung ineh ngagka' amung-amung saad arang lemulun.

¹⁷Allah sikal ngegala' tu-tu kuan lemulun luk miak ngalap luk pijani'Neh, ratnan Ieh na ngisu' terawéNeh. Ngaceku ineh Ieh nengetueh jani'Neh dengan aceh bulung.

¹⁸Ngaceku ineh, inan dueh punneh luk na misu', idi Allah na mebalih ratnan ineh. Idi tau luk paneh nengalap ulun bang Neneh, miak ngalap kuu', pad tau ngimet meraben rapet ineh luk pangeh rireng pa kiung tau.

¹⁹Rapet ineh mepad kudeng betuh niat tau. Rapet ineh lutep idi meraben, idi lemaba dicing Ruma' Allah déi' surga,

²⁰su luk inan Yésus pangeh nesemuet ngaceku tau, mangun ku Luk Atun ineh, ngaceku Ieh pana' pangeh mangun ku Imam Rayeh raked-raked maya' adat Melkisedek.

Iberani 7

¹Melkisedek ineh raca' Salem idi imam Allah luk Meluun Dita'. Ieh nepapu' ni Ibrahim kareb Ibrahim nuli' ratnan ngelaya' raca'-raca', idi Melkisedek nengeperuan neneh.

²Idi Ibrahim nemaré kuanneh babpat pulu' ratnan luk tibanneh. (Ilung ngadan Melkisedek ineh "Raca' ratnan Luk Matu." Idi ngaceku ieh raca' Salem, ngadanneh teh Raca' Pedo'.")

³Na luk inayud ratnan taman-tinan idi tepun Melkisedek. Idi teh na luk inayud ratnan aco lukinanneh tinganak, idi aco aténeh. Ieh mepad kudeng Anak Allah, idi ieh mangun ku imam raked-raked.

⁴Siruh kudeng peh rayehneh! Tepun tau Ibrahim nemaré babpat pulu' ratnan amung-amung luk tiban bang bunu' ineh.

⁵Maya' Ukum Musa amung-amung inul Liwi luk mangun ku imam miak ngalap babpat pulu' rat nelun Israil, ieh ineh ratnan kinanak-kinanakdeh, sagan pana' ideh ineh inul Ibrahim teh.

⁶Melkisedek baken inul Liwi. Iamo' ieh nengalap babpat pulu' rat ni Ibrahim, idi ieh nengeperuan neneh luk nengalap pejani' Allah ineh.

⁷Kali' rungen lemulun luk ngeperuan meluun rayeh ratnan lemulun luk ngalap peruan.

⁸Imam-imam luk ngalap babpat pulu' ineh maté, iamo' maya' kudeng luk inayud, Melkisedek luk nengalap babpat pulu' ineh mulun ruked-ruked.

⁹Idi teh miak belén, kareb Ibrahim nemayar babpat pulu' ineh, idi Liwi nemayar teh (sagan pana' inulneh ngalap babpat pulu' teh.)

¹⁰Ngaceku Liwi nateh tinganak kareb Melkisedek nepapu' ni Ibrahim. Iamo' ieh bang burur tepunneh.

¹¹Ukum ineh biré nelun Israil luun diri imam-imam Liwi. Kudeng kekamen imam-imam Liwi meriput, na petulu inan imam baken maya' ayu Melkisedek, idi baken maya' ayu Arun.

¹²Ngaceku kareb lun imam-imam linibal na miak na Ukum ineh pana' pelibal teh.

¹³Ngaceku amung-amung ineh pangeh bila ratnan Tuhan tau luk ratnan inul baken, idi ratnan pupu ineh seburur pana' nateh nangun ku imam luk ngakem iring bubpun.

¹⁴Ngaceku pangeh megala' ratnan Ieh tinganak ratnan pupu Yahuda, idi Musa na nepebala ratnan pupu ineh kareb ieh nemada' ratnan imam.

¹⁵Idi meluun gala' nekini; seburur imam pangeh nacing luk mepad kudeng Melkisedek.

¹⁶Na Ieh mangun ku imam maya' ukum idi lawé lemulun, iamo' maya' lalud ulun luk meruked.

¹⁷Ngaceku pangeh inayud, "Iko ini Imam luk ruked-ruked, maya' dalam Melkisedek."

¹⁸Dengan luk kudeng ini ukum luk atun ineh pangeh tila' ngaceku melaya' idi na ulekneh.

¹⁹Ngaceku Ukum Musa ineh na miak ngeriput anun-anun pana'. Idi nekini aceh rapet luk meluun do' pangeh icing, luk nguit netau amé' muneng nan Allah.

²⁰Idi teh inan bulung Allah. Na luk idi bulung kareb lun baken ineh mangun ku imam.

²¹Yésus mangun ku imam dengan aceh bulung, areb Allah nepebala Neneh, "Tuhan pangeh nepebulung, idi na Ieh nginuud: 'Iko ini Imam luk raked-ruked.' "

²²Kudeng ineh teh Yésus mangun ku etu pejani' luk meluun do'.

²³Idi teh mula'deh nangun ku imam, ngaceku ideh maté idi na miak ngakem meruked.

²⁴Iamo' Yésus mulun raked-ruked, mangun ku Imam luk ngakem dengan na libal-libal.

²⁵Idi Ieh melalud ngulun idi ngeligan amung-amung lemulun luk amé' matun Allah lemaba Neneh, ngaceku Ieh megéi' mulun idi mutuh ngaceku ideh.

²⁶Yésus ineh Imam Rayeh luk miak ngedengan netau. Ieh ineh meligan, idi na mesala'; Ieh pitad ratnan lemulun luk mesala', idi inau' medita' ratnan amung-amung langit.

²⁷Na Ieh mepad kudeng imam baken; idi na ulek kuanNeh maré luk barén anid-anid aco luun bubpun, pun-pun ngaceku sala'Neh, idi mucu ngaceku sala'pupu ineh. Yésus pangeh nemaré baré sekua' mo' kuan amung-amung, kareb Ieh nemaré bururNeh sebuleng.

²⁸Ukum Musa ineh nengeletep lemulun luk melaya' mangun ku imam-imam rayeh, iamo' jani' Allah dengan bulung ineh, luk mucu ratnan Ukum Musa ineh nengeletep seburur Anak ineh luk pangeh riniput macing raked-ruked.

Iberani 8

¹Idi ini luk belén kai: idi tau inan sebuleng Imam Rayeh luk kudeng ineh, luk tudo pa tinueh kerusi Luk Meluun Rayeh déi' surga,

²ieh ineh Lun Ngasa' Su luk inan luk Meluun Ligan idi Lepo luk matu, luk pinudut Tuhan, baken ratnan lemulun.

³Anid-anid Imam Rayeh litep pad maré baré idi luk kereten luun bubpun teh; idi ratnan ineh na miak na Imam ineh pana' inan kuan bururNeh luk miak barénNeh.

⁴Kudeng Ieh bang tana' ini na Ieh miak mangun ku imam ngaceku pangeh inan lemulun luk maré luk barén maya' Ukum lun Yahudi.

⁵Kekamendeh ineh pinginud idi lungung amung-amung luk déi' surga, mepad kudeng luk icuk allah ni Musa, kareb ieh netemina' nganau' Lepo ineh, kebalaNeh, "Ngerawé do'-do' pad iko nganau' amung-amung ineh maya' ayu luk pangeh bida' namu déi' luun pegkung ineh.

⁶Iamo' nekini Yésus pangeh nengalap aceh kekamen luk meluun ligan, ngaceku Ieh mangun ku Lun Ngatum aceh pejani' luk meluun ligan, luk litep luun amung-amung jani' luk meluun ligan.

⁷Kudeng pejani' luk pun-pun ineh meriput, na petulu inan jani' luk kedueh ineh.

⁸Iamo' Allah ngesala' pupuNeh, kebalaNeh, "Aconeh miak macing, kebala Tuhan, kareb Ui miak nganau' pejani' luk mebaruh kuan pupu Israil idi pupu Yahuda.

⁹Baken maya' kudeng pejani' luk inau'Ku kuan tepundeh, kareb aco Ui nengimet ticu'deh idi nenguyut nedeh remuat rat bang bawang Masir. Na ideh lutep maya' jani'Ku ineh, idi Ui pana' na nengerawé nedeh.

¹⁰Iamo' kudeng ini pejani' luk barénKu kuan pupu Israil mucu rat kareb ineh, kebala Tuhan: Ui sikal nuet ukumKu bang terawédeh idi Ui sikal ngayud ukum ineh bang niatdeh. Ui sikal mangun ku Tuhandeh, idi ideh mangun ku pupuKu.

¹¹Na ulek seburur pana' mada' nelun bang bawangdeh, idi pebala kuan kinanak-kinanakneh, 'Do' ngiti Tuhan.' Ngaceku amung-amungdeh miak ngiti Negku ratnan luk isuut macing luk rayeh pana'.

¹²Ui maré do' ratnan amung kekamendeh luk dat, idi na Ui ngerawe sala'deh teh.”

¹³Kareb Ieh pebala ratnan pejani' baruh, Allah pebala luk pun-pun ineh pangeh mangun ku luk mon, idi anun-anun luk amé' mon ineh idi luk amé' mengered lélé miak talan.

Iberani 9

¹Pejani' luk pun-pun ineh inan ukum-ukum sembayang, idi su luk inan sembayang teh luk inau' lemulun.

²Lepo kibung pangeh tinina', ieh ineh luk pa atun, luk titen Su luk Meligan. Idi bang ineh inan kukud lapung, méja, idi ruti luk biré kuan Allah.

³Pa keted dicing luk kedueh ineh inan Lepo luk titen Su luk Meluun Ligan.

⁴Bang ineh inan aceh luk inan ngeseb umau luk do' buen ratnan amas, Pati' Pejani' luk ibpu ku amas libut-libutneh, bigan amas luk panu' ku manna, rukud Arun luk nginulih, idi dueh balad batu pejani'.

⁵Pa luun pati' ineh inan dueh ayu melaikat karub luk buren luk ngelungung Su luk inan Pedo' ineh; iamo' nekini tau na miak mala ratnan amung ineh dengan mekadang.

⁶Kudeng ineh lawéneh amung ineh tinina'. Imam-imam semuet géi'-géi' bang Lepo luk pa atun ineh pian nganau' kekamen luk inandeh pekalai.

⁷Iamo' Imam Rayeh mo' miak semuet bang Lepo luk kedueh ineh sekua' selak mo'. Ieh nguit dara', luk barénneh ngaceku bururneh sebuleng idi ngaceku sala' pupu ineh luk na kali'deh.

⁸Ratnan luk kudeng ineh Roh Meligan ngegala' kuan tau ratnan dalam semuet bang Su luk Meluun Ligan ineh nateh inukab kareb Lepo luk pa atun ineh idi teh.

⁹Ini mangun ku aceh luk pinginud kuan kareb ini. Ilungneh baré-baré idi luk kereten luun bubpun na miak ngeligan teruayen niat lemulun luk sembayang kudeng ineh.

¹⁰Amung-amung ineh petulu dengan akan, luk rupen, idi tuda'-tuda' baru', idi mangun ku ukum maya' ayu burur mo', luk inau' kuan lemulun pad macing nan kareb amung-amung ineh miak uen ngeriput teh.

¹¹Iamo' Keristus pangeh nacing mangun ku Imam Rayeh bang amung-amung luk do' luk idi nekini. Lepo su luk inanNeh ngakem ineh meluun rayeh idi meluun ligan, idi baken inau' ticu' lemulun, ilungneh baken aceh babpat ratnan pudut tana' ini.

¹²Kareb Keristus nelemaba Lepo idi nesemuet sekua' mo' bang Su luk Meluun Ligan ineh, na Ieh nenguit dara' amék idi sapi' ku aceh baré; iamo' Ieh nenguit dara'Neh sebuleng, pad Ieh nengacing ulun luk meruked kuan tau.

¹³Dara' amék, dara' sapi', idi abuh anak sapi' tineh uen ngisak kuan lemulun luk melutak ineh, idi maru' nedeh pad bururdeh meligan.

¹⁴Kudeng pieh kudeng ineh meluun teh dara' Keristus, luk ratnan Roh luk meruked ineh pangeh nemaré bururNeh sebuleng dengan na mesala' kuan Allah ineh, miak maru' teruayen niat tau ratnan kekamen luk macing inan até, pad muyuh mepicet inan Allah luk mulun ineh.

¹⁵Ini punneh Keristus mangun ku Gatum sebuleng pejani' luk mebaruh, pad lemulun luk tinawar Allah ineh miak ngalap babpat luk meruked, luk pangeh pijani' Allah kuandeh ineh. Ini miak mangun ngaceku inan aceh até luk muit lemulun ratnan sala' luk inau'deh kareb ideh pa liang pejani' luk mon ineh.

¹⁶Ngaceku kudeng inan surat periteteng, na miak na inan até kuan lemulun luk periteteng ineh.

¹⁷Ngaceku surat periteteng inan lalud kareb lemulun maté, ngaceku kareb lemulun luk periteteng ineh mulun, idi tetengneh ineh na luk idi lalud.

¹⁸Ineh punneh pejani' luk mon ineh litep ku dara'.

¹⁹Pun-pun Musa pangeh nemada' ukum kuan pupu ineh, maya' kudeng Ukum Surat. Idi ieh nengalap dara' anak sapi', idi abpa', idi ieh nengisak ineh luun surat ineh, idi luun amung-amung pupu ineh ku buluh dumba luk mesia', idi likudung.

²⁰Kebalaneh, "Ini dara' pejani' luk bila Allah kuan muyuh."

²¹Kudeng ineh teh Musa nengisak dara' luun Lepo idi amung-amung luk pikaideh kareb sembayang.

²²Maya' Ukum lélé amung-amung pangeh biru' ku dara', idi baken ratnan ngeruat dara' na luk idi dalam ngalap do' ratnan sala'.

²³Amung-amung ineh, luk mangun ku pinginud amung-amung binaweh rat surga, baruin maya' dalam ineh, iamo' binaweh rat surga ineh teh miak baruin ku aceh baré luk meluun do' ratnan baré ineh.

²⁴Ngaceku Keristus na nesemuet bang Su luk Meligan luk inau' ticu', luk mangun ku luk pinginud mo' ratnan Su luk Meligan luk matu ineh; iamo' bang surga luk matu, pad Ieh miak amé' nekini matun Allah ngaceku tau.

²⁵Keristus na megéi' maré bururNeh, mepad kudeng Imam Rayeh lun Yahudi luk anid-anid lak semuet bang Su luk Meligan dengan nguit dara' pung.

²⁶Ngaceku kudeng pieh kudeng ineh na miak na Ieh megéi' kali' dereh rat pun-pun tana' ini pinudut. Iamo' nekini kareb kekiped tana' ini, sekua' mo' Ieh pangeh ginala' miak ngiu' sala' dengan dalam luk nemaré bururNeh sebuleng.

²⁷Anid-anid burur lemulun maté sekua' mo', idi pangeh ineh ieh miak kumin Allah.

²⁸Kudeng ineh teh Keristus pana' pangeh biré sekua' mo' pad mabeh sala' lun mula'. Idi Ieh miak macing sekedueh kua', baken pad mabeh sala' lemulun teh, iamo' pad ngulun lemulun luk ngingulat Neneh.

Iberani 10

¹Ukum lun Yahudi ineh baken aceh pinginud luk meriput, iamo' mepad kudeng lungung peruan luk miak macing. Idi Ukum ineh na tu-tu miak ngeligan lemulun luk amé' muneng dengan baré luk kereten imam-imam anid-anid lak.

²Kudeng lemulun luk sembayang inan Allah pangeh linigan tu-tu ratnan sala'deh, na ideh ngerawé sala'deh, pad ideh miak ugka' maré baré.

- ³Iamo' baré-baré ineh mangun ku aceh terawé ratnan sala' lemulun anid-anid lak.
- ⁴Ngaceku na tu-tu dara' sapi' idi amék miak ngiu' sala' lemulun.
- ⁵Ini punneh kareb Keristus ineh nesemuet bang tana', idi kebalaNeh kuan Allah, "Luk kereten idi baré na Iko pian, iamo' Iko pangeh nenganau' temina' aceh burur kuanKu.
- ⁶Idi baré luk sabpen, idi baré ngaceku sala' na petulu kuanMu.
- ⁷Idi kebalaKu, 'Siruh Ui pangeh nacing pad nganau' luk pianMu, O Allah, maya' kudeng luk inayud bang Surat Ukum ratnan Ui.' “
- ⁸Pun-pun Ieh nepebala, "Luk kereten, baré luk baken-baken, baré luk sabpen, idi baré ngaceku sala' na Iko pian idi na petulu kuanMu," sagan pana' barén maya' Ukum.
- ⁹Pangeh ineh Ieh nepebala, "Siruh, Ui pangeh nacing sikal nganau' luk pianMu." Idi baré luk mon pangeh tila' Allah pad até Keristus ngelibal ineh.
- ¹⁰Ngaceku Yésus Keristus nenganau' luk pian Allah kuanNeh, amung tau pangeh biru' ratnan sala', ngaceku baré bururNeh luk biré sekua' mo' macing ruked-ruked.
- ¹¹Anid-anid burur imam lun Yahudi tuper anid-anid aco nganau' kekamendeh, idi megéi' maré luk kereten ineh teh, luk na tu-tu miak ngiu' sala' lemulun.
- ¹²Iamo' Keristus namaré aceh baré luk meruked ngaceku amung-amung sala', idi pangeh ineh Ieh tudo pa tinueh Allah.
- ¹³Nekini Ieh nganét su ineh pad amung-amung bunu'Neh mangun ku tapin kukudNeh.
- ¹⁴Dengan sebuleng baré Ieh pangeh nengelian amung-amung lemulun luk biru' ineh macing ruked-ruked.
- ¹⁵Idi Roh Meligan pana' maré kali' kuan tau' ngaceku pangeh bilaNeh,

- ¹⁶"Ini pejani' luk barénKu nedeh mucu, kebala Tuhan: Ui sikal nuet ukumKu bang niatdeh, idi ngayud ukum ineh bang terawédeh."
- ¹⁷Idi kebalaNeh, "Amung-amung sala' idi kekamendeh luk dat na teruayenKu peh."
- ¹⁸Idi kareb ideh pangeh nengalap do' ratnan sala' ineh, na luk idi baré teh ngaceku sala' lemulun.
- ¹⁹Ngaceku ineh, O kinanak-kinanakku, tau mekuu' semuet bang Su luk Meluun Ligan ngaceku dara' Yésus.
- ²⁰Ieh nengukab kuan tau aceh dalam luk mebaruh idi luk mulun, maya' dicing, ieh ineh bururNeh.
- ²¹Tau inan seburur Imam Rayeh luk ngimet uang ruma' Allah.
- ²²Ngaceku ineh do' tau amé' matun Neneh dengan niat luk matu idi dengan anu luk mela, idi niat tau linigan ratnan teruayen niat luk dat, idi burur tau biru' ku abpa' luk melio.
- ²³Do' tau ngimet meraben amo rapet tau dengan na merapang, ngaceku Allah ine lutep maya' jani'.
- ²⁴Do' tau ngerawé seburur dengan luk baken pad ngacing awa idi kekamen luk do'.
- ²⁵Aleg tau ugka' tebubpun pad-pad, mepad kudeng luk inau' sebuang lemulun, iamo' mada' seburur dengan seburur, meluun teh ngaceku muyuh nier Aco Tuhan pangeh muneng.
- ²⁶Ngaceku kudeng tau nganau' sala' dengan rungen mucu ratnan tau pangeh nengiti ratnan luk matu ineh, idi na luk idi baré teh ngaceku sala'.
- ²⁷Iamo' luk ketecan, ieh ineh tot ratnan ukum luk macing, idi lau' apui luk miak ngeseb amung-amung lemulun luk sikal metueh ratnan Allah.
- ²⁸Idé-idé luk ngelaba Ukum Musa ineh, maté pitayen dengan na inan méi', maya' luk bila dueh teluh burur lemulun luk nekali'.

²⁹Do' muyuh ngerawé kudeng apéh berat ukum luk petulu ruen kuan lemulun luk ngeradu' Anak Allah, idi luk mala dara' pejani' ineh melutak bang luk inanneh linigan ineh, idi luk situnga-situnga inan Roh luk lawa katu ineh.

³⁰Ngaceku tau ngiti Neneh luk nepebala, "Ui ini miak ngukum, Ui ini miak ngua'." Idi teh, "Tuhan luk miak ngukum pupuNeh."

³¹Idi pelaba dereh kudeng tau mebpeh bang palad Allah luk mulun.

³²Do' ngerawé ratnan ulun muyuh bang kareb luk atun ineh. Kareb ineh mucu ratnan acang Allah ngacang nemuyuh, muyuh pelaba dereh, iamo' na muyuh linaya' ku bunu' ineh.

³³Rabpu'-rabpu' muyuh inan situnga pa kiung lun mula' idi pidereh, idi rabpu'-rabpu' muyuh perurum nelun luk pidereh kudeng ineh.

³⁴Ngaceku muyuh pidereh dengan lemulun luk tinutup, idi dengan awang nait muyuh, muyuh nima' binaweh muyuh pinawen lemulun, ngaceku muyuh kali' inan binaweh luk meluun do' idi luk meruked teh.

³⁵Ngaceku ineh aleg ngetutu' kuu' muyuh luk ngacing tabpar luk rayeh.

³⁶Ngaceku ulai niat inan ulek kuan muyuh, pad muyuh miak nganau' luk pian Allah, idi ngalap jani' ineh.

³⁷Maya' kudeng luk inayud, "Segageh teh, idi Tuhan luk miak macing sikal macing teh dengan na nginiuk.

³⁸PupuKu luk matu ineh miak mulun ngaceku anu; iamo' kudeng ieh lemubed, na Ui mawang niat neneh."

³⁹Iamo' tau ini baken lemulun luk lemubed, pad ngalap ukum até, iamo' lemulun luk manu pad ngalap ulun.

Iberani 11

¹Idi anu, ieh ineh lutep ratnan amung-amung luk inan merapet, idi gala' ratnan amung-amung luk na siren.

²Ngaceku ratnan anu, lun rayeh-rayeh ineh pangeh inubur Allah.

- ³Idi ratnan anu, tau kali' amung tana' ini pangeh pinudut dengan bala Allah, pad amung-amung luk siren tau pangeh pinudut ratnan luk na miak siren.
- ⁴Ratnan anu teh, Abil nemaré kuan Allah aceh baré luk meluun do' rantan baré Kain. Idi teh ngaceku anuneh ineh Allah nengamo neneh selemulun luk matu, ngaceku Allah sebuleng mawang niat ku baréneh. Ngaceku anuneh Abil pebala-pebala teh, sagan pana' ieh pangeh naté.
- ⁵Ratnan anu Enok na naté. Iamo' ieh kinikit Allah, pad ieh na sinier lemulun, ngaceku ieh kinikit Allah. Idi pangeh inayud, kareb nateh Enok kinikit, ieh nengawang niat Allah.
- ⁶Seburur pana' na miak ngawang niat Allah kudeng na luk idi anu. Ngaceku lemulun luk amé' matun Allah ineh na miak na manu ratnan Allah ineh idi, idi Ieh maré tabpar kuan lemulun luk nakap Neneh.
- ⁷Ratnan anu teh, Noh neninger bada' Allah ratnan luk miak mangun, sagan pana' ineh na miak sirennéh. Idi ieh nenganau' temina' aceh alud rayeh pad miak ngulun amung uang tetek ruma'neh. Dengan luk kudeng ineh Noh nengesala' tana' ini, idi ieh nengalap ratnan Allah babpat luk matu luk macing ratnan anu ineh.
- ⁸Ratnan anu teh Ibrahim nemaya' tawar Allah, pad ieh neremuat amé' nan bawang su luk pijani' Allah kuanneh. Idi ieh nenecan bawangneh sebuleng dengan na kali' iapeh luk ulekneh.
- ⁹Ratnan anu teh ieh tudo bang tana' luk pijani' Allah ineh mepad kudeng bang tana' dulun. Ieh mudeng bang lepo dengan Isak idi Yakub, luk pad-pad nengalap babpat denganneh bang pejani' Allah teh.
- ¹⁰Ngaceku ieh nenginulat aceh bawang luk inan diri luk meraben ineh, luk tinui idi luk pinudut Allah.
- ¹¹Ratnan anu teh Ibrahim idi Sara nengalap tueh pad miak nginul sagan pana' didueh pelaba ngered, ngaceku Ibrahim manu inan Allah luk lutep maya' jani'Neh.

¹²Ineh punneh ratnan seburur lemulun, luk mepad kudeng maté, pangeh neremuat tuda'-tuda' lemulun, luk mepad kudeng gituen déi' langit, idi mepad kudeng bada tangeb abpa' rayeh luk na miak uen ngiap.

¹³Amungdeh ineh pangeh naté bang anu dengan na ngalap jani' ineh, iamo' pangeh sinierdeh idi ilapdeh rat mado. Ideh nengamo bururdeh lun sakai idi lemulun luk tudo segageh bang tana' ini.

¹⁴Lemulun luk pebala kudeng ini ngegala' ratnan bawangdeh sebuleng luk tekapendeh.

¹⁵Kudeng lemulun ini pangeh nengerawé ratnan bawang luk iratdeh, kali' rungen ideh sikal lemubed.

¹⁶Iamo' setuneh ideh geregan ku aceh bawang luk meluun do', ieh ineh luk déi' surga. Ineh punneh Allah na migu' tetanen Allahdeh, ngaceku Ieh pangeh nenganau' temina' aceh bawang kuandeh.

¹⁷Ratnan anu teh Ibrahim ineh nemaré Isak, kareb ieh tinutun Allah. Ibrahim ineh pangeh nengalap amung-amung jani', iamo' na ieh ara' ngeseb anak bulengneh,

¹⁸sagan pana' pangeh bila Allah neneh, "Ratnan Isak inulmu miak tetanen."

¹⁹Ibrahim nengerawé Allah melalud nui lemulun, sagan pana' ratnan até' idi ratnan luk kudeng ineh Ibrahim nengalap ni Isak muli' mulun.

²⁰Ratnan anu teh Isak nengeperuan ni Yakub idi Esau petulu dengan maung luk miak macing.

²¹Ratnan anu teh Yakub, kareb ieh lélé maté, nengeperuan anak-anak Yusup. Ieh nesembayang idi netekunal luun paped rukudneh.

²²Ratnan anu teh Yusup, karebneh lélé maté, nemada' ratnan pupu Israil miak remuat rat Masir, idi ieh neperiteteng ratnan butungneh.

²³Ratnan anu teh taman-tinan Musa nengapung neneh teluh bulan kinioneh, kareb ieh pangeh tinganak, ngaceku didueh nenier anak ineh do' taga, idi na didueh matot ku ukum raca'.

- ²⁴Ratnan anu teh Musa, kareb ieh pangeh rayeh, ara' tetanen ku anak kuan anak decur raca' Masir.
- ²⁵Ieh meluun pian ku dereh pad-pad dengan pupu Allah ratnan awang luk macing ratnan sala' idi luk segageh mo' kinioneh.
- ²⁶Ngaceku bang terawéneh kediman ngaceku Keristus meluun rayeh raganeh rantan amung-amung binaweh Masir, ngaceku ieh nengerawé tabpar luk miak macing.
- ²⁷Ratnan anu teh Musa nenecan tana' Masir dengan na matot ku useh raca' ineh, ngaceku ieh lutep, ayu-ayu ieh nenier Allah luk na sinier ineh.
- ²⁸Ratnan anu teh ieh nenganau' adat Paska, idi adat ngisak dara', pad melaikat até na ngaté amung-amung anak lun Israil luk atun.
- ²⁹Ratnan anu teh lun Israil neguta Abpa' Pisui mepad kudeng maya' tana' luk tekering; idi lun Masir luk nenutun nganau' kudeng ineh pangeh nened.
- ³⁰Ratnan anu teh ar bawang Yeriko netabpa, kareb pangeh linibut lun Israil tudu' aco kinioneh.
- ³¹Ratnan anu teh Rahab, decur luk mesawa' ineh na pinaté dengan amung-amung lemulun luk nengelaba ukum, ngaceku ieh nenawar lemulun luk iné' nier bawang dengan awang.
- ³²Idi anunké luk miak belénku teh? Ngaceku na luk idi karebneh ui miak mada' ratnan Gidion, Barak, Samson, Yepta, Daud, Semuil, idi amung-amung nabi ineh.
- ³³Ratnan anu teh ideh nengelaya' tuda'-tuda' bawang, idi nenganau' luk matu. Ideh nengalap luk pijani' Allah, idi neniep tang balang.
- ³⁴Ideh nengilep budung apui, idi nepuit ratnan tadem pelapet. Ratnan laya' ideh pangeh mangun metueh. Ideh meluun sangit bang bunu'. Ideh nemasut baweh-baweh lun pupu baken pad ideh neburo.

³⁵Ratnan anu teh tuda'-tuda' decur nengalap nelun luk naté bang tetek ruma'deh muli' mulun. Idi luk baken pangeh pidereh, idi na ideh sikal puatin, pad ideh miak ngalap tui luk meluun do'.

³⁶Lun baken pangeh tinutun dengan situnga idi bibal, idi teh kiling idi tinutup.

³⁷Ideh binitung ku batu, rinadi', idi pinaté ku pelapet. Idi ideh lawé-lawé dengan ayung kubil dumba idi kubil amék. Ideh masi', pidereh, idi inurat.

³⁸Tana' ini na petap do' kuandeh. Idi ideh lawé-lawé déi' su luk ali-ali idi luun surud idi bang lubang batu idi lubang tana' pana'.

³⁹Idi lemulun ini na nengalap luk pijani' ineh, sagan pana' ideh pangeh inubur ngaceku anudeh.

⁴⁰Ngaceku Allah pangeh nengelelep luk meluun do' kuan tau, pad lemulun ineh na miak uen ngeligan kudeng na pad-pad dengan tau.

Iberani 12

¹Tau pangeh linibut lun nekali' luk mula' ineh. Ngaceku ineh do' tau nala' anid-anid babeh luk meberat, idi sala' luk malé ngabet netau, idi do' tau upun dengan mulai niat bang peribatun luk tinina' kuan tau.

²Do' tau nier Yésus, luk nenganau' idi luk neriput anu tau. Ieh pana' ngaceku awang luk litep kuanNeh pangeh netuman ratnan dereh salib, dengan na ngerawé igu'Neh, idi Ieh tudo pa tinueh kerusi Allah.

³Do' muyuh ngerawé Neneh luk pangeh nedereh ku gateh niat lemulun luk mesala', pad muyuh na musam idi metalang niat.

⁴Muyuh nateh nepebunu' dengan sala' pad macing muyuh maté.

⁵Pangehké muyuh nekelupan bala Allah luk ngubuk nemuyuh mepad kudeng anak-anak kebalaNeh, 'O anakKu, aleg iko necan bada' Tuhanmu, idi aleg metalang niat kareb ukumNeh macing namu.

⁶Ngaceku Tuhan mada' anid-anid lemulun luk inanNeh mawa, idi mebal lemulun luk mangun ku anakNeh.”

- ⁷Mabeh dereh muyuh mepad kudeng bada' ratnan aceh taman, ngaceku dereh muyuh ngegala' ratnan Allah ngerawé nemuyuh mepad kudeng anak-anakNeh. Anak idéké luk na bida' tamanneh?
- ⁸Kudeng muyuh na badén, mepad kudeng anakNeh, ilungneh muyuh baken anak-anak luk matu, iamo' muyuh ineh anak-anak batek.
- ⁹Taman tau bang tana' ini nemada' netau, idi tau nengedita' nedeh. Meluun teh petulu tau ngebeneh burur tau pa kiung Taman roh ineh, pad tau ngalap ulun!
- ¹⁰Ideh nengukum netau segageh mo', maya' luk petulu sirendeh. Iamo' Allah ngukum netau pad ngacing peruan kuan tau, pad tau ngalap babpat bang liganNeh.
- ¹¹Kareb tau badén, bada' ineh na ngacing awang niat iamo' susa' niat. Iamo' mucu lemulun luk bida' ineh ngalap bua'-bua'neh luk matu luk ngacing awang kuan lemulun luk bida' ineh.
- ¹²Ngaceku ineh ngiding amung-amung ticu' luk melaya' idi aleb luk meliai!
- ¹³Do' maya' dalan luk mesiri, pad liai ineh na mepekisu'; iamo' pad ieh uen ngedo'.
- ¹⁴Do' muyuh nakap pedo' dengan amung-amung lemulun idi nutun maya' ulun luk mleigan, ngaceku dengan na ligan ineh seburur pana' na miak nier Tuhan.
- ¹⁵Matar do'-do' pad seburur pana' na teketed ratnan katu Allah. Matar do'-do', pad aceh "uat luk mepét" na mulun idi nganau' susa' kuan muyuh pad amung-amung lemulun uenneh ngelutak.
- ¹⁶Idi aleg seburur pana' mesawa', idi mangun ku lemulun luk na sembayang, mepad kudeng Esau, luk nemasui babpat anak luk atun ngaceku ratnan sesuut luk kenen.

¹⁷Ngaceku muyuh pangeh kali' idi mucu ratnan ineh, kareb ieh sikal ngalap babpat peruan ineh, idi ieh tila', ngaceku na inan kareb ieh miak uren, sagan pana' peruan ineh tikapneh dengan tangi'.

¹⁸Ngaceku muyuh na macing nan aceh pegkung luk miak kamen mepad kudeng Pegkung Sinai, luk mebudung ku apui, luk melungung, medacem, idi mebui,

¹⁹dengan uni serupit, idi uni tang, pad lemulun luk neninger ineh nemutuh Neneh na maré bala peh.

²⁰Ngaceku ideh na miak tuman ku uni tang ineh luk nepebala, "Idi kudeng sebuleng pung pana' ngakem pegkung ineh kali' rungen ieh uen mitung ku batu."

²¹Ideh pelaba gagap ku luk sinierdeh ineh, pad Musa nepebala, "Ui pelaba tot idi megegker."

²²Iamo' muyuh pangeh nacing déi' Pegkung Sion, idi bawang Allah luk mulun, ieh ineh Yerusalim luk déi' surga, dengan tuda'-tuda' ngeribu melaikat pana'.

²³Muyuh pangeh nacing kuan tebubpun amung-amung anak Allah luk atun, luk pangeh inayud ngadandeh déi' surga, idi kuan Allah, Lun luk Mutut Besara' kuan amung-amung lemulun, idi kuan amung-amung roh lemulun luk matu luk pangeh linigan.

²⁴Muyuh pangeh nacing inan Yésus, Gatum Pejani' luk Mebaruh ineh, idi kuan dara' luk inisak, luk pebala-pebala luk meluun do' ratnan dara' Abil.

²⁵Matar do'-do', aleg muyuh ngarung Neneh luk pebala ineh. Lemulun luk nengarung Neneh luk nepebala bang tana' ini, na nepuit. Meluun teh tau ini na mepuit kudeng tau lumi rat Neneh luk pebala rat surga.

²⁶Kareb ineh tangNeh nengegio tana' ini, iamo' nekini Ieh pangeh pejani' idi pebala, "Idi sekua' teh Ui miak ngeruyuh baken tana' ini mo' iamo' langit pana'."

²⁷Idi bala ineh, "Sekua' teh," ilungneh, idi amung-amung luk tigio ineh miak buro, ieh ineh amung-amung luk pangeh pinudut, pad luk na sigio ineh miak ketecan.

²⁸Ngaceku ineh tau ini luk ngalap Imet luk na miak sigio ineh, do' tau maré ubur, idi dengan dalan ineh miak tau sembayang maya' kudeng luk petulu pa kiung Allah dengan ngedita' Neneh idi matot;

²⁹ngaceku Allah tau, Ieh ineh mepad kudeng apui luk ngeseb.

Iberani 13

¹Do' awa muyuh kuan kinanak-kinanak ineh lutep.

²Aleg muyuh mekelupan ratnan nawar lun sakai, ngaceku dengan luk kudeng ineh lemulun pangeh nenganak melaikat dengan na kali'.

³Ngerawé ratnan lemulun luk tinutup, mepad kudeng ayu muyuh pangeh tinutup dengan deh, idi ngerawé ratnan lemulun luk medereh mepad kudeng ayu burur muyuh pana' medereh.

⁴Idi ratnan paweh, do' ieh buren arang amung-amung lemulun, idi luk inan rudap na mangun melutak; ngaceku lemulun luk mesawa' idi lemulun luk pasét miak kumin Allah.

⁵Do' muit burur muyuh ratnan mawa ku usin, idi do' muyuh mawang niat ratnan anun-anun luk inan bang palad muyuh; ngaceku Allah pangeh pebala, "Idi na tu-tu Ui miak nima' namu, idi na tu-tu Ui miak necan namu."

⁶Ngaceku ineh do' tau mekuu' pebala, "Tuhan ineh Lun Ngedengan negku, idi na ui matot peh. Anunké luk miak ruen lemulun kuanku?"

⁷Ngerawé ratnan lemulun lu mangun ku lun nguyut nemuyuh atun, luk pangeh nemada' bala Allah kuan muyuh, idi ngerawé kekiped ulundeh, idi do' maya' dalan anudeh.

⁸Yésus Keristus ineh na miak misu', do' so nilad, idi aco sini pana', idi raked-ruked teh.

- ⁹Idi aleg muyuh uen ngeraruh ku anid-anid bada' luk baken ratnan bada' kai; ngaceku luk tuneh do' niat tau uen micet ku katu Allah, baken ku luk kenen luk na maré ulek kuan lemulun luk nemaya' adat luk kudeng ineh.
- ¹⁰Imam-imam luk ngakem bang lepo lun Yahudi na miak kuman baré ratnan bubpun ineh.
- ¹¹Dara' amung-amung pung luk kirat inuit lun imam semuet bang Su luk Meluun Ligan ineh ngaceku sala'; iamo' butungdeh iseb mado ratnan su luk inan nelupo ineh.
- ¹²Ineh punneh Yésus pana' naté bal alad bawang Yerusalim, pad Ieh miak ngeligan pupu ineh dengan dara'Neh sebuleng.
- ¹³Ngaceku ineh do' tau remuat amé' matun Neneh, mado ratnan su luk inan lupo ineh, idi mabeh susa'Neh.
- ¹⁴Ngaceku tungé' tau na luk idi bawang luk meruked, iamo' tau nakap bawang luk meruked, iamo' tau nakap bawang luk miak macing.
- ¹⁵Ngaceku ineh dengan dalan Yésus ineh do' tau megéi' maré kuan Allah baré ubur tau, ieh ineh buah'-buah' bibir tang tau luk ngamo ngadanNeh.
- ¹⁶Idi aleg muyuh mekelupan nganau' luk do' idi méi' nelun, ngaceku baré luk kudeng ineh luk pian Allah.
- ¹⁷Do' maya' bala lemulun luk nguyut nemuyuh idi do' mebeneh rat nedeh. Ideh matar ulun muyuh mepad kudeng lemulun luk maré or kuan Allah. Do' maya' nedeh, pad ideh nganau' kekamen ineh dengan mawang niat, baken dengan dat niat, ngaceku luk kudeng ineh na ulek kuan muyuh.
- ¹⁸Do' sembayang kuan kai. Kai merapet teruayen niat kai do', ngaceku kai megéi' pian nganau' luk matu.
- ¹⁹Ui mutuh nemuyuh sembayang tu-tu, pad ui mesaget lemubed amé' nemuyuh teh.

²⁰Allah pangeh nenui Tuhan tau Yésus Keristus ratnan até. Ngaceku dara'Neh, nekini Ieh mangun ku Lun Matar Dumba luk Rayeh. Idi dengan dara'Neh ineh pejani' luk meruked ineh pangeh itu.

²¹Do' Allah luk lawa awang ineh nganau' nemuyuh temina' maya' pianNeh, pad muyuh miak nganau' tuda'-tuda' kekamen luk do'. Idi do' Ieh ngisu' amung tau, pad tau maya' luk petulu pa kiungNeh bang Yésus Keristus. Idi rayeh kuanNeh macing ruked-ruked. Amin.

²²Ui mutuh nemuyuh, O kinanak-kinanakku, do' ngimet bada'ku ineh, ngaceku pangeh inayud kuan muyuh dengan sekamu'.

²³Ui pian nemuyuh kali' Timotius, kinanak tau, pangeh pinuit idi kudeng ieh macing dengan mesaget teh, ui miak papu' nemuyuh pad-pad denganneh.

²⁴Tabi' kuan amung-amung lemulun luk nguyut nemuyuh, idi kuan amung lun manu teh. Kinanak-kinanak rat Italia pana' maré tabi' kuan muyuh.

²⁵Idi do' katu Allah ngedengan amung-amung muyuh! Amin.

Yakub

Yakub 1

- ¹Rat ni Yakub, demulun Allah idi demulun Tuhan Yésus Keristus: Tabi' kuan pulu' dueh pupu luk nepatad.
- ²O kinanak-kinanakku, kareb muyuh mebpeh bang anid-anid tutun, do' mala amungneh ineh mangun ku awang mo';
- ³ngaceku muyuh kali' tutun anu muyuh ineh ngacing inan ulai niat.
- ⁴Idi do' ulai niat muyuh meriput, pad muyuh mangun meligan idi petap anu idi na masi' bang anun-anun pana'.
- ⁵Kudeng inan seburur rat arang muyuh luk na petap ileh, idi do' ieh mutuh inan Allah, luk maré dengan mekatu kuan anid-anid lemulun dengan na ngesala' neneh, idi kali' rungen miak barén kuanneh.
- ⁶Iamo' do' ieh mutuh dengan anu, dengan na merapang, ngaceku lemulun luk merapang ineh mepad kudeng lipu' abpa' luk iten bui.
- ⁷⁻⁸Lemulun luk kudeng ineh perapid niat, idi na merapet ku luk ruenneh. Ngaceku ineh ieh na miak merapet ngalap anun-anun luk ratnan Tuhan.
- ⁹Do' kinanak luk masi' mawang niat kareb ieh uen Allah ngedita',
- ¹⁰idi lun do' kareb ieh uen Allah ngebeneh, ngaceku lun do' mepad kudeng busak uduh luk mekarang.
- ¹¹Ngaceku mateh aco ineh masat dengan pelaba lau', idi ngekarang uduh ineh, idi busakneh pana' merurug, idi taga busakneh pana' metutu'. Kudeng ineh teh lun do' pana' mekarang kareb ieh uned nganau' kekamenneh.
- ¹²Samal kuan lemulun luk mulai niat mabeh amung-amung tutun, ngaceku pangeh ieh tuman ratnan tutun, ieh miak ngalap pata ulun, luk pijani' Tuhan kuan amung-amung lemulun luk mawa Neneh.
- ¹³Aleg seburur pebala kareb ieh mekaneh tutun, "Ui nekaneh tutun Allah," ngaceku Allah na tinutun ku luk dat idi Ieh sebuleng na nutun seburur pana' ku luk dat.

14Iamo' lemulun mekaneh tutun kareb ieh rinuid idi tiban ratnan pian buruneh sebuleng.

15Pangeh ineh pinian burur ineh ngeruat bua', idi ngacing sala' idi kareb sala' ineh iuk amé' rayeh, ieh ngacing até.

16Aleg muyuh uen naluk, O kinanak-kinanak luk inanku mawa!

17Anid-anid baré luk do' idi anid-anid katu luk meriput ineh macing rat surga idi temurun ratnan Taman, lawa amung-amung acang. Idi Ieh luk na miak misu' idi lungung-lungung luk medacem pana' na.

18Idi maya' pianNeh sebuleng Ieh pangeh nemudut netau dengan balaNeh luk amtu, pad tau mangun ku bua'-bua' luk atun ratnan amung-amung luk pinudutNeh.

19Do' ngerawé bala ini, O kinanak-kinanak luk inanku mawa. Do' anid-anid burur lemulun mesaget ninger idi mulai peburi', idi mikat museh.

20Useh lemulun na ngacing pian Allah luk matu.

21Do' muyuh nala' amung-amung luk melutak idi luk dat luk mela ineh, idi ngalap dengan niat luk mebeneh bada' luk pangeh tinibu bang nemuyuh, luk melalud ngulun burur muyuh.

22Iamo' do' muyuh mangun ku lun luk maya' bada' ineh, baken lemulun luk ninger mo' idi naluk bururdeh sebuleng.

23Kudeng idé-idé luk ninger bada' ineh, iamo' na maya', ieh mepad kudeng selemulun luk nier kiungneh bang sayun.

24Ieh nier bururneh idi petacu nalan, idi ieh mekelupan ratnan kudeng apeh ayuneh ineh.

25Iamo' lemulun luk ngerawé ukum luk meriput luk muit lemulun, idi luk lutep ngerawé ineh, baken ninger mo' idi mekelupan, iamo' maya' ineh, lemulun ineh uen Allah ngeperuan bang amung-amung kekammeneh.

26Kudeng idé-idé luk ngerawé anuneh mepicet, iamo' na ngimet dila'neh iamo' naluk niatneh sebuleng, idi baya' lemulun ineh mo'-mo'.

²⁷Baya' luk meligan idi meriput pa kiung Allah Taman, ieh ineh ngikak anak maté idi decur tinula' bang susa'deh, idi ngasa' burur pad na uen tana' ini ngelutak.

Yakub 2

¹O kinanak-kinakku luk manu inan Tuhan tau Yésus Keristus luk rayeh ineh, aleg muyuh mili' lemulun maya' ayudeh.

²Pingitudneh, seburur lemulun semuet bang tebubpun muyuh luk inan susing amas idi ayung luk meraga, idi teh seburur lun masi' semuet luk nengayung ku kibung luk medarak.

³Kudeng muyuh ngerayeh lemulun luk nengayung ku luk meraga ineh idi pebala, "Do' iko tudo ieni su luk do'," idi kuan lemulun luk masi' muyuh pebala, "Tuped iko déi'," kian "Tudo su luk inan tapin kukudku,"

⁴muyuh pangeh mesala'. Muyuh mili' arang muyuh sebuleng idi mangun ku lun luk mutut besara' dengan terawé luk dat.

⁵Do' muyuh ninger, O kinanak-kinanak luk inanku mawa, bakenké Allah mili' lemulun luk masi' bang tana' ini mangun ku lun do' bang anu idi ngalap babpat Imet luk pangeh pijani'Neh kuan amung-amung lemulun luk mawa Neneh?

⁶Iamo' muyuh ini ngebeneh nelun masi'. Bakenké lun do' luk ngedereh nemuyuh, idi luk ngeruid nemuyuh amé' matun besara'?

⁷Bakenké ideh ineh luk nguyo ngadan luk do', luk pangeh biré kuan muyuh?

⁸Iamo' kudeng muyuh maya' ukum Imet, mepad kudeng ayat bang Surat Allah, "Do' iko mawa inan lun denganmu mepad kudeng bururmu sebuleng," idi kekamen muyuh ineh do' teh.

⁹Iamo' kudeng muyuh nier ayu lemulun, muyuh nganau' sala', idi muyuh miak kumin ku Ukum ineh mangun ku lemulun luk ngelaba ukum.

¹⁰Kudeng idé-idé ngelaba sebuleng ukum ineh, lemulun ineh pangeh nengelaba amung ukum ineh.

- 11**Ngaceku Ieh luk pangeh nepebala, "Aleg pasét," Ieh ineh teh nepebala, "Aleg ngaté." Kudeng iko pasét, iamo' iko ngaté, iko pangeh nengelaba ukum.
- 12**Do' mala kudeng ini idi maya' kudeng ineh teh mepad kudeng lemulun luk kumin ku ukum luk muit lemulun.
- 13**Ngaceku Allah na méi' kareb Ieh ngukum lemulun luk na méi'; iamo' éi' ineh meluun rayeh ratnan ukum.
- 14**O kinanak-kinakku, anunké ulekneh kudeng seburur lemulun pebala, "Ui inan anu," iamo' kekammeneh na ngegala' anu ineh? MIakké anu ineh ngulun neneh?
- 15**Pinginudneh, inan kinanak deléi' idi decur luk na petap ayung idi luk kenen kuan anid-anid aco.
- 16**Anun ulekneh muyuh pebala nedeh, "Do'-do' lawé, do' muyuh ngelau' burur muyuh, idi kuman pad macing mebor," kudeng muyuh na maré kuandeh anun-anun luk petulu barén kuan ulundeh?
- 17**Kudeng ineh teh anu, kudeng na dinengan ratnan kekamen, ieh sebuleng miak maté.
- 18**Iamo' inan luk pebala, "Iko inan anu idi ui inan kekamen." Do' mada' anumu ineh sirenku dengan na kekamenmu, idi ui pana' miak mada' kuanmu anuku ratnan kekamenku.
- 19**Manuké iko ku Allah ineh Sebuleng? Matu! Amung-amung ada' pana' manu teh, idi megegker ku tot.
- 20**O lun luk mebacé, pianké iko kali' idi anu dengan na kekamen ineh na uang?
- 21**Bakenké tepun tau Ibrahim inau' matu ratnan kekamen, kareb ieh sikal ngeseb Isak anakneh ineh luun bubpun?
- 22**Idi megala' kuan muyuh idi anu dengan kekamen ineh pangeh nengakem pad-pad, idi ngaceku kekamen Ibrahim anuneh ineh pangeh mangun meligan.

²³Ratnan luk kudeng ineh ayat bang Surat Allah pangeh nacing, luk pebala, "Ibrahim pangeh manu inan Allah, idi ineh luk iniap kuanneh mangun ku luk matu." Idi ieh teh bila mangun ku lun rorum Allah.

²⁴Idi megala' kuan muyuh lemulun ruen matu ngaceku kekammeneh, idi baken ngaceku anuneh mo'.

²⁵Kudeng ineh teh Rahab seburur decur luk mesawa' ineh pana'. Ieh inau' matu ngaceku ratnan kekammeneh, ratnan ieh nenganak idi nengecuk lemulun luk duken rumuat maya' dalan luk baken?

²⁶Ngaceku mepad kudeng burur dengan na roh ineh maté, kudeng ineh teh anu dengan na kekamen ineh maté.

Yakub 3

¹O kinanak-kinanakku! Na petulu mula' rat arang muyuh sikal mangun ku guru, ngaceku muyuh kali' idi tau luk mangun ku guru ini ngalap ukum luk meluun berat.

²Amung-amung tau megé' mepesala' ku bala tau. Kudeng seburur lemulun na mepesala' ku balaneh, ieh ineh selemulun luk meriput idi luk miak ngimet amung bururneh.

³Tau nganau' belawan bang tang kuda pad ieh maya' lawé tau, idi amung bururneh pana' miak tau ngeliud.

⁴Ngerawé teh ratnan kapal, ieh pelaba rayeh idi kerungen bui luk metueh, idi uen ngeliud amé' iapeh-iapeh luk pian lemulun luk ngimet neneh dengan ulin luk isuut tu.

⁵Kudeng ineh teh dila' ineh sebabpat uang luk isuut, iamo' ieh metueh ngerayeh bururneh. Siruh kudeng apeh rayehneh pulung kara miak sabpen apui luk isuut!

⁶Idi dila' ineh sebuleng apui. Idi rat arang amung-amung babpat uang tau dila' ineh aceh tana' mepanu' ku luk dat. Ieh miak ngeraruh amung-amung

burur, idi miak ngeseb amung-amung ulun tau, idi ieh sebuleng pana' miak sabpen bang apui.

⁷Ngaceku amung-amung pung luk meliput, suit, menipeh, idi luk bang abpa' ineh pana' miak uen lemulun ngelayo;

⁸iamo' na luk idi seburur pana' luk miak ngelayo dila' ineh. Ieh ineh aceh dereh luk na sikal ugka'. Ieh panu' ku galih luk ngaté.

⁹Dengan dila' ineh tau ngubur Tuhan, ieh ineh Taman, idi dengan dila' ineh teh tau ngediman lemulun luk inau' maya' ayu Allah.

¹⁰Ratnan tang ineh teh remuat ubur-ubur idi kediman. Amung-amung luk kudeng ineh, O kinanak-kinanakku, na mayu.

¹¹Inanké bued abpa' ngeruat abpa' luk metalang idi abpa' luk mepét ratnan bued abpa' luk sebuleng ineh teh?

¹²O kinanak-kinanakku, miakké lawa gita' ngeruat bua' saitun, idi lawa anggur ngeruat bua' gita'? Idi bued abpa' luk mepaci' na miak ngeruat abpa' luk metalang.

¹³Idéké rat arang muyuh luk mileh idi luk do' kali'? Do' ieh ngegala ilehneh ratnan ulunneh luk do', dengan kekamen luk do' luk ruen dengan mebeneh niat idi ileh.

¹⁴Iamo' kudeng bang niat muyuh, muyuh temaruh, mét niat, idi ngedita' burur muyuh sebuleng, aleg muyuh medita' niat idi mebalih pa kiung luk matu ineh.

¹⁵Idi ileh ineh baken ileh luk macing rat surga iamo' ratnan tana', ieh ineh luk macing ratnan pian burur idi pian Iblis.

¹⁶Ngaceku su apeh inan temaruh idi ngedita' burur sebuleng, idi su ineh teh inan ria' idi amung-amung kekamen luk dat.

¹⁷Iamo' ileh luk rat surga pun-pun meligan, pangeh ineh sikal pedo', do' buri', idi do' baya' ukum, idi panu' dengan éi' idi bua'-bua' luk do' dengan na metebaceng, idi dengan na naluk.

¹⁸Idi bua'-bua'neh, ieh ineh luk matu, tinibu dengan pedo' ratnan amung-amung lemulun luk ngakem kekamen luk pedo'.

Yakub 4

¹Rat iapehké acingneh pebunu', idi rat iapehké acingneh kedaluh luk arang muyuh? Acingdeh ratnan pian burur muyuh luk sikal metueh bang niat muyuh.

²Muyuh melili, iamo' na muyuh miak ngalap. Muyuh ngaté idi mét niat, iamo' na muyuh miak ngalap; muyuh pekedaluh idi pebunu', iamo' na muyuh miak ngalap ngaceku muyuh na mutuh ratnan Allah.

³Idi muyuh mutuh, iamo' muyuh na miak ngalap, ngaceku putuh muyuh sala'. Muyuh mutuh luk ngawang niat muyuh sebuleng.

⁴O muyuh luk na lutep! Naké muyuh kali' idi rorum dengan tana' ini, ieh ineh pebunu' dengan Allah? Kudeng idé-idé luk sikal perurum dengan tana' ini, ieh ineh luk mangun ku bunu' Allah.

⁵Idi mo'-mo'ké bang terawé muyuh luk bila bang Surat Allah, "Roh luk tinudo Allah bang netau mepanu' ku lili luk rayeh?"

⁶Iamo' katu luk barén Allah meluun tueh. Maya' kudeng bala bang Surat Allah, "Allah sikal metueh ratnan lemulun luk medita' niat, iamo' Ieh maré katu kuan lemulun luk mebeneh niat."

⁷Do' maré burur muyuh kuan Allah, iamo' megateh inan Iblis, idi Iblis ineh miak buro rat nemuyuh.

⁸Do' muneng inan Allah idi Ieh miak muneng nemuyuh. Maru' ticu' muyuh, O muyuh lun mesala'; idi ngeligan niat muyuh, O muyuh luk perapid niat.

⁹Do' nginuud dengan temido idi nangi', idi do' riruh muyuh mangun ku tido, idi awang muyuh mangun ku susa'.

¹⁰Ngebeneh burur muyuh pa kiung Allah, idi Ieh miak ngedita' nemuyuh teh.

¹¹O kinanak-kinanakku, aleg seburur ngedat lemulun. Lemulun luk ngedat kinanakneh idi ngesala' kinanakneh, ieh luk ngedat Ukum idi ngesala' Ukum

ineh teh. Iamo' kudeng iko ngesala' Ukum ineh, na iko lemulun luk maya' Ukum ineh, iamo' mangun ku luk mutut neneh.

¹²Idi inan Sebuleng mo' luk maré ukum idi luk mangun ku lun luk mutut besara', ieh ineh Allah luk melalud ngulun idi ngaté, iamo' idéké iko ini luk ngesala' lun denganmu?

¹³O muyuh luk pebala, "Aco sini idi nebpa do' tau amé' bawang keceh idi tudo selak déi', idi pepua' idi nakap binaweh luk do'."

¹⁴Iamo' setuneh na muyuh kali' anun luk miak mangun nebpa. Kudeng apehké ulun muyuh ineh? Ngaceku muyuh mepad kudeng aceh non luk megala' segageh mo' idi metutu'.

¹⁵Iamo' do' muyuh pebala, "Kudeng pian Tuhan, tau miak mulun nganau' ini idi ineh."

¹⁶Iamo' nekini muyuh ngerayeh burur muyuh ngaceku dita' niat muyuh ineh. Idi bala luk medita' ineh dat.

¹⁷Ngaceku ineh, kudeng lemulun kali' nganau' luk do', iamo' na ieh nganau' luk kudeng ineh, idi ini mangun ku sala' kuanneh.

Yakub 5

¹Ninger bada'ku, O muyuh luk mula' binaweh. Do' muyuh nangi' idi temido ngaceku amung-amung dereh luk macing nemuyuh.

²Binaweh muyuh ineh pangeh musag, idi ayung muyuh ineh pangeh kinan tugor.

³Amas idi pirak muyuh pangeh netugor idi tugor ineh miak mangun ku luk nekali' ratnan muyuh, idi kuman uang muyuh mepad kudeng apui. Muyuh pangeh nengamung binaweh bang tuda'-tuda' aco ini luk kekiped.

⁴Muyuh na nemayar tabpar lemulun luk ngakem bang lati' muyuh. Ninger aroddeh! Arod lemulun luk ngeranah bang lati' muyuh ineh pangeh nesemuet bang lalid Tuhan luk Meluun Lalud.

⁵Muyuh pangeh mulun luun tana' ini dengan nakap binaweh luk meraga; muyuh pangeh nengawang niat muyuh; idi muyuh pangeh nengelamu burur muyuh mepad kudeng dumba luk miak kereten.

⁶Muyuh pangeh nengukum idi nengaté lemulun luk matu ineh; ieh na sikal metueh rat nemuyuh.

⁷Ngaceku ineh, O kinanak-kinanakku, do' muyuh mulai niat pad kareb Aco Tuhan ineh macing. Siruh, lemulun luk bang lati' nganét bua' luk do' remuat ratnan tana' dengan mulai niat, pad macing udan luk pun-pun idi luk mucu.

⁸Do' muyuh mulai niat, idi do' muyuh lutep niat, ngaceku Tuhan ineh lélé macing.

⁹O kinanak-kinanakku, aleg muyuh medureng rat arang muyuh sebuleng, pad muyuh na mekaneh ukum Allah. Siruh, Lun luk Mutut Besara' ineh tuped munung tanga'.

¹⁰O kinanak-kinanakku, do' ngerawé dalan susa' idi ulai niat amung-amung nabi luk pangeh nepebala dengan ngadan Tuhan.

¹¹Lemulun luk mulai niat ineh tau mala samal. Muyuh panegh neninger ratnan ulai niat Ayub, idi muyuh kali' kudeng apeh Tuhan nengasa' neneh kareb kekiped derehneh. Ngaceku Tuhan pelaba éi' idi mekatu.

¹²Iamo' luk pun-pun, O kinanak-kinanakku, aleg muyuh pebulung, do' ratnan surga idi ratnan tana' pana', idi ratnan bulung luk baken-baken teh. Iamo' do ngamo ratnan luk "mo", idi mala "Na" ratnan luk "na", pad muyuh na mekaneh ukum.

¹³Idéké rat arang muyuh luk mesusa'? Do' ieh sembayang. Idéké rat arang muyuh luk mawang niat? Do' ieh menani ngubur Allah.

¹⁴Idéké rat arang muyuh luk mét? Do' ieh nawar lun rayeh-rayeh sidang, luk miak sembayang kuanneh, idi ngumau neneh dengan ngadan Tuhan.

¹⁵Sembayang ini luk dinengan anu miak ngedo' lemulun luk mét ineh, idi Tuhan miak nui neneh; idi kudeng ieh pangeh nenganau' sala' idi ieh miak ngalap do' ratnan sala'neh.

¹⁶Ngaceku ineh do' anid-anid burur muyuh ngamo sala' muyuh arang muyuh sebuleng, idi sembayang seburur kuan seburur pad muyuh uen ngedo'. Idi sembayang lemulun luk matu, dengan matu-matu niatneh, rayeh laludneh.

¹⁷Elia ineh mepad teh ulunneh dengan tau, idi ieh nesembayang dengan anu pad udan na temurun, idi teluh lak anem bulan kinioneh udan na netemurun luun tana'.

¹⁸Idi ieh nesembayang teh, idi langit pana' nemaré udan idi tana' pana' nengeruat uli'neh.

¹⁹O kinanak-kinanakku, kudeng seburur rat arang muyuh meraruh ratnan luk matu, idi seburur lun baken nenguit neneh lumi,

²⁰idi do' muyuh kali' seburur lemulun luk nenguit seburur lemulun luk mesala' lumi ratnan dalanneh luk neraruh ineh, miak ngulun niat lemulun ineh ratnan até, idi miak ngapung sala' luk mula'.

1 Petrus

1 Petrus 1

¹Rat ni Pétrus, rasul Yésus Keristus — Kuan amung-amung lemulun luk pinili', ieh ineh lun sakai luk nepatad déi' Pontus, Galatia, Kapadokia, Asia, idi Bitinia.

²Muyuh pangeh pinili' maya' pian Allah Taman, idi muyuh pangeh linigan RohNeh mangun ku pupuNeh luk meligan, pad muyuh maya' bala Yésus Keristus idi baruin ku dara'Neh. Idi do' katu idi awang amé'-amé' mula' kuan muyuh.

³Do' tau ngubur Allah Taman Tuhan tau Yésus Keristus! Ngaceku éi'Neh luk pelaba rayeh, Ieh nemaré ulun luk mebaruh kuan tau, dengan nui Yésus Keristus ratnan até. Ngaceku ineh tau mepanu' ku rapet luk mulun.

⁴Ineh punneh tau merapet ngalap peruan luk rayeh luk tinina' Allah kuan pupuNeh, ieh ineh luk na miak melu, idi na miak melutak, idi na miak mekarang, idi luk dinug bang surga kuan muyuh.

⁵Peruan ineh isa' dengan lalud Allah ngaceku anu, pad muyuh miak ngalap ulun luk inau' temina' idi luk miak uen ngegala' bang aco kekiped.

⁶Bang luk kudeng ini muyuh mawang niat, sagan pana' segageh mo', kudeng petulu, muyuh ngalap susa' bang anid-anid tutun,

⁷pad anu muyuh luk matu uen ngegala'. Amas pana' luk miak melu ineh uen nutun ku apui, idi anu muyuh luk meluun raga ratnan amas, na miak na uen nutun, pad ieh meraben. Kareb ineh muyuh miak ngalap ubur, rayeh, idi dita', kareb Aco Yésus Keristus uen ngegala'.

⁸Muyuh mawa Neneh; sagan pana' muyuh nateh nenier Neneh. Muyuh manu Neneh sagan pana' muyuh na miak nier Neneh. Idi muyuh pelaba awang niat dengan awang idi rayeh luk na miak belén,

⁹ngaceku muyuh ngalap ulek anu muyuh, ieh ineh ulun kuan niat muyuh.

¹⁰Idi ratnan ulun ineh, nabi-nabi pangeh nenakap idi nengelio do'-do', idi ideh nemada' ratnan katu luk miak barén Allah kuan muyuh.

¹¹Ideh nenakap karebneh idi kudeng apeh ayu kareb luk bida' Roh Keristus luk idi bang nedeh. Idi Roh ineh nemaré kali' atun ratnan amung-amung dereh Keristus, dengan amung-amung rayeh luk miak macing mucu.

¹²Idi kuan nabi-nabi ineh pangeh ginala' Allah, baken ideh ngakem kuan bururdeh sebuleng, iamo' kuan muyuh, bang luk amung-amung luk pangeh bida' kuan muyuh nekini lemaba nabi-nabi ineh luk tigio Roh Meligan luk paneh icuk macing rat surga pad ngacing Bala luk Do' kuan muyuh. Idi ratnan luk kudeng ineh melaikat-melaikat pana' sikal kali'.

¹³Ngaceku ineh do' terawé muyuh metadem, idi do' muyuh ngerawé, idi merapet tu-tu inan peruan luk miak macing kuan muyuh kareb Yésus Keristus uen ngegala'.

¹⁴Do' muyuh mulun mepad kudeng anak-anak luk lutep maya' ukum, idi aleg muyuh mulun maya' pian burur muyuh luk atun ineh, luk bang kareb muyuh mebacé.

¹⁵Iamo' mepad kudeng Tuhan luk pangeh nenawar nemuyuh ineh meligan, kudeng ineh teh muyuh pana' do' meligan bang amung-amung ulun muyuh.

¹⁶Ngaceku pangeh inayud, "Do' muyuh meligan ngaceku Ui meligan."

¹⁷Kudeng muyuh neten Neneh Taman, luk ngukum lemulun dengan na mili' lemulun iamo' maya' mepad kudeng luk kikem anid-anid burur, idi do' muyuh matot seruked muyuh tudo bang tana' ini.

¹⁸Muyuh kali' idi muyuh pangeh inuli' ratnan ulun muyuh luk mo'-mo' luk nacing ratnan tepun muyuh, baken dengan binaweh luk miak melu, mepad kudeng pirak idi amas,

¹⁹iamo' dengan dara' luk meligan, luk mepad kudeng dara' anak dumba luk na melutak idi na mesala', ieh ineh dara' Keristus.

²⁰Ieh pangeh pinili' Allah kareb nateh tana' ini pinudut, iamo' pangeh ginala' bang kareb ini luk kekiped ngaceku muyuh.

²¹Idi ngaceku Keristus muyuh pangeh mangun ku lemulun luk manu inan Allah, luk pangeh nenui Neneh rat arang lun naté, idi luk nemarké rayeh kuanNeh, pad anu muyuh idi rapet muyuh lutep bang Allah.

²²Ngaceku muruh pangeh nemarku' niat muyuh idi lutep maya' luk matu, pad muyuh mawa dengan amung-amung kinanak dengan na siayu, idi do' muyuh mawa seburur dengan seburur, dengan niat luk matu.

²³Ngaceku muyuh pangeh tinganak mebaruh idi baken ratnan inul luk miak maté, iamo' luk na miak maté, ieh ineh dengan bala Allah luk mulun idi luk meruked.

²⁴Maya' kudeng luk inayud, "Amung-amung lemulun mepad kudeng uduh idi amung rayehdeh mepad kudeng busakneh, Uduh ineh mekarang, idi busakneh merurug,

²⁵iamo' bala Tuhan ineh macing ruked-ruked." Idi bada' ini, ieh ineh Bala luk Do' luk bida' kuan muyuh.

1 Petrus 2

¹Ngaceku ineh do' nala' amung-amung luk dat, amung-amung balih, siayu, temaruh, idi buri' luk dat.

²Do' muyuh mepad kudeng anak luk baruh-baruh tinganak, idi do' muyuh melili ku rata luk ratnan roh, luk na pinuer, idi denganneh ineh muyuh miak mungar macing inan ulun.

³Maya' kudeng luk inayud, "Muyuh pangeh nekali' idi Tuhan ineh mekatu."

⁴Do' muyuh amé' matun Tuhan, ieh ineh Batu luk Mulun, sagan pana' tila' lemulun, iamo' pa kiung Allah pinili' idi meraga.

⁵Do' muyuh amé' Neneh, mepad kudeng batu luk mulun, uen mudut mangun ku aceh ruma' luk ratnan Roh, idi mangun ku imam-imam luk meligan, idi

maré luk ratnan Roh idi luk petulu dengan pian Allah, ngaceku ratnan Yésus Keristus.

⁶Ngaceku pangeh inayud bang Surat Allah, "Ui miak nganau' aceh Batu luk meraga ku Batu Lidung bang bawang Sion; idi lemulun luk manu Neneh na miak migu'."

⁷Batu ineh inan ulek luk rayeh kuan muyuh luk manu, iamo' kuan lemulun luk na manu: "Batu luk pangeh tila' lun luk mudut ruma' ineh, pangeh mangun ku Batu Lidung."

⁸Idi teh, pangeh inayud, "Ieh ineh aceh Batu luk inan lun metebaceng, idi aceh Batu luk nganau' nedeh mebpeh." Ideh metebaceng ngaceku na maya' bala Allah. Kudeng ineh teh luk pian Allah kuandeh.

⁹Iamo' muyuh ini aceh pupu luk pinili', idi imam-imam Raca', aceh inul luk meligan, luk pupu Allah sebuleng, pad muyuh miak mada' amung-amung do' Tuhan luk pangeh nenawar nemuyuh remuat ratnan dacem semuet bang acangNeh luk inan mawa.

¹⁰Atun muyuh baken pupu Allah, iamo' nekini muyuh mangun ku pupu Allah. Atun muyuh na kali' éi' Allah, iamo' nekini muyuh pangeh nengalap éi'Neh.

¹¹O luk inanku mawa, ui mutuh nemuyuh mepad kudeng lun sakai idi lemulun luk tudo segageh bang tana' ini! Do' muyuh ngado burur muyuh ratnan amung-amung lili tana' ini luk pebunu' dengan ulun muyuh.

¹²Do' kekamen muyuh arang lun pupu baken mesiri sirendeh, pad kareb ideh ngadu' nemuyuh, idi neten nemuyuh lemulun luk dat, na miak na ideh ngiti kekamen muyuh luk do', idi ngerayeh Allah kareb Aco Tuhan macing.

¹³Ngaceku ratnan Tuhan, do' muyuh mebeneh pa liang amung-amung ukum luk inau' lutep kuan lemulun, do' kuan raca' ngaceku ieh luk pa luun,

¹⁴do' kuan amung-amung lun luk ngimet, ngaceku ideh luk icuk raca' maré ua' kuan amung-amung lemulun luk nganau' luk dat, idi maré ubur kuan lemulun luk nganau' luk do'.

- ¹⁵Ngaceku kudeng ini luk pian Allah: Ieh pian nemuyuh niep tang lemulun luk mebacé ku kekamen muyuh luk do'.
- ¹⁶Do' muyuh mulun mepad kudeng lemulun luk pinuit dengan na makai puit ineh mangun ku luk ngakeb luk dat, iamo' mepad kudeng demulun Allah.
- ¹⁷Maré dita' kuan amung-amung lemulun idi mawa kuan amung-amung kinanak. Matot inan Allah, idi maré dita' kuan raca'.
- ¹⁸Do' muyuh demulun mebeneh ratnan tuan muyuh dengan amung-amung tot, baken kuan lemulun luk do' idi mawa mo', iamo' kuan lemulun luk megateh pana'.
- ¹⁹Allah miak ngeperuan nemuyuh, ngaceku kekamen luk kudeng ineh, kudeng muyuh tuman ku dereh luk na petulu ineh, ngaceku muyuh kali' luk pianNeh.
- ²⁰Miakké muyuh buren, kudeng muyuh medereh ngaceku nganau' sala'? Iamo' kudeng muyuh nganau' luk do' idi medereh ku ineh dengan mulai niat, ini luk petulu pa kiung Allah.
- ²¹Ngaceku muyuh pangeh tinawar kuan luk kudeng ini, ngaceku Keristus pangeh nemabeh dereh teh ngaceku muyuh, idi Ieh nenecan dalam kuan muyuh pad muyuh miak maya lawéNeh.
- ²²Ieh na nenganau' sala'. Seburur lemulun pana' na neninger balih remuat rat bang tangNeh.
- ²³Kareb Ieh pidat na Iehnengua' dengan dat, idi kareb Ieh pidereh na Ieh nengatot nedeh, iamo' Ieh nemaré bururNeh kuan Allah luk ngukum dengan matu.
- ²⁴Keristus nemabeh amung-amung sala' tau bang bururNeh luun kayuh tepalang, pad tau pinaté kuan sala', idi mulun kuan luk matu. Idi ratnan uratNeh muyuh pangeh dino'.
- ²⁵Atun muyuh neraruh mepad kudeng dumba, iamo' nekini muyuh pangeh lemubed inan Lun Matar, ieh ineh Luk Ngimet ulun muyuh.

1 Petrus 3

¹Kudeng ineh teh muyuh decur luk inan awan, do' mebeneh ratnan deléi muyuh sebuleng mo', idi kudeng inan luk sikal metueh ratnan bala ineh, miak ideh uen ngelaya' ngaceku ratnan ulun decurdeh dengan na ria'-ria'.

²Ngaceku ideh miak nier ulun muyuh luk meligan idi mepiteb.

³Idi aleg muyuh ngayung luun burur muyuh, dengan abpuk luk inayung, idi makai amas idi ayung luk meraga.

⁴Iamo' do' ayung muyuh mangun ku ayung luk bang niat, ieh ineh ayung luk na miak merapuk, ieh ineh niat luk mulai idi mebeneh, luk meraga pa kiung Allah.

⁵Ngaceku kudeng ineh teh bang kareb luk atun decur-decur luk manu idi merapet inan Allah nengayung bururdeh teh, idi mebeneh ratnan deléideh sebuleng,

⁶mepad kudeng Sara pana' kudeng ineh teh. Ieh nemaya' ukum Ibrahim dengan neten neneh tuan. Idi muyuh ini pangeh nangun ku anak-anakneh kudeng muyuh nganau' luk do' dengan na megagap ratnan anun-anun luk miak ngatot nemuyuh.

⁷Kudeng ineh teh, muyuh deléi luk inan awan, do' muyuh kali' nedeh meluun laya'. Do' muyuh ngedita' nedeh, ngaceku ideh pana' ngalap baré Allah, ieh ineh ulun luk pad-pad dengan muyuh. Nganau' kudeng ini pad sembayang muyuh na uen ngesabeng.

⁸Kekipedneh, do' amung-amung muyuh sebuleng niat, idi méi' seburur dengan luk baken, idi mawa kuan amung-amung kinanak, dengan mulai niat idi mebeneh niat.

⁹Aleg muyuh ngua' dat dengan luk dat idi ngua' ngedat dengan ngedat, iamo' mutuh peruan, ngaceku ratnan luk kudeng ineh muyuh pangeh tinawar, pad muyuh galap peruan ku babpat muyuh.

¹⁰Ngaceku pangeh inayud, "Lemulun luk pian ngalap ulun, idi ngalap kareb luk do', do' ieh ngimet dila'neh ratnan pebala luk dat, idi do' ieh ugka' mebalih.

¹¹Do' ieh umai ratnan luk dat idi nganau' luk do', do' ieh nakap pedo', idi nakap neneh do'-do'.

¹²Ngaceku Tuhan megéi' nier lemulun luk matu, idi Ieh megéi' ninger sembayangdeh; iamo' Ieh teketed ratnan lemulun luk nganau' luk dat."

¹³Idéké miak ngedereh nemuyuh, kudeng muyuh mekél nganau' luk do'?

¹⁴Iamo' kudeng muyuh ngalap dereh ngaceku ratnan luk matu, samal kuan muyuh. Aleg matot ku lemulun, idi aleg muyuh merapang.

¹⁵Iamo' do' ngerayeh Keristus mangun ku Tuhan bang niat muyuh, idi do' muyuh megéi' temina' maré or kuan anid-anid lemulun luk ngitun nemuyuh ratnan rapet luk pangeh ilap muyuh,

¹⁶iamo' dengan mebeneh niat idi maré ubur idi dengan teruayen niat luk do', pad kareb muyuh uen lemulun ngedat ngaceku ulun muyuh luk do' bang Keristus, lemulun ineh miak uen ngigu'.

¹⁷Ngaceku meluun do' muyuh ngalap dereh ngaceku nganau' luk do', kudeng ini luk petulu dengan pian Allah, ratnan muyuh ngalap dereh ngaceku nganau' luk dat.

¹⁸Ngaceku Keristus pana' pangeh nengalap dereh maté ngaceku sala' lemulun, ieh ineh Lemulun luk Matu ngaceku lemulun luk na matu, pad Ieh nguit netau amé' matun Allah; sagan pana' bururNeh pinaté, iamo' mulun bang roh;

¹⁹idi bang roh ineh Ieh iné' mada' amung-amung roh luk bang tutup,

²⁰ieh ineh roh luk atun ngelaba ukum kareb Allah nganét dengan mekadang niat bang kareb Noh, laba' Noh nganau' alud rayeh ineh temina'. Idi bang alud ineh inan sesuut lemulun, ieh ineh ualuh burur lemulun pangeh inulun ratnan abpa' ineh.

²¹Idi abpa' ineh pinginud rereb luk nekini ngulun nemuyuh, idi ilungneh baken nala' luk melutak ratnan burur, iamo' mutuh teruayen niat luk do' pa kiung Allah, ngaceku ratnan tui Yésus Keristus,

²²luk pangeh numak iné' surga, idi tudo pa tinueh Allah, idi amung-amung melaikat idi lalud idi luk ngimet pana' inau' mebeneh rat Neneh.

1 Petrus 4

¹Ngaceku Keristus pangeh nengalap dereh bang burur lemulun, do' muyuh pana' ngayung ku niat luk mepad kudeng ineh teh; ngaceku lemulun luk ngalap dereh bang burur ineh, pangeh ugka' ratnan nganau' sala'.

²Rat pad sini seruked ulun muyuh luk ketecan, aleg muyuh maya' lili lemulun, iamo' pian Allah.

³Bang kareb luk atun petap sala' luk inau' muyuh maya' kekamen luk inau' lun luk na manu. Atun muyuh mulun bang luk melutak, pian burur, mabuk, idi rot luk dat. Muyuh ucet ngirup, sembayang inan akang, idi nganau' luk bibpeng ineh teh.

⁴Idi nekini lun luk na manu mawa nemuyuh na upun pad-pad dengandeh sikal semuet bang rot luk pelaba dat ineh, idi ideh nguyo nemuyuh.

⁵Iamo' ideh na miak na maré or kuan Allah luk temina' sikal ngukum lemulun luk mulun idi luk naté.

⁶Ineh punneh Bala luk do' ineh bida' kuan lemulun luk naté pana', pad ideh miak kumin maya' kudeng ayu lemulun, iamo' mulun kudeng maya' ayu Allah bang roh.

⁷Iamo' kareb luk kekiped ineh pangeh muneng. Do' muyuh ngimet burur muyuh, idi matar pad miak sembayang.

⁸Idi luk pun-pun do' muyuh mawa seburur dengan seburur, ngaceku awa ineh miak mapen sala' luk mula'.

⁹Do' muyuh ngasa' seburur dengan luk baken dengan na dureng-dureng.

- ¹⁰Do' ngasa' nelun baken maya' kinula' baré luk ilap anid-anid lemulun, mepad kudeng lun ngasa' luk lutep ngimet baré Allah.
- ¹¹Kudeng seburur mada', do' ieh mada' bala Allah; kudeng seburur ngasa' nelun baken, do' ieh ngasa' dengan tueh luk biré Allah, pad Allah miak uen ngerayeh bang luk amung-amung ngaceku ratnan Yésus Keristus. Idi rayeh kuanNeh, idi lalud macing raked-raked! Amin.
- ¹²O luk inanku mawa, aleg muyuh mawa ku tutun luk rayeh luk macing luun muyuh ineh, ayu-ayu mepad kudeng sebuleng luk inan mawa pangeh macing luun muyuh.
- ¹³Iamo' do' muyuh mawang niat ngaceku muyuh miak ngalap babpat ratnan dereh Keristus, pad muyuh mepanu' ku awang, kareb rayehNeh uen ngelio.
- ¹⁴Kudeng muyuh uen nguyo ngaceku ngadan Keristus, samal kuan muyuh, ngaceku Roh luk rinayah, ieh ineh Roh Allah, idi bang nemuyuh.
- ¹⁵Aleg seburur rat arang muyuh medereh ngaceku ieh lun ngaté, lun mano, lun luk dat, kian lun luk semuet bang gayam lun baken lek.
- ¹⁶Iamo' kudeng muyuh medereh ngaceku muyuh lun Kristen, aleg muyuh migu'. Iamo' ngubur Allah ngaceku muyuh ngegala' ngadan Keristus.
- ¹⁷Ngaceku pangeh macing karebneh ukum Allah ngimun kuan uang ruma' Allah, iamo' kudeng ukum ineh ngimun rat netau, idi anunké kekipedneh kuan amung-amung lemulun luk na maya' bala Allah ineh?
- ¹⁸Maya' kudeng luk inayud, "Idi kudeng mikat kuan lemulun luk matu ngalap ulun, kudeng apeh teh miak mangun kuan lemulun luk dat idi luk mesala' ineh?"
- ¹⁹Ngaceku ineh do' lemulun luk medereh maya' pian Allah maré ulundeh dengan megéi' nganau' luk do', kuan Lemulun luk Mudut luk lutep maya' jani' ineh.

1 Petrus 5

¹Idi kuan amung lun rayeh sidang luk arang muyuh, ini aceh bada'ku, ngaceku ui pana' seburur lun rayeh teh, idi ui mangun ku lun luk nekali' ratnan dereh Keristus, idi teh ui miak ngalap babpat rayeh luk miak uen ngegala'.

²Ui mutuh nemuyuh: do' matar dumba Allah luk inan arang muyuh, baken dengan sinaad, iamo' dengan awang niat maya' pian Allah. Aleg ngakem ngaceku sikal ngalap tabpar, iamo' ngakem ngaceku pian ngedengan.

³Aleg muyuh mepad kudeng lun ngimet ukum kuan lemulun luk biré nemuyuh, iamo' do' muyuh mangun ku luk pinginud kuan sengeriudan dumba ineh.

⁴Idi kareb Lun Rayeh lun matar ineh uen ngegala', muyuh miak ngalap pata rayehNeh luk na miak mekarang.

⁵Kudeng ineh teh, O muyuh lun luk anak adi', do' muyuh mebeneh ratnan lun rayeh-rayeh ineh. Idi do' amung-amung muyuh dengan niat luk mebeneh ngedengan seburur dengan luk baken, ngaceku "Allah sikal metueh ratnan lemulun luk medita' niat, iamo' Ieh maré katuNeh kuan lemulun luk mebeneh niat."

⁶Ngaceku ineh do' muyuh ngebeneh burur muyuh pa liang ticu' Allah luk meluun melalud ineh, pad Ieh ngedita' nemuyuh bang karebNeh.

⁷Do' maré amung-amung rapang muyuh kuanNeh ngaceku Ieh luk ngerawé nemuyuh.

⁸DO' muyuh ngerawé, idi matar do'-do'! Iblis luk bunu' muyuh ineh, mepad kudeng balang luk ngeku luk nalan-nalan nakap idé luk miak kenneh.

⁹Do' muyuh munu' neneh dengan nau muyuh luk meraben, ngaceku muyuh kali' amung-amung dereh luk kudeng ineh teh miak mangun kuan kinanak-kinanak muyuh luk libut-libut tana' ini.

¹⁰Idi Allah, lawa amung-amung katu, luk pangeh nenawar nemuyuh semuet bang rayehNeh luk meruked bang Keristus, kareb muyuh pangeh nengalap

dereh bang segageh mo', idi Ieh luk miak ngeligan nemuyuh idi ngeraben nemuyuh idi ngetueh nemuyuh pana'.

¹¹Idi kuanNeh lalud raked-raked peh. Amin.

¹²Idi dengan ayud ticu' kinanak tau Siluanus, luk lutep maya' luk pianku, ui ngayud surat ini dengan sesuut kuan muyuh, pad mada' idi maré kali' ratnan katu Allah ini luk matu. Do' muyuh lutep bang ineh.

¹³Idi sidang kinanak-kinanak muyuh déi' Babil, luk pinili' mepad kudeng muyuh sebuleng, maré tabi' kuan muyuh, kudeng ineh teh anakku Markus.

¹⁴Idi do' muyuh maré tabi' seburur kuan seburur dengan pebuen luk meligan. Idi do' awang ngedengan amung-amung muyuh luk idi bang Keristus.

2 Petrus

2 Petrus 1

¹Rat ni Simun Pétrus, demulun idi rasul Yésus Keristus— Kuan lemulun luk pangeh nengalap anu, luk mepad letep dengan anu kai, ngaceku siri Allah, Tuhan tau, idi Yésus Keristus Lun Nengulun:

²Do' katu idi awang amé'-amé' mula' kuan muyuh, ngaceku muyuh ngiti Allah idi Yésus Tuhan tau.

³Amung-amung luk inan ulek kuan ulun luk meligan pangeh biré kuan tau ngaceku lalud Tuhan, ngaceku tau kali' Neneh lu pangeh nenawar netau dengan rayeh idi do'Neh sebuleng.

⁴Dengan dalan ineh Ieh pangeh nemaré amung baré luk pelaba do' idi luk meluun rayeh ineh luk pijani'Neh kuan tau, pad dengan baré ineh muyuh inan babpat bang ulun Tuhan, pad muit burur muyuh ratnan luk melu luk idi bang tana' ngaceku ratnan pinian burur.

⁵Ngaceku ineh do' muyuh mekél ngula' anu muyuh dengan kekamen luk do', idi kekamen luk do' ineh miak uen ngula' dengan ileh,

⁶idi ileh ineh miak uen ngula' dengan metueh ngimet burur, idi metueh ngimet burur miak uen ngula' dengan lutep niat, idi lutep niat ineh miak uen ngula' dengan ulun luk meligan,

⁷idi ulun luk meligan ineh miak uen ngula' dengan éi', idi éi' ineh miak uen ngula' dengan awa.

⁸Kudeng bua' ini idi bang nemuyuh dengan mela, idi ineh luk ngedengan nemuyuh, pad muyuh mekél idi kebua' bang ileh ratnan Tuhan tau Yésus Keristus.

⁹Iamo' lemulun luk na bua' luk kudeng ineh, dat sier, idi pangeh nekelupan ratnan ieh pangeh biru' ratnan sala'-sala'neh luk atun ineh.

- ¹⁰Ngaceku ineh, O kinanak-kinanakku, do' muyuh mekél ngeletep tawar idi pili' Allah ineh, pad muyuh tured meraben. Kudeng muyuh nganau' kudeng ineh, na muyuh meraruh.
- ¹¹Dengan dalan ineh muyuh miak simén semuet bang Imet luk meruked, ieh ineh Imet Yésus Keristus, Tuhan tau idi Lun Nengulun.
- ¹²Ngaceku ineh ui megéi' temina' mada' nemuyuh ratnan ini, sagan pana' muyuh kali' bada' ineh, idi muyuh lutep bang luk matu mepad kudeng luk pangeh ilap muyuh.
- ¹³Bang terawéku, seruked ui mulun, do' ui ngegio niat muyuh dengan mada' nemuyuh.
- ¹⁴Ui kali' bururku ini dengan segageh mo' miak metutu' maya' kudeng luk linio Tuhan tau Yésus Keristus kuanku.
- ¹⁵Ui sikal mekél, pad bang anid-anid kareb luk mucu ratnan atéku muyuh miak ngerawé ratnan bada' ini.
- ¹⁶Na kai nemaya' dalan ago luk mebalih, kareb kai ngegala' kuan muyuh ratnan lalud idi acing Tuhan tau Yésus Keristus, iamo' kai sebuleng pangeh nenier rayehNeh.
- ¹⁷Kai idi kareb Ieh nengalap dita' idi rayeh ratnan Allah Taman kareb Ieh neninger aceh tang rat bang langit ratnan Luk Meluun Rayeh, luk nepebala, "Ini AnakKu luk inanKu mawa, idi Ui mawang niat Neneh."
- ¹⁸Kai sebuleng neninger uni tang ineh rat bang langit kareb kai pad-pad denganNeh luun pegkung luk meligan ineh.
- ¹⁹Idi kai meluun rapet ku bala luk bida' nabi, idi do' muyuh ngerawé ineh, ngaceku ieh mepad kudeng lapung luk merasat bang su luk medacem, pad Aco masat, idi gituen rat pa busat aco masat idi ngacang bang niat muyuh.
- ²⁰Iamo' luk pun-pun, do' muyuh ngerawé ratnan ini, seburur pana' nateh luk miak ngelio bada' luk biré bang Surat Allah dengan ilehneh sebuleng,

²¹ngaceku na luk idi bala nabi luk macing maya' pian lemulun, iamo' acingneh ratnan Allah, idi bila lemulun luk tigio Roh Meligan.

2 Petrus 2

¹Atun inan nabi-nabi luk mebalih rat arang pupu ini, kudeng ineh teh tuda'-tuda' guru luk mebalih miak tumui rat arang muyuh. Ideh miak nguit bada' luk mebalih idi luk ngeraruh. Lemulun ineh ngalum Tuhan luk pangeh nenguli' nedeh, idi ngacing até kuan bururdeh sebuleng dengan mesaget.

²Mula' lemulun miak maya' kekamendeh luk melutak, idi dalam luk matu ruen lemulun nguyo ngaceku ideh.

³Dengan lilideh ideh miak nakap tabpar rat nemuyuh dengan bala luk naluk. Iamo' ngaceku kekamendeh ineh, rat mon ukum pangeh tinina' kuandeh, idi atédeh na miak uen ngiuk.

⁴Allah na méi' kuan melaikat-melaikat luk nenganau' sala', luk tila'Neh bang apui idi kiling bang lubang luk medacem pad Ieh ngacing ukum kuandeh.

⁵Ieh na méi' kuan lemulun bang kareb luk mon, iamo' Noh luk nemada' luk matu ineh, isa'Neh dengan tudu' burur lemulun kareb Ieh ngacing ereb kuan uang tana' ini luk na manu;

⁶idi bawang Sodom idi Gemora ineh inukumNeh dengan até idi isebNeh pad mangun ku abuh, idi nenganau' neneh mangun ku luk pinginud kuan amung-amung lemulun luk sikal mulun dengan na sembayang.

⁷Ieh nemuit ni Lut, seburur lemulun luk matu ineh, luk mesusa' niat ku ulun lemulun luk melutak idi luk dat ineh.

⁸Lemulun luk matu ineh tudo arangdeh, idi anid-anid aco ieh nenier idi neninger luk dat pad ieh pelaba susa' niat ngaceku kekamendeh luk dat ineh.

⁹Kudeng ineh teh Tuhan luk meluun kali' kudeng apéh muit lun manu ratnan tutun luk macing nedeh, idi kudeng apéh ngata lemulun luk dat pad macing Aco Ngukum, pad Ieh ngedereh nedeh,

- 10** meluun teh lemulun luk maya' pinian bururdeh luk melutak, idi ngebeneh lalud Allah. Idi guru-guru luk mebalih ineh mekuu' idi medita' niat, idi na matot nguyo amung-amung pudut luk rayeh déi' surga.
- 11** Melaikat-melaikat pana' luk meluun tueh idi meluun lalud ratnan guru-guru luk mebalih ineh, na ideh nguyo nedeh pa kiung Tuhan.
- 12** Iamo' lemulun ini mepad kudeng aceh pudut luk na ileh, idi mepad kudeng ulun pung luk uen nganup idi pitayen. Ideh nguyo amung-amung luk na kali'deh. Idi ideh miak pitayen.
- 13** Ideh ngalap tabpar dereh ngaceku ideh nengedereh nelun baken. Idi rotdeh luk dat luk ngacing awang kuandeh, ruendeh kareb macang, ieh ineh anun-anun luk maya' pinian burur. Ideh mangun ku aceh luk inan migu' kareb ideh pamung kuman dengan muyuh. Idi ideh ngeraruh nemuyuh dengan salukdeh bang irau ineh.
- 14** Ideh pian nier decur luk mesawa'. Ideh na sikal ugka' ratnan sala'. Ideh nguit lemulun luk melaya' anu semuet bang abpung, idi niatdeh pekalai bang lili. Ideh pa liang kediman Allah.
- 15** Ideh nenecan dalam luk mesiri, idi maya' luk meraruh. Ideh maya' dalam Bilam Bior luk geregan ku tabpar kekamen luk dat;
- 16** iamo' ieh sinala' ngaceku sala'neh. Keladai luk mebegkeh ineh pana' nepebala dengan tang lemulun, idi ieh nengagka' ruden nabi ineh.
- 17** Lemulun ineh mepad kudeng bued abpa' luk nekeket idi laput luk pinalid ku bui. Idi dacek luk pingot-pingot pangeh tinina' Allah kuandeh.
- 18** Ideh ngerayeh bururdeh dengan bala luk mo'-mo', idi dengan kekamen pinian burur luk melutak, ideh ngubuk lemulun luk ngimun buro ratnan lemulun luk neraruh ineh.
- 19** Ideh pejani' maré puit kuandeh, iamo' ideh sebuleng mangun ku demulun kuan luk maté. Ngaceku tau lemulun mangun ku demulun kuan anun-anun luk miak ngelaya' netau.

²⁰Kudeng mucu ratnan lemulun nepuit ratnan lutak tana' ini ngaceku miti Tuhan Yésus Keristus, Lun Nengulun, idi ideh lemubed teh mepabpung bang amung-amung luk kudeng ineh, pad uen ngelaya', kekiped lemulun ineh meluun dat ratnan luk pun-pun.

²¹Meluun do' kuandeh kudeng ideh na ngiti dalam luk matu rat pun-pun, ratnan ideh nengiti ineh idi lumi ratnan ukum luk meligan luk pangeh biré kuandeh.

²²Idi pangeh mangun kuandeh ineh mepad kudeng luk pinginud ineh luk matu, ieh ineh uko' lemubed nila' uta'neh, idi barek luk pangeh diniu' lemubed silusu' bang lisuen.

2 Petrus 3

¹O kinanak-kinanakku luk inanku mawa, ini kedueh surat luk ui maré kuan muyuh, idi bang dueh-duehneh ini ui ngegio terawé muyuh luk meligan ineh dengan dalam mada' kuan muyuh,

²pad muyuh ngerawé ratnan bala luk bida' nabi-nabi luk meligan atun, idi ukum Tuhan, Lun Nengulun, luk biré rasul-rasul luk icuk kuan muyuh.

³Pun-pun, ngerawé do'-do'! Kareb aco kekiped, miak macing tuda'-tuda' lun luk nalan maya' pinian bururdeh sebuleng.

⁴Ideh miak situnga nemuyuh, kebaladeh, "Idanké acingNeh luk pijani' ineh? Tepun tau pangeh naté, iamo' amung-amung mepad kudeng ayuneh rat pun-pun tana' ini pinudut."

⁵Dengan rungen ideh mekelupan ratnan luk mangun mon. Ieh ineh Allah nepebala pad langit idi tana' pinudut. Tana' pinudut ratnan abpa' idi dengan abpa' pana'.

⁶Dengan dalam ineh tana' luk idi bang kareb ineh pangeh nengalap até idi nereb ku abpa' ineh.

⁷Iamo' langit idi tana' luk idi nekini uen ngasa' ratnan bala Allah ineh, pad uen ngusag ku apui, ieh ineh pad macing aco luk inan lemulun luk na manu kumin idi pitayen.

⁸Iamo' aleg muyuh mekelupan sebuleng bala ini, O amung-amung luk inanku mawa! Seaco kuan Tuhan mepad kudeng meribu lak, idi meribu lak mepad kudeng seaco.

⁹Tuhan na nginiuk luk pijani'Neh mepad kudeng luk tirawé tuda'-tuda' lemulun, iamo' Ieh mekadang niat nemuyuh; ngaceku na Ieh pian seburur pana' pitayen. Luk pianNeh, pad amung-amung lemulun teketed ratnan sala'deh.

¹⁰Iamo' Aco Tuhan sikal macing mepad kudeng lun mano. Langit miak metutu' dengan uni luk meluun rayeh, idi amung-amung pudut luk bang langit miak meseb idi ubpa', idi tana' dengan amung-amung kekamen luk ina bangneh ineh miak meseb.

¹¹Kudeng luk amung-amung miak uen ngusag kudeng ineh, kudeng apehké luk petulu kuan ulun muyuh? Do' muyuh meligan idi meriput pa kiung Allah

¹²laba' muyuh nganét Aco Allah ineh, idi do' muyuh mekél ngacing Aco ineh kareb langit miak meseb idi ubpa', idi amung-amung pudut miak meseb idi remuno.

¹³Iamo' maya' kudeng luk pijani' Allah tau nganét langit luk mebaruh idi aceh tana' luk mebaruh, luk panu' ku luk matu.

¹⁴Ngaceku ineh, O luk inanku mawa, laba' muyuh nganét amung-amung luk kudeng ini, do' muyuh mekél pad muyuh miak lapen dengan awang, dengan na melutak idi na mesala' pa kiung Tuhan.

¹⁵Do' muyuh ngerawé kadang niat Tuhan tau ineh ngacing inan ulun, kudeng ineh teh Paulus, kinanak luk inan tau mawa ineh, pangeh nengayud kuan muyuh maya' ileh luk biré Allah kuanneh.

¹⁶Bang amung-amung suratneh ieh mala' ratnan luk kudeng ini. Idi bang suratneh inan tuda'-tuda' bala luk medalem luk mikat kali', idi lemulun luk na

nesibada' idi luk na lutep, ngelupat bala ineh, mepad kudeng luk inau'deh kuan surat-surat luk baken, pad ngacing até kuan bururdeh sebuleng.

¹⁷Iamo' muyuh ini, O luk inanku mawa, kali' ratnan amung-amung ini. Matar do'-do', pad muyuh na manud ngaceku raruh lemulun luk dat ineh, idi pad muyuh na mebpeh ratnan ulun muyuh luk lutep ineh.

¹⁸Iamo' do' muyuh temubu' bang katu idi ileh ratnan Tuhan tau Yésus Keristus, Lun Nengulun. Idi rayeh kuanNeh, do' nekini idi raked-raked pana'. Amin.

1 Yahya

1 Yahya 1

¹Kai ngayud ratnan Bala Ulun luk idi rat pun-pun, luk pangeh pindenger kai, luk pangeh sinier dengan mateh kai, luk pangeh tinutong kai, idi luk kikem dengan ticu' kai.

²Kareb ulun ineh pangeh ginala', kai nenier neneh, idi maré kali' idi mada' kuan muyuh ulun luk meruked, luk idi pad-pad dengan Taman idi luk pangeh ginala' kuan kai.

³Anun-anun luk pangeh sinier idi pindenger kai, kai mada' teh kuan muyuh, pad muyuh pana' miak perurum dengan kai; setuneh rurum kai ini inan pad-pad dengan Taman idi dengan Yésus Keristus, AnakNeh ineh.

⁴Kai ngayud amung-amung luk kudeng ini pad awang kai mangun meriput.

⁵Idi ini bada' AnakNeh luk pangeh pindenger kai rat Neneh, idi mada' kuan muyuh teh: idi Allah, Ieh ineh acang idi na tu-tu inan dacem bang Neneh.

⁶Kudeng tau pebala tau perurum Neneh, iamo' nalan bang dacem, tau mebalih idi na nganau' luk matu.

⁷Iamo' kudeng tau mulun bang acang, mepad kudeng Ieh pana' bang acang, idi tau perurum seburur dengan seburur, idi dara' Yésus, AnakNeh ineh, maru' netau ratnan amung-amung sala'.

⁸Kudeng tau mala netau na sala', idi tau naluk burur tau sebuleng, idi luk matu ineh na luk idi bang netau.

⁹Iamo' kudeng tau ngamo amung-amung sala' tau, idi Allah ineh lutep idi matu, pad Ieh maré do' ratnan amung-amung sala' tau, idi maru' netau ratnan amung-amung luk dat.

¹⁰Kudeng tau mala netau na tu-tu nenganau' sala', idi tau mala Allah mebalih, idi balaNeh na mudeng bang netau.

1 Yahya 2

- ¹O anak-anakku, ui ngayud ini kuan muyuh, pad muyuh na nganau' sala. Kudeng idé lemulun nganau' sala', idi tau inan seburur Lun Ngedengan luk idi pa kiung Taman, ieh ineh Yésus Keristus luk matu.
- ²Keristus mangun ku baré pedo' ngaceku amung-amung sala' tau, baken ngaceku sala'-sala' tau mo', iamo' ngaceku amung-amung sala' uang tana' ini teh.
- ³Kudeng tau maya' ukum-ukum Allah, tau kali' tau pangeh nengiti Neneh.
- ⁴Idi lemulun luk pebala, "Ui miti Neneh," iamo' na maya' ukum-ukumNeh, idi ieh mangun ku lemulun luk mebalih, idi luk matu ineh na idi bang neneh.
- ⁵Iamo' idé-idé luk maya' balaNeh, idi matu awa Allah uen ngeriput bang neneh. Dengan luk kudeng ineh tau kali' idi tau mulun bang Allah.
- ⁶Lemulun luk mala bururneh mulun bang Allah, do' ieh mulun mepad kudeng Keristus.
- ⁷O amung-amung luk inanku mawa, baken ukum luk mebaruh luk ui ngayud kuan muyuh, iamo' ukum luk mon luk pangeh ilap muyuh rat pun-pun. Idi ukum luk mon ineh, ieh ineh bala luk pindenger muyuh.
- ⁸Iamo' ui ngayud ukum luk mebaruh kuan muyuh, idi luk kudeng ineh pangeh ginala' matu bang Keristus idi bang nemuyuh pana', ngaceku dacem ineh pangeh netutu', idi acang luk matu pangeh merasat.
- ⁹Idé-idé luk mala bururneh bang acang, iamo' ieh megateh inan kinanakneh, ieh ineh bang dacem pad macing nekini.
- ¹⁰Idi lemulun luk mawa inan kinanakneh ineh, ieh tudo bang acang, idi bang lemulun ineh na luk idi anun-anun luk ngeraruh kinanakneh.
- ¹¹Iamo' lemulun luk megateh inan kinanakneh, ieh ineh bang dacem idi nalan bang dacem, idi na kali' su ulekneh, ngaceku matehneh pangeh inau' mebuser ngaceku ratnan dacem ineh.
- ¹²O anak-anakku, ui ngayud kuan muyuh, ngaceku muyuh pangeh nengalap do' ratnan sala' ngaceku ngadan Keristus.

¹³O amung-amung taman, ui ngayud kuan muyuh ngaceku muyuh pangeh nengiti Neneh luk idi rat pun-pun. O amung-amung lun anak adi', ui ngayud kuan muyuh ngaceku muyuh pangeh nengelaya' Luk Dat ineh.

¹⁴O amung-amung anakku, ui pangeh nengayud kuan muyuh, ngaceku muyuh pangeh nengiti Taman ineh. O amung-amung taman, ui pangeh nengayud kuan muyuh, ngaceku muyuh pangeh nengiti Neneh luk idi rat pun-pun. O amung-amung lun anak adi', ui pangeh nengayud kuan muyuh ngaceku muyuh metueh, idi bala Allah ineh tudo bang nemuyuh, idi muyuh nengelaya' Luk Dat ineh.

¹⁵Aleg muyuh mawa ku tana', idi amung-amung uangneh teh. Kudeng idé lemulun mawa ku tana', idi awa Taman ineh na idi bang neneh.

¹⁶Amung-amung luk inan bang tana', ieh ineh lili burur, lili mateh, idi ulun luk dengan dita' niat ineh, baken ratnan Taman, iamo' ratnan tana' ini.

¹⁷Tana' ini miak metutu', kudeng ineh teh lilineh; iamo' ieh luk maya' pian Allah mulun raked-raked.

¹⁸O anak-anakku, ini kareb luk kekiped. Mepad kudeng luk pangeh pindenger muyuh idi Bunu' Keristus sikal macing teh, idi nekini pana' inan mula' bunu' Keristus. Ratnan luk kudeng ineh tau kali' idi ini kareb luk kekiped.

¹⁹Lemulun ineh pangeh neremuat rat arang tau, ngaceku baken ideh rat netau; ngaceku kudeng ideh rat netau, kali' rungen ideh na miak na lutep pad-pad dengan tau. Iamo' ideh pangeh neremuat, pad megala' ratnan pundeh baken rat netau.

²⁰Iamo' muyuh pangeh inumau ku Roh Meligan ineh, idi muyuh kali' luk amung-amung.

²¹Baken ui ngayud kuan muyuh ngaceku muyuh na kali' luk matu, iamo' ngaceku muyuh kali' ineh, idi ngaceku muyuh kali' na luk idi balih luk remuat ratnan luk matu.

²²Idéké lun mebalih ineh? Ieh ineh lemulun luk pebala, Yésus ineh baken Keristus. Idi lemulun luk ngarung Taman idi Anak ineh, ieh ineh luk bunu' Keristus.

²³Idé-idé luk ngarung Anak, kali' rungen na luk idi Taman bang neneh. Idi lemulun luk ngamo Anak ineh, kali' rungen Taman ineh pana' idi bang neneh.

²⁴Matar do'-do', pad anun-anun luk pangeh pindenger muyuh rat pun-pun, lutep bang nemuyuh. Kudeng luk pangeh pindenger muyuh rat pun-pun lutep bang nemuyuh, idi muyuh pana' miak lutep bang Anak idi Taman ineh pana'.

²⁵Idi luk pijani' Keristus kuan tau, ieh ineh ulun luk meruked.

²⁶Ui ngayud surat ini kuan muyuh ratnan lemulun luk sikal naluk nemuyuh.

²⁷Idi kuan muyuh ini, Keristus pangeh nengutang RohNeh luun muyuh. Seruked RohNeh idi bang nemuyuh, idi na ulek muyuh badén seburur lemulun peh. Ngaceku RohNeh ineh mada' nemuyuh ratnan luk amung-amung, idi luk badénNeh ineh matu idi na mebalih. Ngaceku ineh do' muyuh maya' bada' Roh ineh, idi do' muyuh lutep bang Keristus.

²⁸Nekini, O anak-anakku, do' muyuh lutep bang Keristus, pad tau mepanu' ku kuu' kareb Ieh megala' teh, idi na sigapung ku igu' kareb Aco acingNeh.

²⁹Muyuh kali' Keristus ineh matu. Ngaceku ineh, petulu muyuh kali' idi anid-anid burur lemulun luk nganau' luk matu, ieh ineh anak Allah.

1 Yahya 3

¹Siruh, kudeng afeh kirayehneh awa Taman luk pangeh biré kuan tau pad amung-amung tau miak tetanen ku anak-anak Allah: idi kali' rungen tau ini anakNeh. Idi ini punneh tana' ini na ngiti netau, ngaceku tana' ini na ngiti Allah.

²O amung-amung luk inanku mawa, nekini tau ini anak-anak Allah, idi nateh tau kali' kudeng afeh luk mangun kuan tau mucu. Iamo' tau kali' idi kareb Ieh pangeh megala', tau pana' mepad kudeng Ieh, ngaceku tau nier Neneh mepad kudeng Ieh idi.

- ³Anid-anid lemulun luk merapat inan Keristus ineh, matar bururneh pad ieh meligan mepad kudeng Keristus pana' meligan.
- ⁴Idé-idé luk nganau' sala', ieh pana' ngelaba ukum Allah ngaceku sala' ineh, ieh ineh ngelaba ukum.
- ⁵Muyuh kali' Keristus ineh pangeh ginala' pad Ieh ngiu' amung-amung sala' idi bang Neneh ineh na luk idi sala'.
- ⁶Idé-idé luk mulun bang Keristus, na ieh megéi' nganau' sala', idi teh idé-idé luk megéi' nganau' sala', nateh ieh nekali' Keristus idi na ieh ngiti Neneh.
- ⁷O anak-anakku, aleg muyuh uen lun naluk! Lemulun luk nganau' luk matu ineh, ieh teh matu, mepad kudeng Keristus matu teh.
- ⁸Lemulun luk megéi' nganau' sala', ieh nacing ratnan Iblis, ngaceku Iblis ineh nganau' sala' rat pun-pun. Ini punneh Anak Allah pangeh ginala', pad Ieh miak ngusag amung-amung kekamen Iblis ineh.
- ⁹Idé-idé luk tinganak ratnan Allah, na ieh megéi' nganau' sala', ngaceku ulun Allah idi bang neneh, idi na ieh megéi' nganau' sala', ngaceku ieh tinganak ratnan Allah.
- ¹⁰Ini tanu'neh anak-anak Allah idi anak-anak Iblis pana'. Idé-idé luk na nganau' luk matu ineh baken ieh anak Allah, kudeng ineh teh lemulun luk na mawa inan kinanakneh.
- ¹¹Bala luk pindenger muyuh rat pun-pun, ieh ineh do' tau mawa seburur dengan seburur.
- ¹²Aleg tau ini mepad kudeng Kain, luk nacing ratnan Luk Dat, idi nengaté kinanakneh. Anunké punneh ieh nengaté neneh? Ngaceku amung-amung kekamen Kain dat, iamo' kekamen kinanakneh ineh matu.
- ¹³O kinanak-kinanakku, aleg muyuh mawa kudeng lun bang tana' ini megateh nemuyuh.
- ¹⁴Tau kali' tau ini pangeh nepuit ratnan até amé' inan ulun, ngaceku tau mawa inan amung-amung kinanak. Idi lemulun luk na mawa lutep bang até.

¹⁵Idé-idé luk megateh inan kinanakneh, ieh ineh selemulun luk ngaté; idi muyuh kali' seburur lemulun luk ngaté na luk idi ulun luk meruked bang neneh.

¹⁶Ratnan luk kudeng ineh tau kali' awa luk matu: Keristus nemarké ulunNeh ngaceku tau. Idi do' tau pana' maré ulun tau ngaceku kinanak-kinanak.

¹⁷Kudeng seburur lun do' kali' kinanakneh masi', iamo' na méi' neneh, kudeng apehké ieh miak ngamo awa Allah idi bang niatneh?

¹⁸O anak-anakku, aleg tau mawa dengan bala idi dengan dila'mo', iamo' dengan kekamen idi dengan luk matu.

¹⁹Ratnan luk kudeng ineh tau kali' netau nesemuet bang luk matu, idi tau miak ngeletep niat tau pa kiung Tuhan.

²⁰Kudeng niat tau ngesala' netau, tau kali' Allah ineh meluun rayeh ratnan niat tau, idi Ieh kali' luk amung-amung.

²¹O amung-amung luk inanku mawa, kudeng niat tau na ngesala' netau, kali' rungen tau mekuu' pa kiung Allah.

²²Anun-anun luk pituen tau, tau miak ngalap rat Neneh, ngaceku tau maya' amung-amung ukumNeh, idi nganau' anun-anun luk petulu denganNeh.

²³Ini ukumNeh, ieh ineh, do' tau manu inan ngadan AnakNeh Yésus Keristus, idi mawa seburur dengan seburur mepad kudeng luk icuk Keristus kuan tau.

²⁴Lemulun luk maya' ukum-ukum Allah, ieh mulun bang Allah, idi Allah mulun bang neneh. Idi ratnan ini tau kali' idi Allah mulun bang netau, ieh ineh ngaceku Roh luk biréNeh kuan tau.

1 Yahya 4

¹O amung-amung luk inanku mawa, aleg muyuh manu ku bala anid-anid lemulun luk ngamo neneh pangeh nengalap Roh Allah, iamo' do' muyuh nutun nedeh, pad muyuh kali' kudeng roh luk ilapdeh ineh macing ratnan Allah. Ngaceku mula' nabi luk mebalih pangeh neremuat iné' iapeh-iapeh.

- ²Kudeng ini lawéneh muyuh miak ngiti Roh Allah: idé-idé luk ngamo Yésus Keristus nacing mepad kudeng lemulun, ieh ineh ratnan Allah;
- ³Idi idé-idé luk na ngamo Yésus ineh, baken ieh nengalap roh luk ratnan Allah, iamo' roh ineh bunu' Keristus. Muyuh pangeh neninger ratnan acingneh, idi nekini ieh idi bang tana' ini.
- ⁴O anak-anakku, muyuh ini ratnan Allah. Muyuh pangeh nengelaya' nabi luk mebalih ineh ngaceku Roh luk bang nemuyuh meluun lalud ratnan Roh luk bang lemulun luk bang ulun tana ini.
- ⁵Ideh pebala ratnan tana' ini, idi tana' ini neninger baladeh, ngaceku ideh ratnan tana' ini.
- ⁶Iamo' tau ini ratnan Allah, idi lemulun luk miti Allah ieh luk ninger bala tau. Idi lemulun luk baken ratnan Allah na ieh ninger bala tau. Ratnan luk kudeng ineh tau miak ngiti Roh luk matu, idi roh luk ngeraruh ineh.
- ⁷O amung-amung luk inanku mawa, do' tau mawa seburur kuan seburur; ngaceku awa ineh ratnan Allah. Idé-idé luk inan awa, ieh ineh tinganak ratnan Allah idi ngiti Allah.
- ⁸Lemulun na mawa ineh na ieh ngiti Allah ngaceku Allah ineh awa.
- ⁹Kudeng ini lawéneh Allah nengegala' awaNeh kuan tau: Ieh pangeh nengecuk AnakNeh luk sebuleng semuet bang tana' ini pad rat Neneh ineh tau miak ngalap ulun.
- ¹⁰Kudeng ini awa ineh: baken ngaceku tau mawa inan Allah, iamo' ngaceku Allah mawa netau, idi nengecuk AnakNeh mangun ku baré pedo' ratnan amung-amung sala' tau.
- ¹¹O amung-amung luk inanku mawa kudeng Allah panegh mawa netau kudeng ineh, idi petulu tau ini pana' mawa seburur dengan seburur.
- ¹²Seburur lemulun pana' nateh nenier Allah. Kudeng tau mawa seburur dengan seburur idi Allah mulun bang netau, idi awaNeh ineh riniput bang netau.

¹³Ratnan luk kudeng ini tau kali' tau mulun bang Allah idi Allah pana' mulun bang netau, ngaceku Ieh pangeh nemaré RohNeh kuan tau.

¹⁴Kai pangeh nenier, idi maré kali', ratnan Taman ineh pangeh nengecuk AnakNeh mangun ku Lun Nengulun tana' ini.

¹⁵Idé-idé luk ngamo idi Yésus ineh Anak Allah, idi Allah ineh mulun bang neneh idi ieh pana' mulun bang Allah.

¹⁶Tau ini pangeh nekali' idi manu ratnan awa Allah bang netau. Allah ineh awa, idi lemulun luk mulun bang awa mulun bang Allah, idi Allah mulun bang neneh.

¹⁷Dengan luk kudeng ineh awa ineh uen ngeriput bang netau, pad tau mekuu' kareb Aco Ngukum, ngaceku mepad kudeng Keristus, kudeng ineh teh tau bang tana' ini.

¹⁸Bang awa na luk idi tot, iamo' awa luk meriput nala' amung-amung tot, ngaceku tot ineh ngacing ukum, idi lemulun luk matot nateh riniput bang awa.

¹⁹Tau mawa ngaceku Allah pun-pun mawa netau.

²⁰Kudeng idé lemulun luk pebala, "Ui mawa inan Allah," iamo' ieh megateh inan kinanakneh, idi lemulun ineh mebalih, ngaceku lemulun luk na mawa inan kinanakneh luk sirennéh, idi na ieh miak mawa inan Allah luk nateh siniernéh.

²¹Ukum ini pangeh biré Keristus kuan tau: lemulun luk mawa inan Allah, na miak na mawa inan kinanakneh teh.

1 Yahya 5

¹Idé-idé luk manu idi Yésus ineh Keristus, idi lemulun ineh tinganak ratnan Allah, idi idé-idé luk mawa inan Taman, ieh pana' mawa inan anakNeh teh.

²Ratnan ini tau kali', idi tau mawa inan anak-anak Allah, ieh ineh kudeng tau mawa inan Allah idi maya ukum-ukumNeh.

- ³Ngaceku ini awa inan Allah, ieh ineh maya' ukum-ukumNeh. Idi ukum-ukumNeh ineh baken meberat.
- ⁴Ngaceku idé-idé pana' luk tinganak ratnan Allah miak ngelaya' tana' ini. Idi ini tueh tau luk ngelaya' tana' ini, ieh ineh anu tau.
- ⁵Idéké miak ngelaya' tana' ini? Lemulun luk manu idi Yésus ineh Anak Allah mo'.
- ⁶Yésus Keristus ineh luk pangeh nacing. Ieh nacing dengan abpa' rerebNeh idi dara' atéNeh. Ieh nacing baken dengan abpa' mo', iamo' dengan abpa' idi dara'. Idi Roh ineh mangun ku luk nekali' ratnan ineh matu, ngaceku Roh ineh matu.
- ⁷Inan teluh luk mangun ku luk nekali',
- ⁸ieh ineh Roh, abpa', idi dara'; luk teluh ini mangun ku luk nekali' luk mepad mo'.
- ⁹Tau manu ku luk nekali' lemulun, iamo' luk nekali' Allah meluun lalud. Idi ini luk nekali' Allah, idi luk pangeh bilaNeh ratnan AnakNeh ineh.
- ¹⁰Ngaceku ineh, lemulun luk manu inan Anak Allah, inan luk nekali' bang niatneh, idi lemulun luk na manu inan Allah, ieh mala Allah mebalih, ngaceku lemulun ineh na manu ku luk nekali' luk pangeh biré Allah ratnan AnakNeh.
- ¹¹Idi ini luk nekali' luk pangeh bida'Neh: Allah pangeh nemaré ulun luk meruked kuan tau, idi ulun ineh bang Anakneh.
- ¹²Idi lemulun luk kuan Anak inan ulun; idi lemulun luk na kuan Anak ineh na luk idi ulun neneh.
- ¹³Ui nengayud ini kuan muyuh pad muyuh kali' idi muyuh pangeh nengalap ulun luk meruked, ieh ineh muyuh luk pangeh manu ku ngadan Anak Allah.
- ¹⁴Tau mekuu' pa kiung Allah ngaceku tau kali' Ieh ninger sembayang tau kareb tau mutuh anun-anun maya' luk pianNeh.

¹⁵Kudeng tau kali' Ieh ninger ratnan anun-anun luk pituen tau Neneh, idi tau kali' tau ngalap amung-amung luk pituen tau rat Neneh.

¹⁶Kudeng idé lemulun lu nier kinanakneh nganau' sala' luk na ngacing até, idi do' ieh sembayang kuanneh, idi Allah miak maré ulun kuanneh, ieh ineh anid-anid lemulun luk nganau' sala' luk na ngacing até. Idi inan aceh sala' luk ngacing até; idi na ui ngecuk nemuyuh mutuh nan Allah ratnan sala' ineh.

¹⁷Idi anid-anid kekamen luk dat, ieh ineh sala'; idi inan sala' luk na ngacing até.

¹⁸Tau kali' idi idé lemulun luk tinganak ratnan Allah na megéi' nganau' sala'; iamo' lemulun luk tinganak ratnan Allah ineh nginita bururneh, idi Luk Dat ineh na miak ngakem neneh.

¹⁹Tau kali' tau ini ratnan Allah, idi amung-amung tana' ini pa liang imet Luk Dat ineh.

²⁰Tau kali' Anak Allah pangeh nacing idi pangeh nemaré ileh kuan tau pad tau miak ngiti Allah luk matu; idi tau ini idi bang Allah luk matu, ieh ineh bang AnakNeh, Yésus Keristus. Idi Ieh ineh Allah luk matu, idi ieh ineh ulun luk meruked.

²¹O anak-anakku, nginita burur muyuh ratnan akang-akang luk mebalih.

2 Yahya

2 Yahya 1

¹Rat negku, seburur lun rayeh — Kuan seburur decur luk pinili' dengan anak-anakneh, luk inanku mawa, idi baken ui mo', iamo' amung-amung luk ngiti luk matu mawa namu,

²ngaceku luk matu ineh lutep bang netau, idi miak ngedengan netau macing raked-raked.

³Do' katu, éi', idi awang ratnan Allah Taman, idi ratnan Yésus Keristus, Anak Taman ineh, ngedengan netau bang luk matu idi awa.

⁴Ui pelaba awang niat ngaceku ui pangeh nekali' tuda'-tuda' anakmu luk nemaya' luk matu maya' kudeng ukum luk icuk Taman ineh kuan tau.

⁵Idi nekini, O decur, ui mutuh namu, pad muyuh mawa seburur dengan seburur. Na ui ngayud aceh ukum luk mebaruh kuanmu, iamo' ini ukum luk pangeh ilap tau rat pun-pun.

⁶Idi ini awa, ieh ineh, do' tau mulun maya' ukum-ukumNeh. Idi ini ukumNeh ineh mepad kudeng luk pangeh pindenger muyuh rat pun-pun, ieh ineh do' muyuh mulun bang awa.

⁷Mula' lun luk ngeraruh pangeh neremuat iné' aput-aput tana', luk na ngamo Yésus Keristus pangeh nacing mangun ku lemulun. Lemulun ineh ngeraruh nelun, idi ideh ineh bunu' Keristus.

⁸Ngerawé ratnan burur muyuh sebuleng, pad muyuh na miak ngetutu' anun-anun luk pangeh ilap muyuh ratnan kél muyuh, iamo pad muyuh ngalap tabpar muyuh dengan petap.

⁹Idé-idé luk na lutep bang bada' Keristus, iamo' luk ngeluun ineh na luk idi Allah kuanneh. Iamo' lemulun luk lutep bang bada' ineh, lemulun ineh luk kuan Taman idi Anak ineh pana'.

¹⁰Idi kudeng idé lemulun luk macing nemuyuh, idi luk nguit bada' luk baken ratnan ineh, aleg muyuh maré neneh umak ruma' muyuh, idi aleg maré tabi' kuanneh.

¹¹Ngaceku idé-idé luk maré tabi' kuanneh, ieh mangun ku rurunneh bang kekammeneh luk dat ineh.

¹²Sagan pana' mula' luk belénku nemuyuh, na ui pian ngayud ku geretas idi dawat, iamo' ui merapet macing nemuyuh idi pegayam petutup, pad awang tau meligan peh.

¹³Anak-anak kinanakmu luk decur luk pinili' maré tabi' kuanmu.

3 Yahya

3 Yahya 1

- ¹Rat negku, seburur lun rayeh — Kuan Gayus luk inanku mawa dengan matu.
- ²O luk inanku mawa, ui sembayang pad iko miak uen ngeperuan bang luk amung-amung, idi pad iko do' ulun — mepad kudeng niatmu pangeh nengalap do' teh.
- ³Ui pelaba awang niat kareb tuda'-tuda' kinanak nacing idi nemaré kali' ratnan sirimu, idi kudeng apeh iko mulun bang luk matu.
- ⁴Idi na luk idi awang negku luk meluun rayeh ratnan ini, ieh ineh ninger ratnan anak-anakku luk mulun bang luk matu.
- ⁵O luk inanku mawa, iko lutep bang kekamen luk ruenmu kuan kinanak-kinanak tau, sagan pana' lemulun ineh sakai.
- ⁶Ideh nemaré kali' ratnan awamu pa kiung sidang tungé'. Do' ngedengan nedeh pad ideh nacu lawédeh maya' kudeng luk petulu dengan Allah.
- ⁷Ngaceku ideh nenalan ngakem kuan Keristus dengan na ngalap tabpar rat nelun lukna manu ineh.
- ⁸Ngaceku ineh do' tau lun manu ngedengan lemulun ineh, pad tau miak ngalap babpat bang kekamendeh kuan bada' luk matu ineh.
- ⁹Ui nengayud tuda'-tuda' bala kuan sidang, iamo' Diotrepes luk sikal pa luundeh, na pian ngalap nekai.
- ¹⁰Ngaceku ineh kareb ui macing, ui pian ngegala' amung-amung luk inau'neh ineh: ieh neh kuyoneh nekai, idi balihneh pana'! Iamo' na ieh musam ku ineh. Iamo' ieh ara' nganak kinanak-kinanak tau, kareb ideh macing idi ieh mebpeng lemulun luk sikal nganak nedeh, idi nala' nedeh rat bang sidang.
- ¹¹O luk inanku mawa aleg iko nginud luk dat, iamo' nginud luk do'. Lemulun luk nganau' luk do', ieh ineh ratnan Allah; idi lemulun luk nganau' luk dat ineh nateh nenier Allah.

¹²Amung-amung lemulun ngubur ni Demitrius. Luk matu ineh pana' ngubur neneh. Idi kai pana' maré kali' ratnan ineh, idi muyuh kali' bala kai ineh matu peh.

¹³Inan teh mula' luk belénku namu, iamo' na ui pian ngayud ku dawat idi péh.

¹⁴Iamo' na mio teh ui meraept papu' namu, idi kiteh miak pegayam petutup.

¹⁵Awang kuanmu. Amung-amung lun rurummu maré tabi' namu. Do' maré tabi' kuan anid-anid lun rurum kiteh.

Yahuda

Yahuda 1

¹Rat ni Yahuda, demulun Yésus Keristus, idi kinanak Yakub — Kuan lemulun luk tinawar Allah luk mulun bang awa Allah Taman idi luk inita Yésus Keristus:

²Do' éi', awang, idi awa amé'-amé' mula kuan muyuh.

³O amung-amung luk inanku mawa, ui pelaba pian ngayud surat kuan muyuh ratnan ulun tau luk pad-pad ineh, iamo' niatku nesigio pad ui ngayud pad ngecuk nemuyuh pesingaro bang anu luk pangeh biré Allah sekua' mo' kuan amung-amung pupuNeh.

⁴Ngaceku inan lemulun luk na manu nesemeut luk ngisu' bala ratnan katu Allah tau, pad ngelinged kekamendeh luk melutak. Idi ideh ngarung Yésus Keristus, Allah Tuhan tau luk Sebuleng ineh. Idi mon pangeh ginala' bang Surat allah ratnan ukum luk tinina' kuan lemulun ineh.

⁵Sagan pana' muyuh kali' amug ini, ui sikal mada' nemuyuh ratnan kudeng apéh Tuhan nengulun pupu Israil luk inuitNeh remuat rat bang bawang Masir, iamo' mucu Ieh nengaté lemulun luk na manu.

⁶Ngerawé amung-amung melaikat luk nelemaba lakan lalud luk litep kuandeh, idi luk nenecan su luk inandeh tudo. Melaikat-melaikat ineh pange kiling ku kaling luk meruked pa liang tana' bang su luk medacem, pad macing Aco Ngukum luk rayeh ineh.

⁷Ngerawé Sodom, Gemora, idi bawang-bawang luk pelengit bawang ineh, su luk inan lemulun nenganau' luk kikem melaikat ineh pana'. Ideh pasét, idi deléi dengan deléi nenganau' luk inandeh na pekalai. Ideh inukum ku apui luk meruked ineh, mangun ku luk pinginud kuan amung lemulun.

⁸Kudeng ineh teh lemulun ini luk mileh nier ngelutak bururdeh sebuleng. Ideh ngebeneh lalud Allah, idi ngedat pudut-pudut luk buren déi' dita'.

⁹Iamo' Mikail, lun rayeh melaikat ineh pana' na nenganau' kudeng ineh. Kareb ieh nepekedaluh dengan Iblis, idi didueh nepesaad ratnan idé luk miak

ngalap butung Musa, idi na Mikail mekuu' ngukum Iblis dengan nguyo neneh, iamo' keburu'neh, "Aganeh Tuhan mebpeng namu!"

¹⁰Iamo' lemulun ini nguyo anun-anun luk na nekali'deh, idi anun-anun luk nekali'deh dengan na ileh, mepad kudeng pung luk meliputi, ieh ineh luk ngacing até kuandeh.

¹¹Ideh pelaba susa' ngaceku ideh nemaya' lawé Kain. Ideh nemaré bururdeh maya' sala' Bilam pad ngalap tabpar. Ideh sikal metueh mepad kudeng Kora, idi uen ngusag mepad kudeng ieh teh.

¹²Ideh mangun ku aceh sabeng luk melutak bang irau muyuh, kareb ideh mabuk dengan na migu'. Ideh ngerawé burudeh sebuleng mo'. Ideh mepad kudeng laput pinalid ku bui; mepad kudeng lawa kayuh luk na kebua' bang kareb, luk petulu, luk dueh kua' maté, idi luk meububput dengan uatneh;

¹³mepad kudeng ribut, luk bang abpa' rayeh, idi kekamendeh luk inan migu' mepad kudeng lapa'. Ideh mepad kudeng gituen luk nalan, idi kuan lemulun ineh dacek luk pingot-pingot pangeh tinina' macing raked-raked.

¹⁴Idi kuandeh ineh teh Enok, mupun luk keanem ratnan Adam, nemada' atun, keburu'neh, "Siruh, Tuhan macing dengan tuda'-tda' ngepulu' ribu melaikatNeh luk meligan,

¹⁵pad ngacing ukumNeh kuan amung-amung lemulun idi ngukum lemulun luk dat ngaceku amung-amung kekamendeh luk dat ineh luk pangeh inau'deh, idi ngaceku amung-amung kuyo lun luk dat ineh inan Allah!"

¹⁶Lemulun ini dureng-dureng idi ngadu'-ngadu'. Ideh maya' pian bururdeh sebuleng, idi ngubur bururdeh sebuleng idi ngedita' nelun baken pad ngalap tabpar kuan bururdeh sebuleng.

¹⁷O luk inanku mawa, do' muyuh ngerawé ratnan luk bila rasul-rasul Tuhan tau Yésus Keristus atun.

¹⁸Kebaladeh nemuyuh, "Kareb aco luk kekiped lemulun miak macing situnga nemuyuh, ieh ineh lemulun luk maya' pian bururdeh luk dat ineh."

¹⁹Idi ideh luk ngatad lemulun, idi maya' pian bururdeh, idi na luk idi Roh bang nedeh.

²⁰Iamo' muyuh ini, O luk inanku mawa, do' naped burur muyuh luun diri anu muyuh luk meligan, idi sembayang bang Roh Meligan.

²¹Do' matar burur muyuh bang awa Allah, idi nganét éi' Tuhan tau Yésus Keristus luk maré ulun luk meruked nemuyuh.

²²Idi do' méi' kuan lemulun luk merapang;

²³ngeruid nedeh ineh rat bang apui, idi ngulun nedeh. Idi kuan lun baken do' muyuh mé' idi matot, dengan megateh ku ayungdeh luk melutak ratnan lili tana' ini.

²⁴Idi kuan Allah luk melalud matar nemuyuh pad muyuh na metebaceng, idi luk naped nemuyuh dengan na sala' pa atun rayehNeh, dengan awang niat,

²⁵ieh ineh kuan Allah Lun Nengulun netau luk Sebuleng: rayeh, dita', tueh, idi lalud, ratnan Tuhan tau Yésus Keristus luk idi rat pun-pun idi nekini pana', idi macing ruked-ruked peh! Amin.

Bala Luk Linio

Bala Luk Linio 1

¹Ini bala luk linio Yésus Keristus idi luk biré Allah Neneh, pad ngegala' kuan demulun-demulunNeh, anun-anun luk miak mangun dengan mesaget. Keristus nengecuk melaikatNeh maré kali' ratnan ineh kuan demulunNeh, Yahya,

²idi Yahya nemada' ratnan amung-amung luk sinierneh. Ini bala Yahya ratnan bala luk biré Allah, idi bada' luk matu luk linio Yésus Keristus.

³Samal kuan lemulun luk maca' surat ini, idi amal kuan lemulun luk ninger bada' luk biré ini, idi luk maya' luk inayud bang surat ini, ngaceku karebneh pangeh muneng.

⁴Rat ni Yahya kuan tudu' sidang luk déi' Asia: Do' katu idi awang temurun kuan muyuh ratnan Allah, Luk idi nekini, idi Luk pangeh idi atun, idi Luk miak macing teh, idi ratnan tudu' roh luk pa kiung kerusiNeh,

⁵idi ratnan Yésus Keristus, Lun Nekali' luk lutep maya' jani' ineh, ieh ineh Anak luk atun luk tinui rat arang lun naté, idi luk mangun ku raca' pa luun amung-amung raca' bang tana' ini. Ieh mawa netau, idi dengan dara'Neh Ieh nemuit netau ratnan amung-amung sala'tau.

⁶Ieh nenganau' netau mangun ku aceh imet imam-imam kuan Allah TamanNeh. Rayeh idi tueh kuan Yésus Keristus raked-raked peh! Amin.

⁷Siruh, Ieh macing dengan laput! Ieh miak siren amung lemulun, meluun teh lemulun luk nenebpek Neneh; idi amung-amung pupu bang tana' ini miak temido Neneh. Kali' rungen ineh mangun. Amin!

⁸"Ui ini Urup luk Pun-pun idi Urup luk Kekiped," kebala Tuhan Allah luk Meluun Lalud ineh, Luk idi nekini, Luk pangeh idi atun, idi Luk miak macing teh.

⁹Ui ini Yahya, kinanak muyuh. Idi bang Yésus ui ngalap babpat dengan muyuh bang susa', idi bang ImetNeh. Idi dengan muyuh ui tuman bang dereh.

Ui pangeh tila' déi' Pulau Patmos, ngaceku ui nemada' bala Allah idi bada' luk matu luk linio Yésus.

¹⁰Kareb aco Tuhan ui tigio Roh, idi ui neninger rat pa ketedku aceh uni tang luk rayeh kudeng uni serupit.

¹¹Kebalaneh, "Do' iko ngayud luk sirenmu idi maré surat ineh kuan tudu' sidang ini: Epesus, Smirna, Pergamum, Tiatira, Sardis, Piladelpia, idi Laudikia."

¹²Ui nelumi pian nier idé luk nepebala negku. Idi ui nenier tudu' kukud dawan luk ratnan amas.

¹³Luun uneddeh inan Seburur Lemulun luk kudeng Anak-Lemulun, luk kuyu' boyor macing ku kukudNeh, idi ruukNeh inabet ku abet amas.

¹⁴AbpukNeh mebuda', mepad kudeng buluh anak dumba luk mebuda' idi salju pana'; idi matehNeh mepad kudeng budung apui:

¹⁵kukudNeh mepad kudeng tekaling luk mesilo, luk iseb bang tetel, idi arodNeh mepad kudeng beri rueb luk medita' luk mula'.

¹⁶Ieh nengimet tudu' gituen bang paladNeh pa tinueh, idi remuat rat bang tangNeh aceh pelapet luk metadem, luk tadem pekop, idi kiungNeh mepad kudeng mateh aco luk pelaba rasat.

¹⁷Kareb ui nenier Neneh, ui neluka' iring kukudNeh mepad kudeng lemulun luk naté. Idi Ieh nengerareng tiku'Neh pa tinueh luunku idi nepebala, "Aleg matot, Ui ini Luk Pun-pun idi Luk Kekiped.

¹⁸Ui ini Luk Mulun. Ui pangeh naté, idi siruh, nekini Ui mulun raked-raked, idi inan bang tiku'Ku taka até idi su inan até.

¹⁹Ngaceku ineh do' iko ngayud anun-anun luk sirenmu, do' anun-anun luk bang kareb ini, idi luk miak macing teh.

²⁰Idi luk inalum ratnan tudu' gituen luk pangeh siniermu bang tiku'Ku pa tinueh, idi tudu' kukud dawan luk ratnan amas ineh: idi tudu' gituen ini, ieh

ineh melaikat kuan sidang luk tudu' ineh, idi tudu' kukud dawan ineh, ieh ineh tudu' sidang ineh teh.

Bala Luk Linio 2

¹"Kuan melaikat sidang luk déi' Epesus do' ngayud kudeng ini: "Idi ini bala rat Neneh luk ngimet tudu' gituen bang ticu'Neh luk pa tinueh, luk nala-nalan arang tudu' kukud dawan luk ratnan amas ineh.

²Ui kali' kekamenmu, erur, idi ulai niatmu. Ui kali' namu na perurum dengan amung-amung lemulun luk dat, iamo' iko pangeh nenutun amung-amung lemulun luk mala nedeh rasul, iamo' baken, idi pangeh iko nekali' nedeh mebalih.

³Iko mulai niat idi pangeh nemabeh dereh ngaceku ngadanKu dengan na musam.

⁴Iamo' ini adu'Ku namu: iko pangeh nenecan awamu luk pun-pun ineh.

⁵Do' ngerawé rat iapeh iko nebpeh! Do' uren ratnan sala'mu, idi nganau' kekamen luk inau'mu pun-pun ineh; kudeng iko na uren, Ui sikal macing namu idi mubuh kukud dawanmu ineh rat su luk inanneh.

⁶Iamo' iko miak buren ngaceku iko megateh niat ku kekamen lun Nikolai, luk inanKu megateh teh.

⁷Idé luk inan lalid, do' ieh ninger bala Roh luk kuan amung-amung sidang! "Kuan lemulun luk ngalap tueh, Ui miak maré akan luk ratnan bua' lawa ulun luk bang Kabun Allah.

⁸"Kuan melaikat sidang luk déi' Smirna do' ngayud kudeng ini: "Ini bala rat Neneh luk Pun-pun idi luk Kekiped, luk pangeh naté, idi muli' mulun teh.

⁹Ui pangeh kali' susa'mu idi asi'mu—iamo' setuneh iko mula binaweh. Ui kali' kuyo ratnan lemulun luk mala nedeh lun Yahudi, iamo' baken, iamo' ideh aceh ruma' sembayang Sétan.

¹⁰Aleg iko matot ku susa' luk macing namu teh. Siruh, Iblis sikal nuet sebuang muyuh bang tutup, pad muyuh tetunin; idi muyuh miak ngalap dereh teh

bang pulu' aco kinioneh. Do' iko lutep pad macing maté, idi Ui miak maré kuanmu pata ulun ineh.

11"Idé luk inan lalid, do' ieh ninger bala Roh luk kuan amung-amung sidang. "Idi lemulun luk metueh, na tu-tu ieh miak ngalap dereh até luk kedueh ineh.

12"Kuan melaikat sidang Pergamum, do' ngayud kudeng ini: "Ini bala rat Neneh luk inan pelapet metadem idi tadem pekop ineh.

13Ui kali' su inanmu tudo', ieh ineh su inan kerusi Sétan. Iko ngimet ngadanKu idi na necan anumu Negku, sagan pana' bang kareb Antipas, lun nekali' Negku luk lutep ineh, luk pangeh pinaté pa kiung muyuh, su luk inan Sétan tudo.

14Iamo' ini sesuut adu'ku namu, inan teh denganmu lemulun luk ngimet bada' Bilam, luk nemada' ni Balak pad ngeraruh nelun pupu Israil, pad ideh kuman luk pangeh biré kuan akang, idi pasét teh.

15Kudeng ineh teh inan denganmu lemulun luk ngimet bada' lun Nikolai luk mepad kudeng ineh teh.

16Ngaceku ineh do' uren. Kudeng na, Ui macing namu dengan mesaget, idi munu' lemulun ineh ku pelapet luk remuat rat bang tangKu.

17"Idé luk inan lalid, do' ieh ninger bala Roh luk kuan amung-amung sidang! "Kuan lemulun luk metueh Ui maré manna luk inapung ineh, idi Ui maré kuanneh aceh batu luk mebuda', idi luun batu ineh inayud aceh ngadan luk mebaruh luk na miak kali' seburur lemulun pana', iamo' lemulun luk ngalap ineh mo' luk kali'.

18"Kuan melaikat sidang déi' Tiatira do' ngayud kudeng ini: "ini bala Anak Allah, luk matehNeh mepad kudeng budung apui, idi kukudNeh mepad kudeng tekaling luk mesilo.

19Ui kali' kekamenmu. Ui kali' awa, anu, asa', idi ulai niatmu. Ui kali' kekamenmu nekini meluun do' ratnan luk atun.

²⁰Iamo' ini adu'Ku namu: iko nima' decur luk ngadan Isabel luk mala neneh nabi decur. Ieh mada' idi ngeraruh demulun-demulunKu pad ideh pasét idi kuman luk biré kuan akang.

²¹Ui nemaré kuanneh aceh kareb pad ieh miak uren, iamo' na ieh sikal uren ratnan pasét ineh.

²²Ngaceku ineh Ui ngacing ét kuanneh luun luk inanneh rudap, idi ideh luk pasét denganneh miak semuet denganneh bang dereh luk rayeh, kudeng ideh na uren ratnan maya' kekamen decur ineh.

²³Idi Ui miak ngaté anak itinneh ku luk kadan, pad amung-amung sidang kali' ratnan Ui ini kali' terawé idi lili lemulun, idi Ui miak ngua' kuan muyuh maya' kekamen muyuh.

²⁴"Iamo' muyuh lun baken luk déi' Tiatira na nemaya' bada' luk dat ineh. Muyuh na nesibada' luk titen lun baken 'Kekamen Sétan luk medalem.' Ui pebala nemuyuh, na Ui ngerareng babeh luk baken luun muyuh.

²⁵Iamo' amung-amung luk inan bang palad muyuh do' ngimet meraben pad Ui macing.

²⁶⁻²⁸Kuan lemulun luk metueh idi luk lutep nganau' luk pianKu macing kekipedneh, Ui miak maré lalud, mepad kudeng luk ilapKu ratnan TamanKu: Ui miak maré kuandeh lalud pa luun amung-amung pupu, pad ideh ngimet nedeh dengan rukud belawan, idi mila' nedeh mepad kudeng kuden. Idi teh Ui maré kuandeh gituen pekak.

²⁹"Idé luk inan lalid, do' ieh ninger bala Roh luk kuan amung-amung sidang.

Bala Luk Linio 3

¹"Kuan melaikat sidang luk déi' Sardis, do' ngayud kudeng ini: "Ini bala rat Neneh luk kuan tudu' Roh Allah, idi tudu' gituen ineh. Ui kali' kekamenmu. Iko inan ngadan mulun, iamo' setuneh iko maté.

²Do' kulat idi ngetueh amung-amung luk ketecan idi luk sikal maté teh. Ngaceku Ui kali' na luk idi kekamenmu luk meligan pa kiung AllahKu.

³Ngaceku ineh, do' ngerawé kudeng apeh luk pangeh ilapmu idi pindengermu. Do' nginita ineh idi uren. Kudeng iko na kulat, Ui sikal macing kudeng lemulun luk mano, idi iko na kali' ratnan karebneh luk Ui sikal macing namu.

⁴Iamo' inan teh denganmu déi' Sardis ineh tuda'-tuda' lemulun luk na nengelutak ayungdeh. Ideh miak nalan pad-pad denganKu inayung ku luk mebuda', ngaceku ideh mayu.

⁵Lemulun luk metueh miak uen ngayung ku ayung luk mebuda', idi na tu-tu Ui miak ngiu' ngadandeh rat bang surat ulun ineh. Ui miak ngamo ngadandeh pa kiung TamanKu idi pa kiung melaikat-melaikatNeh.

⁶"Idé luk inan lalid do' ieh ninger bala Roh luk kuan amung-amung sidang!

⁷"Kuan melaikat sidang luk déi' Piladelpia, do' ngayud kudeng ini: "Ini bala rat Neneh luk meligan idi luk matu, luk ngimet taka Daud, luk ngukab, idi na seburur pana' miak ngitek, luk ngitek, idi seburur pana' na miak ngukab.

⁸Ui kali' kekamenmu. Siruh, Ui nenganau' pa kiungmu aceh tanga' luk mukab, idi seburur pana' na miak ngitek neneh; ngaceku sagan pana' laludmu sesuut, iamo' iko pangeh nemaya' balaKu dengan na ngalum ngadanKu.

⁹Siruh! Lemulun luk ratnan ruma' sembayang Sétan, lun mebalih luk mala nedeh lun Yahudi, iamo' baken, Ui nganau' nedeh macing tekeradung sembayang iring kukudmu, pad ideh kali' Ui ini mawa namu.

¹⁰Ngaceku iko pangeh nenginita bada'Ku ratnan ulai niat ineh, Ui pana' miak nginita namu ratnan tutun luk macing kuan amung uang tana' ini, idi luk nutun amung lemulun bang tana' ini.

¹¹Ui macing dengan mesaget. Do' ngimet anun-anun luk idi bang paladmu, pad seburur na miak ngalap patamu.

¹²Ui sikal nganau' lemulun luk metueh mangun ku aceh diri bang ruma' AllahKu, idi na tu-tu ieh miak remuat rat déi'. Idi Ui ngayud luunneh ngadan AllahKu idi ngadan bawang AllahKu, ieh ineh Yerusalim luk mebaruh luk

temurun rat surga ratnan AllahKu ineh, idi teh Ui ngayud luunneh ngadanKu luk mebaruh ineh.

¹³"Idé luk inan lalid, do' ieh ninger bala Roh luk kuan amung-amung sidang.

¹⁴"Kuan melaikat sidang luk déi' Laudikia, do' ngayud kudeng ini: "Ini bala rat Neneh luk ngadanNeh Amin, ieh ineh Lun Nekali' luk lutep maya' jani' idi luk matu, idi Luk Pun-pun ratnan amung-amung pudut Allah.

¹⁵Ui kali' kekamenmu, iko ineh meteneb pana' na, melau' pana' na. Ui sikal kudeng iko meteneb kian melau' lek.

¹⁶Ngaceku iko kudeng ineh damé, idi melau' pana' na, idi meteneb pana' na, Ui sikal nguta' namu rat bang tangKu.

¹⁷Ngaceku iko pebala, ui lun do', idi ui pangeh nengalap mula' binaweh, sebuleng pana' nateh luk na idi negku; iamo' na iko kali' iko selemulun luk dat, luk inan méi', luk masi', mebuser, idi lubpa.

¹⁸Ngaceku ineh Ui mada' namu, do' melih rat Negku amas luk pangeh tinutun ku apui, pad iko mangun ku lun do', idi ayung luk mebuda' pad iko inan ayung, pad iko na nalan lubpa idi na migu' siren lemulun. Idi melih ubat luk miak pingubat matehmu, pad iko miak nier.

¹⁹Idi tuda'-tuda' lemulun luk inanKu mawa Ui mada' idi ngukum nedeh. Ngaceku ineh do' mekéi' idi uren.

²⁰Siruh, Ui tuped munung tanga' idi nateg; kudeng idé luk ninger balaKu idi ngukab tanga', idi Ui miak semuet bang neneh, idi kuman denganneh, pad ieh pana' denganKu.

²¹Ui maré lemulun luk metueh, tudo denganKu luun kerusiKu, mepad kudeng Ui pana' pangeh metueh idi tudo dengan TamanKu luun kerusiNeh.

²²"Idé luk inan lalid, do' ieh ninger bala Roh luk kuan amung-amung sidang."

Bala Luk Linio 4

¹Kareb ineh inan aceh luk sinierku. Ui nenier aceh tanga' luk mukab déi' surga. Idi arod luk pindengerku pun-pun luk mepad kudeng uni serupit

nepebala, "Do'umak amé' tungé idi Ui sikal mada' sirenmu anun-anun luk miak mangun mucu."

²Petacu ui tigio Roh, idi inan aceh kerusi déi' surga idi inan Luk tudo luun kerusi ineh teh.

³Idi kiungNeh merasat mepad kudeng batu luk mebirar idi bau burur; idi inan tegkang nengelibut kerusi ineh, mepad kudeng batu luk bata' uduh ayuneh.

⁴Idi libut-libut kerusi ineh inan dueh ngepulu' apat kerusi, idi luun amung-amung kerusi ineh inan dueh ngepulu' apat lun rayeh luk tudo, dengan ayung luk mebuda', idi luun uluhdeh inan pata amas.

⁵Idi remuat rat bang kerusi ineh kilep, arod, idi lalam; idi inan tudu' lapung luk tinutud pa atun kerusi ineh, ieh ineh tudu' roh Allah.

⁶Idi pa atun kerusi ineh inan luk mepad kudeng abpa' rayeh luk mesor, mepad kudeng gelas luk pelaba do' ayuneh. Idi luun uned kerusi ineh idi libut-libut kerusi ineh teh inan apat pudut luk mulun, panu' ku mateh pa atun idi pa keted.

⁷Idi pudut luk mulun luk pun-pun ineh mepad kudeng balang, idi luk kedueh ineh mepad kudeng anak sapi', idi luk keteluh ineh mepad kudeng kiung lemulun, idi luk keapat mepad kudeng kanui luk temulud.

⁸Idi apat pudut luk mulun ineh, anid-aniddeh inan anem ilad, panu' ku mateh pa luun idi pa dalem, idi ideh menani dengan na ucu' tebaco kedangan, "Meligan, meligan, meligan Tuhan Allah luk Melalud, Luk pangeh idi atun, Luk idi nekini, idi Luk miak macing teh."

⁹Idi anid-anid kareb, pudut luk mulun ineh ngerayeh idi ngedita' idi ngubur Neneh luk tudo luun kerusi ineh, idi luk mulun raked-raked.

¹⁰Idi dueh ngepulu' apat lun rayeh ineh pana' tekeradung pa kiung Luk tudo luun kerusi ineh teh idi sembayang Neneh luk mulun raked-raked; idi ideh ngerareng patadeh pa atun kerusi ineh, kebaladeh,

¹¹"O Tuhan idi Allah kai, Iko mayu ngimet rayeh, dita', idi lalud. Ngaceku Iko nemudut luk amung-amung, idi dengan pinianMu amung-amungdeh pangeh inau' idi pangeh mulun teh."

Bala Luk Linio 5

¹Ui nenier aceh surat bang paladNeh pa tinueh Luk tudo luun kerusi ineh. Idi inan luk inayud pekop surat ineh, idi ieh itu ku tudu' etu.

²Idi ui nenier teh seburur malaikat luk metueh mada' dengan tang luk rayeh, kebalaneh, "Idéké petulu miak ngelesad surat ini, idi narak etuneh?"

³Idi do' bang surga idi bang tana' pana' idi meluun teh pa liang tana', seburur pana' nateh luk miak ngelesad surat ineh idi nier neneh.

⁴Idi ui nangi' ngaceku na seburur lemulun pana' luk mayu ngelesad surat ineh idi nier neneh.

⁵Idi inan seburur rat arang amung-amung lun rayeh ineh nepebala negku, "Aleg nangi', siruh, Balang luk ratnan pupu Yahuda, ieh ineh Uat Daud ineh, pangeh nengalap tueh pad Ieh miak ngelesad surat idi narak tudu' etu ineh."

⁶Idi ui nenier luun uned kerusi ineh, idi arang apat pudut luk mulun, idi arang amung-amung lun rayeh ineh, netuped aceh Anak Dumba luk mepad kudeng pangeh kirat ayuneh, idi luk inan tudu' unga, idi tudu' mateh, ieh ineh tudu' roh Allah luk pangeh icuk kuan aput-aput tana' ini.

⁷Idi Anak Dumba ineh nengalap surat ineh rat bang paladNeh pa tinueh Luk tudo luun kerusi ineh.

⁸Kareb Ieh nenganau' ineh, idi apat pudut luk mulun ineh idi dueh ngepulu' apat lun rayeh ineh netekeradung pa kiung Anak Dumba ineh, idi anid-aniddeh uned ngimet giula' idi bigan amas panu' ku umau luk do' buen, ieh ineh sembayang lun manu.

⁹Idi ideh menani aceh nani luk mebaruh, unineh, "Iko mayu miak ngalap surat ineh, idi ngelesad etuneh. Ngaceku Iko pangeh kirat, idi dengan

dara'Mu Iko nenguli' lemulun kuan Allah ratnan anid-anid babpat, buri', inul, idi pupu.

¹⁰Iko pangeh nenganau' nedeh mangun ku aceh imet imam-imam kuan Allah tau, idi ideh miak ngimet tana' ini.”

¹¹Idi teh ui nenier, idi neninger uni tang melaikat luk mula' libut-libut kerusi ineh idi apat pudut luk mulun idi amung-amung lun rayeh ineh. Inan tuda'-tuda' ngeribu idi tuda'-tuda' ngepulu' ribu melaikat ineh.

¹²Ideh menani dengan uni tang luk rayeh, "Anak Dumba ineh luk kirat ineh mayu miak ngalap lalud idi mula' binaweh, ileh, idi tueh, dita', rayeh, idi ubur!”

¹³Idi ui ninger teh anid-anid pudut luk bang surga, idi luk bang tana', idi luk pa liang tana', idi luk bang abpa' rayeh, idi amung-amung luk bangneh ineh pebala, "KuanNeh luk tudo luun kerusi raca', idi kuan Anak Dumba ineh inan ubur, dita' rayeh, idi lalud, macing raked-raked!”

¹⁴Idi apat pudut luk mulun nepebala, "Amin!" Idi amung-amung lun rayeh netekeradung idi nesembayang.

Bala Luk Linio 6

¹Idi ui nenier Anak Dumba ineh ngukab sebuleng ratnan luk ketudu' etuneh, idi ui neninger sebuleng rat arang apat pudut luk mulun ineh pebala mepad kudeng uni lalam, "Do' amé' tungé!”

²Idi ui nenier, inan aceh kuda luk mebuda, idi lemulun luk tudo luunneh ineh ngimet aceh binor; idi aceh pata pana' pangeh biré kuanneh. Ieh neremuat dengan tuehneh, pad ieh miak ngelaya' pupu-pupu.

³Idi Anak Dumba ineh nengukab etu luk kedueh ineh idi ui neninger pudut luk mulun luk kedueh ineh pebala, "Do' amé' tungé!”

⁴Idi aceh kuda luk baken neremuat, ieh ineh kuda luk mesia'; idi kuan lemulun luk tudo luunneh ineh pangeh buré lalud ngacing bunu' luun tana' pad lemulun pepaté; idi aceh pelapet luk rayeh pangeh biré kuanneh.

⁵Idi Anak Dumba ineh nengukab etu luk keteluh ineh, idi ui neninger pudut luk mulun luk keteluh ineh pebala, "Do' amé' tungé!" Idi ui nenier, inan aceh kuda luk mitem; idi lemulun luk tudo luunneh ineh inan aceh timang bang paladneh.

⁶Ui neninger uni mepad kudeng tang arang uned apat pudut luk mulun ineh pebala, "Teluh lio setangal bara tabpar seaco. Iamo' matar umau dengan abpa' anggur ineh."

⁷Idi Anak Dumba nengukab etu luk keapat, idi ui neninger uni tang pudut luk mulun luk keapat ineh pebala, "Do' amé' tungé!"

⁸Ui nenier inan aceh kuda luk mabuh, idi lemulun luk tudo luunneh ineh Até ngadanneh, idi Su inan Até pana' nemaya' neneh. Kuan didueh ineh pangeh biré lalud pa luun sebabpat rat arang apat babpat tana' pad ngaté ku pelapet idi ku iru' idi ét idi ku pung-pung luk meliputi bang tana' ini.

⁹Idi Anak Dumba nengukab etu luk kelimeh ineh, Ui nenier pa liang bubpun ineh amung-amung ulun lemulun luk pangeh pinaté ngaceku bala Allah, idi ngaceku ideh lutep mada' luk nekali'deh.

¹⁰Ideh nengitang, kebaladeh, "O Tuhan luk Melalud, meligan idi matu! Tuda' io teh kareb nateh Iko ngelio lemulun bang tana' ini idi ngukum nedeh ngaceku ideh nengaté nekai?"

¹¹Anid-aniddeh pangeh biré aceh kuyu' luk mebuda', idi pangeh bila kuandeh, do' ideh nganét segageh teh pad demulun-demulun idi kinanak-kinanak lu serurum dengandeh ineh, luk miak pitayen, petap kinula'deh.

¹²Idi ui nenier Anak Dumba nengukab etu luk keanem ineh. Idi inan ruyuh tana' luk rayeh, idi mateh aco pana' mangun mitem, mepad kudeng kibungguni luk mekara urat, idi bulan mangun mesia' mepad kudeng dara'.

¹³Gituen-gituen bang langit nerurug amé' tana', mepad kudeng lawa gita' luk ngerurug bua'neh, luk melu kareb ieh neguyu' ku bui luk mula'.

¹⁴Langit pana' netutu' mepad kudeng surat luk linulun, idi anid-anid pegkung idi pulau pangeh binubuh idi neremuat rat su luk inandeh.

¹⁵Idi raca'-raca' bang tana', lun rayeh-rayeh, lun rayeh baweh, lun do', lun mesangit, idi anid-anid lemulun, do' demulun idi lun do' pana', amung-amungdeh sigapung bang lubang batu idi arang batu-batu luk luun pegkung.

¹⁶Ideh nengitang kuan pegkung-pegkung idi batu-batu ineh, "Do' ngeritep nekai, idi ngelinged nekai ratnan matehNeh luk tudo luun kerusi ineh, idi ratnan useh Anak Dumba ineh!

¹⁷Aco rayeh, aco usehdeh ineh pangeh nacing, idi idéké luk miak tuman ratnan ineh?"

Bala Luk Linio 7

¹Pangeh ineh ui nenier apat melaikat luk tuped bang apat lidung tana', luk ngimet apat bui, pad bui na miak ngiup luun tana', abpa' rayeh, idi aceh lawa kayuh pana'.

²Idi ui nenier teh inan seburur melaikat luk numak rat pa busat aco, dengan etu Allah luk mulun ineh. Ieh nengitang kuan apat melaikat luk inan Allah nemaré lalud ngusag tana' idi abpa' rayeh.

³Kebala melaikat ineh, "Aleg ngusag tana', abpa' rayeh, idi aceh lawa kayuh pana', pad kai ngetu nan madu' demulun-demulun Allah tau."

⁴Idi ui pangeh bida' ratnan kinula' lemulun luk pangeh itu Allah, ieh ineh 144,000, luk pangeh itu ratnan amung-amung inul lun Israil.

⁵Ratnan inul Yahuda pangeh itu 12,000; ratnan inul Rubin 12,000; ratnan inul Gad 12,000;

⁶ratnan inul Asir 12,000; ratnan inul Naptali 12,000; ratnan inul Manasé 12,000;

⁷ratnan inul Simon 12,000; ratnan inul Liwi 12,000; ratnan inul Iskar 12,000;

⁸ratnan inul Sebulon 12,000; ratnan inul Yusup 12,000; ratnan inul Benjamin 12.000.

⁹Pangeh ineh ui nenier aceh tebubpun luk rayeh, luk na miak iapin seburur lemulun pana'. Ideh ineh ratnan anid-anid pupu, babpat, inul, idi buri. Ideh

tuped pa atun kerusi idi pa atun Anak Dumba ineh, idi ideh nengayung ku ayung luk mebuda', idi nengimet angkat piasau bang paladdeh.

¹⁰Ideh nengitang, kebaladeh, "Ulun tau ini ratnan Tuhan tau luk tudo luun kerusi raca' ineh, idi ratnan Anak Dumba teh!"

¹¹Amung-amung melaikat ineh pana' netuped libut-libut kerusi, lun rayeh, idi apat pudut luk mulun ineh teh, idi ideh netekeradung pa atun kerusi ineh idi sembayang inan Allah,

¹²kebaladeh, "Amin! Maré ubur, rayeh, ileh, ubur, dita', lalud, idi tueh kuan Tuhan kai, macing ruked-ruked peh! Amin!"

¹³Idi kebala seburur rat arang lun rayeh-rayeh ineh negku, "Idéké lemulun luk inayung ku kuyu' mebuda' ineh, idi rat iapehké ideh?"

¹⁴Idi keburu'ku neneh, "Na kali'ku. Iko luk kali' ratnan ineh." Idi kebalaneh negku, "Ini lemulun luk neremuat ratnan susa' luk rayeh ineh. Ideh pangeh nemupu' kuyu'deh idi nengebuda' nedeh ku dara' Anak Dumba ineh.

¹⁵Ineh punneh ideh idi pa atun kerusi Allah, idi ngakem kuanNeh tebaco kedangan bang ruma'Neh. Ieh luk tudo luun kerusi ineh miak malad lepo kibungNeh pad ngelungung nedeh.

¹⁶Na ideh miak melau idi meparing teh, idi na ideh ketukan lau' mateh aco idi anun-anun luk melau' pana'.

¹⁷Ngaceku Anak Dumba luk luun uned kerusi ineh miak mangun ku Lun Matar nedeh, idi nguit nedeh amé' inan bued abpa' luk mulun. Idi Allah pana' miak miid amung-amung abpa' mateh ratnan matehdeh ineh."

Bala Luk Linio 8

¹Kareb Anak Dumba nengukab etu luk ketudu' ineh, idi bang surga ali-ali lélé setangal jam kinioneh.

²Idi ui nenier tudu' melaikat luk tuped pa kiung Allah ineh, idi pangeh biré kuandeh tudu' serupit.

³Idi seburur melaikat luk baken nacing idi netuped iring bubpun ineh. Ieh nengimet bigan amas luk inan luk sabpen luk do' buen, idi pangeh biré kuanneh tuda'-tuda' luk do' buen, pad ieh miak ngeseb ineh pad-pad dengan sembayang lun manu luun bubpun luk ratnan amas luk pa atun kerusi raca' ineh.

⁴Idi rabpun luk do' buen ineh pad-pad dengan sembayang lun manu ineh numak iné' pa kiung Allah rat bang palad melaikat ineh.

⁵Idi melaikat ineh nengalap bigan ineh idi nenganau' apui luk ratnan bubpun ineh bang idi, idi ieh nenala' ineh luun tana'. Idi nangun tuda'-tuda' uni lalam, arod, kilep, idi ruyuh tana'.

⁶Idi tudu' melaikat ngimet tudu' serupit ineh netemina' sikal ngiup ineh.

⁷Idi melaikat luk pun-pun ineh nengiup serupitneh. Idi udan batu idi apui netemurun puar-puar dengan dara', idi amung-amung ineh inutang kuan tana'. Idi sebuleng ratnan teluh babpat tana' neseb, idi sebabpat ratnan teluh babpat lawa kayuh neseb, idi amung-amung uduh ineh neseb teh.

⁸Idi melaikat luk kedueh ineh nengiup serupitneh, idi nangun aceh luk ayu-ayu mepad kudeng pegkung luk rayeh luk mebudung ku apui pangeh tila' bang abpa' rayeh. Idi sebabpat ratnan teluh babpat abpa' rayeh ineh mangun ku dara',

⁹Idi sebabpat ratnan teluh babpat amung-amung pudut luk bang abpa' luk inan niat pangeh naté, idi sebabpat ratnan teluh babpat amung-amung kapal nusag.

¹⁰Idi melaikat luk keteluh ineh nengiup serupitneh. Aceh gituen luk rayeh nerurug rat bang langit, luk mebudung mepad kudeng budung sesakan, idi gituen ineh nengeritep sebabpat ratnan teluh babpat amung-amung abpa' idi amung-amung bued abpa' pana'.

¹¹(Idi ngadan gituen, ieh ineh Luk Mepét.) Idi sebabpat ratnan teluh babpat abpa' ineh mangun mepét, idi mula' lemulun naté ku abpa' ineh ngaceku ieh pangeh mangun mepét.

¹²Idi melaikat luk keapat ineh nengiup serupitneh, idi sebabpat ratnan teluh babpat mateh aco bibpet, idi sebabpat ratnan teluh babpat bulan, idi sebabpat ratnan teluh babpat gituen-gituen, pad sebabpat ratnan teluh babpat ineh medacem peh, pad sebabpat ratnan teluh babpat acang aco ineh na luk idi acang, idi dacem pana' kudeng ineh teh.

¹³Idi ui nenier idi neninger aceh kanui netemulud déi' arang gawa' luk nengitang, "Mesusa', mesusa', mesusa' kuan amung lemulun luk tudo bang tana' ini, ngaceku ratnan uni serupit luk uen teluh melaikat luk baken ineh ngiup."

Bala Luk Linio 9

¹Melaikat luk kelimeh ineh pana' nengiup serupitneh, idi ui nenier aceh gituen luk pangeh nerurug rat bang langit amé' luun tana', idi pangeh biré kuaneh taka tanga' lubang luk na miak teriin kidalemneh.

²Gituen ineh nengukab tanga' lubang luk na miak teriin kidalemneh ineh, idi rabpun neremuat rat bang lubang ineh, mepad kudeng rabpun tetel luk rayeh, pad mateh aco idi arang gawa' pana' medacem ngaceku ratnan rabpun lubang ineh.

³Idi kato-kato neremuat rat bang rabpun ineh amé' luun tana', idi pangeh biré kuandeh lalud luk mepad kudeng lalud menipal kara'.

⁴Idi pangeh bila kuandeh na miak ngaté uduh, lawa kayuh, idi tibu luk baken, iamo' ideh miak ngedereh lemulun luk na etu Allah nan madu'deh.

⁵Idi pangeh bila kuandeh pad ideh na ngaté nedeh, iamo' ngedereh nedeh pad macing limeh bulan kinioneh. Idi derehdeh ineh mepad kudeng kareb lemulun kitep menipal kara'.

⁶Kareb ineh teh lemulun miak nakap até, iamo' na miak kali' ineh, idi ideh sikal maté, iamo' até ineh buro rat nedeh.

⁷Idi ayu kato ineh mepad kudeng kuda luk temina' pebunu', idi nan uluhdeh inan mepad kudeng pata luk ratnan amas; idi kiungdeh mepad kudeng kiung lemulun.

- ⁸Abpukdeh mepad kudeng abpuk decur idi lipendeh mepad kudeng lipen balang.
- ⁹Idi nan ruukdeh inan mepad kudeng kuyuh' belawan, idi uni iladdeh mepad kudeng uni keréta dengan kuda luk pelaba ula' upun kareb pebunu'.
- ¹⁰Ideh inan iur mepad kudeng iur menipar kara', idi megalih teh. Idi bang iurdeh ineh inan lalud ngacing ét kuan lemulun pad macing limeh bulan kinioneh.
- ¹¹Idi raca'deh, ieh ineh melaikat lubang luk na miak teriin kidalemneh ineh. Ngadanneh bang buri' lun Iberani, Abadon, idi bang buri Grika, ngadanneh Apolion, (ilungneh "Luk Ngaté").
- ¹²Idi susa' luk pun-pun ineh pangeh nepelaba; idi inan dueh susa' luk miak macing baruh teh.
- ¹³Idi melaikat luk keanem ineh pana' nengiup serupitneh, idi ui neninger arod remuat ratnan apat unga bubpun amas luk pa kiung Allah ineh.
- ¹⁴Arod ineh pebala kuan melaikat luk keanem luk ngimet serupit ineh, "Muit apat melaikat luk kiling tangeb abpa' rayeh ineh, ieh ineh Abpa' Pirat."
- ¹⁵Idi apat melaikat ineh pinuit. Ideh pangeh tinina' kuan jam idi aco idi bulan idi lak ineh, pad miak ngaté sebabpat ratnan teluh babpat amung-amung lemulun.
- ¹⁶Idi kinula' amung-amung baweh luk inan kuda ineh 200 juta; ui pangeh neninger kinula'deh.
- ¹⁷Bang luk sinierku ui nenier kuda-kuda ineh idi lemulun luk tudo luundeh, ayudeh kudeng ini: ideh inan kuyu' belawan luk mesia' mepad kudeng apui, idi mebata' mepad kudeng batu luk bata' langit, idi mebirar mepad kudeng batu apui. Uluh kuda ineh mepad kudeng uluh balang, idi remuat rat bang tangdeh apui, rabpun, idi batu apui.

¹⁸Idi ngaceku ratnan teluh dereh ineh sebabpat ratnan teluh babpat amung-amung lemulun pinaté ku apui, rabpun, idi batu apui luk remuat rat bang tangdeh ineh.

¹⁹Ngaceku lalud kuda ineh inan bang tangdeh idi bang iurdeh. Iurdeh ineh mepad kudeng menipeh luk inan uluh, idi dengan ineh ideh ngatep lemulun.

²⁰Lun baken luk nateh pinaté ku dereh ineh, na nuren ratnan kekamendeh, iamo' ideh megéi sembayang inan ada' idi akang luk ratnan amas, pirak, tekaling, batu, idi kayuh, luk na miak nier idi ninger, idi luk na miak nalan pana'.

²¹Idi nateh ideh nuren ratnan ngaté lemulun, ratnan bangun, sét, idi pano pana'.

Bala Luk Linio 10

¹Idi ui nenier melaikat baken luk metueh, temurun rat bang langit. Ieh nengayung ku kuyu' laput, idi tegkang luun uluhneh. Kiungneh mepad kudeng mateh aco, idi kukudneh mepad kudeng diri apui.

²Bang paladneh inan aceh surat isuut luk lisad. Kukudneh pa tinueh ngeradu' luun abpa' rayeh. Idi kukudneh pa kabing ngeradu' luun tana'.

³Ieh nengitang mepad kudeng uni balang luk ngeku. Idi kareb ieh nengitang, tudu' lalam ineh pana' nenguni unideh anid-anid.

⁴Kareb tudu' lalam ineh pangeh muni, ui temina' ngayud, idi ui neninger aceh arod rat bang langit, kebalaneh, "Ngetu anun-anun luk pangeh bila tudu' lalam ineh, idi aleg ngayud ineh."

⁵Idi melaikat luk pangeh sinierku tuperd luun abpa' rayeh idi luun tana', nengiding ticu'neh pa tinueh nicul déi' langit,

⁶Idi ieh nepebulung ku ngadan Allah luk mulun raked-raked, idi luk nemudut langit dengan amung-amung uangneh, idi tana' dengan amung-amung uangneh, idi abpa' rayeh dengan amung-amung uangneh, kebalaneh, "Na kareb kuandeh teh!

⁷Iamo' kareb melaikat luk ketudu' ineh ngiup serupitneh, luk inalum Allah ineh uen ngacing, maya' kudeng luk bilaNeh kuan demulunNeh, nabi-nabi.”

⁸Idi arod luk pindengerku rat bang langit ineh, nepebala negku sekua' teh, kebalaneh, "Amé' iko, ngalap surat luk lisad luk bang palad melaikat luk tuped luun abpa' rayeh idi luun tana'.”

⁹Ui iné' matun melaikat ineh idi nemutuh neneh maré surat luk isuut ineh negku. Idi kebalaneh kuanku, "Do' ngalap idi kuman ineh, idi ieh miak nganau' batekmu mepét, iamo' bang tangmu ieh mepaci' mepad kudeng duru' tebikan.”

¹⁰Ui nengalap surat luk isuut ineh rat ticu' melaikat ineh, idi nekuman ineh, idi bang tangku ieh mepaci' mepad kudeng duru' tebikan, iamo' kareb ui pangéh nekuman ineh, ieh mepét bang batekku.

¹¹Idi ieh nepebala kuanku, "Do' iko mada' bala Allah sekua' teh ratnan tuda'-tuda' inul idi tuda'-tuda' pupu, inul, buri', idi raca'.”

Bala Luk Linio 11

¹Idi pangéh biré kuanku aceh bulu' luk mepad kudeng rukud ayunneh, idi keburineh, "Tumui iko, idi nari ruma' Allah idi bubpun, idi ngiap amung-amung lemulun luk sembayang bang ruma' Allah ineh.

²Iamo' aleg nari natad luk bal alad Ruma' Allah ineh, aganeh, ngaceku pangéh biré kuan lun pupu baken, idi bawang luk meligan ineh miak ridueneh apat ngepulu' dueh bulan kinioneh.

³Idi Ui miak maré dueh lun nekali' Negku mada' pad macing 1,260 aco kinioneh, idi didueh miak ngayung ku kibung guni.”

⁴Dueh lun nekali' ineh mepad kudeng dueh lawa saitun idi dueh kukud dawan luk tuped pa kiung Tuhan luk kuan tana' ini.

⁵Idi kudeng idé lemulun sikal ngesusa' nedidueh, apui miak remuat rat bang tang didueh idi ngaté amung-amung bunu' didueh; idi kudeng idé lemulun sikal ngesusa' nedidueh, idi na miak na ieh maté ratnan luk kudeng ineh.

⁶Didueh inan lalud ngitek langit pad na mudan laba' didueh mada', idi didueh inan lalud pa luun bued abpa' pad miak ngisu' ineh mangun ku dara', idi didueh miak ngelaya' tana' ku amung-amung ét, tuda'-tuda' kua' maya' pian didueh.

⁷Kareb didueh pangeh nengeriput luk nekali' didueh, idi pung luk meliputi luk remuat rat bang lubang luk na miak teriin kidalemneh ineh sikal munu' nedidueh. Ieh miak ngelaya' nedidueh, idi ngaté nedidueh.

⁸Idi butung didueh miak telubid nan dalam bawang luk rayeh, luk dengan pinginud titen Sodom idi Masir, su luk inan Tuhan didueh sinalib ineh.

⁹Lemulun rat arang amung-amung inul, babpat, buri', idi pupu pana' miak nier butung didueh teluh aco setangal kinioneh. Idi na ideh sikal nanem butung didueh.

¹⁰Idi lemulun bang tana' ini mawang niat ngaceku até didueh idi do' ria'. Ideh maré baré seburur kuan seburur, ngaceku dueh lun nabi ineh pangeh nengedereh lemulun luk tudo bang tana' ini.

¹¹Pangeh teluh aco setangal ineh idi niat ulun ratnan Allah nesemuet bang nedidueh, idi didueh netumui idi netuped; idi tot luk rayeh nacing kuan amung-amung lemulun luk nenier nedidueh ineh.

¹²Idi dueh nabi ineh neninger aceh tang luk rayeh rat bang langit luk nepebala nedidueh, "Umak amé' tungé!" Idi didueh numak iné' déi" langit maya' bang laput. Idi amung-amung bunu'deh pana' nenier nedidueh.

¹³Kareb ineh teh mangun ruyuh tana' luk rayeh, pad sebabpat ratnan pulu' babpat bawang ineh netabpa, idi 7,000 lemulun naté bang ruyuh tana' ineh, idi luk ketecan ineh matot idi nengerayeh Allah luk déi' surga.

¹⁴Idi susa' luk kedueh ineh pangeh nepelaba! Siruh, susa' luk keteluh ineh macing dengan mesaget!

¹⁵Idi melaikat luk ketudu' ineh nengiuip serupitneh, idi inan tuda'-tuda' arod déi' surga luk pebala, "Imet tana' ini mangun ku Imet Tuhan tau, idi Imet KeristusNeh, idi Ieh miak ngimet macing raked-raked peh."

¹⁶Idi dueh ngepulu' apat lun rayeh luk tudo luun kerusideh luk pa kiung Allah ineh munel sembayang inan Allah,

¹⁷Idi nepebala, "Kai ngubur Namu, O Tuhan Allah luk Melalud, Luk idi nekini idi Luk pangeh idi atun, ngaceku Iko makai laludMu luk rayeh, idi Iko pangeh ngimun ngimet!

¹⁸Lun luk na manu megateh niat ngaceku aco usehMu pangeh nacing, idi lun maté miak kumin. Ini karebneh inan maré tabpar kuan demulunMu, nabi-nabi, idi amung pupuMu luk matot Namu, do' luk isuut idi luk rayeh pana'. Ini karebneh inan ngaté amung lemulun luk ngusag tana' ini."

¹⁹Ruma' Allah luk déi' surga pana' mukab, idi megala Pati' Pejani'neh ineh bang ruma' ineh. Idi mangun tuda'-tuda' kilep, arod, lalam, ruyuh tana', idi udan batu luk mula'.

Bala Luk Linio 12

¹Idi aceh tanu' luk rayeh megala' bang langit, ieh ineh seburur decur luk nengayung ku mateh aco, idi bulan inan pa liang kukudneh, idi nan uluhneh ineh inan pata luk ratnan pulu' dueh gituen.

²Ieh mali' idi nengitang ngaceku mét idi dereh sikal nenganak.

³Idi aceh tanu' luk baken pana' megala' bang langit, ieh ineh inan aceh galau luk mesia', luk inan tudu' uluh, idi tudu' unga, idi luun uluhneh inan tudu' pata.

⁴Idi iurneh ngeruid sebabpat ratnan teluh babpat gituen bang langit, idi nenala' ineh luun tana'. Idi galau ineh netuped pa kiung decur luk uned sikal nenganak ineh, idi kareb ieh pangeh nenganak, galau ineh miak kuman anakneh ineh.

⁵Idi ieh nenganak seburur anak deléi luk miak ngimet amung-amung pupu dengan rukud belawan, idi anakneh kikem idi inuit iné pa atun Allah idi kerusiNeh.

⁶Idi decur ineh pana' neburo iné' su luk ali-ali; idi déi' inan su luk inan luk tinina' Allah kuanneh, pad ieh miak uen ngasa' déi' 1,260 aco kinioneh.

⁷Idi mangun aceh bunu' déi' surga, Mikail dengan amung-amung melaikatneh pebunu' dengan galau, idi galau dengan amung-amung bawehneh pana' nepebunu'.

⁸Iamo' galau idi bawehneh ineh linaya', idi su luk inandeh netutu' rat surga.

⁹Galau luk rayeh ineh tila', ieh ineh menipeh luk mengered, luk titen Iblis idi Sétan ineh, luk nenaluk amung uang tana' ini. Ieh pangeh tila' luun tana', idi amung-amung bawehneh pana' pangeh tila' denganneh.

¹⁰Idi ui neninger aceh arod déi' surga, luk pebala, "Nekini pangeh macing ulun, lalud, idi Imet Tuhan tau, idi lalud KeristusNeh; ngaceku luk ngadu' kinanak tau pangeh tila', ieh ineh luk ngadu' nedeh pa kiung Tuhan tau tebaco kedangan.

¹¹Kinanak-kinanak tau nengelaya' neneh ku dara' Anak Dumba ineh, idi ku bala luk nekali'deh ineh, idi ideh na méi' inan ulun didueh sagan pana' maté.

¹²Ngaceku ineh, do' mawang niat, O surga, idi amung-amung luk tudo bang namu! Idi mesusa' kuan tana' idi abpa' rayeh, ngaceku Iblis pangeh netemurun kuan medueh dengan usehneh luk rayeh, ngaceku ieh kali' karebneh pangeh mekamu'."

¹³Kareb galau ineh nenier neneh pangeh tila' bang tana', idi ieh nengerada' decur luk nenganak anak deléi ineh.

¹⁴Idi kuan decur ineh pangeh biré dueh ilad kanui luk rayeh ineh, pad ieh miak temulud amé' su luk ali-ali matun su luk inanneh, ieh ineh su inanneh uen nginita teluh lak setangal kinioneh, mado ratnan mateh menipeh ineh.

¹⁵Idi menipeh ineh nemuput abpa' mepad kudeng aceh bued abpa' rat bang tangneh rat pa keted decur ineh, pad ieh miak uen nganud ku bued abpa' ineh.

¹⁶Iamo' tana' ineh pangeh nengedengan decur ineh, dengan nengukab tangneh idi nenelen abpa' luk pinuput galau rat bang tangneh ineh.

¹⁷Idi galau ineh museh inan decur ineh, idi iné' pebunu' dengan inul decur ineh luk ketecan, ieh ineh amung-amung lemulun luk maya' ukum-ukum Allah idi luk lutep maya' bada' luk matu luk linio ratnan Yésus ineh.

¹⁸Idi galau ineh netuped tangeb abpa' rayeh.

Bala Luk Linio 13

¹Idi ui nenier aceh pung neremuat rat bang abpa' rayeh, luk inan pulu' unga idi tudu' uluh, idi nan unganéh ineh inan pulu' pata, idi inayud luun anid-anid uluhneh inan ngadan kuyo.

²Ayu pung luk sinierku ineh mepad kudeng kuir, kukudneh mepad kudeng kukud beruang, idi tangneh mepad kudeng tang balang. Idi galau ineh nemaré kuanneh tuehneh, kesusineh, idi laludneh luk rayeh.

³Idi ui nenier sebuleng uluhneh ayuneh mepad kudeng pangeh pinaté; iamo' urat luk inanneh naté ineh pangeh nepali', idi amung uang tana' pana' mawa ku pung ineh, idi nemaya' neneh.

⁴Ideh sembayang inan galau ineh, ngaceku ieh pangeh nemaré laludneh kuan pung ineh. Idi teh ideh nesembayang inan pung ineh, kebaladeh, "Idéké luk mepad kudeng pung ini? Idéké luk miak metueh rat neneh?"

⁵Idi pangeh biré kuan pung ineh tang luk mepanu' ku dita' niat idi kuyo, idi pangeh biré kuanneh lalud ngimet apat ngepulu' dueh bulan kinioneh.

⁶Ieh nengimun nguyo Allah, su luk inanNeh tudo, idi amung-amung luk tudo déi' surga ineh pana'.

⁷Ieh sinima' munu' amung-amung luk manu pad ieh nengelaya' nedeh, idi pangeh biré kuanneh lalud pa luun anid-anid babpat, inul, buri', idi pupu.

⁸Amung-amung lemulun bang tana' ini miak sembayang neneh, ieh ineh luk ngadanneh na inayud rat pun-pun tana' ini pinudut, bang surat ulun Anak Dumba luk kirat ineh.

⁹"Idé lemulun luk inan lalid, do' ieh ninger!

¹⁰Idé lemulun luk litep miak tebanen, kali' rungen ieh miak tebanen; idé lemulun luk litep pitayen ku pelapet, kali' rungen ieh pitayen ku pelapet teh. Ngaceku ineh na miak na pupu Allah tuman idi manu."

¹¹Idi ui nenier aceh pung luk baken remuat rat bang tana'. Ieh inan dueh unga luk mepad kudeng unga anak dumba, idi ieh nepebala mepad kudeng galau.

¹²Ieh nemakai amung-amung lalud pung luk pun-pun ineh pa kiungneh. Idi tana' ini dengan amung-amung luk tudo bangneh icukneh sembayang inan pung luk pun-pun ineh, luk pangeh dino' ratnan uratneh luk nguit maté ineh.

¹³Pung luk kedueh ineh nenganau' tanu'-tanu' luk rayeh, pad apui pana' temurun rat bang langit amé' bang tana' idi pa kiung lemulun teh.

¹⁴ieh nenaluk amung-amung luk tudo bang tana' ini ku mula' tanu' luk biré kuanneh dengan lalud nganau' amung-amung luk kudeng ineh pa kiung pung ineh. Ieh ngecuk uang tana' ini nganau' akang kuan pung luk pangeh inurat ku pelapet iamo' mulun.

¹⁵Idi pangeh biré kuan pung luk kedueh ineh lalud miak maré niat kuan akang pung ineh, pad akang ineh miak pebala idi ngaté amung-amung lemulun luk na sembayang neneh.

¹⁶Ieh nengecuk amung-amung lemulun, isuut idi rayeh, lun do' idi lun masi', luk pinuit idi demulun, pad aceh tanu' uen ngerareng nan ticu'deh pa tinueh idi nan madu'deh pana'.

¹⁷Seburur pana' na miak masui idi melih kudeng na inan tanu' ineh, ieh ineh ngadan pung ineh idi kinula' iap ngadanneh ineh.

¹⁸Pad kali' ilung ini, na miak na inan ileh. Lemulun luk inan ileh, do' ieh ngiap kinula' iap pung ineh; ngaceku kinula' iap ineh ngadan lemulun. Idi kinula'neh, ieh ineh 666.

Bala Luk Linio 14

¹Idi ui nenier Anak Dumba ineh netuped luun Pegkung Sion, idi pad-pad denganNeh inan 144,000 lemulun luk inayud ngadan Anak Dumba idi ngadan TamanNeh nan madu'deh.

²Idi ui neninger aceh arod rat bang langit, mepad kudeng beri rueb luk medita', idi mepad kudeng uni lalam luk rayeh. Idi arod luk pindengerku ineh mepad kudeng uni giula' luk tetagken lun luk nateg giula'deh.

³Idi ideh menani aceh nani luk mebaruh pa kiung kerusi ineh, idi pa kiung apat pudut luk mulun idi amung-amung lun rayeh ineh. Idi seburur pana' na miak sibada' nani ineh, iamo 144,000 lemulun luk inuli' rat bang tana' ini mo',

⁴ieh ineh lemulun luk nateh nengelutak bururdeh ku decur, ngaceku ideh anak luk pun mebaruh; idi ideh ini lemulun luk maya' Anak Dumba ineh iapeh-iapeh pana' ulekNeh. Idi ideh pangeh inuli' rat arang lemulun mangun ku bua' luk atun kuan Allah idi kuan Anak Dumba ineh.

⁵Rat mon ideh na mebalih idi na sala' teh.

⁶Idi ui nenier aceh melaikat baken luk temulud déi' arang gawa', idi ieh inan Bala luk Do' luk meruked luk miak badén kuan amung-amung lemulun luk tudo bang tana' ini, ieh ineh kuan anid-anid pupu, babpat, buri', idi inul.

⁷Ieh nengitang, "Do' matot inan Allah idi ngerayeh Neneh, ngaceku pangeh nacing karebNeh ngukum lemulun! Do' sembayang neneh luk nemudut langit, tana', idi abpa' rayeh dengan amung bued abpa' teh!"

⁸Melaikat luk kedueh nemaya' melaikat luk pun-pun ineh, kebalaneh, "Pangeh netabpa, pangeh netabpa bawang Babil luk rayeh, luk nemaré abpa' anggur rupen amung-amung pupu, ieh ineh useh Allah, ngaceku sawa'neh."

⁹Melaikat luk keteluh nemaya' nedidueh luk atun ineh, idi nengitang, "Kudeng idé lemulun luk sembayang inan pung ineh dengan akangneh, idi ngalap tanu' nan madu' idi tiku'neh,

¹⁰idi ieh teh miak ngirup ratnan abpa' anggur, ieh ineh useh Allah luk tinina' dengan na pinuar bang sangkir usehNeh ineh. Lemulun ineh miak uen

ngedereh ku apui idi batu apui pa kiung melaikat-melaikat luk meligan, idi pa kiung Anak Dumba ineh.

¹¹Rabpun apui luk ngedereh nedeh ineh miak umak amé' dita' ruked-ruked. Ideh na miak ugka' medereh tebaco kedangan, ieh ineh lemulun luk sembayang inan pung idi akangneh ineh, idi luk nengalap etu ngadanneh ineh.”

¹²Ngaceku ineh, na miak na pupu Allah tuman idi manu, ieh ineh lemulun luk lutep maya' ukum-ukum Allah idi lutep manu inan Yésus.

¹³Idi ui neninger aceh arod rat bang langit luk nepebala, "Do' ngayud kudeng ini: Samal kuan lemulun luk pangeh naté, ieh ineh luk naté bang Tuhan rat pad sini!" "Matu," kebala Roh ineh, "Ideh miak ucu' ratnan amung erurdeh; ngaceku kekamendeh luk do' maya' nedeh.”

¹⁴Idi ui nenier inan aceh laput luk mebuda', idi luun laput ineh inan Seburur Lemulun luk tudo, ayuNeh mepad kudeng lemulun, idi inan pata amas nan uluhNeh, idi bang paladNeh inan aceh aling luk metadem.

¹⁵Idi aceh melaikat luk baken neremuat teh rat bang ruma' Allah, luk nengitang kuan Lemulun luk tudo luun laput ineh, kebalaneh, "Ngeruat alingMu idi ngeranéh, ngaceku karebneh ngeranéh pangeh nacing, ngaceku perinien tana' ini pangeh melak!”

¹⁶Idi Lemulun luk tudo luun laput ineh pana' nengimet alingNeh déi' bang tana', idi tana' ineh rinanihNeh peh.

¹⁷Idi teh aceh melaikat luk baken neremuat rat bang ruma' Allah luk déi' surga. Ieh teh inan aceh aling luk metadem.

¹⁸Idi aceh melaikat nacing teh rat bubpun, idi ieh luk inan lalud ratnan apui. Ieh nengitang kuan melaikat luk ngimet aling luk metadem ineh, kebalaneh, "Do' ngeruat alingmu luk metadem idi ngamung amung-amung runguh bua' anggur luk bang tana', ngaceku bua'neh pangeh melak!”

¹⁹Idi melaikat ineh nenguit alingneh idi nengeranih bua' anggur luk bang tana' ini, idi nengerareng ineh bang su luk inan rumik luk rayeh, ieh ineh useh Allah.

²⁰Idi bua' anggur ineh rinik lemulun mado rat ku bawang; idi dara'deh pana' manud rat bang su luk inan rumik ineh limeh kaki kidalemneh, idi kiadoneh 200 batu.

Bala Luk Linio 15

¹Idi teh ui nenier aceh tanu' luk déi' langit luk pelaba rayeh idi luk inan mawa. Inan tudu' melaikat luk ngimet tudu' dereh luk kekiped; ngaceku bang ineh amung-amung useh Allah pangeh meriput.

²Idi ui nenier mepad kudeng ayu abpa' rayeh luk mesor puar dengan apui, idi amung-amung lemulun luk pangeh metueh ratnan pung ineh idi akangneh, idi lemulun luk kuan ngadanneh ineh pangeh iniap, tured tangeb abpa' rayeh luk mesor, idi ideh nengimet amung-amung giula' Allah.

³Ideh menani ku nani Musa, demulun Allah ineh, idi nani Allah Dumba ineh teh, kenanideh, "Tuhan, Allah luk Melalud, kekamenMu rayeh idi inan mawa! O Raca' amung-amung pupu, amung dalanMu mesiri idi matu!

⁴Idéké luk na matot Namu, O Tuhan? Idéké luk ara' mada' rayehMu? Iko sebuleng mo' luk meligan. Amung-amung pupu miak amé' sembayang pa kiungMu, ngaceku kekamenMu luk matu pangeh megala'.

⁵Pangeh ineh ui nenier ruma' Allah dengan Lepo su luk inan papu' Tuhan luk pangeh mukab déi' surga.

⁶Idi tudu' melaikat neremuat rat bang ruma' Allah ineh. Ideh ngimet tudu' dereh ineh, idi nengayung ku kibung pu luk mebuda' idi merasat, idi ruukdeh inabet ku nuper amas.

⁷Idi sebuleng ratnan apat pudut luk mulun ineh nemaré bigan amas kuan tudu' melaikat, luk panu' ku useh Allah luk mulun raked-raked ineh.

⁸Idi ruma' Allah ineh pinu' ku rabpun luk ratnan rayeh Allah, idi ratnan laludNeh; idi seburur pana' na miak semuet bang ruma' Allah ineh pad tudu' dereh luk bang palad tudu' melaikat ineh mabud.

Bala Luk Linio 16

¹Idi ui neninger aceh arod rat bang ruma' Allah ineh luk pebala kuan tudu' melaikat ineh, "Do' muyuh amé' idi ngutang tudu' bigan useh Allah ineh luun tana'."

²Melaikat luk pun-pun ineh iné', idi nengutang uang biganneh luun tana'; idi ieh mangun ku kimuh luk dat idi megalih kuan amung-amung lemulun luk inan etu pung ineh, idi luk sembayang inan akangneh ineh.

³Idi melaikat luk kedueh ineh nengutang uang biganneh bang abpa' rayeh; idi abpa' ineh misu' ku dara', mepad kudeng dara' lun naté, idi amung-amung luk mulun bang abpa' rayeh naté.

⁴Idi melaikat luk keteluh ineh nengutang uang biganneh bang amung-amung abpa' idi bued abpa', idi ideh misu' ku dara'.

⁵Idi ui neninger amung-amung melaikat luk ngimet abpa' ineh pebala, "Matu Iko luk idi nekini, idi Luk pangeh idi atun, idi Luk Meligan, ngaceku Iko pangeh nengukum kudeng ineh.

⁶Ideh nengutang dara' lun manu idi nabi-nabi teh, idi Iko pangeh nemaré nedeh ngirup dara'. Luk kudeng ineh petulu ku amung-amung luk pangeh kikemdeh!"

⁷Idi ui neninger aceh arod rat bubpun ineh luk pebala, "O Tuhan, Allah luk Melalud! Matu idi mesiri amung-amung ukumMu ineh!"

⁸Idi melaikat luk keapat ineh nengutang uang biganneh luun mateh aco, idi mateh aco ineh pangeh biré lalud ngeseb amung-amung lemulun ku apui.

⁹Idi lemulun neseb ku pelaba lau', idi ideh nenguyo ngadan Allah luk melalud pa luun amung-amung dereh ineh. Iamo' nateh ideh sikal uren pad maré rayeh kuanNeh.

- ¹⁰Idi melaikat luk kelimeh ineh pana' nengutang uang biganneh luun kerusi pung ineh, idi imetneh ineh medacem idi ideh ngatep-ngatep dila'deh anid-anid burur ngaceku mét,
- ¹¹Idi ideh nenguyo Allah luk déi' surga ngaceku étdeh idi kimuhdeh ineh. Iamo' nateh ideh sikal uren ratnan kekamendeh ineh.
- ¹²Idi melaikat luk keanem ineh nengutang uang biganneh bang abpa' rayeh, ieh ineh Abpa' Pirat, idi abpa' ineh pana' mekeket, pad nganau' temina' dalam kuan raca'-raca' rat pa busat aco.
- ¹³Idi ui nenier teluh ada' mepad kudeng atit ayudeh remuat rat bang tang galau, idi rat bang tang pung idi nabi luk mebalih ineh.
- ¹⁴Ngaceku diteluh ineh ada' sétan-sétan luk nganau' tuda'-tuda' tanu', idi luk amé' matun amung-amung raca' luk aput-put tana' sikal ngamung nedeh miak pebunu' kareb aco luk rayeh ineh, ieh ineh Aco Allah luk Melalud.
- ¹⁵"Do' muyuh matar do'-do'! Ui ini macing mepad kudeng lun mano! Idi samal kuan lemulun luk matar do'-do' idi nginita ayungneh, pad ieh na nalan lubpa idi na migu' siren lemulun."
- ¹⁶Idi ada'-ada' ineh nengamung amung-amung raca' ineh teububpun su luk titen dengan buri' Iberani Armagedon.
- ¹⁷Idi melaikat luk ketudu' ineh pana' nengutang uang biganneh déi' arang gawa', idi inan sebuleng tang luk rayeh neremuat rat bang ruma' Allah, ieh ineh ratnan kerusi ineh luk nepebala, "Amung-amung pangeh meriput!"
- ¹⁸Idi mangun tuda'-tuda' kilep, arod, lalam, idi ruyuh tana' luk pelaba bura', idi nateh luk kudeng ineh mangun rat pun-pun lemulun inan bang tana', ieh ineh ruyuh tana' luk kudeng ineh idi luk kirayeh ineh teh.
- ¹⁹Idi bawang luk rayeh ineh nekupa babpat teluh, idi amung-amung bawang metabpa, idi bawang Babil luk rayeh ineh na miak mekelupan pa kiung Allah. Ieh maré kuanneh sangkir usehNeh luk rayeh.

²⁰Amung-amung pulau netutu', idi pegkung-pegkung pana' na luk idi siren peh.

²¹Idi udan batu netemurun rat bang langit nengeritep lemulun idi beratneh tudu' ngepulu' limeh kati. Idi lemulun ineh pana' nenguyo Allah ngaceku ratnan dereh udan batu ineh, ngaceku dereh ineh pelaba rayeh.

Bala Luk Linio 17

¹Idi seburur rat arang tudu' melaikat ineh luk nenguit tudu' bigan ineh iné' negku idi nepebala, "Amé' tungé, ui sikal mada' kuanmu ukum kuan decur luk pelaba sawa', ieh ineh bawang rayeh luk pinudut muneng ku abpa' luk mula'.

²Raca'-raca' bang tana' ini pangeh nepasét neneh, idi amung-amung uang tana' pana' mabuk ku abpa' anggur sawa'neh ineh."

³Idi ui tigio Roh, idi melaikat ineh nenguit negku amé' déi' su luk ali-ali. Idi ui nenier seburur decur tudo luun keted pung luk mesia', luk mepanu' ku ngadan kuyo, idi luk inan tudu' uluh idi pulu' unga.

⁴Idi decur ineh nengayung ku ayung luk sia' merirem idi luk mesia', idi nengayung ku amas idi batu luk meraga idi mutiara. Idi bang paladneh inan sebuleng sangkir ratnan amas luk mepanu' ku amung-amung bebpeng idi lutak sawa'neh ineh.

⁵Idi luun madu'neh inan aceh ngadan luk inayud, ieh ineh, luk inalum, "Babil luk rayeh, tinan amung-amung sawa' idi amung-amung bebpeng luk bang tana'."

⁶Idi ui nenier decur ineh mabuk ku dara' amung-amung lun manu idi dara' amung-amung lun nekali' Yésus ineh. Kareb ui nenier neneh ui pelaba awa.

⁷Idi kebala melaikat ineh negku, "Anunké punneh iko mawa? Ui sikal mada' kuanmu luk inalum ratnan decur ineh, idi luk inalum ratnan pung luk nguit neneh ineh, idi luk inan tudu' uluh idi pulu' unga.

⁸Idi pung luk siniermu ineh, ieh idi atun, iamo' nekini na idi; ieh sikal umak rat bang lubang luk na miak teriin kidalemneh ineh, idi semuet bang ukum

até. Lemulun bang tana' ini, luk na inayud ngadandeh bang surat ulun ineh rat pun-pun tana' ini, miak mawa kareb ideh nier pung ineh, luk idi atun, iamo' nekini na idi, idi luk sikal macing teh.

⁹"Pad kali' ilung ini na miak na inan ileh. Tudu' uluh ineh mangun ku tudu' pegkung su luk inan decur ineh tudo, idi ini teh mangun ku tudu' raca'.

¹⁰Limeh pangeh nebpeh, seburur teh ketecan, idi sebuleng teh luk nateh nacing. Idi kareb ieh macing na miak na ieh tudo sesuut io teh.

¹¹Idi pung luk pangeh idi, idi luk na idi nekini, ieh luk mangun ku luk kewaluh, idi luk iniap kuan luk ketudu' ineh, ieh teh luk miak semuet bang ukum até.

¹²"Idi pulu' unga luk siniermu ineh, ieh ineh pulu' raca' luk nateh nengimet, iamo' ideh nengalap lalud mepad kudeng raca' pad-pad dengan pung ineh bang sejam mo' kinioneh.

¹³Idi pulu' raca' ineh sebuleng terawé idi ideh maré tuehdeh idi laluddeh kuan pung ineh.

¹⁴Ideh miak pebunu' inan Anak Dumba ineh, iamo' Anak Dumba ineh miak ngelaya' nedeh, ngaceku Ieh Tuhan pa luun amung-amung tuan, idi Rac'a' pa luun amung-amung raca'; idi amung-amung lemulun luk idi pad-pad denganNeh ineh metueh, ieh ineh amung-amung lemulun luk pangeh tinawar idi luk pinili' idi luk lutep."

¹⁵Idi kebala melaikat negku, "Abpa' luk siniermu ineh su luk inan decur luk mesawa ineh tudo, ieh ineh tuda'-tuda' inul, babpat, pupu, idi buri'.

¹⁶Idi pulu' unga luk pangeh siniermu ineh idi pung ineh pana', miak megateh inan decur luk mesawa'; idi ideh miak ngalap amung-amung binawehneh, pad ieh lubpa. Ideh miak kuman uangneh, idi ngeseb neneh ku apui.

¹⁷Ngaceku Allah nenuet terawé bang niatdeh, miak nganau' luk pian Allah, idi ideh mangun ku sebuleng terawé, idi maré kekamendeh ineh kuan pung ineh, pad bala Allah ineh miak meriput.

¹⁸"Idi decur luk pangeh siniermu ineh, ieh ineh bawang rayeh, luk ngimet amung-amung raca' bang tana' ini."

Bala Luk Linio 18

¹Pangeh ineh ui nenier aceh melaikat luk baken netemurun rat déi' langit. Ieh inan lalud luk rayeh, idi tana' ineh macang ku rasat melaikat ineh.

²Idi ieh nengitang, kebalaneh, "Babil bawang rayeh ineh pangeh netabpa. Ieh mangun ku luk inan sétan, ada', idi suit-suit luk melutak idi luk inan megateh.

³Ngaceku ieh nemaré lutak sawa'neh rupen amung-amung pupu. Idi raca'-raca' bang tana' ini mangun ku lun do' ngaceku ratnan lilineh luk pelaba ini."

⁴Idi ui neninger aceh arod luk baken teh rat bang surga luk nepebala, "O pupuKu, do' remuat rat neneh, pad muyuh na perurum bang sala'neh, idi muyuh na kumin pad-pad denganneh!

⁵Ngaceku sala'neh pebuun-pebuun pad macing déi' langit, idi Allah ngerawé ratnan kekamenneh luk dat.

⁶Ngua' kuanneuh mepad kudeng luk inau'neh nemuyuh, idi nganau' dueh kua' kinula' ratnan luk inau'neh. Manu' sangkirneh ku luk rupen, dueh kua' galih ratnan luk tinina'neh kuan muyuh.

⁷Maré dereh idi susa' neneh maya' kinula' ubur idi rayeh luk biréneh kuan bururneh sebuleng. Ngaceku ieh megéi' pebala bang niatneh: 'Ui tudo mepad kudeng raca' decur! Baken ui tinula', Na tu-tu ui miak nangi!'

⁸Ngaceku ineh bang seaco amung derehneh miak macing, ieh ineh até, tido, idi lau. Idi ieh miak sabpen ku apui, ngaceku Tuhan Allah luk ngukum neneh ineh melalud."

⁹Idi raca'-raca' bang tana' ini luk pangeh nepasét idi netudo dengan lutak pad-pad denganneh miak nangi' idi temido neneh kareb ideh nier rabpun apui luk ngeseb neneh.

¹⁰Ideh tuped rat mado ngaceku matot ku derehneh idi pebala, "Mesusa', mesusa', bawang Babil luk rayeh, bawang luk meraben ineh! Bang sejam kinioneh ukum pangeh nacing namu."

¹¹Idi lemulun luk pepua' bang tana' ini miak nangi' idi temido neneh, ngaceku seburur pana' na miak melih binawehdeh teh;

¹²seburur pana' nateh luk melih binaweh amas, pirak, batu luk meraga, bau mutiara, idi kibung luk melipi, luk sia' merirem, luk mesalud, idi luk mesia', tuda'-tuda' kayuh luk do' buen, idi binaweh luk ratnan tulang, binaweh luk inau' ratnan kayuh luk mikat raga, binaweh ratnan tekaling, belawan, idi batu luk mebuda';

¹³idi teh anit kayuh kadingau, tuda'-tuda' akan luk maré do' én, idi luk sabpen luk do' buen, mur, ilu', abpa' anggur, umau saitun, banak, padé, sapi', dumba, kuda, keréta, demulun, idi ulun lemulun pana'.

¹⁴Kebala lemulun luk pepua' ineh, "Amung-amung luk inanmu melili atun pangeh neburo rat namu. Idi amung-amung luk mén idi luk meraga ineh pangeh netutu', pad na miak mekalap teh."

¹⁵Lemulun luk pepua' ini, luk pangeh mangun ku lun do' ratnan pepua' bang bawang ineh, miak tuped rat mado ngaceku matot ku derehneh. Ideh miak nangi' idi temido,

¹⁶keburi'deh, "Mesusa', pelaba susa' kuan bawang rayeh ineh, luk pangeh inayung ku kibung luk melipi luk sia' merirem idi luk mesia', idi luk ibpu ku amas, batu luk meraga, idi bau mutiara!

¹⁷Idi bang sejam mo' kinioneh amung-amung binawehneh pangeh inusag." Idi anid-anid lemulun luk ngimet kapal, lemulun luk maya' kapal, lemulun luk ngakem bang kapal, idi lemulun luk pepua' maya' abpa' rayeh ineh, tuped rat mado,

¹⁸idi nengitang kareb ideh nenier rabpun apui luk ngeseb bawang ineh, idi pebala, "Bawang sapehké luk mepad kudeng bawang rayeh ineh?"

¹⁹Idi ideh mubpur uluhdeh ku abuh dengan ngitang, nangi' idi temido, keburi'deh, "Mesusa', pelaba susa' kuan bawang rayeh ineh, ieh ineh bawang su luk inan lemulun luk maya' kapal bang abpa' rayeh pangeh mangun ku lun do' ku amung-amung binawehneh! Idi bang sejam mo' ieh pangeh inusag!"

²⁰O surga, do' iko mawang niat ngaceku usagneh ineh! O lun manu, rasul-rasul idi nabi-nabi, do' muyuh mawang niat, ngaceku Allah pangeh nengukum neneh ngaceku luk inau'neh nemuyuh.

²¹Idi seburur melaikat luk metueh, nengiding aceh batu luk mepad kudeng batu iung kirayehneh, idi ieh nenala' neneh bang abpa' rayeh idi nepebala, "Dengan bitung luk kudeng ini, Babil bawang luk rayeh ineh miak talan dengan metueh, idi na tu-tu ieh miak siren teh.

²²Idi uni giula' luk tetagken lemulun luk menani, luk ngiup suling idi serupit, na tu-tu miak megala' pedingeren bang namu teh. Idi lun luk mileh ku kekamen anun-anun pana' na miak siren bang namu teh, idi uni batu iung pana' na miak pedingeren teh!

²³Idi acang ilu' na tu-tu miak macang bang namu, idi uni tang deléi luk ngaweh idi decur pana', na tu-tu miak pedingeren bang namu. Amung-amung lemulunmu luk pepua', ieh ineh luk meluun mebala apud tana', idi ratnan bangunmu amung-amung pupu pangeh neraruh!"

²⁴Babil pangeh inukum ngaceku dara' nabi-nabi idi lun manu luk nekali'Neh bang bawang ineh, setuneh dara' amung-amung lemulun luk pinaté bang tana' ini pana'.

Bala Luk Linio 19

¹Muci ratnan ineh ui neninger teh uni mepad kudeng arod lun mula' luk ngitang déi' surga, kebaladeh, "Ngubur Allah! Ulun luk meruked, rayeh idi lalud idi bang palad Allah!

²Amung-amung ukumNeh ineh matu idi mesiri! Ieh pangeh nengukum decur luk pelaba sawa' ineh, luk nengeraruh tana' ini ku sawa'neh ineh. Allah

pangeh nengukum neneh ngaceku ieh nengaté demulun-demulunNeh kusawa' ineh.”

³Idi kebaladeh luk kedueh kua'neh, "Ngubur Allah! Rabpun ratnan bawang luk meseb ineh umak macing raked-raked!"

⁴Idi dueh ngepulu' apat lun rayeh ineh idi apat pudut luk mulun ineh teh netekeradung sembayang inan Allah luk tudo luun kerusi, idi nepebala, "Amin! Ngubur Allah!"

⁵Idi aceh arod luk rayeh neremuat ratnan kerusi ineh kebalaneh, "Do' ngubur Allah tau, O amung-amung muyuh luk demulunNeh, idi luk matot Neneh, do' luk isuut idi luk rayeh pana'!"

⁶pangeh ineh ui neninger aceh arod luk mepad kudeng arod lun luk mula', idi mepad kudeng beri rueb luk medita', idi mepad kudeng uni lalam kebaladeh, "Ngubur Allah! Ngaceku Tuhan tau, Allah luk Melalud, Ieh ineh Raca'!

⁷Do' tau mawang niat idi do' ria', idi do' tau ngubur rayehNeh! Ngaceku kareb irau paweh Anak Dumba pangeh nacing, idi awanNeh pana' pangeh temina'.

⁸Idi pangeh biré kuanneh kibung pu luk malét idi merasat, pad ieh miak ngayung ku ineh." (Kibung pu ineh pinginud kekamen-kekamen luk matu luk inau' lun manu.)

⁹Idi kebala melaikat negku, "Do' ngayud kudeng ini: Samal kuan lemulun luk tinawar amé' ku irau paweh Anak Dumba ineh." Idi teh kebala melaikat ineh, "Ini bala Allah luk matu.”

¹⁰Ui netekeradung sembayang neneh, iamo' kebalaneh negku, "Aleg nganau' kudeng ineh! Ui pana' demulun teh mepad kudeng iko, idi mepad kudeng amung-amung kinanakmu luk ngimet luk nekali' Yésus. Do' sembayang inan Allah." Ngaceku bada' luk matu luk ginala' Yésus, ieh ineh luk ngegio niat nabi-nabi.

¹¹Pangeh ineh ui nenier langit mukab idi inan aceh kuda luk mebuda'. Ngadan lemulun luk tudo luunneh ineh, Lutep Maya' Jani' idi Matu, idi dengan siriNeh Ieh mutut ukum idi pebunu' pana'.

¹²MatehNeh ineh mepad kudeng budung apui, idi Ieh nengayung ku mula' pata; idi inan aceh ngadan luk inayud luunNeh luk na miak miti seburur lemulun pana', iamo' Ieh sebuleng.

¹³Idi Ieh inan kuyuh' luk pangeh rireb bang dara'. Idi Ieh tetanen "Bala Allah."

¹⁴Idi baweh-baweh surga nemaya' puetNeh luun kuda luk mebuda'. Ideh nengayung ku kibung pu luk malét idi mebuda'.

¹⁵Idi rat bang tangNeh neremuat aceh pelapet luk metadem, dengan ineh Ieh miak ngelaya' amung-amung pupu. Ieh miak ngimet nedeh ku rukud belawan. Idi Ieh luk rumik-rumik bua' anggur, ieh ineh lau' useh Allah luk Melalud.

¹⁶Idi luun kuyuh'Neh idi tipanNeh pangeh inayud aceh ngadan, ieh ineh, "Raca' pa luun amung-amung raca' idi Tuhan pa luun amung-amung tuan."

¹⁷Idi ui nenier teh aceh melaikat luk tuper nan mateh aco. Ieh nengarod kuan amung-amung suit luk temulud déi' arang gawa', kebalaneh, "Amé' tungé' idi pamung bang irau Allah luk rayeh.

¹⁸Amé' kuman uang raca'-raca', lun rayeh baweh, idi lun pebunu', idi uang kuda-kuda, uang lemulun luk tudo luun keteddeh idi uang amung-amung lemulun, do' lun do' idi demulun, do' luk isuut idi luk rayeh pana'."

¹⁹Idi ui nenier pung ineh idi raca'-raca' bang tana' ini dengan bawehdeh, nepamung sikal pebunu' Neneh luk maya' kuda ineh, idi bawehNeh pana'.

²⁰Idi pung ineh pana' kikem pad-pad dengan nabi luk mebalih luk pangeh nenganau' tuda'-tuda' tanu' luk nan mawa pa kiungneh. (Idi dengan tanu'-tanu' ineh ieh nengeraruh lemulun luk inan etu pung ineh, idi luk pangeh sembayang inan akangneh.) Didueh ineh tila' dengan mulun bang takung apui luk mebudung ku batu apui.

²¹Idi baweh-bawehdeh pinaté ku pelapetNeh luk tudo luun keted kuda ineh, ieh ineh pelapet luk remuat rat bang tangNeh. Idi suit-suit pana' mebor ku uang lemulun ineh.

Bala Luk Linio 20

¹Idi ui nenier teh seburur melaikat netemurun rat bang langit luk ngimet taka tanga' lubang luk na miak teriin kidalemneh ineh, idi inan aceh kaling luk rayeh bang paladneh.

²Teh nengakem galau ineh, ieh ineh menipeh luk mengered luk titen Iblis idi Sétan, idi nengaling neneh meribu lak kinioneh.

³Melaikat ineh nenala' neneh bang lubang luk na miak teriin kidalemneh, idi nengitek lubang ineh, idi nenganau' etu luunneh, pad ieh na miak ngeraruh pupu-pupu teh pad mabud meribu lak ineh. Muci ratnan ineh na miak na ieh puatin bang segageh mo' kinioneh.

⁴Idi ui nenier tuda'-tuda' kerusi, idi inan lemulun luk tudo luundeh, idi kuandeh ineh pangeh biré lalud ngukum. Idi teh ui nenier niat lemulun luk kileb uluhdeh ngaceku maré kali' ratnan Yésus idi bala Allah. Ideh na nesembayang inan pung ineh idi akangneh, idi ideh na inan etu nan madu'deh idi bang paladdeh. Idi ideh ineh mo' luk muli' mulun idi ngimet pad-pad dengan Keristus meribu lak kinioneh.

⁵(Iamo' lun naté luk baken ineh na netemui kareb nateh mabud meribu lak ineh.) Idi ini tui luk pun-pun.

⁶Mawang niat idi samal kuan lemulun luk semuet bang babpat tui luk pun-pun ineh. Até luk kedueh ineh na miak melalud pa luundeh, iamo' ideh mangun ku imam kuan Allah idi kuan Keristus, idi miak ngimet pad-pad denganNeh bang meribu lak kinioneh.

⁷Idi kareb mabud meribu lak ineh, idi Sétan ineh pana' miak puatin rat bang lubangneh,

⁸Idi ieh miak amé' ngeraruh pupu-pupu luk urap apud tana', ieh ineh Gog idi Magog. Iblis miak ngamung pupu-pupu ineh pad ideh pebunu'. Idi ula'deh ineh mepad kudeng bada luk tangeb abpa' rayeh.

⁹Idi ideh nurap aput tana' idi nengelibut su luk inan baweh pupu Allah idi bawang luk inan Allah mawa ineh. Iamo' apui rat déi' langit netemurun nengeseb nedeh.

¹⁰Idi Iblis luk nengeraruh nedeh pana' tila' bang takung apui idi batu apui ineh, su luk inan pung idi nabi luk mebalih ineh pangeh tila', idi ideh uen ngedereh tebaco kedangan macing raked-raked.

¹¹Idi ui nenier aceh kerusi rayeh luk mebuda' idi Luk tudo luunneh ineh. Tana' idi langit netutu' rat pa kiungNeh, pad ineh na miak siren teh.

¹²Idi ui nenier amung-amung lemulun luk naté, do' luk rayeh idi luk isuut pana', tupid pa atun kerusi ineh. Surat-surat pana' inukab; idi inan aceh surat luk baken inukab, ieh ineh surat ulun. Idi lun luk naté ineh inukum maya' kekamendeh luk inayud bang surat-surat ineh.

¹³Idi abpa' rayeh pana' nengeruat amung-amung lemulun luk pangeh naté bang neneh. Idi até dengan su inan até ineh pana' nengeruat amung-amung lemulun luk pangeh naté bang nedeh. Idi ideh ineh inukum maya' kekamen anid-anid bururdeh.

¹⁴Idi até idi su inan até ineh pana' tila' bang takung apui ineh. Takung apui, ieh ineh até luk kedueh.

¹⁵Kudeng idé-idé luk na luk idi ngadanneh inayud bang surat ulun ineh, idi ieh pana' tila' bang takung apui ineh.

Bala Luk Linio 21

¹Idi ui nenier aceh langit luk mebaruh idi tana' luk mebaruh; ngaceku langit luk pun-pun idi tana' luk pun-pun ineh pangeh netutu', idi abpa' rayeh na luk idi peh.

²Idi ui nenier aceh bawang luk meligan, Yerusalim luk mebaruh, netemurun rat surga ratnan Allah, inayung mepad kudeng seburur decur luk ngaweh inayung pad miak papu' awanneh.

³Ui neninger aceh arod luk rayeh rat bang kerusi ineh kebalaneh, "Ngerawé do'-do'! Su luk inan Allah mudeng nekini idi pad-pad dengan lemulun! Ieh miak tudo pad-pad dengan lemulun idi ideh miak amngun ku pupuNeh. Allah sebuleng miak tudo dengandeh, idi mangun ku Allahdeh.

⁴Ieh miak miid amung-amung abpa' mateh ratnan matehdeh. Idi na luk idi até kuandeh teh: tido, tangi', idi ét pana' na luk idi. Amung-amung luk mon pangeh netutu'."

⁵Idi Ieh luk tudo luun kerusi ineh pana' nepebala, "Siruh, Ui nganau' amung-amungneh mebaruh." Idi kebalaneh teh, "Do' ngayud, ngaceku bala ini lutep idi matu."

⁶Idi teh kebalaneh, "Pangeh neriput! Ui ini Urup luk Pun-pun idi Urup luk Kekiped, ieh ineh Luk Pun-pun idi Luk Kekiped. Kuan lemulun luk meparing Ui miak amré neneh ngirup ratnan bued abpa' luk mulun ineh dengan mo'-mo'.

⁷Lemulun luk metueh miak ngalap ineh rat Negku Ui ini miak mangun ku Allahneh, idi ieh mangun ku anakKu.

⁸Iamo' kuan lun luk matot, idi lun luk na manu, lun luk melutak, lun luk ngaté, lun luk pasét, lun luk mangun idi sembayang inan akang, idi lun luk mebalih, babpatdeh ineh inan déi' bang takung luk mebudung ku apui idi batu apui, ieh ineh até luk kedueh."

⁹Idi seburur rat arang tudu' melaikat luk ngimet tudu' bigan ineh luk panu' ku tudu' dereh luk kekiped ineh nacing, idi nepebala negku, "Amé tungé', ui miak mada' sirenmu Decur luk sikal ngaweh ineh, ieh ineh awan Anak Dumba ineh."

¹⁰Ui tigio Roh, idi melaikat ineh nenguit negku umak luun pegkung luk medita', idi nemada' sirenku Yerusalim, Bawang luk Meligan ineh, luk netemurun rat surga ratnan Allah,

¹¹Idi luk macing ku rayeh Allah. Idi acangneh mepad kudeng batu luk meluun raga, mepad kudeng batu luk mebirar, mesor mepad kudeng gelas luk pelaba do'.

¹²Idi bawang ineh inan ar luk rayeh idi medita', idi inan pulu' dueh tanga', luk pitarin pulu' dueh melaikat, idi ngadan pulu' dueh pupu Israil pangeh inayud luun tanga'-tanga' ineh.

¹³Pa busat aco inan teluh tanga', pad tinueh busat aco inan teluh tanga', pa kabing busat aco inan teluh tanga', idi pa acep aco inan teluh tanga' teh.

¹⁴Ar bawang ineh pinudut luun pulu' dueh batu, idi pangeh inarit luun batu ineh ngadan pulu' dueh rasul Anak Dumba ineh.

¹⁵Melaikat luk nepebala negku ineh ngimet aceh luk pinari, ieh ineh rukud amas, sikal nari bawang ineh dengan tanga'neh idi arneh.

¹⁶Bawang ineh inan apat lebping, idi kadangneh mepad rayeh dengan pipangneh. Idi dengan tari ineh ieh nenari bawang ineh, ieh ineh 1,500 batu; kadangneh, pipangneh, idi dita'neh mepad mo'.

¹⁷Idi teh melaikat ineh nenari ar bawang ineh, teluh ngepulu' anem depeh, maya' kudeng tari lemulun, luk pikai melaikat ineh.

¹⁸Arneh ineh inau' ratnan batu luk mebirar, idi bawang ineh inau' ratnan amas luk meluun do' luk mesor mepad kudeng gelas luk pelaba do'.

¹⁹Idi amung-amung batu tapin ar bawang ineh inayung ku puar-puar batu luk meraga. Batu tapin luk pun-pun ineh batu luk mebirar, idi luk kedueh, batu luk bata' langit, idi luk keteluh, batu luk sia' merirem, idi luk keapat, batu luk bata' uduh,

²⁰Idi luk kelimeh, batu luk mebarit, idi luk keanem, bau burur, idi luk ketudu', batu luk mebudi, idi luk kewaluh, batu luk bata' melaco, idi luk keiwa', batu luk mebirar, idi luk kepulu', batu luk mebata', idi luk kepulu' aceh, batu luk bata' abpa' rayeh, idi luk kepulu' dueh, batu luk merirem.

²¹Idi pulu' dueh tanga' ineh, ieh ineh pulu' dueh ngilung bau mutiara, anid-anid tanga' ineh inau' ratnan sengilung bau mutiara. Idi dalam bawang ineh amas luk meluun do' luk mesor, mepad kudeng gelas luk pelaba do'.

²²Idi ui nenier na luk idi ruma' Allah bang bawang ineh, ngaceku Tuhan Allah luk Melalud, idi Anak Dumba ineh, mangun ku ruma'neh.

²³Idi bawang ineh na makai mateh aco idi bulan pana', ngaceku rasat Allah luk ngacang neneh, idi Anak Dumba ineh mangun ku lapungneh.

²⁴Idi pupu-pupu pana' miak nalan bang acangneh, idi raca'-raca' bang tana' ini nguit do'deh amé' bang bawang ineh.

²⁵Idi tanga'-tanga'neh na tu-tu initek tebaco-tebaco ngaceku dace na luk idi déi' peh.

²⁶Idi rayeh idi dita' ratnan amung-amung pupu miak iten semuet bang bawang ineh.

²⁷Iamo' na tu-tu luk melutak miak semuet bang neneh, idi lemulun luk nganau' luk bibpeng idi mebalih pana' na miak semuet, iamo' lemulun luk inayud ngadandeh bang surat ulun Anak Dumba ineh mo' miak semuet bang bawang ineh.

Bala Luk Linio 22

¹Melaikat ineh nemada' sirenku aceh bued abpa' luk panu' ku abpa' luk mulun, mesor mepad kudeng gelas luk pelaba' do', luk manud remuat ratnan kerusi Allah idi Anak Dumba ineh.

²Idi nan uned dalam bawang ineh, dipar déi' idi dipar tungé', abpa' ineh inan aceh lawa ulun luk kebua' pulu' dueh kua' bang selak, ieh ineh anid-anid bulan; idi don-donneh ineh miak ku ngedo' amung-amung pupu.

³Idi na luk idi anun-anun luk kidiman Allah bang bawang ineh. Kerusi Allah idi Anak Dumba ineh idi bang bawang ineh. Idi demulun-demulunNeh miak sembayang Neneh.

⁴Ideh miak nier kiungNeh, idi ngadanNeh uen ngayud nan madu'deh.

⁵Idi na luk idi daceh teh, idi ideh na sikal ku acang ilu' idi acang aco pana', ngaceku Tuhan Allah sebuleng mangun ku acangdeh, idi ideh miak ngimet macing raked-raked peh.

⁶Idi kebala melaikat negku, "Amung-amung bala ini luteh idi matu. Idi Tuhan Allah luk nemaré roh kuan nabi-nabi ineh, pangeh nengecuk melaikat mada' demulun-demulunNeh ratnan luk na miak na macing dengan mesaget."

⁷Kebala Yésus, "Ngerawé do'-do', Ui macing dengan mesaget." Samal kuan lemulun luk maya' amung-amung bala luk biré bang surat ini.

⁸Ui ini Yahya pangeh neninger idi nenier amung-amung ini. Kareb pangeh pindenger idi sinierku, ui netekeradung sembayang inan melaikat luk nemada' amung-amung ineh sirenku.

⁹Iamo' kebalaneh negku, "Aleg nganau' ineh. Ui pana' mepad teh kudeng iko, idi mepad kudeng kinanakmu teh, ieh ineh nabi-nabi ineh, idi mepad kudeng amung-amung lemulun luk maya' bala surat ini. Do' sembayang inan Allah!"

¹⁰Idi kebalaneh negku, "Aleg iko ngalum amung-amung bala bada' luk bang surat ini, ngaceku karebneh pangeh muneng.

¹¹Idi lemulun luk dat, nima' neneh nganau' luk dat teh, idi lemulun luk melutak, nima' neneh nganau' luk melutak teh, idi lemulun luk matu, nima' neneh nganau' luk matu teh, idi lemulun luk meligan, nima' neneh mangun meligan teh."

¹²"Ngerawé do'-do'! Ui macing dengan mesaget! Ui nguit tabparKu, pad Ui ngua' kuan anid-anid lemulun maya' kekammeneh.

¹³Idi Ui ini Urup luk Pun-pun idi Urup luk Kekiped, Luk Atun idi Luk Muci, Luk Pun-pun idi Luk Kekiped."

¹⁴Samal kuan lemulun luk maru' kuyu'deh, pad ideh ngalap lalud amé' matun lawa ulun ineh, idi semuet bang bawang ineh maya' tanga'neh.

¹⁵Iamo' lemulun luk dat, lemulun luk mangun, lemulun luk pasét, lemulun luk ngaté, lemulun luk sembayang inan akang, idi idé-idé luk geregan ku balih idi nganau' luk mebalih, amung-amungdeh ketecan déi' liang.

¹⁶"Ui ini Yésus pangeh nengecuk melaikatKu maré kali' ratnan amung-amung ini namu bang amung-amung sidang. Ui ini uat idi inul Daud, idi gituen pekak luk merasat ineh."

¹⁷Idi Roh dengan Decur luk ngaweh pebala, "Amé' tungé!" Idi lemulun luk ninger ineh pana' do' ieh pebala, "Amé' tungé!" Idi lemulun luk meparing do' ieh macing, idi idé-idé luk sikal, do' ieh ngalap abpa' mulun ineh dengan mo'-mo'.

¹⁸Ui ini Yahya maré kali' kuan anid-anid burur luk ninger bala luk biré bang surat ini: kudeng idé lemulun luk ngeluun bala ini, kali' rungen Allah miak ngula' anid-anid dereh luk pangeh inayud bang surat ini kuanneh.

¹⁹Idi kudeng idé lemulun luk ngasi' bala luk biré bang surat ini, kali' rungen Allah miak ngetutu' babpatneh ratnan lawa ulun idi ratnan bawang luk meligan, maya' kudeng luk inayud bang surat ini.

²⁰Idi Ieh luk maré kali' ratnan amung-amung ini nepebala, "Matu! Ui macing dengan mesaget!" Amin! Do' Iko macing, O Tuhan Yésus.

²¹Idi do' katu Tuhan tau Yésus ngedengan amung-amung muyuh. Amin!

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira

2022, Vitória/ES - Brasil